


Tnúhu ní cáhá<sup>n</sup> yă  
ndiŏxí xito cùu uú



New Testament in Mixtec, Peñoles (MX:mil:Mixtec, Peñoles)

**Tnúhu ní cáhá<sup>n</sup> yă ndiöxí xito cùu uú**  
**New Testament in Mixtec, Peñoles (MX:mil:Mixtec, Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

SAN MATEO . . . . .	1
SAN MARCOS . . . . .	67
SAN LUCAS . . . . .	107
SAN JUAN . . . . .	170
LOS HECHOS . . . . .	213
ROMANOS . . . . .	270
1 CORINTIOS . . . . .	296
2 CORINTIOS . . . . .	323
GÁLATAS . . . . .	340
EFESIOS . . . . .	349
FILIPENSES . . . . .	358
COLOSENSES . . . . .	364
1 TESALONICENSES . . . . .	370
2 TESALONICENSES . . . . .	375
1 TIMOTEO . . . . .	378
2 TIMOTEO . . . . .	386
TITO . . . . .	391
FILEMÓN . . . . .	394
HEBREOS . . . . .	396
SANTIAGO . . . . .	417
1 PEDRO . . . . .	423
2 PEDRO . . . . .	430
1 JUAN . . . . .	435
2 JUAN . . . . .	441
3 JUAN . . . . .	442
JUDAS . . . . .	443
APOCALIPSIS . . . . .	445

## TNÚHU NÍ CHÍDÓ TNÙNÍ TÉ MÀTEÚ

*Nchaa cue téé ní xíndecu ndéé sanaha cùtnàhá vátá quíxí-gǎ Xítóhó Jesucristú (Lc. 3:23-38)*

<sup>1</sup> Te ñaní tnáhá Xítóhó Jesucristú ní cuu ndíi Dàvíí ndíi ndíi Àbrahám, cue téé ní xíndecu ndéé sanaha vǐhi-gǎ ñuyíú-a. Te duha ndúu cuendá dava-gǎ cue téé ní cuu ñaní tnáhá-gǎ ní xíndecu ndéé sanaha.

<sup>2</sup> Ndíi Àbrahám ní xóo ìḡ déhe ndíi, te ndíi-án ñí xínani ndíi Isàác. Te déhe ndíi Isàác-án ñí cuu ndíi Jàcób, te déhe ndíi Jàcób-án ñí cuu ndíi Jùdá, te diu-ni ndíi Jàcób-án ñí cuu tǎtá dava-gǎ cue ñaní ndíi Jùdá-án. <sup>3</sup> Te déhe ndíi Jùdá-án ndíi ñadìhí ndíi, ndíi Tàmár ní cuu ndíi Fàrés ndíi ndíi Zàrá. Te déhe ndíi Fàrés-án ñí cuu ndíi Èsróm, te déhe ndíi Èsróm-án ñí cuu ndíi Àrám. <sup>4</sup> Te déhe ndíi Àrám-án ñí cuu ndíi Aminàdáb, te déhe ndíi Aminàdáb-án ñí cuu ndíi Nàsón, te déhe ndíi Nàsón-án ñí cuu ndíi Sàlmón. <sup>5</sup> Te ñadìhí ndíi Sàlmón-án ñí xínani-a<sup>n</sup> Ràháb, te ní xóo ìḡ déhe-yu ní xínani-dě Bòóz. Te ñadìhí ndíi Bòóz-án ñí xínani-a<sup>n</sup> Rùt, te ní xóo ìḡ déhe-yu ní xínani-dě Òbéd, te déhe ndíi Òbéd-án ñí cuu ndíi Isàí. <sup>6</sup> Te déhe ndíi Isàí-án ñí cuu ndíi Dàvíí téé ní xíndaha ñàha xii cue ñáyiú isràèl. Te déhe ndíi Dàvíí-án ndíi ñadìhí ndíi ní cuu ndíi Salòmón. Te díhna-gǎ ndíi Ùriás ní cándeca ndíi ñadìhí-án te dǎtnùní ní naquehe<sup>n</sup> ñàha ndíi Dàvíí-án.

<sup>7</sup> Te déhe ndíi Salòmón ní cuu ndíi Ròboám, te déhe ndíi Ròboám-án ñí cuu ndíi Àbíás, te déhe ndíi Àbíás-án ñí cuu ndíi Àsá. <sup>8</sup> Te déhe ndíi Àsá-án ñí cuu ndíi Josàfát, te déhe ndíi Josàfát-án ñí cuu ndíi Jòrám, te déhe ndíi Jòrám-án ñí cuu ndíi Ùziás. <sup>9</sup> Te déhe ndíi Ùziás-án ñí cuu ndíi Jòtám, te déhe ndíi Jòtám-án ñí cuu ndíi Àcáz, te déhe ndíi Àcáz-án ñí cuu ndíi Ezèquiás. <sup>10</sup> Te déhe ndíi Ezèquiás-án ñí cuu ndíi Manàsés, te déhe ndíi Manàsés-án ñí cuu ndíi Àmón, te déhe ndíi Àmón-án ñí cuu ndíi Jòsiás. <sup>11</sup> Te déhe ndíi Jòsiás-án ñí cuu ndíi Jecòniás. Te diu-ni

ndíi Jòsiás-án ñí cuu tǎtá nchaa dava-gǎ cue ñaní ndíi Jecòniás-án. Te dàvá-án ñí quide yica cuè téé ñuú Babiloniá ndécá-güedě ñáyiú isràèl cuáhán ñuú-güedé cuendá yàcá<sup>n</sup> cundecú-yu.

<sup>12</sup> Te sátá ñí yáha duca<sup>n</sup> ñí cuu, te ndíi Jecòniás ní xóo ìḡ déhe ndíi ndíi ñadìhí ndíi, te téé-án ñí xínani-dě Salàtiél. Te déhe ndíi Salàtiél-án ñí cuu ndíi Zorobàbél. <sup>13</sup> Te déhe ndíi Zorobàbél-án ñí cuu ndíi Àbiúð, te déhe ndíi Àbiúð-án ñí cuu ndíi Eliàquím, te déhe ndíi Eliàquím-án ñí cuu ndíi Àzór. <sup>14</sup> Te déhe ndíi Àzór-án ñí cuu ndíi Sàdóc, te déhe ndíi Sàdóc-án ñí cuu ndíi Àquím, te déhe ndíi Àquím-án ñí cuu ndíi Èliúð. <sup>15</sup> Te déhe ndíi Èliúð-án ñí cuu ndíi Eleàzár, te déhe ndíi Eleàzár-án ñí cuu ndíi Mátán, te déhe ndíi Mátán-án ñí cuu ndíi Jàcób. <sup>16</sup> Te déhe ndíi Jàcób-án ñí cuu ndíi Chèé téé ní cuu yḡ tá Màriá xíchí ñí cuu nǎná Jèsús Yaa ní tendaha Dütú Ndiõxí ní quixi ñuyíú-a.

<sup>17</sup> Te sa ní cuu úxúú tnáhá cue téé cùu ñaní tnáhá ndíi Àbrahám ndécú dàvá-án, te dǎtnùní ní cacu ndíi Dàvíí diu-ni ñaní tnáhá ndíi. Te núú tnáhá méé ndíi Àbrahám ndíi ndíi Dàvíí ní cuu úxícúmí tnáhá-güedé. Te duca<sup>n</sup> te sa ní xínu úxícúmí-gǎ tucu-güedé ní cacu, te dǎtnùní ní tniḡ ñàha cuè téé ñuú Babiloniá xii ñáyiú isràèl ndécá ñàha-güedé xii-yu cuáhán ñuú-güedé cuendá yàcá<sup>n</sup> cundecú-yu. Te sátá ñí yáha sá dúcá<sup>n</sup> ñí cuu, te ní cacu úxúní tucu cue téé ní cuu ñaní tnáhá ndíi Àbrahám ndíi ndíi Dàvíí, te dǎtnùní ní cacu Xítóhó Jesucristú ñuyíú-a. Te núú tnáhá méé-gǎ ní cuu úxícúmí tnáhá-güedé.

*Ní cacu Jèsús*

*(Lc. 2:1-7)*

<sup>18</sup> Te duha ní cuu cùtnàhá ní cacu Xítóhó Jesucristú, chí dàvá-án ñí xíndecu ìḡ xíchí cuéchí ñí xínani Màriá. Te xíchí-ǎ<sup>n</sup> sa ní cundáá tnúhu sá tnǎndaha-xi ndíi ìḡ téé nani Chèé. Te cùmání-gǎ tnǎndaha-xi ndíi téé-án te Espíritú Yá Ndiõxí ní quide ní ngúhu<sup>n</sup> déhe-xi. <sup>19</sup> Te té Chèé téé cuini cándeca ñàha xii xíchí-ǎ<sup>n</sup> ñí cutnùní iní-dé sá ñúhú déhe-xi. Te cùu-dé ìḡ téé quide ndáá, núu xíá<sup>n</sup> duu<sup>n</sup> duu<sup>n</sup> ní sani iní-dé sá vǎ tnǎndaha-gǎ-dé ndíi-xi, te dícó-ni sá ñà túú ní cǎhá<sup>n</sup>-dé chí ní cuini-dé sá vǎ cǎhá<sup>n</sup> cuèhé cǎhá<sup>n</sup> duha ñáyiú cuendá-xi. <sup>20</sup> Te sátá dúcá<sup>n</sup> ñí sani iní-dé te ní ngáva-dé ní

xidí-dé, te núú sàní-dé ní sáhá<sup>n</sup> ì<sup>n</sup> espíritú xínú cuèchi núú Yă Ndiöxí ní xáha<sup>n</sup>-xi xii-dé:

—Yòhó té Chèé téè cùu ñaní tnáhá ndĩ Dàvíí, yúhú càchí tnúhu-í xii-n sã ñà túú nã cani iní-n, tnãndaha nahi-ni-n ndĩhi tá Màriá cuèi ñùhu déhe-xi, chi mee Espíritú Yă Ndiöxí ní quide-xi duca<sup>n</sup> nĩ ngúhu<sup>n</sup> déhe-xi. <sup>21</sup> Te na càcu déhe-xi-á<sup>n</sup> te danàni-n-dé Jèsús. Te duca<sup>n</sup> cùnani-dé, chi téé-á<sup>n</sup> cada-dé cuendá sá vã cúndècu-gá cue ñaní tnáhá-dě ñáyíu isràél ichi cuèhé ichi duha —duha ní xáha<sup>n</sup> espíritú-á<sup>n</sup> xii té Chèé-á<sup>n</sup> núú sàní-dé.

<sup>22</sup> Te duca<sup>n</sup> nĩ cuu chi ní quee ndáá-xi nàcuáa ní xáha<sup>n</sup> Yă Ndiöxí xii ì<sup>n</sup> téé ní cáhá<sup>n</sup> tnúhu-gá ndéé sanaha. Te téé-á<sup>n</sup> nĩ chídó tnùní-dé núú tütú-gá nàcuáa ní xáha<sup>n</sup>-gã xii-dé, te duha ní xáha<sup>n</sup>-gã:

<sup>23</sup> Cundecu ì<sup>n</sup> xíchí cuèchí ndéé cuèé-gá.

Te òré ndécú ìí-xi vátá nihí-gá yì-xi te ngúhu<sup>n</sup> déhe-xi.

Te òré ná cãcú dẽhe-xi te danàni ñahá-yu Emànuél.

Duha ní xáha<sup>n</sup>-gã xii téé-á<sup>n</sup> nĩ chídó tnùní-dé núú tütú-gá. Te tnúhu Emànuél-á<sup>n</sup> quèé-xí: Yă Ndiöxí ndécú ndĩhi-o. Núú xiã<sup>n</sup> duca<sup>n</sup> nĩ cuu vitna.

<sup>24</sup> Te òré ní ndiquíú iní té Chèé-á<sup>n</sup> te ní quide-dé nàcuáa ní xáha<sup>n</sup> espíritú-á<sup>n</sup> xii-dé chi ní tnãndaha-dé ndĩhi tá Màriá. <sup>25</sup> Dico ndi dí<sup>n</sup> nĩ xíndecú-yu ndéé ní sáá nduu nĩ cacu déhe-xi. Te òré ní cacu déhe-xi-á<sup>n</sup> te ní dánání ñaha-dé Jèsús.

## 2

### *Cue téé cuángoto ñaha xii Jesús*

<sup>1</sup> Te Jèsús ní cacu-gá ì<sup>n</sup> ñuú nání Bèlén, te ñuú-á<sup>n</sup> yíndèhu-xi distritú Jùdeá. Te dàvá-á<sup>n</sup> cùnùu té Hèrodés yíndaha-dé ñáyíu. Te ñuú Jerusalén ní quexìo cue téé véxi ndàa xio nacuáa quène nchíanchii, cue téé túha dàcuaha cuendá nchaa sá ndéé andíu. <sup>2</sup> Te ndùcu tnúhu-güedé núú ñáyíu ñuú-á<sup>n</sup>, te xáha<sup>n</sup>-güedé:

—¿Vá cúndèe iní-ndó càchí tnúhu-ndo ndéé ndécú téè quíndaha ñaha xii ñáyíu isràél-á<sup>n</sup>? Chi ní xiní-ndí ní quene chódíní-dě ndàa xio nacuáa quène nchíanchii, núú xiã<sup>n</sup> véxi-ndí chi cuíní-ndí quiní-ndí-dé te

chiñuhu-ndí-dé —càchí-güedé xáha<sup>n</sup>-güedé xii-yu.

<sup>3</sup> Te òré ní níhí téè cùnùu nani Herodés tnúhu sá ndúcú tnúhu cue téé-á<sup>n</sup> ndéé ndécú téè quíndaha ñaha xii ñáyíu isràél, te ñá túú tnáhí ní cùu váha iní-dé, te diu-ni duca<sup>n</sup> ñà túú ní cùu váha iní tnáhá nchaa ñáyíu ñuú-á<sup>n</sup>. <sup>4</sup> Te ní cana-dé cue téè cùu dútú cùnùu, ndĩhi cue téè dàcuaha ñaha xii ñáyíu nchaa tnúhu ní chídó tnùní ndíi Moisés, te ní xicá<sup>n</sup> tnúhú-dě núú-güedé núú xiní-güedé ndéé cacu Cristú téè tendaha Yă Ndiöxí quixi ñuyíú-a. <sup>5</sup> Te ní xáha<sup>n</sup>-güedé xii-dé:

—Ì<sup>n</sup> ñuú yíndèhu distritú Jùdeá cacu-dé, te ñuú-á<sup>n</sup> nání-xí Bèlén, chi quee ndáá-xi nàcuáa ní xáha<sup>n</sup> Yă Ndiöxí xii ì<sup>n</sup> téé ní xóo cáhá<sup>n</sup> tnúhu-gá ndéé sanaha. Te duha ndùu tnúhu ní chídó tnùní-dé núú tütú-gá:

<sup>6</sup> Ñuú Bèlén cúú-xí ì<sup>n</sup> ñuú líhli yíndèhu distritú Jùdeá, te ío-gá cùnùu-xi dacúúxí dàva-gá ñuú cùnùu yíndèhu distritú-á<sup>n</sup>,

chi diu ñuú-á<sup>n</sup> quee ì<sup>n</sup> téé ío cùnùu.

Te téè cunuu-á<sup>n</sup> quíndaha-dě ñáyíu cùu cuendá-í ñáyíu isràél.

Duha ní xáha<sup>n</sup>-gã xii téé ní xóo cáhá<sup>n</sup> tnúhu-gá, te duca<sup>n</sup> nĩ chídó tnùní-dé núú tütú-gá —càchí-güedé xáha<sup>n</sup>-güedé xii té Hèrodés.

<sup>7</sup> Te sátá dúcá<sup>n</sup> te té Hèrodés dayuhu nĩ cana-dé cue téè ndùcu tnúhu núu ndéé ní cacu téè quíndaha ñaha xii ñáyíu isràél, te ní xicá<sup>n</sup> tnúhú-dě núú-güedé ná nduu cùu-xi nduu díhna nuu nĩ xiní-güedé chódíní. <sup>8</sup> Te sátá dúcá<sup>n</sup> te ní xáha<sup>n</sup>-dě xii-güedé:

—Chí cuáhá<sup>n</sup> ñuú Bèlén te nducu tnúhu váha-ndo núu ndéé ní cacu téè duca<sup>n</sup> quíndaha ñaha xii ñáyíu isràél. Te òré ná nánihí-ndó-dě te quixi-ndo càchí tnúhu-ndo cuendá quíhí<sup>n</sup>-í tnáhá-í chiñuhu-í-dé —càchí-dé xáha<sup>n</sup>-dě xii-güedé.

<sup>9</sup> Te sátá dúcá<sup>n</sup> nĩ xáha<sup>n</sup> tẽ Hèrodés-á<sup>n</sup> te ní xica-güedé cuáhá<sup>n</sup>-güedé. Te chódíní nĩ xiní-güedé ní quene ndàa xio nacuáa quène nchíanchii-á<sup>n</sup> yòdo nuu-di núú-güedé cuáhá<sup>n</sup>. Te ní ngüíñí chódíní-á<sup>n</sup>, te núú nĩ ngüíñí-di-á<sup>n</sup> yíndáá núú ndécú Jèsús. <sup>10</sup> Te òré ní xiní cue téé-á<sup>n</sup> nĩ ngüíñí chódíní-á<sup>n</sup> núú yíndáá ndécú-gã, te ní cudíí víhí

iní-güedé. <sup>11</sup> Te duca<sup>n</sup> te ní quexìo-güedé ndéé núú cáá vèhe ndecu Jesús. Te òré cuánguihu-güedé xítí vehe te ní xiní-güedé Jèsús ndécú-gă ndihi năná-gă Màriá. Te ní ngüíñí xítí-güedé, te ní ngüíta-güedé ní cachí-güedé sá ïo càhnu cuu Jesús. Te dătnùnì ní nacaá<sup>n</sup>-güedé càjá xĩnehe-güedé, te ní tava-güedé díhú<sup>n</sup> cuaá<sup>n</sup>, ndihi dúsa sá ïo váha sàhá<sup>n</sup> tnámí nàni insiensú, ndihi yúcú sã nání mĩrrá ní taxi ndecu-güedé núú Jèsús cuendá cuu-xi ì<sup>n</sup> táhú sã cúú-xí-gă. <sup>12</sup> Te Yá Ndiõxí ní cáhá<sup>n</sup>-gă núú sàní-güedé, te xăha<sup>n</sup>-gă xii-güedé sá vă nâyăha-gă-güedé cáhá<sup>n</sup> ndihi-güedé té Hèrodés. Núu xĩă<sup>n</sup> cue téé-á<sup>n</sup> cuănuhú-güedé ingá ichi, te ñá túú-gă ní nâyăha-güedé núú ndécú tē Hèrodés.

### *Cuáhá<sup>n</sup>-yu ndihi Jèsús nació<sup>n</sup> Ègiptú*

<sup>13</sup> Te sátá ñí yáha cuănuhú cue téé ní sângoto ñaha xii Jesús, te ní quexìo ì<sup>n</sup> espíritú xínú cuèchi núú Yă Ndiõxí núú sàní té Chèé, te xăha<sup>n</sup>-xi xii-dé:

—Véxi-í càchí tnúhu-í xii-n sã ndácóo-n, te ndee-n ñúú-a ndihi Jèsús, ndihi năná-gă cunu-ndo quĩhí<sup>n</sup>-ndó nació<sup>n</sup> Ègiptú, chi té Hèrodés tendaha-dé cue téé quixi nanducu ñaha xii Jesús cuendá cahni ñaha-güedé. Te yacá<sup>n</sup> cundecu-ndo ndéé cachí tnúhu-í xii-n ndùu ndixi-ndo —cachí espíritú-á<sup>n</sup> xăha<sup>n</sup>-xi xii té Chèé núú sàní-dé.

<sup>14</sup> Te té Chèé-á<sup>n</sup> ñí ndacóo-dé, te niú ní xica-dé ndihi tá Màriá ndécă-yu Jesús cuáhá<sup>n</sup> nació<sup>n</sup> Ègiptú. <sup>15</sup> Te nació<sup>n</sup> Ègiptú-á<sup>n</sup> ndécú-yu ní xihí té Hèrodés. Te duca<sup>n</sup> ñí cuu chi ní quee ndáá-xi năcuáa ní cachí ì<sup>n</sup> téé ní xóo cáhá<sup>n</sup> tnúhu Yá Ndiõxí ndéé sanaha ñí quide-dé núú-gă ní cáhá<sup>n</sup>-dé yuhu-gă, te duha ní xăha<sup>n</sup>-gă ní cáhá<sup>n</sup>-dé: “Nació<sup>n</sup> Ègiptú ndécú Dêhe-í ní cùu, te ní xăha<sup>n</sup>-í xii-dé sá ndéé-dé ñúú-á<sup>n</sup> vă cundecu-gă-dé”, duha ní xăha<sup>n</sup>-gă xii téé ní cáhá<sup>n</sup> tnúhu-gă ní quide-dé núú-gă.

### *Té Hèrodés ní táuchúú<sup>n</sup>-dē cahni-güedé cue landú*

<sup>16</sup> Te cue téé ní sângoto ñaha xii Jesús ní dándàhú-güedé té Hèrodés, chi ñá túú ní nâyăha-güedé cúñaha-güedé sá ñí nanihí-güedé Jèsús. Te sátá ñí cutnùnì iní té Hèrodés sá ñí dándàhú ñáhă-güedé xii-dé te ní cudéé<sup>n</sup> vîhí-dé, te ní tendaha-dé cue téé

cuáhá<sup>n</sup> ñúú Bèlén, ndihi nchaa dava-gă ñúú cáá yàtni xía<sup>n</sup> cuendá cahni-güedé mee-ni cuè landú téé. Te ndéé cue landú íchí ñí cacu, ndihi ndéé cue landú sa ní nútnahá úú cuía<sup>n</sup>-xi nchaa-güexi cahni-güedé ní xăha<sup>n</sup>-dē. Te duca<sup>n</sup> ñí quide-dé chi ní quide cuendá-dé năcuáa ndùu tnúhu ní xăha<sup>n</sup> cuè téé ní sângoto ñaha xii Jesús nduu ñí xiní-güedé chódíní, núu xĩă<sup>n</sup> duca<sup>n</sup> ñí táuchúú<sup>n</sup>-dē ní quide cue téé-á<sup>n</sup>. <sup>17</sup> Te duca<sup>n</sup> ñí cuu chi ní quee ndáá-xi năcuáa ní cachí ndí Jeremiás téé ní xóo cáhá<sup>n</sup> tnúhu Yá Ndiõxí ndéé sanaha, te duha ní cachí ndí:

<sup>18</sup> Ní tecú ndàhí vîhí ñăyiu ñúú Rámá sá ndihú iní-yu,

te ñăyiu xĩndáhyú-á<sup>n</sup> cúŷ-yu ñaní tnáhă tă Ràquél, te ndàhyú-yu cuendá sá ñí xihí déhe-yu.

Te ñăyiu-á<sup>n</sup> ñà túú ní cuiní-yu dăñă-yu sá ndihú iní-yu cuendá sá ñí xihí déhe-yu.

Duha ní cachí ndí Jeremiás.

<sup>19</sup> Te sátá ñí xihí té Hèrodés te ní sáhá<sup>n</sup> tucu espíritú xínú cuèchi núú Yă Ndiõxí núú sàní té Chèé òré ndécú-dé nació<sup>n</sup> Ègiptú, te ní xăha<sup>n</sup>-xi xii-dé:

<sup>20</sup> —Véxi tucu-í càchí tnúhu-í xii-n sã ndácóo-n, te núhú-n ndihi Jesús ndihi năná-gă ñúú cue ñaní tnáhă-n ñăyiu isràél cundecu-ndo, chi sa ní xihí cue téé cuiní cahni ñaha xii Jesús ní cùu —cachí espíritú-á<sup>n</sup> xăha<sup>n</sup>-xi xii té Chèé núú sàní-dé.

<sup>21</sup> Te té Chèé-á<sup>n</sup> ñí ndacóo-dé, te ní ndee-dé ndihi Jèsús ndihi năná-gă cuănuhú-yu ñúú cue ñăyiu isràél ñăyiu cùu ñaní tnáhă-yu. <sup>22</sup> Te té Chèé ní níhí-dé tnúhu sá tē Arquèlaú ní nucúnutnî-dé núú tătá-dé té Hèrodés distrítú Jùdeá yíndàha-dé ñăyiu. Te ní yùhú té Chèé-á<sup>n</sup>, te ñá túú ní cuiní-dé quĩhí<sup>n</sup>-dé cundecu-dé distrítú-á<sup>n</sup>. Te Yá Ndiõxí ní cáhá<sup>n</sup>-gă núú sàní-dé, te ní xăha<sup>n</sup>-gă xii-dé sá quĩhí<sup>n</sup>-dé distrítú Galileá, núu xĩă<sup>n</sup> yacá<sup>n</sup> cuáhá<sup>n</sup>-yu. <sup>23</sup> Te òré ní quexìo-yu distrítú Galileá, te ní sáhă<sup>n</sup>-yu ì<sup>n</sup> ñúú nání Nàzarét ní xíndecú-yu. Te duca<sup>n</sup> ñí cuu chi ní quee ndáá-xi năcuáa ní cachí cue téé ní xóo cáhá<sup>n</sup> tnúhu Yá Ndiõxí ndéé sanaha sá Jèsús cuu-gă téé ñúú Nazàrét.



## 3

*Té Juàá téè dâcuandute ñaha xii ñâyüü cãhá<sup>n</sup>-dé tnúhu Yá Ndiöxí xití yucu*

*(Mr. 1:1-8; Lc. 3:1-9, 15-17; Jn. 1:19-28)*

<sup>1</sup> Te ní xica nduu sá dúcá<sup>n</sup> ñi cuu, te téè nâni Juáá téè dâcuandute ñaha xii ñâyüü ní quexìo-dé yucu distritú Jùdeá cãhá<sup>n</sup>-dé tnúhu Yá Ndiöxí núú ñâyüü xití yucu-á<sup>n</sup>. <sup>2</sup> Te xãhá<sup>n</sup>-dê xii-yu:

—Chí dándixi túu iní sá ñà túú quide váha-ndo ndècu-ndo, te dañâ-ndo nchâa ichi cuehé ichi duha, chi sa ní cuyatni nduu ndíhu ndaha ñàha Yá Ndiöxí xii-ndo —cãhí-dé xãhá<sup>n</sup>-dê xii-yu.

<sup>3</sup> Te ñü cuendá té Juáá-á<sup>n</sup> ñi chídó tnùní ndí Chàíá téè ní xóo cãhá<sup>n</sup> tnúhu Yá Ndiöxí ndéé sanaha, te duha ndüu tnúhu ní chídó tnùní ndí cuendá-dé:

Tècú cãhá<sup>n</sup> níhi ñ<sup>n</sup> téè yíhi xití yucu, te cãhí-dé:

“Chí dáñá nchâa ichi cuehé ichi duha ndècu-ndo, te tñi-ndo ichi váha,

Te duca<sup>n</sup> càda-ndo cuendá cundecu túha-ndo chí véxi Yaá ío cùnûu”, duha quesaha téè-á<sup>n</sup>.

Duha ndüu tnúhu ní chídó tnùní ndí Chàíá-á<sup>n</sup> cuendá té Juáá.

<sup>4</sup> Te té Juáá-á<sup>n</sup> ñi xóo cuihnu-dé dóo idi cãméyu, te ñ<sup>n</sup> ñi ní cuu pãñú xití-dé, te ní xóo caxi-dé tíca làngóstá ndíhi ndudí ñúñú cuéchi. <sup>5</sup> Te ñâyüü ñúú Jerusalén, ndíhi ñâyüü nchaa ñúú yíndèhu distritú Jùdeá, ndíhi ñâyüü nchaa ñúú cáá yàtni yúte Jòrdán ní sáhá<sup>n</sup>-yu ní xíndedóho-yu nâcuáa ní cãhá<sup>n</sup> té Juáá. <sup>6</sup> Te ní ngúita-yu ní náhmá-yu nchaa cuéchi-yu núú Yá Ndiöxí. Te òré duca<sup>n</sup> ñi náhmá-yu te ní dâcuándute ñaha té Juáá xii-yu yúte Jòrdán.

<sup>7</sup> Te vâi cue téè cùu fariséú ndíhi cue téè cùu saducéú cuáhá<sup>n</sup>-güedé núú ndécú tẽ Juáá cuíní-güedé dâcuándute ñaha-dé xii-güedé. Te òré ní quexìo-güedé núú ndécú-dê, te ní xáha<sup>n</sup>-dê xii-güedé:

—¡Nchaa nchòhó cúú-ndó dàtná ñ<sup>n</sup> cóo dèé<sup>n</sup> chí ío cuihna íní-ndó! ¿Te nása ní cuu núu tnàhá nchòhó ndúcú-ndó nâcuáa cada-ndo cácu nihnu-ndo núú tnúndòho cahnu vihi ta cuyatni ñaha xii-ndo véxi-í?

<sup>8</sup> Te chí cádá váha vitna cundecu-ndo cuendá duca<sup>n</sup> cùtnuní sá ñi dáñá-ndó nchâa ichi cuehé ichi duha ndècu-ndo. <sup>9</sup> Te vá

cãhí-ndó sã ío cãhnu cuu-ndo cuendá sá cúú-ndó ñàní tnàhá ndí Abrahám. Chi cuéi ndéé yúú te ndacu Yá Ndiöxí ndada-gá ñâyüü te cúú-yu ñàní tnàhá ndí Abrahám. <sup>10</sup> Te caá chí ndècu túha-xi sá quèhndé-xi nchaa yutnu sá dúcá<sup>n</sup> ñà túú càváha sávidí-xi-á<sup>n</sup>, chí nchaa yutnu-á<sup>n</sup> tèhndé-xi te cuángèe-xi núú ñùhú càyú-xi. Te duha sãtnàhá-xi ndoho nchaa ñâyüü ñà túú quide váha-á<sup>n</sup> chí nchaa ñâyüü ñà túú quide váha cùu-yu dàtná nchaa yutnu sá ñà túú càváha sávidí-xi. <sup>11</sup> Te ña cãhí tnúhu ndáá-í xii-ndo sã yúhú dâcuándute-í mee-ni ñâyüü ní dáñá nchâa ichi cuehé ichi duha. Dico nchicú<sup>n</sup> tucu íngá téè véxi, te téè-á<sup>n</sup> taxi-dé Espiritú Yá Ndiöxí cundecu ndíhi-ndo. Te cùu-xi datná ñ<sup>n</sup> ñuhú, chí ndada ndoo ndada nine-xi íní-ndó. Te téè-á<sup>n</sup> ío-gá cùnûu-dé dâcúxí yúhú, chí yúhú cùu-í ñ<sup>n</sup> téè duu<sup>n</sup> duu<sup>n</sup> ñà túú tàu cuita nehe ni chàú-dé dico quide-í chiu<sup>n</sup>-dé. <sup>12</sup> Te téè-á<sup>n</sup> sa véxi túha-dé sá cádá dñ<sup>n</sup> ñaha-dé xii-o dàtná quidé ñâyüü ndàda ndoo triú, chí ñâyüü-á<sup>n</sup> sa nèhe túha-ná-yu yaxí<sup>n</sup>-yu òré náñani cuendá ndada ndoo-yu. Te òré ndádá ndòo-yu triú-á<sup>n</sup> te dàquee dñ<sup>n</sup>-yu mihi-xi, te tàxúha-yu mee-nã triú-á<sup>n</sup> te sãhmí-yu mihi-xi-á<sup>n</sup>. Te dàtná quidé-yu mihi triú-á<sup>n</sup> duca<sup>n</sup> sãtnàhá-xi cada ñaha téè-á<sup>n</sup> xii nchaa ñâyüü ñà túú quide váha, chí daquihí<sup>n</sup> ñàhá-dê xii-yu núú ñùhú núú càyú, te ñuhú-á<sup>n</sup> ñà túú tnàhí ndàhvã —cãhí-dé xãhá<sup>n</sup>-dê xii-güedé.

### *Sàndute Jesús*

*(Mr. 1:9-11; Lc. 3:21-22)*

<sup>13</sup> Te Jèsús ní quee-gá distritú Galiléa cuáhá<sup>n</sup>-gá yúte Jòrdán núú ndécú tẽ Juáá cuendá dâcuándute ñaha-dé xii-gá. <sup>14</sup> Te òré ní quexìo Jesús núú ndécú tẽ Juáá, te ñà cuíní-dé dâcuándute ñaha-dé xii-gá ní cùu, te ní xáha<sup>n</sup>-dê xii-gá:

—Yúhú tàú-í sá dâcuándute ñaha-n xii-í, te ñà díú dà yúhú dâcuándute ñaha-í xii-n —cãhí-dé xãhá<sup>n</sup>-dê xii-gá.

<sup>15</sup> Te Jèsús ní xáha<sup>n</sup>-gã xii-dé:

—Quehe<sup>n</sup> dañâ, chí dâcutíí xini ñuhu-xi duca<sup>n</sup> cada-o nâcuáa cundáá-ó núú Yá Ndiöxí —cãhí-gá xãhá<sup>n</sup>-gã xii-dé.

Te té Juáá-á<sup>n</sup> ñi sáhá<sup>n</sup> uu<sup>n</sup>-dé tnúhu ní xáha<sup>n</sup> Jèsús xii-dé. <sup>16</sup> Te ní dâcuándute-dé

Jèsús. Te òré ní nene-gá xítí ndute te ní xiní-gá nchí andi, te ní quee Espíritú Yá Ndiöxí véxi cuu<sup>n</sup>-xi ngúndecu ndihí ñaha-xi xii-gá, te dàtná cáá ì<sup>n</sup> lómá cáá Espíritú-á<sup>n</sup> véxi cuu<sup>n</sup>-xi. <sup>17</sup> Te òré-á<sup>n</sup> ní tecú ní cáhá<sup>n</sup> Yá Ndiöxí ndéé andi, te xáha<sup>n</sup>-gá xii Jèsús:

—Yòhó cúu-n Dèhe-í téé ío cùu iní-í te ío cùdí iní ñàhà-í xii-n —càchí-gá xáha<sup>n</sup>-gá xii Jèsús.

#### 4

*Sácuíhná quidé yíca-xi cada Jesús sá ñà túú tàú-gá cada-gá ní cùu*  
(Mr. 1:12-13; Lc. 4:1-13)

<sup>1</sup> Te Espíritú Yá Ndiöxí ndécá-xí Jèsús cuáhá<sup>n</sup> ì<sup>n</sup> xítí yucu cuendá yàcá<sup>n</sup> cundecu tnaa-gá, te yàcá<sup>n</sup> quexìo sácuíhná coto ndéé ñáhá-xí xii-gá te núu ndisa sá vā cádá-gá ì<sup>n</sup> sá ñà túú tàú-gá cada-gá.

<sup>2</sup> Te Jèsús ñá ní xèxi-gá údico nduu údico niú, te duca<sup>n</sup> te dàtnùní ní xícá<sup>n</sup> iní-gá caxi-gá. <sup>3</sup> Te sátá dúcá<sup>n</sup> te ní quexìo sácuíhná quidé yíca-xi cada Jesús ì<sup>n</sup> sá ñà túú tàú-gá cada-gá, te xáha<sup>n</sup>-xi xii-gá:

—Te núu ndisa sá cúu-n Dèhe Yá Ndiöxí te cúñaha xii yúú-a na ndùu-xi paá —càchí-xi xáha<sup>n</sup>-xi xii-gá.

<sup>4</sup> Te Jèsús ní xáha<sup>n</sup>-gá xii-xi:

—Núú tütú Yá Ndiöxí càchí-xi: “Ñá díú mèe-ni paá candeca-xi iní ñáyiú ñuyú, chí tñahá nchaa tñuhu càhá<sup>n</sup> Yá Ndiöxí candeca-xi iní-yu”, duha càchí-xi núú tütú-gá —càchí-gá xáha<sup>n</sup>-gá xii-xi.

<sup>5</sup> Te dàtnùní sácuíhná-á<sup>n</sup> ndécá ñaha-xi xii-gá cuáhá<sup>n</sup> ñuú Jerusálén, te yàcá<sup>n</sup> ní xáha<sup>n</sup>-xi xii-gá cuásaá-gá díquí véñùhu càhnu sá ío cùnuu núú ñáyiú isràél, <sup>6</sup> te dàtnùní ní xáha<sup>n</sup> tucu-xi xii-gá:

—Te núu ndisa cùu-n Déhe Yá Ndiöxí te cuandèe ndava núú ñuhú cuendá quee ndáá-xi nàcuáa càhá<sup>n</sup>-xi núú tütú-gá núú càchí-xi: “Yá Ndiöxí tendaha-gá cue espíritú xínú cuèchi núú-gá quixi-xi cuendá coto ñaha-xi xii-n, te núú ndáhá-xí càundodo-n cuendá sá vā dánicuèhé yúú sáhá-n”, duha càchí-xi núú tütú-gá —càchí sácuíhná-á<sup>n</sup> xáha<sup>n</sup>-xi xii Jèsús.

<sup>7</sup> Te Jèsús ní xáha<sup>n</sup>-gá xii-xi:

—Te càchí tucu-xi núú tütú Yá Ndiöxí: “Vá cání iní-n còto ndéé-n Dütú Ndiöxí Yáá cúu Ndiöxí-n cuendá-ni sá cuíní-n

sá dácăcu nihnu ñaha-gá xii-n ì<sup>n</sup> sá sání iní-n càda-n”, duha càchí-xi núú tütú-gá —càchí-gá xáha<sup>n</sup>-gá xii-xi.

<sup>8</sup> Te sácuíhná ndécá tucu-xi Jesús cuáhá<sup>n</sup> ì<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xii-gá nchaandi túhú nàció<sup>n</sup> cáá ñuyú, ndihí nchaa sá vāha ío ì<sup>n</sup> ì<sup>n</sup> nàció<sup>n</sup>-á<sup>n</sup>. <sup>9</sup> Te ní xáha<sup>n</sup>-xi xii-gá:

—Te núu yòhó ngüñí xítí-n núú-í chiñuhu ñaha-n xii-í ñá, te taxi cuendá-í nchaa sá ní dánèhé ñàhà-í-a cuu cuendá-n —càchí-xi xáha<sup>n</sup>-xi xii-gá.

<sup>10</sup> Te Jèsús ní xáha<sup>n</sup>-gá xii-xi:

—Xocuñí yòhó sácuíhná núú ndécú-í-a, chí vá cúú càda-í nàcuáa càchí-n, chí núú tütú Yá Ndiöxí càchí-xi: “Chiñuhu-ndo Dütú Ndiöxí Yáá cúu Ndiöxí-ndó, te diu-ni-gá cada-ndo nchàa nacuáa càhá<sup>n</sup>-gá”, duha càchí-xi núú tütú-gá —càchí-gá xáha<sup>n</sup>-gá xii-xi.

<sup>11</sup> Te dàtnùní sácuíhná ní dáñá-xí Jèsús ní xica-xi cuáhá<sup>n</sup>-xi. Te sátá dúcá<sup>n</sup> te ní quexìo cue espíritú xínú cuèchi núú Yá Ndiöxí ní xinu cuechi-xi núú Jèsús.

*Distritú Galiléa ní chisaha Jèsús chiú<sup>n</sup> ní táhú Tátá-gá Dütú Ndiöxí cada-gá*  
(Mr. 1:14-15; Lc. 4:14-15)

<sup>12</sup> Te òré ní níhí Jèsús tñuhu sá ní ngava té Juáá tée dàcuandute ñaha xii ñáyiú vecaá, te ní xica-gá cuáhá<sup>n</sup>-gá distritú Galiléa. <sup>13</sup> Te ní ñà túú ní xíndecu-gá ñuú Nazàrét, chí ní yáha-gá cuáhá<sup>n</sup>-gá ndéé ñuú Capèrnaúm yàcá<sup>n</sup> ní xíndecu-gá, te ñuú-á<sup>n</sup> cáá yàtni yuhu lagúná, te yatni xía<sup>n</sup> cáá ñuhu nani Zabulón, ndihí ñuhu nani Neftalí. <sup>14</sup> Te duca<sup>n</sup> ní cuu chí ní quee ndáá-xi nàcuáa ní chídó tñùní ndí Chàíá téé ní xóo cáhá<sup>n</sup> tñuhu Yá Ndiöxí ndéé sanaha núú tütú-gá núú càchí-xi:

<sup>15</sup> Ñuhu nani Zabulón, ndihí ñuhu nani Neftalí, ñuhu-á<sup>n</sup> yíndèhu-xi distritú Galiléa,

te xía<sup>n</sup> xíndecu cue ñáyiú ñá túú cùu ñáyiú isràél,

te càa-xi yatni yuhu lagúná te ndàa ingá xio yúte Jòrdán cúu-xí.

<sup>16</sup> Te cue ñáyiú-á<sup>n</sup> ndécú-yu ì<sup>n</sup> núú néé chí ndécú-yu ichi cuèhé ichi duha,



te sáá nduu te cada iní-ndó sǎ ñǎyiu-án  
queé-yu núú ditó chi vá cúndècu-gá-yu  
ichi cuèhé ichi duha.

Te ñiu-ni ñáyiu-án cúú-yu ñáyiu ta xíta ni-  
hnu duu<sup>n</sup> cuáhá<sup>n</sup>,

dico sáá nduu te vá cuíta nihnu-gá-yu.

Duha ní chídó tnùní ndíi núú tütú-gá.

<sup>17</sup> Te dàvá-án ñǎ ngúíta Jèsús ní dánèhé-gá  
ñáyiu, te ní xáha<sup>n</sup>-gǎ xií-yu:

—Chí dándixi túu iní sǎ ñà túú quide  
váha-ndo ndècu-ndo te dañá-ndo nchàa  
ichi cuèhé ichi duha, chi sa ní cuyatni  
nduu ndíhu ndaha ñàha Yá Ndiöxí xii-ndo  
—càchí-gá xáha<sup>n</sup>-gǎ xií-yu.

*Jèsús càhá<sup>n</sup>-gá cúmí tnàhá cue téé tnèi  
chácá*

*(Mr. 1:16-20; Lc. 5:1-11)*

<sup>18</sup> Te Jèsús ñúhú-gǎ ichi cuáhá<sup>n</sup>-gá  
tá yáha-gá yuhu làgúná Galileá, te ní  
xiní-gá úú tnàhá cue téé xídáquèe-güedé  
ñunu-güedé xití ndute tnèi-güedé chácá, chi  
quití tnàhí-án cúú chiú<sup>n</sup>-güedé tnèi-güedé-di.  
Te ñ<sup>n</sup>-dé nání-dě Xímú, àdi Pelú chi úú  
diú-dé, te ñaní-dé cúú ìngá téé ndíhi-dé te  
téé-án nání-dě Ndríxí. <sup>19</sup> Te Jèsús ní xáha<sup>n</sup>-gǎ  
xii-güedé:

—Chí dáñá chiú<sup>n</sup> quide-ndo-án te  
quixi-ndo chitnahá ñáhá-ndó xii-í, te taxi-í  
ìngá núú chiú<sup>n</sup> cada-ndo chi quíhí<sup>n</sup>-ndó  
dàcahá<sup>n</sup>-ndó ñáyiu cuendá tuha ñàhá-yu  
xii-í —càchí-gá xáha<sup>n</sup>-gǎ xii-güedé.

<sup>20</sup> Te òré-ni-án ñǎ dáñá cuè téé-án  
ñunu-güedé, te ní tuha-güedé Jèsús.

<sup>21</sup> Te ní xica tucu Jèsús cuáhá<sup>n</sup>-gá luha-gá,  
te ní xiní tucu-gá úú-gá tnàhá cue téé  
tnèi chácá. Te ñ<sup>n</sup> téé-án nání-dě Jàcobó,  
te ñaní-dé cúú ìngá téé ndíhi-dé te téé-án  
nání-dě Juàá, te ndí ndúú-güedé cúú-güedé  
déhe té Zebèdeú. Te xixínucóo-güedé  
ndíhi tǎtá-güedé xití bàrcú xínaticu-güedé  
ñunu-güedé, te Jèsús ní cana ñàha-gǎ  
xii-güedé.

<sup>22</sup> Te òré-ni-án ñǎ dándöo-güedé  
bàrcú-güedé, ndíhi tǎtá-güedé, te ní tuha  
ñàha-güedé xii-gá.

*Jèsús dánèhé-gá cuèhé víhí ñáyiu*

*(Lc. 6:17-19)*

<sup>23</sup> Te Jèsús tá xica ndodo-gá ñíhí distritú  
Galileá cuáhá<sup>n</sup> tá dānehé-gá ñáyiu tnúhu

váha tnúhu sá sánú ìchi ñàha xií-yu nàcuáa  
ndíhu ndaha ñàha Yá Ndiöxí xií-yu. Te  
ndí tnahá ñ<sup>n</sup> ñ<sup>n</sup> ñúú sàá-gá te duca<sup>n</sup>  
cuānguihu-gá xití veñúhu dānehé-gá ñáyiu  
tnúhu-án. Te ndí díí<sup>n</sup> ndí díí<sup>n</sup> núú cuèhé  
tnàhá ñ<sup>n</sup> ñ<sup>n</sup> ñáyiu dico nchaa-ní-yu ta quide  
tátna-gá cuáhá<sup>n</sup>. <sup>24</sup> Te ndéé nchaa ñáyiu  
yíndehu distritú Síría ní níhí-yu tnúhu  
nchaa nàcuáa quide Jesús. Te ní queé-yu  
ñúú-yu te ndècá-yu nchaa ñáyiu tnàhá ndí  
díí<sup>n</sup> núú cuèhé cuáhá<sup>n</sup> núú ndécú Jèsús.  
Te cuèi ñáyiu xiyíhí, ndíhi ñáyiu ñá túú-gǎ  
càndá nihnu, ndíhi ñáyiu yíhi ñàha espíritú  
cúndíhi yucu ñávàha ndècá-yu cuáhá<sup>n</sup>  
núú-gǎ, te nchaa-yu ní quide tátna ñàha-gǎ  
xií-yu. <sup>25</sup> Te ío vǎi ñáyiu ní chinchícú<sup>n</sup>  
ñáhá xii Jesús, chi ní chinchícú<sup>n</sup> ñáhá ñáyiu  
distritú Galileá, ndíhi ñáyiu nchaa ñúú  
xíndáa Dècápolís, ndíhi ñáyiu ñúú Jerusàlén,  
ndíhi cue ñáyiu nchaa ñúú yíndehu distritú  
Jùdeá, ndíhi ñáyiu xíndecu yatni yúte Jòrdán  
ndàa xio quene nchícanhii.

## 5

*Jèsús núcöo-gá ñ<sup>n</sup> núú tìndúú dánèhé-gá  
ñáyiu*

<sup>1</sup> Te sátá ní xiní Jèsús sá cuèhé víhí  
ñáyiu nchícú<sup>n</sup> ñáhá xii-gá, te ní xica-gá  
cuásaá-gá ñ<sup>n</sup> núú tìndúú te xía<sup>n</sup> ñǎ ngóo-gá,  
te cue téé xica cuu ndíhi-gá ní nadúcú<sup>n</sup> ndéé  
ñáhá-güedé xii-gá. <sup>2</sup> Te ní ngúíta-gá dánèhé  
ñáhá-gǎ xii-güedé ndíhi cue ñáyiu-án, te  
xáha<sup>n</sup>-gǎ:

*Cuendá ñáyiu ío váha táhú-xi*

*(Lc. 6:20-23)*

<sup>3</sup> —Váha táhú nchaa ñáyiu cùtnuní iní-xi  
sá ío-gá cúmǎnǎ-yu cudíú-yu núú Yá Ndiöxí,  
chi ñáyiu-án nduu táhú-yu ndíhu ndaha  
ñàha-gá xií-yu.

<sup>4</sup> Váha táhú nchaa ñáyiu ndàhyú sá ndíhú  
iní-yu, chi Yá Ndiöxí cuáñàha-gǎ tnúhu  
ndee ìní cundecu ndíhí-yu.

<sup>5</sup> Váha táhú nchaa ñáyiu ndàhú iní-xi, chi  
ñáyiu-án nduu táhú-yu cundecú-yu ñ<sup>n</sup> xichi  
núú cuáñàha Yá Ndiöxí xií-yu.

6 'Váha táhú nchaa ñáyiú ío cuení cada nchaa nàcuáa càhá<sup>n</sup> Yá Ndiöxí, chi ñáyiú-á<sup>n</sup> ío nduu vétú iní-yu.

7 'Váha táhú nchaa ñáyiú cùndahú iní tnàha ñáyiú-xi, chi ñáyiú-á<sup>n</sup> ñu-ni duca<sup>n</sup> càda ñaha Yá Ndiöxí xií-yu cundàhú iní ñáhá-gã.

8 'Váha táhú nchaa ñáyiú ní nduu ndoo ní nduu nine iní-xi, chi cue ñáyiú-á<sup>n</sup> nduu táhú-yu cundecú-yu ndihí Yá Ndiöxí.

9 'Váha táhú nchaa ñáyiú càhá<sup>n</sup> dóho tnàha ñáyiú-xi nàcuáa cundecu ndihí váha tnàhá-yu, chi cùtnuní sá ñáyiú-á<sup>n</sup> cuú-yu déhe Yá Ndiöxí.

10 'Váha táhú nchaa ñáyiú ío ndòho ndecu ñuyíú-a sá cuendá sá quidě-yu nàcuáa càhá<sup>n</sup> Yá Ndiöxí, chi ñáyiú-á<sup>n</sup> nduu táhú-yu ndihu ndaha ñaha-gá xií-yu.

11 'Te cùu-ndo ñáyiú ío váha táhú-xi te núu na cùcuèhé ñáhá ñáyiú, àdi cada úhú ñáhã-yu xii-ndo, àdi daciaa díquí ñáhã-yu nándi cuéchi neñúú xii-ndo sá cuendá-í.

12 Te òré duca<sup>n</sup> na càda ñahá-yu xii-ndo te cudíí víhí-ní iní-ndó cùndecu-ndo, chi ío váha càa sá ndécú àndi nduu táhú-ndó cùndecu ndihí-ndo nduu na saá-ndó yàcá<sup>n</sup> cundecu-ndo, chi ñu-ni duca<sup>n</sup> ní xóo cada ñaha cué ñaní tnáhã-yu xii cue téé ní xóo càhá<sup>n</sup> tnúhu Yá Ndiöxí ní xíndecu ndéé sanaha.

*Cuendá ñíí ndihí cuendá ñuhú  
(Mr. 9:50; Lc. 14:34-35)*

13 'Te nchòhó cada iní-ndó sá cúú-ndó dàtná ñíí cuendá ñuyíú-a. Te ñíí chi nándihí-xi dico núu na ndúu víxi<sup>n</sup>-xi, te ñá túú-gã nándihí-xi chi dǎngoyo-ná-ó, te yáha ñáyiú xènihnú-yu. Te duca<sup>n</sup> sǎtnahá-xi cùu nchohó chi cùu-ndo datná ñíí vǎha te núu na càda váha-ndo, te núu vá càdá vǎha-ndo te quee tíhú-ndó.

14 'Te nchòhó cada iní-ndó sá cúú-ndó dàtná ñíí sá dáyèhé ndécú ñuyíú-a, chi sànu ichi-ndo ñáyiú ichi váha. Te nchòhó xíní-ndó sá nùu ñíí ñuú cáá ñíí núú tìndúú te vá cúú càchí-ó sá nguivǎha-xi. 15 Te ñá túú xíní-ó ñíí ñáyiú teñuhú-yu ñíí lìntérná te chiváha-yu xití ñíí càjá, chi tàxi ndecú-yu núú ñíí cuendá cutnùní núú nchàa ñáyiú ndècu vehe. 16 Te duca<sup>n</sup> càda nchohó cada váha-ndo dàtná quidě ñíí ñuhú dayèhe-xi

núú ñáyiú, te duca<sup>n</sup> quení ñáyiú nàcuáa quidè-ndo ndecu-ndo, te tnàhá-yu cachí-yu sá ío càhnu cuu Dútú Ndiöxí Yaá cúú Tǎtá-ndó ndècu andiú chi quení-yu sá quidě vǎha-ndo ndècu-ndo.

*Cuendá tnúhu ní chidó tnùní ndíi Moisés*

17 'Te vá cání iní-ndó sá yǎhú véxi-í xocàni-í tnúhu ní chidó tnùní ndíi Moisés, te ní vǎ cání iní-ndó sá vǎxi-í xocàni-í tnúhu ní chidó tnùní cue téé ní xóo càhá<sup>n</sup> tnúhu Yá Ndiöxí ndéé sanaha, chi yǎhú véxi-í sá càdá-í nàcuáa càhá<sup>n</sup> nchaa tnúhu-á<sup>n</sup>. 18 Te na càchí tnúhu ndáá-í xii-ndo sá tnúhu ní chidó tnùní ndíi Moisés ío ndáá càhá<sup>n</sup>-xi, chi dacuití cùu nchaa nacuáa càhá<sup>n</sup>-xi. Te yáchí-gá naa andiú ndihí ñuyíú dàcúúxí sá quèe cáva ñíí tnúhu-á<sup>n</sup>. 19 Núu xiá<sup>n</sup> nchaa ñáyiú na càchí sá dává tnúhu ní chidó tnùní ndíi Moisés ñá túú xini ñuhu-xi chi ñá túú cùnuu-xi, te ñáyiú-á<sup>n</sup> ñu-ni duca<sup>n</sup> dǎnehé-yu nchaa dava-gá tnàha ñáyiú-yu, te sá dúcá<sup>n</sup> quidè-yu te vá cùnùu víhí-yu núú ndécú Yá Ndiöxí táxí tnùní-gá, chi cuú-yu dàtná ñíí ñáyiú nchìcú<sup>n</sup> cuí-nǎ. Dico nchaa ñáyiú nchìcú<sup>n</sup> nihnu quidè nchaa nacuáa càhá<sup>n</sup> nchaa tnúhu-á<sup>n</sup>, te ñu-ni duca<sup>n</sup> dǎnehé-yu nchaa dava-gá tnàha ñáyiú-yu, te ñáyiú-á<sup>n</sup> ío cunùú-yu núú ndécú Yá Ndiöxí táxí tnùní-gá. 20 Te na càchí tnúhu-í xii-ndo sá ío xini ñuhu-xi cada-ndo nchaa nacuáa càhá<sup>n</sup> Yá Ndiöxí, te vá càdá-ndó dàtná xiquide cue téé dǎnehé ñáhá xii ñáyiú nchaa tnúhu ní chidó tnùní ndíi Moisés, ndihí dàtná xiquide cue téé cùu fariséú, chi núu na càda-ndo datná xiquide cue téé-á<sup>n</sup> ñá, te vá ndúú táhú-ndó ndihu ndaha ñaha Yá Ndiöxí xii-ndo.

*Jèsús càhá<sup>n</sup>-gá cuendá ñáyiú cùdée<sup>n</sup>  
(Lc. 12:57-59)*

21 'Te nchòhó sa xíní-ndó sá ncháá ñáyiú ní cuu ñaní tnàhá-ndó ní xíndecu ndéé sanaha ní níhí-yu tnúhu sá vǎ cúú càhni-yu tnàha ñáyiú-yu, chi núu duca<sup>n</sup> na càdá-yu te nacháhu-yu cuéchi-yu. 22 Dico vitna na càchí tnúhu-í xii-ndo sá nùu ndédani càa-ndo na cudéé<sup>n</sup>-ndó nùú tnàha ñáyiú-ndo, te nacháhu-ndo sá dúcá<sup>n</sup> quidè-ndo, àdi núu na cùcuèhé-ndó-yu te núú chítú nùú tàcá cundáá cuéchi-ndo te núu duca<sup>n</sup> na càda-ndo, àdi núu nà cúu-ndo tnàha ñáyiú-ndo ñíí tnúhu véé vǎhi,

te cucuéchi vìhi xii-ndo chi quíhí<sup>n</sup>-ndó núú ùhú núú ndàhú.

<sup>23</sup> Te xíǎ<sup>n</sup> núu nchòhó òré ndécú ndìhi-ndo ì<sup>n</sup> sá cuíní-ndó cuǎha-ndo Yǎ Ndiǒxí nduu táhú-gǎ, te òré cuáhá<sup>n</sup>-ndó cuǎñaha-ndo xì-gá, te òré ní quexìo-ndo núú dúcá<sup>n</sup> cuǎñaha-ndo xì-gá sá ndúú táhú-gǎ, te ní ndacu iní-ndó sá ndécú ñáyiú ñá túú cùu váha iní ñáhá xì-ndo cuendá ì<sup>n</sup> sá ní cumání núú tnáhá-ndó. <sup>24</sup> Te dàndóo-ndo sá dúcá<sup>n</sup> nèhe-ndo cuáhá<sup>n</sup> nduu táhú Yǎ Ndiǒxí, te díhna-gá quíhí<sup>n</sup>-ndó nàcahá<sup>n</sup> cáhnú iní tnáhá-ndó ndìhi ñáyiú ñá túú cùu váha iní ñáhá xì-ndo-á<sup>n</sup>, te dàtnùní duca<sup>n</sup> te quíhí<sup>n</sup>-ndó cuǎha-ndo Yǎ Ndiǒxí sá ndúú táhú-gǎ.

<sup>25</sup> Te núu ió ì<sup>n</sup>-ndo ní sáhá<sup>n</sup> ñáyiú núú tée cùchiu<sup>n</sup> ní sacá<sup>n</sup> cuéchi-yu cuendá-ndó cuendá ì<sup>n</sup> sá ní quide-ndo, te òré ní naníhí tnáhá-ndó ndìhí-yu cuáhá<sup>n</sup>-ndó núú tée cùchiu<sup>n</sup>-á<sup>n</sup>, te nacáhá<sup>n</sup> cáhnú iní tnáhá-ndó ndìhí-yu cuendá sá vǎ cuǎha cuendá ñáhá-gǎ-yu xii-ndo núú tée cùchiu<sup>n</sup>, chi núu duca<sup>n</sup> na càdá-yu te tée cùchiu<sup>n</sup>-á<sup>n</sup> cuǎha cuendá ñáhá-dě xii-ndo núú cuè tée cùu poleciá, te cue tée-á<sup>n</sup> chihi ñaha-güedé vecaá xii-ndo. <sup>26</sup> Te na càchí tnúhu ndáá-í xii-ndo sá vǎ cǎcu-ndo te núu na ngàva-ndo vecaá ndéé nacháhu-ndo nchàa sá tàú-ndó.

#### *Cuendá cue ñáyiú ñá túú quide váha*

<sup>27</sup> Te nchòhó sa xìní-ndó nàcuáa ndùu tnúhu ní cáhá<sup>n</sup> cue tée ní xíndecu ndéé sanaha, te duha ní cachí-güedé: “Nchaa cue tée vá cúú cǎhá<sup>n</sup> ndìhi-güedé ñadìhí te núu ñá díú ñadìhí-güedé cúú-yu, te diu-ni duca<sup>n</sup> tùcu nchaa cue ñáyiú dìhí vá cúú cǎhá<sup>n</sup> ndìhí-yu tée te núu ñá díú yǐ-yu cùu-güedé”, duha ní cachí-güedé. <sup>28</sup> Dico yúhú càchí tnúhu-í xii-ndo sá nděda-ni càa cue tée na cùndehe ì<sup>n</sup> ñadìhí te núu na càni iní-güedé cundecu díí iní-güedé ndìhí-yu te cada iní-ndó sá dàtná sá sá ní cáhá<sup>n</sup> ndìhi ñaha-güedé xii-yu sá dúcá<sup>n</sup> ní sani iní-güedé.

<sup>29</sup> Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá te tava-ndo, chi váha-gá sá ná cuíta te ñá díú ñihí ní ndúú yǐquì cuñú-ndó quíhí<sup>n</sup>-xi núú ùhú núú ndàhú. <sup>30</sup> Te núu ì<sup>n</sup> xio ndaha-ndo quide-xi quide-ndo nándi sá cuèhé sá dúhá

te quehndé-ndó, chi váha-gá sá ná cuíta ì<sup>n</sup> xio ndaha-ndo te ñá díú sá ñihí ní ndúú yǐquì cuñú-ndó quíhí<sup>n</sup>-xi núú ùhú núú ndàhú.

#### *Jèsús càhá<sup>n</sup>-gá cuendá cue ñáyiú dàña tnaha*

(Mt. 19:9; Mr. 10:11-12; Lc. 16:18)

<sup>31</sup> Te nchòhó sa nàha tucu-ndo nacúaa ní cáhá<sup>n</sup> tucu cue tée ní xíndecu ndéé sanaha, te duha ní cachí-güedé: “Te núu ì<sup>n</sup> tée na dàña tnaha-dé ndìhi ñadìhí-dé, te xìni ñuhu-xi cadúha-dé ì<sup>n</sup> tutú cuǎñaha-dě núú càhá<sup>n</sup>-xi sá ní dáña ñaha-dé”, duha ní cachí-güedé. <sup>32</sup> Dico yúhú càchí tnúhu-í xii-ndo sá cúú dàña ì<sup>n</sup> tée ñadìhí-dé, te núu cùtnuní ndáa iní-dé sá càhá<sup>n</sup> ndìhi-a<sup>n</sup> ingá tée. Dico núu ñá túú dùca<sup>n</sup> quide-a<sup>n</sup> te ñá túú ndùu váha-xi dañá ñaha-dé. Te núu ñá túú dùca<sup>n</sup> quide ñadìhí-dé, te cada iní-ó sá mée-dě ní sanu ichi ñaha-dě xii-a<sup>n</sup> cáhá<sup>n</sup> ndìhi-a<sup>n</sup> ingá tée te núu na dàña ñaha-dé. Te tée na nàquehe<sup>n</sup> ñaha xii ñaha ní dáña ñaha yǐ-xi-á<sup>n</sup>, te diu-ni ñá túú ní quide váha-dé sá dúcá<sup>n</sup> ní naquehe<sup>n</sup>-dè ñaha-á<sup>n</sup>.

#### *Ñáyiú càcunehe ñaha xii Yǎ Ndiǒxí cuendá cutnùní iní tnàha ñáyiú-yu sá ndáa cada-yu ì<sup>n</sup> sá sání iní-yu cada-yu*

<sup>33</sup> Te sa nàha tucu-ndo nacúaa ní cáhá<sup>n</sup> tucu cue tée ní xíndecu ndéé sanaha, chi cue tée-á<sup>n</sup> ní cachí-güedé: “Te núu càcunehe-ndo Yǎ Ndiǒxí núú tnàha ñáyiú-ndo nàcuáa cutnùní iní-yu sá ndáa cada-ndo ì<sup>n</sup> sá sání iní-ndó càda-ndo, te cada-ndo”, duha ní cáhá<sup>n</sup> dóho tnàha-güedé. <sup>34</sup> Dico yúhú càchí tnúhu-í xii-ndo sá ñà túú nǎ càcunehe-ndo sá ndáa cada-ndo ì<sup>n</sup> sá sání iní-ndó càda-ndo. Te ní vǎ cǎcú nèhe-ndo andiú chi yàcá<sup>n</sup> cúú-xí núú núcõo Yǎ Ndiǒxí táxí tnùnigá. <sup>35</sup> Te ní vǎ cǎcú nèhe-ndo ñuyíú-a, chi tnáhá ñuyíú-a ndècu-gá, te ní vǎ cǎcú nèhe-ndo ñuú Jerusàlén chi ñuú-á<sup>n</sup> cúú cuendá-gá, te diu-gá cúú-gǎ Yaá ío cùnuu. <sup>36</sup> Te ní vǎ cǎcú nèhe-ndo díquí-ndó chi nàha-ndo sá nì ì<sup>n</sup> idi díquí-ndó ñá ndácú-ndó ndàda cuixí<sup>n</sup>-ndó àdi ndada tnuu-ndo. <sup>37</sup> Te váha-gá sá núu ì<sup>n</sup> sá sání iní-ndó càda-ndo, te cachí-ni-ndo: “Cuu cada-ndí, àdi vá cúú càda-ndí”, cachí-ni-ndo. Chi nchaa dava-gá sá chídó-ndó càhá<sup>n</sup>-ndó òré duca<sup>n</sup>



sàni iní-ndó càda-ndo ì<sup>n</sup> sá cádá-ndó cùu-xi sá dácàhu iní ñáhá yùcu ñávàha.

*Cuèndá ñáyiu nàchinaa sá quidé ñaha tnaha ñáyiu-xi*  
(Lc. 6:29-30)

<sup>38</sup> Te sa nàha tucu-ndo nacuáa ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ñí cachí-güedé: “Ñáyiu na càda ñaha tnaha ñáyiu-xi ì<sup>n</sup> sá ñà túú vâha, te nanchòcáva-yu nachinaá-yu sá ñí quide ñaha tnaha ñáyíu-yu”, duha ní cachí-güedé. <sup>39</sup> Dico yúhú càchí tnúhu-í xii-ndo sá ñà túú ñà cada-ndo nchàa cue ñáyiu cuihna iní-xi te núu quide ñahá-yu ì<sup>n</sup> sá ñà túú vâha xii-ndo. Te núu ní canihá-yu ì<sup>n</sup> xito te cuini tucú-yu canihá-yu ingá xito te dañá-ndo na canihá-yu. <sup>40</sup> Àdi ní sacá<sup>n</sup> cuéchi-yu núu cuè téé cùchiu<sup>n</sup> cuendá-ndó, te cuini-yu quendeé-yu dúhnú-ndó te dañá-ndo na canehé-yu quíhí<sup>n</sup>, te tnàhá-ni dóó ndíxí ndòdo-ndo dañá-ndo na canehé-yu quíhí<sup>n</sup>. <sup>41</sup> Te núu quide yicá-yu caca-ndo dàtná úú kilómetrú cuido-ndo ndàchiú<sup>n</sup>-yu ña, te chido-ndo úú-gá tucu kilómetrú cuido-ndo ndàchiú<sup>n</sup>-yu. <sup>42</sup> Te núu ió ì<sup>n</sup> sá xicá<sup>n</sup>-yu núú-ndó te cuañaha-ndo, àdi ió ì<sup>n</sup> sá sánúú-yu núú-ndó te cuañaha nùu-ndo.

*Cuu iní-ó nchàa ñáyiu cùu úhú iní ñáhá xii-o*  
(Lc. 6:27-28, 32-36)

<sup>43</sup> Te sa nàha tucu-ndo nacuáa ní cachí tucu cue téé ní xíndecu ndéé sanaha, chi cue téé-á<sup>n</sup> ñí cachí-güedé: “Cuu iní-ndó cuè ñáyiu ndècu ndíhi váha-ndo, te cuu úhú iní-ndó cuè ñáyiu cùu úhú iní ñáhá xii-ndo”, duha ní cachí-güedé. <sup>44</sup> Dico yúhú càchí tnúhu-í xii-ndo sá cúú ìní-ndó cuè ñáyiu cùu úhú iní ñáhá xii-ndo, te cáhá<sup>n</sup> váha-ndo cuèndá cue ñáyiu càhá<sup>n</sup> úhú ñáhá xii-ndo, te cada-ndo sá vâha sá cúú-xí cuè ñáyiu cùu úhú iní ñáhá xii-ndo, te cáhá<sup>n</sup> ndíhi-ndo Yá Ndiòxí cuèndá cue ñáyiu xícuèhé ñáhá xii-ndo, ndíhi cuèndá cue ñáyiu quide úhú ñáhá xii-ndo. <sup>45</sup> Te núu na càda-ndo nchaa nacuáa càhá<sup>n</sup>-í-a, te duca<sup>n</sup> te cutnùní sá cúú-ndó dèhe Tātá-ndó Dútú Ndiòxí Yaá ndécú àndiú. Te diu-gá cúú-gá Yaá quidé quène nchíanchii, te diu-ni-gá cúú-gá Yaá dácùu<sup>n</sup> dáú ñuyíu<sup>n</sup>-a, te duca<sup>n</sup> quide-gá cuèndá cuu-xi sá vâha

sá cúú-xí cuè ñáyiu quide váha, ndíhi sá cúú-xí cuè ñáyiu ñá túú quide váha. <sup>46</sup> Te núu nchòhó ná cúú ìní-ndó mèe-ni ñáyiu na cùu iní ñáhá xii-ndo, te vá càchí-ndó sá Yá Ndiòxí taxi-gá sá ndúú tãhú-ndó sá dúcá<sup>n</sup> quide-ndo, chi cuèi cue téé cuihna iní-xi quide cobrá ñáhá xii cue ñáyiu cuèndá impuèstú duca<sup>n</sup> xíquide-güedé. <sup>47</sup> Te núu mee-ni ñáyiu ndècu ndíhi váha-ndo ïo váha cáhá<sup>n</sup> ndíhi-ndó-yu, te vá càchí-ndó sá ïo váha quide-ndo sá dúcá<sup>n</sup> quide-ndo, chi cuèi ndéé nchaa ñáyiu ñá túú xini dana cuèndá Yá Ndiòxí duca<sup>n</sup> xíquide-yu. <sup>48</sup> Te duha ndúu tnúhu càhá<sup>n</sup>-í cuèndá sá nchòhó cada ndáá-ndó cùndecu-ndo datná quidé ndáá méé Tātá-ndó Dútú Ndiòxí Yaá ndécú àndiú –duha ní dánèhé ñáhá Jèsús xii cue téé xica cuu ndíhi-gá ndíhi nchaa ñáyiu.

## 6

*Jèsús dánèhé-gá ñáyiu nàcuáa cada-yu sá vâha*

<sup>1</sup> Te Jèsús ndécú-ni-gá dánèhé-gá cue téé xica cuu ndíhi-gá ndíhi nchaa ñáyiu, te xãhá<sup>n</sup>-gã:

–Te òré quidé-ndó sá vâha te vá cádá-ndó núú ñáyiu cuèndá-ni sá cuini-ndó cáhá<sup>n</sup> váha-yu cuèndá-ndó, chi núu núú ñáyiu duca<sup>n</sup> na càda-ndo te Dútú Ndiòxí Yaá cúú Tātá-ndó vâ táxi-gá sá ndúú tãhú-ndó. <sup>2</sup> Te xíã<sup>n</sup> núu nchòhó òré chindèe-ndo ñáyiu ndàhú, te vá cùñaha-ndo xii cue ñáyiu sá chindèe-ndo cue ñáyiu ndàhú-á<sup>n</sup> dàtná xíquide cue ñáyiu dandahú méé-xí sá quidé ndáá te ñá ndáá sá quidé ndáá-yu, chi ñáyiu-á<sup>n</sup> duca<sup>n</sup> xíquide-yu òré sãhá<sup>n</sup>-yu veñúhu, chi dàtecú tnúhu-yu nchaa ñáyiu òré duca<sup>n</sup> chindeé-yu ñáyiu ndàhú. Te diu-ni duca<sup>n</sup> quidé-yu xãhá<sup>n</sup>-yu xii cue ñáyiu sá chindèe-yu cue ñáyiu ndàhú-á<sup>n</sup> nchaa núu xicá cùu-yu, te duca<sup>n</sup> xíquide-yu cuèndá cuini-yu cáhá<sup>n</sup> váha ñáyiu cuèndá-yu. Te yúhú na càchí tnúhu ndáá-í xii-ndo sá ñà túú ñà nduu tãhú ñáyiu-á<sup>n</sup> núú Yá Ndiòxí sá dúcá<sup>n</sup> quidé-yu chi mee-ni núú tnàha ñáyíu-yu cùdiú-yu. <sup>3</sup> Te nchòhó òré chindèe-ndo ñáyiu ndàhú, te cuèi ñáyiu ío-gá váha ndècu ndíhi-ndo dico vá cùñaha-ndo sá dúcá<sup>n</sup> chindee-ndo cue ñáyiu ndàhú-á<sup>n</sup>, te ni cuè dava-gá ñáyiu vá cùñaha-ndo. <sup>4</sup> Chi váha-gá sá iní

mée-ní-ndó ná cùhu<sup>n</sup> sá dúcá<sup>n</sup> chindee-ndo cue ñáyiú ndàhú-á<sup>n</sup>. Te núu duca<sup>n</sup> na càda-ndo ña, te Dútú Ndiöxí Yaá cúú Tātá-ndó tàxi-gá sá ndúú tǎhú-ndó chi ðiu-ni mee-gǎ ndéhé-gǎ nàcuáa quide-ndo ndecu-ndo.

*Jèsús dánèhé-gá ñáyiú nàcuáa cáhá<sup>n</sup> ndihí-yu Yá Ndiöxí*  
(Lc. 11:2-4)

<sup>5</sup> Te nchòhó òré càhá<sup>n</sup> ndihí-ndo Yá Ndiöxí, te vá cáda-ndó dàtná xǐquide cue ñáyiú dándahú méé-xí càchí sá quidé ndǎá te ñá ndǎá sá quidé ndǎá-yu, chi ñáyiú-á<sup>n</sup> tnàhá iní-yu cunutnii-yu càhá<sup>n</sup> ndihí-yu Yá Ndiöxí òré yíhí-yu veñúhu. Te ðiu-ni duca<sup>n</sup> xǐquidé-yu nchaa núú xícá cùú-yu, te duca<sup>n</sup> quidé-yu cuendá sá cuiní-yu quini ñáyiú nàcuáa xǐquidé-yu. Te na càchí tnúhu ndǎá-í xii-ndo sǎ ñà túú nǎ nduu táhú ñáyiú-á<sup>n</sup> núú Yá Ndiöxí sá dúcá<sup>n</sup> quidé-yu chi mee-ni núú tnàha ñáyiú-yu cùðíú-yu. <sup>6</sup> Te nchòhó òré cuiní-ndó cáhá<sup>n</sup> ndihí-ndo Yá Ndiöxí, te ndíhu ndedí nihnu-ndo xítí vehe-ndo, chi ðiu-gá cúú Tātá-ndó te ndècu ndihí ñaha-gá xii-ndo, te ðiu-ni mee-gǎ ndéhé ñaha-gá xii-ndo nàcuáa quide-ndo, te núu duca<sup>n</sup> na càda-ndo te taxi-gá sá ndúú tǎhú-ndó.

<sup>7</sup> Te òré càhá<sup>n</sup> ndihí-ndo Yá Ndiöxí te vá sùúni cuendá-ni daçáá-ndó tnúhu cáhá<sup>n</sup> ndihí-ndo-gǎ dàtná xǐquide cue ñáyiú ñá túú xini tnúhu-gá, chi ñáyiú-á<sup>n</sup> sání iní-yu sá tédòho ñaha vihi-gá Yá Ndiöxí xii-yu sá dúcá<sup>n</sup> sùúni dàcaá-yu tnúhu càhá<sup>n</sup> ndihí ñàhá-yu xii-gá dico ñàhá. <sup>8</sup> Dico nchòhó, vá cáda-ndó dàtná xǐquide cue ñáyiú-á<sup>n</sup>, chi mee Tātá-ndó Dútú Ndiöxí sa ñaha-gá ná cúú nchaa sá xini ñúhu-ndo cuéi òré vátá càcá<sup>n</sup>-gá-ndó núú-gǎ. <sup>9</sup> Te duha cáhá<sup>n</sup>-ndó òré càhá<sup>n</sup> ndihí-ndo Yá Ndiöxí:

Yòhó Tātá-ndí Dútú Ndiöxí Yaá ndécú àndíu,  
nchaa ñáyiú na càhá<sup>n</sup>-yu sá cúú-n Yàá ío yíñúhu.

<sup>10</sup> Te xícá<sup>n</sup> táhú-ndí núú-n sǎ ná sàá nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndíu.

<sup>11</sup> Te xícá<sup>n</sup> táhú-ndí núú-n sǎ táxi-n sǎ cóhó-ndí sá cáxi-ndí ñ<sup>n</sup> nduu ñ<sup>n</sup> nduu.

<sup>12</sup> Te cada càhnu iní-n nchaa yícá cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

<sup>13</sup> Te vá dáñá-n dàcahá<sup>n</sup> ñàhá yùcu ñávàha xii-ndí cada-ndí sá ñà túú vǎha, chi coto ñaha-n xii-ndí cuendá sá vá dúcá<sup>n</sup> càda ñaha-xí.

Te ðiu-n cùu-n Yaá ío cùnuu nchaa nduu nchaa quíú, te ío càhnu cuu-n, te ðiu-ni-n quindaha ñaha-n xii-ndí ni caa ni quíhí<sup>n</sup>. Te duca<sup>n</sup> na cùnduu.

Duha dènehé ñàhá-í xii-ndo cáhá<sup>n</sup> ndihí-ndo Yá Ndiöxí.

<sup>14</sup> Te núu nchòhó quidé càhnu iní-ndó nchaa sá quidé ñàha tnaha ñáyiú-ndo, te duca<sup>n</sup> te Tātá-ndó Dútú Ndiöxí Yaá ndécú àndíu cada cahnu iní-gá nchaa sá ñà túú vǎha quide-ndo tucu. <sup>15</sup> Dico núu nchòhó vá cáda càhnu iní-ndó nchaa sá quidé ñàha tnaha ñáyiú-ndo ña, te ni Dútú Ndiöxí Yaá cúú Tātá-ndó vá cáda càhnu iní-gá nchaa sá quidé-ndó tucu.

*Cuendá ñáyiú ñà túú tnàhí ná xéxí ãma cáhá<sup>n</sup> ndihí-yu Yá Ndiöxí*

<sup>16</sup> Te nchòhó, nduu ñà túú tnàhí ná xéxí-ndó càhá<sup>n</sup> ndihí-ndo Yá Ndiöxí, te vá cùndíyí-ndó dàtná xǐquide nchaa ñáyiú dándahú méé-xí càchí sá quidé ndǎá te ñá ndǎá sá quidé ndǎá-yu, chi ñáyiú-á<sup>n</sup> duca<sup>n</sup> xǐquidé-yu cuendá sá cuiní-yu cutnùní iní ñáyiú sá ñà túú tnàhí ná xéxí-yu càhá<sup>n</sup> ndihí-yu Yá Ndiöxí. Te yúhú càchí tnúhu-í xii-ndo sǎ sà dúcá<sup>n</sup> quidé-yu te ñá túú nǎ chindee ñàha-xi xii-yu cuendá níhí-yu ñ<sup>n</sup> sá ndúú tǎhú-yu núú Yá Ndiöxí. <sup>17</sup> Dico nchòhó, nduu duca<sup>n</sup> quide-ndo ñà túú tnàhí ná xéxí-ndó càhá<sup>n</sup> ndihí-ndo Yá Ndiöxí, te váha váha naquete-ndo núú-ndó, te váha váha chihi-ndo cùcá <sup>18</sup> cuendá sá vá cùtnùní iní ñáyiú sá ñà túú nǎ xéxí-ndó nduu duca<sup>n</sup> cáhá<sup>n</sup> ndihí-ndo Yá Ndiöxí. Te Dútú Ndiöxí Yaá cúú Tātá-ndó ndècu ndihí-ndo ðiu-ni mee-gǎ ndéhé-gǎ nàcuáa quide-ndo ndecu-ndo, te ðiu-gá taxi-gá sá ndúú tǎhú-ndó.

*Cuendá nchaa sá vǎha nduu táhú-ó*  
(Lc. 12:33-34)

<sup>19</sup> Te vá cání iní-ndó cùu-ndo ñáyiú cuica nǎndí sá cùndècu ndihí-ndo ñuyíú-a chi vá



cúdĩ-xi, chi dava quee tíquidi, te dava caxi cudi ñuhu, àdi quíhu ñadúhú vehe-ndo te duhu-güedě. <sup>20</sup> Te váha-gá chí ndúcú nàcuáa cada-ndo cuendá duca<sup>n</sup> ngündecu sá ndúú tǎhú-ndó àndiũ, te xǎ<sup>n</sup> cudíi-xi cundecu ndihi-ndo ni caa ni quíhí<sup>n</sup>, chi yàcá<sup>n</sup> vá queé-gǎ tíquidi, te ni vǎ cǎxí-gǎ cudi ñuhu, te ni vǎ quíní-gá-ndó ñadúhú duhu-güedě ndachiu<sup>n</sup>-ndo. <sup>21</sup> Te núu cùu-ndo ñáyiũ cuica ndècu ñuyíú-a, te ðiu-ni nchaa sá ndécú ndihi-ndo ñuyíú-a ñuhu iní-ndó. Àdi cuu-ndo ñáyiũ quide nacuáa ngündecu sá ndúú tǎhú-ndó àndiũ, te ðiu-ni sá ndúú tǎhú-ndó ndècu àndiũ-á<sup>n</sup> ñúhú iní-ndó.

*Núú-ó cùu-xi datná ñ<sup>n</sup> ñuhú  
(Lc. 11:34-36)*

<sup>22</sup> Te cada iní-ndó sǎ núú-ndó cùu-xi datná ñ<sup>n</sup> ñuhú. Te núu núú-ndó cǎváha te cùtnuní iní-ndó nǎ cúú sǎ ndécú núú-ndó. <sup>23</sup> Dico núu cùhú núú-ndó ña túú cùtnuní cundehe-ndo ña, te ña túú cùtnuní iní-ndó nǎ cúú sǎ ndécú núú-ndó. Te sá dúcá<sup>n</sup> cùhú núú-ndó te cada iní-ndó sǎ ndécú-ndó datná ñ<sup>n</sup> núú néé. Te duha ndùu tnúhu cǎhá<sup>n</sup>-í chi núu sàni váha iní-ndó cuendá Yǎ Ndiõxí ña, te cùu vii cuu váha iní-ndó ndècu-ndo. Á<sup>n</sup> te núu ña túú sàni váha iní-ndó cuendá-gá ña, te ña túú tnàhí cùu váha iní-ndó ndècu-ndo. Te sá dúcá<sup>n</sup> ña túú sàni váha iní-ndó cuendá-gá te cada iní-ndó sǎ ndécú-ndó datná ñ<sup>n</sup> núú néé.

*Vá ndácú ñ<sup>n</sup> téé cunu cuechi-dě núú úú pàtróó<sup>n</sup>  
(Lc. 16:13)*

<sup>24</sup> Te ni ñ<sup>n</sup> téé xínu cuechi vá ndácú-dě cunu cuechi-dě núú úú pàtróó<sup>n</sup>, chi téé-á<sup>n</sup> cuu váha iní-dé núú ñ<sup>n</sup> pàtróó<sup>n</sup>-dě te tníi-dé nchaa tnúhu cǎhá<sup>n</sup> pàtróó<sup>n</sup> téé cùu váha iní-dé núú-xi-á<sup>n</sup>. Te núú ìngá tucu pàtróó<sup>n</sup>-dě vá cúú váha iní-dé, te ni vǎ tníi-dě tnúhu cǎhá<sup>n</sup> ìngá téé-á<sup>n</sup>. Te duca<sup>n</sup> sǎtnahá-xi cùu nchòhó chi vá ndácú-ndó cunu cuechi-ndo núú Yǎ Ndiõxí te cuhu<sup>n</sup> iní-ndó nchaa sá íó ñuyíú-a.

*Yǎ Ndiõxí xító-gǎ nchaa ñáyiũ cùu déhe-gá  
(Lc. 12:22-31)*

<sup>25</sup> Te na cǎchí tnúhu-í xii-ndo sǎ vǎ ío caní iní-ndó núu nása níhí-ndó sǎ cóhó sǎ cǎxí-ndó, te ni vǎ ío caní iní-ndó núu nása níhí-ndó dǒó cuihnu-ndo, chi cùnuu-gá méé-ndó dàcúúxí sǎ nchító-ndó, te duca<sup>n</sup> cùnuu-gá yíqui cùñú-ndó dàcúúxí

dǒó sácúñhu-ndo. <sup>26</sup> Te chí cǎdá cuendá sá ncháá quiti ndava ña túú tnàhí ná xítú-güedi, te ni ña túú ndèé cuáhá<sup>n</sup>-güedi nàtahu-güedi, te ni ña túú nǎ nǎtaxúha-güedi, te ni ña túú ndèé cáá yàcá-güedi, chi mee Tǎtá-ó Dǔtú Ndiõxí Yáa ndécú àndiũ xito ñaha-gá xii-güedi níhí-güedi sá xéxí-güedi. Te núu cue quiti-á<sup>n</sup> duca<sup>n</sup> xito ñaha-gá xii-güedi, jte uu<sup>n</sup>-gá xító ñaha-gá xii nchòhó, chi nchòhó ío-gá cùnuu-ndo dàcúúxí cué quiti-á<sup>n</sup>! <sup>27</sup> Te cuéi nándi sá sání vihi iní-ndó ndècu-ndo, dico ña ndácú-ndó cǎda-ndo nacuáa cuehnu-ndo cuédicó ñ<sup>n</sup> yíqui-gǎ.

<sup>28</sup> Te vá ío caní iní-ndó núu nása níhí-ndó dǒó cuihnu-ndo. Te chí cǎdá cuendá nàcuáa sǎhnu nchaa itá íó yucu, chi nchaa itá-á<sup>n</sup> ña túú quide chiu<sup>n</sup>-xi, te ni ña túú quèhe<sup>n</sup>-xi idi. <sup>29</sup> Te na cǎchí tnúhu-í xii-ndo sǎ ndíi Salómón cuéi ío vii ní xínduu dǒó ní xóo cuihnu ndíi, dico ña túú nǔtnahá-xi nàcuáa cǎa nchaa itá, chi ío-gá vii cǎa nchaa itá. <sup>30</sup> Te nchaa itá íó yucu tnaa-ni cùdíi-xi, te yìchí-xi te sǎhmi ñáyiũ. Te cuéi duca<sup>n</sup> dico mee Yǎ Ndiõxí quidé-gǎ ío vii sácúnduu-xi. Te núu nchaa itá-á<sup>n</sup> duca<sup>n</sup> quide-gá xító-gǎ sácúnduu vii-xi, te xǎ<sup>n</sup> cùtnuní sá ío-gá coto ñaha-gǎ xii-ndo, dicó-ni sá ña túú sǎndáá váha iní-ndó-gǎ. <sup>31</sup> Te xǎ<sup>n</sup> núu ña túú xini ñuhu vihi-xi caní iní-ndó núu nása níhí-ndó sǎ cóhó sǎ cǎxí-ndó, àdi nása níhí-ndó dǒó cuihnu-ndo. <sup>32</sup> Chi nchaa ñáyiũ ña túú xini nàcuáa cǎhá<sup>n</sup> tnúhu Yǎ Ndiõxí mee-ni nchaa xǎ<sup>n</sup> ñúhú iní-yu. Dico nchòhó chi mee Tǎtá-ndó Dǔtú Ndiõxí sa naha-gá ná cúú sǎ xini ñuhu-ndo. <sup>33</sup> Te xǎ<sup>n</sup> núu ío xini ñuhu-xi sá cùhú<sup>n</sup> iní-ndó sǎ Yǎ Ndiõxí yíndàha ñaha-gá xii-ndo, te duca<sup>n</sup> cǎda-ndo nchaa nacuáa cuíní-gá, te duca<sup>n</sup> te taxi-gá nchaa sá xini ñuhu-ndo. <sup>34</sup> Núu xǎ<sup>n</sup> vá ío caní iní-ndó nása cundecu-ndo ndùu tneé, chi caní iní-ndó nàcuáa cada-ndo cùndecu-ndo vitna, chi nduu tneé-á<sup>n</sup> te òré-nǎ te cùtnuní núu nása cada-ndo cùndecu-ndo. Chi nchòhó sa naha-ndo sá ío titní núú sǎ quidé-xí ñ<sup>n</sup> nduu ñ<sup>n</sup> nduu — duha ní dánèhé ñáhá Jèsús xii cue téé xica cuu ndihi-gá ndihi nchaa ñáyiũ.

## 7

*Vá cǎhá<sup>n</sup> cuèhé-ó cuendá tnàha ñáyiũ-o  
(Lc. 6:37-38, 41-42)*

1 Te Jèsús nděcuu-ni-gá dánèhé-gá cue téé xica cuu ndihi-gá ndihi nchaa ñáyi, te xáha<sup>n</sup>-gã:

—Vá càhá<sup>n</sup> cuèhé-ndó cuendá tnàha ñáyi-ndo, te duca<sup>n</sup> te Yá Ndiöxí ñá túú nã tnúhu cúñaha-gã xii-ndo. 2 Chi núu na càhá<sup>n</sup> cuèhé-ndó cuendá tnàha ñáyi-ndo, te Yá Ndiöxí ío ì<sup>n</sup> sá cáda ñàha-gá xii-ndo. Te núu nchòhó ná càhá<sup>n</sup> cuèhé víhí-ndó cuendá tnàha ñáyi-ndo te Yá Ndiöxí ío-gá dandòho ñaha-gá xii-ndo. 3 ¿Te ná cuendá ndéhé-ndó ì<sup>n</sup> sá ñà túú vãha quide tnaha ñáyi-ndo te mee-ndo vihi-gá quidé-ndó-í? Te sá dúcá<sup>n</sup> quide-ndo te cada iní-ndó sã ndéhé-ndó dàtná ì<sup>n</sup> mihi líhli ñùhu núú tnàha ñáyi-ndo te mee-ndo ñùhu ì<sup>n</sup> mihi cahnu-gá núú-ndó te ñá túú quide cuendá-ndó. 4 Te núu na nàcanu ichi-ndo tnaha ñáyi-ndo cuendá sã ñà túú quide vãha-yu ndécú-yu, te mee-ndo vihi-gá quidé-ndó ñá, te cada iní-ndó sã xáha<sup>n</sup>-ndo xii tnaha ñáyi-ndo sã nátava-ndo mihi líhli ñùhu núú-yu sá dúcá<sup>n</sup> quide-ndo, te mihi càhnu ñùhu núú méé-ndó ñà túú quide cuendá-ndó. 5 Te sá dúcá<sup>n</sup> quide-ndo te ío dandahú-ndó mée-ndo sá quidé ndáá-ndó te ñá ndáá sá quidé ndáá-ndó, te xini ñùhu-xi díhna-gá ñàha-ndo nchaa sã ñà túú vãha quide-ndo, te dàtnùní duca<sup>n</sup> te cuu nàcanu ichi-ndo tnàha ñáyi-ndo cuendá nchaa sã ñà túú vãha quidé-yu.

6 Te nchaa ñáyi ío sàá iní-xi, te vá cáda yica-ndó-yu cundedóho-yu tnúhu Yá Ndiöxí, chi núu na càda yica-ndó-yu te ngóo-yu cuu úhú iní ñáhã-yu xii-ndo. Te ñáyi-á<sup>n</sup> cúú-yu dàtná iná chi quiti-á<sup>n</sup> núu na cuñaha-o ì<sup>n</sup> sá cuñaha-o, te núu ñá túú cùtnuní iní-dì ná cúú xĩã<sup>n</sup> te tñi ñaha-dì xii-o. Te cùu tucú-yu dàtná cùchí chi quiti-á<sup>n</sup> núu na chùcu-o núú-dì yúú vãha sã ío vii càa nani pér lá, te dìcò-ni cùnu sáhá-dì chi ñá túú cùtnuní iní-dì sá cúú-xí yúú vãha.

*Cácá<sup>n</sup>-ó núú Yá Ndiöxí núu ná cuiní-ó  
(Lc. 11:9-13; 6:31)*

7 Te na càchí tnúhu-í xii-ndo sã cãcá<sup>n</sup>-ndó núú Yá Ndiöxí te núu ná cuiní-ndó te taxi-gá, te vá ñáñá ndéé-ndó cãcá<sup>n</sup>-ndó núú-gã núu ná cuiní-ndó te duca<sup>n</sup> te nihí-ndó. Te cada iní-ndó sã ñi quexio-ndo vehe ì<sup>n</sup> tnaha ñáyi-ndo te ní cáhá<sup>n</sup>-ndó, te ñáyi-á<sup>n</sup> ñi tedóho ñàhá-yu xii-ndo te ní

nacaá<sup>n</sup>-yu yuyèhe. Te duca<sup>n</sup> càda iní-ndó chi Yá Ndiöxí tedóho ñaha-gã xii-ndo, te taxi-gá sá ná cãcá<sup>n</sup>-ndó núú-gã. 8 Chi nchaa ñáyi duca<sup>n</sup> xĩquide, te Yá Ndiöxí tedóho ñaha-gã xii-yu te nihí-yu sá cuiní-yu. Te diu-ni duca<sup>n</sup> tucu nchaa ñáyi na cãcá<sup>n</sup> núú-gã ì<sup>n</sup> sá cuiní-yu, chi sãñaha-gã sá xicá<sup>n</sup>-yu núú-gã. Te diu-ni duca<sup>n</sup> tucu nchaa ñáyi ñá túú ñàña ndéé xicá<sup>n</sup> núú Yá Ndiöxí sá cuiní-yu chi nihí-yu.

9 Te nchòhó cue téé cùu tátá, ñá túú cùndee iní-ndó cuñaha-ndo xii cue déhe-ndo ì<sup>n</sup> yúú caxi-güexi òré xicá<sup>n</sup>-güexi ì<sup>n</sup> pàá núú-ndó càxi-güexi. 10 Te ni ñà túú cùndee iní-ndó cuñaha-ndo ì<sup>n</sup> cóo caxi-güexi òré xicá<sup>n</sup>-güexi ì<sup>n</sup> chácá núú-ndó càxi-güexi. 11 Te nchòhó cuèi ndéé dau-na sàá iní-ndó dico sãha-ndo cuè déhe-ndo sã vãha xèxi-güexi òré ná cúú sã xicá<sup>n</sup>-güexi núú-ndó càxi-güexi. Te núu nchòhó duca<sup>n</sup> quide-ndo, jte uu<sup>n</sup>-gá duca<sup>n</sup> quide Tátá-ndó Dütú Ndiöxí Yaá ndécú àndi, chi taxi-gá sã vãha sá cúú-xí-ndó te núu na cãcá<sup>n</sup>-ndó núú-gã!

12 Te nchaa sã vãha cuiní-ndó càda tnaha ñáyi-ndo, te cada-ndo tnàhá-ndó ndihí-yu, chi duca<sup>n</sup> sànu ichi ñaha tnúhu ní chídó tnùní ndíi Moisés, te diu-ni duca<sup>n</sup> sànu ichi ñaha tucu nchaa tnúhu ní chídó tnùní cue téé ní xóo cáhá<sup>n</sup> tnúhu Yá Ndiöxí ndéé sanaha.

*Yuyèhe cuiñi  
(Lc. 13:24)*

13-14 Te xini ñùhu-xi nducu-ndo nacúaá cada-ndo tñi-ndo ichi Yá Ndiöxí. Te ichi-gá-á<sup>n</sup> cúú-xí dàtná ì<sup>n</sup> ichi cuiñi, àdi dàtná ì<sup>n</sup> yuyèhe cuiñi. Te duha càhá<sup>n</sup>-í chi ío úhú xínu iní-ndó tñi-ndo ichi Yá Ndiöxí, te sacú-ni nchòhó cue ñáyi ndècu ñuyíú-a tñi-ndo ìchi-gá. Te nchaa ñáyi ndècu ichi cuehé ichi duha ta xita nihnú-yu cuáhá<sup>n</sup>. Te ichi ndécú-yu-á<sup>n</sup> cada iní-ndó sã cúú-xí ì<sup>n</sup> ichi cahnu ichi quehé<sup>n</sup>, àdi ì<sup>n</sup> yuyèhe quehé<sup>n</sup>. Te duha càhá<sup>n</sup>-í chi ío vãi ñáyi ndécú-yu ichi-á<sup>n</sup>.

*Ndi ñi<sup>n</sup> núú yutnu xini-ó ñá yutnu cùu-xi  
cuendá sã sãvidí-xi  
(Lc. 6:43-44)*

15 Te càchí tnúhu-í xii-ndo sã ío quihí iní-ndó cùndecu-ndo cuendá sã vã dandahú ñáhã cuè téé càchí sã càhá<sup>n</sup> tnúhu Yá

Ndiõxí te ñá ndàá sá càhá<sup>n</sup>-güedé tnúhu-gá. Chi cue téé-á<sup>n</sup> sànuu sá quidé-güedé dàtná quidé mbéé quitì ío váha iní-xi, dico ñá ndàá chi ñá túú ñùhu váha iní-güedé, chi quide-güedé dàtná quidé quitì déé<sup>n</sup> quitì nàni yíhí. <sup>16</sup> Te òré quexìo-güedé núú ndécú-ndó te cada cuendá-ndó nàcuáa quide-güedé cuendá duca<sup>n</sup> cùtnuní iní-ndó nã ñáyiú cùu-güedé. Te nchòhó xìní-ndó sã ñà túú cùu<sup>n</sup> ndéhé yoho yàha stilé tnu iñu, te ni ñà túú xìní-ndó cùu<sup>n</sup> ngúxí ñ<sup>n</sup> tnu iñu. <sup>17-18</sup> Te xìní tucu-ndo sã ncháá yùtnu váha cùu<sup>n</sup> sávidí váha, te nchaa yutnu váha-á<sup>n</sup> ñà túú cùu<sup>n</sup> sávidí sá ñà túú vãha. Te nchaa yutnu sá ñà túú vãha ñà túú cùu<sup>n</sup> sávidí váha, chi mee-ni sávidí sá ñà túú vãha cùu<sup>n</sup>. <sup>19</sup> Te nchaa yutnu sá ñà túú cùu<sup>n</sup> sávidí váha xèhndé-güedé, te cuánguee-xi núú ñùhú càyú-xi. Te duca<sup>n</sup> sãtnahá-xi yáha nchaa cue téé dàndahú ñáhá càchí sá càhá<sup>n</sup> tnúhu Yá Ndiõxí te ñá ndàá sá càhá<sup>n</sup>-güedé tnúhu-gá, chi quihí<sup>n</sup>-güedé núú ñùhú núú càyú. <sup>20</sup> Te nchòhó cutnùnì iní-ndó nã ñáyiú cùu cue téé-á<sup>n</sup> cuendá nchaa sá quidé-güedé.

*Ñá ncháá ñáyiú ngúndecú-yu núú ndécú Yá Ndiõxí táxi tnùnì-gá (Lc. 13:25-27)*

<sup>21</sup> Te na càchí tnúhu-í xii-ndo sã ìo vài ñáyiú cachí-yu sá yùhú cùu-í Xítohó-yu, dico ñá ncháá-yu nduu táhù-yu cundecú-yu núú ndécú Tãtà-í Dútú Ndiõxí táxi tnùnì-gá, chi mee-ni nchaa ñáyiú na càda nchaa nacuáa càhá<sup>n</sup>-gá ñáyiú-á<sup>n</sup> nduu táhù-yu cundecú-yu núú ndécú-gã táxi tnùnì-gá. <sup>22</sup> Te na sàá nduu càda ndáá Yá Ndiõxí cuéchi nchaa ñáyiú, te vài-yu cúñahá-yu xii-í: “Yòhó Xítohó Jesucrìstú nchúhú cùu-ndí ñáyiú ní càhá<sup>n</sup> tnúhu-n nàcuáa ní cachí-n, te ñu-ni-n ñí cacunehe-ndí te ní sándáá iní ñáhá nchaa espíritú cùndihí yucu ñávãha xii-ndí ní quee-xi yiqui cùñú ñáyiú, te ñu-ni yòhó ní chindee ñãha-n xii-ndí ní ndacu-ndí ní quide-ndí titní núú sã vã yòo tnàhí ndàcu cada”, duha cúñahá-yu xii-í dàvá-á<sup>n</sup>. <sup>23</sup> Dico yùhú cúñaha-í xií-yu: “Ñá túú tnàhí xìnì ñáhà-í xii nchòhó núú ndèé ñáyiú cùu-ndo, te chí xócuñí nchaa nchòhó

ñáyiú quide nchaa sá cuéhé sá dúhá núú ndécú-í-a”, duha cúñaha-í xií-yu.

*Ñ<sup>n</sup> vehe ndècu cimientú-xi ndihí ñ<sup>n</sup> vehe ñá túú cimientú-xi (Mr. 1:22; Lc. 6:47-49)*

<sup>24</sup> Te nchaa ñáyiú sácúndedóho tnúhu càhá<sup>n</sup>-í te núu na tní-yu, te ñáyiú-á<sup>n</sup> cùu-yu dàtná ñ<sup>n</sup> téé ío váha cùtnuní iní-xi. Chi téé-á<sup>n</sup> ñí dácáá-dé ñ<sup>n</sup> vehe, dico díhna-gá ní xete-dé ndéé ní tnahá-dé yúú cáxí<sup>n</sup> te dàtnùnì ní tava-dé cimientú-xi. <sup>25</sup> Te òré ní cuu<sup>n</sup> dáú te ní ndee ndute ñuhu, te ní dándáá-xí ndéé núú cáá vèhe-á<sup>n</sup>, dico ñá túú ní ndàcu-xi cuido-xi. Te ní quene tucu táchí ñíhi dico ñá túú ní ndàcu-xi cuido-xi vehe-á<sup>n</sup>, te duca<sup>n</sup> chi téé ní dácáá vèhe-á<sup>n</sup> ñí tava-dé cimientú-xi núú yúú cáxí<sup>n</sup>. Duha sãtnahá-xi cùu nchaa ñáyiú tní tnúhu càhá<sup>n</sup>-í. <sup>26</sup> Dico nchaa ñáyiú sácúndedóho tnúhu càhá<sup>n</sup>-í te ñá túú cuínì-yu tní-yu, ñáyiú-á<sup>n</sup> cùu-yu dàtná ñ<sup>n</sup> téé ñá túú tnàhí cùtnuní iní-xi. Chi téé-á<sup>n</sup> ñí dácáá-dé ñ<sup>n</sup> vehe núú yúú mèe-ni ñuhu cùchí. <sup>27</sup> Te òré ní cuu<sup>n</sup> dáú te ní ndee ndute ñuhu, te ní dándáá-xí ndéé núú cáá vèhe-á<sup>n</sup>, te ní quene táchí ñíhi te íí-ni ní xido-xi vehe-á<sup>n</sup> cuendá sá núú ñuhu cùchí ñí sáá. Duha sãtnahá-xi cùu nchaa ñáyiú sácúndedóho tnúhu càhá<sup>n</sup>-í te ñá túú cuínì-yu tní-yu —duha ní dánèhé ñáhá Jèsús xii cue téé xica cuu ndihí-gá ndihí nchaa ñáyiú.

<sup>28</sup> Te òré ní ndihí Jèsús sá dúcá<sup>n</sup> ñí càhá<sup>n</sup>-gá, te nchaa ñáyiú ní xíndedóho nchaa tnúhu ní càhá<sup>n</sup>-gá ío ní cuñúhu-yu nàcuáa ní dánèhé ñáhá-gã xií-yu. <sup>29</sup> Chi ní càhá<sup>n</sup>-gá dàtná càhá<sup>n</sup> cue téé cùnuu, te cùnuu ndisa-gá, te ñá túú ní càhá<sup>n</sup>-gá dàtná càhá<sup>n</sup> nchaa cue téé dàcuaha ñaha xii ñáyiú nchaa tnúhu ní chídó tnùnì ndí Moisés.

## 8

*Jèsús quidé tãtna-gá ñ<sup>n</sup> téé tnàhá cuéhé sã dátèhyú nihnu-xi yiqui cùñú-ó (Mr. 1:40-45; Lc. 5:12-16)*

<sup>1</sup> Te Jèsús ní xica-gá cuánuu-gá ñíhí tindúú núú dúcá<sup>n</sup> ñí xíndecu-gá ní dánèhé-gá ñáyiú-á<sup>n</sup>, te cuéhé víhí ñáyiú nchícú<sup>n</sup> ñáhá xii-gá cuánuu. <sup>2</sup> Te ní quexìo ñ<sup>n</sup> téé tnàhá cuéhé sã dátèhyú nihnu-xi yiqui cùñú-ó



núú Jèsús, te ní ngúñí xítí-dě núú-gă, te xăha<sup>n</sup>-dě xii-gă:

—Mèstrú, véxi-í càhá<sup>n</sup> ndàhú-í núú-n nũu vá cùndèe iní-n càda tátna ñaha-n xii-í, chi cùtnuní iní-í sá ndácú-n —càchí-dé xăha<sup>n</sup>-dě xii-gă.

<sup>3</sup> Te Jèsús ní dácàá-gă ndaha-gă ní tendaha ñaha-gă xii-dé, te xăha<sup>n</sup>-gă:

—Cuu cada tátna ñaha-í xii-n, te vitna ndúha-n —càchí-gă xăha<sup>n</sup>-gă xii-dé.

Te òré-ni-á<sup>n</sup> nĩ xócuñí cuéhé tnàhá-dé.

<sup>4</sup> Te Jèsús ní xăha<sup>n</sup> tùcu-gă xii-dé:

—Te vitna cuanùhú te vá yõ ì<sup>n</sup> cúñaha-n sã yũhú ní quide tátna ñaha-í xii-n, núú dütú-ni cuáhá<sup>n</sup> cuendá sá ná quini ñáhá-dě xii-n sã nĩ ndúha-n, te cuáñaha-n sã ndúú táhú Yă Ndiõxí dàtná ní cachí ndíi Moisés. Te duca<sup>n</sup> càda-n cuendá cutnùní iní ñáyiu sá nĩ ndúha-n —càchí-gă xăha<sup>n</sup>-gă xii té ní quide tátna-gă-á<sup>n</sup>.

*Jèsús quidé tátna-gă ì<sup>n</sup> té xinu cuechi núú ì<sup>n</sup> té cùu capitá<sup>n</sup>*  
(Lc. 7:1-10)

<sup>5</sup> Te Jèsús ní xica-gă cuáhá<sup>n</sup>-gă ñuú Capèrnaúm. Te òré cuánguñhu-gă ñuú-á<sup>n</sup> te ní quexìo ì<sup>n</sup> té cùu capitá<sup>n</sup> càhá<sup>n</sup> ndàhú-dé núú-gă, <sup>6</sup> te xăha<sup>n</sup>-dě xii-gă:

—Mèstrú, véxi-í càhá<sup>n</sup> ndàhú-í núú-n nũu vá cùndèe iní-n càda tátna-n ì<sup>n</sup> té xinu cuechi núú-í, chi cùhú-dé te càhú víhí tnàhá-dé, te ío ndòho-dé te ní ñă cùndèe-gă-dé candá nihnu-dé —càchí-dé xăha<sup>n</sup>-dě xii-gă.

<sup>7</sup> Te Jèsús ní xăha<sup>n</sup>-gă xii-dé:

—Te na quihí<sup>n</sup>-ó càda tátna-í-dé —càchí-gă xăha<sup>n</sup>-gă xii-dé.

<sup>8</sup> Te té cùu capitá<sup>n</sup>-á<sup>n</sup> nĩ xăha<sup>n</sup>-dě xii-gă:

—Mèstrú, ñá túú tàú-í sá quñhu-n ndèe xítí vehe-í, chi cùu-í ì<sup>n</sup> té cùtexínu sá cúú-xí-n, te càhá<sup>n</sup>-ni sá ndúha té xinu cuechi núú-í te ndúha-dé. <sup>9</sup> Chi yúhú ndècu cue té taxi tñuní ñáhá xii-í, te duca<sup>n</sup> yũhú tucu ndècu cue sandadú táxi tñuní-í. Te òré xăha<sup>n</sup>-í xii ì<sup>n</sup>-dé quihí<sup>n</sup>-dé ì<sup>n</sup> chiu<sup>n</sup> te cuáhá<sup>n</sup>-dé, te òré xăha<sup>n</sup>-í xii ingá-dé quixi-dé te véxi-dé, te òré xăha<sup>n</sup>-í xii ì<sup>n</sup> té xinu cuechi núú-í cada-dé ì<sup>n</sup> chiu<sup>n</sup> te quide-dé. Núu xíă yòhó càhá<sup>n</sup>-ni sá ndúha té xinu cuechi núú-í te ndúha-dé —càchí-dé xăha<sup>n</sup>-dě xii Jèsús.

<sup>10</sup> Te Jèsús ío ní cuñúhu-gă sá dúcá<sup>n</sup> nĩ càhá<sup>n</sup> té cùu capitá<sup>n</sup>-á<sup>n</sup>, te ní xăha<sup>n</sup>-gă xii nchaa ñáyiu nchicú<sup>n</sup> ñáhá xii-gă:

—Na càchí tñúhu ndáá-í xii-ndo sã vátá quini-gă-í ní ì<sup>n</sup> ñáyiu isràél, ñáyiu súúni ío váha sàndáá iní ñáhá xii Yă Ndiõxí dàtná sàndáá iní ñáhá té-a xii-gă. <sup>11</sup> Te na càchí tñúhu ndáá tucu-í xii-ndo sã ío cuéhé ñáyiu quixi ndàa xio nacuáa quène nchíanchii, te ñu-ni duca<sup>n</sup> ío cuéhé tucú-yu quixi ndàa xio nacuáa quée tucu nchíanchii. Te nchaa ñáyiu-á<sup>n</sup> naníhí tñáhă-yu ndihí té Àbrahám, ndihí té Isàác, ndihí té Jàcób núú ndécú Yă Ndiõxí táxi tñuní-gă te yàcá<sup>n</sup> cundecu ndihí ñáhá-yu xii-güedé. <sup>12</sup> Te nchaa ñáyiu tàú nduu táhú cundecu núú ndécú Yă Ndiõxí táxi tñuní-gă ní cùu, ñáyiu-á<sup>n</sup> quee tíhŭ-yu, chi quihí<sup>n</sup>-yu ì<sup>n</sup> xichi núú néé núú ío ndohó-yu cundecú-yu, te yàcá<sup>n</sup> ío ndáhí-yu, te dícó rúhñú-nă cuu núhu-yu sá sàtú iní-yu cuendá sá ndóhŭ-yu —càchí-gă xăha<sup>n</sup>-gă xii-yu.

<sup>13</sup> Te Jèsús ní xăha<sup>n</sup> tùcu-gă xii té cùu capitá<sup>n</sup>-á<sup>n</sup>:

—Yòhó té ndècu ndihí té cùhú cuanùhú vehe-n vitna chi ndúha-dé chi ní sàndáá iní-n Yă Ndiõxí —càchí-gă xăha<sup>n</sup>-gă xii-dé.

Te ñu-ni òré duca<sup>n</sup> nĩ xăha<sup>n</sup> Jèsús xii té cùu capitá<sup>n</sup>-á<sup>n</sup> nĩ ndúha té xinu cuechi núú-dě.

*Jèsús quidé tátna-gă năná ñadìhí té Pèlú*  
(Mr. 1:29-31; Lc. 4:38-39)

<sup>14</sup> Te Jèsús ní xica-gă cuáhá<sup>n</sup>-gă vehe té Pèlú, te òré ní quexìo-gă vehe-dé te ní xiní-gă cáá năná ñadìhí-dé cùhú-a<sup>n</sup> ñùhu vihi-a<sup>n</sup> cahni. <sup>15</sup> Te Jèsús ní tñi-gă ndaha ñaha cùhú-á<sup>n</sup>, te òré-ni-á<sup>n</sup> nĩ nchíco-a<sup>n</sup> cahni te ní ndacóo-a<sup>n</sup> ní xinu cuechi-a<sup>n</sup> núú-güedé ndihí-gă.

*Jèsús quidé tátna-gă vâi ñáyiu cùhú*  
(Mr. 1:32-34; Lc. 4:40-41)

<sup>16</sup> Te òré ní dáhu nchíanchii te ní quexìo ñáyiu núú ndécú Jèsús, te ndécá-yu vâi ñáyiu yìhí ñaha espíritú cùndihí yucu ñávăha ní sáá núú-gă te ndèca tucú-yu vâi ñáyiu tnàhá dava-gă núú cuéhé. Te ì<sup>n</sup>-ni tñúhu ní càhá<sup>n</sup> Jèsús ní tenàá-gă nchaa espíritú cùndihí yucu ñávăha yìhí ñaha xii nchaa ñáyiu-á<sup>n</sup>, te ní quee-xi yiqui cùñú-yu cuáhá<sup>n</sup>-xi. Te tnàhá nchaa dava-gă ñáyiu

cùhú-á<sup>n</sup> nǐ quide tátna-gá. <sup>17</sup> Te duca<sup>n</sup> nǐ cuu chi ní quee ndáá-xi nàcuáa ní cáhá<sup>n</sup> ndíi Chàíá tée ní xóo cáhá<sup>n</sup> tnúhu Yá Ndiöxí ndéé sanaha, te duha ní cachí ndíi: “Mee-gã cada tátna ñaha-gã xii-o, chi diu-gá xocàni-gá nchaa sá quidé ùhú yiqui cùñú-ó”, duha ní cachí ndíi.

*Ñáyiú cuení tuha ñaha xii Jesús  
(Lc. 9:57-62)*

<sup>18</sup> Te òré ní xiní Jèsús sá ïo cuéhé ñáyiú xixúcu núú ndécú-gã, te ní xáha<sup>n</sup>-gã xii cue tée xica cuu ndíhi-gá sá quée-gá ndíhi-güedé bàrcú cuendá téhndé-gá ndíhi-güedé ndàa ingá xio yuhu làgúná. <sup>19</sup> Te mei òré-á<sup>n</sup> nǐ quexio ì<sup>n</sup> tée dàcuaha ñaha xii cue ñáyiú nchaa tnúhu ní chídó tnùní ndíi Moisés, te xáha<sup>n</sup>-dë xii-gá:

—Mèstrú, cuení-í canchicú<sup>n</sup> ñáhà-í xii-n ndëni ní cuu na quíhí<sup>n</sup>-n —càchí-dé xáha<sup>n</sup>-dë xii-gá.

<sup>20</sup> Te Jèsús ní xáha<sup>n</sup>-gã xii-dé:

—Nchaa ñúcuí chi ndècu yaú cúú vèhe-güedi saquíhi-güedi, te nchaa cue quíti ndàva caa tacá-güedi diquí yutnu. Dico yúhú Tée cùu ñaní tnáhá-ndó nchàa-ndo chi ñá túú ndéé cáá vèhe-í ñuyú-a ndetatú-í —càchí-gá xáha<sup>n</sup>-gã xii-dé.

<sup>21</sup> Te ì<sup>n</sup> tée ní chitnahá ñáhá xii Jesús ní xáha<sup>n</sup>-dë xii-gá:

—Jèsús, dañá na nùhú-í cundetú-í cuú tátà-í te chindúxi-í-dé dàtnùní quixi-í chitnahá ñáhá dùca<sup>n</sup>-ná-í xii-n —càchí-dé xáha<sup>n</sup>-dë xii-gá.

<sup>22</sup> Te Jèsús ní xáha<sup>n</sup>-gã xii-dé:

—Daña ñáyiú ñá túú sàndáá iní ñáhá xii-í ná chindúxi tnàha meé-yu, chi ñáyiú-á<sup>n</sup> cúú-yu dàtná ñáyiú ní xíhí cuèi ndècu-ní-yu núú ñuyú-a, te yòhó canchicú<sup>n</sup> ñáhá-ní xii-í —càchí-gá xáha<sup>n</sup>-gã xii-dé.

*Jèsús ngání-gã táchí ndíhi ndute làgúná  
(Mr. 4:35-41; Lc. 8:22-25)*

<sup>23</sup> Te sátá dúcá<sup>n</sup> te Jèsús cuánguee-gá bàrcú ndíhi cue tée xica cuu ndíhi-gá, te ní xica bàrcú-á<sup>n</sup> cuáhá<sup>n</sup>-xi. <sup>24</sup> Te nini ñùhu bàrcú-á<sup>n</sup> ichi cuáhá<sup>n</sup>-xi núú ndute ní xídí Jèsús, te ní ngúíta-xi níhi vèhi quene táchí, te ta nàdachitú-xi ndute xití bàrcú cuáhá<sup>n</sup>. <sup>25</sup> Te cue tée xica cuu ndíhi-gá cuáhá<sup>n</sup>-güedé núú cáá-gá xídí-gá, te xáha<sup>n</sup>-güedë xii-gá:

—¡Mèstrú, ndiquíú iní chi dàcácu ñaha-n xii-o chi quée naa-o cuení-xi! —càchí-güedé xáha<sup>n</sup>-güedë xii-gá.

<sup>26</sup> Te Jèsús ní xáha<sup>n</sup>-gã xii-güedé:

—¿Ná cuendá ndéé duca<sup>n</sup> ïo yùhú-ndó? ¿Náa ñá túú sàndáá iní ñáhá ndisa-ndo xii-í-á<sup>n</sup>? —càchí-gá xáha<sup>n</sup>-gã xii-güedé.

Te Jèsús ní ndacóo-gá te ní tenáa-gá táchí-á<sup>n</sup> ndíhi ndute-á<sup>n</sup>, te ní ngúíñí táchí-á<sup>n</sup> te ní nucúndecu nahi-nã ndute làgúná-á<sup>n</sup>.

<sup>27</sup> Te nchaa cue tée ñùhu xití bàrcú-á<sup>n</sup> nǐ cuñúhu-güedé sá dúcá<sup>n</sup> nǐ quide-gá ní xiní-güedé, te ní xitnàha-güedé:

—¿Te ná tée cùu tée-a núu duha ní cáhá<sup>n</sup>-ni-dé te ní ngúíñí táchí te ní nucúndecu nahi-ni ndute làgúná-a-i? —càchí-güedé xitnàha-güedé.

*Cue tée ñuú Gàdará cue tée yèhi ñaha  
espíritú cundíhi yucu ñávàha  
(Mr. 5:1-20; Lc. 8:26-39)*

<sup>28</sup> Te òré ní quèxio Jesús ndàa ingá xio yuhu làgúná yucu cue tée ñuú Gàdará, te úú tnàhá cue tée quide vehe núú yíndüxi ndíyí ní quee-güedé cuáhá<sup>n</sup>-güedé núú ndécú Jèsús, te ndi ndúú-güedé yíhí ñaha espíritú cundíhi yucu ñávàha xii-güedé, te ío mãñá-güedé chi vá yòo tnàhí dañá-güedé yáha yatni núú ndécú-güedé. <sup>29</sup> Te cue espíritú yíhí ñaha xii-güedé-á<sup>n</sup> nǐ quide-xi níhi ní cáhá<sup>n</sup>-güedé, te xáha<sup>n</sup>-güedë xii-gá:

—¿Ná cuendá véxi-ö Jèsús Déhe Dútú Ndiöxí chidácá ñáhá-n xii-ndí? ¿Á<sup>n</sup> sàma véxi-n dàndoho ñaha-n xii-ndí? Te vátá sàá-gá nduu dùca<sup>n</sup> cada-n —cachí-güedé xáha<sup>n</sup>-güedë xii-gá.

<sup>30</sup> Te yatni xía<sup>n</sup> xixica cuu vài cuchí xixexi-güedi. <sup>31</sup> Te cue espíritú cundíhi yucu ñávàha yèhi ñaha xii cue tée-á<sup>n</sup> nǐ cáhá<sup>n</sup> ndàhú-xi núú Jèsús, te xáha<sup>n</sup>-xi:

—Te núu vá dañá-gã-n quíhi-ndí yiqui cùñú cue tée-a, te cáhá<sup>n</sup> ndàhú-ndí núú-n sã dañá-n na quíhí<sup>n</sup>-ndí quíhu-ndí yiqui cùñú nchaa cùchí-á<sup>n</sup> —càchí cue espíritú-á<sup>n</sup> xáha<sup>n</sup>-xi xii-gá.

<sup>32</sup> Te Jèsús ní xáha<sup>n</sup>-gã xii cue espíritú cundíhi yucu ñávàha-á<sup>n</sup>:



—Chí táquèe yiqui cuñú cue téé-án te quíhí<sup>n</sup>-ndó nũu ndèé ichi quíhí<sup>n</sup>-ndó — cächí-gá xáha<sup>n</sup>-gã xii nchaa espíritú-án.

Te cue espíritú cundíhi yucu ñávãha-án nĩ quee-xi yiqui cuñú cue téé-án, te cuáhá<sup>n</sup>-xi cuánguihu-xi nchaa cùchí-án. Te cue quití-án nĩ xinu-güedi duha ní queé-güedi ndàa núú dèhvá yuhu làgúná-án, te ní ngau-nihnu-güedi xití ndute, te ní ndíhi-güedi ní cáhá.

<sup>33</sup> Te cue téé xito ñaha xii nchaa cuchí-án nĩ yuhú-güedé te ní xinu-güedé, te ní sáhá<sup>n</sup>-güedé ní caní-güedé cuendú núú cuè ñáyiú ndècu xití ñuú nchaa nàcuáa ní cuu cuendá cue téé ní xíhi ñaha nchàa espíritú cundíhi yucu ñávãha-án. <sup>34</sup> Te nchaa ñáyiú ñuú-án nĩ queé-yu cuáhá<sup>n</sup>-yu núú ndécú Jèsús. Te òré ní quexió-yu núú ndécú-gã te ní cáhá<sup>n</sup> ndàhú-yu núú-gã sá ná queé-gã yucu ñuú-yu núhú-gã.

## 9

*Jèsús quidé tãtna-gã ì<sup>n</sup> téé cùhú ñá cúú-gã candá nihnu*

*(Mr. 2:1-12; Lc. 5:17-26)*

<sup>1</sup> Te sátá dúcá<sup>n</sup> nĩ cuu te Jèsús cuánde-gã bàrcú cuáhá<sup>n</sup>-gã ní natehdé-gã ndàa ingá xio yuhu làgúná. Te xía<sup>n</sup> nĩ ndexió-gã ñuú núú quidé ñuú-gã. <sup>2</sup> Te xía<sup>n</sup> ndécú-gã ní quexió cue téé nchido-güedé ì<sup>n</sup> téé cùhú ñá cúú-gã candá nihnu ñùhu-dé xito, te Jèsús ní cutnùní iní-gã sá sàndáá ndisa iní ñáhá-güedé xii-gã nũu ní xáha<sup>n</sup>-gã xii téé cùhú-án:

—Yòhó téé cùhú vá ndíhú-gã iní-n, chi sa ní quide càhnu iní-í nchaa cuéchi-n — cächí-gá xáha<sup>n</sup>-gã xii-dé.

<sup>3</sup> Te sátá dúcá<sup>n</sup> nĩ cáhá<sup>n</sup>-gã nũu xía<sup>n</sup> cue téé dàcuaha ñaha xii ñáyiú nchaa tnúhu ní chídó tnùníní ndíi Moisés ní sani iní-güedé: “Téé-a càhá<sup>n</sup> cuèhé-dé cuendá Yã Ndiõxí”, duha ní sani iní-güedé. <sup>4</sup> Te Jèsús ní cutnùní iní-gã nàcuáa sàni iní-güedé nũu ní xáha<sup>n</sup>-gã xii-güedé:

—¿Ná cuendá duca<sup>n</sup> sàni cuehé sání dùha iní-ndó? <sup>5</sup> Te sátá dúhá nĩ xáha<sup>n</sup>-í xii téé cùhú-a sá nĩ quide càhnu iní-í nchaa yíca cuéchi-dé, te xía<sup>n</sup> nchòhó ñá túú cùtnuní iní-ndó nũu ndáá càhá<sup>n</sup>-í àdi ñá ndàá. Dico núú cúú-í-dé sátá ndácóo-dé te caca-dé, te

cutnùní ndáá iní-ndó nũu ndáá càhá<sup>n</sup>-í àdi ñá ndàá, chi cundehe nũu-ndó nàcuáa cada-í. <sup>6</sup> Te vitna na càda-í nàcuáa cutnùní iní-ndó nchàa-ndo sátá yuhú Téé cùu ñaní tnáhá-ndó nchàa-ndo ndecu ndíhi-í tnúhu ndee iní ñuyú-a sátá cádá càhnu iní-í nchaa cuéchi ñáyiú — cächí-gá xáha<sup>n</sup>-gã xii-güedé.

Te sátá dúcá<sup>n</sup> te ní xáha<sup>n</sup>-gã xii téé cùhú-án:

—Ndacóo, te ndocani-n xito ñùhu-n véxi-án te núhú-n vehe-n — cachí-gã xáha<sup>n</sup>-gã xii-dé.

<sup>7</sup> Te òré-ni-án nĩ ndúha téé cùhú-án te ní ndacóo-dé te ní ndocani-dé xito ñùhu-dé ní quexió-án te ní xica-dé cuánuhú-dé vehe-dé. <sup>8</sup> Te nchaa ñáyiú xíndecu-án ìo ní cuñúhu-yu sátá dúcá<sup>n</sup> nĩ quide Jèsús ní xiní-yu, te ní cachí-yu sátá ìo càhnu cuu Yã Ndiõxí cuendá sátá nĩ sáñaha-gã xii Jèsús tnúhu ndee iní cada-gã nchaa sátá vã yõo tnàhí ndàcu cada.

*Jèsús càhá<sup>n</sup>-gã ì<sup>n</sup> téé nàni Mateú chitnahá ñáhá-dé xii-gã*

*(Mr. 2:13-17; Lc. 5:27-32)*

<sup>9</sup> Te Jèsús ní nucúhu<sup>n</sup> tucu-gã ichi cuáhá<sup>n</sup>-gã, te ichi ñùhu-gã ní xiní-gã núcõo ì<sup>n</sup> téé nàni Mateú quidé còbrá-dé ñáyiú chi cobràdór impuèstú cúú-dé, te ní xáha<sup>n</sup>-gã xii-dé:

—Màteú, néhé chitnahá ñáhá-n xii-í — cächí-gã xáha<sup>n</sup>-gã xii-dé.

Te té Màteú-án nĩ ndacuíñí-dé ní chitnahá ñáhá-dé xii-gã.

<sup>10</sup> Te ì<sup>n</sup> xito ndècu Jèsús ì<sup>n</sup> vehe, te yíhi-gã mèsá ndíhi cue téé xica cuu ndíhi-gã xéxi ndíhi ñaha-gã xii-güedé. Te tnàhá cue téé cuihna iní-xi quide cobrá ñáhá xii ñáyiú cuendá impuèstú yíhi ndíhi-gã mèsá, te tnàhá tucu dava-gã cue téé ndècu ichi cuehé ichi duha yíhi ndíhi-gã mèsá. <sup>11</sup> Te sátá nĩ xiní cue téé cùu fariséú xéxi Jèsús ndíhi nchaa cue téé-án, te ní xicá<sup>n</sup> tnúhú-güedé núú cuè téé xica cuu ndíhi-gã, te xáha<sup>n</sup>-güedé:

—¿Ná cuendá duca<sup>n</sup> quide téé cùu mestrú-ndó xèxi-dé ndíhi cue téé cuihna iní-xi quide cobrá ñáhá xii ñáyiú cuendá impuèstú, ndíhi nchaa dava-gã cue téé ndècu ichi cuehé ichi duha-i? — cächí-güedé xáha<sup>n</sup>-güedé.

12-13 Te Jèsús ní tecú dóho-gá nàcuáa ndùu tnúhu ní xáha<sup>n</sup>-güedě xii cue téé xica cuu ndihi-gá, núu ní xáha<sup>n</sup>-gã xii-güedé:

—Nchaa ñáyiú ñá túú cùhú chi ñá túú xìni ñuhú-yu ñátátná, dico nchaa ñáyiú cùhú chi xìni ñuhú-yu ñátátná. Te yúhú véxi-í cáhá<sup>n</sup>-í ñáyiú cùtnuní iní-xi sá ndécú cuěchi-xi cuèndá dañá-yu nchaa sá cuèhé sá dúhá quidé-yu, te ñá túú vèxi-í cáhá<sup>n</sup>-í ñáyiú càchí sá ñá túú ndècu cuéchi-xi. Te chí cádá cuèndá váha nàcuáa càhá<sup>n</sup> Yã Ndiõxí núú tütú-gá núú càchí-xi: “Yúhú cuèní-í sá cùndàhú iní-ndó cuè tnaha ñáyiú-ndo, te ñá díú mèe-ni sá cáhni-ndó quiti nduu táhù-í”, duha càchí-gá núú tütú-gá —càchí Jèsús xáha<sup>n</sup>-gã xii-güedé.

*Cue téé ndùcu tnúhu núú Jèsús cuèndá ñáyiú ñá túú tnàhí ná xéxi áma càhá<sup>n</sup> ndihi-yu Yá Ndiõxí*

(Mr. 2:18-22; Lc. 5:33-39)

14 Te cue téé xica cuu ndihi té Juáa téé dàcuandute ñaha xii ñáyiú ní sáhá<sup>n</sup>-güedé núú ndécú Jèsús, te xicá<sup>n</sup> tnúhú-güedé núú-gã, te xáha<sup>n</sup>-güedé:

—Cuèní-ndí cachí tnúhu-n nã cuèndá nchúhú, ndihi cue téé cùu fariséú ñá túú tnàhí ná xéxi-ndí áma càhá<sup>n</sup> ndihi-ndí Yã Ndiõxí, te cue téé xica cuu ndihi-n ñá túú duca<sup>n</sup> quide-güedé —càchí-güedé xáha<sup>n</sup>-güedé xii-gá.

15 Te Jèsús ní xáha<sup>n</sup>-gã xii-güedé:

—Nchòhó xìní-ndó sã vã cúú cũñaha-o xì ñáyiú ñuhu vico tnándaha sã vã cúú cãxi-yu nini ndècu ndihi ñaha téé tnándaha xií-yu, dico sáa nduu vã cùndècu ndihi ñaha-gá téé tnándaha-á<sup>n</sup> xií-yu, te dàvá-á<sup>n</sup> te cahni iní-yu vã cãxi-yu cuèndá sá ndihú iní-yu.

16 Te ni vã yõ dándée luha dóó sáa ñá dóó sa ní cuu tühú víhí, chí dóó sáa-á<sup>n</sup> nãndiyi-xi te uu<sup>n</sup>-gá ndata-xi dóó sã ñí cuu tühú-á<sup>n</sup>.

17 Te ni vã yõ chihí ndidí sáa xìtí ñá lamba sa ní cuu tühú víhí, chí núu yoo duca<sup>n</sup> na càda te ndava lamba sa ní cuu tühú-á<sup>n</sup> chí ío níhi yóó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núu duca<sup>n</sup> na càdá-yu, núu xiã xìní ñuhu-xi quée ndidí sáa-á<sup>n</sup> xìtí ñá lamba saa cuèndá duca<sup>n</sup> ñá túú nã cuu cováha-xi —càchí-gá xáha<sup>n</sup>-gã xii-güedé.

*Cuèndá déhe yoco té Jàirú ndihi cuèndá ñá ñaha ní tnándeé dóó Jèsús*

(Mr. 5:21-43; Lc. 8:40-56)

18 Te càhá<sup>n</sup> dúcá<sup>n</sup>-ní Jèsús ní quexìo ñá téé cùnuu núú ndécú-gã, ñá téé tàxi tnuní veñúhu, te ní ngüñí xìtí-dě núú-gã càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n núu vá cùndèe iní-n quíhí<sup>n</sup>-ó vehe-í dandòto-n déhe yoco-í chí ní xihí-xi tnávíí, te yúhú cùtnuní iní-í sá núu quíhí<sup>n</sup>-n tëndaha-n yiqui cuñú-xi te ndoto-xi —càchí-dé xáha<sup>n</sup>-dě xii-gá.

19 Te Jèsús ní xica-gá cuáhá<sup>n</sup>-gá ndihi-dé ndihi cue téé xica cuu ndihi-gá. 20 Te ichi ñuhu-gá cuáhá<sup>n</sup>-gá ní sáhá<sup>n</sup> ñá ñadihí ní tnándeé-a<sup>n</sup> yuhu dõó-gã ndàa sátá-gã, te ñaha-á<sup>n</sup> sa ní cuu úxúú cuíá sã cùhú-a<sup>n</sup> ngòyo ñaha ñíhí xii-a<sup>n</sup>. 21 Te duca<sup>n</sup> ñí quide-a<sup>n</sup> chí ní sani iní-a<sup>n</sup> sá núu ndacu-a<sup>n</sup> tnándeé-a<sup>n</sup> cuèdicó luha yuhu dõó Jèsús te ndúha-a<sup>n</sup> ní sani iní-a<sup>n</sup>. 22 Te Jèsús ní nchócótó-gã ndàa sátá-gã te ní xìní-gá ñadihí-á<sup>n</sup>, te ní xáha<sup>n</sup>-gã:

—Yòhó ñaha cùhú, vá ndihú-gá iní-n vitna chí sa ní ndúha-n, chí ní sándáá iní ñáhá-n xii-í —càchí-gá xáha<sup>n</sup>-gã xii-a<sup>n</sup>.

Te òré-ni-á<sup>n</sup> ñí ndúha ñaha cùhú-á<sup>n</sup>.

23 Te òré ní quexìo Jèsús vehe téé cùnuu taxi tnuní veñúhu-á<sup>n</sup>, te ní xìní-gá xĩndáhí víhí ñáyiú, te xĩndecu mùsicú. 24 Te ní xáha<sup>n</sup>-gã xií-yu:

—Chí táquèe xìtí vehe-a, chí xíchí-a ñá túú ní xihí-xi chí dicó xidí-xi —càchí-gá xáha<sup>n</sup>-gã xií-yu.

Te ní sácú ndeé ñáhã-yu xii-gá sá dúcá<sup>n</sup> ñí cáhá<sup>n</sup>-gá, chí sá cúú-xí mèe-yu te ní xihí ndisa xíchí-á<sup>n</sup>. 25 Te ñáyiú-á<sup>n</sup> ñí queé-yu te cuánguihu Jèsús núú cándòdo xíchí ñí xihí-á<sup>n</sup>, te ní tní-gá ndaha-xi te òré-ni-á<sup>n</sup> ñí ndacóo-xi. 26 Te nchaa ñuú cáá yàtni xiá<sup>n</sup> ñí níhí ñáyiú tnúhu nàcuáa ní quide Jèsús.

*Jèsús quidé tãtna-gá núú ùú tnàhá cue téé cuáá*

27 Te sátá dúcá<sup>n</sup> ñí cuu te ní xica Jèsús cuánuhú-gá, te ichi ñuhu-gá ní chinchícú<sup>n</sup> ñáhá ùú tnàhá cue téé cuáá xii-gá, te níhí càhá<sup>n</sup>-güedé, te xáha<sup>n</sup>-güedé xii-gá:

—Yòhó Jèsús, téé cùu ñaní tnáhá ndí Dàvíí, cundàhú iní ñáhá xii-ndí —càchí-güedé xáha<sup>n</sup>-güedé xii-gá.

<sup>28</sup> Te òré ní nasáá Jèsús núú quidé vèhe-gá, te cue téé cuàá-á<sup>n</sup> ñí quexìo-güedé ndéé núú-gá, te ní xicá<sup>n</sup> tnúhú-gá núú-güedé, te xáha<sup>n</sup>-gá:

—¿Sàndáá iní-ndó sá yùhú ndacu-í cada tátna-í núú-ndó-á<sup>n</sup>? —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Sàndáá iní-ndí sá díú yòhó Jèsús ndacu-n càda tátna-n núú-ndí —càchí-güedé xáha<sup>n</sup>-güedé xii-gá.

<sup>29</sup> Te Jèsús ní dácáa-gá ndaha-gá ní tendaha-gá núú-güedé, te ní xáha<sup>n</sup>-gá xii-güedé:

—Te vitna, ndúha núú-ndó chi ní sàndáá iní-ndó sá díú yùhú ndacu-í cada tátna-í núú-ndó —càchí-gá xáha<sup>n</sup>-gá xii-güedé.

<sup>30</sup> Te òré-ni-á<sup>n</sup> ñí ndúha núú-güedé, te Jèsús ní cáhá<sup>n</sup> víhí-gá dóho-güedé cuendá sá vǎ càhá<sup>n</sup>-güedé nàcuáa ní cuu ní ndúha núú-güedé.

<sup>31</sup> Te cue téé-á<sup>n</sup> òré ní ndee-güedé núú ndécú Jèsús, te ní ngüíta-ni-güedé ní caní-güedé cuendú núú ñáyiú nàcuáa ní quide ñaha-gá xii-güedé. Te nchaa dava-gá ñuú cáá yàtni xíá<sup>n</sup> ñí sáhá<sup>n</sup>-güedé ní caní-güedé cuendú núú ñáyiú nàcuáa ní quide ñaha Jèsús xii-güedé.

*Jèsús quidé tátna-gá ñí téé ñíhí*

<sup>32</sup> Te íchí ñí ndee cue téé ní ndúha núú-xi-á<sup>n</sup> núú ndécú Jèsús, te ní quexìo ñí uú ñáyiú ndécá-yu ñí téé ñíhí yíhí ñaha espíritú cundíhi yucu ñávǎha. <sup>33</sup> Te Jèsús ní queñuhu-gá espíritú cundíhi yucu ñávǎha yíhí ñaha xii téé-á<sup>n</sup>, te òré-ni-á<sup>n</sup> ñí cuu ní nacáhá<sup>n</sup>-dé. Te nchaa ñáyiú xíndecu-á<sup>n</sup> ño ní cuñúhu-yu, te ní xítnáhá-yu:

—Ñá túú tnàhí xíní-ó ñí téé duha cada ñuú nchoo cuè ñáyiú isràél ní cùu —cachí-yu xítnáhá-yu.

<sup>34</sup> Te cue téé cùu fariséú ní ngüíta-güedé xítnàha-güedé:

—Téé-a chi sácúíhná chíndèe ñaha-xi xii-dé queñuhu-dé nchaa espíritú yíhí ñaha xii ñáyiú te ñuú-ni sácúíhná-á<sup>n</sup> táxi

tnúní-xi nchaa espíritú-á<sup>n</sup> —càchí-güedé xítnàha-güedé.

*Jèsús cundàhú iní-gá ñáyiú*

<sup>35</sup> Te Jèsús cuáhá<sup>n</sup>-gá nchaa ñuú náhnú ndíhi nchaa ñuú líhli, te ndí tnahá ñí ñí ñuú sàá-gá te duca<sup>n</sup> cuànguihu-gá ñí ñí veñúhu càa nchaa ñuú-á<sup>n</sup> dánèhé-gá ñáyiú tnúhu váha, tnúhu sá sánú ìchi ñaha xii-yu nàcuáa ndíhu ndaha ñaha Yá Ndióxi xii-yu. Te duca<sup>n</sup>-ni ta quide tátna-gá nchaa ñáyiú cùhú cuáhá<sup>n</sup> cuèi ndí dǐí<sup>n</sup> ndí dǐí<sup>n</sup> núú cuèhé tnàhá-yu ñí ñí-yu. <sup>36</sup> Te sá ñí xíní Jèsús sá ño vǎi ñáyiú nchícú<sup>n</sup> ñáhá xii-gá, te ní cundàhú iní ñáhá-gá xii-yu chi ío ndíhú iní-yu, te vǎ yó nèhe cuendá ñáhá xii-yu, te cùú-yu dàtná cue mbéé cue quiti ñá túú tòli-xi. <sup>37</sup> Te Jèsús ní xáha<sup>n</sup>-gá xii cue téé xica cuu ndíhi-gá:

—Nchòhó xíní-ndó sá òré ná sàá nduu cùu nchaa sá xítú ñáyiú te ío vǎi cuu. Te na càchí tnúhu ndáá-í xii-ndo sá dàtná ío vǎi sá xítú ñáyiú cùu, duca<sup>n</sup> ño vǎi ñáyiú cùmání cundedóho tnúhu-í, te ío sacú ñáyiú dàcuaha ñaha xii-yu. <sup>38</sup> Núú xíá<sup>n</sup> xíní ñúhu-xi cáca<sup>n</sup>-ndó núú Yá Ndióxi Yá cúú Xítohó-ndó ndíhí-yu cuendá sá ná dàcahá<sup>n</sup>-gá iní-yu cáhá<sup>n</sup>-yu tnúhu-gá núú nchàa dava-gá tnàha ñáyiú-yu cùmání cundedóho tnúhu-gá —càchí-gá xáha<sup>n</sup>-gá xii-güedé.

## 10

*Jèsús sǎñaha-gá tnúhu ndee iní xii ndí ùxúú cue téé xica cuu ndíhi-gá*

(Mr. 3:13-19; Lc. 6:12-16)

<sup>1</sup> Te Jèsús ní cana-gá ndí ùxúú cue téé xica cuu ndíhi-gá, te ní sǎñaha-gá xii-güedé tnúhu ndee iní cundecu ndíhi-güedé cuendá queñuhu-güedé nchaa espíritú cundíhi yucu ñávǎha yíhí ñaha xii ñáyiú, ndíhi cuendá sá cáda tátna-güedé nchaa dava-gá ñáyiú cùhú cuèi nándi núú cuèhé tnàhá-yu.

<sup>2</sup> Te duha xínani ndí ùxúú cue téé-á<sup>n</sup>: téé cùnuu-gá nání-dé Xímú, àdi Pelú chi úú ñuú-dé, te ñaní-dé cúú tǎ Ndríxí, te tnàhá téé-á<sup>n</sup> cúú-dé téé xica cuu ndíhi Jesús, ndíhi té Jàcobó ndíhi ñaní té Jàcobó-á<sup>n</sup> téé nàni Juaá, te ndí ndúú cue téé-á<sup>n</sup> cúú-güedé déhe té Zebèdeú. <sup>3</sup> Te tnàhá té Lìpé xicá cùu

ndihi-gá, ndihi té Bartolómé, ndihi té Mǎxí, ndihi té Mǎteú té cùu cobradór impuèstú ní cùu, ndihi té Jàcobó déhe té Àlfeú, ndihi té Lèbeú té dǎnani-güedé Tàdeú, <sup>4</sup> ndihi té Xímú té ní cundihí cue té canànistá, ndihi té Jùdás Iscàrioté té ní sáá nduu nǐ sáha cuèndá ñáhá xii Jesús núú cuè té cùu úhú iní ñáhá xii-gá.

*Jèsús téndàha-gá ndi ùxúú cue té xica cuu ndihi-gá quihín-güedé cáhá<sup>n</sup>-güedé tnúhu-gá núú ñáyiú*

*(Mr. 6:7-13; Lc. 9:1-6)*

<sup>5-6</sup> Te Jèsús ní xáha<sup>n</sup>-gǎ xii ndi ùxúú cue té xica cuu ndihi-gá sá quihín-güedé cáhá<sup>n</sup>-güedé tnúhu-gá núú ñáyiú, te cùmání-gǎ caca-güedé quihín-güedé, te ní xáha<sup>n</sup>-gǎ xii-güedé:

—Na càchí tnúhu-í xii-ndo sǎ méé-ní ñúú núú xíndecu cue ñáyiú isràél quihín-ndó cáhá<sup>n</sup>-ndó tnúhu-í, te vá quihín-ndó nǐ ñúú ñúú yíndèhu distritú Sàmariá, te ni vǎ quihín-ndó dàva-gá ñúú núú xíndecu ñáyiú ñá túú cùu ñáyiú isràél. Te cue ñáyiú isràél-án cúu-yu dàtná cue mbèé cue quiti ní xíta chi ta xíta nihnú-yu cuáhán. <sup>7</sup> Te cúñaha-ndo xii-yu sá sà ní cuyatni nduu ndíhu ndaha ñàha Yá Ndiöxí xii-yu. <sup>8</sup> Te cada tátna-ndo nchàa ñáyiú cùhú cuèi ñáyiú tnàhá cuéhé sǎ dátèhyú nihnu-xi yiqui cùñú-yu, te queñuhu-ndo nchàa espíritú cundihí yucu ñávàha yihí ñaha xii ñáyiú, te dandòto-ndo cue ñáyiú sa ní xihí, te vá càcá<sup>n</sup>-ndó yǎhu-ndo núú ñáyiú òré cada-ndo nchàa chiu<sup>n</sup>-án, chi sa nàha-ndo sá dícó duca<sup>n</sup> nǐ taxi-í tnúhu ndee iní ndécú ndihi-ndo.

<sup>9</sup> Te vá cánèhe-ndo díhú<sup>n</sup> cuu ichi-ndo, <sup>10</sup> te ni vǎ cánèhe-ndo ñunu cuhu<sup>n</sup> ndachiu<sup>n</sup>-ndo, te ni vǎ cánèhe-ndo ingá ichi dóó-ndó nàdáma-ndo, te ni vǎ cánèhe-ndo úú-gá chàú-ndó chi diu-ni chàú yihí-ndó-ǎ<sup>n</sup> xiǎ<sup>n</sup>-ni quihí-ndo, te ni vǎ cánèhe-ndo tatnu, te duca<sup>n</sup> càda-ndo chi nchòhó sa nàha-ndo sá ncháá ñáyiú quide chiu<sup>n</sup> te diu-ni cuèndá chiú<sup>n</sup> quidé-yu nihí-yu sá xéxi-yu.

<sup>11</sup> Te ndi tnahá ñúú ná quèxio-ndo te nducu-ndo ñáyiú cùtnuní iní-ndó sǎ cúu-yu ñáyiú váha, te vehe ñáyiú-án cundecu-ndo

ndèé sáá nduu ndèe-ndo ñúú-án. <sup>12</sup> Te òré quexio-ndo vehé-yu te cúñaha-ndo xii-yu: “Yá Ndiöxí chíndèe chitúu ñaha-gǎ xii-ndo ndècu-ndo”, duha cúñaha-ndo xii-yu. <sup>13</sup> Te núú ní cáhá<sup>n</sup> váha ndihi ñáhá-yu xii-ndo, te cuu-xi sá váha sá cúú-xi-yu cuèndá tnúhu ní xáha<sup>n</sup>-ndo-ǎ<sup>n</sup>, dico núú ñá túú ní càhá<sup>n</sup> váha ndihi ñáhá-yu xii-ndo, te cúñaha-ndo xii-yu sá vǎ cúú-xi sǎ váha xii-yu tnúhu ní xáha<sup>n</sup>-ndo-ǎ<sup>n</sup>. <sup>14</sup> Te núú ní sáá-ndó ñúú ñúú àdi ñúú vehe, te núú ñá túú ní càhá<sup>n</sup> ndihi ñaha váha-yu xii-ndo te ni ñà túú ní cuini-yu cundedóho-yu tnúhu càhá<sup>n</sup>-ndó te ndee-ndo ñúú-án àdi vehe-án, te naquidi-ndo tǐcá chúhmá nǐ tníi sáhá-ndó cuèndá ná cùtnuní iní-yu sá ñà túú quide váha-yu. <sup>15</sup> Te na càchí tnúhu ndáá-í xii-ndo sǎ sáá nduu te ío-gá dandòho ñaha Yá Ndiöxí xii ñáyiú duca<sup>n</sup> na càda ñaha xii-ndo-án dàcúxí ñáyiú ní xíndecu ñúú Sòdomá ndihi ñúú Gòmorra.

*Ndoho tnahá-ó cùndecu-o ichi Xítóhó Jesu-  
crístú*

<sup>16</sup> Te cada iní-ndó sǎ cúú-ndó dàtná cue mbèé cue quiti cuáhán núú ío yihí. Te duca<sup>n</sup> sǎtnahá-xi cùu-ndo chi yúhú tendaha ñaha-í xii-ndo quihín-ndó núú xíndecu cue ñáyiú cuihna iní-xi, te ío váha cuáha-ndo cuèndá nàcuáa cada-ndo dàtná quidé cóó, dico cunduu váha iní-ndó ñà túú nǎ cada-ndo dàtná quidé lómá. <sup>17</sup> Te quihí iní-ndó chi cue ñáyiú na cùu úhú iní ñáhá xii-ndo, te cuáha cuèndá ñáhǎ-yu xii-ndo núú cuè té cùchiu<sup>n</sup>, te caniha-güedé xii-ndo xití veñúhu-güedé. <sup>18</sup> Te dava tucu ñáyiú cuu úhú iní ñáhá xii-ndo candeca ñahá-yu xii-ndo quihín núú cuè té cùnuu yíndaha nació<sup>n</sup>, àdi núú dàva-gá cue té cùnuu sá cuèndá-í. Te nchòhó nihí-ndó nàcuáa cada-ndo cáhá<sup>n</sup> váha-ndo cuèndá-í núú-güedé ndihi núú cuè ñáyiú ñá túú cùu ñáyiú isràél. <sup>19-20</sup> Dico òré cuáha cuèndá ñáhǎ-yu xii-ndo núú nchàa cue té-án, te vá cání iní-ndó núú nása cunduu tnúhu cáhá<sup>n</sup>-ndó núú-güedé, chi òré-nǎ te nihí-ndó tnúhu cáhá<sup>n</sup>-ndó. Te ñá díú mèe-ndo cahu iní-ndó tnúhu cáhá<sup>n</sup>-ndó, chi mee Espíritú Yá Ndiöxí Yá cúú Tátá-ndó dàcáhu iní ñáhá-xi xii-ndo nàcuáa cunduu tnúhu cáhá<sup>n</sup>-ndó.



21 'Te dava cue tée cuáha cuendá-güedé ñaní-güedé núú cuè tée cùchiu<sup>n</sup> cuendá cahni ñaha-güedé, te dava cue tée cùu tátá ñu-ni duca<sup>n</sup> càda-güedé déhe-güedé, te ñu-ni duca<sup>n</sup> càda ñaha dava cue ñáyiú cùu déhe xii tátá-yu ndihi nãã-yu, chi cuáha cuendá ñáhã-yu núú cuè tée cùchiu<sup>n</sup> cuendá cahni ñaha-güedé xii-yu. 22 Te nchòhó chi nchaa ñáyiú ngüíta-yu cuu úhú iní ñáhã-yu xii-ndo sã cuendá-í. Te núu na càda ndee-ni iní-ndó càncicú<sup>n</sup> nihnu-ni-ndo ìchi-í cuèi nãndi sã ná càda ñahá-yu xii-ndo ndéé ná sãá nduu vã cùndècu-gá-ndó ñùyú-a ña, te nduu táhú-ndó cùndecu-ndo ni caa ni quíhí<sup>n</sup> ndihi Yá Ndiöxí. 23 Te núu ñuú ñuú cuiní-güedé tñi ñaha-güedé xii-ndo càda úhú ñáhã-güedé sã cuendá-í, te cunu-ndo núú-güedé quíhí<sup>n</sup>-ndó ìngá ñuú. Te na càchí tñuhu ndáá-í xii-ndo sã cùmání-gã quíhí<sup>n</sup>-ndó nchaa dava-gã ñuú núú xíndecu ñáyiú israhél cáhã<sup>n</sup>-ndó tñuhu-í, te sa quixi tucu yúhú, Tée cùu ñaní tñahá-ndó nchaa-ndo ñuyú-a.

24-25 'Te nchòhó xini-ndó sã ni ñuú tée dàcuaha ñá túú cùnuu-dé dàcúúxí mèstrú-dé, te núu mèstrú tée-á<sup>n</sup> nãndi yãha-dé ndécú-dé te tàú-dé nduu vétú iní-dé te núu tñahá-dé yãha-dé dàtná yãha mèstrú-dé-á<sup>n</sup>. Te ñu-ni duca<sup>n</sup> sãtnahá tucu-xi cùu ñuú tée xínu cuechi, chi ñá túú cùnuu-dé dàcúúxí pãtróó<sup>n</sup>-dé, te nchaa sã yãha pãtróó<sup>n</sup>-dè-á<sup>n</sup> te tàú-dé nduu vétú iní-dé te núu tñahá-dé yãha-dé dàtná yãha pãtróó<sup>n</sup>-dè-á<sup>n</sup>. Te núu yúhú Yaa táxí tñuní ñáhã xii-ndo cachí-yu sã cùu-í sãcuíhã, te uu<sup>n</sup>-gã duca<sup>n</sup> cùñahá-yu xii nchòhó cue tée cùndihi-í.

*Vá yùhú-ó cuendá nchaa sã cáda ñaha ñáyiú xii-o*

*(Lc. 12:2-7)*

26 'Te nchòhó vá yùhú-ndó núú ñáyiú. Chi nchaa tñuhu sã cúu yùhu ni cuu vá cúu yùhu-gã, chi nchaa dacuití sã queé tñu-xi núú ñáyiú. 27 Te nchaa tñuhu sã càchí tñuhu-í xii-ndo núú méé núú ñuú-ó, cùu-xi tñuhu sã ndúú yùhu ni cuu datúu-ndo núú cuè ñáyiú cuèi núú chítú núú tàcá. 28 Te xini ñuhu-xi sã vã yùhú-ndó cuè ñáyiú cuèi na càhni ñahá-yu xii-ndo, chi ñu-ni yiqui cùñú-ndó ndácú-yu cahni-yu, dico ñá

túú nãgã ndacú-yu cada ñahá-yu xii-ndo. Te tàú-ndó sã Yã Ndiöxí yùhú-ndó chi Yaa-á<sup>n</sup> ndacu-gã danãa-gã yiqui cùñú-ndó, te ndacu-gã daquihí<sup>n</sup> ñáhã-gã xii-ndo núú úhú núú ndàhú.

29 'Te nchòhó xini-ndó sã ndéé úu tñahá tñahá cùyãhu-di núú ñuú-í dñhú<sup>n</sup>, te ni ñuú-di ñá túú xihí cùtexínu-di chi ndéé núu mee Yã Ndiöxí Yaa cúu Tátá-ndó ná càchí-gã te xihí-di. 30 Dico nchòhó chi ío-gã néhe cuendá ñahá Yã Ndiöxí xii-ndo chi ndéé idi dñu-ndó yíndehu. 31 Núu xia<sup>n</sup> càchí-í sã vã yùhú-ndó chi cùnuu-gã-ndó dàcúúxí tñahá cuèi vai vihi-güedi.

*Nchaa ñáyiú datúu núu tñaha ñáyiú-xi sã ndécú ndihi-yu Xitohó Jesucristú*

*(Lc. 12:8-9)*

32 'Te na càchí tñuhu-í xii-ndo sã nchaa ñáyiú na datúu núu tñaha ñáyiú-xi sã ndécú ndihi ñahá-yu xii-í, te duca<sup>n</sup> te tñahá yúhú datúu-í núu Tátá-í Dútú Ndiöxí Yaa ndécú àndiu sã ndécú ndihi-í-yu. 33 Dico nchaa ñáyiú na cùñaha xii tñaha ñáyiú-xi sã ñã túú ndècu ndihi ñahá-yu xii-í, te ñu-ni duca<sup>n</sup> càda yúhú tucu chi cùñaha-í xii Tátá-í Dútú Ndiöxí Yaa ndécú àndiu sã ñã túú ndècu ndihi-í-yu.

*Ñá túu cùu ñuú ñáyiú*

*(Lc. 12:51-53; 14:26-27)*

34 'Te na càchí tñuhu-í xii-ndo sã vã caní iní-ndó sã yúhú véxi-í ñuyú-a te cuu ñuú-gã ñáyiú cundecú-yu, chi da ngüíta-yu vá cúu ñuú-gã-yu cundecú-yu, te duca<sup>n</sup> chi nchaa ñáyiú vá quíndáá iní ñáhã xii-í ñáyiú-á<sup>n</sup> ngõo-yu cuu úhú iní-yu nchaa ñáyiú quíndáá iní ñáhã xii-í. 35 Te dava cue tée xíndecu tátá-xi te ngóo-güedé cuu úhú iní-güedé tátá-güedé, te ñu-ni duca<sup>n</sup> càda cue ñáyiú dñi xíndecu nãã-xi, chi ngóo-yu cuu úhú iní-yu nãã-yu, te ñu-ni duca<sup>n</sup> càda tucu cue ñáyiú cùu sãnu, chi ngóo-yu cuu úhú iní-yu nãã yí-yu. 36 Te ndi mèé-yu vehé-yu ngóo-yu vá cúu ñuú-gã-yu cundecú-yu.

37 'Te na càchí tñuhu tucu-í xii-ndo sã nchaa ñáyiú ío-gã ná cùu iní tátá-xi àdi nãã-xi dàcúúxí yùhú, te ñáyiú-á<sup>n</sup> ñã túú tàú-yu cundecu ndihi ñahá-yu xii-í, te nchaa ñáyiú ío-gã ná cùu iní déhe ducu<sup>n</sup>-xi,



àdi déhe yoco-xi dàcúxí yǔhú, te ñi-ndi duca<sup>n</sup> ñà túú tàú-yu cundecu ndihi ñàhá-yu xii-í. <sup>38</sup> Te nchaa ñáiyu vá cáncǎcú<sup>n</sup> ni-hnu ñaha xii-í cuendá sá yùhú-yu ndohó-yu dàtná ndoho-í ñáiyu-á<sup>n</sup> ñà túú tàú-yu cundecu ndihi ñàhá-yu xii-í. <sup>39</sup> Te cue ñáiyu na yùhú cuú sá cuendá-í te ñáiyu-á<sup>n</sup> cuíta nihnú-yu, dico nchaa ñáiyu vá yùhú cuú sá cuendá-í, te ñáiyu-á<sup>n</sup> nduu táhú-yu cundecú-yu ni caa ni quíhí<sup>n</sup> ndihi Yá Ndióxi.

*Cuendá sá ndúú tǎhú-ó*  
(Mr: 9:41)

<sup>40</sup> Te nchaa ñáiyu na quèhe<sup>n</sup> cuendá ñàhá xii-ndo te cada iní-yu sá tñàhá yùhú ní quehe<sup>n</sup> cuendá-yu. Te nchaa ñáiyu na quèhe<sup>n</sup> cuendá ñàhá xii-í, te cada iní-yu sá tñàhá Tǎtǎ-í Dútú Ndióxi Yá ní tendaha ñàhá xii-í véxi-í ñuyú-a ní quehe<sup>n</sup> cuendá-yu. <sup>41</sup> Te nchaa ñáiyu na quèhe<sup>n</sup> cuendá ñà tée cáhá<sup>n</sup> tñúhu Yá Ndióxi cuendá sá quidé-dě chù<sup>n</sup>-gá, te dàtná-ni càa táhú cuǎñaha-gǎ nduu táhú tée duca<sup>n</sup> cáhá<sup>n</sup> tñúhu-gá-á<sup>n</sup>, ñi-ndi duca<sup>n</sup> cùnduu táhú cuǎñaha-gǎ nduu táhú ñáiyu duca<sup>n</sup> na quèhe<sup>n</sup> cuendá ñàhá xii-dé. Te nchaa ñáiyu na quèhe<sup>n</sup> cuendá ñà tée quide váha cuendá sá dúcá<sup>n</sup> quide váha-dé, te dàtná-ni càa táhú nduu táhú tée-á<sup>n</sup> ñi-ndi duca<sup>n</sup> cùnduu táhú nduu táhú ñáiyu na quèhe<sup>n</sup> cuendá ñàhá xii-dé. <sup>42</sup> Te nchaa ñáiyu na cuǎñaha ñà yaxi<sup>n</sup> ndute coho ñà ñáiyu cùu cuendá-í cuendá sá ní tuha ñàhá-yu xii-í cuéi ñà túú cùnuu vihi-yu, te ñáiyu duca<sup>n</sup> na cuǎñaha ndùte-á<sup>n</sup> ñi-ndi-yu sá ndúú tǎhú-yu núú Yá Ndióxi — càchí Jèsús xǎha<sup>n</sup>-gǎ xii-güedé.

## 11

*Jèsús cáhá<sup>n</sup> ndihi-gá cue tée xica cuu ndihi té Juàá*

(Lc. 7:18-35)

<sup>1</sup> Te sátá ní yáha duca<sup>n</sup> ní xǎha<sup>n</sup> Jèsús xii ndi ùxúú cue tée xica cuu ndihi-gá, te ní xica-gá cuáhá<sup>n</sup>-gá nchaa ñuú cáa yàtni xíá<sup>n</sup> dánèhé-gá ñáiyu tñúhu-gá.

<sup>2</sup> Te té Juàá yìhi-dé vecaá te ní níhí-dě tñúhu nchaa nàcuáa quide Xítóhó Jesu-crístú. Te sátá dúcá<sup>n</sup> te ní tendaha-dě ñà úú cue tée xica cuu ndihi-dé cuáhá<sup>n</sup>-güedé núú ndécú Jèsús. <sup>3</sup> Te òré ní quexìo-güedé núú ndécú-gǎ, te xicá<sup>n</sup> tñúhú-güedé núú-gǎ

nàcuáa ní xǎha<sup>n</sup> tǎ Juàá xii-güedé, te xǎha<sup>n</sup>-güedé xii-gá:

—Véxi-ndí xicá<sup>n</sup> tñúhú-ndí núú-n núu sá díú-n cùu-n Cristú Yá ní tendaha Yá Ndióxi véxi ñuyú-a, àdi sá cùndetu nahi-ni-ndí mei Yá-á<sup>n</sup> —càchí-güedé xǎha<sup>n</sup>-güedé xii-gá.

<sup>4</sup> Te Jèsús ní xǎha<sup>n</sup>-gǎ xii-güedé:

—Chí cuánùhú te cani-ndo cuendú núú tǎ Juàá nchaa sá ní xiní-ndó quide-í, ndihi nchaa nàcuáa ndùu tñúhu ní cáhá<sup>n</sup>-í ní xindedóho-ndo. <sup>5</sup> Te cùñaha-ndo xii-dé sá quidé tǎtna-í núú cué ñáiyu cuáa, te quide tǎtna-í cue ñáiyu yacua, ndihi cue ñáiyu tñàhá cuéhé sá dátèhyú nihnú-xi yiqui cùñú-yu, ndihi cue ñáiyu doho, nchaa ñáiyu-á<sup>n</sup> quidé tǎtna-í, te ndùha-yu, te ndéé tñàhá cue ñáiyu sa ní xíhí dándòto-í cùñaha-ndo. Te cùñaha tucu-ndo xii-dé sá ndècuu-í dánèhé-í nchaa ñáiyu ndàhú, tñúhu sá sánú ìchi ñaha xii-yu nàcuáa naníhí tǎhú-yu. <sup>6</sup> Te cùñaha tucu-ndo xii-dé sá ìo váha táhú nchaa ñáiyu ñà túú quide sáa iní-xi nchaa tñúhu cáhá<sup>n</sup>-í, duha cùñaha-ndo xii-dé —càchí-gá xǎha<sup>n</sup>-gǎ xii-güedé.

<sup>7</sup> Te sátá ní yáha-güedé cuánuhú-güedé te ní ngúita Jèsús ní cáhá<sup>n</sup>-gá núú ñáiyu cuendá té Juàá, te xǎha<sup>n</sup>-gǎ xii-yu:

—Nchòhó ní sǎhá<sup>n</sup> ndéhé-ndó ñà tée ndècu xití yucu, te tée-á<sup>n</sup> ñà túú sàni ñà sàni úú iní-dé, chi ñà túú quide-dé dàtná quidé nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tǎchí. <sup>8</sup> Te ní ñà túú ní sǎhá<sup>n</sup> ndéhé-ndó ñà tée nihnú dóo váha dóo vii càa. Te nchòhó xiní-ndó sǎ ncháá ñáiyu nihnú dóo váha dóo vii càa xindecú-yu vehe cue tée cùnuu yindaha ñáiyu. <sup>9</sup> Dico nchòhó chí ní sándéhé-ndó ñà tée cáhá<sup>n</sup> tñúhu Yá Ndióxi, te ndáá sá díú ñà tée cáhá<sup>n</sup> tñúhu-gá cùú-dě, te cùnuu-gá-dé dàcúxí dàva-gá cue tée cáhá<sup>n</sup> tñúhu-gá. <sup>10</sup> Te ñi-ndi cuendá té Juàá-á<sup>n</sup> cáhá<sup>n</sup>-xi núú tütú Yá Ndióxi nàcuáa ní xǎha<sup>n</sup>-gǎ xii Crístú, te duha ní xǎha<sup>n</sup>-gǎ: Tendaha-í ñà tée cáhá<sup>n</sup>-dé tñúhu-í codonùu-dé núú-n,

cuendá dàtúha-dé ñáiyu cuendá quíndáa iní-yu tñúhu-n.

Duha ní xǎha<sup>n</sup>-gǎ, te duca<sup>n</sup> ní ngódó tñúni núú tütú-gá. <sup>11</sup> Te na càchí tñúhu ndáá-í xii-ndo sǎ ní ñà tée ñuyú-a ñà túú cùnuu-güedé dàtná cùnùu té Juàá tée

dàcuandute ñaha xii ñáiyu. Te nchaa ñáiyu sa ta ndíhu ndaha ñaha Yá Ndiõxí vitna cuáhá<sup>n</sup> cúnúu-gá-ni tucú-yu dácúúxí tē Juàá cuéi cùu-yu ñáiyu ñá túú cúnúu dácúúxí dāva-gá ñáiyu yìndaha-gá.

12 Te ndéé cùtnàhá ní ngüíta té Juàá tée dàcuandute ñaha xii ñáiyu càhá<sup>n</sup>-dé tnúhu Yá Ndiõxí ñuyíú-a, ndéé dāvá-á<sup>n</sup> nǐ ngüíta ñáiyu cuíní-yu sá ndíhu ndaha ñaha Yá Ndiõxí xií-yu te ndùcu ndéé-yu quidé-yu nàcuáa ndíhu ndaha ñaha-gá xií-yu. 13 Te nchaa cue tée ní xóo cáhá<sup>n</sup> tnúhu Yá Ndiõxí ndéé sanaha nǐ cáhá<sup>n</sup>-güedé sá díú-gá ndíhu ndaha-gá cue ñáiyu, te ñu-ni duca<sup>n</sup> nǐ cáhá<sup>n</sup> tucu ndíi Moisés ní ngódó tnùní núú tütú ndíi. Te ñu-ni duca<sup>n</sup> cúnúu nchaa tnúhu-á<sup>n</sup> càhá<sup>n</sup>-xi nàcuáa ndíhu ndaha Yá Ndiõxí ñáiyu ndéé ní sáá nduu nǐ ngüíta té Juàá càhá<sup>n</sup>-dé tnúhu-gá ñuyíú-a. 14 Te na càchí tnúhu-í xii-ndo sá cádá cuendá-ndó, chí núú tütú Yá Ndiõxí càchí-xi sá ndíxí tē Èliás, te ñu núú tē Èliás-á<sup>n</sup> nǐ quide té Juàá. 15 Te nchaa nchòhó ñáiyu ndèdóho nchaa tnúhu càhá<sup>n</sup>-í-a te ío váha chí cuáha cuendá.

16 Te na càchí tnúhu tucu-í xii-ndo nàcuáa sãtnahá-xi cùu ñáiyu ndècu vitna. Chí ñáiyu-á<sup>n</sup> cùú-yu dàtná cue landú sácõo núú yáhu dàdiqui-güexi te níhi càhá<sup>n</sup>-güexi, te xĩtnàha-güexi ndi mee landú-güexi: 17 “Ní tiú-ndí yaá ndíhi vilu te ñá túú ní cuíní-ndó càta-ndo. Te ío yica ìní ní xita yuhu-ndí te ñá túú ní ndáhyú-ndó”, càchí-güexi xĩtnàha-güexi. Te duca<sup>n</sup> sãtnahá-xi cùu ñáiyu ndècu vitna, 18 chí té Juàá ío ndàhú ní xóo caxi-dé, te nǐ ñà túú ní xõo coho-dé ndudí ndéhé yoho yàha stilé sá sà ní nduu-xi ndidí, te sá dúcá<sup>n</sup> nǐ xóo cada-dé te ní cachí-yu sá nǐ xíndecu ndíhi-dé espíritú cùndíhi yucu ñávàha. 19 Te sáta nǐ quexìo yúhú Tée cùu ñaní tnáhá-ndó nchaa-ndo, te xèxi-í xìhi-í quidè-í, te càchí-yu sá yúhú cùu-í ñ<sup>n</sup> tée xèxi vihi te xìhi vihi, te càchí tucú-yu sá cùu-í tée xìca cuu ndíhi cue tée cuìhna ìní-xi quide cobrá ñahá xii-yu cuendá impuèstú ndíhi nchaa dāva-gá cue tée ndècu ichi cuehé ichi duha, duha càchí-yu. Te ñáiyu ní tnahá tnúhu ndíhi Yá Ndiõxí, ñáiyu-á<sup>n</sup> quidè-yu sá váha nàcuáa cutnùní sá méé-gá ío ndècu ndíhi-gá sá xìní tnùní-gá —càchí-gá xàha<sup>n</sup>-gá xií-yu.

*Cuendá ñáiyu dāva ñuú ñá túú sàndáá iní tnúhu Xitohó Jesucristú*

*(Lc. 10:13-15)*

20 Te Jèsús ní ngüíta-gá càhá<sup>n</sup>-gá dóho nchaa ñáiyu ñuú núú ío-gá vǎi núú sǎ vǎ yõo tnàhí ndàcu cada ní quide-gá, chí nchaa ñáiyu ñuú-á<sup>n</sup> ñà túú cuíní-yu ndixi túu iní-yu sá ñà túú quide váha-yu ndècú-yu, te xàha<sup>n</sup>-gá xií-yu:

21 —¡Ndàhú nchòhó cue ñáiyu ñuú Coràzín! ¡Te ndàhú nchòhó cue ñáiyu ñuú Bètsaidá! Chí núu dícó ñuú Tírú ndíhi ñuú Sidón ní quide-í nchaa sá vǎ yõo tnàhí ndàcu cada datná ní quide-í ñuú-ndó-á nǐ xìní-ndó ñá, te sá ndéé ama-gá cuihnú-yu dóo ndàhú te cunu cóo-yu núú yàá cuendá sá ndíxí cuèchi iní-yu sá ñà túú quide váha-yu ni cùu. 22 Dico sáá nduu te ío-gá dandóho ñaha Yá Ndiõxí xii-ndo dácúúxí ñáiyu ñuú Tírú ndíhi ñáiyu ñuú Sidón.

23 Te nchòhó cue ñáiyu ñuú Capèrnaúm ío quide cahnu-ndo mee-ndo, te quide iní-ndó sá sá cuánda-ná-ndó àndíu, dico ñahá chí núú ùhú núú ndàhú nduu táhú-ndó cùndecu-ndo. Te núu dícó ñuú Sòdomá ní quide-í nchaa sá vǎ yõo tnàhí ndàcu cada datná ní quide-í ñuú-ndó nǐ xìní-ndó ñá, te ñáiyu-á<sup>n</sup> vǎ náá-yu chí cundecu-ní-yu ndéé vitna ni cùu. 24 Te na càchí tnúhu-í xii-ndo sá sáá nduu te ío-gá dandóho ñaha Yá Ndiõxí xii-ndo dácúúxí ñáiyu ñuú Sòdomá —càchí-gá xàha<sup>n</sup>-gá xii nchaa ñáiyu ñuú-á<sup>n</sup>.

*Jèsús cuíní-gá sá túhá ñaha ñáiyu xii-gá*

*(Lc. 10:21-22)*

25 Te sáta xǎ<sup>n</sup> te Jèsús ní ngüíta-gá càhá<sup>n</sup> ndíhi-gá Tǎtá-gá Dútú Ndiõxí, te xàha<sup>n</sup>-gá:

—Yòhó Tǎtá-í Dútú Ndiõxí, ío chíñuhu ñaha-í xii-n chí ñu-n tǎxi tnùní-n àndíu ndíhi ñuyíú-a, te dànehé-n cuè ñáiyu nchaa tnúhu váha, te ñu-ni ñáiyu-á<sup>n</sup> cùú-yu ñáiyu ñá túú cùtnùní iní-xi nchaa tnúhu càhá<sup>n</sup> cue tée càchí sá ío túha, te nchaa tnúhu váha-á<sup>n</sup> ñà túú dàtúu-n núú ñáiyu càchí sá ío túha te ío váha sáá díquí-xi. 26 Chí duca<sup>n</sup> cuíní-n cùnduu —cachí-gá xàha<sup>n</sup>-gá xii Tǎtá-gá.

27 Te xàha<sup>n</sup>-gá xii nchaa ñáiyu xĩndecu-á<sup>n</sup>:

—Mee Tǎtá-í Dútú Ndiõxí ní cachí-gá sá cúnúu-í núú nchàandi túhú sá ío. Te vá yõo ñ<sup>n</sup>-gá xìní nàcuáa sàni iní yúhú Déhe Dútú Ndiõxí, chí ñ<sup>n</sup>díi díí-ni mee-gá xìní-gá nàcuáa sàni iní-í, te mee-í xìní-í nàcuáa

sàni iní mée-gă. Te nchaa ñáyiú càchí iní-í sá quíní-yu nàcuáa sàni iní Tătà-í Dútú Ndiòxí te xĩtnũhu-í-yu, te vá yõo ñá-gá xìní chi ñiú-ni ñáyiú duca<sup>n</sup> xĩtnũhu-í-á<sup>n</sup> xìní-yu. <sup>28</sup> Te nchaa nchòhó ñáyiú ñá túú ndècu váha, ñáyiú ñá túú ñihí nàcuáa cada cundecu váha iní-xi quixi-ndo tũha ñaha-ndo xii-í nàcuáa duca<sup>n</sup> cundecu váha iní-ndó. <sup>29</sup> Te cuu vii cuu váha iní-ndó tñi-ndo nchaa tnũhu càhá<sup>n</sup>-í, te ío dacuàha-ndo, te duca<sup>n</sup> càda-ndo chi yúhú ío càhnu iní-í, te ío ndàhú iní-í. Te núu duca<sup>n</sup> na càda-ndo te ío váha cuu iní-ndó cundecu-ndo. <sup>30</sup> Te tñi-ndo nchaa tnũhu càhá<sup>n</sup>-í chi ñá túú cùu-xi ñá sá vèe, chi cada iní-ndó sá cùu-xi dàtná ñá chiu<sup>n</sup> ñamá —càchí-gá xãha<sup>n</sup>-gã xii-yu.

## 12

*Cue tée xica cuu ndihí Jesús sàhnú-güedé yoco triú nduu ndetátú ñáyiú*

*(Mr. 2:23-28; Lc. 6:1-5)*

<sup>1</sup> Te ñá nduu cùu-xi nduu ndetátú ñáyiú ñũhu Jesús ichi ndihí cue tée xica cuu ndihí-gá, te ta yãha-gá ndihí-güedé ñá xichi núu cáá triú te xixíhí-güedé docó nõu xĩa<sup>n</sup> ní ngũita-güedé sàhnú-güedé yoco triú-á<sup>n</sup>, te ndihí ndaha-güedé quí<sup>n</sup>-güedé queé triú-á<sup>n</sup> tá xèxi-güedé cuáhá<sup>n</sup>. <sup>2</sup> Te cue tée cùu fariséu ní xini-güedé nàcuáa quide cue tée xica cuu ndihí Jesús, núu ní xãha<sup>n</sup>-güedé xii-gá:

—¿Ná cuendá duca<sup>n</sup> quide cue tée xica cuu ndihí-n sàhnú-güedé yoco triú, te vitna cùu-xi nduu ndetátú-í? Te ñá túú tàú-güedé duca<sup>n</sup> càda-güedé —càchí-güedé xãha<sup>n</sup>-güedé xii-gá.

<sup>3</sup> Te Jèsús ní xãha<sup>n</sup>-gã xii-güedé:

—¿Náa ñá túú dàcuaha-ndo núu tùtú Yá Ndiòxí núu càhá<sup>n</sup>-xi nàcuáa ní quide ndí Dávíí cùnàhá ní xihí ndí docó ndihí cue tée ní xica cuu ndihí ndí-á<sup>n</sup>? <sup>4</sup> Chi ndí-á<sup>n</sup> ñá quihu ndí vehe Yá Ndiòxí ní quehe<sup>n</sup> ndí pãá ní cuu í ndécú-á<sup>n</sup> ñá xèxi ndí ndihí cue tée ní xica cuu ndihí ndí, te ñá túú tàú ndí sá dúcá<sup>n</sup> càda ndí ndihí cue tée-á<sup>n</sup> ní cùu, chi mee-ni cuè dútú tàú-güedé caxi-güedé pãá-á<sup>n</sup> ní cùu. <sup>5</sup> ¿Te náa ñá túú xini-ndó nàcuáa càhá<sup>n</sup>-xi núu tùtú ndí Moisés sá ncháá cuè dútú vã ndetátú-güedé nduu cùu-xi nduu ndetátú-á<sup>n</sup>? Te ñá díú ñá cuèchi cùu-xi sá dúcá<sup>n</sup> ñá túú ndetátú-güedé nduu

cùu-xi nduu ndetátú. <sup>6</sup> Te na cãchí tnũhu-í xii-ndo sã yũhú cùu-í tée ío-gá cùnũu ndecu ndihí-ndo dacúxí veñũhu sã ío cùnũu. <sup>7</sup> Dico nchòhó chi ñá təcú tnũni-ndó nàcuáa càhá<sup>n</sup> Yá Ndiòxí núu tùtú-gá núu cãchí-xi: “Yúhú cuñí-í sá cùndàhú iní-ndó cuè tñaha ñáyiú-ndo te ñá díú mèe-ni sá cãhni-ndó quiti nduu táhú-í”, duha cãchí-gá núu tùtú-gá. Te núu dícó nchòhó təcú tnũni-ndó ñá, te vá càhá<sup>n</sup> cuèhé-ndó cuendá nchaa ñáyiú ñá túú ndècu cuèchi-xi. <sup>8</sup> Te yúhú Tée cùu ñani tnãhá-ndó nchaa-ndo, tnãhá-í ndécú ndihí-í tnũhu ndee iní sá cùu-í nchaa ñáyiú nàcuáa cadá-yu nduu ndetátú-ó-á —cãchí-gá xãha<sup>n</sup>-gã xii-güedé.

*Ñá tée ní yichí ñá xio ndaha-xi*

*(Mr. 3:1-6; Lc. 6:6-11)*

<sup>9</sup> Te Jèsús ní xica-gá cuáhá<sup>n</sup>-gá, te cuanguihu-gá xiti ñá veñũhu. <sup>10</sup> Te xĩa<sup>n</sup> ndécú ñá tée ní yichí ñá xio ndaha-dé. Te dava cue tée xĩndecu-á<sup>n</sup> ndúcú-güedé nàcuáa cada-güedé cacá<sup>n</sup> cuèchi-güedé cuendá-gá núu cuè tée cùnũu, te ní xicá<sup>n</sup> tnũhú-güedé núu-gã, te xãha<sup>n</sup>-güedé:

—Cachí tnũhu xii-ndí nõu cuu cada tátna-o ñá tée cùhú nduu cùu-xi nduu ndetátú-ó ñá ñãhá —cãchí-güedé xãha<sup>n</sup>-güedé xii-gá.

<sup>11</sup> Te Jèsús ní xãha<sup>n</sup>-gã xii-güedé:

—Te nchòhó òré ná ngãunihnu ñá mbéé-ndó ñá déhvã cùnú te nãtava-ndo-di cuèi cùu-xi nduu ndetátú-ó. <sup>12</sup> Te ñá ñáyiú ío-gá cùnũu-yu dàcúxí ñá mbéé, núu xĩa<sup>n</sup> tàú-ó sã cadá-ó sã váha sá cùu-xi-yu cuèi cùu-xi nduu ndetátú-ó —cãchí-gá xãha<sup>n</sup>-gã xii-güedé.

<sup>13</sup> Te dàtnũni ní xãha<sup>n</sup>-gã xii tée cùhú ndaha-xi-á<sup>n</sup>:

—Ndacani ndaha-n —cãchí-gá xãha<sup>n</sup>-gã xii-dé.

Te tée-á<sup>n</sup> ñá ndacani-dé ndaha-dé, te òré-ni ní ndúha ní nduu-xi dàtná cáá ñngá xio ndaha-dé. <sup>14</sup> Te cue tée cùu fariséu ní ndee-güedé xiti veñũhu, te ní ngũita-güedé ndãtnũhu-güedé nõu nása cada-güedé cahni-güedé Jèsús.

*Nàcuáa sa ndéé tnũni cuendá Jèsús*

<sup>15</sup> Te sãtã ñá cutnũni iní Jèsús nàcuáa cuñí-güedé cada ñaha-güedé xii-gá te ní xica-gá cuáhá<sup>n</sup>-gá, te ío vai ñáyiú nchícú<sup>n</sup>

ñáhá xii-gá cuáhá<sup>n</sup>, te tnáhá cue ñáyiú cùhú nchicú<sup>n</sup> ñáhá xii-gá cuáhá<sup>n</sup>, te ní quide tátna-gá cue ñáyiú-á<sup>n</sup>. <sup>16</sup> Te ní xáha<sup>n</sup>-gá xii-yu sá vǎ cǎhá<sup>n</sup>-yu yoo cùu-gá. <sup>17</sup> Te duca<sup>n</sup> nǐ cuu chi ní quee ndáá-xi nǎcuáa ní xáha<sup>n</sup> Yǎ Ndiǒxí xii ndíi Chàíá téé ní xóo cáhá<sup>n</sup> tnúhu-gá ndéé sanaha nǐ chídó tnùní ndíi núú tütú-gá, te duha ndùu tnúhu ní xáha<sup>n</sup>-gǎ:

<sup>18</sup> Téé-a cùu-dé téé ní sani iní-í sá cúnú cuèchi-dé núu-í,

te ío cùu iní-í-dé, te cùdǐ iní-í-dé.

Te yúhú cuǎñaha-í Espíritú-í cundecu ndíhi-dé,

te diu-dé cùñaha-dě xii nchaa ñáyiú ñuyíú sǎ yúhú ío ndáá quídè-í.

<sup>19</sup> Te vǎ dǎcǎá-dé tnúhu cáhá<sup>n</sup>-dé ndíhi ñáyiú, te ní vǎ cáná sǎa-dé òré cáhá<sup>n</sup>-dé,

te ní vǎ yǒo níhí tnúhu nása cáhá<sup>n</sup>-dé cuhu<sup>n</sup>-dé ichi.

<sup>20</sup> Te ní ñà túú nǎ cada-dé cue ñáyiú cùu datná ì<sup>n</sup> tnu ndǒó sá cuìní-xi tnáhnú, te diu-ni ñáyiú-á<sup>n</sup> cúú tucú-yu datná ì<sup>n</sup> mèchá cǎndíl sǎ ío quène ñúhmá te cuìní-xi ndahvá.

Te duca<sup>n</sup> sǎtnahá-xi cùu ñáyiú-á<sup>n</sup> chi ñá túú níhí ndéè-yu cundecú-yu sá cúú-xi-í, te mee-ni sǎ vǎha cada ñaha-dě xii-yu,

te diu-ni duca<sup>n</sup> cǎda-dé ndéé sǎá nduu cùtnuní iní nchaa ñáyiú sǎ ío ndáá quídè-dě.

<sup>21</sup> Te nchaa ñáyiú níhí ñuyíú ío cundee cùu cahnu iní ñáhǎ-yu xii-dé.

Duha ní xáha<sup>n</sup>-gǎ xii ndíi Chàíá ní chídó tnùní ndíi núú tütú-gá.

*Càchí-güedé sá ndécú ndíhi Jesús espíritú cùndíhi yucu ñávǎha*

*(Mr. 3:20-30; Lc. 11:14-23; 12:10)*

<sup>22</sup> Te ní quexìo ì<sup>n</sup> úú cue téé núú ndécú Jèsús, te ndèca-güedé ì<sup>n</sup> téé ñíhí te cuàá-dé, te yíhi ñaha espíritú cùndíhi yucu ñávǎha xii-dé, te Jèsús ní queñuhu-gá espíritú cùndíhi yucu ñávǎha yíhi ñaha xii-dé, te òré-ni-á<sup>n</sup> nǐ cuu ní nacáhá<sup>n</sup>-dé te ní ndúha núú-dé. <sup>23</sup> Te nchaa ñáyiú xǐndecu-á<sup>n</sup> ío ní cuñúhu-yu sá dúcá<sup>n</sup> nǐ quide-gá, te ní xǐtnáhá-yu:

—Váa téé-a cùu-dé ñaní tnáhá ndíi Dávíí téé tendaha Yǎ Ndiǒxí quixi ñuyíú-a — cǎchí-yu xǐtnáhá-yu.

<sup>24</sup> Te cue téé cùu fariséú ní tecú dóho-güedé nǎcuáa ndùu tnúhu xǐtnáhá-yu, núu xǐá<sup>n</sup> ní xǐtnàha-güedé:

—Téé-a ndèñuhu-dé nchaa espíritú cùndíhi sácuíhná yíhi ñàha xii ñáyiú, chi diu-ni sácuíhná-ǎ<sup>n</sup> chǐndèe ñaha-xi xii-dé te diu-ni-xi tàxi tnuní-xi nchaa espíritú-á<sup>n</sup> — duha ní xǐtnàha-güedé.

<sup>25</sup> Te Jèsús ní cutnùní iní-gá nǎcuáa ndùu tnúhu ní xǐtnàha-güedé, núu ní xáha<sup>n</sup>-gǎ xii-güedé:

—Te nchòhó xìní-ndó sǎ núu ì<sup>n</sup> téé yǐndaha ì<sup>n</sup> nació<sup>n</sup> vǎ cúú ì<sup>n</sup>nuu-dé ndíhi cue téé cùndíhi-dé, te vǎ cùdǐ-dé cunuu-dé. Te diu-ni duca<sup>n</sup> sǎtnahá tucu-xi cùu tucu cue téé cùchiu<sup>n</sup> ì<sup>n</sup> ñuú, chi núu vǎ cúú ì<sup>n</sup>nuu-güedé cundecu-güedé, te vǎ cùdǐ-güedé cundecu-güedé taxi tnùní-güedé. Te diu-ni duca<sup>n</sup> sǎtnahá tucu-xi cùu cue ñáyiú xǐndecu ì<sup>n</sup>-ni vèhe, chi núu vǎ cúú ì<sup>n</sup>nuu-yu cundecú-yu te vǎ cùdǐ-yu cundecu cǎhnú-yu. <sup>26</sup> Te núu sácuíhná duca<sup>n</sup> quide-xi queñuhu-xi cue espíritú cùndíhi-xi yíhi ñaha xii ñáyiú ña, te ñá túú cùu ì<sup>n</sup>nuu-xi ndecu-xi te núu duca<sup>n</sup>, te vǎ cùdǐ sácuíhná-ǎ<sup>n</sup> cundecu-xi taxi tnùní-xi te núu duca<sup>n</sup> quide-xi. <sup>27</sup> Te duha cǎhá<sup>n</sup>-í chi nchòhó cǎchí-ndó sǎ chǐndèe ñaha sácuíhná xii-í queñúhu-í nchaa espíritú cùndíhi-xi yíhi ñaha xii ñáyiú. Te núu yúhú quídè cuèndá-ndó sǎ sácuíhná chǐndèe ñaha-xi xii-í, te xini ñuhu-xi cada cuèndá-ndó yòo chindee ñaha xii cue téé xǐca cuu ndíhi-ndo queñuhu-güedé nchaa espíritú cùndíhi yucu ñávǎha yíhi ñaha xii ñáyiú. Te mee-güedé cǎchí-güedé sá nchòhó ñá túú cǎhá<sup>n</sup> ndáá-ndó sǎ dúcá<sup>n</sup> cǎhá<sup>n</sup>-ndó. <sup>28</sup> Dico yúhú chi Espíritú Yǎ Ndiǒxí chǐndèe ñaha-xi xii-í queñúhu-í nchaa espíritú cùndíhi sácuíhná yíhi ñàha xii ñáyiú, te sá dúcá<sup>n</sup> chǐndee ñaha Espíritú-gá xii-í, xǐá<sup>n</sup> cùtnùní sǎ sǎ ní sǎá nduu cuìní-gá ndíhu ndaha ñàha-gá xii-ndo.

<sup>29</sup> Te nchòhó xìní-ndó sǎ cuè ñadúhú chi vǎ ndácú-güedé cuèndá-ni quíhu-güedé duhu-güedé vehe ì<sup>n</sup> téé ío ndee, chi díhna-gá xìní ñúhu-xi tni-güedé téé-á<sup>n</sup>



dacùtu ñaha-güedé xii-dé dătnùní duca<sup>n</sup> te ndacu-güedé duhu-güedé nchaa sá ndécú ndìhi-dé.

<sup>30</sup> Te nchaa ñáyiú ñá túú cùndìhi ñaha xii-í, te cùu úhú iní ñáhă-yu. Te nchaa ñáyiú ñá túú chindee ñaha xii-í, te dàquee tíhŭ-yu chiu<sup>n</sup> quide-í.

<sup>31</sup> Te na cächí tnúhu-í xii-ndo să ncháá ñáyiú quide nchaa sá cuèhé sá dúhá cuu cada cahnú iní ñáhá Yă Ndiöxí xii-yu, te ñu-ni duca<sup>n</sup> cùu cada cahnú iní-gá nchaa tnúhu cuèhé tnúhu duha cահá<sup>n</sup>-yu. Dico cue ñáyiú na cահá<sup>n</sup> úhú cuendá Espiritú-gá, te ñáyiú-án vă cádá cahnú iní ñáhá tnáhí-gá xii-yu. <sup>32</sup> Te nchaa ñáyiú na cահá<sup>n</sup> úhú cuendá yúhú Tée cùu ñaní tnáhă-yu ncháá-yu, te cuu cada cahnú iní ñáhá Yă Ndiöxí xii-yu. Dico cue ñáyiú na cահá<sup>n</sup> úhú cuendá Espiritú-gá te vă cádá cahnú iní ñáhá tnáhí-gá xii-yu cuèi vitna ndècu vívŭ-yu, te cuèi na cùú-yu.

*Ndi dŭ<sup>n</sup> núú yutnu xini-ó nă yutnu cùu-xi cuendá sá săvidí-xi (Lc. 6:43-45)*

<sup>33</sup> Te nchòhó xini-ndó să ndi dŭ<sup>n</sup> núú yutnu xini-ó nă yutnu cùu-xi cuendá sá săvidí-xi, te xini-ó să ncháá yutnu váha cùu<sup>n</sup> mee-ni sávidí váha, dico nchaa yutnu sá ñà túú váha te cùu<sup>n</sup> mee-ni sávidí sá ñà túú váha. Te duha cահá<sup>n</sup>-í cuendá cada cuendá váha-ndo năcuáa ndùu chiu<sup>n</sup> quide-ndo ì<sup>n</sup> ì<sup>n</sup>-ndo cuendá duca<sup>n</sup> cùtnuní ná ñáyiú cùu-ndo. <sup>34</sup> Dico nchòhó cúú-ndó dătná ì<sup>n</sup> cóo dĕé<sup>n</sup> chi ío cuihna iní-ndó, te vă cání iní-ndó să ndácú-ndó cահá<sup>n</sup>-ndó ì<sup>n</sup> tnúhu váha, chi ío cuihna iní-ndó. Te nchòhó xini-ndó să ncháá ñáyiú cահá<sup>n</sup>-yu nání véxi iní-yu. <sup>35</sup> Te nchaa ñáyiú váha iní-xi cահá<sup>n</sup>-yu tnúhu váha, chi ñu-ni tnúhu váha-án ñúhú iní-yu. Te nchaa ñáyiú cuihna iní-xi cահá<sup>n</sup>-yu tnúhu cuèhé tnúhu duha, chi ñu-ni tnúhu cuèhé tnúhu duha-án ñúhú iní-yu. <sup>36</sup> Te na cächí tnúhu-í xii-ndo să ná sàá nduu càda ndáá Yă Ndiöxí cuéchi nchaa nchòhó ñáyiú ndècu ñuyú-a, te nchaa tnúhu cuèhé tnúhu duha cահá<sup>n</sup>-ndó cահá<sup>n</sup>-gá sá ñà túú ní quide váha-ndo să dúcá<sup>n</sup> ñí cահá<sup>n</sup>-ndó tnúhu-án. <sup>37</sup> Te năcuáa ndùu tnúhu ní cահá<sup>n</sup>-ndó ì<sup>n</sup> ì<sup>n</sup>-ndo, te duca<sup>n</sup> cահá<sup>n</sup> Yă Ndiöxí te núu ndècu cuéchi-ndo àdi ñá túú ndècu cuéchi-ndo. Te núu ñá túú cuéchi-ndo te cácu-ndo, dico núu

ndècu cuéchi-ndo te vă cácu-ndo —cächí-gá xăha<sup>n</sup>-gă xii cue tée cùu fariséú-án.

*Cue tée cuini sá cádá Jèsús ì<sup>n</sup> sá vă yŏo tnáhí ndacu cada*

*(Mr. 8:12; Lc. 11:29-32)*

<sup>38</sup> Te cue tée cùu fariséú, ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés xăha<sup>n</sup>-güedé xii Jèsús:

—Mèstrú, cuini-ndí cada-n ì<sup>n</sup> sá vă yŏo tnáhí ndacu cada cuendá duca<sup>n</sup> cùtnuní iní-ndí sá Yă Ndiöxí chindèe ñaha-gá xii-n —cächí-güedé xăha<sup>n</sup>-güedé xii-gá.

<sup>39</sup> Te Jèsús ní xăha<sup>n</sup>-gă xii-güedé:

—Ñáyiú ndècu ichi cuehé ichi duha ñá túú cuini-yu tní-yu tnúhu cահá<sup>n</sup> Yă Ndiöxí, te ñáyiú-án cuini-yu cada-í ì<sup>n</sup> sá vă yŏo tnáhí ndacu cada năcuáa cùtnuní iní-yu núu ndáá sá Yă Ndiöxí chindèe ñaha-gá xii-í. Dico yúhú chi ñá túú năgá cada-í quini-yu, chi sa ñihí-yu tnúhu năcuáa ní yáha ndíi Jónás tée ní xóo cահá<sup>n</sup> tnúhu Yă Ndiöxí ndéé sanaha, te ñu-ni duca<sup>n</sup> yăha yúhú tucu. <sup>40</sup> Chi ndíi Jónás-án ñí xúhu<sup>n</sup> ndíi úní nduu úní niú xití ì<sup>n</sup> chácá cahnú vîhi nani ballená. Te ñu-ni duca<sup>n</sup> yăha yúhú Tée cùu ñaní tnáhá-ndó nchàa-ndo, chi úní nduu úní niú cuhu<sup>n</sup>-í xití ñuhu. <sup>41</sup> Te na sàá nduu càda ndáá Yă Ndiöxí cuéchi nchaa ñáyiú ndècu ñuyú-a, te dàvá-án cachí nchaa ñáyiú ñuú Nínivé sá ñà túú ní quide ndáá nchaa ñáyiú ndècu vitna, te duca<sup>n</sup> cահá<sup>n</sup>-yu chi mèe-yu ní dáñă-yu ichi cuèhé ichi duha cùtnáhá ní sáhá<sup>n</sup> ndíi Jónás ñuú-yu ní cահá<sup>n</sup> ndíi tnúhu Yă Ndiöxí núú-yu. Dico vitna iha ndècu ndìhi ñaha-ndo xii yúhú, te ñu-í ío-gá cùnùu-í dăcúxí ndíi Jónás. <sup>42</sup> Te nduu càda ndáá Yă Ndiöxí cuéchi nchaa ñáyiú, te dàvá-án quini-ndó ì<sup>n</sup> ñadìhí ñaha ní xindaha ì<sup>n</sup> nació<sup>n</sup> cáá ndàa xio datni núú quéné nchĭcanchii, te ñaha-án ño xica ñí xindecu-a<sup>n</sup> te ní sáhá<sup>n</sup>-a<sup>n</sup> ní xindedóho-a<sup>n</sup> nchaa tnúhu ní cահá<sup>n</sup> ndíi Salómón, chi ndíi-án ño ní sáá sá xini tnùní ndíi. Te tnáhá ñaha-án cահá<sup>n</sup>-a<sup>n</sup> sá ñà túú ní quide ndáá nchaa ñáyiú ndècu vitna. Dico vitna iha ndècu ndìhi ñaha-ndo xii yúhú, te ñu-í ío-gá cùnùu-í dăcúxí ndíi Salómón.

*Espiritú cùndìhi yucu ñávăha sá nănchòcáva xito cùu uú (Lc. 11:24-26)*



<sup>43</sup> Te òré ná quée ñàha ì<sup>n</sup> espíritú cùndìhi yucu ñávàha xii ì<sup>n</sup> ñáyíu, te cuáhá<sup>n</sup>-xi ndùcu-xi ì<sup>n</sup> xichi núú cùndècu-xi te ñá ñihí-xi te ní sani iní-xi: <sup>44</sup> “Váha-gá núhú tucu-í núú ñí xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáyíu-á<sup>n</sup> dàtná cáá-ná ì<sup>n</sup> vehe ní natíhú ní nduu vii-ná te vá yòo-gá ndécú. <sup>45</sup> Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xi ùsá tnhá espíritú cùndìhi-xi sá nèhé víhí-gã xíquide. Te òré ní ñihí-xi cue espíritú-á<sup>n</sup> te ndèca ñaha-xi cuáhá<sup>n</sup> cuendá ngúndecu ndìhi-xi ñáyíu-á<sup>n</sup>. Te ñáyíu-á<sup>n</sup> uu<sup>n</sup>-gá nándi yáha-yu dàcúxí ndèè díhna. Te ñíu-ni duca<sup>n</sup> sãtnahá-xi yáha nchaa ñáyíu cuihna iní-xi ndècu ñuyíú-a vitna –càchí-gá xãha<sup>n</sup>-gã xii-güedé.

*Cue ñaní Jèsús ndìhi nãná-gã*  
(Mr. 3:31-35; Lc. 8:19-21)

<sup>46</sup> Te càhá<sup>n</sup> dúcá<sup>n</sup>-ní Jèsús ní quexìo náná-gã ndìhi cue ñaní-gã cuìní-yu càhá<sup>n</sup> ndìhi ñàhá-yu xii-gá, te ní ngúnu tñí-yu ndàa quehé vehe núú ndécú-gã. <sup>47</sup> Te ì<sup>n</sup> cue ñáyíu xíndecu-á<sup>n</sup> ñí xáhã<sup>n</sup>-yu xii-gá:

–Ní quexìo náná-n ndìhi cue ñaní-n xínutñí-yu quehé, te cuìní-yu càhá<sup>n</sup> ndìhi ñàhá-yu xii-n –càchí ñáyíu-á<sup>n</sup> xáhã<sup>n</sup>-yu xii-gá.

<sup>48</sup> Te ní xáha<sup>n</sup>-gã xii ñáyíu duca<sup>n</sup> xãha<sup>n</sup> xì-gá-á<sup>n</sup>:

–Te cachí tñúhu yóndi-gá ñáyíu cùu datná nãná-í ndìhi dàtná cue ñaní-í –càchí-gá xãha<sup>n</sup>-gã xii ñáyíu-á<sup>n</sup>.

<sup>49</sup> Te ní dánèhé ñàhá-gã nchaa cue téé xica cuu ndìhi-gá, te ní xáha<sup>n</sup>-gã xii ñáyíu-á<sup>n</sup>:

–Cue téé-a cùu-güedé dàtná nãná-í, ndìhi dàtná cue ñaní-í. <sup>50</sup> Te nchaa ñáyíu na càda nchaa nacuaá càhá<sup>n</sup> Tãtà-í Dútú Ndiõxí Yaá ndécú àndiu, te ñáyíu-á<sup>n</sup> cùú-yu dàtná nãná-í, ndìhi dàtná cue ñaní-í, ndìhi dàtná cue cúha-í –càchí-gá xãha<sup>n</sup>-gã xii ñáyíu duca<sup>n</sup> ñí dáyãha tñúhu núú-gã-á<sup>n</sup>.

## 13

*Nàcuáa quide téé cuángacá<sup>n</sup> triú*  
(Mr. 4:1-9; Lc. 8:4-8)

<sup>1</sup> Te ñíu-ni nduu-ã<sup>n</sup> ní quee Jèsús vehe núú ndécú-gã, te ní xica-gá cuáhá<sup>n</sup>-gá ní ngóo-gá yuhu làgúná. <sup>2</sup> Te ío cuéhé ñáyíu ní tacá núú ndécú-gã. Te sá dúcá<sup>n</sup> ïo

cuéhé ñáyíu núu ní quée-gá xití ì<sup>n</sup> bàrcú nùtní xití ndute làgúná-á<sup>n</sup>, te núú xíã<sup>n</sup> ní ngóo-gá, te nchaa ñáyíu-á<sup>n</sup> xíxúcu-yu yuhu làgúná-á<sup>n</sup>. <sup>3</sup> Te Jèsús ní ngúita-gá ní caní-gá tñí cuendú núú-yu nàcuáa tecú tñúni-yu nchaa nàcuáa ndùu tñúhu-gá, te xãha<sup>n</sup>-gã xii-yu:

–Ì<sup>n</sup> téé cuángacá<sup>n</sup>-dé triú, <sup>4</sup> te òré ní ngúita-dé dǎngoyo-dé triú-á<sup>n</sup>, te dava ní quene ndava ní ngava ndéé ichi, te ní xiní cue tíaá te ní nadatàcá-güedi. <sup>5</sup> Te dava ní ngava ñuhu yadi núú yíhí vñi yúú, te ndìhi-ni ní xínu-xi chi ñá túú cavihi ñuhu. <sup>6</sup> Dico òré ní nayehé te ñá túú ní cùndee iní-xi chi ní yíhí-xi, chi ñá túú ní ñíhí quíhí<sup>n</sup> cùnú yóho-xi. <sup>7</sup> Te dava ní ngava núú yúcu ndíquí<sup>n</sup> tnu ñíu, te ì<sup>n</sup>nuu-ni ñí xínu-xi ndìhi tnu ñíu. Te tnu ñíu-á<sup>n</sup> ñí sahnú-xi te ní dánáá-xí nchaa triú sá ñí xínu-á<sup>n</sup>. <sup>8</sup> Dico dava-gá triú ní ngava núú ndécú ñíu coco<sup>n</sup> te xíã<sup>n</sup> ío váha ní cuu, chi núú ì<sup>n</sup>-ní triú-á<sup>n</sup> te dava yoco-xi ní nguíhí ócò úxí triú-xi, te dava yoco-xi ní nguíhí únídico triú-xi, te dava yoco-xi ní nguíhí ì<sup>n</sup> ciendú triú-xi. <sup>9</sup> Te vitna nchaa nchòhó ñáyíu ní xíndedóho tñúhu ní càhá<sup>n</sup>-í-a, te ío váha chí cuáha cuendá –càchí-gá xãha<sup>n</sup>-gã xii-yu.

*Cue téé xica cuu ndìhi Jèsús ndícú tñúhu-güedé núú-gã ná cuendá caní-gã cuendú núú ñáyíu*

(Mr. 4:10-12; Lc. 8:9-10)

<sup>10</sup> Te cue téé xica cuu ndìhi Jèsús ní sáhã<sup>n</sup>-güedé ndéé núú-gã, te xãha<sup>n</sup>-güedé xii-gá:

–Ndùcu tñúhu-ndí núú-n nùu ná cuendá duca<sup>n</sup> mée-ni cuendú caní-n núú ñáyíu –càchí-güedé xãha<sup>n</sup>-güedé xii-gá.

<sup>11</sup> Te ní xáha<sup>n</sup>-gã xii-güedé:

–Nchòhó chi sa càchí tñúhu Yá Ndiõxí xii-ndo ì<sup>n</sup> sá vátá quíni-gá-ndó, chi càchí tñúhu-gá nàcuáa quide-gá ndíhu ndaha-gã ñáyíu, dico dava-gá ñáyíu chi ñá túú nã xãha<sup>n</sup>-gã xii-yu. <sup>12</sup> Te nchaa ñáyíu sa tècú tñúni te uu<sup>n</sup>-gá cuita tecú tñúni-yu quíhí<sup>n</sup>, te nchaa ñáyíu ñá túú tècú tñúni te uu<sup>n</sup>-gá vá tècú tñúni-yu. <sup>13</sup> Te xíã<sup>n</sup> nùu duha càni-í mee-ni cuendú núú-yu, chí cuèi na quíni-yu nchaa nàcuáa cuu dico

ni vǎ cútnùní iní-yu ná cuendá duca<sup>n</sup> cùu, te cuèi na cùndedóho-yu dico ni vǎ tècú tnùnì-yu. <sup>14</sup> Te ñu cuendá ñáyiu-á<sup>n</sup> nǐ xáha<sup>n</sup> Yá Ndiöxí xii ndíi Chàíá téé ní xóo cáhá<sup>n</sup> tnúhu-gá ndéé sanaha nǐ chídó tnùnì ndíi núú tütú-gá núú càchí-xi:

Nchaa nchòhó cùndedóho-ndo tnúhu càhá<sup>n</sup>-í, dico ni vǎ tècú tnùnì-ndó, te cuèi na quìnì-ndó nchàa nacuaá cada-xi, dico ni vǎ cútnùní iní-ndó nǎ cuendá duca<sup>n</sup> quide-xi.

<sup>15</sup> Te duca<sup>n</sup> chi cùu-ndo ñáyiu ío sàà iní-xi, te cùu-ndo ñáyiu ñá túú tècú tnùnì tnúhu càhá<sup>n</sup>-í,

te cùu tucu-ndo datná cue ñáyiu cuàá chi ñá túú cuìnì-ndó càda cuendá-ndó tnúhu-í,

te ni ñà túú cuìnì-ndó cùndedóho-ndo,

te ni ñà túú cuìnì-ndó tècú tnùnì-ndó,

te ni ñà túú cuìnì-ndó nàtuha ñaha-ndo xii-í cuendá cada càhnu iní-í nchaa yíca cuèchi-ndo nàcuáa ío váha cuu iní-ndó cùndecu-ndo.

Duha ní xáha<sup>n</sup> Yá Ndiöxí xii ndíi Chàíá ní chídó tnùnì ndíi núú tütú-gá.

<sup>16</sup> 'Dico nchòhó chi ío váha táhú-ndó chi cùtnunì iní-ndó nchàa nacuaá quide-í, te cùtnunì tucu iní-ndó nchàa nacuaá ndùu tnúhu càhá<sup>n</sup>-í. <sup>17</sup> Te na càchí tnúhu ndáá-í xii-ndo sǎ ío vǎi cue téé ní xóo cáhá<sup>n</sup> tnúhu Yá Ndiöxí ndéé sanaha ndíi nchaa ñava-gá ñáyiu váha iní-xi ní cuìnì-yu cundehé-yu nchaa sá ndéhé-ndó vitna quide-í dico ñá túú ní xìnì-yu, te ní cuìnì tucú-yu cùndedóho-yu nchaa tnúhu ndèdóho-ndo vitna cáhá<sup>n</sup>-í te ñá túú ní xíndedóho-yu.

*Jèsús càhá<sup>n</sup>-gá nàcuáa quèe-xi cuendá téé cuángacá<sup>n</sup> triú*

*(Mr. 4:13-20; Lc. 8:11-15)*

<sup>18</sup> Te vitna cùndedóho váha-ndo na càchí tnúhu-í xii-ndo nàcuáa quèe-xi cuendú téé cuángacá<sup>n</sup> triú ní caní-í núú-ndó. <sup>19</sup> Te triú sá nǐ quene ndava ní ngava ndéé ichi, xiǎ<sup>n</sup> cúú-xí dàtná ñáyiu ní xíndedóho tnúhu sá càhá<sup>n</sup> nàcuáa ndíhu ndaha ñaha Yá Ndiöxí xii-yu, dico ñá túú ní cuìnì-yu tñí-yu, chi sácúíhná cuǎhá<sup>n</sup>-xi nàdatuhú-xi iní-yu cuendá sá vǎ cǎnchìcú<sup>n</sup> nihnú-yu nàcuáa càhá<sup>n</sup> tnúhu-á<sup>n</sup>. <sup>20</sup> Te triú sá nǐ ngava ñuhu yadi núú yíhí vǐhi yúú-ǎ<sup>n</sup>, xiǎ<sup>n</sup> cúú-xí dàtná ñáyiu ní xíndedóho tnúhu Yá

Ndiöxí te dǐí iní ní tñí-yu tnúhu-gá, <sup>21</sup> dico òré ná ngúíta ñáyiu cúcuèhé ñáhǎ-yu xií-yu àdi nándi-gá sá yáha-yu sá cuendá tnúhu-gá, te ñá cùndéé iní-yu chi dàñá-yu tnúhu-gá cuendá sá ñà túú nihí ndéè-yu. <sup>22</sup> Te triú sá nǐ ngava núú yúcu ndíquí<sup>n</sup> tnu ñnu-á<sup>n</sup>, xiǎ<sup>n</sup> cúú-xí dàtná ñáyiu ní tecú dóho-xi tnúhu Yá Ndiöxí dico cuèé cuèé ní nacua-naá-yu tnúhu-gá, chi cuendá mee-ni sǎ ío ñuyú-a ñuhu iní-yu, ndíhi cuendá sá ío sàni iní-yu cuu cuicá-yu, te mee-ni nchàa xiǎ<sup>n</sup> ñuhú iní-yu te ñá túú ñuhu iní-yu tnúhu sá nǐ xíndedóho-yu-á<sup>n</sup> nàcuáa cada váha-yu cundecú-yu. <sup>23</sup> Dico triú sá nǐ ngava núú ndécú ñuhu coco<sup>n</sup>-á<sup>n</sup>, xiǎ<sup>n</sup> cúú-xí dàtná ñáyiu ní xíndedóho tnúhu Yá Ndiöxí te quide-yu nàcuáa càhá<sup>n</sup> tnúhu-gá. Te cada iní-ndó sǎ ñáyiu-á<sup>n</sup> cúú-yu dàtná triú sá nǐ nguíhi yoco-xi ócú úxí triú-xi, ndíhi triú sá nǐ nguíhi yoco-xi únídico triú-xi, ndíhi triú sá nǐ nguíhi yoco-xi ñ<sup>n</sup> cièndú triú-xi. Duca<sup>n</sup> sǎtnahá-xi cùu-yu chi ío váha quide-yu — càchí-gá xǎha<sup>n</sup>-gǎ xii-güedé.

*Cuendá nchaa cúhú sǎ ñà túú vǎha xǎnu xití triú*

<sup>24</sup> Te Jèsús ní caní-gá ñ<sup>n</sup> cuèndú núú ñáyiu nàcuáa tecú tnùnì-yu tnúhu-gá, te xǎha<sup>n</sup>-gǎ xií-yu:

—Te vitna na càni-í ñ<sup>n</sup> cuèndú núú-ndó nàcuáa tecú tnùnì-ndó nàcuáa cada-xi òré ndíhu ndaha ñaha Yá Ndiöxí xii ñáyiu. ñ<sup>n</sup> téé ío váha triú ní sacá<sup>n</sup>-dé núú ñuhú-dé. <sup>25</sup> Dico xití niú ní sáhá<sup>n</sup> ñ<sup>n</sup> téé cùu úhú iní ñáhá xii-dé, te ní dǎngoyo-dé ndíquí<sup>n</sup> yúcu sǎ ñà túú vǎha núú nǐ sacá<sup>n</sup>-dé triú-á<sup>n</sup>. <sup>26</sup> Te òré vitna váha váha ní ngúíta-xi quèene yoco nchaa triú-á<sup>n</sup>, te ní xínu coyo nchaa yúcu sǎ ñà túú vǎha-á<sup>n</sup>. <sup>27</sup> Te cue téé xínu cuechi núú tǎe ní sacá<sup>n</sup> triú-á<sup>n</sup> nǐ xitñúhu ñaha-güedé xii-dé sá dúcá<sup>n</sup> nǐ xínu cúhú sǎ ñà túú vǎha-á<sup>n</sup> núú triú-dé, te xǎha<sup>n</sup>-güedé: “Pátróó<sup>n</sup>, ¿nása ní cuu núú ní xínu cúhú sǎ ñà túú vǎha núú triú-n, te ío váha càa triú ní sacá<sup>n</sup>-n ní cùu?”, cachí-güedé xǎha<sup>n</sup>-güedé. <sup>28</sup> Te téé cùu patróó<sup>n</sup>-güedé-á<sup>n</sup> nǐ xáha<sup>n</sup>-dǎ xii-güedé: “Í<sup>n</sup> téé cùu úhú iní ñáhá nǎhi xii-í duca<sup>n</sup> nǐ quide-dé ní sáhá<sup>n</sup>-dé ní dǎngoyo-dé ndíquí<sup>n</sup> cǎhú sǎ ñà túú vǎha-á<sup>n</sup> núú triú-í núu duca<sup>n</sup> nǐ xínu coyo-xi”, càchí-dé xǎha<sup>n</sup>-dǎ xii-güedé. Te cue téé

xìnu cuechi núú-dě ní xáha<sup>n</sup>-güedě xii-dé: “Te núu cuíní-n te quíhí<sup>n</sup>-ndí tnuhu-ndí nchaa cùhú sǎ ñà túú vǎha ní xínu núú triú-n”, cǎchí-güedé xáha<sup>n</sup>-güedé xii-dé. <sup>29</sup> Te tée cùu xítóhó triú-á<sup>n</sup> ñí xáha<sup>n</sup>-dě xii cue tée xínu cuechi núú-dě-á<sup>n</sup>: “Ñáhá, vá quíhí<sup>n</sup>-ndó tñuhu-ndo, chi òré tnuhu-ndo te tñahá-ni triú quene chi càa vihi cùhú-ǎ<sup>n</sup>. <sup>30</sup> Váha-gá chí dáñá ná cuíhnu nahi ndéé ná cùu triú, te dàtnùní nducu-í cue tée quíhí<sup>n</sup>-güedé tnuhu-güedé nchaa cùhú sǎ ñà túú vǎha-á<sup>n</sup>, te dacùtu nuhní-güedé te cahmi-güedé, te dàtnùní nàquehdé-güedé triú nacani-güedé te nataxúha-güedé xití yacá-í”, cǎchí-dé xáha<sup>n</sup>-dě xii-güedé —duha ní cani Jèsús cuèndú núú-yu.

*Cuèndá ndíquí<sup>n</sup> yutnu nàni mostázá*  
(Mr. 4:30-32; Lc. 13:18-19)

<sup>31</sup> Te Jèsús ní cani tucu-gá ingá cuèndú núú ñáiyu nàcuáa tecú tñùní-yu tñuhu-gá, te xáha<sup>n</sup>-gǎ xií-yu:

—Na càni-í ñ<sup>n</sup> cuèndú núú-ndó nàcuáa tecú tñùní-ndó nàcuáa cada-xi òré ndíhu ndaha ñaha Yá Ndiöxí xii ñáiyu. ñ<sup>n</sup> tée ní quehe<sup>n</sup>-dé ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dě. <sup>32</sup> Te ndíquí<sup>n</sup> yutnu-á<sup>n</sup> ño chàhu, dico òré ná xínu-xi te sàhnu-gá-xi dàcúxí nchàa cùhú, te cue quítí ndàva núú tàchí cádùha-güedi tacá-güedi núú dìté-xi —cǎchí-gá xáha<sup>n</sup>-gǎ xií-yu.

*Nàcuáa quide levadurá*  
(Lc. 13:20-21)

<sup>33</sup> Te Jèsús ní xáha<sup>n</sup> tucu-gá xii ñáiyu:

—Te na cǎchí tñuhu tucu-í xii-ndo nàcuáa cada-xi òré ndíhu ndaha ñaha Yá Ndiöxí xii ñáiyu. ñ<sup>n</sup> ñadíhí ní chihi-a<sup>n</sup> levadurá úní arròbá yuchi triú, te levadurá-á<sup>n</sup> ñí quide-xi ní ndaa ñihí yusa<sup>n</sup>-á<sup>n</sup> —cǎchí-gá xáha<sup>n</sup>-gǎ xií-yu.

*Mee-ni cuèndú ní cani Jèsús núú ñáiyu*  
(Mr. 4:33-34)

<sup>34</sup> Te mee-ni cuèndú ní cani Jèsús núú ñáiyu ndí tnahá òré ní dánèhé ñáhá-gǎ xií-yu tñuhu-gá. <sup>35</sup> Te duca<sup>n</sup> ñí quide-gá chí ní quee ndáá-xi nàcuáa ní chídó tñùní ñ<sup>n</sup> tée ní xóo cǎhá<sup>n</sup> tñuhu Yá Ndiöxí ndéé sanaha núú tütú-gá núú cǎchí-xi:

Mee-ni cuèndú cani-í núú ñáiyu òré danèhé-í-yu tñuhu-í cuèndá tecú tñùní-yu,

te nchaa tñuhu sá vǎtá yõo-gá cundedóho danèhé-í-yu, te nchaa tñuhu-á<sup>n</sup> ndúú yùhu-xi ndéé cútñahá ní ngáva ñuyíú. Duha ní chídó tñùní téé-á<sup>n</sup> núú tütú-gá.

*Jèsús cǎhá<sup>n</sup>-gá nàcuáa quèe-xi cuèndá cùhú sǎ ñà túú vǎha càa xití triú*

<sup>36</sup> Te Jèsús ní dándácá-gǎ ñáiyu te cuánuhú-gá vehe, te cue tée xica cuu ndíhí-gá ní xáha<sup>n</sup>-güedé xii-gá:

—Cachí tñuhu xii-ndí nása quèe-xi cuèndá cùhú sǎ ñà túú vǎha càa xití triú —cǎchí-güedé xáha<sup>n</sup>-güedé xii-gá.

<sup>37</sup> Te Jèsús ní xáha<sup>n</sup>-gǎ xii-güedé:

—Tée cǎchí-í ní sacá<sup>n</sup> triú cǎvǎha-á<sup>n</sup> cúu yùhú Téé cùu ñaní tñahá-ndó nchàa-ndo.

<sup>38</sup> Te nchaa núú ñí sacá<sup>n</sup> téé-á<sup>n</sup> triú cúú-xí ñuyíú. Te tatá váha-á<sup>n</sup> cúú-xí cuè ñáiyu yìndaha ñaha Yá Ndiöxí. Te nchaa cùhú sǎ ñà túú vǎha-á<sup>n</sup> cúú-xí ñáiyu yìndaha ñaha sácúhna. <sup>39</sup> Te tée ní dǎngoyo ndíquí<sup>n</sup> cùhú sǎ ñà túú vǎha núú triú-á<sup>n</sup> cúú-dě mee sácúhna. Te nduu nàtehndé-nǎ triú-á<sup>n</sup> cúú-xí nduu ndíhí ñihnu-ná nchaa sá ño ñuyíú-a. Te nchaa ñáiyu nàquehdé triú-á<sup>n</sup> cúú-yu mee-ni cuè espíritú xínú cuèchi núú Yá Ndiöxí. <sup>40</sup> Te dàtná cada cue téé quíhí<sup>n</sup> tnuhu nchaa cùhú sǎ ñà túú vǎha-á<sup>n</sup> dacùtu nuhní-güedé te cahmi-güedé, duca<sup>n</sup> sǎtnahá-xi yáha nchaa ñáiyu cùndíhí yucu ñávǎha na sàá nduu. <sup>41</sup> Te yúhú Téé cùu ñaní tñahá-ndó nchàa-ndo tendaha-í nchaa espíritú xínú cuèchi núú-í quíhí<sup>n</sup>-xi nadatácá-xi nchaa ñáiyu sànu ichi cue tñaha ñáiyu-xi ichi cuèhé ichi duha, ndíhí nchaa dava-gá ñáiyu ñá túú quide váha, te nchaa ñáiyu-á<sup>n</sup> xíndecú-yu nchaa núú ndécú cuè ñáiyu yìndaha-í. <sup>42</sup> Te cue espíritú-á<sup>n</sup> daquíhí<sup>n</sup>-xi cue ñáiyu-á<sup>n</sup> núú ñúhú núú càyú, te yàcá<sup>n</sup> ño ndáhyú-yu te dicó rúhñú-nǎ cuu núhu-yu sá sàtú iní-yu sá ndóhõ-yu. <sup>43</sup> Te nchaa ñáiyu quide nchaa nacuáa cuíní Tǎtǎ-yu Dútú Ndiöxí, ñáiyu-á<sup>n</sup> ño cunúú-yu cundecú-yu núú ndécú-gǎ táxí tñùní-gá, chí cuú-yu dàtná nchícanhii dayèhé-yu cundecú-yu núú ndécú-gǎ. Te nchaa nchòhó ñáiyu ndédóho nchaa tñuhu



cáhá<sup>n</sup>-í-a, te ío váha chí cuäha cuëndá — cächí-gá xäha<sup>n</sup>-gä xii-güedé.

*Cuëndá ñ<sup>n</sup> sá ïo ndèyáhu*

<sup>44</sup> Te Jèsús xäha<sup>n</sup> tucu-gá xii-güedé:

—Na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiu. ñ<sup>n</sup> téé ní naníhí-dě ñ<sup>n</sup> sá ïo ndèyáhu yìndúxi ñ<sup>n</sup> xichi, te ní nachindúxi tucu-dé ðu-ni núú nñ naníhí-dě-á<sup>n</sup>, te ío ní cudíí ìní-dé sá dúcá<sup>n</sup> nñ naníhí-dě xíá<sup>n</sup>. Te ní xica-dé cuánuhú-dé te ní nadico-dě nchaa sá ndécú ndíhi-dé, te ní nacuaa<sup>n</sup>-dé ñuhu núú dúcá<sup>n</sup> nñ naníhí-dě xíá<sup>n</sup>.

*Cuëndá ñ<sup>n</sup> sá ïo ndèyáhu nàni pèrlá*

<sup>45</sup> Te na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiu. ñ<sup>n</sup> téé quide ndáhú ndúcú-dě sá nání pèrlá sá ïo ndèyáhu. <sup>46</sup> Te ní naníhí-dě ñáyiu ndècu ndíhi ñ<sup>n</sup> pèrlá sá ïo-gá ndèyáhu, te ní xica-dé cuánuhú-dé te ní nadico-dě nchaa sá ndécú ndíhi-dé, te ní sáhá<sup>n</sup>-dé ní saa<sup>n</sup>-dé pèrlá sá ïo-gá ndèyáhu-á<sup>n</sup>.

*Cuëndá ñunu tnè-güedé chácá*

<sup>47</sup> Te na càni tucu-í ingá cuëndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiöxí xii ñáyiu. Cue téé tnè chácá nñ dáquëe-güedé ñunu-güedé xití ndute làmár tnè-güedé chácá, te dàcá nuu dàcá nihnu chácá cuänguee-güedé xití ñunu-á<sup>n</sup>. <sup>48</sup> Te òré ní cutnùní iní-güedé sá nñ chítú ñunu-güedé, te ní natava-güedé ní nene yuhu làmár, te ní ngüíta-güedé nácäxi-güedé nchaa chácá-á<sup>n</sup>. Te nchaa chácá vâha dàquëe-güedé-di xití tídihi, te nchaa chácá nèhé dängoyo-güedé-di. <sup>49</sup> Te dàtná ní quide cue téé-á<sup>n</sup> duca<sup>n</sup> càda cue espíritú xínú cuèchi núú Yá Ndiöxí ná sàá nduu vâ cündècu-gá nchaa sá ío ñuyíú-a, chí cue espíritú-á<sup>n</sup> daquëe ði<sup>n</sup>-xi nchaa ñáyiu ní quide váha tnuú nchaa ñáyiu ñá túú ní quide váha. <sup>50</sup> Te nchaa ñáyiu ñá túú ní quide váha-á<sup>n</sup> daquèhí<sup>n</sup> ñáhá-xí xii-yu núú ñùhú núú càyú, te yàcá<sup>n</sup> ío ndáhyú-yu, te dícó rúhñú-nă cuu núhu-yu sá sätú iní-yu cuëndá sá ndóhó-yu —cächí-gá xäha<sup>n</sup>-gä xii cue téé xica cuu ndíhi-gá.

*Cuëndá cue téé ndècu ndíhi sá nñ quee túu dñhna ndíhi sá nñ quee túu saa*

<sup>51</sup> Te Jèsús ní xícá<sup>n</sup> tnúhú-gä núú-güedé, te xäha<sup>n</sup>-gä xii-güedé:

—¿Ní tecú tnùní-ndó nàcuáa ndùu nchaa tnúhu ní cáhá<sup>n</sup>-í-á<sup>n</sup>? —cächí-gá xäha<sup>n</sup>-gä xii-güedé.

Te ní xäha<sup>n</sup>-güedé xii-gá:

—Ní tecú tnùní-ndí —cächí-güedé xäha<sup>n</sup>-güedé xii-gá.

<sup>52</sup> Te ní xäha<sup>n</sup> tucu Jesús xii-güedé:

—Te núu ñ<sup>n</sup> téé dàcuaha ñàha xii ñáyiu nchaa tnúhu ní chídó tnùní ndíi Moisés ná cùtnuní iní-dé nàcuáa quide Yá Ndiöxí ndíhu ndaha-gä ñáyiu, te téé-á<sup>n</sup> cúú-dě dàtná ñ<sup>n</sup> téé cùu xítóhó vehe. Te téé cùu xítóhó vehe-á<sup>n</sup> nñ queñuhu-dé nchaa sá nñ quee túu dñhna ndècu ndíhi-dé, ndíhi nchaa sá nñ quee túu saa. Te duca<sup>n</sup> sätnahá-xi cùu téé-á<sup>n</sup> te núu na cùtnuní iní-dé nàcuáa quide Yá Ndiöxí ndíhu ndaha-gä ñáyiu —cächí-gá xäha<sup>n</sup>-gä xii-güedé.

*Jèsús ndécú-gä ñuú núú nñ sahnú-gá*  
(Mr. 6:1-6; Lc. 4:16-30)

<sup>53</sup> Te sátá nñ yáha duca<sup>n</sup> nñ cani Jèsús cuëndú núú-güedé, te ní xica-gá cuánuhú-gá. <sup>54</sup> Te ní ndexìo-gá ñuú núú cúú ñùú-gá, te cuánguñhu-gá xití veñúhu càa ñuú-á<sup>n</sup> te ní ngüíta-gá dánèhé-gá ñáyiu. Te nchaa ñáyiu ndèdóho nchaa tnúhu cáhá<sup>n</sup>-gä xícüñúhu-yu, te xitnähá-yu:

—¿Nása ní cuu núu ío váha cùtnuní iní téé-a nàcuáa cunduu tnúhu cáhá<sup>n</sup>-dé, te quide-dé nchaa sá vâ yóo tnàhí ndàcu cada-i? <sup>55</sup> Te dícó déhe téé cùu carpinterú ndíhi tá Màriá cúú-dě, te ñani-dé cúú tè Jàcobó, ndíhi té Chèé, ndíhi té Xímú, ndíhi té Jüdás. <sup>56</sup> Te cue cúha-dé ndécú ndíhi ñáhá-yu xii-o ñùú-a. ¿Te nása ní quide-dé núu ndéé dàcá<sup>n</sup> ío váha cùtnuní iní-dé nàcuáa cunduu tnúhu cáhá<sup>n</sup>-dé-i? —cächí-yu xitnähá-yu.

<sup>57</sup> Te ñá túú ní cuñí-yu cáhá<sup>n</sup> ndíhi váha-yu Jèsús, dico mee-gä ní xäha<sup>n</sup>-gä xii-yu:

—Te núu ñ<sup>n</sup> téé cáhá<sup>n</sup> tnúhu Yá Ndiöxí ná nàsáá-dé ñuú-dé, te nchaa ñáyiu ñuú-dé-á<sup>n</sup> ndíhi nchaa ñáyiu cùu ndimee-dé ñá túú nèhé-yu sá yíñuhu núú-dě, dico cue ñáyiu



nchaa dava-gá ñuú chi nèhé-yu sá yíñùhu núú-dě —càchí-gá xăha<sup>n</sup>-gă xii-yu.

<sup>58</sup> Te ñá túú ní quide Jesús títñí núú să vă yõ tnàhí ndàcu cada ñuú-á<sup>n</sup>, chi ñá túú ní cuiní-yu quindáá iní ñáhă-yu xii-gá.

## 14

*Nàcuáa ní cuu ní xihí té Juàá té dâcuandute ñaha xii ñáyiu*

*(Mr. 6:14-29; Lc. 9:7-9)*

<sup>1</sup> Te ñu-ni dàvâ-á<sup>n</sup> ñí níhí tẽ Hèrodés tnúhu nchaa nàcuáa quide Jesús, te té Hèrodés-á<sup>n</sup> cúú-dě téé tàxi tnuní distritú Galileá. <sup>2</sup> Te ní xáha<sup>n</sup>-dě xii nchaa cue téé ndècu ndihí-dé:

—Tée dii cuèndú-xi nihí-ó-á<sup>n</sup> cùu-dé té Juàá té dâcuandute ñaha xii ñáyiu, téé ní xihí ní cùu te ní ndoto-dé ñuú dàcá<sup>n</sup> ndácú-dě quidé-dě nchaa sá vă yõ tnàhí ndàcu cada —cachí-dé xăha<sup>n</sup>-dě xii-güedé.

<sup>3</sup> Te duca<sup>n</sup> ñí cáhá<sup>n</sup> té Hèrodés chi mee-dě ní táuchíú<sup>n</sup>-dě ní tñi ñaha-güedé xii té Juàá, te ní dácútú ñaha-güedé xii-dé, te ní chihi ñaha-güedé vecaá. Te duca<sup>n</sup> ñí quide té Hèrodés-á<sup>n</sup> să cuèndá ñaha nani Herodiás, ñaha ní cándeca ñaní-dé té Lìpé, te ní naquehe<sup>n</sup> ñaha-dě xii-a<sup>n</sup> ndèca ñaha-dé.

<sup>4</sup> Te té Juàá ní xáha<sup>n</sup>-dě xii té Hèrodés:

—Ñá túú ní quide váha-n dùha ní naquehe<sup>n</sup>-n ñaha ní cándeca ñaní-n —duha ní xáha<sup>n</sup> tẽ Juàá xii té Hèrodés.

<sup>5</sup> Te sá dúcá<sup>n</sup> ñí xáha<sup>n</sup> tẽ Juàá-á<sup>n</sup> xii té Hèrodés, te ní cuiní té Hèrodés-á<sup>n</sup> cahni-dé té Juàá-á<sup>n</sup>, dico ñá túú ní cùyi-dé chi ní yùhú-dé núú cuè ñáyiu, chi nchaá-yu ní cutnùní iní-yu sá tẽ Juàá cúú-dě ñí tée càhá<sup>n</sup> tnúhu Yá Ndiõxí. <sup>6</sup> Te ñí nduu ní quide té Hèrodés vico vehe-dé ní quide càhnu-dé nduu ñí cacu-dé. Te ndècu ñí déhe yoco ñaha nani Herodiás-á<sup>n</sup>, te xíchí-ă<sup>n</sup> ñí quihu-xi xití vehe núú cúú vico-á<sup>n</sup> ñí xita saha-xi. Te núcóo té Hèrodés ndihí cue téé ní cáhá<sup>n</sup>-dé ndéhé-güedé, te ío ní cudí iní-dé nàcuáa ní xita xíchí-ă<sup>n</sup>. <sup>7</sup> Te té Hèrodés-á<sup>n</sup> ñí cacunehe-dé ndéé Yá Ndiõxí nàcuáa cutnùní iní xíchí-ă<sup>n</sup> să ndàá cuañaha-dě ñuú ná cúú să ná càcá<sup>n</sup>-xi núú-dě. <sup>8</sup> Te xíchí-ă<sup>n</sup> ñí dácáhú iní ñáhá ñaná-xi xii-xi ná cúú să càcá<sup>n</sup>-xi núú tẽ Hèrodés, núu xiă<sup>n</sup> ní xáha<sup>n</sup>-xi xii-dé:

—Cuiní-í quehndé-n ñíquí tẽ Juàá té dâcuandute ñaha xii ñáyiu te taxi-n, dico na

cùhu<sup>n</sup> ñí xití cóhó taxi-n —càchí-xi xăha<sup>n</sup>-xi xii-dé.

<sup>9</sup> Te sá dúcá<sup>n</sup> ñí xáha<sup>n</sup>-xi, te ní cundiyí té Hèrodés, dico ñá túú ní nihí-dě nása cada-dé, chi ndèdóho ñáyiu òré ní cacunehe-dé Yá Ndiõxí sá ndàá cuañaha-dě ñí sá ná càcá<sup>n</sup>-xi núú-dě. Te ní quide-dé nàcuáa ní xáha<sup>n</sup>-xi. <sup>10</sup> Chi ní táuchíú<sup>n</sup>-dě ní sáhá<sup>n</sup> cue téé ní xehndé-güedé ñíquí té Juàá òré yíhí-dě vecaá. <sup>11</sup> Te ní chihi-güedé ñíquí-dě ñí xití cóhó te nèhe-güedé cuánuhú ní sáñaha-güedé xii xíchí-ă<sup>n</sup>, te xíchí-ă<sup>n</sup> ñí nacuañaha-xi xii náná-xi.

<sup>12</sup> Te cue téé xica cuu ndihí té Juàá-á<sup>n</sup> ñí sáhá<sup>n</sup>-güedé ní naquehe<sup>n</sup>-güedé yíquí cùñú-dé ní chindúxi-güedé, te dâtnùní ní sáhá<sup>n</sup>-güedé ní xáha<sup>n</sup>-güedé xii Jèsús nàcuáa ní cuu.

*Jèsús dâcâxi-gá úhú<sup>n</sup> mîl cue téé te ñí ñáyiu ñíhí ndihí landú*

*(Mr. 6:30-44; Lc. 9:10-17; Jn. 6:1-14)*

<sup>13</sup> Te Jèsús ní nihí-gă tnúhu nàcuáa ní cuu ní xihí té Juàá. Te sátá xiă<sup>n</sup> te cuánguee-gá ñí bàrcú cuáhá<sup>n</sup>-gá ñí xichi núú ñá túú ñáyiu ndècu, dico nchaa ñáyiu xîndecu nchaa ñuú cáá yàtni xiá<sup>n</sup> ñí nihí-yu tnúhu sá cuáhá<sup>n</sup>-gá, te ní queé-yu ñuú-yu xica sahá-yu cuáhá<sup>n</sup> núú quidé-yu cuèndá quexìo Jesús. <sup>14</sup> Te òré ní quexìo Jesús núú cuáhá<sup>n</sup>-gá, te ní quene-gá bàrcú, te ní xiní-gá cuéhé vîhí ñáyiu xixúcu-yu xiá<sup>n</sup>, te ní cundàhú iní ñáhá-gă xii-yu, te ní quide tátna-gá nchaa ñáyiu cùhú ndihí-yu. <sup>15</sup> Te sátá ñí cuaa te ní sáhá<sup>n</sup> cue téé xica cuu ndihí Jesús núú-gă, te xăha<sup>n</sup>-güedé xii-gá:

—Sa ní cuu dandâca-n nchaa ñáyiu-a chi sa ní cuaa, te na quihí<sup>n</sup>-yu nchaa ñuú cáá yàtni iha cuaá<sup>n</sup>-yu sá caxí-yu, chi núú ndécú-ó ñha ñá túú tnàhí ná ío —càchí-güedé xăha<sup>n</sup>-güedé xii-gá.

<sup>16</sup> Te Jèsús ní xáha<sup>n</sup>-gă xii-güedé:

—Ñáhá, vá dândâca-í-yu, váha-gá mee-ndo chí cuañaha să ná caxí-yu —càchí-gá xăha<sup>n</sup>-gă xii-güedé.

<sup>17</sup> Te ní xáha<sup>n</sup>-güedé xii-gá:

—Ñá túú ñágá ndécú ndihí-ndí, chi úhú<sup>n</sup> duha-ná pàà ndihí úú-nă chácá ndécú ndihí-ndí —càchi-güedé xăha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gă xii-güedé:

—Chí cánèhe paá-án ndihí chácá-ǎn táquixi iha —cachí-gá xǎha<sup>n</sup>-gǎ xii-güedé.

<sup>19</sup> Te Jèsús ní xáha<sup>n</sup>-gǎ xii nchaa ñáyiú sá ná ngõo-yu nchaa-yu núú íté cuíí càa xiá<sup>n</sup>, te ní quehe<sup>n</sup>-gá ndi ùhú<sup>n</sup> pàá-án ndihí ndi ndúú chácá-ǎn te ní ndacoto-gá andiú, te ní ndacá<sup>n</sup> táhú-gǎ núú Yǎ Ndiõxí, te dàtnùní ní táhú cuèchi-gá pàá-án te ní sáñaha-gǎ xii cue téé xica cuu ndihí-gá ní dácǎhñu-güedé cue ñáyiú ní xexí-yu. <sup>20</sup> Te nchaa-yu ní xexí-yu ní ndahá xití-yu. Te sátá ní túhú cóhõ-yu te ní nadatácá-güedé nchaa sá ní quendóo, te ní chítú ùxúú tnàhá tídihi mee-ni sǎ ní quendóo. <sup>21</sup> Te nchaa ñáyiú ní xexi-án ní xínu úhú<sup>n</sup> mǐl mee-ni cuè téé chi mee-ni cuè téé-án ní quiúndehu, te dií<sup>n</sup> cue ñáyiú dií<sup>n</sup> ndihí cue landú.

*Jèsús xicá-gǎ núú ndute*  
(Mr. 6:45-52; Jn. 6:16-21)

<sup>22</sup> Te òré-ni-án ní xáha<sup>n</sup> Jèsús xii cue téé xica cuu ndihí-gá sá quèe-güedé bàrcú téhndé-güedé ndàa ingá xio yuhu làgúná, te mee-gǎ quendóo-gǎ cada ndee iní tnàhá-gǎ ndihí cue ñáyiú. <sup>23</sup> Te sátá ní yáha ní quide ndee iní tnàhá-gǎ ndihí cue ñáyiú, te medii-gá ní xica-gǎ cuásaá-gǎ ñ<sup>n</sup> tǐndúú cáá yàtni xiá<sup>n</sup> cuèndá cáhá<sup>n</sup> ndihí-gǎ Yǎ Ndiõxí, te diu-ni medii-gǎ ndécú xiá<sup>n</sup> ní cundiqu<sup>n</sup>. <sup>24</sup> Te bàrcú sá ñúhú cuè téé xica cuu ndihí-gǎ-án sa cuáhá<sup>n</sup>-xi ndéé cuádava xití làgúná-án, te níhi vìhi quene táchí ndàa ichi cuáhá<sup>n</sup>-xi, te dàcandau ndeé-xi ndute nchaa dií<sup>n</sup>-xi. <sup>25</sup> Te tàcuíhndá váhi-gǎ tá xica Jèsús núú ndute cuáhá<sup>n</sup> tá cùyatni-gǎ bàrcú-án. <sup>26</sup> Te cue téé xica cuu ndihí-gǎ ní xiní ñáhá-güedé xii-gǎ tá xica-gǎ núú ndute cuáhá<sup>n</sup>, te ní yùhú-güedé te níhi ní cáhá<sup>n</sup>-güedé te xǐtnàha-güedé:

—ñ<sup>n</sup> àlmá! —càchí-güedé xǐtnàha-güedé.

<sup>27</sup> Te Jèsús ní cáhá<sup>n</sup>-gǎ, te xǎha<sup>n</sup>-gǎ xii-güedé:

—Ñíí cunduu-ndo vǎ yùhú-ndó, chi yúhú cùú-í —càchí-gǎ xǎha<sup>n</sup>-gǎ xii-güedé.

<sup>28</sup> Te té Pèlú ní xáha<sup>n</sup>-dè xii-gǎ:

—Mèstrú, te núú diu-n te tauchìu<sup>n</sup> sá tnàhá-í ná càca-í núú ndute quixi tnàhá ñáhà-í xii-n —càchí-dé xǎha<sup>n</sup>-dè xii-gǎ.

<sup>29</sup> Te Jèsús ní xáha<sup>n</sup>-gǎ xii-dé:

—Taqùixi —cachí-gǎ xǎha<sup>n</sup>-gǎ xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáhá<sup>n</sup> cuátnahá ñáhá-dè xii-gǎ. <sup>30</sup> Te ní cutnùní iní-dé sá ño níhi xico táchí, te ní ngüíta-dé yùhú-dé. Te òré-ni-án tá quèe naa-dé xití ndute cuáhá<sup>n</sup> ní cùu, te níhi ní cáhá<sup>n</sup>-dè xǎha<sup>n</sup>-dè xii Jèsús:

—ñ<sup>n</sup> Mèstrú, vá dáñá-n quèe naa-í xití ndute! —càchí-dé xǎha<sup>n</sup>-dè xii-gǎ.

<sup>31</sup> Te òré-ni-án ní tñi Jèsús ndaha-dé, te ní xáha<sup>n</sup>-gǎ xii-dé:

—ñ<sup>n</sup> Ná cuèndá ñá túú sàndáá ndisa iní ñáhá-n xii-í sàni ñ<sup>n</sup> sàni úú iní-n-í? —càchí-gǎ xǎha<sup>n</sup>-gǎ xii-dé.

<sup>32</sup> Te òré cuánguee Jèsús ndihí té Pèlú xití bàrcú, te òré-ni-án ní ngüíñí táchí. <sup>33</sup> Te cue téé ñùhu xití bàrcú-án ní ngüíñí xití-güedé núú-gǎ, te xǎha<sup>n</sup>-güedé xii-gǎ:

—Sá ndàá sá cuítí sǎ díú yòhó cùú-n Dèhe Dútú Ndiõxí —càchí-güedé xǎha<sup>n</sup>-güedé xii-gǎ.

*Jèsús quidé tǎtna-gǎ ñáyiú cùhú ñ<sup>n</sup> xichi núú nání Gènesarét*  
(Mr. 6:53-56)

<sup>34</sup> Te ní quexìo Jèsús ndihí cue téé xica cuu ndihí-gǎ ndàa ingá xio yuhu làgúná, te núú ní quexìo-gǎ ndihí-güedé-án nání-xí Gènesarét. <sup>35</sup> Te nchaa ñáyiú xǐndecu xiá<sup>n</sup> ní cutnùní iní-yu sá díú-gǎ ní quexìo, te ní dátècú tnùhu-yu nchaa dava-gǎ ñáyiú xǐndecu yatni xiá<sup>n</sup> sǎ ní quexìo-gǎ. Te ndécá-yu nchaa ñáyiú cùhú ndécú ndihí-yu cuáhá<sup>n</sup> núú ndécú Jèsús. <sup>36</sup> Te nchaa ñáyiú cùhú-án ní ngüíta-yu càhá<sup>n</sup> ndàhú-yu núú Jèsús sá ná dàña-gǎ tnándeé-yu cuèdicó luha yuhu dõó-gǎ cuèndá ndúha-yu, te cue ñáyiú cùhú, ñáyiú ní tnándeé yuhu dõó-gǎ ní ndúha-yu.

## 15

*Cuèndá nchaa sá quidé-xí ngündecu cuèchi ñáyiú*

(Mr. 7:1-23)

<sup>1</sup> Te sátá dúcá<sup>n</sup> te ñ<sup>n</sup> úú cue téé cùu fariséu ní quee-güedé ñúú Jerusálén, ndihí cue téé dàcuaha ñaha xii ñáyiú nchaa tnùhu ní chídó tnùní ndi Moisés ní quexìo-güedé núú ndécú Jèsús, te xǎha<sup>n</sup>-güedé xii-gǎ:

<sup>2</sup> —¿Ná cuèndá cue téé xica cuu ndihi-n ñá túú nàquete-güedé ndaha-güedé òrè caxi-güedé nàcuáa ní cachí cue ñaní tnáhá-ó nǐ xíndecu ndéé sanaha-i? —càchí-güedé xáha<sup>n</sup>-güedé xii-gá.

<sup>3</sup> Te Jèsús ní xáha<sup>n</sup>-gá xii-güedé:

—Te nchòhó tucu, ¿ná cuèndá ñá túú quide-ndo nacuáa ní cachí Yá Ndiöxí cada-ndo, núu da nàcuáa ta quide cue téé ñuyíú-a quide-ndo-i? <sup>4</sup> Te Yá Ndiöxí càchí-gá núú tütú-gá: “Canehe-ndo sǎ yíñuhu núú tǎtá-ndó ndihi núú nǎná-ndó”, càchí-gá. Te càchí tucu-gá ingá xichi núú tütú-gá: “Nchaa ñáyiú na càhá<sup>n</sup> úhú tǎtá-xi àdi náná-xi te cahni ñaha-güedé xii-yu”, duha càchí-gá núú tütú-gá. <sup>5</sup> Dico nchòhó càchí-ndó sǎ cuè ñáyiú chi cuu cúñahá-yu xii tǎtá-yu àdi náná-yu: “Vá cúú chindee ñaha-ndí xii-n, chi sǎ táxí-ndí xii-n ni cùu, xǎ<sup>n</sup> ní nduu cuèndá Yá Ndiöxí”, cuu duha cúñaha ñáyiú xii tǎtá-yu àdi náná-yu càchí-ndó. <sup>6</sup> Te càchí-ndó sǎ cuè ñáyiú duca<sup>n</sup> na cúñaha xii tǎtá-xi àdi náná-xi te ñá túú-gá tǎu-yu chindéé-yu ni tǎtá-yu ni náná-yu. Te duca<sup>n</sup> quide-ndo chi ní dáquéé tǐhú-ndó nàcuáa ní cachí Yá Ndiöxí cada-ndo, te mee-ni nàcuáa ta quide cue téé ñuyíú-a véxi nchícú<sup>n</sup> nihnu-ndo quide-ndo.

<sup>7</sup> Te nchòhó cúú-ndó ñáyiú ío dándahú méé-xí, chi càchí-ndó sǎ quidé ndǎá-ndó te ñá ndǎá sǎ quidé ndǎá-ndó! Te ní quee ndǎá-xi nàcuáa ní chídó tnùní ndí Chàíá téé ní xóo càhá<sup>n</sup> tnúhu Yá Ndiöxí ndéé sanaha núú tütú-gá núú càhá<sup>n</sup>-xi nàcuáa ní càhá<sup>n</sup>-gá cuèndá-ndó, te duha ní cachí-gá:

<sup>8</sup> Ñáyiú-a càchí-yu sǎ ío càhnu cuu-í dico dícó-ni yuhu càhá<sup>n</sup>-yu,

chi duu<sup>n</sup> duu<sup>n</sup> ñá túú ñuhu iní ñáhǎ-yu xii-í.

<sup>9</sup> Te àú<sup>n</sup> nǎ cuu chǐñuhu ñahá-yu xii-í chi ñá túú vèdana ndéé nándíhi-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sǎ nǐ cahu iní cue ñáyiú ñuyíú-a càhá<sup>n</sup>-yu.

Duha ní chídó tnùní ndí Chàíá núú tütú Yá Ndiöxí nàcuáa ní càhá<sup>n</sup>-gá cuèndá-ndó —càchí-gá xáha<sup>n</sup>-gá xii-güedé.

<sup>10</sup> Te ní xáha<sup>n</sup>-gá xii cue ñáyiú:

—Chí táquixi ndehe iha, te cundedóho váha-ndo tnúhu na càhá<sup>n</sup>-í, te ío váha

cuáha-ndo cuèndá. <sup>11</sup> Nchaa sǎ xéxi-ndó chi ñá túú nǎ quidé-xí iní-ndó, dico nchaa sǎ cuèhé sǎ dúhá sàni iní-ndó càhá<sup>n</sup>-ndó nchaa xǎ<sup>n</sup> quidé-xí ndècu cuéchi-ndo —càchí-gá xáha<sup>n</sup>-gá xii-yu.

<sup>12</sup> Te cue téé xica cuu ndihi-gá ní sáhá<sup>n</sup>-güedé ndéé núú-gá, te xáha<sup>n</sup>-güedé xii-gá:

—Véxi-ndí càchí tnúhu-ndí xii-n sǎ cuè téé cùu fariséú ñá túú cùu váha iní-güedé cuèndá tnúhu ní càhá<sup>n</sup>-n —càchí-güedé xáha<sup>n</sup>-güedé xii-gá.

<sup>13</sup> Te ní xáha<sup>n</sup>-gá xii-güedé:

—Nchaa ñáyiú ñá túú cùu cuèndá Tǎtá-í Dútú Ndiöxí cuíta nihnú-yu, chi ñáyiú-án cúú-yu dàtná nchaa cúhú sǎ ñá túú nándíhi te tnúhu ñáyiú. <sup>14</sup> Te vá cadá cuèndá-ndó nàcuáa càhá<sup>n</sup> cue téé-án, chi cùu-güedé dàtná cue ñáyiú cuàá sácuíta nehe tnàha. Te nchòhó xìní-ndó sǎ núu ì<sup>n</sup> ñáyiú cuàá ná cuítá nèhe tucú-yu ingá ñáyiú cuàá, te ndí nduú-yu quée-yu déhva —càchí-gá xáha<sup>n</sup>-gá xii-güedé.

<sup>15</sup> Te té Pèlú ní xáha<sup>n</sup>-dè xii-gá:

—Cachí tnúhu xii-ndí nàcuáa quèe-xi tnúhu ní càhá<sup>n</sup>-n-ǎ<sup>n</sup> —càchí-dé xáha<sup>n</sup>-dè xii-gá.

<sup>16</sup> Te Jèsús ní xáha<sup>n</sup>-gá:

—¿Náa tnàhá nchòhó ñá túú ní tècú tnùní-ndó nàcuáa ndùu tnúhu ní càhá<sup>n</sup>-í núú ñáyiú-ǎ<sup>n</sup> ñǎ? <sup>17</sup> Nchaa sǎ xéxi-yu cuánguee-xi xití-yu, te dàtnùní náyàha ñaha-xi xii-yu.

<sup>18</sup> Dico nchaa tnúhu cuèhé tnúhu duha càhá<sup>n</sup>-yu xǎ<sup>n</sup> véxi quene-xi iní-yu, te diu nchaa xǎ<sup>n</sup> quidé-xí ndècu cuéchi-yu. <sup>19</sup> Te iní-yu-án cǎcú nihnu nchaa sǎ cuèhé sǎ dúhá, chi sàni cuèhé sání dùha iní-yu, te sàhni-yu tnàha ñáyiú-yu, te cue téé càhá<sup>n</sup> ndihi-güedé ñáyiú dǐhí te ñá díú ñàdǐhí-güedé cúú-yu. Te diu-ni duca<sup>n</sup> quide cue ñáyiú dǐhí càhá<sup>n</sup> ndihí-yu cue téé te ñá díú yǐ-yu cùu-güedé, te cuèi téé te cuèi ñadǐhí mee-ni ìchi díí iní cúdíí iní-yu cundecú-yu, te dùhu ndachiu<sup>n</sup> tnahá-yu, te dàcuandehndé-yu, te càhá<sup>n</sup> cuèhé-yu cuèndá tnàha ñáyiú-yu. <sup>20</sup> Te nchaa xǎ<sup>n</sup> quidé-xí ndècu cuéchi-yu, dico ñá díú sǎ ñá túú ndàhá-yu dàtná ní cachí cue téé ndéé sanaha, chi xǎ<sup>n</sup> ñá túú quide-xi cuèndá

ngúndecu cuéchi-yu —càchí-gá xăha<sup>n</sup>-gă xii-güedé.

*İ<sup>n</sup> ñadîhî ñaha cùu ñanî tnáhá ñăyiu canàneá ní sándáá iní-a<sup>n</sup> Jèsús*  
(Mr. 7:24-30)

<sup>21</sup> Te Jèsús ní xica-gá cuáhá<sup>n</sup>-gá ní sáá-gá yucu cue tée ñuú Tírú, ndihî yucu cue tée ñuú Sidón. <sup>22</sup> Te ì<sup>n</sup> ñadîhî ñaha cùu ñanî tnáhá ñăyiu canàneá ndécú yàtni-a<sup>n</sup> xía<sup>n</sup>, te níhi ta càhá<sup>n</sup>-a<sup>n</sup> ní quexìo núú ndécú Jèsús, te xăha<sup>n</sup>-a<sup>n</sup> xii-gá:

—İMèstrú, ñanî tnáhá ndî Dàvií, cundàhú iní ñáhá xii-í cada tátna-n dèhe yoco-ì! Chi yîhî ñaha espíritú cündîhî yucu ñávâha xii-xi te ío dândoho ñaha-xi —cachí-a<sup>n</sup> xăha<sup>n</sup> xii-gá.

<sup>23</sup> Dico Jèsús ñá túú tnàhî ni càhá<sup>n</sup>-gá, te cue tée xica cuu ndihî-gá ní sáhá<sup>n</sup>-güedé núú-gă, te xăha<sup>n</sup>-güedé xii-gá:

—Cúñaha xii ñaha-á<sup>n</sup> ná nùhú-a<sup>n</sup>, chi ío níhi càhá<sup>n</sup>-a<sup>n</sup> nchìcú<sup>n</sup> ñáhá-á<sup>n</sup> xii-o —cachí-güedé xăha<sup>n</sup>-güedé xii-gá.

<sup>24</sup> Te Jèsús ní xáha<sup>n</sup>-gă xii-güedé:

—Yá Ndiöxí ní tendaha ñàha-gá xii-í véxi-í mee-ni ñuú núú xîndecu cue ñăyiu isràél, chi ñăyiu-á<sup>n</sup> cúu-yu dàtná cue mbéé cue quiti ní xíta, chi ta xíta nihnú-yu cuáhá<sup>n</sup> —càchí-gá xăha<sup>n</sup>-gă xii-güedé.

<sup>25</sup> Te ñadîhî-á<sup>n</sup> ní sáhá<sup>n</sup>-a<sup>n</sup> ndéé núú Jèsús ní ngüîñî xítî-á<sup>n</sup>, te xăha<sup>n</sup>-a<sup>n</sup> xii-gá:

—İMèstrú, chindee ñàha xii-í! —càchí-a<sup>n</sup> xăha<sup>n</sup>-a<sup>n</sup> xii-gá.

<sup>26</sup> Te Jèsús ní xáha<sup>n</sup>-gă xii-a<sup>n</sup>:

—Vá cúú chîndee-í cue ñăyiu ñá túú cùu ñăyiu isràél, chi ì<sup>n</sup>-ni cùu-xi núu na quèhe<sup>n</sup>-o paá cúú cuèndá cue landú te cuáha-o iná caxi-di —càchí-gá xăha<sup>n</sup>-gă xii-a<sup>n</sup>.

<sup>27</sup> Dico ñaha-á<sup>n</sup> ní xáha<sup>n</sup>-a<sup>n</sup> xii-gá:

—Ndáá càhá<sup>n</sup>-n, dico cue iná chi nàdatacá-güedi sá ngóyó yùhu cóhó xítòhó-güedi —càchí-a<sup>n</sup> xăha<sup>n</sup>-a<sup>n</sup> xii-gá.

<sup>28</sup> Te Jèsús ní xáha<sup>n</sup>-gă xii-a<sup>n</sup>:

—İYòhó ñaha cùhú déhe-xi, ío váha sándáá iní ñáhá-n xii-í! Te na càda-í nàcuáa cuìní-n —càchí-gá xăha<sup>n</sup>-gă xii-a<sup>n</sup>.

Te òré-ni-á<sup>n</sup> ní ndúha déhe-a<sup>n</sup>.

*Jèsús quidé tátna-gá vâi ñăyiu cùhú*

<sup>29</sup> Te sáta dúcá<sup>n</sup> ní cuu te Jèsús ní xica-gá cuáhá<sup>n</sup>-gá ní yáha-gá yuhu làgúná distritú Galiléa, te cuásá-gá ì<sup>n</sup> tindúú te xía<sup>n</sup> ní

ngóo-gá. <sup>30</sup> Te xía<sup>n</sup> núcòo-gá ní quexìo cuéhé víhî ñăyiu, te ndécá-yu ñăyiu yacua, ndihî ñăyiu ní yíchî ì<sup>n</sup> xio ndaha-xi, ndihî ñăyiu cuàá, ndihî ñăyiu ñîhî, te vâi dava-gá cue ñăyiu cùhú tnàhá dava-gá núú cuéhé ndécá-yu ní quexìo núú ndécú-gă. Te ní taxi ndecu ñáhá-yu núú Jèsús te ní quide tátna ñaha-gă xii-yu te ní ndúha-yu. <sup>31</sup> Te nchaa ñăyiu xîndecu-á<sup>n</sup> ío ní cuñúhu-yu sá dúcá<sup>n</sup> ní xini-yu ní cuu ní nacáhá<sup>n</sup> nchaa ñăyiu ñîhî, ndihî cuèndá sá ní ndúha nchaa cue ñăyiu yacua, ndihî cuèndá sá ní ndúha cue ñăyiu ní yíchî ì<sup>n</sup> xio ndaha-xi, ndihî cuèndá sá ní ndúha núú cuè ñăyiu cuàá. Te ncháa-yu ní cachí-yu sá ío càhnu cuu Yá Ndiöxí Yaá cúú Ndiöxí cue ñăyiu isràél.

*Jèsús dácàxi-gá cúmî mîl cue tée te dî<sup>n</sup> ñăyiu dîhî ndihî landú*  
(Mr. 8:1-10)

<sup>32</sup> Te Jèsús ní cana-gá cue tée xica cuu ndihî-gá, te ní xáha<sup>n</sup>-gă xii-güedé:

—Yúhú cündàhú iní-í nchaa ñăyiu-a, chi sa ní cuu únî nduu ndècu ndihî ñahá-yu xii-o ìha, te ñá túú tnàhî-gá sá caxî-yu, te ñá túú cuìní-í natendaha-î-yu núhú tnámă-yu vehé-yu, chi ná ndéé cuáhá<sup>n</sup> cuneé-yu docó ichi —càchí-gá xăha<sup>n</sup>-gă xii-güedé.

<sup>33</sup> Te ní xáha<sup>n</sup>-güedé xii-gá:

—İTe ndéé níhî-ó să cuñaha-o càxi nchaa ñăyiu-a, te ío cuéhé-yu te ñá túú nă ío ìha chi cùu-xi xítî yucu-i? —càchí-güedé xăha<sup>n</sup>-güedé xii-gá.

<sup>34</sup> Te Jèsús ní xícá<sup>n</sup> tnúhú-gă núú-güedé, te xăha<sup>n</sup>-gă:

—İNá dâha-gá pàá ndécú ndihî-ndo-i? —cachí-gá xăha<sup>n</sup>-gă xii-güedé.

Te ní xáha<sup>n</sup>-güedé xii-gá:

—Ndècu ndihî-ndí úsá-gá tnàhá pàá ndihî ì<sup>n</sup> úú-gá chácá —càchí-güedé xăha<sup>n</sup>-güedé xii-gá.

<sup>35</sup> Te Jèsús ní xáha<sup>n</sup>-gă xii nchaa ñăyiu sá ná ngóo-yu ncháa-yu, te ní ngóo-yu.

<sup>36</sup> Te ní quehe<sup>n</sup>-gá ndi úsá pàá-á<sup>n</sup> ndi ì<sup>n</sup> úú-gá chácá-á<sup>n</sup>, te ní ndacá<sup>n</sup> táhú-gă núú Yá Ndiöxí, te dàtnúnî ní táhú cuèchi-gá pàá-á<sup>n</sup> ndihî chácá-á<sup>n</sup> te ní sáñaha-gă xii cue tée xica cuu ndihî-gá ní dácâhñu-güedé nchaa ñăyiu-á<sup>n</sup>. <sup>37</sup> Te ncháa-yu ní xexí-yu ní ndahá xitî-yu. Te sáta ní túhú cóhó-yu te



ní nadatàcá-güedé nchaa sá nǐ quendóo, te ní chítú ùsá tnàhá tídihi mee-ni sǎ nǐ quendóo-án. <sup>38</sup> Te núú ncháá ñáyiú ní xexi te ní xínu cúmí mǐl mee-ni cuè téé chi ðiu-ni cue téé-án nǐ quiúndehu, te ðií<sup>n</sup> cue ñáyiú ðií<sup>n</sup> ndihi cue landú. <sup>39</sup> Te sátá dúcá<sup>n</sup> te Jèsús ní dándácá ñàha-gá xií-yu, te cuánguee-gá bàrcú cuáhá<sup>n</sup>-gá yucu cue téé ñúú Màgdalá.

## 16

*Cue téé cùu fariséú ndihi cue téé cùu saducéú xàha<sup>n</sup>-güedé xii Jèsús cada-gá ñ<sup>n</sup> sá vǎ yǎo tnàhí ndàcu cada*

*(Mr. 8:11-13; Lc. 12:54-56)*

<sup>1</sup> Te cue téé cùu fariséú ndihi cue téé cùu saducéú ní sáá-güedé núú ndécú Jèsús xító ndèé ñáhá-güedé xii-gá, te xàha<sup>n</sup>-güedé sá ná cáda-gǎ ñ<sup>n</sup> sá vǎ yǎo tnàhí ndàcu cada cundehe-güedé nàcuáa cutnùní iní-güedé núú ndáá sá Yǎ Ndiǒxí ní tendaha ñàha-gá xii-gá véxi-gá ñuyíú-a. <sup>2</sup> Te Jèsús ní xàha<sup>n</sup>-gǎ xii-güedé:

—Nchòhó chi òré tá cuàa cuáhá<sup>n</sup> te ndàcoto-ndo andiú, te càchí-ndó: “Ío váha cada-xi tneé chi càa vícò tícuèhé andiú”, duha càchí-ndó. <sup>3</sup> Te òré dátneé ndàcòto tucu-ndo andiú, te càchí-ndó: “Vá cáda vǎha-xi nduu vitna chi tícuèhé andiú, te càa vícò”, duha càchí-ndó. ¡Dico nchòhó cúú-ndó ñáyiú ío dándahú méé-xí sǎ quidé ndáá te ñá ndáá sá quidé ndáá-ndó! Te cutnùní iní-ndó nàcuáa quide-xi andiú, dico ñá túú cutnùní iní-ndó nàcuáa quèe-xi nchaa sá quidé Yǎ Ndiǒxí vitna. <sup>4</sup> Dico nchaa nchòhó ñáyiú ndècu ñuyíú vitna ío cuihna iní-ndó, te ñá túú cuíní-ndó càda ndáá-ndó núú Yǎ Ndiǒxí, te cuíní-ndó càda-í ñ<sup>n</sup> sá vǎ yǎo tnàhí ndàcu cada dico ñá túú nǎgá cada-í, chi ðiu-ni nàcuáa ní quide Yǎ Ndiǒxí ndíi Jónás ðiu-ni duca<sup>n</sup> càda tucu-gá vitna —càchí-gá xàha<sup>n</sup>-gǎ xii-güedé.

Te duca<sup>n</sup> te ní xica-gá cuáhá<sup>n</sup>-gá ndihi cue téé xica cuu ndihi-gá.

*Cuendá cue téé cùu fariséú ndihi cuendá cue téé cùu saducéú*

*(Mr. 8:14-21)*

<sup>5</sup> Te òré ní quexìo ndihi ñàha-gá xii-güedé ndàa ingá xio yuhu làgúná, te ní ndacu iní-güedé sá nǐ cunaa-güedé canehe-güedé pàa quíhí<sup>n</sup> caxi-güedé. <sup>6</sup> Te Jèsús ní cǎhá<sup>n</sup>-gá dóho-güedé, te xàha<sup>n</sup>-gǎ xii-güedé:

—Na càchí tnúhu-í xii-ndo sǎ ío quihi iní-ndó cùndecu-ndo, te vá cáda cuendá tnàhí-ndo lèvadurá cue téé cùu fariséú ndihi cue téé cùu saducéú —càchí-gá xàha<sup>n</sup>-gǎ xii-güedé.

<sup>7</sup> Te ní ngüíta-güedé xǐtnàha-güedé:

—Cuendá sá ñà túú ní cǎnehe-o pàa quixi xǐá<sup>n</sup> duha cǎhá<sup>n</sup>-gá —càchí-güedé xǐtnàha-güedé.

<sup>8</sup> Te Jèsús ní cutnùní iní-gá nàcuáa ndùu tnúhu xǐtnàha-güedé, núu ní xàha<sup>n</sup>-gǎ xii-güedé:

—Nchòhó chi ñá túú sàndáá iní ñáhá vǎha-ndo xii-í núú xǐá<sup>n</sup> da sá ñà túú ní cǎnehe-ndo pàa quixi cǎhá<sup>n</sup>-ndó. <sup>9</sup> ¿Te náa ñá ndácú iní-ndó sǎ núú ùhú<sup>n</sup>-ni pàa, te ní taxi-í ní dǎcǎhñu-ndo nǐ xexi ùhú<sup>n</sup> mǐl cue téé, chi ðiu-ni cue téé-án nǐ quiúndehu, te sátá nǐ túhú cóhó-güedé te ní chítú tǐtní tídihi mee-ni sǎ nǐ quendóo-án? Te ñá tècú tnùní-ndó nàcuáa quèe-xi nàcuáa ní quide-í. <sup>10</sup> ¿Te náa ñá ndácú tucu iní-ndó sǎ núú ùsá-ni pàa te ní taxi-í ní dǎcǎhñu tucu-ndo nǐ xexi cúmí mǐl cue téé, chi ðiu-ni cue téé-án nǐ quiúndehu, te sátá nǐ túhú cóhó-güedé te ní nadatàcá-ndó nchàa sá nǐ quendóo, te ní chítú tǐtní tídihi mee-ni sǎ nǐ quendóo-án? <sup>11</sup> Dico nchòhó chi ñá túú ní quide cuendá-ndó nàcuáa ndùu tnúhu cǎhá<sup>n</sup>-í òré ní cachí-í sá vǎ quèhé<sup>n</sup> cuendá-ndó lèvadurá cue téé cùu fariséú ndihi cue téé cùu saducéú, chi ñá ðíú cuendá pàa ní cǎhá<sup>n</sup>-í —càchí-gá xàha<sup>n</sup>-gǎ xii-güedé.

<sup>12</sup> Te sátá dúcá<sup>n</sup> nǐ xàha<sup>n</sup> Jèsús xii cue téé xica cuu ndihi-gá, te ní tecú tnùní-güedé sá xàha<sup>n</sup>-gǎ xii-güedé sá vǎ tníi-güedé tnúhu cǎhá<sup>n</sup> cue téé cùu fariséú ndihi cue téé cùu saducéú, te ñá ðíú cuendá levadurá sá quíhu yuchi cuàha pàa ní cǎhá<sup>n</sup>-gá.

*Té Pèlú xàha<sup>n</sup>-dǎ xii Jèsús sá ðíú-gǎ cúú-gǎ Cristú*

*(Mr. 8:27-30; Lc. 9:18-21)*

<sup>13</sup> Te Jèsús ní quexìo-gá yucu cue téé ñúú Cèsareá Fìlipú, te ní xícá<sup>n</sup> tnúhú-gǎ núú cuè téé xica cuu ndihi-gá, te xàha<sup>n</sup>-gǎ xii-güedé:

—¿Yoo cùu yúhú Téé cùu ñaní tnàhá-ndó nchàa-ndo cachí cue ñáyiú-va? —càchí-gá xàha<sup>n</sup>-gǎ xii-güedé.

<sup>14</sup> Te ní xàha<sup>n</sup>-güedé xii-gá:

—Davá-yu cächí-yu sá cúú-n ndïi Juàá téé ní xóo dacuàndute ñaha xii ñáiyu, te davá-yu cächí-yu sá cúú-n tē Èliás, te davá-yu cächí-yu sá cúú-n ndïi Jeremiás téé ní xóo cáhá<sup>n</sup> tnúhu Yá Ndiöxí ndéé sanaha, àdi cuu-n ingá téé ní xóo cáhá<sup>n</sup> tnúhu-gá ndéé sanaha, duha cächí-yu —cächí-güedé xáha<sup>n</sup>-güedé xii-gá.

15 Te Jèsús ní xícá<sup>n</sup> tnúhú tucu-gá núú-güedé, te xáha<sup>n</sup>-gá xii-güedé:

—Te nchòhó, ¿yoo sàni iní-ndó cùu-í-i? —cächí-gá xáha<sup>n</sup>-gá xii-güedé.

16 Te té Ximú, àdi Pelú chi úú diu-dé, ní xáha<sup>n</sup>-dē xii-gá:

—Yòhó cúú-n Crìstú Yaa ní tendaha Yá Ndiöxí véxi ñuyíú-a, te diu Yá Ndiöxí cúú-gá Yaa ndécú nchàa nduu nchaa quiú, te yòhó cúú-n Dēhe-gá —cächí-dé xáha<sup>n</sup>-dē xii-gá.

17 Te Jèsús ní xáha<sup>n</sup>-gá xii-dé:

—Yòhó té Ximú déhe té Jónás, ío váha táhú-n chi mee Tātá-í Dútú Ndiöxí ní dácáhu iní ñáhá-gá xii-n nàcuáa cunduu tnúhu cáhá<sup>n</sup>-n, te ñá díú ñáiyu ñuyíú-a duca<sup>n</sup> ni dàcahu iní ñáhá-yu xii-n tnúhu-á<sup>n</sup>.

18 Te yúhú xáha<sup>n</sup>-í Pèlú xii-n, te tnúhu-á<sup>n</sup> quée-xí yúú, chi quèe ndáá-xi nàcuáa nàni-n, chi cuu-n ñá tée vá cání ñá caní úú iní-xi canu ichi-n cuè ñáiyu nàcuáa cundecu ndihí ñáhá-yu xii-í. Te nchaa ñáiyu cùu cuendá-í vá ndácú yùcu ñávàha dacuíta nihnu ñaha-xi xii-yu. 19 Te yúhú taxi-í tnúhu ndee iní cundecu ndihí-n cuendá cunuu-n núú cuè ñáiyu yìndaha ñaha Yá Ndiöxí, te nchaa sá ná cáhá<sup>n</sup>-n sá cúú-xí sá vaha, te diu-ni duca<sup>n</sup> cáhá<sup>n</sup> Yá Ndiöxí, te nchaa sá ná cáhá<sup>n</sup>-n sá ñà túú cùu-xi sá vaha, te diu-ni duca<sup>n</sup> cáhá<sup>n</sup> tucu-gá, chi quide-n nàcuáa cuiní-gá —cächí-gá xáha<sup>n</sup>-gá xii-dé.

20 Te sáta dúcá<sup>n</sup> te ní xáha<sup>n</sup> Jèsús xii cue tée xica cuu ndihí-gá sá vā yòo cúñaha-güedé sá díú-gá cúú-gá Crìstú Yaa ní tendaha Yá Ndiöxí véxi ñuyíú-a.

*Jèsús cáhá<sup>n</sup>-gá sá cáhni ñaha-güedé xii-gá (Mr. 8:31-9:1; Lc. 9:22-27)*

21 Te ndéé dàvá-á<sup>n</sup> ñá ngüita Jèsús xáha<sup>n</sup>-gá xii cue tée xica cuu ndihí-gá:

—Dacuitíi sá quihí-í ñuu Jerusalén, te yacá<sup>n</sup> cue tée cùu sacuéhé núú ñáiyu isràél, ndihí cue dútú cùnù, ndihí cue tée dàcuaha

ñaha xii ñáiyu nchaa tnúhu ní chídó tnùnì ndii Moisés, nchaa cue tée-á<sup>n</sup> ño dandòho ñaha-güedé xii-í, te cahni ñaha-güedé, dico nduu úní sá cúú-í te ndoto-í —cächí-gá xáha<sup>n</sup>-gá xii-güedé.

22 Te té Pèlú ní cana-dé Jèsús ñá xio, te ní ngüita-dé ténáá ñáhá-dé xii-gá, te xáha<sup>n</sup>-dē:

—¡Sá vā cächí Ndiöxí sá dúcá<sup>n</sup> ndòho-n chi ñá túú tàú-n sá dúcá<sup>n</sup> ndòho-n! —cachí-dé xáha<sup>n</sup>-dē xii-gá.

23 Te ndàa sáta Jèsús nútñi té Pèlú òrè duca<sup>n</sup> xáha<sup>n</sup>-dē xii-gá núu ní nchócuñhu-gá, te xáha<sup>n</sup>-gá xii-dé:

—¡Xocuiñi yòhó yucu ñávàha núu-í-a chi dicó quidé tneñu-n! Chi ñá túú sàni iní-ò dàtná sání iní Yá Ndiöxí chi ñá-ni sàni iní-ò ndihí dava-gá cue ñáiyu ndecu ñuyíú-a —cächí-gá xáha<sup>n</sup>-gá xii-dé.

24 Te sáta dúcá<sup>n</sup> te ní xáha<sup>n</sup>-gá xii nchaa cue tée xica cuu ndihí-gá:

—Nchaa ñáiyu cuiní chitnahá ñáhá xii-í, te xini ñuhu-xi dañá-yu vá cáda-gá-yu sá sání iní méé-yu, te ío cada ndee iní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í. 25 Te nchaa ñáiyu cuiní sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáiyu ñá túú tnàhí yuhú cuèi nándi sá ná yáha-yu cundecu-yu ñuyíú-a sá cuendá-í, te ñáiyu-á<sup>n</sup> naníhí tàhú-yu. 26 Te cuèi nchaandi túhú sá ío ñuyíú-a na nihí ñáiyu cundecu ndihí-yu, dico núu diu nchaa xíá<sup>n</sup> ná càda cuíta nihnú-yu te ñá túú vèdana nàndihí-xi sá dúcá<sup>n</sup> ndecu ndihí-yu nchaa xíá<sup>n</sup>. Te ni ñá sá ío ñuyíú-a vá chindèe ñaha-xi xii-yu cuendá naníhí tàhú-yu. 27 Te ndáá quée-xí tnúhu cáhá<sup>n</sup>-í, chi na quixi tucu yúhú Tée cùu ñaní tnáhá-yu ncháá-yu, te dàvá-á<sup>n</sup> quini-yu sá ío càhnu cuu-í dàtná càhnu cuu Tātá-í Dútú Ndiöxí, te quixi-í ndihí cue espíritú xínú cuèchi núú-gá, te dàvá-á<sup>n</sup> cuáha-í nchaa ñáiyu sá ndúú tãhü-yu nàcuáa ndùu sá ñá quidé-yu ñá ñá-yu. 28 Te na cächí tnúhu ndáá-í xii-ndo sá ío dava nchòhó ñáiyu ndecu iha vitna vá cùu-ni-ndo, chi cundecu-ni-ndo ndéé quini-ndó quixi tucu yúhú Tée cùu ñaní tnáhá-ndó nchàa-ndo taxi tnuní-í nchaa ñáiyu —cächí-gá xáha<sup>n</sup>-gá xii-güedé.

## 17

*Ní nadáma dóo Jèsús ndihi núú-gǎ  
(Mr. 9:2-13; Lc. 9:28-36)*

<sup>1</sup> Te núú ìnú nduu sá dúcá<sup>n</sup> ñí cáhá<sup>n</sup> Jèsús, te ní xica-gǎ cuásaá-gǎ ì<sup>n</sup> yucu dùcú<sup>n</sup>, te ndèca-gǎ té Pèlú, ndihi té Jàcobó, ndihi té Juáá ñaní té Jàcobó-á<sup>n</sup> cuásaá. Te úní tnàhí-ni cue téé-á<sup>n</sup> ndécá-gǎ cuásaá. <sup>2</sup> Te yucu-á<sup>n</sup> ndécú-gǎ ní nadáma núú-gǎ ndihi dóo-gǎ, te núú-gǎ súúni dátása<sup>n</sup>-xi dátná quidé-xí núú nchíanchii, te dóo-gǎ súúni ñí nduu cuixí<sup>n</sup> dátná cáá ñùhú cuixí<sup>n</sup>. <sup>3</sup> Te òré-ni-á<sup>n</sup> ñí xiní-güedé ndíi Moisés ndihi té Èliás nútní-güedé ndihi-gǎ ndátnùhu ndihi ñaha-güedé xii-gǎ. <sup>4</sup> Te té Pèlú ní xáha<sup>n</sup>-dè xii Jèsús:

—Mèstrú, ñváha ní cuu sá ndécú-ó ìha vitna! Te núú cuìní-n, te na dàcaa-ndí úní tnàhá vehe tnuvixi<sup>n</sup>, te ì<sup>n</sup> cuu cuèndá-n, te ì<sup>n</sup> cuu cuèndá té Moisés, te ì<sup>n</sup> cuu cuèndá té Èliás —càchí-dé xáha<sup>n</sup>-dè xii-gǎ.

<sup>5</sup> Te ñini dùca<sup>n</sup> cahá<sup>n</sup> té Pèlú ní quexìo ì<sup>n</sup> vícò núú ndécú-güedé ní dádáhu ñaha-xi xii-güedé te súúni chàhnchí. Te xití vícò-á<sup>n</sup> ñí tecú ní cáhá<sup>n</sup> Yá Ndiõxí, te xáha<sup>n</sup>-gǎ xii-güedé:

—Tée-a cùu-dé Déhe-í téé ío cùu iní-í, te ío cùdíí iní-í-dé, te cundedóho-ndo nchàa tnúhu cáhá<sup>n</sup>-dé —duha ní xáha<sup>n</sup>-gǎ xii-güedé.

<sup>6</sup> Te sá dúcá<sup>n</sup> ñí cáhá<sup>n</sup> Yá Ndiõxí ní tecú dóho cue téé xica cuu ndihi Jèsús te ío ní yùhú-güedé, te ní ngüíñí xití-güedé te ní nuu núú-güedé ndàa núú ñùhú. <sup>7</sup> Te Jèsús cuáhá<sup>n</sup>-gǎ núú xíndecu cue téé xica cuu ndihi-gǎ, te ní tendaha ñaha-gǎ, te xáha<sup>n</sup>-gǎ xii-güedé:

—Chí ndácuñí, vá yùhú-ndó —càchí-gǎ xáha<sup>n</sup>-gǎ xii-güedé.

<sup>8</sup> Te òré ní ndanehe núú-güedé, te ñá túú-gǎ ní xiní-güedé cue téé úú-á<sup>n</sup> chí mee-nǎ Jèsús. <sup>9</sup> Te òré cuánuu ndihi ñaha Jèsús xii-güedé tindúú-á<sup>n</sup>, te ní xáha<sup>n</sup>-gǎ xii-güedé:

—Vá yõo cúñaha-ndo ñí ì<sup>n</sup> sá ñí xiní-ndó núú ñí sáá-ó-á, te cuu cáhá<sup>n</sup>-ndó dico ndéé ná yáha ndoto yùhú Tée cùu ñaní tnàhá-ndó nchàa-ndo sá cùú-í —càchí-gǎ xáha<sup>n</sup>-gǎ xii-güedé.

<sup>10</sup> Te cue téé xica cuu ndihi-gǎ ní xáha<sup>n</sup>-güedé xii-gǎ:

—Cuìní-ndí cachí tnúhu-n nǎ cuèndá cue téé dàcuaha ñaha xii ñáyiu nchaa tnúhu ní chídó tnùní ndíi Moisés càchí-güedé sá dǐhna-gǎ té Èliás quixi, te dàtnùní quixi Yá tendaha Yá Ndiõxí quixi ñuyíú-a —càchí-güedé xáha<sup>n</sup>-güedé xii-gǎ.

<sup>11</sup> Te Jèsús ní xáha<sup>n</sup>-gǎ xii-güedé:

—Ndáá sá códó nùu ì<sup>n</sup> téé quixi-dé te cada-dé dátná ní quide té Èliás te téé-á<sup>n</sup> cada ndáá-dé nchaa nàcuáa cùu. <sup>12</sup> Te na càchí tnúhu-í xii-ndo vitna sá sá ní quixi téé ní quide dátná ní xóo cada té Èliás, te cue ñáyiu ñá túú ní cùtnuní iní-yu sá díú-dè, te ní quide ñahá-yu xii-dé nchaa nàcuáa ní quixi iní méè-yu, te diu-ni duca<sup>n</sup> càda ñaha tucú-yu xii yùhú Tée cùu ñaní tnàhá-yu ncháa-yu, chí dandòho ñahá-yu xii-í —càchí-gǎ xáha<sup>n</sup>-gǎ xii-güedé.

<sup>13</sup> Te cue téé xica cuu ndihi-gǎ ní cutnùní iní-güedé sá cuèndá ndíi Juáá téé ní xóo dacuàndute ñaha xii ñáyiu ní cáhá<sup>n</sup>-gǎ.

*Jèsús quidé tǎtna-gǎ ì<sup>n</sup> téé cuechi tnàhá  
cuéhé xiyíhí*

*(Mr. 9:14-29; Lc. 9:37-43)*

<sup>14</sup> Te Jèsús ní nasáá-gǎ ndihi cue téé ní sáá ndihi-gǎ tindúú-á<sup>n</sup> núú xíndecu vai ñáyiu, te ní quexìo ì<sup>n</sup> téé núú-gǎ ní ngüíñí xití-dè, te xáha<sup>n</sup>-dè xii-gǎ:

<sup>15</sup> —Mèstrú, cundàhú iní déhe-í chí tnàhá-dé cuéhé xiyíhí, te ío dándoho ñaha-xi xii-dé, te ní cuu vai xito daquée ñaha-xi núú ñùhú xii-dé, te ní cuu vai tucu xito dangaunihnu ñaha-xi ndute xii-dé. <sup>16</sup> Te sa ndèca-í-dé ní quixi núú cuè téé xica cuu ndihi-n dico ñá túú ní ndàcu-güedé cada tǎtna ñaha-güedé xii-dé —càchí-dé xáha<sup>n</sup>-dè xii-gǎ.

<sup>17</sup> Te Jèsús ní xáha<sup>n</sup>-gǎ xii nchaa ñáyiu xíndecu-á<sup>n</sup>:

—Nchaa nchòhó ñáyiu ndècu ñuyíú-a, ío sáá iní-ndó chí ñá túú cuìní-ndó quíndáá iní-ndó Yá Ndiõxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcá<sup>n</sup>-gǎ cada-ndo-i? Te chí cándèca téé cùhú-á<sup>n</sup> táquixi iha —cachí-gǎ xáha<sup>n</sup>-gǎ xii-yu.

18 Te Jèsús ní tenàá-gá espíritú cúndìhi yucu ñávãha yìhi ñaha xii téé-á<sup>n</sup>, te ní queue ñaha-xi xii-dé, te òré-ni-á<sup>n</sup> nǐ ndúha-dé.

19 Te sátá dúcá<sup>n</sup> te òré ndécú mèe Jesús ndìhi cue téé xica cuu ndìhi-gá, te ní xicá<sup>n</sup> tnúhú-güedé núú-gã, te xãha<sup>n</sup>-güedé xii-gá:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú cúndìhi yucu ñávãha yìhi ñaha xii téé-ã<sup>n</sup> — càchí-güedé xãha<sup>n</sup>-güedé xii-gá.

20 Te Jèsús ní xãha<sup>n</sup>-gã xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yã Ndiõxí. Te na càchí tnúhu ndáá-í xii-ndo sã nõu nchòhó quíndáá ndisa iní-ndó Yã Ndiõxí cuèdicó luha lí dàtná lìhli ndíquí<sup>n</sup> yutnu nàni mostázá, te duca<sup>n</sup> te cuu cúñaha-ndo xii ì<sup>n</sup> tñdúú xocuíñí-xi núú ndécú-xí te xocuíñí-xi. Te nchaa núú sã vãha ndacu-ndo càda-ndo te núu na quíndáá iní ndisa-ndo Yã Ndiõxí. 21 Te xini ñuhu-xi sã ïo cáhá<sup>n</sup> ndìhi-ndo-gã te ñá túú tnáhí ná caxi-ndo cáhá<sup>n</sup> ndìhi-ndo-gã, te duca<sup>n</sup> te ndacu-ndo queñuhu-ndo espíritú cúndìhi yucu ñávãha yìhi ñaha xii ñáyiu, dàtná cúu espíritú sá yíhí ñaha xii téé-ã<sup>n</sup> ní cùu — cachí-gá xãha<sup>n</sup>-gã xii-güedé.

*Jèsús càhá<sup>n</sup> tucu-gá sá cáhni ñãha-güedé xii-gá*

*(Mr. 9:30-32; Lc. 9:43-45)*

22 Te nini xica cuu Jesús ndìhi cue téé xica cuu ndìhi-gá distritú Galileá, te ní xãha<sup>n</sup>-gã xii-güedé:

—Yúhú Téé cùu ñaní tnáhá-ndó nchaa-ndo sãá ì<sup>n</sup> nduu te cuáha cuèndá ñáhá-güedé xii-í núú cuè téé cùu úhú iní ñáhá, 23 te cahni ñaha-güedé xii-í dico nduu úní sá cùú-í te ndoto-í —càchí-gá xãha<sup>n</sup>-gã xii-güedé.

Te sátá dúcá<sup>n</sup> nǐ xãha<sup>n</sup>-gã xii-güedé, te ïo ní ndíhú iní-güedé.

*Díhú<sup>n</sup> cuèndá veñúhu*

24 Te òré ní quexio Jesús ndìhi cue téé xica cuu ndìhi-gá ñuú Capèrnaúm, te cue téé quide cobrá díhú<sup>n</sup> cuèndá veñúhu ní sáhá<sup>n</sup>-güedé ní cáhá<sup>n</sup> ndìhi-güedé té Pèlú, te xãha<sup>n</sup>-güedé:

—¿Chãhu mèstrú-ndó úú díhú<sup>n</sup> sã nání drãcmá cuèndá veñúhu ã<sup>n</sup> ñáhá? — càchí-güedé xãha<sup>n</sup>-güedé xii-dé.

25 Te té Pèlú ní xãha<sup>n</sup>-dë:

—Chãhu-dé —càchí-dé xãha<sup>n</sup>-dë xii-güedé.

Te té Pèlú cuánguihu-dé xití vehe núú ndécú Jesús, te díhna-gá ní cáhá<sup>n</sup>-gá, te xãha<sup>n</sup>-gã xii-dé:

—Xímú, ¿nása sàni iní-n, ná cúú ñáyiu quide cobrá ñáhá cuè téé yìndaha ñáyiu ndécú ñuyúú-a cuèndá nchaa sá ndúú yãhu ñuú-güedé ndìhi cuèndá nchaa díhú<sup>n</sup> sã ngàutnáha, cue ñáyiu ñuú-güedé ã<sup>n</sup> cuè ñáyiu véxi xica quide cobrá-güedé? — càchí-gá xãha<sup>n</sup>-gã xii-dé.

26 Te té Pèlú ní xãha<sup>n</sup>-dë xii-gá:

—Cue ñáyiu véxi xica quide cobrá-güedé — càchí-dé xãha<sup>n</sup>-dë xii-gá.

Te Jèsús ní xãha<sup>n</sup>-gã xii-dé:

—Te núu duca<sup>n</sup> te cue ñáyiu ñuú-güedé ñá túú nã chãhu-yu te núu duca<sup>n</sup>. 27 Dico cuèndá sá vã yõo dasátú-ó iní-xi, te cuáhá<sup>n</sup> làgúná te dàquée-n sã tníí-n chácá xití ndute, te chácá díhnanuu na tàva-n te cundehe-n yùhu-di, chi yìhi ì<sup>n</sup> díhú<sup>n</sup> cuixí<sup>n</sup>. Te díhú<sup>n</sup>-ã<sup>n</sup> canehe-n quíhí<sup>n</sup> cháhu-n cuèndá-í ndìhi cuèndá-n, chi díhú<sup>n</sup>-ã<sup>n</sup> sa tnahá quéyãhu cuèndá-ó ndí ndúú-ó — càchí-gá xãha<sup>n</sup>-gã xii-dé.

## 18

*Cue téé ndùcu tnúhu núú Jèsús yoo ïo-gá cúnùu*

*(Mr. 9:33-37; Lc. 9:46-48)*

1 Te sátá dúcá<sup>n</sup> te cue téé xica cuu ndìhi Jesús ní sáhá<sup>n</sup>-güedé núú-gã, te xãha<sup>n</sup>-güedé xii-gá:

—Cachí tnúhu xii-ndí, yoo ïo-gá cúnùu núú cuè ñáyiu yìndaha ñaha Yã Ndiõxí — càchí-güedé xãha<sup>n</sup>-güedé xii-gá.

2 Te Jèsús ní cana-gá ì<sup>n</sup> té lìhli te ní sanutnìí ñaha-gã xii-dé cuádava tnuú-güedé.

3 Te xãha<sup>n</sup>-gã xii-güedé:

—Na càchí tnúhu ndáá-í xii-ndo sã nõu vã dáñá-ndó nchaa sá ñã túú vãha quide-ndo, te nduu ndàhú iní-ndó dàtná ndàhú iní té lìhli-a, te vã ndúú tãhú-ndó ndìhu ndaha ñaha Yã Ndiõxí xii-ndo. 4 Te ñáyiu quide datná quidé tã lìhli-a ndàhú iní-yu, te ñá túú quide cahnú-yu mèé-yu, ñáyiu-ã<sup>n</sup> ïo cunúú-yu núú ndécú Yã Ndiõxí táxi tnùnì-gá. 5 Te nchaa ñáyiu na quèhe<sup>n</sup> cuèndá ì<sup>n</sup> landú dàtná té lìhli-a cuèndá sá



cúu ínî ñáhă-yu xii-í ñá, te cada iní-yu sá yúhú ní quehe<sup>n</sup> cuendá-yu —càchí-gá xăha<sup>n</sup>-gă xii-güedé.

*Quihi iní-ó vă cündècu-o ichi cuehé ichi duha*

*(Mr. 9:42-48; Lc. 17:1-2)*

<sup>6</sup> Te Jèsús xăha<sup>n</sup> tùcu-gá xii-güedé:

—Te núu ì<sup>n</sup> tée na dăcahá<sup>n</sup>-dé cue ñáyiú sàndáá ínî ñáhá xii-í cadá-yu nándi sá cuèhé sá dúhá, te váha-gá sá ná dăcutu ndeé-güedé ì<sup>n</sup> yúú yódó dúcú<sup>n</sup>-dě, te dăquée ñaha-güedé xii-dé xití ndute làmár, te ñá díú să cündècu-dé duca<sup>n</sup> cāda-dé. <sup>7</sup> ;Te ndàhú ní cuu nchaa ñáyiú xīndecu ñuyíú-a, chi coo cue tée dacáhá<sup>n</sup> ñáhá xii-yu cadá-yu nándi sá cuèhé sá dúhá te dacuítí să dúcá<sup>n</sup> cāda-xi! ;Dico ndàhú ní cuu cue tée duca<sup>n</sup> na dăcahá<sup>n</sup> ñáhá xii-yu cadá-yu nándi sá cuèhé sá dúhá!

<sup>8</sup> 'Te núu ì<sup>n</sup> xio ndaha-ndo àdi ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chi váha-gá sá nánihí tàhú-ndó cuèi na cuíta ì<sup>n</sup> xio ndaha-ndo àdi ì<sup>n</sup> xio sáhá-ndó, te ñá díú să quihi<sup>n</sup>-ndó ñihí ní ndúú-ndó núú ñùhú núú càyú. <sup>9</sup> Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi váha-gá sá nánihí tàhú-ndó cuèi na cuíta ì<sup>n</sup> xio tinùu-ndo, te ñá díú să ndi ndúú xio núú-ndó quihi<sup>n</sup>-ndó núú ñùhú núú càyú.

*Cuendá ì<sup>n</sup> mbéé quihi ní xíta*

*(Lc. 15:3-7)*

<sup>10</sup> 'Te vá dăquée tihú-ndó cuè ñáyiú cùu cuendá-í cuèi cùu-yu ñáyiú ío ndàhú ínî-xi. Te na cāchí tnúhu-í xii-ndo să cuè espíritú xínú cuèchi núú Yă Ndiöxí, cue espíritú néhé cuendá ñáhá xii-yu ñuyíú-a, nchaa-ni nduu nchaa-ni òré ndécú-xi núú Tătà-í Dútú Ndiöxí Yaá ndécú àndiú. <sup>11</sup> Te duca<sup>n</sup> chi yúhú Tée cùu ñani tnáhá-ndó nchaa-ndo véxi-í ñuyíú-a dăcácu nihnu-í ñáyiú núú ùhú núú ndàhú, ñáyiú ta xíta nihnu cuáhá<sup>n</sup>.

<sup>12</sup> '¿Te nása sàni ínî-ndó cuendá ì<sup>n</sup> tée ndècu ì<sup>n</sup> ciendú mbéé-xi?, chi núu na cuíta ì<sup>n</sup>-di te dândóo-dé cūmídícó sáhú<sup>n</sup> cūmí-di cundecu-di ì<sup>n</sup> yucu te quihi<sup>n</sup>-dé cúnúndúcú-dé quihi ní xíta-án. <sup>13</sup> Te núu na nánihí-dě-di, te nchòhó sa cùtnuní ínî-ndó să ío-gá cudí ínî-dé cuendá quihi ní xíta-án

òré naníhí-dě-di dăcúúxí cūmídícó sáhú<sup>n</sup> cūmí quihi ñá túú ní xíta-án. <sup>14</sup> Te duca<sup>n</sup> sătnahá-xi quide Tătá-ó Dútú Ndiöxí Yaá ndécú àndiú, chi cuini-gá sá vă cuíta ni ì<sup>n</sup> cue ñáyiú cùu cuendá-gá.

*Cada cāhnu iní-ó să quidé ñaha tnaha ñáyiú-o*

*(Lc. 17:3)*

<sup>15</sup> 'Te núu ì<sup>n</sup> ñáyiú ndècu ndihi-ndo ní quidé-yu ì<sup>n</sup> sá ñà túú tàú-yu cadá-yu sá cúu-xi-ndó, te cāhá<sup>n</sup>-ndó dōho-yu núú méé núú ì<sup>n</sup>-ndó ndihi-yu cuendá sá ná ndixi cuèchi ínî-yu sá ñà túú quide váha-yu. Te núu ní tní<sup>n</sup>-yu tnúhu ní xáha<sup>n</sup>-ndo xii-yu, te ní ndacu-ndo ní nacanu ichi-ndó-yu.

<sup>16</sup> Te núu ñá túú ní cuini-yu tní<sup>n</sup>-yu tnúhu xăha<sup>n</sup>-ndo xii-yu, te nducu-ndo ì<sup>n</sup> àdi úú tnáhá cue tée canehe núú-güedé cuendá cundedóho-güedé năcuáa ndúu tnúhu ndàtnúhu-ndo ndihi-yu. <sup>17</sup> Te tnáhá cue tée-án cāhá<sup>n</sup>-güedé dōho-yu, dico núu ni tnúhu cāhá<sup>n</sup> cue tée-án ñà túú ní cuini-yu tní<sup>n</sup>-yu, te dātúu-ndo núú dăva-gá ñáyiú ndècu ndihi-ndo ichi Xítóhó Jesucrístú cuendá cutnúní ínî-yu năcuáa quide ñáyiú-án. Te núu ñáyiú ndècuèchi-án ñà túú ní cuini-yu tní<sup>n</sup>-yu tnúhu sá ní xáha<sup>n</sup> dăva-gá cue ñáyiú ndècu ichi-gá, te cada-ná ínî-ndó să cúu-yu ñáyiú ñà túú ndècu ichi Yă Ndiöxí dātá cue tée cuihna ínî-xi quide cobrá ñáhá xii ñáyiú cuendá impuestú.

<sup>18</sup> 'Te na cāchí tnúhu ndáá-í xii-ndo să núu nchòhó ná cāchí-ndó să ndécú cuèchi ñáyiú, te diu-ni duca<sup>n</sup> cāhá<sup>n</sup> Yă Ndiöxí, àdi cāchí-ndó să ñà túú cuèchi-yu te diu-ni duca<sup>n</sup> cāhá<sup>n</sup> tucu-gá, te duca<sup>n</sup> chi nchòhó quidé-ndó năcuáa cāhá<sup>n</sup>-gá.

<sup>19</sup> 'Te na cāchí tnúhu-í xii-ndo să núu úú tnáhá-ndó cùu ì<sup>n</sup>-nuu-ndo cāhá<sup>n</sup> ndihi-ndo Tătà-í Dútú Ndiöxí Yaá ndécú àndiú xicá<sup>n</sup>-ndó núú-gă núu ná cúú să cuini-ndó, te taxi-gá núu ná cúú să xicá<sup>n</sup>-ndó núú-gă. <sup>20</sup> Te núu úú tnáhá-ndó àdi úní tnáhá-ndó ní natacá-ndó ì<sup>n</sup> xichi cuendá sá ñúhú ínî ñáhá-ndó xii-í, te xía<sup>n</sup> ndécú ndihi ñaha-í xii-ndo —cāchí-gá xăha<sup>n</sup>-gă xii-güedé.

<sup>21</sup> Te té Pèlú ní sáhá<sup>n</sup> ndehe yatni-dé núú Jèsús, te xăha<sup>n</sup>-dě xii-gá:

—Mèstrú, cachí tnúhu xii-í ná daha xito cada cāhnu ínî-í tnàha ñáyiú-í te núu ì<sup>n</sup> sá

ná càda ñahá-yu xii-í. ¿Cuèdicó úsá xito-ǎn?  
—càchí-dé xǎha<sup>n</sup>-dë xii-gá.

<sup>22</sup> Te Jèsús ní xáha<sup>n</sup>-gǎ xii-dé:

—Yúhú càchí-í sá ñà díú-ní úsá xito cada càhnu iní-n-yu, chi únídico úxí xito ndihí úsá ndihí úsá xito cada càhnu iní-n-yu —càchí-gá xǎha<sup>n</sup>-gǎ xii-dé.

*Cuèndá téé ñá túú quide cahnu iní tnàha ñáyiu-xi*

<sup>23</sup> Te xǎha<sup>n</sup> tùcu-gá xii-güedé:

—Na càni-í ì<sup>n</sup> cuèndú núú-ndó nàcuáa tecú tnùní-ndó nàcuáa cada-xi òré ndihú ndaha ñàha Yá Ndiõxí xii ñáyiu. ì<sup>n</sup> téé yìndaha ñaha xii ñáyiu ní sani iní-dé sá cáda ndǎá-dé ndihí cue téé xìnu cuechi núú-dë cuèndá nchaá sá tàú-güedé núú-dë. <sup>24</sup> Te òré sa ní ngúndecu túha-dé te ní quexìo ì<sup>n</sup> téé xìnu cuechi núú-dë. Te téé-ǎn tàú-dé cuéhé víhí díhú<sup>n</sup> núú-dë, chi tàú-dé úxí mìl díhú<sup>n</sup> sǎ nání tàlentú. <sup>25</sup> Te téé xìnu cuechi-ǎn ñà túú díhú<sup>n</sup> ndécú ndihí-dé nacháhu-dé sá tàú-dé núú patróón-dë-ǎn, núu xǎn ní táuchíú<sup>n</sup> tée cùu patróón-dë-ǎn dico ñàha-güedé xii-dé ndihí ñadìhí-dé ndihí cue déhe-dé ndihí nchaá sá ndécú ndihí-dé cuèndá nchaá-yu cuú-yu ñáyiu ñá túú tnàhí dàñá quee núú chíú<sup>n</sup> patróón-xi, te duca<sup>n</sup> te ndéyǎhu sá tàú-dé núú patróón-dë. <sup>26</sup> Te téé xìnu cuechi-ǎn ní ngüíñí xítí-dë núú patróón-dë, te xǎha<sup>n</sup>-dë: “Patróón, càhán ndàhú-í núú-n sǎ ìo ndee ìo càhnu cada iní-n sǎ dúhá tàú-í núú-n, te ñá túú nǎ caní iní-n chi nacháhu-í nchaá sá tàú-í núú-n”, càchí-dé xǎha<sup>n</sup>-dë xii patróón-dë. <sup>27</sup> Te téé cùu patróón-dë-ǎn ní cundàhú iní ñáhá-dë xii-dé, te ní quide càhnu iní ñáhá-dë, te ní dáñá ñàha-dé cuánuhú-dé. <sup>28</sup> Te téé xìnu cuechi-ǎn ní naníhí-dë ì<sup>n</sup> téé xìnu cuechi ndihí-dé ichi cuánuhú-dé, te téé ní naníhí-dë-ǎn tàú-dé sacú-ni díhú<sup>n</sup> núú-dë chi ì<sup>n</sup> cièndú-ni díhú<sup>n</sup> denàriú tàú-dé. Te ní tñi-dé téé tàú núú-dë-ǎn dácüèhné ñáhá-dë xii-dé, te xǎha<sup>n</sup>-dë: “Nacháhu sá tàú-n núú-í”, càchí-dé xǎha<sup>n</sup>-dë. <sup>29</sup> Te téé tàú-ǎn ní ngüíñí xítí-dë núú tée dii núú-xi tàú-dé-ǎn, te xǎha<sup>n</sup>-dë: “Càhán ndàhú-í núú-n sǎ cáda càhnu iní ñáhá-n xii-í sá tàú-í núú-n, te nacháhu cuéé-í nchaá sá tàú-í núú-n”, càchí-dé xǎha<sup>n</sup>-dë. <sup>30</sup> Dico téé dii núú-xi tàú-dé-ǎn ñà túú ní cuíní-dé cada ndee ìní-dé cundetú-dé nacháhu cuéé téé-ǎn sǎ tàú-dé, chi ní chihí

ñaha-dë vecaá cuèndá yàcá<sup>n</sup> quihi-dé ndéé nacháhu-dé nchaá sá tàú-dé. <sup>31</sup> Te dava-gá cue téé xìnu cuechi ní xini-güedé nàcuáa ní quide téé-ǎn, te ní cudéé<sup>n</sup>-güedé núú-dë, te ní sáhán-güedé ní xitnùhu-güedé téé cùu patróón-güedé sá dúcá<sup>n</sup> ní quide-dé. <sup>32</sup> Te téé cùu patróón-güedé-ǎn ní cana-dé téé duca<sup>n</sup> ní quide-ǎn, te ní xáha<sup>n</sup>-dë: “Yòhó cúú-n ì<sup>n</sup> téé ìo cuihna iní-xi xìnu cuechi núú-í, chi yúhú ní quide càhnu iní ñáhá-í xii-n cuèndá nchaá sá tàú-n núú-í òré ní cáhán ndàhú-n. <sup>33</sup> Te tnàhá yòhó tàú-n dùca<sup>n</sup> cada-n cada càhnu iní-n tée xìnu cuechi ndihí-n núú-í cuèndá nchaá sá tàú-dé núú-n dàtná ní quide ñaha-í xii-n ní quide càhnu iní-í cuèndá nchaá sá tàú-n”, càchí téé cùu patróón-ǎn xǎha<sup>n</sup>-dë xii téé duca<sup>n</sup> ní quide-ǎn. <sup>34</sup> Te téé cùu patróón-ǎn ní cudéé<sup>n</sup> víhí-dë sá dúcá<sup>n</sup> ní quide téé-ǎn, te ní táuchíú<sup>n</sup>-dë dandòho ñaha-güedé xii-dé ndéé nacháhu-dé nchaá sá tàú-dé —duha ní caní Jèsús cuèndú núú-güedé.

<sup>35</sup> Te xǎha<sup>n</sup> tùcu-gá xii-güedé:

—Dàtná ní quide téé cùu patróón-ǎn ní dándóhó-dë téé tàú núú-dë-ǎn duca<sup>n</sup> càda ñaha Tátá-í Dútú Ndiõxí Yaá ndécú àndiú xii-ndo, te núu vá ní yùhu ni iní-ndó càda càhnu iní-ndó sǎ quidé ñàha tnaha ñáyiu-ndo xii-ndo —cachí-gá xǎha<sup>n</sup>-gǎ xii-güedé.

## 19

*Jèsús càhá<sup>n</sup>-gá cuèndá cue ñáyiu dàña tnaha*

(Mr. 10:1-12; Lc. 16:18)

<sup>1</sup> Te sátá ní yáha duca<sup>n</sup> ní cáhán Jèsús, te ní ndee-gá distrítú Galiléa cuáhán-gá ndàa ìngá xio yúte Jòrdán yucu distrítú Jùdeá. <sup>2</sup> Te ìo cuéhé ñáyiu nchicú<sup>n</sup> ñáhá xii-gá cuáhán, te yàcá<sup>n</sup> ní quide tátna-gá nchaá ñáyiu cùhú.

<sup>3</sup> Te ní quexìo ì<sup>n</sup> úú cue téé cùu fariséú núú ndécú Jèsús xító ndéé ñáhá-güedé xii-gá núu nása cunduu tnùhu cáhán-gá, te xǎha<sup>n</sup>-güedé xii-gá:

—Véxi-ndí xicá<sup>n</sup> tnùhú-ndí núú-n, ¿cuu dàña ì<sup>n</sup> téé ñadìhí-dé núu ndédani càa ì<sup>n</sup> sǎ ñà túú cundáá-yu-ǎn? —càchí-güedé xǎha<sup>n</sup>-güedé xii-gá.

<sup>4</sup> Te Jèsús ní xáha<sup>n</sup>-gǎ xii-güedé:

—Te nchòhó, ¿náa ñá túú dàcuaha-ndo núú tütú Yá Ndiõxí, te diu núú tütú-gá

càhá<sup>n</sup>-xi sá cǔtnàhá ní cadúha-gá ñáyi, te téé ñadìhí ní cadúha-gá-ǎ? <sup>5</sup> Te duha cǎchí tucu-xi núú tǔtú Yǎ Ndiǒxí nàcúáa ní càhá<sup>n</sup>-gá: “Cue téé na ñihí ñadìhí-xi te dǐ<sup>n</sup>-ná cada-güedé tǎtá-güedé ndihí nǎná-güedé, chi ñadìhí-nǎ-güedé cuu cuu ndihí-güedé, te cada iní-ndó sǎ ñ<sup>n</sup>-nǎ yiqui cǔñú cuú-yu cundecú-yu”, duha cǎchí Yǎ Ndiǒxí núú tǔtú-gá. <sup>6</sup> Te xǎ<sup>n</sup> núu cada iní-ndó sǎ cué ñáyi úú-á<sup>n</sup> ñ<sup>n</sup>-nǎ yiqui cǔñú cuú-yu, te ñá túú-gǎ ndi dǐ<sup>n</sup> ndi dǐ<sup>n</sup> yiqui cuñú cuú-yu. Núu xǎ<sup>n</sup> ñá túú ndùu váha-xi dañá cué téé ñadìhí-güedé, chi mee Yǎ Ndiǒxí ní cǎchí-gá sá cúú úú-yu cundecú-yu —cǎchí Jèsús xǎha<sup>n</sup>-gǎ xii-güedé.

<sup>7</sup> Te ní xǎha<sup>n</sup>-güedé xii Jèsús:

—Te núu duca<sup>n</sup>, ¿te ná cuendá ndí Moisés ní cǎchí ndí sá núu ñ<sup>n</sup> téé cuíní-dé dañá-dé ñadìhí-dé, te cuu cadúha-dé ñ<sup>n</sup> tǔtú núú càhá<sup>n</sup>-xi sá ní dañá-dé ñadìhí-dé, te duca<sup>n</sup> te cuu dañá ñaha-dé ní cǎchí ndí vǎ? — cǎchí-güedé xǎha<sup>n</sup>-güedé xii-gá.

<sup>8</sup> Te Jèsús ní xǎha<sup>n</sup>-gǎ xii-güedé:

—Te duca<sup>n</sup> ní cǎchí ndí Moisés sá cúú dañá-ndo ñadìhí-ndó, chi nchòhó ío sǎá iní-ndó, dico ndéé díhna chi ní tecú tnúhu nchaa cue téé sá vǎ dañá-güedé ñadìhí-güedé. <sup>9</sup> Dico yúhú cǎchí tnúhu-í xii-ndo sǎ núu ñ<sup>n</sup> téé na dañá-dé ñadìhí-dé te naquehe<sup>n</sup>-dé ñgá ñadìhí te ío nèhé quidé-dé, te núu ñá díú cuendá sá càhá<sup>n</sup> ndihí-a<sup>n</sup> ñgá téé duca<sup>n</sup> na dañá ñaha-dé. Te sá dúcá<sup>n</sup> cuendá-ni na dañá ñ<sup>n</sup> téé ñadìhí-dé, te ñ<sup>n</sup>-ni cuéchi cùu-xi ndihí cuéchi quide téé ndéca ñadìhí te càhá<sup>n</sup> ndihí-dé ñgá ñadìhí —cǎchí-gá xǎha<sup>n</sup>-gǎ xii-güedé.

<sup>10</sup> Te cue téé xica cuu ndihí-gá ní xǎha<sup>n</sup>-güedé xii-gá:

—Te núu duca<sup>n</sup> cùu cuendá cue téé ndihí ñadìhí-güedé, te váha-gá sá vǎ cǎndéca cue téé ñadìhí —cǎchí-güedé xǎha<sup>n</sup>-güedé xii-gá.

<sup>11</sup> Te Jèsús ní xǎha<sup>n</sup>-gǎ xii-güedé:

—Ñá ncháá ñáyi duca<sup>n</sup> ndùu táhú-yu cundecú-yu, chi mee-ni ñáyi ní cǎchí Yǎ Ndiǒxí sá dúcá<sup>n</sup> tnàhí nduu táhú cundecu mee. <sup>12</sup> Te ío cue téé duca<sup>n</sup> tnàhí ní nduu táhú-güedé ndéé òré ní cacu-güedé sá vǎ cǎndéca-güedé ñadìhí. Te ío cue

téé ñá ndácú-güedé candéca-güedé ñadìhí cuendá sá ní quide ñaha dàva-gá cue tnàha téé-güedé xii-güedé. Te dava-güedé ñá túú cǎndéca-güedé ñadìhí chi cuíní-güedé sá vǎ dañá ndéé-güedé cunu cuechi-güedé núú Yǎ Ndiǒxí. Te nchaa cue téé duca<sup>n</sup> ní nduu táhú núú Yǎ Ndiǒxí cundecu mee, te váha-ni te núu na cundecu mee-güedé — cǎchí-gá xǎha<sup>n</sup>-gǎ xii-güedé.

*Jèsús xicá<sup>n</sup> táhú-gǎ núú Yǎ Ndiǒxí cuendá landú*

(Mr. 10:13-16; Lc. 18:15-17)

<sup>13</sup> Te ñ<sup>n</sup> úú ñáyi ndécá-yu landú lǐhli cuáhá<sup>n</sup> núú Jèsús, chi cuíní-yu sá téndàha ñaha-gá xii-güexi, te cǎcá<sup>n</sup> táhú-gǎ núú Yǎ Ndiǒxí cuendá-güexi. Te cue téé xica cuu ndihí-gá ní ngüita-güedé ténáá ñhá-güedé xii-yu, te xǎha<sup>n</sup>-güedé sá vǎ dúcá<sup>n</sup> cǎdá-yu.

<sup>14</sup> Te Jèsús ní xǎha<sup>n</sup>-gǎ xii-güedé:

—Chí dañá ná quixi nahi cue landú lǐhli-á<sup>n</sup> núú-í-a, te vá cǎdí-ndó ìchi-güexi, chi dàtná cúú váha iní cue landú lǐhli-á<sup>n</sup> duca<sup>n</sup> cùu váha iní cue ñáyi yindaha ñaha Yǎ Ndiǒxí —cǎchí-gá xǎha<sup>n</sup>-gǎ xii-güedé.

<sup>15</sup> Te ní tendaha ñaha-gá xii-güexi, te ní xicá<sup>n</sup> táhú-gǎ núú Yǎ Ndiǒxí cuendá-güexi, te sǎtá dúcá<sup>n</sup> ní quide-gá te ní xica-gá cuáhá<sup>n</sup>-gá.

*Ñ<sup>n</sup> téé cuica càhá<sup>n</sup> ndihí-dé Jèsús*

(Mr. 10:17-31; Lc. 18:18-30)

<sup>16</sup> Te ñ<sup>n</sup> téé cuechi ní quexio-dé núú ndécú Jèsús, te xicá<sup>n</sup> tnúhú-dé núú-gǎ, te xǎha<sup>n</sup>-dé xii-gá:

—Yòhó Mèstrú, cùu-n téé ío váha iní-xi, te cuíní-í núu vá cǔndéé iní-n cǎchí tnúhu-ñ nǎ cúú sǎ váha cada-í cuendá nduu táhú-í cundecu-í ndihí Yǎ Ndiǒxí ni caa ni quíhí<sup>n</sup> —cǎchí-dé xǎha<sup>n</sup>-dé xii-gá.

<sup>17</sup> Te Jèsús ní xǎha<sup>n</sup>-gǎ xii-dé:

—¿Te cǔtnuní iní-n nàcuáa ndùu tnúhu càhá<sup>n</sup>-n sǎ yúhú váha iní-ǎ?, chi ñ<sup>n</sup> dǐ díí-ni Yǎ Ndiǒxí ío váha iní-gá. Te núu cuíní-n nàníhí táhú-n te tnii-n nchaa tnúhu càhá<sup>n</sup> Yǎ Ndiǒxí, tnúhu sá sánú ìchi ñaha xii ñáyi nàcuáa cǎdá-yu cundecú-yu — cǎchí-gá xǎha<sup>n</sup>-gǎ xii-dé.

<sup>18</sup> Te téé cuechi-ǎ<sup>n</sup> ní xǎha<sup>n</sup>-dé xii-gá:

—¿Te ndénda cǎa tnúhu càhá<sup>n</sup> Yǎ Ndiǒxí cada-í-i? —cǎchí-dé xǎha<sup>n</sup>-dé xii-gá.

Te Jèsús ní xǎha<sup>n</sup>-gǎ xii-dé:



—Te duha ní cachí Yă Ndiõxí cada ñáyíu: “Vá cáhni-ndó tnàha ñáyíu-ndo, vá càhá<sup>n</sup> ndihí-ndo ñàdihí te núu ñá díú ñàdihí-ndó cùú-yu, te duca<sup>n</sup>-ni nchòhó cue ñáyíu dìhí tucu vá càhá<sup>n</sup> ndihí-ndo tée te núu ñá díú yì-ndo cuu-güedé, te vá dúhú-ndó sã ndécú ndihí tnaha ñáyíu-ndo, vá dácàcu-ndo cuéchi neñùú sá cúú-xí tnàha ñáyíu-ndo. 19 Te canehe-ndo sã yíñùhu núú tátá-ndó ndihí núú náná-ndó, te cundàhú iní-ndó tnàha ñáyíu-ndo dàtná cundàhú iní-ndó mèe-ndo”, duha ní cachí Yă Ndiõxí cada ñáyíu —càchí-gá xàha<sup>n</sup>-gã xii-dé.

20 Te tée cuechi-ã<sup>n</sup> ní xàha<sup>n</sup>-dë xii-gá:

—Nchaa xíã<sup>n</sup> ní ngüíta-í quidè-í ndéé cútnàhá cúú làndú-í, ¿te vitna nágá cúmãni cada-í-i? —càchí-dé xàha<sup>n</sup>-dë xii-gá.

21 Te Jèsús ní xàha<sup>n</sup>-gã xii-dé:

—Te núu cuñí-n cùu-n ñ<sup>n</sup> tée ío váha cada ndáá, te cuáhá<sup>n</sup> dico-n nchàa sá ndécú ndihí-n, te díhú<sup>n</sup>-n cuãha táhú-n cuè ñáyíu ndàhú, te duca<sup>n</sup> te nduu táhú-n ngündecu váha-n núú ndécú Yă Ndiõxí táxí tnùní-gá. Te sátá ná yàha duca<sup>n</sup> càda-n te quixi-n chìtnahá ñáhá-n xii-í —càchí-gá xàha<sup>n</sup>-gã xii-dé.

22 Te sá dúcá<sup>n</sup> ñí xàha<sup>n</sup> Jèsús xii-dé te ío ní cundiyí-dé, chi ío cuica-dë, te ní xica-dé cuáhá<sup>n</sup>-dé.

23 Te Jèsús ní xàha<sup>n</sup>-gã xii cue tée xica cuu ndihí-gá:

—Na càchí tnúhu ndáá-í xii-ndo sã ío úhú quíndáá iní ñaha cuè ñáyíu cuica xii Yá Ndiõxí cuèndá ndíhu ndaha ñàha-gá xií-yu. 24 Te na càchí tnúhu tucu-í xii-ndo sã yáchí-gá yàha ñ<sup>n</sup> caméyu yaú ñ<sup>n</sup> yiqui ticú dàcúúxí sã quíndáá iní ñ<sup>n</sup> ñáyíu cuica Yă Ndiõxí cuèndá ndíhu ndaha ñàha-gá xií-yu —càchí-gá xàha<sup>n</sup>-gã xii-güedé.

25 Te sá dúcá<sup>n</sup> ñí cáhá<sup>n</sup> Jèsús, xíã<sup>n</sup> ío ní cuñúhu cue tée xica cuu ndihí-gá, te ní ngüíta-güedé xitnàha-güedé:

—¿Yoo naníhí táhú te núu duca<sup>n</sup> vai<sup>n</sup>? —càchí-güedé xitnàha-güedé.

26 Te Jèsús ní ndacoto-gá núú-güedë, te xàha<sup>n</sup>-gã xii-güedé:

—Nchaa ñáyíu ñuyíú-a chi vá ndácü-yu ná cadá-yu nàcuáa ndíhu ndaha ñàha Yá Ndiõxí xií-yu, dico mee-gã chi ndacu-gá

ndíhu ndaha ñàha-gá xií-yu chi nchaandi túhú sá váha ndàcu-gá quidé-gã —càchí-gá xàha<sup>n</sup>-gã xii-güedé.

27 Te té Pèlú ní xàha<sup>n</sup>-dë xii-gá:

—Nchúhú ní dándõ-ndí nchaa sá ndécú ndihí-ndí, te ní tuha ñaha-ndí xii-n, ¿te ná cúú sã ñihí-ndí nduu táhú-ndí sá dúcá<sup>n</sup> ñí quide-ndí-i? —càchí-dé xàha<sup>n</sup>-dë xii-gá.

28 Te Jèsús ní xàha<sup>n</sup>-gã xii-güedé:

—Na càchí tnúhu ndáá-í xii-ndo sã ná sàá nduu, nduu saa nchaa sá ío andíu ndihí ñuyíú-a, te dàvá-á<sup>n</sup> cunucóo yúhú Tée cùu ñaní tnáhá-ndó nchàa-ndo ñ<sup>n</sup> núú xilé váha, te nchaa ñáyíu quini-yu sá ío càhnu cuu-í, te nchòhó cue tée ní tuha ñaha xii-í tnáhá-ndó cunucóo-ndo núú ñ<sup>n</sup> caa xilé váha ndí ùxúú tnáhá-ndó, te xíã<sup>n</sup> cunucóo-ndo càda ndáá-ndó cuéchi ndí ùxúú xichi cue ñáyíu isràél. 29 Te nchaa ñáyíu na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu duca<sup>n</sup> na cadá-yu sá cuèndá-í te ío-gá cuéhé sã cuãñaha Yă Ndiõxí cundecu ndihí-yu, te ñá díú-ní xíã<sup>n</sup> chi tnáhá nduu táhú-yu cundecú-yu ndihí-gá ñí caa ñí quíhí<sup>n</sup>. 30 Te dava ñáyíu cùnuu ndecu ichi Yá Ndiõxí vitna, ñáyíu-á<sup>n</sup> sáá nduu te vá ío-gá cunúú-yu dàtná cunúú-yu vitna, te dava ñáyíu nchícú<sup>n</sup> ñá túú cùnuu vitna, ñáyíu-á<sup>n</sup> sáá nduu te ío cunúú-yu —càchí-gá xàha<sup>n</sup>-gã xii-güedé.

## 20

### *Cuèndá cue tée quide chiu<sup>n</sup>*

1 Te xàha<sup>n</sup> tucu Jesús xii cue tée xica cuu ndihí-gá:

—Na càni-í ñ<sup>n</sup> cuèndú núú-ndó cuèndá tecú tnùní-ndó nàcuáa cada-xi òré ndíhu ndaha ñàha Yá Ndiõxí xii ñáyíu. ñ<sup>n</sup> tée ní xitu-dé yoho yàha stilé, te ñ<sup>n</sup> nduu ní quee-dé nehé-ni cuándúcú-dë cue tée cada chiú<sup>n</sup> núú dúcá<sup>n</sup> ñí xitu-dé yoho yàha stilé-á<sup>n</sup>. 2 Te òré ní ñihí-dë cue tée cada chiú<sup>n</sup>-á<sup>n</sup>, te ní quide ndáá-dé ndihí-güedé sá chãhu ñaha-dë xii-güedé ñ<sup>n</sup> díhú<sup>n</sup> denàriú ñ<sup>n</sup> nduu. Te sátá dúcá<sup>n</sup> te ní tendaha ñàha-dé xii-güedé cuáhá<sup>n</sup>-güedé cada chiú<sup>n</sup>-güedé núú dúcá<sup>n</sup> ñí xitu-dé yoho yàha stilé-á<sup>n</sup>. 3 Te dàtnùní ní xica tucu-dé cuáhá<sup>n</sup>-dë dàtná òré caá ñ<sup>n</sup> dátneé cuándúcú-gã-dé



cue té cada chiú<sup>n</sup> núú nǐ xitu-dé yoho yàha stilé-á<sup>n</sup>, te ní xiní-dé xǐnutnǐi ì<sup>n</sup> ùú cue té núú yàhu te ñá túú nǎ chiú<sup>n</sup> xíquide-güedé.

4 Te ní xáha<sup>n</sup>-dē xii-güedé: “Ñá túú cùdana cuyáchí-ndó càda-ndo chiú<sup>n</sup>-í te cháhu ñaha-í xii-ndo nàcuáa tàú-xi cunduu-ǎ<sup>n</sup>”, càchí-dé xáha<sup>n</sup>-dē xii-güedé. Te cue té-á<sup>n</sup> nǐ sáha-güedé tnúhu cada chiú<sup>n</sup>-güedé te ní xica-güedé cuáhá<sup>n</sup>-güedé. 5 Te té ní xitu yoho yàha stilé-á<sup>n</sup> nǐ xica tucu-dé dàtná òré caúxúú nduu cuándúcú-gǎ-dé cue té cada chiú<sup>n</sup>-dé, te ní níhí tucu-dé cue té cada chiú<sup>n</sup>. Te ní quee tucu-dé dàtná òré caá úní sacuaa, te diu-ni duca<sup>n</sup> nǐ quide tucu-dé. 6 Te ní quee tucu-dé dàtná òré caá úhú<sup>n</sup> sacuaa cuándúcú-gǎ-dé cue té cada chiú<sup>n</sup>-dé, te ní xiní-dé xǐnutnǐi ì<sup>n</sup> ùú cue té diu-ni núú yàhu-á<sup>n</sup> te ñá túú nǎ chiú<sup>n</sup> quide-güedé, te ní xáha<sup>n</sup>-dē xii-güedé: “Sànuu sá nchòhó ní cuu nchàca vitna ñá túú nihí-ndó chiú<sup>n</sup> cada-ndo”, cachí-dé xáha<sup>n</sup>-dē xii-güedé. 7 Te cue té-á<sup>n</sup> nǐ xáha<sup>n</sup>-güedé xii-dé: “Ñá túú nihí-ndí chiú<sup>n</sup> cada-ndí chi vá yõ ndücu ñaha xii-ndí”, càchí-güedé xáha<sup>n</sup>-güedé xii-dé. Te ní xáha<sup>n</sup>-dē xii-güedé: “Yúhú taxi-í chiú<sup>n</sup> cada-ndo, te quíhí<sup>n</sup>-ndó núú nǐ xitu-í yoho yàha stilé yàcá<sup>n</sup> cada chiú<sup>n</sup>-ndo, te cháhu ñaha-í xii-ndo nàcuáa tàú-xi cunduu”, càchí-dé xáha<sup>n</sup>-dē xii-güedé. 8 Te sátá nǐ dáhu nchícanchii, te tée dii chiú<sup>n</sup>-xi-á<sup>n</sup> nǐ xáha<sup>n</sup>-dē xii tée tàxi tnuní ñáhá xii cue té quide chiú<sup>n</sup>-á<sup>n</sup>: “Cúñaha xii nchaa cue té quide chiú<sup>n</sup>-á<sup>n</sup> ná quíxí-güedé te cháhu-n-güedé, te díhna-gá cue té nchícú<sup>n</sup> cuíi-nǎ cuánguihu núú chíú<sup>n</sup> ngüíta-n cháhu-n, te ndéé núú nǐ ndihí-ná cháhu-n cué té cuánguihu díhna nuu-gǎ núú chíú<sup>n</sup>”, càchí-dé xáha<sup>n</sup>-dē xii tée tàxi tnuní ñáhá xii cue té quide chiú<sup>n</sup>-á<sup>n</sup>. 9 Te díhna-gá cue té cuánguihu caá úhú<sup>n</sup> sacuaa ní quexio-güedé cuèndá cháhu ñaha-dē, te ní cháhu ñaha-dē ì<sup>n</sup> caa díhú<sup>n</sup> denàriú xii ì<sup>n</sup> ì<sup>n</sup>-güedé. 10 Te sátá nǐ cháhu-dé dava-gá cue té ní quide chiú<sup>n</sup>. Te ndéé núú nǐ ndihí-ná ní cháhu-dé cue té cuánguihu díhna nuu-gǎ núú chíú<sup>n</sup>. Te cue té-á<sup>n</sup> nǐ sani iní-güedé sá vái-gǎ cháhu ñaha-dē xii-güedé, dico ñáhá chi ì<sup>n</sup> caa-ni díhú<sup>n</sup> denàriú ní cháhu ñaha-dē xii ì<sup>n</sup> ì<sup>n</sup>-güedé.

11 Te cue té-á<sup>n</sup> nǐ quehe<sup>n</sup> cuèndá-güedé díhú<sup>n</sup>-güedé dico ñá túú ní quide váha-xi iní-güedé. 12 Te ní xáha<sup>n</sup>-güedé xii tée dii chiú<sup>n</sup>-xi ní quide-güedé: “¿Ñá cuèndá cue té nchícú<sup>n</sup> cuíi-nǎ cuánguihu núú chíú<sup>n</sup> ì<sup>n</sup>-ni ní cháhu ñaha-n xii-ndí ndihí-güedé, te ì<sup>n</sup> dii oré duha ní quide chiú<sup>n</sup>-güedé? Te nchúhú nchàca nchaa ní sahani iní-ndí ní quide chiú<sup>n</sup>-ndí, te ní ndoho-ndí cahni, te ì<sup>n</sup>-ni ní cháhu ñaha-n xii-ndí ndihí-güedé”, càchí-güedé xáha<sup>n</sup>-güedé xii tée dii chiú<sup>n</sup>-xi ní quide-güedé. 13 Te tée dii chiú<sup>n</sup>-xi ní quide-güedé-á<sup>n</sup> nǐ xáha<sup>n</sup>-dē xii ì<sup>n</sup> té-á<sup>n</sup>: “Yòhó, ñá túú quide-í ì<sup>n</sup> sá ñá túú tàú-í cada-í sá cúu-xí-n, chi ní quide ndáá-ó sǎ díú-ní ì<sup>n</sup> díhú<sup>n</sup> denàriú cháhu ñaha-í xii-n ì<sup>n</sup> nduu. 14 Te vitna quehe<sup>n</sup> díhú<sup>n</sup> cuèndá nduu-n te núhú-n, chi yúhú cuíní-í sá ì<sup>n</sup>-ní cháhu ñaha-í xii-n ndihí cue té nchícú<sup>n</sup> cuíi-nǎ cuánguihu núú chíú<sup>n</sup>. 15 Chi yúhú cuu-ni cada-í nani cuíní-í ndihí díhú<sup>n</sup>-í, ¿adi dico ñá túú quide váha-xi iní-n sǎ dúhá cundahú iní-í cue té-á<sup>n</sup> duca<sup>n</sup> cháhu-í-güedé?”, càchí tée cùu patróo<sup>n</sup>-á<sup>n</sup> xáha<sup>n</sup>-dē xii té-á<sup>n</sup>. Duha nduu cuèndú caní-í núú-ndó. 16 Te duha càhá<sup>n</sup>-í chi dava ñáyiu cunuú ndecu ichi Yá Ndióxi vitna sáá nduu te vá cúnúu vihi-gá-yu dàtná cúnúu-yu vitna, te dava ñáyiu ñá túú cunuú vitna sáá nduu ïo cúnúu-yu. Te ío cuéhé ñáyiu càhá<sup>n</sup> ñáhá Yá Ndióxi xií-yu dico sacú-ni-yu nduu táhü-yu cundecú-yu ndihí-gá –càchí-gá xáha<sup>n</sup>-gǎ xii-güedé.

*Jesús càhá<sup>n</sup> tucu-gá sá cáhni ñaha-güedé xii-gá*

*(Mr. 10:32-34; Lc. 18:31-34)*

17 Te ñuhu Jesús ichi cuásaá-gá ñuu Jerusálén ndihí cue té xica cuu ndihí-gá, te ní cana ñaha-gǎ xii-güedé ní naníhí tnáhá-güedé ndihí-gá, te ta ndàtnúhu ndihí ñaha-gǎ xii-güedé cuáhá<sup>n</sup>, te xáha<sup>n</sup>-gǎ xii-güedé:

18 –Vitna ñuhu-o ichi cuásaá-ó ñuu Jerusálén, te yàcá<sup>n</sup> cuáha cuèndá ñáhá-güedé xii yúhú Té cùu ñaní tnáhá-ndó nchàa-ndo núú cué té cùu dútú cúnúu, ndihí núú cué té dàcuaha ñaha xii ñáyiu nchaa tnúhu ní chídó tnuní ndíi Moisés. Te diu cue té-á<sup>n</sup> cùñaha-güedé xii dava-gá cue té sá cáhni ñaha-güedé xii-í. 19 Te cuáha cuèndá

ñáhá-güedě xii-í núú cuè téé ñá túú cùu cue téé israél, te cue téé-á<sup>n</sup> cudíquí ndeé ñáhá-güedě xii-í, te caniha-güedě ndihi ñii, te dàtnùní cata caa ñaha-güedě xii-í núú cùrúxí te núú cùrúxí-á<sup>n</sup> cuú-í, dico nduu úní sá cùú-í te ndoto-í —càchí-gá xáha<sup>n</sup>-gá xii-güedé.

*Nǎná tǎ Jàcobó ndihi té Juàá cuìní-a<sup>n</sup> sá cùnùu-güedé ndihi Jèsús*

*(Mr. 10:35-45)*

<sup>20</sup> Te cue déhe té Zebèdeú té Jàcobó ndihi té Juàá ndécá ñàha náná-güedě xii-güedé cuáhá<sup>n</sup> núú ndécú Jèsús, te òré ní quexìo-a<sup>n</sup> ndihi-güedé núú ndécú-gá te ní ngüíñí xítí-á<sup>n</sup> núú-gá cuendá cuìní-a<sup>n</sup> ndàtnúhu ndihi ñaha-a<sup>n</sup> xii-gá cuendá sá cúú-xí cuè déhe-a<sup>n</sup>. <sup>21</sup> Te cùmání-gá cáhá<sup>n</sup>-a<sup>n</sup> te ní xícá<sup>n</sup> tnúhú Jèsús núú-a<sup>n</sup>, te xáha<sup>n</sup>-gá:

—¿Ná cuìní-n? —càchí-gá xáha<sup>n</sup>-gá xii-a<sup>n</sup>.

Te ní xáha<sup>n</sup>-a<sup>n</sup> xii-gá:

—Véxi-í càhá<sup>n</sup> ndàhú-í núú-n núu vá cùndèe iní-n cùnucóo ñ<sup>n</sup> déhe-í-a xio cùha-n, te ingá-dé cunucóo-dé xio dàtni-n na saá nduu cùnucóo-n núú táxí tnùn-í —càchí-á<sup>n</sup> xáha<sup>n</sup>-a<sup>n</sup> xii-gá.

<sup>22</sup> Te Jèsús ní xáha<sup>n</sup>-gá xii úú cue téé-á<sup>n</sup>:

—Nchòhó, ñá túú cùtnuní váha iní-ndó nàcuáa ndùu sá xicá<sup>n</sup>-ndó núú-í. ¿Te náa cundee iní-ndó dandoho ñaha ñáyíu xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná càhni ñahá-yu xii-í-á<sup>n</sup>? —càchí-gá xáha<sup>n</sup>-gá xii-güedé.

Te ní xáha<sup>n</sup>-güedě xii-gá:

—Cundee iní-ndí yáha-ndí nchaa nàcuáa càhá<sup>n</sup>-n-á<sup>n</sup> —càchí-güedé xáha<sup>n</sup>-güedé xii-gá.

<sup>23</sup> Te Jèsús ní xáha<sup>n</sup>-gá xii-güedé:

—Ndáá sá cùndèe iní-ndó ndòho-ndo nchaa nacuaa ndòho-í, dico sá dúcá<sup>n</sup> cuìní-ndó sá ñ<sup>n</sup>-ndó cùnucóo-ndo xio cuhá-í, te ñ<sup>n</sup>-ndo cùnucóo-ndo xio datni-í, te xíá<sup>n</sup> chi ñá díú yùhú tàú-í cachí-í núu sá cúú cùnucóo-ndo àdi sá vǎ cúú cùnucóo-ndo, chi mee Tàtá-í Dútú Ndiòxí cachí-gá te núu ná cúú ñáyíu nduu táhú cunucóo diñi-í dàvá-á<sup>n</sup> —càchí-gá xáha<sup>n</sup>-gá xii-güedé.

<sup>24</sup> Te òré ní níhí ùxí-gá cue téé xica cuu ndihi-gá tnúhu nàcuáa ndùu sá cuìní cue téé úú-á<sup>n</sup>, te ní cudéé<sup>n</sup>-güedé núú cuè téé úú-á<sup>n</sup>.

<sup>25</sup> Te Jèsús ní cana-gá nchaa cue téé xica cuu ndihi-gá, te ní xáha<sup>n</sup>-gá xii-güedé:

—Nchòhó xini-ndó sá cuè téé yindaha nació<sup>n</sup> quidé-güedé sá ño cùnucóo-güedé, te nchaa dáva-gá cue téé cùnucóo ndihi-güedé quidé-güedé tnàhá-güedé sá ño cùnucóo-güedé.

<sup>26</sup> Dico nchòhó chi vá dúcá<sup>n</sup> càda-ndo, chi núu dáva-ndo cuìní-ndó cùnucóo-ndo, te xini ñuhu-xi cunu cuechi núú tnàhá-ndó te vá càdá-ndó sá cùnucóo-ndo. <sup>27</sup> Te núu dáva-ndo cuìní-ndó quène cáva-ndo, te cuu-ndo dàtná cue ñáyíu ñá túú tnàhí dàñá quee núú chíú<sup>n</sup> pàtróo<sup>n</sup>-xi cunu cuechi núú tnàhá-ndó. <sup>28</sup> Te cada-ndo dàtná quidé yùhú Téé cùu ñaní tnàhá-ndó nchaa-ndo, chi yùhú véxi-í ñuyíú-a dico ñá díú sá cùnucóo cuèchi ñáyíu núú-í chi véxi-í sá cùnucóo cuèchi-í núú-yu. Te cuú-í ñuyíú-a cuendá vǎi-yu cácu nihnú-yu núú ùhú núú ndàhú —càchí-gá xáha<sup>n</sup>-gá xii-güedé.

*Jèsús quidé tǎtna-gá núú ùú tnàhá cue téé cuáá*

*(Mr. 10:46-52; Lc. 18:35-43)*

<sup>29</sup> Te òré ní quee Jèsús ñuú Jericó ndihi cue téé xica cuu ndihi-gá, te cuéhé víhí ñáyíu nchicú<sup>n</sup> ñáhá xii-gá cuáhá<sup>n</sup>. <sup>30</sup> Te yuhu ìchi cuáhá<sup>n</sup>-gá xìnucóo úú tnàhá cue téé cuáá, te cue téé-á<sup>n</sup> ní cutnùn-í iní-güedé sá Jèsús ñúhú-gá ìchi-á<sup>n</sup> te ní ngüíta-güedé níhi càhá<sup>n</sup>-güedé, te xáha<sup>n</sup>-güedé xii-gá:

—¿Yòhó Mèstrú, ñaní tnàhá ndí Dàvíí, cundàhú iní ñáhá xii-ndí! —càchí-güedé xáha<sup>n</sup>-güedé xii-gá.

<sup>31</sup> Te cue ñáyíu tènáá ñáhá-yu xii-güedé, te xáhá<sup>n</sup>-yu sá ná càdí-güedé yuhu-güedé, dico uu<sup>n</sup>-gá níhi ní cáhá<sup>n</sup>-güedé, te xáha<sup>n</sup>-güedé xii-gá:

—¿Yòhó Mèstrú, ñaní tnàhá ndí Dàvíí, cundàhú iní ñáhá xii-ndí! —càchí-güedé xáha<sup>n</sup>-güedé xii-gá.

<sup>32</sup> Te ní ngüíñí Jèsús te ní cana ñaha-gá xii-güedé, te ní xícá<sup>n</sup> tnúhú-gá núú-güedé, te xáha<sup>n</sup>-gá:

—¿Ná cuìní-ndó càda ñaha-í xii-ndo-i? —càchí-gá xáha<sup>n</sup>-gá xii-güedé.

<sup>33</sup> Te ní xáha<sup>n</sup>-güedé xii-gá:

—Mèstrú, cuìní-ndí sá càdá tǎtna-n núú-ndí cuendá cundehe-ndí —càchí-güedé xáha<sup>n</sup>-güedé xii-gá.

<sup>34</sup> Te Jèsús ní cundàhú iní ñáhá-gǎ xii-güedé, te ní tendaha-gǎ núú-güedé. Te òré-ní ní ndúha núú-güedé, te nchìcú<sup>n</sup> ñáhá-güedé xii-gá cuáhá<sup>n</sup>.

## 21

*Jèsús cuánguihu-gá ñuú Jerusàlén*

(Mr. 11:1-11; Lc. 19:28-40; Jn. 12:12-19)

<sup>1</sup> Te òré sa ta cùyatni Jesús ndihi cue téé xica cuu ndihi-gá ñuú Jerusàlén, te ní quexìo-gá ndihi-güedé yatni vii-nǎ ñuú Bètfaqé, te xiá<sup>n</sup> cáá yùcu nani Olívú. Te ní ndatnúhu-gá ndihi úú cue téé xica cuu ndihi-gá, <sup>2</sup> te ní xáha<sup>n</sup>-gǎ xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te nanihí-ndó ì<sup>n</sup> búrru dìhí ndètníi-di ndihi déhe-di, te nandaxi-ndo-güèdì te candeca-ndo-güèdì quixi. <sup>3</sup> Te núú ió ñáyiu dàdaha<sup>n</sup> ñaha xii-güedì, te cúñaha-ndo xii-yu sá yùhú Yaá xicá cùu ndihi-ndo xini ñuhu-í-güedì, te ndihi-ni natendaha-í-güedì núhú-güedì cúñaha-ndo —càchí-gá xáha<sup>n</sup>-gǎ xii-güedé.

<sup>4</sup> Te duca<sup>n</sup> ñí cuu chí ní quee ndáá-xi nàcuáa ní chídó tnùnì ì<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha núú tütú-gá núú càchí-xi:

<sup>5</sup> Chí cúñaha cuè ñáyiu ñuú Sìón ná cádá cuendá-yu, chí véxi téé yìndaha ñaha xii-yu yòdo-dé ì<sup>n</sup> búrru líhli déhe ì<sup>n</sup> búrru quiti sa xido,

te cùu-dé ì<sup>n</sup> téé ió ndàhú iní-xi. Duha ní chídó tnùnì ì<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha núú tütú-gá.

<sup>6</sup> Te cue téé xica cuu ndihi-gá ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gǎ xii-güedé cada-güedé.

<sup>7</sup> Te ní ndexìo-güedé ndécá-güedé ì<sup>n</sup> búrru dìhí ndihi déhe-di, te ní sacá<sup>n</sup> ndodo-güedé dóo-güedé sátá-güedì, te dàtnùnì cuásaá Jèsús sátá ì<sup>n</sup>-dì ní ngódó ñaha-gá xii-di.

<sup>8</sup> Te ió cuéhé ñáyiu ta sàcá<sup>n</sup>-yu dóo-yu ichi cuáhá<sup>n</sup>-gá cuendá núú dǒo-yu-á<sup>n</sup> yǎha-gá ndihi quiti yòdo-gá. Te davá-yu xèhndé-yu ndaha yùtnu ñúú tá sàcá<sup>n</sup>-yu cuáhá<sup>n</sup>. <sup>9</sup> Te nchaa ñáyiu yòdonuu núú-gǎ ndihi nchaa ñáyiu nchìcú<sup>n</sup> ndàa sátá-gǎ ní ngüíta-yu níhi càhá<sup>n</sup>-yu, te càchí-yu:

—¡Ío càhnu cuu Yaá cúú ñàní tnáhá ndí Dàvíí! ¡Te Yá Ndiòxí ió na chìndee ñaha-gá

chí cùu-gá Yaá ní tendaha Yǎ Ndiòxí véxi quide núú-gǎ! ¡Te ndéé nchaa sá ió andíu na càchí-xi sá ío càhnu cuu-gá! —duha càchí-yu.

<sup>10</sup> Te òré cuánguihu Jèsús ñuú Jerusàlén, te nchaa ñáyiu ñuú-á<sup>n</sup> ñí ngüíta-yu xicuáá-yu, te davá-yu ní ngüíta-yu xitnàhá-yu:

—¿Yoo cùu téé-ǎ<sup>n</sup>? —càchí-yu xitnàhá-yu.

<sup>11</sup> Te davá-yu xitnàhá-yu:

—Téé-ǎ<sup>n</sup> cúú-dé Jèsús téé càhá<sup>n</sup> tnúhu Yá Ndiòxí, te cùu-dé téé ñuú Nazàrét ñuú yìndèhu distritú Galileá —càchí-yu xitnàhá-yu.

*Jèsús ñá túú tnàhá iní-gá nàcuáa xíquide ñáyiu xití veñúhu*

(Mr. 11:15-19; Lc. 19:45-48; Jn. 2:13-22)

<sup>12</sup> Te Jèsús cuánguihu-gá xití veñúhu càhnu sá ío cùnuu, te xití veñúhu-á<sup>n</sup> xìndecu ñáyiu quide ndáhú nádìcò-yu, ndihi ñáyiu xísaa<sup>n</sup>, te nchaá-yu ní queñuhu ñaha Jèsús xii-yu quehé, te ní dándüá-gá mèsá nchaa ñáyiu dàma díhú<sup>n</sup>, ndihi nchaa xilé sácòo nchihì ñáyiu dìco lómá xìndecu xití veñúhu-á<sup>n</sup>. <sup>13</sup> Te ní xáha<sup>n</sup>-gǎ xii-yu:

—Núú tütú Yǎ Ndiòxí càhá<sup>n</sup>-xi nàcuáa ní càhá<sup>n</sup>-gá, te ní cachí-gá: “Vehe-í cúú-xi núú càhá<sup>n</sup> ndihi ñaha ñáyiu xii-í”, duha ní càhá<sup>n</sup>-gá càchí-xi núú tütú-gá. Dico nchòhó quidé-ndó vehe-gá vehe ñadúhú —càchí-gá xáha<sup>n</sup>-gǎ xii-yu.

<sup>14</sup> Te xiá<sup>n</sup> ndécú Jèsús ní quexìo cue téé cuáá ndihi cue téé yacua, te ní quide tátna ñaha-gǎ xii-güedé te ní ndúha-güedé.

<sup>15</sup> Te cue dütú cùnùu ndihi cue téé dàcuaha ñaha xii ñáyiu nchaa tnúhu ní chídó tnùnì ndí Moisés ní xiní-güedé ní quide Jèsús sá vǎ yòo tnàhí ndàcu cada, te ndèdóho tucu-güedé níhi xicáhá<sup>n</sup> cue landú xití veñúhu càhnu sá ío cùnuu-á<sup>n</sup>, te càchí-güexi: “Ío càhnu cuu Yaá cúú ñàní tnáhá ndí Dàvíí”, càchí-güexi. Te ní cudéé<sup>n</sup>-güedé, <sup>16</sup> te ní xáha<sup>n</sup>-güedé xii Jèsús:

—¿Ndèdóho-n nàcuáa càhá<sup>n</sup> cue landú-ǎ<sup>n</sup> ñǎ? —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gǎ xii-güedé:

—Ndèdóho-í, te nchòhó náa ñá túú dàcuaha-ndo núú tütú Yǎ Ndiòxí núú càhá<sup>n</sup>-xi cuendá cue landú-ǎ<sup>n</sup>, te duha càchí-xi:



Yòhó ní quide-n sã cuè landú vitna sàdi,  
ndìhi cue dava-gá landú,  
chiñuhu ñaha-güexi xii-n nàcuáa tàú-xi cun-  
duu.

Duha cächí-xi núú tütú-gá —cächí-gá  
xãha<sup>n</sup>-gã xii-güedé.

<sup>17</sup> Te xiá<sup>n</sup> ñí dándõ ñaha Jèsús xii-güedé,  
te ní xica-gá cuáhá<sup>n</sup>-gá ñuú Bètaniá, yacá<sup>n</sup> ní  
xíndecu-gá niú-á<sup>n</sup>.

*Jèsús xãha<sup>n</sup>-gã xii yutnu ngüxí sá vã  
cúú<sup>n</sup>-gã sávidí-xi*

*(Mr. 11:12-14, 20-26)*

<sup>18</sup> Te nduu tněé-á<sup>n</sup> nehé-ni cuáhá<sup>n</sup> tucu  
Jèsús ñuú Jerusálén, te ichi ñuhu-gá ní  
xíhí-gá docó. <sup>19</sup> Te ní xiní-gá ñí yutnu ngüxí  
nútní ñí xio yuhu ichi, te ní xica-gá cuáhá<sup>n</sup>  
ndéhé-gã nõu ndèé sávidí-xi, dico ñá túú  
nã ndèé chi mee-ni ndàha-xi ndeé. Te ní  
xãha<sup>n</sup>-gã xii yutnu ngüxí-á<sup>n</sup>:

—jVitna te vá ñí ndùu-gá cuu<sup>n</sup> sávidí-n! —  
cächí-gá xãha<sup>n</sup>-gã xii-xi.

Te òré-ni-á<sup>n</sup> ñí yíchí yutnu ngüxí-á<sup>n</sup>. <sup>20</sup> Te  
sá dúcá<sup>n</sup> ñí cuu ní xiní cue téé xica cuu  
ndìhi Jesús, te ío ní cuñúhu-güedé, te ní xicá<sup>n</sup>  
tnúhú-güedé núú-gã, te xãha<sup>n</sup>-güedé:

—¿Ná cuendá ndéé dàcá<sup>n</sup> ío ndìhi ní  
yíchí yutnu ngüxí-á<sup>n</sup>-i? —cächí-güedé  
xãha<sup>n</sup>-güedé xii-gá.

<sup>21</sup> Te Jèsús ní xãha<sup>n</sup>-gã xii-güedé:

—Na cächí tnúhu ndáá-í xii-ndo sã nõu  
nchòhó quíndáá ndisa iní-ndó Yã Ndiõxí, te  
vá cání ñí caní úú iní-ndó, te ñá díú-ní sã ñí  
quide-í-a ní xiní-ndó ndàcu-ndo cada-ndo,  
chi ndéé tándúú-a xocuíñí-xi núú ndécú-xí  
te núú cúñaha-ndo sã xocuíñí-xi te quíhí<sup>n</sup>-xi  
quéé-xi xití lámár. Te díu duca<sup>n</sup> càda-xi  
te núú na quíndáá iní-ndó. <sup>22</sup> Te nchaa  
sá ná cãcá<sup>n</sup>-ndó nõú Yã Ndiõxí òré cãhá<sup>n</sup>  
ndìhi-ndo-gã te taxi-gá te núú sãndáá ndisa  
iní-ndó sã táxí-gã sã xicá<sup>n</sup>-ndó nõú-gã —  
cächí-gá xãha<sup>n</sup>-gã xii-güedé.

*Jèsús ndécú ndìhi-gá tnúhu ndee iní  
(Mr. 11:27-33; Lc. 20:1-8)*

<sup>23</sup> Te Jèsús cuánguihu-gá xití veñúhu  
cãhnu sá ío cùnuu danehé-gã ñáiyu, te xiá<sup>n</sup>  
ndécú-gã ní quexio cue dütú cùnùu ndìhi  
cue téé cùu sacuéhé nõú ñáiyu isràél, te  
xãha<sup>n</sup>-güedé xii-gá:

—Cuíní-ndí cachí tnúhu-n xii-ndí nása  
ndùu tnúhu ndee iní ndécú ndìhi-n nõu  
quide-n nándí sá quidé-n, ¿te yoo duca<sup>n</sup> ní  
taxi tnúhu ndee iní-á<sup>n</sup> xii-n-i? —cächí-güedé  
xãha<sup>n</sup>-güedé xii-gá.

<sup>24</sup> Te Jèsús ní xãha<sup>n</sup>-gã xii-güedé:

—Yúhú tnàhá-í cuíní-í cãcá<sup>n</sup> tnúhu-í ñí  
sá cãcá<sup>n</sup> tnúhu-í núú-ndó, te núu na cächí  
tnúhu-ndo te cachí tnúhu-í xii-ndo yòo ní  
taxi tnúhu ndee iní duha quide-í. <sup>25</sup> Te  
chí cächí tnúhu xii-í yoo ní táuchíú<sup>n</sup> ñí  
dàcuándute ndí Juáá ñáiyu, ¿Yá Ndiõxí ñí  
cuè téé ñuyúú-a ní táuchíú<sup>n</sup> dùca<sup>n</sup> ní quide  
ndí?, te chí cächí tnúhu —cächí-gá xãha<sup>n</sup>-gã  
xii-güedé.

Te ní ngüíta-güedé xitnàha-güedé:

—¿Nása cúñaha-o? Chi núu na cúñaha-o  
sã Yã Ndiõxí ní táuchíú<sup>n</sup> dùca<sup>n</sup> ní quide ndí  
Juáá ñá, te quesaha-dè: “¿Ná cuendá ñá túú  
ní sãndáá iní-ndó tnúhu ní cãhá<sup>n</sup> ndí vãí<sup>n</sup>?”,  
quesaha-dè. <sup>26</sup> Te núu na cúñaha-o sã cuè  
ñáiyu ñuyúú-a ní táuchíú<sup>n</sup> dùca<sup>n</sup> ní quide  
ndí ña, te cudéé<sup>n</sup> ñáiyu núú-ó, chi nchaa-yu  
cächí-yu sá Yã Ndiõxí ní xãha<sup>n</sup>-gã xii ndí sá  
cãhá<sup>n</sup> ndí tnúhu-gá núú ñáiyu —cächí-güedé  
xitnàha-güedé.

<sup>27</sup> Te ní xãha<sup>n</sup>-güedé xii Jèsús:

—Ñá túú xiní-ndí yoo ní táuchíú<sup>n</sup> dùca<sup>n</sup>  
ní dàcuándute ndí Juáá ñáiyu —cächí-güedé  
xãha<sup>n</sup>-güedé xii-gá.

Te ní xãha<sup>n</sup>-gã xii-güedé:

—Te núu duca<sup>n</sup> te ní yúhú vá cächí tnúhu-í  
xii-ndo yòo ní taxi tnúhu ndee iní duha  
quide-í —cächí-gá xãha<sup>n</sup>-gã xii-güedé.

*Cuendá ñí téé ndìhi úú déhe-dé*

<sup>28</sup> Te Jèsús ní xãha<sup>n</sup> tucu-gá xii-güedé:

—Na cãni-í ñí cuendú núú-ndó nàcuáa  
tecú tnúni-ndó tnúhu cãhá<sup>n</sup>-í. ñí téé  
ndècu úú déhe-dé, te ní xãha<sup>n</sup>-dè xii  
déhe-dé téé sacuéhé-gã: “Yòhó déhe-í,  
véxi-í cãhá<sup>n</sup> ndàhú-í núú-n nõu vá cündèe  
iní-n cuãñundaha ñaha-n xii-í cada chiú<sup>n</sup>-o  
núú ñí xitu-í yoho yàha stilé”, cächí-dé  
xãha<sup>n</sup>-dè. <sup>29</sup> Te ní xãha<sup>n</sup> dèhe-dé xii-dé: “Vá  
quíhí<sup>n</sup>-í cada chiú<sup>n</sup>-í núú chíú<sup>n</sup>-n”, cächí-dé  
xãha<sup>n</sup>-dè xii tãtá-dè. Dico cuèé ní nacani  
iní-dé te ní sãhá<sup>n</sup>-dé ní quide chiú<sup>n</sup>-dé núú  
chíú<sup>n</sup> tãtá-dè. <sup>30</sup> Te téé-á<sup>n</sup> ñí sãhá<sup>n</sup> tucu-dé  
ní xãha<sup>n</sup>-dè xii déhe-dé téé líhli-gã nõu vá  
cündèe iní-dé cuãñundaha ñaha-dé, te ní  
xãha<sup>n</sup> dèhe-dé-á<sup>n</sup> xii-dé: “Cuu cuãñundaha  
ñaha-í xii-n”, cächí-dé xãha<sup>n</sup>-dè. Dico ñá



túu ní sǎhá<sup>n</sup>-dé cada chiú<sup>n</sup>-dé. <sup>31</sup> Te vitna chí cǎhá<sup>n</sup> núu ndédacǎa cue téé úú-á<sup>n</sup> ní quide-güedé sá cuini tátá-güedé —cǎchí-gǎ xǎhá<sup>n</sup>-gǎ xii-güedé.

Te ní xǎhá<sup>n</sup>-güedé xii-gǎ:

—Téé cùu sacuéhé-gǎ, téé ní cǎhá<sup>n</sup> ndihí-dé díhna —cǎchí-güedé xǎhá<sup>n</sup>-güedé xii-gǎ.

Te Jèsús ní xǎhá<sup>n</sup>-gǎ xii-güedé:

—Na cǎchí tnúhu ndáá-í xii-ndo sǎ ncháá cuè téé cuihna ìní-xi quide cobrá ñáhá xii ñáyiú cuendá impuèstú, ndihí cue ñáyiú dìhí xǐndecu ichi díí ìní yáchí-gǎ ndíhu ndaha ñàha Yá Ndiöxí xii cue téé-á<sup>n</sup> ndihí cue ñáyiú dìhí-á<sup>n</sup> dàcúúxí nchòhó. <sup>32</sup> Chi ndíi Juáá téé ní xóo dacuàndute ñaha xii ñáyiú ní cǎhá<sup>n</sup> ndíi nàcuáa cadá-yu cundecú-yu, dico nchòhó chi ñá túu cuini-ndó quindáá ìní-ndó nàcuáa ní cǎhá<sup>n</sup> ndíi, dico cue téé cuihna ìní-xi quide cobrá ñáhá xii ñáyiú cuendá impuèstú, ndihí cue ñáyiú dìhí xǐndecu ichi díí ìní, chi sàndáá ìní-güedé ndihí-yu tnúhu ní cǎhá<sup>n</sup> ndíi. Te nchòhó cuèi ndèhe-ndo sá sàndáá ìní cue ñáyiú-á<sup>n</sup> nchaa tnúhu ní cǎhá<sup>n</sup> ndíi, dico ñá túu cuini-ndó ndixi cuéchi ìní-ndó cuendá nchaa sá cuéhé sá dúhá quide-ndo cuendá tní-ndo tnúhu ní cǎhá<sup>n</sup> ndíi —cǎchí-gǎ xǎhá<sup>n</sup>-gǎ xii-güedé.

*Cuendá cue téé cuihna ìní-xi  
(Mr. 12:1-12; Lc. 20:9-19)*

<sup>33</sup> Te xǎhá<sup>n</sup> tucu Jesús xii-güedé:

—Cundedóho-ndo na cǎni tucu-í ìngá cuendú núu-ndó cuendá tecú tnúni-ndó tnúhu cǎhá<sup>n</sup>-í. Hí<sup>n</sup> téé ní nacúxi-dé mee-ni yòho yaha stilé núu ñúhú-dé, te ní chidoco-dé cuendá sá vǎ cúu dàñú, te ní cadúha-dé núu quíhni-dé ndéhé yoho yaha stilé-á<sup>n</sup> òré ná cùu, te ní cadúha-dé hí<sup>n</sup> xító dùcú<sup>n</sup> núu cáúndòdo cue téé coto nchaa yoho yaha stilé-á<sup>n</sup>.

Te ní sǎá hí<sup>n</sup> nduu quèe-dé quíngaca cuu xica-dé te ní dándöo ndaha-dé sá ní xitu-dé-á<sup>n</sup> xii hí<sup>n</sup> úú cue téé xini tnáhá ndihí-dé cuendá cada chiú<sup>n</sup>-güedé, te ní ndatnúhu-güedé sá òré ná cúu te cuu cuendá dava-güedé, te duca<sup>n</sup> te ní quee-dé cuáhá<sup>n</sup>-dé. <sup>34</sup> Te sátá ní sǎá nduu ní cuu ndéhé nchaa yoho yaha stilé sá ní xitu-dé-á<sup>n</sup>, te ní xǎhá<sup>n</sup>-dè xii hí<sup>n</sup> úú cue téé xinu cuechi núu-dé: “Chí cuáhá<sup>n</sup> cǎcá<sup>n</sup>-ndó

sǎ cúu cuendá-í núu cuè téé ní dándöo ndàha-í nchaa yoho yaha stilé sá ní xitu-í”, cǎchí-dé xǎhá<sup>n</sup>-dè xii-güedé. <sup>35</sup> Te cue téé ní dándöo ndaha-dé nchaa yoho yaha stilé sá ní xitu-dé-á<sup>n</sup> ní tní-güedé cue téé xinu cuechi núu-dé-á<sup>n</sup>, te hí<sup>n</sup>-dé ní cani-güedé, te hí<sup>n</sup>-dé ní sahani ñaha-güedé, te ìngá-dé ní sǎñaha-güedé yúu. <sup>36</sup> Te téé ní xitu yoho yaha stilé-á<sup>n</sup> ní tendaha-dé titní-gǎ tucu cue téé xinu cuechi núu-dé cuáhá<sup>n</sup>-güedé cuángácá<sup>n</sup>-güedé sá cúu cuendá-dé núu cuè téé ní dándöo ndaha-dé sá ní xitu-dé-á<sup>n</sup>, dico díu-ni duca<sup>n</sup> ní quide ñaha cuè téé-á<sup>n</sup> xii cue téé xinu cuechi núu-dé-á<sup>n</sup>.

<sup>37</sup> Te téé cùu xítóhó nchaa yoho yaha stilé-á<sup>n</sup> ní sani ìní-dé: “Váha-gǎ núu tendaha-í déhe-í-a núhú-dé, chi òré quini ñáhá-güedé xii-dé te canehe-güedé sá yíñùhu núu-dé”, duha ní sani ìní-dé. Te ní tendaha-dé déhe-dé cuánuhú-dé. <sup>38</sup> Dico òré ní xini cue téé quide chiu<sup>n</sup>-á<sup>n</sup> dèhe téé cùu xítóhó nchaa yoho yaha stilé-á<sup>n</sup>, te ní xitnáha-güedé: “Téé-á<sup>n</sup> téé véxi nduu táhú ñuhu-a ndihí nchaa sá cáá núu-xi, dico cahni-o-dé te mee-o nduu táhú-ó sǎ ndúú táhú-dé”, cǎchí-güedé xitnáha-güedé. <sup>39</sup> Te ní tní-güedé téé-á<sup>n</sup> te ndéca ñaha-güedé cuáhá<sup>n</sup> hí<sup>n</sup> xio yuhu ñuhu-á<sup>n</sup>, te ní sahani ñaha-güedé xii-dé —duha cuáhá<sup>n</sup> cuendú ní cani Jèsús núu-güedé.

<sup>40</sup> Te ní xǎhá<sup>n</sup> tucu Jesús xii-güedé:

—¿Te nchòhó sa cùtnuní ìní-ndó nǎsa cada ñaha xítóhó ñuhu-á<sup>n</sup> xii cue téé-á<sup>n</sup> ñǎ? —cǎchí-gǎ xǎhá<sup>n</sup>-gǎ xii-güedé.

<sup>41</sup> Te cue téé-á<sup>n</sup> ní xǎhá<sup>n</sup>-güedé xii-gǎ:

—Téé cùu xítóhó ñuhu-á<sup>n</sup> núhú-dé, te vǎ cùndáhú ìní-dé cue téé cuihna ìní-xi-á<sup>n</sup> chí cahni ñaha-dé xii-güedé, te dándöo ndaha-dé ñuhu-dé xii cue téé cùtnuní ìní-dé cada ndáá cuendá ndí tnahá cúu<sup>n</sup> ndéhé nchaa yoho yaha stilé sá ní xitu-dé-á<sup>n</sup> te cuáñaha-güedé xii-dé sá cúu cuendá-dé —cǎchí-güedé xǎhá<sup>n</sup>-güedé xii-gǎ.

<sup>42</sup> Te Jèsús ní xǎhá<sup>n</sup>-gǎ xii-güedé:

—Te nchòhó, náá ñá túu dàcuaha-ndo núu tütú Yá Ndiöxí núu cǎchí-xi: Yúu sǎ ní dáquéé tíhú cue téé dàcaa vehe, ní cuu-xi yúu cúnúu vitna.

Chi mee Dütú Ndiöxí duca<sup>n</sup> ní cǎchí-gǎ cunduu, te cùu-xi hí<sup>n</sup> sǎ ìo cùñùhu-o vitna. Duha cǎchí-xi núu tütú-gǎ. <sup>43</sup> Te duha cǎhá<sup>n</sup>-í chí Yá Ndiöxí cada-gǎ te vǎ nihí-ndó

tn̄hu ndee ìní cundecu ndihì-ndo cuèndá ndíhu ndaha ñàha-gá xii-ndo, chi tn̄hu ndee ìní-á<sup>n</sup> cundecu ndihì cue ñáyiú cada ndáá cuèndá ndíhu ndaha ñàha Yá Ndiõxí xii-yu. <sup>44</sup> Te yúú sá cúnùu-á<sup>n</sup> cúú-xí yùhú, te nchaa ñáyiú ñá túú tn̄i tn̄hu-í cùú-yu dàtná ì<sup>n</sup> ñáyiú ndùá núú yùú-ã<sup>n</sup> te tnàhnú duú<sup>n</sup>-yu, àdi núú na tàú ñáhá-xí xii-yu, te dacàchi duu<sup>n</sup> ñaha-xi –cachí-gá xãha<sup>n</sup>-gã xii-güedé.

<sup>45</sup> Te sá dúcá<sup>n</sup> ndùu cuendú ní canì Jèsús te cue téé cùu dùtú cúnùu-á<sup>n</sup>, ndihì cue téé cùu fariséú ní cutnùnì ìní-güedé sá cuèndá-güedé ní cáhá<sup>n</sup>-gá. <sup>46</sup> Te ní cuinì-güedé tn̄i ñaha-güedé xii-gá òré-á<sup>n</sup> dico ñá túú ní cùyii-güedé, chi ní yùhú-güedé cue ñáyiú, chi ní cutnùnì ìní-yu sá cúú-gã ì<sup>n</sup> téé cáhá<sup>n</sup> tn̄hu Yá Ndiõxí.

## 22

### *Cuèndá ì<sup>n</sup> vico tn̄ndaha*

<sup>1</sup> Te Jèsús ní ngüita tucu-gá caní-gã ingá cuèndú núú-güedé, te xãha<sup>n</sup>-gã:

<sup>2</sup> —Na canì tucu-í ingá cuèndú núú-ndó cuèndá tecú tnùnì-ndó nàcuáa cada-xi òré ndíhu ndaha ñàha Yá Ndiõxí xii ñáyiú. ì<sup>n</sup> téé yìndaha ñaha xii ñáyiú ní quide-dé ì<sup>n</sup> vico ní dátñandaha-dé déhe ducu<sup>n</sup>-dé. <sup>3</sup> Te ní tendaha-dé cue téé xìnu cuechi núú-dé cuáhá<sup>n</sup>-güedé cuángana-güedé cue ñáyiú sa ní cáhá<sup>n</sup>-dé cuhu<sup>n</sup> vico, dico ñáyiú-á<sup>n</sup> ñà túú ní cuinì-yu quíhì<sup>n</sup>-yu. <sup>4</sup> Te ní xãha<sup>n</sup> tucu-dé xii dava-gá cue téé xìnu cuechi núú-dé: “Quíhì<sup>n</sup>-ndó cñaha-ndo xii cue ñáyiú sa ní cáhá<sup>n</sup>-í cuhu<sup>n</sup> vico sá sà ní quide túha-í sá cáxi-yu, te sa ní sahni-í ndicutu ndihì nchaa dava-gá quiti ní dánúcuñhu-í, te nchaa sa ní quide túha-í, te na quixí-yu cuhú<sup>n</sup>-yu vico cächí-í cúñaha-ndo”, cächí-dé xãha<sup>n</sup>-dë xii cue téé xìnu cuechi núú-dë-á<sup>n</sup>. <sup>5</sup> Dico ni ì<sup>n</sup> ñáyiú ní cáhá<sup>n</sup>-dé-á<sup>n</sup> ñà túú ní cuinì-yu quíhì<sup>n</sup>-yu cuhú<sup>n</sup>-yu vico. Chi ì<sup>n</sup>-yu ní sáhá<sup>n</sup>-yu ní quide chiú<sup>n</sup>-yu núú ñùhú-yu, te ingá-yu ní sáhá<sup>n</sup>-yu ní nadicó-yu núú nándi cùu ndáhú quidë-yu. <sup>6</sup> Te dava-gá-yu ní tn̄i-yu dava cue téé xìnu cuechi núú tée quide vico-á<sup>n</sup>, te ní canihá-yu ndéé ní sahni ñáhá-yu xii-güedé. <sup>7</sup> Te téé yìndaha ñaha xii ñáyiú quide vico-á<sup>n</sup> n̄i cudéé<sup>n</sup> víhí-dé sá dúcá<sup>n</sup> n̄i

quidë-yu, te ní tendaha-dë cue sandádú-dé ní sáhá<sup>n</sup>-güedé ní sahni-güedé cue ñáyiú duca<sup>n</sup> n̄i quide-á<sup>n</sup>, te ní sahmi-güedé nchaa vehe càa ñuú-yu. <sup>8</sup> Te sátá dúcá<sup>n</sup> te ní xãha<sup>n</sup>-dë xii dava-gá cue téé xìnu cuechi núú-dë: “Nchaa sa ndècu túha, te cue ñáyiú ní cáhá<sup>n</sup>-í cuhu<sup>n</sup> vico-a ni cùu ñá túú-gã tàú-yu sá cùhú<sup>n</sup>-yu. <sup>9</sup> Te chí cuáhá<sup>n</sup> ndëni ní cuu te cáhá<sup>n</sup>-ndó nchaa ñáyiú na nàníhí-ndó ìchi na quixí-yu cuhú<sup>n</sup>-yu vico-a”, cächí-dé xãha<sup>n</sup>-dë xii-güedé. <sup>10</sup> Te cue téé xìnu cuechi-á<sup>n</sup> n̄i quee-güedé cuáhá<sup>n</sup>-güedé, te ní cáhá<sup>n</sup>-güedé nchaa ñáyiú ní nàníhí-güedé ìchi, te cuèi ñáyiú váha ìní-xi, te cuèi ñáyiú cuihna ìní-xi, te ní chítú-yu núú cúú vico-á<sup>n</sup>.

<sup>11</sup> Te sátá dúcá<sup>n</sup> te téé yìndaha ñáyiú quide vico-á<sup>n</sup> n̄i quíhu-dé xiti vehe ní xindéhé-dé cue ñáyiú ñùhu vico-á<sup>n</sup>, te ní xiní-dé ì<sup>n</sup> téé ñùtnahá tnuú-yu te ñá túú càa dóó-dé dàtná cáá dõó níhnú cuè ñáyiú ñùhu vico-á<sup>n</sup>. <sup>12</sup> Te ní xãha<sup>n</sup>-dë xii téé-á<sup>n</sup>: “¿Tãta, nása ní cuu cuánguihu-õ iha, te ñá túú càa dóó-n dàtná cáá dõó níhnú cuè ñáyiú ñùhu vico tn̄andaha-i?”, cächí-dé xãha<sup>n</sup>-dë xii téé-á<sup>n</sup>. Dico téé-á<sup>n</sup> ñà túú ní níhí-dë tn̄hu cáhá<sup>n</sup>-dé. <sup>13</sup> Te téé yìndaha ñáyiú quide vico-á<sup>n</sup> n̄i xãha<sup>n</sup>-dë xii cue ñáyiú xìnu cuechi núú mèsá: “Chí tn̄i tée-á<sup>n</sup> te dacùtu-ndo-dé, te queñuhu-ndo-dë ná quíhì<sup>n</sup>-dé cundecu-dé ì<sup>n</sup> xichi núú néé núú ìo ndoho-dé, te yacá<sup>n</sup> ìo ndáhyú-dé te dicó rúhñú-nã cuu núhu-dé sá sátú ìní-dé sá ndóhó-dé”, cächí-dé xãha<sup>n</sup>-dë xii cue ñáyiú xìnu cuechi núú mèsá-á<sup>n</sup>. <sup>14</sup> Te duha ndùu cuendú cáhá<sup>n</sup>-í chi ìo cuéhé ñáyiú cáhá<sup>n</sup> ñáhá Yá Ndiõxí xii-yu, dico sacú-ni-yu nduu táhú-yu cundecú-yu ndihì-gá –cächí-gá xãha<sup>n</sup>-gã xii-güedé.

### *Cuèndá impuèstú*

(Mr. 12:13-17; Lc. 20:20-26)

<sup>15</sup> Te cue téé cùu fariséú ní sáhá<sup>n</sup>-güedé ì<sup>n</sup> xichi ní ndatnúhu-güedé nàcuáa cada-güedé datìcanuu-güedé Jèsús núú tn̄hu cáhá<sup>n</sup>-gá cuèndá duca<sup>n</sup> níhí-güedé nàcuáa cada-güedé cacá<sup>n</sup> cuèchi-güedé cuèndá-gá. <sup>16</sup> Te ní tendaha-güedé ì<sup>n</sup> ùú cue téé cùndihì-güedé, ndihì cue téé cùndihì té Hèrodés cuáhá<sup>n</sup>-güedé núú ndécú Jèsús.

Te òré ní quexìo-güedé núú ndécú-gã, te ní xáha<sup>n</sup>-güedě xii-gá:

—Mèstrú, ñihí-ndí tnúhu sá ïo ndáá càhá<sup>n</sup>-n, te càhá<sup>n</sup> ndáá-n nàcuáa càhá<sup>n</sup> Yă Ndiöxí cundecu-o ñùyíú-a, te cuëi nděda-ni càa ñáyíu ì<sup>n</sup>-ni càhá<sup>n</sup>-n ndihí-yu chi ñá túú quide cuendá-n cuëi ná ñáyíu cùú-yu.

17 Te cachí tnúhu xii-ndí, núú váha-ni quide-ndí sá chăhu-ndí té Cèsár tée ío cùnūu cuendá impuèstú á<sup>n</sup> ñăhá —càchí-güedé xăha<sup>n</sup>-güedě xii-gá.

18 Dico Jèsús ní cutnùnì iní-gá sá xító ndèè ñáhá-güedě xii-gá, núú ní xáha<sup>n</sup>-gã xii-güedé:

—Nchòhó cue tée dândahú mée-xí sã quidé ndáá te ñá ndáá sã quidé ndáá-ndó, ¿ná cuendá xító ndèè ñáhá-ndó xii-í? 19 Chí dánèhé ñáhá xii-í ì<sup>n</sup> díhú<sup>n</sup> sã chăhu-ndo cuendá impuèstú núú nása càa —cachí-gã xăha<sup>n</sup>-gã xii-güedé.

Te ní dánèhé ñáhá-güedě xii-gá ì<sup>n</sup> díhú<sup>n</sup> sã nání dènariú. 20 Te òré ní xini-gá díhú<sup>n</sup>-ã<sup>n</sup> te ní xicá<sup>n</sup> tñuhú-gã núú-güedě, te xăha<sup>n</sup>-gã:

—Chí cächí tnúhu yoo núú-xi ndèè ndihí yoo ñiú-xi ndéè —cächí-gã xăha<sup>n</sup>-gã xii-güedé.

21 Te ní xáha<sup>n</sup>-güedě xii-gá:

—Núú tē Cèsár ndèè ndihí ñiú-dé —cächí-güedé xăha<sup>n</sup>-güedě xii-gá.

Te Jèsús ní xáha<sup>n</sup>-gã xii-güedé:

—Te núú duca<sup>n</sup> te chí nácua<sup>n</sup>há té Cèsár sá cúú cuendá-dé, te sá cúú cuendá mée Yă Ndiöxí te xíã<sup>n</sup> nacuáha-ndo-gã —cächí-gã xăha<sup>n</sup>-gã xii-güedé.

22 Te cue tée-án ïo ní cuñúhu-güedé sá dúcá<sup>n</sup> ñí cáhá<sup>n</sup>-gá, te ní natnî-güedé ichi cuánuhú-güedé.

### *Cuendá cue ñáyíu ndoto*

(Mr. 12:18-27; Lc. 20:27-40)

23 Te ñiú-ni nduu-ã<sup>n</sup> ñí quexìo ì<sup>n</sup> úú cue tée cùu saducéú núú ndécú Jèsús. Te cue tée-án ñá túú sándáá iní-güedé sá ndótó cuè ñáyíu ní xihí, te ní xáha<sup>n</sup>-güedě xii-gá:

24 —Mèstrú, ndí Moisés ní cachí ndí sá núu ì<sup>n</sup> tée ndècu ñadihí-xi cuú-dé te quendóo ñadihí-dé, te núú ñá túú dēhe-dé ní xōo ndihí-a<sup>n</sup> te tée cùu ñani-dé naquehe<sup>n</sup>-dé ñaha ní quendóo quèè-á<sup>n</sup> cuendá coo déhe-dé ndihí-a<sup>n</sup> cuendá ñani-dé tée ní xihí-á<sup>n</sup>. 25 Te ñuú-ndí-a ní xindecu úsá

tnàhá cue tée mee-ni ndí ñani-güedé. Te tée díhna ní ñihí ñadihí-dé te ñá túú ní cùdí-dé cundecu-dé chi ní xihí-dé, te ní ì<sup>n</sup> déhe-dé ñá túú ní xōo ndihí ñadihí-dé-á<sup>n</sup>. Te tée cùu uú ní nàquehe<sup>n</sup>-dé ñaha ní quendóo quèè-á<sup>n</sup>.

26 Dico ní xihí tucu-dé, te ní ì<sup>n</sup> tucu déhe-dé ñá túú ní xōo ndihí ñaha-á<sup>n</sup>, te ñiú-ni duca<sup>n</sup> ñí yáha tée cùu uní, te ní xínu ndi úsá-güedé ní cándeca ñaha-güedě xii ñaha-á<sup>n</sup> dico ñiú-ni duca<sup>n</sup> ñí xihí-güedé. 27 Te ndéé núú ñí ndihí-ná te ní xihí tnàhá ñadihí-á<sup>n</sup>. 28 Te na sàá nduu ndòto-güedé ndihí ñaha-á<sup>n</sup>, ¿te ndèdacàa-güedé ñadihí-güedé cuu-a<sup>n</sup>-i? Chi ndi úsá-güedé ní cándeca ñaha-güedě xii-a<sup>n</sup> —cächí-güedé xăha<sup>n</sup>-güedě xii-gá.

29 Te Jèsús ní xáha<sup>n</sup>-gã xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xini-ndó nàcuáa càhá<sup>n</sup> Yă Ndiöxí núú tütú-gá, te ní ñá túú cùtnuní iní-ndó sã díú-gã ndácú-gã quidé-gã nchaandi túhú sã váha. 30 Te na cächí tnúhu-í xii-ndo sã òré ná sàá nduu ndòto nchaa ñáyíu ní xihí, te dàvá-á<sup>n</sup> vã yōo-gã dasa<sup>n</sup> dēhe yoco-xi chi vá yōo-gã candeca tnàha, chi cuu-ná-yu dàtná cue espíritú xínú cuèchi núú Yă Ndiöxí. 31 ¿Te náa ñá túú quide cuendá-ndó nàcuáa càhá<sup>n</sup> Yă Ndiöxí núú tütú-gá núú càhá<sup>n</sup>-gã cuendá cue ñáyíu ní xihí-á<sup>n</sup>? Te duha cächí-gã: 32 “Yúhú cùú-í Ndiöxí tē Àbrahám, ndihí té Isàác, ndihí té Jàcób”, duha cächí-gã núú tütú-gã. Te cue tée-án chi cuëi ní xihí-güedé núú ñùyíú-a, dico sá cúú-xi Yă Ndiöxí chi ndècu vívú-ni-güedé. Chi ñiú-gã cúú-gã Ndiöxí mee-ni cuè ñáyíu xindecu vívú, te ñá túú cùu-gã Ndiöxí cue ñáyíu ñá túú ndècu vívú —cächí-gã xăha<sup>n</sup>-gã xii-güedé.

33 Te sá dúcá<sup>n</sup> ñí cáhá<sup>n</sup>-gá ní xii-gá cue tée-án, te ío ní cuñúhu nchaa ñáyíu cuendá sá ïo váha ndùu tnúhu ní cáhá<sup>n</sup>-gã.

### *Tnúhu sá ïo-gá cùnùu*

(Mr. 12:28-34)

34 Te cue tée cùu fariséú ní xini-güedé ní sadí Jèsús yuhu cue tée cùu saducéú, chi ñá túú ní ñihí-gã-güedé tnúhu cúñaha-güedě xii-gá, te cue tée cùu fariséú-á<sup>n</sup> ñí nat-acá-güedé te cuáhá<sup>n</sup>-güedé núú ndécú Jèsús. 35 Te ì<sup>n</sup> tée cùu fariséú-á<sup>n</sup> ïo váha cùtnuní iní-dé nàcuáa ndùu nchaa tnúhu ní chídó



tnùní ndíi Moisés te xito ndeé-dé Jèsús, te xáha<sup>n</sup>-dě xii-gá:

<sup>36</sup> —Mèstrú, cachí tnúhu ndēdacàa tnúhu sá nǐ chídó tnùní ndíi Moisés ío-gá cúnùu cada-o —cachí-dé xáha<sup>n</sup>-dě xii-gá.

<sup>37</sup> Te Jèsús ní xáha<sup>n</sup>-gǎ xii-dé:

—Duha càhá<sup>n</sup> tnúhu sá ío-gá cúnùu: “Cuu iní-ndó Dütú Ndiöxí Yaá cúú Ndiöxí-ndó nǐ yuhu ní iní-ndó, te caní iní-ndó càda-ndo datná cuíní mée-gǎ, te mee-ni tnúhu váha caní iní-ndó nàcuáa cuu vii cuu váha-ndo núú-gǎ”, <sup>38</sup> duha càhá<sup>n</sup> tnúhu sá ío-gá cúnùu. <sup>39</sup> Te duha càhá<sup>n</sup> tucu ingá tnúhu cùu uú sá ío cúnùu, te sa yatni ì<sup>n</sup>-ni cùu-xi ndihí tnúhu díhna nuu, te càchí-xi: “Cuu iní-ndó tnàha ñáyíu-ndo datná cúú iní-ndó mée-ndo”, duha càhá<sup>n</sup> tnúhu cùu uú-á<sup>n</sup>. <sup>40</sup> Te cuendá úú tnúhu-a ní cáá nchaa tnúhu ní cáhá<sup>n</sup> ndíi Moisés nàcuáa cada ñáyíu, te ñíu-ni cuendá úú tnúhu-a ní cáá tnúhu ní cáhá<sup>n</sup> nchaa cue téé ní xóo cáhá<sup>n</sup> tnúhu Yá Ndiöxí ndéé sanaha —càchí-gá xáha<sup>n</sup>-gǎ xii-güedé.

### *Yoo cùu Xítohó Jesucristú*

*(Mr. 12:35-37; Lc. 20:41-44)*

<sup>41</sup> Te ndècu duca<sup>n</sup>-ni cue téé cùu fariséú núú ndécú Jèsús. <sup>42</sup> Te ní xicá<sup>n</sup> tnúhú-gǎ núú-güedé, te xáha<sup>n</sup>-gǎ:

—Cuíní-í cachí tnúhu-ndo yòo déhe-xi cùu Cristú Yaá tendaha Yá Ndiöxí quixi ñuyíú-a —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé xii-gá:

—Déhe ndíi Dàvíí cúú Yàá-á<sup>n</sup> —càchí-güedé xáha<sup>n</sup>-güedé xii-gá.

<sup>43</sup> Te Jèsús ní xáha<sup>n</sup>-gǎ xii-güedé:

—¿Te nása càchí-tu-ndo sǎ déhe ndíi Dàvíí cúú Cristú Yaá tendaha Yá Ndiöxí quixi ñuyíú-a, te mee ndíi Dàvíí-á<sup>n</sup> nǐ dácáhú iní ñáhá Espíritú Yá Ndiöxí xii ndíi, te ní cachí ndíi sá Cristú Yaá tendaha Yá Ndiöxí quixi ñuyíú-a cùu-gá Xítohó ndíi? Te duha ní cachí ndíi:

<sup>44</sup> Dütú Ndiöxí ní xáha<sup>n</sup>-gǎ xii Yaá cúú Xítohó-í:  
“Ngóo xio cùha-í, te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dütú Ndiöxí xii Yaá cúú Xítohó-í, càchí ndíi. <sup>45</sup> ¿Te nása cùu Cristú déhe ndíi Dàvíí, te mee ndíi ní cachí ndíi sá cúú-gǎ Xítohó ndíi? —càchí Jèsús xáha<sup>n</sup>-gǎ xii-güedé.

<sup>46</sup> Te ní ì<sup>n</sup>-güedé ñá túú-gǎ ní nǐhí-güedé tnúhu cúñaha-güedé xii-gá. Te ndéé nduu-á<sup>n</sup> ñá túú-gǎ ní cùyíi-güedé ná tnúhu cáca<sup>n</sup> tnúhú-güedé núú-gǎ.

## 23

*Jèsús càhá<sup>n</sup>-gá cuendá cue téé cùu fariséú ndihí cuendá cue téé dàcuaha ñaha xii ñáyíu (Mr. 12:38-40; Lc. 11:37-54; 20:45-47)*

<sup>1</sup> Te Jèsús ní cáhá<sup>n</sup> ndodo-gá núú nchaa ñáyíu, ndihí núú cuè téé xica cuu ndihí-gá, te xáha<sup>n</sup>-gǎ:

<sup>2</sup> —Cue téé dàcuaha ñaha xii ñáyíu nchaa tnúhu ní chídó tnùní ndíi Moisés, ndihí cue téé cùu fariséú ndécú ndihí-güedé tnúhu ndee iní cáhá<sup>n</sup>-güedé nchaa tnúhu sá nǐ chídó tnùní ndíi Moisés-á<sup>n</sup>. <sup>3</sup> Te cada-ndo nàcuáa dànehé ñáhá-güedé xii-ndo, dico vá cáda-ndó datná xíquide-güedé, chi tucu nduu tnúhu càhá<sup>n</sup>-güedé, te tucu quide-güedé. <sup>4</sup> Te quide-güedé datná quidé ñáyíu dàcuído ì<sup>n</sup> tnahá ñáyíu-xi ì<sup>n</sup> sá ío véé, te mée-yu ní lùha ñá túú cuíní-yu cuidó-yu. Te duca<sup>n</sup> sǎtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ní lùha ñá túú cuíní-güedé cada-güedé nàcuáa dànehé ñáhá-güedé xii-ndo. <sup>5</sup> Te mee-ni ndùcu-güedé nàcuáa quide-güedé cuendá quini ñáyíu sá ío cùu cahnu-güedé. Te ndéé xindá sá ndéé ì<sup>n</sup> úú tnúhu Yá Ndiöxí tneé-güedé ndihí ndaha-güedé, te tnàhá iní-güedé sá ío-gá cunduu quèhé<sup>n</sup> xindá-á<sup>n</sup> dàcúxí xindá dava-gá ñáyíu. Te tnàhá tucu iní-güedé sá ío-gá cunduu nàni núú dǒó sácuihnu-güedé dàcúxí dǒó sácuihnu dava-gá-yu. <sup>6</sup> Te ndi tnahá òré sácǒo vico, òré quíhu-güedé mèsá caxi-güedé te ío-gá cúdíí iní-güedé cunucóo-güedé núú xilé núú sácǒo cue téé cúnùu-gá, te ñíu-ni duca<sup>n</sup> quide tucu-güedé cuèi xití veñùhu. <sup>7</sup> Te nchaa núú xicá cùu-güedé cuíní-güedé sá ndihí tnúhu yíñùhu cáhá<sup>n</sup> ndihí ñaha ñáyíu xii-güedé, te cuíní tucu-güedé sá cùñahá-yu xii-güedé mèstrú.

<sup>8</sup> Dico nchòhó vá cùñaha-ndo xii ñáyíu sá cùñahá-yu mèstrú xii-ndo, chi nchòhó ì<sup>n</sup>-ni cùu-ndo ndecu-ndo, chi duca<sup>n</sup> ì<sup>n</sup>-ni yúhú Yaá ní tendaha Yá Ndiöxí véxi ñuyíú-a



cùu-í Mèstrú ndécú ndìhi ñaha-í xii-ndo. <sup>9</sup> Te ñndìi-ni Dútú Ndiòxí Yaá ndécú àndiù cuu-gá Tátá-ndó, núu xíá<sup>n</sup> vá càhá<sup>n</sup>-ndó sá dàva cue téé ñuyíú-a cùu-güedé tátá-ndó.

<sup>10</sup> Te ni vǎ cáni ínì-ndó càda-ndo nacuaá cáhá<sup>n</sup> ñáyiú sá cùnùu-ndo, chi ñndìi-ni yúhú Crístú Yaá ní tendaha Yǎ Ndiòxí véxi ñuyíú-a cùnùu-í. <sup>11</sup> Te ñáyiú ío-gá cùnùu ndecu ndìhi-ndo, ñáyiú-á<sup>n</sup> cúu-yu ñáyiú xínu cuechi núu-ndó. <sup>12</sup> Te nchaa ñáyiú quíde cahnu mee-xi ñáyiú-á<sup>n</sup> vǎ cúu-yu ñáyiú cùnùu, te nchaa ñáyiú ñá túú quíde cahnu mee-xi ñáyiú-á<sup>n</sup> cùnùu-yu.

<sup>13</sup> Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cùu-ndo cue téé ío dándahú méé-xí sá quíde ndáá te ñá ndáá sá quíde ndáá-ndó, te ndáhú ní cuu-ndo chi sàdí-ndó ìchi ñáyiú ñá dáñá-ndó ndìhu ndaha ñàha Yá Ndiòxí xií-yu, te ni mèe-ndo ñá túú quíde-ndo nacuaá ndìhu ndaha ñàha-gá xii-ndo, te ni dàva-gá cue ñáyiú cuìní sá ndìhu ndaha ñàha-gá xií-yu ñá dáñá-ndó.

<sup>14</sup> Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cúu-ndó cuè téé ío dándahú méé-xí sá quíde ndáá te ñá ndáá sá quíde ndáá-ndó, te ndáhú ní cuu-ndo chi quèndeé-ndó vèhe cue ñáyiú quèé, te ío naha càhá<sup>n</sup> ndìhi-ndo Yǎ Ndiòxí cuèndá cuìní-ndó sá vǎ yǒo cutnùnì ínì-xi nàcuáa quíde-ndo. Te sá dúcá<sup>n</sup> quíde-ndo te ío-gá ndoho-ndo núu ùhú núu ndáhú dàcúúxí dàva-gá ñáyiú.

<sup>15</sup> Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cúu-ndó cuè téé ío dándahú méé-xí sá quíde ndáá te ñá ndáá sá quíde ndáá-ndó, te ndáhú ní cuu-ndo chi sàhni ínì-ndó cuáhá<sup>n</sup>-ndó ndèni ní cuu dàcahá<sup>n</sup>-ndó ñáyiú cuèndá cuìní-ndó tnì-yu ichi ndècu-ndo. Te òré ná xínu ínì-yu tnì-yu ichi ndècu-ndo-á<sup>n</sup> te uu<sup>n</sup>-gá cuíta nihnú-yu dàcúúxí mèe-ndo.

<sup>16</sup> Te nchòhó cúu-ndó datná cue ñáyiú cuáá, chi ñá cutnùnì ínì-ndó nàcuáa canu ichi-ndo ñáyiú, te ndáhú ní cuu-ndo chi càchí-ndó: “Íñ ñáyiú na càcunehe veñúhu càhnu sá ío cùnùu òré cuìní-yu cutnùnì ínì tnàha ñáyiú-yu sá ndáá cadá-yu ññ sá sání

ínì-yu cadá-yu, te vá cúu cuèchi xií-yu cuèi vá cadá-yu. Dico núu na càcu nehé-yu díhú<sup>n</sup> cuáá<sup>n</sup> yíhí xítí veñúhu-á<sup>n</sup> te cuu cuèchi xií-yu te núu vá cadá-yu sá ññ cachí-yu cadá-yu”, duha càchí-ndó.

<sup>17</sup> ;Nchòhó cúu-ndó cuè téé ío ññ díquí-xi, te cùu-ndo datná cue ñáyiú cuáá chi ñá tècú tnùnì-ndó! Te vá càchí-ndó sá ío-gá cùnùu díhú<sup>n</sup> cuáá<sup>n</sup> dàcúúxí veñúhu, chi ññ cuèndá veñúhu-á<sup>n</sup> ññ cuu íí díhú<sup>n</sup> cuáá<sup>n</sup>-á<sup>n</sup>.

<sup>18</sup> Te càchí tucu-ndo: “Íñ ñáyiú na càcunehe xító núu sácòdó sá ndúú tǎhú Yǎ Ndiòxí òré cuìní-yu cutnùnì ínì tnàha ñáyiú-yu sá ndáá cadá-yu ññ sá sání ínì-yu cadá-yu, te vá cúu cuèchi xií-yu cuèi vá cadá-yu, dico núu na càcu nehé-yu sá ndúú tǎhú Yǎ Ndiòxí yódó núu xító-á<sup>n</sup> te cuu cuèchi xií-yu te núu vá cadá-yu sá ññ sani ínì-yu cadá-yu”, duha càchí-ndó. <sup>19</sup> ;Te cùu-ndo

cue téé ío ññ díquí-xi, te cùu-ndo datná cue ñáyiú cuáá chi ñá tècú tnùnì-ndó! Te vá cáni ínì-ndó sá ío-gá nándìhi sá ndúú tǎhú Yǎ Ndiòxí sácòdó núu xító núu sácòdó tnàhí sá ndúú tǎhú-gá-á<sup>n</sup> dàcúúxí mèe xító-á<sup>n</sup>.

<sup>20</sup> Chi nchaa ñáyiú duca<sup>n</sup> càcunehe xító-á<sup>n</sup>, te tnàhá-ni sá yódó núu-xi càcu nehé-yu òré duca<sup>n</sup> càhá<sup>n</sup>-yu. <sup>21</sup> Te nchaa ñáyiú

duca<sup>n</sup> càcunehe veñúhu càhnu sá ío cùnùu te ñá díú mèe-ni veñúhu càcu nehé-yu òré duca<sup>n</sup> càhá<sup>n</sup>-yu, chi tnàhá-ni Yá Ndiòxí Yaá cúu cuèndá veñúhu-á<sup>n</sup> cácu nehé-yu òré duca<sup>n</sup> càhá<sup>n</sup>-yu. <sup>22</sup> Te nchaa ñáyiú càcunehe andiù cuèndá cutnùnì ínì tnàha ñáyiú-yu sá ndáá cadá-yu ññ sá sání ínì-yu cadá-yu, te ñá díú mèe-ni andiù cacu nehé-yu chi tnàhá-ni núu núcõo Yá Ndiòxí táxí tnùnì-gá cácu nehé-yu òré duca<sup>n</sup> càhá<sup>n</sup>-yu, te tnàhá mèé-gǎ cácu nehé-yu òré duca<sup>n</sup> càhá<sup>n</sup>-yu.

<sup>23</sup> Te nchòhó cue téé dàcuaha ñaha xii ñáyiú nchaa tnúhu ní chídó tnùnì ndíi Moisés, ndìhi nchòhó cue téé cùu fariséu, cúu-ndó cuè téé ío dándahú méé-xí sá quíde ndáá te ñá ndáá sá quíde ndáá-ndó. Te cuèi núu ùxí xichi yúcu mèntá ñhí-ndó, te sǎñaha-ndo ññ xichi xii Yá Ndiòxí, te ññ duca<sup>n</sup> quíde-ndo yúcu nání ànís, ndìhi yúcu nání còminú, dico ndáhú ní cuu-ndo chi ñá túú quíde cuèndá-ndó nàcuáa càhá<sup>n</sup> nchaa tnúhu sá ío-gá cùnùu sanu ichi ñaha xii-ndo, te tnúhu-á<sup>n</sup> càchí-xi sá ío xínu

ñuhu-xi cada ndáá-ndó cùndecu-ndo, te cundàhú iní-ndó cuè tnahá ñáyi-ndo, te quindáá iní-ndó Yá Ndióxi, te cada-ndo nchaa nacuaa nduu tñuhu caha<sup>n</sup>-ndó, te nchaa tñuhu-á<sup>n</sup> cúu-xi tñuhu sá ïo cùnuu xini ñuhu-xi cada-ndo nacuaa caha<sup>n</sup>-xi, dico vá dáña ndéé-ndó cada-ndo nchaa dava-gá nacuaa caha<sup>n</sup> tñuhu sá sánú ìchi ñaha xii-ndo. <sup>24</sup> ;Te nchòhó cúu-ndó dàtná cue ñáyi-ndo, chi ñá túú cùnuni iní-ndó nacuaa canu ichi-ndo ñáyi, chi quide cuendá-ndó mèe-ni nchaa tñuhu sá ñá túú ïo cùnuu, dico nchaa tñuhu sá ïo-gá cùnuu xini ñuhu-xi cada cuendá-ndó ñá túú quide cuendá-ndó!

<sup>25</sup> "Te nchòhó cue téè dàcuaha ñaha xii ñáyi nchaa tñuhu ní chidó tñuni ndí Moisés, ndihí nchòhó cue téè cùu fariséu, cùu-ndo cue téè ïo dandahú méé-xi sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná cue ñáyi nàquete sátá-ni tàsá<sup>n</sup> ndihí sátá-ni còhó te xití-xi cànedehe caduha-ni. Te duca<sup>n</sup> sãtnahá-xi cùu-ndo chi mee-ni sá ndécú ndihí tnahá ñáyi-ndo ñuhu iní-ndó, te nándi dandahú-ndó-yu te quèhe<sup>n</sup>-ndo sá ndécú ndihí-yu. <sup>26</sup> Te nchòhó cue téè cùu fariséu, cúu-ndó dàtná cue ñáyi-ndo, chi ñá túú cùnuni iní-ndó nacuaa nduu sá quidé-ndó. Te ïo xini ñuhu-xi sá cáda-ndó nacuaa nduu ndoo nduu nine iní-ndó cuendá ndacu-ndo cada-ndo sá vaha, te xiá<sup>n</sup> nùu chí cáda dàtná xiquide ñáyi nàquete ndaa xití tàsá<sup>n</sup> ndihí ndaa xití còhó.

<sup>27</sup> "Te nchòhó cue téè dàcuaha ñaha xii ñáyi nchaa tñuhu ní chidó tñuni ndí Moisés, ndihí nchòhó cue téè cùu fariséu, cùu-ndo cue téè ïo dandahú méé-xi sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná núu yínduxi ndíyí núu ní cuáha vii te ní nacáhyú sá cuixí<sup>n</sup>, dico xití yaú-á<sup>n</sup> chi cànedehe caduha chi mee-ni yiquí ndíyí ñuhu. <sup>28</sup> Te duca<sup>n</sup> sãtnahá-xi cùu-ndo chi sãnuu sá cúu-ndó cuè téè váha dico iní-ndó chi mee-ni sá cuéhé sá dúhá ñuhu, te ïo dandahú-ndó mèe-ndo sá quidé ndáá-ndó te ñá ndáá sá quidé ndáá-ndó.

<sup>29</sup> "Te nchòhó cue téè dàcuaha ñaha xii ñáyi nchaa tñuhu ní chidó tñuni ndí Moisés, ndihí nchòhó cue téè cùu fariséu, cúu-ndó cuè téè ïo dandahú méé-xi sá quidé

ndáá te ñá ndáá sá quidé ndáá-ndó. Te ndàhú ní cuu-ndo chi cadúha-ndo nchaa núu ní nguínduxi cue téè ní xóo cáhá<sup>n</sup> tñuhu Yá Ndióxi ndéé sanaha, te ïo vii quide-ndo nchaa núu sá ní cuáha núu yínduxi cue ñáyi ní quide váha ní xíndecu ñuyú-a. <sup>30</sup> Te cãchí-ndó: "Te núu dicó nchoo ní xíndecu-ndo cùnàhá ní xíndecu cue ñani tnahá-ó ndéé sanaha, te vá chítnahá-ó-güedé cahni-o cuè téè ní xóo cáhá<sup>n</sup> tñuhu Yá Ndióxi dàvá-á<sup>n</sup> ní cùu", duha cãchí-ndó. <sup>31</sup> Te sá dúcá<sup>n</sup> caha<sup>n</sup>-ndó, te xiá<sup>n</sup> cútnuni sá ñi<sup>n</sup>-ní cùu-ndo ndihí cue ñani tnahá-ndó cuè téè ní xíndecu ndéé sanaha, cue téè ní sahani ñaha xii cue téè ní cáhá<sup>n</sup> tñuhu Yá Ndióxi dàvá-á<sup>n</sup>, <sup>32</sup> Te núu duca<sup>n</sup> te chí dáxínu cava chiú<sup>n</sup> ní tausaha-güedé.

<sup>33</sup> ;Te nchòhó cúu-ndó cuè téè ïo cuihna iní-xi, chi cùu-ndo datná cóo dèé<sup>n</sup>! Te nchòhó vá nihí-ndó nacuaa cada-ndo cãcu nihnu-ndo nùu ùhú núu ndàhú. <sup>34</sup> Te cuendá xiá<sup>n</sup> nùu tendaha-í cue téè caha<sup>n</sup> tñuhu Yá Ndióxi quixi núu-ndó, ndihí cue téè cùu mestrú danèhé ñahá xii-ndo tñuhu-gá, ndihí cue téè ïo váha cùnuni iní-xi cuendá cáhá<sup>n</sup>-güedé tñuhu-gá núu-ndó. Dico nchòhó chi da cùu ùhú iní-ndó-güedé, chi dava-güedé cahni-ndo-güedé, te dava-güedé cata caa-ndo-güedé núu cùrúxí, te dava-güedé cani-ndo-güedé xití veñuhu, te ndi tnahá ñuu ndi tnahá ñuu quihí<sup>n</sup>-ndó nànducu-ndo-güedé cuendá cada ùhú iní-ndó-güedé. <sup>35</sup> Te sá dúcá<sup>n</sup> ná cada-ndo, te ndadíquí-ndó cuè téè ní quide ndáá ní xíndecu ní xihí ní sahani ñaha cuè ñani tnahá-ndó. Te ndéé ndí Abél téè ïo váha ní quide ndáá ní xíndecu ní sahani-güedé ndadíquí-ndó, ndihí nchaa dava-gá cue téè ní sahani-güedé, ndihí ndéé ndí Zacariá déhe ndí Berèquiás téè ní sahani-güedé ndéé núu ní ndihí-ná ndadíquí-ndó, te ndí-á<sup>n</sup> ní sahani-güedé mei tñuu veñuhu cãnuu sá ïo cùnuu ndihí xito núu sácódó sá ndúú táhú Yá Ndióxi, te nchaa cue téè-á<sup>n</sup> ndadíquí-ndó chi dàtná tñuhu mee-ndo ní sahani-ndo cuè téè-á<sup>n</sup>, chi diu-ni ñani tnahá mèe-ndo duca<sup>n</sup> ní sahani ñaha xii-güedé. <sup>36</sup> Te na cãchí tñuhu ndáá-í xii-ndo sá nchaa cue téè ní quide ndáá ní xíndecu ní sahani-güedé, nchaa cue téè-á<sup>n</sup> ndadíquí nchaa ñáyi ndècu vitna — cachí-gá xãha<sup>n</sup>-gã xii-güedé.

*Jèsús càhá<sup>n</sup>-gá cuèndá ñáyiú ñuú Jerusàlén  
(Lc. 13:34-35)*

<sup>37</sup> Te xàha<sup>n</sup> Jèsús xii ñáyiú ñuú Jerusàlén:

—Nchòhó ñáyiú ñuú Jerusàlén sàhni-ndo cue téé ní tendaha Yá Ndiòxí véxi càhá<sup>n</sup> tnúhu-gá núú-ndó, te mee-ni ndìhi yúú sáhní-ndó dàva-güedé. ¡Te yúhú titní xito ní cuiní-í coto ñaha-í xii-ndo dàtná quidé nchùxi xito-güedi déhe-güedi sàquíhi-güedi xití ndíxí<sup>n</sup>-güedi, dico nchòhó ñá túú ní cuiní-ndó, te diu-ni duca<sup>n</sup> sàni iní-í ndéé vitna! <sup>38</sup> Te na càchí tnúhu ndáá-í xii-ndo sá sáá nduu te ío ndàhú yáha ñuú-ndó, te vá cùndècu-gá-ndó. <sup>39</sup> Te na càchí tnúhu tucu-í xii-ndo sá vǎ quini ñáhá-gǎ-ndó xii-í, dico sáá nduu quini ñáhá tucu-ndo, te dàvá-á<sup>n</sup> cachí-ndó: “Ío càhnu cuu Yaá ní tendaha Dütú Ndiòxí véxi”, duha cachí-ndó —càchí-gá xàha<sup>n</sup>-gǎ xii-yu.

## 24

*Jèsús càchí-gá sá ngóyó veñúhu  
(Mr. 13:1-2; Lc. 21:5-6)*

<sup>1</sup> Te Jèsús ní quee-gá veñúhu càhnu sá ío cùnuu, te meí òré ní quehe<sup>n</sup>-gá ichi quíhí<sup>n</sup>-gá ì<sup>n</sup> xichi, te ní sàndehe yatni cue téé xica cuu ndìhi-gá dìñi-gá, te xàha<sup>n</sup>-güedé xii-gá:

—Cundehe veñúhu-a nǎ ío váha ní sáá —càchí-güedé xàha<sup>n</sup>-güedé xii-gá.

<sup>2</sup> Te Jèsús ní xàha<sup>n</sup>-gǎ xii-güedé:

—Na càchí tnúhu ndáá-í xii-ndo sá ncháá sá ndéhe-ndó-á vitna saá nduu te vá cùndùu-gá-xi dàtná cáá-xí vitna, chi ni ì<sup>n</sup>-gá yúú vǎ códó nchìhi taha-xi chi ndìhi ngoyo —càchí-gá xàha<sup>n</sup>-gǎ xii-güedé.

*Nàcuáa cada-xi nduu ta cùyatni naa  
ñuyú-a*

*(Mr. 13:3-23; Lc. 21:7-24; 17:22-24)*

<sup>3</sup> Te Jèsús ní sáá-gá ndìhi cue téé xica cuu ndìhi-gá yucu Òlívú, te xiá<sup>n</sup> nǎ ngóo-gá te núú núcòo-gá-á<sup>n</sup> nǎ sáhá<sup>n</sup> cue téé xica cuu ndìhi-gá, te dayuhu nǎ xàha<sup>n</sup>-güedé xii-gá:

—Cuiní-ndí cachí tnúhu-n nǎ nduu dùca<sup>n</sup> cada-xi ngoyo veñúhu càhnu sá ío cùnuu, ndìhi nándi cùu sá cádá-xí òré sa ta cùyatni nduu quixi tucu-n ñuyú-a, ndìhi òré sa ta cùyatni naa-xi —cachí-güedé xàha<sup>n</sup>-güedé xii-gá.

<sup>4</sup> Te Jèsús ní xàha<sup>n</sup>-gǎ xii-güedé:

—Ío quíhi iní-ndó cùndecu-ndo cuendá sá vǎ yòo dandàhú ñáhá xii-ndo. <sup>5</sup> Chi ío cuéhé cue téé coo ñuyú, te danàni-güedé mée-güedé dàtná nani-í, te cachí-güedé: “Yúhú cùu-í Crístú Yaá ní tendaha Yá Ndiòxí véxi ñuyú-a”, duha cachí-güedé. Te sá dúcá<sup>n</sup> càhá<sup>n</sup>-güedé te ío vǎi ñáyiú dandàhú-güedé. <sup>6</sup> Te níhi-ndó tnúhu nàa-güedé ndèni ní cuu, dico vá yùhú-ndó chi dacuítí sǎ dúcá<sup>n</sup> càda-xi, dico vátá sáa-gá nduu nàa ñuyú òré duca<sup>n</sup> càda-xi. <sup>7</sup> Chi cue téé ì<sup>n</sup> nàció<sup>n</sup> nàa-güedé ndìhi cue téé ingá nàció<sup>n</sup>, te titní ñuú ngüita-güedé nàa-güedé, te titní xichi ñuyú coo tnamá, te titní tucu xichi ñuyú quixi cuéhé, te titní tucu xichi ñuyú ío níhi tnáa. <sup>8</sup> Te nchaa xiá<sup>n</sup> cuu-xi tnúndòho sá vitná vǎha váha quèsaha sá cúu-xí cuè ñáyiú xǐndecu ñuyú.

<sup>9</sup> Te cue ñáyiú na cùu úhú iní ñáhá xii-ndo cuáha cuèndá ñáhǎ-yu núú cuè téé cùchiu<sup>n</sup> cuendá caniha-güedé xii-ndo, te dava-ndo càhni ñaha-güedé, te nchaa ñáyiú cuu úhú iní ñáhǎ-yu xii-ndo sá cuèndá-í. <sup>10</sup> Te dàvá-á<sup>n</sup> ío vǎi ñáyiú dàñá-yu sá sàndáá iní-yu Yá Ndiòxí, te ngóo-yu cuu úhú iní tnáhǎ-yu, te cuáha cuèndá tnáhǎ-yu núú cuè téé cùchiu<sup>n</sup>. <sup>11</sup> Te ío vǎi cue téé cachí-güedé sá càhá<sup>n</sup>-güedé tnúhu Yá Ndiòxí te ñá ndáá sá càhá<sup>n</sup>-güedé tnúhu-gá, te duca<sup>n</sup> ío vǎi ñáyiú dandàhú-güedé. <sup>12</sup> Te dàvá-á<sup>n</sup> cunuu mèe-ni nchaa sá cuéhé sá dúhá càdá-yu, te vǎi-yu vá cúu iní-gá-yu tnàha ñáyiú-yu. <sup>13</sup> Dico nchaa ñáyiú na càda ndee-ni iní canchicú<sup>n</sup> nihnu ñaha-ni xii-í, ñáyiú-á<sup>n</sup> naníhí tǎhú-yu. <sup>14</sup> Te níhí ñuyú quíhí<sup>n</sup> ñáyiú càhá<sup>n</sup>-yu tnúhu váha, tnúhu sá càhá<sup>n</sup> nàcuáa ndíhu ndaha ñàha Yá Ndiòxí xii ñáyiú, te sáta ná níhi nchaa ñáyiú tnúhu-á<sup>n</sup> te naa ñuyú.

<sup>15</sup> Te ndí Dániél téé ní xóo càhá<sup>n</sup> tnúhu Yá Ndiòxí ndéé sanaha ní chídó tnùní ndí cuèndá ì<sup>n</sup> sá dáquèe tihú Yá Ndiòxí cundecu ì<sup>n</sup> xichi núú nǎ cuu íí, te xiá<sup>n</sup> cada-xi sá vǎ cùndècu-gá ni ì<sup>n</sup> ñáyiú xiá<sup>n</sup>. Te cada cuèndá váha-ndo nàcuáa ní càhá<sup>n</sup> ndí, chi nduu na quini-ndó xiá<sup>n</sup> cundecu-xi núú dúcá<sup>n</sup> nǎ cuu íí, <sup>16</sup> te dàvá-á<sup>n</sup> nchaa ñáyiú xǐndecu distritú Jùdeá xini ñuhu-xi cunú-yu quíhí<sup>n</sup>-yu xití yucu. <sup>17</sup> Te nchaa ñáyiú ndáa ndódó dǐquí véhé-xí



vã ndïhu-gá-yu vehé-yu quehé<sup>n</sup>-yu ï<sup>n</sup> ndachïú<sup>n</sup>-yu canehé-yu quíhí<sup>n</sup>. <sup>18</sup> Te nchaa ñáyiú cuáhá<sup>n</sup> yucu vá nùhú-gá-yu vehé-yu cúnúquehé<sup>n</sup>-yu dóó-yu. <sup>19</sup> Te ndàhú ní cuu nchaa ñáyiú ðíhí ñúhú ðehe-xi, ndíhi cue ñáyiú ðíhí xĩndeca ðehe vitna sàdi na saá nduu dùca<sup>n</sup> cada-xi! <sup>20</sup> Te nchòhó, chí càcá<sup>n</sup> táhú nùú Yã Ndiöxí cuendá sá vã dúcá<sup>n</sup> ndòho-ndo yóó quidé vïxi<sup>n</sup>-xi, te ni vã dúcá<sup>n</sup> ndòho-ndo nduu cuu-xi nduu ndetatú-ndó. <sup>21</sup> Chi ðává-á<sup>n</sup> coo tnúndòho cahnu vihi ñuyíú, te vátá ï<sup>n</sup> ndùu-gá coo tnúndòho cahnu vihi-á<sup>n</sup> ndèe cútnàhá ní ngáva ñuyíú, chí ðiu-ni ðává-á<sup>n</sup> coo tnúndòho cahnu vihi-á<sup>n</sup>, te ni nùú cuáhá<sup>n</sup> nùú vèxi vá cóó-gã tnúndòho-á<sup>n</sup>. <sup>22</sup> Te Yã Ndiöxí càchí-gá sá vã ïo vãi nduu coo tnúndòho cahnu vihi-á<sup>n</sup> sã cuendá nchaa ñáyiú ní càhá<sup>n</sup>-gã cundecu ndíhi-gá. Chi núu vãi nduu na coo tnúndòho-á<sup>n</sup> te vá yóo cácu nihnu.

<sup>23</sup> Te núu ìó ñáyiú càchí-yu xii-ndo: “Chí cündèhe iha, chí iha ní quexìo Cristú Yaá ní tendaha Yã Ndiöxí véxi ñuyíú-a”, àdi cachí-yu: “Chí cündèhe yacá<sup>n</sup> chí yàcá<sup>n</sup> ndécú-gã”, càchí-yu ña. Te vá quèndáá iní-ndó tnùhu càhá<sup>n</sup>-yu. <sup>24</sup> Chi coo cue tée cachí-güedé sá cúú-güedé Yaá ní tendaha Yã Ndiöxí véxi ñuyíú-a, te dava-güedé cachí-güedé sá cúú-güedé cue tée càhá<sup>n</sup> tnùhu Yã Ndiöxí dico ñá ndàá sá cúú-güedé cue tée càhá<sup>n</sup> tnùhu-gá, te cada-güedé titní núú sã vã yóo tnàhí ndàcu cada cuendá dandàhú-güedé ñáyiú. Te cani iní-güedé dandàhú-güedé ndéé cue ñáyiú ní càhá<sup>n</sup> Yã Ndiöxí cundecu ndíhi-gá. <sup>25</sup> Te duha nduu tnùhu càhá<sup>n</sup>-í dátùha ñaha-í xii-ndo. <sup>26</sup> Te núu càchí-yu xii-ndo: “Xití yucu-ã<sup>n</sup> ní quexìo Yaá ní tendaha Yã Ndiöxí véxi ñuyíú-a”, càchí-yu. Te vá quèndáá iní-ndó quíhí<sup>n</sup>-ndó, àdi cachí-yu: “Vehe-ã<sup>n</sup> ndécú Yaá ní tendaha Yã Ndiöxí véxi ñuyíú-a”, càchí-yu. Te vá quèndáá iní-ndó tnùhu càhá<sup>n</sup>-yu. <sup>27</sup> Chi ðàtná xìní nchaa ñáyiú quide-xi oré sáá ndúté ðàyehé-xi ni càa xico ñuyíú duca<sup>n</sup> càda-xi oré quixi tucu yúhú Tée cùu ñaní tnáhá-ndó nchaa-ndo chí ncháa-yu quini ñáhã-yu xii-í. <sup>28</sup> Te nchòhó xìní-ndó sã ncháa nùú yúcú yìqui cuñú ní xíhí te yacá<sup>n</sup> tàcá nchaa ndixíí xéxí-güedi.

*Nàcuáa cada-xi òré quixi tucu Tée cùu ñaní tnáhá cuè ñáyiú*

(Mr. 13:24-37; Lc. 21:25-33; 17:26-30, 34-36)

<sup>29</sup> Te na yãha-ni coo tnúndòho cahnu vihi-á<sup>n</sup>, te vá ðáyèhé-gá nchícanhii, te ni vã ðáyèhé-gá yóó, te ngoyo nchaa chódíní ndèe andiu, te quidi-xi andiu <sup>30</sup> nàcuáa cutnùní iní ñáyiú sá sà véxi yúhú Tée cùu ñaní tnáhã-yu ncháa-yu. Te cue ñáyiú nihí ñuyíú ndähyú-yu sá ndíhú iní-yu òré duca<sup>n</sup> càda-xi, te ncháa-yu quini ñáhã-yu xii-í quee-í andiu quixi-í ichi xití vícò, te quini-yu sá ïo cahnu cuu-í, te quide-í nchaa sá vãha. <sup>31</sup> Te tauchiú<sup>n</sup>-í cue espíritú xínú cuèchi núu-í níhi tíú-xi cútú nadatàcá-xi nchaa ñáyiú ní càhá<sup>n</sup>-í chitnahá ñáhã xii-í xĩndecu ni càa xico ñuyíú.

<sup>32</sup> Te nchòhó sa xìní-ndó nàcuáa quide yutnu ngúxí, chí yutnu-á<sup>n</sup> ndúú yùte núú ðité-xi te nàtáhú ndaha-xi. Te òré duca<sup>n</sup> quide-xi te càchí-ndó sã sà ní cuyatni nuu cahni. <sup>33</sup> Te ðiu-ni duca<sup>n</sup> sãtnahá-xi cada-xi ñuyíú-a òré ná quini-ndó càda-xi nchaa nacuáa ní càhá<sup>n</sup>-í, te cutnùní iní-ndó sã sà ní cuyatni vii-nã nduu nàa ñuyíú. <sup>34</sup> Te na càchí tnùhu ndáá-í xii-ndo sã òré vátá cùú-gá nchaa ñáyiú xĩndecu ñuyíú-a vitna, te cada-xi nchaa nàcuáa ní càhá<sup>n</sup>-í. <sup>35</sup> Te andiu ndíhi ñuyíú-a chí ndíhi nihnu-xi, dico tnùhu-í chí vá ndíhí nihnu-xi chí cùu-xi tnùhu ndáá cuití.

<sup>36</sup> Dico ñá túú cùtnuní ná nduu quixi tucu-í, te ni ña túú cùtnuní ná òré chí vá yóo xìní, te ni cuè espíritú xínú cuèchi núú Yã Ndiöxí ñá túú xìní-xi ná nduu quixi-í, te ni mèe yúhú Tée cùu Déhe Dútú Ndiöxí ñá túú xìní-í ná nduu quixi tucu-í, chí ï<sup>n</sup> ðìí ní mee-gã xìní-gá nùu ná nduu quixi-í.

<sup>37</sup> Te nduu na quixi tucu yúhú Tée cùu ñaní tnáhá-ndó nchaa-ndo ñuyíú-a te cada-xi ðàtná ní quide-xi cútnàhá ní xĩndecu ndíi Nòé. <sup>38</sup> Chi nchaa ñáyiú ní xĩndecu ðává-á<sup>n</sup> òré vátá ndáá-gã ndute ñuyíú, te xèxí-yu xihí-yu quide-yu, te ðavá-yu ìó-yu vico tnãndaha, te ðavá-yu ðàsá<sup>n</sup>-yu ðehe yòcò-yu candeca ñaha tée, te duca<sup>n</sup>-ni xĩquide-yu ndéé ní sáá nduu cuãguee té Nòé xití bàrcú. <sup>39</sup> Te ñá túú ní cùtnuní iní-yu nàcuáa cada-xi ñuyíú ndèé ní sáá nduu ñí ngúta-xi ní cuu<sup>n</sup> dáú ñí ndaa



ndute ñuyú ní dánáá ñàha-xi xií-yu. Te òu-ni duca<sup>n</sup> sàtnahá tucu-xi cada-xi nduu na quixi tucu yúhú Tée cùu ñani tnáhã-yu nchaá-yu ñuyú-a, chi nduu ñà túú nã yíhí ìní-yu te quixi tucu-í. <sup>40</sup> Te dàvã-á<sup>n</sup> nũ úú tnàhá cue tée yíhi-güedé xití yucu, te ì<sup>n</sup>-dé ndanchita te ì<sup>n</sup>-dé quendóo. <sup>41</sup> Àdi úú ñáyiu ðíhí nchícõ-yu ì<sup>n</sup>-ni vèhe, te ì<sup>n</sup>-yu ndanchita te ì<sup>n</sup>-yu quendóo.

<sup>42</sup> Te duha nduu tnúhu càhá<sup>n</sup>-í cuendá nchòhó cundecu túha-ndo, chi ñá túú xìní-ndó nã òré quixi tucu yúhú Yaá cúu Xítohó-ndó. <sup>43</sup> Te nchòhó xìní-ndó sã nũ ì<sup>n</sup> tée cùu xítohó vehe xìní-dé ná òré cúu-xí niú quíhu ñadúhú vehe-dé duhu-güedé, te quíhi ìní-dé cundecu-dé cuendá sã vã dáñá-dé quíhu ñadúhú-ã<sup>n</sup> vehe-dé duhu-güedé, dico ñá túú xìní-dé. <sup>44</sup> Te duha càhá<sup>n</sup>-í chi nchòhó xìní ñùhu-xi cundecu túha-ndo, chi na cuáhã<sup>n</sup> òré ñá túú nã yíhí ìní-ndó quèxio yúhú Tée cùu ñani tnáhã-ndó nchãa-ndo.

*Cuendá ì<sup>n</sup> tée xínu cuechi  
(Lc. 12:41-48)*

<sup>45</sup> Te na càni-í ì<sup>n</sup> cuendú núú-ndó. ì<sup>n</sup> tée xínu cuechi núú ì<sup>n</sup> patróon<sup>n</sup> cúu-dé ì<sup>n</sup> tée ío váha tècú tnùní, te quide ndáá-dé ndécú-dé. Te ì<sup>n</sup> xito ní dándõ ndaha ñaha patróon<sup>n</sup>-dẽ xii-dé nchaa cue ñáyiu ndècu vehe-dé cuendá coto ñaha-dẽ xií-yu cuãñaha-dẽ sã cáxi-yu òré tàú-xi caxí-yu, te tée cùu patróon<sup>n</sup>-á<sup>n</sup> ñí quee-dé cuáhã-dé. <sup>46</sup> Te váha táhú tõe xínu cuechi-á<sup>n</sup> te núu ndècuu-dé quidé-dé nchaa nãcuáa ní xáha<sup>n</sup> patróon<sup>n</sup>-dẽ cada-dé mei òré ní nasáa patróon<sup>n</sup>-dẽ-á<sup>n</sup>. <sup>47</sup> Te na càchí tnúhu ndáá-í xii-ndo sã tõe cùu patróon<sup>n</sup>-dẽ-á<sup>n</sup> cũñaha-dẽ xii-dé sã quíndaha-dé nchaa sã ndécú ndíhi-dé. <sup>48</sup> Dico núu tée xínu cuechi-á<sup>n</sup> ní cùu-dé ì<sup>n</sup> tée cuihna ìní-xi, te ngóo-dé cani ìní-dé sã cúyã patróon<sup>n</sup>-dẽ vá nasáa ndíhi-dé. <sup>49</sup> Te ngúita-dé cani-dé nchaa dava-gá cue ñáyiu xínu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quíhu. <sup>50</sup> Te ì<sup>n</sup> nduu òré ñá túú yíhi ìní-dé nasáa patróon<sup>n</sup>-dẽ, <sup>51</sup> te ío dandõho ñaha patróon<sup>n</sup>-dẽ xii-dé, chi daquihí<sup>n</sup> ñáhã-dẽ xii-dé núu xíndecu cue ñáyiu ní cachí sã ñí quide ndáá te ñá ndáá sã ñí quide ndáá-yu. Te duca<sup>n</sup> sàtnahá-xi dandõho ñaha Yá Ndiõxí xii

ñáyiu, chi daquihí<sup>n</sup> ñáhã-gã xií-yu ì<sup>n</sup> xichi núú ío ndohó-yu te yacá<sup>n</sup> ío ndáhyú-yu, te dicó rúhñú-nã cuu núhu-yu sã sátú ìní-yu sã ndóhõ-yu –càchí-gá xáha<sup>n</sup>-gã xii-güedé.

## 25

*Cuendá úxí ñáyiu ðíhí*

<sup>1</sup> Te xáha<sup>n</sup> tùcu Jesús xii-güedé:

–Na càni-í ì<sup>n</sup> cuendú núú-ndó nãcuáa tecú tnùní-ndó nãcuáa cada-xi òré ndíhu ndaha ñaha Yá Ndiõxí xii ñáyiu. Te úxí tnàhá ñáyiu ðíhí ñáyiu cuechi ní quehé<sup>n</sup>-yu lintérnã-yu, te cuáhã<sup>n</sup>-yu ì<sup>n</sup> xichi núú cóo víco tnándaha cuendá cundetú-yu quexio tée tnándaha. <sup>2</sup> Te úhú<sup>n</sup> ñáyiu cuechi-ã<sup>n</sup> ío váha cùtnuní ìní-yu, te úhú<sup>n</sup>-yu ñáhã. <sup>3</sup> Te ndi úhú<sup>n</sup> ñáyiu cuechi dùca<sup>n</sup> ñá túú cùtnuní ìní-xi-á<sup>n</sup> ñà túú ní cãnehé-yu sã ndẽe lintérnã-yu. <sup>4</sup> Dico ndi úhú<sup>n</sup> ñáyiu cuechi cùtnuní ìní-xi-á<sup>n</sup> nẽhẽ-yu sã ndẽe lintérnã-yu. <sup>5</sup> Te tée tnándaha-á<sup>n</sup> cúyã-dé quexio-dé núú ndétú ñáhã-yu-á<sup>n</sup>, te ñini dùca<sup>n</sup> cuyaa-dé ní tñi ñaha sàní xií-yu ní xidí-yu. <sup>6</sup> Te cùu-xi datná dava niú níhi ní cáhá<sup>n</sup> dava-gá ñáyiu, te càchí-yu: “Sa véxi tée tnándaha, chí táquèe quehé quehe<sup>n</sup> cuendá-ndó-dẽ”, càchí-yu. <sup>7</sup> Te ndi úxí ñáyiu cuechi-ã<sup>n</sup> ñí ndacóo-yu quide túha-yu lintérnã-yu. <sup>8</sup> Te ndi úhú<sup>n</sup> ñáyiu cuechi ñà túú cùtnuní ìní-xi-á<sup>n</sup> ñí xáhã<sup>n</sup>-yu xii cue ndi úhú<sup>n</sup> ñáyiu cùtnuní ìní-xi-á<sup>n</sup>: “Chí táxi núu luha sã ndẽe lintérnã-ndó ná ndẽe lintérnã-ndi chí ñá cuñí-xi cáyú mee-ñi ndàhvã”, càchí-yu xáhã<sup>n</sup>-yu. <sup>9</sup> Te cue ñáyiu cuechi cùtnuní ìní-xi-á<sup>n</sup> ñí xáhã<sup>n</sup>-yu: “Vá táxi núu-ndi chí vá tnàhá canehé chiú<sup>n</sup> mee-ndi, te váha-gá chí cuáhã<sup>n</sup> cuaa<sup>n</sup>-ndo núú cuè ñáyiu xídíco cuendá sã vã cúmãní xii-ndo, te vá cúmãní xii nchúhú tucu”, càchí-yu xáhã<sup>n</sup>-yu. <sup>10</sup> Te ñini cuáhã<sup>n</sup> ndi úhú<sup>n</sup> ñáyiu duca<sup>n</sup> ñà túú cùtnuní ìní-xi-á<sup>n</sup> cuãguaa<sup>n</sup>-yu sã ndẽe lintérnã-yu ní quexio tée tnándaha. Te ndi úhú<sup>n</sup> ñáyiu cuechi cùtnuní ìní-xi-á<sup>n</sup> ñí quehe<sup>n</sup> cuendá ñáhã-yu xii-dé, te cuãguíhu ndíhi ñáhã-yu xii-dé núú cóo víco tnándaha, te sátá dúcã<sup>n</sup> te ní nandedí yuyèhe. <sup>11</sup> Te òré ní nasáa cue ñáyiu cuechi ñáyiu ní sãnguaa<sup>n</sup> sã ndẽe lintérnã-xi-á<sup>n</sup>, te ní ngúita-yu càhá<sup>n</sup>-yu xínutñi-yu ndàa sátá yuyèhe ndaa quehé, te

xăhă<sup>n</sup>-yu xii tée tnăndaha-á<sup>n</sup>: “ĭTăta, nacaá<sup>n</sup> yuyèhe na quíhu-ndí!”, cächí-yu xăhă<sup>n</sup>-yu xii-dé. <sup>12</sup> Te tée tnăndaha-á<sup>n</sup> nĩ xáha<sup>n</sup>-dĕ xii-yu: “Na cächí tnúhu ndáá-í xii-ndo sã nchòhó ñã túú tàú-ndó quíhu-ndo vico-a, chi ñã túú tnàhá tnúhu ndihĩ ñaha-ndo xii-í”, cächí-dé xăha<sup>n</sup>-dĕ xii-yu –cächí Jèsús xăha<sup>n</sup>-gã xii-güedé.

<sup>13</sup> Te xăha<sup>n</sup> tucu Jèsús xii-güedé:

—Ío quíhi iní-ndó cūndecu-ndo, chi ñã túú xini-ndó nã nduu, te ni ñã túú xini-ndó nã òré quixi tucu yúhú Tée cū ñani tnàhá-ndó nchăa-ndo —cachí-gã xăha<sup>n</sup>-gã xii-güedé.

*Cuendá cue tée ní ndóo ndaha dĭhú<sup>n</sup>*  
(Lc. 19:11-27)

<sup>14</sup> Te xăha<sup>n</sup> tucu Jèsús xii-güedé:

—Na cãni tucu-í ingã cuendú núú-ndó năcuáa tecú tnúni-ndó năcuáa cada-xi òré ndihu ndaha ñaha Yá Ndiõxí xii ñáyiu. ĩ<sup>n</sup> tée sa ñuhu ichi-ná-dé sã cáca-dĕ quingaca cuu xica-dĕ, te ní cana-dé cue tée xinu cuechi núú-dĕ cuendá dândóo ndaha ñaha-dé dĭhú<sup>n</sup>-dĕ xii-güedé.

<sup>15</sup> Te năcuáa nduu chiu<sup>n</sup> quide ĩ<sup>n</sup> ĩ<sup>n</sup>-güedé, te duca<sup>n</sup> dĭhú<sup>n</sup> nĩ sãñaha-dĕ xii-güedé, te ĩ<sup>n</sup>-dé ní sãñaha-dĕ úhú<sup>n</sup> tnàhá dĭhú<sup>n</sup> sã ĩo yahu nani talentú, te ingã-dé ní sãñaha-dĕ úú tnàhá dĭhú<sup>n</sup>-ă<sup>n</sup>, te ingã-dé ní sãñaha-dĕ ĩ<sup>n</sup> dĭhú<sup>n</sup>-ă<sup>n</sup>, te dătnúni ní quee-dé cuáhã-dé. <sup>16</sup> Te tée ní quehe<sup>n</sup> cuendá úhú<sup>n</sup> tnàhá dĭhú<sup>n</sup> sã nání tàlentú ní quide-dé ndáhú ndihĩ-xi te ní níhi tucu-dé úhú<sup>n</sup>-gã tucu tnàhá dĭhú<sup>n</sup>-ă<sup>n</sup>. <sup>17</sup> Te dĭu-ni duca<sup>n</sup> nĩ quide tucu tée ní níhi úú dĭhú<sup>n</sup> sã nání tàlentú-á<sup>n</sup>, chi ní quide-dé ndáhú te ní níhi tucu-dé úú-gã tucu tnàhá. <sup>18</sup> Dico tée ní níhi ĩ<sup>n</sup>-ni dĭhú<sup>n</sup>-ă<sup>n</sup> chi da ní chiváha-dé dĭhú<sup>n</sup> patróo<sup>n</sup>-dĕ, chi ní xete-dé ĩ<sup>n</sup> yaú te ní chindúxi-dé.

<sup>19</sup> Te ní cuu cuéhé nduu sã nĩ quee patróo<sup>n</sup>-güedé-á<sup>n</sup> ní sãngaca cuu-dé, te ní nasáa-dé te ní ngúita-dé quidé ndăá-dé ndihĩ-güedé cuendá dĭhú<sup>n</sup> sã nĩ dândóo ndaha ñaha-dé xii-güedé. <sup>20</sup> Te tée ní quendóo ndaha úhú<sup>n</sup> tnàhá dĭhú<sup>n</sup>-ă<sup>n</sup> nĩ xáha<sup>n</sup>-dĕ xii patróo<sup>n</sup>-dĕ: “Patróo<sup>n</sup>, náu úhú<sup>n</sup> tnàhá dĭhú<sup>n</sup> sã nĩ dândóo ndaha ñaha-n xii-í-a, te ní sáhã-í ní quide-í ndihĩ-xi ndáhú te ní chídó-xí úhú<sup>n</sup>-gã tucu tnàhá, te náu-a naquehe<sup>n</sup> cuendá-n”, cächí-dé xăha<sup>n</sup>-dĕ xii patróo<sup>n</sup>-dĕ. <sup>21</sup> Te tée cū

patróo<sup>n</sup>-dĕ-á<sup>n</sup> nĩ xáha<sup>n</sup>-dĕ xii-dé: “Ío váha ní quide-n, te vitna quide ñaha-í xii-n ĩ<sup>n</sup> tée váha tée quide ndáá, te sã sácú dĭhú<sup>n</sup> nĩ dândóo ndaha ñaha-ĩ xii-n te ní quide ndáá-n, te sã dúcã<sup>n</sup> nĩ quide-n te vãi-gã taxi cuendá ñhã-í xii-n. Te vitna cuu cundecu-n núú ndécú-í, te ío cudĭĩ iní-ó cūndecu ndihĩ tnaha-o”, cachí tée cū patróo<sup>n</sup>-dĕ-á<sup>n</sup> xăha<sup>n</sup>-dĕ xii-dé. <sup>22</sup> Te sãtã dúcã<sup>n</sup> te tée ní quendóo ndaha úú tnàhá dĭhú<sup>n</sup> sã nání tàlentú-á<sup>n</sup> nĩ xáha<sup>n</sup>-dĕ xii patróo<sup>n</sup>-güedé: “Patróo<sup>n</sup>, náu úú tnàhá dĭhú<sup>n</sup> sã nĩ dândóo ndaha ñaha-n-a, te ní sáhã-í ní quide-í ndihĩ-xi ndáhú, te ní chídó-xí úú-gã tucu tnàhá, te náu-a naquehe<sup>n</sup> cuendá-n”, cächí-dé xăha<sup>n</sup>-dĕ xii patróo<sup>n</sup>-güedé. <sup>23</sup> Te ní xáha<sup>n</sup> tée cū patróo<sup>n</sup>-á<sup>n</sup> xii-dé: “Ío váha ní quide-n, te vitna quide ñaha-í xii-n ĩ<sup>n</sup> tée váha tée quide ndáá, te sã sácú dĭhú<sup>n</sup> nĩ dândóo ndaha ñaha-ĩ xii-n te ní quide ndáá-n, te sã dúcã<sup>n</sup> nĩ quide-n te vãi-gã taxi cuendá-í. Te vitna cuu cundecu-n núú ndécú-í, te ío cudĭĩ iní-ó cūndecu ndihĩ tnaha-o”, cachí tée cū patróo<sup>n</sup>-á<sup>n</sup> xăha<sup>n</sup>-dĕ xii-dé. <sup>24</sup> Te tée ní ndóo ndaha ĩ<sup>n</sup>-ni dĭhú<sup>n</sup>-ă<sup>n</sup> nĩ xáha<sup>n</sup>-dĕ xii tée cū patróo<sup>n</sup>-dĕ-á<sup>n</sup>: “Patróo<sup>n</sup>, yúhú sa ñaha-í sã yòhó cúú-n ĩ<sup>n</sup> tée nducu mee-ni sã cúú-xí mèe-xi te tàhu-n chiu<sup>n</sup> cuáhã<sup>n</sup> nchúhú cue tée xinu cuechi núú-n sácã<sup>n</sup>-ndí triú, te òré ná nãtaxi tnaha-ndí, te yòhó dĭcò-nã náquehe<sup>n</sup> cuendá-n tàxúha-n. <sup>25</sup> Te núu xiã<sup>n</sup> ní yúhú-í cada-í ndáhú ndihĩ dĭhú<sup>n</sup>-n, te ní sáhã-í ní xete-í ĩ<sup>n</sup> yaú te ní chindúxi-í, te náu dĭhú<sup>n</sup>-n-á<sup>n</sup> naquehe<sup>n</sup> cuendá-n”, cächí-dé xăha<sup>n</sup>-dĕ xii tée cū patróo<sup>n</sup>-á<sup>n</sup>. <sup>26</sup> Te tée cū patróo<sup>n</sup>-á<sup>n</sup> nĩ xáha<sup>n</sup>-dĕ: “Yòhó cúú-n ĩ<sup>n</sup> tée cuihna iní-xi xinu cuechi núú-í te cuhndu-n, te núu yòhó sání iní-n sã cúú-í ĩ<sup>n</sup> tée tàuchiu<sup>n</sup> cuáhã<sup>n</sup>-ndó sácã<sup>n</sup>-ndó triú te òré nãtaxi tnaha-ndo, te yúhú dĭcò-nã náquehe<sup>n</sup> cuendá-í nãtàxúha-í. <sup>27</sup> Te núu sání iní-n sã dúcã<sup>n</sup> quide-í, te dasã<sup>n</sup> núu-n dĭhú<sup>n</sup>-í te cúñaha-n chăhu-yu díquí-xi ni cū, te òré ndexi-í te sa ngódó lùha-gã díquí-xi naquehe<sup>n</sup>-í ní cū”, cachí-dé xăha<sup>n</sup>-dĕ xii tée xinu cuechi-á<sup>n</sup>. <sup>28</sup> Te tée cū patróo<sup>n</sup>-á<sup>n</sup> nĩ xáha<sup>n</sup>-dĕ xii dava-gã cue tée ndecu ndihĩ-dé: “Chí quéndé ĩ<sup>n</sup> dĭhú<sup>n</sup> sã nání tàlentú néhé tĕe-ă<sup>n</sup>, te cuáha-ndo tĕe

nèhe úxí tnàhá ðiu-ni díhú<sup>n</sup>-á<sup>n</sup>. 29 Chi cue tée sa ndècu ndihí te níhí-gǎ-güedé cundecu ndihí-güedé, te ni vǎ níhí-gǎ-güedé ndèe cundecu nchaa sá cündècu ndihí-güedé. Te cue tée ñá túú nǎ ndécú ndihí vai, te nchaa sá ndécú ndihí-güedé vá cündècu ndihí-gǎ-güedé. 30 Te tée xínu cuechi ñá túú vèdana nàndíhí-á<sup>n</sup>, chí tní<sup>n</sup>-dè te daquihí<sup>n</sup>-ndó-dè ì<sup>n</sup> xichi núú néé núú ïo ndoho-dé, te yàcá<sup>n</sup> ndáhyú-dé, te ðicó rúhñú-nǎ cuu núhu-dé sá sǎtú iní-dé sá ndóhó-dè”, càchí tée cùu patróo<sup>n</sup>-á<sup>n</sup> xǎha<sup>n</sup>-dè xii-güedé. Duha sǎtnahá-xi ndoho nchaa ñáiyu ñá túú quide váha —càchí-gǎ xǎha<sup>n</sup>-gǎ xii-güedé.

*Cuèndá cue ñáiyu ní quide váha ndihí cuèndá cue ñáiyu ñá túú ní quide váha*

31 Te xǎha<sup>n</sup> tucu Jesús xii-güedé:

—Te nduu na quixi tucu yúhú Tée cùu ñaní tnàhá-ndó nchaa-ndo, te quixi-í ndihí nchaa cue espíritú xínú cuèchi núú-í, te nchaa ñáiyu quini-yu sá ïo càhnu cuu-í, te dàvá-á<sup>n</sup> cunucóo-í núú táxí tnùn-í, te ïo cuñuhu ñáiyu sá ïo càhnu cuu-í. 32 Te dàvá-á<sup>n</sup> nataká nchaa ñáiyu xíndecu ni càa xico ñuyú cundecu-yu núú-í, te cada-í-yu dàtná quidé ì<sup>n</sup> toli oré táú ðí<sup>n</sup>-dé nchaa mbéé ndihí nchaa chivá chi ðí<sup>n</sup> taxi ndecu-dé nchaa mbéé, te ðí<sup>n</sup> taxi ndecu-dé nchaa chivá. 33 Te duca<sup>n</sup> sǎtnahá-xi cada-í chi nchaa ñáiyu ní quide ndáá núú-í ñáiyu-á<sup>n</sup> taxi ndecu-í-yu xio cùha-í, te nchaa ñáiyu cuihna iní-xi ñá túú ní cuini cada ndáá núú-í ñáiyu-á<sup>n</sup> taxi ndecu-í-yu xio dàtni-í. 34 Te duca<sup>n</sup> te yúhú tée ïo cùnuu cúñaha-í xii ñáiyu na cündecu xio cuha-í: “Nchaa nchòhó ñáiyu ní quide váha ñaha Tǎtà-í Dútú Ndióxi, chí nèhé chi vitna ní sáá nduu cündecu-ndo núú ndécú-gǎ táxí tnùn-í-gǎ, chí ndéé cútnahá ní ngáva ñuyú sa ndècu túha tnàhí núú ndécú-gǎ-á<sup>n</sup> sá nchòhó nduu táhú-ndó cündecu-ndo. 35 Te duca<sup>n</sup> chí òré xihí-í docó te ní taxi-ndo sǎ ní xexi-í, te òré yichí-í ndute te ní taxi-ndo ndute ní xihí-í, te òré ñùhù-í ichi te ní taxi-ndo vehe ní ndetatú-í. 36 Te òré xíní ñùhu-í dóo cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xihí-í vècaá te ní quixi tucu-ndo ní quixi coto ñaha-ndo xii-í”, duha cúñaha-í xii

nchaa ñáiyu-á<sup>n</sup>. 37 Te nchaa ñáiyu duca<sup>n</sup> ní quide ndáá-á<sup>n</sup> cùñahá-yu xii-í: “Yòhó Yaá cúú Xitohó-ndí, ni ì<sup>n</sup> xito ñá túú ní tàxi-ndí sá cáxí-n òré xihí-n dòcò, te ni ì<sup>n</sup> xito ñá túú ní tàxi-ndí ndute coho-n òré yichí-n. 38 Te ni ñá túú ní tàxi-ndí vehe ndetatú-n òré ñùhù-n ìchi, te ni ñá túú ní tàxi-ndí dóo cuihnu-n òré xíní ñùhu-n. 39 Te ni ñá túú ní quixi coto ñaha-ndí xii-n òré ní cuhú-n, te ni ñá túú ní quixi coto ñaha-ndí xii-n òré ní xihí-n vècaá”, duha quesàhá-yu cúñahá-yu xii-í. 40 Te yúhú tée cùnuu cúñaha-í xii-yu: “Na càchí tnùhu ndáá-í xii-ndo sǎ ncháá sǎ váha ní quide-ndo sǎ cúú-xí nchaa ñáiyu xíndecu ichi-í cuèi ïo ndàhú xíndáa-yu, te sá dúcá<sup>n</sup> ní quide-ndo sǎ váha sá cúú-xí-yu, te cada iní-ndó sǎ mèe-í duca<sup>n</sup> ní quide-ndo ní xito ñaha-ndo xii-í”, duha cúñaha-í xii-yu.

41 Te dàtnùn-í cúñaha-í xii ñáiyu na cündecu xio datni-í: “Nchaa nchòhó ñáiyu ní xíta nihnu chí xócuñí núú ndécú-í-a, chí nchòhó ní nduu táhú-ndó cündecu-ndo núú ñùhú núú càyú, ðiu-ni núú ní quide túha-í cundecu sácuíhná ndihí nchaa espíritú cündihí-xi, te yàcá<sup>n</sup> cundecu-ndo ni caa ni quihí<sup>n</sup>. 42 Chi yúhú òré xihí-í docó te ñá túú ní tàxi-ndo sá cáxí-í, te ni òré yichí-í ndute te ñá túú ní tàxi-ndo ndute coho-í. 43 Te ni òré ní xúhu-í ichi ñá túú ní tàxi-ndo vehe ndetatú-í, te ni òré xíní ñùhu-í dóo cuihnu-í te ñá túú ní tàxi-ndo, te ni òré ní cuhú-í te ñá túú ní quixi-ndo quixi coto ñaha-ndo xii-í, te ni òré ní xihí-í vècaá te ðiu-ni duca<sup>n</sup> ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í xii-yu. 44 Te ñáiyu-á<sup>n</sup> cùñahá-yu xii-í: “Yòhó Yaá cúú Xitohó-ndí ni ì<sup>n</sup> xito ñá túú ní xíní-ndí òré xihí-n dòcò cuèndá taxi-ndí sá cáxí-n, te ni ì<sup>n</sup> xito ñá túú ní xíní-ndí òré yichí-n ndute cuèndá taxi-ndí ndute coho-n, te ni ì<sup>n</sup> xito ñá túú ní xíní-ndí cuhu<sup>n</sup>-n ìchi cuèndá taxi-ndí vehe ndetatú-n, te ni ì<sup>n</sup> xito ñá túú ní xíní-ndí òré xíní ñùhu-n dóo cuèndá taxi-ndí dóo cuihnu-n, te ni ì<sup>n</sup> xito ñá túú ní xíní-ndí òré cuhú-n cuèndá quixi coto ñaha-ndí xii-n, te ni ì<sup>n</sup> xito ñá túú ní xíní-ndí quihí-n vècaá cuèndá quixi coto ñaha-ndí xii-n”, duha quesàhá-yu cúñahá-yu xii-í. 45 Te yúhú



cúñaha-ĩ xii-yu: “Na càchí tnúhu ndáá-í xii-ndo sã sã cuendá sã ñà túú ní quide-ndo ìñ sã vãha sã cúú-xí cuè ñáyiú ndècu ichi-í cuèi ío ndàhú xindáa-yu, te sã dúcáñ nĩ quide-ndo ñà túú ní quide-ndo sã vãha sã cúú-xi-yu, te cada iní-ndó sã mèe-í ducañ nĩ quide-ndo ñà túú ní quide-ndo sã vãha sã cúú-xi-í”, duha cúñaha-ĩ xii-yu. <sup>46</sup> Te nchaa ñáyiú-án quíhíñ-yu núú ùhú núú ndàhú nĩ caa nĩ quíhíñ. Te nchaa ñáyiú ní quide ndáá núú-í ní xíndecu ñuyíú-a, ñáyiú-án nduu táhũ-yu ío vãha cundecú-yu nĩ caa nĩ quíhíñ —càchí-gá xãhañ-gã xii-güedé.

## 26

*Cue tée cùu úhú iní ñáhá xii Jesús ndúcú-güedé nàcuáa cada-güedé tñi ñaha-güedé xii-gá*

*(Mr. 14:1-2; Lc. 22:1-2; Jn. 11:45-53)*

<sup>1</sup> Te sátá nĩ yáha ducañ nĩ cáháñ Jèsús, te ní xáhañ-gã xii cue tée xica cuu ndihí-gá:

<sup>2</sup> —Nchòhó sa xini-ndó sã cùmání úú-gá nduu te coo vico pàscuá, te càchí tnúhu-í xii-ndo sã yùhú Téé cùu ñaní tnáhá-ndó nchàa-ndo tñi ñaha-güedé xii-í, te cuáha cuendá ñáhá-güedé núú cuè téé cùu úhú iní ñáhá xii-í, te cata caa ñaha-güedé núú cùrúxí te núú cùrúxí-án cuú-í —càchí-gá xãhañ-gã xii-güedé.

<sup>3</sup> Te ñiú-ni òré càháñ ndihí Jèsús cue téé xica cuu ndihí-gá ní natacá cue téé cùu dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùnì ndii Moisés, ndihí cue téé cùu sacuéhé núú ñáyiú isràél. Te mei quèhé vehe núú cúú vèchiuñ té Caifás téé cùu dútú ño-gá cùnùu ní nat-acá-güedé. <sup>4</sup> Te xíáñ nĩ ndatnúhu-güedé nàcuáa cada-güedé dandàhú-güedé Jèsús cuendá tñi ñaha-güedé xii-gá, te cahni ñaha-güedé. <sup>5</sup> Te ní xitnàha-güedé:

—Vãha-gá sã vã tñi-ó Jèsús mei ndùu vico, chi núú ducañ na càda-o te ío dusañ càda ñáyiú —càchí-güedé xitnàha-güedé.

*Ìñ ñadìhí chíhí-án àcítí díquí Jèsús*  
*(Mr. 14:3-9; Jn. 12:1-8)*

<sup>6</sup> Te ndècu Jesús ñuú Bètania vehe ìñ téé nàni Xímú, téé ní tnáhá cuéhé sã dátèhyú nihnu-xi yiqui cùñú-ó. <sup>7</sup> Te xíáñ ndécú-gã ní quexìo ìñ ñadìhí néhé-án ìñ sã nĩ cuáha

yúú vãha nàni alabastrú, te xití xíáñ ñúhú àcítí sàháñ tnámí sã ño ndèyáhu. Te yihí Jesús mèésá xéxí-gã, te ñaha-án nĩ sáháñ-añ ní sódó-añ àcítí ñúhú xití xíáñ díquí-gã. <sup>8</sup> Te òré ní xini cue téé xica cuu ndihí Jesús sã dúcáñ nĩ quide ñaha-án te ní cudééñ-güedé, te ní ngüíta-güedé xitnàha-güedé:

—Ñá túú quide vãha ñaha-án dàcáñ quidé-án dacuíta-añ acítí-án. <sup>9</sup> Chi vãha-gá nùu cuyáhu acítí-án ní cùu chi ío ndèyáhu, te díhúñ cuyáhu acítí-án cuu cuendá cue ñáyiú ndàhú ní cùu —cachí-güedé xitnàha-güedé.

<sup>10</sup> Te Jèsús ní cutnùnì iní-gá nàcuáa ndùu tnúhu xitnàha-güedé, núú ní xáhañ-gã xii-güedé:

—Vã dásatú-ndó iní ñadìhí-a, chi sã nĩ quide ñaha-añ xii-í cúú-xí ìñ sã vãha. <sup>11</sup> Chi cue ñáyiú ndàhú ducañ-ni cùtnahá ñáyiú-án tnuú-ndó, dico yúhú chi vá ncháá ndùu cundecu ndihí ñaha-í xii-ndo ñuyíú-a. <sup>12</sup> Te sã dúhá nĩ quide ñaha ñadìhí-a xii-í ní sódó-añ àcítí díquí-í, te xíáñ cada iní-ndó sã sã quide túha-añ yiqui cùñú-í cuendá nguíndüxi-xi. <sup>13</sup> Te na càchí tnúhu ndáá-í xii-ndo sã ndèni ní cuu nihí ñuyíú ná càháñ ñáyiú tnúhu-í, te cáháñ-yu tnáhá cuendá ñadìhí-a cuendá quini nchaa ñáyiú nàcuáa ní quide-añ te ducañ vã nàcuánaá-yu —càchí-gá xãhañ-gã xii-güedé.

*Té Jüdás ndúcú-dé nàcuáa cada-dé cuáha cuendá-dé Jèsús núú cuè téé cùu úhú iní ñáhá xii-gá*

*(Mr. 14:10-11; Lc. 22:3-6)*

<sup>14</sup> Te sátá dúcáñ te té Jüdás Iscarioté ní sáháñ-dé ní ndatnúhu-dé ndihí cue téé cùu dútú cùnùu. Te núú tnáhá té Jüdás-án cúú ùxúú cue téé xica cuu ndihí Jesús. <sup>15</sup> Te ní xáhañ-dé xii cue téé cùu dútú cùnùu-án:

—¿Ndédau cháhu ñaha-ndo xii-í te taxi cuendá-í Jèsús xii-ndo-í? —càchí-dé xãhañ-dé xii-güedé.

Te cue dútú-án nĩ xáhañ-güedé xii-dé sã cuãñaha-güedé ócò úxí díhúñ cuixíñ, te ñiú-ni ducañ nĩ sãñaha-güedé xii-dé. <sup>16</sup> Te ndéé òré ní queheñ cuendá té Jüdás-án díhúñ, te ní ngüíta-dé ndúcú-dé nàcuáa cada-dé cuáha cuendá-dé Jèsús núú-güedé.



*Cùdini Jesús ndihi cue té xica cuu ndihi-gá (Mr. 14:12-25; Lc. 22:7-23; Jn. 13:21-30; 1 Co. 11:23-26)*

17 Te ní sáá nduu nĩ quesaha vico xexi ñáyiú pàá sá ñà túú yìhi levadurá ñu-ni vico pàscuá, te cue té xica cuu ndihi Jesús ní sándehe yatni-güedé ñiñi-gá, te xáha<sup>n</sup>-güedé xii-gá:

—Mèstrú, véxi-ndí xicá<sup>n</sup> tnúhú-ndí núú-n nũ ndéé cuini-n càda túha-ndí cuendá cudini-o sacuaa nduu vico pascuá — càchí-güedé xáha<sup>n</sup>-güedé xii-gá.

18 Te Jèsús ní xáha<sup>n</sup>-gá xii-güedé:

—Chí cuáhá<sup>n</sup> xití ñuú-á<sup>n</sup>, te yacá<sup>n</sup> naníhí-ndó ñ<sup>n</sup> té cùtnuní iní-ndó sá sà xini ñáhá-dé xii-o, te cúñaha-ndo xii-dé: “Yáá cúú Mèstrú càchí-gá sá sà ní cuyatni nduu vã cùndècu-gá ñuyúú-a, te vehe-n cuini-gá cada-gá vico pàscuá ndihi cue té xica cuu ndihi-gá”, duha cúñaha-ndo xii té-á<sup>n</sup> — càchí-gá xáha<sup>n</sup>-gá xii-güedé.

19 Te cue té xica cuu ndihi-gá-á<sup>n</sup> nĩ xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gá xii-güedé, te ní quide túha-güedé sá cudini-güedé ndihi-gá sacuaa nduu vico pascuá-á<sup>n</sup>. 20 Te òré sa ní cundiqui<sup>n</sup> te cuánguñhu Jèsús ndihi ndi ùxúú cue té xica cuu ndihi-gá mèsá cuendá cudini-gá ndihi-güedé. 21 Te nini xèxi-gá ndihi-güedé ní xáha<sup>n</sup>-gá xii-güedé:

—Na càchí tnúhu ndáá-í xii-ndo sá díú ñ<sup>n</sup> nchohó cue té xica cuu ndihi-í cuáha cuendá ñáhá-ndó xii-í núú cuè té cùu úhú iní ñáhá —càchí-gá xáha<sup>n</sup>-gá xii-güedé.

22 Te sá dúcá<sup>n</sup> nĩ xáha<sup>n</sup>-gá xii-güedé te nchaa-güedé ní ngüita-güedé cùndiyí-güedé, te da ñ<sup>n</sup> da ñ<sup>n</sup>-güedé ní ngüita-güedé xáha<sup>n</sup>-güedé xii-gá:

—Mèstrú, ¿ñá díú yùhú duca<sup>n</sup> sàni iní-n càda-í-u? —càchí-güedé xáha<sup>n</sup>-güedé xii-gá.

23 Te ní xáha<sup>n</sup>-gá xii-güedé:

—Té nacaxi ndihi-í ñ<sup>n</sup>-ni cóhó caxi-ndí, té-á<sup>n</sup> cuáha cuendá ñáhá-dé xii-í núú cuè té cùu úhú iní ñáhá. 24 Te yùhú Té cùu ñaní tnáhá-ndó nchàa-ndo ñuhu ichi-í cuáhá<sup>n</sup>-í yáha-í nàcuáa càhá<sup>n</sup>-xi núú tütú Yá Ndiöxí, dico ndàhú ní cuu té duca<sup>n</sup> na cuáha cuendá ñáhá xii-í núú cuè té cùu úhú

iní ñáhá, chi váha-gá sá vã cacú tée-á<sup>n</sup> cun-decu-dé ní cùu, te ñá díú sá nĩ cacu-dé te duca<sup>n</sup> càda-dé —càchí-gá xáha<sup>n</sup>-gá xii-güedé.

25 Te sáta dúcá<sup>n</sup> te ní cáhá<sup>n</sup> té Jùdás té cuáha cuendá ñáhá xii-gá, te xáha<sup>n</sup>-dè:

—Mèstrú, ¿te náa sàni iní-n sá yùhú cuáha cuendá ñáhá-í xii-n núú cuè té cùu úhú iní ñáhá xii-n-á<sup>n</sup>? —càchí-dé xáha<sup>n</sup>-dè xii-gá.

Te Jèsús ní xáha<sup>n</sup>-gá xii-dé:

—Ñu-n —càchí-gá xáha<sup>n</sup>-gá xii-dé.

26 Te nini cùdini cue té xica cuu ndihi Jesús ní quehe<sup>n</sup>-gá pàá, te ní ndacá<sup>n</sup> táhú-gá núú Yá Ndiöxí, te dàtnuní ní táhú cuèchi-gá te ní ngüita-gá dácãñhu-gá cue té xica cuu ndihi-gá-á<sup>n</sup>, te xáha<sup>n</sup>-gá xii-güedé:

—Chí quéhé<sup>n</sup> pàá-a caxi-ndo, te cada iní-ndó sá yiqui cuñú-í cúú-xí —càchí-gá xáha<sup>n</sup>-gá xii-güedé.

27 Te ní quehe<sup>n</sup>-gá vàsú ñúhú ndudí ndéhé yoho yàha stilé, te ní ndacá<sup>n</sup> táhú-gá núú Yá Ndiöxí, te dàtnuní ní ngüita-gá sãñaha-gá xii-güedé cuendá coho-güedé luha luha sá ñúhú xití-xi, te xáha<sup>n</sup>-gá xii-güedé:

—Chí cóhó nchàa nchohó ndudí ndéhé yoho yàha stilé ñúhú xití vàsú-a. 28 Te cada iní-ndó sá cúú-xí dàtná ñiñi-í sá catí òré cahni ñaha-güedé xii-í, te sá dúcá<sup>n</sup> càti ñiñi-í xíá<sup>n</sup> cutnuni ndáá sá Yá Ndiöxí cada-gá ingá núú sá váha sá cúú-xí vãi ñáyiú dàtná ní cachí-gá cada-gá, te ío vãi ñáyiú cada càhnu iní-gá cuèchi-yu. 29 Te na càchí tnúhu-í xii-ndo sá vítná-ñá duha xihí ndihi ñaha-í xii-ndo ndudí ndéhé yoho yàha stilé-a, te vá cóhó ndihi ñaha-gá-í xii-ndo, dico na sáá nduu nanihí tnáhá-ó núú ndécú Tãtà-í Dútú Ndiöxí táxi tnuní-gá te dàvá-á<sup>n</sup> cada iní-ndó sá dàtná sá cóhó ndihi ñaha tucu-í xii-ndo chi ío cudí ñiñi-ó —càchí-gá xáha<sup>n</sup>-gá xii-güedé.

*Té Pèlú cúñaha-dé xii ñáyiú sá ñà túú xini-dé Jèsús*

*(Mr. 14:26-31; Lc. 22:31-34; Jn. 13:36-38)*

30 Te Jèsús ní xita-gá ñ<sup>n</sup> ndudú ndihi cue té xica cuu ndihi-gá, te dàtnuní ní xica-gá cuáhá<sup>n</sup>-gá ndihi-güedé yucu Òlívú. 31 Te yacá<sup>n</sup> ní xáha<sup>n</sup>-gá xii-güedé:

—Na càchí tnúhu-í xii-ndo sá ncháá-ndó dandóo ñaha-ndo xii-í niú vitna, chi quee ndáá-xi nàcuáa càhá<sup>n</sup>-xi núú tütú Yá

Ndiöxí núú cächí-xi: “Yúhú cuáha-í tnúhu cahni-güedé té cùu toli, te nchaa mbéé-dě ndihí-güedi cuténuu”, duha cächí-xi núú tütú-gá. <sup>32</sup> Dico na ndòto-í te codonuu-í núú-ndó quíhí<sup>n</sup> distritú Galileá —cächí-gá xáha<sup>n</sup>-gá xii-güedé.

<sup>33</sup> Te té Pèlú ní xáha<sup>n</sup>-dě xii-gá:

—Te cuèi nchaa-güedé ná dándóo ñaha-güedě xii-n, dico yúhú chi vá dándóo ñaha-í xii-n —cächí-dé xáha<sup>n</sup>-dě xii-gá.

<sup>34</sup> Te Jèsús ní xáha<sup>n</sup>-gá xii-dé:

—Na cächí tnúhu ndáá-í xii-n sã nùú vitna cùmání-gá cana ì<sup>n</sup> líhi, te úní xito cáhá<sup>n</sup>-n nùú ñàyiú sá ñà túú xìní ñáhà-n xii-í —cächí-gá xáha<sup>n</sup>-gá xii-dé.

<sup>35</sup> Te té Pèlú ní xáha<sup>n</sup>-dě xii-gá:

—Cuèi na cùú ndihí ñaha-í xii-n dico vá cáhá<sup>n</sup>-í núú ñàyiú sá ñà túú xìní ñáhà-í xii-n —cächí-dé xáha<sup>n</sup>-dě xii-gá.

Te nchaa dava-gá cue téé xica cuu ndihí-gá ñi-ndi duca<sup>n</sup> ñí xáha<sup>n</sup>-güedě xii-gá.

*Jèsús cáhá<sup>n</sup> ndihí-gá Yã Ndiöxí ì<sup>n</sup> xichi núú nání Gètsemaní*

*(Mr. 14:32-42; Lc. 22:39-46)*

<sup>36</sup> Te Jèsús ní quexìo-gá ndihí cue téé xica cuu ndihí-gá ì<sup>n</sup> xichi núú nání Gètsemaní, te xía<sup>n</sup> ñí xáha<sup>n</sup>-gá xii-güedé:

—Chí cúnúo iha cundet-ndo na quíhí<sup>n</sup>-í yacá<sup>n</sup> cáhá<sup>n</sup> ndihí-í Yã Ndiöxí —cächí-gá xáha<sup>n</sup>-gá xii-güedé.

<sup>37</sup> Te ndèca-gá té Pèlú, ndihí ndi ndùú déhe té Zebèdeú cuáhá<sup>n</sup>, te ní ngüíta-xi sùúni ndihú iní-gá. <sup>38</sup> Te ní xáha<sup>n</sup>-gá xii cue téé úní-án:

—Sùúni ndihú iní-í dàtná sá cùú-í, te chí quéndóo nchòhó iha te vá cùú-ndó chí yúhú vá cùú-í —cächí-gá xáha<sup>n</sup>-gá xii-güedé.

<sup>39</sup> Te sa ñunchíi luha ní xica ndehe Jèsús núú ndécú-güedě, te ní ngüíñí xítí-gá te ní nuu núú-gá ndàa núú ñúhú, te ní ngüíta-gá cáhá<sup>n</sup> ndihí-gá Tãtã-gá Dútú Ndiöxí, te xáha<sup>n</sup>-gá:

—Yòhó Tãtã mèè-í, cáhá<sup>n</sup> ndàhú-í núú-n nùú vá cùndèe iní-n tàunihnu ñaha-n xii-í cuendá sá vá ndòhò-í ná sàá òré, dico vá cádá-n nàcuáa cächí iní mèè-í, chí cada-n nàcuáa cächí iní mèè-n —cächí-gá xáha<sup>n</sup>-gá xii Tãtã-gá Dútú Ndiöxí.

<sup>40</sup> Te sãtã ñí yãha ní cáhá<sup>n</sup> ndihí-gá Tãtã-gá Dútú Ndiöxí, te cuánuhú-gá núú ñí

dándóo-gá cue téé úní-án te xixídí-güedé òré ní nasáá-gá, te ní xáha<sup>n</sup>-gá xii té Pèlú:

—¿Náa ñã cùndèe iní-ndó vá cùú-ni-ndo cuèdicó ì<sup>n</sup> òré nini cáhá<sup>n</sup> ndihí-í Yã Ndiöxí-ã<sup>n</sup>? <sup>41</sup> Te chí quéndóo tucu te cuhu<sup>n</sup> iní-ndó vá cùú-ndó, te cáhá<sup>n</sup> ndihí-ndo Yã Ndiöxí cuendá sá vá dácáhã<sup>n</sup> ñáhã yùcu ñávãha xii-ndo càda-ndo sá ñà túú tàú-ndó càda-ndo. Te xìní ndáá-í sã nchòhó cuíni-ndó càda-ndo nchaa nacúaa cáhá<sup>n</sup>-í dicó-ni sá ñà túú ñihí ndéé-ndó —cächí-gá xáha<sup>n</sup>-gá xii-güedé.

<sup>42</sup> Te xito cùu uú cuáhá<sup>n</sup> tucu Jèsús cáhá<sup>n</sup> ndihí-gá Tãtã-gá Dútú Ndiöxí, te xáha<sup>n</sup>-gá:

—Yòhó Tãtã mèè-í, te núú vá cùndèe iní-n tàunihnu ñaha-n xii-í cuendá sá vá ndòhò-í, te cada nàcuáa cächí iní mèè-n —cächí-gá xáha<sup>n</sup>-gá xii Tãtã-gá Dútú Ndiöxí.

<sup>43</sup> Te òré ní yãha ní cáhá<sup>n</sup> ndihí-gá Tãtã-gá Dútú Ndiöxí, te cuánuhú tucu-gá núú xíndecu cue téé úní xicá cùu ndihí-gá-án, te xidí-ni tucu-güedé òré ní nasáá-gá, te duca<sup>n</sup> ñí quide-güedé chí sùúni ñihu saní núú-güedé. <sup>44</sup> Te ní dándóo ñaha tucu Jèsús xii-güedé xía<sup>n</sup>, te cuáhá<sup>n</sup> tucu-gá xito cùu úní cáhá<sup>n</sup> ndihí tucu-gá Tãtã-gá Dútú Ndiöxí, te ñi-ndi tnúhu sá sà ní xáha<sup>n</sup>-gá xii Tãtã-gá Dútú Ndiöxí, ñi-ndi tnúhu-án ñí xáha<sup>n</sup> tucu-gá. <sup>45</sup> Te sãtã ñí yãha ní cáhá<sup>n</sup> ndihí-gá Tãtã-gá Dútú Ndiöxí, te cuánuhú tucu-gá núú ndécú cuè téé xica cuu ndihí-gá-án, te òré ní nasáá-gá, te ní xáha<sup>n</sup>-gá xii-güedé:

—¿Te náa xidí-ni tucu-ndo? Te sa ní sáá òré cuáha cuendá ñáhã-güedě xii-í núú cuè téé ndècu ichi cuehé ichi duha. <sup>46</sup> Dico vitna chí ndácóo na quíhí<sup>n</sup>-ó, chí sa véxi téé cuáha cuendá ñáhã xii-í núú cuè téé cùu úhú iní ñáhã —cächí-gá xáha<sup>n</sup>-gá xii-güedé.

*Ní tñi-güedé Jèsús ndécã ñaha-güedé xii-gá cuáhá<sup>n</sup>*

*(Mr. 14:43-50; Lc. 22:47-53; Jn. 18:2-11)*

<sup>47</sup> Te cáhá<sup>n</sup> dúcã<sup>n</sup>-ní Jèsús ní quexìo té Jüdás. Te núú tnàhá téé-án cùú ùxúú tnàhá cue téé xica cuu ndihí-gá ní cùu te duca<sup>n</sup> ñí quide-dé. Te ndihí-dé vai cue téé ní quexìo te dava-güedé xínehe-güedé machítí, te dava-güedé xínehe-güedé carrutí. Te cue téé-án ñí tendaha ñaha cue dútú cùnùu, ndihí cue téé cùu sacuéhé nùú ñàyiú is-ràél. <sup>48</sup> Te té Jüdás téé cuáha cuendá ñáhã

xii-gá-á<sup>n</sup> sa ní xítñuhu-dé cue téé-á<sup>n</sup> nàcuáa cada-dé cuáha cuendá-dé Jèsús núú-güedě, te duha ní xáha<sup>n</sup>-dě xii-güedě:

—Cundehe-ndo tée na tèyuhu-í te téé-á<sup>n</sup> tñii-ndo-dě chi téé-á<sup>n</sup> cúú-dě téé ndèè iní-ndó —duha ní xáha<sup>n</sup>-dě xii-güedě.

<sup>49</sup> Te sátá dúcá<sup>n</sup> nǐ xáha<sup>n</sup>-dě xii-güedě, te ní sándehe yatni-dé núú Jèsús, te ní xáha<sup>n</sup>-dě xii-gá:

—¡Ràció<sup>n</sup> Mèstrú! —càchí-dé xáha<sup>n</sup>-dě xii-gá.

Te ní teyuhu ñàha-dé xii-gá. <sup>50</sup> Te Jèsús ní xáha<sup>n</sup>-gǎ xii-dé:

—Yòhó téé ní chitnahá ñáhá xii-í, ¿ná cuíní-n nǔu véxi-n nǔu-í? —càchí-gá xáha<sup>n</sup>-gǎ xii-dé.

Te òré-ni-á<sup>n</sup> nǐ tñii ñàha cuè téé ndihi té Jùdás-á<sup>n</sup> xii Jèsús, te ndèca ñàha-güedě xii-gá cuáhá<sup>n</sup>.

<sup>51</sup> Te ì<sup>n</sup> cue téé ndihi Jèsús ní tava-dé machití-dé, te ní xehndé-ni-dé ì<sup>n</sup> xio lóho ì<sup>n</sup> téé xínu cuechi núú dǔtú cúnùu te ní quen-deé duu<sup>n</sup> lóho-dé. <sup>52</sup> Te Jèsús ní xáha<sup>n</sup>-gǎ xii téé duca<sup>n</sup> nǐ xehndé lóho téé-á<sup>n</sup>:

—Nachihí machití-n ñii-xi, chi nchaa cue téé na nàa ndihi machití cahni-güedě tñàha ñáyiü-güedě te ñii-ni ndihi machití cuú méé-güedě tucu. <sup>53</sup> Te na càchí tñúhu-í xii-ndo sǎ nǔu yúhú cuíní-í cácu-í te cáhá<sup>n</sup> ndihi-í Tǎtà-í Dútú Ndiöxí, te tendaha-gǎ cuéhé víhí espíritú xínú cuèchi núú-gǎ quixi-xi dàcácu ñàha-xi xii-í. <sup>54</sup> Dico núú duca<sup>n</sup> na càda-í te vǎ quée ndǎá-xi nàcuáa càhá<sup>n</sup>-xi núú tǔtú Tǎtà-í Dútú Ndiöxí núú ndéè tñuní sǎ dàcuítí xini ñuhu-xi nándi ndoho-í —càchí-gá xáha<sup>n</sup>-gǎ xii-dé.

<sup>55</sup> Te Jèsús ní xáha<sup>n</sup>-gǎ xii cue téé duca<sup>n</sup> nǐ tñii ñàha xii-gá-á<sup>n</sup>:

—Nchaa-ni nduu ní xiní-ndó nǐ xóo cunucóo-í xití veñúhu càhnu sǎ ño cúnúu ní xóo danèhé-í ñáyiü, te ñá túú ní tñii ñàha-ndo xii-í, ¿te ná cuendá vitna quide ñàha-ná-ndó xii-í dàtná quidé-ndó ì<sup>n</sup> ñadúhú, nèhe-ná-ndó màchití nèhe-ná-ndó càrrutí ní quexio ní tñii ñàha-ndo xii-í-í?

<sup>56</sup> Dico dàcuítí sǎ dúhá càda-xi nacuáa quee ndǎá-xi nàcuáa ní cáhá<sup>n</sup> cue téé ní xóo cáhá<sup>n</sup> tñúhu Yá Ndiöxí ndéè sanaha nǐ ngódó tñuní núú tǔtú-gá —càchí-gá xáha<sup>n</sup>-gǎ xii-güedě.

Te nchaa cue téé xica cuu ndihi-gá ní xinu-güedě ní dándõ ñàha-güedě xii-gá.

### *Jèsús ndécú-gǎ jündá*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Te cue téé ní tñii ñàha xii Jèsús ndécá ñàha-güedě xii-gá cuáhá<sup>n</sup> núú tē Caifás téé cùu dǔtú cúnùu-gá. Te núú ndécú dǔtú cúnùu-gá-á<sup>n</sup> sa ní tacá cue téé dàcuaha ñàha xii ñáyiü nchaa tñúhu ní chídó tñuní ndíi Moisés, ndihi cue téé cùu sacuéhé nǔú ñáyiü isràél cuendá cada-güedě jündá. <sup>58</sup> Te té Pèlú xica xica-ni nchicú<sup>n</sup> ñáhá-dě xii-gá cuáhá<sup>n</sup> ní sǎá-dé ndéè quehé vehe núú ndécú téé cùu dǔtú cúnùu-gá-á<sup>n</sup>, te xía<sup>n</sup> nǐ ngóo-dé ndihi cue téé cùu poleciá cuendá cuíní-dé quiní-dé nása cada ñàha-güedě xii Jèsús.

<sup>59</sup> Te cue téé cùu dǔtú cúnùu, ndihi cue téé cùu sacuéhé nǔú ñáyiü isràél, ndihi nchaa dava-gá cue téé xǐndecu jündá ndúcú-güedě nàcuáa cada-güedě dacàa-güedě ì<sup>n</sup> cuèchi díquí Jèsús cuèi cùu-xi ì<sup>n</sup> sǎ ñǎ ndǎa cuendá níhí-güedě nàcuáa cada-güedě cahni ñàha-güedě xii-gá. <sup>60</sup> Te vǎi cue téé ní ngüíta-güedě dacàa-güedě cuèchi díquí-gǎ, dico ñá túú ní cundeè tñúhu-güedě chí mee-ni tñúhu ndehnde cùu-xi. Te sátá dúcá<sup>n</sup> te ní quexio tucu úú tñàhá cue téé dàcuandehnde-güedě, <sup>61</sup> te xáha<sup>n</sup>-güedě xii nchaa cue téé xǐndecu jündá:

—Véxi-ndí càchí tñúhu-ndí xii-ndo sǎ tée-a càchí-dé sǎ dǎngõyo-dé veñúhu càhnu sǎ ño cúnúu núú chíñúhu-o Yá Ndiöxí, te dandàa-dé ñngá veñúhu saa, ñii-ni núú cáá tñàhí veñúhu-ǎ<sup>n</sup>, te xití úní-ni nduu sa nadaxínu-dé, duha càchí-dé —càchí-güedě xáha<sup>n</sup>-güedě.

<sup>62</sup> Te téé cùu dǔtú cúnùu-gá-á<sup>n</sup> nǐ ndacuíní-dé, te xáha<sup>n</sup>-dě xii Jèsús:

—¿Ná cuendá duha ndùu tñúhu càhá<sup>n</sup> cue téé-a cuendá-n? Te cáhá<sup>n</sup> nǔu nása cunduu tñúhu cáhá<sup>n</sup>-n —càchí-dé xáha<sup>n</sup>-dě xii-gá.

<sup>63</sup> Dico Jèsús ñá túú tñàhí ni cáhá<sup>n</sup>-gá. Te téé cùu dǔtú cúnùu-gá-á<sup>n</sup> nǐ xáha<sup>n</sup> tucu-dé xii-gá:

—Yúhú, cácu nèhe-í Yá Ndiöxí chi cuíní-í sǎ càchí tñúhu ndǎá-n xii-ndí nǔu sǎ díú Crístú Déhe Yá Ndiöxí Yáá ní tendaha-gǎ



véxi ñuyíú-a cùu-n —cachí-dé xǎha<sup>n</sup>-dě xii-gá.

<sup>64</sup> Te Jèsús ní xáha<sup>n</sup>-gǎ xii-dé:

—Díu Yaá-án cùu-í dàtná càchí-n-ǎ<sup>n</sup>, te na càchí tnúhu-í xii-ndo sǎ sàá nduu te quini-ndó yǎhú Tée cùu ñaní tnáhá-ndó nchàa-ndo cunucóo-í xio cùha Dútú Ndiǒxí Yaá ndácú quide nchaandi túhú sá vǎha. Te dàvá-án quini ñáhá-ndó xii-í quee-í andiu quixi-í ichi xití vícò —càchí-gá xǎha<sup>n</sup>-gǎ xii-dé.

<sup>65</sup> Te dútú cùnùu-gá-án ní ndátá-dě dóo níhnú-dě cuendá sá ñà túú ní tnáhá iní-dé nàcuáa ní cáhá<sup>n</sup> Jèsús, te ní xáha<sup>n</sup>-dě xii nchaa cue tée xǎndecu jùndá:

—Tée-a càhá<sup>n</sup> úhú-dé cuendá Yǎ Ndiǒxí, te vitna ñá túú-gǎ xini ñùhu-xi cue tée cáhá<sup>n</sup> ndáá nǎu ndáá sá ndècuéchi-dé àdi ñá túú ndècuéchi-dé, chi sa ní tecú dóho-o nàcuáa ndùu tnúhu ní cáhá<sup>n</sup>-dé ní cáhá<sup>n</sup> úhú-dé cuendá Yǎ Ndiǒxí. <sup>66</sup> Te nchaa-ndo chí càhá<sup>n</sup> vitna núu nása sàni iní-ndó cùnduu cuendá tée-a —càchí-dé xǎha<sup>n</sup>-dě xii nchaa cue tée-án.

Te cue tée-án ní xáha<sup>n</sup>-güedé:

—Nchúhú càchí-ndí sá tàù-xi cuú-dé chi ndècuéchi-dé —càchí-güedé xǎha<sup>n</sup>-güedé.

<sup>67</sup> Te ní ngúíta-güedé ní tíu díí ñáhá-güedé xii-gá te ní caniha-güedé, te tnáhá núu-gǎ ní cani-güedé. <sup>68</sup> Te ní cudíquí ndeé ñáhá-güedé xii-gá, te xǎha<sup>n</sup>-güedé:

—Yòhó Tée càchí sá cúu Crístú Yaá ní tendaha Yǎ Ndiǒxí véxi ñuyíú-a, cáhá<sup>n</sup> ná còto yoo ní caniha xii-n —cachí-güedé xǎha<sup>n</sup>-güedé xii-gá.

*Té Pèlú xǎha<sup>n</sup>-dě xii ñáyiú sá ñà túú xini-dé Jèsús*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Te nini nùcòo té Pèlú quehé, te ní sáhá<sup>n</sup> ñí xíchí xínú cuèchi vehe-án núu-dě, te xǎha<sup>n</sup>-xi xii-dé:

—Yòhó tnáhá-n cùu-n tée xica cuu ndihi Jèsús tée distrítú Galileá —càchí-xi xǎha<sup>n</sup>-xi xii-dé.

<sup>70</sup> Te té Pèlú ñá túú ní nǎnuu-dé, te ndèdóho nchaa ñáyiú xǎndecu-án ní xáha<sup>n</sup>-dě xii xíchí-án:

—Yúhú, ñá túú cùtnuní iní-í nása ndùu tnúhu càhá<sup>n</sup>-n —càchí-dé xǎha<sup>n</sup>-dě xii-xi.

<sup>71</sup> Te ní xica té Pèlú cuáhá<sup>n</sup>-dé ndàa nacuáa nchíi yuyèhe vehe-án, te ní xini

ñáhá tùcu ingá xíchí xínú cuèchi vehe-án, te xǎha<sup>n</sup>-xi xii nchaa ñáyiú xǎndecu-án:

—Tée-a tnáhá-dé xicá cùu-dé ndihi Jèsús tée ñuú Nazàrét —càchí-xi xǎha<sup>n</sup>-xi xii-yu.

<sup>72</sup> Te té Pèlú ní xáha<sup>n</sup>-dě:

—Nchàcuiiti Yá Ndiǒxí sá ñà túú xini-í tée càcunehe-ndo-án —càchí-dé xǎha<sup>n</sup>-dě xii-yu.

<sup>73</sup> Te tna tnaa-ni ní cuu, te dava ñáyiú xǎndecu xiá<sup>n</sup> ní xáha<sup>n</sup> tùcú-yu xii té Pèlú:

—Ndáá sá tnáhá-n xica cuu-n ndihi tée ndèca-güedé cuánguihu-án, chí ñáyiúhú càhá<sup>n</sup>-n —càchí-yu xǎhá<sup>n</sup>-yu xii-dé.

<sup>74</sup> Te té Pèlú ní xáha<sup>n</sup>-dě xii-yu:

—Nchàcuiiti Yá Ndiǒxí sá yǎhú càhá<sup>n</sup> ndáá-í sá ñà túú xini-í tée càcunehe-ndo-án —càchí-dé xǎha<sup>n</sup>-dě xii-yu.

Te òré-ni-án ní cana ñí ñí. <sup>75</sup> Te ní ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gǎ cana ñí ñí te úní xito cáhá<sup>n</sup>-dé sá ñà túú xini ñáhá-dě xii-gá. Te ní quee-dé tnuú ñáyiú-án cuáhá<sup>n</sup>-dé ñí xio ní ndáhyú víhí-dé ní ndixi cuéchi iní-dé.

## 27

*Ndèca-güedé Jèsús cuáhá<sup>n</sup> núu tē Pilatú (Mr. 15:1; Lc. 23:1-2; Jn. 18:28-32)*

<sup>1</sup> Te sáta ní túndaá te nchaa cue tée cùu dútú cùnùu, ndihi cue tée cùu sacuéhé núu ñáyiú isràel ní ndatnúhu-güedé nàcuáa cada-güedé cahni-güedé Jèsús. <sup>2</sup> Te ní dácútú ñàha-güedé xii-gá, te ndèca ñàha-güedé cuáhá<sup>n</sup> núu tē Pilatú tée cùu gobiernú.

*Ní xihí té Jùdás*

<sup>3</sup> Te té Jùdás tée ní sáha cuendá ñáhá xii Jèsús ní cutnùní iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcá<sup>n</sup> ní quide-dé ní sáha cuendá ñáhá-dě xii-gá núu cuè tée cùu úhú iní ñáhá, te ní xica-dé cuáhá<sup>n</sup>-dé danchòcáva-dé ócò úxí díhú<sup>n</sup> cuixí<sup>n</sup> núu cuè dútú cùnùu-án, ndihi núu cuè tée cùu sacuéhé núu ñáyiú isràel, chí díu cue tée-án ní sáñaha-güedé díhú<sup>n</sup> xii-dé. <sup>4</sup> Te òré ní quexìo té Jùdás-án núu ndécú-güedé, te xǎha<sup>n</sup>-dě xii-güedé:

*Ní xihí té Jùdás*

—Yúhú, ñá túú ní quide váha-í sá dúcá<sup>n</sup> ní quide-í ní taxi cuendá-í ñí tée ñá túú tnàhí cuéchi-xi cahni-ndo-dě —càchí-dé xǎha<sup>n</sup>-dě xii-güedé.

Te cue tée-án ní xáha<sup>n</sup>-güedé xii-dé:



—Nchúhú, ñá túú nǎgá cuëndú cuíní-ndí cáhá<sup>n</sup> ndíhi ñaha-ndí xii-n, te mee-n nàha núu nása sàni iní-n càda-n —cachí-güedé xǎha<sup>n</sup>-güedé xii-dé.

5 Te té Jùdás ní dǎngoyo-dé díhú<sup>n</sup>-ǎ<sup>n</sup> xití veñúhu càhnu sá ïo cùnunu, te ní xica-dé cuáhá<sup>n</sup>-dé ní dácüèhné-dé méé-dé.

6 Te cue dútú cúnunu ní naquehe<sup>n</sup>-güedé díhú<sup>n</sup>-ǎ<sup>n</sup>, te ní xitnáha-güedé:

—Díhú<sup>n</sup>-a ní queyǎhu cuëndá sá cùú ì<sup>n</sup> ñáyiu, núu xíǎ<sup>n</sup> vá cúú nàchihi-o xití càjá núú ñúhú sǎ cúú cuëndá Yǎ Ndiǒxí —càchí-güedé xǐtnàha-güedé.

7 Te ní ndatnúhu-güedé te ní cuu ì<sup>n</sup>nuu-güedé cuëndá nacuaa<sup>n</sup>-güedé ì<sup>n</sup> xichi núú cáá ñùhu danani-güedé Núú Cuǎha Nchaa Sá Cuǎha Ñuhu, te xíǎ<sup>n</sup> ñí saa<sup>n</sup>-güedé cuëndá xíǎ<sup>n</sup> nguǐndǔxi nchaa ñáyiu véxi xica. 8 Te ní nadáma diù ñuhu-á<sup>n</sup>, te vitna dànani-güedé Ñuhu Yáhu Niñí, duha dànani-güedé. 9 Te duca<sup>n</sup> ñí cuu chi ní quee ndáá-xi nàcuáa ní cáhá<sup>n</sup> ndí Jeremiás téé ní xóo cáhá<sup>n</sup> tnúhu Yá Ndiǒxí ndéé sanaha, te duha ní cachí ndí: “Cue téé isràél ní cachí-güedé sá òcò úxí díhú<sup>n</sup> cuixí<sup>n</sup> cháhu-güedé cuëndá ì<sup>n</sup> téé quehe<sup>n</sup> cuëndá-güedé. Te díhú<sup>n</sup>-ǎ<sup>n</sup> nàquehe<sup>n</sup>-güedé, 10 te cuaa<sup>n</sup>-güedé ì<sup>n</sup> xichi núú nání Núú Cuǎha Nchaa Sá Cuǎha Ñuhu, te duca<sup>n</sup> càda-xi chi duca<sup>n</sup> ñí cachí Yá Ndiǒxí cunduu”, duha ní cachí ndí Jeremiás-á<sup>n</sup>.

### *Jèsús ndécú-gǎ núú tǎ Pilatú*

(Mr. 15:2-5; Lc. 23:3-5; Jn. 18:33-38)

11 Te Jèsús ndécú-gǎ núú tǎ Pilatú téé cùu gobiernú, te téé-á<sup>n</sup> ñí xicá<sup>n</sup> tnúhú-dé núú-gǎ, te xǎha<sup>n</sup>-dǎ xii-gá:

—¿Ndáá sá díú-n cùu-n téé yǐndaha ñaha xii ñáyiu isràél-ǎ<sup>n</sup>? —càchí-dé xǎha<sup>n</sup>-dǎ xii-gá.

Te Jèsús ní xáha<sup>n</sup>-gǎ xii-dé:

—Di-u-í yǐndàha-í-yu —càchí-gá xǎha<sup>n</sup>-gǎ xii-dé.

12 Te cue dútú cúnunu ndíhi cue téé cùu sacuéhé núú ñáyiu isràél sàcá<sup>n</sup> cuéchi-güedé núú tǎ Pilatú cuëndá Jèsús, dico mee-gǎ ní ì<sup>n</sup> tnúhu ñá túú ní cáhá<sup>n</sup>-gá. 13 Te té Pilatú ní xáha<sup>n</sup>-dǎ xii-gá:

—Cáhá<sup>n</sup>, ná cuëndá ñá túú càhá<sup>n</sup>-n, te cundehe nǎ ndéé duha titní cuéchi dàcaa cue téé-a díquí-n —càchí-dé xǎha<sup>n</sup>-dǎ xii-gá.

14 Dico Jèsús ñá túú tnàhí ní cáhá<sup>n</sup>-gá, te té Pilatú téé cùu gobiernú-á<sup>n</sup> ïo ní cuñúhu-dé sá dúcá<sup>n</sup> ñà túú tnàhí ní cáhá<sup>n</sup>-gá.

*Ní quide ndáá-güedé sá cáhni-güedé Jèsús*  
(Mr. 15:6-20; Lc. 23:13-25; Jn. 18:38-19:16)

15 Te ndi tnahá nduu vico pascuá dácăcu té Pilatú téé cùu gobiernú-á<sup>n</sup> ì<sup>n</sup> téé yǐhi ve-caá chi duca<sup>n</sup> tnàhí quide-dé, te mee ñáyiu càhá<sup>n</sup>-yu te núu ndédacàa téé yǐhi ve-caá-á<sup>n</sup> cǎcu-dé te téé-á<sup>n</sup> dácăcu-dé. 16 Te dàvá-á<sup>n</sup> yǐhí ì<sup>n</sup> téé nàni Barrabás ve-caá, te téé-á<sup>n</sup> ïo cuëndú-dé sá ïo nèhé ní quide-dé. 17 Te ní natacá nchaa ñáyiu, te té Pilatú ní xicá<sup>n</sup> tnúhú-dé núú-yu, te xǎha<sup>n</sup>-dǎ:

—¿Ndédacàa núú ùú cue téé-a cuíní-ndó dácăcu-í-güedé-í? ¿Té Barrabás ǎ<sup>n</sup> Jèsús téé nàni Cristú? —càchí-dé xǎha<sup>n</sup>-dǎ xii-yu.

18 Te duca<sup>n</sup> ñí cáhá<sup>n</sup> té Pilatú, chi ní cutnùní iní-dé sá dicó sá cuèdú iní-güedé duca<sup>n</sup> ñí quide-güedé ní sáha cuëndá ñáhá-güedé xii Jèsús núú-dǎ.

19 Te nini núcóo té Pilatú núú xèhndé-dé cuéchi ní tendaha ñàdihí-dé tnúhu cuáhá<sup>n</sup> núú-dǎ, te duha nduu tnúhu ní tendaha-a<sup>n</sup>: “Vá cání iní-n nǎ cada-n tǎe ní taxi cuëndá ñáhá-güedé xii-n, téé ñá túú tnàhí cuéchi-xi, chi icuini ïo nèhé ní dácótó ñàha saní-í cuëndá-dé”, duha nduu tnúhu ní xáha<sup>n</sup>-a<sup>n</sup> xii té Pilatú.

20 Dico cue téé cùu dútú cúnunu, ndíhi cue téé cùu sacuéhé núú ñáyiu isràél ní xáha<sup>n</sup>-güedé xii ñáyiu sá ná cuñhá<sup>n</sup>-yu xii té Pilatú dácăcu-dé té Barrabás te cahni-dé Jèsús, te ní quidé-yu nàcuáa ní xáha<sup>n</sup>-güedé.

21 Te té Pilatú-á<sup>n</sup> ñí xáha<sup>n</sup> tùcu-dé xií-yu:

—¿Ndédacàa núú ùú cue téé-a cuíní-ndó dácăcu-í? —càchí-dé xǎha<sup>n</sup>-dǎ xií-yu.

Te ní xáhǎ<sup>n</sup>-yu xii-dé:

—Té Barrabás dácăcu-n —càchí-yu xáhǎ<sup>n</sup>-yu xii-dé.

22 Te té Pilatú ní xicá<sup>n</sup> tnúhú-dé núú-yu, te xǎha<sup>n</sup>-dǎ:

—¿Te ná cuíní-ndó càda-í Jèsús téé nàni Cristú téé càchí sá Yá Ndiǒxí ní tendaha ñàha xii-dé véxi-dé ñuyíú-a-í? —càchí-dé xǎha<sup>n</sup>-dǎ xií-yu.

Te nchá<sup>n</sup>-yu ní cáhá<sup>n</sup>-yu, te xáhǎ<sup>n</sup>-yu:

—Cata caa-dé núú cùrúxí —càchí-yu xǎhǎ<sup>n</sup>-yu xii-dé.

<sup>23</sup> Te té Pilatú ní xáha<sup>n</sup> tùcu-dé xií-yu:

—¿Te ná cúú cuèchi ní quide-dé nùu duca<sup>n</sup> cuìní-ndó càda-í-dé-í? —càchí-dé xǎha<sup>n</sup>-dè xií-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xǎhǎ<sup>n</sup>-yu xii-dé:

—¡Cata caa-dé núú cùrúxí! —càchí-yu xǎhǎ<sup>n</sup>-yu xii-dé.

<sup>24</sup> Te té Pilatú ní cutnùnì iní-dé sá vǎ nihí-dé nàcuáa cada-dé, chí uu<sup>n</sup>-gá ní ngüíta ñáyiú xǐcuáa-yu, te xǎ<sup>n</sup> ní xícá<sup>n</sup>-dé ndute ní ndáhá-dé núú ncháa ñáyiú, te ní xáha<sup>n</sup>-dè xií-yu:

—Tée-a cùu-dé ì<sup>n</sup> tée ñá túú tnàhí cuèchi-xi, te nchòhó cuìní-ndó sǎ cùu-dé, dico ñiú-ni mee-ndo cuído yáhu-ndo-dè chí yúhú vá cuído yáhu-í-dé —càchí-dé xǎha<sup>n</sup>-dè xií-yu.

<sup>25</sup> Te nchaá-yu ní xǎhǎ<sup>n</sup>-yu xii-dé:

—¡Ñiú nchúhú ndíhi cue déhe-ndí cuído yáhu-ndí-dé! —càchí-yu xǎhǎ<sup>n</sup>-yu.

<sup>26</sup> Te sátá dúcá<sup>n</sup> te té Pilatú ní dácácu-dé té Barrábás, te ní táuchíú<sup>n</sup>-dè ní caní-güedé Jèsús. Te sátá dúcá<sup>n</sup> ñí quide ñaha-güedé xii-gá, te ní táuchíú<sup>n</sup>-dè candeca ñaha-güedé xii-gá quíhí<sup>n</sup> cata caa ñaha-güedé xii-gá núú cùrúxí.

<sup>27</sup> Te cue tée cùu sandadú té Pilatú ndécá-güedé Jèsús cuánguihu xití vehe càhnu cuu cuendá-dé, te cue tée cùu sandadú-á<sup>n</sup> ñí cana-güedé dava-gá cue sandadú núú dúcá<sup>n</sup> ndèca-güedé Jèsús cuánguihu-á<sup>n</sup>. <sup>28</sup> Te xía<sup>n</sup> ñí taunuu-güedé dóo-gǎ, te ní dácúíhnú ñaha-güedé xii-gá ì<sup>n</sup> dóo tícuèhé víhí. <sup>29</sup> Te ní cadúha-güedé ì<sup>n</sup> coróná ñnu ní chíhi-güedé díquí-gǎ, te ní chitnì-güedé ì<sup>n</sup> carrutí ndaha cùha-gá, te ní ngüíñí xití-güedé núú-gǎ cúdíquí ndeé ñáhá-güedé xii-gá, te xǎha<sup>n</sup>-güedé:

—¡Ío càhnu cuu yohó tée yìndaha ñaha xii ñáyiú isràél! —càchí-güedé xǎha<sup>n</sup>-güedé xii-gá.

<sup>30</sup> Te ní tíú díí ñáhá-güedé xii-gá, te ní quehe<sup>n</sup>-güedé carrutí sá ñí sǎñaha-güedé xii-gá te ní ducu<sup>n</sup>-güedé díquí-gǎ. <sup>31</sup> Te sátá ñí yáha ní cudíquí ndeé ñáhá-güedé xii-gá, te ní nataunuu ñaha-güedé xii-gá

dóo tícuèhé víhí sǎ ñí dácúíhnú ñaha-güedé xii-gá, te ní dándíúnuu ñaha-güedé xii-gá dóo méé-gǎ, te dàtnùnì ndécá ñaha-güedé cuáhá<sup>n</sup> núú catá càa ñaha-güedé xii-gá núú cùrúxí.

*Sàta caa-güedé Jèsús núú cùrúxí*

(Mr. 15:21-32; Lc. 23:26-43; Jn. 19:17-27)

<sup>32</sup> Te ñuhu-güedé ndíhi-gá ichi, te ní naníhí-güedé ì<sup>n</sup> tée ñuú Cirené nání-dè Xímú, te tée-á<sup>n</sup> ñí quide yica-güedé ní xido-dé cùrúxí sá nchídó Jèsús.

<sup>33</sup> Te ní sáa-güedé ndíhi-gá ì<sup>n</sup> xichi núú nání Gólgotá, te tnúhu-á<sup>n</sup> quée-xí: Núú nání yìquí díquí ndíyi, duha quèe-xi tnúhu-á<sup>n</sup>.

<sup>34</sup> Te xía<sup>n</sup> sǎñaha-güedé ndudí úa coho-gá ní cùu, te ñá túú ní xíhi-gá chí dico-ni ní xito ndeé-gǎ.

<sup>35</sup> Te ní sata caa ñaha-güedé xii-gá núú cùrúxí, te sátá dúcá<sup>n</sup> te cue tée cùu sandadú-á<sup>n</sup> ñí xito ndeé-güedé nùu ndèdacàa-güedé cuu cuendá-güedé dóo-gǎ. Te duca<sup>n</sup> ñí cuu chí ní quee ndáa-xi nàcuáa ní cáhá<sup>n</sup> ì<sup>n</sup> tée ní xóo cáhá<sup>n</sup> tnúhu Yá Ndióxi ndeé sanaha yòdo tnunì núú tütú-gá, te duha càchí-xi: “Ní xito ndeé-güedé nùu ndèdacàa-güedé cuu cuendá-güedé dóo-gǎ”, duha ní cachí tée-á<sup>n</sup> te duca<sup>n</sup> ñí ngódó tnùnì núú tütú-gá. <sup>36</sup> Te sátá dúcá<sup>n</sup> ñí quide-güedé, te ní ngóo-güedé ndeé ñáhá-güedé xii-gá. <sup>37</sup> Te ní taxi ndecu-güedé ì<sup>n</sup> sá ndeé lètrá ndàa díquí-gǎ.

Te lètrá-á<sup>n</sup> càhá<sup>n</sup>-xi ná cuendá duca<sup>n</sup> ñí quide ñaha-güedé xii-gá, te duha càhá<sup>n</sup> lètrá-á<sup>n</sup>: “Tée-a cùu-dé tée yìndaha ñaha xii ñáyiú isràél”, duha càchí-xi. <sup>38</sup> Te tnàhá úú cue tée cùu ñadúhú ñí sata caa-güedé ñiú-ni núú cùrúxí tucu, te ì<sup>n</sup>-dé ní sata caa-güedé xio cùha-gá, te ñgá-dé ní sata caa-güedé xio dàtni-gá. <sup>39</sup> Te ncháa ñáyiú yáha yatni núú tàcàa-gá-á<sup>n</sup>, te dàcuicó-yu díquí-yu ndèhe ñáhá-yu xii-gá, te xǐcuèhé ñáhá-yu. <sup>40</sup> Te xǎhǎ<sup>n</sup>-yu xii-gá:

—Yòhó càchí-n sǎ dàngoyo-n veñúhu càhnu sá ío cùnuu, te dandàa-n ñgá veñúhu saa, te xití únì-ni nduu sa nadaxínu-n, te vitna tanuu núú cùrúxí-á<sup>n</sup> dácácu-n mèe-n te nùu ndísa sá Dèhe Yá Ndióxi cúu-n —càchí-yu xǎhǎ<sup>n</sup>-yu xii-gá.

<sup>41</sup> Te ñiú-ni duca<sup>n</sup> cudíquí ndeé ñáhá cuè tée cùu dútú cùnùu xii-gá, ndíhi cue tée

dàcuaha ñaha xii ñáiyu nchaa tnúhu ní chídó tnùní ndíi Moisés, ndíhi cue tée cùu fariséu, ndíhi cue tée cùu sacuéhé nùú ñáiyu isràél, te xítnàha-güedé:

<sup>42</sup> —Tée-a ní ndacu-dé ní dácácu-dé dava ñáiyu, te mee-dě ñá ndácú-dě dácácu ni-hnu-dé méé-dě. Te núu ndisa sá cúú-dě tée yíndaha ñaha xii ñáiyu isràél, te na cùndehe-o nuu-dé núú cùrúxí-a cuendá quíndáá iní-ó-dě. <sup>43</sup> Te càchí-dé sá sàndáá iní-dé Yá Ndiöxí, te mee-gã ná dácácu ñaha-gã xii-dé te núu cùndahú iní ñáhá-gã, chi mee-dě càchí-dé sá Dèhe-gá cúú-dě —càchí-güedé xítnàha-güedé.

<sup>44</sup> Te ndéé tnàhá cue tée cùu ñadúhú tácaà xio xio diñi-gá xícuèhé ñáhá-güedé xii-gá.

### *Ní xíhí Jèsús*

*(Mr. 15:33-41; Lc. 23:44-49; Jn. 19:28-30)*

<sup>45</sup> Te òré ní cuu cuádava nduu te ní cunee nihí ñuyíú, te duca<sup>n</sup>-ni càa ní cuu caá úní sacuaa. <sup>46</sup> Te òré sa ta cùyatni cuu caá úní sacuaa-á<sup>n</sup>, te níhi ní cáhá<sup>n</sup> Jèsús, te càchí-gá:

—Èlí, Èlí, ¿láma sabàctaní? —càchí-gá.

Te tnúhu-á<sup>n</sup> quée-xí: Ndiöxí méè-í, Ndiöxí méè-í, ¿ná cuendá ní dáñá ñàha-n xii-í?, duha quèe-xi tnúhu-á<sup>n</sup>.

<sup>47</sup> Te dava cue tée xíndecu yatni núú tácaà-gá-á<sup>n</sup> ñí tecú dóho-güedé nàcuáa ní cáhá<sup>n</sup>-gá, te ní xítnàha-güedé:

—Tée-a càna-dé té Èliás —càchí-güedé xítnàha-güedé.

<sup>48</sup> Te òré-ni-á<sup>n</sup> ñí quene cunu ñ<sup>n</sup> cue tée xíndecu-á<sup>n</sup> ñí quehe<sup>n</sup>-dé luha cáchí, te ní chindóyo-dé xítí ndudí íá, te ní chinenu-dé díquí ñ<sup>n</sup> yutnu càni te ní ndocani-dé ní chihi-dé yuhu-gá. <sup>49</sup> Te dava-güedé ní xáha<sup>n</sup>-güedé xii tée-á<sup>n</sup>:

—Cundeṭu tnaa na cùndehe-o nacoto núu quixi té Èliás dácácu ñaha-dě xii-dé —càchí-güedé xáha<sup>n</sup>-güedé xii tée-á<sup>n</sup>.

<sup>50</sup> Te Jèsús níhi ní cana saa-gá, te ní xíhí-ni-gá. <sup>51</sup> Te sáta dúcá<sup>n</sup> te ní ndátá dǒó cúú còrtiná xítí veñúhu càhnu sá ño cùnuu ní quée dava ndáá, te ndàa núú ñinu ní ngüita-xi ní ndátá, te ní tnáa, te dava cava nàhnu ní táhú. <sup>52</sup> Te dava yaú núú yíndüxi ñáiyu ní xíhí ní sàndáá iní ñáhá xii Yá Ndiöxí ní nacaá<sup>n</sup> te ní ndotó-yu. <sup>53</sup> Te sáta ñí yáha ní ndoto Jèsús, te cue ñáiyu ní

ndoto-á<sup>n</sup> cuãnguihú-yu xítí ñuú Jerusalén, te cue ñáiyu ñuú-á<sup>n</sup> ño vai-yu ní xiní-yu cue ñáiyu duca<sup>n</sup> ñí ndoto-á<sup>n</sup>.

<sup>54</sup> Te sá dúcá<sup>n</sup> nãndí ní guide-xi, ndíhi sá dúcá<sup>n</sup> ñí tnáa xíá<sup>n</sup> ío ní yùhú tée cùu capitá<sup>n</sup> ndíhi nchaa dava-gá cue tée ndècu ndíhi-dé ndèé-güedé yiqui cùñú Jèsús, te ní xítnàha-güedé:

—Sá ndáa ndisa sá díú tée-a cùu-dé Dèhe Yá Ndiöxí ní cùu —càchí-güedé xítnàha-güedé.

<sup>55</sup> Te xica xínutnii vai ñáiyu diñí ndéhè-yu nchaa nàcuáa ní guide ñaha-güedé xii Jèsús, te ñáiyu-á<sup>n</sup> cúú-yu ñáiyu ní chindéé-yu Jèsús, te ndéé distritú Galileá ní chinchícú<sup>n</sup> ñáhá-yu xii-gá. <sup>56</sup> Te tnuú ñáiyu-á<sup>n</sup> tnàhá tá Màriá Magdaléná, ndíhi tá Màriá nãná tẽ Jàcobó ndíhi té Chèé, ndíhi nãná cue déhe té Zebèdeú.

### *Chíndúxi-güedé Jèsús*

*(Mr. 15:42-47; Lc. 23:50-56; Jn. 19:38-42)*

<sup>57</sup> Te ndècu ñ<sup>n</sup> tée cuica nàni-dé Chèé te cùu-dé tée ñuú Arimateá, te tnàhá-dé ní tnahá tnúhu-dé ndíhi Jèsús. Te òré sa ní cuaa, <sup>58</sup> te ní sáhá<sup>n</sup>-dé núú tẽ Pilatú, te xáha<sup>n</sup>-dẽ nùu vá cùndèe iní-dé dañá-dẽ chindúxi-dé yiqui cùñú Jèsús. Te té Pilatú-á<sup>n</sup> ñí sáha-dé tnúhu, te ní táúchíú<sup>n</sup>-dẽ sá cuãha cuendá-güedé té Chèé-á<sup>n</sup> yiqui cùñú-gá.

<sup>59</sup> Te té Chèé-á<sup>n</sup> ñí quehe<sup>n</sup> cuendá-dé yiqui cùñú-gá, te ní chidúcú<sup>n</sup> nuu-dé ñ<sup>n</sup> dóó cuixí<sup>n</sup> dóó cándò. <sup>60</sup> Te sa nchii ñ<sup>n</sup> yaú sáa ñí caá<sup>n</sup> té Chèé-á<sup>n</sup> ñ<sup>n</sup> yiqui naha càva te xíá<sup>n</sup> cúú cuendá-dé, te yaú-á<sup>n</sup> ñí chihi-dé yiqui cùñú Jèsús, te dàtnùní ní sadí-dé ñ<sup>n</sup> yúú cáhnú yúú quèhé<sup>n</sup> yuhu yaú-á<sup>n</sup>, te ní xica-dé cuánuhú-dé. <sup>61</sup> Te tnàhá tá Màriá Magdaléná, ndíhi ingá xíchí nání Màriá ní quexió-yu ní ngóo-yu yatni núú nchii yaú-á<sup>n</sup>.

### *Cue tée ndèé yaú núú yíhí yiqui cùñú Jèsús*

<sup>62</sup> Te sáta ñí yáha ní guide túha ñáiyu nchaa sá nãndíhi-yu nduu tnéé nduu ndètatú-yu-á<sup>n</sup>, te diu-ni nduu ndètatú-yu-á<sup>n</sup> ñí sáhá<sup>n</sup> cue dútú cùnùu, ndíhi cue tée cùu fariséu ní cáhá<sup>n</sup> ndíhi-güedé té Pilatú. <sup>63</sup> Te xáha<sup>n</sup>-güedé xii-dé:

—Yòhó tée cùnuu, véxi-ndí càchí tnúhu-ndí sá ñí ndacu iní-ndí sá tẽ ndehnde ñí xíhí-á<sup>n</sup>



càchí-dé òré ndécú-gă-dé sá ndùu úní sá cùú-dé, te ndoto-dé. <sup>64</sup> Te tendaha-n cue téé na quíhí<sup>n</sup>-güedé cundeé-güedé yuhu yaú núú nǐ chihi-güedé yiqui cùñú-dé, chi na cuáhá<sup>n</sup> quíhí<sup>n</sup> cue téé ní xica cuu ndíhi-dé duhu-güedé yiqui cùñú-dé, te cúñaha-güedé xii ñáyiú sá nǐ ndoto-dé. Chi núu duca<sup>n</sup> na càda-güedé te ío-gá dandàhú-güedé cue ñáyiú dàcúúxí dàtná ní quide mee téé ní xíhí-ǎ<sup>n</sup> —càchí-güedé xăha<sup>n</sup>-güedé.

<sup>65</sup> Te té Pilatú ní xăha<sup>n</sup>-dē xii-güedé:

—Náu cue sandàdú-a candeca-ndo-güedé quíhí<sup>n</sup>, te cadí váha-ndo ndíhi-güedé yuhu yaú-á<sup>n</sup> nàcuáa tàú-xi cunduu, te na cundeé-güedé nàcuáa sàni iní-ndó cunduu —cachí-dé xăha<sup>n</sup>-dē xii-güedé.

<sup>66</sup> Te cue téé-á<sup>n</sup> nǐ xica-güedé cuáhá<sup>n</sup>-güedé, te ní tee-güedé ì<sup>n</sup> sēná yúú ndēdí yèhe yaú-á<sup>n</sup>, te ní dándõ-güedé cue sandàdú-á<sup>n</sup> ndēé-güedé yaú-á<sup>n</sup>, te duca<sup>n</sup> nǐ quide-güedé cuendá sá vǎ yõo quíhí<sup>n</sup> nacaá<sup>n</sup> yaú-á<sup>n</sup>.

## 28

### *Ní ndoto Jèsús*

*(Mr. 16:1-8; Lc. 24:1-12; Jn. 20:1-10)*

<sup>1</sup> Te sátá nǐ yáha nduu ndètatú ñáyiú, te ndumìngú nehé víhí-ní nǐ xica tá Màriá Magdaléná ndíhi ingá xíchí nání Màriá cuángotó-yu yaú núú nǐ chihi-güedé yiqui cùñú Jèsús. <sup>2</sup> Te uu<sup>n</sup> níhi víhi ní tnáa, te òré duca<sup>n</sup> nǐ quide-xi chi ì<sup>n</sup> espíritú xínú cuèchi núú Yă Ndiõxí ní quexìo-xi núú dúcá<sup>n</sup> nchii yaú núú nǐ chihi-güedé yiqui cùñú Jèsús, te ní xócání espíritú-á<sup>n</sup> yúú ndēdí yèhe yaú-á<sup>n</sup> te ní ngóo-xi núú yúú-ǎ<sup>n</sup>. <sup>3</sup> Te dàtná dátăsa<sup>n</sup>-xi òré sàá ndúté dùca<sup>n</sup> datăsa<sup>n</sup>-xi núú espíritú-á<sup>n</sup>, te dóó níhnú-xi cuixí<sup>n</sup> quiyí. <sup>4</sup> Te òré duca<sup>n</sup> nǐ quide-xi te cue sandàdú ndēé yaú-á<sup>n</sup> nǐ quidi ñaha-xi xii-güedé sá nǐ yùhú-güedé, te ní nduá-güedé, te ní xíta sá xini tnùnì-güedé. <sup>5</sup> Te espíritú-á<sup>n</sup> nǐ xăha<sup>n</sup>-xi xii cue ñáyiú dîhí cuángoto yaú-á<sup>n</sup>:

—Nchòhó ñáyiú dîhí véxi coto yaú-a, vǎ yùhú-ndó chi yùhú cútnùnì iní-í sá nchòhó véxi-ndo nànducu-ndo yiqui cuñú Jèsús Yaá ní xíhí núú cùrúxí. <sup>6</sup> Dico Yaá-á<sup>n</sup> chí ñá túú-gă ndécú yiqui cuñú-gá iha, chí sa ní ndoto-gá, te dîu duca<sup>n</sup> nǐ cachí-gá sá ndótó-gă cútnàhá vátá cùú-gá, te chí

táquixi cundehe-ndo núú nǐ sacá<sup>n</sup>-güedé yiqui cùñú-gá ní cùu te quiní-ndó nǎ ñá túú-gă. <sup>7</sup> Te vitna ío ndíhi chí cuáhá<sup>n</sup> núú xñdecu cue téé ní xica cuu ndíhi-gá, te duha cúñaha-ndo xii-güedé: “Ní ndoto Jèsús Yaá ní xíhí ní cùu, te codonuu-gá núú-ndó quíhí<sup>n</sup> distritú Galileá te yàcá<sup>n</sup> quiní-ndó-gă”, duha cúñaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-á<sup>n</sup> xăha<sup>n</sup>-xi xii cue ñáyiú dîhí-á<sup>n</sup>.

<sup>8</sup> Te cue ñáyiú dîhí-á<sup>n</sup> nǐ natnii-yu ichi, te súuní ndíhi cuánuhú-yu núú xñdecu cue téé ní xica cuu ndíhi Jèsús cuendá nacani tnúhu-yu núú-güedé nàcuáa ní xăha<sup>n</sup> espíritú-á<sup>n</sup> xii-yu, te cuèí ní yùhú-yu dico súuní cùdíí iní-yu. <sup>9</sup> Te ichi ñùhú-yu cuánuhú-yu, te na iní-yu ní quexìo Jesús núú-yu ní dándácõo váha ñaha-gă xii-yu. Te ñáyiú-á<sup>n</sup> nǐ ngüíñí xití-yu núú-gă, te ní numi ñàhá-yu xii-gá, te ní chiñuhu ñàhá-yu. <sup>10</sup> Te ní xăha<sup>n</sup>-gă xii-yu:

—Vá yùhú-ndó, chí cuáhá<sup>n</sup> cúñaha-ndo xii cue téé ní xica cuu ndíhi-í sá ná quíhí<sup>n</sup>-güedé distritú Galileá, te yàcá<sup>n</sup> quiní ñàhá-güedé xii-í —càchí-gá xăha<sup>n</sup>-gă xii-yu.

*Nàcuáa ndùu tnúhu ní nacani cue sandàdú*

<sup>11</sup> Te nini ñùhu cue ñáyiú dîhí-á<sup>n</sup> ichi cuánuhú-yu, te dava cue sandàdú cue téé ndēé yaú-á<sup>n</sup> ní cùu ní xica-güedé cuánuhú-güedé ñuu cuendá nacani tnúhu-güedé núú cuè téé cùu dútú cùnùu nàcuáa ní cuu. <sup>12</sup> Te cue téé cùu dútú cùnùu-á<sup>n</sup> nǐ quide-güedé jündá ndíhi cue téé cùu sacuéhé núú ñáyiú isràél, te ní ndatnúhu-güedé nàcuáa cada-güedé, te ní quide ndáá-güedé ndíhi cue sandàdú-á<sup>n</sup> sǎ cuáñaha-güedé vǎi díhú<sup>n</sup> cuendá dacuàndehnde-güedé. <sup>13</sup> Te ní xăha<sup>n</sup>-güedé xii cue sandàdú-á<sup>n</sup>:

—Cuíní-ndí sá vǎ càhá<sup>n</sup> ndáá-ndó núú ñáyiú nàcuáa ní cuu, chí cúñaha-ndo xii-yu sá òré xidí-ndó nǐ quixi cue téé ní xica cuu ndíhi-dé ní dúhú-güedé yiqui cùñú-dé nehé-güedé cuáhá<sup>n</sup>, duha cúñaha-ndo xii-yu. <sup>14</sup> Te núu na nihí té Pilatú téé cùu gobiernú tnúhu nàcuáa cúñaha-ndo xii ñáyiú, te nchúhú cada ndáá-ndí ndíhi-dé cuendá sá ñà túú nǎ cada ñaha-dē



xii-ndo —càchí-güedé xǎha<sup>n</sup>-güedě xii cue sandàdú-á<sup>n</sup>.

<sup>15</sup> Te cue sandàdú-á<sup>n</sup> nǐ quehe<sup>n</sup> cuèndá-güedé díhú<sup>n</sup>, te ní xica-güedé cuáhá<sup>n</sup>-güedé te ní cǎhá<sup>n</sup>-güedé nàcuáa ní xáha<sup>n</sup> cuè téé-á<sup>n</sup> cǎhá<sup>n</sup>-güedé. Te nchaa ñáyu isràél ní níhǐ-yu tnúhu ní cǎhá<sup>n</sup>-güedé-á<sup>n</sup>, te diu-ni tnúhu-á<sup>n</sup> cǎhá<sup>n</sup>-yu ndéé vitna.

*Jèsús xǎha<sup>n</sup>-gǎ xii cue téé ní xica cuu ndìhì-gá nàcuáa ndiù chiu<sup>n</sup> cada-güedé*

*(Mr. 16:14-18; Lc. 24:36-49; Jn. 20:19-23)*

<sup>16</sup> Te ndì ùxí ì<sup>n</sup> cue téé ní xica cuu ndìhì Jèsús ní xica-güedé cuáhá<sup>n</sup>-güedé ì<sup>n</sup> yucu càa distritú Galileá núú nǐ xáha<sup>n</sup>-gǎ naníhì tnáhá-güedě ndìhì-gá. <sup>17</sup> Te òré ní xiní-güedé Jèsús te ní chiñuhu ñaha-güedě xii-gá, dico dava-güedé sàni ì<sup>n</sup> sanì úú iní-güedé nùu diu-gá àdi ñá díú-gǎ. <sup>18</sup> Te Jèsús ní sàndehe yatni-gá ndéé núú-güedě, te ní xáha<sup>n</sup>-gǎ xii-güedé:

—Yúhú ndécú ndìhì-í tnúhu ndee iní táxí tnùnì-í cuèi andiù te cuèi ñuyíú-a. <sup>19</sup> Te vitna tàuchiu<sup>n</sup>-í sá quìhì<sup>n</sup>-ndó ñihì ñuyíú cǎhá<sup>n</sup>-ndó tnùhu-í núú ñáyu cuèndá tuha ñàhá-yu xii-í, te dacuàndute-ndó-yu. Te òré duca<sup>n</sup> càda-ndo, te cacunehe-ndo tǎtá-ó Dütú Ndiöxí ndìhì yúhú Yaá cúú Dèhe-gá ndìhì Espiritú-gá. <sup>20</sup> Te cúñaha-ndo xii-yu sá ná càdá-yu nchaa nàcuáa sa ní dánèhé ñáhà-í xii-ndo càda-ndo. Te ña càchí tnúhu-í sá cùndècu ndìhì ñaha-ñi-í xii-ndo ñuyíú-a ndéé ná sàá nduu nàa-xì —cachí-gá xǎha<sup>n</sup>-gǎ xii-güedé. Te duca<sup>n</sup> na cùnduu.

## TNÚHU NÍ CHÍDÓ TNÙNÍ TÉ MÀCÚ

*Té Juàá té dâcuandute ñaha xii ñáyi  
cáhá<sup>n</sup>-dé tnúhu Yá Ndiöxí xití yucu  
(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Duha ní quesaha tnúhu sá cáhá<sup>n</sup> nâcuáa naníhí tãhú-ó tnúhu Xítóhó Jesucrístú Déhe Yá Ndiöxí.

<sup>2</sup> Te ndí Chàiaá té ní xóo cáhá<sup>n</sup> tnúhu Yá Ndiöxí ndéé sanaha ñí chídó tnùní ndí nâcuáa ní xáha<sup>n</sup> Yá Ndiöxí xii Déhe-gá, te duha ní xáha<sup>n</sup>-gã:

Tendaha-í ñí téé codonùu-dé núu-n,  
te dàtúha-dé ñáyi cuendá tñí-yu tnúhu-n.

<sup>3</sup> Te téé-á<sup>n</sup> quihi-dé xití yucu te níhi cáhá<sup>n</sup>-dé cúñaha-dě xii ñáyi:

“Chí dáñá nchàa ichi cuehé ichi duha ndècu-ndo, te tñí-ndo ichi váha, te duca<sup>n</sup> càda-ndo cuendá cundecu túha-ndo, chí véxi Yaá ío cùnùu”, duha cúñaha-dě xií-yu.

Duha ndùu tnúhu ní chídó tnùní ndí Chàiaá nâcuáa ní xáha<sup>n</sup> Yá Ndiöxí xii Déhe-gá.

<sup>4</sup> Te téé dii cuendá-xi ní ngódó tnùní-á<sup>n</sup> naní-dě Juàá, te téé-á<sup>n</sup> ñí xíhi-dé xití yucu ní cáhá<sup>n</sup>-dé tnúhu Yá Ndiöxí, te ní xóo dâcuandute-dé ñáyi, te duha ní xáha<sup>n</sup>-dě xií-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te duca<sup>n</sup> te Yá Ndiöxí cada càhnu iní-gá nchaa yíca cuèchi-ndo —duha ní xáha<sup>n</sup>-dě xií-yu.

<sup>5</sup> Te nchaa ñáyi distritú Jùdeá, ndíhi ñáyi ñuú Jerusàlén ní sáhá<sup>n</sup>-yu ndéé yúte Jòrdán núu ndécú tē Juàá ní xíndedóho-yu nchaa tnúhu ní cáhá<sup>n</sup>-dé. Te cue ñáyi ní náhmá nchaa yíca cuèchi-xi te ní dâcuandute ñaha-dé xií-yu.

<sup>6</sup> Te té Juàá-á<sup>n</sup> ñí xíhnu-dé dóó idi càméyu, te ñí ñí ní cuu pãñú xití-dé, te ní xóo caxi-dé tíca làngóstá ndíhi ndudí ñúñú cuéchi. <sup>7</sup> Te ní xáha<sup>n</sup> tùcu-dé xii ñáyi:

—Nchícú<sup>n</sup> ñí téé véxi, te téé-á<sup>n</sup> ño-gá cùnùu-dé dàcúxí yúhú, chí yúhú cùu-í ñí téé duu<sup>n</sup> duu<sup>n</sup> ñà túú tàú-í ngúnundeyi-í nandaxi cuèdicó ñí nihnu chàu-dé dico

quide-í chiù<sup>n</sup>-dé. <sup>8</sup> Te yúhú dâcuandute ñaha-í xii-ndo, dico mee-dě taxi-dé Espiritú Yá Ndiöxí cundecu ndíhi-ndo —càchí-dé xáha<sup>n</sup>-dě xií-yu.

*Sàndute Jesús*

*(Mt. 3:13-17; Lc. 3:21-22)*

<sup>9</sup> Te dàvá-á<sup>n</sup> ñí quee Jèsús ñuú Nazàrét ñí ñuú yíndèhu distritú Galileá cuáhá<sup>n</sup>-gá yúte Jòrdán. Te yàcá<sup>n</sup> ní dâcuandute ñaha té Juàá xii-gá. <sup>10</sup> Te òré ní nene-gá xití ndute, te ní xiní-gá nchí andíu, te ní quee Espiritú Yá Ndiöxí véxi cuu<sup>n</sup>-xi ngúndecu ndíhi ñaha-xi xii-gá, te dàtná cáá ñí lómá cáá Espiritú-á<sup>n</sup> véxi cuu<sup>n</sup>-xi. <sup>11</sup> Te òré-á<sup>n</sup> ñí tecú ní cáhá<sup>n</sup> Yá Ndiöxí ndéé andíu, te xáha<sup>n</sup>-gã xii Jèsús:

—Yòhó cúu-n Déhe-í téé ío cùu iní-í te ío cùdí iní ñàhà-í xii-n —càchí-gá xáha<sup>n</sup>-gã.

*Sácuíhná quidé yíca-xi cada Jesús sá ñà túú tàú-gá cada-gá dico ñà túú ní quide-gá*

*(Mt. 4:1-11; Lc. 4:1-13)*

<sup>12</sup> Te Espiritú Yá Ndiöxí ndécá-xi Jèsús cuáhá<sup>n</sup> ñí xití yucu. <sup>13</sup> Te xití yucu-á<sup>n</sup> ío víhí quiti déé<sup>n</sup>, te xiá<sup>n</sup> ndécú Jèsús ní ngúita sácuíhná quidé yíca-xi cada-gá ñí sá ñà túú tàú-gá cada-gá dico ñà túú ní sàndáá iní-gá. Te cue espiritú xínú cuèchi núu Yá Ndiöxí ní xinú cuechi-xi ñú-gã. Te ní xíndecu-gá údico nduu xití yucu-á<sup>n</sup>.

*Distritú Galileá ní chisaha Jèsús chiù<sup>n</sup> ní táhú Tátá-gã Dútú Ndiöxí cada-gá*

*(Mt. 4:12-17; Lc. 4:14-15)*

<sup>14</sup> Te sátá ñí ngava té Juàá vecaá, te Jèsús cuáhá<sup>n</sup>-gá distritú Galileá dânehé-gá ñáyi tnúhu váha, tnúhu sá cáhá<sup>n</sup> nâcuáa ndíhu ndaha ñaha Yá Ndiöxí xií-yu. <sup>15</sup> Te xáha<sup>n</sup>-gã xií-yu:

—Vitna sa ní cuyatni nduu ndíhu ndaha ñaha Yá Ndiöxí xii-ndo, te chí dáñá nchàa ichi cuehé ichi duha ndècu-ndo, te quíndáá iní-ndó tnúhu váha, tnúhu sá cáhá<sup>n</sup> nâcuáa naníhí tãhú-ndó —càchí-gá xáha<sup>n</sup>-gã xií-yu.

*Jèsús cáhá<sup>n</sup>-gá cúmí tnhá cue té tñí chácá*

*(Mt. 4:18-22; Lc. 5:1-11)*

<sup>16</sup> Te Jèsús ñúhú-gã ichi cuáhá<sup>n</sup>-gá tá yãha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí xídáquèe-güedé ñunu-güedé xití ndute

tn̄i-güedé chácá, chi quití tnàhí-án cúu chiùn-güedé tn̄i-güedë-dí. 17 Te Jèsús ní xáha<sup>n</sup>-gã xii-güedé:

—Chí dáñá chiùn quide-ndo-án, te quixi-ndo chitnahá ñáhá-ndó xì-í te taxi-í ingá núu chiùn cada-ndo chi quíhí<sup>n</sup>-ndó cãhá<sup>n</sup>-ndó ñáyiü cuendá dacuahá-yu tnúhu-í —càchí-gá xãha<sup>n</sup>-gã xii-güedé.

18 Te òré-ni-án ñí dáñá cuè téé-án ñunu-güedé te ní tuha ñaha-güedë xii-gá.

19 Te cuáhá<sup>n</sup>-gá luha-gá, te ní xini-gá té Jàcobó ndihí ñaní-dé té Juáá ñúhú-güedë xití bàrcú-güedé náticu-güedé ñunu-güedé, te ndi ndúú-güedé cúu-güedë déhe té Zebèdeú. 20 Te ní cana ñaha-gã xii-güedé, te ní dándoo-güedé tátá-güedë ndihí cue téé xìnu cuechi núu-güedë xití bàrcú, te ní tuha ñaha-güedë xii-gá.

*Í<sup>n</sup> téé yìhi ñaha espíritú cúndihí yucu ñávãha*

*(Lc. 4:31-37)*

21 Te ní quexìo Jesús ndihí cue téé-án ñí ñuú nání Cãpernaúm, te yacá<sup>n</sup> ndécú-gã ní tnahá nduu ndetátú ñáyiü, te cuánguihu-gá veñúhu ñáyiü isràél dānehé ñáhá-gã xii-yu. 22 Te xicuñúhu vihi-yu nchaa tnúhu cãhá<sup>n</sup>-gá, chi quide-gá sá cúu-gã ñí Yaá táxi tnúni víhi, te ñá túú dàcuaha ñaha-gá xii-yu dàtná dacuahá ñaha cue téé dàcuaha ñaha xii-yu nchaa tnúhu ní chídó tnúni ndíi Moisés. 23 Te xití veñúhu-án ndécú tnahá ñí téé yìhi ñaha ñí espíritú cúndihí yucu ñávãha, te espíritú-án ñí quide-xi níhi ní cãhá<sup>n</sup> téé-án, te xãha<sup>n</sup>-dë xii Jèsús:

24 —¿Te ná cuini yòhó Jèsús téé ñuú Nazàrét cada ñaha-n xì-ndí nüü véxi-n nüü ndécú-ndí-i? ¿Á<sup>n</sup> vëxi-n dànaa ñaha-n xii-ndí? Chi yúhú xini ñáhà-í xii-n sã cúu-n ñí téé ñá túú tnàhí cuéchi-xi, chi núu Yã Ndiòxí ní quee-n vëxi-n ñüyíú-a —càchí-dé xãha<sup>n</sup>-dë xii-gá.

25 Dico Jèsús ní tenáá-gá espíritú cúndihí yucu ñávãha-án, te xãha<sup>n</sup>-gã:

—¿Cadí yuhu-n, te taquèe yiqui cuñú téé-án! —càchí-gá xãha<sup>n</sup>-gã xii espíritú-án.

26 Te espíritú cúndihí yucu ñávãha-án ñí dácüyìhí ñáhá-xí xì téé-án, te ní dácáná sàa ñaha-xi, te ní quee-xi yiqui cuñú-dé

cuáhá<sup>n</sup>-xi. 27 Te nchaa ñáyiü xĩndecu-án ño ní cuñúhu-yu, te ní xitnahá-yu:

—¿Te nása nduu-tu sá quidé téé-a? ¿Ndudú sáá cãhá<sup>n</sup>-tu-dé sánuu? Te quide-dé dàtná quidé ñí téé cūnuu vihi, chi cãhá<sup>n</sup>-ni-dé te sãndáá iní ñáhá nchaa espíritú cúndihí yucu ñávãha —càchí-yu xitnahá-yu.

28 Te ío ndihí ní níhi nchaa ñáyiü dava-gá ñuú yíndèhu distritú Galileá tnúhu nchaa nàcuáa cãhá<sup>n</sup> Jèsús ndihí nchaa sá quidé-gã.

*Jèsús quidé tátna-gá nãná ñadìhí té Xímú*

*(Mt. 8:14-15; Lc. 4:38-39)*

29 Te òré ní ndee Jèsús veñúhu cue ñáyiü isràél, te cuáhá<sup>n</sup>-gá ndihí té Jàcobó ndihí té Juáá vehe té Xímú ndihí té Ndríxi.

30 Te nãná ñadìhí té Xímú cùhú-a<sup>n</sup> ñúhu vihi-a<sup>n</sup> cahni, te ndihí-ni ní xáha<sup>n</sup>-güedë xii Jèsús sá cùhú-a<sup>n</sup>. 31 Te ní sáhá<sup>n</sup>-gá núu cáá ñaha cùhú-án te ní tn̄i-gá ndaha-a<sup>n</sup> ní ndocani ñaha-gã xii-a<sup>n</sup>. Te òré-ni-án ñí nchíco-a<sup>n</sup> cahni, te ní ngüíta-a<sup>n</sup> xìnu cuechi-a<sup>n</sup> núu-güedë ndihí-gã.

*Jèsús quidé tátna-gá vãi ñáyiü cùhú*

*(Mt. 8:16-17; Lc. 4:40-41)*

32 Te òré sa cuini-xi cundiqui<sup>n</sup> te ní quexìo ñáyiü núu ndécú Jèsús, te nchaa ñáyiü cùhú ní dátacá-yu ndécá-yu ní sáá núu-gã, te tnàhí cue ñáyiü yìhi ñaha espíritú cúndihí yucu ñávãha ndécá-yu ní sáá núu-gã. 33 Te nchaa ñáyiü ñuú-án ñí chítú níhnü-yu yuyèhe vehe núu ñí quexìo Jesús. 34 Te Jèsús ní quide tátna-gá nchaa ñáyiü cùhú cuéi ndi dí<sup>n</sup> ndi dí<sup>n</sup> nüü cuéhe tnàhí-yu ñí ñí-yu, te ní queñuhu-gá nchaa espíritú cúndihí yucu ñávãha yìhi ñaha xii ñáyiü, te ñá túú ní dàña-gá cãhá<sup>n</sup> cue espíritú cúndihí yucu ñávãha-án ñí ñí tnúhu, te duca<sup>n</sup> ñí quide-gá chi cue espíritú-án sa xìni-xi yoo cùu-gã.

*Jèsús cãhá<sup>n</sup>-gá tnúhu Yã Ndiòxí distritú Galileá*

*(Lc. 4:42-44)*

35 Te òré vátá tũndaá váha-gá ní ndacóo Jèsús cuáhá<sup>n</sup>-gá ñí xio yuhu ñuú núu ñá túú ñáyiü ndècu cuendá yacá<sup>n</sup> cãhá<sup>n</sup> ndihí-gá Yã Ndiòxí. 36 Te té Xímú ndihí cue téé cúndihí-dé nándücu ñaha-güedë xii-gá. 37 Te òré ní naníhí ñáhá-güedë xii-gá, te ní xáha<sup>n</sup>-güedë:

—Nchaa ñáyiú nànducu ñahá-yu xii-n — càchí-güedé xáha<sup>n</sup>-güedé xii-gá.

<sup>38</sup> Te ní xáha<sup>n</sup>-gá xii-güedé:

—Chí ná quihí<sup>n</sup>-ó nchàa ñuú xĩndáa yatni-a, chi danèhé-í ñáyiú tnúhu Yá Ndióxi chí diu chiú<sup>n</sup>-á<sup>n</sup> vèxi-í —càchí-gá xáha<sup>n</sup>-gá xii-güedé.

<sup>39</sup> Te Jèsús tá xica ndodo-gá cuáhá<sup>n</sup> nchaa ñuú yĩndèhu distritú Galileá dánèhé-gá ñáyiú, te ndi tnahá ì<sup>n</sup> ì<sup>n</sup> ñuú sáá-gá te duca<sup>n</sup> cuãnguihu-gá veñúhu-yu dānehé ñáhá-gá xii-yu tnúhu Yá Ndióxi, te cue ñáyiú yíhi ñaha espíritú cundihí yucu ñávāha ta queñuhu-gá nchaa espíritú-á<sup>n</sup> yiqui cùñú-yu cuáhá<sup>n</sup>.

*Jèsús quidé tātna-gá ì<sup>n</sup> tée tñàhá cuéhé sã dátèhyú nihnu-xi yiqui cùñú-ó*  
(Mt. 8:1-4; Lc. 5:12-16)

<sup>40</sup> Te ní quexìo ì<sup>n</sup> tée tñàhá cuéhé sã dátèhyú nihnu-xi yiqui cùñú-ó núú Jèsús, te ní ngüñí xití-dé núú-gá càhá<sup>n</sup> ndàhú-dé, te xáha<sup>n</sup>-dè xii-gá:

—Véxi-í càhá<sup>n</sup> ndàhú-í núú-n ñuú vá cundèe iní-n càda tātna ñaha-n xii-í chí cùtnuní iní-í sá ndácú-n —càchí-dé xáha<sup>n</sup>-dè xii-gá.

<sup>41</sup> Te Jèsús ní cundàhú iní ñáhá-gá xii-dé te ní dácáá-gá ndaha-gá ní tendaha ñàha-gá xii-dé, te xáha<sup>n</sup>-gá:

—Cuu cada tātna ñaha-í xii-n, te vitna ndúha-n —càchí-gá xáha<sup>n</sup>-gá xii-dé.

<sup>42</sup> Te òré-ni-á<sup>n</sup> ñi xócuñí cuéhé tñàhá-dé.  
<sup>43-44</sup> Te Jèsús ní càhá<sup>n</sup> víhí-gá dóho-dé, te xáha<sup>n</sup>-gá xii-dé:

—Vitna cuanùhú-na, dico vá yõo ì<sup>n</sup> cúñaha-n sà ní quide tātna ñaha-í xii-n, te núú dütú-ni cuáhá<sup>n</sup> cuendá sá ná quini ñáhá-dè xii-n sà ní ndúha-n te cuáha-n-dè sá ndúú tãhú Yá Ndióxi dátna ní cachí ndí Moisés cuendá ná quini ñáyiú sá ndáá ní ndúha-n —càchí-gá xáha<sup>n</sup>-gá xii-dé.

<sup>45</sup> Te tée ní cuhú-á<sup>n</sup> ñi xica-dé cuáhá<sup>n</sup>-dè, te ní ngüita-dé xáha<sup>n</sup>-dè xii nchaa ñáyiú ta nàníhí-dè nàcuáa ní quide Jèsús ní quide tātna ñaha-gá xii-dé. Te sá dúcá<sup>n</sup> ñi xité nuu tée-á<sup>n</sup> cuendú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xíá<sup>n</sup> ñuú dayuhu ñi xóo quihu-gá dava ñuú núú ïo vai ñáyiú ndèhe ñaha xii-gá, te ní xóo cundecu-gá xití yucu núú ñà túú

ñáyiú ndècu. Te nchaa ñuú ní quee ñáyiú ní sáhá<sup>n</sup>-yu núú ndécú-gá ní càhá<sup>n</sup> ndihí ñahá-yu xii-gá.

## 2

*Jèsús quidé tātna-gá ì<sup>n</sup> tée cùhú ñá cúú-gá candá nihnu*

(Mt. 9:1-8; Lc. 5:17-26)

<sup>1</sup> Te sātá ñi cuu ì<sup>n</sup> úú nduu sá ñi quee Jèsús ñuú Capernaúm te ní nasáa tucu-gá, te cue ñáyiú ní níhí-yu tnúhu sá ñi ndexìo-gá núú quidé vèhe-gá. <sup>2</sup> Te ndihí-ni ní tacá cuéhé víhí-yu, te ní chítú víhí-yu ndéé yuyèhe te ñá ní tñàhá-gá-yu. Te ní ngüita-gá ní dánèhé ñáhá-gá xii-yu tnúhu Yá Ndióxi. <sup>3</sup> Te òré-á<sup>n</sup> ñi quexìo cúmí tñàhá cue tée núú ndécú-gá nchídó-güedé ì<sup>n</sup> tée cùhú ñá cúú-gá candá nihnu-dé. <sup>4</sup> Dico ñá túú ní ndàcu-güedé sáá-güedé ndéé núú-gá chí ío cuéhé ñáyiú ndècu. Te xíá<sup>n</sup> ñuú ní sáá-güedé díquí véhé núú yíhí-gá-á<sup>n</sup> ñi caá<sup>n</sup>-güedé, te ichi ndàa díquí véhé-á<sup>n</sup> ñi dáquèe-güedé tée cùhú-á<sup>n</sup>, te ñuhu-dé ì<sup>n</sup> xító ní dáquèe ñaha-güedé ndéé núú-gá. <sup>5</sup> Te Jèsús sa ní cutnùní iní-gá sá sàndáá iní ñáhá-güedé xii-gá ñuú ní xáha<sup>n</sup>-gá xii tée cùhú-á<sup>n</sup>:

—Yòhó tée cùhú, sa ní quide càhnu iní-í nchaa cuèchi-n —càchí-gá xáha<sup>n</sup>-gá xii-dé.

<sup>6</sup> Te xíá<sup>n</sup> xĩnucóo ì<sup>n</sup> úú cue tée dàcuaha ñaha xii ñáyiú nchaa tnúhu ní chídó tnùní ndí Moisés, te sá dúcá<sup>n</sup> ñi càhá<sup>n</sup> Jèsús núú cue tée-á<sup>n</sup> ñi sani iní-güedé: <sup>7</sup> “Tée-a càhá<sup>n</sup> cuéhé-dé cuendá Yá Ndióxi duha càhá<sup>n</sup>-dè, chí vá yõo ì<sup>n</sup> ndàcu cada cahnu iní nchaa yíca cuèchi ñáyiú chí ì<sup>n</sup> dñi dí-ñi Yá Ndióxi quidé càhnu iní-gá”, duha ní sani iní-güedé. <sup>8</sup> Dico òré-ni-á<sup>n</sup> ñi cutnùní iní Jèsús nàcuáa sàni iní-güedé, núú ní xáha<sup>n</sup>-gá xii-güedé:

—¿Te ná cuendá duca<sup>n</sup> sàni iní-ndó-í? <sup>9</sup> Te sá dúhá ñi xáha<sup>n</sup>-í xii tée cùhú-a sá ñi quide càhnu iní-í nchaa yíca cuèchi-dé, te xíá<sup>n</sup> nchòhó ñá túú cùtnuní iní-ndó ñuú ndáá càhá<sup>n</sup>-í àdi ñá ndáá. Dico núú cúú-í-dé sá ndácóo-dé, te ndocani-dé xító ñuhu-dé véxi, te caca-dé, te cutnùní ndáá iní-ndó ñuú ndáá càhá<sup>n</sup>-í àdi ñá ndáá chí cundehe núú-ndó nàcuáa cada-í. <sup>10</sup> Te vitna na càda-í nàcuáa cutnùní iní-ndó nchàa-ndo sá yùhú Tée cùu ñani tñàhá-ndó nchàa-ndo ndecu ndihí-í tnúhu ndee ñi sá cáda càhnu



iní-í nchaa cuéchi ñáyiú ñuyíú-a —càchí-gá xǎha<sup>n</sup>-gǎ xii-güedé.

Te sátá dúcá<sup>n</sup> te ní xáha<sup>n</sup>-gǎ xii té cùhú-á<sup>n</sup>:

11 —Ndacóo te ndocani-n xǐto ñùhu-n véxi-á<sup>n</sup>, te núhú-n vèhe-n —cachí-gá xǎha<sup>n</sup>-gǎ xii-dé.

12 Te òré-ni-á<sup>n</sup> ñí ndacóo-dé, te ní ndocani-dé xǐto ñùhu-dé ní quexìo-á<sup>n</sup>, te ndèhe nchaa ñáyiú xǐndecu-á<sup>n</sup> ñí ndee-dé tnuú-yu cuáhá<sup>n</sup>-dé. Te sá dúcá<sup>n</sup> ñí quide Jèsús ní quide tátna-gá té-á<sup>n</sup>, xǐá<sup>n</sup> ío ní cuñúhu nchaa ñáyiú, te ní xítnahá-yu:

—Càhnu vihi cuu Yá Ndiöxí, chi ñá ñ<sup>n</sup> ndùu quini-ó dùha cuu datná ní cuu vitna —càchí-yu xítnahá-yu.

*Jèsús càhá<sup>n</sup>-gá ñ<sup>n</sup> té nàni Leví  
(Mt. 9:9-13; Lc. 5:27-32)*

13 Te Jèsús cuáhá<sup>n</sup> tucu-gá yuhu làgúná, te ío cuéhé ñáyiú ní sátnahá ñáhá xii-gá, te ní dánèhé ñáhá-gǎ xií-yu tnuúhu Yá Ndiöxí.

14 Te òré ní yáha ní dánèhé ñáhá-gǎ xií-yu, te ní naquehe<sup>n</sup>-gá ichi, te ní yáha yatni-gá ñ<sup>n</sup> xichi núú núcóo ñ<sup>n</sup> té nàni Leví déhe ñ<sup>n</sup> té nàni Alfeú quidé còbrá-dé ñáyiú cuendá impuèstú chi cobràdór cúú-dé. Te òré ní xiní ñáhá-gǎ xii-dé, te ní xáha<sup>n</sup>-gǎ:

—Néhe chitnahá ñáhá-n xii-í —càchí-gá xǎha<sup>n</sup>-gǎ xii-dé.

Te té Lèví-á<sup>n</sup> ñí ndacuñí-dé, te ní tuha ñaha-dé xii-gá.

15 Te té Lèví-á<sup>n</sup> cuáhá<sup>n</sup>-dé ndihí Jèsús vehe-dé. Te yíhi Jesús mèsá xéxi-gǎ ndihí cue té xica cuu ndihí-gá, te tnàhá vài cue té cuihna iní-xi quide cobrá ñáhá xii ñáyiú cuendá impuèstú, ndihí dava-gá cue té ndècu ichi cuehé ichi duha núcóo ndihí ñaha-güedé xii-gá xéxi ndihí ñaha-güedé, te duca<sup>n</sup> chi ío vài ñáyiú nchícú<sup>n</sup> ñáhá xii-gá. 16 Te sá ñí xiní cue té dàcuáha ñaha xií-yu nchaa tnuúhu ní chídó tnùní ndí Moisés, ndihí cue té cùu fariséu xéxi Jèsús ndihí nchaa cue té-á<sup>n</sup> núu ní xicá<sup>n</sup> tnuúhú-güedé núu cué té xica cuu ndihí-gá, te xǎha<sup>n</sup>-gǎ xii-güedé:

—¿Ná cuendá duca<sup>n</sup> quide té cùu mestrú-ndó xéxi-dé ndihí cue té cuihna iní-xi quide cobrá ñáhá xii ñáyiú cuendá impuèstú, ndihí nchaa dava-gá cue té

ndècu ichi cuehé ichi duha-i? —càchí-güedé xǎha<sup>n</sup>-güedé.

17 Te Jèsús ní tecú dóho-gá nàcuáa ndùu tnuúhu ní xáha<sup>n</sup>-güedé xii cue té xica cuu ndihí-gá, núu ní xáha<sup>n</sup>-gǎ xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í càhá<sup>n</sup>-í ñáyiú cùtnuní iní-xi sá ndécú cuèchi-xi te ñá túú véxi-í càhá<sup>n</sup>-í ñáyiú càchí sá ñá túú ndècu cuéchi-xi —càchí-gá xǎha<sup>n</sup>-gǎ xii-güedé.

*Cuendá cue ñáyiú ñá túú tnàhí ná xéxi áma càhá<sup>n</sup> ndihí-yu Yá Ndiöxí  
(Mt. 9:14-17; Lc. 5:33-39)*

18 Te cue té xica cuu ndihí té Juáá, ndihí cue té xica cuu ndihí cue té cùu fariséu ñá túú tnàhí ná xéxi-güedé áma càhá<sup>n</sup> ndihí-güedé Yá Ndiöxí. Te ñ<sup>n</sup> nduu duca<sup>n</sup> xiquide-güedé, te ní sáhá<sup>n</sup> ñáyiú ní xicá<sup>n</sup> tnuúhú-yu núu Jèsús, te xǎhá<sup>n</sup>-yu xii-gá:

—Cuñí-ndí cachí tnuúhu-n nǎ cuendá cue té xica cuu ndihí té Juáá, ndihí cue té xica cuu ndihí cue té cùu fariséu ñá túú tnàhí ná xéxi-güedé áma càhá<sup>n</sup> ndihí-güedé Yá Ndiöxí, te cue té xica cuu ndihí-n ñá túú dùca<sup>n</sup> quide-güedé —càchí-yu xǎhá<sup>n</sup>-yu xii-gá.

19 Te Jèsús ní xáha<sup>n</sup>-gǎ xií-yu:

—Nchòhó xiní-ndó sǎ vǎ cúú cùñaha-o xii ñáyiú ñùhu vico tnándaha sá vǎ cúú càxí-yu ñini ndècu ndihí ñaha té tnándaha xií-yu. 20 Dico sáá nduu te vǎ cùndècu ndihí ñaha-gá té tnándaha-á<sup>n</sup> xií-yu, te dàvá-á<sup>n</sup> te cahni iní-yu vǎ cáxí-yu cuendá sá ndihí iní-yu.

21 Te vǎ yǎo ñ<sup>n</sup> dándée luha dóo sáá ñ<sup>n</sup> dóo sa ní cuu tùhú víhí, chi dóo sáá-á<sup>n</sup> nàndiyí-xi te uu<sup>n</sup>-gá ndata-xi dóo sà ní cuu tùhú-á<sup>n</sup>. 22 Te ñí vǎ yǎo ñ<sup>n</sup> chihí ndidí sáá xítí ñ<sup>n</sup> lamba sa ní cuu tùhú víhí, chi núu yoo duca<sup>n</sup> na càda te ndava lamba sa ní cuu tùhú-á<sup>n</sup>, chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núu duca<sup>n</sup> na càdá-yu. Núu xǐá<sup>n</sup> xiní ñùhu-xi quée ndidí sáá-á<sup>n</sup> xítí ñ<sup>n</sup> lamba saa —càchí-gá xǎha<sup>n</sup>-gǎ xií-yu.

*Cue té xica cuu ndihí Jesús sàhnú-güedé yoco triú nduú ndetátú ñáyiú  
(Mt. 12:1-8; Lc. 6:1-5)*

23 Te ì<sup>n</sup> nduu cùu-xi nduu ndetatú ñáyiu ññhu Jesús ichi ndihí cue téé xica cuu ndihí-gá, te ta yáha-gá ndihí-güedé ì<sup>n</sup> xichi núú cáá triú, te ní ngüíta-güedé sàhnú-güedé yoco triú-á<sup>n</sup>. 24 Te cue téé cùu fariséú ní xáha<sup>n</sup>-güedé xii-gá:

—¿Ná cuendá duca<sup>n</sup> quide cue téé xica cuu ndihí-n sahnú-güedé yoco triú vitna cùu-xi nduu ndetatú-í? Te ñá túú tàú-güedé duca<sup>n</sup> càda-güedé —càchí-güedé xáha<sup>n</sup>-güedé xii-gá.

25 Te ní xáha<sup>n</sup>-gá xii-güedé:

—¿Te náa vátá dácua<sup>n</sup>hà tnahi-gá-ndó nñú tütú Yá Ndiöxí núú càhá<sup>n</sup>-xi nàcuáa ní quide ndíi Dàvíí cútnahá ní xihí ndíi docó ndihí cue téé ní xica cuu ndihí ndíi-á<sup>n</sup>? 26 Te dàvá-á<sup>n</sup> ñí xíndecu ì<sup>n</sup> téé ní xínani Abiátár ní cuu-dé dútú cúnú, te ndíi Dàvíí ní quíhu ndíi xití vehe Yá Ndiöxí ní quehe<sup>n</sup> ndíi pàá ní cuu íí ndécú-á<sup>n</sup> ñí dácáhnú ndíi cue téé ní xica cuu ndihí ndíi ní xexi ndíi ndihí-güedé, te mee-ni cuè dútú tàú-güedé caxi-güedé pàá-á<sup>n</sup> ní cùu —cachí-gá xáha<sup>n</sup>-gá xii-güedé.

27 Te ní xáha<sup>n</sup> tùcu Jesús xii-güedé:

—Mee Yá Ndiöxí ní taxi ndecu-gá nduu ndetatú ñáyiu, te ñá túú ní càchí-gá sá meé-yu nándi cani iní-yu cadá-yu canehe ñ-yu nduu ndetatú-yu-á<sup>n</sup>. 28 Te yúhú Téé cùu ñaní tnáhá-ndó ncháa-ndo, tnáhá-í ndécú ndihí-í tnúhu ndee ñí sá cùu-í ncháa ñáyiu nàcuáa cadá-yu nduu ndetatú-ó-á<sup>n</sup> —càchí-gá xáha<sup>n</sup>-gá xii-güedé.

### 3

*Ì<sup>n</sup> téé ní yíchí ì<sup>n</sup> xio ndaha-xi  
(Mt. 12:9-14; Lc. 6:6-11)*

1 Te Jèsús cuánguihu tucu-gá xití veñúhu, te xití veñúhu-á<sup>n</sup> ndécú ì<sup>n</sup> téé ní yíchí ì<sup>n</sup> xio ndaha-dé. 2 Te xíá<sup>n</sup> ndécú cuè téé xito dayuhu ñaha xii-gá, te núú cada tátna-gá téé cùhú-á<sup>n</sup> nduu cùu-xi nduu ndetatú-güedé ndihí ñáyiu, cuendá duca<sup>n</sup> te níhí-güedé nàcuáa cada-güedé cacá<sup>n</sup> cuéchi-güedé cuendá-gá. 3 Te ní xáha<sup>n</sup>-gá xii téé cùhú ndaha-xi-á<sup>n</sup>:

—Ndacuíñi te ngúnutñi-n cuádava iha —càchí-gá xáha<sup>n</sup>-gá xii-dé.

4 Te ní xicá<sup>n</sup> tnúhú-gá núú-güedé, te xáha<sup>n</sup>-gá:

—Chí càchí tnúhu ná cúú sá cúú càda-o nduu ndetatú-ó. ¿Sá vaha ñá sá cuéhé? ¿Sá

cadá tátna-o ñáyiu cùhú ñá sá cáhni-ó-yu? —càchí-gá xáha<sup>n</sup>-gá xii-güedé.

Dico ni ì<sup>n</sup>-güedé ñá túú tnáhí ní càhá<sup>n</sup>-güedé. 5 Te Jèsús ní xíndéhé vaha-gá núú ncháa-güedé te ní cudéé<sup>n</sup>-gá, te ní ndíhú iní-gá chí ío sáa iní-güedé, te ní xáha<sup>n</sup>-gá xii téé cùhú ndaha-xi-á<sup>n</sup>:

—Ndocani ndaha-n —càchí-gá xáha<sup>n</sup>-gá xii-dé.

Te ní ndocani-dé ndaha-dé, te òré-ni-á<sup>n</sup> ñí ndúha. 6 Te cue téé cùu fariséú ní xica-güedé cuáhá<sup>n</sup>-güedé ì<sup>n</sup> xichi núú ñí naníhí tnáhá-güedé ndihí cue téé cùndihí té Hèrodés cuendá ndatnúhu-güedé nása cada-güedé cahni-güedé Jèsús.

*Cuéhé víhí ñáyiu ní quexìo yuhu lagúná*

7 Te Jèsús ní xica-gá cuáhá<sup>n</sup>-gá ndihí cue téé xica cuu ndihí-gá yuhu làgúná distritú Galileá, te ío cuéhé ñáyiu distritú-á<sup>n</sup> nchicú<sup>n</sup> ñáhá-yu xii-gá cuáhá<sup>n</sup>. 8 Te núú ñí quexìo-gá-á<sup>n</sup> ñí sáhá<sup>n</sup> ñáyiu distritú Júdeá, ñáyiu ñúú Jerusàlén, ñáyiu distritú Idùmeá, ñáyiu xíndecu ndàa ñngá xio yúte Jòrdán, ndihí ñáyiu xíndecu yatni ñúú Tirú ndihí ñúú Sidón, te duca<sup>n</sup> ño vai-yu ní sáhá<sup>n</sup> núú ndécú-gá chí ní níhí-yu tnúhu ncháa nàcuáa quide-gá. 9 Te Jèsús ní xáha<sup>n</sup>-gá xii cue téé xica cuu ndihí-gá sá cáda túha-güedé ì<sup>n</sup> bàrcú cuendá caa-gá núú-xi cuendá sá vā dádèhnde ñahá-yu xii-gá chí ío cuéhé-yu. 10 Te sá dúcá<sup>n</sup> ñí níhí-yu tnúhu sá quidé tátna-gá ñáyiu cùhú, núú xíá<sup>n</sup> ncháa dāva-gá ñáyiu cùhú súúni dícó ngõnchihi tnáhá-yu cuáhá<sup>n</sup>-yu núú ndécú-gá cuíní-yu tnándeé ñáhá-yu xii-gá cuendá sá cuíní-yu ndúha-yu. 11 Te cue ñáyiu yìhí ñaha espíritú cùndihí yucu ñávaha ní sanu xití ñaha-xi xii-yu núú Jèsús òré ní xíní ñáhá-xí xii-gá, te xíá<sup>n</sup> ní quide níhí ní cáhá<sup>n</sup>-yu, te xáhá<sup>n</sup>-yu xii Jèsús:

—¿Yòhó cúú-n Dèhe Yá Ndiöxí! —càchí-yu xáhá<sup>n</sup>-yu xii-gá.

12 Te Jèsús ní tenáa-gá ncháa espíritú cùndihí yucu ñávaha-á<sup>n</sup>, te ní xáha<sup>n</sup>-gá xii ncháa ñáyiu ní xihí-xi-á<sup>n</sup> sá vā càhá<sup>n</sup>-yu núú ñáyiu yoo cùu-gá.

*Jèsús caxi-gá úxúú tnáhá cue téé dacuàha ñaha xii ñáyiu tnúhu-gá  
(Mt. 10:1-4; Lc. 6:12-16)*

13 Te sátá dúcá<sup>n</sup> nǐ cuu te Jèsús ní sáá-gá ñ<sup>n</sup> yucu, te xíá<sup>n</sup> ndécú-gǎ ní cana-gá nchaa cue téé cǎchí iní-gá. Te òré ní quexìo nchaa cue téé-á<sup>n</sup> núú-gǎ, 14 te ní cáxi-gá úxúú tnàhá cue téé caca cuu ndìhi-gá, te ñ<sup>n</sup> ni cue téé-á<sup>n</sup> tendaha-gǎ quíhí<sup>n</sup>-güedé cáhá<sup>n</sup>-güedé tnúhu-gá núú ñáyiú. 15 Te ní sáñaha-gǎ xii-güedé tnúhu ndee iní cundecu ndìhi-güedé cuendá cada tátna-güedé ñáyiú cùhú, ndìhi cuendá queñuhu-güedé nchaa espíritú cündìhi yucu ñávãha yíhi ñaha xii ñáyiú. 16 Te duha xñani ndi úxúú cue téé-á<sup>n</sup>: ñ<sup>n</sup>-dé nání-dě Xímú, te mee-gǎ ní taudìu ñaha-gá xii-dé sá cúnani-dé Pèlú. 17 Te ingá-dé nání-dě Jàcobó, te ingá-dé nání-dě Juàá, te ñani té Jàcobó-á<sup>n</sup> cúú tǎ Juàá te ndi ndúú-güedé cúú-güedé déhe té Zebèdeú, te ndi ndúú cue téé-á<sup>n</sup> nǐ dánání ñaha Jesús xii-güedé Boànergés, te tnúhu-á<sup>n</sup> queé-xí: Cue téé ío yáchí cúdeé<sup>n</sup>, duha quee-xi tnúhu-á<sup>n</sup>. 18 Te duha xñani dàva-gá-güedé: Té Ndríxí, té Lìpé, té Bartolómé, té Mâteú, té Mǎxí, té Jàcobó déhe té Àlfeú, té Tàdeú, té Xímú téé ní cundìhi cue téé cananístá ní cùu, 19 ndìhi té Jüdás Iscàrioté téé ní sáá nduu nǐ sáha cuendá ñáhá xii Jesús núú cuè téé cùu úhú iní ñáhá xii-gá, duha xñani cuè téé ní cáxi Jèsús ní xica cuu ndìhi-gá.

*Càchí-güedé sá ndécú ndìhi Jesús yucu ñávãha dico ñá ndàá*  
(Mt. 12:22-32; Lc. 11:14-23; 12:10)

Te sátá dúcá<sup>n</sup> te cuáhá<sup>n</sup>-gá ndìhi-güedé núú quidé vèhe-gá. 20 Te ío vǎi ñáyiú ní tacá-ni tucú-yu xíá<sup>n</sup>, te ní ñǎ ní nǐhí-gǎ nása cada-gá caxi-gá ndìhi cue téé xica cuu ndìhi-gá cuendá sá ío vǎi-yu. 21 Te cue ñáyiú cùu ndi mee Jesús ní nǐhí-yu tnúhu nchaa nàcuáa cùu, te nchaa ñáyiú ñá cùnuni váha iní-xi ní cachí-yu sá nǐ nduu lúcú-gá núu xíá<sup>n</sup> cuáhá<sup>n</sup> ñáyiú cùu ndi mee Jesús núú ndécú-gǎ cuendá candeca ñáhá-yu xii-gá núhú ní cùu.

22 Te cue téé dàcuaha ñaha xii ñáyiú nchaa tnúhu ní chídó tnùnì ndí Moisés véxi ndéé ñúú Jerusalén ní cáhá<sup>n</sup> cuèhé-güedé cuendá Jèsús, chi ní xitnaha-güedé:

—Téé-a ndècu ndìhi-dé sácuíhná, te ñ<sup>n</sup> xíá<sup>n</sup> chíndèe ñaha-xi xii-dé queñuhu-dé nchaa espíritú cündìhi-xi yíhi ñaha xii ñáyiú,

te ñ<sup>n</sup> ni-xi tàxi tnuní-xi nchaa espíritú-á<sup>n</sup> —duha ní xitnaha-güedé.

23 Te Jèsús ní cana ñaha-gǎ xii-güedé, te ní cani-gá ñ<sup>n</sup> cuendú núú-güedé nàcuáa tecú tnùnì-güedé tnúhu-gá, te xáha<sup>n</sup>-gǎ xii-güedé:

—¿Te nása cada sácuíhná queñuhu-xi cue espíritú cündìhi-xi yíhi ñaha xii ñáyiú-i?

24 Te nchòhó xínì-ndó sǎ núu ñ<sup>n</sup> téé yíndaha ñ<sup>n</sup> nació<sup>n</sup> vá cúú ñ<sup>n</sup> nuu-dé ndìhi cue téé cündìhi-dé, te vá cúdí-dé cunuu-dé. 25 Te ñ<sup>n</sup> ni duca<sup>n</sup> sǎtnahá-xi cùu tucu ñáyiú xíndecu ñ<sup>n</sup>-ni vèhe, chi núu vá cúú ñ<sup>n</sup> nuú-yu, te vá cúdí-yu cundecu càhnú-yu. 26 Te núu sácuíhná ñá túú cùu ñ<sup>n</sup> nuu-xi ndìhi cue espíritú cündìhi-xi, te vá cúdí-xi cundecu-xi taxi tnùnì-xi te núu duca<sup>n</sup> quide-xi.

27 Te nchòhó xínì-ndó sǎ cuè ñadúhú chi vá ndácú-güedé cuendá-ni quíhu-güedé duhu-güedé vèhe ñ<sup>n</sup> téé ío ndee, chi díhna-gá xínì ñúhu-xi tní-güedé téé-á<sup>n</sup> dacùtu ñaha-güedé xii-dé dàtnùnì duca<sup>n</sup> te ndacu-güedé duhu-güedé nchaa sá ndécú ndìhi-dé.

28 Te na cǎchí tnúhu ndáá-í xii-ndo sǎ ncháá sǎ cuèhé sá dúhá quide ñáyiú, ndìhi nchaa tnúhu cuèhé tnúhu duha càhá<sup>n</sup>-yu cuendá Yǎ Ndióxi cuu cada càhnu iní-gá.

29 Dico cue ñáyiú na càhá<sup>n</sup> cuèhé cuendá Espíritú Yǎ Ndióxi, ñáyiú-á<sup>n</sup> vǎ cadá càhnu iní ñáhá tnàhí-gá xii-yu, chi cundecu-ni cuéchi-yu núú-gǎ ní caa ní quíhí<sup>n</sup> —càchí-gá xáha<sup>n</sup>-gǎ xii-güedé.

30 Te duca<sup>n</sup> nǐ cáhá<sup>n</sup>-gá chi cǎchí-güedé sá ndécú ndìhi-gá espíritú cündìhi yucu ñávãha.

*Nǎná Jèsús ndìhi cue ñani-gá*  
(Mt. 12:46-50; Lc. 8:19-21)

31 Te ní quexìo náná Jèsús ndìhi cue ñani-gá núú ndécú-gǎ xínutnǐ-yu quehé, te ní xáhã<sup>n</sup>-yu xii ñ<sup>n</sup> ñáyiú xíndecu-á<sup>n</sup> sǎ dáyãha-yu tnúhu núú-gǎ cuendá quee-gá ndatnúhu ndìhi ñaha-gǎ xii-yu. 32 Te cue ñáyiú xínucóo ní cándéé díñi-gá ní xáhã<sup>n</sup>-yu xii-gá:

—Nǎná-n ndìhi cue ñani-n ndécú-yu quehé nándùcu ñahá-yu xii-n —càchí-yu xáhã<sup>n</sup>-yu xii-gá.

33 Te Jèsús ní xáha<sup>n</sup>-gǎ xii-yu:



—Te cachí tnúhu-ndo yõndi-gá ñáiyu cùu datná nãná-í ndihì datná cue ñanì-í —càchì-gá xãha<sup>n</sup>-gã xií-yu.

<sup>34</sup> Te dàtnùnì ní xíndéhé vãha-gá núu nchaa ñáiyu xínucóo ni càndéé dñi-gá-á<sup>n</sup>, te ní xãha<sup>n</sup>-gã xií-yu:

—Nchaa ñáiyu-a cùu-yu datná nãná-í ndihì datná cue ñanì-í. <sup>35</sup> Chi nchaa ñáiyu quìde nacuáa càhá<sup>n</sup> Yã Ndiõxí, ñáiyu-á<sup>n</sup> cúu-yu datná cue ñanì-í, ndihì datná cue cúha-í, ndihì datná nãná-í —càchì-gá xãha<sup>n</sup>-gã xií-yu.

#### 4

*Nàcuáa quìde téé cuángacá<sup>n</sup> triú*  
(Mt. 13:1-9; Lc. 8:4-8)

<sup>1</sup> Te Jèsús ní ngüíta-gá dácuaaha tucu-gá ñáiyu yuhu làgúná. Te cuéhé víhì-yu ní tacá xíá<sup>n</sup> nõu cuásaá-gá núu ñ<sup>n</sup> bàrcú nùtnñi xití ndute làgúná-á<sup>n</sup>, te núu xãá<sup>n</sup> ní ngóo-gá te ní ngüíta-gá dánèhé ñáhá-gã xií-yu, te ncháa-yu xixúcu-yu yuhu làgúná-á<sup>n</sup>. <sup>2</sup> Te ní ngüíta-gá ní canì-gá tñtñi cuendú núu-yu nàcuáa tecú tnùnì-yu tnúhu-gá, te xãha<sup>n</sup>-gã xií-yu:

<sup>3</sup> —Chí cùndedóho váha ñ<sup>n</sup> cuendú ná canì-í-a. ñ<sup>n</sup> téé cuángacá<sup>n</sup>-dé triú. <sup>4</sup> Te òré ní ngüíta-dé dãngoyo-dé triú-á<sup>n</sup>, te dava ní quene ndava ní ngava ndéé ichi, te ní xiní cue tílaá te ní nadatàcá-güedi. <sup>5</sup> Te dava ní ngava ñuhu yadi nõu yíhì vèhi yúú, te ndihì-ni ní xínu-xi cuendá sá ñà túú càvihi ñuhu. <sup>6</sup> Dico òré ní nayehé ñà túú ní cùndee iní-xi chí ní yíchì-xi, chí ñà túú ní ñhì quíhì<sup>n</sup> cùnú yóho-xi. <sup>7</sup> Te dava ní ngava núu yúcu ndíquí<sup>n</sup> tnu iñu, te ñ<sup>n</sup>nuu-ni ní xínu-xi ndihì tnu iñu, te tnu iñu-á<sup>n</sup> ñi sahnu-xi te ní dánáá-xi nchaa triú sá ñi xínu-á<sup>n</sup>. <sup>8</sup> Dico dava triú-á<sup>n</sup> ñi ngava-xi núu ndécú ñuhu coco<sup>n</sup>, te xíá<sup>n</sup> ní xínu-xi te ní sahnu-xi te ío váha ní cuu, chí núu ñ<sup>n</sup>-ní triú-á<sup>n</sup> te dava yoco-xi ní nguíhi ócò úxì triú-xi, te dava yoco-xi ní nguíhi únídico triú-xi, te dava yoco-xi ní nguíhi ñ<sup>n</sup> ciendú triú-xi —càchì-gá xãha<sup>n</sup>-gã xií-yu.

<sup>9</sup> Te xãha<sup>n</sup> tucu-gá xií-yu:

—Nchaa nchòhó ñáiyu ní xíndedóho nchaa tnúhu ní càhá<sup>n</sup>-í-a, te ío váha chí cuãha cuendá —càchì-gá xãha<sup>n</sup>-gã xií-yu.

*Jèsús càhá<sup>n</sup>-gá ná cuendá duca<sup>n</sup> canì-gá cuendú*

(Mt. 13:10-17; Lc. 8:9-10)

<sup>10</sup> Te sátá ñi ndaca ñáiyu-á<sup>n</sup> te ní quendóo mee-nã Jèsús ndihì cue téé xica cuu ndihì-gá, ndihì ñ<sup>n</sup> ùú-nã ñáiyu. Te ñáiyu-á<sup>n</sup> ndihì cue téé-á<sup>n</sup> ñi xíca<sup>n</sup> tnúhũ-yu ndihì-güedé núu-gã, núu nása quèe-xi cuendú ní canì-gá núu-yu ndihì-güedé.

<sup>11</sup> Te ní xãha<sup>n</sup>-gã:

—Nchòhó chí sa càchì tnúhu Yá Ndiõxí xii-ndo ñ<sup>n</sup> sá vátá quini-gá-ndó, chí càchì tnúhu-gá nàcuáa cada-gá ndihu ndaha-gã ñáiyu, dico dava-gá ñáiyu canì-í mee-ni cuendú núu-yu. <sup>12</sup> Chí cuèi na quini-yu nchaa nàcuáa cuu dico ní vã cútnùnì iní-yu ná cuendá duca<sup>n</sup> cùu, àdi cuèi na cùndedóho-yu dico ní vã tècú tnùnì-yu. Te duca<sup>n</sup> ndòhó-yu cuendá sá vã quindáá iní-yu Yá Ndiõxí, ndihì cuendá sá vã cadá càhnu iní-gá nchaa yíca cuèchi-yu —càchì-gá xãha<sup>n</sup>-gã xií-yu ndihì-güedé.

*Jèsús càhá<sup>n</sup>-gá nàcuáa quèe-xi cuendá téé cuángacá<sup>n</sup> triú*

(Mt. 13:18-23; Lc. 8:11-15)

<sup>13</sup> Te ní xãha<sup>n</sup> tucu Jesús xii cue téé xica cuu ndihì-gá, ndihì cue ñáiyu-á<sup>n</sup>:

—Nchòhó, ñà túú ní tècú tnùnì-ndó cuendú ní canì-í núu-ndó, te núu duca<sup>n</sup>, ¿te nása tecú tnùnì-ndó dàva-gá cuendú canì-í núu-ndó-í? Te na càchì tnúhu-í xii-ndo nàcuáa quèe-xi cuendú ní canì-í núu-ndó.

<sup>14</sup> Te téé cuángacá<sup>n</sup> triú-á<sup>n</sup> cúu-dé datná ñ<sup>n</sup> téé cuáhá<sup>n</sup> càhá<sup>n</sup> tnúhu Yá Ndiõxí núu ñáiyu.

<sup>15</sup> Te triú-á<sup>n</sup> cúu-xì datná tnúhu Yá Ndiõxí, te triú sá ñi quene ndava ní ngava ndéé ichi, xíá<sup>n</sup> cúu-xì datná ñáiyu ní tnahá iní-xi tnúhu Yá Ndiõxí, dico sácuihná cuáhá<sup>n</sup>-xi xòcani-xi tnúhu-gá iní-yu cuendá sá vã cãchícú<sup>n</sup> nihnú-yu nàcuáa càhá<sup>n</sup> tnúhu-á<sup>n</sup>.

<sup>16</sup> Te triú sá ñi ngava ñuhu yadi nõu yíhì vèhi yúú, xíá<sup>n</sup> cúu-xì datná ñáiyu ní xíndedóho tnúhu Yá Ndiõxí te díí iní ní tñi-yu tnúhu-gá. <sup>17</sup> Dico òré ná ngüíta ñáiyu cúcuéhé ñáhá-yu xií-yu àdi nãndi-gá sá yãha-yu sá cuendá tnúhu-gá, te ñà cùndee iní-yu chí dàñá-yu tnúhu-gá cuendá sá ñà túú ñhì ndéè-yu. <sup>18</sup> Te triú sá ñi ngava núu yúcu ndíquí<sup>n</sup> tnu iñu xíá<sup>n</sup> cúu-xì datná ñáiyu ní tecú dóho-xi tnúhu Yá Ndiõxí, <sup>19</sup> dico cuèé cuèé ní nacuanaá-yu



tnúhu-gá, chi cuendá mee-ni sã cúu-xí mèe-yu ñùhu iní-yu, ndihí cuendá sã ïo sàni iní-yu cuu cuicá-yu, ndihí cuendá sã ïo cùdí iní-yu nchaa sã ïo ñuyú-a, te ñá túú ñùhu iní-yu tnúhu sã ñí xíndedóho-yu-án nàcuáa cada váha-yu cundecú-yu. <sup>20</sup> Dico triú sã ñí ngava núú ndécú ñùhu coco<sup>n</sup>, xíá<sup>n</sup> cúu-xí dàtná ñáyiú ní xíndedóho tnúhu Yá Ndiöxí te quidé-yu nchaa nàcuáa càhá<sup>n</sup> tnúhu-án. Te cada iní-ndó sã ñáyiú-án cúu-yu dàtná triú sã ñí nguíhi yoco-xi ócó úxí triú-xi, ndihí triú sã ñí nguíhi yoco-xi únídico triú-xi, ndihí triú sã ñí nguíhi yoco-xi ì<sup>n</sup> ciendú triú-xi. Te duca<sup>n</sup> sãtnahá-xi cùu-yu chi ïo váha quidé-yu —càchí-gá xãha<sup>n</sup>-gã xii cue tée xica cuu ndihí-gá ndihí cue ñáyiú-án.

*Cuendá iti  
(Lc. 8:16-18)*

<sup>21</sup> Te xãha<sup>n</sup>-gã xii nchaa ñáyiú:

—Ñá túú nì ì<sup>n</sup> ñáyiú tẽñuhú iti te chiváha-yu ì<sup>n</sup> xití quídí, àdi chiváha-yu ì<sup>n</sup> caha camá, chi tàxi ndecú-yu ì<sup>n</sup> núú dùcú<sup>n</sup> cuendá cutnùní núú nchaa ñáyiú. <sup>22</sup> Te ni ì<sup>n</sup> tnúhu sã ñã tècú tnùní ñáyiú vitna cachí-ó sã vã tècú tnùní-yu chi dacuití sã tècú tnùní-yu, te ni ì<sup>n</sup> tnúhu sã càchí-ó cùu yuhu vitna vá cúu yùhu chi dacuití sã quée tũu-xi núú ñáyiú. <sup>23</sup> Te nchòhó cue ñáyiú ní xíndedóho nchaa tnúhu ní càhá<sup>n</sup>-í-a, te ïo váha chí ná cuãha cuendá —càchí-gá xãha<sup>n</sup>-gã xií-yu.

<sup>24</sup> Te ní xáha<sup>n</sup> tùcu-gá:

—Ío váha chí cùndedóho tnúhu na càhá<sup>n</sup>-í-a. Te nàcuáa-ni quide-ndo danehé-ndó ñáyiú tnúhu Yá Ndiöxí, te ñu-ni duca<sup>n</sup> càda ñaha-gá xii-ndo, te uu<sup>n</sup>-gá duca<sup>n</sup> càda-gá sã cúu-xí-ndó. <sup>25</sup> Te nchaa nchòhó ñáyiú tècú tnùní tnúhu Yá Ndiöxí, uu<sup>n</sup>-gá cuita tecú tnùní-ndó tnũhu-gá quíhí<sup>n</sup>. Te nchaa nchòhó ñáyiú ñá túú tècú tnùní tnúhu-gá, te uu<sup>n</sup>-gá vá tècú tnùní-ndó —càchí-gá xãha<sup>n</sup>-gã xií-yu.

*Nàcuáa sãhnu triú*

<sup>26</sup> Te Jèsús xãha<sup>n</sup> tùcu-gá:

—Na càni-í ì<sup>n</sup> cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiöxí xii ñáyiú. ì<sup>n</sup> tée cuángacá<sup>n</sup>-dé triú. <sup>27-28</sup> Te sãtá ñí yãha

ní sacá<sup>n</sup>-dé triú-án, te cuánuhú-dé vehe-dé ndétátú-dé. Te duca<sup>n</sup>-ni ta xica nduu cuáhá<sup>n</sup> te ní xínu triú-án, te nàcuáa ta sãhnu-xi cuáhá<sup>n</sup> te ta quèe ndaha-xi, te duca<sup>n</sup>-ni cùu ní sáá nduu ñí quene yoco-xi te ní nguíhi triú-xi, dico tée ní sacá<sup>n</sup> triú-án ñà túú xíní-dé nása ní sãhnu-xi, chi mee ñùhu ní quide-xi ní sãhnu triú-án. <sup>29</sup> Te òré sa ní ndihí ní cuaa<sup>n</sup> te ní nguíta tée ní sacá<sup>n</sup>-án náquèhndé-dé nátaxi tnahá-dé —càchí-gá xãha<sup>n</sup>-gã xií-yu.

*Cuendá ndíquí<sup>n</sup> yutnu nàni mostázá  
(Mt. 13:31-32; Lc. 13:18-19)*

<sup>30</sup> Te xãha<sup>n</sup> tùcu Jèsús xií-yu:

—Na càni tucu-í ingá cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiöxí xii ñáyiú.

<sup>31</sup> ì<sup>n</sup> yutnu nàni mostázá cúu-xí ì<sup>n</sup> yutnu sã líhli vìhi-gá ndíquí<sup>n</sup>-xi dàcúúxí ndíquí<sup>n</sup> nchaa cúhú, <sup>32</sup> dico òré ná càcá<sup>n</sup>-güedé núú ñúhú-güedé, te na xínu-xi te sãhnu-gá-xi dàcúúxí nchaa cúhú, te nchaa dité-xi ïo cùu cahnu-xi, te ndéé cue quití ndàva núú tàchí sácõ-güedi nchaa núú dité-xi xínu ndeti-güedi —cachí-gá xãha<sup>n</sup>-gã xií-yu.

*Ío titní cuendú ní cani Jèsús núú ñáyiú  
(Mt. 13:34-35)*

<sup>33</sup> Te ío-gá vãi cuendú ní cani Jèsús núú ñáyiú cuendá tecú tnùní-yu tnúhu Yá Ndiöxí, dico dava cuendú ñá túú ní càni-gá núú-yu, chi ní cutnùní iní-gá sã vã tècú tnùní-yu nchaa. <sup>34</sup> Te mee-ni cuendú ní cani Jèsús núú ñáyiú ndi tnahá òré ní dánèhé ñahá-gã xií-yu tnúhu-gá. Te òré ndécú mèe Jèsús ndihí cue tée xica cuu ndihí-gá, te ní xáha<sup>n</sup>-gã xii-güedé nàcuáa quèe-xi ì<sup>n</sup> ì<sup>n</sup> cuendú ní cani-gá núú ñáyiú.

*Jèsús ngání-gã táchí ndihí ndute làgúná  
(Mt. 8:23-27; Lc. 8:22-25)*

<sup>35</sup> Te ñu-ni nduu-ã<sup>n</sup> òré sa ta cùndiquí<sup>n</sup> cuáhá<sup>n</sup> ní xáha<sup>n</sup> Jèsús xii cue tée xica cuu ndihí-gá:

—Chí ná quíhí<sup>n</sup>-ó ndàa ingá xio yuhu làgúná —càchí-gá xãha<sup>n</sup>-gã xii-güedé.

<sup>36</sup> Te ní quide ndee iní-gá nchaa ñáyiú xíxúcu-án, te ñu-ni bàrcú sã ñúhú-gã òré ní dánèhé-gá ñáyiú tnúhu-gá ñu-ni xíá<sup>n</sup> ní dácacá cue tée xica cuu ndihí-gá ndécá ñaha-güedé xii-gá cuáhá<sup>n</sup>, te tnahá ì<sup>n</sup>

ũú-gá bàrcú ní xica-xi nchìcú<sup>n</sup>-xi bàrcú ñùhú-gã-á<sup>n</sup> cuáhá<sup>n</sup>. <sup>37</sup> Te ñùhu barcú ñùhú-gã-á<sup>n</sup> ichi cuáhá<sup>n</sup>-xi núú ndute, te ní quexìo ì<sup>n</sup> táchí ñìhi, te ta nàdachitú-xi ndute xití bàrcú-á<sup>n</sup> cuáhá<sup>n</sup>, te sa cuìní-nã-xi quée naa bàrcú-á<sup>n</sup> xití ndute ni cùu. <sup>38</sup> Te Jèsús cáá-gã xidí-gá ì<sup>n</sup> xichi ndàa sáta bàrcú-á<sup>n</sup>, te yìnchihi ì<sup>n</sup> dóo dǐquí-gã. Te sá dúcá<sup>n</sup> cuìní-xi quée naa bàrcú-á<sup>n</sup> nũu ní sáhá<sup>n</sup>-güedé ní ndocani ñaha-güedě xii-gá, te xãha<sup>n</sup>-güedě:

—ìMèstrú, ndiquíú ìní! ¿Náa ñá túú ndìhú ìní-n sã tá quée naa-o cuáhá<sup>n</sup>-ã<sup>n</sup>? —càchí-güedé xãha<sup>n</sup>-güedě xii-gá.

<sup>39</sup> Te Jèsús ní ndiquíú ìní-gá te ní ndacóo-gá, te ní tenáá-gá táchí-ã<sup>n</sup>, te ní xáha<sup>n</sup>-gã xii ndute làgúná:

—ìTnavíí-nã cuhu<sup>n</sup>, chi ío dusa<sup>n</sup>! —càchí-gá xãha<sup>n</sup>-gã xii ndute-á<sup>n</sup>.

Te òré-ni ní ngüíñí táchí-ã<sup>n</sup> te ní nucúndecu nahi-nã ndute làgúná-á<sup>n</sup>. <sup>40</sup> Te Jèsús ní xáha<sup>n</sup>-gã xii-güedé:

—¿Ná cuendá ndéé dúcá<sup>n</sup> yùhú-ndó-í? ¿Náa ñá túú sàndáá ìní ñáhá ndìsa-ndo xii-í-ã<sup>n</sup>? —càchí-gá xãha<sup>n</sup>-gã xii-güedé.

<sup>41</sup> Dico mee-güedě chi ío ní yùhú-güedé sá duca<sup>n</sup> ñi quide-gá ní xiní-güedé, te ní xitnãha-güedé:

—¿Te ná téé cùu téé-a núu ní cáhá<sup>n</sup>-ni-dé, te ní ngüíñí táchí te ní nucúndecu nahi ndùte làgúná-a-í? —càchí-güedé xitnãha-güedé.

## 5

*Ì<sup>n</sup> téé yìhi ñaha espíritú cúndìhi yucu ñávãha*  
(Mt. 8:28-34; Lc. 8:26-39)

<sup>1</sup> Te ní sáá Jèsús ndìhi cue téé xica cuu ndìhi-gá ndàa ingá xio yuhu làgúná yucu cue téé ñuú Gàdará. <sup>2</sup> Te òré ní quene-gá xití bàrcú te ì<sup>n</sup> téé yìhi ñaha espíritú cúndìhi yucu ñávãha ní quée-dé núú yíndüxi ndíyì cuáhá<sup>n</sup>-dé núú-gã. <sup>3</sup> Te mee-ni nũu yíndüxi ndíyì-á<sup>n</sup> quidé vèhe-dé, te cuèi dàcutu ñaha-güedé cadená xii-dé dico ñá túú tnàhí ndàcu-güedé núú-dě. <sup>4</sup> Te ío titní xito ní dácútú-güedě cadená sáhá-dě ndìhi ndaha-dé dico ní dándává-ni-dě, te ní xóo dacàchi-gá-dé nchaa cadená-á<sup>n</sup>, te

ñá túú tnàhí ni ndàcu-güedé núú-dě. <sup>5</sup> Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núu yíndüxi ndíyì dico càna saa nahi-ni-dé, te ío ní xóo dánícuèhé-dé méé-dě ndìhi yúú. <sup>6</sup> Te òré ní xiní-dé Jèsús te xinu-dé ní sáhá<sup>n</sup> núú-gã, te ní ngüíñí xití-dě, <sup>7</sup> te espíritú yìhi ñaha xii-dé-á<sup>n</sup> ñi quide-xi níhi ní cáhá<sup>n</sup>-dé, te xãha<sup>n</sup>-dě xii-gá:

—¿Ná cuendá véxi yòhó Jèsús Déhe Dútú Ndiõxí sàdí-n ìchi-í? Te càhá<sup>n</sup> ndàhú-í núú Ndiõxí yuhu nũu-n sã vã dándòho ñaha-n xii-í —càchí-dé xãha<sup>n</sup>-dě xii-gá.

<sup>8</sup> Te duca<sup>n</sup> ñi cáhá<sup>n</sup>-dé cuendá sá Jèsús ní xáha<sup>n</sup>-gã xii espíritú cúndìhi yucu ñávãha yìhi ñaha xii-dé-á<sup>n</sup> sã quée ñaha-xi xii-dé.

<sup>9</sup> Te Jèsús ní xicá<sup>n</sup> tnùhú-gã núú-dě, te xãha<sup>n</sup>-gã:

—¿Nása nàni-n-í? —cachí-gá xãha<sup>n</sup>-gã xii-dé.

Te ní xáha<sup>n</sup>-dě:  
—Vài Sandadú, duha nàni-í chi ío cuèhé-ndí —càchí-dé xãha<sup>n</sup>-dě xii-gá.

<sup>10</sup> Te cue espíritú cúndìhi yucu ñávãha-á<sup>n</sup> ñi cáhá<sup>n</sup> ndàhú-xi núú Jèsús sá vã téndàha ñaha-gá xii-xi quíhí<sup>n</sup>-xi ingá xichi. <sup>11</sup> Te ñu-ni yatni yucu núú ndécú Jèsús-á<sup>n</sup> yìhi vãi cuchí xixexi-güedi. <sup>12</sup> Te nchaa cue espíritú-á<sup>n</sup> ñi cáhá<sup>n</sup> ndàhú-xi núú-gã, te xãha<sup>n</sup>-xi xii-gá:

—Càhá<sup>n</sup> ndàhú-ndí núú-n sã dáñá-n quíhu-ndí yiqui cùñú nchaa cùchí-ã<sup>n</sup> —càchí-xi xãha<sup>n</sup>-xi xii-gá.

<sup>13</sup> Te Jèsús ní xáha<sup>n</sup>-gã sá cúú quíhu-xi yiqui cùñú-güedi, te xinu dàtná úú mǐl-güedi yìhi yucu-á<sup>n</sup>. Te nchaa espíritú cúndìhi yucu ñávãha yìhi ñaha xii téé-á<sup>n</sup> ñi quée ñaha-xi xii-dé, te cuánguihu-xi yiqui cùñú nchaa cùchí-á<sup>n</sup>, te nchaa-güedi ní xinu-güedi duha ní quée-güedi ndàa núú dèhvá yuhu làgúná-á<sup>n</sup>, te ní ngauni-hnu-güedi xití ndute te ní ndìhi-güedi ní cáhá.

<sup>14</sup> Te òré ní xiní cue téé xito cuchí-á<sup>n</sup> nàcuáa ní cuu te ní xinu-güedé, te ní sáhá<sup>n</sup>-güedé ní cani-güedé cuendú núú cuè ñáyiu ndècu xití ñuú, ndìhi núú cuè ñáyiu ndècu xití yucu. Te nchaa ñáyiu ní níhi tnùhu ní xicá-yu cuáhá<sup>n</sup> ndéhě-yu nàcuáa ní

cuu. <sup>15</sup> Te òré ní quexìó-yu núú ndécú Jèsús te ní xiní-yu téé ní xíhi ñaha cuè espíritú cùndìhi yucu ñávãha-á<sup>n</sup> núcõo-dé núú sàhá Jèsús, te ñihnu-ná-dé dóó-dé te núcõo-ná-dé dàtná ñ<sup>n</sup> ñáyiu váha, te ní yùhú-yu òré ní xiní ñáhã-yu xii-dé. <sup>16</sup> Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávãha-á<sup>n</sup> ní cùu ní caní-yu cuèndú núú nchaa ñáyiu ní quexìo-á<sup>n</sup> nàcuáa ní cuu ní ndúha téé-á<sup>n</sup> ndìhi nàcuáa ní cuu cuèndá nchaa cùchí-á<sup>n</sup>. <sup>17</sup> Te sá dúcá<sup>n</sup> ní ñíhi ñáyiu-á<sup>n</sup> tnùhu nàcuáa ní cuu núú nchaa-yu ní ngúita-yu càhá<sup>n</sup> ndàhú-yu núú Jèsús sá ná quèe-gá yucu ñuú-yu núhú-gá.

<sup>18</sup> Te ní xica-gá cuáhã-gá núú ndécú bàrcú, te òré ndée-gá bàrcú-á<sup>n</sup> nùhú-gá ní ngúita téé ní xíhi ñaha cuè espíritú cùndìhi yucu ñávãha-á<sup>n</sup> càhá<sup>n</sup> ndàhú-dé núú-gã nùu vá cùndèe iní-gá quíhí<sup>n</sup> ndìhi ñaha-gã xii-dé.

<sup>19</sup> Dico ñá túú ní sãha-gá tnùhu quíhí<sup>n</sup> ndìhi ñaha-gã xii-dé, te ní xãha<sup>n</sup>-gã xii-dé:

—Cuanùhú vehe-n, te caní-n cuèndú núú cuè ñáyiu sá Yã Ndiõxí ní cundàhú iní ñáhã-gã xii-n, te ío càhnu cuu nchaa sá vãha ní quide-gá sá cúú-xí-n —càchí-gã xãha<sup>n</sup>-gã xii-dé.

<sup>20</sup> Te téé-á<sup>n</sup> ní xica-dé cuánuhú-dé, te ní sáhã<sup>n</sup>-dé ndì ùxí ñuú nání Dècápolís, te ní caní-dé cuèndú núú nchaa ñáyiu sá ío càhnu cuu nchaa sá vãha ní quide ñaha Jèsús xii-dé, te nchaa-yu ío ní cuñùhu-yu.

*Cuèndá déhe yoco té Jàirú ndìhi cuèndá ñ<sup>n</sup> ñadìhí ní tnándeé dóó Jèsús*

*(Mt. 9:18-26; Lc. 8:40-56)*

<sup>21</sup> Te Jèsús cuánde-gá bàrcú, te ní natehdé-gá ndàa ingá xio yuhu làgúná, te ío vãi ñáyiu ní tacá núú ní quexìo-gã-á<sup>n</sup>, te xíá<sup>n</sup> ndécú-gã <sup>22</sup> ní quexìo ñ<sup>n</sup> téé tàxi tnuní veñùhu núú-gã, te téé-á<sup>n</sup> nání-dě Jàirú, te ní ngúíhí xítí-dě núú-gã. <sup>23</sup> Te ní ngúita-dé càhá<sup>n</sup> ndàhú-dé núú-gã, te xãha<sup>n</sup>-dě xii-gã:

—Ío càhú tnàhá déhe yoco-í cùhú-xi, te ndècu-ná-xi sá cùú-xi, te véxi-í càhá<sup>n</sup> ndàhú-í núú-n nùu vá cùndèe iní-n quíhí<sup>n</sup>-ó vèhe-í tendaha-n-xi cuèndá ndúha-xi, te cundecu-xi —càchí-dé xãha<sup>n</sup>-dě xii-gã.

<sup>24</sup> Te Jèsús ní xica-gá cuáhã-gá ndìhi téé-á<sup>n</sup>, te ío vãi ñáyiu nchìcú<sup>n</sup> ñáhã xii-gã

cuáhã<sup>n</sup>, te dàdehnde ñaha-ná-yu xii-gã ní cùu. <sup>25</sup> Te tnuú nchaa ñáyiu-á<sup>n</sup> ñútnàhá ñ<sup>n</sup> ñaha cùhú, te ñaha-á<sup>n</sup> sa ní cuu úxúú cuía sã cùhú-a<sup>n</sup> ngòyo ñaha níhí xii-a<sup>n</sup>. <sup>26</sup> Te ío ta ndòho-a<sup>n</sup> véxi, te ío cuéhé ñátátná ní cuu ta quide tátna ñaha xii-a<sup>n</sup>, te sa ní ndìhi nchaa sá ndécú ndìhi-a<sup>n</sup> ní nadico-a<sup>n</sup> cuèndá ní níhí-a<sup>n</sup> díhú<sup>n</sup> ní quehe<sup>n</sup> nchaa ñáyiu ní quide tátna ñaha xii-a<sup>n</sup> dico ní ñ<sup>n</sup>-yu ñá túú ní ndàcú-yu ndúha-a<sup>n</sup>, chí da uu<sup>n</sup>-gã tá cùu cahú-a<sup>n</sup> cuáhã<sup>n</sup>. <sup>27</sup> Te òré ní níhí-a<sup>n</sup> tnùhu cuèndá Jèsús, te ní xica-a<sup>n</sup> cuáhã<sup>n</sup>-a<sup>n</sup> núú ndécú-gã. Te òré ní quexìo-a<sup>n</sup> núú ndécú-gã te ní sáhã<sup>n</sup> ndehe yatni-a<sup>n</sup> ndàa sátá-gã ní tnándeé-a<sup>n</sup> dóó-gã. <sup>28</sup> Te duca<sup>n</sup> ní quide-a<sup>n</sup> chí ní sani iní-a<sup>n</sup> sá nùu ndacu-a<sup>n</sup> tnándeé-a<sup>n</sup> cuèdicó luha yuhu dóó Jèsús te ndúha-a<sup>n</sup> ní sani iní-a<sup>n</sup>. <sup>29</sup> Te òré duca<sup>n</sup> ní quide-a<sup>n</sup> te ñá túú-gã ní ngòyo ñaha-gã níhí xii-a<sup>n</sup>, te òré-á<sup>n</sup> ní cutnùní iní-a<sup>n</sup> sá ní ndúha-a<sup>n</sup> cuéhé tnàhá-a<sup>n</sup>. <sup>30</sup> Te Jèsús ní cutnùní iní-gã sá ñ<sup>n</sup> ñáyiu ní ndúha sá cuèndá-gã, núu ní nchócótó-gã ndàa sátá-gã te ní xicá<sup>n</sup> tnùhú-gã núú nchaa ñáyiu nchìcú<sup>n</sup> ñáhã xii-gã, te xãha<sup>n</sup>-gã xií-yu:

—¿Ndèdacàa-ndo ní tnándeé ñáhã xii-í? —càchí-gã xãha<sup>n</sup>-gã xií-yu.

<sup>31</sup> Te cue téé xica cuu ndìhi-gã ní xãha<sup>n</sup>-güedě xii-gã:

—Mèstrú, ndèhe-n sá vái ñáyiu nchìcú<sup>n</sup> ñáhã xii-n, te texio texio dàdehnde ñahã-yu xii-n te xicá<sup>n</sup> tnùhú-gã-n yòo ní tnándeé ñáhã xii-n —cachí-güedé xãha<sup>n</sup>-güedě xii-gã.

<sup>32</sup> Te Jèsús ní xíndéhé vãha-gã xio xio dñí-gã nùu ndèdacàa ñáyiu ní tnándeé ñáhã xii-gã. <sup>33</sup> Te sá dúcá<sup>n</sup> ní cutnùní iní ñadìhí-á<sup>n</sup> nàcuáa ní cuu, núu yùhú yùhú-a<sup>n</sup> ní sáhã<sup>n</sup>-a<sup>n</sup> ní ngúíhí xítí-á<sup>n</sup> núú Jèsús, te ní xãha<sup>n</sup> ndãá-a<sup>n</sup> xii-gã nàcuáa ndùu cuèndá-a<sup>n</sup>. <sup>34</sup> Te Jèsús ní xãha<sup>n</sup>-gã xii-a<sup>n</sup>:

—Yòhó ñaha cùhú ní cùu, ní sándáá iní ñáhã-n xii-í, núu ní ndúha-n, te vitna cuanùhú te vá ndìhú-gã iní-n, chí vá dúcá<sup>n</sup>-gã ndòho-n —càchí-gã xãha<sup>n</sup>-gã xii-a<sup>n</sup>.

<sup>35</sup> Te càhá<sup>n</sup> dúcá<sup>n</sup>-ní Jèsús ní sáá cue téé xínu cuechi vehe té Jàirú téé tàxi tnuní veñùhu-á<sup>n</sup>, te xãha<sup>n</sup>-güedě xii-dé:

—Sa ní xíhí déhe-n, vá chíchìu<sup>n</sup>-gá-n Mèstrú —càchí-güedé xáha<sup>n</sup>-güedé xii-dé.

<sup>36</sup> Dico Jèsús ñá túú ní quide cuendá-gá nàcuáa ndùu tnúhu ní cáhá<sup>n</sup> cue téé-á<sup>n</sup>, te ní xáha<sup>n</sup>-gã xii téé tàxi tnuní veñúhu-á<sup>n</sup>:

—Ñá túú nã caní iní-n, quindáá iní ñáhá-ní-n xii-í —càchí-gá xáha<sup>n</sup>-gã xii-dé.

<sup>37</sup> Te Jèsús vá yõo-gá ní cuiní-gá canchicú<sup>n</sup> ñáhá xii-gá quíhí<sup>n</sup>, chí té Pèlú-ni, ndihí té Jàcobó-ni, ndihí ñaní-ni-dé té Juáa cuáhá<sup>n</sup> ndihí ñaha-gã xii-güedé. <sup>38</sup> Te òré ní quexìo-gá ndihí-güedé vehe téé tàxi tnuní veñúhu-á<sup>n</sup>, te ní xiní-gá sá ïo vãi ñáyiu xĩndecu, te súúni dùsa<sup>n</sup> quidé-yu te níhi xícáhá<sup>n</sup>-yu te xĩndáhí-yu. <sup>39</sup> Te òré cuànguihu-gá xití vehe, te ní xáha<sup>n</sup>-gã xii-yu:

—¿Ná cuendá ndéé dúcá<sup>n</sup> ïo dusa<sup>n</sup> quide-ndo, te ndàhyú-ndó? Te xíchí-a ñá túú ní xíhí-xi chí dicó xidí-xi —càchí-gá xáha<sup>n</sup>-gã xii-yu.

<sup>40</sup> Te ní sácú ndéé ñáhã-yu xii-gá sá dúcá<sup>n</sup> ñí cáhá<sup>n</sup>-gá, chí sá cúu-xí mèe-yu chí ní xíhí ndisa xíchí-á<sup>n</sup>. Te òré-á<sup>n</sup> ñí queñuhu-gá ncháa-yu quehé, te cuànguihu-gá núu cándòdo yiqui cuñú xíchí ñí xíhí-á<sup>n</sup>. Te ndèca-gá tãtã xíchí ñí xíhí-á<sup>n</sup> ndihí ñaná-xi cuànguihu, te tnàhá cue téé úní ndihí-gá-á<sup>n</sup> cuànguihu ndihí-gá. <sup>41</sup> Te ní tñi-gá ndaha xíchí ñí xíhí-á<sup>n</sup>, te ní xáha<sup>n</sup>-gã:

—Tàlita, cúmí —càchí-gá xáha<sup>n</sup>-gã.

Te tnúhu-á<sup>n</sup> queé-xí: Yòhó xíchí cuéchí yúhú càchí-í sá ndácòo-n, duha quèe-xi tnúhu-á<sup>n</sup>.

<sup>42</sup> Te òré-ni-á<sup>n</sup> ñí ndoto xíchí cuéchí-á<sup>n</sup> ñí ndacòo-xi ní nacaca cuu-xi, te ndècu-xi úxúú cuíá-xi. Te ïo ní cuñúhu ncháa ñáyiu sá dúcá<sup>n</sup> ñí dándótó ñàha Jèsús xii-xi.

<sup>43</sup> Te Jèsús ní cáhá<sup>n</sup> víhí-gã dóho tãtã-xi ndihí ñaná-xi sá vã yõo ñí<sup>n</sup> cúñàhá-yu sá ñí dándótó ñàha-gá xii-xi. Te sátá dúcá<sup>n</sup> te ní xáha<sup>n</sup>-gã xii-yu sá cuñàhá-yu xii-xi sá cáxí-xí.

## 6

*Jèsús ndécú-gã ñuú Nazàrét  
(Mt. 13:53-58; Lc. 4:16-30)*

<sup>1</sup> Te Jèsús ní ndee-gá ñuú núú ñí dándótó-gã xíchí ñí xíhí-á<sup>n</sup>, te cuánuhú-gá núu cúu ñuú-gá, te tnàhá cue téé xica cuu

ndihí-gá cuánuhú ndihí-gá. <sup>2</sup> Te ndècu Jèsús ñuú-gá ní tnàhá nduu ndètatú ñáyiu. Te nduu-á<sup>n</sup> cuànguihu-gá xití veñúhu dàcuaha ñaha-gá xii-yu. Te vãi ñáyiu ndèdóho ncháa tnúhu càhá<sup>n</sup>-gá, te xicuñúhu vñí-yu, te xitnàhá-yu:

—¿Ndéé ní sáhá<sup>n</sup> dácúhá<sup>n</sup> tõe-a núu ndéé duha váha càhá<sup>n</sup>-dé, nása ní quide-dé núu ndéé duha ïo váha cùtnuní iní-dé, te ndàcu-dé quidé-dé ncháa sá vã yõo tnàhí ndàcu cada-í? <sup>3</sup> Te dicó carpintèrú cúu-dé, dicó déhe tá Màriá cúu-dé, te ñaní-dé cúu té Jàcobó, ndihí té Chèé, ndihí té Judás, ndihí té Ximú, te diu-ni cue cúha-dé cúu ñáyiu ndècu ndihí-o ñuú-a —càchí-yu xitnàhá-yu.

Te ñá túú ní cuiní-gá-yu cáhá<sup>n</sup> ndihí váha ñàhá-yu xii-gá. <sup>4</sup> Te Jèsús ní xáha<sup>n</sup>-gã xii-yu:

—Te núu ñí<sup>n</sup> téé càhá<sup>n</sup> tnúhu Yá Ndiõxí ná nàsáá-dé ñuú-dé dacuàha-dé ñáyiu tnúhu-gá, te ncháa ñáyiu ñuú-dé-á<sup>n</sup>, ndihí ncháa ñáyiu ndècu ndihí-dé vehe-dé, ndihí ncháa ñáyiu cùu ndi mee-dé ñá túú nèhé-yu sá yíñùhu núu-dé, dico cue ñáyiu ncháa dava-gá ñuú chí nèhé-yu sá yíñùhu núu-dé —càchí-gá xáha<sup>n</sup>-gã xii-yu.

<sup>5</sup> Te ñá túú ní quide tátna Jèsús vãi ñáyiu cuendá sá ñà túú ní sàndáá iní ñáhã-yu xii-gá, dico ní quide tátna-gá ñí<sup>n</sup> úú ñáyiu cùhú ní sàndáá iní ñáhã xii-gá. Te ní tendaha ñàha-ni-gá xii-yu te ní ndúha-yu. <sup>6</sup> Te ïo ní cuñúhu-gá sá dúcá<sup>n</sup> ñà túú ní cuiní-yu quindáá iní ñáhã-yu xii-gá. Te sátá dúcá<sup>n</sup> te ní xica-gá cuáhá<sup>n</sup>-gá ncháa dava-gá ñuú líhli càa yatni xíá<sup>n</sup> cuendá dacuàha-gá ñáyiu tnúhu-gá.

*Jèsús táuchìu<sup>n</sup>-gá quíhí<sup>n</sup> cue téé xica cuu ndihí-gá cáhá<sup>n</sup>-güedé tnúhu Yá Ndiõxí núu ñáyiu*

*(Mt. 10:5-15; Lc. 9:1-6)*

<sup>7</sup> Te Jèsús ní cana-gá ndi ùxúú cue téé xica cuu ndihí-gá, te ní sãñaha-gã xii-güedé tnúhu ndee iní cundecu ndihí-güedé cuendá queñuhu-güedé ncháa espíritú cùndihí yucu ñávãha yíhí ñaha xii ñáyiu. Te ní xáha<sup>n</sup>-gã xii-güedé sá ndi ndúú ndi ndúú-güedé quíhí<sup>n</sup>-güedé cáhá<sup>n</sup>-güedé tnúhu Yá Ndiõxí núu ñáyiu. <sup>8-9</sup> Te cùmání-gã caca-güedé quíhí<sup>n</sup>-güedé, te ní xáha<sup>n</sup>-gã xii-güedé:



—Vá cánèhe-ndo ñunu cuhu<sup>n</sup> ndachiu<sup>n</sup>-ndo, te ni vã cánèhe-ndo sá cáxí-ndó, te ni vã cánèhe-ndo díhú<sup>n</sup>, chi ñ<sup>n</sup> caa-ni tátnu canehe-ndo, te chàú yíhí-ní-ndó-ã<sup>n</sup> xíã<sup>n</sup>-ni quihi-ndo, te vá cánèhe-gá-ndó ìngá ichi dóó-ndó chi ñ<sup>n</sup> diu-ni dóó níhnú-ndó-ã<sup>n</sup> xíã<sup>n</sup> tnàhí-ni cuihnu-ndo te ñá túú tnàhí-gá ná canehe-ndo —càchí-gá xãha<sup>n</sup>-gã xii-güedé.

10 Te xãha<sup>n</sup> tucu-gá:

—Te òré ná sàá-ndó ñ<sup>n</sup> ñuú, te íó ñáyiu cáhá<sup>n</sup> ñáhã-yu xii-ndo vèhé-yu, te xíã<sup>n</sup>-ni cundecu-ndo ndèé ná sàá nduu ndèe-ndo ñuú-á<sup>n</sup>. 11 Te núu íó dava ñuú ñá túú cuíní-yu cáhá<sup>n</sup> ndíhi ñaha váha-yu xii-ndo, te ni ñá túú cuíní-yu cundedóho-yu tnúhu càhá<sup>n</sup>-ndó, te ndee-ni-ndo ñuú-á<sup>n</sup> te naquidi-ndo ticáchúhmá ñ<sup>n</sup> tñi sáhá-ndó cuendá ná cùtnuní iní-yu sá ñà túú quide váha-yu. Te na càchí tnúhu ndáá-í xii-ndo sá ná sàá nduu càda ndáá Yã Ndiõxí cuéchi nchaa ñáyiu, te cue ñáyiu duca<sup>n</sup> na càda ñaha xii-ndo-á<sup>n</sup> ño-gá ndohó-yu dàvá-á<sup>n</sup> dàcúxí dàtná ndoho cue ñáyiu ñuú Sòdomá ndíhi cue ñáyiu ñuú Gòmorrá —càchí-gá xãha<sup>n</sup>-gã xii-güedé.

12 Te cue téé-á<sup>n</sup> ñ<sup>n</sup> xica-güedé cuáhá<sup>n</sup>-güedé te ní ngüíta-güedé dácuàha-güedé cue ñáyiu tnúhu Yã Ndiõxí, te xãha<sup>n</sup>-güedé xii-yu:

—Chí dándìxi túu iní sá ñà túú quide váha-ndo ndècu-ndo, te dañã-ndo nchaa ichi cuehé ichi duha ndècu-ndo. —càchí-güedé xãha<sup>n</sup>-güedé xii-yu.

13 Te vãi espíritú cùndìhi yucu ñávãha yíhi ñaha xii ñáyiu ta quèñuhu-güedé yiqui cùñú-yu cuáhá<sup>n</sup>, te vãi tucu ñáyiu cùhú tá quide tátna-güedé cuáhá<sup>n</sup> chíhí ñaha-güedé acítí xii-yu te ndúha-yu.

*Nàcuáa ní cuu ní xíhí té Juàá téé dàcuandute ñaha xii ñáyiu*

*(Mt. 14:1-12; Lc. 9:7-9)*

14 Te nchaa xichi ní níhí ñáyiu tnúhu nchaa nàcuáa quide Jesús, te tnàhá té Hèrodés téé yìndaha ñaha xii ñáyiu ní níhí-dé tnúhu nchaa nàcuáa quide-gá, te ní cachí-dé:

—Té Juàá téé ní xóo dacuàndute ñaha xii ñáyiu ní ndoto núu dàcá<sup>n</sup> ndácú-dé quidé-dé nchaa sá vã yõ tnàhí ndàcu cada —duha ní cachí-dé.

15 Te dava ñáyiu càchí-yu sá tẽ Èliás téé ní xóo cáhá<sup>n</sup> tnúhu Yã Ndiõxí ndéé sanaha ní nasáá-dé.

Te davá-yu càchí-yu sá cúú-gã dàtná ñ<sup>n</sup> téé ní xóo cáhá<sup>n</sup> tnúhu Yã Ndiõxí ndéé sanaha. 16 Te té Hèrodés ní níhí-dé tnúhu nchaa nàcuáa càhá<sup>n</sup>-yu, te ní cachí-dé:

—Díu té Juàá téé ní táuchíu<sup>n</sup>-í ní xehndé-güedé díquí-xi ní ndoto —càchí-dé.

17-18 Te duha ní cuu cùtnàhá ní sahani té Hèrodés té Juàá, chi dàvá-á<sup>n</sup> ñ<sup>n</sup> naquehe<sup>n</sup> té Hèrodés-á<sup>n</sup> ñ<sup>n</sup> ñaha nani Herodiás ndécá-dé, te ñaha-á<sup>n</sup> sá ní cándeca ñaha ñàní-dé té Lipé. Te té Juàá ní xáha<sup>n</sup>-dẽ xii té Hèrodés sá ñà túú ní quide váha-dé sá dúcá<sup>n</sup> ñ<sup>n</sup> naquehe<sup>n</sup>-dé ñaha ní cándeca ñaní-dé, núu sá cuendá ñaha-á<sup>n</sup> ñ<sup>n</sup> táuchíu<sup>n</sup> tẽ Hèrodés ní tñi-güedé té Juàá ní chíhi ñaha-güedé vecaá, te ní dácútú ñaha-güedé xii-dé, te duca<sup>n</sup> ñ<sup>n</sup> quide-dé cuendá sá ndécá ñaha-dé xii-a<sup>n</sup>.

19 Te ñaha nani Herodiás ndécá tẽ Hèrodés-á<sup>n</sup> ío ní cuu úhú iní-a<sup>n</sup> té Juàá, te ní cuíní-a<sup>n</sup> cahni-a<sup>n</sup>-dé, dico ñá túú ní níhí-a<sup>n</sup> nàcuáa cada-a<sup>n</sup>. 20 Te mee tẽ Hèrodés chí ní cutnùní ndáá iní-dé sá tẽ Juàá cuú-dé ñ<sup>n</sup> téé quide mee-ni sá váha, te quide ndáá-dé núu Yã Ndiõxí, te ní xóo yùhú ñáhã-dé núu xíã<sup>n</sup> ñá túú ní dàña-dé ná cada ñaha ñaha ndeca-dé-á<sup>n</sup> xii té Juàá. Te té Hèrodés-á<sup>n</sup> ío ní cudíí iní-dé ní xíndedóho-dé nchaa tnúhu ní xáha<sup>n</sup> tẽ Juàá xii-dé, dico ñá túú ní sàni iní-dé duu<sup>n</sup> duu<sup>n</sup> tñi-dé tnúhu-á<sup>n</sup>.

21 Te ñ<sup>n</sup> nduu ní xóo vico vehe té Hèrodés ní quide càhnu-dé nduu ñ<sup>n</sup> cacu-dé. Te nduu-á<sup>n</sup> ñ<sup>n</sup> níhí ñaha nani Herodiás-á<sup>n</sup> nàcuáa cada-a<sup>n</sup> cuendá cuú té Juàá. Te nduu-á<sup>n</sup> ní cáhá<sup>n</sup> té Hèrodés nchaa cue téé cùchiu<sup>n</sup>, ndíhi nchaa cue téé tàxi tñuní ñáhã xii cue sandadú, ndíhi nchaa cue téé cuica ndècu distritú Galileá cuendá cudini ndíhi ñaha-dé xii-güedé nduu-á<sup>n</sup>. 22 Te ndècu ñ<sup>n</sup> déhe yoco ñaha nani Herodiás-á<sup>n</sup>, te xíchí-á<sup>n</sup> ñ<sup>n</sup> quíhu-xi vehe núu cúú vico-á<sup>n</sup> ñ<sup>n</sup> xita saha-xi mèi oré yíhí tẽ Hèrodés mèsá ndíhi nchaa cue téé ní cáhá<sup>n</sup>-dé, te ío ní cudíí iní-dé ndíhi nchaa cue téé-á<sup>n</sup> nàcuáa ní xita xíchí-á<sup>n</sup>. Te té Hèrodés ní xáha<sup>n</sup>-dẽ xii-xi:

—Cáca<sup>n</sup> núu-í núu ná cuíní-n te taxi-í —càchí-dé xãha<sup>n</sup>-dẽ xii-xi.

23 Te ní cacunehe-dé ndéé Yã Ndiõxí nàcuáa cutnùní iní xíchí-á<sup>n</sup> sá ndáá cuãñaha-dé núu ná cúú sá ná càcá<sup>n</sup>-xi núu-dé cuèi ndéé cuádava nchaa sá ndécú

ndihí-dé, te núu na càcá<sup>n</sup>-xi. <sup>24</sup> Te sá dúcá<sup>n</sup> nĩ xáha<sup>n</sup>-dě xii-xi núu ní quee-xi quehé ní xáha<sup>n</sup>-xi xii náná-xi:

—Nǎá, ¿ná cúú sǎ càcá<sup>n</sup>-í núú tǎ Hèrodés? —càchí-xi xǎha<sup>n</sup>-xi xii-a<sup>n</sup>.

Te nǎná-xi-á<sup>n</sup> nĩ xáha<sup>n</sup>-a<sup>n</sup> xii-xi:

—Cuàhá<sup>n</sup> cǎcá<sup>n</sup>-n dǐquí tǎ Juàá tée dàcuandute ñaha xii ñáyiú —càchí-a<sup>n</sup> xǎha<sup>n</sup>-a<sup>n</sup>.

<sup>25</sup> Te ndǐhi-ni cuándihu xíchí-ǎ<sup>n</sup> xití vehe núú yíhí tǎ Hèrodés-á<sup>n</sup>, te xǎha<sup>n</sup>-xi xii-dé:

—Cuíní-í sá mèi nduu vitna quehndé-n dǐquí tǎ Juàá tée dàcuandute ñaha xii ñáyiú te taxi-n, dico na cùhu<sup>n</sup> ì<sup>n</sup> xití cóhó taxi-n —càchí-xi xǎha<sup>n</sup>-xi xii-dé.

<sup>26</sup> Te té Hèrodés ní ngüíta-dé ndihú víhí iní-dé sá dúcá<sup>n</sup> nĩ xáha<sup>n</sup>-xi xii-dé, dico ñá túú ní cùyí-dé cúñaha-dě xii-xi sá vǎ cúú cuǎñaha-dě sá xicá<sup>n</sup>-xi, chi cuèndá sá núú nchaa ñáyiú ní xáha<sup>n</sup>-dě sá cúú cuǎñaha-dě núu ná cúú sǎ ná càcá<sup>n</sup>-xi, te ní cacunehe-dé ndéé Yǎ Ndiǒxí nàcuáa cutnùní iní-xi sá ndáa cuǎñaha-dě sá ná càcá<sup>n</sup>-xi núú-dě. <sup>27</sup> Te té Hèrodés-á<sup>n</sup> ndihí-ni ní xáha<sup>n</sup>-dě xii ì<sup>n</sup> sandàdú sá quihí<sup>n</sup>-dé quehndé-dé dǐquí tǎ Juàá. <sup>28</sup> Te sandàdú-á<sup>n</sup> nĩ xica-dé cuáhá<sup>n</sup>-dé vecaá núú yíhí tǎ Juàá-á<sup>n</sup>, te ní quexìo-dé te ní xehndé-ni-dé dǐquí tǎ Juàá, te ní chihí-dé ì<sup>n</sup> xití cóhó te nèhe-dé cuánuhú ní sáha-dé xíchí xicá<sup>n</sup>-á<sup>n</sup>, te xíchí-ǎ<sup>n</sup> nĩ nacuáha-xi nǎná-xi. <sup>29</sup> Te òré ní nihí nchaa cue tée ní xica cuu ndihí ndí Juàá-á<sup>n</sup> tnúhu sá dúcá<sup>n</sup> nĩ sahní ñaha-güedé xii ndí, te ní sáhá<sup>n</sup>-güedé ní ndocani-güedé yiqui cùñú ndí te ní chindúxi-güedé.

*Jèsús dácaxi-gá úhú<sup>n</sup> mǐl cue tée te dǐ<sup>n</sup> ñáyiú dǐhí ndihí landú*

*(Mt. 14:13-21; Lc. 9:10-17; Jn. 6:1-14)*

<sup>30</sup> Te nchaa cue tée ní táuchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndiǒxí núú ñáyiú ní ndexìo-güedé núú-gǎ te ní ngüíta-güedé nácàni tnúhu-güedé nchaa nàcuáa ní quide-güedé ndihí nchaa nàcuáa ní dánèhé ñáhá-güedé xii-yu. <sup>31</sup> Te Jèsús ní xáha<sup>n</sup>-gǎ xii-güedé:

—Chí nèhé ná quihí<sup>n</sup>-ó ì<sup>n</sup> xichi núú ñà túú ñáyiú ndetatú-ó —càchí-gǎ xǎha<sup>n</sup>-gǎ xii-güedé.

Te duca<sup>n</sup> nĩ xáha<sup>n</sup>-gǎ xii-güedé, chi ío cuéhé ñáyiú cuáhá<sup>n</sup> véxi-yu cùú-yu núú

ndécú-gǎ. Te ní ñǎ nihí-gá nása cada-gǎ caxi-gǎ ndihí cue tée xica cuu ndihí-gǎ. <sup>32</sup> Te Jèsús cuánguee-gǎ bàrcú ndihí mee-ni cuè tée ní táuchíú<sup>n</sup>-gǎ cáhá<sup>n</sup> tnúhu-gǎ, te cuáhá<sup>n</sup>-gǎ ndihí-güedé ì<sup>n</sup> xichi núú ñà túú ñáyiú ndècu. <sup>33</sup> Dico vǎi ñáyiú ní cutnùní iní-yu sá díú-gǎ ñúhú bàrcú-á<sup>n</sup> cuáhá<sup>n</sup> ndihí cue tée xica cuu ndihí-gǎ, te nchaa ñuú cáa yàtni xía<sup>n</sup> nĩ quee ñáyiú xixinú-yu cuáhá<sup>n</sup> núú nĩ quidé-yu cuèndá quexìo Jèsús, te sa ndécú-yu xía<sup>n</sup> nĩ quexìo-gǎ. <sup>34</sup> Te òré ní quene Jèsús xití bàrcú, te ní xiní-gǎ cuéhé víhí ñáyiú xixúcu núú nĩ quexìo-gǎ-á<sup>n</sup>, te ní cundàhú iní ñáhá-gǎ xii-yu chi ndécú-yu dàtná xǐndecu cue mbéé cue quití ñà túú tòli-xi, te ío vǎi núú sǎ nĩ ngüíta-gǎ ní dácuhá ñaha-gǎ xii-yu. <sup>35</sup> Te sátá tá cuàa cuáhá<sup>n</sup> te ní sáhá<sup>n</sup> cue tée xica cuu ndihí Jèsús núú-gǎ, te xáha<sup>n</sup>-güedé xii-gǎ:

—Sa ní cuaa te ñà túú ñáyiú ndècu yatni iha. <sup>36</sup> Váha-gǎ dandàca nchaa ñáyiú-a chi na quihí<sup>n</sup>-yu nchaa vehe càa xití yucu-a, ndihí nchaa ñuú cáa nchaa yatni iha cuaá<sup>n</sup>-yu sá cǎxí-yu —càchí-güedé xǎha<sup>n</sup>-güedé xii-gǎ.

<sup>37</sup> Te Jèsús ní xáha<sup>n</sup>-gǎ:

—Mee-ndo chí cuǎñaha sǎ ná cǎxí-yu —càchí-gǎ xǎha<sup>n</sup>-gǎ xii-güedé.

Te xáha<sup>n</sup>-güedé xii-gǎ:

—¿Te nása cada-ndí, chi xini ñuhu-xi datná úú cièndú díhú<sup>n</sup> denàriú cuèndá cuaa<sup>n</sup>-ndí sá cǎxí-yu? —càchí-güedé xǎha<sup>n</sup>-güedé xii-gǎ.

<sup>38</sup> Te Jèsús ní xáha<sup>n</sup>-gǎ xii-güedé:

—Chí cuáhá<sup>n</sup> cundehe-ndo núu ná daha pàa ndécú ndihí-ndo te cachí tnúhu-ndo —càchí-gǎ xǎha<sup>n</sup>-gǎ xii-güedé.

Te ní sáhá<sup>n</sup> ndéhé-güedé núu ná daha pàa ndécú, te ní xáha<sup>n</sup>-güedé xii-gǎ:

—Úhú<sup>n</sup> duha-ná pàa ndihí úú-nǎ chácá ndécú —càchí-güedé xǎha<sup>n</sup>-güedé xii-gǎ.

<sup>39</sup> Te Jèsús ní xáha<sup>n</sup>-gǎ xii nchaa ñáyiú sá ná nihí tnáhǎ-yu cuu titní xichí-yu, te ngóo-yu nchaa núú cùhú cuíí càa xía<sup>n</sup>.

<sup>40</sup> Te nchaá-yu ní ngóo-yu, te dava xichí-yu ní ngóo ì<sup>n</sup> cièndú-yu, te dava xichí-yu ní ngóo údico úxí-yu. <sup>41</sup> Te sátá nĩ ndihí-yu ní ngóo, te ní quehe<sup>n</sup> Jèsús

ndi ùhú<sup>n</sup> pàá ndi úú chácá-ǎ<sup>n</sup>, te ní ndacoto-gá andiu te ní ndacá<sup>n</sup> táhú-gǎ núú Yǎ Ndiǒxí, te dǎtnùní ní táhú cuèchi-gá pàá-á<sup>n</sup> te ní sǎñaha-gǎ xii cue téé xìca cuu ndihi-gá ní dácǎññu-güedé nchaa ñáyiu-á<sup>n</sup> nǐ xexí-yu. Te ññu-ni duca<sup>n</sup> nǐ quide tucu-gá úú chácá-ǎ<sup>n</sup>. <sup>42</sup> Te nchaá-yu ní xexí-yu ní ndahá xití-yu. <sup>43</sup> Te sátá nǐ túhú cóhǒ-yu te ní nadatàcá-güedé nchaa sá nǐ quendóo, te ní chítú ùxúú tnàhá tídihi mee-ni sǎ nǐ quendóo núú ùhú<sup>n</sup>-ni pàá, ndihi núú ùú-ni chácá. <sup>44</sup> Te nchaa ñáyiu ní xexi-á<sup>n</sup> chi xǐnu ùhú<sup>n</sup> mǐl mee-ni cuè téé chi ññu-ni cue téé-á<sup>n</sup> nǐ quíundeñu, te ññu ñáyiu ññu ndihi cue landú.

*Jèsús xícá-gǎ núú ndute*

*(Mt. 14:22-27; Jn. 6:16-21)*

<sup>45</sup> Te òré-ni-á<sup>n</sup> nǐ xáha<sup>n</sup> Jèsús xii cue téé xìca cuu ndihi-gá sá quèe-güedé bàrcú codonù-güedé quíhí<sup>n</sup>-güedé ññu núú nání Bètsaidá cáá ndàa ingá xio yuhu làgúná núú ndécú-güedé-á<sup>n</sup>, te mee-gǎ quendóo-gá cada ndee iní tnàhá-gǎ ndihi cue ñáyiu. <sup>46</sup> Te sátá nǐ yáha ní quide ndee iní tnàhá-gǎ ndihi-yu, te ní xica-gá cuáhá<sup>n</sup>-gá ññu tǐndúú cáá yàtni xíá<sup>n</sup> cuendá cáhá<sup>n</sup> ndihi-gá Yǎ Ndiǒxí. <sup>47</sup> Te òré sa ní cundiquí<sup>n</sup> te bàrcú sá ññu cuè téé xìca cuu ndihi-gá sa cuáhá<sup>n</sup>-xi ndéé cuádava xití làgúná-á<sup>n</sup>, te mee-gǎ ndécú-gǎ ññu núú tǐndúú. <sup>48</sup> Te túu ndèhe-gá sá sùúní ndòho-güedé tá dácaca-güedé bàrcú-á<sup>n</sup> cuáhá<sup>n</sup>, chi cuendá ndàa nacuáa cuáhá<sup>n</sup>-xi-á<sup>n</sup> duha véxi táchí te nàtúndaha-xi. Te ingá nduu-ǎ<sup>n</sup> tàcuíhndá-gá sa ní cuyatni vií-nǎ Jèsús bàrcú ññu-güedé-á<sup>n</sup>, dico núú ndute tá xìca-gá cuáhá<sup>n</sup> te luha-ná te yáha ñaha-gǎ xii-güedé ní cùu. <sup>49-50</sup> Te òré ní xini ñáhá cuè téé ññu bàrcú-á<sup>n</sup> xii-gá te ní yùhú-güedé ní cana saa-güedé, chi ní sani iní-güedé sá ññu almá cúu-gǎ. Te ní xáha<sup>n</sup>-gǎ xii-güedé:

—ññu cunduu-ndo, vá yùhú-ndó, chi yùhú cúu-í! —càchí-gá xǎha<sup>n</sup>-gǎ xii-güedé.

<sup>51</sup> Te Jèsús cuánguee-gá xití bàrcú ññu-güedé-á<sup>n</sup>, te sátá cuánguee-gá te òré-ni ní ngüíñí táchí, te ní cuñúhu vihi-güedé. <sup>52</sup> Te duca<sup>n</sup> chi cue téé-á<sup>n</sup> ñà túú ní cùtnuní iní-güedé nása quide-gá, chi ñà túú ní cùtnuní váha iní-güedé nacuáa ndùu

sá nǐ quide-gá òré ní nadacáyá-gá pàá, chi ññu ññu-güedé.

*Jèsús quidé tǎtna-gá ñáyiu cùhú ññu Genesàrét*

*(Mt. 14:34-36)*

<sup>53</sup> Te ní yáha-güedé ndihi-gá ndàa ingá xio yuhu làgúná, te ní sáa-güedé ndihi-gá yucu cue téé ññu Genesàrét. Te yàcá<sup>n</sup> ní dácútú ndèe-güedé bàrcú-güedé yuhu làgúná. <sup>54</sup> Te òré ní quene Jèsús ndihi cue téé xìca cuu ndihi-gá xití bàrcú, te nchaa ñáyiu xǐndecu-á<sup>n</sup> nǐ cùtnuní iní-yu sá díu-gǎ. <sup>55</sup> Te ñáyiu-á<sup>n</sup> ndihi-ni ní sáhá<sup>n</sup>-yu nchaa núú xǐndecu cue ñáyiu cùhú, te cue ñáyiu cùhú-á<sup>n</sup> nǐ quèe-yu xító nchido ñáhá-yu cuáhá<sup>n</sup> ndi tnàhá ññu ññu xichi núú ññu-yu tñuhu quèxio Jèsús. <sup>56</sup> Te nchaa ññu náhnú ndihi nchaa ññu lǐhli núú cuáhá<sup>n</sup> Jèsús, duca<sup>n</sup> xǐndecá-yu nchaa ñáyiu cùhú cuáhá<sup>n</sup> xití ññu sàcá<sup>n</sup> ñáhǎ-yu núú-gǎ cuendá cada tǎtna ñaha-gǎ xii-yu. Te ññu-ni duca<sup>n</sup> xǐquidé-yu nchaa dava-gá xichi núú cuáhá<sup>n</sup>-gá núú xǐndecu cue ñáyiu, te càhá<sup>n</sup> ndàhú-yu núú-gǎ sá ná dáñá-gǎ tnàndéé cue ñáyiu cùhú-á<sup>n</sup> cuèdìcò luha yuhu dǒó-gǎ cuendá ndúha-yu. Te nchaa ñáyiu cùhú ní tnàndéé yuhu dǒó-gǎ ní ndúha-yu.

## 7

*Cuendá nchaa sá quidé-xi ngündecu cuèchi ñáyiu*

*(Mt. 15:1-20)*

<sup>1</sup> Te ññu Jerusálén ní quee cue téé dácuaña ñaha xii ñáyiu nchaa tñuhu ní chídó tñuní ndíi Moisés, te ní quexìo-güedé núú ndécú Jèsús, te tnàhá cue téé cùu fariséu ní quexìo ndihi-güedé. <sup>2</sup> Te cue téé-á<sup>n</sup> nǐ xini-güedé sá dáva cue téé xìca cuu ndihi Jèsús ñà túú ndàha-güedé dǎtná ndáhá mée cue téé cùu fariséu-á<sup>n</sup> òré caxi-güedé. Te xíá<sup>n</sup> ññu cue téé ní quexìo-á<sup>n</sup> nǐ càhá<sup>n</sup> cuèhé-güedé cuendá cue téé xìca cuu ndihi-gá. <sup>3</sup> Te duca<sup>n</sup> chi nchaa cue téé cùu fariséu-á<sup>n</sup> ndihi nchaa ñáyiu isràèl nchìcú<sup>n</sup> ññu-yu quidé-yu dǎtná ní xóo cada nchaa cue ññu tnàhá-yu ní xǐndecu ndéé sanaha, chi nchaa ñáyiu-á<sup>n</sup> và cǎxí-yu te núu vá ndáhǎ-yu dǎtná ní xóo ndaha nchaa cue ññu tnàhá-yu ní xǐndecu ndéé sanaha-ǎ<sup>n</sup>.



4 Te ñáyiú-án ndi tnahá òré cuáhá<sup>n</sup>-yu núú yáhu te nàsáá-yu, te ndáhá-yu nàcuáa sàni iní-yu ndùvétú iní Yá Ndiöxí, te núú vá dúcá<sup>n</sup> càdá-yu te vá caxí-yu. Te tnàhá náquète-yu vàsú sá sácũhu<sup>n</sup> sá xihí-yu, ndihí lítu, ndihí cóhó càá, ndihí camá. Te nchaa xéhé náquète-yu nàcuáa sàni iní-yu ndùvétú iní Yá Ndiöxí. Te ío-gá titní sá nĩ xóo cada nchaa ñáyiú ní xíndecu ndéé sanaha-ã<sup>n</sup> nchícú<sup>n</sup> nihnú-yu quidé-yu. 5 Te cue téé cùu fariséú-án, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés-án nĩ xáha<sup>n</sup>-güedě xii Jèsús:

—¿Ná cuendá cue téé xica cuu ndihí-n ñá túú nàquete-güedě ndaha-güedě òré caxi-güedě dàtná ní cachí nchaa cue téé ní xíndecu ndéé sanaha-i? —càchí-güedě xáha<sup>n</sup>-güedě xii-gá.

6 Te Jèsús ní xáha<sup>n</sup>-gá xii-güedě:

—Nchòhó cúú-ndó cue téé ío dándahú méé-xí chi càchí-ndó sá ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùní ndíi Chàíá téé ní xóo cáhá<sup>n</sup> tnúhu Yá Ndiöxí ndéé sanaha núú tütú-gá núú cáhá<sup>n</sup>-xi nàcuáa ní cáhá<sup>n</sup>-gá cuendá-ndó, te duha ní cachí-gá:

Ñáyiú-a càchí-yu sá ío càhnu cuu-í, dico dícó-ni yuhu càhá<sup>n</sup>-yu, chi ñá túú ñùhu iní ñáhã-yu xii-í.

7 Te àú<sup>n</sup> nã cuu chĩñuhu ñahá-yu xii-í, chi ñá túú vèdana ndéé nándihí-xi, chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá nĩ cahu iní cue ñáyiú ñuyíú-a càhá<sup>n</sup>-yu.

Duha ní chídó tnùní ndíi Chàíá núú tütú Yá Ndiöxí nàcuáa ní cáhá<sup>n</sup>-gá cuendá-ndó.

8 Te nchòhó ní dáñá-ndó nàcuáa ní cachí Yá Ndiöxí cada-ndo, te nchícú<sup>n</sup> nihnu-ndo quide-ndo nàcuáa ní cahu iní cue ñáyiú ñuyíú-a, chi nàquete-ni-ndo lítu, te nàquete-ni-ndo vasú sácũhu<sup>n</sup> sá xihí-ndó nàtava-ndo nàcuáa ní xóo cada ñáyiú-án nĩ xóo naqueté-yu nchaa xíã<sup>n</sup>, te nándi-gá nchaa núú sá quidé-ndó —càchí Jèsús xáha<sup>n</sup>-gá xii-güedě.

9 Te ní xáha<sup>n</sup> tùcu-gá xii-güedě:

—Te nchòhó, ñá túú cuíní-ndó càda-ndo nàcuáa cuíní Yá Ndiöxí, chi mee-ni nàcuáa ní cachí cue téé ní xíndecu ndéé sanaha nchícú<sup>n</sup> nihnu-ndo quide-ndo. 10 Te

ndíi Moisés ní cachí ndíi sá ncháá ñáyiú canehé-yu sá yíñùhu núú tãtä-yu ndihí núú nãñã-yu. Te nchaa ñáyiú na càhá<sup>n</sup> úhú cuendá tãtä-yu àdi cuendá nãñã-yu te cahni ñaha-güedě xii-yu ní cachí ndíi.

11 Te nchòhó càchí-ndó sá núu ì<sup>n</sup> téé na cũñaha-dě xii tãtä-dě ndihí nãñã-dě sá sá nĩ sani iní-dé cuãñaha-dě xii-yu cùu-xi Corbán, te ñá túú-gá xíní ñùhu-xi sá cuãñaha-dě xii-yu, te tnúhu Còrbán-án quée-xi: Sá cúú cuendá Yá Ndiöxí. 12 Te sá dúcá<sup>n</sup> ná càhá<sup>n</sup> ì<sup>n</sup> téé-án te nchòhó chindèe tnúhu-ndo-dě cuendá sá vá chindèe-gá-dě tãtä-dě ndihí nãñã-dě. 13 Te duca<sup>n</sup> quide-ndo chi ní dáquée tĩhú-ndó nàcuáa ní cachí Yá Ndiöxí cada-ndo, te mee-ni nàcuáa ta quide cue téé ñuyíú-a véxi nchícú<sup>n</sup> nihnu-ndo quide-ndo, te diu-ni duca<sup>n</sup> ta sànu ichi tnaha-ndo véxi, te nándi-gá nchaa sá cáhú iní-ndó quide-ndo —cachí-gá xáha<sup>n</sup>-gá xii-güedě.

14 Te Jèsús ní xáha<sup>n</sup> tùcu-gá xii cue ñáyiú xíndecu-án:

—Chí táquixi ndehe iha, te cundedóho váha-ndo tnúhu na càhá<sup>n</sup>-í-a te ío váha cuáha-ndo cuendá. 15 Nchaa sá xéxí-ndó chi ñá túú nã quidé-xi iní-ndó, dico nchaa sá cuèhé sá dúhá sàni iní-ndó quide-ndo, nchaa xíã<sup>n</sup> quidé-xi ndècu cuéchi-ndo.

16 Te nchaa nchòhó ñáyiú ndèdóho nchaa tnúhu càhá<sup>n</sup>-í-a ío váha chí cuãha cuendá —càchí-gá xáha<sup>n</sup>-gá xii-yu.

17 Te Jèsús ní dándõ-gá nchaa ñáyiú núú xixúcu-yu-án te cuándihu-gá xití vehe. Te cue téé xica cuu ndihí-gá ní xicá<sup>n</sup> tnúhú-güedě núú-gá núu nása quèe-xi cuendú ní cani-gá núú ñáyiú-án. 18 Te ní xáha<sup>n</sup>-gá xii-güedě:

—¿Te náa tnàhá nchòhó ñá túú ní tècú tnùní-ndó cuendú ní cani-í núú ñáyiú-ã<sup>n</sup>? Nchaa sá xéxí-yu cuánguee xití-yu ñá túú quide-xi iní-yu nàcuáa ngúndecu cuéchi-yu.

19 Chi ñá díú iní-yu cuánguee-xi chi cuánguee ndáá-xi xití-yu, te nàyáha ñaha-xi xii-yu —càchí-gá xáha<sup>n</sup>-gá xii-güedě.

Te sá dúcá<sup>n</sup> nĩ cáhá<sup>n</sup>-gá te ní dátũu-gá sá cúú càxi-o nchaa núú sá cúú càxi-o. 20 Te ní xáha<sup>n</sup> tùcu-gá xii-güedě:

—Nchaa sá cuèhé sá dúhá quide ñáyiú xíã<sup>n</sup> cácu nihnu-xi iní-yu, te nchaa xíã<sup>n</sup> quidé-xi ndècu cuéchi-yu. 21 Te iní-yu-án



cácú ñihnu nchaa sá cuèhé sá dúhá, chi sàni cuehé sání dùha iní-yu. Te cue téè càhá<sup>n</sup> ndihí-güedé ñadìhí te ñá díú ñadìhí-güedé cúu-yu, te ñu-ni duca<sup>n</sup> quide cue ñáyiú dìhí càhá<sup>n</sup> ndihí-yu téè te ñá díú yíi-yu cùu-güedé. Te sàhní-yu cue tñaha ñáyiú-yu, te mee-ni ìchi díí ìní cúdìí ìní-yu cundecú-yu. <sup>22</sup> Te dùhu ndachiu<sup>n</sup> tnahá-yu, te xihó-yu cundecu ndihí-yu sá ndécú ndihí tñaha ñáyiú-yu, te ío quide úhú ìní-yu sá cúu-xí tñaha ñáyiú-yu, te ío dándahú tñahá-yu, te mee-ni nchàa sá cuèhé sá dúhá cùdíí ìní-yu quidé-yu, te ío cuédú ìní-yu, te ío yíi yùhú-yu, te ío quide cahnú-yu mèé-yu, te quidé-yu nándi-gá sá ñà túú tàu-yu cadá-yu. <sup>23</sup> Te nchaa sá cuèhé sá dúhá-á<sup>n</sup> cácú ñihnu-xí ìní-yu, te nchaa xíá<sup>n</sup> quidé-xí ndècu cuéchi-yu, te ñá túú cùu-xí sá vaha sá cúu-xí ìní-yu.

*Í<sup>n</sup> ñadìhí véxi ñuú xicá ñí sándáá ìní-a<sup>n</sup> Jèsús*

*(Mt. 15:21-28)*

<sup>24</sup> Te ní xica Jèsús cuahá<sup>n</sup>-gá ndéé yucu cue téè ñuú Tírú, ndihí yucu cue téè ñuú Sidón. Te òré ní quexìo-gá xíá<sup>n</sup> te cuànguìhu-gá ì<sup>n</sup> vehe te xíá<sup>n</sup> cundecu-gá, te cuìní-gá sá vã quèní ñáyiú sá xíá<sup>n</sup> ndécú-gã ní cùu, dico dai ní ñihí-yu tñuhu. <sup>25</sup> Te ì<sup>n</sup> ñadìhí ndécú ì<sup>n</sup> déhe yoco-a<sup>n</sup>, te yìhi ñaha espíritú cùndìhí yucu ñávãha xii-xi, te ñaha-á<sup>n</sup> ío ndìhí ní ñihí-a<sup>n</sup> tñuhu sá ñí quexìo Jèsús xíá<sup>n</sup> ñuú ní sáhá<sup>n</sup>-a<sup>n</sup> núú ndécú-gã, te ní ngüíñí xítí-á<sup>n</sup> núú-gã. <sup>26</sup> Te ní ngüíta-a<sup>n</sup> cãhá<sup>n</sup> ndàhú-a<sup>n</sup> núú-gã, te xãha<sup>n</sup>-a<sup>n</sup> sã ñuú vá cùndèe ìní-gá queñuhu-gá espíritú cùndìhí yucu ñávãha yìhi ñaha xii déhe-a<sup>n</sup>. Dico ñá díú ñàha israél cúu-á<sup>n</sup> chi ñaha ñuú Sirofènicíá cúu-á<sup>n</sup> te tñuhu griégú cúu tñuhu-a<sup>n</sup>. <sup>27</sup> Te xíá<sup>n</sup> ñuú ní xãha<sup>n</sup> Jèsús xii-a<sup>n</sup>:

—Daña na càxi tnaa nchaa landú chítú xítí-güexi, te dàtnùnì caxi cue ìná, chi ñá túú ndùu váha-xi quehe<sup>n</sup>-o sã xéxí landú te cuáha-o ìná —càchí-gá xãha<sup>n</sup>-gã xii-a<sup>n</sup>.

<sup>28</sup> Te ní xãha<sup>n</sup>-a<sup>n</sup> xii-gá:

—Mèstrú, ndáá-ni cãhá<sup>n</sup>-n, dico ìná chi nàdatacá-güedi sá ngóyó yùhu cóhó landú —càchí-a<sup>n</sup> xãha<sup>n</sup>-a<sup>n</sup> xii-gá.

<sup>29</sup> Te Jèsús ní xãha<sup>n</sup>-gã xii-a<sup>n</sup>:

—Ío váha ní cãhá<sup>n</sup>-n, te cuanùhú te ñá túú-gã ná canì ìní-n, chi sa ní quee espíritú cùndìhí yucu ñávãha yìhi ñaha xii déhe-n —càchí-gá xãha<sup>n</sup>-gã xii-a<sup>n</sup>.

<sup>30</sup> Te ñaha-á<sup>n</sup> ñí nasáá-a<sup>n</sup> vehe-a<sup>n</sup> te càa déhe-a<sup>n</sup> núú càamá, dico ñá túú-gã espíritú cùndìhí yucu ñávãha yìhi ñaha xii-xi chi sa ní quee ñaha-xi.

*Jèsús quidé tátna-gá ì<sup>n</sup> téè ñá cúu cãhá<sup>n</sup> váha te doho-dě*

<sup>31</sup> Te Jèsús ní ndee-gá yucu cue téè ñuú Tírú te ní yãha-gá yucu cue téè ñuú Sidón, ndihí yucu ndi úxí ñuú nánì Dècápolís, te ní sáá-gá ndéé yuhu làgúná distritú Galileá. <sup>32</sup> Te xíá<sup>n</sup> ndécú-gã ní quexìo ñáyiú ndéé núú-gã ndécã-yu ì<sup>n</sup> téè ñá cúu cãhá<sup>n</sup> váha-dé te doho-dě. Te cãhá<sup>n</sup> ndàhú-yu núú-gã sá ná tëndaha ñaha-gá xii-dé cuendá ndúha-dé. <sup>33</sup> Te Jèsús ní queñuhu ñaha-gã xii-dé tnuú-yu, te ndèca ñaha-gá cuahá<sup>n</sup> ì<sup>n</sup> xio, te ní dáquìhu-gá díquí ndáhá-gã yaú lóho-dé, te ní dácànùu-gá díí-gã díquí ndáhá-gã, te ní tendaha-gã yàa-dé. <sup>34</sup> Te ní ndacoto-gá andiú te ní sãnuu ìní-gá, te ní cãhá<sup>n</sup>-gá tñuhu mee-gã, te xãha<sup>n</sup>-gã:

—Íĕfatá! —càchí-gá xãha<sup>n</sup>-gã xii-dé.

Te tñuhu-á<sup>n</sup> queé-xí: Nacaá<sup>n</sup> yòhó lóho.

<sup>35</sup> Te òré-ni-á<sup>n</sup> ñí nacaá<sup>n</sup> lóho-dé, te ní nduu váha yàa-dé, te ní cuu cãhá<sup>n</sup> váha-dé. <sup>36</sup> Te Jèsús ní cãhá<sup>n</sup> víhí-gã dóho ñáyiú ndihí ñaha xii téè ní quide tátna-gá-á<sup>n</sup> sã vã yòo ì<sup>n</sup> cùñahá-yu sá ñí quide tátna ñaha-gã xii-dé, dico uu<sup>n</sup>-gá ní quidé-yu ní cãhá<sup>n</sup>-yu núú ñáyiú sá ñí quide tátna-gá téè-á<sup>n</sup>. <sup>37</sup> Te nchaa-yu ío ní cuñuhu-yu, te ní xítñahá-yu:

—Vãha vîhi quide-dé, chi nchaa-ni ndàcu-dé quidé-dě, chi quide tátna-ni-dé ñáyiú doho, te quide tátna-ni-dé ñáyiú ñihí —càchí-yu xítñahá-yu.

## 8

*Jèsús dácàxi-gá cùmí mĩ ñáyiú*  
*(Mt. 15:32-39)*

<sup>1</sup> Te ì<sup>n</sup> nduu tucu ío cuèhé ñáyiú ní tacá núú ndécú Jèsús, te ñá túú tñahí sá cãxí-yu. Te ní cana-gá cue téè xica cuu ndihí-gá, te ní xãha<sup>n</sup>-gã xii-güedé:

<sup>2</sup> —Yúhú, cùndahú ìní-í nchaa ñáyiú-a chi sa ní cuu únì nduu ndècu ndihí

ñahá-yu xii-o iha, te ñá túú tnàhí ná sá cáxí-yu. <sup>3</sup> Te núu na nàtendaha-í-yu núhú tnámă-yu vehé-yu, te cuneé-yu docó ichi, chi davá-yu ío xica ndècú-yu —càchí-gá xăha<sup>n</sup>-gă xii-güedé.

<sup>4</sup> Te ní xăha<sup>n</sup>-güedé xii-gá:

—¿Te ndèé níhí-ó să cuăñaha-o càxi nchaa ñáyiu-a, te iha ñá túú nă ío chi cùu-xi xití yucu-i? —càchí-güedé xăha<sup>n</sup>-güedé xii-gá.

<sup>5</sup> Te Jèsús ní xícá<sup>n</sup> tnúhú-gă núú-güedé, te xăha<sup>n</sup>-gă:

—¿Ná daha-gá pàá ndécú ndihí-ndo-i? —cachí-gá xăha<sup>n</sup>-gă xii-güedé.

Te ní xăha<sup>n</sup>-güedé xii-gá:

—Ndècu ndihí-ndí úsá-gá tnàhá —càchí-güedé xăha<sup>n</sup>-güedé xii-gá.

<sup>6</sup> Te Jèsús ní xăha<sup>n</sup>-gă xii nchaa ñáyiu sá ngóo-yu nchaá-yu, te ní ngóo-yu, te ní quehe<sup>n</sup>-gá ndi úsá pàá-á<sup>n</sup>, te ní ndacá<sup>n</sup> táhú-gă núú Yă Ndiöxí. Te dătnùní ní táhú cuèchi-gá te ní sãñaha-gă xii cue téé xica cuu ndihí-gá ní dácăhñu-güedé nchaa ñáyiu-á<sup>n</sup>.

<sup>7</sup> Te ndècu ndihí-güedé ì<sup>n</sup> úú chácá lîhli, te ñiu-ni duca<sup>n</sup> ñi quide-gá ní ndacá<sup>n</sup> táhú-gă núú Yă Ndiöxí. Te dătnùní ní táúchíú<sup>n</sup>-gă ní dácăhñu ñaha-güedé xií-yu. <sup>8</sup> Te nchaá-yu ní xexí-yu ní ndahá xití-yu. Te sátá ñi túhú cóhō-yu te ní nadatácá-güedé nchaa sá ñi quendóo, te ní chítú úsá tnàhá tídihi mee-ni sã ñi quendóo-á<sup>n</sup>.

<sup>9</sup> Te núú ncháá ñáyiu ní xexí-á<sup>n</sup> xñu dătná cúmí mîl-yu. Te sátá ñi yáha ní dácáxí ñaha Jesús xii-yu te ní dándácá ñaha-gá. <sup>10</sup> Te dătnùní cuánguee-gá bàrcú ndihí cue téé xica cuu ndihí-gá cuáhá<sup>n</sup>-gá ndihí-güedé yucu cue téé ñuú Dalmànutá.

*Cue téé cùu fariséú xăha<sup>n</sup>-güedé xii Jèsús cada-gá ì<sup>n</sup> sá vă yōo tnàhí ndàcu cada*

*(Mt. 16:1-4; Lc. 12:54-56)*

<sup>11</sup> Te núú ñi quexìo Jesús xiá<sup>n</sup> ñi sáá cue téé cùu fariséú, te ní ngüíta-güedé nándi tnúhu xăha<sup>n</sup>-güedé xii-gá xító ndèé ñáhá-güedé. Te xăha<sup>n</sup>-güedé sá ná cádá-gă ì<sup>n</sup> sá vă yōo tnàhí ndàcu cada cundehe-güedé nàcuáa cutnùní iní-güedé núu ndáá sá Yă Ndiöxí ní tendaha ñaha-gá xii-gá véxi-gá ñuyíú-a. <sup>12</sup> Te ní sánuu iní-gá te ní xăha<sup>n</sup>-gă xii-güedé:

—Nchaa nchòhó ñáyiu ndècu ñuyíú-a cuíní-ndó càda-í ì<sup>n</sup> sá vă yōo tnàhí ndàcu cada nacuáa cutnùní iní-ndó núu ndáá sá Yă Ndiöxí chindèe ñaha-gá xii-í. Dico na càchí tnúhu ndáá-í xii-ndo sã vă cádá-í sá cuíní-ndó —càchí-gá xăha<sup>n</sup>-gă xii-güedé.

<sup>13</sup> Te ní dándōo-gá ñáyiu xñdecu-á<sup>n</sup>, te cuándeé-gá bàrcú ndihí cue téé xica cuu ndihí-gá te cuáhá<sup>n</sup>-gá ndihí-güedé ndàa ingá xio yuhu làgúná.

*Nàcuáa quide cue téé cùu fariséú*

*(Mt. 16:5-12)*

<sup>14</sup> Te ní cunaa-güedé canehe-güedé sá cáxí-güedé quíhí<sup>n</sup>, te ì<sup>n</sup>ndii-ni pàá ndécú xití bàrcú-á<sup>n</sup> ñi naníhí-güedé. <sup>15</sup> Te Jèsús ní cáhá<sup>n</sup>-gá dóho-güedé, te xăha<sup>n</sup>-gă xii-güedé:

—Na càchí tnúhu-í xii-ndo sã ío quíhí iní-ndó cùndecu-ndo te vă cádá cuendá tnàhí-ndo lèvadurá cue téé cùu fariséú, ndihí levadurá cue téé cùndihí té Hèrodés —càchí-gá xăha<sup>n</sup>-gă xii-güedé.

<sup>16</sup> Te ní ngüíta-güedé xitnàha-güedé:

—Cuendá sá ñà túú ní cãnehe-o pàá quixi núu xiá<sup>n</sup> duha càhá<sup>n</sup>-gá —càchí-güedé xitnàha-güedé.

<sup>17</sup> Te Jèsús ní cutnùní iní-gá nàcuáa ndùu tnúhu xitnàha-güedé, núu ní xăha<sup>n</sup>-gă xii-güedé:

—¿Ná cuendá da sá ñà túú ní cãnehe-ndo pàá quixi càhá<sup>n</sup>-ndó? Te ñá díú cuendá pàá-á<sup>n</sup> ní cãhá<sup>n</sup>-í, te dícó-ni sá mée-ndó ñà túú quide cuendá váha-ndo nàcuáa ndùu tnúhu càhá<sup>n</sup>-í, te ni ñă tècú tnùní-ndó chi ío ñi ñi quíúndehu. <sup>18</sup> Te cuèi ndèhe-ndo dico ñà túú cùtnùní iní-ndó nă cúú nchàa sá quidè-í, te cuèi ndèdóho-ndo nchàa tnúhu càhá<sup>n</sup>-í dico ñà cùtnùní iní-ndó năsa ndùu-xi, te ni ñă ndácú iní-ndó nchàa sá tá quide-í véxi. <sup>19</sup> Te chí dándàcu iní cùtnàhá ní táhú cuèchi-í úhú<sup>n</sup>-ni pàá te ní xexi úhú<sup>n</sup> mîl mee-ni cuè téé chí ñiu-ni cue téé-á<sup>n</sup> ñi quíúndehu. Te chí càchí tnúhu ná daha tídihi ní chítú mee-ni sã ñi quendóo òré ní nadatácá-ndó —càchí-gá xăha<sup>n</sup>-gă xii-güedé.

Te ní xăha<sup>n</sup>-güedé xii-gá:

—Úxúú tnàhá tídihi ní chítú mee-ni sã ñi quendóo —càchí-güedé xăha<sup>n</sup>-güedé xii-gá.

Te ní xăha<sup>n</sup>-güedé xii-gá:

—Úxúú tnàhá tídihi ní chítú mee-ni sã ñi quendóo —càchí-güedé xăha<sup>n</sup>-güedé xii-gá.

Te xăha<sup>n</sup> tucu-gá:

<sup>20</sup> —Te cùtnàhá ní táhú cuèchi tucu-í úsá tnàhá pàá ní xexi cúmí mîl ñáyiu, te chí càchí tnúhu ná daha tucu tídihi ní chítú

mee-ni sã nĩ quendóo —càchí-gá xãha<sup>n</sup>-gã xii-güedé.

Te ní xáha<sup>n</sup>-güedě xii-gá:

—Úsá tnàhá tídihi ní chítú mee-ni sã nĩ quendóo —càchí-güedé xãha<sup>n</sup>-güedě xii-gá.

<sup>21</sup> Te Jèsús ní xáha<sup>n</sup> tùcu-gá xii-güedé:

—Vitna, ¿te sa ní tecú tnùní-ndó tnũhu ní cáhá<sup>n</sup>-í à<sup>n</sup> ñàhá? —càchí-gá xãha<sup>n</sup>-gã xii-güedé.

*Jèsús quidé tãtna-gá ì<sup>n</sup> téé cuàá ñuú Bètsaidá*

<sup>22</sup> Te Jèsús ní sáá-gá ndihi cue téé xica cuu ndihi-gá ñuú Bètsaidá. Te ñuú-á<sup>n</sup> ndécú-gã ní quexìo ñáyiu núú-gã tánèhé-yu ì<sup>n</sup> téé cuàá, te cáhá<sup>n</sup> ndàhú-yu núú-gã ñuú vá cùndèe iní-gá tendaha ñàha-gá xii-dé cuendá ndúha núú-dě. <sup>23</sup> Te Jèsús ní tñi-gá ndaha téé cuàá-á<sup>n</sup>, te ní queñuhu ñaha-gã tnuú-yu, te ndèca ñaha-gá cuáhá<sup>n</sup> ì<sup>n</sup> xio yuhu ñuú. Te yàcá<sup>n</sup> ní dácánùu-gá díí-gá núú-dě te ní tendaha ñàha-gá xii-dé, te dàtnùní ní xícá<sup>n</sup> tnúhú-gã núú-dě, te xãha<sup>n</sup>-gã:

—¿Cùtnuní núú-n-à<sup>n</sup>? —càchí-gá xãha<sup>n</sup>-gã xii-dé.

<sup>24</sup> Te téé cuàá-á<sup>n</sup> nĩ ndonehe núú-dě, te xãha<sup>n</sup>-dě xii-gá:

—Cùtnuní núú-í ndéhè-í nchaa cue téé-à<sup>n</sup>, dico dà ndáa yutnu cuí ndáa-güedé te xica-güedé —càchí-dé xãha<sup>n</sup>-dě xii-gá.

<sup>25</sup> Te Jèsús ní tendaha tùcu-gá núú-dě te ní cuu ní ndacoto váha-gá-dé, te òré-á<sup>n</sup> nĩ ndúha núú-dě. Te nchaandi túhú sá ndéhé-dě ní cutnùní váha núú-dě nándi cuu nchaa xíá<sup>n</sup>. <sup>26</sup> Te ní xáha<sup>n</sup> Jèsús xii-dé:

—Vitna te núhú-n, dico ndáá ichi vehe-n nũhú-n te ñá díú dà xití ñuú quíhí<sup>n</sup>-n, te vá yõo ì<sup>n</sup> cúñaha-n sã yũhú ní quide tãtna-í núú-n nĩ ndúha —càchí-gá xãha<sup>n</sup>-gã xii-dé.

*Té Pèlú xãha<sup>n</sup>-dě xii Jèsús sá díú-gã cúú-gã Crìstú*

*(Mt. 16:13-20; Lc. 9:18-21)*

<sup>27</sup> Te Jèsús ní xica-gá cuáhá<sup>n</sup>-gá ndihi cue téé xica cuu ndihi-gá nchaa ñuú líhli càa ñuú Cèsareá Filipú, te òré ñúhú-gã ndihi-güedé ichi te ní xícá<sup>n</sup> tnúhú-gã núú-güedě, te xãha<sup>n</sup>-gã xii-güedé:

—Chí càchí tnúhu nása càhá<sup>n</sup> ñáyiu cuendá-í. ¿Yoo cùu-í càchí-yu-va? —càchí-gá xãha<sup>n</sup>-gã xii-güedé.

<sup>28</sup> Te ní xáha<sup>n</sup>-güedě xii-gá:

—Davá-yu càchí-yu sá cúú-n ndĩ Juàá téé ní xóo dacuàndute ñaha xii ñáyiu, te davá-yu càchí-yu sá cúú-n tẽ Èliás, te dava tucú-yu càchí-yu sá cúú-n ì<sup>n</sup> téé ní xóo cáhá<sup>n</sup> tnúhu Yá Ndiõxí ndéé sanaha, duha càchí-yu —càchí-güedé xãha<sup>n</sup>-güedě xii-gá.

<sup>29</sup> Te ní xícá<sup>n</sup> tnúhú tùcu-gá núú-güedě, te xãha<sup>n</sup>-gã xii-güedé:

—Te nchòhó, ¿yoo sàni iní-ndó cùu-í-i? —càchí-gá xãha<sup>n</sup>-gã xii-güedé.

Te té Pèlú ní xáha<sup>n</sup>-dě xii-gá:

—Yòhó cúú-n Crìstú Yaá ní tendaha Yã Ndiõxí véxi ñuyíú-a —càchí-dé xãha<sup>n</sup>-dě xii-gá.

<sup>30</sup> Te Jèsús ní cáhá<sup>n</sup>-gá dóho-güedé, te xãha<sup>n</sup>-gã:

—Vá yõo ì<sup>n</sup> cúñaha-ndo yòo cuu-í —càchí-gá xãha<sup>n</sup>-gã xii-güedé.

*Jèsús càhá<sup>n</sup>-gá sá cáhni ñàha-güedé xii-gá (Mt. 16:21-28; Lc. 9:22-27)*

<sup>31</sup> Te Jèsús ní ngüíta-gá xĩtnũhu-gá cue téé xica cuu ndihi-gá nàcuáa yáha-gá, te xãha<sup>n</sup>-gã xii-güedé:

—Yúhú Téé cùu ñaní tnáhá-ndó nchaa-ndo chí ío ndoho-í, chí daquèe tíhú ñáhá nchàa cue téé cùu sacuéhé nũú ñáyiu isràél, ndihi cue dútú cùnùu, ndihi cue téé dàcuaha ñaha xii ñáyiu nchaa tnúhu ní chídó tnùní ní chídó tnùní ndíi Moisés, nchaa cue téé-á<sup>n</sup> dàquee tíhú ñáhá-güedě xii-í. Te sáa nduu te cahni ñaha-güedě xii-í, dico nduu úní sá cúú-í te ndoto-í —càchí-gá xãha<sup>n</sup>-gã xii-güedé.

<sup>32</sup> Te duca<sup>n</sup> nĩ cáhá<sup>n</sup> Jèsús núú cue téé xica cuu ndihi-gá nàcuáa tecú tnùní váha-güedé tnúhu cáhá<sup>n</sup>-gá. Te té Pèlú ní cana ñaha-dě xii-gá ì<sup>n</sup> xio, te ní ngüíta-dé ténàá ñáhá-dě xii-gá ní cùu.

<sup>33</sup> Dico Jèsús ndihi-ni ní nchócuĩhnu-gá ní ndàcoto-gá núú nchàa-güedé chí ndàa sátá-gã xĩndecu-güedé, te ní ngüíta-gá ténàá-gá té Pèlú, te xãha<sup>n</sup>-gã xii-dé:

—¿Xocuíñi yòhó núú-í-a, chí dàtná càhá<sup>n</sup> yucu ñávàha càhá<sup>n</sup>-n! Chí ñá túú sàni iní-õ dàtná sání iní Yã Ndiõxí, chí ì<sup>n</sup>-ni sàni iní-õ ndihi dava-gá cue ñáyiu ndècu ñuyíú-a —càchí-gá xãha<sup>n</sup>-gã xii-dé.



<sup>34</sup> Te Jèsús ní cana-gá nchaa cue téé xica cuu ndihi-gá, ndihi nchaa ñáyiú xíndecu-án, te ní xáha<sup>n</sup>-gã:

—Nchaa ñáyiú cuíni chitnahá ñáhá xii-í, te xini ñuhu-xi vá cáda-gã-yu sá sání iní méé-yu, te ío cada ndee iní-yu cundecu túha-yu ndohó-yu cuendá-í, te cuéi na ndohó-yu dàtná ndoho-í. <sup>35</sup> Te nchaa ñáyiú cuíni sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñá túú tnàhí yùhú cuéi nándi sá ná yáha-yu cundecú-yu ñuyíú-a sá cuendá-í, ndihi sá cuendá tnúhu-í, te ñáyiú-án naníhí tàhú-yu. <sup>36</sup> Te cuéi nchaandi túhú sá ío ñuyíú-a na nihí ñáyiú cundecu ndihí-yu, dico núu ñáyiú nchaa xíá<sup>n</sup> ná cáda cuíta nihnú-yu te ñá túú vèdana nàndíhí-xi sá dúcá<sup>n</sup> ndècu ndihí-yu nchaa xíá<sup>n</sup>. <sup>37</sup> Te ni ñáyiú sá ío ñuyíú-a vá chíndèe-xi ñáyiú cuendá naníhí tàhú-yu. <sup>38</sup> Te nchaa ñáyiú na cùcaha<sup>n</sup> núú-xi cáhán váha cuendá-í, ndihi cuendá tnúhu-í núú nchaa ñáyiú dàquee tihú ñáhá xii Yá Ndiöxí, ñáyiú xíndecu ichi cuèhé ichi duha, te tnàhá yùhú Téé cùu ñaní tnàhá-yu nchaá-yu cuc-aha<sup>n</sup> núú-í núú-yu òré ná quixi tucu-í ndihi cue espíritú xínú cuèchi núú Tàtá-í Dútú Ndiöxí. Te mee-gã cada cutnùni iní nchaa ñáyiú sá yùhú ío càhnu cuu-í.

## 9

<sup>1</sup> Te na càchí tnúhu ndáá-í xii-ndo sá ío dava nchòhó ñáyiú xíndecu iha vitna vá cùu-ni-ndo, chi cundecu-ni-ndo ndèé quini-ndó sàá nduu ndíhu ndaha ñàha Yá Ndiöxí xii ñáyiú, te dàvá-án quini-ndó sá ndácú-gã quidé-gã nchaandi túhú sá váha —càchí-gã xáha<sup>n</sup>-gã xii cue téé xica cuu ndihi-gá ndihi cue ñáyiú-án.

*Jèsús ní nadama dóo-gã ndihi núú-gã (Mt. 17:1-13; Lc. 9:28-36)*

<sup>2</sup> Te núú iñú nduu sá dúcá<sup>n</sup> ní cáhán Jèsús te ní xica-gá cuásaá-gá ñáyiú yucu dùcú<sup>n</sup>, te ndèca-gá té Pèlú, ndihi té Jàcobó, ndihi té Juáá cuásaá, te úní tnàhí-ni cue téé-án ndécá-gã cuásaá. Te yucu-án ndécú-gã ní nadama núú-gã, <sup>3</sup> te ní nadama dóo-gã. Te dóo-gã-án sùúni ní nduu cuixín quiyí te tása<sup>n</sup>, te ni ñáyiú ñuyíú-a ñá túú ndàcú-yu naqueté-yu ñáyiú dóo nduu cuixín dàtná ní nduu dóo-gã. <sup>4</sup> Te ní xiní-güedé té

Moisés ndihi té Èliás nútní-güedé ndihi-gá ndátnúhu ndihi ñaha-güedé xii-gá. <sup>5</sup> Te te Pèlú ní xáha<sup>n</sup>-dè xii Jèsús:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnu-vixi<sup>n</sup>, te ñáyiú cuu cuendá-n te ñáyiú cuu cuendá té Moisés te ñáyiú cuu cuendá té Èliás —càchí-dé xáha<sup>n</sup>-dè xii-gá.

<sup>6</sup> Te duca<sup>n</sup> ní cáhán-dé chi ío ní yùhú-güedé, te cuendá-ni ní cuu yáchí-dé ní cáhán-dé, te ni mèe-dé ñá túú ní cùtnuní iní-dé nása nduu tnúhu ní cáhán-dé. <sup>7</sup> Te òré-án ní quexio ñáyiú vico núú ndécú-güedé ndihi Jèsús ní dádhá ñaha-xi xii-güedé ndihi-gá, te xití vico-án ní cáhán Yá Ndiöxí ní tecú dóho-güedé, te xáha<sup>n</sup>-gã xii-güedé:

—Téé-a cùu-dé Déhe-í téé ío cùu iní-í, te cundedóho-ndo nchaa tnúhu càhán-dé —càchí-gã xáha<sup>n</sup>-gã xii-güedé.

<sup>8</sup> Te òré ní quide cuendá-güedé, te ñá túú-gã ní xiní-güedé cue téé úú-án chi mee-ná Jèsús ndécú.

<sup>9</sup> Te òré cuánuu ndihi ñaha-gã xii-güedé yucu-án, te ní cáhán-gá dóho-güedé, te xáha<sup>n</sup>-gã:

—Vá yóo ñáyiú cùñaha-ndo nchaa sá ní xiní-ndó núú ní sáá-ó-á, te cuu cáhán-ndó dico ndèé ná yáha ndoto yùhú Téé cùu ñaní tnàhá-ndó nchaa-ndo sá cùú-í —càchí-gã xáha<sup>n</sup>-gã xii-güedé.

<sup>10</sup> Núú xíá<sup>n</sup> cue téé-án ní xúhu<sup>n</sup> nahi-ni iní-güedé nchaa sá ní xiní-güedé núú ní sáhán-güedé ndihi Jèsús te ñá túú tnàhí ní cáhán-güedé, dico ní ndúcú tnúhu núú tnàhá-güedé ná cuendá duca<sup>n</sup> ní cáhán-gá sá ndèé ná yáha ndoto-gá sá cùú-gá te dàtnùni cáhán-güedé nàcuáa nduu nchaa sá ní xiní-güedé. <sup>11</sup> Te ní xíca<sup>n</sup> tnúhú-güedé núú Jèsús, te xáha<sup>n</sup>-güedé xii-gá:

—¿Cuíni-ndí cachí tnúhu-n ná cuendá càchí cue téé dàcuaha ñaha xii ñáyiú nchaa tnúhu ní chídó tnùnini ndí Moisés sá díhna-gá té Èliás ndixi-dé te dàtnùni quixi Yá tendaha Yá Ndiöxí quixi ñuyíú-a? —càchí-güedé xáha<sup>n</sup>-güedé xii-gá.

<sup>12</sup> Te Jèsús ní xáha<sup>n</sup>-gã:

—Ndáá sá códo núú ñáyiú téé quixi-dé te cada-dé dàtná ní quide té Èliás, te téé-án cada ndáá-dé nchaa nàcuáa cùu. Dico núú tütú Yá Ndiöxí cáhán-xi cuendá yùhú Téé cùu ñaní tnàhá-ndó nchaa-ndo sá ío



ndoho-í, te daquèe tihú ñáhá ñáyiú xii-í. <sup>13</sup> Te na càchí tnúhu-í xii-ndo vitna sá sà ní quixi ñá tée ní quide dàtná ní xóo cada té Èliás, te cue ñáyiú ñá túú ní cànehé-yu sá yíñùhu núú-dě, te ní quide ñáhá-yu xii-dé nchaa nàcuáa ní quixi iní méè-yu. Te núú tütú Yá Ndiöxí sa ndéé tnuní nchaa nàcuáa yáha-dé, te nchaa xíá<sup>n</sup> sa ní quide ñaha ñáyiú xii-dé —càchí-gá xáha<sup>n</sup>-gã xii-güedé.

*Jesús quidé tãtna-gá ñá tée cuechi yíhi ñaha espíritú cündihí yucu ñávãha*  
(Mt. 17:14-21; Lc. 9:37-43)

<sup>14</sup> Te Jèsús ní ndexìo-gá ndihí cue tée úní-á<sup>n</sup> núú xíndecu dava-gá cue tée xica cuu ndihí-gá, te vai vihi ñáyiú ndècu núú ndécú-güedé-á<sup>n</sup>, te tnáhá cue tée dàcuaha ñaha xii-yu nchaa tnúhu ní chídó tnuní ndíi Moisés xíndecu, te cue tée-á<sup>n</sup> nãndi tnúhu xáha<sup>n</sup>-güedé xii cue tée xica cuu ndihí Jesús. <sup>15</sup> Te òré ní xiní-yu ní ndexìo-gá, te nchaá-yu ío ní cuñúhu-yu, te xinú-yu ní sáhá<sup>n</sup> ní cáhá<sup>n</sup> ndihí ñáhá-yu xii-gá. <sup>16</sup> Te ní xicá<sup>n</sup> tnúhú-gã núú cuè tée xica cuu ndihí-gá núu ná tnúhu ndàtnúhu-güedé ndihí cue tée-á<sup>n</sup>. <sup>17</sup> Te ñáyiú xíndecu xíá<sup>n</sup> ñí xáhã<sup>n</sup>-yu xii-gá:

—Mèstrú, ndèca-í déhe-í véxi nãnducu ñaha-í xii-n, chí yíhi ñaha espíritú cündihí yucu ñávãha xii-dé, te diu xíá<sup>n</sup> ní quide ní cuu ñíhí-dé. <sup>18</sup> Te ío ndòho-dé chí súúni ndèni ní cuu ngótní ñaha-xi xii-dé, te òré duca<sup>n</sup> quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nùhu-dé, te ndàda ruú<sup>n</sup> ñáhá-xí xii-dé. Te sa ní xáha<sup>n</sup>-í xii cue tée xica cuu ndihí-n sá queñùhu-güedé espíritú cündihí yucu ñávãha yíhi ñaha xii-dé dico ñá túú ní ndàcu-güedé queñuhu-güedé-xi —càchí ñáyiú-á<sup>n</sup> xáhã<sup>n</sup>-yu xii-gá.

<sup>19</sup> Te Jèsús ní xáha<sup>n</sup>-gã:

—¡Nchaa nchòhó ñáyiú ndècu ñuyíú-a ío sàa iní-ndó, chí ñá túú cuñí-ndó quíndáa iní-ndó Yá Ndiöxí, te ní cuu vai nduu quide ndee iní-í nchaa sá quidé-ndó! ¿Te ná ndéé ama vá dúcá<sup>n</sup>-gã cada-ndo-i? Te chí cándèca tée cùhú-á<sup>n</sup> táquixi iha —cachí-gá xáha<sup>n</sup>-gã xii-yu.

<sup>20</sup> Te ñáyiú ndihí ñaha xii tée yíhi ñaha espíritú cündihí yucu ñávãha-á<sup>n</sup> ndéca

ñáhá-yu xii-dé cuáhá<sup>n</sup> ndéé núú Jèsús, te òré ní xiní ñáhá espíritú cündihí yucu ñávãha-á<sup>n</sup> xii-gá, te ní ngüíta-ni-xi sàhni yíhi ñáhá tùcu-xi xii-dé, te ní dànduá ñáhá-xí xii-dé, te ní ngüíta-dé xíchí ñùhu-dé, te quène tíñú yuhu-dé. <sup>21</sup> Te Jèsús ní xicá<sup>n</sup> tnúhú-gã núú tãtá-dě, te xáha<sup>n</sup>-gã xii-dé:

—¿Ná ndéé ama ní ngüíta-xi duha ndòho déhe-n? —càchí-gá xáha<sup>n</sup>-gã xii-dé.

Te tée-á<sup>n</sup> ñí xáha<sup>n</sup>-dě xii-gá:

—Ndéé cútnáhá cúú líhli-dé ní ngüíta espíritú cündihí yucu ñávãha duha quide ñaha-xi xii-dé. <sup>22</sup> Te ní cùtítní xito dàngaunihmu ñaha-xi xii-dé núú ñùhú, te ní cutítní tucu xito dàngaunihnu ñaha-xi xii-dé ndute cuñí-xi cahni ñaha-xi xii-dé. Te ndèca-í-dé véxi núú-n te núu ndacu-n càda tãtna-n-dě, te cundáhú iní ñáhá-n xii-ndí chindee ñaha-n —cachí-dé xáha<sup>n</sup>-dě xii-gá.

<sup>23</sup> Te Jèsús ní xáha<sup>n</sup>-gã:

—Te ná cuendá càchí-n núu ndacu-í cada tãtna-í déhe-n, chí nchaa ñáyiú na quíndáa iní ñáhá xii-í te nihí-yu sá ná càcá<sup>n</sup>-yu núú-í —càchí-gá xáha<sup>n</sup>-gã xii-dé.

<sup>24</sup> Te tãtá tée cuechi-á<sup>n</sup> ñíhi ní cáhá<sup>n</sup>-dé xáha<sup>n</sup>-dě xii-gá:

—Sàndáa iní ñáhá-í xii-n, dico chindee ñaha xii-í cuendá ná quíndáa iní ñáhá-gã-í xii-n —càchí-dé xáha<sup>n</sup>-dě xii-gá.

<sup>25</sup> Te Jèsús ndéhé-gã sá ío vai ñáyiú ta tàcá núú ndécú-gã-á<sup>n</sup>. Te ní tenáa-gá espíritú cündihí yucu ñávãha-á<sup>n</sup>, te xáha<sup>n</sup>-gã xii-xi:

—Yòhó espíritú cündihí yucu ñávãha, ní quide ñíhí-n ñí quide doho-n tée-a, dico vitna yúhú càchí-í sá quée-n yiqui cuñú-dé te vá ndíhu-gá-n —càchí-gá xáha<sup>n</sup>-gã xii espíritú cündihí yucu ñávãha-á<sup>n</sup>.

<sup>26</sup> Te espíritú cündihí yucu ñávãha-á<sup>n</sup> ñí dácáná sàa ñaha-xi xii tée-á<sup>n</sup>, te ní sahni yíhi ñáhá tùcu-xi xii-dé, te dàtnuní ní quee ñaha-xi xii-dé cuáhá<sup>n</sup>-xi, dico tée-á<sup>n</sup> chí dacàa-ni ndíyí càa-dé cãtùu-dé. Te nchaa ñáyiú xíndecu xíá<sup>n</sup> càchí-yu sá ñí xíhí-dé ní cùu. <sup>27</sup> Te Jèsús ní tñí-gã ndaha-dé ní ndocani ñaha-gã xii-dé, te ní ndacóo-dé ní nucúnutnii-dé.

<sup>28</sup> Te Jèsús cuándihu-gá xití vehe ndihí cue tée xica cuu ndihí-gá, te òré ndéhé-güedé

ñá túú-gǎ ñáyiú, te ní xícá<sup>n</sup> tnúhú-güedě núú-gǎ, te xǎha<sup>n</sup>-güedě xii-gǎ:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cündìhi yucu ñávǎha yìhi ñaha xii té-ǎ<sup>n</sup> —càchí-güedě xǎha<sup>n</sup>-güedě xii-gǎ.

<sup>29</sup> Te Jèsús ní xǎha<sup>n</sup>-gǎ xii-güedé:

—Na càchí tnúhu-í xii-ndo sǎ nǔú òré cuení-ndó queñuhu-ndo espíritú cündìhi yucu ñávǎha yìhi ñaha xii ñáyiú dàtná cúú espíritú cündìhi-xi yìhi ñaha xii té-ǎ<sup>n</sup> ní cùu ñá, te xìni ñuhu-xi sǎ ìo cáhá<sup>n</sup> ndìhi-ndo Yǎ Ndiǒxí te ñá túú tnàhí ná caxi-ndo cáhá<sup>n</sup> ndìhi-ndo-gǎ, te duca<sup>n</sup> te ndacu-ndo queñuhu-ndo espíritú cündìhi yucu ñávǎha yìhi ñaha xii ñáyiú —càchí-gǎ xǎha<sup>n</sup>-gǎ xii-güedé.

*Jèsús càhá<sup>n</sup> tucu-gǎ sǎ cáhni ñàha-güedé xii-gǎ*

*(Mt. 17:22-23; Lc. 9:43-45)*

<sup>30</sup> Te Jèsús ní quee-gǎ núú ndécú-gǎ-ǎ<sup>n</sup> ndìhi cue téé xìca cuu ndìhi-gǎ cuáhá<sup>n</sup>-gǎ ndìhi-güedé distritú Galileá, te cuení-gǎ sǎ vǎ quení ñáyiú ndèé ichi cuáhá<sup>n</sup>-gǎ. <sup>31</sup> Te duca<sup>n</sup> nǐ sani iní-gǎ, chi mee-gǎ sa nàha-gǎ sǎ ndáá cada-xi nàcuáa xǎha<sup>n</sup>-gǎ xii cue téé xìca cuu ndìhi-gǎ, te duha xǎha<sup>n</sup>-gǎ xii-güedé:

—Yúhú Téé cùu ñaní tnáhá-ndó nchǎa-ndo sǎá ñ<sup>n</sup> nduu te cuáha cuendá ñáhá-güedé xii-í núú cuè téé cùu úhú iní ñáhá, te cahni ñaha-güedě xii-í, dico nduu úní sǎ cùú-í te ndoto-í —càchí-gǎ xǎha<sup>n</sup>-gǎ xii-güedé.

<sup>32</sup> Dico ñá túú tnàhí ni tècú tnùnì-güedé nása ndùu tnúhu ní cáhá<sup>n</sup>-gǎ, te ni ñá túú ní cùyì-güedé cáca<sup>n</sup> tnúhú-güedě núú-gǎ.

*Cue téé ndùcu tnúhu núú tnáhá nǔú ndédacàa-güedé ìo-gǎ cùnùu*

*(Mt. 18:1-5; Lc. 9:46-48)*

<sup>33</sup> Te Jèsús ní quexìo-gǎ ndìhi cue téé xìca cuu ndìhi-gǎ ñuú Capèrnaúm, te òré sa ndècu-gǎ ñ<sup>n</sup> vehe te ní xícá<sup>n</sup> tnúhú-gǎ núú-güedě, te xǎha<sup>n</sup>-gǎ xii-güedé:

—¿Nándi cùu tnúhu ta xìtnàha-ndo véxi? —càchí-gǎ xǎha<sup>n</sup>-gǎ xii-güedé.

<sup>34</sup> Dico ñá túú tnàhí ni cáhá<sup>n</sup>-güedé cúñaha-güedě xii-gǎ nǔú ná tnúhu xìtnàha-güedé òré ñúhú-güedě ichi. Te

duca<sup>n</sup> nǐ quide-güedé chi cuendá tá ndàtnúhu-güedé nǔú ndédacàa-güedé ìo-gǎ cùnùu. <sup>35</sup> Te Jèsús ní ngóo-gǎ, te ní xǎha<sup>n</sup>-gǎ xii ndi ùxúú cue téé xìca cuu ndìhi-gǎ:

—Chí táquixi iha te cundedóho-ndo tnúhu na càhá<sup>n</sup>-í-a. Te núú ìo dava-ndo cuení-ndó cùnùu-ndo, te cada-ndo sǎ cúú-ndó ñáyiú nchìcú<sup>n</sup> cuí-nǎ, te cunu cuechi-ndo nǔú tnàha ñáyiú-ndo —càchí-gǎ xǎha<sup>n</sup>-gǎ xii-güedé.

<sup>36</sup> Te Jèsús ní sanutnì-gǎ ñ<sup>n</sup> té lǐhli cuádava tnuú-güedé, te dàtnùnì ní nguídèhé ñáhá-gǎ xii-dé, te xǎha<sup>n</sup>-gǎ xii-güedé:

<sup>37</sup> —Nchaa ñáyiú na quehe<sup>n</sup> cuendá ñ<sup>n</sup> té lǐhli dàtná té lǐhli-a cuendá sǎ ñúhú iní ñáhǎ-yu xii-í ñá, te cada iní-yu sǎ yúhú ní quehe<sup>n</sup> cuendá-yu. Te nchaa ñáyiú na quehe<sup>n</sup> cuendá ñáhá xii-í te ñá díú-ní mèe-í ní quehe<sup>n</sup> cuendá-yu, chi tnàhá Tǎtà-í Dútú Ndiǒxí Yaá ní tendaha ñàha xii-í véxi-í ñuyúú-a ní quehe<sup>n</sup> cuendá-yu —càchí-gǎ xǎha<sup>n</sup>-gǎ xii-güedé.

*Nchaa ñáyiú ñá túú cùu úhú iní ñáhá xii-o te cündìhi ñáhá-yu*

*(Mt. 10:42; Lc. 9:49-50)*

<sup>38</sup> Te té Juáa diu-ni ñ<sup>n</sup> téé xìca cuu ndìhi-gǎ ní xǎha<sup>n</sup>-dě xii-gǎ:

—Mèstrú, ní xiní-ndí ñ<sup>n</sup> téé càcunehe ñaha-dé xii-n, te queñuhu-dé espíritú cündìhi yucu ñávǎha yìhi ñaha xii ñáyiú, te nchúhú ñá túú ní dàña-gǎ-ndí duca<sup>n</sup> càda-dé, chi ñá túú xìca cuu ndìhi ñaha-dé xii-o —càchí-dé xǎha<sup>n</sup>-dě xii-gǎ.

<sup>39</sup> Te Jèsús ní xǎha<sup>n</sup>-gǎ xii-güedé:

—Daña-ndo na càda nahi-dé ní cùu, chi ñá túú nǐ ñ<sup>n</sup> ñáyiú ndìhi ndìhi-ni ndacu cáhá<sup>n</sup> cuèhé cuendá-í te núu càcunehe ñáhá-yu xii-í, te quidé-yu sǎ vǎ yǒo tnàhí ndàcu cada. <sup>40</sup> Te nchaa ñáyiú ñá túú cùu úhú iní ñáhá xii-o te cündìhi ñáhá-yu. <sup>41</sup> Te na càchí tnúhu-í xii-ndo sǎ cuè ñáyiú na tàxi ñ<sup>n</sup> yaxi<sup>n</sup> ndute coho-ndo cuendá sǎ cúú-ndó cuè téé xìca cuu ndìhi-í, te ñáyiú-ǎ<sup>n</sup> sǎá nduu te dacuèi sǎ nihí-yu sǎ ndúú tǎhǔ-yu —càchí-gǎ xǎha<sup>n</sup>-gǎ xii-güedé.

*Cada cuendá-ó vǎ cündècu-o ichi cuehé ichi duha*

*(Mt. 18:6-9; Lc. 17:1-2)*

<sup>42</sup> Te xǎha<sup>n</sup> tucu Jèsús xii-güedé:

—Te núu ì<sup>n</sup> téé na dàcahá<sup>n</sup>-dé cue ñáyiú sàndáá iní ñáhá xii-í cadá-yu nándi sá cuèhé sá dúhá, te váha-gá sá núu na dàcutu ndeé-güedé ì<sup>n</sup> yúú yódó dúcú<sup>n</sup>-dë, te dàquée ñaha-güedë xii-dé xiti ndute làmár, te ñá díú sã cündecu-dé duca<sup>n</sup> càda-dé. <sup>43</sup> Te núu ì<sup>n</sup> xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ì<sup>n</sup> xio ndaha-ndo te ñá díú sã quihí<sup>n</sup>-ndó ñihii ní ndúú-ndó núú ùhú núú ndàhú núú dícó sàá ndáhá itá ñuhú ni caa ni quihí<sup>n</sup>. <sup>44</sup> Chi yacá<sup>n</sup> cúú-xi núú ñà túú tñàhí ndàhvá ñuhú, te ío ndoho-ndo cündecu-ndo xíá<sup>n</sup> ni caa ni quihí<sup>n</sup>. <sup>45</sup> Te núu ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèi na cuíta ì<sup>n</sup> xio sáhá-ndó, te ñá díú sã quihí<sup>n</sup>-ndó ñihii ní ndúú-ndó núú ùhú núú ndàhú núú dícó sàá ndáhá itá ñuhú ni caa ni quihí<sup>n</sup>. <sup>46</sup> Chi yacá<sup>n</sup> ñá túú tñàhí ndàhvá ñuhú, te ío ndoho-ndo cündecu-ndo xíá<sup>n</sup> ni caa ni quihí<sup>n</sup>. <sup>47</sup> Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cündecu-ndo núú ndécú Yã Ndiõxí táxí tñuní-gá cuèi na cuíta ì<sup>n</sup> xio tinùu-ndo, te ñá díú sã ndi nduú xio núú-ndó quihí<sup>n</sup>-ndó núú ùhú núú ndàhú. <sup>48</sup> Chi yacá<sup>n</sup> ñá túú tñàhí ndàhvá ñuhú, te ío ndoho-ndo cündecu-ndo xíá<sup>n</sup> ni caa ni quihí<sup>n</sup>.

<sup>49</sup> Te dàtná quidé-güedë quiti sàhni-güedë chìhi-güedë cuñú-di ñí te dàquée-güedë núú ñuhú, duca<sup>n</sup> sãtnahá-xi ndoho cue ñáyiú chi ío ndohó-yu. <sup>50</sup> Te ñí chi ío váha nándihí-xi, dico núu na ndùu víxi<sup>n</sup>-xi te ñá túú-gã nándihí-xi te ni ñà túú-gã nása cada-o ndùu úhá tucu-xi. Te ío váha cada cuendá-ndó nãcuáa cündecu-ndo cuendá cuu-ndo ñáyiú váha, te duca<sup>n</sup> te cuu-ndo dàtná ñí sã ñà túú ndùu víxi<sup>n</sup>, te ío váha cündecu ndihí tñaha-ndo —cachí-gá xãha<sup>n</sup>-gã xii-güedë.

## 10

*Jèsús càhá<sup>n</sup>-gá cuendá cue ñáyiú dàña tñaha*  
(Mt. 19:1-12; Lc. 16:18)

<sup>1</sup> Te Jèsús ní xica-gá cuáhá<sup>n</sup>-gá ní yáha-gá yucu distritú Jùdeá ní téhndé-gá ndàa ingá xio yúte Jòrdán. Te yacá<sup>n</sup> ndécú-gã ní tacá tucu cuèhé víhí ñáyiú, te ní ngúita-ni tucu-gá dánèhé ñáhá-gã xii-yu tñuhu-gá chi duca<sup>n</sup> tñàhí quide-gá. <sup>2</sup> Te ní quèxio ì<sup>n</sup> úú cue téé cùu fariséú núú ndécú Jèsús xito ndèé ñáhá-güedë xii-gá núu nása cunduu tñuhu càhá<sup>n</sup>-gá, te xãha<sup>n</sup>-güedë xii-gá:

—Véxi-ndí xicá<sup>n</sup> tñuhú-ndí núú-n núu cuu daña ì<sup>n</sup> téé ñadihí-dé ã<sup>n</sup> ñáhá —càchí-güedë xãha<sup>n</sup>-güedë xii-gá.

<sup>3</sup> Te Jèsús ní xãha<sup>n</sup>-gã xii-güedë:

—Te nchòhó, ¿nása ní cachí ndíi Moisés cada-ndo-i? —càchí-gá xãha<sup>n</sup>-gã xii-güedë.

<sup>4</sup> Te ní xãha<sup>n</sup>-güedë xii-gá:

—Ndíi Moisés ní cachí ndíi sá cúú dàña ì<sup>n</sup> téé ñadihí-dé dícó-ni sá cadúha-dé ì<sup>n</sup> tutú cuãñaha-dë, te núú tütú-án codo tñuní sá ñí dáñá ñaha-dé, te duca<sup>n</sup> te cuu daña-dë ñadihí-dé —càchí-güedë xãha<sup>n</sup>-güedë xii-gá.

<sup>5</sup> Te Jèsús ní xãha<sup>n</sup>-gã xii-güedë:

—Te duca<sup>n</sup> ñí chídó tñuní ndíi Moisés cada-ndo cuendá sá ío sàá iní-ndó. <sup>6</sup> Dico Yã Ndiõxí cútñahá ní cadúha-gá ñuyúú ndihí nchaa sá ío, chi téé ñadihí ní cadúha-gá. <sup>7</sup> Te xíá<sup>n</sup> núu nchaa cue téé na ñihí ñadihí-xi, te dè<sup>n</sup>-ná cada-güedë tãtã-güedë ndihí nãná-güedë, chi mee-nã ñadihí-güedë cuu cuu ndihí-güedë. <sup>8</sup> Te cue ñáyiú úú-án ñà túú-gã ndí dè<sup>n</sup> ndí dè<sup>n</sup> yiqui cuñú cúú-yu, chi cada iní-ndó sã ì<sup>n</sup>-nã yiqui cùñú cúú-yu. <sup>9</sup> Te xíá<sup>n</sup> núu ñá túú ndùu váha-xi daña cuè téé ñadihí-güedë, chi mee Yã Ndiõxí ní cachí-gá sá cúú úú-yu cundécú-yu ndéé naa ndéé cuú-yu —càchí-gá xãha<sup>n</sup>-gã xii-güedë.

<sup>10</sup> Te òré yíhí Jèsús ndihí cue téé xica cuu ndihí-gá vehe, te ní xicá<sup>n</sup> tñuhú-güedë núú-gã nása ndùu tñuhu ní càhá<sup>n</sup>-gá cuendá cue ñáyiú dàña tñaha. <sup>11</sup> Te Jèsús ní xãha<sup>n</sup>-gã xii-güedë:

—Te núu ì<sup>n</sup> téé na dàña-dé ñadihí-dé te naquehe<sup>n</sup>-dé ingá ñadihí, te ío nèhé quidé-dë, te ì<sup>n</sup>-ni cuèchi cùu-xi ndihí cuèchi quide téé ndèca ñadihí te càhá<sup>n</sup> ndihí-dé ingá ñadihí. <sup>12</sup> Te diu-ni duca<sup>n</sup> sãtnahá-xi cùu tucu ñáyiú dè<sup>n</sup> te núu na dàñá-yu yí-yu te naquehé<sup>n</sup>-yu ingá téé, chi ì<sup>n</sup>-ni cuèchi

cùu-xi sá quidě-yu ndihí sá quidé cuè ñáyiú dîhí ndécú yî-xi, te càhá<sup>n</sup> ndihí-yu ingá téé —càchí-gá xăha<sup>n</sup>-gă xii-yu.

*Jèsús xicá<sup>n</sup> táhú-gă núú Yă Ndiöxí cuendá landú*

*(Mt. 19:13-15; Lc. 18:15-17)*

<sup>13</sup> Te ì<sup>n</sup> ũú ñáyiú ndécá-yu landú lîhli cuáhá<sup>n</sup> núú Jèsús, chi cuíní-yu sá téndaha ñaha-gá xii-güexi. Te cue téé xica cuu ndihí-gá ní ngüíta-güedé ténáá ñáhá-güedé xii-yu, te xăha<sup>n</sup>-güedé sá vă dúcá<sup>n</sup> càdá-yu.

<sup>14</sup> Te òré ní xiní-gá sá dúcá<sup>n</sup> quide-güedé, te ní cudéé<sup>n</sup>-gă núú-güedé, te xăha<sup>n</sup>-gă xii-güedé:

—Chí dáñá ná quixi nahi cue landú lîhli-á<sup>n</sup> nüú-í-a te vă càdí-ndó ìchi-güexi, chi datná cúú vâha iní cue landú lîhli-á<sup>n</sup> duca<sup>n</sup> cùu váha iní cue ñáyiú yindaha Yá Ndiöxí.

<sup>15</sup> Te ña càchí tnúhu ndáá-í xii-ndo sã nüú vă quindáá iní ñáhá-ndó datná quidé cuè landú lîhli sândáá iní ñáhá xii-í, te vă ndîhu ndaha ñaha Yá Ndiöxí xii-ndo —càchí-gá xăha<sup>n</sup>-gă xii-güedé.

<sup>16</sup> Te sátá dúcá<sup>n</sup> ñí xăha<sup>n</sup>-gă te ní nguídéhé-gá cue landú-á<sup>n</sup> te ní tendaha ñaha-gá xii-güexi, te ní xicá<sup>n</sup> táhú-gă núú Yă Ndiöxí cuendá-güexi.

*Î<sup>n</sup> téé cuica càhá<sup>n</sup> ndihí-dé Jèsús*

*(Mt. 19:16-30; Lc. 18:18-30)*

<sup>17</sup> Te òré sa ñûhu ichi Jèsús caca-gá quíhí<sup>n</sup>-gá ingá xichi ni cùu ní quexio cunu ì<sup>n</sup> téé ní ngüíñí xítí-dě núú-gă, te xăha<sup>n</sup>-dě xii-gá:

—Yòhó Mèstrú, cùu-n téé ío váha iní-xi, te cuíní-í nüú vă cündèe iní-n càchí tnúhu-n ñă cúú sã càdà-í cuendá nduu táhú-í cundecu-í ndihí Yá Ndiöxí ñi caa ñi quíhí<sup>n</sup> —càchí-dé xăha<sup>n</sup>-dě xii-gá.

<sup>18</sup> Te Jèsús ní xăha<sup>n</sup>-gă xii-dé:

—¿Te cùtnuní iní-n năcuáa ndùu tnúhu càhá<sup>n</sup>-n sã yûhú váha iní-â<sup>n</sup>? Chi ì<sup>n</sup> dîí-ni Yá Ndiöxí ío váha iní-gá. <sup>19</sup> Te yòhó xiní-n năcuáa ní cachí Yă Ndiöxí cada ñáyiú, te duha ní cachí-gá: “Nchòhó cue téé vă càhá<sup>n</sup> ndihí-ndo ñădihí te núú ñă díú ñădihí-ndó cúú-yu, te duca<sup>n</sup>-ni nchòhó cue ñáyiú dîhí tucu vă càhá<sup>n</sup> ndihí-ndo tēe te núú ñă díú yî-ndo cuu-güedé, te vă cáhni-ndó tnàha ñáyiú-ndo, te ni vă dúhú-ndó sã

ndécú ndihí-yu, te ni vă dácàcu-ndo cuéchi neñúú sá cúú-xí tnàha ñáyiú-ndo, te ni vă dăcuàndehnde-ndo, te canehe-ndo sã yîñùhu núú tătá-ndó ndihí núú ñăná-ndó”, duha ní cachí Yă Ndiöxí cada ñáyiú —càchí-gá xăha<sup>n</sup>-gă xii-dé.

<sup>20</sup> Te téé-á<sup>n</sup> ñí xăha<sup>n</sup>-dě xii-gá:

—Mèstrú, nchaa xiá<sup>n</sup> ní ngüíta-í quidè-í ndéé cùtnàhá cúú landú-í —càchí-dé xăha<sup>n</sup>-dě xii-gá.

<sup>21</sup> Te Jèsús ní xindéhé ñaha váha-gá xii-dé, te ní cuu váha iní ñáhá-gă, te ní xăha<sup>n</sup>-gă xii-dé:

—Dico cùmání ingá núú sã càdá-n. Vitna te quíhí<sup>n</sup>-n te dico-n nchaa sá ndécú ndihí-n, te díhú<sup>n</sup>-n cuăha táhú-n cuè ñáyiú ndàhú. Te duca<sup>n</sup>, te nduu táhú-n núcúndecu váha-n núú ndécú Yă Ndiöxí táxí tnùn-í-gá, te sátá ná yăha duca<sup>n</sup> càda-n, te quixi-n chitnahá ñáhá-n xii-í cuèi na ndòho-n datná ndòho-í —càchí-gá xăha<sup>n</sup>-gă xii-dé.

<sup>22</sup> Te sá dúcá<sup>n</sup> ñí xăha<sup>n</sup> Jèsús xii-dé te ío ní cundiýí-dé chi ío cuica-dě, te ní xica-dé cuánuhú-dé.

<sup>23</sup> Te ní ndacoto-gá ñi càndéé dîñi-gá, te ní xăha<sup>n</sup>-gă xii cue téé xica cuu ndihí-gá:

—Cue ñáyiú cuica chi ío úhú quindáá iní-yu Yá Ndiöxí cuendá ndîhu ndaha ñaha-gá xii-yu —càchí-gá xăha<sup>n</sup>-gă xii-güedé.

<sup>24</sup> Te cue téé xica cuu ndihí-gá-á<sup>n</sup> ío ní cuñúhu-güedé năcuáa ní cáhá<sup>n</sup>-gá, te ní xăha<sup>n</sup> tucu-gá xii-güedé:

—Nchòhó cue téé xica cuu ndihí-í càchí tnúhu tucu-í xii-ndo sã ío úhú quindáá iní cue ñáyiú cuica Yă Ndiöxí cuendá ndîhu ndaha ñaha-gá xii-yu, chi sàni iní-yu sá ncháá sã ndécú ndihí-yu dácácu nihnu ñaha-xi xii-yu núú ùhú núú ndàhú. <sup>25</sup> Te yáchí-gá yăha ì<sup>n</sup> caméyu yaú ì<sup>n</sup> yiqui ticú dácúxí sã quindáá iní ì<sup>n</sup> ñáyiú cuica Yă Ndiöxí cuendá ndîhu ndaha ñaha-gá xii-yu —càchí-gá xăha<sup>n</sup>-gă xii-güedé.

<sup>26</sup> Te cue téé xica cuu ndihí-gá ní cuñúhu vîhi-gá-güedé sá dúcá<sup>n</sup> ñí cáhá<sup>n</sup>-gá, te ní ngüíta-güedé xitnàha-güedé:

—¿Te yoo sa ndacu naníhí tãhú te núú duca<sup>n</sup> vâi<sup>n</sup>? —càchí-güedé xitnàha-güedé.



27 Te Jèsús ní xíndéhé vǎha ñaha-gǎ xii-güedé, te ní xáha<sup>n</sup>-gǎ:

—Nchaa ñáyiú ñuyíú-a chi vá ndácü-yu ná cadá-yu nàcuáa ndíhu ndaha ñàha Yá Ndiöxí xii-yu, dico mee-gǎ chi ndacu-gǎ ndíhu ndaha ñàha-gǎ xii-yu, chi nchaandi túhú sǎ vǎha ndacu-gǎ quidé-gǎ —càchí-gǎ xǎha<sup>n</sup>-gǎ xii-güedé.

28 Te té Pèlú ní xáha<sup>n</sup>-dǎ xii-gǎ:

—Nchúhú ní dándöo-ndí nchaandi túhú sǎ ndécú ndíhi-ndí te ní tuha ñaha-ndí xii-n —càchí-dé xǎha<sup>n</sup>-dǎ xii-gǎ.

29 Te Jèsús ní xáha<sup>n</sup>-gǎ xii-dé:

—Na càchí tnúhu ndáá-í xii-ndo sǎ ncháá ñáyiú na dándöo vehe-xi, àdi ñaní-xi, cúha-xi, tǎtá-xi, nǎná-xi, déhe-xi, àdi ñuhu-xi, te núu duca<sup>n</sup> na càdá-yu sǎ cuendá-í ndíhi sǎ cuendá tnúhu-í, 30 te ío-gǎ cuéhé sǎ cuǎñaha Yá Ndiöxí cundecu ndíhi-yu, chi níhi-yu vehé-yu, ñuhú-yu, ñaní-yu, cúha-yu, nǎná-yu, déhe-yu, te ñá díú-ní sǎ nchàa xǎ<sup>n</sup> níhi-yu cundecu ndíhi-yu, chi tnàhá nduu táhü-yu cundecu ndíhi ñàhá-yu xii-í ni caa ni quíhí<sup>n</sup> ná sǎá nduu. Dico díhna-gǎ ndoho tnahá-yu núu ñuyíú-a sǎ cuendá-í. 31 Te dava ñáyiú cùnnuu ndecu ichi Yá Ndiöxí vitna, ñáyiú-á<sup>n</sup> sǎá nduu te vá ío-gǎ cunúú-yu dàtná cùnúú-yu vitna, te dava ñáyiú nchícú<sup>n</sup> ñá túú cùnnuu vitna ñáyiú-á<sup>n</sup> sǎá nduu te ío cunúú-yu —càchí-gǎ xǎha<sup>n</sup>-gǎ xii-güedé.

*Jèsús càhá<sup>n</sup> tucu-gǎ sǎ cáhni ñàha-güedé xii-gǎ*

*(Mt. 20:17-19; Lc. 18:31-34)*

32 Te ñuhu Jesús ichi ndíhi cue téé xica cuu ndíhi-gǎ cuásaá ndíhi ñaha-gǎ xii-güedé ñuu Jerusálén, te yòdo nuu-gǎ núu-güedé cuásaá. Te cue téé-á<sup>n</sup> xícuñúhu-güedé sǎ dúcá<sup>n</sup> cuǎhá<sup>n</sup>-gǎ ñuu Jerusálén, te dava cue ñáyiú xínchícú<sup>n</sup> xiyúhú-yu. Te ní taudí<sup>n</sup>-gǎ ndí ùxúú cue téé xica cuu ndíhi-gǎ, te ní ngúíta-gǎ cání-gǎ cuendú núu-güedé nchaa nàcuáa yáha-gǎ. 33 Te xǎha<sup>n</sup>-gǎ xii-güedé:

—Vitna ñuhu-o ichi cuásaá-ó ñuu Jerusálén, te yáca<sup>n</sup> cuáha cuendá ñàhá-güedé xii yúhú Téé cùu ñaní tnàhá-ndó nchàa-ndo núu cuè téé cùu dútú cùnùu, ndíhi núu cuè téé dàcuaha ñaha xii ñáyiú nchaa tnúhu ní chídó tnùní ndí Moisés. Te díu cue

téé-á<sup>n</sup> cǔñaha-güedé xii dava-gǎ cue téé sǎ cáhni ñàha-güedé xii-í, te cuáha cuendá ñàhá-güedé xii-í núu cuè téé ñá túú cùu cue téé israél. 34 Te cue téé-á<sup>n</sup> cudíquí ndéé ñàhá-güedé xii-í, te caniha-güedé ndíhi ñíi, te tíú díí ñàhá-güedé, te cahni ñaha-güedé xii-í dico nduu úní sǎ cùú-í te ndoto-í —càchí-gǎ xǎha<sup>n</sup>-gǎ xii-güedé.

*Té Jàcobó ndíhi té Juáá càhá<sup>n</sup> ndàhú-güedé núu Jèsús sǎ cadá-gǎ ñ<sup>n</sup> sǎ cuíní-güedé (Mt. 20:20-28)*

35 Te cue déhe té Zebèdeú té Jàcobó ndíhi té Juáá ní quexìo-güedé núu Jèsús, te xǎha<sup>n</sup>-güedé xii-gǎ:

—Mèstrú, véxi-ndí càhá<sup>n</sup> ndàhú-ndí núu-n núu vá cündèe iní-n càda-n ñ<sup>n</sup> sǎ cuíní-ndí —càchí-güedé xǎha<sup>n</sup>-güedé xii-gǎ.

36 Te Jèsús ní xíca<sup>n</sup> tnúhú-gǎ núu-güedé, te xǎha<sup>n</sup>-gǎ:

—¿Ná cúú sǎ cuíní-ndó càda-í-í? —càchí-gǎ xǎha<sup>n</sup>-gǎ xii-güedé.

37 Te ní xáha<sup>n</sup>-güedé xii-gǎ:

—Cuíní-ndí sǎ òré ná sǎá nduu cündecu-n núu táxí tnùní-n, te ñ<sup>n</sup>-ndí cunucóo-ndí xio cùha-n te ñ<sup>n</sup>-ndí cunucóo-ndí xio dàtni-n —càchí-güedé xǎha<sup>n</sup>-güedé xii-gǎ.

38 Te Jèsús ní xáha<sup>n</sup>-gǎ xii-güedé:

—Nchòhó, ñá túú cùnuni iní-ndó nàcuáa nduu sǎ xíca<sup>n</sup>-ndó núu-í. ¿Te náa cundee iní-ndó dándöho ñaha ñáyiú xii-ndo dàtná dandöho ñàhá-yu xii-í, te cundee tùcu iní-ndó càhni ñàhá-yu xii-ndo dàtná cahni ñàhá-yu xii-í-á<sup>n</sup>? —càchí-gǎ xǎha<sup>n</sup>-gǎ xii-güedé.

39 Te ní xáha<sup>n</sup>-güedé xii-gǎ:

—Cundee iní-ndí yáha-ndí nchaa nàcuáa càhá<sup>n</sup>-n-á<sup>n</sup> —càchí-güedé xǎha<sup>n</sup>-güedé xii-gǎ.

Te Jèsús ní xáha<sup>n</sup>-gǎ xii-güedé:

—Ndáá sǎ cündèe iní-ndó ndòho-ndo nchaa nàcuáa ndoho-í, te cundee tùcu iní-ndó càhni ñàhá-yu xii-ndo, chi yúhú cahni ñàhá-yu xii-í. 40 Dico sǎ dúcá<sup>n</sup> cuíní-ndó sǎ ñ<sup>n</sup>-ndó cùnucóo-ndo xio cuhá-í te ñ<sup>n</sup>-ndo cùnucóo-ndo xio datni-í, te xǎ<sup>n</sup> chi ñá díú yúhú tàú-í càchí-í te núu sǎ cúú cùnucóo-ndo àdi sǎ vá cúú cùnucóo-ndo, chi mee Tǎtà-í Dútú Ndiöxí càchí-gǎ te núu ná cúú ñáyiú nduu táhú cunucóo díñi-í dàvá-á<sup>n</sup> —càchí-gǎ xǎha<sup>n</sup>-gǎ xii-güedé.

41 Te òré ní níhí ùxí-gá cue téé xica cuu ndihí-gá tnúhu nàcuáa ndùu sá cuíní té Jàcobó ndihí ñaní-dé té Juáá, te ní cudéé<sup>n</sup>-güedé núú cuè téé úú-á<sup>n</sup>. 42 Te Jèsús ní cana-gá nchaa cue téé xica cuu ndihí-gá-á<sup>n</sup>, te ní xáha<sup>n</sup>-gã xii-güedé:

—Nchòhó xìní-ndó sã cuè téé yìndaha ì<sup>n</sup> nació<sup>n</sup> quide-güedé sá ìo cùnùu-güedé, te nchaa dava-gá cue téé cùndihí-güedé tnàhá-güedé quidé-güedé sá ìo cùnùu-güedé. 43 Dico nchòhó chi vá dúcá<sup>n</sup> càda-ndo. Chi núu dava-ndo cuíní-ndó cùnùu-ndo te xini ñuhu-xi cunu cuechi núú tnàhá-ndó te vá cáda-ndó sã cùnùu-ndo. 44 Te núu dava-ndo cuíní-ndó quène cáva-ndo, te cuu-ndo dàtná cue ñáyiú ñá túú tnàhí dàñá quee núú chíú<sup>n</sup> pàtróón-xi cunu cuechi núú tnàhá-ndó. 45 Te yúhú Téé cùu ñaní tnàhá-ndó nchaa-ndo, chi ñá túú vèxi-í sá cúnú cuèchi ñáyiú núú-í, chi véxi-í sá cúnú cuèchi-í núú-yu. Te cuú-í ñuyíú-a cuèndá vèi-yu cácu nihnu núú ùhú núú ndàhú — càchí-gá xáha<sup>n</sup>-gã xii-güedé.

*Jèsús quidé tãtna-gá ì<sup>n</sup> téé cuàá nání-dé Bartimeú*  
(Mt. 20:29-34; Lc. 18:35-43)

46 Te Jèsús ní quexìo-gá ñuú Jericó ndihí cue téé xica cuu ndihí-gá, te ní yáha-gá ndihí-güedé ichi xití ñuú-á<sup>n</sup>, te ìo cuéhé ñáyiú nchìcú<sup>n</sup> ñáhá xii-gá cuáhá<sup>n</sup> te ì<sup>n</sup> xio yuhu ìchi sá ní quee xití ñuú-á<sup>n</sup> núcõo ì<sup>n</sup> téé cuàá nání-dé Bartimeú, te tãtá-dé nání-dé Tìmeú, te téé-á<sup>n</sup> núcõo-dé yuhu ìchi-á<sup>n</sup> xicá<sup>n</sup> ndàhú-dé. 47 Te téé-á<sup>n</sup> ní cutnùní iní-dé sá Jèsús téé ñuú Nazàrét ñúhú-dé ichi, te ní ngüíta-dé níhi càhá<sup>n</sup>-dé, te xáha<sup>n</sup>-dè xii-gá:

—Jèsús, ñaní tnàhá ndíi Dàvíí, cundàhú iní ñáhá xii-í! —càchí-dé xáha<sup>n</sup>-dè xii-gá.

48 Te vèi ñáyiú tènáá ñáhã-yu xii-dé, te xáhã<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dé xáha<sup>n</sup>-dè xii-gá:

—Jèsús, ñaní tnàhá ndíi Dàvíí cundàhú iní ñáhá xii-í! —càchí-dé xáha<sup>n</sup>-dè xii-gá.

49 Te Jèsús ní ngüíñí-gá te ní xáha<sup>n</sup>-gã xii cue téé ndihí-gá:

—Chí cuãnguaca téé cuàá-ã<sup>n</sup> can-deca-ndo-dé quixi iha —càchí-gá xáha<sup>n</sup>-gã.

Te cue téé-á<sup>n</sup> ní xica-güedé cuãnguaca-güedé téé cuàá-á<sup>n</sup>, te òré ní quexìo-güedé núú-dé te ní xáha<sup>n</sup>-güedé xii-dé:

—Ndacuíñí te vá ndihú-gá iní-n, na quihí<sup>n</sup>-ó chi càna ñaha Jèsús xii-n — càchí-güedé xáha<sup>n</sup>-güedé xii-dé.

50 Te téé-á<sup>n</sup> ní xócání-dé dóo ndíxí-dé, te ndíhi-ni ní ndacuíñí-dé te ní xica-dé cuáhá<sup>n</sup>-dé núú Jèsús. 51 Te òré ní quexìo-dé te ní xicá<sup>n</sup> tnúhú-gã núú-dé, te xáha<sup>n</sup>-gã xii-dé:

—¿Ná cuíní-n càda ñaha-í xii-n-i? — càchí-gá xáha<sup>n</sup>-gã xii-dé.

Te téé cuàá-á<sup>n</sup> ní xáha<sup>n</sup>-dè xii-gá:

—Mèstrú, cuíní-í cada tãtna-n núú-í cuèndá cundehe-í —càchí-dé xáha<sup>n</sup>-dè xii-gá.

52 Te Jèsús ní xáha<sup>n</sup>-gã xii-dé:

—Cuanùhú vitna, chi sa ní ndúha núú-n chi ní sándáá iní-n Yã Ndiõxí —càchí-gá xáha<sup>n</sup>-gã xii-dé.

Te òré-ni-á<sup>n</sup> ní ndúha núú-dé te nchìcú<sup>n</sup>-dé Jèsús cuáhá<sup>n</sup>.

## 11

*Jèsús cuãnguahu-gá ñuú Jerusàlén*

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gá ndihí cue téé xica cuu ndihí-gá ñuú Bètaniá, ndihí ñuú Bètfaqé, te xíá<sup>n</sup> cáá yùcu nani Olívú, te yatni víí-nã xíá<sup>n</sup> cáá ñuú Jerusàlén. Te Jèsús ní cana-gá úú-ni tnàhá cue téé xica cuu ndihí-gá. 2 Te ní xáha<sup>n</sup>-gã xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te naníhí-ndó ì<sup>n</sup> búrru ndètní<sup>n</sup>-di, te vátá yõo ì<sup>n</sup>-gá codo ñàha xii-di, te nandaxi-ndo-di te candeca-ndo-di quixi.

3 Te núu yoo na càcá<sup>n</sup> tnúhú núú-ndó nã cuèndá nándaxi-ndo-di, te cúñaha-ndo sã yúhú Yaá xicá cùu ndihí-ndo xini ñuhu-í-di, te na yáha canehe chiu<sup>n</sup>-í-di te ndíhi-ni nã tendaha-í-di, duha cúñaha-ndo —càchí-gá xáha<sup>n</sup>-gã xii-güedé.

4 Te cue téé-á<sup>n</sup> ní xica-güedé cuáhá<sup>n</sup>-güedé, te òré ní quexìo-güedé ñuú-á<sup>n</sup> te ní naníhí-güedé ì<sup>n</sup> búrru ndètní<sup>n</sup>-di ì<sup>n</sup> yutnu nihnu yatni ì<sup>n</sup> yuyehe vehe caa yatni yuhu ichi, te ní ngüíta-güedé nándaxi-güedé-di.

5 Te mei òré nándaxi-güedé-di ní quexìo

—¿Ná cuèndá nándaxi-ndo búrru-á<sup>n</sup>-i? — càchí-yu xáhã<sup>n</sup>-yu xii-güedé.

6 Te cue téé-án nǐ xáha<sup>n</sup>-güedě xií-yu nàcuáa ní xáha<sup>n</sup> Jèsús cúñaha-güedě. Te sátá dúcá<sup>n</sup> te ní dáñá-yu ndèca-güedé búrru-án cuáhá<sup>n</sup> núú ndécú Jèsús. 7 Te òré ní quexìo-güedé ndihì-di núú ndécú-gă, te ní sacá<sup>n</sup> ndodo-güedé dóo-güedě sátá-di, ní ngódó ñaha Jesús xii-di. 8 Te ío cuéhé ñáiyu ta sàcá<sup>n</sup>-yu dóo-yu ichi cuáhá<sup>n</sup>-gá cuendá núú dǒo-yu-án yáha-gá ndihì quiti yòdo-gá, te davá-yu xèhndé-yu ndaha yùtnu ta sacá<sup>n</sup>-yu cuáhá<sup>n</sup>.

9 Te nchaa ñáiyu yòdo nuu núú-gă ndihì nchaa ñáiyu nchícú<sup>n</sup> ndàa sátá-gă ní ngüita-yu níhi càhá<sup>n</sup>-yu, te càchí-yu:

—Ío càhnu cuu Yaá-a! ¡Te Yá Ndiöxí ná chindee ñaha-gá, chi diu-gá cúú-gă Yaá ní tendaha-gă véxi quide núú-gă! 10 ¡Te diu-ni Yaá-á cúú-gă Yaá véxi quindaha ñaha xii-o datná ní xóo cada ndíi Dàvíl! ¡Te ndéé nchaa sá ío andíu na càchí-xi sá ío càhnu cuu-gă! —duha càchí-yu.

11 Te Jèsús ní quexìo-gă ñuú Jerusalén, te cuánguihu-gá xití veñúhu càhnu sá ío cùnunu, te ní xíndéhé vâha-gá nchaa sá ndécú xití veñúhu-án. Te sátá dúcá<sup>n</sup> te ní ndee-gá cuáhá<sup>n</sup>-gă ñuú Bètaniá ndihì ndi ùxúú cue téé xica cuu ndihì-gă chi sa ní cuaa.

*Jèsús xâha<sup>n</sup>-gă xii yutnu ngüxí sá vă cúú<sup>n</sup>-gă sávidí-xi  
(Mt. 21:18-19)*

12 Te nduu tnéé-án nǐ quee Jèsús ñuú Bètaniá ndihì cue téé xica cuu ndihì-gă, te ichi ñùhu-gă ní xíhí-gă docó. 13 Te xica nǐ xiní-gă nútnǐ ñ<sup>n</sup> yutnu ngüxí, te ní xica-gă cuándéhé-gă ñuu ndéé sávidí-xi te ñá túú nă ndéé, chi mee-ni ndàha-xi ndéé chi ñá díú yóo sácundeé sávidí-xi. 14 Te Jèsús ní xáha<sup>n</sup>-gă xii yutnu ngüxí-án:

—Vitna te vá yóo ñ<sup>n</sup>-gă caxi sávidí-n, chi vá cúú<sup>n</sup>-gă —càchí-gă xâha<sup>n</sup>-gă xii yutnu ngüxí-án.

Te cue téé xica cuu ndihì-gă ní tecú dóho-güedé nàcuáa ní xáha<sup>n</sup>-gă xii yutnu ngüxí-án.

*Jèsús ñá túú tnàhá iní-gă nàcuáa quide ñáiyu xití veñúhu*

*(Mt. 21:12-17; Lc. 19:45-48; Jn. 2:13-22)*

15 Te Jèsús ní quexìo tucu-gă ndihì cue téé xica cuu ndihì-gă ñuú Jerusalén, te

cuánguihu tucu-gă xití veñúhu càhnu sá ío cùnunu, te xití veñúhu-án xíndecu cue ñáiyu quide ndáhú nádìcò-yu, ndihì cue ñáiyu xísaa<sup>n</sup>. Te ncháa-yu ní queñuhu ñaha Jèsús xií-yu quehé, te ní dándüá-gă mèsá cue ñáiyu dàma díhú<sup>n</sup>, ndihì nchaa xilé sácóo nchihì cue ñáiyu dico lómá xíndecu xití veñúhu-án. 16 Te ñá túú tnàhí-gă ní dàña-gă yáha cue ñáiyu ndihì nchaa sá nchídö-yu ichi xití veñúhu-án. 17 Te ní xáha<sup>n</sup>-gă xií-yu:

—Núú tütú Yă Ndiöxí càhá<sup>n</sup>-xi nàcuáa ní càhá<sup>n</sup>-gă, te ní cachí-gă: “Vehe-í cúú-xi vèhe núú tàcá ñáiyu ñihí ñuyíú càhá<sup>n</sup> ndihì ñàhá-yu xii-í”, duha ní càhá<sup>n</sup>-gă càchí-xi núú tütú-gă. Dico nchòhó quidé-ndó vèhe-gă vehe ñadúhú —càchí-gă xâha<sup>n</sup>-gă xií-yu.

18 Te nchaa dütú cùnunu, ndihì nchaa cue téé dàcuaha ñaha xií-yu nchaa tnúhu ní chídó tnùnì ndíi Moisés ní tecú dóho-güedé nàcuáa ní càhá<sup>n</sup>-gă te ní ngüita-güedé ndúcú-güedě nàcuáa cada-güedé cahni ñaha-güedě xii-gă, chi yùhú-güedé sá ío cunuu-gă, te duca<sup>n</sup> chi nchaa ñáiyu ío cùñúhu-yu nchaa tnúhu càhá<sup>n</sup>-gă. 19 Te òré sa ní cuaa cuí-nă, te ní quee tucu Jèsús ndihì cue téé xica cuu ndihì-gă ñuú Jerusalén cuáhá<sup>n</sup>-gă ndihì-güedé ingá xichi.

*Ní yíchí yutnu ngüxí  
(Mt. 21:20-22)*

20 Te nduu tnéé nehé-ni ní yáha tucu Jèsús ndihì cue téé xica cuu ndihì-gă núú níhnú yùtnu ngüxí, te ní xiní-güedé sa ní yíchí ñihí ndéé yóho-xi. 21 Te té Pèlú ní ndacu iní-dé nàcuáa ní xáha<sup>n</sup> Jèsús xii yutnu ngüxí-án, te ní xáha<sup>n</sup>-dě xii-gă:

—Mèstrú, cundehe nă ní yíchí yutnu ngüxí sá nǐ xáha<sup>n</sup>-n să vă cúú<sup>n</sup>-gă sávidí-xi —càchí-dé xâha<sup>n</sup>-dě xii-gă.

22 Te Jèsús ní xáha<sup>n</sup>-gă xii-güedé:

—Quindáa ndisa iní-ndó Yă Ndiöxí. 23 Te na càchí tnúhu ndáá-í xii-ndo să ñuu nchòhó cúñaha-ndo xii tìndúú-a xocuíñí-xi núú ndécú-xí, te quíhí<sup>n</sup>-xi quée-xi xití làmár. Te diu duca<sup>n</sup> càda-xi te núu nchòhó vá cání ñ<sup>n</sup> caní úú iní-ndó, te quindáa iní-ndó să dúcá<sup>n</sup> càda-xi. 24 Te xǎ<sup>n</sup> ñuu càchí tnúhu-í xii-ndo să nchàa sá ná càcá<sup>n</sup>-ndó ñuu Yă Ndiöxí òré càhá<sup>n</sup> ndihì-ndo-gă, te taxi-gă te núu nchòhó sàndáa ndisa iní-ndó să



táxi-gã sá xicá<sup>n</sup>-ndó nũú-gã. <sup>25</sup> Te òré càhá<sup>n</sup> ndihí-ndo Yã Ndiõxí te dandàcu iní-ndó te núu ndècu ñáyiú ñá túú cùu vaha iní ñáhá xii-ndo, te cada càhnu iní-ndõ-yu cuendá duca<sup>n</sup> càda cahnu iní ñáhá Tãtá-ndó Dũtú Ndiõxí Yaá ndécú àndiu xii-ndo cuendá nchaa sá ñà túú vaha quide-ndo. <sup>26</sup> Dico núu nchòhó vá cadá càhnu iní-ndó sã quidé ñàha tnahá ñáyiú-ndo xii-ndo, te ni Tãtá-ndó Dũtú Ndiõxí vá cadá càhnu iní ñáhá-gã xii-ndo cuendá nchaa sá ñà túú vaha quide-ndo —cachí-gã xãha<sup>n</sup>-gã xii-güedé.

*Jèsús ndécú ndihí-gã tnúhu ndee iní  
(Mt. 21:23-27; Lc. 20:1-8)*

<sup>27</sup> Te Jèsús ní ndexìo tucu-gã ñũú Jerusàlén ndihí cue tée xica cuu ndihí-gã, te cuánguìhu tucu-gã xití veñúhu càhnu sá ìo cùnũu ndihí-güedé. Te xití veñúhu-án yíhí-gã ní quexìo cue dútú cùnũu ndihí cue tée dàcuaha ñaha xii ñáyiú nchaa tnúhu ní chídó tnùnì ndí Moisés, ndihí cue tée cùu sacuéhé nũú ñáyiú isràél. <sup>28</sup> Te xãha<sup>n</sup>-güedé xii-gã:

—Cuìní-ndí cachí tnúhu-n xii-ndí nása ndũu tnúhu ndee iní ndécú ndihí-n núu quide-n nándi sá quidé-n, ¿te yoo duca<sup>n</sup> ní taxi tnúhu ndee iní-án xii-n-í? —cachí-güedé xãha<sup>n</sup>-güedé xii-gã.

<sup>29</sup> Te Jèsús ní xãha<sup>n</sup>-gã xii-güedé:

—Yúhú tnàhá-í cuìní-í cáca<sup>n</sup> tnúhu-í ñ<sup>n</sup> sá cáca<sup>n</sup> tnúhu-í núú-ndó te núu na càchí tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í. <sup>30</sup> Te chí càchí tnúhu xii-í yoo ní táuchíú<sup>n</sup> ñí dácúándüte ndí Juàá ñáyiú, ¿Yá Ndiõxí à<sup>n</sup> cuè tée ñuyúú-a ní táuchíú<sup>n</sup> dùca<sup>n</sup> ní quide ndí? Te chí càchí tnúhu —cachí-gã xãha<sup>n</sup>-gã xii-güedé.

<sup>31</sup> Te ní ngüíta-güedé xítnàha-güedé:

—¿Nása cúñaha-o? Chi núu na cúñaha-o sã Yã Ndiõxí ní táuchíú<sup>n</sup> dùca<sup>n</sup> ní quide ndí Juàá ñá, te quesaha-dé: “¿Ná cuendá ñá túú ní sàndáá iní-ndó tnúhu ní cáhá<sup>n</sup> ndí vèi<sup>n</sup>?”; quesaha-dé. <sup>32</sup> Te ni vã cúú cúñaha-o sã cuè ñáyiú ñuyúú-a ní táuchíú<sup>n</sup> dùca<sup>n</sup> ní quide ndí Juàá —cachí-güedé xítnàha-güedé.

Te duca<sup>n</sup> ñí xítnàha-güedé chí ñá túú ní cùnũu iní-güedé nása cúñaha-güedé xii-gã, chí xiyùhú-güedé cue ñáyiú chí nchaa ñáyiú-án ñí cutnùnì ndáá iní-yu sá

Yã Ndiõxí ní táuchíú<sup>n</sup>-gã duca<sup>n</sup> ñí quide ndí Juàá. <sup>33</sup> Te ní xãha<sup>n</sup>-güedé xii Jèsús:

—Ñá túú xìnì-ndí yoo ní táuchíú<sup>n</sup> dùca<sup>n</sup> ní dácúándüte ndí Juàá ñáyiú —cachí-güedé xãha<sup>n</sup>-güedé xii-gã.

Te Jèsús ní xãha<sup>n</sup>-gã xii-güedé:

—Te núu duca<sup>n</sup> te ni yùhú vá càchí tnúhu-í xii-ndo yòo ní taxi tnúhu ndee iní duha quide-í —cachí-gã xãha<sup>n</sup>-gã xii-güedé.

## 12

*Cuendá cue tée cuihna iní-xi  
(Mt. 21:33-46; Lc. 20:9-19)*

<sup>1</sup> Te Jèsús ní ngüíta-gã cánì-gã ñ<sup>n</sup> cuendú núú ñáyiú nàcuáa tecú tnùnì-yu tnúhu-gã, te xãha<sup>n</sup>-gã xii-yu:

—Ñ<sup>n</sup> tée ní nacúxi-dé mee-ni yòho yaha stilé núú ñúhú-dé, te ní chidoco-dé cuendá sá vã cúú dàñú, te ní cadúha-dé núú quíhí-dé ndéhé yoho yaha stilé-án òré ná cùu, te ní cadúha-dé ñ<sup>n</sup> xító dùcú<sup>n</sup> núú cáúndòdo cue tée coto yoho yaha stilé-án.

“Te ní sáá ñ<sup>n</sup> nduu quèe-dé quíngaca cuu xica-dé vèi nduu, te ní dándòo ndaha-dé sá ñí xitu-dé-án xii ñ<sup>n</sup> ùú cue tée càhá<sup>n</sup> ndihí-dé cuendá cada chi<sup>n</sup>-güedé, te ní ndatnúhu-güedé sá òré ná cúú te cuu cuendá dava-güedé te duca<sup>n</sup> te ní quee-dé cuáhán-dé. <sup>2</sup> Te sáta ñí sáá nduu ñí cuu ndéhé yoho yaha stilé sá ñí xitu-dé-án, te ní xãha<sup>n</sup>-dè xii ñ<sup>n</sup> tée xínu cuechi núú-dé: “Cuáhán cáca<sup>n</sup>-n sá cúú cuendá-í núú cuè tée ní dándòo ndàha-í nchaa yoho yaha stilé sá ñí xitu-í-án”, càchí-dé xãha<sup>n</sup>-dè. Te tée xínu cuechi-án ñí xica-dé cuáhán-dé. <sup>3</sup> Te cue tée-án ñí tñii-güedé tée xínu cuechi-án, te ní caniha-güedé xii-dé, te dàtnùnì ní nacúí<sup>n</sup> ñáhá-güedé, te ñá túú tnàhí ná ní sãñaha-güedé. <sup>4</sup> Te tée cùu xítóhó yoho yaha stilé-án ñí tendaha tùcu-dé íngá tée xínu cuechi núú-dé cuáhán-dé. Te òré ní quexìo tée xínu cuechi-án te cue tée-án ñí sáha ñaha-güedé yúú xii-dé, te ní táhú-güedé díquí-dé, te ní xícuèhé ñáhá-güedé xii-dé. <sup>5</sup> Te tée cùu xítóhó nchaa yoho yaha stilé-án ñí tendaha tùcu-dé íngá tée xínu cuechi núú-dé cuáhán-dé núú cuè tée-án, dico tée-án òré ní quexìo-dé te ní sahani ñaha-güedé xii-dé. Te tée cùu xítóhó nchaa yoho yaha stilé-án ñí tendaha-dé vèi-gã cue tée xínu cuechi núú-dé cuáhán<sup>n</sup>



ngácá<sup>n</sup>-güedé sá cúú cuendá-dé ní cùu dico diu-ni duca<sup>n</sup> ñi quide ñaha tùcu cue té ndèé nchaa yoho yàha stilé-á<sup>n</sup> xii-güedé, chi dava-güedé ní caniha-güedé te dava-güedé ní sahani ñaha-güedé.

6 Te téé cùu xítóhó nchaa yoho yàha stilé-á<sup>n</sup> ndécú ñ<sup>n</sup>dii-ná téé tendaha-dé quíhí<sup>n</sup> núú cuè téé ní dándóo ndaha-dé sá ñi xitu-dé-á<sup>n</sup>, te téé tendaha-dé-á<sup>n</sup> cúú-dé déhe ducu<sup>n</sup>-dé, te ío cùu iní ñáhá-dé. Te ní sani iní-dé: “Váha-gá ñu tendaha-í déhe-í-a núhú-dé, chi òré quini ñáhá-güedé xii-dé te cànehe-güedé sá yíñuhu núú-dé”, duha ní sani iní-dé. Te duca<sup>n</sup> te ní xáha<sup>n</sup>-dé xii déhe-dé-á<sup>n</sup> sá núhú-dé, te téé-á<sup>n</sup> cuñuhú-dé cuáhá<sup>n</sup> ngácá<sup>n</sup>-dé sá cúú cuendá tátá-dé núú cuè téé-á<sup>n</sup>. 7 Dico òré ní xini cue téé quide chiu<sup>n</sup>-á<sup>n</sup> déhe téé cùu xítóhó nchaa yoho yàha stilé-á<sup>n</sup>, te ní xítàha-güedé: “Téé-á<sup>n</sup> téé véxi nduu táhú ñuhu-a ndihi sá cáá núú-xi, dico cahni-o-dé te mee-o ndùu táhú-ó sá ndúú táhú-dé”, duha ní xítàha-güedé. 8 Te ní tñi-güedé téé-á<sup>n</sup>, te ní sahani ñaha-güedé, te ní dáquéné-güedé yiqui cùñú-dé ñ<sup>n</sup> xio yuhu ñuhu núú cáá yòho yaha stilé-á<sup>n</sup> — duha cuáhá<sup>n</sup> cuendú ní cani Jèsús núú-yu.

9 Te Jèsús ní xáha<sup>n</sup> tùcu-gá xií-yu:

—¿Te nchòhó sa cùtnuní iní-ndó nàcuáa cada xítóhó ñuhu-á<sup>n</sup> á<sup>n</sup>? Chi núhú-dé te cahni-dé cue téé-á<sup>n</sup> te dándóo ndaha-dé ñuhu-dé xii cue téé cùtnuní iní-dé cada ndáá —càchí-gá xàha<sup>n</sup>-gá xií-yu.

10 Te xàha<sup>n</sup> tùcu-gá xií-yu:

—Te nchòhó, náa ñá túú dàcuaha-ndo núú tütú Yá Ndiòxí núú càchí-xi:

Yúú sá ñi dáquéé tñí cue téé dàcaa vehe, ní cuu-xi yúú cúnùu vitna.

11 Chi mee Yá Ndiòxí duca<sup>n</sup> ñi càchí-gá cundu, te cùu-xi ñ<sup>n</sup> sá ío cùñúhu-o vitna. Duha càchí-xi núú tütú-gá —càchí Jèsús xàha<sup>n</sup>-gá xií-yu.

12 Te cue téé ní xíndedóho nàcuáa ndùu tñuhu ní cáhá<sup>n</sup>-gá ní cuini-güedé tñi ñaha-güedé xii-gá ní cùu, chi ní cutnùní iní-güedé sá cuendá-güedé ní cáhá<sup>n</sup>-gá, dico ní yuhú-güedé tñi ñaha-güedé xii-gá cuendá sá ío vèi ñáiyu, te ná ío ná cada ñáhá-yu xii-güedé ní sani iní-güedé, te ní xica-güedé cuáhá<sup>n</sup>-güedé.

### *Cuendá impuèstú*

(Mt. 22:15-22; Lc. 20:20-26)

13 Te sátá ñi xica-güedé cuáhá<sup>n</sup>-güedé, te ní tendaha-güedé ñ<sup>n</sup> úú cue téé cùu fariséú, ndihi ñ<sup>n</sup> úú cue téé cùndihi té Hèrodés cuáhá<sup>n</sup>-güedé núú ndécú Jèsús ndúcú-güedé nàcuáa cada-güedé daticánuu ñaha-güedé xii-gá núú tñuhu càhá<sup>n</sup>-gá. 14 Te cue téé-á<sup>n</sup> ñi quexio-güedé núú Jèsús, te xàha<sup>n</sup>-güedé xii-gá:

—Mèstrú, cùtnuní iní-ndí sá ío ndáá càhá<sup>n</sup>-n, te ñá túú quide cuendá-n nàcuáa càhá<sup>n</sup> ñáiyu, te cuèi ndédani càá-yu ñ<sup>n</sup>-ni càhá<sup>n</sup>-n ndihí-yu chi ñá túú quide cuendá-n cuèi ná ñáiyu cùú-yu, te càhá<sup>n</sup> ndáá-n nàcuáa càhá<sup>n</sup> Yá Ndiòxí cundecu-o ñuyíu-a. Te cachí tñuhu xii-ndí ñu váha-ni quide-ndí sá chàhu-ndí té Cèsár téé ío cùnuu cuendá impuèstú á<sup>n</sup> ñáhá —càchí-güedé xàha<sup>n</sup>-güedé xii-gá.

15 Dico Jèsús ní cutnùní iní-gá sá xító ndèé ñáhá-güedé xii-gá, núú ní xáha<sup>n</sup>-gá xii-güedé:

—¿Ná cuendá duca<sup>n</sup> xító ndeé ñáhá-ndó xii-í? Chí dánèhé ñáhá xii-í ñ<sup>n</sup> díhú<sup>n</sup> sá chàhu-ndo cuendá impuèstú te núú nása càa —cachí-gá xàha<sup>n</sup>-gá xii-güedé.

16 Te cue téé-á<sup>n</sup> ñi dánèhé ñáhá-güedé xii-gá ñ<sup>n</sup> díhú<sup>n</sup> sá chàhu-güedé cuendá impuèstú. Te Jèsús ní xáha<sup>n</sup>-gá xii-güedé:

—Chí càchí tñuhu xii-í ñu yoo núú-xi ndèé ndihi yoo diu-xi ndeé —càchí-gá xàha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tñé Cèsár ndèé ndihi diu-dé —càchí-güedé xàha<sup>n</sup>-güedé xii-gá.

17 Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí nàcuáha té Cèsár sá cúú cuendá-dé, te sá cúú cuendá méé Yá Ndiòxí te xí<sup>n</sup> nacuáha-ndo-gá —càchí-gá xàha<sup>n</sup>-gá xii-güedé.

Te cue téé-á<sup>n</sup> ío ní cuñúhu-güedé sá dúcá<sup>n</sup> ñi cáhá<sup>n</sup>-gá.

### *Cuendá cue ñáiyu ndoto*

(Mt. 22:23-33; Lc. 20:27-40)

18 Te sátá dúcá<sup>n</sup> te ní quexio ñ<sup>n</sup> úú cue téé cùu saducéú núú ndécú Jèsús, te cue téé-á<sup>n</sup> ñá túú sàndáá iní-güedé sá ndótó cuè ñáiyu ní xihí, te ní xáha<sup>n</sup>-güedé xii-gá:

19 —Mèstrú, ndíi Moisés càchí ndíi núú tütú ndíi ndècu vitna sá nõu ì<sup>n</sup> téé na cùú-dé te quendóo ñadìhí-dé, te núú ñá túú ní xõo déhe-dé ndíhi ñadìhí-dé-á<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuendá coo déhe-dé ndíhi-a<sup>n</sup> cuendá téé ní xíhí-á<sup>n</sup>. 20 Te ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadìhí-dé, te ñá túú ní cùdí-dé cundecu-dé chi ní xíhí-dé, te ni ì<sup>n</sup> déhe-dé ñá túú ní xõo ndíhi ñadìhí-dé. 21 Te téé cùu uú ní naquehe<sup>n</sup>-dé ñaha ní quendóo quèé-á<sup>n</sup>, dico ní xíhí tucu-dé, te ni ì<sup>n</sup> tucu déhe-dé ñá túú ní xõo ndíhi ñaha-á<sup>n</sup>. Te ñi-<sup>n</sup> duca<sup>n</sup> ñi xíhí téé cùu uní. 22 Te ní xínu ndí úsá-güedé ní cándeca ñaha-güedé xii ñaha-á<sup>n</sup>, dico ni ì<sup>n</sup>-güedé ñá túú ní xõo déhe-güedé ndíhi-a<sup>n</sup>, te ní ndíhi-güedé ní xíhí te ndéé núú ñi ndíhi-ná ní xíhí tnàhá ñadìhí-á<sup>n</sup>. 23 Te na sáá nduu ndòto-güedé ndíhi ñaha-á<sup>n</sup>, ¿te ndèdacàa-güedé ñadìhí-güedé cuu-a<sup>n</sup>-i? Chi ndí úsá-güedé ní cándeca ñaha-güedé xii-a<sup>n</sup> —càchí-güedé xàha<sup>n</sup>-güedé xii-gá.

24 Te Jèsús ní xàha<sup>n</sup>-gá xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xíní-ndó nàcuáa càhá<sup>n</sup> Yá Ndiõxí núú tütú-gá, te ni ñá túú xíní-ndó sá díú-gá ndácú-gá quidé-gá nchaandi túhú sá vaha. 25 Te na càchí tnúhu-í xii-ndo sá òré ná sáá nduu ndòto nchaa ñáyiú ní xíhí, te dàvá-á<sup>n</sup> vã yõo-gá dasa<sup>n</sup> dèhe yoco-xi chi vá yõo-gá candeca tnàha, chi na ndòtó-yu te cuu-ná-yu dàtná cue espíritú xínú cuèchi núú Yá Ndiõxí. 26 Te núú nchòhó cuíní-ndó càhá<sup>n</sup>-ndó cuendá nchaa ñáyiú ndoto, te díhna-gá dacuàha-ndo nacuáa ní chídó tnùní ndíi Moisés núú tütú ndíi ni cùu. Chi ñi-<sup>n</sup> núú tütú ndíi càhá<sup>n</sup>-xi nàcuáa ní xàha<sup>n</sup> Yá Ndiõxí xii ndíi cútnàhá ní càhá<sup>n</sup> ndíhi ñaha-gá ì<sup>n</sup> xichi núú níhnú tnùtaú nchìcú<sup>n</sup> ñuhú. Te duha ní xàha<sup>n</sup>-gá xii ndíi: “Yúhú cùú-í Ndiõxí tẽ Àbrahám, ndíhi té Isàác, ndíhi té Jácób”, duha ní xàha<sup>n</sup> Yá Ndiõxí xii ndíi càchí-xi núú tütú ndíi. 27 Te Yá Ndiõxí ñá túú cùu-gá Ndiõxí cue ñáyiú ní xíhí, chi cùu-gá Ndiõxí cue ñáyiú xíndecu vívú, núú xíá<sup>n</sup> nchòhó ío xíta-ndo tnúhu càhá<sup>n</sup>-ndó. Te sá dúcá<sup>n</sup> ñi càhá<sup>n</sup>-gá cuendá cue téé-á<sup>n</sup>, te xíá<sup>n</sup> cútnùní sá cuèi ní xíhí-güedé sá cùú-xí tnàha ñáyiú-güedé, dico ndècu vívú-güedé

sá cùú-xí-gá —càchí-gá xàha<sup>n</sup>-gá xii-güedé.

*Tnúhu sá ño-gá cúnúu*

(Mt. 22:34-40)

28 Te tnàhá ì<sup>n</sup> téé dàcuaha ñaha xii ñáyiú nchaa tnúhu ní chídó tnùní ndíi Moisés ndèdóho-dé nchaa tnúhu càhá<sup>n</sup> Jèsús ndíhi cue téé cùu saducéú-á<sup>n</sup>, te ndèdóho-dé sá sùúní vaha ñíhí-gá tnúhu nàdanchocáva-gá. Te ní sàndehe yatni-dé núú-gá, te xàha<sup>n</sup>-dè xii-gá:

—Cachí tnúhu xii-í ndèdacàa tnúhu sá ñi càhá<sup>n</sup> Yá Ndiõxí ño-gá cúnúu cuu díhna —càchí-dé xàha<sup>n</sup>-dè xii-gá.

29 Te Jèsús ní xàha<sup>n</sup>-gá xii-dé:

—Duha càhá<sup>n</sup> tnúhu sá ño-gá cúnúu: “Nchòhó ñáyiú isràèl ío vaha chí cùndèdóho tnúhu-a. Ì<sup>n</sup>ndí díi-ni Yá Ndiõxí ndécú, te ñi-<sup>n</sup> ní-gá cùú-gá Ndiõxí-ó. 30 Te cuu iní-ndó Dütú Ndiõxí Yaá cùú Ndiõxí-ndó ñi yuhu ñi iní-ndó, te caní iní-ndó càda-ndo dàtná cuíní mée-gá, te mee-ni tnúhu vaha caní iní-ndó cuendá cuu víi cuu vaha-ndo núú-gá, te coo iní-ndó càda-ndo nacuáa cuu vaha iní-gá”, duha càhá<sup>n</sup> tnúhu sá ño-gá cúnúu. 31 Te duha càhá<sup>n</sup> tucu ingá tnúhu cùu uú sá ño cúnúu: “Cuu iní-ndó tnàha ñáyiú-ndo dàtná cùú iní-ndó mée-ndo”, duha càhá<sup>n</sup> tnúhu cùu uú-á<sup>n</sup>. Te úú duha-ni tnúhu-a cùu-xi tnúhu sá ño-gá cúnúu —cachí-gá xàha<sup>n</sup>-gá xii-dé.

32 Te téé dàcuaha ñaha xii ñáyiú nchaa tnúhu ní chídó tnùní ndíi Moisés ní xàha<sup>n</sup>-dè xii-gá:

—Mèstrú, vaha-ni càhá<sup>n</sup>-n chi ndáá sá ì<sup>n</sup>ndíi-ni Yá Ndiõxí ndécú, te ñá túú-gá ndèé ndécú ñngá ndiõxí. 33 Te dàtná ní cachí-n sá ñi yuhu ñi iní-ó cùu iní-ó Yá Ndiõxí, te caní iní-ó càda-o nacuáa cuu víi cuu vaha iní-gá te ío víi ío vaha cuu iní-ó dàtná cuíní mée-gá, te coo iní-ó càda-o nacuáa cuu vaha iní-gá, te cuu iní-ó cuè tnàha ñáyiú-o dàtná cùú iní-ó mée-o. Te nchaa xíá<sup>n</sup> ío-gá xíní ñuhú-xi cada-o dacúxí sá cuañaha-o quèti cahni-güedé te cáyú-di nduu táhú ñáhá Yá Ndiõxí, ndíhi dàcúxí nchàa dava-gá sá sãñaha-o nduu táhú-gá —càchí-dé xàha<sup>n</sup>-dè xii-gá.

34 Te sá dúcá<sup>n</sup> ío vaha nduu tnúhu ní càhá<sup>n</sup> téé-á<sup>n</sup>, núú ní xàha<sup>n</sup> Jèsús xii-dé:

—Luha-ná cùmãní xii-n te ndíhu ndaha ñaha Yá Ndiõxí —càchí-gá xàha<sup>n</sup>-gá xii-dé.

Te sá dúcá<sup>n</sup> ñí xáha<sup>n</sup>-gã xii téé-á<sup>n</sup>, núu vá yõo ñ<sup>n</sup>-gá ní cùyi ñágá tnúhu nducu tnúhu-yu núú-gã.

*Yoo cùu Xítóhó Jesucristú  
(Mt. 22:41-46; Lc. 20:41-44)*

<sup>35</sup> Te Jèsús yíhí-gã xití veñúhu càhnu sá ño cùnnuu danehé-gá ñáyíu, te xáha<sup>n</sup>-gã xií-yu:

—Cue téé dàcuaha ñaha xii ñáyíu nchaa tnúhu ní chídó tnùní ndíi Moisés cächí-güedé sá Cristú Yaá tendaha Yã Ndiõxí quixi ñuyú-a cùu-gá déhe ndíi Dàvíí, te ndíi-á<sup>n</sup> ñí cunaha vîhi ní xíhí ndíi. ¿Te ná cuendá duca<sup>n</sup> càhá<sup>n</sup>-güedé? <sup>36</sup> Te mee ndíi Dàvíí-á<sup>n</sup> ñí dácáhú ñí ñáhá Espíritú Yã Ndiõxí xii ndíi nàcuáa càhá<sup>n</sup> ndíi, te duha ní cachí ndíi:

Dútú Ndiõxí ní xáha<sup>n</sup>-gã xii Yaá cúu Xítóhó-í:  
“Ngóo xio cùha-í,  
te yúhú cada-í te nchaa sá cúu ùhú ñí ñáhá xii-n canehe-xi sá yíñúhu núú-n.”

Duha ní xáha<sup>n</sup> Dútú Ndiõxí xii Yaá cúu Xítóhó-í.

Duha ní cachí ndíi. <sup>37</sup> ¿Te nása cùu Cristú déhe ndíi Dàvíí, te mee ndíi ní cachí ndíi sá cúu-gã Xítóhó ndíi? —cächí Jèsús xáha<sup>n</sup>-gã xií-yu.

Te ío cuéhé ñáyíu ní xíndedóho nchaa tnúhu ní càhá<sup>n</sup>-gá, te ío ní cudíí ñí-yu ní xíndedóho ñáhá-yu xii-gá.

*Jèsús càhá<sup>n</sup>-gá cuendá cue téé dàcuaha ñaha xii ñáyíu nchaa tnúhu ní chídó tnùní ndíi Moisés*

*(Mt. 23:1-36; Lc. 11:37-54; 20:45-47)*

<sup>38</sup> Te òré dánèhé ñáhá Jèsús xii cue ñáyíu, te xáha<sup>n</sup>-gã xií-yu:

—Cada cuendá-ndó vã cadá-ndó dàtná quidé cué téé dàcuaha ñaha xii ñáyíu nchaa tnúhu ní chídó tnùní ndíi Moisés, chi cue téé-á<sup>n</sup> tnàhá ñí-güedé cuhnu-güedé dóo nání sã sácúhnu cue téé cùnnuu-gá te cuení-güedé sá méé-ní ndíi tnúhu yíñúhu càhá<sup>n</sup> ndíi ñaha ñáyíu xii-güedé nchaa núu xíca cùu-güedé. <sup>39</sup> Te nàcáxi-güedé xilé sácóo nchíhi cue téé cùnnuu-gá xití veñúhu sácóo nchíhi-güedé. Te duca<sup>n</sup>-ni quíde-güedé cuéi òré quíhu-güedé mèsá caxi-güedé òré ndécú-güedé ñ<sup>n</sup> vico, chi mee-ni núu sácóo cue téé cùnnuu cuení-güedé coo-güedé. <sup>40</sup> Te quèndeé-güedé vehe nchaa

ñáyíu quèé, te ío naha càhá<sup>n</sup> ndíhi-güedé Yã Ndiõxí dándahú-güedé méé-güedé sá ño quíde ndáá-güedé cuendá sá cuení-güedé càhá<sup>n</sup> váha ñáyíu cuendá-güedé. Te sá dúcá<sup>n</sup> quíde-güedé te ío-gá ndoho-güedé núu ùhú núu ndàhú dàcúxí dàva-gá ñáyíu —cächí-gá xáha<sup>n</sup>-gã xií-yu.

*Díhú<sup>n</sup> nduu táhú Yã Ndiõxí ní dáquëe ñ<sup>n</sup> ñaha ndàhú ñaha quèé  
(Lc. 21:1-4)*

<sup>41</sup> Te núcóo Jèsús xití veñúhu yatni núu ndécú àlcanciá te ndèhe-gá xídáquëe ñáyíu díhú<sup>n</sup> xití àlcanciá-á<sup>n</sup>, te tnàhá cue ñáyíu cuica xídáquëe-yu vâi díhú<sup>n</sup>. <sup>42</sup> Te ní quexìo ñ<sup>n</sup> ñaha ndahú ñaha quèé, te ndèhe-gá ní dáquëe-a<sup>n</sup> úu tnàhá díhú<sup>n</sup> còbrí xití àlcanciá, te díhú<sup>n</sup>-á<sup>n</sup> ño sacú yáhu-xi. <sup>43</sup> Te Jèsús ní cana-gá cue téé xíca cuu ndíhi-gá, te ní xáha<sup>n</sup>-gã xii-güedé:

—Na cächí tnúhu ndáá-í xii-ndo sã ñaha ndahú ñaha quèé-a ío-gá nándíhi díhú<sup>n</sup> ní dáquëe-a<sup>n</sup> xití àlcanciá dàcúxí díhú<sup>n</sup> ñí dáquëe dáva-gá-yu. <sup>44</sup> Chi nchaa ñáyíu-á<sup>n</sup> ñí dáquëe-yu mee-nã díhú<sup>n</sup> sã ñí quendóo-ná, dico ñaha quèé-a cuéi ndàhú-a<sup>n</sup> dico ní dáquëe-a<sup>n</sup> ñíhí díhú<sup>n</sup> sã cuáá<sup>n</sup> sã caxí-á<sup>n</sup> ní cùu —cächí-gá xáha<sup>n</sup>-gã xii-güedé.

## 13

*Jèsús cächí-gá sá ngóyó veñúhu  
(Mt. 24:1-2; Lc. 21:5-6)*

<sup>1</sup> Te òré ní ndee Jèsús xití veñúhu càhnu sá ño cùnnuu, te ñ<sup>n</sup> téé xíca cuu ndíhi-gá ní xáha<sup>n</sup>-dè xii-gá:

—¡Mèstrú, cundehe nã ío víi ní sáá veñúhu-a<sup>n</sup> ndíhi nchaa vehe nèhe tnaha ndíhi-xi, te ío víi ndãa nchaa yúu yíhí! —cächí-dé xáha<sup>n</sup>-dè xii-gá.

<sup>2</sup> Te Jèsús ní xáha<sup>n</sup>-gã xii-dé:

—Nchaa nàcuáa càa nchaa vehe sá cúñúhu-n-a vîtna sáá nduu te vá cúndùu-gá-xi dàtná cáá-xí vîtna, chi ní ñ<sup>n</sup>-gá yúu vã códó nchíhi tnaha-xi, chi ndíhi ngoyo —cächí-gá xáha<sup>n</sup>-gã xii-dé.

*Nàcuáa cada-xi nduu ta cùyatni naa ñuyúú  
(Mt. 24:3-28; Lc. 21:7-24; 17:22-24)*

<sup>3</sup> Te Jèsús ní xica-gá ndíhi cue téé xíca cuu ndíhi-gá cuáhá<sup>n</sup> ndíhi ñaha-gã xii-güedé yucu nàni Olívú, te yucu Olívú-á<sup>n</sup> tũu ndáá



núu cáá veñúhu càhnu sá ïo cùnuu. Te Jèsús ní quexìo-gá ndihì-güedé yucu Òlívú-án, te xíán nǐ ngóo-gá te núu núcòo-gá-án nǐ sáhán té Pèlú ndihì té Jàcobó ndihì té Juàá ndihì té Ndríxí, te dayuhu nǐ xáha<sup>n</sup>-güedě xii-gá:

4—Cuìní-ndí cachí tnúhu-n nǎ nduu dùca<sup>n</sup> cada-xi ngoyo veñúhu càhnu sá ïo cùnuu, àdi nándi cùu sá cáda-xí cuendá cutnùnì iní-ndí sá sà ta cuyatni nduu duca<sup>n</sup> cada-xi —cachí-güedé xáha<sup>n</sup>-güedě xii-gá.

5 Te Jèsús ní xáha<sup>n</sup>-gǎ xii-güedé:

—Ío quihi iní-ndó cùndecu-ndo cuendá sá vǎ yòo dandàhú ñáhá xii-ndo. 6 Chi ío cuéhé cue tée coo ñuyú te danàni-güedé méé-güedě dàtná nánì-í, te cachí-güedé: “Yúhú cùu-í Cristú Yaá ní tendaha Yǎ Ndiòxí véxi ñuyú-a”, duha cachí-güedé. Te sá dúcá<sup>n</sup> cǎhá<sup>n</sup>-güedé te ío vǎi ñáyi u dandàhú-güedé.

7 Te òré ná nihí-ndó tnúhu sá nàá-güedé nděni ní cuu, te vǎ yùhú-ndó chi dacuítí sǎ dúcá<sup>n</sup> càda-xi, dico vátá sàá-gǎ nduu nàa ñuyú òré duca<sup>n</sup> càda-xi. 8 Chi cue tée ì<sup>n</sup> nàció<sup>n</sup> nàá-güedé ndihì cue tée ingá nàció<sup>n</sup>, te titní ñuu ngúíta-güedé nàá-güedé, te titní xichi ñuyú nǐhi vihi tnáa, te titní tucu xichi ñuyú coo tnamá, te ío-gǎ cuéhé sǎ yǎha ñáyi. Te nchaa sá dúcá<sup>n</sup> càda-xi-án cùu-xí tnúndòho sá vítná vǎha vǎha quèsaha-xi sácúu-xí cuè ñáyi ndècu ñuyú-a.

9 Dico nchòhó ío quihi iní-ndó cùndecu-ndo, chi nchaa ñáyi na cùu úhú iní ñáhá xii-ndo cuáha cuendá ñáhá-yu xii dava-ndo núu cuè tée cùchiu<sup>n</sup>, te candeca ñaha-güedě xii-ndo quihí<sup>n</sup> xití veñúhu-güedé, te yàcá<sup>n</sup> caniha-güedě xii-ndo. Te quihí<sup>n</sup>-ndó núu cuè tée yèndaha nació<sup>n</sup> àdi núu dàva-gǎ cue té cùnuu sá cuendá-í, te nchòhó nihí-ndó nàcuáa càda-ndo cǎhá<sup>n</sup> vǎha-ndo cuendá-í núu-güedé. 10 Te cùmánì-gǎ sáa nduu nàa ñuyú-a te sa cuténuu tnúhu-í nǐ càa xico ñuyú-a, te tnúhu-án cǎhá<sup>n</sup>-xi nàcuáa naníhí tǎhú ñáyi. 11 Te òré ná càndeca ñaha ñáyi xii-ndo quihí<sup>n</sup> núu cuè tée cùchiu<sup>n</sup> cuáha cuendá ñáhá-yu, te òré vátá sàá-gǎ-ndó núu-güedě te vǎ cánì iní-ndó núu nása cunduu tnúhu cúñaha-ndo xii-güedé. Chi òré-nǎ te Yǎ Ndiòxí dacàhu iní ñáhá-gǎ

xii-ndo nása cunduu tnúhu cúñaha-ndo xii-güedé, te diu-ni tnúhu sá dacàhu iní ñáhá-gǎ-án cùñaha-ndo xii-güedé. Te ñá diú mèe-ndo cǎhá<sup>n</sup>-ndó chi Espiritú Yǎ Ndiòxí cǎhá<sup>n</sup>-xi yuhu-ndo. 12 Te dava cue tée cuáha cuendá-güedé ñaní-güedé núu cuè té cùchiu<sup>n</sup> cuendá cahni ñaha-güedě. Te dava cue té cùu tátá diu-ni duca<sup>n</sup> càda-güedé cuáha cuendá-güedé déhe-güedé núu cuè té cùchiu<sup>n</sup>. Te dava cue té cùu déhe cuu úhú iní-güedé tátá-güedé ndihì náná-güedé, te cuáha cuendá ñáhá-güedě xií-yu núu cuè té cùchiu<sup>n</sup> cuendá cahni ñaha-güedě xií-yu. 13 Te ío cuéhé ñáyi cuu úhú iní ñáhá-yu xii-ndo sǎ cuendá-í, dico nchaa nchòhó ñáyi na càda ndee-ni iní canchicú<sup>n</sup> nihnu ñaha-ni xii-í te naníhí tǎhú-ndó.

14 Te ndí Dániél té ní xóo cǎhá<sup>n</sup> tnúhu Yǎ Ndiòxí ndéé sanaha nǐ chídó tnùnì ndí núu tütú ndí cuendá ì<sup>n</sup> sá dáquè tǐhú Yǎ Ndiòxí cundecu ì<sup>n</sup> xichi núu ñà túu tǎu-xi cundecu-xi, te xiá<sup>n</sup> cada-xi sǎ vǎ cùndecu-gǎ nǐ ì<sup>n</sup> ñáyi xiá<sup>n</sup>. Te cada cuendá vǎha-ndo nàcuáa ní cǎhá<sup>n</sup> ndí, chi nduu na quèní-ndó xiá<sup>n</sup> cundecu-xi ì<sup>n</sup> xichi núu ñà túu tǎu-xi cundecu-xi, te dàvǎ-án nchaa ñáyi xǐndecu distritú Júdeá xínì ñuhu-xi cunú-yu quihí<sup>n</sup>-yu xití yucu. 15 Te nchaa ñáyi ndáa ndódó dìquí véhé-xí vǎ ndíhu-gǎ-yu vehé-yu quehé<sup>n</sup>-yu ì<sup>n</sup> ndachíu<sup>n</sup>-yu canehé-yu quihí<sup>n</sup>. 16 Te nchaa ñáyi cuáhá<sup>n</sup> yucu nǐ vǎ nùhú-gǎ-yu vehé-yu cúnúquehé<sup>n</sup>-yu dóo-yu. 17 Te ndàhú ní cuu nchaa ñáyi dìhí ñúhú dèhe-xi, ndihì cue ñáyi dìhí xǐndeca déhe vitna sàdi na saá nduu dùca<sup>n</sup> cada-xi! 18 Te nchòhó ío chí cǎcá<sup>n</sup> tǎhú núu Yǎ Ndiòxí cuendá sá vǎ dúcá<sup>n</sup> ndòho-ndo yóo quidé víxi<sup>n</sup>-xi. 19 Chi dàvǎ-án coo tnúndòho cahnu vihi ñuyú, te vátá ì<sup>n</sup> nduu-gǎ coo tnúndòho cahnu vihi-án ndéé cùtnàhá ní cadúha Yǎ Ndiòxí ñuyú, chi diu-ni dàvǎ-án coo tnúndòho cahnu vihi-án, te nǐ núu cuáhá<sup>n</sup> núu véxi vǎ cóo-gǎ tnúndòho-án. 20 Te Yǎ Ndiòxí cǎchí-gǎ sá vǎ ïo vǎi nduu coo tnúndòho cahnu vihi-án ñuyú sǎ cuendá nchaa ñáyi ní cǎhá<sup>n</sup>-gǎ cundecu ndihì-gǎ. Te núu vǎi nduu na coo tnúndòho-án, te vǎ yòo cácu nihnu.

21 Te dàvǎ-án cùñaha ñáyi xii-ndo: “Chí cùndèhe iha, chi iha ní quexìo Cristú



Yaá ní tendaha Yă Ndiöxí véxi ñuyíú-a”, duha cúñàhá-yu xii-ndo. Àdi quesahá-yu: “Chí cùndèhe yacá<sup>n</sup> chi yàcá<sup>n</sup> ndécú-gă”, quesàhá-yu. Te vá quèndáá iní-ndó tnúhu càhá<sup>n</sup>-yu. <sup>22</sup> Te coo cue tée danàni-güedé méé-güedé dàtná nánì-í te cachí-güedé sá cúú-güedé Yaá ní tendaha Yă Ndiöxí véxi ñuyíú-a. Te dava-güedé cachí-güedé sá cúú-güedé cue tée càhá<sup>n</sup> tnúhu Yă Ndiöxí dico ñá ndáá sá cúú-güedé cue tée càhá<sup>n</sup> tnúhu-gá, te cada-güedé títñí núú sã vã yõ tnàhí ndàcu cada cuendá dandàhú-güedé ñáyíu, te caní iní-güedé dandàhú-güedé ndéé cue ñáyíu ní càhá<sup>n</sup> Yă Ndiöxí cundecu ndíhi-gá. <sup>23</sup> Te vitna ío váha cuáha-ndo cuendá, te quíhi iní-ndó cundecu-ndo, chi nchaa sa ní dátúha ñaha-í xii-ndo.

*Nàcuáa cada-xi òré quixi tucu Tée cùu ñanì tnáhá nchàa ñáyíu*

(Mt. 24:29-35,42-44; Lc. 21:25-36)

<sup>24</sup> Te nà yáha-ni coo tnúndòho cahnu vihi-á<sup>n</sup>, te vá dáyèhé-gá nchícanhii te ni vã dáyèhé-gá yóó. <sup>25</sup> Te ngoyo nchaa chódíní ndéé andíu, te quídi-xi andíu. <sup>26</sup> Te dàvá-á<sup>n</sup> quíní ñáhá nchàa ñáyíu xii yúhú Tée cùu ñanì tnáhá-yu ncháa-yu quee-í andíu quixi-í ichi xití vícò, te quíní-yu sá ío càhnu cuu-í, te quíde-í nchaa sá vãha. <sup>27</sup> Te tendaha-í cue espíritú xínú cuèchi núú-í quíhí<sup>n</sup>-xi nadatàcá-xi nchaa ñáyíu ní càhá<sup>n</sup>-í chitnahá ñáhá xii-í xíndecu ní càa xico ñuyíú.

<sup>28</sup> Te cundehe-ndo nàcuáa quíde yutnu ngúxí, chi yutnu-á<sup>n</sup> ndúú yùte núú díté-xi te nàtahú ndaha-xi, te òré duca<sup>n</sup> quíde-xi te càchí-ndó sã sà ní cuyatni nuu cahni. <sup>29</sup> Te duca<sup>n</sup> sãtnahá-xi cada-xi òré ná quíní-ndó càda-xi nchaa nacuáa ní càhá<sup>n</sup>-í, te cutnùnì iní-ndó sã sà ní cuyatni vií-nã nduu nàa ñuyíú. <sup>30</sup> Te na càchí tnúhu ndáá-í xii-ndo sã òré vátá cùú-gá cue ñáyíu xíndecu ñuyíú-a vitna, te cada-xi nchaa nàcuáa ní càhá<sup>n</sup>-í. <sup>31</sup> Te andíu ndíhi ñuyíú-a chi ndíhi nihnu-xi, dico tnúhu-í chi vá ndíhí nihnu-xi chi cùu-xi tnúhu ndáá.

<sup>32</sup> Dico ñá túú cùtnunì ná nduu quixi tucu-í, te ni ñà túú cùtnunì ná òré chi vá yõ xíní, te ni cuè espíritú xínú cuèchi núú Yă Ndiöxí ñá túú xíní-xi ná nduu quixi-í, te ni mèe yúhú tée cùu Déhe Dútú Ndiöxí

ñá túú xíní-í ná nduu quixi tucu-í, chi ñndì díi-ni mee Tătà-í Dútú Ndiöxí xíní-gá núu ná nduu quixi-í.

<sup>33</sup> Te nchòhó xíní ñùhu-xi sá ío quíhi iní-ndó cundecu-ndo, te càhá<sup>n</sup> ndíhi-ndo Yă Ndiöxí, chi ñá túú xíní-ndó nã nduu quixi tucu-í. <sup>34</sup> Te na càchí tnúhu-í xii-ndo cuendá ñndì tée cùní quíngaca cuu xica. Te tée-á<sup>n</sup> cùmání-gă quee-dé vehe-dé te ní xáha<sup>n</sup>-dë xii cue tée xínu cuechi núú-dë sá ná càdá cuendá-güedé vehe-dé. Te ní sãñaha-dë xii-güedé ndí díí<sup>n</sup> núú-güedé chiu<sup>n</sup> cada-güedé. Te ní xáha<sup>n</sup>-dë xii tée ndéé yuyèhe sá ná cundecu túha-ni-dé yuyèhe ndéé nàsáá-dé. <sup>35</sup> Te duha ndúu tnúhu càhá<sup>n</sup>-í cuendá nchòhó cundecu túha-ndo, chi ñá túú xíní-ndó nã nduu te ni ñà túú xíní-ndó nã òré quixi tucu yúhú Yaá cúú Xitohó-ndó, núu òré sa ní cundiquí<sup>n</sup>, àdi dava niú, àdi oré sa ní cana uu<sup>n</sup> líhi, àdi oré sa ta cùditó cuáhá<sup>n</sup>, núu xíã<sup>n</sup> ío chí cùndecu túha. <sup>36</sup> Te duha càhá<sup>n</sup>-í chi na cuáhá<sup>n</sup> òré ñá túú nã yíhí iní-ndó quèxio-í, te ñá túú ndècu túha-ndo. <sup>37</sup> Te dàtná-ni xáha<sup>n</sup>-í xii nchòhó sá cùndecu túha-ndo, te díu-ni duca<sup>n</sup> xáha<sup>n</sup>-í xii nchaa dava-gá ñáyíu sá cùndecu túha-yu –càchí-gá xáha<sup>n</sup>-gă xii-güedé.

## 14

*Ndùcu-güedé nàcuáa cada-güedé cahni-güedé Jèsús*

(Mt. 26:1-5; Lc. 22:1-2; Jn. 11:45-53)

<sup>1</sup> Te cùmání ùú-gá nduu te quesaha víco pascuá, víco xèxi ñáyíu pàá sá ñà túú yíhi levadurá. Te cue dútú cùnùu, ndíhi cue tée dàcuaha ñaha xii ñáyíu nchaa tnúhu ní chídó tnùnì ndíi Moisés ndúcú-güedé nàcuáa cada-güedé dandàhú-güedé Jèsús cuendá tñí ñaha-güedé xii-gá te cahni ñaha-güedé. <sup>2</sup> Te ní xítñaha-güedé:

—Váha-gá sá vã tñí-ó Jèsús mei ndúu víco, chi núu duca<sup>n</sup> na càda-o te ío dusa<sup>n</sup> càda ñáyíu –càchí-güedé xítñaha-güedé.

*Í<sup>n</sup> ñadìhí chíhí-á<sup>n</sup> àcítí díquí Jèsús*

(Mt. 26:6-13; Jn. 12:1-8)

<sup>3</sup> Te Jèsús ndécú-gă ñuú Bètaniá vehe ñndì tée nàni Xímú, tée ní tnahá cuéhé sã dátèhyú nihnu-xi yiquí cùñú-ó. Te yíhi Jèsús mèsa xéxí-gă ní quexìo ñndì ñadìhí néhé-á<sup>n</sup> ñndì sá ní cuáha yúú vãha yúú nánì àlabastrú, te xití

xíãñ ñúhú àcítí sàháñ tnámí sã nání nãrdú sá ío ndèyáhu, te ní táhú-án xíãñ te acítí ñúhú xítí-xi-án ñí sódó-añ díquí Jèsús. <sup>4</sup> Te ññ úú cue téé xíndecu-án ñí cudééñ-güedé sá dúcáñ ñí quide-añ, te ní xítñaha-güedé:

—Ñá túú quide váha ñaha-ãñ dàcáñ quidé-án, chí íí ñí dácuíta-añ acítí váha-ãñ. <sup>5</sup> Chí váha-gá ñúu cuyáhu acítí-ãñ sá ùní ciendú díhúñ denariú, te díhúñ sã cuyáhu acítí-ãñ cuu cuendá ñáyíu ndàhú ní cùu —cachí-güedé xítñaha-güedé.

Te ní tenàá-güedé ñaha-án sã dúcáñ ñí quide-añ.

<sup>6</sup> Te Jèsús ní xáhañ-gã xii-güedé:

—Chí dáñá, vá dásátú-ndó ñí ñadìhí-a, chí sá ñí quide ñaha-añ xii-í cúú-xí ññ sá váha. <sup>7</sup> Chí cue ñáyíu ndàhú ducañ-ni cùtnahá ñáyíu-án tnuú-ndó, te nání òrè cächí ñí-ndó te chindee-ndó-yu. Dico yúhú chí vá ncháá ndùu cundecu ndihí ñaha-í xii-ndo ñúyíú-a. <sup>8</sup> Te ñadìhí-a ní quide-añ ññ sá váha ndèé není ní ndacu-añ, chí sá dúhá ñí quide ñaha-añ xii-í ní chíhí ñaha-añ àcítí, te xíãñ cada ñí-ndó sã sá quide túha-añ yíquí cùñú-í cuendá quíndúxi-xi. <sup>9</sup> Te na cächí tnúhu ndáá-í xii-ndo sã ndèni ní cuu ñíhí ñúyíú ná càháñ ñáyíu tnúhu-í, te càháñ-yu tnàhá cuendá ñadìhí-a cuendá quíñí nchaa ñáyíu nàcuáa ní quide-añ, te ducañ vã nàcuànaá-yu —cachí-gá xáhañ-gã xii-güedé.

*Té Jùdás ndúcú-dé nàcuáa cada-dé cuáha cuendá-dé Jèsús núú cuè téé cùu úhú ñí ñáhá xii-gá*

*(Mt. 26:14-16; Lc. 22:3-6)*

<sup>10</sup> Te té Jùdás Iscarioté ní sáhán-dé ní ndatnúhu-dé ndihí cue téé cùu dútú cùnùu sá cuáha cuendá-dé Jèsús núú-güedé, te núú tnàhá té Jùdás-án cúú ùxúú tnàhá cue téé xica cuu ndihí-gá ní cùu. <sup>11</sup> Te òrè ducañ ñí ndatnúhu-dé ndihí-güedé, te ío ní cudíí ñí-güedé, te ní xáhañ-güedé xii-dé sá cuáñaha-güedé díhúñ xii-dé. Te té Jùdás-án ñí ngúíta-dé ndúcú-dé nàcuáa cada-dé cuáha cuendá-dé Jèsús núú-güedé.

*Cùdini Jèsús ndihí cue téé xica cuu ndihí-gá*  
*(Mt. 26:17-29; Lc. 22:7-23; Jn. 13:21-30;*  
*1 Co. 11:23-26)*

<sup>12</sup> Te ní sáá nduu ñí quesaha vico pascuá, vico ñá túú xèxi ñáyíu pàá sá ñà túú yíhí levadurá, te díu-ni nduu-ãñ sáñní-güedé ññ mbéé líhli xèxi-yu nduu vico pascuá-án. Te cue téé xica cuu ndihí Jèsús ní xicáñ tnúhú-güedé núú-gã, te xáhañ-güedé xii-gá:

—Mèstrú, véxi-ndí xicáñ tnúhú-ndí núú-n ñúu ndèé cáá vèhe cuíñí-n càda túha-ndí sá cùdini-o sacuaa nduu vico pascuá —cachí-güedé xáhañ-güedé xii-gá.

<sup>13</sup> Te Jèsús ní xáhañ-gã xii úú-ni tnàhá cue téé xica cuu ndihí-gá:

—Chí cuáháñ xítí ñúú-ãñ, te yacáñ naníhí-ndó ññ téé tànehe yóó ndute, te téé-án cándèndaha-ndo-dé quíhíñ. <sup>14</sup> Te núu ndèdacàa vèhe na ndíhu-dé te xíãñ quíhu-ndo. Te cúñaha-ndo xii xítóhó vèhe-án: “Yaá cúú Mèstrú cächí-gá sá ñúu ndèdacàa xichi xítí vèhe-n cuáñaha ñúu-n xii-gá cùdini-gá ndihí cue téé xica cuu ndihí-gá sacuaa nduu pàscuá”, duha cúñaha-ndo. <sup>15</sup> Te dàtnùní danèhé ñáhá-dé xii-ndo ññ cuartú cáhnú càa núú ñínu, chí vèhe yòdo tnaha cuu-xi, te sa ní quide túha-dé nchaa sá nándíhí, te nchòhó dícó-nã comidá cada túha-ndo cùdini-o —cachí-gá xáhañ-gã xii-güedé.

<sup>16</sup> Te cue téé-án ñí xica-güedé cuáháñ-güedé xítí ñúú-án, te nchaa-ni nàcuáa ní xáhañ Jèsús ní cuu. Te ní quide túha-güedé sá cùdini-güedé ndihí-gá sacuaa nduu vico pascuá-án.

<sup>17</sup> Te sátá ñí cundíquíñ te ní quexìo Jèsús ndihí ndí ùxúú cue téé xica cuu ndihí-gá.

<sup>18</sup> Te cuánguñhu-gá mèsá ndihí-güedé cuendá cùdini ndihí ñaha-gá xii-güedé, te òrè yíhí-gã mèsá ndihí-güedé, te xáhañ-gã xii-güedé:

—Na cächí tnúhu ndáá-í xii-ndo sã ññ nchòhó cue téé xèxi ndihí ñaha xii-í cuáha cuendá ñáhá-ndó núú cuè téé cùu úhú ñí ñáhá xii-í —cachí-gá xáhañ-gã xii-güedé.

<sup>19</sup> Te sá dúcáñ ñí xáhañ-gã xii-güedé, te nchaa-güedé ní ngúíta-güedé cùndíyí-güedé. Te da ññ da ññ-güedé ní ngúíta-güedé xicáñ tnúhú-güedé núú-gã, te xáhañ-güedé xii-gá:

—¿Ñá díú yúhú ducañ sàni ñí-n càda-í-u? —cachí-güedé xáhañ-güedé xii-gá.

<sup>20</sup> Te Jèsús ní xáhañ-gã xii-güedé:

—Diu-ni ñ<sup>n</sup> nchòhó cue téé úxúú xicá cùu ndihí-í, téé na dàquëndaha còhó òré daquëndaha-í, téé-á<sup>n</sup> cuáha cuëndá ñáhá-dě xii-í núú cuè téé cùu úhú iní ñáhá. <sup>21</sup> Te yúhú Téé cùu ñaní tnáhá-ndó nchàa-ndo ñuhu ichi-í cuáhá<sup>n</sup>-í ndoho-í nàcuáa càhá<sup>n</sup>-xi núú tütú Yă Ndiöxí. Dico ndáhú ní cuu téé duca<sup>n</sup> na cuáha cuëndá ñáhá xii-í núú cuè téé cùu úhú iní ñáhá, chi váha-gá sá vâ cáciú tēe-á<sup>n</sup> cundecu-dé ní cùu, te ñá díú sã ñí cacu-dé te duca<sup>n</sup> càda-dé —càchí-gá xăha<sup>n</sup>-gă xii-güedé.

<sup>22</sup> Te ñini cùdini cue téé xica cuu ndihí Jesús ní quehe<sup>n</sup>-gá pàá, te ní ndacá<sup>n</sup> táhú-gă núú Yă Ndiöxí, te dătnúni ní táhú cuèchi-gá, te ní ngüíta-gá dăcăhñu ñaha-gă xii-güedé, te xăha<sup>n</sup>-gă:

—Chí quéhé<sup>n</sup> pàa-a caxi-ndo, te cada iní-ndó sã cúú-xí dătná yiqui cùñú-í —càchí-gá xăha<sup>n</sup>-gă xii-güedé.

<sup>23</sup> Te ní quehe<sup>n</sup>-gá văsú ñúhú ndúdi ndéhé yoho yàha stilé, te ní ndacá<sup>n</sup> táhú-gă núú Yă Ndiöxí, te dătnúni ní ngüíta-gá sãñaha-gă xii-güedé cuëndá coho-güedé luha luha sá ñúhú xití-xi, te nchaa-güedé ní xihí. <sup>24</sup> Te ní xăha<sup>n</sup>-gă xii-güedé:

—Ndudí ndéhé yoho yàha stilé-a cada iní-ndó sã cúú-xí dătná ñíñí-í sá cătí òré cahni ñaha-güedé xii-í. Te sá dúcá<sup>n</sup> cătí ñíñí-í xíá<sup>n</sup> cutnùni ndáá sá Yă Ndiöxí cada-gá ingá núú sã vâha sá cúú-xí vâi ñáyiu dătná ní cachí-gá cada-gá. <sup>25</sup> Te na càchí tnúhu ndáá-í xii-ndo sã vitná-nă duha xihí-í ndudí ndéhé yoho yàha stilé-a te vâ còhó-gă-í, dico na sàá nduu cundecu-í núú ndécú Yă Ndiöxí táxí tnùnigă, te dăvâ-á<sup>n</sup> cada iní-í sá dătná sá còhó tucu-í chi ío cudíí iní-í —càchí-gá xăha<sup>n</sup>-gă xii-güedé.

*Jèsús càhá<sup>n</sup>-gá sá tē Pèlú cùñaha-dě xii ñáyiu sá ñà túú xini ñáhá-dě xii-gá*

*(Mt. 26:30-35; Lc. 22:31-34; Jn. 13:36-38)*

<sup>26</sup> Te Jèsús ní xita-gá ñ<sup>n</sup> ndudú ndihí cue téé xica cuu ndihí-gá, te dătnúni ní xica-gá cuáhá<sup>n</sup>-gá ndihí-güedé yucu Òlívú. <sup>27</sup> Te yacá<sup>n</sup> ní xăha<sup>n</sup>-gă xii-güedé:

—Na càchí tnúhu-í xii-ndo sã ncháá-ndó dàña nihnu ñaha-ndo xii-í niú vitna, chi quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi: “Yúhú cuáha-í tnúhu cahni-güedé téé cùu toli, te nchaa mbéé-dě ndihí-güedi cuténuu”, duha càchí-xi núú

tütú-gá. <sup>28</sup> Dico na cùú-í te ndoto-í te codonuu-í núú-ndó quíhí<sup>n</sup> distritú Galileá —càchí-gá xăha<sup>n</sup>-gă xii-güedé.

<sup>29</sup> Te té Pèlú ní xăha<sup>n</sup>-dě xii-gá:

—Te cuèi nchaa-güedé ná dândóo ñaha-güedé xii-n, dico yúhú chi vá dândóo ñaha-í xii-n —càchí-dé xăha<sup>n</sup>-dě xii-gá.

<sup>30</sup> Te Jèsús ní xăha<sup>n</sup>-gă xii-dé:

—Na càchí tnúhu ndáá-í xii-n sã niú vitna cùmání-gă cana líhi úú xito, te úní xito cáhá<sup>n</sup>-n núú ñáyiu sá ñà túú xini ñáhá-n xii-í —càchí-gá xăha<sup>n</sup>-gă xii-dé.

<sup>31</sup> Dico té Pèlú ní cáhá<sup>n</sup> ñíí-dé, te xăha<sup>n</sup>-dě xii-gá:

—Cuèi na cùú ndihí ñaha-í xii-n dico vá càhá<sup>n</sup>-í núú ñáyiu sá ñà túú xini ñáhá-í xii-n —càchí-dé xăha<sup>n</sup>-dě xii-gá.

Te nchaa dava-gá cue téé xica cuu ndihí-gá diu-ni duca<sup>n</sup> ñí xăha<sup>n</sup>-güedé xii-gá.

*Jèsús càhá<sup>n</sup> ndihí-gá Yă Ndiöxí ñ<sup>n</sup> xichi núú nání Gètsemaní*

*(Mt. 26:36-46; Lc. 22:39-46)*

<sup>32</sup> Te Jèsús cuáhá<sup>n</sup>-gá ndihí cue téé xica cuu ndihí-gá ñ<sup>n</sup> xichi núú nání Gètsemaní. Te òré ní quexìo-gá ndihí-güedé xíá<sup>n</sup>, te ní xăha<sup>n</sup>-gă xii-güedé:

—Chí cúnúcóo iha cundetu-ndo na quíhí<sup>n</sup>-í yacá<sup>n</sup> cáhá<sup>n</sup> ndihí-í Yă Ndiöxí —càchí-gá xăha<sup>n</sup>-gă xii-güedé.

<sup>33</sup> Te ndèca-gá té Pèlú, ndihí té Jàcobó, ndihí té Juàá cuáhá<sup>n</sup>, te ñà túú tnàhí-gá cúú vâha iní-gá te ní ngüíta-xi súúni ndihú iní-gá. <sup>34</sup> Te ní xăha<sup>n</sup>-gă xii cue téé úní-á<sup>n</sup>:

—Súúni ndihú iní-í dătná sá cùú-í, te chí quëndóo iha te vâ cùdú-ndó —càchí-gá xăha<sup>n</sup>-gă xii-güedé.

<sup>35</sup> Te sa ñùnchií luha ní xica ndehe Jèsús núú ndécú-güedé, te ní ngáundeyi-gá ndéé ñuhu càhá<sup>n</sup> ndihí-gá Tătá-gă Dútú Ndiöxí sá nüú vá cündèe iní-gá taunihnu ñaha-gă xii-gá cuëndá nchaa nàcuáa yáha-gá. <sup>36</sup> Te òré càhá<sup>n</sup> ndihí Jèsús Tătá-gă Dútú Ndiöxí, te xăha<sup>n</sup>-gă:

—Yòhó tătá mée-í, nchaandi túhú sá vâha ndàcu-n quide-n, te càhá<sup>n</sup> ndáhú-í núú-n nüú vá cündèe iní-n tàunihnu ñaha-n xii-í cuëndá sá vâ ndòhò-í ná sàá òré, dico vá cádá-n nàcuáa càchí iní mée-í chí cada-n nàcuáa càchí mee-n —càchí-gá xăha<sup>n</sup>-gă xii Tătá-gă Dútú Ndiöxí.



37 Te sáta nĩ yáha ní cáhá<sup>n</sup> ndihí-gá Tátá-gã Dútú Ndiõxí, te cuánuhú-gá núú nĩ dándõ-gá cue téé úní-á<sup>n</sup>, te xixídí-güedé òré ní nasáá-gá, te ní xáha<sup>n</sup>-gã xii té Pèlú:

—Ximú, ¿náa sama xidí-n? ¿Náa ñá cündèè tnahi núú-n vã cùdú-ni-n cuèdicó ñ<sup>n</sup> òré-ã<sup>n</sup>? —càchí-gá xáha<sup>n</sup>-gã xii-dé.

Te ní xáha<sup>n</sup> tucu-gá xii-güedé:

38 —Te chí quéndõ tucu, te cuhu<sup>n</sup> iní-ndó vã cùdú-ndó, te cáhá<sup>n</sup> ndihí-ndo Yã Ndiõxí cuendá sá vã dácáhá<sup>n</sup> ñáhá yùcu ñávãha xii-ndo càda-ndo sá ñà túú tàú-ndó càda-ndo. Te na càchí tnúhu ndáá-í xii-ndo sã nchòhó cuìní-ndó càda-ndo nchaa nacuaá càhá<sup>n</sup>-í dícó-ni sá ñà túú ñihí ndéé-ndó —càchí-gá xáha<sup>n</sup>-gã xii-güedé.

39 Te Jèsús ní xica tucu-gá cuáhá<sup>n</sup>-gá cáhá<sup>n</sup> ndihí-gá Tátá-gã Dútú Ndiõxí, te ñu-ni nàcuáa ní xáha<sup>n</sup>-gã díhna xáha<sup>n</sup> tucu-gá. 40 Te òré ní yáha ní cáhá<sup>n</sup> ndihí-gá Tátá-gã Dútú Ndiõxí, te cuánuhú tucu-gá núú xĩndecu cue téé úní xicá cùu ndihí-gá-á<sup>n</sup>, te xidí-ni tucu-güedé òré ní nasáá-gá, te duca<sup>n</sup> nĩ quide-güedé chí súúní ñùhu saní núú-güedé, te ñá ní ñihí-güedé tnúhu cúñaha-güedé xii-gá òré ní nasáá-gá. 41 Te ní sáhá<sup>n</sup> tucu-gá xito cùu úní ní cáhá<sup>n</sup> ndihí-gá Tátá-gã Dútú Ndiõxí, te òré ní nasáá tucu-gá núú xĩndecu-güedé, te xáha<sup>n</sup>-gã xii-güedé:

—¿Te náa xidí-ni tucu-ndo?, te vitna vã cùdú-gá-ndó chí sa ní sáá òré cuáha cuendá ñáhá-güedé xii yúhú Téé cùu ñaní tnáhá-ndó nchaa-ndo núú cuè téé ndècu ichi cuehé ichi duha. 42 Te vitna chí ndácõ na quihí<sup>n</sup>-ó chí sa véxi téé cuáha cuendá ñáhá xii-í núú cuè téé cùu úhú iní ñáhá —càchí-gá xáha<sup>n</sup>-gã xii-güedé.

*Ní tñi-güedé Jèsús ndécá ñaha-güedé xii-gá cuáhá<sup>n</sup>*

(Mt. 26:47-56; Lc. 22:47-53; Jn. 18:2-11)

43 Te càhá<sup>n</sup> dúcá<sup>n</sup>-ní Jèsús ní quexìo té Jüdás. Te núú tnáhá téé-á<sup>n</sup> cúú ùxúú tnáhá cue téé xica cuu ndihí-gá. Te ndihí-dé vãi cue téé ní quexìo, te dava-güedé xĩnehe-güedé machití te dava-güedé xĩnehe-güedé carrutí. Te cue téé-á<sup>n</sup> nĩ tendaha ñaha cue dútú cúnùu ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí cue téé cùu sacuéhé núú ñáyiú isráel. 44 Te té Jüdás téé cuáha cuendá ñáhá xii Jèsús sa ní xitnúhu-dé

cue téé-á<sup>n</sup> nàcuáa cada-dé cuáha cuendá ñáhá-dé xii Jèsús núú-güedé. Te duha ní xáha<sup>n</sup>-dé xii-güedé:

—Cundehe-ndo tée na tøyuhu-í, te téé-á<sup>n</sup> tñi-ndo-dé chí téé-á<sup>n</sup> cúú-dé téé ndèé iní-ndó, te ío quihí iní-ndó càndeca-ndo-dé quihí<sup>n</sup> —duha ní xáha<sup>n</sup>-dé xii-güedé.

45 Te òré ní quexìo té Jüdás ndihí cue téé-á<sup>n</sup> núú ndécú Jèsús, te ní xáha<sup>n</sup>-dé xii-gá:

—Mèstrú —càchí-dé xáha<sup>n</sup>-dé xii-gá.

Te ní teyuhu ñaha-dé. 46 Te nchaa cue téé ndihí-dé-á<sup>n</sup> nĩ tñi-güedé Jèsús cuendá càndeca ñaha-güedé xii-gá quihí<sup>n</sup>. 47 Te ñ<sup>n</sup> cue téé cùndihí Jèsús ní tava-dé machití-dé, te ní xehndé-ni-dé ñ<sup>n</sup> xio lóho ñ<sup>n</sup> téé xinu cuechi núú dútú cúnùu, te ní quendeé duu<sup>n</sup> lóho téé-á<sup>n</sup>. 48 Te Jèsús ní xáha<sup>n</sup>-gã xii cue téé ní tñi ñaha xii-gá-á<sup>n</sup>:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñaha-ndo xii-í, dàtná quidé-ndó ñ<sup>n</sup> ñadúhú quidé ñaha-ndo xii-í. 49 Te nchaa-ni nduu ní xiní-ndó nĩ xĩndecu-í xití veñúhu càhnu sá ño cùnùu ní xóo danèhé-í ñáyiú, te ñá túú ní tñi ñaha-ndo xii-í. Dico dàcuítí sã dúhá yáha-í cuendá quee ndáá-xi nàcuáa càhá<sup>n</sup>-xi núú tütú Yã Ndiõxí —càchí-gá xáha<sup>n</sup>-gã xii-güedé.

50 Te nchaa cue téé xica cuu ndihí-gá ní xinu-güedé ní dándõ ñaha-güedé xii-gá.

*Ñ<sup>n</sup> téé cuechi nĩ xinu-dé*

51 Te ñ<sup>n</sup> téé cuechi ndëndaha-dé Jèsús cuáhá<sup>n</sup>, te lavichi-dé, ñ<sup>n</sup>-ni dóó yadí yidúcú<sup>n</sup> nuu-dé ñihí-dé, te ní tñi ñaha-güedé xii-dé, 52 dico ní ndacu-dé ní quenuñi-dé te ní dándõ-dé dóó yidúcú<sup>n</sup> nuu-dé-á<sup>n</sup> nĩ xinu-dé.

*Jèsús ndécú-gã jündá*

(Mt. 26:57-68; Lc. 22:54-55, 63-71; Jn. 18:12-14, 19-24)

53 Te cue téé ní tñi ñaha xii Jèsús ndécá ñaha-güedé xii-gá cuáhá<sup>n</sup> núú tée cùu dútú cúnùu-gá. Te xiá<sup>n</sup> nĩ tacá nchaa dava-gá cue téé cùu dútú cúnùu, ndihí cue téé cùu sacuéhé núú ñáyiú isráel, ndihí cue téé dàcuaha ñaha xií-yu nchaa tnúhu ní chídó tnùní ndíi Moisés cuendá cada-güedé jündá. 54 Te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup> ní sáá-dé ndéé quehé vehe núú ndécú tée cùu dútú cúnùu-gá-á<sup>n</sup>, te xiá<sup>n</sup>



nǐ ngóo teté-dé yuhu nùhú ndihì cue téé cùu poleciá.

<sup>55</sup> Te cue téé cùu dútú cùnùu ndihì nchaa dava-gá cue téé xǐndecu jùndá ndúcú-güedě ñáyiú dacáa ì<sup>n</sup> cuéchi díquí Jèsús cuendá duca<sup>n</sup> ñhí-güedě nàcuáa cada-güedé cahni ñaha-güedě xii-gá, dico ñá túú ní ndàcu-güedé. <sup>56</sup> Te cuèi vài ñáyiú dàcaá-yu cuéchi díquí-gã dico mee-ni sã nǐ cahu iní mée-yu ní cáhá<sup>n</sup>-yu, chi tucu cáhá<sup>n</sup> ì<sup>n</sup> tucu cáhá<sup>n</sup> ì<sup>n</sup>-yu. <sup>57</sup> Te davá-yu ní ndacuíñí-yu te ní ngüíta-yu dàcaá-yu ì<sup>n</sup> cuéchi neñuú díquí-gã, te xãhá<sup>n</sup>-yu xii nchaa cue téé cùnùu:

<sup>58</sup> —Nchúhú ní tecú dóho-ndí càchí-dé sá dǎngöyo-dé veñúhu càhnu sá ìo cùnùu sá nǐ dácáá cuè téé ñuyíú-a, te dandaa tucu-dé ìngá veñúhu saa, ñu-ni núú cáá tñahí veñúhu-á<sup>n</sup> te xití úní-ni nduu sa nadaxinu-dé, te vá cúú-gã-xi veñúhu sá nǐ dácáá cuè téé ñuyíú-a, duha càchí-dé ní tecú dóho-ndí —càchí-yu xãhá<sup>n</sup>-yu xii-güedé.

<sup>59</sup> Dico ni dùca<sup>n</sup> ñá túú ní cùu ì<sup>n</sup>nuú-yu nchaa tnúhu ní cáhá<sup>n</sup>-yu.

<sup>60</sup> Te téé cùu dútú cùnùu-gá ní ndacuíñí-dé tnuú nchaa ñáyiú, te xãhá<sup>n</sup>-dë xii Jèsús:

—¿Ná cuendá duha ndùu tnúhu cáhá<sup>n</sup> ñáyiú-a cuendá-n? Te cáhá<sup>n</sup> nùu nása ndùu tnúhu cáhá<sup>n</sup>-n —càchí-dé xãhá<sup>n</sup>-dë xii-gá.

<sup>61</sup> Dico Jèsús ñá túú tñahí ni cáhá<sup>n</sup>-gá. Te téé cùu dútú cùnùu-gá-á<sup>n</sup> nǐ xãhá<sup>n</sup> tùcu-dé xii-gá:

—Cuíní-í cachí tnúhu-n xii-ndí nùu sá díú Crístú Déhe Yá Ndiöxí Yaá ní tendaha-gã véxi ñuyíú-a cùu-n. Te ñu Yá Ndiöxí cúú-gã Yaá quidé càhnu-ndí —càchí-dé xãhá<sup>n</sup>-dë xii-gá.

<sup>62</sup> Te Jèsús ní xãhá<sup>n</sup>-gã xii-dé:

—Ñu Yaá-á<sup>n</sup> cúú-í, te na càchí tnúhu-í xii-ndo sã sãa nduu te quini-ndó yùhú Téé cùu ñani tñahá-ndó nchaa-ndo cunucóo-í xio cùha Dútú Ndiöxí Yaá ndácú quide nchaandi túhú sá vaha. Te davá-á<sup>n</sup> quini ñahá-ndó xii-í quee-í andi quixi-í ichi xití vícú —càchí-gã xãhá<sup>n</sup>-gã xii-dé.

<sup>63</sup> Te dútú cùnùu-gá-á<sup>n</sup> nǐ ndátá-dë dóo cání nihnu-dé cuendá sã ñá túú ní tñahá iní-dé nàcuáa ní cáhá<sup>n</sup> Jèsús, te ní xãhá<sup>n</sup>-dë xii nchaa cue téé xǐndecu jùndá:

—Ñá túú-gã xini ñuhu-xi cue téé cáhá<sup>n</sup> nùu ndáá sá ndècuéchi-dé àdi ñá túú ndècuéchi-dé. <sup>64</sup> Chi sa ní xǐndedóho-o nàcuáa ndùu tnúhu ní cáhá<sup>n</sup>-dé ní cáhá<sup>n</sup> úhú-dé cuendá Yá Ndiöxí, te nchaa-ndo chí cáhá<sup>n</sup> vitna núu nása sàni iní-ndó cùnduu cuendá téé-a —càchí-dé xãhá<sup>n</sup>-dë xii-í-güedé.

Te nchaa-güedé ní cachí-güedé sá ná cùú-dé.

<sup>65</sup> Te dava-güedé ní ngüíta-güedé ní túú dí ñahá-güedě xii-gá, te ní dádähu-güedé núú-gã, te ní ngüíta-güedé cánha-güedé xii-gá, te xãhá<sup>n</sup>-güedé:

—¿Cáhá<sup>n</sup> ná cótó nã cúú tée ní caniha xii-n! —cachí-güedé xãhá<sup>n</sup>-güedé xii-gá.

Te cue téé cùu poleciá ní cani-güedé núú-gã.

*Té Pèlú cáhá<sup>n</sup>-dé núú ñáyiú sá ñá túú xini-dé Jèsús*

*(Mt. 26:69-75; Lc. 22:56-62; Jn. 18:15-18, 25-27)*

<sup>66</sup> Te ndéé xití vehe càa núú nǐnu quide-güedé jùndá, chí vehe yòdo tñaha cuu-xi, te té Pèlú núcöo-dé quehé vehe-á<sup>n</sup>. Te ì<sup>n</sup> xíchí xínú cuèchi núú dútú cùnùu-á<sup>n</sup> nǐ quexiö-xi núú núcöo té Pèlú. <sup>67</sup> Te òré ní xini ñahá-xi xii-dé núcöo teté-dé yuhu nùhú, te ní xindéhé ñaha váha-xi xii-dé, te xãhá<sup>n</sup>-xi:

—Yòhó tñahá-n cùu-n téé xica cuu ndihì Jèsús téé ñuú Nazàrét —càchí-xi xãhá<sup>n</sup>-xi xii-dé.

<sup>68</sup> Te té Pèlú ní xãhá<sup>n</sup>-dë xii-xi:

—Yùhú ñá túú xini-í téé-ã<sup>n</sup>, te ni ñá túú cùtñuní iní-í nása ndùu tnúhu cáhá<sup>n</sup>-n —càchí-dé xãhá<sup>n</sup>-dë xii-xi.

Te té Pèlú ní xica-dé cuáhá<sup>n</sup>-dé ndaa nàcuáa nchii yuyèhe vehe-á<sup>n</sup>, te ní cana ì<sup>n</sup> líhi. <sup>69</sup> Te xíchí xínú cuèchi-á<sup>n</sup> nǐ xini ñahá tùcu-xi xii-dé, te xãhá<sup>n</sup>-xi xii nchaa ñáyiú xǐndecu-á<sup>n</sup>:

—Ñu téé-ã<sup>n</sup> tñahá-dé xicá cùu-dé ndihì téé ndèca-güedé cuanguihu-a —càchí-xi xãhá<sup>n</sup>-xi xii-yu.

<sup>70</sup> Dico té Pèlú ñá túú ní nǐnuu tucu-dé sá xicá cùu-dé ndihì Jèsús. Te tna tnaa-ni ní cuu sá dúcá<sup>n</sup> nǐ xãhá<sup>n</sup> xíchí-ã<sup>n</sup> xii-dé, te ní xãhá<sup>n</sup> tùcu dava cue ñáyiú xǐndecu-á<sup>n</sup> xii-dé:

—Ndáá sá tñahá-n cùu-n téé xica cuu ndihì téé ndèca-güedé cuanguihu-ã<sup>n</sup> chí cùu-n téé distritú Galileá, te cáhá<sup>n</sup>-n dàtná cáhá<sup>n</sup>-güedé —càchí-yu xãhá<sup>n</sup>-yu xii-dé.

<sup>71</sup> Te té Pèlú ní xáha<sup>n</sup>-dě xií-yu:

—Nchàcuiti Yá Ndiöxí sá yùhú càhá<sup>n</sup> ndáá-í sá ñà túú xìní-í tée càcunehe-ndo-á<sup>n</sup> —càchí-dé xáha<sup>n</sup>-dě xií-yu.

<sup>72</sup> Te òré-ni-á<sup>n</sup> ñí cana tucu líhi xito cùu uú, te òré-á<sup>n</sup> ñí ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gã cana ñí líhi úú xito te úní xito cáhá<sup>n</sup>-dé núú ñáyiu sá ñà túú xìní ñáhá-dě xii-gá. Te òré duca<sup>n</sup> ñí ndacu iní-dé nàcuáa ní xáha<sup>n</sup> Jèsús xii-dé, te ní ndáhyú-dé ní ndixi cuéchi iní-dé.

## 15

*Jèsús ndécú-gã núú tẽ Pilatú*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Te sátá ñí túndaá te cue tée cùu dútú cúnùu, ndihi cue tée cùu sacuéhé nùú ñáyiu isràél, ndihi cue tée dàcuaha ñaha xii ñáyiu nchaa tnúhu ní chídó tnùní ndíi Moisés, ndihi nchaa dava-gá cue tée cùnùu ní xíndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáhá<sup>n</sup> núú tẽ Pilatú. <sup>2</sup> Te té Pilatú ní xícá<sup>n</sup> tnúhú-dě núú Jèsús, te xáha<sup>n</sup>-dě xii-gá:

—¿Ndáá sá díú-n cùu-n tée yìndaha ñaha xii ñáyiu isràél-á<sup>n</sup>? —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã xii-dé:

—Díu-í yìndaha-í-yu —càchí-gá xáha<sup>n</sup>-gã xii-dé.

<sup>3</sup> Te cue tée cùu dútú cúnùu dacao-güedé vài cuéchi díquí-gã. <sup>4</sup> Te té Pilatú ní xícá<sup>n</sup> tnúhú tucu-dé núú-gã, te xáha<sup>n</sup>-dě xii-gá:

—Cáhá<sup>n</sup>, ná cuèndá ñá càhá<sup>n</sup>-n te cundehe ñà ndéé duha titní cuéchi dàcaa díquí ñáhá cuè tée-a xii-n —càchí-dé xáha<sup>n</sup>-dě xii-gá.

<sup>5</sup> Dico Jèsús ñá túú tnàhí ní càhá<sup>n</sup>-gá te té Pilatú ío ní cuñúhu-dé sá dúcá<sup>n</sup> ñà túú tnàhí ní càhá<sup>n</sup>-gá.

*Cue ñáyiu xáhã<sup>n</sup>-yu xii té Pilatú sá cáhni-dẽ Jèsús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Te ndi tnahá nduu vico pascuá dácacu té Pilatú ñí tée yìhi vecaá chi duca<sup>n</sup> tnàhí quide-dé, te mee ñáyiu càhá<sup>n</sup>-yu te núu ndédacàa tée yìhi vecaá-á<sup>n</sup> càcu-dé, te tée-á<sup>n</sup> dácacu-dé. <sup>7</sup> Te yìhi ñí tée nàni Barrabás vecaá ndihi dava-gá cue tée cùndihi-dé. Te

té Barrabás-á<sup>n</sup> ñí sanu ichi-dé ñáyiu ñuu ingá ichi, te ní ngüita-yu ndihi-dé ní cuu úhú iní-yu cue tée cùchiu<sup>n</sup>, te ní sahani-dé ndíyí núu xiá<sup>n</sup> ní chihi ñaha-güedé vecaá xii-dé. <sup>8</sup> Te nchaa ñáyiu ní sáhá<sup>n</sup>-yu núú tẽ Pilatú, te càhá<sup>n</sup> ndàhú-yu núú-dě sá ná cáda nàhi-ni-dé dàtná quidé-dě. <sup>9</sup> Te té Pilatú ní xáha<sup>n</sup>-dě xií-yu:

—¿Cuñí-ndó sã dácacu-í tée yìndaha ñaha xii ñáyiu isràél-á<sup>n</sup>? —càchí-dé xáha<sup>n</sup>-dě xií-yu.

<sup>10</sup> Te duca<sup>n</sup> ñí cáhá<sup>n</sup> té Pilatú, chi ní cutnùní iní-dé sá dícó sá cuèdú iní cuè dútú cúnùu núu xiá<sup>n</sup> duca<sup>n</sup> ñí quide-güedé ní sáha cuèndá ñáhá-güedé xii Jèsús núú-dě.

<sup>11</sup> Te cue dútú cúnùu ní xáha<sup>n</sup>-güedé xii nchaa ñáyiu sá ná cùñáhá-yu xii té Pilatú dácacu-dé té Barrabás, te ní quidé-yu nàcuáa ní xáha<sup>n</sup>-güedé. <sup>12</sup> Te té Pilatú ní xícá<sup>n</sup> tnúhú-dě núú-yu, te xáha<sup>n</sup>-dě xií-yu:

—¿Ná cuñí-ndó càda-í tée càchí-ndó yìndaha ñaha xii ñáyiu isràél-i? —càchí-dé xáha<sup>n</sup>-dě xií-yu.

<sup>13</sup> Te ncháá-yu níhi ní cáhá<sup>n</sup>-yu, te xáhã<sup>n</sup>-yu xii-dé:

—¿Cata caa-dé núú cùrúxí! —càchí-yu xáhã<sup>n</sup>-yu xii-dé.

<sup>14</sup> Te té Pilatú ní xáha<sup>n</sup>-dě xií-yu:

—¿Te ná cúú cuéchi ní quide-dé te núu duca<sup>n</sup> cuñí-ndó càda-í-dé-i? —càchí-dé xáha<sup>n</sup>-dě xií-yu.

Dico ncháá-yu uu<sup>n</sup>-gá níhi ní cáhá<sup>n</sup>-yu, te xáhã<sup>n</sup>-yu xii-dé:

—¿Cata caa-dé núú cùrúxí! —càchí-yu xáhã<sup>n</sup>-yu xii-dé.

<sup>15</sup> Te té Pilatú ní quide-dé nàcuáa ní xáhã<sup>n</sup>-yu xii-dé cuèndá sá cúdù-dé núú-yu, te ní dácacu-dé té Barrabás, te ní táuchíú<sup>n</sup>-dě ní caní-güedé Jèsús ndihi ñí. Te sátá dúcá<sup>n</sup> ñí quide ñaha-güedé xii-gá, te ní táuchíú<sup>n</sup>-dě candeca ñaha-güedé quíhí<sup>n</sup> cata caa ñaha-güedé xii-gá núú cùrúxí.

<sup>16</sup> Te cue tée cùu sandadú ndéca ñaha-güedé xii-gá cuáhá<sup>n</sup> vechiú<sup>n</sup>, te díu-ni xiá<sup>n</sup> cúú vèhe tée cùu gobiernú. Te xiá<sup>n</sup> ñí tacá nchaa dava-gá cue tée cùu sandadú.

<sup>17</sup> Te xiá<sup>n</sup> ñí dácúhñú ñaha-güedé xii-gá ñí dóó tìcuèhé víhí, te ní cadúha-güedé ñí coróná iñu ní chihi-güedé díquí-gã. <sup>18</sup> Te ní

ngüita-güedé níhi càhá<sup>n</sup>-güedé cúdíquí ndeé ñáhá-güedé xii-gá, te xáha<sup>n</sup>-güedé:

—Ío càhnu cuu yohó téé yíndaha ñaha xii ñáyiú isráél! —càchí-güedé xáha<sup>n</sup>-güedé xii-gá.

<sup>19</sup> Te càni-güedé díquí-gã ndihi ì<sup>n</sup> carrutí, te tiú dí ñáhá-güedé xii-gá, te ngüñí xítí-güedé núú-gã quidé-güedé sá néhé-güedé sá yíñùhu núú-gã dico ñá ndàá chi dícó cúdíquí ndeé ñáhá-güedé xii-gá.

<sup>20</sup> Te sátá dúcá<sup>n</sup> ñí cudíquí ndeé ñáhá-güedé xii-gá, te ní nataunuu ñaha-güedé xii-gá dóó tícuèhé víhí sã ñí dácúíhnú ñáha-güedé, te ní dándíunuu ñaha-güedé xii-gá dóó méé-gã. Te dätñuní ndécá ñáha-güedé cuáhá<sup>n</sup> núú cátá càa ñaha-güedé xii-gá núú cùrúxí.

*Sàta caa-güedé Jèsús núú cùrúxí*

*(Mt. 27:32-44; Lc. 23:26-43; Jn. 19:17-27)*

<sup>21</sup> Te ichi cuáhá<sup>n</sup>-güedé ndihi Jèsús ní naníhí-güedé ì<sup>n</sup> téé ñuú Cìrené nání-dé Xímú, te déhe-dé cúú ì<sup>n</sup> téé nàni Lijandru, ndihi ingá téé nàni Rúfú. Te té Xímú-á<sup>n</sup> ñúhú-dé ichi duha cuándixi-dé ní sáhá<sup>n</sup>-dé yucu, te ní quide yica-güedé ní xido-dé cùrúxí sá nchídó Jèsús.

<sup>22</sup> Te ndèca-güedé Jèsús cuáhá<sup>n</sup> ì<sup>n</sup> xichi núú nání Gölgotá, te tnúhu-á<sup>n</sup> quée-xí: Ì<sup>n</sup> xichi núú nání yìquí díquí ndíyi, duha quèe-xi tnúhu-á<sup>n</sup>. <sup>23</sup> Te ní sáñaha-güedé xii-gá ndudí sá ñí quée yúcu nání mìrrá coho-gá ní cùu dico ñá túú ní xíhi-gá. <sup>24</sup> Te ní sata caa ñaha-güedé xii-gá núú cùrúxí. Te sátá dúcá<sup>n</sup> te cué téé cùu sandadú-á<sup>n</sup> ñí xito ndeé-güedé ñuú ndédacàa-güedé cuu cuendá-güedé dóó-gã.

<sup>25</sup> Te cùu-xi caá ì<sup>n</sup> dátneé òré ní sata caa ñaha-güedé xii-gá núú cùrúxí. <sup>26</sup> Te ní taxi ndecu-güedé ì<sup>n</sup> sá ndèé lètrá núú táca-gá. Te lètrá-á<sup>n</sup> càhá<sup>n</sup>-xi ná cuendá duca<sup>n</sup> ñí quide ñaha-güedé xii-gá. Te duha càhá<sup>n</sup> lètrá-á<sup>n</sup>: “Téé yíndaha ñaha xii ñáyiú isráél”, duha càchí-xi. <sup>27</sup> Te tnàhá úú cue téé cùu ñadúhú ñí sata caa-güedé ñuú cùrúxí tucu. Te ì<sup>n</sup>-dé ní sata caa-güedé xio cùha-gá, te ingá-dé ní sata caa-güedé xio dätñi-gá. <sup>28</sup> Te duca<sup>n</sup> ñí cuu chi ní quee ndáá-xi nàcuáa càhá<sup>n</sup>-xi núú tütú Yã Ndiöxí núú càchí-xi: “Ì<sup>n</sup>-ni ñí quide ñaha-güedé

xii-gá ndihi cue téé ndècu cuéchi-xi”, duha càchí-xi núú tütú-gá.

<sup>29</sup> Te nchaa ñáyiú yáha yatni núú táca-gá dácúicó-yu díquí-yu te xícuèhé ñáhá-yu xii-gá, te xáhá<sup>n</sup>-yu:

—Te ná cuendá duca<sup>n</sup> càa-n tacaa-n xía<sup>n</sup>, te càchí-n sã dàngoyo-n veñúhu càhnu sá ìo cùnuu te dandàa-n ingá veñúhu saa, te xítí úní-ni nduu sa nadaxínu-n càchí-n. <sup>30</sup> Te vitna tanuu núú cùrúxí-á<sup>n</sup> dácácu-n mèe-n —cachí-yu xáhá<sup>n</sup>-yu xii-gá.

<sup>31</sup> Te ñuú-duca<sup>n</sup> ñí quide cue téé cùu dütú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés, chi ní cudíquí ndeé ñáhá-güedé xii-gá, te ní xítñaha-güedé:

—Téé-a ní ndacu-dé ní dácácu nihnu-dé ñáyiú, ¿te ná cuendá ñá ndácú-dé dácácu nihnu-dé méé-dé-i? <sup>32</sup> Te núu ndáá sá ñíu-dé cúú-dé Crístú Yáá ní tendaha Yã Ndiöxí véxi ñuyíú-a quíndaha ñaha xii ñáyiú isráél, te na cundehe-o nuu-dé núú cùrúxí, cuendá quíndáá iní-ó-dé —càchí-güedé xítñaha-güedé.

Te ndeé tnàhá cue téé tàcaa xio xio ñíhi-gá xícuèhé ñáhá-güedé xii-gá.

*Ní xítí Jèsús*

*(Mt. 27:45-56; Lc. 23:44-49; Jn. 19:28-30)*

<sup>33</sup> Te òré ní cuu cuádava nduu, te ní cunee nihí ñuyíú, te duca<sup>n</sup>-ni càa ní cuu ndeé caá úní sacuaa. <sup>34</sup> Te ñuú-duca<sup>n</sup> òré caá úní sacuaa-á<sup>n</sup> ñíhi ní càhá<sup>n</sup> Jèsús, te xáha<sup>n</sup>-gã xii Tátá-gã Dütú Ndiöxí:

—Elói, Elói, láma sabàctaní —càchí-gá xáha<sup>n</sup>-gã.

Te tnúhu-á<sup>n</sup> quée-xí: Ndiöxí méé-í, Ndiöxí méé-í, ná cuendá ní dáñá ñaha-n xii-í, duha quèe-xi tnúhu-á<sup>n</sup>.

<sup>35</sup> Te dava cue téé xíndecu yatni núú táca-gá-á<sup>n</sup> ñí tecú dóho-güedé nàcuáa ní càhá<sup>n</sup>-gá, te ní xítñaha-güedé:

—Chí cündèdóho chi càna-dé té Èliás —càchí-güedé xítñaha-güedé.

<sup>36</sup> Te ì<sup>n</sup> cue téé xíndecu-á<sup>n</sup> xínú-dé ní sáhá<sup>n</sup> ní chindóyo-dé luha càchí xítí ndudí íá, te ní chinenu-dé díquí ì<sup>n</sup> yutnu càni te ní ndo-cani-dé chíhí-dé yuhu-gá cuendá coho-gá. Te ní xáha<sup>n</sup> cuè téé xíndecu-á<sup>n</sup> xii téé-á<sup>n</sup>:

—Cundetü tnaa na cundehe-o nacoto núu quixi té Eliás nunehe ñaha-dě xii-dé núu cùrúxí —càchí-güedé xáha<sup>n</sup>-güedě xii-dé.

<sup>37</sup> Te Jèsús níhi ní canasaa-gá te ní xihí-ni-gá. <sup>38</sup> Te sátá dúcá<sup>n</sup> te ní ndátá dǒó cúú còrtiná xití veñúhu càhnu sá ìo cùnunu ní quée dava ndáá, te ndàa núú ñinu ní ngüíta-xi ní ndátá. <sup>39</sup> Te tée cùu capitá<sup>n</sup> nùtnǎ-dé ndàa núú Jèsús, te ndèhe-dé nàcuáa ní quide-gá òré ní xihí-gá, te ní cachí-dé:

—Sá ndàa ndisa sá díú tǎe-a cùu-dé Déhe Yá Ndiǒxí ní cùu —duha ní cachí-dé.

<sup>40</sup> Te xica xǎnutnǎ ì<sup>n</sup> úú ñáyiú òhí ndéhě-yu nchaa nàcuáa ní quide ñaha-güedě xii Jèsús, te tnàhá tá Màriá Magdalèná, ndihí tá Salómé, ndihí tá Màriá náná tǎ Chèé ndihí té Jàcobó tée càchí-güedé cúú líhli-gá. <sup>41</sup> Te cue ñáyiú òhí-á<sup>n</sup> ñi xica cuú-yu ndihí Jèsús distrítú Galileá ní xinu cuèchí-yu núú-gǎ. Te cue ñáyiú òhí-á<sup>n</sup> nchícú<sup>n</sup> ñáhà-yu xii-gá ní quexió ndéé ñuú Jerusàlén ndihí dava-gá ñáyiú òhí nchícú<sup>n</sup> ñáhà xii-gá cuáhá<sup>n</sup>.

### *Chindúxi-güedé Jèsús*

*(Mt. 27:57-61; Lc. 23:50-56; Jn. 19:38-42)*

<sup>42</sup> Te cùu-xi nduu vispré nduu ndètátú ñáyiú. Te nduu-ǎ xǎquide túha-yu sá cúú ìngá nduu nduu ndètátú-yu-á<sup>n</sup>, te òu-ni nduu-ǎ sa ní cuaa vìhi, <sup>43</sup> te ì<sup>n</sup> tée nàni Chéé tée ñuú Arimàtéa ní cuyǎ-dě ní sáhá<sup>n</sup>-dé núú tǎ Pilatú, te ní xáha<sup>n</sup>-dě sá ñuú vá cùndèe iní-dé dañà-dě chindúxi-dé yǎquì cùñú Jèsús. Te tnàhá té Chèé-á<sup>n</sup> cúú-dě ì<sup>n</sup> tée cùnunu cundihí-dé cue tée quide jundá, te tnàhá-dé ndétú-dě sáá nduu ndihú ndaha ñaha Yá Ndiǒxí xii-dé ndihí cue ñáyiú. <sup>44</sup> Te té Pilatú ìo ní cuñúhu-dé sá dúcá<sup>n</sup> ìo ndihí ní xihí Jèsús, te ní cana-dé tée cùu capitá<sup>n</sup> ní xicá<sup>n</sup> tnúhú-dě núú-dě ñuú ndisa sá sà ní xihí-gá. <sup>45</sup> Te tée cùu capitá<sup>n</sup>-á<sup>n</sup> ñi xáha<sup>n</sup>-dě xii té Pilatú sá ndàá ní xihí Jèsús, núu xǎn té Pilatú-á<sup>n</sup> ñi sáha-dé tnúhu chindúxi té Chèé-á<sup>n</sup> yǎquì cùñú-gá. <sup>46</sup> Te té Chèé-á<sup>n</sup> ñi saa<sup>n</sup>-dé ì<sup>n</sup> dóo vǎha, te ní sáhá<sup>n</sup>-dé ní nunehe-dé yǎquì cùñú Jèsús núu cùrúxí, te ní chidúcú<sup>n</sup>nduú-dé yǎquì cùñú-gá dóo vǎha sá ñi saa<sup>n</sup>-dé-á<sup>n</sup>, te dàtnùní néhé-dé yǎquì cùñú-gá cuáhá<sup>n</sup> ní chihí-dé ì<sup>n</sup> yáú nchíi yǎquì naha càva, te ní sadí-dé yuhu

yáú-á<sup>n</sup> ndihí ì<sup>n</sup> yáú quèhé<sup>n</sup>. <sup>47</sup> Te tá Màriá Magdalèná, ndihí tá Màriá náná tǎ Chèé ní xiní-yu núu ñi chihí-dé yǎquì cùñú Jèsús.

## 16

### *Ní ndoto Jèsús*

*(Mt. 28:1-10; Lc. 24:1-12; Jn. 20:1-10)*

<sup>1</sup> Te sátá ñi cundiquì<sup>n</sup> nduu ndètátú ñáyiú, te tá Màriá Magdalèná, ndihí tá Salómé, ndihí tá Màriá náná tǎ Jàcobó ní saa<sup>n</sup>-yu acití sàhá<sup>n</sup> tnámí cuendá canehé-yu quihí<sup>n</sup> chihí-yu yǎquì cùñú Jèsús. <sup>2</sup> Te ndumìngú nehé-ni òré vitna vǎha vǎha ní xinu coto núu nchíanchii ní quexió-yu núu nchíi yáú yǎquì cùñú Jèsús. <sup>3</sup> Te ní xǎtnàhá-yu:

—Yoo cúñaha-o xòcani yáú ndèdí yuhu yáú-a, chí vá yǒo tnàhí ndècu iha —cachí-yu xǎtnàhá-yu.

<sup>4</sup> Te òré ní xíndéhé vǎha-yu te ní xiní-yu sá yúú cáhnú ndèdí yuhu yáú-á<sup>n</sup> ì<sup>n</sup> xio-ná ndécú. <sup>5</sup> Te cuánguìhú-yu xití yáú-á<sup>n</sup>, te ní xiní-yu nùcòo ì<sup>n</sup> espíritú xínú cuèchi núu Yá Ndiǒxí ndàa xio cuhá-yu, te càa-xi datná cáá ì<sup>n</sup> tée cuechi, te ñihnu-xi ì<sup>n</sup> dóo cuixí<sup>n</sup> dóo cání, te ní yùhú-yu òré ní xiní-yu espíritú-á<sup>n</sup>. <sup>6</sup> Te espíritú-á<sup>n</sup> ñi xáha<sup>n</sup>-xi xii-yu:

—Vá yùhú-ndó, chí yùhú sa cùtnuní iní-í sá nchòhó véxi-ndo nànducu-ndo yǎquì cùñú Jèsús tée ñuú Nazàrét tée ní sahani-güedé núu cùrúxí, dico ñá túú-gǎ yǎquì cùñú-dé ndécú iha chí sa ní ndoto-dé, te chí cùndèhe núu ñi sacá<sup>n</sup>-güedé yǎquì cùñú-dé te quini-ndó ñá ñá túú-gǎ-dé. <sup>7</sup> Te chí cuáhá<sup>n</sup> núu ndécú tǎ Pèlú ndihí dava-gá cue tée ní xica cuu ndihí-dé, te duha cúñaha-ndo xii-güedé: “Jèsús codonùu-gá núu-ndó quihí<sup>n</sup> distrítú Galileá, te yàcá<sup>n</sup> quini-ndó-gǎ dàtná ní cachí-gá xii-ndo”, duha cúñaha-ndo xii-güedé —càchí espíritú-á<sup>n</sup> xáha<sup>n</sup>-xi xii-yu.

<sup>8</sup> Te cue ñáyiú òhí-á<sup>n</sup> ìo ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá ìo ní yùhú-yu, te ñá túú tnàhí ná tnúhu ní xǎhǎ<sup>n</sup>-yu xii cue ñáyiú ní naníhí-yu ichi cuendá sá ìo ní yùhú-yu.

*Tá Màriá Magdalèná ní xiní-xi Jèsús*  
*(Jn. 20:11-18)*



<sup>9</sup> Te sáta dúcá<sup>n</sup> ñi ndoto Jèsús ndumìngú nehé-ni-á<sup>n</sup>, te díhna nuu-gã tá Màriá Magdalèná ní quee túu-gá núú-xi, te ñiu tá Màriá-á<sup>n</sup> cúu-xí xíchí ñi xíhi ñaha úsá espíritú cúndíhi yucu ñávãha ni cùu, te Jèsús ní queñuhu-gá nchaa espíritú-á<sup>n</sup> yiqui cùnú-xi. <sup>10</sup> Te xíchí-ã<sup>n</sup> ñi sáhá<sup>n</sup>-xi ní xítñuhu-xi cue téé ní xica cuu ndíhi Jèsús nàcuáa ní cuu, te xíndáhi-güedé sá ndíhú iní-güedé òré ní quexìo-xi núú ndécú-güedé. <sup>11</sup> Te òré ní xáha<sup>n</sup> tã Màriá xii-güedé sá ñi ndoto Jèsús ndíhi sá ñi xiní ñáhá-xí xii-gá, te ñá túú ní sàndáa iní-güedé.

*Jèsús ní quee túu-gá núú úú cue téé ní xica cuu ndíhi-gá*

*(Lc. 24:13-35)*

<sup>12</sup> Te úú tñáhá cue téé ní xica cuu ndíhi Jèsús ñúhú-güedé ichi cuáhá<sup>n</sup>-güedé yucu, te uu<sup>n</sup>i ní quee túu-gá núú-güedé, te ní dácótó ñaha-xi xii-güedé sá ñá túú-gã cáá-gã dàtná cáá-gã. <sup>13</sup> Te cue téé úú-á<sup>n</sup> ñi xica-güedé cuáhá<sup>n</sup>-güedé ní xítñuhu-güedé nchaa dava-gá cue téé ní xica cuu ndíhi-gá sá ñi xiní ñáhá-güedé xii-gá, dico ñiu-ni duca<sup>n</sup> ñá túú ní sàndáa iní cue téé-á<sup>n</sup> tñuhu ní cáhá<sup>n</sup>-güedé.

*Jèsús xáha<sup>n</sup>-gã xii cue téé ní xica cuu ndíhi-gá nàcuáa ndíu chiu<sup>n</sup> cada-güedé*

*(Mt. 28:16-20; Lc. 24:36-49; Jn. 20:19-23)*

<sup>14</sup> Te ndí ùxí ñ<sup>n</sup> cue téé ní xica cuu ndíhi Jèsús yíhi-güedé mèsá xéxí-güedé, te ní quee túu-gá núú-güedé te ní tenàa ñáhá-gã xii-güedé cuèndá sá ño sàá iní-güedé ñá túú sàndáa iní ñáhá vãha-güedé xii-gá, chí ñá túú ní cuèní-güedé quíndáa iní-güedé nàcuáa ní xáha<sup>n</sup> ñá yiu ní xiní ñáhá xii-gá sáta ñi yáha ní ndoto-gá. <sup>15</sup> Te ní xáha<sup>n</sup>-gã xii-güedé:

—Quíhí<sup>n</sup>-ndó ñíhí ñuyú cáhá<sup>n</sup>-ndó núú nchaa ñá yiu tñuhu váha tñuhu sá cáhá<sup>n</sup> nàcuáa naníhí tãhú-yu. <sup>16</sup> Te nchaa ñá yiu na quíndáa iní tñuhu-á<sup>n</sup> te cuanduté-yu, te naníhí tãhú-yu, dico nchaa ñá yiu vá quíndáa iní tñuhu-á<sup>n</sup> te cuíta nihnú-yu. <sup>17</sup> Te nchaa ñá yiu na quíndáa iní ñáhá xii-í te cadá-yu sá vã yõ tñáhí ndàcu cada, te cuncenehe ñáhá-yu xii-í, te queñuhú-yu nchaa espíritú cúndíhi yucu ñávãha yíhi ñaha xii

ñá yiu. Te uu<sup>n</sup>i ndacú-yu cáhá<sup>n</sup>-yu ingá núú tñuhu sá vãta dácuàha-gá-yu. <sup>18</sup> Te cuèi na tñí-yu cóo dèé<sup>n</sup> dico ñá túú ñá cada ñaha-ñi xii-yu, te cuèi venènú ná cáxí-yu dico ñá túú ñá tñáhá-yu, te tendáhá-yu cue ñá yiu cùhú te ndúha-yu —càchí-gá xáha<sup>n</sup>-gã xii-güedé.

*Jèsús cuánda-gá andíu*

*(Lc. 24:50-53)*

<sup>19</sup> Te sáta ñi yáha duca<sup>n</sup> ñi xáha<sup>n</sup> Jèsús xii cue téé ní xica cuu ndíhi-gá, te ní ndanchita-gá cuánda-gá andíu te ní ngóo-gá xio cùha Dútú Ndiõxí. <sup>20</sup> Te cue téé-á<sup>n</sup> ñi xica-güedé cuáhá<sup>n</sup>-güedé, te ní ngúita-güedé cáhá<sup>n</sup>-güedé tñuhu Xítohó Jesucristú nchaa xichi. Te mee-gã ní chindee ñaha-gã xii-güedé ní quide-güedé nchaa sá vã yõ tñáhí ndàcu cada cuèndá cutnùní iní ñá yiu sá ndàa cáhá<sup>n</sup>-güedé tñuhu-gá. Duha ní cuu dàvá-á<sup>n</sup>.

## TNÚHU NÍ CHÍDÓ TNÙNÍ TÉ LÛCÁ

### *Nàcuáa ní ngódó tnùní tnúhu Yá Ndiöxí*

<sup>1</sup> Te vâi ñáyiú chîdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nàcuáa ní cuu. <sup>2</sup> Te ñáyiú nchaa tnúhu chîdo tnuní-yu-án cúú-xí tnúhu ní cáhá<sup>n</sup> nchaa cue téé ní xini ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndiöxí. <sup>3</sup> Te yúhú sa ní cuu nduu quide cuendá-í nchaa nàcuáa ní cuu, núu xíá<sup>n</sup> ní sani iní-í tee váha-í nchaa tnúhu-a núu tütú sá cúú-xí yòhó té Tëofilú chi ío váha cùu iní-í sá cúú-xí-n, <sup>4</sup> te tèe-í cuendá cutnùní iní-n sá sá ndáá cúú-xí nchaa sá ní dánèhé ñáhá-güedé xii-n.

### *Í<sup>n</sup> espíritú xínú cuèchi núú Yá Ndiöxí cächí-xi sá cáciú ñ<sup>n</sup> téé cunani Juáá*

<sup>5</sup> Te cútnàhá ní xíndaha té Hèrodés ñáyiú distrítú Jùdeá dàvá-án ñí xíndecu ñ<sup>n</sup> dútú ñí xínani-dé Zacàriá, te ní cundihi-dé cue dútú Àbíás. Te ñadìhí-dé ní xínani-a<sup>n</sup> Èlisabét, te ñaha-án ñí cuu-a<sup>n</sup> ñani tnàhá ndi Àrón. <sup>6</sup> Te ndi ndùú-yu ío ní quide ndáá-yu núu Dütú Ndiöxí, chi ní tñi-yu nchaa tnúhu ní cáhá<sup>n</sup>-gá. <sup>7</sup> Te ñá túú ñí ñ<sup>n</sup> déhe-yu, chi duca<sup>n</sup> táhú tá Elisabét sá vâ cóo déhe-a<sup>n</sup>, te duca<sup>n</sup> ndi nduú-yu ío ní sahnú-yu.

<sup>8</sup> Te ñ<sup>n</sup> nduu xínu cuechi tucu té Zacàriá ndihi nchaa cue téé cundihi-dé núu Yá Ndiöxí xití veñúhu. <sup>9</sup> Te dàvá-án ñí xito ndéé-güedé cuendá cutnùní iní-güedé núu ndèdaca-güedé quíhu núu nàá xití veñúhu-án cahmi-güedé sá sàhá<sup>n</sup> tnámí, te ní cutnùní sá tē Zacàriá quíhu-dé. Te duca<sup>n</sup> ñí quide-güedé, chi duca<sup>n</sup> tnàhí ní xóo cada nchaa cue dútú dàvá-án. <sup>10</sup> Te ñini sàhmi té Zacàriá sá sàhá<sup>n</sup> tnámí núu nàá, te vâi vihi ñáyiú xíndecu quehé veñúhu-án càhá<sup>n</sup> ndihi-yu Yá Ndiöxí. <sup>11</sup> Te ní xini té Zacàriá ñ<sup>n</sup> espíritú xínú cuèchi núu Yá Ndiöxí núnñi-xi xio cùha núu nàá núu càyú sá sàhá<sup>n</sup> tnámí-án. <sup>12</sup> Te òré ní xini té Zacàriá espíritú-án te ñá ní cutnùní iní-dé nása cada-dé chi ío ní yúhú-dé. <sup>13</sup> Te espíritú-án ñí xáha<sup>n</sup>-xi:

—Zacàriá, vá yúhú-n chi Yá Ndiöxí ní tedóho-gá tnúhu ní cáhá<sup>n</sup>-n, te vitna coo ñ<sup>n</sup> déhe ñadìhí-n tá Elisabét te danàni-n-dé Juáá. <sup>14</sup> Te ío cudíí iní-n, te duca<sup>n</sup> ío vâi ñáyiú cudíí iní-yu na càcu-dé. <sup>15</sup> Te ío cudíu-dé núu Yá Ndiöxí, te ní vâ cóhó-dé ndidí te ní vâ cóhó-dé ndudí sá ñí natíu, te sa cundecu ndihi-dé Espíritú Yá Ndiöxí òré cacu-dé. <sup>16</sup> Te ñáyiú cada te ío vâi ñáyiú isràél natuhá-yu ichi Dütú Ndiöxí Yá cúú Ndiöxí-ó. <sup>17</sup> Te té Juáá-án codonù-dé núu-gá, te cundecu ndihi-dé Espíritú-gá, te taxi tnùní-dé dàtná ní quide té Èliás. Te nacanu ichi-dé cue téé cùu sacuéhé cuendá cada-güedé sá váha sá cúú-xí cuè téé cuechi, te cuèi cue téé ío sàá iní-xi, te ñáyiú cada te tñi-güedé tnúhu váha, tnúhu càhá<sup>n</sup> ñáyiú quide ndáá. Te duca<sup>n</sup> càda-dé cada túha-dé ñáyiú cuendá cunu cuèchí-yu núu Dütú Ndiöxí —cächí-xi xáha<sup>n</sup>-xi xii-dé.

<sup>18</sup> Te té Zacàriá ní ndúcú tnúhu-dé núu espíritú-án, te xáha<sup>n</sup>-dé:

—¿Te nása cutnùní ndáá iní-í tnúhu càhá<sup>n</sup>-n-í? Chi yúhú ío ní sahnú-í ndihi ñadìhí-í —cächí-dé xáha<sup>n</sup>-dē xii-xi.

<sup>19</sup> Te espíritú-án ñí xáha<sup>n</sup>-xi:

—Yúhú cùu-í espíritú nání Gàbriél, te xínu cuechi-í núu Yá Ndiöxí, te mee-gá ní táuchíú-gá náhá-í tnúhu-gá véxi cuendá cutnùní iní-n nàcuáa cada ñaha-gá xii-ndo.

<sup>20</sup> Te vitna cuu ñihí-n te vá càhá<sup>n</sup>-gá-n ndéé ná sàá nduu càcu déhe ñadìhí-n, chi ñá túú ní sàndáá-ni iní-n tnúhu ní cáhá<sup>n</sup>-í. Te dacuití sáá nduu càda-xi nàcuáa ní cáhá<sup>n</sup>-í-a —cächí espíritú-án xáha<sup>n</sup>-xi xii-dé.

<sup>21</sup> Te nchaa ñáyiú xíndecu quehé ndétü-yu té Zacàriá, te xícuñúhu-yu sá ío cùyaa-dé xití veñúhu. <sup>22</sup> Te òré ní ndee té Zacàriá, te ñá ní cùu-gá cáhá<sup>n</sup> ndihi ñaha-dé xii-yu, te òré-án ñí cutnùní iní-yu sá ñí xini-dé ñ<sup>n</sup> espíritú xínú cuèchi núu Yá Ndiöxí xití veñúhu. Te mee-nà ndaha-dé ní quide-dé núu-yu chi ñá ní cùu-gá cáhá<sup>n</sup>-dé.

<sup>23</sup> Te ní xínu nduu ñí xínu cuechi tē Zacàriá núu Yá Ndiöxí xití veñúhu, te cuánuhú-dé vehe-dé. <sup>24</sup> Te sáta dúcá<sup>n</sup> ñí cuu te ñadìhí-dé tá Elisabét ní ngúhu<sup>n</sup> déhe-a<sup>n</sup>, te úhú<sup>n</sup> yóó ñá túú tnàhí-gá ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>: <sup>25</sup> “Mee Dütú Ndiöxí duha ní cundàhú iní ñáhá-gá sá cóo ñ<sup>n</sup>

déhe-í cuendá sá vǎ cúu yǐchí iní ñáhá ñǎyiu xii-í”, duha ní cachí-a<sup>n</sup>.

*I<sup>n</sup> espíritú xínú cuèchi núú Yǎ Ndiǒxí cǎchí-xi sá cǎcú Jèsús*

26-27 Te núú iñú yóó sǎ ñí ngúhu<sup>n</sup> déhe tá Elisàbét, te ní tendaha tùcu Yá Ndiǒxí espíritú nání Gǎbriél cuáhá<sup>n</sup>-xi ñ<sup>n</sup> ñúú nání Nàzarét cuáhá<sup>n</sup> ngoto-xi ñ<sup>n</sup> xíchí cuéchí nàni Mariá. Te ñúú-á<sup>n</sup> yíndèhu-xi distritú Galileá. Te xíchí-ǎ<sup>n</sup> sa ní cundáá tnúhu sá tnándaha-xi ndíhi ñ<sup>n</sup> téé nàni Cheé ñaní tnáhá ndíi Dávíi. 28 Te espíritú-á<sup>n</sup> ñí quíhu-xi ndéé xití vehe núú ndécú tǎ Màriá, te ní xáha<sup>n</sup>-xi:

—ǐCóvǎha-n-a<sup>n</sup>! Dútú Ndiǒxí ío cùu iní ñáhá-gǎ xii-n te ndècu ndíhi ñaha-gǎ, te ío-gǎ xító ñaha-gǎ xii-n dàcúúxí dǎva-gǎ ñáyiu dǐhí —cǎchí espíritú-á<sup>n</sup> xǎha<sup>n</sup>-xi.

29 Dico òré ní xiní tá Màriá espíritú-á<sup>n</sup>, te ní quiyùhú iní-xi sá dúcá<sup>n</sup> ñí cǎhá<sup>n</sup> espíritú-á<sup>n</sup>. Te ní sani iní-xi: “ǐNá cuendá duha cǎhá<sup>n</sup>-tu espíritú-a-i?”, duha ní sani iní-xi. 30 Te espíritú-á<sup>n</sup> ñí xáha<sup>n</sup>-xi:

—Màriá, vá yùhú-n chi duca<sup>n</sup> ñí nduu táhú-n ñúu Yá Ndiǒxí. 31 Te vitna ngúhu<sup>n</sup> déhe-n, te na cǎcu-dé te danàni-n-dé Jèsús. 32 Te ío cunuu-dě, chi Dútú Ndiǒxí Yáá ío cùnuu cachí-gǎ sá Dèhe-gǎ cúu-dě, te dǐu-gǎ cada te cuu-dé ñ<sup>n</sup> téé cùnuu núú ñáyiu isràél dàtná ní quide-gǎ ndíi Dávíi. 33 Te taxi tnùní-dé ñáyiu isràél, te duca<sup>n</sup>-ni cùnuu-dé ñí caa ñí quíhí<sup>n</sup> —cǎchí-xi xǎha<sup>n</sup>-xi.

34 Te tá Màriá ní xáha<sup>n</sup>-xi xii espíritú-á<sup>n</sup>:

—ǐTe nása cuu tnúhu cǎhá<sup>n</sup>-n te ñá túú yǐi-í-i? —cǎchí-xi xǎha<sup>n</sup>-xi.

35 Te ní xáha<sup>n</sup> espíritú-á<sup>n</sup>:

—Espíritú Yǎ Ndiǒxí quixi cundecu ndíhi-n, te duca<sup>n</sup> Yǎ Ndiǒxí cada-gǎ ñ<sup>n</sup> sá vǎha sá cúu-xí-n ná cǎcu déhe-n. Te Yá Ndiǒxí cǎchí-gǎ sá ío cundecu yíñùhu-dé núú-gǎ, chi Dèhe-gǎ cúu-dě. 36 Te tnáhá didí-n tǎ Elisàbét ñúhú dèhe-a<sup>n</sup> cuèi ío ní sahnú-a<sup>n</sup>, te dǐu-a<sup>n</sup> cǎchí-yu sá vǎ cóo dèhe-a<sup>n</sup> ni cùu, te vitna sa ní cuu íñú yóó ñúhú dèhe-a<sup>n</sup>. 37 Chi Yá Ndiǒxí ndácú-gǎ quidé-gǎ nchaá sá vǎ yǒo tnáhí ndàcu cada —cachí-xi xǎha<sup>n</sup>-xi.

38 Te tá Màriá ní xáha<sup>n</sup>-xi:

—Yùhú ná cúnú cuèchi-í núú Dútú Ndiǒxí, te mee-gǎ ná cǎdá ñaha-gǎ xii-í nàcuáa ní cachí-n —cǎchí-xi xǎha<sup>n</sup>-xi xii espíritú-á<sup>n</sup>.

Te sátá dúcá<sup>n</sup> te espíritú-á<sup>n</sup> ñí xica-xi cuáhá<sup>n</sup>-xi.

*Tá Màriá cuáhá<sup>n</sup> ngoto-xi tá Elisàbét*

39 Te tá Màriá ío ndíhi cuáhá<sup>n</sup>-xi ñ<sup>n</sup> ñúú cǎá xití yucu distritú Jùdeá. 40 Te ní sǎá-xi vehe té Zacàriá, te cuánguihu-xi ní dándácǒo váha-xi tá Elisàbét. 41 Te òré ní tecú dóho tá Elisàbét ní cǎhá<sup>n</sup> tá Màriá, te ní candá déhe-a<sup>n</sup> xití-a<sup>n</sup>, te òré-á<sup>n</sup> ñí ngúndecu ndíhi-a<sup>n</sup> Espíritú Yǎ Ndiǒxí. 42 Te níhi ní cǎhá<sup>n</sup>-a<sup>n</sup>, te xǎha<sup>n</sup>-a<sup>n</sup> xii tá Màriá:

—Yá Ndiǒxí ío xító ñaha-gǎ xii-n dàcúúxí dǎva-gǎ tnàha dǐhí-ó, te duca<sup>n</sup>-ni xító-gǎ cuèi déhe-n. 43 ǐTe ná cúu yùhú ñúu véxi coto ñaha yòhó nǎná Yáá cúu Xítóhó-í-i? 44 Chi òré-ni ní tecú dóho-í ní cǎhá<sup>n</sup>-n te ní candá-ni déhe-í xití-í sá cùdǐí iní-dé. 45 Te váha táhú yòhó sá ñí sàndáá iní-n, chi dacuití sǎ cǎdá Dútú Ndiǒxí nàcuáa ní cǎhá<sup>n</sup> espíritú ní tendaha-gǎ ní quixi ní cachí tnúhu xii-n nàcuáa cada-gǎ —cǎchí-a<sup>n</sup> xǎha<sup>n</sup>-a<sup>n</sup> xii tá Màriá.

46 Te ní xáha<sup>n</sup> tǎ Màriá:

Ío cǎhnu cuu Dútú Ndiǒxí,

47 Ío cùdǐí iní-í chi dǐu-gǎ taunihnu ñaha-gǎ xii-í núú ùhú núú ndàhú.

48 Chi ní ndacu iní ñáhá-gǎ xii yùhú, te dǐcò ñ<sup>n</sup> xíchí xínú cuèchi núú-gǎ cúu-í, te vitna te nchaandǐ túhú ñáyiu cachí-yu sá ío váha táhú-í.

49 Te Yá Ndiǒxí cǎndòo caa nine iní-gǎ, te ío cǎhnu ñ<sup>n</sup> sá vǎha ní quide-gǎ sá cúu-xí-í.

50 Te cùndahú iní-gǎ nchaá ñáyiu nèhe sá yíñùhu núú-gǎ.

Te duca<sup>n</sup>-ni cuèi ñáyiu sa ndècu ñuyíú-a ndíhi ñáyiu vitna véxi.

51 Chi ta quide-gǎ nchaá sá vǎ yǒo tnáhí ndàcu cada véxi, te ta dándóo canúú-gǎ cue ñáyiu quide cahnu mee-xi.

52 Te cue ñáyiu tàxi tnùní ñá túú-gǎ dǎñá-gǎ taxi tnùní-yu,

te cue ñáyiu ndàhú ní quide nínu ñaha-gǎ xii-yu.

53 Te cue ñáyiu ndècu ndíhi tnúndòho tnúhu ndàhú ní quide váha ñaha-gǎ xii-yu,

te cue ñáyiú cuica ñà túú nă ní ñihí-gă-yu cundecu ndihí-yu.

54 Te chindee-gă ñáyiú isrâél, ñáyiú xînu cuechi núú-gă, te ñá túú dàña ni-hnu ñaha-gă xií-yu, chi cùndahú iní ñáhá-gă.

55 Chi duca<sup>n</sup> ñí xáha<sup>n</sup>-gă xii ndíi Àbrahám, ndihí cue ñaní tnáhá ndíi. Duha ní xáha<sup>n</sup> tă Màriá xii tá Elisàbét.

56 Te ní xîndecu tá Màriá dàtná úní yóó ndihí tá Elisàbét te dàtnùní cuánuhú-xi vehe-xi.

*Ní cacu té Juàá té dacuàndute ñaha xii ñáyiú*

57 Te ní sáá nduu ñí cacu ñí<sup>n</sup> déhe téé tá Elisàbét. 58 Te nchaa ñáyiú ndècu yatni ndihí-a<sup>n</sup>, ndihí nchaa ñaní tnáhá-á<sup>n</sup> ñí níhí-yu tnúhu nàcuáa ní chindee ñàha Yá Ndiöxí xii-a<sup>n</sup>. Te ío ní cudíi iní-yu cuendá-a<sup>n</sup>.

59 Te núú ùná nduu sá ñí cacu déhe-a<sup>n</sup>, te ní sáhá<sup>n</sup> ñáyiú núú ndécú-á<sup>n</sup> cuendá cuáhă-yu sèñá ñí<sup>n</sup> déhe-a<sup>n</sup>. Te cuiní-yu cunani dèhe-á<sup>n</sup> Zacàriá dàtná nání tătă ní cùu. 60 Te ní xáha<sup>n</sup> năná dèhe-á<sup>n</sup>:

—Ñáhá, chi Juàá cunani-dě —càchí-a<sup>n</sup> xáha<sup>n</sup>-a<sup>n</sup> xií-yu.

61 Te ní xáhă<sup>n</sup>-yu:

—¿Te ná cuendá te ñá túú ñí ñí<sup>n</sup> ñaní tnáhá-ndó dùca<sup>n</sup> nani-i? —cachí-yu xáhă<sup>n</sup>-yu.

62 Te ní quidé-yu ndàhá-yu núú tătă dèhe-á<sup>n</sup> cuendá cuiní-yu núú nása cuiní méé-dě cunani dèhe-dé. 63 Te ní xícá<sup>n</sup>-dé ñí<sup>n</sup> tutú ní chídó tnùní-dé nàcuáa cunani dèhe-dé, te duha ní chídó tnùní-dé: “Juàá cunani-dě”, càchí-xi núú tütú ní tee-dé-á<sup>n</sup>. Te nchaa ñáyiú xîndecu-á<sup>n</sup> ñí cuñúhu-yu nàcuáa ní cuu. 64 Te òré-á<sup>n</sup> ñí nacáhá<sup>n</sup> té Zacàriá sá ñí cuu ñihí-dé ní cùu, te ní ngúita-dé ní cachí-dé sá ño càhnu cuu Yá Ndiöxí. 65 Te nchaa ñáyiú xîndecu yatni ndihí-dé ní cuñúhu-yu, te nchaa ñáyiú xîndecu nihíi xití yucu distritú Jùdeá ní níhí-yu tnúhu nàcuáa ní cuu. 66 Te nchaa ñáyiú-á<sup>n</sup> ño vâi ní sani iní-yu, te ní xítñahá-yu:

—¿Ná cúú să cádá tēe-ă<sup>n</sup> ndéé ìdá-gă ná cuèhnu-dé? —càchí-yu xítñahá-yu.

Te duca<sup>n</sup> ñí xítñahá-yu chi Dútú Ndiöxí ndécú ndihí ñaha-gă xii-dé.

*Té Zacàriá càchí-dé sá ño càhnu cuu Yá Ndiöxí*

67 Te té Zacàriá tătă tē ñihli-á<sup>n</sup> ñí ngúndecu ndihí-dé Espiritú Yá Ndiöxí te ní cáhá<sup>n</sup>-dé nchaa tnúhu sá ñí dánèhé ñáhá-gă, te ní cachí-dé:

68 Ío càhnu cuu Dútú Ndiöxí nchoo ñáyiú isrâél,

chi ní quixi coto ñaha-gă xii-o, te cùu-o ñáyiú cùu cuendá-gă, chi dàcácu ni-hnu ñaha-gă xii-o vitna.

69 Chi ní tendaha-gă ñí<sup>n</sup> téé véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíi téé ní xinu cuechi núú-gă ndéé sanaha.

70 Te diu-ni tnúhu ní cáhá<sup>n</sup> Yá Ndiöxí ní cáhá<sup>n</sup> cue téé ní quide ndáá ní xîndecu núú-gă ñuyúú-a ndéé sanaha.

71 Te ní cachí-güedé sá táunihnu ñaha-gă xii-o núú nchàa ñáyiú cùu ùhú iní ñáhá, ndihí núú nchàa ñáyiú ñá túú cùu quini ndee ñáhá.

72 Te ní xáha<sup>n</sup>-gă sá cùndahú iní ñáhá-gă xii-o, te duca<sup>n</sup> càda-gă chi vá nàcuánaa-gă tnúhu ní cáhá<sup>n</sup>-gă ndihí-güedé.

73 Te diu duca<sup>n</sup> ndùu tnúhu ní xáha<sup>n</sup>-gă xii ndíi Àbrahám sá

74 táunihnu ñaha-gă xii-o núú nchàa ñáyiú cùu ùhú iní ñáhá,

cuendá sá vâ yùhú-ó cùnu cuechi-o núú-gă.

75 Te cada ndáá-ó, te cundecu yíñuhu-o núú-gă ndi nchàa nduu cundecu-o ñuyúú-a.

Duha ní cachí té Zacàriá.

76 Te xáha<sup>n</sup>-dě xii té ñihli-á<sup>n</sup>:

Te yòhó té ñihli, cáhá<sup>n</sup> ñáyiú cuendá-n să cúú-n ñí<sup>n</sup> téé cáhá<sup>n</sup> tnúhu Dútú Ndiöxí Yáá ío cùnuu,

chi quíhí<sup>n</sup>-n còdonuu-n núú Yáá cúú Xítòhó-ó dàtúha-n ñáyiú cuendá cundecu túha-yu òré quexìo-gă.

77 Te cúñaha-n xii ñáyiú isrâél sá cuiní-gă cada càhnu iní-gă nchaa cuéchi-yu,

te naníhí tàhú-yu.

78 Te duca<sup>n</sup> càda-gă chi ío cùu iní ñáhá-gă xii-o, chi ndéé andíu ñí tendaha-gă ñí<sup>n</sup> téé véxi

cuu<sup>n</sup>-dé dandixi túu-dé iní-ó cuendá cutnùní iní-ó nàcuáa ndùu cuendá Yá Ndiöxí.



79 Te duca<sup>n</sup> dândixi túu-dé iní nchaa ñáyi ndècu ichi cuehé ichi duha ta xíta nihnu cuáhá<sup>n</sup> cuendá nucúnu ichi-yu ñ<sup>n</sup> ichi váha.

Duha ní xáha<sup>n</sup> tẽ Zacàriá xii déhe-dé.

80 Te té lĩhli-á<sup>n</sup> tá sàhnu-dé, te ta chĩndee chitúu ñaha Yá Ndiõxí xii-dé cuáhá<sup>n</sup>, te ní xĩndecu-dé xití yucu ndéé ní sáá nduu ñi ngũíta-dé ní cáhá<sup>n</sup>-dé núú cuè ñáyi isràèl tnúhu Yá Ndiõxí.

## 2

### *Ní cacu Jèsús (Mt. 1:18-25)*

1 Te dává-á<sup>n</sup> ñi táuchíu<sup>n</sup> tẽ Aùgustú Cèsár nucodó tnúni nchaa ñáyi nació<sup>n</sup> yĩndàha-dé. 2 Te xéhé sã dĩhnanuu ñi nucodó tnúni ñáyi, te diu-ni dává-á<sup>n</sup> ñi cunuu té Cĩreniú distritú Siríá. 3 Te nchaa ñáyi ní nataká-yu ñúú núú ñi cacú-yu cuendá nucodó tnúni-yu. 4 Núú xiá<sup>n</sup> ní quee té Chèè ñúú Nazàrét ñ<sup>n</sup> ñúú yĩndèhu distritú Galileá, te cuáhá<sup>n</sup>-dé ñúú Bèlén ñ<sup>n</sup> ñúú yĩndèhu distritú Jùdeá, chi xiá<sup>n</sup> ñi cuu ñúú ndí Dàvíí, te diu-ni ñani tnáhá tẽ Chèè-á<sup>n</sup> ñi cuu ndí. 5 Núú xiá<sup>n</sup> cuáhá<sup>n</sup>-dé ndéé ñúú Bèlén nucodó tnúni-dé, te tnáhá tá Màriá xíchí ñi cundáá tnúhu sá tnãndaha ndíhi-dé cuáhá<sup>n</sup> ndíhi ñaha-dé, te sa ñúhu déhe-xi. 6 Te ñini cùyaá-yu ñúú Bèlén-á<sup>n</sup> ñi sáá òrè cacu déhe-xi. 7 Te ní cacu déhe díhna-xi, te ní chidúcú<sup>n</sup>nuu-xi dóó, te ní sacá<sup>n</sup> ñáhá-xi ñ<sup>n</sup> vehe núú cúú vèhe quití, chi ñá túú ní ñĩhí-yu vehe coó-yu.

*Cue espíritú xínú cuèchi núú Yá Ndiõxí ndíhi cue toli.*

8 Te yatni ñúú-á<sup>n</sup> xĩndecu ñ<sup>n</sup> úú toli ndéé-güedé mbèé-güedé ndécú-güedé majadá niú-á<sup>n</sup>. 9 Te uu<sup>n</sup>ni ní quexìo ñ<sup>n</sup> espíritú xínú cuèchi núú Yá Ndiõxí, te Yá Ndiõxí ní quide-gá ní dáyèhé-xi ní càndéé núú xĩndecu-güedé, te ní yùhú víhí-güedé. 10 Te ní xáha<sup>n</sup> espíritú-á<sup>n</sup>:

—Vá yùhú-ndó, chi nàha-í ñ<sup>n</sup> tnúhu váha véxi sá cúú-xi-ndó, te ío cudí<sup>ñ</sup> ñi-ndó ndíhi nchaa ñáyi. 11 Chi vitna ní cacu ñ<sup>n</sup> tée dàcácu nihnu ñaha xii-ndo núú ùhú núú ndáhú ñúú ndí Dàvíí, te tée-á<sup>n</sup> cúú-dé Xítóhó Jesucrístú. 12 Te dàtná ñ<sup>n</sup> sèñá te naníhí-ndó tẽ lĩhli-á<sup>n</sup> yídúcú<sup>n</sup> nuu-dé

dóó cáá-dé ñ<sup>n</sup> vehe quití —càchí-xi xáha<sup>n</sup>-xi xii-güedé.

13 Te òrè-á<sup>n</sup> ñi quexìo cuéhé víhí espíritú véxi cuu<sup>n</sup> andiu ñi naníhí tnáhá-xi ndíhi espíritú-á<sup>n</sup>, te ní ngũíta-xi ní chiñuhu-xi Yá Ndiõxí, te càchí-xi:

14 ¡Ío càhnu cuu Yá Ndiõxí Yaá ndécú àndiu, te na cùndecu váha-ni nchaa ñáyi cùu iní mée-gã!

Duha càchí cue espíritú-á<sup>n</sup>.

15 Te òrè cuánda cue espíritú-á<sup>n</sup> andiu, te ní ngũíta cue toli-á<sup>n</sup> xĩtnàha-güedé:

—Na quíhí<sup>n</sup>-ó ñúú Bèlén quini-ó nàcuáa ní cuu, chi Dútú Ndiõxí sa ní cachí tnúhu-gá —càchí-güedé xĩtnàha-güedé.

16 Te ní tñi-güedé ichi súúni ndíhi cuáhá<sup>n</sup>-güedé, te ní naníhí-güedé tá Màriá ndíhi té Chèè, ndíhi té lĩhli-á<sup>n</sup> cáá-dé xití ñ<sup>n</sup> vehe quití. 17 Te òrè ní xini ñáhá-güedé te ní xáha<sup>n</sup>-güedé xií-yu nàcuáa ní xáha<sup>n</sup> espíritú-á<sup>n</sup> xii-güedé cuendá té lĩhli-á<sup>n</sup>. 18 Te nchaa ñáyi ní tecú dóho-xi ní cuñúhu-yu nàcuáa ní cáhá<sup>n</sup>-güedé. 19 Dico tá Màriá chi ñúhu nahi-ni iní-xi, te dicó-ni sàni iní-xi cuendá nchaa tnúhu-á<sup>n</sup>. 20 Te cue toli-á<sup>n</sup> ñi natñi-güedé ichi, te ta xĩtnàha-güedé cuánuhú sã ío càhnu cuu Yá Ndiõxí cuendá nchaa tnúhu ní xĩndedóho-güedé, ndíhi cuendá nchaa sá ñi xini-güedé, chi cuendá sá ndáá ní cuu nchaa nàcuáa ní tecú tnúhu-güedé.

### *Ndècá-yu Jèsús cuáhá<sup>n</sup> veñúhu*

21 Te núú ùná nduu sá ñi cacu té lĩhli-á<sup>n</sup>, te ní sáha-güedé sèñá ñ<sup>n</sup>-dé, te ní dánání ñaha-güedé Jèsús xii-dé, diu-ni nàcuáa ní xáha<sup>n</sup> espíritú xínú cuèchi núú Yá Ndiõxí xii tá Màriá ndéé cùtnáhá vátá ngũhu<sup>n</sup>-gá-dé xití-xi.

22 Te sátá ñi tnáhá nduu, ndúu ñi-yu nàcuáa cáhá<sup>n</sup> nchaa tnúhu ní chídó tnúni ndí Moisés, te ndècá-yu té lĩhli-á<sup>n</sup> cuáhá<sup>n</sup> ñúú Jerusálén cuendá quee túu-dé núú Dútú Ndiõxí. 23 Te duca<sup>n</sup> ñi quide-yu, chi duca<sup>n</sup> cáhá<sup>n</sup>-xi núú tütú Yá Ndiõxí sá ncháá lãndú tée na càcu díhna quetúu-güexi núú-gã cuendá cundecu-ná-güexi cuendá-gá. 24 Te ní quide-yu nàcuáa cáhá<sup>n</sup> Yá Ndiõxí núú tütú-gá núú càchí-xi: “Canehe-ndo úú lõmá àdi úú cùcu

quíhí<sup>n</sup> nduu táhú ñáhá Yă Ndiöxí”, duha cãhá<sup>n</sup>-gá núú tütú-gá.

<sup>25</sup> Te dává-án ndécú ñ<sup>n</sup> téé nàni Mió ñuú Jerusálén. Te ío váha iní-dé, te chíñuhu-dé Yă Ndiöxí, te ndètu-dé sáá nduu chindee ñaha Yá Ndiöxí xii ñáyiu isràél. Te ndècu ndihí té Mió-án Espíritú Yă Ndiöxí. <sup>26</sup> Te sa ní xáha<sup>n</sup>-xi xii-dé sá vă cùú-ni-dé, chí dacuítí quini-dé Cristú Yaá tendaha Yă Ndiöxí quixi ñuyíú-a. <sup>27</sup> Te téé-án ndécá ñaha Espíritú Yă Ndiöxí xii-dé cuáhán veñúhu cãhnu sá ño cùnuu. Te cuáhán-yu ndihí Jèsús veñúhu-án cuendá cada-yu ndihí-gá nàcuáa cãhá<sup>n</sup> tnúhu ní chídó tnùní ndíi Moisés. <sup>28</sup> Te òré ní sáá-yu, te té Mió-án ñí nguídèhé-dé Jèsús, te ní cãhá<sup>n</sup>-dé sá ño cãhnu cuu Yá Ndiöxí, te ní xáha<sup>n</sup>-dè xii-gá:

<sup>29</sup> Yòhó Dútú Ndiöxí sa ní cuu daña-n cùú-í vitna,

chí sa ní quide-n nàcuáa ní cachí-n xii yúhú téé xínu cuechi núú-n.

<sup>30</sup> Chí sa ní xiní núú-í Yaá dácácu nihnu ñaha xii ñáyiu núú ùhú núú ndàhú vitna.

<sup>31</sup> Te Yaá ní tendaha-n vèxi núú ndécú nchàa ñáyiu ñuyíú-a.

<sup>32</sup> Te cùu-gá dàtná ñ<sup>n</sup> ñuhú, chí dandìxi túu-gá iní ñáyiu cuendá cutnùní iní-yu cuendá Yă Ndiöxí cuèi ñá díú ñáyiu isràél cùú-yu.

Te diu-gá cada, te canehe ñáyiu dava-gá ñuú sá yíñuhu núú ñáyiu isràél chí diu ñáyiu isràél cùú-yu ñáyiu cùu cuendá-n.

Duha ní xáha<sup>n</sup> té Mió xii Yá Ndiöxí.

<sup>33</sup> Te té Chèé ndihí náná Jèsús ní cuñúhu-yu tnúhu ní cãhá<sup>n</sup> té Mió cuendá-gá. <sup>34</sup> Te dàtnùní té Mió ní xicá<sup>n</sup> táhú-dè núú Yă Ndiöxí cuendá-yu, te xáha<sup>n</sup>-dè xii tá Màriá náná Jèsús:

—Cundedóho tnúhu na cãhá<sup>n</sup>-í-a, té líhli-a ní nduu táhú-dè nacanu ichi-dé dava ñáyiu isràél ichi Yá Ndiöxí, te davá-yu vá tní-yu tnúhu cãhá<sup>n</sup>-dé, te ñáyiu-án cuíta nihnú-yu, te cada-dé nàcuáa cutnùní iní ñáyiu sá Yă Ndiöxí ní tendaha ñaha-gá xii-dé, dico vá quindáá iní-yu, chí daquèe tíhú ñáhã-yu xii-dé. <sup>35</sup> Te duca<sup>n</sup> te cutnùní nàcuáa sàni iní ñ<sup>n</sup> ñáyiu. Dico sá cùú-xi yòhó chí ío cada ndàhú-xi iní-n, chí súúní dàtná sá ní

nícuehé iní-n càda-xi —cachí-dé xáha<sup>n</sup>-dè xii tá Màriá.

<sup>36</sup> Te xía<sup>n</sup> ndécú tnàhá ñ<sup>n</sup> ñaha cãhá<sup>n</sup> tnúhu Yá Ndiöxí nání-án Aná, te tãtá-a<sup>n</sup> ní xínani-dè Fànuél ñani tnàhá ndíi Àsér. Te ñaha-án sa ní sahnu vèhi-a<sup>n</sup>, te cuechi-ni-a<sup>n</sup> ñí tnándaha-a<sup>n</sup> te úsá-ni cuía<sup>n</sup> ñí xíndecu-a<sup>n</sup> ndihí yí-a<sup>n</sup>, <sup>37</sup> te ní quendóo quèé-a<sup>n</sup>, te sa ñùhu-a<sup>n</sup> cùmídícó cùmí cuía<sup>n</sup>-a<sup>n</sup>. Te ñá túú ní xòo quee-a<sup>n</sup> veñúhu cãhnu sá ño cùnuu, chí nduu níu ní xòo chíñuhu-a<sup>n</sup> Dútú Ndiöxí, te áma ñá túú tnàhí ná ní xòo caxi-a<sup>n</sup> ní xòo cãhá<sup>n</sup> ndihí-a<sup>n</sup> Yá Ndiöxí. <sup>38</sup> Te diu-ni òré ndécú-yu ndihí Jèsús ní quexio-a<sup>n</sup> núú-yu, te ní ndacá<sup>n</sup> táhú-án núú Yă Ndiöxí cuendá sá ñí xiní-a<sup>n</sup> Jèsús, te dàtnùní ní nguíta-a<sup>n</sup> cãhá<sup>n</sup> váha-a<sup>n</sup> cuendá-gá núú nchàa ñáyiu, ñáyiu ndètu quini sáá nduu dácácu Yá Ndiöxí ñáyiu Jerusálén núú tnündòho tnúhu ndàhú.

### *Cuánuhú-yu ñuú Nazàrét*

<sup>39</sup> Te sátá ñí quidé-yu nchaa nàcuáa cãhá<sup>n</sup> tnúhu Yá Ndiöxí, te cuánuhú-yu ñuú Nazàrét núú ndécú tnàhí-yu, te ñuú-án yíndèhu-xi distritú Galiléa. <sup>40</sup> Te té líhli nàni Jèsús-án tá sahnu-dé, te ta nihí ndéé-dé cuáhán, te duca<sup>n</sup> ño váha ta sáá sá xini tnùní-dé cuáhán, chí Yá Ndiöxí ndécú ndihí ñaha-gá xii-dé.

### *Jèsús ndécú-gã veñúhu*

<sup>41</sup> Te ndí tnàhá cuía<sup>n</sup> ñí xòo quíhí<sup>n</sup> té Chèé ndihí náná Jèsús vico pascuá ñuú Jerusálén. <sup>42</sup> Te cùtnàhá ní chítú Jèsús úxúú cuía<sup>n</sup>-gã, te cuáhán-yu ndihí-gá ñuú Jerusálén vico pascuá, chí duca<sup>n</sup> tnàhí quidé-yu. <sup>43</sup> Te òré ní yáha vico, te ní natnì-yu ichi cuánuhú-yu, te ní quendóo-gá ñuú Jerusálén, te ní náná-gã, te ní té Chèé ñá túú ní xiní ní quendóo-gá. <sup>44</sup> Chí ní sani iní-yu sá ñútnàhá-gá tnuú nchaa ñáyiu ní sáhán vico cuánuhú. Te ní xúhu<sup>n</sup>-yu ñ<sup>n</sup> nduu ichi ta ndùcu tnúhu-yu-gá núú nchàa ñani tnàhã-yu, ndihí núú nchàa ñáyiu xiní tnàhá ndihí-yu, <sup>45</sup> te ñá túú ní náníhí ñáhã-yu xii-gá. Núu ní nacuicó-yu cuánuhú tucú-yu ñuú Jerusálén cuendá yacá<sup>n</sup> nanducu ñáhã-yu xii-gá.

<sup>46</sup> Te núú ùní nduu sá ñí dana núú ñáhã-yu xii-gá, te ní naníhí ñáhã-yu núcóo-gá xití veñúhu cãhnu sá ño cùnuu tnuú

cue tée dàcuaha ñaha xií-yu nchaa tnúhu ní chídó tnùnì ndí Moisés, te ndèdóho ñaha-gã xii-güedé, te nándi sá ndúcú tnúhu-gá núú-güedé. <sup>47</sup> Te nchaa cue tée xíndedóho ñaha xii-gá xícuñúhu-güedé sá ïo váha sàá sá xínì tnùnì-gá, te ïo váha ñihí-gá tnúhu nàdanchocáva-gá. <sup>48</sup> Te òré ní xínì ñáhá tē Chèé ndihì náná-gã xii-gá, te ïo ní cuñúhu-yu, te ní xáha<sup>n</sup> náná-gã xii-gá:

—Yòhó déhe-í, ¿ná cuendá duca<sup>n</sup> ñi quide ñaha-n xii-ndí? Te tātá-n ndihì yúhú ndihú iní-ndí xícá nànducu ñaha-ndí xii-n —càchí-xi xãha<sup>n</sup>-xi xii-gá.

<sup>49</sup> Te ní xáha<sup>n</sup> Jèsús xií-yu:

—¿Ná cuendá nánducu ñaha-ndo? ¿Náa ñá túú xínì-ndó sã núú chíú<sup>n</sup> Tātá-í tau-í caca cuu-í-ã<sup>n</sup>? —càchí-gá xãha<sup>n</sup>-gã xií-yu.

<sup>50</sup> Dico mée-yu ñá túú ní təcú tnùnì-yu nàcuáa ní xáha<sup>n</sup>-gã.

<sup>51</sup> Te sátá dúcá<sup>n</sup> te cuánuhú ndihì ñáhá-yu xii-gá ñuú Nazàrét, te ïo ní sándáá iní ñáhá-gã xií-yu. Te nchaa sá ñi quide-gá-á<sup>n</sup> ñi xúhu<sup>n</sup> nahi-ni iní náná-gã. <sup>52</sup> Te Jèsús duca<sup>n</sup>-ni ta sãhnu-gá cuáhá<sup>n</sup>, te ta sàá-gá sá xínì tnùnì-gá cuáhá<sup>n</sup>, te duca<sup>n</sup> cùdiu-gá núú Yã Ndiöxí, ndihì núú nchaa ñáyiu.

### 3

*Té Juáá tée dàcuandute ñaha xii ñáyiu càhá<sup>n</sup>-dé tnúhu Yã Ndiöxí xití yucu (Mt. 3:1-12; Mr. 1:1-8; Jn. 1:19-28)*

<sup>1</sup> Te ní cuu sáhú<sup>n</sup> cuía sã yíndàha té Tiberiú cuéhé nació<sup>n</sup>, te dàvá-á<sup>n</sup> ñi cunuu té Pilatú distritú Júdeá, te té Hèrodés ní cunuu-dě distritú Galileá, te ñani-dé té Lìpé ní cunuu-dě distritú Itùreá ndihì ingá distritú nání Tràconité, te té Lisàniás ní cunuu-dě distritú Abiliniá. <sup>2</sup> Te té Ànás ndihì té Caifás ní cuu-güedé dútú cùnùu. Te dàvá-á<sup>n</sup> ñi cáhá<sup>n</sup> ndihì ñaha Yã Ndiöxí xii té Juáá déhe té Zacàriá xití yucu sá quihí<sup>n</sup>-dé cáhá<sup>n</sup>-dé tnúhu-gá núú ñáyiu. <sup>3</sup> Te té Juáá ní yáha-dé nchaa ñuú cáá yàtni yúte Jòrdán, te xãha<sup>n</sup>-dě xii nchaa ñáyiu:

—Chí dándixi túu iní sá ñà túú quide váha-ndo, te dañà-ndo nchaa ichi cuehé ichi duha ndècu-ndo, te cuandute-ndo, te duca<sup>n</sup> te cada càhnu iní Yã Ndiöxí nchaa yícá cuèchi-ndo —duha ní xáha<sup>n</sup>-dě xií-yu.

<sup>4</sup> Te duca<sup>n</sup> ñi quide-dé chi ní quee ndáá-xi nàcuáa ní chídó tnùnì ndí Chàia tée ní xóo cáhá<sup>n</sup> tnúhu Yã Ndiöxí ndéé sanaha núú tütú ndí núú càchí-xi:

Təcú càhá<sup>n</sup> níhi ñ<sup>n</sup> tée yìhi xití yucu, te xãha<sup>n</sup>-dě xii ñáyiu:

“Chí dáñá nchaa ichi cuehé ichi duha ndècu-ndo, te tñi-ndo ichi váha, te duca<sup>n</sup> càda-ndo cuendá cundecu túha-ndo, chi véxi Yáá ïo cùnùu.

<sup>5</sup> Te nchaa núú cùnù nachítú, te nchaa tìndúú ndihì nchaa yucu ngoyo nihnu cuendá nduu ndáá, te nchaa ichi ñá túú cuáhá<sup>n</sup> ndáá nduu ndáá,

te nchaa ichi ñá túú càváha nduu váha.

<sup>6</sup> Te nchaa ñáyiu ñuyiú-a níhi-yu tnúhu sá Yã Ndiöxí véxi-gá dàcácu nihnu ñaha-gã xií-yu núú ùhú núú ndàhú.”

Duha ní chídó tnùnì ndí Chàia núú tütú ndí.

<sup>7</sup> Te òré ní xica ñáyiu cuáhá<sup>n</sup>-yu cuendá dacuandute ñaha té Juáá xií-yu, te ní xáha<sup>n</sup>-dě:

—¿Nchaa nchòhó cúu-ndó dàtná ñ<sup>n</sup> cóo déé<sup>n</sup> chi ïo cuihna iní-ndó! ¿Te nása ní cuu núu tnàhá nchòhó ndúcú-ndó nàcuáa cácu nihnu-ndo núú tñndòho cahnu vihi sá tá cùyatni ñaha xii-ndo véxi-i? <sup>8</sup> Te chí cádá váha vitna cuendá duca<sup>n</sup> cùtnunì sá ñi dáñá-ndó nchaa ichi cuehé ichi duha ndècu-ndo. Te vá càchí-ndó sã ïo càhnu cuu-ndo cuendá sá cúu-ndó ñani tnáhá ndí Abrahám, chi cuèi ndéé yúú te ndacu Yã Ndiöxí ndada-gá ñáyiu te cuú-yu ñani tnáhá ndí Abrahám. <sup>9</sup> Te caá chi ndècu túha-xi sá quèhndé-xi nchaa yutnu sá ñà túú càváha sávidí-xi, chi nchaa yutnu-á<sup>n</sup> tèhndé-xi te cuánguee-xi núú ñuhú càyú-xi. Te duha sãtnahá-xi ndoho nchaa ñáyiu ñá túú quide váha, chi nchaa ñáyiu duca<sup>n</sup> ñà túú quide váha cùu-yu dàtná nchaa yutnu sá ñà túú càváha sávidí-xi. —càchí-dé xãha<sup>n</sup>-dě xií-yu.

<sup>10</sup> Te ní xícá<sup>n</sup> tnúhu-yu núú-dě, te xãhã<sup>n</sup>-yu:

—¿Te nása cada-ndí vái<sup>n</sup>? —càchí-yu xãhã<sup>n</sup>-yu xii-dé.

<sup>11</sup> Te xãha<sup>n</sup>-dě:

—Te núu ndèdacàa-ndo ndecu ndihì-ndo úú dóó te cuáñaha-ndo ñ<sup>n</sup> xii ñáyiu ñá túú ndècu ndihì, àdi núu ndècu ndihì-ndo sá nchító-ó te cuáha-ndõ-yu na càxí-yu —càchí-dé xãha<sup>n</sup>-dě xií-yu.

12 Te ní quexìo ìí<sup>n</sup> úú cue tée cuihna ìní-xi quide cobrá ñáhá xii ñáyiú cuendá impuèstú cuendá cuàndute-güedé, te ní xicá<sup>n</sup> tnúhu-güedé núú tē Juàá, te xáha<sup>n</sup>-güedé:

—Mèstrú, ¿te nása cada-ndí cuendá cuu váha ìní Yá Ndiòxí-í? —càchí-güedé xáha<sup>n</sup>-güedé xii-dé.

13 Te té Juàá ní xáha<sup>n</sup>-dē:

—Vá cuídó-ndó càda cobrá-ndó ñáyiú —càchí-dé xáha<sup>n</sup>-dē xii-güedé.

14 Te tnàhá ìí<sup>n</sup> úú cue tée cùu sandadú xíndecu-á<sup>n</sup> ní xicá<sup>n</sup> tnúhú-güedé núú tē Juàá, te xáha<sup>n</sup>-güedé:

—Te nchúhú ¿nása cada-ndí cuendá cuu váha ìní Yá Ndiòxí-í? —càchí-güedé xáha<sup>n</sup>-güedé xii-dé.

Te ní xáha<sup>n</sup> tē Juàá:

—Vá quéndé-ndó sã néhé tnàha ñáyiú-ndo, te ni vã dácàa díquí-ndõ-yu ìí<sup>n</sup> sá ñà túú nã quidē-yu, te nduu vétú ìní-ndó nàcuáa ñùhu yáhu-ndo —càchí-dé xáha<sup>n</sup>-dē xii-güedé.

15 Te nchaa ñáyiú xíndetu sá quíxí Crìstú sàni ìí<sup>n</sup> sàni úú ìní-yu núu sá díú Crìstú Yaá tendaha Yá Ndiòxí quixi ñuyíú-a cùu te Juàá àdi ñáhá. 16 Dico té Juàá ní cáhá<sup>n</sup> ndodo-dé núú-yu nchaa-yu, te xáha<sup>n</sup>-dē:

—Na càchí tnúhu ndáá-í xii-ndo sã yùhú véxi-í sá cuendá-ni dacuàndute ñaha-í xii-ndo dàtná ní cachí Yá Ndiòxí, dico nchícú<sup>n</sup> ìngá tée véxi, te tée-á<sup>n</sup> taxi-dé Espiritú Yá Ndiòxí cundecu ndihi-ndo, te cùu-xi datná ìí<sup>n</sup> ñuhú, chi ndada ndoo ndada nine-xi ìní-ndó. Te tée-á<sup>n</sup> ìo-gá cúnùu-dé dàcúúxí yùhú, chi yùhú cùu-í ìí<sup>n</sup> tée duu<sup>n</sup> duu<sup>n</sup> ñá túú tàú-í nandaxi-í cuèdicó ñí chàu-dé dico quide-í chiú<sup>n</sup>-dē.

17 Te tée-á<sup>n</sup> sa véxi túha-dé sá cadá ìí<sup>n</sup> ñaha-dé xii-o dàtná quidé ñáyiú ndàda ndoo triú, chi ñáyiú-á<sup>n</sup> sa nèhe túha-ná-yu yaxí<sup>n</sup>-yu òré náñani cuendá ndada ndoo-yu, te òré ndádá ndòò-yu triú-á<sup>n</sup> te dàquee díí<sup>n</sup>-yu mihi-xi, te tàxúha-yu mee-nã triú-á<sup>n</sup>, te mihi-xi-á<sup>n</sup> sáhmí-yu. Te dàtná quidé-yu mihi triú-á<sup>n</sup> duca<sup>n</sup> sãtnahá-xi cada ñaha tée-á<sup>n</sup> xii nchaa ñáyiú ñá túú quide váha, chi daquìhí<sup>n</sup> ñáhá-dē xií-yu núú ñùhú núú càyú, te ñuhú-á<sup>n</sup> ñà túú tnàhí ndàhvá —càchí-dé xáha<sup>n</sup>-dē xií-yu.

18 Te tìtní víhí-gã tnúhu váha ní xáha<sup>n</sup> tē Juàá xií-yu òré ní dásàhú ñáhá-dē. 19 Te ní cáhá<sup>n</sup>-dē dóho té Hèrodés cuendá sá ndéca-dē ìí<sup>n</sup> ñaha nani Herodiás ñaha ní càndeca ñani-dé té Lìpé, te ní xáha<sup>n</sup>-dē cuendá nchaa dava-gá sá cuèhé sá dúhá quide-dé. 20 Dico té Hèrodés ñá túú ní quide cuendá-dé tnúhu ní cáhá<sup>n</sup> tē Juàá, chi nèhé-gá tucu ní quide-dé, chi da vecáá ní chihi-dé té Juàá.

### *Sàndute Jesús*

*(Mt. 3:13-17; Mr. 1:9-11)*

21 Te òré dàcuàndute té Juàá nchaa ñáyiú, te tnàhá Jèsús ní dàcuàndute ñaha-dé xii-gá. Te ñini càhá<sup>n</sup> ndihi-gá Dútú Ndiòxí ní nacaá<sup>n</sup> andiú, 22 te ní quee Espiritú Yá Ndiòxí véxi cuu<sup>n</sup> túu-xi, te càa-xi datná cáá ìí<sup>n</sup> lómá, te òré-á<sup>n</sup> ní tecú ní cáhá<sup>n</sup> Yá Ndiòxí ndéé andiú, te xáha<sup>n</sup>-gã xii Jèsús:

—Yòhó cúu-n Dèhe-í tée ío cùu ìní-í, te ío cùdí<sup>n</sup> ìní ñáhá-í xii-n —càchí-gá xáha<sup>n</sup>-gã xii Jèsús.

### *Cue tée ní xíndecu díhna-gá ñuyíú-a dàcúúxí Xítohó Jesucristú*

*(Mt. 1:1-17)*

23 Te ndécu Jesús dàtná ócò úxí cuía-gã cúnàhá ní chisaha-gã chiú<sup>n</sup> ní táhú Tátá-gã Dútú Ndiòxí cada-gá. Te ní cuu-gá déhe té Chèé chi duca<sup>n</sup> sàni ìní ñáyiú ñuyíú-a. Te té Chèé-á<sup>n</sup> ñí cuu-dé déhe té Èlì, 24 te tée-á<sup>n</sup> ñí cuu-dé déhe té Màtát. Te té Màtát-á<sup>n</sup> ñí cuu-dé déhe té Lèví, te tée-á<sup>n</sup> ñí cuu-dé déhe té Mèlquí. Te té Mèlquí-á<sup>n</sup> ñí cuu-dé déhe té Jàná, te tée-á<sup>n</sup> ñí cuu-dé déhe té Chèé. 25 Te té Chèé-á<sup>n</sup> ñí cuu-dé déhe té Matàtiás, te tée-á<sup>n</sup> ñí cuu-dé déhe té Àmós. Te té Àmós-á<sup>n</sup> ñí cuu-dé déhe té Nàhúm, te tée-á<sup>n</sup> ñí cuu-dé déhe té Èslí. Te té Èslí-á<sup>n</sup> ñí cuu-dé déhe té Nagàí, 26 te tée-á<sup>n</sup> ñí cuu-dé déhe té Màát. Te té Màát-á<sup>n</sup> ñí cuu-dé déhe té Matàtiás, te tée-á<sup>n</sup> ñí cuu-dé déhe té Semèí. Te té Semèí-á<sup>n</sup> ñí cuu-dé déhe té Chèé, te tée-á<sup>n</sup> ñí cuu-dé déhe té Jüdá. 27 Te té Jüdá-á<sup>n</sup> ñí cuu-dé déhe té Jòaná, te tée-á<sup>n</sup> ñí cuu-dé déhe té Rèsá. Te té Rèsá-á<sup>n</sup> ñí cuu-dé déhe té Zorobàbél, te tée-á<sup>n</sup> ñí cuu-dé déhe té Salàtiél. Te té Salàtiél-á<sup>n</sup> ñí cuu-dé déhe té Nèrí, 28 te tée-á<sup>n</sup> ñí cuu-dé déhe té Mèlquí. Te té Mèlquí-á<sup>n</sup> ñí cuu-dé déhe té Àdí, te tée-á<sup>n</sup> ñí cuu-dé déhe té Còsám. Te té Còsám-á<sup>n</sup> ñí cuu-dé déhe té Elmòdám, te



tée-án nǐ cuu-dé déhe té Ęr. <sup>29</sup> Te té Ęr-án nǐ cuu-dé déhe té Jòsué, te tée-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te tée-án nǐ cuu-dé déhe té Mátát. <sup>30</sup> Te té Mátát-án nǐ cuu-dé déhe té Lèví, te tée-án nǐ cuu-dé déhe té Mió. Te té Mió-án nǐ cuu-dé déhe té Jùdá, te tée-án nǐ cuu-dé déhe té Chèé. Te té Chèé-án nǐ cuu-dé déhe té Jònán, te tée-án nǐ cuu-dé déhe té Eliàquím. <sup>31</sup> Te té Eliàquím-án nǐ cuu-dé déhe té Mèleá, te tée-án nǐ cuu-dé déhe té Mainán. Te té Mainán-án nǐ cuu-dé déhe té Mátatá, te tée-án nǐ cuu-dé déhe té Nátán. <sup>32</sup> Te té Nátán-án nǐ cuu-dé déhe té Dàvíí, te tée-án nǐ cuu-dé déhe té Isàí. Te té Isàí-án nǐ cuu-dé déhe té Òbéd, te tée-án nǐ cuu-dé déhe té Bòóz. Te té Bòóz-án nǐ cuu-dé déhe té Sàlmón, te tée-án nǐ cuu-dé déhe té Naàson. <sup>33</sup> Te té Naàson-án nǐ cuu-dé déhe té Aminadáb, te tée-án nǐ cuu-dé déhe té Àrám. Te té Àrám-án nǐ cuu-dé déhe té Èsróm, te tée-án nǐ cuu-dé déhe té Fàrés. Te té Fàrés-án nǐ cuu-dé déhe té Jùdá, <sup>34</sup> te tée-án nǐ cuu-dé déhe té Jàcób. Te té Jàcób-án nǐ cuu-dé déhe té Isàác, te tée-án nǐ cuu-dé déhe té Àbrahám. Te té Àbrahám-án nǐ cuu-dé déhe té Tàré, te tée-án nǐ cuu-dé déhe té Nàcór. <sup>35</sup> Te té Nàcór-án nǐ cuu-dé déhe té Sèrúg, te tée-án nǐ cuu-dé déhe té Ragàú. Te té Ragàú-án nǐ cuu-dé déhe té Pèlég, te tée-án nǐ cuu-dé déhe té Hèbér. Te té Hèbér-án nǐ cuu-dé déhe té Sàlá, <sup>36</sup> te tée-án nǐ cuu-dé déhe té Cainán. Te té Cainán-án nǐ cuu-dé déhe té Arfàxád, te tée-án nǐ cuu-dé déhe té Sèm. Te té Sèm-án nǐ cuu-dé déhe té Nòé, te tée-án nǐ cuu-dé déhe té Làméc. <sup>37</sup> Te té Làméc-án nǐ cuu-dé déhe té Matusalén, te tée-án nǐ cuu-dé déhe té Ènóc. Te té Ènóc-án nǐ cuu-dé déhe té Jàréd, te tée-án nǐ cuu-dé déhe té Mahalàleél. Te té Mahalàleél-án nǐ cuu-dé déhe té Cainán, <sup>38</sup> te tée-án nǐ cuu-dé déhe té Ènós. Te té Ènós-án nǐ cuu-dé déhe té Sèt, te tée-án nǐ cuu-dé déhe té Àdán. Te té Àdán-án chi mee Yá Ndiöxí ní cadúha ndaha ñaha-gá xii-dé.

#### 4

*Sácuíhná quidé yica-xi cada Jesús sá ñà túú tàú-gá cada-gá ní cùu*

*(Mt. 4:1-11; Mr. 1:12-13)*

<sup>1</sup> Te Jèsús ní naquehe<sup>n</sup>-gá ichi yuhu yúte Jòrdán cuánuhú-gá. Te sa ndècu ndihi-gá Espíritú Yá Ndiöxí, te Espíritú-án ndécá ñaha-xi xii-gá cuáhán ì<sup>n</sup> xití yucu. <sup>2</sup> Te

yàcán ní xíndecu-gá údico nduu, te sácuíhná nǐ cuíní-xi coto ndeé ñáhá-xí xii-gá te núu ndisa sá vǎ cádá-gǎ ì<sup>n</sup> sá ñà túú tàú-gá cada-gá. Te ñà túú tnàhí ná ní xèxi-gá ndi údico nduu-án, te sátá dúcán te ní xícán iní-gá caxi-gá. <sup>3</sup> Te sácuíhná-án nǐ xáha<sup>n</sup>-xi xii-gá:

—Te núu ndisa sá cúu-n Dèhe Yá Ndiöxí, te cúñaha xii yúú-a na ndùu-xi paá —càchí-xi xǎha<sup>n</sup>-xi xii-gá.

<sup>4</sup> Te Jèsús ní xáha<sup>n</sup>-gǎ xii-xi:

—Núú tütú Yá Ndiöxí càchí-xi: “Ñá díú mèe-ni paá candeca-xi iní ñáyíu, chi tnàhá nchaa tnúhu càhán Yá Ndiöxí candeca-xi iní-yu”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>5</sup> Te dǎtnùní sácuíhná ndécá ñaha-xi xii-gá cuáhán ì<sup>n</sup> núú tìndúú dùcún, te uu<sup>n</sup>ni ní dánèhé núú ñáhá-xí xii-gá nchaandi túhu nació<sup>n</sup> cáá ñùyíú. <sup>6</sup> Te ní xáha<sup>n</sup>-xi xii-gá:

—Yúhú cada-í, te taxi tnùnín nchaa-ndi túhú nació<sup>n</sup>-a ndihi nchaa sá vǎha ió diu-ni nchaa nació<sup>n</sup>-a, te cachí ñáyíu sá ìo cùnuu-n, chi yúhú cúú cuendá-í nchaa sá ió nchaa nació<sup>n</sup>-a, te ndédani càa ñáyíu cùu iní-í te cúñaha-í xii-yu taxi tnùnín-yu. <sup>7</sup> Te núu ni yúhu ni iní-n chiñuhu ñaha-n xii-í ñá, te nchaa taxi-í cuu cuendá-n —càchí-xi xǎha<sup>n</sup>-xi xii-gá.

<sup>8</sup> Te Jèsús ní xáha<sup>n</sup>-gǎ xii-xi:

—Xocuñí yòhó sácuíhná núú ndécù-í-a, chi vá cúú càda-í nàcuáa càchí-n chi núú tütú Yá Ndiöxí càchí-xi: “Chiñuhu-ndo Dütú Ndiöxí Yá cúú Ndiöxí-ndó, te ì<sup>n</sup>di díí-ni-gǎ cada-ndo nchaa nacuáa càhán-gá”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>9</sup> Te sácuíhná ndécá ñaha tucu-xi xii-gá cuáhán ñuú Jerusálén, te ní xáha<sup>n</sup>-xi xii-gá cuasaá-gá díquí veñuhu càhnu sá ìo cùnuu, te ní xáha<sup>n</sup> tucu-xi:

—Te núu ndisa cùu-n Dèhe Yá Ndiöxí te cuandèe ndava ndeé núú ñúhú <sup>10</sup> cuendá quee ndáá-xi nàcuáa càhán-xi núú tütú Yá Ndiöxí núú càchí-xi:

Yá Ndiöxí tendaha-gǎ cue espíritú xínú cuèchi núú-gǎ quixi-xi coto ñaha-xi xii-n.

<sup>11</sup> Te núú ndáhá-xí càundodo-n cuendá sá vǎ dǎncuèhé yúú sǎhá-n, duha càchí-xi núú tütú-gá —càchí sácuíhná xǎha<sup>n</sup>-xi xii-gá.

12 Te Jèsús ní xáha<sup>n</sup>-gã xii-xi:

—Te cächí tucu-xi núú tütú Yã Ndiöxí: “Vá cání iní-n còto ndeé-n Dütú Ndiöxí Yáa cúú Ndiöxí-n nũu ndisa sá dácäcu nihnu ñaha-gã xii-n cuëndá ì<sup>n</sup> sá sání iní-n càda-n sá cúú-xí mèe-n”, duha cächí-xi núú tütú-gá —cächí-gá xãha<sup>n</sup>-gã xii-xi.

13 Te sátá dúcá<sup>n</sup> te sácuihná ñà túú-gã ní cùtnuní iní-xi nása cada-xi Jèsús, núú xiá<sup>n</sup> ní xica-xi cuáhá<sup>n</sup>-xi ní sanaa tnaa-xi.

*Distritú Galileá ní chisaha Jèsús chiú<sup>n</sup> ní táhú Tãtã-gã Dütú Ndiöxí cada-gá (Mt. 4:12-17; Mr. 1:14-15)*

14 Te Jèsús cuáhá<sup>n</sup> tucu-gá distritú Galileá, dico sa ndècu ndihí-gá Espíritú Yã Ndiöxí, te ni càa xico xiá<sup>n</sup> nĩ níhí-yu tnúhu nchaa nàcuáa quide-gá. 15 Te ndi tnahá ñuú cuáhá<sup>n</sup>-gá duca<sup>n</sup> cuãnguihu-gá veñúhu-yu dànehé ñáhá-gã xii-yu, te nchaá-yu cächí-yu sá ìo càhnu cuu-gá.

*Jèsús ndécú-gã ñuú Nazàrét (Mt. 13:53-58; Mr. 6:1-6)*

16 Te Jèsús ní sáhá<sup>n</sup>-gã ñuú Nazàrét ñuú núú nĩ sahnu-gá. Te nduu ndètatú ñáyiu ní quíhu-gá veñúhu, chi duca<sup>n</sup> tnàhí quide-gá, te ní ngúnutnĩ-gã dácua<sup>n</sup>-gá tutú ndèé tnúhu Yá Ndiöxí. 17 Te ní sãñaha-güedé xii-gá tutú ndèé tnúhu ní cáhá<sup>n</sup> ndí Chàíá téé ní xóo cáhá<sup>n</sup> tnúhu Yá Ndiöxí ndéé sanaha, te òré ní nandicá-gá núú tütú-á<sup>n</sup> te ní naníhí-gã núú cächí-xi:

18 Espíritú Yã Ndiöxí ndécú ndihí ñaha-xi xii-í, chi ní cachí-gá sá càhá<sup>n</sup>-í tnúhu-gá sá cúú-xí ñáyiu ndàhú, ñáyiu vátá cündèdóho tnàhí-gá.

Te véxi-í cuëndá vá ndìhú-gá iní ñáyiu ñá túú ndècu váha iní-xi, te cue ñáyiu sa nèhe váha ñaha-nã yucu ñávãha dácäcu nihnu-í-yu.

Te cue ñáyiu cuáá nacaá<sup>n</sup>-í núú-yu, te ñáyiu ndòho dandoho ñaha tnahá ñáyiu-xi taunihnu-í-yu.

19 Te cúñaha-í xii ñáyiu sá sáá nduu càda Yá Ndiöxí ì<sup>n</sup> sá vãha sá cúú-xí-yu. Duha cächí-xi núú tütú dácua<sup>n</sup>-gá.

20 Te Jèsús ní nacadí-gá núú tütú-á<sup>n</sup>, te ní nacua<sup>n</sup>-gá ì<sup>n</sup> téé xínu cuechi veñúhu-á<sup>n</sup>, te ní ngóo-gá. Te nchaa ñáyiu yìhi veñúhu

ñá núú nũu-yu ndèhe ñahá-yu xii-gá. 21 Te xãha<sup>n</sup>-gã xií-yu:

—Mei vitna ní quee ndáá-xi nàcuáa càhá<sup>n</sup>-xi núú tütú Yã Ndiöxí —cächí-gá xãha<sup>n</sup>-gã xií-yu.

22 Te nchaá-yu ní cáhá<sup>n</sup> váha-yu cuëndá-gá, te ní cuñúhu-yu tnúhu váha càhá<sup>n</sup>-gá, te xitnàhá-yu:

—¿Te náa ñá díú tõe-a cùu-dé déhe té Chèé-ã<sup>n</sup>? —cächí-yu xitnàhá-yu.

23 Te Jèsús ní xáha<sup>n</sup>-gã:

—Na cächí tnúhu ndáá-í xii-ndo sã ñúhú iní-ndó cùñaha-ndo xii-í ì<sup>n</sup> tnúhu cùtexínu sá cáhá<sup>n</sup> mée-ndó, te quesaha-ndo: “Ñátátná cada tátna mee-n”, duha quesaha-ndo. Te cúñaha tucu-ndo xii-í: “Sa ní níhí-ndí tnúhu nàcuáa ní quide-n ñuú Capèrnaúm, te cada-n tnàhá ñuú núú nĩ sahnu-n”, duha quesaha-ndo —cächí-gá xãha<sup>n</sup>-gã xií-yu.

24 Te ní xáha<sup>n</sup> tucu-gá:

—Na cächí tnúhu ndáá-í xii-ndo sã ñi ì<sup>n</sup> téé cáhá<sup>n</sup> tnúhu Yá Ndiöxí ñá túú tnàhá iní ñáhá ñáyiu ñuú-dé. 25 Te na cächí tnúhu ndáá tucu-í xii-ndo sã ìo vài ñáyiu dìhí ñáyiu queé ní xíndecu nació<sup>n</sup> Isràél cùtnàhá ní xíndecu té Èliás cùtnàhá ñá túú ní cùu<sup>n</sup> dáú ùní cuiá dava, te dává-á<sup>n</sup> ìo ní ndoho ñáyiu docó nitùhú nació<sup>n</sup>. 26 Dico Yá Ndiöxí ñá túú ní tëndaha-gá té Èliás quíhí<sup>n</sup>-dé vehe ndèdani càa ñáyiu dìhí-á<sup>n</sup>, chi vehe ì<sup>n</sup> ñaha ñuú Sàreptá ní xáha<sup>n</sup>-gã ní sáhá<sup>n</sup>-dé, te ñuú-á<sup>n</sup> cáá yàtni-xi ñuú Sidón. 27 Te ní xíndecu tucu ingá téé ní xóo cáhá<sup>n</sup> tnúhu Yá Ndiöxí ndéé sanaha, te téé-á<sup>n</sup> nĩ xínani-dé Eliseú, te diu-ni dává-á<sup>n</sup> nĩ xíndecu tucu vài ñáyiu cùhú nació<sup>n</sup> Isràél, ñáyiu ní tnahá cuéhé sã dátèhyú nihnu-xi yiqui cùñú-yu dico ñá túú ní ndúha-yu, chi ì<sup>n</sup> dèi-ni té Nàamán téé distritú Siriá ní ndúha-dé —cächí-gá xãha<sup>n</sup>-gã xií-yu.

28 Te sá dúcá<sup>n</sup> nĩ cáhá<sup>n</sup>-gá te xiá<sup>n</sup> ní cudéé<sup>n</sup> víhí nchaa ñáyiu yìhi veñúhu-ã<sup>n</sup> núú-gã. 29 Te ní queñuhú-yu Jèsús yuhu dèhvá tìndúú núú cáá ñuú-yu-á<sup>n</sup> cuëndá yacá<sup>n</sup> dàquée-yu-gá dèhvá ní cùu. 30 Dico Jèsús vii-ni ní quee-gá tnuú-yu cuáhá<sup>n</sup>-gá.

*Ì<sup>n</sup> téé yìhi ñaha espíritú cündèhí yucu ñávãha (Mr. 1:21-28)*

31 Te Jèsús cuáhán-gá ñuu Capèrnaúm, te ñuu-án yíndèhu-xi distritú Galileá. Te yácán ndécú-gá ní tnahá nduu ndètatú ñáyi, te ní ngúíta-gá dácuaá-gá ñáyi. 32 Te xícuñúhu-yu nchaa nàcuáa dànehé ñáhá-gá xii-yu, chi càhá-gá dàtná càhá ñ tée cùnuu, te cùnuu ndisa-gá.

33 Te xití veñúhu yìhi ñ tée yìhi ñaha ñ espíritú cündìhi yucu ñávãha, te espíritú-án ñ quide-xi níhi ní cáhá tée-án, te xãha-dě xii Jèsús:

34 —¿Te ná cuíní yòhó Jèsús tée ñuu Nazàrét cada ñaha-n xii-ndí nũ véxi-n nũ ndécú-ndí-i? ¿Án vèxi-n dànaa ñaha-n xii-ndí? Chi yúhú xini ñáhà-í xii-n sã cúu-ñ tée ñá túú tnahí cuéchi-xi chi núú Yã Ndióxí ní quee-n vèxi-n ñuyíú-a —càchí-dé xãha-dě xii-gá.

35 Te Jèsús ní tenáá-gá espíritú cündìhi yucu ñávãha-án, te xãha-gã:

—¿Cadí yuhu-n, te taquèe yiqui cuñú tée-án! —càchí-gá xãha-gã.

Te espíritú cündìhi yucu ñávãha-án ñ dándüá-xi tée-án ndèé ñuhu tnuú ñáyi xíndecu-án, te ñá túú-gá ná ní quide ñaha-xi, te ní quee ñaha-xi xii-dé. 36 Te nchaa ñáyi xíndecu-án ñ cuñúhu-yu, te ní xitnãhá-yu:

—¿Te nása nduu-tu tnuúhú càhá tée-ã ñá? ¿Te càhá-dé dàtná càhá ñ tée tàxi tnuú víhí, chi càhá-ni-dé te nchaa espíritú cündìhi yucu ñávãha quèe-ni-xi yiqui cuñú-yu! —càchí-yu xitnãhá-yu.

37 Te nchaa xichi ní níhi-yu tnuúhú nàcuáa quide Jèsús.

*Jèsús quidé tãtna-gá ñaná ñadìhí té Xímú*  
(Mt. 8:14-15; Mr. 1:29-31)

38 Te Jèsús ní ndee-gá xití veñúhu, te cuáhán-gá vehe té Xímú. Te ñaná ñadìhí té Xímú-án cùhú-a ñ ñuhu vihi-a cahní, te ní cáhá ndáhú-yu núú Jèsús cuèndá-a.

39 Te Jèsús ní sáhán-gá núú ndécú-án, te ní ngúnundeyi-gá te ní xãha-gã xii cahní-án sã ná xòcuñí-xi, te ní xócuñí-ni-xi, te òré-ni-án ñ ndúha ñaha cùhú-án te ní ndacóo-a ní xinu cuechi-a núú-güedé ndìhi-gá.

*Jèsús quidé tãtna-gá vai ñáyi cùhú*  
(Mt. 8:16-17; Mr. 1:32-34)

40 Te òré ní ngódó tnuú nchíanchii, te nchaa ñáyi xíndecu ndìhi ñáyi cùhú vehe-xi ndèca ñáhá-yu cuáhán núú Jèsús. Te Jèsús ní sacán ndodo-gá ndaha-gá díquí ñ ñáyi cùhú-án, te duca ñ quide-gá te ní ndúha-yu. Te ndi díí núú cuèhé tnahá-yu ñ ñ-yu ni cùu. 41 Te tnahá dava ñáyi cùhú-án yìhí ñaha espíritú cündìhi yucu ñávãha xii-yu ni cùu, te òré ní quee ñaha-xi xii-yu, te xãha ní quide-xi níhi ní cáhá-yu, te xãhá-yu xii Jèsús:

—Yòhó cúu-n Dèhe Dútú Ndióxí —càchí-yu xãhá-yu xii-gá.

Dico Jèsús níhi ní cáhá-gá ní tenáá-gá nchaa espíritú cündìhi yucu ñávãha-án, te xãha-gã sã vã dúcá-gã cada-xi, chi sa xini-xi sã díú-gã cúu-gã Cristú Yá ní tendaha Yã Ndióxí véxi ñuyíú-a.

*Jèsús dánèhé-gá ñáyi distritú Galileá*  
(Mr. 1:35-39)

42 Te ñ nduu ní tundaá-ni ní quee Jèsús ñuu núú ndécú-gã-án cuáhán-gã ñ xichi núú ñá túú ñáyi ndècu. Te cue ñáyi ní ngúíta-yu nànducu ñáhá-yu xii-gá te ní naníhí ñáhá-yu, te cuíní-yu ngani ñáhá-yu xii-gá cuèndá sã ñá túú-gã ndèé quíhí-gá ní cùu. 43 Dico ní xãha-gã xii-yu:

—Dacuití quíhí-í cúñaha-í xii nchaa ñáyi dava-gá ñuu tnuúhú sã càhá nàcuáa ndìhu ndaha ñaha Yá Ndióxí xii-yu, chi chiù tnahí-ã vèxi-í —càchí-gá xãha-gã xii-yu.

44 Te ní xica cuu Jèsús ní dánèhé-gá ñáyi tnuúhú-gá nchaa xití veñúhu ndaa distritú Galileá.

## 5

*Jèsús ní quide-gá ní níhi-güedé chácá*  
(Mt. 4:18-22; Mr. 1:16-20)

1 Te ñ xito ndècu Jèsús yuhu làgúná Genesàrét, te ío cuèhé ñáyi ní sáá, te ta dàdehnde ñaha-ná-yu xii-gá cuáhán sã cuíní-yu cundedóho-yu nchaa tnuúhú càhá-gá. 2 Te Jèsús ní xiní-gá úú bàrcú cue tée tñ chácá xínutñ-xi yatni yuhu làgúná-án, te sa ní quee cue tée ñuhu xití-xi-án xínaquete-güedé ñunu-güedé. 3 Te Jèsús cuásaá-gá núú ñ bàrcú-án, te bàrcú-án



cúu-xí bàrcú té Xímú, te ní xáha<sup>n</sup>-gã xii té Xímú-á<sup>n</sup> sã dánũndehe-dé-xi luha-gá xití ndute. Te dǎtnùní ní ngóo-gá núu bàrcú-á<sup>n</sup>, te xía<sup>n</sup> núcõo-gá ní ngũíta-gá dánèhé-gá ñáyiu. <sup>4</sup> Te òré ní túhú ní dánèhé ñàhá-gã xii-yu, te ní xáha<sup>n</sup>-gã xii té Xímú:

—Daquihí<sup>n</sup> bàrcú-a xití làgúná mei núu cùnú-gá, te dàquée-ndo ñunu-ndo tñi-ndo chácá —càchí-gá xãha<sup>n</sup>-gã xii-dé.

<sup>5</sup> Te té Xímú ní xáha<sup>n</sup>-dẽ:

—Mèstrú, ni niú ní quide chiu<sup>n</sup>-ndí te ni ñ<sup>n</sup> chácá ñà túú ní ñhí-ndí, dico vitna cuendá-ni sá yòhó táuchiu<sup>n</sup>-n te na dàquée-ndí ñunu-ndí vá<sup>n</sup> —càchí-dé xãha<sup>n</sup>-dẽ xii-gá.

<sup>6</sup> Te òré ní dáquëe-güedé ñunu-güedé te súúni vâi chácá ñí ñhí-güedé, te ta ndátá-nã ñunu-güedé cuáhá<sup>n</sup> ní cùu. <sup>7</sup> Núu ní quide-güedé ndaha-güedé núu dâva-gá cue té cùndihí-güedé xixúhu<sup>n</sup> ingá bàrcú cuendá quihí<sup>n</sup>-güedé chindee ñaha-güedé. Te cue té-á<sup>n</sup> ñí sáhá<sup>n</sup>-güedé ní chindee tñaha-güedé ní dáchitú-güedé ndi ndúu bàrcú mee-ni chácá, te súúni ñí cuu véé núu cuíní-na-xi quée naa-güedé ndihí bàrcú ní cùu. <sup>8</sup> Te sá dúcá<sup>n</sup> cuíní-xi quée naa bàrcú ní cùu, núu té Xímú, àdi Pelú chi úú diu-dé, ní ngũíñí xití-dẽ núu Jèsús, te xãha<sup>n</sup>-dẽ:

—Xocuiñí yòhó Jèsús núu ndécú-í-a, chi yúhú cúu-í ñ<sup>n</sup> téé ío ndècu cuéchi-xi —càchí-dé xãha<sup>n</sup>-dẽ xii-gá.

<sup>9</sup> Te duca<sup>n</sup> ñí cáhá<sup>n</sup>-dé chi ní yùhú-dé, te ní cuñúhu-dé ndihí nchaa cue té ndihí-dé-á<sup>n</sup> cuendá sá ío vâi chácá ñí ñhí-güedé. <sup>10</sup> Te tñahá té Jãcobó ndihí té Juáá cue déhe té Zebèdeú ío ní cuñúhu-güedé, te diu-ni cue té cùndihí té Xímú-á<sup>n</sup> cúu-güedé tñahá-güedé. Te Jèsús ní xáha<sup>n</sup>-gã xii té Xímú:

—Vá yùhú-n, chi není vitna quihí<sup>n</sup>-n dàcahá<sup>n</sup>-n ñáyiu cuendá tuha ñàhá-yu xii-í —càchí-gá xãha<sup>n</sup>-gã xii-dé.

<sup>11</sup> Te ní quene-güedé ndihí bàrcú ndéé ñuhu yìchí yuhu làgúná-á<sup>n</sup>. Te òré-á<sup>n</sup> ñí dándõo-güedé nchaandi túhú sá ndécú ndihí-güedé, te ní tuha-güedé Jèsús.

*Jèsús quidé tãtña-gá ñ<sup>n</sup> téé tñahá cuéhé sã dátèhyú nihnu-xi yiqui cùñú-ó*  
(Mt. 8:1-4; Mr. 1:40-45)

<sup>12</sup> Te òré ní quexìo Jèsús ñ<sup>n</sup> ñuú, te ní quexìo ñ<sup>n</sup> téé cùhú tñahá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáhá<sup>n</sup>-dé núu ndécú-gã, te ní ngũíñí xití-dẽ núu-gã te ní nuu núu-dẽ ndàa núu ñúhú te càhá<sup>n</sup> ndàhú-dé, te xãha<sup>n</sup>-dẽ xii-gá:

—Mèstrú, véxi-í càhá<sup>n</sup> ndàhú-í núu-n núu vá cùndèe iní-n càda tátña ñaha-n xii-í, chi cùtnuní iní-í sá ndácú-n —càchí-dé xãha<sup>n</sup>-dẽ xii-gá.

<sup>13</sup> Te Jèsús ní dácàá-gá ndaha-gá ní tendaha ñaha-gá xii-dé, te xãha<sup>n</sup>-gã:

—Cuu cada tátña ñaha-í xii-n, te vitna te ndúha-n —càchí-gá xãha<sup>n</sup>-gã xii-dé.

Te òré-ni ní xócuñí cuéhé tñahá-dé. <sup>14</sup> Te dǎtnùní ní xáha<sup>n</sup> tucu Jèsús xii-dé:

—Vá yõ ñ<sup>n</sup> cúñaha-n sã ñí quide tátña ñaha-í xii-n, núu dütú-ni cuáhá<sup>n</sup> cuendá sá ná quíní ñahá-dẽ xii-n sã ñí ndúha-n te cuáha-n-dẽ sá ndúú tãhú Yã Ndiõxí dàtná ní cachí ndí Moisés cuendá ná quíní ñáyiu sá ndàa ní ndúha-n —càchí-gá xãha<sup>n</sup>-gã xii-dé.

<sup>15</sup> Te duca<sup>n</sup> ta xíté nuu-gá tñúhu nchaa nàcuáa quide Jèsús, te ío cuéhé ñáyiu ní xóo tacá nchaa núu ñí xíndecu-gá cuendá sá cuíní-yu cundedóho-yu tñúhu càhá<sup>n</sup>-gã, ndihí cuendá sá cuíní-yu cada tátña ñaha-gã xií-yu. <sup>16</sup> Dico Jèsús ní xóo quee nihni-gá tnuú-yu ní xóo quihí<sup>n</sup>-gá núu ñà túú ñáyiu ndècu ní xóo cáhá<sup>n</sup> ndihí-gá Yã Ndiõxí.

*Jèsús quidé tãtña-gá ñ<sup>n</sup> téé cùhú ñá cúu-gã candá nihnu*

(Mt. 9:1-8; Mr. 2:1-12)

<sup>17</sup> Te ñ<sup>n</sup> nduu dànehé-gá ñáyiu, te xñucóo ñ<sup>n</sup> úú cue téé cùu fariséú, ndihí cue téé dàcuaha ñaha xii ñáyiu nchaa tñúhu ní chídó tñuní ndí Moisés. Te cue té-á<sup>n</sup> ñí quee-güedé nchaa ñuú yíndèhu distritú Galileá, ndihí distritú Júdeá, ndihí ñuú Jerusalén, te nchaa ñuú-á<sup>n</sup> ñí quee-güedé cuáhá<sup>n</sup>-güedé núu ndécú-gã. Te Yá Ndiõxí chíndèe ñaha-gá quidé tãtña-gá ñáyiu cùhú.

<sup>18</sup> Te ñ<sup>n</sup> úú cue téé nchido-güedé ñ<sup>n</sup> téé cùhú ñá cúu-gã candá nihnu ñuhu-dé xító ní quexìo ndihí ñaha-güedé, te cuíní-güedé quíhu ndihí ñaha-güedé ndéé xití vehe, sáá-güedé ndéé núu Jèsús ndihí téé cùhú-á<sup>n</sup>.

<sup>19</sup> Dico ñá túú ní ñhí-güedé ndéé ichi quíhu-güedé, chi cuendá ío cuéhé ñáyiu



ndècu, núu xiá<sup>n</sup> ní sáá-güedé díquí véhé-á<sup>n</sup> ní caá<sup>n</sup>-güedé te ndàa díquí véhé-á<sup>n</sup> ní dáquëe-güedé téé cùhú-á<sup>n</sup>, te ñùhu-ni-dé xító ní dáquëe ñaha-güedé tnuú ñáyiú ní sáá ndéé núú Jèsús. <sup>20</sup> Te Jèsús ní cutnùni iní-gá sá ñi yuhu ni iní-güedé sàndáá iní ñáhá-güedé xii-gá, núu ní xáha<sup>n</sup>-gã xii téé cùhú-á<sup>n</sup>:

—Yòhó téé cùhú, sa ní quide càhnu iní-í nchaa cuéchi-n —càchí-gá xãha<sup>n</sup>-gã xii-dé.

<sup>21</sup> Te cue téé dàcuaha ñaha xii-yu nchaa tnúhu ní chídó tnùní ndíi Moisés ndihí cue téé cùu fariséu ní sani iní-güedé: “¿Ná cúú tée-a núu càhá<sup>n</sup> cuèhé-dé cuendá Yá Ndiöxí-i? Te vá yòo ñi ndàcu cada cahnu iní nchaa yíca cuéchi ñáyiú, chi ñi dídí-ni Yá Ndiöxí quidé càhnu iní-gá”, duha ní sani iní-güedé.

<sup>22</sup> Dico Jèsús sa ní cutnùni iní-gá nàcuáa sàni iní-güedé núu ní xáha<sup>n</sup>-gã xii-güedé:

—¿Te ná cuendá duca<sup>n</sup> sàni iní-ndó-í? <sup>23</sup> Te sá dúhá ñi xáha<sup>n</sup>-í xii téé cùhú-a sá cáda càhnu iní-í nchaa yíca cuéchi-dé, te xiá<sup>n</sup> nchòhó ñá túú cùtnuní iní-ndó núu ndáá càhá<sup>n</sup>-í àdi ñá ndáa. Dico núu cúu-í-dé sá ndáccoo-dé, te caca-dé te cutnùni ndáá iní-ndó núu ndáá càhá<sup>n</sup>-í àdi ñá ndáa, chi cundehe núu-ndó nàcuáa cada-í. <sup>24</sup> Te vitna na càda-í nàcuáa cutnùni iní-ndó nchaa-ndo sá yùhú Téé cùu ñani tnáhá-ndó nchaa-ndo ndecu ndihí-í tnúhu ndee iní sá cáda càhnu iní-í nchaa cuéchi ñáyiú ñuyíú-a —càchí-gá xãha<sup>n</sup>-gã xii-güedé.

Te sáta dúcá<sup>n</sup> te ní xáha<sup>n</sup>-gã xii téé cùhú-á<sup>n</sup>:

—Ndacóo, te ndocani-n xító ñùhu-n véxi-á<sup>n</sup>, te núhú-n vèhe-n —cachí-gá xãha<sup>n</sup>-gã xii-dé.

<sup>25</sup> Te òré-ni-á<sup>n</sup> ñi ndúha téé cùhú-á<sup>n</sup> te ní ndacóo-dé, te ní ndocani-dé xító ñùhu-dé ní quexio-á<sup>n</sup>, te ní natni-dé ichi ta càhá<sup>n</sup>-dé cuánuhú sá ño càhnu cuu Yá Ndiöxí. <sup>26</sup> Te nchaa ñáyiú xíndecu-á<sup>n</sup> ñi cuñúhu-yu, te tnáhá-yu ní cachí-yu sá ño càhnu cuu Yá Ndiöxí, te duca<sup>n</sup> ño ní yùhú-yu, te ní xítñahá-yu:

—Vitna ní xini-ó ñi sá ñá túú tnáhí xini-ó ní cùu —cachí-yu xítñahá-yu.

*Jèsús cáná-gã té Lèví*

*(Mt. 9:9-13; Mr. 2:13-17)*

<sup>27</sup> Te sáta dúcá<sup>n</sup> ñi cuu te ní quee Jèsús xiá<sup>n</sup>, te ní xini-gá ñi téé nàni Leví núccoo-dé

ñi xichi quide cobrá-dé ñáyiú cuendá impuèstú, chi cobradór cúu-dé, te ní xáha<sup>n</sup>-gã xii-dé:

—Néhe chitnahá ñáhá-n xii-í —càchí-gá xãha<sup>n</sup>-gã xii-dé.

<sup>28</sup> Te té Lèví-á<sup>n</sup> ñi ndàcuñí-dé te ní dándõo-dé nchaa sá ndécú ndihí-dé núu núccoo-dé-á<sup>n</sup>, te ní tuha-dé Jèsús.

<sup>29</sup> Te sáta dúcá<sup>n</sup> te té Lèví-á<sup>n</sup> ñi quide-dé ñi vico càhnu vehe-dé sá cúu-xi Jèsús, te ní tacá vai cue téé quide chiu<sup>n</sup> quide-dé, te nchaa-güedé cuánguihu-güedé mèsá ní ngóo-güedé ndihí dava-gá ñáyiú ní quexio cuendá caxi-güedé ndihí-yu. <sup>30</sup> Dico cue téé cùu fariséu ndihí cue téé dàcuaha ñaha xii-yu nchaa tnúhu ní chídó tnùní ndíi Moisés ní ngüita-güedé xicuehé-güedé cue téé xica cuu ndihí-gá, te xáha<sup>n</sup>-güedé:

—¿Ná cuendá xéxi-ndó xihí-ndo ndihí cue téé cuihna iní-xi quide cobrá ñáhá xii ñáyiú cuendá impuèstú, ndihí nchaa dava-gá cue téé ndècu ichi cuehé ichi duha-í? —càchí-güedé xãha<sup>n</sup>-güedé.

<sup>31</sup> Te Jèsús ní xáha<sup>n</sup>-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhu ñahá-yu. <sup>32</sup> Te yùhú véxi-í càhá<sup>n</sup>-í ñáyiú cùtnuní iní-xi sá ndécú cuéchi-xi cuendá dàñá-yu nchaa sá cuèhé sá dúhá quidé-yu, te ñá túú véxi-í càhá<sup>n</sup>-í ñáyiú càchí sá ñá túú ndècu cuéchi-xi —càchí-gá xãha<sup>n</sup>-gã xii-güedé.

*Cue téé ndècu tnúhu núú Jèsús cuendá ñáyiú ñá túú tnáhí ná xéxi áma càhá<sup>n</sup> ndihí-yu Yá Ndiöxí*

*(Mt. 9:14-17; Mr. 2:18-22)*

<sup>33</sup> Te ní xáha<sup>n</sup>-güedé xii Jèsús:

—Te áma ñá túú tnáhí ná xéxi cuè téé xica cuu ndihí té Juáá càhá<sup>n</sup> ndihí-güedé Yá Ndiöxí, te diu-ni duca<sup>n</sup> quide cue téé xica cuu ndihí nchúhú cue téé cùu fariséu. ¿Te ná cuendá cue téé xica cuu ndihí-n ñá túú dùca<sup>n</sup> quide-güedé núu nchaa-ni nduu xèxi-güedé xihí-güedé quidé-güedé-í? —cachí-güedé xãha<sup>n</sup>-güedé xii-gá.

<sup>34</sup> Te Jèsús ní xáha<sup>n</sup>-gã xii-güedé:

—Nchòhó xini-ndó sá vã cúu cññaha-o xii cue ñáyiú ñuhu vico tnándaha sá vã cúu càxi-yu nini ndècu ndihí ñaha téé tnándaha-á<sup>n</sup> xii-yu. <sup>35</sup> Dico sáá nduu te vá cùndècu ndihí ñaha-gá téé tnándaha-á<sup>n</sup>

xii-yu, te dàvá-án te cahni iní-yu vá cáxi-yu sá ndihú iní-yu —càchí-gá xăha<sup>n</sup>-gă xii-güedé.

<sup>36</sup> Te ní cani-gá ì<sup>n</sup> cuèndú núú ñăyiu nàcuáa tecú tnùnì-yu tnúhu-gá, te xăha<sup>n</sup>-gă:

—Vá yôo ì<sup>n</sup> dândée luha dóó sáá ì<sup>n</sup> dóó sa ní cuu tühú víhí, chi núu yoo duca<sup>n</sup> na càda, te dóó sáá-ă<sup>n</sup> nàndiyi-xi te uu<sup>n</sup>-gá ndata-xi dóó sã ñi cuu tühú-án, te luha dóó sáá-ă<sup>n</sup> ñà túú nàtaú-xi ndée dóó sã ñi cuu tühú-án. <sup>37</sup> Te nì vá yôo ì<sup>n</sup> chihi ndidí sáá xití ì<sup>n</sup> lamba sa ní cuu tühú víhí, chi núu yoo duca<sup>n</sup> na càda, te ndava lamba sa ní cuu tühú-án chi ío níhi yócó ndidí-án, te cuíta-ni ndidí-án te cuíta-ni lamba-án. <sup>38</sup> Núu xíá<sup>n</sup> xíní ñùhu-xi quée ndidí sáá-ă<sup>n</sup> xití ì<sup>n</sup> lamba saa cuèndá duca<sup>n</sup> ñà túú nã cuu cováha-xi. <sup>39</sup> Te nì ì<sup>n</sup> ñăyiu ñà túú tnàhá iní-yu cohó-yu ndidí sáá, te núu díhna-gá ná còhó-yu ndidí sá ñi quene díhna-gá, chi càchí-yu sá xíhí văha-gá ndidí sá ñi quene díhna-gá-án dácúxí ndidí sáá —càchí-gá xăha<sup>n</sup>-gă xii-yu.

## 6

*Cue tée xica cuu ndihi Jesús sàhnú-güedé yoco triú nduu ndètatú ñăyiu*  
(Mt. 12:1-8; Mr. 2:23-28)

<sup>1</sup> Te ì<sup>n</sup> nduu cùu-xi nduu ndetatu ñăyiu ñùhu Jesús ichi ndihi cue tée xica cuu ndihi-gá, te ta yăha-gá ndihi-güedé ì<sup>n</sup> xichi núú cáá triú, te ní ngüíta-güedé sàhnú-güedé yoco triú-án te ndihi ndaha-güedé quí<sup>n</sup>-güedé quée triú tá xèxi-güedé cuáhá<sup>n</sup>. <sup>2</sup> Te ì<sup>n</sup> úú cue tée cùu fariséú ní xăha<sup>n</sup>-güedé xii cue tée xica cuu ndihi-gá:

—¿Te ná cuèndá duca<sup>n</sup> quide nchohó ì<sup>n</sup> sá ñà túú tau-ó càda-o vitna cuu-xi nduu ndetatu-ó-í? —càchí-güedé xăha<sup>n</sup>-güedé.

<sup>3</sup> Te Jesús ní xăha<sup>n</sup>-gă xii-güedé:

—¿Te náa ñà túú dàcuaha-ndo núú tütú Yă Ndióxi núú càhá<sup>n</sup>-xi nàcuáa ní quide ndii Dàvií cúnàhá ní xíhí ndii docó ndihi cue tée ní xica cuu ndihi ndii-ă<sup>n</sup>? <sup>4</sup> Chi ní quihu ndii vehe Yă Ndióxi, te ní quehe<sup>n</sup> ndii pàá ní cuu íi ndécú-ă<sup>n</sup> ñi dácăhñu ndii cue tée xica cuu ndihi ndii ní xexi ndii ndihi-güedé, te ñà túú tau ndii sá dúcá<sup>n</sup> càda ndii ni cùu, chi mee-ni cuè dútú tau-güedé caxi-güedé pàá-án ní cùu —cachí-gá xăha<sup>n</sup>-gă xii-güedé.

<sup>5</sup> Te ní xăha<sup>n</sup> tucu-gá:

—Te yúhú Tée cùu ñani tnàhá-ndo nchàa-ndo, tnàhá-í ndécú ndihi-í tnúhu ndee iní sá cùu-í nchaa ñăyiu nàcuáa cadá-yu nduu ndètatú-ó-á —càchí-gá xăha<sup>n</sup>-gă xii-güedé.

*Ì<sup>n</sup> tée ní yíchí ì<sup>n</sup> xio ndaha-xi*  
(Mt. 12:9-14; Mr. 3:1-6)

<sup>6</sup> Te ingá nduu diu-ni nduu ndètatú ñăyiu cuánguihu Jèsús xití veñúhu dānehé-gá ñăyiu. Te xía<sup>n</sup> ndécú ì<sup>n</sup> tée cùhú ní yíchí nihnu ì<sup>n</sup> xio ndaha cùha-dé. <sup>7</sup> Te cue tée dàcuaha ñaha xii ñăyiu nchaa tnúhu ní chídó tnùnì ndii Moisés, ndihi cue tée cùu fariséú ndéhé-güedé nùu cada tátna ñaha Jèsús xii tée cùhú-án nduu ndètatú-güedé-án cuèndá níhí-güedé nàcuáa cada-güedé cacá<sup>n</sup> cuéchi-güedé cuèndá-gá. <sup>8</sup> Dico Jèsús sa ní cutnùnì iní-gá nàcuáa sàni iní-güedé, te ní xăha<sup>n</sup>-gă xii tée cùhú ndaha-xi-án:

—Ndacuiñí te ngúnutnii-n cuădava tnuú-ndí-a —càchí-gá xăha<sup>n</sup>-gă xii-dé.

Te tée-án ñi ndacuiñí-dé te ní ngúnutnii-dé cuădava tnuú-güedé ndihi-gá. <sup>9</sup> Te dătnùnì Jèsús ní xicá<sup>n</sup> tnúhú-gă núu cuè ñăyiu xindecu-án, te xăha<sup>n</sup>-gă xii-yu:

—Cuñí-í cachí tnúhu-ndo nã cúú sã văha cada-o nduu ndetatu-ó. ¿Ì<sup>n</sup> chiun<sup>n</sup> váha àdi ì<sup>n</sup> chiun<sup>n</sup> cuehé, sá cadá tátna-o ñăyiu cùhú àdi sá cahní-ó-yu? —càchí-gá xăha<sup>n</sup>-gă xii-yu.

<sup>10</sup> Te dătnùnì ní ndacoto-gá nùu-yu nchaa-yu, te ní xăha<sup>n</sup>-gă xii tée cùhú ndaha-xi-án:

—Ndocani ndaha-n —càchí-gá xăha<sup>n</sup>-gă xii-dé.

Te ní ndocani-dé ndaha-dé, te òré-ni ní ndúha. <sup>11</sup> Te cue tée xindecu-án sùúni ñi cudée<sup>n</sup>-güedé sá dúcá<sup>n</sup> ñi quide tátna Jèsús tée cùhú-án, te ní ngüíta-güedé ndátnùhu-güedé nùu nása cada ñaha-güedé xii-gá.

*Jèsús căxi-gá úxúú tnàhá cue tée dacuaha ñaha xii ñăyiu tnúhu-gă*  
(Mt. 10:1-4; Mr. 3:13-19)

<sup>12</sup> Te sátá dúcá<sup>n</sup> ñi cuu te ní xica Jèsús cuáhá<sup>n</sup>-gá xití yucu cuèndá yacá<sup>n</sup> cáhá<sup>n</sup> ndihi-gá Tátá-gă Dútú Ndióxi, te ñi niú ní cáhá<sup>n</sup> ndihi ñaha-gă. <sup>13</sup> Te sátá ñi túndaá, te ní cana-gá nchaa cue tée xica cuu ndihi-gá,

te ní cáxi-gá úxúú tnàhá-güedé, te cue téé-án nĩ xáha<sup>n</sup>-gã sá díú-güedé cuu-güedé cue téé quíhí<sup>n</sup> cáhá<sup>n</sup> tnúhu-gá núú ñăyiu. <sup>14</sup> Te duha xĩnani ndi ùxúú cue téé-án. Té Ximú, àdi Pelú chi úú dìu-dé, ndihĩ ñaní-dé té Ndrĩxí, ndihĩ té Jàcobó, ndihĩ té Juàá, ndihĩ té Lìpé, ndihĩ té Bartolòmé, <sup>15</sup> ndihĩ té Mâteú, ndihĩ té Măxí, ndihĩ té Jàcobó déhe té Àlfeú, ndihĩ ingá té Ximú téé ní cundihĩ cue téé cananistá, <sup>16</sup> ndihĩ té Jùdás ñaní té Jàcobó, ndihĩ té Jùdás Iscarioté téé ní sáá nduu nĩ sáha cuendá ñáhá xii Jesús núú cuè téé cùu úhú iní ñáhá xii-gá, duha xĩnani cuè téé ní cáxi Jèsús ní xica cuu ndihĩ-gá.

*Jèsús dánèhé-gá cuéhé víhí ñăyiu*  
(Mt. 4:23-25)

<sup>17</sup> Te Jèsús cuánuu-gá yucu núú nĩ sáá-gá-án, te ní ngava-gá ì<sup>n</sup> núú ndàá ndihĩ cue téé xica cuu ndihĩ-gá, te xía<sup>n</sup> nĩ ngúnutnĩ-gá. Te xía<sup>n</sup> ndécú dàva-gá cue téé xica cuu ndihĩ-gá ndihĩ vai ñăyiu ndètu ñáhá-yu xii-gá, te ñăyiu-án vëxi-yu nchaa ñúú cáá dìstritú Jùdeá, ndihĩ ñúú Jerusalén, te ndècu ñăyiu véxi ndàa yuhu lamár yatni ñúú Tìrú, ndihĩ ñúú Sídón. Te nchaa ñăyiu-án nĩ quexió-yu cuiní-yu cundedóho-yu nchaa tnúhu càhá<sup>n</sup> Jèsús, ndihĩ cuendá sá cuiní-yu ndúha-yu nchaa cuéhé tnàhá-yu. <sup>18</sup> Te tnàhá ñăyiu yìhĩ ñaha espíritú cundihĩ yucu ñávãha. <sup>19</sup> Te ncháá-yu cuiní-yu dacáá-yu ndahá-yu tendahá-yu Jèsús ní cùu cuendá sá nĩ níhĩ-yu tnúhu sá ndècu ndihĩ-gá tnúhu ndee iní quidé tãtna-gá nchaa ñăyiu cùhú.

*Cuendá ñăyiu ío váha táhú-xi*  
(Mt. 5:1-12)

<sup>20</sup> Te Jèsús ní ndacoto-gá núú cuè téé xica cuu ndihĩ-gá, te ní xáha<sup>n</sup>-gã:

—Váha táhú nchaa nchòhó cue ñăyiu ndàhú, chi nduu táhú-ndó cundecu-ndo núú táxí tnùnĩ Yã Ndiõxí.

<sup>21</sup> Váha táhú nchaa nchòhó ñăyiu ío cuiní cundedóho tnúhu Yã Ndiõxí chi ío vii ío váha cuu iní-ndó.

Váha táhú nchaa nchòhó ñăyiu ndàhyú sá ndihú iní-ndó, chi sáá nduu te cudíí iní-ndó nĩ caa nĩ quíhí<sup>n</sup>.

<sup>22</sup> Váha táhú nchaa nchòhó ñăyiu na cùu úhú iní ñáhá tnàha ñăyiu-xi, chi sáá nduu

te vá dáñá-gã-yu quíhu-ndo vèñúhu, te cúcuèhé ñáhã-yu xii-ndo, te cachí-yu sá ñà díú ñăyiu váha cùu-ndo, te duca<sup>n</sup> càda ñáhã-yu xii-ndo sã cuendá yúhú Téé cùu ñaní tnáhã-ndó nchãa-ndo. <sup>23</sup> Te òré duca<sup>n</sup> na càda ñáhã-yu xii-ndo te cudíí víhí-ní iní-ndó cundecu-ndo, chi sáá nduu nduu táhú-ndó sã ío váha càa ndecu andi cu-ndecu ndihĩ-ndo nduu na nasaá-ndó yacá<sup>n</sup> cundecu-ndo, chi dìu-ni duca<sup>n</sup> nĩ xóo cada ñaha cuè ñaní tnáhã-yu xii cue téé ní xóo cáhá<sup>n</sup> tnúhu Yã Ndiõxí ní xíndecu ndéé sanaha.

<sup>24</sup> Te ndàhú ní cuu nchaa ñăyiu cuica ñà túú sàndáá iní ñáhá xii Yã Ndiõxí, chi vitna ío váha ndècú-yu, dico sáá nduu te nduu ndàhú-yu.

<sup>25</sup> Te ndàhú ní cuu tucu nchaa ñăyiu ñà túú tnàhí ná cúmãní xii-xi vitna, chi sáá nduu quiní-yu tnúndòho tnúhu ndàhú.

Te ndàhú ní cuu nchaa ñăyiu cudíí iní-xi ndècu ichi cuehé ichi duha vitna, chi sáá nduu te ndàhyú-yu sá ndihú iní-yu.

<sup>26</sup> Te ndàhú ní cuu nchaa ñăyiu na càhá<sup>n</sup> váha dava-gá ñăyiu cuendá-xi, chi duca<sup>n</sup> nĩ xóo cáhá<sup>n</sup> váha-yu cuendá nchaa cue téé ní xóo dandàhú ñáhá xii ñăyiu ndéé sanaha, chi ní cachí-güedé sá càhá<sup>n</sup>-güedé tnúhu Yã Ndiõxí te ñà ndàá —càchí-gá xáha<sup>n</sup>-gã xii-güedé.

*Cuu iní-ó nchãa ñăyiu cùu úhú iní ñáhá xii-o*  
(Mt. 5:38-48; 7:12)

<sup>27</sup> Te Jèsús ní xáha<sup>n</sup>-gã xii nchaa ñăyiu xíndecu-án:

—Nchaa nchòhó ñăyiu xíndedóho ñaha càchí tnúhu-í xii-ndo sã cúú iní-ndó ñăyiu cùu úhú iní ñáhá xii-ndo, te cada-ndo sã vãha sã cúú-xi-yu cuèi nãndi sã ná cáda ñáhã-yu xii-ndo. <sup>28</sup> Te cáca<sup>n</sup> táhú-ndó núú Yã Ndiõxí cuendá ñăyiu càhá<sup>n</sup> úhú ñáhá xii-ndo, ndihĩ cuendá ñăyiu tèè ñaha cuéchi neñúú xii-ndo. <sup>29</sup> Te núú ní canihá-yu xii-ndo ì<sup>n</sup> xito te cuiní tucú-yu canihá-yu, te dañã-ndo na canihá-yu, àdi núu na quèndéé-yu dóó ndíxí ndòdo-ndo, ndihĩ dúhnú-ndó, te dañã-ndo na cànehé-yu quíhí<sup>n</sup>. <sup>30</sup> Te núú xicá<sup>n</sup>-yu ì<sup>n</sup> sã nãndĩhĩ-yu núú-ndó te cuãñaha-ndo, àdi quèndéé-yu ì<sup>n</sup> ndachiu<sup>n</sup>-ndo, te vá nãndacá<sup>n</sup>-ndó



nũ-yu. <sup>31</sup> Te nchaa sá vǎha cuìní-ndó càda tnaħa ñáyi-u-ndo, te cada-ndo tnàhá-ndó ndìhí-yu.

<sup>32</sup> Chi núu nchòhó ná cùu iní-ndó mèe-ni ñáyi-u cùu iní ñàhá xii-ndo, te vá càchí-ndó sǎ ïo váha quide-ndo, chi tnàhá nchaa ñáyi-u ndècu ichi cuehé ichi duha duca<sup>n</sup> xǐquidé-yu. <sup>33</sup> Àdi mee-ni ñáyi-u quide ñaha sá vǎha xii-ndo quide váha-ndǒ-yu, te vá càchí-ndó sǎ ïo váha quide-ndo, chi tnàhá nchaa ñáyi-u ndècu ichi cuehé ichi duha duca<sup>n</sup> xǐquidé-yu. <sup>34</sup> Àdi mee-ni ñáyi-u sàni iní-ndó nàcoto ñaha xii-ndo cuáñaha-ndo ñ<sup>n</sup> sá xicá<sup>n</sup>-yu núu-ndó, te vá cání iní-ndó sǎ ïo quide váha-ndo, chi tnàhá ñáyi-u ndècu ichi cuehé ichi duha dása<sup>n</sup> nuú-yu ñ<sup>n</sup> sá néhé vǎha-yu, te ndètu cahnu-ná-yu nacoto ñaha ñáyi-u ní sáha núu-yu-á<sup>n</sup>. <sup>35</sup> Dico nchòhó xíní ñùhu-xi cuu iní-ndó ñáyi-u cùu úhú iní ñàhá xii-ndo, te cada-ndo sǎ vǎha sá cúu-xí-yu, te cuáñaha núu-ndo ñ<sup>n</sup> sá ná ndìhi-yu te núu xicá<sup>n</sup>-yu núu-ndó, te vá cùndètu-ndo nacoto ñàhá-yu xii-ndo. Te duca<sup>n</sup> te ío-gá cuehé ñhí-ndó cùndecu ndìhi-ndo, te cuu ndisa-ndo dèhe Dútú Ndiǒxí, chi ío càhnu iní-gá sá cúu-xí nchàa ñáyi-u ñá túú ndàcá<sup>n</sup> táhú nũú-gǎ cuendá nchaa sá vǎha quide-gá, ndìhi sá cúu-xí nchàa ñáyi-u ndècu ichi cuehé ichi duha. <sup>36</sup> Te cunduu càhnu iní nchòhó tucu dàtná càhnu iní Tátá-ó Dútú Ndiǒxí.

*Vá càhá<sup>n</sup> cuèhé-ó cuendá tnàha ñáyi-u-o  
(Mt. 7:1-5)*

<sup>37</sup> Te vá càhá<sup>n</sup> cuèhé-ndó cuendá sá quidé tnàha ñáyi-u-ndo, te duca<sup>n</sup> te Yá Ndiǒxí ñá túú nà tnúhu cúñaha-gǎ xii-ndo. Te vá cùñaha-ndo xii ñáyi-u sá quihí<sup>n</sup>-yu ñ<sup>n</sup> xichi núu úhú núu ndàhú ndohó-yu cuendá nchaa sá ñà túú vǎha quidé-yu, te duca<sup>n</sup> te Yá Ndiǒxí vá cúñaha-gǎ xii-ndo sǎ tnàhá-ndó quihí<sup>n</sup>-ndó ñ<sup>n</sup> xichi núu úhú núu ndàhú ndohó-ndo. Te chí cáda càhnu iní nchaa sá quidé-yu, te duca<sup>n</sup> te Yá Ndiǒxí cada càhnu iní ñàhá-gǎ xii-ndo tucu. <sup>38</sup> Te chí cuáñaha xii ñáyi-u núu ná cúu sǎ xíní ñùhú-yu, te dàtná chitu ñ<sup>n</sup> yicá súúní xidó coyo-ná, duca<sup>n</sup> tàxi Yá Ndiǒxí xii-ndo. Te nánicuáa na càda-ndo cada váha-ndo sǎ cúu-xí tnàha ñáyi-u-ndo, te diu-ni duca<sup>n</sup>

càda ñaha Yá Ndiǒxí xii-ndo —càchí Jèsús xǎha<sup>n</sup>-gǎ xií-yu.

<sup>39</sup> Te dǎtnùní ní cani-gá ñ<sup>n</sup> cuendú núu-yu nàcuáa tecú tnùní-yu tnúhu-gá, te xǎha<sup>n</sup>-gǎ:

—Ñ<sup>n</sup> tée cuáá chi ñá ndácú-dě cuita nehe-dé ingá tée cuáá, chi núu duca<sup>n</sup> na càda-güedé te ndi nduú-güedé ngau-nihnu-güedé déhvá. <sup>40</sup> Te ni ñ<sup>n</sup> landú yíhí scuèlá ñá túú cùnuu-gá-güexi dàcúúxí mèstrú-güexi, te ndéé nũu na cùtúha váha-güexi, te dǎtnùní nútnahá-güexi tée dànehé ñàhá xii-güexi.

<sup>41</sup> Te na càchí tnúhu-í xii-ndo sǎ nchàa cuèchi quide ñáyi-u cùu-xí datná ñ<sup>n</sup> mihi líhli. ¿Te ná cuendá ndéhé-ndó ñ<sup>n</sup> sá ñà túú vǎha quide tnaħa ñáyi-u-ndo, te mee-ndo vihi-gá quidé-ndó-í? Te sá dúcá<sup>n</sup> quide-ndo te cada iní-ndó sǎ ndéhé-ndó dàtná ñ<sup>n</sup> mihi líhli ñùhu núu tnàha ñáyi-u-ndo, te mee-ndo ñùhu ñ<sup>n</sup> mihi cahnu-gá núu-ndó. <sup>42</sup> Te núu na nàcanu ichi-ndo tnaħa ñáyi-u-ndo cuendá sá ñà túú quide váha-yu ndècú-yu te mee-ndo vihi-gá quidé-ndó ñá, te cada iní-ndó sǎ xǎha<sup>n</sup>-ndo xii-yu sá nátava-ndo mihi líhli ñùhu núu-yu, te mihi càhnu ñuhu núu méé-ndó ñà túú quide cuendá-ndó. ¿Te sá dúcá<sup>n</sup> quide-ndo te ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó! Te xini ñuhu-xi díhna-gá ñàña-ndo nchàa sá ñà túú vǎha quide-ndo, te dǎtnùní duca<sup>n</sup> te cutnùní váha iní-ndó nàcuáa nacanu ichi-ndo tnàha ñáyi-u-ndo.

*Ndi dǎñ<sup>n</sup> núu yutnu xini-ó nǎ yutnu cùu-xi  
cuendá sá sǎvidí-xi  
(Mt. 7:17-20; 12:34-35)*

<sup>43</sup> Te ñá túú ni ñ<sup>n</sup> yutnu váha te quini-ó cùu<sup>n</sup> sǎvidí sá ñà túú vǎha, te ni ñ<sup>n</sup> yutnu sá ñà túú vǎha, te quini-ó cùu<sup>n</sup> sǎvidí váha, chi mee-ni sǎvidí sá ñà túú vǎha cùu<sup>n</sup>. <sup>44</sup> Te ndi dǎñ<sup>n</sup> núu yutnu xini-ó nǎ yutnu cùu-xi cuendá sá sǎvidí-xi, chi ñá túú xini-ó cùu<sup>n</sup> ngúxí ñ<sup>n</sup> tnu iñu, te ni ñà túú xini-ó cùu<sup>n</sup> ndéhé yoho yàha stilé díquí ñ<sup>n</sup> yoho yàha cutexínu. <sup>45</sup> Te nchaa ñáyi-u váha iní-xi càhá<sup>n</sup>-yu tnúhu váha, chi diu-ni tnúhu váha tnàhí-á<sup>n</sup> ñùhú iní-yu, te nchaa ñáyi-u ñá túú vǎha iní-xi càhá<sup>n</sup> cuèhé-yu, chi diu-ni tnúhu cuèhé tnàhí-á<sup>n</sup> ñùhú iní-yu, chi nchaa sá ñùhú iní-yu te xǎñ<sup>n</sup> càhá<sup>n</sup>-yu.



*Jèsús ndècu cimientú-xi ndihi ìn vehe ñá túú cimientú-xi*  
(Mt. 7:24-27)

<sup>46</sup> ¿Te ná cuendá cächí-ndó sã yǔhú cùu-í Yaá cùu Xitohó-ndó te ñá túú quide-ndo nchaa nacuaá cãhá-í-i? <sup>47</sup> Te na cächí tnúhu-í xii-ndo cuendá ñáyiú tũha ñaha xii-í, chi ñáyiú-án sácũndedóho-yu nchaa tnúhu cãhá-í te tnĩ-yu. <sup>48</sup> Te ñáyiú-án cùu-yu dàtná ìn tée ní dácáá ìn vehe, chi tée-án dǐhna-gá ní xete-dé ndéé ní tnahá-dé yúú cáxí te dàtnú ní ní tava-dé cimientú-xi, te òré ní cuu dáú, te ní ndee ndute ñuhu, te ní ndacá-xi ndéé núú cáá vèhe-án, dico ñá túú ní ndacu-xi cuido-xi, te duca chi tée ní dácáá vèhe-án ní tava-dé cimientú-xi núú yúú cáxí. Duha sãtnahá-xi cùu nchaa ñáyiú sácũndedóho tnúhu cãhá-í te tnĩ-yu. <sup>49</sup> Te ñáyiú sácũndedóho tnúhu cãhá-í te ñá túú tnĩ-yu, ñáyiú-án cùu-yu dàtná ìn tée ní dácáá ìn vehe, te ñá túú ní tava-dé cimientú-xi, te òré ní cuu dáú, te ní ndee ndute ñuhu, te ní ndacá-xi ndéé núú cáá vèhe-án, te íi-ni ní xido-xi vehe-án cuendá sã ñá túú ní quène cimientú-xi. Duha sãtnahá-xi cùu nchaa ñáyiú sácũndedóho tnúhu-í te ñá túú cuini-yu tnĩ-yu —cächí-gá xãha-gã xii-yu.

## 7

*Jèsús quidé tãtna-gá ìn tée xĩnu cuechi núú ìn tée cùu capitán*  
(Mt. 8:5-13)

<sup>1</sup> Te sátá ñi yãha ní cáhá Jèsús ndihi ñáyiú, te cuáhã-gã ñuú Capernaúm. <sup>2</sup> Te yacã ndécú ìn tée cùu capitán, te cùhú ìn tée xĩnu cuechi núú-dě tée ío-gá cùu ìní-dé, te sa ndècu-ná-dé sã cùú-dé. <sup>3</sup> Te òré ní níhí tõe cùu capitán-án tnũhu cuendá Jèsús, te ní tendaha-dě ìn úú cue tée cùu sacuéhé núú ñáyiú isrãel cuáhã-güedé cáhá ndàhú-güedé núú-gã nõu vá cùndèe ìní-gá quíhĩ-gã cada tátna-gá tée xĩnu cuechi núú-dě-án. <sup>4</sup> Te ní quexìo-güedé núú ndécú Jèsús, te ní ngüita-güedé cãhá ndàhú víhĩ-güedé núú-gã, te xãha-güedé:

—Tée cùu capitán ní cachí-dé véxi-ndí nõu vá cùndèe ìní-n quíhĩ-n càda tátna-n ìn tée xĩnu cuechi núú-dě chi cùhú-dé, te tàú ndisa-n càda-n nacuaá cãhá-

capitán-án, <sup>5</sup> chi tée-ã ìo cùu ìní ñáhã-dě xii nchaa nchúhú ñáyiú isrãel te diu-dé ní táuchíú-dě ní sãá veñúhu-ndí —cächí-güedé xãha-güedé xii-gã.

<sup>6</sup> Te sátá dúcã te Jèsús ní xica-gã cuáhã-gã ndihi-güedé, te òré tá cùyatni-gã vehe núú ndécú tõe cùhú-án cuáhã, te tõe cùu capitán-án ñi xãha-dě xii ìn úú cue tõe cãhá ndihi-dé:

—Quíhĩ-ndó cũñaha-ndo xii Yaá cùu Mèstrú sã cächí-í sã ñá túú ñã cani ìní-gã, chi ñá túú tàú-í sã quíhu-gã ndéé xití vehe-í, <sup>7</sup> chi ñi sã cùnú ndúcú mèe-í-gã ñá túú ní cùy-í. Núu xãã cũñaha-ndo xii-gã sã ná cãhá-ni-gã sã ndũha tõe xĩnu cuechi núú-í-a te ndũha-dé. <sup>8</sup> Chi yúhú ndécú cuè tõe tàxi tnuní ñáhã xii-í, te duca yúhú tucu ndècu cue sandadú táxí tnuní-í. Te òré xãha-ĩ xii ìn-dé quíhĩ-dé ìn chiú te cuáhã-dé, te òré xãha-ĩ xii ìngã-dé quixi-dé te véxi-dé, te òré xãha-ĩ xii tõe xĩnu cuechi núú-í cada-dé ìn chiú te quide-dé. Duha cächí-í cũñaha-ndo xii-gã —cächí-dé xãha-dě xii cue tõe cãhá ndihi-dé-án.

<sup>9</sup> Te sátá dúcã ñi xãha-güedé xii Jèsús, te ní cuñúhu-gã nchaa tnúhu ní cáhá tõe cùu capitán-án, te ní nchócótó-gã núú nchãa ñáyiú nchícú ñáhã xii-gã cuáhã, te ní xãha-gã:

—Na cächí tnúhu ndãá-í xii-ndo sã vãtã quini-gã-í ñi ìn ñáyiú isrãel, ñáyiú ìo váha sãndãá ìní-xi Yá Ndiõxí dàtnã sãndãá ìní ñáhã tõe-ã xii-gã —cächí-gã xãha-gã xii-yu.

<sup>10</sup> Te òré ní ndexìo cue tõe nèhe tnúhu-án ñi sãhá núú Jèsús, te sa ní ndũha tõe cùhú-án.

*Jèsús dándòto-gã déhe ìn ñaha quèe*

<sup>11</sup> Te sátá dúcã ñi cuu te ní xica Jèsús cuáhã-gã ìn ñuú nãní Nãin, ndihi cue tõe xica cuu ndihi-gã, ndihi vãi ñáyiú. <sup>12</sup> Te òré ní sãá-gã yuhu ñuú-án, te ní xiní-gã nchídó-güedé ìn ndíyi cuáhã chindúxi ñaha-güedé, te ndíyi-án cùú dẽhe ìn ñaha quèe, te ìndi duca-ni déhe-a ndècu ñi cuu te ní xihí-dé. Te ìo cuéhé ñáyiú cuáhã chindúxi ñaha. <sup>13</sup> Te òré ní xiní ñáhã Jèsús xii-a ndàhyú-a te ní cundãhú ìní ñáhã-gã, te ní xãha-gã:

—Vã ndàhyú-n —cächí-gã xãha-gã xii-a.

14 Te ní dáyátní-gã càjá ñúhú ndíyí-án te ní dácàá-gá ndaha-gá te ní tendaha-gá càjá-án, te ní ngüíñí cue téé nchìdo ñaha-án. Te ní xáha<sup>n</sup>-gã xii ndíyí-án:

—Tée cuechi, yúhú càchí-í sá ndácõo-n — càchí-gá xáha<sup>n</sup>-gã xii ndíyí-án.

15 Te téé ní xíhí-án ñí núcúnucóo-dé te ní ngüíta-dé càhá<sup>n</sup>-dé, te Jèsús ní nacuáha cuendá ñáhá-gã xii-dé ndaha ñaná-dě. 16 Te sá dúcá<sup>n</sup> ñí quide Jèsús ní xiní-yu te ío ní yúhú-yu, te ní xítnàhá-yu:

—Ío càhnu cuu Yá Ndiõxí chi ñí<sup>n</sup> téé càhá<sup>n</sup> tnúhu-gá ní quexìo núú ndécú-ó —càchí-yu xítnàhá-yu.

Te ní xítnàhá tucú-yu:

—Yá Ndiõxí véxi-gá chindee ñàha-gá xii nchaa nchoo ñáyiú cùu cuendá-gá — càchí-yu xítnàhá-yu.

17 Te nchaa ñúú distritú Jùdeá, ndíhi dava-gá ñúú ní níhí-yu tnúhu nàcuáa ní quide Jèsús.

*Cue téé ní tendaha té Juàá cuáhá<sup>n</sup> núú ndécú Jèsús*

*(Mt. 11:2-19)*

18 Te cue téé xica cuu ndíhi té Juàá ní xáha<sup>n</sup>-güedě xii-dé nchaa sá ñí quide-gá, núú ní cana-dé úú tnàhá-güedé 19 cuendá cúñaha-dě quíhí<sup>n</sup>-güedé nducu tnúhu-güedé núú Jèsús, te núú sá díú-gã cúú-gã Crístú Yaá ní tendaha Yá Ndiõxí véxi ñuyíú-a àdi sá cùndètu nahi-ni-güedé mei Yàá-án. 20 Te òré ní quexìo cue téé ní tendaha tẽ Juàá núú ndécú Jèsús, te xáha<sup>n</sup>-güedě xii-gá:

—Té Juàá tée dàcuandute ñaha xii ñáyiú ní tendaha ñàha-dé xii-ndí véxi-ndí cáca<sup>n</sup> tnúhú-ndí núú-n, núú sá díú-n cùu Crístú Yaá quixi ñuyíú-a, àdi sá cùndètu-ndí mei Crístú càchí-dé —càchí-güedé xáha<sup>n</sup>-güedě xii-gá.

21 Te mei òré ní quexìo-güedé-án ñí quide tátna Jèsús vai ñáyiú cùhú, te davá-yu càhú víhí tnàhá-yu, te ndí díí<sup>n</sup> ndí díí<sup>n</sup> núú cuèhé tnàhá-yu ñí<sup>n</sup> ñí<sup>n</sup>-yu, te cue ñáyiú yíhi ñaha espíritú cùndíhi yucu ñávàha ní queñuhu-gá espíritú-án yiqui cùñú-yu, te ío vai ñáyiú cuáá ní nacaá<sup>n</sup>-gá núú-yu. 22 Te Jèsús ní xáha<sup>n</sup>-gã xii-güedé:

—Chí cuánuhú te cani-ndo cuendú núú tẽ Juàá nchaa sá ñí xiní-ndó quide-í, ndíhi

nchaa nàcuáa ndùu tnúhu ní cáhá<sup>n</sup>-í ní xíndedóho-ndo. Te cúñaha-ndo xii-dé sá quidé tátna-í núú cue ñáyiú cuáá, te quide tátna-í cue ñáyiú yacua, ndíhi cue ñáyiú tnàhá cuèhé sá dátèhyú nihnu-xi yiqui cùñú-yu, ndíhi cue ñáyiú doho, nchaa ñáyiú-án quide tátna-í te ndúha-yu, te ndéé cue ñáyiú sa ní xíhí dándòto-í cúñaha-ndo xii-dé, te cúñaha tucu-ndo xii-dé sá ndécú-í dánèhé-í nchaa ñáyiú ndàhú tnúhu sá sánú ìchi ñaha xii-yu nàcuáa naníhí tànhú-yu. 23 Te cúñaha tucu-ndo xii-dé sá ío váha táhú nchaa ñáyiú ñá túú quide sáá iní nchaa tnúhu càhá<sup>n</sup>-í, duha cúñaha-ndo xii-dé — càchí-gá xáha<sup>n</sup>-gã xii-güedé.

24 Te sátá ñí yáha-güedé cuánuhú-güedé, te ní ngüíta Jèsús ní cáhá<sup>n</sup>-gá núú ñáyiú cuendá té Juàá, te xáha<sup>n</sup>-gã xii-yu:

—Nchòhó ní sándéhé-ndó ñí<sup>n</sup> téé ndécú xití yucu, te téé-án ñà túú sàni ñí<sup>n</sup> sàni úú iní-dé, chi ñá túú quide-dé dàtná quidé nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné táchí. 25 Te ñí ñà túú ní sándéhé-ndó ñí<sup>n</sup> téé ñihnu dóó vaha dóó vii càa. Te nchòhó xiní-ndó sá ñáyiú sàcúhnu dóó vaha dóó vii càa ñá túú ñá cùmání xii-yu, te nchaa ñáyiú-án ndécú-yu vehe cue téé cùnuu yíndaha ñaha xii ñáyiú. 26 Dico nchòhó chi ní sándéhé-ndó ñí<sup>n</sup> téé càhá<sup>n</sup> tnúhu Yá Ndiõxí. Te ndáá sá díú tẽ càhá<sup>n</sup> tnúhu-gá cúú-dě dico cùnuu-gá-dé dàcúxí dàva-gá cue téé càhá<sup>n</sup> tnúhu-gá. 27 Te díu cuendá té Juàá-án càhá<sup>n</sup>-xi núú tütú Yá Ndiõxí nàcuáa ní xáha<sup>n</sup>-gã xii Crístú, te duha ní xáha<sup>n</sup>-gã:

Tendaha-í ñí<sup>n</sup> téé cáhá<sup>n</sup> tnúhu-í codonù-dé núú-n cuendá dàtúha-dé ñáyiú cuendá quíndáá iní-yu tnúhu-n.

Duha ní xáha<sup>n</sup>-gã, te duca<sup>n</sup> ñí ngódó tnùnì núú tütú-gá. 28 Te na càchí tnúhu-í xii-ndo sá ñí<sup>n</sup> cue téé ñuyíú-a ñá túú cùnuu-güedé dàtná cùnùu té Juàá tée dàcuandute ñaha xii ñáyiú. Te nchaa ñáyiú sa ta ndíhu ndaha ñaha Yá Ndiõxí vitna cuáhá<sup>n</sup> cùnùu-gá-ni tucú-yu dàcúxí tẽ Juàá cuèi cùú-yu ñáyiú ñá túú cùnuu dàcúxí dàva-gá ñáyiú yíndaha-gá —càchí Jèsús xáha<sup>n</sup>-gã xii-yu.

29 Te sá dúcá<sup>n</sup> ñí cáhá<sup>n</sup> Jèsús, núú nchaa ñáyiú ní dàcuandute té Juàá ní càchí-yu sá ío váha quide Yá Ndiõxí, te díu-ni duca<sup>n</sup> ñí cáhá<sup>n</sup> cue téé cuihna iní-xi quide cobrá

ñáhá xii ñáyiú cuendá impuèstú, cue tée ní dácuañdute-dé. <sup>30</sup> Dico cue tée cùu fariséú, ndihí cue tée dàcuaha ñaha xii ñáyiú nchaa tnúhu ní chídó tnùní ndíi Moisés, cue tée ñá túú ní dàcuandute té Juàá ñá túú ní tnàhá iní-güedé cada-güedé nchaa sá vaha cuení Yá Ndiöxí. <sup>31</sup> Te Xítohá Jesucristú ní xáha<sup>n</sup>-gã xii-yu:

—Na càchí tnúhu-í xii-ndo nàcuáa sãtnahá-xi cùu ñáyiú ndècu vitna. <sup>32</sup> Chi ñáyiú-á<sup>n</sup> cúú-yu dàtná cue landú sácõo núu yáhu dàdiqui-güexi te níhi càhá<sup>n</sup>-güexi, te xítñaha-güexi: “Ní tíú-ndí yaá ndihí vïlu te ñá túú ní cuení-ndó càta-ndo. Te ío yica iní ní xita yuhu-ndí te ñá túú ní ndáhyú-ndó”, càchí-güexi xítñaha-güexi. Te duca<sup>n</sup> sãtnahá-xi cùu ñáyiú ndècu vitna. <sup>33</sup> Te té Juàá tée ní xóo dacuañdute ñaha xii ñáyiú ío ndàhú ní xóo caxi-dé, te ni ñà túú ní xõo coho-dé ndudí ndéhé yoho yàha stilé sá sà ní nduu-xi ndidí, te ní càchí-ndó sã ní xíndecu ndihí-dé espíritú cúndihí yucu ñávãha. <sup>34</sup> Te sátá ní quexìo yúhú Tée cùu ñaní tnàhá-ndó nchaa-ndo, te xèxi-í xihí-í ndécù-í te càchí-ndó sã cúú-í tée xèxi vihi te xihí vihi-í. Te càchí tucu-ndo sã cúú-í tée xica cuu ndihí cue tée cuihna iní-xi quide cobrá ñáhá xii ñáyiú cuendá impuèstú, ndihí nchaa dava-gá cue tée ndècu ichi cuehé ichi duha, duha càchí-ndó. <sup>35</sup> Te ñáyiú ní tnahá tnúhu ndihí Yá Ndiöxí, ñáyiú-á<sup>n</sup> quidè-yu nàcuáa cutnùní sá méé-gã ío ndècu ndihí-gá sá xini tnùní-gá —càchí-gá xáha<sup>n</sup>-gã xii-yu.

*Jèsús ndécú-gã vehe ì<sup>n</sup> tée cùu fariséú tée nàni Xímú*

<sup>36</sup> Te ì<sup>n</sup> tée cùu fariséú ní càhá<sup>n</sup>-dé Jèsús vehe-dé caxi-gá, te òré ní quexìo-gá te cuànguihu-gá mèsá. <sup>37</sup> Te xíá<sup>n</sup> núcõo-gá ní sáá ì<sup>n</sup> ñadìhí te diu-ni ñaha ñuú-á<sup>n</sup> cúú-á<sup>n</sup>, te ndècu-a<sup>n</sup> ichi díí iní, te sá ní níhí-a<sup>n</sup> tnúhu sá cuàngaxi Jèsús vehe tée cùu fariséú-á<sup>n</sup>, núu nèhe-a<sup>n</sup> ì<sup>n</sup> yoó chitu àcítí sàhá<sup>n</sup> tnámí. <sup>38</sup> Te ní ngóo-a<sup>n</sup> ì<sup>n</sup> xio dñi Jesús, te ní ngüíta-a<sup>n</sup> ndàhyú-a<sup>n</sup> te ndihí ndute núu-a<sup>n</sup> ní naquete-a<sup>n</sup> sàhá-gã. Te dàtnùní ní nadayìchí-a<sup>n</sup> ndihí idi díquí-a<sup>n</sup>, te ní teyuhu-a<sup>n</sup> sàhá-gã, te ní chihí ñaha-a<sup>n</sup> àcítí sàhá<sup>n</sup> tnámí-ã<sup>n</sup>. <sup>39</sup> Te sá dúcá<sup>n</sup> ní quide-a<sup>n</sup> ní xini tée cùu fariséú tée ní càhá<sup>n</sup> ñáhá xii-gá-á<sup>n</sup>

núu ní sani iní-dé: “Te núu dícó ndisa tée càhá<sup>n</sup> tnúhu Yá Ndiöxí cúú tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiú cùu-a<sup>n</sup>, te dícó ì<sup>n</sup> ñaha ndècu ichi díí iní cúú-á<sup>n</sup>”, duha ní sani iní-dé. <sup>40</sup> Te Jèsús ní xáha<sup>n</sup>-gã xii-dé:

—Xímú, ndècu ì<sup>n</sup> tnúhu cachí tnúhu-í xii-n —càchí-gá xáha<sup>n</sup>-gã xii-dé.

Te tée cùu fariséú-á<sup>n</sup> xáha<sup>n</sup>-dè xii-gá:

—Cachí tnúhu, Mèstrú —càchí-dé xáha<sup>n</sup>-dè xii-gá.

<sup>41</sup> Te Jèsús ní xáha<sup>n</sup>-gã:

—Ní xíndecu ì<sup>n</sup> tée ní xóo dasa<sup>n</sup> núu díhú<sup>n</sup>, te ní xítaú úú tnàhá-güedé núu-dè. Te ì<sup>n</sup>-dè ní sàha-dé úhú<sup>n</sup> cièndú díhú<sup>n</sup> denàriú, te ingá-dé ní sàha-dé údico úxí. <sup>42</sup> Te ñá ní níhí-güedè nacháhu-güedé núu-dè, te tée ní sánùu ñaha-á<sup>n</sup> ní quide càhnu iní-dé ndi ndùú-güedé. Te vitna cachí-ò tucu te núu ndèda càa-güedé cúú iní ñáhá-gã-güedé xii-dé —càchí-gá xáha<sup>n</sup>-gã xii-dé.

<sup>43</sup> Te ní xáha<sup>n</sup> tẽ Xímú-á<sup>n</sup>:

—Sànuu sá tée tàú vài-gá díhú<sup>n</sup> ìo-gá cúú iní-dé tée ní sánùu ñaha díhú<sup>n</sup>-ã<sup>n</sup> —càchí-dé xáha<sup>n</sup>-dè xii-gá.

Te ní xáha<sup>n</sup> Jèsús:

—Sá ndàá càhá<sup>n</sup>-n —càchí-gá xáha<sup>n</sup>-gã xii-dé.

<sup>44-46</sup> Te Jèsús ní ndacoto-gá núu ñadìhí-á<sup>n</sup>, te ní xáha<sup>n</sup>-gã xii té Xímú-á<sup>n</sup>:

—¿Ndèhe-n nàcuáa quide ñadìhí-a ñã? Chi cuànguihu-í vehe-n, dico ñá túú ní tàxi-n ndute ndoo sàhá-í, te ni ñà túú ní tàyuhu ñaha-n, te ni ñà túú ní chihí-n acítí díquí-í, dico ñadìhí-a ní naquete-a<sup>n</sup> ndihí ndute núu-a<sup>n</sup> sàhá-í, te ní nadayìchí-a<sup>n</sup> ndihí idi díquí-a<sup>n</sup>, te nuu núu teyuhu-a<sup>n</sup> sàhá-í, te ní chihí-a<sup>n</sup> acítí sàhá<sup>n</sup> tnámí sàhá-í. <sup>47</sup> Te na càchí tnúhu-í xii-n sã ío cùu iní ñáhá-á<sup>n</sup> xii-í, te núu xíá<sup>n</sup> cutnùní iní-ó sã cuéi ío vài sá cuéhé sá dúhá ní quide-a<sup>n</sup>, dico Yá Ndiöxí sa ní quide càhnu iní ñáhá-gã xii-a<sup>n</sup>. Chi Yá Ndiöxí quidé càhnu iní-gá ñáyiú cuéi vài àdi sacú cuéchi-yu, te núu sacú cuéchi-yu te sacú cúú iní ñáhã-yu xii-í —càchí-gá xáha<sup>n</sup>-gã xii-dé.

<sup>48</sup> Te ní xáha<sup>n</sup>-gã xii ñadìhí-á<sup>n</sup>:

—Sa ní quide càhnu iní-í nchaa cuéchi-n —càchí-gá xáha<sup>n</sup>-gã xii-a<sup>n</sup>.

<sup>49</sup> Te cue tée xínucóo ndihí-gá xítñaha-güedé:



—¿Ná tée cùu tée-a núu nándi sá quidé-dě, te ndéé nchaa yíca cuěchi ñáyiú quide cahnu iní-dé-i? —càchí-güedé xítñàha-güedé.

<sup>50</sup> Te Jèsús ní xáha<sup>n</sup> tùcu-gá xii ñadhí-á<sup>n</sup>:

—Sa ní cácu nihnu-n núú ùhú núú ndàhú vitna chi ní sándáá iní ñáhá-n xii-í, te vitna cuanùhú te ñá túú-gă ná cani iní-n —càchí-gá xáha<sup>n</sup>-gă xii-a<sup>n</sup>.

## 8

### *Ñáyiú ðihí ní chindee ñàha xii Jesús*

<sup>1</sup> Te sátá dúcá<sup>n</sup> ní cuu te Jèsús ní xica-gá cuáhá<sup>n</sup>-gá titní víhí ñúú náhnú, ndihí ñúú líhli dànehé-gá ñáyiú nàcuáa ndíhu ndaha ñàha Yá Ndiöxí xii-yu. Te cuáhá<sup>n</sup> ndihí-gá ndi ùxúú tñàhá cue tée xica cuu ndihí-gá, <sup>2</sup> ndihí ñúú ñáyiú ðihí ní quide tátna-gá ní xíhí ñàha espíritú cündihí yucu ñávàha, ndihí ñáyiú tñàhá dava-gá cuéhé ùhú ní cùu. Te xía<sup>n</sup> tñàhá tucu ñàha nàni Mariá Magdaléná, te ñàha-á<sup>n</sup> ní xíhí ñàha ùsá espíritú cündihí yucu ñávàha xii-a<sup>n</sup> ni cùu, te ní quee ñàha-xi. <sup>3</sup> Te tñàhá ñàha nàni Juáná ñadhí ñúú tée nàni Chúza tée ní cunuu ní xinu cuechi vèhe té Hèrodés, ndihí ingá ñàha nàni Susaná nchaa ñáyiú-á<sup>n</sup> ní chindee ñàhá-yu xii-gá ndihí nchaa sá ndécú ndihí-yu, te ðiu-ni duca<sup>n</sup> ní quide vâi-gá tucu ñáyiú nchícú<sup>n</sup> ñàhá xii-gá cuáhá<sup>n</sup>.

### *Nàcuáa quide tée cuángacá<sup>n</sup> triú*

(Mt. 13:1-9; Mr. 4:1-9)

<sup>4</sup> Te ío vâi ñáyiú ndaa ñúú ní tacá-yu núú ndécú Jèsús, te ní ngüíta-gá ní cani-gá ñúú cuèndú núú-yu cuèndá tecú tñùní-yu tñúhu-gá, te xáha<sup>n</sup>-gă xii-yu:

<sup>5</sup> —Í<sup>n</sup> tée cuángacá<sup>n</sup>-dé triú. Te òré ní ngüíta-dé dāngoyo-dé triú-á<sup>n</sup> te dava ní quene ndava ní ngava ndéé ichi, te ní xénihnu ñáyiú, te ní xiní tiláá te ní nadatácá-güedi. <sup>6</sup> Te dava ní ngava ñuhu yadi núú yíhí vîhi yúú, te ní xínu-xi dico núú sàcú-ni nduu te ní yíchí-xi, chi ñá túú cõhyo yíhí. <sup>7</sup> Te dava ní ngava núú yúcu ndíquí<sup>n</sup> tnu ññu-á<sup>n</sup>, te ññu-ni ní xínu-xi ndihí tnu ññu-á<sup>n</sup>, te tnu ññu-á<sup>n</sup> ní dánáá-xi nchaa triú sá ní xínu-á<sup>n</sup>. <sup>8</sup> Dico dava triú-á<sup>n</sup> ní ngava-xi núú ndécú ñuhu coco<sup>n</sup>, te xía<sup>n</sup> ní xínu-xi te

ní sahnú-xi, te ío váha ní cuu, chi núú íí<sup>n</sup>-ní triú te ní ngüihí yoco-xi ñúú cièndú triú-xi —càchí-gá xáha<sup>n</sup>-gă xii-yu.

Te níhi ní cáhá<sup>n</sup>-gá ní xáha<sup>n</sup> tùcu-gá xii-yu:

—Nchaa nchòhó ñáyiú ní xíndedóho tñúhu ní cáhá<sup>n</sup>-í-a, te ío váha chí cuàha cuèndá —càchí-gá xáha<sup>n</sup>-gă xii-yu.

### *Nàcuáa quèe-xi tñúhu ní cáhá<sup>n</sup> Jèsús*

(Mt. 13:10-17; Mr. 4:10-12)

<sup>9</sup> Te cue tée xica cuu ndihí Jesús ní xícá<sup>n</sup> tñúhú-güedé núú-gă ñúú nása quèe-xi cuèndú ní cani-gá núú ñáyiú. <sup>10</sup> Te ní xáha<sup>n</sup>-gă xii-güedé:

—Nchòhó chí sa càchí tñúhu Yá Ndiöxí xii-ndo ñúú sá vâtá quíni-gá-ndó, chí càchí tñúhu-gá nàcuáa cada-gá ndíhu ndaha-gă ñáyiú, dico dava-gá ñáyiú càni-í mee-ni cuèndú núú-yu, chí cuéi na quíni-yu nchaa nàcuáa cuu dico ní vá cùtnùní iní-yu ná cuèndá duca<sup>n</sup> cùu, àdi cuéi na cùndedóho-yu dico ní vá tècú tñùní-yu —càchí-gá xáha<sup>n</sup>-gă xii-güedé.

### *Jèsús càhá<sup>n</sup>-gá nàcuáa quèe-xi tñúhu cuèndá tée cuángacá<sup>n</sup> triú*

(Mt. 13:18-23; Mr. 4:13-20)

<sup>11</sup> Te xáha<sup>n</sup> tùcu-gá xii-güedé:

—Duha quèe-xi cuèndú ní cani-í núú-ndó, chí triú ní sacá<sup>n</sup> tée-á<sup>n</sup> cúú-xí dàtná tñúhu Yá Ndiöxí. <sup>12</sup> Te triú sá ní quene ndava ní ngava ndéé ichi-á<sup>n</sup>, xía<sup>n</sup> cúú-xí dàtná ñáyiú ní quèe iní-xi tñúhu Yá Ndiöxí, dico sàcuíhná cuáhá<sup>n</sup>-xi xòcani-xi tñúhu-gá iní-yu cuèndá sá vâ quíndáá iní-yu, te vá nánihí tàhú-yu. <sup>13</sup> Te triú sá ní ngava ñuhu yadi núú yíhí vîhi yúú, xía<sup>n</sup> cúú-xí dàtná ñáyiú ní xíndedóho tñúhu Yá Ndiöxí te díí iní ní tñí-yu tñúhu-gá, dico òré ná dàcahá<sup>n</sup> ñàhá yùcu ñávàha xii-yu nándi cadá-yu, te dàña nihnú-yu tñúhu-gá chí ñá nihí ndéé-yu canchicú<sup>n</sup> nihnú-yu nàcuáa càhá<sup>n</sup> tñúhu-gá. <sup>14</sup> Te triú sá ní ngava núú yúcu ndíquí<sup>n</sup> tnu ññu-á<sup>n</sup>, xía<sup>n</sup> cúú-xí dàtná ñáyiú ní tecú dóho-xi tñúhu Yá Ndiöxí, dico cuèé cuèé ní nacuanaá-yu tñúhu-gá, chí cuèndá mee-ni sã cúú-xí mèe-yu ñuhu iní-yu, ndihí cuèndá sá ío sàni iní-yu cuu cuicá-yu, ndihí cuèndá sá ío cùdí iní-yu nchaa sá ío ñuyúú-a núú xía<sup>n</sup> àú<sup>n</sup> nã cuu ní xíndedóho-yu tñúhu-gá. <sup>15</sup> Dico triú sá ní



ngava núú ndécú ñùhu coco<sup>n</sup>, xí<sup>n</sup> cúu-xí dàtná ñáyiú váha iní-xi ní xíndedóho tnúhu Yá Ndiöxí chi ñá túú daña nihnú-yu, te ni yùhu ni iní-yu quidé-yu nchaa nàcuáa càhá<sup>n</sup> tnúhu-gá.

*Nàcuáa quidé-yu iti*  
(Mr. 4:21-25)

<sup>16</sup> Te ñá túú ni ñá ñáyiú tènñuhú-yu ñá iti te dàdáhu-yu, àdi chiváha-yu ñá caha camá, chi tàxi ndecú-yu núú ñnu cuendá cutnùní núú nchaa ñáyiú ndècu vehe. <sup>17</sup> Te ni ñá tnúhu sá ñá tècú tnùní ñáyiú vitna vá càchí-ó sá vǎ tècú tnùní-yu chi dacuèi sá tècú tnùní-yu, te ni ñá tnúhu sá càchí-ó cùu yuhu vitna vá cúu yùhu chi dacuítí sá quée túu-xi núú ñáyiú.

<sup>18</sup> Te chí cùndedóho váha tnúhu na càhá<sup>n</sup>-í-a. Nchaa ñáyiú sàndáá iní ñáhá xii Yá Ndiöxí ío-gá cuita quindáá-gá iní ñáhá-yu xii-gá quíhí<sup>n</sup>, te nchaa ñáyiú ñá túú sàndáá iní ñáhá xii-gá uu<sup>n</sup>-gá cuita cuu sáa-gá iní-yu núú-gǎ quíhí<sup>n</sup> —càchí-gá xáha<sup>n</sup>-gǎ xii-güedé.

*Cue ñaní Jèsús ndihi nǎná-gǎ*  
(Mt. 12:46-50; Mr. 3:31-35)

<sup>19</sup> Te ní quexìo náná Jèsús ndihi cue ñaní-gá vehe núú ndécú-gǎ, te ñá ndácü-yu càhá<sup>n</sup> ndihi ñáhá-yu xii-gá chí ío cuéhé ñáyiú ndècu núú ndécú-gǎ. <sup>20</sup> Te ñá ñáyiú xíndecu-á<sup>n</sup> ní dáya<sup>n</sup>ha-yu tnúhu núú-gǎ, te xǎhá<sup>n</sup>-yu:

—Ní quexìo náná-n ndihi cue ñaní-n xínutní-yu quehé, te cuíní-yu càhá<sup>n</sup> ndihi ñáhá-yu xii-n —càchí-yu xǎhá<sup>n</sup>-yu xii-gǎ.

<sup>21</sup> Te ní xáha<sup>n</sup>-gǎ:

—Nchaa ñáyiú sàcùndedóho tnúhu Yá Ndiöxí te quidé-yu nchaa nàcuáa càhá<sup>n</sup> tnúhu-gá, ñáyiú-á<sup>n</sup> cúu-yu dàtná nǎná-í ndihi dàtná cue ñaní-í —càchí-gá xáha<sup>n</sup>-gǎ xii ñáyiú ní dáya<sup>n</sup>ha tnúhu núú-gǎ-á<sup>n</sup>.

*Jèsús nganí-gǎ táchí ndihi ndute làgúná*  
(Mt. 8:23-27; Mr. 4:35-41)

<sup>22</sup> Te ñá nduu ní quée Jèsús bàrcú ndihi cue téé xica cuu ndihi-gá, te ní xáha<sup>n</sup>-gǎ:

—Chí ná quíhí<sup>n</sup>-ó ndàa ingá xio yuhu làgúná —càchí-gá xáha<sup>n</sup>-gǎ xii-güedé.

Te cuáhá<sup>n</sup>-güedé ndihi-gá. <sup>23</sup> Te ñá ñá ñùhu bàrcú ichi cuáhá<sup>n</sup>-xí núú ndute ní xídí Jèsús. Te ní ngüíta-xi níhi vìhi quene

táchí te ta nàdachitú-xi ndute xítí bàrcú-á<sup>n</sup> cuáhá<sup>n</sup>, te sa cuíní-nǎ-xi quée naa bàrcú-á<sup>n</sup> xítí ndute ni cùu. <sup>24</sup> Te ní sáhá<sup>n</sup>-güedé núú cáá Jèsús xídí-gá, te ní xáha<sup>n</sup>-güedé xii-gá:

—¡Mèstrú, ndiquíú iní chí tà quée naa-o cuáhá<sup>n</sup>! —càchí-güedé xáha<sup>n</sup>-güedé xii-gá.

Te Jèsús ní ndiquíú iní-gá te ní ndacóo-gá te ní tenàá-gá táchí-á<sup>n</sup> ndihi ndute làgúná-á<sup>n</sup>, te ní ngüíñí-ni táchí-á<sup>n</sup> te ní nucúndecu nahi-nǎ ndute làgúná-á<sup>n</sup>. <sup>25</sup> Te ní xáha<sup>n</sup>-gǎ xii-güedé:

—¿Náa ñá túú sàndáá iní ñáhá ndisa-ndo xii-í á<sup>n</sup>? —càchí-gá xáha<sup>n</sup>-gǎ xii-güedé.

Te ní cuñúhu-güedé sá dúcá<sup>n</sup> ní quide-gá ní xiní-güedé, te ní yùhú-güedé, te ní xítñaha-güedé:

—¿Te ná téé cùu téé-a núu ní càhá<sup>n</sup>-ni-dé te ní ngüíñí táchí te ní nucúndecu nahi-ni ndute làgúná-a-i? —càchí-güedé xítñaha-güedé.

*Tée yíhi ñaha cue espíritú cùndihi yucu ñávǎha*  
(Mt. 8:28-34; Mr. 5:1-20)

<sup>26</sup> Te ní sáa-gá ndihi-güedé yucu cue téé ñúu Gàdará, te yíhi ndáa-ni ndàa ingá xio làgúná-á<sup>n</sup> cáá dístítú Galiléa. <sup>27</sup> Te òré ní quene Jèsús xítí bàrcú te ní dáyatní ñàha ñá téé ñúu-á<sup>n</sup> xii-gá, te yíhi ñaha títní espíritú cùndihi yucu ñávǎha xii-dé. Te ní cunaha ñá túú-gǎ sácüñnu-dé dóo-dě, te ni ñá túú-gǎ sácúndecu-dé vehe-dé, chí da nchaa núú yíndüxi ndíyí quide vehe-dé. <sup>28</sup> Te òré ní xiní-dé Jèsús te ní ngüíñí xítí-dě núú-gǎ, te cue espíritú yíhí ñàha xii-dé-á<sup>n</sup> ní quide-xi níhi ní càhá<sup>n</sup>-dé, te xǎhá<sup>n</sup>-dě xii-gá:

—¿Ná cuendá véxi-ò Jèsús Déhe Dútú Ndiöxí sàdí-n ìchi-í-i? Te càhá<sup>n</sup> ndàhú-í núu-n sá vǎ dándòho ñaha-n xii-í —càchí-dé xáha<sup>n</sup>-dě xii-gá.

<sup>29</sup> Te duca<sup>n</sup> ní càhá<sup>n</sup>-dé cuendá sá Jèsús ní xáha<sup>n</sup>-gǎ xii nchaa espíritú cùndihi yucu ñávǎha yíhi ñaha sá ná quée ñaha-xi xii-dé. Te nchaa xí<sup>n</sup> ní xóo dacàhá<sup>n</sup>-xí iní-dé nándi sá ní xóo cada-dé ñúu ní xóo dacùtu ñaha-güedé cadená xii-dé cuendá sá ñá túú-gǎ ná cada-dé, te ní xóo cundé ñáhá-güedé, dico cuèi duca<sup>n</sup> dico ní xóo dandáva-ni-dé cadená, te cue espíritú

cúndìhi yucu ñávãha-á<sup>n</sup> ñí xóo dacùnu ñaha-xi xii-dé ní xóo quíhí<sup>n</sup>-dé xití yucu. <sup>30</sup> Te Jèsús ní xicá<sup>n</sup> tnúhú-gã núú-dě, te xáha<sup>n</sup>-gã:

—¿Nása nàni-n-í? —cachí-gá xáha<sup>n</sup>-gã.

Te ní xáha<sup>n</sup>-dě:

—Vài Sandadú nàni-í —càchí-dé xáha<sup>n</sup>-dě xii-gá.

Te duca<sup>n</sup> ñí xáha<sup>n</sup>-dě xii-gá cuèndá sá ïo cuéhé espíritú cúndìhi yucu ñávãha yìhi ñaha xii-dé. <sup>31</sup> Te nchaa espíritú-á<sup>n</sup> ñí cáhá<sup>n</sup> ndàhú-xi núú Jèsús sá vã téndàha ñaha-gá xii-xi quíhí<sup>n</sup>-xi núú ùhú núú ndàhú. <sup>32</sup> Te ñiu-ni yatni yucu núú ndécú Jèsús-á<sup>n</sup> yíhí vài cuchí xixexi-güedi, te nchaa espíritú-á<sup>n</sup> ñí cáhá<sup>n</sup> ndàhú-xi núú-gã sá ná dàña-gá quíhu-xi yiqui cùñú nchaa cùchí-á<sup>n</sup>, te Jèsús ní xáha<sup>n</sup>-gã sá cúú quíhu-xi yiqui cùñú-güedi. <sup>33</sup> Te ní quee ñaha nchaa espíritú-á<sup>n</sup> xii téé-á<sup>n</sup>, te ní quíhu-xi nchaa cùchí-á<sup>n</sup>, te cùchí-á<sup>n</sup> ñí xinu-güedi duha ní queé-güedi ndàa núú dèhvã yuhu làgúná-á<sup>n</sup>, te ní ngaunihnu-güedi xití ndute te ní ndìhi-güedi ní cáhá.

<sup>34</sup> Te òré ní xiní cue téé xito cuchí-á<sup>n</sup> nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní cani-güedé cuèndú núú cuè ñáyiu ndècu xití ñuú, ndìhi núú cuè ñáyiu ndècu xití yucu. <sup>35</sup> Te nchaa ñáyiu ní níhí tnúhu ní queé-yu cuáhá<sup>n</sup> ndéhě-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhi ñaha cuè espíritú cúndìhi yucu ñávãha-á<sup>n</sup> núcõo-dé núú sàhá Jèsús, te ñihnu-ná-dé dóo-dě, te núcõo-dé dàtná ñí ñáyiu váha, te ní yùhú-yu òré ní xiní ñáhã-yu xii-dé. <sup>36</sup> Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cúndìhi yucu ñávãha-á<sup>n</sup> ní cùu ní caní-yu cuèndú núú nchaa ñáyiu ní quexió-á<sup>n</sup> nàcuáa ní cuu ní ndúha téé-á<sup>n</sup> ndìhi nàcuáa ní cuu cuèndá nchaa cùchí-á<sup>n</sup>. <sup>37</sup> Te sá dúcá<sup>n</sup> ñí níhí-yu tnúhu nàcuáa ní cuu, núu nchaa ñáyiu ñuú Gàdará ío ní yùhú-yu te ní ngüíta-yu càhá<sup>n</sup> ndàhú-yu núú Jèsús sá ná nùhú-gá ñuú ndèé ichi véxi-gá. Te sá dúcá<sup>n</sup> ñí cáhá<sup>n</sup>-yu núu cuáhá<sup>n</sup>-gá núú ndécú bàrcú. Te òré ndée-gá bàrcú-á<sup>n</sup> nùhú-gá <sup>38</sup> ní ngüíta téé ní xíhi

ñaha cuè espíritú cúndìhi yucu ñávãha càhá<sup>n</sup> ndàhú-dé núú-gã ñuú vá cúndèe iní-gá quíhí<sup>n</sup> ndìhi ñaha-gã xii-dé, dico Jèsús ní quide ndee iní ñáhã-ni-gã xii-dé, te ní xáha<sup>n</sup>-gã:

<sup>39</sup> —Cuanùhú vehe-n, te cani-n cuèndú núú nchaa ñáyiu sá ïo càhnu cuu nchaa sá váha ní quide ñaha Yã Ndiõxí xii-n —càchí-gá xáha<sup>n</sup>-gã xii-dé.

Te téé-á<sup>n</sup> ñí xica-dé cuánuhú-dé te ní ngüíta-dé ní cani-dé cuèndú núú nchaa ñáyiu xíndecu ñihí ñuú sá ïo càhnu cuu nchaa sá váha ní quide ñaha Jèsús xii-dé.

*Cuèndá déhe yoco tẽ Jàirú, ndìhi cuèndá ñí ñadìhí ní tnándeé dóo Jèsús*

*(Mt. 9:18-26; Mr. 5:21-43)*

<sup>40</sup> Te òré ní ndexìo Jèsús ndàa ingá xio yuhu làgúná, te ñáyiu xíndecu xíá<sup>n</sup> sa ndètu càhnu ñaha-ná-yu, te ío váha ní cáhá<sup>n</sup> ndìhi ñáhã-yu xii-gá òré ní nasáá-gá. <sup>41</sup> Te ñí téé tàxi tnuní veñúhu ní quexió-dé núú ndécú Jèsús, te téé-á<sup>n</sup> nání-dě Jàirú, te ní ngüíñí xití-dě núú-gã càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núú-n ñuú vá cúndèe iní-n quíhí<sup>n</sup>-ó vèhe-í cada tátna-n dèhe yoco-í —càchí-dé xáha<sup>n</sup>-dě xii-gá.

<sup>42</sup> Te duca<sup>n</sup> ñí xáha<sup>n</sup>-dě chi ndècu ñí dii-ni déhe yoco-dě, te ndècu-xi datná úxúú cuíá-xi, te càhú víhí tnáhã-xi cùhú-xi te cuíní-xi cuú-xi. Te Jèsús ní xica-gá cuáhá<sup>n</sup>-gá ndìhi téé-á<sup>n</sup>, te ío vài ñáyiu nchìcú<sup>n</sup> ñáhã xii-gá cuáhá<sup>n</sup>, te dàdehnde ñaha-ná-yu xii-gá ní cùu.

<sup>43</sup> Te tnuú nchaa ñáyiu-á<sup>n</sup> ñútnáhã ñí ñaha cùhú, te ñaha-á<sup>n</sup> sà ní cuu úxúú cuíá sã cùhú-a<sup>n</sup> ngòyo ñaha níñí xii-a<sup>n</sup>, te ío cuéhé díhú<sup>n</sup> ñí cuu dāndoñuhu-a<sup>n</sup> chi ní nadico-a<sup>n</sup> nchaa sá ndécú ndìhi-a<sup>n</sup> cuèndá ní níhí-a<sup>n</sup> díhú<sup>n</sup> ñí quehe<sup>n</sup> nchaa ñáyiu ní quide tátna ñaha xii-a<sup>n</sup>, dico ní ñí-yu ñá túú ní ndàcú-yu ndúha-a<sup>n</sup>. <sup>44</sup> Te ní sáhá<sup>n</sup> ndehe yatni-a<sup>n</sup> ndàa sátá Jèsús, te ní tnándeé-a<sup>n</sup> luha yuhu dóo-gã te òré-ni-á<sup>n</sup> ñí ndúha-a<sup>n</sup>.

<sup>45</sup> Te Jèsús ní xicá<sup>n</sup> tnúhú-gã núú-yu, te xáha<sup>n</sup>-gã:

—¿Ndèdacàa-ndo ní tnándeé ñáhã xii-í? —càchí-gá xáha<sup>n</sup>-gã xii-yu.

Te nchaá-yu ní xáhã<sup>n</sup>-yu sá nǐ ì<sup>n</sup>-yu ñá túú ní tnándeé ñáhá xii-gá. Te té Pèlú ndihi cue té cùndihi-dé ní xáha<sup>n</sup>-güedé xii-gá:

—Mèstrú, ndèhe-n sá vái ñáyiú nchìcú<sup>n</sup> ñáhá xii-n, te xio xio dàdehnde ñáhá-yu, te xicá<sup>n</sup> tnúhú-gã-n yòo ní tnándeé ñáhá xii-n —cachí-güedé xáha<sup>n</sup>-güedé xii-gá.

<sup>46</sup> Dico Jèsús ní xáha<sup>n</sup>-gã xii-yu:

—Dico ñu ì<sup>n</sup>-ndo nǐ tnándeé ñáhá xii-í, chi ní cutnùní iní-í sá ì<sup>n</sup> ñáyiú cùhú ní tnándeé ñáhá xii-í te ní ndúha-yu —càchí-gã xáha<sup>n</sup>-gã xii-yu.

<sup>47</sup> Te sátá nǐ xiní ñaha-á<sup>n</sup> sã nǐ cutnùní iní Jèsús sá nǐ tnándeé ñáhá-á<sup>n</sup> xii-gá, te yùhú yùhú-a<sup>n</sup> ní sáhá-a<sup>n</sup> ní ngüíñí xítí-á<sup>n</sup> núú-gã, te ní náhmá-a<sup>n</sup> núú-gã, ndihi núú nchaa ñáyiú ná cuendá duca<sup>n</sup> nǐ quide-a<sup>n</sup> ní tnándeé-a<sup>n</sup>-gã, ndihi cuendá sá òré-ni-á<sup>n</sup> nǐ ndúha-a<sup>n</sup>. <sup>48</sup> Te Jèsús ní xáha<sup>n</sup>-gã xii-a<sup>n</sup>:

—Yòhó ñaha cùhú, ní sándáá iní ñáhá-n xii-í núu ní ndúha-n, te cuanùhú vitna te ñá túú-gã ná cani iní-n —càchí-gã xáha<sup>n</sup>-gã xii-a<sup>n</sup>.

<sup>49</sup> Te càhá<sup>n</sup> dúcá<sup>n</sup>-ní Jèsús ní sáá ì<sup>n</sup> tée xinu cuechi vehe té Jàirú tée tàxi tnuní veñúhu, te xáha<sup>n</sup> tée xinu cuechi-á<sup>n</sup> xii-dé:

—Sa ní xihí déhe-n, vá chíchìu<sup>n</sup>-gã-n Mèstrú —càchí-dé xáha<sup>n</sup>-dè.

<sup>50</sup> Te sá dúcá<sup>n</sup> xáha<sup>n</sup> tée xinu cuechi-á<sup>n</sup> xii té Jàirú ní tecú dóho Jèsús, núu ní xáha<sup>n</sup>-gã xii-dé:

—Vá ndihú iní-n, quindáá iní ñáhá-ni-n xii-í te ndúha déhe-n —càchí-gã xáha<sup>n</sup>-gã xii-dé.

<sup>51</sup> Te òré ní sáá-gã vehe té Jàirú te ñá ní dàña-gã quihu ñáyiú cùtexínu, núu té Pèlú-ni ndihi té Jàcobó-ni, ndihi té Juáá-ni, ndihi tãtã ndihi nãná-ni xíchí nǐ xihí-á<sup>n</sup> cuànguihu ndihi-gã xití vehe. <sup>52</sup> Te nchaa ñáyiú sa xindecu vehe-dé-á<sup>n</sup> xindáhyú-yu sá ndihú iní-yu cuendá sá nǐ xihí-xi. Te Jèsús ní xáha<sup>n</sup>-gã xii-yu:

—Vá ndàhyú-ndó, chi dicó-ni xidí-xi ñá túú ní xihí-xi —càchí-gã xáha<sup>n</sup>-gã xii-yu.

<sup>53</sup> Te ní sácú ndeé ñáhã-yu xii-gá, chi sá cúu-xí mèe-yu chi ní xihí ndisa xíchí-á<sup>n</sup>.

<sup>54</sup> Te Jèsús ní tñi-gã ndaha xíchí nǐ xihí-á<sup>n</sup>, te níhi ní cáhá<sup>n</sup>-gã, te xáha<sup>n</sup>-gã:

—Xíchí cuéchí, ndacóo —càchí-gã xáha<sup>n</sup>-gã.

<sup>55</sup> Te xíchí-á<sup>n</sup> nǐ ndoto-xi, te òré-ni ní ndacóo-xi, te Jèsús ní xáha<sup>n</sup>-gã sá ná cuãñáhã-yu sá cáxí-xí. <sup>56</sup> Te tãtã-xi ndihi nãná-xi súúni nǐ cuñúhu-yu sá dúcá<sup>n</sup> nǐ dándótó ñaha Jesús xii-xi, te ní xáha<sup>n</sup>-gã xii-yu sá vã yòo ì<sup>n</sup> cuñáhã-yu sá dúcá<sup>n</sup> nǐ quide-gã.

## 9

*Jèsús téndaha-gã ndi ùxúú cue tée xica cuu ndihi-gã quihí<sup>n</sup>-güedé cáhá<sup>n</sup>-güedé tnúhu-gã (Mt. 10:5-15; Mr. 6:7-13)*

<sup>1</sup> Te Jèsús ní cana-gã ndi ùxúú cue tée xica cuu ndihi-gã, te ní sãñaha-gã xii-güedé tnúhu ndee ìní cundecu ndihi-güedé cuendá queñuhu-güedé nchaa espíritú cùndihi yucu ñávãha yihí ñaha xii ñáyiú, ndihi cuendá sá cádá tãtna-güedé nchaa ñáyiú cùhú.

<sup>2</sup> Te ní xáha<sup>n</sup>-gã xii-güedé sá quihí<sup>n</sup>-güedé danèhé-güedé ñáyiú nàcuáa cada Yá Ndiõxí ndihu ndaha ñaha-gã xii-yu, te duca<sup>n</sup> cada tãtna-güedé cue ñáyiú cùhú. <sup>3</sup> Te cùmání-gã caca-güedé quihí<sup>n</sup>-güedé, te ní xáha<sup>n</sup>-gã xii-güedé:

—Ñá túú tñáhi ná canehè-ndo cùu ichi-ndo, ni tãtnu, ni ñunu, ni sã cáxí-ndó, ni dñhú<sup>n</sup>. Te ni vã cánèhe-ndo ìngá ichi dóó-ndó, chi ñu-ni dóó níhnú-ndó-á<sup>n</sup> xíá<sup>n</sup> tñáhi-ni. <sup>4</sup> Te ndédani cãa vehe na saá-ndó, te xíá<sup>n</sup> cundecu-ndo ndeé ná sáá nduu ndeè-ndo. <sup>5</sup> Te núu ñá túú cuñí-yu quehe<sup>n</sup> cuendá ñáhã-yu xii-ndo, te ndee-ndo ñúú-á<sup>n</sup>, te naquidi-ndo tìcá chùhmá nǐ tñi sáhá-ndó cuendá sá ná cùtnuní iní-yu sá ñá túú quide váha-yu —càchí-gã xáha<sup>n</sup>-gã xii-güedé.

<sup>6</sup> Te sátá dúcá<sup>n</sup> nǐ xáha<sup>n</sup> Jèsús xii-güedé, te ní quee-güedé cuáhã<sup>n</sup>-güedé nchaa ñúú dácua<sup>n</sup>-güedé ñáyiú tnúhu Yá Ndiõxí, tnúhu sá càhá<sup>n</sup> nàcuáa naníhi tãhú-yu, te duca<sup>n</sup> ta quide tãtna-güedé nchaa ñáyiú cùhú cuáhã<sup>n</sup>.

*Nàcuáa ní cuu ní xihí té Juáá tée dàcuandute ñaha xii ñáyiú*

*(Mt. 14:1-12; Mr. 6:14-29)*

<sup>7</sup> Te té Hèrodés tée cùu gobiernú ní níhi-dè tnúhu nchaa nàcuáa quide Jesús, te quiyuhú iní-dé te sàni iní-dé yoo cùu-gã. Te duca<sup>n</sup> nǐ sani iní-dé chi dava ñáyiú càchí-yu sá té

Juàá téé ní xóo dacuàndute ñaha xii ñáyiú ní ndoto cùu-gá. <sup>8</sup> Te davá-yu cächí-yu sá tē Èliás cúu-gá, te davá-yu cächí-yu sá ñí tēé ní xóo cáhá<sup>n</sup> tnúhu Yá Ndiöxí ndéé sanaha vîhi ní ndoto cùu-gá, cächí-yu. <sup>9</sup> Dico té Hèrodés ní cachí-dé:

—Yúhú ní táuchíú<sup>n</sup>-í ní xehndé-güedé díquí tē Juàá. ¿Te yoo cùu tēé dii cuèndú-xi nihí-a sá sùúni cuéhé nùú sá quidé-dē váí<sup>n</sup>? —duha ní cachí-dé.

Te té Hèrodés ndúcú-dē nàcuáa cada-dé cuèndá quini-dé Jèsús.

*Jèsús dácàxi-gá úhú<sup>n</sup> mîl cue tēé te dî<sup>n</sup> ñáyiú dîhí ndihí landú*

*(Mt. 14:13-21; Mr. 6:30-44; Jn. 6:1-14)*

<sup>10</sup> Te nchaá cue tēé ní táuchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndiöxí núú ñáyiú ní ndexiö-güedé núú-gá te ní ngüíta-güedé nácàni tnúhu-güedé nchaá nàcuáa ní quide-güedé. Te dätñuní ní xica-gá medî-ni-gá ndécá ñaha-gá xii-güedé cuáhá<sup>n</sup> ñí xichi núú ñà túú ñáyiú ndècu, yatni núú cáá ñúú Bètsaidá. <sup>11</sup> Dico òré ní níhí ñáyiú tnúhu sá cuáhá<sup>n</sup> Jèsús, te nchícú<sup>n</sup>-yu-gá cuáhá<sup>n</sup>, te òré ní quexiö-yu núú-gá, te ní quehe<sup>n</sup> cuèndá ñahá-gá xií-yu, te ní dánèhé ñahá-gá xií-yu nàcuáa ndihu ndaha ñaha Yá Ndiöxí xií-yu, te ní quide tátna-gá nchaá ñáyiú cùhú.

<sup>12</sup> Te òré sa ní cuaa te ní natacá ndi ùxúú cue tēé xica cuu ndihí-gá núú-gá, te ní xáha<sup>n</sup>-güedé xii-gá:

—Sa ní cuu dandàca-n nchaá ñáyiú-a, chi sa ní cuaa, te na quihí<sup>n</sup>-yu nchaá vehe càa yatni iha, ndihí nchaá xití ñúú cáá yàtni iha cuaá<sup>n</sup>-yu sá cáxí-yu, te diu-ni yacá<sup>n</sup> ndetátú-yu, chi núú ndécú-ó ìha ñá túú tnàhí ná íó —cächí-güedé xáha<sup>n</sup>-güedé xii-gá.

<sup>13</sup> Te Jèsús ní xáha<sup>n</sup>-gá xii-güedé:

—Mee-ndo chí cuañaha sá ná caxí-yu —cächí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Ñá túú nágá ndécú ndihí-ndí, chí úhú<sup>n</sup> duha-ná pàá, ndihí úú-ná chácá ndécú ndihí-ndí, te diu-ni núú quihí<sup>n</sup>-ndí cuaa<sup>n</sup>-ndí sá cáxí-yu —cächí-güedé xáha<sup>n</sup>-güedé xii-gá.

<sup>14</sup> Te xínu dàtná úhú<sup>n</sup> mîl mee-ni cuè tēé, te dî<sup>n</sup> ñáyiú dîhí ndihí landú. Te Jèsús ní xáha<sup>n</sup>-gá xii cue tēé xica cuu ndihí-gá:

—Chí cññaha na ngöo ndi údico úxí ndi údico úxí-yu ñí ñí xichi —cächí-gá xáha<sup>n</sup>-gá xii-güedé.

<sup>15</sup> Te duca<sup>n</sup> ní quide-güedé, te ní ngóo-yu nchaá-yu. <sup>16</sup> Te dätñuní ní quehe<sup>n</sup>-gá ndi úhú<sup>n</sup> pàá-á<sup>n</sup>, ndihí ndi ndúú chácá-á<sup>n</sup>. Te ní ndacoto-gá andiú, te ní ndacá<sup>n</sup> táhú-gá núú Yá Ndiöxí, te dätñuní ní táhú cuèchi-gá pàá-á<sup>n</sup> ndihí chácá-á<sup>n</sup>, te ní sáha-gá nchaá cue tēé xica cuu ndihí-gá ní dácáññu ñaha-güedé xií-yu. <sup>17</sup> Te nchaá-yu ní xexí-yu ní ndahá xití-yu. Te sátá ní túhú cóhó-yu te ní nadatácá-güedé nchaá sá ní quendóo, te ní chítú ùxúú tnàhá tídihi mee-ni sá ní quendóo.

*Té Pèlú xáha<sup>n</sup>-dē xii Jèsús sá díú-gá cúu-gá Crístú*

*(Mt. 16:13-19; Mr. 8:27-29)*

<sup>18</sup> Te ñí nduu ndècu mee Jesús ndihí cue tēé xica cuu ndihí-gá, te cáhá<sup>n</sup> ndihí-gá Yá Ndiöxí, te sátá ní yáha ní cáhá<sup>n</sup> ndihí-gá Yá Ndiöxí, te ní xicá<sup>n</sup> tnúhú-gá núú-güedé, te xáha<sup>n</sup>-gá xii-güedé:

—¿Yoo cùu yúhú cächí ñáyiú-va? —cächí-gá xáha<sup>n</sup>-gá xii-güedé.

<sup>19</sup> Te ní xáha<sup>n</sup>-güedé xii-gá:

—Davá-yu cächí-yu sá cúu-n ndi Juàá téé ní xóo dacuàndute ñaha xii ñáyiú, te davá-yu cächí-yu sá cúu-n tē Èliás, te davá-yu cächí-yu sá ñí tēé ní xóo cáhá<sup>n</sup> tnúhu Yá Ndiöxí ndéé sanaha ní ndoto cùu-n, duha cächí-yu —cächí-güedé xáha<sup>n</sup>-güedé xii-gá.

<sup>20</sup> Te ní xicá<sup>n</sup> tnúhú tùcu-gá núú-güedé, te xáha<sup>n</sup>-gá xii-güedé:

—Te nchòhó, ¿yoo sàni iní-ndó cùu-í-í? —cächí-gá xáha<sup>n</sup>-gá xii-güedé.

Te té Pèlú ní xáha<sup>n</sup>-dē xii-gá:

—Yòhó cúu-n Crístú Déhe Dútú Ndiöxí —cächí-dé xáha<sup>n</sup>-dē xii-gá.

*Jèsús cáhá<sup>n</sup>-gá sá cáhni ñaha-güedé xii-gá*

*(Mt. 16:20-28; Mr. 8:30-9:1)*

<sup>21</sup> Te ní xáha<sup>n</sup>-gá xii-güedé sá vā yòo ñí cññaha-güedé yoo cùu-gá. <sup>22</sup> Te ní xáha<sup>n</sup>-gá xii-güedé:

—Yúhú Tēé cùu ñani tnàhá-ndó nchàa-ndo ío cuéhé sá ndóhò-í, chí daquèe



tíhú ñáhá cuè téé cùu sacuéhé nùú ñáiyu isràél, ndihí cue dútú cùnùu, ndihí cue téé dàcuaha ñaha xii ñáiyu nchaa tnúhu ní chídó tnùní ndíi Moisés, te sáá nduu te cahni ñaha-güedě xii-í, dico nduu úní sá cùú-í te ndoto-í —càchí-gá xáha<sup>n</sup>-gã xii-güedé.

<sup>23</sup> Te dàtnùní ní xáha<sup>n</sup>-gã xii nchaa ñáiyu:

—Nchaa ñáiyu cuíní chitnahá ñáhá xii-í, te xìni ñuhu-xi vá cáda-gã-yu sá sání iní méé-yu, te ì<sup>n</sup> nduu ì<sup>n</sup> nduu cada ndee iní-yu cundecu túha-yu ndohó-yu cuendá-í, te cuèi na ndohó-yu dàtná ndoho-í. <sup>24</sup> Te nchaa ñáiyu cuíní sá ñà túú tnàhí ná yáha cundecu ñuyú-a cuíta nihnú-yu. Dico nchaa ñáiyu ñà túú yùhú cuèi nándi sá ná yáha-yu cundecú-yu ñuyú-a sá cuendá-í, te ñáiyu-án naníhí tàhú-yu. <sup>25</sup> Te cuèi nchaandi túhú sá ío ñuyú-a na nihí ñáiyu cundecu ndihí-yu, dico núu diu nchaa xiá<sup>n</sup> ná càda cuíta nihnú-yu te ñà túú vèdana nàndihí-xi sá dúcá<sup>n</sup> ndècu ndihí-yu nchaa xiá<sup>n</sup>. <sup>26</sup> Te nchaa ñáiyu na cùcaha<sup>n</sup> núú-xi cáhá<sup>n</sup> váha cuendá-í ndihí cuendá nchaa tnúhu-í, te tnàhá yùhú Téé cùu ñaní tnàhá-ndó nchàa-ndo cucaha<sup>n</sup> núú-í núú-yu òré quixi tucu-í ndihí cue espíritú xínú cuèchi núú Tàtá-í Dútú Ndiöxí, te mee-gã cada cutnùní iní nchaa ñáiyu sá ío càhnu cuu-í. <sup>27</sup> Te na càchí tnúhu ndáá-í xii-ndo sã ío dava nchòhó ñáiyu ndècu iha vitna vá cùú-ni-ndo, chi cundecu-ni-ndo ndéé quíní-ndó sáá nduu ndíhu ndaha ñaha Yá Ndiöxí xii ñáiyu —càchí-gá xáha<sup>n</sup>-gã xií-yu.

*Ní nadáma dóo Jèsús ndihí núú-gã*

*(Mt. 17:1-8; Mr. 9:2-8)*

<sup>28</sup> Te ní cuu dàtná úná nduu sá dúcá<sup>n</sup> ñí cáhá<sup>n</sup> Jèsús, te cuásaá-gã ì<sup>n</sup> yucu cáhá<sup>n</sup> ndihí-gá Yá Ndiöxí, te ndèca-gá té Pèlú, ndihí té Jàcobó, ndihí té Juàá cuásaá. <sup>29</sup> Te ñini cáhá<sup>n</sup> ndihí-gá Yá Ndiöxí ní nadáma núú-gã ndihí dóo-gã, te dóo-gã-án sùúni ñí nduu cuixí<sup>n</sup> víhí, te sùúni dàtása<sup>n</sup>-xi. <sup>30</sup> Te òré-ni-án ñí xiní-güedé úú tnàhá cue téé càhá<sup>n</sup> ndihí-gá, te ì<sup>n</sup>-dé cùú-dě té Moisés, te ingá-dé cùú-dě té Èliás, <sup>31</sup> te sùúni dàtása<sup>n</sup>-xi ñí càndéé núú ndécú cuè téé úú-án ndihí-gá, te xindatnúhu-güedé nàcuáa ndoho Jèsús cuú-gã ñuu Jerusàlén dàtná ní cachí méé-gã. <sup>32</sup> Te té Pèlú ndihí

úú-gá-güedé cuíní víhí-güedě cùdú-güedé, dico ní sahani iní-güedé ñà túú ní xidí-güedé, te ní dánèhé núú ñáhá-xi xii-güedé sá sùúni váha càa núú ndécú Jèsús, ndihí úú cue téé càhá<sup>n</sup> ndihí-gá-án. <sup>33</sup> Te òré sa ndùcu ndee cue téé úú-án caca-güedé núhú-güedé, te ní xáha<sup>n</sup> tè Pèlú xii-gá:

—Mèstrú, ¡váha ní cuu sá ndécú-ó iha vitna! Te na dàcaa-ndí úní tnàhá vehe tnuvixí<sup>n</sup>, ì<sup>n</sup> cuu cuendá-n, te ì<sup>n</sup> cuu cuendá té Moisés, te ì<sup>n</sup> cuu cuendá té Èliás —càchí-dé xáha<sup>n</sup>-dě xii-gá.

Dico té Pèlú chi ñí mèe-dé ñà túú ní cùtnuní iní-dé nása ndùu tnúhu ní cáhá<sup>n</sup>-dé. <sup>34</sup> Te ñini cáhá<sup>n</sup>-dé ní quexìo ì<sup>n</sup> vícò núú ndécú-güedě-án ñí dádähu ñaha-xi xii-güedé, te ní yùhú-güedé sá dúcá<sup>n</sup> ñí quexìo vícò-án ñí dádähu ñaha-xi. <sup>35</sup> Te xití vícò-án ñí tecú ní cáhá<sup>n</sup> Yá Ndiöxí, te xáha<sup>n</sup>-gã xii-güedé:

—Téé-a cùu-dé Déhe-í, téé ío cùu iní-í, te tni-ndo nchàa tnúhu càhá<sup>n</sup>-dé —duha ní xáha<sup>n</sup>-gã xii-güedé.

<sup>36</sup> Te sátá dúcá<sup>n</sup> ñí cáhá<sup>n</sup> Yá Ndiöxí, te ní quide cuendá-güedé sá mèdii-ná Jèsús ndécú-gã xiá<sup>n</sup>. Te vá yòo ì<sup>n</sup> ñí xáha<sup>n</sup>-güedé nàcuáa ndùu nchaa sá ñí xiní-güedé-án.

*Jèsús quidé tãtna-gã ì<sup>n</sup> téé cuechi yìhi ñaha espíritú cùndihí yucu ñávãha*

*(Mt. 17:14-21; Mr. 9:14-29)*

<sup>37</sup> Te ingá nduu-án cuãnuu-gá yucu-án ndihí-güedé, te ío cuéhé ñáiyu cuáhá<sup>n</sup> tnahá ñáhá xii-gá. <sup>38</sup> Te ì<sup>n</sup> téé ñuhu tnahá tnuú-yu-án ñí cáhá<sup>n</sup> níhi-dé, te xáha<sup>n</sup>-dě xii-gá:

—Mèstrú, ío càhá<sup>n</sup> ndàhú-í núú-n núu vá cùndèe iní-n càda tãtna-n dèhe-í, chi ì<sup>n</sup>ndi duha-dé ndécú, <sup>39</sup> te yìhi ñaha espíritú cùndihí yucu ñávãha xii-dé, te òré ná nãtni ñaha-xi xii-dé, te dàcana saa ñaha-xi, te ndàda ruú<sup>n</sup> ñáhá-xi xii-dé, te tàva-xi tíñú yuhu-dé. Te ío dándoho ñaha-xi xii-dé, chi ndéé núú ñà cùú-gã, te dàña ñaha tnaa-xi xii-dé. <sup>40</sup> Te sa ní cáhá<sup>n</sup> ndàhú-í núú cuè téé xica cuu ndihí-n queñuhu-güedé-xi, dico ñà túú ní ndàcu-güedé —càchí-dé xáha<sup>n</sup>-dě xii-gá.

<sup>41</sup> Te Jèsús ní xáha<sup>n</sup>-gã xii nchaa ñáiyu:

—¡Nchaa nchòhó ñáiyu ndècu ñuyú-a ío sáá iní-ndó, chi ñà túú cuíní-ndó quindáa iní-ndó Yá Ndiöxí! Te ní cuu vai nduu quide

ndee iní-í nchaa sá quidé-ndó, ¿te ná ndée ama vá dúcá<sup>n</sup>-gã cada-ndo-i? —càchí-gá xáha<sup>n</sup>-gã xii-yu.

Te ní xáha<sup>n</sup>-gã xii tée cùhú déhe-xi-á<sup>n</sup>:

—Taxi déhe-n ìha —cachí-gá xáha<sup>n</sup>-gã xii-dé.

<sup>42</sup> Te òré cuáhá<sup>n</sup> tée cuechi-ã<sup>n</sup> núú-gã, te espíritú cùndìhi yucu ñávãha-á<sup>n</sup> ñí dándùá ñáhá-xí xii-dé, te sàhni yìhí ñáhá tùcu-xi xii-dé ní cùu, dico Jèsús níhi ní cáhá<sup>n</sup>-gá ní tenáá-gá espíritú-á<sup>n</sup>, te ní quee ñaha-xi xii-dé, te ní nacuéha cuèndá ñáhá-gã xii-dé tãtã-dé. <sup>43</sup> Te ncháá-yu ní cuñúhu-yu sá dúcá<sup>n</sup> ñí cuu, te ní cachí-yu sá ìo càhnu cuu Yá Ndiöxí.

*Jèsús càhá<sup>n</sup> tucu-gá sá cùú-gá*

*(Mt. 17:22-23; Mr. 9:30-32)*

Te ñini xícuñúhu-yu nàcuáa ní quide Jèsús, te ní xáha<sup>n</sup>-gã xii cue tée xica cuu ndìhi-gá:

<sup>44</sup> —Nchòhó cundedóho váha-ndo tnúhu na càhá<sup>n</sup>-í-a, te vá ná cuànaa-ndo, chi yúhú Téé cùu ñaní tnáhá-ndó nchàa-ndo sáá ñí nduu te cuáha cuèndá ñáhá-güedé xii-í núú cuè téé cùu úhú iní ñáhá —càchí-gá xáha<sup>n</sup>-gã xii-güedé.

<sup>45</sup> Dico cue téé-á<sup>n</sup> ñà túú ní tècú tnùnì-güedé nàcuáa ndùu tnúhu ní xáha<sup>n</sup>-gã xii-güedé, te duca<sup>n</sup> ñí yáha-güedé, chi duca<sup>n</sup> tnàhí ní cachí-gá sá vã tècú tnùnì-güedé, te ní yùhú-güedé cáca<sup>n</sup> tnúhú-güedé núú-gã nása ndùu tnúhu ní xáha<sup>n</sup>-gã xii-güedé.

*Cue téé ndùcu tnúhu núú tnáhá nũu ndèdacàa-güedé ío-gá cùnùu*

*(Mt. 18:1-5; Mr. 9:33-37)*

<sup>46</sup> Te cue téé xica cuu ndìhi-gá ní ngüíta-güedé ndátnúhu-güedé nũu ndèdacàa-güedé ío-gá cùnùu, <sup>47</sup> dico Jèsús ní cutnùnì iní-gá nàcuáa sàni iní-güedé nũu ní cana-gá ñí té ìhli, te ní sanu tní ñaha-gã ñí xio dñi-gá. <sup>48</sup> Te ní xáha<sup>n</sup>-gã xii-güedé:

—Nchaa ñáyiu na quèhe<sup>n</sup> cuèndá ñí té ìhli dàtná té ìhli-a cuèndá sá ñúhú iní ñáhã-yu xii-í ñá, te cada iní-yu sá yúhú ní quehe<sup>n</sup> cuèndá-yu, te nchaa ñáyiu na quèhe<sup>n</sup> cuèndá ñáhá xii yúhú, te cada iní-yu sá tnáhá Tãtã-í Dútú Ndiöxí Yaá ní tendaha ñaha xii-í véxi-í ñuyíú-a ní quehe<sup>n</sup> cuèndá-yu. Te nchaa ñáyiu ío ndàhú

iní-xi mee-ni xinu cuechí-yu, ñáyiu-á<sup>n</sup> ìo-gá cùnùú-yu —càchí-gá xáha<sup>n</sup>-gã xii-güedé.

*Ñáyiu ñá túú cùu úhú iní ñáhá cùndìhi ñáhã-yu xii-o*

*(Mr. 9:38-40)*

<sup>49</sup> Te té Juáa diu-ni ñí téé xica cuu ndìhi-gá ní xáha<sup>n</sup>-dè xii-gá:

—Mèstrú, ní xiní-ndí ñí téé càcunehe ñaha-dé xii-n, te ndèñuhu-dé espíritú cùndìhi yucu ñávãha yìhi ñaha xii ñáyiu, te nchúhú ñá túú ní dàña-gá-ndí duca<sup>n</sup> càda-dé, chi ñá túú xica cuu ndìhi ñaha-dé xii-o —càchí-dé xáha<sup>n</sup>-dè xii-gá.

<sup>50</sup> Te Jèsús ní xáha<sup>n</sup>-gã xii-dé:

—Dàña-ndo na càda nahi-dé ní cùu, chi ñáyiu ñá túú cùu úhú iní ñáhá xii-o te cùndìhi ñáhã-yu —càchí-gá xáha<sup>n</sup>-gã xii-dé.

*Jèsús càhá<sup>n</sup>-gá dóho té Jàcobó ndìhi té Juáa*

<sup>51</sup> Te òré sa ta cùyatni ndaa Jesús andiu, te ní xica-gá cuáhá<sup>n</sup>-gá ñuú Jerusàlén, chi duu<sup>n</sup> duu<sup>n</sup> ní sani iní-gá sá quíhí<sup>n</sup>-gá.

<sup>52</sup> Te ní tendaha-gã cue téé yòdo nuu cuáhá<sup>n</sup>, te ní quexìo-güedé ñí ñuú, te ñuú-á<sup>n</sup> yíndèhu-xi distritú Sàmariá, te ndùcu-güedé ñí vehe cada túha-güedé òré quexìo-gá.

<sup>53</sup> Dico ñáyiu Sàmariá ñá túú ní cuínì-yu cuáñaha núú-yu vehe, chi cuèndá sá ñí cutnùnì iní-yu sá ìchi yáha-ni-gá quíhí<sup>n</sup>-gá ñuú Jerusàlén. <sup>54</sup> Te sá dúcá<sup>n</sup> ñí quidé-yu ñá túú ní cuínì-yu cuáñaha núú-yu vehe ndetátú-gá, núu ní xáha<sup>n</sup> tè Jàcobó ndìhi té Juáa cue téé xica cuu ndìhi-gá xii-gá:

—Mèstrú, ¿cuínì-n cáca<sup>n</sup> táhú-ó núú Yá Ndiöxí cuèndá dangàva-gá ñuhú danàa-gá ñáyiu ñuú-a dàtná ní quide té Èliás téé ní xóo cáhá<sup>n</sup> tnúhu Yá Ndiöxí ndée sanaha-ã<sup>n</sup>? —càchí-güedé xáha<sup>n</sup>-güedé xii-gá.

<sup>55</sup> Te Jèsús ní nchócótó-gã núú-güedé, te níhi ní cáhá<sup>n</sup>-gá dóho-güedé, te xáha<sup>n</sup>-gã:

—Nchòhó, chi ñá túú váha iní-ndó te núu duca<sup>n</sup> càhá<sup>n</sup>-ndó. <sup>56</sup> Chi yúhú Téé cùu ñaní tnáhá-ndó nchàa-ndo véxi-í sá dácãcu ni-hnu-í ñáyiu, te ñá díú véxi-í sá dácüíta ni-hnu-í-yu —càchí-gá xáha<sup>n</sup>-gã xii-güedé.

Te sáta dúcá<sup>n</sup> ñí xáha<sup>n</sup>-gã, te ní xica-gá cuáhá<sup>n</sup>-gá ndìhi-güedé ingá ñuú.

*Ñáyiu cuínì chitnahá ñáhá xii Jesús ní cùu*

*(Mt. 8:19-22)*

57 Te ñuhu Jesús ichi ndihí-güedé, te ñ tée ní xáha<sup>n</sup>-dë xii-gá:

—Mèstrú, cuiní-í canchicú<sup>n</sup> ñáhà-í xii-n ndèni ní cuu na quíhí<sup>n</sup>-n —càchí-dé xáha<sup>n</sup>-dë xii-gá.

58 Te Jèsús ní xáha<sup>n</sup>-gã xii-dé:

—Nchaa ñúcuii chi ndècu yaú cúu vèhe-güedi saquihí-güedi, te nchaa quiti ndàva caa tacá-güedi díquí yutnu, dico yúhú Tée cùu ñaní tnáhá-ndó nchàa-ndo chi ñá túú ndèé cáá vèhe-í ñuyú-a ndetatú-í —càchí-gá xáha<sup>n</sup>-gã xii-dé.

59 Te dàtnùnì ní xáha<sup>n</sup> tùcu-gá xii-íngá-dé:

—Yòhó taquixi chitnahá ñáhà-n xii-í —càchí-gá xáha<sup>n</sup>-gã xii-dé.

Dico tée-á<sup>n</sup> ñí xáha<sup>n</sup>-dë xii-gá:

—Mèstrú, dañá na nùhú-í cundetú-í cuú tàtá-í te chindúxi-í-dé, te dàtnùnì quixi-í chitnahá ñáhà dùca<sup>n</sup>-ná-í xii-n —càchí-dé xáha<sup>n</sup>-dë xii-gá.

60 Te Jèsús ní xáha<sup>n</sup>-gã xii-dé:

—Daña ñáyiú ñá túú sàndáá iní ñáhà xii-í ná chindúxi tnàha meé-yu, chi ñáyiú-á<sup>n</sup> cúu-yu dàtná ñáyiú ní xihí cuèi ndècu-ní-yu núu ñuyú-a. Te yòhó taquixi, chi quíhí<sup>n</sup>-n dànehé-n ñáyiú nàcuáa cada Yá Ndiòxí ndíhu ndaha ñàha-gá xii-yu —càchí-gá xáha<sup>n</sup>-gã xii-dé.

61 Te ní xáha<sup>n</sup> tùcu íngá-dé xii-gá:

—Mèstrú, cuiní-í chitnahá ñáhà-í xii-n, dico díhna-gá dañá na nùhú-í cada ndee iní-í nchaa ñáyiú ndècu vehe-í, te dàtnùnì quixi-í —càchí-dé xáha<sup>n</sup>-dë xii-gá.

62 Te Jèsús ní xáha<sup>n</sup>-gã:

—Nchaa ñáyiú ní sàndáá iní ñáhà xii-í, te núu vá cànchicú<sup>n</sup> nihnu ñáhà-yu ñí yùhu ñí iní-yu, te cùu-yu dàtná ñí tée ní tñi ndaha làtú cutu-dé, chi tée-á<sup>n</sup> núu na ndàcoto-dé ndàa sátá-dë òré xítú-dë, te vá quíhí<sup>n</sup> ndáa làtú-dé duca<sup>n</sup> sàtnahá-xi cùu-yu. Te cue ñáyiú chi vá cúu ndáa-yu nàcuáa ndíhu ndaha-gá dava-gá ñáyiú—càchí-gá xáha<sup>n</sup>-gã xii-dé.

## 10

*Jèsús téndàha-gá únídico úxí cue tée quíhí<sup>n</sup> cáhá<sup>n</sup> tnúhu-gá núu ñáyiú*

1 Te sátá dúcá<sup>n</sup> ñí cuu, te ní cáxi tucu Xítohó Jesucristú únídico úxí cue tée

codonùu-güedé quíhí<sup>n</sup>-güedé cáhá<sup>n</sup>-güedé tnúhu-gá nchaa ñúú, ndihí nchaa dava-gá xichi núu quíhí<sup>n</sup>-gá, te ndí ndúú ndí ndúú-güedé tendaha ñàha-gá xii-güedé quíhí<sup>n</sup>-güedé. 2 Te cùmání-gã caca-güedé, te ní xáha<sup>n</sup>-gã xii-güedé:

—Nchòhó xìnì-ndó sã òré ná sàá yóó cuu nchaa sá xítú ñáyiú, te ío vài cuu. Te na càchí tnúhu ndáá-í xii-ndo sã dàtná vài sá xítú ñáyiú cùu, duca<sup>n</sup> ío vài ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñàha xii-yu tnúhu-gá, núu xíá<sup>n</sup> xìnì ñuhu-xi cácá<sup>n</sup>-ndó núu Yá Ndiòxí cuendá sá ná dàcáhá<sup>n</sup>-gá iní ñáyiú cáhá<sup>n</sup>-yu tnúhu-gá núu ñáyiú cùmání cundedóho tnúhu-gá. 3 Te nchòhó cúu-ndó dàtná cue mbéé cue quiti cuáhá<sup>n</sup> núu yíhí cuè quiti déé<sup>n</sup>. Chi tendaha ñàha-í xii-ndo quíhí<sup>n</sup>-ndó núu xíndecu nchaa ñáyiú cuihna iní-xi. 4 Te vá cànèhe-ndo ñunu cuhu<sup>n</sup> ndachiu<sup>n</sup>-ndo, ni núu cúhú<sup>n</sup> díhú<sup>n</sup>-ndó, te ni vã cádá tũha-gá-ndó chàu-ndó chi ñíu-ni chàu yíhí-ndó-á<sup>n</sup> xíá<sup>n</sup>-ni quihí-ndo, te vá ío cuyaa-ndo cáhá<sup>n</sup> ndihí-ndo ñáyiú ñuhu ichi.

5 Te òré ná quèxio-ndo ñí vehe, te duha cúñaha-ndo xii ñáyiú dii vèhe-xi-á<sup>n</sup>: “Yá Ndiòxí chindee ñàha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. 6 Te núu ñáyiú-á<sup>n</sup> ñí nduu táhú-yu sá cùndècu váha iní-yu núu Yá Ndiòxí, te cuu-xi sá vãha sá cúu-xí-yu tnúhu cúñaha-ndo-á<sup>n</sup>, dico núu ñá túú ní cáhá<sup>n</sup> váha ndihí ñáhà-yu xii-ndo, te cúñaha-ndo sã vã cúu-xí sã vãha sá cúu-xí-yu. Dico núu ní cáhá<sup>n</sup> váha ndihí ñáhà-yu xii-ndo, 7 te ñíu-ni vehe-á<sup>n</sup> cada vehe tnaa-ndo, te ñá túú-gã ndèé nducu-ndo vèhe cùndecu-ndo, te caxi-ndo nchàa sá ná tàxí-yu, chi nchaa cue tée quide chiu<sup>n</sup> dacuití tau-güedé sá nihí-güedé sá cáxí-güedé cuendá nchaa chiu<sup>n</sup> quide-güedé. 8 Te núu ní sáá-ndó ñí ñúú núu ñí quehe<sup>n</sup> cuendá ñáhà-yu xii-ndo, te caxi-ndo nchàa sá ná tàxí-yu.

9 Te cada tátna-ndo cuè ñáyiú cùhú xíndecu ñúú-á<sup>n</sup>, te cúñaha-ndo xii-yu sá sà ní sáá nduu ndíhu ndaha ñàha Yá Ndiòxí xii-yu. 10 Dico núu ní sáá-ndó ñí ñúú núu ñá túú ní quehe<sup>n</sup> cuendá ñáhà-yu xii-ndo, te tñi-ndo ñí cuita cáhá<sup>n</sup>-ndó cuáhá<sup>n</sup>, te cúñaha-ndo xii-yu: 11 “Ndéé tíca chúhmá

10 Dico núu ní sáá-ndó ñí ñúú núu ñá túú ní quehe<sup>n</sup> cuendá ñáhà-yu xii-ndo, te tñi-ndo ñí cuita cáhá<sup>n</sup>-ndó cuáhá<sup>n</sup>, te cúñaha-ndo xii-yu: 11 “Ndéé tíca chúhmá

11 “Ndéé tíca chúhmá



nǐ tñí sáhá-ndí ñuú-ndó nàquidi-ndí, te duha quide-ndí cuendá cutnùnì iní-ndó sǎ ñà túú quide váha-ndo ndècu-ndo. Dico cunaha-ndo sǎ sà ní sáá nduu ndíhu ndaha ñàha Yá Ndiöxí xii-ndo ni cùu”, duha cúñaha-ndo xii-yu. <sup>12</sup> Te na cächí tñuhu-í xii-ndo sǎ ná sáá nduu càda ndáá Yá Ndiöxí cuéchi nchaa ñáyi, te ñáyi ñuú-án ïo-gá ndohó-yu dàvá-án dàcúxí ñáyi ñuú Sòdomá —cächí-gá xáha<sup>n</sup>-gǎ xii-güedé.

*Cuendá ñáyi dava ñuú ñà túú sàndáá iní tñuhu Xítoho Jesucristú*  
(Mt. 11:20-24)

<sup>13</sup> Te Jèsús xáha<sup>n</sup>-gǎ xii ñáyi dava ñuú ñà túú sàndáá iní tñuhu-gá:

—jNdàhú nchòhó cue ñáyi ñuú Coràzín!  
jTe ndàhú nchòhó cue ñáyi ñuú Bètsaidá!  
Chi núu dícó ñuú Tírú, ndíhi ñuú Sìdón ní quide-í nchaa sá vǎ yõ tñàhí ndàcu cada datná ní quide-í ñuú-ndó-án nǐ xíní-ndó ñá, te sá ndéé ama-gá cuihnú-yu dóo ndàhú, te cunucóo-yu núu yàá cuendá sá ndíxí cuéchi iní-yu sá ñà túú quide váha-yu ni cùu. <sup>14</sup> Dico sáá nduu te ïo-gá dandòho ñàha Yá Ndiöxí xii-ndo dàcúxí ñáyi ñuú Tírú, ndíhi ñáyi ñuú Sìdón. <sup>15</sup> Te nchòhó ñáyi ñuú Capèrnaúm quide iní-ndó sǎ sà cuándaa-ndo àndiu, dico ñáhá chi núu ùhú núu ndàhú cundecu-ndo —duha ní xáha<sup>n</sup>-gǎ xii nchaa ñáyi ñuú-án.

<sup>16</sup> Te xáha<sup>n</sup> tùcu-gá xii cue té tendaha-gǎ quíhí<sup>n</sup> cáhá<sup>n</sup> tñuhu-gá-án:

—Nchaa ñáyi na cùndedóho nchaa tñuhu cáhá<sup>n</sup>-ndó, te cada iní-yu sá yǔhú càhá<sup>n</sup>-í ndèdóho-yu, te nchaa ñáyi na dàquee tíhú ñáhá xii-ndo, te tñàhí yúhú daquèe tíhú-yu, te nchaa ñáyi duca<sup>n</sup> na dàquee tíhú ñáhá xii-í, te tñàhí Tǎtà-í Dútú Ndiöxí Yá ní tendaha ñàha xii-í véxi-í ñuyíú-a dàquee tíhú-yu —cächí-gá xáha<sup>n</sup>-gǎ xii-güedé.

Te duca<sup>n</sup> te ní xica-güedé cuáhá<sup>n</sup>-güedé.

*Ní nasáá cue tée únídico úxí ní tendaha Jèsús ní sáhá<sup>n</sup> ní cáhá<sup>n</sup> tñuhu-gá núu ñáyi*

<sup>17</sup> Te cue tée únídico úxí-án nǐ nasáá-güedé te súuní cùdí<sup>n</sup> iní-güedé, te xáha<sup>n</sup>-güedé xii Jèsús:

—Mèstrú, ndéé espíritú cùndíhi yucu ñávàha sàndáá iní ñáhá-xí xii-ndí òrè

cácú nèhe ñàha-ndí xii-n —cächí-güedé xáha<sup>n</sup>-güedé xii-gá.

<sup>18</sup> Te Jèsús ní xáha<sup>n</sup>-gǎ:

—Ndáá càhá<sup>n</sup>-ndó chi yúhú ní xíní-í cùtnàhá ní xíta nihnu yucu ñávàha, chi dàtná ní ngava ï<sup>n</sup> tasa<sup>n</sup> ní ngava-xi ñuyíú-a.

<sup>19</sup> Te dàtná quidé-ndó òrè xènihnu-ndo ï<sup>n</sup> cóo, àdi ï<sup>n</sup> nchacua duca<sup>n</sup> cada-ndo daquee tíhú-ndó yucu ñávàha, te ñà túú nǎ cada ñàha-xi xii-ndo, chi ní taxi-í tñuhu ndee iní ndécú ndíhi-ndo. <sup>20</sup> Dico vǎ cùdí<sup>n</sup> iní-ndó cuendá sá sàndáá iní ñáhá cuè espíritú cùndíhi yucu ñávàha xii-ndo, chi cùdí<sup>n</sup> iní-ndó cuendá sá sà yodo tñuní-ndó núu tütú Yá Ndiöxí Yá ndécú àndiu —cachí-gá xáha<sup>n</sup>-gǎ xii-güedé.

*Jèsús cùdí<sup>n</sup> iní-gá*

(Mt. 11:25-27; 13:16-17)

<sup>21</sup> Te òrè-án súuní nǐ quide dí<sup>n</sup> iní ñáhá Espíritú Yá Ndiöxí xii Jèsús, te ní xáha<sup>n</sup>-gǎ xii Yá Ndiöxí:

—Yòhó Tǎtà-í Dútú Ndiöxí, ío chñuhu ñàha-í xii-n chi diu-n tàxi tñuní-n àndiu ndíhi ñuyíú-a, te dànehé-n cuè ñáyi nchaa tñuhu váha, te diu-ni ñáyi-án cùú-yu ñáyi ñà túú cùtnuní iní-xi nchaa tñuhu càhá<sup>n</sup> cue téé túha, te nchaa tñuhu càhá<sup>n</sup>-n-án ñà túú ní dàtúu-n núu ñáyi cächí sá ïo túha, te ío váha sáá díquí-xi. Te duca<sup>n</sup> quide-n, chi duca<sup>n</sup> cuíní-n cùnduu —cachí-gá xáha<sup>n</sup>-gǎ xii Yá Ndiöxí.

<sup>22</sup> Te xáha<sup>n</sup> tùcu-gá xii cue téé ní nasáá-án:

—Mee Tǎtà-í Dútú Ndiöxí ní cachí-gá sá cùnùu-í núu nchàa-ndí túhú sá ío. Te vǎ yõ ï<sup>n</sup> xíní nàcuáa sàni iní yúhú Déhe Dútú Ndiöxí, chi ï<sup>n</sup> dǐ dí-ni mee-gǎ xíní-gá nàcuáa sàni iní-í. Te duca<sup>n</sup> ï<sup>n</sup> dii-ni yúhú xíní-í nàcuáa sàni iní méé-gǎ, te nchaa ñáyi cächí iní-í sá quíní-yu nàcuáa sàni iní Tǎtà-í Dútú Ndiöxí te xitnùhu-í-yu, te vǎ yõ ï<sup>n</sup>-gǎ xíní nàcuáa sàni iní-gá chi diu-ni ñáyi duca<sup>n</sup> xitnùhu-í-án xíní-yu —cächí-gá xáha<sup>n</sup>-gǎ xii-güedé.

<sup>23</sup> Te ní nchócótó-gǎ núu xǐndecu mee-ni cuè téé xica cuu ndíhi-gá, te ní xáha<sup>n</sup>-gǎ xii-güedé:

—Váha táhú nchòhó ndíhi nchaa ñáyi ndèhe nchaa nacuáa quide-í vitna. <sup>24</sup> Chi ío cuéhé cue téé ní xóo cáhá<sup>n</sup> tñuhu Yá Ndiöxí ndéé sanaha, ndíhi cue téé ní



xíndaha ñàha xii ñáyiu ní cuiní-güedé cundehe-güedě nchaa sá ndéhé-ndó quide-í vitna, te ñá túú ní xìní-güedé, te ní cuiní-güedé cundedóho-güedé nchaa tnúhu càhá<sup>n</sup>-í ndédóho-ndo vitna, te ñá túú ní xíndedóho-güedé —càchí-gá xáha<sup>n</sup>-gã xii-güedé.

*Nàcuáa ní quide ì<sup>n</sup> téé distritú Sàmariá*

<sup>25</sup> Te ì<sup>n</sup> téé dàcuaha ñaha xii ñáyiu nchaa tnúhu ní chídó tnùnì ndíi Moisés ní ndacuíñí-dé xító ndèé-dé Jèsús nùu nása cunduu tnúhu cáhá<sup>n</sup>-gá, te xáha<sup>n</sup>-dě xii-gá:

—Mèstrú, ¿ná cúú sá cáda-í cuendá nduu táhù-í cundecu-í ndíi Yá Ndiöxí ní caa ní quíhí<sup>n</sup>-i? —càchí-dé xáha<sup>n</sup>-dě xii-gá.

<sup>26</sup> Te Jèsús ní xáha<sup>n</sup>-gã xii-dé:

—Cuiní-í cachí tnúhu-n nása càhá<sup>n</sup>-xi núú tütú ndíi Moisés —càchí-gá xáha<sup>n</sup>-gã xii-dé.

<sup>27</sup> Te xáha<sup>n</sup>-dě xii-gá:

—Ndíi Moisés càchí ndíi núú tütú ndíi: “Cuu iní-ndó Dütú Ndiöxí Yaá cúú Ndiöxí-ndó nì yuhu nì iní-ndó, te cani iní-ndó càda-ndo datná cuiní méé-gã, te mee-ni tnúhu váha cani iní-ndó nàcuáa cuu vii cuu váha-ndo nùú-gã, te coo iní-ndó cùu iní-ndó-gã. Te cuu iní-ndó tnàha ñáyiu-ndo dàtná cúú iní-ndó mèe-ndo”, duha càchí ndíi núú tütú ndíi —càchí-dé xáha<sup>n</sup>-dě xii-gá.

<sup>28</sup> Te Jèsús ní xáha<sup>n</sup>-gã:

—Váha-ni càhá<sup>n</sup>-n, te núú cada-n nàcuáa càhá<sup>n</sup>-n à<sup>n</sup>, te nduu táhù-n cundecu-n ndíi Yá Ndiöxí ní caa ní quíhí<sup>n</sup> —càchí-gá xáha<sup>n</sup>-gã xii-dé.

<sup>29</sup> Te sá dúcá<sup>n</sup> nì xáha<sup>n</sup> Jèsús xii-dé nùu ndùcu-dé nàcuáa cada-dé cácu nihnu-dé núú tnúhu ní cáhá<sup>n</sup>-dé, te ní xícá<sup>n</sup> tnúhú-dé núú-gã, te xáha<sup>n</sup>-dě:

—¿Yoo cùu tnaha ñáyiu-í-i? —càchí-dé xáha<sup>n</sup>-dě xii-gá.

<sup>30</sup> Te Jèsús ní cani-gá ì<sup>n</sup> cuendú núú-dě nàcuáa tecú tnùnì-dé tnúhu-gá, te xáha<sup>n</sup>-gã:

—Ì<sup>n</sup> téé ní ndee-dé ñúú Jerusalén ñúhú-dě ichi cuánuu-dé cuáhá<sup>n</sup>-dé ñúú Jericó, te ní queue ñadúhú ichi-dé ní dúhú-güedě dóó níhnú-dě, ndíi nchaa sá néhé-dě, te ní caniha vihi-güedé, te nchìto ñu-ná-dé ní dáñá ñàha-güedé te cuáhá<sup>n</sup>-güedé. <sup>31</sup> Te mei òré cátùu-dé-á<sup>n</sup> ñúhú ì<sup>n</sup> dütú ichi-á<sup>n</sup>, te òré ní xiní ñáhá dütú-á<sup>n</sup> xii-dé, te ì<sup>n</sup> xio-ni ní xócõ ndee-dé

ní yáha-dé. <sup>32</sup> Te ñùhu tucu ì<sup>n</sup> téé cùu levitá ichi-á<sup>n</sup>, te òré ní xiní-dé téé-á<sup>n</sup> cátùu-dé, te ñu-ni duca<sup>n</sup> nì quide-dé ì<sup>n</sup> xio-ni ní xócõ ndee-dé ní yáha-dé. <sup>33</sup> Dico ì<sup>n</sup> téé distritú Sàmariá ñúhú tucu-dé ichi-á<sup>n</sup> te òré ní xiní-dé téé-á<sup>n</sup> cátùu-dé, te ní cundáhú iní ñáhá-dě. <sup>34</sup> Te ní sáhá<sup>n</sup>-dé núú cátùu téé-á<sup>n</sup>, te ní quide tátna-dé nchaa núú nì nícuèhé xii téé-á<sup>n</sup> nì chihi-dé yúcu, te ní dácútù-dě. Te dàtnùnì ní dácáá ñàha-dé sátá quiti-dé, te ndèca ñàha-dé cuáhá<sup>n</sup> ì<sup>n</sup> vehe núú sácõ cue ñáyiu sácúhu<sup>n</sup> ichi, te yacá<sup>n</sup> ní xito ñàha-dě. <sup>35</sup> Te ingá nduu òré ní nucúhu<sup>n</sup> téé Samaritànú-á<sup>n</sup> ichi, te ní tava-dé úú díhú<sup>n</sup> denàriú, te ní sáha-dé téé cùu xitohó vehe-á<sup>n</sup>, te ní xáha<sup>n</sup>-dě: “Coto saú-n tée-a, te núú ñá ní tnàhá díhú<sup>n</sup> sã nì taxi-í, te cuèi na dàndoñuhu-gá-n díhú<sup>n</sup>-n cuendá-dé, te òré ná quixi tucu-í te nacháhu-í”, duha ní xáha<sup>n</sup> tée Samaritànú-á<sup>n</sup> xii téé dii vehe xía<sup>n</sup>. <sup>36</sup> Te vitna cáhá<sup>n</sup>, te núú ndédacáa cue téé úní-á<sup>n</sup> cúú-güedě téé váha cùu iní-güedé tnàha ñáyiu-güedé —càchí-gá xáha<sup>n</sup>-gã xii téé dàcuaha ñaha xii-í ñáyiu-á<sup>n</sup> nchaa tnúhu ní chídó tnùnì ndíi Moisés.

<sup>37</sup> Te téé-á<sup>n</sup> nì xáha<sup>n</sup>-dě xii-gá:

—Tée ní cundáhú iní ñáhá xii téé ní dancuèhé ñáhá cuè ñadúhú-á<sup>n</sup>, téé-á<sup>n</sup> cúú-dé téé cùu iní tnàha ñáyiu-xi —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã:

—Cuáhá<sup>n</sup> te ñu-ni duca<sup>n</sup> càda-n tnahá-n —càchí-gá xáha<sup>n</sup>-gã xii-dé.

*Jèsús ndécú-gã vehe tá Mārta ndíi tá Mārriá*

<sup>38</sup> Te Jèsús ñúhú-ni-gã ichi cuáhá<sup>n</sup>-gá ndíi cue téé xica cuu ndíi-gá, te ní sáá-gá ì<sup>n</sup> ñúú líhli, te xía<sup>n</sup> nì queue ì<sup>n</sup> xíchí nání Mārta ní cáhá<sup>n</sup> ñáhá-xi xii-gá vehe-xi. <sup>39</sup> Te tá Mārta ndècu ì<sup>n</sup> cùhú-xi nani-xi Mariá, te xíchí-á<sup>n</sup> nì ngóo-xi núú Jèsús ndédóho-xi nchaa tnúhu càhá<sup>n</sup>-gá. <sup>40</sup> Te tá Mārta-á<sup>n</sup> ndíi vihi-ni iní-xi quide-xi chiu<sup>n</sup>-xi, te ní sáhá<sup>n</sup>-xi núú Jèsús, te ní xáha<sup>n</sup>-xi:

—Mèstrú, ¿náa ñá túú tnàhí sàni iní-n sã nì dándõ ndaha ñàha cùhù-í nchaa chiu<sup>n</sup>-á<sup>n</sup>? Cúñaha saú ná quixi-xi chindee ñaha-xi —cachí-xi xáha<sup>n</sup>-xi xii-gá.

<sup>41</sup> Dico Jèsús ní xáha<sup>n</sup>-gã:

—Yòhó Mārta, ñùhu tneñu vihi-n, te ndíhú iní-n sã ño vài chiu<sup>n</sup>-n ñuhu, <sup>42</sup> dico xini ñuhu vihi-gá-xi cundedóho-n tnúhu càhá<sup>n</sup>-í,

chi tá Màriá-a sa ndèdóho-xi tnúhu-í, te vá yõo ñ<sup>n</sup> ndacu xocani tnúhu-í sá ñ<sup>n</sup> ngúndecu ndihí-xi —càchí-gá xáha<sup>n</sup>-gã xii-xi.

## 11

*Jèsús dánèhé-gá cue téé xica cuu ndihí-gá nàcuáa cáhá<sup>n</sup> ndihí-güedé Yã Ndiõxí (Mt. 6:9-15, 7:7-11)*

<sup>1</sup> Te ñ<sup>n</sup> nduu cáhá<sup>n</sup> ndihí Jèsús Yã Ndiõxí ñ<sup>n</sup> xichi, te sáta ñ<sup>n</sup> yáha ní cáhá<sup>n</sup> ndihí-gá Yã Ndiõxí, te ní xáha<sup>n</sup> ñ<sup>n</sup> téé xica cuu ndihí-gá xii-gá:

—Mèstrú, danèhé ñáhá xii-ndí nása cáhá<sup>n</sup> ndihí-ndí Yã Ndiõxí dàtná ní quide ndí Juáá ní dánèhé ndí cue téé ní xica cuu ndihí ndí —càchí-dé xáha<sup>n</sup>-dë xii-gá.

<sup>2</sup> Te Jèsús ní xáha<sup>n</sup>-gã:

—Òré cáhá<sup>n</sup> ndihí-ndo Yã Ndiõxí, te cachí-ndó:

Yòhó tátá-ndí Dútú Ndiõxí Yaá ndécú àndiu, nchaa ñáyiú na cáhá<sup>n</sup>-yu sá cúu-n Yáá ío yíñùhu.

Te xicá<sup>n</sup> táhú-ndí núú-n sá ná sàá nduu ndíhu ndáhá-n-yu.

Te cada-n dàtná cáchí iní-n ñùyíú-a dàtná quidé-n àndiu.

<sup>3</sup> Te xicá<sup>n</sup> táhú-ndí núú-n sá táxí-n sá cándèca iní-ndí ñ<sup>n</sup> nduu ñ<sup>n</sup> nduu.

<sup>4</sup> Te cada càhnu iní-n nchaa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

Te vá dáñá-n dàcahá<sup>n</sup> ñáhá yùcu ñávàha xii-ndí cada-ndí sá ñà túú vaha, chi coto ñaha-n xii-ndí cuèndá sá vã dúcá<sup>n</sup> càda ñaha-xi,

duha cáhá<sup>n</sup>-ndó

—càchí-gá xáha<sup>n</sup>-gã xii-güedé.

<sup>5</sup> Te Jèsús ní xáha<sup>n</sup> tùcu-gá:

—Te núu ndèdacàa nchohó ndécú ñ<sup>n</sup> téé tnàha tnúhu ndihí-ndo, te dava niú cuáhá<sup>n</sup>-ndó vèhe-dé, te òré ní quexìo-ndo, te xáha<sup>n</sup>-ndo xii-dé: “Véxi-í núu vá cùndèe iní-n tàxi nuu-n úní tnàhá pàá, <sup>6</sup> chi ñ<sup>n</sup> téé xini tnàhá ndihí-í ñúhú-dë ichi ní quexìo-dé vehe-í, te ñá túú tnàhí ná cuáñaha-í caxi-dé”, quesaha-ndo cùñaha-ndo. <sup>7</sup> Te téé-án cáhá<sup>n</sup>-dé ndéé xití vehe-dé, te cùñaha-dë xii-ndo: “Vá dásatú nihá-n chi ndèdí yuyèhe-í, te càa-í ndihí cue landú-í,

te vá cúu ndàcòo-í taxi-í sá cuini-n”, quesaha-dë cùñaha-dë xii-ndo. <sup>8</sup> Te na càchí tnúhu-í xii-ndo sã cuèi cùu-dé téé tnàha tnúhu ndihí-ndo, dico duca<sup>n</sup> cùñaha-dë xii-ndo, dico dacuití sã ndácòo-dé taxi-dé sá cuini-ndó cuèndá sá vã dásatú-gá-ndó iní-dé. <sup>9</sup> Te yúhú càchí-í xii-ndo sã cáhá<sup>n</sup>-ndó núu ná cuini-ndó núú Yã Ndiõxí te taxi-gá. Te vá dáñá ndéé-ndó cáhá<sup>n</sup>-ndó núú-gã núu ná cuini-ndó, te duca<sup>n</sup> te nihí-ndó. Te cada iní-ndó sã ñ<sup>n</sup> quexìo-ndo vehe ñ<sup>n</sup> tnaha ñáyiú-ndo te ní cáhá<sup>n</sup>-ndó, te ñáyiú-án ñ<sup>n</sup> tedóho ñáhá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yã Ndiõxí tedóho ñaha-gã xii-ndo, te taxi-gá sá ná cáhá<sup>n</sup>-ndó núú-gã. <sup>10</sup> Chi nchaa ñáyiú duca<sup>n</sup> xiquide te Yã Ndiõxí tedóho ñaha-gã xií-yu nihí-yu sá cuini-yu.

Te diu-ni duca<sup>n</sup> tùcu nchaa ñáyiú na cáhá<sup>n</sup> núú-gã ñ<sup>n</sup> sá cuini-yu, chi sãñaha-gã sá xicá<sup>n</sup>-yu núú-gã. Te diu-ni duca<sup>n</sup> tùcu nihí nchaa ñáyiú ñá túú dàña ndéé xicá<sup>n</sup> núú Yã Ndiõxí sá cuini-yu, chi nihí-yu.

<sup>11</sup> Te nchòhó cue téé cùu tátá ñá túú cùndee iní-ndó cuáha-ndo cuè déhe-ndo ñ<sup>n</sup> yúú caxi-güexi òré xicá<sup>n</sup>-güexi ñ<sup>n</sup> pàá núú-ndó càxi-güexi, te ni ñà túú cùndee iní-ndó cuáñaha-ndo ñ<sup>n</sup> cóo caxi-güexi òré xicá<sup>n</sup>-güexi ñ<sup>n</sup> chácá núú-ndó càxi-güexi.

<sup>12</sup> Te ni ñà túú cùndee iní-ndó cuáñaha-ndo ñ<sup>n</sup> nchacua caxi-güexi òré xicá<sup>n</sup>-güexi ñ<sup>n</sup> ndíú núú-ndó càxi-güexi. <sup>13</sup> Te nchòhó cuèi ndéé dau sàá iní-ndó, dico sãha-ndo cuè déhe-ndo sã vaha xèxi-güexi òré xicá<sup>n</sup>-güexi núú-ndó. Te núu nchòhó duca<sup>n</sup> quide-ndo, ÿte uu<sup>n</sup>-gá duca<sup>n</sup> quide Tátá-ndó Dútú Ndiõxí Yaá ndécú àndiu, chi taxi-gá Espiritú-gá cundecu ndihí-ndo te núu na cáhá<sup>n</sup>-ndó núú-gã!

—càchí-gá xáha<sup>n</sup>-gã xii-güedé.

*Càchí-güedé sá ndécú ndihí Jesús yucu ñávàha*

*(Mt. 12:22-30; Mr. 3:20-27)*

<sup>14</sup> Te Jèsús ndéñùhu-gá espíritú cùndihí yucu ñávàha yíhi ñaha xii ñ<sup>n</sup> téé ní quide ñihí-xi, te òré ní ndee ñaha espíritú-án xii téé-án, te ní nacáhá<sup>n</sup>-dé. Te ío ní cuñúhu ñáyiú sá dúcá<sup>n</sup> ñ<sup>n</sup> quide-gá. <sup>15</sup> Te davá-yu ní xitnàhá-yu:

—Tée-a ndèñuhu-dé nchaa espíritú cùndìhi sácúíhná yíhí ñàha xii ñáyíu, chi ñíu-ni sácúíhná-á<sup>n</sup> chíndèe ñàha-xi xii-dé, te ñíu-ni-xi tàxi tñuní-xi nchaa espíritú-á<sup>n</sup> — càchí-yu xitnàhá-yu.

<sup>16</sup> Te davá-yu xito ndeé ñáhă-yu xii-gá, te xáhă<sup>n</sup>-yu sá ná cádá-gă ñ<sup>n</sup> sá vă yôo tñàhí ndàcu cada ñuyíú-a cundehé-yu nàcuáa cutnùní iní-yu núu ndáá sá Yă Ndiôxí ní tendaha ñàha-gá xii-gá véxi-gá ñuyíú-a. <sup>17</sup> Dico mee-gă sa ní cutnùní iní-gá nchaa nàcuáa sàni iní-yu, núu ní xáha<sup>n</sup>-gă xií-yu:

—Te nchòhó xìní-ndó să nūu ñ<sup>n</sup> tée yindaha ñ<sup>n</sup> nació<sup>n</sup> vá cúú ñ<sup>n</sup>nuu-dé ndihí cue tée cùndìhi-dé, te vá cùdđi-dé cunuu-dě. Te ñíu-ni duca<sup>n</sup> sãtnahá tucu-xi cùu cue ñáyíu xíndecu ñ<sup>n</sup>-ní vehe, chi núu vá cúú ñ<sup>n</sup>nuú-yu cundecú-yu, te vá cùdđi-yu cundecu càhnú-yu. <sup>18</sup> Te duca<sup>n</sup> sãtnahá-xi cùu sácúíhná, chi núu vá cúú ñ<sup>n</sup>nuu-xi ndihí nchaa espíritú cùndìhi-xi te vá cùdđi-xi cundecu-xi taxi tñuní-xi. Te duha càhá<sup>n</sup>-í chi nchòhó càchí-ndó să sácúíhná chíndèe ñàha-xi xii-í queññuhu-í nchaa espíritú cùndìhi-xi yíhí ñàha xii ñáyíu. <sup>19</sup> Te núu yúhú quidé cuendá-ndó să sácúíhná chíndèe ñàha-xi xii-í, te xìní ñuhu-xi cada cuendá-ndó yôo chindee ñàha xii cue tée xica cuu ndihí-ndo queññuhu-güedé nchaa espíritú cùndìhi-xi yíhí ñàha xii ñáyíu. Te mee-güedě càchí-güedé sá nchòhó ñá túú càhá<sup>n</sup> ndáá-ndó să dúcá<sup>n</sup> càhá<sup>n</sup>-ndó. <sup>20</sup> Te ndáá sá Yă Ndiôxí chíndèe ñàha-gá xii-í queññuhu-í nchaa espíritú cùndìhi sácúíhná yíhí ñàha xii ñáyíu, te xíá<sup>n</sup> cutnùní iní-ndó să sà ní sáá nduu ndíhu ndaha ñàha Yă Ndiôxí xii-ndo.

<sup>21</sup> Te núu ñ<sup>n</sup> tée ío ndee, te súúní ññí cáá-dě, te ndeé-dé vehe-dé cuendá sá vă cuíta, te ní quide túha-dé titní sá dëé<sup>n</sup>, te ío váha nèhe váha-dé nchaa ndachíu<sup>n</sup>-dé. <sup>22</sup> Dico núu quexíò ingá tée ío-gá ññí cáá te ndee-gă-dé, te ngüíta-dé nàá-dé ndihí tée ndèe vehe-xi-á<sup>n</sup>, te cada cànarí ñáhá tée-á<sup>n</sup> xii tée ndèe vehe-xi-á<sup>n</sup>, te quen-deé-dé nchaa sá dëé<sup>n</sup> cùndèe iní-dé, te taxi tñuní-na-dé nchaa xíá<sup>n</sup>, ndihí nchaa sá ndécú ndihí-dé, te dácáhñu-dé nchaa cue tée cùndìhi-dé nchaa sá ná ñihí-dé.

<sup>23</sup> Te nchaa ñáyíu ñá túú cùndìhi ñàha

xii-í, te cùu úhú iní ñáhă-yu, te nchaa ñáyíu ñá túú chindee ñàha xii-í, te dàquee tíhñu-yu chiú<sup>n</sup> quide-í.

*Espíritú cùndìhi yucu ñávăha sá nánchòcáva xito cùu uú*  
(Mt. 12:43-45)

<sup>24</sup> Te òré ná quèe ñàha ñ<sup>n</sup> espíritú cùndìhi yucu ñávăha xii ñ<sup>n</sup> ñáyíu, te cuáhá<sup>n</sup>-xi ndùcu-xi ñ<sup>n</sup> xichi núú cùndècu-xi te ñá ñihí-xi, te ní sàni iní-xi: “Váha-gá núhú tucu-í núú ñí xíndecu-í”, duha ní sàni iní-xi. <sup>25</sup> Te cuánuhú-xi, te òré ní nasáá-xi, te ní xíní-xi sá cáá ñí ñáyíu-á<sup>n</sup> dàtná cáá-ñă ñ<sup>n</sup> vehe ní natíhú, chi ní nduu vii-ná, vá yôo-gă ndécú. <sup>26</sup> Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xí ũsá tñàhá espíritú cùndìhi-xi sá nèhé víhí-gă xíquide, te òré ní ñihí-xi cue espíritú-á<sup>n</sup> te ndèca ñàha-xi cuáhá<sup>n</sup> cuendá ngúndecu ndihí-xi ñáyíu-á<sup>n</sup>, te ñáyíu-á<sup>n</sup> uu<sup>n</sup>-gá nándi yáha-yu dácúúxí ndèe díhna —càchí-gă xáha<sup>n</sup>-gă xií-yu.

*Cuendá ñáyíu cùu váha ndisa iní-xi*

<sup>27</sup> Te ñini càhá<sup>n</sup> Jèsús tñúhu-á<sup>n</sup> núú ñáyíu ní càhá<sup>n</sup> ñihí ñ<sup>n</sup> ñadìhí tñuú-yu, te xáha<sup>n</sup>-a<sup>n</sup> xii Jèsús:

—¡Sá văha táhú ñadìhí ní dácácú ñàha xii-n, te ní dácuéhnú ñàha-a<sup>n</sup>! —cachí-a<sup>n</sup> xáha<sup>n</sup>-a<sup>n</sup> xii-gă.

<sup>28</sup> Te Jèsús ní xáha<sup>n</sup>-gă:

—¡Váha-gă táhú nchaa ñáyíu sàcúndedóho nchaa tñúhu càhá<sup>n</sup> Yă Ndiôxí te sàndáá iní-yu! —càchí-gă xáha<sup>n</sup>-gă xii-a<sup>n</sup>.

*Ñáyíu ñá túú sàndáá iní ñáhá xii Jèsús cuíní-yu cada-gá ñ<sup>n</sup> sá vă yôo tñàhí ndàcu cada*  
(Mt. 12:38-42; Mr. 8:12)

<sup>29</sup> Te ta tàcá vâi ñáyíu te dàdehnde tñaha-ná-yu, te ní ngüíta Jèsús xáha<sup>n</sup>-gă xií-yu:

—Nchòhó ñáyíu ndècu ñuyíú vitna, chi ío sáá iní-ndó, te cuíní-ndó càda-í ñ<sup>n</sup> sá vă yôo tñàhí ndàcu cada cuendá cuíní-ndó cùtnuní iní-ndó núu ndisa sá Yă Ndiôxí ní tendaha ñàha-gă xii-í véxi-í. Dico ñá túú năgá càda-í quíní-ndó, chi sa ñihí-ndó tñúhu nàcuáa ní yáha ndíi Jônás tée ní xóo càhá<sup>n</sup> tñúhu Yă Ndiôxí ndeé sanaha, te ñíu-ni duca<sup>n</sup> yáha yúhú tucu. <sup>30</sup> Chi nchaa ñáyíu ñúú Ñínivé ní cutnùní iní-yu sá Yă Ndiôxí ní



tendaha ñàha-gá xii ndíi Jònás ní sáhá<sup>n</sup> ndíi ñuú-yu. Te duca<sup>n</sup> sãtnahá-xi cùu yúhú Tée cùu ñaní tnáhá-ndó nchàa-ndo, chi sáá nduu te cutnùní iní-ndó sã Yã Ndiöxí ní tendaha ñàha-gá xii-í véxi-í ñuyíú-a. <sup>31</sup> Te na sáá nduu càda ndáá Yã Ndiöxí cuéchi nchaa nchòhó ñáyíu ndècu ñuyíú-a, te dàvá-á<sup>n</sup> quini-ndó ñ<sup>n</sup> ñadihí ñaha ní xíndaha ñ<sup>n</sup> nació<sup>n</sup> cáá ndàa xio cuha núú quéné nchícanhii. Te ñaha-á<sup>n</sup> ïo xica ñí xíndecu-a<sup>n</sup>, te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cáhá<sup>n</sup> ndíi Salòmón, chi ndíi-á<sup>n</sup> ïo ní sáá sá xìní tnùní ndíi. Te ñaha-á<sup>n</sup> cáhá<sup>n</sup>-a<sup>n</sup> dàvá-á<sup>n</sup> sã nchòhó ñáyíu ndècu vitna ñá túú ní quide ndáá-ndó. Dico vitna iha ndècu ndíhi ñaha-ndo xii yúhú, te ñíu-í ío-gá cúnúu-í dàcúúxí ndíi Salòmón. <sup>32</sup> Te ñíu-ni nduu càda ndáá Yã Ndiöxí cuéchi nchaa nchòhó ñáyíu ndècu ñuyíú-a vitna, dàvá-á<sup>n</sup> tnáhá cue ñáyíu ní xíndecu ñuú Nínivé cundecú-yu núú Yã Ndiöxí, te tnáhá-yu cachí-yu sá ñà túú ní quide ndáá-ndó. Chi ñáyíu ñuú Nínivé-á<sup>n</sup> ñí ndixi túu iní-yu sá ñà túú quide váha-yu ndècú-yu te ní natuhá-yu ichi Yã Ndiöxí cùtnáhá ní cáhá<sup>n</sup> ndíhi ñaha ndíi Jònás tnúhu-gá xii-yu. Dico vitna iha ndècu ndíhi ñaha-ndo xii yúhú tée cáhá<sup>n</sup> tucu tnúhu Yã Ndiöxí, te ñíu-í ío-gá cúnúu-í dàcúúxí ndíi Jònás.

*Núú-ó cùu-xi datná ñ<sup>n</sup> ñuhú  
(Mt. 5:15; 6:22-23)*

<sup>33</sup> 'Te ñá túú ñí ñ<sup>n</sup> ñáyíu tēñuhú ñ<sup>n</sup> linterná, te taxi ndecú-yu ñ<sup>n</sup> núú yídähu, àdi chiváha-yu xití ñ<sup>n</sup> tídihi, chi tàxi ndecú-yu ñ<sup>n</sup> núú ñíu cuendá nchaa ñáyíu quíhu vehe cutnùní núú-yu. <sup>34</sup> Te núú-ndó cùu-xi datná ñ<sup>n</sup> ñuhú, chi ñ<sup>n</sup> sá ná quini-ndó te ndixi túu iní-ndó nã cúú xíã<sup>n</sup>, te núú càváha núú-ndó, te duca<sup>n</sup> cùtnuní iní-ndó nã cúú sã ndécú núú-ndó, á<sup>n</sup> te núú cùhú, te vá cùtnuní iní-ndó nã cúú sã ndécú núú-ndó. Te sá dúcá<sup>n</sup> cùhú núú-ndó te cada iní-ndó sã ndécú-ndó dàtná ñ<sup>n</sup> núú néé. <sup>35</sup> Te ío cada cuendá-ndó vã caní cuèhé iní-ndó cuendá tnúhu Yã Ndiöxí cuendá cutnùní iní-ndó nàcuáa cundecu-ndo, chi núu na càni cuehé iní-ndó cuendá tnúhu-gá, te cùu-ndo datná ñ<sup>n</sup> ñáyíu ñá túú cùtnuní núú-xí. <sup>36</sup> Te núú càndoo canine iní-ndó, te mee-ni sã vãha ñùhu iní-ndó, te cùtnuní váha iní-ndó tnúhu ndáá dàtná cùtnuní váha núú-ndó

òré càyú ñuhú, duca<sup>n</sup> cùtnuní iní-ndó — càchí-gá xáha<sup>n</sup>-gã xii-yu.

*Jèsús cáhá<sup>n</sup>-gá cuendá cue tée cùu fariséu  
ndíhi cue tée dàcuaha ñaha xii-í ñáyíu*

*(Mt. 23:1-36; Mr. 12:38-40; Lc. 20:45-47)*

<sup>37</sup> Te òré ní ndíhi tnúhu ní cáhá<sup>n</sup> Jèsús, te ñ<sup>n</sup> tée cùu fariséu ní cáhá<sup>n</sup> ñáhá-dé xii-gá vehe-dé caxi-gá, te cuánguihu-gá vehe-dé, te ní ngóo-gá mèsá. <sup>38</sup> Te tée cùu fariséu-á<sup>n</sup> ïo ní cuñúhu-dé, chi Jèsús ñá túú ní ndàha-gá nàcuáa sàni iní-güedé nduu vétú iní Yã Ndiöxí òré ní ngóo-gá caxi-gá dàtná quidé mèe-güedé. <sup>39</sup> Te Jèsús ní xáha<sup>n</sup>-gã xii-dé:

—Nchòhó cue tée cùu fariséu xìní-ndó sã ío ñáyíu nàquete sátá-ni tàsá<sup>n</sup> ndíhi sátá-ni cõhó, te xití-xi càndehe caduha-ni. Te duca<sup>n</sup> sãtnahá-xi cùu nchòhó, chi ndaha-ni-ndo nàquete-ndo, te iní-ndó ñà túú nduu ndoo, te nándi dándahú-ndó tnàha ñáyíu-ndo, te quèhe<sup>n</sup>-ndo sá ndécú ndíhi-yu, te nándi-gá nchaa sá cuèhé sá dúhá ñùhu iní-ndó quide-ndo. <sup>40</sup> ;Te nchòhó cúú-ndó cuè tée ío ñí iní-xi! ;Te náa ñá túú cùtnuní iní-ndó sã Yã Ndiöxí Yaá ní cadúha yiqui cùñú-ó ñíu-ni-gá ní chihí-gá iní-ó-ã<sup>n</sup>? <sup>41</sup> Te nchaa sá vãha ndècu ndíhi-ndo cuáha-ndo nchàa ñáyíu xini ñuhu na cundecu ndíhi-yu, te núu duca<sup>n</sup> na càda-ndo, te cuu-ndo ñáyíu sa ní nduu ndoo ní nduu nine iní-xi.

<sup>42</sup> ;Te ndàhú ní cuu nchaa nchòhó cue tée cùu fariséu! Chi sãha-ndo Yã Ndiöxí núú ùxí xichí yúcú nání mენტá, ndíhi yúcú rùdá, ndíhi nchaa dava-gá núú yúcú quèe comidá, dico ñá túú quide ndáá-ndó, te ní ñà túú ñùhu iní-ndó Yã Ndiöxí. Dico tnúhu cáhá<sup>n</sup>-í-a tàú-ndó càda-ndo, te ní vã dáñá ndéé-ndó càda-ndo nchaa dava-gá sá vãha.

<sup>43</sup> ;Te ndàhú ní cuu nchòhó cue tée cùu fariséu! Chi cuini-ndó cùnucóo-ndo núú sácõo cue tée ío cùnuu xití veñúhu, te cuini-ndó mèe-ni ndíhi tnúhu yíñùhu cáhá<sup>n</sup> ndíhi ñaha ñáyíu xii-ndo nchàa núú xicá cùu-ndo.

<sup>44</sup> ;Te ndàhú ní cuu nchòhó cue tée dàcuaha ñaha xii ñáyíu nchaa tnúhu ní chídó tnùní ndíi Moisés, ndíhi nchòhó cue tée cùu fariséu chi ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ñ<sup>n</sup> ñáyíu ní xihí te ní nguíndüxi, te ñá túú cùtnuní-gá



ndèe yíndüxi-yu, te cuèi nà yáha ñáiyu dico ñá túú cùtnuní sá yíndüxi ndíyi. Te duca<sup>n</sup> sãtnahá-xi cùu nchohó, chi nchaa ñáiyu ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó — càchí-gá xáha<sup>n</sup>-gã xii-güedé.

45 Te ní xáha<sup>n</sup> ñá tée dàcuaha ñaha xií-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcá<sup>n</sup> càhá<sup>n</sup>-n te tnàhá nchúhú xícuèhé-n ã<sup>n</sup> —càchí-dé xáha<sup>n</sup>-dè xii-gá.

46 Te Jèsús ní xáha<sup>n</sup>-gã:

—Ndàhú ní cuu tnàhá nchaa nchòhó cue tée dàcuaha ñaha xii ñáiyu nchaa tnúhu ní chídó tnùní ndíi Moisés! Chi quíde-ndo datná quidé ñáiyu dàcuído ñá taha ñáiyu-xi ñá sá ío véé, te mèé-yu ni lùha ñá túú cuíní-yu cuidó-yu. Te duca<sup>n</sup> sãtnahá-xi quíde nchohó chi dànehé-ndó ñáiyu nàcuáa cadá-yu, dico mee-ndo chi ni lùha ñá túú cuíní-ndó càda-ndo nàcuáa dànehé-ndó-yu.

47 'iTe ndàhú ní cuu tucu-ndo! Chi càdúha-ndo núú ñá nguíndüxi cue tée ní xóo càhá<sup>n</sup> tnúhu Yá Ndiöxí ndéé sanaha cuèndá sá cúnàha-ndo núú yíndüxi cue ndíi, te ñá-ni cue ñani tnàhá-ndó ñá sahani-güedé cue ndíi. 48 Te nchòhó sa nàha-ndo nàcuáa ní quíde cue ñani tnàhá-ndó, te càchí-ndó sã ñá quíde váha-güedé sá dúcá<sup>n</sup> ñá sahani-güedé cue ndíi-án, te vitna càdúha-ndo núú ñá nguíndüxi cue ndíi.

49 'Te Yá Ndiöxí ío sãá nchaa sá xini tnùní-gá, te ní cachí-gá sá dácàhá<sup>n</sup>-gã iní cue tée cuèndá càhá<sup>n</sup>-güedé tnúhu-gã núú ñáiyu, te cada-güedé nchaa nàcuáa cuíní-gã, te dava-güedé cahni ñàhá-yu xii-güedé, te dava-güedé ío dandòho ñàhá-yu xii-güedé duha ní cachí-gã. 50 Te nchaa ñáiyu ñuyíú vitna tnàhá-yu nacháhu-yu núú Yá Ndiöxí cuèndá sá ñá sahani-güedé cue tée ní càhá<sup>n</sup> tnúhu-gã ndéé cùtnàhá ní ngáva ñuyíú. 51 Te ndéé ndíi Àbél tée ní sahani-güedé ndéé díhna nuu, ndíhi ndéé ndíi Zacariá tée ní sahani-güedé ndéé núú ñá ndíhi-ná ndácá<sup>n</sup> cuèndá ñàhá Yá Ndiöxí núú ñáiyu ndècu ñuyíú vitna, te ñá ndíi-án ñá sahani-güedé mei tnúú veñúhu càhnu sá ío cùnuu, ndíhi xító núú sácòdó sã ndúú tãhú Yá Ndiöxí.

52 'iTe ndàhú ní cuu tucu nchaa nchòhó cue tée dàcuaha ñaha xii ñáiyu nchaa tnúhu

ní chídó tnùní ndíi Moisés! Chi quíde-ndo datná quidé ñá tée tàxi tnuní ñá vehe, chi nacadí-dé te ñá dáñá-dè quíhu ñáiyu te ni mèe-dé ñá túú quíhu-dé. Te duca<sup>n</sup> sãtnahá-xi quíde-ndo, chi dàcuaha-ndo tnúhu Yá Ndiöxí te ñá túú cuíní-ndó quíndáá iní-ndó te ni ñá túú dànehé-ndó ñáiyu cuíní tnúhu-gã nàcuáa tàú-xi cunduu cuèndá naníhi tãhú-yu —càchí-gã xáha<sup>n</sup>-gã xii-dé.

53 Te òré ní ndee Jèsús vehe tée cùu fariséú-án, te cue tée dàcuaha ñaha xii ñáiyu nchaa tnúhu ní chídó tnùní ndíi Moisés, ndíhi cue tée cùu fariséú ní cudéé<sup>n</sup>-güedé núú-gã, te ní nguíta-güedé nándi sá xicá<sup>n</sup> tnúhú-güedé núú-gã cuèndá cuíní-güedé núú vá cuíta-gã ñá tnúhu càhá<sup>n</sup>-gã 54 cuèndá duca<sup>n</sup> ñíhi-güedé nàcuáa cada-güedé cacá<sup>n</sup> cuéchi-güedé cuèndá-gã.

## 12

*Jèsús càhá<sup>n</sup>-gã cuèndá cue tée dándahú méé-xí*

1 Te òré-án ñá tacá titní mìl ñáiyu núú ndécú Jèsús, te súuní dicó ngõnchihi tnàha-ná-yu. Te ndèdòho-yu ní xáha<sup>n</sup> Jèsús xii cue tée xica cuu ndíhi-gã:

—Cada cuèndá-ndó vá cãncñicú<sup>n</sup> ni-hnu-ndo nàcuáa quíde cue tée cùu fariséú, chi cue tée-án ío dándahú-güedé méé-güedé sá quidé ndáá-güedé dico ñá ndáá sá quidé ndáá-güedé. 2 Te nchaa tnúhu sá cúu yùhu ni cuu vá cúu yùhu-gã, chi nchaa dacuítí sã quée tũu-xi núú ñáiyu. 3 Chi nchaa tnúhu càhá<sup>n</sup> dayuhu-ndo quée túu-xi núú chítú núú tàcá, te nchaa tnúhu càhá<sup>n</sup> méé-ndó vèhe-ndo dacuítí sã ñíhi ñáiyu tnúhu.

*Yá Ndiöxí xini ñúhu-xi yuhú-ó-gã (Mt. 10:26-31)*

4 'Te nchòhó cue tée ío váha tnàhá tnúhu ndíhi-í ná càchí tnúhu-í xii-ndo sã vá yùhú-ndó cuè ñáiyu cuèi na càhni ñàhá-yu xii-ndo, chi ñá-ni yiqui cùñú-ndó ndàcú-yu cahni-yu, te ñá túú ñágá ndacú-yu cada ñàhá-yu xii-ndo. 5 Te na càchí tnúhu-í xii-ndo sã Yá Ndiöxí tàú-ndó yùhú-ndó-gã, chi mee-gã ío cùnuu-gã, te ñá quíde-gã sã vá cùndècu-gã ñáiyu ñuyíú, te daquihí<sup>n</sup> ñàhá-gã xií-yu núú ùhú

núu ndàhú, núu xiá<sup>n</sup> càchí tnúhu-í xii-ndo sã Yáa-á<sup>n</sup> táu-ndó yùhú-ndó-gã.

<sup>6</sup> Te nchòhó xìní-ndó sã ndèé úhú<sup>n</sup> tnàhá tìlãá cùyãhu-di núu ùú díhú<sup>n</sup>, dico Yá Ndiöxí ñá túú cùnaa-gá ni ì<sup>n</sup>-güedi, chi nèhe cuendá ñáhã-gã xii-güedi. <sup>7</sup> Te nchòhó ndéé ì<sup>n</sup> ì<sup>n</sup> idi díquí-ndó yìndehu, núu xiá<sup>n</sup> càchí-í sã vã yùhú-ndó, chi cùnuu-gá-ndó dâcúxí tìlãá cuèi vâi vihi-güedi.

*Ñáyiu na dàtúu núu dàva-gã ñáyiu sã ndécú ndìhi-yu Xítóhó Jesucrìstú (Mt. 10:32-33; 12:32; 10:19-20)*

<sup>8</sup> Te na càchí tnúhu-í xii-ndo sã nùu na dàtúu-ndo nùú dàva-gã ñáyiu sã ndécú ndìhi ñaha-í xii-ndo. Te duca<sup>n</sup> te tnàhá yùhú Tée cùu ñaní tnáhã-ndó nchãa-ndo datúu-í núu nchãa cue espíritú xínú cuèchi núu Yá Ndiöxí sã nchòhó ndécú ndìhi ñaha-ndo xii-í. <sup>9</sup> Dico núu na cùñaha-ndo xii ñáyiu sã ñà túú ndècu ndìhi ñaha-ndo xii-í, te ñiu-ni duca<sup>n</sup> càda yùhú Tée cùu ñaní tnáhã-ndó nchãa-ndo, chi cùñaha-í xii cue espíritú xínú cuèchi núu Yá Ndiöxí sã ñà túú ndècu ndìhi ñaha-í xii-ndo.

<sup>10</sup> Te ndèdani càa ñáyiu na càhá<sup>n</sup> cuèhé cuendá yùhú Tée cùu ñaní tnáhã-ndó nchãa-ndo, te cada càhnu iní ñáhã Yá Ndiöxí xii-yu. Dico ñáyiu na càhá<sup>n</sup> cuèhé cuendá Espíritú Yá Ndiöxí, te ñáyiu-á<sup>n</sup> vã cadã càhnu iní ñáhã-gã xii-yu.

<sup>11</sup> Te òré ná càndeca ñaha-güedé xii-ndo quìhí<sup>n</sup> veñúhu, àdi núu cuè tée cùchiu<sup>n</sup>, te ni vã caní ìní-ndó nùu nása cunduu tnúhu cùñaha-ndo xii-güedé, te ni vã caní ìní-ndó nùu ná tnúhu nadànchocáva-ndo nùu ná tnúhu na cùñaha-güedé xii-ndo, <sup>12</sup> chi òré-nã te mee Espíritú Yá Ndiöxí dacàhu iní ñáhã-xí xii-ndo tnúhu cùñaha-ndo xii-güedé —càchí-gã xáha<sup>n</sup>-gã xii-güedé.

*Cuendá ì<sup>n</sup> tée cuica*

<sup>13</sup> Te ì<sup>n</sup> tée ñùhu tnahã tnuú ñáyiu-á<sup>n</sup> nì xáha<sup>n</sup>-dè xii Jèsús:

—Mèstrú, cùñaha xii ñaní-í sã ná chidava-dé sã nì dándõo tãtã-ndí cuu cuendá-ndí —càchí-dé xáha<sup>n</sup>-dè xii-gã.

<sup>14</sup> Te Jèsús ní xáha<sup>n</sup>-gã xii-dé:

—¿Te ná cuendá duca<sup>n</sup> càhá<sup>n</sup>-n? Te ñã díú chiu<sup>n</sup>-á<sup>n</sup> vèxi-í cada-í, chi ñã díú tée cùchiu<sup>n</sup> cuu-í —càchí-gã xáha<sup>n</sup>-gã xii-dé.

<sup>15</sup> Te xáha<sup>n</sup>-gã xii nchaa ñáyiu xíndecu-á<sup>n</sup>:

—Nchaa nchòhó ñáyiu ndèdõho nchaa tnúhu càhá<sup>n</sup>-í ìo váha cada cuendá-ndó, te vã caní ìní-ndó nãndi nducuu-ndo cùndecu ndìhi-ndo, chi cuèi vâi vihi na nihí-ndó cùndecu ndìhi-ndo, dico vã chindèe ñaha-xi cudíi-ndo cùndecu-ndo ñuyíú-a —càchí-gã xáha<sup>n</sup>-gã xii-yu.

<sup>16</sup> Te dãtnùní ní ngüita-gã caní-gã ì<sup>n</sup> cuendú nùu-yu cuendá tecú tnùnì-yu tnúhu-gã, te xáha<sup>n</sup>-gã:

—Ì<sup>n</sup> tée cuica sùúni nì cuu nchaa tatã ní xitu-dé núu ñùhú-dè. <sup>17</sup> Te ní ngüita-dé sání ìní-dé: “¿Te nása cada-í? Te ñã túú ndèé nataxúha-í nchaa sã nì xitu-í”, duha ní sani ìní-dé. <sup>18</sup> Te dãtnùní ní sãha váha tucu-dé cuendá nãcuãa cada-dé, te ní cachí-dé: “Duha na cùnduu, dangõyo-í yacá-í, te ndada càhnu-gã-í, te xití-xi nataxúha-í nchaandi túhú sã nì xitu-í, ndìhi nchaa dava-gã sã ndécú ndìhi-í. <sup>19</sup> Te sátã dúcã<sup>n</sup>, te cachí-í: Ío vâi sã ndécú ndìhi-í, te cudíi-xi cuèhé cuíã, te vitna ndetatú-í, te coho-í te caxi-í cada-í, te nãndi-gã cada-í cuendá cudíi ìní-í cundecu-í, duha quesaha-í”, càchí-dé. <sup>20</sup> Dico Yá Ndiöxí ní xáha<sup>n</sup>-gã xii-dé: “Yòhó, ñã túú nãndìhi sã sání ìní-n, chi yùhú càchí-í sã niú vitna cuú-n, te nchaa sã ndécú ndìhi-n ¿yoo cuu sã vãha xii-a<sup>n</sup>-í?”, càchí-gã xáha<sup>n</sup>-gã xii-dé. <sup>21</sup> Duha yãha nchaa ñáyiu nãndi sãni ìní-xi cundecu ndìhi-xi ñuyíú-a, dico ñáyiu-á<sup>n</sup> ìo ndàhú-yu chi ñã túú nã nduu táhú-yu núu Yá Ndiöxí cundecu ndìhi-yu —càchí Jèsús xáha<sup>n</sup>-gã xii-yu.

*Yá Ndiöxí xító-gã nchaa ñáyiu sãndãã iní ñáhã xii-gã*

*(Mt. 6:25-34)*

<sup>22</sup> Te ní xáha<sup>n</sup> Jèsús xii cue tée xica cuu ndìhi-gã:

—Te na càchí tnúhu-í xii-ndo sã vã ìo caní ìní-ndó nùu nása cundecu-ndo, àdi nása nihí-ndó sã cãxí-ndó, àdi nása nihí-ndó dõo cuihnu-ndo. <sup>23</sup> Chi cùnuu-gã mée-ndó dâcúxí sã nchító-ndó, te duca<sup>n</sup> yìqui cuñú-ndó cùnuu-gã-xi dâcúxí dõo sãcuìhnu-ndo. <sup>24</sup> Te chí cuãha cuendá nãcuãa quide cue tãcãcã, chi ni ñã túú chihí-güedi tatã cuu itú natahu-güedi te ni ñã túú ndèé nùtnñi yacã-güedi, te nihí-güedi xèxi-güedi, chi Yá Ndiöxí xító

ñaha-gá xii-güedi. ¡Te nchòhó cúnù-gá-ndó dàcúxí nchàa cue quiti ndava! <sup>25</sup> Te cuèi nándi sá sání vñhi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuèdicó ì<sup>n</sup> yiqui-gã. <sup>26</sup> Te núu ni sã lúhá xĩã<sup>n</sup> ñá ndácú-ndó càda-ndo, ¿te ná cuendá ío sãni iní-ndó cuendá nchaa sá cuini-ndó nihí-ndó cùndecu ndihí-ndo?

<sup>27</sup> Te chí cãdá cuendá nacuáa sãhnu ì<sup>n</sup> tnu itá, chí ni ñá túú quide chiu<sup>n</sup>-xi, te ni ñá túú quèhe<sup>n</sup>-xi idi. Te na cãchí tnúhu-í xii-ndo sã ndĩi Salòmón ío vii ní cãa nchaa sã ní xíndecu ndihí ndíi, dico vii-gã tucu cãa nchaa itá dàcúxí nchàa sã ní xíndecu ndihí ndíi. <sup>28</sup> Te cùhú sã ío vitna tnaa-ni cùdíi-xi te sãhmi-yu, te cuèi duca<sup>n</sup> dico ío vii càdúha Yá Ndiòxí nchaa cùhú-ã<sup>n</sup>. ¡Te nchòhó ío cùnùu-ndo dàcúxí nchàa cùhú-ã<sup>n</sup>, núu xĩã<sup>n</sup> ío xito ñaha-gá xii-ndo, te dicó yica cùu iní-ndó sãndáá iní-ndó-gã! <sup>29</sup> Te vá ío canchicú<sup>n</sup> nihnu-ndo sã cóhó sã cãxí-ndó, te ni vã dándihú-ndó iní-ndó nõu nása cada-ndo nihí-ndó. <sup>30</sup> Chi nchaa ñáyiu ñá túú sãndáá iní ñáhá xii Yá Ndiòxí duca<sup>n</sup> mée-ni sã cóhó sã cãxí-yu xica nchicú<sup>n</sup> nihnú-yu. Dico mee Tãtã-ó Dütú Ndiòxí sa naha-gá nándi cùu sã xíní ñuhu-ndo, te taxi-gã. <sup>31</sup> Te cada-ndo nchàa nacuáa cãhá<sup>n</sup> Yã Ndiòxí Yaa yíndaha ñaha xii-ndo, te duca<sup>n</sup> te taxi-gã nchaa sã xíní ñuhu-ndo.

*Cuendá sã vãha nduu táhú-ó nõú Yã Ndiòxí*  
(Mt. 6:19-21)

<sup>32</sup> Te vá yùhú nchòhó cue tée ndècu ndihí-í cuèi ío sacú-ndó, chí Tãtã-ó Dütú Ndiòxí ní cachí-gã sã ndúú táhú-ndó cùndecu-ndo núu ndécú-gã taxi tnùní-ndó tnáhá-ndó. <sup>33</sup> Te chí dicó nchàa sã ndécú ndihí-ndo, te chí cuãha nchaa ñáyiu ndàhú díhú<sup>n</sup>-ndó ñáyiu xini ñuhu, te cada váha-ndo cùndecu-ndo, te duca<sup>n</sup> te nduu táhú-ndó sã ío-gã váha núu Yã Ndiòxí cùndecu ndihí-ndo, te xĩã<sup>n</sup> vá cúú tühú tnáhí-gã-xi, te ni vã ndíhí nihnu-gã-xi, te ni ñadúhú vã ndácú-güedë duhu-güedë, te ni tiquidi vá quée-dí. <sup>34</sup> Te núu xĩã<sup>n</sup> cúú cuendá-ndó ñá, te ñu-ni xĩã<sup>n</sup> ñúhú iní-ndó, á<sup>n</sup> te núu mee-ni sã ndécú ñùyíú-a ndècu ndihí-ndo, te ñu-ni nchaa xĩã<sup>n</sup> ñúhú iní-ndó.

*Xini ñuhu-xi quihí iní-ó cùndecu-o*

<sup>35-36</sup> Te ío quihí iní-ndó cùndecu-ndo, te cada-ndo dàtná quidé dàva cue tée xínu cuechi sacùndecu túha-güedë cuèi nání òré-á<sup>n</sup> ndétú-güedë patróó<sup>n</sup>-güedë ná òré nasáá-dé sã cuáhá<sup>n</sup>-dé vico tnãndaha. Te núu niú te sa cúu cáyú-ni ñuhú-güedë sã cùndetu ñaha-güedë, chí òré ná nasáá-dé dacãsa<sup>n</sup>-dé yuyèhe, te ndíhí-ni nacaá<sup>n</sup>-güedë ndíhu-dé. <sup>37</sup> Te váha táhú nchaa cue tée xínu cuechi-á<sup>n</sup>, chí ndècu túha-ni-güedë ndétú-güedë ndéé òré ní nasáá patróó<sup>n</sup>-güedë, te na cãchí tnúhu ndáá-í xii-ndo sã òré ná nasáá patróó<sup>n</sup>-güedë-á<sup>n</sup> te chihi ñaha-dë mèsá xii-güedë, te ndacá<sup>n</sup> ndee-dé dóo níhnú-dë núu yíquí-dë, te ngüita-dé caní-dé cóhó-güedë cuendá caxi-güedë. <sup>38</sup> Te ñu-ni duca<sup>n</sup> càda-dé cuèi dava niú, àdi tacuìhndá-gã, te núu ñá túú xidí-güedë òré nasáá-dé, te cue tée xínu cuechi-á<sup>n</sup> ío váha tnáhá-güedë. <sup>39</sup> Te núu dicó ì<sup>n</sup> tée cùu xitohó ì<sup>n</sup> vehe xíní-dé ná òré quíhu ñadúhú vehe-dé ñá, te quihí iní-dé te vá cùdú-dé, te vá dáñá-dë nacaá<sup>n</sup>-güedë yuyèhe-dé quíhu-güedë duhu-güedë. <sup>40</sup> Te nchòhó tucu nchaa-ni nduu quihí iní-ndó cùndecu túha-ndo, chí na cuáhá<sup>n</sup> nduu ñá túú yihí iní-ndó, te quixi tucu yúhú Tée cùu ñaní tnáhá-ndó nchàa-ndo —cachí-gã xáha<sup>n</sup>-gã xii-güedë.

*Cue tée quide ndáá ndihí cue tée ñá túú quide ndáá*  
(Mt. 24:45-51)

<sup>41</sup> Te té Pèlú ní xicá<sup>n</sup> tnúhú-dë núu Jèsús, te xãha<sup>n</sup>-dë:

—Mèstrú, ¿te tnúhu ní cãhá<sup>n</sup>-n-ã<sup>n</sup> cùu-xi mee-ni cuendá nchúhú ã<sup>n</sup> cuendá nchaa ñáyiu? —cãchí-dé xãha<sup>n</sup>-dë xii-gã.

<sup>42</sup> Te Jèsús ní xáha<sup>n</sup>-gã:

—Cãhá<sup>n</sup>-í cuendá ñáyiu quide váha dàtná quidé ì<sup>n</sup> tée tàxi tnuní ñáhá xii cue ñáyiu xínu cuechi ndecu vehe patróó<sup>n</sup>-xi, chí tée-á<sup>n</sup> ío váha tècú tnùní-dé, te quide-dé nchaa nacuáa cãhá<sup>n</sup> patróó<sup>n</sup>-dë, te dàcaxi-dé cue ñáyiu xínu cuechi oré tàú-xi caxí-yu.

<sup>43</sup> Te núu duca<sup>n</sup> quide váha tée tàxi tnuní ñáhá xii cue ñáyiu xínu cuechi-á<sup>n</sup> ñá, te ío váha tnáhá-dé òré nasáá patróó<sup>n</sup>-dë nõu ndéé cuáhá<sup>n</sup>-dé. <sup>44</sup> Te na cãchí tnúhu ndáá-í xii-ndo sã tée quide ndáá táxi tnùní ñáhá



xii cue ñáyiú xìnu cuechi-án cũñaha-nă pàtróón-dě xii-dé sá ncháándì túhú-nă sá ndécú ndìhi-dé quindaha-dě. <sup>45</sup> Dico núu tée tàxi tnuní ñáhá xii cue ñáyiú xìnu cuechi-án ná càni iní-dé sá cùyàa patróón-dě vá násàá ndìhi-ni-dé ñá, te ngüíta-dé cani-dé nchaa ñáyiú xìnu cuechi, cuèi tée cuèi ñadìhí, te ngüíta-dé caxi-dé coho-dé, te dàxìni-dé méé-dě, <sup>46</sup> te nduu ñà túú yìhi iní-dé te nasáá pàtróón-dě, te dandòho ñaha patróón-dě-án xii-dé, te daquìhí ñáhá-dě xii-dé núú ndécú ñáyiú ñá túú ní quide ndáá.

<sup>47</sup> Te dava cue tée xìnu cuechi xiní-güedé nàcuáa cuiní pàtróón-güedě cada-güedé te ñá túú quide-güedé, te ni ñà túú cuiní-güedé cundecu túha-güedé cundetu-güedé pàtróón-güedě, te nchaa cue tée duca<sup>n</sup> xiquide dandòho ñaha patróón-güedě, chi ñáni vîhi-güedé. <sup>48</sup> Te dava cue tée xìnu cuechi ñá túú xiní-güedé nàcuáa cuiní pàtróón-güedě cada-güedé, te ní quide-güedé sá neñuú-güedé ñá sá ñà túú tàú-güedé cada-güedé ñá, te cue tée-án sacú-gá dandòho ñaha patróón-güedě, chi sacú-gá ñáni-güedé. Te ñáyiú cùtnuní iní-xi nàcuáa cuiní Yá Ndiöxí cada-yu, te ñu-ni duca<sup>n</sup> tàú-yu cada-yu nàcuáa cuiní-gá. Te ñáyiú vai-gá tècú tnùnì nàcuáa càhá<sup>n</sup>-gá, te ñu-ni duca<sup>n</sup> vai nchaa sá càhá<sup>n</sup>-gá tàú-yu cada-yu.

*Ñá túú cùu ñáyiú*  
(Mt. 10:34-36)

<sup>49</sup> Te yúhú véxi-í ñuyíú-a cuendá cutnùnì iní ñáyiú nàcuáa cada ñaha Yá Ndiöxí xii-yu, jte cuiní-í sá ndìhi-ni cada-gá nàcuáa sàni iní-gá! <sup>50</sup> Te yúhú ío vai tnúhu sàni iní-í, jchi sáá nduu te ío ndoho-í, te ñu-ni xíá<sup>n</sup> cuhu<sup>n</sup> iní-í ndéé ná sàá nduu dùca<sup>n</sup> yáha-í! <sup>51</sup> Te nchòhó vá cání iní-ndó sá yúhú véxi-í ñuyíú-a te cundecu ndìhi tnàha váha-ni ñáyiú, te ñáhá chi da ngüíta-yu vá cúú ñánuú-yu cundecú-yu. <sup>52</sup> Te ndéé není vitna ngüíta ñáyiú vá cúú ñánuú-yu cundecú-yu, te na càda-o cuendá te núu úhú<sup>n</sup> ñáyiú xñdecu ñá-ni vèhe, te vá cúú ñánuu-gá-yu, chi únì-yu ndatnúhu-yu te nàá-yu ndìhi úú-gá-yu, àdi ñáyiú úú-án ndatnúhu-yu te nàá-yu

ndìhi ñáyiú únì-án. <sup>53</sup> Te dava cue tée cùu tátá vá cúú ñánuu-gá-güedé ndìhi déhe ducu<sup>n</sup>-güedé, te ni dáva cue ñáyiú cùu náná vá cúú ñánuu-gá-yu ndìhi déhe yòcò-yu, te ni sánu-yu vá cúú ñánuu ndìhi-gá-yu. Te duca<sup>n</sup> càdá-yu chi davá-yu quindáá iní ñáhá-yu xii-í, te davá-yu vá quindáá iní ñáhá-yu —càchí-gá xáha<sup>n</sup>-gá xii-güedé.

*Ñáyiú cùtnuní iní-xi nàcuáa quide-xi ñuyíú ndìhi andìu*

(Mt. 16:1-4; Mr. 8:11-13)

<sup>54</sup> Te Jèsús ní xáha<sup>n</sup>-gá xii nchaa ñáyiú xñdecu-án:

—Te nchòhó òré ndéhé-ndó ndànchita vico ndàa xio quée nchíanchii, te càchí-ndó sá cúú<sup>n</sup> dàú, te ñu duca<sup>n</sup> ndisa quide-xi. <sup>55</sup> Te òré ná quène táchí ndàa xio datni nacuáa quène nchíanchii, te càchí-ndó sá ío cada ihni-xi, te ñu duca<sup>n</sup> ndisa quide-xi. <sup>56</sup> Te nchòhó ío váha cùtnuní iní-ndó nàcuáa quide-xi andìu ndìhi ñuyíú, jte ná cuendá quidé-ní-ndó sá ñá tècú tnùnì-ndó nàcuáa quide Yá Ndiöxí vitna? Te sá dúcá<sup>n</sup> quide-ndo-án ío dandahú-ndó mèe-ndo sá ío váha cùtnuní iní-ndó, chi ñá ndáá sá cùtnuní iní-ndó.

*Nducu-o nàcuáa nucúndecu ndìhi váha-o ñáyiú cùu úhú iní ñáhá*

(Mt. 5:25-26)

<sup>57</sup> Te nchòhó, jná cuendá ñá túú dandixi túu-ndo iní-ndó càda-ndo mee-ni sá váha sá tàú-ndó càda-ndo-í? <sup>58</sup> Te núu ío ñá-ndo ní sacá<sup>n</sup> cuèchi ñáyiú cuendá-ndó cuendá ñá sá ní quide-ndo, te cuáhá<sup>n</sup>-ndó ndìhí-yu núú tée cùchiu<sup>n</sup>, te ñini ñùhu-ndo ndìhí-yu ichi, te nducu-ndo nàcuáa càda-ndo nàcáhá<sup>n</sup> cáhnú iní tnáhá-ndó ndìhí-yu cuendá sá vâ cándèca ñaha-gá-yu quíhí<sup>n</sup> núú tée cùchiu<sup>n</sup>, chi núu duca<sup>n</sup> na càdá-yu te tée cùchiu<sup>n</sup>-án nachihí ñaha-dě ndaha cue tée cùu poleciá, te cue tée-án chihí ñaha-güedě vecaá xii-ndo. <sup>59</sup> Te na càchí tnúhu-í xii-ndo sá núu na ngáva-ndo vecaá, te vá cãcu-ndo te núu vá nãchãhu-ndo nchàa sá tàú-ndó —càchí-gá xáha<sup>n</sup>-gá xii-yu.

## 13

*Xìni ñuhu-xi natuha-o ichi Yá Ndiöxí*

<sup>1</sup> Te ñu-ni òré-án ní ngúnutnì ñá ñáyiú núú Jèsús cání-yu cuendú núú-gá nàcuáa



ní quide ñaha té Pilatú xii cue tée distritú Galileá cue tée ní sahani quiti nduu táhú Yá Ndiöxí, te mei òré ní sahani-güedé cue quiti-án ní táuchíú<sup>n</sup> të Pilatú cue sandádú-dé ní sahani-güedé cue tée Galileá-án, te ní xica níñi-güedé núú ñúhú ndìhi níñi cue quiti-án, te ní nadacánuu-xi. <sup>2</sup> Te Jèsús ní xáha<sup>n</sup>-gã xií-yu:

—Te núu nchòhó sání ìní-ndó sã sà dúcá<sup>n</sup> ñi yáha cue tée distritú Galileá-án te cùu-güedé cue tée ndècu vihi-gá cuèchi-xi dàcúúxí cuè tée ñuú-güedé ñá. <sup>3</sup> Te na càchí tñúhu-í xii-ndo sã ñáhá. Te núu nchòhó vá ndíxí cuèchi ìní-ndó cuèndá nchaa sá cuèhé sá dúhá quide-ndo ndecu-ndo ña, te tñáhá nchaa nchòhó cuíta nihnu-ndo te núu vá nátni-ndo ichi Yá Ndiöxí. <sup>4</sup> Te núu nchòhó sání ìní-ndó sã ñáiyu sáhú<sup>n</sup> úní ní xíhí ní táú ñáhá vèhe ducú<sup>n</sup> Silòé ío-gá ndécú cuèchi-yu dàcúúxí nchaa ñáiyu xíndecu ñuú Jerusàlén ñá, <sup>5</sup> te na càchí tñúhu tucu-í xii-ndo sã ñáhá. Te núu nchòhó vá ndíxí cuèchi ìní-ndó cuèndá nchaa sá cuèhé sá dúhá quide-ndo ndecu-ndo ña, te tñáhá nchaa nchòhó cuíta nihnu-ndo te núu vá nátni-ndo ichi Yá Ndiöxí —càchí-gá xáha<sup>n</sup>-gã xií-yu.

### *Yutnu ngüxí ñá túú cùu<sup>n</sup> sávidí-xi*

<sup>6</sup> Te Jèsús ní cani tucu-gá ñi cuèndú núu-yu nàcuáa tecú tñúni-yu tñúhu-gá, te xáha<sup>n</sup>-gã:

—Ñi<sup>n</sup> tée nùtni<sup>n</sup> ñi yutnu ngüxí núú ñúhú-dé, te cuáhá<sup>n</sup> ndéhé-dé núu ní cuu<sup>n</sup> sávidí-xi ní cùu, te ní ñi<sup>n</sup> ñá túú ní cùu<sup>n</sup>. <sup>7</sup> Te ní xáha<sup>n</sup> tèe-án xii tée ndéé ñuhu-dé: “Ñaha-n sá vitna ní cuu úní cuíá quíxí còto-í yutnu ngüxí-a te ñá túú xìní-í ní ñi<sup>n</sup> sávidí-xi. Te quehdé-n vitna, chi àú<sup>n</sup> nã cuu nùtni<sup>n</sup>-xi quide tneñu-xi núú ñuhu-án”, càchí-dé xáha<sup>n</sup>-dë xii tée ndéé ñuhu-dé-án. <sup>8</sup> Te tée ndéé ñuhu-án ní xáha<sup>n</sup>-dë: “Pàtróón, dañá na cuñhu-xi cuíá vitna-ná, te na nàdatayá-í ñuhu núú sàhá-xi, te chihi-í sahán. <sup>9</sup> Te duca<sup>n</sup> te cudana cuu<sup>n</sup> sávidí-xi, àdi núú ñá túú ní cùu<sup>n</sup> sávidí-xi ña te téhdé-nã-xi”, càchí-dé xáha<sup>n</sup>-dë xii pàtróón-dë —càchí-gá xáha<sup>n</sup>-gã xií-yu.

*Jèsús quidé tãtña-gá ñi<sup>n</sup> ñadìhí ní nduu cueyi sãtá-xi nduu ndètátú ñáiyu*

<sup>10</sup> Te ñi<sup>n</sup> xito cùu-xi nduu ndetátú ñáiyu, te yìhi Jèsús ñi<sup>n</sup> veñúhu dànehé-gá ñáiyu.

<sup>11</sup> Te xíá<sup>n</sup> ndécú ñi<sup>n</sup> ñadìhí ní cuu sáhú<sup>n</sup> úní cuíá sã cùhú-a<sup>n</sup> yìhi ñaha espíritú cùndìhi yucu ñávãha xii-a<sup>n</sup>, te xíá<sup>n</sup> ní ndada cueyi-xi sãtá-a<sup>n</sup>, te ñá dáñá-gã-xi núcúnutni<sup>n</sup> ndáá-a<sup>n</sup>. <sup>12</sup> Te òré ní xiní ñáhá Jèsús xii-a<sup>n</sup> te ní cana ñaha-gã, te xáha<sup>n</sup>-gã:

—Yòhó ñaha cùhú, ndúha-n cuèhé tñáhá-n —càchí-gá xáha<sup>n</sup>-gã xii-a<sup>n</sup>.

<sup>13</sup> Te ní dácáa-gá ndaha-gá ní tendaha ñaha-gá xii-a<sup>n</sup>, te òré-ni-án ní ndúha-a<sup>n</sup> te ní núcúnutni<sup>n</sup> ndáá-a<sup>n</sup>, te ní ngüíta-a<sup>n</sup> ní càchí-a<sup>n</sup> sá ío càhnu cuu Yá Ndiöxí. <sup>14</sup> Dico tée tàxi tñuni veñúhu ní cudéé<sup>n</sup>-dë sá dúcá<sup>n</sup> ñi quide Jèsús ní quide tãtña-gá ñaha cùhú-án nduu ndètátú-yu, te ní xáha<sup>n</sup>-dë xií-yu:

—Ío ñúú nduu tàú-ó càda chiu<sup>n</sup>-o, te ndédani càa nduu-án quixi-ndo cùtãtña-ndo, dico ñá díú nduu cuu-xi nduu ndetátú-ó —càchí-dé xáha<sup>n</sup>-dë xií-yu.

<sup>15</sup> Te ní xáha<sup>n</sup> Jèsús:

—Nchòhó chi ío dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedé ndute nduu ndetátú-ó ã<sup>n</sup>? <sup>16</sup> Te ñadìhí-a cùu-a<sup>n</sup> ñaní tñáhá ndi<sup>n</sup> Àbrahám, te dicó-ni sá yùcu ñávãha quide duha cùhú-a<sup>n</sup> ní cuu sáhú<sup>n</sup> úní cuíá, ¿te náa ñá túú xìni ñuhu-xi cùtãtña-a<sup>n</sup> cuèi cùu-xi nduu ndetátú-ó ã<sup>n</sup>? —càchí-gá xáha<sup>n</sup>-gã xii-dé.

<sup>17</sup> Te sá dúcá<sup>n</sup> ñi càhán Jèsús, núu nchaa cue tée cùu úhú ìní ñáhá xì-gá ní cucaha<sup>n</sup> núu-güedé, dico nchaa dava-gá ñáiyu chi xícudí<sup>n</sup> ìní-yu xíndéhë-yu nchaa sá vã yòo tñáhí ndàcu cada quide-gá.

### *Cuèndá ndíquí<sup>n</sup> yutnu nàni mostázá (Mt. 13:31-32; Mr. 4:30-32)*

<sup>18</sup> Te ní xáha<sup>n</sup>-gã xií-yu:

—Na càni-í ñi<sup>n</sup> cuèndú núu-ndó nàcuáa tecú tñúni-ndó nàcuáa cada-xi òré ndi<sup>n</sup> ndaha ñaha Yá Ndiöxí xii-ndo. <sup>19</sup> ñi<sup>n</sup> tée ní quehe<sup>n</sup>-dë ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dë núú ñúhú-dé te ní xínu-xi, te ní sahnú-xi ní cuu dúcú<sup>n</sup>-xi, te cue quiti ndàva núú tàchí cãdúha-güedé tacá-güedé núú dìté-xi —càchí-gá xáha<sup>n</sup>-gã xií-yu.

*Nàcuáa quide levadurá**(Mt. 13:33)*

<sup>20</sup> Te ní xáha<sup>n</sup> tucu Jesús xii-yu:

—Te na càchí tnúhu tucu-í xii-ndo nàcuáa cada tucu Yá Ndiöxí òré ndíhu ndaha ñàha-gá xii-ndo. <sup>21</sup> Ì<sup>n</sup> ñadìhí ní quehe<sup>n</sup>-a<sup>n</sup> levadurá ní chihi-a<sup>n</sup> úní arròbá yuchi triù, te levadurá-á<sup>n</sup> ñí quide-xi ní ndaa ñihí yusa<sup>n</sup>-á<sup>n</sup> —càchí-gá xáha<sup>n</sup>-gã xii-yu.

*Yuyèhe cuiñi**(Mt. 7:13-14, 21-23)*

<sup>22</sup> Te ichi ñuhu Jesús cuáhá<sup>n</sup>-gá ñuu Jerusàlén, te nchaa ñuu náhnú, ndìhi nchaa ñuu lìhli ta yáha-gá duca<sup>n</sup> ta dànehé-gá ñáyiu tnúhu-gá cuáhá<sup>n</sup>. <sup>23</sup> Te ì<sup>n</sup> ñuu-á<sup>n</sup> ñí xáha<sup>n</sup> ì<sup>n</sup> téé xii-gá:

—Mèstrú, cuíní-í cacadá<sup>n</sup> tnúhu-í ì<sup>n</sup> tnúhu núú-n, ¿ndáá sá ïo sacú ñáyiu nàníhí tàhú-á<sup>n</sup>? —càchí-dé xáha<sup>n</sup>-dẽ xii-gá.

Te Jèsús ní xáha<sup>n</sup>-gã xii-dé ndìhi nchaa ñáyiu:

<sup>24</sup> —Cada-ndo sã nánihí tàhú-ndó, te tnì-ndo ichi Yá Ndiöxí, te ichi-gá-á<sup>n</sup> cúú-xí dàtná ì<sup>n</sup> yuyèhe cuiñi, te càchí tnúhu-í xii-ndo sã ïo cuéhé ñáyiu cachí iní-yu quíhu-yu yuyèhe cuiñi-á<sup>n</sup> dico vá ndácũ-yu.

<sup>25</sup> Te na càni tucu-í ingá cuèndú núú-ndó nàcuáa tecú tnùní-ndó tnúhu càhá<sup>n</sup>-í. Te òré ná ndàcuiñi téé cùu xítóhó vehe, te nacadí-dé yuyèhe, te nchaa nchòhó ñáyiu na quèndóo quehé dacàsa<sup>n</sup>-ndo yuyèhe, te quesaha-ndo cũñaha-ndo xii-dé: “Tátá, nacaá<sup>n</sup> yuyèhe na quíhu-ndí”, quesaha-ndo cũñaha-ndo xii-dé. Dico téé cùu xítóhó vehe-á<sup>n</sup> cũñaha-dẽ xii-ndo: “Ñá túú xìní-í nchòhó ndèé ñáyiu cùu-ndo”, duha cúñaha-dẽ xii-ndo. <sup>26</sup> Te dàtnùní ngúita nchòhó cúñaha-ndo xii-dé: “Nchúhú ní xexi ndìhi ñaha-ndí, te ní xihí ndìhi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cũñaha-ndo xii-dé.

<sup>27</sup> Dico cachí tucu téé cùu xítóhó vehe-á<sup>n</sup> cũñaha-dẽ xii-ndo: “Sa ní cachí-í sá ñà túú xìní-í ndèé ñáyiu cùu-ndo. Te chí xócuñi nchòhó ñáyiu ndècu ichi cuehé ichi duha núú ndècu-í”, quesaha-dẽ cúñaha-dẽ xii-ndo. <sup>28</sup> Te na sãá nduu dùca<sup>n</sup> cada-xi te quini-ndó tẽ Abrahám, ndìhi té Isàác, ndìhi té Jàcób, ndìhi nchaa cue téé ní xóo càhá<sup>n</sup> tnúhu Yá Ndiöxí, te nchaa cue téé-á<sup>n</sup>

ndécú-güedẽ núú ndécú-gã táxí tnùní-gá, te nchòhó quee tíhú-ndó núú-gã sá tnúhu ñá túú ní cuíní cada ndáá, te dàvá-á<sup>n</sup> ndàhyú-ndó te cuu rúhñú-ñá núhu-ndo sã sàtú iní-ndó cuèndá sá ndóhó-ndó. <sup>29</sup> Te dàvá-á<sup>n</sup> quíhu nchaa ñáyiu ndi cùmí xio ñuyúú núú ndécú Yá Ndiöxí táxí tnùní-gá caxí-yu ndìhi-gá, te cundecú-yu ndìhi-gá. <sup>30</sup> Te dava ñáyiu nchìcú<sup>n</sup> ñá túú cùnuu ndecu ichi Yá Ndiöxí vitna, ñáyiu-á<sup>n</sup> sãá nduu te ío cunúú-yu. Te dava ñáyiu cùnuu ndecu ichi-gá vitna, ñáyiu-á<sup>n</sup> sãá nduu te vá ïo-gá cunúú-yu —càchí-gá xáha<sup>n</sup>-gã xii-yu.

*Jèsús ndàhyú-gá cuèndá ñáyiu ñuu Jerusàlén**(Mt. 23:37-39)*

<sup>31</sup> Te diu-ni nduu-á<sup>n</sup> ñí quexìo ì<sup>n</sup> úú cue téé cùu fariséu núú ndécú-gã, te xáha<sup>n</sup>-güedẽ xii-gá:

—Quee-n ìha quíhí<sup>n</sup>-n núu ndèé quíhí<sup>n</sup>-n, chí téé cùu Herodés cuíní-dé cahni ñaha-dẽ xii-n —càchí-güedẽ xáha<sup>n</sup>-güedẽ xii-gá.

<sup>32</sup> Te Jèsús ní xáha<sup>n</sup>-gã:

—Chí cuáhá<sup>n</sup> te cúñaha-ndo xii téé nèhe mañá-á<sup>n</sup> sã càchí-í sá ná cùndedóho váha-dé ì<sup>n</sup> tnúhu càhá<sup>n</sup>-í, chí cùmání ì<sup>n</sup> úú-gá nduu cundecu-í xocàni-í nchaa espíritú cùndìhi yucu ñávãha yìhi ñaha xii ñáyiu, te cada tátna-í nchaa dava-gá ñáyiu cùhú, te duca<sup>n</sup> te ndìhi chiu<sup>n</sup>-í, duha cúñaha-ndo xii-dé.

<sup>33</sup> Dico dacuití sã cùhù<sup>n</sup>-í ichi ì<sup>n</sup> úú-gá nduu, te duca<sup>n</sup> te sãá-í núú quíhí<sup>n</sup>-í, chí vá cúú tnàhí cuú ì<sup>n</sup> téé càhá<sup>n</sup> tnúhu Yá Ndiöxí ingá ñuu, chí mei ñuu Jerusàlén cuú-güedẽ —càchí-gá xáha<sup>n</sup>-gã xii-güedẽ.

<sup>34</sup> Te ní xáha<sup>n</sup>-gã xii ñáyiu ñuu Jerusàlén:

—Nchòhó chí sàhni-ndo nchaa cue téé càhá<sup>n</sup> tnúhu Yá Ndiöxí, cue téé ní tendaha-gã véxi, te mee-ni ndìhi yúú sàhni-ndó-güedẽ. ¿Te titní xito ní cuíní-í nadatàcá ñàhà-í xii-ndo dàtná nádàtacá ì<sup>n</sup> nchuxi cuè déhe-di sàquihí-güedè xití ndíxí<sup>n</sup>-di, dico ñá ní cuíní-ndó, te duca<sup>n</sup>-ni sàni iní-í ndéé vitna! <sup>35</sup> Te chí cùndedóho tucu ingá tnúhu na càhá<sup>n</sup>-í-a: Yá Ndiöxí dañá ñàha-gá xii-ndo. Te na càchí tnúhu tucu-í xii-ndo sã vã quini ñàhá-gã-ndó xii-í, dico sãá nduu te quini ñàhá tucu-ndo, te nduu-á<sup>n</sup> cachí-ndó sã ïo càhnu cuu yúhú

Yaá ní tendaha Dütú Ndiöxí véxi ñuyíu-a —càchí-gá xáha<sup>n</sup>-gã xií-yu.

## 14

### *Jèsús quidé tãtna-gá ì<sup>n</sup> téé ñùhu cuiñu*

<sup>1</sup> Te duha ní cuu ì<sup>n</sup> nduu, nduu ndètatú ñáyíu chi ì<sup>n</sup> téé cùu fariséú cùnùu ní cáhá<sup>n</sup>-dé Jèsús vehe-dé caxi-gá, te cue téé ndècu vehe-dé ndéhé-güedé nùu nása cada-gá. <sup>2</sup> Te xíá<sup>n</sup> ndécú tnàhá ì<sup>n</sup> téé cùhú ñúhú-dé cuiñu. <sup>3</sup> Te Jèsús ní xíca<sup>n</sup> tnúhú-gã núu cuè téé dàcuaha ñaha xii ñáyíu nchaa tnúhu ní chídó tnùní ndí Moisés, ndihí núu cuè téé cùu fariséú, te xáha<sup>n</sup>-gã:

—¿Cuu cada tãtna-o ì<sup>n</sup> ñáyíu cùhú nduu ndètatú-ó ã<sup>n</sup> ñáhá? —càchí-gá xáha<sup>n</sup>-gã xii-güedé.

<sup>4</sup> Dico cue téé-á<sup>n</sup> ñà túú tnàhí ni cáhá<sup>n</sup>-güedé. Te ní dácaá-gá ndaha-gá ní tendaha-gã téé cùhú-á<sup>n</sup> ní quide tãtna ñaha-gã xii-dé, te ní xáha<sup>n</sup>-gã sá ná nùhú-dé vehe-dé. <sup>5</sup> Te ní xíca<sup>n</sup> tnúhú-gã núu nchaa cue téé-á<sup>n</sup>, te xáha<sup>n</sup>-gã:

—¿Te núu nchòhó ná ngáúñihu ì<sup>n</sup> búrru-ndo àdi ì<sup>n</sup> ndicutu-ndo déhvá, te vá ná tàva ndihí-ni-ndo-dí cuèi cùu-xi nduu ndetatu-ndó-ã<sup>n</sup>? —càchí-gá xáha<sup>n</sup>-gã xii-güedé.

<sup>6</sup> Te ñá túú ní ñihí-güedé tnúhu na dànocháva-güedé.

### *Ñáyíu càhá<sup>n</sup>-yu quíhí<sup>n</sup> vico tnãndaha*

<sup>7</sup> Te ndèhe Jèsús nãcuáa xĩquide nchaa ñáyíu ndècu vico sá sũúni ní nacáxi-yu xilé sácõo nchihi cue téé cùnuu-gá conchihí-yu òré cuánguñu-yu mèsá caxí-yu, núu ní xáha<sup>n</sup>-gã xií-yu:

<sup>8</sup> —Òré ná càhá<sup>n</sup> ñáhá ì<sup>n</sup> ñáyíu xii-ndo ì<sup>n</sup> vico tnãndaha, te vá cóo-ndó nùu xilé sácõo cue téé cùnuu-gá, chí núu duca<sup>n</sup> na càda-ndo, te cudana quexio dava-gá ñáyíu cùnuu-gá dàcúxí nchòhó. <sup>9</sup> Te ñáyíu ní cáhá<sup>n</sup> ñáhá xii-ndo-á<sup>n</sup> quixí-yu te cúñahá-yu xii-ndo: “Chí cuãñaha xilé núcõo nchihi-ndo-ã<sup>n</sup> ná cõnchihi ñáyíu ní quexio-a”, quesàhá-yu cúñahá-yu xii-ndo. Te cuñí-ndó ñáhá cuèi cùcaha<sup>n</sup> núu-ndó ndàcuñí-ndó quíhí<sup>n</sup>-ndó ngõo-ndo nùu xilé xĩnutnĩ ndéé núu ní ndihí-ná ndàa sátá-xi. <sup>10</sup> Te yúhú càchí-í sá òré ná càhá<sup>n</sup> ñáhá-yu

xii-ndo, te ngõo-ndo nùu xilé xĩnutnĩ ndéé núu ní ndihí-ná ndàa sátá-xi chí cuendá òré ná quèxio ñáyíu ní cáhá<sup>n</sup> ñáhá xii-ndo, te cúñahá-yu xii-ndo: “Nchòhó cue ñáyíu càhá<sup>n</sup> ndihí-í, chí yãha núu xilé sácõo cue téé cùnuu-gá coo-ndo”, duha cúñahá-yu xii-ndo. Te duca<sup>n</sup> te cada nínu ñaha nchaa ñáyíu yìhi ndihí-ndo mesá. <sup>11</sup> Te nchaa ñáyíu na càda nínu mee-xi, te ñáyíu-á<sup>n</sup> ñà túú cùu nínu-yu, te nchaa ñáyíu ñá túú quide nínu mee-xi, ñáyíu-á<sup>n</sup> cúu ñnu-yu —càchí-gá xáha<sup>n</sup>-gã xií-yu.

<sup>12</sup> Te dàtnùní ní xáha<sup>n</sup>-gã xii téé ní cáhá<sup>n</sup> ñáhá xii-gá:

—Te yòhó òré cuñí-n càda-n ì<sup>n</sup> vico, te vá càhá<sup>n</sup>-n mèe-ni cue téé càhá<sup>n</sup> ndihí-n, ní cuè ñaní-n, ní cuè ñáyíu cùu ñaní tnàhá-n, ní cuè ñáyíu cuica ndècu yatní ndihí-n, chí ñáyíu-á<sup>n</sup> duca<sup>n</sup> càdá-yu ì<sup>n</sup> nduu cáhá<sup>n</sup> ñáhá-yu xii-n te ndéyãhu-ni sá ní quidé-n-yu. <sup>13</sup> Te ñáhá chí òré ná càda-n ì<sup>n</sup> vico, te cáhá<sup>n</sup>-n ñáyíu ndàhú, ndihí ñáyíu ñá cúu càca, ndihí ñáyíu yacua, ndihí ñáyíu cuáá. <sup>14</sup> Te núu duca<sup>n</sup> na càda-n, te cuu-xi ì<sup>n</sup> sá váha xii-n, chí ñáyíu-á<sup>n</sup> vá ñihí-yu nacoto ñáhá-yu xii-n, dico na cùu-n te sáá nduu ndòto-n ndihí nchaa ñáyíu ní quide ndáá ní xĩndecu ichi Yá Ndiöxí, te dàvá-á<sup>n</sup> taxi-gá sá ndúú tàhú-n —càchí-gá xáha<sup>n</sup>-gã xii-dé.

### *Nãcuáa xĩquide ñáyíu òré càhá<sup>n</sup> ñáhá ì<sup>n</sup> téé cada vico*

(Mt. 22:1-10)

<sup>15</sup> Te sá dúcá<sup>n</sup> ní cáhá<sup>n</sup> Jèsús ní tecú dóho cue téé yìhi mesá-á<sup>n</sup>, núu ní xáha<sup>n</sup> ì<sup>n</sup>-dé xii-gá:

—Ío váha tàhú nchaa ñáyíu na càxi nchaa sá cuãha ñaha Yá Ndiöxí nduu na sàá-yu cundecú-yu núu ndécú-gã táxi tnùní-gá —càchí-dé xáha<sup>n</sup>-dè xii-gá.

<sup>16</sup> Te Jèsús ní xáha<sup>n</sup>-gã xii-dé:

—Í<sup>n</sup> téé quide-dé vico, te ní dátécú tnúhu-dé cuéhé víhí ñáyíu quíhí<sup>n</sup>-yu caxí-yu. <sup>17</sup> Te òré sa ní cuu-ná sá caxí-yu, te ní xáha<sup>n</sup>-dè xii téé xĩnu cuechi núu-dé sá quíhí<sup>n</sup>-dé cúñaha-dè quíhí<sup>n</sup>-yu caxí-yu, chí sa ndècu túha nchaa sá caxí-yu. <sup>18</sup> Dico ncháa-yu ní xáhá<sup>n</sup>-yu xii-dé sá ná cáda càhnu iní téé càhá<sup>n</sup> ñáhá-ã<sup>n</sup>, chí ñá túú cùyáchí-yu quíhí<sup>n</sup>-yu vico-á<sup>n</sup>. Te téé ní cáhá<sup>n</sup> ndihí téé xĩnu cuechi-á<sup>n</sup> ñhna ní



xáha<sup>n</sup>-dê: “Íchí nĩ saa<sup>n</sup>-í ì<sup>n</sup> pedàsú ñuhu, te quíhí<sup>n</sup> ndéhè-í tnavíí, núu xíá<sup>n</sup> càhá<sup>n</sup> ndàhú-í núu-n sã cũñaha-n xii téé càhá<sup>n</sup> ñáhá-ã<sup>n</sup> xii-í sá ná cádá càhnu iní-dé chi ñá tuú cùyáchí-í”, càchí-dé xáha<sup>n</sup>-dê. <sup>19</sup> Te ingá-dé ní xáha<sup>n</sup>-dê: “Ní saa<sup>n</sup>-í úhú<sup>n</sup> yùndá ndicutu sa xítu, te cue quití-á<sup>n</sup> quíhí<sup>n</sup>-í coto ndeé-í-güedi vitna, núu xíá<sup>n</sup> càhá<sup>n</sup> ndàhú-í núu-n sã cũñaha-n xii téé càhá<sup>n</sup> ñáhá-ã<sup>n</sup> xii-í sá ná cádá càhnu iní-dé chi ñá tuú cùyáchí-í”, càchí-dé xáha<sup>n</sup>-dê. <sup>20</sup> Te ingá tucu-dé ní xáha<sup>n</sup>-dê: “Íchí nĩ tnándaha-í nõu xíá<sup>n</sup> vá cùyáchí-í quíhí<sup>n</sup>-í”, càchí-dé xáha<sup>n</sup>-dê. <sup>21</sup> Te òré ní nasáá téé xínu cuechí-á<sup>n</sup>, te ní nacani tnúhu-dé núu patróó<sup>n</sup>-dê nchaa nàcuáa ní xáhã<sup>n</sup>-yu. Te ní cudéé<sup>n</sup> téé cùu patróó<sup>n</sup>-ã<sup>n</sup>, te ní xáha<sup>n</sup>-dê xii téé xínu cuechí núu-dê-á<sup>n</sup>: “Yáchí cuáhã<sup>n</sup> nanducu-n nchaa ñáyíu ndàhú, ndíhí nchaa ñáyíu ñá cúú càca, ndíhí nchaa ñáyíu yacua, ndíhí nchaa ñáyíu cuáá, te ndèni ní cuu na nàníhí-n-yu te candècá-n-yu quixi”, càchí-dé xáha<sup>n</sup>-dê. <sup>22</sup> Te sátá nĩ nasáá téé xínu cuechí-á<sup>n</sup>, te ní xáha<sup>n</sup>-dê xii patróó<sup>n</sup>-dê: “Patróó<sup>n</sup>, sa ní quide-í chiù<sup>n</sup> ní táhú-n, dico ndècu-gá núu cóo-yu”, càchí-dé xáha<sup>n</sup>-dê. <sup>23</sup> Te téé cùu patróó<sup>n</sup>-dê-á<sup>n</sup> nĩ xáha<sup>n</sup>-dê: “Cuáhã<sup>n</sup> tucu ndèni ní cuu te cada yica-n na quixí-yu quíhu-yu cuèndá ná chítú vehe-í. <sup>24</sup> Te na càchí tnúhu-í xii-n sã nĩ ì<sup>n</sup> ñáyíu ní cáhá<sup>n</sup>-í díhna vá cúú-gã caxí-yu sá sã ní quide túha-í caxí-yu ni cùu”, cachí téé-á<sup>n</sup> xáha<sup>n</sup>-dê xii téé xínu cuechí núu-dê —càchí-gá xáha<sup>n</sup>-gã xii téé-á<sup>n</sup>.

*Ndoho-o cùndecu-o ichi Xítohó Jesucristú*  
(Mt. 10:37-38)

<sup>25</sup> Te ío cuéhé ñáyíu nchìcú<sup>n</sup>-yu Jèsús, te ní xáha<sup>n</sup>-gã xii-yu:

<sup>26</sup> —Te núu dava nchòhó cuìní-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dàndóo-ndo tátá-ndó, ndíhí náná-ndó, ndíhí ñadíhí-ndó, ndíhí déhe-ndo, ndíhí ñaní-ndó, ndíhí cúha-ndo, te cani iní-ndó sã cuèi na cùú-ndó sã cuèndá-í, te duca<sup>n</sup> te cuu ndisa-ndo cuè ñáyíu tnàhá tnúhu ndíhí-í. <sup>27</sup> Te nchaa ñáyíu vá cãchícú<sup>n</sup> nihnu ñaha xii-í cuèndá sá yùhú-yu ndohó-yu dàtná ndoho-í, ñáyíu-á<sup>n</sup> vá cúú-yu ñáyíu tnàhá tnúhu ndíhí-í. <sup>28</sup> Te núu ì<sup>n</sup> nchòhó ná càni iní-ndó dàcaa-ndo ì<sup>n</sup> vehe ducú<sup>n</sup>, ÷te náa ñá díú díhna-gá cada

cuèndá-ndó nõu ndédau díhú<sup>n</sup> cuu, duca<sup>n</sup> te cutnùní iní-ndó nõu tnàhá díhú<sup>n</sup>-ndó càa vehe-á<sup>n</sup> àdi ñáhá? <sup>29</sup> Chi núu vá dúcá<sup>n</sup> càda-ndo, te na ngüíta-ndo tàusaha-ndo te vá xínu cada-ndo, te nchaa ñáyíu na cùndehe ñaha xii-ndo, te cáhá<sup>n</sup> cuéhé-yu cuèndá-ndó. <sup>30</sup> Te cachí-yu: “Tée-ã<sup>n</sup> ní ngüíta-dé dácàa-dé ì<sup>n</sup> vehe te ñá ní ndàcu-dé xínu”, cachí-yu. <sup>31</sup> Àdi te núu ì<sup>n</sup> téé yìndaha ñaha xii ñáyíu cuìní-dé nàá-dé ndíhí ingá tucu téé yìndaha ñaha xii ñáyíu, ÷te náa ñá díú díhna-gá cada cuèndá-dé te núu ndacu-dé ndíhí úxí mĩl cue sandàdú-dé nàá-güedé, ndíhí ócò mĩl cue sandàdú ingá tucu téé yìndaha ñaha xii ñáyíu cùu úhú iní tnàhá ndíhí-dé-ã<sup>n</sup>? <sup>32</sup> Àdi te núu xìto-dé sã vá ndácú-dé ñá, te òré vátá cùyàtni ñaha-gá téé cùu úhú iní tnàhá ndíhí-dé-á<sup>n</sup>, te tendaha-dê ì<sup>n</sup> téé quíhí<sup>n</sup>-dé quíhu-dé tnúhu ndàhú núu téé-á<sup>n</sup> cuèndá sá vã nàá-güedé. <sup>33</sup> Te duha càhá<sup>n</sup>-í chi núu nchòhó vá cádá ndèe iní-ndó dàña-ndo nchaa sá ndécú ndíhí-ndo cuèndá chitnahá ñáhá-ndó xii-í, te vá cúú-ndó cuè ñáyíu tnàhá tnúhu ndíhí-í.

*Ñí nĩ nduu víxi<sup>n</sup>*  
(Mt. 5:13; Mr. 9:50)

<sup>34</sup> Te ñí chi ío váha, dico núu na ndùu víxi<sup>n</sup>-xi, ÷te nása-gá cada-o nàndíhí-o te núu duca<sup>n</sup>-i? <sup>35</sup> Chi ñá túú-gã nándíhí-xi nĩ sá dàcá ñuhu, te nĩ sá dàcá sahá<sup>n</sup>, chi cuèndá-nã dǎngoyo-o. Te nchaa nchòhó ñáyíu ní xíndedóho tnúhu ní cáhá<sup>n</sup>-í-a xini ñuhu-xi ío váha cuáha-ndo cuèndá —càchí-gá xáha<sup>n</sup>-gã xii-yu.

## 15

*Cuèndá ì<sup>n</sup> mbéé quití ní xíta*  
(Mt. 18:10-14)

<sup>1</sup> Te cue téé cuihna iní-xi quide cobrá ñáhá xii ñáyíu cuèndá impuestú ndíhí cue dava-gá ñáyíu ndècu ichi cuehé ichi duha ní quexió-yu núu ndécú Jèsús cuèndá cund-edóho-yu tnúhu càhá<sup>n</sup>-gá. <sup>2</sup> Te ní ngüíta cue téé cùu fariséú, ndíhí cue téé dàcuaha ñaha xii ñáyíu nchaa tnúhu ní chídó tnùní ndíi Moisés xicáhã<sup>n</sup> cuéhé-güedé cuèndá-gá, te càchí-güedé:

—Tée-a quèhe<sup>n</sup> cuèndá-dé ñáyíu ndècu ichi cuehé ichi duha, te xèxi ndíhí ñaha-dé xii-yu —càchí-güedé xitnàha-güedé.



3 Te Jèsús ní cani-gá ìḡ cuèndú nàcuáa tecu tñuní-güedé tñuhu-gá, te xáha<sup>n</sup>-gá xii-güedé:

4 —ḡ tée ndècu ìḡ ciendú mběé-dě, te ní xíta ìḡ-di, te nchòhó sa cùtnuní iní-ndó nàcuáa cada tée-á<sup>n</sup>, chi dándóo-dé cùmídícó sǎhú<sup>n</sup> cùmí-di ìḡ yucu, te cúnúndúcú-dě quiti ní xíta xǎ<sup>n</sup> ndéé ndéé naníhí-dě-di.

5 Te òré ní naníhí-dě-di te ní dácáá-dě-di chíó-dě ní docó-dé-di sá cúdǎ iní-dé. 6 Te òré ní nasáá-dé vehe-dé, te ní dátacá-dé nchaa cue tée cǎhá<sup>n</sup> ndihí-dé, ndihí nchaa ñáyiú ndècu yatni ndihí-dé, te ní xáha<sup>n</sup>-dě: “Chí ná cùdí iní-ó vitna, chi ní naníhí-í mběé-í quiti ní xíta ní cùu”, cachí-dé xǎha<sup>n</sup>-dě xii-yu.

7 Te yúhú cǎchí-í sá ìo-gá cúdǎ iní Yǎ Ndiǒxí ndihí cue espíritú xínú cuèchi núú-gǎ nūu ìḡ ñáyiú ndècu ichi cuehé ichi duha na ndixi cuèchi iní-yu cuèndá nchaa sá ñà túú vǎha quidé-yu ndécú-yu te tñí-yu ichi-gá, dàcúúxí cùmídícó sǎhú<sup>n</sup> cùmí ñáyiú sa ní tuha ichi-gá, chi ñà túú-gǎ xíní ñuhu-xi ndixi cuèchi iní-yu chi sa ndécú-yu ichi-gá —cǎchí-gá xáha<sup>n</sup>-gá xii-güedé.

#### *Cuèndá díhú<sup>n</sup> ní xíta*

8 Te ní cani Jèsús ingá cuèndú núú-güedé, te xáha<sup>n</sup>-gǎ:

—ḡ ñadíhí ndécú ndihí-a<sup>n</sup> úxí díhú<sup>n</sup> cuixí<sup>n</sup>, te ní dácuíta-a<sup>n</sup> ìḡ te ní teñuhú-a<sup>n</sup> ití, te ní ngúita-a<sup>n</sup> nàtihu-a<sup>n</sup> vehe, te súúní vǎha vǎha ní nanducu-a<sup>n</sup> ndéé ní naníhí-a<sup>n</sup>.

9 Te òré ní naníhí-a<sup>n</sup>, te ní dátacá-a<sup>n</sup> nchaa ñáyiú díhí cǎhá<sup>n</sup> ndihí-a<sup>n</sup> ndihí nchaa ñáyiú ndècu yatni ndihí-a<sup>n</sup>, te ní xáha<sup>n</sup>-a<sup>n</sup>: “Chí ná cùdí iní-ó vitna chi ní naníhí-í díhú<sup>n</sup>-í sá ní xíta ní cùu”, cachí-a<sup>n</sup> xǎha<sup>n</sup>-a<sup>n</sup> xii-yu.

10 Te yúhú cǎchí-í sá dúcá<sup>n</sup> ìo cùdí iní nchaa espíritú xínú cuèchi núú Yǎ Ndiǒxí, núu ìḡ ñáyiú ndècu ichi cuehé ichi duha na ndixi cuèchi iní-yu cuèndá nchaa sá ñà túú vǎha quidé-yu, te tñí-yu ichi-gá —cǎchí-gá xáha<sup>n</sup>-gǎ xii-güedé.

#### *Cuèndá ìḡ tée ñà túú ní quide vǎha*

11 Te ní cani tucu Jèsús ingá cuèndú núú-güedé, te xáha<sup>n</sup>-gǎ:

—ḡ tée ndècu úú déhe ducu<sup>n</sup>-dé, 12 te tée líhli-gá ní xáha<sup>n</sup>-dě xii tǎtá-dé: “Táu, taxi-n tǎhú sǎ cúú cuèndá-í”, cǎchí-dé xǎha<sup>n</sup>-dě. Te tǎtá-dě-á<sup>n</sup> ní sǎñaha-dě ndí díḡ nūú-güedé sá cúú cuèndá-güedé. 13 Te

núú sàcú-ni nduu, te déhe-dé tée líhli-gá-á<sup>n</sup> ní nadico-dě nchaa sá ní sǎñaha tǎtá-dě, te ní xica-dé cuáhá<sup>n</sup>-dé ìḡ ñuú xícá, te yácá<sup>n</sup> ní tñí-dé ìḡ ichi cuèhé ichi duha, te ní ndihí díhú<sup>n</sup>-dě ní dándóñuhu-dé ndihí cue tée cǎhá<sup>n</sup> ndihí-dé, ndihí nchaa ñáyiú díhí xǎndecu ichi díḡ iní. 14 Te ní ndihí ndoo díhú<sup>n</sup>-dě ní dándóñuhu-dé, te núú sàcú-ni nduu ní sáá tnamá ñuú núú ndécú-dě-á<sup>n</sup>, te ñà ñihí-gá-dé sá cǎxí-dě, te xihí-dé docó.

15 Núu ní xica-dé cuáhá<sup>n</sup> ndúcú chiu<sup>n</sup>-dé núú ìḡ tée diu-ni ñuú xía<sup>n</sup>, te tée-á<sup>n</sup> ní sǎha chiu<sup>n</sup> ñaha-dé ìḡ xichi núú ñuhú-dě coto-dé cùchí. 16 Te súúní xihí-dé docó te cuini-dé caxi-dé nchaa sá sǎha-yu cùchí-á<sup>n</sup> ní cùu, dico ñà túú ní sǎñahá-yu xii-dé. 17 Te uu<sup>n</sup>ni ní sani váha iní-dé, te ní cachí-dé: “Ío cuéhe cue tée xínu cuechi vehe tǎtá-í te ío cuéhe sǎ xéxí-güedé ndécú, te yúhú duha ndòho-í docó iha!

18 Te ndacuíñí-í te núhú-í vehe tǎtá-í, te cùñaha-í xii-dé: Táu, ñà túú ní quide váha-í núú Yǎ Ndiǒxí te ní ñà túú ní quide váha-í núú-n, 19 te ñà túú-gǎ tǎu-í sá cùu-í déhe-n vitna, te cada ñaha-ñá-n xii-í dàtná ìḡ tée xínu cuechi núú-n”, duha ní sani iní-dé cùñaha-dě xii tǎtá-dě. 20 Te sǎtá dúcá<sup>n</sup> ní sani iní-dé, te ní natnḡ-dé ichi cuánuhú-dé vehe tǎtá-dě, te xica-gǎ cuánuhú-dé ní xíní ñáhá tǎtá-dě xii-dé te ní cundáhú iní ñáhá-dě. Te xínu tǎtá-dě-á<sup>n</sup> ní sáhá<sup>n</sup> nútnahá ñáhá-dé, te ní numi ñaha-dé, te ío vǎha ní cǎhá<sup>n</sup> ndihí ñaha-dé. 21 Te ní xáha<sup>n</sup> déhe-dé-á<sup>n</sup> xii-dé: “Táu, ñà túú ní quide váha-í núú Yǎ Ndiǒxí te ní ñà túú ní quide váha-í núú-n, te ñà túú-gǎ tǎu-í sá cùu-í déhe-n vitna”, cachí-dé xǎha<sup>n</sup>-dě.

22 Dico tǎtá-dě-á<sup>n</sup> ní xáha<sup>n</sup>-dě xii cue tée xínu cuechi núú-dé: “Chí queñuhu ndihí-ni dóo vǎha-gá cuáha-ndo déhe-í-a na cuíhnu-dé, ndihí ìḡ dehé ná quíhí díquí ndáhá-dě, ndihí chàú váha na quíhí-dé.

23 Te quíhí<sup>n</sup> nguehe<sup>n</sup>-ndo ìḡ ndicutu numa quiti caváha-gá, te cahni-ndo-di, te na càda-o vico, te na cǎxi-o-di. 24 Chi déhe-í-a ní sani iní-í sá ní xihí-dé ní cùu, te ñáhá chi ndècu vívú-dě, te ní sani tucu iní-í sá ní xíta-dé ní cùu te ní nasáá méé-dě”, cǎchí-dé xǎha<sup>n</sup>-dě xii cue tée xínu cuechi núú-dě-á<sup>n</sup>. Te ní ngúita-güedé ní quide-güedé vico.

25 Te déhe-dé tée sàcuéhé-gǎ cuáhá<sup>n</sup>-dé yucu, te òré cuándixi-dé tá nduu yatni-dé vehe, te ní tecú dóho-dé ío yaá cúú vico.

26 Te ní cana-dé ìḡn tée xìnu cuechi, te ní xícán tñuhú-dě núú-dě ná cuendá duca<sup>n</sup> ío yaá.

27 Te tée xìnu cuechi-án nǐ xáha<sup>n</sup>-dě: “Ñaní-ḡn tée cuáhán ní cùu ní nasáá-dé, te tātá-n nǐ táúchíú<sup>n</sup>-dě ní xíhí ìḡn ndicutu nùma quitì caváha-gá cuendá sá nǐ nasáá váha-dé”, cächí-dé xáha<sup>n</sup>-dě.

28 'Dico ñaní-dé tée sàcuéhé-ǎn nǐ cudéé<sup>n</sup>-dě, te ní cachí-dé sá vǎ ndíhu-dé vehe cundecu-dé vico-án ní cùu, dico ní quee tātá-güedé ní cáhá<sup>n</sup> ndàhú-dé núú-dě cuendá ndíhu-dé.

29 Te ní xáha<sup>n</sup>-dě xii tātá-dě: “Táu, cundedóho váha saú-n tñuhu na càhá<sup>n</sup>-í-a, yúhú ío cuéhé cuíá nǐ cuu xìnu cuechi-í núú-n, te ni ìḡn xito ñá túú quide sáá iní-í núú-n, te ni ìḡn chivá líhli ñá túú tàxi-n-di caxi díí iní-í-di ndíhi cue tée càhá<sup>n</sup> ndíhi-í.

30 Te vitna ní nasáá déhe-n tée ní sáhán ní dándóñuhu díhú<sup>n</sup>-n ndíhi nchaa ñáyiú xíndecu ichi díí iní. Te ní sahani-n ìḡn ndicutu numa quitì caváha-gá sá cuendá-dé”, cächí-dé xáha<sup>n</sup>-dě xii tātá-dě.

31 Te ní xáha<sup>n</sup> tātá-dě xii-dé: “Yòhó déhe-í duca<sup>n</sup>-ni ndècu ndíhi ñaha-n xii-í, te nchaa sá ndécú ndíhi-í cúú-xí cuendá-n.

32 Te vitna dacutíí tàú-xi sá cádá-ó vico, te cudíí iní-ó, chi ñaní-n-án nǐ quide-í cuendá sá nǐ xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te ní nasáá méé-dě”, cächí-dé xáha<sup>n</sup>-dě xii déhe-dé tée sàcuéhé-gǎ-án —duha cuáhán cuendú ní cani Jèsús núú-güedé.

## 16

*Nàcuáa ní quide ìḡn tée tàxi tñuní ñáhá xii cue tée xìnu cuechi*

1 Te Jèsús xáha<sup>n</sup>-gǎ xii cue tée xìca cuu ndíhi-gá:

—Ní xíndecu ìḡn tée cuica, te duca<sup>n</sup> nǐ xíndecu ìḡn tée ní taxi tñuní ñáhá xii cue tée ní xìnu cuechi núú-dě. Te tée-án nǐ xini ñáhá ñáyiú dùhu-dé díhú<sup>n</sup> tée cùu patróó<sup>n</sup>-dě, te cuáhán-dé dándóñuhu-dé, te ní xáhǎ<sup>n</sup>-yu xii tée cùu patróó<sup>n</sup>-dě sá dúcán quide-dé.

2 Te tée cùu patróó<sup>n</sup>-dě-án nǐ cana ñaha-dě xii-dé, te ní xáha<sup>n</sup>-dě: “¿Ná cuendá duha càhá<sup>n</sup> ñáyiú cuendá-n? Yáchí chi na tàxi cuendá-n nchàa chiu<sup>n</sup> ní quide-n, chi vitna te vǎ táxí tñuní-gá-n cue tée xìnu cuechi núú-í”, cächí-dé xáha<sup>n</sup>-dě.

3 Te tée tàxi tñuní ñáhá xii cue tée xìnu cuechi-án nǐ sani iní-dé: “¿Te nása cada-í

vitna na quèhndé patróó<sup>n</sup>-í chiu<sup>n</sup>-í? Chi ñá cündèe-gá-í cada-í chiu<sup>n</sup> vée, te cùcaha<sup>n</sup> núú-í cácán ndàhú-í.

4 Dico duha cada-í cuendá quehe<sup>n</sup> cuendá ñáhá ñáyiú vehé-yu òré ná quèhndé duu<sup>n</sup>-ná patróó<sup>n</sup>-í chiu<sup>n</sup>-í”, duha ní sani iní-dé.

5 Te sátá dúcán te ní cana-dé ìḡn ìḡn cue tée tàú núú patróó<sup>n</sup>-güedé. Te tée díhna ní xícán tñuhú-dě núú-dě, te xáha<sup>n</sup>-dë: “¿Ndèé dau tàú-n núú patróó<sup>n</sup>-í?”

6 Te tée-án nǐ xáha<sup>n</sup>-dë: “Táu-í ìḡn ciendú barríl acití”, cächí-dé xáha<sup>n</sup>-dë.

7 Te tée tàxi tñuní ñáhá xii cue tée xìnu cuechi-án nǐ xáha<sup>n</sup>-dë: “Iha náu reciú-n-á, te ndadúha ingá sá údico úxí taxi-n”, cächí-dé xáha<sup>n</sup>-dë.

8 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

9 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

10 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

11 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

12 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

13 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

14 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

15 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

16 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

17 Te tée cùu patróó<sup>n</sup>-án nǐ cachí-dé sá ío váha ñuhu díquí tée dùhu-án nàcuáa cada-dé cundecu váha-dé.

Te nchaa ñáyiú xíndecu ichi cuéhé ichi duha, ío-gá váha ñuhu díquí-yu nàcuáa cada-yu cundecu váha-yu ndíhi nchaa ñáyiú cündíhi-yu dàcúúxí ñáyiú ndècu ichi Yá Ndiöxí.

tní-dé nchaa tnúhu càhá<sup>n</sup> pàtróó<sup>n</sup> tée cùu váha iní-dé núu-xi-á<sup>n</sup>. Te núu ìngá tucu pàtróó<sup>n</sup>-dè vá cúu váha iní-dé, te ni vǎ tní-dè tnúhu càhá<sup>n</sup> pàtróó<sup>n</sup>-dè-á<sup>n</sup>. Te duca<sup>n</sup> sǎtnahá-xi cùu nchohó chi vá ndácú-ndó cùnu cuechi-ndo núu Yá Ndióxi te cuhu<sup>n</sup> iní-ndó nchaa sá ìó ñuyíú-a —càchí-gá xáha<sup>n</sup>-gǎ xii-güedé.

14 Te nchaa cue tée cùu fariséú ío ñùhu iní-güedé nchaa sá ìó ñuyíú-a, te xǐndedóho-güedé nchaa tnúhu càhá<sup>n</sup> Jèsús, te ní cáhá<sup>n</sup> yíchí-güedé cuèndá-gá. 15 Te Jèsús ní xáha<sup>n</sup>-gǎ xii-güedé:

—Nchòhó cúu-ndó cuè tée ío váha càhá<sup>n</sup> núu ñáyiú cuèndá-ni sá cuíni-ndó cáhá<sup>n</sup> váha-yu cuèndá-ndó, dico Yá Ndióxi xini ndáá-gá nàcuáa càa iní-ndó ñ<sup>n</sup> ñ<sup>n</sup>-ndo, te nchaa sá càchí cue ñáyiú ñuyíú-a sá ìo nàndíhi, Yá Ndióxi dáquèe tíhú-gǎ.

*Cuèndá nchaa tnúhu ní chídó tnùní ndíi Moisés*

16 Te nchaa tnúhu ní chídó tnùní ndíi Moisés cúnú-xi ni cuu, ndíhi nchaa tnúhu ní chídó tnùní cue tée ní xóo cáhá<sup>n</sup> tnúhu Yá Ndióxi ndéé sanaha. Dico cùtnahá ní ngúita té Juáá tée ní xóo dacuàndute ñaha xii ñáyiú ní cáhá<sup>n</sup>-dé tnúhu-í, ndéé dàvá-á<sup>n</sup> ñà túú-gǎ ní cùnuu nchaa tnúhu ní chídó tnùní ndíi Moisés ndíhi nchaa tnúhu ní chídó tnùní cue tée ní xóo cáhá<sup>n</sup> tnúhu Yá Ndióxi ndéé sanaha. Te ñu-ni ndéé dàvá-á<sup>n</sup> ní quesaha ta təcú tnùní ñáyiú nàcuáa ndíhu ndaha ñaha Yá Ndióxi xii-yu, te vǎi ñáyiú ío sàni iní-yu vitna nàcuáa cadá-yu ndíhu ndaha ñaha Yá Ndióxi xii-yu. 17 Te nchaa tnúhu ní chídó tnùní ndíi Moisés ío ndáá cáhá<sup>n</sup>-xi, te ndíhi-gǎ naa andíu ndíhi ñuyíú dàcúúxí sǎ ndíhí ñ<sup>n</sup> ñ<sup>n</sup> tnúhu-á<sup>n</sup> cada-xi nàcuáa càhá<sup>n</sup>-xi.

*Jèsús càhá<sup>n</sup>-gǎ cuèndá ñáyiú dàña tnaha (Mt. 19:1-12; Mr. 10:1-12)*

18 Te núu ñ<sup>n</sup> tée na dàña tnaha-dé, ndíhi ñadíhí-dé, te tnándaha tucu-dé ndíhi ìngá-yu, te nèhé víhí quide-dé te núu duca<sup>n</sup> na càda-dé, te tée na tnándaha ndíhi ñaha ní dáña yí-xi, te ñu-ni duca<sup>n</sup> ñà túú cùu-xi sá váha te núu duca<sup>n</sup> na càda-yu —càchí-gá xáha<sup>n</sup>-gǎ xii-güedé.

*Cuèndá ñ<sup>n</sup> tée nàni Lázarus ndíhi cuèndá ñ<sup>n</sup> tée cuica*

19 Te xáha<sup>n</sup> tucu-gǎ xii-güedé:

—Ní xíndecu ñ<sup>n</sup> tée cuica, te ní xóo cuihu-dé mee-ni dǎo váha dóo vii càa, te nchaa nduu súuní váha ní xóo cada-dé vico vehe-dé. 20 Te ní xíndecu tucu ñ<sup>n</sup> tée ndàhú ní xínani-dè Lázarus, te tée-á<sup>n</sup> ní cuhú-dé ní xíndéé-dé nitùhú-dé ndíhyi, te ñ<sup>n</sup> nduu ñ<sup>n</sup> nduu ní xóo taxinucóo ñaha-güedé xii-dé yuyèhe tée cuica-á<sup>n</sup>. 21 Te tée ndàhú-á<sup>n</sup> ní xóo cuú-dé docó, te ní xóo cuíni-dé caxi-dé nchaa sá ñà túú-gǎ ní xǎo yáha caxi tée cuica-á<sup>n</sup>, te ñà túú ní xǎo níhí-dè. Te cuèi iná ní xóo quíhí<sup>n</sup>-di ní xóo nayuu-di nchaa núu ndíhyi ndéé-dé-á<sup>n</sup>. 22 Te ní sáá ñ<sup>n</sup> nduu te ní xíhí tée ndàhú-á<sup>n</sup>, te cue espíritú xínú cuèchi núu Yá Ndióxi ndéca ñaha-xi xii-dé cuàndaa núu ndécú tǎ Àbrahám cundecu-dé. Te ní sáá nduu ní xíhí tée cuica-á<sup>n</sup> tnàhá-dé, te ní chindúxi ñaha-güedé xii-dé. 23 Te ní sáá-dé núu xíndecu nchaa ñáyiú ní xíhí ñà túú ní quide ndáá núu Yá Ndióxi te xíá<sup>n</sup> ìo ndòho-dé ndécú-dè, te ní ndonehe núu-dè te xica ní xini-dé tǎ Àbrahám ndíhi tǎ Lázarus-á<sup>n</sup> xíndecu-güedé. 24 Te níhi ní cáhá<sup>n</sup>-dé, te xáha<sup>n</sup>-dè: “Yòhó tǎtá Àbrahám, cundàhú iní ñàhá xii-í, te cùñaha xii tǎ Lázarus ná dándaxi<sup>n</sup>-dé díquí ndàhá-dè, te na quíxi-dé dandaxi<sup>n</sup>-dé yàa-í, chi ío ndòho-í ñùhú-í núu ñùhú núu càyú-a”, càchí-dé xáha<sup>n</sup>-dè xii tǎ Àbrahám. 25 Dico tǎ Àbrahám ní xáha<sup>n</sup>-dè: “Ndàhú yòhó ñani tnàhá-í, dandacu iní sá ìo váha ní xíndecu-n ñuyíú, te tǎ Lázarus ío ndàhú ní ndòho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna. 26 Te ñà díú-ní sǎ xǎá<sup>n</sup> tucu, chi cuádava ndècu ñ<sup>n</sup> déhvá cùnú ñùhú nèhu-xi núu ndécú-ó, te cuèi nchaa ñáyiú xíndecu iha na càchí iní-yu quixí-yu núu ndécú-ndó dico vá ndácú-yu, te ni nchòhó vá ndácú-ndó quíxi-ndo núu ndécú-ndí”, càchí-dé xáha<sup>n</sup>-dè. 27 Te ní xáha<sup>n</sup> tée cuica-á<sup>n</sup>: “Te núu duca<sup>n</sup> te càhá<sup>n</sup> ndàhú-í núu yòhó tǎtá Àbrahám vitna sá téndaha-n tǎ Lázarus ná quíhí<sup>n</sup>-dé vehe tǎtá-í, 28 chi ndècu úhú<sup>n</sup>-gǎ ñani-í, te na cùñaha-dè xii-güedé sá vǎ cadá-güedé dàtná ní quide-í cuèndá sá vǎ quixí-güedé tnàhá-güedé núu ndécú-í ndòhó-í-a”, càchí-dé xáha<sup>n</sup>-dè. 29 Te tǎ Àbrahám ní xáha<sup>n</sup>-dè: “Mee-güedé ndécú ndíhi-güedé nchaa tnúhu ní chídó tnùní ndíi Moisés, ndíhi nchaa tnúhu ní chídó tnùní cue tée



ní xóo cáhá<sup>n</sup> tnúhu Yá Ndiöxí ndéé sanaha, te nchaa tnúhu-á<sup>n</sup> ná tñi-güedé nàcuáa càhá<sup>n</sup>-xi”, càchí-dé xáha<sup>n</sup>-dë xii-dé. <sup>30</sup> Te ní xáha<sup>n</sup> tùcu té cuica-ã<sup>n</sup>: “Tátá Àbrahám, dico vá cáda cuendá-güedé nchaa tnúhu-á<sup>n</sup>, dico núu ñ<sup>n</sup> ñáyu ñá túú-gã ndécú ñùyu ñ<sup>n</sup> ñáyu ndècu ndihí-n quíhí<sup>n</sup>-yu cáhá<sup>n</sup> ndihí ñàhá-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñá túú quide váha-güedé ndécú-güedë, te cada váha-güedé”, càchí-dé xáha<sup>n</sup>-dë xii-dé. <sup>31</sup> Dico té Àbrahám ní xáha<sup>n</sup>-dë: “Te núu ñá túú cuini-güedé tñi-güedé tnúhu ní cáhá<sup>n</sup> ndíi Moisés, ndihí tnúhu ní cáhá<sup>n</sup> cue té ní xóo cáhá<sup>n</sup> tnúhu Yá Ndiöxí ndéé sanaha ña, te ñu-ni duca<sup>n</sup> càda-güedé cuéi ñ<sup>n</sup> ñáyu ní xíhí ná ndótó-yu cúñàhá-yu nàcuáa ndùu tnúhu váha, chi vá quindáá iní-güedé”, càchí té Àbrahám xáha<sup>n</sup>-dë xii té cuica-ã<sup>n</sup> —càchí Jèsús xáha<sup>n</sup>-gã xii cue té cùu fariséu.

## 17

*Quihi iní-ó vã cündècu-o ichi cuehé ichi duha*

*(Mt. 18:6-7, 21-22; Mr. 9:42)*

<sup>1</sup> Te Jèsús ní xáha<sup>n</sup>-gã xii cue té xica cuu ndihí-gá:

—Dacuítíi sã cóo cuè té dacàhá<sup>n</sup>-güedé ñáyu cada-yu nándi sá cuèhé sá dúhá, j dico ndàhú ní cuu cue té duca<sup>n</sup> na dàcàhá<sup>n</sup> ñàhá xii-yu cada-yu nándi sá cuèhé sá dúhá! <sup>2</sup> Chi váha-gã sá ñùu na dàcutu ndéé ñáyu ñ<sup>n</sup> yúu yödó dücú<sup>n</sup>-güedë te dàquée ñàhá-yu xii-güedé xití ndute làmár, te ñá díú sã cündècu-güedé dacàhá<sup>n</sup>-güedé ñáyu cada-yu nándi sá cuèhé sá dúhá, cuéi ñáyu ndàhú iní-xi dandàhú-güedé. <sup>3</sup> Te ío quihi iní-ndó cündècu-ndo.

Te núu ñ<sup>n</sup> ñaní tnàhá-ndó quide-dé ñ<sup>n</sup> sá ñá túú tàú-dé cada-dé sá cúú-xí-ndó te cáhá<sup>n</sup>-ndó dôho-dé, te núu ní ndixi cuéchi iní-dé sá ñá túú ní quide váha-dé, te cada càhnu iní-ndó sã ñí quide-dé. <sup>4</sup> Te cuéi úsá xito na càda-dé nándi sá ñá túú tàú-dé cada-dé sá cúú-xí-ndó ñ<sup>n</sup> nduu, te núu na quixi-dé úsá xito núú-ndó, te cachí-dé sá vã dúcá<sup>n</sup>-gã cada-dé, te xìni ñuhu-xi cada cahnu iní-ndó-dë —càchí-gã xáha<sup>n</sup>-gã xii-güedé.

*Ñáyu sàndáá ndisa iní-xi*

<sup>5</sup> Te ní xáha<sup>n</sup> cuè té xica cuu ndihí Jèsús xii-gá:

—Chindee ñàha xii-ndí cuendá duca<sup>n</sup> te quindáá-gá iní-ndí sá Yá Ndiöxí ndácú-gã quidé-gã nchaa sá váha —càchí-güedé xáha<sup>n</sup>-güedë xii-gá.

<sup>6</sup> Te ní xáha<sup>n</sup> Jèsús:

—Te núu nchòhó quindáá ndisa iní-ndó sùúni cuédicó luha líi dàtná cuini-ndó càa ñ<sup>n</sup> ndíqui<sup>n</sup> yutnu nàni mostázá, te duca<sup>n</sup> te cuu cúñaha-ndo xìi ñ<sup>n</sup> yutnu: “Quene-n ìha te quíhí<sup>n</sup>-n cuìhnu-n xití làmár”, duha cúñaha-ndo. Te duca<sup>n</sup> càda-xi te núu na quindáá ndisa iní ñàhá-ndó xìi-í —càchí-gã xáha<sup>n</sup>-gã xii-güedé.

*Nàcuáa tàú ñ<sup>n</sup> té xìnu cuechi cada-dé*

<sup>7</sup> Te xáha<sup>n</sup> tùcu-gã xii-güedé:

—Te núu ñ<sup>n</sup> nchòhó ndécú ñ<sup>n</sup> té xìnu cuechi núú-ndó, te cuáhá<sup>n</sup>-dé yucu cuángada chiú<sup>n</sup>-dé, àdi cuáhá<sup>n</sup>-dé yucu coto-dé quiti, te òré ní nasáá-dé vehe sá ñí sáhá<sup>n</sup>-dé yucu, te vá cúñaha nchòhó cue té cùu patróo<sup>n</sup>-dë xii-dé: “Yáchí nehé caxi-n dítá”, vá dúhá cúñaha-ndo. <sup>8</sup> Chi nchòhó cue té cùu patróo<sup>n</sup>-dë cúñaha-ndo xìi-dé: “Cundihi iní cada túha sá cùdini-í, te díhna-gá-í caxi-í dítá te dàtnúni caxi-n”, duha cúñaha nchòhó cue té cùu patróo<sup>n</sup> xii-dé. <sup>9</sup> Te òré ná ndíhí chiú<sup>n</sup> ní táhú nchòhó cue té cùu patróo<sup>n</sup> cada té xìnu cuechi núú-ndó, te ñá túú tàú-ndó ndàcá<sup>n</sup> táhú-ndó núú tõe xìnu cuechi núú-ndó. <sup>10</sup> Te duha càhá<sup>n</sup>-í chi núu òré ná ndihí nchaa chiú<sup>n</sup> ní táhú Yá Ndiöxí cada-ndo, te cachí-ndó: “Nchúhú cúú-ndí cue té xìnu cuechi núú Yá Ndiöxí, dico ñá túú tàú-gã ndacá<sup>n</sup> táhú-gã núú-ndí, chi mee-ni chiú<sup>n</sup> ní táhú-gã ní quide-ndí”, duha cachí-ndó —càchí-gã xáha<sup>n</sup>-gã xii-güedé.

*Jèsús quidé tãtna-gã úxí cue té tnàhá cuéhé sã dátèhyú nihnu-xi yiqui cùñú ñáyu*

<sup>11</sup> Te ñuhu Jèsús ichi cuáhá<sup>n</sup>-gã ñuu Jerusálén, te ní yáha-gã núu ràyá distritú Sãmariá ndihí distritú Galileá. <sup>12</sup> Te ta cùyatni-gã ñ<sup>n</sup> ñuu líhli cuáhá<sup>n</sup>, te ní sãtnahá ñàhá úxí tnàhá cue té cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu



tníi-güedé, <sup>13</sup> te níhi ní cáhá<sup>n</sup>-güedé, te xáha<sup>n</sup>-güedě xii Jèsús:

—¡Mèstrú, cundàhú iní ñáhá xii-ndí! —  
càchí-güedé xáha<sup>n</sup>-güedě xii-gá.

<sup>14</sup> Te òrè ní xiní ñáhá Jèsús xii-güedé, te ní xáha<sup>n</sup>-gá:

—Chí cuáhá<sup>n</sup> núú dütú ná cundehe ñaha-dé xii-ndo —càchí-gá xáha<sup>n</sup>-gá xii-güedé.

Te ní xica-güedé cuáhá<sup>n</sup>-güedé, te ichi-ni ñuhu-güedé cuáhá<sup>n</sup>-güedé ní ndúha-güedé cuéhé tnàhá-güedé. <sup>15</sup> Te nchaa-güedé ní cutnùní iní-güedé sá ñí ndúha-güedé, dico ñ<sup>n</sup>-ni-dé ní nacuico-dě, te ní ngüíta-dé níhi ní cáhá<sup>n</sup>-dé, te ní cachí-dé sá ño càhnu cuu Yá Ndiöxí. <sup>16</sup> Te ní ngüíñí xítí-dě núú Jèsús, te ní nuu núú-dě ndàa núú ñúhú ndàcá<sup>n</sup> táhú-dě núú-gá. Te té-á<sup>n</sup> cúú-dě téé distritú Sàmariá. <sup>17</sup> Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndèé ndécú dàva-gá-güedé-í?

<sup>18</sup> ¿Te náa ñ<sup>n</sup>dii-ni téé ingá ñuú-a ní nacuico-dě ndàcá<sup>n</sup> táhú-dě núú Yá Ndiöxí, te càchí-dé sá ño càhnu cuu-gá ñá? —  
càchí-gá.

<sup>19</sup> Te ní xáha<sup>n</sup>-gá xii téé-á<sup>n</sup>:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yá Ndiöxí —càchí-gá xáha<sup>n</sup>-gá xii-dé.

### *Nàcuáa yìndaha ñaha Yá Ndiöxí*

*(Mt. 24:23-28, 36-41)*

<sup>20</sup> Te cue téé cùu fariséú ní xicá<sup>n</sup> tnúhú-güedé núú Jèsús núu ná ama ngüíta Yá Ndiöxí ndíhu ndaha-gá ñáyíu. Te ní xáha<sup>n</sup>-gá:

—Ñá túú ñá cada-xi ñuyíú quini-ndó cuèndá cutnùní iní-ndó sá ndíhu ndaha ñaha Yá Ndiöxí xii-ndo. <sup>21</sup> Te ni vā yōo cachí: “Iha ndècu-gá táxí tnùní-gá, àdi yacá<sup>n</sup> ndécú-gá táxí tnùní-gá”, chi tnuú-ndó sà ndecu-gá ndíhi nchaa ñáyíu yìndaha-gá —  
càchí-gá xáha<sup>n</sup>-gá xii-güedé.

<sup>22</sup> Te ní xáha<sup>n</sup>-gá xii cue téé xica cuu ndíhi-gá:

—Te nchòhó chi sáá nduu, te cachí iní-ndó sá sùúni cuèdicó ñ<sup>n</sup> nduu quini ñáhá-ndó xii yúhú Téé cùu ñani tnàhá-ndó nchaa-ndo, dico vá quini ñáhá-gá-ndó xii-í. <sup>23</sup> Te coo ñáyíu cúñàhá-yu xii-ndo: “Iha ndècu-gá, á<sup>n</sup> yàcá<sup>n</sup> ndécú-gá”, quesàhá-yu

cúñàhá-yu xii-ndo. Dico vá quindáá iní-ndó quíhí<sup>n</sup>-ndó ndíhí-yu núú càchí-yu, te ni vā cání iní-ndó quíhí<sup>n</sup> méé-ndó. <sup>24</sup> Chi dàtná cuini-ndó quide-xi oré sáá nduté àndíu, chi uu<sup>n</sup>i dàyehé-xi nihíí ñuyíú, duca<sup>n</sup> càda-xi nduu na quixi tucu yúhú Téé cùu ñani tnàhá-ndó nchaa-ndo, te dàvá-á<sup>n</sup> quini ñáhá nchaa-ndi túhú ñáyíu xii-í.

<sup>25</sup> Dico díhna-gá ndoho vihi-í, te daquèe tíhú ñáhá ñáyíu ñuyíú-a xii-í. <sup>26</sup> Te cadá-yu dàtná ní quide ñáyíu ní xíndecu cútnàhá ní xíndecu té Nòé, te diu-ni duca<sup>n</sup> sàtnahá-xi cada nchaa ñáyíu ndècu vitna ndéé sáá nduu quixi tucu yúhú Téé cùu ñani tnàhá-ndó nchaa-ndo. <sup>27</sup> Chi caxi-ní-yu, coho-ní-yu, te caca cuu-ni cue téé xica ndáhú, te tnàndaha-ní-yu, chi duca<sup>n</sup> ñí quide-yu dàvá-á<sup>n</sup> ndéé ní sáá nduu cuànguee té Nòé xítí bàrcú, te ní ngüíta-xi ní cuu<sup>n</sup> dáú ñí ndaa ndute ñuyíú, te nchaá-yu ní xihí ní cáhá-yu dàvá-á<sup>n</sup>. <sup>28</sup> Te diu-ni duca<sup>n</sup> ñí quide tucu ñáyíu cútnàhá ní xíndecu té Löt, chi xèxí-yu xihí-yu, te sáá<sup>n</sup>-yu te nàdicó-yu, te xixitú-yu nándi sá xixitú-yu, te nchaa cue téé xídácáá-güedě vehe. <sup>29</sup> Te òrè ní quee té Löt ñuú Sòdomá, te ní ngoyo ñuhú àndíu, te dàcá yúú sùúni dicó ní nduu ñuhú-ñá-xi, te ní xihí nchaandi túhú ñáyíu ñuú-á<sup>n</sup>. <sup>30</sup> Te diu-ni duca<sup>n</sup> sàtnahá-xi cada ñáyíu na sáá nduu quixi tucu yúhú Téé cùu ñani tnàhá-ndó nchaa-ndo ñuyíú-a.

<sup>31</sup> Te núu ñ<sup>n</sup> ñáyíu càndodó-yu díquí véhè-yu nduu-á<sup>n</sup>, te ni vā ndíhu-gá-yu quehé<sup>n</sup>-yu ñ<sup>n</sup> ndachíu<sup>n</sup>-yu canehé-yu quíhí<sup>n</sup>, te ñáyíu cuáhá<sup>n</sup> yucu, te ni vā nùhú-gá-yu vehé-yu. <sup>32</sup> Te chí dándacu iní nàcuáa ní yáha ñadíhí té Löt. <sup>33</sup> Te nchaa ñáyíu cuini dàcácu nihnu mee-xi ñuyíú-a ña, te cuíta nihnú-yu, te nchaa ñáyíu na cùú sá cuèndá-í, te naníhí tàhú-yu.

<sup>34</sup> Te na càchí tnúhu tucu-í xii-ndo sá ndùu-á<sup>n</sup>, te núu úú-yu càa ñ<sup>n</sup> núú xító, te ñ<sup>n</sup>-yu ndanchitá-yu ndaá-yu àndíu, te ñ<sup>n</sup>-yu quendóo. <sup>35</sup> Te núu úú ñáyíu díhí nchícō-yu ñ<sup>n</sup>-ni véhe, te ñ<sup>n</sup>-yu ndanchitá-yu ndaá-yu àndíu, te ñ<sup>n</sup>-yu quendóo. <sup>36</sup> Te núu úú cue téé yìhi-güedé yucu, te ñ<sup>n</sup>-dé ndànchita-dé ndaa-dé àndíu, te ñ<sup>n</sup>-dé quendóo —càchí-gá xáha<sup>n</sup>-gá xii-güedé.

<sup>37</sup> Te sá dúcá<sup>n</sup> ñí cáhá<sup>n</sup>-gá ñúu ní xícá<sup>n</sup> tnúhú-güedě núú-gă, te xăhá<sup>n</sup>-güedě xii-gă:

—Mèstrú, ¿te ndéé duca<sup>n</sup> càda-xi-i? — cachí-güedě xăhá<sup>n</sup>-güedě xii-gă.

Te ní xáha<sup>n</sup>-gă:

—Te nchòhó xìní-ndó să ncháá ñúú yúcu yìqui cuñú ní xíhí, te yàcá<sup>n</sup> tàcá cue ndíxí xéxí-güedě —cachí-gă xáha<sup>n</sup>-gă xii-güedě.

## 18

*Jèsús càhá<sup>n</sup>-gá cuendá ì<sup>n</sup> juéxí ndihí cuendá ì<sup>n</sup> ñaha quèé*

<sup>1</sup> Te Jèsús ní cani-gă ì<sup>n</sup> cuendú núú-güedě cuendá sá vă ná tūhú iní-güedě cáhá<sup>n</sup> ndihí-güedě Yă Ndiöxí nchaa-ni òré. <sup>2</sup> Te xáha<sup>n</sup>-gă:

—Ì<sup>n</sup> ñúú ndécú ì<sup>n</sup> juéxí, te ni ñà túú sàndáá iní-dé Yă Ndiöxí, te ni ì<sup>n</sup> tnúhu xáha<sup>n</sup> ñăyiu ñá túú cuiní-dé cada cuendá-dé.

<sup>3</sup> Te ñúu-ni ñúú-á<sup>n</sup> ndécú tùcu ì<sup>n</sup> ñadihí ñaha quèé, te ní sáhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú juéxí-á<sup>n</sup> cuendá cada ndáá-dé ì<sup>n</sup> cuéchi. <sup>4</sup> Te titní xito ní cuu sàhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú-dé te ñá túú cuiní-dé cada cuendá-dé tnúhu càhá<sup>n</sup>-a<sup>n</sup> ni cùu, te ndéé núú ñà cúú-gă te ní sani iní-dé: “Te cuéi ñá túú sàndáá iní-í Yă Ndiöxí, te ni ñà túú quide cuendá-í nchaa tnúhu càhá<sup>n</sup> ñăyiu cada-í, <sup>5</sup> dico na càda ndáá-í cuendá ñaha quèé-a ndihí ñăyiu cùu úhú iní tnáhá ndihí-a<sup>n</sup>, chi vá cundèe-gă iní-í nuu núu quixi-a<sup>n</sup> dasátú iní ñáhá xii-í”, duha ní sani iní téé cùu juéxí-á<sup>n</sup> —càchí-gă xáha<sup>n</sup>-gă xii-güedě.

<sup>6</sup> Te ní xáha<sup>n</sup> tùcu-gă xii-güedě:

—Cada cuendá-ndó nàcuáa ní sani iní juéxí téé cuihna iní-xi-á<sup>n</sup>. <sup>7</sup> Te Yă Ndiöxí ío chindee-gă nchaa ñăyiu ní cáhá<sup>n</sup>-gă cundecu ndihí-gă, chi cuéi nduu cuéi niú càhá<sup>n</sup> ndihí ñáhá-yu xii-gă, te vá cùyàa-gă nachinaa-gă nchaa sá quidé ñaha nchaa ñăyiu cùu úhú iní ñáhá xii-yu. <sup>8</sup> Te ío ndihí duca<sup>n</sup> càda-gă. Te òré ná quixi yúhú Téé cùu ñani tnáhá-ndó nchaa-ndo, ¿te náa naníhí-gă-í ñăyiu sàndáá ndisa iní Yă Ndiöxí-á<sup>n</sup>? —càchí-gă xáha<sup>n</sup>-gă xii-güedě.

*Nàcuáa quide ì<sup>n</sup> téé cùu fariséú ndihí ì<sup>n</sup> téé cùu cobradór*

<sup>9</sup> Te Jèsús ní cáhá<sup>n</sup>-gă núú ñăyiu nàcuáa quide ñăyiu sàni iní sá ío quide ndáá te

dàquee tíhũ-yu tnàha ñăyiu-yu, te xáha<sup>n</sup>-gă xii-yu:

<sup>10</sup> —Úú cue téé cuáhá<sup>n</sup>-güedé veñúhu càhnu sá ío cùnuu cáhá<sup>n</sup> ndihí-güedé Yă Ndiöxí, te ì<sup>n</sup>-dé cúú-dé téé cùu fariséú, te ingá-dé cúú-dé téé cuihna iní-xi quide cobrá ñáhá xii ñăyiu cuendá impuèstú. <sup>11</sup> Te téé cùu fariséú-á<sup>n</sup> nútñi-dé càhá<sup>n</sup> ndihí-dé Yă Ndiöxí, te xáha<sup>n</sup>-dē xii-gă: “Yòhó Dútú Ndiöxí ndàcá<sup>n</sup> táhú-í núú-n, chi ñá túú quide-í dàtná quidé dăva-gă-güedé, chi dùhu-güedé, càhá<sup>n</sup> ndihí-güedé ñadihí te ñá díú ñadihí-güedé cúú-yu, te nándi-gă nchaa sá cuèhé sá dúhá quide-güedé, te ni ñà túú quide-í dàtná quidé téé cuihna iní-xi quide cobrá ñáhá xii ñăyiu cuendá impuèstú ndécú ìha. <sup>12</sup> Chi yúhú ñá túú tnáhi ná xéxi-í úú nduu xití samàná cuendá sá càhá<sup>n</sup> ndihí ñaha-í xii-n, te nchaa sá ñihí-í te càhu-í úxí xichi, te ì<sup>n</sup> xichi tàxi-í xii-n”, càchí-dé xáha<sup>n</sup>-dē xii Yă Ndiöxí. <sup>13</sup> Dico téé cuihna iní-xi quide cobrá ñáhá xii ñăyiu cuendá impuèstú-á<sup>n</sup> chi xica lùha nutñi-dé, te ni lùha ñá túú cùyi-dé ndonehe núú-dé andiu cuendá sá ndíxí cuéchi iní-dé nchaa sá ñà túú văha quide-dé, te ndédí ndaha-dé pèchú-dé sá ndihú iní-dé, te xáha<sup>n</sup>-dē xii Yă Ndiöxí: “¿Yòhó Dútú Ndiöxí cundàhú iní ñáhá xii-í, chi ío cuèhé să ñà túú văha quide-í núú-n!”, càchí-dé xáha<sup>n</sup>-dē xii Yă Ndiöxí. <sup>14</sup> Te na càchí tnúhu-í xii-ndo să téé cuihna iní-xi quide cobrá ñáhá xii ñăyiu-á<sup>n</sup> ñí tedóho Yă Ndiöxí nchaa tnúhu ní cáhá<sup>n</sup>-dē, te ní quide càhnu iní-gă nchaa sá ñà túú văha ní quide-dé, te cuánuhú-dé vehe-dé. Te téé cùu fariséú-á<sup>n</sup> ñà túú ní tedóho ñaha Yă Ndiöxí xii-dé. Chi nchaa ñăyiu na càda cahnu mee-xi ñuyú-a te vá cúú-yu ñăyiu cùnuu, te nchaa ñăyiu ñá túú quide cahnu mee-xi, ñăyiu-á<sup>n</sup> cunúú-yu —càchí Jèsús xáha<sup>n</sup>-gă xii-yu.

*Jèsús quidé ÿ-gă landú*

*(Mt. 19:13-15; Mr. 10:13-16)*

<sup>15</sup> Te ì<sup>n</sup> úú ñăyiu ndécá-yu landú líhli cuáhá<sup>n</sup> núú Jèsús chi cuiní-yu sá téndàha ñaha-gă xii-güexi, te òré ní xiní cue téé xica cuu ndihí-gă sá ndécá-yu landú-á<sup>n</sup> cuáhá<sup>n</sup> núú-gă, te ní ngúita-güedé ténàá ñáhá-güedě xii-yu, te xáha<sup>n</sup>-güedě sá vă

dúcá<sup>n</sup> càdá-yu. <sup>16</sup> Dico Jèsús ní cana ñaha-gã xii-güedé, te ní xáha<sup>n</sup>-gã:

—Chí dáñá ná quixi nahi landú lĩhli-á<sup>n</sup> nũ-í-a, te vá càdí-ndó ìchi-güexi, chi dàtná cúú vãha iní cue landú lĩhli-á<sup>n</sup> duca<sup>n</sup> cùu vãha iní cue ñáyiu yĩndaha ñaha Yá Ndiõxí. <sup>17</sup> Te ña càchí tnúhu ndáá-í xii-ndo sã nũu vá quĩndáá iní ñáhá-ndó dàtná quídé dãva landú lĩhli sãndáá iní ñáhá xii-í, te vá ndĩhu ndaha ñaha Yá Ndiõxí xii-ndo, te vá ndúú táhú-ndó cùndecu-ndo ndihí-gã ni caa ni quĩhí<sup>n</sup> —càchí-gã xáha<sup>n</sup>-gã xii-güedé.

*J<sup>n</sup> tée cuica càhá<sup>n</sup> ndihí-dé Jèsús  
(Mt. 19:16-30; Mr. 10:17-31)*

<sup>18</sup> Te ñ<sup>n</sup> tée cùnuu ní xicá<sup>n</sup> tnúhú-dě núú Jèsús, te xáha<sup>n</sup>-dě xii-gã:

—Yòhó Mèstrú, cùu-n tée ío vãha iní-xi, te cuiní-í nũu vá cùndèe iní-n càchí tnúhu-n nã cúú sã vãha cada-í cuendá nduu táhú-í cundecu-í ndihí Yá Ndiõxí ni caa ni quĩhí<sup>n</sup> —càchí-dé xáha<sup>n</sup>-dě xii-gã.

<sup>19</sup> Te Jèsús ní xáha<sup>n</sup>-gã xii-dé:

—¿Te cùtnuní iní-n nãcuáa ndùu tnúhu càhá<sup>n</sup>-n sã yũhú vãha iní-ã<sup>n</sup>? Chi ñ<sup>n</sup> dũ dũ-ni Yá Ndiõxí vãha iní-gã. <sup>20</sup> Te yòhó xini-n nãcuáa ní cachí Yá Ndiõxí cada ñáyiu, te duha ní cachí-gã: “Nchòhó cue tée vá càhá<sup>n</sup> ndihí-ndo ñàdihí te núu ñá díú ñàdihí-ndó cùu-yu, te duca<sup>n</sup>-ni nchòhó cue ñáyiu dũhí tucu vá càhá<sup>n</sup> ndihí-ndo tõe te núu ñá díú yĩ-ndo cuu-güedé, te vá cáhni-ndó tnàha ñáyiu-ndo, te ni vã dúhú-ndó sã ndécú ndihí-yu, te ni vã dácacu-ndo cuéchi neñúú sã cúú-xí tnàha ñáyiu-ndo, te canehe-ndo sã yĩñũhu núú tátá-ndó ndihí núú nãná-ndó”, duha ní cachí Yá Ndiõxí cada ñáyiu —càchí Jèsús xáha<sup>n</sup>-gã xii-dé.

<sup>21</sup> Te tée-á<sup>n</sup> ñí xáha<sup>n</sup>-dě xii-gã:

—Nchaa xĩã<sup>n</sup> ní ngũita-í quídè-í ndéé cùtnàhá cúú lãndú-í —càchí-dé xáha<sup>n</sup>-dě xii-gã.

<sup>22</sup> Te Jèsús ní xáha<sup>n</sup>-gã xii-dé:

—Dico cùmání ìngá núú sã cádá-n, vitna te quĩhí<sup>n</sup>-n te dico-n nchàa sã ndécú ndihí-n, te díhú-n cuãha táhú-n cuè ñáyiu ndàhú, te duca<sup>n</sup> te nduu táhú-n cùndecu vãha-n nũú ndécú Yá Ndiõxí táxí tnũní-gã,

te na yãha duca<sup>n</sup> càda-n te quixi-n chĩtnahá ñáhá-n xii-í —càchí-gã xáha<sup>n</sup>-gã xii-dé.

<sup>23</sup> Te sã dúcá<sup>n</sup> ñí xáha<sup>n</sup> Jèsús xii-dé, te ío ní cundiyí-dé, chi ío cuica-dé. <sup>24</sup> Te sã ñí xini ñáhá Jèsús xii-dé cundiyí-dé, núu ní cachí-gã:

—Ío úhú quĩndáá iní ñáyiu cuica Yá Ndiõxí cuendá ndĩhu ndaha ñaha-gã xii-yu! <sup>25</sup> Te yáchí-gã yãha ñ<sup>n</sup> caméyu yaú ñ<sup>n</sup> yiqui tícú dàcúúxí sã quĩndáá iní ñ<sup>n</sup> ñáyiu cuica Yá Ndiõxí cuendá ndĩhu ndaha ñaha-gã xii-yu —duha ní cachí-gã.

<sup>26</sup> Te nchaa ñáyiu ní tecú dóho-xi tnúhu ní càhá<sup>n</sup>-gã ní xáhá<sup>n</sup>-yu xii-gã:

—¿Te yoo naníhí táhú te núu duca<sup>n</sup> vã<sup>n</sup>? —càchí-yu xáhá<sup>n</sup>-yu xii-gã.

<sup>27</sup> Te Jèsús ní xáha<sup>n</sup>-gã xii-yu:

—Cue ñáyiu ñuyíú-a chí vá ndácũ-yu ná cada-yu nãcuáa ndĩhu ndaha ñaha Yá Ndiõxí xii-yu, dico mee-gã chí ndacu-gã ndĩhu ndaha ñaha-gã xii-yu chí nchaa sã vãha ndacu-gã quídé-gã —càchí-gã xáha<sup>n</sup>-gã xii-yu.

<sup>28</sup> Te té Pèlú ní xáha<sup>n</sup>-dě xii-gã:

—Nchúhú ní dándõo-ndí nchaa sã ndécú ndihí-ndí, te ní tuha ñaha-ndí xii-n —càchí-dé xáha<sup>n</sup>-dě xii-gã.

<sup>29</sup> Te ní xáha<sup>n</sup>-gã xii ñáyiu:

—Na càchí tnúhu ndáá-í xii-ndo sã nchãá ñáyiu na dándõo vehe-xi, àdi tátá-xi, nãná-xi, ñaní-xi, cúha-xi, ñadĩhí-xi, déhe-xi cuendá sã cuiní-yu ndĩhu ndaha ñaha Yá Ndiõxí xii-yu, <sup>30</sup> te ío-gã cuéhé sã cuãñaha-gã xii-yu cundecu ndihí-yu, te ñá díú-ní xĩã<sup>n</sup>, chí tnàhá nduu táhũ-yu cundecu ndihí ñáhá-yu xii-í ni caa ni quĩhí<sup>n</sup> ná sãá nduu —càchí-gã xáha<sup>n</sup>-gã xii-yu.

*Jèsús càhá<sup>n</sup> tucu-gã sã cáhni ñaha-güedé  
xii-gã*

*(Mt. 20:17-19; Mr. 10:32-34)*

<sup>31</sup> Te Jèsús ní taudĩ<sup>n</sup>-gã ndi ùxúú cue téé xica cuu ndihí-gã tnuú ñáyiu, te ní xáha<sup>n</sup>-gã xii-güedé:

—Vitna te quĩhí<sup>n</sup>-ó ñũú Jerusalén, chí yacá<sup>n</sup> cada-xi nchaa nãcuáa sa ní chídó tnũní cue téé ní xóo càhá<sup>n</sup> tnúhu Yá Ndiõxí ndéé sanaha nãcuáa yãha yũhú Téé cùu ñaní tnàhá-ndó nchàa-ndo. <sup>32</sup> Chí cuáha

cuendá ñáhá-güedě xii-í núú cuè téé ñá túú cùu cue téé isràél, te cudíquí ndeé ñáhá-güedě xii-í, te cúcuèhé ñáhá-güedě, te tiú díí ñáhá-güedě xii-í. <sup>33</sup> Te caniha-güedě ndíhi ñí, te dātñuní cahni ñaha-güedě xii-í, dico nduu úní sá cùú-í te ndoto-í —càchí-gá xáha<sup>n</sup>-gã xii-güedě.

<sup>34</sup> Dico ní ñí<sup>n</sup> tnúhu ní cáhá<sup>n</sup>-gá ñá túú ní tècú tnùn-í-güedé, chi ío yídáhu tnúhu ní cáhá<sup>n</sup>-gá nūu xíá<sup>n</sup> ní ñí<sup>n</sup> ñá túú ní tècú tnùn-í-güedé.

*Jèsús quidé tātna-gá núú ñí<sup>n</sup> téé cuáá ñúú Jericó*

*(Mt. 20:29-34; Mr. 10:46-52)*

<sup>35</sup> Te òré tá cùyatni Jesús ñúú Jericó cuáhá<sup>n</sup>, te yuhu ìchi cuáhá<sup>n</sup>-gá-á<sup>n</sup> núcõo ñí<sup>n</sup> téé cuáá xicá<sup>n</sup> ndàhú-dé. <sup>36</sup> Te òré ní tecú dóho-dé xicáhá<sup>n</sup> vai ñáyiu xiyáha-yu, te ní xicá<sup>n</sup> tnúhú-dé núú ñáyiu ndècu ndíhi-dé ná cuendá duca<sup>n</sup> vai-yu yáha. <sup>37</sup> Te ní xáhá<sup>n</sup>-yu sá Jèsús téé ñúú Nazàrét ñúhú-dé ichi. <sup>38</sup> Te níhi ní cáhá<sup>n</sup>-dé, te xáha<sup>n</sup>-dè xii-gá:

—Jèsús ñaní tnáhá ndíi Dàvíí, cundàhú iní ñáhá xii-í! —càchí-dé xáha<sup>n</sup>-dè xii-gá.

<sup>39</sup> Te ñáyiu xixódó núú nūú Jèsús ní tenàá ñáhá-yu xii-dé, te xáhá<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dè xáha<sup>n</sup>-dè xii-gá:

—Yòhó téé cùu ñaní tnáhá ndíi Dàvíí, cundàhú iní ñáhá xii-í! —càchí-dé xáha<sup>n</sup>-dè xii-gá.

<sup>40</sup> Te Jèsús ní ngüíñí-gá, te ní táuchíú<sup>n</sup>-gã ní sánguehe<sup>n</sup> ñaha cuè téé ndíhi-gá. Te òré ní quexìo-dé núú-gã, te ní xicá<sup>n</sup> tnúhú-gã núú-dè, te xáha<sup>n</sup>-gã:

<sup>41</sup> —¿Ná cuíní-n càda ñaha-í xii-n-í? —càchí-gá xáha<sup>n</sup>-gã xii-dé.

Te téé cuáá-á<sup>n</sup> ñí xáha<sup>n</sup>-dè:

—Mèstrú, cuíní-í cada tātna-n nūú-í cuendá cundehe-í —càchí-dé xáha<sup>n</sup>-dè xii-gá.

<sup>42</sup> Te Jèsús ní xáha<sup>n</sup>-gã:

—Sa ní ndúha núú-n chi ní sándáá iní-n Yá Ndiõxí —càchí-gá xáha<sup>n</sup>-gã xii-dé.

<sup>43</sup> Te òré-ni-á<sup>n</sup> ñí ndúha núú-dè, te ní chinchícu<sup>n</sup>-dé Jèsús, te ní cachí-dé sá ío càhnu cuu Yá Ndiõxí. Te nchaa ñáyiu ní xiní nàcuáa ní cuu ní ndúha núú-dè tnàhá-yu ní cachí-yu sá ío càhnu cuu Yá Ndiõxí.

## 19

*Jèsús ndíhi ñí<sup>n</sup> téé nàni Zaqueú*

<sup>1</sup> Te Jèsús ní sáá-gá ñúú Jericó, te ta yáha-gá xití ñúú-á<sup>n</sup> cuáhá<sup>n</sup>. <sup>2</sup> Te ñúú-á<sup>n</sup> ndécú ñí<sup>n</sup> téé cuica nàni-dé Zaqueú, te cùnūu-dé táxí tnùn-í-dé cue téé cùndíhi-dé, cue téé cuihna ìní-xi quide cobrá ñáhá xii ñáyiu cuendá impuèstú. <sup>3</sup> Te téé-á<sup>n</sup> cuíní-dé quíní-dé Jèsús òré-á<sup>n</sup> ní cùu te ñá ní ndàcu-dé, chi ío cuéhé ñáyiu, te ñá túú dùcú<sup>n</sup>-dé. <sup>4</sup> Te xinu-dé ní ngódó núú-dè te ní sáá-dé díquí ñí<sup>n</sup> yutnu sìcómorú nùtní yatni yuhu ìchi núú yáha Jèsús cuendá cuíní-dé quíní ñáhá-dè xii-gá. <sup>5</sup> Te òré tá yáha Jèsús xíá<sup>n</sup>, te ní ndonehe núú-gã díquí yutnu núú càndòdo-dé-á<sup>n</sup>, te ní xáha<sup>n</sup>-gã xii-dé:

—Zaqueú, tanūu ndíhi díquí yutnu-á<sup>n</sup>, chi tnávíi quexìo-í vehe-n ndètátú-í —càchí-gá xáha<sup>n</sup>-gã xii-dé.

<sup>6</sup> Te té Zaqueú-á<sup>n</sup> ñí nuu ndíhi-dé díquí yutnu-á<sup>n</sup>, te ío ní cudíi ìní-dé ní quehe<sup>n</sup> cuendá-dé Jèsús vehe-dé. <sup>7</sup> Te sá ñí xiní ñáyiu ní quexìo Jesús vehe-dé, te ncháa-yu ní ngüíta-yu càhá<sup>n</sup> cuéhe-yu cuendá-gá, te xitnàhá-yu:

—Téé-a cuánguìhu-dé vehe ñí<sup>n</sup> téé ndècu ìchi cuehé ichi duha —càchí-yu xitnàhá-yu.

<sup>8</sup> Te té Zaqueú-á<sup>n</sup> ñí ndacuíñí-dé tnuú-yu, te xáha<sup>n</sup>-dè xii Jèsús:

—Yòhó Mèstrú, na cuáha-í ñáyiu ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùní-gá tnàhá sá ñí dúhù-í-yu nacuáñaha-í xii-yu —càchí-dé xáha<sup>n</sup>-dè xii-gá.

<sup>9</sup> Te Jèsús ní xáha<sup>n</sup>-gã xii té Zaqueú:

—Vitna ní naníhí tàhú-n ndíhi nchaa ñáyiu xindecu vehe-n, chi tnàhá-n cùu-n ñaní tnáhá ndíi Àbrahám. <sup>10</sup> Te yúhú Téé cùu ñaní tnáhá-ndó nchaa-ndo véxi-í nándùcu-í ñáyiu ní xíta nihnu cuendá dàcácu nihnu-í-yu núú ùhú núú ndàhú —càchí-gá xáha<sup>n</sup>-gã xii-dé.

*Nàcuáa ní quide-güedé ndíhi díhú<sup>n</sup> cuáá<sup>n</sup> (Mt. 25:14-30)*

<sup>11</sup> Te nchaa ñáyiu-á<sup>n</sup> ñí sani iní-yu sá ndíhi-ni ndíhu ndaha ñàha Yá Ndiõxí xii-yu cuendá sá ñí cuyatni Jèsús ñúú Jerusalén, te xíá<sup>n</sup> nūu ní ngüíta Jèsús ní caní-gá ñí<sup>n</sup>



cuèndú núu-yu cuèndá tecú tnùní váha-yu tnúhu-gá. <sup>12</sup> Te xáha<sup>n</sup>-gã xií-yu:

—Ní xíndecu ì<sup>n</sup> téé cùu ñaní tnáhá ñáyiú cùnuu, te cuáhá<sup>n</sup>-dé ingá ñuú xíca cuèndá yàcá<sup>n</sup> cuáha ñaha-güedé chiú<sup>n</sup> coo-dé, te dātnùní ndixi-dé quíndaha-dé titní ñuú. <sup>13</sup> Te cùmání-gã quee-dé quíhí<sup>n</sup>-dé, te ní cana-dé úxí cue téé xínu cuechi núú-dé, te ní sáñaha-dé ndí díí<sup>n</sup> núú-güedé ì<sup>n</sup> caa ì<sup>n</sup> caa díhú<sup>n</sup> cuáá<sup>n</sup>, te ní xáha<sup>n</sup>-dē: “Chí cádá ndáhú ndihí díhú<sup>n</sup>-á<sup>n</sup> ndèé ná sáá nduu násáá-í”, cāchí-dé xāha<sup>n</sup>-dē xii-güedé. <sup>14</sup> Dico nchaa ñáyiú ñuú quíndaha-dé-á<sup>n</sup> ñá túú tnáhá iní-yu sá quíndaha ñaha-dé, núu ní tendáhá-yu cue téé nèhe tnúhu cuáhá<sup>n</sup> núú cuè téé cuáñaha chiú<sup>n</sup> coo-dé-á<sup>n</sup>, te ní xáhá<sup>n</sup>-yu sá cūñaha-güedé sá ñá túú tnáhá iní-yu sá tēe-á<sup>n</sup> quíndaha ñaha-dé xií-yu. <sup>15</sup> Dico dacutíí sã ñí sáha-güedé téé-á<sup>n</sup> chiú<sup>n</sup> coo-dé sá díú-dē quíndaha-dé ñáyiú nchaa ñuú-á<sup>n</sup>, te ní nacuíco-dē cuánuhú-dé ñuú-dé. Te òré ní nasáá-dé vehe-dé, te ní tendaha-dē ì<sup>n</sup> téé ní sánúcana ñaha xii cue téé xínu cuechi núú-dé, cue téé ní dándõ ndaha-dé díhú<sup>n</sup> cuèndá cācá<sup>n</sup> tnúhú-dé núú-güedé ì<sup>n</sup> ì<sup>n</sup>-güedé núu ndèé dau ní chídó-xí díquí díhú<sup>n</sup> sã ñí dándõ ndaha ñaha-dé-á<sup>n</sup>. <sup>16</sup> Te téé ní ndèxio díhna xāha<sup>n</sup>-dē: “Pàtróón, ní quide-í ndáhú ndihí díhú<sup>n</sup>-n sã ñí dándõ ndaha ñaha-n xii-í, te sá ì<sup>n</sup> ñí taxi-n te ní chídó-xí úxí-gá tnáhá te ná-a naquehe<sup>n</sup> cuèndá-n”, cāchí-dé xāha<sup>n</sup>-dē. <sup>17</sup> Te téé cùu patróón-dē-á<sup>n</sup> ñí xáha<sup>n</sup>-dē: “Ío váha téé xínu cuechi cuu-n chí ío váha ní quide-n, te sá ñí quide váha-n ndihí sacú díhú<sup>n</sup> sã ñí dándõ ndaha ñaha-í xii-n, te xíá<sup>n</sup> núu yúhú cāchí-í sá táxí tnùní-n úxí ñuú vitna”, cāchí-dé xāha<sup>n</sup>-dē. <sup>18</sup> Te ní ndèxio ingá-dé, te ní xáha<sup>n</sup>-dē: “Pàtróón, ní quide-í ndáhú ndihí díhú<sup>n</sup>-n sã ñí dándõ ndaha ñaha-n xii-í, te sá ì<sup>n</sup> ñí taxi-n te ní chídó-xí úhú<sup>n</sup>-gá tnáhá te ná-a naquehe<sup>n</sup> cuèndá-n”, cāchí-dé xāha<sup>n</sup>-dē. <sup>19</sup> Te ní xáha<sup>n</sup> téé cùu patróón-dē-á<sup>n</sup> xii-dé: “Te yòhó taxi tnùní-n úhú<sup>n</sup> ñuú”, cāchí-dé xāha<sup>n</sup>-dē xii téé xínu cuechi-á<sup>n</sup>. <sup>20</sup> Te dātnùní ní ndèxio tucu ingá-dé, te xáha<sup>n</sup>-dē: “Pàtróón, náu díhú<sup>n</sup>-n-á, te naquehe<sup>n</sup> cuèndá-n chí ní taxúha-í ní chidúcú<sup>n</sup>nuu-í ì<sup>n</sup> pāñú te ñá túú ní quide-í ndáhú ndihí díhú<sup>n</sup>-n, <sup>21</sup> chí

ní yúhú ñáhá-í xii-n, chí cùu-n ì<sup>n</sup> téé díí, te nāquehe<sup>n</sup>-n ì<sup>n</sup> sá ñá túú ní tàxi ndecu-n, te nàtahu-n ì<sup>n</sup> xichi núú ñá túú ní chíhi-n tatá”, cāchí-dé xāha<sup>n</sup>-dē xii patróón-dē. <sup>22</sup> Te ní xáha<sup>n</sup> patróón-dē xii-dé: “Yòhó cùú-n ì<sup>n</sup> téé cuihna iní-xi xínu cuechi núú-í, te díu-ni nchaa tnúhu cāhá<sup>n</sup>-n-á<sup>n</sup> cāchí tnùní-xi nācuáa cuu ndáá cuéchi-n. Te núu sáni iní-n sá cùú-í ì<sup>n</sup> téé díí, te nāquehe<sup>n</sup>-í ì<sup>n</sup> sá ñá túú ní tàxi ndecu-í, te nàtahu-í ì<sup>n</sup> xichi núú ñá túú ní chíhi-í tatá, <sup>23</sup> te núu duca<sup>n</sup> ña, ¿te ná cuèndá ñá túú ní càhu iní-n dāsa<sup>n</sup> nuu-n díhú<sup>n</sup> ñí taxi-í, te cūñaha-n chāhu-yu díquí-xi, te òré ná násáá-í vehe-í, te sa ngódó lùha-gá díquí-xi naquehe<sup>n</sup> cuèndá-í ní cùu-í?”, cāchí-dé xāha<sup>n</sup>-dē xii téé xínu cuechi-á<sup>n</sup>. <sup>24</sup> Te ní xáha<sup>n</sup> tēe cùu patróón-á<sup>n</sup> xii cue téé xíndecu xíá<sup>n</sup>: “Chí quèndèé díhú<sup>n</sup> cuáá<sup>n</sup> néhé tēe-a, te cuáha-ndo tēe nèhe úxí tucu díhú<sup>n</sup> cuáá<sup>n</sup>-á<sup>n</sup>”, cāchí-dé xāha<sup>n</sup>-dē xii-güedé. <sup>25</sup> Te ní xáha<sup>n</sup>-güedé: “Pàtróón, dico sa nèhe-dé úxí díhú<sup>n</sup> cuáá<sup>n</sup>”, cāchí-güedé xāha<sup>n</sup>-güedé. <sup>26</sup> Te ní xáha<sup>n</sup> tēe cùu patróón-á<sup>n</sup>: “Na cāchí tnúhu-í xii-ndo sã cuè ñáyiú ío xii-xi te níhí-gã-yu cundecu ndihí-yu, te cue ñáyiú sacú ndécú ndihí cuita ndihí nihnu nchaa sá ndécú ndihí-yu”, cāchí téé cùu patróón-á<sup>n</sup> xāha<sup>n</sup>-dē xii-güedé. <sup>27</sup> Te xāha<sup>n</sup> tūcu-dé xii-güedé: “Nchaa ñáyiú cùu úhú iní ñáhá xii-í ñá tnáhá iní-yu quíndaha-í-yu, te chí cāndecá-yu taquixi íha, te cahni-ndõ-yu núú-í-a”, cāchí téé cùu patróón-á<sup>n</sup> xāha<sup>n</sup>-dē xii-güedé —duha cuáhá<sup>n</sup> cuèndú ní caní Jèsús núú ñáyiú.

### *Jèsús cuánguihu-gá ñuú Jerusálén*

(Mt. 21:1-11; Mr. 11:1-11; Jn. 12:12-19)

<sup>28</sup> Te sátá dúcá<sup>n</sup> ñí cāhá<sup>n</sup>-gá, te ní nucúhu<sup>n</sup> ichi-gá cuáhá<sup>n</sup>-gá ñuú Jerusálén. <sup>29</sup> Te òré sa ní cuyatni-gá ñuú Bètfaqé, ndihí ñuú Bètaniá te xíá<sup>n</sup> cáá yùcu nani Olivú, te ní xáha<sup>n</sup>-gã xii úú cue téé xíca cuu ndihí-gá:

<sup>30</sup> —Chí cuáhá<sup>n</sup> ñuú cáá yàtni yacá<sup>n</sup>, te òré quèxio-ndo yacá<sup>n</sup>, te naníhí-ndó ì<sup>n</sup> búrru ndètníi-di, te vátá yõo ì<sup>n</sup>-gá codo ñaha xii-di, te nandaxi-ndo-di te candeca-ndo-di quèxi.

<sup>31</sup> Te núu yoo na cācá<sup>n</sup> tnúhu núú-ndó ñá cuèndá nándaxi-ndo-di, te cūñaha-ndo xii-yu sá yúhú Yaá xíca cùu ndihí-ndo xini ñuhu-í-di —cāchí-gá xáha<sup>n</sup>-gã xii-güedé.

<sup>32</sup> Te cue tée-á<sup>n</sup> ñi xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús duca<sup>n</sup> ñi cuu, <sup>33</sup> chi mei òré nándàxi-güedé búrru-á<sup>n</sup> ñi quexìo cue ñáyiú cùu xítóhó-dì xicá<sup>n</sup> tnúhu-yu núú-güedé, te xáhã<sup>n</sup>-yu:

—¿Ná cuendá nándàxi-ndo búrru-ndí-i? — càchí-yu xáhã<sup>n</sup>-yu.

<sup>34</sup> Te ní xáha<sup>n</sup>-güedé xii-yu:

—Nà ndaxi-ndí-dì chi Yaá xicá cùu ndihí-ndí xíní ñùhu ñaha-gá xii-dì — càchí-güedé xáhã<sup>n</sup>-güedé xii-yu.

<sup>35</sup> Te ndèca-güedé-dì cuáhá<sup>n</sup> núú ndécú Jèsús, te òré ní quexìo-güedé ndihí-dì núú ndécú-gã te ní sacá<sup>n</sup> ndodo-güedé dóo-güedé sátá-dì, te ní ngódó ñáhã-gã xii-dì. <sup>36</sup> Te ío cuéhé ñáyiú ta sàcá<sup>n</sup>-yu dóo-yu ichi cuáhã<sup>n</sup>-gã cuendá núú dóo-yu-á<sup>n</sup> yáha-gã ndihí quití yòdo-gã. <sup>37</sup> Te ní nucuíta nuu-gã ichi tìndúú yucu Òlívú tá cùyatni-gã ñuú Jerusàlén cuáhã<sup>n</sup>, te nchaa ñáyiú sàndáá iní ñáhã xii-gã nchìcú<sup>n</sup> ñáhã-yu te ní ngúita-yu níhi càhá<sup>n</sup>-yu sá cúdí iní-yu, te càchí-yu sá ìo càhnu cuu Yá Ndióxi cuendá sá ñi xíní-yu nchaa sá vã yòo tnháí ndàcu cada ní quide-gã. <sup>38</sup> Te càchí-yu:

—¡Ío càhnu cuu Yaá véxi quindaha ñaha xii-o, te diu-gã cúú-gã Yaá ní tendaha Yá Ndióxi véxi quide núú-gã! ¡Te ío càhnu cuu mee-gã! ¡Te andíu ñà túú tnháí ná cúú! — duha càchí-yu.

<sup>39</sup> Te ñi<sup>n</sup> úú cue tée cùu fariséú ñúhú tnhá tnuú ñáyiú-á<sup>n</sup> ñi xáha<sup>n</sup>-güedé xii Jèsús:

—Mèstrú, cúñaha nchaa ñáyiú ndihí-n na càdí-yu yuhú-yu —càchí-güedé xáhã<sup>n</sup>-güedé xii-gã.

<sup>40</sup> Dico Jèsús ní xáha<sup>n</sup>-gã xii-güedé:

—Te na càchí tnúhu-í xii-ndo sã ñuú ñáyiú-a na càdí-yu yuhú-yu ña, te nchaa yúú càhá<sup>n</sup> níhi-xi dàtná ñi<sup>n</sup> ñáyiú —càchí-gã xáha<sup>n</sup>-gã xii-güedé.

<sup>41</sup> Te òré ní cuyatni-gã ñuú Jerusàlén te ní xíní-gã, te ní ndáhyú-gã cuendá nchaa ñáyiú dii ñuú-xi-á<sup>n</sup> sã ndihú iní-gã. <sup>42</sup> Te ní xáha<sup>n</sup>-gã xii cue ñáyiú-á<sup>n</sup>:

—Ío cuu váha iní-í te núú dicó nchòhó tecú tnùní-ndó vitna ñi<sup>n</sup> tnúhu sá cadá váha ñaha xii-ndo, chi ñà túú-gã ná cuu cundecu-ndo, te núu na tècú tnùní-ndó. Dico ñà tècú

tnùní-ndó, chi ío yidáhu tnúhu-a. <sup>43</sup> Te sáá nduu tnündòho tnúhu ndàhú sá cúú-xi-ndó, te nchaa cue tée dava-gã ñuú cúú ùhú iní tnháá ndihí-ndo quixi-güedé chidoco ñaha-güedé xii-ndo, te ñi càndéé núú ndécú-ndó-ã<sup>n</sup> dacàa-güedé ndóho cuendá xíá<sup>n</sup> quihi váha-güedé nàá ndihí ñaha-güedé xii-ndo, te vá dañá-güedé cunu-ndo. <sup>44</sup> Te cahni ñaha-güedé xii-ndo, te ndihí nchaa vehe-ndo dàngoyo-güedé ndéé cimiéntú-xi, chi ñà túú ní cuení-ndó nàcuáha-ndo cuendá òré ní quixi coto ñaha Yá Ndióxi xii-ndo — duha ní xáha<sup>n</sup>-gã xii ñáyiú ñuú-á<sup>n</sup>.

*Jèsús ñà túú tnháá iní-gã nàcuáa quidé-yu veñúhu*

(Mt. 21:12-17; Mr. 11:15-19; Jn. 2:13-22)

<sup>45</sup> Te Jèsús cuánguihu-gã xití veñúhu càhnu sá ìo cùnuu, te xití veñúhu-á<sup>n</sup> xíndecu cue ñáyiú quide ndáhu ndihí cue ñáyiú xísaa<sup>n</sup>. Te ní queñuhu ñaha Jèsús xii-yu quehé. <sup>46</sup> Te ní xáha<sup>n</sup>-gã xii-yu:

—Núú tütú Yá Ndióxi càhá<sup>n</sup>-xi nàcuáa ní càhá<sup>n</sup>-gã, te duha ní cachí-gã: “Vehe-í cúú-xi núú càhá<sup>n</sup> ndihí ñaha ñáyiú xii-í”, duha ní càhá<sup>n</sup>-gã càchí-xi núú tütú-gã. Dico nchòhó quidé-ndó vehe-gã vehe ñadúhú — càchí-gã xáha<sup>n</sup>-gã xii-yu.

<sup>47</sup> Te Jèsús nchaa nduu dànehé-gã ñáyiú xití veñúhu, dico cue tée cùu dütú cùnù, ndihí cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndihí cue tée cùnuu ñuú-á<sup>n</sup> ndúcú-güedé nàcuáa cada-güedé cahni ñaha-güedé xii-gã. <sup>48</sup> Dico ñà nihí-güedé nàcuáa cada-güedé, chi cuendá nchaa ñáyiú ío cúdí iní-yu ndèdòho-yu nchaa tnúhu càhá<sup>n</sup>-gã.

## 20

*Jèsús ndécú ndihí-gã tnúhu ndee iní*

(Mt. 21:23-27; Mr. 11:27-33)

<sup>1</sup> Te ñi<sup>n</sup> nduu yíhi Jèsús xití veñúhu càhnu sá ìo cùnuu danehé-gã ñáyiú tnúhu sá càhá<sup>n</sup> nàcuáa naníhí tãhú-yu. Te ní quexìo cue tée cùu dütú cùnù ndihí cue tée dàcuaha ñaha xii ñáyiú nchaa tnúhu ní chídó tnùní ndí Moisés, ndihí cue tée cùu sacuéhé núú ñáyiú isráel, <sup>2</sup> te ní xáha<sup>n</sup>-güedé xii-gã:

—Cuení-ndí cachí tnúhu-n xii-ndí nása nduu tnúhu ndee iní ndécú ndihí-n núu quide-n nándi sá quidé-n. ¿Te yoo duca<sup>n</sup> ñi

taxi tnúhu ndee ìní-á<sup>n</sup> xii-n? —càchí-güedé xǎha<sup>n</sup>-güedě xii-gá.

<sup>3</sup> Te Jèsús ní xáha<sup>n</sup>-gǎ:

—Yúhú tnàhá-í cuìní-í cǎcá<sup>n</sup> tnúhu-í ì<sup>n</sup> sǎ cǎcá<sup>n</sup> tnúhu-í núú-ndó, te cachí tnúhu-ndo.

<sup>4</sup> Te chí cǎchí tnúhu xii-í yoo ní táúchíú<sup>n</sup> ñí dǎcuándùte ndíi Juàá ñáyiu. ¿Yá Ndiǒxí ã<sup>n</sup> cuè téé ñuyúú-a ní táúchíú<sup>n</sup> dùca<sup>n</sup> ní quide ndíi? —càchí-gá xáha<sup>n</sup>-gǎ xii-güedé.

<sup>5</sup> Te ní nguíta-güedé xǐtnàha-güedé:

—¿Nása cúñaha-o? Chi núu nà cúñaha-o sǎ Yǎ Ndiǒxí ní táúchíú<sup>n</sup> dùca<sup>n</sup> ní quide ndíi Juàá ñá, te quesaha-dě: “¿Ná cuendá ñá túú ní sǎndáá ìní-ndó tnúhu ní cǎhá<sup>n</sup> ndíi vǎi<sup>n</sup>?”, quesaha-dě. <sup>6</sup> Àdi te núu nà cúñaha-o sǎ cuè ñáyiu ñuyúú-a ní táúchíú<sup>n</sup> dùca<sup>n</sup> ní quide ndíi ñá, te nchaa ñáyiu cuáha ñàhá-yu yúú xii-o, te cahni ñàhá-yu, chi cǎchí-yu sǎ ndáá sǎ Yǎ Ndiǒxí ní táúchíú<sup>n</sup>-gǎ ní cǎhá<sup>n</sup> ndíi Juàá tnúhu-gá núú ñáyiu —càchí-güedé xǐtnàha-güedé.

<sup>7</sup> Te ní xáha<sup>n</sup>-güedé xii-gá sǎ ñà túú xini-güedé yoo ní táúchíú<sup>n</sup> dùca<sup>n</sup> ní dǎcuándùte ndíi Juàá ñáyiu. <sup>8</sup> Te ní xáha<sup>n</sup> Jèsús xii-güedé:

—Te núu duca<sup>n</sup> te ni yǔhú vá cǎchí tnúhu-í xii-ndo yò ní taxi tnúhu ndee ìní duha quide-í —càchí-gá xáha<sup>n</sup>-gǎ xii-güedé.

*Cuendá cue téé cuihna ìní-xi  
(Mt. 21:33-44; Mr. 12:1-11)*

<sup>9</sup> Te sǎtá dúcá<sup>n</sup> te ní nguíta Jèsús ní cani-gá ì<sup>n</sup> cuendú núú ñáyiu nàcuáa tecú tnùnì-yu tnúhu-gá, te xáha<sup>n</sup>-gǎ xií-yu:

—Ì<sup>n</sup> téé ní xitu-dé mee-ni yòho yaha stilé núú ñúhú-dě. Te ní sǎá ì<sup>n</sup> nduu quingaca cuu xica-dě vǎi nduu te ní dǎndóo ndaha-dě sǎ ñí xitu-dé-á<sup>n</sup> xii ì<sup>n</sup> úú cue téé cǎhá<sup>n</sup> ndíi-dé cuendá cada chiú<sup>n</sup>-güedé, te ní ndatnúhu-güedé sǎ òré ná cùu te cuu cuendá dǎva-güedé te duca<sup>n</sup> te ní quee-dé cuáhá<sup>n</sup>-dé. <sup>10</sup> Te sǎtá ñí sǎá nduu ñí cuu nchaa ndéhé yoho yàha stilé sǎ ñí xitu-dé-á<sup>n</sup>, te ní xáha<sup>n</sup>-dě xii ì<sup>n</sup> téé xinu cuechi núú-dě: “Cuáhá<sup>n</sup> cǎcá<sup>n</sup>-n sǎ cúú cuendá-í núú cuè téé ní dǎndóo ndàha-í nchaa yoho yàha stilé sǎ ñí xitu-í”, cǎchí-dé xǎha<sup>n</sup>-dě. Te téé xinu cuechi-á<sup>n</sup> ñí xica-dé cuáhá<sup>n</sup>-dé, dico cue téé ndéé nchaa yoho yàha stilé-á<sup>n</sup> ñí tñi-güedé téé xinu cuechi-á<sup>n</sup> te ní caniha-güedé, te ní nacuícú<sup>n</sup> ñáhá-güedé xii-dé, te ñá túú tnàhí ná ní

sǎñaha-güedé. <sup>11</sup> Te dǎtnùnì téé cùu xítóhó nchaa yoho yàha stilé-á<sup>n</sup> ñí tendaha tùcu-dé ìngá téé xinu cuechi núú-dě cuáhá<sup>n</sup>-dé, dico ðiu-ni duca<sup>n</sup> ñí quide ñaha-güedé xii-dé, chi ní xícuèhé ñáhá-güedé, te ní caniha-güedé te ní nacuícú<sup>n</sup> ñáhá-güedé, te ñá túú tnàhí ná ní sǎñaha-güedé. <sup>12</sup> Te téé cùu xítóhó nchaa yoho yàha stilé-á<sup>n</sup> ñí tendaha tùcu-dé ìngá-dé cuáhá<sup>n</sup>-dé, te ðiu-ni duca<sup>n</sup> ñí quide ñaha tùcu-güedé, chi ní dǎncuèhé ñáhá-güedé, te ní nacuícú<sup>n</sup> ñáhá-güedé.

<sup>13</sup> Te téé cùu xítóhó nchaa yoho yàha stilé-á<sup>n</sup> ñí sani ìní-dé: “¿Nása cada-í vitna? Váha-gá tendaha-í déhe-í téé ío cùu ìní-a núhú-dé, chi cudana te òré quini ñáhá-güedé xii-dé, te canehe-güedé sǎ yǐñùhu núú-dě”, duha ní sani ìní-dé. <sup>14</sup> Dico òré ní xini cue téé quide chiu<sup>n</sup>-á<sup>n</sup> déhe xítóhó nchaa yoho yàha stilé-á<sup>n</sup>, te ní xǐtnàha-güedé: “Téé-á<sup>n</sup> téé véxi nduu táhú ñuhu-a ndíi nchaa sǎ cáá núú-xi, dico cahni-o-dě te mee-o nduu tahú-ó sǎ ndúú táhú-dě”, cǎchí-güedé xǐtnàha-güedé. <sup>15</sup> Te ní queñuhu ñaha-güedé ì<sup>n</sup> xio yuhu ñuhu-á<sup>n</sup>, te ní sahani ñaha-güedé xii-dé —duha cuáhá<sup>n</sup> cuendú ní cani Jèsús núú-yu.

Te dǎtnùnì ní xáha<sup>n</sup> tùcu-gá xií-yu:

—¿Te nchòhó sa cùtnunì ìní-ndó nàcuáa cada ñaha xítóhó ñuhu-á<sup>n</sup> xii cue téé-á<sup>n</sup> ñá? <sup>16</sup> Chi núhú-dé te cahni-dé cue téé-á<sup>n</sup>, te dǎndóo ndaha-dě ñuhu-dé xii cue téé cùtnunì ìní-dé cada ndáá —càchí-gá xáha<sup>n</sup>-gǎ xií-yu.

Te sǎ dúcá<sup>n</sup> ñí cǎhá<sup>n</sup>-gá, núu ní cachí-yu:

—¿Sǎ vǎ cǎchí Ndiǒxí sǎ dúcá<sup>n</sup> yàha-o! —càchí-yu.

<sup>17</sup> Te Jèsús ní ndacoto-gá núú-yu, te ní xáha<sup>n</sup>-gǎ:

—Chí cǎchí tnúhu nása quèe-xi nacuáa cǎhá<sup>n</sup>-xi núú tütú Yǎ Ndiǒxí, núú cǎchí-xi: Yúú sǎ ñí dáquéé tǐhú cue téé dàcaa vehe ní saa-xi cùu-xi yúú cúnùu vitna.

Duha cǎchí-xi núú tütú-gá. <sup>18</sup> Te nchaa ñáyiu ñá túú cuini tñi tnúhu-í, te ndohó-yu dǎtná ì<sup>n</sup> ñáyiu tnàhnú duu<sup>n</sup> òré ndúá-yu núú yúú, àdi núu na tàù ñáhá-xi te dàcachi duu<sup>n</sup> ñaha-xi —cachí-gá xáha<sup>n</sup>-gǎ xií-yu.

*Cuendá impuèstú*

*(Mt. 21:45-46; 22:15-22; Mr. 12:12-17)*



19 Te cue tée cùu dùtú cùnùu, ndihì cue tée dàcuaha ñaha xii ñáyiù nchaa tnúhu ní chídó tnùnì ndíi Moisés ní cuiní-güedé tñi-güedé Jèsús òré-ni-á ní cùu, chi ní cutnùnì iní-güedé sá cuendá-güedé ní cáhá<sup>n</sup>-gá, dico ní yùhú-güedé cuendá sá ìo vài ñáyiù. 20 Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáhá<sup>n</sup> ngoto dayuhu ñaha xii-gá, te cuáhá<sup>n</sup>-güedé dàtná cue tée váha iní-xi, te ndùcu-güedé nàcuáa cada-güedé nùu cáhá<sup>n</sup>-gá ì<sup>n</sup> tnúhu sá ñà túú tàú-gá cáhá<sup>n</sup>-gá cuendá duca<sup>n</sup> te candeca ñaha-güedé xii-gá quíhí<sup>n</sup> cuáha cuendá ñáhá-güedé núú tée cùnùu. 21 Te ní xáha<sup>n</sup>-güedé xii Jèsús:

—Mèstrú, ñihí-ndí tnúhu sá dánèhé-n ñáyiù mee-ni tnúhu váha, te cuèi ndédani caa ñáyiù ì<sup>n</sup>-ni cáhá<sup>n</sup>-n ndihí-yu, te cáhá<sup>n</sup> ndáá-n nàcuáa cáhá<sup>n</sup> Yá Ndiòxí cundecu-o ñùyíú-a. 22 Te cachí tnúhu xii-ndí nùu váha-ni cháhu-ndí té Cèsár tée ío cùnùu cuendá impuèstú á<sup>n</sup> ñáhá —càchí-güedé xáha<sup>n</sup>-güedé xii-gá.

23 Dico Jèsús ní cutnùnì iní-gá sá xító ndèé ñáhá-güedé xii-gá, núu ní xáha<sup>n</sup>-gá xii-güedé:

24 —Chí dánèhé ñáhá xii-í ì<sup>n</sup> díhún cuèixí<sup>n</sup> te cachí tnúhu-ndo nùu yoo núú-xi ndèé, ndihì yoo ñiù-xi ndèé —càchí-gá xáha<sup>n</sup>-gá xii-güedé.

Te ní xáha<sup>n</sup>-güedé xii-gá:

—Núú tē Cèsár ndèé ndihì ñiù-dé —càchí-güedé xáha<sup>n</sup>-güedé xii-gá.

25 Te ní xáha<sup>n</sup> tùcu-gá xii-güedé:

—Te núu duca<sup>n</sup> te chí nàcuáha té Cèsár sá cúu cuendá-dé, te sá cúu cuendá mée Yá Ndiòxí, te xíá<sup>n</sup> nacuáha-ndo-gá —càchí-gá xáha<sup>n</sup>-gá xii-güedé.

26 Te ñá ní ndàcu tnahí-güedé datìcánuu ñaha-güedé xii-gá núu tnúhu cáhá<sup>n</sup>-gá, chi òré ní cáhá<sup>n</sup>-gá, te da ní cuñúhu-güedé nchaa tnúhu ní cáhá<sup>n</sup>-gá, te váha-gá ní sadí-güedé yuhu-güedé.

*Cuendá nchaa ñáyiù ndoto*  
(Mt. 22:23-33; Mr. 12:18-27)

27 Te sátá dúcá<sup>n</sup> te ní sáá ì<sup>n</sup> ùú cue tée cùu saducéu núu ndécú Jèsús. Te cue tée-án ñà túú sàndáá iní-güedé sá ndótó cuè ñáyiù ní xihí, te ní xáha<sup>n</sup>-güedé xii-gá:

28 —Mèstrú, ndí Moisés càchí ndíi núú tütú ndècu vitna sá nùu ì<sup>n</sup> tée na cùu, te quendóo ñadìhí-dé te ñá túú dèhe-dé ní xòo ndihì-a<sup>n</sup>, te tée cùu ñani-dé naquehe<sup>n</sup>-dé ñaha ní quendóo quèé-á<sup>n</sup> cuendá coo dèhe-dé ndihì-a<sup>n</sup> cuendá ñani-dé tée ní xihí-á<sup>n</sup>. 29 Te ní xíndecu úsá tñahá cue tée mee-ni ndí ñani-güedé. Te tée díhna ní níhí ñadìhí-dé, dico ñá túú ní cùdí-dé cundecu-dé chi ní xihí-dé, te ní ì<sup>n</sup> dèhe-dé ñá túú ní xòo ndihì ñadìhí-dé-á<sup>n</sup>. 30 Te tée cùu úú ní naquehe<sup>n</sup>-dé ñaha ní quendóo quèé-á<sup>n</sup> dico ní xihí tucu-dé, te ní ì<sup>n</sup> tucu dèhe-dé ñá túú ní xòo ndihì ñaha-á<sup>n</sup>. 31 Te tée cùu uní ní naquehe<sup>n</sup> tucu-dé ñaha ní quendóo quèé-á<sup>n</sup>, te ñiù-ni duca<sup>n</sup> ñi xihí-dé, te ní xínu ndí úsá-güedé ní cándeca ñaha-güedé xii ñaha-á<sup>n</sup>, dico ní ì<sup>n</sup>-güedé ñá túú ní xòo dèhe-güedé ndihì-a<sup>n</sup>, te ní ndihì-güedé ní xihí. 32 Te ndèé núú ñi ndihì-ná ní xihí tñahá ñadìhí-á<sup>n</sup>. 33 Te na sáa nduu ndòto-güedé ndihì ñaha-á<sup>n</sup> ¿Te ndédacàa-güedé ñadìhí-güedé cuu-a<sup>n</sup>-i? Chi ndí úsá-güedé ní cándeca ñaha-güedé xii-a<sup>n</sup> —càchí-güedé xáha<sup>n</sup>-güedé xii-gá.

34 Te Jèsús ní xáha<sup>n</sup>-gá xii-güedé:

—Nchaa ñáyiù ñuyíú-a tñandahá-yu.

35 Dico nchaa ñáyiù ní nduu táhú ndoto díhna nuu ñáyiù-án cundecú-yu ndihì Yá Ndiòxí ñi caa ñi quíhí<sup>n</sup>, te yàcá<sup>n</sup> ñá túú-gá sá cándeca tñahá-yu. 36 Te ní ñà túú-gá tnúhu xihí, chi cuu-ná-yu dàtná cue espíritú xínú cuèchi núú Yá Ndiòxí cuendá sá ñi ndotó-yu, chi cúu-yu dèhe-gá. 37 Te ndèé ndíi Moisés ní chídó tnùnì ndíi núú tütú ndíi sá ncháá ñáyiù ní xihí ndotó-yu, te ñiù-ni xíá<sup>n</sup> cáhá<sup>n</sup>-xi cuendá tñatáu nchicú<sup>n</sup> ñuhú, te ñiù-ni xíá<sup>n</sup> càchí tucu-xi sá Yá Ndiòxí cúu-gá Ndiòxí ndíi Àbrahám, ndíi Isàác, ndihì ndíi Jàcób. 38 Te cue tée-án chi cuèi ní xihí-güedé sá cúu-xi nchòhó, dico sá cúu-xi Yá Ndiòxí chi ndècu vívú-ni-güedé. Chi cùtnunì iní-ó sá Yá Ndiòxí cúu-gá Ndiòxí mee-ni cuè ñáyiù xíndecu vívú, te ñá túú cùu-gá Ndiòxí cue ñáyiù ñá túú ndècu vívú. Te sá cúu-xi mèe-gá chi nchaa ñáyiù ndècu ndihì-gá ndécú vívú-yu cuèi sa ní xihí-yu núú ñuyíú-a —càchí-gá xáha<sup>n</sup>-gá xii-güedé.

39 Te ì<sup>n</sup> tée dàcuaha ñaha xii ñáyiù nchaa tnúhu ní chídó tnùnì ndíi Moisés ní xáha<sup>n</sup>-dè



xii Jèsús:

—Mèstrú, váha-ni càhá<sup>n</sup>-n —càchí-dé xáha<sup>n</sup>-dè xii-gá. <sup>40</sup> Te ñá túú-gá ní cùyii-güedé cacadá<sup>n</sup> tnúhú-güedé ni ñ<sup>n</sup> tnúhu núú-gá.

*Yoo déhe-xi cùu Cristú*  
(Mt. 22:41-46; Mr. 12:35-37)

<sup>41</sup> Te Jèsús ní xáha<sup>n</sup>-gá xii-güedé:

—¿Te nása càchí-tu-yu sá Crìstú Yaá tendaha Yá Ndiöxí quixi ñuyú-a cùu-gá déhe ndíi Dàvíí? <sup>42</sup> Te mee ndíi Dàvíí-á<sup>n</sup> ñí cachí ndíi núú librú Sălmú:

Dútú Ndiöxí ní xáha<sup>n</sup>-gá xii Yaá cúu Xítóhó-í:

“Ngóo xio cùha-í,

<sup>43</sup> te yúhú cada-í te nchaa sá cúu ùhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dútú Ndiöxí xii Yaá cúu Xítóhó-í càchí ndíi núú librú Sălmú. <sup>44</sup> ¿Te nása cùu Cristú déhe ndíi Dàvíí, te mee ndíi ní cachí ndíi sá cúu-gá Xítóhó ndíi-í? —càchí Jèsús xáha<sup>n</sup>-gá xii-güedé.

*Jèsús càhá<sup>n</sup>-gá cuendá cue tée dàcuaha ñaha xii ñáyiu nchaa tnúhu ní chídó tnùní ndíi Moisés*

(Mt. 23:1-36; Mr. 12:38-40; Lc. 11:37-54)

<sup>45</sup> Te òré ndátnùhu Jèsús ndíhi cue tée xica cuu ndíhi-gá xíndedóho ñaha ñáyiu, te xáha<sup>n</sup>-gá xii-güedé:

<sup>46</sup> —Cada cuendá-ndó vǎ cádá-ndó nàcuáa quide cue tée dàcuaha ñaha xii ñáyiu nchaa tnúhu ní chídó tnùní ndíi Moisés, chi tnàhá iní-güedé cuihnu-güedé dóó nání sǎ sácuihnu cue tée cùnuu. Te nchaa núú tàcá ñáyiu cuiní-güedé sá ndíhi tnúhu yíñùhu cáhá<sup>n</sup> ndíhi ñáhá-yu xii-güedé, te nàcáxi-güedé xilé sácóo nchíhi cue tée cùnuu-gá xití veñúhu conchíhi-güedé, te duca<sup>n</sup>-ni quide-güedé cuèi òré quíhu-güedé mèsá caxi-güedé òré ndécú-güedé ñ<sup>n</sup> vico, chi mee-ni núú sácóo cue tée cùnuu-gá cuiní-güedé coo-güedé. <sup>47</sup> Te quèndeé-güedé vehe nchaa ñáyiu dǐhí ñáyiu quèé, te ío naha càhá<sup>n</sup> ndíhi-güedé Yá Ndiöxí cuendá cuiní-güedé cáhá<sup>n</sup> váha-yu cuendá-güedé. Te sá dúcá<sup>n</sup> quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáyiu —càchí-gá xáha<sup>n</sup>-gá xii-güedé.

## 21

*Dǐhú<sup>n</sup> nduu táhú Yá Ndiöxí ní dáquèe ñ<sup>n</sup> ñaha ndàhú ñaha quèé*

(Mr. 12:41-44)

<sup>1</sup> Te Jèsús ní xiní-gá xití veñúhu xǐdáquèe cue tée cuica dǐhú<sup>n</sup> nduu táhú Yá Ndiöxí xití alcanciá. <sup>2</sup> Te ní xiní-gá tnàhá ñ<sup>n</sup> ñaha ndàhú ñaha quèé ní dáquèe-a<sup>n</sup> úú dǐhú<sup>n</sup> còbrí, <sup>3</sup> te ní xáha<sup>n</sup> Jèsús xii cue ñáyiu xǐndecu-á<sup>n</sup>:

—Na càchí tnúhu ndáá-í xii-ndo sǎ ñaha ndahú ñaha quèé-a ío-gá nándǐhi dǐhú<sup>n</sup> ñí dáquèe-a<sup>n</sup> xití alcanciá nduu táhú Yá Ndiöxí dàcúxí dǐhú<sup>n</sup> ñí dáquèe dava-gá-yu. <sup>4</sup> Chi nchaa ñáyiu-á<sup>n</sup> ñí dáquèe-yu mee-nǎ sǎ ñí ndóo-ná, dico ñaha quèé-a cuèi ndàhú-a<sup>n</sup> dico ní dáquèe-a<sup>n</sup> ñíhí dǐhú<sup>n</sup> sǎ cuáá<sup>n</sup>-á<sup>n</sup> sǎ cǎxí-á<sup>n</sup> ní cùu —cachí-gá xáha<sup>n</sup>-gá xii-yu.

*Jèsús càchí-gá sá ngóyó veñúhu*

(Mt. 24:1-2; Mr. 13:1-2)

<sup>5</sup> Te ñ<sup>n</sup> úú ñáyiu xǐcáhá<sup>n</sup>-yu cuendá veñúhu càhnu sǎ ìo cùnuu sǎ ìo víi càa nchaa yúu yíhi, ndíhi cuendá nchaa sǎ ñí sǎñaha táhú ñáyiu yíhi xití-xi. Te Jèsús ní xáha<sup>n</sup>-gá xii-yu:

<sup>6</sup> —Sáá nduu te nchaa sǎ cúñùhu-ndo-a vǎ cùndùu-gá-xi dàtná cáá-xí vǐtna, chi ni ñ<sup>n</sup>-gá yúu vǎ códó nchíhi tnaha-gá-xi chi ndíhi ngoyo —càchí-gá xáha<sup>n</sup>-gá xii-yu.

*Nàcuáa cada-xi nduu ta cùyatni naa ñuyúú*

(Mt. 24:3-28; Mr. 13:3-23)

<sup>7</sup> Te cue tée xǐndecu-á<sup>n</sup> ñí xícá<sup>n</sup> tnúhú-güedé núú Jèsús, te xáha<sup>n</sup>-güedé xii-gá:

—Mèstrú, ¿te ná nduu dùca<sup>n</sup> cada-xi ngoyo veñúhu, àdi nándí cùu sǎ cádá-xí cuendá cutnùní iní-ndí sǎ sǎ ta cuyatni nduu duca<sup>n</sup> cada-xi-í? —cachí-güedé xáha<sup>n</sup>-güedé xii-gá.

<sup>8</sup> Te Jèsús ní xáha<sup>n</sup>-gá xii-güedé:

—Ío quíhi iní-ndó cùndecu-ndo, te vá dáñá-ndó mè-ndo dandahú ñáhá ñáyiu xii-ndo. Chi ío cuéhé cue tée coo ñuyúú-a, te danàni-güedé méé-güedé dàtná nání-í te cachí-güedé: “Yúhú cùu-í Crìstú Yaá ní tendaha Yá Ndiöxí véxi ñuyúú-a”, duha cachí-güedé. Te cachí tucu-güedé: “Vǐtna sa ní sáá nduu càda-xi nchaa nacuáa ní cáhá<sup>n</sup>-í”, duha cachí-güedé. Dico vǎ

quindáá iní-ndó, te nì vá túhá-ndó-güedě. <sup>9</sup> Te òré ná nihí-ndó tnùhu sá tìtní nàció<sup>n</sup> xìnàá-güedé te dava ñuú xìnàá-güedé ndi mèe-güedé, te vá yùhú-ndó chi dacuítí sá dúcá<sup>n</sup> càda-xi, dico vátá sàá-gá nduu nàa ñuyíú òré duca<sup>n</sup> càda-xi —cachí-gá xáha<sup>n</sup>-gã xii-güedé.

<sup>10</sup> Te xãha<sup>n</sup> tucu-gá xii-güedé:

—Nchaa cue téé ñ<sup>n</sup> nàció<sup>n</sup> nàá-güedé ndihi cue téé ingá nàció<sup>n</sup>, te tìtní ñuú ngüíta-güedé nàá-güedé. <sup>11</sup> Te tìtní xichi ñuyíú ñihi vìhi tnáa, te tìtní tucu xichi ñuyíú coo tnamá, te tìtní tucu xichi ñuyíú quixi cuéhé, te tìtní núú sá cáda-xí àndiú, te yùhú ñáyiu.

<sup>12</sup> Te òré cúmání-gã cada-xi nchaa nàcuáa càhá<sup>n</sup>-í-a, te cue téé cùu úhú iní ñáhá xii-ndo tñi ñaha-güedé, te candeca ñaha-güedě xii-ndo quíhí<sup>n</sup> xití veñúhu-güedé cada ndáá-güedé cuéchi-ndo, te chihi ñaha-güedě vecaá xii-ndo, te candeca ñaha-güedě quíhí<sup>n</sup> núú cuè téé cùnuu yindaha nació<sup>n</sup> àdi núú dàva-gá cue téé cùnuu sá cuendá-í. <sup>13</sup> Te òré duca<sup>n</sup> na càda ñaha-güedé xii-ndo, te òré-á<sup>n</sup> tàú-xi cáhá<sup>n</sup> váha-ndo cuendá-í núú-güedé. <sup>14</sup> Te vá cání iní-ndó núu nása cunduu tnúhu cúñaha-ndo xii-güedé cuendá cácu nihnu-ndo. <sup>15</sup> Chi yùhú dacàhu iní ñáhà-í xii-ndo tnùhu cúñaha-ndo xii-güedé, te taxi-í sá vátá quini tnùnigá-ndó, te ni ñ<sup>n</sup> ñáyiu cùu úhú iní ñáhá xii-ndo vá nihí-gá-yu tnúhu cúñahá-yu xii-ndo. <sup>16</sup> Te ndéé tātá-ndó, ndihi ñaní-ndó, ndihi cue ñáyiu cùu ñaní tnáhá-ndó, ndihi cue ñáyiu càhá<sup>n</sup> ndihi váha-ndo cuàha cuendá ñáhã-yu xii-ndo núú cuè téé cùchiu<sup>n</sup>, te dava-ndo càhni ñaha-güedé xii-ndo. <sup>17</sup> Te ío cuéhé ñáyiu cuu úhú iní ñáhã-yu xii-ndo sã cuendá-í. <sup>18</sup> Dico Yá Ndióxi ío coto ñaha-gã xii-ndo chi ndéé idi díquí-ndó còto-gá. <sup>19</sup> Te núu na càda ndee iní-ndó cànchicú<sup>n</sup> nihnu ñaha-ndo xii-í, te nduu táhú-ndó cùndecu-ndo ndihi Yá Ndióxi ni caa ni quíhí<sup>n</sup>.

<sup>20</sup> Te nduu na quini-ndó ñùhu doco sandadú ni càndéé yuhu ñuú Jerusàlén, te sa cutnùní iní-ndó sã sã ní cuyatni nduu dànaa-güedé ñuú-á<sup>n</sup>. <sup>21</sup> Te dàvá-á<sup>n</sup> nchaa ñáyiu xíndecu distritú Jùdeá xíní

ñùhu-xi cunú-yu quíhí<sup>n</sup>-yu xití yucu, te nchaa ñáyiu xíndecu ñuú Jerusàlén quee-yu xití ñuú-á<sup>n</sup>, te ñáyiu ñá túú xíndecu ñuú-á<sup>n</sup> vã ndíhu-gá-yu. <sup>22</sup> Chi dàvá-á<sup>n</sup> cuu-xi nduu tnùndòho tnúhu ndàhú, te duca<sup>n</sup> càda-xi chi duca<sup>n</sup> ndéé tnuní núú tütú Yá Ndióxi nàcuáa dandòho ñaha-gá xii-yu. <sup>23</sup> Te ndàhú ní cuu nchaa ñáyiu dñí ñùhú dèhe-xi, ndihi nchaa ñáyiu ndèca déhe vitna sàdi na sáá nduu dùca<sup>n</sup> cada-xi! Chi ío cuéhé tnùndòho tnúhu ndàhú coo núú ndécú-yu dàvá-á<sup>n</sup>, te xíá<sup>n</sup> cuu-xi ñ<sup>n</sup> tnùndòho tendaha Yá Ndióxi quixi sá cúu-xi-yu. <sup>24</sup> Te dava cue téé cuú-güedé cahni ñaha-güedě, te dava-güedé tñi ñaha-güedě candeca ñaha-güedě quíhí<sup>n</sup> nchaa ñuú xícá, te cue téé dava-gá ñuú cunuu-güedě ñuú Jerusàlén, te mee Yá Ndióxi cachí-gá te núu ná daha nduu cunuu-güedě ñuú-á<sup>n</sup>.

*Nàcuáa cada-xi òré quixi tucu Téé cùu ñaní tnáhá cuè ñáyiu*

*(Mt. 24:29-35, 42-44; Mr. 13:24-37)*

<sup>25</sup> Te cada-xi ñ<sup>n</sup> sá vátá quini-gá ñáyiu núú nchicanhii, ndihi núú yóó, ndihi núú nchàa chódíní, te ñuyíú-a coo tnúhu ndíhú iní-xi te vá cutnùní iní-yu nása cada-yu cuendá sá ío dusa<sup>n</sup> càda ndute lamár òré candaundéé tnáhá-xí. <sup>26</sup> Te nchaa ñáyiu cuneé-yu sá yùhú-yu, ndihi sá ndíhú iní-yu cuendá nchaa sá cáda-xí ñuyíú-a, te quidi-xi andiú. <sup>27</sup> Te sátá dúcá<sup>n</sup> te quini-ndó yùhú Téé cùu ñaní tnáhá-ndó nchàa-ndo quee-í andiú quixi-í ichi xití vícò, te dàvá-á<sup>n</sup> quini ñáhá nchàa ñáyiu sá ío cùnuu-í te ndàcu-í quide-í nchaa sá váha. <sup>28</sup> Te òré ná ngüíta-xi duca<sup>n</sup> càda-xi, te cuita cundee-gã iní-ndó quíhí<sup>n</sup>, te quíhí iní-ndó chi sa ní cuyatni víí-nã nduu cácu nihnu-ndo vã cùndecu-gá-ndó núú ñuyíú yícá cuéchi-a —càchí-gá xáha<sup>n</sup>-gã xii-güedé.

<sup>29</sup> Te ní canigá ñ<sup>n</sup> cuendú núú-güedé nàcuáa tecú tnùní váha-güedé tnúhu-gá, te xáha<sup>n</sup>-gã xii-güedé:

—Chí cùndèhe yutnu ngúxí ndihi nchaa dava-gá yutnu. <sup>30</sup> Chi nàtahú ndaha-xi, te òré duca<sup>n</sup> quide-xi te càchí-ndó sã sã ní cuyatni nuu cahni. <sup>31</sup> Te ñuú-ndó duca<sup>n</sup> sãtnahá-xi cùu òré ná quini-ndó càda-xi

nchaa nacuaa cãhá<sup>n</sup>-í, te sã dúcã<sup>n</sup> te cutnùni iní-ndó sã sã ní cuyatni nduu ndíhu ndaha ñàha Yá Ndiõxí xii-ndo.

<sup>32</sup> Te na cãchí tnúhu ndáá-í xii-ndo sã òré vátã cùú-gã cue ñáyiú xĩndecu ñuyíú-a vitna, te cada-xi nchaa nãcuáa ní cãhá<sup>n</sup>-í.

<sup>33</sup> Te andiú ndíhi ñuyíú-a chi ndíhi nihnu-xi, dico tnúhu-í chi vá ndíhí nihnu-xi, chi cùu-xi tnúhu ndáá.

<sup>34</sup> Te quihi iní-ndó vã cùndècu-ndo ichi cuehé ichi duha, te vá cùú-ndó ñáyiú quihu, te vá cùhú<sup>n</sup> iní-ndó mèe-ni nchaa sã ío ñuyíú-a, chi núu duca<sup>n</sup> na càda-ndo te nacuaana-ndo sã sã nduu càda-xi nacuaa ní cãhá<sup>n</sup>-í. Te uu<sup>n</sup>ni sãá nduu-ã<sup>n</sup>, <sup>35</sup> te cada-xi dàtnã cuiní-ndó quide ì<sup>n</sup> trampã chi uu<sup>n</sup>ni ngãva-xi, te duca<sup>n</sup> càda-xi nchaa ñáyiú xĩndecu ñuyíú-a, chi uu<sup>n</sup>ni sãá nduu-ã<sup>n</sup>. <sup>36</sup> Te nchòhó cundecu túha-ndo te ío cãhá<sup>n</sup> ndíhi-ndo Yá Ndiõxí cuendã ndacu-ndo yãha-ndo nchãa tnúndòho quixi ñuyíú-a, te duca<sup>n</sup> te nasãá-ndó cùndecu-ndo núú ndécú yùhú Tée cùu ñãní tnãhá-ndó nchãa-ndo —cachí-gã xãhá<sup>n</sup>-gã xii-güedé.

<sup>37</sup> Te nduu ndùu ní xóo danéhé Jèsús ñáyiú tnúhu-gã xití veñúhu càhnu sã ío cùnuu, te niú niú ní xóo quíhí<sup>n</sup> ngúdú-gã xití yucu Olívú. <sup>38</sup> Te nehé nehé ní xóo quíhí<sup>n</sup> nchaa ñáyiú veñúhu-ã<sup>n</sup> ñí xóo cundedóho-yu nchaa tnúhu cãhá<sup>n</sup>-gã.

## 22

*Ndùcu-güedé nãcuáa cada-güedé cahni-güedé Jèsús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Te sa ní cuyatni nduu tnãhá vico pãscuá, te vico-ã<sup>n</sup> xéxí ñáyiú pãá sã ñã túú yìhi levadurá. <sup>2</sup> Te cue tée cùu dútú cùnùu, ndíhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nãcuáa cada-güedé cahni-güedé Jèsús, te dicó-ni sã xiyùhú-güedé ñáyiú.

<sup>3</sup> Te yucu ñãvãha ní dácãhú iní ñãhá-xi xii té Jüdás déhe té Iscarioté, te núú tnãhá tée-ã<sup>n</sup> cùú ùxúú tnãhá cue tée xica cuu ndíhi-gã ní cùu. <sup>4</sup> Te té Jüdás-ã<sup>n</sup> ñí sãhá<sup>n</sup>-dé ní ndatnúhu-dé ndíhi cue tée cùu dútú cùnùu, ndíhi cue tée tàxi tñuní ñãhá xii cue tée quide cuendã veñúhu nãcuáa cada-dé cuãha cuendã-dé Jèsús núú-güedé. <sup>5</sup> Te ío

ní cudíi iní-güedé, te ní xãhá<sup>n</sup>-güedé xii-dé sã cuãhaha-güedé díhú<sup>n</sup>, <sup>6</sup> te ní xãhá<sup>n</sup>-dè sã cùú quèhe<sup>n</sup>-dé díhú<sup>n</sup>-ã<sup>n</sup>, te ní ngüita-dé ndúcú-dé nãcuáa cada-dé cuãha cuendã-dé Jèsús núú-güedé òré ñã túú ñáyiú.

*Cùdini Jèsús ndíhi cue tée xica cuu ndíhi-gã*  
(Mt. 26:17-29; Mr. 14:12-25; Jn. 13:21-30; 1 Co. 11:23-26)

<sup>7</sup> Te ní sãá nduu ñí quesaha vico xexí-yu pãá sã ñã túú yìhi levadurá, te diu-ni nduu-ã<sup>n</sup> sãhni-güedé ì<sup>n</sup> mbéé líhli xéxí-yu.

<sup>8</sup> Te Jèsús ní xãhá<sup>n</sup>-gã xii té Pèlú ndíhi té Juãá:

—Chí cuãhá<sup>n</sup> chi cada túha-ndo núú cùdini-o sacuaa nduu vico pãscuá — cãchí-gã xãhá<sup>n</sup>-gã xii-güedé.

<sup>9</sup> Te ní xicã<sup>n</sup> tnúhú-güedé núú-gã, te xãhá<sup>n</sup>-güedé xii-gã:

—¿Te ndéé cáá vèhe cuiní-n càda túha-ndí-i? —cãchí-güedé xãhá<sup>n</sup>-güedé xii-gã.

<sup>10</sup> Te ní xãhá<sup>n</sup> Jèsús xii-güedé:

—Chí cùndedóho na cãchí tnúhu-í xii-ndo nãcuáa cada-ndo. Òré quihu-ndo xití ñuú núú quíhí<sup>n</sup>-ndó, te naníhí-ndó ì<sup>n</sup> tée tànehe ì<sup>n</sup> yoó ndute, te tée-ã<sup>n</sup> candédaha-ndo-dé quíhí<sup>n</sup>, te núu ndédacãa vehe na ndíhu-dé te xíã<sup>n</sup> quíhu-ndo. <sup>11</sup> Te cùñaha-ndo xii xitohó vehe-ã<sup>n</sup>: “Yá cùú Mèstrú cãchí-gã núu ndédacãa xichi xití vehe-n cuãhaha núu-n xii-gã cùdini-gã ndíhi cue tée xica cuu ndíhi-gã sacuaa nduu vico pãscuá”, duha cùñaha-ndo. <sup>12</sup> Te dàtnùní danéhé ñãhá-dé xii-ndo ì<sup>n</sup> quartú cãhnú càa núú ñinu, chi vehe yòdo tnaha cuu-xi, te sa ní quide túha-dé nchaa sã ná ndíhi, te nchòhó dicó-ñã sã cùdini-o cada túha-ndo — cãchí-gã xãhá<sup>n</sup>-gã xii-güedé.

<sup>13</sup> Te ní xica-güedé cuãhá<sup>n</sup>-güedé, te nchaa-ni nãcuáa ní xãhá<sup>n</sup> Jèsús xii-güedé ní cuu, chi nchaa sa ndècu túha, te ní quide túha-güedé sã cùdini-güedé ndíhi-gã sacuaa nduu vico pãscuá-ã<sup>n</sup>.

<sup>14</sup> Te sãtã ñí tnãhá òré cùdini Jèsús ndíhi cue tée ní táuchíú<sup>n</sup>-gã cãhá<sup>n</sup> tnúhu-gã núú ñáyiú, te cuãnguihu ndíhi ñaha-gã xii-güedé mèsã. <sup>15</sup> Te xãhá<sup>n</sup>-gã xii-güedé:

—¿Duca<sup>n</sup>-ni ío sãni iní-í sã cùdini ndíhi ñaha-í xii-ndo sãcuua nduu vico pãscuá òré cùmãní-gã sãá nduu ndòho-í te cuú-í! <sup>16</sup> Te



na cächí tnúhu-í xii-ndo sã vã dúhá-gã caxi ndihí ñaha-í xii-ndo ndùu vico pascuá, chi ndéé òré ná sàá nduu nàsáá-ndó nũú táxí tnùní Yã Ndiõxí cundecu-o, te ðává-á<sup>n</sup> cada iní-ndó sã ðàtná sá caxí tucu-o chí ío váha cuu iní-ó cundecu-o —cachí-gá xáha<sup>n</sup>-gã xii-güedé.

17 Te ní quehe<sup>n</sup>-gá ì<sup>n</sup> vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gã núú Yã Ndiõxí, te ðàtnùní ní xáha<sup>n</sup>-gã xii-güedé:

—Chí quéhé<sup>n</sup> vàsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. 18 Te na cächí tnúhu tucu-í xii-ndo sã vítná-nã duha xihí ndihí ñaha-í xii-ndo ndùdí ndéhé yoho yàha stilé-a te vá cóhó ndihí ñaha-gá-í, dico na sàá nduu nàníhí tnáhá-ó núú ndécú Tãtà-í Dútú Ndiõxí táxí tnùní-gã, te ðává-á<sup>n</sup> cada iní-ó sã ðàtná sá cóhó ndihí ñaha tucu-í xii-ndo, chí ío cudíí iní-ó —cächí-gá xáha<sup>n</sup>-gã xii-güedé.

19 Te sáta ní túhú cóhó-güedé ní cudíni-güedé, te ní quehe<sup>n</sup>-gá pàá te ní ndacá<sup>n</sup> táhú tucu-gá núú Yã Ndiõxí, te ðàtnùní ní táhú cuèchi-gá, te ní ðácãhñu ñaha-gã xii-güedé, te xáha<sup>n</sup>-gã:

—Pàá-a cùu-xi ðàtná yiquí cùñú-í, chí cahni ñaha-güedé xii-í sá cuendá-ndó, te duca<sup>n</sup>-ni càxi-ndo paá-a cuendá ndacu iní ñáhá-ndó xii-í —cächí-gá xáha<sup>n</sup>-gã xii-güedé.

20 Te ðiu-ni duca<sup>n</sup> ñí quide-gá ndihí vàsú ñúhú ndùdí ndéhé yoho yàha stilé, chí ní quehe<sup>n</sup>-gá te òré sãñaha-gã xii-güedé coho-güedé, te ní xáha<sup>n</sup>-gã:

—Ndudí ñúhú vàsú-a cada iní-ndó sã cúu-xí ðàtná níñí-í sá catí òré cahni ñaha-güedé xii-í. Te sá dúcá<sup>n</sup> càti níñí-í xíã<sup>n</sup> cutnùní ndáá sá Yã Ndiõxí cada-gá ingá núú sã vãha sá cúu-xí-ndó.

21 'Dico vitna chí iha tnáhá téé cuáha cuendá ñáhá xii-í núú cuè téé cùu úhú iní ñáhá yihí-dé mèsá. 22 Te yúhú Téé cùu ñaní tnáhá-ndó nchaa-ndo ñuhu ichi-í cuáhá<sup>n</sup>-í cuú-í ðàtná ní cachí Yã Ndiõxí. ¡Dico ndáhú ní cuu téé duca<sup>n</sup> na cuãha cuendá ñáhá xii-í núú cuè téé cùu úhú iní ñáhá! —cächí-gá xáha<sup>n</sup>-gã xii-güedé.

23 Te ní ngüíta-güedé ndúcú tnúhu núú tnáhá-güedé nũu ndéda càa-güedé duca<sup>n</sup>

càda cuáha cuendá ñáhá xii-gá núú cuè téé cùu úhú iní ñáhá.

### *Xĩndatnúhu-güedé ndédacàa-güedé cunuu-gã*

24 Te sáta dúcá<sup>n</sup> te ní ngüíta-güedé xĩndatnúhu-güedé nũu ndédacàa-güedé tàu-güedé cunuu-güedé. 25 Dico Jèsús ní xáha<sup>n</sup>-gã xii-güedé:

—Nchaa cue téé yĩndaha ñaha xii ñáyiú ío tàxi tnùní-güedé, te mee-güedé cuíní-güedé sá càhá<sup>n</sup> váha ñáyiú cuendá-güedé. 26 Dico nchòhó vá dúcá<sup>n</sup> càda-ndo, chí núu ì<sup>n</sup>-ndo cunuu te cada-ni-ndo sã ñà túú cunuu-ndo, àdi cuu-ndo ì<sup>n</sup> téé tàxi tnùní ñáhá xii cue téé xĩnu cuechi, te cada-ni-ndo sã cúu-ndó ì<sup>n</sup> téé xĩnu cuechi-á<sup>n</sup>. 27 Te vá cächí-ó sã téé xĩnu cuechi cunuu-gá-dé, chí téé quíhu mèsá cùnùu-gá-dé. Dico yúhú ndécú ndihí ñaha-í xii-ndo ðàtná ì<sup>n</sup> téé xĩnu cuechi.

28 'Te nchòhó duca<sup>n</sup>-ni ndècu ndihí ñaha-ndo xii-í, te tàyáha ndihí ñaha-ndo xii-í nchaa sá tàyáha-í véxi. 29 Te Tãtà-í Dútú Ndiõxí ní cachí-gá sá táxí tnùní-í, te yúhú cächí-í xii-ndo sã sàá nduu te tnáhá-ndó tàxi tnùní-ndó. 30 Te ðává-á<sup>n</sup> caxi-o coho-o càda-o núú táxí tnùní-í, te yacá<sup>n</sup> ngüíta-ndo càda ndáá-ndó cuèchi ndi úxúú xichi ñáyiú isràél —cächí-gá xáha<sup>n</sup>-gã xii-güedé.

### *Jèsús càhá<sup>n</sup>-gá sá tẽ Pèlú cùñaha-dẽ xii ñáyiú sá ñà túú xini ñáhá-dẽ xii-gã*

(Mt. 26:31-35; Mr. 14:27-31; Jn. 13:36-38)

31 Te Xítohó Jesucrìstú ní xáha<sup>n</sup>-gã xii té Xĩmú:

—Yòhó Xĩmú, cundedóho váha ì<sup>n</sup> tnúhu na càhá<sup>n</sup>-í-a, chí ðàtná cuíní-n quide táchí trìú sàcá<sup>n</sup>-xi duha sàcá<sup>n</sup>-xi ðàcá<sup>n</sup>, duca<sup>n</sup> quèsaha yucu ñávãha cada ñaha-xi xii-ndo. Chí coto ndéé ñáhá-xí xii-ndo te núu ndisa sàndáá iní ñáhá-ndó xii-í. 32 Dico yúhú xicá<sup>n</sup> táhú-í núú Yã Ndiõxí cuendá-n, cuendá sã vã ðáñá ndéé-n quĩndáá iní ñáhá-n xii-í. Te òré ndixi túu iní-n sã ñà túú ní quide váha-n, te quíhí<sup>n</sup>-n cuãha-n cuè téé cùndihí-n tnúhu ndee iní cuendá canchicú<sup>n</sup> nihnu-ni-güedé ichi Yã Ndiõxí —cächí-gá xáha<sup>n</sup>-gã xii-dé.

33 Te ní xáha<sup>n</sup>-dẽ xii-gá:

—Mèstrú, sa ndècu túha-í sá quíhí<sup>n</sup> ndihí ñaha-í xii-n vècaá, àdi cuéi na cùu ndihí ñaha-í xii-n —cächí-dé xáha<sup>n</sup>-dẽ xii-gã.

34 Te Jèsús ní xáha<sup>n</sup>-gã:



—Pèlú, na càchí tnúhu-í xii-n sǎ cùmání-gǎ cana ìḡ líhi te úní xito cáhá<sup>n</sup>-n núú ñǎyiu sǎ ñà túú xíní ñáhá-n xii-í — càchí-gǎ xáha<sup>n</sup>-gǎ xii-dé.

### *Sa ní cuyatni ndoho Jèsús*

<sup>35</sup> Te Jèsús ní xáha<sup>n</sup>-gǎ xii-güedé:

—Te cúnàhá ní tendaha ñaha-í xii-ndo ní sáhá<sup>n</sup>-ndó chiú<sup>n</sup>-í, chí ñá túú ní cǎnehe-ndo ní ìḡ sǎ cúhú<sup>n</sup> díhú<sup>n</sup>-ndó, te ní ìḡ sǎ cúhú<sup>n</sup> ndàchiú<sup>n</sup>-ndo ñá túú ní cǎnehe-ndo. Te chí càchí tnúhu núú ió ìḡ sǎ ní cùmání xii-ndo —càchí-gǎ xáha<sup>n</sup>-gǎ xii-güedé.

Te ní xáha<sup>n</sup>-güedé:

—Ñáhá, chí ní ìḡ sǎ ñà túú ní cùmání xii-ndí —càchí-güedé xáha<sup>n</sup>-güedé xii-gǎ.

<sup>36</sup> Te ní xáha<sup>n</sup>-gǎ:

—Te vitna núú ndècu ndihi-ndo sǎ sácúhu<sup>n</sup> díhú<sup>n</sup>-ndó, àdi sǎ sácúhu<sup>n</sup> ndàchiú<sup>n</sup>-ndo te cǎnehe-ndo. Te núú ñá túú ndècu ndihi-ndo machití, te nadico-ndo dóó tǎcachi nihnu-ndo te cuaa<sup>n</sup>-ndo. <sup>37</sup> Te na càchí tnúhu-í xii-ndo sǎ dàcutíí sǎ yáha-í nàcuáa cáhá<sup>n</sup>-xi núú tütú Yǎ Ndiöxí núú càchí-xi: “Ìḡ-ni ní quide ñaha-güedé xii-gǎ, ndihi cue téé ndècu cuéchi-xi”, duha càchí-xi núú tütú-gǎ. Te ñá díú-ní xǎ<sup>n</sup> yáha-í chí nchaandi túhú nàcuáa cáhá<sup>n</sup>-xi núú tütú-gǎ yáha-í —càchí-gǎ xáha<sup>n</sup>-gǎ xii-güedé.

<sup>38</sup> Te xáha<sup>n</sup>-güedé:

—Mèstrú, iha ndècu úú machití —càchí-güedé xáha<sup>n</sup>-güedé xii-gǎ.

Te ní xáha<sup>n</sup>-gǎ:

—Chí návíí-ñá yuhu-ndo, vá cáhá<sup>n</sup>-gǎ-ndó —càchí-gǎ xáha<sup>n</sup>-gǎ xii-güedé.

### *Jèsús cáhá<sup>n</sup> ndihi-gǎ Yǎ Ndiöxí yucu Òlívú (Mt. 26:36-46; Mr. 14:32-42)*

<sup>39</sup> Te Jèsús ní quee-gǎ cuáhá<sup>n</sup>-gǎ yucu Òlívú, chí duca<sup>n</sup> tnàhí quide-gǎ. Te cue téé xica cuu ndihi-gǎ nchicú<sup>n</sup> ñáhá-güedé xii-gǎ cuáhá<sup>n</sup>. <sup>40</sup> Te òré ní quexio-gǎ xián, te ní xáha<sup>n</sup>-gǎ xii-güedé:

—Chí cáhá<sup>n</sup> ndihi Yǎ Ndiöxí cuendá sǎ vǎ dácáhá<sup>n</sup> ñáhá yucu ñáváha xii-ndo càda-ndo sǎ ñà túú tàú-ndó càda-ndo —cachí-gǎ xáha<sup>n</sup>-gǎ xii-güedé.

<sup>41</sup> Te sǎtá dúcá<sup>n</sup> te ní quee dèḡ<sup>n</sup>-gǎ tnuú-güedé cuáhá<sup>n</sup>-gǎ ìḡ xio, te sa ñunchií luha ní xica ndehe-gǎ núú ndécú-güedé, te

xián ní ngüñí xití-gǎ cáhá<sup>n</sup> ndihi-gǎ Tǎtá-gǎ Dútú Ndiöxí. <sup>42</sup> Te xáha<sup>n</sup>-gǎ:

—Táu, te núú dícó cachí-n te taunihnu ñaha-n xii-í cuendá sǎ vǎ ndóhò-í ná sǎà òré, dícó vá cádá-n nàcuáa càchí iní mée-í, chí cada-n nàcuáa càchí iní mée-n —càchí-gǎ xáha<sup>n</sup>-gǎ xii Tǎtá-gǎ Dútú Ndiöxí.

<sup>43</sup> Te sǎtá dúcá<sup>n</sup> te ní quexio ìḡ espíritu xínú cuèchi núú Yǎ Ndiöxí ní sǎñaha-gǎ-xi tnúhu ndee iní xii-gǎ. <sup>44</sup> Te òré súúni ndihú iní-gǎ, te uu<sup>n</sup>-gǎ súúni ní yuhu ní iní-gǎ cáhá<sup>n</sup> ndihi-gǎ Dútú Ndiöxí, te tnée-gǎ cáá dàtná cáá ñíí te ngóyó núú ñúhú.

<sup>45</sup> Te sǎtá ní yáha ní cáhá<sup>n</sup> ndihi-gǎ Tǎtá-gǎ Dútú Ndiöxí, te ní ndacuñí-gǎ cuánuhú-gǎ núú ní dándóo-gǎ cue téé-á<sup>n</sup>, te òré ní nasáa-gǎ te xǎxíí-güedé cuendá sǎ ió cuéhe tnúhu sàni iní-güedé cuendá-gǎ. <sup>46</sup> Te xáha<sup>n</sup>-gǎ xii-güedé:

—¿Ná cuendá xidí-ndó? Chí ndácóo, te cáhá<sup>n</sup> ndihi-ndo Yǎ Ndiöxí cuendá sǎ vǎ dácáhá<sup>n</sup> ñáhá yucu ñáváha xii-ndo càda-ndo sǎ ñà túú tàú-ndó càda-ndo —cachí-gǎ xáha<sup>n</sup>-gǎ xii-güedé.

### *Ní tñi-güedé Jèsús ndécá ñaha-güedé cuáhá<sup>n</sup>*

*(Mt. 26:47-56; Mr. 14:43-50; Jn. 18:2-11)*

<sup>47</sup> Te cáhá<sup>n</sup> dúcá<sup>n</sup>-ní Jèsús ní quexio vai cue téé, te ìḡ téé xica cuu ndihi-gǎ nání Júdás cúnú-dé yódó nùu-dé núú-güedé ní quexio ndée núú-gǎ, te ní teyuhu ñaha-dé xii-gǎ, te núú tnàhá téé-á<sup>n</sup> cúú ùxúú cue téé xica cuu ndihi-gǎ. <sup>48</sup> Te ní xáha<sup>n</sup> Jèsús xii-dé:

—Júdás, ¿te yòhó cuáha cuendá ñáhá-n xii yúhú Téé cùu ñaní tnàhá-ndó nchàa-ndo núú cuè téé cùu úhú iní ñáhá xii-í cáhá<sup>n</sup>-n núu duha tàyuhu ñaha-n-á<sup>n</sup>? —càchí-gǎ xáha<sup>n</sup>-gǎ xii-dé.

<sup>49</sup> Te sǎtá ní xíní nchaa cue téé cùndihi Jèsús nàcuáa cùu cue téé ní quexio-á<sup>n</sup>, núú ní xicá<sup>n</sup> tnúhú-güedé núú-gǎ, te xáha<sup>n</sup>-güedé xii-gǎ:

—Mèstrú, ¿cùu nàá-ndí ndihi-güedé ndihi machití-a ñá? —càchí-güedé xáha<sup>n</sup>-güedé xii-gǎ.

<sup>50</sup> Te ìḡ-dé ní xehndé-ni-dé lóho xio cùha ìḡ cue téé ní quexio-á<sup>n</sup>, te téé-á<sup>n</sup> xínú cuèchi-dé núú dütú cúnú-gǎ, te ní quen-deé duu<sup>n</sup> lóho-dé. <sup>51</sup> Te Jèsús ní xáha<sup>n</sup>-gǎ xii-güedé:

—Chí dáñá-güedě, vá dúcá<sup>n</sup> càda-ndo — cachí-gá xáha<sup>n</sup>-gã xii-güedé.

Te ní dácàá-gá ndaha-gá ní tendaha-gã núú ní xindeé lóho téé-á<sup>n</sup>, te ní nduu váha dàtná-ni càa. <sup>52</sup> Te nchaa cue téé cùu dútú cùnùu, ndihi cue téé tàxi tnuní nchaa cue téé quide cuendá veñúhu sá ìo cùnùu, ndihi cue téé cùu sacuéhé núú ñàyiú isràél, nchaa cue téé-á<sup>n</sup> vèxi tñi ñaha-güedě xii-gá, te ní xáha<sup>n</sup>-gã xii-güedé:

—Nchòhó, nèhe-ná-ndó màchití, nèhe-ná-ndo càrrutí véxi-ndo núú ndécù-í, dàtná quidé-ndó ì<sup>n</sup> ñadúhú quidé ñàha-ndo xii-í. <sup>53</sup> Te duca<sup>n</sup>-ni ní xini-ndó ní xindecu-í xití veñúhu càhnu sá ìo cùnùu ní xóo danèhé-í ñàyiú, te ní lùha ñá túú ní cùu tnándeé ñáhá-ndó xii-í òré-á<sup>n</sup>, te vitna ní sáá òré duca<sup>n</sup> càda-ndo, te cada sácúíhná nàcuáa cùu iní-xi —càchí-gá xáha<sup>n</sup>-gã xii-güedé.

*Té Pèlú càhá<sup>n</sup>-dé núú ñàyiú sá ñà túú xini-dé Jèsús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Te ní tñi-güedé Jèsús, te ndèca ñaha-güedé xii-gá cuáhá<sup>n</sup> vehe téé cùu dútú cùnùu-gá, te té Pèlú xica xica-ni nchicú<sup>n</sup> ñáhá-dé xii-gá cuáhá<sup>n</sup>. <sup>55</sup> Te òré ní quexio-güedé xiá<sup>n</sup> te ní dátñáhá-güedé ñuhú quehé vehe-á<sup>n</sup>, te ní càndéé yuhu nùhú-á<sup>n</sup> ní ngóo teté-güedé, chi quide víxi<sup>n</sup>-xi, te tnàhá té Pèlú ní ngóo teté ndihi ñaha-dé xii-güedé. <sup>56</sup> Te xiá<sup>n</sup> ndécú ì<sup>n</sup> xíchí xínú cuèchi vehe-á<sup>n</sup>, te òré ní xini-xi núcóo teté tnàhá té Pèlú, te ní ndacoto-xi núú-dé, te ní xáha<sup>n</sup>-xi xii-güedé:

—Tnàhá téé-a xica cuu ndihi-dé téé ndèca-güedé cuánguihu-á<sup>n</sup> —càchí-xi xáha<sup>n</sup>-xi xii-güedé.

<sup>57</sup> Dico té Pèlú ñá túú ní nñuu-dé, te xáha<sup>n</sup>-dè xii-xi:

—Yúhú ñá túú xini-í téé-á<sup>n</sup> —càchí-dé xáha<sup>n</sup>-dè xii-xi.

<sup>58</sup> Te tna tnaa-ni ní cuu, te ní xini ñáhá tucu ì<sup>n</sup>-dé, te xáha<sup>n</sup>-dè:

—Yòhó tnàhá-n xica cuu ndihi-n téé ndèca-güedé cuánguihu-á<sup>n</sup> —càchí-dé xáha<sup>n</sup>-dè xii-dé.

Dico té Pèlú ní xáha<sup>n</sup>-dè:

—Ñáhá, ñá díú yúhú xicá cùu ndihi-í-dé —càchí-dé xáha<sup>n</sup>-dè.

<sup>59</sup> Te sa ní cuu dàtná ì<sup>n</sup> òré te càchí tucu ingá-dé:

—Ndáá sá tée-a xica cuu ndihi-dé téé ndèca-güedé cuánguihu-á<sup>n</sup>, chi tnàhá-dé cùu-dé téé distritú Galileá —càchí-dé xáha<sup>n</sup>-dè xii-güedé.

<sup>60</sup> Te té Pèlú ní xáha<sup>n</sup>-dè xii téé-á<sup>n</sup>:

—Yúhú ñá túú cùnùní iní-í nása ndùu tnúhu càhá<sup>n</sup>-n —càchí-dé xáha<sup>n</sup>-dè.

Te ní vátá xinu duca<sup>n</sup>-gã tnúhu càhá<sup>n</sup>-dé ní cana-ni ì<sup>n</sup> líhi. <sup>61</sup> Te Xítóhó Jesucristú ní nchócótó-gã núú-dé, te òré-ni-á<sup>n</sup> ní ndacu iní-dé tnúhu ní xáha<sup>n</sup>-gã xii-dé sá cùmání-gã cana ì<sup>n</sup> líhi, te úní xito càhá<sup>n</sup>-dé sá ñà túú xini ñáhá-dé xii-gá. <sup>62</sup> Te té Pèlú ní quee-dé tnuú-güedé cuáhá<sup>n</sup>-dé ì<sup>n</sup> xio, te ní ndáhyú víhí-dé ní ndixi cuèchi iní-dé.

*Cùdiquí ndeé-güedé Jèsús*

(Mt. 26:67-68; Mr. 14:65)

<sup>63-64</sup> Te cue téé ndèé ñáhá xii Jèsús ní cudíquí ndeé ñáhá-güedé xii-gá, te ní dádáhu-güedé núú-gã, te ní caniha-güedé xii-gá, te xáha<sup>n</sup>-güedé:

—¡Cáhá<sup>n</sup> ná cótó yòo ní caniha xii-n! —cachí-güedé xáha<sup>n</sup>-güedé xii-gá.

<sup>65</sup> Te cuéhé víhí-gã tnúhu cuèhé ní xáha<sup>n</sup>-güedé xii-gá.

*Jèsús ndécú-gã jündá*

(Mt. 26:59-66; Mr. 14:55-64; Jn. 18:19-24)

<sup>66</sup> Te sátá ní túnadaá, te ní tacá cue téé cùu sacuéhé núú ñàyiú isràél, ndihi cue téé cùu dútú cùnùu, ndihi cue téé dàcuaha ñaha xii-yu nchaa tnúhu ní chídó tnùní ndíi Moisés, te ndèca-güedé Jèsús cuáhá<sup>n</sup> núú cáda-güedé jündá, te òré ní quexio-güedé ndihi-gá núú cáda-güedé jündá-á<sup>n</sup>, te ní xáha<sup>n</sup>-güedé xii-gá:

<sup>67</sup> —Cuíni-ndí cachí tnúhu-n xii-ndí nñu díu-n cùu-n Cristú Yaá ní tendaha Yá Ndiòxí véxi ñuyíú-a —càchí-güedé xáha<sup>n</sup>-güedé xii-gá.

Te ní xáha<sup>n</sup>-gã xii-güedé:

—Te núu na càchí-í sá díu-í cùu Cristú ñá, te ní vá quíndaá iní-ndó, <sup>68</sup> àdi te núu ì<sup>n</sup> sá ná càcá<sup>n</sup> tnúhu-í núú-ndó, te ní vá càchí tnúhu-ndo, te ní vá dáñá ñàha-ndo. <sup>69</sup> Dico vitna ní cuyatni nduu ngóo yúhú Téé cùu ñaní tnàhá-ndó nchàa-ndo xio cuha Dútú Ndiòxí Yaá ío cùnùu —cachí-gá xáha<sup>n</sup>-gã xii-güedé.

<sup>70</sup> Te dàtnùní nchaa-güedé ní xicá<sup>n</sup> tnúhú-güedé núú-gã, te xáha<sup>n</sup>-güedé xii-gá:

—¿Te yòhó cúú-n Dèhe Yá Ndiõxí te núu duca<sup>n</sup> vání? —càchí-güedé xàha<sup>n</sup>-güedé xii-gá.

Te ní xáha<sup>n</sup> Jèsús:

—Ndáá sá díú Dèhe-gá cúú-í dàtná càchí méé-ndó-ã<sup>n</sup> —càchí-gá xáha<sup>n</sup>-gã xii-güedé.

<sup>71</sup> Te ní xítñaha-güedé:

—Ñá túú-gã xíní ñùhu-xi cue téé cáhá<sup>n</sup> núu ndáá sá ndècuéchi-dé àdi ñá túú ndècuéchi-dé chi yuhu mee-dé ní cáhá<sup>n</sup>-dé vitna ní xíndedóho-o —càchí-güedé xítñaha-güedé.

## 23

### *Jèsús ndécú-gã núú tẽ Pilatú*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Te nchaa-güedé ní ndacuíñi-güedé, te ndèca-güedé Jèsús cuáhá<sup>n</sup> núú té Pilatú, <sup>2</sup> te núú tẽe-á<sup>n</sup> ñí ngüíta-güedé sàcá<sup>n</sup> cuéchi-güedé cuèndá-gá, te xáha<sup>n</sup>-güedé:

—Ní naníhí-ndí tẽe-a dándahú-dé ñáyíu ñuú-ó, chi xáha<sup>n</sup>-dẽ xii-yu sá vã chãhu-gá-yu impuèstú xii té Cèsár tẽe ío cùnuu, te càchí-dé sá díú-dẽ cúú-dẽ Crístú Yaá ní tendaha Yá Ndiõxí véxi ñuyíú-a te yíndaha-dé ñáyíu càchí-dé —càchí-güedé xáha<sup>n</sup>-güedé xii-dé.

<sup>3</sup> Te té Pilatú ní xícá<sup>n</sup> tnúhu-dé núú-gã, te xáha<sup>n</sup>-dẽ xii-gá:

—¿Ndáá sá díú-n cùu-n tẽe yíndaha ñaha xii ñáyíu isràél-ã<sup>n</sup>? —càchí-dé xáha<sup>n</sup>-dẽ xii-gá.

Te Jèsús ní xáha<sup>n</sup>-gã xii-dé:

—Díu-í yíndaha-í-yu —càchí-gá xáha<sup>n</sup>-gã xii-dé.

<sup>4</sup> Te té Pilatú ní xáha<sup>n</sup>-dẽ xii nchaa ñáyíu, ndíhi cue tẽe cùu dútú cùnùu:

—Yúhú cútnùní iní-í sá ñà túú ñí ñ<sup>n</sup> cuéchi tẽe-a —càchí-dé xáha<sup>n</sup>-dẽ xii-yu.

<sup>5</sup> Dico níhi-gá ní cáhá<sup>n</sup>-güedé, te xáha<sup>n</sup>-güedé:

—Càchí-ndí sá ío dusa<sup>n</sup> xíquide ñáyíu cuèndá nchaa sá dánèhé ñáhá-dẽ xii-yu, te ní quesaha-dẽ ndéé distritú Galileá, te ní yáha-dé ñíhí distritú Júdeá dánèhé-dé ñáyíu, te vitna ní sáá-ni-tu-dé ndéé ndíha dánèhé-dé-yu —càchí-güedé xáha<sup>n</sup>-güedé xii té Pilatú.

### *Jèsús ndécú-gã núú tẽ Hèrodés*

<sup>6</sup> Te sá dúcá<sup>n</sup> ñí tecú dóho té Pilatú ní cacu nehé-yu distritú Galileá, núu xíã<sup>n</sup> ní xícá<sup>n</sup> tnúhú-dẽ núu-yu núu tẽe Galileá cúú-gã. <sup>7</sup> Te ní xáhã<sup>n</sup>-yu sá díú tẽe yàcá<sup>n</sup> cúú-gã, núu xíã<sup>n</sup> ní na dàyáha ñaha-dẽ xii-gá ndaha té Hèrodés tẽe cùu gobiernú distritú Galileá chi nduu-ã<sup>n</sup> ndécú-dẽ tnáhá-dé ñuú Jerusálén-á<sup>n</sup>. <sup>8</sup> Te òré ní xíní té Hèrodés-á<sup>n</sup>

Jèsús te ío ní cudíí iní-dé, chi ní cunaha dùca<sup>n</sup>-ni cuiní-dé quíní ñáhá-dẽ xii-gá te ñá túú tnáhí xíní ñáhá-dẽ xii-gá ní cùu, chi cuèndá-ni tnúhu ñíhí-dé cuèndá-gá, te ndètu-dé sáá ñ<sup>n</sup> nduu quíní ñáhá-dẽ xii-gá, te cada-gá ñ<sup>n</sup> sá vã yõo tnáhí ndacu cada cundehe-dé ní sani iní-dé. <sup>9</sup> Te vài sá ñí xícá<sup>n</sup> tnúhú-dẽ núú Jèsús, dico ní ñ<sup>n</sup> tnúhu ñá túú ní cáhá<sup>n</sup>-gã. <sup>10</sup> Te xíã<sup>n</sup> xíndecu tnáhá cue tẽe cùu dútú cùnùu, ndíhi cue tẽe dàcuaha ñaha xii ñáyíu nchaa tnúhu ní chídó tnùní ndíi Moisés, te cue tẽe-á<sup>n</sup> súúní ío iní-güedé sàcá<sup>n</sup> cuéchi-güedé cuèndá-gá.

<sup>11</sup> Te té Hèrodés ndíhi cue tẽe cùu san-dadú-dé ñá túú ní cùu váha iní-güedé núú Jèsús, te ní cudíquí ndéé ñáhá-güedé xii-gá, te ní dáciuñú ñaha-güedé dóo vãha xii-gá dàtná cáá dõó sáciuñu cue tẽe sáciundaha ñaha xii ñáyíu. Te dàtnùní té Hèrodés ní dánùhú ñáhá tucu-dé xii-gá ndaha té Pilatú.

<sup>12</sup> Te nduu-ã<sup>n</sup> ñí tnáhá tnúhu té Pilatú ndíhi té Hèrodés, chi cùu úhú iní tnáhá-güedé ní cùu.

### *Càchí-güedé sá cáhni-güedé Jèsús*

(Mt. 27:15-26; Mr. 15:6-15; Jn. 18:39-19:16)

<sup>13</sup> Te té Pilatú ní nadatácá-dé nchaa cue tẽe cùu dútú cùnùu ndíhi dava-gá cue tẽe cùnuu, ndíhi nchaa ñáyíu ñuú-á<sup>n</sup>, <sup>14</sup> te ní xáha<sup>n</sup>-dẽ:

—Nchòhó ndécá-ndó tẽe-a véxi ní taxi cuèndá-ndó-dé iha, te càchí-ndó sá ío dusa<sup>n</sup> quide ñáyíu cuèndá nchaa sá dánèhé ñáhá-dẽ xii-yu, te núú-ndó ndùcu tnúhu-í núú-dẽ núu ná ní quide-dé. Dico yúhú cútnùní iní-í sá ñà túú ñí ñ<sup>n</sup> cuéchi-dé dàtná cáhá<sup>n</sup>-ndó-ã<sup>n</sup>. <sup>15</sup> Te cuèi té Hèrodés díu-ni duca<sup>n</sup> cáhá<sup>n</sup>-dé sá ñà túú cuéchi-dé núu ní techiú<sup>n</sup> ñaha tucu-dé cuándixi-dé iha. Te vitna sa ní cutnùní iní-ó sá ñà túú taú-xi cahni-o-dé chi ñá túú cuéchi ní quide-dé.

<sup>16</sup> Te na dándoho-ni-í-dé te dàcácu-í-dé —càchí-dé xáha<sup>n</sup>-dẽ xii-yu.



17 Te ndi tnahá nduu vico pascuá te dacuítí sã dácácu té Pilatú-án ññ cue tée yìhi vecaá, chi duca<sup>n</sup> tnàhí quide-dé. 18 Dico nchaá-yu ní cuáá-yu, te xähá<sup>n</sup>-yu xii-dé:

—¡Queñuhu tée nàni Jesús-án, te cahni-n-dě! ¡Te dácácu-n té Barrábás! — cächí-yu xähá<sup>n</sup>-yu xii-dé.

19 Te té Barrábás-án ññ sanu ichi-dé ñáyiu ñúú ingá ichi, te ní ngüíta-yu ndihí-dé ní cuu úhú iní-yu cue tée cùchiu<sup>n</sup>, te ní sahani-dé ndíyí núu xíá<sup>n</sup> ní chihí ñaha-güedé vecaá xii-dé. 20 Te té Pilatú cuñí-dé dácácu-dé Jesús núu xíá<sup>n</sup> cãhá<sup>n</sup> ndihí ñaha tucu-dé xii-yu ni cùu, 21 dico uu<sup>n</sup>-gá níhi ní cuáá-yu, te ní xähá<sup>n</sup>-yu xii-dé úú xito:

—¡Cata caá-dé núu cùrúxí! ¡Cata caá-dé núu cùrúxí! — cächí-yu xähá<sup>n</sup>-yu xii-dé.

22 Te xito cuu úní ní xáha<sup>n</sup> té Pilatú:

—¿Te ná cúú cuèchi ní quide-dé te núu duca<sup>n</sup> cuñí-ndó càda-í-dé-i? Te yúhú cútnuní iní-í sá ñà túú cuèchi ní quide-dé núu xíá<sup>n</sup> ñà túú tàú-xi cahni-o-dě, te na dândoho-ni-í-dé te dácácu-í-dé — cächí-dé xähá<sup>n</sup>-dě xii-yu.

23 Dico níhi-ni cãhá<sup>n</sup>-yu xähá<sup>n</sup>-yu sá ná càta caa ñaha-dé xii-gá núu cùrúxí, te ñáyiu-án ndihí nchaa cue tée cùu dútú cùnùu xicáhá<sup>n</sup> níhi-güedé ndihí-yu ndéé ní xínu iní té Pilatú cada-dé nàcuáa cächí iní-yu. 24 Te ní xáha<sup>n</sup>-dě xii-yu sá cúú càda-dé nàcuáa xähá<sup>n</sup>-yu. 25 Te duca<sup>n</sup> te ní dácácu-dé té Barrábás tée ní sanu ichi ñáyiu ñúú ingá ichi, te ññ-ni-dé ní sahani-dé ndíyí núu xíá<sup>n</sup> ní xíhi-dé vecaá, te dätñuní ní táuchíu<sup>n</sup>-dě cada-güedé Jesús nàcuáa xähá<sup>n</sup>-yu.

*Sàta caa-güedé Jesús núu cùrúxí*

(Mt. 27:32-44; Mr. 15:21-32; Jn. 19:17-27)

26 Te ndèca-güedé Jesús cuáhá<sup>n</sup> núu catá càa ñaha-güedé xii-gá, te ichi cuáhá<sup>n</sup>-güedé ndihí-gá ní tñi-güedé ññ tée ñúú Cirené nání-dě Ximú ñúhú-dě ichi duha cuándixi-dé ní sáhá<sup>n</sup>-dé yucu, te ní dácuidó ñaha-güedé xii-dé cùrúxí nchídó Jesús, te ní ngüíta nchicú<sup>n</sup>-dé sátá-gã.

27 Te ío cuéhé ñáyiu nchicú<sup>n</sup> ñáhá xii-gá cuáhá<sup>n</sup>, te vai ñáyiu ññ ío níhi ndàhí-yu sá ndihú iní-yu cuendá Jesús. 28 Te Jesús ní nchócótó-gã núu-yu, te ní xáha<sup>n</sup>-gã:

—Nchòhó ñáyiu ññ Jerusàlén, vá ndàhyú-ndó cuendá-í chí ndàhyú cuendá méé-ndó ndihí cuendá déhe-ndo. 29 Chi sáá nduu quèsaha ñáyiu: “Sá vãha táhú nchaa ñáyiu ñà túú càcu déhe-xi, ndihí nchaa ñáyiu vátá quini-gá cuhu<sup>n</sup> déhe-xi, chi ni ñà túú xini-yu dacadi-yu”, duha quèsahá-yu. 30 Te dàvá-án cüñaha ñáyiu xii nchaa tindúú ndihí nchaa núu xiquí: “Chí tãcùu<sup>n</sup> ngónchihí ñaha-ndo xii-ndí”, duha cüñahá-yu. 31 Te núu yúhú tée quide ndáá duha quide ñaha-güedé xii-í vitna, te ndéé-gá cada-güedé nchaa ñáyiu ndècu ichi cuehé ichi duha — cächí-gá xáha<sup>n</sup>-gã xii-yu.

32 Te ndèca tucu-güedé úú tnàhã cue tée ndècu ndisa cuèchi-xi cuáhá<sup>n</sup> cuendá cahni ñaha-güedé xii-güedé ndihí Jesús. 33 Te òré ní quexio-güedé ndihí-gá ññ xichi núu nání Yiquí Díquí Ndíyí, te xíá<sup>n</sup> ññ sata caa ñaha-güedé xii-gá núu cùrúxí, ndihí úú cue tée ndècu ndisa cuèchi-xi-án, te ññ-dé ní sata caa-güedé xio cùha-gá te ingá-dé ní sata caa-güedé xio dätñi-gá ññ-ni núu cùrúxí tucu. 34 Te ní xáha<sup>n</sup>-gã xii Tãtã-gã Dútú Ndiõxí:

—Táu, cada càhnu iní sá quidé-güedé, chi ñà túú cùtnuní iní-güedé ná cúú sã quidé-güedé — cächí-gá xáha<sup>n</sup>-gã.

Te cue tée cùu sandadú ní xito ndéé-güedé núu ndèdacãa-güedé cuu cuendá-güedé dóó-gã. 35 Te nchaa ñáyiu xindecu-án ndéhë-yu nàcuáa quide-güedé Jesús, te nchaa cue tée cùnùu ní cudíquí ndéé ñáhã-güedé xii-gá, te ní xitnãha-güedé:

—Te dava ñáyiu ní ndacu-dé ní dácácu nihnu-dé, te vitna na dácácu nihnu-dé méé-dě, te núu ndisa sá Crístú Yáá ní tendaha Yã Ndiõxí véxi ñuyíú-a cùu-dé — cächí-güedé xitnãha-güedé.

36 Te tnàhã cue tée cùu sandadú ní cudíquí ndéé ñáhã-güedé xii-gá, chi ní sãndehe yatni-güedé núu tãcãa-gã sãñaha-güedé ndudí íá còho-gá ní cùu, 37 te ní xáha<sup>n</sup>-güedé xii-gã:

—Te núu yòhó cúú-n tée yindaha ñaha xii ñáyiu israhél, te dácácu nihnu mee-n — cächí-güedé xáha<sup>n</sup>-güedé xii-gã.

38 Te ní taxi ndècu-güedé ññ sá ndéé lètrã ndàa díquí-gã te ndéé úní núu tnùhu, tnùhu grìégú, ndihí tnùhu làtín, ndihí tnùhu



hèbreú, te duha quèe-xi ndi nuní núu tnũhu-án “Tée-a cùu-dé tée yìndaha ñaha xii ñáyiú isràél”, duha quèe-xi.

<sup>39</sup> Te ìn tée ndècu ndisa cuèchi-xi, tée ní sata caa-güedé diñi-gá xìcuèhé ñáhá-dě xii-gá, te xáha<sup>n</sup>-dè:

—Te núu yòhó cúu-n Crìstú Yaá ní tendaha Yá Ndiöxí véxi ñuyíú-a, te dàcácu nihnu mee-n, te dàcácu nihnu ñaha xii nchúhú tnàhá-ndí tucu —càchí-dé xáha<sup>n</sup>-dè xii-gá.

<sup>40</sup> Dico ingá tée cùndihí-dé tée tàcaa ingá xio diñi-gá ní tenàá ñáhá-dě xii-dé, te xáha<sup>n</sup>-dè:

—¿Te náa ñá túu ndàcu iní-n Yá Ndiöxí vitna duha cãa-o ndoho-o ndihí tée nani Jesús-a ñá? <sup>41</sup> Chi nchoo tàu ndisa-o sã dúhá ndòho-o nacháhu-o cuèchi-o, dico Jèsús-a chi ñá túu cuèchi-dé —càchí-dé xáha<sup>n</sup>-dè xii tée tàcaa ndihí-dé-án.

<sup>42</sup> Te dàtnùnì ní xáha<sup>n</sup>-dè xii-gá:

—Jèsús, ndacu iní ñáhá-n xii-í òré ná quixi-n taxi tnuní-n ñuyíú-a —càchí-dé xáha<sup>n</sup>-dè xii-gá.

<sup>43</sup> Te Jèsús ní xáha<sup>n</sup>-gã:

—Na càchí tnúhu ndáá-í xii-n sã méi ndùu vitna cundecu ndihí ñaha-í xii-n núu ñí nduu táhù-í cundecu-í —càchí-gá xáha<sup>n</sup>-gã xii-dé.

*Ní xihí Jèsús*

(Mt. 27:45-56; Mr. 15:33-41; Jn. 19:28-30)

<sup>44</sup> Te òré ní cuu cuádava nduu. Te ní cunee nihí ñuyíú, te duca<sup>n</sup>-ni cãa ní cuu ndéé caá úní sacuaa. <sup>45</sup> Chi ñá túu-gã ní dàyehé nchíanchii te ní ndátá dõó cúu còrtiná veñúhu càhnu sã ìo cùnuu ní quée dava ndáá. <sup>46</sup> Te níhi ní cáhá<sup>n</sup> Jèsús, te xáha<sup>n</sup>-gã xii Tãtã-gã Dútú Ndiöxí:

—Táu, naquehe<sup>n</sup> cuendá-n espíritú-í —càchí-gá xáha<sup>n</sup>-gã xii Tãtã-gã.

Te tnúhu-ná-án ñí cáhá<sup>n</sup>-gá te ní xihí-ni-gá.

<sup>47</sup> Te òré ní xiní tée cùu capitán sá dúcán ñí cuu, te ní ndacu iní-dé Yá Ndiöxí, te ní cachí-dé:

—Sá ndáá ndisa sã tõe-a cùu-dé ìn tée ìo quide ndáá ndécú ñuyíú-a ni cùu —duha ní cachí-dé.

<sup>48</sup> Te chitu ñáyiú ní tacá xíán chi cùnì-yu cundehé-yu nása cada-güedé Jèsús. Te

sátá ñí yáha ní xiní-yu nàcuáa ní quide ñaha-güedé xii-gá, te ní ndihí-yu ní ndaca ta cànì-yu pèchú-yu cuánuhú sá ndìhú iní-yu.

<sup>49</sup> Dico ndècu tnahá cue ñáyiú xiní tnáhá ndihí Jesús, ndihí ñáyiú diñí ní chinchícú<sup>n</sup> ñáhá xii-gá ndéé distritú Galileá, te ñáyiú-án xica-ni xixínutnii-yu xìndéhè-yu nchaa nàcuáa ní quide ñaha-güedé xii-gá.

*Chìndúxi-güedé Jèsús*

(Mt. 27:57-61; Mr. 15:42-47; Jn. 19:38-42)

<sup>50</sup> Te ndècu ìn tée ñuú Arimàtea nání-dě Chèé, te ñuú-án yìndèhu-xi distritú Jùdeá, te ìo váha iní-dé te quide ndáá-dé núu Yá Ndiöxí, te tnàhá-dé cúu-dé chiú<sup>n</sup> te ní xìndecu-dé jùndá cue tée isràél. <sup>51</sup> Te ñá ní tnàhá tnàhí iní-dé nàcuáa ní cáhá<sup>n</sup>-güedé núu jùndá nàcuáa cada-güedé Jèsús. Te tée-án ndétú-dě sáa nduu ndihu ndaha ñaha Yá Ndiöxí xii-dé ndihí ñáyiú. <sup>52</sup> Te tée-án ñí sáhá<sup>n</sup>-dé núu té Pilatú te ní xáha<sup>n</sup>-dè sã núu vá cùndèe iní-dé dañá-dé chindúxi-dé yiqui cùñú Jèsús. Te té Pilatú-án ñí sáha-dé tnúhu. <sup>53</sup> Te ní nunehe-dé yiqui cùñú-gá núu cùrúxí, te ní chidúcú<sup>n</sup>nuu-dé ìn dõó cuixí<sup>n</sup>, te ní chihi-dé ìn yaú nchí yiqui naha cava, te vátá yõo ìn-gá nguindúxi yaú-án. <sup>54</sup> Te cùu-xi nduu vispré nduu ndetátú ñáyiú, núu xiquide túha-ná-yu sá cúu ìngá nduu.

<sup>55</sup> Te nchaa ñáyiú diñí ní chinchícú<sup>n</sup> ñáhá xii Jesús ndéé distritú Galileá ndèndàhá-yu té Chèé ní sáhá<sup>n</sup> núu nchí yaú-án, núu ní xiní-yu nàcuáa ní sacá<sup>n</sup>-dé yiqui cùñú-gá xití yaú-án. <sup>56</sup> Te duca<sup>n</sup> te cuánuhú-yu vehé-yu, te ní quide túha-yu acití sáhá<sup>n</sup> tnámí, ndihí pomàdá, te ní ndetátú-yu ìngá nduu-án ñí quidé-yu nàcuáa càhá<sup>n</sup> tnúhu Yá Ndiöxí.

## 24

*Ní ndoto Jèsús*

(Mt. 28:1-10; Mr. 16:1-8; Jn. 20:1-10)

<sup>1</sup> Te ndumìngú nehé víhí-ní cuáhá<sup>n</sup> tucu ñáyiú diñí núu nchí yaú ní chihi-güedé yiqui cùñú Jèsús, te nèhé-yu nchaa sá sáhá<sup>n</sup> tnámí ñí quide túha-yu-án cuáhá<sup>n</sup>, te tnàhá tucu ìn ùú-gá tnàha diñí-yu nchícú<sup>n</sup> ñáhá xii-yu cuáhá<sup>n</sup>. <sup>2</sup> Te òré ní quexìo-yu

yuhu yàú-án te ní xini-yu sá yúú ndèdí ìḡ xio-ná ndécú, <sup>3</sup> te ní quihu-yu xití yaú-án, dico ñá túú-gã yiqui cùñú Jèsús yíhí. <sup>4</sup> Te ñá ní cùtnuní tnàhí iní-yu ndéé ichi cuáhán yiqui cùñú-gá, te ní xini-yu úú espíritú xínú cuèchi núú Yá Ndiòxí xínutnì-xi dìñi-yu te xíxíhnu-xi dóó chàhnhí. <sup>5</sup> Te ní yuhú-yu te ñá túú ní cùyí-yu cundehé-yu cue espíritú-án, te cue espíritú-án ñi xáha<sup>n</sup>-xi xii-yu:

—¿Ná cuendá nándücu-ndo Jesús Yá ndécú vívú núú yíndüxi ñáyiú ní xíhí-i? <sup>6</sup> Te ñá túú-gã yiqui cùñú-gá ndécú ìha chi sa ní ndoto-gá, te chí dándàcu iní nàcuáa ní cáhán-gá cùtnàhá ní xíndecu-ndo ndìhi-gá distritú Galileá, <sup>7</sup> chi ní cachí-gá sá méé-gã cúú-gã ñani tnáhá-ndó nchàa-ndo, te dacuítí cuáha cuendá ñáhá-güedě xii-gá núú cuè téé ndècu ichi cuehé ichi duha, te cata caa ñaha-güedě xii-gá núú cùrúxí, te núú cùrúxí-án cuú-gá dico nduu úní sá cùú-gá te ndoto-gá, duha ní cachí-gá xii-ndo.

<sup>8</sup> Te òré-án ñi ndacu iní-yu tnúhu ní cáhán Jèsús. <sup>9</sup> Te sátá dúcá<sup>n</sup> te ní naquehé<sup>n</sup>-yu ichi cuánuhú-yu, te ní caní-yu cuèndú núú ndì úxí ìḡ cue téé ní táuchíú<sup>n</sup> Jèsús cáhán tnúhu-gá, ndìhi núú dàva-gá ñáyiú. <sup>10</sup> Te ñáyiú duca<sup>n</sup> nàha tnúhu cuánuhú núú-güedé-án cúú tá Màriá Magdaléná, ndìhi tá Juáná, ndìhi tá Màriá náná tē Jàcobó, ndìhi dava-gá ñáyiú dìhí. <sup>11</sup> Dico cue téé-án ñi sani iní-güedé sá dicó cáhú ìní-yu tnúhu xáhã<sup>n</sup>-yu xii-güedé nùu ñá túú ní sàndáá iní-güedé nàcuáa ní xáhã<sup>n</sup>-yu.

<sup>12</sup> Dico té Pèlú ní quee-dé xínú-dě cuáhán cuándéhé-dě yaú núú ñi chihi-güedé yiqui cùñú Jèsús, te ní sáá-dé te ní ngáundeyi-dé xító ñihni-dé xití yaú-án te ní xini-dé sá méé-nã dóó ñi xiducú<sup>n</sup> nuu-gá yúcu ìḡ xio, te ío ní cuñúhu-dé sá dúcá<sup>n</sup> ñi cuu, te ní natnì-dé ichi cuánuhú-dé vehe núú xíndecu-güedé.

### *Ichi ñuú Emàús* (Mr. 16:12-13)

<sup>13</sup> Te diu-ni nduu-ã<sup>n</sup> ñúhú úú cue téé ní xica cuu ndìhi Jèsús ichi cuáhán-güedé ìḡ ñuú nání Emàús, te sàcúhu<sup>n</sup>-güedé dàtná úú òré ichi ndéé ñuú Jerusàlén, te ndéé ñuú

Emàús. <sup>14</sup> Te ta ndàtnúhu-güedé cuáhán nchaa nàcuáa ní cuu, <sup>15</sup> te ñini dùca<sup>n</sup> xicáhán-güedé, te Jèsús ní natnahá ñáhá-gã xii-güedé te ndèca tnaha-gá ndìhi-güedé cuáhán. <sup>16</sup> Te cuèi ndèhe ñaha-güedé xii-gá dico dàtná ìḡ sá ndèdí núú-güedě, chi ñá ná quini ñáhá-güedě xii-gá ní cuu. <sup>17</sup> Te Jèsús ní xicá<sup>n</sup> tnúhú-gã núú-güedě, te xáha<sup>n</sup>-gã:

—¿Ná tnúhu xicáhán-ndó ñùhu-ndo ichi núú duca<sup>n</sup> ío cùu ndiyí-ndó-í? —càchí-gá xáha<sup>n</sup>-gã xii-güedé.

<sup>18</sup> Te ìḡ téé nani Cleofás ní xáha<sup>n</sup>-dě xii-gá:

—¿Te ná cuendá nchaa ñáyiú íchí ñi sáá ñuú Jerusàlén xini-yu nchaa nàcuáa ní cuu, te ìḡ dìi-ná yòhó ñá túú xini-n-í? —càchí-dé xáha<sup>n</sup>-dě xii-gá.

<sup>19</sup> Te ní xáha<sup>n</sup>-gã xii-güedé:

—¿Te ná ní cuu-i? —càchí-gá xáha<sup>n</sup>-gã xii-güedé.

Te ní xáha<sup>n</sup>-güedě xii-gá:

—Cuendá Jèsús téé ñuú Nazàrét càhá<sup>n</sup>-ndí, chi téé-án cúú-dě ìḡ téé càhá<sup>n</sup> tnúhu Yá Ndiòxí, te ío váha ndùu tnúhu càhá<sup>n</sup>-dé ní cuu, te quide-dé sá vã yòo tnàhí ndàcu cada nacuáa cudíí ìní Yá Ndiòxí ndìhi ñáyiú ñi cuu. <sup>20</sup> Te cue téé cùu dútú cùnùu, ndìhi cue téé cùnùu taxi tnuní ñáhá xii-ndí ní sáha cuendá ñáhá-güedě xii-dé núú tē Pilatú te ní sata caa ñaha-güedě te núú cùrúxí-án ñi xíhí-dé. <sup>21</sup> Dico vitna sa ní cuu úní nduu sá ñi xíhí-dé, te nchúhú ní sani iní-ndí sá tē-án dàcácu nihnu ñaha-dě xii nchúhú ñáyiú isràél núú nchàa tnúndòho tnúhu ndàhú ndécú-ndí. <sup>22</sup> Dico ío cùñúhu-ndí cúú, chi ìḡ úú ñáyiú dìhí ní tuha ñaha xii-dé ndécú ndìhi-ndí ní sáhá<sup>n</sup> ngotó-yu ndéxuehe tàcuíhndá-gá yaú núú ñi chihi-güedé yiqui cùñú-dé, <sup>23</sup> te ní nasáá-yu càchí-yu xii-ndí sá ña túú-gã yiqui cùñú-dé yíhí xití yaú-án. Te ní xini-yu espíritú xínú cuèchi núú Yá Ndiòxí, te ní xáha<sup>n</sup>-xi xii-yu sá ndécú vívú-dě. <sup>24</sup> Te sátá dúcá<sup>n</sup> te ìḡ úú cue téé cùndìhi-ndí ní sáhá<sup>n</sup> ndéhé-güedě yaú-án, te ní xini-güedé sá ndáá cúú-xí nchàa tnúhu ní cáhán ñáyiú dìhí-án, dico ñá túú ní xini-güedé téé-án —càchí-güedé xáhã<sup>n</sup>-güedě xii-gá.

<sup>25</sup> Te Jèsús ní xáha<sup>n</sup>-gã xii-güedé:

—Ío cùmání sã xini tnúni-ndó, chi ío cuèé sàndáá iní-ndó tnúhu ní cáhán cue téé ní

xóo cáhá<sup>n</sup> tnúhu Yá Ndiöxí ndéé sanaha!  
 26 ¿Te náa ñá túú taú-xi sá ndóhó Crístú  
 òré cúmání-gã sáá nduu ndàa-gã andiu  
 núú ndécú Dütú Ndiöxí cundecu-gã-ã? —  
 càchí-gã xáha<sup>n</sup>-gã xii-güedé.

27 Te ní ngüíta-gã xáha<sup>n</sup>-gã nàcuáa quèe-xi  
 nchaa tnúhu càhá<sup>n</sup>-xi núú tütú Yá Ndiöxí  
 cuëndá-gã, te díhna-gã ní cáhá<sup>n</sup>-gã nàcuáa  
 ndùu nchaa tnúhu yòdo tnuní núú tütú ndíi  
 Moisés, te dàtnuní ní cáhá<sup>n</sup>-gã nàcuáa ndùu  
 nchaa tnúhu yòdo tnuní núú tütú nchaa  
 cue téé ní xóo cáhá<sup>n</sup> tnúhu Yá Ndiöxí ndéé  
 sanaha.

28 Te òré ní quexìo-güedé yuhu ñúú núú  
 cuahá<sup>n</sup>-güedé-ã<sup>n</sup>, te Jèsús ní quide-ni-gã  
 sá yáha-gã quíhí<sup>n</sup>-gã ingá xichi ni cùu.  
 29 Dico ní cáhá<sup>n</sup> ndàhú-güedé núú-gã sá  
 quéndöo-gã xíá<sup>n</sup> ndetatú-gã ndíhi-güedé, te  
 xáha<sup>n</sup>-güedé xii-gã:

—Quendóo ndíhi ñaha xii-ndí iha nde-  
 tatú-n chi sa ní cuaa, te tnavíi cundi<sup>n</sup> —  
 càchí-güedé xáha<sup>n</sup>-güedé xii-gã.

Te xíá<sup>n</sup> cáá ñ<sup>n</sup> vehe cuánguihu-güedé nde-  
 tatú-güedé ndíhi-gã. 30 Te òré sa yíhi-güedé  
 mèsá ndíhi-gã cùdini ndíhi ñaha-güedé, te  
 ní quehe<sup>n</sup>-gã pàá te ní ndacá<sup>n</sup> táhú-gã  
 núú Yá Ndiöxí, te ní táhú cuèchi-gã te  
 dàtnuní ní dácãhñu ñaha-gã xii-güedé. 31 Te  
 òré-á<sup>n</sup> ñí naquiní ñáhá-güedé xii-gã ní  
 cùu, dico uu<sup>n</sup> ní ndóñúhú-gã. 32 Te ní  
 xítñaha-güedé:

—Te ndáá sá sùúní cùdíí ìní-ó òré tá  
 ndàtnúhu-o ndíhi Jèsús véxi ichi, te ta  
 dànehé ñáhá-gã xii-o nchàa nacuáa quèe-xi  
 tnúhu càhá<sup>n</sup>-xi núú tütú Yá Ndiöxí —  
 càchí-güedé xítñaha-güedé.

33 Te ñá túú-gã ní xíndetu-güedé chi  
 ndíhi-ni ní natn<sup>n</sup>-güedé ichi cuánuhú-güedé  
 ñúú Jerusálén, te ní nasáá-güedé núú  
 xíndecu ndí ùxí ñ<sup>n</sup> cue téé ní táuchíú<sup>n</sup> Jèsús  
 cáhá<sup>n</sup> tnúhu-gã, ndíhi dava-gã ñáyíu. 34 Te  
 cue téé xíndecu-á<sup>n</sup> xáha<sup>n</sup>-güedé:

—Ndáá sá ñí ndoto Yaá cúú Mèstrú,  
 chi ní xíní ñáhá tẽ Xímú —càchí-güedé  
 xáha<sup>n</sup>-güedé.

35 Te cue téé ní nasáá-á<sup>n</sup> ñí cani-güedé  
 cuëndú nàcuáa ní cuu ichi, ndíhi nàcuáa ní  
 cuu ní naquiní-güedé Jèsús òré ní táhú-gã  
 pàá ní dácãhñu ñaha-gã xii-güedé.

*Jèsús ní quexìo-gã núú xíndecu cue téé ní  
 xica cuu ndíhi-gã*

(Mt. 28:16-20; Mr. 16:14-18; Jn. 20:19-  
 23)

36 Te càhá<sup>n</sup> dúcá<sup>n</sup>-ní-güedé nàcuáa ní  
 cuu ní quexìo Jèsús ní ngúnutn<sup>n</sup>-gã ndéé  
 tnuú-güedé, te xáha<sup>n</sup>-gã xii-güedé:

—Yá Ndiöxí chíndèe ñaha-gã xii-ndo ïo  
 váha cùu ìní-ndó ndècu-ndo —cachí-gã  
 xáha<sup>n</sup>-gã xii-güedé.

37 Te da ní yùhú-güedé, te ní sani  
 ìní-güedé sá dícó ñ<sup>n</sup> espíritú cúú sã  
 ndéhé-güedé ní cùu. 38 Dico Jèsús ní  
 xáha<sup>n</sup>-gã xii-güedé:

—¿Ná cuëndá yùhú-ndó, te sàni ñ<sup>n</sup> sani  
 úú ìní-ndó-í? 39 Chí cùndèhe ndaha-í ndíhi  
 sáhá-í te quiní-ndó ñá ñu-ni-í. Te chí  
 téndàha ñaha xii-í te cundehe-ndo, te núu  
 ñ<sup>n</sup> espíritú ndécú yìqui cuñú-xi dàtná ndécú  
 ndíhi yùhú —càchí-gã xáha<sup>n</sup>-gã xii-güedé.

40 Te sátá dúcá<sup>n</sup> ñí xáha<sup>n</sup>-gã te ní dánèhé  
 ñáhá-gã xii-güedé ndaha-gã ndíhi sáhá-gã.

41 Te ío ní cuñúhu-güedé, te ní cudíí  
 ìní-güedé sá ndécú-gã tnuú-güedé dico  
 sàni ñ<sup>n</sup> sani úú ìní-güedé, te ní xáha<sup>n</sup> Jèsús  
 xii-güedé:

—¿Ndècu ndíhi-ndo luha sá cáxí-ó ìha ñá?  
 —càchí-gã xáha<sup>n</sup>-gã xii-güedé.

42 Te ní sãñaha-güedé xii-gã luha chácá ñí  
 chíhó, ndíhi dítá ññú ññú ndúdí, 43 te ní  
 quehe<sup>n</sup>-gã te ndèhe-güedé ní xexi-gã. 44 Te  
 dàtnuní ní xáha<sup>n</sup>-gã:

—Nchaa sá ñí yáha-í-a cùu-xi sá ñí  
 cachí tnúhu-í xii-ndo cùtnàhá ndécú ndíhi  
 ñaha-gã-í xii-ndo, chi ní cachí-í sá dàcuiíí  
 càda-xi nchaa nacuáa càhá<sup>n</sup>-xi núú tütú  
 ndíi Moisés, ndíhi núú tütú ndéé tnúhu  
 ní cáhá<sup>n</sup> cue téé ní xóo cáhá<sup>n</sup> tnúhu Yá  
 Ndiöxí ndéé sanaha, ndíhi núú librú Sãlmú  
 —càchí-gã xáha<sup>n</sup>-gã xii-güedé.

45 Te òré-á<sup>n</sup> ñí sãñaha-gã sá xíní  
 tnùní-güedé, te ní tecú tnùní-güedé nchaa  
 tnúhu càhá<sup>n</sup>-xi núú tütú Yá Ndiöxí. 46 Te ní  
 xáha<sup>n</sup>-gã xii-güedé:

—Ducá<sup>n</sup> ndéé tnuní núú tütú Yá Ndiöxí  
 sá dàcuiíí sã yùhú Crístú cuú-í, te nduu  
 úní ndoto-í. 47 Te ñíhí ñuyíú cùtènuu  
 tnúhu ní cáhá<sup>n</sup>-í, dico díhna nuu-gã ñúú  
 Jerusálén ngüíta-yu cacunehe ñáhá-yu  
 xii-í, te cáhá<sup>n</sup>-yu nàcuáa ní dánèhé-í-yu,

te cúñàhá-yu xii cue ñáyiú sá ná dándixi túu-yu iní-yu sá ñà túú quède váha-yu, te dàñá-yu nchaa ichi cuéhé ichi duha ndècú-yu, te natní-yu ichi Yá Ndiöxí, te duca<sup>n</sup> te cada càhnu iní-gá nchaa yíca cuèchi-yu. <sup>48</sup> Te vitna nchòhó cuu-ndo cue téè cáhá<sup>n</sup> ndáá nchaa nàcuáa ní cuu chi ní xíní núú-ndó. <sup>49</sup> Te yúhú tendaha-í Espíritú Yá Ndiöxí quixi cundecu ndihí-ndo, chi duca<sup>n</sup> ní cachí-gá. Dico chí cundecu-ni ñuú Jerusàlén-á<sup>n</sup> ndèé ná quèxio Espíritú Yá Ndiöxí ngúndecu ndihí-ndo cuèndá chindee ñàha-xi xii-ndo cada-ndo nchaa nacuáa ní cáhá<sup>n</sup>-í —càchí-gá xáha<sup>n</sup>-gá xii-güedé.

*Jèsús cuánda-gá andiu*

*(Mr. 16:19-20)*

<sup>50</sup> Te Jèsús ní queñuhu ñàha-gá xii-güedé ñuú Jerusàlén ndéca ñàha-gá cuáhá<sup>n</sup> ñuú Bètaniá, te xía<sup>n</sup> ní ndonehe-gá ndaha-gá núú ññu, te ní xíca<sup>n</sup> táhú ñàha-gá xii-güedé núú Yá Ndiöxí. <sup>51</sup> Te sátá ní xíca<sup>n</sup> táhú ñàha-gá xii-güedé núú Yá Ndiöxí, te ní quee-gá tnuú-güedé cuánda-gá andiu. <sup>52</sup> Te ní ngüíta-güedé ní cachí-güedé sá ïo càhnu cuu Jesús, te ní natní-güedé ichi cuánuhú-güedé ñuú Jerusàlén, te súúni cùdíí ìní-güedé ñúhú-güedé ichi. <sup>53</sup> Te nchaa nduu ní xíndecu-güedé veñúhu càhnu sá ïo cùnuu ní ndacá<sup>n</sup> táhú-güedé núú Yá Ndiöxí, te ní cachí-güedé sá ïo càhnu cuu-gá. Duha ní cuu dàvá-á<sup>n</sup>.



## TNÚHU NÍ CHÍDÓ TNÜNÍ TÉ JUÀÁ

### *Déhe Yá Ndiöxí ní cuu-gá ññá yiu*

1 Cùmání-gã ngáva ñuyúú, te sa ndècu ndihí Yá Ndiöxí Déhe-gá. Te ññá-ni xǐcúu-gá. Te Déhe-gá-áñ ññá cuu-gá dàtná ññá tnúhu, chí ní cachí tnúhu-gá nàcuáa càa Tátá-gã Dútú Ndiöxí. 2 Te sa ndècu-gá ndihí Dútú Ndiöxí te ní ngáva ñuyúú. 3 Te ññá-ni tnúhu mee Dútú Ndiöxí ní cuu ní cadúha Déhe-gá nchaa sá íó ñuyúú. Te núu ñá túú Déhe-gá ñá, te ñá túú ñá coo ñuyúú-a ní cùu. 4 Te ññá-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o. 5 Te tnúhu-gá ní xité nuu-xi núú ndécú nchaa ñá yiu ññáhu ichi cuehé ichi duha. Te ñá yiu-áñ cùú-yu dàtná cue ñá yiu ndècu ññá núú néé, te ññá-ni-yu cachí iní-yu xocàní-yu tnúhu-gá dico vá ndácú-yu.

6-7 Te ní xíndecu ññá téé ní xínani-dě Juàá, te téé-áñ ññá táuchíúñ Yá Ndiöxí sá càháñ-dé tnúhu-gá núú ñá yiu. Te ní xáhañ-dě xií-yu sá vèxi Déhe-gá ñuyúú-a, te dandìxi túu-gá iní-yu cuendá cutnùnì iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. 8 Te ñá díú mèe té Juàá ní dandìxi túu-dé iní-yu cuendá cutnùnì iní-yu nàcuáa ndùu cuendá Yá Ndiöxí, chí cuendá-ni ní xica cuu-dé ní càháñ-dé sá Déhe Yá Ndiöxí véxi-gá dandìxi túu-gá iní-yu. 9 Te ndáá ndisa sá méé-gã dándìxi túu-gá iní ñá yiu ñuyúú-a cuendá cutnùnì iní-yu nàcuáa ndùu cuendá Yá Ndiöxí.

10 Te ní xíndecu-gá ñuyúú-a, te ñá yiu ñuyúú-a ñá ní cùnùnì iní-yu yoo cùu-gá, te ññá-ni mee-gã ní cadúha-gá ñuyúú-a ní quide-gá chùuñ ní táhú Dútú Ndiöxí. 11 Te ní quixi-gá ñuyúú ññá cadúha mee-gã, dico cue ñá yiu ñuyúú-a ñá ní cùu váha iní-yu núú-gã. 12 Dico davá-yu ní sándáá iní ñá há yu xii-gá, te ní nduu táhú-yu ní nduu déhe ñá ha Yá Ndiöxí xií-yu. 13 Te ñá túú ní ndùu déhe ñá ha-gã xií-yu sá cùú-yu déhe ñá yiu ñuyúú-a, àdi sá ndécú tátá-yu, ñá ñá-yu chí mee Yá Ndiöxí ducañ ññá cuiní-gá cunduu sá ndúú dèhe ñá ha-gã xií-yu.

14 Te Déhe-gá ní quixi túu-gá ñuyúú-a, te ní cuu-gá ññá yiqui cùúú ní xíndecu ndihí ñá ha-gã xii nchoo cuè ñá yiu ní xica cuu túu ndihí-gá. Te ní xíní-ó sá ío càhnu cuu-gá cuendá sá ññá dìi díi-ni-gã cùú-gã Déhe Yá Ndiöxí, te ío cùndahú iní ñá há-gã chíndèe ñá ha-gã xii nchoo ñá yiu ndècu ñuyúú-a, te ío ndáá càháñ-gá. 15 Te duha ní càháñ té Juàá cuendá Déhe Yá Ndiöxí ní xáhañ-dě xii ñá yiu:

—Cuendá téé iha ní càháñ-í ndéé càni-gá ní cachí-í sá quixí ññá téé quixi. Te téé-áñ cùnùu-gá-dé, chí díhna-gá-dé sa ndècu-dé dàcùúxí yùhú —duha ní xáhañ-dě xií-yu.

16 Te ío váha iní Yá-áñ chí xito ñá ha-gã xii-o nchaa-o ññá nduu ññá nduu. 17 Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ñchi ñá ha xii-o nacuáa cundecu-o, dico Déhe-gá Xítohó Jesucrístú ní cachí-gá sá ío cùu iní ñá há Yá Ndiöxí xii-o. Te ní càháñ-gá nchaa dava-gá tnúhu ndáá. 18 Te ñá ññá ñá yiu xíní túu-yu Yá Ndiöxí. Dico ññá dìi ní Déhe-gá Yá ndécú ndihí-gá càchí tnúhu-gá nàcuáa càa-gá.

### *Té Juàá téé dàcuandute ñá ha xii ñá yiu càháñ váha-dé cuendá Xítohó Jesucrístú*

(Mt. 3:11-12; Mr. 1:7-8; Lc. 3:15-17)

19 Te cue téé israhél ndécú ññá Jerusalén ní tendaha-güedé cue dútú ndihí cue téé cùu levítá cuháñ-güedé núú ndécú tẽ Juàá ndúcú tnúhu-güedé núú-dě ññá ná téé cùu-dé. 20 Te ní càháñ ndáá-dé ní xáhañ-dě xii-güedé:

—Yùhú, ñá díú Crístú Yá ní tendaha Yá Ndiöxí véxi ñuyúú-a cùu-í —càchí-dé xáhañ-dě.

21 Te ní xáhañ tucu-güedé:

—¿Te yoo cùu yohó váíñ? ¿Á yohó cùu-n tẽ Èliás? —càchí-güedé xáhañ-güedé xii-dé.

Te ní xáhañ tẽ Juàá:

—Yùhú, ñá díú tẽ Èliás cùu-í —càchí-dé xáhañ-dě.

Te xáhañ tucu-güedé:

—¿Te yohó cùu-n tẽ ní cachí cue téé ndéé sanaha quixi càháñ tnúhu Yá Ndiöxí-áñ? —càchí-güedé xáhañ-güedé xii-dé.

Te ní xáhañ-dě:

—Ní ñá díú tẽ-áñ cùu-í —càchí-dé xáhañ-dě xii-güedé.

22 Te ní xáhañ tucu-güedé:

—¿Te ná tée cùu yohó vái<sup>n</sup>?, cuèndá duca<sup>n</sup> nàcani tnúhu-ndí núú cuè tée ní tendaha ñàha xii-ndí véxi-ndí, te cáhá<sup>n</sup> duu<sup>n</sup>-n núu ná tée cùu-n —cachí-güedé xàha<sup>n</sup>-güedé xii-dé.

<sup>23</sup> Te ní xáha<sup>n</sup> tẽ Juàá:

—Yúhú cùu-í tée xica cáhá<sup>n</sup> xití yucu nàcuáa ní cáhá<sup>n</sup> ndí Chàíá, chi ndí-á<sup>n</sup> ní cachí ndí: “Chí dáñá ìchi cuehé ichi duha ndècu-ndo te tni-ndo ìchi váha, chi véxi Yaá ío cùnuu”, duha ní cachí ndí —càchí té Juàá xàha<sup>n</sup>-dẽ xii-güedé.

<sup>24</sup> Te cue tée ndècu tnúhu núú tẽ Juàá núu ná tée cùu-dé, cue tée-á<sup>n</sup> ñí tendaha ñàha cue tée cùu fariséú xii-güedé. <sup>25</sup> Te ní xáha<sup>n</sup> tùcu-güedé xii té Juàá:

—¿Ná cuèndá dácuañdute-n ñáyiu te núu ñá díú Crístú cúu-n, te ni ñá díú tẽ Èliás, te ni ñá díú tẽ véxi cáhá<sup>n</sup> tnúhu Yá Ndiõxí cúu-n vái<sup>n</sup>? —càchí-güedé xàha<sup>n</sup>-güedé xii-dé.

<sup>26-27</sup> Te ní xáha<sup>n</sup> tẽ Juàá:

—Yúhú ní ngódó núu-í dácuañdute-í ñáyiu. Dico nchícú<sup>n</sup> ñí tée véxi, te tée-á<sup>n</sup> cùnùu-gá-dé dácúxí yúhú, chi yúhú cùu-í ñí tée duu<sup>n</sup> duu<sup>n</sup> ñá túú tau nandaxi cuèdicó ñí chàú-dé dico quide-í chùu<sup>n</sup>-dé. Te tée-á<sup>n</sup> sa ñúhu tnahá-dé tnuú-ndó dicó-ni sá ñá túú xini-ndó-dẽ —càchí-dé xàha<sup>n</sup>-dẽ.

<sup>28</sup> Duha ní cuu ñuu Bètábará ñuu cáa ndàa ingá xio yúte Jordán, yacá<sup>n</sup> ní xindecu té Juàá ní dácuañdute-dé ñáyiu.

*Jèsús quidé càhnu iní-gá nchaa yíca cuèchi ñáyiu*

<sup>29</sup> Te nduu tnèé ní xini té Juàá Jèsús véxi yatni-gá núú ndécú-dẽ ndíhi ñáyiu. Te ní xáha<sup>n</sup>-dẽ xii-yu:

—Chí cündèhe tée-á<sup>n</sup>, chi tée-á<sup>n</sup> cúu-dẽ Crístú Yaá ní tendaha Yá Ndiõxí véxi ñuyíu-a, te véxi-dé cada càhnu iní-dé nchaa yíca cuèchi ñáyiu ñuyíu. Te cùu-dé dàtná ñí mbéé quiti ío váha iní-xi. <sup>30</sup> Te ñiu tée-á<sup>n</sup> ní cachí-í sá cànchícú<sup>n</sup>-dé quixi. Te cùnuu-gá-dé dácúxí yúhú, chi díhna-gá-dé sa ndècu ní cachí-í xii-ndo. <sup>31</sup> Te ni yúhú ñá túú xini-í-dé ní cùu, dico xica cuu-í dácuañdute-í ñáyiu cuèndá nchaa ñáyiu israél quini ñáhà-yu xii-dé —càchí-dé xàha<sup>n</sup>-dẽ xii-yu.

<sup>32</sup> Te ní xáha<sup>n</sup> tùcu-dé:

—Ní xini-í Espiritú Yá Ndiõxí ní quee-xi andíu véxi cuu<sup>n</sup>-xi ngúndecu ndíhi ñàha-xi

xii-dé, te dàtná cáa lõmá cáa Espiritú-á<sup>n</sup> véxi cuu<sup>n</sup>-xi. <sup>33</sup> Te yúhú ñá túú xini-í-dé ní cùu, dico Yá Ndiõxí Yaá ní tendaha ñàha xii-í xicá cùu-í dácuañdute-í ñáyiu, Yaá-á<sup>n</sup> ní cachí tnúhu-gá sá tée na quini-í ngúndecu ndíhi Espiritú-gá sá véxi cuu<sup>n</sup> andíu, te tée-á<sup>n</sup> taxi-dé Espiritú-gá cundecu ndíhi-o. <sup>34</sup> Te yúhú ní xini-í-dé te xini ndáá-í sá Dèhe Dútú Ndiõxí cúu-dẽ. Te xiá<sup>n</sup> càchí tnúhu-í xii-ndo —càchí té Juàá xàha<sup>n</sup>-dẽ xii-yu.

*Cue tée díhna nuu xica cuu ndíhi Jèsús*

<sup>35</sup> Te nduu tnèé-á<sup>n</sup> ñiu-ni xiá<sup>n</sup> ndécú tẽ Juàá ndíhi úu cue tée xica cuu ndíhi-dé.

<sup>36</sup> Te ní xini-dé Jèsús ñúhú-gá ichi, te ni xáha<sup>n</sup>-dẽ xii cue tée xica cuu ndíhi-dé-á<sup>n</sup>:

—Chí cündèhe tée-á<sup>n</sup>, chi tée-á<sup>n</sup> cúu-dẽ Crístú Yaá ní tendaha Yá Ndiõxí véxi ñuyíu-a. Te cùu-dé dàtná ñí mbéé quiti ío váha iní-xi —càchí-dé xàha<sup>n</sup>-dẽ.

<sup>37</sup> Te sá dúcá<sup>n</sup> ñí cáhá<sup>n</sup> té Juàá núú cuè tée úu ndíhi-dé-á<sup>n</sup> núu ní chinchícú<sup>n</sup>-güedé Jèsús. <sup>38</sup> Te ní nchócótó-gá ndàa sátá-gá, te ní xini-gá sá nchícú<sup>n</sup> ñáhà-güedé xii-gá. Te ní xáha<sup>n</sup>-gá xii-güedé:

—¿Ná nánducu-ndo? —cachí-gá xáha<sup>n</sup>-gá xii-güedé.

Te ní xáha<sup>n</sup>-güedé:

—¿Ndèé ndécú-n, Ràbí? —càchí-güedé xàha<sup>n</sup>-güedé xii-gá.

Te Ràbí-á<sup>n</sup> quée-xi Mèstrú tnúhu mee-güedé. <sup>39</sup> Te ní xáha<sup>n</sup> Jèsús xii-güedé:

—Chí nèhé te quini-ndó —càchí-gá xáha<sup>n</sup>-gá.

Te ní xica-güedé cuáhà-güedé, te ní quexio-güedé núú quidé vèhe-gá. Te ndècu-ni-güedé ndíhi-gá ní cuaa, chi dàtná òré caa cúmí sacuaa ní sáa-güedé.

<sup>40</sup> Te úu cue tée-á<sup>n</sup> ñí tni-güedé tnúhu ní cáhá<sup>n</sup> té Juàá, te ní chinchícú<sup>n</sup>-güedé Jèsús. Te núú úu cue tée-á<sup>n</sup>, ñí-dé nani-dẽ Ndríxi, te ñani-dé cúu tẽ Xímú, àdi Pelú chi úu ñiu-dé. <sup>41</sup> Te té Ndríxi-á<sup>n</sup> ñí nanducu-ni-dẽ ñani-dé te ní xáha<sup>n</sup>-dẽ:

—Ní naníhi-ndí tée cùu Mesiás —càchí-dé xàha<sup>n</sup>-dẽ.

Te Mesiás-á<sup>n</sup> quée-xi Crístú tnúhu mee-güedé, Yaá ní tendaha Yá Ndiõxí véxi ñuyíu-a. <sup>42</sup> Te ndèca té Ndríxi ñani-dé cuáhà-núú ndécú Jèsús. Te òré ní xini ñáhà Jèsús xii té Xímú, te ní xáha<sup>n</sup>-gá:

—Yòhó cúú-n tē Xǐmú déhe té Jònás, te vitna danàni ñaha-í Céfás xii-n —càchí-gá xáha<sup>n</sup>-gǎ.

Te Céfás-ǎ<sup>n</sup> quée-xí Pèlú tnúhu mee-güedě.

*Jèsús ní cáhá<sup>n</sup>-gá té Lìpé ndihí té Natanàél*

<sup>43</sup> Te nduu tnée ní sani iní-gá quihí<sup>n</sup>-gá distritú Galileá. Te ní naníhí-gǎ ñ<sup>n</sup> tée nàni Lìpé, te ní xáha<sup>n</sup>-gǎ xii-dé:

—Néhe ná quihí<sup>n</sup>-ó nūú quihí<sup>n</sup>-í-a —càchí-gá xáha<sup>n</sup>-gǎ.

<sup>44</sup> Te té Lìpé-án cúú-dě tée ñuú Bètsaidá. Te diu-ni ñuú yàcá<sup>n</sup> cúú ñuú té Ndríxí ndihí té Pèlú. <sup>45</sup> Te té Lìpé ní naníhí tnáhá-dě ndihí té Natanàél, te ní xáha<sup>n</sup>-dě:

—Ní naníhí-ndí tée dii cuendú-xi ní chídó tnùní ndíi Moisés ndihí dava-gá cue tée ní xóo cáhá<sup>n</sup> tnúhu Yá Ndiöxí ndée sanaha. Te tée-án nání-dě Jèsús déhe té Chée, tée ñuú Nazàrét —càchí-dé xáha<sup>n</sup>-dě.

<sup>46</sup> Te ní xáha<sup>n</sup> tē Natanàél xii té Lìpé:

—¿Te náa ío váha càa ñuú Nazàrét nūu da yàcá<sup>n</sup> quee tée cáhá<sup>n</sup> tnúhu Yá Ndiöxí? —càchí-dé xáha<sup>n</sup>-dě.

Te ní xáha<sup>n</sup> tē Lìpé:

—Néhe ná quihí<sup>n</sup>-ó te quiní-n —càchí-dé xáha<sup>n</sup>-dě.

<sup>47</sup> Te òré ní xiní Jèsús té Natanàél tá cùyatni-dé cuáhá<sup>n</sup>, te ní cáhá<sup>n</sup>-gá cuendá-dé te ní cachí-gá:

—Tée véxi-ǎ<sup>n</sup> cúú-dě mei tēe isràél, te ñá ñ<sup>n</sup> ndūu dandahú-dé ñáyiú —càchí-gá xáha<sup>n</sup>-gǎ.

<sup>48</sup> Te ní xáha<sup>n</sup> tē Natanàél xii Jèsús:

—¿Te nása náquiní ñáhá-n? —càchí-dé xáha<sup>n</sup>-dě.

Te ní xáha<sup>n</sup> Jèsús:

—Yúhú sa ní xiní ñáhà-í xii-n òré ndécú-gǎ-n càha yutnu ngúxí-ǎ<sup>n</sup> te ní tē Lìpé vátá cáná ñàha-gá-dé xii-n òré-án —càchí-gá xáha<sup>n</sup>-gǎ xii-dé.

<sup>49</sup> Te sá dúcá<sup>n</sup> ñí cáhá<sup>n</sup>-gá, núu ní xáha<sup>n</sup> tē Natanàél xii-gá:

—Mèstrú, yòhó cúú-n Dēhe Dútú Ndiöxí yíndàha-n ñáyiú isràél —càchí-dé xáha<sup>n</sup>-dě xii-gá.

<sup>50</sup> Te Jèsús ní xáha<sup>n</sup>-gǎ:

—Cuendá sá ñí xiní ñáhà-í xii-n càha yutnu ngúxí xíǎ<sup>n</sup> iní ñáhá-n, dico cuéhé-gǎ núu sǎ quiní-n —càchí-gá xáha<sup>n</sup>-gǎ xii-dé.

<sup>51</sup> Te ní xáha<sup>n</sup> tùcu-gá:

—Na càchí tnúhu ndáá-í sá sàá nduu, te quiní-ndó nàcaá<sup>n</sup> andiu. Te quiní-ndó cuè espíritú xínú cuèchi núú Yá Ndiöxí sá ndàa nuu-xi quide-xi núú cündècu yúhú Tée cùu ñaní tnáhá-ndó nchàa-ndo —cachí-gá xáha<sup>n</sup>-gǎ xii-güedé.

## 2

*Vico tnǎndaha ío ñuú Cànaá*

<sup>1</sup> Te nduu úní sá dúcá<sup>n</sup> ñí cuu te ní xóo ñ<sup>n</sup> vico tnǎndaha ñuú Cànaá, ñ<sup>n</sup> ñuú yíndèhu distritú Galileá. Te yàcá<sup>n</sup> ní xíndecu nǎná Jèsús. <sup>2</sup> Te tnáhá Jèsús ndihí cue tée xíca cuu ndihí-gá ní cáhá<sup>n</sup>-yu cuáhá<sup>n</sup>-gá ndihí-güedé vico-án. <sup>3</sup> Te òré ní ndihí vínú, te ní xáha<sup>n</sup> nǎná Jèsús xii-gá:

—Ñá túú-gǎ vínú ndécú ndihí-yu —càchí-a<sup>n</sup> xáha<sup>n</sup>-a<sup>n</sup>.

<sup>4</sup> Te ní xáha<sup>n</sup> Jèsús xii-a<sup>n</sup>:

—Náá, ñá túú xìni ñuhu-xi da yúhú cúñaha-n cuendá vínú-án, chi vátá tnáhá-gá òré quiní-yu yoo cùu yúhú —càchí-gá xáha<sup>n</sup>-gǎ xii-a<sup>n</sup>.

<sup>5</sup> Te ní xáha<sup>n</sup>-a<sup>n</sup> xì ñáyiú xínu cuechi:

—Cada-ndo nchàa nacuáa na càhá<sup>n</sup> Jèsús —càchí-a<sup>n</sup> xáha<sup>n</sup>-a<sup>n</sup>.

<sup>6</sup> Te yàcá<sup>n</sup> nútñí íñú quídí yúú te quée dàtná ñ<sup>n</sup> ciendú lítrú ndute ñ<sup>n</sup> ñ<sup>n</sup> quídí-án. Te ndute-án nándíhi ñáyiú isràél ndáhá-yu te nàqueté-yu cóhó-yu chi duca<sup>n</sup> tnáhí quidé-yu nacuáa sàndáá iní-yu Yá Ndiöxí. <sup>7</sup> Te ní xáha<sup>n</sup> Jèsús xii nchaa cue tée xínu cuechi:

—Nadachítú-ndó ndüte ndí nchaa quídí-án —càchí-gá xáha<sup>n</sup>-gǎ xii-güedé.

Te ní nadachítú-güedé. <sup>8</sup> Te ní xáha<sup>n</sup>-gǎ:

—Vitna te tava-ndo lùha, te canehe-ndo quihí<sup>n</sup> cuáha-ndo tēe quide vico —cachí-gá xáha<sup>n</sup>-gǎ xii-güedé.

Te duca<sup>n</sup> ñí quide-güedé ní tava-güedé luha nèhe-güedé cuáhá<sup>n</sup> ní sáha-güedé tēe quide vico. <sup>9</sup> Te ní xito ndée tēe quide vico-án, te sa ní nduu-xi vínú, te ñá túú ní xíní-dé ndée véxi-xi, dico mee cuè tēe xínu cuechi sa naha-güedé núú ñí tava-güedé. Duca<sup>n</sup> te tēe quide vico-án ñí cana-dé tēe tnǎndaha. <sup>10</sup> Te ní xáha<sup>n</sup>-dě:

—Nchaa ñáyiú quide vico queñuhú-yu díhna-gá vínú váha. Te sa vài vínú váha xihí-yu, te dàtnúní queñuhú-yu vínú ndàhú. Te yòhó díhna-gá vínú ndàhú ní

queñuhu-n, te ndéé núú nǐ ndihi-ná ní queñuhu-n vǐnú váha —càchí téé quide vico-á<sup>n</sup> xáha<sup>n</sup>-dě xii téé tnǎndaha-á<sup>n</sup>.

11 Te sá nǐ nadatiù Jesús ndute-á<sup>n</sup> nǐ nduu-xi vǐnú cúú-xí ì<sup>n</sup> chiu<sup>n</sup> díhna nuu sǎ vǎ yõo tnàhí ndàcu cada ní quide-gá ñuú Cànaá, ì<sup>n</sup> ñuú yǐndèhu distritú Galileá, te chiu<sup>n</sup> ní quide-gá-á<sup>n</sup> cúú-xí ì<sup>n</sup> chiu<sup>n</sup> cahnu vihi, núu xiǎ<sup>n</sup> nǐ cutnùní iní-yu sá ìo càhnu cuu-gá, te ní sándáá iní ñáhá nchaa cue téé xìca cuu ndihi-gá.

12 Te sátá nǐ yáha vico, te ní xica Jèsús ndihi nǎná-gǎ, ndihi cue ñaní-gá, ndihi nchaa cue téé xìca cuu ndihi-gá cuáhá<sup>n</sup>-yu ñuú Capernaúm. Te yàcá<sup>n</sup> ní xíndecú-yu ì<sup>n</sup> ùú nduu ndihi-gá.

*Jèsús ñá túú tnàhá iní-gá nàcuáa quide ñáyiu xití veñúhu*  
(Mt. 21:12-13; Mr. 11:15-18; Lc. 19:45-46)

13 Te ta cùyatni cada ñáyiu isràél vico pàscuá, te ní xica Jèsús cuáhá<sup>n</sup>-gá ñuú Jerusàlén. 14 Te sátá nǐ sáa-gá yàcá<sup>n</sup>, te ní xica-gá cuáhá<sup>n</sup>-gá veñúhu càhnu sá ìo cùnunu, te xití veñúhu-á<sup>n</sup> nǐ xiní-gá ndécú ñáyiu dìcò-yu ndicutu, mbéé ndihi lõmá, te tnàhá ñáyiu dàma díhú<sup>n</sup> núcõo-yu ní xiní-gá. 15 Te ní quehe<sup>n</sup>-gá ì<sup>n</sup> ùú yoho, te ní cáunuu tnàha-gá, te ní dáyùhu-gá ñáyiu ní queé-yu quehé veñúhu, ndihi ndicutú-yu ndihi mbéé-yu. Te cue ñáyiu dàma díhú<sup>n</sup>-ǎ<sup>n</sup> ní dǎngõyo-gá díhú<sup>n</sup>-yu, te ní dándùá-gá mèsá-yu. 16 Te ní xáha<sup>n</sup>-gǎ xii cue ñáyiu dìcò lõmá:

—¿Queñuhu-ndo nchaa quití-a xití veñúhu-a! ¿Vá cáda-ndó vèhe núú yǎhu núú cúú vèhe Tàtá-í Dútú Ndiõxí! —càchí-gá xáha<sup>n</sup>-gǎ xií-yu.

17 Te xiǎ<sup>n</sup> ní ndacu iní cue téé xìca cuu ndihi-gá sá dúcá<sup>n</sup> yòdo tnuní núú tütú-gá, te càchí-xi: “Ìo cùyica iní-í chi ñá cuíní-yu canehe ì-yu vèhe Tàtá-í”, duha càchí-xi núú tütú-gá.

18 Te ní xáha<sup>n</sup> cuè téé isràél xii-gá:

—¿Ná cúú sǎ vǎ yõo tnàhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xii-ndí-i? —càchí-güedé xáha<sup>n</sup>-güedé xii-gá.

19 Te ní xáha<sup>n</sup> Jèsús:

—Chí dǎngõyo veñúhu-a, te není xití úní nduu te sa nadaxínu-í —càchí-gá xáha<sup>n</sup>-gǎ xii-güedé.

20 Te ní xáha<sup>n</sup> tucu cue téé isràél:

—Údico ìñú cuía nǐ xíndecuu-güedé ní sáa veñúhu-a, te yòhó cuíní-n nàdaxínu-n xití úní-ni nduu —càchí-güedé xáha<sup>n</sup>-güedé xii-gá.

21 Dico sá nǐ cáhá<sup>n</sup>-gá chi ñá díú cuèndá veñúhu ní cáhá<sup>n</sup>-gá chi cuèndá yiqui cùñú-gá ní cáhá<sup>n</sup>-gá. 22 Núu sátá nǐ xíhí-gá, te ní ndoto-gá, te òré-á<sup>n</sup> nǐ ndacu iní cue téé ní xica cuu ndihi-gá nàcuáa ní cáhá<sup>n</sup>-gá, núu xiǎ<sup>n</sup> ní sándáá iní-güedé tnúhu yòdo tnuní núú tütú-gá. Te duca<sup>n</sup> te ní sándáá iní-güedé tnúhu ní cáhá<sup>n</sup>-gá.

*Jèsús xiní-gá nàcuáa càa iní nchaa ñáyiu*

23 Te òré ndécú Jèsús vico pàscuá, te ìo vǎi ñáyiu ní sándáá iní ñáhá xii-gá cuèndá ìo títí sá vǎ yõo tnàhí ndàcu cada ní quide-gá ní xiní-yu. 24 Dico Jèsús ñá ní cáhá<sup>n</sup>-gá nchaa tnúhu ñuhu iní-gá, chi sa ní cutnùní iní-gá sá ñá túú cùu váha iní-yu. 25 Te ñá túú xiní ñuhu-gá ì<sup>n</sup> ñáyiu cúñaha nàcuáa càa iní nchaa tnàha ñáyíu-yu, chi mee-gǎ sa nàha ndáa-gá nàcuáa càa iní-yu ncháa-yu.

### 3

*Jèsús ndihi té Nicòdemú*

1 Ní xíndecu ì<sup>n</sup> téé cùu fariséu ní xínani-dě Nicòdemú, te ní cuu-dé ì<sup>n</sup> téé cùnunu núú ñáyiu isràél. 2 Te téé-á<sup>n</sup> nǐ sáhá<sup>n</sup>-dé niú ní cáhá<sup>n</sup> ndihi-dé Jèsús, te ní xáha<sup>n</sup>-dě:

—Mèstrú, yúhú ndihi dava-gá-güedé sa nàha-ndí sá Yǎ Ndiõxí ní tendaha ñàha-gá xii-n vèxi-n dǎnehé ñáhá-n xii-ndí, chi núu ñá túú Yǎ Ndiõxí ndécú ndihi-n, te vá ndácú-n càda-n nchaa sá vǎ yõo tnàhí ndàcu cada quide-n —cachí-dé xáha<sup>n</sup>-dě.

3 Te ní xáha<sup>n</sup> Jèsús:

—Na càchí tnúhu ndáa-í xii-n sǎ ncháa ñáyiu vá ná càcu saa tucu, te vá ndihu ndaha ñàha Yǎ Ndiõxí xií-yu —càchí-gá xáha<sup>n</sup>-gǎ xii-dé.

4 Te ní xáha<sup>n</sup> tǎ Nicòdemú:

—¿Te nása cada ì<sup>n</sup> ñáyiu sa ní yíi te cacu-ni tucú-yu? ¿Náa ndihu tucú-yu xití nǎná-yu te cacu tucú-yu xito cùu uú-ǎ<sup>n</sup>? —càchí-dé xáha<sup>n</sup>-dě xii-gá.



<sup>5</sup> Te ní xáha<sup>n</sup> Jèsús:

—Na càchí tnúhu ndáá-í xii-n sã nchaa ñáyíu na ndùu ndoo nduu nine iní-xi cuú-yu ñáyíu ní na càcu saa ndíhi ndute ndíhi Espíritú Yã Ndiöxí, ñáyíu-án ndíhu ndaha ñàha-gá xii-yu. <sup>6</sup> Te nchaa ñáyíu càcu ñuyíú-a, chi déhe ñáyíu ñuyíú-a cùú-yu. Te ñáyíu ní nduu ndoo ní nduu nine iní-xi, ñáyíu-án ñí nduu táhü-yu Espíritú Yã Ndiöxí te tàxi tnuní ñáhá-nã Espíritú-gá xii-yu. <sup>7</sup> Te vá cùñühu-n tnühu ní cáhá<sup>n</sup>-í-a, chi nchaa ñáyíu ní sándáá iní ñáhá xii-í ní nduu ndoo ní nduu nine iní-yu, te ñáyíu-án cùú-yu dàtná ñáyíu ní nacacu saa. <sup>8</sup> Táchí ndèni xiá<sup>n</sup> tècú dóho-o xico-xi, dico ñá túú xini-ó ndéé ichi véxi-xi, te ní ñá túú xini-ó ndéé ichi cuáhá<sup>n</sup>-xi. Duca<sup>n</sup> sãtnahá-xi cùu Espíritú-gá ndécú ndíhi ñáyíu ní nduu ndoo ní nduu nine iní-xi —càchí-gá xáha<sup>n</sup>-gã xii-dé.

<sup>9</sup> Te dàtnùní ní xicá<sup>n</sup> tnúhú tùcu té Nicòdemú núú-gã, te xáha<sup>n</sup>-dè xii-gá:

—¿Te nása ndùu tnúhu càhá<sup>n</sup>-n dùca<sup>n</sup> cahá<sup>n</sup>-n? —càchí-dé xáha<sup>n</sup>-dè xii-gá.

<sup>10</sup> Te ní xáha<sup>n</sup> Jèsús:

—Yòhó cúú-n ñí tée cùtnuní iní-xi, chi dàcuaha-n ñáyíu isràél, ¿te ñá tècú tnùní-n tnühu càhá<sup>n</sup>-í-u? <sup>11</sup> Te na càchí tnúhu ndáá-í xii-n sã nchühu càhá<sup>n</sup>-ndí ñí sá ñí tecú tnùní-ndí, te càhá<sup>n</sup> ndáá-ndí cuendá ñí sá ñí xini-ndí. Dico nchòhó ñá tècú tnùní-ndó tnühu càhá<sup>n</sup>-ndí. <sup>12</sup> Te ñá sándáá iní-ndó tnühu càhá<sup>n</sup>-í cuendá nchaa nàcuáa cùu ñuyíú-a, te uu<sup>n</sup>-gá cada-ndo ñü cáhá<sup>n</sup>-í cuendá nchaa nàcuáa cùu andü.

<sup>13</sup> Vá yòo ñí sàá andü, te caní-xi cuendú nàcuáa càa. Chi ñí dñi díi-ni yúhú véxi cuu<sup>n</sup>-í andü, te cùu-í ñaní tnáhá-ndó nchaa-ndo. Te diu-ni yàcá<sup>n</sup> ndaa-í cundecu-í. <sup>14</sup> Te dàtná ní ndanehe ndíi Moisés cóo ñí sata caa ndíi-di xiti yucu, duca<sup>n</sup> càda ñaha-güedé cata caa ñaha-güedé núú cùrúxí xii yúhú Tée cùu ñaní tnáhá-ndó nchaa-ndo ñí nduu, <sup>15</sup> te duca<sup>n</sup> yãha-í cuendá nchaa ñáyíu na quindáá iní ñáhá xii-í te nduu táhü-yu cundecu-yu ndíhi Yã Ndiöxí ñí caa ñí quíhí<sup>n</sup> —càchí-gá xáha<sup>n</sup>-gã xii-dé.

*Yá Ndiöxí ío cùu iní-gá ñáyíu ñuyíú-a*

<sup>16</sup> Te Yá Ndiöxí ío cùu iní-gá ñáyíu ñuyíú-a. Te ñí dñi-ni Déhe-gá ndécú, te ní tendaha ñàha-gá ní quixi-gá ñuyíú-a, te

núu na quindáá iní ñáhá ñáyíu, te vá cuíta nihnú-yu, chi nduu táhü-yu cundecu-yu ndíhi-gá ñí caa ñí quíhí<sup>n</sup>. <sup>17</sup> Te Yá Ndiöxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyíu, chi ní tendaha-gã Déhe-gá ní quixi-gá sá dácãcu nihnu-gá ñáyíu ñuyíú-a núú ùhú núú ndàhú.

<sup>18</sup> Nchaa ñáyíu sándáá iní ñáhá xii Déhe-gá, te vá cuíta nihnú-yu. Te nchaa ñáyíu ñá túú sándáá iní ñáhá xii Déhe-gá ñühü-yu ichi cuáhá<sup>n</sup>-yu núú ùhú núú ndàhú, chi ñá túú sándáá iní-yu Déhe Dútú Ndiöxí. <sup>19</sup> Chi ní quixi Déhe-gá ñuyíú-a ní dándíxí tũu-gá iní-yu cuendá cutnùní iní-yu nàcuáa ndùu cuendá Yã Ndiöxí te tní-yu ñí ichi váha ñí cùu, te ñá ní tnàhá iní-yu, chi ní cudí-gã iní-yu nchaa sá cuèhé sá dúhá dácúxí sã vãha, núu xiá<sup>n</sup> tá xita nihnú-yu cuáhá<sup>n</sup>. <sup>20</sup> Te nchaa ñáyíu quide nchaa sá cuèhé sá dúhá ñá tnàhá iní-yu cutnùní iní-yu nàcuáa ndùu cuendá Yã Ndiöxí, te ñá tní-yu tnúhu-gá cuendá yühü-yu nduu tnùní nchaa sá quidè-yu. <sup>21</sup> Te nchaa ñáyíu ñühu ichi ndáá cuíní-yu cutnùní iní-yu nàcuáa ndùu cuendá Yã Ndiöxí, te cùtnuní sá chindèe ñaha-gá xii-yu, chi quide váha-yu.

*Té Juàá tée dàcuandute ñaha xii ñáyíu càhá<sup>n</sup> váha tucu-dé cuendá Jèsús*

<sup>22</sup> Te sátá dúcá<sup>n</sup> ñí cuu, te ní quee Jèsús cuáhá<sup>n</sup>-gá ndíhi cue tée xica cuu ndíhi-gá distritú Jüdeá. Te yàcá<sup>n</sup> ní xindecu tnaa-gá ndíhi-güedé ní xóo dacuandute-güedé ñáyíu.

<sup>23</sup> Te ndècu té Juàá ñí xichi núú nání Ènón yatni ñúú Sàlém dácuaandute-dé ñáyíu, chi yàcá<sup>n</sup> ío váha ñühu ndute, núu xiá<sup>n</sup> ní xóo quíhí<sup>n</sup> ñáyíu yàcá<sup>n</sup> ní xóo cuanduté-yu.

<sup>24</sup> Duha ní cuu cùtnàhá vátá ngává-gã té Juàá vecaá.

<sup>25</sup> Te ní cacu ñí cuendú ní cáhá<sup>n</sup> cue tée xica cuu ndíhi té Juàá ndíhi ñí ùú cue tée isràél, núu ndèdacàa sá vãha-gá cada ñáyíu cuendá nduu ñí-yu. <sup>26</sup> Te ní sáhá<sup>n</sup>-güedé núú ndécú té Juàá ní xáha<sup>n</sup>-güedé:

—Mèstrú, tée ní quixi núú ñí xindecu-n ndaa ingá xio yúte Jòrdán, tée dii cuendú-xi ní cáhá<sup>n</sup>-n, tée-ã<sup>n</sup> dácuaandute-dé tnàhá-dé ñáyíu. Te ío vai ñáyíu ní chinchícú<sup>n</sup> ñáhá xii-dé —càchí-güedé xáha<sup>n</sup>-güedé xii-dé.

27 Te ní xáha<sup>n</sup> tẽ Juáa:

—Te vá yõo ì<sup>n</sup> ndàcu cada ì<sup>n</sup> chiu<sup>n</sup> nacuáa cuu váha iní Yá Ndiõxí, te núu ñá túú mèe-gá chindèe ñaha-gá xií-yu. 28 Te nchòhó sa ñaha-ndo sá yùhú ní cáhá<sup>n</sup> ndáá-í sá ñà díú Crìstú cúu-í, dico mee Yá Ndiõxí ní tendaha ñaha-gá yódó núu-í véxi núú Yáá-á<sup>n</sup>. 29 Te nchòhó xìní-ndó sã ì<sup>n</sup> tée tnãndaha te xíchí tnãndaha ndìhi-ná-dé cùndìhi-dé. Te tée ní xica ndáhú ìo cùdíí iní-dé ndèdòho-dé nchaa tnúhu càhá<sup>n</sup> tée tnãndaha-á<sup>n</sup>. Te duca<sup>n</sup> sãtnahá-xi cùu yùhú, chi ìo cùdíí iní-í sá váí ñáyiu ta chìnchícú<sup>n</sup> ñáhá xii Jesús cuáhá<sup>n</sup>. 30 Te uu<sup>n</sup>-gá cuita cuu vai ñáyiu cutnùní iní-xi sá ìo cùnuu-gá, te yùhú cuita ndóo ndee-í quíhí<sup>n</sup> —càchí-dé xãha<sup>n</sup>-dẽ xii-güedé.

### *Crìstú véxi cuu<sup>n</sup>-gá andiu*

31 Te ì<sup>n</sup>ndí díí-ní Crìstú Yáá véxi cuu<sup>n</sup> andiu cùnuu-gá núú ñùyíú-a. Te nchaa ñáyiu ndècu ñuyíú-a cùú-yu ñáyiu ñuyíú iha, te càhá<sup>n</sup>-yu sá cúú-xí ñùyíú-a. Dico Crìstú Yáá véxi cuu<sup>n</sup> andiu 32 càhá<sup>n</sup>-gá ì<sup>n</sup> sá ñí xìní-gá, te càhá<sup>n</sup>-gá ì<sup>n</sup> sá ñí tecú dóho-gá. Te ñá túú cuìní-yu quindáá iní-yu tnúhu càhá<sup>n</sup>-gá. 33 Te nchaa ñáyiu tnìi tnúhu càhá<sup>n</sup> Yáá véxi cuu<sup>n</sup> andiu-á<sup>n</sup> càhá<sup>n</sup>-yu sá tnúhu Yá Ndiõxí cúú-xí ì<sup>n</sup> sá ndáá. 34 Te Déhe-gá Yáá véxi cuu<sup>n</sup> andiu càhá<sup>n</sup>-gá mee-ni tnúhu-gá. Te ñá ùhú iní-gá ní sãñaha-gã Espiritú-gá ndécú ndìhi Déhe-gá. 35 Te Dútú Ndiõxí ìo cùu iní-gá Déhe-gá, núu ní xáha<sup>n</sup>-gã sá méé-gã taxi tnùní-gá nchaandi túhú sá ìo. 36 Te nchaa ñáyiu na quindáá iní ñáhá xii Déhe-gá, ñáyiu-á<sup>n</sup> cundecú-yu ndìhi-gá ni caa ni quíhí<sup>n</sup>. Te nchaa ñáyiu vá quindáá iní ñáhá xii Déhe Yá Ndiõxí ìo dandòho ñaha-gá xií-yu.

## 4

### *Jèsús ndìhi ì<sup>n</sup> ñaha Sàmariá*

1 Te ní níhí cue tée cùu fariséú tnúhu sá vai-gá ñáyiu ta chìnchícú<sup>n</sup> ñáhá xii Jesús. Te duca<sup>n</sup> vai-gá-yu ta dàcuandute-gá cuáhá<sup>n</sup> dàcúúxí tẽ Juáa. 2 Te cuèi ñá díú mèe-gá dácuandute ñaha-gá xií-yu, dico cue tée xica cuu ndìhi-gá dácuandute ñaha-güedé xií-yu. 3 Te ní níhí Jèsús tnúhu nacuáa càhá<sup>n</sup> cue tée

cùu fariséú, núu ní ndee-gá distritú Jüdeá cuánuhú tucu-gá distritú Galiléa.

4 Te ichi ñuhu-gá ní nayáha-gá distritú Sàmariá. 5 Te ní sáá-gá ì<sup>n</sup> ñuú nání Sicár te ñuú-á<sup>n</sup> yíndèhu-xi distritú Sàmariá. Te xía<sup>n</sup> cáá yãtni ñuhu núú ñí sáha táhú ndíi Jácób déhe ndíi ndíi Chèé. 6 Te yàcá<sup>n</sup> cáá dòco ní cuu cuendá ndíi Jácób. Te cùu-xi datná cuádava nduu ñuhu Jesús ichi, te ìo ní xàú-gá ñuu ní sáá-gá yuhu dòco-á<sup>n</sup> ñí ngóo-gá ndétátú-gá. 7-8 Te ní xica cue tée xica cuu ndìhi-gá cuáhá<sup>n</sup>-güedé xití ñuú Sicár cuánguaa<sup>n</sup>-güedé sá cáxí-güedé. Te yuhu dòco-á<sup>n</sup> núcõo-gá ní sáá ì<sup>n</sup> ñadìhí ñaha distritú Sàmariá véxi quèhnu-a<sup>n</sup> ndute, te ní xáha<sup>n</sup> Jèsús:

—Taxi táhú luha ndute na còho-í —càchí-gá xáha<sup>n</sup>-gã.

9 Te ní xáha<sup>n</sup> ñadìhí-á<sup>n</sup>:

—¿Ná cuendá da núu-í xicá<sup>n</sup>-n ndute coho-n? Te yòhó cúú-n tõe isràél, te yùhú cúu-í ñaha Sàmariá —càchí-a<sup>n</sup> xãha<sup>n</sup>-a<sup>n</sup> xii-gá.

Te duca<sup>n</sup> ñí xáha<sup>n</sup>-a<sup>n</sup>, chi ñá túú ndècu váha ñáyiu isràél ndìhi ñáyiu distritú Sàmariá. 10 Te ní xáha<sup>n</sup> Jèsús xii-a<sup>n</sup>:

—Ñá cútnùní iní-n ñá taxi Yá Ndiõxí xii-n, te ni ñá cútnùní iní-n yòo xicá<sup>n</sup> ndute núu-n. Te núu dícó xìní-n yòo cuu yùhú á, te da mee-n cãcá<sup>n</sup>-n ndute núu-í coho-n, te yùhú taxi-í ndute cundecu ndìhi-n núú cuáhá<sup>n</sup> núú véxi —càchí-gá xáha<sup>n</sup>-gã.

11 Te ní xáha<sup>n</sup> tucu ñadìhí-á<sup>n</sup>:

—Tãtá, ñí sá quèhnu-n ndute ñá túú nèhe-n, te doco-a cùnú víhí, te ñá túú ndéé quinguehe<sup>n</sup>-n ndute taxi-n coho-í.

12 Ndíi Jácób ñaní tnáhá-ndíi ní xíndecu ndéé sanaha ñí cadúha ndíi doco-a ñí tóo ndute ní xihí ndíi, ndìhi nchaa déhe ndíi, ndìhi nchaa quiti ndíi, te ní ndóo cùu cuendá-ndíi. ¿Te násai, te yòhó cùnùu-gá-n dàcúúxí ndíi-ã<sup>n</sup>? —càchí-a<sup>n</sup> xãha<sup>n</sup>-a<sup>n</sup> xii-gá.

13 Te ní xáha<sup>n</sup> Jèsús:

—Nchaa ñáyiu xihí ndute doco-a, te vá cúú vétú dúcá<sup>n</sup> iní-yu chi dayichí ñáhá-ní tucu-xi ndute-a. 14 Dico nchaa ñáyiu na còho ndute na cuãñaha-í, te vá ì<sup>n</sup> ndùu-gá dayichí ñáhá-xí ndute-á<sup>n</sup> xií-yu, chi ndute cuãñaha-í cúú-xí ndute váha-gá. Te dàtná quée ñihni ndute xití doco-a, nchaa-ni

nduu ñùhu ñá túu yìchí, duca<sup>n</sup> sãtnahá-xi cada-xi chi candeca-xi iní-yu ni caa ni quíhí<sup>n</sup>, te núu na còhó-yu ndute cuáñaha yùhú —càchí-gá xáha<sup>n</sup>-gã xii-a<sup>n</sup>.

<sup>15</sup> Te ní xáha<sup>n</sup>-a<sup>n</sup>:

—Tátá, taxi ndute-á<sup>n</sup> ná còho-í cuendá sá vã dáyìchí ñáhá tnahí-gá-xi ndute. Te vá quíxí-gã-í quixi quéhnu-í ndute doco-a —càchí-a<sup>n</sup> xãha<sup>n</sup>-a<sup>n</sup> xii-gá.

<sup>16</sup> Te ní xáha<sup>n</sup> Jèsús:

—Cuahá<sup>n</sup> cuàngana yì-n, te quixi-ndo ìha —cachí-gá xáha<sup>n</sup>-gã xii-a<sup>n</sup>.

<sup>17</sup> Te ní xáha<sup>n</sup>-a<sup>n</sup>:

—Ñá túu yì-í —càchí-a<sup>n</sup> xãha<sup>n</sup>-a<sup>n</sup> xii-gá.

Te ní xáha<sup>n</sup> tùcu Jesús:

—Ndáá càhá<sup>n</sup>-n sã ñà túu yì-n. <sup>18</sup> Dico ní cuu úhú<sup>n</sup> téé cãndeca-n, te téé ndèca-n vitna chi ñá díú yì-n cuu-dé, te ndáá càhá<sup>n</sup>-n sã ñà túu yì-n —cachí-gá xáha<sup>n</sup>-gã xii-a<sup>n</sup>.

<sup>19</sup> Te sá dúcá<sup>n</sup> ñí xáha<sup>n</sup>-gã ñuu ní xáha<sup>n</sup> tùcu-a<sup>n</sup>:

—Tátá, yúhú sání ìní-í sá yòhó cúu-n ì<sup>n</sup> téé càhá<sup>n</sup> tnúhu Yá Ndiòxí. <sup>20</sup> Te cue ñañí tnahá-ndí ní xíndecu ndéé sanaha ñí xóo cada càhnú-yu Yá Ndiòxí tindúú-a, dico nchòhó ñáiyu israhél càchí-ndó sã ndéé ñuu Jerusálén cada càhnu-o-gá —càchí-a<sup>n</sup> xãha<sup>n</sup>-a<sup>n</sup> xii-gá.

<sup>21</sup> Te ní xáha<sup>n</sup> Jèsús xii-a<sup>n</sup>:

—Ì<sup>n</sup> tnúhu na càhá<sup>n</sup>-í-a, te quindáá iní-n. Sa ta cùyatni sáá nduu sã ñà díú-gã mee-ni tindúú-a, te ni ñà díú-gã mee-ni ñuu Jerusálén cada càhnu-ndo Tátá-ó Dütú Ndiòxí, chi ndèni ní cuu cada càhnu-ndo-gá.

<sup>22</sup> Te nchòhó cue ñáiyu Sãmariá chi ñá cútnuní iní-ndó ñá cúu sã quidé càhnu-ndo, dico nchúhú ñáiyu israhél, chi cùtnuní iní-ndí ná cúu sã quidé càhnu-ndí. Chi ì<sup>n</sup> téé israhél véxi-dé dàcácu nihnu-dé ñáiyu cuendá vá quíhí<sup>n</sup>-yu núu ùhú núu ndàhú. <sup>23</sup> Te není vitna ngüita-yu cada càhnu ndisá-yu Tátá-ó Dütú Ndiòxí, te cadá-yu ni yùhu ni iní-yu sá cúu-xí-gã, chi mee-gã duca<sup>n</sup> cuini-gá cadá-yu cada càhnú-yu-gá. <sup>24</sup> Te Yá Ndiòxí chi ì<sup>n</sup> espíritú cúu-gã. Te nchaa ñáiyu na cada càhnu ñaha, te cadá-yu ni yùhu ni iní-yu sá cúu-xí-gã te cadá-yu dàtná càhá<sup>n</sup> tnúhu-gá —càchí-gá xáha<sup>n</sup>-gã xii-a<sup>n</sup>.

<sup>25</sup> Te ní xáha<sup>n</sup> ñadhí-á<sup>n</sup>:

—Xini-í sá quíxí tée cùu Mesiás, téé càchí-güedé nání Crístú. Te téé-ã<sup>n</sup> ná sàá-dé, te cachí tnúhu ndáá-dé nàcuáa cuu —càchí-a<sup>n</sup> xãha<sup>n</sup>-a<sup>n</sup> xii-gá.

<sup>26</sup> Te ní xáha<sup>n</sup> Jèsús:

—Diu téé-á<sup>n</sup> cúu yùhú téé ndàtnúhu ndihí-n —càchí-gá xáha<sup>n</sup>-gã xii-a<sup>n</sup>.

<sup>27</sup> Te òré-á<sup>n</sup> ñí ndexìo cue téé xica cuu ndihí-gá, te ní cuñúhu-güedé sã ndàtnúhu-gá ndihí ñadhí-á<sup>n</sup>. Dico ni ì<sup>n</sup>-güedé ñá ní xicá<sup>n</sup> tnúhú-güedé núu-gã ñuu ná cuendú ndàtnúhu-gá ndihí ñadhí-á<sup>n</sup>.

<sup>28</sup> Duca<sup>n</sup> te ní dándõo ñadhí-á<sup>n</sup> yoó ndute-a<sup>n</sup> xía<sup>n</sup>, te ní xica-a<sup>n</sup> cuánuhú-a<sup>n</sup> ñuu cútnúhu-a<sup>n</sup> ñáiyu cuendá Jèsús. <sup>29</sup> Te ní xáha<sup>n</sup>-a<sup>n</sup>:

—Chí nèhé ná quíhí<sup>n</sup>-ó, chi quiní-ndó ñá cúu ì<sup>n</sup> téé núcóo yuhu dòco-á<sup>n</sup> ñuu ñá díú Crístú Yaá ní tendaha Yã Ndiòxí véxi ñuyíú-a cùu-dé ñuu ní càhá<sup>n</sup> ndáá-dé nàcuáa cùu ndecu-í —càchí-a<sup>n</sup> xãha<sup>n</sup>-a<sup>n</sup> xii-yu.

—Chí nèhé ná quíhí<sup>n</sup>-ó, chi quiní-ndó ñá cúu ì<sup>n</sup> téé núcóo yuhu dòco-á<sup>n</sup> ñuu ñá díú Crístú Yaá ní tendaha Yã Ndiòxí véxi ñuyíú-a cùu-dé ñuu ní càhá<sup>n</sup> ndáá-dé nàcuáa cùu ndecu-í —càchí-a<sup>n</sup> xãha<sup>n</sup>-a<sup>n</sup> xii-yu.

<sup>30</sup> Te sá ñí níhí ñáiyu ñuu-á<sup>n</sup> tnúhu, xía<sup>n</sup> ní xicá-yu cuahá<sup>n</sup>-yu. <sup>31</sup> Te òré vátá sàá-gá-yu xía<sup>n</sup> ñí xáha<sup>n</sup> cué téé xica cuu ndihí-gá xii-gá:

—Mèstrú, cudèhñu na cudehñu-o —cachí-güedé xãha<sup>n</sup>-güedé xii-gá.

<sup>32</sup> Te ní xáha<sup>n</sup>-gã:

—Ndècu ì<sup>n</sup> sá cáxì-í, ì<sup>n</sup> sá ñà túu xini nchòhó —càchí-gá xáha<sup>n</sup>-gã xii-güedé.

<sup>33</sup> Te cue téé xica cuu ndihí-gá xitnaha-güedé:

—Váa ió ñáiyu ní quixi nehe sá ñí xexi-gá ñuu duha càhá<sup>n</sup>-gá —càchí-güedé xitnaha-güedé.

<sup>34</sup> Te ní xáha<sup>n</sup>-gã:

—Dàtná cuini-ndó cùu vétú iní-ó òré xéxi-ó, duca<sup>n</sup> cùu vétú iní-í quidé-í nchaa nàcuáa ní càhá<sup>n</sup> Yã Ndiòxí Yaá ní tendaha ñaha xii-í véxi-í ñuyíú-a, te chiú<sup>n</sup>-gá ío cùdii ìní-í dandihí-í. <sup>35</sup> Te nchòhó càchí-ndó sã cùmání cùmí-gã yóó te cuu itú. Dico yúhú càchí-í sá cundehe-ndo ñáiyu-ã<sup>n</sup>, chi sa ndècu túha-yu, dàtná cúu-ñá itú sá sà ní cuu-ná natahu-o cùu-yu, chi sa ndècu túha-ná-yu cundedóho-yu tnúhu-í.

<sup>36</sup> Te dàtná cúu ñáiyu natahu itú chi sa cúhu<sup>n</sup> yáhu-yu, duca<sup>n</sup> sãtnahá-xi cùu ñáiyu na càhá<sup>n</sup> tnúhu-í, chi cuáñaha-í sá ndúú tãhú-yu na sàá nduu. Te nchaa ñáiyu na

tn̄i tnúhu-í te nduu táhũ-yu cundecu-í ndihí-yu ni caa ni quihí<sup>n</sup>. Te dàtná cúu ñáyiú ní chihi tatá-xi, ndihí ñáyiú ní natahu ítú-xi cùdíi-nã iní-yu. Duca<sup>n</sup> sãtnahá-xi cùu ñáyiú na càhá<sup>n</sup> tnúhu-í. <sup>37</sup> Chi ndáá quée-xí nãcuáa cuáhá<sup>n</sup> ñ<sup>n</sup> cuendú sá cãchí-xi: “Tucu téé ní chihi tatá, te tucu téé ní natahu”, duha cuáhá<sup>n</sup> cuendú-á<sup>n</sup>. <sup>38</sup> Te yúhú tendaha ñaha-í xii-ndo quihí<sup>n</sup>-ndó cãhá<sup>n</sup>-ndó tnúhu-í núú sà ní yáha-güedé ní cáhá<sup>n</sup>-güedé tnúhu-í. Te nchòhó quihí<sup>n</sup>-ndó dícó-nã nduu cuendá-ndó chiú<sup>n</sup>-á<sup>n</sup> — cãchí-gá xáha<sup>n</sup>-gã xii-güedé.

<sup>39</sup> Te ío cuéhé ñáyiú ñuú-á<sup>n</sup> n̄i xíndedóho-yu cuendú ní cani ñadihí-á<sup>n</sup> nũ-yu sá Jèsús ní xáha<sup>n</sup>-gã nchaa nãcuáa quide-a<sup>n</sup>, te xíã<sup>n</sup> ío vâi-yu ní sãndáá iní-yu Jèsús. <sup>40</sup> Te ní quexió-yu núú ndécú-gã, te ní cáhá<sup>n</sup> ndàhú-yu núú-gã sá quèndõ-gã ñuú-yu, núú xíã<sup>n</sup> ní xíndecu-gá ndihí-yu úú nduu. <sup>41</sup> Te ío cuéhé-gã-yu ní sãndáá iní-yu tnúhu ní cáhá<sup>n</sup> mée-gã. <sup>42</sup> Te ní xáhá<sup>n</sup>-yu xii ñadihí-á<sup>n</sup>:

—Vitna te ñá díú mèe-ni tnúhu ní cáhá<sup>n</sup>-n ní sãndáá iní-ndí-gã, chi ní cáhá<sup>n</sup> mée-gã ní xíndedóho-ndí vitna núú ní sãndáá ndisa iní-ndí sá díú-gã cúú-gã Crístú Yaá ní tendaha Yã Ndiõxí véxi ñuyíú-a dàcácu nihnu-gá ñáyiú núú ùhú núú ndàhú — cãchí-yu xáhá<sup>n</sup>-yu xii-a<sup>n</sup>.

*Jèsús quidé tãtna-gá déhe ñ<sup>n</sup> téé ndèé chíú<sup>n</sup> núú gobiernú*

<sup>43</sup> Te nduu úní ní nucúhu<sup>n</sup> Jèsús ichi cuáhá<sup>n</sup>-gã distrítú Galileá. <sup>44</sup> Te cuáhá<sup>n</sup>-gã yacá<sup>n</sup>, chi mee-gã ní cachí-gá sá nũ ñ<sup>n</sup> téé na càhá<sup>n</sup>-dé tnúhu Yá Ndiõxí ñuú núú n̄i cacu-dé, te ñá túú nèhé-yu sá yíñùhu núú-dě. <sup>45</sup> Te òré ní sáá-gã distrítú Galileá, te ío váha ní cuu iní ñáhã-yu xii-gã, chi cuendá tnàhá-yu ní xíndecu ndihí-gã vico pascuá ñuú Jerusálén. Te yacá<sup>n</sup> ní xiní-yu nchaa sá ñ<sup>n</sup> quide-gã.

<sup>46</sup> Te ní sáhá<sup>n</sup> tucu-gã ñuú Cànaá ñ<sup>n</sup> ñuú yíndèhu distrítú Galileá, núú ñ<sup>n</sup> nadatìu-gã ndute ní nduu-xi vínú. Te ñuú Capèrnaüm ndécú ñ<sup>n</sup> téé ndèé chíú<sup>n</sup> nũú téé cùu gobiernú, te téé-á<sup>n</sup> cùhú ñ<sup>n</sup> déhe-dé. <sup>47</sup> Te ní níhí-dě tnúhu sá ñ<sup>n</sup> ndee Jèsús distrítú Jüdeá ní ndexió-gã distrítú Galileá,

núú ní sáhá<sup>n</sup>-dé núú ndécú-gã, te ní cáhá<sup>n</sup> ndàhú-dé núú-gã sá quihí<sup>n</sup>-gã cada tátna-gá déhe-dé, chi sa ndècu-na-dé sá cùú-dé. <sup>48</sup> Te ní xáha<sup>n</sup> Jèsús xii-dé:

—Nchòhó, chi vá quíndáá iní ñáhá-ndó xii-í te núú vá cáda-í ñ<sup>n</sup> sá vã yõo tnàhí ndàcu cada quiní-ndó —cãchí-gá xáha<sup>n</sup>-gã xii-dé.

<sup>49</sup> Te ní xáha<sup>n</sup> tucu téé cùhú déhe-xi-á<sup>n</sup> xii-gã:

—Tátá, cundee iní-n ná quihí<sup>n</sup>-ni-o càda tátna-n dèhe-í ná cuu-dé, chi càhú vihí tnàhá-dé —cãchí-dé xáha<sup>n</sup>-dẽ xii-gã.

<sup>50</sup> Te ní xáha<sup>n</sup> Jèsús:

—Cuanùhú te quiní-n nã ní ndúha déhe-n —cãchí-gá xáha<sup>n</sup>-gã xii-dé.

Te ní sãndáá iní-dé tnúhu ní cáhá<sup>n</sup> Jèsús, te cuánuhú-dé. <sup>51</sup> Te ñùhu-dé ichi cuánuhú-dé ní sánú tnàhá ñáhá cuè téé xínu cuechi núú-dě. Te ní xáha<sup>n</sup>-güedé sá sã ta ndúha déhe-dé cuáhá<sup>n</sup>.

<sup>52</sup> Te ní xicá<sup>n</sup> tnúhú-dẽ núú-güedé ná òré cúú-xí ñ<sup>n</sup> ngüíta-xi ta quètaú cuéhé-dě. Te ní xáha<sup>n</sup>-güedé:

—Icu dàtná òré caá ñ<sup>n</sup> sacuaa ní nchíco-dé cahni —cãchí-güedé xáha<sup>n</sup>-güedé xii-dé.

<sup>53</sup> Te tátá téé cùhú-á<sup>n</sup> ñ<sup>n</sup> ndacu iní-dé sá díú òré ní quètaú cuéhé-dě ní cáhá<sup>n</sup> ndihí-dé Jèsús ní xáha<sup>n</sup>-gã sá ndúha déhe-dé. Te xíã<sup>n</sup> nũ ndi nchaa téé-á<sup>n</sup> vehe-dé ní sãndáá iní-yu Jèsús.

<sup>54</sup> Te sá ñ<sup>n</sup> quide-gã-á<sup>n</sup> cúú ùú xito quide-gã sá vã yõo tnàhí ndàcu cada. Te sá ñ<sup>n</sup> quide-gã xito cùu uú-á<sup>n</sup> cúú-xí sã ñ<sup>n</sup> quide-gã cútnàhá ní ndee-gã distrítú Jüdeá cuánuhú-gã distrítú Galileá.

## 5

*Jèsús quidé tãtna-gá ñ<sup>n</sup> téé cùhú ñ<sup>n</sup> xichi núú nání Bètesdá*

<sup>1</sup> Te sátá dúcá<sup>n</sup> ñ<sup>n</sup> cuu, te ní tnàhá nduu ñ<sup>n</sup> quide ñáyiú isràél ñ<sup>n</sup> vico. Te ní sáhá<sup>n</sup> Jèsús ñuú Jerusálén. <sup>2</sup> Te ñ<sup>n</sup> càa xico yuhu ñuú-á<sup>n</sup> ñúhú dòco, te titní yèhe-xi ndecu. Te ñ<sup>n</sup> yèhe-xi-á<sup>n</sup> nání Yùyehe Mbée, te yatni xíá<sup>n</sup> caá ñ<sup>n</sup> tanquí ndute dàna-ní-yu Bètesdá tnúhu mèe-yu tnúhu hèbreú, te yuhu tànquí-á<sup>n</sup> caá ùhú<sup>n</sup> corrèdór. <sup>3</sup> Te xití corrèdór-á<sup>n</sup> xíndecu cuéhé ñáyiú cùhú, ñáyiú cuáa, ñáyiú yacua, ñáyiú ñá cúú-gã candá nihnu, ndètú-yu candá ndute-á<sup>n</sup>. <sup>4</sup> Chi



nihí-yu tnúhu sá áma nihnu cùu<sup>n</sup> ì<sup>n</sup> espíritú xínú cuèchi núú Yă Ndiöxí, te dàcandá-xi ndute ñùhu tanquí-á<sup>n</sup>. Te ñáyiú díhna nuu nà quée xítí ndute-á<sup>n</sup>, te òré-ni ndúha-yu. <sup>5</sup> Te yàcá<sup>n</sup> ñútnàhá ì<sup>n</sup> téé ní cuu ócó sáhú<sup>n</sup> úní cuíá sǎ cùhú-dé. <sup>6</sup> Te ní xiní Jèsús cáá-dě, te ní cutnùníní iní-gá sá ñí cuu cuéhé cuíá cùhú-dé, te ní xáha<sup>n</sup>-gǎ:

—¿Cuíní-n ndúha-n-ǎ<sup>n</sup>? —càchí-gá xáha<sup>n</sup>-gǎ xii-dé.

<sup>7</sup> Te ní xáha<sup>n</sup> tée cùhú-á<sup>n</sup>:

—Táta, vá yõo nihí-í dàquée ñaha xii-í xítí tànquí-a òré cándá ndute, chi òré cuíní-í quée-í, te ingá-ni tucú-yu quènduú-yu núu-í cuángueé-yu —càchí-dé xáha<sup>n</sup>-dě xii-gá.

<sup>8</sup> Te ní xáha<sup>n</sup> Jèsús:

—Ndacuíñí, te ndaca-ni-n yùu-n, te caca-n —càchí-gá xáha<sup>n</sup>-gǎ xii-dé.

<sup>9</sup> Te òré-ni-á<sup>n</sup> ñí ndúha téé cùhú-á<sup>n</sup>, te ní ndaca-ni-dé yuu-dé, te ní xica-dé cuáhá<sup>n</sup>-dé. Te nduu-ǎ<sup>n</sup> cúu-xí nduu ndetátú ñáyiú, <sup>10</sup> núu ní xáha<sup>n</sup> cué téé isráel xii téé ní cuhú-á<sup>n</sup>:

—Vitna cùu-xi nduu ndetátú-ó núu vá cúu cuído-n yuu-n —cachí-güedé xáha<sup>n</sup>-güedě xii-dé.

<sup>11</sup> Te ní xáha<sup>n</sup>-dě:

—Mee tée ní quide tátna ñaha xii-í ní cachí-dé sá ndácàni-í yuu-í, te caca-í —càchí-dé xáha<sup>n</sup>-dě xii-güedé.

<sup>12</sup> Te ní xáha<sup>n</sup>-güedě:

—¿Te ná cúu tée duca<sup>n</sup> ñí cachí sá ndácàni-n yuu-n te caca-n-í? —càchí-güedé xáha<sup>n</sup>-güedě xii-dé.

<sup>13</sup> Dico téé ní cuhú-á<sup>n</sup> ñà túu ní cùtnuní iní-dé ná cúu tée ní quide tátna ñaha xii-dé, chi Jèsús òré-ni ní xica-gá cuáhá<sup>n</sup>-gá tnuú nchaá ñáyiú chitu xíndecu xía<sup>n</sup>. <sup>14</sup> Te sátá dúcá<sup>n</sup> te ní naníhí tnáhá Jèsús ndihí téé ní quide tátna-gá-á<sup>n</sup> xítí veñúhu càhnu sá ïo cùnuu, te ní xáha<sup>n</sup>-gǎ xii-dé:

—Ní xiní-n ñà ní ndúha-n-va. Te vitna vá cáda-gǎ-n nǎndi sá cuéhé sá dúhá, chi núu na cáda-ni-n ña, te quixi ingá cuéhé, te vñhi-gá ndoho-n —càchí-gá xáha<sup>n</sup>-gǎ xii-dé.

<sup>15</sup> Duca<sup>n</sup> te ní xica téé ní cuhú-á<sup>n</sup> cuángúñaha-dé xii cue téé isráel sá Jèsús ní quide tátna ñaha-gǎ xii-dé. <sup>16</sup> Núu sátá ñí níhí cue téé isráel tnúhu, te ní cuu úhú iní-güedé Jèsús. Te ní cuíní-güedé cahni ñaha-güedě xii-gá cuendá sá dúcá<sup>n</sup> ñí quide

tátna-gá nduu ndetátú-güedé. <sup>17</sup> Te ní xáha<sup>n</sup> Jèsús xii-güedé:

—Tátà-í Dútú Ndiöxí quidé chiú<sup>n</sup>-ni-gá núu xía<sup>n</sup> quidé chiú<sup>n</sup>-í tnàhá-í —càchí-gá xáha<sup>n</sup>-gǎ xii-güedé.

<sup>18</sup> Te ní cudéé<sup>n</sup>-güedě sá ñǎ ní cǎnehe íí-gǎ nduu ndetátú-güedé, te ní cuíní-güedé cahni ñaha-güedě, te uu<sup>n</sup>-gá ní cuíní-güedé cahni ñaha-güedě xii-gá sá ñí cachí-gá sá Tátá-gǎ cúu Dútú Ndiöxí, chi ní sani iní-güedé sá cuíní-gá nútnahá-gá Yă Ndiöxí núu xía<sup>n</sup> ío ní cudéé<sup>n</sup>-güedě.

### *Jèsús Déhe Yá Ndiöxí táxi tnùní-gá*

<sup>19</sup> Te ní xáha<sup>n</sup> tucu Jèsús xii-güedé:

—Na càchí tnúhu ndáá-í xii-ndo sǎ yùhú chi ni ì<sup>n</sup> sá ñǎ ndácú-í cada mee-í núu ñǎ túu mée Tátà-í dánèhé ñáhá-gǎ xii-í nàcuáa cada-í, chi nchaá sá quidé Tátà-í quidé-í tnàhá-í. <sup>20</sup> Te Tátà-í ío cùu iní ñáhá-gǎ xii-í núu dǎnehé ñáhá-gǎ nchaá nàcuáa quide-gá. Te vitna ndècu vai-gá chiú<sup>n</sup> tahu-gá cada-í, chiú<sup>n</sup> sá vǎtá quíní-gá-ndó cada-í nàcuáa cuñúhu vñhi-ndo. <sup>21</sup> Chi Tátà-í dandòto-gá ñáyiú ní xíhí. Te yùhú cada-í te nduu táhú nchaá ñáyiú càchí iní-í cundecu ndihí ñáhá-yu xii-í ñí caa ñí quíhí<sup>n</sup>. <sup>22</sup> Te na sàá nduu te ñǎ díú Tátà-í cada ndáá-gá cuèchi ñáyiú, chi ní cachí-gá sá yùhú cada ndáá-í <sup>23</sup> cuendá nchaá ñáyiú canehé-yu sá yíñùhu núu-í dàtná nehé-yu sá yíñùhu núu Tátà-í Yaá ní tendaha ñaha xii-í véxi-í ñuyíú-a. Te nchaá ñáyiú ñǎ túu nèhe sá yíñùhu núu yùhú, te ñí núu Tátà-í ñǎ túu nèhé-yu sá yíñùhu.

<sup>24</sup> Te na càchí tnúhu ndáá-í xii-ndo sǎ nchàa ñáyiú na cùndedóho tnúhu na càhá<sup>n</sup>-í, te núu na quíndáá iní-yu Dútú Ndiöxí Yaá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhú-yu cundecú-yu ndihí-gá ñí caa ñí quíhí<sup>n</sup>. <sup>25</sup> Te vitna na càchí tnúhu ndáá-í xii-ndo sǎ nchàa ñáyiú ndècu ichi cuéhé ichi duha cúu-yu dàtná ì<sup>n</sup> ñáyiú ní xíhí, te vitna ní sàá nduu cùndedóho-yu tnúhu càhá<sup>n</sup> yùhú Déhe Dútú Ndiöxí, te nchaá ñáyiú na quíndáá iní-xi, te naníhí táhú-yu. <sup>26</sup> Te dàtná quidé mée Tátà-í dácácu nihnu-gá ñáyiú, duca<sup>n</sup> ñí cachí-gá cada-í dácácu nihnu-í-yu. <sup>27</sup> Te ní cachí tucu-gá sá sàá ì<sup>n</sup> nduu, te cada ndáá-í

cuéchi nchaa ñáiyu ñá túú quide ndáá, chi yúhú táxi tnùn-í, te cùu-í ñaní tnáhá-ndo nchaa-ndo. <sup>28</sup> Te ni vǎ cúññu-ndo tnñhu cǎhá<sup>n</sup>-í, chi sǎá nduu te nchaa ñáiyu ní xíhí tecú dóho-yu tnúhu cǎhá<sup>n</sup>-í. <sup>29</sup> Te ndoto nchaa ñáiyu ní quide váha cundecu ndihí-í-yu ni caa ni quíhí<sup>n</sup>, te ndoto tnáhá nchaa ñáiyu ní quide cuèhé ní quide duha, te ñáiyu-án quíhí<sup>n</sup>-yu núú ùhú núú ndàhú.

### *Yá Ndiöxí chindèe tnúhu-gá Jèsús*

<sup>30</sup> Te yúhú, chi ni ñ<sup>n</sup> sǎ ñǎ ndácù-í cada mee-í nñu ñá díú mèe Yá Ndiöxí táuchíu<sup>n</sup>-gá nàcuáa cada-í. Te quide ndáá-í cuéchi ñáiyu nàcuáa tàxi tnuní-gá cada-í, te yúhú ñá túú quide-í sǎ cúú ìní mèe-í chi Tǎtà-í ní táuchíu<sup>n</sup>-gǎ nàcuáa cada-í. <sup>31</sup> Te núu na cǎhá<sup>n</sup>-í sǎ mèe-í táxi tnùn-í, te vá quindáá ìní-ndó. <sup>32</sup> Chi Yá Ndiöxí chindèe tnúhu ñaha-gǎ xii-í, te yúhú xìn-í sǎ tnñhu cǎhá<sup>n</sup>-gá cuendá-í cúú-xí ñ<sup>n</sup> sǎ ndáá. <sup>33</sup> Te nchòhó ní téchíu<sup>n</sup>-ndó cuè téé ní sǎhá<sup>n</sup> ní ndúcú tnñhu-güedé núú tǎ Juáa nñu ná tnúhu cǎhá<sup>n</sup>-dé cuendá-í, te téé-ǎn ní cǎhá<sup>n</sup> ndáá-dé nàcuáa nduu cuendá-í. <sup>34</sup> Dico yúhú, chi ñá túú xini ññu-í ñ<sup>n</sup> ñáiyu ñuyíu-a chindee tnñhu ñáhá-yu xii-í, dico té Juáa ní cǎhá<sup>n</sup> váha-dé cuendá-í, te xǎ<sup>n</sup> cǎchí tnúhu tucu-í cuendá quindáá ìní-ndó, te naníhí tǎhú-ndó. <sup>35</sup> Te dàtná cuiní-ndó cùu ñ<sup>n</sup> ití ndéñuhú te dàyehé-xi, duca<sup>n</sup> sǎtnahá-xi ní cuu té Juáa, chi sacú-ni nduu ío ní cudí ìní-ndó tnñhu ní cǎhá<sup>n</sup>-dé. <sup>36</sup> Te váha-ni ní cǎhá<sup>n</sup> té Juáa, dico yúhú chi ndècu nchaa sǎ tá quide-í véxi nàcuáa ní táuchíu<sup>n</sup> Yá Ndiöxí cada-í, te nchaa xǎ<sup>n</sup> cúú-xí ñ<sup>n</sup> sǎ cútnùn-í ìní-ndó sǎ mèe Yá Ndiöxí ní tendaha ñaha-gǎ xii-í véxi-í ñuyíu-a. <sup>37</sup> Te ññu-ni-gá chindèe tnúhu ñaha-gǎ xii-í, dícó-ni sǎ mèe-ndó ñá túú cuiní-ndó càda cuendá-ndó tnñhu cǎhá<sup>n</sup>-gá, te ni ñá túú xìn-í-ndó nàcuáa càa-gá. <sup>38</sup> Te ñá túú quèe ìní nchòhó tnúhu cǎhá<sup>n</sup>-gá, chi ñá túú sàndáá ìní ñáhá-ndó xii yúhú Déhe-gá. <sup>39</sup> Te dàcuaha vihi-ndo tutú ndéè tnúhu-gá, chi sàni ìní-ndó sǎ xǎ<sup>n</sup>-ni dacuàha-ndo te naníhí tǎhú-ndó. Te váha-ni quide-ndo, chi ññu tutú-án cǎhá<sup>n</sup>-xi cuendá-í. <sup>40</sup> Te nchòhó ñá túú cuiní-ndó quindáá ìní ñáhá-ndó xii-í cuendá naníhí tǎhú-ndó.

<sup>41</sup> Te yúhú, ñá túú xini ññu-í sǎ cǎdá cǎhnu ñaha-ndo xii-í. <sup>42</sup> Dico sa xìn-í nàcuáa sàni ìní-ndó chi ñá túú cùu ìní-ndó Yá Ndiöxí. <sup>43</sup> Te yúhú véxi-í ñuyíu-a chi Tǎtà-í ní tendaha ñaha-gá, te nchòhó ñá túú cuiní-ndó tnñ-ndo tnúhu cǎhá<sup>n</sup>-í, dico núu quixi ñ<sup>n</sup> téé cǎhá<sup>n</sup> cuendá mèe-xí, chi quindáá ìní-ndó. <sup>44</sup> Te ná váha nchòhó ná tnñ-ndó tnñhu cǎhá<sup>n</sup>-í, te xio xio-ni quide cǎhnu tnaha-ndo, te ñá túú quide cuendá-ndó sǎ tnñhu váha cǎhá<sup>n</sup> Yá Ndiöxí cuu xii-ndo. <sup>45</sup> Te vá cǎní ìní-ndó sǎ yúhú ndàcǎ<sup>n</sup> cuéchi-í núú Tǎtà-í nàcuáa quide-ndo, chi ndíi Moisés ní chídó tnùn-í ndíi núú tütú Yá Ndiöxí nàcuáa quide-ndo sǎ ñá túú quide váha-ndo, te mee-ndo sàni ìní-ndó sǎ naníhí tǎhú-ndó cuendá tnúhu ní cǎhá<sup>n</sup> ndíi. <sup>46</sup> Chi núu nchòhó sàndáa ndisa ìní-ndó tnñhu ní cǎhá<sup>n</sup> ndíi Moisés ñá, te duca<sup>n</sup> te quindáá ìní-ndó yúhú ní cùu, chi ndíi-ǎn ní chídó tnùn-í ndíi nàcuáa cada-í ñuyíu-a vitna. <sup>47</sup> Te núu ñá túú sàndáa ìní-ndó tnñhu ní chídó tnùn-í ndíi, te ññu-ni duca<sup>n</sup> càda ñaha-ndo xii-í vá quindáá ìní-ndó tnñhu cǎhá<sup>n</sup>-í —cǎchí-gá xǎhá<sup>n</sup>-gǎ xii-güedé.

## 6

### *Jèsús dǎcǎxi-gá úhú<sup>n</sup> mǐl ñáiyu*

*(Mt. 14:13-21; Mr. 6:30-44; Lc. 9:10-17)*

<sup>1</sup> Te sǎtá dúcǎ<sup>n</sup> ñí cuu, te ní quee Jèsús cuáhá<sup>n</sup>-gá ñngá xio yuhu làgúná Galileá, àdi Tiberiás chi úú ññu-xi. <sup>2</sup> Te ío cuéhé ñáiyu nchícú<sup>n</sup> ñáhá xii-gá cuáhá<sup>n</sup> cuendá sǎ ñí xini-yu nchaa sǎ vá yòo tnáhí ndàcu cada ní quide-gá, chi ní quide tátna-gá nchaa ñáiyu cùhú. <sup>3</sup> Te ní sǎá Jèsús ndihí cue téé xica cuu ndihí-gá ñ<sup>n</sup> núú tìndúú, te xǎ<sup>n</sup> ñí ngóo-gá ndihí-güedé. <sup>4</sup> Te ta cùyatni coo vico pascuá, vico quide ñáiyu isràél. <sup>5</sup> Te ní xini-gá sǎ ío vǎi ñáiyu nchícú<sup>n</sup> ñáhá xii-gá cuáhá<sup>n</sup>, te ní xǎhá<sup>n</sup>-gǎ xii té Lìpé:

—¿Ndéè quíhí<sup>n</sup>-ó quinguaa<sup>n</sup>-o sǎ cǎxí nchaa ñáiyu-a? —cǎchí-gá xǎhá<sup>n</sup>-gǎ xii-dé.

<sup>6</sup> Te duca<sup>n</sup> ñí xǎhá<sup>n</sup>-gǎ xii-dé cuendá sǎ cuiní-gá quini-gá nása cunduu tnúhu cǎhá<sup>n</sup>-dé, dico mee-gǎ sa xini-gá nàcuáa cada-gá. <sup>7</sup> Te ní xǎhá<sup>n</sup> tǎ Lìpé xii-gá:

—Te cuèi úú cièndú díhú<sup>n</sup> denàriú ná dàndoñuhu-o cuaa<sup>n</sup>-o paá, te ni vǎ tnáhá

caxí-yu luha luha —càchí-dé xáha<sup>n</sup>-dë xii-gá.

<sup>8</sup> Te té Ndríxí ingá téé xica cuu ndihi-gá, ñaní té Xímú, àdi Pelú chi úú diu-dé, ní xáha<sup>n</sup>-dë:

<sup>9</sup> —Iha ndècu ñ<sup>n</sup> té lĩhli nèhe-dé úhú<sup>n</sup> pàá cebadá te úú chácá, dico ndéé tnahá xéhé, te cuéhé víhí ñáyiú —càchí-dé xáha<sup>n</sup>-dë xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cũñaha nà ngóo-yu nchaá-yu —càchí-gá xáha<sup>n</sup>-gã.

Te ñáyiú-á<sup>n</sup> ñí ngóo-yu, te càa vihi ité núú ñí ngóo-yu-á<sup>n</sup>, te xínu dàtná úhú<sup>n</sup> mĩ mee-ni cuè téé, te dñ<sup>n</sup> ñáyiú dñí ndihi landú. <sup>11</sup> Te ní quehe<sup>n</sup> Jèsús pàá, te ní ndacá<sup>n</sup> táhú-gã núú Yã Ndiõxí, te ní sáñaha-gã pàá-á<sup>n</sup> xii cue téé xica cuu ndihi-gá, te cue téé-á<sup>n</sup> ñí dácãhñu-güedé ní xexi nchaá ñáyiú xixúcu-á<sup>n</sup>. Te diu-ni duca<sup>n</sup> ñí quide-gá chácá, te ní dácãhñu tucu-güedé-di ní xexi ñáyiú ní ndahá xití-yu. <sup>12</sup> Te òré ní túhú cóhõ-yu, te ní xáha<sup>n</sup> Jèsús xii cue téé xica cuu ndihi-gá sá ná naquehe<sup>n</sup>-güedé nchaá sá ñí quendóo cuendá sá vã quihí<sup>n</sup>-xi núú míhí.

<sup>13</sup> Te cue téé-ã<sup>n</sup> ní naquehe<sup>n</sup>-güedé nchaá sá ñí quendóo, te ní chítú ùxúú tídihi núú úhú<sup>n</sup>-ni pàá cebadá. <sup>14</sup> Te sá ñí xiní-yu ní nadacáyá-gá sá ñí xexí-yu, xíã<sup>n</sup> ní ngúita-yu ní xitnàhá-yu:

—Ndáá sá tẽ-a sa ió cuendú sá quixí-dë ñuyíú-a cáhá<sup>n</sup>-dé tnúhu Yá Ndiõxí —càchí-yu xitnàhá-yu.

<sup>15</sup> Te ní cutnùní iní Jèsús sá cádá yicá-yu candeca ñàhá-yu xii-gá quihí<sup>n</sup> cuendá cundecu-gá quindaha ñàha-gá xii-yu ni cùu, núú xíã<sup>n</sup> ní xica tucu-gá cuáhá<sup>n</sup>-gá xití yucu mee dii chícuú-gá.

### *Jèsús xicá-gã núú ndute*

(Mt. 14:22-27; Mr. 6:45-52)

<sup>16</sup> Te òré ní cuu ndiquí<sup>n</sup>, te cuáhá<sup>n</sup> cue téé xica cuu ndihi-gá yuhu làgúná. <sup>17</sup> Te ní quée-güedé bàrcú cuáhá<sup>n</sup>-güedé ñuú Capèrnaúm cáá ndàa ingá xio yuhu làgúná, te sa ní cuu ndiquí<sup>n</sup>, te ñá túú Jèsús quexìo quée-gá bàrcú ñúhú-güedé-á<sup>n</sup>. <sup>18</sup> Te ní ngúita-xi quène táchí ñihí, te níhi dácandau ndéé tnahá ndùte làgúná-á<sup>n</sup>. <sup>19</sup> Te sa ní

cuu dàtná úhú<sup>n</sup> kilómetrú cuáhá<sup>n</sup>-güedé, te ní xiní-güedé Jèsús tá cùyatni-gá bàrcú ñúhú-güedé véxi-gá núú nduté, te ní yùhú-güedé. <sup>20</sup> Te ní xáha<sup>n</sup> Jèsús xii-güedé:

—Yúhú véxi-í, vá yùhú-ndó —càchí-gá xáha<sup>n</sup>-gã xii-güedé.

<sup>21</sup> Te ío ní cudñí iní-güedé sá ñí quexìo-gá cuánguee-gá bàrcú, te òré-ni ní quexìo-güedé ndihi-gá ndéé ingá xio yuhu làgúná núú cuáhá<sup>n</sup>-güedé.

### *Ñáyiú nànducu ñaha xii Jèsús*

<sup>22</sup> Te ingá nduu-ã<sup>n</sup> xĩndecu-ni nchaá ñáyiú ní quendóo yuhu làgúná. Te ní quide cuendá-yu sá ñí dñí-ná bàrcú nútnñ-á<sup>n</sup> ní cùu ñá túú-gã, chi cue téé xica cuu ndihi Jèsús ní quée-güedé bàrcú-á<sup>n</sup> cuáhá<sup>n</sup>-güedé. Te ní níhí-yu tnúhu sá ñà túú ní quée tnahá Jèsús. <sup>23</sup> Te diu-ni nduu-ã<sup>n</sup> ñí quee ñí úú bàrcú ñuú Tìberías ní sáá-xi yatni núú ñí xexí-yu pàá sá ñí ndacá<sup>n</sup> táhú Jèsús núú Yã Ndiõxí. <sup>24</sup> Te ní xiní-yu sá ñà túú Jèsús ndihi cue téé xica cuu ndihi-gá, núú ní quée-yu bàrcú-á<sup>n</sup> cuáhá<sup>n</sup>-yu ñuú Capèrnaúm cuánúndúcú ñàhá-yu xii-gá.

### *Jèsús cúú-gã dàtná ñí sá nchító-ó*

<sup>25</sup> Te ní sáá-yu ingá xio yuhu làgúná, xíã<sup>n</sup> ñí naníhí-yu Jèsús, te ní xáhã<sup>n</sup>-yu xii-gá:

—Mèstrú, ¿ná òré ní sáá-n ìha? —cachí-yu xáhã<sup>n</sup>-yu xii-gá.

<sup>26</sup> Te ní xáha<sup>n</sup> Jèsús:

—Na càchí tnúhu ndáá-í sá nchòhó nándücu ñaha-ndo xii-í cuendá-ni sá ñí xexi-ndo ñí ndahá xití-ndó, dico ñá díú cuendá sá ñí quide-í sá vã yóo tnahí ndàcu cada nanducu ñaha-ndo. <sup>27</sup> Te vá cádá cuendá-ndó sã mée-ní sã caxí-ndó càda chiu<sup>n</sup>-ndo chi xíã<sup>n</sup> vá cudñí-xi. Chi ío-gá xiní ñúhu-xi cada cuendá-ndó tnúhu Yá Ndiõxí te tnñ-ndo, te naníhí tãhú-ndó. Te tnúhu-á<sup>n</sup> cachí tnúhu yúhú Téé cùu ñaní tnahá-ndó nchàa-ndo, te xíã<sup>n</sup> candeca-xi iní-ndó ñí caa ñí quihí<sup>n</sup>, chi mee Dütú Ndiõxí ní cachí-gá sá dúcá<sup>n</sup> càda-í —càchí-gá xáha<sup>n</sup>-gã xii-yu.

<sup>28</sup> Te ní xáhã<sup>n</sup>-yu:

—¿Nása cada-ndí cuendá ngúnu ichi-ndí nàcuáa cuñí Yã Ndiõxí cunduu-i? —càchí-yu xáhã<sup>n</sup>-yu xii-gá.

<sup>29</sup> Te ní xáha<sup>n</sup> Jèsús xii-yu:

—Yá Ndiöxí cuení-gá sá quíndáá iní ñáhá-ndó xì yúhú, téé ní tendaha-gã véxi ñuyíú-a —càchí-gá xáha<sup>n</sup>-gã xií-yu.

<sup>30</sup> Te ní xáha<sup>n</sup> tùcú-yu xii-gá:

—¿Ná cúú sã vã yõo tnàhí ndàcu cada, cada-n cùndehe-ndí cuendá quíndáá iní ñáhá-ndí xii-n-i? ¿Àdi nágá cúú sã cáda-n cuendá cutnùní iní-ndí sá ndáa càhá<sup>n</sup>-n-í? <sup>31</sup> Chi cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu dàtná yódó tnùnì núú tùtú Yá Ndiöxí núú càchí-xi: “Yá Ndiöxí ní sáñaha-gã sá ñí xexí-yu, te ní cuu<sup>n</sup> túu-xi andiù”, duha càchí-xi núú tùtú-gá —càchí-yu xáhã<sup>n</sup>-yu xii-gá.

<sup>32</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sã ñã díú ndíi Moisés ní sáñaha ndíi pàá ní cuu<sup>n</sup> andiù ñí xexí-yu, chi mee Tàtá-í ní sáñaha-gã sá ñí xexí-yu. Te sá táxi-gã vitna cùu-xi <sup>33</sup> datná pàá véxi cuu<sup>n</sup> andiù càndeca-xi iní-ndó ñí caa ñí quíhí<sup>n</sup> —càchí-gá xáha<sup>n</sup>-gã xií-yu.

<sup>34</sup> Te ní xáhã<sup>n</sup>-yu xii-gá:

—Tàtá, mee-ñi pàá-á<sup>n</sup> taxi-n càxi-ndí —càchí-yu xáhã<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yúhú cúu-í dàtná ñí sá xexí-ndó càndeca-xi iní-ndó. Te duha ndúu tnúhu càhá<sup>n</sup>-í, chi nchaa ñáyíu na quíndáá iní ñáhá xii-í, te vã ndóhó-gã-yu docó te vã ndóhó-gã-yu ndute. <sup>36</sup> Dìcò-ñi sá nchòhó ñá túú sàndáá iní ñáhá-ndó cuèi xini ñáhá-ndó xii-í. <sup>37</sup> Te nchaa ñáyíu na càchí Tàtá-í nduu cuendá-í nasaá-yu núu-í, te ñáyíu-á<sup>n</sup> vã dáquèe tíhù-í-yu. <sup>38</sup> Te ñã díú yúhú sá véxi cuu<sup>n</sup>-í andiù te quíde-í nchaa sá cúú iní mèe-í, chi véxi cuu<sup>n</sup>-í sá cáda-í nchaa nàcuáa ní táuchíú<sup>n</sup> mèe Tàtá-í Dútú Ndiöxí Yaá ní tendaha ñàha xii-í véxi-í ñuyíú-a. <sup>39</sup> Te cuení-gá sá ncháá ñáyíu ní cachí-gá nduu cuendá-í vã dáñà-í-yu cuíta nihnú-yu, te na sáa nduu te diu-ñi-í dandòto-í-yu. <sup>40</sup> Chi duca<sup>n</sup> ñí cachí Dútú Ndiöxí cunduu sá ncháá ñáyíu na tnèi tnúhu càhá<sup>n</sup>-í, te quíndáá ndisa iní ñáhã-yu xii yúhú Déhe-gá, te nduu táhũ-yu cundecú-yu ndíhi Yá Ndiöxí ñí caa ñí quíhí<sup>n</sup>, te yúhú dandòto-í-yu na sáa nduu —càchí-gá xáha<sup>n</sup>-gã xií-yu.

<sup>41</sup> Te ñá ní tnàhá iní ñáyíu isràél tnúhu ní cáhá<sup>n</sup> Jèsús núu ní ngúita-yu ní cáhá<sup>n</sup> cuèhé-yu cuendá-gá cuendá sá ñí xáha<sup>n</sup>-gã sá méé-gã cúú-gã dàtná sá xexí-ó véxi cuu<sup>n</sup> andiù. <sup>42</sup> Te ní xitnàhá-yu:

—¿Náa ñá díú tèe-a cùu-dé Jèsús déhe té Chèé? Nchoo xini-ó tãtá-dé, te xini-ó ñãná-dé, ñá cachí-tu tèe-a sá andiù véxi cuu<sup>n</sup>-dé! —càchí-yu xitnàhá-yu.

<sup>43</sup> Te ní xáha<sup>n</sup> Jèsús xií-yu:

—Vá càhá<sup>n</sup> cuèhé-gá-ndó cuendá-í, chí dáñá. <sup>44</sup> Vã yõo quíndáá iní ñáhá xii yúhú núu ñã túú mèe Tàtá-í táxi cuendá ñáhá-gã xií-yu. Te diu-gá ní tendaha ñàha-gã xii-í véxi-í, te yúhú dandòto-í-yu na sáa nduu. <sup>45</sup> Te núú tùtú cue téé ní xóo cáhá<sup>n</sup> tnúhu Yá Ndiöxí ndéé sanaha càchí-xi: “Yá Ndiöxí danèhé ñáhá-gã xií-yu tnúhu-gá”, duha càchí-xi. Te nchaa ñáyíu na cùndedóho nchaa tnúhu càhá<sup>n</sup> Dútú Ndiöxí, te cutúha-yu nàcuáa càhá<sup>n</sup>-gá, te ñáyíu-á<sup>n</sup> quíndáá iní ñáhã-yu xii yúhú.

<sup>46</sup> Te vã yõo xini ñáhá xii Dútú Ndiöxí chí ñí ddi-ñi yúhú xini-í-gá, chí núú ndécú-gã ní quee-í véxi cuu<sup>n</sup>-í —càchí-gá xáha<sup>n</sup>-gã xií-yu.

<sup>47</sup> Te xáhã<sup>n</sup> tùcu-gá:

—Na càchí tnúhu ndáá-í xii-ndo sã nchaa ñáyíu na quíndáá iní ñáhá xii-í, te naníhí tàhú-yu. <sup>48</sup> Te yúhú cúu-í dàtná ñí sá xexí-ndó càndeca-xi iní-ndó, te duca<sup>n</sup> sãtnahá-xi cùu-í chí yúhú cada-í te nduu táhú-ndó cùndecu-ndo ndíhi Yá Ndiöxí ñí caa ñí quíhí<sup>n</sup>. <sup>49</sup> Te cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu, dico ní sáa nduu te dacuítí ñí xihí-yu. <sup>50-51</sup> Te yúhú càhá<sup>n</sup>-í cuendá mèe-í, chí véxi cuu<sup>n</sup>-í andiù. Te cùu-í dàtná ñí sá nchító-ndó, te nchaa ñáyíu na càxi te càndeca-xi iní-yu ñí caa ñí quíhí<sup>n</sup> te vã cuíta nihnu-gá-yu. Te sá táxi-í xii-ndo xíã<sup>n</sup> cúu-xí yiqui cuñú-í, te cùu-xi cuendá nchaa ñáyíu nihí ñuyíú cuendá nduu táhũ-yu cundecú-yu ndíhi Yá Ndiöxí ñí caa ñí quíhí<sup>n</sup> —càchí-gá xáha<sup>n</sup>-gã xií-yu.

<sup>52</sup> Te ní ngúita ñáyíu isràél xitnàhá-yu:

—¿Nása cada-tu tèe-a núu càchí-tu-dé sá yiqui cuñú-dé taxi-dé caxi-o-í? —càchí-yu xitnàhá-yu.

<sup>53</sup> Te ní xáha<sup>n</sup> Jèsús:



—Na càchí tnúhu ndáá-í xii-ndo sã nõu na càda iní-ndó sã dàtná sá cáxí-ndó yiqui cuñú yúhú Tée cùu ñaní tnáhá-ndó nchàa-ndo, te cada tucu iní-ndó sã dàtná sá cóhó-ndó ññí-í ñá, te xiã<sup>n</sup> queé-xí sã quèndáá iní ñáhá-ndó ñi yuhu ñi iní-ndó te naníhí tàhú-ndó, te nõu ñáhá te cuíta nihnu-ndo. <sup>54</sup> Nchaa ñáyiu na càda iní-xi sá dàtná sá cáxí-yu yiqui cuñú-í te cohó-yu ññí-í, ñáyiu-á<sup>n</sup> naníhí tàhú-yu te yúhú dandòto-í-yu na sàá nduu. <sup>55</sup> Chi yiqui cuñú-í ndihí ññí-í cúu-xí mèe-í. <sup>56</sup> Te nchaa ñáyiu na càda iní-xi sá dàtná sá cáxí-yu yiqui cuñú-í te cohó-yu ññí-í, te ñáyiu-á<sup>n</sup> ñ<sup>n</sup>-nã cuu-í ndihí-yu chi cundecu ndihí-í-yu. <sup>57</sup> Te yúhú nchìto-í chi duca<sup>n</sup> nchìto Tàtá-í Yaá ní tendaha ñàha xii-í véxi-í ñuyú-a. Te ñiu-ñi duca<sup>n</sup> nchàa ñáyiu na quèndáá iní ñáhá xii-í te cundecu ndihí-í-yu ñi caa ñi quíhí<sup>n</sup>. <sup>58</sup> Te yúhú cúu-í dàtná ñ<sup>n</sup> sá nchító-ndó véxi cuu<sup>n</sup> andiu, dico ñá díu pàá sá nání mànáá ní xèxi cue ñaní tnáhá-ó ñi xindecu ndéé sanaha, chi ní xexí-yu pàá te dacuéi ní xíhí-yu. Te nchaa ñáyiu na quèndáá iní ñáhá xii yúhú Yaá véxi cuu<sup>n</sup> andiu, te cundecu ndihí-í-yu ñi caa ñi quíhí<sup>n</sup> —càchí-gá xáha<sup>n</sup>-gã xii-yu.

<sup>59</sup> Nchaa tnúhu-a ní cáhá<sup>n</sup>-gá xití veñúhu ñáyiu ñuú Capèrnaúm.

### *Jèsús càchí tnúhu-gá nàcuáa naníhí tàhú-ó*

<sup>60</sup> Te sá dúcá<sup>n</sup> ñi cáhá<sup>n</sup>-gá nõu vai ñáyiu nchìcú<sup>n</sup> ñáhá xii-gá ní xitnàhá-yu:

—Vá tníi cuíti-o tnúhu càhá<sup>n</sup>-dé chi ñá díu tnúhu sá cúu vãha iní-ó càhá<sup>n</sup>-dé —càchí-yu xitnàhá-yu.

<sup>61</sup> Te ní cutnùní iní Jèsús sá ñá túu càhá<sup>n</sup> váha-yu cuèndá tnúhu ní cáhá<sup>n</sup>-gá, nõu ní xáha<sup>n</sup>-gã xii-yu:

—¿Náa ñá tnàhá iní-ndó nàcuáa càhá<sup>n</sup>-í-a?

<sup>62</sup> Te uu<sup>n</sup>-gá cada nchòhó nõu quini-ndó yúhú Tée cùu ñaní tnáhá-ndó nchàa-ndo ndaa-í núu ñi xindecu-í díhna. <sup>63</sup> Te espíritú ndécú ndihí yiqui cuñú-ó, xiã<sup>n</sup> ndécá ñàha-xi xii-o, te nõu ñá túu xiã<sup>n</sup>, te yiqui cuñú-ó ñá túu nandíhí-xi. Dico nõu nchaa tnúhu càhá<sup>n</sup>-í-a queé-xi iní-ndó ñá, te quini-ndó ñá xéhé candeca ñàha-xi xii-ndo núu cuáhá<sup>n</sup> núu véxi. <sup>64</sup> Te dava nchòhó chi

ñá túu sàndáá iní-ndó —càchí-gá xáha<sup>n</sup>-gã xii-yu.

Te duca<sup>n</sup> ñi xáha<sup>n</sup>-gã chi sa nàha-gá nándi cùu ñáyiu vá quèndáá iní ñáhá xii-gá. Te duca<sup>n</sup> sá nàha-gá ndèdacàa tée cuàha cuèndá ñáhá xii-gá núu cuè tée cùu úhú iní ñáhá. <sup>65</sup> Te ní xáha<sup>n</sup> tùcu Jèsús xii-yu:

—Te duha càhá<sup>n</sup>-í chi sa ní càchí tnúhu-í xii-ndo sã vá yòo ñ<sup>n</sup> cuini tníi tnúhu-í te nõu ñá túu Tàtá-í Dútú Ndiõxí sánú ìchi ñàha-gá xii-yu —càchí-gá xáha<sup>n</sup>-gã xii-yu.

<sup>66</sup> Te òré-á<sup>n</sup> ño vai ñáyiu nchìcú<sup>n</sup> ñáhá xii-gá ní xócõo-yu ñá ní xica cuu-gá-yu ndihí-gá. <sup>67</sup> Te xiã<sup>n</sup> ní xáha<sup>n</sup> Jèsús xii ndi ùxúú cue tée xica cuu ndihí-gá:

—¿Cuini-ndó dandóo ñàha-ndo tnàhá-ndó-ã<sup>n</sup>? —càchí-gá xáha<sup>n</sup>-gã xii-güedé.

<sup>68</sup> Te ní xáha<sup>n</sup> tẽ Xímú, àdi Pelú chi úu ñiu-dé:

—Mèstrú, ñá túu-gã ndéé quíhí<sup>n</sup>-ndí, chi nchúhú náhá-ndí sá tnúhu mee-n cùu-xi sá vãha candeca-xi iní-ndí ñi caa ñi quíhí<sup>n</sup>.

<sup>69</sup> Chi nchúhú sa ní sàndáá iní ñáhá-ndí xii-n chi nàha-ndí sá yòhó cúu-n Cristú Déhe Dútú Ndiõxí yaá ndécú àndiu —cachí-dé xãha<sup>n</sup>-dẽ xii-gá.

<sup>70</sup> Te ní xáha<sup>n</sup> Jèsús:

—Nàha-ndo sá yúhú ní cáhá<sup>n</sup> ñáhá-í xii ndi ùxúú-ndó xica cuu ndihí ñàha-í xii-ndo, dico ñ<sup>n</sup>-ndo quíhu ñàha yùcu ñávãha xii-ndo —càchí-gá xáha<sup>n</sup>-gã xii-güedé.

<sup>71</sup> Duha ní cáhá<sup>n</sup> Jèsús cuèndá té Jùdás déhe té Xímú Iscarioté ñ<sup>n</sup> tée ñùtnahá núu ùxí ñ<sup>n</sup> cue tée xica cuu ndihí-gá, chi sa nàha-gá sá tée-ã<sup>n</sup> cuàha cuèndá ñáhá-dẽ xii-gá ñ<sup>n</sup> nduu núu cuè tée cùu úhú iní ñáhá.

## 7

### *Cue ñaní Jèsús ñá túu sàndáá iní-güedé nàcuáa ndúu tnúhu càhá<sup>n</sup>-gá*

<sup>1</sup> Te sátá dúcá<sup>n</sup> ñi cuu, te ní xica cuu Jèsús distritú Galileá, te ñá ní sãhá<sup>n</sup>-gá distritú Jùdeá, chi yacá<sup>n</sup> cuini cue tée israhél cahni ñàha-güedé xii-gá ní cùu. <sup>2</sup> Te ní cuyatni nduu càdá-yu vico, vico sá dánàni-yu Vico Vehe Tnuvixi<sup>n</sup>. <sup>3</sup> Te ní xáha<sup>n</sup> cuè ñaní Jèsús xii-gá:

—Vàha-gá quíhí<sup>n</sup>-n distritú Jùdeá te vá cundècu-n iha, chi yacá<sup>n</sup> cada-n nchàa sá quidé-n iha cuèndá quini nchaa ñáyiu

cùndihî ñaha xii-n ndecu yacá<sup>n</sup>. <sup>4</sup> Chi núu cuiní-ó quíní nchaa ñáyíu ná chiú<sup>n</sup> cada-o te vá cáda dàyuhu-o. Te yòhó cuéhé núú sá quidé-n, te cada-n na quíní nchaa ñáyíu — cächí-güedé xähá<sup>n</sup>-güedé xii-gá.

<sup>5</sup> Duca<sup>n</sup> ñí cáhá<sup>n</sup> cue ñaní-gá, chi ni mée-güedé ñá túú sàndáá iní-güedé nàcuáa ndúu tnúhu cähá<sup>n</sup>-gá. <sup>6</sup> Te ní xähá<sup>n</sup> Jèsús xii-güedé:

—Vátá tnähá-gá òré quíhí<sup>n</sup>-í dico nchòhó ndédani càa oré cuu quíhí<sup>n</sup>-ndó. <sup>7</sup> Chi nchaa ñáyíu ñúhu ichi cuehé ichi duha chi ñá túú cùu úhú iní ñáhã-yu xii nchòhó. Dico yúhú chi cùu úhú iní ñáhã-yu xii-í cuendá sá cähá<sup>n</sup>-í sá quidè-yu nchaa sá cuéhé sá dúhá. <sup>8</sup> Te chí cuähá<sup>n</sup> nchòhó vico chi yúhú vá quíhí<sup>n</sup>-ni-í chi vátá tnähá-gá òré quíhí<sup>n</sup>-í —cächí-gá xähá<sup>n</sup>-gã xii-güedé.

<sup>9</sup> Te duca<sup>n</sup> ñí xähá<sup>n</sup>-gã te ní ndóo-gá Galiléa, te cue téa-á<sup>n</sup> cuähá<sup>n</sup>-güedé.

*Jèsús ndécú-gã ñí vico chiñuhú-yu Yá Ndiöxí*

<sup>10</sup> Dico sátá cuähá<sup>n</sup> cue ñaní-gá, te ní xica-gá cuähá<sup>n</sup>-gá tnähá-gá dicó-ni sá dàyuhu cuähá<sup>n</sup>-gá. <sup>11</sup> Te ñáyíu isràél ñáyíu xñdecu vico nànducú-yu Jèsús, te xñtnähá-yu:

—¿Ndèé ndécú Jèsús? —cächí-yu xñtnähá-yu.

<sup>12</sup> Te nchaa ñáyíu xñdecu vico xñdatnúhu-yu cuendá-gá. Te davá-yu xñtnähá-yu sá ño váha iní-gá, te davá-yu xñtnähá-yu sá ña díú tée váha cùu-gá, chi dàndahú-gá ñáyíu.

<sup>13</sup> Dico mee-ni xícáhá<sup>n</sup> náhí-yu, chi xñyùhú-yu cue téa cùnúu núú-yu.

<sup>14</sup> Te ta ngühu<sup>n</sup> dava vico, te cuánguihu Jèsús veñúhu cähnu sá ño cùnúu, te ní ngüíta-gá dácuàha-gá ñáyíu. <sup>15</sup> Te ñáyíu isràél ní cuñúhu vñhí-yu sá ño váha cähá<sup>n</sup>-gá, te ní xñtnähá-yu:

—¿Ná cuendá ño váha ñúhu-tu díquí tée-a tnúhu cáhá<sup>n</sup>-dé te ñá túú ní dàcuaha-dé-í? —cächí-yu xñtnähá-yu.

<sup>16</sup> Te ní xähá<sup>n</sup> Jèsús:

—Ñá díú cuendá mée-í cúu-xí sã dánèhé ñáhã-í xii-ndo, chi cuendá Dútú Ndiöxí Yáa ní tendaha ñaha xii-í véxi-í cúu-xí. <sup>17</sup> Te núu ío dava-ndo ñé yuhu ñí iní-ndó

cuiní-ndó càda-ndo nacuáa cuiní Yá Ndiöxí cunduu, te cutnúú ní ndáá iní-ndó sã tnúhu dàcuaha ñaha-í xii-ndo cùu-xi cuendá mée Dútú Ndiöxí, te ñá díú cuendá mée-í cúu-xí.

<sup>18</sup> Te téa cuiní sá cáda cähnu ñaha ñáyíu xii-dé, téa-á<sup>n</sup> cähá<sup>n</sup>-dé nàcuáa véxi iní mée-dé. Dico yúhú cuiní-í sá cáda cähnú-yu Dútú Ndiöxí Yáa ní tendaha ñaha xii-í véxi-í ñuyú-a, te cähá<sup>n</sup> ndáá-í te ñá túú dàcuandehnde-í.

<sup>19</sup> Te ndí Moisés ní taxi ndí tnúhu sá sánú ichi ñaha xii-ndo nacuáa cundecu-ndo, te ní dùca<sup>n</sup> ñá túú sàndáá iní-ndó nàcuáa cähá<sup>n</sup> tnúhu-á<sup>n</sup>. ¿Te ná cuendá cuiní-ndó cähni ñaha-ndo xii-í? —cächí-gá xähá<sup>n</sup>-gã xii-yu.

<sup>20</sup> Te ní xähá<sup>n</sup>-yu xii-gá:

—Yucu ñävãha dàcoto ñaha xii-ó, chi vá yõ ñí cuiní cähni ñaha xii-n —cächí-yu xähá<sup>n</sup>-yu xii-gá.

<sup>21</sup> Te ní xähá<sup>n</sup> Jèsús xii-yu:

—Sá ñí quide-í ñí sá vá yõ tnähí ndàcu cada nduu cuu-xi nduu ndetatú-ó, xíá<sup>n</sup> ío ní cuñúhu ñaha-ndo xii-í. <sup>22</sup> Te ndí Moisés ní cachí ndí sá cuãha-yu seña ñí cue landú téa, dico ñá díú mée ndí ni cãhu iní ndí chi duca<sup>n</sup> tnähí ní xóo cada cue ñaní tnähá-ó dàvá-á<sup>n</sup>, núu xíá<sup>n</sup> nchòhó sãha-ndo seña ñí landú téa cuéi cùu-xi nduu ndetatú-ó.

<sup>23</sup> Te duca<sup>n</sup> quide-ndo cuendá sã ña túú ñá cumání-ndó núú tnúhu sá sánú ichi ñaha xii-ndo ní dàndõ ndí Moisés. ¿Te ná cuendá cúdèé<sup>n</sup>-ndó núú-í sá ñí quide tátna-í téa cùhú nduu ndetatú-ó-í? <sup>24</sup> Te váha váha cada cuendá-ndó, te vá cuendá-ni cáhá<sup>n</sup>-ndó sá yúhú ndécuechi-í chi ñá túú xini-ndó —cächí-gá xähá<sup>n</sup>-gã xii-yu.

*Jèsús xähá<sup>n</sup>-gã xii-yu núú véxi-gã*

<sup>25</sup> Te dava ñáyíu ñúú Jerusàlén ní ngüíta-yu xñtnähá-yu:

—¿Náa ñá díú tée-á<sup>n</sup> nánducu-güedé cähni-güedé?, <sup>26</sup> núu náí-dé nútní núú chítú núú tàcá-ã<sup>n</sup> cähá<sup>n</sup>-dé, te vá yõ cùyíi cúñaha xii-dé ñí tnúhu. Cudana te cue téa cùchiu<sup>n</sup> sandáá iní-güedé sá díú-dé cúu-dé Crìstú Yáa ní tendaha Yá Ndiöxí véxi ñuyú-a. <sup>27</sup> Dico nchoo xini-ó ndèé ichi véxi téa-ã<sup>n</sup>, dico Crìstú ná quixi-gá chi vá yõ ñí quíní ndèé ichi quixi Yáa-á<sup>n</sup> —cächí-yu xñtnähá-yu.

<sup>28</sup> Te yñi Jèsús xití veñúhu cähnu sá ño cùnúu danehe-gá ñáyíu, te ní tecú dóho-gá

tnúhu càhá<sup>n</sup>-yu. Te níhi ní cáhá<sup>n</sup>-gá, te xáha<sup>n</sup>-gã xií-yu:

—¡Ná quiní-tu nchòhó ndèé ichi véxi yúhú! Yúhú véxi-í dico ñá díú sã cúú ìní méè-í, chi Yá Ndiöxí Yaá quidé nchàa-ndi túhú sã vãha ní tendaha ñàha-gá xii-í véxi-í, te nchòhó ñá túú xini-ndó-gã. <sup>29</sup> Te yúhú xini-í-gá chi núú ndécú-gã ní quee-í véxi-í, te ñu mee-gã ní tendaha ñàha-gá véxi-í — càchí-gá xáha<sup>n</sup>-gã xií-yu.

<sup>30</sup> Te sã dúcá<sup>n</sup> ñí cáhá<sup>n</sup>-gá, núú cuini-güedé tñi ñaha-güedé xii-gá quíhí<sup>n</sup>-gá vecaá ní cùu, dico vá yõ ñí cùyí tñi ñaha xii-gá chi vátá sàá-gá òré tñi ñaha-güedé. <sup>31</sup> Dico vai-yu ní sándáá ìní ñáhã-yu xii-gá, te ní xitnàhá-yu:

—¿Nágá cúú sã cádá Cristú ná quixi-gá-i?, te té-a ío cuéhé núú sã tá quide-dé véxi. Váa ñu té-a cùu-dé Cristú Yaá ní tendaha Yá Ndiöxí véxi ñuyú-a — càchí-yu xitnàhá-yu.

*Cue té cùu fariséu cuini-güedé quíhí<sup>n</sup> Jèsús vecaá*

<sup>32</sup> Te ní níhí cue té cùu fariséu tnúhu nàcuáa càhá<sup>n</sup> ñáyiu cuendá Jèsús, núú ní ndatnúhu-güedé ndihí cue dútú cùnùu, te ní techiü-güedé cue té quide cuendá veñúhu cuáhá<sup>n</sup>-güedé cuátni ñaha-güedé xii-gá ní cùu. <sup>33</sup> Te ní xáha<sup>n</sup>-gã xii-güedé:

—Sacú duha nduu cundecu ndihí ñaha-í xii-ndo, te núhú tucu-í núú ndécú tãtã-í Yaá ní tendaha ñàha xii-í véxi-í ñuyú-a. <sup>34</sup> Te cuéi na nànducu ñaha-ndo dico vá ná níhí ñáhã-ndó chi vá sãá-ndó núú cündecu-í — càchí-gá xáha<sup>n</sup>-gã xii-güedé.

<sup>35</sup> Te ní ngüita ñáyiu isràél xitnàhá-yu:

—¿Ndèé quíhí<sup>n</sup>-tu té-a te vá ná níhí-ó-dé-i? ¿Àdi quíhí<sup>n</sup>-dé na chitnàhá-dé ñáyiu isràél ñáyiu nchiténuu nchaa ñuú xicá cuendá danèhé-dé ñáyiu griégú? <sup>36</sup> ¿Nása càhá<sup>n</sup>-tu-dé duha càhá<sup>n</sup>-dé: “Nanducu ñàha-ndo te vá nánihí ñáhã-ndó chi vá sãá-ndó núú cündecu-í”, càchí-tu-dé? — càchí-yu xitnàhá-yu.

*Nàcuáa cada Espiritú Yá Ndiöxí ìní-ó*

<sup>37</sup> Te nduu ñí yáha-ná vico cùu-xi nduu cahnu vihi, te nduu-ã<sup>n</sup> ñí ngúnu tñi Jèsús tnuú ñáyiu, te níhi ní cáhá<sup>n</sup>-gá, te xáha<sup>n</sup>-gã xií-yu:

—Núu ío dava-ndo yichí-ndó ndüte, te quixi-ndo núu-í, te coho-ndo. <sup>38</sup> Duha

càhá<sup>n</sup>-í chi nchaa ñáyiu na quindáá ìní ñáhã xii-í, te cada-xi ìní-yu dàtná ñí núú xicá ndüte, nchaa-ni nduu xica ñá túú yichí, duca<sup>n</sup> càda-xi ìní-yu núú cuáhá<sup>n</sup> núú véxi dàtná càhá<sup>n</sup>-xi núú tütú Yá Ndiöxí — càchí-gá xáha<sup>n</sup>-gã xií-yu.

<sup>39</sup> Te duca<sup>n</sup> ñí cáhá<sup>n</sup>-gá cuendá sã quixí Espiritú Yá Ndiöxí ngündecu ndihí nchaa ñáyiu na quindáá ìní ñáhã xii-gá, chi sãa nduu ndãa-gá andiü càda cahnu ñaha Tãtã-gã xii-gá, te dàvã-ã<sup>n</sup> te quixi Espiritú Yá Ndiöxí cundecu ndihí-yu.

*Ñá ní cùu ñí nuú-yu cuendá tnúhu ní cáhá<sup>n</sup> Jèsús*

<sup>40</sup> Te dava ñáyiu ní xindedóho tnúhu ní cáhá<sup>n</sup> Jèsús ní xitnàhá-yu:

—Ndáá sã tãe-a cùu-dé té càchí-yu quixi cáhá<sup>n</sup> tnúhu Yá Ndiöxí — càchí-yu xitnàhá-yu.

<sup>41</sup> Te dava tucú-yu xitnàhá-yu:

—Tãe-a cùu-dé Cristú Yaá ní tendaha Yá Ndiöxí véxi ñuyú-a — càchí-yu xitnàhá-yu.

Te dava-gá tucú-yu xitnàhá-yu:

—¿Náa ndãa distritú Galileá quixi Cristú Yaá tendaha Yá Ndiöxí quixi ñuyú-a? <sup>42</sup> Chi núú tütú Yá Ndiöxí càchí-xi sã Cristú Yaá tendaha Yá Ndiöxí quixi ñuyú-a cuu-gá ñí ñani tñáhã ndi Dãvií, te quee-gá ñuú Belén ñuú méé ndi Dãvií, duha càhá<sup>n</sup>-xi núú tütú Yá Ndiöxí — càchí-yu xitnàhá-yu.

<sup>43</sup> Te xiã<sup>n</sup> núu ñá ní cùu ñí nuú-yu cuendá Jèsús. <sup>44</sup> Te davã-yu cuini-yu tñi-yu Jèsús quíhí<sup>n</sup>-gá vecaá ní cùu, dico ní ñí-yu ñá túú ní cùyí-yu tñi ñàhá-yu xii-gá.

*Cue té cùchiu<sup>n</sup> ñá túú sándáá ìní-güedé Jèsús*

<sup>45</sup> Te cue té cuáhá<sup>n</sup> tñi ñaha xii Jesús ní cùu ní ndexiü-güedé núú cué té cùu fariséu ndihí núú cué dútú cùnùu. Te xáha<sup>n</sup> cué té cùnùu-ã<sup>n</sup>:

—¿Ná cuendá ñá ní cãndeca-ndo tãe-ã<sup>n</sup> quixi? — càchí-güedé xáha<sup>n</sup>-güedé.

<sup>46</sup> Te cue té ní sáhã<sup>n</sup> chiü<sup>n</sup> ní xáha<sup>n</sup>-güedé: —Ni ñí tãe ñá túú xini-ndí cáhá<sup>n</sup> dàtná càhá<sup>n</sup> tãe-ã<sup>n</sup> — càchí-güedé xáha<sup>n</sup>-güedé.

<sup>47</sup> Te ní xáha<sup>n</sup> cué té cùu fariséu:

—¿Náa tñáhã nchòhó ní sándáá ìní-ndó tnúhu ndehnde càhá<sup>n</sup> tãe-ã<sup>n</sup>? <sup>48</sup> ¿Náa ñá túú xini-ndó sã ñí ñí cue té tãxi tñuní nchúhú, te ní ñí nchúhú cue té cùu fariséu ñá túú

sàndáá iní-ndí téé-ǎñ ñǎ? <sup>49</sup> Nchaa ñáyiú tùha ñaha xii téé-ǎñ ñá túú sàndáá iní-yu nàcuáa càhá<sup>n</sup> tnúhu sá sánú ìchi ñaha xii-o, dico cuíta nihnú-yu sá dúcá<sup>n</sup> quidé-yu —càchí-güedé xáha<sup>n</sup>-güedé xii cue téé-ǎñ.

<sup>50</sup> Te té Nicòdemú téé ní sáhá<sup>n</sup> niú ní ndatnúhu-dé ndihí Jèsús cúú-dé tnàhá-dé ì<sup>n</sup> téé fariséú, te ní xáha<sup>n</sup>-dē xii-güedé:

<sup>51</sup> —Tnúhu sá sánú ìchi ñaha xii-o nacuáa cundecu-o càchí-xi sá ndéé cundedóho-o nǎsa càhá<sup>n</sup> téé tàú cuéchi cuèndá cutnùní iní-ó nǎ ní quide-dé, te dàtnùní càhá<sup>n</sup>-ó nùu ndisa ndècuéchi-dé àdi ñá túú ndècuéchi-dé —càchí-dé xáha<sup>n</sup>-dē.

<sup>52</sup> Te ní xáha<sup>n</sup>-güedé:

—Cùu ní cachí sá tnàhá-ò cúú-n tēe distritú Galileá nùu duca<sup>n</sup> càhá<sup>n</sup>-n. Dacuàha tutú yódó tnùní tnúhu Yá Ndiòxí te quiní-n nàcuáa càhá<sup>n</sup>-xi sá nì ì<sup>n</sup> téé véxi distritú Galileá ñá túú càhá<sup>n</sup>-dé tnúhu Yá Ndiòxí —càchí-güedé xáha<sup>n</sup>-güedé.

<sup>53</sup> Duca<sup>n</sup> te ndi dí<sup>n</sup> cuānuhú-güedé vehe-güedé.

## 8

### *Ì<sup>n</sup> ñadìhí ndécú vîhi cuéchi-xi*

<sup>1</sup> Te Jèsús cuáhá<sup>n</sup>-gá yucu Òlívú. <sup>2</sup> Te sátá nǎ túndaá nduu tnéé, te cuáhá<sup>n</sup> tucu-gá veñúhu càhnu sá ìo cùnūu. Te ìo cuéhé ñáyiú ní chítú níhnú-yu núú-gǎ, te ní ngóo-gá ní dánèhé ñáhá-gǎ xii-yu. <sup>3</sup> Te ní quexìo cue téé dàcuaha ñaha xii-yu nchaa tnúhu ní chídó tnùní ndí Moisés, ndihí cue téé cùu fariséú, te ndèca-güedé ì<sup>n</sup> ñadìhí ní sáá, te ñaha-á<sup>n</sup> nǎ xiní ñáhá-yu càhá<sup>n</sup> ndihí-a<sup>n</sup> ì<sup>n</sup> téé dico ñá díú yì-a<sup>n</sup> cuu-dé, te ní sanutnì ñaha-güedé xii-a<sup>n</sup> tnuú nchaa ñáyiú xīndecu núú Jèsús. <sup>4</sup> Te ní xáha<sup>n</sup>-güedé xii Jèsús:

—Mèstrú, ñadìhí-a ní xiní ñáhá ñáyiú xii-a<sup>n</sup> càhá<sup>n</sup> ndihí-a<sup>n</sup> ì<sup>n</sup> téé dico ñá díú yì-a<sup>n</sup> cuu-dé. <sup>5</sup> Te tnúhu ní chídó tnùní ndí Moisés càchí-xi sá yúu cahni-o nchaa ñáyiú dìhí duha quide. Te yòhó, ¿nǎsa càchí-n cùnduu-í? —cachí-güedé xáha<sup>n</sup>-güedé xii-gá.

<sup>6</sup> Duha ní càhá<sup>n</sup>-güedé chi cuèndá sá cuení-güedé coto ndeé ñáhá-güedé xii-gá nùu nǎsa càhá<sup>n</sup>-gá cuèndá núcóo nchihí ñaha-güedé xii-gá ní càhá<sup>n</sup>-güedé. Te ní ngúnu ndeyi-gá te ní ngúita-gá téé-gǎ ndihí díquí ndáhá-gǎ lètrá núú ñúhú. <sup>7</sup> Te

xìcá<sup>n</sup> tnúhú-ní tucu-güedé núú-gǎ nùu ní ndonehe núú-gǎ, te ní xáha<sup>n</sup>-gǎ:

—Ndédani càa nchohó te núu ñá túú nǎ cuéchi quide-ndo te díhna nuu-gǎ-ndó chí cuáha-a<sup>n</sup> yúú —càchí-gá xáha<sup>n</sup>-gǎ xii-güedé.

<sup>8</sup> Te ní ngúnu ndeyi tucu-gá téé tucu-gá lètrá núú ñúhú. <sup>9</sup> Te sá dúcá<sup>n</sup> nǎ xáha<sup>n</sup>-gǎ xii-güedé te ní ndixi túu iní-güedé sá ñá túú quide váha mee-güedé tnàhá-güedé, núu da ì<sup>n</sup> da ì<sup>n</sup>-güedé ní ndee, te díhna-gá cue téé cùu sacuéhé nǎ ndee te ní ngúita nchicú<sup>n</sup> dava-gá-güedé. Te sátá nǎ ndihí-güedé ní ndee, te ní quendóo mee-nǎ Jèsús ndihí ñadìhí-á<sup>n</sup>. <sup>10</sup> Te ní ndonehe núú Jèsús te ní xiní-gá sá nǎ ndihí-güedé cuáhá<sup>n</sup> te mee-nǎ ñadìhí-á<sup>n</sup> nǎ ndóo-a<sup>n</sup>, te ní xáha<sup>n</sup>-gǎ xii-a<sup>n</sup>:

—¿Ndèndi cuáhá<sup>n</sup> cue téé càchí sá nǎ quide-n cuéchi? ¿Ni ì<sup>n</sup>-güedé ñá ní cùndee tnúhu-güedé quíhí<sup>n</sup>-n càstiú-va? —càchí-gá xáha<sup>n</sup>-gǎ xii-a<sup>n</sup>.

<sup>11</sup> Te ní xáha<sup>n</sup>-a<sup>n</sup> xii Jèsús:

—Ñáhá, chi ni ì<sup>n</sup>-güedé ñá ní ndàcu-güedé —càchí-a<sup>n</sup> xáha<sup>n</sup>-a<sup>n</sup>.

Te ní xáha<sup>n</sup> Jèsús:

—Te ni yúhú vá dáquihí<sup>n</sup> ñáhà-í castiú xii-n. Te vitna te núhú-n te vá cadá-gǎ-n nǎndi sá cuéhé sá dúhá —càchí-gá xáha<sup>n</sup>-gǎ xii-a<sup>n</sup>.

### *Jèsús dándixi túu-gá iní-ó*

<sup>12</sup> Te ní càhá<sup>n</sup> tucu Jèsús núú ñáyiú, te xáha<sup>n</sup>-gǎ xii-yu:

—Yúhú cùú-í dàtná ì<sup>n</sup> ñuhú dáyèhe-í ñuyíú-a, te nchaa ñáyiú na chìtnahá ñáhá xii-í, te vá cùndecu-gá-yu ìchi cuéhé ìchi duha, chi yúhú dándixi túu-í iní-yu cuèndá cutnùní iní-yu nàcuáa ndùu cuèndá Yá Ndiòxí, te cundecu-í ndihí-yu ni caa ni quíhí<sup>n</sup> —càchí-gá xáha<sup>n</sup>-gǎ xii-yu.

<sup>13</sup> Te ní xáha<sup>n</sup> cuè téé cùu fariséú xii-gá:

—Medì-n cahá<sup>n</sup>-n sǎ cúú-n tēe váha, te vá yòo ì<sup>n</sup>-gá chindèe tnúhu ñaha xii-n núu ná téé cùu-n, dico xǎñ ñá túú nàndìhí-xi —càchí-güedé xáha<sup>n</sup>-güedé xii-gá.

<sup>14</sup> Te ní xáha<sup>n</sup> Jèsús:

—Cuéi càhá<sup>n</sup>-í cuèndá mèe-í dico nàndìhí tnúhu càhá<sup>n</sup>-í. Chi yúhú nàha-í ndeé ìchi véxi-í, te xìní-í ndeé ìchi núhú-í, dico nchòhó chi ñá túú xìní-ndó ndeé ìchi véxi-í, te ni ñá túú xìní-ndó ndeé ìchi quíhí<sup>n</sup>-í. <sup>15</sup> Te



nchòhó chi cuèndá-ni càhá<sup>n</sup>-ndó cuèndá ñáyiú núu quide váha-yu àdi ñá túú quide váha-yu. Te yúhú ñá túú càhá<sup>n</sup>-í cuèndá ñáyiú núu quide váha-yu àdi ñá túú quide váha-yu. <sup>16</sup> Àdi núu càhá<sup>n</sup>-í dico ì<sup>n</sup> tnúhu ndáá càhá<sup>n</sup>-í chi ñá díú-ní mèe-í càhá<sup>n</sup>, chi tnàhá Tàtà-í Yaá ní tendaha ñàha xii-í véxi-í ñuyíú-a càhá<sup>n</sup>-gá chindèe tnúhu ñàha-gã xii-í. <sup>17</sup> Te tnúhu sá sánú ìchi ñàha xii-ndo cachí-xi sá núu na cùndecu úú cue tée càhá<sup>n</sup> ndáá-güedé nàcuáa cùu ì<sup>n</sup> sá cùndáá, te núu ì<sup>n</sup>-ni tnúhu na càhá<sup>n</sup>-güedé ndi ndúú-güedé te xiá<sup>n</sup> nándíhi-xi, duha càchí tnúhu-á<sup>n</sup>. <sup>18</sup> Te ñu-ni duca<sup>n</sup> cùu-xi yúhú chi càhá<sup>n</sup>-í ì<sup>n</sup> tnúhu ndáá sá cúu-xí mèe-í, te ñu-ni dàtná càhá<sup>n</sup>-í càhá<sup>n</sup> Tàtà-í Yaá ní tendaha ñàha xii-í véxi-í ñuyíú-a —càchí-gá xáha<sup>n</sup>-gã xii-güedé.

<sup>19</sup> Te ní xáha<sup>n</sup>-güedé xii-gá:

—¿Te ndèe ndécú Tàtà-n-í? —càchí-güedé xáha<sup>n</sup>-güedé.

Te ní xáha<sup>n</sup> Jèsús:

—Te núu dicó xini-ndó yòo cuu yúhú-á te duca<sup>n</sup> te quini-ndó Tàtà-í. Te ni yúhú ñá túú xini-ndó yòo cuu-í núu xiá<sup>n</sup> ñá túú xini-ndó Tàtà-í —càchí-gá xáha<sup>n</sup>-gã xii-güedé.

<sup>20</sup> Duha ní cáhá<sup>n</sup> Jèsús ñini dàcuaha-gá ñáyiú xití veñúhu núu ndécú àlcaniá díhú<sup>n</sup>. Te vá yòo ì<sup>n</sup> ni cùyì<sup>n</sup> tnì ñàha xii-gá chi vátá sáa-gá òré tnì ñàha-güedé.

*Ñáyiú ñá túú sàndáá iní ñáhá xii Jèsús vá ndácú-yu quíhí<sup>n</sup>-yu núu nùhú-gá cundecu-gá*

<sup>21</sup> Te ní xáha<sup>n</sup> tùcu Jèsús xii-güedé:

—Yúhú nùhú-í te nanducu ñàha-ndo te vá nánihí ñáhá-ndó, te cuú-ndó núu yíca cuèchi-ndo, chi vá ndácú-ndó sáa-ndó núu nùhú-í cundecu-í —càchí-gá xáha<sup>n</sup>-gã xii-güedé.

<sup>22</sup> Te ní xitnàha cue tée isràèl:

—¿Te náa cahni-dé mèe-dé núu càchí-dé sá vã ndácú-ó sáa-ó núu quíhí<sup>n</sup>-dé-ã<sup>n</sup>? —càchí-güedé xitnàha-güedé.

<sup>23</sup> Te ní xáha<sup>n</sup> Jèsús xii-güedé:

—Nchòhó chi cue tée ñuyíú-a cùu-ndo, núu ío ñùhu iní-ndó sã ío ñuyíú-a. Te yúhú chi tée núu ñnu cùu-í núu xiá<sup>n</sup> ñá túú sã ío ñuyíú-a ñùhu iní-í. <sup>24</sup> Te xiá<sup>n</sup> núu càchí-í sá cúu-ndó núu yíca cuèchi-ndo, chi ñá cuèni-ndó quíndáá iní-ndó sã yúhú véxi cuu<sup>n</sup>-í andiú, te núu xiá<sup>n</sup> ñu-ni núu yíca

cuèchi-ndo cúu-ndó —càchí-gá xáha<sup>n</sup>-gã xii-güedé.

<sup>25</sup> Te ní xicá<sup>n</sup> tnúhú-güedé núu-gã, te xáha<sup>n</sup>-güedé:

—¿Te ná cúu yòhó núu duca<sup>n</sup> càhá<sup>n</sup>-n-í? —càchí-güedé xáha<sup>n</sup>-güedé xii-gá.

Te ní xáha<sup>n</sup>-gã:

—Sa ní cachí tnúhu-í xii-ndo ndéé díhna —càchí-gá xáha<sup>n</sup>-gã xii-güedé.

<sup>26</sup> Te xáha<sup>n</sup> tùcu-gá:

—Ndècu cuéhé tnúhu cáhá<sup>n</sup>-í cada ndáá-í cuèndá nchòhó. Te Tàtà-í Yaá ní tendaha ñàha xii-í véxi-í ñuyíú-a càhá<sup>n</sup>-gá tnúhu ndáá, te tnúhu càhá<sup>n</sup> yúhú ñuyíú-a cùu-xi tnúhu ní cáhá<sup>n</sup>-gá ní xíndedóho-í —càchí-gá xáha<sup>n</sup>-gã xii-güedé.

<sup>27</sup> Te mee-güedé ñá túú ní tècú tnùn-í-güedé sá cuèndá Dútú Ndiòxí ní cáhá<sup>n</sup> Jèsús. <sup>28</sup> Te ní xáha<sup>n</sup>-gã xii-güedé:

—Òré ná catá cà ñàha-ndo xii yúhú Téé cùu ñani tnáhá-ndó nchàa-ndo núu cùrúxí cahni ñàha-ndo, te òré-á<sup>n</sup> cutnùn-í iní-ndó yòo cuu-í, te ñá túú quide-í sá cúu iní mèe-í, chi yúhú càhá<sup>n</sup>-í nàcuáa ní dánèhé ñáhá Tàtà-í <sup>29</sup> Yaá ní tendaha ñàha xii-í véxi-í. Te ñu-gá ndécú ndíhi ñàha-gã xii-í, te ñá túú dàña nihnu ñàha-gã chi quide-í nchaa nàcuáa cùu iní-gá —càchí-gá xáha<sup>n</sup>-gã xii-güedé.

<sup>30</sup> Te sá dúcá<sup>n</sup> ñí cáhá<sup>n</sup>-gá núu ío vai ñáyiú ní sàndáá iní ñáhá xii-gá.

*Ñáyiú sàndáá iní ñáhá xii Yá Ndiòxí ndíhi ñáyiú ndècu ichi cuéhé ichi duha*

<sup>31</sup> Te ní xáha<sup>n</sup> Jèsús xii ñáyiú isràèl ñáyiú ní sàndáá iní ñáhá xii-gá:

—Te núu vá dáñá ndèe-ndó càda-ndo nchaa nacuáa càhá<sup>n</sup>-í, te cuu ndisa-ndo cuè téé tnàhá tnúhu ndíhi-í, <sup>32</sup> te tecú tnùn-í-gá-ndó tnúhu ndáá, te duca<sup>n</sup> te cácu nihnu-ndo —càchí-gá xáha<sup>n</sup>-gã xií-yu.

<sup>33</sup> Te ní xáhá<sup>n</sup>-yu:

—Nchúhú cúu-ndí cue ñani tnáhá ndí Abrahám, te ni ì<sup>n</sup> nduu ñá túú ndéé sácündedí nihnu-ndí ndoho tnahá-ndí núu cáchí-ò sá dácácu nihnu ñàha-n xii-ndí —càchí-yu xáhá<sup>n</sup>-yu xii-gá.

<sup>34</sup> Te ní xáha<sup>n</sup> Jèsús xií-yu:

—Na càchí tnúhu ndáá-í xii-ndo sã nchàa ñáyiú quide nchaa sá cuéhé sá dúhá tàxi tnùn-í ñáhá-nã-xi xií-yu. <sup>35</sup> Te cue ñáyiú

xinu cuechi te vá cúú ì<sup>n</sup>-ná cuú-yu ndihi ñáyiú dii vèhe-xi xinu cuechí-yu, dico cue déhe ñáyiú dii vèhe-xi-á<sup>n</sup> chi ì<sup>n</sup>-ni cùu ndihi ñaha-güexi xií-yu. <sup>36</sup> Te núu yúhú Yaá cúú Dèhe Yá Ndiöxí dàcácu nihnu ñaha-í xii-ndo núu nchàa yíca cuèchi-ndo, te ndáá sá nchòhó cácu nihnu ndisa-ndo. <sup>37</sup> Te yúhú sa xini-í sá nchòhó cúú-ndó ñani tnáhá ndíi Àbrahám, te dìcò-ni sá ñá tnàhá iní-ndó tnúhu càhá<sup>n</sup>-í núu xíã<sup>n</sup> cuìní-ndó càhni ñaha-ndo. <sup>38</sup> Te yúhú càhá<sup>n</sup>-í nàcuáa ní dánèhé ñáhá Tàtà-í, te nchòhó quidé-ndó nàcuáa càhá<sup>n</sup> tātá-ndó —càchí-gá xáha<sup>n</sup>-gã xií-yu.

<sup>39</sup> Te ní xáhá<sup>n</sup>-yu:

—Ndíi Àbrahám cúú tātá-ndí —càchí-yu xǎhá<sup>n</sup>-yu xii-gá.

Te ní xáhá<sup>n</sup> Jèsús:

—Núu ndisa ñani tnáhá ndíi Àbrahám cúú-ndó, te cada-ndo nàcuáa ní xóo cada ndíi ni cùu. <sup>40</sup> Te yúhú cuèi càhá<sup>n</sup>-í ì<sup>n</sup> tnúhu ndáá nàcuáa càhá<sup>n</sup> Yá Ndiöxí càchí tnúhu-gá xii-í, te cuìní-ndó càhni ñaha-ndo. ¡Dico ndíi Àbrahám chi ñá túú dùca<sup>n</sup> ni quide ndíi! <sup>41</sup> Te nchòhó quidé-ndó nàcuáa quide tātá-ndó —càchí-gá xáha<sup>n</sup>-gã xií-yu.

Te ní xáhá<sup>n</sup>-yu:

—Nchúhú, ñá túú yàyacá<sup>n</sup> ndécú tātá-ndí, chi ì<sup>n</sup>dii Yá Ndiöxí cúú tātá-ndí —càchí-yu xǎhá<sup>n</sup>-yu xii-gá.

<sup>42</sup> Te ní xáhá<sup>n</sup> Jèsús:

—Núu dìcò Yá Ndiöxí ndisa cùu Tātá-ndó te cuu iní ñáhá-ndó xii-í ní cùu chi yúhú ní quee-í núú ndécú-gã véxi-í ñuyíú-a. Te ñá túú véxi-í sá cúú iní mée-í, chi mee-gã ní tendaha ñaha-gá véxi-í. <sup>43</sup> Te ñá túú tècú tnùn-ndó tnúhu càhá<sup>n</sup>-í chi ñá túú tnàhá iní-ndó. <sup>44</sup> Te nchòhó chi tātá-ndó cùu yucu ñávãha núu cùdí iní-ndó quide-ndo nchaa nacuáa cùu iní-xi, chi ndée òré ní ngáva ñuyíú duca<sup>n</sup>-ni ndècu-xi dacáhá<sup>n</sup>-xi iní-ndó sàhni tnaha-ndo. Te ñá ì<sup>n</sup> ndùu cáhá<sup>n</sup>-xi ì<sup>n</sup> tnúhu ndáá chi ñá túú xica-xi ichi ndáá, chi mee-ni ichi tnúhu ndehnde xica-xi chi duca<sup>n</sup> iní-xi. Te ñu-xi dàcahu-xi iní-ndó dàcuandehnde-ndo. <sup>45</sup> Te yúhú càhá<sup>n</sup>-í tnúhu ndáá te ñá túú cuìní-ndó quindáá iní ñáhá-ndó. <sup>46</sup> ¿Te ndédacàa nchòhó xini-ndó sá quidè-í ì<sup>n</sup> sá cuèhé sá dúhá-í?, te yúhú ñá túú nã quidè-í chi càhá<sup>n</sup> ndáá-í, ¿te ná cuendá ñá túú cuìní-ndó quindáá iní-ndó

tnúhu càhá<sup>n</sup>-í? <sup>47</sup> Te nchaa ñáyiú ndècu ichi Yá Ndiöxí, ñáyiú-á<sup>n</sup> sácúndedóho-yu nchaa tnúhu càhá<sup>n</sup>-gá. Te nchòhó chi ñá díú ichi Yá Ndiöxí ndécú-ndó núu ñá túú sácúndedóho-ndo tnúhu càhá<sup>n</sup>-gá —càchí-gá xáha<sup>n</sup>-gã xií-yu.

*Díhna-gá Crístú sa ndècu dacúúxí ndíi Àbrahám*

<sup>48</sup> Te ní xáhá<sup>n</sup> ñáyiú isràél:

—Váha-ni càhá<sup>n</sup>-ndí sá tée samaritanú cúú-n, te yucu ñávãha ndècu ndihi-n —cachí-yu xǎhá<sup>n</sup>-yu xii-gá.

<sup>49</sup> Te ní xáhá<sup>n</sup> Jèsús:

—Yúhú, ñá túú yùcu ñávãha ndècu ndihi-í, chi Tàtà-í quidé càhnu-í, te nchòhó da cùu úhú iní ñáhá-ndó xii-í —càchí-gá xáha<sup>n</sup>-gã xií-yu.

<sup>50</sup> Te xáhá<sup>n</sup> tùcu-gá:

—Yúhú, ñá túú càchí-í sá cáda càhnu ñaha-ndo, dico Dútú Ndiöxí cuìní-gá sá cáda càhnu ñaha-ndo xii-í. Te mee-gã cáhá<sup>n</sup>-gá núu ndédacàa-ndo quide váha, te ndédacàa-ndo ñá túú quide váha. <sup>51</sup> Te na càchí tnúhu ndáá-í xii-ndo sã nchàa ñáyiú na tní tnúhu càhá<sup>n</sup>-í te vá cuíta nihnú-yu —càchí-gá xáha<sup>n</sup>-gã xií-yu.

<sup>52</sup> Te ní xáhá<sup>n</sup> tùcu ñáyiú isràél:

—Vitna te ní xini ndáá-ndí sá yùcu ñávãha ndècu ndihi-n, chi ndíi Àbrahám ndihi nchaa cue tée ní xóo cáhá<sup>n</sup> tnúhu Yá Ndiöxí ndée sanaha ní xihí-güedé, te yòhó càchí-tu-n sã ncháá ñáyiú na tní tnúhu càhá<sup>n</sup>-n te vá cùú-gá-yu. <sup>53</sup> ¿Náa ío-gá càhnu cuu-ó dàcúúxí ñani tnáhá-ndí ndíi Àbrahám-ã<sup>n</sup>? Tée-á<sup>n</sup> dai ní xihí-dé ndihi cue tée ní xóo cáhá<sup>n</sup> tnúhu Yá Ndiöxí ndée sanaha. ¿Te yòhó nágá-tu cùu-n te vá cùú-n càhá<sup>n</sup>-n-í? —cachí-yu xǎhá<sup>n</sup>-yu.

<sup>54</sup> Te ní xáhá<sup>n</sup> Jèsús:

—Te núu dìcò mée-í quidé càhnu-í mée-í ñá, te ñá túú nandíhi sá quidè-í núu duca<sup>n</sup>. Dico Tàtà-í quidé càhnu ñaha-gá xii-í, te ñu-ni Yaá-á<sup>n</sup> càchí-ndó cùu Ndiöxí-ndó. <sup>55</sup> Te nchòhó chi ñá túú xini-ndó-gã. Te yúhú chi xini-í-gá. Te núu na càchí-í sá ñá túú xini-í-gá te dàcuandehnde-í dàtná ndehnde mée-ndo. Te yúhú chi xini ndisa-í-gá te tní-í nchaa tnúhu càhá<sup>n</sup>-gá.

<sup>56</sup> Te ndíi Àbrahám ñani tnáhá-ndó ñá

xíndecu ndéé sanaha ío ní cudíí ìní ndíi sá quìní ñáhá ndíi xii-í, te ní sáá nduu nǐ xini ñáhá ndíi xii-í nǔu ío ní cudíí ìní ndíi — cǎchí-gá xáha<sup>n</sup>-gǎ xii-yu.

<sup>57</sup> Te ní xáha<sup>n</sup> ñǎyiu isràél xii Jèsús:

—Ni vǎtá cúhú<sup>n</sup>-gǎ-n ùdico úxí cuíá-n te cǎchí-n sǎ nǐ xini-n ndíi Àbrahám, te ní cunaha vǐhi ní xíhí ndíi-á<sup>n</sup> —cǎchí-yu xǎhǎ<sup>n</sup>-yu xii-gá.

<sup>58</sup> Te ní xáha<sup>n</sup> Jèsús:

—Te na cǎchí tnúhu ndáá-í xii-ndo sǎ cùmání-gǎ cundecu ndíi-á<sup>n</sup> ñuyíú-a te yúhú sa ndècu-gá-í —cǎchí-gá xáha<sup>n</sup>-gǎ xii-yu.

<sup>59</sup> Te sá dúcá<sup>n</sup> nǐ cǎhá<sup>n</sup>-gá nǔu xǎá<sup>n</sup> ní quehé<sup>n</sup>-yu yúú cuǎha ñáhá-yu xii-gá ní cùu, te ní nguívǎha-gá núú-yu te ní quee-gá xití veñúhu cuáhá<sup>n</sup>-gá.

## 9

### *Jèsús quidé tǎtna-gá ìn tée cuàá*

<sup>1</sup> Te núú xicá cùu Jèsús ní naníhí-gǎ ìn tée cuàá, te sa duca<sup>n</sup> tnàhí cǎa núú-dě ní cacu-dé. <sup>2</sup> Te ní xáha<sup>n</sup> cuè tée xica cuu ndíhi-gá xii-gá:

—Mèstrú, ¿ná cuendá dàcá<sup>n</sup> cuàá tée-ǎ<sup>n</sup> ní cacu-dé? ¿Sá cuendá nchaa yícá cuèchi tǎtá-dě, ǎ<sup>n</sup> sǎ cuendá nchaa yícá cuèchi nǎná-dě, ǎ<sup>n</sup> sǎ cuendá nchaa yícá cuèchi mee-dě dàcá<sup>n</sup> cáá-dě ní cacu-dé? —cǎchí-güedé xǎha<sup>n</sup>-güedé xii-gá.

<sup>3</sup> Te ní xáha<sup>n</sup> Jèsús:

—Ni ñà díú sǎ cuendá nchaa yícá cuèchi mee-dě, te ni ñà díú sǎ cuendá nchaa yícá cuèchi tǎtá-dě, te ni ñà díú sǎ cuendá nchaa yícá cuèchi nǎná-dě, chí mee Yǎ Ndiǒxí ní cuini-gá sá dúcá<sup>n</sup> cùnduu-dé sáá-dé ñuyíú-a cuendá sá ñuyíú-a quini ñáyiu nása cada ñaha Yǎ Ndiǒxí xii-dé ndúha núú-dě. <sup>4</sup> Te vitna ío-gá nduu cùyica sá cáda-í nchaa chù<sup>n</sup> ní táhú Yǎa ní tendaha ñàha xii-í véxi-í ñuyíú-a, chí sáá nduu te vá ndácú-gǎ-í cada-í chù<sup>n</sup>-gá. <sup>5</sup> Te nini ndècu-gá-í ñuyíú-a te dǎndixi túu-í iní nchaa ñáyiu cuendá cutnùní iní-yu nǎcuáa ndùu cuendá Yǎ Ndiǒxí —cǎchí-gá xáha<sup>n</sup>-gǎ xii-güedé.

<sup>6</sup> Te sátá dúcá<sup>n</sup> nǐ cǎhá<sup>n</sup>-gá, te ní sati-gá díí-gá núú ñúhú te ní dácá-gǎ luha ñuhu ní cuáha ndéhyú, te ndéhyú-ǎ<sup>n</sup> nǐ dácánùu-gá ndúú xio núú tée cuàá-á<sup>n</sup>. <sup>7</sup> Te ní xáha<sup>n</sup>-gǎ xii-dé:

—Quíhí<sup>n</sup>-n nàquete-n núú-n ndùte tanquí Silòé —cǎchí-gá xáha<sup>n</sup>-gǎ xii-dé. Te Silòé-á<sup>n</sup> quée-xí tnúhu mèe-yu: Tée xica chiu<sup>n</sup>.

Te ní sáhá<sup>n</sup> tée cuàá-á<sup>n</sup> nǐ naquete-dé núú-dě, te òré ní ndexìo-dé te sa ndèhe-dé.

<sup>8</sup> Te nchaa ñáyiu ndècu yatni núú ndécú-dě ndíhi nchaa ñáyiu xini ñáhá xii-dé núú xicá<sup>n</sup> ndàhú-dé ní xitnàhá-yu:

—¿Náa ñà díú tée-ǎ<sup>n</sup> ní xóo cǎcá<sup>n</sup> ndàhú-dé? —cǎchí-yu xitnàhá-yu.

<sup>9</sup> Te davá-yu cǎchí-yu sá díú-dě, te davá-yu cǎchí-yu sá ñà díú-dě, dico duca<sup>n</sup> cǎa-dé, cǎchí-yu xitnàhá-yu.

Dico mee-dě ní xáha<sup>n</sup>-dě xii-yu sá díú-dě.

<sup>10</sup> Te ní xicá<sup>n</sup> tnúhú-yu núú-dě, te xǎhǎ<sup>n</sup>-yu:

—¿Nása ní cuu núu ní ndúha núú-n ndèhe-n vitna? —cǎchí-yu xǎhǎ<sup>n</sup>-yu xii-dé.

<sup>11</sup> Te ní xáha<sup>n</sup>-dě:

—Tée nani Jèsús-ǎ<sup>n</sup> ní cadúha-dé luha ndéhyú te ní dácánùu-dé núú-í, te ní táuchíú<sup>n</sup>-dě ní sáhá<sup>n</sup>-í tǎnquí Silòé ní naquete-í núú-í, te òré-á<sup>n</sup> nǐ cuu cundehe-í —cǎchí-dé xǎha<sup>n</sup>-dě xii-yu.

<sup>12</sup> Te ní xicá<sup>n</sup> tnúhú tucú-yu núú-dě, te xǎhǎ<sup>n</sup>-yu:

—¿Te ndèé ndécú tée-á<sup>n</sup>? —cǎchí-yu xǎhǎ<sup>n</sup>-yu xii-dé.

Te ní xáha<sup>n</sup>-dě:

—Ñá túú xini-í —cǎchí-dé xǎha<sup>n</sup>-dě xii-yu.

### *Cue tée cùu fariséú ndátnúhu-güedé ndíhi tée ní ndúha núú-xi*

<sup>13</sup> Te ndèca-güedé tée ní ndúha núú-xi-á<sup>n</sup> cuáhá<sup>n</sup> núú cuè tée cùu fariséú. <sup>14</sup> Te cuendá sá ndùu ndetatú-yu ní cadúha Jèsús ndéhyú nǐ dácánùu-gá núú tée-á<sup>n</sup> te ní ndúha, <sup>15</sup> xǎá<sup>n</sup> nǔu ní xicá<sup>n</sup> tnúhú cuè tée cùu fariséú núú-dě, te xǎha<sup>n</sup>-güedé:

—¿Nása ní cuu ní ndúha núú-n? —cǎchí-güedé xǎha<sup>n</sup>-güedé xii-dé.

Te ní xáha<sup>n</sup>-dě xii-güedé:

—Í<sup>n</sup> tée ní dácánùu-dé ndéhyú núú-í te ní sáhá<sup>n</sup>-í ní naquete-í, te ní cuu ndèhe-í vitna —cǎchí-dé xǎha<sup>n</sup>-dě xii-güedé.

<sup>16</sup> Te dava cue tée cùu fariséú ní xitnàha-güedé:

—Ñá díú Yǎ Ndiǒxí ní tendaha ñaha-gá xii tée-ǎ<sup>n</sup> véxi-dé nǔu duha quide-dé nchaa sá vǎ yǒo tnàhí ndàcu cada, te ñà túú

sàndáá iní-dé canehe íí-dě nduu ndètátú-ó —càchí-güedé xĩtnàha-güedé.

Te dava-güedé ní xĩtnàha-güedé:

—¿Nása ndacu-dé cada-dé sá vǎ yõ tnhí ndàcu cada te núu cùu-dé téé yíca cuěchi? —càchí-güedé xĩtnàha-güedé.

Te ñá túú ní cùu ì<sup>n</sup>nuu-güedé tnúhu ní cáhá<sup>n</sup>-güedé. <sup>17</sup>Te ní xícá<sup>n</sup> tnúhú tucu-güedé núú tée ní ndúha núu-xi-á<sup>n</sup>, te xǎha<sup>n</sup>-güedé:

—Te yòhó, ¿nása càchí-n cuèndá téé ní quide tátna núu-n te ní ndúha? —càchí-güedé xǎha<sup>n</sup>-güedé xii-dé.

Te ní xáha<sup>n</sup>-dè:

—Yúhú càchí-í sá ì<sup>n</sup> tée càhá<sup>n</sup> tnúhu Yá Ndiõxí cùú-dé —càchí-dé xǎha<sup>n</sup>-dè xii-güedé.

<sup>18</sup>Dico cue téé isràél ñá ní sàndáá iní-güedé sá cuàá-dé ní cùu, chí cuèndá sa ní ndúha núu-dè ní xini ñáhá-güedé, te xǎ<sup>n</sup> núu ní cana-güedé tátá-dè ndihi nǎná-dè, <sup>19</sup>te ní xícá<sup>n</sup> tnúhú-güedé núu-yu, te xǎha<sup>n</sup>-güedé:

—¿Diu téé-a déhe-ndo tée càchí-ndó cuàá-dé ní cacu-dé-ǎ<sup>n</sup>? ¿Te nása ní cuu ní ndúha núu-dé? —càchí-güedé xǎha<sup>n</sup>-güedé xii-yu.

<sup>20</sup>Te ní xáha<sup>n</sup> tátá-dè ndihi nǎná-dè:

—Diu déhe-ndí cùú-dé te sa cuàá ndisa-dé ní cacu-dé, <sup>21</sup>dico ñá túú xini-ndí nása ní cuu ní ndúha núu-dè, te ni ñá túú xini-ndí yoo ní quide tátna. Chí càcá<sup>n</sup> tnúhú núú méé-dè xǎ<sup>n</sup> núu sa sàcuéhé-dè, te na càhá<sup>n</sup>-dé núu nása ní cuu ní ndúha núu-dè —càchí-yu xǎhǎ<sup>n</sup>-yu xii-güedé.

<sup>22</sup>Duha ní cáhá<sup>n</sup> tátá-dè ndihi nǎná-dè ní xǎhǎ<sup>n</sup>-yu xii-güedé cuèndá sá yùhú-yu cue téé cùnnoo núú ñáyiú isràél, chí cue téé-ǎ<sup>n</sup> sa ní ndatnúhu-güedé ní cuu ì<sup>n</sup>nuu-güedé sá núu ndédacàa ñáyiú na càhá<sup>n</sup> sá Jèsús cùú-gǎ Cristú Yaá ní tendaha Yá Ndiõxí véxi ñuyíú-a, te vá dáñá-gǎ-güedé quíhu-yu veñúhu. <sup>23</sup>Núu xǎ<sup>n</sup> ní xáha<sup>n</sup> tátá-dè ndihi nǎná-dè sá ná càcá<sup>n</sup> tnúhú-güedé núú méé-dè chí sa sacuéhé-dè.

<sup>24</sup>Te xǎ<sup>n</sup> núu ní cana tucu-güedé téé ní ndúha núu-xi-á<sup>n</sup>, te ní xáha<sup>n</sup>-güedé:

—Cáhá<sup>n</sup>-n ì<sup>n</sup> tnúhu ndáá chí Yá Ndiõxí ndéhé ndí-gǎ nàcuáa ní cuu ní ndúha núu-n, chí nchúhú xini-ndí sá dícó ì<sup>n</sup> tée ndècu yíca cuěchi-xi cùu téé càchí-n ní quide

tátna núu-n —càchí-güedé xǎha<sup>n</sup>-güedé xii-dé.

<sup>25</sup>Te ní xáha<sup>n</sup>-dè:

—Yúhú, ñá túú xini-í te núu téé ndècu yíca cuěchi-xi cùu-dé àdi ñáhá. Dícó-ni sá xini-í sá cuàá-í ní cùu te vitna ní cuu cundehe-í —càchí-dé xǎha<sup>n</sup>-dè xii-güedé.

<sup>26</sup>Te ní xícá<sup>n</sup> tnúhú tucu-güedé núu-dè, te xǎha<sup>n</sup>-güedé:

—¿Nása ní quide ñaha-dè xii-n te ní ndúha núu-n-í? —càchí-güedé xǎha<sup>n</sup>-güedé xii-dé.

<sup>27</sup>Te ní xáha<sup>n</sup>-dè:

—Yúhú sa ní cáhá<sup>n</sup>-í te ñá túú quide cuèndá-ndó. ¿Te ná cuèndá cuèni-ndó càchí tnúhu-ni tucu-í? ¿Á tnhá-ndó cuèni-ndó quíndáá iní-ndó tnúhu càhá<sup>n</sup>-dé? —càchí-dé xǎha<sup>n</sup>-dè xii-güedé.

<sup>28</sup>Te ní cudéé<sup>n</sup>-güedé núu-dè, te ní xáha<sup>n</sup>-güedé xii-dé:

—Te núu yòhó cuèni-n chinchícu<sup>n</sup>-n tée-ǎ<sup>n</sup> te cuáhá<sup>n</sup>, dico nchúhú chí canchícu<sup>n</sup> nihnu nahi-ni-ndí nàcuáa ní cáhá<sup>n</sup> ndí Moisés. <sup>29</sup>Te nchúhú chí naha-ndí sá Yá Ndiõxí ní cáhá<sup>n</sup> ndíhi-gǎ ndí Moisés, dico téé càchí-n-ǎ<sup>n</sup> chí ní ñá túú xini-ndí ndèé téé cùu-dé —càchí-güedé xǎha<sup>n</sup>-güedé xii-dé.

<sup>30</sup>Te ní xáha<sup>n</sup> tée ní ndúha núu-xi-á<sup>n</sup>:

—¿Te náa ñá díú nchòhó càchí-ndó sǎ ì<sup>n</sup> túha-ndo? Te núu duca<sup>n</sup> càhá<sup>n</sup>-ndó sǎ ñá túú xini-ndó ndèé téé cùu-dé, te diu-dé ní quide tátna-dé núu-í ní ndúha —càchí-dé xǎha<sup>n</sup>-dè xii-güedé.

Te xǎha<sup>n</sup> tucu-dé:

<sup>31</sup>—Xini-ó sǎ Yá Ndiõxí ñá túú tédòho-gǎ tnúhu càhá<sup>n</sup> ñáyiú quide nchaá sá cuéhé sá dúhá, chí nchaá ñáyiú quide cahnu ñaha xii-gǎ te quidé-yu nchaá nàcuáa cùu iní-gǎ, te ñáyiú-á<sup>n</sup> tédòho-gǎ tnúhu càhá<sup>n</sup>-yu. <sup>32</sup>Te ñá ì<sup>n</sup> ndúu càhá<sup>n</sup> ñáyiú cuèndá ì<sup>n</sup> tée cada tátna núu ì<sup>n</sup> ñáyiú cuàá ndéé ní cacu-xi te ndúha. <sup>33</sup>Te núu ñá díú mèe Yá Ndiõxí ní tendaha ñaha-gǎ xii téé-ǎ<sup>n</sup> véxi-dé ñá, te vá ndácú-dé cada tátna-dé núu-í ní cùu —cachí-dé xǎha<sup>n</sup>-dè xii-güedé.

<sup>34</sup>Te ní xáha<sup>n</sup>-güedé:

—Dico yòhó ndèé yatni vǎi cuéchi sa ta quide-n véxi, ¿te vitna nacanú ichi ñaha-n xii-ndí cáhá<sup>n</sup>-n-ǎ<sup>n</sup>? —càchí-güedé xǎha<sup>n</sup>-güedé xii-dé.



Te ní queñuhu ñaha-güedë xii-dé tnuú-güedé ñá túú ní dàña-gá-güedé níhí tnáhá ndìhi ñaha-dé xii-güedé.

*Ñáyiú ñá túú ndìxi túú iní cuendá nchaa sá cuèhé sá dúhá quidé-yu*

<sup>35</sup> Te ní níhí Jèsús tnúhu sá ní queñuhu-güedé téé ní cuhú núú-xi-án tnuú-güedé cuendá sá vǎ tnáhá tnúhu ndìhi ñaha-gǎ-dé xii-güedé, te ní naníhí ñáhá-gǎ xii-dé te ní xáha<sup>n</sup>-gǎ:

—¿Sàndáá iní-n Dèhe Yá Ndiõxí-ǎn? — cǎchí-gǎ xáha<sup>n</sup>-gǎ.

<sup>36</sup> Te ní xáha<sup>n</sup> tǎe ní cuhú núú-xi-án:

—Mèstrú, cachí tnúhu núú ndèé ndécú tǎe-án cuendá quíndáá iní-í-dé —cǎchí-dé xǎha<sup>n</sup>-dǎ xii-gǎ.

<sup>37</sup> Te ní xáha<sup>n</sup> Jèsús:

—Sa xíní-n-dǎ chi dǎu-dé cúú yǘhú téé ndàtnúhu ndìhi-n —cǎchí-gǎ xáha<sup>n</sup>-gǎ xii-dé.

<sup>38</sup> Te ní ngüñí xítí-dǎ núú-gǎ, te ní xáha<sup>n</sup>-dǎ:

—Xítóhó Jesucristú, sàndáá iní ñáhà-í xii-n —cǎchí-dé xǎha<sup>n</sup>-dǎ xii-gǎ.

<sup>39</sup> Te ní xáha<sup>n</sup> tùcu Jèsús:

—Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quide váha cùú-yu dàtná ì<sup>n</sup> ñáyiú cuàá, dico nchaa ñáyiú cùtnuní iní-xi sá ñà túú quide váha, te núu na quíndáá iní-yu tnúhu cǎhá<sup>n</sup>-í, te cada iní-ndó sǎ dàtná sá ñí nacaá<sup>n</sup> núú-yu chi tní<sup>n</sup>-yu tnúhu cǎhá<sup>n</sup>-í. Te ñáyiú cǎchí sá quidé váha vá núu núu-yu cuéchi-yu chi quesáhá-yu sá ío ndáá quidǎ-yu, ñáyiú-án cúú-yu dàtná ì<sup>n</sup> ñáyiú cuàá, chi vá ndíxí túú iní-yu sá ñà túú quide váha-yu ndécú-yu, te vá tní<sup>n</sup>-yu tnúhu cǎhá<sup>n</sup>-í —cǎchí-gǎ xáha<sup>n</sup>-gǎ xii-dé.

<sup>40</sup> Te sá dúcá<sup>n</sup> ñí cǎhá<sup>n</sup>-gǎ, núu ní cǎhá<sup>n</sup> ì<sup>n</sup> úú cue téé cùu fariséú, te xǎha<sup>n</sup>-güedé:

—¿Te náa tnáhá nchúhú cuàá-ndí cǎhá<sup>n</sup>-n-ǎn? —cǎchí-güedé xǎha<sup>n</sup>-güedé xii-gǎ.

<sup>41</sup> Te ní xáha<sup>n</sup> Jèsús:

—Te núu dicó nchòhó cuàá-ndó ñá, te vá cùndècu cuéchi-ndo ní cùu, dico cǎchí-ndó sǎ ndéhé-ndó ì<sup>n</sup> sá quidé-ndó te ñá ndáá, núu xǎ<sup>n</sup> ío ndècu cuéchi-ndo.

## 10

*Jèsús cǎhá<sup>n</sup>-gǎ cuendá cùrrálí mbéé*

<sup>1</sup> Te na cǎchí tnúhu ndáá-í xii-ndo sǎ ì<sup>n</sup> téé ñá túú quíhu ndáa yuyehe ì<sup>n</sup> cùrrálí mbéé, te cùtexínu-ni na cùidó-dé, téé-án cúú-dǎ ñádúhú. <sup>2</sup> Dico téé quíhu ichi yèhe cùrrálí-güedi, téé-án cúú-dǎ xítóhó-güedi. <sup>3</sup> Te téé ndèé yèhe cùrrálí-güedi nacaá<sup>n</sup>-dé te cuánguìhu xítóhó-güedi te ní cǎhá<sup>n</sup>-dé, te ní nucúhu<sup>n</sup> ndudú ñáhá-güedi xii-dé. Te ní cǎhá<sup>n</sup> díú-dǎ-güedi te ní queñuhu-dé-güedi cùrrálí. <sup>4</sup> Te sátá ñí quee-güedi cùrrálí, te ní ngódó núú-dǎ núú-güedi, te ní ngüíta nchicú<sup>n</sup> ñáhá-güedi xii-dé chi ní nucúhu<sup>n</sup> ndudú ñáhá-güedi. <sup>5</sup> Te ñá túú chinchícú<sup>n</sup>-güedi ì<sup>n</sup> téé tàtú, chi núcúhu<sup>n</sup> ndudú-güedi sá ñà díú xítóhó-güedi cùu-dé, núu xǎ<sup>n</sup> xínú-güedi núú-dǎ —cǎchí-gǎ xáha<sup>n</sup>-gǎ xii-güedé.

<sup>6</sup> Duha ní cǎhá<sup>n</sup> Jèsús cuendá sá cuení-gǎ dacuàhá-yu tnúhu-gǎ ní cùu, dico ñá ní tècú tnùní-yu nása ndùu tnúhu ní cǎhá<sup>n</sup>-gǎ.

*Jèsús cúú-gǎ dàtná ì<sup>n</sup> toli*

<sup>7</sup> Te ní xáha<sup>n</sup> tùcu Jèsús xii-güedé:

—Na cǎchí tnúhu ndáá-í xii-ndo sǎ yǘhú cùu-í dàtná ì<sup>n</sup> yèhe cùrrálí núú ndìhu cue mbéé. <sup>8</sup> Te nchaa cue téé sa yòdo nuu-gǎ ní quixi ní dándàhú-güedé ñáyiú cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cùtnùní iní-güedi sá ñà díú xítóhó-güedi cùu-güedé. <sup>9</sup> Te yúhú cùu-í dàtná yuyèhe cùrrálí cue mbéé. Te duca<sup>n</sup> sǎtnahá-xi cùu-í chi nchaa ñáyiú na tùha ñaha xii-í te naníhí tàhú-yu. Te cùu-yu dàtná cue mbéé quiti xíquee cùrrálí-xi cuáhá<sup>n</sup>-güedi núú cáá ité caxi-güedi, te dàtnùní cuándihu-ná-güedi cùrrálí, duca<sup>n</sup> sǎtnahá-xi cùu-yu.

<sup>10</sup> Ñádúhú òré véxi-dé chi dùhu-dé, sǎhni-dé te dànaa-dé mbéé, dico yúhú chi véxi-í cuendá sá naníhí tàhú-ndó te ío cudíí iní-ndó cùnu cuéchi-ndo núú Dùtú Ndiõxí ní caa ní quíhí<sup>n</sup>. <sup>11</sup> Te yúhú cùu-í dàtná ì<sup>n</sup> toli téé ío nèhe cuendá mbéé-xi, chi téé-án cuéi na cùu-dé sá cúú-xí mbéé-dǎ cuendá-ñǎ sá ná cǎcu-güedi. <sup>12</sup> Te núu ì<sup>n</sup> téé na còto ñaha xii-güedi, te téé-án cuendá-ni sá ñúhú yǎhu-dé xító-dǎ-güedi.

Te núu na quèní-dé sáá ì<sup>n</sup> quiti déé<sup>n</sup> te dàña-dé-güedi xìnu-dé, te ndìhi-güedi xité nuu ñaha quiti déé<sup>n</sup>-ǎ<sup>n</sup>, chi ñá díú mèi xítóhó-güedi cùu-dé. <sup>13</sup> Chi cuendá-ni sá ñúhú yáhu-dé xító-dě-güedi núu ñá túú nǎ ndìhú iní-dé cuèi na dándìhi ñaha quiti cuihna. <sup>14</sup> Te yúhú cùu-í dàtná ì<sup>n</sup> téé ío váha xító mbéé-xi, chi téé-á<sup>n</sup> da ì<sup>n</sup> da ì<sup>n</sup>-dì xìní-í-dé nàcuáa ndáa-di, te duca<sup>n</sup> xìní ñáhá-güedi xii-dé. Te duca<sup>n</sup> sǎtnahá-xi cùu yúhú ndìhi nchaa ñáyiu sàndáá iní ñáhá xii-í, chi yúhú xìní-í-yu te duca<sup>n</sup> mèé-yu xìní ñáhá-yu xii-í.

<sup>15</sup> Te ñá-ni duca<sup>n</sup> cùu-í ndìhi Tǎtá-í, chi xìní ñáhá-gǎ xii-í te xìní-í-gǎ. Te sáá nduu cùu-í cuendá nchaa ñáyiu sàndáá iní ñáhá xii-í. <sup>16</sup> Te ndècu-gǎ ñáyiu vátá quèndáá iní ñáhá-gǎ xii-í. Te xìní ñuhu-xi cundedóho-yu tnúhu-í te quèndáá iní ñáhá-yu cuendá ì<sup>n</sup>-nǎ ichi cuú-yu, te duca<sup>n</sup> cùndecu ì<sup>n</sup>-ná téé coto ñaha xii-yu cuu-dé dàtná ì<sup>n</sup> tòlí-yu, te téé coto ñaha xii-yu-á<sup>n</sup> cuú yúhú.

<sup>17</sup> Te Tǎtá-í ío cùdíí iní ñáhá-gǎ xii-í cuendá sá sáá ì<sup>n</sup> nduu te cuú-í, te cuú-í chi duca<sup>n</sup> cǎchí iní-í, te ñá díú sǎ cuú iní ñáyiu ñuyíú-a cuú-í, te cuú-í dico ndoto-í. <sup>18</sup> Te vá yóo ì<sup>n</sup> te ndacu cahni ñaha xii-í, te núu ñá díú sǎ cuú iní mèé-í cuú-í. Te dàtná-ni cùu iní-í sá cùu-í te ñá-ni duca<sup>n</sup> ndòto-í chi duca<sup>n</sup> ñá cachí Tǎtá-í Dútú Ndióxi cunduu —cǎchí-gǎ xáha<sup>n</sup>-gǎ xii-güedé.

<sup>19</sup> Te sá dúcá<sup>n</sup> ñá cáhá<sup>n</sup>-gǎ te ñá ní cùu ì<sup>n</sup>nuu tucu ñáyiu isràél. <sup>20</sup> Te davá-yu ní xítñahá-yu:

—¿Ná cuendá sàndáá-tu iní-ndó tnúhu cǎhá<sup>n</sup> téé-ǎ<sup>n</sup>, te yucu ñávǎha ndècu ndìhi-dé, lúcú téé-ǎ<sup>n</sup>? —cǎchí-yu xítñahá-yu.

<sup>21</sup> Te davá-yu ní xítñahá-yu:

—¿Náa xìní-ndó ì<sup>n</sup> téé ndècu ndìhi yucu ñávǎha duha váha cǎhá<sup>n</sup>-dé? ¿Náa xìní-ndó núu ndàcu yucu ñávǎha cada tátna-xi núu ì<sup>n</sup> téé cuáá te ndúha? —cǎchí-yu xítñahá-yu.

### *Ñáyiu isràél dáquèe tíhú-yu Jèsús*

<sup>22</sup> Te ndì tnahá cuía ndádá cǎhnú-yu vico veñúhu cǎhnu sá ío cùnuu ñuú Jerusálén, te mei yóo quidé vixi<sup>n</sup>-xi quidé-yu vico-á<sup>n</sup>. <sup>23</sup> Te corrèdór veñúhu-á<sup>n</sup> nání-xí Sàlomón, te xía<sup>n</sup> xicá cùu Jèsús. <sup>24</sup> Te ní chítú níhnú ñáyiu isràél núu-gǎ, te ní xáhá<sup>n</sup>-yu:

—¿Ná ndéé òré cachí tnúhu ndáá-n, te núu sá Crístú Yáá ní tendaha Yǎ Ndióxi véxi ñuyíú-a cùu-n, àdi ná téé cùu-n?, cáhá<sup>n</sup>-ni-n —cǎchí-yu xáhá<sup>n</sup>-yu xii-gǎ.

<sup>25</sup> Te ní xáha<sup>n</sup> Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái núu sǎ quidé-í sá ñá táuchíú<sup>n</sup> Tǎtá-í cada-í, te cùu-xi ì<sup>n</sup> sá cùtnùni iní-ndó nǎ téé cùu-í. <sup>26</sup> Dico nchòhó ñá sàndáá iní-ndó, chi ñá túú cùu-ndo ñáyiu ní chitnahá ñáhá xii-í. <sup>27</sup> Chi nchaa ñáyiu ní chitnahá ñáhá xii-í cùu-yu dàtná cue mbéé quiti xíndecu ndìhi xítóhó-xi chi nùcúhu<sup>n</sup> ndudú-güedi xítóhó-güedi, te duca<sup>n</sup> nàquiní ñáhá-ní xítóhó-güedi xii-güedi. Duca<sup>n</sup> sǎtnahá-xi cùu nchaa ñáyiu ní chitnahá ñáhá xii-í. <sup>28</sup> Te yúhú cada-í te nduu táhú-yu cundecu ndìhi ñáhá-yu xii-í ni caa ni quíhí<sup>n</sup> te vá ì<sup>n</sup> nduu-gǎ cuíta nihnú-yu, te ni vá yóo ì<sup>n</sup> ndacu naquendeé ñáhá xii-yu ndaha-í. <sup>29</sup> Chi Tǎtá-í ní taxi cuendá ñáhá-gǎ xii-yu. Te ío cùnuu-gǎ núu xía<sup>n</sup> vá yóo ì<sup>n</sup> ndacu naquendeé ñáhá xii-yu ndaha-gǎ. <sup>30</sup> Yúhú ndìhi Tǎtá-í Dútú Ndióxi ì<sup>n</sup>-ni cùu-ndí —cǎchí-gǎ xáha<sup>n</sup>-gǎ xii-yu.

<sup>31</sup> Te ní quehe<sup>n</sup> tucu ñáyiu isràél yúu cuáha ñáhá-yu xii-gǎ ní cùu.

<sup>32</sup> Te ní xáha<sup>n</sup>-gǎ xii-yu:

—Ío cuéhé sǎ váha ní quide-í núu-ndó ñá chindee ñaha Tǎtá-í Dútú Ndióxi. ¿Te ndèdacáa sá ñá tñahá iní-ndó núu cuèni-ndó cuáha ñaha-ndo yúu xii-í-í? —cǎchí-gǎ xáha<sup>n</sup>-gǎ xii-yu.

<sup>33</sup> Te ní xáha<sup>n</sup> ñáyiu isràél:

—Ñá díú cuendá nchaa sá váha ni quide-n cuini-ndí cuáha ñaha-ndí yúu xii-n, chi ì<sup>n</sup> dñi-ni sá ío cǎhá<sup>n</sup> úhú-n cuendá Yǎ Ndióxi. Te dñí ì<sup>n</sup> téé ñuyíú-a cùu-n te cǎchí-n sá cùu-n Ndióxi —cǎchí-yu xáhá<sup>n</sup>-yu xii-gǎ.

<sup>34</sup> Te ní xáha<sup>n</sup> Jèsús:

—Núu tütú Yǎ Ndióxi sá ndécú ndìhi-ndo cáhá<sup>n</sup>-xi nàcuáa ní cáhá<sup>n</sup>-gǎ, te duha ní cachí-gǎ: “Nchòhó quidé-ndó núu-í”, duha ní cachí-gǎ. <sup>35</sup> Te ñaha-o sá vá cuú quèndé nihnu-o tnúhu yòdo tnuní núu tütú Yǎ Ndióxi, chi mee-gǎ ní cachí-gǎ sá cáda-yu núu-gǎ, te vá cǎchí-ó sǎ ñá ndáá. <sup>36</sup> Te núu duca<sup>n</sup> ñá cáhá<sup>n</sup>-gǎ sá núu-gǎ quidé nchaa ñáyiu ní sàndáá iní ñáhá xii-gǎ ñá, ¿te ná cuendá cùdèé<sup>n</sup>-ndó núu yúhú sá cǎchí-í sá

cúu-í Déhe-gá? Te mee Yă Ndiöxí ní tendaha ñaha-gá xii-í véxi-í ñuyú-a sá cáda-í chiú-gá. <sup>37</sup> Te núu ñá túu quide-í nàcuáa ní táuchíú<sup>n</sup> Tătà-í cada-í ñá, te vá quindáa iní ñáhá-ndó. <sup>38</sup> Te núu quide-í ñá, te cuëi vá quindáa iní ñáhá-ndó xii mee-í dico quindáa iní-ndó nchàa chiu<sup>n</sup> quide-í. Duca<sup>n</sup> te cutnùní ndáa iní-ndó sã Yă Ndiöxí ndécú ndìhi-í te ì<sup>n</sup>-ni cùu-ndí —càchí-gá xáha<sup>n</sup>-gã xií-yu.

<sup>39</sup> Te ní cuiní-güedé tñi ñaha tùcu-güedé xii-gá quihí<sup>n</sup>-gá vecaá ní cùu, dico ní xinu núu ñáhá-gã xii-güedé.

<sup>40</sup> Te ní xica-gá cuáhá<sup>n</sup>-gá ndàa ingá xio yúte Jòrdán núu ñí xóo dacuàndute ndí Juàá ñáyiú ndéé díhna, yàcá<sup>n</sup> ní xíndecu-gá. <sup>41</sup> Te yàcá<sup>n</sup> ío vai ñáyiú ní sáhá<sup>n</sup> ní cáhá<sup>n</sup> ndìhi ñaha xii-gá, te ní xitnàhá-yu:

—Ndí Juàá, cuëi ñá túu ní quide ndí sá vã yóo tnahí ndàcu cada dico ndáa ní cáhá<sup>n</sup> ndí, chi dàtná-ni ní cáhá<sup>n</sup> ndí quide té-a —càchí-yu xitnàhá-yu.

<sup>42</sup> Te yàcá<sup>n</sup> ío vai-yu ní sándáa iní ñáhã-yu xii-gá.

## 11

### *Ní xihí té Lăzarú*

<sup>1</sup> Ñuú Bètaniá ní xíndecu ì<sup>n</sup> té ní xínani-dé Lăzarú. Te càhú víhí ñí tnahá-dé ní cuhú-dé, te ní xíndecu ndìhi-dé cue cúha-dé tá Màriá ndìhi tá Màrta chi xiá<sup>n</sup> ñuú-yu.

<sup>2</sup> Te tá Màriá-án cúu-xí xíchí ñí sódó àcítí sáhá<sup>n</sup> tnámí sáhá Jèsús, te ní nadayìchí-xi sáhá-gã ndìhi idi díquí-xi. Te cuendá sá cùhú cúha-yu té Lăzarú, <sup>3</sup> núu ní tendàhá-yu ñáyiú ñaha tnúhu cuáhá<sup>n</sup> núu Jèsús, te xáhã<sup>n</sup>-yu xii-gá:

—Mèstrú, téé ío cùu iní-n ìo càhú tnahá-dé cùhú-dé —càchí-yu xáhã<sup>n</sup>-yu xii-gá.

<sup>4</sup> Te sá dúcá<sup>n</sup> càa tnúhu ní sáá, núu ní xáha<sup>n</sup> Jèsús xií-yu:

—Dico cuéhé-ã<sup>n</sup> chi vá cùu-dé sá cùu dúcá<sup>n</sup>-dë, chi Yă Ndiöxí cuiní-gá sá quini-yu nchaa sá cáda-gã cuendá chiñuhu ñáhã-yu xii-gá, te ñiú-ni duca<sup>n</sup> chiñuhu ñáhã-yu xii yúhú Déhe-gá —càchí-gá xáha<sup>n</sup>-gã xií-yu.

<sup>5</sup> Te cuëi ío cùu iní ñáhã Jèsús xii té Lăzarú ndìhi cue cúha-dé <sup>6</sup> dico òré ní níhí-gã tnúhu, te ní cuyaa-gã úu-gá nduu

núu ndécú-gã. <sup>7</sup> Te ní xáha<sup>n</sup>-gã xii cue téé xica cuu ndìhi-gá:

—Na quihí<sup>n</sup> tucu-o òdistritú Jùdeá —càchí-gá xáha<sup>n</sup>-gã xii-güedé.

<sup>8</sup> Te ní xáha<sup>n</sup> cuè téé xica cuu ndìhi-gá xii-gá:

—Mèstrú, vitna-ni cuiní cue téé isràél xíndecu yàcá<sup>n</sup> cuáha ñaha-güedë xii-n yúú ní cùu, ¿te cuiní-ni tucu-n quihí<sup>n</sup>-n-ú? —càchí-güedé xáha<sup>n</sup>-güedë xii-gá.

<sup>9</sup> Te ní xáha<sup>n</sup> Jèsús:

—Úxúú òré cúu ì<sup>n</sup> nduu, te núu nduu na càca cuu-o, te ñá túu ñá candaundeé-ó chi cùtnuní núu-ó chi ditó. <sup>10</sup> Dico núu niú ná càca cuu-o, te ío ná candaundeé-ó chi vá cùtnuní núu-ó —càchí-gá xáha<sup>n</sup>-gã xii-güedé.

<sup>11</sup> Te ní xáha<sup>n</sup> Jèsús:

—Té Lăzarú téé ío váha tnahá tnúhu ndìhi-o ñí xidí-dé dico quihí<sup>n</sup>-ó chi ndocani-o-dë —càchí-gá xáha<sup>n</sup>-gã xii-güedé.

<sup>12</sup> Te ní xáha<sup>n</sup>-güedë xii-gá:

—Mèstrú, te núu xidí-dé te váa sa ta ndúha-dé cuáhá<sup>n</sup> —càchí-güedé xáha<sup>n</sup>-güedë xii-gá.

<sup>13</sup> Duha ní cáhá<sup>n</sup> Jèsús, chi té Lăzarú sa ní xihí-dé te cue téé xica cuu ndìhi-gá ní sani iní-güedé sá ñí xidí ndisa-dé. <sup>14</sup> Te Jèsús ní xáha<sup>n</sup> ndáá-gã xii-güedé:

—Sa ní xihí té Lăzarú. <sup>15</sup> Váha-gá sá ñá ní sáhá<sup>n</sup>-í quíngoto-í-dé, chi ndëcu ingá chiú<sup>n</sup> cada-í quini-ndó, te quindáa iní ñáhã-gã-ndó xii-í, te vitna na quihí<sup>n</sup>-ó núu ndécú yiqui cuñú ndí —càchí-gá xáha<sup>n</sup>-gã xii-güedé.

<sup>16</sup> Te té Măxí téé xáha<sup>n</sup>-güedë cuächí ní xáha<sup>n</sup>-dë xii dava-gã-güedé:

—Na quihí<sup>n</sup>-ó nchàa-o chi yàcá<sup>n</sup> cuú-ó ndìhi-dé —càchí-dé xáha<sup>n</sup>-dë xii-güedé.

*Jèsús càhá<sup>n</sup>-gá sá cuëi na cùu ñáyiú dico ndotó-yu cundécú-yu ndìhi-gá*

<sup>17</sup> Te òré ní sáá Jèsús ñuú Bètaniá, te ní xáhã<sup>n</sup>-yu sá sà ní cuu cúmí nduu ní xihí té Lăzarú. <sup>18</sup> Te ñuú-án cáá yàtni-ni-gá ñuú Jerusàlén, dàtná cuádava-ná òré cuhú<sup>n</sup>-o ìchi te saá-ó. <sup>19</sup> Núu xiá<sup>n</sup> vai ñáyiú isràél ní sáhã<sup>n</sup>-yu ní cáhá<sup>n</sup> ndìhi-yu tá Màrta ndìhi cùhú-xi tá Màriá, te ní sãñáhã-yu tnúhu ndee iní sá dúcá<sup>n</sup> ñí xihí cúha-yu. <sup>20</sup> Te

ní níhí tǎ Mǎrta tnúhu sá ñúhú Jèsús ichi cuáhá<sup>n</sup>-gá núú ndécú-yu núú ní sáhá<sup>n</sup>-xi ní sátnahá-xi-gá, te cùhú-xi tá Mǎriá ní ndóo-xi vehe. <sup>21</sup> Te òré ní naníhí tǎ Mǎrta Jèsús, te ní xáha<sup>n</sup>-xi xii-gá:

—Mèstrú, te núú dicó ní xǐndecu-n ìha te vǎ cùú cúha-ndí ní cùu. <sup>22</sup> Te cuèi vitna te núú ná sá ná càcá<sup>n</sup>-n nùú Yǎ Ndiòxí te taxi-gá xii-n —càchí-xi xáha<sup>n</sup>-xi xii-gá.

<sup>23</sup> Te ní xáha<sup>n</sup> Jèsús:

—Vǎ ndìhú iní-n chi ndoto cúha-n —càchí-gá xáha<sup>n</sup>-gǎ xii-xi.

<sup>24</sup> Te ní xáha<sup>n</sup> tǎ Mǎrta:

—Ndáá chi sa xìní-í sá ndótó-dě ná quǐtnahá nduu ndòto nchaa ñáyiu ní xíhí —càchí-xi xáha<sup>n</sup>-xi xii-gá.

<sup>25</sup> Te ní xáha<sup>n</sup> Jèsús:

—Yúhú dandòto-í-yu cuendá cundecú-yu ni caa ni quíhí<sup>n</sup> ná sàá nduu. Te nchaa ñáyiu na quìndáá iní ñáhá xii-í, te cuèi na cùú-yu dico ndotó-yu cundecu-í ndihí-yu ni caa ni quíhí<sup>n</sup>. <sup>26</sup> Te nchaa ñáyiu ndècu vívú ñuyúú-a te núú na quìndáá iní ñáhǎ-yu xii-í, te cundecu ndihí-í-yu ni caa ni quíhí<sup>n</sup>. ¿Sàndáá iní-n tnúhu-a ñǎ? —càchí-gá xáha<sup>n</sup>-gǎ xii tá Mǎrta.

<sup>27</sup> Te xáha<sup>n</sup>-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yá Ndiòxí, Yaá ní tendaha-gǎ véxi ñuyúú-a —càchí-xi xáha<sup>n</sup>-xi xii-gá.

### *Jèsús ndàhí-gá núú ní nguíndüxi té Lǎzarú*

<sup>28</sup> Sátá dúcá<sup>n</sup> ní cáhá<sup>n</sup>-xi te ní sáhá<sup>n</sup> ngana-xi cùhú-xi tá Mǎriá, te dayuhu ní xáha<sup>n</sup>-xi:

—Yàcá<sup>n</sup> ní quexìo Mèstrú, te càna ñaha-dé xii-n —càchí-xi xáha<sup>n</sup>-xi.

<sup>29</sup> Te sá dúcá<sup>n</sup> xáha<sup>n</sup> cùhú tǎ Mǎriá sá cáná ñàha Jèsús xii-xi, núú ndìhí-ni ní xica-xi cuáhá<sup>n</sup>-xi núú ndécú-gǎ. <sup>30</sup> Te Jèsús vátá quǐhu-gá xití ñúú, chi ndècu-ni-gá núú ní sáhá<sup>n</sup> tnahá ñáhá tǎ Mǎrta. <sup>31</sup> Te ñáyiu isràél ndécú sǎñaha tnúhu ndee ìní xii tá Mǎriá ndihí cùhú-xi ní sani iní-yu sá cuáhá<sup>n</sup>-xi núú yíndüxi cúha-xi ndáhyú-xi ní cáhá<sup>n</sup>-yu, núú nchìcú<sup>n</sup>-yu-xi cuáhá<sup>n</sup>.

<sup>32</sup> Te ní sáá tá Mǎriá núú ndécú Jèsús te ní nguíñí xití-xi nùú-gǎ, te xáha<sup>n</sup>-xi xii-gá:

—Mèstrú, te núú dicó ní xǐndecu-n ìha te vǎ cùú cúha-ndí ní cùu —càchí-xi xáha<sup>n</sup>-xi xii-gá.

<sup>33</sup> Te sá ní xiní Jèsús ndàhyú tá Mǎriá ndihí ñáyiu isràél nchìcú<sup>n</sup> ñáhá cuáhá<sup>n</sup>, xíá<sup>n</sup> ío ní cuyica ìní-gá. <sup>34</sup> Te ní xáha<sup>n</sup>-gǎ xii-yu:

—¿Ndèé ní taxi ndecu-ndo yìqui cuñú-dé-i? —càchí-gá xáha<sup>n</sup>-gǎ xii-yu.

Te ní xáhá<sup>n</sup>-yu:

—Mèstrú, néhé ná quíhí<sup>n</sup>-ó te quiní-n —càchí-yu xáhá<sup>n</sup>-yu xii-gá.

<sup>35</sup> Te ní ndáhyú-gá tnahá-gá. <sup>36</sup> Te ní xitnàha ñáyiu isràél:

—Súúni cùu iní-dé ndíi ni cùu —càchí-yu xitnàhá-yu.

<sup>37</sup> Te davá-yu xitnàhá-yu:

—Tée-a ní quide tátna-dé núú tée cuàá te ní ndúha. ¿Te nása ní cuu núú ñá túú ní quide tátna-dé té Lǎzarú cuendá sá vǎ cùú-dé ní cùu-i? —càchí-yu xitnàhá-yu.

### *Jèsús dándòto-gá té Lǎzarú*

<sup>38</sup> Te ío ní cuyica tucu iní Jèsús òré ní quexìo-gá yuhu yàú núú ní chihi-güedé yìqui cùñú té Lǎzarú. Te yuhu yàú-á<sup>n</sup> ndèdí ñ<sup>n</sup> yúú. <sup>39</sup> Te ní xáha<sup>n</sup> Jèsús xii-yu:

—Chí xócàni yúú-á<sup>n</sup> —càchí-gá xáha<sup>n</sup>-gǎ xii-yu.

Te ní xáha<sup>n</sup> tǎ Mǎrta cúha tée ní xíhí-á<sup>n</sup>:

—Mèstrú, sa tucu sáhá<sup>n</sup>-dé chi sa ní cuu cùmí nduu sá ní xíhí-dé —càchí-xi xáha<sup>n</sup>-xi xii-gá.

<sup>40</sup> Te ní xáha<sup>n</sup> Jèsús:

—¿Náa ñá díú ní cachí-í sá nùu na quìndáá iní-n, te quiní-n sǎ ìo càhnu cuu Yá Ndiòxí? —càchí-gá xáha<sup>n</sup>-gǎ xii-xi.

<sup>41</sup> Te ní xócáñi-yu yúú ndèdí yuhu yàú-á<sup>n</sup>. Te ní ndacoto-gá andü, te ní xáha<sup>n</sup>-gǎ xii Tǎtá-gǎ Dútú Ndiòxí:

—Táu, ndàcá<sup>n</sup> táhù-í núú-n sǎ ní tédoho-n tnúhu ní cáhá<sup>n</sup>-í. <sup>42</sup> Te yúhú sa ñaha-í sá ncháá-ni òré ndèdóho ñaha-n xii-í, dico duha càhá<sup>n</sup>-í cuendá sá ná təcú dóho nchaa ñáyiu ndècu iha cuendá quìndáá iní-yu sá díú-n ní tendaha ñaha-n xii-í véxi-í ñuyúú-a —càchí-gá xáha<sup>n</sup>-gǎ xii Dútú Ndiòxí.

<sup>43</sup> Te sátá dúcá<sup>n</sup> ní cáhá<sup>n</sup>-gá ndihí Yá Ndiòxí, te níhí ní cáhá<sup>n</sup>-gá xáha<sup>n</sup>-gǎ xii tée ní xíhí-á<sup>n</sup>:

—¡Lǎzarú, tandèe xía<sup>n</sup>! —càchí-gá xáha<sup>n</sup>-gǎ xii-dé.



44 Te ní ndee téé ní xihí-án yaú-án, te ndùtu dóo cuíñí ndàha-dé ndihí sáhá-dě, te dàhu tucu ìñ dóo nùú-dě. Te ní xáha<sup>n</sup> Jèsús xií-yu:  
—Chí nándàxi-dé te dañà-ndo-dě ná cáca-dě —càchí-gá xáha<sup>n</sup>-gá xií-yu.

*Ndùcu-güedé nàcuáa cada-güedé cahni-güedé Jèsús*

(Mt. 26:1-5; Mr. 14:1-2; Lc. 22:1-2)

45 Te nchaa ñáyi nchìcú<sup>n</sup> ñáhá xii tá Màriá cuáhán ío vài-yu ní sándáá iní-yu Jèsús sá ñí xiní-yu nàcuáa ní quide-gá.  
46 Dico davá-yu ní sáhá<sup>n</sup>-yu núú cuè téé cùu fariséú, te ní caní-yu cuèndú núú-güedé nàcuáa ní quide Jèsús. 47 Te cue téé cùu fariséú ndihí cue dútú cùnùu ní nataká-güedé ní xóo-güedé jündá, te ní xitnàha-güedé:

—¿Nása cada-o?, chi téé-án ío vài sá vǎ yõ tnahí ndàcu cada quide-dé. 48 Te núu na dàña ío te nchaa ñáyi quindáá iní ñáhá-yu xii-dé, te quixi cue téé ñuú Rómá dangoyo-güedé veñúhu-o te danàa-güedé nchaa ñuú-ó —càchí-güedé xitnàha-güedé.

49 Te ìñ cue téé-án nání-dě Caifás, te cùnùu-gá-dé núú dàva-gá cue dútú cuíá-án, te ní xáha<sup>n</sup>-dě xii-güedé:

—Nchòhó ni lùha ñá túú cùtnuní iní-ndó.  
50 Te ni ñá sàha-ndo cuèndá sá vǎha-gá tnahá-ó, te núu na cùú ìñ-ni téé cuèndá nchaa ñáyi isràél, te ñá díú sǎ dánàa ñaha-güedé xií-yu —càchí-dé xáha<sup>n</sup>-dě xii-güedé.

51 Dico té Caifás chi ñá díú sǎ cúú iní méé-dě ní cáhá<sup>n</sup>-dé, chi cuèndá sá cuíá-án ñí cùnùu-dě núú cuè dútú, núu xíá<sup>n</sup> Yǎ Ndiõxí ní dácáhu iní ñáhá-gǎ nàcuáa cáhá<sup>n</sup>-dé sá Jèsús cuú-gá sá cúú-xí nchàa ñáyi isràél.

52 Te ñá díú cuèndá mee-ni ñáyi-án cuú-gá, chi cuú-gá tnahá cuèndá nchaa ñáyi ní sándáá iní ñáhá xii-gá, ñáyi nchiténuu ñihí ñuyíú, te ìñ-nǎ cuú-yu ndihí-gá. 53 Núu ndéé nduu-án ñí ndatnúhu cue téé cùnùu núú ñáyi isràél nàcuáa cada-güedé cahni-güedé Jèsús.

54 Te xíá<sup>n</sup> núu ñá ní xica cuu-gá Jèsús quini ñáhá ñáyi isràél, te ní quee-gá cuáhán-gá ñuú Efraín, ìñ ñuú cáa yàtni yucu, yàcán ní ngüíñí-gá ndihí cue téé xica cuu ndihí-gá.

55 Te ta cùyatni nduu cadá-yu vico páscaá. Te cuéhé ñáyi ní queé-yu ñuú-yu

cuáhán-yu ñuú Jerusàlén cuèndá sá sà ndihí-yu ncháa-yu nduu íí, te tnahá nduu vico páscaá. 56 Te yàcán nándúcú-yu Jèsús ní cùu te ñá túú-gǎ òré-án, te ní naníhí tnahá-yu xití veñúhu, te xitnàhá-yu:

—¿Nása sàni iní-ndó-í? ¿Quixi Jèsús vico án ñáhá? —càchí-yu xitnàhá-yu.

57 Te cue téé cùu fariséú ndihí cue dútú cùnùu sa ní xáha<sup>n</sup>-güedé xii ñáyi sá núu ndèda-ni cáa-yu xiní-yu núú ndécú Jèsús te na cáhá<sup>n</sup>-ni-yu cuèndá tñi ñaha-güedé xii-gá.

## 12

*Ìñ ñadìhí chíhí-án Jèsús acití*  
(Mt. 26:6-13; Mr. 14:3-9)

1 Ìñú-gá nduu cùmání tnahá vico páscaá, te ní sáhán Jèsús ñuú Bètaniá, ñuú té Lǎzarú téé ní dándótó-gǎ. 2 Te xíá<sup>n</sup> ñí cadúha-yu sá ñí cudini Jesús. Te tá Màrta ní sani-xi cóhó, te té Lǎzarú yíhí-dě mèsá ndihí Jèsús, ndihí dava-gá-güedé xéxí-güedé. 3 Te tá Màriá néhé-xí cuádava lǐtrú acití sáhán tnamí sǎ ìo ndèyáhu, te acití-án ñí cuáha mee-ni yúcú nǎrdú, te ní sódó-xi sáhá Jèsús, te ní nadayíchí-xi ndihí idi díquí-xi sáhá-gǎ. Te ñihí xití vehe ní xité nuu dicó acití-án.  
4 Te té Jüdás déhe té Xímú Iscàrioté diu-ni ìñ téé xica cuu ndihí-gá, téé cuáha cuèndá ñáhá xii-gá núú cuè téé cùu úhú iní ñáhá ñí xáha<sup>n</sup>-dě xii-gá:

5 —¿Ná cuèndá ñá ní cùyáhu acití-a sá ùní cièndú díhú<sup>n</sup> denàriú cuu cuèndá ñáyi ndàhú? —càchí-dé xáha<sup>n</sup>-dě xii-gá.

6 Dico sá dúcán ñí cáhá<sup>n</sup> té Jüdás chi ñá díú sǎ ndísá ñuhu iní-dé ñáyi ndàhú chi dicó-ni ìñ ñádúhú cúú-dě, chi diu-dé néhé cuèndá-dé díhú<sup>n</sup>-güedé nchaa-güedé te ní xóo duhu ñaha-dé xii-güedé. 7 Te ní xáha<sup>n</sup> Jèsús:

—Daña, vá dásatú-n iní xíchí-a na tàxúha nahi-xi acití-a, chi nándihí ndéé òré ná nguindüxi-í. 8 Chi nchòhó chi cuhú<sup>n</sup> tnahá-ni ñáyi ndàhú tnuú-ndó, dico yúhú chi vá ncháá nduu cundecu ndihí ñaha-í xii-ndo —càchí-gá xáha<sup>n</sup>-gǎ xii-dé.

*Tnahá té Lǎzarú cuini-güedé cahni ñaha-güedé xii-dé*

<sup>9</sup> Te vai ñáyiú isràél ní níhí-yu tnúhu sá ndécú Jèsús ñúú Bètaniá. Te ní sáhá<sup>n</sup>-yu cuendá quiní-yu-gá, te quiní-yu tnàhá té Lázaru té ní dándótó-gă. <sup>10</sup> Te cue dútú cúnú ní ndatnúhu-güedé ní cuu ñ<sup>n</sup>nuu-güedé cuendá sá cáhni-güedé tnàhá té Lázaru ní cùu, <sup>11</sup> chi ñ<sup>n</sup> cuendá té-á<sup>n</sup> ní cuu cuéhé ñáyiú isràél tá dàña ni-hnú-yu-güedé cuáhá<sup>n</sup> cuendá sá ní sándáá iní-yu Jèsús.

*Jèsús cuánguñhu-gá ñúú Jerusàlén*

*(Mt. 21:1-11; Mr. 11:1-11; Lc. 19:28-40)*

<sup>12</sup> Te nduu tnèé-á<sup>n</sup> vai ñáyiú ní quexiú ñúú Jerusàlén cuendá cundecú-yu vico, te ní níhí-yu tnúhu sá Jèsús sáá-gá tnàhá-gá cundecu-gá vico-á<sup>n</sup>, <sup>13</sup> núu ní xehndé-yu ndaha yùtnu ñúú, te nèhé-yu ní sáhá<sup>n</sup> ní sátnahá ñáhă-yu xii-gá. Te níhi ní cáhă<sup>n</sup>-yu, te cächí-yu:

—Ío cahnú cuu Yá Ndiöxí! Te duca<sup>n</sup>-ni ño cahnú cuu Yaá ní tendaha-gă véxi quindaha ñaha xii-o —duha ní cachí-yu.

<sup>14</sup> Te Jèsús ní níhí-gă ñ<sup>n</sup> bürü, te yòdo-gá-di cuáhá<sup>n</sup>. Te duca<sup>n</sup> ní cuu chi ní quee ndáá-xi nàcuáa cáhă<sup>n</sup>-xi núu tütú Yá Ndiöxí núu cächí-xi:

<sup>15</sup> Vá yuhú nchòhó cue ñáyiú ndècu ñúú Sìón, chi iha véxi té yindaha ñaha xii-ndo yodo-dé ñ<sup>n</sup> bürü.

Duha cächí-xi núu tütú-gá. <sup>16</sup> Dico cue té xica cuu ndihí Jesús ñá ní ndàcu iní-güedé nàcuáa cáhă<sup>n</sup>-xi núu tütú Yá Ndiöxí nàcuáa cada Jèsús. Dico sátá cuándaa-gá andiú cada cahnú ñaha Tátá-gă xii-gá, te ní ndacu iní-güedé sá dúcá<sup>n</sup> yòdo tnuní nàcuáa cada-gá, te duca<sup>n</sup> ní cuu.

<sup>17</sup> Nchaa ñáyiú ní xíndecu ndihí Jèsús òré ní dándótó-gă té Lázaru, ya yàcá<sup>n</sup> ní caní-yu cuendú núu ñáyiú nàcuáa ní quide ñaha-gă xii-dé. <sup>18</sup> Te vai-yu ní sáhă<sup>n</sup>-yu núu ndécú Jèsús cuendá sá ní níhí-yu tnúhu ní quide-gá sá vá yòo tnàhí ndàcu cada. <sup>19</sup> Te cue té cùu fariséú ní xitnàha-güedé:

—Ní xito-ndo nă ñá túú nàndihí sá quidé-ó-vá, chi nchaa ñáyiú ní chinchícú<sup>n</sup> ñáhă-yu xii-dé —cächí-güedé xitnàha-güedé.

*Ñáyiú ñá túú cùu ñáyiú isràél nánducú-yu Jèsús*

<sup>20</sup> Te tnàhá ñáyiú ñá túú cùu ñáyiú isràél ní sáhă<sup>n</sup>-yu vico ñúú Jerusàlén ní quide cahnú-yu Yá Ndiöxí. <sup>21</sup> Te ñáyiú-á<sup>n</sup> ní sáhă<sup>n</sup>-yu núu té Lìpé té ñúú Betsaidá, te ñúú-á<sup>n</sup> yíndèhu-xi distritú Galileá. Te ní xáhă<sup>n</sup>-yu xii-dé:

—Tátá, vá cündèe iní-n cächí tnúhu-n ñúu ndèe ndécú Jèsús, chi cuíní-ndí cáhă<sup>n</sup> ndihí-ndí-gá —cächí-yu xáhă<sup>n</sup>-yu xii-dé.

<sup>22</sup> Te té Lìpé ní naníhí-dé té Ndríxí te ní xáha<sup>n</sup>-dè nàcuáa cáhă<sup>n</sup>-yu, te ndí ndúu-güedé ní sáhă<sup>n</sup>-güedé ní xáha<sup>n</sup>-güedé xii Jèsús nàcuáa cáhă<sup>n</sup>-yu. <sup>23</sup> Te ní xáha<sup>n</sup> Jèsús xii-güedé:

—Vitna ní cuyatni òré cada cahnú ñaha Tátá-í xii-í, te quiní-yu sá ño cahnú cuu yúhú Té cùu ñaní tnáhă-yu nchaa-yu. <sup>24</sup> Te na cächí tnúhu ndáá-í xii-ndo sá ñúu ñ<sup>n</sup> tatá vá ngává-xí núu ñúhú téhyú-xi ña, te ñ<sup>n</sup> duca<sup>n</sup> cùnduu-xi cundecu-xi. Dico ñ<sup>n</sup> tatá ná ngává núu ñúhú xínu déhe-xi, te xíá<sup>n</sup> nádàcayá tnáhă-xí, te mee-xi téhyú-xi. <sup>25</sup> Te nchaa ñáyiú ño ñúhu iní-xi cundecu ñuyíú-a ñá túú ñúhu iní-yu Yá Ndiöxí, te ñáyiú-á<sup>n</sup> cuíta nihnú-yu. Te nchaa ñáyiú ño ñúhu iní ñáhă xii Yá Ndiöxí, ñáyiú-á<sup>n</sup> cundecú-yu ndihí-gá ní caa ní quíhí<sup>n</sup>. <sup>26</sup> Te nchaa ñáyiú cuíní cunu cuechi ñú-í xini ñúhu-xi natuha ñahă-yu xii-í, te nduu táhú-yu cundecú-yu núu ñúhú-í cundecu-í. Te nchaa ñáyiú na cunu cuechi ñú-í, te cada cahnú ñaha Tátá-í xii-yu —cächí-gá xáha<sup>n</sup>-gă xii-güedé.

*Jèsús cáhă<sup>n</sup>-gá sá cáhni ñàha-güedé xii-gá*

<sup>27</sup> Te ní xáha<sup>n</sup> tucu-gá:

—Ío ndihú iní-í. Te cúñaha-í xii Tátá-í taunihnu ñaha-gă ñúu dícó sá cúú, dico vá cúú chi cuendá tnàhí-a véxi-í —cächí-gá xáha<sup>n</sup>-gă xii-güedé.

<sup>28</sup> Te ní xáha<sup>n</sup>-gă xii Tátá-gă Dútú Ndiöxí:

—Táu, cada nàcuáa ní sani iní-n cùnduu cuendá sá ná cádá cahnú ñaha ñáyiú xii-n —cächí-gá xáha<sup>n</sup>-gă.

Te duca<sup>n</sup> te ní tecú ní cáhă<sup>n</sup> Yá Ndiöxí ndèe andiú, te cächí-gá:

—Sa ní quide-í nàcuáa cachí ñáyiú sá ño cahnú cuu-í. Te cada tucu-í cuendá cada cahnú ñaha-gá-yu xii-í —cächí Yá Ndiöxí xáha<sup>n</sup>-gă xii Déhe-gá.

<sup>29</sup> Te nchaa ñáyiú xĩndecu ní tecú dóho-yu ní cáhá<sup>n</sup>-gá, dico ñá túú ní sàni iní-yu sá méé-gă ní cáhá<sup>n</sup>, chi davá-yu ní xĩtnàhá-yu sá ñũhu ní cáhá<sup>n</sup>, te davá-yu ní xĩtnàhá-yu sá ñ<sup>n</sup> espíritú xínú cuèchi núú Yă Ndiöxí ní cáhá<sup>n</sup>. <sup>30</sup> Te ní xáha<sup>n</sup> Jèsús xii-yu:

—Ñá díú cuendá yúhú ní cãhá<sup>n</sup> Yă Ndiöxí, chi ní cáhá<sup>n</sup>-gá cuendá sá nchòhó cund-edóho-ndo. <sup>31</sup> Te vitna ní sáá nduu càda ndáá Yă Ndiöxí cuèchi nchaa ñáyiú ñuyíú-a, te duca<sup>n</sup> te vá cúnùu-gá yucu ñávãha. <sup>32</sup> Te na càta caa ñaha-güedé xii-í núú cùrúxí, te xiá<sup>n</sup> cuú-í te níhí-yu tnúhu ni càa xico ñuyíú, te quindáá iní-yu tnúhu-í —càchí-gá xáha<sup>n</sup>-gă xii-yu.

<sup>33</sup> Duha ní cáhá<sup>n</sup>-gá cuendá cutnùnì iní-yu nàcuáa ndoho-gá òré cuú-gá. <sup>34</sup> Te ní xáhã<sup>n</sup>-yu xii-gá:

—Nihí-ndí tnúhu sá nũú tùtú yódó tnùnì tnúhu Yă Ndiöxí càhá<sup>n</sup>-xi sá Crìstú Yaá tendaha-gă quixi ñuyíú-a cundecu-gá ni caa ni quíhí<sup>n</sup>. ¿Te yòhó nása càhá<sup>n</sup>-tu-n sã ñ<sup>n</sup> tée cùu ñani tnáhã nchãa ñáyiú ñuyíú-a cahni ñaha-güedé núú cùrúxí? Te cachí tnúhu-n nã cúú tãe-á<sup>n</sup> —càchí-yu xáhã<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yúhú cúú-í dàtnã ñ<sup>n</sup> ñuhú dáyèhé ñuyíú-a, dico sacú-ni nduu ndècu ndihì ñaha-í xii-ndo. Te caca-ndo ìchi ndáá vitna dáyehé-gá-í núú-ndó chi na cùnee te vá cùtnùnì-gá núú-ndó ndèé ichi quíhí<sup>n</sup>-ndó. <sup>36</sup> Quindáá iní ñáhã-ndó xii-í vitna ndècu ndihì ñaha-gá-í xii-ndo dandixi túu-í iní-ndó, cuendá cutnùnì iní-ndó nàcuáa ndùu cuendá Yă Ndiöxí, te cuu-ndo dèhe-í —càchí-gá xáha<sup>n</sup>-gă xii-yu.

Te sátá dúcã<sup>n</sup> ñí cáhá<sup>n</sup> Jèsús, te ní quee-gá cuáhã<sup>n</sup>-gá ñ<sup>n</sup> núú vã ná nihí ñáhã<sup>n</sup>-yu xii-gá.

*Ñáyiú isràél ñá cuìnì-yu quindáá iní-yu Jèsús*

<sup>37</sup> Te cuèi ío vãi sá vã yõo tnàhí ndàcu cada ní quide Jèsús ní xinì-yu, dico ni dùca<sup>n</sup> ñá túú ní sàndáá iní-yu-gá. <sup>38</sup> Te duca<sup>n</sup> ñí quidé-yu chi dacuítí ñí quee ndáá-xi nàcuáa ní chídó tnùnì ndíi Chàíá ndíi ní cáhá<sup>n</sup> tnúhu Yă Ndiöxí ndéé sanaha nũú tùtú-gá núú càchí-xi:

Yòhó Yaá cúú Xĩtohó-í, vá yõo ñ<sup>n</sup> sàndáá iní tnúhu càhá<sup>n</sup>-ndí, Te vá yõo ñ<sup>n</sup> cùtnunì iní-xi sá ño càhnu cuu-n.

Duha ní chídó tnùnì ndíi Chàíá núú tùtú-gá. <sup>39</sup> Te ñá ní sàndáá iní-yu chi ní quee ndáá-xi nàcuáa ní chídó tnùnì tucu ndíi Chàíá núú tùtú Yă Ndiöxí nàcuáa cáhá<sup>n</sup> Jèsús:

<sup>40</sup> Mee Yă Ndiöxí ní quide-gá sá vã tècú tnùnì-yu,

chi ní dádãhu ndodo iní ñáhã-gă xii-yu, chi ío sáá iní-yu núú ñá ní cuìnì-gá-yu quindáá iní ñáhã<sup>n</sup>-yu xii-gá.

Te ni vã túhá ñáhã<sup>n</sup>-yu xii yúhú cuendá dacãcu nihnu-í-yu.

<sup>41</sup> Duha ní chídó tnùnì ndíi Chàíá nàcuáa cáhá<sup>n</sup> Jèsús chi ní xinì ndíi sá ño càhnu cuu-gá.

<sup>42</sup> Te cuèi duca<sup>n</sup> ñí cuu dico titní cue tée cùnùu núú ñáyiú isràél ní sàndáá iní ñáhã-güedé xii-gá. Dico ñá túú ní xõo cáhá<sup>n</sup> ndáá-güedé chi ní xõo yúhú-güedé sá vã dáñã-gă cue tée cùu fariséú quíhu-güedé veñúhu. <sup>43</sup> Chi ní xõo cudíí-gă iní-güedé sá càhá<sup>n</sup> ñáyiú dàcúúxí tnúhu càhá<sup>n</sup> Yă Ndiöxí.

*Ñáyiú ñá túú sàndáá iní tnúhu Jèsús cuíta nihnú-yu*

<sup>44</sup> Jèsús níhi ní cáhá<sup>n</sup>-gá, te càchí-gá:

—Nchaa ñáyiú na quindáá iní ñáhã xii-í, te ñá díú-ní mèe-í quindáá iní-yu, chi tnàhá Tãtà-í Yaá ní tendaha ñaha xii-í véxi-í ñuyíú-a quindáá iní-yu. <sup>45</sup> Te ñáyiú xinì ñáhã xii yúhú xinì-yu tnàhá Tãtà-í. <sup>46</sup> Te yúhú véxi-í dandixi túu-í iní ñáyiú ñuyíú-a cuendá cutnùnì iní-yu nàcuáa ndùu cuendá Yă Ndiöxí, te nchaa ñáyiú na quindáá iní ñáhã xii-í te vá cùndècu-gá-yu ichi cuèhé ichi duha. <sup>47</sup> Te núú òo davá-yu ndèdóho-yu nàcuáa càhá<sup>n</sup>-í te ñá túú tní<sup>n</sup>-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dàcuíta nihnu-í-yu, chi véxi-í sá dacãcu nihnu-í-yu. <sup>48</sup> Te nchaa ñáyiú na cùyíchí iní ñáhã xii-í te ñá túú quide cuendá-yu nàcuáa càhá<sup>n</sup>-í, te ñáyiú-á<sup>n</sup> ná sáá nduu te cuíta nihnú-yu chi ñá ní tní<sup>n</sup>-yu tnúhu ní cáhá<sup>n</sup>-í. <sup>49</sup> Te yúhú ñá túú càhá<sup>n</sup>-í tnúhu véxi iní mèe-í, chi mee Tãtà-í Yaá ní tendaha ñaha xii-í véxi-í ñuyíú-a ní cachí tnúhu-gá nàcuáa cunduu tnúhu cáhá<sup>n</sup>-í danèhé-í ñáyiú. <sup>50</sup> Te yúhú xinì-í sá tnúhu ní táuchíú<sup>n</sup> Tãtà-í cáhá<sup>n</sup>-í cúú-xí ñ<sup>n</sup> sá vãha sá cúú xii-ndo chi nduu táhú-ndó cundecu-ndo ndihì-gá ni caa ni quíhí<sup>n</sup>, núu

xíã<sup>n</sup> càhá<sup>n</sup>-í nchaa nàcuáa ní táuchíu<sup>n</sup>-gã —  
càchí-gá xáha<sup>n</sup>-gã xií-yu.

### 13

*Jèsús náquète-gá sáhá cuè téé xica cuu ndihi-gá*

<sup>1</sup> Te cùmání-gã tnahá vico pàscuá, te Jèsús sa nàha-gá sá sà ní cuyatni òré dándóo-gá ñuyíú-a, te ndaa-gá núú ndécú Tātá-gã. Te ío ní cuu iní-gá nchaa ñáyiú ní sándáá iní ñáhá xii-gá, te ní quide ndisa-gá sá ñi cuu iní ñáhá-gã xií-yu.

<sup>2-4</sup> Te ní quíhu yucu ñávãha díquí tẽ Jùdás déhe té Xímú Iscarioté, te ní sani iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá méé Yã Ndióxi Yáa cúu Tātá-gã ní sãñaha-gã tnúhu ndee iní xii-gá sá cáda-gã núú-gã, te nàha-gá sá díú núú Tātá-gã ní quee-gá véxi-gá ñuyíú-a. Te sáá nduu nàsáá tucu-gá núú Tātá-gã. Te cùdini Jèsús ndihi cue téé xica cuu ndihi-gá ní cùu, te ní ndacuíñí-gá yuhu mèsá, te ní taunuu-gá ñi<sup>n</sup> dóo níhnú-gã, te ní quehe<sup>n</sup>-gá ñi<sup>n</sup> dóo ní dácútú-gã núú yíquí-gã. <sup>5</sup> Te ní chihí-gá ndute ñi<sup>n</sup> tìná, te xíã<sup>n</sup> ñi<sup>n</sup> naquete-gá sáhá cuè téé xica cuu ndihi-gá, te ndihi dóo ndútú núú yíquí-gã-á<sup>n</sup> ñi<sup>n</sup> nadayíchí-gá sáhá-güedé.

<sup>6</sup> Te òré naquete-gá sáhá tẽ Xímú, àdi Pelú, ní cùu ní xáha<sup>n</sup>-dẽ xii-gá:

—Mèstrú, ¿te yòhó naquete-n sãhà-í-u? —  
càchí-dé xáha<sup>n</sup>-dẽ xii-gá.

<sup>7</sup> Te ní xáha<sup>n</sup> Jèsús:

—Vitna ñá cùtnùní iní-n sã quídè-í-a dico sáá nduu te cutnùní iní-n —càchí-gá xáha<sup>n</sup>-gã xii-dé.

<sup>8</sup> Te ní xáha<sup>n</sup> tẽ Pèlú:

—Yúhú chi vá ñi<sup>n</sup> ndùu te naquete-n sãhà-í —  
càchí-dé xáha<sup>n</sup>-dẽ xii-gá.

Te ní xáha<sup>n</sup> Jèsús:

—Te núu vá náquète-í sáhá-n á<sup>n</sup>, te vá cáda-gã-n cuèndá sá ndécú ndihi ñaha-í xii-n —càchí-gá xáha<sup>n</sup>-gã xii-dé.

<sup>9</sup> Te ní xáha<sup>n</sup> tẽ Pèlú:

—Te núu duca<sup>n</sup> te vá méé-ní sãhà-í naquete-n, chi naquete-n tnàhá ndaha-í ndihi díquí-í —càchí-dé xáha<sup>n</sup>-dẽ xii-gá.

<sup>10</sup> Te ní xáha<sup>n</sup> Jèsús xii-dé:

—Tée íchí ñi<sup>n</sup> xichi chi xini ñuhu-xi sá sáhá-na-dẽ ndoo, te duca<sup>n</sup> te nduu ndoo-dé ñihí-dé. Te nchòhó sa càndoo-ndo cuéj ñá ncháá-ndó càndoo —cachí-gá xáha<sup>n</sup>-gã xii-dé.

<sup>11</sup> Te duca<sup>n</sup> ñi<sup>n</sup> cáhá<sup>n</sup> Jèsús chi sa nàha-gá sá ñi<sup>n</sup> cuè téé-á<sup>n</sup> cuáha cuèndá ñáhá-güedé xii-gá núú cuè téé cùu úhú iní ñáhá, xiã<sup>n</sup> núu ní xáha<sup>n</sup>-gã sá ñá túú càndoo-güedé nchaa-güedé.

<sup>12</sup> Te sátá ñi<sup>n</sup> naquete-gá sáhá-güedé, te ní ndécuihnu-gá dóo-gã, te ní nucóo-gá yuhu mèsá, te ní xáha<sup>n</sup>-gã xii-güedé:

—¿Te ní cutnùní iní-ndó sã ñi<sup>n</sup> quide ñaha-í xii-ndo-ã<sup>n</sup>? <sup>13</sup> Te nchòhó váha-ní càhá<sup>n</sup>-ndó sã cùnùu-í, te ònanani ñaha tucu-ndo Mèstrú xii-í, te ndáá càhá<sup>n</sup>-ndó. <sup>14</sup> Te núu yúhú cúu-í Mèstrú, te cùu tucu-í téé cùnùu te nàquete-í sáhá-ndó, te ñi<sup>n</sup> duca<sup>n</sup> càda nchòhó tucu naquete sáhá tnàhá-ndó. <sup>15</sup> Yúhú sànu ichi ñaha-í xii-ndo nàcuáa cada-ndo. <sup>16</sup> Te na càchí tnúhu ndáá-í xii-ndo sã ñi<sup>n</sup> téé xinu cuechi ñá túú cùnùu-dé dácúúxí patróo<sup>n</sup>-dẽ, te ñi<sup>n</sup> téé xica chiú<sup>n</sup> ñá túú cùnùu-dé dácúúxí tẽ tendaha ñaha xii-dé cuáhá<sup>n</sup>-dẽ chiú<sup>n</sup>. Te duca<sup>n</sup> sãtnahá-xi cùu yúhú ndihi nchòhó. <sup>17</sup> Te núu ní cutnùní iní-ndó nàcuáa ní quide ñaha-í xii-ndo ña, te duca<sup>n</sup> càda tnaha-ndo te cuu váha iní ñáhá Yã Ndióxi xii-ndo.

<sup>18</sup> 'Yúhú, ñá túú càhá<sup>n</sup>-í cuèndá-ndó nchàa-ndo, chi yúhú sa nàha-í nàcuáa sàni iní ñi<sup>n</sup> ñi<sup>n</sup> nchòhó cue téé ní nanducu ñihnu-í tnuú nchaa ñáyiú ñuhu ichi cuehé ichi duha ní càchí-í chitnahá ñáhá-ndó xii-í. Chi dacuití sã quée ndáá-xi nàcuáa càhá<sup>n</sup>-xi núú tütú Yã Ndióxi núú càchí-xi: “Tée xèxi ndihi ñaha xii-í ngóo-dé cuu úhú iní ñáhá-dẽ”, duha càchí-xi núú tütú-gá.

<sup>19</sup> Te cùmání-gã sáá nduu càda ñaha-dé sá sání iní-dé, núu xiã<sup>n</sup> càchí tnúhu-í xii-ndo nàcuáa cada-dé, chi na sáá nduu-ã<sup>n</sup> te cutnùní iní-ndó sã yúhú cúu-í Cristú Yáa ní tendaha Yã Ndióxi véxi ñuyíú-a. <sup>20</sup> Te na càchí tnúhu ndáá-í xii-ndo sã nchàa ñáyiú na quèhe<sup>n</sup> cuèndá ñáhá xii cue téé tendaha-í cáhá<sup>n</sup> tnúhu-í, te cada iní-yu sá tnàhá yúhú ní quehe<sup>n</sup> cuèndá-yu. Te nchaa ñáyiú na quèhe<sup>n</sup> cuèndá ñáhá xii-í, te cada iní-yu sá tnàhá Tātá-í Dútú Ndióxi Yáa ní tendaha ñaha xii-í véxi-í ñuyíú-a ní quehe<sup>n</sup> cuèndá-yu —càchí-gá xáha<sup>n</sup>-gã xii-güedé.



*Jèsús càchí-gá sá tẽ Jùdás cuáha cuendá ñáhá-dẽ xii-gá núú cuè téè cùu úhú iní ñáhá (Mt. 26:20-25; Mr. 14:17-21; Lc. 22:21-23)*

<sup>21</sup> Te sáta dúcá<sup>n</sup> nĩ cáhá<sup>n</sup> Jèsús te ío ní ndíhú iní-gá, te ní xáha<sup>n</sup>-gã xii-güedé:

—Na càchí tñúhu ndáá-í xii-ndo sã díú-ní ì<sup>n</sup> nchohó cuáha cuendá ñáhá-ndó xii-í núú cuè téè cùu úhú iní ñáhá —càchí-gá xáha<sup>n</sup>-gã xii-güedé.

<sup>22</sup> Te ní ngüíta cue téè xica cuu ndihí-gá ndéhé ì<sup>n</sup> ndehe ì<sup>n</sup> núú tnáhá-güedé, chi ñá ní cùtnuní iní-güedé ndëdacàa-güedé cuendá-güedé ní cáhá<sup>n</sup>-gá. <sup>23</sup> Te ì<sup>n</sup> téé-á<sup>n</sup> ìo cùdíí iní ñáhá Jèsús, te ndècu yatni-dé dñi-gá cùdini-dé ndihí-gá. <sup>24</sup> Te té Xímú, àdi Pelú chi úu diu-dé, ní quide-dé seña núú téè ndècu yatni dñi-gá-á<sup>n</sup> sá càcá<sup>n</sup> tñúhú-dé núú-gã nõu ndëdacàa-güedé cuendá-güedé ní cáhá<sup>n</sup>-gá. <sup>25</sup> Te téé-á<sup>n</sup> ní sáhá<sup>n</sup> ndehe yatni-gá-dé dñi Jèsús, te ní xáha<sup>n</sup>-dẽ xii-gá:

—Mèstrú, ¿ndëdacàa-ndí cuendá-ndí ní cáhá<sup>n</sup>-n-í? —càchí-dé xáha<sup>n</sup>-dẽ xii-gá.

<sup>26</sup> Te ní xáha<sup>n</sup> Jèsús:

—Na chindóyo-í luha pàá, te téè na cuáha-í te téé-á<sup>n</sup> cúú-dẽ —càchí-gá xáha<sup>n</sup>-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté. <sup>27</sup> Te òré ní quehe<sup>n</sup>-dé pàá, te ní ngúndecu ndihí ñaha dùu<sup>n</sup>-ná yucu ñävãha xii-dé. Te ní xáha<sup>n</sup> Jèsús:

—Sá nĩ sani iní-n càda-n te cada ndihí-ni-n —càchí-gá xáha<sup>n</sup>-gã xii-dé.

<sup>28</sup> Te ní ì<sup>n</sup> cue téè cùdini ndihí-gá ñá ní tècú tñúhú-güedé nása ndùu tñúhu ní xáha<sup>n</sup>-gã xii té Jùdás. <sup>29</sup> Te dava-güedé ní sani iní-güedé sá sã cuendá sá ndécú ndihí-dé sá ñúhú dñi<sup>n</sup>, te vaa ío ì<sup>n</sup> sá cuáá<sup>n</sup>-dẽ nandíhí-güedé vico, àdi díhú<sup>n</sup> cuáha-dé ñáyiu ndàhú xáha<sup>n</sup>-gã ní cáhá<sup>n</sup>-güedé. <sup>30</sup> Te sa ní cundi<sup>n</sup> ní quehe<sup>n</sup> cuendá té Jùdás pàá caxi-dé, te òré ní níhí-dẽ pàá-á<sup>n</sup> te ní quee-dé cuáhá<sup>n</sup>-dé.

*Jèsús càchí tñúhu-gá nàcuáa cada-o*

<sup>31</sup> Te sáta nĩ quee té Jùdás cuáhá<sup>n</sup>-dé, te ní xáha<sup>n</sup> Jèsús xii dava-gá-güedé:

—Vitna te quiní-ndó ndihí nchaa ñáyiu sá ìo càhnu cuu yúhú Téè cùu ñaní tnáhá-ndó

nchaa-ndo, te òré-á<sup>n</sup> cutnùní iní-ndó sã ìo càhnu cuu tucu mee Yá Ndiõxí. <sup>32</sup> Te núú yúhú quidé càhnu-í Yá Ndiõxí, te diu-ni duca<sup>n</sup> càda càhnu ñaha-gá xii yúhú, te ñá túú-gã tñi<sup>n</sup> nduu te duca<sup>n</sup> càda-gá. <sup>33</sup> Te nchòhó cue déhe-í na càchí tñúhu-í sá sàcú duha-ná nduu ndècu ndihí ñaha-í xii-ndo. Te nchòhó nanducu ñaha-ndo xii-í dico vá ná nihí ñáhá-ndó dàtná ní xáha<sup>n</sup>-í xii ñáyiu isràél, te diu-ni duca<sup>n</sup> càhá<sup>n</sup>-í núú-ndó sã vã ndácú-ndó quíhí<sup>n</sup>-ndó nõú quíhí<sup>n</sup>-í. <sup>34</sup> Te duha sànu ichi ñaha tucu-í xii-ndo nàcuáa cada-ndo sã cúú iní tnáhá-ndó ì<sup>n</sup> ì<sup>n</sup>-ndo datná yúhú cúú iní ñáhá-í xii-ndo. <sup>35</sup> Te núú na cùu iní tnáhá-ndó ì<sup>n</sup> ì<sup>n</sup>-ndo ña, te duca<sup>n</sup> te cutnùní iní nchaa ñáyiu sá cúú-ndó cuè téè ní chitnahá ñáhá xii-í —càchí-gá xáha<sup>n</sup>-gã xii-güedé.

*Jèsús càhá<sup>n</sup>-gá sá tẽ Pèlú vá nõnuu-dé sá xicá cùu ndihí ñaha-dé xii-gá*

*(Mt. 26:31-35; Mr. 14:27-31; Lc. 22:31-34)*

<sup>36</sup> Te ní xáha<sup>n</sup> tẽ Xímú, àdi Pelú chi úu diu-dé, xii Jèsús:

—Mèstrú, ¿ndéé quíhí<sup>n</sup>-n-í? —càchí-dé xáha<sup>n</sup>-dẽ xii-gá.

Te ní xáha<sup>n</sup> Jèsús:

—Vitna te vá ndácú-n cànchicú<sup>n</sup> ñáhá-n quíhí<sup>n</sup> núú quíhí<sup>n</sup>-í, dico na sàá nduu te dai sáá-n nõú cùndecu-í —càchí-gá xáha<sup>n</sup>-gã xii-dé.

<sup>37</sup> Te ní xáha<sup>n</sup> tẽ Pèlú xii-gá:

—Mèstrú, ¿te ná cuendá nõu vá ndácú-í cànchicú<sup>n</sup> ñáhá-í xii-n quíhí<sup>n</sup> vitna-í? Chi yúhú ñá túú tñahí yùhú-í cuèi na cùú-í sá cuendá-n —càchí-dé xáha<sup>n</sup>-dẽ xii-gá.

<sup>38</sup> Te ní xáha<sup>n</sup> Jèsús:

—¿Te ndáá sá xèhndé iní-n sã cuèi na cùú-n cuendá-í-u? Te na càchí tñúhu ndáá-í xii-n sã cùmání-gã cana líhi, te úní xito cáhá<sup>n</sup>-n sã ñá túú xini ñáhá-n xii-í —càchí-gá xáha<sup>n</sup>-gã xii-dé.

## 14

*Jèsús dánèhé ñáhá-gã nàcuáa cada-o nàsáá-ó nõú ndécú Yá Ndiõxí*

<sup>1</sup> Te ní xáha<sup>n</sup>-gã xii-güedé:

—Te ñá túú nã caní iní-ndó. Quindáá iní-ndó Yá Ndiõxí, te quindáá iní-ndó yúhú. <sup>2</sup> Chi núú ndécú Tãtã-í ío nõne núú cùndecu-o, chi núú ñáhá ñá te sa cachí

tnúhu-í xii-ndo ni cùu. Te vitna na nùhú-í te cada túha-í núu cùndècu-ndo. <sup>3</sup> Te dàtnùní quixi tucu-í te candeca ñaha-í xii-ndo quíhí<sup>n</sup> cuèndá ñ<sup>n</sup>-ni xìchi cundecu-o. <sup>4</sup> Te sa nàha-ndo ndéé quíhí<sup>n</sup>-í te sa xìní-ndó ìchi —cachí-gá xáha<sup>n</sup>-gã xii-güedé.

<sup>5</sup> Te ní xáha<sup>n</sup> tẽ Măxí xii-gá:

—Mèstrú, ñá túú xìní-ndí ndéé quíhí<sup>n</sup>-n te da ichi-ná quiní-ndí —càchí-dé xáha<sup>n</sup>-dẽ xii-gá.

<sup>6</sup> Te ní xáha<sup>n</sup> Jèsús:

—Yúhú cùu-í dàtná ñ<sup>n</sup> ichi te càhá<sup>n</sup>-í tnúhu ndáá, te yúhú cada-í te naníhí tãhú-ndó. Te ñ<sup>n</sup> dìi díi-ni yúhú cada-í te sáá-ndó núu Yă Ndiöxí cundecu-ndo te núu na quìndáá iní ñáhá-ndó xii-í. <sup>7</sup> Te núu dìcò cutnùní ndisa iní-ndó yòo cuu-í-á<sup>n</sup>, duca<sup>n</sup> te cutnùní iní-ndó yòo cuu Tătà-í ní cùu. Dico vitna dàtná sá ñí xìní núu-ndó Dútú Ndiöxí Yaá cùu Tătà-í cada iní-ndó, chi ní xìní-ndó yúhú —càchí-gá xáha<sup>n</sup>-gã xii-dé.

<sup>8</sup> Te ní xáha<sup>n</sup> tẽ Lìpé xii-gá:

—Mèstrú, danèhé ñáhá xii-ndí Dútú Ndiöxí chi na cùu váha iní-ndí —càchí-dé xáha<sup>n</sup>-dẽ xii-gá.

<sup>9</sup> Te ní xáha<sup>n</sup> Jèsús xii-dé:

—Lìpé, ¿te náa ñá túú xìní ñáhá-n xii-í? Te sa ní cuu vâi nduu ndecu ndihí ñaha-í xii-ndo, chi ñáyiu xìní ñáhá xii-í te xìní-yu tnàhá Tătà-í. ¿Te ná cuèndá yòhó càchí-n sã dánèhé ñáhà-í xii-ndo Tătà-í? <sup>10</sup> ¿Náa ñá túú sàndáá iní-ndó sã yúhú ndécù-í ndihí Tătà-í? Te mee-gã ndécú ndihí ñaha-gá xii-í. Te nchaa tnúhu càhá<sup>n</sup>-í núu-ndó ñà túú càhá<sup>n</sup>-í sá vèxi iní mée-í, chi Tătà-í Yaá ndécú ndihí ñaha xii-í chindèe ñaha-gá quidè-í chi<sup>u</sup>-gá. <sup>11</sup> Te quìndáá iní-ndó sã yúhú ndécù-í ndihí Tătà-í, te duca<sup>n</sup> mée-gã ndécú ndihí ñaha-gá xii-í. Te núu ñá túú sàndáá iní-ndó tnúhu càhá<sup>n</sup>-í-a, te dandacu iní-ndó nchaa chiu<sup>n</sup> ta quide-í véxi, te quìndáá iní ñáhá-ndó. <sup>12</sup> Te na càchí tnúhu ndáá-í xii-ndo sã nchaa ñáyiu na quìndáá iní ñáhá xii-í, te cadá-yu chi<sup>u</sup> quide-í te càhnu-gá chi<sup>u</sup> cadá-yu chi yúhú nùhú-í núu ndécú Tătà-í cundecu-í nàcuáa níhí ndéé-gã-yu cundecú-yu. <sup>13</sup> Te nchaa sá ná càcá<sup>n</sup>-ndó te taxi-í te núu na quìndáá iní ñáhá-ndó xii-í, te nchaa cada-í cuèndá cutnùní iní ñáyiu sá ïo càhnu cuu Tătà-í

Dútú Ndiöxí. <sup>14</sup> Te yúhú cada-í nchaa sá cuìní-ndó càcá<sup>n</sup> tãhú-ndó núu-í, te núu na quìndáá iní ñáhá ndisa-ndo xii-í.

*Jèsús càchí-gá sá téndàha-gá Espiritú Yă Ndiöxí quixi cundecu ndihí-o*

<sup>15</sup> Te núu nchòhó cùu iní ñáhá-ndó xii-í te tnii-ndo nchaa tnúhu càhá<sup>n</sup>-í. <sup>16</sup> Te yúhú càcá<sup>n</sup> tãhú-í núu Tătà-í sá téndàha-gá Espiritú-gá quixi cundecu ndihí-ndo cànu ichi ñaha-xi xii-ndo nacuáa cundecu-ndo, te chindee ñaha-xi xii-ndo ni caa ni quíhí<sup>n</sup>. <sup>17</sup> Te nchaa ñáyiu ndècu ichi cuehé ichi duha ñá túú xìní-yu Espiritú Yă Ndiöxí te ni vã cùu cùndecu ndihí-yu. Dico nchòhó sa xìní-ndó Espiritú-gá te ndècu ndihí ñaha-xi xii-ndo. Te sáá ñ<sup>n</sup> nduu te cunuu Espiritú-gá iní-ndó. <sup>18</sup> Te yúhú vá dáñá ñihnu ñaha-í xii-ndo, chi quixi tucu-í cundecu ndihí ñaha-í xii-ndo. <sup>19</sup> Te sácú duha-ná nduu ndècu-í te vá quiní ñáhá-gã ñáyiu xii-í, dico nchòhó chi quiní ñáhá-ní-ndó xii-í. Te duca<sup>n</sup>-ni cùndecu-ndo ichi váha chi cundecu ndihí ñaha-í xii-ndo ni caa ni quíhí<sup>n</sup>. <sup>20</sup> Te dàvá-á<sup>n</sup> cutnùní iní-ndó sã ndécù-í ndihí Tătà-í, te duca<sup>n</sup> nchòhó cundecu ndihí ñaha-ní-ndo xii-í. <sup>21</sup> Te nchaa ñáyiu dàcuaha tnúhu-í te tnii-yu, ñáyiu-á<sup>n</sup> quidè ndisá-yu sá cùu iní ñáhá-yu xii-í. Te duca<sup>n</sup> Tătà-í cùu iní ñáhá-gã xií-yu, te duca<sup>n</sup>-ni yúhú cùu iní-í-yu tucu, te duca<sup>n</sup> te cùtnuní iní-yu sá ndécú ndihí-í-yu —càchí-gá xáha<sup>n</sup>-gã xii-dé.

<sup>22</sup> Te ní càhá<sup>n</sup> ñ<sup>n</sup> tée nàni Judás dico ñá díú tẽ Jùdás déhe té Ximú Iscarioté ní càhá<sup>n</sup>, chi ingá té Jùdás ní xáha<sup>n</sup>-dẽ xii-gá:

—Mèstrú, ¿nása cada-n cuèndá cutnùní iní-ndí sá cùndècu ndihí ñaha-n xii-ndí, te ñáyiu ñùhu ichi cuehé ichi duha vá cùndècu ndihí-n-yu-i? —càchí-dé xáha<sup>n</sup>-dẽ xii-gá.

<sup>23</sup> Te ní xáha<sup>n</sup> Jèsús xii-güedé:

—Nchaa ñáyiu cùu iní ñáhá xii-í te tnii-yu tnúhu càhá<sup>n</sup>-í, te ñáyiu-á<sup>n</sup> cùu iní ñáhá Tătà-í xií-yu, te yúhú ndihí Tătà-í ndécú-ndí ndihí-yu. <sup>24</sup> Te nchaa ñáyiu ñá túú cùu iní ñáhá xii-í te ñá túú tnii-yu tnúhu càhá<sup>n</sup>-í. Te nchaa tnúhu ní càhá<sup>n</sup>-í ní xindèdóho-ndo chi Tătà-í Yaá ní tendaha ñaha xii-í véxi-í ñuyú-a ní dácáhu iní ñáhá-gã xii-í, te ñá díú mée-í ní càhu iní-í tnúhu càhá<sup>n</sup>-í.

25 'Duha ndùu tnúhu càhá<sup>n</sup>-í núú-ndó vitna ndecu ndihí ñaha-gá-í xii-ndo. 26 Dico Yá Ndiöxí tendaha-gã Espiritú-gá quixi-xi cada-xi núu-í taxi-xi tnúhu ndee ìní xii-ndo, te ñu-xi chindee ñaha-xi xii-ndo te danèhé ñáhá-xí xii-ndo nchaa sá cúmăní quini-ndó, te ñu-ni-xi dandacu ìní ñáhá-xí xii-ndo nchaa nacuaa ní cáhá<sup>n</sup>-í.

27 'Te yúhú chindee chítuu ñaha-í xii-ndo ïo váha cuu ìní-ndó cùndecu-ndo datná yúhú ïo váha cùu ìní-í ndécù-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vá cadà-í datná quidé ñáyuu ñuhu ichi cuehé ichi duha. Te ni vã ndihú ìní-ndó, te ni vã yúhú-ndó. 28 Te sa ní xindèdóho-ndo ñí cáhá<sup>n</sup>-í sá nùhú-í, te quixi tucu-í cundecu ndihí ñaha-í xii-ndo. Te núu ndisa cùu ìní ñáhá-ndó xii-í ñá, te òré ní níhí-ndó tnúhu sá nùhú-í núú ndécú Tãtã-í, te cudíí ìní-ndó ní cùu, chi ïo càhnu cuu-gá dàcúxí yúhú. 29 Te sa ní cachí tnúhu-í sá nùhú-í, te na sàá òré nùhú-í núú ndécú Tãtã-í, te quindáá ìní ñáhá-ndó xii-í.

30 'Te ñá túú-gã vãi tnúhu ndatnúhu ndihí ñaha-í xii-ndo chi sa véxi yucu ñávãha sá táxí tnùní ñuyú-a, dico vá táxí tnùní ñáhá-xí xii yúhú. 31 Te cada-í nchaa nàcuáa ní táuchíú<sup>n</sup> Tãtã-í cuendá cutnùní ìní nchaa ñáyuu ñuyú-a sá yúhú ïo cùu ìní-í-gá. Te vitna chí ndacuíñí ná quihí<sup>n</sup>-ó -càchí-gá xáha<sup>n</sup>-gã xii-güedé.

## 15

### *Cuendá yoho yàha stilé ndihí nchaa dité-xi*

1 Te ní xáha<sup>n</sup> tùcu-gá xii-güedé:

-Yúhú cùu-í datná yoho yàha stilé, te Tãtã-í cùu-gã datná ñ<sup>n</sup> téé xito yoho yaha stilé-á<sup>n</sup>. 2 Te nchaa ñáyuu ní sándáá ìní ñáhá xii-í cùu-yu datná dité nchaa yoho yàha stilé-á<sup>n</sup>. Te téé xito yoho yaha stilé-á<sup>n</sup> xèhndé-dé nchaa dité-xi sá ñá cuini-gá-xi cuu<sup>n</sup> ndéhé-xi, te ndàda ndoo-dé nchaa dité-xi sá cùu<sup>n</sup> cuendá cuu<sup>n</sup>-gá. 3 Te duca<sup>n</sup> sãtnahá-xi cùu nchohó, chi sa ní xocuíñí nchaa sá cuèhé sá dúhá ndècu ndihí-ndo, chi ní sándáá ìní-ndó tnúhu ní cáhá<sup>n</sup>-í. 4 Te cuu ñ<sup>n</sup>nuu-ndo cùndecu ndihí ñaha-ndo xii-í, te núu duca<sup>n</sup> na càda-ndo, te cundecu ndihí ñaha-í xii-ndo. Chi núu ñ<sup>n</sup> yutnu vídí ná quèndèe dité-xi, te dité-xi sá ñí quen-deé-á<sup>n</sup> vã cùu<sup>n</sup>-gã sávídí-xi chi duu<sup>n</sup> duu<sup>n</sup>

ní xíta-xi. Duca<sup>n</sup> sãtnahá-xi cùu nchohó chi vá ndácú-ndó càda-ndo chiu<sup>n</sup>-í, te núu vá cùndecu ndihí ñaha-í xii-ndo.

5 'Chi yúhú cùu-í datná yutnu vídí-á<sup>n</sup>, te nchòhó cùu-ndó datná nchaa dité-xi. Te nchaa ñáyuu cùu ñ<sup>n</sup>nuu ndihí ñaha xii-í, te ndècu ndihí-í-yu, te ndácú-yu quidé-yu chiú<sup>n</sup>-í. Te núu vá cùu ñ<sup>n</sup>nuu ndihí ñahá-yu xii-í, te vá ndácú-yu cadá-yu chiú<sup>n</sup>-í. 6 Te nchaa ñáyuu vá cùu ñ<sup>n</sup>nuu ndihí ñaha xii-í, te yáha-yu datná yãha ñ<sup>n</sup> dité yutnu vídí sá ñá túú cùu<sup>n</sup> sávídí-xi, chi xèhndé-güedé yíchí-xi, te sãhmi-güedé.

7 'Cuu ñ<sup>n</sup>nuu ndihí ñaha-ndo xii-í, te vá nàcuánaa-ndo nacuaa ní cáhá<sup>n</sup>-í. Te núu duca<sup>n</sup> na càda-ndo, te nãní cuini-ndó cãcã<sup>n</sup>-ndó núu-í te taxi-í. 8 Te núu nchòhó ná cadá vãha-ndo cùndecu-ndo, te ïo cada càhnu-ndo Tãtã-í, te duca<sup>n</sup> cùtnuní sá ndísá cùu-ndo cue téé ní chitnahá ñáhá xii-í. 9 Te yúhú ïo cùu ìní ñáhà-í xii-ndo datná cùu ìní ñáhá Yã Ndiöxí xii-í. Te cada-ni-ndo mèe-ni sá vãha cuendá cudíí ìní ñáhá-gã-í xii-ndo. 10 Te núu na quindáá ìní-ndó càda-ndo nchaa nacuaa ní cáhá<sup>n</sup>-í, te ïo cuu ìní ñáhà-í xii-ndo, chi yúhú duca<sup>n</sup> ïo sándáá ìní-í Tãtã-í quidé-í nchaa nàcuáa ní cáhá<sup>n</sup>-gá, te xíã<sup>n</sup> núu ïo cùu ìní ñáhá-gã xii-í.

11 'Duha càhá<sup>n</sup>-í núú-ndó cuendá cudíí ndisa ìní-ndó datná cudíí ìní mèe-í. 12 Te duha ndùu tnúhu càhá<sup>n</sup>-í cuendá sá cùu ìní tnáhá-ndó ñ<sup>n</sup> ñ<sup>n</sup>-ndo datná cùu ìní ñáhà-í xii-ndo. 13 Te núu ní xihó sã cùu-xí ñ<sup>n</sup> téé ïo váha tnáhá tnúhu ndihí-o, te xíã<sup>n</sup> cutnùní ìní ñáyuu sá ïo cùu ìní-ó-dé. 14 Te nchòhó cuu-ndo cue téé ïo váha tnáhá tnúhu ndihí-í te núu na càda-ndo nchaa nacuaa càhá<sup>n</sup>-í. 15 Te vá cùñaha-gã-í xii-ndo sã cùu-ndó cue téé xinu cuechi núu-í, chi ní ñ<sup>n</sup> téé xinu cuechi ñá túú xini-dé ná quidé patróo<sup>n</sup>-dè. Te yúhú càchí-í xii-ndo sã cùu-ndó cue téé ïo váha tnáhá tnúhu ndihí-í, chi ní cachí tnúhu-í nchaa nàcuáa ní cáhá<sup>n</sup> Tãtã-í. 16 Te ñá ñíú nchòhó ní càhá<sup>n</sup> ñáhá-ndó xii yúhú, chi yúhú ní cáhá<sup>n</sup> ñáhà-í xii-ndo. Te yúhú tauchíu<sup>n</sup>-í quihí<sup>n</sup>-ndó càda-ndo nchaa nacuaa ní cáhá<sup>n</sup>-í, chi tnúhu-á<sup>n</sup> vã ndíhí ñihnu-xi. Te duca<sup>n</sup> nchaa sá ná cãcã<sup>n</sup>-ndó núu Tãtã-í Yã Ndiöxí te taxi-gá, te núu na quindáá ìní ñáhá-ndó xii-í. 17 Te yúhú càhá<sup>n</sup>-í dóho-ndo sã cùu ìní tnáhá-ndó ñ<sup>n</sup> ñ<sup>n</sup>-ndo.



*Ñáyi ndècu ichi cuehé ichi duha cùu úhú iní-yu Jèsús ndìhi nchaa ñáyi sàndáá iní tnúhu-gá*

18 "Te nchaa ñáyi ndècu ichi cuehé ichi duha ñá cùu quìní ñáhã-yu xii-ndo, te sa ñaha-ndo sá dîhna-gá yúhú ní ngüita-yu duca<sup>n</sup> ñá cùu quìní ñáhã-yu xii-í. 19 Te núu dîcô tñahá nchòhó ndécú-ndó ichi cuehé ichi duha ña, te cuu iní ñáhã-yu xii-ndo dàtná cùu iní tñahã-yu ndi mèe-yu ni cùu. Te yúhú ní nanducu ñihnu ñaha-í xii-ndo tnúu ñáyi ndècu ichi cuehé ichi duha, núu xiã<sup>n</sup> ío cùu úhú iní ñáhã-yu xii-ndo cuendá sá ña túu-gã chítnahá-ndó-yu. 20 Te dandacu iní-ndó ñacuáa ní cáhá<sup>n</sup>-í sá ni ñ<sup>n</sup> téé xînu cuechi ñá túu cùnuu-dé dàcúúxí pàtróo<sup>n</sup>-dê. Te yúhú cùu úhú iní ñáhã-yu, te ñu-ni duca<sup>n</sup> càda ñahã-yu xii nchòhó. Te núu dîcô ní tñi<sup>n</sup>-yu tnúhu ní cáhá<sup>n</sup>-í ñá, te ñu-ni duca<sup>n</sup> tñi<sup>n</sup>-yu tnúhu cáhá<sup>n</sup>-ndó nñu-yu ni cùu. 21 Te duca<sup>n</sup> càda ñahã-yu xii-ndo sá cuendá-í, chi ñá xîní-yu Tãtã-í Yaá ní tendaha ñaha xii-í véxi-í ñuyú-a.

22 "Te váa vá cùndècu cuéchi-yu ni cùu, te núu ñá túu yúhú ní cáhá<sup>n</sup>-í nñu-yu, te vitna vá cùu tñahí cachí-yu sá ña túu cuéchi-yu. 23 Chi nchaa ñáyi cùu úhú iní ñáhã xii-í, te cùu úhú iní-yu tñahá Tãtã-í. 24 Te váa ni ñ<sup>n</sup> cuéchi-yu vá cùndècu ni cuu, te núu dîcô ñá túu ní xîní-yu nchaa sá ñi quide-í sá vá yòo tñahí ndacu cada. Te cuéi ní xîní-yu dico dai cùu úhú iní ñáhã-yu xii-í ndìhi Tãtã-í. 25 Te duha quidé-yu chi dacuítí quèe ndáá-xi ñacuáa yòdo tnuní núu tütú Yã Ndiõxí sá dácuahã-yu, chi cachí-xi sá ña túu ñá cuéchi-í te cuu úhú iní ñáhã-yu xii-í.

26 "Te Espiritú Tãtã-í Dútú Ndiõxí sá ndécú nñu-gã tendaha-í quixi chindee ñaha-xi xii-ndo, te canu ichi ñaha-xi ñacuáa cundecu-ndo, te Espiritú-á<sup>n</sup> cáhá<sup>n</sup> ndáá-xi cuendá cutnùní iní nchaa ñáyi yoo cùu-í. 27 Te nchòhó tñahá-ndó cáhá<sup>n</sup> váha-ndo cuendá-í cuendá cutnùní iní-yu yoo cùu-í, chi ñaha-ndo sá ndéé òré ní ngüita-í quidè-í chi<sup>n</sup> Tãtã-í ní chitnahá ñáhã-ndó xii-í — cachí-gá xáha<sup>n</sup>-gã xii-güedé.

## 16

1 Te ní xáha<sup>n</sup> tùcu-gá xii-güedé:

—Duha cáhá<sup>n</sup>-í cuendá ná nanchòcáva iní-ndó nñu-ndó ichi cuehé ichi duha.

2 Chi vá dáñã-gã-güedé quíhu-ndo vèñúhu, te ni vá cùu-gã quini ndéé ñáhã-güedé xii-ndo. Te sáá ñ<sup>n</sup> nduu te cahni ñaha-güedé xii-ndo, te xiã<sup>n</sup> cuu caha<sup>n</sup>-güedé sá quidé-güedé chi<sup>n</sup> Yã Ndiõxí. 3 Te duca<sup>n</sup> càda-güedé chi ñá túu xîní-güedé Tãtã-í, te ni ña túu xîní ñáhã-güedé xii yúhú. 4 Te duha nduu tnúhu cáhá<sup>n</sup>-í núu-ndó, chi na sáa òré te ndacu iní-ndó nchaa tnúhu sá sá ní cachí tnúhu-í xii-ndo ñacuáa cada ñaha-güedé xii-í.

### *Nchaa chi<sup>n</sup> quide Espiritú Yã Ndiõxí*

"Te ñá túu ní cachí tnúhu-í xii-ndo ndéé dîhna chi ndècu ndìhi ñaha-í xii-ndo. 5 Dico vitna sa ta cùyatni nduu nñu-í núu ndécú Tãtã-í Yaá ní tendaha ñaha xii-í véxi-í ñuyú-a. Te ni ñ<sup>n</sup> nchòhó ñá túu xicá<sup>n</sup> tnúhu-ndó nñu-í nñu ndéé quíhí<sup>n</sup>-í. 6 Chi mee-ni sá ndìhú iní-ndó sá dúcá<sup>n</sup> ñi cáhá<sup>n</sup>-í. 7 Te na cachí tnúhu ndáá-í xii-ndo sá váha-gá sá cùu-xi-ndó nñu nñu-í, chi tendaha-í Espiritú Yã Ndiõxí quixi cundecu ndìhi-ndo chindee ñaha-xi, chi núu vá nñu-í te vá quixí Espiritú-gá cundecu ndìhi-ndo chindee ñaha-xi xii-ndo. 8 Te na quixi Espiritú-gá te dandixi túu-xi iní nchaa ñáyi ndècu ichi cuehé ichi duha sá ña túu quide váha-yu. Te dacàhu iní ñáhã-xi sá ndécú ñ<sup>n</sup> ichi váha ichi ndáá. Te Espiritú-gá-á<sup>n</sup> cada-xi ñacuáa cutnùní iní-yu sá Yã Ndiõxí cada ndáá-gá cuéchi-yu. 9 Te duca<sup>n</sup> te cutnùní iní-yu sá ndécú cuéchi-yu, chi ñá túu sàndáá iní ñáhã-yu xii-í. 10 Te duca<sup>n</sup> te cutnùní iní-yu ñacuáa nduu cuendá ichi váha ichi ndáá, chi yúhú nñu-í núu ndécú Tãtã-í, te nchòhó vá quini ñáhã-gã-ndó. 11 Te duca<sup>n</sup> te cutnùní iní-yu sá Yã Ndiõxí cada ndáá-gá cuéchi-yu, chi sa ní cáhá<sup>n</sup>-gá sá yúcu ñávãha sá táxi tnùní ñuyú-a quíhí<sup>n</sup>-xi núu ùhú núu ndàhú.

12 "Te vai-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchaa vitna. 13 Te na quixi Espiritú Yã Ndiõxí, Espiritú cáhá<sup>n</sup> ndáá cuíti, te Espiritú-á<sup>n</sup> danèhé ñáhã-xi nchaa tnúhu váha tnúhu ndáá. Te vá dacàhu iní ñáhã-xi xii-ndo sá véxi iní méé-xi chi dacàhu iní ñáhã-xi nchaa sá cáhá<sup>n</sup> Yã Ndiõxí, te cachí tnúhu-xi nchaa ñacuáa cada-xi ndéé núu cuahã<sup>n</sup> núu véxi-gá. 14 Te Espiritú-gá-á<sup>n</sup> cada càhnu ñaha-xi xii



yúhú chi ndècu ndìhi-xi tnúhu-í, te danèhé ñáhá-xí xii-ndo. <sup>15</sup> Te nchaa sá ndécú ndìhi Tàtá-í ndécú ndìhi-í tnàhá-í, núu xíá<sup>n</sup> càchí-í sá Espíritú-gá danèhé ñáhá-xí nchaa tnúhu-í xii-ndo.

*Nchaa ñáyiú ndìhú iní-xi nduu díí iní-yu na quixi tucu Jesús*

<sup>16</sup> Te ì<sup>n</sup> úú-ná nduu ndècu-í te vá quìní ñáhá-gã-ndó xii-í, dico núú sàcú-ni nduu te quìní ñáhá tùcu-ndo xii-í, te duca<sup>n</sup> chi núhú-í núú ndécú Tàtá-í —càchí-gá xáha<sup>n</sup>-gã xii-güedé.

<sup>17</sup> Te sá dúcá<sup>n</sup> ñí cáhá<sup>n</sup>-gá núu ní ngüíta ì<sup>n</sup> úú cue téé xica cuu ndìhi-gá xitnàha-güedé:

—¿Nása ndùu-tu tnúhu càhá<sup>n</sup>-gá sá càchí-gá sá ì<sup>n</sup> úú-ná nduu ndècu-gá te vá quìní-gá-ó-gã, dico núú sàcú-ni nduu te quìní tucu-o-gã-í?, chi núhú-gá núú ndécú Tàtá-gã —càchí-güedé xitnàha-güedé.

<sup>18</sup> Te xitnàha tucu-güedé:

—¿Nása cuáhá<sup>n</sup>-tu tnúhu-ã<sup>n</sup> sá sàcú-ni nduu? Te ñá tècú tnùn-ó nása ndùu tnúhu càhá<sup>n</sup>-gá —càchí-güedé xitnàha-güedé.

<sup>19</sup> Te Jèsús ní cutnùn-í iní-gá sá cuìní-güedé cáca<sup>n</sup> tnúhú-güedé núú-gã nása ndùu tnúhu ní cáhá<sup>n</sup>-gá, núu ní xáha<sup>n</sup>-gã:

—Cuèndá sá ñí cachí-í sá ì<sup>n</sup> úú-ná nduu ndècu-í te vá quìní ñáhá-gã-ndó xii-í, dico núú sàcú-ni nduu te quìní ñáhá tùcu-ndo xii-í ní cachí-í, ¿xíá<sup>n</sup> ndécú tnúhu núú tnàhá-ndó-ã<sup>n</sup>? —càchí-gá xáha<sup>n</sup>-gã xii-güedé.

<sup>20</sup> Te ní xáha<sup>n</sup> tùcu-gá:

—Te na càchí tnúhu ndáá-í xii-ndo sã nchòhó ndìhú víhí ìní-ndó te ndáhyú-ndó, dico nchaa ñáyiú ndècu ichi cuehé ichi duha chi da cudíí ìní-yu. Dico nchòhó ñáyiú ndáhyú chi sáá nduu te nduu díí ìní-ndó.

<sup>21</sup> Chi dàtná cuìní-ndó cùu ì<sup>n</sup> ñadihí ñaha ní tnàhá nduu cacu déhe-xi vèi sàni iní-a<sup>n</sup> sá quidé úhú ñáhá-xí. Dico na yàha cacu déhe-a<sup>n</sup>, te ñá túú-gã ndácú ìní-a<sup>n</sup> sá ñí quide úhú ñáhá-xí xii-a<sup>n</sup> chi mee-nã sá cudíí ìní-a<sup>n</sup> déhe-a<sup>n</sup>. <sup>22</sup> Duca<sup>n</sup> sãtnahá-xi cùu nchohó vitna chi ndìhú ìní-ndó sã nùhú-í, dico quixi tucu-í quixi coto ñaha-í xii-ndo, te òré-á<sup>n</sup> te cudíí ndisa ìní-ndó, te vá yòo ì<sup>n</sup>-gá dandìhú ìní ñáhá xii-ndo davá-á<sup>n</sup>.

<sup>23</sup> Te dàvá-á<sup>n</sup> ñá túú-gã ná nducu tnúhu-ndo núu-í. Te na càchí tnúhu

ndáá-í xii-ndo sã Tàtá-í taxi-gá nchaa sá ná cáca<sup>n</sup>-ndó núu-gã núu na quìndáá ìní ñáhá-ndó xii-í. <sup>24</sup> Te ndéé vitna vátá dúcá<sup>n</sup>-gã cada-ndo cáca<sup>n</sup>-ndó. Dico cáca<sup>n</sup>-ndó núu-gã núu ná cuìní-ndó te taxi-gá cuèndá cudíí ndisa ìní-ndó —càchí-gá xáha<sup>n</sup>-gã xii-güedé.

*Xitohó Jesucristú ní cunuu tnúhu-gá núu yucu ñávãha*

<sup>25</sup> Te xáha<sup>n</sup> tùcu-gá xii-güedé:

—Mee-ni ñí chidáhu ndodo-í tnúhu ní cáhá<sup>n</sup>-í núu-ndó, dico sáá nduu te vá chidáhu-gá-í tnúhu cáhá<sup>n</sup>-í, chi cáhá<sup>n</sup> ndáá-na-í cuèndá Tàtá-í. <sup>26</sup> Te dàvá-á<sup>n</sup> cáca<sup>n</sup>-ndó núu Tàtá-í núu ná cuìní-ndó te taxi-gá, te núu na quìndáá ìní ñáhá-ndó xii yúhú Déhe-gá. Te ñá túú-gã xini ñuhu-xi sá yúhú cáca<sup>n</sup>-í núu-gã cuèndá-ndó chi cáca<sup>n</sup> mée-nã-ndó. <sup>27</sup> Chi mee Tàtá-í ío cùu ìní ñáhá-gã xii-ndo cuèndá cùu ìní ñáhá-ndó xii-í, te sàndáá ìní-ndó sã núu-gã ní quee-í véxi-í. <sup>28</sup> Te yúhú ní quee-í núu Tàtá-í véxi-í ñuyú-a, te vitna dándóo-í ñuyú-a te núhú-í núu ndécú-gã —càchí-gá xáha<sup>n</sup>-gã xii-güedé.

<sup>29</sup> Te ní xáha<sup>n</sup> cuè téé xica cuu ndìhi-gá:

—Vitna chi càhá<sup>n</sup> ndáá-nã-n, ñá túú-gã chidáhu-n tnúhu càhá-n. <sup>30</sup> Te vitna ní xini-ndí sá ío váha cutnùn-í ìní-n nchaa nacúáa cùu, te cutnùn-í ìní-n nchaa nacúáa sàni ìní nchaa ñáyiú. Te ñá túú xini ñuhu-xi nágá nducu tnúhu-yu núu-n chi nchaa sa ní dátúu-n núu-yu. Te xíá<sup>n</sup> núu sàndáá ìní-ndí sá núu Yã Ndiöxí ní quee-n véxi-n —càchí-güedé xáha<sup>n</sup>-güedé xii-gá.

<sup>31</sup> Te ní xáha<sup>n</sup> Jèsús:

—¿Te vitna sàndáá ìní-ndó-ã<sup>n</sup>? <sup>32</sup> Vitna ní sáá nduu ñí sáá òré sá ncháá nchòhó cuténuu-ndo càa ì<sup>n</sup> caa úú cuu-ndo, te dándóo mee ñaha-ndo xii-í. Dico ñá díú mee díí-í quendóo chi ndècu ndìhi-í Tàtá-í.

<sup>33</sup> Duha càhá<sup>n</sup>-í cuèndá cuu váha ìní-ndó cùndecu-ndo, chi ñuyú-a cuu úhú ìní ñáhá-yu xii-ndo, dico ni vã yúhú-ndó chi yúhú sa ní dáquéé tìhú-í nchaa sá cuèhé sá dúhá ío ñuyú-a —càchí-gá xáha<sup>n</sup>-gã xii-güedé.

## 17

*Jèsús xicá<sup>n</sup> táhú-gã núu Tàtá-gã Dútú Ndiöxí cuèndá cue téé xica cuu ndìhi-gá*

<sup>1</sup> Te sátá dúcá<sup>n</sup> ñí cáhá<sup>n</sup> Jèsús te ní ndacoto-gá andiú, te ní xáha<sup>n</sup>-gã xii Tãtã-gã Dútú Ndiõxí:

—Táu, vitna ní sáá nduu càda cahnu ñaha-n xii-í cuendá duca<sup>n</sup> càda cahnu ñaha-í xii-n. <sup>2</sup> Chi mee-n ñí cachí-n sá táxí tnùní-í nchaa ñáyíu ñuyíú-a, te dácacu nihnu-í nchaa ñáyíu ní cachí-n nàníhí tàhú. <sup>3</sup> Te cundecu ndihí-õ-yu ñí caa ñí quíhí<sup>n</sup>, chi sándáá iní ñáhã-yu sá íí<sup>n</sup> dìi díí-ni yòhó cúú-n Ndiõxí ndisa, te duca<sup>n</sup> xìní ñáhã-yu xii yúhú Jesucristú téé ní tendaha-n véxi ñuyíú-a.

<sup>4</sup> Te yúhú ní chiñuhu ñaha-í xii-n ñuyíú-a, te ní xínu chù<sup>n</sup> ní cachí-n càda-í. <sup>5</sup> Táu, vitna na nàsáá-í núú-n te cada càhnu ñaha-n xii-í dàtná ní xóo cada càhnu ñaha-n xii-í ndéé cútnàhá vátá ngáva-gã ñuyíú.

<sup>6</sup> Te nchaa ñáyíu ní nanducu nihnu-n tnuú nchaa ñáyíu ndècu ichi cuehé ichi duha, ní taxi cuendá-n-yu, te ní xáha<sup>n</sup>-í xii-yu yoo cùu-n. Te cuendá-n cùú-yu, te ní taxi cuendá-n-yu, te ní sándáá iní-yu tnúhu-n. <sup>7</sup> Te vitna ní cutnùní iní-yu sá ncháá tnúhu ndècu ndihí-í ñíu-ni mee-n ñí taxi-n. <sup>8</sup> Te ní dánèhé-í-yu nchaa tnúhu sá ñí dánèhé ñáhã-n xii-í, te ní sándáá iní-yu. Te ní cutnùní iní-yu sá núú-n ñí quee-í véxi-í, te ní sándáá iní-yu sá yòhó ní tendaha ñaha-n xii-í véxi-í ñuyíú-a.

<sup>9</sup> Te yúhú càhá<sup>n</sup> ndàhú-í núú-n cuendá nchaa ñáyíu ní taxi cuendá-n. Te ñá túú càhá<sup>n</sup> ndàhú-í núú-n cuendá ñáyíu ndècu ichi cuehé ichi duha, chi cuendá nchaa ñáyíu ní taxi cuendá-n càhá<sup>n</sup>-í, chi cuendá-n cùú-yu. <sup>10</sup> Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhá-í. Te xíquide càhnu ñahã-yu xii-í.

<sup>11</sup> Te yúhú vá cùndècu-gá-í ñuyíú-a, dico mèe-yu chi cundecu-ní-yu, te yúhú ndixi-í núú ndécú-n. Táu, yòhó ío yíñuhu ndecu-n, te yúhú càhá<sup>n</sup> ndàhú-í núú-n sá ñí yùhu ñí iní-n còto-n nchaa ñáyíu ní taxi cuendá-n, ñáyíu ní sándáá iní tnúhu-í cuendá sá íí<sup>n</sup>-ní ichi cuú-yu cundecú-yu dàtná íí<sup>n</sup>-ni cùu nchoo. <sup>12</sup> Chi òré ndécú-í ndihí-yu ñuyíú-a ní xito-í-yu nàcuáa cùu iní-n, te ní íí<sup>n</sup>-yu ñá túú ní xíta nihnu, chi íí<sup>n</sup>-ni té Jùdás ní xíta nihnu tnàhí-dé, te duca<sup>n</sup> ñí cuu cuendá

sá ñí quee ndáá-xi nàcuáa yòdo tnuní núú tütú-n.

<sup>13</sup> Te vitna sa ndixi-í núú ndécú-n, dico ñíni ndècu-gá-í ñuyíú-a duha càhá<sup>n</sup>-í cuendá sá cúú ñí iní-yu dàtná cúú ñí iní mèe-í. <sup>14</sup> Te yúhú ní dánèhé-í-yu tnúhu-n, dico nchaa ñáyíu ndècu ichi cuehé ichi duha cùu úhú iní ñáhã-yu xii-yu cuendá sá ñá túú-gã ndécú-yu ichi cuehé ichi duha-á<sup>n</sup> dàtná yúhú ñá túú ndècu-í ichi-á<sup>n</sup>. <sup>15</sup> Te ñá túú càhí-í sá xócàní-n-yu ñuyíú-a, dico càhá<sup>n</sup> ndàhú-í núú-n sá dácacu nihnú-n-yu núú yucu ñávãha. <sup>16</sup> Te yúhú ñá túú ndècu-í ichi cuehé ichi duha, te duca<sup>n</sup> mèe-yu ñá túú-gã ndécú-yu ichi cuehé ichi duha. <sup>17</sup> Te ío na cùndecu yíhí ñuhu-gá-yu núú-n dàcuahá-yu tnúhu-n, chi cùu-xi íí<sup>n</sup> tnúhu ndáá. <sup>18</sup> Te dàtná ní tendaha ñaha-n xii yúhú véxi-í tnuú nchaa ñáyíu ndècu ichi cuehé ichi duha, duca<sup>n</sup> càda-í tendaha-í-yu quíhí<sup>n</sup>-yu càhá<sup>n</sup>-yu tnúhu-í tnuú nchaa ñáyíu ndècu ichi cuehé ichi duha. <sup>19</sup> Te yúhú ndécú yíñuhu-í núú-n, te cada ñaha-n xii-í nàcuáa cùu iní-n sá cuendá-yu, te duca<sup>n</sup> te cundecu yíñuhú-yu núú-n dàcuahá-yu tnúhu-n.

<sup>20</sup> Te ñá díú cuendá mee-ni ñáyíu sa ní sándáá iní-xi càhá<sup>n</sup> ndàhú-í núú-n, chi tnàhá cuendá nchaa ñáyíu na quíndáá iní ñáhã xii-í ndéé ìdá-gã núu na cùndedóho-yu tnúhu càhá<sup>n</sup> ñáyíu na tendaha-í. <sup>21</sup> Te xicá<sup>n</sup> táhú-í núú-n sá ncháá-yu íí<sup>n</sup>-nã ichi na cùú-yu, te íí<sup>n</sup>-nã caní iní ndihí ñahã-yu xii-o dàtná cúú nchòo íí<sup>n</sup>-ni cuu-o. Te duca<sup>n</sup> íí<sup>n</sup>-ná cuu-o ndihí-yu cuendá sá ná quíndáá iní nchaa ñáyíu ndècu ichi cuehé ichi duha sá díú-n ñí tendaha ñaha-n xii-í véxi-í ñuyíú-a. <sup>22</sup> Te nchaa sá vãha ní taxi-n ndècu ndihí-í ní dánèhé-í-yu cuendá sá íí<sup>n</sup>-nã cuú-yu cundecú-yu dàtná ndécú nchòo. <sup>23</sup> Te yúhú cundecu ndihí-í-yu, te yòhó cundecu ndihí ñaha-n xii yúhú cuendá íí<sup>n</sup>-nã cuu ndisá-yu cundecú-yu. Te duca<sup>n</sup> te cutnùní iní nchaa ñáyíu ndècu ichi cuehé ichi duha sá díú mèe-n ní tendaha ñaha-n xii-í véxi-í ñuyíú-a, te cùu iní-n-yu dàtná cúú iní ñáhã-n xii yúhú.

<sup>24</sup> Táu, mee-n ñí taxi cuendá-n-yu, te cuíní-í sá cùndècú-yu núú cùndècu-í cuendá quíní-yu sá quidé càhnu ñaha-n xii-í chi

duca<sup>n</sup>-ni cùu iní ñáhá-n xii yúhú ndéé cútnáhá vátá ngáva-gá ñuyíú. <sup>25</sup> Táu, yòhó ío yíñùhu ndecu-n. Te ñáiyu ndècu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáiyu ní sándáá iní ñáhá xii-í sa xini-yu sá díú-n ní tendaha ñàha-n xii-í véxi-í ñuyíú-a. <sup>26</sup> Te sa xáha<sup>n</sup>-í xii-yu yoo cùu-n, te díu-ni duca<sup>n</sup> càda-í cuendá cuu iní tnáhá-yu dàtná cúú iní ñáhá-n xii-í, te duca<sup>n</sup> cùndecu-í ndihí-yu — cächí-gá xáha<sup>n</sup>-gá xii Tátá-gá Dútú Ndióxi.

## 18

*Ní tñi-güedé Jèsús ndécá ñàha-güedé cuáhá<sup>n</sup>*  
(Mt. 26:47-56; Mr. 14:43-50; Lc. 22:47-53)

<sup>1</sup> Te sátá ducá<sup>n</sup> ní cáhá<sup>n</sup> Jèsús, te ní quee-gá ndihí cue téé xica cuu ndihí-gá cuáhá<sup>n</sup>-güedé ndàa ingá xio yuhu yúu Cèdrón. Te yacá<sup>n</sup> cáá ñi<sup>n</sup> lahuertá, te xití lahuertá-á<sup>n</sup> cuánguihu Jèsús ndihí cue téé xica cuu ndihí-gá. <sup>2</sup> Te té Jüdás déhe té Xímú Iscarioté téé ní sáha cuendá ñáhá xii-gá núú cuè téé cùu úhú iní ñáhá sa xini-dé lahuertá-á<sup>n</sup> chi titní xito ní sáhá<sup>n</sup> Jèsús ndihí-güedé xía<sup>n</sup>. <sup>3</sup> Núú ndáá ichi xía<sup>n</sup> ní sáá té Jüdás ndihí vèi sandadú, ndihí cue téé quide cuendá veñúhu ní techi<sup>n</sup> ñàha cue dútú cùnùu, ndihí cue téé cùu fariséu. Te xínehe-güedé machití ndihí ñi<sup>n</sup> úú-gá sá dèé<sup>n</sup>, te yòtnuú-güedé lìntèrná ndihí ití ní sáá. <sup>4</sup> Te Jèsús sa nàha-gá nchaa nàcuáa cada ñàha-güedé xii-gá núú ní sáhá<sup>n</sup> tuha ñàha-gá xii-güedé, te ní xáha<sup>n</sup>-gá:

—¿Yoo nànducu-ndo? —cachí-gá xáha<sup>n</sup>-gá xii-güedé.

<sup>5</sup> Te ní xáha<sup>n</sup>-güedé:

—Jèsús téé ñuú Nazàrét nánducu-ndí — cächí-güedé xáha<sup>n</sup>-güedé xii-gá.

Te ní xáha<sup>n</sup> Jèsús:

—Yúhú duca<sup>n</sup> nàni-í, te náu-í ndécú-á te núu yúhú nánducu-ndo —cachí-gá xáha<sup>n</sup>-gá xii-güedé.

Te tnáhá té Jüdás téé ní sáha cuendá ñáhá xii-gá ndihí-güedé. <sup>6</sup> Te òré ní xáha<sup>n</sup> Jèsús sá díú-gá cúú téé nànducu-güedé, te ní nacaca dùma-güedé te ní nduá-güedé ndéé ñuhu. <sup>7</sup> Te ní xicá<sup>n</sup> tnúhú tùcu Jèsús núú-güedé yoo nànducu-güedé. Te ní xáha<sup>n</sup> tùcu-güedé sá

Jèsús téé ñuú Nazàrét nánducu-güedé, <sup>8</sup> núu ní xáha<sup>n</sup>-ná Jèsús:

—Sa ní cáhá<sup>n</sup>-í sá díú yúhú duca<sup>n</sup> nàni-í, te núu yúhú nánducu-ndo, te dañà-ndo nchaa cue téé iha na nùhú-güedé —cächí-gá xáha<sup>n</sup>-gá xii-güedé.

<sup>9</sup> Duha ní cuu chi ní quee ndáá-xi nàcuáa ní cáhá<sup>n</sup> méé Jèsús chi ní cachí-gá sá ncháá ñáiyu ní sáha cuendá ñáhá Yá Ndióxi cundecu ndihí-gá vá cuíta nihnú-yu. <sup>10</sup> Te té Xímú, àdi Pelú chi úú díu-dé, néhé-dé ñi<sup>n</sup> machití, te ní tava-dé machití-á<sup>n</sup> ñi<sup>n</sup>-xi te ní xehndé-dé lóho xio cùha ñi<sup>n</sup> téé nàni Malcú ní quèndéé duu<sup>n</sup>. Te téé-á<sup>n</sup> xini<sup>n</sup> cuèchi-dé núú dútú cùnùu-gá. <sup>11</sup> Te ní xáha<sup>n</sup> Jèsús xii té Pelú:

—Nataxúha machití-á<sup>n</sup> núú ñùhú-xí, chi dacuitíi sá ndóhò-í nàcuáa ní cachí Tàtá-í cunduu —cächí-gá xáha<sup>n</sup>-gá xii-dé.

*Jèsús ndécú-gá núú dútú cùnùu-gá*

(Mt. 26:57-58; Mr. 14:53-54; Lc. 22:54)

<sup>12</sup> Te cue sandadú ndihí cue téé cùnùu-gá núú-güedé, ndihí cue téé quide cuendá veñúhu ní tñi-güedé Jèsús, te ní dácútú ñàha-güedé. <sup>13</sup> Te ndèca ñàha-güedé xii-gá cuáhá<sup>n</sup> núú ndécú téé Ànás, te té Ànás-á<sup>n</sup> cúú-dé tátá ñadihí té Caifás. Te té Caifás-á<sup>n</sup> ní cuu-dé dútú cùnùu-gá cuía<sup>n</sup>-á<sup>n</sup>. <sup>14</sup> Te díu-ni téé-á<sup>n</sup> ní xáha<sup>n</sup>-dè xii ñáiyu isràél sá vàha-gá sá ñi<sup>n</sup>-ní téé na cùú-dé sá cuendá-yu nchaa-yu.

*Té Pelú càhá<sup>n</sup>-dé núú ñáiyu sá ñà túú xini-dé Jèsús*

(Mt. 26:69-70; Mr. 14:66-68; Lc. 22:55-57)

<sup>15</sup> Te té Pelú, àdi Xímú chi úú díu-dé, ndihí ingá tucu-dé nàcuáa xica cuu ndihí-güedé Jèsús nchicú<sup>n</sup> ñáhá-güedé xii-gá cuáhá<sup>n</sup>. Te ñi<sup>n</sup> téé-á<sup>n</sup> xini<sup>n</sup> tnáhá-dé ndihí dútú cùnùu-á<sup>n</sup> núu nchicú<sup>n</sup>-dé tnáhá-dé Jèsús cuánguihu ndéé núú cáá vèhe téé cùnùu-á<sup>n</sup>. <sup>16</sup> Dico té Pelú ní ndóo-dé yuyèhe ndaa quehé, núu ní ndee téé ndihí té Pelú-á<sup>n</sup> ní cáhá<sup>n</sup> ndihí-dé ñàha ndéé yuyèhe, te ndèca-dé té Pelú cuánguihu. <sup>17</sup> Te ní xáha<sup>n</sup> ñàha ndéé yuyèhe-á<sup>n</sup> xii té Pelú:

—¿Náa ñá díú yòhó tnáhá-n xica cuu ndihí-n téé ndèca-güedé cuánguihu-a? — cächí-a<sup>n</sup> xáha<sup>n</sup>-a<sup>n</sup> xii-dé.

Te ní xáha<sup>n</sup> té Pelú:

—Ñáhá, ñá túú tēe-ǎ<sup>n</sup> xícá cùu ndihí-ú —  
càchí-dé xǎhá<sup>n</sup>-dē xii-a<sup>n</sup>.

18 Te ío víxi<sup>n</sup> quide-xi núu cue tēe xínu cuechi, ndihí cue tēe quide cuendá veñúhu ní dátñáhá-güedé ñuhú, te xínutñí teté-güedé ndihí té Pèlú.

*Dútú cúnúu nducu tnúhu-dé núú Jèsús*

(Mt. 26:59-66; Mr. 14:55-64; Lc. 22:66-71)

19 Te dútú cúnúu ní xícá<sup>n</sup> tnúhú-dé núú Jèsús núu nándí cùu cue tēe xica cuu ndihí-gá, te nándí sá dánèhé ñáhá-gǎ xii-güedé. 20 Te ní xáha<sup>n</sup>-gǎ:

—Yúhú càhá<sup>n</sup> ndodo-í núu nchàa ñáyiu cuéi xití veñúhu càhnu sá ío cúnúu, te cuéi xití nchaa dava-gá veñúhu núu tàcá nchaa ñáyiu isràél duca<sup>n</sup>-ni dānehé-í-yu, te ñá túú dàyuhu càhá<sup>n</sup>-í. 21 Núu vá càcá<sup>n</sup> tnúhú-n nù-í. Càcá<sup>n</sup> tnúhú núu nchàa ñáyiu sácúndedóho tnúhu càhá<sup>n</sup>-í, te na càhá<sup>n</sup>-yu núu nása ndùu tnúhu càhá<sup>n</sup>-í chi xíní-yu —càchí-gá xáha<sup>n</sup>-gǎ xii-dé.

22 Te sá dúcá<sup>n</sup> ñí càhá<sup>n</sup> Jèsús núu ì<sup>n</sup> tēe quide cuendá veñúhu nùtní-dé tnàhá-dé te ní caní-dé ì<sup>n</sup> déhndé núu-gǎ. Te ní xáha<sup>n</sup>-dē:

—¿Ná cuendá duca<sup>n</sup> càhá<sup>n</sup>-n núu dútú cúnúu-í? —càchí-dé xǎhá<sup>n</sup>-dē xii-gá.

23 Te ní xáha<sup>n</sup> Jèsús xii-dé:

—Te núu nèhé ní càhá<sup>n</sup>-í te càhá<sup>n</sup>-n nǎsa ndùu tnúhu ní càhá<sup>n</sup>-í, te yúhú càhá<sup>n</sup> váha-í te duca<sup>n</sup> càniha-n —càchí-gá xáha<sup>n</sup>-gǎ xii-dé.

24 Te ndùtu yoho-ni Jesús ní dánùhú ñáhá tē Ànás xii-gá ndaha té Caifás dútú cúnúu-gá.

*Té Pèlú càhá<sup>n</sup> tucu-dé núú ñáyiu sá ñà túú xíní-dé Jèsús*

(Mt. 26:71-75; Mr. 14:69-72; Lc. 22:58-62)

25 Te té Pèlú nùtní teté-ni-dé, te ní xáha<sup>n</sup>-güedé xii-dé:

—¿Náa ñá díú tnàhá yòhó xícá cùu ndihí tēe ndèca-ndí véxi-ǎ<sup>n</sup>? —càchí-güedé xǎhá<sup>n</sup>-güedé xii-dé.

Te ní xáha<sup>n</sup> tē Pèlú:

—Ñáhá, ñá túú tēe-ǎ<sup>n</sup> xícá cùu ndihí-ú —càchí-dé xǎhá<sup>n</sup>-dē xii-güedé.

26 Te ì<sup>n</sup> ñaní tnàhá tēe ní xehndé té Pèlú lóho-xi-ǎ<sup>n</sup> xínú cuèchi-dé tnàhá-dé núu dútú cúnúu. Te tēe-ǎ<sup>n</sup> ñí xáha<sup>n</sup>-dē xii té Pèlú:

—¿Náa ñá díú tnàhá-n ndihí-n-dé ní xíní ñáhá-í òré ní tní-ndí-dé xití lahuèrtá? —càchí-dé xǎhá<sup>n</sup>-dē xii-dé.

27 Te té Pèlú ní xáha<sup>n</sup> tucu-dé sá ñà díú-dē, te òré-ǎ<sup>n</sup> ñí cana ì<sup>n</sup> líhi.

*Jèsús ndécú-gǎ núú tē Pìlatú*

(Mt. 27:1-2, 11-14; Mr. 15:1-5; Lc. 23:1-5)

28 Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáhá<sup>n</sup> vechi<sup>n</sup> tēe cùu gobiernú. Te sa ta cùditó-ni-gá cuáhá<sup>n</sup> núu ñá ní cuíní cue tēe isràél quíhu-güedé xití vechi<sup>n</sup> tēe cùu gobiernú-ǎ<sup>n</sup>. Te núu ñí quíhu-güedé vechi<sup>n</sup>-ǎ<sup>n</sup> ñá, te vá cúú-gǎ quíhu-güedé cudìni-güedé vico pàscuá ní cùu chi duca<sup>n</sup> tnàhí quide-güedé. 29 Núu té Pìlatú tēe cùu gobiernú ní quee-dé vechi<sup>n</sup>-dé ní càhá<sup>n</sup> ndihí ñaha-dē xii-güedé, te ní xáha<sup>n</sup>-dē:

—¿Ná cuèchi ní quide tēe-a núu ndèca-ndo-dé véxi? —càchí-dé xǎhá<sup>n</sup>-dē xii-güedé.

30 Te ní xáha<sup>n</sup>-güedé:

—Te núu dícó ñá túú cuèchi-dé-ǎ<sup>n</sup> te vá cándèca-ndí-dé quixi núu-n ní cùu —càchí-güedé xǎhá<sup>n</sup>-güedé xii-dé.

31 Te ní xáha<sup>n</sup> tucu té Pìlatú xii-güedé:

—Chí cándèca-dé cuánùhú, te cada ndáá-ndó cuèchi-dé nàcuáa càa leí méé-ndó —càchí-dé xǎhá<sup>n</sup>-dē xii-güedé.

Te ní xáha<sup>n</sup>-güedé:

—Dico nchúhú ñáyiu isràél chi ñá túú dùca<sup>n</sup> taxi tnuní leí sá càhní-ndí —càchí-güedé xǎhá<sup>n</sup>-güedé xii-dé.

32 Te duca<sup>n</sup> ñí cuu chi dacuití ñí quee ndáá-xi nàcuáa ní càhá<sup>n</sup> méé Jèsús cada-xi cuú-gá. 33 Te cuándihu té Pìlatú vechi<sup>n</sup>-dé, te ní cana-dé Jèsús ní xícá<sup>n</sup> tnúhú-dē núu-gǎ, te xáha<sup>n</sup>-dē:

—¿Yòhó yíndàha-n ñáyiu isràél-ǎ<sup>n</sup>? —càchí-dé xǎhá<sup>n</sup>-dē xii-gá.

34 Te ní xáha<sup>n</sup> Jèsús:

—¿Te xíǎ<sup>n</sup> càhá<sup>n</sup>-n sǎ véxi iní méé-n, àdi ío ì<sup>n</sup> ñáyiu ní cachí tnúhu xii-n cuendá-í? —càchí-gá xáha<sup>n</sup>-gǎ xii-dé.

35 Te ní xáha<sup>n</sup> tē Pìlatú xii-gá:

—Ñá díú tēe isràél cùu-í núu duca<sup>n</sup> càhá<sup>n</sup>-n, chi cue ñaní tnàhá-n cuè tēe isràél ndihí cue dútú cúnúu ní taxi cuendá ñáhá-güedé xii-n ìha. ¿Te ná ní quide-n? —càchí-dé xǎhá<sup>n</sup>-dē xii-gá.



<sup>36</sup> Te ní xáha<sup>n</sup> Jèsús:

—Ñá díú tée ñuyíú-a cùu-í te ni ñà túú vèxi-í taxi tnùn-í ñuyíú-a, chi núu dícó iha tàxi tnùn-í á<sup>n</sup> te cue tée xìca cuu ndih-í nàá-güedé ndih-í cue tée isràél cuendá sá vǎ tñí ñaha-güedé xii-í ní cùu, dico ñá túú vèxi-í sá táxi tnùn-í ñuyíú-a —càchí-gá xáha<sup>n</sup>-gǎ xii-dé.

<sup>37</sup> Te ní xáha<sup>n</sup> tǎ Pilatú:

—¿Te tée yìndaha ñáyiú cùu-ó vání? —càchí-dé xáha<sup>n</sup>-dǎ xii-gá.

Te ní xáha<sup>n</sup> Jèsús:

—Te dàtná càchí-n-ǎ<sup>n</sup> yìndaha ndisa-í ñáyiú, chi yúhú véxi-í ñuyíú-a te iha ní cacu-í te càhá<sup>n</sup>-í mee-ni tñuhu ndáá. Te nchaa ñáyiú na cùdí ìní-xi tnúhu ndáá, te tedóho-yu nchaa tnúhu càhá<sup>n</sup>-í —càchí-gá xáha<sup>n</sup>-gǎ xii-dé.

<sup>38</sup> Te ní xáha<sup>n</sup> tǎ Pilatú:

—¿Te ná cúu-tu tnúhu ndáá-ái<sup>n</sup>? —càchí-dé xáha<sup>n</sup>-dǎ xii-gá.

*Càchí-güedé sá cáhni-güedé Jèsús*

*(Mt. 27:15-31; Mr. 15:6-20; Lc. 23:13-25)*

Te sátá ñí yáha ní xicá<sup>n</sup> tnúhú tǎ Pilatú núu Jèsús, te ní quee tucu-dé quehé, te xáha<sup>n</sup>-dǎ xii cue tée isràél:

—Ñá túú ñá cuèchi tée-a. <sup>39</sup> Te yáha-ni chi duca<sup>n</sup> tnàhí quide nchóhó sá ndi tnahá nduu vico pascuá cuini-ndó sǎ dácacu-í ñ<sup>n</sup> tée yìhi vecaá. Te núu cuini-ndó te na dàcacu-í tée yìndaha ñaha xii-ndo —càchí-dé xáha<sup>n</sup>-dǎ xii-güedé.

<sup>40</sup> Te sá dúcá<sup>n</sup> ñí cáhá<sup>n</sup>-dé, núu nchaa-güedé níhi ní cáhá<sup>n</sup>-güedé, te xáha<sup>n</sup>-güedé:

—¡Vá dácacu-n tǎe-á<sup>n</sup>, tǎ Barrábás dácacu-n! —càchí-güedé xáha<sup>n</sup>-güedé xii-dé.

Te tǎ Barrábás-á<sup>n</sup> ñí cuu-dé ñ<sup>n</sup> ñadúhú.

## 19

<sup>1</sup> Te tǎ Pilatú ní táuchíú<sup>n</sup>-dǎ ní tñi ñaha cuè sandadú xii Jèsús, te ní caniha-güedé xii-gá ndih-í ñi. <sup>2</sup> Te ñu-ni cue tǎe-á<sup>n</sup> ñí cadúha-güedé ñ<sup>n</sup> coroná ñu ní chihi-güedé díquí-gǎ, te ní dáquíu nuu ñaha-güedé xii-gá ñ<sup>n</sup> dóo tícuèhé víhí. <sup>3</sup> Te ní sáhá<sup>n</sup> ndehe yatni-gá-güedé núu-gǎ, te ní xáha<sup>n</sup>-güedé:

—¡Ío càhnu cuu yohó tǎe yìndaha ñaha xii ñáyiú isràél! —càchí-güedé xáha<sup>n</sup>-güedé cúdíquí ndeé ñáhá-güedé xii-gá.

Te ní cani-güedé déhndé núu-gǎ.

<sup>4</sup> Te ní quee tucu tǎ Pilatú quehé te ní xáha<sup>n</sup>-dǎ xii nchaa ñáyiú xíndecu quehé:

—Te cundehe-ndo-dǎ ná ndeé ñuhu-í-dé iha, chi yúhú sáha-í cuendá sá ñá túú cuèchi-dé —càchí-dé xáha<sup>n</sup>-dǎ xii-yu.

<sup>5</sup> Te ní ndeñuhu ñaha tǎ Pilatú xii Jèsús xití vechiú<sup>n</sup>-dé te ñuhu ñ<sup>n</sup> coroná ñu díquí-gǎ, te ñihnu-gá dóo tícuèhé víhí-ǎ<sup>n</sup>. Te ní xáha<sup>n</sup> tǎ Pilatú xii-yu:

—¡Nái-dé-a! —càchí-dé xáha<sup>n</sup>-dǎ xii-yu.

<sup>6</sup> Te ní xini ñáhá cuè dútú cùnùu ndih-í cue tǎe quide cuendá veñuhu. Te ní cuáá-güedé, te xáha<sup>n</sup>-güedé:

—¡Cata caa-dé! ¡Cata caa-dé núu cùrúxí! —càchí-güedé xáha<sup>n</sup>-güedé xii-dé.

Te ní xáha<sup>n</sup> tǎ Pilatú:

—Váha-gá núu candeca mee-ndo-dǎ quíhí<sup>n</sup> cata caa-ndo-dǎ núu cùrúxí, chi yúhú cútnùn-í ñí-í sá ñá túú na cuèchi-dé —càchí-dé xáha<sup>n</sup>-dǎ xii-güedé.

<sup>7</sup> Te ní xáha<sup>n</sup> cuè tǎe isràél:

—Léi ndécú ndih-í nchúhú càchí-xi sá dàí cuú-dé, chi càchí-dé sá Dǎhe Yá Ndióxi cúu-dǎ —càchí-güedé xáha<sup>n</sup>-güedé xii-dé.

<sup>8</sup> Te sá dúcá<sup>n</sup> ñí xáha<sup>n</sup>-güedé xii tǎ Pilatú, te vǎa-gá ní yúhú-dé. <sup>9</sup> Núu cuándihu tucu-dé vechiú<sup>n</sup>-dé, te ní xáha<sup>n</sup> tucu-dé xii Jèsús:

—¿Te yòhó ndeé tǎe cùu-n-i? —càchí-dé xáha<sup>n</sup>-dǎ xii-gá.

Dico Jèsús ñá túú ní cáhá<sup>n</sup>-gá.

<sup>10</sup> Núu ní xáha<sup>n</sup> tǎ Pilatú xii-gá:

—¿Te vá càchí tnúhu-n núu ndeé tǎe cùu-n-u? ¡Náa ñá túú xini-n sǎ yúhú táxi tnùn-í, te cuu-ni tauchiú<sup>n</sup>-í cata caa ñaha-güedé xii-n núu cùrúxí cuú-n, te cuu-ni dàcacu ñaha-í xii-n-ǎ<sup>n</sup>? —càchí-dé xáha<sup>n</sup>-dǎ xii-gá.

<sup>11</sup> Te ní xáha<sup>n</sup> Jèsús:

—Yòhó ñá túú sǎ táxi tnùn-í ñáhá-n xii yúhú ní cùu núu ñá túú Yá Ndióxi ní cuini-gá sá dúcá<sup>n</sup> cùnduu, te tǎe ní taxi cuendá ñáhá xii-í núu-n tǎe-á<sup>n</sup> ío-gá ndécuechi-dé dàcúxí yòhó —càchí-gá xáha<sup>n</sup>-gǎ xii-dé.

<sup>12</sup> Te òré-á<sup>n</sup> ñí ngúíta tǎ Pilatú ndúcú-dǎ nàcuáa cada-dé dàcacu-dé Jèsús ní cùu, dico cue tǎe isràél ní ngúíta-güedé ní cuáá-güedé, te xáha<sup>n</sup>-güedé:

—Te núu na dàcacu-n tǎe-á<sup>n</sup>, te ñá díú tǎe tnàhá tnúhu ndih-í tǎ Cèsár cúu-n. Chi

ndëda-ni cãa tée na cãchí sã cúú-dë tée yíndaha ñaha xii ñáyiú cùú úhú iní-dé té Cèsár. Te té Jèsús-án cãchí-dé sã táxi tnùní-dé —cãchí-güedé xãha<sup>n</sup>-güedé xii-dé.

<sup>13</sup> Te sã dúcã<sup>n</sup> ñí xãha<sup>n</sup>-güedé xii té Pilatú nõu ní quee-dé ndihí Jèsús cuáhã<sup>n</sup> ndihí ñaha-dë corrèdór núú ñí quee mee-ni yúú vãha núú ñúhú, te xiã<sup>n</sup> nãní-xí Gãbatã tnúhu hëbreú. Te xiã<sup>n</sup> ndécú xilé sãcõo nchihí té Pilatú xèhndé-dé cuéchi ñáyiú, núú ní nucóo-dé núú xilé-dé òré ní quexio-dé ndihí Jèsús. <sup>14</sup> Te cùú-xi datná cuádava nduu, nduu vispré vico pãscuã. Te ní xãha<sup>n</sup> tã Pilatú xii ñáyiú isrãél:

—¡Nái tée yíndaha ñaha xii-ndo-a! — cachí-dé xãha<sup>n</sup>-dë xií-yu.

<sup>15</sup> Te ní cuãá-yu, te xãhã<sup>n</sup>-yu:

—¡Cahni-dé! ¡Cahni-dé! ¡Cata caa-dé núú cùrúxí! —cãchí-yu xãhã<sup>n</sup>-yu.

Te ní xãha<sup>n</sup> tã Pilatú:

—¿Te yúhú cata caa-í tée yíndaha ñaha xii-ndo-u? —cachí-dé xãha<sup>n</sup>-dë xií-yu.

Te cue dútú cúnùú ní xãha<sup>n</sup>-güedé:

—Nchúhú ñã túú-gã tée yíndaha ñaha xii-ndí, chi ñndí-ni té Cèsár yíndaha ñaha-dé xii-ndí —cãchí-güedé xãha<sup>n</sup>-güedé xii-dé.

<sup>16</sup> Te té Pilatú ní xãha<sup>n</sup>-dë ní quehen cuendã-güedé Jèsús ndécã ñaha-güedé cuáhã<sup>n</sup> cata caa ñaha-güedé núú cùrúxí.

### *Sãta caa-güedé Jèsús núú cùrúxí*

(Mt. 27:32-44; Mr. 15:21-32; Lc. 23:26-43)

<sup>17</sup> Te ní quee Jèsús nchídó-gã cùrúxí cuáhã<sup>n</sup> ñí xichí núú nãní Yìquí Díquí Ndiýi. Te tnúhu hëbreú quée-xí Gõlgotã. <sup>18</sup> Te yãcã<sup>n</sup> ní sata caa ñaha-güedé xii-gã núú cùrúxí-án. Te xio xio ñndí-gã ní sata caa-güedé úú cue tée ndècu ndisa cuéchi-xi ñndí-ni núú cùrúxí tucu. <sup>19</sup> Te ní táuchíú<sup>n</sup> tã Pilatú ní taxi ndecu-güedé ñí sã ndéé lètrã núú cùrúxí tá cãa-gã, te duha cãchí lètrã-án: “Jèsús tée ñuú Nazàrét, tée yíndaha ñaha xii ñáyiú isrãél”, duha cãchí-xi. <sup>20</sup> Te vãi ñáyiú isrãél ní xiní-yu ñacuãã cãhá<sup>n</sup> lètrã-án, chi yatni-ni yuhu ñuú ní sata caa ñaha-güedé xii-gã núú cùrúxí. Te lètrã-án cãhá<sup>n</sup>-xi tnúhu hëbreú, te cãhá<sup>n</sup>-xi tnúhu griégú, te cãhá<sup>n</sup>-xi tnúhu làtín. <sup>21</sup> Te ní xãha<sup>n</sup> cué dútú cúnùú xii té Pilatú:

—Vã táuchíú<sup>n</sup>-n tee-güedé lètrã cãhá<sup>n</sup>-xi “Tée yíndaha ñaha xii ñáyiú isrãél” ní cùú, vãha-gã tauchíú<sup>n</sup>-n tee-güedé lètrã cãhá<sup>n</sup>-xi “Tée cãchí yíndaha ñaha xii ñáyiú isrãél ní cùú” —cachí-güedé xãha<sup>n</sup>-güedé xii-dé.

<sup>22</sup> Te ní xãha<sup>n</sup> tã Pilatú:

—Ñacuãã ní táuchíú<sup>n</sup>-í ní tee-güedé te duca<sup>n</sup> quèndóo-xi —cãchí-dé xãha<sup>n</sup>-dë xii-güedé.

<sup>23</sup> Te sãtã ñí sata caa ñaha cué sandadú xii Jèsús núú cùrúxí, te cúmí xichí ní quide-güedé dóo-gã, te ñí ñí xichí dóo-gã ní cãhñu cue sandadú-án. Te ndècu ñí dóo-gã dóo cãní ñã túú ní tãcu. <sup>24</sup> Te cuendã dóo-ã<sup>n</sup> ní xítnãha cue sandadú-án:

—Vã ndátã-ó dõo-a, vãha-gã nõu na còto ndéé-ó cuendã quini-ó ndédacãa-o cuu cuendã-ó —cãchí-güedé xítnãha-güedé.

Te duca<sup>n</sup> ñí quide-güedé chi ní quee ndãã-xi ñacuãã cãhá<sup>n</sup>-xi núú tütú Yã Ndiõxí núú cãchí-xi: “Titní xichí ní cãhñu-güedé dóo-í. Te ní xito ndéé-güedé cuendã cutnùní iní-güedé ndédacãa-güedé níhí-güedé dóo-í”, duha cãchí-xi núú tütú-gã. Te sã dúcã<sup>n</sup> cãhá<sup>n</sup>-xi núú tütú Yã Ndiõxí nõu xiã<sup>n</sup> duca<sup>n</sup> ñí quide cue sandadú-án.

<sup>25</sup> Te yatni ñndí curúxí núú tácãa Jèsús nútñí ñãná-gã, ndihí cùhú-xi, ndihí tá Màriã ñadíhí té Clèofás, ndihí tá Màriã Magdalèná. <sup>26</sup> Te ní xiní Jèsús ñãná-gã nútñí-án ñndí ñí tée ní xica cuu ndihí-gã, tée ío cùú iní-gã, te ní xãha<sup>n</sup>-gã xii ñãná-gã:

—Ñãã, tée nútñí-án nduu-dé dàtnã déhe mee-n —cãchí-gã xãha<sup>n</sup>-gã xii-án.

<sup>27</sup> Te ní xãha<sup>n</sup>-gã xii tée ní xica cuu ndihí-gã-án:

—Ñaha-án nduu-án dàtnã ñãná mée-n —cãchí-gã xãha<sup>n</sup>-gã xii-dé.

Núú ndéé dàvã-án ñí nduu ñãná ñãhá tãe-án xii ñãná-gã.

### *Ní xíhí Jèsús*

(Mt. 27:45-56; Mr. 15:33-41; Lc. 23:44-49)

<sup>28</sup> Te ní cutnùní iní Jèsús sã ñí ndihí chiú<sup>n</sup> ní táhú Tãtã-gã Dútú Ndiõxí ní quide-gã nõu ní cachí-gã:

—Yíhí-í ndute —cãchí-gã.

Te duha ní cãhá<sup>n</sup>-gã chi ní quee ndãã-xi ñacuãã cãhá<sup>n</sup>-xi núú tütú Yã Ndiõxí.

<sup>29</sup> Te ndècu ìn lítu ñuhu ndudí íá. Te sá dúcá<sup>n</sup> ñí cáhá<sup>n</sup>-gá sá yìchí-gá ndute, núu xiá<sup>n</sup> ní quehe<sup>n</sup>-güedé cáchí te ní chindóyo-güedé xítí ndudí íá-á<sup>n</sup>, te ní chinenu-güedé díquí ìn díte yutnu nàni hisópó, te ní ndo-cani-güedé ní chihi-güedé yuhu-gá. <sup>30</sup> Te sátá ñí xihí-gá ndudí íá-á<sup>n</sup>, te càchí-gá:

—Vitna ní dǎxǐnu cava-í nchaa chùu<sup>n</sup> ní cachí Tàtà-í cada-í —duha ní cachí-gá.

Te ní xócuíta dúcú<sup>n</sup>-gǎ ndàa núú-gǎ, te ní xihí-ni-gá.

*Ìn sandàdú ní caá<sup>n</sup>-dé yiqui naha Jèsús ndihí ìn pùya yíhí càa núú-xi*

<sup>31</sup> Te cuendá sá nduu vispré vico pascua cúu-xí núu ñá ní cuini cue tée israhél cundecu-ni yiqui cùñú-gá núu cùrúxi ndihí yiqui cùñú cue tée ní sata caa-güedé díñi-gá, chi cuendá nduu tnée-án cúu-xí nduu ndetatú ñáyi, te ío quide cahnú-yu nduu-án, núu ní xáha<sup>n</sup>-güedé xii té Pilatú sá táuchùu<sup>n</sup>-dé quíhí<sup>n</sup> cue tée cáhnú-güedé díhí<sup>n</sup> Jèsús ndihí díhí<sup>n</sup> cue tée tàcaa ndihí-gá, te xocani-güedé yiqui cùñú-gá ndihí yiqui cùñú-güedé yacá<sup>n</sup>. <sup>32</sup> Te sátá dúcá<sup>n</sup> te ní sáhá<sup>n</sup> cue sandàdú ní sáhnú-güedé díhí<sup>n</sup> cue tée tàcaa xio xio díñi Jèsús. <sup>33</sup> Te òré ní cuyatni-güedé núú-gǎ, te ní xiní-güedé sá sá ní xihí-gá núu ñá ní sáhnú-güedé díhí<sup>n</sup>-gá.

<sup>34</sup> Dico ìn sandàdú-án ní cúxi-dé pùya néhé-dé ìn xio yiqui naha-gǎ, te yíhí caá núú-xi núu ní caá<sup>n</sup>-xi yiqui naha-gǎ ní quee níñí ndihí ndute cuií. <sup>35</sup> Te yúhú té Juàá tée ní cadúha tutú-a ní xiní-í nàcuáa ní cuu ní xihí Jèsús, te xiá<sup>n</sup> núu cáhá<sup>n</sup> ndáá-í cuendá quíndáá iní-ndó. <sup>36</sup> Te duca<sup>n</sup> ñí cuu ñá ní sáhnú-güedé díhí<sup>n</sup> Jèsús, chi ní quee ndáá-xi nàcuáa cáhá<sup>n</sup>-xi núu tütú Yǎ Ndióxi núu càchí-xi: “Vá cahnú-güedé ni ìn yiqui-gá”, duha càchí-xi. <sup>37</sup> Te duca<sup>n</sup> ñí quide-güedé Jèsús ní caá<sup>n</sup>-güedé yiqui naha-gǎ, chi ingá xichi núu tütú Yǎ Ndióxi càchí-xi: “Sáá nduu te quini-güedé ìn tée ní dánicuehé-güedé”, duha càchí-xi.

*Chindúxi-güedé Jèsús*

*(Mt. 27:57-61; Mr. 15:42-47; Lc. 23:50-56)*

<sup>38</sup> Te sátá dúcá<sup>n</sup> ñí cuu, te té Chèé téé ñúu Arimateá tnahá-dé ní sándáá iní-dé tñuhu Jèsús dico dayuhu, chi ní xóo

yuhú-dé cue téé cùnuu núu ñáyi israhél. Te téé-án ñí xáha<sup>n</sup>-dè xii té Pilatú núu vá dáhá-dè canehe-dé yiqui cùñú Jèsús quíhí<sup>n</sup> chindúxi-dé, te té Pilatú ní xáha<sup>n</sup>-dè xii-dé sá cúu canehe-dé yiqui cùñú Jèsús quíhí<sup>n</sup>, núu ní sáhá<sup>n</sup>-dé ní nuu nehe-dé yiqui cùñú-gá núu cùrúxi nchídó-dé cuáhá<sup>n</sup>.

<sup>39</sup> Te té Nicodemú téé ní sáhá<sup>n</sup> niú ní cáhá<sup>n</sup> ndihí-dé Jèsús ndéé díhna, téé-án néhé-dé ócò úxí kílu yuchi ní cuáha mee-ni yúcu sá nání mǐrrá ndihí yúcu sá nání àloés. Te ío váha tñami sahá<sup>n</sup>. <sup>40</sup> Te ní naníhí tnahá-dé ndihí té Chèé, te ní chidúcú<sup>n</sup>-nuu-güedé yiqui cùñú Jèsús mee-ni dǒo vǎha, te nàcuáa ta dúcú<sup>n</sup> nuu-güedé yiqui cùñú-gá dóo-á<sup>n</sup>, te duca<sup>n</sup> ta chido-güedé yuchi sáhá<sup>n</sup> tñámí-án núu dǒo-á<sup>n</sup> chí duca<sup>n</sup> tñahí quide ñáyi israhél òré chindúxi tnahá-yu. <sup>41</sup> Te yatni núu ñí sata caa-güedé Jèsús caá ìn lahuertá. Te xítí lahuertá-án nchí ìn yaú cava duha cuáhá<sup>n</sup> ndáá-xi, te vátá yǒo ìn-gá nguíndúxi xiá<sup>n</sup>. <sup>42</sup> Te cuendá sá ñí cuyatni tnahá nduu ndetatú ñáyi israhél núu xiá<sup>n</sup> yaú cava nchí yatni-ni xiá<sup>n</sup> ñí chihi-güedé yiqui cùñú Jèsús.

## 20

*Jèsús ní ndoto-gá*

*(Mt. 28:1-10; Mr. 16:1-8; Lc. 24:1-12)*

<sup>1</sup> Te ndumìngú tacuìhndá-gá cuáhá<sup>n</sup> tá Màriá Magdalèna cuáhá<sup>n</sup> ngoto-xi yaú núu ñí chihi-güedé yiqui cùñú Jèsús, te ní sáá-xi ní xiní-xi sá ñá túu-gǎ ndèdí yúu yèhe yaú-án. <sup>2</sup> Núu xinu-xi cuánuhú núu ndécú té Xímú, àdi Pelú chí úu diu-dé, ndihí ingá téé ní xica cuu ndihí-gá téé ío cùu iní-gá, te ní xáha<sup>n</sup>-xi xii-güedé:

—Nèhe-güedé yiqui cùñú Jèsús cuáhá<sup>n</sup>, te ñá xiní-ó ndéé ní taxi ndecu-güedé —càchí-xi xáha<sup>n</sup>-xi xii-güedé.

<sup>3</sup> Te ní quee té Pèlú ndihí ingá téé-án cuáhá<sup>n</sup> ndéhé-güedé yaú núu ñí chihi-güedé yiqui cùñú-gá. <sup>4</sup> Te ndúu-güedé xinú-güedé cuáhá<sup>n</sup> ní cùu, dico ingá téé-án ñí cuu níhi-gá sáhá-dé cuáhá<sup>n</sup>-dé núu díhna-gá-dé ní sáá-dé yuhu yaú núu ñí chihi-güedé yiqui cùñú Jèsús ní cùu. <sup>5</sup> Te ní ngáundeyi-dé xító nihni-dé xítí yaú-án, te ní xiní-dé mee-nǎ dóo vǎha sá ñí xiducú<sup>n</sup>

nuu-gá yúcu, dico ñá ní quǐhu-dé. <sup>6</sup> Te sátá ñí sáá té Pèlú te cuánguihu-dé xití yaú-á<sup>n</sup>, núu tñhá-dé ní xiní-dé nchaa dóó ñí xíducú<sup>n</sup> nuu-gá yúcu-á<sup>n</sup>. <sup>7</sup> Te ní xiní-dé sá dóó ñí xíndútú díquí-gǎ ñá túú càtuu jundú-xi ndíhi dóó ñí xíducú<sup>n</sup> nuu-gá chi ní nadúcu<sup>n</sup>nuu-ná càtuu ñí xio. <sup>8</sup> Te nchícú<sup>n</sup> tucu téé ní sáá díhna-gá-á<sup>n</sup> cuánguihu xití yaú-á<sup>n</sup>, te ní xiní-dé sá dóó-ñá yúcu, te ñá túú-gǎ yiqui cùñú Jèsús ñúu ní sándáá iní-dé sá ñí ndoto-gá. <sup>9</sup> Chi vátá tècú tñúní-gá-güedé nàcuáa càhá<sup>n</sup>-xi núu tütú Yá Ndiöxí núu cächí-xi sá Jèsús ndoto-gá. <sup>10</sup> Te ní xícó ndí ndúú cue téé ní sángoto yaú núu ñí chihi-güedé yiqui cùñú Jèsús ní cùu cuánuhú-güedé vehe-güedé.

*Jèsús ní naníhi tñhá-gǎ ndíhi tá Màriá Magdaléná*  
(Mr. 16:9-11)

<sup>11</sup> Te ní sáá tucu tá Màriá yuhu yaú núu ñí chihi-güedé yiqui cùñú Jèsús te ní ngúita-xi ndàhyú-xi, te ní ngáundeyi-xi xìto nihni-xi xití yaú-á<sup>n</sup>. <sup>12</sup> Te xití yaú-á<sup>n</sup> ñí xiní-xi úú espíritú xínú cuèchi núu Yá Ndiöxí xíxíhnu-xi mee-ni dóó cuixí<sup>n</sup> xíndecu-xi núu ñí cáa yiqui cùñú-gá. Te ñí-xi nùcúo núu ñí cáa díquí-gǎ, te ñí-xi nùcúo núu ñí cáa sáhá-gǎ. <sup>13</sup> Te espíritú-á<sup>n</sup> ñí xáha<sup>n</sup>-xi xì tá Màriá:  
—¿Ná cuendá ndàhyú-n? —cächí-xi xáha<sup>n</sup>-xi.

Te ní xáha<sup>n</sup> tá Màriá:

—Ndàhyú-í chi nèhe-güedé yiqui cùñú Yaá cúu Xítohó-í cuáhá<sup>n</sup>, te ñá túú xiní-í ndéé ní taxi ndecu-güedé —cächí-xi xáha<sup>n</sup>-xi xì cue espíritú-á<sup>n</sup>.

<sup>14</sup> Te tñúhu-ni-á<sup>n</sup> ñí cáhá<sup>n</sup>-xi te ní nchócótó-xí ñí xio, te ní xiní-xi Jèsús núní-gá dico ñá túú ní cùtnuní iní-xi sá díú mèe-gá. <sup>15</sup> Te ní xáha<sup>n</sup> Jèsús xii-xi:

—¿Ná cuendá ndàhyú-n? ¿Yoo nànducu-n? —cächí-gá xáha<sup>n</sup>-gǎ xii-xi.

Te mee-xi ñí sani iní-xi sá tèe xìto lahuertá-á<sup>n</sup> cúu tèe-á<sup>n</sup>, núu ní xáha<sup>n</sup>-xi:

—Táta, te núu yòhó néhé-n yiqui cùñú Jèsús cuáhá<sup>n</sup>, te cáhá<sup>n</sup>-n ndéé ní taxi ndecu-n chi cuendá naquehe<sup>n</sup>-í canehe-í nùhú —cächí-xi xáha<sup>n</sup>-xi.

<sup>16</sup> Te ní cáhá<sup>n</sup> díú ñàha-gá xii-xi, te xáha<sup>n</sup>-gǎ:

—¿Màriá! —cächí-gá xáha<sup>n</sup>-gǎ xii-xi.

Te ní ndacoto-xi núu-gǎ, te ní cáhá<sup>n</sup>-xi tñúhu hèbreú, te xáha<sup>n</sup>-xi:

—¿Rabóní! —cächí-xi xáha<sup>n</sup>-xi. Te tñúhu-á<sup>n</sup> quée-xi Mèstrú.

<sup>17</sup> Te ní xáha<sup>n</sup> Jèsús:

—Daña vá ngání ñàha-n chi vátá ndáá-gǎ-í núu ndécú Tàtá-í. Te nùhú-n cùñaha-n xii cue téé ío váha ní tñhá tñúhu ndíhi-í sá ndáá-í núu ndécú Tàtá-í Dútú Ndiöxí, te díu-gá cúu Tàtá-ndó nchàa-ndo, te díu-ni-gá cúu Ndiöxí-ndó —cächí-gá xáha<sup>n</sup>-gǎ xii-xi.

<sup>18</sup> Te ní natñí tá Màriá Magdaléná ichi cuánuhú-xi cùñaha-xi xii cue téé ní xica cuu ndíhi-gá sá ñí xiní-xi Jèsús, te ní xáha<sup>n</sup>-xi xii-güedé nchaa nàcuáa ní xáha<sup>n</sup>-gǎ xii-xi.

*Ní quexìo Jesús núu xíndecu cue téé ní xica cuu ndíhi-gá*

(Mt. 28:16-20; Mr. 16:14-18; Lc. 24:36-49)

<sup>19</sup> Te díu-ni ndumìngú sandiqui<sup>n</sup> ní nat-acá cue téé ní xica cuu ndíhi-gá, te xíndedí nihnu-güedé vehe sá xiyùhú-güedé cue téé cùnnoo núu ñáyiú isráel. Te ní quíhu Jèsús ndéé tnuú-güedé ní ngúnutñí-gá, te ní xáha<sup>n</sup>-gǎ:

—Yá Ndiöxí chíndèe ñàha-gá xii-ndo ío váha cùu iní-ndó ndècu-ndo —cächí-gá xáha<sup>n</sup>-gǎ xii-güedé.

<sup>20</sup> Te ní dánèhé ñáhá-gǎ ndaha-gá ndíhi yiqui naha-gǎ xii-güedé. Te ío ní cudíí iní-güedé sá díú ndisa-gá ní xiní ñáhá-güedé. <sup>21</sup> Te ní xáha<sup>n</sup> tucu Jesús xii-güedé:

—Yá Ndiöxí chíndèe ñàha-gá xii-ndo ío váha cùu iní-ndó ndècu-ndo. Te dàtná ní tendaha ñàha Tàtá-í Dútú Ndiöxí xii-í véxi-í ñuyú-a, te duca<sup>n</sup> tendaha ñàha-í xii-ndo quíhí<sup>n</sup>-ndó cáhá<sup>n</sup>-ndó tñúhu-í núu ñáyiú —cächí-gá xáha<sup>n</sup>-gǎ xii-güedé.

<sup>22</sup> Te ní chiyócó-gǎ núu-güedé, te ní xáha<sup>n</sup>-gǎ:

—Chí ndúú tàhú Espíritú Yá Ndiöxí cundecu ndíhi-ndo. <sup>23</sup> Te nchaa ñáyiú na quíndáá iní-xi tñúhu-í te cùñaha-ndo xii-yu sá ñí quide càhnu iní Yá Ndiöxí nchaa cuéchi-yu. Te nchaa ñáyiú vá quíndáá iní tñúhu-í te cùñaha-ndo xii-yu sá vǎ cáda



càhnu iní-gá cuéchi-yu —càchí-gá xáha<sup>n</sup>-gã xii-güedé.

*Té Mǎxí càhá<sup>n</sup> ndihí-dé Jèsús*

<sup>24</sup> Te núú ùxúú cue téé ní xica cuu ndihí-gá, te ì<sup>n</sup>-dé nání-dě Mǎxí téé ní xóo danàni-güedé Cuächí, te téé-á<sup>n</sup> ñà túú-dě ndécú ndihí-güedé òré ní sáhá<sup>n</sup> Jèsús. <sup>25</sup> Te dava-gá cue téé ní xica cuu ndihí-gá ní xáha<sup>n</sup>-güedě xii-dé:

—Ní xiní-ndí Jèsús —càchí-güedé xǎha<sup>n</sup>-güedě.

Te ní xáha<sup>n</sup> tǎ Mǎxí:

—Te vá quíndáá iní-í, chi ndéé quíní-í ndaha-gá núú ñí quée nduyú, te dàquíhu-í díquí ndáhà-í núú ñí caá<sup>n</sup> nduyú-á<sup>n</sup>, te dàquíhu ndàha-í yíquí naha-gã núú ñí caá<sup>n</sup>, duca<sup>n</sup> te quíndáá iní-í —càchí-dé xǎha<sup>n</sup>-dě xii-güedé.

<sup>26</sup> Te núú ùná tucu nduu ní nataká tucu cue téé ní xica cuu ndihí Jèsús ì<sup>n</sup> vehe, te nduu-ǎ<sup>n</sup> tnàhá té Mǎxí ndécú ndihí-güedé. Te cuéi ndèdí nihnu-güedé vehe-á<sup>n</sup>, te ní quíhu Jèsús ndéé tnuú-güedé, te ní xáha<sup>n</sup>-gã:

—Yá Ndióxí chíndèe ñaha-gá xii-ndo ïo váha cùu iní-ndó ndècu-ndo —cachí-gá xáha<sup>n</sup>-gã xii-güedé.

<sup>27</sup> Te ní xáha<sup>n</sup>-gã xii té Mǎxí:

—Cundehe ndàha-í te dàquíhu-n díquí ndáhà-n núú ñí quée nduyú, te dàquíhu-n ndàha-n yíquí naha-í-a cuèndá quíndáá iní-n te vá cání ì<sup>n</sup> caní úú iní-n —càchí-gá xáha<sup>n</sup>-gã xii-dé.

<sup>28</sup> Te ní xáha<sup>n</sup> tǎ Mǎxí xii-gá:

—Yòhó cúú-n Xítóhó-í! Yòhó cúú-n Ndióxi-í! —càchí-dé xǎha<sup>n</sup>-dě xii-gá.

<sup>29</sup> Te ní xáha<sup>n</sup> Jèsús:

—Mǎxí, ndéé vitna ní sándáá iní-n chi ndéé ní xiní ñáhà-n xii-í te ní sándáá iní-n, dico cùdí-gã iní nchaa ñáyiú ñá túú ní xiní núú ñáhà xii-í, te ní sándáá iní-yu —càchí-gá xáha<sup>n</sup>-gã xii-dé.

*Quíndáá iní-ó tnũhu yòdo tnuní núú tütú-a*

<sup>30</sup> Te vâi-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihí-gá. <sup>31</sup> Dico dava-gá ní gódó tnuní núú tütú-a cuèndá

sá quíndáá iní-ndó sǎ Jèsús cúú-gã Crístú Déhe Dútú Ndióxí, te naníhí tǎhú-ndó te núu na quíndáá iní-ndó-gã.

## 21

*Úsá cue téé ní xica cuu ndihí Jèsús ní xiní ñáhà-güedě xii-gá*

<sup>1</sup> Te ingá nduu tucu xíndecu cue téé ní xica cuu ndihí Jèsús yuhu làgúná ñuú Tiberiás, te ní sáhá<sup>n</sup>-gá núú xíndecu-güedé-á<sup>n</sup>. Te duha ní cuu ní xiní ñáhà-güedě xii-gá. <sup>2</sup> Te ndècu té Xímú, àdi Pelú chi úú òú-dé, ndihí té Mǎxí téé ní xóo cúñaha-güedě Cuächí, ndihí té Natanàél téé ñuú Cànaá, te ñuú-á<sup>n</sup> yíndèhu-xi distritú Galileá, te tnàhá ndi ndúú déhe té Zebèdeú, ndihí úú-gá tucu cue téé ní xica cuu ndihí-gá. <sup>3</sup> Te ní xáha<sup>n</sup> tǎ Pèlú xii-güedé:

—Quíhí<sup>n</sup>-í quítní-í chácá —càchí-dé xǎha<sup>n</sup>-dě xii-güedé.

Te ní xáha<sup>n</sup>-güedé:

—Tnàhá nchúhú canchicú<sup>n</sup> ñáhà-ndí xii-n quíhí<sup>n</sup> tucu —càchí-güedé xǎha<sup>n</sup>-güedé xii-dé.

Te ní xica-güedé cuáhà<sup>n</sup>-güedé ní sáá-güedé núú ndécú bàrcú, te ní quée-güedé xití bàrcú-á<sup>n</sup> cuáhà<sup>n</sup>-güedé. Te niú-á<sup>n</sup> ñǎ ní ñhí tnàhí-güedé chácá. <sup>4</sup> Te sa ta cùditó-ñǎ cuáhà<sup>n</sup> ní xiní-güedé Jèsús yuhu làgúná, dico ñá ní cùtnuní iní-güedé sá díú-gã. <sup>5</sup> Te ní xáha<sup>n</sup>-gã xii-güedé:

—Cue téé cuechi, ¿ní ñhí-ndó chǎcá caxi-o ñǎ? —càchí-gá xáha<sup>n</sup>-gã xii-güedé.

Te ní xáha<sup>n</sup>-güedé:

—Védana chácá ñà túú ní ñhí-ndí —càchí-güedé xǎha<sup>n</sup>-güedé xii-gá.

<sup>6</sup> Te ní xáha<sup>n</sup> Jèsús:

—Chí dáquèe ñunu-ndo ndàa xio cuha barcú chi ñhí-ndó-dí —càchí-gá xáha<sup>n</sup>-gã xii-güedé.

Te duca<sup>n</sup> ñí quide-güedé, te òré nátava-güedé ñunu xití ndute, te ñá cùndèe-gá-güedé natava-güedé cuèndá sá ñí chítú chǎcá xití-xi. <sup>7</sup> Te téé ní xica cuu ndihí-gá téé ío cùu iní-gá ní xáha<sup>n</sup>-dě xii té Pèlú:

—Diu Xítóhó Jesucristú! —càchí-dé xǎha<sup>n</sup>-dě xii-dé.

Te sá nǐ tecú dóho té Pèlú sá dúcá<sup>n</sup> càhá<sup>n</sup>-dé nǔu ní ndíúnuu-dé dóó-dě, chi dóó sǎ yímàa-ni-dé níhnú-dě ní cùu. Duca<sup>n</sup> te ní nuu ndava-dé bàrcú ní ngaunihnu-dé ndute, te cuáhá<sup>n</sup>-dé núú ndute-á<sup>n</sup> nǐ quene-dé ndéé ñuhu yìchí. <sup>8</sup> Te dava-gá cue té ndihí té Pèlú ñu-ni cue té ní xica cuu ndihí Jèsús ní quendóo-güedé dàtná ñ<sup>n</sup> ciendú-gá mètrú te quene-güedé yuhu ndüte. Te tàñuhu-ni-güedé ñunu-güedé chitu chǎcá nǐ quene-güedé ndéé yuhu ndüte. <sup>9</sup> Te òré ní quene-güedé ñuhu yìchí, te ní xiní-güedé càyú ñuhú, te núú ñuhú-á<sup>n</sup> ñuhú ñ<sup>n</sup> chácá ndihí ñ<sup>n</sup> pàá. <sup>10</sup> Te ní xáha<sup>n</sup> Jèsús xii-güedé:

—Quíhí<sup>n</sup> nguehe<sup>n</sup>-ndo ñ<sup>n</sup> úú chácá quití íchí nǐ tñi-ndo —càchí-gá xáha<sup>n</sup>-gǎ xii-güedé.

<sup>11</sup> Núu té Pèlú ní sáhá<sup>n</sup>-dé núú ndécú bàrcú, te ní quee-dé xití-xi ní cándeé-dé ñunu ñuhu chácá táñuhu-dé ní quene ndéé ñuhu yìchí, te chitu chǎcá náhnú, te ñuhu ñ<sup>n</sup> ciendú údico úxí úní-dí xití ñunu-á<sup>n</sup>, te cuèi duca<sup>n</sup> vài-dí ñuhu dico ñá ní ndátá ñunu-á<sup>n</sup>. <sup>12</sup> Te ní xáha<sup>n</sup> Jèsús:

—Chí nèhé cadí iní-ndó —càchí-gá xáha<sup>n</sup>-gǎ xii-güedé.

Dico ni ñ<sup>n</sup> cue té ní xica cuu ndihí-gá-á<sup>n</sup> ñǎ ní xicá<sup>n</sup> tnúhú-güedé núú-gǎ nǔu yoo cùu-gá, chi sa ní cutnùní iní-güedé sá díú Jèsús cúu-gǎ. <sup>13</sup> Te Jèsús ní sáhá<sup>n</sup>-gá ní quehe<sup>n</sup>-gá pàá ní sáñaha-gǎ xii-güedé caxi-güedé, te dàtnùní ní quehe<sup>n</sup> tucu-gá chácá nǐ sáñaha-gǎ xii-güedé.

<sup>14</sup> Vitna cùu úní xito sá xiní ñáhá cue té ní xica cuu ndihí-gá sáta nǐ ndoto-gá.

### *Jèsús càhá<sup>n</sup> ndihí-gá té Pèlú*

<sup>15</sup> Te sáta nǐ túhú cóhó-güedé ní sadí iní-güedé te ní xicá<sup>n</sup> tnúhú Jèsús núú tē Xímú, àdi Pelú chi úú diù-dé, te xáha<sup>n</sup>-gǎ:

—Xímú, déhe té Jónás, ¿cùu iní-gá-n yùhú dàcúúxí dàva-gá cue té-a ñǎ? —càchí-gá xáha<sup>n</sup>-gǎ xii-dé.

Te ní xáha<sup>n</sup> tē Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dē xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéé líhli-í —càchí-gá xáha<sup>n</sup>-gǎ xii-dé.

Te cue mbéé-á<sup>n</sup> cúu-güedi ñáyiú cùu cuendá-gá.

<sup>16</sup> Te ní xáha<sup>n</sup> tucu-gá xii té Pèlú:

—Xímú, déhe té Jónás, ¿cùu iní ñáhá-n xii-í-u? —càchí-gá xáha<sup>n</sup>-gǎ xii-dé.

Te ní xáha<sup>n</sup> tucu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dē xii-gá.

Te ní xáha<sup>n</sup>-gǎ:

—Te núu duca<sup>n</sup>, te coto-n cuè mbéè-í —càchí-gá xáha<sup>n</sup>-gǎ xii-dé.

<sup>17</sup> Te xito cùu úní ní xáha<sup>n</sup> tucu-gá xii té Pèlú:

—Xímú, déhe té Jónás, ¿cùu iní ñáhá-n-á<sup>n</sup>? —càchí-gá xáha<sup>n</sup>-gǎ xii-dé.

Te té Pèlú ío ní cundiyí-dé sá dúcá<sup>n</sup> nǐ cuu úní xito xicá<sup>n</sup> tnúhú-gǎ núú-dē nǔu ndisa sá cúu iní ñáhá-dē xii-gá, te ní xáha<sup>n</sup>-dē:

—Mèstrú, yòhó nchaa sa xiní-n, te sa cùtnuní iní-n sǎ cúu iní ñáhà-í xii-n —càchí-dé xáha<sup>n</sup>-dē xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéè-í.

<sup>18</sup> Te na càchí tnúhu ndáá-í xii-n sǎ cùtnàhá cuechí-gǎ-n nǐ xóo ndécuihnu mee-n dóó-n, te ní xóo quíhí<sup>n</sup>-n ndēni ní xóo cachí iní-n, dico na yì-n te dacàá-n ndàha-n, te ingá tée dacuihnu ñaha xii-n dóó-n te cada yica-dē candeca ñaha-dē xii-n quíhí<sup>n</sup> ñ<sup>n</sup> núú ñà túú tnàhá iní-n —càchí-gá xáha<sup>n</sup>-gǎ xii-dé.

<sup>19</sup> Te sá dúcá<sup>n</sup> nǐ cáhá<sup>n</sup> Jèsús cúu-xí sǎ nǐ dátécú tnúhu ñaha-gǎ xii té Pèlú nàcuáa cada-xi cuú-dé, te duca<sup>n</sup> càda cahnu-dé Yá Ndiòxí, te ní xáha<sup>n</sup>-gǎ xii-dé:

—¿Canchicú<sup>n</sup> ñáhá-n xii-í! —càchí-gá xáha<sup>n</sup>-gǎ xii-dé.

### *Téé ío cùu iní-gá*

<sup>20</sup> Te ní nchócótó tē Pèlú ndàa sáta-dē, te ní xiní-dé sá nchicú<sup>n</sup> ñáhá ingá téé xica cuu ndihí-gá cuáhá<sup>n</sup>, téé ío cùu iní-gá téé ní xínucóo diñi-gá òré ní cudini ndihí ñaha-gá xii-güedé, te ñu-ni téé-á<sup>n</sup> nǐ xicá<sup>n</sup> tnúhú-dē núú-gǎ dàvá-á<sup>n</sup> nǔu ndēda càa téé cuáha cuendá ñáhá xii-gá núú cuè téé cùu úhú iní ñáhá. <sup>21</sup> Te òré ní xiní té Pèlú sá nchicú<sup>n</sup> ñáhá tē-á<sup>n</sup>, te ní xicá<sup>n</sup> tnúhú-dē núú Jèsús, te xáha<sup>n</sup>-dē:

—Mèstrú, te téé-á<sup>n</sup>, ¿ná cúu sǎ yàha-dé-í? —càchí-dé xáha<sup>n</sup>-dē xii-gá.

<sup>22</sup> Te ní xáha<sup>n</sup> Jèsús:

—Te núu yúhú cuìní-í sá cùndècu-ni-dé ndéé ná quìxi tucu-í ñuyíú-a, ¿te yòhó ná cuèndá-n nũu xìcá<sup>n</sup> tnúhú-n? Yòhó canchicú<sup>n</sup> ñáhá-ní xì-í —càchí-gá xáha<sup>n</sup>-gã xii-dé.

<sup>23</sup> Te ní xinu tnúhu núú nchàa ñáyiú sàndáá iní tnúhu-gá sá tẽe-ã<sup>n</sup> vã cùú-dé. Dico Jèsús ñá túú dùca<sup>n</sup> ní xáha<sup>n</sup>-gã sá vã cùú-dé, chi ní xáha<sup>n</sup>-gã: “Núu yúhú cuìní-í sá tẽe-ã<sup>n</sup> cundecu-ni-dé ndéé ná quìxi tucu-í ñuyíú-a, ¿te yòhó ná cuèndá-n?”, duha ní xáha<sup>n</sup>-gã xii té Pèlú.

<sup>24</sup> Te ñiu-ni yúhú té Juàá tée ní sani iní-yu sá vã cùú càhá<sup>n</sup> ndáá-í nchaa nàcúáa ní cuu, te duca<sup>n</sup> ní tee-í núú tütú-a, te cùtnuní iní-ndó sã tnúhu ndáá cùú-xí.

<sup>25</sup> Te ndècu vai-gá núú sã ñi quide Jèsús. Te núu dícó ní ngũndee nchaandi túhú ñá, te vaa ni te ñihí ñuyíú te vá tnàhá núú-xi cundecu librú, te núu dícó ní ngũndee nchaa. Te duca<sup>n</sup> na cùnduu. Te ío chí cádá ndèe iní-ñã vitna.

## NCHAA NÀCUÁA NÍ QUIDE CUE TÉE NÍ TAÚCHÍÚ<sup>n</sup> JÈSÚS DACUÀHA ÑAHA XII ÑÁYIU TNÚHU-GÁ

*Jèsús ní cachí tnúhu ndáa-gá sá quíxi  
Espiritú Yá Ndiõxí cundecu ndihí ñáyiu*

<sup>1</sup> Te duha ní cáhá<sup>n</sup> té Lùcá ní xii-dé té Těofilú: Yúhú sa ní chídó tnùn-í núú librú ndéé díhna nchaa sá ní quide Jèsús, ndihí nchaa sá ní dácuahá-gã ñáyiu. Te ní chídó tnùn-í nchaa sá ní quide-gá ndéé nduu ní quesaha-gã quidé chiu<sup>n</sup>-gá, <sup>2</sup> ndihí nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihí cue tée ní cáhá<sup>n</sup>-gá dacuàha ñaha xii ñáyiu tnúhu-gá, te mee Espiritú Yá Ndiõxí ní chindee ñàha-xi xii-gá ní xáha<sup>n</sup>-gã nàcuáa cada-güedé. <sup>3</sup> Te sátá ní xihí-gá te ní ndoto-gá, te ní xindecu-gá údico nduu. Te titní xito ní sáhá<sup>n</sup>-gá núú ní xindecu-güedé, te duca<sup>n</sup> ní quide-gá cuèndá quini-güedé sá ndáa ní ndoto-gá, te ní xáha<sup>n</sup>-gã nàcuáa quide Yá Ndiõxí ndihu ndaha-gã ñáyiu.

<sup>4</sup> Te ñ<sup>n</sup> nduu ndècu ndihí ñaha-gá xii-güedé, te ní xáha<sup>n</sup>-gã:

—Vá quéé-ní-ndó ñúú Jerusàlén, chi cundetú-ndo quíxi Espiritú Yá Ndiõxí cundecu ndihí-ndo, chi sa ní cachí tnúhu-í sá dúcá<sup>n</sup> ní cáhá<sup>n</sup> Tátá-ó Dütú Ndiõxí Yaá ndécú àndiu nacuáa cunduu. <sup>5</sup> Te ndáa sá ndí Juàá ní dácúandüte ñaha ndí xii-ndo, dico vitna ñá túu-gã cuéhé nduu, te quexio Espiritú Yá Ndiõxí cundecu ndihí-ndo —càchí-gá xáha<sup>n</sup>-gã xii-güedé.

*Jèsús cuándaa-gá andiu*

<sup>6</sup> Te òré ní xindecu-güedé ndihí Jèsús, te ní xáha<sup>n</sup>-güedé xii-gá:

—Mèstrú, cuíní-ndí cachí tnúhu-n ñuu sa ta cùyatni nduu chindee-n ñáyiu ñúú Isràél cuèndá taxi tnùn-í tucú-yu ñúú-yu —càchí-güedé xáha<sup>n</sup>-güedé xii-gá.

<sup>7</sup> Te ní xáha<sup>n</sup> Jèsús xii-güedé:

—Ñá túu xìni ñuhu-xi cunaha nchóhó xiá<sup>n</sup>, chi Tátá-ó Dütú Ndiõxí náhá-gã ná

nduu càda-gá nchaa sá ní cáhá<sup>n</sup>-gá. <sup>8</sup> Te òré quexio Espiritú Yá Ndiõxí cundecu ndihí-ndo, te cuyí-ndo ní yuhu ní iní-ndó quíhí<sup>n</sup>-ndó cáhá<sup>n</sup>-ndó tnúhu-í núú ñáyiu ñúú Jerusàlén ndihí núú ñáyiu distritú Júdeá ndihí núú ñáyiu distritú Sàmariá. Te duca<sup>n</sup>-ni cáhá<sup>n</sup>-ndó quíhí<sup>n</sup>-ndó ní caxico ñuyíú —càchí-gá xáha<sup>n</sup>-gã xii-güedé.

<sup>9</sup> Te sátá dúcá<sup>n</sup> ní cáhá<sup>n</sup>-gá, te ndèhe-güedé ní ndanchita-gá cuándaa-gá andiu cuändihu-gá xití vícò, te ñá túu-gã ní xìní ñáhá-güedé xii-gá. <sup>10</sup> Te ndèhe vihi-güedé andiu núu ndéé quini ñáhá-güedé xii-gá yòtnúhu, te ní quexio cunu úú cue tée ñihnu dóó cuixí<sup>n</sup> núu ndécú-güedé. <sup>11</sup> Te xáha<sup>n</sup>-güedé:

—Nchòhó cue tée Galileá, ¿ná cuèndá ndéhé-ndó àndiu? Te dàtná-ni càa Jèsús cuándaa-gá andiu vitna, te duca<sup>n</sup>-ni cùnduu-gá quixi tucu-gá —càchí cue tée ñihnu dóó cuixí<sup>n</sup>-á<sup>n</sup> xáha<sup>n</sup>-güedé.

*Cuèndá sá ñà túu-gã ndí Júdás ñuu ní nanducu-güedé té Màtiá ní nucúnutní-dé núu ndí*

<sup>12</sup> Te ní ndee-güedé yucu Òlívú cuánuhú-güedé ñúú Jerusàlén, te ní xúhu<sup>n</sup>-güedé cuèdicó cuádava òré ichi.

<sup>13</sup> Te òré ní ndexio-güedé ñúú-á<sup>n</sup>, te cuándaa-güedé cuártú ndéé núu ñinu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juàá, té Ndríxí, té Lìpé, té Mǎxí, té Bartolómé, té Mátèú, té Jàcobó déhe té Àlfèú, ndihí té Xímú tée ní cundihí cue tée canànistá, ndihí té Júdás ñaní té Jàcobó. <sup>14</sup> Te ní naníhí tnáhá-güedé nchaa-güedé yàcá<sup>n</sup> ndihí tá Màriá náná Jèsús, ndihí cue ñaní-gá ndihí dava-gá cue ñáyiu díhí. Te ñ<sup>n</sup>-ni ní cuú-yu ní cáhá<sup>n</sup> ndihí-yu Yá Ndiõxí.

<sup>15</sup> Te ñ<sup>n</sup> nduu ní xindecu dàtná ñ<sup>n</sup> cièndú ócò mee-ni ñáyiu sàndáa iní tnúhu Jèsús, te ní ngúnutní té Pèlú núu-yu, te ní xáha<sup>n</sup>-dè xií-yu:

<sup>16-17</sup> —Nchòhó cue ñáyiu ndècu ndihí-í ichi Xítohó Jesucristú, na càni-í cuèndú núu-ndó nàcuáa ní chídó tnùn-í ndí Dàvíí tée ní xindecu ndéé sanaha nàcuáa ní cáhá<sup>n</sup> Espiritú Yá Ndiõxí cuèndá té Júdás. Te dacuítí duca<sup>n</sup> ní cuu, chi tnàhá té Júdás



ní xíndecu ndihí-o, te ní xinu cuechi-o ndihí-dé núú-gã sá díhna, te duca<sup>n</sup> ní quide-dé ní sáha cuendá-dé Jèsús núú cué téé cùu úhú iní ñáhá xii-gá. <sup>18</sup> Te ní cháhu ñaha-güedě xii-dé cuendá sá ñí sáha cuendá ñáhá-dě xii-gá. Te ní sáhá<sup>n</sup>-dé ñí xichi ní sata caa-dé méé-dě, te ní ngava-dé, te ní cahndí duu<sup>n</sup> xití-dé te xía<sup>n</sup> ñí xihí-dé. Te ní naquehe<sup>n</sup>-güedé díhú<sup>n</sup> sá ñí cháhu-güedé ndíi, te ní nacuaa<sup>n</sup>-güedé ñuhu núú ñí ngava ndíi-án. <sup>19</sup> Te nchaa ñáyíu Jerusálén ní ñihí-yu tnúhu, te ní dánání-yu ñuhu-án Acèldamá. Te tnúhu meé-yu quèe-xi: Ñuhu núú ñí sati níñí. <sup>20</sup> Te duha ní cáhán<sup>n</sup> ndíi Dàvíí ní chídó tnúní ndíi núú librú Sálmu ní dándóo ndíi: “Nà ndóo nahi vehe-dé, vá yóo ñí quíhí<sup>n</sup> cundecu”, duha ní cáhán<sup>n</sup> ndíi. Te íngá tucu tnúhu ní cachí ndíi: “Na nànducu-güedé íngá téé nucúnutnñí núú ndíi”, duha ní cáhán<sup>n</sup> ndíi Dàvíí —càchí té Pèlú xáha<sup>n</sup>-dě xii-yu.

<sup>21-22</sup> Te ní xáha<sup>n</sup> tùcu-dé:

—Te duca<sup>n</sup> ñí cáhán<sup>n</sup> ndíi Dàvíí, te vitna xini ñuhu-xi nanducu-o ñí téé nucúnutnñí-dé núú ndíi Jüdás, te xini ñuhu-xi diu-ni ñí téé ní xica cuu ndihí Xítóhó Jesucristú cútnàhá ní xica cuu-o ndihí-gá, ñí téé ní xiní ndéé òré ní dácuaándüte ñaha ndíi Juáa xii-gá, te ndéé òré cuándaa-gá andíu. Te téé nanducu-o cùndecu-dé cáhán<sup>n</sup>-dé nàcuáa ní cuu ní ndoto-gá —càchí té Pèlú xáha<sup>n</sup>-dě xii-yu.

<sup>23</sup> Te ní cacunehe-güedé úu tnàhá-güedé nùu ndědacàa-güedé nduu táhú-güedé nucúnutnñí-güedé núú ndíi. Te ñí-dé nání-dě Chéé Barsábás, àdi Justú chi úu diu-dé, te íngá-dé nání-dě Màtiá. <sup>24</sup> Te ní cáhán<sup>n</sup> ndihí-güedé Yá Ndiöxí, te xáha<sup>n</sup>-güedé xii-gá:

—Yòhó Dútú Ndiöxí xini-n iní nchaa ñáyíu, te mee-n nàha-n núu nděda càa núú úu cue téé-a tnàhá iní-n <sup>25</sup> cáhán<sup>n</sup>-güedé tnúhu-n nùu ñáyíu, te téé-án nucúnutnñí-dé núú ndíi Jüdás, chi cuáhán<sup>n</sup> ndíi núú úhú núú ndàhú núú tàú-xi quíhí<sup>n</sup> ndíi —càchí-güedé xáha<sup>n</sup>-güedě xii-gá.

<sup>26</sup> Te ní xito ndéé-güedé, te ní cutnúní sá tēe nàni Matíá quendóo-dé ndihí úxí ñí cue téé ní táuchíú<sup>n</sup>-gã dacuàha ñaha xii ñáyíu tnúhu-gá.

## 2

*Ní quexìo Espiritú Yá Ndiöxí cundecu ndihí ñáyíu*

<sup>1</sup> Te ní sáá nduu còo vico Pentecostés te xíndecu nchaa ñáyíu ñí-ñí xìchi. <sup>2</sup> Te ní tecú dóho-yu uu<sup>n</sup>ni ní ñihí andíu, dàtná quidé ñí táchí ñihí vìhi ní quide-xi, te duca<sup>n</sup> ñí cuu ndéé xití vehe núú ndécü-yu nchaá-yu. <sup>3</sup> Te ní xiní-yu dàtná cáá itá ñuhú cáá sá ndécú xití vehe, te ní xité nuu-xi ní ngoyo ndodo-xi díquí-yu nchaá-yu. <sup>4</sup> Te duca<sup>n</sup> ñí quide-xi òré ní quexìo Espiritú Yá Ndiöxí ní ngúndecu ndihí-yu nchaá-yu. Te ní ngúíta-yu ní cáhán<sup>n</sup>-yu tnúhu cue ñáyíu ñá túú cùu ñáyíu isràél, te nchaa xía<sup>n</sup> ní quide Espiritú Yá Ndiöxí.

<sup>5</sup> Te vài ñáyíu isràél xíndecu nchaa dava-gá ñuú ní tacá-yu ñuú Jerusálén, te ñáyíu-án ío ndùcu ndeé-yu dácuahá-yu nchaa ndudú sá dácuaàha tnahí-yu. <sup>6</sup> Te òré ní tecú dóho-yu ñihí, te ní sáhán<sup>n</sup>-yu ní xíndedóho-yu tnúhu càhán<sup>n</sup> méé-yu ñí ñí ñuú-yu, chi ndí díí<sup>n</sup> ndí díí<sup>n</sup> tnúhu càhán<sup>n</sup> ñáyíu ndècu-án. <sup>7</sup> Te xía<sup>n</sup> ío ní cuñúhu ñáyíu véxi dava-gá ñuú, te ní xitnàhá-yu:

—Ñáyíu duca<sup>n</sup> xicáhán<sup>n</sup> cúu-yu ñáyíu distritú Galileá. <sup>8</sup> ¿Te nása ní quidé-yu ní cutúha-yu nàcuáa càhán<sup>n</sup>-ó ñí ñí-o ndéé líhli-o? <sup>9</sup> Te iha véxi ñáyíu dava nació<sup>n</sup>, chi véxi ñáyíu Pàrtiá, véxi ñáyíu Mèdiá, véxi ñáyíu Èlám, véxi ñáyíu Mesopòtamiá, véxi ñáyíu Jùdeá, véxi ñáyíu Capàdociá, véxi ñáyíu Pòntó, véxi ñáyíu Àsiá, <sup>10</sup> véxi ñáyíu Frìgiá, véxi ñáyíu Pànfilíá, véxi ñáyíu Ègiptú, véxi ñáyíu Áfricá ñáyíu ndècu ndéé núú-gã-xi ñuú Cìrené. Te tnàhá ñáyíu ñuú Rómá véxi, te ñáyíu-án chi ñá díú mèe-ni ñáyíu isràél cúu-yu nchaá-yu, dico ñí-ñí cùu sá dácuaàhá-yu. <sup>11</sup> Te véxi ñáyíu Crétá, véxi ñáyíu Àrabiá. Te nchaa-o sa ndedóho-o càhán<sup>n</sup>-yu nàcuáa cuáhán<sup>n</sup> tnúhu mee-o ñí ñí-o. Te nchaa ñáyíu xicáhán<sup>n</sup> tnúhu-o càhán<sup>n</sup>-yu cuendá nchaa sá vã yóo tnàhí ndàcu cada ní quide Yá Ndiöxí —càchí-yu xitnàhá-yu.

<sup>12</sup> Te ní cuñúhu vìhí-yu, te ñá ná sàa iní-yu nása ní cuu, te xitnàhá-yu:

—¿Nása ní cuu duha càhá<sup>n</sup>-yu tnúhu-o? —  
càchí-yu xĩtnàhá-yu.

13 Te davá-yu ní sácú ndeé yíchí ñáhã-yu,  
te xĩtnàhá-yu:

—Xĩxíni ñáyiu-á<sup>n</sup> nõu ñá náhá-yu tnúhu  
càhá<sup>n</sup>-yu —càchí-yu xĩtnàhá-yu.

*Tnúhu ní xáha<sup>n</sup> tẽ Pèlú xii cue ñáyiu*

14 Te ní ngúnutnĩi té Pèlú ndihĩ úxí ì<sup>n</sup> cue  
tée ní táúchíú<sup>n</sup> Jèsús dacuàha ñaha xii ñáyiu  
tnúhu-gá, te níhi ní cáhá<sup>n</sup>-dé, te xãha<sup>n</sup>-dẽ  
xií-yu:

—Nchaa nchòhó ñáyiu distritú Jùdeá  
ndihĩ nchòhó ñáyiu ñuú Jerusàlén, cund-  
edóho váha-ndo tnúhu na càhá<sup>n</sup>-í-a. 15 Ñá  
ndáá tnúhu càhá<sup>n</sup>-ndó, chi ñá túú xĩni-ndí te  
duca<sup>n</sup> càhá<sup>n</sup>-ndó, chi davitna cùu-xi caá ì<sup>n</sup>  
dátneé, vátá tnàhá-gá òré coho ñáyiu ndidí.

16 Te yúhú ná càchí tnúhu-í xii-ndo vitna  
nacuáa ní xáha<sup>n</sup> Yã Ndiõxí xii ndíi Jòél tée  
ní xóo cáhá<sup>n</sup> tnúhu-gá ndeé sanaha nàcuáa  
cada ñaha-gã xii ñáyiu, te ndíi-á<sup>n</sup> ñĩ chídó  
tnùnĩ ndíi nàcuáa ní cáhá<sup>n</sup>-gá. 17 Te duha ní  
xáha<sup>n</sup>-gã xii ndíi:

Cùmání-gã sáa nduu nàa ñuyíú, te cuáñaha-ĩ  
Espíritú-í cundecu ndihĩ nchaa ñáyiu  
na quìndáa iní ñáhã xii-í.

Te cue déhe-yu cáhá<sup>n</sup>-yu tnúhu-í,  
te cue tée cuechi dacòto núú ñáhã-xí  
xii-güedé,

te duca<sup>n</sup>-ni cuè tée ni sàhnu cáhá<sup>n</sup>  
saní-güedé,

te ñu-ni cuendá nchaa sá quidè-í duca<sup>n</sup>  
dàcoto núú ñáhã-xí xii-güedé.

18 Te nchaa ñáyiu xĩnu cuechi núu-í  
cáhá<sup>n</sup>-yu tnúhu-í, te cuáñaha-ĩ  
Espíritú-í cundecu ndihĩ-yu.

19 Te ndeé andũ, yàcá<sup>n</sup> vài sá cadà-í nàcuáa  
cuñúhu vñhĩ-yu,

te núú ñuyíú-a cada-í ì<sup>n</sup> sá vátá quini  
tnàhĩ-gã-yu,

te ngoyo níñĩ te ngoyo ñuhú te quene vñhĩ  
ñúhmá.

20 Te vá dáyèhé-gá nchícanhii,  
cuu nee ñuyíú te cuu tĩcuèhé núú yóo dàtná  
tĩcuèhé níñĩ.

Te davá-á<sup>n</sup> sáa nduu quixi Yaá cúú  
Xĩtohó-yu,

te nduu-ã<sup>n</sup> cuu-xi ì<sup>n</sup> nduu càhnu vihi, chi  
cada-gá nchaa sá ñá túú xĩní-yu, te  
cuñúhu vñhĩ-yu.

21 Te òré xiá<sup>n</sup> te nchaa ñáyiu càhá<sup>n</sup> ndihĩ  
ñaha xii Yaá cúú Xĩtohó-yu-á<sup>n</sup> naníhĩ  
tàhú-yu.

Duha ní xáha<sup>n</sup> Yã Ndiõxí xii ndíi Jòél ní  
chídó tnùnĩ ndíi.

22 Te nchòhó ñáyiu isràél, cundedóho  
váha-ndo tnúhu na càhá<sup>n</sup>-í-a cuendá Jèsús  
tée ñuú Nazàrét. Te Jèsús ní quide-gá chiú<sup>n</sup>  
Yã Ndiõxí, chi mee Yã Ndiõxí ní chindee  
ñaha-gá ní quide Jèsús ná daha núú chiú<sup>n</sup>,  
núú xiá<sup>n</sup> ní ndacu-gá ní quide-gá nchaa  
sá vã yóo tnàhĩ ndàcu cada, te xiá<sup>n</sup> ní  
cuñúhu vñhĩ-ndo. Te sa nàha-ndo nacuáa  
ní quide-gá cútnàhá ní xica cuu-gá ñuyíú.

23 Te ndíi Jùdás ní taxi cuendá ñáhã ndíi  
Jèsús xii nchòhó cue tée ní cuu úhú iní  
ñáhã xii-gá, te ní ndúcú-ndó cuè tée úhú  
iní-xi ní tñi ñaha-güedé xii-gá te ní sata caa  
ñaha-güedé núú cùrúxí, te núú cùrúxí-á<sup>n</sup> ñĩ  
xihĩ-gá. Dico sa ní cutnùnĩ iní Yã Ndiõxí  
sá dúcá<sup>n</sup> càda-ndo Jesús, te mee Yã Ndiõxí  
ní cachí-gá sá dúcá<sup>n</sup> ndòho Jesús. 24 Te

ñu-ni mee Yã Ndiõxí ní dándótó-gã Jèsús,  
chi sa ní cáhá<sup>n</sup>-gá sá òré cuú-gá te vá cùú  
dúcá<sup>n</sup>-gã. 25 Te ndíi Dàvíí tée ní xĩndaha  
ñaha xii cue ñaní tnàhá-ó ñĩ xĩndecu ndeé  
sanaha ñĩ chídó tnùnĩ ndíi nàcuáa ní cáhá<sup>n</sup>  
Jèsús, te duha ní cáhá<sup>n</sup>-gá:

Cùtnunĩ iní-í sá ncháá ndùu ndecu ndihĩ-í  
Yã Ndiõxí, te ío chindee ñaha-gã xii-í,

te ñá túú tnàhĩ sá yùhú-í.

26 Te ío ndàcá<sup>n</sup> táhú-í núú Yã Ndiõxí chi  
cùdí iní-í, chi sa nàha-í sá cùú-í dico  
ndoto-í,

27 chi vá dáñã-gã quihĩ<sup>n</sup> dúcá<sup>n</sup> àlmá-í núú  
ndécú ñáyiu ní xihĩ,

te vá dáñã-gã téhyú yiqui cùñú-í chi cùu-í  
Déhe-gá, te yúhú sa nàha-í sá cúú iní  
ñáhã-gã xii-í.

28 Te sa ní cachí tnúhu-gá nàcuáa cada-í  
cundecu-í ichi váha, te cuendá sá  
ndécú ndihĩ ñaha-gã xii-í nõu ío cùdí  
iní-í.

Duha ní cáhá<sup>n</sup> Jèsús, te duca<sup>n</sup> ñĩ chídó tnùnĩ  
ndíi Dàvíí.

29 Te nchòhó cue ñaní tnàhá-í, na càchí  
tnúhu ndáá-í xii-ndo cuendá ndíi Dàvíí tée  
ní xĩndecu ndeé sanaha vñhĩ, chi ní xihĩ-dé,  
te ní chindúxi ñaha-güedé, te nàha-o tnavíí  
núú ñĩ chindúxi ñaha-güedé. 30 Te ndíi Dàvíí  
ní xóo cáhá<sup>n</sup> ndíi tnúhu Yã Ndiõxí, te sa nàha  
ndíi sá Yã Ndiõxí ní cáhá<sup>n</sup> ndáá cuiti-gá

sá díú-ní ìn tnaaha ndíi taxi tnùní-dé ñáyíu israél ndéé cuèé-gá dàtná ní xóo taxi tnùní méé ndíi cútñàhá ní xíndecu ndíi, te téé taxi tnùní-án cúu Cristú chí cùu-gá ìn tnaaha ndíi.

<sup>31</sup> Te sa ní cutnùní iní ndíi sá ndótó Cristú, núu xíán ní chídó tnùní ndíi sá và dáñá Yá Ndiöxí sá quíhí<sup>n</sup> dúcán àlmá-gá cundecu-xi núu ndécú ñáyíu ní xíhí, te và dáñá-gă téhyú yiqui cùñú-gá.

<sup>32</sup> Te ndáá chí Yá Ndiöxí ní dándótó-gă Jèsús, te nchúhú ní xiní-ndí sá ñí ndoto-gá.

<sup>33</sup> Te ní xáha<sup>n</sup> Yá Ndiöxí xii Jèsús sá cundecu ndíhi ñaha-gá, te taxi tnùní Jèsús ní caa ní quíhí<sup>n</sup>. Te Yá Ndiöxí ní sáñaha-gă Espíritú-gá ní ngúndecu ndíhi-gá nàcuáa ní xáha<sup>n</sup>-gă, te díu Jèsús ní quide-gá nchaa sá ñí xiní-ndó vitna ndíhi nchaa sá ñí xíndedóho-ndo. <sup>34</sup> Te ndíi Dávíi ñá túú ní ndàa túu ndíi andíu ndíhi yiqui cùñú ndíi, te òré ndécú-gă ndíi ñuyíú-a ní cachí ndíi:

Dútú Ndiöxí ní xáha<sup>n</sup>-gă xii Yaá cúu Xítohó-í:

“Ngóo xio cùha-í,

<sup>35</sup> te yúhú cada-í te nchaa sá cúu ùhú iní ñáhá xii-n canehe-xi sá yíñúhu núu-n.”

Duha ní xáha<sup>n</sup> Dútú Ndiöxí xii Yaá cúu Xítohó-í cachí ndíi.

<sup>36</sup> Te nchòhó ñáyíu israél cùu-ndo ndí mee-í, te cùiní-í cundedóho váha-ndo ìn tnúhu na cáhá<sup>n</sup>-í-a. Jèsús ní sata caa-ndo-gă núu cùrúxí, dico Yá Ndiöxí ní cachí-gá sá Jèsús dacăcu nihnu-gá ñáyíu, te và cání ìn caní úú iní-ndó, chí díu-gá cúnúu-gá núu nchaa ñáyíu —cachí té Pèlú xáha<sup>n</sup>-dë xii-yu.

<sup>37</sup> Te ñáyíu ní xíndedóho tnúhu ní cáhá<sup>n</sup> té Pèlú ní ndixi túu iní-yu nàcuáa quidé-yu ndécú-yu, te ní xáha<sup>n</sup>-yu xii-dé ndíhi dava-gá cue téé ní táuchíú<sup>n</sup> Jèsús dacuàha ñaha xii-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —cachí-yu xáha<sup>n</sup>-yu xii-güedé.

<sup>38</sup> Te ní xáha<sup>n</sup> tē Pèlú xii-yu:

—Daña-ndo nchaa sá cuèhé sá dúhá quide-ndo, te cada cahnú iní Yá Ndiöxí nchaa yíca cuèchi-ndo. Te cuandute-ndo cuendá quini-yu sá ñí natuha-ndo ichi Jesús, te duca<sup>n</sup> te taxi Yá Ndiöxí Espíritú-gá cundecu ndíhi-ndo, <sup>39</sup> chí cùiní-gá taxi-gá

Espíritú-gá xii mee-ndo ndíhi déhe-ndo, te cuáñaha-gă Espíritú-gá xii nchaa ñáyíu ní caa xico ñuyíú, ñáyíu cáhá<sup>n</sup>-gá cundecu ichi-gá ndéé idá-gá —cachí té Pèlú xáha<sup>n</sup>-dë xii-yu.

<sup>40</sup> Te titní-gá tnúhu ní xáha<sup>n</sup>-dë nàcuáa cada-yu, te xáha<sup>n</sup> tùcu-dé:

—Daña-ndo nchaa sá cuèhé sá dúhá quide-ndo, và cada-ndó sá quidé dāva-gá-yu —cachí-dé xáha<sup>n</sup>-dë.

<sup>41</sup> Te nchaa ñáyíu ní sándáá iní-xi tnúhu ní cáhá<sup>n</sup> té Pèlú ní sanduté-yu, te díu-ní nduu-án ñí cuu dàtná úní míl ñáyíu ní sándáá iní-xi ní xíndecu ndíhi ñáyíu xídacuáhá tnúhu Yá Ndiöxí. <sup>42</sup> Te ío ní xíndedóho-yu tnúhu ní cáhá<sup>n</sup> cue téé ní táuchíú<sup>n</sup> Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi cahnú-yu cuendá náha-yu sá dúcán ñí quide Jèsús cútñàhá vátá cahní ñaha-gá-güedé xii-gá, te ní xóo cáhá<sup>n</sup> ndíhi-yu Yá Ndiöxí.

*Nàcuáa ní quide nchaa ñáyíu ní sándáá iní tnúhu Jèsús ndéé díhna nuu*

<sup>43</sup> Te nchaá-yu ní cùñúhu vñhí-yu, chí cue téé ní táuchíú<sup>n</sup>-gă dacuàha ñaha xii-yu tnúhu-gá ní quide-güedé titní núu sá và yóo tnàhí ndàcu cada, te xíán ní cutnùní iní-yu sá méé Yá Ndiöxí chíndèe ñaha-gá xii-güedé.

<sup>44</sup> Te nchaa ñáyíu sándáá iní tnúhu Jèsús cáhá<sup>n</sup> ndíhi tnàha váha-yu, te cuèi-ni nchaa ndachíu<sup>n</sup> nandíhi-yu ndècu cahnú. <sup>45</sup> Te ní dícō-yu nchaa ndachíu<sup>n</sup> sá ñà túú xini ñuhú-yu, te ní níhí-yu díhú<sup>n</sup> te ní sáñàhá-yu xii nchaa ñáyíu ñá níhí. <sup>46</sup> Te ìn nduu ìn nduu ní xóo quíhí<sup>n</sup> ndíhi tnàhá-yu veñúhu cahnú sá ío cùnuu. Te ní xexi ndíhi tnàhá-yu vehé-yu. Te ío ní cudíí iní-yu chí ìn-ní ní cuú-yu nchaá-yu. <sup>47</sup> Te ío ní ndacá<sup>n</sup> táhú-yu núu Yá Ndiöxí, te nchaa dava-gá ñáyíu ní cáhá<sup>n</sup> váha-yu cuendá ñáyíu-án. Te mee Yá Ndiöxí ní quide-gá ní sándáá iní vài-gá ñáyíu, te ní xíndecú-yu ndíhi dava-gá ñáyíu xídacuáhá tnúhu-gá.

### 3

*Quide tátna-güedé ìn téé yacua*

<sup>1</sup> Te ìn nduu òré caá úní sacuaa, òré xícahá<sup>n</sup>-yu ndíhi Yá Ndiöxí cuáhá<sup>n</sup> té Pèlú

ndihi té Juàá veñúhu càhnu sá ìo cùnnuu sácúú-xí ñáyiú isràél. <sup>2</sup> Te ndècu ìn tée yacua, te duca<sup>n</sup>-ni càa-dé ní cacu-dé. Te sàhá<sup>n</sup> ndihi ñàhá-yu veñúhu càhnu sá ìo cùnnuu, te sàcòo-dé ìn xio yuyèhe veñúhu sá nání Yèhe Vii Caa, chi duca<sup>n</sup> nàni-xi, te xìcá<sup>n</sup> ndàhú-dé núú nchàa ñáyiú sàhá<sup>n</sup> veñúhu. <sup>3</sup> Te ní xiní-dé té Pèlú ndihi té Juàá cuànguihu-güedé veñúhu, te xìcá<sup>n</sup> ndàhú-dé núú-güedé. <sup>4</sup> Te ní ndacoto-güedé núú-dé, te ní xàhá<sup>n</sup> tē Pèlú xii tée yacua-ã<sup>n</sup>:

—Cundehe ñàha xii-ndí —càchí té Pèlú xàhá<sup>n</sup>-dē xii-dé.

<sup>5</sup> Te ní xíndéhé ñàha-dé xii-güedé, chi ní cáhá<sup>n</sup>-dē sá ìo ìn sá cuññaha-güedé. <sup>6</sup> Te ní xàhá<sup>n</sup> tē Pèlú:

—Ñá túú tnàhí díhú<sup>n</sup> néhè-í dico chindee ñàha-í xii-n, te Xítohó Jesucristú Yaá ní xíndecu ñuú Nazàrét, ndacu-gá cada tátna ñaha-gã xii-n, ndacuíñí te caca-n —càchí-dé xàhá<sup>n</sup>-dē.

<sup>7</sup> Te té Pèlú ní tní-dé ndaha cùha tée yacua-ã<sup>n</sup>, te ní ngüíta-dé ndácàni ñaha-dé, te òré xía<sup>n</sup> ñí naníhí ndéé-dē, te ní ndúha sàhá-dē. <sup>8</sup> Te ní ndacuíñí cunu mee-dē te ní xica-dé, te ní cachí-dé sá ìo càhnu cuu Yá Ndiòxí cuendá sá ñí ndúha-dé, te ta sàndava-dé cuànguihu ndihi ñaha-güedé veñúhu. <sup>9</sup> Te nchaa ñáyiú xíndecu-á<sup>n</sup> ñí xiní-yu sá ñí nduu váha-dé, te ndèhé-yu ndàcá<sup>n</sup> táhú-dē núú Yá Ndiòxí. <sup>10</sup> Te ní naquiní ñàhá-yu xii-dé sá díú tēe xìcá<sup>n</sup> ndàhú tēe ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vñí-yu sá ñí ndúha-dé.

*Té Pèlú ní cáhá<sup>n</sup>-dé corredór sá néhé ñuú ndí Salòmón*

<sup>11</sup> Te sátá veñúhu càa corredór sá néhé ñuú ndí Salòmón. Yàcá<sup>n</sup> ndécú tē Pèlú ndihi té Juàá ndihi tēe ní ndúha sàhá-xi, te ñá cuíni tēe ní ndúha sàhá-xi-á<sup>n</sup> dañá-dē quíhí<sup>n</sup>-güedé dandóo ñaha-güedé xii-dé. Te chítú-yu ní quexìo coyó-yu núú ndécú-güedé, te ní cuñúhu vñí-yu sá ñí ndúha sàhá tēe cùhú-á<sup>n</sup>. <sup>12</sup> Te té Pèlú ní xiní-dé ní quexìo coyó-yu, te ní xàhá<sup>n</sup>-dē xii-yu:

—Nchòhó ñáyiú isràél, ¿ná cuendá ndéé dúcá<sup>n</sup> ndèhe ñaha-ndo xii-ndí te cuñúhu-ndo sá ñí ndúha tēe yacua-ái<sup>n</sup>? Nchòhó cáhá<sup>n</sup>-ndó sá méé-ndí ní quide

tátna-ndí-dé sá ìo váha iní-ndí, dico ñàhá chi ñá díú mèe-ndí ní quide tátna-ndí-dé. <sup>13</sup> Chi Yá Ndiòxí ní ndadúha ñaha-gã xii-dé, chi ñuú-gá cúú Ndiòxí ndí Abrahám ndihi ndí Isàac ndihi ndí Jàcób, te ñuú-ni cue tēe-á<sup>n</sup> cúú ñàní tnàhá-ó ñí xíndecu ndéé sanaha vñí. Te ñuú-ni Ndiòxí-á<sup>n</sup> ñí xàhá<sup>n</sup>-gã xii Déhe-gá Jèsús sá táxí tnúni-gá nchaa sá ìo andíu ndihi nchaa ñáyiú ndècu ñuyú-a, dico mee-ndo ñí sàha cuendá-ndó Jèsús núú tēe cùchiu<sup>n</sup>. Te té Pilatú ní cuíni-dé dacàcu-dé Jèsús ní cùu, te mee-ndo ñá ñí cuíni-ndó. <sup>14</sup> Te Yá Ndiòxí ní cachí-gá sá ìo váha iní Jèsús te ñá túú tnàhí cuéchi-gá. Te mee-ndo ñá túú ní cuíni-ndó cãcu-gá ñuú ní xàhá<sup>n</sup>-ndo xii tēe Pilatú sá váha-gá dacàcu-dé ìn tēe ndècu vñí cuéchi-xi, te vá dacàcu-dé Jèsús. <sup>15</sup> Te ní xàhá<sup>n</sup>-ndo sá cáhni-güedé Jèsús Yaá quidé nchìto-o ndecu-o, dico Yá Ndiòxí ní dándótó ñaha-gá, te ní xiní-ndí sá ndàá ní ndoto-gá. <sup>16</sup> Te nchúhú sa ñaha-ndí sá díú Xítohó Jesucristú ní ndadúha-gá tēe yacua, te ná-dé nùtní-a. Te duca<sup>n</sup> ñí quide-gá chi ní sàndáá iní ñàhá-dē xii-gá, te vitna ní xiní-ndó sá ndàá ní ndúha-dé.

<sup>17</sup> Te nchòhó ndihi cue tēe cùnnuu ní sahani-ndo Xítohó Jesucristú, chi ñá ñí cùnnumí iní-ndó sá ñí quide-ndo. <sup>18</sup> Te cue tēe ní xóo cáhá<sup>n</sup> tnúhu Yá Ndiòxí ndéé sanaha ñí chídó tnúni-güedé nàcuáa ní xàhá<sup>n</sup> Yá Ndiòxí xii-güedé sá Crístú quixi-gá ñuyú-a, te ndoho vñí-gá, te xía<sup>n</sup> ñuú duca<sup>n</sup> ñí cuu ìo ní ndoho-gá. <sup>19</sup> Te vitna te dañá-ndo nchàa sá cuéhe sá dúhá quide-ndo. Te quíndáá iní-ndó Yá Ndiòxí, te duca<sup>n</sup> te cada càhnu iní-gá nchaa sá ñá túú váha ní quide-ndo ñuyú-a, te canu ichi ñaha-gã xii-ndo ìn ichi váha. <sup>20</sup> Te ní tendaha-gã Crístú ní quixi-gá ñuyú-a, chi mee Yá Ndiòxí ní cachí-gá sá díú Crístú taunihnu ñaha-gã xii-ndo. <sup>21</sup> Te dacuíñí cùndecu-gá andíu ndéé ná sàá nduu nàtaxi ndecu-gá nchaa sá ndécú ñuyú nàcuáa sàni iní méé-gã. Te ñuú duca<sup>n</sup> ñí cáhá<sup>n</sup> Yá Ndiòxí ñuú duca<sup>n</sup> ñí chídó tnúni cue tēe ní xóo cáhá<sup>n</sup> tnúhu-gá ndéé sanaha. <sup>22</sup> Te ndí Moisés ní xàhá<sup>n</sup> ndí xii cue ñàní tnàhá-ó ñí xíndecu ndéé sanaha: “Yá Ndiòxí tendaha-gã ìn tēe quixi-dé cáhá<sup>n</sup>-dē tnúhu-gá dàtná cuíni-ndó ñí quide ñaha-gã



xii yúhú, te téé-á<sup>n</sup> cuu-dé ì<sup>n</sup> ñaní tnáhá-ndó. Te cundedóho váha-ndo nchàa tnúhu cáhá<sup>n</sup>-dé. <sup>23</sup> Te nchaa ñáyiú vá quíndáá iní tnúhu cáhá<sup>n</sup>-dé, te cuíta nihnú-yu chi vá quíhí<sup>n</sup>-yu núú quíhí<sup>n</sup> ñáyiú sàndáá iní tnúhu Yá Ndióxi”, duha ní xáha<sup>n</sup> ndíi Moisés xií-yu —càchí té Pèlú xáha<sup>n</sup>-dē xií-yu.

<sup>24</sup> Te ní xáha<sup>n</sup> tùcu té Pèlú xií-yu:

—Ndíi Sàmuél ndíi nchaa cue téé nchìcú<sup>n</sup>-gá ní xóo cáhá<sup>n</sup> tnúhu Yá Ndióxi ndéé sanaha ñí cáhá<sup>n</sup>-güedé nàcuáa cada-xi vitna. <sup>25</sup> Te Yá Ndióxi ní cáhá<sup>n</sup>-gá ndíi cue téé ní cáhá<sup>n</sup> tnúhu-gá ndéé sanaha. Te ní quide ndáá-gá ndíi nchaa ñaní tnáhá-ó ñí xíndecu ndéé sanaha nàcuáa cada-gá naníhí tàhú-ó. Te duha ní xáha<sup>n</sup>-gá xii ndíi Àbrahám: “Ío nduu cacu ì<sup>n</sup> tnàha-n, te téé-á<sup>n</sup> cada-dé te naníhí tàhú ñáyiú ñuyíú-a”, duha ní xáha<sup>n</sup>-gá xii ndíi Àbrahám. <sup>26</sup> Núu xiá<sup>n</sup> ní tendaha-gá Déhe-gá ní quixi-gá núú ndécú-ndó cuèndá dañ-ndo nchàa sá cuèhé sá dúhá quide-ndo, te naníhí tàhú-ndó —càchí té Pèlú xáha<sup>n</sup>-dē xií-yu.

## 4

*Té Pèlú ndíi té Juàá ndécú-güedé ndaha téé cùchiu<sup>n</sup>*

<sup>1</sup> Te té Pèlú ndíi té Juàá càhá<sup>n</sup> dúcá<sup>n</sup>-ni-güedé ndíi ñáyiú, ní quexìo cue dútú ndíi téé tàxi tnuní ñáhá xii cue téé quide cuèndá veñúhu càhnu sá ío cùnno, ndíi cue téé cùu saducéú. <sup>2</sup> Te ní cudéé<sup>n</sup>-güedé nchaa-güedé núú tē Pèlú ndíi té Juàá sá xáha<sup>n</sup>-güedé xii ñáyiú sá ndótó ñáyiú ní xíhí dàtná ní ndoto Jèsús. <sup>3</sup> Te ní tní ñaha-güedé ní chihi ñaha-güedé vecaá xii-güedé, te ñá ní quide ndáá téé cùchiu<sup>n</sup> cuèchi-güedé nduu-á<sup>n</sup> chi sa ní cuaa. <sup>4</sup> Te ío vài ñáyiú ní sàndáá iní-yu tnúhu ní cáhá<sup>n</sup>-güedé, te ñáyiú-á<sup>n</sup> ndíi ñáyiú sa ní sàndáá iní-xi ndéé cãni-gá ní xínu dàtná úhú<sup>n</sup> mìl mee-ni cuè téé, te dè<sup>n</sup> ñáyiú dè<sup>n</sup> ndíi landú.

<sup>5</sup> Te nduu tnéé-á<sup>n</sup> dèu-ni ñuú Jerusàlén-á<sup>n</sup> ñí tacá cue téé yíndaha veñúhu, ndíi cue téé cùu sacuéhé núú ñáyiú isràél ndíi cue téé dàcuaha ñaha xií-yu nchaa tnúhu ní chídó tnuní ndíi Moisés. <sup>6</sup> Te tnáhá dútú cùnno-gá téé nàni Anás ndécú ndíi té Caifás, ndíi té Juàá, ndíi té Lijandrú

ndíi dava-gá ñaní tnáhá dútú cùnno-gá-á<sup>n</sup> ndécú. <sup>7</sup> Te ní xáha<sup>n</sup>-güedé xii cue téé xínu cuechi núú-güedé:

—Chí cuàhá<sup>n</sup> queñuhu-ndo tē Pèlú ndíi té Juàá vecaá, te na quixi-güedé iha —càchí-güedé xáha<sup>n</sup>-güedé.

Te ní quexìo té Pèlú ndíi té Juàá núú cuè téé cùnno, te cue téé cùnno-á<sup>n</sup> ñí xícá<sup>n</sup> tnúhú-güedé núú-güedé, te xáha<sup>n</sup>-güedé:

—¿Nása ní quide-ndo cuèndá téé yacua-á<sup>n</sup>? ¿Yoo ní táuchíú<sup>n</sup> dùca<sup>n</sup> cada-ndo? —cachí-güedé xáha<sup>n</sup>-güedé.

<sup>8</sup> Te ndècu ndíi té Pèlú Espiritú Yá Ndióxi, núu xiá<sup>n</sup> ní xáha<sup>n</sup>-dē xii-güedé:

—Nchòhó cue téé cùchiu<sup>n</sup> ndíi nchòhó cue téé cùu sacuéhé núú ñáyiú isràél, <sup>9</sup> te núu cuèní-ndó quíni-ndó nása ní quide-ndí ní ndúha téé yacua-á<sup>n</sup>, <sup>10</sup> te cundedóho-ndo ì<sup>n</sup> tnúhu na càhá<sup>n</sup>-í-a. Xíni ñuhu-xi cund-edóho nchaa ñáyiú isràél cuèndá quíni-yu nàcuáa ní cuu ní ndúha téé-á<sup>n</sup>. Xítohó Jesucristú Yaá ní xíndecu ñuú Nazàrét ní quide tátna-gá sáhá tē yacua ní ndúha, te dèu-ni-gá ní sata caa-ndo núú cùrúxí te núú cùrúxí-á<sup>n</sup> ñí xíhí-gá, te ní dándótó ñaha Yá Ndióxi xii-gá. <sup>11</sup> Te núú tütú Yá Ndióxi càchí-xi: “Cristú cúu-gá dàtná ì<sup>n</sup> yúú ndécú xíquí ì<sup>n</sup> vehe. Te yúú càchí-yu sá ñà túú nàndíi, te dèu xiá<sup>n</sup> ní nàndíi-xi ní ngúnutnì-xi xíquí véhé”, duha càchí-xi núú tütú-gá. Te duca<sup>n</sup> sãtnahá-xi cùu Jesús, chí càchí-ndó sã ñà túú nàndíi-gá, <sup>12</sup> dico Yá Ndióxi ñá túú ndéé ní tàxi ndecu-gá ingá téé dàcácu nihnu ñaha xii-o núú ùhú núú ndàhú, chí ì<sup>n</sup> dèi díi-ni Déhe-gá Xítohó Jesucristú dacácu nihnu ñaha-gá xii-o —càchí té Pèlú xáha<sup>n</sup>-dē xii-güedé.

<sup>13</sup> Te té Pèlú ndíi té Juàá ñá túú tūha-güedé, te cùñúhu cue téé cùchiu<sup>n</sup> sá ío ñí xíndáa-güedé. Te ní cutnùní iní cue téé cùchiu<sup>n</sup>-á<sup>n</sup> sã Jèsús ní xica cuu ndíi-güedé, núu xiá<sup>n</sup> ñá túú tnàhí yùhú-güedé càhá<sup>n</sup>-güedé. <sup>14</sup> Te cuèndá ndécú ndíi té Pèlú ndíi té Juàá téé ní ndúha sáhá-xi, núu xiá<sup>n</sup> ñá ní ñíhí cue téé cùchiu<sup>n</sup> tnúhu cáhá<sup>n</sup>-güedé. <sup>15</sup> Te ní xáha<sup>n</sup>-güedé xii té Pèlú ndíi té Juàá sá quée-güedé quehé cuèndá ndóo mee-güedé ndatnúhu-güedé. <sup>16</sup> Te ní xítnàha-güedé:

—¿Nása cada-o ùú cue tée-ǎ<sup>n</sup>?, chi nchaa ñáyiú ñuú Jerusàlén nàhǎ-yu sá ñi quide tátna-güedé ñ<sup>n</sup> tée yacua, te xǎ<sup>n</sup> xǐcuñúhu vìhi ñáyiú. Te vá cúú cǎchí-ó sǎ ñǎ ndáá, chi vìi ñáyiú ní xiní nàcuáa ní cuu. <sup>17</sup> Te dayùhú-ó-güedé te cúñaha-o sǎ vǎ cǎhá<sup>n</sup>-gá-güedé tnúhu Jèsús, chi núu ñáhá te quindáá-gá iní-yu —cǎchí-güedé xǐtnàha-güedé.

<sup>18</sup> Te ní cana tucu-güedé té Pèlú ndìhi té Juáá, te xǎha<sup>n</sup>-güedé sá vǎ dǎcuàha-gá-güedé ñáyiú tnúhu Jèsús. <sup>19</sup> Te té Pèlú ndìhi té Juáá ní xǎha<sup>n</sup>-güedé:

—Chí cuǎha cuèndá, te núu sá cǎchí nchòhó cada-ndí àdi sá cǎhá<sup>n</sup> Yǎ Ndiòxí cada-ndí. Te cada cǎhnu iní-ndó chi vá cúú cǎda-ndí sá cǎchí-ndó, chi cada nahi-ni-ndí sá cǎchí Yǎ Ndiòxí. <sup>20</sup> Chi dacuití cǎhá<sup>n</sup>-ndí nàcuáa ní cǎhá<sup>n</sup> Jèsús, te cǎhá<sup>n</sup>-ndí nchaa sá ñi xiní-ndí ní quide-gá —cǎchí-güedé xǎha<sup>n</sup>-güedé.

<sup>21</sup> Te cue tée cùchiu<sup>n</sup> níhi-gá ní cǎhá<sup>n</sup>-güedé xǎha<sup>n</sup>-güedé sá cǎdá cǎstiú ñáhá-güedé núu vá dǎñá-güedé sá dǎcuàha-güedé ñáyiú. Te duca<sup>n</sup> te ní dǎñá ñàha-güedé cuánuhú-güedé, chi ñá ní níhi-güedé nása cada-güedé cada castiú ñáhá-güedé, chi nchaá-yu ndàcá<sup>n</sup> táhǎ-yu núu Yǎ Ndiòxí sá ñi ndúha tée yacua. <sup>22</sup> Te tée ní quide tátna-güedé-á<sup>n</sup> ndécú-dé vìhi-gá údico cuíá-dé, te ío ní cuñúhu-yu sá ñi ndúha-dé.

*Ñáyiú sándáá iní tnúhu Jèsús xicá<sup>n</sup> táhǎ-yu núu-gǎ sá vǎ yùhú-yu cǎhá<sup>n</sup>-yu tnúhu-gá*

<sup>23</sup> Te ní ndee té Pèlú ndìhi té Juáá cuánuhú-güedé núu ndécú cuè tée cùndìhi-güedé, te ní nacani tnúhu-güedé nàcuáa ní xǎha<sup>n</sup> cuè dútú cùnùu ndìhi cue tée cùu sacuéhé núu ñáyiú isràél. <sup>24</sup> Te sátá ñi xíndedóho-yu tnúhu ní cǎhá<sup>n</sup>-güedé, te ñ<sup>n</sup>-ni tnúhu ní cǎhá<sup>n</sup>-yu nchaá-yu ndìhi Yǎ Ndiòxí, te ní xǎhǎ<sup>n</sup>-yu xii-gá:

—Yòhó Dútú Ndiòxí, ní cadúha-n àndiú, ní cadúha-n ñuyú, ní cadúha-n làmár, ní cadúha-n nchàandi túhú sá ío ñuyú. <sup>25</sup> Te ndí Dàvíí ní sándáá iní ndí tnúhu ní cǎhá<sup>n</sup>-n, te ní chídó tnùní ndí nàcuáa ní xǎha<sup>n</sup>-n cǎhá<sup>n</sup> ndí, te ñi-ñi Espiritú-n ñi chindee ñàha-xi xii ndí ní chídó tnùní ndí, te duha ní chídó tnùní ndí:

Ñáyiú ñá túú cùu ñáyiú isràél ío cùdèé<sup>n</sup>-yu núu Yǎ Ndiòxí,

te cuíní-yu nàá-yu ndìhi-gá, dico vá ndácù-yu chi mee-gǎ cùnùu-gá.

<sup>26</sup> Te cue tée yìndaha nació<sup>n</sup> ndìhi cue tée cùchiu<sup>n</sup> tacá-güedé nàá-güedé ndìhi Dútú Ndiòxí ndìhi Crístú Yáá ní quixi ñuyú-a.

Duha ní chídó tnùní ndí Dàvíí nàcuáa ndùu tnúhu ní cǎhá<sup>n</sup>-n —cǎchí-yu xǎhǎ<sup>n</sup>-yu xii Yǎ Ndiòxí.

<sup>27</sup> Te xǎha<sup>n</sup> tùcú-yu xii-gá:

—Ndáá ní cǎhá<sup>n</sup> ndí Dàvíí chi ñi-ñi ñuú iha ní tacá té Hèrodés ndìhi té Pònciú Pilatú ndìhi ñáyiú ñá túú cùu ñáyiú isràél ndìhi ñáyiú isràél ní cǎhá<sup>n</sup> cuèhé-yu cuèndá Jèsús. Te Yòhó Dútú Ndiòxí, Déhe-n cùu Jesús núu ío váha iní-gá, te ní sáha chiú<sup>n</sup>-n-gá, te ío úhú ní cuu iní ñáhá ñáyiú xii-gá. <sup>28</sup> Te ní quidé-yu nàcuáa ní sani iní-n cǎdá-yu ndéé sanaha, ndéé cùtnàhá ní ngáva ñuyú. <sup>29</sup> Te Yòhó Dútú Ndiòxí sa nàha-n nása cǎhá<sup>n</sup> cue tée cuíní cada úhú ñáhá xii-ndí. Te quide-ndí chiú<sup>n</sup> tahu-n, te vitna chindee ñàha-n xii-ndí cuèndá sá vǎ yùhú-ndí cǎhá<sup>n</sup>-ndí tnúhu-n. <sup>30</sup> Te cada tátna-n ñáyiú cùhú, te chindee ñàha-n xii-ndí, te cada-ndí nchaa sá vǎ yò tnàhí ndàcu cada nacuéa cuñúhu vìhi-yu. Te xiní-ndí sá méé Jèsús chindee ñàha-gá xii-ndí, chi quide-gá chiú<sup>n</sup> tahu-n —cǎchí-yu xǎhǎ<sup>n</sup>-yu xii Yǎ Ndiòxí.

<sup>31</sup> Te sátá ñi yáha ní cǎhá<sup>n</sup>-yu ndìhi Yǎ Ndiòxí, te ní quidi-xi vehe núu xíndecú-yu, te òré-á<sup>n</sup> ñi cutáhú tucú-yu nchaá-yu Espiritú-gá. Te ní cǎhá<sup>n</sup>-yu tnúhu Yǎ Ndiòxí, te ñá túú tnàhí ní yùhú-yu.

*Cuèndá nchaa ndachìu<sup>n</sup> cǎnehe chiú<sup>n</sup>-yu*

<sup>32</sup> Te nchaa ñáyiú ní sándáá iní tnúhu Yǎ Ndiòxí ñ<sup>n</sup>-ni tnúhu ní cǎhá<sup>n</sup>-yu nchaá-yu. ñ<sup>n</sup>-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnàhǎ-yu nchaa sá xiní ñùhú-yu, te ní ñ<sup>n</sup>-yu ñá túú ní cǎhá<sup>n</sup>-yu sá ndàchiú<sup>n</sup>-yu ñ<sup>n</sup>-ni-ñi-yu cùu nchaa sá ndécú ndìhi-yu. <sup>33</sup> Te cue tée ní táuchíu<sup>n</sup> Jèsús dacuàha ñàha xií-yu tnúhu-gá ío váha ní cǎhá<sup>n</sup>-güedé nàcuáa ní cuu ní ndoho Xítóhó Jesucristú. Te ío ní chindee ñàha Yǎ Ndiòxí ní cǎhá<sup>n</sup>-yu tnúhu-gá, te

ñá túú ní cǎhá<sup>n</sup> cuèhé dava-gá-yu cuèndá ñáiyu dàcuaha tnúhu-gá. <sup>34</sup> Te ñá túú tnàhí ní cùndahú-yu díhú<sup>n</sup>, chi nchaa ñáiyu ndècu ndihí ñuhu-xi, ndihí nchaa ñáiyu cǎa vehe-xi ní nadìcò-yu, te da ì<sup>n</sup> da ì<sup>n</sup> ndachìú<sup>n</sup>-yu ní nadìcò-yu òré xíní ñùhú-yu díhú<sup>n</sup>. <sup>35</sup> Te ní sǎñàhá-yu xii cue tée ní táuchíú<sup>n</sup> Jèsús dacuàha ñaha xií-yu tnúhu-gá, te cue tée-á<sup>n</sup> ñí dǎcǎhñu-güedé nchaa ñáiyu xìni ñuhu. <sup>36</sup> Te distritú Chìpré ndécú ì<sup>n</sup> tée nàni-dé Chèè ñani tnáhá ndíi Lèví, te ní xóo cunu cuechi-dě veñúhu ñáiyu isràél. Te cuèndá sǎ sǎñaha-dě tnúhu ndee ìní xií-yu, xǎ<sup>n</sup> nùu ní dánání ñàha-güedé Vèè xii-dé. <sup>37</sup> Te tée-á<sup>n</sup> ñí nadico-dě luha ñuhu-dé, te nèhe-dé díhú<sup>n</sup> cuáhá<sup>n</sup> núú cuè tée ní táuchíú<sup>n</sup>-gǎ dacuàha ñaha xií-yu tnúhu-gá.

## 5

### *Té Ananiás ndihí tá Sàfirá ñá túú ní quide ndáá-yu*

<sup>1</sup> Te ndècu ì<sup>n</sup> tée nàni Ananiás, te ñadihí-dé nání-á<sup>n</sup> Sàfirá, te ñáiyu-á<sup>n</sup> ñí nadìcò-yu luha ñuhú-yu. <sup>2</sup> Te ní taxúha-dé sacú díhú<sup>n</sup>, te sacú-gá néhé-dě cuáhá<sup>n</sup> ní sǎñaha-dě xii cue tée ní táuchíú<sup>n</sup> Jèsús dacuàha ñaha xii ñáiyu tnúhu-gá, te ní dándahú ñáhá-dě xii-güedé, chi ní xáha<sup>n</sup>-dě sǎ ñihí ní sǎñaha-dě, te nàha ñadihí-dé sǎ dúcá<sup>n</sup> ñí quide-dé. <sup>3</sup> Te ní xáha<sup>n</sup> tǎ Pèlú xii-dé:

—Ananiás, ¿ná cuèndá duca<sup>n</sup> ñí quide-n ñí dáñá-n ñí quíhu sácúlná ìní-n? Te ní dácúandèhnde-n núú Espiritú Yǎ Ndiöxí, te ní taxúha-n sácú díhú<sup>n</sup> ñí ñihí-n cuèndá ñuhu-n. <sup>4</sup> ¿Te ñuhu-á<sup>n</sup> cuèndá sǎ ñùhú mèe-n, àdi díhú<sup>n</sup>-ǎ<sup>n</sup> cuèndá sǎ díhú<sup>n</sup> mèe-n cùu-xi, te cuu-ni cada-n nàcuáa cǎchí ìní-n cǎha<sup>n</sup>-n ñá? ¿Ná cuèndá duca<sup>n</sup> ñí quide-n? ¿Ná ní quide-xi ìní-n nùu ní dácúandèhnde-n núú Yǎ Ndiöxí? Chi ñá díú-ní mèe-ni ñáiyu ni dándahú-n —cǎchí tǎ Pèlú xǎha<sup>n</sup>-dě xii-dé.

<sup>5</sup> Te òré ní ndihí tnúhu ní xáha<sup>n</sup> tǎ Pèlú, te uu<sup>n</sup>ni ní nduá-dé te ní xihí-ni-dé. Te nchaa ñáiyu ní ñihí tnúhu sǎ ñí xihí-dé, te ní yùhú víhí-yu. <sup>6</sup> Te ní quixi ì<sup>n</sup> úú cue tée cuechi, te ní ndanehe ñaha-güedé ní sacá<sup>n</sup> ñáhá-güedé núú yuu, te ní ducu<sup>n</sup> nuu ñaha-güedé yuu-á<sup>n</sup>, te ní

xido ñaha-güedé néhé ñàha-güedé cuáhá<sup>n</sup> chindúxi ñaha-güedé xii-dé.

<sup>7</sup> Te ní cuu úú uní òré, te ní quexìo ñadihí tée ní xihí-á<sup>n</sup>, te vátá quini-gá-a<sup>n</sup> sǎ ñí xihí yí-a<sup>n</sup>. <sup>8</sup> Te ní xáha<sup>n</sup> tǎ Pèlú xii-a<sup>n</sup>:

—Cuini-í cǎchí tnúhu ndáá-n. ¿Ndédau ní dícò-ndó ñùhu, ní dícò-ndó nàcuáa ní cǎchí yí-n ǎ<sup>n</sup>? —cǎchí tǎ Pèlú xǎha<sup>n</sup>-dě xii-a<sup>n</sup>.

Te ní xáha<sup>n</sup>-a<sup>n</sup>:

—Ndáá sǎ díú-ní dùca<sup>n</sup> —cǎchí-a<sup>n</sup> xǎha<sup>n</sup>-a<sup>n</sup>.

<sup>9</sup> Te ní xáha<sup>n</sup> tǎ Pèlú:

—¿Ná cuèndá duca<sup>n</sup> ñí chitnàha tnúhu-ndo dùca<sup>n</sup> ní quide-ndo ñí cuini-ndó dándahú-ndó Espiritú Yǎ Ndiöxí? Quini-n, chi sa cuándixi cue tée ní sáhá<sup>n</sup> ní chindúxi yí-n, te yòhó tnáhá-n cǎndeca ñaha tucu-güedé xii-n quíhí<sup>n</sup> vitna —cǎchí-dé xǎha<sup>n</sup>-dě xii-a<sup>n</sup>.

<sup>10</sup> Te òré-á<sup>n</sup> ñí nduá-a<sup>n</sup> núú tǎ Pèlú, te ní xihí-ni-a<sup>n</sup>. Te cuándihu cue tée cuechi-ǎ<sup>n</sup> xití vehe, te ní xini-güedé sǎ sǎ ñí xihí-a<sup>n</sup>, núu ní xido ñaha tucu-güedé cuáhá<sup>n</sup> chindúxi-güedé-a<sup>n</sup> dìñi yí-a<sup>n</sup>. <sup>11</sup> Te ní yùhú víhí ñáiyu ní sándáa ìní tnúhu Yǎ Ndiöxí, ndihí dava-gá ñáiyu ní ñihí tnúhu nàcuáa ní cuu.

### *Ní quide-güedé titní núú sǎ vǎ yòo tnàhí ndàcu cada te ío ní cuñúhu ñáiyu*

<sup>12</sup> Te cue tée ní táuchíú<sup>n</sup> Jèsús dacuàha ñaha xií-yu tnúhu-gá titní víhí sǎ vǎ yòo tnàhí ndàcu cada ní quide-güedé, te ní cuñúhu víhí-yu. Te nchaa ñáiyu ní sándáa ìní-xi tnúhu Jèsús ní xóo tacá-yu corrèdór néhé dìu ndíi Salòmón. <sup>13</sup> Te nchaa ñáiyu ñá túú dàcuaha tnúhu-gá ñá ní cùyí-yu chitnahá-yu ñáiyu ní sándáa ìní-xi tnúhu-gá, dico nchaá-yu ní cǎhá<sup>n</sup> váha-yu cuèndá ñáiyu ní sándáa ìní-xi tnúhu-gá. <sup>14</sup> Te vǎi tée, vǎi ñadihí ní sándáa ìní-yu tnúhu-gá. <sup>15</sup> Te cuèndá sǎ ñí ñihí-yu tnúhu sǎ quidé tǎtna cue tée ní xica cuu ndihí Jèsús, núu xǎ<sup>n</sup> ní queñuhú-yu nchaa ñáiyu cùhú ichi, te davá-yu ní quide túha-yu cǎmá te davá-yu ní quide túha-yu yuu, núu núú nchàa xǎ<sup>n</sup> tá sàcá<sup>n</sup>-yu cue ñáiyu cùhú-á<sup>n</sup> cuáhá<sup>n</sup>, te xǎ<sup>n</sup> cáa-yu ndètú-yu, chi ní sani ìní-yu sǎ òré yáha tǎ Pèlú te cuèdicó cuándahú-dě yáha ndodo ñaha-xi xií-yu te ndúha-yu. <sup>16</sup> Te ní quixi ñáiyu ñuú yatni Jerusalén ndécá-yu



ñáyiú cùhú, ndihí ñáyiú yìhi ñaha espíritú cùndihí yucu ñávaha ní quixi, te nchaá-yu ní ndúha.

*Ío ní quide úhú-güedé té Pèlú ndihí té Juàá*

17-18 Te dútú cùnù-gá ndihí cue té cù saducéú cue té cùndihí-dé ní cudéé<sup>n</sup>-güedé sá ío chítú-yu dàcuaha tnúhu Jèsús, núu xíá<sup>n</sup> ní tñi-güedé cue té ní táuchíú<sup>n</sup> Jèsús dacuaha ñaha xii-yu tnúhu-gá ní chihí ñaha-güedé vecaá. 19 Te xití niú-á<sup>n</sup> ní quexìo ì<sup>n</sup> espíritú xínú cuèchi núú Yá Ndiöxí ní nacaá<sup>n</sup>-xi yèhe vecaá ní quee-güedé, te ní xáha<sup>n</sup>-xi xii-güedé:

20 —Quíhí<sup>n</sup>-ndó veñúhu càhnu sá ío cùnùu te cùñaha-ndo xii ñáyiú nàcuáa cadá-yu nanihí tàhú-yu —càchí espíritú-á<sup>n</sup> xáha<sup>n</sup>-xi xii-güedé.

21 Te sá dúcá<sup>n</sup> ní xáha<sup>n</sup>-xi núu sátá ní túndaá, te ní sáhá<sup>n</sup>-güedé veñúhu càhnu sá ío cùnùu sá cúu-xí ñáyiú isràél ní dácuáhá ñaha-güedé xii-yu.

Te dútú cùnù-gá ndihí cue té cùndihí-dé ní nadatàcá tnáhá-güedé ndihí nchaa cue té cùu sacuéhé núu ñáyiú isràél ndihí cue té cùchiu<sup>n</sup>, te ní tendaha-güedé sandàdú cuáhá<sup>n</sup> queñuhu-güedé cue té yìhi vecaá ní cùu. 22 Te ní quexìo-güedé yèhe vecaá, te ní xiní-güedé sá ní ì<sup>n</sup>-gá cue té dàcuaha ñaha xii ñáyiú tnúhu Jèsús ñá túu-gä-güedé yíhí. Te cuánuhú-güedé 23 ní xítñùhu-güedé cue té cùchiu<sup>n</sup>, te xáha<sup>n</sup>-güedé:

—Ní sáhá<sup>n</sup>-ndí ní sándéhé-ndí vecaá, te ndéé chóo-ni, te xíndecu-ni sandàdú cue té xíndéé yèhe vecaá. Te ní nacaá<sup>n</sup>-ndí vecaá, te vá yóo ì<sup>n</sup>-gá yíhí —càchí-güedé xáha<sup>n</sup>-güedé.

24 Te sá dúcá<sup>n</sup> ní xáha<sup>n</sup>-güedé, te cuáhá<sup>n</sup> iní cue dútú cùnùu ndihí tée tàxi tnuní cue té xíndéé veñúhu càhnu sá ío cùnùu, te ní xítñàha-güedé:

—¿Nása cada-xi vitna duha càa ní cuu ní xinu cue té yìhi vecaá-i? —càchí-güedé xítñàha-güedé.

25 Te ní quexìo ì<sup>n</sup> té ní xáha<sup>n</sup>-dè:

—Cundedóho-ndo na càchí tnúhu-í ì<sup>n</sup> tnúhu. Cue té ní chihí-ndo vecaá ndécú-güedé veñúhu càhnu sá ío cùnùu dacuaha-güedé ñáyiú —càchí-dé xáha<sup>n</sup>-dè.

26 Te cue té ndéé veñúhu ndihí tée tàxi tnuní ñáhá xii-güedé cuánguaca ñaha-güedé, te ñá túu ní quide úhú ñáhá-güedé, chi ní yùhú-güedé cuáha yúu ñáhá ñáyiú dii ñùú-xi-á<sup>n</sup>. 27 Te ní ndexìo ndihí ñaha-güedé núu cuè té cùu sacuéhé ndihí núu cuè té cùchiu<sup>n</sup>. Te dútú cùnù-gá ní ngüita-dé ténàá ñáhá-dé xii-güedé, te xáha<sup>n</sup>-dè:

28 —Te náa ñá díú ní cachí-ndí sá vã dácuaha-gá-ndó ñáyiú tnúhu Jèsús te dàcuaha-ni-ndó-yu, te vitna nchaa ñáyiú ñuú Jerusálén ní níhí-yu tnúhu nàcuáa càhá<sup>n</sup>-ndó. ¿Te ná cuèndá duca<sup>n</sup> quide-ndo, te càchí-ndó sã nchùhú ndécuéchi-ndí ní sahani-ndí Jèsús-i? —càchí dútú cùnù-gá xáha<sup>n</sup>-dè xii-güedé.

29 Te té Pèlú ndihí dava-gá cue té ní táuchíú<sup>n</sup> Jèsús dacuaha ñaha xii-yu ní xáha<sup>n</sup>-güedé xii cue té cùchiu<sup>n</sup>:

—Nchúhú, Yá Ndiöxí cùnù-gá sandáá iní-ndí tnúhu càhá<sup>n</sup>-gá dàcúxí tnùhu càhá<sup>n</sup> ñáyiú. 30 Te nchòhó ní sata caa-ndo Jèsús núu cùrúxí te núu cùrúxí-á<sup>n</sup> ní xihí-gá, dico ní dándótó ñaha Yá Ndiöxí xii-gá. Te Yá Ndiöxí ní sandáá iní cue ñani tnáhá-ndí ní xíndecu ndéé sanaha. 31 Te Yá Ndiöxí ní xáha<sup>n</sup>-gá sá cùndecu Jesús xio cùha-gá cuèndá taxi tnuní-gá te dacácu nihnu-gá ñáyiú isràél núu ùhú núu ndàhú. Te duca<sup>n</sup>-ni dacácu nihnu-gá nchaa ñáyiú na dàña nchaa sá cuèhé sá dúhá, te cada càhnu iní-gá nchaa yíca cuèchi-yu. 32 Te ní xiní-ndí nàcuáa ní quide-gá, núu xíá<sup>n</sup> caní-ndí cuèndú núu nchàa ñáyiú, te Espíritú Yá Ndiöxí chíndèe ñaha-xi xii-ndí càhá<sup>n</sup>-ndí tnúhu-gá. Te diu-ni Espíritú-gá ní sañaha-gä xii nchaa ñáyiú ní sandáá iní-xi tnúhu-gá —càchí té Pèlú ndihí dava-gá-güedé xáha<sup>n</sup>-güedé xii cue té cùchiu<sup>n</sup>.

33 Te sátá dúcá<sup>n</sup> ní xáha<sup>n</sup>-güedé xii cue té cùchiu<sup>n</sup>, te ní cudéé<sup>n</sup>-güedé, te ní ndatnúhu-güedé sá cáhni ñaha-güedé.

34 Te ì<sup>n</sup> té cùu fariséú tnàha-dé cúu-dé chiú<sup>n</sup>, te nàni-dé Gamaliél, te cùu-dé mèstrú dácuaha-dé ñáyiú nàcuáa ní chídó tnuní ndí Moisés, te ío yíñùhu cahá<sup>n</sup> ndihí ñàhá-yu xii-dé. Te ní ngúnutñi-dé, te ní xáha<sup>n</sup>-dè sá ná quèe tnaa té Pèlú ndihí dava-gá-güedé quehé. 35 Te ní xáha<sup>n</sup>-dè xii cue té cùchiu<sup>n</sup>:



—Nchòhó cue téé isràél, xini ñuhu-xi sá cání vâha iní-ndó nâsa cada-ndo ndihî cue téé-â<sup>n</sup>. <sup>36</sup> Chi ní cunaha ñí xíndecu ñí<sup>n</sup> téé ní xínani Tèudás, te ní cachí-dé sá cúnù-dé, te ní cundihî-dé dàtná cúmí cièndú cue téé, te ñá ní cuení-güedé cuu ñí<sup>n</sup> nuu-güedé ndihî cue téé cùchiu<sup>n</sup>. Te ní sahani ñaha cuè téé cùchiu<sup>n</sup>-á<sup>n</sup> xii téé Tèudás, te ní ndihî cue téé ní xica cuu ndihî-dé ní xité nuu-güedé, te ñá túú-gã ní quide-güedé nâcuâa ní sani iní-güedé cada-güedé. <sup>37</sup> Te sátá ñí xihî téé-á<sup>n</sup>, te ní tnahá nduu núcódó tnúni ñáyiu. Te dàvá-á<sup>n</sup> ñí xíndecu ñí<sup>n</sup> téé distritú Galileá ní xínani-dé Jùdás. Te titní-güedé ní chitnahá ñáhá-güedé xii-dé. Te tnahá-dé ní sahani ñaha tucu cue téé cùchiu<sup>n</sup>, te nchaa cue téé ní xica cuu ndihî-dé ní xité nuu-güedé. <sup>38</sup> Te na càchí tnúhu-í sá dáñá-ndó cuè téé-á<sup>n</sup>, te ñí ñà túú nâgá tnúhu cúñaha-ndo xii-güedé, chi núu chiú<sup>n</sup> mee-güedé quidé-güedé te cuíta-güedé, <sup>39</sup> dico núu chiú<sup>n</sup> Yá Ndiöxí quidé-güedé, te vá ndínihnu chiu<sup>n</sup> quide-güedé. Te núu quide-güedé chiú<sup>n</sup> Yá Ndiöxí, te vá nâá-ndó ndihî-güedé, chi Yá Ndiöxí nâá ndihî-ndo sã dúcá<sup>n</sup> xíquide-ndo —càchí té Gamaliél xâha<sup>n</sup>-dê xii cue téé cùchiu<sup>n</sup>.

<sup>40</sup> Te nchaa-güedé ní cáhá<sup>n</sup> sá tnúhu ndáá càhá<sup>n</sup>-dé. Te dàtnúni ní nacana tucu-güedé té Pèlú ndihî dava-gá-güedé te ní caniha-güedé, te ní cáhá<sup>n</sup> níhi-güedé, te xâha<sup>n</sup>-güedé sá vâ càhá<sup>n</sup>-gá-güedé tnúhu Jèsús, te dàtnúni ní dáñá ñaha-güedé cuánuhú-güedé. <sup>41</sup> Te ío ní cudíí iní-güedé, chi mee Yá Ndiöxí ní cachí-gá sá dúcá<sup>n</sup> ndòho-güedé dacuâha-güedé ñáyiu tnúhu Jèsús. <sup>42</sup> Te ñí<sup>n</sup> nduu ñí<sup>n</sup> nduu ní dacuâhá-güedé ñáyiu xití veñúhu càhnu sá ío cúnuu ndihî nchaa vehé-yu. Te ní xâha<sup>n</sup>-güedé xii-yu sá Jèsús cúú-gã Crístú Yáá ní quixi ñuyíú-a.

## 6

*Ní ndúcú-güedé úsá cue téé cundecu dacâhñu sá cáxí ñáyiu*

<sup>1</sup> Te diu-ni dàvá-á<sup>n</sup> ñí sándáá iní vai ñáyiu tnúhu Jèsús. Te cue ñáyiu griégú ní cáhá<sup>n</sup> cuèhé-yu cuèndá ñáyiu isràél, sá ñáyiu dîhî ñáyiu quèé ñáyiu càhá<sup>n</sup> tnúhu griégú ñá túú tnahá sá cáxí-yu, chi ñá túú sãñaha

ñí<sup>n</sup> nuu-güedé. <sup>2</sup> Te cue téé úxúú ní táuchíú<sup>n</sup> Jèsús dacuâha ñaha xii-yu tnúhu-gá, cue téé-â<sup>n</sup> ñí cana-güedé nchaa ñáyiu sándáá iní tnúhu Jèsús. Te ní xâha<sup>n</sup>-güedé xii-yu:

—Nchúhú chi vá cúú dàcâhñu-ndí sá cáxí-yu, chi mee-ni tnúhu Yá Ndiöxí càhá<sup>n</sup>-ndí. <sup>3</sup> Te nchòhó cue téé ndècu ndihî-ndí ichi Xítohó Jesucristú cáhá<sup>n</sup> ndihî-ndo úsá cue téé xíndecu iha, cue téé càhá<sup>n</sup> ndihî ñáhá-yu mee-ni tnúhu yíñùhu, cue téé ndècu ndihî Espiritú Yá Ndiöxí, mee-ni cuè téé cùtnuní vâha iní-xi. Te cue téé-á<sup>n</sup> cuâha-ndí-güedé chiú<sup>n</sup> cada-güedé dacâhñu-güedé sá cáxí-yu. <sup>4</sup> Te nchúhú mee-ni Yá Ndiöxí cáhá<sup>n</sup> ndihî-ndí, te mee-ni tnúhu-gá dacuâha-ndí-yu —càchí-güedé xâha<sup>n</sup>-güedé xii-yu.

<sup>5</sup> Te ncháá-yu ní tñí-yu tnúhu ní cáhá<sup>n</sup>-güedé, núu ní ndúcú-yu cue téé cada chiú<sup>n</sup>-á<sup>n</sup>. Te ñí<sup>n</sup>-dé nání-dê Tèvá, te ío vâha sándáá iní-dé Yá Ndiöxí, te ndècu ndihî-dé Espiritú-gá. Te duha ní xínani dàva-gá-güedé: té Lìpé, té Pröcoró, té Nicánór, té Tímón, té Pàrmenás, té Lãxí téé ñuú Antiòquia téé ní sándáá iní-xi sá dacuâha ñáyiu isràél te vitna ní sándáá iní-dé tnúhu Jèsús. <sup>6</sup> Te úsá cue téé-á<sup>n</sup> ñí sáhá<sup>n</sup>-güedé núu cuè téé úxúú ní táuchíú<sup>n</sup> Jèsús dacuâha ñaha xii-yu tnúhu-gá, te cue téé úxúú-á<sup>n</sup> ñí cáhá<sup>n</sup> ndihî-güedé Yá Ndiöxí, te ní sacá<sup>n</sup> ndodo-güedé ndaha-güedé díquí cuè téé úsá-á<sup>n</sup>.

<sup>7</sup> Te ñáyiu ní sándáá iní tnúhu Jèsús cuáhá<sup>n</sup>-yu titní xichi càhá<sup>n</sup>-yu tnúhu-gá. Te vai-gá ñáyiu ta sándáá iní-yu tnúhu-gá cuáhá<sup>n</sup>, te ní xíndecú-yu ndihî dava-gá ñáyiu dacuâha tnúhu-gá ñuú Jerusalén. Te titní dútú ñí sándáá iní-güedé tnúhu-gá.

### *Ní tñí-güedé té Tèvá*

<sup>8</sup> Te té Tèvá ní quide-dé titní núu sã vâ yòo tnahí ndàcu cada, te ní cuñúhu vîhî-yu sá dúcá<sup>n</sup> ñí quide-dé, te duca<sup>n</sup> ñí quide-dé chi ndècu ndihî-dé Yá Ndiöxí chíndèe ñaha-gá.

<sup>9</sup> Te ní xíndecu cue téé ní xóo cunu cuechi núu ñí<sup>n</sup> téé tàxi tnuní, te téé tàxi tnuní-á<sup>n</sup> ñá ní xóo dañá tnahí-dé quee-güedé núu chíú<sup>n</sup>-dê, te ní xinu-ná-güedé. Te sátá xíã<sup>n</sup>, te ní dácáá-güedé veñúhu-güedé, te veñúhu-á<sup>n</sup> sáhá<sup>n</sup> ñáyiu ñuú Cìrené, ñáyiu

ñuú Alejandriá, ñáyu ñuú Ciliciá, ndihi ñáyu distritú Asiá. Te nchaa ñáyu-án nĩ nàá ndihí-yu té Těvá. <sup>10</sup> Te ñá ní ñihí-yu tnúhu cáhá<sup>n</sup>-yu, chi ío váha ní sáá díquí-dě nàcuáa ní xáha<sup>n</sup>-dě xii-yu, chi Espiritú Yá Ndiöxí ní chindee ñàha-xi xii-dé. <sup>11</sup> Te ní cháhu-yu cue téé ní dácuanđehnde tnúhu ní cáhá<sup>n</sup> té Těvá núu-yu. Te ní xáha<sup>n</sup>-güedě sá càhá<sup>n</sup> cuèhé-dé cuendá ndii Moisés ndihi cuendá Yá Ndiöxí. <sup>12</sup> Te cuendá sá dúcá<sup>n</sup> nĩ dácuanđehnde-güedé núu ní sándáá iní-yu, te ní cudéé<sup>n</sup>-yu núú tě Těvá. Te ní cudéé<sup>n</sup> cue téé cùu sacuéhé, te tnáhá cue téé dácuaaha ñaha xii-yu nchaa tnúhu ní chídó tnùní ndii Moisés ní cudéé<sup>n</sup>-güedě. Te ní sáhá<sup>n</sup>-güedé ní tñi-güedé té Těvá ndécá ñàha-güedé cuáhá<sup>n</sup> núú quidé cue téé cùchiu<sup>n</sup> jundá, ndihi cue téé cùu sacuéhé. <sup>13</sup> Te ndècá-yu cue téé dácuanđehnde cuáhá<sup>n</sup> núú quidé-güedě jundá, te ní quesaha-ni tucu-güedé càhá<sup>n</sup> cuèhé-güedé, te xàha<sup>n</sup>-güedě:

—Tée-a mee-ni càhá<sup>n</sup> cuèhé-dé cuendá veñúhu sá ío cùnuu, veñúhu ní cuu íi, te càhá<sup>n</sup> cuèhé-dé cuendá nchaa sá ní chídó tnùní ndii Moisés. <sup>14</sup> Te ní tecú dóho-ndí cächí-dé sá Jèsús téé ñuú Nazàrét dangoyo-dé veñúhu càhnu sá ío cùnuu te vá dáña-gä-dé cada-ndí nàcuáa ní cachí ndii Moisés cada-ndí —cächí-güedé xàha<sup>n</sup>-güedě.

<sup>15</sup> Te nchaa cue téé ndècu jundá ní ndacoto váha-güedé núú tě Těvá. Te ní dáyèhé-xi núú-dě dàtná quidé-xi núú espíritú xínú cuèchi núú Yá Ndiöxí.

## 7

### *Té Těvá xàha<sup>n</sup>-dě sá ñà túu cuèchi-dé*

<sup>1</sup> Te ní xáha<sup>n</sup> dütú cùnùu-gá xii-dé:

—¿Ndáá tnúhu càhá<sup>n</sup>-güedé cuendá-n-ã?  
—cächí-dé xàha<sup>n</sup>-dě.

<sup>2</sup> Te té Těvá ní xáha<sup>n</sup>-dě xii-güedé:

—Nchòhó cue ñani tnáhà-í ndihi nchòhó cue téé cùu sacuéhé, cundedóho-ndo ñi<sup>n</sup> tnúhu na càhá<sup>n</sup>-í-a. Yá Ndiöxí ío cùnuu-gá, te ní cáhá<sup>n</sup> ndihi-gá ndii Àbrahám nació<sup>n</sup> Mesopotamiá cútnáhá vátá quihí<sup>n</sup>-gá ndii cundecu ndii ñuú Hàrán. <sup>3</sup> Te ní xáha<sup>n</sup>-gä xii ndii: “Daña-n nchàa ñani tnáhà-n, te daña-n ñuhu-n, te quihí<sup>n</sup>-n ñi<sup>n</sup> xichi núú dánèhé ñàhà-í cundecu-n”, duha ní xáha<sup>n</sup>

Yá Ndiöxí xii ndii Àbrahám. <sup>4</sup> Te sáta dúcá<sup>n</sup> nĩ xáha<sup>n</sup> Yá Ndiöxí xii ndii Àbrahám, te ní ndee ndii ñuú Càldeá, te cuáhá<sup>n</sup> ndii cundecu ndii ñuú Hàrán. Te sáta ní xihí tātá ndii, te ní xáha<sup>n</sup> Yá Ndiöxí quixi ndii cundecu ndii núu ndécú-ó vitna. <sup>5</sup> Te Yá Ndiöxí ñá túú ní sãñaha-gã ni lùha ñuhu cuu cuendá ndii núu nĩ xindecu ndii. Te ní xáha<sup>n</sup> ndáá Yá Ndiöxí xii ndii sá cuãñaha-gã ñuhu cuu cuendá ndii, te na cùu ndii, te ndóo ndihi nchaa ñani tnáhá ndii cacu túu ndéé cuéé-gá. Te duca<sup>n</sup> nĩ xáha<sup>n</sup>-gã cuèi vátá cündècu-gá ni ñi<sup>n</sup> déhe ndii. <sup>6</sup> Te ní xáha<sup>n</sup> tucu Yá Ndiöxí xii ndii Àbrahám sá díú-ni ñani tnáhá ndii quihí<sup>n</sup>-yu núú xicá cündecú-yu cúmi ciendú cuía, te vá dáña-yu queé-yu núú chíu<sup>n</sup>-yu, te ío dandòho ñaha-güedé núú cündècú-yu. Duha ní xáha<sup>n</sup> Yá Ndiöxí xii ndii, te ndáá duca<sup>n</sup> nĩ cuu. <sup>7</sup> Te ní xáha<sup>n</sup> tucu Yá Ndiöxí xii ndii Àbrahám: “Yúhú dandòho-í nchaa ñáyu na dandòho ñaha xii cue ñani tnáhà-n. Te dàvá-án te ndee cue ñani tnáhà-n núú cündècú-yu, te quixi-yu chiñuhu ñàhá-yu xii-í iha”, duha ní xáha<sup>n</sup> Yá Ndiöxí xii ndii Àbrahám, te ndáá duca<sup>n</sup> nĩ cuu. <sup>8</sup> Te Yá Ndiöxí ní quide ndáá-gá ndihi ndii Àbrahám, te ní xáha<sup>n</sup>-gä xii ndii sá cuãha-güedé seña ñi<sup>n</sup> nchaa landú téé cuendá cunáhá-yu nàcuáa ndùu sá ní quide ndáá-gá ndihi ndii Àbrahám. Núu xiã<sup>n</sup> núú ùná nduu sá ní cacu té Isàac déhe ndii Àbrahám, te ní sáha ndii seña ñi<sup>n</sup>-dé. Te diu-ni duca<sup>n</sup> nĩ quide tucu té Isàac déhe-dé té Jàcób, te diu-ni duca<sup>n</sup> nĩ quide té Jàcób, chi úxúú déhe-dé ní xindecu, te nchaa-güedé duca<sup>n</sup> nĩ quide-dé. Te ndi úxúú cue téé-án nĩ cuu-güedé ñani tnáhà-ó.

<sup>9</sup> Te ñi<sup>n</sup> déhe té Jàcób ní xínani-dě Chèé. Te ñá ní cùu váha iní cue ñani-dé núú-dě, núu ní díco ñàha-güedé ní quehe<sup>n</sup> ñaha cue téé cuáhá<sup>n</sup> nació<sup>n</sup> Egiptú, te Yá Ndiöxí ñá ní dàña ñaha-gá xii-dé cuíta nihnu-dé. <sup>10</sup> Te ní chindee ñàha-gá xii-dé ní cacu-dé cútnáhá ní ndoho vihi-dé. Te téé yìndaha Egiptú ío ní cudíí iní-dé té Chèé, te ní cutnùní iní-dé sá ío váha túha té Chèé, te duca<sup>n</sup> nĩ cutnùní iní-dé, chi Yá Ndiöxí ní chindee ñàha-gá xii té Chèé. Te ní xáha<sup>n</sup> tée yìndaha Egiptú xii té Chèé sá díú tě Chèé coo-dé gobiernú Egiptú, te taxi tnùní-dé nchaa ñáyu xinu

cuechi núú tēe yìndaha Egiptú-án.

11 "Te ní quíhu tnamá nihíi nàció<sup>n</sup> Ègiptú ndihí nàció<sup>n</sup> Cànaá, te ío ní ndohó-yu. Te nchaa ñaní tnáhá-ó nǐ xíndecu ndéé sanaha ñá ní xóo níhí-gǎ-yu sá cáxí-yu. 12 Te ní níhí tē Jácób tnúhu sá ío triú Ègiptú, núú ní tendaha-dē cue déhe-dé ní sáhá<sup>n</sup>-güedé ní ságuaa<sup>n</sup>-güedé triú-án, te dàvá-án nǐ sáhá<sup>n</sup> cue ñaní tnáhá-ó xito díhna nuu nàció<sup>n</sup> Ègiptú. 13 Te xito cùu uú cuáhá<sup>n</sup>-güedé, te ní xáha<sup>n</sup> tē Chèé sá ñaní-dé cúu-güedé. Te tēe yìndaha Egiptú ní cutnùní iní-dé sá díú-ní ñaní té Chèé cúu-güedé. 14-15 Te ní cana té Chèé tātá-dé té Jácób ndihí nchaa ñaní tnáhá-dé. Te cùu-xi datná únídico sáhú<sup>n</sup>-yu ndèca té Jácób cuáhá<sup>n</sup> nàció<sup>n</sup> Ègiptú núú ndécú tē Chèé, te xía<sup>n</sup> nǐ quexió-yu ní ngóo-yu. Te yàcá<sup>n</sup> ní xihí té Jácób ndihí nchaa déhe-dé cue ñaní tnáhá-ó. 16 Te sátá nǐ cuu titní cuía, te ní natava-güedé yiqui ndíi Jácób ndihí nchaa déhe ndíi nchido-güedé cuáhá<sup>n</sup> ñuú Sìquém. Te ndíi Àbrahám sa ní cuu titní-gá cuía sǎ nǐ nacuaa<sup>n</sup> ndíi ñuhu núú cuè déhe ndíi Hámór. Te xía<sup>n</sup> nchíi yaú ní nachindúxi-güedé yiqui-án.

17 "Te cútnáhá vátá nátava-gá-güedé yiqui cue ndíi, te sa ta tnáhá yatni cada Yá Ndiöxí nàcuáa ní xáha<sup>n</sup>-gǎ xii ndíi Àbrahám cada-gá sá cúu-xí ñáiyu isràél ndécú Ègiptú, te ta cǎyá víhí-yu cuáhá<sup>n</sup>. 18 Te dàvá-án chi ingá tēe yìndaha nàció<sup>n</sup> Ègiptú, te ñá túú-gǎ ní xíní-dé nása ní xóo cada ndíi Chèé. 19 Te tēe yìndaha Egiptú ñá ní quide ndáá-dé, chi ío ní dándóhó-dē ñaní tnáhá-ó nǐ xíndecu dàvá-án. Te ní táuchíú<sup>n</sup>-dē sá xócuíñí-yu dándóo-yu déhe yiqui<sup>n</sup> cuendá ndihí-güexi cuú. 20 Te dàvá-án nǐ cacu té Moisés, te ío ní cudíi iní ñáhá Yá Ndiöxí xii-dé. Te ní xíndecu ndihí ñaha ñaná-dē ndihí tātá-dē úní-ni yóo. 21 Te ndèca ñahá-yu cuáhá<sup>n</sup> ingá xichi, te yàcá<sup>n</sup> ní dándóo ñáhá-yu xii-dé, te ní naníhí ñáhá dēhe yoco tēe yìndaha Egiptú, te ní xito-xi-dé dàtná xító-xí ñí<sup>n</sup> déhe mee-xi nǐ xito-xi-dé ndéé ní sahnu-dé. 22 Te ní cutúha-dé nchaa sá xíní cue tēe ègiptú, te ío váha ní sáá díquí-dē tnúhu cáhá<sup>n</sup>-dé ndihí nchaa sá cádá-dē.

23 "Te cútnáhá ndécú-dē údico cuía-dē,

te ní cachí-dé sá quíhí<sup>n</sup>-dé cáhá<sup>n</sup> ndihí-dé cue ñaní tnáhá-dē ñáiyu isràél. 24 Te ní xíní-dé ní caniha ñí<sup>n</sup> tēe ègiptú xii ñí<sup>n</sup> tēe isràél, te ñá ní cùndee iní-dé cundehe-dē nùu ní sáhá<sup>n</sup>-dé ní chindee-dē tēe isràél, te ní sahani-dé tēe ègiptú, 25 chi ní cachí Yá Ndiöxí sá díú-dē dacăcu-dé ñaní tnáhá-dē ñáiyu isràél núú cuè tēe ègiptú. Te ní sani iní-dé sá cùtnùní iní-yu nàcuáa ní xáha<sup>n</sup> Yá Ndiöxí xii-dé, dico ñá túú ní cùtnuní iní-yu. 26 Te nduu tnéé ní xíní-dé nàá úú cue tēe isràél, te ñá túú ní tnáhá iní-dé nàá-güedé nùu ní xáha<sup>n</sup>-dē xii-güedé: "¿Ná cuendá duca<sup>n</sup> xínáá-ndó? ¿Ná ñá díú ndimee-ndo núu duca<sup>n</sup> xínáá-ndó?" Duha ní xáha<sup>n</sup> tē Moisés xii-güedé. 27 Te tēe ndècuéchi ní sáhá<sup>n</sup>-dé ní chindaha nihnu-dé té Moisés ñí<sup>n</sup> xio, te ní xáha<sup>n</sup>-dē: "¿Ná cúu yòhó nùu véxi-n tàxi tnuní ñáhá-n? 28 Te tnáhá-ni tucu yúhú cahni-n dàtná ní sahani-n tēe ègiptú icu càha<sup>n</sup>-n á", duha ní xáha<sup>n</sup>-dē xii té Moisés. 29 Te sá dúcá<sup>n</sup> nǐ cáhá<sup>n</sup> tēe isràél nùu ní yúhú té Moisés ní xinu-dé cuáhá<sup>n</sup>-dé ní sáá-dé nàció<sup>n</sup> Medián. Yàcá<sup>n</sup> ní ngóo-dé, te yàcá<sup>n</sup> ní tnándaha-dé, te ní cacu úú déhe tēe-dé.

30 "Te sátá nǐ xínu údico cuía, te ní sáhá<sup>n</sup> té Moisés ñí<sup>n</sup> xio yucu Sinái. Te yàcá<sup>n</sup> ní xíní-dé ñí<sup>n</sup> tnutáú nchícú<sup>n</sup> ñuhú, te xití itá ñuhú-án nǐ xíní-dé yíhí ñí<sup>n</sup> espíritú xínú cuèchi núú Yá Ndiöxí. 31 Te òré ní xíní-dé sá yíhí-xí xití itá ñuhú-án, te ní cuñúhu vñhi-dé sá nǐ xíní-dé espíritú-án xití itá ñuhú-án, te ní sándehe-gá-dé, te ní xíndéhe vñha-dé. Te ní tecú dóho-dé ní cáhá<sup>n</sup> Yá Ndiöxí, te xáha<sup>n</sup>-gǎ xii-dé: 32 "Yúhú cúu-í Ndiöxí ní cáhá<sup>n</sup> ndihí cue ñaní tnáhá-n ndéé sanaha, ndíi Àbrahám ndihí ndíi Isàac ndihí ndíi Jácób, ndihí dava-gá cue ñaní tnáhá-n. Nchaa cue ndíi-án nǐ xóo cáhá<sup>n</sup> ndihí-í." Duha ní xáha<sup>n</sup>-gǎ xii té Moisés. Te ní quidi ñaha-xi xii té Moisés sá nǐ yúhú-dé, te ñá ní cùyíi-gá-dé cundehe-dē tnutáú nchícú<sup>n</sup> ñuhú-án. 33 Te Yá Ndiöxí ní xáha<sup>n</sup>-gǎ xii-dé: "Queñuhu chàu-n, chi núú ñuhú nǐ cuu íi nùtníi-n. 34 Te yúhú ndéhè-í sá ío ndòho nchaa ñáiyu cùu cuendá-í, ñáiyu ndècu nàció<sup>n</sup> Ègiptú. Te ní tecú dóho-í sá ío ndàhú xícáhá<sup>n</sup>-yu, núu xía<sup>n</sup> véxi-í càhí tnúhu-í sá nùhú-n nàció<sup>n</sup> Ègiptú cuendá ndeñuhú-n-yu yàcá<sup>n</sup>." Duha ní xáha<sup>n</sup> Yá Ndiöxí xii té Moisés.



35 "Te ñá ní sàndáá iní-yu té Moisés ndéé díhna, chi ní xáhã<sup>n</sup>-yu: "¿Ná cuendá véxi-n tàxi tnuní ñáhá-n xii-ndí?" Duha ní xáhã<sup>n</sup>-yu xii té Moisés. Te ñu-ni té Moisés ní tendaha ñaha Yá Ndiöxí ní sáhá<sup>n</sup>-dé dacãcu-dé ñáyi israhél nació<sup>n</sup> Ègiptú cuèi ñá ní sàndáá iní ñáhã<sup>n</sup>-yu xii-dé. Dico ní taxi tnuní-dé-yu, chi duca<sup>n</sup> ñí xáha<sup>n</sup>-gã òré ní xiní-dé espíritú xínú cuèchi núú-gã xití tnutàù nchìcú<sup>n</sup> ñuhú. 36 Te té Moisés ní ngúíta-dé ní quide-dé sá vã yõo tnàhí ndàcu cada, te ní cuñúhu vñhí-yu sá dúcá<sup>n</sup> ñí quide-dé, te duca<sup>n</sup> ñí quide-dé Ègiptú ndihí Lámár Tícuèhé. Te ní ngódó núú-dé núú-yu ní queé-yu Ègiptú cuáhá<sup>n</sup>-yu ñí ichi xití yucu núú vã yõo tnàhí ndècu, te ní xihí-yu údico cuíá xití yucu-á<sup>n</sup>, te xiá<sup>n</sup> ñí xóo cada-dé sá vã yõo tnàhí ndàcu cada. 37 Te ñu-ni té Moisés ní xáha<sup>n</sup>-dè xii cue ñaní tnáhá-dé dàvá-á<sup>n</sup>: "Yá Ndiöxí cada-gá te coo ñí ñaní tnáhá-ndó ndéé cuèé-gá, te téé-á<sup>n</sup> cãhá<sup>n</sup>-dé tnúhu-gá núú-ndó dàtná cuiní-ndó ñí cachí-gá quidé yùhú, te ío xini ñuhu-xi cundedóho-ndo tnúhu cãhá<sup>n</sup>-dé", duha ní xáha<sup>n</sup> tẽ Moisés xii-yu dàvá-á<sup>n</sup>. 38 Te ñu-ni té Moisés ní xindecu ndihí-dé ñáyi israhél xití yucu, te ní sáá-dé yucu Sinái, te xiá<sup>n</sup> ñí quixi ñí espíritú xínú cuèchi núú Yá Ndiöxí ní cãhá<sup>n</sup> ndihí ñaha-xi xii-dé, te yacá<sup>n</sup> ní dácúhá<sup>n</sup> ñaha-xi tnúhu-gá, te ñu-ni tnúhu-á<sup>n</sup> ñí ndóo dàcuaha-o.

39 "Te cue ñaní tnáhá-ó ñí xindecu ndéé sanaha ñá ní sàndáá iní-yu té Moisés, te ñá ní ndéé iní ñáhã<sup>n</sup>-yu xii-dé, chi ní cuiní-yu nuhú tucú-yu ñuú Ègiptú cundecú-yu. 40 Te òré ndécú tẽ Moisés yucu ní xáhã<sup>n</sup>-yu xii ñaní-dé té Àrón: "Cadúha-n ñí úú ndiöxí díhú<sup>n</sup> cuáá<sup>n</sup> codonùu núú-ó cùhu<sup>n</sup>-o ichi, chi ñá túú cùtnuní iní-ó ndèé ichi cuáhá<sup>n</sup> té Moisés, téé yòdo nuu núú-ó ndùu ní quee-o Ègiptú", duha ní xii-yu té Àrón. 41 Te dàvá-á<sup>n</sup> ñí cadúha-güedé ñí chëhlu mee-ni díhú<sup>n</sup> cuáá<sup>n</sup>, te ní sahani-güedé ñí úú quití nchìto ní quide càhnu-güedé chëhlu-á<sup>n</sup>. Te ío ní cudíí iní-yu quití-á<sup>n</sup>, chi ní cachí-yu sá díú-ní ndiöxí cúú-dí. 42 Te sá dúcá<sup>n</sup> ñí quidé-yu, xiá<sup>n</sup> ní dáñá ñaha Yá Ndiöxí xii-yu. Te ní dáñá-gã ní xóo cada càhnú-yu nchícanchii, ndihí yóó, ndihí nchaa chódíní. Te duha ní chídó tnuní ñí téé ní xóo cãhá<sup>n</sup> tnúhu Yá

Ndiöxí ndéé sanaha nàcuáa ní xáha<sup>n</sup>-gã xii ñáyi dàvá-á<sup>n</sup>:

Nchòhó ñáyi israhél, ní cuu údico cuíá yíhí-ndó yùcu,

te ní sahani-ndo quití-ndo ní quide càhnu ñaha-ndo xii-í cãhá<sup>n</sup>-ndó, dico ñáhá chi ní sahani-ndo-güedé ní quide càhnu-ndo sá ñí cadúha mee-ndo.

43 Te ní cadúha-ndo ñí veñúhu líhli,

te ní sanutñí-ndo Mòlóc sá càchí-ndó cùu ndiöxí-ndó xica nchido-ndo xití yucu,

te ní cadúha-ndo ñí chódíní, te quití-á<sup>n</sup> càchí-ndó sã cúú-dí ndiöxí Rènfán, te ndi ndúú sá ñí cadúha-ndo-á<sup>n</sup> ñí quide càhnu-ndo.

Te cuendá sá dúcá<sup>n</sup> ñí quide-ndo te yúhú queñuhu ñaha-í xii-ndo quíhí<sup>n</sup>-ndó cundecu-ndo ingá xio nació<sup>n</sup> Babiloniá.

Duha ní xáha<sup>n</sup> Yá Ndiöxí xii-yu, te duca<sup>n</sup> ñí chídó tnuní téé ní xóo cãhá<sup>n</sup> tnúhu-gá.

44 "Te xití yucu-á<sup>n</sup> ñí dácáá-güedé ñí veñúhu vehe dóó. Te vehe-á<sup>n</sup> ñí cuu-xi ñí sá cùtnuní iní-yu sá Yá Ndiöxí ndécú ndihí ñaha-gá xii-yu. Te vehe-á<sup>n</sup> ñí dácáá-güedé nàcuáa ní xáha<sup>n</sup> Yá Ndiöxí xii té Moisés, chi ní dánèhé ñáhá-gã xii-dé nàcuáa dacàa-güedé. 45 Te sátá ñí xihí nchaa cue téé-á<sup>n</sup>, te ní ndóo ndihí nchaa déhe-güedé veñúhu-á<sup>n</sup>. Te ní xido tucu-güedé veñúhu-güedé cuáhá<sup>n</sup>-güedé, te cuáhá<sup>n</sup> ndihí-güedé té Jòsué núú cündécú-yu. Te sátá ñí quexió-yu, te ní dácúnú-yu ñáyi dii ñuú-xi-á<sup>n</sup> chi mee Yá Ndiöxí ní chindee ñaha-gá xii-yu. Te sátá ñí ndihí nchaa ñáyi ní xica nchido veñúhu dóó-á<sup>n</sup> ñí xihí, te ní ndóo ndihí dava-gá-yu. Te duca<sup>n</sup>-ni ndècu-xi ní cacu té Dàvíí, téé ní xindaha ñaha xii-yu. 46 Te Yá Ndiöxí ní cudíí víhí iní-gá té Dàvíí. Te ní xicá<sup>n</sup> tnúhú-dé núú-gã ñuú cuu dacàa-dé veñúhu cuu cuendá-gá, chi ñí Yá Ndiöxí ní xóo cada càhnu té Dàvíí ndihí té Jàcób, ñaní tnáhá-ó ñí xindecu ndéé sanaha vñhí-gá. 47 Te Yá Ndiöxí ñá ní dàña-gá dacàa té Dàvíí veñúhu-gá dico déhe-dé té Salómón, chi ní dáñá-gã ní dácáá-dé veñúhu cuu cuendá-gá 48 cuèi ñá túú sàcúndecu-gá veñúhu dàcaa cue té ñuyú-a, chi ndèni xiá<sup>n</sup> ndécú-gã chi



espíritú cúu-gă. Te duha ní chídó tnùní tée ní xóo cáhá<sup>n</sup> tnúhu Yá Ndiöxí ndéé sanaha nàcuáa ní cáhá<sup>n</sup>-gá:

<sup>49</sup> Yúhú táxí tnùní-í andiu ndìhi ñuyíú, te xiă<sup>n</sup> nũu nchòhó vá ndácú-ndó chìhi ñaha-ndo xití veñúhu dàtná quidě-yu sá cächí-yu cùu ndióxí-yu ní cadúha-yu.

Te ñá túú xini ñuhu-í núu ndétátú-í, <sup>50</sup> chi yúhú ní cadúha-í nchaa sá ío ñuyíú-a. Duha ní cáhá<sup>n</sup> Yá Ndiöxí, te ñu-ni duca<sup>n</sup> ñí chídó tnùní tée ní xóo cáhá<sup>n</sup> tnúhu-gá — duha ndũu nchaa tnúhu ní xáha<sup>n</sup> tē Těvá xii-güedé.

<sup>51</sup> Te ní xáha<sup>n</sup> tùcu-dé:

—Nchòhó, ío sáa iní-ndó chi quide-ndo datná quidé ñáyiú ñá túú cùu ñáyiú is-ràel chi ñá túú tédòho-ndo tnũhu càhá<sup>n</sup> Yá Ndiöxí, chi ñá cuiní-ndó quindáa iní-ndó tnũhu-gá, mee-ni cùu úhú iní-ndó Espíritú-gá dàtná ní xóo cada cue ñaní tnáhá-ndó ñí xindecu ndéé sanaha. <sup>52</sup> Chi cue tée-á<sup>n</sup> ío ní xóo dandòho-güedé nchaa cue tée ní xóo cáhá<sup>n</sup> tnúhu Yá Ndiöxí ndéé sanaha. Te ní sahani-güedé nchaa cue tée ní cáhá<sup>n</sup> sá quixí Cristú ñuyíú-a, te Yaá-á<sup>n</sup> ñá túú cuèchi-gá. Te ñu-ni duca<sup>n</sup> ñí quide-ndo Cristú cùtnáhá ní quixi-gá ñuyíú-a, chi ní sáha cuendá-ndó-gă núu cuè tée ní cuu úhú iní ñáhá xii-gá ní sahani ñaha-güedé. <sup>53</sup> Te ndècu ndìhi-ndo tnúhu ní chídó tnùní ndíi Moisés nàcuáa ní xáha<sup>n</sup> espíritú xínú cuèchi núu Yá Ndiöxí xii ndíi, te ñí dùca<sup>n</sup> ñá túú sàndáa iní-ndó tnũhu-á<sup>n</sup> nũu ní sahani-ndo Jèsús. Te ñu-ni tnúhu-á<sup>n</sup> ndécú ndìhi-ndo ndéé vitna —cächí tē Těvá xáha<sup>n</sup>-dē xii-güedé.

*Ní sahani-güedé tē Těvá*

<sup>54</sup> Te sá dúcá<sup>n</sup> ñí xáha<sup>n</sup> tē Těvá xii-güedé, te ní cudéé<sup>n</sup> víhí-güedé núu-dē, núu ní quide rúhñú-güedé núhu-güedé sá sätú iní-güedé. <sup>55</sup> Te tē Těvá ndécú ndìhi-dé Espíritú Yá Ndiöxí, te ní ndacoto váha-dé andiu, te ní xiní-dé súúní dàtása<sup>n</sup>-xi núu ndécú Yá Ndiöxí, te ní xiní-dé Xítóhó Jesucristú nútníi-gá xio cùha Yá Ndiöxí. <sup>56</sup> Te ní xáha<sup>n</sup> tē Těvá xii-güedé:

—Chí cundèhe andiu chi yúhú ndéhè-í Xítóhó Jesucristú nútníi-gá xio cùha Yá Ndiöxí, te ñu-gá cúu-gă ñaní tnáhá-ndó nchaa-ndo —cachí-dé xáha<sup>n</sup>-dē.

<sup>57</sup> Te ní sadí-güedé dóho-güedé cuendá sá ñá ní tnáhá iní-güedé cundedòho-güedé tnúhu càhá<sup>n</sup>-dē, te uu<sup>n</sup> ní cuáa-güedé, te ní taxi ndaha ñaha-güedé xii-dé <sup>58</sup> ndécá ñaha-güedé cuáhá<sup>n</sup> ndéé ñí xio yuhu ñuú, te yácá<sup>n</sup> ní sáñaha-güedé yúu xii-dé. Te ndècu ñí tée cuechi nani-dé Sàulú, te tée-á<sup>n</sup> ñí quide cuendá-dé dóo-güedé cuendá ní nune ndaha-güedé ní sáñaha-güedé yúu xii tē Těvá. <sup>59</sup> Te òré sáñaha-güedé yúu, te ní cáhá<sup>n</sup> ndìhi-dé Xítóhó Jesucristú te xáha<sup>n</sup>-dē:

—Yòhó Xítóhó Jesucristú, naquehe<sup>n</sup>-n iní-í —cächí-dé xáha<sup>n</sup>-dē xii-gá.

<sup>60</sup> Te ní ngüñí xití-dē, te níhi ní cáhá<sup>n</sup>-dē, te xáha<sup>n</sup>-dē:

—Yòhó Xítóhó Jesucristú, vá técuèchi-n cuè tée-a sá dúhá quide ñaha-güedé xii-í —cächí-dé xáha<sup>n</sup>-dē xii-gá.

Te xiă<sup>n</sup>-nă ní cáhá<sup>n</sup>-dē, te ní xihí-dé.

## 8

*Tē Sàulú chíhí-dē ñáyiú sàndáa iní-xi tnúhu Jèsús vecaá*

<sup>1</sup> Te tē Sàulú ní nduu vétú iní-dé sá ñí sahani-güedé tē Těvá.

Te ñu-ni nduu-á<sup>n</sup> ñí cuu níhi cuendá nchaa ñáyiú sàndáa iní-xi tnúhu Jèsús ñuú Jerusálén. Te ní ndìhi-yu ní xité nuu cuáhá<sup>n</sup>-yu distritú Jùdeá ndìhi distritú Sàmariá. Te cue tée ní táuchíú<sup>n</sup> Jèsús dácua<sup>n</sup> ñaha xii-yu tnúhu-gá ní ndóo-güedé ñuú Jerusálén. <sup>2</sup> Te nchaa cue tée càhá<sup>n</sup> ndìhi Yá Ndiöxí ní chindúxi-güedé ndíi Těvá. Te ío ní ndáhyú ñáyiú ní sàndáa iní tnúhu Jèsús sá ñí xihí ndíi. <sup>3</sup> Te tē Sàulú ío dandòho-dé-yu, chi ndi vehe ndi vehe cuáhá<sup>n</sup>-dē cuátníi-dé cuèi tée cuèi ñadíhí ndécá-dē cuáhá<sup>n</sup> vecaá.

*Càhá<sup>n</sup>-yu tnúhu Yá Ndiöxí distritú Sàmariá*

<sup>4</sup> Te nchaa ñáyiú ní xité nuu cuáhá<sup>n</sup>-yu càhá<sup>n</sup>-yu tnúhu Jèsús nchaa núu quexió-yu.

<sup>5</sup> Te tē Lìpé cuáhá<sup>n</sup>-dē distritú Sàmariá càhá<sup>n</sup>-dē tnúhu Xítóhó Jesucristú Yaá ní tendaha Yá Ndiöxí ní quixi ñuyíú-a. <sup>6</sup> Te ío vài núu sã vã yòo tnáhí ndàcu cada ní quide-dé, te ní cuñúhu víhí-yu, te ní xindedòho váha-yu nchaa tnúhu ní cáhá<sup>n</sup>-dē.

<sup>7</sup> Te vài ñáyiú yíhi ñaha espíritú cundìhi yucu ñávaha ní queñuhu-dé nchaa espíritú-á<sup>n</sup> yiqui cùñú-yu, te ní cana saa-xi òré ní

ndee-xi yiqui cùñú-yu cuáhá<sup>n</sup>-xi, te ní ndúha-yu. Te vai ñáyiú cùhú ñá cúú-gã candá nihnú-yu ndihí ñáyiú yacua ní quide tátna-dé, te ní ndúha-yu. <sup>8</sup> Te sá dúcá<sup>n</sup> ñí cáhá<sup>n</sup>-dé tnúhu Jèsús te ní quide tátna-dé-yu, xiá<sup>n</sup> ío ní cudíí ñí ñáyiú ñuú-á<sup>n</sup>.

<sup>9</sup> Te ñuú-á<sup>n</sup> ndécú ñí tée nàni Xímú, te tée-á<sup>n</sup> xiní-dé cada ndúu-dé, te ní cuu naha dùca<sup>n</sup> quide-dé, te ní xóo cuñúhu ñáyiú distritú Sàmariá sá dúcá<sup>n</sup> quide-dé, te ní cachí-dé sá díú-ní-dě cúnú. <sup>10</sup> Te nchaa ñáyiú cuéi ñáyiú cuica te cuéi ñáyiú ndàhú ío nèhé-yu sá yíñúhu núú-dě, te xitnàhá-yu:

—Tée-á<sup>n</sup> ío chindee ñaha Yá Ndiöxí xii-dé núu vai núú sá quide-dě —cachí-yu xitnàhá-yu.

<sup>11</sup> Te ní sándáá iní-yu nàcuáa ní xóo cada ndúu-dé, te ní xóo cuñúhu vñí-yu, te ní cuu naha dùca<sup>n</sup>-ni dandahú ñáhá-dě xii-yu. <sup>12</sup> Te té Lìpé ní cáhá<sup>n</sup>-dé tnúhu Xítóhó Jesucristú, te ní xáha<sup>n</sup>-dě xii-yu sá Yá Ndiöxí cuini-gá ndíhu ndaha ñaha-gá xii-yu. Te cuéi tée cuéi ñadihí ní sándáá iní-yu tnúhu-gá, te ní sanduté-yu. <sup>13</sup> Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núú sá vñí yóo tnàhí ndàcu cada ní quide té Lìpé, te ní cuñúhu vñí nchaa ñáyiú.

<sup>14</sup> Te dava-gá cue tée ní táuchíú<sup>n</sup> Jèsús dacuàha ñaha xii ñáyiú tnúhu-gá ní níhí-güedě tnúhu sá ñáyiú distritú Sàmariá ní sándáá iní-yu tnúhu Yá Ndiöxí. Te ní tendaha-güedě té Pèlú ndihí té Juáa cuáhá<sup>n</sup>-güedé distritú Sàmariá. <sup>15</sup> Te ní quexìo-güedé, te ní cáhá<sup>n</sup> ndihí-güedé Yá Ndiöxí ní xicá<sup>n</sup>-güedé Espiritú-gá quixi cundecu ndihí-yu. <sup>16</sup> Chi ní ñí-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. <sup>17</sup> Te òré ní sacá<sup>n</sup> ndodo-güedé ndaha-güedé díqui-yu, te ní quexìo Espiritú-gá ní ngúndecu ndihí-yu.

<sup>18</sup> Te ní xiní té Xímú nàcuáa ní quide-güedé ní quexìo Espiritú-gá ní ngúndecu ndihí-yu, te cuini-dé cuáñaha-dě díhú<sup>n</sup> xii té Pèlú ndihí té Juáa ní cùu. <sup>19</sup> Te ní xáha<sup>n</sup>-dě:

—Chindee ñaha-ndo cuendá nděda-ni càa-yu cacá<sup>n</sup> ndodo-í ndaha-í díqui-yu, te níhí-yu Espiritú Yá Ndiöxí cundecu ndihí-yu —cachí-dé xáha<sup>n</sup>-dě xii-güedé.

<sup>20</sup> Te té Pèlú ní xáha<sup>n</sup>-dě xii-dé:

—Yòhó cuíta nihnu-n ndihí díhú<sup>n</sup>-n, chi cuini-n cuáa<sup>n</sup>-n sá vñaha quide Yá Ndiöxí.

<sup>21</sup> Yòhó vá cúú càda-n chiu<sup>n</sup> quide-ndí, chi ñá túú ndècu váha iní-n núú Yá Ndiöxí.

<sup>22</sup> Te vá dúcá<sup>n</sup> cáhá<sup>n</sup>-n, chi ío nèhé cáhá<sup>n</sup>-n sá dúcá<sup>n</sup> cáhá<sup>n</sup>-n. Te cáhá<sup>n</sup> ndàhú-n núú Yá Ndiöxí sá ná cádá càhnu iní-gá tnúhu ní cáhá<sup>n</sup>-n. <sup>23</sup> Te yúhú sa xiní-í sá ío úhú iní-n, chi mee-ni sá cuèhé sá dúhá chido nuu-n quide-n —cachí té Pèlú xáha<sup>n</sup>-dě xii té Xímú.

<sup>24</sup> Te ní xáha<sup>n</sup> tē Xímú xii-güedé:

—Cáhá<sup>n</sup> ndàhú-ndó núú Yá Ndiöxí sá ñá túú ná tnàhá-í sá dúcá<sup>n</sup> ñí cáhá<sup>n</sup>-í —cachí-dé xáha<sup>n</sup>-dě.

<sup>25</sup> Te té Pèlú ndihí té Juáa ní cáhá<sup>n</sup>-güedé tnúhu Yá Ndiöxí núú ñáyiú ñuú-á<sup>n</sup>. Te ní xáha<sup>n</sup>-güedé nchaa nàcuáa ní quide Jèsús ní xiní-güedé òré ní xica cuu-gá ñuyúú-a. Te ní tñi-güedé ichi cuánuhú-güedé ñuú Jerusàlén, te ní yáha-güedé titní ñuú yíndèhu distritú Sàmariá, te ní cáhá<sup>n</sup>-güedé tnúhu-gá.

### *Té Lìpé ndihí ñí tée ñuú Etiòpiá*

<sup>26</sup> Te ñí espíritú xinú cuèchi núú Yá Ndiöxí ní quexìo-xi ñuú Jerusàlén ní xáha<sup>n</sup>-xi xii té Lìpé:

—Cada túha-n chi quée nuu-n ñuú Gázá, dico mee-ni xití yucu cuáhá<sup>n</sup> ichi —cachí-xi xáha<sup>n</sup>-xi xii-dé.

<sup>27</sup> Te ní xica-dé cuáhá<sup>n</sup>-dé, te ní natnahá-dé ñí tée nació<sup>n</sup> Etiòpiá ñúhú-dě ichi. Te cùu-dé tesorèrú xinú cuèchi-dé núú ñí ñadihí ñaha yíndaha nació<sup>n</sup> Etiòpiá, te ñaha-á<sup>n</sup> nání-á<sup>n</sup> Cándacé. <sup>28</sup> Te tée etiòpiá-á<sup>n</sup> ní sáhá<sup>n</sup>-dé ñuú Jerusàlén ní cáhá<sup>n</sup> ndihí-dé Yá Ndiöxí, te ñúhu-dé ichi cuánuhú-dé ñuú-dé ñúhú-dě carretà, te dàcuaha-dé tnúhu ní chídó tnùní ndí Chaiá tée ní xóo cáhá<sup>n</sup> tnúhu Yá Ndiöxí ndéé sanaha. <sup>29</sup> Te ní xáha<sup>n</sup> Espiritú Yá Ndiöxí xii té Lìpé:

—Quíhí<sup>n</sup> tuha-n càrretá-á<sup>n</sup> —cachí Espiritú-gá xáha<sup>n</sup>-xi xii-dé.

<sup>30</sup> Te té Lìpé ní sátuha-dé carretà-á<sup>n</sup>, te ní tecú dóho-dé nàcuáa cáhá<sup>n</sup> tée etiòpiá-á<sup>n</sup>, tée ñúhu carretà-á<sup>n</sup> dácua<sup>n</sup>-dè nàcuáa ní chídó

tnùní ndíi Chàiaá. Te ní xáha<sup>n</sup> tē Lìpé xii tée etiòpiá-án:

—¿Tècú tnùní-n nchàa tnúhu dàcuaha-n-án?  
—càchí tē Lìpé xáha<sup>n</sup>-dē xii-dé.

<sup>31</sup> Te ní xáha<sup>n</sup> tē etiòpiá:

—¿Nása tecú tnùní-í te vá yõ dānehé ñáhá xii-í? Ta quène iha coo-n chi danèhé ñáhá-n  
—càchí-dé xáha<sup>n</sup>-dē xii tē Lìpé.

Te cuásaá tē Lìpé núu carrètá ní ngóo-dé.

<sup>32</sup> Te ndèdóho-dé nācuáa dàcuaha tée etiòpiá-án nācuáa ní chídó tnùní ndíi Chàiaá núu tütú Yá Ndiõxí núu càchí-xi:

Dàtná quidé ñ<sup>n</sup> mbéé cada-dé òré can-deca ñaha-güedē xii-dé quíhí<sup>n</sup> cahni ñaha-güedē chi ñá túú ná cada-dé,  
dàtná cuíní-ndó quide mbéé òré dètē-di ñá túú ndàhí-di duca<sup>n</sup> càda-dé òré cahni ñaha-güedē chi ni vá càhá<sup>n</sup>-dē.

<sup>33</sup> Te mee-ni cùdiquí ndéé ñáhá-güedē xii-dé, te ní vá ndúcu tnúhu-güedē núu-dē núu ndáá ndècuéchi-dé.

Te ío cuu nduu cuihna iní cue ñaní tñáhá-dē, chi cahni ñaha-güedē xii-dé ñuyíú-a.

Duha càhá<sup>n</sup> tutú ní dácuáhá tē etiòpiá ní xíndedóho tē Lìpé.

<sup>34</sup> Te ní xáha<sup>n</sup> tùcu tée Etiòpiá xii tē Lìpé:

—Cundee iní-n càchí tnúhu-n yòo cuncenehe tée ní càhá<sup>n</sup> tnúhu Yá Ndiõxí ndéé sanaha, núu càhá<sup>n</sup>-dē cuendá méé-dē àdi cahá<sup>n</sup>-dē cuendá ingá ñáyiu —càchí tée etiòpiá-án xáha<sup>n</sup>-dē xii tē Lìpé.

<sup>35</sup> Te tē Lìpé ní cani-dé cuendú núu tē etiòpiá nācuáa ní càhá<sup>n</sup> ndíi Chàiaá nācuáa cada Jèsús òré quixi-gá ñuyíú-a. Te ní xáha<sup>n</sup>-dē nācuáa nduu tnúhu Jèsús ndíhi nācuáa ní quide-gá. <sup>36</sup> Te ñuhu-güedē ichi cuáhá<sup>n</sup>-güedē ní naníhí-güedē ñ<sup>n</sup> xichi núu ñuhú ndüte, te ní xáha<sup>n</sup> tē etiòpiá:

—Iha ñuhu ndute, ¿te vá cúu cuàndute-í iha-án? —càchí-dé xáha<sup>n</sup>-dē xii tē Lìpé.

<sup>37</sup> Te xáha<sup>n</sup> tē Lìpé:

—Te núu sàndáá ndisa iní-n Jèsús, te cuu cuandute-n —càchí-dé xáha<sup>n</sup>-dē.

Te ní xáha<sup>n</sup> tē etiòpiá:

—Sàndáá ndisa iní-í sá Dēhe Yá Ndiõxí cúu Xítohó Jesucrístú —càchí-dé xáha<sup>n</sup>-dē.

<sup>38</sup> Te ní ngani-dé carrètá, te ní nuu-güedē ndi ndúu-güedē, te cuánguee-güedē xití ndute, te ní dácuándüte ñaha tē Lìpé xii-dé.

<sup>39</sup> Te òré ní nene-güedē xití ndute, te ndéca

ñaha Espíritú Yá Ndiõxí xii tē Lìpé cuáhá<sup>n</sup>. Te ñá túú ní xini tée ní sandute-án ndéé ichi cuáhá<sup>n</sup> tē Lìpé. Te ío ní cudíi iní-dé sá ñí natuha-dé ichi Yá Ndiõxí, te cuándaa-dé núu carrètá-dé cuánuhú-dé. <sup>40</sup> Te ní quexio tē Lìpé ñuu Azotó, te ndi tnahá ñuu ndi tnahá ñuu cuáhá<sup>n</sup>-dē càhá<sup>n</sup>-dē tnúhu Yá Ndiõxí, te ní yáha-dé cuáhá<sup>n</sup>-dē ní quexio-dé ndéé ñuu Cèsareá.

## 9

### *Té Sàulú ní tuha-dé ichi Xítohó Jesucrístú (Hch. 22:6-16; 26:12-18)*

<sup>1</sup> Te tē Sàulú mee-ni càhá<sup>n</sup> cuèhé-dé cuendá ñáyiu ní sàndáá iní tnúhu Jèsús, te cuíní-dé cahni ñaha-dē xii-yu. Te ní sáhá<sup>n</sup>-dē núu dùtú cúnùu-gá, <sup>2</sup> te ní xáha<sup>n</sup>-dē sá cādūha dùtú-án ñ<sup>n</sup> tutú canehe-dé quíhí<sup>n</sup> cuáha-dé cue tée xindeé nchito veñúhu ñuu Dàmascú, chi cuíní-dé tñii-dé nchaa ñáyiu dàcuaha tnúhu Xítohó Jesucrístú candeca ñaha-dē quíhí<sup>n</sup> ñuu Jerusálén. <sup>3</sup> Te ní xica-dé cuáhá<sup>n</sup>-dē tá cùyatni-dé ñuu Dàmascú, te uu<sup>n</sup>ni ní quee ñuhú andiu, te ní dáyèhé-xi ndéé núu nùtnñ-dé. <sup>4</sup> Te ní nduá-dé ndéé ñuhu, te ní tecú dóho-dé càhá<sup>n</sup> ñ<sup>n</sup> sá càhá<sup>n</sup> núu ñinu, te xáha<sup>n</sup>-xi xii-dé:

—Yòhó Sàulú, ¿ná cuendá cúu ùhú iní ñáhá-n xii-í te dāndoho ñaha-n? —càchí sá càhá<sup>n</sup>-án xáha<sup>n</sup>-xi xii-dé.

<sup>5</sup> Te ní xáha<sup>n</sup>-dē:

—¿Ná cúu yòhó sá càhá<sup>n</sup>-án-í? —càchí-dé xáha<sup>n</sup>-dē.

Te ní xáha<sup>n</sup> sá càhá<sup>n</sup> xii-dé:

—Yúhú cúu-í Jèsús tée cùu úhú iní-n. Te ío dāndoho-n mee-n, chi dàtná quidé ndicutu quide-n, chi quiti-án núu na cùxi-güedē-di puyá te sáha-di patadá núu-xi, te quide úhú-di mee-di. Te duca<sup>n</sup> sātñahá-xi cùu yohó chi ñá túú sàndáá iní ñáhá-n xii-í —càchí sá càhá<sup>n</sup>-án xáha<sup>n</sup>-xi xii-dé.

<sup>6</sup> Te tē Sàulú ní quidi ñaha-xi xii-dé sá ñí yùhú-dé, te ní xáha<sup>n</sup>-dē:

—Xítohó Jesucrístú, ¿te ná cuíní-n càda-í-í? —càchí-dé xáha<sup>n</sup>-dē.

Te Jèsús ní xáha<sup>n</sup>-gá xii-dé:

—Ndacóo, te quíhí<sup>n</sup>-n ñuu-án, te yacá<sup>n</sup> tecú tnúhu-n ná cúu sá càdá-n —càchí-gá xáha<sup>n</sup>-gá xii-dé.

<sup>7</sup> Te cue tē cuáhá<sup>n</sup> ndíhi tē Sàulú ní tecú dóho-güedē càhá<sup>n</sup> ñ<sup>n</sup> sá càhá<sup>n</sup>, dico vá yòo

tnàhí ni xìní-güedé, te ní yùhú vîhí-güedě, te ñá túú tnàhí ni cãhá<sup>n</sup>-güedé. <sup>8</sup> Te ní ndacóo té Sàulú, te ñá ní cùu-gá cundehe-dě, chi ní cuaa-dé, te ní tñi-güedé ndaha-dé ndécá ñaha-güedé cuáhá<sup>n</sup> ñuú Dàmascú. <sup>9</sup> Te yàcá<sup>n</sup> ní xíndecu-dé úní nduu, te ñá ní cùu tnahí cundehe-dě, te ñá túú nã ní xèxi-dé, te ñá túú ní xîhi-dé ndute.

<sup>10</sup> Te ndècu té sàndáá iní tnúhu Jèsús ñuú Dàmascú, nání-dě Anàniás, te ní sáhá<sup>n</sup> Jèsús núú sàní-dé, te ní xáha<sup>n</sup>-gã xii-dé:

—¡Anàniás! —càchí-gá xáha<sup>n</sup>-gã.

Te ní xáha<sup>n</sup>-dě:

—¿Yúhú càhá<sup>n</sup> ndîhi-n-ã<sup>n</sup>? —càchí-dé xáha<sup>n</sup>-dě.

<sup>11</sup> Te ní xáha<sup>n</sup>-gã:

—Ndacuíñí, te quíhí<sup>n</sup>-n ñi<sup>n</sup> chiu<sup>n</sup> ichi núú dánàni-güedé Ichi Ndáá, te yàcá<sup>n</sup> nanducu-n vehe té Jüdás, chi vehe té-ã<sup>n</sup> ndécú ñi<sup>n</sup> té ñuú Tarsú nání-dě Sàulú, te té-ã<sup>n</sup> sa càhá<sup>n</sup> ndîhi ñaha-dě xii-í. <sup>12</sup> Te té-ã<sup>n</sup> ní dácótó ñaha-xi sá ní xìní ñáhá-dě xii-n ní quexìo-n núú ndécú-dě, te ní sacá<sup>n</sup> ndodo-n ndàha-n díquí-dě, te duca<sup>n</sup> te ní nacaá<sup>n</sup> núú-dě ní dácótó ñaha-xi xii-dé —càchí-gá xáha<sup>n</sup>-gã.

<sup>13</sup> Te té Anàniás ní xáha<sup>n</sup>-dě:

—Yòhó Xítóhó Jesucristú, càchí tnúhu-í xii-n sã ní níhí-í tnúhu nàcuáa quide-dé sá ío quide úhú-dé ñáyiú càhá<sup>n</sup> ndîhi-n ñuú Jerusàlén. <sup>14</sup> Chi nèhe-dé tutú ní sãñaha cuè dútú cúnùu cuendá níhí-dě nàcuáa cada-dé tñi-dé nchaa ñáyiú sàndáá iní ñáhá xii-n —càchí-dé xáha<sup>n</sup>-dě xii-gá.

<sup>15</sup> Te Jèsús ní xáha<sup>n</sup>-gã xii-dé:

—Quíhí<sup>n</sup>-n ndàtnúhu-n ndîhi-dé, chi cuíní-í cada-dé chiu<sup>n</sup>-í, quíhí<sup>n</sup>-dè càhá<sup>n</sup>-dè tnúhu-í núú cuè ñáyiú isràél, ndîhi núú cuè ñáyiú ñá túú cùu ñáyiú isràél, ndîhi núú cuè té yíndaha ñaha xií-yu. <sup>16</sup> Te yúhú cúnaha-í xii-dé sá ndóhó vîhi-dé cuendá-í —càchí-gá xáha<sup>n</sup>-gã xii té Anàniás.

<sup>17</sup> Te cuáhá<sup>n</sup> té Anàniás vehe núú ndécú tẽ Sàulú te ní sacá<sup>n</sup> ndodo-dé ndaha-dé díquí tẽ Sàulú, te ní xáha<sup>n</sup>-dě:

—Yòhó té Sàulú té ndècu ndîhi-í ichi Xítóhó Jesucristú, ñuú-ni Xítóhó Jesucristú Yaá ní càhá<sup>n</sup> ndîhi ñaha xii-n ichi ní tendaha ñaha-gá véxi-í cuendá cacá<sup>n</sup> táhú-í núú-gã cuendá-n te ndúha núú-n, te dàtnúú quixi

Espiritú-gá cundecu ndîhi-n —càchí-dé xáha<sup>n</sup>-dě.

<sup>18</sup> Te dàtná sá ní xócání-ó ñi<sup>n</sup> sá ndèdí núú-dě ní quide ñaha-xi xii-dé, te ní nacaá<sup>n</sup> núú-dě, te ní sandute-dé. <sup>19</sup> Te ní xexi-dé, te ní naníhí ndéé-dě, te títñi nduu ní xíndecu ndîhi-dé ñáyiú ní sàndáá iní tnúhu-gá ñuú Dàmascú.

*Té Sàulú dácuàha-dé ñáyiú tnúhu Yá Ndiõxí ñuú Dàmascú*

<sup>20</sup> Te sáta ní ndúha núú-dě, te ní sáhá<sup>n</sup>-dè veñúhu cue ñáyiú isràél ní xáha<sup>n</sup>-dè sá Jèsús cúu-gã Déhe Yá Ndiõxí. <sup>21</sup> Te nchaa ñáyiú ní xíndedóho tnúhu ní càhá<sup>n</sup>-dè, te ní cuñúhu vîhí-yu, te ní xítñahá-yu:

—Díu té-ã<sup>n</sup> ní sañi-dé ñáyiú ní xóo chiñuhu ñaha xii Jèsús ñuú Jerusàlén. Te ní quixi-dé iha ní cuíní-dé tñi ñaha-dě xií-yu candeca ñaha-dě quíhí<sup>n</sup> núú cuè dútú cúnùu ni cuu —càchí-yu xítñahá-yu.

<sup>22</sup> Te ío iní-gá té Sàulú xáha<sup>n</sup>-dè xií-yu sá díú Jèsús cúu-gã Cristú Yaá ní tendaha Yá Ndiõxí ní quixi ñuyú-a, te xíã<sup>n</sup> ñá ní níhí ñáyiú isràél ndécú ñuú Dàmascú tnúhu càhá<sup>n</sup>-yu, te ní cuñúhu vîhí-yu.

*Té Sàulú ní dáxió-dè núú ñáyiú isràél*

<sup>23</sup> Te sáta ní cuu títñi nduu, te ní ndatnúhu cue té isràél sá càhni-güedě té Sàulú. <sup>24</sup> Te té Sàulú ní níhí-dè tnúhu nàcuáa càhá<sup>n</sup>-güedé cada ñaha-güedě xii-dé, te cuèi nduu cuèi niú néhé cuendá-güedé yuyèhe núú ñúdòco ndóho yuhu ñuú cuendá cuíní-güedé tñi ñaha-güedě xii-dé te cahni ñaha-güedě. <sup>25</sup> Te ñi<sup>n</sup> niú ndécá ñaha cue té ní sàndáá iní-xi tnúhu Jèsús cuáhá<sup>n</sup> ndéé núú ñúdòco ndóho yuhu ñuú. Te ní sáá-güedé núú ndòho, te ní chihí ñaha-güedě xii-dé xítí tídihi te ní dándèe ñaha-güedě núú ñúhú, te ní quene-dé cuáhá<sup>n</sup>-dè.

*Te Sàulú ndécú-dè ñuú Jerusàlén*

<sup>26</sup> Te té Sàulú ní nasáá-dè ñuú Jerusàlén, te cuíní-dé chitnahá-dé ñáyiú sàndáá iní tnúhu Jèsús, te ní yùhú-yu chi ní càhá<sup>n</sup>-yu sá dándàhú ñáhá-dè sá sàndáá iní-dé Jèsús.

<sup>27</sup> Te té Bèè ndécá-dè té Sàulú cuáhá<sup>n</sup> núú ndécú cuè té ní táuchíú<sup>n</sup> Jèsús dacuàha ñaha xií-yu tnúhu-gá. Te ní caní té Bèè cuendú núú-güedě nàcuáa ní cuu ní naníhí tnáhá tẽ Sàulú ndîhi Jèsús ichi, te ní càhá<sup>n</sup>



ndihi ñaha-gã xii-dé. Te ní xáha<sup>n</sup> tùcu té Bèè nàcuáa ní cáhá<sup>n</sup> té Sàulú tnúhu Jèsús núú ñáyiú Dàmascú, te ñá túú tnàhí ni yùhú-dé ní cáhá<sup>n</sup>-dé, càchí té Bèè xãha<sup>n</sup>-dè xii-güedé. <sup>28</sup> Te ní xíndecu té Sàulú ndihi ñáyiú xídacuáhá tnúhu-gá ñuú Jerusàlén. Te ní ndicuu ndicuu-dé ní cáhá<sup>n</sup>-dé tnúhu Jèsús, te ñá túú tnàhí ni yùhú-dé <sup>29</sup> ní cáhá<sup>n</sup> ndihi-dé ñáyiú isràél ñáyiú càhá<sup>n</sup> tnúhu griégú. Te ñáyiú-á<sup>n</sup> ñi ngüíta-yu ndàtnúhu-yu sá cáhni ñàhá-yu xii-dé. <sup>30</sup> Te ñáyiú sàndáá iní tnúhu-gá ní níhí-yu tnúhu nàcuáa cuini ñáyiú càhá<sup>n</sup> tnúhu griégú cada ñàhá-yu xii té Sàulú, núú ní sàndeca ñàhá-yu xii-dé ñuú Cèsareá, te yàcá<sup>n</sup> ní tendaha ñàhá-yu cuánuhú-dé ñuú Tàrsú.

<sup>31</sup> Te sátá xiá<sup>n</sup> te ní sanaá-yu ñá túú-gã ní xóo cada úhú-yu nchaa ñáyiú sàndáá iní tnúhu Jèsús níhí distritú Jüdeá, ndihi distritú Galileá, ndihi distritú Sàmariá. Te ní níhí ndéè-yu ní quidé-yu nàcuáa ní xáha<sup>n</sup> Yã Ndiöxí cada-yu, te ío ní xíndecu yíñùhú-yu núú-gã, te Espiritú-gá ní chindee ñàha-xi xií-yu, te vãi-gá ñáyiú ní sàndáá iní-yu tnúhu-gá.

### *Té Pèlú ní quide tátna-dé té Èneás*

<sup>32</sup> Titní xichi ní sáhá<sup>n</sup> té Pèlú ní cáhá<sup>n</sup>-dé tnúhu Yã Ndiöxí. Te ñ<sup>n</sup> nduu ní sáhá<sup>n</sup>-dé ñuú Lidá ní cáhá<sup>n</sup> ndihi-dé ñáyiú sàndáá iní ñàhá xii Jesús. <sup>33</sup> Te yàcá<sup>n</sup> ní naníhí-dé ñ<sup>n</sup> té nàni Eneás, te ní cuu úná cuía cùhú-dé, te ni lùha ñá cúú-gã candá nihnu-dé. <sup>34</sup> Te ní xáha<sup>n</sup> té Pèlú xii-dé:

—Èneás, Xítohó Jesucristú cada tátna ñaha-gã xii-n tnáví. Ndacóo te ndocani-n yùu-n —cachí-dé xãha<sup>n</sup>-dè.

Te òré-ni ní ndacóo-dé. <sup>35</sup> Te nchaa ñáyiú ñuú Lidá ndihi ñáyiú ñuú Sàrón ní xiní-yu sá ñi ndúha-dé, te ní sàndáá víhí iní-yu Xítohó Jesucristú.

### *Ní ndoto tá Dòrcás*

<sup>36</sup> Te ñuú Jòpé ndécú ñ<sup>n</sup> ñadihí sàndáá iní-a<sup>n</sup> tnúhu Jèsús, te nàni-a<sup>n</sup> Tabitá, te tnúhu griégú xãhá<sup>n</sup>-yu Dòrcás, te ío váha ní xóo cada-a<sup>n</sup> chi ío váha iní-a<sup>n</sup>, te ní xóo chindee-a<sup>n</sup> ñáyiú ndàhú. <sup>37</sup> Te váha-ni ndècu-a<sup>n</sup> ni cuu, te ní tñi ñaha cuèhé ñi xíhí-a<sup>n</sup>, te ní nadacùchi ñàhá-yu, te ní chihi ñàhá-yu ñ<sup>n</sup> cuàrtú ndécú ndéé núú ñiñu. <sup>38</sup> Te ñáyiú ní sàndáá iní tnúhu Jèsús ñuú

Jòpé ní níhí-yu tnúhu sá ndécú tẽ Pèlú ñuú Lidá. Te yatni-ni càa ñuú-á<sup>n</sup>, te ní tendàhá-yu úú cue té cuáhá<sup>n</sup>-güedé núú ndécú-dé cuèndá cùñaha-güedé candeca ñaha-güedé xii-dé quíhí<sup>n</sup> núú ndécú-yu. Te ní xáha<sup>n</sup>-güedé xii té Pèlú:

—Yáchí ná quíhí<sup>n</sup>-ó ñuú-ndí, chi yàcá<sup>n</sup> caná ñàhá-yu quíhí<sup>n</sup>-n tnáví —càchí-güedé xãha<sup>n</sup>-güedé xii té Pèlú.

<sup>39</sup> Te té Pèlú ní xica-dé cuáhá<sup>n</sup>-dé ndihi cue té-á<sup>n</sup> ñuú Jòpé, te òré ní quexio-güedé ndihi-dé, te cuásaa ndihi ñaha-güedé cuàrtú ndéé núú ñiñu. Te nchaa ñáyiú dihí ñáyiú quèé ní tacá ndéé ñàhá xii ndíyi-á<sup>n</sup> xíndáhyú-yu, te ní dánèhé ñàhá-yu nchaa dóo ñi cadúha ñaha ní xíhí-á<sup>n</sup>. Chi ní xóo cadúha-a<sup>n</sup> dícú<sup>n</sup>, te ní xóo cadúha-a<sup>n</sup> dío òré ní xíndecu-a<sup>n</sup> ñuyú-a, te nchaa xiá<sup>n</sup> ní dánèhé ñàhá-yu xii té Pèlú. <sup>40</sup> Te té Pèlú ní xáha<sup>n</sup>-dè sá quèè-yu nchaa-yu quehé, te ní queé-yu. Te ní ngüíñí xítí-dé te ní cáhá<sup>n</sup> ndihi-dé Yã Ndiöxí, te dàtnúni ní ndacoto-dé núú cándòdo ndíyi-á<sup>n</sup>, te ní xáha<sup>n</sup>-dè:

—Tàbitá, ndacóo —càchí-dé xãha<sup>n</sup>-dè.

Te ní ndacoto-a<sup>n</sup> núú tẽ Pèlú te ní ndacóo-a<sup>n</sup>. <sup>41</sup> Te ní tñi-dé ndaha-a<sup>n</sup> ní nacanutñi ñaha-dè. Te ní cana-dé nchaa ñáyiú dihí ñáyiú quèé ndihi nchaa ñáyiú sàndáá iní tnúhu Jèsús cuèndá quini-yu sá ñi ndoto-a<sup>n</sup>. <sup>42</sup> Te nchaa ñáyiú ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xíhí-á<sup>n</sup>, te vãi-yu ní sàndáá iní-yu Xítohó Jesucristú. <sup>43</sup> Te titní nduu ní xíndecu té Pèlú vehe té Xímú tée dàcuitá ñi.

## 10

### *Té Pèlú ndihi té Còrneliú*

<sup>1</sup> Te ndècu ñ<sup>n</sup> té nàni-dé Còrneliú ñuú Cèsareá te cùu-dé capitá<sup>n</sup>, te ndècu ndihi-dé ñ<sup>n</sup> cièndú sandàdú. Te cue té-á<sup>n</sup> nání-güedé Sandàdú Itàlianú. <sup>2</sup> Te té cùu capitá<sup>n</sup> ío váha iní-dé, te mee-dé ndihi ñadihí-dé ndihi nchaa landú-dé ío nèhé-yu sá yíñùhu núú Yã Ndiöxí, te sáha-dé ñáyiú ndàhú ñáyiú isràél díhú<sup>n</sup>, te ío càhá<sup>n</sup> ndihi-dé Yã Ndiöxí. <sup>3</sup> Te ñ<sup>n</sup> nduu dàtná òré caá úní sacuaa ní dácótó núú ñàhá-xi xii-dé sá ñi sãhá<sup>n</sup> ñ<sup>n</sup> espíritú xínú cuèchi núú Yã Ndiöxí núú-dé, te ní xáha<sup>n</sup>-xi:

—Còrneliú —càchí-xi xãha<sup>n</sup>-xi xii-dé.

4 Te ní xiní-dé ndi ndúú xio núú-dě espíritú-án. Te ío ní yuhú-dé. Te ní xáha<sup>n</sup>-dě: —¿Ná chíú<sup>n</sup> vèxi-n? —càchí-dé xăha<sup>n</sup>-dě.

Te xăha<sup>n</sup>-xi:

—Ío càhá<sup>n</sup> ndihi-n Yă Ndiöxí, te ñáyiú ndàhú sãñaha-n dîhú<sup>n</sup>-n, te nchaa xiă<sup>n</sup> sa nàha-gá. 5 Te vitna tendaha-n cuè téé na quihí<sup>n</sup>-güedé ñuú Jòpé quíngana-güedé ì<sup>n</sup> téé nani Xímú, àdi Pelú chi úú diú-dé, te candeca ñaha-güedé quixi. 6 Te òré quexio-dé te cachí tnúhu-dé nchaa dava-gá sá cuini Yă Ndiöxí cada-n. Te ndècu-dé vehe ingá tucu téé nani Xímú téé dàcuitá ñi, te vehe téé-án cáá ì<sup>n</sup> xio yuhu lamár —càchí-xi xáha<sup>n</sup>-xi xii-dé.

7 Te sátá cuáhá<sup>n</sup> espíritú-án, te té Còrneliú ní cana-dé úú tnàhá cue téé xínu cuechi núú-dě ndihi ì<sup>n</sup> sandádú xínú cuèchi tucu núú-dě, te tnàhá sandádú-án ío càhá<sup>n</sup> ndihi-dé Yă Ndiöxí. 8 Te té Còrneliú ní cani-dé cuendú núú-güedé nàcuáa ní cáhá<sup>n</sup> espíritú xínú cuèchi núú Yă Ndiöxí. Te ní tendaha ñaha-dé xii-güedé cuáhá<sup>n</sup>-güedé ñuú Jòpé.

9 Te nduu tnèé-án ñúhú-ní-güedé ichi cuáhá<sup>n</sup>-güedé, te cùu-xi datná òré caúxúú nduu ta cùyatni-güedé ñuú-án, te òré-án ní sáá té Pelú díquí véhé càhá<sup>n</sup> ndihi-dé Yă Ndiöxí. 10 Te òré-án sa xihí-dé docó cuini-dé caxi-dé, te nini càdúha-yu sá cáxí-dé ní dácótó núú ñáhá-xí 11 sã ní xiní-dé ì<sup>n</sup> sá ndécú àndiú, te càa datná cáá ì<sup>n</sup> dóó cáhnú nchícú<sup>n</sup> yoho ndi cùmí xíquí-xi véxi cuu<sup>n</sup> núú ñúhú. 12 Te núú dǒó-án yódó cǒo ndihi quiti ndàva ndihi nchaa núú quiti ndéé cùmí sãhá-xi. 13 Te ní tecú dóho-dé càhá<sup>n</sup> ì<sup>n</sup> sá càhá<sup>n</sup>, te xăha<sup>n</sup> sã càhá<sup>n</sup>-án xii-dé:

—Pelú, ndacuíñi cahni-n nděda-ni càa quiti-a caxi-n-di —cachí sá càhá<sup>n</sup>-án xăha<sup>n</sup>-xi xii-dé.

14 Te té Pelú ní xáha<sup>n</sup>-dě:

—Vá cáhni-í-di chi càchí tnúhu sá sánú ichi ñaha xii nchúhú ñáyiú isràél sá vã cúú càxi-ndí nchaa quiti-a chi cuu cuèchi, te vátá cáxí-gã-í-di ni ì<sup>n</sup> xito —cachí-dé xăha<sup>n</sup>-dě.

15 Te ní cáhá<sup>n</sup> tucu sá ní cáhá<sup>n</sup>-án, te xăha<sup>n</sup>-xi:

—Vá cúú càchí-n sã vã cúú càxi-n-di, chi mee Yă Ndiöxí ní cachí-gá sá diú nchaa quiti-a cuu caxi-o vitna —cachí sá ní cáhá<sup>n</sup>-án xăha<sup>n</sup>-xi xii-dé.

16 Te duca<sup>n</sup> ñí cáhá<sup>n</sup> sá ñí cáhá<sup>n</sup>-án ùni xito, te dàtnúni cuándaa tucu dóó-án andiú.

17 Te té Pelú ñá ní cùtnuní iní-dé ná cuendá duca<sup>n</sup> ñí dácótó núú ñáhá-xí xii-dé, núu xiă<sup>n</sup> ío cuéhé ñí sani iní-dé. Te òré-án ñí quexio cue téé ní tendaha té Còrneliú ndéé yuyèhe, chi ndi vehe ndi vehe cuáhá<sup>n</sup>-güedé ndúcú tnúhu-güedé ndéé cáá véhe té Xímú téé dii véhe-xi ndecu té Pelú. 18 Te ní cáhá<sup>n</sup> níhi-güedé, te xăha<sup>n</sup>-güedé:

—Ñá túú cùdana iha ndecu ì<sup>n</sup> téé nànducu-ndí nání-dě Xímú, àdi Pelú chi úú diú-dé —càchí-güedé xăha<sup>n</sup>-güedé.

19 Te té Pelú vai sani iní-dé sá ñí dácótó núú ñáhá-xí xii-dé. Te òré-án ñí xáha<sup>n</sup> Espíritú Yă Ndiöxí xii-dé:

—Cundedóho-n ì<sup>n</sup> tnúhu na càhá<sup>n</sup>-í-a. Ní quexio úní cue téé nànducu ñaha xii-n.

20 Yáchí, cuandèe chi quihí<sup>n</sup>-n ndihi-güedé, te vá yuhú-n chi yuhú ní xáha<sup>n</sup>-í véxi cuaca ñaha-güedé xii-n —càchí Espíritú-gá xăha<sup>n</sup>-xi xii té Pelú.

21 Te ní xica-dé cuánde-dé núú ndécú cuè téé xica nanducu ñaha xii-dé, te xăha<sup>n</sup>-dě xii-güedé:

—Yúhú cúú tée nànducu-ndo-án. Náu-í-a núu ná chíú<sup>n</sup> cuini ñáhá-ndó —càchí-dé xăha<sup>n</sup>-dě xii-güedé.

22 Te xăha<sup>n</sup>-güedé:

—Tée cùu capitá<sup>n</sup> téé nani Corneliú ní tendaha ñaha-dé véxi-ndí, te téé-án ío váha iní-dé, chi ío sandáá iní-dé Yă Ndiöxí, te nchaa ñáyiú isràél ío váha càhá<sup>n</sup>-yu cuendá-dé. Te ì<sup>n</sup> espíritú xínú cuèchi núú Yă Ndiöxí ní xáha<sup>n</sup>-xi xii-dé sá cáná ñaha-dé xii-n quihí<sup>n</sup>-n véhe-dé dacuàha-n-dé tnúhu Yă Ndiöxí —càchí cue téé ní tendaha té Còrneliú xăha<sup>n</sup>-güedé xii té Pelú.

23 Te ní xáha<sup>n</sup> tẽ Pelú sá quihu-güedé vehe-dé, te candeca tnàha-güedé ndihi-dé quihí<sup>n</sup> ndéé nduu tnèé. Te nduu tnèé-án ñí xica-güedé ndécá tnàha-güedé ndihi té Pelú cuáhá<sup>n</sup>, te tnàhá ì<sup>n</sup> úú cue téé sandáá iní tnúhu Jèsús ñuú Jòpé cuáhá<sup>n</sup> ndihi ñaha-güedé xii-dé.

24 Te ndéé ingá nduu ní quexio-güedé ñuú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndihi ñadihí-dé ndihi nchaa landú-dé ndihi cue téé ío váha tnàhá tnúhu ndihi-dé, chi ní cana ñaha-dě ní nítnáhã-yu ndihi-dé cundetú-yu té Pelú. 25 Te sátá ñí quèxio té Pelú vehe té

Còrneliú, te ní quee-dé quehé, te ní ngüñí xítí-dě núú tē Pèlú chíñùhu ñaha-dé ní cùu. <sup>26</sup> Te té Pèlú ní xáha<sup>n</sup>-dē:

—Ndacuíñí vá ngüñí xítí-n nùú-í chi ñá díú Ndiöxí cùú-í, dícó ñ<sup>n</sup> tée ñuyíú-a cùu-í —càchí té Pèlú xáha<sup>n</sup>-dē xii-dé.

<sup>27</sup> Te ta cáhá<sup>n</sup> té Pèlú ndíhi té Còrneliú cuánguihu-güedé xítí vehe, te chitu ñáyiú xixíhi xítí vehe. <sup>28</sup> Te ní xáha<sup>n</sup> tē Pèlú xií-yu:

—Sa nàha-ndo sá càchí tnúhu sá sánú ichi ñaha xii nchúhú ñáyiú isràél sá vā cùú quixi-ndí vehe ni ñ<sup>n</sup> nchóhó ñáyiú ñá túú cùu ñáyiú isràél te ni vā cùú tnàhá tnúhu ndíhi ñaha-ndí xii-ndo. Dico Yá Ndiöxí ní cachí-gá sá vā cùú cáhá<sup>n</sup>-í sá vā cùú cáhá<sup>n</sup> ndíhi-í ñáyiú ñá túú cùu ñáyiú isràél, chi cuu cuéchi. <sup>29</sup> Núu xiá<sup>n</sup> ndíhi-ni véxi-í òré ní quexio tnúhu sá cáná ñaha-ndo. Te cachí tnúhu-ndo nā cuendá cáná ñaha-ndo —cachí té Pèlú xáha<sup>n</sup>-dē xii-yu.

<sup>30</sup> Te té Còrneliú ní xáha<sup>n</sup>-dē:

—Ní cuu cúmí nduu, te ñ<sup>n</sup> ni dàtná òré iha cùu-xi, te yúhú ndècu-í ñ<sup>n</sup> ni vehe-í, te ñá túú tnàhí ná xéxi-í cáhá<sup>n</sup> ndíhi-í Yá Ndiöxí, te òré-á<sup>n</sup> ní quexio ñ<sup>n</sup> espíritú xínú cuèchi núú-gá níhnu-xí dōó cuixí<sup>n</sup> dōó chàhnchí. <sup>31</sup> Te càchí-xi: “Còrneliú, ní xíndedóho Yá Ndiöxí tnúhu ní cáhá<sup>n</sup>-n ndíhi-gá, te xíní-gá sá sãñaha-n díhú<sup>n</sup> xii ñáyiú ndàhú. <sup>32</sup> Te ñuú Jòpé ndécú ñ<sup>n</sup> tée nani Xímú, àdi Pelú chi úú ñ<sup>n</sup> dé, te ndècu-dé vehe ñ<sup>n</sup> tée nani tucu Xímú tée dàcuitá ñ<sup>n</sup>, te càa vehe-dé ñ<sup>n</sup> xio yuhu làmár, te cana-n-dē ná quixi-dé ndatnúhu-n ndíhi-dé”, duha ní cáhá<sup>n</sup> espíritú xínú cuèchi núú Yá Ndiöxí. <sup>33</sup> Núu xiá<sup>n</sup> ndíhi-ni ní cana ñaha-í xii-n. Te táxáhu xii-n sã véxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tnúhu Yá Ndiöxí, te cuíní-ndí cachí tnúhu-n nchaa tnúhu ní cachí Yá Ndiöxí cáhá<sup>n</sup>-n —càchí té Còrneliú xáha<sup>n</sup>-dē.

*Té Pèlú ní ndatnúhu-dé ndíhi ñáyiú ní tacá vehe té Còrneliú*

<sup>34</sup> Te té Pèlú xáha<sup>n</sup>-dē xií-yu:

—Vitna ní xíní-í sá Yá Ndiöxí cáhá<sup>n</sup> ndíhi-gá ñáyiú cuéi ndēda-ni càa ñuú, te ñ<sup>n</sup>-ni quide-gá ndíhi nchaa-yu. <sup>35</sup> Te nchaa ñáyiú nèhe sá yíñùhu núú Yá Ndiöxí, te xíquide váha-yu, te nchaa-yu cùu váha iní ñáhá-gá xií-yu. Te ñá túú quide cuendá-gá

cuéi ná ñáyiú ñuú cùu-yu. <sup>36</sup> Te Yá Ndiöxí ní tendaha-gã Xítohó Jesucristú ní sáhá<sup>n</sup>-gá ní xíndecu-gá nació<sup>n</sup> Isràél, te ní xáha<sup>n</sup>-gá xií-yu ñ<sup>n</sup> tnúhu váha nacuáa cuu váha iní-yu. Te ñ<sup>n</sup> ni mee Jèsús cùnù-gá núú ñáyiú ni càa xico ñuyíú. <sup>37</sup> Te nàha-ndo sá díhna-gá ndí Juàá ní cáhá<sup>n</sup> ndí tnúhu Yá Ndiöxí núú ñáyiú, te ní dácúandute ñaha ndí xií-yu. Te dàtnúni ní ngüita Jèsús ní cáhá<sup>n</sup>-gá tnúhu-gá distritú Galileá, te dàtnúni ní sáhá<sup>n</sup>-gá níhí nació<sup>n</sup> Isràél ní cáhá<sup>n</sup>-gá tnúhu-gá núú ñáyiú. <sup>38</sup> Te sa nàha-ndo sá Yá Ndiöxí ní sãñaha-gã Espíritú-gá xii Jèsús tée ñuú Nazàrét ndécú ndíhi-dé chindèe ñaha-xi xii-dé. Te nàha-ndo sá ní xica cuu Jèsús ní quide tátna-gá nchaa ñáyiú yíhi ñaha espíritú cùndíhi yucu ñávãha. Te ío vãi-gá sá váha ní quide ñaha-gã xií-yu, te duca<sup>n</sup> ní quide-gá, chi Yá Ndiöxí ní chindee ñaha-gá. <sup>39</sup> Te mee-ndí ní xíní-ndí nacuáa ní quide Jèsús ñuú Jerusalén ndíhi níhí nació<sup>n</sup> Isràél. Te ní sata caa ñaha-güedé xii-gá núú cùrúxi te yacá<sup>n</sup> ní xíhí-gá. <sup>40</sup> Te núú ùní nduu ní dándótó ñaha Yá Ndiöxí xii-gá. Te ní cuíní-gá sá cùndecu Xítohó Jesucristú títní nduu sátá ní ndoto-gá cuendá cáhá<sup>n</sup> ndíhi ñaha-gã xii-ndí nchaa-ndí nacuáa ní xica cuu-ndí ndíhi-gá. <sup>41</sup> Te ñá ncháá ñáyiú ni xíní ñáhá xii-gá, chi mee-ni nchúhú cue tée ní cachí-gá sá cáhá<sup>n</sup> ndáá-ndí sá ní ndoto-gá, chi ní xíndecu ndíhi-ndí-gá, te ní xíhi ní xexi-ndí ndíhi-gá, núu cáhá<sup>n</sup> ndáá-ndí sá ní ndoto-gá. <sup>42</sup> Te ní cachí-gá sá nchúhú quíhí<sup>n</sup>-ndí cùñaha-ndí xii ñáyiú sá méé Yá Ndiöxí ní táuchíú<sup>n</sup>-gã sá Jèsús cada ndáá-gá cuéchi nchaa ñáyiú ndècu vívú ndíhi cuéchi nchaa ñáyiú ní xíhí. Te duca<sup>n</sup> ní xáha<sup>n</sup> Yá Ndiöxí xii Jèsús, te ñ<sup>n</sup> ni duca<sup>n</sup> ní cachí Jèsús cáhá<sup>n</sup>-ndí. <sup>43</sup> Te cue tée ní cáhá<sup>n</sup> tnúhu Yá Ndiöxí ndéé sanaha ní cáhá<sup>n</sup>-güedé sá quíxi Jèsús, te ní cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuéchi-yu —càchí té Pèlú xáha<sup>n</sup>-dē xií-yu.

*Ní quexio Espíritú Yá Ndiöxí ní ngúndecu ndíhi cue ñáyiú ñá túú cùu ñáyiú isràél*

<sup>44</sup> Te mei òré cáhá<sup>n</sup>-dē ndédóho-yu ní quexio Espíritú Yá Ndiöxí ní ngúndecu ndíhi



nchaa ñáyiú-án. <sup>45</sup> Te cue téé israhél cuáhán ndihí té Pèlú, cue téé ní sándáá iní tnúhu Jèsús ní cuñúhu vñhi-güedé sá ñí quexìo Espíritú Yá Ndiöxí ní ngúndecu ndihí-yu, chi cuendá sá ñà díú ñáyiú israhél cúu-yu núu xíá<sup>n</sup> ní cuñúhu-güedé. <sup>46</sup> Te ní cutnùní sá ñí quexìo Espíritú Yá Ndiöxí ní ngúndecu ndihí-yu, chi ní ngüíta-yu càhá<sup>n</sup>-yu tnúhu sá dácàhu iní ñáhá Espíritú-gá, tnúhu sá ñà túú xìní-yu càhá<sup>n</sup>-yu. Te ní ndacá<sup>n</sup> táhü-yu núú Yá Ndiöxí cuendá nchaa sá ñí quide-gá.

<sup>47</sup> Te dàtnùní ní xáha<sup>n</sup> tē Pèlú:

—Vitna te cuandute ñáyiú ní natuha ichi Xítohó Jesucristú chi sa ndècu ndihí-yu Espíritú Yá Ndiöxí dàtná cuíní-ndó ndècu ndihí nchoo, núu xíá<sup>n</sup> vá cúú càchí dava-gá ñáyiú sá vā cúú cuànduté-yu —càchí-dé xáha<sup>n</sup>-dē xii-yu.

<sup>48</sup> Te dàtnùní ní xáha<sup>n</sup>-dē xii ñáyiú:

—Vitna te cuandute-ndo, te òré-án te cacunehe-ndo Xítohó Jesucristú —càchí-dé xáha<sup>n</sup>-dē xii-yu.

Te dàtnùní ní càhá<sup>n</sup> ndàhú-yu núú tē Pèlú cundecu ndihí ñaha-dē xii-yu ñí ùú nduu.

## 11

*Té Pèlú ní caní-dé cuèndú núú ñáyiú sándáá iní tnúhu Jèsús ñuú Jerusàlén*

<sup>1</sup> Te cue téé ní táuchíú<sup>n</sup> Jèsús dacuàha ñaha xii ñáyiú tnúhu-gá, ndihí cue ñáyiú ní sándáá iní tnúhu-gá, ñáyiú ndècu distritú Júdeá ní níhí-yu tnúhu sá ñáyiú ñà túú cùu ñáyiú israhél ní sándáá iní-yu tnúhu Yá Ndiöxí. <sup>2</sup> Te òré ní ndexìo té Pèlú ñuú Jerusàlén, te ñáyiú israhél ñáyiú ní cachí sá cáda nchaa nacuáa ní càhá<sup>n</sup> ndí Moisés ní satnuhu ñáhá-yu xii-dé. <sup>3</sup> Te ní xáhá<sup>n</sup>-yu xii té Pèlú:

—¿Ná cuendá ní sáhá<sup>n</sup>-n ndéé ndiáçá<sup>n</sup> ní càhá<sup>n</sup> ndihí-n ñáyiú-á<sup>n</sup>, te ñà túú quidé-yu dàtná quidé nchòo-i? Te ní sáhá<sup>n</sup>-n yacá<sup>n</sup> ní xexi-n ndihí-yu —càchí-yu xáhá<sup>n</sup>-yu xii-dé.

<sup>4</sup> Te té Pèlú ní caní-dé cuèndú nacuáa ní cuu núú ñí sáhá<sup>n</sup>-dē, te xáha<sup>n</sup>-dē:

<sup>5</sup> —Ní xíndecu-í ñuú Jòpé. Te òré càhá<sup>n</sup> ndihí-í Yá Ndiöxí, te ní dácótó ñaha-xi xii-í sá vèxi cuu<sup>n</sup> ñí dóó càhnú àndü, te ndütü ndi cumí xíquí-xi, te ní ngava-xi núú ndécü-í.

<sup>6</sup> Te ní xíndéhé vaha-í, te ní xíní-ínchaa quiti yòdo núú-xi. Te ñí xichi yòdo quiti cúmí

sáhá-xi, te ñí xichi yòdo quiti déé<sup>n</sup>, te ñí xichi yòdo cóó, te ñí xichi yòdo quiti ndava.

<sup>7</sup> Te ní tecú dóho-í càhá<sup>n</sup> ñí sá càhá<sup>n</sup>, te càchí-xi: “Pèlú, ndacuíñí cahni-n ndéda-ni càa quiti-a caxi-n-di”, cachí sá ñí càhá<sup>n</sup>-án.

<sup>8</sup> Te ní xáha<sup>n</sup>-í: “Vá càhní-í-di chi càchí tnúhu sá sánú ichi ñaha xii nchúhú ñáyiú israhél sá vā cúú càxi-ndí nchaa quiti-a”, xáha<sup>n</sup>-í.

<sup>9</sup> Te ní tecú dóho-í càhá<sup>n</sup>-ni tucu núú ñínu, te càchí sá càhá<sup>n</sup>-án: “Vá cúú càchí-n sá vā cúú càxi-n-di, chi mee Yá Ndiöxí ní cachí-gá sá díú nchaa quiti-á<sup>n</sup> cuu caxi-o”, càchí sá càhá<sup>n</sup>-án. <sup>10</sup> Te duca<sup>n</sup> ñí càhá<sup>n</sup> sá ñí càhá<sup>n</sup>-án ùní xito, te dàtnùní cuàndaa dóó-á<sup>n</sup> ndihí nchaa quiti-á<sup>n</sup> andü. <sup>11</sup> Te òré-ni ní quexìo úní cue téé vehe núú ndécü-í.

Te cue téé-án ñí tendaha ñaha ñí tée ñuú Cèsareá nándücu ñaha-güedé xii-í. <sup>12</sup> Te mee Espíritú Yá Ndiöxí ní cachí-xi sá quihí<sup>n</sup>-í ndihí-güedé, te ní cachí-xi sá ñà túú ñà caní iní-í. Te tnàhá ñíu cue téé ndècu iha ní sáhá<sup>n</sup> ndihí ñaha-güedé xii-í, te nchaa-ndí

ní sáhá<sup>n</sup>-ndí vehe té Còrneliú ñuú Cèsareá. <sup>13</sup> Te ní caní-dé cuèndú nacuáa ní cuu ní sáhá<sup>n</sup> ñí espíritú xínú cuèchi núú Yá Ndiöxí vehe-dé, te ní quíhu-xi ndéé xití vehe-dé, te ní xáha<sup>n</sup>-xi xii-dé: “Tendaha-n cuè téé na quihí<sup>n</sup>-güedé ñuú Jòpé quingana-güedé ñí tée nàni Xímú, àdi Pelú chi úú diu-dé. Te candeca ñaha-güedé quixi. <sup>14</sup> Te téé-án cachí tnúhu-dé nása cada-n nàníhí tãhú-n ndihí ñadihí-n, ndihí landú-n, ndihí nchaa ñáyiú xínu cuechi vehe-n”, duha ní xáha<sup>n</sup> espíritú-án xii té Còrneliú. <sup>15</sup> Te òré ní ngüíta-í càhá<sup>n</sup> ndihí-í-yu ní quexìo Espíritú Yá Ndiöxí ní ngúndecu ndihí-yu dàtná ní quide-xi cútnáhá ní taxi Yá Ndiöxí Espíritú-gá ndéé díhna ní ngúndecu ndihí nchoo. <sup>16</sup> Te ní ndacu iní-í nacuáa ní càhá<sup>n</sup> Xítohó Jesucristú, te duha ní cachí-gá: “Té Juáa ní xóo dacuàndute-dé ñáyiú, dico yúhú sãñaha-í Espíritú Yá Ndiöxí cundecu ndihí-yu”, duha ní cachí-gá. <sup>17</sup> Te Yá Ndiöxí ní sãñaha-gã Espíritú-gá cundecu ndihí ñáyiú ñà túú cùu ñáyiú israhél dàtná ní quide-gá cútnáhá ní sándáá iní-ó tnúhu Jèsús, núu xíá<sup>n</sup> vá càchí-í sá vā cúú càda-í ñí sá cuíní Yá Ndiöxí cada-í —càchí té Pèlú xáha<sup>n</sup>-dē xii-yu.

<sup>18</sup> Te sátá dúcá<sup>n</sup> ñí xáha<sup>n</sup> tē Pèlú, te ñà túú-gã ná tnúhu ni càhá<sup>n</sup>-yu, te ío ní cudíí



iní-yu nchaa nàcuáa ní quide Yá Ndiöxí, te ní xítnàhá-yu:

—Tnàhá nchaa ñáyiu ñá túú cùu ñáyiu is-  
ràél naníhí tàhú-yu núu na dàñá-yu nchaa  
sá cuèhé sá dúhá quidé-yu, chi duca<sup>n</sup> cuìni  
Yá Ndiöxí cunduu —càchí-yu xítnàhá-yu.

*Ñáyiu sàndáa iní tnúhu Jèsús ñuú An-  
tiòquia*

<sup>19</sup> Te sáta ní sahani-güedé té Tèvá, te ní  
cuini-güedé cada úhú-güedé nchaa ñáyiu ní  
sàndáa iní-xi tnúhu Jèsús, te ní xité nuú-yu  
ndi tnahá ñuú. Te davá-yu cuáhán-yu  
ndéé distritú Fènicia ndihí distritú Chìpré  
ndihí ñuú Antiòquia. Te ní cáhán-yu tnúhu  
Jèsús núu mee-ni ñáyiu isràél, te ñá ní  
xítnúhu-yu dava-gá-yu. <sup>20</sup> Te dava-gá ñáyiu  
distritú Chìpré ndihí ñáyiu ñuú Cìrené ní  
sáhán-yu ñuú Antiòquia. Te ñá díú mè-ni  
ñáyiu isràél ní cáhán ndihí-yu, chi tnàhá  
ñáyiu ñá túú cùu ñáyiu isràél ní xáhán-yu  
tnúhu Jèsús. <sup>21</sup> Te ní chindee ñàha-gá xii  
ñáyiu càhán tnúhu-gá, te vai-gá-yu ní sàndáa  
iní-yu-gá chi ní tuhá-yu ichi-gá.

<sup>22</sup> Te ñáyiu ndècu ñuú Jerusalén ñáyiu  
ní sàndáa iní tnúhu Jèsús ní níhí-yu tnúhu  
nàcuáa ní cuu, núu xíán ní tendàhá-yu té  
Bèé cuáhán-dé ñuú Antiòquia. <sup>23</sup> Te òré ní  
quexìo té Bèé, te ní xini-dé nàcuáa ní quide  
ñaha-gá xii-yu sá ní naníhí tàhú-yu, núu xíán  
ío ní cudí iní-dé. Te ní dácáhu iní ñáhá-dé,  
te ní xáhán-dé:

—Ío nducu ndèe-ndo cada-ndo nchaa  
sá càchí Yá Ndiöxí cada-ndo —càchí-dé  
xáhán-dé xii-yu.

<sup>24</sup> Te té Bèé cúu-dé ñuú tée váha iní-xi,  
te ndècu ndihí-dé Espiritú Yá Ndiöxí, te ío  
sàndáa iní-dé tnúhu Jèsús. Te vai vihi ñáyiu  
ní tuhá-yu ichi-gá.

<sup>25</sup> Te dàtnùni cuáhán té Bèé ñuú Tàrsú  
cuánúndúcú-dé té Sàulú. <sup>26</sup> Te òré ní naníhí  
ñáhá-dé, te ndèca ñaha-dé cuáhán ñuú An-  
tiòquia, te yacá ní xindecu-güedé ñuú cuía  
ndihí ñáyiu ní sàndáa iní tnúhu Jèsús, te  
vai-yu ní dácúhá ñaha-güedé tnúhu-gá. Te  
dìu-ni ñuú Antiòquia ní dánání ñàhá-yu  
Cristiànú xii nchaa ñáyiu sàndáa iní tnúhu  
Jèsús.

<sup>27</sup> Te ndéé dàvá-án ní quee ñuú cùu  
tée cáhán tnúhu Yá Ndiöxí ñuú Jerusalén  
cuáhán-güedé ñuú Antiòquia. <sup>28</sup> Te ñuú-dé

nání-dé Àgabú, te ní chindee ñàha Espiritú  
Yá Ndiöxí xii-dé, te ní sáhán-dé núu nchaa  
ñáyiu sàndáa iní tnúhu-gá, te ní xáhán-dé  
xii-yu sá quíxí ñuú tnamá ñihí ñuyíú. Te  
duca<sup>n</sup> ní cuu sáta ní ngúnutnì té Clàudiú tée  
yìndaha cuèhé nàció<sup>n</sup>. <sup>29</sup> Núu xíán nchaa  
ñáyiu sàndáa iní tnúhu Jèsús ñuú Antiòquia  
ní ndatnúhu-yu sá chindèé-yu nchaa ñáyiu  
sàndáa iní tnúhu-gá ndécú distritú Jùdeá  
cuèndá vá ndóhó vihí-yu docó. Te nàcuáa ní  
níhí-yu, te duca<sup>n</sup> ní sacá<sup>n</sup> tnáhá-yu. <sup>30</sup> Te ní  
tacá díhú-án, te nèhe té Bèé ndihí té Sàulú  
cuáhán, cuáha-güedé cue tée yìndaha ñáyiu  
sàndáa iní tnúhu-gá.

## 12

*Sáta ní xihí té Jàcobó, te ní ngava té Pèlú  
vecaá*

<sup>1</sup> Te ndéé dàvá-án ní ngüita té Hèrodés  
tée yìndaha ñaha xii ñáyiu isràél ní quide  
úhú-dé ñuú ñáyiu sàndáa iní tnúhu Yá  
Ndiöxí. <sup>2</sup> Te ní táuchíu-dé ní tñi-güedé té  
Jàcobó ñani té Juáa, te ní sahani ñaha-güedé  
ndihí machití. <sup>3</sup> Te ío ní cudí iní dava ñáyiu  
isràél cuèndá sá ní sahani ñaha-güedé xii té  
Jàcobó, núu xíán ní tendaha tucu té Hèrodés  
sandàdú-dé ní sáhán tñi tucu-güedé té Pèlú.  
Te duca<sup>n</sup> ní quide-dé cútnàhá ní xóo vico  
ní xexí-yu pàa sá ñà túú yìhí levadurá.  
<sup>4</sup> Te ní naníhí-güedé té Pèlú, te ní tñi  
ñaha-güedé ndécá ñaha-güedé cuáhán ve-  
caá. Te té Hèrodés ní táuchíu-dé cuáhán  
sáhán ñuú sandàdú cundeé-güedé té Pèlú. Te  
ní xáhán-dé:

—Cundeé-ndó ndi cúmi ndi cúmi-ndó  
tèe-án —càchí-dé xáhán-dé xii-güedé.

Te té Hèrodés ní sani iní-dé queñuhu-dé  
té Pèlú vecaá òré ná yàha vico cuèndá cahni  
ñaha-güedé cáhán-dé ní cùu. <sup>5</sup> Te ní xihí-ni té  
Pèlú vecaá, te ní xindeé cuaa ñaha sandàdú  
xii-dé. Te cue ñáyiu sàndáa iní tnúhu Yá  
Ndiöxí ío ní xicá<sup>n</sup> tãhú-yu núu-gá cuèndá sá  
ñà túú nã cada ñaha-güedé xii-dé.

*Yá Ndiöxí ní dácăcu-gá té Pèlú vecaá*

<sup>6</sup> ñuú-gá quihí té Pèlú vecaá ní cùu,  
te nduu tñé tauchiú<sup>n</sup> té Hèrodés quihí<sup>n</sup>  
sandàdú queñuhu ñaha-güedé xii-dé ve-  
caá cuèndá quini nchaa ñáyiu nása cada  
ñaha-güedé ní cùu. Te té Pèlú cáá-dé xidí-dé

xítí vecaá, te ndi ndùú dúcú<sup>n</sup> ndáhá-dě ndútú càdená, te xio xio òñi-dé ndécú sàndadú, te dava-gá sandàdú xindeé-güedé yèhe vecaá. <sup>7</sup> Te ní quexìo ì<sup>n</sup> espíritú xínú cuèchi núú Yă Ndiöxí xítí vecaá núú cáá tē Pèlú xidí-dé, te uu<sup>n</sup> ní dáyèhé-xi xítí vecaá, te ní dāngüñhi ñaha-xi xii-dé, te xăha<sup>n</sup>-xi xii-dé:

—Yáchí, ndàcòo —càchí-xi xăha<sup>n</sup>-xi xii-dé.

Te ní ndacòo-dé, te ncha cadèná ndútú dúcú<sup>n</sup> ndáhá-dě ní nandáxí. <sup>8</sup> Te ní xăha<sup>n</sup> tùcu espíritú-á<sup>n</sup> xii-dé:

—Yáchí, nucuñhu dóo-n, te ndíhu-n chàu-n —càchí-xi xăha<sup>n</sup>-xi xii-dé.

Te ní ndíhu nuu-dé dóo-dě, te ní xăha<sup>n</sup> tùcu espíritú-á<sup>n</sup>:

—Candixi dóo-n, te na quèhí<sup>n</sup>-ó —càchí-xi xăha<sup>n</sup>-xi xii-dé.

<sup>9</sup> Te té Pèlú ní chinchícú<sup>n</sup>-dé espíritú-á<sup>n</sup>, te ñá ní cùtnuní iní-dé ñu ndáá ì<sup>n</sup> espíritú xínú cuèchi núú Yă Ndiöxí duca<sup>n</sup> quide àdi ñáhá, te dàcoto ñaha-xi xii-dé ní sani iní-dé. <sup>10</sup> Te nděndaha-ni-dě espíritú-á<sup>n</sup> cuáhá<sup>n</sup> ní yáha-dé nàcuáa xñutñi sandàdú, te ta yăha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáhá<sup>n</sup> ndéé xítí ñuú, te ní nacaá<sup>n</sup> méé yèhe-á<sup>n</sup>, te ní quee-dé cuáhá<sup>n</sup>-dé ndihí espíritú-á<sup>n</sup>. Te ní tnahá-dé ì<sup>n</sup> tnuú, te yàcá<sup>n</sup> ní dándõo ñaha espíritú-á<sup>n</sup> xii-dé. <sup>11</sup> Te dătnùní ní nene váha saní núú-dě, te ní cutnùní iní-dé, te ní cachí-dé:

—Ndáá sá Yă Ndiöxí ní tendaha-gă espíritú-á<sup>n</sup> ní quixi-xi ní dácăcu ñaha-xi xii-í cuèndá sá và cáhni ñaha té Hèrodés. Te dava ñăyiu isràel ío ní cudí<sup>n</sup> iní-yu cuèndá sá ní cuiní té Hèrodés cahni ñaha-dě xii-í —duha ní cachí-dé sá ní cutnùní iní-dé.

<sup>12</sup> Te sá ní cutnùní iní-dé sá ní cácu-dé, te cuáhá<sup>n</sup>-dé vehe ì<sup>n</sup> ñaha năni Mariá năná tē Juáá, àdi Mácú chi úú ñu-dé, te xía<sup>n</sup> ndécú vâi-yu càhá<sup>n</sup> ndihí-yu Yă Ndiöxí. <sup>13</sup> Te té Pèlú ní quexìo-dé ndéé yuyèhe ní dácásá<sup>n</sup>-dě, te ní quixi ì<sup>n</sup> xíchí nání Ròdé ní quixi ndehe-xi nă cúú ñăyiu dàcasa<sup>n</sup>. <sup>14</sup> Te ní nucúhu<sup>n</sup> ndudú-xi sá díú tē Pèlú, te ní cudí<sup>n</sup> víhí iní-xi, dico ñá ní nacaá<sup>n</sup>-xi yuyèhe. Te ní quene cunu-xi cuáhá<sup>n</sup> ngúñaha-xi xii-yu sá nútni tē Pèlú yuyèhe ndaa quehé. <sup>15</sup> Te

ñá ní sàndáá iní-yu tñuhu ní cáhá<sup>n</sup>-xi, te xăhă<sup>n</sup>-yu xii-xi:

—¡Ná tñuhu vîhi cáhá<sup>n</sup>-õ<sup>n</sup> xíchí lùcú! —càchí-yu xăhă<sup>n</sup>-yu.

Te xăha<sup>n</sup>-xi să ndáá nútni-dé, te xăhă<sup>n</sup>-yu:

—Ñá díú tē Pèlú chi espíritú sá xító ñaha xii-dé cúú să càhá<sup>n</sup> —càchí-yu xăhă<sup>n</sup>-yu xii-xi.

<sup>16</sup> Te òré duca<sup>n</sup> xñtnáhá-yu, te té Pèlú ní dácásá<sup>n</sup> tùcu-dé yuyèhe. Te ní sáhá<sup>n</sup>-yu ní nacaá<sup>n</sup>-yu yuyèhe, te ní xiní-yu sá díú tē Pèlú, te ní cuñúhu vîhí-yu. <sup>17</sup> Te ní quide-dé ndaha-dé núu-yu cuèndá cadí-yu yuhú-yu. Te ní ngúita-dé ní cani-dé cuèndú nàcuáa ní quide ñaha Yă Ndiöxí xii-dé sá ní dácăcu ñaha ì<sup>n</sup> espíritú xínú cuèchi núú-gă xii-dé vecaá, te ní xăha<sup>n</sup>-dě xií-yu:

—Cúu-ndo tē Jàcobó ndihí dava-gă ñăyiu sàndáá iní tñuhu Jèsús nàcuáa ní quide ñaha Yă Ndiöxí xii-í —càchí-dé xăha<sup>n</sup>-dě xií-yu.

Te sá ní dúcá<sup>n</sup> ñi xăha<sup>n</sup>-dě, te ní quee-dé cuáhá<sup>n</sup>-dé ñngá xichi.

<sup>18</sup> Te sá ní túndaá, te ní ngúita ncha sandàdú càhá<sup>n</sup> ì<sup>n</sup> càhá<sup>n</sup> ì<sup>n</sup>-güedé, te xñtnaha-güedé:

—Ñá túú-gă té Pèlú yíhí vècaá, ¿te nása cada-o-í? —càchí-güedé xñtnaha-güedé.

<sup>19</sup> Te té Hèrodés ní tendaha-dě titñi sandàdú cuáhá<sup>n</sup>-güedé cuánúndúcú ñaha-güedé, te ñá ní năníhí ñáhá-güedé xii-dé. Te dătnùní ní cana-dé sandàdú cue tē ní xindeé ñáhá xii tē Pèlú, te ní tenà ñáhá-dě xii-güedé, te ní xăha<sup>n</sup>-dě xii dava-gă cue sandàdú-dé:

—Cahni-ndo cuè tē-á<sup>n</sup> —càchí té Hèrodés xăha<sup>n</sup>-dě.

Te dătnùní ní quee té Hèrodés distrítú Jùdeá cuáhá<sup>n</sup>-dé ñuú Cèsareá, yàcá<sup>n</sup> ní ngúndecu-dé.

### *Ní xíhí té Hèrodés*

<sup>20</sup> Té Hèrodés ní cudéé<sup>n</sup>-dě núú ñăyiu ñuú Tirú ndihí núú ñăyiu ñuú Sidón. Te xía<sup>n</sup> ní ndatnúhu-yu ní cuu ì<sup>n</sup> nuu tñuhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndihí ñáhá-yu xii-dé, te ní ndatnúhu ndihí-yu té Blástú. Te tē-á<sup>n</sup> cúú-dě chiu<sup>n</sup> quide-dé núú tē Hèrodés, te ní chindee tñuhu ñaha-dě xií-yu, chi ní cáhá<sup>n</sup> ndáhú-yu núú tē Hèrodés sá và cádá ùhú ñáhá-dě xií-yu. Te

duca<sup>n</sup> nǐ quidé-yu cuendá ñuú té Hèrodés-án quée sǎ xéxi-yu. <sup>21</sup> Te ní xáha<sup>n</sup> tē Hèrodés ná nduu quíhí<sup>n</sup>-yu ndatnúhu ndihí ñaha-dě xií-yu, te nduu-ǎ<sup>n</sup> nǐ quíunuu-dé ñ<sup>n</sup> dóo vǎha, ñ<sup>n</sup> sá sácuíhnu tée tàxi tnuní. Te ní ngóo-dé núú xilé váha, xilé sá sácōo nchihí tée tàxi tnuní, te ní ngüíta-dé ní cáhá<sup>n</sup> sàhú-dé dóho-yu. <sup>22</sup> Te uu<sup>n</sup>ni ní cuáá-yu te càchí-yu:

—¡Tée-a càhá<sup>n</sup>-dé dico ñá díú tēe ñuyíú-a cùu-dé chi ndiöxí cúu-dě! —càchí-yu xǐtnàhá-yu.

<sup>23</sup> Te ñuú-ni òr-é-á<sup>n</sup> nǐ yáha ñ<sup>n</sup> espíritú xínú cuèchi núú Yá Ndiöxí, te ní sáñaha-xi cuéhé xii té Hèrodés. Te duca<sup>n</sup> nǐ tnahá-dé chi mee-dě ñá ní xáha<sup>n</sup>-dē sá ñáyiú cùu-dé, te ní cáhá<sup>n</sup>-yu sá ndiöxí cúu-dě. Te nchìto-gá-dé ní sanú ñáhá tìndácú xii-dé, te dàtnùní ní xíhí-dé.

<sup>24</sup> Te ío tìtní xichi ní sáhá<sup>n</sup> ñáyiú sàndáá iní tnúhu Yá Ndiöxí ní cáhá<sup>n</sup>-yu tnúhu-gá, te ío chítú-yu ní sàndáá iní-yu tnúhu-gá.

<sup>25</sup> Te té Bèe ndihí té Sàulú ní ndihí chiùn-güedé, te ní ndee-güedé ñuú Jerusálén cuáhá<sup>n</sup>-güedé ndihí té Juáá, àdi Mácú chi úú ñuú-dé.

## 13

*Té Bèe ndihí té Sàulú cuáhá<sup>n</sup>-güedé dácuàha-güedé ñáyiú tnúhu Yá Ndiöxí nchaa ñuú xícá*

<sup>1</sup> Te ñuú Antiòquia ndécú ñ<sup>n</sup> úú cue tée càhá<sup>n</sup> tnúhu Yá Ndiöxí núú nchaa ñáyiú ní sàndáá iní-xi tnúhu-gá. Te ndècu tucu ñ<sup>n</sup> úú cue tée cùu mestrú dácuàha ñaha-güedé xií-yu tnúhu-gá. ñ<sup>n</sup>-dé nání-dě Bèe, te ñ<sup>n</sup>-dé nání-dě Xímú, te té Xímú-á<sup>n</sup> xáha<sup>n</sup>-güedé Nègrú chi tnuu-dě. Te ñngá-dé nání-dě Lùciú, te tée-á<sup>n</sup> cúu-dě tée ñuú Cirené. Te ñngá-dé nání-dě Sàulú, te ñngá tucu-dé nání-dě Manàén. Te té Manàén-á<sup>n</sup> ndihí té Hèrodés tée cùu gobiernú Galileá ío váha ní xóo cáhá<sup>n</sup> ndihí tñaha-güedé cútnàhá ní cuu líhli-güedé. <sup>2</sup> Te ñ<sup>n</sup> nduu ñá túú nǎ ní xèxi ñáyiú ní sàndáá iní tnúhu Yá Ndiöxí cuendá mee-ni-gǎ ní cáhá<sup>n</sup> ndihí-yu, te ní xáha<sup>n</sup> Espíritú Yá Ndiöxí xií-yu:

—Tendaha-ndo tē Bèe ndihí té Sàulú quíhí<sup>n</sup>-güedé dava-gá ñuú cada-güedé chiùn

tahu-í, chi duca<sup>n</sup> cuíní-í cunduu —càchí Espíritú-gá xáha<sup>n</sup>-xi xií-yu.

<sup>3</sup> Te ní cáhá<sup>n</sup> ndihí tucú-yu Yá Ndiöxí, te ñá túú tñahí ná ní xèxi tucú-yu, te ní sacá<sup>n</sup> ndodo-güedé ndaha-güedé díquí tē Bèe ndihí té Sàulú. Te sátá dúcá<sup>n</sup> nǐ quide-güedé, te ní quide ndee iní ñáhá-yu xii-güedé.

*Té Bèe ndihí té Sàulú cuáhá<sup>n</sup>-güedé distritú Chìpré cáhá<sup>n</sup>-güedé tnúhu Yá Ndiöxí*

<sup>4</sup> Te té Bèe ndihí té Sàulú ní quee-güedé cuáhá<sup>n</sup>-güedé cuendá duca<sup>n</sup> cuíní Espíritú Yá Ndiöxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcá<sup>n</sup> ní quée-güedé bàrcú cuáhá<sup>n</sup>-güedé distritú Chìpré. Te ñuú-á<sup>n</sup> cáá xití làmár chi ndècu ñuhu yichí xití ndute.

<sup>5</sup> Te ní quexìo-güedé meí ñuú Salàminá, te ní quene-güedé bàrcú, te ní xica-güedé cuáhá<sup>n</sup>-güedé nchaa veñúhu ñáyiú isràél càhá<sup>n</sup>-güedé tnúhu Yá Ndiöxí. Te cuáhá<sup>n</sup> ndihí-güedé té Juáá cuendá chindee ñaha-dé xii-güedé. <sup>6</sup> Te ní tñi-güedé ichi cuáhá<sup>n</sup>-güedé ñuú Páfós cáá ndaa ñngá xio Chìpré, te yàcá<sup>n</sup> ní naníhí tñahá-güedé ndihí ñ<sup>n</sup> tée isràél nání-dě Barjèsús, te tée-á<sup>n</sup> xíní-dé cada ndùu-dé, te càchí-dé sá càhá<sup>n</sup>-dé tnúhu Yá Ndiöxí dico ñá ndàá.

<sup>7</sup> Te tée-á<sup>n</sup> quidé chiùn-dé ndihí té Sèrgiú, àdi Páblú chi úú ñuú-dé, te cùu-dé gobiernú Chìpré, te ío túha-dé. Te ní cana-dé té Bèe ndihí té Sàulú, chi cuíní-dé cundedóho-dé tnúhu Yá Ndiöxí. <sup>8</sup> Te tée quide nduu-á<sup>n</sup> ñá ní dàña-dé cáhá<sup>n</sup>-güedé tnúhu-gá, chi ñá ní cuíní-dé sá tēe cùu gobiernú-á<sup>n</sup> tuha-dé ichi Yá Ndiöxí. Te duca<sup>n</sup> nǐ quide té Barjèsús, tēe xáha<sup>n</sup>-güedé Èlimás. <sup>9</sup> Te tñahá tucu té Sàulú ndécú úú ñuú-dé chi xáha<sup>n</sup> tùcu-güedé Páblú, te ndècu ndihí-dé Espíritú Yá Ndiöxí. Te ní xíndéhé ñí ñáhá-dě xii tēe quide nduu-á<sup>n</sup>.

<sup>10</sup> Te ní xáha<sup>n</sup>-dē:

—Yòhó, chi dàtná quidé yùcu ñávàha quide-n chi mee-ni dándahú-n ñáyiú. Yòhó cúu-n dēhe sácuíhná, chi nchaa tnúhu váha cuíní Yá Ndiöxí cáhá<sup>n</sup>-yu, te yòhó ñá dáñá-n. <sup>11</sup> Te vitna quíní-n nàcuáa cunduu, chi taxi Yá Ndiöxí ñ<sup>n</sup> castiú xii-n chi vá cútnùní-gá núú-n càca cuu-n ñ<sup>n</sup> úú nduu —càchí-dé xáha<sup>n</sup>-dē xii tēe quide nduu-á<sup>n</sup>.



Te òré duca<sup>n</sup> nǐ xáha<sup>n</sup> tǎ Pǎblú xii-dé, te òré-ni ní cuaa-dé, te ñá túú ní cùtnuní tnahí-gá núu-dě, te ní xóo nducu-nǎ-dé ñáyiú ní xóo cuita nehe ñaha xii-dé. <sup>12</sup> Te tée cùu gobiernú ní xiní-dé nàcuáa ní quide té Pǎblú, te ío ní cuñúhu-dé. Te ní tnahá iní-dé tnúhu Jèsús, núu xǎ<sup>n</sup> ní sándáa iní-dé.

*Té Pǎblú ndihi té Bèé ndécú-güedě ñuú Antiòquia Pìsidiá*

<sup>13</sup> Te té Pǎblú ndihi dava-gá cue tée xica cuu ndihi-dé ní quee-güedé bàrcú, te ní quee-güedé ñuú Páfós cuáhá<sup>n</sup>-güedé ñuú Pèrgé, te ñuú-á<sup>n</sup> yíndèhu-xi distritú Pànfilíá. Te té Juàá ní nacuico-dě ní dándóo ñaha-dě xii-güedé cuánuhú-dé ñuú Jerusalén. <sup>14</sup> Te dava-gá-güedé ní quee-güedé ñuú Pèrgé cuáhá<sup>n</sup>-güedé ñuú Antiòquia, te Pìsidiá yíndàha-xi ñuú-á<sup>n</sup>. Te nduu xíndetatú-yu, te ní sáhá<sup>n</sup>-güedé veñúhu ñáyiú isràél, te ní ngóo-güedé xití veñúhu. <sup>15</sup> Te cue tée ndècu veñúhu ní quehe<sup>n</sup>-güedé tutú yódó tnùní nchaa tnúhu sá nǐ chídó tnùní ndíi Moisés ndihi tutú yódó tnùní nchaa tnúhu sá nǐ chídó tnùní dava-gá cue tée ní xóo cáhá<sup>n</sup> tnúhu Yá Ndiòxí ndéé sanaha, te ní dácuhá-güedé ní xíndedóho cue ñáyiú, te dǎtnùní cue tée yíndaha veñúhu-á<sup>n</sup> nǐ xáha<sup>n</sup>-güedé xii té Pǎblú ndihi dava-gá-güedé:

—Nchòhó cue tée cùu ñaní tnahá-ndí, te núu cuíní-ndó cáhá<sup>n</sup>-ndó tnúhu Yá Ndiòxí, te cuu cáhá<sup>n</sup>-ndó tnavíí cuendá cutúha-yu —càchí-güedé xǎha<sup>n</sup>-güedé.

<sup>16</sup> Te té Pǎblú ní ndacuíñí-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáhá<sup>n</sup>-dé, te ní xáha<sup>n</sup>-dě:

—Te nchòhó ñáyiú quide nchaa nacuáa cáhá<sup>n</sup> Yá Ndiòxí ndihi nchaa nchòhó ñáyiú isràél, cundedóho-ndo nchàa-ndo ñ<sup>n</sup> tnúhu na cáhá<sup>n</sup>-í-a. <sup>17</sup> Te cuèi ndéé sanduu te cuèi vitna chindee ñaha-ni Yá Ndiòxí xii nchaa ñáyiú isràél, te ní nacáxi ñaha-gǎ xii-yu te ní chindee ñaha-gá cuendá cáyá-yu, chi cuíní-gá sá cúu vǎi-yu, te duca<sup>n</sup> nǐ quide-gá cútnahá ní xíndecú-yu nàció<sup>n</sup> Ègiptú. Te dǎtnùní ní dácăcu ñaha-gǎ xii-yu ñuú-á<sup>n</sup>, chi mee-gǎ nchaa ndăcu-gá quidé-gǎ. <sup>18</sup> Te ní xíndecú-yu ñ<sup>n</sup> xichi núu ñá túú tnahí sàcúndecu ñáyiú údico

cuía, te xití údico cuía-á<sup>n</sup> nǐ cundee iní-gá nchaa sá nǐ quidé-yu. <sup>19</sup> Te Yá Ndiòxí ní chindee ñaha-gá xii ñáyiú isràél, te ní dánáa-yu úsá nàció<sup>n</sup>, chi cuendá ní cuíní-gá cuu cuendá-yu ñuhú-á<sup>n</sup>. <sup>20</sup> Te dǎtnùní ní cachí Yá Ndiòxí sá díú-ní cuè tée cùchiu<sup>n</sup> taxi tnuní-güedé nchaa ñáyiú, te duca<sup>n</sup> nǐ quide-güedé dǎtná cúmí ciendú dava cuía. Te sátá xǎ<sup>n</sup>, te ní xíndecu té Sàmuel tée ní cáhá<sup>n</sup> tnúhu Yá Ndiòxí. <sup>21</sup> Te dàvǎ-á<sup>n</sup> nǐ cuíní ñáyiú isràél sá cündecu ñ<sup>n</sup> tée quíndaha ñaha-dé xii-yu, te Yá Ndiòxí ní cachí-gá sá tǎ Sàul quíndaha-dě-yu, te tée-á<sup>n</sup> nǐ cuu-dé déhe té Cís, te té Benjamín tée ní xíndecu ndéé sanaha-gǎ ní cuu ñaní tnahá-dě. Te té Sàul ní xíndaha-dě ñáyiú údico cuía. <sup>22</sup> Te Yá Ndiòxí ñá ní cuíní-gá cundecu-ni-dé quíndaha-dě ñáyiú, chi ní cuíní-gá sá tǎ Dàvíí ndíhu ndaha-dě cue ñáyiú isràél, te ní cachí-gá: “Ío váha ní tnahá iní-í nàcuáa quide té Dàvíí déhe tée Isàí, te cada-dé nchaa nàcuáa cúñaha-í xii-dé”, duha ní cachí Yá Ndiòxí —càchí té Pǎblú xǎha<sup>n</sup>-dě xii-yu.

<sup>23</sup> Te ní xáha<sup>n</sup> tucu té Pǎblú:

—Díu-ni ñaní tnahá tǎ Dàvíí cúu Jèsús. Te Yá Ndiòxí ní tendaha-gǎ Jèsús ní quixi-gá ñuyú-a cuendá nchaa ñáyiú isràél ná quíndáa iní ñáhá xii Jesús naníhí tǎhú-yu, chi duca<sup>n</sup> nǐ cachí Yá Ndiòxí cunduu. <sup>24</sup> Te cútnahá vátá ngüíta-gá Jèsús cáhá<sup>n</sup>-gá tnúhu Yá Ndiòxí, te ní cáhá<sup>n</sup> té Juàá núu ñáyiú isràél sá xíní ñuhu-xi dañá-yu nchaa sá cuéhé sá dúhá, te cuanduté-yu. <sup>25</sup> Te sa ta cùyatni-ni-gá cuú-dé, te ní xáha<sup>n</sup>-dě xii-yu: “Nchòhó càchí-ndó sǎ yǔhú cúu-í Crístú Yáá ndétú-ndó dico ñáhá, chi ñá díú yǔhú cúu-í Crístú, chi davitna quixi Crístú Yáá tendaha Yá Ndiòxí quixi ñuyú-a. Te yúhú cúu-í ñ<sup>n</sup> tée duu<sup>n</sup> duu<sup>n</sup> ñá túú tàú nandaxi cuèdicó chǎu-gá dico quide-í chiú<sup>n</sup>-gá”, duha ní cáhá<sup>n</sup> te Juàá —càchí té Pǎblú xǎha<sup>n</sup>-dě xii-yu.

<sup>26</sup> Te ní xáha<sup>n</sup> tucu té Pǎblú:

—Cundedóho tucu-ndo ñngá tnúhu na cáhá<sup>n</sup>-í. Nchòhó tnahá-ndó cùu-ndo ñaní tnahá ndíi Abrahám, te xíní-ndó sǎ Yá Ndiòxí cúnú-gá. Te díu-ni-gá cuíní-gá sá ncháa-ndó cundedóho-ndo tnúhu-gá, chi cùu-xi tnúhu sá cáhá<sup>n</sup> nàcuáa naníhí tǎhú-ndó. <sup>27</sup> Te nchaa ñáyiú ndècu ñuú



Jerusalén ndihi nchaa cue té cùnū ñá ní cùtnūnī iní-yu ndihi-güedé sá Yă Ndiöxí ní tendaha-gă Jèsús ní quixi-gă ñuyíú-a. Te ñá ní sãha-yu cuendá sá díú Jèsús ní cacunehe cue té ní cáhá<sup>n</sup> tnúhu Yă Ndiöxí ndéé sanaha cuēi ní dácúáhă-yu tnúhu-gă veñúhu-yu ndi tnahá úná nduu, nduu ndetàtú-yu. Te ní cachí-yu sá ndècuéchi Jèsús, te ní xáhă<sup>n</sup>-yu sá cáhni ñàha-güedé xii-gă. Te xiă<sup>n</sup> sa ñaha cue té ní xóo cáhá<sup>n</sup> tnúhu-gă ndéé sanaha sá dúcá<sup>n</sup> cãhá<sup>n</sup>-yu. <sup>28</sup> Te cuēi ñá túú nă ní quide-gă te ní xáhă<sup>n</sup>-yu xii té Pilatú té cùu gobiernú sá táuchiu<sup>n</sup>-dé cahni ñaha-güedé xii-gă. <sup>29</sup> Te xiă<sup>n</sup> núu ní sata caa ñaha-güedé xii-gă núu cùrúxí. Te ní quide-güedé nchaa nàcuáa ní chídó tnùnī cue té ní cáhá<sup>n</sup> tnúhu Yă Ndiöxí ndéé sanaha. Te sátá nì xihí-gă, te ní nunehe ñaha-güedé xii-gă núu cùrúxí, te nchìdo ñaha-güedé cuáhă<sup>n</sup>, te ní chihi ñaha-güedé ì<sup>n</sup> xití yaú. <sup>30</sup> Te Yă Ndiöxí ní dándótó-gă Jèsús. <sup>31</sup> Te titní xito ní sáhă<sup>n</sup> Jèsús núu ndécú ñáyiū ní xica cuu ndihi-gă, ñáyiū ní quee distritú Galileá ní sáhă<sup>n</sup>-yu ndihi-gă ñuú Jerusalén. Te vitna nchaa ñáyiū-á<sup>n</sup> xáhă<sup>n</sup>-yu xii dava-gă ñáyiū isràel nàcuáa ní cuu ní ndoto-gă.

<sup>32</sup> Te nchúhú cãhá<sup>n</sup>-ndí nàcuáa cada-ndo nánihí tãhú-ndó, chi Yă Ndiöxí ní xáhă<sup>n</sup>-gă xii cue ñani tñáhă-ó nì xindecu ndéé sanaha sá téndaha-gă Déhe-gă Jèsús quixi-gă ñuyíú-a. <sup>33</sup> Te ní quixi-gă ní xihí-gă, te ní dándótó ñaha Yă Ndiöxí xii-gă, te núu xiă<sup>n</sup> naníhí tãhú-ó núu na quindáá iní-ó-gă. Te ì<sup>n</sup> té ní cáhá<sup>n</sup> tnúhu Yă Ndiöxí ndéé sanaha ní chídó tnùnī-dé núu sãlmú cúú ùú nàcuáa ní cáhá<sup>n</sup> Yă Ndiöxí ní xáhă<sup>n</sup>-gă xii Déhe-gă, te duha ní xáhă<sup>n</sup>-gă: “Yòhó cúú-n Déhe-í, te vitna cutnùnī iní ñáyiū sá yùhú cúú-í Tãtá-n”, duha ní xáhă<sup>n</sup>-gă xii Jèsús. Te ñu-ni duca<sup>n</sup> nì chídó tnùnī té ní cáhá<sup>n</sup> tnúhu-gă ndéé sanaha. <sup>34</sup> Te ìngá xichi tucu núu tütú-gă ní chídó tnùnī ì<sup>n</sup> té ní xindecu ndéé sanaha nàcuáa ní xáhă<sup>n</sup>-gă xii Déhe-gă, te duha ní xáhă<sup>n</sup>-gă: “Mee-ni sã vãha cada ñaha-í dàtná ní xii-í té Dávíí”, duha ní xáhă<sup>n</sup>-gă. Te duca<sup>n</sup> nì chídó tnùnī té ní xindecu ndéé sanaha nàcuáa ní cáhá<sup>n</sup> Yă Ndiöxí, chi òré ní xihí Jèsús te ní dándótó ñaha-gă cuendá sá vã tíú yìqui cuñú-gă. <sup>35</sup> Te núu xiă<sup>n</sup> duha ní chídó tnùnī ì<sup>n</sup> té

ní xindecu ndéé sanaha núu librú Sãlmú nàcuáa ní xáhă<sup>n</sup>-dē xii-gă: “Vá dáñá-n sã tíú yìqui cuñú Déhe-n chi ío vãha quide-gă”, duha ní chídó tnùnī té ní xindecu ndéé sanaha —cächí té Pãblú xáhă<sup>n</sup>-dē xii-yu.

<sup>36</sup> Te xáhă<sup>n</sup> tucu-dé:

—Te té Dávíí ní quide-dé nchaa chiū<sup>n</sup> ní tãhú Yă Ndiöxí cada-dé, te dàtnùnī ní xihí-dé. Te ní chindúxi ñaha-güedé xii-dé yatni nàcuáa yìndúxi cue ñani tñáhă-dē ndéé sanaha-gă, te xiă<sup>n</sup> nì téhyú yìqui cuñú-dé. <sup>37</sup> Te Jèsús chi ñá ní téhyú yìqui cuñú-gă, chi ní dándótó ñaha Yă Ndiöxí xii-gă. <sup>38</sup> Te cuñí-í cachí tnúhu-í xii-ndo cuendá cutnùnī iní-ndo nchaa-ndo sá cadá cãhnu iní Yă Ndiöxí nchaa cuéchi-o, chi ní xihí Jèsús cuendá naníhí tãhú-ó. <sup>39</sup> Te nchaa ñáyiū na quindáá iní ñáhă xii Jesús te cada cãhnu iní-gă nchaa sá ñà túú vãha ní quidé-yu, chi núu mee-ni tnúhu ní chídó tnùnī ndíi Moisés ná quindáá iní-yu te vá naníhí tãhú-yu. <sup>40-41</sup> Te ío coto-ndo mēe-ndo cuendá sá vã yãha-ndo dàtná ní cachí Yă Ndiöxí yãha cue ñáyiū ñá túú ní quide vãha ní xindecu ndéé sanaha. Te nàcuáa ní cáhá<sup>n</sup>-gă ní chídó tnùnī ì<sup>n</sup> té ní cáhá<sup>n</sup> tnúhu-gă ndéé sanaha, te duha ní xáhă<sup>n</sup>-gă xii-yu dává-á<sup>n</sup>:

Cundedóho nchaa nchòhó ñáyiū cuèhé yuhu-xi na cãhá<sup>n</sup>-í ì<sup>n</sup> tnúhu te quini-ndo nă cuñúhu-ndo, yúhú quidè-í vài núú sã ío vãha vitna ndècu-ndo ñuyíú-a,

te cuēi na còo ñáyiū cachí tnúhu xii-ndo nàcuáa ndúu nchaa sá vãha-á<sup>n</sup>, dico nchòhó vá quindáá iní-ndó,

te sá dúcá<sup>n</sup> cada-ndo vá quindáá iní-ndó, te dàcuíta nihnu-ndo mēe-ndo.

Duha ní xáhă<sup>n</sup>-gă xii-yu te duca<sup>n</sup> nì chídó tnùnī té ní cáhá<sup>n</sup> tnúhu-gă ndéé sanaha —cächí té Pãblú xáhă<sup>n</sup>-dē xii-yu.

<sup>42</sup> Te òré ní ndee té Pãblú veñúhu ñáyiū isràel ndihi cue té xica cuu ndihi-dé, te ní cáhá<sup>n</sup> ndàhú ñáyiū yìhi veñúhu núú-dē sá quihí<sup>n</sup>-dé núú ùná nduu, te ñu-ni tnúhu ní cáhá<sup>n</sup>-dé cáhá<sup>n</sup> tucu-dé òré quexìo-dé.

<sup>43</sup> Te sátá nì túhú veñúhu-yu, te vài ñáyiū isràel ndihi ñáyiū ní chitnahá ñáhă xii-yu nchìcú<sup>n</sup> nihnu quide nàcuáa quidé-yu cãhá<sup>n</sup> ndihí-yu Yă Ndiöxí cuáhă<sup>n</sup> ndihí-yu té Pãblú

ndihi té Bèé. Te ní xáha<sup>n</sup>-güedě xií-yu sá vǎ dáñá ndèé-yu canchicú<sup>n</sup> nihnú-yu tnúhu sá càhá<sup>n</sup> nàcuáa quide Yá Ndiöxí sá cúú-xí-yu.

<sup>44</sup> Te núú ùná nduu, nduu ndètatú-yu ní quexìo vai vihi ñáyiú, chi nihìi ñuú ní quexìo ndedóho-yu tnúhu Yá Ndiöxí. <sup>45</sup> Te cuèndá sá ìo vǎi ñáyiú ní quexìo, núú xiǎ<sup>n</sup> ní cuu cuédú ìní ñáhá ñáyiú isràél xii té Pǎblú, te ní xícuèhé ñáhǎ-yu xii-dé. Te ní xáhǎ<sup>n</sup>-yu xii-dé sá dándàhú ñáhá-dě xií-yu ndihi tnúhu càhá<sup>n</sup>-dé. <sup>46</sup> Te té Pǎblú ndihi té Bèé ñá túú ní yùhú ñáhá-güedě xií-yu. Te ní xáha<sup>n</sup>-güedě:

—Xìni ñuhu-xi díhna-gá nchòhó ñáyiú isràél càhá<sup>n</sup> ndihi-ndí tnúhu Yá Ndiöxí, te mee-ndo ñǎ cuìní-ndo cùndedóho-ndo. Te sá dúcá<sup>n</sup> quide-ndo, te vǎ nánihí tǎhú-ndo, te ni vǎ càhá<sup>n</sup>-gá-ndí tnúhu Yá Ndiöxí núú-ndo, dico càhá<sup>n</sup>-ndí núú dàva-gá ñáyiú cuèi ñá díú ñáyiú isràél cúú-yu, <sup>47</sup> chi duca<sup>n</sup> ñǎ táuchíú<sup>n</sup> Yá Ndiöxí cada-ndí. Te ní cachí-gá:

Cuìní-í cundecu-ndo dàtná ì<sup>n</sup> tée yòtnuú ñuhú cundecu-ndo càhá<sup>n</sup>-ndo tnúhu-í núú nchàa ñáyiú ñá túú cùndihi-ndo ñáyiú ndècu nihii ñuyúú, te naníhí tǎhú-yu, duha ní càhá<sup>n</sup>-gá —cachí té Pǎblú ndihi té Bèé xáha<sup>n</sup>-güedě xií-yu.

<sup>48</sup> Te ñáyiú ñá túú cùu ñáyiú isràél ìo ní cudíi ìní-yu sá dúcá<sup>n</sup> ñǎ càhá<sup>n</sup>-güedé, te ní xítnáhá-yu sá ìo váha cuáhá<sup>n</sup> tnúhu Yá Ndiöxí. Te mee Yá Ndiöxí sa nàha-gá nándi cùu ñáyiú naníhí tǎhú, te ñu-ni ñáyiú-á<sup>n</sup> ñǎ sándáá ìní-yu. <sup>49</sup> Te nchaa xichi xiǎ<sup>n</sup> ñǎ sáhá<sup>n</sup>-yu ní càhá<sup>n</sup>-yu tnúhu-gá. <sup>50</sup> Te cue tée isràél ní ndatnúhu-güedé ndihi cue tée cùnuu, ndihi cue ñáyiú dìhí cùnùu, te ñáyiú dìhí-á<sup>n</sup> ñá túú tnàhí cùmáñi-yu veñúhu. Te ní xáha<sup>n</sup>-güedě sá cadá ùhú-yu té Pǎblú ndihi té Bèé, te dàtnùní cuícú<sup>n</sup> ñáhǎ-yu xii-güedé, te duca<sup>n</sup> ñǎ quidé-yu. <sup>51</sup> Te ní casa<sup>n</sup> ñuhu té Pǎblú ndihi té Bèé sáhá-güedé ní naquidi-güedé tícá chúhmá ñǎ tñi sáhá-güedé. Te duca<sup>n</sup> ñǎ quide-güedé cuèndá cutnùní ìní-yu sá ñá túú ní quide váha-yu. Te dàtnùní ní quee-güedé cuáhá<sup>n</sup>-güedé ñuú Ìconiú. <sup>52</sup> Te ñáyiú ní sándáá ìní-xi tnúhu Jèsús ìo váha

ní cuu ìní-yu cuèndá sá ñǎ naníhí tǎhú-yu, te nchaa-yu sa ndècu ndihí-yu Espíritú Yá Ndiöxí.

## 14

*Té Pǎblú ndihi té Bèé ndécú-güedě ñuú Ìconiú*

<sup>1</sup> Te ní quexìo té Pǎblú ndihi té Bèé ñuú Ìconiú. Te ní sáhá<sup>n</sup>-güedé veñúhu ñáyiú isràél, te ìo váha ní càhá<sup>n</sup>-güedé tnúhu Yá Ndiöxí, te vǎi ñáyiú isràél ndihi ñáyiú ñá túú cùu ñáyiú isràél ní sándáá ìní-yu tnúhu-gá. <sup>2</sup> Te dava ñáyiú isràél ñá ní sándáá ìní-yu, te ní càhá<sup>n</sup> cuèhé-yu cuèndá té Pǎblú ndihi té Bèé cuèndá sá vǎ quèndáá ìní ñáyiú ñá túú cùu ñáyiú isràél. <sup>3</sup> Te ní xíndecu-güedé títñi nduu, te ñá túú tnàhí ni yùhú-güedé ní dácuáhá-güedé ñáyiú tnúhu Yá Ndiöxí. Te mee-gǎ ní chindee ñàha-gá ní quide-güedé títñi núú sǎ vǎ yòo tnàhí ndàcu cada, te ìo ní cuñúhu-yu. Te duca<sup>n</sup> ñǎ quide-gá cuèndá cutnùní ìní-yu sá ndàá càhá<sup>n</sup>-güedé sá mée-gǎ ìo cùu ìní ñáhá-gǎ xií-yu, te naníhí tǎhú-yu núu na quèndáá ìní-yu tnúhu-gá. <sup>4</sup> Te ní quee dava ñáyiú ñuú Ìconiú, davá-yu cùndihí-yu ñáyiú isràél ñáyiú ñá túú sándáá ìní tnúhu Jèsús. Te davá-yu cùndihí-yu cue tée ní táuchíú<sup>n</sup> Jèsús càhá<sup>n</sup> tnúhu-gá. <sup>5</sup> Te ñáyiú isràél ndihi dava-gá ñáyiú ñá túú sándáá ìní-xi ní cuu ì<sup>n</sup>nuú-yu ndihi cue tée cùnuu sá cáni-yu-güedé, te cuáha yúú ñáhǎ-yu xii-güedé. <sup>6</sup> Te té Pǎblú ndihi té Bèé ní níhí-güedé tnúhu sá cuìní-yu canihá-yu, núu xiǎ<sup>n</sup> dayuhu ñǎ quee-güedé cuáhá<sup>n</sup>-güedé ñuú Lìstrá ndihi ñuú Dèrbé. Te ndi ndùú ñuú-á<sup>n</sup> yíndèhu-xi Licaoniá. Te ní sáhá<sup>n</sup>-güedé dava-gá ñuú lìhli càa yatni xiǎ<sup>n</sup>. <sup>7</sup> Te nchaa ñuú-á<sup>n</sup> ñǎ càhá<sup>n</sup>-güedé tnúhu Jèsús.

*Ñuú Lìstrá ní sáhayúú ñáhǎ-yu xii té Pǎblú*

<sup>8</sup> Te ñuú Lìstrá ndécú ì<sup>n</sup> tée yacua, mee-ni nùcòo-dé chi duca<sup>n</sup> tnàhí càa-dé ní cacu-dé. <sup>9</sup> Te ndèdóho-dé tnúhu càhá<sup>n</sup> té Pǎblú, te ní cutnùní ìní té Pǎblú sá ìo sándáá ìní tée yacua-á<sup>n</sup> sǎ Yá Ndiöxí cada tátna ñàha-gǎ xii-dé, núu xiǎ<sup>n</sup> ní xíndéhé ñàha váha té Pǎblú xii-dé. <sup>10</sup> Te té Pǎblú ní càhá<sup>n</sup> níhi-dé, te ní xáha<sup>n</sup>-dě:

—Ndacuíñí cunutñí váha-n —càchí-dé xáha<sup>n</sup>-dě.

Te ní ndacuíñí cunu-dé te ní xica-ni-dé. **11** Te òré ní xiní-yu sá tē Pāblú ní quide tátna-dé tēe yacua-ǎ<sup>n</sup>, te nchaá-yu ní cáhá<sup>n</sup>-yu tnúhu mēe-yu tnúhu Licàoniá. Te ní cáhá<sup>n</sup> níhi-yu, te xitnàhá-yu:

—Cue tēe-ǎ<sup>n</sup> sànuu sá ñáiyu cùu-güedé dico ñáhá, chi ndiöxí cúu-güedé te ní quexiö-güedé ñuyíu-a —càchí-yu xitnàhá-yu.

**12** Te ní cachí-yu sá tē Bèe cúu-dē ndiöxí dánàni-yu Jüpitér, te tē Pāblú cúu-dē ndiöxí dánàni-yu Mèrcuriú, chi cuendá tēe-ǎ<sup>n</sup> cúu-dē tēe cáhá<sup>n</sup>. **13** Te càa ñ<sup>n</sup> veñúhu yuhu ñúú-ǎ<sup>n</sup> núu quide càhnú-yu ndiöxí sá dánàni-yu Jüpitér. Te dútú yíndàha veñúhu-ǎ<sup>n</sup> ndécá-dē ñ<sup>n</sup> úú ndicutu cuáhá<sup>n</sup> quehé veñúhu, te ñúhu itá dúcú<sup>n</sup>-güedi. Te cue quití-ǎ<sup>n</sup> cahni-dé cada càhnu-dé ndihí-yu tē Bèe ndihí tē Pāblú ní cùu, chi duca<sup>n</sup> quidé-yu quide cahnú-yu ndiöxí-yu. **14** Te tē Bèe ndihí tē Pāblú ní níhi-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuendá cutnùní iní-yu sá ñā tnàhá iní-güedé nàcuáa sàni iní-yu cadá-yu. Te xìnu-güedé cuánguihu-güedé tnuú-yu, te níhi ní cáhá<sup>n</sup>-güedé, te xáha<sup>n</sup>-güedé:

**15** —¿Ná cuendá duca<sup>n</sup> cuiní-ndó càda-ndo? Te diu-ni tnàha ñáiyu-ndo cùu-ndí, dicó-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vā cadá-gá-ndó nàcuáa quide-ndo, te quindáá iní-ndó Yá Ndiöxí, chi ñ<sup>n</sup>di-ni Yá Ndiöxí ndécú. Te diu-gá ní cadúha-gá andíu ndihí ñuyíu-a ndihí lámár ndihí nchaandi túhú sá ío ñuyíu-a. **16** Te ndéé sanaha ñí dáñá Yá Ndiöxí ní quidé-yu nàcuáa cuáhá<sup>n</sup> iní mēe-yu. **17** Te ní xóo cada-gá sá vāha cuendá cutnùní iní-yu sá ío váha iní-gá. Te diu-gá dácùu<sup>n</sup>-gá dáu, te tàxi-gá sá nchító-ó chi xìto-gá nchaa tatá xítú-ó, te xiǎ<sup>n</sup> cúdíí iní-ó ndècu-o ñuyíu-a —càchí tē Pāblú ndihí tē Bèe xáha<sup>n</sup>-güedé xii-yu.

**18** Te cuēi duca<sup>n</sup> ñí xáha<sup>n</sup>-güedé nchaa tnúhu-ǎ<sup>n</sup>, dico ío úhú ní sándáá iní-yu ñā ní sàhni-yu ndicutu-ǎ<sup>n</sup> chi cuendá duca<sup>n</sup> tnàhí quidé-yu sàhni-yu ndicutu òré quide càhnú-yu ndiöxí-yu.

**19** Te ñúú Antiòquiá ndihí ñúú Ìconiú xíndecu dava ñáiyu isràel, te ní quee-yu cuáhá<sup>n</sup>-yu ñúú Lìstrá núu ndécú tē Pāblú. Te xiǎ<sup>n</sup> ñí quexiö-yu te ní xáhǎ<sup>n</sup>-yu xii ñáiyu dii ñúú xiǎ<sup>n</sup> sá cáhni-yu tē Pāblú. Te ní sáha yúú ñáhǎ-yu xii-dé, te ní cáhǎ<sup>n</sup>-yu sá ñí xihí-dé, te ní tñi ñaha-güedé xii-dé, te tañuhu ñaha-güedé xii-dé cuáhá<sup>n</sup> ñ<sup>n</sup> xio yuhu ñúú ní sá dáquéné ñaha-güedé. **20** Te ní quexiö cue ñáiyu sándáá iní tnúhu Jèsús núu cātùu-dé-ǎ<sup>n</sup>, te ní nadúcú<sup>n</sup> ndéé ñáhǎ-yu xii-dé, te ñini xínutñi-yu-ǎ<sup>n</sup> ñí ndacóo-dé cuánuhú ndihí ñaha tucu-dé xii-yu xití ñúú. Te nduu tñéé-ǎ<sup>n</sup> ñí ndee-dé ndihí tē Bèe cuáhá<sup>n</sup>-güedé ñúú Dèrbé.

**21** Te ní cáhá<sup>n</sup>-güedé tnúhu Yá Ndiöxí ñúú-ǎ<sup>n</sup>, te ío vāi ñáiyu ní sándáá iní-yu tnúhu-gá. Te dātñùní ní quee-güedé cuáhá<sup>n</sup> tucu-güedé ñúú Lìstrá, ndihí ñúú Ìconiú, ndihí ñúú Antiòquiá. **22** Te ní xáha<sup>n</sup>-güedé xii-yu sá vā dáñá ñihnú-yu tnúhu Jèsús. Te sá dúcá<sup>n</sup> ñí cáhá<sup>n</sup>-güedé, te vñi-gá ní cudíí iní-yu cadá-yu nàcuáa cuiní Yá Ndiöxí cadá-yu, te ní xáha<sup>n</sup>-güedé:

—Dacuití cùndecu-o ñuyíu-a ndoho-o, te dātñùní duca<sup>n</sup> te nacuaca ñaha Yá Ndiöxí xii-o —càchí-güedé xáha<sup>n</sup>-güedé xii-yu.

**23** Te ní sáhá<sup>n</sup>-güedé ndi tnahá ñ<sup>n</sup> ñ<sup>n</sup> xichi núu ndécú ñáiyu dàcuaha tnúhu Yá Ndiöxí, te ní taxi ndecu-güedé cue tēe quindaha ñaha xii-yu, te ní cáhá<sup>n</sup> ndihí-güedé Yá Ndiöxí, te ñā túú tnàhí ná ní xèxi-güedé cuendá sá ñí cáhá<sup>n</sup> ndihí-güedé-gá. Te ní xáha<sup>n</sup>-güedé sá Yá Ndiöxí coto ñaha-gǎ xii-yu chi diu-ni-gá ní sándáá iní-yu.

*Té Pāblú ndihí tē Bèe cuáhá<sup>n</sup> tucu-güedé ñúú Antiòquiá Siríá*

**24-25** Te dātñùní ní quee tē Pāblú ndihí tē Bèe cuáhá<sup>n</sup>-güedé, ní yáha-güedé distritú Pisidiá. Te ní quexiö-güedé ñúú Pèrgé, xiǎ<sup>n</sup> ñí cáhá<sup>n</sup>-güedé tnúhu Jèsús. Te ñúú-ǎ<sup>n</sup> yíndèhu-xi Panfilíá. Te dātñùní cuáhá<sup>n</sup>-güedé ñúú Àtaliá. **26** Te yàcá<sup>n</sup> ní quee-güedé bàrcú cuánuhú tucu-güedé ñúú Antiòquiá. Te ñúú-ǎ<sup>n</sup> cúu-xí ñúú núu ñí xicá<sup>n</sup> táhú-yu núu Yá Ndiöxí cuendá sá chíndèe ñaha-gá xii-güedé chiu<sup>n</sup> quide-güedé. Te cuendá sá ñí ndihí chiu<sup>n</sup>-güedé nchaa ñúú núu ñí sáhá<sup>n</sup>-güedé,



núu xiǎ<sup>n</sup> cuánuhú-na-güedé. <sup>27</sup> Te ní ndexìo-güedé ñuú-á<sup>n</sup>, te ní cana-güedé nchaa ñáyiú sàndáá iní tnúhu-gá, te ní caní-güedé cuèndú núu-yu nchaa nàcuáa ní cuu núu ní sáhá<sup>n</sup>-güedé, te xáha<sup>n</sup>-güedé: “Yá Ndiöxí ío ní chindee ñàha-gá xii-ndí ní cáhá<sup>n</sup>-ndí tnúhu-gá núu ní sáhá<sup>n</sup>-ndí, te mee-gǎ ní quide sá tnàhá ñáyiú ñá túú cùu ñáyiú isràél ní xíndedóho-yu tnúhu-gá cuèndá quíndáá iní-yu”, càchí-güedé xáha<sup>n</sup>-güedé xii-yu. <sup>28</sup> Te vài nduu ní xíndecu-güedé ñuú Antiòquia ndihí nchaa ñáyiú ní sàndáá iní tnúhu Jèsús.

## 15

### *Ní natacá ñáyiú sàndáá iní tnúhu Jèsús ñuú Jerusàlén*

<sup>1</sup> Te ní quee ñ<sup>n</sup> úú cue téé distritú Jùdeá cuáhá<sup>n</sup>-güedé ñuú Antiòquia, te ní sáá-güedé, te ní xáha<sup>n</sup>-güedé xii ñáyiú sàndáá iní tnúhu Jèsús sá ñuu vá cuáha-güedé sèñá ñ<sup>n</sup> nchaa cue téé dàtná ní cachí ndí Moisés, te vá nánihí tàhú-güedé. <sup>2</sup> Te sá dúcá<sup>n</sup> ní cáhá<sup>n</sup> cue téé-á<sup>n</sup>, te ní ngüíta té Páblú ndihí té Bèé ní tenàá-güedé cue téé-á<sup>n</sup>, chi dandàhú ñáhá-güedé cuíní-güedé ní cùu. Te nchaa ñáyiú sàndáá iní tnúhu-gá ní cachí-yu sá quíhí<sup>n</sup> té Páblú ndihí té Bèé ndihí ñ<sup>n</sup> úú-gá-güedé ñuú Jerusàlén. Te yàcá<sup>n</sup> cada-güedé ñ<sup>n</sup> jùndá ndihí mee-ni cuè téé ní táuchíú<sup>n</sup> Jèsús cáhá<sup>n</sup> tnúhu-gá, ndihí cue téé yìndaha ñáyiú sàndáá iní tnúhu-gá ñuú-á<sup>n</sup>, te jùndá-á<sup>n</sup> cada ndáá-güedé tnúhu ní cáhá<sup>n</sup> cue téé ní sáá ñuú Antiòquia.

<sup>3</sup> Te nchaa ñáyiú sàndáá iní tnúhu-gá ní quide ndee iní ñáhá-yu xii-güedé, te ní tñi-güedé ichi cuáhá<sup>n</sup>-güedé. Te ní yáha-güedé distritú Fèniciá ndihí distritú Sàmariá, te yàcá<sup>n</sup> ní caní-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiöxí, te ní cudíí víhí iní nchaa ñáyiú ní xíndedóho-á<sup>n</sup>.

<sup>4</sup> Te té Páblú ndihí té Bèé ní ndexìo-güedé ñuú Jerusàlén, te ío ní cudíí iní-yu sá ní ndexìo váha-güedé. Te ndècu dava-gá cue téé ní táuchíú<sup>n</sup> Jèsús dácua<sup>n</sup> ñaha xii-yu tnúhu-gá, ndihí cue téé yìndaha ñaha xii-yu, ndihí dava-gá ñáyiú sàndáá iní tnúhu-gá, te ní caní-güedé cuèndú núu-yu nàcuáa

ní quide Yá Ndiöxí ní chindee ñàha-gá xii-güedé ní quide-güedé chù<sup>n</sup>-gá. <sup>5</sup> Te ndècu ñ<sup>n</sup> úú cue téé ní tuha ichi Yá Ndiöxí, te cue téé-á<sup>n</sup> cúu-güedé cue téé fariséú, te ní ndacuíñí-güedé, te ní xáha<sup>n</sup>-güedé:

—Dacuití xini ñuhu-xi sá cuáha-güedé sèñá ñ<sup>n</sup> cue téé cùmání cue téé ñá túú cùu ñáyiú isràél, te cùñaha-ndo sá ná cádá-güedé nchaa nàcuáa ní chídó tnùní ndí Moisés —càchí cue téé cùu fariséú-á<sup>n</sup> xáha<sup>n</sup>-güedé xii-güedé.

<sup>6</sup> Te cue téé ní táuchíú<sup>n</sup> Jèsús dácua<sup>n</sup> ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. <sup>7</sup> Te vài vihi tnúhu ní cáhá<sup>n</sup>-güedé. Te té Pèlú ní ndacuíñí-dé, te ní xáha<sup>n</sup>-dè xii-güedé:

—Nchòhó cue téé ndècu ndihí-í ichi Xítohó Jesucristú, chí cùndedóho ñ<sup>n</sup> tnúhu na càhá<sup>n</sup>-í-a. Sa nàha-ndo sá ní cachí Yá Ndiöxí sá díu-í cáhá<sup>n</sup>-í tnúhu Jèsús núu ñáyiú ñá túú cùu ñáyiú isràél cuèndá sá quíndáá iní-yu, te naníhí tàhú-yu. <sup>8</sup> Dico Yá Ndiöxí sa nàha-gá nása càa iní ñ<sup>n</sup> ñáyiú. Te cùtnuní iní-ó sá cúu iní ñáhá-gǎ xii cue ñáyiú ñá túú cùu ñáyiú isràél, chi ní sáñaha-gǎ Espiritú-gá ndécú ndihí-yu dàtná cuíní-ndó ní taxi-gá ndécú ndihí nchoo. <sup>9</sup> Chi Yá Ndiöxí ñ<sup>n</sup> nuu-ni cùu iní ñáhá-gǎ xii-o nchàa-o ndihí cue ñáyiú ñá túú cùu ñáyiú isràél, chi tnàhá-yu ní xócání-gǎ nchaa sá cuèhé sá dúhá ní xóo cadá-yu ndéé òré ní sàndáá iní-yu Jèsús. <sup>10</sup> ¿Te ná cuèndá nchòhó cuíní-ndó càda ñáyiú ní sàndáá iní tnúhu-gá ñ<sup>n</sup> sá ñá tnàhá iní-gá sá cádá-yu? Te cuíní-ndó dàndoho-ndó-yu. Te ní nchòo te ní cue ñaní tnàhá-ó ní xíndecu ndéé sanaha ñá ní ndàcú-yu cadá-yu nchaa xíá<sup>n</sup>. <sup>11</sup> Te vá dúcá<sup>n</sup> cáhá<sup>n</sup>-ndó, chi sa nàha-ndo sá Yá Ndiöxí ní cundàhú iní ñáhá-gǎ xii-o, te dío duca<sup>n</sup> ní quide-gá sá nánihí tàhú-ó nchàa-o. Te díu-ni duca<sup>n</sup> ní quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáha<sup>n</sup>-dè xii-güedé.

<sup>12</sup> Te dàtnùní té Bèé ndihí té Páblú ní ngüíta-güedé ní cáhá<sup>n</sup>-güedé, te ní xíndedóho-yu nchaa tnúhu ní cáhá<sup>n</sup>-güedé. Te ní xáha<sup>n</sup>-güedé xii-yu nàcuáa ní chindee



ñaha Yá Ndiõxí xii-güedé, te ní quide-güedé vai núú sã vã yõ tnahí ndàcu cada, te duca<sup>n</sup> te ní cutnùní iní ñáyiú ñá túú cùu ñáyiú isràél sá ndáá càhá<sup>n</sup>-güedé. <sup>13</sup> Te òré ní ndihí cuèndú ní cáhá<sup>n</sup>-güedé, te té Jàcobó ní xáha<sup>n</sup>-dë:

—Nchòhó cue téé ndècu ndihí-í ichi Xítohó Jesucristú, chí cùndèdóho ì<sup>n</sup> tnúhu na càhá<sup>n</sup>-í-a. <sup>14</sup> Té Xímú, àdi Pelú chí úú òu-dé, ní cani-dé cuèndú nàcuáa ní quide Yá Ndiõxí ndéé díhna ní dáquée dí<sup>n</sup>-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuèndá cuíní-gá chiñuhu ñàhá-yu xii-gá. <sup>15</sup> Te dàtnùní ní cáhá<sup>n</sup>-dé nàcuáa ní cáhá<sup>n</sup> Yá Ndiõxí ndéé sanaha. Te duha ní chídó tnùní cue téé ní xóo cáhá<sup>n</sup> tnúhu-gá ndéé sanaha nàcuáa ní cáhá<sup>n</sup>-gá, te duha ní cachí-gá:

<sup>16</sup> Dàtná cuíní-ndó cùu ì<sup>n</sup> vehe ní sáa te ní ngoyo te dàndaa-güedé xito cùu úú, duca<sup>n</sup> sàtnahá-xi cada-xi ì<sup>n</sup> nduu,

chí ñaní tnahá ndíi Dàvíí ní xóo cáhá<sup>n</sup> ndihí ñàhá-yu xii-í ní cùu, te ní dáña ndéé-yu ichi-í,

te na quixi-í te natuha ñaha tùcú-yu.

<sup>17</sup> Te duca<sup>n</sup> te vai ñáyiú ñá túú cùu ñáyiú isràél nandúcú-yu ichi-í te cáhá<sup>n</sup> ndihí ñàhá-yu.

<sup>18</sup> Duha ní cáhá<sup>n</sup> Yá Ndiõxí, te duca<sup>n</sup> ní chídó tnùní cue téé ní xóo cáhá<sup>n</sup> tnúhu-gá ndéé sanaha —càchí té Jàcobó xáha<sup>n</sup>-dë xii-güedé.

<sup>19</sup> Te xáha<sup>n</sup> tùcu-dé:

—Yúhú càchí iní-í sá vã cúú dàsatú-ó iní nchaa ñáyiú ta sàndáa iní-xi tnúhu Yá Ndiõxí, ñáyiú ñá túú cùu ñáyiú isràél, te ì<sup>n</sup> úú-ni tnúhu cúñaha-o nàcuáa cada-yu. <sup>20</sup> Dico xini ñuhu-xi daquihí<sup>n</sup>-ó tùtú cúñaha-o sã vã cáxí-gá-yu nchaa sá nchító-ó ndùu táhú nchaa sá càchí-yu cùu ndióxí-yu. Te cúñaha-o sã vã càhá<sup>n</sup> ndihí cue téé ñadhí te núu ñá díú ñadhí-güedé cúú-yu, te ní cuè ñáyiú dhí vá càhá<sup>n</sup> ndihí-yu téé te núu ñá díú yí-yu cùu-güedé, te vá cáxí-yu cuñú qui<sup>n</sup> cuèhné, te vá cáxí-yu níñí. <sup>21</sup> Te duca<sup>n</sup> cúñaha-o, chí ndi tnahá ñuú núú ndécü-yu, te xíndecu ñáyiú isràél dácuahá-yu tnúhu ní chídó tnùní ndíi Moisés, te ndi tnahá nduu ndètatú-yu dàcuahá-yu tnúhu ndíi veñuhu-yu —càchí té Jàcobó xáha<sup>n</sup>-dë xii-güedé.

<sup>22</sup> Te dàtnùní cue téé ní táuchíú<sup>n</sup> Jèsús dacuàha ñaha xii-yu tnúhu-gá, ndihí cue téé yíndaha ñáyiú sàndáa iní tnúhu-gá ní cachí-güedé sá ndúcú-güedé ì<sup>n</sup> úú-gá cue téé quihí<sup>n</sup> ndihí té Páblú ndihí té Bèè ñuú Antiòquiá, te òu-ni duca<sup>n</sup> ní cáhá<sup>n</sup> dava-gá ñáyiú ndècu ichi-gá. Te úú cue téé ní ndúcú-güedé, ì<sup>n</sup>-dé nání-dë Silás, te ì<sup>n</sup>-dé nání-dë Jùdás, àdi Barsabás chí úú òu-dé, te cùnuu-güedé ndi ndùú-güedé. <sup>23</sup> Te ní cadúha nchaa cue téé cùnuu tutú canehe-güedé quihí<sup>n</sup>, te duha càhá<sup>n</sup>-xi:

“Còvaha díí-ndó nchàa-ndo. Nchúhú cue téé ní táuchíú<sup>n</sup> Jèsús cáhá<sup>n</sup>-ndí tnúhu-gá, ndihí cue téé yíndaha cue ñáyiú sàndáa iní tnúhu-gá quide ndee iní ñàhá-ndí xii nchòhó cue ñáyiú ndècu ndihí-ndí ichi-gá cuèi ñá díú ñáyiú isràél cúú-ndó. Te nchòhó ñáyiú xíndecu ñuú Antiòquiá, ndihí nchòhó ñáyiú ndècu distritú Sìriá, ndihí nchòhó ñáyiú ndècu distritú Ciliciá, càchí tnúhu-ndí xii-ndo sã <sup>24</sup> ní níhí-ndí tnúhu sá ì<sup>n</sup> úú cue téé ndècu iha ní quixi-güedé núú ndécú-ndó, te ñá túú chiú<sup>n</sup> ní tahu-ndí quixi-güedé. Te sá ì<sup>n</sup> tnúhu ní cáhá<sup>n</sup>-güedé ní xáha<sup>n</sup>-güedé xii-ndo sã ngündecu sèña ñi-ndo, te canchicú<sup>n</sup> nihnu-ndo nchàa nàcuáa ní chídó tnùní ndíi Moisés, te xí<sup>n</sup> ní sani ì<sup>n</sup> ní sani úú iní-ndó, chí ñá túú xini-ndó núu ndáa tnúhu càhá<sup>n</sup>-güedé àdi ñá ndáa. <sup>25</sup> Te ní ndatnúhu-ndí nàcuáa cunduu sá téndaha-ndí úú cue téé quixi-güedé ndihí té Bèè ndihí té Páblú, cue téé ío cùu iní-ndí, te cue téé-á<sup>n</sup> cáhá<sup>n</sup>-güedé nàcuáa cáhá<sup>n</sup>-ndí-a. <sup>26</sup> Te òu-ni té Bèè ndihí té Páblú ní sáhá<sup>n</sup>-güedé ní cáhá<sup>n</sup>-güedé tnúhu Xítohó Jesucristú nchaa xichi. Te ndi tnahá cuahá<sup>n</sup>-güedé cuíní-yu cahni ñàhá-yu xii-güedé. <sup>27</sup> Te tendaha-ndí té Jùdás ndihí té Silás quixi-güedé tnahá-güedé cachí tnúhu váha-güedé nàcuáa cuahá<sup>n</sup> tnúhu cáhá<sup>n</sup>-ndí. <sup>28</sup> Te òu-ni duca<sup>n</sup> cáhá<sup>n</sup>-ndí càchí tnúhu-ndí nàcuáa cáhá<sup>n</sup> Espiritú Yá Ndiõxí cada-ndo, chí nchúhú vá cáhá<sup>n</sup>-ndí sá cáda-ndó nchàa sá ní cáhá<sup>n</sup> ndíi Moisés cada ñáyiú, chí ío úhú, te vá yõ ndacu cada. Te vitna na cáhá<sup>n</sup>-ndí ì<sup>n</sup> úú-ni tnúhu nàcuáa cada-ndo. <sup>29</sup> Vá cáxí-ndó sã nchító-ó ndùu táhú nchaa sá càchí ñáyiú cùu ndióxí-yu,

te vá cáxí-ndó ñíñí, te vá cáxí-ndó cùñú quití cuèhné, te vá càhá<sup>n</sup> ndihí cue tée ñadihí te núu ñá díú ñadihí-güedé cúu-yu, te ni cuè ñáyiú ñá díú vá càhá<sup>n</sup> ndihí-yu tée te núu ñá díú yí-yu cùu-güedé. Te núu na càda-ndo nchaa nacuáa càhá<sup>n</sup>-ndí-a, te cada váha-ndo. Te vitna ío cada ndee ñí-ndó nchaa-ndo-na.” Duha ní chídó tñuní-güedé núu tütú ní tendaha-güedé cuáhá<sup>n</sup>.

<sup>30</sup> Te ní quide ndee ñí-yu cue tée quíhí<sup>n</sup> ñuú Antiòquiá, te duca<sup>n</sup> te ní xica-güedé cuáhá<sup>n</sup>-güedé. Te òré ní quexio-güedé ñuú-á<sup>n</sup>, te ní cana-güedé nchaa ñáyiú sàndáá ñí tñuhu Jèsús, te ní sáñaha-güedé tutú xii-yu. <sup>31</sup> Te ní dácuáhá-yu tutú ní sáñaha-güedé-á<sup>n</sup>, te ní cudíí víhí ñí-yu chí ío váha càhá<sup>n</sup> tutú-á<sup>n</sup>. <sup>32</sup> Te té Jüdás ndihí té Silás tñahá-güedé ní nduu táhu-güedé cáhá<sup>n</sup>-güedé tñuhu sá dácàhu ñí ñáhá Yá Ndiòxí. Te ní xáha<sup>n</sup>-güedé vai tñuhu nàcuáa cada-yu, te vihi-gá ní cudíí ñí-yu cada-yu nàcuáa càhá<sup>n</sup> Yá Ndiòxí cada-yu. <sup>33</sup> Te ní xíndecu-güedé ñí úú nduu ndihí-yu, te dātñuní ní quide ndee ñí ñáhá-yu xii-güedé cuendá sá ñuhú-güedé núu vèxi-güedé, te mee-ni tē Jüdás cuánuhú-dé. <sup>34</sup> Te té Silás ní xáha<sup>n</sup>-dē sá vā ñuhú-ni-dé. <sup>35</sup> Te té Pāblú ndihí té Bèé ní ndóo-güedé ní cáhá<sup>n</sup>-güedé tñuhu Yá Ndiòxí ñuú Antiòquiá, te vai-gá tucu ñáyiú Antiòquiá ní cáhá<sup>n</sup>-yu tñuhu-gá.

*Xito cùu uú cuáhá<sup>n</sup> té Pāblú càhá<sup>n</sup>-dē tñuhu Yá Ndiòxí núu ñáyiú*

<sup>36</sup> Te sáta ní cuu cuéhé nduu, te ní xáha<sup>n</sup> tē Pāblú xii té Bèé:

—Na quíhí<sup>n</sup>-ó nchaa ñuú núu ní sáhá<sup>n</sup>-ó ní cáhá<sup>n</sup>-ó tñuhu Yá Ndiòxí cáhá<sup>n</sup> ndihí-o nchaa ñáyiú ní tuha ichi-gá cuendá quini-ó núu ndècu váha-yu —càchí-dé xáha<sup>n</sup>-dē.

<sup>37</sup> Te té Bèé ní xáha<sup>n</sup>-dē sá quíhí<sup>n</sup> ndihí-güedé té Juáá, àdi Mácú chí úú díu-dé.

<sup>38</sup> Dico té Pāblú ñá ní dàña-gá-dé quíhí<sup>n</sup> té Juáá, chí ní dándõ ñaha-dē xii-güedé cútñahá ní xíndecu-güedé Pāñfilíá, te ní nacuico-dē cuánuhú-dé, te ñá túú-gá ní sáhá<sup>n</sup> ndihí ñaha-dē xii-güedé. <sup>39</sup> Xíá<sup>n</sup> ní cuu ní tenáá tñahá tē Bèé ndihí té Pāblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáhá<sup>n</sup>-güedé

Chìpré. <sup>40</sup> Te té Pāblú ní xáha<sup>n</sup>-dē xii té Silás sá quíhí<sup>n</sup> ndihí ñaha-dē, te ñáyiú sàndáá ñí-xi tñuhu Jèsús ní cáhá<sup>n</sup> ndihí-yu Yá Ndiòxí sá chíndèe ñaha-gá xii-güedé. <sup>41</sup> Te ní xica-güedé cuáhá<sup>n</sup>-güedé te ní yáha-güedé ñíhí distritú Siríá ndihí distritú Ciliciá. Te ní cáhá<sup>n</sup>-güedé tñuhu Jèsús núu nchaa ñáyiú ní sàndáá ñí tñuhu-gá, núu xíá<sup>n</sup> ío-gá ní cudíí ñí-yu cada-yu nàcuáa càhá<sup>n</sup> Yá Ndiòxí.

## 16

*Tñahá té Timùteú cuáhá<sup>n</sup> ndihí-dé té Pāblú ndihí té Silás*

<sup>1</sup> Te té Pāblú ndihí té Silás cuáhá<sup>n</sup>-güedé ñuú Dèrbé ndihí ñuú Lìstrá, te ñuú Lìstrá yacá<sup>n</sup> ndécú ñí tée nàni Timuteú. Te tée-á<sup>n</sup> sàndáá ñí-dé tñuhu Jèsús, te tñahá ñáná-dē sàndáá ñí-a<sup>n</sup> tñuhu-gá, te ñaha is-ràél cúu-á<sup>n</sup>, te tée griégú cúu tātá-dē.

<sup>2</sup> Te nchaa ñáyiú ní sàndáá ñí tñuhu-gá ñáyiú ndècu ñuú Lìstrá, ndihí ñáyiú ñuú Ìconiú, nchaa ñáyiú-á<sup>n</sup> cudíí ñí-yu nàcuáa quide-dé. <sup>3</sup> Te ní cuini té Pāblú sá tñahá té Timùteú quíhí<sup>n</sup> ndihí-dé dava-gá ñuú, núu xíá<sup>n</sup> díhna-gá seña ní sáha té Pāblú ñí té Timùteú, chí ñá ní tñahá ñí té Pāblú sá càhá<sup>n</sup> cuéhé ñáyiú is-ràél cuendá té Timùteú. Te nchaa ñáyiú is-ràél ndécú ñuú-á<sup>n</sup> xini-yu sá tē griégú cúu tātá-dē, te ñá díú tē is-ràél cúu-dē, te xíá<sup>n</sup> ní sáha té Pāblú seña ñí té Timùteú. <sup>4</sup> Te ndí tñahá ñuú ndí tñahá ñuú cuáhá<sup>n</sup>-güedé cáhá<sup>n</sup> ndihí-güedé nchaa ñáyiú ní sàndáá ñí tñuhu Jèsús. Te ní xáha<sup>n</sup>-güedé nàcuáa càhá<sup>n</sup> tutú ní cadúha cue tée ní táuchíú<sup>n</sup> Jèsús dacuàha ñaha xii-yu tñuhu-gá, ndihí cue tée yíndaha ñáyiú sàndáá ñí tñuhu-gá ñuú Jerusálén. <sup>5</sup> Te cuendá duca<sup>n</sup> ní sáhá<sup>n</sup>-güedé nchaa ñuú núu ndécú ñáyiú sàndáá ñí tñuhu-gá ní dácuáhá ñaha-güedé xii-yu, núu xíá<sup>n</sup> tá cùu túha-gá-yu tñuhu Yá Ndiòxí, te vai-gá-yu ní tuhá-yu ichi-gá.

*Ní dácótó ñaha-xi xii té Pāblú sá ní xini-dé ñí tē distritú Macèdoniá*

<sup>6</sup> Te ñá ní dàña Espiritú Yá Ndiòxí quíhí<sup>n</sup>-güedé cáhá<sup>n</sup>-güedé tñuhu-gá distritú Asiá, núu ní sáhá<sup>n</sup>-güedé distritú Frigiá ndihí distritú Galaciá cáhá<sup>n</sup>-güedé

tnúhu-gá. <sup>7</sup> Te ní sáá-güedé yuhu distritú Misiá. Te quíhí<sup>n</sup>-güedé distritú Bìtiniá ní cùu, dico ñá ní dàña Espiritú Yá Ndiöxí quíhí<sup>n</sup>-güedé yàcá<sup>n</sup>. <sup>8</sup> Te ní yáha-güedé Misiá, te ní quexìo-güedé ñuú Tròás, te yàcá<sup>n</sup> ní nanítnáhá-ndí ndihí-dé. <sup>9</sup> Te ñí niú ní dácótó-xí núú tē Pāblú sá ñí xiní-dé ñí tē distritú Macèdoniá nútñí-dé, te ní xáha<sup>n</sup> tē-á<sup>n</sup> xii té Pāblú: “Cada ndee iní-n quíhí<sup>n</sup>-n Macedoniá chi dacuàha ñaha-n nchaa sá xiní-n”, cāchí-dé xáha<sup>n</sup>-dē, ní dácótó ñaha-xi xii té Pāblú. <sup>10</sup> Te cuendá sá dúcá<sup>n</sup> ñí dácótó ñaha-xi xii té Pāblú núu ní ndatnúhu-ndí quíhí<sup>n</sup>-ndí Macèdoniá, chi ní cutnùníní iní-ndí sá cáná ñaha Yá Ndiöxí quíhí<sup>n</sup>-ndí cāhá<sup>n</sup>-ndí tnúhu-gá núú ñáyiú yàcá<sup>n</sup>.

*Té Pāblú ndihí té Silás ndécú-güedē ñuú Fìlipú*

<sup>11</sup> Te ní quée-ndí bàrcú ñuú Tròás, te cuáhá<sup>n</sup> ndáá-ndí ñuú Samòtraciá, te yàcá<sup>n</sup> ní quexìo-ndí, te ní yáha-ni-ndí cuáhá<sup>n</sup>-ndí. Te nduu tnēé ní quexìo-ndí ñuú Nèápolis. <sup>12</sup> Te yàcá<sup>n</sup> ní quene-ndí bàrcú, te xìca-na-ndí cuáhá<sup>n</sup>-ndí ñuú Fìlipú te ñuú-á<sup>n</sup> yíndèhu-xi distritú Macèdoniá. Te yàcá<sup>n</sup> ní cudíi-ndí ní xíndecu tnaa-ndí. Te ñuú Fìlipú-á<sup>n</sup> ño cùnuu-xi, chi ío chitu ñáyiú rómá ní ngóo-yu. <sup>13</sup> Te nduu ndetátú-yu ní quee-ndí ñuú cuáhá<sup>n</sup>-ndí ñí xio yuhu yūte, chi yàcá<sup>n</sup> sàhá<sup>n</sup>-yu cāhá<sup>n</sup> ndihí-yu Yá Ndiöxí. Te òré ní quexìo-ndí, te ní naníhí tnáhá-ndí ndihí mee-ni ñáyiú dihí, te ní cāhá<sup>n</sup>-ndí tnúhu Yá Ndiöxí ní xíndedóho-yu. <sup>14</sup> Te ndècu ñí ñaha naní Lidiá ní xíndedóho-a<sup>n</sup> nācuáa ní cāhá<sup>n</sup>-ndí, te ñaha ñuú Tiàtirá cúú-á<sup>n</sup>, te dīco-a<sup>n</sup> dóó muradú, te ío cāhá<sup>n</sup> ndihí-a<sup>n</sup> Yá Ndiöxí. Te dīu-ni mee Yá Ndiöxí ní chindee ñaha-gá ní sándáá iní-a<sup>n</sup> tnúhu ní cāhá<sup>n</sup> té Pāblú. <sup>15</sup> Te ní sandute-a<sup>n</sup> ndihí landú-a<sup>n</sup>, ndihí nchaa ñáyiú xīnu cuechi núú-a<sup>n</sup>, te ní cachí-a<sup>n</sup> xii-ndí:

—Te núu ní cutnùníní iní-ndó sá ñí sándáá ndisa iní-í tnúhu Jèsús, te cundecu tnaa-ndo vèhe-í —cāchí-a<sup>n</sup> xii-ndí.

Te ní quide yica-a<sup>n</sup> ñí xíndecu-ndí vehe-a<sup>n</sup>.

<sup>16</sup> Te ñí nduu ñùhu-ndí ichi cuáhá<sup>n</sup>-ndí núu cāhá<sup>n</sup> ndihí-yu Yá Ndiöxí, te ní

naníhí-ndí ñí xíchí ñúhú ìchi, te yìhi ñaha espíritú cündihí yucu ñávāha xii-xi. Te xíá<sup>n</sup> ní quide ní cāhá<sup>n</sup>-xi nchaa sá vā yōo tnàhí cùtnuní iní-xi núú nchāa ñáyiú ní sángándihí ñaha xii-xi. Te ñáyiú dīi vèhe-xi xīnu cuechi-xi ío vāi dīhú<sup>n</sup> ñí níhí-yu chi ní chāhu nchaa ñáyiú ní sángándihí ñaha xii-xi. <sup>17</sup> Te xíchí-á<sup>n</sup> ñí chinchícú<sup>n</sup> ñáhá-xí xii-ndí ndihí té Pāblú ndēndaha ñaha-xi cuáhá<sup>n</sup>, te ní cāhá<sup>n</sup> níhi-xi xāha<sup>n</sup>-xi xii dava-gá ñáyiú:

—Cue tēe-a xīnu cuechi-güedé núu Yá Ndiöxí, chi ío cāhnu cuu-gá, te cāchí tnúhu-güedé nása cada-ndo naníhí tāhú-ndó —cāchí-xi xāha<sup>n</sup>-xi xii-yu.

<sup>18</sup> Te titní xito ní yáha-ndí duca<sup>n</sup>-ni ñí cāhá<sup>n</sup>-xi. Te ñá ní cūndee-gá iní té Pāblú sá dúcá<sup>n</sup> cāhá<sup>n</sup>-xi, núu ní nanchocuíhnu-dé núu nútñí-xi, te ní xáha<sup>n</sup>-dē xii espíritú cündihí yucu ñávāha yìhi ñaha xii-xi:

—Ío cāhnu cuu Xítohó Jesucristú, núu xíá<sup>n</sup> cāchí-í sá xócuñí<sup>n</sup>-n vā quíhí-gā-n yìqui cuñú xíchí-a —cāchí-dé xāha<sup>n</sup>-dē.

Te òré-ni ní quee espíritú cündihí yucu ñávāha-á<sup>n</sup> yìqui cūñú-xi.

<sup>19-20</sup> Te ñáyiú dīi vèhe-xi xīnu cuechi-xi-á<sup>n</sup> ñí cutnùníní iní-yu sá vā nihí-gá-yu dīhú<sup>n</sup> cuendá tnúhu cāhá<sup>n</sup>-xi, núu ní tní<sup>n</sup>-yu té Pāblú ndihí té Silás ndécá ñahá-yu cuáhá<sup>n</sup> núu cuè tēe cūchiu<sup>n</sup> Romá, te xāhā<sup>n</sup>-yu xii-güedé:

—Cue tēe-a cūu-güedé cue tēe israhél, te ío dusa<sup>n</sup> xíquide-güedé ñuú-ó. <sup>21</sup> Te cuñí-güedé cada-o nācuáa quide-güedé, te vā cúú dùca<sup>n</sup> cada-o chi ñáyiú nāció<sup>n</sup> Rómá cúú-ó —cāchí-yu xāhā<sup>n</sup>-yu xii cue tēe cūchiu<sup>n</sup>.

<sup>22</sup> Te uu<sup>n</sup>-ni ní cāhá<sup>n</sup> ncháa-yu, te xāhā<sup>n</sup>-yu sá ñá túú quide váha té Pāblú ndihí té Silás. Te cue tēe cūchiu<sup>n</sup> ní cāndeé-güedé dóó tē Pāblú ndihí dóó tē Silás ní ndátá-güedē, te ní táuchíú<sup>n</sup>-güedē caniha-güedē ndihí tnudíi xii-güedé. <sup>23</sup> Te ní caniha-güedē, te dātñuní ní chihí ñaha-güedē vecaá. Te ní xáha<sup>n</sup>-güedē xii tēe ndēnchito vecaá sá cáda cuèdadú víhí-dē cuendá ná canú-güedé vecaá. <sup>24</sup> Te cuendá sá dúcá<sup>n</sup> ñí cāhá<sup>n</sup>-güedé, núu tēe ndēnchito vecaá ní dáyāha ñaha-dē ingá cuártú ndécú xítí vecaá, te ní chihí-dé sáhá-güedē yaú nduhu, te ní quide tñí-dé.



25 Te dava niú ní cáhá<sup>n</sup> ndihí té Páblú ndihí té Silás Yá Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue tée yìhi vecaá ní xíndedóho-güedé nàcuáa ní xita-güedé. 26 Te uu<sup>n</sup>ni níhi vîhi ní tnáa ní quidi-xi ndéé cimièntú vecaá, te ní nacaá<sup>n</sup> nchaa yèhe vecaá, te ní ndihí cadèná ndútú cuè tée yìhi vecaá ní nandáxí. 27 Te ní ndiquíú cúnú ìní téé ndénchito vecaá, te ní quide cuèndá-dé nchií nchaa yèhe vecaá. Te ní tava-dé machití-dé cahni-dé méé-dé ní cùu, chi ní cáhá<sup>n</sup>-dè sá ñí ndihí cue tée yìhi vecaá ní xinu ni cùu. 28 Te té Páblú ní cáhá<sup>n</sup> níhi-dé, te xáha<sup>n</sup>-dè xii téé ndénchito vecaá:

—Vá dúcá<sup>n</sup> càda-n cahni-n mee-n, chi nchaa-ni-ndí yíhí —càchí-dé xáha<sup>n</sup>-dè xii téé ndénchito vecaá.

29 Te dàtnùní ní xícá<sup>n</sup> téé ndénchito vecaá ñuhú, te xinu-dé cuánguïhu xití vecaá núu yíhí té Páblú ndihí té Silás, te quidi ñaha-ná-xi xii-dé ní quexìo-dé ní ngüíñí xití-dé núu-güedé. 30 Te dàtnùní ndécá ñaha-dé xii-güedé ní ndee vecaá, te ní xícá<sup>n</sup> tnúhú-dé núu-güedé, te xáha<sup>n</sup>-dè:

—Nchòhó cachí tnúhu-ndo ñasa cada-í naníhí tàhú-í —càchí-dé xáha<sup>n</sup>-dè.

31 Te ní xáha<sup>n</sup>-güedé:

—Quindáa ìní-n ndihí ñadihí-n, ndihí landú-n, ndihí nchaa ñáyiu xinu cuechi núu-n tnúhu càhá<sup>n</sup> Xítohó Jesucristú, te naníhí tàhú-ndó —càchí-güedé xáha<sup>n</sup>-güedé.

32 Te ní dácuáhá ñaha-güedé xii téé ndénchito vecaá ndihí nchaa ñáyiu ndècu vehe-dé tnúhu Yá Ndiöxí. 33 Te diu-ni òré-á<sup>n</sup> ñí naquete-dé sátá-güedé núu ñí ñáni, te dàtnùní ní sandute-dé ndihí-yu. 34 Te ndèca ñaha-dé cuáhá<sup>n</sup> vehe-dé ní sáñaha-dé sá ñí xexi-güedé, te ní cudíí víhí ìní téé ndénchito vecaá ndihí nchaa-dé vehe-dé sá ñí tuhá-yu ichi Yá Ndiöxí. Te cuándihu tucu té Páblú ndihí té Silás vecaá.

35 Te nduu tnéé ní xáha<sup>n</sup> cuè téé cùchiu<sup>n</sup> xii poleciá cuáhá<sup>n</sup>-güedé cùu-güedé téé ndénchito vecaá queñuhu-dé úu cue téé cuánguïhu ndedí nduu ìcu núhú-güedé. 36 Te téé ndénchito vecaá ní xáha<sup>n</sup>-dè xii téé Páblú ndihí té Silás:

—Cue téé cùchiu<sup>n</sup> ní cachí-güedé sá queé-ndó ñuhú-ndó, chi ñá túu-gá ná cada-güedé, chi sa ní yáha cuèndá-ndó

—càchí téé ndénchito vecaá xáha<sup>n</sup>-dè xii-güedé.

37 Te té Páblú ní xáha<sup>n</sup>-dè xii cue téé cùu poleciá:

—Tée ròmá cúu-ndí, te vá cúu dùca<sup>n</sup>-ní cunduu, chi ní caniha-güedé tnudi xii-ndí, te ní xiní-yu nchaá-yu. Te ñá túu tnàhí ní xicá<sup>n</sup> tnúhú-güedé ñuu ndáá ndècuéchi-ndí àdi ñáhá, chi cuèndá-ni ní chihi ñaha-güedé vecaá xii-ndí. Te vitna cuíni-güedé dacacu ñaha-güedé núhú-ndí cuèndá sá vā yõo quini ñáhá ñuhú-ndí cáhá<sup>n</sup>-güedé, dico vá cúu dùca<sup>n</sup> cada ñaha-güedé xii-ndí. Chí cuáhá<sup>n</sup> cùñaha-ndo na quixi mee-güedé queñuhu ñaha-güedé —càchí té Páblú xii-dé cue poleciá.

38 Te cue téé cùu poleciá cuánuhú-güedé núu ndécú cuè téé cùchiu<sup>n</sup>, te ní xáha<sup>n</sup>-güedé nàcuáa ní cáhá<sup>n</sup> téé Páblú. Te sá dúcá<sup>n</sup> ñí xáha<sup>n</sup> poleciá sá téé ròmá cúu-güedé, xiá<sup>n</sup> ní yùhú-güedé. 39 Te ní sáhá<sup>n</sup> cue téé cùchiu<sup>n</sup> yehe vecaá, te ní xáha<sup>n</sup>-güedé sá cadá càhnu ìní-güedé sá ñí chihi ñaha-güedé vecaá, te ní ndèñuhu ñaha-güedé vecaá. Te ní cáhá<sup>n</sup> ndàhú-güedé núu cuè téé ní xíhi vecaá sá ndéé-güedé ñuu-á<sup>n</sup> ñuhú-güedé. 40 Te ní ndee-güedé vecaá, te cuáhá<sup>n</sup>-güedé vehe tá Lidiá, te ní ndatnúhu-güedé ndihí nchaa ñáyiu ní sándáa ìní-xi tnúhu Jèsús, te ní xáha<sup>n</sup>-güedé xii-yu nàcuáa cada-yu, te ío ní cudíí ìní-yu, te duca<sup>n</sup> te ní xica-güedé cuáhá<sup>n</sup>-güedé.

## 17

### *Ío dusa<sup>n</sup> quide ñáyiu ñuu Tesalónica*

1 Te ní yáha-güedé ñuu Ànfípólís ndihí ñuu Apòloniá, te ní quexìo-güedé ñuu Tesalónica, te yàcá<sup>n</sup> cáa ñí veñúhu ñáyiu israél. 2 Te ní sáhá<sup>n</sup> téé Páblú veñúhu-á<sup>n</sup>, chi duca<sup>n</sup> tnàhí quide-dé, te ndí tnahá nduu ndètatú-yu ní sáhá<sup>n</sup>-dé veñúhu-á<sup>n</sup> ùní xito. Te ní ndatnúhu ndihí ñaha-dé xii-yu nàcuáa ní chídó tnùnì cue téé ní xóo cáhá<sup>n</sup> tnúhu Yá Ndiöxí ndéé sanaha. 3 Te ní xitnúhu ñaha-dé nàcuáa ní cáhá<sup>n</sup> cue téé-á<sup>n</sup> sá Cristú Yá tendaha Yá Ndiöxí quixi ñuyúú-a ndoho vîhi-gá, te cuú-gá, te ndoto-gá, te xáha<sup>n</sup>-dè:

—Te diu Jèsús cúu Crìstú Yáa ní tendaha Yá Ndiöxí ní quixi ñuyúú-a, núu xiá<sup>n</sup>



càchí tnúhu-í vitna —càchí té Păblú xăha<sup>n</sup>-dë xii-yu.

<sup>4</sup> Te dava ñáyiú isràél ní sándáá iní-yu tnúhu ní cáhá<sup>n</sup> té Păblú, te ní níhí tnáhă-yu ndihî-dé, ndihî té Silás. Te vâi ñáyiú griégú ñáyiú càhá<sup>n</sup> ndihî Yá Ndiöxí ní sándáá iní-yu tnúhu Jèsús. Te ndècu titní ñáyiú dîhî ñáyiú cùnûu, te ñáyiú-á<sup>n</sup> tnáhă-yu ní sándáá iní-yu tnúhu-gá. <sup>5</sup> Te dava ñáyiú isràél ñá túú ní cùu váha iní-yu núú tē Păblú ñûu ní ndúcû-yu cue tēe cuihna iní-xi tuhío-güedé cada chiu<sup>n</sup>-güedé, chi ndi cuihnu ndi cuihnu-ni-güedé, te nchaá-yu ndihî cue tēe-á<sup>n</sup> ndi coyo ndi coyó-yu xicuáá-yu. Te sátá ñi tecú dóho dava-gá-yu, te ní sáhá<sup>n</sup> tuhá-yu, te ío ní quide dùsá<sup>n</sup>-yu. Te nísáhá<sup>n</sup>-yu vehe té Jàsón, te ní quide yicá-yu ní quihu-yu vehe-dé nándúcú-yu té Păblú ndihî té Silás cuendá queñuhu ñáhă-yu núú nchàa ñáyiú. <sup>6</sup> Te ñá ní nánihî ñáhă-yu xii-güedé, núú xíă<sup>n</sup> ní tñî-yu té Jàsón ndihî ñî ùú-gá cue tēe sándáá iní tnúhu Jèsús, te tàñuhu ñáhă-yu xii-güedé cuáhá<sup>n</sup> núú cuè tēe cùchiu<sup>n</sup>. Te òré ní quexió-yu núú ndécú cuè tēe cùchiu<sup>n</sup>, te ní ngüíta-yu ní cuáá-yu, te xăhă<sup>n</sup>-yu xii-güedé:

—Ní quexío cue tēe-ă<sup>n</sup> ñûú-ó, te ío dusa<sup>n</sup> quide-güedé, te duca<sup>n</sup>-ni quide-güedé nchaa ñûú núú xicá cùu-güedé. <sup>7</sup> Te té Jàsón-ă<sup>n</sup> ní xáha<sup>n</sup>-dë sá cúú cùndecu-güedé vehe-dé, te ñá túú sándáá iní-güedé năcuáa càhá<sup>n</sup> té Cèsár tēe yindaha cuéhé năción<sup>n</sup>, te càchí-güedé sá ndécú ñngá tēe cùnûu-gá tucu năni-dé Jèsús —càchí-yu xăhă<sup>n</sup>-yu xii cue tēe cùchiu<sup>n</sup>.

<sup>8</sup> Te sátá dúcá<sup>n</sup> ñi cáhá<sup>n</sup>-yu, te ní cudéé<sup>n</sup> víhî cuè tēe cùchiu<sup>n</sup> ndihî dava-gá ñáyiú ndédóho. <sup>9</sup> Te vâi díhú<sup>n</sup> ñi xicá<sup>n</sup> cue tēe cùchiu<sup>n</sup> núú tē Jàsón ndihî dava-gá cue tēe cuáhá<sup>n</sup> ndihî-dé cuendá té Păblú ndihî té Silás, te núu na ndèe-güedé nùhú-güedé, te nacuáñaha cuè tēe cùchiu<sup>n</sup> díhú<sup>n</sup>-güedé.

*Té Păblú ndihî té Silás ndécú-güedé ñûú Bèréa*

<sup>10</sup> Te òré ní cundiqui<sup>n</sup>, te ní quide ndee iní ñáhă ñáyiú sándáá iní tnúhu Jèsús xii té Păblú ndihî té Silás, te ní xica-güedé cuáhá<sup>n</sup>-güedé ñûú Bèréa. Te diu-ni nduu ñi sáa-güedé yacá<sup>n</sup> ní sáhá<sup>n</sup>-güedé veñuhu ñáyiú isràél. <sup>11</sup> Te váha-gá iní ñáyiú ñûú

Bèréa dăcúxí ñáyiú ñûú Tesalónicá, chi ío ní cudí<sup>n</sup> iní-yu ní xíndedóho-yu tnúhu Jèsús, te ñî nduu ñî nduu ní dăcuáhă-yu tnúhu ní chídó tnùnî cue tēe ní xóo cáhá<sup>n</sup> tnúhu Yá Ndiöxí ndéé sanaha cuendá cuinî-yu quini-yu núu ndáa càhá<sup>n</sup> té Păblú ndihî té Silás. <sup>12</sup> Te titní ñáyiú isràél ní sándáá iní-yu tnúhu-gá ndihî titní cue tēe griégú ndihî ñáyiú dîhî ñáyiú cùnûu ní sándáá iní-yu. <sup>13</sup> Te dava ñáyiú isràél ndécû-yu ñûú Tesalónicá, te ñáyiú-á<sup>n</sup> ñi níhî-yu tnúhu sá ndécú tē Păblú ndihî té Silás ñûú Bèréa càhá<sup>n</sup>-güedé tnúhu Yá Ndiöxí, núu xíă<sup>n</sup> ní sáhá<sup>n</sup>-yu ñûú Bèréa ní dăcuándèndé-yu núu nchàa ñáyiú vátá dăcuàha-gá. Te ñáyiú-á<sup>n</sup> ñi sándáá iní-yu tnúhu ndehnde te ní cudéé<sup>n</sup> víhî-yu núu-güedé. <sup>14</sup> Te òré-á<sup>n</sup> ñi xáha<sup>n</sup> ñáyiú sándáá iní tnúhu-gá xii té Păblú sá quihî<sup>n</sup>-dé yuhu lămár, te ní xica-dé cuáhá<sup>n</sup>-dé, te té Silás ndihî té Timùteú ní quendóo-güedé ñûú Bèréa. <sup>15</sup> Te ñî ùú-güedé cuáhá<sup>n</sup> ndihî-güedé té Păblú, te ndèca ñaha-güedé cuáhá<sup>n</sup> ndéé ñûú Atenás, te ní xáha<sup>n</sup> té Păblú xii-güedé:

—Núu na nùhú-ndó, te cúu-ndo tē Silás ndihî té Timùteú ná quixí ndihî-ni-güedé nanítnáhă-ndî iha —càchí-dé xăha<sup>n</sup>-dë.

Te ní xica-güedé cuánuhú-güedé.

### *Té Păblú ndécú-dé ñûú Atenás*

<sup>16</sup> Te ñûú Atenás ndétú tē Păblú quihî<sup>n</sup> té Silás ndihî té Timùteú. Te yacá<sup>n</sup> ní xiní-dé sá ño cuéhé sá càchí-yu cùu ndiöxí-yu ndècu te ñá ndáa sá díú ndiöxí cúú-xí, te xíă<sup>n</sup> ñá túú ní cùu váha iní-dé, chi ñá tnáhă iní-dé năcuáa quidé-yu. <sup>17</sup> Te ní sáhá<sup>n</sup>-dé veñuhu ní cáhá<sup>n</sup> ndihî-dé ñáyiú isràél ndihî dava-gá ñáyiú càhá<sup>n</sup> ndihî Yá Ndiöxí. Te ñî nduu ñî nduu sáhá<sup>n</sup>-dé xití ñûú càhá<sup>n</sup>-dé tnúhu-gá ndihî nchaa ñáyiú xica cuu yacá<sup>n</sup>. <sup>18</sup> Te cue tēe cùu epicureú ndihî cue tēe cùu estoicú, cue tēe-á<sup>n</sup> ñi ndatnúhu-güedé ndihî té Păblú, te dava-güedé xítnàha-güedé:

—¡Ná tnúhu vihi cáhá<sup>n</sup> tēe lùcú-ă<sup>n</sup>! —càchí-güedé xítnàha-güedé.

Te dava-güedé xítnàha-güedé:

—Sàni iní-ndí sá càhá<sup>n</sup>-dé cuendá ndiöxí sá vátá quini-gá-ó —càchí-güedé xítnàha-güedé.

Te duca<sup>n</sup> x̄itnàha-güedé, chi càhá<sup>n</sup> té Păblú tnúhu Jèsús, te ní cáhá<sup>n</sup>-dé nàcuáa ní dándótó ñàha Yá Ndiöxí xii-gá, xiá<sup>n</sup> nũu duca<sup>n</sup> x̄itnàha-güedé. <sup>19</sup> Te ndèca ñàha-güedé xii té Păblú cuáhá<sup>n</sup> ì<sup>n</sup> xichi núu nání Àreópagú, te ní xáha<sup>n</sup>-güedé xii-dé:

—Cachí tnúhu ndáá-n năsa cuáhá<sup>n</sup> tnúhu càhá<sup>n</sup>-n, chi na cùtnuní ndáá iní-ndí, <sup>20</sup> chi duca<sup>n</sup>-ni càhá<sup>n</sup>-n tnúhu sá ñà túú sàcúndèdóho-ndí, te cuìní-ndí cachí tnúhu ndáá-n năsa ndũu tnúhu-á<sup>n</sup> cuendá cutnùní váha iní-ndí —càchí-güedé x̄àha<sup>n</sup>-güedé xii-dé.

<sup>21</sup> Te nchaá ñáyiu ñuú Àtenás ndihí ñáyiu dava-gá ñuú, mee-ni tnúhu saa cuìní-yu càhá<sup>n</sup>-yu, nchaá sá vátá cùndèdóho-gá-yu cuìní-yu cundèdóho-yu.

<sup>22</sup> Te té Păblú ní ngúnutn̄í-dé núu x̄ixúcu-yu nchaá-yu, te x̄àha<sup>n</sup>-dè:

—Nchòhó cue ñáyiu ñuú Àtenás, cundèdóho-ndo nchàa tnúhu na càhá<sup>n</sup>-í-a. Ío quide cahnu nchohó sá càchí-ndó cùu ndiöxí-ndó. <sup>23</sup> Te vitna ní quexì-í ñuú-ndó, te ní xiní-í sá yàyacá<sup>n</sup> ndécú nchàa sá càchí-ndó cùu ndiöxí-ndó càhá<sup>n</sup> ndihí-ndo. Te ní xiní-í ì<sup>n</sup> xichi núu ndéé tnuní quide cahnu-ndo Yá Ndiöxí Yaá ñà túú xiní-ndó, te ñu-ni duca<sup>n</sup> càhá<sup>n</sup> lètrá ndéé tnuní xiá<sup>n</sup>, te càchí-xi: “Iha quide cahnu-ndí Ndiöxí sá ñà túú xiní-ndí”, duha càhá<sup>n</sup> lètrá-á<sup>n</sup>. Te quide cahnu-ndo Yá Ndiöxí càhá<sup>n</sup>-ndó, dico ñà túú xiní-ndó năsa càa-gá, te yúhú xiní ndáá-í nàcuáa càa Yá Ndiöxí, chi ñu-ni Yá Ndiöxí càhá<sup>n</sup> ndihí-í, te ñu tnúhu-gá càhá<sup>n</sup>-í vitna.

<sup>24</sup> Te ñu Yá Ndiöxí ní cadúha-gá ñuyíú-a ndihí nchaá sá ío, núu ñu-gá cúu X̄itohó ñuyíú-a ndihí andi. Te ñà túú x̄ini ñuhu-gá vehe dàcaa ñáyiu ñuyíú-a cundecu-gá. <sup>25</sup> Te ñà túú x̄ini ñuhu-gá ñáyiu chindee ñàhá-yu xii-gá, chi mee-gă quidé-gă nchító-ó ndècu-o te tàxi-gá yócó tăchí-ó ndihí nchaá sá xiní ñuhu-o.

<sup>26</sup> Te ndéé sanaha ñà cadúha-gá ì<sup>n</sup> ñu-ni té, te ñu-ni ñíí-dé cúu ñáyiu ndècu ñicaxico ñuyíú. Te ñu-ni mee Yá Ndiöxí ní xáha<sup>n</sup>-gă nchaá núu cùndécú-yu, te mee-gă ní cáhá<sup>n</sup>-gá ná daha cuíá cudíi nchaá nació<sup>n</sup> ndihí mée-yu. <sup>27</sup> Te cuìní-gá sá nchàá ñáyiu nanducu ñàhá-yu càhá<sup>n</sup> ndihí ñàhá-yu

xii-gá, te mee-gă ndécú t̄ha-gá sá càhá<sup>n</sup> ndihí ñàha-gă xií-yu ì<sup>n</sup> ñu-yu. <sup>28</sup> Te ñu-ni Yá Ndiöxí xitó ñàha-gá xií-yu núu cudíi-yu ndécú-yu te càndá-yu. Te duha ní cáhá<sup>n</sup> ì<sup>n</sup> ñaní tnàhá-ndó, té ní cutnùní iní-xi ní x̄indecu ndéé sanaha, te ní xáha<sup>n</sup>-dè xií-yu: “Nchaá-o cùu-o déhe Yá Ndiöxí”, duha ní xáha<sup>n</sup>-dè xií-yu. <sup>29</sup> Te núu déhe Yá Ndiöxí cúu-yu nchaá-yu, te vá cúu càhá<sup>n</sup>-yu sá Yá Ndiöxí cúu sá ñà cadúha-yu ndahá-yu. Te sá ñà cadúha-yu cùu ndiöxí-yu-á<sup>n</sup>, dava cùu-xi d̄ihú<sup>n</sup> cuáá<sup>n</sup>, dava cùu-xi d̄ihú<sup>n</sup> cuixí<sup>n</sup>, dava cùu-xi yúu. Te mée-yu ní cahu iní-yu nàcuáa cunduu sá cúu ndiöxí-yu. <sup>30</sup> Te cùtnàhá ñà túú ní cùtnuní iní-yu sá nèhé ní quidé-yu ní cadúha-yu nchaá xiá<sup>n</sup>, te ñà túú ní quide cuendá Yá Ndiöxí sá dúcá<sup>n</sup> ñà quidé-yu. Te vitna càchí Yá Ndiöxí sá dáñá nchàa ndi túhú-yu nchaá sá cuèhé sá dúhá quidé-yu. <sup>31</sup> Te Yá Ndiöxí nàhá-gă ná nduu cùndecu nchaá ñáyiu núu-gă, te mee-gă sa nàha-gá ndèndida càa ñáyiu ní quide váha, te ndèndida càa ñáyiu ñà túú ní quide váha. Te mee-gă ní xáha<sup>n</sup>-gă xii Déhe-gá Yaá nání Jèsús cùñaha-gă xií-yu núu ndèndida càa-yu ní quide váha te ndèndida càa-yu ñà túú ní quide váha. Te mee Jèsús càhá<sup>n</sup> ndáa cuiti-gá, te sa nàha-o sá nchàá xiá<sup>n</sup> cada Jèsús, chi ñu cuendá-á<sup>n</sup> ñà dándótó ñàha Yá Ndiöxí xii-gá —càchí té Păblú x̄àha<sup>n</sup>-dè xií-yu.

<sup>32</sup> Te òré ní cáhá<sup>n</sup> té Păblú sá ñà ndoto Jèsús, te dava ñáyiu ñà ní tnàhá iní-xi tnúhu ní cáhá<sup>n</sup>-dé ní cáhá<sup>n</sup> yíchí-yu. Te davá-yu ní x̄àhá<sup>n</sup>-yu xii-dé:

—Te ingá xito quixi-n, te càhá<sup>n</sup> tucu-n tnúhu ní cáhá<sup>n</sup>-n vitna —cachí-yu x̄àhá<sup>n</sup>-yu xii-dé.

<sup>33</sup> Te ní xica-dé cuáhá<sup>n</sup>-dé. <sup>34</sup> Te dava ñáyiu ní x̄indedóho tnúhu ní cáhá<sup>n</sup> té Păblú ní sándáá iní-yu Jèsús, te ní chindee tnúhu ñàhá-yu xii-dé. Te ì<sup>n</sup> té cùchiu<sup>n</sup> Areópagú nání-dè Nixú ndihí ì<sup>n</sup> ñadihí nání-á<sup>n</sup> Dămarís, tnàhá-yu ní sándáá iní-yu tnúhu-gá ndihí dava-gá-yu.

## 18

### *Té Păblú ndécú-dè ñuú Còrintú*

<sup>1</sup> Te té Păblú ní quee-dé ñuú Àtenás cuáhá<sup>n</sup>-dé ñuú Còrintú. <sup>2</sup> Te yàcá<sup>n</sup> ní naníhí

tnáhá-dě ndihí ì<sup>n</sup> té isràél nání-dě Àquilú, te té-á<sup>n</sup> cúú-dě té distritú Pòntó, te ní xíndecu-dé ndihí ñadìhí-dé tá Priscilá ñuú Rómá. Te té Cèsár té yíndaha cuéhé nàció<sup>n</sup>, té nàni Claudiú ní xáha<sup>n</sup>-dě sá vǎ cúú-gǎ cundecu ñáyiú isràél ñuú Rómá, te xiǎ<sup>n</sup> ñuú ní ndee té Àquilú ndihí ñadìhí-dé cuáhá<sup>n</sup>-yu ñuú Còrintú. Te sácú-ni nduu ní cuu sá ñí quexió-yu ñuú-á<sup>n</sup>, te ní sáhá<sup>n</sup> té Páblú ní ndatnúhu ndihí ñaha-dě xií-yu vehé-yu. <sup>3</sup> Te ní xáhǎ<sup>n</sup>-yu sá cùndècu-dé cada chiú<sup>n</sup> ndihí ñahá-yu, chi ì<sup>n</sup>-ni chiú<sup>n</sup> quide-dé ndihí-yu, te ní xóo dacáa-yu vehe dóó. Te núu xiǎ<sup>n</sup> ní xíndecu ndihí ñaha-tě Páblú ní quide chiú<sup>n</sup> ndihí ñaha-dé xií-yu. <sup>4</sup> Te núú ùná núú ùná nduu, nduu ndètátú-yu, ní xóo quíhí<sup>n</sup>-dé veñúhu ñáyiú isràél. Te ní ndatnúhu-dé ndihí ñáyiú isràél ndihí ñáyiú ñá túú cùu ñáyiú isràél, te ní xáha<sup>n</sup>-dě sá quíndáá iní-yu tnúhu Jèsús.

<sup>5</sup> Te té Silás ndihí té Timùteú ní quee-güedé distritú Macèdoniá cuáhá<sup>n</sup>-güedé núú ndécú-tě Páblú. Te òré ní quexió-güedé, te ní cáhá<sup>n</sup>-ni té Páblú tnúhu Yá Ndiòxí núú ñáyiú isràél, te xáha<sup>n</sup>-dě xií-yu sá Jèsús cúú-gǎ Crìstú Yá ní tendaha Yá Ndiòxí ní quixi ñuyúú-a. <sup>6</sup> Te sá dúcá<sup>n</sup> ñí cáhá<sup>n</sup>-dé ñuú ní nǎá ndihí ñahá-yu xii-dé, te ní cáhá<sup>n</sup> cuéhé-yu cuèndá-dé, núu xiǎ<sup>n</sup> ní naquidi-dé dóó-dě. Te duca<sup>n</sup> ñí quide-dé cuèndá sá cútnúni iní-yu sá ñǎ ní tnáhá iní-dé nàcuáa ní cáhá<sup>n</sup>-yu, te ní xáha<sup>n</sup>-dě xií-yu:

—Yúhú ñá túú cuèchi-í, te núu ní xíta ni-hnu-ndo, xiǎ<sup>n</sup> quèndóo cuèchi mee-nǎ-ndó. Te vitna quíhí<sup>n</sup>-í cáhá<sup>n</sup> ndihí-í ñáyiú ñá túú cùu ñáyiú isràél, te vǎ nándùcu-gǎ-í nchòhó ñáyiú isràél cáhá<sup>n</sup> ndihí ñaha-í xii-ndo —càchí-dé xáha<sup>n</sup>-dě xií-yu.

<sup>7</sup> Te ní xica-dé cuáhá<sup>n</sup>-dé vehe ì<sup>n</sup> té nàni Justú, te té-á<sup>n</sup> ndécú yàtni-dé núú cáá veñúhu, te tnáhá-dé càhá<sup>n</sup> ndihí-dé Yá Ndiòxí. <sup>8</sup> Te té Crìspú té yíndaha veñúhu-á<sup>n</sup> ñí sándáá iní-dé Jèsús ndihí ñadìhí-dé ndihí landú-dé. Te vǎi ñáyiú ñuú Còrintú ní sáhá<sup>n</sup>-yu ní xíndedóho-yu tnúhu-gǎ, te ní sándáá iní ñáhǎ-yu xii-gǎ, te ní sanduté-yu. <sup>9</sup> Te ì<sup>n</sup> níú ní cáhá<sup>n</sup> saní té Páblú sá ñí xáha<sup>n</sup> Yá Ndiòxí xii-dé:

—Cáhá<sup>n</sup>-ni-n tnúhu-í, te vǎ yùhú-n nchàa tnúhu cuéhé tnúhu duha càhá<sup>n</sup> ñáyiú, <sup>10</sup> chi

yúhú chindee ñàha-í xii-n, te vǎ yóo ì<sup>n</sup> cada úhu ñáhá xii-n, te vǎi-gǎ ñáyiú ñuú-á<sup>n</sup> quíndáá iní-yu tnúhu-í —càchí-gǎ xáha<sup>n</sup>-gǎ núú saní-dé.

<sup>11</sup> Te ñuú Còrintú ní xíndecu té Páblú ì<sup>n</sup> cuía dava, te mee-ni tnúhu Yá Ndiòxí ní xóo dacuàha-dé ñáyiú.

<sup>12</sup> Te ndècu-gǎ-dé ñuú-á<sup>n</sup> ñí ngóo té Gàlìón chiú<sup>n</sup> taxi tnuní-dé distritú Acáyá. Te dàvá-á<sup>n</sup> ñí cudéé<sup>n</sup> ñáyiú isràél núú-tě Páblú, te ní tñi ñahá-yu xii-dé ndécá ñahá-yu cuáhá<sup>n</sup> núú cuè té cùchiú<sup>n</sup>. <sup>13</sup> Te ní xáhǎ<sup>n</sup>-yu xii té Gàlìón té cùu gobiernú:

—Té-a ní quexió-dé ñuú-ó xica cuu-dé te cuini-dé dandàhú ñáhá-dě chitnahá-ndí-dé cada-ndí nàcuáa quide-dé quidé càhnu-dé Ndiòxí-dě, te dañá-ndí vǎ cádá-gǎ-ndí nàcuáa càhá<sup>n</sup> tnúhu sá sánú ìchi ñaha xii-o nàcuáa cundecu-o cuini-dé —càchí-yu xáhǎ<sup>n</sup>-yu xii té cùu gobiernú.

<sup>14</sup> Te té Páblú cuini-dé cani-dé cuèndú ní cùu, te ní ngúita té Gàlìón càhá<sup>n</sup>-dé, te xáha<sup>n</sup>-dě xií-yu:

—Nchòhó ñáyiú isràél, cundedóho-ndo tnúhu na càhá<sup>n</sup>-í-a. Te núu ndècu núú ì<sup>n</sup> cuèchi ní quide-dé àdi ní sahani-dé ì<sup>n</sup> ndíyi, te cuu cundáá-xi iha, te cáhá<sup>n</sup>-ndó ñuú nándi cùu sá ñí quide-dé, <sup>15</sup> àdi dico-ni sá ì<sup>n</sup> tnúhu ní cáhá<sup>n</sup>-dé, te yáchí-gǎ chí cuáhá<sup>n</sup> yàcá<sup>n</sup> ndatnúhu-ndo núú mée-ndó, chi mee-ni sǎ ñǎ túú quide-dé nàcuáa càhá<sup>n</sup> tnúhu sá sánú ìchi ñaha xii-ndo càhá<sup>n</sup>-ndó, te yúhú ñá túú tnáhá iní-í cada ndáá-í nchaa xiǎ<sup>n</sup> —càchí-dé xáha<sup>n</sup>-dě.

<sup>16</sup> Te ní cudéé<sup>n</sup>-dě, te ní ndeñuhu ñaha-dě xií-yu vechù<sup>n</sup>. <sup>17</sup> Te ñáyiú ñá túú cùu ñáyiú isràél ní tñi-yu té Sòstenés té yíndaha veñúhu ñáyiú isràél, te ndèhe té Gàlìón té cùu gobiernú ní canihá-yu xii-dé, dico ñá túú tnáhí ná tnúhu ni càhá<sup>n</sup>-dé taunihnu-dé té ní caní-yu-á<sup>n</sup>.

*Té Páblú cuáhá<sup>n</sup> tucu-dé ñuú Antiòquia, te yàcá<sup>n</sup> ní xica tucu-dé cuáhá<sup>n</sup>-dé dava-gǎ ñuú càhá<sup>n</sup>-dé tnúhu Yá Ndiòxí*

<sup>18</sup> Te titní-gǎ nduu ní xíndecu té Páblú ñuú Còrintú, te ní quide ndee iní-dé nchaa ñáyiú ní sándáá iní-xi tnúhu Jèsús, te ní tñi-dé ìchi cuáhá<sup>n</sup>-dé distritú Sìriá ndihí té Àquilú ndihí ñadìhí té Àquilú-á<sup>n</sup> tá Priscilá, te ní quexió-yu ñuú Cèncreá. Te cùmání-gǎ



tníi-yu ichi quíhí<sup>n</sup>-yu ñuú Éfesú, te ní dèté díquí tē Pāblú, chi duca<sup>n</sup> ñí xáha<sup>n</sup>-dē xii Yá Ndiöxí sá ndéé xínu ñ<sup>n</sup> chiu<sup>n</sup> ní sani iní-dé cada-dé cuendá-gá, te dātnūnī dèté-dé. Te ní quée-yu bàrcú cuáhá<sup>n</sup>-yu.

<sup>19</sup> Te ní quexió-yu ñuú Éfesú, te yàcá<sup>n</sup> ní xáha<sup>n</sup> tē Pāblú sá cūndēcu té Àquilú ndihī ñadìhí-dé, te mee-dē quíhí<sup>n</sup>-dé dava-gá ñuú. Te cūmání-gā caca-dé quíhí<sup>n</sup>-dé, te ní sáhá<sup>n</sup>-dé veñúhu ñáyiū isràél ní ndatnúhu ndihī ñaha-dē xii-yu. <sup>20</sup> Te ní xáhā<sup>n</sup>-yu sá cūndēcu-dé tītní nduu, te ñá ní cuíní-dé cundecu-dé. <sup>21</sup> Te ní xáha<sup>n</sup>-dē:

—Núhú-í chi dacuítí xini ñuhu-xi cundecu-í vico coo ñuú Jerusalén, te quixi tucu-í te núu Ndiöxí ná cāchí-gá, te vitna chí cadá ndèe iní —cāchí-dé xāha<sup>n</sup>-dē xii-yu.

Te ní quée-dé bàrcú cuáhá<sup>n</sup>-dé. <sup>22</sup> Te ní quexió-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusalén, te ní ndexió-dé, te ní dāndácōo váha-dé ñáyiū ndēcu ichi Yá Ndiöxí, te dātnūnī ní xica-dé cuáhá<sup>n</sup>-dé ñuú Antióquiá. <sup>23</sup> Te yàcá<sup>n</sup> ní xīndecu-dé tītní nduu, te dātnūnī ní tñi-dé ichi cuáhá<sup>n</sup>-dé. Te ní sáhá<sup>n</sup>-dé ñihí distritú Gálaciá ndihī distritú Frigiá. Te ndi tnahá ñuú ní sáhá<sup>n</sup>-dé ní cáhá<sup>n</sup>-dé ndihī ñáyiū sàndáá iní tñuhu Yá Ndiöxí, te ní ndúcú ndéé-gā-yu ní quidé-yu nchaa nācuáa ní xáha<sup>n</sup>-dē cadá-yu.

### *Té Àpolós cāhá<sup>n</sup>-dé tñuhu Yá Ndiöxí ñuú Éfesú*

<sup>24</sup> Te dàvá-á<sup>n</sup> ñí quèxio ñ<sup>n</sup> tée isràél ñuú Éfesú, te nāni-dé Àpolós, te cūu-dé tée ñuú Alejándriá, te ío váha túha-dé tñuhu Yá Ndiöxí, te ío váha ñuhu díquí-dē nācuáa cáhá<sup>n</sup>-dé, <sup>25</sup> chi sa xini-dé nācuáa ní xóo cáhá<sup>n</sup> ndíi Juáa cūtnahá ní xóo dacuándute ndíi ñáyiū. Te ío ní cudí iní-dé ní cáhá<sup>n</sup>-dé nchaa nācuáa ní cuu cuendá Jèsús, dico vátá dācuàha-gá-dé nchaa tñuhu ní cáhá<sup>n</sup> méé Jèsús. <sup>26</sup> Te ní sáhá<sup>n</sup>-dé veñúhu ñáyiū isràél, te yàcá<sup>n</sup> ní cáhá<sup>n</sup>-dé ñi yùhu ñi iní-dé. Te ndēcu té Àquilú ndihī ñadìhí-dé tá Priscilá ndédóho-yu tñuhu ní cáhá<sup>n</sup>-dé, te ní xáhā<sup>n</sup>-yu sá quíhí<sup>n</sup>-dé vehé-yu, te ní sáhá<sup>n</sup>-dé, te ní xitñuhu ñahá-yu xii-dé dava-gá tñuhu Yá Ndiöxí sá ñā túu xini-dé.

<sup>27</sup> Te ní cachí té Àpolós sá quíhí<sup>n</sup>-dé distritú Acāyá, núu xiā<sup>n</sup> ní cadúha ñáyiū ñuú Éfesú ñ<sup>n</sup> tutú canehe-dé quíhí<sup>n</sup> ndaha ñáyiū sàndáá iní tñuhu-gá xīndecu Acāyá. Te xáhā<sup>n</sup>-yu núu tütú-yu: “Cáhá<sup>n</sup> váha-ndo ndihī té Àpolós ñuú ní quexió-dé”, cāchí-yu xáhā<sup>n</sup>-yu núu tütú-yu. Te ní xica-dé cuáhá<sup>n</sup>-dé, te ní quexió-dé Acāyá. Te nchaa ñáyiū sàndáá iní tñuhu-gá yàcá<sup>n</sup>, diu-ni mee Yá Ndiöxí ní chindee ñaha-gá ní sàndáá iní ñahā-yu xii-gá. Te té Àpolós ío váha ní cáhá<sup>n</sup>-dé tñuhu Yá Ndiöxí núu-yu, te xiā<sup>n</sup> ío ní ndúcú ndéé-gā-yu ní quidé-yu chiu<sup>n</sup>-gá.

<sup>28</sup> Te té Àpolós ní ndatnúhu-dé ndihī ñáyiū isràél, te ní xīndedóho dava-gá-yu. Te ío váha ní caní-dé cuendú nchaa nācuáa ní xóo cáhá<sup>n</sup> cue tée ndéé sanaha sá quixí Cristú ñuyú-a. Te ní cáhá<sup>n</sup> ndáá-dé ní xáha<sup>n</sup>-dē sá díu-ní Jèsús cúu-gā Cristú Yaá ní tendaha Yá Ndiöxí ní quixi ñuyú-a. Te ñáyiū isràél xīndatnúhu-yu sá ñā ndáa nācuáa cāhá<sup>n</sup>-dé, dico ñā ní ñihí-yu tñuhu cūñahá-yu xii-dé, chi ío váha ñuhu díquí-dē tñuhu cáhá<sup>n</sup>-dé.

## 19

### *Té Pāblú ndécú-dē ñuú Éfesú*

<sup>1</sup> Te cūtnahá ndécú-gā té Àpolós ñuú Còrintú, te ní xica té Pāblú cuáhá<sup>n</sup>-dé tá yāha-dé mee-ni xití yucu cuáhá<sup>n</sup>, te ní sáá-dé ndéé ñuú Éfesú. Te ñuú-á<sup>n</sup> ñí naníhí tñahá-dē ndihī cue tée sàndáá iní tñuhu Jèsús. <sup>2</sup> Te ní xicá<sup>n</sup> tñuhú-dē núu-güedē, te xáhā<sup>n</sup>-dē:

—¿Sa ní quexio Espiritú Yá Ndiöxí ní ngūndecu ndihī-ndo ndéé òré ní sàndáá iní-ndó Jèsús-ā<sup>n</sup>? —cāchí-dé xáhā<sup>n</sup>-dē xii-güedé.

Te ní xáha<sup>n</sup>-güedé:

—Ñá túu xini-ndí sá ío Espiritú Yá Ndiöxí —cāchí-güedé xáhā<sup>n</sup>-güedé xii-dé.

<sup>3</sup> Te ní xáha<sup>n</sup> tūcu-dé:

—¿Nása ní cáhá<sup>n</sup> tée ní dācuándute ñaha xii-ndo-í? —cachí-dé xáhā<sup>n</sup>-dē xii-güedé.

Te ní xáha<sup>n</sup>-güedé:

—Ní cáhá<sup>n</sup>-dé nācuáa ní xóo cáhá<sup>n</sup> ndíi Juáa —cāchí-güedé xáhā<sup>n</sup>-güedé xii-dé.

<sup>4</sup> Te ní xáha<sup>n</sup> tē Pāblú:

—Ndíi Juáa ní dācuándute ñaha ndíi xii ñáyiū, chi ní cuíní-yu sá dāñā-yu nchaa sá cuéhé sá dúhá quidé-yu. Te ní xáha<sup>n</sup> ndíi



xií-yu: “Quindáá iní-ndó tn̄hu Jèsús chi dacuítí quìxi-gá ì<sup>n</sup> nduu”, duha ní xáha<sup>n</sup> ndíi Juáá xií-yu —càchí té Páblú xáha<sup>n</sup>-dē xii-güedé.

<sup>5</sup> Te sá dúcá<sup>n</sup> n̄i cáhá<sup>n</sup> té Páblú xáha<sup>n</sup>-dē xii-güedé, núu xiá<sup>n</sup> ní sandute-güedé nàcuáa ní dándõo tn̄hu Jèsús. <sup>6</sup> Te ní sacá<sup>n</sup> ndodo té Páblú ndahá-dé díquí-güedē, te òré-ni ní quexìo Espiritú Yá Ndiõxí ní ngúndecu ndíhi-güedé, te ní ngüíta-güedé ní cáhá<sup>n</sup>-güedé tn̄hu sá dácàhu iní ñáhá Espiritú-gá, tn̄hu sá ñà túú xìní-güedé cáhá<sup>n</sup>-güedé, te ní cáhá<sup>n</sup>-güedé tn̄hu Yá Ndiõxí nàcuáa ní dácáhú iní ñáhá Espiritú-gá xii-güedé. <sup>7</sup> Te cùu datná úxúú tnàhá-güedé.

<sup>8</sup> Te té Páblú ní sáhá<sup>n</sup>-dé veñúhu ñáyiú isràél ní cáhá<sup>n</sup> ndíhi-dé-yu, te úní yóó n̄i xínu ní xica cuu-dé veñúhu-yu. Te ío váha ñúhu díquí-dē tn̄hu cáhá<sup>n</sup>-dé, núu xiá<sup>n</sup> ní cuyi-dē ní cáhá<sup>n</sup>-dé, te ní xáha<sup>n</sup>-dē sá quindáá iní-yu tn̄hu Jèsús, te duca<sup>n</sup> te ndíhu ndaha ñàha Yá Ndiõxí xií-yu. <sup>9</sup> Te davá-yu ío sàá iní-yu ñá ní cuini-yu quindáá iní-yu, te ío ní cáhá<sup>n</sup> cuèhé-yu cuendá Jèsús xití veñúhu núú dàva-gá-yu. Te té Páblú ní ndee-dé veñúhu cuáhá<sup>n</sup>-dé ndíhi ñáyiú sàndáá iní tn̄hu Jèsús. Te ì<sup>n</sup> nduu ì<sup>n</sup> nduu ní sáhá<sup>n</sup>-dé scuèlá té Tiranú ní dácuahá ñàha-dé xií-yu. <sup>10</sup> Te úú cuía duca<sup>n</sup> n̄i sáhá<sup>n</sup>-dé scuèlá ní dácuahá-dē ñáyiú. Te nchaa ñáyiú isràél ñáyiú ndècu ñíhi distritú Àsiá ndíhi nchaa ñáyiú ñá túú cùu ñáyiú isràél ní xindedóho-yu tn̄hu Jèsús. <sup>11</sup> Te té Páblú ío ní chindee ñàha Yá Ndiõxí xii-dé ní quide-dé v̄ai núú s̄a v̄a yõo tnàhí ndàcu cada. <sup>12</sup> Te p̄añú díquí-dē ndíhi dóo cándèé núú yíquí-dē ní xicá<sup>n</sup>-yu nèhé-yu ní sáhá<sup>n</sup> núú ndécú ñáyiú cùhú, te xiá<sup>n</sup> ní tn̄i ñáyiú cùhú ndíhi ñáyiú yìhi ñaha espíritú cùndìhi yucu ñávàha, te ní ndúha-yu.

<sup>13</sup> Te ñuú Isràél véxi cue tée tatna xica cuu-güedé quidé tātna-güedé ñáyiú yìhi ñaha espíritú cùndìhi yucu ñávàha. Te ní ngüíta-güedé ní cacu nèhe-güedé Jèsús cuendá quee espíritú-á<sup>n</sup> yiqui cùñú-yu, te ní xáha<sup>n</sup>-güedé:

—Xocuñí-n, chi càchí Jèsús sá v̄a cùndècu ndíhi-gá-n tēe-a. Te diu-ni Jèsús cacú nèhe té Páblú òré cáhá<sup>n</sup>-dé tn̄hu-gá —càchí-güedé xáha<sup>n</sup>-güedē xii espíritú-á<sup>n</sup>.

<sup>14</sup> Te úsá tnàhá-güedé duca<sup>n</sup> n̄i xóo cada-güedé. Te tātá-güedē ní xínani-dē Èsevá, te tēe-á<sup>n</sup> n̄i cuu-dé dútú cùnùu. <sup>15</sup> Te sá dúcá<sup>n</sup> n̄i cáhá<sup>n</sup>-güedé, te ní xáha<sup>n</sup> espíritú cùndìhi yucu ñávàha-á<sup>n</sup> xii-güedé:

—¿Te ná cúú nchòhó n̄u dayùhú ñáhá-ndó? Te xìní-í Jèsús, te xìní-í yoo cùu té Páblú, te nchòhó ñá túú xìní ñáhà-í xii-ndo —càchí espíritú-á<sup>n</sup> xáha<sup>n</sup>-xi xii-güedé.

<sup>16</sup> Te tēe yìhi ñaha espíritú cùndìhi yucu ñávàha-á<sup>n</sup> n̄i ndanchita-dé ní tn̄i-dé cue tēe quide tātna-á<sup>n</sup>, te ní ndíhi dóo-güedē ní ndátá-dē, te ní dánicuèhé ñáhá-dē xii-güedé, te ní xinu-güedé cuáhá<sup>n</sup>-güedé.

<sup>17</sup> Te nchaa ñáyiú isràél ndécú ñuú Éfesú ndíhi dava-gá ñáyiú ndècu diu-ni ñuú-á<sup>n</sup> n̄i ñíhí-yu tn̄hu nàcuáa ní cuu, te ío ní yùhú-yu, te v̄ai-yu ní cachí sá ìo càhnu cuu Xitohó Jesucristú.

<sup>18</sup> Te dava ñáyiú ní sàndáá iní-xi tn̄hu Jèsús ní sáhá<sup>n</sup>-yu núú ndécú tē Páblú, ndíhi núú ndécú nchàa ñáyiú ní sàndáá iní tn̄hu-gá ní nàhmá-yu nàcuáa ní xóo cada-yu. <sup>19</sup> Te titní ñáyiú ni xóo cada ndùu nehé-yu tutú-yu ní sáhá<sup>n</sup> núú ndécú nchàa ñáyiú sàndáá iní-xi tn̄hu-gá, te yacá<sup>n</sup> ní ndada cuendá-yu sá ìo yahu ní sáha-yu tutú-yu, chi ndéé údico úxí m̄l díhú<sup>n</sup> cuixí<sup>n</sup> ní sáha-yu núú ncháá. Te ncháa-yu ní sahmí-yu tutú-yu. <sup>20</sup> Te sátá n̄i cáyú nchaa tutú-á<sup>n</sup>, te v̄ai-gá ñáyiú ní tuhá-yu ichi Yá Ndiõxí, te ní sáha-yu cuendá sá ìo xini ñuhu tn̄hu Yá Ndiõxí.

<sup>21</sup> Te ní cachí té Páblú sá quíhí<sup>n</sup>-dé distritú Macèdoniá ndíhi distritú Acáyá, te dàtnùní nùhú-dé ñuú Jerusalén, te duca<sup>n</sup> te dàtnùní quíhí<sup>n</sup>-dé ñuú Rómá. <sup>22</sup> Te ndècu ndíhi-dé té Timùteú ndíhi té Èrastú cue tēe chindee ñaha xii-dé. Te té Páblú ní xáha<sup>n</sup>-dē xii-güedé sá códo n̄u-güedé quíhí<sup>n</sup> Macèdoniá, te ní xica-güedé cuáhá<sup>n</sup>-güedé, te mee-dē ní quendóo-dé.

*Ñáyiú Éfesú ío dusa<sup>n</sup> quidé-yu ñuú-yu*

23 Te dàvá-án ïo ní cudéẽn-yu núú nchàa ñáyiu ní tuha ichi Yá Ndiõxí. 24 Te ìn tée ñuú Éfesú nání-dě Demètriú. Te tée-án ñi xóo canehé chiú-dé mee-ni díhú cuixí ní xóo cadúha-dé veñúhu líhli, dàtná cuini-ndó càa veñúhu Diàná sá cuú ndiõxí-yu. Te vài díhú ñi xóo níhí-dě ndihí cue tée ní xóo cada chiú ndihí-dé. 25 Te ní cana-dé cue tée quide chiú ndihí-dé, ndihí nchaa cue tée quide chiú ndihí díhú cuixí, te ní xáha-dě xii-güedé:

—Nàha-ndo sá ïo váha níhí-ó díhú cuendá chiú quide-o. 26 Te nàha-ndo sá cächí té Páblú sá ña díú ndiõxí cuú sá ñi cadúha ñáyiu ñuyíú-a. Te duca càhá-dé ñuú-ó, te duca-ni càhá-dé níhí distritú Àsiá, te ío-gá vài ñáyiu sàndáá iní tnúhu càhá-dé. 27 Te ío úhú ñuú na cuíta chiú quide-o, vá yõ-gá cuaa sá cadúha-o. Te ngúita-yu càhá-yu sá veñúhu Diàná ña túú càváha, te vá cadá càhnu-gá-yu sàndú-ó. Te nàha-ndo sá ïo càhnu cuu Dianá, chi nchaa ñáyiu distritú Àsiá quidé càhnu ñahá-yu ndihí ñáyiu xíndecu ní càa xico ñuyíú —cächí té Demètriú xáha-dě xii-güedé.

28 Te sá dúcá ñi càhá té Demètriú, xíã ní cudéẽn-güedé núú tẽ Páblú, te uu-ni ní cuáá-güedé te cächí-güedé:

—¡Ío càhnu cuu Dianá sàndú ñáyiu Éfesú! —cächí-güedé.

29 Te nchaa ñáyiu ñuú Éfesú ndi coyo ndi coyo-yu xicáhá-yu. Te tnàhá úú cue tée distritú Macèdoniá xicá cuu-güedé ndihí té Páblú, ìn-dé nání-dě Gãyú, te ìn-dé nání-dě Arístarcú. Te ní tni-güedé úú cue tée-án, te cuánguñhu coyo ndihí ñaha-güedé vehe núú quidé-güedé jundá. 30 Te té Páblú cuini-dé quíhu-dé tnàhá-dé vehe-án càhá ndihí ñaha-dě ní cuu, te ña ní dàña cue tée ní sàndáá iní tnúhu-gá. 31 Te ìn úú cue tée cùnno distritú Àsiá ní càhá váha-güedé cuendá té Páblú, te ní xáha-güedé xii ìn tée xínu cuechi núú-güedé ní sáhá-dé ní xáha-dě xii té Páblú sá vã quíhu-dé vehe núú quidé-güedé jundá. 32 Te uu-ni ní cuáá-yu ncháá-yu, te ña ìn-ní tnúhu ní càhá-yu, chi ndi díñ tnúhu ní càhá-yu ìn ìn-yu. Te chitu-gã ñáyiu ña ní cùtnuní iní-yu ná cuendá ní dátacá ñahá-güedé xití

vehe-án, chi ña ìn-ní tnúhu ní càhá-yu. 33 Te davá-yu ní càhá-yu sá cuéchi té Lijandrú cuú-xí, chi ní xáha ñáyiu isràél xii-dé sá càhá-dé yuhú-yu chindee tnúhu ñaha-dě xii-yu. Te ní quide-dé ndaha-dé núú-yu sá cùndedóho-yu tnúhu càhá-dé chindee tnúhu ñaha-dě xii-yu yòtnúhu. 34 Te ní cùtnuní iní-yu sá tẽ isràél cuú-dé, te uu-ni ní cuáá tucú-yu, ña ní dàña-yu càhá-dé, te cächí-yu:

—¡Ío cùnno Dianá sàndú ñuú Éfesú! —cächí-yu. Te dàtná úú òrè ìn-ni tnúhu ní càhá-yu.

35 Te tée cùu secretariú-ni-gá ní càhá-dé, te dàtnuní cuéé cuéé ní sadí-yu yuhú-yu. Te ní xáha-dě xii-yu:

—Nchaa-ndo cùndedóho-ndo ìn tnúhu na càhá-í-a. Ío cùnno Dianá, te nchaandi túhu ñáyiu sa nàhá-yu sá ncháá-ó ïo nèhe cuendá-ó veñúhu-ã. Te nàhá-yu sá nehé cuendá-ó sàndú-án, chi véxi cuu-gá andi. 36 Te vá yõ ìn cächí sá ña ndáá. Te coto-ndo mée-ndo, te vá cuídó-ndó càda-ndo, te vá cuídó-ndó càhá-ndó. 37 Te ná cuendá ndécá-ndó cué tée-án véxi, te ña túú ña ní quide-güedé, te ña túú ña ní dùhu-güedé veñúhu, te ña túú càhá cuéhé-güedé cuendá Diàná. 38 Te núu ío yoo nàá ndihí ñaha xii té Demètriú ndihí cue tée quide chiú ndihí-dé, te quíhí-güedé cacá cuéchi-güedé núú cué tée cùchiú. Te cue tée cùchiú na cundoho-güedé ñuú quehdé-güedé cuéchi-yu àdi ñahá. 39 Àdi ío-gá ná cuendú ñuhú iní-ndó, te càhá-ndó òrè ná cóo jundá. 40 Te ío úhú ñuú na níhí tée tàxi tnuní ñahá xii-o tnúhu sá dúhá ïo quide dusa-o, te cachí-dé sá ndécuechi-o chi ña túú sàndáá iní-ó-dě quesaha-dě. Te ña túú tnàhí ndùu váha-xi sá dúhá càda-o ni cuu, te vitna duha ní quide-o, te ña cùtnuní iní-ó nãsa cúñaha-o xii tée tàxi tnuní ñahá xii-o núu na càna ñaha-dé —cächí tée cùu secretariú xáha-dě xii-yu.

41 Te ní xáha-dě sá nùhú-yu te ní ndihí-yu cuánuhú.

## 20

*Té Páblú cuáhá-dé distritú Macèdoniá ndihí distritú Grèciá*

1 Te òrè ña túú-gã ní quide dusa-yu, te ní cana ñaha tẽ Páblú xii nchaa ñáyiu

sàndáá iní tnúhu Jèsús ní cáhá<sup>n</sup>-dé dóho-yu nàcuáa cadá-yu. Te ní quide ndee iní ñáhá-dě xií-yu, te ní tñi-dé ichi cuáhá<sup>n</sup>-dé distrítú Macèdoniá. <sup>2</sup> Te tayâha-dé cuáhá<sup>n</sup> ñi<sup>n</sup> ñi<sup>n</sup> ñuú yíndèhu Macèdoniá. Te càhá<sup>n</sup>-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudí iní-yu cadá-yu nàcuáa càhá<sup>n</sup> Yã Ndiõxí cadá-yu sá dúcá<sup>n</sup> ñi cáhá<sup>n</sup>-dé dóho-yu. Té ní quexìo-dé distrítú Grèciá. <sup>3</sup> Te xiá<sup>n</sup> ñi xíndecu-dé úní yóó. Te xiá<sup>n</sup> quèe-dé bàrcú quíhí<sup>n</sup>-dé distrítú Siriá ní cùu, te ní níhí-dě tnúhu sá ndétú ñàha ñi<sup>n</sup> úu cue tée isràèl cahni ñàha-güedě xii-dé ní cùu, núu xiá<sup>n</sup> ní tñi-dé ichi cuáhá<sup>n</sup>-dé ní yáha-dé ichi distrítú Macèdoniá. <sup>4</sup> Te cuáhá<sup>n</sup> ndihí-dé té Sopàtér tée ñuú Bèréa, ndihí té Aristarcú, ndihí ñi<sup>n</sup> tée nàni Segundú. Te ndi ndúú cue tée-án<sup>n</sup> cúu-güedě cue tée ñuú Tesalónicá. Te tñàhá té Gáyú tée ñuú Dèrbé, ndihí té Timùteú cuáhá<sup>n</sup> ndihí-dé, te tñàhá té Tìquicú ndihí té Trõfimú cuáhá<sup>n</sup> ndihí-dé, te úu cue tée-án<sup>n</sup> cúu-güedě cue tée distrítú Àsiá. Te nchaa cue tée-án<sup>n</sup> cuáhá<sup>n</sup> ndihí-güedě té Pàblú. <sup>5-6</sup> Te ní quexìo-güedě ñuú Filipú, te yàcá<sup>n</sup> ní naníhí ñáhá-güedě xii-ndí. Te té Pàblú ní tendaha-dě cue tée ndihí-dé cuáhá<sup>n</sup>-güedě ñuú Tròás, te ní xáha<sup>n</sup>-dě sá díú-ní yàcá<sup>n</sup> cundetú ñàha-güedě xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhí levadurá. Te sàtá ñi yáha vico, te ní quèe-ndí bàrcú cuáhá<sup>n</sup>-ndí, te ní xúhu<sup>n</sup>-ndí ichi úhú<sup>n</sup> nduu, te ní quexìo-ndí ñuú-án<sup>n</sup>. Te yàcá<sup>n</sup> ní naníhí tñàhá-ndí ndihí cue tée yòdo nuu cuáhá<sup>n</sup> ní xíndecu-ndí úsá nduu.

### *Té Pàblú cuáhá<sup>n</sup> ngándihí-dé ñáyiú ñuú Tròás*

<sup>7</sup> Te ñi<sup>n</sup> nduu ndumìngú ní naníhí tñàhá-ndí ndihí nchaa ñáyiú ní sàndáá iní-xi tnúhu Jèsús ní xexi-ndí pàá ndihí-yu. Te duca<sup>n</sup> ñi quide-ndí, chi ní cachí Jèsús sá dúcá<sup>n</sup> càda-o cuendá sá vã nácuànaa-o sá ñi xíhí-gá cuendá naníhí tãhú-ó. Te té Pàblú ní ngüíta-dé càhá<sup>n</sup>-dé tnúhu-gá, te càhá<sup>n</sup>-dé ní cuu dava niú, chi cuendá ná tũndaá ingá nduu-án<sup>n</sup>, te caca-dé quíhí<sup>n</sup>-dé ingá xichi. <sup>8</sup> Te ndécú-yu vehe yòdo tñaha, te yìhí-yu

ndéé cuartú cúu ùní núu ññu, te càyú víhí ñùhú xití cuartú-án<sup>n</sup>. <sup>9</sup> Te ñi<sup>n</sup> tée sa ta cùu sacuéhé luha nàni-dé Eùticú núcõo-dé yèhe ventaná, cuini-dé cúdu-dé, chi ní cunaha víhí cahá<sup>n</sup> té Pàblú, te ní tñi ñàha sàní xii-dé ní xídí-dé, te ní ngava-dé ndéé ñuhu. Te ní nuú-yu núu ñùhú cuendá ndacani ñàhá-yu, te sa ní xíhí-dé, chi ío dùcú<sup>n</sup> ní ngava-dé. <sup>10</sup> Te tñàhá té Pàblú nchìcú<sup>n</sup>-dé ní nuu. Te ní quexìo cunu-dé núu cãtùu tée ní xíhí-án<sup>n</sup>, te ní numi ñàha-ni-dě, te ní xáha<sup>n</sup>-dě xií-yu:

—Vá ndìhú iní-ndó, chi ní ndoto-dé —  
càchí-dé xáha<sup>n</sup>-dě xií-yu.

<sup>11</sup> Te dàtnùni cuánda ndihí ñàha tucu-dé xií-yu cuartú núu yìhí-yu ní cùu, te yàcá<sup>n</sup> ní xexi ndihí ñàha-dě xií-yu, dàtnùni ní ngüíta-dé vãi-gá tnúhu ní cáhá<sup>n</sup>-dé, te càhá<sup>n</sup>-ni-dé ní tũndaá, te dàtnùni ní xica-dé cuáhá<sup>n</sup>-dé. <sup>12</sup> Te tée ní ngava-án<sup>n</sup> ní sánũndeca ñàhá-yu xii-dé ndéé vehe-dé, te ío ní cudí iní-yu sá ñi ndoto-dé.

### *Ní quee-güedě ñuú Tròás cuáhá<sup>n</sup>-güedě ñuú Miletú*

<sup>13</sup> Te té Pàblú ní cachí-dé sá quíhí<sup>n</sup>-ndí ndihí bàrcú ndéé ñuú Àsón, te mee-dě caca saha-dě, te yàcá<sup>n</sup> naníhí tñàhá-ndí ndihí-dé te quèe-dé bàrcú, te ní quèe-ndí bàrcú cuáhá<sup>n</sup>-ndí. <sup>14</sup> Te ní naníhí tñàhá-ndí ndihí-dé ñuú Àsón, te yàcá<sup>n</sup> ní quèe-dé bàrcú tñàhá-dé cuáhá<sup>n</sup>-ndí ñuú Mitilené. <sup>15</sup> Te ní quexìo-ndí ndéé ingá nduu yatni ñuú Quíú, te ndéé nduu tñéé ní quexìo-ndí ñuú Sãmú te yàcá<sup>n</sup> ní yáha-ndí, te ní quexìo-ndí ñuú Trògiliú. Te ndéé nduu idá ní quexìo-ndí ñuú Miletú. <sup>16</sup> Te té Pàblú ñà ní cuini-dé yáha-ndí ñuú Éfesú, chi ñà túú ní tñàhá iní-dé cuyaa-dě ichi, chi ío ndìhí iní-dé cuendá cuini-dé quiní-dé ñuú vá ndácú-dě ndexìo-dé ñuú Jerusalén cundecu-dé vico Pentecòstés.

### *Té Pàblú càhá<sup>n</sup> ndihí-dé cue tée yíndaha ñàha xii ñáyiú sàndáá iní tnúhu Jèsús ñuú Éfesú*

<sup>17</sup> Te òré ndécú tẽ Pàblú ñuú Miletú, te ní cana-dé cue tée yíndaha ñàha xii ñáyiú sàndáá iní tnúhu Jèsús ñuú Éfesú sá quíhí<sup>n</sup>-güedě núu ndécú-dě. <sup>18</sup> Te sàtá ñi quexìo-güedě, te ní xáha<sup>n</sup>-dě xii-güedě:



—Nàha-ndo nacuaáa ní quide-í ndéé cútnàhá ní quexiò-í distritú Àsiá. <sup>19</sup> Chi ní quide-í nàcuáa ní cáhá<sup>n</sup> Yă Ndiöxí cada-í, ñá túú ní tühío-í, te ñá túú ní quide cahnu-í mée-í, te ío ní ndáhyú-í sá quidé dàvá-yu, chi ío sàá iní-yu. Te sa nàha-ndo sá titní xito ní cuini ñáyiú isràél cahni ñàhá-yu xii-í ní cùu, te ío ní ndoho-í ní cácu-í. <sup>20</sup> Te sa nàha-ndo sá ncháándì tühú sa ní cachí tnúhu-í nàcuáa cada-ndo cuendá sá chindèe ñaha Yă Ndiöxí xii-ndo. Te ní cáhá<sup>n</sup>-í tnúhu-gá núú-ndó nchàa-ndo, te ñu-ni duca<sup>n</sup> ñi quixi-í ndi tnahá vehe-ndo ñi cáhá<sup>n</sup>-í tnúhu-gá núú-ndó. <sup>21</sup> Te ní xáha<sup>n</sup>-í xii ñáyiú isràél ndihí ñáyiú ñá túú cùu ñáyiú isràél sá dáñá-yu nchaa sá cuèhé sá dúhá quidé-yu te quindáá iní-yu tnúhu Xítohó Jesucristú. <sup>22</sup> Te dacuití quihí<sup>n</sup>-í ñuú Jerusálén, chi Espiritú Yă Ndiöxí ní cachí-xi sá dáí quihí<sup>n</sup>-í, te ñá túú xini-í nándi cada ñaha-güedé xii-í yacá<sup>n</sup> te núu na quèxio-í. <sup>23</sup> Te ñi<sup>n</sup> ñi<sup>n</sup> ñuú núú sàhá<sup>n</sup>-í cächí tnúhu Espiritú-gá sá chíhí ñaha-güedé vecaá, te cada úhú ñàhá-güedé. <sup>24</sup> Dico ñá túú tnahí ná cuu cuèi na cahni ñaha-güedé xii-í, dico cuini-í sá díi iní dandihí-í nchaa sá ñi cachí Xítohó Jesucristú cada-í. Te ní cachí Yă Ndiöxí sá cáhá<sup>n</sup>-í núú ñáyiú sá ío cùu iní ñàhá-gă xii-yu, te naníhí tànhú-yu núu na quindáá iní-yu tnúhu-gá.

<sup>25</sup> Te sa ní cachí tnúhu-í xii-ndo nchàa-ndo sá núu na quindáá iní-ndó Yă Ndiöxí, te ndíhu ndaha ñàha-gá xii-ndo. Te na cächí tnúhu-í sá ñi ñi<sup>n</sup> nduu-gá vá quini ñàhá-ndó xii-í ñuyú-a. <sup>26-27</sup> Te yúhú ñá túú cuèchi-í núu ío ñáyiú vá naníhí tànhú, chi sa ní cachí tnúhu-í nchaa sá ñi cáhá<sup>n</sup> mée Yă Ndiöxí cada-ndo. <sup>28</sup> Te coto-ndo mée-ndo, te coto-ndo tnahá ñáyiú sàndáá iní tnúhu-gá, chi Espiritú-gá ní cachí-xi sá cùnùu-ndo núu-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu duca<sup>n</sup> cada-ndo cuendá, chi nàha-ndo sá Jèsús ní sati níñi-gă, te ní xihí-gá cuendá naníhí tànhú-ó ndihí-yu. <sup>29</sup> Te yúhú sa cùtnuní iní-í sá òré ñá túú-gă-í ndécú, te quixi ñáyiú dandàhú ñàhá xii-ndo cuendá dañà-ndo tnúhu Yă Ndiöxí, te cada ñàhá-yu xii-ndo dàtná

quidé ñàhá òré tñí-dí mbéé. <sup>30</sup> Te ñu-ni ñi<sup>n</sup> úú cue téé ndècu ndihí-ndo, cue téé-án<sup>n</sup> dacuàndehnde-güedé, te cudana davá-yu quindáá iní-yu chítnàhá ñàhá-yu xii-güedé. <sup>31</sup> Te xíá<sup>n</sup> núu cächí tnúhu-í sá ío quihí iní-ndó cùndecu-ndo ndihí nchaa ñáyiú sàndáá iní tnúhu-gá. Te nàha-ndo sá yúhú ní xíndecu-í úní cuía ñi cáhá<sup>n</sup>-í tnúhu Jèsús núú ñáyiú cuèi nduu cuèi niú. Te áma ní xóo ndáhyú-í, chi ñá ní cuini-yu quindáá iní-yu nchaa-yu tnúhu ní cáhá<sup>n</sup>-í —cächí té Páblú xáha<sup>n</sup>-dē xii-güedé.

<sup>32</sup> Te xáha<sup>n</sup> tùcu-dé:

—Nchòhó cue téé ndècu ndihí-í ichi Xítohó Jesucristú, ío cuini-í sá mée Yă Ndiöxí chindee ñàha-gá xii-ndo. Te mee-gă ñi cáhá<sup>n</sup>-gá sá ío cùdíi iní ñàhá-gă xii-ndo. Te naníhí tànhú-ndó ndihí nchaa ñáyiú cùu cuendá-gá, te chindee ñàha-gá xii-ndo cuendá cada-ndo nchàa sá cáhá<sup>n</sup>-gá. <sup>33</sup> Te òré ní xíndecu ndihí ñaha-í xii-ndo, te ní díhú<sup>n</sup> ñi dōó ñà túú ní cùdíi iní-í. <sup>34</sup> Te mee-ndo sà naha-ndo sá yúhú ní quide chiú<sup>n</sup>-í, te ní níhí-í nchaa sá ñi nandihí-í ndihí cue téé xica cuu ndihí-í. <sup>35</sup> Te sa ní xini-ndó nàcuáa ní quide-í ní quide chiú<sup>n</sup>-í, te ñu-ni duca<sup>n</sup> cada chiú<sup>n</sup>-ndo cuendá chindee-ndo nchàa ñáyiú ndàhú, chi sa nàha-ndo nacuaáa ní cachí Xítohó Jesucristú, te duha ní cachí-gá: “Cùdíi-gă iní-ó cuàha-ò ñáyiú ndàhú sá xini ñùhú-yu dàcúxí sá táxi-yu xii mee-o”, duha ní cachí-gá —cächí té Páblú xáha<sup>n</sup>-dē xii-güedé.

<sup>36</sup> Te sátá dúcá<sup>n</sup> ñi cáhá<sup>n</sup>-dé, te ní ngüñí xítí-dē ndihí dava-gá-güedé, te ní cáhá<sup>n</sup> ndihí-dé Yă Ndiöxí. <sup>37</sup> Te sátá ñi tühú tnúhu ní cáhá<sup>n</sup>-dé ndihí Yă Ndiöxí, te ní ndáhyú víhí-güedé sá quihí<sup>n</sup>-dé, te ní numi ñaha-güedé, te ní teyuhu ñàha-güedé. <sup>38</sup> Te ní ndíhú víhí iní-güedé, chi ní xáha<sup>n</sup> té Páblú sá ñi ñi<sup>n</sup> nduu-gá vá naníhí tnahá-güedé cáhá<sup>n</sup> ndihí tnahá-güedé. Te cuáhá<sup>n</sup> ndihí ñaha-güedé xii-dé núú ndécú bàrcú.

## 21

### *Té Páblú cuáhá<sup>n</sup>-dé ñuú Jerusálén*

<sup>1</sup> Te ní quide ndee iní-ndí nchaa cue téé cùnuu. Te ní quée-ndí bàrcú cuáhá<sup>n</sup> ndáá ichi-ndí ñuú Cös. Te nduu tnéé ní sàhá<sup>n</sup>-ndí



ñuú Ròdás, te ní yáha-ndí cuáhá<sup>n</sup>-ndí ñuú Pàtará. <sup>2</sup> Te yàcá<sup>n</sup> ní naníhí-ndí ñ<sup>n</sup> bàrcú ñúhú ìchi-xi quíhí<sup>n</sup>-xi distritú Fèniciá, xíà<sup>n</sup> ní quée-ndí cuáhá<sup>n</sup>-ndí. <sup>3</sup> Te ichi cuáhá<sup>n</sup>-ndí ní xiní-ndí distritú Chìpré cáá cuádava xítí làmár, te ní yáha-ndí, te ní quendóo ñuú-á<sup>n</sup> xio dàtni-ndí. Te cuáhá<sup>n</sup>-ndí ñuú Tìrú ñ<sup>n</sup> ñuú yíndèhu distritú Siriá cuendá yàcá<sup>n</sup> tava-güedé nchaa sá nchídó bàrcú. <sup>4</sup> Te yàcá<sup>n</sup> ní naníhí tnáhá-ndí ndihí ñáyiú ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáhá<sup>n</sup>-yu sá vǎ quíhí<sup>n</sup> té Pǎblú ñuú Jerusálén, chi Espiritú Yǎ Ndiöxí ní xáha<sup>n</sup>-xi xíi-yu sá ndóhó vihi-dé ñuú na quíhí<sup>n</sup>-dé. <sup>5</sup> Te sátá ñí yáha nduu úsá, te ní quee-ndí cuáhá<sup>n</sup>-ndí yuhu làmár. Te ní quee nchaa ñáyiú ní sándáá iní tnúhu-gá, té, ñàdìhí, nchaa landú, nchaá-yu ní sándeça ñàhá-yu yuhu làmár, te òré ní quexìo-ndí, te ní ngüíñí xítí-ndí ní cáhá<sup>n</sup> ndihí-ndí Yǎ Ndiöxí. <sup>6</sup> Te ní quide ndee ìní tnáhá-ndí ndihí-yu, te dàtnùnì ní quée-ndí bàrcú, te ní naquehé<sup>n</sup>-yu ichi cuánuhú-yu vehé-yu.

<sup>7</sup> Te ní xica bàrcú ñúhú-ndí ní quee-xi ñuú Tìrú cuáhá<sup>n</sup>-ndí ndihí-xi ñuú Tolèmaidá. Te xía<sup>n</sup> ñí sáá-xi te ní quene-ndí, te ní sáhá<sup>n</sup>-ndí ní cáhá<sup>n</sup> ndihí-ndí nchaa ñáyiú sándáá iní-xi tnúhu Jèsús, te ní xíndecu-ndí ndihí-yu ñ<sup>n</sup> nduu. <sup>8</sup> Te nduu tnèé ní ndée tucu-ndí bàrcú cuáhá<sup>n</sup>-ndí ñuú Cèsareá, te yàcá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lìpé cundecu-ndí ndihí-dé. Te téé-á<sup>n</sup> ñí xóo cada chiu<sup>n</sup> ndihí-dé ñíú-gá cue téé ní chindee ñàha xii ñáyiú sándáá iní tnúhu-gá ñuú Jerusálén ní xóo cuáñaha-güedé sá ñí xóo caxí-yu. Te dàtnùnì mee-ñǎ tnúhu Yǎ Ndiöxí càhá<sup>n</sup>-dé xíca cùu-dé. <sup>9</sup> Te té Lìpé-á<sup>n</sup> ndècu cúmí dèhe dìhí-dé, te ní ñ<sup>n</sup>-yu vátá ndúcú ñàha-gá téé xíi-yu, te nchaá-yu càhá<sup>n</sup>-yu tnúhu Yǎ Ndiöxí tnúhu sá dácàhu iní ñàhá mèe-gá. <sup>10</sup> Te xía<sup>n</sup> ñí cuu titní nduu ndècu-ndí, te ní quexìo ñ<sup>n</sup> téé nàni Agabú ñuú-á<sup>n</sup>, véxi-dé distritú Jùdeá, te téé-á<sup>n</sup> tnáhá-dé càhá<sup>n</sup>-dé tnúhu Yǎ Ndiöxí. <sup>11</sup> Te ní níhí-dé tnúhu núú ndécú-ndí ñuú ní quixi-dé ní cáhá<sup>n</sup>

ndihí ñàha-dé xii-ndí. Te ní xíca<sup>n</sup>-dé cìrchú té Pǎblú, te ní ngóo-dé, te ní ngüíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espiritú Yǎ Ndiöxí ní cachí-xi sá tée dii cìrchú-xi-a tñii ñàha cuè téé isràél ñuú Jerusálén, te duha dácùtu ñàha-güedé xii-dé, te cuáha cuendá ñàhá-güedé xii-dé núú cuè téé ñuú Ròmá. Duha ní cáhá<sup>n</sup> Espiritú-gá —càchí té Agabú.

<sup>12</sup> Te sá dúcá<sup>n</sup> ñí cáhá<sup>n</sup>-dé, te ní xáha<sup>n</sup>-ndí nchaa-ndí sá vǎ quíhí<sup>n</sup> té Pǎblú ñuú Jerusálén. <sup>13</sup> Te té Pǎblú ní cachí-dé:

—¿Ná cuendá ndée dúcá<sup>n</sup> ndàhyú-ndó dàndihú iní ñàhá-ndó xii-í-i? Te ñá túú ñǎ cuu cuèi na dácùtu ñàha-güedé, àdi cuèi na càhni ñàha-güedé xii-í cuendá sá càhá<sup>n</sup> ndihí-í Jèsús, chi sa ndècu túha-í sá cùú-í —càchí-dé.

<sup>14</sup> Te ñá túú ní sándáá iní-dé sá dúcá<sup>n</sup> xáha<sup>n</sup>-ndí, núú xíà<sup>n</sup> ñá túú-gǎ ná ní xáha<sup>n</sup>-ndí xii-dé sá vǎ quíhí<sup>n</sup>-dé, te ní xítñàha-ndí:

—Mee-ni-gǎ Yǎ Ndiöxí ná cùnaha-gá nása sàni iní-gá cada-gá —xítñàha-na-ndí.

<sup>15</sup> Te ní quehe<sup>n</sup>-ndí ndàchiu<sup>n</sup>-ndí, te ní xica-ndí cuáhá<sup>n</sup>-ndí ñuú Jerusálén. <sup>16</sup> Te cuáhá<sup>n</sup> ndihí-ndí ñ<sup>n</sup> ùú cue téé Cèsareá, cue téé ní sándáá iní tnúhu Jèsús. Te ndèca ñàha-güedé xii-ndí cuáhá<sup>n</sup> vehe té Mnàson, te téé-á<sup>n</sup> cùú-dé téé distritú Chìpré, te ndècu-dé ñuú Jerusálén, te sa ní cuu vǎi nduu ní sándáá iní-dé tnúhu-gá, te vehe téé-á<sup>n</sup> ñí xíndecu-ndí.

### *Té Pǎblú ndátnūhu-dé ndihí té Jàcobó*

<sup>17</sup> Te òré ní quexìo-ndí ñuú Jerusálén, te nchaa ñáyiú ní sándáá iní tnúhu Jèsús ní quixí-yu ní dándácõ váha ñàhá-yu, chi ní cudíí víhí iní-yu sá ñí quexìo-ndí. <sup>18</sup> Te nduu tnèé cuáhá<sup>n</sup> ndihí-ndí té Pǎblú cuendá cáhá<sup>n</sup> ndihí-ndí té Jàcobó, te òré ní quexìo-ndí núú ndécú-dé, te ndècu ndihí-dé nchaa cue téé yíndaha ñàha xii ñáyiú sándáá iní tnúhu Jèsús. <sup>19</sup> Te té Pǎblú ní dándácõ váha ñàha-dé xii-güedé, te ní xáha<sup>n</sup>-dé nàcuáa ní quide Yǎ Ndiöxí ní chindee ñàha-gá xii-dé ní cáhá<sup>n</sup>-dé tnúhu-gá núú ñáyiú ñá túú cùu ñáyiú isràél. <sup>20</sup> Te sátá ñí yáha ní cáhá<sup>n</sup>-dé, te ní ndácá<sup>n</sup> táhū-yu núú Yǎ

Ndióxí cuendá nchaa sá ñí quide-gá. Te dātnùní ní xáha<sup>n</sup>-güedě xii té Pāblú:

—Yòhó sa nàha-n sá ñí cuu titní mīl ñáyiú isràél ní sándáá iní-yu tnúhu Jèsús, te càchí-yu sá ìo xìni ñuhu-xi cadá-yu nchaa nàcuáa càhá<sup>n</sup> tnúhu sá ñí chídó tnùní ndíi Moisés. <sup>21</sup> Te ní níhí-yu tnúhu sá dācuàha-n ñáyiú isràél ñáyiú ndècu ñuú xíca cuendá sá vā cadá-gā-yu nàcuáa ní cachí ndíi Moisés cadá-yu. Te xāha<sup>n</sup>-n xií-yu sá vā cuāha-gā-yu señá ñi landú-yu, te vā cadá-gā-yu dātná ní xóo cada ñáyiú ndéé sanaha, duha dācuaha-n ñáyiú ní níhí-yu tnúhu. <sup>22</sup> Te na nihí-yu tnúhu sá ndécú-n ìha, te tnāvíí ngúíta-yu cáhá<sup>n</sup> cuèhé-yu cuendá-n. <sup>23</sup> Te na càchí tnúhu-ndí nàcuáa cada-n. Ndècu cúmí cue tée vátá cadá-gā-güedé nàcuáa ní cáhá<sup>n</sup> méé-güedé sá cadá-güedé cuendá nduu vétú iní Yā Ndióxí. <sup>24</sup> Te quíhí<sup>n</sup>-n ndíhi-güedé te cada-n nchaa nàcuáa ní xóo cada ñáyiú ndéé sanaha cuendá nduu vétú iní Yā Ndióxí. Te tava-n díhú<sup>n</sup> cuu núú-güedé cháhu-güedé veñúhu, te duca<sup>n</sup> te dātnùní ndacu dèté díquí-güedé. Nchaa xíá<sup>n</sup> cada-n, te quini ñáyiú sá ñā ndāá tnúhu càhá<sup>n</sup> nchaa ñáyiú càhá<sup>n</sup> cuèhé cuendá-n. Te na cùtnuní iní-yu sá tnàhá-n quide-n nchaa nàcuáa ní chídó tnùní ndíi Moisés cadá-yu. <sup>25</sup> Te sa ní quide ndáá-ndí cuendá nchaa ñáyiú ñuú xíca, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyiú-á<sup>n</sup> sá vā cáxi-yu nchaa sá nchító-ó ndùu táhú nchaa sá càchí-yu cùu ndióxí ní cadúha cue ñáyiú ñuyíú-a. Te ní xáha<sup>n</sup>-ndí sá vā cáxi-yu níhí, te vā cáxi-yu cuñú nchaa quití cuèhné. Te vā càhá<sup>n</sup> ndíhi cue tée ñadíhí te núu ñā díú ñādíhí-güedé cúy-yu, te ní cuè ñáyiú díhí vā càhá<sup>n</sup> ndíhí-yu tée te núu ñā díú yí-yu cùu-güedé. Duha ní tee-ndí núú tütú cuáhá<sup>n</sup> —càchí-güedé xāha<sup>n</sup>-güedé xii té Pāblú.

*Ní tñi-güedé té Pāblú xití veñúhu ñáyiú isràél*

<sup>26</sup> Te nduu tnéé cuáhá<sup>n</sup> té Pāblú ndíhi cúmí cue tée veñúhu càhnu sá ìo cùnūu núú ñáyiú isràél cada-güedé nàcuáa ní xóo cada ñáyiú ndéé sanaha cuendá nduu vétú iní Yā Ndióxí. Te ní quíhu-dé veñúhu càhnu

sá ìo cùnūu-á<sup>n</sup> ní xáha<sup>n</sup>-dē ná daha-gá nduu cùmání dandíhi-güedé nàcuáa ní xóo cada ñáyiú ndéé sanaha, te dātnùní cànehe-güedé sá ndúú táhú Yā Ndióxí quíhí<sup>n</sup> veñúhu.

<sup>27</sup> Te cùmání-gā cuu úsá nduu sá ñí sáhá<sup>n</sup>-güedé veñúhu càhnu sá ìo cùnūu, te sa ndècu tucu té Pāblú veñúhu. Te cue tée isràél véxi distrítú Àsiá ní xiní-güedé té Pāblú yíhí-dē veñúhu, te ní tñi ñaha-güedé xii-dé, te ìo ní cáhá<sup>n</sup> cuèhé-güedé cuendá-dé núú dāva-gá ñáyiú yíhí veñúhu cuendá sá cúdē<sup>n</sup>-yu núú tē Pāblú. <sup>28</sup> Te níhi ní cáhá<sup>n</sup>-güedé, te xāha<sup>n</sup>-güedé xií-yu:

—¡Nchòhó ñáyiú isràél, yáchí-ndó chì cuánundaha ñaha-ndo! Chì tée-a yayacá<sup>n</sup> cuáhá<sup>n</sup>-dé càhá<sup>n</sup>-dé sá ñā túú nāndíhi-o, te càhá<sup>n</sup>-dé sá vā cadá-ó nchaa nàcuáa càhá<sup>n</sup> tnúhu sá ñí chídó tnùní ndíi Moisés, te càchí-dé sá ñā túú nāndíhi veñúhu-a. Te ñā díú-ní xíá<sup>n</sup> chì sa ní quíhu-dé veñúhu-a ndíhi cue tée ñā túú cùu ñáyiú isràél, te sá dúcá<sup>n</sup> ñí quide-dé, te ñā túú-gā ní cànehe íí-dē xití veñúhu, Te veñúhu-a cùu-xi vehe Yā Ndióxí —càchí-güedé xāha<sup>n</sup>-güedé xií-yu.

<sup>29</sup> Te duca<sup>n</sup> ñí cáhá<sup>n</sup>-güedé chì ní sani iní-güedé sá ñí quíhu ndíhi-dé té Trōfimú veñúhu-güedé, chì ní xiní-güedé xíca cùu ndíhi ñaha-dé xití ñuú. Te tée-á<sup>n</sup> cúú-dē tée ñuú Éfésú, te ñā díú tē isràél cúú-dē.

<sup>30</sup> Te chitu ñáyiú ñuú-á<sup>n</sup> ñí tacá-yu ní tñi-yu té Pāblú táñùhu ñahá-yu ní ndee veñúhu càhnu sá ìo cùnūu, te òré-ni ní nacadí-güedé yēhe veñúhu-á<sup>n</sup>. <sup>31</sup> Te sa cahní-yu té Pāblú ní cùu, te ní sáhá<sup>n</sup> ñí úú-güedé núú ndécú tē cùu capitá<sup>n</sup> cùnūu-gá, te ní xáha<sup>n</sup>-güedé xii-dé sá ncháá ñáyiú ñuú Jerusàlén xínáá-yu. <sup>32</sup> Te òré-á<sup>n</sup> cuáhá<sup>n</sup> tē cùu capitá<sup>n</sup> cùnūu-gá ndíhi dāva-gá cue tē nchícú<sup>n</sup>-gá ndíhi sandādú-dé. Te òré ní xiní-yu ní quexìo coyo-güedé núú xíxúcu-yu, te ní yùhú-yu ñā túú-gā ní cāní-yu té Pāblú. <sup>33</sup> Te tē cùu capitá<sup>n</sup> ní sātuhā-dé té Pāblú, te ní xáha<sup>n</sup>-dē xii cue sandādú-dé sá tñi ñaha-güedé dacùtu ñaha-güedé úú cadēná. Te dātnùní ní xíca<sup>n</sup> tnúhú-dē núú-yu, te xāha<sup>n</sup>-dē:

—¿Ná cúú tē-a? ¿Ná ní quide-dé? — càchí-dé xāha<sup>n</sup>-dē xií-yu.

34 Te tée cùu capitá<sup>n</sup>-á<sup>n</sup> ñă ní cùtnuni iní-dé nŭu ná cúú sã ní quide té Păblú, chi uu<sup>n</sup>i ní cuáá-yu. Te tucu cãhá<sup>n</sup> ì<sup>n</sup>, tucu cãhá<sup>n</sup> ì<sup>n</sup>-yu, núu xiã<sup>n</sup> ní xáha<sup>n</sup>-dě cue sandàdú-dé sá cándeca ñaha-güedé xii-dé quíhí<sup>n</sup> cuártél núú ndécú-güedé. 35-36 Te nchìcú<sup>n</sup> ñáhă-yu cuáhá<sup>n</sup> ní quexìo ndéé nàcuáa càa nchio cuìní-yu cahni ñàhá-yu xii-dé ni cùu. Te níhi ní cáhá<sup>n</sup>-yu xãhá<sup>n</sup>-yu sá cáhni ñàha-güedé, te xiã<sup>n</sup> ní ndacani ñaha-güedé ndécá ñàha-güedé cuásaá nchio-ã<sup>n</sup>.

*Té Păblú xãha<sup>n</sup>-dě xii-güedé sá ñà túú cuéchi-dé*

37 Te cuángu<sup>n</sup>hu-güedé cuártél ndihi té Păblú ní cùu, te ní xáha<sup>n</sup>-dě xii tée cùu capitá<sup>n</sup> cúnùu-gá:

—Cãhá<sup>n</sup> ndàhú-í núú-n cùndetu-n na cúñaha-í ì<sup>n</sup> úú tnúhu xií-yu —càchí-dé xãha<sup>n</sup>-dě.

Te tée tàxi tnuní-á<sup>n</sup> ní xáha<sup>n</sup>-dě:

—¿Náa tnàhá yòhó cãhá<sup>n</sup>-n tnúhu grìégú?

38 Te ní cáhà<sup>n</sup>-í sá tée ègiptú cúú-n, chi diu-n ní ndúcú-n cuè tée ní nàá ndihi tée cùchiu<sup>n</sup> Cesár ní cáhà<sup>n</sup>-í, chi diu ì<sup>n</sup> tée yacá<sup>n</sup> ní ndúcú-dé cúmí mĩl cue tée ní sahani ndíyi. Te ndèca tnaha-güedé ní sáhá<sup>n</sup> xití yucu ní xíhi váha-güedé —càchí-dé xãha<sup>n</sup>-dě xii té Păblú.

39 Te té Păblú ní xáha<sup>n</sup>-dě:

—Ñá díú tée ègiptú cúú-í, chi tée isràél cúú-í, chi diu-ni tée isràél cúú tătà-í, te dìcò-ni sá ní cacu-í ñuú Tàrsú ñuú cáhni, te ñuú-á<sup>n</sup> yíndèhu-xi distritú Ciliciá. Te cuìní-í cada ndee iní-n dàña-n na cahá<sup>n</sup> ndihi-í-yu —càchí-dé xãha<sup>n</sup>-dě.

40 Te ní xáha<sup>n</sup> tée cùu capitá<sup>n</sup> cúnùu-gá sá cúú cãhá<sup>n</sup> té Păblú, núu ní ngúnutnî-dé núú nchio, te ní quide-dé ndaha-dé sá cùndedóho-yu. Te ní sadí-yu yuhú-yu, te ní cáhá<sup>n</sup>-dé tnúhu ñáyiú isràél, te xãha<sup>n</sup>-dě xií-yu:

## 22

1 —Chí cáda càhnu iní nchòhó cue tée sa cuéhé ndihi nchòhó cue tée cuechi, na cãhá<sup>n</sup>-í ì<sup>n</sup> tnúhu cundedóho-ndo sã ñà túú cuéchi-í, chi ñà túú ñă ní quide-í, te ni ñà túú ñă tnúhu cãhá<sup>n</sup>-í —càchí-dé xãha<sup>n</sup>-dě xii-güedé.

2 Te cuendá sá dúcá<sup>n</sup> ní cáhá<sup>n</sup>-dé tnúhu mèe-yu núu tnàví-ñă ní sadí-yu yuhú-yu ní xíndedóho-yu ní cáhá<sup>n</sup>-dé, te xãha<sup>n</sup>-dě:

3 —Yúhú cúú-í tée isràél, te ní cacu-í ñuú Tàrsú, te ñuú-á<sup>n</sup> yíndèhu-xi Ciliciá. Te davitna lĩhli-í cùtnàhá ní quexìo-í ñuú Jerusàlén ní dácuáhá ñàha té Gamàliél. Te ní dácuáhà-í nchaa tnúhu ní chídó tnùnì nchaa cue tée ndéé sanaha nàcuáa cada ñáyiú. Te yúhú ní cahu iní-í ní quide-í títní núú chiu<sup>n</sup> nacuáa cuu váha iní Yă Ndiõxí ní cáhà<sup>n</sup>-í, te diu-ni duca<sup>n</sup> quide nchohó tucu.

4 Te ní sánú ndúcú-í nchaa ñáyiú sandáá iní-xi tnúhu Jèsús, cuèi tée, cuèi ñáyiú dìhí ní dácútù-í-yu, te ní chihi-í-yu vecaá, te ní níhì-í tnúhu ndee iní sá cáhni-ndí-yu.

5 Te dútú cúnùu-gá ndihi cue tée cúnuu núú-ndó naha-güedé sá ndàá cãhá<sup>n</sup>-í chi mee-güedé ní taxi-güedé tutú cuáñaha-í xii ñáyiú isràél ñáyiú ndècu ñuú Dàmascú cuendá cutnùnì iní-yu ná chíú<sup>n</sup> cuáhá<sup>n</sup>-í ní cùu. Te ñuhu-í ichi cuáhá<sup>n</sup>-í ñuú-á<sup>n</sup> cuánúndúcú-í ñáyiú ní sandáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñàhá-güedé xií-yu ní cùu.

*Té Păblú xãha<sup>n</sup>-dě xii ñáyiú nàcuáa ní cuu ní tuha-dé ichi Jèsús*

*(Hch. 9:1-19; 26:12-18)*

6 Te ta cùyatni-í ñuú Dàmascú cuáhá<sup>n</sup>-í, te cùu-xi datná òré cauxúú nduu, te uu<sup>n</sup>i ní quee ñuhú andiu, te ní dáyèhé-xi ndéé núú núnî-í. 7 Te ní quide nee-xi núú-í, xiã<sup>n</sup> ní nduá-í ndéé ñuhu. Te ní tecú dóho-í cãhá<sup>n</sup> ì<sup>n</sup> sá cãhá<sup>n</sup> andiu, te càchí-xi: “Yòhó té Sàulú, ¿ná cuendá cúú úhú iní ñàhá-n dândoho ñaha-n xii-í?”, càchí sá cãhá<sup>n</sup>-á<sup>n</sup>.

8 Te ní xáha<sup>n</sup>-í: “¿Ná cúú yòhó sá cãhá<sup>n</sup>-ái?”, xãha<sup>n</sup>-í. Te ní cáhá<sup>n</sup> tucu ingá xito te càchí-xi: “Yúhú cúú-í Jèsús tée ní xíndecu ñuú Nazàrét, te duca<sup>n</sup> ïo dândoho ñaha-n xii-í”, càchí sá cãhá<sup>n</sup>-á<sup>n</sup>. Te xiã<sup>n</sup> ní cutnùnì iní-í sá díú Jèsús cãhá<sup>n</sup>. 9 Te nchaa cue tée ndihi-í ní xiní-güedé ní dáyèhé ñuhú, te ní yuhú-güedé, dico ñà túú ní tècú dóho-güedé òré ní cáhá<sup>n</sup>-gá. 10 Te ní xáha<sup>n</sup>-í xii-gá: “Yòhó Xítòhó Jesucrìstú, ¿ná cuìní-n càda-í?”, xãha<sup>n</sup>-í xii-gá. Te ní cachí-gá: “Ndacóo, te quíhí<sup>n</sup>-n ñuú Dàmascú, yacá<sup>n</sup> tecú tnúhu-n nchàa nacuáa cuìní Yă Ndiõxí



cada-n”, cächí-gá —cächí té Păblú xăha<sup>n</sup>-dë xií-yu.

11 Te ní xáha<sup>n</sup> tùcu té Păblú:

—Te cuëndá sá nǐ dăcuáá ñàha ñuhú xii-í nǔu ní tñi cue tée ndihi-í ndaha-í ndécá ñàha-güedé cuáhá<sup>n</sup> ndéé ñuú Dàmascú.

12 Te yàcá<sup>n</sup> ndécú ñ<sup>n</sup> tée nàni Ananiás, te ío vâi sá nǐ chídó tñuní ndíi Moisés cadá-yu quide-dé. Te nchaa ñáyiu ñuú Dàmascú ío váha càhá<sup>n</sup> ndihi ñàhá-yu xii-dé. 13 Te ní quexìo-dé núu ndécú-í, te ní cachí-dé: “Yòhó té Sàulú, tée ndècu ndihi-í ichi Xítóhó Jesucristú, ndúha núu-n”, cächí-dé. Te òré-ni ní nacaá<sup>n</sup> núu-í te ní xiní-í-dé. 14 Te dătnuní ní cachí-dé: “Yá Ndiòxí ní càhá<sup>n</sup> ndihi-gá ñani tñáhá-ó nǐ xíndecu ndéé sanaha. Te ñu-gá ní cáxi ñaha-gă xii-n cuëndá quini-n nchàa sá vâha cuini-gá cada-n. Te quini-n Jèsús Yaá ñá túu cuèchi-xi, te ñu-ni mee-gă càhá<sup>n</sup> ndihi ñaha-gă xii-n. 15 Te càhá<sup>n</sup>-n tñuhu Jèsús núu nchàa ñáyiu, te càhá<sup>n</sup>-n nchàa sá nǐ xiní-n ndihi nchaa sá nǐ xíndedóho-n. 16 Tnàvíi, te quíhí<sup>n</sup>-n cuàndute-n, te càhá<sup>n</sup> ndihi-n Yá Ndiòxí cuëndá cada càhnu iní-gá nchaa sá cuèhé sá dúhá nǐ quide-n”, duha ní cachí té Ananiás xii-í —cächí té Păblú xăha<sup>n</sup>-dë xií-yu.

*Té Păblú ní caní-dé cuëndú năcuáa ní xáha<sup>n</sup> Jèsús cada-dé quíhí<sup>n</sup>-dë ñuú núu xíndecu ñáyiu ñá túu cùu ñáyiu isràèl*

17 Te ní xáha<sup>n</sup> tùcu té Păblú:

—Te ní ndee-í cuândixi-í ñuú Jerusàlén. Te ní sáhá<sup>n</sup>-í veñúhu càhnu sá ño cùnūu ní càhá<sup>n</sup> ndihi-í Yá Ndiòxí, te ní dăcótó núu ñáhá-xí sǎ mée Jèsús ní xiní-í xití veñúhu, 18 te ní cachí-gá: “Yáchí, quee-n ñuú Jerusàlén, chi ñáyiu-a vá quindáá iní-yu năcuáa ní cachí-í cùñaha-n xii-yu cuëndá-í”, duha ní cachí-gá xii-í. 19 Te ní xáha<sup>n</sup>-í xii-gá: “Yòhó Xítóhó Jesucristú, sa xiní-n sǎ ncháá ñáyiu nàhá-yu sá nǐ sáhá<sup>n</sup>-í ndi tñahá ñ<sup>n</sup> ndi tñahá ñ<sup>n</sup> veñúhu nànducu-í ñáyiu sàndáá iní tñuhu-n, te ní tñi-í-yu, ní chihi-í-yu vecaá, te ní táuchíu<sup>n</sup>-í ní caniha-güedé xii-yu. 20 Te cútnàhá ní sahani-güedé ndíi Těvá tée ní xóo càhá<sup>n</sup> tñuhu-n, te tñahá-í ndécú òré-á<sup>n</sup> te ní xíndee-í dóo cue tée ní sahani ñaha xii ndíi. Te yúhú ní càhá<sup>n</sup>-í sá nǐ quide váha-güedé sá dúcá<sup>n</sup> nǐ quide-güedé”, duha ní xáha<sup>n</sup>-í xii-gá. 21 Te ní cachí tñuhu-gá xii-í: “Cuáhá<sup>n</sup>

chi cuini-í quíhí<sup>n</sup>-n nchàa ñuú xícá nǔu xíndecu cue ñáyiu ñá túu cùu ñáyiu isràèl càhá<sup>n</sup>-n tñuhu-í”, cächí-gá —cächí té Păblú xăha<sup>n</sup>-dë xií-yu.

*Te Păblú ndihi tée tàxi tñuní ñáhá xii cue sandadú*

22 Te sá dúcá<sup>n</sup> nǐ càhá<sup>n</sup>-dé, te ñá ní tñahá-gá iní-yu cundedóho-yu tñuhu càhá<sup>n</sup>-dé. Te ñ<sup>n</sup>-ni ní cuú-yu nchaa-yu, te ní cuáá-yu, te xăhá<sup>n</sup>-yu:

—¡Chí cáhni-dë! ¡Ñá ñúu sǎ cùndècu-dé ñuyú-a! —cächí-yu xăhá<sup>n</sup>-yu.

23 Te mei òré duca<sup>n</sup> nǐ càhá<sup>n</sup>-yu, te ní ndátă-yu dóo-yu, te ní dáquéně-yu núu ñnu sá sàtú iní-yu. Te ní quèhnu-yu ñuhu, te ní dăcàcòyó-yu núu ñnu sá ño sàtú iní-yu. 24 Te tée cùu capitá<sup>n</sup> cùnūu-gá ní xáha<sup>n</sup>-dë xii cue sandadú-dé:

—Chí dítă-dë ná quíhu-dé ndéé xití vehe, te cani-ndo-dë ñi, chi na quène yuhu-dé ná tñuhu ní càhá<sup>n</sup>-dé nǔu ndéé dúcá<sup>n</sup> cùdèě<sup>n</sup>-yu núu-dë —cächí-dé xăha<sup>n</sup>-dë xii-güedé.

25 Te sàtá nǐ dăcútú ñaha-güedé xii té Păblú sá caní ñaha-güedé ní cùu, te ní xáha<sup>n</sup>-dë xii tée cùu capitá<sup>n</sup> ndécú-ă<sup>n</sup>:

—Te na cächí tñuhu-í sá vǎ cúu càniha-güedé ñi, chi tée ròmá cùu-í, te vátă quini ndáá-gá-ndó nǔu ndècuèchi-í àdi ñáhá —cächí-dé xăha<sup>n</sup>-dë xii tée cùu capitá<sup>n</sup>.

26 Te sá dúcá<sup>n</sup> nǐ càhá<sup>n</sup>-dé, te ní sáhá<sup>n</sup> tée cùu capitá<sup>n</sup> núu tée cùnūu-gá, te ní xáha<sup>n</sup>-dë:

—Vǎ cúu càni-o tée-ă<sup>n</sup>, chi tée ròmá cùu-dë —cächí-dé xăha<sup>n</sup>-dë.

27 Te ní sáhá<sup>n</sup> tée cùu capitá<sup>n</sup> cùnūu-gá ndéé núu té Păblú, te ní xáha<sup>n</sup>-dë:

—Cáhá<sup>n</sup> ndáá-n nǔu ndisa tée ròmá cùu-n —cächí-dé xăha<sup>n</sup>-dë.

Te ní xáha<sup>n</sup> tē Păblú:

—Ndáá sá tē ròmá cùu-í —cächí té Păblú xăha<sup>n</sup>-dë xii tée cùnūu-á<sup>n</sup>.

28 Te ní xáha<sup>n</sup> tē cùnūu-á<sup>n</sup>:

—Yúhú tñahá-í cùu-í tée ròmá, chi vâi díhú<sup>n</sup> nǐ cháhu-í —cächí-dé xăha<sup>n</sup>-dë.

Te té Păblú ní xáha<sup>n</sup>-dë:

—Tñahá-í cùu-í tée yàcá<sup>n</sup> tucu, chi tătă-í cùu-dë tée ròmá —cächí té Păblú xăha<sup>n</sup>-dë xii tée cùu capitá<sup>n</sup> cùnūu-gá.

29 Te uu<sup>n</sup>-ni ní nacaca sata cuè tée cuáhá<sup>n</sup> caniha xii-dé ní cùu. Te ní yúhú tée tàxi tñuní sá dúcá<sup>n</sup> nǐ xáha<sup>n</sup> tē Păblú sá tē ròmá cùu-dë, chi ní xáha<sup>n</sup>-dë ní dăcútú ñaha-güedé xii-dé, núu xíá<sup>n</sup> ní yuhu-dé.



*Té Păblú ní cáhá<sup>n</sup> ndihí-dé cue té cùnū oré ní quide-güedë jündá*

<sup>30</sup> Te té tãxi tnuní sandádú ñá ní xìní-dé ná cuéchi ní dácáá ñáyiū isrâél díquí tē Păblú, núu xiǎ<sup>n</sup> nduu tněé ní cana-dé cue dútú cùnū, ndihí cue té cùchiu<sup>n</sup>, ndihí cue té cùu sacuéhé, te ní xáha<sup>n</sup>-dē sá cádá-güedë jündá cuendá nducu tnūhu-güedë núu tē Păblú ná cuéchi ní dácáá-yu díquí-dē. Te ní xáha<sup>n</sup>-dē xii cue sandádú sá nándàxi ñaha-güedë cadená ndútú-dē, te candeca ñaha-güedë quíhí<sup>n</sup> núu cádá-güedë jündá. Te ní sáhá<sup>n</sup>-güedë ní nandaxi ñaha-güedë xii-dé ndécá ñaha-güedë cuáhá<sup>n</sup> jündá, te ní quexiō-güedë, te ní ngúnutnī-dé núu cuè té cùchiu<sup>n</sup>.

## 23

<sup>1</sup> Te yacá<sup>n</sup> ní xíndéhé vāha té Păblú núu nchāa-güedë, te ní xáha<sup>n</sup>-dē:

—Cada cāhnu iní nchòhó cue té cùchiu<sup>n</sup>, te duca<sup>n</sup> nchòhó cue té cùu sacuéhé, véxi-í cāchí tnūhu-í sá ñà túu cuēchi-í, chi mee Yă Ndiōxí nánhá-gă nása ndècu-í ñuyíú-a, te ñá túu cūcaha<sup>n</sup> núu-í núu-gă —cāchí té Păblú xáha<sup>n</sup>-dē xii-güedë.

<sup>2</sup> Te té Ananiás té cùu dútú cùnū-gá ní xáha<sup>n</sup>-dē xii cue té nùtnī yatni dīñi té Păblú sá cānī-güedë déhndé yuhu-dé. <sup>3</sup> Te té Păblú ní xáha<sup>n</sup>-dē xii dútú-ǎ<sup>n</sup>:

—Yòhó, chi úhú tnàhí iní-n, chi ní ndúcú-n tē ní caniha xii-í, te ñá túu cuēchi-í, dico quiní-n ñà cada ñaha Yă Ndiōxí xii-n. Te yòhó ní cana ñaha-n ndūcu tnūhu-n nūu quide-í nchaa nācuáa cāhá<sup>n</sup> tnūhu sá ñi chídó tnūnī ndī Moisés cada-o. Te mee-n ñi ndúcú-n tē ní caniha, te ñá túu dùca<sup>n</sup> ní cáhá<sup>n</sup> ndī cada-o —cāchí té Păblú xáha<sup>n</sup>-dē xii dútú cùnū-gá-á<sup>n</sup>.

<sup>4</sup> Te cue té xīnutnī dīñi té Păblú ní xáha<sup>n</sup>-güedë xii-dé:

—Nèhé ní quide-n chi ní xícuèhé-n dútú cùnū-gá té xīnu cuechi núu Yă Ndiōxí —cāchí-güedë xáha<sup>n</sup>-güedë xii té Păblú.

<sup>5</sup> Te té Păblú ní xáha<sup>n</sup>-dē xii-güedë:

—Cada cāhnu iní-ndó chi ñá túu xìní-í sá dútú cùnū-gá cúu-dē, chi núu tūtú Yă Ndiōxí cāchí-xi sá vā cúu cāhá<sup>n</sup> cuèhé-ó cuendá ñi<sup>n</sup> té cùnū ñuú-ó yòtnūhu. Te yúhú ñá túu xìní-í sá tē cùnū cuu-dé nūu ní

sácóo-í ní cáhá<sup>n</sup>-í —cāchí té Păblú xáha<sup>n</sup>-dē xii-güedë.

<sup>6</sup> Te òré-á<sup>n</sup> ñi cutnūnī iní té Păblú sá dāvā-güedë cūndihí-güedë cue té cùu saducéu, te dāvā-güedë cūndihí-güedë cue té cùu fariséu, te níhi ní cáhá<sup>n</sup>-dē ní xáha<sup>n</sup>-dē xii-güedë:

—Yúhú cúu-í té fariséu, te tnàhá tātà-í ndihí xii-í cúu-güedë cue té fariséu tucu. Te tnàhá yúhú sàndáá iní-í sá ndótó nchāa ñáyiū ní xihí, te núu xiǎ<sup>n</sup> cuñi-ndó ndūcu tnūhu-ndo nūu-í cāná ñaha-ndo —cachí-dé xáha<sup>n</sup>-dē xii-güedë.

<sup>7</sup> Te sá dúcá<sup>n</sup> ñi cáhá<sup>n</sup>-dē xiǎ<sup>n</sup> ní nāa ndihí tnàha cue té cùu fariséu ndihí cue té cùu saducéu, chi ñá ñi<sup>n</sup>-ní tnūhu ní cāhá<sup>n</sup>-güedë, chi ní ndi quehe<sup>n</sup> ndi quehe<sup>n</sup>-güedë sá ñi cáhá<sup>n</sup>-güedë. <sup>8</sup> Te cue té cùu saducéu cāchí-güedë sá vā ndótó cuè ñáyiū ní xihí, te cue té cùu fariséu cāchí-güedë sá ndótó-yu. Te cue té cùu saducéu cāchí-güedë sá ñà túu espíritú xínú cuèchi núu Yă Ndiōxí, te cue té cùu fariséu cāchí-güedë sá ió espíritú xínú cuèchi núu-gă. <sup>9</sup> Te ta cùdée<sup>n</sup>-güedë cuáhá<sup>n</sup>, te níhi-gá cúu iní-güedë cāhá<sup>n</sup>-güedë, te ñi<sup>n</sup> úu cue té cùu fariséu cue té dācuaha ñaha xii ñáyiū nchaa tnūhu ní chídó tnūnī ndī Moisés ní cáhá<sup>n</sup> níhi-güedë, te xáha<sup>n</sup>-güedë:

—Ñá túu cuēchi-dé, te cudana te ní cáhá<sup>n</sup> ndihí-dé ñi<sup>n</sup> espíritú xínú cuèchi núu Yă Ndiōxí te vā ngōo vā cúu vāha iní-ó nūu-gă —cāchí cue té cùu fariséu xáha<sup>n</sup>-güedë xii-güedë.

<sup>10</sup> Te cuendá sá iō xīnāa-güedë, xiǎ<sup>n</sup> ní yúhú té cùu capitá<sup>n</sup> cùnū-gá sá cāhni-güedë té Păblú, núu xiǎ<sup>n</sup> ní xáha<sup>n</sup>-dē sá quíhí<sup>n</sup>-güedë cúnūcuaca ñaha-güedë candeca ñaha-güedë nūhú cuàrtél.

<sup>11</sup> Te ndéé niú cúu úu ní quexiō Xítohó Jesucristú núu ndécú tē Păblú, te ní xáha<sup>n</sup>-gă:

—Ñi<sup>n</sup> cunduu-n, vā yúhú-n, chi nācuáa ní cáhá<sup>n</sup>-n ñi cacunehe ñaha-n xii-í iha, te dīu-ni duca<sup>n</sup> cāhá<sup>n</sup>-n cācunehe ñaha-n xii-í quíhí<sup>n</sup>-n ñuú Rómá —cāchí-gá xáha<sup>n</sup>-gă xii-dé.

### *Cahni-güedë té Păblú ní cùu*

<sup>12-13</sup> Te nduu tněé ní nataká vñhi-gá údico cue té isrâél ní ndatnūhu-güedë sá cāhni-güedë té Păblú, te ní xítñaha-güedë:

—Ni dítá vǎ cáxí-ó te ni ndùte vá cóhó-ó ndéé ndacu-o càhni-o té Pǎblú, te dǎtnùní caxi-o dítá, te coho-o ndùte, chi sa ní sani iní-ó sǎ cádá-ó, te cuu cuéchi xii-o nùu vá cádá-ó —càchí-güedé xǐtnàha-güedé.

<sup>14</sup> Te ní sáhá<sup>n</sup>-güedé núú ndécú nchàa dútú cúnùu ndihì nchaa cue tée cùu sacuéhé, te ní xáha<sup>n</sup>-güedé:

—Ní cachí-ndí sá ni dítá vǎ cáxí-ndí ndéé nùu ní ndacu-ndí ní sahani-ndí té Pǎblú, chi sa ní sani iní-ndí sá cádá-ndí, te cuu cuéchi núu vá cádá-ndí. <sup>15</sup> Te duha cada-ndo ndihì dava-gá cue tée cùnùu, chi cúñaha-ndo xii tée cùu capitá<sup>n</sup> cúnùu-gá: “Quixi ndihì-n tǎ Pǎblú núú ndécú-ndí cuendá ndatnúhu ndihì-ndí-dé, chi cuíní-ndí nducu tnùhu váha-gá-ndí ná cúú sǎ nǐ quide-dé”, duha cúñaha-ndo xii tée tàxi tnuní sandàdú. Te duca<sup>n</sup>-ni cúñaha-ndo dándahú-ndó-güedé cuendá quixi ndihì-güedé té Pǎblú, te nchúhú sa cundetú-ndí-güedé ichi, chi quiní té Pǎblú ná cahni-ndí-dé —càchí-güedé xǎha<sup>n</sup>-güedé xii cue tée cùchiu<sup>n</sup>.

<sup>16</sup> Te déhe cúha té Pǎblú ní níhí-dě tnúhu nàcuáa cada-güedé ditó-dé. Te ní sáhá<sup>n</sup>-dé cuártel, te ní xáha<sup>n</sup>-dě xii ditó-dé nàcuáa càhá<sup>n</sup>-güedé cada ñaha-güedé. <sup>17</sup> Te ní cana té Pǎblú <sup>in</sup> tée cùu capitá<sup>n</sup>, te ní xáha<sup>n</sup>-dě:

—Vá cùndèe iní-n, quíhí<sup>n</sup> ndihì-n tǎe-a na càhá<sup>n</sup> ndihì-dé tée cùnùu-gá, chi ndècu <sup>in</sup> cuendú cúñaha-dě cuíní-í —càchí té Pǎblú xǎha<sup>n</sup>-dě xii tée cùu capitá<sup>n</sup>.

<sup>18</sup> Te dǎtnùní ní xica tée cùu capitá<sup>n</sup> ndécá-dě dǎxí<sup>n</sup> tǎ Pǎblú cuáhá<sup>n</sup> núú ndécú tée cùnùu-gá, te òré ní quexìo-güedé núú-dě, te ní xáha<sup>n</sup> tǎe cùu capitá<sup>n</sup> xii-dé:

—Té Pǎblú tée yìhì vecaá ní cana ñaha-dě xii-í, te ní cachí-dé véxi-í ndihì tǎe-a cuendá cachí tnúhu-dé <sup>in</sup> cuendú cuíní-dé —càchí-dé xǎha<sup>n</sup>-dě xii tée cùnùu-gá.

<sup>19</sup> Te tée cùnùu-á<sup>n</sup> nǐ tñi-dé ndaha dǎxí<sup>n</sup> tǎ Pǎblú, te tǎnehe ñaha-dé cuáhá<sup>n</sup> <sup>in</sup> xio, te ní xíca<sup>n</sup> tnúhú-dě núú-dě, te xǎha<sup>n</sup>-dě:

—¿Ná cuendú cuíní-n càhá<sup>n</sup>-n? —càchí-dé xǎha<sup>n</sup>-dě xii dǎxí<sup>n</sup> tǎ Pǎblú.

<sup>20</sup> Te ní xáha<sup>n</sup>-dě xii tée cùnùu-á<sup>n</sup>:

—Cue tée isràel ní ndatnúhu ndáá-güedé sá quíxí-güedé tneé càhá<sup>n</sup> ndàhú-güedé núú-n càndeca-n té Pǎblú quíhí<sup>n</sup> jùndá, te yàcá<sup>n</sup> caca<sup>n</sup> tnúhú ndáá-güedé núú-dě ná cúú sǎ nǐ quide-dé, càchí-güedé

xǐtnàha-güedé.

<sup>21</sup> Te vá quíndáa iní-n chi dicó dandàhú ñáhá-güedé, chi vìhi-gá údico-güedé ndátnùhu-güedé cundedí-güedé ichi cahni ñaha-güedé. Te xǐtnàha-güedé sá ni dítá vǎ cáxí-güedé, te ni ndùte vá cóhó-güedé ndéé nùu ní ndacu-güedé ní sahani ñaha-güedé, te dǎtnùní caxi-güedé dítá, te coho-güedé ndute, chi sa ní sani iní-güedé sá cádá-güedé, te cuu cuéchi núu vá cádá-güedé, càchí-güedé xǐtnàha-güedé. Te cundecu túha-ná-güedé cundetú ñaha-güedé tneé, te núu na quíndáa iní-n càndeca-n-dé quíhí<sup>n</sup> jùndá —càchí-dé xǎha<sup>n</sup>-dě xii tée cùnùu-á<sup>n</sup>.

<sup>22</sup> Te tée cùnùu-á<sup>n</sup> nǐ xáha<sup>n</sup>-dě:

—Cuanùhú, te vá yǒo tñahì cúñaha-n sǎ nǐ quixi-n nǐ cachí tnúhu-n nàcuáa càhá<sup>n</sup>-güedé cada-güedé té Pǎblú —càchí-dé xǎha<sup>n</sup>-dě.

*Ndèca-güedé té Pǎblú cuáhá<sup>n</sup> núú tǎ Juélí tée cùu gobiernú*

<sup>23</sup> Te tée cùnùu-gá ní cana-dé úú cue tée cùu capitá<sup>n</sup>, te xǎha<sup>n</sup>-dě:

—Tava-ndo ùú ciendú sandàdú cue tée xica saha, ndihì únídico úxí sandàdú cue tée yòdo cuayú, ndihì úú ciendú sandàdú mee-ni cuè tée xínehe lànzá. Te cada túha-ndo chi caca-ndo òré caá <sup>in</sup> niú quíhí<sup>n</sup>-ndó ñùú Cèsareá ndihì té Pǎblú. <sup>24</sup> Te nducu-ndo cuèdicó <sup>in</sup> ùú cuayú codo-dě ndihì cue tée ndéé ñáhá xii-dé. Te cada cuedàdú-ndó-dě ichi, te candeca-ndo-dě quíhí<sup>n</sup> quíndeca-ndo-dě núú tǎe cùu gobiernú —càchí tée cùnùu-á<sup>n</sup> xǎha<sup>n</sup>-dě xii cue tée cùu capitá<sup>n</sup>.

<sup>25</sup> Te tée cùnùu-á<sup>n</sup> nǐ cadúha-dé tutú cuendá quíhí<sup>n</sup> ndaha té Juélí tée cùu gobiernú. Te duha ní chídó tnùní-dé núú tutú cuáhá<sup>n</sup>:

<sup>26</sup> “Cóvaha díi-n, tǎtá gobernàdór. Ío cada càhnu iní, yúhú nání-í Claudiú Lìsiás. Yúhú ní tendaha-í <sup>in</sup> tutú véxi ndaha-n cuendá quiní tnùní-n nàcuáa ní cuu iha.

<sup>27</sup> Cue tée isràel ní tñi-güedé <sup>in</sup> tée nàni Pǎblú cuíní-güedé cahni ñaha-güedé ní cùu, te ní níhí-í tnúhu sá tǎe ròma cúú-dě nùu ní sáhá<sup>n</sup>-í ndihì sandàdú-í ní dácacu-ndí-dé. <sup>28</sup> Te ní cuíní-í quiní-í ná cuendá tée ñaha-güedé cuéchi xii-dé, núu xǎ<sup>n</sup> ndécá-í-dé ní sáhá<sup>n</sup> núú nǐ quide cue

tée cùchiu<sup>n</sup> israel jùndá. <sup>29</sup> Te yacá<sup>n</sup> ní níhì-í tnúhu sá ñà túú nã cuéchi ní quide-dé, chi cuendá-ni sá ñí níhí-güedě tnúhu sá ñà túú sandáá iní-dé cada-dé nchaa sá ñí xóo cada ñáyu ní xíndecu ndéé sanaha nchicú<sup>n</sup> nihnu-güedé quide-güedé, xíá<sup>n</sup> ní cudéé<sup>n</sup>-güedě núú-dě. Te ñá túú cuéchi cãhnu ní quide-dé nõu quíhí<sup>n</sup>-dé vecaá àdi cãhni-í-dé. <sup>30</sup> Te ní níhì-í tnúhu sá cuè tée israél ndúcú-güedě nãcuáa cada-güedé cãhni ñaha-güedě xii-dé, xíá<sup>n</sup> ní xáha<sup>n</sup>-í xii sandádú-í sá cándèca ñaha-güedé quixi xíá<sup>n</sup>. Te ní xáha<sup>n</sup>-í xii cue tée tée ñaha cuéchi sá quixí-güedé ndéé xíá<sup>n</sup> cãhá<sup>n</sup>-güedé nõu ná cuéchi ní quide-dé. Te cada cãhnu iní-n chi duha-ni ndùu tnúhu cãhá<sup>n</sup>-í, te cundee iní-n quèhe<sup>n</sup> cuendá-n-dě”, duha ní chídó tnúni tée ní cadúha tutú cuáhá<sup>n</sup> ndaha té Juéli.

<sup>31</sup> Te cue sandádú ní quide-güedé nãcuáa ní xáha<sup>n</sup> tée tàxi tnúni ñáhá xii-güedé chi ní xica-güedé ndihi té Pãblú òré caá ñ<sup>n</sup> niú, te ñiu-ni niú-á<sup>n</sup> ñí quexìo-güedé ñuú Antipatrís. <sup>32</sup> Te sáta ñí túndaá, te ní nacuico cuè tée xínehe lãnzá ndihi dava-gá sandádú xícá sàha cuánuhú-güedé cuártel, te mee-nã sandádú cue tée yòdo cuayú cuáhá<sup>n</sup> ndihi té Pãblú. <sup>33</sup> Te òré ní quexìo-güedé ñuú Cèsareá, te ní sàha-güedé tée cùu gobiernú tutú néhé-güedé cuáhá<sup>n</sup>. Te ní quehe<sup>n</sup> cuendá-dé té Pãblú. <sup>34</sup> Te sáta ñí dácuáhá tée cùu gobiernú-á<sup>n</sup> tutú-á<sup>n</sup> te ní xícá<sup>n</sup> tnúhú-dé núú té Pãblú, te xáha<sup>n</sup>-dě:

—¿Ndéé tée cùu-n? —cachí-dé xáha<sup>n</sup>-dě.

Te ní xáha<sup>n</sup> tã Pãblú:

—Tée Ciliciá cùu-í —cãhí-dé xáha<sup>n</sup>-dě.

<sup>35</sup> Te ní xáha<sup>n</sup> tée cùu gobiernú-á<sup>n</sup>:

—Òré quexìo cue tée tée ñaha cuéchi xii-n, te cãhá<sup>n</sup>-n nãsa ní cuu, chi níhì-í nãcuáa cada ndáá-í cuendá-n —cãhí-dé xáha<sup>n</sup>-dě xii té Pãblú.

Te ní xáha<sup>n</sup>-dě xii sandádú sá cùndèe-güedé té Pãblú vehe cãhnu té Hèrodés.

## 24

*Té Pãblú xáha<sup>n</sup>-dě xii té Juéli sá ñà túú cuéchi-dé*

<sup>1</sup> Te sáta ñí cuu úhú<sup>n</sup> nduu, te té Ananiás dútú cúnúu-gá cuáhá<sup>n</sup>-dé ñuú Cèsareá ndihi cue tée cùu sacuéhé ndihi ñ<sup>n</sup> tée nãni Tértulú tée cãhá<sup>n</sup> yuhu-güedé. Te cuáhá<sup>n</sup>-güedé núú tã cùu gobiernú cuáhá<sup>n</sup> dácuándèhnde-güedé núú-dě sá ndècuéchi

té Pãblú. <sup>2</sup> Te ní sãnguaca-güedé té Pãblú. Te òré ní quexìo-dé núú-güedě, te ní ngüita té Tértulú xáha<sup>n</sup>-dě xii té Juéli nãcuáa cãa cuéchi tãe-güedé té Pãblú:

—Ío cãhnu cada iní tãtá gobernádor.

Duha ndùu chiu<sup>n</sup> ndéé iní ñáhá-ndí xii-n vèxi-ndí, nõu nãsa cachí-n cùnduu. Táxãhu xii-n, chi ío váha ndècu nchaa ñáyu, te ñá túú nãá-yu chi ío váha quide-n. <sup>3</sup> Te ío cùdí<sup>n</sup> iní-yu chi nchaa-ni nduu xíndecu váha-yu ncháa-yu, te ío táxãhu Ndiõxí xii-n sã dúcá<sup>n</sup> quide-n. <sup>4</sup> Te cada cãhnu iní, cùní-í ndatnúhu-o ñ<sup>n</sup> úú-ni cuendú cuendá sá vã cùyãa-o dacuíta-í chiú<sup>n</sup>-n.

<sup>5</sup> Te ñ<sup>n</sup> tée iha ío dàsatú iní ñáhá-dě, chi ndéni ní cuu cuáhá<sup>n</sup>-dé ndatnúhu-dé ndíhi ñáyu israel dánáa-dé-yu. Te néhé quidé-dé chi cuáhá<sup>n</sup>-dé dácãhá<sup>n</sup>-dé nchaa ñáyu cuendá quíndáá iní-yu tnúhu tée ní xíndecu ñuú Nazàrét. <sup>6</sup> Chi duca<sup>n</sup> cãhá<sup>n</sup> cue tée iha sá ñí sáhá<sup>n</sup>-dé veñúhu cãhnu sá ío cúnúu, te cùní-dé daquèe tíhú-dě veñúhu cuendá cùní-dé xocàni-dé sá ñí ndécú, nõu xíá<sup>n</sup> ní tñí ñaha-güedě ndécá ñaha-güedé cuáhá<sup>n</sup> núú cuè tée cùchiu<sup>n</sup> cuendá cáca<sup>n</sup> tnúhú-güedě núú-dě nõu ná cuendá duca<sup>n</sup> cùní-dé cada-dé, chi duca<sup>n</sup> cãa leí ndécú ndíhi-güedé sá cáda ndáá-güedé nõu ná ñ<sup>n</sup> sá cùú. <sup>7</sup> Te té Lìsiú tée cùu capitá<sup>n</sup> cúnúu-gá ní quexìo-dé ndihi sandádú, te ní dácúnú-güedě nchaa cue tée nùtní ndíhi té Pãblú, te dãtnúni ní tñí ñaha-güedě xii-dé ndécá ñaha-güedé cuáhá<sup>n</sup>. <sup>8</sup> Te sáta xíá<sup>n</sup>, te ní xáha<sup>n</sup>-dě sá quixí-güedě ndéé ndíha cundáá cuéchi-dé. Te yòhó cundee iní-n cáca<sup>n</sup> tnúhú-n nõú-dě, te nõu ndáá duca<sup>n</sup> ñí quide-dé àdi ñáhá —cãhí té Tértulú xáha<sup>n</sup>-dě xii té Juéli tée cùu gobiernú.

<sup>9</sup> Te dava-gá cue tée israél xínutnii xíá<sup>n</sup> ñí cáhá<sup>n</sup>-güedé sá ndáá cãhá<sup>n</sup> té Tértulú. <sup>10</sup> Te tée cùu gobiernú ní quide-dé ndaha-dé núú tã Pãblú cuendá cáhá<sup>n</sup>-dé, te té Pãblú ní xáha<sup>n</sup>-dě:

—Yòhó sa ní cuu tñí cuíá ndécú-n iha xehndé-n cuéchi nchaa ñáyu xíndá, nõu xíá<sup>n</sup> ío cùdí<sup>n</sup> iní-í sá ndíha téhndé cuéchi tãe ñaha-güedé xii-í. Te cundee iní-n cùndedóho-n ña cãni-í cuendú nãcuáa ní cuu. <sup>11</sup> Te nducu tnúhu-n te quini-n ñã cãhá<sup>n</sup> ndáá-í, chi sa ní cuu úxúú nduu sá ñí sáhá<sup>n</sup>-í veñúhu cãhnu sá ío cúnúu ñuú



Jerusalén ní cáhá<sup>n</sup> ndihí-í Yă Ndiöxí. <sup>12</sup> Te ni ñà túú ní nàá-í ndihí ñáyíu xití veñúhu, te ñá túú ní xáha<sup>n</sup>-í nàá-yu ni ñ<sup>n</sup> xichi, te ni ñ<sup>n</sup> veñúhu lĩhli ní sáhá<sup>n</sup>-í ñá túú ñá ní xáha<sup>n</sup>-í cada-yu. <sup>13</sup> Te ni ñà túú quèñuhu-güedé cue téé cáhá<sup>n</sup> ndáá te núu ndáá duca<sup>n</sup> ñi quide-í. <sup>14</sup> Te yúhú cáhá<sup>n</sup> ndáá-í sá cáhá<sup>n</sup> ndihí-í Yă Ndiöxí, chi ñi-ni Yă Ndiöxí ní xóo cáhá<sup>n</sup> ndihí ñáyíu ndéé sanaha, núu xíá<sup>n</sup> ní tuha-í ichi-gá. Te cue téé-a càchí-güedé sá ñà díú ñ<sup>n</sup> ichi váha ni tuha-í. Te yúhú sàndáá iní-í nchaá sá ñi chídó tñuní ndí Moisés ndihí dava-gá cue téé ní xóo cáhá<sup>n</sup> tñúhu Yă Ndiöxí ndéé sanaha. <sup>15</sup> Te sàndáá tucu iní-í sá ndótó nchàa ñáyíu ní xíhí, cuèi ñáyíu váha iní-xi, te cuèi ñáyíu úhú iní-xi, dico ndotó-yu. Te duca<sup>n</sup> ñi xóo quindáá iní nchaá ñáyíu ní xíndecu ndéé sanaha. <sup>16</sup> Te yúhú ío ndücu ndee-í quidè-í nchaá sá cáhá<sup>n</sup> Yă Ndiöxí cuendá sá vă cúu cáha<sup>n</sup> núu-í núu-gá ndihí núu ñáyíu ñuyú-a.

<sup>17</sup> Te sa ní cuu titní cuía sá ñà túú-gá sáhá<sup>n</sup>-í ñuú Jerusalén, te ní sáhá<sup>n</sup> tucu-í nehè-í díhú<sup>n</sup> ñi taxi ñáyíu ñuú xicá cuendá cuañaha-í xii ñáyíu ñuú Jerusalén. Te ní ndúcù-í sá cuáha táhù-í Yă Ndiöxí. <sup>18</sup> Te ní xíndecu-í veñúhu càhnu sá ío cùnuu ní quide-í nchaá nàcuáa ní xóo cada ñáyíu ní xíndecu ndéé sanaha cuendá nduu vétú iní Yă Ndiöxí. Te ñá túú chítú-yu ni sáhá<sup>n</sup>, te ni ñà túú ñá ní cùu, te ní naníhí ñáhá ñ<sup>n</sup> úú cue téé israhél xii-í, cue téé véxi distritú Àsiá. <sup>19</sup> Te quixi mee-güedé iha cáhá<sup>n</sup>-güedé, te núu sá ndàá ní xini-güedé sá yúhú ndècuéchi-í ní cùu, <sup>20</sup> àdi ñáhá. Dico cachí tñúhu cue téé-á<sup>n</sup> ñása ní cuu òré ní xíndecu-í jündá-güedé núu ndècuéchi-í àdi ñá túú ndècuéchi-í. <sup>21</sup> Dico ñá túú cuèchi-í chi ñ<sup>n</sup> dli-ni tñúhu ní cáhá<sup>n</sup>-í ní xáha<sup>n</sup>-í xii-güedé sá sàndáá iní-í sá ndótó nchàa ñáyíu ní xíhí, te ñi-ni núu xíá<sup>n</sup> càchí-güedé sá ndècuéchi-í —càchí té Păblú xáha<sup>n</sup>-dè xii té Juéli.

<sup>22</sup> Te té Juéli sa xini váha-dé nàcuáa cuáhá<sup>n</sup> tñúhu Jësús, núu xíá<sup>n</sup> ñá ní cuiní-gá-dé ndatnúhu-dé ndihí té Păblú, te ní xáha<sup>n</sup>-dè:

—Sa ní cuu, cundetu-n na quèxio té Lìsiú téé cùu capitá<sup>n</sup> cùnù-gá, te òré-á<sup>n</sup> cundáa cuendá-n —càchí té Juéli xáha<sup>n</sup>-dè.

<sup>23</sup> Te ní xáha<sup>n</sup>-dè xii téé cùu capitá<sup>n</sup>:

—Cundeé-n tē Păblú-ă<sup>n</sup>, te núu nása càchí-dé cada-n, te dañá-n na cáhá<sup>n</sup> ndihí-dé cue téé xini tñáhá ndihí-dé núu cuañaha-güedé nchaá sá xini ññuhu-dé àdi nása cada-güedé —càchí té Juéli xáha<sup>n</sup>-dè xii téé cùu capitá<sup>n</sup>.

<sup>24</sup> Te ní cuu titní nduu, te ní sáhá<sup>n</sup> té Juéli vechiú<sup>n</sup> ndihí ñadihí-dé, te ñaha-á<sup>n</sup> naní-á<sup>n</sup> Drusilá, te ñaha israhél cúu-á<sup>n</sup>. Te ní xáha<sup>n</sup>-dè sá quingueñuhu-güedé té Păblú, te òré ní quexio-dé vechiú<sup>n</sup>, te ní cáhá<sup>n</sup>-dè núu-yu nchaá-yu sá quindáá iní-yu tñúhu Xítohó Jesucristú. <sup>25</sup> Te ní xáha<sup>n</sup>-dè:

—Mee-ni sá vâha cada-ndo. Te coto-ndo mēe-ndo, te vá cáda-ndó ñi ñ<sup>n</sup> sá cuèhé sá dúhá, chi ñ<sup>n</sup> nduu cáhá<sup>n</sup> Yă Ndiöxí ndèdacàa ñáyíu váha iní-xi, te ndèdacàa ñáyíu úhú iní-xi —càchí té Păblú xáha<sup>n</sup>-dè.

Te sá dúcá<sup>n</sup> ñi xáha<sup>n</sup>-dè, te ní yùhú té Juéli, te ní xáha<sup>n</sup>-dè:

—Vá cáhá<sup>n</sup>-gá-ó tñavíi, cuáhá<sup>n</sup>, te òré cúyächí-í, te cana ñaha-í xii-n —càchí-dé xáha<sup>n</sup>-dè.

<sup>26</sup> Te té Juéli ní quide-dé cuendá sá cuañaha tē Păblú díhú<sup>n</sup> te vá ndiñu-gá-dé vecaá ní cùu, núu xíá<sup>n</sup> titní xito ní cana-dé té Păblú vechiú<sup>n</sup> ní ndatnúhu ndihí tñaha-güedé, dico ñá túú ní chăhu-dé. <sup>27</sup> Te úú cuía duca<sup>n</sup> ñi quide-güedé, te dătnuní ní xinu té Juéli chiú<sup>n</sup>-dé, te ní ngúnutñi té Porsió Fèstú. Te òré ní xinu té Juéli chiú<sup>n</sup>-dé, te ní dándõo-dé té Păblú yíhí-ni-dè vecaá. Te duca<sup>n</sup> ñi quide-dé cuendá ní cuiní-dé cudü-dé núu cuè téé israhél.

## 25

### *Té Păblú cáhá<sup>n</sup> ndihí-dé té Fèstú*

<sup>1</sup> Te ní cuu úní nduu sá ñi quexio té Fèstú ñuú Cèsareá ní quehe<sup>n</sup>-dé chiú<sup>n</sup>, te ní quee-dé cuáhá<sup>n</sup>-dé ñuú Jerusalén. <sup>2</sup> Te yacá<sup>n</sup> ní naníhí tñáhá-dè ndihí nchaá dútú cùnùu ndihí nchaá cue téé tàxi tñuní ñáhá xii ñáyíu israhél, te xáha<sup>n</sup>-güedé xii té Fèstú sá ndàá ndècuéchi té Păblú. <sup>3</sup> Te ní cáhá<sup>n</sup> ndàhú-güedé núu-dè sá téndàha-dé sandádú-dé quingueñuhu ñaha-güedé vecaá xii-dé ndéé ñuú Cèsareá te candeca ñaha-güedé quíhí<sup>n</sup>. Te duca<sup>n</sup> ñi cáhá<sup>n</sup>-güedé, chi ní ndatnúhu-güedé sá cáhni ñaha-güedé xii té Păblú ichi ni cùu. <sup>4</sup> Te té Fèstú ní xáha<sup>n</sup>-dè:



—Vá cúu quixi-dé ndéé ndíha. Na cùndetu-dé ñúú Cèsareá chi sacú-ni nduu cuyaa-í iha te dātnūnī nūhú-í yàcá<sup>n</sup>.

5 Te yáchí-gá quíhí<sup>n</sup> ndihí-í cue tée cūnuu-gá, te yàcá<sup>n</sup> cuu cáhá<sup>n</sup>-ndó nūu ndáá ndècuéchi-dé àdi cáhá<sup>n</sup> mée-dě nūu ndáá ndècuéchi-dé àdi ñáhá, te cutnūnī iní-ndó —càchí-dé xāha<sup>n</sup>-dě.

6 Te ní xīndecu té Fèstú úná úxí nduu ñúú Jerusàlén, te dātnūnī cuánuhú-dé ñúú Cèsareá. Te nduu tněe cuáhá<sup>n</sup>-dé vechiū<sup>n</sup>, te òré ní quexiò-dé, te ní xāha<sup>n</sup>-dě xii cue sandádú xínú cuèchi sá quíhí<sup>n</sup>-güedé queñuhu-güedé té Pāblú vecaá te candeca ñaha-güedě quíhí<sup>n</sup> vechiū<sup>n</sup>. 7 Te òré ní quexiò té Pāblú vechiū<sup>n</sup>, te sa ndècu cue tée isràél cue tée ní quee ñúú Jerusàlén, te cuánguihu-güedé ndéé dīñi té Pāblú ní ngúnutnī-güedé, te xāha<sup>n</sup>-güedě xii cue tée cūchiu<sup>n</sup> sá ndècuéchi vīhi-dé, dico ñá túú ní cūndee tnūhu-güedé. 8 Te té Pāblú ní xāha<sup>n</sup>-dě xii té Fèstú:

—Ñá túú ndècuéchi-í, ñá túú nã ní quide-í, chi ñá túú tnàhá iní-í cada-í ñ<sup>n</sup> sá cāchí lèi sá vã cúu cada-o. Te ni xití veñúhu càhnu sá ïo cūnuu ñá túú nã quidè-í, te ni té Cèsár tée yìndaha cuéhé nàció<sup>n</sup> ñá túú càhá<sup>n</sup> cuèhé-í cuèndá-dé —cāchí té Pāblú xāha<sup>n</sup>-dě xii-dé.

9 Te té Fèstú ní cuiní-dé cada-dé nācuáa cudū-dé núu cuè tée isràél ní cūu, núu xīǎ<sup>n</sup> ní xāha<sup>n</sup>-dě xii té Pāblú:

—¿Cundee iní-n quíhí<sup>n</sup>-n ñúú Jerusàlén-ǎ<sup>n</sup>? Te yàcá<sup>n</sup> cundáá cuéchi sá sàá díquí-n —cāchí té Fèstú xāha<sup>n</sup>-dě xii té Pāblú.

10 Te xāha<sup>n</sup> tē Pāblú:

—Diu-ni ñ<sup>n</sup> vechiū<sup>n</sup> tée cūchiu<sup>n</sup> Cesár ndécū-í iha, te diu-ni iha cada ndáá-n nūu cuiní-n ní cūu. ¿Te ná cuèndá candeca ñaha-n quíhí<sup>n</sup> ingá xichi? Yòhó tnàhá-n xini-n sá ñá túú nã quidè-í ñáyiu isràél.

11 Chi núu dīcò yúhú ní quide-í ñ<sup>n</sup> cuéchi càhnu, te ñá túú nã cada-xi cuèi na càhni ñaha-ndo xii-í ní cūu. Te sa ní cutnūnī iní-n sá ñá ndáá, chi mee-ni tnūhu ndehnde xīcáhá<sup>n</sup>-güedé, te ñá túú ndūu váha-xi duca<sup>n</sup> cada-n cúñaha-n sã quíhí<sup>n</sup>-í ndihí-güedé ingá xichi. Te xīǎ<sup>n</sup> cuiní-í quíhí<sup>n</sup>-í núu tē Cèsár tée yìndaha cuéhé nàció<sup>n</sup>, te yàcá<sup>n</sup> cáhá<sup>n</sup> mée-dě nūu ndáá ndècuéchi-í —cāchí té Pāblú xāha<sup>n</sup>-dě xii té Fèstú.

12 Te ní ndatnúhu té Fèstú ndihí cue tée chīndee tnūhu ñaha xii-dé, te dātnūnī ní xāha<sup>n</sup>-dě xii té Pāblú:

—Te sa ní cáhá<sup>n</sup>-n sã quíhí<sup>n</sup>-n quítnahá-n tē Cèsár te diu-ni quíhí<sup>n</sup>-n, te quini-n nāsa cáhá<sup>n</sup> tée-ǎ<sup>n</sup> yàcá<sup>n</sup> —cāchí-dé xāha<sup>n</sup>-dě xii té Pāblú.

*Té Pāblú càhá<sup>n</sup> ndihí-dé té Àgripá tée yìndaha nació<sup>n</sup> Isràél*

13 Te sātá ñ<sup>n</sup> cuu cuéhé nduu, te ní quee té Àgripá tée yìndaha nació<sup>n</sup> Isràél cuáhá<sup>n</sup>-dé ñúú Cèsareá ndihí ñadīhí-dé, te ñaha-ǎ<sup>n</sup> nání-ǎ<sup>n</sup> Berènicé te òré ní quexiò-yu, te ní cáhá<sup>n</sup> ndihí-yu té Fèstú. 14 Te sātá ñ<sup>n</sup> cuu titnī nduu, te ní cáhá<sup>n</sup> té Fèstú cuèndá té Pāblú ní xii-dé té Àgripá:

—Ndècu ñ<sup>n</sup> tée ní dāndō té Juèlī vecaá nání-dě Pāblú. 15 Te cūtnàhá ní sáhá<sup>n</sup>-í ñúú Jerusàlén ní nanínàhá-í ndihí cue dútú cūnuu ndihí cue tée cūu sacuéhé nūu ñáyiu isràél. Te ní dācáá díquí-güedé té Pāblú cuéchi, te ní cāchí-güedé sá táuchū<sup>n</sup>-í cahni ñaha-güedě xii-dé ní cūu.

16 Te ní xāha<sup>n</sup>-í xii-güedé sá vã cúu, chi ñá túú dùca<sup>n</sup> quide nchúhú cue tée rómá cūtexínu cada castiū-ndí ñáyiu, chi dīhna-gá ndúcú tnūhu-ndí núu ñáyiu sàá cuéchi díquí-xi cuèndá quini-ndí nūu nāsa cáhá<sup>n</sup> mée-yu ndihí ñáyiu sàcá<sup>n</sup> cuéchi cuèndá-yu, te òré-ǎ<sup>n</sup> cūtnūnī iní-ndí nūu ndáá ndècuéchi-yu àdi ñáhá, te duca<sup>n</sup> te nihí-ndí nācuáa quide ndáá-ndí cuèndá-yu, duha ní xāha<sup>n</sup>-í xii-güedé —cāchí té Fèstú xāha<sup>n</sup>-dě xii té Àgripá.

17 Te ní xāha<sup>n</sup> tūcu té Fèstú:

—Te sātá ñ<sup>n</sup> quexiò-güedé ndéé ndíha, te nduu tněe ní sáhá<sup>n</sup>-ni-ndí vechiū<sup>n</sup>. Te ní xāha<sup>n</sup>-í sá quíngueñuhu-güedé té Pāblú candeca ñaha-güedě quixi, te òré ní quexiò-dé, 18 te ní ngūíta-güedé xāha<sup>n</sup>-güedé sá ndècuéchi-dé. Te ní sani iní-í sá ñ<sup>n</sup> cuéchi càhnu tee ñaha-güedé dico ñáhá, chi dīcò-ni sá ñ<sup>n</sup> tnūhu ní cáhá<sup>n</sup>-dé, xīǎ<sup>n</sup> duca<sup>n</sup> ní quide-güedé. 19 Te ní tenáá ñáhá-güedé xii-dé, chi cāchí-güedé sá ñá túú càhá<sup>n</sup> váha-dé cuèndá ndiōxí-güedé. Te tnàhá-ni cuèndá ñ<sup>n</sup> tée nàni Jesús càhá<sup>n</sup>-dé, chi cāchí-dé sá ñ<sup>n</sup> xihí tée-ǎ<sup>n</sup> te ní ndoto-dé cāchí-dé xāha<sup>n</sup>-dě xii-güedé, cāchí-güedé.

20 Te ñá ní cùtnuní iní-í nása cúñaha-í xii-güedé cuendá téhndé cuéchi-dé. Te xiá<sup>n</sup> ní xicá<sup>n</sup> tnúhu-í núú tē Páblú nūu cundee iní-dé quíhí<sup>n</sup>-dé ñúú Jerusálén, te ndéé ndíacã<sup>n</sup> cada ndáá-ndí cuendá-dé, te núu ndáá ndècuéchi-dé nàcuáa cãhá<sup>n</sup>-güedé àdi ñáhá ní cùu. 21 Te dättnuní té Páblú ní cachí-dé sá cündècu tnaa-dé vecaá te dättnuní quíhí<sup>n</sup>-dé núú tē Cèsár, te tée-á<sup>n</sup> cada ndáá-dé cuendá-dé. Te cuendá sá dúcá<sup>n</sup> nĩ cãhá<sup>n</sup> té Páblú, xiá<sup>n</sup> nūu ní xãhá<sup>n</sup>-í sá cündèé ñáhá cuè sandadú xii-dé, nini na còto-í nása cada-í quíhí<sup>n</sup>-dé núú tē Cèsár, duha ní xãhá<sup>n</sup>-í xii-güedé —cächí té Fèstú xãhá<sup>n</sup>-dē xii té Àgripá.

22 Te té Àgripá ní xãhá<sup>n</sup>-dē xii té Fèstú:

—Te tnàhá yúhú ío cudíí iní-í cundedóho-í tnúhu cãhá<sup>n</sup>-dé —cächí-dé xãhá<sup>n</sup>-dē.

Te ní xãhá<sup>n</sup> tē Fèstú:

—Tneé cana-í-dé te cundedóho-n nása cãhá<sup>n</sup>-dé —cächí-dé xãhá<sup>n</sup>-dē.

23 Te nduu tnéé ní quexìo té Àgripá ndihí ñadìhí-dé tá Berènicé vechiun, te ío ní quide cãhnu ñaha-güedé xií-yu. Te cuánguìhú-yu vechiun ndihí cue tée cùu capitán cùnū-gá ndihí cue tée cùnū ñúú Cèsareá. Te té Fèstú ní xãhá<sup>n</sup>-dē sá quingueñuhu-güedé té Páblú vecaá, te òré ní quexìo-dé, 24 te ní xãhá<sup>n</sup> tē Fèstú xii té Àgripá ndihí nchaa ñáyiu xĩndecu-á<sup>n</sup>:

—Chí cündèhe tée iha chi tée-a cächí cue tée isràèl sá ndècuéchi-dé, te cùtnàhá ní xĩndecu-í ñúú Jerusálén ní cachí-güedé sá ndáá ndècuéchi-dé, te diu-ni duca<sup>n</sup> cãhá<sup>n</sup>-güedé iha. Te nchaa-güedé ní cuáá-güedé te cächí-güedé sá táuchiu<sup>n</sup>-í cahni ñaha-güedé xii-dé ní cùu. 25 Te sátá nĩ ndihí cuendú ní cãhá<sup>n</sup>-güedé, te ní cutnùní iní-í sá ñà túú nĩ ñúú cuéchi cãhnu nĩ quide-dé, núu ñá túú ní tàuchiu<sup>n</sup>-í cahni ñaha-güedé xii-dé. Te mee-dē ní cachí-dé sá quíhí<sup>n</sup>-dé núú tē Cèsár tée yìndaha cuéhé nació<sup>n</sup>, te ní xãhá<sup>n</sup>-í sá cúu quíhí<sup>n</sup>-dé. 26 Te ñá túú ní xìní váha-í nása ní quide-dé, núu xiá<sup>n</sup> ñá ní nĩhí-í nàcuáa cadúha-í tutú quíhí<sup>n</sup> ndaha té Cèsár, te xiá<sup>n</sup> ní cana-í-dé véxi-dé iha cuendá nchaa-ndo cãhá<sup>n</sup> ndihí-ndo-dē. Te duca<sup>n</sup> cànuu cadíhna-gá yòhó tãtá Àgripá cáca<sup>n</sup> tnúhú-n nūú-dē nūu nása cãhá<sup>n</sup>-dé, te òré-á<sup>n</sup> cutnùní iní-í nása cada-í cadúha-í tutú quíhí<sup>n</sup> ndaha té Cèsár. 27 Chi sàni iní-í

sá ñà túú ndūu váha-xi sá quíhí<sup>n</sup> ñúú tée tàú cuéchi te núu vá códó tnùní núú ñúú tutú nàcuáa cãa cuéchi tàú-dé —cächí té Fèstú xãhá<sup>n</sup>-dē xii-güedé.

## 26

### *Te Páblú cãhá<sup>n</sup> ndihí-dé té Àgripá*

1 Te dättnuní ní xãhá<sup>n</sup> tē Àgripá tée yìndaha nació<sup>n</sup> Isràèl xii té Páblú:

—Te vitna cãhá<sup>n</sup>-n nūu nása ní cuu cuendá-n —cächí-dé xãhá<sup>n</sup>-dē.

Te té Páblú ní ndacani-dé ndaha-dé sá cündedóho-güedé, te ní xãhá<sup>n</sup>-dē xii té Àgripá tée yìndaha nació<sup>n</sup> Isràèl:

2-3 —Tãtá Àgripá, ío cudíí iní-í sá nĩ naníhí tnàhá-ó vitna, chi yòhó ío váha xìní-n nchaa nacuáa quide ñáyiu isràèl quidé cãhnú-yu Yá Ndióxi, te ío váha xìní-n nchaa tnúhu xĩtnàhá-yu. Te vitna cundee iní-n cündedóho-n ñúú túú tnúhu na cãhá<sup>n</sup>-í. Na cächí tnúhu-í sá ñá ndáá ní quide-í nchaa sá cãhá<sup>n</sup> cue tée isràèl.

### *Té Páblú cãhá<sup>n</sup>-dé nàcuáa ní quide-dé cùtnàhá vátá túhá-gã-dé ichi Yá Ndióxi*

4 Te sa naha nchaa cue tée cùnūu núú ñáyiu isràèl nàcuáa ní quide-í ñúú-í ndihí ñúú Jerusálén cùtnàhá ní cuu landú-í. 5 Te mee-güedé náhá-güedé sá ndéé líhli-í ní chitnahá-í cue tée cùu fariséu. Te núu cuíní-güedé cãhá<sup>n</sup>-güedé sá tē fariséu cúu-í àdi ñáhá dico nchaa-güedé sa naha-güedé sá cuè tē-á<sup>n</sup> nĩ chitnahá-í. Te cue tē cùu fariséu-á<sup>n</sup> ío cuíní-güedé cada-güedé nchaa nàcuáa nchicú<sup>n</sup> nihnu ñáyiu quidé-yu. Te yúhú nchaa sá nchicú<sup>n</sup> nihnú-yu quidé-yu-á<sup>n</sup> nĩ quide-í. 6 Te vitna ndècu-í iha, te cãhá<sup>n</sup>-n nūu váha-ni quide-í àdi ñáhá, chi cue tē-á<sup>n</sup> tē ñaha-güedé cuéchi xii-í cuendá sá sàndáá iní-í sá ndótó nchaa ñáyiu ní xíhí. Te diu-ni duca<sup>n</sup> nĩ xãhá<sup>n</sup> Yá Ndióxi xii nchaa ñaní tnàhá-ó nĩ xĩndecu ndéé sanaha. 7 Te nchaa ñáyiu-á<sup>n</sup> xĩndetú-yu nduu ndòto ñáyiu ní xíhí ní cùu. Te diu-ni duca<sup>n</sup> ndètu nchaa ñaní tnàhá-ó ndècu ñuyíú-a ndéé vitna, te xiá<sup>n</sup> nūu cuéi nduu cuéi niú cãhá<sup>n</sup> ndihí-yu Yá Ndióxi. Te sá sàndáá iní-í nūu xiá<sup>n</sup> ní cãhá<sup>n</sup>-í, te tē ñaha cue tē isràèl cuéchi xii-í. 8 ¿Te ná cuendá nchòhó cue tē isràèl ñá túú cuíní-ndó quindáá iní-ndó sã dándòto Yá

Ndiöxí nchaa ñáyiú ní xíhí? —càchí té Păblú xăhá<sup>n</sup>-dĕ.

*Té Păblú câní-dĕ cuëndú sá ñí xóo chihi-dĕ ñáyiú sândáá iní tnúhu Jësús vecaá*

<sup>9</sup>Te ní xăhá<sup>n</sup> tucu té Păblú:

—Ndéé dāvá-á<sup>n</sup> ñí quide úhú-í ñáyiú sândáá iní-xi tnúhu Jësús Yaá ní quee ñúú Nazàrét, te ní cáhà<sup>n</sup>-í sá vâha-ni ní quide-í sá dúcá<sup>n</sup> ñí quide-í. <sup>10</sup>Te ñiu-ni duca<sup>n</sup> ñí quide-í ñúú Jerusàlén. Te cue dútú cúnúu ní taxi-güedé ñí tutú cuëndá tñi-í ñáyiú ní sândáá iní tnúhu Jësús, te vâi-yu ní chihi-í vecaá. Te òré ní cáhà<sup>n</sup>-güedé sá cáhni-güedĕ ñáyiú-á<sup>n</sup>, te tnàhá-í ní cáhà<sup>n</sup>-í sá cúu càhni ñaha-güedé xií-yu. <sup>11</sup>Te titní xito ní sáhà<sup>n</sup>-í nchaa veñúhu ñáyiú isràél, te ní caní-í-yu te ní xăhá<sup>n</sup>-í sá dáñă-yu ichi Jësús. Te cuëndá ío ní cudéè<sup>n</sup>-í núŷ-yu, xiă<sup>n</sup> ní sáhà<sup>n</sup>-í nchaa ñúú xícá ñí sánúndúcù-í dava-gá ñáyiú sândáá iní tnúhu-gá cuëndá dandôho ñaha-güedé xií-yu.

*Té Păblú càhá<sup>n</sup> tucu-dĕ nása ní cuu ní tuha-dĕ ichi Yá Ndiöxí*

*(Hch. 9:1-19; 22:6-16)*

<sup>12</sup>Te cuëndá xiă<sup>n</sup> ní xica tucu-í cuáhà<sup>n</sup>-í ñúú Dâmascú, néhè-í tutú ní taxi cue dútú cúnúu cuáhà<sup>n</sup>, cuëndá sá ndácù-í tñi-í nchaa ñáyiú sândáá iní tnúhu Jësús ní cùu. <sup>13</sup>Te òré caúxúú nduu ñúhu-í ichi cuáhà<sup>n</sup>-í, te uu<sup>n</sup>ni ní quee ñuhú andiú ñí dáyèhé-xi ndéé núú nútni-í ndihi cue tée ndéca tñaha ndihi-í, te níhi-gá ñí dáyèhé-xi dàcúúxi nchicanchii. <sup>14</sup>Te nchaa-ndí ní nduá-ndí ndéé ñuhu, te ní tecú dóho-í càhá<sup>n</sup> ñí sá càhá<sup>n</sup> tnúhu ñáyiú isràél, te càchí-xi: “Yòhó Sàulú, ¿Ná cuëndá cúu úhú iní ñáhà<sup>n</sup>-n xií-í dándôho ñaha-n? Te ío dândôho-n mee-n, chi dàtná cuíní-n quide ndicutu quide-n chi quiti-á<sup>n</sup> òré cūxi-güedé-di püyá te sâha-di patadá núú-xi, te sá dúcá<sup>n</sup> quide-di te quide úhú-di mee-di. Te duca<sup>n</sup> sâtnahá-xi cùu yohó chi ñá túú sândáá iní ñáhà<sup>n</sup>-n xií-í”, càchí sá ñí càhá<sup>n</sup>-á<sup>n</sup>. <sup>15</sup>Te ní xăhá<sup>n</sup>-í: “¿Ná cúu yòhó sá ñí càhá<sup>n</sup>-ái<sup>n</sup>?”, xăhá<sup>n</sup>-í. Te càchí sá càhá<sup>n</sup>-á<sup>n</sup>: “Yúhú cúu-í Jësús Yaá cúu úhú iní-n”, duha ní cachí sá càhá<sup>n</sup>-á<sup>n</sup>. Te xiă<sup>n</sup> ní cutnùní iní-í sá Jësús càhá<sup>n</sup>. <sup>16</sup>Te ní cachí-gá: “Ndacuíñi-n chi yúhú càhá<sup>n</sup>-í chi cuíní-í quíhí<sup>n</sup>-n càda-n chiu<sup>n</sup>-í, chi quíhí<sup>n</sup>-n càhá<sup>n</sup>-n núú ñáyiú nâcuáa ní cuu ní xiní ñáhà<sup>n</sup>-n xií-í vitna, te quixi tucu-í càhá<sup>n</sup>

ndihi ñaha-í xii-n, te cúñaha-n xií-yu nâcuáa càhá<sup>n</sup>-í. <sup>17</sup>Chi cuíní-í quíhí<sup>n</sup>-n càhá<sup>n</sup>-n tnúhu-í núú ñáyiú isràél ndihi núú ñáyiú ñá túú cùu ñáyiú isràél, te coto ñaha-í xii-n cuëndá vá cáhni ñáhà<sup>n</sup>-yu xii-n. <sup>18</sup>Te cuíní-í quíhí<sup>n</sup>-n cūñaha-n xií-yu sá dáñă-yu nchaa ichi cuèhé ichi duha ndécú-yu, te tuhá-yu ichi váha cuëndá vá quíndáá iní-yu cadá-yu sá càhá<sup>n</sup> yucu ñávâha, te quíndáá iní-yu cadá-yu nchaa nâcuáa càhá<sup>n</sup> Yă Ndiöxí. Te núu na quíndáá iní-yu tnúhu càhá<sup>n</sup>-í, te cada càhnu iní-í nchaa cuéchi-yu, te naníhí tãhú-yu ndihi dava-gá ñáyiú sa ní xócuíñi nchaa sá cuèhé sá dúhá ñí xíndecu iní-yu”, duha ní cachí-gá xii-í —càchí té Păblú xăhá<sup>n</sup>-dĕ xii té Àgripá tée yíndaha nació<sup>n</sup> Isràél.

*Té Păblú quidé-dĕ nchaa nâcuáa ní xăhá<sup>n</sup> Jësús cada-dĕ*

<sup>19</sup>Te ní xăhá<sup>n</sup> tucu té Păblú xii té Àgripá:

—Ñá túú dàña ndeé-í quidé-í nchaa nâcuáa ní càhá<sup>n</sup> Jësús òré ní càhá<sup>n</sup>-gá andiú. <sup>20</sup>Te díhna-gá ñáyiú ñúú Dâmascú ní càhá<sup>n</sup>-í tnúhu-gá núŷ-yu, te ní xăhá<sup>n</sup>-í xií-yu sá dáñă-yu nchaa sá cuèhé sá dúhá quidé-yu, te càhá<sup>n</sup> ndihi-yu Yá Ndiöxí, te cadá-yu mee-ni sã vâha cuëndá cutnùní iní dava-gá-yu sá ñí dáñă-yu nchaa sá ñá túú vâha ní xóo cadá-yu. Te duca<sup>n</sup>-ni ní xăhá<sup>n</sup>-í xii ñáyiú ñúú Jerusàlén ndihi ñáyiú ñiñi nació<sup>n</sup> Isràél ndihi nchaa ñáyiú ñá túú cùu ñáyiú isràél. <sup>21</sup>Te cuëndá sá dúcá<sup>n</sup> ñí càhá<sup>n</sup>-í núú ní tñi ñaha cue tée isràél xií-í cùtnàhá ní sáhà<sup>n</sup>-í veñúhu càhnu sá ío cúnúu càhni ñaha-güedé ní cùu. <sup>22</sup>Te ñiu-ni mee Yă Ndiöxí ní chindee ñàha-gá xii-í núú ndécú-í iha tnàví càhá<sup>n</sup>-í tnúhu-gá, te mee-ni tnúhu-gá càhá<sup>n</sup> ndihi-í nchaa<sup>n</sup>-yu, cuéi ñáyiú cuica, te cuéi ñáyiú ndàhú. Te ndíi Moisés ndihi dava-gá cue tée ní xóo càhá<sup>n</sup> tnúhu Yá Ndiöxí ndéé sanaha ñí càhá<sup>n</sup>-güedé nâcuáa cada-xi vitna, te ñiu-ni duca<sup>n</sup> càhá<sup>n</sup>-í nchaa-ni nduu. <sup>23</sup>Te cue tée-á<sup>n</sup> ñí cachí-güedé sá Cristú Yaá tendaha Yă Ndiöxí quixi ñuyú-a ndoho tnahá-gá, te cuú-gá, te dàtnùní ndoto-gá. Te duca<sup>n</sup> càda-xi nchaa ñáyiú ní xíhí ndotó-yu núu na sàà nduu chi duca<sup>n</sup> càda-xi ní cachí méé Yă Ndiöxí. Te cuëndá sá dúcá<sup>n</sup> ñí ndoto-gá, xiă<sup>n</sup> cùtnùní sá cúu naníhí tãhú ñáyiú, cuéi



ñáyiú israhél, te cuèi ñáyiú ñá túú cùu ñáyiú israhél. Te dàtná-ni ndùu tnúhu ní cáhá<sup>n</sup> cue téé ní xóo cáhá<sup>n</sup> tnúhu-gá ndéé sanaha-ã<sup>n</sup>, te ñiu-ni duca<sup>n</sup> cáhá<sup>n</sup> yúhú tucu —càchí té Páblú xáha<sup>n</sup>-dë.

*Té Páblú xáha<sup>n</sup>-dë xii té Àgripá sá quindáá iní-dé tnúhu Jèsús*

<sup>24</sup> Te sá dúcá<sup>n</sup> ñí cáhá<sup>n</sup> té Páblú, te ní cáhá<sup>n</sup> níhi té Fèstú, te xáha<sup>n</sup>-dë:

—Páblú, ¡ío lúcú cáhá<sup>n</sup>-n! Cuèndá ío vài ní dácuáhá<sup>n</sup>, núu xiã<sup>n</sup> ndádá lúcú ñáhá<sup>n</sup>-xi xii-n —cachí-dé xáha<sup>n</sup>-dë.

<sup>25</sup> Te ní xáha<sup>n</sup> tē Páblú:

—Ñáhá, vá dúcá<sup>n</sup> cáhá<sup>n</sup>-n chi ñá díú sá lúcú-í duha cáhá<sup>n</sup>-í, chi tnúhu ndáá cáhá<sup>n</sup>-í.

<sup>26</sup> Te té Àgripá-a sa nàha-dé ndihi nchaa ñáyiú israhél nàcuáa ní cuu, chi sa ní níhí-dë tnúhu ndihi dava-gá-yu nàcuáa ní cáhá<sup>n</sup>-í, núu xiã<sup>n</sup> cúyì-í cáhá<sup>n</sup> ndihi-í-dé —càchí-dé xáha<sup>n</sup>-dë xii té Fèstú.

<sup>27</sup> Te ní xáha<sup>n</sup>-dë xii té Àgripá:

—Yúhú sa xini-í sá sàndáá iní-n tnúhu ní chídó tnùní cue téé ní xóo cáhá<sup>n</sup> tnúhu Yá Ndióxi ndéé sanaha —càchí-dé xáha<sup>n</sup>-dë.

<sup>28</sup> Te ní xáha<sup>n</sup> tē Àgripá:

—¿Quide-n cuendá sá ñí<sup>n</sup> úú tnúhu ní cáhá<sup>n</sup>-n te quindáá iní-í tnúhu Jèsús cáhá<sup>n</sup>-n-ã<sup>n</sup>? —càchí-dé xáha<sup>n</sup>-dë.

<sup>29</sup> Te ní xáha<sup>n</sup> tucu té Páblú:

—Cuèi vitna te cuèi ndéé cuèé-gá dico cuini-í sá dàcutíí sá quindáá iní-n tnúhu Jèsús. Te ñiu-ni duca<sup>n</sup> xicá<sup>n</sup> táhù-í núu Yá Ndióxi sá ncháá ñáyiú ndècu ndihi-o iha quindáá iní-yu tnúhu-gá dàtná cuini-n ñí quide yúhú, duca<sup>n</sup> càdá-yu. Dìcò-ni sá ñuú vá quihí<sup>n</sup>-ni-yu vecaá dàtná cuini-n ndòho yúhú —càchí-dé xáha<sup>n</sup>-dë xii té Àgripá.

<sup>30</sup> Te sátá dúcá<sup>n</sup> ñí cáhá<sup>n</sup>-dé, te ní ngúnutnii té Àgripá téé yindaha nació<sup>n</sup> Israhél, ndihi té Fèstú téé cùu gobiernú, ndihi tá Berènicé ndihi dava-gá ñáyiú xñucóo yatni. <sup>31</sup> Te ní tnahá-yu ndèca tnahá-yu cuáhá<sup>n</sup> ñí xio. Te ní xitnàhá-yu:

—Téé-ã<sup>n</sup> ñá túú nã cuèchi ni quide-dé ñuú chihi ñaha-güedë vecaá àdi cahni ñaha-güedë —càchí-yu xitnàhá-yu.

<sup>32</sup> Te té Àgripá ní xáha<sup>n</sup>-dë xii té Fèstú:

—Cuèchi mee-dë chi ní cachí-dé sá quitnahá-dé té Cèsár, xiã<sup>n</sup> ñuú ndíhu tucu-dé vecaá, te núu ñá túú dùca<sup>n</sup> ni

cáhá<sup>n</sup>-dé, te cácu-dé ní cùu —cachí-dé xáha<sup>n</sup>-dë xii té Fèstú.

## 27

*Té Páblú cuáhá<sup>n</sup>-dé ñuú Rómá*

<sup>1-2</sup> Te ní ndatnúhu-güedé sá quihí<sup>n</sup> té Páblú ndihi bàrcú nació<sup>n</sup> Itàliá, te tnahá yúhú quihí<sup>n</sup>-í ndihi-dé. Te tnahá ñí<sup>n</sup> téé nàni Aristarcú cuini-dé quihí<sup>n</sup> ndihi-ndí-dé, te cùu-dé téé ñuú Tesalónica, te ñuú-á<sup>n</sup> yindèhu-xi distritú Macèdoniá. Te ní sáha cuèndá-güedé té Páblú ndihi ñí<sup>n</sup> úú-gá cue téé xixihi vecaá ní quehe<sup>n</sup> cuèndá ñáhá tē Jülüú téé cùu capitá<sup>n</sup>, téé yindaha nchaa sandadú nání Augustú, te ní quée-ndí nchaa-ndí bàrcú ñuú Adramitiú. Te ní xica bàrcú-á<sup>n</sup> cuáhá<sup>n</sup>-ndí ndihi-xi te cuita yáha-ndí ñí<sup>n</sup> úú ñuú yindèhu distritú Asiá quihí<sup>n</sup>. <sup>3</sup> Te nduu tnéé ní quexiò-ndí ñuú Sidón. Te ío váha ní quide té Jülüú, chi ní dáñá-dë ní quene té Páblú ní sáhá<sup>n</sup>-dé ní cáhá<sup>n</sup> ndihi-dé cue téé ío váha tnahá tnúhu ndihi-dé ñuú cudana cundahú iní ñáhá-güedë cuñaha-güedë nchaa sá xini ñuhu-dé. <sup>4</sup> Te dàtnùní ní ndéé tucu-dé bàrcú cuáhá<sup>n</sup>-ndí. Te ío níhi táchí te ñá ní dàña-xi caca ndáá bàrcú, te ní sáhá<sup>n</sup> bàrcú ndéé yatni yuhu distritú Chìpré, te distritú-á<sup>n</sup> cáá cuádava xití làmár, te xiã<sup>n</sup> ñà túú cuèhé táchí ni yáha-ndí. <sup>5</sup> Te ta yáha-ndí cuáhá<sup>n</sup>, te ní yáha-ndí ñí<sup>n</sup> xio yuhu distritú Ciliciá ndihi yuhu distritú Pànfiliá, te ní sáá-ndí ndéé ñuú Mírá ñí<sup>n</sup> ñuú yindèhu distritú Liciá.

<sup>6</sup> Te ní quene téé cùu capitá<sup>n</sup> cuándúcú-dë ingá bàrcú, te ní níhí-dë ñí<sup>n</sup> bàrcú téé ñuú Alejándriá, ñúhú ichi-xi quihí<sup>n</sup>-xi nació<sup>n</sup> Itàliá. Te ní ndicuaca ñaha-dë xii-ndí cuáhá<sup>n</sup>-ndí ní quée-ndí bàrcú-á<sup>n</sup>, te ní xica-xi cuáhá<sup>n</sup>-xi. <sup>7</sup> Te ío cuèé cuáhá<sup>n</sup> bàrcú-á<sup>n</sup>, cuèhé nduu ní xúhu<sup>n</sup>-xi ichi, te yica-ni ñí quexiò-ndí yuhu ñuú Nidú, te ñá ní dàña-gá táchí quihí<sup>n</sup> ndáá bàrcú ñuú ní xicó ndúú-xi. Te ní yáha-ndí ñí<sup>n</sup> xio yuhu distritú Crètá núú ñà túú quène vihi táchí, te ñiu-ni cuádava tucu làmár cáá distritú-á<sup>n</sup>. Te ní yáha-ndí yuhu ñuú Salmón, te ñiu-ni Crètá yindaha-xi ñuú-á<sup>n</sup>. <sup>8</sup> Te ní yáha-ndí cuáhá<sup>n</sup>-ndí mee-nã núú ràyá distritú Crètá,



te ío ní ndoho-ndí ní sáá-ndí ì<sup>n</sup> xichi núú nání Puèrtú Váha, yatni víí-ni-gá ñuu Làseá.

<sup>9</sup> Te ní cuyaa vihi-ndí ichi, duca<sup>n</sup>-ni cùu-ndí ní tnahá yóó cúú<sup>n</sup> dǎú táchí, te ío úhú yáha bàrcú ñuu na quíhí<sup>n</sup>-ni-xi. <sup>10</sup> Te ní xáha<sup>n</sup> tē Pǎblú xii-güedé:

—Nchaa-ndo cùndedóho-ndo tnùhu na càhá<sup>n</sup>-í-a. Ío úhú núú na càda yica-o quíhí<sup>n</sup>-ó ndíhi barcú chi cuíta càrgá te cuíta bàrcú, te cuu-ni iní-xi tnahá-ni mee-o cùú-ó chi càhá-ó ñuu na ngàunihnu-o xití ndute — càchí-dé xáha<sup>n</sup>-dē xii-güedé.

<sup>11</sup> Te tée cùu capitá<sup>n</sup> ñá ní sàndáá iní-dé tnùhu ní càhá<sup>n</sup> tē Pǎblú. Dico tnùhu ní càhá<sup>n</sup> tée dàcaca barcú ndíhi xítóhó-xi chi ní sàndáá iní-dé. <sup>12</sup> Te ñá ní tnahá iní-güedé Puèrtú Váha cuèndá sá ñi tnahá yóó cúú<sup>n</sup> dǎú táchí, te ñá túú dǎhu váha táchí xǎá<sup>n</sup>, núu vǎi-güedé ní cuini-güedé yáha-güedé quíhí<sup>n</sup>-güedé sáá-güedé ndéé ñuu Fènicé ní cùu. Te yàcá<sup>n</sup> cundecu-güedé yóó cúú<sup>n</sup> dǎú táchí cuèi ñá túú càváha vihi, chi nchii nàcuáa yáha bàrcú, te yàcá<sup>n</sup> quíhu táchí, dico dǎhu-gá. Núu xǎá<sup>n</sup> ndéé ndíácá<sup>n</sup> nátàcá bàrcú yóó cúú<sup>n</sup> dǎú táchí, te diu-ni Crètá yíndàha-xi ñuu-á<sup>n</sup>.

### *Nitùhú làmár cúú<sup>n</sup> dǎú táchí*

<sup>13</sup> Te duha ní quene nuu luha táchí, xǎá<sup>n</sup> ní sani iní-güedé sá ndácú-güedé quíhí<sup>n</sup>-güedé, núu ní natava-güedé caá ndètní ndéé bàrcú, te ní xica-xi cuáhá<sup>n</sup>-xi ní yáha-ndí yatni víí yuhu dìstrítú Crètá. <sup>14</sup> Te tnaa-ni ní cuu sá ñi xica bàrcú, te duha ní cunuu dǎú táchí ì<sup>n</sup> xio yuhu ñuu-á<sup>n</sup> <sup>15</sup> te nchita ichi cuáhá<sup>n</sup> bàrcú. Te ñá ní ndacu-gá-xi quíhí<sup>n</sup> ndáá-xi nàcuáa cuáhá<sup>n</sup>-xi ni cùu, núu ní dáñá-ndí cuáhá<sup>n</sup> méé-nǎ bàrcú. <sup>16</sup> Te ní yáha-ndí ì<sup>n</sup> ñuu nání Clàudá, te ñuu-á<sup>n</sup> cáá cuádava xití làmár. Te ì<sup>n</sup> xio yuhu ñuu núú ñá túú quène vihi táchí ñi yáha-ndí, te bàrcú líhli sá nchícú<sup>n</sup> sátá bàrcú cáhnú, chi ní ndacu-ndí ní taxúha-ndí xití bàrcú cáhnú. <sup>17</sup> Te sátá ñi ndacu-ndí ní taxúha-ndí bàrcú líhli, te ní ducu<sup>n</sup> nuu-güedé yoho bàrcú cáhnú. Te ío ní yùhú-güedé sá yáha bàrcú ndéé núú ñúhú cùchí yuhu ñuu Sirté, núu xǎá<sup>n</sup> ní ndíhi dóó nchítá díquí bàrcú ní nuu nehe-güedé, chi dóó-á<sup>n</sup> ío níhi chindaha

táchí, núu xǎá<sup>n</sup> cuáhá<sup>n</sup> bàrcú ì<sup>n</sup> xio. Te ní dáñá-güedé ñá túú-gǎ ní dàcaca-güedé, núu cuáhá<sup>n</sup> méé-nǎ-xi ta chindaha táchí cuáhá<sup>n</sup>. <sup>18</sup> Te ío níhi dǎú táchí, te ñá ní cuini tnahí-xi yáha. Te nduu úú sá dúcá<sup>n</sup> ñá túú-gǎ ní dàcaca-güedé bàrcú te ní ngüíta-güedé ní dǎngöyo-güedé sá nchídó-xi cuèndá cuini-güedé nduu ñamá-xi. <sup>19</sup> Te nduu úní ní dǎngoyo-güedé nchaa ndachiu<sup>n</sup> cánehe chiu<sup>n</sup>-güedé xití bàrcú. <sup>20</sup> Te cuéhé nduu ñá túú ní xini-ndí ni chòdíní ni nchícanhii, chi ío níhi ní cuu<sup>n</sup> dǎú táchí, núu ní càhá<sup>n</sup>-ndí sá vǎ càcu-ndí, chi ndíhi-ndí càhá ní càhá<sup>n</sup>-ndí.

<sup>21</sup> Te ní cuu titní nduu ñá túú-gǎ xéxí-ndí, núu xǎá<sup>n</sup> ní ngúnutnii tē Pǎblú núú-güedé, te xáha<sup>n</sup>-dē:

—Quindáá iní-ndó tnùhu ní càhá<sup>n</sup>-í, te cundecu nahi-o Crètá ní cùu. Te núu ni tní-ndo tnùhu-í, te vǎ dǎcuíta-o càrgá ndíhi dava-gá ndàchiu<sup>n</sup> ni cuu. <sup>22</sup> Te vǎ yùhú-ndó chi vǎ cùú ni ì<sup>n</sup>-ndo dico bàrcú chi cuíta. <sup>23</sup> Te nàha-ndo sá yùhú càhá<sup>n</sup> ndíhi-í Yǎ Ndiöxí te quide-í nàcuáa càhá<sup>n</sup>-gá. Te diu-ni mee-gǎ ní techiu<sup>n</sup>-gá ì<sup>n</sup> espíritú xínú cuèchi núú-gǎ ní quixi, <sup>24</sup> te ní cachí-xi xii-í: “Vǎ yùhú-n chi vǎ cùú-n, dico dacuití quíhí<sup>n</sup>-n càhá<sup>n</sup> ndíhi-n tē Cèsár. Te ni ì<sup>n</sup> tée ndíhi-n vǎ cùú, chi ío cùdí iní ñáhá Yǎ Ndiöxí xii-n”, duha ní càhá<sup>n</sup> espíritú xínú cuèchi núú-gǎ ní cachí tnùhu-xi xii-í. <sup>25</sup> Núu xǎá<sup>n</sup> càchí tnùhu-í sá vǎ yùhú-ndó, chi sa cùtnuní iní-í sá cádá Yǎ Ndiöxí nàcuáa ní càhá<sup>n</sup> espíritú xínú cuèchi núú-gǎ. <sup>26</sup> Te mee táchí chindaha-xi bàrcú daquíhí<sup>n</sup>-xi ndéé yuhu ndute —cachí tē Pǎblú xáha<sup>n</sup>-dē xii-güedé.

<sup>27</sup> Te sa ní cuu sáhú<sup>n</sup> nduu sáhú<sup>n</sup> niú sá ñi ngüíta-xi cùu<sup>n</sup> dǎú táchí, te ñá túú-gǎ dǎcaca-güedé bàrcú, chi mee-nǎ táchí tá chindaha-xi barcú cuáhá<sup>n</sup> núú ndute làmár Adriá. Te sátá ñi cuu dava niú, te ní quide cuèndá cue tée dàcaca barcú sá tá cùyatni-güedé ñuhu yìchí. <sup>28</sup> Te ní chicuáhá-güedé ná daha-gá mètrú néhé-xi sǎ cùnú xití ndute cuèndá cùtnuní iní-güedé sá tá cùyatni-xi ndéé yuhu làmár, te nèhe-xi ócò sáhú<sup>n</sup> ì<sup>n</sup>-ni-gá mètrú. Te ní xica tucu bàrcú luha-gá, te dǎtnuní ní chicuáhá tucu-güedé, te xǎá<sup>n</sup> néhé-xi ócò úsá-ni-gá mètrú. <sup>29</sup> Te ní yùhú-güedé sá candaundéé-xi cava, te ní

quehe<sup>n</sup>-güedé cúmí caá náhnú sǎ nchícú<sup>n</sup> yoho, te ní dáquēe-güedé xití ndute ndàa sátá bàrcú, te dàtnùnì ní ngüíñí-xi ñá ní xica-gá-xi, te ní cuiní-güedé sá òré-ni túndaá ní cùu. <sup>30</sup> Te cue tée dàcaca barcú ní natava-güedé bàrcú lǐhli dǎndée-güedé núu ndute ni cùu, te ní cachí-güedé sá quíhí<sup>n</sup>-güedé ndàa núu bàrcú dàquēe-güedé úú-gá caá cuendá cuita candee-xi bàrcú cáhnú cuendá sá vǎ cacá-xí. Te cuiní-güedé dandàhú-güedé dava-gá nchúhú cue tée ñuhu ndihí-güedé bàrcú, chi ní ndatnúhu-güedé sá cúnú-güedé ní cùu. <sup>31</sup> Te té Pǎblú ní xáha<sup>n</sup>-dǎ xii tée cùu capitá<sup>n</sup> ndihí dava-gá sandàdú:

—Te núu na dǎndóo ñaha cuè tée dàcaca barcú cunu-güedé, te vǎ cácu-o —cachí-dé xǎha<sup>n</sup>-dǎ.

<sup>32</sup> Te sá dúcá<sup>n</sup> ñí xáha<sup>n</sup>-dǎ núu ní sáhá<sup>n</sup> sandàdú ní xehndé-güedé yoho nchícú<sup>n</sup> bàrcú lǐhli dǎngáúnihnu-güedé xití ndute cuáhá<sup>n</sup>-xi.

<sup>33</sup> Te váha váha-ni ta túndaá cuáhá<sup>n</sup>, te ní xáha<sup>n</sup> tǎ Pǎblú:

—Sa ní cuu sáhú<sup>n</sup> nduu ñá túu tñahí xèxi-ndo sá ndihú iní-ndó. <sup>34</sup> Te vitna yáchí-ndó, chi caxi-ndo cuendá naníhí ndée-ndó, te vǎ yùhú-ndó chi ñá túu ñǎ tñahá ni ñ<sup>n</sup>-ndo —cachí-dé xǎha<sup>n</sup>-dǎ xii-güedé.

<sup>35</sup> Te sátá dúcá<sup>n</sup> ñí cáhá<sup>n</sup>-dé, te ní quehe<sup>n</sup>-dé ñ<sup>n</sup> pàá, te ní ndacá<sup>n</sup> táhú-dé núu Yǎ Ndiǒxí, te núu-güedé nchaa-güedé duca<sup>n</sup> ñí quide-dé, te dàtnùnì ní táhú-dé luha ní xexi-dé. <sup>36</sup> Te duca<sup>n</sup> te dàtnùnì ní cuyí-güedé ní xexi-güedé nchaa-güedé.

<sup>37</sup> Te úú ciendú únídico sáhú<sup>n</sup> ñ<sup>n</sup>-ndí ñúhú bàrcú núu tñahá té Pǎblú, te nchaa-ndí ní xexi ndihí-ndí-dé. <sup>38</sup> Te ní xexi-ndí ní ndahá xití-ndí. Te dàtnùnì ní ngüíta-güedé ní tava-güedé nchaa ngohnchi triú ní dǎngoyo-güedé xití ndute cuendá nduu ñamá-gá bàrcú.

### *Ní dáhu bàrcú xití làmár*

<sup>39</sup> Te sátá ñí túndaá, te ñá ní cùtnuní-gá iní-güedé ndée cúu-xí núu ñí sáá-güedé, te ní xiní-güedé ñ<sup>n</sup> xichi núu ñí xícó nduu luha yuhu làmár, te vǎi vihi cúchí dǎndáá-xí yùhu ndute, te xía<sup>n</sup> ñá túu dàcandá víhí táchí ndute. Te ní ndatnúhu-güedé sá

ndácú-güedé dàcaca-güedé bàrcú quíhí<sup>n</sup>-xi ndée núu ñúhú cùchí. <sup>40</sup> Te xía<sup>n</sup> núu ní sáhá<sup>n</sup>-güedé ní xehndé-güedé nchaa yoho nchícú<sup>n</sup> caá tácandé bàrcú ní ndóo xití làmár, te ní nadatáyá-güedé vítú sǎ dácuico-xi barcú, te ní nacata caa-güedé ñ<sup>n</sup> dóo díquí bàrcú, te ta chindaha táchí cuáhá<sup>n</sup> yuhu làmár tá cùyatni-xi ñuhu yichí cuáhá<sup>n</sup>. <sup>41</sup> Te ndècu ñ<sup>n</sup> xichi ní natacá víhí cùchí xití ndute, te xía<sup>n</sup> ñí nguindüxi nihnu bàrcú-güedé, te ní cutí-xi xití cúchí, te ñá ní ñihí-gǎ-güedé nàcuáa cada-güedé nene-xi. Te ío níhi ní dǎcandá táchí ndute, te ní chúcú ndée-xi ndàa sátá bàrcú, te ní ndihí ní táhú-xí. <sup>42</sup> Te cue sandàdú ní xitnàha-güedé sá cáhní-güedé nchaa cue tée ní xíhi vecaá cuendá sá vǎ quíhí<sup>n</sup>-güedé núu ndute te cunu-güedé. <sup>43</sup> Te té cùu capitá<sup>n</sup> ñá ní dàña-dé cahni-güedé cue tée ní xíhi vecaá, chi ñá ní cùndee iní-dé cahni-güedé tñahá té Pǎblú. Te ní xáha<sup>n</sup>-dǎ xii-güedé sá cuè tée xícuu cada quíhí<sup>n</sup> núu ndute te na yǎha-güedé ndute quene-güedé yuhu làmár. <sup>44</sup> Te dava cue tée ñá cúu càda, ní xáha<sup>n</sup>-dǎ nanducu-güedé vítú ní àdi vítú ñí táhú sǎ ñí xíhi bàrcú, te núu xía<sup>n</sup> caundodo-güedé yáha-güedé ndute quene-güedé ndée yuhu làmár. Núu duha ní cuu ní cácu-ndí nchaa-ndí.

## 28

### *Té Pǎblú ndécú-dǎ ñúú Mǎltá cáa cuǎdava làmár*

<sup>1</sup> Te sátá ñí cácu-ndí ní nene-ndí ñuhu yichí, te ní níhí-ndí tñuhu nàcuáa nàni ñúú núu ñí sáá-ndí, te ñúú-á<sup>n</sup> nání-xí Mǎltá, te càa-xi cuádava làmár. <sup>2</sup> Te ío quide víxi<sup>n</sup>-xi cuendá ío cùu<sup>n</sup> dáu. Te ñáyíu ñúú-á<sup>n</sup> ñí cundàhú iní ñáhǎ-yu xii-ndí, ní dátñahá-yu ñuhú te ní cana ñáhǎ-yu ní sáhá<sup>n</sup>-ndí ní nacuídí-ndí. <sup>3</sup> Te té Pǎblú dátacá-dé nducú, te tñahá-ñí ñ<sup>n</sup> cóo dée<sup>n</sup> ñí tñí nihnu-dé-di, te òré cuáhá<sup>n</sup> ndaha-dé chucu-dé núu ñuhú, te ní ñáni-di cahni, te ní ndee-di xití nducú ní sándúú-di ndaha-dé, te ní xexi-ñ<sup>n</sup>-di xii-dé. <sup>4</sup> Te nchaa ñáyíu ndehé-yu sá tácandé-di ndaha-dé, te ní ngüíta-yu ní xitnàhá-yu:

—Váa ndíyí ní sahani téa-a, te ñá ní xihí-dé làmár, te dacutíí sã cùú-dé vitna, chi sa ñaha Yá Ndiõxí ná ní quide-dé ñuyíú-a — càchí-yu xitnàhá-yu.

5 Te té Páblú ní quidi-dé ndaha-dé ní ngaunihnu-di núú ñùhú, te ñá túú tnàhí ná ní cùu núú ñí xexi-di. 6 Te ñáyíu ñúú-á<sup>n</sup> xíndéhè-yu núu daquihí<sup>n</sup>-xi chùhú<sup>n</sup> àdi nduá-dé cuú-dé. Te naha ñí xíndéhé ñàhá-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xitnàhá-yu:

—Váa ndiõxí cúú tée-a núu dàcá<sup>n</sup> ñá túú tnàhí ná ní quide-xi ndaha-dé núú ñí xexi cóó —càchí-yu xitnàhá-yu.

7 Te yatni núu dúcá<sup>n</sup> ñí xexiha<sup>n</sup> cóó-ã<sup>n</sup> cáá ñùhu xitu tée ñani Publiú, te tée-ã<sup>n</sup> táxi tnùnì-dé ñihí ñúú cáá cuádava xití làmár núu ndécú-ndí nduu-ã<sup>n</sup>. Te ío váha iní-dé chi ní cana ñaha-dé ní sáhá<sup>n</sup>-ndí ní xíndecu-ndí únì nduu vehe-dé. 8 Te tãtã tẽ Pùbliú-á<sup>n</sup> cáá-dé cùhú-dé ñùhú-dé cahni, te tnàhá-dé daxi. Te té Páblú ní sáhá<sup>n</sup>-dé núu cáá-dé, te ní cáhá<sup>n</sup> ndihí-dé Yá Ndiõxí, te ní sacá<sup>n</sup> ndodo-dé ndaha-dé díquí tée cùhú-á<sup>n</sup>, te duca<sup>n</sup>-ni ñí quide-dé, te ní ndúha tée cùhú-á<sup>n</sup>. 9 Te sátá dúcá<sup>n</sup> ñí quide té Páblú, te ní quixi nchaa ñáyíu cùhú núu ndécú-ndí, te ní quide tátna ñaha tẽ Páblú xii-yu te ní ndúha-yu. 10 Te òré ndécú-ndí xíá<sup>n</sup>, te vài sá ñí taxi táhú-güedé, te òré ní xica-ndí ní taxi tucu-güedé nchaa sá xínì ñùhu-ndí ichi.

### *Té Páblú ní quexìo-dé ñúú Ròmá*

11 Te yàcá<sup>n</sup> ní xíndecu-ndí únì yóó, te sa ndècu ñí<sup>n</sup> barcú tée ñúú Alejándriá òré ní quexìo-ndí, te ní xíndecu-xi ñihí yóó cúú<sup>n</sup> dàú táchí. Te núú-xi càndodo sandú sá dánàni-güedé Càstór ndihí sandú sá dánàni-güedé Pólux, te xití bàrcú-á<sup>n</sup> ñí quée-ndí cuáhá<sup>n</sup>-ndí. 12 Te ní quexìo-ndí ñúú Siràcusá, te yàcá<sup>n</sup> ní xíndecu-ndí únì nduu. 13 Te ní xica tucu bàrcú cuáhá<sup>n</sup>-xi, te ní quexìo-ndí ñúú Règiú. Te nduu tnèé duha ní quene nuu táchí. Te ní xica bàrcú cuáhá<sup>n</sup>-xi, te ndéé nduu úú ní quexìo-ndí ñúú Pùteolí. 14 Te yàcá<sup>n</sup> ní naníhí tnàhá-ndí ndihí ñáyíu sàndáá iní tnúhu Jèsús, te ní cachí-yu sá cùndècu-ndí úná nduu, núu xíã<sup>n</sup>

ní xíndecu-ndí úná nduu ndihí-yu. Te ní xica tucu bàrcú cuáhá<sup>n</sup>-xi, te ní quexìo-ndí ñúú Ròmá. 15 Te ñáyíu ròmá ñáyíu sàndáá iní tnúhu Jèsús, ní níhí-yu tnúhu sá cuáhá<sup>n</sup>-ndí, te ní quixí-yu ní quixi tnàhá ñáhã-yu ichi. Te davá-yu ní naníhí-ndí ñúú Fòrú Àpiú, te davá-yu ní naníhí-ndí ñúú Úní Tàbernás. Te òré ní xínì té Páblú nchaa ñáyíu véxi tnàhá ñáhá xii-ndí, te ndee ndèe ní cuu iní-dé, te ní ndacá<sup>n</sup> táhú-dé núu Yá Ndiõxí sá dúcá<sup>n</sup> ñí quidé-yu. 16 Te sátá ñí quexìo-ndí ñúú Ròmá, te cue tée cùchiu<sup>n</sup> ní xáha<sup>n</sup>-güedé xii té Páblú sá cùndècu ñí<sup>n</sup>-dé, te ní xíndéé ñáhá cuàa sandadú xii-dé.

### *Té Páblú càhá<sup>n</sup>-dé tnúhu Yá Ndiõxí ñúú Ròmá*

17 Nduu únì sá ñí quexìo té Páblú, te ní cana-dé cue tée cùnuu núu ñáyíu isràél ndécú ñúú Ròmá, te ní sáhá<sup>n</sup>-güedé núu ndécú-dé, te ní xáha<sup>n</sup>-dè:

—Nchòhó cue tée isràél, càchí tnúhu-í sá ñà túú ñá ní quide-í ní ñí<sup>n</sup> ñáyíu cùtnàhá ní xíndecu-í ñúú Jerusàlén. Te ñá túú ní càhá<sup>n</sup> cuèhé-í sá quidè-yu nchaa nàcuáa ní xóo cada cue ñani tnàhá-ó ñí xíndecu ndéé sanaha, te ñá túú ñá ní quide-í te ní tñi ñaha-güedé ní sáha cuendá ñáhá-güedé xii-í núu cuè tée ròmá, cue tée ndècu yacá<sup>n</sup>. 18 Te cue tée-á<sup>n</sup> ñí ndúcú tnúhu-güedé núu ndáá ndècuéchi-í, te ní cutnùnì iní-güedé sá ñá túú ñá ní quide-í, te xíã<sup>n</sup> cuìní-güedé queñuhu ñaha-güedé xii-í vecaá ní cùu. 19 Te ñíu-ni cue tée isràél ñá ní dàña-güedé cácu-í, chi cuìní-güedé sá cáhni ñaha cue tée ròmá, cue tée xíndecu yàcá<sup>n</sup> xii-í ní cùu, te xíã<sup>n</sup> núu ní xáha<sup>n</sup>-í sá quixí-í cáhá<sup>n</sup> ndihí-í té Cèsár cuendá iha cada ndáá méé-dé cuendá-í, te vá yóo ñí<sup>n</sup> tee-í cuéchi. 20 Núu xíã<sup>n</sup> ní cana ñaha-í xii-ndo cuendá cunaha-ndo nàcuáa ní cuu. Te ní xáha<sup>n</sup>-í sá sàndáá iní-í sá ndótó ñáyíu ní xihí, te ñíu-ni duca<sup>n</sup> càhá<sup>n</sup> dava-gá ñáyíu isràél, te sá dúcá<sup>n</sup> ñí cáhá<sup>n</sup>-í, te ní chihi ñaha-güedé vecaá, te xíndéé ñáhá-güedé ndéé vitna —càchí té Páblú xáha<sup>n</sup>-dè xii-güedé.

21 Te ní xáha<sup>n</sup>-güedé xii-dé:

—Ñá túú tnàhí tutú ní tèndaha cue tée distritú Jùdeá quixi cuendá-n. Te ní cuè tée isràél ñá túú ní quixi-güedé cáhá<sup>n</sup> cuèhé-güedé cuendá-n. 22 Te cuìní-ndí

cundedóho-ndí nása cunduu tnúhu cáhá<sup>n</sup>-n, chi sa ní níhí-ndí tnúhu sá ncháá xìchi ío xícáhá<sup>n</sup> cuèhé-yu cuèndá nchaa ñáyiú sàndáá iní tnúhu Jèsús –càchí-güedé xáha<sup>n</sup>-güedé xii té Páblú.

<sup>23</sup> Te ní xáha<sup>n</sup>-güedé nduu cùyáchí-güedé te quixi-güedé cundedóho-güedé dava-gá cuèndú cáhá<sup>n</sup> té Páblú. Te ní tnahá nduu ní ndatnúhu-güedé quíhí<sup>n</sup>-güedé núú quidé vèhe-dé, te vái-yu ní sáhá<sup>n</sup>-yu ní xíndedóho-yu tnúhu ní cáhá<sup>n</sup>-dé, te ncháca nchaa ní cáhá<sup>n</sup> ndihí-dé-yu. Te ní xáha<sup>n</sup>-dē xii-yu sá ndí Moisés ndihí dava-gá cue té ní xóo cáhá<sup>n</sup> tnúhu Yá Ndiöxí ndéé sanaha ní chídó tnùní-güedé núú tütú-güedé sá díú-gã tendaha-gã Crístú quixi-gá ñuyíú-a. Te ní chídó tnùní-güedé nchaa nàcuáa cada-gá, te díu-ni nàcuáa càhá<sup>n</sup> tutú-güedé cada Crístú, te duca<sup>n</sup> ní quide-gá cútnáhá ní xica cuu-gá ñuyíú-a, núú xíá<sup>n</sup> ní cutnùní sá díú Jèsús cúú-gã Crístú Yaá ní tendaha Yá Ndiöxí ní quixi ñuyíú-a. Te núú quíndáá iní-yu, te ndíhu ndaha ñàha Yá Ndiöxí xii-yu. <sup>24</sup> Te davá-yu ní sàndáá iní-yu tnúhu ní cáhá<sup>n</sup>-dé, te davá-yu ñá túú ní sàndáá iní-yu. <sup>25</sup> Te cuèndá sá ñá íí<sup>n</sup>-ní tnúhu ní cáhá<sup>n</sup>-yu, núú xíá<sup>n</sup> cuíní-yu núhú-yu ní cùu. Te ní xáha<sup>n</sup> té Páblú sá cündetu tnaá-yu cáhá<sup>n</sup>-dé ingá tnúhu, te xáha<sup>n</sup>-dē:

—Ní xáha<sup>n</sup> Espíritú Yá Ndiöxí xii ndí Chàíá nàcuáa cáhá<sup>n</sup> ndí núú ncháa ñaní tnáhá-ó ní xíndecu ndéé sanaha. Te ní cáhá<sup>n</sup> Espíritú-gá íí<sup>n</sup> sá ndáá ní xáha<sup>n</sup>-xi xii ndí, te duha ní xáha<sup>n</sup>-xi:

<sup>26</sup> Quíhí<sup>n</sup>-n te cúñaha-n xii ñáyiú:

Nchòhó mee-ni cündedóho-ndo tnúhu càhá<sup>n</sup>  
Yá Ndiöxí, dico ni vã tècú tnùní-ndó.

Te cada-gá títí núú sã vã yõo tnàhí ndàcu  
cada, dico ni vã cútnùní iní-ndó  
nàcuáa ndùu sá cáda-gã,

<sup>27</sup> chi cuèndá sá ío sàá iní-ndó,  
xíá<sup>n</sup> duca<sup>n</sup> ñà túú sãha-ndo cuèndá nása  
cuáhá<sup>n</sup> tnúhu càhá<sup>n</sup>-gá,

chi ñá cuíní-ndó cündedóho-ndo, te ni ñá  
sàndáá iní-ndó.

Te ni ñá cuíní-ndó dàña-ndo nchaa sá cuèhé  
sá dúhá quide-ndo

cuendá xocàni-gá nchaa xíá<sup>n</sup> iní-ndó,

duha cúñaha-n xii-yu.

Càchí Espíritú-gá xáha<sup>n</sup>-xi xii ndí. <sup>28</sup> Te na  
càchí tnúhu-í sá quíhí<sup>n</sup> cue tée càhá<sup>n</sup> tnúhu

Yá Ndiöxí cáhá<sup>n</sup>-güedé tnúhu-gá núú ñáyiú ñá túú cùu ñáyiú isràél, chi ñáyiú isràél ñá túú cuíní-yu cündedóho-yu. Dico ñáyiú ñá túú cùu ñáyiú isràél chi cùdí iní-yu cündedóho-yu, núú xíá<sup>n</sup> naníhí tàhú-yu –càchí té Páblú xáha<sup>n</sup>-dē xii-yu.

<sup>29</sup> Te sátá ní ndihí cuèndú ní xáha<sup>n</sup>-dē, te ní ndeé-yu cuánuhú-yu ta ndatnúhu-yu cuáhá<sup>n</sup>.

<sup>30</sup> Te úú cuía ní xínu ní xíndecu té Páblú íí<sup>n</sup> vehe ní cháhu-dé. Te ní xóo cáhá<sup>n</sup> váha-dé ndihí nchaa ñáyiú ní xóo quíhí<sup>n</sup> vehe-dé.

<sup>31</sup> Te ní xáha<sup>n</sup>-dē sá ndíhu ndaha ñàha Yá Ndiöxí xii-yu núú quíndáá iní-yu tnúhu-gá, te vã yõo íí<sup>n</sup> ni sàdí yuhu-dé. Te mee-ni tnúhu Xítohó Jesucristú ní cáhá<sup>n</sup>-dé núú-yu.



## TUTÚ NÍ CADÚHA TĒ PĀBLÚ QUIHĪ<sup>n</sup> NDAHA ÑÁYIU ÑUÚ RÒMÁ

*Té Pāblú cadūha-dé tutú quihĪ<sup>n</sup> ndaha ñáyiū xĭndecu ichi Xítóhó Jesucristú ndécú ñuú Rómá*

<sup>1</sup> Yúhú té Pāblú xínú cuèchi-í núú Xítóhó Jesucristú, chi mee Yă Ndiöxí ní cachí-gá sá cúu-í #<sup>n</sup> téé cāhá<sup>n</sup> tnúhu-gá núú ñáyiū, te tnúhu-gá cúu-xí tnúhu sá cāhá<sup>n</sup> nācuāa naníhí tǎhú-ó, núu ñu-gá ní tendaha ñàha-gá xii-í xicá<sup>n</sup> cúu-í cāhá<sup>n</sup>-í tnúhu-gá.

<sup>2</sup> Te ndéé sanaha ñí cachí Yă Ndiöxí sá dàcuítí sáa nduu ngūndecu ndihĪ ñáyiū tnúhu-gá. Te duca<sup>n</sup> ñí xáha<sup>n</sup>-gă xii cue téé ní cāhá<sup>n</sup> tnúhu-gá dàvá-á<sup>n</sup> ñí chídó tnùnĪ-güedé núú tütú-gá. <sup>3</sup> Te tnúhu-gá sá cāhá<sup>n</sup>-í-a cāhá<sup>n</sup>-xí ñu-gá cuendá Xítóhó Jesucristú Yaá cúu Déhe-gá. Te Déhe-gá-á<sup>n</sup> cúu-gă #<sup>n</sup> ñáyiū, te cūu-gă ñanĪ tñáhá ndĪ Dàvií. <sup>4</sup> Te cūu-gă Yaá ñá túú tñáhí cuèchi-xi. Te ní xihĪ-gá te ní ndoto-gá, te xĭá<sup>n</sup> cútnùnĪ inĪ-ó sá cúu-gă Déhe Yă Ndiöxí, te ío cāhnu cuu-gă. <sup>5</sup> Te ñu-gá Xítóhó Jesucristú ní quide-gá ní nduu tǎhú-í núú Yă Ndiöxí sá cāhá<sup>n</sup>-í tnúhu-gá núú cuè ñáyiū ñuyíú-a cuendá quĭndáá inĪ-yu tnúhu-gá te canchicú<sup>n</sup> nihnú-yu cadá-yu nchaā nācuāa cāhá<sup>n</sup>-xi, te duca<sup>n</sup> ío cuu cāhnu-gă. <sup>6</sup> Te tñáhá nchòhó cúu-ndó ñáyiū sa nchĪcú<sup>n</sup> nihnu quide-ndo nchaā nācuāa cāhá<sup>n</sup> tnúhu-á<sup>n</sup>, chi ní cachí Yă Ndiöxí sá nchòhó tñáhá tnúhu-ndo ndihĪ Xítóhó Jesucristú. <sup>7</sup> Te nchòhó ñáyiū xĭndecu ñuú Rómá, ñáyiū ío cūu inĪ ñáhá Yă Ndiöxí, cadúha-í tutú-a daquixi-í ndaha-ndo. Te ñu-gá nchòhó cúu-ndó cuè ñáyiū ní cachí Yă Ndiöxí cada ndáá cundecu-ndo ñuú-gă. Te xicá<sup>n</sup> tǎhú-í núú Tǎtá-ó Dütú Ndiöxí ndihĪ núú Xítóhó Jesucristú sá ío na chĭndee chitúu ñaha-gă xii-ndo, te duca<sup>n</sup> ndĪ nduú-gă ná càda te ío váha cuu inĪ-ndó cūndecu-ndo.

*Té Pāblú cuĭnĪ-dé quihĪ<sup>n</sup> ngoto-dé cue ñáyiū xĭndecu ichi Xítóhó Jesucristú ndécú ñuú Rómá*

<sup>8</sup> Te díhna nuu-gă cāchĪ tnúhu-í xii-ndo sá ío ndácá<sup>n</sup> tǎhú-í núú Yă Ndiöxí cuendá sá ío sàndáá inĪ-ndó-gă, te nchaā ñáyiū ñihĪ-yu tnúhu sá dúcá<sup>n</sup> quide-ndo. Te Xítóhó Jesucristú dáyāha-gă nchaā tnúhu cāhá<sup>n</sup>-í núú Yă Ndiöxí. <sup>9</sup> Te ndĪ tñáhá òré cāhá<sup>n</sup> ndihĪ-í Yă Ndiöxí duca<sup>n</sup>-ñí xicá<sup>n</sup> tǎhú-í núú-gă cuendá-ndó, te mee-gă náhá-gă sá cāhá<sup>n</sup> ndáá-í, te ñu-gá ní núú-gă xínú cuèchi-í ní yúhu ní inĪ-í, chi cāhá<sup>n</sup>-í nācuāa ní quide Déhe-gá Xítóhó Jesucristú cuendá naníhí tǎhú-ó. <sup>10</sup> Te xicá<sup>n</sup> tǎhú-í núú Yă Ndiöxí sá ñuū mee-gă ná cāchĪ te sáá #<sup>n</sup> nduu quixi coto ñaha-í xii-ndo. <sup>11</sup> Chi ío cuĭnĪ-í cundecu ndihĪ ñaha-í xii-ndo dānehé ñáhà-í #<sup>n</sup> úú tnúhu nācuāa ío-gă chĭndee ñaha Espiritú Yă Ndiöxí xii-ndo, te duca<sup>n</sup> ío-gă cuita nducu ndèe-ndo cada-ndo nchaā nācuāa cuĭnĪ-gă. <sup>12</sup> Te ío chí ná cuāha tñaha-o tnúhu ndee inĪ cundecu-o ñu-gă, chi nchòhó ndihĪ yúhú ío sàndáá inĪ-ó-gă.

<sup>13</sup> Te nchòhó ñáyiū ndècu ndihĪ-í ichi Xítóhó Jesucristú na cāchĪ tnúhu-í xii-ndo sá dúcá<sup>n</sup>-ní ío sàni inĪ-í quixi coto ñaha-í xii-ndo. Te cuĭnĪ-í sá òré quixi coto ñaha-í xii-ndo, te vá cuĭta chĭu<sup>n</sup> quixi-í dàtná quidè-í òré sǎngoto-í nchaā ñáyiū dāva-gă ñuú ñá túú xĭta chĭu<sup>n</sup>-í chí ío váha sǎhúu<sup>n</sup>-yu tnúhu cāhá<sup>n</sup>-í, dico ñá ndácù-í quixi-í quixi coto ñaha-í xii-ndo. <sup>14</sup> Te yúhú yĭdíquĭ-í cāhá<sup>n</sup>-í tnúhu Xítóhó Jesucristú núú nchāa ñáyiū cāhá<sup>n</sup> tnúhu griégú, ndihĪ núú nchāa ñáyiū cāhá<sup>n</sup> dāva-gă núú tnúhu, ndihĪ núú nchāa ñáyiū túha, ndihĪ núú nchāa ñáyiū ñá túú túha. <sup>15</sup> Te cuendá sá dúhá yĭdíquĭ-í cāhá<sup>n</sup>-í tnúhu-gă, xĭá<sup>n</sup> ío cuĭnĪ-í dānehé ñáhà-í xii nchaā nchòhó ñáyiū ñuú Rómá nācuāa ndūu tnúhu sá cāhá<sup>n</sup> nācuāa naníhí tǎhú-ó.

### *Ío cūnuu tnúhu Xítóhó Jesucristú*

<sup>16</sup> Te yúhú ñá túú tñáhí cūcaha<sup>n</sup> núu-í cāhá<sup>n</sup>-í tnúhu Xítóhó Jesucristú, chi cūu-xi tnúhu ío cūnuu, chí Yă Ndiöxí ní cachí-gá sá nchāá ñáyiū na quĭndáá inĪ-xi tnúhu-á<sup>n</sup> te naníhí tǎhú-yu. Te ní cachí-gá sá díhnanuu-gă ñáyiū isráel ngūndecu ndihĪ-yu tnúhu-á<sup>n</sup> te dàtnùnĪ ngūndecu ndihĪ ñáyiū ñá túú cūu ñáyiū isráel. <sup>17</sup> Te tnúhu-á<sup>n</sup> dānehé ñáhà-xí xĭi-o sá cúu-o núú Yă Ndiöxí te nūu mee-ni sá quĭndáá inĪ-ó-gă

dàtná càhá<sup>n</sup>-xi núú tütú-gá núú càchí-xi: “Nchaa ñáyiú sàndáá iní ñáhá xii Yá Ndiöxí cúdíú-yu núú-gă, te ndècu ndihí ñahá-yu xii-gá”, duha càchí-xi núú tütú-gá.

*Nchaa ñáyiú ndècu ñuyúú ndècuéchi-yu*

<sup>18</sup> Te ndéé andiu tëndaha Yá Ndiöxí sá ùhú quixi sá cúú-xí nchaa ñáyiú ñá túú quide ndáá núú-gă, ñáyiú quide nchaa sá cuèhé sá dúhá. Te cuèndá nchaa sá quidè-yu-á<sup>n</sup> xíã<sup>n</sup> ñá túú cuiní-yu tñí-yu tñúhu ndáá tñúhu Yá Ndiöxí cuèndá cuu-xi ñá sá vâha sá cúú-xí-yu. <sup>19</sup> Te cuèi duca<sup>n</sup> quidè-yu dico cùtnuní ndáá iní-yu nàcuáa ndùu sá sání iní Yá Ndiöxí ndihí nàcuáa ndùu sá quidè-gă dàtná cùtnuní iní nchaa dava-gá-yu, chi ñu-gá dánèhé ñáhá-gă xii-yu. <sup>20</sup> Te ni vâ ndácú-ó quini núú-ó nâsa càa-gá, te ni vâ ndácú-ó quini-ó nâsa càa iní-gá, te ni vâ ndácú-ó quini-ó nâsa quide-gă táxi tñuní-gá nchaa nduu nchaa quíú. Te cuèi duca<sup>n</sup> dico ndéé cùtnàhá ní ngáva ñuyúú ní ngúita nchaa ñáyiú tècú tñuní váha-yu nàcuáa ndùu sá sání iní-gá ndihí nàcuáa ndùu sá quidè-gă te duca<sup>n</sup> tècú tñuní-yu cuèndá nchaa sá ñí cadúha-gá ndéhè-yu ío ñuyúú-a, núú xíã<sup>n</sup> vá càchí-yu sá ñá túú cuèchi-yu. <sup>21</sup> Te cuèi duca<sup>n</sup> ní cùtnuní iní-yu cuèndá Yá Ndiöxí dico ñá túú cuiní-yu canehé-yu sá yíñùhu núú-gă nàcuáa tàú-xi cunduu. Te ni ñá túú cuiní-yu ndacá<sup>n</sup> táhù-yu núú-gă cuèndá nchaa sá vâha quide ñaha-gá xii-yu, chi mee-ni nchaa sá ñá túú vèdana nàndíhi ñùhu iní-yu. Te quidè-yu dàtná quidè ñá ñáyiú ñá túú ndècu ndihí nchaa sá xini tñuní-xi. Te uu<sup>n</sup>-gá uu<sup>n</sup>-gá tá quidè-yu cuáhá<sup>n</sup>. <sup>22</sup> Te càchí-yu sá cúú-yu ñáyiú ío váha sáá sá xini tñuní-xi dico ñá ndáá, chi cùú-yu ñáyiú ío ñí ñíquí-xi. <sup>23</sup> Te ñá túú cuiní-yu càhá<sup>n</sup>-yu sá ío càhnu cuu Yá Ndiöxí Yaá ndécú nchaa nduu nchaa quíú, chi da nchaa sá ñí cadúha mèe-yu quide cahnú-yu. Te ní cadúha-yu nchaa sá nàhá ñáyiú ñá túú cùdí ndècu ñuyúú-a. Te ní cadúha-yu sá nàhá quiti ndàva, ndihí sá nàhá quiti sàcuíta ñuhu mee-xi, ndihí sá nàhá nchaa dava-gá quiti, nchaa xíã<sup>n</sup> quidè càhnú-yu.

<sup>24</sup> Te xíã<sup>n</sup> ñùu ní dáñá Yá Ndiöxí quidè-yu nchaa sá cuèhé sá dúhá sàni iní-yu. Te

xíã<sup>n</sup> ío quide ndihí tnahá-yu sá cuèhé sá dúhá sàcúú-xí yiqui cuñú-yu. <sup>25</sup> Te duca<sup>n</sup> quidè-yu chi ñá túú sàndáá iní-yu tñúhu ndáá tñúhu Yá Ndiöxí. Te mee-ni tñúhu ndehnde sàndáá iní-yu, te nèhé-yu sá yíñùhu núú dàva sá ñí cadúha-gá ío ñuyúú-a ndihí dava sá ndéé andiu te quide cahnú-yu, te ñá túú càchí-yu sá mèe-gă ío càhnu cuu-gá, dico mee-gă xini ñùhu-xi càhá<sup>n</sup>-yu sá ío càhnu cuu-gá ni caa ni quíhi<sup>n</sup>. Te ndáá ndisa sá ío càhnu cuu-gá.

<sup>26</sup> Te sá dúcá<sup>n</sup> ñá túú quide váha-yu núu xíã<sup>n</sup> ní dáñá-ñá Yá Ndiöxí quidè-yu nchaa sá cuèhé sá dúhá sàni iní mèe-yu. Te dava ñáyiú ñíhi càhá<sup>n</sup> ndihí tnahá-yu ndi mèe ñíhi-yu te ñá túú quidè-yu nàcuáa ní nduu táhù-yu cadá-yu. <sup>27</sup> Te ñu-ni duca<sup>n</sup> xiquide dava cue tée chi sàni cuehé sání dùha iní-güedé sá cúú-xí yiqui cuñú-güedé ndi mèe tnahá tée-güedé, chi càhá<sup>n</sup> ndihí tnahá ndi mee-güedé te ñá túú quide-güedé nàcuáa ní nduu táhù-güedé cada-güedé, te sá dúcá<sup>n</sup> quide-güedé te ñá túú tñahí cùu váha iní-güedé ndécú-güedé, te duca<sup>n</sup> tñahí tàú-xi ndoho-güedé cundecu-güedé.

<sup>28</sup> Te ñá túú tñahí ñùhu iní-yu Yá Ndiöxí ñùu xíã<sup>n</sup> duu<sup>n</sup> duu<sup>n</sup> ní dáñá ñìhnu ñaha-gá xii-yu sàni cuehé sání dùha iní-yu, te quidè-yu nchaa sá ñá túú tàú-yu cadá-yu. <sup>29</sup> Te nchaa núú sá cuèhé sá dúhá cùnuu quidè-yu. Te cue tée càhá<sup>n</sup> ndihí-güedé ñáyiú ñíhi te ñá díú ñàndíhi-güedé cùú-yu. Te ñu-ni duca<sup>n</sup> xiquide cue ñáyiú ñíhi chi càhá<sup>n</sup> ndihí-yu cue tée te ñá díú yíi-yu cùu-güedé. Te mee-ni sá ñá túú váha quidè-yu sá cúú-xí tñaha ñáyiú-yu, te xihó-yu cundecu ndihí-yu sá ndécú ndihí dava-gá tñaha ñáyiú-yu, te ío sàni cuehé sání dùha iní-yu sá cúú-xí tñaha ñáyiú-yu, te ío cuédú iní-yu, te sàhni tnahá-yu, te ío plètú-yu, te dándahú tñahá-yu, te cùu úhú iní-yu cue tñaha ñáyiú-yu, te ío yiti yùhú-yu. <sup>30</sup> Te càhá<sup>n</sup> cuèhé-yu cuèndá nchaa dava-gá tñaha ñáyiú-yu, te cùu úhú iní-yu Yá Ndiöxí, te xio xio cuiní-yu cunuu tñúhu-yu, te mee-ni sàni iní-yu sá ío váha cunduu-yu, te ío quide cahnú-yu mèe-yu, te ío sàni iní-yu sá cadá úhú-yu tñaha ñáyiú-yu, te ñá túú sàndáá iní-yu ni tãtä-yu ni nãñá-yu. <sup>31</sup> Te ñá túú

tècú tnùnì-yu sá vǎha, te ñá túú quidè-yu ñí sá càhá<sup>n</sup>-yu, te ñá túú cùu iní-yu nì ñáyiu cùu ndi meé-yu, te ni dàva-gá tnàha ñáyiu-yu, te ñá túú quidè cahnu iní-yu ñí sá cúmǎní nǔú tnáhǎ-yu, te ni ñà túú cùndahú iní-yu tnàha ñáyiu-yu. <sup>32</sup> Te Yá Ndiõxí ní cachí-gá sá ncháá ñáyiu duca<sup>n</sup> xǐquide quíhí<sup>n</sup>-yu núú ùhú núú ndàhú. Te xìnì-yu sá Yá Ndiõxí daquihí<sup>n</sup> ñáhá-gǎ xií-yu núú ùhú núú ndàhú sá dúcá<sup>n</sup> quidè-yu, dico uu<sup>n</sup>-gá quidè-yu chi váha-gá cúú iní-yu cue ñáyiu quidè datná quidè mèe-yu.

## 2

*Yá Ndiõxí cada ndáá-gá cuéchi nchaa ñáyiu ndècu ñuyúú*

<sup>1</sup> Te nchòhó ñáyiu càchí sá ïo ndècu cuéchi dava-gá ñáyiu tnàhá-ndó ïo ndècu cuéchi-ndo cuèi nágá ñáyiu cùu-ndo, chi tnàhá-ndó quidè-ni-ndo nchaa nacuaá quidè dava-gá ñáyiu càchí-ndó ndècu cuéchi-xi, te sá dúcá<sup>n</sup> càhá<sup>n</sup>-ndó sǎ ndécú cuéchi ñáyiu-á<sup>n</sup> te dàcaa-ndo cuéchi díquí-ndó chi tnàhá-ndó quidè-ndo datná quidè-yu. <sup>2</sup> Te nchoo xìnì-ó sǎ Yá Ndiõxí ïo váha cùtnuní iní-gá nàcuáa cada ndáá-gá cuéchi ñí ñí nchoo ñáyiu ndècu ñuyúú-a, chi daquihí<sup>n</sup>-gá nchaa ñáyiu quidè nacuaá ní càhá<sup>n</sup>-í núú ùhú núú ndàhú. <sup>3</sup> Te nchòhó ñáyiu ñí ñí quidè ndihí ñáyiu càchí mèe-ndó sǎ ndécú cuéchi-xi dacuítí sǎ ná chǎhu-ndo nǔú Yá Ndiõxí sá dúcá<sup>n</sup> quidè-ndo. <sup>4</sup> Te ñá túú cùu váha iní-ndó sǎ Yá Ndiõxí cùndahú iní ñáhá-gǎ xii-ndo, te ni ñà túú cùu váha iní-ndó sǎ ïo cuìní-gá cada càhnu iní-gá nchaa sá ñà túú váha quidè-ndo, te ni ñà túú quidè cuendá-ndó sǎ Yá Ndiõxí quidè váha ñaha-gǎ xii-ndo cuendá cuìní-gá sá nchòhó ndixi túu iní-ndó sǎ ñà túú quidè váha-ndo ndècu-ndo. <sup>5</sup> Te nchòhó cúú-ndó ñáyiu ïo sǎa iní-xi, chi ñá túú cuìní-ndó ndixi túu iní-ndó sǎ ñà túú quidè váha-ndo ndècu-ndo, te xǎ<sup>n</sup> nǔu ïo-gá tá cùu vai tnúndòho sá cúú-xí-ndó. Te na sǎa nduu tnúhu ndòho tnúhu ndàhú te ïo ndòho-ndo, chi Yá Ndiõxí cada ndáá-gá nàcuáa ndùu cuéchi-ndo. <sup>6</sup> Te dàvá-á<sup>n</sup> cada ndáá Yá Ndiõxí nchaa nàcuáa ndùu nchaa sá ñí quidè ñí ñí ñáyiu ndècu ñuyúú-a. <sup>7</sup> Te nchaa ñáyiu nchìcú<sup>n</sup> nihnu-ni quidè mee-ni sá

vǎha, ñáyiu-á<sup>n</sup> nduu táhǔ-yu cundecú-yu ndihí Yá Ndiõxí ni caa ni quíhí<sup>n</sup>, te duca<sup>n</sup> quidè váha-yu chi cuìní-yu sá Yá Ndiõxí cuu váha iní ñáhá-gǎ xií-yu, te cuìní tucú-yu nduu táhǔ-yu núú ïo váha càa ndecu Yá Ndiõxí cundecú-yu ni caa ni quíhí<sup>n</sup>. <sup>8</sup> Te ïo cùdée<sup>n</sup>-gǎ núú ncháa ñáyiu ñùhu iní mee-ni sǎ cúú-xí mèe-xi, te ñá túú sàndáá iní-yu tnúhu ndáá chi mee-ni sǎ cuèhé sá dúhá quidè-yu. <sup>9</sup> Te nchaa ñáyiu duca<sup>n</sup> xǐquide ïo ndíhú iní-yu. Te díhna-gá ñáyiu isràél ngúíta-xi ndohó-yu, te dàtnùnì ngúíta-xi ndoho nchaa ñáyiu ñá túú cùu ñáyiu isràél. <sup>10</sup> Te nchaa ñáyiu ní quidè váha, te Yá Ndiõxí cada-gá te ngúndecú-yu núú ïo váha càa ndecu-gá, te cachí-gá sá ñí quidè váha-yu, te ïo váha cuu iní-yu cundecú-yu. Te díhna-gá ñáyiu isràél ñáyiu ní quidè váha duca<sup>n</sup> càda ñaha-gá xií-yu, te dàtnùnì duca<sup>n</sup> càda ñaha-gá xii ñáyiu ñá túú cùu ñáyiu isràél ñáyiu ní quidè váha.

<sup>11</sup> Te ñá túú quidè cuendá-gá cuèi náí ñáyiu cùu-yu. <sup>12</sup> Te nchaa ñáyiu ndècu ndihí nchaa tnúhu ní chídó tnùnì ndíi Moisés, Yá Ndiõxí cada ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Te nchaa ñáyiu ñá túú ndècu ndihí tnúhu ní chídó tnùnì ndíi-á<sup>n</sup>, Yá Ndiõxí vá cáda ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Dico nchaa ñáyiu quidè nándi sá cuèhé sá dúhá dàcuítí cuíta nihnú-yu cuèi ndècu ndihí-yu tnúhu ní chídó tnùnì ndíi Moisés àdi ñá túú ndècu ndihí-yu. <sup>13</sup> Te nchaa ñáyiu dícó-ni sàcúndedóho nchaa tnúhu ní càhá<sup>n</sup> ndíi Moisés te ñá túú tnèi-yu, ñáyiu-á<sup>n</sup> ñà túú cùdiú-yu núú Yá Ndiõxí, dico nchaa ñáyiu tnèi nchaa tnúhu ní càhá<sup>n</sup> ndíi, ñáyiu-á<sup>n</sup> càchí Yá Ndiõxí sá cúdiú-yu núú-gǎ, chi ñá túú-gǎ cuéchi-yu ndècu núú-gǎ. <sup>14</sup> Te nchaa ñáyiu ñá túú ndècu ndihí tnúhu ní chídó tnùnì ndíi Moisés, te núu quidè-yu nchaa nàcuáa ní càhá<sup>n</sup> ndíi te cùu-xi ñí sá sání tnàhí iní mèe-yu cadá-yu, te sá sání iní-yu-á<sup>n</sup> cúú-xí ñí tnúhu váha sá sánú ìchi ñaha xií-yu nàcuáa cada váha-yu cundecú-yu. <sup>15</sup> Te sá dúcá<sup>n</sup> quidè-yu xǎ<sup>n</sup> cùtnùnì sá sání iní-yu dàtná càhá<sup>n</sup> tnúhu ní chídó tnùnì ndíi Moisés cada ñáyiu isràél, te ïo váha cùtnuní iní-yu nchaa nàcuáa



quidé-yu chi ndixi túu iní-yu òré ñá túú quide váha-yu. <sup>16</sup> Te sáá nduu te Yá Ndióxi cúñaha-gã xii Xítoho Jesucristú cada ndáá-gá nchaa cuéchi ñáiyu, nchaa sá sání iní méě-yu ndùu yuhu, te cada-gá dàtná càhá<sup>n</sup> tnúhu sá sánú ìchi ñaha xii-o nacuaá naníhí tàhú-ó, tnúhu sá dánèhé ñáhà-í xii-ndo.

*Cuendá ñáiyu isràél ndihi cuendá nchaa tnúhu ní chídó tnùní ndí Moisés*

<sup>17</sup> Te nchòhó ñáiyu isràél nchaa-ndo cùu-ndo ndi mee-í, te càchí-ndó sã nchìcú<sup>n</sup> nihnu-ndo quide-ndo nchaa tnúhu ní cáhá<sup>n</sup> ndí Moisés núu xíá<sup>n</sup> ndécú vâha-ndo, te càchí-ndó sã ìo càhnu cuu-ndo sá ndécú ndihí-ndo Yá Ndióxi. <sup>18</sup> Te cùnùní iní-ndó nchàa nacuaá cùní Yá Ndióxi cada-ndo, te sá dúcá<sup>n</sup> nchìcú<sup>n</sup> nihnu-ndo quide-ndo nacuaá càhá<sup>n</sup> tnúhu-á<sup>n</sup> xíá<sup>n</sup> cùnùní iní-ndó nchàa sá ìo-gá váha xini ñuhu-xi cada-ndo. <sup>19</sup> Te càchí-ndó sã ìo váha xini-ndó cànuichi-ndo nchaa ñáiyu ñá túú cùnùní iní-xi, te càchí tucu-ndo sã ìo váha xini-ndó nà canu ichi-ndo nchaa ñáiyu ndècu ichi cuehé ichi duha. <sup>20</sup> Te sànu ichi-ndo nchaa ñáiyu ío nì dǐquí-xi, ndihí nchaa ñáiyu vitna ta tècú tnùní nchaa sá vâha, te duca<sup>n</sup> quide-ndo chi ndècu ndihí-ndo nchaa tnúhu ní chídó tnùní ndí Moisés, te tnúhu-á<sup>n</sup> cúu-xí tnúhu ndáá, chi sànu ichi ñaha-xi xii-ndo nacuaá cada-ndo. <sup>21</sup> Te nchòhó dàcuaha-ndo ñáiyu nàcuáa cadá-yu, te mee-ndo ñà túú dàcuaha-ndo cada-ndo nchaa nacuaá tàú-xi cunduu, te xâha<sup>n</sup>-ndo xii-yu sá vã cúú dùhú-yu te mee-ndo dùhu-ndo. <sup>22</sup> Te dàcuaha-ndó-yu sá cuè téé vá cúú càhá<sup>n</sup> ndihí-güedé ñáiyu dîhí te núu ñá díú ñàdihí-güedé cúú-yu, te duca<sup>n</sup>-ni cuè ñáiyu dîhí, vá cúú càhá<sup>n</sup> ndihí-yu téé te núu ñá díú yǐ-yu cùu-güedé. Te nchaa sá xâha<sup>n</sup>-ndo vã cúú càda ñáiyu te mee-ndo quide-ni-ndo, te xâha<sup>n</sup>-ndo xii-yu sá vã cànèhé-yu sá yǐñùhu núú nchàa sá càchí-yu cùu ndióxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. <sup>23</sup> Te càchí-ndó sã ìo cùnuu nchaa tnúhu ní chídó tnùní ndí Moisés, te ñá túú quide-ndo nchaa nacuaá ní cáhá<sup>n</sup> ndí, te sá dúcá<sup>n</sup> quide-ndo-á<sup>n</sup> te dàquee tíhú-ndó Yá Ndióxi. <sup>24</sup> Te quèe ndáá-xi nàcuáa càhá<sup>n</sup>-xi núú tütú Yá Ndióxi nàcuáa quide-ndo-á<sup>n</sup>

núú càchí-xi sá ncháá ñáiyu ñá túú cùu ñáiyu isràél càhá<sup>n</sup> cuèhé-yu cuendá Yá Ndióxi sá cuendá-ndó.

<sup>25</sup> Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcá<sup>n</sup> te núu quide-ndo nchaa nacuaá ní cáhá<sup>n</sup> ndí Moisés. Dico núu ñá túú quide-ndo nchaa nacuaá ní cáhá<sup>n</sup> ndí ña, te ñá túú nàndihí-xi sá cúu-ndó ñáiyu isràél cuèi ndècu seña ñii-ndo. <sup>26</sup> Te nchaa ñáiyu ñá túú ndècu ndihí seña ñii-xi, te núu quidé-yu nchaa nàcuáa ní cáhá<sup>n</sup> ndí Moisés, te cùu-yu dàtná cue ñáiyu ndècu ndihí seña ñii-xi, chi quidé-yu nchaa nàcuáa ní cáhá<sup>n</sup> ndí. <sup>27</sup> Te ñáiyu ñá túú ndècu ndihí seña ñii-xi, te núu na cadá-yu nchaa nàcuáa ní cáhá<sup>n</sup> ndí Moisés, te ñáiyu-á<sup>n</sup> cachí-yu sá ñà túú quide ndáá nchaa nchòhó ñáiyu ndècu ndihí seña ñii-xi, chi ndècu ndihí-ndo nchaa tnúhu ní chídó tnùní ndí te ñá túú quide-ndo nacuaá càhá<sup>n</sup> tnúhu-á<sup>n</sup>. <sup>28</sup> Te nchòhó ñáiyu isràél, ñáiyu nchìcú<sup>n</sup> nihnu-ni quide nchaa nacuaá ta quide tnahi-ndo véxi, ñá túú quide-ndo sá cúu-ndó ñáiyu isràél, te mee-ndo ndècu seña ñii-ndo dico ñá túú quide-ndo nacuaá tàú-xi cada nchaa ñáiyu ndècu seña ñii-xi, te mee-ni seña-á<sup>n</sup> sãha-ndo ñii-ndo te ñá túú quide-ndo nacuaá cùní Yá Ndióxi cada-ndo. <sup>29</sup> Te nchaa ñáiyu sàndáá ndisa iní-xi Yá Ndióxi, ñáiyu-á<sup>n</sup> cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yá Ndióxi duca<sup>n</sup> nǐ quide-xi, dico ñá díú sã sãha-yu seña ñii-yu dàtná ní cachí ndí Moisés. Te ñáiyu-á<sup>n</sup> cúú vâha iní ñáhá Yá Ndióxi xii-yu cuèi ñá túú càhá<sup>n</sup> váha tnàha ñáiyú-yu cuendá-yu.

### 3

<sup>1</sup> Te sá dúhá càhá<sup>n</sup>-í te ìo dava ñáiyu quesàhá-yu sá íí<sup>n</sup>-ní cùu ñáiyu ñá túú cùu ñáiyu isràél ndihí nchoo ñáiyu isràél, te quesaha tucú-yu sá íí<sup>n</sup>-ní quide tucu-xi cuèi na cuãha àdi vá cuãha seña ñii-yu. <sup>2</sup> Dico yúhú càchí-í sá ncháá ñáiyu isràél ìo-gá cùnùú-yu, chi ìo titní núú sã vâha ní quide ñaha Yá Ndióxi xii-yu, chi ní sãñaha-gã tnúhu-gá ndécú ndihí-yu. <sup>3</sup> Te davá-yu ñá túú cùní-yu cada ndáá-yu, dico



ñá díú sǎ xiǎ<sup>n</sup> te cùyica iní Yǎ Ndiǒxí ñá túú quide ndáá-gá. <sup>4</sup> Dico ñáhá chi xini ñuhu-xi sá ncháá ñáyiú cada cuendá-yu sá Yǎ Ndiǒxí cúú-gǎ Yaá quidé ndáá cuiti, te cuèi ncháá-yu na càchí-yu sá ñà túú quide ndáá-gá, dico mee-gǎ chi quide ndáá-ni-gá. Te núú tütú-gá càhá<sup>n</sup>-xi nàcuáa ní xáha<sup>n</sup> ì<sup>n</sup> téé ní xíndecu ndéé sanaha xii-gá, te duha ní xáha<sup>n</sup>-dë:

Yòhó Dútú Ndiǒxí, cùtnuní iní ñáyiú sá ìo ndáá càhá<sup>n</sup>-n,

te cùnūu nahi-ni tnúhu-n cuèi òré càchí ñáyiú sá ñà túú càhá<sup>n</sup> ndáá-n.

Duha ní xáha<sup>n</sup> tée ndéé sanaha-ǎ<sup>n</sup> xii-gá càchí-xi núú tütú-gá.

<sup>5</sup> Te cuendá nchaa sá cuèhé sá dúhá quide ñáyiú, xiǎ<sup>n</sup> cútnuní iní-yu sá Yǎ Ndiǒxí cúú-gǎ Yaá ío váha quide ndáá, chi mee-gǎ ñá túú duca<sup>n</sup> quide-gá. Te cuèi duca<sup>n</sup> dico vá caní iní-yu sá Yǎ Ndiǒxí ñá túú quide ndáá-gá sá dándòho ñaha-gá xii-yu na sàa nduu, te núú duca<sup>n</sup> na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. <sup>6</sup> Te vá dúcá<sup>n</sup> càni iní-yu, chi núú Yǎ Ndiǒxí ñá túú quide ndáá-gá ñá, te vá cúú càda ndáá-gá nchaa cuèchi cue ñáyiú ñuyúú-a te núú duca<sup>n</sup>.

<sup>7</sup> Te núú yúhú ná càni iní-í càhá<sup>n</sup>-í ì<sup>n</sup> tnúhu ndehnde, te sá tnúhu-á<sup>n</sup> te caní tucu iní-í sá quidé càhnu-gá-í tnúhu ndáá tnúhu Yǎ Ndiǒxí, te sá dúcá<sup>n</sup> ná càhá<sup>n</sup>-í te caní tucu iní-í sá vǎ cúú càhá<sup>n</sup> Yǎ Ndiǒxí sá ndécú cuèchi-í. <sup>8</sup> Te núú na càni tucu iní-í sá vǎha-gá cada-í nchaa sá cuèhé sá dúhá cuendá Yǎ Ndiǒxí cada-gá sá vǎha, dico ñá ndáá. Te ío ñáyiú càhá<sup>n</sup> cuèhé cuendá-í te càchí-yu sá díú-ní duca<sup>n</sup> dacuaha-í ñáyiú dico ñá ndáá sá dúcá<sup>n</sup> dànehé-í-yu, te ñáyiú-á<sup>n</sup> nacháhu-yu tnúhu càhá<sup>n</sup>-yu, chi duca<sup>n</sup> tàú-xi cunduu.

#### *Nchaa ñáyiú ñuyúú-a ndècuèchi-yu*

<sup>9</sup> Te vitna càchí dava ñáyiú sá ìo-gá cùnūu nchoo cue ñáyiú isràél dàcúúxí dàva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sǎ nchàa ñáyiú ndècuèchi-yu cuèi ñáyiú isràél te cuèi ñáyiú ñá túú cùu ñáyiú isràél. <sup>10</sup> Te núú tütú Yǎ Ndiǒxí càchí-xi:

Vá yǒo ì<sup>n</sup> quide ndáá,

<sup>11</sup> te ni vá yǒo ì<sup>n</sup> tècú tnùní tnúhu váha, te ni vá yǒo ì<sup>n</sup> nànducu nihnu Yǎ Ndiǒxí.

<sup>12</sup> Chi ncháá-yu ñá túú nchìcú<sup>n</sup> nihnú-yu ichi váha, te ncháá-yu cùú-yu ñáyiú xíndecu neñúú sá cúú-xí Yǎ Ndiǒxí.

Te ni ì<sup>n</sup>-yu ñá túú quide-yu ì<sup>n</sup> sá váha.

<sup>13</sup> Te cada iní-ndó sǎ yúhú-yu cùu-xi datná cúú ì<sup>n</sup> yaú núú yíndüxi ndíyi núú ìo ndehe sàhá<sup>n</sup>,

te duca<sup>n</sup> sàtnahá-xi cùu yuhú-yu, chi ío càhá<sup>n</sup> cuèhé-yu, te mee-ni dándahú-yu nchaa tnàha ñáyiú-yu.

Te cada iní-ndó sǎ vènenú cóo yíhí yúhú-yu chi mee-ni càhá<sup>n</sup> úhú-yu cuendá tnàha ñáyiú-yu.

<sup>14</sup> Te ío iní-yu càhá<sup>n</sup> úhú tnáhǎ-yu.

<sup>15</sup> Te àú<sup>n</sup> nǎ cuu àú<sup>n</sup> nǎ xiǎ<sup>n</sup> xíshni tnàhá-yu.

<sup>16</sup> Te nchaa núú xicá cùu-yu quide úhú iní-yu nchaa tnàha ñáyiú-yu nàcuáa ndìhú iní ñáyiú-á<sup>n</sup>.

<sup>17</sup> Te ñá túú cuíní-yu cundecu ndìhi tnàha váha-yu.

<sup>18</sup> Te ñá túú sàni iní-yu canehé-yu sá yíñùhu núú Yǎ Ndiǒxí.

Duha quidé-yu càchí-xi núú tütú-gá.

<sup>19</sup> Te cùtnuní iní-ó sǎ nchàa tnúhu ní chídó tnùní ndíi Moisés cúú-xí cuendá nchaa ñáyiú nchìcú<sup>n</sup> nihnu nchaa tnúhu-á<sup>n</sup>. Te tnúhu-á<sup>n</sup> cúú-xí cuendá sá vǎ yǒo tnàhí cachí sá ñà túú cuèchi-xi, te duca<sup>n</sup> te nchaandi túhú ñáyiú cutnùní iní-yu sá ná chǎhu-yu nchaa sá quidé-yu núú Yǎ Ndiǒxí. <sup>20</sup> Te duca<sup>n</sup> càda-xi chi ni ì<sup>n</sup> ñáyiú vá càchí-ó sǎ vǎ cùndècu cuèchi-yu núú Yǎ Ndiǒxí cuendá-ni sá nchìcú<sup>n</sup> nihnú-yu nchaa tnúhu sá ní chídó tnùní ndíi Moisés, te tnúhu-á<sup>n</sup> càchí tnúhu-xi cuendá-ni sá cútnuní iní-ó sǎ ndécú-ó ichi cuehé ichi duha.

#### *Te núu na quèndáá iní-ó Xìtohó Jesucristú te naníhí tàhú-ó*

<sup>21</sup> Te vitna ní cutnùní iní-ó sǎ ñà díú sǎ cadá-ó nchàa nacuáa ní càhá<sup>n</sup> ndíi Moisés cudíu-o núú Yǎ Ndiǒxí, chi mee-gǎ quidé cùdìu-o núú-gǎ. Te núú tütú ndíi Moisés ndìhi núú tütú cue téé ní xóo càhá<sup>n</sup> tnúhu Yǎ Ndiǒxí ndéé sanaha càhá<sup>n</sup>-xi nàcuáa cada ñaha-gǎ xii-o vitna. <sup>22</sup> Te duca<sup>n</sup> cùdìu-o núú Yǎ Ndiǒxí te núu na quèndáá iní-ó Xìtohó Jesucristú. Te dèu-ni duca<sup>n</sup> cùdìu nchaa ñáyiú ñuyúú te núu na quèndáá iní ñáhǎ-yu xii-gá, chi ì<sup>n</sup>-ni cùu-o nchaa-o sá cúú-xí Yǎ Ndiǒxí.

23 Chi nchaá-yu ndècu cuéchi-yu, chi ñá ññ-yu quidé-yu nàcuáa cáhá<sup>n</sup> Yá Ndiöxí sá cúu-yu ñáyi quide váha. 24 Dico Yá Ndiöxí ío váha iní-gá chi ní quide ñaha-gã xii-o ññ sá váha, chi dícó-ni duca<sup>n</sup> ññ quide-gá nàcuáa vá cùndècu-gá cuéchi-o nùú-gã, chi Xítohó Jesucristú ní sati ññí-gã te ní xíhí-gá, te duca<sup>n</sup> ññ yáha-gá cuendá sá vã cùndècu-gá cuéchi-o. 25 Te Yá Ndiöxí ní taxi ndecu-gá Xítohó Jesucristú núú ñáyi ñuyú-a, te ní xíhí-gá sá cuendá nchaa yíca cuéchi-yu, te duca<sup>n</sup> ññ cuu cuendá sá nchaá ñáyi na quíndáa iní ñáhá xii-gá te vá náchãhu-yu cuéchi-yu núú Yá Ndiöxí. Te Yá Ndiöxí ní quide ndee iní-gá nchaa sá cuéhé sá dúhá ññ quide cue ñáyi ní xíndecu ndéé sanaha. Te xíã<sup>n</sup> ní xíhí Xítohó Jesucristú cuendá cutnùní iní-ó sã Yá Ndiöxí cúu-gã Yaá ío váha quide ndáa cuéi duca<sup>n</sup> ññ quide ndee iní-gá nchaa sá ññ quide cue ñáyi-á<sup>n</sup>. 26 Núu xíã<sup>n</sup> vitna ní cutnùní ndisa iní-ó sã quidé ndáa-gá, te quide-gá sá cue ñáyi vá cùndècu-gá cuéchi-yu núú-gã, te núu na quíndáa iní-yu Xítohó Jesucristú.

27 Te vitna vá càchí-ó sã ío càhnu cuu-o cuendá sá ñà túú-gã cuéchi-o ndècu núú Yá Ndiöxí, te duca<sup>n</sup> ñà túú-gã cuéchi-o ndècu núú-gã cuendá sá sàndáa iní-ó Xítohó Jesucristú, te ñá díú sã cuendá nchaa tnúhu ní cáhá<sup>n</sup> ndíi Moisés. 28 Te cùtnùní iní-ó sã ndéda-ni cà ñáyi vá cùndècu-gá cuéchi-yu núú Yá Ndiöxí te núu na quíndáa iní-yu Xítohó Jesucristú cuéi ní quidé-yu nchaa nàcuáa ní cáhá<sup>n</sup> ndíi Moisés àdi ñà túú ní quidé-yu.

29 Te cùtnùní iní-ó sã Yá Ndiöxí cúu-gã Ndiöxí nchaandi túhú ñáyi, te ñá díú mèe-ni Ndiöxí ñáyi isràél cúu-gã. 30 Te ññ díi-gã cúu-gã Ndiöxí, te nchaa ñáyi sàndáa iní ñáhá xii Xítohó Jesucristú te vá cùndècu-gá cuéchi-yu núú Yá Ndiöxí cuéi cùu-yu ñáyi isràél àdi ñà túú cùu-yu. 31 Te ñá díú sã sàndáa iní-ó Xítohó Jesucristú te cachí-ó sã ñà túú nàndíhi nchaa tnúhu sá sánú ichi ñaha xii-o nacuáa cada-o, te ñáhá chi sá dúhá sàndáa iní-ó-gã te xíã<sup>n</sup> nchícú<sup>n</sup> nihnu-o quide-o nacuáa cáhá<sup>n</sup> tnúhu-á<sup>n</sup>.

## 4

### *Cuendá ndíi Àbrahám*

1 Te vitna na càchí tnúhu-í xii-ndo cuendá ndíi Àbrahám téé ní cuu ññ ní tnáhá-ó ññ xíndecu ndéé sanaha. 2 Te ndíi-á<sup>n</sup> ñà túú ní xíndecu cuéchi ndíi núú Yá Ndiöxí, dico ñà díú cuendá ññ chiu<sup>n</sup> ní quide ndíi duca<sup>n</sup> ñà túú ní xíndecu cuéchi ndíi núú-gã. Chi núu cuendá ññ chiu<sup>n</sup> ní quide ndíi duca<sup>n</sup> ñà túú ní xíndecu cuéchi ndíi núú Yá Ndiöxí ñà, te cada càhnu ndíi mee ndíi ní cùu, dico ñà díú nùú Yá Ndiöxí cada càhnu ndíi mee ndíi te núu duca<sup>n</sup> ññ quide ndíi. 3 Te chí dándacu iní nàcuáa cáhá<sup>n</sup>-xi núú tütú Yá Ndiöxí núú càchí-xi: “Té Àbrahám ní sàndáa iní-dé Yá Ndiöxí, te xíã<sup>n</sup> ní cachí-gá sá cúdu-dé núú-gã”, duha càchí-xi núú tütú-gã. 4 Te sá cúhú<sup>n</sup> yáhu ññ téé quide chiu<sup>n</sup>, te vá càchí-ó sã xíã<sup>n</sup> cúu-xi ññ táhú sã cúu-xi-dé chi yáhu tnàhí-dé cúu-xi. 5 Te vá yõ ññ ndàcu cada ññ chiu<sup>n</sup> nacuáa cudíu-xi núú Yá Ndiöxí. Te ñà túú ñà chiu<sup>n</sup> xini ññhu-xi cada ñáyi te cudíu-yu núú-gã, chi xini ññhu-ni-xi sá quíndáa-ni iní-yu-gá. Te díu-gá càchí-gá sá ñáyi ndècu ichi cuehé ichi duha vá cùndècu-gá cuéchi-yu núú-gã, te núu na quíndáa iní ñáhã-yu xii-gã. 6 Te díu-ni duca<sup>n</sup> ññ cáhá<sup>n</sup> ndíi Dàvií, chi ní cachí ndíi sá ío váha táhú nchaa ñáyi ní cachí Yá Ndiöxí cudíu núú-gã, dico ñà díú cuendá ññ chiu<sup>n</sup> quidé-yu cudíu-yu núú-gã. 7 Te duha ní cachí ndíi:

Váha táhú nchaa ñáyi quide cahnu iní Yá Ndiöxí nchaa cuéchi-xi, te ñà túú-gã quidé cuendá-gá nchaa sá cuéhé sá dúhá ññ quidé-yu.

8 Váha táhú-yu chi Yá Ndiöxí càchí-gá sá ñà túú-gã cuéchi-yu.

Duha ní cachí ndíi Dàvií.

9 Te ñà díú mèe-ni ñáyi ngúndecu seña ññ-xi duca<sup>n</sup> váha táhú-yu, chi tnáhá ñáyi ñà túú ngúndecu seña ññ-xi duca<sup>n</sup> váha táhú-yu. Te sa nàha-o sá Yá Ndiöxí ní cachí-gá sá cúdu ndíi Àbrahám núú-gã cuendá sá ní sàndáa iní ñáhá ndíi xii-gã.

10 Te cunaha-ndo sã díhna-gá ní cachí Yá Ndiöxí sá cúdu ndíi Àbrahám núú-gã te dātñùní ngúndecu seña ññ ndíi. 11 Te ní ngúndecu seña ññ ndíi cuendá xíã<sup>n</sup> cuu-xi ññ seña sá cúdu ndíi núú Yá Ndiöxí. Te ndéé cùtnáhá vátá ngúndecu-gá seña ññ

ndíi, te sa cùdiu ndíi núú-gã chi ní sándáá iní ñáhá ndíi xii-gá. Te sá dúcá<sup>n</sup> ñà túú ndècu seña ñii ndíi cùtnàhá ní sándáá iní ndíi Yá Ndiöxí xiã<sup>n</sup> ní cuu ndíi dàtná ì<sup>n</sup> díhí dütú nchaa ñáyiú sándáá iní ñáhá xii-gá, ñáyiú ñá túú ní ngündecu seña ñii-xi, te cùdiu-yu núú-gã. <sup>12</sup> Te ndíi Àbrahám ní cuu tucu ndíi dàtná ì<sup>n</sup> díhí dütú nchaa ñáyiú ní ngündecu seña ñii-xi, dico ñá díú cuendá-ni sá ñi ngündecu seña ñii-yu cùu ndíi díhí dütü-yu, chi cuendá sá sándáá iní-yu Yá Ndiöxí nchìcú<sup>n</sup> nihnú-yu nàcuáa ní quide ndíi ní sándáá iní ñáhá ndíi xii-gá ndéé cùtnàhá vátá ngündecu-gá seña ñii ndíi.

*Yá Ndiöxí cada-gá nchaa nàcuáa ní cachí-gá te núu na quindáá iní-ó-gã*

<sup>13</sup> Te Yá Ndiöxí ní xáha<sup>n</sup>-gã xii ndíi Àbrahám sá ndúú tãhú ndíi cunuu ndíi ñuyíú, ndíhi cue dèhe ndíi, ndíhi nchaa dava-gá cue ñani tnáhá ndíi vitna cacu túu. Te duca<sup>n</sup> ñi xáha<sup>n</sup> Yá Ndiöxí xii ndíi ndíhi cue ñani tnáhá ndíi, chi ní sándáá iní ñáhá ndíi xii-gá núu xiã<sup>n</sup> ní cudíu ndíi núú-gã. Te duca<sup>n</sup> ñi xáha<sup>n</sup>-gã xii ndíi dico ñá díú cuendá sá ñi quide ndíi nàcuáa ní xáha<sup>n</sup> Yá Ndiöxí xii ndíi Moisés cada ñáyiú ndéé cuéé-gá. <sup>14</sup> Te núu mee-ni ñáyiú nchìcú<sup>n</sup> nihnu quide nàcuáa ní cáhá<sup>n</sup> ndíi Moisés ní ndúu tãhü-yu cunúu-yu ñuyíú-a ni cùu ña, te ñá túú xini ñuhu-xi quindáá iní-ó Yá Ndiöxí, te ñá túú nandíhi tnúhu ní xáha<sup>n</sup> Yá Ndiöxí xii ndíi Àbrahám ní cùu te núu duca<sup>n</sup>. <sup>15</sup> Te núu ì<sup>n</sup> ñáyiú ñá túú quide nàcuáa cáhá<sup>n</sup> tnúhu sá sánú ìchi ñaha xii-o nàcuáa cada-o te nacháhu-yu sá dúcá<sup>n</sup> quidé-yu. Te núu ñá túú tnúhu sá sánú ìchi ñaha-xi xii-o nàcuáa cada-o ni cùu ña, te ñá túú cuéchi-o ni cùu.

<sup>16</sup> Te duca<sup>n</sup> ñi xáha<sup>n</sup> Yá Ndiöxí xii ndíi Àbrahám nàcuáa cada-gá, chi cuendá sá ni sándáá iní ñáhá ndíi xii-gá. Te duca<sup>n</sup> ñi quide-gá chi ío váha iní-gá, dico ñá díú sã ì<sup>n</sup> chiu<sup>n</sup> ni quide ndíi duca<sup>n</sup> ñi xáha<sup>n</sup>-gã. Te sá dúcá<sup>n</sup> ñi cuu te cùu-xi ì<sup>n</sup> tnúhu ndáá sá cúu-xí nchàa ñani tnáhá ndíi, ñáyiú sándáá iní ñáhá xii-gá dàtná ní sándáá iní ñáhá mèe ndíi xii-gá, te ñá díú mèe-ni cuendá nchaa ñani tnáhá ndíi nchìcú<sup>n</sup> nihnu nchaa nàcuáa ní cáhá<sup>n</sup> ndíi Moisés, chi ndíi Àbrahám-á<sup>n</sup> ñi cuu ndíi dàtná ì<sup>n</sup>

díhí dütú cue ñáyiú sándáá iní ñáhá xii Yá Ndiöxí. <sup>17</sup> Te núú tütú Yá Ndiöxí cáhá<sup>n</sup>-xi nàcuáa ní xáha<sup>n</sup>-gã xii ndíi, te duha ní xáha<sup>n</sup>-gã: “Yòhó té Àbrahám ní quide ñaha-í xii-n dàtná ì<sup>n</sup> díhí dütú cue ñáyiú xíndecu nihí ñuyíú.” Duha ní xáha<sup>n</sup> Yá Ndiöxí xii ndíi, cãchí-xi núú tütú-gá. Te Yá Ndiöxí náhá ndáá-gá sá cádá-xí nàcuáa ní xáha<sup>n</sup>-gã xii ndíi Àbrahám, te diu-ni-gá cúu Yáá ní sándáá iní ndíi, te diu-ni-gá dándòto-gá ñáyiú ní xihí, te diu-ni-gá quidé tá ngündecu nchaa sá vátá cùndecu-gá ñuyíú-a.

<sup>18</sup> Te Yá Ndiöxí ní xáha<sup>n</sup>-gã xii ndíi Àbrahám sá ío cuéhé dèhe ndíi coo, te ío ní sándáá iní ndíi nàcuáa ní xáha<sup>n</sup>-gã dico ñá túú ní cùtnuní iní ndíi nása cada-gá, chi ío ní sahu ndíi. Te cuendá sá dúcá<sup>n</sup> ío ní sándáá iní ndíi tnúhu ní xáha<sup>n</sup>-gã núu xiã<sup>n</sup> ní cuu ndíi díhí dütú vai ñáyiú xíndecu nihí ñuyíú.

<sup>19</sup> Te ndíi Àbrahám ñuhu ndíi ì<sup>n</sup> ciëndú cuía cùtnàhá duca<sup>n</sup> ñi xáha<sup>n</sup> Yá Ndiöxí xii ndíi, te ní cutnùní iní ndíi sá ña túú tãhú ndíi sá cóo dèhe ndíi ndíhi ñadíhi ndíi ndíi Sãrá, chi ndíi ndúu-yu sa ní sahu vihí-yu, te cuéi duca<sup>n</sup> dico ní sándáá-ni iní ndíi nàcuáa ní xáha<sup>n</sup> Yá Ndiöxí. <sup>20</sup> Te ñá túú ní sãni ì<sup>n</sup> sãni úú iní ndíi nàcuáa ní xáha<sup>n</sup> Yá Ndiöxí cada-gá sá cúu-xí ndíi, chi da uu<sup>n</sup>-gá váha ní sándáá iní ndíi nàcuáa ní xáha<sup>n</sup>-gã, te ní cachí ndíi sá ío càhnu cuu-gá. <sup>21</sup> Te ní cutnùní ndáá iní ndíi sá Yá Ndiöxí ndácú-gã quidé-gã nchaa sá cáhá<sup>n</sup>-gã. <sup>22</sup> Te sá ni sándáá iní ndíi nàcuáa ní cáhá<sup>n</sup> Yá Ndiöxí, núu xiã<sup>n</sup> ní cachí-gá sá cúu ndíi ì<sup>n</sup> téé ñá túú cuéchi-xi núú-gã.

<sup>23</sup> Te ní ngódó tnùní núú tütú Yá Ndiöxí cuendá ndíi Àbrahám sá ñi cachí-gá sá ña túú cuéchi ndíi núú-gã, te ñá díú-ni cuendá mée ndíi ni ngódó tnùní núú tütú-gá. <sup>24</sup> Chi tnàhá cuendá-ó nchàa-o ní ngódó tnùní núú tütú-gá. Te cãchí-gá sá ña túú cuéchi-o núú-gã chi sándáá iní-ó-gã, te diu-gá cúu-gã Yáá ní dándótó ñaha xii Xitohó Jesucristú Yáá cúu Xitohó-ó. <sup>25</sup> Te Yá Ndiöxí ní cachí-gá sá díú Xitohó Jesucristú cuú-gá cuendá nacháhu-gá nchaa cuéchi-o. Te ní xihí-gá te ní ndoto-gá cuendá nchaa-o vã cùndecu-gá cuéchi-o núú Yá Ndiöxí te núu na quindáá iní-ó-gã.



*Ío váha tnàhá ñáyiu càchí Yá Ndiöxí sá ñà túú cuéchi-xi*

<sup>1</sup> Te vitna, ñá túú-gã cuéchi-o ndècu núú Yá Ndiöxí chi sàndáá iní-ó Xítohó Jesucristú, te ío váha ndècu ndìhi-o Yá Ndiöxí vitna sá cuendá Xítohó Jesucristú. <sup>2</sup> Te cuendá sá ni sàndáá iní-ó Xítohó Jesucristú xiã<sup>n</sup> ñu-gá ní quide ní ngúndecu váha-o núú Yá Ndiöxí, te duca<sup>n</sup>-ni cùndecu-o, te ío cùdíí iní-ó chi ndècu ndìhi-o tnúhu ndee iní sá sáá nduu ngúndecu-o núú ío váha càa ndecu Yá Ndiöxí. <sup>3</sup> Te ñá díú-ní sá cuendá sá ndúú tãhú-ó cùndecu-o núú ndécú-gã cùdíí iní-ó, chi cùdíí iní-ó ndòho-o cuendá-gá, chi cùtnuní iní-ó sá ñu na ndòho-o cuendá-gá te cunduu càhnu-gá iní-ó, <sup>4</sup> te núú cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núú cùu-o ñáyiu quide váha te uu<sup>n</sup>-gá tá ngúndecu ndìhi-o tnúhu ndee iní cuáhá<sup>n</sup> sá cádá vãha ñaha Yá Ndiöxí xii-o. <sup>5</sup> Te núú duca<sup>n</sup> te vá íí<sup>n</sup> ndúu ndixi cuéchi iní-ó sá ndécú ndìhi-o tnúhu ndee iní ngúndecu váha-o. Te Espíritú sá ñi taxi Yá Ndiöxí ndécú ndìhi-o xiã<sup>n</sup> quidé-xí cùtnuní iní-ó sá ío cùu iní ñáhá Yá Ndiöxí xii-o.

<sup>6</sup> Te nchoo ñà túú vèdana ná ní ndàcu-o cada-o cuendá dàcácu nihnu-o mèe-o, dico Xítohó Jesucristú ní xihí-gá cuendá-ó, ndìhi cuendá nchaa dava-gá ñáyiu ñá túú tnàhá tnúhu ndìhi Yá Ndiöxí, te ní xihí-gá mei ndúu taú-xi cuú-gá. <sup>7</sup> Te cudana-ni núú xihí íí<sup>n</sup> ñáyiu sá cuendá íí<sup>n</sup> ñáyiu quide ndáá, te áma xihí tucu íí<sup>n</sup>-yu sá cuendá ñáyiu quide váha tnàhá ñáyiu-xi. <sup>8</sup> Te Yá Ndiöxí ní quide-gá sá nchóó cùtnuní iní-ó sá ío cùu iní ñáhá-gã xii-o, chi cùtnàhá ndécú-ó ìchi cuehé ichi duha te ní tendaha-gã Xítohó Jesucristú ní quixi-gá ñuyíú-a ní xihí-gá cuendá-ó. <sup>9</sup> Te sá cuendá sá ñi xihí Xítohó Jesucristú xiã<sup>n</sup> ñá túú-gã cuéchi-o ndècu núú Yá Ndiöxí, te vitna ní cùtnuní ndáá iní-ó sá vã dáquihí<sup>n</sup> ñáhá-gã Yá Ndiöxí xii-o núú ùhú núú ndàhú sá cuendá Xítohó Jesucristú. <sup>10</sup> Te cùtnàhá ñá túú tnàhá tnúhu-o ndìhi Yá Ndiöxí ní cùu ní xihí Xítohó Jesucristú Yaá cúú Dèhe-gá cuendá cuu váha iní ñáhá-gã xii-o, te duca<sup>n</sup> te nduu tãhú-ó cùndecu-o ndìhi-gá ñi caa ñi quihí<sup>n</sup> cuendá sá ñi ndoto Xítohó Jesucristú. <sup>11</sup> Te ndètu-o sáá nduu ngúndecu-o ndìhi-gá ñi caa ñi quihí<sup>n</sup>, te ñá

díú-ní xiã<sup>n</sup> quidé-ó chi tnàhá cùdíí iní-ó Yá Ndiöxí, chi Xítohó Jesucristú ní quide-gá duca<sup>n</sup> cùdíí iní-ó-gã, te ñu-ni Xítohó Jesucristú ní quide-gá ní nucúndecu váha-o ndìhi Yá Ndiöxí.

*Ñacuáa ní quide ndíi Àdán ndìhi ñacuáa ní quide Xítohó Jesucristú*

<sup>12</sup> Te ndíi Àdán ñá túú ní quide ndáá ndíi núú Yá Ndiöxí núu xiã<sup>n</sup> ní ngúndecu nchaa sá cuèhé sá dúhá ñuyíú-a, te sá cuendá nchaa sá cuèhé sá dúhá quide ñáyiu xiã<sup>n</sup> xihí-yu, te nchaá-yu xihí-yu chi nchaá-yu quidé-yu nchaa sá cuèhé sá dúhá. <sup>13</sup> Te sa quide-gá-yu nchaa sá cuèhé sá dúhá te dàtnuní ní ngúndecu nchaa tnúhu sá ñi chidó tnuní ndíi Moisés ñacuáa ní xáha<sup>n</sup> Yá Ndiöxí cada ñáyiu, te nchoo cùtnuní iní-ó sá núu ñá túú tnúhu sá sánú ìchi ñaha xii-o ñacuáa cada-o, te ñá túú cuéchi-o sànuu. <sup>14</sup> Te ndéé cùtnàhá ní xíndecu ndíi Àdán ní quesaha-xi xihí ñáyiu, te duca<sup>n</sup>-ni xihí-yu ndéé ní sáá nduu ñi xíndecu ndíi Moisés. Te duca<sup>n</sup> ñi xihí-yu chi ní quidé-yu nchaa sá cuèhé sá dúhá cuèi ñá túú ní quidé-yu ñacuáa ní quide ndíi Àdán, chi ndíi-án ñà túú ní sàndáá iní ndíi ñacuáa ní xáha<sup>n</sup> Yá Ndiöxí cada ndíi. Te ndíi Àdán ní cuu ndíi íí<sup>n</sup> téé cùu cahnu ní xíndecu ñuyíú-a, te sátá dúcá<sup>n</sup> te ní quixi Xítohó Jesucristú te Yaá-án ío-gá càhnu cuu-gá.

<sup>15</sup> Te sá ñi quide ndíi Àdán te vá càchí-ó sá íí<sup>n</sup>-ní cùu-xi ndìhi sá ñi cachí Yá Ndiöxí nduu tãhú-ó vitna. Te sá ñà túú ní quide ndáá ndíi xiã<sup>n</sup> nchaa ñáyiu xihí-yu, dico Yá Ndiöxí ío váha iní-gá chi ío váha ní quide-gá sá cúú-xí nchaa nchoo ñáyiu ndècu ñuyíú-a, chi dícó duca<sup>n</sup> ñi cachí-gá sá nánihí tãhú-ó, te íí<sup>n</sup>-ni téé tnàhá-dé ío váha ní quide-dé sá cúú-xí-ó, te téé-án cúú-dě Xítohó Jesucristú. <sup>16</sup> Te sá ñi quide íí<sup>n</sup>-ni ndíi Àdán ñá túú íí<sup>n</sup>-ni cuu-xi ndìhi sá ñi quide Yá Ndiöxí sá cúú-xí-ó, chi ndíi-án ñà túú ní quide ndáá ndíi núú-gã. Te sá dúcá<sup>n</sup> ñi quide ndíi te xiã<sup>n</sup> ní cuu-xi cuéchi díhna nuu ñi quide ndíi, núu xiã<sup>n</sup> ní cachí Yá Ndiöxí sá cuè ñáyiu quihí<sup>n</sup>-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gã ní quide sá cuè ñáyiu naníhí tãhú-yu dícó-ni duca<sup>n</sup>, te duca<sup>n</sup> te vá cùndècu-gá cuéchi-yu núú-gã cuèi ío



vài cuéchi-yu. <sup>17</sup> Te sá dúcá<sup>n</sup> ñà túú ní quide ndáá ñ<sup>n</sup>dii-ni ndíi Àdán-á<sup>n</sup> núú Yá Ndiöxí, xíá<sup>n</sup> ní quide-xi xihí nchaa ñáyiú. Te sá cuendá sá ñi quide ñ<sup>n</sup>dii-ni Xítohó Jesucristú xíá<sup>n</sup> ío váha ní quide ñaha Yá Ndiöxí xii ñáyiú, chi dícó-ni duca<sup>n</sup> ñi nduu táhũ-yu cùdiú-yu núú-gã. Te nchaa ñáyiú duca<sup>n</sup> cùdiú núú-gã nduu táhũ-yu cunúú-yu ndihí Xítohó Jesucristú cuendá sá ñi quide-gá sá vâha sá cúú-xí-yu.

<sup>18</sup> Te sá dúcá<sup>n</sup> ñi quide ndíi Àdán ñá túú ní quide ndíi ñacuáa ní xáha<sup>n</sup> Yá Ndiöxí xii ndíi ñ<sup>n</sup> xito, núú xíá<sup>n</sup> ní cachí-gá sá ncháá ñáyiú tàú-yu nacháhu-yu nchaa cuéchi-yu, dico Xítohó Jesucristú ní quide-gá ñ<sup>n</sup> sá vâha cuendá nchaa ñáyiú vá cùndècu-gá cuéchi-yu núú Yá Ndiöxí te núú na quèndáá iní ñáhã-yu xii-gá, te duca<sup>n</sup> te cundecú-yu ndihí-gá ñi caa ñi quíhí<sup>n</sup>. <sup>19</sup> Te sá ñà túú ní sàndáá iní ñ<sup>n</sup>dii-ni ndíi Àdán ñacuáa ní xáha<sup>n</sup> Yá Ndiöxí xii ndíi, xíá<sup>n</sup> ní nguínchicú<sup>n</sup> nihnu nchaa ñáyiú quidé-yu nchaa sá cuèhé sá dúhá. Te duca<sup>n</sup> ñ<sup>n</sup>dii-ni Xítohó Jesucristú ní quide-gá ñacuáa ní xáha<sup>n</sup> Yá Ndiöxí cuendá sá Yá Ndiöxí cachí-gá sá cúdiú-yu núú-gã.

<sup>20</sup> Te Yá Ndiöxí ní xáha<sup>n</sup>-gã xii ndíi Moisés ñacuáa cada ñáyiú, te sá cuendá tnúhu-á<sup>n</sup> uu<sup>n</sup>-gá ní nguíta nchaa ñáyiú quidé-yu nchaa sá cuèhé sá dúhá, te Yá Ndiöxí uu<sup>n</sup>-gá cùndáhú iní ñáhã-gã xii-yu tucu. <sup>21</sup> Te sá cuendá nchaa cuéchi ñáyiú xíá<sup>n</sup> xihí-yu, dico Yá Ndiöxí ío váha iní-gá chi diú-gá ní cachí-gá sá ncháá ñáyiú na tnàhá tnúhu ndihí ñaha xii-gá cùdiú-yu núú-gã, te cundecú-yu ndihí-gá ñi caa ñi quíhí<sup>n</sup>, te duca<sup>n</sup> chi Xítohó Jesucristú ní quide-gá sá vâha sá cúú-xí-yu.

## 6

*Ñáyiú ñá túú-gã ndécú ichi cuehé ichi duha ndécú-yu cuendá Xítohó Jesucristú*

<sup>1</sup> Te sá dúcá<sup>n</sup> quide Yá Ndiöxí, te vá cání iní-ó cànchicú<sup>n</sup> nihnu-ni-o ìchi cuehé ichi duha, chi ñá díú sã cànchicú<sup>n</sup> nihnu-o ìchi-á<sup>n</sup> te ngóo càni iní-ó sã ío-gá cundáhú iní ñáhã-gã xii-o. <sup>2</sup> Te vá cúú cànchicú<sup>n</sup> nihnu-o ìchi cuehé ichi duha, chi nchoo cùu-o datná cue ñáyiú sa ní xihí, núú xíá<sup>n</sup>

vá cúú-gã cànchicú<sup>n</sup> nihnu-o ìchi-á<sup>n</sup>. <sup>3</sup> Te sa ñaha-o sá cuendá sá ñi sandute-o quèe-xi sá tnàhá tnúhu-o ndihí Xítohó Jesucristú. Te sá ñi sandute-o quèe tucu-xi sá cúú-ó datná ñáyiú ní xihí ndihí-gá. <sup>4</sup> Te ñá díú-ní sá ñi xihí-ó ndihí-gá chi quèe tucu-xi sá ñi nguíndũxi-o ndihí-gá te ní ndoto-o datná ní ndoto mee-gã ní dándótó ñaha Dútú Ndiöxí Yá ío càhnu cuu, te duca<sup>n</sup> ñi cuu cuendá sá vâ cùndècu-gá-ó datná ní xíndecu-o.

<sup>5</sup> Te núú ñ<sup>n</sup>-ni cùu-o ndihí Xítohó Jesucristú cuendá sá cúú-ó datná ñáyiú ní xihí ndihí-gá, te ndáá sá cúú-ó datná ñáyiú ní ndoto ní nguíndecu váha datná ní ndoto mee-gã ní nucúndecu váha-gã. <sup>6</sup> Te nchoo ñaha-o sá cúú-ó ñáyiú ío ndècu cuéchi-xi ní cùu, dico sátá ñi cuu-o datná ñáyiú ní xihí datná ní xihí Xítohó Jesucristú núú cùrúxí, te ndéé dàvá-á<sup>n</sup> ñi dáñá-ó ncháa ichi cuehé ichi duha ndècu-o ni cuu, te ñá túú-gã cùnúu sá cuèhé sá dúhá iní-ó. <sup>7</sup> Chi nchaa ñáyiú ní xihí ñá túú-gã ndécú-yu ichi cuehé ichi duha. <sup>8</sup> Te núú cùu-o datná ñáyiú ní xihí datná ní xihí Xítohó Jesucristú ñá, te cùtnuní ndáá iní-ó sã cùndècu-o ndihí-gá ñi caa ñi quíhí<sup>n</sup>. <sup>9</sup> Te sa ñaha-o sá Xítohó Jesucristú ní xihí-gá te ní ndoto-gá te vá ñ<sup>n</sup> ndùu ñ<sup>n</sup> quíú-gã te cuú-gá, chi ñá túú nãgá sá cádá cùú-gá. <sup>10</sup> Te Xítohó Jesucristú ní xihí-gá ñ<sup>n</sup> xito-ni sá cuendá nchaa cuéchi nchoo ñáyiú ñuyú, te vá ñ<sup>n</sup> ndùu-gá cuú-gá, te ndècu-ni-gá sá cúú-xí Yá Ndiöxí. <sup>11</sup> Núú xíá<sup>n</sup> nchòhó cada iní-ndó sã datná sá ñi xihí-ndó vâ cùndècu-gá-ndó sã cúú-xí ìchi cuehé ichi duha, chi ndècu-ná-ndó sã cúú-xí Yá Ndiöxí, chi ní tnàhá tnúhu-ndo ndihí Xítohó Jesucristú Yá cúú Xítohó-ó.

<sup>12</sup> Te núú xíá<sup>n</sup> vá dáñá-gã-ndó cùnuu ni ñ<sup>n</sup> sá cuèhé sá dúhá iní-ndó cuendá sá vâ cádá-gã-ndó ñi ñ<sup>n</sup> sá cuèhé sá dúhá sàni iní-ndó. <sup>13</sup> Te vá dáñá-ndó tàxi tnuní ñáhã ñi ñ<sup>n</sup> sá cuèhé sá dúhá-ã<sup>n</sup> xii-ndo cuendá sá vâ cádá-gã-ndó, te chí dáñá ná tàxi tnuní ñáhã Yá Ndiöxí xii-ndo, te chí dáñá ná chindee ñaha-gã cada-ndo mèe-ni sá vâha, te duca<sup>n</sup> te cada iní-ndó sã cúú-ndó datná ñáyiú ní xihí te ní ndoto ndècu. <sup>14</sup> Te duca<sup>n</sup> càda-ndo chi vá ndácú-gã ñi ñ<sup>n</sup> sá cuèhé sá dúhá tàxi tnuní ñáhã-xí xii-ndo, chi Yá Ndiöxí cùndáhú iní ñáhã-gã chíndèe

ñaha-gá xii-ndo. Te duca<sup>n</sup> chi ñá túú-gã cúnùu nchaa tnúhu sá ñí chídó tnùní ndí Moisés cada ñáyiú.

### *Ñáyiú nchicú<sup>n</sup> nihnu sá vãha*

<sup>15</sup> Te ñá díú sã cundàhú iní ñáhá Yã Ndiõxí xii-o chindee ñaha-gá ndihí sá ñá túú-gã cúnùu nchaa tnúhu ní chídó tnùní ndí Moisés, te cachí-ó sã cúú-ní cundecu-o ichi cuehé ichi duha. <sup>16</sup> Te nchoo xini-ó sã ñúu na cuãha-o tnúhu cunu cuechi-o núú ñáyiú cuení cunu cuechi-o núú-xi, te cùu-ná-ó ñáyiú xinu cuechi núú-yu te quide-o nchaa chiu<sup>n</sup> tahu-yu. Te duca<sup>n</sup> sãtnahá-xi cùu nchaa ñáyiú quide nchaa sá cuehé sá dúhá chi tàxi tnuní ñáhá-ñá-xi xii-yu, te ñíu nchaa xiã<sup>n</sup> dácuíta nihnu ñaha-xi xii-yu, te ñíu-ni duca<sup>n</sup> sãtnahá-xi cùu nchaa ñáyiú sãndáá iní ñáhá xii Yã Ndiõxí chi tàxi tnuní ñáhá-gã xii-yu, te quidé-yu nchaa sá vãha nãcuáa cuení mée-gã cada-yu. <sup>17</sup> Te nchòhó duca<sup>n</sup> ñí xóo cada-ndo nchaa sá cuehé sá dúhá ní cùu, dico táxãhu xii Yã Ndiõxí chi vitna ñí yùhu ñí iní-ndó quide-ndo nchaa nacuáa càhá<sup>n</sup> tnúhu-gá sá ñí ngúndecu ndihí-ndo. <sup>18</sup> Te vitna ñá túú-gã táxi tnùní ñáhá ñí ñí sá cuehé sá dúhá xii-ndo, te quide-ná-ndó nchaa sá vãha tàuchiú<sup>n</sup> Yã Ndiõxí cada-ndo. <sup>19</sup> Te duha càhá<sup>n</sup>-í cuendá cue ñáyiú xinu cuechi cuendá sá nchòhó tecú tnùní-ndó nãcuáa ndùu tnúhu càhá<sup>n</sup>-í. Te nchòhó ní dáñá-ndó ñí taxi tnùní ñáhá nchaa sá cuehé sá dúhá xii-ndo, te ñá túú ní quide-ndo nacuáa ní càhá<sup>n</sup> Yã Ndiõxí cada-ndo chi da vñhi-gá ní quide-ndo, te ñíu-ni duca<sup>n</sup> chí dáñá ná tàxi tnuní ñáhá Yã Ndiõxí xii-ndo vitna cuendá cada-ndo mée-ni sá vãha nãcuáa cuení mée-gã cada-ndo, te duca<sup>n</sup> te cuu-ndo ñáyiú quide ndáá cundecu núú-gã. <sup>20</sup> Te nchoo cùtnahá ní xóo cada-o nchaa sá cuehé sá dúhá ñá túú ní xóo cada-o ñí ñí sá vãha cuení Yã Ndiõxí cada-o. <sup>21</sup> Te dícó sácá<sup>n</sup>-núú sãñaha nchaa sá cuehé sá dúhá-ã<sup>n</sup> te núu na càda-o, te ñí ñí sá vãha vá ñihí-ó te núu na càda-o nchaa xiã<sup>n</sup>, te ñíu nchaa xiã<sup>n</sup> dácuíta nihnu ñaha-xi xii-o. <sup>22</sup> Te vitna ñá túú-gã cúú-ó ñáyiú ndècu ichi cuehé ichi duha, chi cùu-ná-ó ñáyiú quide nchaa nacuáa càhá<sup>n</sup> Yã Ndiõxí. Te sá dúhá quide-o cuu ndisa-xi ñí sá vãha sá cúú-xi-ó, te cùu-o ñáyiú quide ndáá ndécú-ó núú-gã vitna, te sáá nduu cundecu-o ndihí-gá ñí caa ñí quíhí<sup>n</sup>. <sup>23</sup> Te nchaa sá cuehé sá dúhá dícó

dácuíta nihnu ñaha-xi xii-o, dico Yã Ndiõxí ní quide-gá sá dícó-ni duca<sup>n</sup> ndùu táhú-ó cundecu-o ndihí-gá ñí caa ñí quíhí<sup>n</sup>, chi ní tnahá tnúhu-o ndihí Xítóhó Jesucristú Yaa cúú Xítóhó-ó.

## 7

### *Cuendá ñáyiú tnãndaha*

<sup>1</sup> Te nchaa nchòhó ñáyiú ndècu ndihí-í ichi Xítóhó Jesucristú sa ñaha-ndo nacuáa càhá<sup>n</sup> tnúhu sá dánèhé ñáhá xii-o nacuáa cada-o cundecu-o, chí tnúhu-á<sup>n</sup> càhá<sup>n</sup>-xi dóho nchaa ñáyiú xñdecu vñvú ñuyíú-a. <sup>2</sup> Te nchaa ñáyiú ñíhí sa ndècu yñ-xi, te ñíu tnúhu-á<sup>n</sup> dánèhé ñáhá-xi xii-yu sá vã dáñá-yu yñ-yu, dico núu na cùú yñ-yu te ñá túú-gã ná càhá<sup>n</sup> tnúhu-á<sup>n</sup> cuendá-yu. <sup>3</sup> Dico núu vátá cùú-gá yñ-yu te ñá túú ndùu váha-xi naquehé<sup>n</sup>-yu ingá téé, dico núu na cùú yñ-yu te quendóo mée-yu, te ñá túú ñágá càhá<sup>n</sup> tnúhu sá dánèhé ñáhá xii-yu nãcuáa cada-yu te duca<sup>n</sup> te cuu naquehé<sup>n</sup>-yu ingá téé, te ñá túú cùu-xi ñí cuéchi. <sup>4</sup> Te nchòhó cue ñáyiú ndècu ndihí-í ichi Xítóhó Jesucristú cúú-ndó dàtná ñáyiú ní xihí dàtná ní xihí-gá. Te xiã<sup>n</sup> ñá túú-gã táxi tnùní ñáhá nchaa tnúhu ní chídó tnùní ndí Moisés xii-ndo. Te duca<sup>n</sup> ñí cuu cuendá nchòhó ngúndecu-ndo ndihí Xítóhó Jesucristú Yaa ní xihí ní cùu te ní ndoto-gá. Te duca<sup>n</sup> ñí cuu cuendá nchaa nchoo ñáyiú ndècu ichi-gá cada-o nchaa nacuáa càhá<sup>n</sup> Yã Ndiõxí. <sup>5</sup> Te nchoo ñí xñdecu-o ichi cuehé ichi duha, te tnúhu sá sánú ichi ñaha xii-o nacuáa cada-o cundecu-o cachí-xi sá ñá túú vãha cundecu-o ichi-á<sup>n</sup>, te nchoo dà uu<sup>n</sup>-gá ní quide-o nchaa sá cuehé sá dúhá sã dúcá<sup>n</sup> càhá<sup>n</sup> tnúhu-á<sup>n</sup>, te sá dúcá<sup>n</sup> ñí quide-o te ta xita nihnu-o cuãhá<sup>n</sup> ní cùu. <sup>6</sup> Te vitna cada iní-ó sã cúú-ó dàtná ñáyiú ní xihí sá cúú-xi tnúhu sá dánèhé ñáhá xii-o nacuáa cada-o cundecu-o, chí ñá túú-gã cúnùu-xi, te vitna mee-ñá Espíritú Yã Ndiõxí chindèe ñaha-xi xii-o xinu cuechi-o núú-gã, te ñá díú cuendá nchaa tnúhu sá ñí ngúndéé ndéé ñíhna cada ñáyiú xinu cuechi-o núú-gã vitna.

### *Nchaa sá cuehé sá dúhá ñíhu iní-í*

<sup>7</sup> Te cuéi duha càhá<sup>n</sup>-í dico vá cúú tñahí càhá<sup>n</sup>-ó sã tnúhu sá sánú ichi ñaha xii-o

nacuáa cada-o cùndecu-o ñá díú tnùhu váha cùu-xi. Te yúhú ñá túú cùtnuní iní-í ná cúú nchàa sá cuèhé sá dúhá ní cùu te núu ñá túú tnùhu-án ní cächí tnùhu-xi xii-í, te ni ñá túú cùtnuní tucu iní-í núu váha àdi ñá túú váha sá nchídó ìní-í sá ndécú ndìhi tnaha ñáyiu-o ni cùu te núu ñá túú tnùhu-án ní cächí-xi sá vǎ cúú cùu iní-í sá ndécú ndìhi-yu. <sup>8</sup> Te tnùhu-án ñí dánèhé ñáhá-xí xii-í sá vǎ cúú càda-í ni ìñ sá cuèhé sá dúhá, dico sá cuèndá tnùhu-án uu<sup>n</sup>-gá duca<sup>n</sup> ñí sani iní-í ní quide-í. Te núu ñá túú tnùhu sá sánú ìchi ñaha xii-o nacuáa cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. <sup>9</sup> Te cùtnàhá vátá nihí-gá-í tnùhu-án te ñá túú tnàhí ná sání iní-í ndécú-í ni cùu, dico sá tá ní ñíhí-í tnùhu-án te ní cutnùní iní-í sá ndécú cuèchi-í, te ta xíta nihnu-í cuáhán ní cùu. <sup>10</sup> Te núu ni quide-í nchaa nàcuáa càhán tnùhu-án te sa ndéé ama-gá naníhí tǎhú-í ní cùu, dico ñá túú ní quide-í núu ní cutnùní iní-í sá tá xíta nihnu-í cuáhán ní cùu. <sup>11</sup> Te sá xii tnùhu-án xiǎ<sup>n</sup> uu<sup>n</sup>-gá ní cunuu nchaa sá cuèhé sá dúhá ñí dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáhán ní cùu.

<sup>12</sup> Te tnùhu sá sánú ìchi ñaha xii-o nacuáa cada-o cùndecu-o cuu-xi tnùhu ío yíñùhu ní taxi Yá Ndiöxí, te ìñ ìñ tnùhu-án cúú-xi mèe-ni tnùhu váha, te ni ìñ tnùhu cuèhé tnùhu duha ñá túú ñùhu tnahá. <sup>13</sup> Te vǎ cúú cächí-í sá tnùhu váha-án ñí quide-xi ta xíta nihnu-í cuáhán ní cùu, chi nchaa sá cuèhé sá dúhá ñí quide-í, xiǎ<sup>n</sup> tá dàcuíta nihnu ñaha-xi xii-í cuáhán ní cùu, te sá cuèndá tnùhu váha-án ñí cutnùní iní-í sá quidè-í nchaa sá cuèhé sá dúhá, te xiǎ<sup>n</sup> tá xíta nihnu-í cuáhán ní cùu. Te sá cuèndá nchaa nàcuáa càhán tnùhu sá sánú ìchi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

<sup>14</sup> Te tnùhu-án ñí taxi Espiritú Yá Ndiöxí ndécú ndìhi-o cachí tnùhu-xi nàcuáa cada váha-o. Te nchoo cùu-o mee-ni ñáyiu yicá cuèchi, te tàxi tnuní ñáhá nchaa sá cuèhé sá dúhá xii-o ni cuu. <sup>15</sup> Dico nchoo tnàhá iní-ó càda-o nchaa sá vǎha dico ñá túú quide-o, te da nchaa sá ñá túú tnàhá iní-ó càda-o quide-o, te ñá túú cùtnuní iní-ó nǎ cuèndá duca<sup>n</sup> quide-o. <sup>16</sup> Te sá dúcán quide-o nchaa sá ñá túú tnàhá iní-ó, te xiǎ<sup>n</sup> ndíxí tǔu iní-ó sǎ tnùhu sá dúcán sǎnu ìchi ñaha xii-o nacuáa cada-o cùndecu-o cuu-xi tnùhu ío

váha. <sup>17</sup> Te cùtnuní iní-ó sǎ nchàa sá cuèhé sá dúhá ñùhu iní-ó, xiǎ<sup>n</sup> quidè-xí dùca<sup>n</sup> quide-o sá ñá túú váha, te ñá díú sǎ cǎhú iní mée-ó dùca<sup>n</sup> quide-o. <sup>18</sup> Te cùu-o cue ñáyiu sǎni cuehé sání dùha iní-xi, te cuini-ó càda-o nchaa sá vǎha dico ñá túú nihí ndéé-ó càda-o. <sup>19</sup> Te cuini-ó càda-o nchaa sá vǎha dico ñá ndácú-ó, te ñá túú cuini-ó càda-o datná quidè nchaa ñáyiu ndècu ìchi cuehé ìchi duha, chi ñáyiu-án mee-ni nchaa sá cuèhé sá dúhá quidè-yu, dico ñu-ni nchaa xiǎ<sup>n</sup> quidè-ó tnàhá-ó. <sup>20</sup> Te sá dúcán quide-o nchaa sá ñá túú tnàhá iní-ó càda-o te ñá díú mèe-o duca<sup>n</sup> cahu iní-ó quide-o, chi nchaa sá cuèhé sá dúhá ñùhu iní-ó xiǎ<sup>n</sup> quidè-xí dùca<sup>n</sup> quide-o.

<sup>21</sup> Te duca<sup>n</sup> tnàhí yáha-o òré cuini-ó càda-o sá vǎha, chi da mee-ni nchaa sá cuèhé sá dúhá quide-o. <sup>22</sup> Te ío cùdí ìní-ó càda-o nchaa nacuáa càhán Yá Ndiöxí, <sup>23</sup> te dicó-ni sá ncháá sǎ cuèhé sá dúhá ñùhu iní-ó, xiǎ<sup>n</sup> quidè-xí ngàni ñaha-xi xii-o ñá túú quide-o sá vǎha sǎni iní-ó càda-o, te duca<sup>n</sup> yáha-o chi nchaa sá cuèhé sá dúhá-ǎ cùnùu-xi taxi tnuní ñáhá-xí xii-o.

<sup>24</sup> ;Te ndàhú ní cuu nchoo! Chi vá yǒo ìñ ni ndàcu cada nacuáa vá táxi tnuní ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáhán ní cùu. <sup>25</sup> Te táxǎhu xii Yá Ndiöxí sá Xítohó Jesucristú ní quide-gá cuèndá sá vǎ táxi tnuní ñáhá-gǎ ni ìñ sá cuèhé sá dúhá xii-o, sá tá dàcuíta nihnu ñaha xii-o cuáhán ní cùu. Te mee-o sǎni iní-ó càda-o nchaa nacuáa càhán Yá Ndiöxí, dico núu nchaa sá cuèhé sá dúhá ná cùnùu-xi taxi tnuní ñáhá-xí xii-o, te ñu-ni nchaa xiǎ<sup>n</sup> cada-o.

## 8

### *Ñáyiu quide nchaa nacuáa càhán Espiritú Yá Ndiöxí*

<sup>1</sup> Te vitna nchaa nchoo ñáyiu tnàhá tnùhu ndìhi Xítohó Jesucristú vá cuíta nihnu-gá-ó, chi ñá túú-gǎ ndécú-ó ìchi cuehé ìchi duha, chi mee-nǎ nchaa nàcuáa càhán Espiritú Yá Ndiöxí quidè-ó. <sup>2</sup> Te Espiritú Yá Ndiöxí-ǎ táxi tnuní ñáhá-xí xii-o, te duca<sup>n</sup> chi ndècu ndìhi-o Xítohó Jesucristú, te sá dúcán tàxi tnuní ñáhá Espiritú-gá xii-o núu xiǎ<sup>n</sup> ñá túú-gǎ táxi tnuní ñáhá ni ìñ sá cuèhé sá dúhá xii-o, te duca<sup>n</sup>



quide Espiritú-gá cuendá sá vǎ cuíta ni-hnu-o, te diu-ni Espiritú-gá quidé-xí cuendá sá nchóó ndùu táhú-ó cùndecu-o ndihi-gá ni caa ni quíhí<sup>n</sup>. <sup>3</sup> Te nchoo ñǎ ní ndàcu-o cada-o nchaa nacuaá càhá<sup>n</sup> tnúhu sá sánú ìchi ñaha xii-o nacuaá cada-o cùndecu-o, núu xiǎ<sup>n</sup> tnúhu-á<sup>n</sup> ñà túú ní nihí ndéé-xí càda-xi cuendá sá nchóó vǎ cuíta nihnu-o. Dico Yá Ndióxi ní tendaha-gǎ Déhe mee-gǎ ní quixi ñuyíú-a, te Yaá-á<sup>n</sup> cúú-gǎ ì<sup>n</sup> ñáyiu, te cǎa-gǎ dàtná cáá ñáyiu ndècu cuéchi-xi xíndecu ñuyíú-a, te sá cuendá nchaa cuéchi nchaa nchoo ñáyiu xíndecu ñuyíú-a ní quixi-gǎ, te ndéé dàvá-á<sup>n</sup> ñí quide-gǎ cuendá sá vǎ táxi tnùní ñáhá-gǎ ni ì<sup>n</sup> sá cuèhé sá dúhá xii-o. <sup>4</sup> Te duca<sup>n</sup> ñí quide-gǎ cuendá nchoo nchícú<sup>n</sup> nihnu-o quide-o nacuaá càhá<sup>n</sup> tnúhu sá sánú ìchi ñaha xii-o nacuaá cada-o, chi ñà túú-gǎ cùnùu ni ì<sup>n</sup> sá cuèhé sá dúhá iní-ó, chi Espiritú Yá Ndióxi-ñǎ táxi tnùní ñáhá-xí xii-o.

<sup>5</sup> Te nchaa ñáyiu cùnùu nchaa sá cuèhé sá dúhá iní-xi mee-ni xiǎ<sup>n</sup> ñúhú iní-yu te quidé-yu. Dico nchoo ñáyiu quide nchaa nacuaá cuíní Espiritú Yá Ndióxi ñúhú iní-ó mèe-ni nacuaá càhá<sup>n</sup> Espiritú-gǎ-á<sup>n</sup> te quide-o. <sup>6</sup> Te núu mee-ni nchaa sá cuèhé sá dúhá cùnùu iní-ó, te cuíta nihnu-o, dico núu mee-ni nchaa tnúhu càhá<sup>n</sup> Espiritú Yá Ndióxi cùnùu iní-ó, te ío váha cuu iní-ó cùndecu-o ndihi-gǎ ni caa ni quíhí<sup>n</sup>. <sup>7</sup> Te nchaa ñáyiu ñúhu iní mee-ni sá cuèhé sá dúhá cùu úhú iní-yu Yá Ndióxi, te ñà túú cuíní-yu cadá-yu nàcuáa càhá<sup>n</sup>-gǎ, te ni ñǎ ndácú-yu cadá-yu. <sup>8</sup> Te nchaa ñáyiu duca<sup>n</sup> cùnùu nchaa sá cuèhé sá dúhá iní-xi-á<sup>n</sup> ñà túú cùdiú-yu núu Yá Ndióxi.

<sup>9</sup> Te nchòhó chi ñà túú-gǎ cùnùu sá cuèhé sá dúhá iní-ndó, chi mee-ñǎ nàcuáa càhá<sup>n</sup> Espiritú Yá Ndióxi quidé-ndó, te duca<sup>n</sup> quide-ndo chi ndècu ndihi-ndo Espiritú-gǎ, te diu-ni Espiritú-gǎ-á<sup>n</sup> ñí tendaha Xítohó Jesucristú véxi ndècu ndihi-o, te nchaa ñáyiu ñà túú ndècu ndihi Espiritú sá ñí tendaha Xítohó Jesucristú véxi ndècu ndihi-o ñà túú ndècu ndihi ñahá-yu xii-gǎ. <sup>10</sup> Te núu ndècu ndihi-ndo Xítohó Jesucristú, te cuèi na cúú yiqui cùñú-ndó sá cuendá nchaa sá cuèhé sá dúhá ío ñuyíú-a, dico iní-ndó chi cùndecu ndihi-xi Yá Ndióxi chi ñà túú-gǎ cuéchi-ndo ndècu núú-gǎ. <sup>11</sup> Te núu ndècu

ndihi-ndo Espiritú Yá Ndióxi Yaá ní dándótó ñaha xii Xítohó Jesucristú, te diu-ni-gǎ cada te ndoto yiqui cùñú-ndó sǎ tá xíta nihnu cuáhá<sup>n</sup> núu na cúú-xi, te duca<sup>n</sup> chi ndècu ndihi-ndo Espiritú-gǎ.

<sup>12</sup> Te nchòhó ñáyiu ndècu ndihi-í ichi Xítohó Jesucristú, ñà túú-gǎ tàú-ndó cùnùu ni ì<sup>n</sup> sá cuèhé sá dúhá iní-ndó nàcuáa vǎ cùndecu-gǎ-ndó ìchi cuèhé ichi duha. <sup>13</sup> Chi núu na cùnùu sá cuèhé sá dúhá iní-ndó te cuíta nihnu-ndo, chi quíhí<sup>n</sup>-ndó núú úhú núú ndáhú. Dico núu dañá-ndo mèe-ndo chindee ñaha Espiritú Yá Ndióxi xii-ndo cuendá sá vǎ cùnùu-gǎ sá cuèhé sá dúhá iní-ndó ñà, te nduu táhú-ndó cùndecu-ndo ndihi-gǎ ni caa ni quíhí<sup>n</sup> te núu duca<sup>n</sup> na càda-ndo.

<sup>14</sup> Chi nchaa ñáyiu quide nchaa nacuaá sànu ichi ñaha Espiritú Yá Ndióxi cúú-yu déhe-gǎ. <sup>15</sup> Te Espiritú sá ñí taxi Yá Ndióxi ndécú ndihi-o ñà túú quide-xi sá nchóó yùhú-ó cùnùu cuechi-o núú-gǎ, chi Espiritú-á<sup>n</sup> quidé-xí sǎ nchóó cùu-o déhe-gǎ, te diu-ni Espiritú-á<sup>n</sup> quidé xǎhá<sup>n</sup>-o xii Yá Ndióxi: “¡Yòhó Dútú Ndióxi cúú-n Tǎtá méé-ndí!” duha xǎhá<sup>n</sup>-o xii-gǎ. <sup>16</sup> Te diu-ni Espiritú-gǎ-á<sup>n</sup> tnàhá tnúhu-xi ndihi iní-ó, te càhá<sup>n</sup> ndáá-xi sá nchóó cùu-o déhe-gǎ. <sup>17</sup> Te sá dúcá<sup>n</sup> cùu-o déhe Yá Ndióxi xiǎ<sup>n</sup> ní cachí-gǎ sá tnàhá-ó ndùu táhú-ó sǎ ñí nduu táhú Xítohó Jesucristú, te duca<sup>n</sup> ndùu táhú-ó te núu na càda ndee iní-ó ndòho-o datná ní ndoho Xítohó Jesucristú, te núu duca<sup>n</sup> te ío cuu càhnu-o ndihi-gǎ ni caa ni quíhí<sup>n</sup>.

<sup>18</sup> Te yúhú càchí-í sá ñà túú ñǎ cada-xi cuèi ndòho-o cuendá-gǎ ndécú-ó ñuyíú-a, chi ío váha càa núú ndúú táhú-ó cùndecu-o na saá nduu. <sup>19</sup> Te nchaandi túhú sá ñí cadúha Yá Ndióxi ní taxi ndecu-gǎ ñuyíú-a ndètu cahnu-ná-xi saá nduu càchí-gǎ sá ío càhnu cuu nchaa déhe-gǎ. <sup>20</sup> Te nchaa sá ñí cadúha Yá Ndióxi ní taxi ndecu-gǎ ñuyíú-a ní saá nduu ñà túú-gǎ cúú-xí sǎ vǎha sá cúú-xí-gǎ. Te ñà díú mèe sá ñí taxi ndecu Yá Ndióxi ñuyíú-a duca<sup>n</sup> ni sàni iní-xi cunduu, chi mee-gǎ duca<sup>n</sup> tnàhí ní cachí-gǎ cunduu sá saá nduu vǎ cúú-xí sǎ vǎha sá cúú-xí-gǎ, dico saá tucu nduu te nchaa xiǎ<sup>n</sup> cuu tucu-xi sá vǎha sá cúú-xí-gǎ. <sup>21</sup> Te nchaa sá ñí taxi ndecu-gǎ ñuyíú-a



vá cùndùu-gá-xi dàtná cáá-xí vitna te ni vâ dánàa-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá. <sup>22</sup> Te nàha-o sá ncháándì túhú sá nchító nì cadúha Yá Ndiöxí ndécú ñùyíu-a ndòho-xi vitna datná ndóhó ì<sup>n</sup> ñadihí sa ní tnahá òré cacu déhe-xi. <sup>23</sup> Te ñá díú-ní nchàa sá dúcá<sup>n</sup> nì cadúha-gá-ã<sup>n</sup> duca<sup>n</sup> ndòho-xi, chi tnahá nchoo dùca<sup>n</sup> ndoho-o ndecu-o ñùyíu-a tucu, te nchoo sà ní nduu táhú-ó Espíritú Yá Ndiöxí Espíritú sá nì cachí méé-gã nduu táhú-ó ðìhnanuu. Te ío ndòho tnahá-ó ndècu-o ñùyíu-a te ndètu cahnu-ná-ó sáá nduu ndàda saa-gá yiqui cùñú-ó, te cáhá<sup>n</sup>-gá sá cúú-ó dèhe-gá. <sup>24</sup> Te Yá Ndiöxí ní quide-gá ní naníhí tàhú-ó nùu xiã<sup>n</sup> ní ngúndecu ndihi-o tnùhu ndee ìní ndétú-ó sáá nduu càda-gá nàcuáa ní cachí-gá, te núu sa ndècu ndihi-o sá ndúú táhú-ó te vâ cúú cáhá<sup>n</sup>-ó sã cùndètu-o sá ndúú táhú-ó chi sa ndècu ndihi-o. <sup>25</sup> Dico sá ndétú-ó ndùu táhú-ó cùu-xi sá vátá cùndècu ndihi-gá-ó, te xini ñuhu-ni-xi cada ndee-ni iní-ó cùndètu-o ndéé sáá nduu ndùu táhú-ó sã dúcá<sup>n</sup> nì cachí Yá Ndiöxí nduu táhú-ó.

<sup>26</sup> Te Espíritú-gá chindee ñàha-xi xii-o nacuáa níhí ndéé-ó cùndecu-o, te nchoo ñà túú xini-ó cáhá<sup>n</sup> ndihi-o Yá Ndiöxí nàcuáa tàú-xi cunduu dico Espíritú-gá cáhá<sup>n</sup> ndàhú-xi núú-gã cuendá-ó cuèi òré ñá nihí-ó tnùhu cáhá<sup>n</sup>-ó cuendá nchaa sá ìo cuìní-ó cãcá<sup>n</sup>-ó nùú-gã. <sup>27</sup> Te Yá Ndiöxí sa nàha ndáá-gá nchaa nàcuáa sàni iní-ó, te duca<sup>n</sup> sà naha ndáá-gá nchaa nàcuáa sàni iní Espíritú-gá. Te Espíritú-gá cáhá<sup>n</sup> ndàhú-xi núú-gã cuendá nchoo ñáyíu yìndaha-gá, te cáhá<sup>n</sup> ndàhú-xi núú-gã nàcuáa cuìní méé-gã cunduu.

*Nchaa sá ná càda ñàha ñáyíu te vâ ndácù-yu nadatùhú-yu iní-ó chi ndacu nahi-ni-o yàha-o nchàa sá ná cáda ñàhá-yu*

<sup>28</sup> Te sa nàha-o sá Yá Ndiöxí quidé-gã sá ncháá sã yàha-o ndècu-o ñùyíu-a cùu-xi sá vâha sá cúú-xi nchòo cue ñáyíu cùu iní ñàhá xii-gá, chi cùu-o ñáyíu ní cáhá<sup>n</sup>-gá cundecu ndihi-gá dàtná ní cachí iní méé-gã. <sup>29</sup> Te ndéé cùtnàhá vátá ngáva-gá ñùyíu, te Yá Ndiöxí sa nàha-gá nándì cùu ñáyíu cundecu ndihi-gá, te ðiu-ni ndéé dàvã-á<sup>n</sup> nì cachí-gá sá ñáyíu-á<sup>n</sup> cunduu váha iní-yu dàtná váha iní Déhe mee-gã, te duca<sup>n</sup> nì cachí-gá

cuendá sá Déhe mee-gã-á<sup>n</sup> cunuu-gã núú nchàa ñáyíu cundecu ndihi-gá. <sup>30</sup> Te nchaa ñáyíu duca<sup>n</sup> nì cachí-gá cundecu ndihi-gá ndéé cùtnàhá vátá ngáva-gá ñùyíu cáhá<sup>n</sup> ñàhá-gã xii-yu vitna, te nchaa ñáyíu duca<sup>n</sup> cáhá<sup>n</sup>-gá càchí-gá sá ñà túú-gã cuèchi-yu ndècu núú-gã, te ðiu-ni ñáyíu-á<sup>n</sup> cachí-gá sá ìo càhnu cuú-yu.

<sup>31</sup> Te vitna ní cutnùnì iní-ó, te ñá túú nãgá cani iní-ó, chi Yá Ndiöxí ndécú ndihi ñàha-gá xii-o, te vâ yòo ì<sup>n</sup>-gá ndacu quehndé nihnu cuendá sá vâ chindèe ñàha-gá xii-o. <sup>32</sup> Te Yá Ndiöxí ñá túú ní cùdí iní-gá Déhe-gá sá cùú-gá cuendá nchaa nchoo ñáyíu xìndecu ñùyíu-a, te sá dúcá<sup>n</sup> ndéé Déhe-gá ñá túú ní cùdí iní-gá xiã<sup>n</sup> cùtnùnì iní-ó sã táxi-gã nchaandì túhú sá xini ñuhu-o. <sup>33</sup> Te vâ yòo ì<sup>n</sup> ndacu cacá<sup>n</sup> cuèchi núú Yá Ndiöxí cuendá nchaa ñáyíu ní cachí-gá cundecu ndihi-gá te núu ná cúú cuèchi-yu ndècu. Chi mee-gã càchí-gá sá ñà túú ndècu cuèchi-yu núú-gã. <sup>34</sup> Te vâ yòo ì<sup>n</sup> ndacu daquìhí<sup>n</sup> ñàhá xii-o núú ùhú núú ndàhú, chi Xítóhó Jesucristú ní xihí-gá te ní ndoto-gá, te cuándaa-gá núú ndécú Dütú Ndiöxí núcòo-gá xio cùha-gá, te duca<sup>n</sup> ìo cunuu-gá, te yacá<sup>n</sup> cáhá<sup>n</sup> ndàhú-gá núú Dütú Ndiöxí cuendá-ó. <sup>35</sup> Te vâ yòo ì<sup>n</sup> ndacu cada ñàha xii-o ì<sup>n</sup> sá ñà túú vâha cuendá sá vâ cúú iní ñàhá-gã Xítóhó Jesucristú xii-o, te ni tnúndòho tnùhu ndàhú, te ni sá ndihú iní-ó ñã cùtnùnì iní-ó nãsa cada-o cãcu nihnu-o ì<sup>n</sup> sá ná yàha-o, te ni nchàa sá cáda ñàha ñáyíu sá cuendá-gá, te cuèi-ni sá vâ nihí-ó sã cóhó sã cáxi-ó, te cuèi-ni sá vâ nihí-ó dóo cuihnu-o, te cuèi ndècu-ná-ó sã yàha-o ì<sup>n</sup> sá yàha-o, te cuèi sa ndècu-ná-ó sã cáhni ñàhá-yu, dico Xítóhó Jesucristú vâ dáñá ndéé-gá sá cúú iní ñàhá-gã xii-o. <sup>36</sup> Te quee ndáá-xi nàcuáa ní cáhá<sup>n</sup> ì<sup>n</sup> téé ní xóo cáhá<sup>n</sup> tnùhu Yá Ndiöxí ndéé sanaha nì ngódó tnùnì núú tütú-gá núú càchí-xi:

Yòhó Dütú Ndiöxí nchaa-ni nduu nchaa-ni òré cuìní ñáyíu cahni ñàhá-yu xii-ndì sá cuendá-n,

te càchí-yu sá cúú-ndì dàtná cue mbéé cue quitì sa ndècu túha-ná cahni-yu.

Duha ní cachí téé ní xóo cáhá<sup>n</sup> tnùhu-gá-á<sup>n</sup>, te duca<sup>n</sup> nì ngódó tnùnì núú tütú-gá. <sup>37</sup> Te cuèi duca<sup>n</sup> nándì sá ná càda ñàhá-yu xii-o,

dico vá ndácũ-yu nadatùhú-yu iní-ó chi ndacu nahi-ni-o yãha-o nchàa sá dúcá<sup>n</sup> ná càda ñahá-yu xii-o, te duca<sup>n</sup> chi Xítohó Jesucristú Yaá ío cùu iní ñáhá xii-o ndecu ndihí ñaha-gá chindèe ñaha-gá. <sup>38-39</sup> Te yúhú cútnùní ndáá iní-í sá ñi ñ<sup>n</sup> sá ío ñuyíú-a vá ndácú-xí càda-xi cuendá sá vã cúú ñi ñáhá-gã Yã Ndiöxí xii-o, te ñi sá cùú-ó, te ñi sá cùndècu-o ñuyíú-a, te ñi ñ<sup>n</sup> espíritú sá ío cùnùu cundihí yucu ñávãha te ñi ñ<sup>n</sup> dava-gá cue espíritú cùndihí-xi vá ndácú-xí càda-xi cuendá sá vã cúú ñi ñáhá Yã Ndiöxí xii-o. Te ñi sá cúú ñuyíú-a vitna, te ñi sá cúú ndéé cuèé-gá, te ñi ñ<sup>n</sup> sá ndécú àndiú, te ñi ñ<sup>n</sup> sá ndécú ñuyíú-a, te ñi ñ<sup>n</sup> sá ñi cadúha mee Yã Ndiöxí, ñi ñ<sup>n</sup> xíã<sup>n</sup> vá ndácú-xí càda-xi cuendá sá vã cúú ñi ñáhá-gã xii-o chi ndècu ndihí-o Xítohó Jesucristú Yaá cúú Xítohó-ó.

## 9

*Yá Ndiöxí ní cachí-gá sá ñáyiú isràél cúú-yu ñáyiú canchicú<sup>n</sup> ñihnu ñaha xii-gá*

<sup>1</sup> Te yúhú càhá<sup>n</sup> ndáá-í chi cùu-í ñ<sup>n</sup> té ndècu ndihí Xítohó Jesucristú, te ndècu ndihí-í Espíritú Yã Ndiöxí ñu xíã<sup>n</sup> cútnùní iní-í sá càhá<sup>n</sup> ndáá-í. <sup>2</sup> Te nchaa-ni nduu nchaa-ni òré ío ndihú iní-í, te duca<sup>n</sup>-ni ío quide úhú-xi iní-í <sup>3</sup> sá cuendá nchaa ñáyiú cùu ndi mee-í. Te núu dícó cúú-xí ñ<sup>n</sup> sá chindèe ñaha xii-yu nucúndecu váha-yu núu Yã Ndiöxí ñá, te dàña-í mée-í dàcuíta ñihnu ñaha Xítohó Jesucristú ñu dícó sá cúú. <sup>4</sup> Te nchaa ñáyiú cùu ndi mee-í-á<sup>n</sup> cúú-yu ñáyiú isràél, te Yá Ndiöxí ní cachí-gá sá cúú-yu déhe-gá, te ní quide-gá nàcuáa ní cutnùní iní-yu sá ío càhnu cuu-gá, te ní càhá<sup>n</sup> ndáá-gá núú-yu nàcuáa cada ñaha-gã xii-yu, te ní xáha<sup>n</sup>-gã xii ndí Moisés ní chídó tñùní ndí nàcuáa cada-yu cundécú-yu. Te ní xáha<sup>n</sup>-gã xii-yu nàcuáa cada-yu cada càhnu ñahá-yu xii-gá, te ní xáha<sup>n</sup> tùcu-gá xii-yu nchaa nàcuáa cada-gá ndéé cuèé-gá. <sup>5</sup> Te nchaa ñáyiú-á<sup>n</sup> cúú-yu ñaní tñáhá nchaa cue té ní cunuu ñi xíndecu ndéé sanaha, te diu-ni ñaní tñáhá-yu cùu Xítohó Jesucristú Yaá ní tendaha Dütú Ndiöxí ní quixi ñuyíú-a, te tñáhá-gá cúú-gã Ndiöxí te ío cùnùu-gá, te nchaa nduu nchaa quíú ío càhnu cuu-gá. Te duca<sup>n</sup> na cùnduu.

<sup>6</sup> Te vá càchí-ó sã Yã Ndiöxí ñá túú ní quide-gá nchaa nàcuáa ní cachí-gá cada-gá cuendá sá ñá túú sàndáá iní ñáhá dáva ñáyiú isràél xii-gá. Te sá dúcá<sup>n</sup> xiquide davá-yu te ñá túú quide-yu nàcuáa tàú-xi cada-yu sá cúú-yu ñáyiú isràél. Te ñáyiú duca<sup>n</sup> xiquide-á<sup>n</sup> cúú-yu ñáyiú ñá túú cùu cuendá ñáhá Yã Ndiöxí. <sup>7</sup> Te cuèi nchaa-yu cùu-yu ñaní tñáhá ndí Àbrahám dico ñá túú quide-yu nchaa nàcuáa tàú-xi cunduu cada-yu sá cúú-yu ñaní tñáhá ndí. Te Yá Ndiöxí ní xáha<sup>n</sup>-gã xii ndí Àbrahám: “Nchaa cue ñaní tñáhá tã Isàác té cùu déhe ducu<sup>n</sup>-n, mee-ni cuè ñáyiú-á<sup>n</sup> cuu ñaní tñáhá-n”, duha ní xáha<sup>n</sup>-gã xii ndí Àbrahám. <sup>8</sup> Te xíã<sup>n</sup> cútnùní iní-ó sã ñá ncháá ñáyiú cùu ñaní tñáhá ndí Àbrahám cúú-yu ñáyiú cùu cuendá Yã Ndiöxí, chi mee-ni ñáyiú sàndáá iní nàcuáa ní càhá<sup>n</sup>-gá cada-gá, ñáyiú-á<sup>n</sup> cúú cuendá-gá. <sup>9</sup> Te duha nduu tñúhu ní xáha<sup>n</sup> Yã Ndiöxí xii ndí Àbrahám: “Sáá nduu te yúhú cada-í te coo ñ<sup>n</sup> déhe-n ndihí ñadihí-n tã Sãrà”, duha ní xáha<sup>n</sup>-gã xii ndí.

<sup>10</sup> Te ñá díú-ni xíã<sup>n</sup> ní quide Yá Ndiöxí, chi tñáhá ní ndatnúhu-gá ndihí ndí Rêbecá cútnáhá vitna ñúhu úú déhe ndí ndihí ndí Isàác té ní cuu ñaní tñáhá-ó ñi xíndecu ndéé sanaha. <sup>11-13</sup> Te cútnáhá vitna ñúhu-gá déhe ndí Rêbecá, cútnáhá vátá cáda-gã-güexi ñi ñ<sup>n</sup> sá cuèhé sá dúhá, te ñi ñ<sup>n</sup> sá vãha, ní xáha<sup>n</sup> Yã Ndiöxí xii ndí: “Déhe-n tã díhna na càcu te té-á<sup>n</sup> tñi-dé nchaa tñúhu càhá<sup>n</sup> déhe-n tã cùu úú ná càcu”, duha ní xáha<sup>n</sup>-gã xii ndí Rêbecá. Te ní quee ndáá-xi nàcuáa ní càhá<sup>n</sup> Yã Ndiöxí núú tütú-gá núú càchí-xi: “Té Jàcób ní cuu váha iní-í núú-dé, te té Esàú ñá túú ní cùu váha iní-í núú-dé”, duha càchí-gá núú tütú-gá. Te duca<sup>n</sup> ñi cuu chi duca<sup>n</sup> ñi cachí mée-gã cunduu sá càhá<sup>n</sup>-gã nchaa ñáyiú cuíni mée-gã, te ñá díú cuendá ñ<sup>n</sup> chiu<sup>n</sup> quide-yu càhá<sup>n</sup> ñáhá-gã xii-yu.

<sup>14</sup> Te vá cúú tñáhí càhá<sup>n</sup>-ó sã Yã Ndiöxí ñá túú quide váha-gá sá dúcá<sup>n</sup> quide-gá chi mee-gã ío ndáá quide-gã! <sup>15</sup> Te mee-gã ní xáha<sup>n</sup>-gã xii ndí Moisés: “Cundàhú iní-í chindee-í mee-ni cuè ñáyiú càchí iní-í”, duha ní xáha<sup>n</sup>-gã xii ndí. <sup>16</sup> Te xíã<sup>n</sup> cútnùní iní-ó sã cùndàhú iní-gá ñáyiú chi duca<sup>n</sup> cuíni mée-gã cunduu, dico ñá túú

cùndahú iní ñáhá-gã xii-yu cuendá sá dúcá<sup>n</sup> cuení-yu cada-gá, te ni ñà túú cùndahú iní ñáhá-gã xii-yu cuendá sá ïo ndùcu ndeé-yu quidé-yu ì<sup>n</sup> sá quídě-yu. <sup>17</sup> Te núú tütú Yá Ndiöxí càhá<sup>n</sup>-xi nàcuáa ní xáha<sup>n</sup>-gã xii téé ní cuu Faràón téé ní xíndaha nàció<sup>n</sup> Ègiptú, te duha ní xáha<sup>n</sup>-gã: “Yúhú ní quide-í yíndàha-n ñáyiú cuendá cada-í titní núú sã cáda-í núú-n cuendá cutnùní iní-n sã ïo càhnu cuu-í, te duca<sup>n</sup> nchàa ñáyiú ñuyíú cutnùní iní-yu sá yùhú cù-í Ndiöxí”, duha ní xáha<sup>n</sup>-gã xii téé ní cuu Faràón. <sup>18</sup> Te xiã<sup>n</sup> cùtnùní iní-ó sã Yá Ndiöxí cùndahú iní-gá mee-ni cuè ñáyiú cächí iní mée-gã, te duca<sup>n</sup> ndàda díi-gá iní nchaa ñáyiú cächí iní mée-gã duca<sup>n</sup> càda-gá.

<sup>19</sup> Te sá dúhá càhá<sup>n</sup>-í te dava-ndo quèsaha-ndo: “Ná cuendá Yá Ndiöxí dácàa-gá cuéchi díquí ñáyiú núu ni ì<sup>n</sup>-yu ñá ndácü-yu quehdé nihnú-yu cuendá sá vã cáda Yá Ndiöxí nàcuáa cuení-gá”, quesaha-ndo. <sup>20</sup> Te chí cuãha cuendá sá dícó ñáyiú ñuyíú-a cùu-ndo te ñá túú ndùu váha-xi sá nchòhó càhá<sup>n</sup>-ndó ì<sup>n</sup> tnúhu sá ñà túú ndùu váha sá cúú-xí Yá Ndiöxí. Te duha na càhá<sup>n</sup>-í núú-ndó nàcuáa tecú tnùní-gá-ndó nàcuáa ndùu tnúhu càhá<sup>n</sup>-í. Te ñá túú xini-ó sã ì<sup>n</sup> quídi ñuhu cùñaha-xi xii ñáyiú ní cadúha ñaha xii-xi: “Ná cuendá duha ní cadúha ñaha-n xii-í”, cùñaha-xi. <sup>21</sup> Chi ñáyiú cadúha nchaa quídi-án cuu-ni cadúha-yu ndihi ñuhu cuèi nása na cùnduu quídi cadúha-yu canehe chiú<sup>n</sup>-yu, chi ì<sup>n</sup>-ni ñuhu cadúha-yu quídi cánehe chiú<sup>n</sup>-yu ndi tnahá nduu sàcòo-yu vico ndihi quídi sá cãnehe chiú<sup>n</sup>-yu nduu cùtexínu.

<sup>22</sup> Te diu-ni duca<sup>n</sup> quide Yá Ndiöxí, chi cuení-gá dandòho-gá ñáyiú ñá túú quide nchaa nacuáa nduu vétú iní-gá, te cada-gá nàcuáa cutnùní iní-yu sá ïo càhnu cuu-gá. Te sa ndècu túha-ná-yu sá quihí<sup>n</sup>-yu núú ùhú núú ndàhú, te cuèi duca<sup>n</sup> dico ío ta quide cahnu iní-gá cuáhá<sup>n</sup>. <sup>23</sup> Te duca<sup>n</sup> quide-gá cuendá cutnùní iní nchaa ñáyiú ñuyíú sã ïo váha quide-gá sá cúú-xí nchàa nchoo ñáyiú cùndahú iní-gá, chi ní cachí-gá sá nchóó cuè ñáyiú cùndahú iní-gá nduu táhú-ó cùndecu-o ndihi-gá núú ïo váha càa ndecu-gá. <sup>24</sup> Te dava nchoo ñáyiú ní càhá<sup>n</sup> Yá Ndiöxí cúú-ó ñáyiú isràél, te dava-o

cùu-o ñáyiú ñá túú cùu ñáyiú isràél. <sup>25</sup> Te ní quee ndáa-xi nàcuáa ní xáha<sup>n</sup> Yá Ndiöxí xii ndíi Òseás téé ní xóo càhá<sup>n</sup> tnúhu-gá ndéé sanaha ñi chídó tnùní ndíi núú tütú-gá núú cächí-xi:

Ñáyiú ñá túú cùu cuendá-í ní cùu te nduu cuendá-í-yu,  
te diu-ni ñáyiú-á<sup>n</sup> ñà túú cùu váha iní-í núú-yu ni cùu, dico vitna cùu váha iní-í núú-yu.

<sup>26</sup> Te diu-ni ñuú núú dúcá<sup>n</sup> ñi cachí-í sá ñà túú ñáyiú cùu cuendá-í diu-ni ñuú-á<sup>n</sup> coo ñáyiú cuu déhe yúhú Dútú Ndiöxí Yaá ndécú tũu andiu.

Duha ní xáha<sup>n</sup> Yá Ndiöxí xii ndíi Òseás ní chídó tnùní ndíi núú tütú-gá. <sup>27</sup> Te ndíi Chàíá téé ní xóo càhá<sup>n</sup> tucu tnúhu Yá Ndiöxí ndéé sanaha ñi càhá<sup>n</sup> ndíi cuendá ñáyiú isràél, te duha ní cachí ndíi: “Cuèi cuéhé víhí ñáyiú isràél dàtná cuéhé ñuhu cúchí làmár dico sacú-ni-yu vá quini-yu tnúndòho tnúhu ndàhú. <sup>28</sup> Te Yá Ndiöxí ío ndihi cada-gá nchaa nàcuáa càhá<sup>n</sup>-gá ñuyíú”, duha ní cachí ndíi. <sup>29</sup> Te ní càhá<sup>n</sup> tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yaá táxi tnùní nchaandi túhú sá ío andiu ndihi ñuyíú ñà túú ní dànaa-gá nchaa ñáyiú isràél, chi núu ni ndihí-yu danàa ñaha-gá,

te nchoo cùu-o datná ní cuu nchaa ñáyiú ní xíndecu ñuú Sòdomá ndihi nchaa ñáyiú ní xíndecu ñuú Gòmorrá, te ndihi-o nàa datná ní naa nchaa ñáyiú-á<sup>n</sup> ní cùu.

Duha ní cachí ndíi.

*Ñáyiú isràél ñá túú sàndáa iní-yu tnúhu Xítóhó Jesucrístú*

<sup>30</sup> Te sá cuendá xiã<sup>n</sup> núu vitna cächí tnúhu-í xii-ndo sã cuè ñáyiú ñá túú cùu ñáyiú isràél ñá túú ní nànducu nihnú-yu nàcuáa cadá-yu cudiú-yu núú Yá Ndiöxí, dico vitna cudiú-yu núú-gã chi ní sàndáa iní-yu Xítóhó Jesucrístú. <sup>31</sup> Te ñáyiú isràél nchícú<sup>n</sup> nihnú-yu tnúhu sá dánèhé ñáhá xii-yu nàcuáa cadá-yu cudiú-yu núú Yá Ndiöxí dico ñá túú cudiú-yu núú-gã chi ñá ndácü-yu cadá-yu nchaa nàcuáa càhá<sup>n</sup>-xi.

<sup>32</sup> Te duca<sup>n</sup> ñà túú cudiú-yu núú Yá Ndiöxí chi ñá túú sàndáa iní-yu Xítóhó Jesucrístú, te sàni iní-yu sá sã cuendá mee-ni nchàa sá



quidé mèe-yu cudíu-yu núu-gă, te sá dúcá<sup>n</sup> quidé-yu te cùu-yu dàtná ì<sup>n</sup> ñáyiu nguñenu ì<sup>n</sup> yúu te nduá-yu. Te duca<sup>n</sup> sãtnahá-xi cùu-yu chi ñá túú cùu váha iní-yu núu Xítóhó Jesucristú. <sup>33</sup> Te quèe ndáá-xi nàcuáa ní cáhá<sup>n</sup> Yă Ndiöxí ì<sup>n</sup> xichi núu tütú-gá núu cãchí-xi:

Yúhú táxí ndècu-í ì<sup>n</sup> tée ñuú Sìón, te cuu-dé dàtná ì<sup>n</sup> yúu, te yúu-ã<sup>n</sup> nguñenu ñáyiu te nduá-yu,

te nchaa ñáyiu na quindáá iní ñáhá xii-dé, te vá ndíxí cuèchi iní-yu sá dúcá<sup>n</sup> ñí sándáá iní ñáhã-yu xii-dé.

Duha cãchí-gá núu tütú-gá.

## 10

<sup>1</sup> Te nchòhó ñáyiu ndècu ndìhi-í ichi Xítóhó Jesucristú cãchí tnúhu-í xii-ndo sã cáhá<sup>n</sup> ndìhi-í Yă Ndiöxí cuendá ñáyiu isràél, chi ío cuiní-í sá nánihí tãhú-yu. <sup>2</sup> Te na cáhá<sup>n</sup> ndáá-í cuendá-yu sá ío ndùcu ndeé-yu xinu cuechí-yu núu Yă Ndiöxí, te dicó-ni sá ñà túú quidé-yu nàcuáa cuiní mée-gă cadá-yu. <sup>3</sup> Chi ñá túú quide cuendá-yu nàcuáa cuiní Yă Ndiöxí cada ñaha-gă xii-yu nàcuáa cudíu-yu núu-gă, te quide-ni-yu nàcuáa sàni iní mée-yu cudíu-yu núu-gă te ñá túú cuiní-yu tnií-yu tnúhu cáhá<sup>n</sup>-gá nàcuáa cudíu-yu núu-gă. <sup>4</sup> Te Xítóhó Jesucristú ní quide-gá cuendá sá vã cúnùu-gá nchaa tnúhu ní chídó tnùní ndíi Moisés, te nchaa ñáyiu na quindáá iní ñáhá xii-gá te ñu-gá cada te cudíu-yu núu Yă Ndiöxí.

<sup>5</sup> Te ndíi Moisés cáhá<sup>n</sup> ndíi núu tütú ndíi cuendá ñáyiu cuiní cudíu núu Yă Ndiöxí cuendá sá nchícú<sup>n</sup> nihnú-yu nchaa nàcuáa ní cáhá<sup>n</sup> ndíi. Te ní cachí ndíi sá ncháá ñáyiu na càda nchaa nàcuáa ní xáha<sup>n</sup> Yă Ndiöxí xii ndíi ní chídó tnùní ndíi te naníhí tãhú-yu, te núu dicó ndacú-yu cadá-yu nchaa nàcuáa ní cáhá<sup>n</sup> ndíi. <sup>6</sup> Dico vitna núu na quindáá iní-ó Xítóhó Jesucristú, te cudíu-o núu Yă Ndiöxí. Te duha cãchí tnúhu ní chídó tnùní ndíi núu tütú-gá: “Vá cání ñí-ndó sã xíní ñùhu-xi cada-ndo ì<sup>n</sup> sá vã yõo tnàhí ndàcu cada sá cáá tũu-ndo àndíu te cúñaha-ndo xii Cristú cuu<sup>n</sup>-ndo ndìhi-gá núu ñùyíú-a. <sup>7</sup> Te ní vã cání tũcu iní-ndó sã quíhí<sup>n</sup> túu-ndo núu xĩndecu nchaa ñáyiu ní xíhí te cada-ndo

sã Cristú ndoto-gá”, duha cãchí tnúhu-á<sup>n</sup> sã vã dúcá<sup>n</sup> cãni iní-ó. <sup>8</sup> Te cãchí tucu tnúhu-á<sup>n</sup>: “Tnúhu Yă Ndiöxí sá ndécú ndìhi ñaha-xi xii-ndo chi sàni iní-ndó cuendá tnúhu-á<sup>n</sup> te cáhá<sup>n</sup>-ndó”, duha cãchí tnúhu-á<sup>n</sup>. Te tnúhu sá ndécú ndìhi-ndo-á<sup>n</sup> cúu-xí tnúhu cáhá<sup>n</sup>-ndí núu ñáyiu, te xini ñuhu-xi sá quindáá iní-yu tnúhu-á<sup>n</sup>. <sup>9</sup> Te núu na nñuu-ndo cáhá<sup>n</sup>-ndó sã Xítóhó Jesucristú cúu-gă Xítóhó-ndó, te quindáá iní-ndó ñí yuhu ní iní-ndó sã Yă Ndiöxí ní dándótó-gă Xítóhó Jesucristú, te naníhí tãhú-ndó te núu duca<sup>n</sup> na càda-ndo. <sup>10</sup> Te nchaa ñáyiu duca<sup>n</sup> sándáá iní te cáhá<sup>n</sup>-yu sá Xítóhó Jesucristú cúu-gă Xítóhó-yu, ñáyiu-á<sup>n</sup> cudíu-yu núu Yă Ndiöxí te naníhí tãhú-yu.

<sup>11</sup> Te núu tütú Yă Ndiöxí cãchí-xi sá ñí ì<sup>n</sup> ñáyiu sándáá iní ñáhá xii Xítóhó Jesucristú vá ndíxí cuèchi iní-yu sá dúcá<sup>n</sup> sándáá iní ñáhã-yu xii-gá. <sup>12</sup> Te sá cúu-xí Xítóhó Jesucristú chi ì<sup>n</sup>-ni cùu ñáyiu isràél ndìhi ñáyiu ñá túú cùu ñáyiu isràél, chi ñu-gá cúu-gă Yá cúnùu taxi tnuní-gá nchaa ñáyiu, te ío váha quide-gá sá cúu-xí ncháa ñáyiu cáhá<sup>n</sup> ndìhi ñaha xii-gá. <sup>13</sup> Te quèe ndáá-xi nàcuáa cáhá<sup>n</sup>-xi núu tütú Yă Ndiöxí núu cãchí-xi: “Nchaa ñáyiu na cáhá<sup>n</sup> ndàhú núu Xítóhó Jesucristú sá dácacu nihnu ñaha-gă xii-yu, te ñáyiu-á<sup>n</sup> naníhí tãhú-yu”, duha cãchí-xi núu tütú-gá. <sup>14</sup> Te ñáyiu-á<sup>n</sup> vã nihí-yu nàcuáa cáhá<sup>n</sup> ndàhú-yu núu-gă te núu ñá túú sándáá iní ñáhã-yu xii-gá, te ní vã nihí-yu nàcuáa cadá-yu quindáá iní ñáhã-yu xii-gá te núu vátá cündèdóho-gá-yu tnúhu-gá, te ní vã nihí-yu tnúhu-gá te núu vá yõo quíhí<sup>n</sup> cútñuhu ñaha xii-yu. <sup>15</sup> Te ní vã yõo quíhí<sup>n</sup> duca<sup>n</sup> cútñuhu ñaha xii-yu tnúhu-gá te núu Yă Ndiöxí vá téndàha-gá ñáyiu quíhí<sup>n</sup> cútñuhu ñaha xii-yu. Te núu tütú Yă Ndiöxí cãchí-xi: “Ío vii ío váha cùu iní-ó vèxi ñáyiu dānehé ñáhá xii-o nàcuáa ndùu tnúhu sá cáhá<sup>n</sup> nàcuáa naníhí tãhú-ó”, duha cáhá<sup>n</sup>-xi núu tütú-gá.

<sup>16</sup> Te ñá ncháã-yu cuiní-yu quindáá iní-yu tnúhu-á<sup>n</sup>. Te ní quee ndáá-xi nàcuáa ní xáha<sup>n</sup> ndíi Chàíá xii Yă Ndiöxí te duha ní xáha<sup>n</sup> ndíi xii-gá: “Yòhó Dútú Ndiöxí na nàcãni tnúhu-í núu-n sã ío sacú-ni ñáyiu sándáá iní-yu tnúhu cáhá<sup>n</sup>-ndí”, duha ní xáha<sup>n</sup> ndíi xii-gá. <sup>17</sup> Te xini ñuhu-xi sá



dìhna-gá cunedóho-yu tnúhu-á<sup>n</sup> cuendá duca<sup>n</sup> te quindáá iní-yu, te tnúhu-á<sup>n</sup> cúu-xí tnúhu Xítóhó Jesucrístú.

<sup>18</sup> Te vá cúu cǎhá<sup>n</sup>-ó sǎ ñà túú ní nǐhí ñǎyiu isràél tnúhu-gá, chi nchaá-yu ní nǐhí-yu tnúhu-gá, chi núu tùtú Yǎ Ndiǒxí cǎchí-xi: Cue téé ní cǎhá<sup>n</sup> tnúhu Yá Ndiǒxí ní cǎhá<sup>n</sup>-güedé tnúhu-gá núu ñǎyiu, te tnúhu-á<sup>n</sup> ní xité nuu-xi nǐhí ñuyúú.

Duha cǎchí-xi núu tùtú-gá. <sup>19</sup> Te ni vá cǎhá<sup>n</sup>-ó sǎ ñǎyiu isràél ñá túú ní cùu tnuní iní-yu nàcuáa ndùu tnúhu-gá chi ní tecú tnùnì-yu. Te ndéé sanaha ñǎ chídó tnùnì ndíi Moisés nàcuáa ní xáha<sup>n</sup> Yǎ Ndiǒxí xii ñǎyiu isràél, te duha ní xáha<sup>n</sup>-gǎ xií-yu:

Yúhú cada váha-í nchaa ñǎyiu ñá túú cùu ñǎyiu isràél, ñǎyiu ñá túú cùtnuní iní-xi nàcuáa cada váha cundecu núu-í,

te nchòhó cudéé<sup>n</sup>-ndó nǔ-yu te cuu cuédú iní-ndǒ-yu.

Duha ní xáha<sup>n</sup> Yǎ Ndiǒxí xií-yu te duca<sup>n</sup> ní chídó tnùnì ndíi Moisés. <sup>20</sup> Te ndíi Chàíá ñá túú tnàhí ni yúhú ndíi ní quide ndíi núu Yǎ Ndiǒxí ní cǎhá<sup>n</sup> ndíi tnúhu-gá, te ní cachí ndíi:

Ñǎyiu ñá túú nànducu ñaha xii-í ní cùu ní naníhí ñáhǎ-yu xii-í,

te ni ñà túú ndùcu tnúhu ñàhá-yu xii-í ní cùu te ní xiní ñáhǎ-yu.

Duha ní cachí ndíi Chàíá ní cǎhá<sup>n</sup> ndíi tnúhu Yá Ndiǒxí. <sup>21</sup> Te ní quide tucu ndíi núu Yǎ Ndiǒxí ní cǎhá<sup>n</sup> ndíi tnúhu-gá cuendá ñǎyiu isràél, te ní cachí ndíi: “Nchaa-ni nduu yǐhí-í cǎhá<sup>n</sup>-í ñǎyiu isràél te ñá túú cuení-yu quindáá iní-yu chi ío sàá iní-yu”, duha ní cachí ndíi Chàíá ní cǎhá<sup>n</sup> ndíi tnúhu Yá Ndiǒxí.

## 11

### *Cuendá ñǎyiu isràél ñǎyiu naníhí tàhú*

<sup>1</sup> Te cuéi duca<sup>n</sup> dico vá cǎhá<sup>n</sup>-ó sǎ Yǎ Ndiǒxí dáquèe tǐhú-gǎ ñǎyiu isràél chi ñu-ni ñǎyiu-á<sup>n</sup> cúu cuendá-gá, chi yúhú tnàhá-í cúu-í mei tēe isràél, te ñani tnàhá-í ní cuu ndíi Àbrahám téé ní xindecu ndéé sanaha vǐhi-gá, te ñu-ni ñani tnàhá-í ní cuu tucu ndíi Benjamín. <sup>2</sup> Te ndéé sanaha dùca<sup>n</sup> ní cachí Yǎ Ndiǒxí sá nchùhú ñǎyiu isràél cúu-ndí ñǎyiu cùu cuendá-gá, te ñá túú dàquee tǐhú ñáhǎ-gǎ xii-ndí, te nchòhó

sa xiní-ndó nàcuáa cǎhá<sup>n</sup>-xi núu tùtú Yǎ Ndiǒxí núu cǎchí-xi nàcuáa ní quide té Èliás ní ndacá<sup>n</sup> cuéchi-dé núu-gǎ cuendá ñǎyiu isràél. <sup>3</sup> Te duha ní xáha<sup>n</sup>-dē xii-gá: “Yòhó Dútú Ndiǒxí, ná nàcani tnúhu-í núu-n sǎ nǐ sahní-yu cue téé cǎhá<sup>n</sup> tnúhu-n, te ní dátanú-yu núu xihí quitì ndùu táhú-n, te yúhú-nǎ ní cácu-í ndécù-í dico nànducu ñàhá-yu chi tnàhá-í cuení-yu cahni ñàhá-yu xii-í”, duha ní xáha<sup>n</sup>-dē xii Yá Ndiǒxí.

<sup>4</sup> Te Yá Ndiǒxí ní xáha<sup>n</sup>-gǎ xii-dé: “Sa ní dáquée dǐhí-í úsá mǐl cue téé cùu cuendá-í, te ñá túú nèhe-güedé sá yǐñùhu núu Bàál sá cǎchí-yu cùu ndiǒxí-yu te ñá ndàá sá ndiǒxí cúu-xí”, duha ní xáha<sup>n</sup>-gǎ xii té Èliás.

<sup>5</sup> Te duca<sup>n</sup> sǎtnahá-xi cùu vitna chi xǐndecu ñǎyiu ní cǎhá<sup>n</sup>-gá ní chǐtnahá ñáhǎ xii-gá, te duca<sup>n</sup> nǐ quide-gá chi ní cundàhú iní ñáhǎ-gǎ xií-yu. <sup>6</sup> Te duca<sup>n</sup> nǐ cǎhá<sup>n</sup> ñáhǎ-gǎ xii-yu sá cundàhú iní ñáhǎ-gǎ, te ñá díú cuendá ñ<sup>n</sup> chiu<sup>n</sup> quidé-yu duca<sup>n</sup> nǐ cǎhá<sup>n</sup> ñáhǎ-gǎ xií-yu, chi núu dǐcò cuendá ñ<sup>n</sup> chiu<sup>n</sup> quidé-yu duca<sup>n</sup> nǐ cǎhá<sup>n</sup> ñáhǎ-gǎ xií-yu ña, te ñá díú-gǎ sá cúu iní méé-gǎ duca<sup>n</sup> nǐ cǎhá<sup>n</sup> ñáhǎ-gǎ xií-yu te núu duca<sup>n</sup>.

<sup>7</sup> Te na cǎchí tnúhu-í xii-ndo nàcuáa cùu vitna sá ñǎyiu isràél cuení-yu cudíu-yu núu Yǎ Ndiǒxí dico ñá ndácù-yu, dico dava ñǎyiu ní cǎhá<sup>n</sup>-gá ñǎyiu-á<sup>n</sup> cudíu-yu núu-gǎ, te ñǎyiu duca<sup>n</sup> ñà túú cùdùu núu-gǎ-á<sup>n</sup> ío ní cuu sàá iní-yu núu-gǎ. <sup>8</sup> Te ní quee ndáá-xi nàcuáa cǎhá<sup>n</sup>-xi núu tùtú Yǎ Ndiǒxí núu cǎchí-xi: “Yá Ndiǒxí ní cachí-gá sá cúu-yu ñǎyiu ío nǐ dǐquí-xi, chi cuéi ndèhé-yu nàcuáa cǎhá<sup>n</sup> tnúhu-gá dico ñá cùtnuní iní-yu nàcuáa cǎhá<sup>n</sup>-xi, te cuéi ndédóho-yu dico ñá túú quée díquí-yu, te duca<sup>n</sup>-ni quidé-yu ndéé vitna”, duha cǎchí-xi núu tùtú-gá. <sup>9</sup> Te ndíi Dàvíí ní cachí ndíi:

Ñǎyiu ío váha ndècu te cudíí iní-yu quidé-yu vico,

dico yáha-yu dàtná yáha ñ<sup>n</sup> quitì ngáva trampá àdi ñ<sup>n</sup> quitì ñá cùtnuní iní-xi quée xití ñunu,

chi cuíta nihnú-yu te nacháhu-yu nchaa sá quidé-yu.

<sup>10</sup> Te cúu-yu ñǎyiu ñá túú vèdana tècú tnùnì, te cùu tucu-yu dàtná ñ<sup>n</sup> ñǎyiu ío ndòho nchido ñ<sup>n</sup> sá vèe.

Duha ní cachí ndí Dàví.

*Ñáyiú ñá túú cùu ñáyiú isràél naníhí tànhú-yu*

11 Te cuèi duca<sup>n</sup> dico vá càchí-ó sã sã dúcá<sup>n</sup> ñá túú ní quide ndáá ñáyiú isràél te ní xíta nihnu duú<sup>n</sup>-yu, te ñáhá chi sá dúcá<sup>n</sup> ñí quidé-yu te ní ngúndecu ndihí dava-gá ñáyiú tnúhu sá cãhá<sup>n</sup> nãcuáa naníhí tànhú-yu, te ñáyiú isràél quini-yu nãcuáa naníhí tànhú ñáyiú ñá túú cùu ñáyiú isràél, te tnàhá-yu cudíí iní-yu naníhí tànhú-yu. 12 Te sá dúcá<sup>n</sup> ñí quide sàá iní-yu ñá túú ní quide ndáá-yu núú Yã Ndiõxí, te xíã<sup>n</sup> ní cuu-xi ñí sá vãha sá cúu-xí ñáyiú nihí ñuyúú, dico sáá nduu te cada ñáyiú isràél nchaa nãcuáa cãhá<sup>n</sup> Yã Ndiõxí, te ðávã-á<sup>n</sup> ño-gã váha cuu xii nchaa ñáyiú nihí ñuyúú.

13 Te nchòhó ñáyiú ñá túú cùu ñáyiú isràél cãchí tnúhu-í xii-ndo sã Yã Ndiõxí ní cachí-gá sá cãhá<sup>n</sup>-í tnúhu-gá núú-ndó, te yúhú cãchí-í sá ño cãhnu cuu chiu<sup>n</sup> quide-í.

14 Te duha cãhá<sup>n</sup>-í cuendá sá ñuu cudana ió dava ñáyiú cùu ndi mee-í cudíí iní-yu cada váha ñaha Yã Ndiõxí xii-yu ðàtná quidé vãha ñaha-gã xii-ndo, te naníhí tànhú-yu.

15 Te sá cuendá sá ñí quee tíhú ñáyiú isràél ní nacáhã<sup>n</sup> cáhnú iní tnáhã ñáyiú nihí ñuyúú ndihí Yã Ndiõxí, dico na sãá nduu núcúndecu váha ñáyiú isràél ndihí Yã Ndiõxí, te ío-gã váha tnáhã ñáyiú nihí ñuyúú, te ñáyiú-á<sup>n</sup> cada iní-ó sã cúu-yu ðàtná ñáyiú ní xíhí, dico ðávã-á<sup>n</sup> cada tucu iní-ó sã cúu-yu ðàtná ñáyiú ní ndoto chi núcúndecu váha-yu ndihí-gã. 16 Te núu sá lúhá-ní ñí tílúú yusa<sup>n</sup> cãváha te ðiu-ni duca<sup>n</sup> cãváha nihí. Te núu cãváha yóho ñí yutnu te ðiu-ni duca<sup>n</sup> cãváha-xi nihí-xi. Te ðiu-ni duca<sup>n</sup> sãtnahã-xi cùu ñáyiú isràél, chi ñani tnáhã-yu ní xíndecu ndéé sanaha ñí cuú-yu ñáyiú ní cuu cuendá ñáhã Yã Ndiõxí, te ðiu-ni duca<sup>n</sup> cùu cuendá ñáhã-gã xii mée-yu ndéé vitna.

17 Te ío ñí yutnu váha nani olívú, te dava dité yutnu-á<sup>n</sup> ñí téhndé te ní nucódó dité yutnu olívú cùtexínu, te mee-ñã yutnu olívú váha-á<sup>n</sup> ño váha quide-xi nchito dité yutnu olívú cùtexínu-á<sup>n</sup>. Te dité nchaa yutnu olívú váha-á<sup>n</sup> cúu-xí ðàtná ñáyiú isràél, te nchaa dité-xi sá ñí téhndé-á<sup>n</sup> cúu-xí ðiu-ni ñáyiú isràél ñáyiú ñá túú tnàhá tnúhu ndihí

Yã Ndiõxí. Te dité yutnu olívú cùtexínu sá ñí nucódó tnáhã-á<sup>n</sup> cúu-xí ðàtná ñáyiú ñá túú cùu ñáyiú isràél tnàhá tnúhu ndihí Yã Ndiõxí. 18 Te vá caní iní-ndó sã sã dúcá<sup>n</sup> ndècu váha-ndo ndihí Yã Ndiõxí te ío cùnuu-ndo dacúúxí ñáyiú isràél, te vá dúcá<sup>n</sup> caní iní-ndó chi sá cuendá nchaa ñani tnáhã ñáyiú isràél ní xíndecu ndéé sanaha duca<sup>n</sup> ndècu váha-ndo ndihí Yã Ndiõxí vitna, te ñá díú sã cuendá nchòhó ndécú ndihí váha ñáyiú-á<sup>n</sup> Yã Ndiõxí vitna.

19 Te cudana sãni iní-ndó te cãchí-ndó sã ñáyiú isràél ní quee tíhú-yu cuendá sã nchòhó nucuíñí-ndó ñúu-yu núcúndecu váha-ndo ndihí Yã Ndiõxí. 20 Te ndáá sá ñí quee tíhú-yu chi ñá túú ní sãndáá iní ñáhã-yu xii-gã, te nchòhó ío váha cùu ndecu-ndo ndihí-gã chi ní sãndáá iní-ndó-gã, dico vá cãchí-ndó sã ño cãhnu cuu-ndo, te ío váha chí cuãha cuendá nãcuáa cundecu-ndo. 21 Te cue ñáyiú isràél cúu-yu ñáyiú cùu cuendá-gã ní cùu te ní dáquée tíhú ñáhã-gã xii-yu cuendá sá ñá túú ní sãndáá iní ñáhã-yu xii-gã, te tnàhá nchòhó

daquée tíhú ñáhã-gã xii-ndo te núu na cãda-ndo ðàtná ní quide ñáyiú-á<sup>n</sup>. 22 Te chí cáda cuendá sá Yã Ndiõxí ío váha iní-gã, dico cùdée<sup>n</sup>-gã núu nchãa ñáyiú ñá túú sãndáá iní ñáhã xii-gã, dico sá cúu-xí nchòhó cue ñáyiú sãndáá iní ñáhã xii-gã chi ío váha iní-gã. Te duca<sup>n</sup>-ni cùnduu váha iní-gã sá cúu-xí-ndó te núu vá ðãñã ndéé-ndó cãda-ndo nacuáa cãhá<sup>n</sup>-gã cuendá sá ño váha iní-gã, te núu ñáhã te tnàhá nchòhó quee tíhú-ndó ðàtná ní quee tíhú ñáyiú isràél, ñáyiú ñá túú ní sãndáá iní ñáhã xii-gã. 23 Dico núu ñáyiú isràél ñáyiú ní dáquée tíhú ñáhã Yã Ndiõxí quíndáá iní ñáhã-yu xii-gã te nduu cuendá ñáhã tucu-gã xii-yu, te ñáyiú-á<sup>n</sup> cúu-yu ðàtná dava dité yutnu olívú sá ñí téhndé te ní nucódó tnáhã tucu. Te duca<sup>n</sup> sãtnahã-xi cúu-yu te núu na quíndáá iní ñáhã-yu xii-gã. 24 Te nchòhó cúu-ndó ðàtná nchaa dité yutnu olívú cùtexínu, chi ñá díú ñáyiú isràél cúu-ndó, te dité nchaa yutnu olívú cùtexínu-á<sup>n</sup> ní nucódó-xi núu dité yutnu olívú váha-á<sup>n</sup>. Te yáchí-gã núcúndecu váha ñáyiú isràél ndihí Yã Ndiõxí, chi cúu-yu ðàtná nchaa dité yutnu olívú váha sá ñí téhndé te ní nucódó

tnáhá tùcu. Te duca<sup>n</sup> sàtnahá-xi cùú-yu te núu na quíndáá iní ñáhã-yu xii-gá.

### *Sáa nduu te naníhí tàhú ñáyiu isràél*

<sup>25</sup> Te nchòhó ñáyiu ndècu ndìhí-í ichi Xítohó Jesucristú, na càchí tnúhu-í xii-ndo ì<sup>n</sup> tnúhu ndùu yuhu ni cuu, cuèndá sá vã cání iní-ndó sã ìo-gá váha sàá díquí-ndó dàcúúxí ñáyiu isràél, chi dava ñáyiu isràél cùú sàá iní-yu núú Yã Ndiòxí ñini na ndìhí ñáyiu ní cachí Yã Ndiòxí ngúndecu váha ndìhí ñáhã-yu xii-gá, ñáyiu ñá túú cùu ñáyiu isràél. <sup>26</sup> Te nduu na ndìhí ñáyiu-á<sup>n</sup> ngúndecu váha-yu ndìhí Yã Ndiòxí, te dàvá-á<sup>n</sup> naníhí tàhú ñáyiu isràél chi quee ndáá-xi nàcuáa càhá<sup>n</sup> Yã Ndiòxí núú tùtú-gá núú càchí-xi:

Ndàa ñuú Sìón quixi Yaá cada naníhí tàhú nchaa ñáyiu,

te ñu-ni Yaá-á<sup>n</sup> cada-gá cuèndá sá dáñã nchaa ñáyiu isràél ichi cuèhé ichi duha.

<sup>27</sup> Te yúhú cada càhnu iní-í nchaa cuéchi ñáyiu isràél, chi cada-í dàtná ní cachí-í ndéé sanaha.

Duha càchí Yã Ndiòxí núú tùtú-gá.

<sup>28</sup> Te sá cuèndá tnúhu sá càhá<sup>n</sup> nàcuáa naníhí tàhú-ó xiã<sup>n</sup> cùú ùhú iní ñáyiu isràél Yã Ndiòxí, te sá dúcá<sup>n</sup> quidé-yu xiã<sup>n</sup> nchòhó ní níhí-ndó tnúhu sá càhá<sup>n</sup> nàcuáa naníhí tàhú-ndó. Te ní cachí Yã Ndiòxí sá ñáyiu isràél cuu cuèndá-gá, te cùu iní ñáhã-ní-gã xií-yu, te duca<sup>n</sup> quidé-gá chi duca<sup>n</sup> ñí xáha<sup>n</sup>-gã xii cue ñaní tnáhã-yu ní xíndecu ndéé sanaha. <sup>29</sup> Te Yã Ndiòxí ñá túú ndùu ùhú iní-gá ì<sup>n</sup> sá táxí-gã, te ñí ñá túú ndìxi cuéchi iní-gá sá càhá<sup>n</sup> ñáhã-gã xii-o.

<sup>30</sup> Te nchòhó chi ñá túú sàndáá iní-ndó Yã Ndiòxí ní cùu, dico vitna ñini ñá túú sàndáá iní ñáhã ñáyiu isràél xii-gá, te ní cundàhú iní ñáhã-gã ní dácãcu nihnu ñaha-gã xii-ndo núú ùhú núú ndàhú. <sup>31</sup> Te vitna quidé-yu dàtná ní xóo cada nchòhó cútnáhã ñá túú ní xóo quíndáá iní-ndó-gã. Dico sáá nduu te natuha ñáhã-yu xii-gá te dàcãcu nihnu ñaha-gã xií-yu sá cundàhú iní ñáhã-gã dàtná ní quidé ñaha-gã xii nchòhó. <sup>32</sup> Te Yã Ndiòxí ní dáñã-gã sá dúcá<sup>n</sup> cùnduu saá iní nchaa ñáyiu cuèndá cuíní-gá cundàhú iní ñáhã-gã xií-yu.

<sup>33</sup> Te súúní vãha quíde ñaha Yã Ndiòxí xii-o, te ío váha xíní-gá nchaa cuéi sá ío andiu te cuéi sá ío ñuyíú-a, te duca<sup>n</sup> ìo váha sàá nchaa sá xíní tnúní-gá. Te ñá ndácú-ó cùtnuní iní-ó ñá cùú nchaa sá sání iní-gá cada-gá, te ñí ñá ndácú-ó cùtnuní iní-ó nàcuáa ndùu cuendá nchaa sá quidé-gã.

<sup>34</sup> Te núú tùtú-gá càchí-xi: “Vã yõo ì<sup>n</sup> cùtnuní iní-xi nàcuáa sání iní Yã Ndiòxí, te ñí vã yõo ì<sup>n</sup> ndacu dacahu iní ñáhã xii-gá nàcuáa càhá<sup>n</sup>-gã. <sup>35</sup> Te Yã Ndiòxí ñá túú quíde yica iní-gá cada-gá sá vãha sá cùú-xí ñáyiu cuèndá ì<sup>n</sup> sá sãñáhã-yu xii-gá chi ñá túú dùca<sup>n</sup> quidé-gã”, duha càchí-xi núú tùtú-gá. <sup>36</sup> Te duca<sup>n</sup> chi mee Yã Ndiòxí ní taxi ndecu-gá nchaandi túhú sá ío ñuyíú, te ñu-ni mee-gã táxí tnúní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná càchí-ó sã ìo càhnu cuu-gá ñí caa ñí quíhí<sup>n</sup>. Te duca<sup>n</sup> na cùnduu.

## 12

### *Cada-o nàcuáa nduu vétú iní Yã Ndiòxí*

<sup>1</sup> Te vitna nchòhó ñáyiu ndècu ndìhí-í ichi Xítohó Jesucristú càchí tnúhu-í xii-ndo sã Yã Ndiòxí cundàhú iní ñáhã-gã xii-o chindee ñaha-gã, núu xiã<sup>n</sup> càhá<sup>n</sup> ndàhú-í núú-ndó sã dáñã-ndó mèe-ndo núú ndáhã-gã, te cada iní-ndó sã cùú-ndó dàtná ì<sup>n</sup> táhú sã nchító-ó ñí nduu táhú-gã. Te cuu-ndo ñáyiu váha ñáyiu cada nchaa nàcuáa nduu vétú iní Yã Ndiòxí chi duca<sup>n</sup> tàú-ndó càda-ndo sá cùú-xí-gã. <sup>2</sup> Te vá cãchicú<sup>n</sup> nihnu-gã-ndó càda-ndo datná xíquide nchaa ñáyiu ndècu ichi cuehé ichi duha ndècu ñuyíú-a, te vá cùhú<sup>n</sup>-gã iní-ndó ìchi cuehé ichi duha-á<sup>n</sup>, chi mee-ñá sá vãha cuhu<sup>n</sup> iní-ndó, te duca<sup>n</sup> te cutnùní iní-ndó nchaa nàcuáa cuíní Yã Ndiòxí cada-ndo, te nchaa sá cuíní-gá cada-ndo cùu-xi mee-ñí sá vãha, sá ìo váha ndùu vétú iní-gá, te cùu-xi nchaa sá xíní ñuhu-xi cada-ndo núú-gã.

<sup>3</sup> Te sá cuèndá chiú<sup>n</sup> ní cundàhú iní ñáhã Yã Ndiòxí ní taxi-gã xii-í xiã<sup>n</sup> núu na càhá<sup>n</sup>-í dóho-ndo vitna: Vã cání iní-ndó ì<sup>n</sup> sá ñá túú tàú-ndó càni iní-ndó te cucaha<sup>n</sup>-ndo sã ìo càhnu cuu-ndo. Te nchòhó ní sàndáá iní-ndó Yã Ndiòxí núu chindee ñaha-gã xii-ndo, te vitna chí cuãha cuèndá núu ná daha núú chiú<sup>n</sup>-gã ndacu-ndo càda-ndo.

<sup>4</sup> Te nchoo títní xichi cùu yíqui cuñú-ó,



te ndi díí<sup>n</sup> ndi díí<sup>n</sup> chiú<sup>n</sup> quide-xi íí<sup>n</sup> íí<sup>n</sup>-xi.  
 5 Te duca<sup>n</sup> sãtnhá tucu-xi cùu nchoo ñáyiú ndècu ndihí Xítóhó Jesucristú chi cuèi ná daha tnàhá-ó dico íí<sup>n</sup>-ni cùu-o ndihí-gá, te duca<sup>n</sup> mée-o tucu íí<sup>n</sup>-ni cùu-o.

6 Te mee Yã Ndiöxí ní cundàhú iní ñáhá-gã xii-o ní taxi-gá chiú<sup>n</sup> taú-ó càda-o íí<sup>n</sup> íí<sup>n</sup>-o te chindee ñaha-gá xii-o, te xini ñuhu-xi cada-o nacuáa ndùu chiu<sup>n</sup> ní taxi-gá cada-o. Te núu ní nduu táhú-ó nùú-gã sá càhá<sup>n</sup>-ó tnùhu sá dácàhu iní ñáhá mée-gá xii-o te càhá<sup>n</sup>-ó nàcuáa sàndáá iní-ó chindee ñaha-gá xii-o, 7 àdi ní nduu táhú-ó nùú-gã sá ìo váha chindee-o tnàha ñáyiú-o te ñiú-ni duca<sup>n</sup> càda-o, àdi ní nduu táhú-ó dānehé-ó ñáyiú tnúhu-gá te ñiú-ni duca<sup>n</sup> càda-o, 8 àdi ní nduu táhú-ó nùú-gã sá dácàhá<sup>n</sup>-ó ñáyiú canchicú<sup>n</sup> nihnú-yu ichi-gá te ñiú-ni duca<sup>n</sup> càda-o, àdi ní nduu táhú-ó nùú-gã sá cuãñaha-o xii tnaha ñáyiú-o sã ñihí-ó ndècu ndihí-o te ñiú-ni duca<sup>n</sup> càda-o, dico ñi yùhu ñi iní-ó cuãñaha-o xii-yu, àdi ní nduu táhú-ó nùú-gã taxi tnùní-ó te ñiú-ni duca<sup>n</sup> càda-o, te ñi yùhu ñi iní-ó càda-o, àdi ní nduu táhú-ó nùú-gã chindee-o cuè ñáyiú ndècu ndihí tnúndòho tnúhu ndàhú te ñiú-ni duca<sup>n</sup> càda-o, te ìo cudíí iní-ó càda-o chiu<sup>n</sup>-á<sup>n</sup>.

*Nchaa nàcuáa tàú-xi cada nchaa ñáyiú ndècu ichi Xítóhó Jesucristú*

9 Te cuu iní tnáhá ndìsa-ndo íí<sup>n</sup> íí<sup>n</sup>-ndo, te dañā-ndo nchāa sá cuèhé sá dúhá te cada-ndo mée-ni sá vāha. 10 Te ìo cuu iní tnáhá-ndó, te cada-ndo cuendá sá íí<sup>n</sup>-ní ñáyiú cùu-ndo, te íí<sup>n</sup> íí<sup>n</sup>-ndo càni-gá iní-ndó cànehe yíñuhu núú tnáhá-ndó.

11 Te nducu ndèe-ndo cada-ndo nchaa chiu<sup>n</sup> tahu Xítóhó Jesucristú vá tühío-ndo, te cada-ndo ñi yuhu ñi iní-ndó sã cúú-xí-gã.

12 Te ìo cudíí iní-ndó cùndecu-ndo chi ní ngùndecu ndihí-ndo tnùhu ndee iní sá cùndecu ndihí-ndo Xítóhó Jesucristú, te cada càhnu iní-ndó cuèi nāndi na càda ñaha ñáyiú xii-ndo sã cuendá-gá, te vá dáñā ndèe-ndó càhá<sup>n</sup> ndihí-ndo Yã Ndiöxí.

13 Te chindee tnàha-ndo te núu ìo daya nchòhó ñáyiú ndècu ichi-gá ìo íí<sup>n</sup> sá cúmāni xii-ndo, te ìo váha cuu iní-ndó còto-ndo ñáyiú véxi vehe-ndo.

14 Te cācā<sup>n</sup> táhú-ndó nùú Yã Ndiöxí cuendá nchaa ñáyiú nāndi quide ñaha xii-ndo, te cācā<sup>n</sup> táhú-ndó nùú-gã sá ná

chindee ñaha-gá xii-yu te ñā díú dà cācā<sup>n</sup> táhú-ndó nùú-gã sá ná dàcuíta nihnu ñaha-gã xii-yu.

15 Te núu ìo ñáyiú cùdíí iní-xi te cudíí iní-ndó ndihí-yu, te núu ìo ñáyiú ndihú iní-xi te ndihú iní-ndó ndihí-yu.

16 Te cuu íí<sup>n</sup>nuu-ndo cùndecu-ndo, te vá cādā càhnu-ndo mee-ndo, te tnahá tnúhu-ndo ndihí nchaa ñáyiú ndàhú iní-xi, te vá cāni iní-ndó sã ìo-gá túha-ndo.

17 Te vá nānchòcāva-ndo nāchinaa-ndo íí<sup>n</sup> sá quidé ñaha ñáyiú xii-ndo, te ìo nducu ndèe-ndo cada-ndo mee-ni sá vāha nàcuáa cuu vāha iní ñáyiú. 18 Te ìo nducu ndèe-ndo cada-ndo sá ndácú-ndó cùndecu vāha-ndo ndihí nchaa ñáyiú. 19 Te nchòhó ñáyiú ìo cùu iní-í, vá cāni iní-ndó nāchinaa-ndo íí<sup>n</sup> sá cādā ñaha ñáyiú xii-ndo, chi cundetú-ndo sã mée Yã Ndiöxí ná nāchinaa-gá sá quidé ñahá-yu xii-ndo, chi quee ndāá-xi nàcuáa càhá<sup>n</sup> Yã Ndiöxí núú tütú-gá núú càchí-xi: “Yúhú dandòho-í-yu chi nachinaa-í nchaa sá quidè-yu”, duha càchí-gá núú tütú-gá.

20 Te xini ñuhu tucu-xi cada-ndo nacuáa càhá<sup>n</sup> tucu-xi ingá xichi núú tütú-gá núú càchí-xi: “Te núu ñáyiú cùu úhú iní ñáhá xii-ndo ñā túú sã còhó sã cāxí-yu te cuãñaha-ndo xii-yu, te núu duca<sup>n</sup> na càda-ndo te ìo cucaha<sup>n</sup> núú-yu”, duha càchí-xi núú tütú-gá. 21 Te núu ìo íí<sup>n</sup> sá quidé ñaha tnaha ñáyiú-ndo xii-ndo te vá nānchòcāva-ndo nāchinaa-ndo sá quidé ñahá-yu xii-ndo, chi cada-ndo sã vāha sá cúú-xí-yu, te duca<sup>n</sup> te vá cādā-ndó sã ñā túú tàú-ndó càda-ndo núú Yã Ndiöxí dàtná quidè-yu.

## 13

1 Te nchaa ñáyiú tàú-yu quindáá iní-yu nchaa cue tée cùchiu<sup>n</sup>, chi Yã Ndiöxí ní cachí-gá sá cùndecu tée cùchiu<sup>n</sup> ñuyíú-a, núu xíá<sup>n</sup> xíndecu-güedé vitna. 2 Te nchaa ñáyiú ñā túú sàndáá iní ñáhá xii cue tée cùchiu<sup>n</sup> ñā túú tnàhá iní Yã Ndiöxí sá dúcā<sup>n</sup> quidé-yu, chi mee-gã ní cachí-gá sá cùndecu-güedé. Te nchaa ñáyiú duca<sup>n</sup> ñā túú sàndáá iní ñáhá xii cue tée cùchiu<sup>n</sup> nacháhu-yu sá dúcā<sup>n</sup> quidé-yu. 3 Te nchaa ñáyiú quide vāha ñā túú yùhú-yu cue tée cùchiu<sup>n</sup> chi quide vāha-yu, dico nchaa ñáyiú ñā túú quide vāha chi xíyùhú-yu cue tée cùchiu<sup>n</sup>. Te



vitna núu nchòhó cuení-ndó sã vã yùhú-ndó cuè téè cùchiu<sup>n</sup> te chí cádá vãha, te duca<sup>n</sup> te cáhá<sup>n</sup> váha-güedé cuendá-ndó. <sup>4</sup> Te Yá Ndiõxí duca<sup>n</sup> nĩ cachí-gá cundecu-güedé cuendá cada-güedé sá ñà túú nã cuu cundecu-ndo, te núu ñã túú quide váha-ndo ndècu-ndo te quiyùhú iní-ndó nũ-güedě, chí ñã túú àú<sup>n</sup> nã cuu ndècu ndihí-güedé tnúhu ndee iní dandòho-güedé nchaa ñáyiu ñã túú quide váha, chí Yá Ndiõxí duca<sup>n</sup> nĩ cachí-gá cundecu-güedé sá dúcá<sup>n</sup> càda-güedé dandòho-güedé nchaa ñáyiu ñã túú quide váha. <sup>5</sup> Núu xiã<sup>n</sup> ío xini ñuhu-xi sá quindáá iní-ndó nchàa cue téè cùchiu<sup>n</sup>, te ñã díú sã yùhú-ndó dandòho ñaha-güedé xii-ndo, chí cada-ndo sã cùtnúni iní-ndó sã cúú-xí ñ<sup>n</sup> sã vãha. <sup>6</sup> Chí ñu cuendá xiã<sup>n</sup> sácá<sup>n</sup>-ndó díhú<sup>n</sup> nũ cuè téè cùchiu<sup>n</sup>, te duca<sup>n</sup> chí Yá Ndiõxí duca<sup>n</sup> nĩ cachí-gá cundecu-güedé te ñu-ná chiú<sup>n</sup> ndeé-güedé ñúhú iní-güedé.

<sup>7</sup> Te nacháhu-ndo nchàa sá tàú-ndó nũ nchàa ñáyiu tàú-ndó nũ-xi, te cuè díhú<sup>n</sup> tàú-ndó cuendá ñuhu-ndo nũ cuè téè cùchiu<sup>n</sup> àdi nágá díhú<sup>n</sup> tàú-ndó nũ-güedě te nacháhu-ndo nũ-güedě. Te ío-gá canehe-ndo sã yíñuhu núu nchàa ñáyiu cùnuu, te cáhá<sup>n</sup> váha-ndo ndihí-yu. <sup>8</sup> Te vá dácuídó-ndó ndùu nacháhu-ndo sã tàú-ndó nũ tnàha ñáyiu-ndo, te cuu iní tnáhá-ndó ñ<sup>n</sup> ñ<sup>n</sup>-ndo. Te núu duca<sup>n</sup> quide-ndo ndecu-ndo ña, te quide-ndo nchaa nacuaá cáhá<sup>n</sup> tnúhu sá sánú ìchi ñaha xii-o nacuaá cada-o cundecu-o. <sup>9</sup> Te duha ndùu tnúhu cáhá<sup>n</sup> Yá Ndiõxí cuendá nchaa sã vã cúú càda-o: “Nchaa nchòhó cue téè vá cáhá<sup>n</sup> ndihí-ndo ñáyiu dìhí te núu ñã díú ñàdihí-ndó cùú-yu, te duca<sup>n</sup>-ni nchàa nchohó cue ñáyiu dìhí tucu vá cáhá<sup>n</sup> ndihí-ndo tée te núu ñã díú yí-ndo cuu-güedé, te vá cáhni-ndó tnàha ñáyiu-ndo, te vá dúhú-ndó sã ndécú ndihí-yu, te vá dácàcu-ndo cuèchi neñúú, te vá xíhó-ndó sã ndécú ndihí tnaha ñáyiu-ndo”, nchaa xéhé càchí Yá Ndiõxí sã vã cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cundecu-o, te núu quide-o ingá tnúhu sã cáchí-xi: “Cuu iní-ndó nchàa tnaha ñáyiu-ndo datná cúú iní-ndó mèe-ndo”, duha cáhá<sup>n</sup> tnúhu-á<sup>n</sup>. Te nchaa

dava-gá quidé-ó te núu quide-o nacuaá cáhá<sup>n</sup> tnúhu-a. <sup>10</sup> Te nchaa ñáyiu cùu iní tnàha ñáyiu-xi te ñã túú quide úhú iní-yu tnàha ñáyiu-yu, te núu duca<sup>n</sup> cùu iní-yu tnàha ñáyiu-yu te quidé-yu nacuaá cáhá<sup>n</sup> tnúhu sá sánú ìchi ñaha xii-o nacuaá cada-o cundecu-o.

<sup>11</sup> Te duca<sup>n</sup> xini ñuhu-xi cada-ndo chí sa ní cutnúni iní-ndó nacuaá ta xica nduu cuáhá<sup>n</sup> ñuyú-a, te ní sáá nduu sã ío xini ñuhu-xi ndixi túu iní-ó càda-o nchaa nacuaá cáhá<sup>n</sup> Yá Ndiõxí, chí vitna sa ní cuyatni-gá nduu nacuaa ñaha Xítohó Jesucristú xii-o dàcúúxí ndeé cùtnáhá ní sándáá iní-ó tnúhu-gá. <sup>12</sup> Te cada iní-ndó sã datná ñ<sup>n</sup> niú sá sã ta cuyatni túndaá, duca<sup>n</sup> sãtnahá-xi cùu ñuyú yíca cuèchi-a chí sa ta cuyatni nduu quixi tucu Xítohó Jesucristú, te núu xiã<sup>n</sup> xini ñuhu-xi dañ-a-o nchaa sã cuèhé sá dúhá te cada-o mèe-ni sã vãha, te duca<sup>n</sup> te ní ñ<sup>n</sup> sã cuèhé sá dúhá vã cùnùu-xi taxi tñuní ñáhá-xí xii-o, te duca<sup>n</sup> te vá cúú-gá-ó datná ñáyiu ndècu núu née chí cuu-ná-ó datná ñáyiu ndècu núu ditó. <sup>13</sup> Te cada-o nchàa nacuaá tàú-xi cunduu cundecu-o datná tàú-xi cada ñáyiu ndècu ìchi Xítohó Jesucristú, te vá quihí<sup>n</sup>-ó vico cuehé vico duha, te vá cúú-ó ñáyiu quihu, te ni vã cáhá<sup>n</sup> ndihí-o ñáyiu dìhí te núu ñã díú ñàdihí-ó cùú-yu, te duca<sup>n</sup>-ni cuè ñáyiu dìhí tucu vá cáhá<sup>n</sup> ndihí-yu tée te núu ñã díú yí-yu cùu-güedé, te ni vã cùndècu-o ìchi díí ìní, te ni vã nàá-ó ndihí tnaha ñáyiu-o, te ni vã cúú-ó ñáyiu cuédú ìní. <sup>14</sup> Te vitna nchòhó dañ-a-ndo mèe-ndo sá Xítohó Jesucristú ná chindee ñaha-gá xii-ndo càda váha-ndo cundecu-ndo datná quidé mèe-gá ndécú-gã, te vá cání-gã iní-ndó càda-ndo datná ní xóo cada-ndo cùtnáhá ní cùnùu nchàa sã cuèhé sá dúhá iní-ndó.

## 14

*Vá cuátnúhu tnaha-o nacuaá ndècu-o ìchi Xítohó Jesucristú*

<sup>1</sup> Te núu ñ<sup>n</sup> ñáyiu ndècu ìchi Xítohó Jesucristú ñã túú tècú tñuní váha-yu nacuaá cuení Yá Ndiõxí cadá-yu, te quehe<sup>n</sup> cuendá-ni-ndó-yu te vá ténáá tnáhá-ndó ndihí-yu. <sup>2</sup> Chí ío ñáyiu sàni iní sá cúú vãha iní Yá Ndiõxí sá cúú càxí-yu nani nihí-yu, te dava ñáyiu ñã túú cùtnuní váha iní-yu nacuaá cáhá<sup>n</sup> Yá Ndiõxí te mee-ni

yǔcú xéxi-yu. <sup>3</sup> Te ñáiyu xèxi nchaa núú sǎ nihí-yu te vá dáquèe tihǔ-yu ñáiyu ñá túú xèxi, te duca<sup>n</sup>-ni ñáiyu duca<sup>n</sup> ñà túú xèxi-á<sup>n</sup> vǎ cuátnùhu-yu nchaa ñáiyu duca<sup>n</sup> xèxi nchaa núú sǎ nihí-xi-á<sup>n</sup>, chi tnàhá ñáiyu duca<sup>n</sup> xèxi nchaa núú sǎ nihí-xi-á<sup>n</sup> quéhé<sup>n</sup> cuendá ñáhá Yǎ Ndiǒxí xií-yu. <sup>4</sup> Te ñá túú ndècu ndihí-o tnúhu ndee ínì cuatnúhu-o ñáiyu xínu cuechi, chi mee ñáiyu cùu patród<sup>n</sup>-yu tàú-yu cáhá<sup>n</sup>-yu te núu cùndáá ñáiyu xínu cuechi núú-yu àdi ñá túú cùndáá-yu. Te duca<sup>n</sup> sǎtnahá-xi cùu ñáiyu xínu cuechi núú Yǎ Ndiǒxí, chi mee-gǎ cáhá<sup>n</sup>-gǎ te núu nása quidé-yu, te ñu-ni mee-gǎ cada te cundáá-yu cundecú-yu núú-gǎ.

<sup>5</sup> Te na càchí tnúhu tucu-í xii-ndo sǎ ío ñáiyu càchí sǎ ío dava nduu ío càhnu cuu-xi, te ío tucu dava ñáiyu càchí-yu sǎ ñ<sup>n</sup>-ni cuu-xi nchaa-ni nduu, te xini ñuhu-xi sǎ cùtnuní ndáá iní-yu sǎ ndáá cúú-xí nàcuáa càhá<sup>n</sup>-yu ñ<sup>n</sup> ñ<sup>n</sup>-yu. <sup>6</sup> Te ñáiyu cánehe íí dava nduu quidé-yu sǎ néhě-yu sǎ yíñùhu núú Yǎ Ndiǒxí, te ñáiyu càchí sǎ ñ<sup>n</sup>-ní cùu-xi nchaa-ni nduu quidé-yu sǎ néhě-yu sǎ yíñùhu núú Yǎ Ndiǒxí tnàhá-yu. Te ñu-ni duca<sup>n</sup> sǎtnahá-xi cùu nchaa ñáiyu xèxi nchaa nani nihí-yu, chi quidé-yu sǎ néhě-yu sǎ yíñùhu núú Yǎ Ndiǒxí, chi ndàcá<sup>n</sup> táhǔ-yu núú-gǎ cuendá nchaa sǎ nihí-yu. Te ñu-ni duca<sup>n</sup> sǎtnahá-xi cùu nchaa ñáiyu ñá túú xèxi nchaa núú sǎ nchító-ó chi quidé-yu sǎ néhě-yu sǎ yíñùhu núú Yǎ Ndiǒxí, te ndàcá<sup>n</sup> táhǔ-yu núú-gǎ cuendá nchaa sǎ nihí-yu.

<sup>7</sup> Te nchoo cuèi vitna ndècu vívú-ó àdi cuèi na cùú-ó dico ñá díú cuendá méé-ó cùú-ó. <sup>8</sup> Chi vitna ndècu vívú-ó te ndècu-o sǎ cúú-xí Xítóhó Jesucristú àdi cuèi na cùú-ó dico cuú-ó ñu-ni sǎ cúú-xí-gǎ, núu xiǎ<sup>n</sup> cuèi vitna ndècu vívú-ó àdi cuèi na cùú-ó dico ñu-ni Xítóhó Jesucristú cúú cuendá ñáhá-gǎ xii-o. <sup>9</sup> Chi Xítóhó Jesucristú ní xihí-gǎ te ní ndoto-gǎ, te vitna cùu-gǎ Xítóhó nchaa ñáiyu, cuèi ñáiyu xíndecu vívú te cuèi ñáiyu ní xihí.

<sup>10</sup> Te nchòhó, ñá túú ndùu váha-xi cuatnúhu tnàha-ndo nacuáa ndècu-ndo ichi Xítóhó Jesucristú, te ní ñà túú ndùu váha-xi daquèe tihú tnàhá-ndó, chi nchaa-o sǎa

nduu cùndecu-o núú Xítóhó Jesucristú, te mee-gǎ cachí-gǎ te núu ní quide ndáá-ó àdi ñá túú ní quide ndáá-ó. <sup>11</sup> Te Yǎ Ndiǒxí càchí-gǎ núú tùtú-gǎ:

Yúhú Yǎ Ndiǒxí ndécù-í càchí tnúhu ndáá-í xii-ndo sǎ nchaa ñáiyu ngüñí xití-yu núu-í,

te ncháa-yu cáhá<sup>n</sup>-yu sǎ yúhú cúu-í Ndiǒxí. Duha càchí Yǎ Ndiǒxí núú tùtú-gǎ. <sup>12</sup> Núu xiǎ<sup>n</sup> nchaa-o ndì díí<sup>n</sup> nàcani tnúhu-o núú Yǎ Ndiǒxí nchaa sǎ ní quide-o.

### *Vá dácuíta nihnu tnàha-o*

<sup>13</sup> Núu xiǎ<sup>n</sup> vá cuátnùhu tnàha-gǎ-ndó, te cada yica-ndo càda-ndo mee-ni sǎ vǎha, te vá cáda-ndó ñ<sup>n</sup> sǎ ñà túú tàú-ndó càda-ndo cuendá sǎ vǎ cuíta nihnu dava ñáiyu ndècu ndihí-ndo ichi Xítóhó Jesucristú. <sup>14</sup> Te yúhú ndécú ndihí-í Xítóhó Jesucristú te cùtnuní ndáá iní-í sǎ ncháa núú sǎ cúú càxi-o cuu-ni càxi-o te vá cúú cuèchi. Te ñáiyu sàni iní sǎ vǎ cúú càxi-yu te núu na càxi-yu te cuu cuèchi xií-yu. <sup>15</sup> Te nchòhó, te núu cuendá sǎ xéxi-ndó nchaa núú sǎ cúú càxi-ndo, cuendá xiǎ<sup>n</sup> ñá túú-gǎ cúú vǎha iní nchaa ñáiyu ndècu ndihí-ndo ichi Xítóhó Jesucristú, te ñá túú-gǎ quidé-ndó sǎ cúú iní ndisa-ndó-yu te núu duca<sup>n</sup> na càda-ndo, te núu ñ<sup>n</sup> sǎ sání iní-ndó càxi-ndo te cùtnuní iní-ndó sǎ xiǎ<sup>n</sup> cada-xi cuíta nihnu ñáiyu ndècu ndihí-ndo ichi Xítóhó Jesucristú te vá càxi-ndó xiǎ<sup>n</sup> te núu duca<sup>n</sup>, chi Xítóhó Jesucristú ní xihí-gǎ cuendá-yu. <sup>16</sup> Te núu ñ<sup>n</sup> sǎ quidé-ndó sàni iní-ndó sǎ cúú-xí ñ<sup>n</sup> sǎ vǎha, te ñáiyu càchí-yu sǎ ñà túú vǎha te vá cáda-ndó cuendá sǎ vǎ càhá<sup>n</sup> cuéhé-yu cuendá-ndó. <sup>17</sup> Te sǎ yíndàha ñaha Yǎ Ndiǒxí xii-o xiǎ<sup>n</sup> ío xini ñuhu-xi cada ndáá-ó cùndecu-o, te cundecu váha ndihí tnàha-o, te cudíí iní-ó cùndecu-o chi Espiritú-gǎ ndécú ndihí ñaha-xi xii-o, te nchaa xéhé ío-gǎ cùnùu dacúxí sǎ cóhó sǎ càxi-ó. <sup>18</sup> Te nchaa ñáiyu duca<sup>n</sup> quide nchaa sǎ ío-gǎ xini ñuhu-xi, xinu cuechí-yu núú Xítóhó Jesucristú, te sǎ dúcá<sup>n</sup> quidé-yu te ndùu vétú iní Yǎ Ndiǒxí, te cùdíu-yu núú ñáiyu.

<sup>19</sup> Te nchoo chí ná ndècu-o nacuáa cada-o cùndecu ndihí váha tnàha-o, te nducu tùcu-o nacuáa cada-o chindee tnúhu tnàha-o nacuáa cuita cundáá-gǎ-ó núú Xítóhó Jesucristú quíhí<sup>n</sup>. <sup>20</sup> Te ñá díú sǎ

cuendá ì<sup>n</sup> núú sǎ xéxí-ó, te dàquee tíhú-ó sǎ vǎha ní quide ñaha Yǎ Ndiǒxí xii tnàha ñáyiu-o. Te na cǎchí tnúhu ndáá-í xii-ndo sǎ ncháá-ní núú sǎ cúú cǎxi-o, te dìcó-ni sǎ ñà túú ndúu váha-xi núú sǎ cuendá-ni sǎ cǎxí-ó ì<sup>n</sup> núú sǎ cúú cǎxi-o cuíta nihnu ì<sup>n</sup> tnàha ñáyiu-o. <sup>21</sup> Te váha-gǎ sǎ vǎ cǎxí-ó cùñú te vá cóhó ndídí, te ni ñà túú nǎgǎ cada-o te núu xito-o sǎ xǎ<sup>n</sup> cada te ngúíta tnàha ñáyiu-o cǎdá-yu sǎ ñà túú vǎha, àdi xito-o sǎ xǎ<sup>n</sup> cada te ngúíta-yu cani ì<sup>n</sup> cani úú iní-yu cundecú-yu ichi Xítohó Jesucristú, te vá cúndǎá-gǎ-yu núú-gǎ te núu duca<sup>n</sup> na cǎda-o. <sup>22</sup> Te núu ì<sup>n</sup> sǎ vǎha sàni iní-ó cǎda-o, te vá dátúu-o núú ñáyiu chi mee-ni núú Yǎ Ndiǒxí dátúu-o. Te nchoo cùu-o ñáyiu ío váha táhú-xi te núu cùtnuní ndáá iní-ó sǎ quidé ndáá-ó núu nándi cùu sǎ quidé-ó, te cùtnuní iní-ó sǎ ñà díú ì<sup>n</sup> cuéchi cùu-xi sǎ quidé-ó. <sup>23</sup> Te núu nchoo sàni iní-ó sǎ quidé vǎha-o àdi ñà túú quide váha-o òré xéxí-ó ì<sup>n</sup> núú sǎ xéxí-ó, te cuu cuéchi xii-o te núu duca<sup>n</sup> na cǎda-o. Te duca<sup>n</sup> cùu cuéchi xii-o chi ñà túú ì<sup>n</sup>-ni sǎ sání iní-ó, chi nchaa núú sǎ quidé-ó sàni ì<sup>n</sup> sani úú iní-ó núu váha-ni àdi ñà túú vǎha-ni, te cuu cuéchi xii-o sǎ dúcǎ<sup>n</sup> quide-o.

## 15

### *Cada-o sǎ vǎha sǎ cúú-xí tnàha ñáyiu-o*

<sup>1</sup> Te nchoo ñáyiu ío váha sàndǎá iní ñáhá xii Xítohó Jesucristú, xini ñuhu-xi cuáñaha-o tnúhu ndee iní xii ñáyiu ñà túú ñihí ndéé cundecu ichi-gǎ, te vá cǎdá-ó mèe-ni sǎ cúú-xí mèe-o. <sup>2</sup> Te cada-o sǎ vǎha nàcuáa cuu váha iní tnàha ñáyiu-o cuendá cuu-xi sǎ vǎha sǎ cúú-xí-yu, te duca<sup>n</sup> cuíta níhí ndéé-gǎ-yu quindǎá iní-yu Xítohó Jesucristú. <sup>3</sup> Te Xítohó Jesucristú ñà túú ní quide-gǎ mee-ni sǎ cúú vǎha iní méé-gǎ, te ní quee ndáá-xi nàcuáa cǎhá<sup>n</sup>-xi núú tütú Yǎ Ndiǒxí nàcuáa ní xáha<sup>n</sup> Xítohó Jesucristú xii-gǎ, te cǎchí-xi: “Nchaa ñáyiu cùu úhú iní ñáhá xii-n ní xícuéhé ní xíduha ñáhá-yu xii-í”, duha cǎhá<sup>n</sup>-xi núú tütú Yǎ Ndiǒxí nàcuáa ní xáha<sup>n</sup> Xítohó Jesucristú xii-gǎ. <sup>4</sup> Te ndéé sanaha ñí ngúndeé nchaa tnúhu Yǎ Ndiǒxí núú tütú-gǎ, te duca<sup>n</sup> ñí ngúndeé cuendá dacuàha-o, te tnúhu-á<sup>n</sup> dánèhé ñáhá-xí cùnduu cahnu iní-ó cuéi nándi nà váha-o cundecu-o ichi-gǎ, te sǎ

xii tnúhu-á<sup>n</sup> te vá ndìhú-gǎ iní-ó cundecu-o, te díu-ni sǎ xii tnúhu-á<sup>n</sup> cundecu ndìhi-o tnúhu ndee iní. <sup>5</sup> Te Yǎ Ndiǒxí quidé-gǎ ndécú ndìhi-o tnúhu cǎhnu iní, te díu-ni-gǎ quidé-gǎ ñà túú ndìhú iní-ó ndècu-o. Te xicá<sup>n</sup> táhú-í núú-gǎ sǎ díú-gǎ ná cǎdá te cuu ì<sup>n</sup>nuu-ndo cundecu-ndo datná ní quide mee Xítohó Jesucristú cùtnáhá ní xíndecu-gǎ ñuyú-a. <sup>6</sup> Te duca<sup>n</sup> ncháa-ndo cuu ì<sup>n</sup>nuu-ndo, te daníhí tnáhá-ndó yǒcǒ tǎchí-ndó te cǎchí-ndó sǎ ìo cǎhnu cuu Yǎ Ndiǒxí Yáá cúú Tǎtá Xítohó Jesucristú.

### *Ñáyiu ñà túú cùu ñáyiu isràél ní ñihí-yu tnúhu Xítohó Jesucristú*

<sup>7</sup> Te núu xǎ<sup>n</sup> chí quéhé<sup>n</sup> cuendá tnáhá datná ní quide Xítohó Jesucristú ní quehe<sup>n</sup> cuendá ñáhá-gǎ xii-o, te núu duca<sup>n</sup> na cǎda-ndo te ío cuu cǎhnu Yǎ Ndiǒxí. <sup>8</sup> Te na cǎchí tnúhu-í xii-ndo sǎ Xítohó Jesucristú ní quixi-gǎ ní quide-gǎ sǎ vǎha sǎ cúú-xí ñáyiu isràél, te sǎ dúcǎ<sup>n</sup> ñí quide-gǎ xǎ<sup>n</sup> cùtnuní ndáá iní-ó sǎ Yǎ Ndiǒxí quidé-gǎ ì<sup>n</sup> sǎ cǎhá<sup>n</sup>-gǎ, chi Xítohó Jesucristú ní quide-gǎ nchaa nàcuáa ní xáha<sup>n</sup> Yǎ Ndiǒxí xii cue ñani tnáhá-ó ñí xíndecu ndéé sanaha. <sup>9</sup> Te duca<sup>n</sup> ñí quide Xítohó Jesucristú sǎ vǎha sǎ cúú-xí ñáyiu isràél cuendá nchaa ñáyiu ñà túú cùu ñáyiu isràél cǎchí-yu sǎ ìo cǎhnu cuu Yǎ Ndiǒxí, te duca<sup>n</sup> quèsahá-yu chí ío cùndahú iní ñáhá-gǎ chíndèe ñaha-gǎ xii-yu, te quee ndáá-xi nàcuáa cǎhá<sup>n</sup>-xi núú tütú Yǎ Ndiǒxí núú cǎchí-xi:

Yúhú cǎchí-í sǎ ìo cǎhnu cuu-n núú ncháa ñáyiu ñà túú cùu ñáyiu isràél,

te cata-í ndudú chiñuhu ñaha-í xii-n.

Duha cǎchí-xi núú tütú-gǎ <sup>10</sup> Te cǎchí tucu-xi núú tütú-gǎ:

Te nchòhó ñáyiu ñà túú cùu ñáyiu isràél ío chí cúdǎ<sup>n</sup> iní ndìhi ñáyiu isràél ñáyiu ndècu ndìhi-í.

Duha cǎchí-xi núú tütú-gǎ. <sup>11</sup> Te cǎchí tucu-xi ñgǎ xichi núú tütú-gǎ:

Nchaa nchòhó ñáyiu ñà túú cùu ñáyiu isràél chí cǎhá<sup>n</sup> sǎ ìo cǎhnu cuu Yǎ Ndiǒxí, te nchaa ñáyiu na cǎhá<sup>n</sup>-yu sǎ ìo cǎhnu cuu-gǎ.

Duha cǎchí-xi núú tütú-gǎ. <sup>12</sup> Te ndí Chàíá cǎchí tucu ndí núú tütú Yǎ Ndiǒxí:

Coo ì<sup>n</sup> ñani tnáhá ndí Isàí téé ní xíndecu ndéé sanaha,



te téé-á<sup>n</sup> taxi tnùní-dé cue ñáyiú ñá túú cùu ñáyiú isràél,  
te ñáyiú-á<sup>n</sup> cundee cùu cahnu iní ñáhă-yu xii-dé.

Duha ní cáhá<sup>n</sup> ndí Chàíá càchí-xi núú tütú-gá.

13 Te xicá<sup>n</sup> táhù-í núú Yă Ndiöxí Yaá ní taxi tnúhu ndee ìní ndécú ndìhi-o sá méé-gă ná càda ío cudíí ìní-ndó cùndecu-ndo, te duca<sup>n</sup> ío váha cundecu ìní-ndó nũú-gă chi sândáá ìní-ndó-gă, te duca<sup>n</sup> Espiritú-gá ná càda te uu<sup>n</sup>-gá uu<sup>n</sup>-gá cuita ngúndecu ndìhi-ndo tnúhu ndee ìní quíhí<sup>n</sup> sá cáda váha ñaha-gă xii-ndo.

14 Te nchòhó ñáyiú ndècu ndìhi-í ichi Xítohó Jesucristú cùtnuní ndáá ìní-í sá nchòhó ío váha ìní-ndó, te duca<sup>n</sup> ío váha cùtnuní ìní-ndó nchàa tnúhu váha, te duca<sup>n</sup> ío dàsahú tnáhá-ndó nàcuáa cundecu-ndo. 15 Te dava tnúhu ní chídó tnùní-í núú tütú-a cùu-xi tnúhu sá ío cáhá<sup>n</sup>-í dóho-ndo, te duca<sup>n</sup> ní tee-í cuendá sá nchòhó dandacu ìní-ndó tnúhu-á<sup>n</sup>, te ní tee-í chi Yă Ndiöxí ní cundáhú ìní ñáhă-gă xii-í ní taxi-gă chiu<sup>n</sup> quide-í 16 xínú cuèchi-í núú Xítohó Jesucristú cáhá<sup>n</sup>-í tnúhu-gá núú ñáyiú ñá túú cùu ñáyiú isràél. Te tnúhu-á<sup>n</sup> cúu-xi tnúhu sá sánú ìchi ñaha xii-o nacuáa naníhí tàhú-ó, te duca<sup>n</sup> dànehé-í ñáyiú ñá túú cùu ñáyiú isràél tnúhu Yă Ndiöxí cuendá cuú-yu dàtná ì<sup>n</sup> sá ndúú tǎhú-gă, te Espiritú-gá quidé-xí cùu-yu ñáyiú cùdìu núú-gă, te cùu váha ìní ñáhă-gă xii-yu.

17 Te ío váha cùu ìní-í cuendá nchaa chiu<sup>n</sup> quide-í sá cúu-xí Yă Ndiöxí, chi Xítohó Jesucristú ndécú ndìhi ñaha-gá xii-í.

18 Te mee-ni nàcuáa quide Xítohó Jesucristú chindèe ñaha-gá xii-í xíá<sup>n</sup>-ni cáhá<sup>n</sup>-í, te sá dúcá<sup>n</sup> quide-gá xíá<sup>n</sup> ní sândáá ìní cue ñáyiú ñá túú cùu ñáyiú isràél tnúhu-gá. Te duca<sup>n</sup> chi ní chindee ñaha-gá xii-í ní cáhá<sup>n</sup>-í tnúhu-gá te duca<sup>n</sup>-ni ní chindee ñaha-gá xii-í ní quide-í titní núú sǎ ní quide-í núu-yu ní xiní-yu. 19 Te Espiritú Yă Ndiöxí ní quide-xi ní quide-í titní núú sǎ vǎ yò tnàhí ndàcu cada ní xiní-yu te ío ní cuñúhu-yu. Te nchaa ñuú ní sáhá<sup>n</sup>-í ní cáhá<sup>n</sup>-í tnúhu Xítohó Jesucristú núú ñáyiú cuèi ndéé ñuú Jerusàlén, te cuèi ndéé distritú Ìliricú, núu nchaa ñuú-á<sup>n</sup> ní sáhá<sup>n</sup>-í ní cáhá<sup>n</sup>-í núu-yu tnúhu sá cáhá<sup>n</sup> nàcuáa

naníhí tàhú-ó. 20 Te duca<sup>n</sup> ío ndècu ndee-í cáhá<sup>n</sup>-í tnúhu sá cáhá<sup>n</sup> nàcuáa naníhí tàhú-ó núú vátá ñihí-gá-yu tnúhu cuendá Xítohó Jesucristú, te duca<sup>n</sup> quide-í chi ñá túú cuìní-í quíhí<sup>n</sup>-í cáhá<sup>n</sup>-í tnúhu-gá núú sǎ xíndecu ñáyiú cáhá<sup>n</sup> tnúhu-gá. 21 Te quide-í nàcuáa cáhá<sup>n</sup>-xi núú tütú Yă Ndiöxí núú càchí-xi: Ñáyiú vátá ñihí-gá tnúhu cuendá Yaá quixi ñuyú te ñihí-yu, te duca<sup>n</sup> tècú tnùní-yu tnúhu-gá. Duha càchí-xi núú tütú-gá.

### *Té Păblú cuìní-dé quíhí<sup>n</sup>-dé ñuú Rómá*

22 Te sá dúcá<sup>n</sup> cáhá<sup>n</sup>-í tnúhu-gá núu xíá<sup>n</sup> ñá túú ní ndàcu-í quixi-í quixi coto ñaha-í xii-ndo cuèi duca<sup>n</sup>-ni sàni ìní-í quixi coto ñaha-í. 23 Te ní cuu titní cuía duca<sup>n</sup>-ni sàni ìní-í quixi coto ñaha-í xii-ndo, te vitna ní ndìhi-í nchaa iha ní cáhá<sup>n</sup>-í tnúhu Xítohó Jesucristú núú nchaa ñáyiú. 24 Núu xíá<sup>n</sup> sání ìní-í sá ndùu na quíhí<sup>n</sup>-í nació<sup>n</sup> Èspañá te yáha cáhá<sup>n</sup>-í quini-í nása ndècu-ndo, te dàvá-á<sup>n</sup> ío cudíí ìní-ó cùndecu tnaa-o, te duca<sup>n</sup> te òré nucúhu<sup>n</sup> tucu-í ichi te cada ndee ìní-ndó chindee ñaha-ndo xii-í. 25 Te vitna quíhí<sup>n</sup>-í ñuú Jerusàlén quínehe-í sá ndúú tǎhú ñáyiú ndècu ichi Xítohó Jesucristú xíndecu yàcá<sup>n</sup>. 26 Te ñáyiú xíndecu ichi Xítohó Jesucristú ndécú distritú Macèdoniá, ndìhi distritú Acăyá ní cuu ì<sup>n</sup> núu-yu ní sacá<sup>n</sup> tnáhă-yu sá ndúú tǎhú ñáyiú ndàhú xíndecu ichi-gá ndécú ñuú Jerusàlén. 27 Te duca<sup>n</sup> tnàhí ní cudíí ìní-yu cadá-yu, te duca<sup>n</sup> tnàhí tàú-yu cadá-yu chindèe-yu ñáyiú xíndecu ñuú Jerusàlén. Te ñáyiú Macèdoniá ndìhi ñáyiú Acăyá-á<sup>n</sup> ñà túú cùu-yu ñáyiú isràél. Te ñáyiú xíndecu ñuú Jerusàlén cúu-yu mee-ni ñáyiú isràél, te duca<sup>n</sup> tàú-yu cadá-yu chi sá cuendá ñáyiú isràél-á<sup>n</sup> ní ñihí-yu tnúhu sá cáhá<sup>n</sup> nàcuáa naníhí tàhú-yu, núu xíá<sup>n</sup> tàú-yu chindee ñahă-yu ndìhi nchaa sá ñihí-yu. 28 Te sátá ná yáha quínguáha cuendá-í-yu sá ndúú tǎhú-yu, te duca<sup>n</sup> te dàtnuní quee-í quíhí<sup>n</sup>-í nació<sup>n</sup> Èspañá, te ichi yáha-í yáha cáhá<sup>n</sup>-í núú ndécú-ndó. 29 Te cùtnuní ndáá ìní-í sá òré ná quèxio-í núú ndécú-ndó, te Xítohó Jesucristú ío chindee ñaha-gá xii-í cáhá<sup>n</sup>-í tnúhu-gá núú-ndó nàcuáa ío váha cundecu-ndo ìchi-gá.



30 Te nchòhó ñáyi ndècu ndìhi-í ichi Xítohó Jesucristú cáhá<sup>n</sup> ndàhú-í núú-ndó sã ïo chindee ñaha-ndo xii-í cáhá<sup>n</sup> ndìhi-o Yã Ndiõxí cuendá-í, te duca<sup>n</sup> càda-ndo chi ndècu ndìhi-ndo Xítohó Jesucristú. Te Espíritú Yã Ndiõxí quidé-xí cùu iní tnàhá-ó ì<sup>n</sup> ì<sup>n</sup>-o. 31 Te ío chí càcá<sup>n</sup> táhú núú Yã Ndiõxí sá ná còto ñaha-gá xii-í, te ñá túú nã cada ñaha nchàa ñáyi ñá túú sándáá iní ñáhá xii-gá xĩndecu distritú Jùdeá. Te cáca<sup>n</sup> táhú tùcu-ndo núú-gã sá ncháá sã cánèhe-í quíhí<sup>n</sup> nduu táhú ñáyi ndècu ichi-gá ndécú ñúú Jerusalén ío váha cuu iní-yu quehe<sup>n</sup> cuendá-yu. 32 Te duca<sup>n</sup> càda-ndo cuendá sá núú Yã Ndiõxí ná càchí-gá te ío cudí<sup>n</sup> iní-í òré quexio-í núú ndécú-ndó, te ío váha cuu iní-í cundecu ndìhi ñaha tnà xii-ndo. 33 Te vitna xicá<sup>n</sup> táhú-í núú Yã Ndiõxí Yaá quidé ïo váha cùu iní-ó ndècu-o sá ná chindee chitúu ñaha-gã xii-ndo nchàa-ndo. Te duca<sup>n</sup> na cùnduu.

## 16

*Té Pãblú quidé ndèe iní-dé ñáyi ndècu ñúú Ròmá*

1 Te yúhú tendaha-í tá Fèbé quixi-xi núú ndécú-ndó, te tnàhá-xi ndècu-xi ichi Xítohó Jesucristú, te quide-xi chiu<sup>n</sup> Yã Ndiõxí sá cúú-xí ñáyi ndècu ichi Xítohó Jesucristú xĩndecu ñúú Cèncreá. 2 Te cuiní-í sá ïo váha cuu iní-ndó quèhe<sup>n</sup> cuendá-ndó-xí, chi ndècu ndìhi-xi Xítohó Jesucristú, te cada-ndo nàcuáa tàú-xi cunduu dàtná tàú-xi cada ñáyi ndècu ichi-gá, te ío chindee-ndo-xi te núú ná cúú sã xíní ñùhu-xi, chi tnàhá-xi ío chindee-xi cue ñáyi ndècu ichi Xítohó Jesucristú, te tnàhá yúhú duca<sup>n</sup> ïo chindee-xi.

3 Te cúñaha-ndo ïo na càda ndee iní té Àquilú ndìhi ñadìhí-dé tá Priscilá, chi ñáyi-á<sup>n</sup> nĩ quide chiu<sup>n</sup>-í ndìhí-yu ní quide-ndí chiu<sup>n</sup> Xítohó Jesucristú. 4 Chi mèe-yu ní cácu cuú-yu sá cuendá sá nĩ dácacu ñáhá-yu xii-í sá nĩ yáha-í, núú xĩã<sup>n</sup> ío ndàcá<sup>n</sup> táhú-í núú-yu, te ñá díú-ní yúhú duca<sup>n</sup> ïo ndàcá<sup>n</sup> táhú-í núú-yu chi tnàhá nchaa ñáyi ñá túú cùu ñáyi isràél xĩndecu ichi-gá xĩndecu nchaa xichí duca<sup>n</sup> ïo ndàcá<sup>n</sup> táhú-yu núú tẽ Àquilú ndìhi núú ñadìhí-dé tá Priscilá. 5 Te cúñaha tùcu-ndo sá ïo na càda ndee iní nchaa ñáyi xĩndecu ichi

Xítohó Jesucristú tàcá vehe té Àquilú ndìhi tá Priscilá dácuhá-yu tnúhu-gá, te cúñaha tùcu-ndo sá ïo na càda ndee iní té Epènetú chi tnàhá-dé ío ñùhu iní-í-dé, chi téé-á<sup>n</sup> cúú-dè téé díhna nuu nĩ sándáá iní tnúhu Xítohó Jesucristú distritú Acáyá. 6 Te cúñaha tùcu-ndo sá ïo na càda ndee iní tá Màriá xichí ndécú ndìhi-ndo, xichí ío ndècu ndee xinu cuechi núú Xítohó Jesucristú. 7 Te cúñaha tùcu-ndo sá ïo na càda ndee iní cue téé cùu ndi mee-í té Andrónicú ndìhi té Jùniás, chi tnàhá-güedé ní xihí ndìhi ñaha-güedé xii-í vecaá, te ío cùdú-güedé núú nchaa cue téé ní táuchíú<sup>n</sup> Jèsús cáhá<sup>n</sup> tnúhu-gá. Te díhna-gá-güedé ní sándáá iní-güedé tnúhu Xítohó Jesucristú dácúúxí yúhú.

8 Te cúñaha-ndo sã ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucristú. 9 Te cúñaha tùcu-ndo xii té Bãnú téé cùndìhi ñaha xii-o quide-o chiu<sup>n</sup> Xítohó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tnàhá-dé ío ñùhu iní-í-dé. 10 Te cúñaha tùcu-ndo xii té Àpelés sá ïo na càda ndee iní-dé, chi téé-á<sup>n</sup> ïo váha cùndáá-dé núú Xítohó Jesucristú, te cúñaha tùcu-ndo xii ñáyi xĩndecu vehe té Aristóbulú sá ïo na càda ndee iní-yu. 11 Te cúñaha-ndo xii té Heròdión téé cùu ndi mee-í sá ïo na càda ndee iní-dé, te cúñaha-ndo xii ñáyi ndècu ichi Xítohó Jesucristú xĩndecu vehe té Nàrcisú sá ïo na càda ndee iní-yu. 12 Te cúñaha-ndo xii tnàhá tá Trifená ndìhi tá Trifosá sá ïo na càda ndee iní-yu, chi tnàhá-yu quidé-yu chiu<sup>n</sup> Xítohó Jesucristú. Te tnàhá tá Pèrsidá xichí ndécú ndìhi-o ichi Xítohó Jesucristú cúñaha-ndo xii-xi sá ïo na càda ndee iní-xi, chi tnàhá-xi ío ndècu ndee-xi quide-xi chiu<sup>n</sup> Xítohó Jesucristú. 13 Te cúñaha-ndo tnàhá té Rũfú téé ío váha sándáá iní tnúhu Xítohó Jesucristú sá ïo na càda ndee iní-dé ndìhi nãná-dẽ, chi ñaha-á<sup>n</sup> quidé iní-í sá cúú-á<sup>n</sup> dàtná nãná-í. 14 Te cúñaha-ndo sã ïo na càda ndee iní té Àsincritú, ndìhi té Flègonté, ndìhi té Hèrmás, ndìhi té Pàtrobás, ndìhi té Hèrmés, ndìhi nchaa dava-gá cue ñáyi ndècu ndìhi-o ichi Xítohó Jesucristú xĩndecu ndìhi-güedé. 15 Te cúñaha tùcu-ndo sá ïo na càda ndee iní té Filológó, ndìhi tá Jüliá, ndìhi té Nèréú, ndìhi

cúha té Nèréú, ndihi tá Òlimpás, ndihi nchaa dava-gá ñáyiú sàndáá iní tnúhu Xítohó Jesucristú xĩndecu ndihí-yu.

16 Te ío yĩñùhu cada ndee iní tnáhá-ndó ññ ññ-ndo. Te nchaa ñáyiú tàcá nchaa iha dàcuaha tnúhu Xítohó Jesucristú quidé ndèe iní ñáhã-yu xii-ndo.

17 Te nchòhó ñáyiú ndècu ndihi-í ichi Xítohó Jesucristú càhá<sup>n</sup>-í dóho-ndo sã cádá cuèndá-ndó nũu ío ñáyiú quide nacuáa vá cúú ññnuu-ndo cundecu-ndo, chi ñáyiú-án sánú ìchi ñahá-yu ññ ichi ñã túú vãha, chi ñã túú ññ-ni cuu-xi tnúhu càhá<sup>n</sup>-yu ndihi tnúhu sá ñĩ níhí-ndó ndècu ndihi-ndo, te ñáyiú duca<sup>n</sup> xĩquide vá nihí tnáhá-gã-ndó ndihí-yu. 18 Chi ñáyiú-án ñã túú quidé-yu chiú<sup>n</sup> sá cúú-xí Xítohó Jesucristú, chi mee-ni sã cúú-xí mèe-yu quidé-yu, te mee-ni nchàa tnúhu sá ío víi ío váha cuáhá<sup>n</sup> càhá<sup>n</sup>-yu òré cuáhá<sup>n</sup>-yu dándahú-yu nchaa ñáyiú ío yáchí sàndáá iní-xi ññ tnúhu. 19 Te nchaa ñáyiú nihí-yu tnúhu sá nchòhó sàndáá iní-ndó tnũhu Xítohó Jesucristú, núu xĩã<sup>n</sup> ío cùdĩ iní-í. Te cuìní-í sá nchòhó ío váha cutnùní iní-ndó nàcuáa cada-ndo mèe-ni sá vãha, te vá cání iní-ndó càda-ndo datná xĩquide nchaa ñáyiú ndècu ichi cuehé ichi duha.

20 Te Yá Ndiõxí Yaa quidé ío váha cùu iní-ó ndècu-o ío ndihí cada-gá cuèndá sá sàcuíhná ñã túú-gã ná cada ñaha-xi xii-ndo, te xìcá<sup>n</sup> táhù-í núú Xítohó Jesucristú sá ío na chĩndee chitúu ñaha-gã xii-ndo.

21 Te té Timùteú tée quide ndihi-í chiú<sup>n</sup> Xítohó Jesucristú iha quide ndee iní ñáhã-dẽ xii-ndo, te tnáhã té Lùciú, ndihi té Jàsón, ndihi té Sosipàtér cue tée cùu ndi mee-í quidé ndèe iní ñáhã-güedẽ xii-ndo.

22 Te tnáhã yúhú té Tèrciú tée càdúha tutú-a cuèndá té Pãblú quidé ndèe iní ñáhã-í xii-ndo, chi ññ-ni cùu-o ndihi Xítohó Jesucristú.

23 Te tnáhã té Gãyú tée dii vèhe-xi ndecu-í quidé ndèe iní ñáhã-dẽ xii-ndo, te diu-dé ní taxi nũu-dé vehe tàcá ñáyiú dàcuahá-yu tnúhu Xítohó Jesucristú. Te tnáhã té Èrastú tée yĩndaha díhú<sup>n</sup> ñũú quidé ndèe iní ñáhã-dẽ xii-ndo, te tnáhã té Cuártú tée ndècu ndihi-o ichi Xítohó Jesucristú quidé ndèe iní ñáhã-dẽ xii-ndo.

24 Te xìcá<sup>n</sup> táhù-í núú Xítohó Jesucristú sá ío na chĩndee chitúu ñaha-gã xii-ndo nchàa-ndo. Te duca<sup>n</sup> na cùnduu.

*Cáhã<sup>n</sup>-ó sã ío càhnu cuu Yá Ndiõxí*

25 Te vitna chí ná càchí-ó sã ío càhnu cuu Yá Ndiõxí, chi mee-gã cada te ío-gá cuita níhí ndéé-gã-ndó cùndecu-ndo ichi Xítohó Jesucristú dàtná càchí tnúhu sá càhá<sup>n</sup> nàcuáa naníhí tàhù-ó, tnúhu sá dánèhé-í ñáyiú cuèndá Xítohó Jesucristú, te nchaa tnúhu-a ññ-ni cùu-xi ndihi nchaa tnúhu sá ñĩ cachí Yá Ndiõxí cuu yuhu ndéé cùtnáhã ní ngáva ñuyíú, te vitna ní quee túu-xi, 26 chi mee Yá Ndiõxí ní dátũu-gã núú-ó vitna, te càhá<sup>n</sup>-ndí nàcuáa ní chídó tnùní cue tée ní xóo càhá<sup>n</sup> tnúhu Yá Ndiõxí ndéé sanaha. Te duca<sup>n</sup> tnũhu sá ndúú yũhu ni cuu ta xíté nuu-xi nihí ñuyíú cuáhã<sup>n</sup>, chi duca<sup>n</sup> ñĩ cachí Yá Ndiõxí Yaa ndécú nchàa nduu nchaa quíú cunduu cuèndá sá quĩndáá iní ñáhã ñáyiú xii-gã, te tnĩ-yu nchaa tnúhu càhá<sup>n</sup>-gã.

27 ¡Te ññ-dii-ni Yá Ndiõxí cúú-gã Yaa ío sàá sá xìní tnùní-xi! ¡Te nchaa-o chí ná càchí-ó sã ío càhnu cuu-gã, chi ndècu ndihi-o Xítohó Jesucristú, te duca<sup>n</sup>-ni càda-o ni caa ni quíhí! Te duca<sup>n</sup> na cùnduu. Te ío chí cádá ndèe iní-ñã vitna.

# TUTÚ DÍHNA NUU NÍ CADÚHA TÉ PÁBLÚ QUIH<sup>n</sup> NDAHA ÑÁYIU ÑUÚ CÒRINTÚ

*Té Páblú cadúha-dé tutú quíh<sup>n</sup> ndaha ñáyi ndècu ichi Xítohó Jesucristú ndécú ñúú Còrintú*

<sup>1</sup> Yúhú té Páblú ní cáhá<sup>n</sup> ñáhá Yă Ndiöxí xii-í cuendá sá cáhá<sup>n</sup>-í tnúhu Xítohó Jesucristú núú ñáyi, chi duca<sup>n</sup> ní cachí Yă Ndiöxí cunduu. Te cadúha-í tutú-a ndíhi té Söstenés té ndècu ndíhi-o ichi Xítohó Jesucristú <sup>2</sup> cuendá daquixi-í ndaha nchòhó ñáyi ndècu ichi Yă Ndiöxí ndécú ñúú Còrintú, chi nchòhó cúu-ndó ñáyi cùu cuendá Yă Ndiöxí cuendá sá ndécú ndíhi-ndo Xítohó Jesucristú. Te diu-ni-ndo cùu-ndo ñáyi ní cáhá<sup>n</sup> ñáhá Yă Ndiöxí cuendá cundecu yíñuhu-ndo núú-gă, ndíhi nchaa dava-gă ñáyi ndècu nchaa xichi, ñáyi cachí sá ïo cànnyu cuu Xítohó Jesucristú. Te Yaá-á<sup>n</sup> cúu-gă Xítohó-yu, te diu-ni-gă cúu-gă Xítohó nchoo tucu. <sup>3</sup> Te xicá<sup>n</sup> táhù-í núú Tătá-ó Dütú Ndiöxí ndíhi núú Xítohó Jesucristú sá ndi nduú-gă ïo na chindee chitúu ñaha-gă xii-ndo, te ïo váha cuu iní-ndó cundecu-ndo.

*Yă Ndiöxí ïo chindee ñaha-gă xii-o cuendá sá ndécú-ó ndíhi Xítohó Jesucristú*

<sup>4</sup> Te duca<sup>n</sup>-ni ïo ndácá<sup>n</sup> táhù-í núú Yă Ndiöxí cuendá-ndó, chi mee-gă ïo chindee chitúu ñaha-gă xii-ndo sá cuendá Xítohó Jesucristú. <sup>5</sup> Te cuendá sá ndécú-ndó ndíhi Xítohó Jesucristú, núú xiá<sup>n</sup> Yă Ndiöxí ïo chindee ñaha-gă xii-ndo sáá díquí-ndó nàcuáa cáhá<sup>n</sup>-ndó, ndíhi nàcuáa cùtnuní iní-ndó, <sup>6</sup> chi tnúhu sá ni ñíhí-ndó cuendá Xítohó Jesucristú ní quée-xi iní-ndó. <sup>7</sup> Te xiá<sup>n</sup> núu nchaa sá váha ñá túu tnàhí cùmání xii-ndo chi Yă Ndiöxí ïo chindee ñaha-gă. Te duca<sup>n</sup> quide-gă ñini nchòhó ni yùhu ni iní-ndó ndètu-ndo sáá nduu quixi tucu Xítohó Jesucristú. <sup>8</sup> Te Yă Ndiöxí duca<sup>n</sup>-ni ïo chindee ñaha-gă xii-ndo cuendá sá vă yô teñaha cuèchi nduu na quixi tucu Xítohó Jesucristú. <sup>9</sup> Te nchaa sá cáhá<sup>n</sup> Yă Ndiöxí

dacutíi quide-gă, te diu-gă cúu-gă Yaá ní cáhá<sup>n</sup> ñáhá xii-ndo cuendá cuu ñ<sup>n</sup>nuu-ndo ndíhi Déhe-gă Xítohó Jesucristú Yaá cúu Xítohó-ó.

*Ñá túu cùu ñ<sup>n</sup>nuu ñáyi ndècu ichi Xítohó Jesucristú*

<sup>10</sup> Te nchòhó ñáyi ndècu ndíhi-í ichi Xítohó Jesucristú cáhá<sup>n</sup>-í dóho-ndo sá vă ndí dí<sup>n</sup> cànny iní-ndó, te ïo cuu ñ<sup>n</sup>nuu-ndo cundecu-ndo, te ñ<sup>n</sup>-ni cànny iní-ndó, te ñ<sup>n</sup>-ni càda-ndo chi duca<sup>n</sup> cuiní-gă cunduu. <sup>11</sup> Te duha cáhá<sup>n</sup>-í dóho nchòhó ñáyi ndècu ndíhi-í ichi Xítohó Jesucristú, chi cue ñáyi vehe té Clòé ní cachí tnúhu-yu xii-í sá ñá túu cùu ñ<sup>n</sup>nuu-ndo ndècu-ndo. <sup>12</sup> Te duha nduu tnúhu ní ñíhí-í nàcuáa cùu ndècu-ndo, chi dava-ndo cachí-ndó: “Yúhú cúu-í cuendá té Páblú.” Te dava-ndo cachí-ndó: “Yúhú cúu-í cuendá té Àpolós.” Te dava-ndo cachí-ndó: “Yúhú cúu-í cuendá té Pèlú.” Te dava tucu-ndo cachí-ndó: “Yúhú cúu-í cuendá Xítohó Jesucristú”, duha cachí-ndó. <sup>13</sup> Te vá dúcá<sup>n</sup> cáhá<sup>n</sup>-ndó chi ñá túu ñá daha Xítohó Jesucristú ndécú chi ñ<sup>n</sup>dí-ni-gă. Te ñá díú yùhú té Páblú ní xíhí-í núú cùrúxí sá cuendá-ndó, te ni ñá túu ní sandute-ndo cuendá sá yùhú cuu cuendá ñáhá-í xii-ndo. <sup>14</sup> Te táxăhu xii Yă Ndiöxí chi ñá díú nchaa-ndo ni dacuandute-í, chi té Crispú-ni ndíhi té Găyú-ni ní dacuandute-í-güedé. <sup>15</sup> Te xiá<sup>n</sup> núu vá cúu tnàhí cáhá<sup>n</sup>-ndó sá ñí sandute-ndo sá cúu cuendá ñáhá-í xii-ndo. <sup>16</sup> Te ní ndacu tucu iní-í sá tnàhá tucu ñáyi cùu ndi mee té Estéfanás ní dacuandute-í, te diu-ná ñáyi-á<sup>n</sup> te sànuu sá ñá túu-gă nágá ñáyi ni dacuandute-í. <sup>17</sup> Te Xítohó Jesucristú ñá túu ní tendaha ñaha-gă xii-í sá dacuandute-í ñáyi, chi ní tendaha ñaha-gă xii-í sá cáhá<sup>n</sup>-í tnúhu-gă núu-yu, tnúhu sá cáhá<sup>n</sup> nàcuáa naníhí táhú-ó. Te ñá túu cáhá<sup>n</sup>-í dàtná cáhá<sup>n</sup> ñáyi túha. Te duca<sup>n</sup> quide-í cuendá sá nchòhó quindáá váha iní-ndó tnúhu sá cáhá<sup>n</sup> nàcuáa ní xíhí Xítohó Jesucristú núú cùrúxí. Chi núu na cáhá<sup>n</sup>-í dàtná cáhá<sup>n</sup> ñáyi túha te nchòhó vá quindáá iní-ndó tnúhu-á<sup>n</sup> nàcuáa tàú-xi cunduu.

*Sá cuendá Xítohó Jesucristú cùtnuní iní-ó sá ïo cànny cuu Yă Ndiöxí*

<sup>18</sup> Te nchaa ñáyi ta xíta ñihnu cuáhá<sup>n</sup> cachí-yu sá ñá túu nandíhi tnúhu sá cáhá<sup>n</sup>

nàcuáa ní xíhí Xítohó Jesucrístú núú cùrúxí, dico sá cúú-xí nchòo ñáyiú sa ní naníhí tàhú, chi tnúhu-á<sup>n</sup> cúú-xí ñ<sup>n</sup> tnúhu sá ñí taxi Yá Ndiöxí ndécú ndìhi-o cuendá ndacu-gá cada-gá nchaa nàcuáa cuìní-gá iní-ó, <sup>19</sup> te quèe ndáá-xi nàcuáa càhá<sup>n</sup>-gá núú tütú-gá núú càchí-xi:

Yúhú cada-í te nchaa ñáyiú túha vá nándìhi-gá nchaa sá xìní tnùní-yu, te nchaa ñáyiú ío váha sàá díquí-xi vá nándìhi-gá nchaa nàcuáa sàni iní-yu. Duha càchí Yá Ndiöxí núú tütú-gá.

<sup>20</sup> Te xíá<sup>n</sup> cútnùní iní-ó sá ncháá ñáyiú sàni iní-xi sá ño túha ndècu ñuyíú-a, ndìhi nchaa cue téé dàcuaha ñaha xíi-yu nchaa tnúhu ní chídó tnùní ndí Moisés, ndìhi nchaa ñáyiú ío váha sàá díquí-xi càhá<sup>n</sup> cuendá nchaa sá ío ñuyíú-a, te nchaa ñáyiú-á<sup>n</sup> càchí Yá Ndiöxí sá ñà túú nándìhi nchaa sá xìní tnùní-yu sá cúú-xí-gá. <sup>21</sup> Te Yá Ndiöxí ío váha cùtnuní iní-gá nàcuáa quide-gá, chi ñá túú dàña-gá cundecu ndìhi ñáhá-yu xii-gá sá cuendá nchaa sá ñí sáá díquí méé-yu, te duca<sup>n</sup> quide-gá chi cuìní-gá sá cùndèdóho-yu tnúhu sá sání iní-yu ñá túú nándìhi. Te sá cuendá tnúhu-á<sup>n</sup> te naníhí tàhú-yu te núu na quíndáá iní ñáhá-yu xii-gá.

<sup>22</sup> Te cue ñáyiú isràél cuìní-yu quini-yu sá vǎ yòo tnàhí ndàcu cada, te cue ñáyiú grìégú nchìcú<sup>n</sup> nihnú-yu nchaa sá dácuàha ñáyiú ío túha. <sup>23</sup> Dico nchoo yìhi-o càhá<sup>n</sup>-ó núú ñáyiú sá Xítohó Jesucrístú ní xíhí-gá núú cùrúxí. Te cue ñáyiú isràél ñá túú tnàhí tnàhá iní-yu cundèdóho-yu tnúhu-á<sup>n</sup>. Te cue ñáyiú ñá túú cùu ñáyiú isràél càchí-yu sá ñà túú vèdana nándìhi tnúhu-á<sup>n</sup>. <sup>24</sup> Dico sá cúú-xí nchaa ñáyiú ní càhá<sup>n</sup> ñáhá Yá Ndiöxí chi cuèi cùu-yu ñáyiú isràél àdi ñá túú cùu-yu, dico ñáyiú-á<sup>n</sup> càchí-yu sá sǎ cuendá Xítohó Jesucrístú cútnùní iní-yu sá ño càhnu cuu Yá Ndiöxí te ndècu ndìhi-gá nchaa sá xìní tnùní-gá. <sup>25</sup> Te sá quidé Yá Ndiöxí càchí ñáyiú ñuyíú-a sá ñà túú nándìhi, dico xíá<sup>n</sup> ío-gá nándìhi dàcúúxí sǎ sání iní méé-yu. Te sá ñí xíhí Xítohó Jesucrístú núú cùrúxí, xíá<sup>n</sup> càchí ñáyiú sá ñá túú ní ñíhí ndéé Yá Ndiöxí cada-gá sá ñí sani iní-gá cada-gá. Dico sá dúcá<sup>n</sup> ñí

quide Yá Ndiöxí, xíá<sup>n</sup> cúú-xí sǎ ño-gá ní ñíhí ndéé-gǎ ní quide-gá ñ<sup>n</sup> sá ñí sani iní-gá dàcúúxí sǎ sání iní méé ñáyiú ñuyíú-a. <sup>26</sup> Te nchòhó ñáyiú ndècu ndìhi-í ichi Xítohó Jesucrístú, chí dándàcu iní nàcuáa ndècu-ndo cútnàhá ní càhá<sup>n</sup> ñáhá Yá Ndiöxí xii-ndo, chí sacú-ni-ndo túha dàcúúxí ñáyiú ñá túú ndècu ichi-gá. Te duca<sup>n</sup> sàcú-ni-ndo tàxi tnuní-ndó, te ñu-ni duca<sup>n</sup> sàcú-ndó nèhe ñáyiú sá yíñùhu núú-ndó. <sup>27</sup> Te ñáyiú ñá túú ndècu ichi Yá Ndiöxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñá túú túha-á<sup>n</sup> càhá<sup>n</sup> ñáhá Yá Ndiöxí xii-yu cundecu-yu ichi-gá, te cundecu ndìhi ñaha-gǎ xii-yu, te duca<sup>n</sup> dándóo canúú-yu nchaa ñáyiú càchí sá ño túha. Te càhá<sup>n</sup> tucu-gá ñáyiú càchí dava-gá ñáyiú sá ñà túú tnàhí tàú cunuu cundecu-yu ichi-gá, te duca<sup>n</sup> cundecu ndìhi ñaha-gá xii-yu, te dándóo canúú-yu nchaa ñáyiú càchí sá táxi tnùní. <sup>28</sup> Te duca<sup>n</sup> Yá Ndiöxí càhá<sup>n</sup>-gá ñáyiú ñá túú tnàhí cunuu cundecu ndìhi-gá, ndìhi ñáyiú quèe tìhú núú dàva-gá tnàha ñáyiú-xi, ndìhi ñáyiú càchí-yu sá ñà túú vèdana nándìhi, nchaa ñáyiú-á<sup>n</sup> càhá<sup>n</sup>-gá cundecu ndìhi-gá, te duca<sup>n</sup> quide-gá cuendá dándóo canúú-yu nchaa ñáyiú càchí sá ño cunuu. <sup>29</sup> Te núu xíá<sup>n</sup> ní ñ<sup>n</sup> ñáyiú vá cúú càchí-yu sá ño càhnu cuú-yu núú Yá Ndiöxí. <sup>30</sup> Dico nchòhó chi mee Yá Ndiöxí ní quide-gá ndécú-ndó ndìhi Xítohó Jesucrístú, te Xítohó Jesucrístú ní quide-gá ní cutnùní iní-ó sǎ Yá Ndiöxí cúú-gǎ Yaá ndécú ndìhi nchaa sá xìní tnùní-gá. Te ñu-ni Xítohó Jesucrístú ní quide-gá cuendá sá nchóo vǎ cùndècu-gá cuèchi-o núú Yá Ndiöxí, te duca<sup>n</sup> cundecu yíñùhu-o núú-gǎ, te nduu táhú-ó cundecu-o ndìhi-gá ní caa ní quíhí<sup>n</sup>. <sup>31</sup> Te sá dúcá<sup>n</sup> quide-gá núu xíá<sup>n</sup> xíní ñùhu-xi cada-o nàcuáa càhá<sup>n</sup>-xi núú tütú Yá Ndiöxí núú càchí-xi: “Vá càchí-ndó sǎ méé-ndó ño càhnu cuu-ndo, chí cachí-ndó sǎ Yáá cúú Xítohó-ndó ño càhnu cuu-gǎ”, duha càchí-xi núú tütú-gá.

## 2

*Tnúhu sá càhá<sup>n</sup> nàcuáa ní cuu ní xíhí Xítohó Jesucrístú núú cùrúxí*

<sup>1</sup> Te nchòhó ñáyiú ndècu ndìhi-í ichi Xítohó Jesucrístú sa nàha-ndo sá cùtnàhá ní



quixi-í ní cáhá<sup>n</sup>-í tnúhu Yá Ndiöxí núú-ndó, te ñá túú ní cáhá<sup>n</sup>-í dàtná cáhá<sup>n</sup> ñ<sup>n</sup> ñáyiú ío váha sàá díquí-xi, àdi datná cáhá<sup>n</sup> ñ<sup>n</sup> ñáyiú ío túha. <sup>2</sup> Chi cútnàhá ní xíndecu ndìhi ñaha-í xii-ndo chi ní sani iní-í sá méé-ní cuèndá Xítóhó Jesucristú cáhá<sup>n</sup>-í núú-ndó ndìhi nacuáa ní cuu ní xíhí-gá, te ñu duca<sup>n</sup> ñí guide-í. <sup>3</sup> Te cútnàhá ní quexìo-í núú ndécú-ndó te ni ñá cútnuní iní-í nása cada-í ní cùu, te ío ní quiyùhú iní-í ní cáhá<sup>n</sup>-í tnúhu-gá núú-ndó. <sup>4</sup> Te cútnàhá ní cáhá<sup>n</sup>-í nàcuáa ndùu tnúhu Xítóhó Jesucristú núú-ndó, te nàha-ndo sá Espiritú Yá Ndiöxí ní chindee ñàha-xi xii-í ní cáhá<sup>n</sup>-í tnúhu-gá núú-ndó, te tnúhu-á<sup>n</sup> ñí quée-xi iní-ndó. Te ñá túú ní cáhá<sup>n</sup>-í ñ<sup>n</sup> tnúhu càhnu núú-ndó tnúhu sá cáhá<sup>n</sup> cue ñáyiú ío váha sàá díquí-xi. <sup>5</sup> Te duca<sup>n</sup> ñí cuu cuèndá sá nchòhó quíndáá iní-ndó tnúhu Yá Ndiöxí chi ní guide-gá sá vâha sá cúú-xí iní-ndó, te ñá díú sá cuèndá tnúhu sá cáhá<sup>n</sup> ñáyiú càchí sá ío túha duca<sup>n</sup> ñí sándáá iní-ndó tnúhu-gá.

### *Espiritú Yá Ndiöxí quidé-xí cùtnuní iní-ó nàcuáa sàni iní-gá*

<sup>6</sup> Te nchoo cáhá<sup>n</sup>-ó tnúhu càhnu núú ñáyiú sa ní níhí ndéé ndècu ichi Xítóhó Jesucristú. Te tnúhu-á<sup>n</sup> ñá túú cáhá<sup>n</sup> ñáyiú ñá túú ndècu ichi-gá, te ni cuè téé yìndaha ñaha xii-yu ñá túú cáhá<sup>n</sup>-güedé tnúhu-á<sup>n</sup> chi cue téé-á<sup>n</sup> naa-güedé. <sup>7</sup> Te tnúhu càhnu-á<sup>n</sup> cúú-xí tnúhu Yá Ndiöxí, te mee-gá ní cachí-gá ndéé cútnàhá vátá ngáva-gá ñuyíú sá ncháá ñáyiú na quíndáá iní tnúhu-á<sup>n</sup> te nduu táhù-yu cundecú-yu ndìhi-gá núú ío váha càa ndecu-gá ñí caa ñí quíhí<sup>n</sup>. Te tnúhu-á<sup>n</sup> ndúú yùhu-xi ni cuu. <sup>8</sup> Te ni ñ<sup>n</sup> cue téé yìndaha cue ñáyiú ñuyíú-a ñá túú tècú tnùnì-güedé tnúhu-á<sup>n</sup>, chí núu dícó tècú tnùnì-güedé tnúhu-á<sup>n</sup> te vá cátá càa-güedé Xítóhó Jesucristú núú cùrúxí cahni ñaha-güedé xii-gá ní cùu. Te ñu-ni Yaá-á<sup>n</sup> ío càhnu cuu-gá. <sup>9</sup> Dico duca<sup>n</sup> ñí cuu chi ní quee ndáá-xi nàcuáa cáhá<sup>n</sup>-xi núú tütú Yá Ndiöxí núú càchí-xi:

Yá Ndiöxí sa ní sani iní-gá ncha nàcuáa cada-gá sá cúú-xí cuèndá ncha ñáyiú cùu iní ñáhá xii-gá.

Te sá ñí sani iní-gá cada-gá cúú-xí sá vátá quíni-gá ñáyiú te ni vátá cùndèdóho-gá-yu, te ni ñá túú tnàhí cùtnuní iní-yu nása cada-gá.

Duha càchí-xi núú tütú-gá. <sup>10</sup> Te mee Yá Ndiöxí ní cachí-gá sá Espiritú-gá cada-xi te nchoo cùtnuní iní-ó ncháa nacuáa sàni iní-gá cada-gá, núu xiá<sup>n</sup> duca<sup>n</sup> tècú tnùnì-ó vítna, chí Espiritú-gá xini-xi nchaandi túhú nàcuáa sàni iní-gá cada-gá.

<sup>11</sup> Te ñá ñ<sup>n</sup> ñáyiú xini ndáá-yu nàcuáa sàni iní ingá ñáyiú, chí mee ñáyiú-á<sup>n</sup> xini ndáá-yu ncha nàcuáa sàni iní-yu. Te duca<sup>n</sup> sátnahá-xi cùu Yá Ndiöxí chí medii-ni Espiritú-gá xini-xi ncha nàcuáa sàni iní-gá. <sup>12</sup> Te nchoo chí Yá Ndiöxí ní taxi-gá Espiritú-gá ndécú ndìhi-o, te ñá díú ñuyíú-a duca<sup>n</sup> ñí quèe espiritú ní ngúndecu ndìhi-o. Te duca<sup>n</sup> ñí taxi-gá Espiritú-gá ndécú ndìhi-o cuèndá duca<sup>n</sup> cùtnuní iní-ó nàcuáa ndùu ncha sá vâha sá dícó duca<sup>n</sup> ñí taxi-gá ndécú ndìhi-o. <sup>13</sup> Te cuèndá ncha sá vâha-á<sup>n</sup> cáhá<sup>n</sup>-ndí, te cáhá<sup>n</sup>-ndí nàcuáa dàcahu iní ñáhá Espiritú Yá Ndiöxí xii-ndí, te ñá túú cáhá<sup>n</sup>-ndí nàcuáa càhu iní ñáyiú ñuyíú-a cáhá<sup>n</sup>-yu, te ñu-ni ncha tnúhu dàcahu iní ñáhá Espiritú-gá xii-ndí cáhá<sup>n</sup>-ndí, ñu-ni ncha xiá<sup>n</sup> dánèhé-ndí ncha ñáyiú ndècu ndìhi tucu Espiritú-gá.

<sup>14</sup> Te ñáyiú ñá túú ndècu ndìhi Espiritú Yá Ndiöxí ñá túú tnàhá iní-yu nàcuáa ndùu tnúhu dàcécú tnúhu ñaha Espiritú-gá xii-yu, te ni ñá túú tècú tnùnì-yu, te càchí-yu sá ñá túú nàndíhi-xi. Te duca<sup>n</sup> chí mee-ni ncháa ñáyiú ndècu ndìhi Espiritú-gá tècú tnùnì-yu nàcuáa ndùu tnúhu-á<sup>n</sup>. <sup>15</sup> Te cue ñáyiú duca<sup>n</sup> ndècu ndìhi Espiritú Yá Ndiöxí cùtnuní ndáá iní-yu ná cúú ncháa sá vâha, te vá yóo ñ<sup>n</sup> xini ncha nàcuáa sàni iní-yu. <sup>16</sup> Te núú tütú Yá Ndiöxí càchí-xi: “Vá yóo ñ<sup>n</sup> xini nàcuáa sàni iní Yá Ndiöxí, núu xiá<sup>n</sup> vá yóo ñ<sup>n</sup> ndacu ná danèhé ñáhá xii-gá”, duha càchí-xi núú tütú-gá. Te nchoo chí ñ<sup>n</sup>-ni sàni iní-ó ndìhi Xítóhó Jesucristú.

## 3

### *Cue téé xíquide chiùn Yá Ndiöxí*

<sup>1</sup> Te nchòhó ñáyiú ndècu ndìhi-í ichi Xítóhó Jesucristú càchí tnúhu-í xii-ndo sá

ñã ní ñhì-í nàcuáa cada-í cáhá<sup>n</sup>-í tnúhu-gá núú-ndó dàtná càhá<sup>n</sup>-í núú nchàa ñáyiú quide nchaa nacuáa càhá<sup>n</sup> Espiritú Yá Ndiöxí, chi ní cáhá<sup>n</sup>-í núú-ndó dàtná càhá<sup>n</sup>-í núú nchàa ñáyiú cùnnu nchaa sá cuèhé sá dúhá ìní-xi, te ní quide ñaha-í xii-ndo dàtná cue ñáyiú íchí ñí sándáá ìní tnúhu Xítóhó Jesucristú, núú xiã<sup>n</sup> duca<sup>n</sup> ñí cáhá<sup>n</sup>-í núú-ndó. <sup>2</sup> Te ní quide ñaha-í xii-ndo dàtná ì<sup>n</sup> déhe yiqui<sup>n</sup> vitna sadi camá, te ñá túú ní quide ñaha-í xii-ndo dàtná cue landú sa xèxi díta, chi ní dánèhé ñáhà-í xii-ndo ì<sup>n</sup> sá ñà túú tnàhí úhú tecú tnùnì-ndó, te ñá túú ní dànèhé ñáhà-í xii-ndo ì<sup>n</sup> sá xítò-í sá vã tècú tnùnì-ndó. Te quide cuendá-í sá díú-ní dùca<sup>n</sup> vá tècú tnùnì-ndó ndèé vitna te núu na dànèhé ñáhà-í xii-ndo nchàa dava-gá tnúhu. <sup>3</sup> Te duca<sup>n</sup> chi quide-ni-ndo nacuáa sàni ìní mée-ndó, chi ndècu-ni-ndo ichi cuédú ìní, te nàá ndihì tnàha-ni-ndo, te ñá túú tnàhí cùu ì<sup>n</sup>nuu-ndo ndècu-ndo. Te xiã<sup>n</sup> cútnùnì sá mée-ní nchàa nacuáa sàni ìní mée-ndó quide-ndo, te xiquide-ndo dàtná quidé nchàa ñáyiú ñá túú ndècu ichi Xítóhó Jesucristú. <sup>4</sup> Te dava-ndo càchì-ndó: “Yúhú cùu-í cuendá té Pãblú.” Te dava-ndo càchì-ndó: “Yúhú cùu-í cuendá té Àpolós”, duha càchì-ndó. Te sá dúcá<sup>n</sup> càhá<sup>n</sup>-ndó xiã<sup>n</sup> cútnùnì sá quidé-ní-ndó mèe-ni nchaa nacuáa sàni ìní mée-ndó.

<sup>5</sup> Te yúhú té Pãblú càchì tnúhu-í xii-ndo sã ñà túú cùnnu-í, te ní té Àpolós ñá túú cùnnu-dé chi dicó cue téé xínu cuechi núú Yá Ndiöxí cùu-ndí, te ní cáhá<sup>n</sup>-ndí tnúhu-gá núú-ndó, núú xiã<sup>n</sup> ní sándáá ìní-ndó. Te ndí dí<sup>n</sup> ndí dí<sup>n</sup> ndùu chiu<sup>n</sup> ní táhú Yá Ndiöxí cada-ndí. <sup>6</sup> Te yúhú cùu-í dàtná ì<sup>n</sup> téé chihì tatá chi dàcahá<sup>n</sup> ñáhà-í xii-ndo tùha-ndo ichi Yá Ndiöxí. Te té Àpolós cùu-dé dàtná ì<sup>n</sup> téé nàcuhñu chi téé-á<sup>n</sup> ndécú-dé dánèhé ñáhà-dé xii-ndo tnúhu-gá. Te Yá Ndiöxí cùu-gã Yaá quidé sàhnu tatá ní chihì-í-á<sup>n</sup>, te duha càhá<sup>n</sup>-í chi ñiu-gá quidé-gã tá ñihí ndéé-ndó ndècu-ndo ichi-gá. <sup>7</sup> Te núú xiã<sup>n</sup> ní téé chihì tatá te ní téé nàcuhñu ñá túú cùnnu-güedé, dico Yá Ndiöxí ío cùnnu-gá chi ñiu-gá quidé-gã xínu tatá-á<sup>n</sup> te sàhnu-xi. <sup>8</sup> Te ì<sup>n</sup>-ní cùu téé chihì tatá ndihì téé nàcuhñu. Te duca<sup>n</sup> sãtnahá-xi cùu nchúhú cue téé xiquide chùu<sup>n</sup> Yá Ndiöxí, te nàcuáa ndùu chiu<sup>n</sup> ní quide-ndí te duca<sup>n</sup> cùnduu táhú taxi Yá Ndiöxí nduu táhú-ndí. <sup>9</sup> Te nchòhó

cùu-ndó dàtná ì<sup>n</sup> xichi núú ñí quée tatá, te nchúhú cùu ì<sup>n</sup>nuu-ndí quidé chùu<sup>n</sup>-ndí xiã<sup>n</sup>. Te duca<sup>n</sup> sãtnahá-xi cùu-ndo chi cùu cuendá ñáhà Yá Ndiöxí xii-ndo, te nchúhú cùu ì<sup>n</sup>nuu-ndí quidé-ndí chùu<sup>n</sup>-gá.

Te cùu tucu-ndo datná ì<sup>n</sup> vehe sá vítná sáá, te duca<sup>n</sup> sãtnahá-xi cùu-ndo chi Yá Ndiöxí quidé-gã tá sàhnu nihnu-ndo ichi-gá cuáhá<sup>n</sup>. <sup>10</sup> Te yúhú cùu-í dàtná ì<sup>n</sup> téé cùnnu daciaa vehe te ní tava-í cimièntú-xi, te ñ<sup>n</sup> cue téé véxi dàcaa-güedé ndóho, te ì<sup>n</sup> ì<sup>n</sup> cue téé-á<sup>n</sup> ío xini ñuhu-xi cada cuendá-güedé nàcuáa dacaa-güedé. Núu duca<sup>n</sup> sãtnahá-xi cùu yúhú chi Yá Ndiöxí ní taxi-gá chùu<sup>n</sup> quide-í te chindee ñaha-gá, chi díhna-gá-í ní quixi-í ní cáhá<sup>n</sup>-í tnúhu Xítóhó Jesucristú núú-ndó, te ñ<sup>n</sup> cue téé véxi dàcuaha ñaha-ná xii-ndo tnúhu-gá, te ì<sup>n</sup> ì<sup>n</sup> cue téé-á<sup>n</sup> ío xini ñuhu-xi cada cuendá-güedé nàcuáa dacuaha ñaha-güedé xii-ndo tnúhu-gá. <sup>11</sup> Te cimièntú vehe-á<sup>n</sup> cada ìní-ó sã cùu-xí mèe Xítóhó Jesucristú, te duca<sup>n</sup> chi yúhú ní dánèhé ñáhà-í xii-ndo ñí ngúndecu ndihì-ndo Xítóhó Jesucristú, te vá yõ-gá cundecu ndihì-ndo chi ì<sup>n</sup>dií dí-í-gã ndécú. <sup>12</sup> Te dava cue téé dàcaa-güedé vehe váha te chihì-güedé díhú<sup>n</sup> cuáá<sup>n</sup>, ndihì díhú<sup>n</sup> cuixí<sup>n</sup>, ndihì yúú sã ío vii càa. Te dava-güedé dácaa-güedé vehe vítú, te dava-güedé dácaa-güedé vehe ité, te dava-güedé dácaa-güedé vehe tnuvixi<sup>n</sup>. <sup>13</sup> Te sáá nduu te nchaa vehe-á<sup>n</sup> càyú-xi, te vehe vítú-á<sup>n</sup> ndihì vehe ité-á<sup>n</sup> ndihì vehe tnuvixi<sup>n</sup>-á<sup>n</sup> ndoo ndoo càyú, te nchaa vehe váha-á<sup>n</sup> vã càyú-xi cuèi na yãha ñuhú. Te nchaa cue téé ní dácaá vèhe váha-á<sup>n</sup> cada ìní-ó sã cùu-güedé ñáyiú ío váha quide chiu<sup>n</sup> Yá Ndiöxí. Te nchaa cue téé ní dácaá vèhe vítú, ndihì cue téé ní dácaá vèhe ité, ndihì cue téé ní dácaá vèhe tnuvixi<sup>n</sup> cada ìní-ó sã cùu-güedé ñáyiú ñá túú cuíni cada chùu<sup>n</sup> Yá Ndiöxí nàcuáa tàú-xi cunduu. Te sáá nduu te cutnùnì nàcuáa ndùu chiu<sup>n</sup> ní quide ì<sup>n</sup> ì<sup>n</sup> ñáyiú, chi Yá Ndiöxí cáhá<sup>n</sup>-gá nàcuáa ndùu chiu<sup>n</sup> ní quide ì<sup>n</sup> ì<sup>n</sup> ñáyiú ní quide chùu<sup>n</sup>-gá. <sup>14</sup> Te cue ñáyiú ío váha xiquide chùu<sup>n</sup> Yá Ndiöxí te cùdí chùu<sup>n</sup> quidé-yu, te ñáyiú-á<sup>n</sup> ñihí-yu sá ndúú tãhú-yu. <sup>15</sup> Te cue ñáyiú ñá túú quide chiu<sup>n</sup> Yá Ndiöxí nàcuáa tàú-xi cunduu, te vá cùdí chùu<sup>n</sup> ní quidé-yu chi cuíta te ndóo-ná-yu duha, dico mèe-yu

chi naníhí tàhú-yu.

<sup>16</sup> Te yúhú càhá<sup>n</sup>-í dóho-ndo dándacu-í iní-ndó sá cúú-ndó dàtná vehe Yá Ndiöxí, chi Espiritú-gá ndécú ndìhi ñaha-xi xii-ndo.

<sup>17</sup> Te núu yoo na dànaa ñaha xii nchohó ñáyiú cùu veñúhu-gá, te Yá Ndiöxí danàa ñaha-gá xii ñáyiú-án, te duca<sup>n</sup> càda-gá chi nchòhó cúú-ndó ñáyiú cùu cuendá-gá.

<sup>18</sup> Te vá dándàhú-ndó mèe-ndo sá ïo túha-ndo. Te núu ío dava-ndo sàni iní-ndó sá túha-ndo dàtná sání iní cue ñáyiú ñá túú ndècu ichi Yá Ndiöxí, te cada-ndo sá cúú-ndó dàtná ñáyiú ñá túú tnàhí túha, te duca<sup>n</sup> te cuu ndisa-ndo ñáyiú túha sá cúú-xí Yá Ndiöxí.

<sup>19</sup> Te nchaa sá xini tnùnì nchaa ñáyiú càchí sá ïo túha ñá túú ndècu ichi Yá Ndiöxí ñá túú nàndíhi-xi sá cúú-xí-gá. Te càchí-xi núú tütú-gá: “Nchaa ñáyiú càchí sá ïo túha te Yá Ndiöxí dandòo canúú ñáhá-gá xii-yu núú nchaa sá quidè-yu”, duha càchí-xi núú tütú-gá.

<sup>20</sup> Te càchí tucu-xi ìngá xichi: “Yá Ndiöxí cùtnùnì iní-gá nchaa nàcuáa sàni iní ñáyiú càchí sá ïo túha. Te nchaa nàcuáa sàni iní-yu-án càchí-gá sá ñà túú vèdana nàndíhi-xi”, duha càchí-xi núú tütú-gá.

<sup>21</sup> Núu xiá<sup>n</sup> càhá<sup>n</sup>-í dóho-ndo sá vã càchí-ndó sá nchùhú cue téè dānehé ñáhá xii-ndo tnúhu-gá ío càhnu cuu-ndí. Te nchaa sá ío ñuyíú-a cùu-xi sá vãha sá cúú-xí-ndó.

<sup>22</sup> Te cuèi yúhú ndìhi té Àpolós ndìhi té Pèlú ndécú-ndí sá cúú-xí-ndó, te cuèi nchaa sá ío ñuyíú-a te cuèi nchaa nduu ndècu-ndo te cuèi sá cùú-ndó dico nchaa cùu-xi sá vãha sá cúú-xí-ndó. Te cuèi nchaa sá ndécú tnàvíí, te cuèi nchaa sá cóo ndèè cuèé-gá nchaa cùu-xi sá vãha sá cúú-xí-ndó.

<sup>23</sup> Te mee-ndo ndècu-ndo sá cúú-xí Xitohó Jesucristú, te mee Xitohó Jesucristú ndécú-gá sá cúú-xí Yá Ndiöxí.

#### 4

*Nàcuáa ndiú chiu<sup>n</sup> quide cue té ní táuchíú<sup>n</sup> Xitohó Jesucristú càhá<sup>n</sup> tnúhu-gá*

<sup>1</sup> Te cada cuendá-ndó sá nchùhú dicó-ni cue téè xinu cuechi núú Xitohó Jesucristú cúú-ndí, te chiú<sup>n</sup>-án ní taxi Yá Ndiöxí quidé-ndí càhá<sup>n</sup>-ndí tnúhu sá ní cachí-gá yíyùhu ni cuu.

<sup>2</sup> Te xini ñuhu-xi sá ncháá ñáyiú duca<sup>n</sup> ní sáñaha Yá Ndiöxí chiú<sup>n</sup> quidé-yu cada ndáá-yu cadá-yu chiú<sup>n</sup>-án.

<sup>3</sup> Te yúhú ñá túú quide cuendá-í nùu nása ndiú tnúhu càhá<sup>n</sup>-ndó cuendá-í nùu cùu-í téè vãha àdi ñá túú cùu-í. Te diu-ni duca<sup>n</sup> ñà túú quide cuendá-í nùu nása-gá càhá<sup>n</sup> nchaa dava-gá ñáyiú cuendá-í. Te ni mèe-í ñá túú càhá<sup>n</sup>-í nùu cùu-í téè vãha àdi ñá túú cùu-í.

<sup>4</sup> Te sànuu iní-í sá ñà túú nã cùmānì-í núú Yá Ndiöxí, dico ñá díú sá xiá<sup>n</sup> te cachí-í sá ñá túú cuèchi-í ndécú nùú-gá, chi mee-gá náhá ndáá-gá te núu nása quide-í ndécú-í.

<sup>5</sup> Te nchòhó vá càhá<sup>n</sup>-gá-ndó sá ñà túú cùndáá ñáyiú núú Yá Ndiöxí, chi vátá sàá-gá nduu cùndáá cuèchi-yu. Te na sàá nduu quixi tucu Xitohó Jesucristú te dàvá-án dàtúu-gá nchaa sá quidè-yu, nchaa sá ñà túú xini-ó quidé-yu vitna, te duca<sup>n</sup> dàtúu-gá nchaa nàcuáa sàni iní-yu. Te Yá Ndiöxí càhá<sup>n</sup> vãha-gá cuendá nchaa ñáyiú ní quide vãha.

<sup>6</sup> Te nchòhó ñáyiú ndècu ndìhi-í ichi Xitohó Jesucristú, càcunehe-í té Àpolós ndìhi yúhú núú-ndó dānehé ñáhà-í xii-ndo nàcuáa cada-ndo cuendá duca<sup>n</sup> cùu-xi ì<sup>n</sup> sá vãha sá cúú-xí-ndó, ndìhi cuendá sá nchòhó canchicú<sup>n</sup> nihnu-ndo càda-ndo mee-ni nchaa nàcuáa yòdo tnùnì núú tütú Yá Ndiöxí. Te duca<sup>n</sup> te vá càchí-ndó sá ì<sup>n</sup> téè càhá<sup>n</sup> tnúhu Yá Ndiöxí ío-gá càhnu cuu-dé dàcúxí ìngá-dé.

<sup>7</sup> Te nchòhó vá càchí-ndó sá ïo-gá cùnùu-ndo dacúxí dàva-gá ñáyiú chi Yá Ndiöxí ní quide-gá ní ngúndecu ndìhi-ndo nchaa sá xini tnùnì-ndó. Te mee-gá duca<sup>n</sup> ní quide-gá ¿Te ná cuendá nchòhó duca<sup>n</sup> quide cahnu-ndo mee-ndo? Te quide-ndo dàtná tnúhu sá méé-ndó ní quide-ndo dùca<sup>n</sup> ní ngúndecu ndìhi-ndo nchaa sá xini tnùnì-ndó.

<sup>8</sup> Te nchòhó quidé-ndó sá ñà túú tnàhí-gá ná cùmānì-ndó nùú Yá Ndiöxí, te quide-ndo sá ni ñíhí-ndó nchaa sá cuiní-ndó nùú-gá ndécú ndìhi-ndo, te sànuu sá cúú-nã-ndó dàtná cue téè yìndaha ñáyiú, te nchùhú ñá túú cùu ì<sup>n</sup>nuu ndìhi ñaha-ndí xii-ndo quìndaha ndìhi ñaha-ndí xii-ndo ñáyiú, ìte vãha-ni te núu dicó ndisa sá yìndaha-ndo ñáyiú chi tnàhá nchùhú ní tnahá ndìhi ñaha-ndí xii-ndo quìndaha-ó-yu te núu dicó cúú-xi ì<sup>n</sup> sá ndáá dico ñáhá!

<sup>9</sup> Te yúhú quidé cuendá-í sá nchùhú cue téè ní táuchíú<sup>n</sup> Xitohó Jesucristú càhá<sup>n</sup> tnúhu-gá núú ñáyiú ní cachí Yá Ndiöxí sá cúú-ndí cue téè ñá túú



nàndíhi sá cúú-xí dàva-gá ñáyiu. Te ní cachí tucu-gá sá cúú-ndí dàtná cue ñáyiu sa ní tnahá òré cuú-xi quíhí<sup>n</sup> nacháhu cuéchi-xi, te nchaa ñáyiu cùñúhu ñàhá-yu xii-ndí sá dúcá<sup>n</sup> ndòho-ndí, te tnahá nchaa espíritú cùñúhu ñaha-xi xii-ndí. <sup>10</sup> Te cuendá sá xínú cuéchi-ndí núú Xítóhó Jesucristú, xiá<sup>n</sup> cúú-ndí dàtná cue téé ñá túú vèdana nàndíhi sá cúú-xí ñáyiu. Te nchòhó quidé-ndó sá cúú-ndó ñáyiu ío túha ndècu ndíhi Xítóhó Jesucristú. Te ñáyiu cächí-yu sá nchúhú cúú-ndí cue téé ñá túú ndàcu cada ì<sup>n</sup> sá cádá sá cúú-xí Yá Ndiöxí. Te nchòhó quidé-ndó sá cúú-ndó ñáyiu ío váha ndàcu quide ì<sup>n</sup> sá sání iní-ndó sá cúú-xí-gá. Te cue ñáyiu dàquee tihú ñáhã-yu xii-ndí, te nchòhó néhë-yu sá yíñúhu núú-ndó. <sup>11</sup> Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiu quide úhú ñáhã-yu xii-ndí, te ni vèhe-ndí ñá túú ndèé cáá cùndecu-ndí. <sup>12</sup> Te ío ndòho-ndí quidé chiu<sup>n</sup>-ndí nihí-ndí sá xéxí-ndí. Te cue ñáyiu xícuèhé ñáhã-yu xii-ndí dico xicá<sup>n</sup> táhú-ndí núú Yá Ndiöxí cuendá-yu, te ñá cúú tnahí quiní ndeé ñáhã-yu xii-ndí dico quide cahnu iní-ndí nchaa sá quidé ñàhá-yu. <sup>13</sup> Te mee-ni tñúhu cuèhé tñúhu duha càhá<sup>n</sup>-yu cuendá-ndí dico sàcahnu iní-ndí te dàsahú-ndí-yu mee-ni tñúhu váha. Te cächí-yu sá cúú-ndí dàtná ì<sup>n</sup> sá ñà túú-gá vèdana nàndíhi, te nchaa-ni nduu duca<sup>n</sup> càhá<sup>n</sup>-yu xáhã<sup>n</sup>-yu xii-ndí.

<sup>14</sup> Te yúhú duha càhá<sup>n</sup>-í núú tütú-a dàsahú ñáhã-í xii-ndo, dico ñá díú tñúhu sá cúú càhá<sup>n</sup> núú-ndó càhá<sup>n</sup>-í. Te duha càhá<sup>n</sup>-í dóho-ndo chi quide iní-í sá sùúní dàtná déhe mee-í cúú-ndó chi ío cùu iní ñáhã-í xii-ndo. <sup>15</sup> Te nchaa-o ndècu-o ichi Xítóhó Jesucristú vitna, dico yúhú cùú-í téé díhna nuu ñí dánèhé ñáhã xii-ndo nacuaa ndùu tñúhu sá càhá<sup>n</sup> nàcuáa naníhí tàhú-ó, núú xiá<sup>n</sup> cùú-í dàtná tãtã-ndó. Te cuèi vâi vihi cue téé na quixi-güedé danèhé ñáhã-güedé xii-ndo tñúhu-gá dico ì<sup>n</sup> dii-ni yúhú cùú-í téé díhna nuu-gã ní dánèhé ñáhã xii-ndo tñúhu-gá. <sup>16</sup> Núú xiá<sup>n</sup> càhá<sup>n</sup>-í dóho-ndo sá cãchícú<sup>n</sup> nihnu-ndo càda-ndo nchaa nacuaa quide-í.

<sup>17</sup> Te xiá<sup>n</sup> núu sa ní tendaha-í té Timùteú véxi coto ñaha-dé xii-ndo, te téé-á<sup>n</sup> ío cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te téé-á<sup>n</sup> cachí tñúhu-dé xii-ndo nchaa nacuaa quide-í ndécú-í ichi-gá. Te diu-ni nàcuáa na cächí tñúhu-dé-á<sup>n</sup> diu-ni duca<sup>n</sup> quide-í nchaa xichí núú tàcá ñáyiu dàcuaha tñúhu Xítóhó Jesucristú. <sup>18</sup> Te dava nchòhó ío quide cahnu-ndo mee-ndo chi sání iní-ndó sá vã quixí-gã-í quixi coto ñaha-í xii-ndo. <sup>19</sup> Dico núu mee Yá Ndiöxí ná cächí-gá te ío ndíhi quixi coto ñaha-í xii-ndo, te dàvá-á<sup>n</sup> quiní-í te núu nása quide nchaa ñáyiu duca<sup>n</sup> ío xíquide càhnu mee-xi-á<sup>n</sup> ndécú-yu ichi Xítóhó Jesucristú. Te vá cádá cuendá-í tñúhu càhá<sup>n</sup>-yu chi chiu<sup>n</sup> quidé-yu cada cuendá-í. <sup>20</sup> Te vitna yíndaha ñaha Yá Ndiöxí xii-o, te chindee ñaha-gá xii-o quide-o nchaa sá váha sání iní-ó quide-o te ñá díú mèe-ni sá càhá<sup>n</sup>-ó. <sup>21</sup> Te ío chí cání iní núu ndèdacàa sá váha-gá cada-í òré ná quéxió-í núú ndécú-ndó, núu sá ténàá ñáhã-í xii-ndo àdi sá càhá<sup>n</sup> ndíhi ñaha-í xii-ndo ndíhi tñúhu vii tñúhu váha nàcuáa cutnùní iní-ndó sá cúú iní ñáhã-í xii-ndo.

## 5

### *È<sup>n</sup> cuéchi càhnu vihi*

<sup>1</sup> Te yúhú sa ní níhí ndáá-í tñúhu nàcuáa cùu ndecu-ndo, chi ì<sup>n</sup> téé ndècu ndíhi-ndo ndeca-dé náná chàhá-dé. Te xiá<sup>n</sup> cúú-xí ì<sup>n</sup> cuéchi càhnu vihi, chi ndéé nchaa ñáyiu ñá túú ndècu ichi Yá Ndiöxí cächí-yu sá vã cúú tnahí duca<sup>n</sup> càda-o. <sup>2</sup> ;Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sá cùndiyí-ndó ndíxi cuéchi iní-ndó sá dúcá<sup>n</sup> cùu ndecu-ndo ni cuu! Te téé duca<sup>n</sup> quide-á<sup>n</sup> xíní ñúhu-xi sá vã dáñã-gã-ndó nihí tnahá ndíhi ñaha-dé xii-ndo ni cùu dico ñá túú dùca<sup>n</sup> quide-ndo. <sup>3</sup> Te yúhú ñá túú ndècu ndíhi ñaha-í xii-ndo dico dàtná tñúhu sá ndécú ndíhi ñaha-í xii-ndo chi duca<sup>n</sup>-ni ío ñúhu iní ñáhã-í xii-ndo. Te yúhú cächí-í sá náchãhu téé-á<sup>n</sup> cuéchi-dé sá dúcá<sup>n</sup> quide-dé, te diu-ni duca<sup>n</sup> càhá<sup>n</sup>-í núú-ndó te núu dicó ndécú ndíhi ñaha-í xii-ndo. <sup>4</sup> Te òré nãtàcã-ndó càhá<sup>n</sup> ndíhi-ndo Yá Ndiöxí te diu-ni Xítóhó Jesucristú ñá túú dàña ndéé-gá chindèe



ñaha-gá xii-ndo, te òré-á<sup>n</sup> cada-ndo nàcuáa cuíní Xítohó Jesucristú cada-ndo, te cada iní-ndó sã tnàhá-í ndécú ndìhi ñaha-í xii-ndo. <sup>5</sup> Chi tàú-xi sã tée duca<sup>n</sup> quide-á<sup>n</sup> daquèe tíhú-ndó-dě, te duca<sup>n</sup> te sácúhná dandòho ñaha-xi xii-dé cuèi na cùú-dé, dico na sàá nduu te nduu táhú-dě cundecu-dé ndìhi Xítohó Jesucristú.

<sup>6</sup> Te nchòhó ñá túú ndùu váha-xi sã càchí-ndó sã ìo càhnu cuu-ndo. Te xini-ndó sã cuèi luha-ni levadùrá ná quíhu yuchi cuáha pàá dándaa-xi cuèi luha-ni nà quíhu te nihí-ni yuchi sàhá<sup>n</sup> ndoho-xi. Te duca<sup>n</sup> sãtnahá-xi cùu nchohó chi núu ndècu ndìhi-ndo ì<sup>n</sup> ñáyiú quide sã ñà túú váha te nchaa-ndo ñà túú-gã cùú váha iní-ndó ndècu-ndo. <sup>7</sup> Te xini ñuhu-xi sã cádá-ndó dàtná quidé cuè ñáyiú quide vico pascuá, chi ñá túú chihí-yu levadùrá yuchi cuáha pàá xéxi-yu nduu quidé-yu vico-á<sup>n</sup>. Te sã quíhu pàá-á<sup>n</sup> cada iní-ó sã cùú-xí nchaa sã cuèhé sã dúhá nì xóo cada-ndo. Te vá cádá-gã-ndó nì ì<sup>n</sup> sã cuèhé sã dúhá, te duca<sup>n</sup> te cuu-ndo ñáyiú váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-á<sup>n</sup> cada iní-ó sã cùú-güedé datná Xítohó Jesucristú nàcuáa ní xihí-gá núú cùrúxí. <sup>8</sup> Te núu xiá<sup>n</sup> xini ñuhu-xi sã vã cádá-gã-ndó nì ì<sup>n</sup> sã cuèhé sã dúhá sã nì xóo cada-ndo, te nì vã cùhú-gã iní-ndó te nì vã cádá-gã-ndó, te nì yùhu nì iní-ná-ndó càda-ndo mee-ni sã váha.

<sup>9</sup> Te tutú sã sà ní dáquixí-í ndaha-ndo nì cachí-í sã vã nihí tnàhá-ndó ndìhi cue ñáyiú ndècu ichi díí ìní. <sup>10</sup> Te sã dúcá<sup>n</sup> càhá<sup>n</sup>-í núú tütú ní dáquixí-í ndaha-ndo te vá cání ìní-ndó sã yùhú càchí-í sã vã cùú-gã tnàhá tnúhu-ndo ndìhi cue ñáyiú ndècu ichi cuehé ichi duha, ndìhi ñáyiú ndècu ichi díí ìní, ndìhi ñáyiú xìho nchaa sã ìo ñuyúú, ndìhi ñáyiú dùhu sã ndécú ndìhi tnaha ñáyiú-xi, ndìhi ñáyiú quide cahnu sã càchí-yu cùu ndiòxí te ñá ndàá sã ndiòxí cùú-xí chi dícó cue tée ñuyúú-a ní cadúha nchaa xiá<sup>n</sup>, chi núu duca<sup>n</sup> na càda-ndo vá tnàhá tnúhu-gã-ndó ndìhi-yu te xini ñuhu-xi sã vã cùndecu-gã-ndó núú ndécú-yu. <sup>11</sup> Te ñá túú dùca<sup>n</sup> quee-xi nacuáa càhá<sup>n</sup>-í núú tütú-í, chi yùhú càchí-í

sã vã cùú tnàhá tnúhu-ndo ndìhi ñáyiú càchí sã ndécú ichi Xítohó Jesucristú te ñá ndàá sã ndécú-yu ichi-gá. Te núu cùú-yu ñáyiú ndècu ichi díí ìní, àdi cuú-yu ñáyiú xìho nchaa sã ìo ñuyúú-a, àdi cuú-yu ñáyiú quide cahnu nchaa sã càchí-yu cùu ndiòxí te ñá ndàá chi dícó cue tée ñuyúú-a ní cadúha nchaa xiá<sup>n</sup>, àdi cuú-yu ñáyiú yiti yùhu-xi, àdi cuú-yu ñáyiú quíhu, àdi cuú-yu ñáyiú dùhu sã ndécú ndìhi tnaha ñáyiú-xi, te nchaa ñáyiú duca<sup>n</sup> càchí sã ndécú ichi-gá te ñá ndàá te duca<sup>n</sup> xíquidè-yu, te nì vã cùú nihí tnàhá-ndó ndìhi-yu caxi-ndo ndìhi-yu.

<sup>12-13</sup> Te ñá díú yùhú cùú-í tée cáhá<sup>n</sup> cuendá nchaa ñáyiú ñá túú ndècu ichi Xítohó Jesucristú núu quide ndàá-yu àdi ñá túú quide ndàá-yu ndécú-yu, chi mee Yã Ndiòxí cáhá<sup>n</sup>-gá te núu nása quidé-yu ndécú-yu. Dico nchòhó chi tàú-ndó càda cuendá-ndó núu nása quide cue ñáyiú ndècu ndìhi-ndo ichi Xítohó Jesucristú. Núu xiá<sup>n</sup> xini ñuhu-xi daquee tíhú-ndó tée duca<sup>n</sup> ñà túú quide váha ndècu ndìhi-ndo-á<sup>n</sup>, te vá dáñá-gã-ndó nihí tnàhá ndìhi ñaha-dé xii-ndo.

## 6

*Nàcuáa tàú-xi cada ñáyiú ndècu ichi Xítohó Jesucristú te núu ñá túú ndècu ndìhi váha tnàhá-yu*

<sup>1</sup> Te dava nchòhó òré ñá túú ndècu ndìhi váha tnàha-ndo te cùyi-ndo cuáhá<sup>n</sup>-ndó núú cuè tée cùchiu<sup>n</sup> ñá túú ndècu ichi Xítohó Jesucristú sàcá<sup>n</sup> cuèchi-ndo, te ñá túú dùca<sup>n</sup> taú-xi cada-ndo chi núú cuè tée ndècu ichi-gá duca<sup>n</sup> tàú-ndó quíhí<sup>n</sup>-ndó càcá<sup>n</sup> cuèchi-ndo. <sup>2</sup> Te nchòhó sa nàha-ndo sã ncháá ñáyiú cùu cuendá Yã Ndiòxí sáa nduu cãhá<sup>n</sup>-yu te núu ní quide ndàá nchaa dava-gá ñáyiú àdi ñá túú ní quide ndàá-yu, te nchòhó tnàhá-ndó cùu-ndo ñáyiú duca<sup>n</sup> cãhá<sup>n</sup>, te núu duca<sup>n</sup> te cutnùní iní-ndó sã ndácú-ndó càda ndàá-ndó nchaa cuèchi sã ñá túú ùhú cundáá vitna ndècu-ndo ñuyúú-a. <sup>3</sup> Te nchòhó sa nàha-ndo sã ncháá ndéé cue espíritú xínú cuèchi núú Yã Ndiòxí sáa nduu cãhá<sup>n</sup>-ó te núu nása quide-xi ndecu-xi. ¡Núu xiá<sup>n</sup> cùtnùní iní-ó sã úú<sup>n</sup>-gã ndacu-o càda ndàá-ó nchaa cuèchi sã ìo ñuyúú-a! <sup>4</sup> Te núu ìo dava-ndo ìo nása cùu ndecu-ndo te xìnàá-ndó, te vá

quihí<sup>n</sup>-ndó càcá<sup>n</sup> cuéchi-ndo núú cuè téé ndèhe-ndo sá ñà túú ndècu-güedé ichi Yá Ndiöxí, dico nchòhó chi da núú cuè téé-á<sup>n</sup> cuáhá<sup>n</sup>-ndó sàcá<sup>n</sup> cuéchi-ndo. <sup>5</sup> Te duha càhá<sup>n</sup>-í cuendá cucahá<sup>n</sup> núú-ndó chi ñá túú quide váha-ndo sá dúcá<sup>n</sup> quide-ndo. ¿Te náa dícó-nă ñá túú tnàhí ì<sup>n</sup> téé cùtnuní iní-xi nàcuáa cada ndáá cuéchi-ndo ndècu ndihí-ndo ichi Xítohó Jesucristú-ă<sup>n</sup>? <sup>6</sup> Te nchòhó, ñá túú quide váha-ndo, chi dava-ndo cuáhá<sup>n</sup>-ndó núú cuè téé ñá túú ndècu ichi Xítohó Jesucristú sàcá<sup>n</sup> cuéchi-ndo cuendá dava-gá cue ñáyiú ndècu ndihí-ndo ichi-gá.

<sup>7</sup> Te ñá túú quide váha-ndo sá dúcá<sup>n</sup> náa ndihí tnàha-ndo te cuáhá<sup>n</sup>-ndó sàcá<sup>n</sup> cuéchi-ndo, te váha-gá sá cada càhnu iní-ndó cuèi náandi na cada ñaha tnaha ñáyiú-ndo xii-ndo cuèi dùhú-yu sá ndécú ndihí-ndo dico cada càhnu-ni iní-ndó. <sup>8</sup> Dico nchòhó chi ñá túú quide cahnu iní-ndó chi da uu<sup>n</sup>-gá ñá túú quide váha-ndo sàcúú-xí tnàha ñáyiú-ndo, chi cùú úhú iní-ndó-yu, te dùhu-ndó-yu, te ndéé mée-ndó nàcuáa ndècu-ndo ichi Xítohó Jesucristú duca<sup>n</sup> quide tnaha-ndo.

<sup>9</sup> Te nchòhó sa nàha-ndo sá ncháá ñáyiú ndècu ichi cuehé ichi duha vá ndúú tãhú-yu cundecú-yu núú ndécú Yá Ndiöxí táxi tnùní-gá, núú xiă<sup>n</sup> vá cání iní-ndó sá ñáyiú-á<sup>n</sup> nduu tãhú-yu cundecú-yu ndihí-gá. Te ni cuè ñáyiú ndècu ichi díí iní, te ni cuè ñáyiú quide cahnu nchaa sá càchí-yu cùú ndiöxí te ñá ndáá chi dícó cue téé ñuyúú-a ní cadúha nchaa xiă<sup>n</sup>, te ni cuè téé càhá<sup>n</sup> ndihí ñadihí te ñá díú ñadihí-güedé cùú-yu, te ni cuè ñáyiú dñí càhá<sup>n</sup> ndihí téé te ñá díú yï-yu cùu-güedé, te ni cuè téé càhá<sup>n</sup> ndihí tnàha téé-xi, <sup>10</sup> te ni cuè ñáyiú dùhu, te ni cuè ñáyiú xilho sá ndécú ndihí tnaha ñáyiú-xi, te ni cuè ñáyiú quihu, te ni cuè ñáyiú càhá<sup>n</sup> úhú, te ni cuè ñáyiú dñícuèhé tnàha ñáyiú-xi te dùhu ñahá-yu, te ni ì<sup>n</sup> cue ñáyiú duha xiquide vá ndúú tãhú-yu cundecú-yu núú ndécú Yá Ndiöxí táxi tnùní-gá. <sup>11</sup> Te dava nchòhó duca<sup>n</sup> ñí xóo cada-ndo ni cùú, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùú cuendá Yá Ndiöxí, te ní cuu tucu-ndo ñáyiú ñá túú-gă cuéchi-xi ndècu núú-gă. Te duca<sup>n</sup>

ñí quide ñaha Yá Ndiöxí xii-ndo sá váha sá cuendá Xítohó Jesucristú, te ní ngündecu ndihí-ndo Espiritú Yá Ndiöxí.

### *Nàcuáa ndùu cuendá yiqui cùñú-ó*

<sup>12</sup> Te càchí ñáyiú sá ncháá sá sání iní-ó cuu cada-o, te ndáá càhá<sup>n</sup>-yu dícó-ni sá ñă ncháá cùu-xi sá váha sá cùú-xí-ó. Te núú cuíni nchaa sá sání iní-ó-ă<sup>n</sup> taxi tnùní ñáhá-xí te vá cada-ó. <sup>13</sup> Te nchòhó sa xini-ndó sá ncháá sá xéxi-ó cuãnguee-xi xití-ó, te xití-ó ñí cuáha tnàhí-xi sá cùhú<sup>n</sup> nchaa sá caxí-ó, dico xití-ó ndihí nchaa sá xéxi-ó chi naa-xi. Te Xítohó Jesucristú néhé cuendá-gá yiqui cùñú-ó, te duca<sup>n</sup> yiqui cùñú-ó cùu-xi cuendá-gá, te ñá túú ní cuáha yiqui cùñú-ó sá cùndècu-xi ichi díí iní. <sup>14</sup> Te datná ní quide Yá Ndiöxí ní dándótó-gă Xítohó Jesucristú duca<sup>n</sup> cada ñaha-gá xii nchoo tucu chi dandòto ñaha-gá xii-o núu na cùú-ó, chi ndàcu-gá quidé-gă nchaa sá váha.

<sup>15</sup> Te nchòhó sa nàha-ndo sá yiqui cùñú-ó cùu-xi cuendá Xítohó Jesucristú chi ì<sup>n</sup>-ni cùu-o ndihí-gá, núú xiă<sup>n</sup> ñá túú tnàhí ndùu váha-xi càhá<sup>n</sup> ndihí-o ñáyiú ndècu ichi díí iní, chi yiqui cùñú-ó cùu-xi cuendá Xítohó Jesucristú, te núú duca<sup>n</sup> na cada-o te cada iní-ó sá cuendá-nă ñáyiú-á<sup>n</sup> cùú yiqui cùñú-ó, núú xiă<sup>n</sup> ñá túú tnàhí ndùu váha-xi duca<sup>n</sup> cada-o. <sup>16</sup> Te sa xini-ndó sá núu ì<sup>n</sup> téé na càhá<sup>n</sup> ndihí-dé ì<sup>n</sup> ñadihí ndécú ichi díí iní te cada iní-ó sá ì<sup>n</sup>-nă yiqui cùñú cùú-yu. Te duca<sup>n</sup> càhá<sup>n</sup>-xi núú tütú Yá Ndiöxí núú càchí-xi: “Ì<sup>n</sup> téé na càhá<sup>n</sup> ndihí-dé ì<sup>n</sup> ñadihí te ì<sup>n</sup>-nă yiqui cùñú cùú-yu”, duha càchí-xi. <sup>17</sup> Te duca<sup>n</sup> sãtnahá-xi cùu nchaa ñáyiú tnàhá tnúhu ndihí Xítohó Jesucristú, chi ì<sup>n</sup>-nă cùú-yu ndihí-gá.

<sup>18</sup> Te núú xiă<sup>n</sup> càhá<sup>n</sup>-í dóho-ndo sá vă cùndècu-ndo ichi díí iní, chi núú duca<sup>n</sup> na cada-ndo te ñá túú tnàhí sá váha cùu-xi sá cùú-xí yiqui cùñú-ndó chi ío dàcuíta nihnu-xi yiqui cùñú-ndó. Te nchaa dava-gá sá cuehé sá dúhá ñá túú quide-xi yiqui cùñú-ndó datná quidé xiă<sup>n</sup>. <sup>19</sup> Te nchòhó sa cùtnuní iní-ndó sá yiqui cùñú-ndó cùu-xi datná ì<sup>n</sup> vehe núú ndécú Espiritú Yá Ndiöxí. Te duca<sup>n</sup> sãtnahá-xi cùu yiqui cùñú-ndó chi ndècu-ndo ndihí Espiritú-gá. Te mee-gă ní

taxi-gá Espiritú-gá ndécú ndìhi-ndo, te ñá díú mèe-ndo cuu cuendá-ndó mèe-ndo chi Yá Ndiòxí cúú cuendá ñáhá-gá xii-ndo. <sup>20</sup> Te duca<sup>n</sup> cùu-ndo ñáyiú cùu cuendá Yá Ndiòxí chi Xítóhó Jesucristú ní nacháhu-gá nchaa yíca cuèchi-ndo. Te núu xíá<sup>n</sup> xíní ñùhu-xi sá ñihí ní ndúú-ndó càda-ndo nacuaá cuu càhnu Yá Ndiòxí, te duca<sup>n</sup> tàú-xi cada-ndo chi espíritú-ndó ndìhi yiqui cuñú-ndó cùu-xi cuendá-gá.

## 7

### *Sáhu sã cúú-xí ñáyiú ní tnándaha*

<sup>1</sup> Te ní quexio tutú sá ñí dáquixí-ndó ndàha-í, te vitna na càchí tnúhu-í xii-ndo cuendá tnúhu càhá<sup>n</sup>-ndó núú tütú-ndó. Te váha cada-xi te núu vá cándeca téé ñadihi, te duca<sup>n</sup>-ni váha cada-xi te núu ñáyiú ñihí vá cándecá-yu téé. <sup>2</sup> Te dicó-ni sá núu duca<sup>n</sup> na càda-ndo te dava-ndo caní iní-ndó cundecu-ndo ichi díí iní. Núu xíá<sup>n</sup> xíní ñùhu-xi sá ncháá cuè téé ndí díí<sup>n</sup> cundecu ñadihi-güedé, te duca<sup>n</sup>-ni tucu nchaa cue ñáyiú ñihí ndí díí<sup>n</sup> cundecu yíí-yu. <sup>3</sup> Te càchí tnúhu-í xii-ndo sã ncháá cuè téé vá cúú càchí-güedé sá vã cúú cãhá<sup>n</sup> ndihí-güedé ñadihi-güedé, te ñáyiú duca<sup>n</sup> cuè ñáyiú ñihí tucu, vá cúú càchí-yu sá vã cúú cãhá<sup>n</sup> ndihí-yu yíí-yu. <sup>4</sup> Te nchaa cue ñáyiú ñihí chi ñá díú mèe-ní-yu cùu cuendá-yu yiqui cùñú-yu chi tnàhá cúú cuendá yíí-yu, te duca<sup>n</sup>-ni nchaa cue téé tucu chi ñá díú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadihi-güedé. <sup>5</sup> Te cue téé vá cúú càchí-güedé sá vã cúú cãhá<sup>n</sup> ndihí-güedé ñadihi-güedé. Te ni cuè ñáyiú ñihí vá cúú càchí-yu sá vã cúú càhá<sup>n</sup> ndihí-yu yíí-yu. Àdi te núu ní ndatnúhu-yu sá vã dúcá<sup>n</sup> càdá-yu ñí ùú nduu cuendá sá cuñí-yu ío cãhá<sup>n</sup> ndihí-yu Yá Ndiòxí, dico ná yáha núu ná daha nduu duca<sup>n</sup> ní ndatnúhu-yu sá vã dúcá<sup>n</sup> càdá-yu te naníhí tnàhá tucú-yu, chi núu ñáhá te cudana te vá cuacàhnu iní-yu te sácuihná dacàhá<sup>n</sup> ñáhá-xí xii-yu cada-yu sá ñá túú tàú-yu cada-yu.

<sup>6</sup> Te tnúhu càhá<sup>n</sup>-í-a quèe-xi sá tée ndihí ñadihi cuu candeca tnàhá-yu dico ñá túú

quide yica-í sá dúcá<sup>n</sup> càdá-yu. <sup>7</sup> Te yúhú sání iní-í sá núu dicó sá cúú te nchaa-ndo cundecu-ndo datná ndécú-í, dico ñáhá chi mee Yá Ndiòxí ní cachí-gá nacuáa nduu táhú-ó ñí<sup>n</sup> ñí<sup>n</sup>-o cundecu-o, chi dava-o ñí cutáhú-ó núú-gã sá cundecu ñadihi-ó te dava-o ñáhá. <sup>8</sup> Te càchí tnúhu-í xii nchòhó cue téé vátá ñihí-gá ñadihi-xi sá vãha-gá sá núu vá cundecu ñadihi-ndó datná yúhú. Te duca<sup>n</sup>-ni nchòhó cue ñáyiú ñihí ñáyiú vátá ñihí-gá yíí-xi sá vãha-gá sá núu vá cundecu yíí-ndo. Te ñáyiú duca<sup>n</sup> càhá<sup>n</sup>-í sá cúú-xí nchaa nchòhó ñáyiú ñihí ní quendóo quèé sá vãha-gá sá núu vá cándeca-gá-ndó téé. <sup>9</sup> Te càchí tnúhu-í xii nchaa-ndo sã núu xito-ndo sã vã cundecu iní-ndó cundecu mee-ndo te váha-gá sá núu tnándaha-ndo, te ñá díú sã mèe-ní caní cuhé caní duha iní-ndó cundecu-ndo.

<sup>10</sup> Te nchaa nchòhó ñáyiú sa ní tnándaha càhá<sup>n</sup>-í dóho-ndo, te ñá díú mèe-í duha càhu iní-í càhá<sup>n</sup>-í dóho-ndo chi Xítóhó Jesucristú duca<sup>n</sup> dàcahu iní ñáhá-gã xii-í, chi mee-gã cuñí-gá cada-ndo nacuáa na càhá<sup>n</sup>-í-a. Te nchaa nchòhó cue ñáyiú ñihí càhá<sup>n</sup>-í dóho-ndo sã vã dáñá-ndó yíí-ndo. <sup>11</sup> Te núu ío dava-ndo sã ní dáñá-ndó yíí-ndo, te xini ñùhu-xi sá vã cándeca-gá-ndó téé, chi cundecu mee-ñá-ndó àdi núu ñáhá te naquehe<sup>n</sup> tucu-ndo téé ní cuu yíí-ndo. Te nchaa nchòhó cue téé ndècu ñadihi-xi càhá<sup>n</sup>-í dóho-ndo sã vã dáñá-ndó ñáyiú cùu ñadihi-ndó.

<sup>12</sup> Te tnúhu na càhá<sup>n</sup>-í-a cùu-xi sá ñí sani iní mèe-í te ñá díú tnúhu sá ñí cachí Xítóhó Jesucristú càhá<sup>n</sup>-í cúú-xi. Te núu dava nchòhó cue téé ndècu ichi Xítóhó Jesucristú ndécá-ndó ñáyiú ñihí ñáyiú ñá túú ndècu ichi-gá, te vá dáñá-ndó-yu te núu cùu váha iní-yu ndèca ñáhá-yu xii-ndo. <sup>13</sup> Te núu dava nchòhó cue ñáyiú ñihí ñáyiú ndècu ichi Xítóhó Jesucristú ndécá-ndó cuè téé ñá túú ndècu ichi-gá te vá dáñá-ndó-güedé te núu cùu váha iní-güedé ndécá ñàha-güedé xii-ndo. <sup>14</sup> Te núu ñí<sup>n</sup> téé ñá túú sàndáá iní-dé Xítóhó Jesucristú te ñadihi-dé sàndáá iní ñáhá-á<sup>n</sup> xii-gá, te téé-á<sup>n</sup> ñí cuu-dé ñí<sup>n</sup> téé sa ní cuyatni tnàhá tnúhu ndihí ñàha xii-gá sá cuendá ñadihi-dé. Te duca<sup>n</sup> sãtnahá-xi cùu tucu ñadihi ñá túú sàndáá



iní ñáhá xii Xítohó Jesucristú te yii-a<sup>n</sup> sàndáá iní ñáhá-dě xii-gá, te ñaha-á<sup>n</sup> sa ní cuyatni tnahá tnúhu-a<sup>n</sup> ndihí-gá sá cuèndá yii-a<sup>n</sup>, te ñu-ni duca<sup>n</sup> sãtnahá-xi cùu cue landú-yu chi sa ní cuyatni tnahá tnúhu-güexi ndihí-gá. Te núu vá dúcá<sup>n</sup> cùu te cue landú-yu-á<sup>n</sup> ño xica cùndecu-güexi núu-gã. <sup>15</sup> Te núu ñi<sup>n</sup> tée ñá túú sàndáá iní ñáhá xii Xítohó Jesucristú cuini-dé ñaha tñaha-dé ndihí ñadihí-dé ñaha sàndáá iní ñáhá xii Xítohó Jesucristú, te ñu-ni na càda-dé nàcuáa sàni iní-dé. Te ñu-ni duca<sup>n</sup> tucu te núu ñadihí ñaha ñá túú sàndáá iní ñáhá xii Xítohó Jesucristú cuini-a<sup>n</sup> ñaha-a<sup>n</sup> tée sàndáá iní ñáhá xii-gá, tée cùu yii-a<sup>n</sup> te ñu-ni na càda-a<sup>n</sup> nàcuáa sàni iní-a<sup>n</sup>. Chi tée sàndáá iní ñáhá xii Xítohó Jesucristú ñá túú tàú-dé cada yica-dé ñadihí-dé cundecu ndihí ñaha-a<sup>n</sup> xii-dé te núu ñá túú cuini-a<sup>n</sup>. Te ñu-ni duca<sup>n</sup> ñadihí ñaha sàndáá iní ñáhá xii-gá ñá túú tàú-a<sup>n</sup> cada yica-a<sup>n</sup> cundecu ndihí ñaha yii-a<sup>n</sup> xii-a<sup>n</sup> te núu ñá túú cuini-dé cundecu ndihí ñaha-dě xii-a<sup>n</sup>, chi Yá Ndiöxí cuini-gá sá ncháá nchòo ñáyiu ndècu ichi-gá cundecu váha-o vã nàá-ó. <sup>16</sup> Chi cue tée sàndáá iní tnúhu Xítohó Jesucristú ñá túú cùtnuní iní-güedé te núu ndacu-güedé canu ichi-güedé ñadihí-güedé ichi-gá àdi ñáhá te núu ñá túú sàndáá iní ñáhã-yu xii-gá, te duca<sup>n</sup>-ni cuè ñáyiu ñadihí sàndáá iní tnúhu Xítohó Jesucristú ñá túú cùtnuní iní-yu te núu ndacú-yu canu ichi-yu yíi-yu ichi-gá àdi ñáhá te núu ñá túú sàndáá iní ñáhã-güedé xii-gá.

<sup>17</sup> Te duha na càchí tnúhu-í xii-ndo, nchaa chiú<sup>n</sup> ní nduu táhú-ndó núú Yá Ndiöxí quidé-ndó ndéé cùtnahá ní cáhá<sup>n</sup> ñáhã-gã xii-ndo ñi natuha-ndo ichi-gá te ñu-ni chiú<sup>n</sup>-á<sup>n</sup> cada-ndo cundecu-ndo. Te nchaa xichi núú tàcá ñáyiu dàcuaha tnúhu-gá ñu-ni duha càhá<sup>n</sup>-í dóho-yu. <sup>18</sup> Te nchaa cue tée ndècu seña ñi-xi dàtná ní cachi ndí Moisés, cue tée ní cáhá<sup>n</sup> Yá Ndiöxí ndécú ichi-gá, te ñu-ni duca<sup>n</sup> cùnduu-güedé cundecu-güedé, te nchaa cue tée ñá túú ndècu seña ñi-xi ní cáhá<sup>n</sup>-gá cundecu ichi-gá, ñu-ni duca<sup>n</sup> cùnduu-güedé cundecu-güedé vá cuãha-güedé seña ñi-güedé. <sup>19</sup> Te ñi<sup>n</sup>-ni cùu-xi cuèi na cuãha-o seña ñi-o àdi vá cuãha-o. Te sá ño-gá xini ñuhu-xi cada-o xiã<sup>n</sup> cúu-xí sã cádá-ó ncháa nàcuáa cuini Yá

Ndiöxí. <sup>20</sup> Chi xini ñuhu-xi sá cùndecu-ni-o datná ndécú-ó cùtnahá ní cáhá<sup>n</sup> ñáhã Yá Ndiöxí xii-o ñi ngùndecu-o ichi-gá. <sup>21</sup> Te núu cùu-ndo ñáyiu ñá túú tñahí dàñá quee núú chiú<sup>n</sup> pàtróo<sup>n</sup>-xi cùtnahá ní cáhá<sup>n</sup> ñáhã Yá Ndiöxí xii-ndo, te ñá túú ñá cani iní-ndó, dico núu dàña ñaha pàtróo<sup>n</sup>-ndó quee-ndo núú chiú<sup>n</sup>-ndó te váha-ni quee-ndo núú chiú<sup>n</sup>-ndó. <sup>22</sup> Te sátná ní cáhá<sup>n</sup> ñáhã Xítohó Jesucristú xii nchòhó ñáyiu duca<sup>n</sup> ñá túú tñahí dàñá quee núú chiú<sup>n</sup> pàtróo<sup>n</sup>-xi-á<sup>n</sup>, te ní cuu-ndo dàtná ñáyiu dàñá quee núú chiú<sup>n</sup> pàtróo<sup>n</sup>-xi sá cúu-xí-gã, te duca<sup>n</sup> chi ñá túú-gã ndécú-ndó ichi cuèhé ichi duha. Te nchòhó ñáyiu dàñá quee núú chiú<sup>n</sup> pàtróo<sup>n</sup>-xi cùu-ndo datná ñáyiu ñá túú tñahí dàñá quee núú chiú<sup>n</sup> pàtróo<sup>n</sup>-xi sá cúu-xí Xítohó Jesucristú, te duca<sup>n</sup> chi xinu cuechi-ná-ndó núú-gã. <sup>23</sup> Te Yá Ndiöxí ní nduu cuèndá ñáhã-gã xii-o chi Xítohó Jesucristú ní nacháhu-gã nchaa yíca cuèchi-o sã ndécú núú Yá Ndiöxí ní cùu, te vá dàñã-ndó sã tñaha ñáyiu-ndo nàdatuhú iní ñáhã-yu xii-ndo vã cùnú cuèchi-ndo núú Xítohó Jesucristú nàcuáa tàú-xi cunduu. <sup>24</sup> Te núu xiã<sup>n</sup> càchí tnúhu-í xii nchaa nchòhó ñáyiu ndècu ndihí-í ichi Xítohó Jesucristú sá cùndecu-ni-ndo datná-ñi ndècu-ndo ndéé cùtnahá ní cáhá<sup>n</sup> ñáhã-gã xii-ndo, te ñu-ni duca<sup>n</sup> cundecu-ndo ichi-gá.

<sup>25</sup> Te càchí tnúhu tucu-í xii-ndo sã Xítohó Jesucristú ñá túú càchí tnúhu-gã xii-í núu nása cáhá<sup>n</sup>-í cuèndá nchaa ñáyiu vátã tñandaha-gã. Te duha sàni iní-í cáhá<sup>n</sup>-í cuèndá-yu, te nchòhó cuu quíndáá iní-ndó tñuhu càhá<sup>n</sup>-í chi Xítohó Jesucristú chindèe chitúu ñaha-gã xii-í. <sup>26</sup> Te yúhú càchí-í sã sã cuèndá nchaa tñundòho tnúhu ndáhú ió ñuyíú-a vitna, te váha-gã sã ncháá ñáyiu te núu nása xíndecú-yu te duca<sup>n</sup>-ni na cùndecú-yu. <sup>27</sup> Te nchaa cue tée ndècu ñadihí-xi te duca<sup>n</sup>-ni na cundecu-güedé ndihí-yu, te nchaa cue tée ñá túú ñadihí-xi te duca<sup>n</sup>-ni na cùnduu-güedé vá ndúcú-güedé ñadihí-güedé. <sup>28</sup> Dico nchaa cue tée na ndècu ñadihí-xi te ñá díú ñi<sup>n</sup> cuèchi cùu-xi sá dúcá<sup>n</sup> ná ndècu-güedé ñadihí-güedé, te ñu-ni duca<sup>n</sup> cùu tucu cue ñáyiu ñadihí te núu na ñihí-yu yíi-yu chi ñá díú ñi<sup>n</sup> cuèchi cùu-xi sá dúcá<sup>n</sup> ñihí-yu yíi-yu.



Te núu cue téé na ñihí-güedé ñadihí-güedé te nándi ndohó-yu cundecú-yu ñuyíú-a, te núu xiá<sup>n</sup> duha càhá<sup>n</sup>-í cuendá sá vǎ ndúcú-güedé ñadihí-güedé cuendá sá vǎ ndóhó-yu.

<sup>29</sup> Te nchaa nchòhó ñáiyu ndècu ndihí-í ichi Xítóhó Jesucristú na càchí tnúhu-í xii-ndo sǎ ñǎ túú-gǎ vǎi nduu cumání te quixi tucu Xítóhó Jesucristú, núu xiá<sup>n</sup> xíní ñùhu-xi sá ndèé vitna ngúita nchaa cue téé ndècu ñadihí-xi cada-güedé chiú<sup>n</sup> Xítóhó Jesucristú, te cada-güedé dàtná sá ñǎ túú ñadihí-güedé. <sup>30</sup> Te nchaa ñáiyu ndihú iní-xi te na càda-ní-yu sá ñǎ túú ndihú iní-yu cadá-yu chiú<sup>n</sup> Yá Ndióxi. Te nchaa ñáiyu cùdíí iní-xi te na càda-ní-yu sá ñǎ túú cùdíí iní-yu cadá-yu chiú<sup>n</sup>-gǎ, te nchaa ñáiyu ndècu ndihí nándi sá ndécú ndihí te na càda-ní-yu sá ñǎ túú ñǎ ndécú ndihí-yu cadá-yu chiú<sup>n</sup>-gǎ. <sup>31</sup> Te nchaa ñáiyu nèhe chiu<sup>n</sup> nchaa sá ío ñuyíú-a te na càda-ní-yu cuendá sá ñǎ túú ñǎ néhé chiú<sup>n</sup>-yu cadá-yu chiú<sup>n</sup> Yá Ndióxi, chi nchaa sá ío ñuyíú-a sa ñùhu-xi ichi cuáhá<sup>n</sup>-xi núú ndihí ñihnu-xi.

<sup>32</sup> Te cùníní-í sá vǎ cùhú<sup>n</sup> iní-ndó nándi sá ío ñuyíú-a, te ni ñǎ túú tnàhí ná cani iní-ndó cùndecu-ndo, chi nchaa cue téé ndècu ichi Xítóhó Jesucristú xíndecu mee ío ñùhu iní-güedé cada-güedé chiú<sup>n</sup>-gǎ nàcuáa cudíu-güedé núú-gǎ. <sup>33</sup> Te nchaa cue téé sa ndècu ñadihí-xi cue téé ndècu ichi-gǎ ñùhu iní-güedé nàcuáa cada-güedé cundecu-güedé ñuyíú-a cuendá duca<sup>n</sup> cùdiu-güedé núú ñadihí-güedé. <sup>34</sup> Te diu-ni duca<sup>n</sup> cùu tucu cue ñáiyu dihí chi ñǎ túú ñ<sup>n</sup>-ni cuu ñáiyu sa ndècu yí<sup>n</sup>-xi ndihí ñáiyu vátá cùndècu-gǎ yí<sup>n</sup>-xi, chi ñáiyu ndècu ichi Xítóhó Jesucristú ñǎ túú ndèca téé ío ñùhu iní-yu cadá-yu chiú<sup>n</sup>-gǎ nàcuáa ñihí ní ndúú-yu cundecu yíñùhú-yu núú Yá Ndióxi, dico cue ñáiyu dihí ndécá tée ndècu ichi-gǎ ío ñùhu iní-yu nàcuáa cundecú-yu ñuyíú-a cuendá cudíu-yu núú yí<sup>n</sup>-yu.

<sup>35</sup> Te duha càhá<sup>n</sup>-í cuendá cúú-xí ñ<sup>n</sup> sá vǎha xii-ndo, te cudíu núú tnáhá-ndó, te cuu-ndo ñáiyu cada ndáá núú Xítóhó Jesucristú, te mee-ni-gǎ cuhu<sup>n</sup> iní-ndó. Te ñǎ díú sǎ dúhá càhá<sup>n</sup>-í te quide yica-í sá

cádá-ndó nàcuáa càhá<sup>n</sup>-í.

<sup>36</sup> Te núu ío dava-ndo sàni iní-ndó sǎ ñǎ túú nduu vǎha-xi sá ío cuu sacuéhé déhe yoco-ndo cundecú-yu ñǎ, te núu sàni iní-ndó sǎ vǎha-gǎ candecá-yu téé te cada-ndo nàcuáa sàni iní-ndó, chi ñǎ díú ñ<sup>n</sup> cuéchi cùu-xi. <sup>37</sup> Te núu dava-ndo ndècu déhe yoco-ndo, te vǎ yòo ñ<sup>n</sup> cada yica ñǎha xii-ndo sá cándecá-yu téé. Te núu mee-ndo sàni vǎha iní-ndó nàcuáa cada-ndo, te núu vǎ dásá<sup>n</sup>-ndó déhe yoco-ndo càndeca ñǎha téé te quide vǎha-ndo sǎ dúcá<sup>n</sup> quide-ndo. <sup>38</sup> Te nchaa ñáiyu dàsa<sup>n</sup> déhe yoco-xi càndeca ñǎha téé te vǎha-ni quidé-yu, te nchaa ñáiyu ñǎ túú dàsa<sup>n</sup> déhe yoco-xi càndeca ñǎha téé te vǎha-gǎ tucu quidé-yu sá dúcá<sup>n</sup> quidé-yu.

<sup>39</sup> Te nchaa ñáiyu dihí ndécú yí<sup>n</sup>-xi xini ñùhu-xi sá cùndècu-ní-yu ndihí yí<sup>n</sup>-yu ñini ndècu vívú-güedé chi duca<sup>n</sup> càhá<sup>n</sup> tnúhu sá dánèhé ñáhá xii-o nàcuáa cada-o cùndecu-o, dico núu na cùú-güedé te cuu naquehé<sup>n</sup>-yu ingá téé candecá-yu dicó-ni sá diu-ni téé ndècu ichi Xítóhó Jesucristú. <sup>40</sup> Te yúhú sání iní-í sá ío-gǎ vǎha cundecú-yu te núu vǎ nándúcú-yu ingá téé candecá-yu, te duha càhá<sup>n</sup>-í chi Espíritú Yá Ndióxi duca<sup>n</sup> dàcahu iní ñáhá-xi xii-í càhá<sup>n</sup>-í.

## 8

*Cuendá nchaa sá nchító-ó sǎñaha ñáiyu nduu táhú nchaa sá càchí-yu cùu ndióxi*

<sup>1</sup> Te vitna na càhá<sup>n</sup>-í cuendá nchaa sá nchító-ó sǎñaha ñáiyu nduu táhú nchaa sá càchí-yu cùu ndióxi te ñǎ ndàá chi dicó ndaha cue tee ñuyíú-a ní cuáha nchaa xiá<sup>n</sup>. Te nchoo sa cùtnuní vǎha iní-ó cuendá nchaa xiá<sup>n</sup>, dicó-ni sá cuendá nchaa sá cùtnuní vǎha iní-ó xiá<sup>n</sup> quidé càhnu-o mee-o, dico núu cùu iní-ó tnàha ñáiyu-o te canu ichi-ò-yu ichi vǎha. <sup>2</sup> Te núu dava-ndo sàni iní-ndó sǎ tǔha-ndo dico cùu-ndo ñáiyu vátá cùtǔha-gǎ nàcuáa tàú-xi cunduu. <sup>3</sup> Te núu nchòhó cúú iní-ndó Yá Ndióxi te mee-gǎ càhá<sup>n</sup>-gǎ sá cúú-ndó ñáiyu cùu cuendá-gǎ.

<sup>4</sup> Te vitna na càchí tnúhu-í xii-ndo nàcuáa nduu cuendá nchaa sá nchító-ó sǎñaha ñáiyu nduu táhú nchaa sá càchí-yu cùu ndióxi te ñǎ ndàá chi dicó ndaha cue téé ñuyíú-a ní cuáha nchaa xiá<sup>n</sup>. Te nchoo cùtnuní iní-ó sǎ ncháá sǎ càchí ñáiyu cùu ndióxi cǎdǔha-yu ñuyíú-a ñǎ túú cùu-xi

ndióxí, chi ì<sup>n</sup>dii díí-ni Yá Ndiöxí ndécú. <sup>5</sup> Te cue ñáyíu ñuyíú-a cächí-yu sá cuèi andíu te cuèi ñuyíú-a ndècu titní ndióxí. Te ndáá sá ndèni ní cuu ndècu espíritú sá cächí ñáyíu cùu ndióxí te ñá ndàá sá ndióxí cúú-xí, te nchaa xiá<sup>n</sup> táxí tnùní ñáhá-xí xii-yu. <sup>6</sup> Te nchoo cùtnuní ndáá iní-ó sã ì<sup>n</sup>dii díí-ni Yá Ndiöxí ndécú te ñá ndàá sá ndióxí cúú-gã Tãtã-ó, te nchoo cùu-o ñáyíu cùu cuendá-gá. Te ñá-ni mee-gã ní táuchíú<sup>n</sup>-gã ní cuáha nchaa sá ió ñuyíú-a, te cùtnuní tucu iní-ó sã ì<sup>n</sup>dii díí-ni Xítóhó Jesucristú ndécú, te Yaá-á<sup>n</sup> ñí quide-gá nchaa chiú<sup>n</sup> ní táhú Dütú Ndiöxí ní cadúha-gá nchaandi túhú sá ió ñuyíú. Te ñá-ni mee Xítóhó Jesucristú quidé ndècu-o ichi-gá vitna.

<sup>7</sup> Te ñá ncháá nchòhó ñáyíu ndècu ichi Xítóhó Jesucristú cùtnuní iní-ndó nàcuáa ndùu tnúhu càhá<sup>n</sup>-í. Chi sa ní cáa<sup>n</sup>-ndo quide cahnu-ndo nchaa sá cächí-yu cùu ndióxí ní cùu. Te cuendá xiá<sup>n</sup> nùu nàquehe<sup>n</sup>-ni-ndo nchaa sá nchító-ó ndùu táhú nchaa sá cächí-yu cùu ndióxí-á<sup>n</sup> xéxi-ndó, te sàni-ni iní-ndó sã quidé cahnu-ndo nchaa sá cächí-yu cùu ndióxí-á<sup>n</sup> te ñá ndàá sá ndióxí cúú-xí. Te núu sàni iní-ndó sã ñá túú vãha caxi-ndo sã dúcá<sup>n</sup> ndùu táhú-xi-á<sup>n</sup> te xèxi-ndo te xiá<sup>n</sup> ñá túú cùu vãha iní-ndó cuendá sá dúcá<sup>n</sup> quide-ndo. <sup>8</sup> Te ñá díú nchàa sá xéxi-ó quide-xi cudíu-o núú Yá Ndiöxí, chi ì<sup>n</sup>-ni quide-xi cuèi na càxi-o àdi vá cáxi-ó chi ni ì<sup>n</sup> sá cáxi-ó vã chindèe ñaha-xi cudíu-o núú Yá Ndiöxí. Te cuèi vá cáxi-ó dico ñá díú xiá<sup>n</sup> cada sá vã cudíu-o núú-gã. <sup>9</sup> Te cuu-ni caxi-ndo nchàa nãni ñihí-ndó. Te dicó-ni sá càda cuendá-ndó sã ñá díú cuendá sá xéxi-ndó-ã<sup>n</sup> cuíta nihnu dava ñáyíu ndècu ndihí-ndo ichi Xítóhó Jesucristú cadá-yu nãndi sá cáda-yu nàcuáa vá cúú vãha iní Yá Ndiöxí chi ñáyíu-á<sup>n</sup> ñá túú cùtnuní iní-yu. <sup>10</sup> Te nchòhó ñáyíu xini vãha cuendá nchaa sá cächí-yu cùu ndióxí, te núu na quihí<sup>n</sup>-ndó nùu ndécú nchàa xiá<sup>n</sup> te ngóo-ndo càxi-ndo nchaa sá ñí cutáhú-xi, te quini ñáyíu ndècu ndihí-ndo ichi Xítóhó Jesucristú, ñáyíu vátá cùtnuní-gá iní-xi nàcuáa ndùu cuendá nchaa sá dúcá<sup>n</sup> cächí-yu cùu ndióxí-á<sup>n</sup>, te cuèi sàni iní-yu sá ñá túú quide vãha-ndo sã dúcá<sup>n</sup> quide-ndo te cudana te cada yicá-yu caxí-yu tnàhá-yu

nchaa sá dúcá<sup>n</sup> ñí nduu táhú nchaa sá cächí-yu cùu ndióxí-á<sup>n</sup> te ñá ndàá sá ndióxí cúú-xí. <sup>11</sup> Te núu duca<sup>n</sup> cùtnuní iní-ndó nàcuáa ndùu cuendá nchaa xiá<sup>n</sup> te duca<sup>n</sup> quide-ndo, te sá dúcá<sup>n</sup> quide-ndo-á<sup>n</sup> te dàcuíta nihnu-ndo dáva-gá ñáyíu ndècu ndihí-ndo ichi Xítóhó Jesucristú, ñáyíu vátá cùtnuní-gá iní-xi nàcuáa ndùu cuendá nchaa xiá<sup>n</sup>, te ñá cuendá tnàhá ñáyíu-á<sup>n</sup> ñí xihí Xítóhó Jesucristú. <sup>12</sup> Te sá dúcá<sup>n</sup> quide-ndo-á<sup>n</sup> cúú-xí ì<sup>n</sup> cuèchi núú Xítóhó Jesucristú, chi quide-ndo nàcuáa xínu iní-yu cadá-yu ì<sup>n</sup> sá sání iní-yu ñá túú vãha, núu xiá<sup>n</sup> ñá túú quide vãha-ndo sã cúú-xi-yu. <sup>13</sup> Te núu yúhú cùtnuní iní-í sá sã cuendá ì<sup>n</sup> sá cáxi-í te ngóo ì<sup>n</sup> ñáyíu ndècu ndihí-í ichi Xítóhó Jesucristú cadá-yu ì<sup>n</sup> sá vã cúú vãha iní Yá Ndiöxí, te vãha-gá sá vã cáxi-gã-í xiá<sup>n</sup> cuendá sá vã cáda-yu ì<sup>n</sup> sá vã cúú vãha iní-gá.

## 9

*Nchaa sá cúú càda cue téé ní táuchíú<sup>n</sup> Xítóhó Jesucristú càhá<sup>n</sup> tnúhu-gá*

<sup>1</sup> Te yúhú chi cuu cada-í nchaa sá sání iní-í, chi tnàhá-í ní táuchíú<sup>n</sup> Xítóhó Jesucristú càhá<sup>n</sup>-í tnúhu-gá núú ñáyíu. Te yúhú ní xini núu-í Xítóhó Jesucristú Yaá cúú Xítóhó-ó te nchòhó cúú-ndó ñáyíu ní sándáa iní tnúhu-gá sá càhá<sup>n</sup>-í te duca<sup>n</sup> chi ndècu ndihí-í-gá. <sup>2</sup> Te ió dava ñáyíu ñá túú sándáa iní-yu sá Xítóhó Jesucristú ní táuchíú<sup>n</sup>-gã càhá<sup>n</sup>-í tnúhu-gá, dico nchòhó chi cùtnuní ndáa iní-ndó sã díú-gã ní tendaha ñaha-gá xii-í xicá cùu-í càhá<sup>n</sup>-í tnúhu-gá, te duca<sup>n</sup> chi yúhú ní càhá<sup>n</sup>-í tnúhu-gá núu-ndó te ní sándáa iní-ndó-gã te xiá<sup>n</sup> cùtnuní sá díú-gã ní tendaha ñaha-gá xii-í xicá cùu-í càhá<sup>n</sup>-í tnúhu-gá núú ñáyíu.

<sup>3</sup> Te duha ndùu tnúhu càhá<sup>n</sup>-í cuendá cundedóho nchaa ñáyíu sãtnuhu ñaha xii-í. <sup>4</sup> Chi yúhú cuu-ni caxi-í nchaa núú sã cúú càxi-o na taxi ñáyíu. <sup>5</sup> Te cuu-ni cundecu ñadhí-í te caca ndeca-í-yu nchaa núú xicá cùu-í càhá<sup>n</sup>-í tnúhu Yá Ndiöxí dàtná quidé dáva-gá cue téé càhá<sup>n</sup> tnúhu-gá, ndihí cue téé cùu ñani Xítóhó Jesucristú, ndihí té Pelú. <sup>6</sup> Te tnàhá yúhú ndihí té Bèé cuu dañá-ndí chiú<sup>n</sup> quide-ndí te cada-ndí dàtná xiquide dáva-gã-güedé càhá<sup>n</sup>-güedé tnúhu Xítóhó

Jesucristú. <sup>7</sup> Te nchoo xini-ó sã ncháá cuè sandadú dacuítí sã ñúhú yãhu-güedé xínú cuèchi-güedé, te ñá túú dicó duca<sup>n</sup> xínu cuechi-güedé. Te duca<sup>n</sup> sãtnahá-xi cùu tucu ñáyiu xítu ñ<sup>n</sup> sá xítú chi dacuítí ñihí-yu ñ<sup>n</sup> sá xítú-yu xèxi-yu, te ñá díú dicó duca<sup>n</sup> xítú-yu. Te duca<sup>n</sup> cùu tucu cue téé cùu toli chi quihni-güedé dícu quití xító-güedé xihí-güedé te ñá túú dicó duca<sup>n</sup> xító-güedé-di. <sup>8</sup> Te vá cání ñí-ndó sã sà dúhá càhá<sup>n</sup>-í te càhu ñí mée-í duha càhá<sup>n</sup>-í, chi tnúhu càhá<sup>n</sup>-í-a ñ<sup>n</sup>-ni quèe-xi ndihí tnúhu ní cáhá<sup>n</sup> ndíi Moisés. <sup>9</sup> Chi ndíi-á<sup>n</sup> ñí chídó tnùní ndíi núú tütú ndíi nàcuáa ní xáha<sup>n</sup> Yã Ndiõxí xii ndíi, te càchí-xi: “Vá chíhí-ndó ñunu yuhu ndicutu oré danchihí-di triú”, duha càchí-xi núú tütú ndíi. Te ñá díú sã dúcá<sup>n</sup> ñí cáhá<sup>n</sup> Yã Ndiõxí te càhá<sup>n</sup>-gá mee-ni cuendá ndicutu-á<sup>n</sup>. <sup>10</sup> Chi ní cáhá<sup>n</sup>-gá cuendá nchoo cuè ñáyiu ndècu ichi-gá, te ndáá sá díú cuendá-ó dùca<sup>n</sup> ní cáhá<sup>n</sup>-gá. Te nchaa cue téé xítu chihi tatá sàni ñí-güedé sá díú tátá chíhí-güedé-á<sup>n</sup> cuu sá cáxi-güedé, te díu-ni duca<sup>n</sup> cùu tucu cue téé xicani triú chi càni-güedé cuendá quee caxi-güedé. <sup>11</sup> Te duca<sup>n</sup> sãtnahá-xi cùu nchúhú cue téé càhá<sup>n</sup> tnúhu Xítóhó Jesucristú, chi dānehé ñáhá-ndí xii-ndo cuendá nchaa sá vãha quide ñaha Yã Ndiõxí xii-o, núu xiã<sup>n</sup> dai tàú-xi sá nchòhó chindee ñaha-ndo xii-ndí ñuu ná cúú sã xini ñúhu-ndí. <sup>12</sup> Te núu dava cue téé càhá<sup>n</sup> tnúhu Yã Ndiõxí chindèe-ndo-güedé, te uu<sup>n</sup>-gá duca<sup>n</sup> tàú-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tàú ndisa-ndo sã chindèe ñaha-ndo xii-ndí dico ñá túú dùca<sup>n</sup> cahá<sup>n</sup>-ndí núú-ndó càda-ndo, te quide cahnu ñí-ndí cuèi nāndi sá tá yãha-ndí véxi. Te duca<sup>n</sup> quide-ndí cuendá sá ñá túú ñá cani ñí ñáyiu cuendá-ndí te duca<sup>n</sup> cuíta cuténuu-gá tnúhu sá càhá<sup>n</sup> nàcuáa naníhí tãhú-ó quíhí<sup>n</sup>. <sup>13</sup> Te nchòhó xini-ndó sã ncháá cuè téé xínu cuechi veñúhu díu-ni xiã<sup>n</sup> ñihí-güedé xèxi-güedé, te díu-ni cue téé-á<sup>n</sup> xínú cuèchi-güedé núú xihí quití ndúu tãhú Yã Ndiõxí, te díu-ni xiã<sup>n</sup> ñihí tucu-güedé sá xèxi-güedé. <sup>14</sup> Te díu-ni duca<sup>n</sup> sãtnahá-xi cùu nchúhú cue téé càhá<sup>n</sup> tnúhu sá càhá<sup>n</sup> nàcuáa naníhí tãhú-ó, chi Xítóhó

Jesucristú ní cachí-gá sá díú-ñí cuendá chiú<sup>n</sup> quide-ndí ñihí-ndí caxi-ndí. <sup>15</sup> Te ñá ñí<sup>n</sup> ndúu cáhá<sup>n</sup>-í núú-ndó càda-ndo nacuáa tàú-xi cunduu sá cúú-xi-í, te vá cání ñí-ndó sã sà dúhá càhá<sup>n</sup>-í te ñ<sup>n</sup> sá xicá<sup>n</sup>-í núú-ndó. ¡Chi cuèi na cùú-í sá ndòhò-í te ñá díú sã càhá<sup>n</sup> ñáyiu sá sã cuendá sá càhá<sup>n</sup>-í tnúhu Xítóhó Jesucristú ñihí-í xèxi-í!

<sup>16</sup> Te yúhú ñá túú quide cahnú-í mée-í sá càhá<sup>n</sup>-í tnúhu sá càhá<sup>n</sup> nàcuáa naníhí tãhú-ó, chi tàú tnàhá-í sá càdà-í chi duca<sup>n</sup> ñí cachí Yã Ndiõxí cada-í. ¡Te ndàhú ní cuu yúhú te núu vá càhá<sup>n</sup>-í tnúhu-á<sup>n</sup>! <sup>17</sup> Te ñá túú càhá<sup>n</sup>-í tnúhu-gá sá cúú ñí mée-í chi mee-gã ní táuchíú<sup>n</sup>-gã cáhá<sup>n</sup>-í tnúhu-gá. Te núu càhá<sup>n</sup>-í tnúhu-gá sá cúú ñí mée-í te tàú-í ñihí-í sá ndúú tãhú-í ní cùu. <sup>18</sup> Dico sá sá ní nduu tãhú-í cúú-xi sã ño cùdú<sup>n</sup> ñí-í sá dicó duca<sup>n</sup> càhá<sup>n</sup>-í tnúhu sá càhá<sup>n</sup> nàcuáa naníhí tãhú-ó. Te cuèi tàú-í quehe<sup>n</sup>-í sá táxi-ndó ndúu tãhú-í sá cuendá sá càhá<sup>n</sup>-í tnúhu Xítóhó Jesucristú, dico ñá túú dùca<sup>n</sup> quide-í. <sup>19</sup> Te sá dúcá<sup>n</sup> dicó duca<sup>n</sup> càhá<sup>n</sup>-í tnúhu sá càhá<sup>n</sup> nàcuáa naníhí tãhú-ó, xiã<sup>n</sup> ni ñ<sup>n</sup> ñáyiu ñuyú-a vá cúú càchí-yu sá táxi tnùní ñáhã-yu xii-í, te cuèi duca<sup>n</sup> dico mee-í ní sani ñí-í sá cúú-í dàtná ñ<sup>n</sup> téé xínu cuechi núú nchaa ñáyiu cuendá duca<sup>n</sup> cuíta cuu vaí-yu tuhá-yu ichi Xítóhó Jesucristú quíhí<sup>n</sup>. <sup>20</sup> Te òré ñúhú tnàhí tnuú cue ñáyiu israhél te quide-í sá ñí<sup>n</sup>-ní cùu-í ndihí-yu cuèi ñá túú nchícú<sup>n</sup> ñihnu-í tnúhu ní cáhá<sup>n</sup> ndíi Moisés, te duca<sup>n</sup> quide-í cuendá sá ñáyiu-á<sup>n</sup> quindáá ñí-yu tnúhu càhá<sup>n</sup>-í te tuhá-yu ichi Xítóhó Jesucristú. <sup>21</sup> Te òré ñúhú tnàhí tnuú nchaa ñáyiu ñá túú nchícú<sup>n</sup> ñihnu tnúhu ní cáhá<sup>n</sup> ndíi Moisés, te quide-ñí-í sá quidè-í dàtná quidè mée-yu cuendá quindáá ñí-yu tnúhu càhá<sup>n</sup>-í, te tuhá-yu ichi Xítóhó Jesucristú. Te cuèi duca<sup>n</sup> quide-í dico ñá túú dàña ndeé-í quidè-í nchaa nàcuáa cuíni Yã Ndiõxí cada-o, te duca<sup>n</sup> chi nchícú<sup>n</sup> ñihnu-í quidè-í nchaa nàcuáa càhá<sup>n</sup> Xítóhó Jesucristú. <sup>22</sup> Te òré ndécú-í ndihí nchaa ñáyiu ñá túú cùtnuní váha ñí-xi nàcuáa cundecu ichi Xítóhó Jesucristú, te tnàhá-í quidè-í dàtná quidè-yu cuendá sá ná tédòho-yu nchaa tnúhu càhá<sup>n</sup>-í te duca<sup>n</sup> cùtnuní-gá ñí-yu nàcuáa cundecú-yu ichi-gá. Te nchaandi tãhú ñáyiu quide-í sá ñ<sup>n</sup>-ni cuu-í



ndihí-yu cuendá duca<sup>n</sup> ñihí-í nàcuáa cada-í te cundedóho-yu tnúhu càhá<sup>n</sup>-í te tñí-yu ichi Xítóhó Jesucristú te naníhí tǎhú-yu. <sup>23</sup> Te duha quide-í cuendá sá cuítá quindáá iní-yu tnúhu sá càhá<sup>n</sup> nàcuáa naníhí tǎhú-ó quíhí<sup>n</sup>, te duca<sup>n</sup> te tñhá yúhú ío váha cundecu-í dàtná càhá<sup>n</sup> tnúhu-á<sup>n</sup>.

<sup>24</sup> Te nchòhó sa xìní-ndó sǎ ncháá cue téé xínu quíhu màrcúhyú nchaa-güedé xínú-güedé, dico ñ<sup>n</sup>-ni-dé cúú tée ndàcu ngodó núú te téé-á<sup>n</sup> cúú tée ñihí sá ndúú tǎhú-xi, te duca<sup>n</sup> xìni ñuhu-xi cada nchóhó tucu chi cada-ndo ncháa nacuáa cuíní Yǎ Ndióxi cada-ndo cuendá duca<sup>n</sup> ñihí-ndó sǎ ndúú tǎhú-ndó. <sup>25</sup> Te nchaa cue téé xìní dadiqui te váha váha quide cuendá-güedé núu ná cúú sǎ cáda tñèñu te xòcani-güedé cuendá sǎ ñà díú xiǎ<sup>n</sup> cada te cuíta-güedé òré dadiqui-güedé. Te duca<sup>n</sup> quide-güedé cuendá cuíní-güedé ñihí-güedé sǎ ndúú tǎhú-güedé, te sǎ ndúú tǎhú-güedé-á<sup>n</sup> cúú-xí ñ<sup>n</sup> sǎ ndíhí ñihnu ñuyú-a. Dico nchoo ndècu ndee-o quide-o nacuáa ñihí-ó sǎ ndúú tǎhú-ó, te xiǎ<sup>n</sup> cudí-xi cundecu ndihí-o ñi caa ñi quíhí<sup>n</sup>. <sup>26</sup> Te yúhú quidè-í dàtná quidè cue téé xínu, chi cue téé-á<sup>n</sup> xìní-güedé núú quéxiò-güedé, te quide tucu-í dàtná xiquide cue téé sa ní cutúha naá, te ñá túú quide-í dàtná quidè cue téé vitna dàcuaha naá. Te duca<sup>n</sup> chi yúhú quidè-í nchaa nàcuáa cuíní Yǎ Ndióxi cunduu. <sup>27</sup> Te yúhú ñá túú dàña-í taxi tñuní ñáhá ñi ñ<sup>n</sup> sǎ cuèhé sǎ dúhá xì-í chi yòtní-í mèè-í. Te duca<sup>n</sup> quide-í chi yúhú càhá<sup>n</sup>-í tnúhu Xítóhó Jesucristú núú ñáyi, te cuíní-í sǎ vǎ cuíta sǎ ñi cachí Yǎ Ndióxi nduu tǎhú-í.

## 10

*Cuendá nchaa sǎ ñi cadúha cue téé ñuyú-a quide cahnu ñáyi*

<sup>1</sup> Te nchòhó ñáyi ndècu ndihí-í ichi Xítóhó Jesucristú na cachí tnúhu-í xii-ndo cuendá nchaa ñaní tñáhá-ndí ñáyi israhél ní xíndecu ndéé sanaha, chi vitna tñáhá nchòhó cúú-ndó dàtná cue ñaní tñáhá ncháa ñáyi-á<sup>n</sup> chi ndècu-ndo ichi-gá. Te nchaa ñáyi-á<sup>n</sup> ñi taxi ndecu Yǎ Ndióxi ñ<sup>n</sup> vícò ñi dánèhé ñáhá-xí xii-yu ichi quíhí<sup>n</sup>-yu, te ní queé dava ndute lámár nání Mǎr

Tícuèhé te ncháa-yu ní yáha-yu. <sup>2</sup> Te sǎ dúcá<sup>n</sup> ñi cuu te ncháa-yu ñ<sup>n</sup>-ná ní cúú-yu ndihí ndí Moisés, te ní xíhi ndaha ñaha ndí xií-yu. <sup>3</sup> Te ncháa-yu ní xexí-yu sǎ ñi sǎñaha Yǎ Ndióxi xií-yu. <sup>4</sup> Te duca<sup>n</sup> ncháa tucu-yu ní xihí-yu ndute sǎ ñi sǎñaha-gǎ xií-yu, ndute sǎ ñi quee yiqui ñaha cava. Te cava-á<sup>n</sup> cada iní-ó sǎ cúú-xí dàtná Xítóhó Jesucristú te duca<sup>n</sup> chi ndihí ñaha-gǎ xií-yu ichi cuáhá<sup>n</sup>-yu dàvá-á<sup>n</sup>. <sup>5</sup> Dico ío vai-yu ñá túú ní quidè-yu nàcuáa càhá<sup>n</sup> Yǎ Ndióxi, te xiǎ<sup>n</sup> ñá túú ní cùu váha iní ñáhá-gǎ xií-yu. Te sǎ dúcá<sup>n</sup> ñi quidè-yu núu xiǎ<sup>n</sup> òré ñúhú-yu ichi cuáhá<sup>n</sup>-yu xiti yucu ío vai-yu ní xíhi.

<sup>6</sup> Te duca<sup>n</sup> ñi cuu cuendá nchoo vǎ cáncícu<sup>n</sup> ñihnu-o càda-o nacuáa ní quidè-yu, chi ñáyi-á<sup>n</sup> mee-ñi ncháa sǎ cuèhé sǎ dúhá ñi sani iní-yu ní quidè-yu. Te nchoo xini ñuhu-xi sǎ vǎ dúcá<sup>n</sup> càda-o. <sup>7</sup> Te yúhú càhá<sup>n</sup>-í dóho-ndo sǎ vǎ quindáá iní-ndó te ñi vǎ cáda càhnu-ndo ñi ñ<sup>n</sup> sǎ cáchi-yu cùu ndióxi ní cadúha cue téé ñuyú-a dàtná ní quide cue ñaní tñáhá-ndí ní xíndecu ndéé sanaha. Chi ñáyi-á<sup>n</sup> ñi quidè-yu dàtná càhá<sup>n</sup>-xi núú tütú Yǎ Ndióxi núú cáchi-xi: “Nchaa ñáyi ní xexí-yu ní xihí-yu ní quidè-yu vico, ní quide càhnú-yu sǎ cáchi-yu cùu ndióxi ní cadúha-yu te ñá ndáa sǎ ndióxi cúú-xí”, duha cáchi-xi núú tütú-gá. <sup>8</sup> Te ñi vǎ cündecu-ndo ichi díí ñi dàtná ní quide dava ñáyi-á<sup>n</sup>, chi sǎ dúcá<sup>n</sup> ñi quidè-yu te ní xíhi ócò úní mǐl-yu ñ<sup>n</sup>-ni ndúu. <sup>9</sup> Te vá cání iní-ndó sǎ sǎ cáhnú ñi Yǎ Ndióxi te nándi sǎ cuèhé sǎ dúhá càda-ndo cuendá cuíní-ndó quíní-ndó núu nása cada ñaha-gǎ xii-ndo, chi ñáyi ní xíndecu ndéé sanaha-á<sup>n</sup> duca<sup>n</sup> ñi xóo cadá-yu, te ní xíhi-yu ní xexiha<sup>n</sup> còó. <sup>10</sup> Te ñi vǎ càhá<sup>n</sup> cuèhé-ndó cuendá Yǎ Ndióxi, chi dava ñáyi ní xíndecu ndéé sanaha-á<sup>n</sup> duca<sup>n</sup> ñi quidè-yu ní cáhá<sup>n</sup> cuèhé-yu cuendá-gá te ní quixi espíritú xínú cuèchi núú-gǎ ní sahní ñaha-xi xií-yu.

<sup>11</sup> Te duca<sup>n</sup> ñi cuu te duca<sup>n</sup> ñi ngúndéé núú tütú Yǎ Ndióxi cuendá dacuàha-o vitna ta cuyatni nduu naa ñuyú-a. Te nchaa tnúhu sǎ ñi ngodó tñuní-á<sup>n</sup> càhá<sup>n</sup> dóho ñaha-xi xii-o cuendá sǎ vǎ cáda-ó dàtná ní quide ñáyi-á<sup>n</sup>. <sup>12</sup> Te xiǎ<sup>n</sup> núu nchaa nchòhó ñáyi sǎni iní sǎ ío váha cündáá ndécú



ichi Xítohó Jesucristú cada cuendá-ndó sã dúcá<sup>n</sup>-ní cundáá-ndó nõú-gã, te vá dáná cuendá-ndó càda-ndo sã ñã túú cùu váha iní Yã Ndiõxí. <sup>13</sup> Te ñu-ni ñã dána quidé sãcũhã dácahá<sup>n</sup>-xi iní nchaa dava-gã ñãyiũ nãndi quidé-yu, te ñu-ni duca<sup>n</sup> quide ñaha-xi xii-ndo. Dico mee Yã Ndiõxí cúú-gã Yã quidé ndãá chi quide-gã nchaa sã càhá<sup>n</sup>-gã, te ñã dáña-gã sã sũní cuídó sãcũhã coto ndeé ñáhá-xí xii-ndo, chi není-ni nãcuáa cundeé iní-ndó ñãña-gã duca<sup>n</sup> quide ñaha-xi xii-ndo. Te ñu-ni-gã chindee ñaha-gã xii-ndo cundeé iní-ndó vá cáda-ndó cuéi nãndi sã ná ñãcahu iní ñáhá-xí xii-ndo.

<sup>14</sup> Te xiã<sup>n</sup> nõu càhá<sup>n</sup>-í dóho nchõhõ ñãyiũ ío cùu iní-í sã vá quindáá iní-ndó ñã sã càchí-yu cùu ndiõxí te ñã ndáa chi ñã ndaha cue tãe ñuyíú-a ní cuáha nchaa xiã<sup>n</sup>, te ñã vá cáda càhnu-ndo. <sup>15</sup> Te duha càhá<sup>n</sup>-í chi cùu-ndo ñãyiũ tãcú tñuní, te mee-ndo ío váha cuáha-ndo cuendá te nõu váha-ni càhá<sup>n</sup>-í ñã ñã túú váha-ni. <sup>16</sup> Te nchoo ndácá<sup>n</sup> táhú-ó nõú Yã Ndiõxí cuendá ndudí ndéhé yoho yàha stilé sã xihí-ó, te sã dúcá<sup>n</sup> xihí-ó ndudí ndéhé yoho yàha stilé-á<sup>n</sup>, te xiã<sup>n</sup> ndácú iní-ó sã ñã-ní cùu-ndihi Xítohó Jesucristú cuendá sã ñã sãti ñãñi-gã ní xihí-gã nõu cùrúxí, te ñu-ni duca<sup>n</sup> sãtnahá tucu-xi cùu paá sã xéxí-ó òré xihí-ó ndudí ndéhé yoho yàha stilé-á<sup>n</sup>, chi sã dúcá<sup>n</sup> xéxi-ó paá-á<sup>n</sup> xiã<sup>n</sup> ndácú iní-ó sã ñã-ní cùu-ndihi Xítohó Jesucristú sã cuendá yiqui cùñú-gã. <sup>17</sup> Te cuéi vãi vihi-ó dico ñãndi-ni paá xéxí-ó, te sã dúcá<sup>n</sup> ñãndi-ni paá xéxí-ó xiã<sup>n</sup> ndácú iní-ó sã ñã-ní cùu-ndihi Xítohó Jesucristú.

<sup>18</sup> Te cada cuendá-ndó nãcuáa quide ñãyiũ isràél, chi ñãyiũ-á<sup>n</sup> xéxí-yu sã ndúú táhú Yã Ndiõxí. Te sã dúcá<sup>n</sup> quidé-yu-á<sup>n</sup> cùtnuní iní-ó sã tñahá tñuhu-yu ndihi-gã. <sup>19</sup> Te vá caní iní-ndó sã sã dúhá càhá<sup>n</sup>-í te cachí-ndó sã cùnuu nchaa sã càchí-yu cùu ndiõxí ní cadúha cue tãe ñuyíú-a chi ñã túú ñã cúú ñã ñã nchaa xiã<sup>n</sup>. Te ñu-ni duca<sup>n</sup> cùu tucu nchaa sã sãñaha ñãyiũ ndúú táhú-xi chi ñã túú cùnuu-xi, chi ñã-ni cùu-xi ndihi nchaa dava-gã sã xéxí-ó. <sup>20</sup> Te yúhú càchí-í sã sã dúcá<sup>n</sup> quide nchaa ñãyiũ ñã túú tñahá tñuhu ndihi Yã Ndiõxí, te ñã nchaa espíritú cundíhi yucu ñãvãha sãñahá-yu sã ndúú táhú-xi sã dúcá<sup>n</sup> quidé-yu. Te ñã díú Yã Ndiõxí sãñahá-yu sã ndúú táhú-gã.

Te yúhú cuení-í sã vá tñahá tñuhu-ndo ndihi cue espíritú cundíhi yucu ñãvãha. <sup>21</sup> Te duca<sup>n</sup> chi vá cúú tñahá tñuhu-ndihi cue espíritú cundíhi yucu ñãvãha te tñahá tñuhu-ndihi Xítohó Jesucristú, te ñã túú ndúú váha-xi ngóo càxi-ó coho-ó sã ndúú táhú cue espíritú cundíhi yucu ñãvãha-á<sup>n</sup>, te ngóo càda-ó nãcuáa ní dãndõ tñuhu Xítohó Jesucristú coho-ó ndudí ndéhé yoho yàha stilé, te caxi-ó paá cada-ó sã ndácú iní-ó sã ñã xihí-gã nõu cùrúxí. <sup>22</sup> Te vá caní iní-ó dùca<sup>n</sup> cada-ó cuendá sã vá cùdãé<sup>n</sup> Yã Ndiõxí, chi ñã túú ñã càhnu cuu-ó nõu cada-ó ñãni véxi iní mée-ó, chi mee-gã ío càhnu cuu-gã.

### *Cada-ó nchaa nãcuáa cuu càhnu Yã Ndiõxí*

<sup>23</sup> Te ndáa sã nchãá sã cuení-ó càda-ó te cuu cada-ó dico ñã nchãá cùu-xi sã váha sã cúú-xi-ó, te ñã ñã nchãá-xi chindee ñaha-xi nãcuáa níhi ndeé-gã-ó cundeecu-ó ichi Xítohó Jesucristú. <sup>24</sup> Te xini ñuhu-xi sã cáda-ó sã váha sã cúú-xi tñaha ñãyiũ-ó te ñã díú mée-ni sã cúú-xi mée-ó cada-ó.

<sup>25</sup> Te nchõhõ cuu caxi-ndo nchãa cuñú sã cùyãhu cuñú sã xini caxi-ndo, te vá ndúcú tñuhu-ndo te nõu cùu-xi cuñú sã ñã ndúú táhú sã càchí-yu cùu ndiõxí. Te ñã túú ñã caní iní-ndó càxi-ndo, <sup>26</sup> chi ñuyíú-a ndihi nchaa sã ío cúú-xi cuendá Yã Ndiõxí.

<sup>27</sup> Te nõu ñã ñãyiũ ñã túú ndëcu ichi Xítohó Jesucristú càhá<sup>n</sup> ñãñã-yu xii-ndo quíhí<sup>n</sup>-ndó càxi-ndo díta vehé-yu, te nõu sãni iní-ndó sã quíhí<sup>n</sup>-ndó te cuu quíhí<sup>n</sup>-ndó te caxi-ndo cuéi nã cùu sã táxi-yu dico vá càcã<sup>n</sup> tñuhú-ndó nõu-yu nõu ndeé ní ñãñi-yu, te duca<sup>n</sup> te cuu váha iní-ndó càxi-ndo. <sup>28</sup> Te nõu ñã ñãyiũ càchí-yu sã xiã<sup>n</sup> cúú-xi sã ñã ndúú táhú sã càchí-yu cùu ndiõxí te vá cáxi-ndó cuendá sã ñãyiũ duca<sup>n</sup> càhá<sup>n</sup>-á<sup>n</sup> cuu váha iní-yu te ñã túú tñahí ná caní iní-yu. <sup>29</sup> Te yúhú càhá<sup>n</sup>-í cuendá nãcuáa sãni iní mée ñãyiũ duca<sup>n</sup> càhá<sup>n</sup>-á<sup>n</sup> te ñã díú sã nãcuáa sãni iní mée-ndó quide-ndo.

Te dava-ndo càchí-ndó: “Cuu-ni cada-ó nchãa nãcuáa sãni iní mée-ó cuéi dava-gã ñãyiũ sãni iní-yu sã ñã túú ndúú váha-xi sã dúcá<sup>n</sup> càda-ó”, duha càchí-ndó. <sup>30</sup> Te càchí tucu-ndo: “Ñã túú tãu-xi càhá<sup>n</sup> cuéhé ñãyiũ cuendá-ó sã cuendá nchaa sã

xéxí-ó chi ndàcá<sup>n</sup> táhú-ó nǔú Yă Ndiöxí òré xéxí-ó”, duha càchí-ndó. <sup>31</sup> Te cuèi nándi sá xini caxi-ndo nihí-ndó xèxi-ndo àdi quide-ndo, te cada-ndo nàcuáa cáhá<sup>n</sup> vâha ñáyiú cuendá Yă Ndiöxí. <sup>32</sup> Te vá cadá-ndó sã ñà túú tàú-ndó càda-ndo cuendá sá vã cadá ñáyiú ì<sup>n</sup> sá ñà túú cùu vâha iní Yă Ndiöxí. Te ni sã cúú-xí cuè ñáyiú isrâél, te ni sã cúú-xí cuè ñáyiú ñá túú cùu ñáyiú isrâél, te ni sã cúú-xí cuè ñáyiú ndècu ichi-gá vã dúcá<sup>n</sup> càda-ndo sá cúú-xí-yu. <sup>33</sup> Te yúhú ío ndùcu ndee-í quidè-í nàcuáa cudùu-í núú nchâa ñáyiú, te quide-í sá vâha sá cúú-xí-yu, te ñá túú quide-í mee-ni sã cúú-xí mée-í. Te duca<sup>n</sup> quide-í cuendá quindáá iní-yu tnúhu Xítóhó Jesucristú te naníhí tàhú-yu.

## 11

<sup>1</sup> Te chí cáncìcú<sup>n</sup> nihnu cada-ndo nchâa nacuáa quide-í nchìcú<sup>n</sup> nihnu-í nchâa nacuáa quide Xítóhó Jesucristú.

*Nàcuáa tàú-xi cada nchâa ñáyiú òré níúú tàcá-yu dàcuahá-yu tnúhu Yă Ndiöxí*

<sup>2</sup> Te nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sã ío cùdíí iní-í, chi ndàcu iní ñáhá-ndó xii-í, te quide-ndo nchâa nacuáa ní dánèhé ñáhà-í xii-ndo. <sup>3</sup> Te cuini-í sá nchòhó cutnùní iní-ndó sã ì<sup>n</sup>dii-ni Yă Ndiöxí cúú-gã Yaá cùnùu taxi tnuní ñáhá xii Xítóhó Jesucristú, te duca<sup>n</sup> Xítóhó Jesucristú ì<sup>n</sup>dii-ni-gá cùnùu taxi tnuní-gá nchâa cue téé, te nchâa cue téé òré-ni mee-güedé cùnùu-güedé táxí tnùnigüedé ñadìhí-güedé. <sup>4</sup> Te núu nchoo cuè téé na dàdâhu-o díquí-ó òré càhá<sup>n</sup>-ó nǔú ñáyiú tnúhu sá dâcâhu iní ñáhá Yă Ndiöxí xii-o àdi òré càhá<sup>n</sup> ndihí-o-gã, te ì<sup>n</sup> sácá<sup>n</sup>nǔú cúú-xí te núu duca<sup>n</sup> na càda-o dadâhu-o díquí-ó. <sup>5</sup> Dico núu ñáyiú òré càhá<sup>n</sup> ndihí-yu Yă Ndiöxí, àdi òré càhá<sup>n</sup>-yu tnúhu sá dâcâhu iní ñáhá-gã xii-yu núú tnàhá ñáyiú-yu, te sácá<sup>n</sup>nǔú cúú-xí te núu vá dadâhu-yu díquí-yu, chi ì<sup>n</sup>-ni cùu-xi te núu na dèté ndí-yu díquí-yu. <sup>6</sup> Te núu ñá túú cuini cue ñáyiú òré dàdâhu-yu díquí-yu te vâha-gá sá ná dèté ndí-yu díquí-yu. Te núu cùcahâ<sup>n</sup> nǔú-yu sá dèté díquí-yu te vâha-gá sá ná dàdâhu-yu díquí-yu. <sup>7</sup> Te nchoo cuè téé

vá cúú dàdâhu-o díquí-ó òré càhá<sup>n</sup> ndihí-o Yă Ndiöxí ni òré càhá<sup>n</sup>-ó tnúhu sá dâcâhu iní ñáhá-gã xii-o nǔú ñáyiú chi dîhna-gá-ó ní cadúha ñaha Yă Ndiöxí xii-o, te ní taxi ndecu-gá nchâa sá xini tnùnigüedé ndécú nchâa sá xini tnùnigüedé. Te duca<sup>n</sup> ní quide-gá chi cuini-gá sá nchòhó càda-o nacuáa cáhá<sup>n</sup> nchâa dava-gá ñáyiú sá ío càhnu cuu-gá, te cue ñáyiú òré quidè-yu nàcuáa cunuu nchòo cue téé. <sup>8</sup> Te Yă Ndiöxí ní cadúha-gá téé, dico ñá díú yìquí naha ñadìhí ní quenehe-gá ní cadúha-gá téé chi yìquí naha téé ní quenehe-gá ní cadúha-gá ñadìhí. <sup>9</sup> Te sá cuendá téé duca<sup>n</sup> ní cadúha-gá ñadìhí-á te ñá díú sã cuendá ñadìhí ní cadúha-gá téé. <sup>10</sup> Núu xii<sup>n</sup> tàú-xi sá nchâá ñáyiú òré dàdâhu-yu díquí-yu cuendá duca<sup>n</sup> cùnùnigüedé sã ñà túú cùnùu-yu dàdâhu cùnùu nchoo cue téé. Te duca<sup>n</sup> xini ñuhu-xi cadá-yu sá cuendá nchâa espíritú xini cuèchi núú Yă Ndiöxí. <sup>11</sup> Te vitna nchoo ñáyiú ndècu ichi Xítóhó Jesucristú, vá càchí-ó sã cuè téé ñá túú xini ñuhu-güedé cue ñáyiú òré chindee ñáhá-yu, te ni vá càchí-ó sã cuè ñáyiú òré ñá túú xini ñuhú-yu cue téé chindee ñaha-güedé xii-yu. <sup>12</sup> Te ì<sup>n</sup> yìquí naha téé ní queñuhu Yă Ndiöxí ní cadúha-gá ñadìhí, dico vitna chi ñáyiú òré dâcâcú-yu téé. Te téé, ñadìhí ní cadúha Yă Ndiöxí, te òré-ni duca<sup>n</sup> ní cadúha-gá nchâa dava-gá sá ío.

<sup>13</sup> Te mee-ndo càda cuendá-ndó te núu ndùu vâha-xi sá vã dadâhu cue ñáyiú òré díquí-yu òré càhá<sup>n</sup> ndihí-yu Yă Ndiöxí àdi ñáhá. <sup>14</sup> Te nchâa ñáyiú càhá<sup>n</sup>-yu sá ñà túú ndùu vâha-xi sá cuè téé cundu nani idi díquí-güedé, chi ì<sup>n</sup> sácá<sup>n</sup>nǔú cúú-xí càchí-yu. <sup>15</sup> Te nchâa ñáyiú òré ñáyiú nani idi díquí-xi càchí ñáyiú sá ì<sup>n</sup> sá vâha cùu-xi sá cúú-xí-yu sá dúcá<sup>n</sup> nani idi díquí-yu. Te duca<sup>n</sup> chi Yă Ndiöxí ní càchí-gá sá dúcá<sup>n</sup> cundu-yu cuendá quidâhu-xi díquí-yu. <sup>16</sup> Te núu ío ñáyiú cuini dacâá cuendú cuendá sá ní càhá<sup>n</sup>-í-a, te na cùnahâ-yu sá nchâá nchùhú cue téé càhá<sup>n</sup> tnúhu Xítóhó Jesucristú òré-ni duca<sup>n</sup> sâni iní-ndí cada nchâa ñáyiú òré. Te òré-ni duca<sup>n</sup> sâni iní nchâa ñáyiú ndècu ichi-gá.

*Cuendá ñáyiú ñá túú quide datná ní quide Xítohó Jesucristú cútñahá ní cudini-gá ndihi cue téé ní xica cuu ndihi-gá*

17 Te nchòhó ñá túú quide váha-ndo ndècu-ndo núu xiǎ<sup>n</sup> duha na càhá<sup>n</sup>-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tñaha-ndo cada-ndo sá vǎha, chi da nàdatuhú iní tñahá-ndó nàcuáa ndècu-ndo. 18 Te díhna-gá na cǎchí tñúhu-í xii-ndo sá nihí-í tñúhu sá òré tàcá-ndó quide-ndo nacuáa ní cáhá<sup>n</sup> Xítohó Jesucristú, te ñá túú cùu ñ<sup>n</sup>nuu-ndo oré duca<sup>n</sup> quide-ndo nacuáa ní cáhá<sup>n</sup>-gá. Te dava sá càhá<sup>n</sup> ñáyiú sàndáá iní-í te dava ñáhá. 19 ¡Te ndáá sá dúcá<sup>n</sup> tñahí cada-xi vá cúú ñ<sup>n</sup>nuu-ndo cuendá duca<sup>n</sup> cùtnuní nǔu ndèdacàa-ndo sandáá ndisa iní-ndó tñúhu Xítohó Jesucristú te ndèdacàa-ndo ñáhá! 20 Te ndi tñahá òré tàcá-ndó quide-ndo datná ní quide Xítohó Jesucristú cútñahá ní cudini-gá ndihi cue téé ní xica cuu ndihi-gá, te ñá túú quide-ndo nacuáa tàú-xi cunduu chi cùtexínu-ni quide-ndo. 21 Chi òré tàcá-ndó quide-ndo nacuáa ní cachí Xítohó Jesucristú, te dava-ndo ngòdó núú-ndó díhna-gá-ndó xèxi-ndo sá néhé-ndó te ñá túú sá cùndètu tñaha-ndo, te ñá túú càhá<sup>n</sup> tñahá-ndó nǔu xiǎ<sup>n</sup> dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xini-ndo. 22 Te vá dúcá<sup>n</sup> càda-ndo chi càa vehe-ndo núú dúcá<sup>n</sup> cǎxi-ndo coho-ndo cada-ndo ndéé ndahá xití-ndó, chi sá dúcá<sup>n</sup> quide-ndo te dàquee tǐhú-ndó nchàa dava-gá ñáyiú ndècu ndihi-ndo ichi Yá Ndiòxí, te dándóo canúú-ndó nchàa ñáyiú ndàhú sá dúcá<sup>n</sup> quide-ndo. ¡Núu xiǎ<sup>n</sup> vá cúú cǎchí-í sá cúú-ndó ñáyiú quide váha chi ñá túú quide váha-ndo sá dúcá<sup>n</sup> quide-ndo ndècu-ndo!

*Xítohó Jesucristú ní dándóo tñúhu-gá sá cóhó-ó ndùdí ndéhé yoho yàha stilé te caxi-o pàa cuendá ndacu iní-ó sá ñí xihí-gá*

*(Mt. 26:26-29; Mr. 14:22-25; Lc. 22:14-20)*

23 Te dàtná-ni ní dánèhé ñáhá Xítohó Jesucristú xii-í te ñi-ndi duca<sup>n</sup> ñí dánèhé ñáhà-í xii-ndo, chi ñi-ndi niú cútñahá ní sáha cuendá ñáhá ndí Jùdás Iscàrioté xii-gá núú cuè téé cùu úhú iní ñáhá ñí quehe<sup>n</sup>-gá pàa, 24 te ní ndacá<sup>n</sup> táhú-gǎ núú Yá Ndiòxí, te ní táhú cuèchi-gá, te ní xáha<sup>n</sup>-gǎ xii cue téé xica

cuu ndihi-gá: “Chí quéhé<sup>n</sup> pàa-a caxi-ndo te cada iní-ndó sǎ cúú-xí dàtná yiqui cùñú-í, chi yúhú cuú-í sǎcuendá-ndó. Te duca<sup>n</sup>-ni càda-ndo cundecu-ndo cuendá ndacu iní ñáhá-ndó xii-í”, cǎchí-gǎ xáha<sup>n</sup>-gǎ xii-güedé. 25 Te sǎtá ñí yáha ní xexi-güedé pàa sá ñí sǎñaha-gǎ, te ní quehe<sup>n</sup>-gǎ tǎsǎ<sup>n</sup> ñúhú ndùdí ndéhé yoho yàha stilé, te ní ndacá<sup>n</sup> táhú tucu-gǎ núú Yá Ndiòxí. Te ní xáha<sup>n</sup>-gǎ xii cue téé xica cuu ndihi-gá: “Chí cóhó ndùdí ndéhé yoho yàha stilé-a, te cada iní-ndó sǎ cúú-xí dàtná níñí-í, te cuendá níñí-í sǎ cǎtí òré cuú-í cutnùní ndáá sǎ Yá Ndiòxí cada-gǎ ingǎ núú sǎ vǎha sǎ cúú-xí ñáyiú. Te ndi tñahá òré coho-ndo ndùdí ndéhé yoho yàha stilé-á<sup>n</sup> te ndacu iní ñáhá-ndó xii-í, te duca<sup>n</sup>-ni càda-ndo cundecu-ndo”, cachí-gǎ xáha<sup>n</sup>-gǎ xii-güedé. 26 Te ndi tñahá òré xéxi-ndó pàa te xihí-ndo ndudí ndéhé yoho yàha stilé, te xiǎ<sup>n</sup> dátúu-ndo nǔu ñáyiú sǎ Xítohó Jesucristú ní xihí-gǎ cuendá-yu, te duca<sup>n</sup>-ni càda-ndo cundecu-ndo ndéé ná sǎa nduu quixi tucu Xítohó Jesucristú.

*Nàcuáa cada-o òré caxi-o pàa ndihi òré coho-o ndùdí ndéhé yoho yàha stilé dàtná ní cachí Xítohó Jesucristú*

27 Te dava-ndo ñà túú quide-ndo nacuáa cuiní Yá Ndiòxí cada-ndo òré xéxi-ndó pàa ndihi òré xihí-ndó ndùdí ndéhé yoho yàha stilé, te sǎ dúcá<sup>n</sup> quide-ndo-á<sup>n</sup> te cucuéchi xii-ndo chi ñá túú nèhe-ndo sǎ yíñúhu sǎ cúú-xí yiqui cuñú Xítohó Jesucristú, te ni ñà túú nèhe-ndo sǎ yíñúhu sǎ cúú-xí níñí-gǎ. 28 Te ío váha cada cuendá-ndó te núu ndècu váha iní-ndó nǔu Xítohó Jesucristú òré cùmǎní-gǎ caxi-ndo pàa ndihi òré cùmǎní-gǎ coho-ndo ndùdí ndéhé yoho yàha stilé. Te núu ndècu váha iní-ndó nǔu-gǎ te caxi-ndo te coho-ndo. 29 Te dava nchòhó ñá túú sàni váha iní-ndó cuendá yiqui cùñú Xítohó Jesucristú te xèxi-ndo pàa te xihí-ndo ndudí ndéhé yoho yàha stilé, te nacháhu-ndo sǎ dúcá<sup>n</sup> ñà túú sàni váha iní-ndó. 30 Te ñi sǎ dúcá<sup>n</sup> quide-ndo núu xiǎ<sup>n</sup> vǎi-ndo cuhú, te ío ndàhú ndécú-ndó, te dava ñáyiú ndècu ndihi-ndo sa ní xihí-yu. 31 Dico núu ío váha sáha-o cuendá nàcuáa ndècu-o núú Yá Ndiòxí, te vá dúcá<sup>n</sup> dándóo ñaha-gǎ xii-o. 32 Te òré ndéhé Yá Ndiòxí sǎ ñà túú quide



ndáá-ó ndècu-o te dándoho ñaha-gá xii-o. Te duca<sup>n</sup> quide-gá cuendá sá vǎ cuíta nihnu-o, chi núu ñáhá te cuíta nihnu-o ndìhi nchaa ñáyiú ndècu ichi cuehé ichi duha.

<sup>33</sup> Te núu xiǎ<sup>n</sup> càhá<sup>n</sup>-í dóho nchaa nchòhó ñáyiú ndècu ndìhi-í ichi Xítóhó Jesucristú sá òré tacá-ndó càda-ndo nacuaá ní quide Xítóhó Jesucristú cùtnàhá ní cudìni-gá ndìhi cue téé ní xica cuu ndìhi-gá, te cundetu tnàha-ndo nduu nchaa-ndo te dàtnùnì duca<sup>n</sup> càda-ndo. <sup>34</sup> Te núu dava-ndo xihí-ndó dòcò te caxi duu<sup>n</sup>-ndo vèhe-ndo te dàtnùnì natacá-ndó, cuendá òré nat-acá-ndó te vá cáda-ndó ì<sup>n</sup> sá ñà túú tàú-ndó càda-ndo cuendá sá vǎ dándòho ñaha Yá Ndiòxí xii-ndo. Te òré quixi coto ñaha-í xii-ndo te dàvá-án<sup>n</sup> cachí tnúhu-í xii-ndo nchaa dava-gá sá cúmání.

## 12

*Nàcuáa chindee ñaha Espiritú Yá Ndiòxí cada-o ì<sup>n</sup> ì<sup>n</sup>-o*

<sup>1</sup> Te nchòhó ñáyiú ndècu ndìhi-í ichi Xítóhó Jesucristú cuení-í cachí tnúhu-í xii-ndo nàcuáa chindee ñaha Espiritú Yá Ndiòxí xii-o ì<sup>n</sup> ì<sup>n</sup>-o cuendá cutnùnì iní-ndó.

<sup>2</sup> Te nchòhó sa nàha-ndo sá cùtnàhá vátá cùndècu-gá-ndó ichi Xítóhó Jesucristú ní xóo dandàhú ñáhá yúcu ñávàha xii-ndo, te ní xóo quíndáá iní-ndó nchaa sá ñà cadúha cue ñáyiú ñuyíú-a nchaa sá càchí-yu cùu ndiòxí te ñà ndáá sá ndiòxí cúú-xí, te nchaa xiǎ<sup>n</sup> ñà túú càhá<sup>n</sup>-xi. <sup>3</sup> Te cuení-í sá nchòhó cutnùnì iní-ndó sǎ Espiritú Yá Ndiòxí ñà túú chindee-xi ni ì<sup>n</sup> ñáyiú cuendá sá càhá<sup>n</sup> úhú-yu Xítóhó Jesucristú. Te ni ì<sup>n</sup> ñáyiú ñà túú càhu iní-yu càhá<sup>n</sup>-yu sá Xítóhó Jesucristú cúú-gǎ Xítóhó-yu te núu ñà túú Espiritú Yá Ndiòxí dácàhu iní ñáhá-xí xii-yu.

<sup>4</sup> Te ndì dǐí<sup>n</sup> ndì dǐí<sup>n</sup> ndùu chiu<sup>n</sup> ní cachí Espiritú Yá Ndiòxí cada-o, te diu-ni ì<sup>n</sup>dì-ni Espiritú-gá ndécú. <sup>5</sup> Te ndì dǐí<sup>n</sup> ndùu chiu<sup>n</sup> quide-o xinu cuechi-o núú ì<sup>n</sup>dì-ni Xítóhó Jesucristú. <sup>6</sup> Te ndì dǐí<sup>n</sup> ndì dǐí<sup>n</sup> chindee ñaha Yá Ndiòxí xii-o nàcuáa cada-o chiu<sup>n</sup>-gá, te diu-ni ì<sup>n</sup> dìi-gá ndécú chindee-gá nchaa ñáyiú. <sup>7</sup> Te Espiritú Yá Ndiòxí quidé-xí sá nchóo càda-o sá vǎha, te duca<sup>n</sup> chindee-o cue ñáyiú ndècu ndìhi-o ichi Xítóhó Jesucristú. <sup>8</sup> Te dava-o ñà nduu táhú-ó núú

Yá Ndiòxí sá Espiritú-gá cada te ndacu-o càhá<sup>n</sup>-ó tnúhu sá ìo càhnu cuu diu-ni tnúhu mee Yá Ndiòxí, te dava tucu-o ñà nduu táhú-ó cùtnunì iní-ó nàcuáa càhá<sup>n</sup> tnúhu-gá te càhá<sup>n</sup>-ó nàcuáa cuení Espiritú-gá. <sup>9</sup> Te dava tucu-o ñà nduu táhú-ó sǎ ìo quíndáá iní-ó Xítóhó Jesucristú cuendá cada-gá ì<sup>n</sup> sá cuení-ó, te duca<sup>n</sup> chi Espiritú Yá Ndiòxí chíndèe ñaha-xi xii-o. Te dava tucu-o ñà nduu táhú-ó sǎ càcá<sup>n</sup> táhú-ní-ó núú Xítóhó Jesucristú cuendá ñáyiú cùhú te ndúha-yu. <sup>10</sup> Te dava tucu-o ñà nduu táhú-ó sǎ ndácú-ó càda-o nchaa sá vǎ yóo tnàhí ndàcu cada, te dava tucu-o ñà nduu táhú-ó núú Yá Ndiòxí sá càhá<sup>n</sup>-ó tnúhu sá dácàhu iní ñáhá-gǎ xii-o, te dava tucu-o ñà nduu táhú-ó sǎ cùtnùnì iní-ó núu diu Espiritú Yá Ndiòxí chíndèe ñaha-xi xii ñáyiú òré càhá<sup>n</sup>-yu tnúhu-gá àdi cue espíritú cùndìhi yucu ñávàha. Te dava tucu-o ñà nduu táhú-ó càhá<sup>n</sup>-ó tnúhu sá dácàhu iní ñáhá Espiritú Yá Ndiòxí xii-o tnúhu sá ñà túú xini-ó, te dava tucu-o ñà nduu táhú-ó càhá<sup>n</sup>-ó nàcuáa quèe-xi nchaa tnúhu-án. <sup>11</sup> Te ì<sup>n</sup>dì dǐí-ni Espiritú Yá Ndiòxí duca<sup>n</sup> chindee ñaha-xi, te diu-ni Espiritú-gá dácàhñu ñaha-xi xii-o ndì dǐí<sup>n</sup> núú chiu<sup>n</sup> sá cuení méé-xí càda-o.

*Nchaa-o ì<sup>n</sup>-ni cuu-o ndìhi Xítóhó Jesucristú*

<sup>12</sup> Te nchoo ñáyiú ndècu ñuyíú-a tǐtní xichi cùu yiqui cuñú-ó dico ì<sup>n</sup>-ni cùu-xi, te diu-ni duca<sup>n</sup> sǎtnahá-xi cùu-o vitna ndecu-o ichi Xítóhó Jesucristú chí ì<sup>n</sup>-ni cùu-o ndìhi-gá. <sup>13</sup> Te dava-o cùu-o ñáyiú isràél, te dava-o ñà túú cùu-o ñáyiú isràél, te dava-o cùu-o ñáyiú ñà túú tnàhí dàñá quee núú chíú<sup>n</sup> pàtróó<sup>n</sup>-xi, te dava-o cùu-o ñáyiú dàñá quee núú chíú<sup>n</sup> pàtróó<sup>n</sup>-xi. Te mee Espiritú Yá Ndiòxí ní quide-xi sá ncháá-ó ì<sup>n</sup>-ná cúú-ó ndècu-o ndìhi Xítóhó Jesucristú. Te Yá Ndiòxí ní cachí-gá sá ncháá-ó cùndecu ndìhi-o Espiritú-gá.

<sup>14</sup> Te nchòhó xini-ndó sǎ tǐtní xichi cùu yiqui cuñú-ó te ñà díú ì<sup>n</sup>-ni xichi cuu-xi. <sup>15</sup> Te cuèi sáhá-ó ndìhi ndaha-o ñà túú ì<sup>n</sup>-ni cuu-xi dico vá cúú càchí-ó sǎ sáhá-ó ñà túú cùu-xi yiqui cuñú-ó. <sup>16</sup> Te cuèi lóho-o ndìhi tinuu-o ñà túú ì<sup>n</sup>-ni cuu-xi dico vá càchí-ó sǎ lóho-o ñà túú cùu-xi yiqui cuñú-ó. <sup>17</sup> Te núu nihí ní ndúú yiqui cuñú-ó ní



xĩndeé mee-ni tĩnuu-o, te ñá túú ndèé cundeé lóho-o cùndedóho ni cùu te núu duca<sup>n</sup>, àdi núu ñihí yiqui cùñú-ó ní xĩndeé mee-ni lóho-o te ñá túú ndèé cundeé dítní-ó ní cùu te núu duca<sup>n</sup>. <sup>18</sup> Dico mee Yá Ndiõxí ní taxi ndecu-gá ñ<sup>n</sup> ñ<sup>n</sup> xichi yiqui cùñú-ó nàcuáa ní cachí iní mée-gã. <sup>19</sup> Te núu ñ<sup>n</sup>-ni sã ní xĩndecu ñihí yiqui cùñú-ó, te vá cùndùu-xi nacuáa tàú-xi cunduu ni cùu te núu duca<sup>n</sup>. <sup>20</sup> Dico titní xichi cùu yiqui cùñú-ó, te ñ<sup>n</sup>-ni cùu-xi ñihí-xi.

<sup>21</sup> Te sa nàha-o sá vã cúú cãchí-ó sã tĩnuu-o ñá túú xini ñuhu-xi ndaha-o, àdi díquí-ó ñà túú xini ñuhu-xi sáhá-ó. <sup>22</sup> Te nchoo sà naha-o sá dává xichi yiqui cùñú-ó sã cãchí-ó sã ñà túú cùnuu ío-gá xini ñuhu-xi. <sup>23</sup> Te dava xichi yiqui cùñú-ó sã ñà túú quide cuendá cávihí-ó nchaa xiã<sup>n</sup> sá quidáhu dóó sácũhnu-o, te dava xichi yiqui cùñú-ó ñà cúú cùtúu chi dacuití sã quidáhu. <sup>24</sup> Te nchaa xichi yiqui cùñú-ó sã cúú cùtúu ñá túú xini ñuhu-xi quidáhu. Te Yá Ndiõxí ní taxi ndecu-gá nchaa xichi yiqui cùñú-ó nàcuáa tàú-xi cunduu. Te ní cachí-gá sá dává-gã xichi yiqui cùñú-ó núú vã cúú cùtúu quidáhu. <sup>25</sup> Te duca<sup>n</sup> ñi quide-gá cuendá sá ñ<sup>n</sup>-ní cùu yiqui cùñú-ó. Te duca<sup>n</sup> ndi tnahá ñ<sup>n</sup> ñ<sup>n</sup> xichi yiqui cùñú-ó chĩndee tnahá-xi. Te duca<sup>n</sup> sãtnahá-xi cùu nchoo vitna ndecu-o ichi Xítoho Jesucristú chi chĩndee tnahá-o. <sup>26</sup> Te núu ñ<sup>n</sup> xichi yiqui cùñú-ó ná tnahúhú te ñihí-ó quide úhú-xi, te núu ñ<sup>n</sup> xichi yiqui cùñú-ó ío váha ndècu-xi te duca<sup>n</sup> ñihí yiqui cùñú-ó cúú váha-xi. Te duca<sup>n</sup> sãtnahá-xi cùu-o vitna ndecu-o ichi Xítoho Jesucristú.

<sup>27</sup> Te nchoo ndècu ndihi-o Xítoho Jesucristú, te cùu-o datná yiqui cùñú-gá te ñ<sup>n</sup> ñ<sup>n</sup>-o cùu-o datná ñ<sup>n</sup> ñ<sup>n</sup> xichi yiqui cùñú-gá. <sup>28</sup> Te duca<sup>n</sup> sãtnahá-xi cùu-o chi Yá Ndiõxí ní taxi-gá ndí díñ<sup>n</sup> ndí díñ<sup>n</sup> chiú<sup>n</sup> quide-o sá cúú-xí nchaa ñá yiu ndècu ichi-gá. Te díhna-gá cue téé caca cuu cáhá<sup>n</sup> tñúhu-gá núú ñá yiu ní taxi ndecu-gá, te dãtnúni ní taxi ndecu-gá cue téé cáhá<sup>n</sup> tñúhu-gá nàcuáa dàcahu iní ñáhá mée-gá, te dãtnúni ní taxi ndecu-gá cue téé dānehé ñáhá xii ñá yiu tñúhu-gá núú tàcá-yu, te dãtnúni ní taxi ndecu tucu-gá cue téé ndàcu quide sá vã yõ tnahí ndàcu cada. Te ní taxi ndecu

tucu-gá cue téé xicá<sup>n</sup> táhú-ní núú Xítoho Jesucristú cuendá ñá yiu cùhú te ndúha-yu. Te ní taxi ndecu tucu-gá cue téé chĩndee cue ñá yiu ndècu ichi-gá. Te ní taxi ndecu tucu-gá cue téé yĩndaha ñaha xii ñá yiu ndècu ichi-gá, te ní taxi ndecu tucu-gá cue téé cãhá<sup>n</sup> tñúhu sá dácàhu iní ñáhá Espiritú-gá tñúhu sá ñà túú xini-güedé. <sup>29</sup> Te ñá ncháá-ó cùu-o cue téé ní táuchíú<sup>n</sup> Xítoho Jesucristú cáhá<sup>n</sup> tñúhu-gá núú ñá yiu, te ñá ncháá-ó cùu-o cue téé cãhá<sup>n</sup> tñúhu sá dácàhu iní ñáhá Yá Ndiõxí xii-o. Te ñá ncháá-ó cùu-o cue téé dàcuaha ñaha xii-yu. Te ñá ncháá-ó cùu-o cue téé quide sá vã yõ tnahí ndàcu cada. <sup>30</sup> Te ñá ncháá-ó cùu-o cue téé dícú-ni cácá<sup>n</sup> táhú núú Xítoho Jesucristú cuendá ñá yiu cùhú te ndúha-yu. Te ñá ncháá-ó cùu-o cue téé cãhá<sup>n</sup> tñúhu sá dácàhu iní ñaha Espiritú Yá Ndiõxí tñúhu sá ñà túú xini-ó, te ñá ncháá-ó cùu-o cue téé cùtnuní iní-xi cáhá<sup>n</sup> nàcuáa ndùu tñúhu-á<sup>n</sup>. <sup>31</sup> Te ío nducu ndèe-ndo cada-ndo nacuáa nduu táhú-ndó núú Yá Ndiõxí nchaa sá ío-gá cùnuu cada-ndo. Te vitna na dānehé ñáhá tucu-í xii-ndo nàcuáa cada-ndo, dico sá dānehé ñáhá-í-a ío-gá cùnuu-xi.

## 13

### *Cuu iní-ó tnahá ñá yiu-o*

<sup>1</sup> Te núu nchoo xini-ó cáhá<sup>n</sup>-ó tñúhu sá ío vii ío váha cuáhá<sup>n</sup> cãhá<sup>n</sup> ñá yiu ñuyíú-a, àdi xini-ó cáhá<sup>n</sup>-ó tñúhu sá ío vii ío váha cuáhá<sup>n</sup> cãhá<sup>n</sup> cue espíritu xini cuèchi núú Yá Ndiõxí, te núu xini-ó cáhá<sup>n</sup>-ó nchaa tñúhu-á<sup>n</sup> te ñá túú cùu iní-ó cuè tnahá ñá yiu-o ña, te ñá túú nandíhi-xi sá xini-ó cáhá<sup>n</sup>-ó tñúhu-á<sup>n</sup> te cùu-o datná dava caá sá ío dusa<sup>n</sup> quide. <sup>2</sup> Te núu cùu-o ñá yiu cãhá<sup>n</sup> tñúhu sá dácàhu iní ñáhá Yá Ndiõxí, àdi cuu-o ñá yiu cùtnuní iní-xi nàcuáa cuáhá<sup>n</sup> nchaa tñúhu ndùu yuhu ni cuu, àdi cuu-o ñá yiu ío váha cùtnuní iní-xi nchaa nàcuáa quide Yá Ndiõxí, àdi cuu-o ñá yiu ío váha sãndáá iní ñáhá xii Yá Ndiõxí nàcuáa ndacu-o cùu-o ñ<sup>n</sup> yucu xocuiñí-xi núú ndécú-xí, te núu nchaa xiã<sup>n</sup> xini-ó càda-o te ñá túú cùu iní-ó cuè tnahá ñá yiu-o ña, te ñá túú vèdana nandíhi-xi te núu vá cúú iní-ó tnahá ñá yiu-o cuèi na càda-o nchaa xiã<sup>n</sup>. <sup>3</sup> Te cuèi nchaa sá ndécú ndihi-o na dacáhñu-o, te cuèi na cuãha cuendá-ó mée-o cáyú-ó sã cúú-xí Yá Ndiõxí, dico ñá túú vèdana chĩndee ñaha-xi xii-o sá

dúcá<sup>n</sup> càda-o te núu ñá túú cùu iní-ó cuè tnahà ñáyi-u-o.

<sup>4</sup> Dico núu cùu iní-ó cuè tnahà ñáyi-u-o, te càhnu iní-ó, te quide váha-o, te ñá túú cùu-o ñáyi-u cuédú íní, te ni ñà túú càhá<sup>n</sup>-ó núu cùu cahnu-o, te ni ñà túú sàni iní-ó càda cahnu-o mee-o, <sup>5</sup> te ni ñà túú ñùhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gã cúdèé<sup>n</sup>-ó cuendá ñ<sup>n</sup> sá cúú, te ni ñà túú-gã sácũhu<sup>n</sup> iní-ó sã quidé ñàha tnahà ñáyi-u-o xii-o. <sup>6</sup> Te ni ñà túú-gã cúdĩ iní-ó nchàa sá ñà túú vãha quide ñáyi-u, chi mee-nã cuendá nchaa sá vãha cúdĩ iní-ó. <sup>7</sup> Te nchaa sá yãha-o sàcahnu iní-ó, te sàni váha iní-ó cuendá nchaa ñáyi-u, te sàni iní-ó sã díú-ní nchàa sá vãha cuu xii nchaa tnahà ñáyi-u-o ndèé cuèé-gã, te ío quide cahnu iní-ó cuèi nãndi sá yãha-o, te nchaa xiã<sup>n</sup> quidé-ó te núu cùu iní-ó cuè tnahà ñáyi-u-o.

<sup>8</sup> Te ni caa ni quíhí<sup>n</sup> duha-ni cuu iní-ó cuè tnahà ñáyi-u-o. Dico sáá nduu te vá cóo-gã ñáyi-u cáhá<sup>n</sup> tnúhu sá dácàhu iní ñáhá Yã Ndiõxí, te ni vã cóo-gã ñáyi-u cáhá<sup>n</sup> tnúhu sá dácàhu iní ñáhá Espíritú Yã Ndiõxí tnúhu sá ñà túú xìní-yu, te ni vã cóo-gã ñáyi-u túha dàtná túha ñáyi-u vitna. <sup>9</sup> Te vitna ñá túú cùtnuní iní-ó nchàa nacuáa sàni iní Yã Ndiõxí chi sacú-ni cùtnuní iní-ó, te duca<sup>n</sup> sácú-ni càhá<sup>n</sup>-ó nàcuáa ndùu tnúhu-gã, dico càhá<sup>n</sup>-ó tnúhu-gã nàcuáa dácàhu iní ñáhá-gã xii-o. <sup>10</sup> Te na sàá nduu càda Yã Ndiõxí nchaa nàcuáa tàú-xi cunduu, te dàvá-á<sup>n</sup> te nchaa sá càhí-gã ñá túú ndècu-xi nacuáa tàú-xi cunduu vá dúcá<sup>n</sup>-gã cundecu-xi.

<sup>11</sup> Te yúhú cùtnàhá ní cuu landú-í ní xóo cada-í sá cùu-í landú, ní xóo cáhá<sup>n</sup>-í, ní xóo caní iní-í, te ní xóo tecú tnùní-í dàtná quidé cuè landú xíndecu vitna, dico sáta ñ<sup>n</sup> cuu-í ñ<sup>n</sup> téé cùu sacuéhé te ñá túú-gã quidè-í dàtná ní xóo cada-í cùtnàhá ní cuu landú-í. <sup>12</sup> Te duca<sup>n</sup> sãtnahá-xi cùu-o vitna ndecu-o ichi Xítohó Jesucristú, chi ñá túú cùtnuní váha iní-ó nàcuáa cùu cuendá Yã Ndiõxí, te cùu-o datná ñáyi-u ndèhe ñ<sup>n</sup> núu yútátá sã ñà túú tũu váha núú-xi, te duca<sup>n</sup> sãtnahá-xi cùu-o chi ñá túú cùtnuní váha iní-ó nãsa cùu cuendá-gã, dico sáá nduu quíní núú-ó-gã. Te nchoo sácú-ni cùtnuní iní-ó nàcuáa ndùu-gã vitna dico na sàá nduu te quíní ndáá-ó nàcuáa càa nacuáa

ndùu-gã dàtná xìní ñáhá mèe-gã xii-o. <sup>13</sup> Te ni caa ni quíhí<sup>n</sup> duca<sup>n</sup>-ni quíndáá iní-ó Yã Ndiõxí, te duca<sup>n</sup>-ni cùndecu ndíhi-o tnúhu ndee iní cundecu-o ndíhi-gã, te duca<sup>n</sup>-ni ío cuu iní-ó-gã ndíhi tnahà ñáyi-u-o. Te sá cúú iní-ó Yã Ndiõxí ndíhi sá cúú iní-ó tnahà ñáyi-u-o xiã<sup>n</sup> ío-gã cùnùu-xi dacúúxí dàva-gã.

## 14

*Ñáyi-u càhá<sup>n</sup> tnúhu sá dácàhu iní ñáhá Espíritú Yã Ndiõxí*

<sup>1</sup> Te vá dáñá ndèé-ndó cùu iní-ndó tnahà ñáyi-u-ndo, te cuhu<sup>n</sup> iní-ndó sã ndùu táhú-ndó núu Yã Ndiõxí tĩtní núu chiu<sup>n</sup> cada-ndo nacuáa chindee ñàha Espíritú-gã xii-ndo, te ío cuhu<sup>n</sup> iní-ndó sã ndúú táhú-ndó cáhá<sup>n</sup>-ndó tnúhu sá dácàhu iní ñáhá Yã Ndiõxí xii-ndo. <sup>2</sup> Te cue ñáyi-u càhá<sup>n</sup> tnúhu sá dácàhu iní ñáhá Espíritú Yã Ndiõxí tnúhu sá ñà túú xìní-yu, te tnúhu càhá<sup>n</sup>-yu-á<sup>n</sup> cúú-xí sã cúú-xí Yã Ndiõxí te ñá díú sã cúú-xí ñáyi-u chi ñá túú tècú tnùní-yu, te mee Espíritú Yã Ndiõxí quidé-xí dùca<sup>n</sup> cáhá<sup>n</sup>-yu tnúhu yìyuhu. <sup>3</sup> Te cue ñáyi-u ní nduu táhú núu Yã Ndiõxí cáhá<sup>n</sup> tnúhu sá dácàhu iní ñáhá-gã xií-yu, te ñáyi-u-á<sup>n</sup> dácàhá<sup>n</sup>-yu ñáyi-u nàcuáa cuita níhí ndèé-gã-yu cundecú-yu ichi-gã, te duca<sup>n</sup> cuãñàhá-yu tnúhu ndee iní xií-yu òré ndíhú iní-yu. <sup>4</sup> Te ñáyi-u càhá<sup>n</sup> tnúhu sá dácàhu iní ñáhá Espíritú Yã Ndiõxí xií-yu tnúhu sá ñà túú xìní-yu-á<sup>n</sup>, ñáyi-u-á<sup>n</sup> mee-ní-yu níhí ndèé-yu ndècú-yu ichi-gã. Dico ñáyi-u càhá<sup>n</sup> tnúhu sá dácàhu iní ñáhá-gã xií-yu, càhá<sup>n</sup>-yu tnúhu-á<sup>n</sup> nàcuáa níhí ndèé dàva-gã ñáyi-u nchìcú<sup>n</sup> nihnu ichi-gã.

<sup>5</sup> Te yúhú ío cudĩ iní-í te núu nchaa-ndo cáhá<sup>n</sup>-ndó tnúhu sá dácàhu iní ñáhá Espíritú Yã Ndiõxí xii-ndo tnúhu sá ñà túú xìní-ndó. Dico ío-gã cudĩ iní-í te núu nchaa-ndo cáhá<sup>n</sup>-ndó tnúhu sá dácàhu iní ñáhá-gã, chi ío-gã xìní ñùhu-xi sá càhá<sup>n</sup>-ndó tnúhu-á<sup>n</sup> dacúúxí sã càhá<sup>n</sup>-ndó tnúhu sá dácàhu iní ñáhá Espíritú-gã cáhá<sup>n</sup>-ndó tnúhu sá ñà túú xìní-ndó. Dico ñ<sup>n</sup>-ni nũtnahá-xi quide-ndo te núu nchòhó ñáyi-u càhá<sup>n</sup> tnúhu sá dácàhu iní ñáhá Espíritú-gã cáhá<sup>n</sup>-ndó nàcuáa quèe-xi tnúhu-á<sup>n</sup>. Te duca<sup>n</sup> te nchaa ñáyi-u ndècu ichi Yã Ndiõxí cuita níhí ndèé-gã-yu quíhí<sup>n</sup> cundecú-yu ichi-gã.

<sup>6</sup> Te núu yúhú quexìo-í núu ndécú nchòhó ñáyiú ndècu ndìhi-í ichi Xítohó Jesucristú, te ngüíta-í cáhá<sup>n</sup>-í mee-ni tnúhu sá dácàhu iní ñáhá Espíritú Yá Ndiòxí xii-í tnúhu sá ñà túú xìní-í, te ñà túú nã sá vãha cuu-xi sá cúu-xí-ndó. Dico cuu-xi sá vãha xii-ndo te núu na càhá<sup>n</sup>-í núu-ndó nchàa tnúhu sá dánhé ñáhá Yá Ndiòxí xii-í tnúhu sá vátá dácua<sup>n</sup>-gá-í, ndìhi nchaa tnúhu sá sà xìní-í, ndìhi nchaa tnúhu sá dácàhu iní ñáhá-gã xii-í cáhá<sup>n</sup>-í, ndìhi nchaa dava-gá tnúhu-gá.

<sup>7</sup> Te na càda-o cuendá sá núu ì<sup>n</sup> tée tiú-dé vïlu àdi caní-dé àrpá te núu ñà túú sàhnú-dé ndìhi-xi ì<sup>n</sup> yaá, te ñà cútñuní iní-ó nã yaá caní-dé àdi ná yaá tiú-dé te núu duca<sup>n</sup> na càda-dé. <sup>8</sup> Te diu-ni duca<sup>n</sup> sãtnahá-xi cùu tucu tée cùu sandadú tiú cútú, chi núu vá tiú váha-dé nàcuáa tàú-xi cunduu òré quíhí<sup>n</sup>-güedé nàá-güedé, te vá ngündecu túha dava-gá cue sandadú te núu duca<sup>n</sup> na càda-dé vá tiú váha-dé. <sup>9</sup> Te duca<sup>n</sup> sãtnahá-xi cùu nchohó te núu vá càhá<sup>n</sup>-ndó ì<sup>n</sup> tnúhu nàcuáa tàú-xi cunduu núu ñáyiú te vá tècú tnùní-yu tnúhu càhá<sup>n</sup>-ndó. ¡Chi àú<sup>n</sup> nã cuu càhá<sup>n</sup>-ndó te núu duca<sup>n</sup> na càda-ndo! <sup>10</sup> Te ío titní núu tnúhu ío ñuyíú, te ì<sup>n</sup> ì<sup>n</sup> núu tnúhu-á<sup>n</sup> cútñuní iní ñáyiú nàcuáa quèe-xi.

<sup>11</sup> Te núu nchoo ñã tècú tnùní-ó ì<sup>n</sup> tnúhu càhá<sup>n</sup> ì<sup>n</sup> ñáyiú, te quide-ó-yu ñáyiú ñuú xicá chi ñà túú càhá<sup>n</sup>-yu tnúhu càhá<sup>n</sup>-ó, te diu-ni duca<sup>n</sup> quide ñahá-yu xii nchoo tucu. <sup>12</sup> Te xíã<sup>n</sup> núu càchí tnúhu-í xii nchaa nchòhó ñáyiú ío cuíní nduu táhú núu Yá Ndiòxí sá Espíritú-gá chindee ñaha-xi xii-ndo cada-ndo ná daha núu chiu<sup>n</sup>, te ío nducu ndèe-ndo cada-ndo chiu<sup>n</sup> sá ñi nduu táhú-ndó nàcuáa cuita níhí ndéé-gã ñáyiú ndècu ichi-gá quíhí<sup>n</sup>.

<sup>13</sup> Te núu càhá<sup>n</sup>-ndó tnúhu sá ñà túú xìní-ndó, tnúhu sá dácàhu iní ñáhá Espíritú Yá Ndiòxí xii-ndo, te xini ñuhu-xi sá càcá<sup>n</sup> táhú-ndó núu Yá Ndiòxí cuendá sá ñà chindee ñaha-gá xii-ndo càhá<sup>n</sup>-ndó núu ñáyiú núu nása quèe-xi tnúhu-á<sup>n</sup>. <sup>14</sup> Chi núu nchoo na càhá<sup>n</sup> ndìhi-o Yá Ndiòxí ndìhi tnúhu sá ñà túú xìní-ó, te ni yùhu ni iní-ó càhá<sup>n</sup> ndìhi-o-gã dícó-ni sá ñà tècú tnùní-ó nàcuáa nduu tnúhu càhá<sup>n</sup>-ó. <sup>15</sup> Te xíã<sup>n</sup> núu xini ñuhu-xi càhá<sup>n</sup> ndìhi-o Yá Ndiòxí ni yùhu ni iní-ó nàcuáa chindee ñaha Espíritú-gá xii-o te càhá<sup>n</sup>-ó nàcuáa tecú tnùní-ó, te diu-ni duca<sup>n</sup> càda-o òré xítá

yùhu-o chiñuhu-o Yá Ndiòxí, chi ni yùhu ni iní-ó dùca<sup>n</sup> cada-o nacuáa chindee ñaha Espíritú-gá xii-o, te cútñuní iní-ó nàcuáa cuáhá<sup>n</sup> nchaa tnúhu càhá<sup>n</sup>-ó xita-o. <sup>16</sup> Chi núu nchoo na ndácá<sup>n</sup> táhú-ó núu Yá Ndiòxí ndìhi mee-ni tnúhu sá ñà túú xìní-ó tnúhu sá dácàhu iní ñáhá Espíritú-gá xii-o, te ñáyiú ñà túú ní nduu táhú càhá<sup>n</sup> tnúhu càhá<sup>n</sup>-ó ndèdóho ñahá-yu xii-o, te ñáyiú-á<sup>n</sup> vã ndácú-yu càhá<sup>n</sup>-yu tnúhu càhá<sup>n</sup>-ó ndácá<sup>n</sup> táhú-ó ndìhí-yu núu Yá Ndiòxí chi ñà túú tècú tnùní-yu tnúhu càhá<sup>n</sup>-ó. <sup>17</sup> Te váha-ni quide-o sá dúcá<sup>n</sup> càhá<sup>n</sup>-ó ndácá<sup>n</sup> táhú-ó núu Yá Ndiòxí, te dícó-ni sá tnúhu-á<sup>n</sup> ñà túú chindee-xi ñáyiú nàcuáa cuita níhí ndéé-gã-yu cundecú-yu ichi-gá. <sup>18</sup> Te yúhú ío ndácá<sup>n</sup> táhú-í núu Yá Ndiòxí chi càhá<sup>n</sup>-í tnúhu sá ñà túú xìní-í tnúhu sá dácàhu iní ñáhá Espíritú-gá xii-í, te càhá<sup>n</sup>-gá-í dácúúxí nchaa nchohó. <sup>19</sup> Te òré tàcá ñáyiú ndècu ichi Yá Ndiòxí dácua<sup>n</sup>-gá-yu tnúhu-gá, te càhá<sup>n</sup>-í tnúhu-gá núu-yu sá sà ní cútñuní iní mèe-í nàcuáa duca<sup>n</sup> cútñuní iní-yu nàcuáa nduu tnúhu càhá<sup>n</sup>-í. Te tnàhá-gá iní-í càhá<sup>n</sup>-í úhú<sup>n</sup>-ni tnúhu-á<sup>n</sup> núu-yu dácúúxí sã càhá<sup>n</sup>-í úxí mïl tnúhu sá ñà túú xìní-í, tnúhu sá dácàhu iní ñáhá Espíritú Yá Ndiòxí xii-í càhá<sup>n</sup>-í.

<sup>20</sup> Te nchòhó ñáyiú ndècu ndìhi-í ichi Xítohó Jesucristú, vá caní iní-ndó dàtná sání iní cue landú, chi caní iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhli vá cundècu-ndo ichi cuehé ichi duha, chi cue landú-á<sup>n</sup> ñà túú ndècu-güexi ichi-á<sup>n</sup>. <sup>21</sup> Te núu tütú Yá Ndiòxí càhá<sup>n</sup>-xi nàcuáa ní càhá<sup>n</sup>-gá, te càchí-xi: “Cue tée ñuú xicá càhá<sup>n</sup> ndi dí<sup>n</sup> núu tnúhu quíhí<sup>n</sup>-güedé càhá<sup>n</sup>-güedé tnúhu-í núu ñáyiú isràel cada-güedé núu-í, te cuèi duca<sup>n</sup> dico vá quindáá iní-yu tnúhu-í”, duha ní cachí Yá Ndiòxí te duca<sup>n</sup> ni ngündeé núu tütú-gá. <sup>22</sup> Te tnúhu sá dácàhu iní ñáhá Espíritú Yá Ndiòxí xii-o tnúhu sá ñà túú xìní-ó, xíã<sup>n</sup> cúu-xí cuendá sá cútñuní iní cue ñáyiú ñà túú sàndáá iní tnúhu Yá Ndiòxí sá ñà túú cùu váha iní ñáhá-gã xii-yu. Dico sá cúu-xí cuè ñáyiú sàndáá iní tnúhu-gá ñà túú nã quidé-xí sã cúu-xí-yu. Te tnúhu sá dácàhu iní ñáhá Yá Ndiòxí xii-o, xíã<sup>n</sup> cúu-xí cuendá sá cútñuní iní cue ñáyiú sàndáá iní tnúhu-gá sá ndécú ndìhi ñaha-gá xii-yu, dico ñà túú dùca<sup>n</sup> sani



iní cue ñáyiú ñá túú sàndáá ínì tnúhu-gá. <sup>23</sup> Te núú ní tacá nchaa nchòhó ñáyiú ndècu ichi Yá Ndiòxí, te nchaa-ndo ñí ngúíta-ndo càhá<sup>n</sup>-ndó tnúhu sá dácàhu ínì ñáhá Espíritú Yá Ndiòxí xii-ndo tnúhu sá ñà túú xìnì-ndó, te mei òré-á<sup>n</sup> quexìo cue ñáyiú ñá túú sàndáá ínì tnúhu-gá, ndihì cue ñáyiú vátá quìnì dana-gá tnúhu-gá núú ndécú-ndó, te ñáyiú-á<sup>n</sup> quesàhá-yu sá lùcú-ndó te núú duca<sup>n</sup> càhá<sup>n</sup>-ndó tnúhu sá dácàhu ínì ñáhá Espíritú-gá xii-ndo òré quexìo-yu. <sup>24</sup> Dico núú nchaa-ndo càhá<sup>n</sup>-ndó tnúhu sá dácàhu ínì ñáhá Yá Ndiòxí xii-ndo, te mei òré-á<sup>n</sup> quexìo cue ñáyiú duca<sup>n</sup> ñà túú sàndáá ínì-xi tnúhu-gá, ndihì cue ñáyiú duca<sup>n</sup> ñà túú xìnì dana tnúhu-gá-á<sup>n</sup>, te ñáyiú-á<sup>n</sup> cutnùnì ínì-yu sá ndécú cuèchi-yu núú-gã, te ngúíta-yu cuáha-yu cuèndá sá ñà túú quidè váha-yu ndécú-yu cuèndá sá càhá<sup>n</sup>-ndó tnúhu-gá ndèdóho-yu. <sup>25</sup> Te nchaa sá cuèhé sá dúhá ñí quidè-yu sàni ínì-yu yìyuhu ndacu ínì-yu, te ngúíta-yu náhmá-yu nchaa sá ñà túú váha ní quidè-yu núú Yá Ndiòxí, te cachí-yu sá ìo càhnu cuu-gá, te cachí tucú-yu sá ndáá ndécú ndihì-ndo-gá.

#### *Cada-o nàcuáa tàú-xi cunduu*

<sup>26</sup> Te vitna nchòhó ñáyiú ndècu ndihì-í ichi Xítóhó Jesucristú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiòxí, te dava-ndo dàsahú-ndó ñáyiú tnúhu-gá, te dava-ndo càhá<sup>n</sup>-ndó nàcuáa dàquixi túu Yá Ndiòxí ínì-ndó, te dava-ndo càhá<sup>n</sup>-ndó tnúhu sá dácàhu ínì ñáhá Espíritú Yá Ndiòxí xii-ndo tnúhu sá ñà túú xìnì-ndó, te dava-ndo càhá<sup>n</sup>-ndó nàcuáa quèe-xi tnúhu-á<sup>n</sup>. Te nchaa sá quidè-ndó ná cùu-xi nàcuáa chindee-xi ñáyiú nàcuáa cuita níhì ndéé-gã-yu cundecú-yu ichi-gá. <sup>27</sup> Te òré càhá<sup>n</sup>-ndó tnúhu sá dácàhu ínì ñáhá Espíritú Yá Ndiòxí xii-ndo tnúhu sá ñà túú xìnì-ndó, te úú-ni-ndo àdi únì-ni tnàhá-ndó càhá<sup>n</sup>-ndó tnúhu-á<sup>n</sup> te vá úú<sup>n</sup>-ní càhá<sup>n</sup>-ndó chí ndéé ndihì ì<sup>n</sup>-ndo te dàtnùnì ngúíta ingá-ndó càhá<sup>n</sup>-ndó. Te xini ñuhu-xi sá ì<sup>n</sup> ñáyiú càhá<sup>n</sup>-yu nàcuáa quèe-xi tnúhu càhá<sup>n</sup>-ndó-á<sup>n</sup>. <sup>28</sup> Te núú ñá túú ñáyiú tècú tnùnì nàcuáa quèe-xi tnúhu càhá<sup>n</sup>-ndó-á<sup>n</sup>, te núú mée núú ì<sup>n</sup>-ní-ndó càhá<sup>n</sup>-ndó tnúhu-á<sup>n</sup> càhá<sup>n</sup> ndihì-ndo Yá Ndiòxí te vá càhá<sup>n</sup>-ndó

núú ñáyiú. <sup>29</sup> Te òré càhá<sup>n</sup>-ndó tnúhu sá dácàhu ínì ñáhá Yá Ndiòxí xii-ndo te úú-ni-ndo àdi únì-ni tucu-ndo càhá<sup>n</sup>, te dava-gá-ndó cùndedóho-ndo tnúhu-á<sup>n</sup> te càhá<sup>n</sup>-ndó núu váha-ni càhá<sup>n</sup>-güedé àdi ñà túú váha-ni. <sup>30</sup> Te núú ì<sup>n</sup>-ndo ñí dácáhú ínì ñáhá Yá Ndiòxí xii-ndo ì<sup>n</sup> tnúhu càhá<sup>n</sup>-ndó, te núú ì<sup>n</sup>-ndo sà cahá<sup>n</sup>-ndó te ngúíñì-ndó te quíhu tucu ingá-ndó càhá<sup>n</sup>-ndó nàcuáa ní dácáhú ínì ñáhá Yá Ndiòxí xii-ndo. <sup>31</sup> Te nchaa nchòhó ñáyiú ní nduu táhú càhá<sup>n</sup> tnúhu sá dácàhu ínì ñáhá Yá Ndiòxí, te vá úú<sup>n</sup>-ní càhá<sup>n</sup>-ndó chí díhna-gá ì<sup>n</sup>-ndo càhá<sup>n</sup> te dàtnùnì càhá<sup>n</sup> tucu ingá-ndó. Te duca<sup>n</sup> càda-ndo cuendá nchaa-ndo tècú tnùnì-ndó nàcuáa nduu tnúhu càhá<sup>n</sup> ì<sup>n</sup> ì<sup>n</sup>-ndo, te duca<sup>n</sup> te cudíí-gã ínì-ndó càncicú<sup>n</sup> nihnu-ndo ìchi-gá. <sup>32</sup> Te nchaa ñáyiú càhá<sup>n</sup> tnúhu Yá Ndiòxí sa nàha-ná mée-yu nàcuáa quidè-yu càhá<sup>n</sup>-yu tnúhu-gá nàcuáa ñà túú quidè cutexínu-yu. <sup>33</sup> Te Yá Ndiòxí cúú-gã Yaá quidè ìo váha cùu ì<sup>n</sup>-nuu-ndo ndecu-ndo, te ñà túú dàticá nuu ñaha-gã xii-ndo.

Te na càchí tnúhu-í xii-ndo nàcuáa càhá<sup>n</sup>-í nchaa núú tàcá cue ñáyiú ndècu ndihì-o ichi Xítóhó Jesucristú. <sup>34</sup> Te yúhú càchí-í sá vã cúú càhá<sup>n</sup> cue ñáyiú dìhì òré tàcá-ndó dàcuaha-ndo tnúhu-gá, chí ñà túú dùca<sup>n</sup> cuinì-gá cadá-yu, te quíndáá-ni ínì-yu cadá-yu nàcuáa tàú-xi cunduu. <sup>35</sup> Te núú ì<sup>n</sup> sá cuinì-yu nducu tnúhu-yu te ndéé òré nasáá-yu vehé-yu te nducu tnúhu-yu núú yíí-yu, chí ñà túú nduu váha-xi sá càhá<sup>n</sup>-yu núú tàcá nchaa ñáyiú dàcuáha ndihì-yu tnúhu-gá.

<sup>36</sup> Te chí dándàcu ínì sá ñà díú nchòhó cúú-ndó ñáyiú ní ngúndecu ndihì tnúhu Yá Ndiòxí díhna nuu nàcuáa datècú tnúhu-ndo dàva-gá ñáyiú, te ni ñà díú mée-ni nchòhó sa ní ngúndecu ndihì-ndo tnúhu Yá Ndiòxí vitna, núú xíá<sup>n</sup> vá càchí-ndó sã ìo cùnuu-ndo. <sup>37</sup> Te núú dava nchòhó sání ínì-ndó sã càhá<sup>n</sup>-ndó nàcuáa dàcahu ínì ñáhá Yá Ndiòxí xii-ndo àdi sani ínì-ndó sã quidè-ndó nàcuáa chindee ñaha Espíritú-gá xii-ndo, te cuáha váha-ndo cuèndá sá ncháá tnúhu càhá<sup>n</sup>-í-a cùu-xi tnúhu sá ñí cachí tnúhu mee Xítóhó Jesucristú cada-o. <sup>38</sup> Te ndèda-ni càa ñáyiú ndècu ndihì-ndo te núú ñà túú sàndáá ínì-yu tnúhu càhá<sup>n</sup>-í, te vá



cadá cuendá-ndó tnúhu càhá<sup>n</sup>-yu.

<sup>39</sup> Te vitna nchòhó ñáyiú ndècu ndihí-í ichi Xítóhó Jesucristú, ío caní iní-ndó càhá<sup>n</sup>-ndó tnúhu sá dácàhu iní ñáhá Yá Ndiòxí núú ñáyiú, te dañá-ndo na càhá<sup>n</sup> cue ñáyiú ní nduu táhú núú Yá Ndiòxí sá càhá<sup>n</sup>-yu tnúhu sá dácàhu iní ñáhá Espíritú-gá xii-yu tnúhu sá ñà túú xìní-yu. <sup>40</sup> Te cada-ndo nchàa nacuáa tàú-xi cunduu nacuáa ñá túú nã cuu cundecu-ndo.

## 15

### *Ní ndoto Xítóhó Jesucristú*

<sup>1</sup> Te vitna nchòhó ñáyiú ndècu ndihí-í ichi Xítóhó Jesucristú cuíní-í sá dándacu iní-ndó nacuáa ní dánèhé ñáhà-í xii-ndo tnúhu sá càhá<sup>n</sup> nacuáa naníhí táhú-ó, chí ñá túú tnúhu-án ní sándáa iní-ndó te nchicú<sup>n</sup> nihnu-ndo. <sup>2</sup> Te sá xii tnúhu-án níhnú-ndó ichi cuáhá<sup>n</sup>-ndó núú ndúú táhú-ndó cundecu-ndo ndihí Yá Ndiòxí ní caa ní quíhí<sup>n</sup>, te duca<sup>n</sup> ndúu táhú-ndó núú cundecu-ndo ní caa ní quíhí<sup>n</sup> ndihí Yá Ndiòxí te núu nchicú<sup>n</sup> nihnu-ndo nacuáa ní dánèhé ñáhà-í xii-ndo, te núu ñá túú nchicú<sup>n</sup> nihnu-ndo te ñá túú ní sándáa iní-ndó nacuáa tàú-xi cunduu.

<sup>3</sup> Te yúhú sa ní cachí tnúhu-í xii-ndo ñá túú tnúhu sá ío cunuú ní níhí-í, chí ní cachí tnúhu-í xii-ndo sã Xítóhó Jesucristú ní xihí-gá cuendá nchaa yíca cuèchi-o, te duca<sup>n</sup> ní cuu chí duca<sup>n</sup> càhá<sup>n</sup>-xi núú tütú Yá Ndiòxí sá dúcá<sup>n</sup> yáha-gá. <sup>4</sup> Te ní chindúxi ñaha-güedě xii-gá te nduu úní ní dándótó ñàha Yá Ndiòxí xii-gá, te duca<sup>n</sup> ní cuu chí duca<sup>n</sup> càhá<sup>n</sup>-xi núú tütú Yá Ndiòxí. <sup>5</sup> Te sáta ní ndoto-gá te ní quee túu-gá núú tē Pèlú, te dātnùní ní quee túu-gá núú dāva-gá cue tē ní táuchíú<sup>n</sup>-gá càhá<sup>n</sup> tnúhu-gá. <sup>6</sup> Te sáta dúcá<sup>n</sup> te dātnùní ní quee túu-gá núú ũhú<sup>n</sup> ciendú cue ñáyiú ndècu ichi-gá, te vāi-yu xīndecu-ní-yu vitna chí sacú-ni-yu ní xihí. <sup>7</sup> Te dātnùní ní quee túu-gá núú tē Jācobó, te sáta dúcá<sup>n</sup> te dātnùní ní quee túu-gá núú nchaa cue tē ní táuchíú<sup>n</sup>-gá càhá<sup>n</sup> tnúhu-gá.

<sup>8</sup> Te ndéé núú ní ndihí-ná te ní quee túu-gá núú mēé-í, te òré ní quee túu-gá núú-í te cū-í dātná ñá déhe yiquí<sup>n</sup> vātá sáa-gá nduu càcu chí cū-í ñá tē ñá túú sàni vāha iní-xi cuendá-gá ní cū. <sup>9</sup> Te yúhú ñá túú cunuú-í dātná cūnuú cue tē ní táuchíú<sup>n</sup>

Xítóhó Jesucristú càhá<sup>n</sup> tnúhu-gá. Te cū-í ñá tē ní táuchíú<sup>n</sup>-gá càhá<sup>n</sup> tnúhu-gá, cuèi ñá túú tàú-í sá càhá<sup>n</sup>-í tnúhu-gá, chí ní xóo cuu úhú iní-í cue ñáyiú ndècu ichi Yá Ndiòxí. <sup>10</sup> Dico Yá Ndiòxí ío vāha iní-gá chí ní quide ñaha-gã xii-í ñá tē vāha, chí ñá túú-gã quidè-í dātná ní xóo cada-í. Te ío cundahú iní ñáhá-gã chindèe ñaha-gã xii-í dico ñá túú àú<sup>n</sup> nã cuu chindèe ñaha-gã, chí ío-gá vāi chíu<sup>n</sup>-gá ní cuu sa ta quide-í cuáhá<sup>n</sup> dācúúxí dāva-gá cue tē ní táuchíú<sup>n</sup>-gá càhá<sup>n</sup> tnúhu-gá te ñá díú mēé-í duca<sup>n</sup> quide-í chí mee Yá Ndiòxí ío cundahú iní ñáhá-gã chindèe ñaha-gã xii-í quidè-í chíu<sup>n</sup>-gá. <sup>11</sup> Te ñá túú nã cada-xi cuèi dāva-gã-güedé sa ní cuu vāi-gá chíu<sup>n</sup>-gá quidè-güedé àdi yúhú, chí ñá ní tnúhu càhá<sup>n</sup>-ndí te tnúhu-án cúú tnúhu ní sándáa iní-ndó.

### *Cue ñáyiú ní xihí ndoto-yu*

<sup>12</sup> Te nchúhú cue tē càhá<sup>n</sup> tnúhu Xítóhó Jesucristú càhá<sup>n</sup>-ndí sá ní xihí-gá te ní ndoto-gá, ¿te ná cuendá dāva nchòhó cāchí-ndó sã vā ndótó cuè ñáyiú ní xihí? <sup>13</sup> Te núu duca<sup>n</sup> sàni iní-ndó sã vā ndótó cuè ñáyiú ní xihí te ní Xítóhó Jesucristú ñá túú ní ndòto-gá te núu duca<sup>n</sup>. <sup>14</sup> Te núu dīcò Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nāndíhí-xi te núu duca<sup>n</sup>, te àú<sup>n</sup> nã cuu sāndáa iní-ndó-gã te núu duca<sup>n</sup>.

<sup>15</sup> Te núu dīcò cúú-xí ñá sá ndāá tnúhu sàni iní dāva-ndo ña, te dācuandehnde-ndí sá càhá<sup>n</sup>-ndí tnúhu Yá Ndiòxí núú-ndó te núu duca<sup>n</sup>, te ñá túú càhá<sup>n</sup> ndāá-ndí núú-ndó sã Yá Ndiòxí ní dāndótó-gã Xítóhó Jesucristú, te núu ndāá nacuáa sàni iní dāva-ndo sã vā ndótó cuè ñáyiú ní xihí, dico ñá ndāá nacuáa sàni iní-ndó. <sup>16</sup> Te núu vā ndótó cuè ñáyiú ní xihí te ní Xítóhó Jesucristú ñá túú ní ndòto-gá. <sup>17</sup> Te núu Xítóhó Jesucristú ñá túú ní ndòto-gá ñá, te àú<sup>n</sup> nã cuu sāndáa iní-ndó-gã te núu duca<sup>n</sup>, te ndècu-ni cuèchi-ndo núú Yá Ndiòxí te núu duca<sup>n</sup>. <sup>18</sup> Te núu ndāá nacuáa sàni iní-ndó ñá te cue ñáyiú ní sāndáa iní ñáhá xii Xítóhó Jesucristú ñáyiú ní xihí ní xita nihnú-yu te núu duca<sup>n</sup>. <sup>19</sup> Te núu nchoo ndècu ndihí-o tnúhu ndee iní núú Xítóhó Jesucristú cuendá-ni sá cūndècu-o ñuyíú-a

ña, te cùu-o ñáyiú ío-gá duu<sup>n</sup> duu<sup>n</sup> ndàhú sá cúú-xí dàva-gá ñáyiú te núu duca<sup>n</sup>.

20 Dico ndáá sá Xítohó Jesucristú ní xíhí-gá te ní ndoto-gá núu xíá<sup>n</sup> cútnùnì iní dava-o sá ndótó cuè ñáyiú ní xíhí ñáyiú ní sándáá iní tnúhu-gá. 21 Te sá cuèchi ñ<sup>n</sup>dì-ni téé ní xíndecu ñuyíú-a xíá<sup>n</sup> xíhí ñáyiú, te sá cuèndá ñ<sup>n</sup>dì-ni tucu ingá téé te ndoto cue ñáyiú ní xíhí. 22 Te nchaa ñáyiú xíhí-yu sá cuèchi ñ<sup>n</sup> téé, te téé-á<sup>n</sup> cúú-dě ndíi Àdán téé díhna nuu nì cuu ñanì tnáhá cuè ñáyiú ñuyíú. Te ñ<sup>n</sup>du-ni duca<sup>n</sup> sá cuèndá ñ<sup>n</sup>dì-ni téé te ndoto cue ñáyiú ní xíhí, te téé-á<sup>n</sup> cúú-dě Xítohó Jesucristú chi nchaa ñáyiú ndècu ndíhi-gá ndotó-yu. 23 Te díhna-gá Xítohó Jesucristú ní ndoto-gá xíá<sup>n</sup> cútnùnì iní dava-o sá ndòu na quixi tucu-gá ñuyíú-a te dāv-á<sup>n</sup> ndoto nchaa ñáyiú ní xíhí ñáyiú ní sándáá iní tnúhu-gá. 24 Te dàtnùnì duca<sup>n</sup> te sáá nduu nàa nchaa sá ío ñuyíú, te Xítohó Jesucristú danàa-gá nchaa ndi túhú sá cùnùu ío ñuyíú-a, chi danàa-gá nchaa ñáyiú ío cùnùu, ndíhi yucu ñávàha, ndíhi nchaa espíritú xínú cuèchi núú-xi. Te duca<sup>n</sup> te cúñaha-gă xii Tătá-ó Dütú Ndiöxí taxi tnùnì-gá. 25 Chi Xítohó Jesucristú dacuítí taxi tnùnì-gá ndéé ná sáá nduu dànaa-gá nchaa sá cúú úhú iní ñáhá xii-gá. 26 Te ndéé núú nì ndíhi-ná te danàa-gá sá quidé xíhí ñáyiú. 27 Te duca<sup>n</sup> chi càhá<sup>n</sup>-xi núú tütú Yá Ndiöxí sá mée-gă ní nachíhi-gá nchaa sá ío ndaha Xítohó Jesucristú cuèndá sá mée Xítohó Jesucristú taxi tnùnì-gá, te vá yòo ñ<sup>n</sup> taxi tnùnì ñáhá xii Yá Ndiöxí, chi mee Yá Ndiöxí cúú-gă Yaá ní nachíhi-gá nchaa sá ío ndaha Xítohó Jesucristú. 28 Te díhna-gá ní xáha<sup>n</sup> Yá Ndiöxí xii Xítohó Jesucristú Yaá cúú Dèhe-gá sá quíndaha-gá nchaa sá ío, te òré ná quíndaha Xítohó Jesucristú nchaa sá ío, te cúñaha-gă xii Yá Ndiöxí taxi tnùnì ñáhá-gă xii-gá, te duca<sup>n</sup> te mee-nă Yá Ndiöxí taxi tnùnì-gá nchaandi túhú sá ío.

29 Te núu ñá túú ndáá càhá<sup>n</sup>-í, ¿te ná cuèndá dava ñáyiú sànduté-yu cuèndá ñáyiú ní xíhí núu ñá túú ndáá sá ndótó ñáyiú ní xíhí?

30 Te nchúhú duca<sup>n</sup>-ni sàni iní ñáyiú cahni ñàhá-yu xii-ndí, te núu vá ndótó ñáyiú ní xíhí te àú<sup>n</sup> nă cuu duca<sup>n</sup> quide cahnu iní-ndí

duca<sup>n</sup> cuínì-yu cahni ñàhá-yu xii-ndí te núu duca<sup>n</sup>. 31 Te nchòhó ñáyiú ndècu ndíhi-í ichi Xítohó Jesucristú ío váha sàni iní-í cuèndá-ndó, chi ndècu-o ichi-gá. Te na càhí tnúhu ndáá-í xii-ndo sá ñ<sup>n</sup> nduu ñ<sup>n</sup> nduu ndeé iní ñáhá ñáyiú cahni ñàhá-yu xii-í. 32 Te núu dícó ndáá sá vă ndótó ñáyiú ní xíhí dàtná càhí dava ñáyiú, te àú<sup>n</sup> nă cuu ní xíndecu-í ñuú Éfesú ní cuu úhú iní ñáhá ñáyiú xii-í te núu duca<sup>n</sup>, chi ñáyiú-á<sup>n</sup> nì quidé-yu dàtná quidé ñ<sup>n</sup> quiti déé<sup>n</sup> sá cúú-xi-í. Te núu ndáá sá vă ndótó ñáyiú ní xíhí ñá, te váha-gá núu cachí-ó dàtná càhí ñáyiú: “Vitna na còho-o te na càxi-o chi tnee idá cuú-ó”, duha càhí-yu.

33 Te vá dáñá-ndó mée-ndo dandahú ñáhá ñáyiú ndècu ichi cuehé ichi duha xii-ndo, te ngüita-ndo càni iní-ndó dàtná sàni iní-yu. Chi quèe ndáá-xi nàcuáa càhá<sup>n</sup> tucu dava-gá ñáyiú, chi càhí-yu sá núu ñáyiú quide váha na nìhí tnáhă-yu ndíhi ñáyiú ndècu ichi cuehé ichi duha, te ngüita ñáyiú quide váha-á<sup>n</sup> cadá-yu tnáhă-yu nchaa sá cuèhé sá dúhá dàtná quidé ñáyiú-á<sup>n</sup>. 34 Te ío váha cuáha-ndo cuèndá nàcuáa cundecu-ndo, te vá cadá-gă-ndó dàtná quidé cuè ñáyiú ndècu ichi cuehé ichi duha. Te dava-ndo quide-ndo datná quidé cuè ñáyiú ndècu ichi cuehé ichi duha chi ñá túú sándáá iní-ndó Yá Ndiöxí. Te duha càhá<sup>n</sup>-í cuèndá sá cúcàha<sup>n</sup> núú-ndó cuèndá nchaa sá ñá túú váha quide-ndo.

### *Nàcuáa ndoto ñáyiú ní xíhí*

35 Te cudana dava-ndo ndècu tnúhu-ndo núu nása ndoto ñáyiú ní xíhí, te nása cunduu yiqui cùñú-yu òré ndotó-yu. 36 Te nchòhó ñáyiú duca<sup>n</sup> càhá<sup>n</sup> cúú-ndó ñáyiú ñá túú tnàhí cùtnùnì iní-xi, te duha na càhá<sup>n</sup>-í nàcuáa tecú tnùnì-ndó. Te núu ñ<sup>n</sup> tatá ná chíhí-ó te tèhyú mée-xí te xínu déhe-xi.

37 Dico ñá díú sá sà ní xínu ta sàhnu cuáhá<sup>n</sup> ní cùxi-o, te ñ<sup>n</sup>du-ni duca<sup>n</sup> quide-o cuéi triú ndíhi nchaa dava-gá tatá xítú-ó. 38 Te Yá Ndiöxí quidé-gă sácùnduu tatá xínu-á<sup>n</sup> dàtná cuínì mée-gă cunduu. Te ndéda-ni càa tatá te ñ<sup>n</sup>du-ni-gá quidé-gă sácùnduu-xi nàcuáa tàú-xi cunduu. 39 Te ndi díí<sup>n</sup> ndáa nchaa yiqui cùñú, chi tucu càa yiqui cùñú nchoo cuè ñáyiú, te tucu càa yiqui cùñú nchaa quiti xica núú ñúhú, te tucu càa yiqui cùñú

nchaa quiti ndáva, te tucu càa yiqui cuñú nchaa chácá. <sup>40</sup> Te duca<sup>n</sup> ñà túú ñ<sup>n</sup>-ni caa nchaa yiqui cuñú sá ío andiu ndihi nchaa yiqui cuñú ñáyiú ío ñuyíú-a, te duca<sup>n</sup> ñà túú ñ<sup>n</sup>-ni ndáa vii nchaa sá ío andiu ndihi ñuyíú-a. <sup>41</sup> Te duca<sup>n</sup> cùu tucu-xi nchíanchii chí tucu dàyehé-xi, te tucu dàyehé yóó, te tucu dàyehé nchaa chódíní, te duca<sup>n</sup> ñà túú ñ<sup>n</sup>-ni dayehé nchaa chódíní. <sup>42</sup> Te duca<sup>n</sup> sãtnahá-xi cùu ñáyiú ní xihí te ndoto, chí tucu càa yiqui cuñú-yu sá nguindüxi te tucu cunduu yiqui cuñú-yu òré ndotó-yu, te yiqui cuñú sá ndótó ndihí-yu-á<sup>n</sup> vã ndihí nihnu-gá-xi. <sup>43</sup> Te yiqui cuñú ñáyiú xihí ñà túú nãndihí-xi, dico yiqui cuñú sá ndótó ndihí-yu te ío váha cunduu. Te nchaa yiqui cuñú ñáyiú xihí ñà túú tnãhí-gá ndee-xi, dico yiqui cuñú ndoto ndihí-yu xíã<sup>n</sup> ío cunduu ndee-xi. <sup>44</sup> Te yiqui cuñú nchaa ñáyiú xihí cúú-xí cuendá ñuyíú-a, dico yiqui cuñú sá ndótó ndihí-yu xíã<sup>n</sup> cundecu-ná-xi cuendá Espíritú Yã Ndiõxí. Te dàtná ío yiqui cuñú sá cúú-xí cuendá ñuyíú-a, te duca<sup>n</sup> ío yiqui cuñú sá cúú-xí cuendá mee-nã Espíritú Yã Ndiõxí.

<sup>45</sup> Te núú tütú Yã Ndiõxí càchí-xi: “Ndíi Àdán ndíi ní xíndecu ndéé díhna ní chihi Yã Ndiõxí iní ndíi”, duha càchí-xi núú tütú-gá. Te íngá tucu téé cùu-dé dàtná ndíi Àdán te téé-á<sup>n</sup> cúú-dě Xítóhó Jesucristú, te Yaá-á<sup>n</sup> quidé-gã sá mée-ná Espíritú Yã Ndiõxí quidé-xí ndècu-o ichi-gá vitna. <sup>46</sup> Te díhna-gá yiqui cuñú cuendá ñuyíú-a ní ngúndecu, te dàtnúni ngúndecu yiqui cuñú cundecu ndihi mee-nã Espíritú Yã Ndiõxí. <sup>47</sup> Te téé díhna nuu ñí xíndecu ñuyíú-a chí ñuhu ní cadúha ñaha Yã Ndiõxí xii-dé, te téé-á<sup>n</sup> cúú-dě ndíi Àdán, te íngá tucu téé ní cuu<sup>n</sup>-dé andiu te téé-á<sup>n</sup> cúú-dě Xítóhó Jesucristú. <sup>48</sup> Te nchaa ñáyiú càa yiqui cuñú-yu dàtná cáá yiqui cuñú téé Àdán téé duca<sup>n</sup> ñí cuáha ñuhu-á<sup>n</sup>, te nchaa ñáyiú ní nduu táhú cundecu ndihi téé duca<sup>n</sup> vëxi cuu<sup>n</sup> andiu-á<sup>n</sup>, ñáyiú-á<sup>n</sup> nduu yiqui cuñú-yu dàtná cáá yiqui cuñú ní nduu táhú-dě ndécú ndihí-dé vitna, te téé-á<sup>n</sup> cúú-dě Xítóhó Jesucristú. <sup>49</sup> Te nchaa ñáyiú ñuyíú-a càá-yu dàtná-ni càa datná-ni ndùu téé duca<sup>n</sup> ñí cuáha ñuhu-á<sup>n</sup>. Te nchaa nchoo ñáyiú ní nduu táhú

cundecu ndihi téé duca<sup>n</sup> vëxi cuu<sup>n</sup> andiu-á<sup>n</sup> nduu-o dàtná-ni càa datná-ni ndùu téé-á<sup>n</sup> tucu.

<sup>50</sup> Te nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sã ncháá nàcuáa càa yiqui cuñú ñáyiú xíndecu vitna vá sàá-xi cundecu-xi núú ndécú Yã Ndiõxí táxí tnùní-gá, chí ñuyíú-a ndihi nihnu-xi. Dico sá tàú-xi sáá núú ndécú-gã táxí tnùní-gá xìni ñuhu-xi cuu-xi sá cúdii cundecu. <sup>51</sup> Te na càchí tnúhu-í xii-ndo ñ<sup>n</sup> tnúhu sá yíyùhu ni cuu: Dava-o cùú-ó te dava-o cùndecu-ni-o, dico nchaa-o nãdáma yiqui cuñú-ó. <sup>52</sup> Te uu<sup>n</sup>ni duca<sup>n</sup> nãdáma yiqui cuñú-ó òré cáhá<sup>n</sup> ñ<sup>n</sup> cútú, te cútú-ã<sup>n</sup> cáhá<sup>n</sup>-xi òré sa ta cùyatni naa ñuyíú. Te òré cáhá<sup>n</sup> cútú-ã<sup>n</sup> te ndoto nchaa ñáyiú ní xihí ñáyiú ní xíndecu ichi Xítóhó Jesucristú, te duca<sup>n</sup> te vá ñ<sup>n</sup> ndùu ñ<sup>n</sup> quíú-gã cuú-yu. Te nchaa ñáyiú ndècu vívú te nãdáma yiqui cuñú-yu tnãhá-yu. <sup>53</sup> Te nchaa yiqui cuñú ndécú ndihi nchaa ñáyiú ndècu ñuyíú-a vitna ñà túú cùdíi-xi chí xihí-xi, dico yiqui cuñú nduu táhú nchoo ñáyiú ndècu ichi Xítóhó Jesucristú chí cudíi-xi ní caa ní quíhí<sup>n</sup> chí vá cùú-gá-xi. <sup>54</sup> Te òré ná ndùu táhú-ó yiqui cuñú sá dúcá<sup>n</sup> cùdíi ní caa ní quíhí<sup>n</sup>-á<sup>n</sup>, te vá cùndècu ndihí-gá-ó yiqui cuñú sá ñà túú cùdíi. Te dàvã-á<sup>n</sup> te quee ndáá-xi nàcuáa càhá<sup>n</sup>-xi núú tütú Yã Ndiõxí núú càchí-xi: “Vitna ñà túú-gã xihí ñáyiú chí mee-nã Yã Ndiõxí cùnù-gá táxí tnùní ñãhá-gã xii-yu. <sup>55</sup> Te ñà túú tnãhí-gá ná ndoho ñáyiú sá cuendá tnúhu xihí, chí vá cóó-gã tnúhu xihí”, duha càchí-xi núú tütú Yã Ndiõxí. <sup>56</sup> Te cue ñáyiú ndècu ndihí-yu tnúhu sá sánú ìchi ñaha xii-yu nàcuáa cadá-yu cundecú-yu dico uu<sup>n</sup>-gá quídè-yu nchaa sá cuèhé sá dúhá. Te sá cuendá nchaa sá cuèhé sá dúhá quídè-yu-á<sup>n</sup>, te xíã<sup>n</sup> ní ngúndecu tnúhu xihí dándòho ñaha-xi xii-yu. <sup>57</sup> Dico táxãhu xii Yã Ndiõxí chí ní taxi-gá tnúhu ndee iní ndécú ndihí-o sá sàá nduu te vá quíní-gá-ó tnúhu xihí, te duca<sup>n</sup> chí ndècu ndihí-o Xítóhó Jesucristú.

<sup>58</sup> Te xíã<sup>n</sup> núu càhá<sup>n</sup>-í dóho nchòhó cue ñáyiú ndècu ndihí-í ichi Xítóhó Jesucristú chí ío cùu iní ñãhá-í xii-ndo, te càhá<sup>n</sup>-í dóho-ndo sã cáncícú<sup>n</sup> nihnu-ni-ndo ìchi Xítóhó Jesucristú cuèi nãndi na càda



ñaha ñáyiú xii-ndo sã cuendá-gá, te ío nducu ndèe-ni-ndo cada-ndo chiu<sup>n</sup>-gá, chi sa nàha-ndo sá ncháá chiu<sup>n</sup> quide-o cuendá-gá ñá túú àú<sup>n</sup> nã cuu quide-o.

## 16

### *Nàcuáa sàcá<sup>n</sup> tnáhá ñáyiú díhú<sup>n</sup>*

<sup>1</sup> Te na càchí tnúhu-í xii-ndo cuendá díhú<sup>n</sup> sã sàcá<sup>n</sup> tnáhá-ndó sã cúú-xí ñáyiú ñuú Jerusálén, chi diu-ni duha ní dánèhé-í cue ñáyiú xĩndecu ichi Xítóhó Jesucristú ndécú ñ<sup>n</sup> ñ<sup>n</sup> xichi distritú Gálaciá. <sup>2</sup> Te duha cada-ndo ndí tnahá nduu ndumíngú, te ñ<sup>n</sup> ñ<sup>n</sup>-ndo dàquee díhú<sup>n</sup>-ndo sacú díhú<sup>n</sup> nàcuáa chĩndee ñaha Yá Ndiõxí xii-ndo ñihí-ndó cuendá òré quexio-í te sa cundecu túha díhú<sup>n</sup>-ã<sup>n</sup>. <sup>3</sup> Te òré quexio-í te mee-ndo cãxi-ndõ-yu núu ndèdacàa-yu sàni iní-ndó càda ndáá canehé díhú<sup>n</sup>-ã<sup>n</sup> quíhí<sup>n</sup> ndaha ñáyiú xĩndecu ichi Xítóhó Jesucristú ndécú ñuú Jerusálén. Te cadúha-í ñ<sup>n</sup> úú tutú canehé-yu quíhí<sup>n</sup> cuendá cutnùní iní ñáyiú ñuú Jerusálén nàcuáa ndùu chiu<sup>n</sup> cuáhá<sup>n</sup>-yu. <sup>4</sup> Te núu xìni ñuhu-xi sá quíhí<sup>n</sup>-í te candeca-í-yu quíhí<sup>n</sup>.

### *Té Pãblú sání iní-dé quíngoto-dé cue ñáyiú ndècu ichi Xítóhó Jesucristú*

<sup>5</sup> Te yúhú sání iní-í yáha-í ñ<sup>n</sup> úú ñuú cáá dìstritú Macèdoniá, te dàtnùní duca<sup>n</sup> te sáá-í núu ndécú-ndó. <sup>6</sup> Te òré quexio-í te cudana cundecu ndihí ñaha-í xii-ndo vài nduu, àdi cudana te cundecu ndihí ñaha-í xii-ndo ndèé yáha nchaá yóó quidé v̄xi<sup>n</sup>-xi. Te sátá dúcá<sup>n</sup> te cada ndee iní-ndó chĩndee ñaha-ndo xii-í òré nucúhu<sup>n</sup> ichi-í te núu ndèé ichi na quíhí<sup>n</sup>-í. <sup>7</sup> Te duha càhá<sup>n</sup>-í chi núu Yá Ndiõxí ná càchí-gá te cundecu ndihí ñaha tnàa-í xii-ndo òré quexio-í te ñá díú dícó-ni ichi yáha-í. <sup>8</sup> Te cundecu-ni-í ñuú Éfesú-a ndéé tnahá vico Pentecòstés. <sup>9</sup> Te duca<sup>n</sup> chi iha ío tédóho ñáyiú tnúhu Xítóhó Jesucristú sá càhá<sup>n</sup>-í núú-yu. Núu xíã<sup>n</sup> ío váha quèe cuendá cada-í chiu<sup>n</sup>-gá cuéi ío vài ñáyiú ñá túú tnáhá iní-yu sá càhá<sup>n</sup>-í tnúhu-gá.

<sup>10</sup> Te núu na quíxi coto ñaha té Timùteú xii-ndo, te ío váha cuu iní-ndó cãhá<sup>n</sup> ndihí-ndo-dé cuendá duca<sup>n</sup> ñá túú nã cani iní-dé cundecu ndihí ñaha-dé xii-ndo, chi tnáhá-dé cúú-dé tée quide chiu<sup>n</sup> Xítóhó

Jesucristú dàtná quidé-í. <sup>11</sup> Te cuíní-í sá ñ<sup>n</sup> ñ<sup>n</sup>-ndo vá cání cuèhé iní-ndó cuendá-dé, te chĩndee-ndo-dé nàcuáa cuu váha iní-dé òré quixi-dé quixi coto ñaha-dé xii-í, chi yúhú ndihí dava-gá ñáyiú ndècu ichi Xítóhó Jesucristú ndétú-ndí-dé quexio-dé.

<sup>12</sup> Te ío ní cãhá<sup>n</sup> ndàhú-í núú té Àpolós tée ndècu ndihí-o ichi Xítóhó Jesucristú cuendá quixi-dé ndihí dava-gá cue tée ndècu ndihí-o ichi-gá quixi coto ñaha-güedé xii-ndo dico ñá túú ní cuíní-dé quixi-dé vitna, dico quixi-dé ndéé cuèé-gá.

### *Tnúhu ndéé núú ñí ndihí-ná*

<sup>13</sup> Te ío quíxi iní-ndó cundecu-ndo ichi Xítóhó Jesucristú, te vá dáñá ndèé-ndó quíndáá iní-ndó-gã, te ío yí cunduu iní-ndó cundecu-ndo ichi-gá, te ío nducu ndèe-ndo canchicú<sup>n</sup> nihnu-ndo ichi-gá. <sup>14</sup> Te ío váha cuu iní tnáhá-ndó, te duca<sup>n</sup> ño váha cada tnàha-ndo te núu nándi cùu sá váha sàni iní-ndó càda-ndo.

<sup>15</sup> Te nchòhó ñáyiú ndècu ndihí-í ichi Xítóhó Jesucristú sa nàha-ndo sá dñhanuu cué ñáyiú cùu ndi mee té Èstéfanás ndécú dìstritú Acãyá ní sándáá iní-yu tnúhu Xítóhó Jesucristú. Te vitna ñá túú dàña ndeé-yu quidé-yu sá váha sá cúú-xí dàva-gá ñáyiú sándáá iní tnúhu-gá. <sup>16</sup> Te càhá<sup>n</sup> ndàhú-í núú-ndó sã quíndáá iní-ndó nchàa ñáyiú duca<sup>n</sup> xĩquide, ndihí nchaa dava-gá ñáyiú ío ndècu ndee quide chiu<sup>n</sup> ndihí-ndo cuendá Xítóhó Jesucristú. <sup>17</sup> Te ío cùdí iní-í sá ñí quexio té Èstéfanás, ndihí té Fortunatú, ndihí té Acàicú, chi cue téé-á<sup>n</sup> ñí quide-güedé núú-ndó ñí quide-güedé nchaá sá ñá túú ndàcu-ndo cada-ndo cuendá-í ní cùu. <sup>18</sup> Te ío tàxi-güedé tnúhu ndee iní xii-í, te diu-ni duca<sup>n</sup> tàxi-güedé tnúhu ndee iní xii nchòhó tucu, te núu xíã<sup>n</sup> xíní ñuhu-xi sá cànèhe-ndo sá yíñuhu núu nchàa cue téé duha xĩquide váha.

<sup>19</sup> Te nchaá ñáyiú xĩndecu ichi Xítóhó Jesucristú ndécú dìstritú Àsiá quide ndee iní ñáhã-yu xii-ndo, te ío cada ndee iní-ndó càchí té Àquilú ndihí ñadìhí-dé tá Priscilá, te duca<sup>n</sup> quide ndee iní ñáhã tucu nchaá ñáyiú tàcá dácua<sup>n</sup>ha tnúhu Yá Ndiõxí vehé-yu xii nchaá nchòhó ñáyiú ndècu ichi-gá. <sup>20</sup> Te cada ndee iní tucu-ndo càchí cue dava-gá ñáyiú ndècu ndihí-o ichi Xítóhó



Jesucrìstú. Te ni yùhu ni iní-ndó càda ndee iní tnáhá-ndó ì<sup>n</sup> ì<sup>n</sup>-ndo.

<sup>21</sup> Te vitna ndaha mee yùhú té Păblú téè-í tnúhu-a guìde ndee iní ñáhà-í xii-ndo.

<sup>22</sup> Te ñáyu ñá túú cùu váha iní-xi núú Xìtohó Jesucrìstú te na cuíta nihnú-yu. Te vitna nchaa-o chǐ ná càchí-ó sǎ Xìtohó Jesucrìstú quixi tucu-gá.

<sup>23</sup> Te xicá<sup>n</sup> táhù-í núú Xìtohó Jesucrìstú sá ná chìndee chitúu ñaha-gǎ xii-ndo. <sup>24</sup> Te ío cùu iní ñáhà-í xii-ndo nàcuáa ndècu-o ichi Xìtohó Jesucrìstú, te duca<sup>n</sup> na cùnduu, te ío chí cádá ndèe iní-nǎ vitna.

## TUTÚ CÚÚ ÛÚ NÍ CADÚHA TÉ PÄBLÚ QUIH<sup>n</sup> NDAHA ÑÁYIU ÑUÚ CÒRINTÚ

*Té Păblú cādúha-dé tutú quíh<sup>n</sup> ndaha ñáyiú xĩndecu ichi Xítohó Jesucristú ndécú ñúú Còrintú*

<sup>1</sup> Yúhú té Păblú cāhá<sup>n</sup>-í tnúhu Xítohó Jesucristú chi duca<sup>n</sup> ñí cachí Yă Ndiöxí cunduu. Te cādúha-í tutú-a ndihí té Timùteú té ndècu ndihí-o ichi-gá cuèndá daquixi-í ndaha nchòhó ñáyiú xĩndecu ichi Yă Ndiöxí ndécú ñúú Còrintú, te tutú-a cuu-xi tnàhá cuèndá nchaa ñáyiú cùu cuendá Yă Ndiöxí xĩndecu nchaa ñúú yĩndèhu distritú Acáyá. <sup>2</sup> Te xicá<sup>n</sup> táhù-í núú Tătá-ó Dütú Ndiöxí ndihí núú Xítohó Jesucristú sá ïo na chĩndee chitúu ñaha-gă xii-ndo, te ñu-ni ndi ndùú-gá ná càda te ïo váha cuu iní-ndó cùndecu-ndo.

*Té Păblú cāhá<sup>n</sup>-dé nchaa nàcuáa ndòho-dé*

<sup>3</sup> Te chí ná cāchí-ó sá ïo váha iní Dütú Ndiöxí Yaá cúú Tătá Xítohó Jesucristú, te ñu-ni Dütú Ndiöxí cúú-gă Yaá ïo cùndahú iní ñáhá xii-o, te ñu-ni-gá cúú-gă Yaá táxi tnúhu ndee iní. <sup>4</sup> Te cuèi nándi ndòho-o ndecu-o dico ñu-ni Dütú Ndiöxí táxi-gă tnúhu ndee iní xii-o, te duca<sup>n</sup> quide-gá cuèndá sá nchóo cuãñaha-o tnúhu ndee iní xii nchaa ñáyiú nándi ndòho ndecu, te ñu-ni nchaa tnúhu ndee iní táxi-gă xii-o ñu-ni nchaa tnúhu ndee iní-á<sup>n</sup> cuãñaha-o xii-yu. <sup>5</sup> Te Xítohó Jesucristú ïo ní ndòho-gá, te duca<sup>n</sup> nchòo tucu ïo ndòho-o, te duca<sup>n</sup> ïo vâi tnúhu ndee iní ñihí-ó ndècu ndihí-o chi ndècu-o ndihí Xítohó Jesucristú. <sup>6</sup> Te nchúhú nándi ndòho-ndí ndécú-ndí cuèndá sá nchòhó ñihí-ndó tnúhu ndee iní cundecu ndihí-ndo te naníhí tãhú-ndó. Te Yă Ndiöxí táxi-gă tnúhu ndee iní xii-ndí, te duca<sup>n</sup> quide-gá cuèndá sá nchòhó tnàhá-ndó ñihí-ndó tnúhu ndee iní-á<sup>n</sup> te naníhí tãhú-ndó, te duca<sup>n</sup> càda ndee cada cahnu iní-ndó ndòho-ndo datná ndóhó nchúhú. <sup>7</sup> Te nchúhú ïo váha sàni ndáá iní-ndí cuèndá-ndó chi ndòho-ndo datná ndóhó-ndí, te duca<sup>n</sup> tàxi Yă Ndiöxí tnúhu ndee iní xii-ndo dàtná táxi-gă xii-ndí.

<sup>8</sup> Te nchòhó ñáyiú ndècu ndihí-ndí ichi Xítohó Jesucristú cuiní-ndí cachí tnúhu-ndí xii-ndo nàcuáa ní yáha-ndí cútnàhá ní xĩndecu-ndí distritú Asíá chi dàvá-á<sup>n</sup> ïo ní ndòho-ndí, te luha-ná te vá cùndèe iní-ndí yáha-ndí nchaa tnúndòho-á<sup>n</sup> ní cùu chi ní xehndé iní-ndí sá vă cãcu-ndí. <sup>9</sup> Chi ní sani iní-ndí sá ndíyi-ná cuu-ndí ní cùu, te duca<sup>n</sup> ñí yáha-ndí cuèndá sá ïo-gá quĩndáá iní-ndí Yă Ndiöxí sá díú-gă taunihnu ñaha-gă xii-ndí, te ñá díú mèe-ndí taunihnu-ndí mée-ndí, te ñu-ni-gá cúú-gă Yaá dándòto cuèi ñáyiú sa ní xíhí. <sup>10</sup> Te ñu-ni-gá ní taunihnu ñaha-gă ñá túú ní sàhni ñaha ñáyiú xii-ndí, te ñu-ni-gá táunihnu ñaha-gá xii-ndí cuèi vitna, te cùtnuní ndáá iní-ndí sá díú-ní-gă taunihnu ñaha-gă xii-ndí núú cuahá<sup>n</sup> núú vëxi te vá cãhni ñàha ñáyiú. <sup>11</sup> Te nchòhó tnàhá-ndó chĩndee ñaha-ndo xii-ndí chi cāhá<sup>n</sup> ndihí-ndo Yă Ndiöxí cuèndá-ndí, te ïo vâi ñáyiú cāhá<sup>n</sup> ndihí ñàhá-yu xii-gá cuèndá-ndí, te duca<sup>n</sup> ïo vâi ñáyiú ndàcá<sup>n</sup> táhù-yu núú-gă cuèndá nchaa sá vâha quide ñaha-gá xii-ndí.

*Té Păblú cāhá<sup>n</sup>-dé ná cuèndá ñá túú ní náyaha-dé ñúú Còrintú*

<sup>12</sup> Te ïo váha cùu iní-ndí chi cùtnuní iní-ndí sá cúú-ndí cue té cùu ndáá dàtná cuiní Yă Ndiöxí cunduu ndècu-ndí ñuyúú-a, te ñu-ni duca<sup>n</sup> quide-ndí sá cúú-xi-ndó chi mee-gă cùndahú iní ñáhá-gă xii-ndí chĩndèe ñaha-gá, te ñá túú quide-ndí dàtná sání iní cue ñáyiú ñuyúú-a. <sup>13-14</sup> Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñà túú ùhú tecú tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuiní-ndí sá ïo-gá váha tecú tnùní-ndó cuèndá sá òré ná quixi tucu Xítohó Jesucristú, te dàvá-á<sup>n</sup> ïo cada ñinu ñaha-ndo xii-ndí dàtná cada ñinu ñaha-ndí xii-ndo. <sup>15</sup> Te cuèndá xíá<sup>n</sup> núu ní sani iní-í yáha cāhá<sup>n</sup>-í úú xito núú ndécú-ndó cuèndá ïo cudí iní-ndó. <sup>16</sup> Chi ní sani iní-í sá òré quíhí<sup>n</sup>-í distritú Macèdoniá te yáha cāhá<sup>n</sup>-í núú ndécú-ndó, te òré ndixi tucu-í te nayáha cāhá<sup>n</sup> tucu-í, te òré nayáha cāhá<sup>n</sup>-í

te taxi-ndo sã cúú ìchi-í cuendá quíhí<sup>n</sup>-í distrítú Jùdeá, duha ní sani iní-í ní cùu. **17** Te sã dúcá<sup>n</sup> ñà túú ní quíxi coto ñaha-í xii-ndo te cudana sàni iní-ndó sã yùhú ñá túú ní sãha váha-í cuendá nàcuáa ní sani iní-í cada-í, àdi cudana ñáyiú ndècu ìchi cuehé ìchi duha, chi cue ñáyiú-á<sup>n</sup> tnaa càchí-yu sã cúú càdá-yu ì<sup>n</sup> sã sání iní-yu cada-yu te tnaa càchí-yu sã ñáhá. **18** Dico Yá Ndiòxí Yáá ío váha quide ndáá nàha ndáá náhá càxi-gá sã nchùhú ñá túú dàma-ndí sã càhá<sup>n</sup>-ndí. **19** Te yùhú ndihí té Silvanú ndihí té Timùteú dánèhé ñáhá-ndí xii-ndo cuendá Xítohó Jesucristú Yáá cúú Dèhe Yá Ndiòxí, te Xítohó Jesucristú cúú-gã Yáá ñá túú dàma-gá tnúhu càhá<sup>n</sup>-gá, chi cùu-gá Yáá càhá<sup>n</sup> mee-ni tnúhu ndáá tnúhu cuíti. **20** Te diu-ni Xítohó Jesucristú cúú-gã Yáá quidé nchàa nacuáa ní cachí Yá Ndiòxí. Te sã cuendá sã dúcá<sup>n</sup> quide Xítohó Jesucristú xiá<sup>n</sup> càchí-ó sã ìo càhnu cuu Yá Ndiòxí. Te nchaa-o na càchí-ó sã díú-ní dùca<sup>n</sup> na cada-gá. **21** Te mee Yá Ndiòxí quidé-gã ndécú-ní-ó ìchi Xítohó Jesucristú. Te diu-ni mee-gã ní càhá<sup>n</sup> ñáhá-gã xii-o cuendá cunu cuechi-o nùú-gã. **22** Te Yá Ndiòxí ní quide-gá sã nchóo cùu-o ñáyiú cùu cuendá-gá, te ní taxi-gá Espiritú-gá ní ngúndecu ndihí-o cuendá cutnùní iní-ó sã ndáá cada ñaha-gã xii-o nàcuáa ní cachí-gá cada-gá.

**23** Te Yá Ndiòxí náhá-gã sã yùhú càhá<sup>n</sup> ndáá-í ná cuendá vátá quíxí-gã-í quíxi coto ñaha-í xii-ndo, te vátá quíxí-gã-í chi ñá túú cuíní-í dándihú-í iní-ndó. **24** Te nchùhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndiòxí, chi sa sàndáá váha iní-ndó-gã, chi nchùhú cuíní-ndí chindee tnúhu ñaha-ndí xii-ndo nàcuáa ío-gá cudí<sup>n</sup> iní-ndó cùndecu-ndo.

## 2

**1** Te ní sani ndáá iní-í sã vã quíxí ndíhí-ni-í quíxi coto ñaha-í xii-ndo cuendá sã vã dándihú-í iní-ndó. **2** Te nchòhó cúú-ndó ñáyiú tàxi tnúhu ndee ìní xii-í cudí<sup>n</sup> iní-í ndécú-í, te xiá<sup>n</sup> nùu ñá túú cuíní-í dándihú-í iní-ndó, chi núu duca<sup>n</sup> na càda-í te vã cùndècu váha-gá iní-ndó nàcuáa taxi-ndo tnúhu ndee ìní xii-í. **3** Te

xiá<sup>n</sup> nùu ní tendaha-í tutú véxi ndaha-ndo cuendá sã òré quíxi coto ñaha-í xii-ndo, te dàvá-á<sup>n</sup> quíní-í sã quidé-ndó nàcuáa cudí<sup>n</sup> iní-í te ñá díú dà dándihú-ndó ìní-í òré quexìo-í, chi nchòhó tàú-ndó càda-ndo sã yùhú cudí<sup>n</sup> iní-í. Te cùtnuní ndáá iní-í sã nùu yùhú cudí<sup>n</sup> iní-í te tnàhá nchòhó cudí<sup>n</sup> iní-ndó cuendá sã dúcá<sup>n</sup> cudí<sup>n</sup> iní-í. **4** Te ndàhyú-í sã ndihú iní-í òré ní cadúha-í tutú ní dáquíxí-í ndaha-ndo, chi ío cuehé sã sání iní-í, te ñá túú ní dàquíxí-í tutú-á<sup>n</sup> ndaha-ndo cuendá sã dándihú iní ñáhà-í xii-ndo, chi ní dáquíxí-í cuendá sã nchòhó cutnùní iní-ndó sã ìo cùu iní ñáhà-í xii-ndo.

*Nàcuáa tàú ñáyiú ñuú Còrintú cada-yu cuendá ì<sup>n</sup> ñáyiú ñá túú quide ndáá*

**5** Te na càchí tnúhu-í xii-ndo cuendá ì<sup>n</sup> téé ní quide ì<sup>n</sup> sã ñà túú tàú-dé cada-dé ndécú ndíhí-ndo, te ní quide ndàhú-xi luha iní-í cuendá sã ñí quide-dé-á<sup>n</sup> dico nchòhó tnàhá-ndó ñí dándihú-dé luha iní-ndó, te duha càchí-í sã lúhá-ní ñí dándihú-dé iní-ndó cuendá sã vã cuidó-gá-í ná tnúhu càhá<sup>n</sup>-í. **6** Te nàcuáa ní ndatnúhu-ndo ñí quide ndáá-ndó cuèchi téé-á<sup>n</sup> te sa ndói-gá cuu nàcuáa ní quide-ndo-dé. **7** Te vitna tàú-ndó càda cahnu iní-ndó sã ñí quide-dé, te cuáñaha-ndo tnúhu ndee ìní xii-dé chi núu ñáhá te vã ñihí ndéé-gã-dé cada-dé sã vãha cuendá sã ndihú iní-dé. **8** Te xiá<sup>n</sup> nùu càhá<sup>n</sup> ndàhú-í núú-ndó sã càdá tùcu-ndo sã cúú iní-ndó-dé. **9** Te diu-ni cuendá iha càhá<sup>n</sup>-í ì<sup>n</sup> núú tutú sã sã ní dáquíxí-í ndaha-ndo, te duca<sup>n</sup> ñí quide-í xító ndéè ñáhà-í xii-ndo nùu ndisa cuíní-ndó càda-ndo nchaa nacuáa càhá<sup>n</sup>-í. **10** Te ndèda-ni càa ñáyiú na càda cahnu iní-ndó ì<sup>n</sup> sã quidè-yu, te tnàhá yùhú cada càhnu iní-í sã quidè-yu tucu. Te núu ìó ì<sup>n</sup> sã xíní ñùhu-xi cada cahnu iní-í te quide cahnu iní-í, te mee Xítohó Jesucristú náhá-gã sã dúcá<sup>n</sup> quide-í, te duca<sup>n</sup> quide-í cuendá sã nchòhó cuu-xi sã vãha xii-ndo. **11** Te duca<sup>n</sup> te sàcuíhná vã ñihí-xi ná cada ñaha-xi xii-o, chi nchoo sã xíní-ó nàcuáa quide-xi.

*Té Pàblú ndihú iní-dé ndécú-dé ñuú Tròás*

**12** Te ní xica-í cuáhá<sup>n</sup>-í ñuú Tròás cuendá yàcá<sup>n</sup> càhá<sup>n</sup>-í tnúhu sã càhá<sup>n</sup> nàcuáa naníhí tàhú-ó tnúhu Xítohó Jesucristú, te òré ní quexìo-í te ní ñihí-í ì<sup>n</sup> ìchi càhnu càhá<sup>n</sup>-í

tnúhu-gá. <sup>13</sup> Dico ñá túú ní cùu váha iní-í chi ñá túú ní nànihi-í té Titú té ndècu ndihi-o ichi Xítóhó Jesucristú, núu xiá<sup>n</sup> ní quide ndee iní tnáhà-í ndihi cue ñá yiu ñúú-á<sup>n</sup>, te ní xica-í cuáhá<sup>n</sup>-í distritú Macèdoniá.

*Dàquetíhú-ó yùcu ñávãha chi ndècu ndihi-o Xítóhó Jesucristú*

<sup>14</sup> Te táxãhu xii Yá Ndiöxí chi duca<sup>n</sup>-ni sãnu ichi ñaha-gá xii-ndí nãcuáa cunuu-ndí núu yucu ñávãha chi ndècu ndihi-ndí Xítóhó Jesucristú, te mee Yá Ndiöxí sáchiu<sup>n</sup> ñaha-gá xii-ndí càhá<sup>n</sup>-ndí tnúhu-gá. Te cada iní-ó sã tnúhu-gá-á<sup>n</sup> cúu-xí dàtná ñ<sup>n</sup> yúcu sã ïo váha sãhá<sup>n</sup> te ta xiténuu dicó-xi ndëni ní cuu cuáhá<sup>n</sup>. Te duca<sup>n</sup> sãtnahá-xi cùu tnúhu-gá chi nchúhú quidé-ndí nãcuáa ta xiténuu ndëni ní cuu cuáhá<sup>n</sup>. <sup>15</sup> Te cùu-ndí dàtná dicó ñ<sup>n</sup> yúcu sã ïo váha sãhá<sup>n</sup>, te nãcãni cuendá Xítóhó Jesucristú núu Yá Ndiöxí, te dicó yúcu-ã<sup>n</sup> nchítã cuëi núu xĩndecu cue ñá yiu sa ní naníhí tàhú, te cuëi núu xĩndecu cue ñá yiu ta xíta nihnu cuáhá<sup>n</sup>. <sup>16</sup> Te sã cúu-xí cuè ñá yiu ta xíta nihnu cuáhá<sup>n</sup>-á<sup>n</sup>, dicó yúcu-ã<sup>n</sup> cúu-xí dàtná ñ<sup>n</sup> sã sãhni ñaha xii-yu, dico sã cúu-xí cuè ñá yiu sa ní naníhí tàhú, dicó yúcu-ã<sup>n</sup> cúu-xí dàtná ñ<sup>n</sup> sã ndécã ìní-yu, duca<sup>n</sup> sãtnahá-xi cùu nchúhú. Te vitna chí cuãha cuendá núu ná cúu ñá yiu sãni iní-ndó ndàcu cada nacuáa ndùu tnúhu càhá<sup>n</sup>-í-a. <sup>17</sup> Chi nchúhú càhá<sup>n</sup>-ndí tnúhu Yá Ndiöxí dico ñá túú ndãhú quidé-ndí ndihi tnúhu-gá dàtná xĩquide dava-gã-güedé, chi quide ndáá-ndí càhá<sup>n</sup>-ndí tnúhu-gá, te mee-gã ní cachí-gã sã dúcã<sup>n</sup> càda-ndí te ndèhe-gã sã nchúhú quidé-ndí nãcuáa ní cachí-gã, chi ndècu ndihi-ndí Xítóhó Jesucristú.

### 3

*Cuendá ingá núu sã vãha ní cachí Yá Ndiöxí cada-gã ñá yiu*

<sup>1</sup> Te cuëi duha càhá<sup>n</sup>-ndí núu-ndó dico ñá túú xini ñuhu-xi sã cũñaha-ndí xii-ndo sã cúu-ndí cue té quide váha, te ni ñã túú xini ñuhu-xi caçanehe-ndí ñ<sup>n</sup> tutú núu càhá<sup>n</sup>-xi sã cúu-ndí cue té váha danèhé ñãhá xii-ndo datná xĩquide dava-gã-güedé, te ni ñã túú xini ñuhu-xi sã nchòhó taxi-ndo ñ<sup>n</sup> tutú núu càhá<sup>n</sup>-ndó sã nchúhú cúu-ndí cue té quide váha. <sup>2</sup> Te ñã túú xini

ñuhu-xi duca<sup>n</sup> cada-ndí. Te cùtnuní ndáá iní-ndí sã nchòhó cúu-ndó dàtná ñ<sup>n</sup> tutú sã ïo váha càhá<sup>n</sup> cuendá-ndí. Te duca<sup>n</sup> sãtnahá-xi cùu-ndo chi nchaa ñá yiu nihí-yu tnúhu nãcuáa quide-ndo ndecu-ndo, te xiá<sup>n</sup> cùtnuní iní-yu sã nchúhú cúu-ndí cue té quide váha. <sup>3</sup> Te nchòhó cúu-ndó cuendá Xítóhó Jesucristú, te cùu-ndo datná tutú-gã te tutú-á<sup>n</sup> ñi táuchíu<sup>n</sup>-gã xii-ndí ní cadúha-ndí, te mee-ni ndihi Espiritú Yá Ndiöxí ní ngúndéé tnúhu-á<sup>n</sup> te ñã díú ndihi tindá ní ngúndéé. Te ñã díú ñ<sup>n</sup> núu yúu ní ngúndéé chi iní-ndó cùu-xi núu dúcã<sup>n</sup> ñi ngúndéé tnúhu-á<sup>n</sup> te duca<sup>n</sup> sãtnahá-xi cùu-ndo.

<sup>4</sup> Te duha càhá<sup>n</sup>-ndí chi cùtnuní ndáá iní-ndí sã Yá Ndiöxí quidé vãha ñaha-gã xii-ndí, chi ndècu ndihi-ndí Xítóhó Jesucristú. <sup>5</sup> Te nchúhú chi ndàcu-ndí quidé-ndí sã vãha dico ñã díú mèe-ndí duca<sup>n</sup> ndàcu-ndí quidé-ndí, chi mee Yá Ndiöxí chĩndèe ñaha-gã xii-ndí núu ndàcu-ndí quidé-ndí sã vãha. <sup>6</sup> Te mee Yá Ndiöxí ní quide-gã sã nchúhú ndacu-ndí cunu cuechi-ndí núu-gã càhá<sup>n</sup>-ndí núu ñá yiu cuendá ingã núu sã vãha ní cachí-gã cada ñaha-gã xii-yu. Te sã vãha ní cachí-gã cada ñaha-gã xii-yu-á<sup>n</sup> ñã túú ñ<sup>n</sup>-ni cuu-xi ndihi nchaa tnúhu sã ñi xãhá<sup>n</sup>-gã xii ndí Moisés ní chídó tnúni ndí, te duca<sup>n</sup> chi espíritú Yá Ndiöxí néhé chiú-xi nchaa tnúhu sã càhá<sup>n</sup> cuendá nchaa sã vãha-á<sup>n</sup>. Te nchaa tnúhu ní chídó tnúni ndí Moisés, dándixi túu-xi iní nchaa ñá yiu ndècu ndihi tnúhu-á<sup>n</sup> sã cuíta nihnú-yu cuendá nchaa cuëchi-yu, dico cue ñá yiu ndècu ndihi Espiritú Yá Ndiöxí ñá yiu-á<sup>n</sup> ndécú ndihi-yu tnúhu ndee ìní sã cãcu nihnú-yu.

<sup>7</sup> Te tnúhu sã ñi càhá<sup>n</sup> Yá Ndiöxí ndéé díhna nãcuáa cada ñá yiu ní ngúndéé-xi ñ<sup>n</sup> núu yúu quèhé<sup>n</sup>. Te òré ní dátüu ndí Moisés nãcuáa càhá<sup>n</sup> tnúhu sã ñi càhá<sup>n</sup> Yá Ndiöxí ndéé núu yúu-ã<sup>n</sup> núu cuè ñá yiu isràél, te súuní ñi tása<sup>n</sup> núu ndí te ñã túú-gã ní cùu cundehé-yu núu ndí, te duca<sup>n</sup>-gã duca<sup>n</sup>-gã quidé-xi dátãsa<sup>n</sup>-xi núu ndí ni cùu ñã túú-gã duca<sup>n</sup> ni quide-xi. Te tnúhu ndéé núu yúu-ã<sup>n</sup> dándixi túu-xi iní cue ñá yiu sã cuíta nihnú-yu sã cuendá nchaa cuëchi-yu,



te ío váha ní quide-xi cútnàhá ní ngúndecu ndíhi cue ñáyiú isràél tnúhu-á<sup>n</sup>. <sup>8</sup> Te sá dúcá<sup>n</sup> ñí quide-xi xíá<sup>n</sup> cútnùní sá tnúhu càhá<sup>n</sup> Espíritú Yá Ndiòxí vitna uu<sup>n</sup>-gá duca<sup>n</sup> ïo-gá váha quide-xi. <sup>9</sup> Te núu duca<sup>n</sup> ïo váha ní quide-xi cútnàhá ní ngúndecu ndíhi cue ñáyiú isràél tnúhu sá dándìxi túu iní-yu sá cuíta nihnú-yu sá cuèndá nchaa cuéchi-yu, te uu<sup>n</sup>-gá duca<sup>n</sup> vâha quide-xi vitna ní ngúndecu ndíhi-o tnúhu sá càhá<sup>n</sup> nâcuáa quide Yá Ndiòxí cuèndá sá vâ cúndècu-gá cuéchi ñáyiú núú-gă. <sup>10</sup> Te vá càchí-ó sã cúttnàhá ní ngúndecu ndíhi cue ñáyiú isràél tnúhu ndéé núú yũú-ã<sup>n</sup> ïo-gá váha ní quide-xi, te ñáhá chi uu<sup>n</sup>-gá váha quide-xi vitna cuèndá tnúhu sá càhá<sup>n</sup> nâcuáa quide Yá Ndiòxí. <sup>11</sup> Te núu duca<sup>n</sup> ïo váha ní quide-xi cútnàhá ní ngúndecu ndíhi ñáyiú isràél tnúhu sá ñà túú ní cùdíi, te uu<sup>n</sup>-gá duca<sup>n</sup> ïo váha quide-xi vitna ní ngúndecu ndíhi-o tnúhu sá vâ ndíhí nihnu tnahí-gá.

<sup>12</sup> Te cùtnuní iní-ndí sá vâ ndíhí nihnu sá dúcá<sup>n</sup> ïo váha quide-xi, núu xíã<sup>n</sup> ío víi ío váha cùu iní-ndí càhá<sup>n</sup>-ndí tnúhu sá ñí ngúndecu ndíhi-o. <sup>13</sup> Te ñá túú quide-ndí dàtná ní xóo cada ndíi Moisés, chi ndíi-á<sup>n</sup> ñí xóo dàdáhu ndíi núú ndíi òré dátãsa<sup>n</sup>-xi núú ndíi cuèndá sá vâ quíní cue ñáyiú isràél òré ñá túú-gă dátãsa<sup>n</sup>-xi núú ndíi. <sup>14</sup> Te cue ñáyiú isràél ñá túú ní tècú tnùní váha-yu nâcuáa ní xóo danèhé ñáhá ndíi Moisés xii-yu, te cuèi ndéé vitna ñá túú tècú tnùní-yu òré dâcuáhá-yu tnúhu sá ñí càhá<sup>n</sup> Yá Ndiòxí ndéé díhna nâcuáa cada-gá, te cada iní-ó sã dàtná sá ñí xidáhu núú ndíi Moisés yidáhu núú-yu cuèndá sá vâ cútnùní núú-yu cundèhé-yu te tecú tnùní-yu, dico núu tnahá tnúhu-yu ndíhi Xítohó Jesucristú te tecú tnùní-yu. <sup>15</sup> Te cuèi ndéé vitna òré dâcuáhá-yu nchaa tnúhu sá ñí chídó tnùní ndíi Moisés nchaa núú tùtú ndíi, te cada iní-ó sã dàtná sá ñí xidáhu núú ndíi yidáhu núú-yu chi ñá túú tècú tnùní-yu. <sup>16</sup> Dico cue ñáyiú na tûha ñaha xii Xítohó Jesucristú te tècú tnùní-yu tnúhu-gá. <sup>17</sup> Te Xítohó Jesucristú ñí-ní cùu-gá ndíhi Espíritú Yá Ndiòxí, te nchaa ñáyiú ndècu ndíhi Espíritú-gá ñá túú-gă táxí tnùní ñáhá ñí ñí sá ñà túú vâha xii-yu. <sup>18</sup> Te dàtná cúú ñí yutátá sã dánèhé núú ñáhá-xí xii ñáyiú ñí sá vâha, duca<sup>n</sup>

sãtnahá-xi cùu-o chi quide-o nacuáa càhá<sup>n</sup> ñáyiú sá ïo càhnu cuu Xítohó Jesucristú, te duca<sup>n</sup> ùu<sup>n</sup>-gá uu<sup>n</sup>-gá tá cùndáá-ó ndècu-o ichi-gá dàtná quidé mèe-gá quidé ndáá-gá. Te Espíritú-gá quidé-xí dùca<sup>n</sup> ta cundáá-ó núú-gă cuáhá<sup>n</sup>.

#### 4

<sup>1</sup> Te mee Yá Ndiòxí ní cundàhú iní ñáhá-gă xii-ndí ní taxi-gá chiú<sup>n</sup> quide-ndí càhá<sup>n</sup>-ndí tnúhu-gá, núu xíã<sup>n</sup> ñá túú tnàhí nàtúhú iní-ndí càhá<sup>n</sup>-ndí tnúhu-gá. <sup>2</sup> Te nchúhú dàquee tíhú-ndí nchaandi túhú sá ñà túú vâha quide dayuhu ñáyiú, chi nchaa xíã<sup>n</sup> cúú-xí ñí sácá<sup>n</sup>-núú sã cúú-xí-yu, te nchúhú ñá túú sàni iní-ndí dandàhú-ndí ñáyiú te ñí ñá túú sàni iní-ndí dama-ndí nâcuáa càhá<sup>n</sup> tnúhu Yá Ndiòxí, chi càhá<sup>n</sup> ndáá-ndí nâcuáa tàú-xi càhá<sup>n</sup>-ndí, te mee Yá Ndiòxí nâhá-gă nâcuáa ndùu tnúhu càhá<sup>n</sup>-ndí núú ñáyiú, te ñáyiú-á<sup>n</sup> cútnùní iní-yu sá nchúhú càhá<sup>n</sup> váha-ndí. <sup>3</sup> Te cue ñáyiú ñá túú tècú tnùní nâcuáa ndùu tnúhu sá càhá<sup>n</sup> nâcuáa naníhí tàhú-ó càhá<sup>n</sup>-ndí núú-yu, ñáyiú-á<sup>n</sup> cúú-yu ñáyiú ta xíta nihnu cuáhá<sup>n</sup>. <sup>4</sup> Te cue ñáyiú-á<sup>n</sup> cúú-yu ñáyiú ío sàá iní-xi chi ñá túú cuíní-yu quíndáá iní-yu tnúhu Xítohó Jesucristú, te xíã<sup>n</sup> núu sâcuíhna cùnùu-xi núú-yu te nihí-xi nâcuáa quide-xi dadáhu ndodo iní ñáhá-xí xii-yu cuèndá sá vâ tècú tnùní-yu tnúhu sá càhá<sup>n</sup> nâcuáa naníhí tàhú-yu, te tnúhu-á<sup>n</sup> cúú-xí tnúhu sá ïo váha chi càhá<sup>n</sup>-xi sá ïo càhnu cuu Xítohó Jesucristú, te cùu-gá dàtná mèe Tãtã-gă Dútú Ndiòxí. <sup>5</sup> Te nchúhú ñá túú càhá<sup>n</sup>-ndí cuèndá sá cúú-xí mèe-ndí núú-ndó chi càhá<sup>n</sup>-ndí cuèndá Xítohó Jesucristú, te càchí-ndí xii-ndo sã díú-gă cúú-gă Yaa ío cùnùu, te càchí-ndí xii-ndo sã mèe-ndí cúú-ndí dícó-ní cue téé xínu cuechi sá cúú-xí-ndó, te duca<sup>n</sup> quide-ndí nâcuáa cuu víi cuu váha iní Xítohó Jesucristú. <sup>6</sup> Te Yá Ndiòxí Yaa ní dáyehe ndéé cútnàhá nee ñuyú ní cùu, Yaa-á<sup>n</sup> ñí cachí-gá sá Xítohó Jesucristú cada-gá nâcuáa tecú tnùní-ó sã ïo càhnu cuu mee Yá Ndiòxí. Te sá dúcá<sup>n</sup> ñí quide-gá te cada iní-ó sã dàtná tnúhu sá ñí dáyehe-gá iní-ó.

*Ío quíndáá iní-ó Yá Ndiòxí*

<sup>7</sup> Te nchúhú ndécú ndìhi-ndí tnúhu Xítóhó Jesucristú, te tnúhu-gá cúú-xí dàtná ì<sup>n</sup> sá ïo váha ñùhu ì<sup>n</sup> xití quídi ñuhu, te nchúhú cúú-ndí dàtná quídi-á<sup>n</sup>. Te duca<sup>n</sup> sãtnahá-xi cùu-ndí chi tnúhu-gá ïo càhnu cuu-xi te mee-ndí ñáhá, te duca<sup>n</sup> cùu nacuáa cutnùní sá méé Yã Ndiõxí quidé-gã nchaa sá váha te ñá díú mèe-ndí. <sup>8</sup> Te cuèi ïo ndòho-ndí ndécú-ndí dico ñihí-ndí nàcuáa quide-ndí tá yãha-ndí nchaa tnúndòho-á<sup>n</sup> cuáhá<sup>n</sup>, cuèi áma sa ndètu vií-nã quehdé iní-ndí sá vã ndácú-ndí yãha-ndí nchaa tnúndòho-á<sup>n</sup>, dico ndàcu-ndí yãha-ndí. <sup>9</sup> Te cuèi nànducu ñaha ñáyiu cuìní-yu ná cada ñàhá-yu xii-ndí dico ñá túú dàña ñaha Yã Ndiõxí xii-ndí, te cuèi cànihá-yu xii-ndí dico cãcu-ndí ñá túú sàhni ñahá-yu. <sup>10</sup> Te ndèni ní cuu cuáhá<sup>n</sup>-ndí xicá cùu-ndí, te cãcu cãcu cahni ñàhá-yu xii-ndí dàtná ní quidé-yu Xítóhó Jesucristú, te duca<sup>n</sup> yãha-ndí cuèndá cutnùní sá ndécú tũu Xítóhó Jesucristú andiu te chindee ñaha-gá xii-ndí. <sup>11</sup> Te nchúhú ñini ndècu-ndí ñuyíú-a te nchaa-ni nduu cãcu cãcu cahni ñaha ñáyiu xii-ndí sá cuèndá Xítóhó Jesucristú, te duca<sup>n</sup> yãha-ndí ndécú-ndí cuèndá cutnùní sá Xítóhó Jesucristú ndécú ndìhi ñaha-gá xii-ndí cuèi vá cúdii yiqui cùñú-ndí cundecu-xi. <sup>12</sup> Te sá dúcá<sup>n</sup> cãcu cãcu cahni ñaha ñáyiu xii-ndí xiã<sup>n</sup> nchòhó uu<sup>n</sup>-gá tá ñihí ndéé-ndó cuáhá<sup>n</sup> ndécú-ndó ìchi Xítóhó Jesucristú.

<sup>13</sup> Te ì<sup>n</sup> tée ní xíndecu ndéé sanaha ñí chídó tnùní-dé núú tütú Yã Ndiõxí núú càchí-xi: “Yúhú ní sãndáá iní-í Yã Ndiõxí núú xiã<sup>n</sup> ní cáhá<sup>n</sup>-í”, duha ní cachí tée-á<sup>n</sup>. Te dàtná-ni ní sani iní tée-á<sup>n</sup> ñi cáhá<sup>n</sup>-dé te ñu-ni duca<sup>n</sup> sãni iní nchúhú tucu núú xiã<sup>n</sup> càchí-ndí: “Sãndáá iní-ndí Yã Ndiõxí núú xiã<sup>n</sup> cáhá<sup>n</sup>-ndí”, duha càchí-ndí. <sup>14</sup> Te cùtnuní iní-ndí sá núu na cùú-ndí te Yã Ndiõxí dandòto ñaha-gá xii-ndí dàtná ní dándótó-gã Xítóhó Jesucristú, te tnàhá nchòhó duca<sup>n</sup> càda ñaha-gá xii-ndo, te dàvá-á<sup>n</sup> candeca ñaha-gã xii-o quíhí<sup>n</sup> nucúndecu-o núú-gã. <sup>15</sup> Te nchúhú nãndi cùu sá tá yãha-ndí véxi cuèndá nchòhó ngúndecu váha-ndo, te duca<sup>n</sup> cuíta cáyá-gã ñáyiu ngúndecu váha sá xíí Yã Ndiõxí, te

diu-ni duca<sup>n</sup> cuíta cuu vai-gã ñáyiu ndacá<sup>n</sup> táhũ-yu núú-gã te cachí-yu sá ïo càhnu cuu-gã.

<sup>16</sup> Te xiã<sup>n</sup> núu nchúhú ñá túú tnàhí nàtúhú iní-ndí ndécú-ndí ìchi Xítóhó Jesucristú, te cuèi yiqui cùñú-ndí tá xàú-xi cuáhá<sup>n</sup> dico iní-ndí chi uu<sup>n</sup>-gá uu<sup>n</sup>-gá tá ñihí ndéé-xi cuáhá<sup>n</sup>. <sup>17</sup> Te nchaa sá ndòhó-ndí ñuyíú-a ñá túú càchí-ndí sá cúú-xí ì<sup>n</sup> tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nãndi ndòho-ndí ndécú-ndí ñuyíú-a te Yã Ndiõxí ïo váha cada ñaha-gã xii-ndí nduu na sàá-ndí núú ndécú-gã, te ñu-ni duca<sup>n</sup> càda ñaha-gã xii-ndí ñi caa ñi quíhí<sup>n</sup>. <sup>18</sup> Te nchúhú ñá túú nchícú<sup>n</sup> ñihnu-ndí sá tũu ndèhe-ndí ïo ñuyíú-a, chi nchícú<sup>n</sup> ñihnu-ndí sá vãtá quìní-gá-ndí ndécú àndiu, te duca<sup>n</sup> quide-ndí chi nchaa sá tũu ndèhe-ndí ïo ñuyíú-a vá cúdii-xi cundecu-xi, te nchaa sá ñà túú tũu ndècu andiu xiã<sup>n</sup> cudíi-xi cundecu-xi ñi caa ñi quíhí<sup>n</sup>.

## 5

<sup>1</sup> Te yiqui cùñú-ó cùu-xi datná ì<sup>n</sup> vehe, te vehe-á<sup>n</sup> ñà túú cudíi-xi, te duca<sup>n</sup> sãtnahá-xi cùu yiqui cuñú-ó chi vá cúdii-xi, te na sàá nduu vã cùndecu-gá-ó ndìhi yiqui cuñú-ó, te Yã Ndiõxí taxi-gã ì<sup>n</sup> yiqui cuñú sáá sá cúú-xí-ó, te xiã<sup>n</sup> cúú-xí dàtná ì<sup>n</sup> vehe sá ñà túú ní càdúha cue ñáyiu ñuyíú-a, chi mee Yã Ndiõxí ní cadúha-gã vehe-á<sup>n</sup> te vehe-á<sup>n</sup> cudíi-xi cundecu-xi ñi caa ñi quíhí<sup>n</sup> andiu. Te duca<sup>n</sup> sãtnahá-xi cùu yiqui cuñú sá táxi Yã Ndiõxí xii-o chi cudíi-xi cundecu-xi ñi caa ñi quíhí<sup>n</sup>. <sup>2</sup> Te nchúhú ndècu ndìhi-gá-ndí yiqui cùñú-ndí sá ndécú ndìhi-ndí vitna te sama cuìní-ndí sá ïo ndìhi taxi Yã Ndiõxí yiqui cuñú sáá cundecu ndìhi-ndí. <sup>3</sup> Chi mee-gã vá dáña-gã sá dúcá<sup>n</sup>-ní cùnduu-ndí cundecu-ndí, chi dai taxi-gã yiqui cùñú sáá-ã<sup>n</sup> xii-ndí. <sup>4</sup> Te ñini ndècu-ndí ndìhi yiqui cùñú-ndí vitna ïo sàni iní-ndí te ndìhú iní-ndí, dico ñá díú sã dúhá quide-ndí te ñá túú-gã tnàhá iní-ndí cundecu-ndí ndìhi yiqui cùñú-ndí, chi cuìní-ndí sá Yã Ndiõxí ïo ndìhi taxi-gã yiqui cùñú sáá nduu táhú-ndí, chi xiã<sup>n</sup> cudíi-xi ñi caa

ni quíhí<sup>n</sup> te yiqui cùñú-ndí sá tá ndìhi ni-hnu cuáhá<sup>n</sup>-a vá cúdì-xi cundecu-xi. <sup>5</sup> Te duca<sup>n</sup> tnàhí ní cachí Yá Ndiöxí cunduu sá dúcá<sup>n</sup> ndùu táhú-ó yiqui cuñú sáá-ã<sup>n</sup>, te ní taxi-gá Espiritú-gá ní ngúndecu ndìhi-o cuèndá cutnùnì iní-ó sã ndáá taxi-gá yiqui cùñú sáá-ã<sup>n</sup> nduu táhú-ó.

<sup>6</sup> Te xiã<sup>n</sup> nũu nchúhú nihí ndéé-ndí ndécú-ndí, te cùtnunì iní-ndí sá nìni ndecu-ndí ndìhi yiqui cùñú-ndí sá ndécú ndìhi-ndí vitna te vátá sáá-gá-ndí cundecu-ndí mei nũú ndécú Xítohó Jesucristú. <sup>7</sup> Te duca<sup>n</sup> cùtnunì iní-ndí chi sàndáá iní-ndí Yá Ndiöxí ndécú-ndí ñuyíú-a cuèi ñá túú xìnì-ndí-gá. <sup>8</sup> Te ío váha cùu iní-ndí ndécú-ndí, te sàni iní-ndí sá vãha-gá sá nũu vá cùndècu-gá-ndí ndìhi yiqui cùñú-ndí sá ndécú ndìhi-ndí vitna. Te duca<sup>n</sup> sàni iní-ndí chi váha-gá cundecu-ndí mei nũú ndécú Xítohó Jesucristú. <sup>9</sup> Te ío ndùcu ndee-ndí quidé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíú-a, te diu-ni duca<sup>n</sup> càda-ndí cuèi òré vá cùndècu-gá-ndí. <sup>10</sup> Te dacuítí sã ncháá-ó cùndecu-o núú Xítohó Jesucristú ì<sup>n</sup> nduu, te dàvá-á<sup>n</sup> mee-gã cáhá<sup>n</sup>-gá te núu nása ndùu chiu<sup>n</sup> ní quide-o ì<sup>n</sup> ì<sup>n</sup>-o, núu ní quide váha-o àdi ñá túú ní quide váha-o, te nàcuáa ndùu chiu<sup>n</sup> ní quide-o ì<sup>n</sup> ì<sup>n</sup>-o te duca<sup>n</sup> ndùu sá táxi-gã nduu táhú-ó.

### *Nàcuáa ní cuu ní ngúndecu váha-o ndìhi Yá Ndiöxí*

<sup>11</sup> Te nchúhú quíyùhú iní-ndí nàcuáa cada Xítohó Jesucristú, núu xiã<sup>n</sup> càhá<sup>n</sup>-ndí tnúhu-gá núú ñáyiú cuèndá xínu iní-yu tuha ñàhá-yu xii-gá. Te mee Yá Ndiöxí sa nàha-gá nàcuáa quide-ndí ndécú-ndí, te sàni iní-ndí sá nchòhó cutnùnì iní-ndó nàcuáa quide-ndí ndécú-ndí. <sup>12</sup> Te sá dúhá càhá<sup>n</sup>-ndí te vá cánì iní-ndó sã nchúhú càhá<sup>n</sup> váha-ndí cuèndá-ndí nàcuáa nchòhó cuu váha iní ñàhá-gã-ndó xii-ndí te ñàhá, chi duha càhá<sup>n</sup>-ndí cuèndá sá nchòhó níhí-ndó tnúhu cáhá<sup>n</sup> váha-gã-ndó cuèndá-ndí núú ñáyiú. Te duca<sup>n</sup> nihí-ndó tnúhu cùñaha-ndo xii cue ñáyiú quide nínu mee-xi, chi cue ñáyiú-á<sup>n</sup> ñà túú quide

cuendá-yu nása ndècu iní-yu. <sup>13</sup> Te núu nchòhó sání iní-ndó sã lùcú-ndí cuèndá nàcuáa quide-ndí ndécú-ndí te cùu-xi cuendá Yá Ndiöxí, àdi núu sàni iní-ndó sã ñà túú lùcú-ndí cuèndá nàcuáa quide-ndí ndécú-ndí te cùu-xi sá vãha sá cúu-xí-ndó. <sup>14</sup> Te quide-ndí nàcuáa cuìní Xítohó Jesucristú chi cùtnunì iní-ndí sá ìo cùu iní-gá nchaa ñáyiú, te duca<sup>n</sup> xìnì ndáá-ndí sá ní xíhí-gá cuèndá ncháá-yu, te xiã<sup>n</sup> nũu cada iní-ó sã dàtná tnúhu sá ncháá ñáyiú ní xíhí-yu ndìhi-gá. <sup>15</sup> Te duca<sup>n</sup> ní xíhí Xítohó Jesucristú cuèndá nchaa ñáyiú chi cuìní-gá sá ncháá-yu cundécú-yu cadá-yu nàcuáa cuìní mée-gã te vá cadã-yu nàcuáa cuìní mée-yu, chi mee-gã ní xíhí-gá te ní ndoto-gá cuèndá cuu-xi sá vãha sá cúu-xí-yu. <sup>16</sup> Te xiã<sup>n</sup> nũu nchúhú ñá túú-gã ná sání iní-ndí cuèndá tnàha ñáyiú-ndí nũu nàndíhi-yu àdi ñá túú nàndíhi-yu dàtná ní xóo canì iní-ndí cùtnàhá ní xíndecu-ndí ichi cuèhé ichi duha, te dàvá-á<sup>n</sup> ní xóo canì iní-ndí cuèndá Xítohó Jesucristú dàtná sání iní cue ñáyiú ndècu ichi cuehé ichi duha vitna. <sup>17</sup> Te nchaa nchoo ñáyiú ní tnàhá tnúhu ndìhi Xítohó Jesucristú ní nduu-o dàtná ì<sup>n</sup> ñáyiú saa, te duca<sup>n</sup> chi ñá túú-gã quidé-ó dàtná ní xóo cada-o cùtnàhá ní xíndecu-o ìchi cuehé ichi duha, chi ní ngúita-o quide-o mee-ná sá vãha te nchaa xiã<sup>n</sup> cúu-xí sã sáá sã cúu-xí-ó chi vátá quìní-gá-ó càda-o.

<sup>18</sup> Te duca<sup>n</sup> quide-o ndecu-o chi mee Yá Ndiöxí quidé-gã sá dúcá<sup>n</sup> càda-o cundecu-o. Te Xítohó Jesucristú ní quide-gá ní ngúndecu váha-o ndìhi Yá Ndiöxí vitna, te duca<sup>n</sup> chi mee Yá Ndiöxí duca<sup>n</sup> tnàhí ní cachí-gá cunduu, te diu-ni mee Yá Ndiöxí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá nàcuáa ngúndecu váha cue ñáyiú ndìhi-gá. <sup>19</sup> Te duca<sup>n</sup> chi mee-gã ní cachí-gá sá Xítohó Jesucristú cada-gá nàcuáa nucúndecu váha nchaa nchoo cuè ñáyiú ndècu ñuyíú-a ndìhi Yá Ndiöxí. Te nchaa ñáyiú ní tuha ñaha xii-gá ñá túú-gã sání iní-gá sá ñáyiú-á<sup>n</sup> nacháhu-yu cuèchi-yu núú-gã. Te mee Yá Ndiöxí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá núú ñáyiú nàcuáa ngúndecu ndìhi ñaha váha-yu xii-gá. <sup>20</sup> Te Xítohó Jesucristú



ní cachí-gá sá nchùhú cáhá<sup>n</sup>-ndí tnúhu-gá núú ncháa ñáyiú, te sá dúhá quide-ndí cáhá<sup>n</sup>-ndí tnúhu-gá te quide-ndí núú Yá Ndiöxí cáhá<sup>n</sup>-ndí yuhu-gá, te xíá<sup>n</sup> nùu cáhá<sup>n</sup> ndàhú-ndí núú-ndó sã tnàhá tnúhu-ndo ndìhi Yá Ndiöxí cuèndá cundecu váha-ndo ndìhi-gá, te duha cáhá<sup>n</sup>-ndí chi duca<sup>n</sup> càchí Xítóhó Jesucristú cada-ndí. <sup>21</sup> Te Xítóhó Jesucristú cúú-gã Yaá ñá túú tnàhí cuéchi-xi, dico Yá Ndiöxí ní quide ñaha-gã xii-gá dàtná ì<sup>n</sup> ñáyiú ndècu cuéchi-xi, te duca<sup>n</sup> chi Xítóhó Jesucristú ní xido-gá cuéchi nchaa nchoo ñáyiú ñuyíú-a, te duca<sup>n</sup> ñí xido Xítóhó Jesucristú nchaa cuéchi-o cuèndá sá nùu na tnàhá tnúhu-o ndìhi-gá te cudìu-o núú Yá Ndiöxí, te duca<sup>n</sup> ñí cuu chi mee Yá Ndiöxí duca<sup>n</sup> ñí cachí-gá cunduu.

## 6

<sup>1</sup> Te nchoo ì<sup>n</sup>-ni cùu-o quide chiu<sup>n</sup>-o cuendá Yá Ndiöxí nùu xíá<sup>n</sup> cáhá<sup>n</sup> ndàhú-ndí núú-ndó sã vã dìcò-ni duca<sup>n</sup> cùndedóho-ndo tnúhu Yá Ndiöxí, chi cada-ndo nàcuáa na chindee ñaha-ni-gá. <sup>2</sup> Chi mee-gã càchí-gá ì<sup>n</sup> xichi núú tùtú-gá núú càchí-xi:

Sáá nduu te cundàhú iní ñáhà-í xii-ndo chindee ñaha-í cuèndá naníhí tãhú-ndó,

te ní sáá nduu tàú-xi sá cùndàhú iní ñáhà-í xii-ndo chindee ñaha-í cuèndá naníhí tãhú-ndó, núu xíá<sup>n</sup> ní xíndedóho-í tnúhu ní cáhá<sup>n</sup>-ndó te ní chindee ñaha-í xii-ndo nàcuáa naníhí tãhú-ndó.

Duha càchí-gá núú tùtú-gá. Te vitna cùu-xi nduu cundàhú iní ñáhá Yá Ndiöxí chindee ñaha-gá, te cùu-xi nduu naníhí tãhú-ó.

<sup>3</sup> Te nchúhú ñá túú quide-ndí ì<sup>n</sup> sá ñà túú tàú-ndí cada-ndí sá cúú-xí ñáyiú, chi cuíní-ndí sá vã cáhá<sup>n</sup> cuèhé-yu cuèndá chiú<sup>n</sup> quide-ndí. <sup>4</sup> Te nchaa sá quidé-ndí cúú-xí nàcuáa cutnùní iní cue ñáyiú sá nchùhú xínú cuèchi-ndí núú Yá Ndiöxí, te ío quide cahnu iní-ndí cuèndá nchaa sá ndóhó-ndí, chi nándi quide ñaha ñáyiú xii-ndí, te duca<sup>n</sup>-ni ta quide cahnu iní-ndí cuèi nándi-gá nchaa sá tá yãha-ndí véxi. <sup>5</sup> Te duha ta yãha-ndí véxi, núú cániha ñáyiú xii-ndí, núú chíhí ñáhá-yu vecaá,

núú cuáá ndeé ñáhá ñáyiú xii-ndí xícuèhé ñáhá-yu, te ío ndòho-ndí quidé-ndí chiú<sup>n</sup> Yá Ndiöxí, te áma xídí-ndí te áma ñá túú xídí-ndí, te áma ñíhí-ndí sá xéxi-ndí te áma ñá túú ñíhí-ndí. <sup>6</sup> Te quide ndáá-ndí ndécú-ndí, te cutnùní váha iní-ndí nàcuáa cáhá<sup>n</sup> tnúhu Yá Ndiöxí, te quide cahnu iní-ndí cuèi nándi quide ñaha ñáyiú xii-ndí, te cùndahú iní-ndí tnàha ñáyiú-ndí, te quide-ndí nchaa sá váha nàcuáa chindee ñaha Espíritú Yá Ndiöxí xii-ndí, te ío ndisa iní-ndí cúú iní-ndí cue tnàha ñáyiú-ndí. <sup>7</sup> Te dànehé-ndí ñáyiú mee-ni tnúhu ndáá, te nchaa chiú<sup>n</sup> quide-ndí te quide-ndí nàcuáa chindee ñaha Yá Ndiöxí xii-ndí, te cuèndá sá quidé ndáá-ndí ndécú-ndí nùu xíá<sup>n</sup> ñíhí ndéé-ndí dáquèe tíhú-ndí nchaa sá cuèhé sá dúhá. <sup>8</sup> Te dava ñáyiú quide nínu ñáhá-yu xii-ndí, te davá-yu tnúhu cuèhé tnúhu duha cáhá<sup>n</sup>-yu xãhã<sup>n</sup>-yu xii-ndí, te davá-yu xícahá<sup>n</sup> váha-yu cuèndá-ndí te davá-yu xícahá<sup>n</sup> cuèhé-yu, te davá-yu càchí-yu sá dándàhú-ndí ñáyiú dico ñá ndáá chi cáhá<sup>n</sup> ndáá-ndí. <sup>9</sup> Te davá-yu càchí-yu sá ñà túú xíní-yu ná ñáyiú cùu-ndí, te davá-yu càchí-yu sá xíní-yu yoo cùu-ndí, te davá-yu cuíní-yu cahni ñáhá-yu xii-ndí dico vátá cáhí ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiöxí, te cuèi ndòho-ndí dico ñá túú cùu-xi sá cùú-ndí. <sup>10</sup> Te cuèi ndíhú iní-ndí dico ñá túú dàña ndeé-ndí sá cúdí iní-ndí, te cùu-ndí cue téé ndàhú dico sànu ichi-ndí vai ñáyiú ichi Yá Ndiöxí cuèndá ngúndecu váha-yu sá cuèndá-gá, te cuèi ñá túú ñà ndécú ndìhi-ndí dico ñá túú ñà cúmãní xii-ndí.

<sup>11</sup> Te nchòhó ñáyiú ndècu ndìhi-í ichi Xítóhó Jesucristú ndécú ñúú Còrintú ío cùu iní ñáhá-ndí xii-ndo, te ñi yùhu ñi iní-ndí cáhá<sup>n</sup>-ndí nchaa tnúhu cáhá<sup>n</sup>-ndí sá cúú-xí-ndó. <sup>12</sup> Te nchúhú chi ñi yùhu ñi iní-ndí cúú iní ñáhá-ndí xii-ndo, dico nchòhó chi ñá túú dùca<sup>n</sup> quide-ndo sá cúú-xí-ndí. <sup>13</sup> Te yúhú cáhá<sup>n</sup> ndàhú-í núú-ndó dàtná quidé ì<sup>n</sup> téé cùu tátá òré cáhá<sup>n</sup> ndìhi-dé cue déhe-dé sá ñi yuhu



ni iní-ndó cùu iní ñáhá-ndó xii-ndí dàtná quidé mèe-ndí cùú iní ñáhá-ndí xii-ndo.

*Nchoo cùu-o datná ìñ vehe Yá Ndiöxí*

14 Te cue ñáyiú ñá túú sàndáá iní tnúhu Xítohó Jesucrístú, te vá cùú ìñ nuu-ndo ndihí-yu cada-ndo dàtná xíquidé-yu, chi ìñ cuu nchaa sá vǎha te ìñ cuu nchaa sá cuèhé sá dúhá, te ñúmí nchícanchii ndihí niú chi ñá túú ìñ-ni cuu-xi. Te duca<sup>n</sup> sǎtnahá-xi cùu nchaa sá vǎha ndihí nchaa sá cuèhé sá dúhá chi ñá túú ìñ-ni cuu-xi. 15 Te ðiu-ni duca<sup>n</sup> ñà túú ìñ-ni cuu Xítohó Jesucrístú ndihí sácuíhná, te ðiu-ni duca<sup>n</sup> ñá túú ìñ-ni cuu ñáyiú sàndáá iní ñáhá xii Xítohó Jesucrístú ndihí ñáyiú ñá túú sàndáá iní ñáhá xii-gá. 16 Te ðiu-ni duca<sup>n</sup> sǎtnahá tucu-xi cùu vehe Yá Ndiöxí ndihí nchaa sá cǎchí ñáyiú cùu ndiöxí ní cadúha cue tée ñuyíú-a, chi vá cùú quíhi ni ìñ xǎn xití vehe-gá. Te nchoo cùu-o datná vehe Yá Ndiöxí Yáá ndécú túu andiu, chi mee-gǎ cǎchí-gǎ núú tütú-gǎ núú cǎchí-xi:

Yúhú vá cúmǎní cundecu-í ndihí-yu ndëni ní cuu na cùndecú-yu,

te ðiu-ni yúhú cuu-í Ndiöxí-yu,

te mèe-yu cuú-yu ñáyiú cùu cuendá-í.

Duha cǎchí-gǎ núú tütú-gǎ. 17 Te xǎn nùu cǎchí tucu-gǎ ingá xichi núú tütú-gǎ núú cǎchí-xi:

Chí tá quèe tnuú nchaa ñáyiú ñá túú sàndáá iní ñáhá xii-í,

te vá cǎní iní-ndó càda-ndo ni ìñ sá cuèhé sá dúhá,

te duca<sup>n</sup> te quehe<sup>n</sup> cuendá ñáhà-í xii-ndo,

18 te yúhú cuu-í Tǎtá-ndó,

te nchòhó cuu-ndo cuè déhe ducu<sup>n</sup>-í, ndihí cue déhe yoco-í,

duha cǎhá<sup>n</sup> yúhú Yáá ío cǎhnu cuu.

Duha cǎchí-gǎ núú tütú-gǎ.

## 7

1 Te sá dúcá<sup>n</sup> ío váha cǎhá<sup>n</sup> Yǎ Ndiöxí sá cùú-xi-ó nùu xǎn cǎhá<sup>n</sup>-í dóho nchòhó ñáyiú ío cùu iní-í sá ðuu<sup>n</sup> duu<sup>n</sup> daña-o nchaa sá cuèhé sá dúhá, chi nchaa xǎn ñá túú cùu-xi sá vǎha sá cùú-xi iní-ó ndihí yiqui cuñú-ó, te cada-o nǎcuáa tàú-xi cunduu nǎcuáa cundáá-ó nùú Yǎ Ndiöxí, te cada-o sǎ néhé-ó sǎ yíñùhu núú-gǎ.

*Cue ñáyiú ñuú Còrintú quidé vǎha-yu*

2 Te ni yúhu ni iní-ndó chì cùú iní ñáhá xii-ndí, chi nchúhú vá yóo ìñ quíde úhú iní-ndí, te ni vǎ yóo ìñ dàcuíta nihnu-ndí, te ni vǎ yóo ìñ dǎndahú-ndí. 3 Te sá dúhá cǎhá<sup>n</sup>-í te vá cǎní iní-ndó sǎ ìñ cuéchi dàcaa-í díquí-ndó, chi dàtná sa ní cachí-í xii-ndo sǎ yúhú ío cùu iní ñáhà-í xii-ndo, te cuéi vitna ndècu-gǎ-ó ñuyíú-a àdi cuéi na cùú-ó dico ðiu-ni duca<sup>n</sup> cùu iní ñáhà-í xii-ndo. 4 Te yúhú ío váha sǎni iní-í cuendá-ndó, te duca<sup>n</sup> ío váha cǎhá<sup>n</sup>-í cuendá-ndó, te ío ndècu ndihí-í tnúhu ndee iní cuendá-ndó, te ío cùdí iní-í sá cuendá-ndó cuéi nǎndí ndòho-í ndihí dava-gǎ-güedé ndécú-ndí.

5 Te nchúhú cùtnahá ní sáhá<sup>n</sup>-ndí distrítú Macèdoniá, te ñá túú tnàhí ni ndetátú-ndí cuendá nchaa sá ñí yáhandí chi ío ní ndòho-ndí cuendá nchaa sá ñí quidé-yu, chi ío ní cuándeé ñáhǎ-yu xii-ndí, te ío ní sani iní-ndí nùu nása-gǎ yáha-ndí ní cùu. 6 Dico Yá Ndiöxí ní taxi-gǎ tnúhu ndee iní xii-ndí òré ní quexìo té Títú núú ndécú-ndí, te ðiu-ni Yáá-án cùú-gǎ Yáá sǎñaha-gǎ tnúhu ndee iní xii cue ñáyiú ndihú iní-xi. 7 Te duca<sup>n</sup> ñí taxi Yá Ndiöxí tnúhu ndee iní xii-ndí cuendá sá ñí quexìo té Títú núú ndécú-ndí, te ñá díú-ní sǎ cuendá ní quexìo-dé chi ní níhí tucu-ndí tnúhu ndee iní cuendá ní caní-dé cuendú núú-ndí sá nchòhó ní sǎñaha-ndo tnúhu ndee iní xii-dé, te ní cachí tnúhu-dé xii-ndí sá nchòhó ío cuíní-ndó cǎhá<sup>n</sup> ndihí ñaha-ndo xii-ndí, te ní cachí tnúhu tucu-dé xii-ndí sá nchòhó ío ndihú iní-ndó cuendá nǎcuáa cùu ndecu-ndo ni cuu, ndihí cuendá sá ío sǎni iní-ndó cuendá-í, te sá dúcá<sup>n</sup> ndùu cuendú ní caní-dé núú-ndí nùu xǎn ío ní cudí iní-í.

8 Te nchòhó ní ndihú iní-ndó cuendá tnúhu cǎhá<sup>n</sup>-í núú tütú sá ñí dáquíxí-í ndaha-ndo, te òré ní níhí-í tnúhu sá ndihú iní-ndó te tnaa-ni ní ndixi cuéchi iní-í sá dúcá<sup>n</sup> ñí quíde-í te dàtnùní ñá túú-gǎ ní ndixi cuéchi iní-í. 9 Te vitna ní ndihú iní-ndó, te xǎn ní quíde-xi ní ndixi cuéchi iní-ndó sǎ ñá túú quíde váha-ndo ndècu-ndo ni cuu, te ní cudí iní-í dico ñá díú cuendá sá ni ndihú iní-ndó ñí cudí iní-í chí cuendá sá ñí ndixi cuéchi iní-ndó, te ní ndihú iní-ndó nǎcuáa ní cuu váha iní Yǎ

Ndiöxí, te xiã<sup>n</sup> nõu ní cuu-xi ì<sup>n</sup> sá vâha sá cúú-xí-ndó cuendá tñuhu ní cáhá<sup>n</sup>-í te ñá túú ní cùu-xi ì<sup>n</sup> sá cuèhé sá cúú-xí-ndó. <sup>10</sup> Te nchoo nõu na ndihú iní-ó nàcuáa cuu váha iní Yá Ndiöxí, te ndixi cuéchi iní-ó te núu ñá túú quide váha-o ndècu-o, te sá dúcá<sup>n</sup> quide-o te nàníhí tãhú-ó, te vá ndihú iní-ó sá dúcá<sup>n</sup> ñi quide-o, te dava ñáyiú xĩndecu ichi cuèhé ichi duha ndihú iní-yu dico ñá túú ndixi cuéchi iní-yu cuendá nchaa sá ñá túú vâha quidé-yu, te sá dúcá<sup>n</sup> quidé-yu te cuíta nihnú-yu. <sup>11</sup> Te sá dúcá<sup>n</sup> ñi ndihú iní-ndó nàcuáa ní cuu váha iní Yá Ndiöxí, te xiã<sup>n</sup> nõu ndùcu ndee-ndo quide-ndo nchaa nacuáa tàú-xi cunduu, te vitna ñi yùhu ñi iní-ndó càhá<sup>n</sup>-ndó sã quidé vâha-ndo, te ío cùdèé<sup>n</sup>-ndó nõú mée-ndó sã ñá túú quide váha-ndo ndècu-ndo ñi cuu, te yùhú-ndó ndècu-ndo cuendá sá ñá túú quide váha-ndo ñi cùu, te ío ní xúhu<sup>n</sup> iní ñáhá-ndó xii-í, te ní ndúcú ndéé-ndó ñi quide ndáá-ndó cuendá téé ndècuéchi ndècu ndihí-ndo, te sá dúcá<sup>n</sup> ñi quide-ndo te xiã<sup>n</sup> ní cutnùní sá mée-ndó ñá túú cuéchi-ndo. <sup>12</sup> Te ní cadúha-í tutú ní dáquixí-í ndaha-ndo, te ní quide-ndo nàcuáa ní cáhá<sup>n</sup>-í, te sá dúcá<sup>n</sup> ñi quide-ndo xiã<sup>n</sup> ní cutnùní iní-ndó sã ío cùu iní ñáhá-ndó xii-í. Te Yá Ndiöxí náhá-gã sá díú cuendá xiã<sup>n</sup> ní dáquixí-í tutú ndaha-ndo, te ñá díú-ní cuendá sá sání iní-í cuendá téé ndècuéchi ndècu ndihí-ndo, te ñi ñá díú-ní cuendá ñáyiú ní dándihú téé ndècuéchi-á<sup>n</sup> iní-xi ní cadúha-í tutú ní dáquixí-í ndaha-ndo. <sup>13</sup> Te cuendá sá quidé vâha-ndo ndècu-ndo xiã<sup>n</sup> cúú-xí tñuhu ndee iní ndécú ndihí-ndí.

Dico ñá díú-ní xiã<sup>n</sup> chi tñàhá ío cùdíí iní-ndí cuendá sá ío cùdíí iní té Títú, te duca<sup>n</sup> cùdíí iní-dé chi nchòhó ní sãñaha-ndo tñuhu ndee iní xii-dé. <sup>14</sup> Te yúhú ñá túú cùcaha<sup>n</sup> núú-í sá ñi cáhá<sup>n</sup> váha-í cuendá-ndó nõú tẽ Títú cùtñàhá vátá quixí-gã-dé núú ndécú-ndó, chi ní cutnùní iní-dé sá ndáá càhá<sup>n</sup> váha-í nàcuáa quide-ndo datná cúú-xí sã ndáá nchaa tñuhu dàcuaha ñaha-í xii-ndo. <sup>15</sup> Te vitna ío-gã váha cùu iní té Títú cuendá-ndó, chi ndàcu iní-dé sá ncháá-ndó ío váha ní tñi-ndo nchaa tñuhu ní cáhá<sup>n</sup>-dé núú-ndó, te ndàcu tucu iní-dé sá ñi quehe<sup>n</sup> cuendá váha-ndo-dé, te ní dátũu-ndo nõú-dé sá ío ní quiyùhú

iní-ndó sã vã ndácú-ndó càda-ndo nchaa nacuáa tàú-xi cunduu. <sup>16</sup> Te ío cùdíí iní-í cuendá-ndó chi cùtnuní ndáá iní-í sá ñá túú dàña ndeé-ndó quide-ndo nchaa nacuáa tàú-xi cunduu.

## 8

### *Ío váha cuu iní-ó chĩndee tñaha-o*

<sup>1</sup> Te nchòhó ñáyiú ndècu ndihí-ndí ichi Xitohó Jesucristú càchí tñuhu-ndí xii-ndo nàcuáa quide ñaha Yá Ndiöxí xii cue ñáyiú xĩndecu ichi-gã ndécú dístítú Macèdoniá, chi ío chĩndee ñaha-gã xii-yu cuendá sá quidé vâha-yu ndécú-yu. <sup>2</sup> Te cuéi ndòho vihí-yu ndécú-yu dico ío-ni cùdíí iní-yu, te cuendá xiã<sup>n</sup> nõu ñi yùhu ñi iní-yu ní sacá<sup>n</sup> tñáhã-yu díhú<sup>n</sup> sã cúú-xí tñaha ñáyiú-yu, te ñá túú tñahí ñi xĩnduu díi-yu cuéi ío ndàhú-yu. <sup>3</sup> Te ñá díú-ní nàcuáa ní sani iní-yu ndacú-yu cacá<sup>n</sup> tñáhã-yu, chi ní quide yica iní-yu ní sacá<sup>n</sup> tñáhã-gã-yu, te yúhú càchí tñuhu ndáá-í xii-ndo sã ñi yuhu ñi iní-yu duca<sup>n</sup> ñi quidé-yu. <sup>4</sup> Te ío ní cáhá<sup>n</sup> ndàhú-yu núú-ndí cuendá sá cuãha-ndí tñuhu sã tñahã-yu chĩndèé-yu dava-gã cue ñáyiú cùu cuendá Yá Ndiöxí. <sup>5</sup> Te ñá díú-ní nàcuáa ní sani iní-ndí ní quidé-yu, chi ní xidó-gã-yu ní quide váha-yu, te duca<sup>n</sup> chí mée-yu ní sani iní-yu sá cadã-yu nchaa nàcuáa cuení Yá Ndiöxí, te dàtnùní duca<sup>n</sup> te ní cachí-yu sá cúú càdá-yu nchaa nàcuáa na cũñaha-ndí xii-yu. Te duca<sup>n</sup> ñi quidé-yu chí duca<sup>n</sup> ñi cuení mée Yá Ndiöxí cunduu. <sup>6</sup> Te sá dúcá<sup>n</sup> ñi quide ñáyiú-á<sup>n</sup> nõu xiã<sup>n</sup> càhá<sup>n</sup> ndàhú-ndí núú tẽ Títú sá quixí tucu-dé núú ndécú-ndó cuendá dàxínu cava-dé chiu<sup>n</sup> sá sã ní ngũita-dé quidé-dé dátacá-dé díhú<sup>n</sup> sã sã ní ngũita-ndo sàcá<sup>n</sup> tñáhã-ndó, te duca<sup>n</sup> quide-ndo chí cùndahú iní-ndó tñaha ñáyiú-ndo. <sup>7</sup> Te nchòhó cúú-ndó ñáyiú ío ngòdónúú quide nchaa sá vâha, te ío váha sãndáá iní-ndó Xitohó Jesucristú, te ío váha cùtnuní iní-ndó nàcuáa càhá<sup>n</sup> tñuhu-gã, te ío váha dàcuaha-ndo ñáyiú tñuhu-gã, te ío ndùcu ndee-ndo quide-ndo mee-ñi sá vâha, te duca<sup>n</sup> ío cùu iní ñáhã-ndó xii-ndí, te sá dúcá<sup>n</sup> quide-ndo núú xiã<sup>n</sup> càhá<sup>n</sup> ndàhú-í núú-ndó sã ngòdó núú-gã-ndó càda-ndo sá cúú-xí tñaha ñáyiú-ndo.

8 Dico yúhú ñá túú tàuchiú<sup>n</sup>-í sá dúcá<sup>n</sup> càda-ndo, chi cuendá-ni sá càchí tnúhu-í xii-ndo nàcuáa quide dava-gá cue ñáyiú ndècu ichi Xítohó Jesucristú, chi cue ñáyiú-á<sup>n</sup> ni yùhu ni iní-yu quidé-yu sá vâha sá cúu-xí tnàha ñáyiú-yu, te càchí tnúhu-í xii-ndo nàcuáa quidé-yu cuendá cutnùní nũ nása cada-ndo nũ ndisa sá cúu iní-ndó cuè tnaha ñáyiú-ndo. <sup>9</sup> Te nchòhó sa xìní-ndó sá Xítohó Jesucristú ío cùndahú iní ñáhá-gã xii-o, te ío vâha ndècu-gá ní cùu te ní quixi-gá ñuyíú-a ní quide vâha ñaha-gã xii-o, te ñuyíú-a ñá túú ní xĩndecu vâha-gá, te duca<sup>n</sup> ñi quixi-gá ñuyíú-a cuèi ñá túú ní xĩndecu vâha-gá cuendá sá nchóó ngũndecu vâha-o nũú ndécú-gã.

<sup>10</sup> Te na càchí tnúhu-í xii-ndo nàcuáa sàni iní-í. Chìu<sup>n</sup> sá ñi yuhu ni iní-ndó ñi ngũíta-ndo quide-ndo cuíá ñi yâha chi cùu-xi sá vâha sá cúu-xí-ndó nũ na dàxínu cava-ndo. <sup>11</sup> Te dàtná-ni ni yùhu ni iní-ndó ñi tausaha-ndo chìu<sup>n</sup>-á<sup>n</sup> te duca<sup>n</sup>-ni ñi yuhu ni iní-ndó dàxínu cava-ndo, te cacá<sup>n</sup> tnáhá-ndó sá ndécú ndìhi-ndo nàcuáa xito mee-ndo ndacu-ndo. <sup>12</sup> Te núu nchòhó ni yùhu ni iní-ndó càcá<sup>n</sup> tnáhá-ndó sá xító mèe-ndo ndacu-ndo ña, te cùu vâha iní Yã Ndiõxí, chi mee-gã sa nàha-gá nása ndècu-o te ndũu vétú-ni iní-gá.

<sup>13</sup> Te sá dúhá ndũu tnúhu càhá<sup>n</sup>-í te vâ cáni iní-ndó sá yúhú cuíní-í sá nchòhó ndoho-ndo cùndecu-ndo te dava-gá-yu ngũndecu vâha-yu sá cuendá-ndó. <sup>14</sup> Te vitna ndècu ndee iní-ndó nàcuáa ndacu-ndo chĩndee-ndo cue ñáyiú xini ñuhu, te nduu ñá túú ndècu ndee iní-ndó te cue ñáyiú-á<sup>n</sup> chĩndee ñáhá-yu xii-ndo te núu ndècu ndee iní-yu, te duca<sup>n</sup> te ni nchòhó ñá túú ñá cumání xii-ndo te ni cuè ñáyiú-ã<sup>n</sup> ñá túú ñá cumání xií-yu. <sup>15</sup> Te duca<sup>n</sup> te quee ndáá-xi nàcuáa càhá<sup>n</sup>-xi núú tütú Yã Ndiõxí núú càchí-xi: “Cue ñáyiú ío vâi sá ñi ñíhí ñá túú ní cùu sobrá xií-yu, te cue ñáyiú sacú ní ñíhí ñá túú ní cùmání xií-yu”, duha càchí-xi núú tütú-gá.

### *Té Títú ndìhi cue té cùndìhi-dé*

<sup>16</sup> Te ndàcá<sup>n</sup> táhù-í núú Yã Ndiõxí chi mee-gã ní quide sá tè Títú ío ñuhu iní ñáhá-dě xii-ndo dàtná ñúhú iní ñáhá-í xii-ndo. <sup>17</sup> Te yúhú ní xáha<sup>n</sup>-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcá<sup>n</sup> ñi xáha<sup>n</sup>-í xii-dé

quixi coto ñaha-dě xii-ndo, chi mee-dě cùdíí tnàhí iní-dé quixi coto ñaha-dě xii-ndo.

<sup>18</sup> Te tendaha-ndí ñi<sup>n</sup> té ndècu ndìhi-o ichi Xítohó Jesucristú quixi-dé ndìhi té Títú, te té quixi ndìhi té Títú-á<sup>n</sup> cúu-dě ñi<sup>n</sup> té ío vâha càhá<sup>n</sup> cue ñáyiú xĩndecu ichi Xítohó Jesucristú cuendá-dé cuendá sá ío vâha quide-dé chìu<sup>n</sup> Xítohó Jesucristú càhá<sup>n</sup>-dé tnúhu-gá tnúhu sá càhá<sup>n</sup> nàcuáa naníhí tàhú-ó. <sup>19</sup> Te cue ñáyiú xĩndecu ichi Xítohó Jesucristú ñá díú-ní sá càhá<sup>n</sup> vâha-yu cuendá-dé, chi tnàhá ní cáxi ñáhá-yu xii-dé cuendá sá cáca cùu ndìhi ñaha-dé xii-ndí chĩndee ñaha-dé tacá sá cúu-xí ñáyiú ndàhú, te quide-ndí chìu<sup>n</sup>-a cuendá ío cuu càhnu Yã Ndiõxí, te cue ñáyiú cutnùní iní-yu sá nchòhó ni yùhu ni iní-ndó quide-ndo nchaa sá vâha sá cúu-xí cuè tnaha ñáyiú-ndo. <sup>20</sup> Te cuíní-ndí sá vâ càhá<sup>n</sup> cuèhé ñáyiú cuendá nàcuáa quide-ndí ndìhi sá ngãutnàha sá cúu-xí cuè tnaha ñáyiú-o, te ío vâi cuu-xi. <sup>21</sup> Chi ndècu ndee-ndí quidé-ndí nàcuáa càhá<sup>n</sup> vâha Xítohó Jesucristú cuendá-ndí, te quide tucu-ndí nàcuáa càhá<sup>n</sup> vâha ñáyiú sá quidé vâha-ndí.

<sup>22</sup> Te tendaha tucu-ndí ingá tucu té ndècu ndìhi-o ichi Xítohó Jesucristú quixi-dé ndìhi cue té uú quixi coto ñaha xii-ndo, te té quixi ndìhi-güedé-á<sup>n</sup> ñi cuu vâi xito quide-dé nàcuáa cutnùní iní-ndí sá ío ndècu ndee-dé quidé-dé sá vâha, te vitna ío-gá cuíní-dé cada-dé sá vâha vitna quixi-dé núú ndécú-ndó, chi cùtnuní ndáá iní-dé sá cúu-ndó cuè ñáyiú quide vâha. <sup>23</sup> Te càchí tnúhu-í xii-ndo sá tè Títú cúu-dě ñi<sup>n</sup> té cùndìhi-í quidé-ndí chìu<sup>n</sup> Xítohó Jesucristú, te tnàhá-dé cúu-dě ñi<sup>n</sup> té xinu cuechi núú-ndó càhá<sup>n</sup>-dé tnúhu-gá. Te càchí tnúhu tucu-í xii-ndo cuendá cue té uú quixi ndìhi-dé, chi cue té-á<sup>n</sup> cúu-güedé cue té tendaha cuè ñáyiú xĩndecu ichi Xítohó Jesucristú quixi coto ñaha xii-ndo. Te cue té-á<sup>n</sup> quidé-güedé nàcuáa cachí ñáyiú sá ío càhnu cuu Xítohó Jesucristú. <sup>24</sup> Te chí cáda sá cúu iní ndisa-ndo-güedé cuendá duca<sup>n</sup> na cùtnuní iní nchaa dava-gá ñáyiú xĩndecu ichi Xítohó Jesucristú sá ndáá ndisa duca<sup>n</sup> quide-ndo, te duca<sup>n</sup> cùtnuní iní-yu sá



ndàá ndisa quide váha-ndo dàtná càhá<sup>n</sup>-ndí cuendá-ndó sã quidé vãha-ndo.

## 9

*Cuendá sã ngãutnãha sã cúu-xí cuè ñáyíu xĩndecu ichi Xítóhó Jesucristú*

<sup>1</sup> Te cuendá sã ngãutnãha sã cúu-xí cuè ñáyíu ndècu ichi Xítóhó Jesucristú ñá túú-gã xíní ñùhu-xi cachí tnúhu-í xii-ndo núú tütú-a nãcuáa cada-ndo, <sup>2</sup> chi sa cùtnuní iní-í sã ïo cuíní-ndó chĩndee-ndó-yu. Te duca<sup>n</sup>-ni ïo váha càhá<sup>n</sup>-í cuendá-ndó núú ñáyíu xĩndecu ichi Xítóhó Jesucristú ndécú dístítú Macèdoniá, te xãha<sup>n</sup>-í xii-yu sã nchòhó ñáyíu xĩndecu ichi Xítóhó Jesucristú ndécú dístítú Acáyá sa ní cuu ñ<sup>n</sup> cuíá duca<sup>n</sup> cuíní-ndó càcá<sup>n</sup> tnáhá-ndó sã cúu-xí cuè ñáyíu ndàhú ndécú ichi-gá. Te vai cue ñáyíu dístítú Macèdoniá cuíní-yu cacá<sup>n</sup> tnáhã-yu sã cúu-xí cuè ñáyíu ndàhú ndécú ichi Xítóhó Jesucristú cuendá sã ñí ñíhĩ-yu tnúhu sã nchòhó ïo cuíní-ndó dùca<sup>n</sup> cada-ndo. <sup>3</sup> Te cuendá sã sání iní-ndó càda-ndo xĩã<sup>n</sup> tendaha-í cue téé ndècu ndihĩ-o ichi Xítóhó Jesucristú quixi-güedé núú ndécú-ndó cuendá dàtúha ñaha-güedé xii-ndo, cuendá sã vã quée ndèhnde-í núú ñáyíu sã ñí càhá<sup>n</sup> váha-í cuendá-ndó, te duca<sup>n</sup> cùndecu túha ndisa-ndo dàtná sa ní càhá<sup>n</sup>-í núú-yu. <sup>4</sup> Chi na cuáhã<sup>n</sup> ndèé quixi-í ndihĩ ñ<sup>n</sup> úú cue ñáyíu dístítú Macèdoniá núú ndécú-ndó te quiní-yu sã ñà túú ndècu túha-ndo, te cucaha<sup>n</sup> núú-í núú-yu sã ñí càhá<sup>n</sup> váha-í cuendá-ndó te núú ñá túú ndècu túha-ndo, te tnáhã-ndó cùcaha<sup>n</sup> núú-ndó. <sup>5</sup> Te xĩã<sup>n</sup> núú ní sani iní-í sã vãha-gá codonùu cue téé ndècu ndihĩ-o ichi Xítóhó Jesucristú quixi coto ñaha-güedé xii-ndo cuendá chĩndee ñaha-güedé tacá sã ñí sani iní-ndó càcá<sup>n</sup> tnáhã-ndó cuendá sã cùndecu túha-xi, te cuu-xi dàtná ñ<sup>n</sup> táhú sã ñí quene cuu iní méé-ndó càcá<sup>n</sup> tnáhã-ndó sã cúu-xí cuè tnaha ñáyíu-ndo. Te duca<sup>n</sup> te vá yõo caní iní-xi quesãhá-yu sã nchũhú ní quide yica-ndí duca<sup>n</sup> ñí sacá<sup>n</sup> tnáhã-ndó.

<sup>6</sup> Te nchòhó sa xíní-ndó sã ñáyíu na chihĩ vai tatá te vai ñíhĩ-yu cùu, te cue ñáyíu na chihĩ sacú tatá te sacú ñíhĩ-yu cùu. Duca<sup>n</sup> sãtnahã-xi cùu ñáyíu sãcá<sup>n</sup> tnáhã sã cúu-xí tnaha ñáyíu-yu. <sup>7</sup> Te ñ<sup>n</sup> ñ<sup>n</sup>-ndo càcá<sup>n</sup> tnáhã-ndó nãcuáa quene cuu iní méé-ndó,

te ïo váha cuu iní-ndó dùca<sup>n</sup> cada-ndo te vá càdã-ndó cuendã-ni sã quidé yĩca ñaha ñáyíu xii-ndo, chi Yá Ndiõxí cúu váha iní-gá núú nchãa ñáyíu cùdí ñí sãcá<sup>n</sup> tnáhã sã cúu-xí cuè tnaha ñáyíu-xi. <sup>8</sup> Te Yá Ndiõxí ndacu-gá chĩndee ñaha-gá xii-ndo nãcuáa cundecu váha-ndo, chi ñíu-gá cada te ñíhĩ-ndó nchãa núú sã xíní ñùhu-ndo cundecu ndihĩ-ndo, te ñá túú tnáhĩ-gá ná cumání xii-ndo, te mee-gã chĩndee ñaha-gá xii-ndo ñíhĩ-ndó ïo vai cundecu ndihĩ-ndo cuendã duca<sup>n</sup> chĩndee-ndo cue tnaha ñáyíu-ndo. <sup>9</sup> Te núú tütú Yá Ndiõxí càchĩ-xi ñ<sup>n</sup> xichĩ:

Ñ<sup>n</sup> ñáyíu ïo vai sã ñí sãñãhá-yu xii ñáyíu ndàhú,

te sã ñí quide ñáyíu-ã<sup>n</sup> ñí cuu-xi sã vãha sã vã yõo cùnaa.

Duha càchĩ-xi núú tütú-gá. <sup>10</sup> Te mee Yã Ndiõxí táxĩ-gã nchãa sã cúu tãtã nchãa nchòhó ñáyíu xitu nãndĩ sã xítú cuendã cuu sã cúu nchĩto-ndo, te ñíu-gá cada te ïo vai sã ñíhĩ-ndó cùndecu ndihĩ-ndo, te duca<sup>n</sup> ïo-gã vai sã vãha cada-ndo sã cúu-xí cuè tnaha ñáyíu-ndo. <sup>11</sup> Te Yá Ndiõxí taxi-gã vai núú sã cùndecu ndihĩ-ndo cuendã duca<sup>n</sup> ñí yuhu ñí iní-ndó vai cuãñaha-ndo sã cúu-xí tnaha ñáyíu-ndo. Te cuendã nchãa sã sãcã<sup>n</sup> tnáhã-ndó quèhe<sup>n</sup> cuendã-ndí cuu xii tnaha ñáyíu-ndo, te cue ñáyíu-ã<sup>n</sup> ïo ndacã<sup>n</sup> táhũ-yu núú Yã Ndiõxí cuendã sã dúcã<sup>n</sup> sãcã<sup>n</sup> tnáhã-ndó sã cúu-xĩ-yu. <sup>12</sup> Te sã dúcã<sup>n</sup> quide-ndo sacã<sup>n</sup> tnáhã-ndó sã cúu-xí cuè ñáyíu cùu cuendã Yã Ndiõxí, te ñáyíu-ã<sup>n</sup> ñà túú-gã ná cumání xii-yu, te ïo ndacã<sup>n</sup> táhũ-yu núú Yã Ndiõxí sã dúcã<sup>n</sup> quide-ndo. <sup>13</sup> Te ñáyíu-ã<sup>n</sup> cutnùnĩ iní-yu sã nchòhó quidé-ndó sã sãndãá ndisa iní-ndó tnũhu Xítóhó Jesucristú, te cuendã xĩã<sup>n</sup> te ñáyíu-ã<sup>n</sup> chĩñũhũ-yu Yá Ndiõxí, te cuendã sã dúcã<sup>n</sup> ñí yuhu ñí iní-ndó sãcã<sup>n</sup> tnáhã-ndó sã cúu-xĩ-yu ndihĩ sã cúu-xí nchãa dava-gã ñáyíu, te cachĩ-yu sã ïo càhnu cuu Yá Ndiõxí. <sup>14</sup> Te ñáyíu-ã<sup>n</sup> càhá<sup>n</sup> ndihĩ-yu Yá Ndiõxí cuendã-ndó, te ïo cuu váha iní ñáhã-yu xii-ndo cuendã sã Yã Ndiõxí chĩndee ñaha-gã xii-ndo quide-ndo sã vãha sã cúu-xĩ-yu ndihĩ dava-gã ñáyíu. <sup>15</sup> Te ïo ndacã<sup>n</sup> táhũ-ó núú Yã Ndiõxí cuendã sã ñí taxi-gã sã ïo váha ndècu ndihĩ-o, te ñí ñã cùtnùnĩ iní-ó nãsa cunduu tnúhu càhá<sup>n</sup>-ó cuendã sã vãha ní taxi-gã.



## 10

*Té Păblú ndécú ndîhi-dé tnúhu ndee ìní sá cǎhá<sup>n</sup>-dé tnúhu Xítóhó Jesucrístú*

1 Te Xítóhó Jesucrístú ío cǎhnu ìní-gá, te cùndahú ìní ñáhá-gǎ xii-o chîndee ñaha-gá, núu xiǎ<sup>n</sup> yúhú té Păblú duca<sup>n</sup> quide-í cǎhá<sup>n</sup> ndàhú-í núú-ndó nǎcuáa cada-ndo. Te dava-ndo cǎchí-ndó sǎ yúhú ío ndàhú ìní-í òré ndécú ndîhi ñaha-í xii-ndo, te òré ñá túú ndècu ndîhi ñaha-í xii-ndo te ío ñîí cǎá-í. 2 Te cǎhá<sup>n</sup> ndàhú-í núú-ndó sǎ cǎdá-ndó nǎcuáa vá cǎhá<sup>n</sup> ñîí-í núú-ndó òré quixi-í quixi coto ñaha-í xii-ndo. Te cuìní-í sá ndîhi tnúhu ñîí ìní-xi cǎhá<sup>n</sup> ndîhi-í cue ñáyiú cǎchí sá ñîí-ni cuu-í ndîhi cue ñáyiú ñá túú sàndáá ìní tnúhu Xítóhó Jesucrístú. 3 Te nchúhú cùu-ndí cue téé ñuyíú-a, dico ndùcu ndee-ndí quidé-ndí nǎcuáa ndàcu-ndí dáquèe tíhú-ndí nchaa sá cuèhé sá dúhá, dico ñá díú mèe-ndí duca<sup>n</sup> ndàcu-ndí quidé-ndí, 4 te ni ñîí sá ío ñuyíú-a ñá túú chîndee ñaha-xi, chi mee Yǎ Ndióxi chîndèe ñaha-gá xii-ndí dáquèe tíhú duu<sup>n</sup>-ndí nchaa núú sǎ cuèhé sá dúhá. 5 Te xiǎ<sup>n</sup> núu ñîí-ndí tnúhu cǎhá<sup>n</sup>-ndí sàdí-ndí yuhu cue ñáyiú cǎhá<sup>n</sup> tnúhu sá ñá túú cùu váha ìní Yǎ Ndióxi, ñáyiú xiquide nínu mee-xi cǎchí sá ñá túú nàndîhi tnúhu-gá. Te quide-ndí sá ñáyiú-á<sup>n</sup> quindáá ìní-yu tnúhu Xítóhó Jesucrístú. 6 Te nchúhú sa ndècu túha-ndí sá dáquèetíhú-ndí cue ñáyiú ñá túú cuìní cada nǎcuáa cuìní Xítóhó Jesucrístú, dico díhna-gá xíní ñùhu-xi sá ncháá nchòhó ñáyiú cuìní cada nǎcuáa cuìní-gá cundáá-ndó. 7 Te nchòhó nǎcuáa ndùu sá ndéhé-ndó te duca<sup>n</sup> sàni ìní-ndó, dico vá dúcá<sup>n</sup> cǎni ìní-ndó cuèndá-ndí. Chi núu cùtnuní ndáá ìní-ndó sǎ cúú-ndó cuèndá Xítóhó Jesucrístú, te ñu-ni duca<sup>n</sup> tàú-ndó cǎni ìní-ndó cuèndá-ndí tucu. 8 Te Xítóhó Jesucrístú ní taxi-gá tnúhu ndee ìní ndécú ndîhi-ndí sá dánèhé ñáhá-ndí xii-ndo nǎcuáa cuita cuehnu nihnu-ndo ìchi-gá quíhí<sup>n</sup>, te ñá díú sǎ dánèhé ñáhá-ndí xii-ndo nǎcuáa cuita nihnu-ndo, te cuèi na chîdo-gá-í cǎhá<sup>n</sup>-í cada nínu-í mèe-í cuèndá tnúhu ndee ìní ní taxi Xítóhó Jesucrístú ndécú ndîhi-ndí, dico vá cúcǎhá<sup>n</sup> núú-í chi cǎhá<sup>n</sup> ndáá-í. 9 Te

ñá túú cuìní-í sá nchòhó cǎni ìní-ndó sǎ yúhú dáyúhú ñáhá-í xii-ndo nǎcuáa ndùu tnúhu cǎhá<sup>n</sup>-í núú tütú-í. 10 Te dava-ndo cǎchí-ndó sǎ ténàá ñáhá-í xii-ndo núú tütú-í, te mee-ni tnúhu cǎhnu sá ío cùnuu cuu-xi, te cǎchí tucu-ndo sǎ òré ndécú ndîhi ñaha-í xii-ndo te ñá túú cǎa-í sá cúú-í ñîí téé cùu váha cùu dico ìní-ndó, te cǎchí tucu-ndo sǎ ñá túú tnàhá ìní-ndó nǎcuáa quide-í òré dácuàha ñaha-í xii-ndo. 11 Te nchòhó ñáyiú duca<sup>n</sup> cǎhá<sup>n</sup> cada cuèndá váha-ndo sǎ dàtná-ni cǎhá<sup>n</sup>-ndí núú tütú-ndí ñu-ni duca<sup>n</sup> quide-ndí òré ndécú ndîhi ñaha-ndí xii-ndo.

12 Te nchúhú, vá cúú tnàhí cǎhá<sup>n</sup>-ndí sá ñîí-ni cuu-ndí ndîhi cue ñáyiú cǎhá<sup>n</sup> váha cuèndá mèe-xí, chi ñáyiú-á<sup>n</sup> sání ìní-yu ná cúú sǎ váha te quidé-yu te xiǎ<sup>n</sup> cǎchí-yu sá ío váha quidé-yu, te cǎchí-yu sá quidé váha-gá-yu dàcúúxí tnàha ñáyiú-yu, te sá dúcá<sup>n</sup> cǎhá<sup>n</sup>-yu te quidé-yu dàtná quidé cue ñáyiú ñá túú tnàhí cùtnuní ìní-xi. 13 Te dico nchúhú ñá túú xidó-ndí cǎhá<sup>n</sup> váha-ndí cuèndá-ndí, chi cǎhá<sup>n</sup> váha-ndí cuèndá-ndí dico nǎcuáa ndùu chiu<sup>n</sup> ní taxi Yǎ Ndióxi cǎhá<sup>n</sup>-ndí, chi mee-gǎ ní cǎchí-gá ndéé není sáá-ndí cǎhá<sup>n</sup>-ndí tnúhu-gá, te ní sáá-ndí ndéé ñuú-ndó cǎhá<sup>n</sup>-ndí tnúhu-gá. 14 Te vitna ndècu ndîhi-ndí tnúhu ndee ìní sá tnàhá nchòhó cuu cǎhá<sup>n</sup> ndîhi ñaha-ndí xii-ndo, chi díhna-gá nchúhú ní quixi-ndí ní cǎhá<sup>n</sup>-ndí tnúhu Xítóhó Jesucrístú ñuú-ndó, tnúhu sá cǎhá<sup>n</sup> nǎcuáa naníhí tàhú-ó, 15 Te nchúhú ñá túú quide cǎhnu-ndí mèe-ndí cuèndá chiu<sup>n</sup> quide dava-gá-güedé quesaha-ndí sá chíú<sup>n</sup> mèe-ndí cúú-xí. Te cuìní-ndí sá nchòhó cuita quindáá-gá ìní-ndó Xítóhó Jesucrístú, te duca<sup>n</sup> te níhí-gǎ-ndí nǎcuáa cada-ndí chiu<sup>n</sup>-gá nchaa dava-gá xichi núú ní cǎchí-gá cada-ndí chiu<sup>n</sup>-gá. 16 Chi cǎhá<sup>n</sup>-ndí tnúhu-gá tnúhu sá cǎhá<sup>n</sup> nǎcuáa naníhí tàhú-ó, te yáha-gá-ndí ñuú-ndó quíhí<sup>n</sup>-ndí nchaa dava-gá xichi cǎhá<sup>n</sup>-ndí, te vá cǎdá cǎhnu-ndí mèe-ndí cuèndá chiu<sup>n</sup> sá sá ní quide dava-gá-güedé.

17 Te cue ñáyiú cuìní cada cǎhnu mee-xi te vá dúcá<sup>n</sup> cǎdá-yu, chi mee Xítóhó Jesucrístú ná cǎda cǎnú-yu-gá. 18 Te nchaa ñáyiú na cǎhá<sup>n</sup> váha Xítóhó Jesucrístú

cuendá-yu, ñáyiú-á<sup>n</sup> cúdiú-yu núú-gã, te ñá túú cùdiú-yu núú-gã cuendá sá càhá<sup>n</sup> váha-yu cuendá méé-yu.

## 11

*Cuendá té Páblú ndihi cuendá cue téé càchí sá càhá<sup>n</sup> tnúhu Yá Ndiöxí te ñá ndàá*

<sup>1</sup> Te cuini-í sá nchòhó cada ndee iní-ndó cùndedóho-ndo tnúhu na càhá<sup>n</sup>-í, chi càhá<sup>n</sup>-í dàtná càhá<sup>n</sup> cue ñáyiú ñá túú cùtnuní iní-xi, te cuèi nása-gá ná cùnduu tnúhu càhá<sup>n</sup>-í dico chí cáda ndèe iní cùndedóho-ndo. <sup>2</sup> Chi yúhú ío ñuhu iní ñáhà-í xii-ndo dàtná ñúhú iní ñáhá mèe Yá Ndiöxí xii-o, te ní càhá<sup>n</sup>-í tnúhu Xítohó Jesucristú núú-ndó ñuu xiá<sup>n</sup> ní tnahá tnúhu-ndo ndihi-gá vitna, te sá dúcá<sup>n</sup> ñí quide-í te cada iní-ndó sã yúhú cúu-í dàtná ñí tée xica ndáhú te nchòhó cúu-ndó dàtná ñí xichí cuéchí, te Xítohó Jesucristú cúu-gã dàtná ñí tée tnándaha ndihi xichí cuéchí-ã<sup>n</sup>. Te duca<sup>n</sup> càda iní-ndó chi na sãá nduu te yúhú na càni cuendá ñáhà-í xii-ndo ñúú Xítohó Jesucristú, te cuu-ndo ñáyiú vá cùndècu tnahí-gá cuèchi-xi. <sup>3</sup> Te yúhú-í sá sàcúhná dandáhú ñáhá-xi xii-ndo vá cání-gã iní-ndó càncicú<sup>n</sup> nihnu-ndo ñí yuhu ñí iní-ndó ìchi Xítohó Jesucristú dàtná nchicú<sup>n</sup> nihnu-ndo vitna. Te yúhú-í ná yáha-ndo dàtná ní yáha tá Èvá, chi sàcúhná ñí nduu-xi cóo ñí dándáhú ñáhá-xi xii-xi, chi sàcúhná-ã<sup>n</sup> ío váha ní xito-xi nàcuáa ní quide-xi ní dándáhú-xi tá Èvá-á<sup>n</sup>. <sup>4</sup> Te nchòhó, quidé ndèe iní-ndó sàcùndedóho-ndo nchàa tnúhu càhá<sup>n</sup> cue téé càhá<sup>n</sup> ingá núú tnúhu cuendá Jèsus tnúhu sá ñá túú dànehé ñáhá-ndí xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo cuendá ingá espíritú, te ñá díú cuendá Espíritú Yá Ndiöxí sá ñí ngúndecu ndihi-ndo dànehé ñáhá-güedé xii-ndo, te quide ndee tucu iní-ndó ndèdóho-ndo dànehé ñáhá-güedé xii-ndo ingá núú tnúhu sá càchí-güedé càhá<sup>n</sup> nàcuáa naníhí tàhú-ndó, te ñá díú nàcuáa nduu tnúhu sá ñí sàndáá iní-ndó cuendá naníhí tàhú-ndó càhá<sup>n</sup>-güedé. <sup>5</sup> Te cue téé duca<sup>n</sup> càhá<sup>n</sup>-á<sup>n</sup> càchí-güedé sá Yá Ndiöxí ní tendaha ñàha-gá xii-güedé xicá cùu-güedé càhá<sup>n</sup>-güedé tnúhu-gá te ío cùnuu-güedé, dico ñá ndàá sá càhá<sup>n</sup>-güedé tnúhu-gá. Te yúhú cùtnuní iní-í sá cuè téé-ã<sup>n</sup> ñá túú

cùnuu-güedé dàtná cùnuu yúhú. <sup>6</sup> Te cuèi ñá túú càhá<sup>n</sup>-í dàtná càhá<sup>n</sup> cue téé ío váha sãá díquí-xi dico ío váha cùtnuní iní-í cuendá nchaa sá dácuàha-í, te yúhú sa quide-í nàcuáa cùtnuní iní-ndó sã ío váha cùtnuní iní-í nàcuáa nduu nchaa tnúhu càhá<sup>n</sup>-í.

<sup>7</sup> Te cudana te sàni iní-ndó sã yúhú ñá túú ní quide váha-í sá ñí quide-í mèe-í dàtná ñí tée ío ndàhú iní-xi, chi ñá túú ní xicá<sup>n</sup>-í yáhu-í núú-ndó cuendá sá ñí càhá<sup>n</sup>-í tnúhu Yá Ndiöxí tnúhu sá càhá<sup>n</sup> nàcuáa naníhí tàhú-ó núú-ndó. <sup>8</sup> Te ní quehe<sup>n</sup>-í díhú<sup>n</sup> ñí taxi dava-gá cue ñáyiú ndècu ìchi Xítohó Jesucristú, te díhú<sup>n</sup>-ã<sup>n</sup> ñí dándóñuhu-í ní saa<sup>n</sup>-í nchaa sá ñí xini ñuhu-í cùtnàhá ní càhá<sup>n</sup>-í tnúhu Xítohó Jesucristú núú-ndó. <sup>9</sup> Te cùtnàhá ní xíndecu ndihi ñàha-í xii-ndo te áma ní xóo cumání sã xini ñuhu-í, te ñá túú ñá ní xicá<sup>n</sup>-í núú ñí ñí-ndo. Chi cue ñáyiú xíndecu ìchi Xítohó Jesucristú ndécú distritú Macèdoniá ní quixí-yu ní taxi-yu sá cùmáni xii-í, te ñá túú tnahí ñí dàsatú iní ñáhà-í xii-ndo càcá<sup>n</sup>-í núú-ndó ñuu ná cúú sã xini ñuhu-í, te díu-ñi duca<sup>n</sup> càda-í. <sup>10</sup> Te díu-ñi duha càhá<sup>n</sup> váha-í cuendá-í te ñí ñí cue ñáyiú distritú Acáyá vá ñihí-yu tnúhu cùñàhá-yu xii-í cuendá cadí-yu yuhu-í. Te mee Xítohó Jesucristú náhá-gã sá ndàá càhá<sup>n</sup>-í dàtná càhá<sup>n</sup> ndàá méé-gã. <sup>11</sup> Te cudana te sàni iní-ndó sã sá dúhá càhá<sup>n</sup>-í te ñá túú cùu iní ñáhà-í xii-ndo, dico ñáhá chi mee Yá Ndiöxí náhá-gã sá yúhú ío cùu iní ñáhà-í xii-ndo.

<sup>12</sup> Te nàcuáa-ñi ta quide-í véxi te díu-ñi duca<sup>n</sup> càda-í cuendá sá cuè téé cuini cada nínu mee-xi càchí sá ñí-ñi cuu ndihi ñàha-güedé xii-í vá ñihí-güedé tnúhu càhá<sup>n</sup>-güedé cachí-güedé sá ñí-ñi chiu<sup>n</sup> quide ndihi ñàha-güedé xii-í. <sup>13</sup> Te cue téé-á<sup>n</sup> càchí-güedé sá Yá Ndiöxí ní tendaha ñàha-gá xii-güedé xicá cùu-güedé càhá<sup>n</sup>-güedé tnúhu-gá dico ñá ndàá, chi mee-ñi dándáhú-güedé ñáyiú ndihi tnúhu càhá<sup>n</sup>-güedé, te quide-güedé dàtná quidé cuè téé càhá<sup>n</sup> tnúhu Xítohó Jesucristú dico ñá ndàá sá cúu-güedé cue téé càhá<sup>n</sup> tnúhu-gá. <sup>14</sup> Te vá cùñuhu-o sã dúcá<sup>n</sup> quide cue téé-á<sup>n</sup>, chi mee sàcúhná quidé-xi sã cúu-xi dàtná ñí espíritú xínú cuèchi núú ío váha càa ndecu Yá Ndiöxí dico ñá ndàá sá xínú cuèchi-xi xiá<sup>n</sup>. <sup>15</sup> Te xiá<sup>n</sup> vá cùñuhu-o sã cuè téé xínu cuechi núú-xi quide-güedé sá

cúu-güedě cue tée quide váha chi ñá ndàá sá quidé vâha-güedé chi dândahú-güedé ñáyiu. Te nâcuáa ndùu nchaa sá quidé-güedé te duca<sup>n</sup> nâcháhu-güedé núu Yá Ndiôxi.

*Té Păblú ío ndòho-dé cuendá sá cúu-dě tée cãhá<sup>n</sup> tnúhu Xítóhó Jesucristú*

16 Te yúhú cãhá<sup>n</sup> tucu-í dóho-ndo sã vã cání iní-ndó sã yúhú cúu-í ì<sup>n</sup> tée cãhá<sup>n</sup> lùcú cãhá<sup>n</sup> duha, te núu dava-ndo dùca<sup>n</sup> sani iní-ndó dico chí cáda ndèe iní cundedóho-ndo tnúhu na cãhá<sup>n</sup>-í cuendá duca<sup>n</sup> tnàhá-í cada nínu-í mée-í. 17 Te vitna na cãhá<sup>n</sup>-í dàtná cãhá<sup>n</sup> ì<sup>n</sup> tée ñá túú cùtnuní iní-xi, chí tnúhu cãhá<sup>n</sup>-í ñá túú ì<sup>n</sup>-ni cuu-xi ndìhi tnúhu Xítóhó Jesucristú, chí vitna cãhá<sup>n</sup>-í nâcuáa cada nínu-í mée-í. 18 Te ío cuéhé ñáyiu quide nínu mee-xi cuendá nchaa sá ío ñuyú-a te xiã<sup>n</sup> núu tnàhá-í cuení-í cada nínu-í mée-í. 19 Chi cùtnuní sá nchòhó quidé ndèe iní-ndó sácúndedóho-ndo nchaa tnúhu cãhá<sup>n</sup> cue tée cãhá<sup>n</sup> lùcú cãhá<sup>n</sup> duha, te duca<sup>n</sup> quide ndee iní-ndó sácúndedóho-ndo tnúhu cãhá<sup>n</sup>-güedé chí cãhí-ndó sã ío túha-ndo. 20 Te nchòhó, quide ndee iní-ndó tñi-ndo nchaa tnúhu cãhá<sup>n</sup> cue tée quide yica ñaha xii-ndo sá cúnú cuèchi-ndo núu-güedě, te xicã<sup>n</sup>-güedé nãndi sá xicã<sup>n</sup>-güedé núu-ndó, te tàxi tnuní ñàhá-güedě xii-ndo, te quide-güedé sã ío cùnûu-güedé ndécú ndìhi ñaha-güedé xii-ndo, te cãniha-güedé xii-ndo, te cuèi nchaa xiã<sup>n</sup> quidé ñàha-güedé xii-ndo dico quide ndee-ni iní-ndó. 21 Te nchòhó cãhí-ndó sã cúu-ndí cue tée ñá túú ní cùyì cada nãndi sá cáda, te ndáa chí ñá túú ì<sup>n</sup>-ni cuu-ndí ndìhi cue tée duca<sup>n</sup> xíquide.

Dico núu cue tée-á<sup>n</sup> cùyì-güedé quidé ñnu-güedé mée-güedě, te tnàhá-í cùyì-í duca<sup>n</sup> càda-í. Te sã dúhá cãhá<sup>n</sup>-í te cãhá<sup>n</sup>-í dàtná ì<sup>n</sup> tée ñá túú cùtnuní iní-xi. 22 Te núu quide cahnu-güedé mée-güedě cuendá sã cãhá<sup>n</sup>-güedé tnúhu hëbreú, te yúhú tucu ñu-ni tée cãhá<sup>n</sup> tnúhu hëbreú cúu-í, àdi quide cahnu-güedé mée-güedě cuendá sã cúu-güedě cue tée isràél, te yúhú tucu tnàhá-í cúu-í tée isràél, àdi quide cahnu-güedé mée-güedě cuendá sã cúu-güedě ñaní tnàhá ndíi Àbrahám, te tnàhá yúhú cúu-í ñaní tnàhá ndíi Àbrahám tucu. 23 Àdi quide cahnu-güedé mée-güedě

cuendá sã sání iní-güedé sã díú núu Xítóhó Jesucristú xínú cuèchi-güedé, dico yúhú ío-gá xínú cuèchi ndisa-í núu-gã. Te sã dúhá quide cahnu-í mée-í te cãhá<sup>n</sup>-í dàtná ì<sup>n</sup> tée ñá túú cùtnuní iní-xi, te yúhú cúu-í ì<sup>n</sup> tée ío-gá quidé chiú<sup>n</sup>-gá dàcúxí cuè tée-á<sup>n</sup>, te vâi xito ní cuu cãniha ñáyiu xii-í, te vâi xito ní cuu chìhi ñàhá-yu vecaá xii-í, te vâi xito ní cuu cãcu cãcu cahni ñaha ñáyiu xii-í. 24 Te cue ñáyiu isràél ní canihá-yu xii-í úhú<sup>n</sup> xito, te ndi tnahá ì<sup>n</sup> ì<sup>n</sup> xito ní canihá-yu ní dáquë-yu ócò sáhú<sup>n</sup> cúmí ñi sàtà-í. 25 Te úní xito ní caniha tucu ñáyiu xii-í ndìhi carrutí, te ì<sup>n</sup> xito ní sãha yúú ñãhã-yu xii-í, te ní cuu úní xito quëe naa bàrcú xití ndute òré sácúhu<sup>n</sup>-í, te ì<sup>n</sup> xito ío ní ndoho-í ní xíndecu-í ì<sup>n</sup> nduu ì<sup>n</sup> niú núu ndute làmár. 26 Te ío títñí xichi ní cuu xica cuu-í, te dava xichi ní cãcu cuido ñaha ndute ñuhu xii-í, te dava xichi ní cãcu duhu ñadúhú nchaa ndachìu<sup>n</sup>-í, te dava xichi ní cãcu cada ñaha cuè ñáyiu cùu ndi mee-í ì<sup>n</sup> sã cáda ñàhá-yu xii-í, te ñu-ni duca<sup>n</sup> ñi cãcu cada ñaha tucu cue ñáyiu ñá túú cùu ndi mee-í ì<sup>n</sup> sã cáda ñàhá-yu xii-í ní cùu, te cuèi xití ñuú te cuèi xití yucu cãcu cãcu cada ñaha ñáyiu xii-í ì<sup>n</sup> sã cáda ñàhá-yu, te ñu-ni duca<sup>n</sup> cãcu cãcu quini-í tnúndòho oré ñúhù-í bàrcú cuáhã<sup>n</sup> núu ndute làmár. Te cue ñáyiu cãhí sã ndécú ìchi Xítóhó Jesucristú te ñá ndàa cãcu cãcu cada ñàhá-yu xii-í ì<sup>n</sup> sã cáda ñàhá-yu. 27 Te ío ndòho-í cuendá chiú<sup>n</sup> quide-í chí ío xàu-í, te ní cuu vâi xito ñá túú xidí-í, te títñí xito ní cuu xihí víhí-í docó, te títñí xito ní cuu yíchí-í ndute, te títñí xito ní cuu ñá túú tnàhí ná xéxi-í cuendá chiú<sup>n</sup> quide-í, te títñí xito ní cuu ndòho-í sã víxi<sup>n</sup>, te títñí xito ní cuu ñá túú nihí-í dóó cuihnu-í.

28 Te ñá díú-ní xiã<sup>n</sup> chí ì<sup>n</sup> nduu ì<sup>n</sup> nduu ío sãni iní-í cuendá nchaa ñáyiu ndècu ìchi Xítóhó Jesucristú xíndecu nchaa xichi. 29 Te ndèda-ni càa ñáyiu ñá túú nihí ndéé cùndecu ìchi Xítóhó Jesucristú, te ío cùndahú iní-í chí sãnuu sã tnàhá-í ñá túú nihí ndéé-í cùndecu-í ìchi-gã sã dúcã<sup>n</sup> quidé-yu. Te núu ì<sup>n</sup> ñáyiu quidé-yu sã ì<sup>n</sup> nchòhó ñáyiu ndècu ìchi Xítóhó Jesucristú quidé-ndó ì<sup>n</sup> sã ñá túú tàú-ndó càda-ndo te vá cúú vâha iní-í chí cudèè<sup>n</sup>-í. 30 Te núu xini ñuhu-xi sã cáda cahnu-í mée-í, te cuu duca<sup>n</sup> càda-í



te cáhá<sup>n</sup>-í mee-ni cuendá nchaa sá quidé nàcuáa ñá túú nihí ndéé yiqui cuñú-í. <sup>31</sup> Te Dútú Ndiõxí Yaá cúú Tătá Xĩtohó Jesucristú náhá-gã sá yũhú càhá<sup>n</sup> ndáá-í núú-ndó, te ñu-gá tàú-gá cachí-ó sã ïo càhnu cuu-gá ni caa ni quíhí<sup>n</sup>. <sup>32</sup> Te cútnàhá ní xĩndecu-í ñuú Dàmascú te tée cùu gobiernú tée cùndihí tée yĩndaha ñáyiu nàni Aretás ní taxi ndecu-dé cue téé ní xĩndedí yuyèhe sá ñũhú dòco ñuú cuendá òré quee-í te tñi ñaha-güedë xii-í ní cùu. <sup>33</sup> Dico yúhú ní queè-í ì<sup>n</sup> xití tídihi, te cue ñáyiu cùndihí ñaha xii-í ní queñuhu ñáhá-yu ndàa ventaná nchii yiqui naha sã ñũhú dòco ñuú-án, te duca<sup>n</sup> te ní cácu-í ñá túú ní ndàcu-güedé tñi ñaha-güedë xii-í.

## 12

*Té Pãblú càhá<sup>n</sup>-dé sã ïo vii càa sã ñĩ dãnèhé núú ñáhá Xĩtohó Jesucristú xii-dé*

<sup>1</sup> Te ñá túú ndéé nándihí-xi sã càhá<sup>n</sup> váha-o cuendá méé-ó, dico vitna xini ñuhu-xi duca<sup>n</sup> cada-í chi cáhá<sup>n</sup>-í nàcuáa ní quide ñaha Xĩtohó Jesucristú xii-í, chi ní quide-gá sã ñĩ cutnùní iní-í nàcuáa ndùu tñuhu-gá, te vai núú sã ñĩ dãnèhé núú ñáhá-gã xii-í. <sup>2</sup> Te yúhú xini-í ì<sup>n</sup> téé sàndáá iní ñáhá xii Xĩtohó Jesucristú, te sa ní cuu úxícúmí cuíá sã tõe-án ñĩ sáá-dé ndéé andiu cùu uní, te ñá túú xini-í te núu ndihí yiqui cùñú-dé ní sáá-dé àdi ñáhá, chi ì<sup>n</sup>dií díí-ni Yá Ndiõxí náhá-gã te núu nása càa-dé ní sáá-dé. <sup>3</sup> Te yúhú càhá<sup>n</sup> ndáá-í cuendá téé-án, dico dàtná ní cachí-í sã ñá túú xini-í te núu ndihí yiqui cùñú-dé ní sáá-dé andiu àdi ñáhá, chi mee Yá Ndiõxí náhá-gã te núu nása càa-dé ní sáá-dé. <sup>4</sup> Te téé-án ñĩ sáá-dé ì<sup>n</sup> xichi núú ïo váha càa andiu, te yàcá<sup>n</sup> ní xĩndedóho-dé tñuhu mee-ni sã cúú-xi cuendá méé-dë, te tñuhu-án vã cúú tñáhí cáhá<sup>n</sup>-dé núú ñi ì<sup>n</sup> ñáyiu. <sup>5</sup> Te yúhú quidé ñĩnu-í téé-án, dico mee-í ñá túú càhá<sup>n</sup> váha-í cuendá-í cuendá cada nínu-í mée-í, chi càhá<sup>n</sup>-ni mee-ni cuendá nchaa sá quidé nàcuáa ñá túú nihí ndéé yiqui cuñú-í. <sup>6</sup> Te núu dicó yúhú cuimí-í te cuu cáhá<sup>n</sup> váha-í cuendá-í cuendá cada nínu-í mée-í, te núu duca<sup>n</sup> na càhá<sup>n</sup>-í te ñá túú cùu-xi ì<sup>n</sup> tñuhu neñúú cáhá<sup>n</sup>-í, chi cùu-xi ì<sup>n</sup> sã càhá<sup>n</sup> ndáá-í te núu na càhá<sup>n</sup>-í. Dico vá dúcá<sup>n</sup> càa-í chi cuimí-í sã nchòhó cada cuendá-ndó nàcuáa ndùu tñuhu càhá<sup>n</sup>-í ndihí nàcuáa quide-í,

te duca<sup>n</sup> mée-ndo cáhá<sup>n</sup>-ndó te núu ná téé cùu-í, te ñá díú sã yũhú cáhá<sup>n</sup> váha-í cuendá mée-í cuendá nchòhó cachí-ndó sã ïo cùnuu-í.

<sup>7</sup> Te sã ñĩ dãnèhé núú ñáhá Xĩtohó Jesucristú xii-í cúú-xi sã xidó ïo váha, te cuendá sã vã cada càhnu-í mée-í núu xiá<sup>n</sup> Xĩtohó Jesucristú ní quide-gá duha ndòho yiqui cuñú-í vitna. Te sã dúcá<sup>n</sup> quide ñaha-gã xii-í te xiá<sup>n</sup> sácuíhná ñĩ nihí-xi ichi càhnu dandòho ñaha-xi xii-í. <sup>8</sup> Te ní cuu uní xito càhá<sup>n</sup> ndàhú-í núú Xĩtohó Jesucristú sã ná cada-gã nàcuáa vá ndòhó-gã yiqui cùñú-í. <sup>9</sup> Dico mee-gã càchí-gá xii-í: “Yúhú ïo cùndahú iní ñáhá-í xii-n chĩndee ñaha-í, te ñá túú ná cúmãní xii-n, te cùtnuní sã ïo-gã chĩndèe-í cue ñáyiu ñá túú nihí ndéé cùndecu”, duha ní cachí-gá xii-í. Te xiá<sup>n</sup> núu yúhú ïo cùdĩí iní-í sã ñá túú nihí ndéè-í ndécù-í, chi ñu cuendá xiá<sup>n</sup> Xĩtohó Jesucristú ñá túú dàña nihnu ñaha-gã xii-í chĩndèe ñaha-gã. <sup>10</sup> Te xiá<sup>n</sup> núu cùdĩí iní-í sã dúhá ñã túú nihí ndéè-í ndécù-í, te cùdĩí tucu iní-í cuendá nchaa tñuhu cuèhé tñuhu duha càhá<sup>n</sup> ñáyiu cuendá-í, te cùdĩí iní-í cuendá nchaa sã ndòhò-í, te cùdĩí tucu iní-í cuendá sá quidé ñaha ñáyiu xii-í, te cùdĩí tucu iní-í cuendá nchaa dava-gã sã ndòhò-í cuendá Xĩtohó Jesucristú. Te òré ñá túú nihí ndéè-í te Xĩtohó Jesucristú chĩndèe ñaha-gã xii-í nihí ndéè-í.

*Té Pãblú ïo sàni iní-dé cuendá cue ñáyiu xĩndecu ichi Xĩtohó Jesucristú ndécú ñuú Còrintú*

<sup>11</sup> Te cùu-í dàtná ì<sup>n</sup> téé ñá túú cùtnuní iní-xi sã dúhá càhá<sup>n</sup> váha-í cuendá-í, te duca<sup>n</sup> quide-í chi mee-ndo quide-ndo sã dúcá<sup>n</sup> càhá<sup>n</sup>-í, dico mee-ndo tàú-ndó càhá<sup>n</sup> váha-ndo cuendá-í ní cùu. Te dava cue téé ïo quide càhnu-güedé méé-güedé, te càchí-güedé sã Xĩtohó Jesucristú ní táuchíú<sup>n</sup>-gã sã càhá<sup>n</sup>-güedé tñuhu-gã, dico yúhú cùnuu-gá-í dàcúúxí cuè téé-án cuèi ñá túú vèdana ná cùu-í ndécù-í ñuyúú-a. <sup>12</sup> Te cútnàhá ní xĩndecu ndihí ñaha-í xii-ndo ïo ní quide càhnu iní-í nándi sã ñĩ yáha-í ní quide-í chiu<sup>n</sup> Xĩtohó Jesucristú sã cúú-xi-ndó. Te ní chĩndee ñaha-gã xii-í ní quide-í titní núú sã vã yõ tñáhí ndàcu cada te ní cuñúhu-ndo, te sã dúcá<sup>n</sup> ñĩ chĩndee ñaha-gã xii-í ní cutnùní iní-ndó sã yúhú



cúu ndisa-í ñ<sup>n</sup> téé ní cachí Xítóhó Jesucristú sá cãhá<sup>n</sup>-í tnúhu-gá. <sup>13</sup> Te yúhú ñ<sup>n</sup>-ni quide ndìhi ñaha-í xii-ndo ndìhi nchaa dava-gá cue ñáyiú ndècu ichi Xítóhó Jesucristú, te dìcò-ni sá yúhú ñá túú ní cuìní-í taxi-ndo sã xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcá<sup>n</sup> nĩ quide-í ñá túú ní cuìní-í chindee ñaha-ndo te chí cádá cãhnu iní ñáhá xii-í.

<sup>14</sup> Te vitna sa ndècu túha-í sá quíxì-í núu ndécú-ndó, te sá quíxì còto ñaha tucu-í xii-ndo cùu-xi xito cuu úní sá quíxì-í, te cuìní-í sá vã dándìhú-ndó ìní-ndó ndècu-ndo sá táxì-ndó cùu xii-í, chi ñá díú xǎ<sup>n</sup> ndéé iní-í chi mee-ndo ndéé iní-í quixi-í. Te duha cãhá<sup>n</sup>-í chi nchòhó xíní-ndó sã cuè téé cùu tátá sãñaha-güedé sá cúu-xí cuè déhe-güedé te ñá díú cuè déhe-güedé sãñaha-güedé sá cúu-xí mèe-güedé. <sup>15</sup> Te yúhú ío váha cùu iní-í dandòñuhu-í sá ndécú ndìhi-í nàcuáa ndacu-í chindee ñaha-í xii-ndo cùndecu váha-ndo sã cúu-xí Yã Ndiõxí chi ío cùdì ìní-í, te cuèi na cùu-í sá cuendá-ndó, chi ío cùu iní ñáhà-í xii-ndo, te sã dúcá<sup>n</sup> cùu iní ñáhà-í xii-ndo, te sãnuu sã nchòhó ñá túú cùu iní ñáhá cãvihi-ndo xii-í.

<sup>16</sup> Te ñaha-ndo sá ñá túú ní dándìhú-í iní-ndó nã taxi-ndo cùu xii-í, dico dava-ndo cãchí-ndó sã ío váha ní xito-í nàcuáa ní quide-í nàcuáa ní dándàhú ñáhà-í xii-ndo.

<sup>17</sup> Te chí cãhá<sup>n</sup> te núu yúhú ní dándàhú ñáhà-í xii-ndo ndìhi cue téé ní tendaha-í ní quixi coto ñaha xii-ndo. <sup>18</sup> Te ní cãhá<sup>n</sup> ndáhú-í núu tẽ Titú ndìhi núu ìngá tucu téé ndècu ndìhi-o ichi Xítóhó Jesucristú ní quixi coto ñaha-güedé xii-ndo. Te nchòhó cùtnùní iní-ndó sã tẽ Titú ñá túú ní dándàhú ñáhà-dě xii-ndo, te duca<sup>n</sup> chi ñ<sup>n</sup>-ni sãni iní-ndí te ñ<sup>n</sup>-ni quide-ndí.

<sup>19</sup> Te cudana te sãni iní-ndó sã sã dúhá cãhá<sup>n</sup>-ndí te tàunihnu-ndí mée-ndí, dico ñá díú dùca<sup>n</sup> queue-xi tnúhu cãhá<sup>n</sup>-ndí, chi cãhá<sup>n</sup>-ndí nàcuáa tàú-xi cãhá<sup>n</sup>-ndí chi ndècu ndìhi-ndí Xítóhó Jesucristú, te mee Yã Ndiõxí náhá ndáá-gá nàcuáa ndùu tnúhu cãhá<sup>n</sup>-ndí, te nchaa sã cãhá<sup>n</sup>-ndí cúu-xí cuendá nchòhó cue ñáyiú ío cùu iní-ndí, te cãhá<sup>n</sup>-ndí nàcuáa cundecu váha-ndo ichi Xítóhó Jesucristú. <sup>20</sup> Te ío sãni iní-í cuendá-ndó chi na cuáhá<sup>n</sup> te òré

quixi-í quixi coto ñaha-í xii-ndo, te ñá túú quide-ndo nacuáa cuu váha iní-í, te sá dúcá<sup>n</sup> te yúhú cãhá<sup>n</sup>-í nàcuáa vá cúu váha iní-ndó, te duca<sup>n</sup> ío sãni iní-í cuendá-ndó chi na cuáhá<sup>n</sup> òré quexìo-í te nàá-ndó, àdi ndecu-ndo ichi cuédú iní, àdi cudéé<sup>n</sup> núu tnáhá-ndó, àdi ñá túú cùu ñ<sup>n</sup>-nuu-ndo ndecu-ndo, àdi cãhá<sup>n</sup> cuèhé-ndó cuendá tnàha ñáyiú-ndo núu chítú núu tàcá, àdi satnuhu tnaha-ndo, àdi quide cahnu-ndo mee-ndo, àdi quide dusa<sup>n</sup> dóho tnàha-ndo. <sup>21</sup> Te ío sãni iní-í cuendá-ndó chi na cuáhá<sup>n</sup> òré quixi-í, te Yã Ndiõxí cada-gá te cucaha<sup>n</sup> núu-í sá cuendá-ndó, te ío ndìhú iní-í cuendá-ndó te núu vátá dáñá-gã-ndó nchaa sã cuèhé sá dúhá nĩ ngüíta-ndo quide-ndo ndéé sanduu, te vãi-ndo ní ngüíta-ndo dùca<sup>n</sup> quide-ndo, chi ndècu-ndo ichi díí iní te nándi-gá nchaa sã cuèhé sá dúhá quide-ndo, te duca<sup>n</sup> ío ndìhú iní-í te núu vátá dáñá-gã-ndó nchaa xǎ<sup>n</sup>.

## 13

### *Tnúhu ndéé núu nĩ ndìhi-ná*

<sup>1</sup> Te sá quíxì-í vitna núu ndécú-ndó cùu-xi xito cuu úní sá quíxì còto ñaha-í xii-ndo. Te cãchí tnúhu-í xii-ndo sã òré cundáá cuèchi-ndo te canehe núu úú àdi úní ñáyiú cãhá<sup>n</sup> ndáá nàcuáa ndùu cuèchi-ndo. <sup>2</sup> Te yúhú sa ní cãhá<sup>n</sup>-í

dóho-ndo cùtnáhá ní quixi-í ní quixi coto ñaha-í xii-ndo xito cuu úú, te díu-ni duca<sup>n</sup> cãhá<sup>n</sup> tucu-í dóho-ndo vitna vátá quíxì tucu-gá-í quixi coto ñaha-í xii-ndo. Te nchòhó ñáyiú ní cunduu nĩ ngüíta quide nchaa sã cuèhé sá dúhá, tenáá ñáhà-í xii-ndo òré quexìo-í te núu vátá dáñá-gã-ndó nchaa sã cuèhé sá dúhá quide-ndo te tnáhá nchaa dava-gá-ndó tẽnaá ñáhà-í xii-ndo. <sup>3</sup> Te nchòhó cuìní-ndó quèní-ndó núu ndáá sá quidè-í núu Xítóhó Jesucristú cãhá<sup>n</sup>-í yuhu-gá, dico dàvá-án cutnùní ndáá iní-ndó. Te Xítóhó Jesucristú quidè-gã nàcuáa cutnùní iní-ndó sã ío cãhnu cuu-gá te ñá túú quide-gá dàtná quidè ñ<sup>n</sup> ñáyiú ñá túú nihí ndéé cùndecu. <sup>4</sup> Te Xítóhó Jesucristú ní ndoho-gá dàtná ñ<sup>n</sup> ñáyiú ñá túú nihí ndéé cùndecu, chi ní sañhi ñaha-güedé xii-gá núu cùrúxí dico mee Yã Ndiõxí ní quide-gá ní nihí ndéé Xítóhó Jesucristú ní ndoto-gá ndécú-gã

vitna, te tnàhá nchúhú tucu duca<sup>n</sup> yãha-ndí ñá túú nihí ndéé-ndí cundecu-ndí, dico mee Yã Ndiõxí chindèe ñaha-gá xii-ndí nihí ndéé-ndí ndécú-ndí cuendá sá ndécú ndihí-ndí Xítohó Jesucristú, te xiã<sup>n</sup> nõu ndàcu-ndí quidé-ndí nàcuáa tàú-xi cunduu sá cúú-xi-ndó.

<sup>5</sup> Te chí cáda cuendá váha te núu ndisa sá sàndáa iní-ndó tnúhu Xítohó Jesucristú, te núu ndáa sá ndécú-ndó ìchi-gá te cùtnuní iní-ndó sã ndécú-ndó ndihí-gá. <sup>6</sup> Te cuiní-ndí sá nchòhó cutnùní ndáa iní-ndó sã nchúhú ndécú ndihí ndisa-ndí Xítohó Jesucristú. <sup>7</sup> Te nchúhú càhá<sup>n</sup> ndihí-ndí Yã Ndiõxí cuendá-ndó cuendá sá vã cáda-ndó nì ì<sup>n</sup> sá cuèhé sá dúhá, te vã cání ìní-ndó sã sà dúcá<sup>n</sup> càhá<sup>n</sup> ndihí-ndí-gá cuendá-ndó, te cuiní-ndí sá nchòhó cutnùní iní-ndó sã nchúhú ío ndècu yĩñuhu-ndí núú-gã, te ñáhá chi càhá<sup>n</sup> ndihí-ndí-gá cuendá-ndó chi cuiní-ndí sá nchòhó cada váha-ndo cundecu-ndo cuéi sàni iní-ndó sã nchúhú cúú-ndí cue téé ñá túú ndècu yĩñuhu núú-gã. <sup>8</sup> Te nchúhú mee-ni càhá<sup>n</sup> váha-ndí cuendá tnúhu ndáa tnúhu Yã Ndiõxí, te ñá túú càhá<sup>n</sup>-ndí ì<sup>n</sup> tnúhu sá ñà túú tàú-xi càhá<sup>n</sup>-ndí cuendá tnúhu-á<sup>n</sup>. <sup>9</sup> Te cùdíí ìní-ndí sá ñà túú-gã xíní ñuhu-xi cada-ndí nàcuáa níhí ndéé-ndí tenàa ñáhá-ndí xii-ndo càhá<sup>n</sup>-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchúhú càhá<sup>n</sup> ndihí-ndí Yã Ndiõxí cuendá-ndó cuendá sá nchòhó cundáa-ndó cundecu-ndo ñá túú-gã ná cumání-ndó nõú-gã. <sup>10</sup> Te xiã<sup>n</sup> nõu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cundecu ndihí ñaha-í xii-ndo te vã ío níhí càhá<sup>n</sup>-í dóho-ndo nàcuáa ndùu tnúhu ndee iní ní taxi Xítohó Jesucristú ndécú ndihí-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhí<sup>n</sup>, te ñá díú cuendá sá cánúichi ñaha-í xii-ndo cuíta nihnu-ndo.

<sup>11</sup> Te vitna nchaa nchòhó ñá yiu ndècu ndihí-ndí ichi Xítohó Jesucristú ío quide ndee iní ñáhá-ndí xii-ndo, te ío chí ndúcú nàcuáa cada-ndo cundáa-ndó nõú Yã Ndiõxí cuendá sá ñà túú tnàhí-gá ná cumání-ndó nõú-gã, te ndee ndèe cada

iní-ndó cundecu-ndo, te chí cúú ì<sup>n</sup>nuu cundecu ndihí tnaha, te duca<sup>n</sup> te Yã Ndiõxí cundecu ndihí ñaha-gã xii-ndo chí ío cùu iní ñáhá-gã xii-o, te diu-gá quidé-gã ío váha cùu iní-ó ndècu-o. <sup>12</sup> Te ndihí tnúhu yĩñuhu chí cáda ndèe iní tnáhá. <sup>13</sup> Te nchaa ñá yiu cùu cuendá Yã Ndiõxí ndécú ìha quide ndee iní ñáhá-yu xii-ndo.

<sup>14</sup> Te xicá<sup>n</sup> táhú-ndí núú Xítohó Jesucristú sá ío na chindèe chitúu ñaha-gã xii-ndo. Te mee Yã Ndiõxí ná cáda-gã nàcuáa cutnùní iní-ndó sã ío cùu iní ñáhá-gã xii-ndo, te Espíritú-gá cundee cùu cahnu iní-ndó cundecu-ndo. Te duca<sup>n</sup> na cunduu. Te ío chí cáda ndèe iní-ñã vitna.

## TUTÚ NÍ CADÚHA TĒ PĀBLŪ QUIH<sup>n</sup> NDAHA ÑÁYIU DISTRITÚ GÀLACIÁ

*Té Păblú cādŭha-dé tutú quíh<sup>n</sup> ndaha nchaa ñáyiu sàndáá iní ñáhá xii Xítóhó Jesucristú ndécú dīstritú Gălaciá*

<sup>1</sup> Te yúhú té Păblú ní tendaha ñaha Xítóhó Jesucristú, ndihí Dútú Ndiöxí véxi-í cáhá<sup>n</sup>-í tnúhu-gá. Te diu Yá Ndiöxí ní dándótó-gă Xítóhó Jesucristú Yaá ní xihí ní cùu. Te cächí tnúhu-í xii-ndo sã ñà díú ñáyiu ñuyú-a ni tēndaha ñaha xii-í véxi-í, te ni Yá Ndiöxí te ni Xítóhó Jesucristú ñá túú ní xăha<sup>n</sup>-gă xii ì<sup>n</sup> ñáyiu quixí-yu cachí tnúhu-yu năcuáa cada-í. <sup>2</sup> Te yúhú té Păblú cādŭha-í tutú-a ndihí nchaa dava-gă ñáyiu ndècu ichi Yá Ndiöxí ndécú ndihí-í iha cuendá daquixi-í ndaha nchòhó ñáyiu sàndáá iní ñáhá xii Xítóhó Jesucristú ndécú dīstritú Gălaciá. <sup>3</sup> Te xicá<sup>n</sup> tãhù-í núú Dútú Ndiöxí, ndihí núú Xítóhó Jesucristú sá ïo na chīndee chitúu ñaha-gă xii-ndo, te duca<sup>n</sup> ndi nduú-gá ná cādá te ío váha cuu iní-ndó cūndecu-ndo. <sup>4</sup> Te Xítóhó Jesucristú ní xihí-gá sá cuendá nchaa cuéchi nchoo cué ñáyiu ndècu ñuyú-a. Te duca<sup>n</sup> ñi quide-gá, chí cuiní-gá sá vã cūndecu-o ichi cuehé ichi duha. Te duca<sup>n</sup> ñi cuu, chí Dútú Ndiöxí duca<sup>n</sup> ñi cuiní-gá cunduu. <sup>5</sup> Te ío chí ná ndácá<sup>n</sup> tãhú-ó núú Yá Ndiöxí cuendá sá ïo cãhnu cuu-gá, te diu-ni duca<sup>n</sup> cãda-o ni caa ni quíh<sup>n</sup>! Te duca<sup>n</sup> na cūnduu.

*Mee-ni tnúhu Xítóhó Jesucristú cúu-xi tnúhu sá cáhá<sup>n</sup> năcuáa naníhí tãhú-ó*

<sup>6</sup> Te ío cūñúhu-í cúu chí ío ndihí ní dáñá-ndó ichi Yá Ndiöxí. Te Yaá-á<sup>n</sup> ní cáhá<sup>n</sup> ñáhá-gă xii-ndo, chí Xítóhó Jesucristú ío ní cundáhú iní ñáhá-gă ní quide váha ñaha-gă xii-ndo, te vitna dăcuaha tucu-ndo ingá tnúhu, te cächí-ndó sã xă<sup>n</sup> dăcácu nihnu ñaha-xi xii-ndo núú ùhú núú ndáhú. <sup>7</sup> Dico ñáhá, chí ñá túú-gă tnúhu sá dăcăcu nihnu ñaha xii-o núú ùhú núú ndáhú. Te dicó-ni sá ío ñáyiu véxi dăticá nuu ñahá-yu xii-ndo dānehé ñáhă-yu tnúhu sá dăcuíta nihnu ñaha xii-ndo, chí

tnúhu-á<sup>n</sup> ñà túú cùu-xi tnúhu Xítóhó Jesucristú. <sup>8</sup> Te yúhú cáhá<sup>n</sup>-í tnúhu Xítóhó Jesucristú, dico núu ío ñáyiu véxi dānehé ñáhá xii-ndo ingá tnúhu sá ñà túú ní dānehé ñáhà-í xii-ndo, te nchòhó cachí-ndó sã ñáyiu-á<sup>n</sup> nacháhu-yu núú Yá Ndiöxí sá dúcá<sup>n</sup> quidé-yu. Te cuéi yúhú, te núu na dàma-í tnúhu danèhé ñáhà-í xii-ndo, te diu-ni duca<sup>n</sup> cáhá<sup>n</sup>-ndó sã năchăhu-í núú-gă te núu duca<sup>n</sup> na cãda-í. Àdi te núu ì<sup>n</sup> espíritú xínú cuéchi núú-gă véxi-xi cáhá<sup>n</sup>-xi ingá tnúhu sá ñà túú ní dānehé ñáhà-í xii-ndo năcuáa naníhí tãhú-ndó ñá, te diu-ni duca<sup>n</sup> cáhá<sup>n</sup>-ndó sã năchăhu-xi núú Yá Ndiöxí te núu duca<sup>n</sup> na cãda-xi. <sup>9</sup> Te diu-ni duha sa ní dānehé ñáhà-í xii-ndo sã núu véxi ñáyiu dānehé ñáhá ingá tnúhu sá ñà túú ní dānehé ñáhà-í xii-ndo năcuáa naníhí tãhú-ndó ñá, te cachí-ndó sã ñáyiu-á<sup>n</sup> nacháhu-yu núú Yá Ndiöxí sá dúcá<sup>n</sup> quidé-yu, duha ní cachí-í xii-ndo.

<sup>10</sup> Te duha ndùu tnúhu cáhá<sup>n</sup>-í chí nchòhó sa xini-ndó sã yúhú cuiní-í sá Yá Ndiöxí cáhá<sup>n</sup>-gá sá quidé vãha-í ndécù-í, te ñá díú sã ñáyiu ñuyú-a cachí-yu sá quidé vãha-í, àdi sá ïo cūdí ìnī-yu nchaa năcuáa quide-í ndécù-í. Te núu na cãni iní-í cūdiu-í núú ñáyiu ñuyú-a, te ñá túú cùu-í tēe xinu cuechi núú Xítóhó Jesucristú te núu duca<sup>n</sup> na cãda-í.

*Năcuáa ní cuu ní ngúita té Păblú cáhá<sup>n</sup>-dé tnúhu Yá Ndiöxí*

<sup>11-12</sup> Te nchòhó ñáyiu ndècu ndihí-í ichi Xítóhó Jesucristú cächí tnúhu-í xii-ndo sã tnúhu sá dānehé ñáhà-í xii-ndo năcuáa naníhí tãhú-ndó cùu-xi tnúhu sá ñi cachí tnúhu mee Xítóhó Jesucristú xii-í, te ñá díú ì<sup>n</sup> ñáyiu ñuyú-a ni cãhu iní-yu tnúhu-á<sup>n</sup>, àdi danèhé ñáhă-yu xii-í, chí mee Xítóhó Jesucristú ní dānehé ñáhá-gă.

<sup>13</sup> Te nchòhó sa nihí-ndó tnúhu năcuáa ní xóo cada-í cūtnáhá nchícú<sup>n</sup> nihnu-í nchaa năcuáa dăcuaha ñáyiu cùu ndi mee-í ñáyiu isràél ní cùu. Te dává-á<sup>n</sup> ïo ní xóo cuu úhú iní-í nchaa ñáyiu ndècu ichi Yá Ndiöxí, te nāndi sá ñi xóo cada-í-yu, te ní cuiní-í danàa-í-yu ni cùu. <sup>14</sup> Te yúhú ío-gá ní xóo quene cáva-í ní xóo dăcuàha-í nchaa sá dăcuàha ñáyiu cùu ndi mee-í dăcúxí ñáyiu ì<sup>n</sup>-ni cuíà-í ndihí-yu ni cùu, te ío-gá

ní xóo cuiní-í cada ndáá-í canchicú<sup>n</sup> ni-hnu-í nchaa nàcuáa ní dánèhé ñáhá cue ñaní tnáhà-í ní xíndecu ndéé sanaha ni cùu. <sup>15</sup> Te ndéé cùtnáhá vátá cécú-gá-í Yá Ndiöxí sa nèhe váha ñaha-gã xii-í cuendá sá cãhá<sup>n</sup>-í tnúhu-gá, núu xíã<sup>n</sup> ní cãhá<sup>n</sup> ñáhá-gã xii-í quidè-í chi<sup>u</sup><sup>n</sup>-gá vitna, te sá dúcá<sup>n</sup> nĩ quide-gá te ío váha ní quide ñaha-gã xii-í. <sup>16</sup> Te òré ní cãhá<sup>n</sup> ñáhá Yá Ndiöxí xii-í te ní cachí tnúhu-gá cuendá Déhe-gá Xítohó Jesucristú. Te duca<sup>n</sup> nĩ quide Yá Ndiöxí cuendá sá cuiní-gá sá cùñaha-í xii ñáyi<sup>u</sup> ñá túú cùu ñáyi<sup>u</sup> isràèl cuendá Yaá cúú Dèhe-gá. Te cùtnáhá ní cãhá<sup>n</sup> ñáhá Yá Ndiöxí xii-í, te vá yóo ì<sup>n</sup> dîi núú-xi ni ndùcu tnúhu-í nàcuáa cada-í. <sup>17</sup> Te nĩ ñà túú ní sãhá<sup>n</sup>-í ñúú Jerusàlén nducu tnúhu-í núú cue téé díhna nuu nĩ tendaha Xítohó Jesucristú cãhá<sup>n</sup> tnúhu-gá nõu nása cada-í, chi ndîhi-ni ní sãhá<sup>n</sup>-í distritú Àrabíá ní xíndecu tnaa-í te dãtnùní cuánuhú tucu-í ñúú Dàmascú.

<sup>18</sup> Te núú ùní cuíá sã nĩ cãhá<sup>n</sup> ñáhá Yá Ndiöxí xii-í, te ní sãhá<sup>n</sup> tucu-í ñúú Jerusàlén ní cãhá<sup>n</sup> ndîhi-í té Pèlú, te ní xíndecu-í ndîhi-dé sãhú<sup>n</sup> nduu. <sup>19</sup> Te tnáhá té Jàcobó ñaní Xítohó Jesucristú ní cãhá<sup>n</sup> ndîhi-í. Te ñá túú ní xini-í dawa-gá cue téé ní tendaha Xítohó Jesucristú cãhá<sup>n</sup> tnúhu-gá. <sup>20</sup> Te Yá Ndiöxí ndéhé ndîi ndehe caxi-gá sá ncháá tnúhu tèe-í núú tütú-a sá cúú-xí-ndó cùu-xi ì<sup>n</sup> sá ndàá.

<sup>21</sup> Te sátá nĩ sãhá<sup>n</sup>-í ñúú Jerusàlén, te dãtnùní ní sãhá<sup>n</sup>-í distritú Sìriá, ndîhi distritú Cìliciá. <sup>22</sup> Te nchaa ñáyi<sup>u</sup> xíndecu ichi Xítohó Jesucristú ndécú distritú Jùdeá ñá túú xini ñáhã-yu xii-í ní cùu. <sup>23</sup> Dico ní xóo níhí-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhá xii nchaa nchoo ñáyi<sup>u</sup> ndècu ichi Xítohó Jesucristú cãhá<sup>n</sup>-dé tnúhu-gá núú ñáyi<sup>u</sup> cuendá quíndáá iní ñáhã-yu xii-gá, te diu-dé nándi sá quidé ñàha-dé, te cuiní-dé danàa ñaha-dé cuendá sá vã cóo-gã ñáyi<sup>u</sup> quíndáá iní ñáhá xii-gá ní cùu”, duha ní cachí-yu cuendá-í. <sup>24</sup> Te ní ngüíta-yu ní cachí-yu sá ío cãhnu cuu Yá Ndiöxí cuendá sá ñà túú-gã quidè-í dãtná ní xóo cada-í.

## 2

*Té Pãblú ní níhí tnáhá-dé ndîhi dawa-gá cue téé cãhá<sup>n</sup> tnúhu Yá Ndiöxí*

<sup>1</sup> Te ní nútahá úxícúmí cuíá sã nĩ sãhá<sup>n</sup>-í ñúú Jerusàlén ní cãhá<sup>n</sup> ndîhi-í té Pèlú, te dãtnùní ndécá-í té Bèé ní sãhá<sup>n</sup>, te tnáhá té Titú ní sãhá<sup>n</sup> ndîhi-ndí-dé. <sup>2</sup> Te ní sãhá<sup>n</sup>-í chi mee Yá Ndiöxí ní cachí-gá sá quíhí<sup>n</sup>-í. Te yacá<sup>n</sup> ní tacá mee-ni cue téé cùnuu. Te ní xãhá<sup>n</sup>-í xii-güedé nàcuáa ndùu tnúhu dãnèhé-í ñáyi<sup>u</sup> ñá túú cùu ñáyi<sup>u</sup> isràèl cuendá naníhí tãhú-yu. Te duca<sup>n</sup> nĩ quide-í cuendá cuiní-í quini-güedé nàcuáa ndùu chi<sup>u</sup><sup>n</sup> quide-í, chi nacuáhá<sup>n</sup> cachí-güedé sá ñà túú nãndîhi-xi. <sup>3</sup> Te té Titú téé ndècu ndîhi-í chi ñá díú téé isràèl cúú-dè, dico ñá túú ní quide yica-güedé cuáha-güedé sèñá ñî-dé. <sup>4</sup> Te ñáyi<sup>u</sup> cãhí sá ndécú ichi Xítohó Jesucristú te ñá ndàá sá ndécú-yu ichi-gá, ñáyi<sup>u</sup>-á<sup>n</sup> nĩ chitnahá ñáhã-yu xii-ndí cuendá cuiní-yu quini-yu nása quide-ndí ndécú-ndí ichi Xítohó Jesucristú. Te duca<sup>n</sup> nĩ quidé-yu cuendá sá nchühú sa ní cácu nihnu-ndí ñá túú-gã quidé-ndí nchaa nàcuáa ní cãhá<sup>n</sup> ndîi Moisés. Te cuiní-yu sá núcuíta saa tucu-ndí cada-ndí nchaa nàcuáa ní cãhá<sup>n</sup> ndîi nucúndecu-ndí dãtná ní xíndecu-ndí cùtnáhá vátá cãcu nihnu-gá-ndí núú tnúhu-á<sup>n</sup> ni cùu. <sup>5</sup> Te nchühú ñá túú tnãhí ni dãña-ndí méé-ndí dandãhú ñáhã-yu xii-ndí. Te duca<sup>n</sup> nĩ quide-ndí, chi cuiní-ndí sá ñà túú nãgá tnúhu dácãnuu ndîhi tnúhu sá cãhá<sup>n</sup> nàcuáa naníhí tãhú-ó ndècu ndîhi-ndo.

<sup>6</sup> Te ni ì<sup>n</sup> tnúhu sá vátá quini-gá-í ñá túú ní cãhí tnúhu cue téé cùnuu núú ñáyi<sup>u</sup> cada-í. Dico yúhú chi ñá túú ní quide cuendá-í nõu cùnuu-güedé àdi ñá túú cùnuu-güedé, chi núú Yá Ndiöxí ì<sup>n</sup>-ni cùu-o nchaa-o. <sup>7</sup> Te ní cutnùní iní-güedé sá Yá Ndiöxí ní cachí-gá xii-í sá cãhá<sup>n</sup>-í tnúhu-gá núú ñáyi<sup>u</sup> ñá túú cùu ñáyi<sup>u</sup> isràèl dãtná ní quide-gá té Pèlú ní xãhá<sup>n</sup>-gã cãhá<sup>n</sup>-dé tnúhu-gá núú ñáyi<sup>u</sup> isràèl. <sup>8</sup> Te duca<sup>n</sup> nĩ cutnùní iní-güedé, chi diu-ni Yá Ndiöxí Yaá chíndèe ñaha xii té Pèlú cãhá<sup>n</sup>-dé tnúhu-gá núú ñáyi<sup>u</sup> isràèl, diu-ni Yaá-á<sup>n</sup> chíndèe ñaha-gá xii-í cãhá<sup>n</sup>-í tnúhu-gá núú ñáyi<sup>u</sup> ñá túú cùu ñáyi<sup>u</sup> isràèl.

<sup>9</sup> Te té Jàcobó, ndîhi té Pèlú, ndîhi té Juáá, cue téé ío cùnuu-gá ní cutnùní iní-güedé sá Yá Ndiöxí ío chíndèe ñaha-gá xii-í quidè-í chi<sup>u</sup><sup>n</sup>-gá. Te ío váha ní cãhá<sup>n</sup>



ndihi ñaha-güedë xii-í, ndihi té Bèè, te ní cuu ñnuu-ndí sá nchùhú quíhí<sup>n</sup>-ndí cáhá<sup>n</sup>-ndí tnúhu Yá Ndiöxí núú nchàa ñáyiú ñá túú cùu ñáyiú isràél, te mee-güedë cáhá<sup>n</sup>-güedë tnúhu-gá núú ñáyiú isràél. <sup>10</sup> Te ñ<sup>n</sup>-ni tnúhu ní cáhá<sup>n</sup>-güedë dóho-ndí te ní cachí-güedë xii-ndí sá chíndèe-ndí cue ñáyiú ndàhú, te sa duca<sup>n</sup> tnàhí sàni iní-ndí cada-ndí.

### *Té Păblú càhá<sup>n</sup>-dé dóho té Pèlú ñuú Antiòquiá*

<sup>11</sup> Te cùtnàhá ní sáhá<sup>n</sup> té Pèlú ñuú Antiòquiá yàcá<sup>n</sup> ní cáhá<sup>n</sup>-í dóho-dé, chi quide-dé ñ<sup>n</sup> sá ñà túú tàú-dé cada-dé ní cùu. <sup>12</sup> Te quide váha-dé ní cùu chi xèxi-dé ndihi ñáyiú ñá túú cùu ñáyiú isràél, dico òré ní sáá ñ<sup>n</sup> úú ñáyiú cùndihi té Jàcobó, te òré-á<sup>n</sup> ñà túú-gă ní cuiní-dé caxi-dé ndihi ñáyiú-á<sup>n</sup>. Te duca<sup>n</sup> ñ<sup>n</sup> quide-dé chi ní yùhú-dé cue ñáyiú nchìcú<sup>n</sup> nihnu quide nchaa nacuaá ní cáhá<sup>n</sup> ndíi Moisés sá vă càhá<sup>n</sup> váha-yu cuendá-dé. <sup>13</sup> Te tnàhá dava-gă ñáyiú isràél xíndecu ichi Yá Ndiöxí ñá túú quide váha-yu, chi quidé-yu dàtná quidé tē Pèlú ní cùu, te ndéé tnàhá té Bèè ní nguíta-dé duca<sup>n</sup> quide-dé ní cùu. <sup>14</sup> Te òré ní xini-í sá ñà túú quide-güedë ndihí-yu nàcuáa càhá<sup>n</sup> tnúhu Yá Ndiöxí, te núú nchàa ñáyiú ndècu ichi Yá Ndiöxí ní xáha<sup>n</sup>-í xii té Pèlú: “Yòhó cúu-n tēe isràél, te ñá túú quide-n nchaa nacuaá quide ñáyiú isràél, chi quide-ni-n datná quidé nchàa ñáyiú ñá túú cùu ñáyiú isràél. Te núú duca<sup>n</sup> quide-n, ¿te ná cuendá dánèhé-n ñáyiú ñá túú cùu ñáyiú isràél sá cádă-yu nchaa nàcuáa quide ñáyiú isràél?”, duha ní xáha<sup>n</sup>-í xii té Pèlú.

### *Ñ<sup>n</sup>-ni nànhí tàhú-ó ndihi ñáyiú isràél nũ na quíndáá iní-ó Xítóhó Jesucristú ndihí-yu*

<sup>15</sup> Te yúhú ndihi té Pèlú cúu-ndí ñani tnàhá ñáyiú isràél, te ñá túú ndècu-ndí ichi cuèhé ichi duha dàtná ndécú nchàa ñáyiú ñá túú cùu ñáyiú isràél. <sup>16</sup> Te xini-ó sá vă cùndècu-gă cuéchi-o nũú Yá Ndiöxí te núú na quíndáá iní-ó Xítóhó Jesucristú, te ñá díú sá cànchicú<sup>n</sup> nihnu-o càda-o nchaa nacuaá ní cáhá<sup>n</sup> ndíi Moisés. Te tnàhá dava nchùhú ñáyiú isràél sàndáá iní-ndí Xítóhó Jesucristú, te xíá<sup>n</sup> cùtnùní iní-ndí sá ñà túú-gă cuéchi-ndí ndécú nũú-gă, dico ñá

díú sá ñ<sup>n</sup> cànchicú<sup>n</sup> nihnu-ndí ní quide-ndí nàcuáa ní cáhá<sup>n</sup> ndíi Moisés, chi cuendá sá sàndáá iní-ndí Xítóhó Jesucristú. Te vă yòo ñ<sup>n</sup> cachí-ó sá ñà túú ndècu cuéchi-xi núú Yá Ndiöxí cuendá sá nchìcú<sup>n</sup> nihnú-yu nchaa nàcuáa ní cáhá<sup>n</sup> ndíi Moisés.

<sup>17</sup> Te núú cuiní-ó sá vă cùndècu cuéchi-o nũú Yá Ndiöxí cuendá sá sàndáá iní-ó Xítóhó Jesucristú, te xíá<sup>n</sup> cùtnùní iní-ó sá ñà túú quide váha-o. ¿Te vă cúu tnàhí cani iní-ó sá Xítóhó Jesucristú dánèhé ñáhá-gă xii-o sá vă cádă váha-o cùndecu-o! <sup>18</sup> Te yúhú cànchí-í sá vă cànchicú<sup>n</sup> nihnu-gă-ó nchàa nacuaá ní cáhá<sup>n</sup> ndíi Moisés, dico núú vitna cànchí-í sá xini ñùhu-xi cada-o nchaa nacuaá ní cáhá<sup>n</sup> ndíi ña, te ñá túú quide váha-í núú Yá Ndiöxí te núú duca<sup>n</sup> na càda-í. <sup>19</sup> Te yúhú duu<sup>n</sup> duu<sup>n</sup> ní cutnùní iní-í sá vă ndácù-í càda-í nchaa nàcuáa ní cáhá<sup>n</sup> ndíi Moisés nũú xíá<sup>n</sup> ní dáñà-í ñá túú-gă nchìcú<sup>n</sup> nihnu-í nchaa nàcuáa ní cáhá<sup>n</sup> ndíi cuendá sá cuiní-í cundecu-í sá cúu-xi Yá Ndiöxí. <sup>20</sup> Te Xítóhó Jesucristú ní xihí-gă cuendá-í, dico dàtná tnúhu sá tnàhá-í ní xihí ndihí-gă, chi ñá cúu-gă cada-í nchaa nàcuáa sàni iní mēe-í, chi Xítóhó Jesucristú-nă ndécú ndihi ñaha-gă xii-í táxi tnùní ñáhá-gă. Te vitna ndècu-í ñuyú-a, te ío sàndáá iní-í Xítóhó Jesucristú Déhe Yá Ndiöxí, te chindee ñaha-gă xii-í. Te díu-ni Xítóhó Jesucristú ío cùu iní ñáhá-gă xii-í nũú ní xihí-gă núú cùrúxí sá cuendá-í. <sup>21</sup> Te vitna ñá túú dàquee tíhù-í sá váha ní quide ñaha Yá Ndiöxí xii-í, chi núú ni ndàcu-o vă cùndècu cuéchi-o nũú Yá Ndiöxí cuendá sá nchìcú<sup>n</sup> nihnu-o quide-o nchaa nacuaá ní cáhá<sup>n</sup> ndíi Moisés ní cùu ña, te àú<sup>n</sup> nă cuu ní xihí Xítóhó Jesucristú ní cùu te núú duca<sup>n</sup>.

## 3

### *Vă dáñá ndèé-ó quíndáá iní-ó tnũhu Xítóhó Jesucristú*

<sup>1</sup> Te nchòhó ñáyiú distritú Gàlaciá, ñáyiú sa xíndecu ichi Xítóhó Jesucristú, ¿ná cuendá ío ñíí iní-ndó ñà cuiní-ndó tní-ndo nchaa tnúhu càhá<sup>n</sup>-gă?, ¿te yoo ní dádăhu ndodo iní ñáhá xii-ndo núú duca<sup>n</sup> quide-ndo? Te nàha-ndo sá ío váha ní dánèhé ñáhá-ndí xii-ndo nàcuáa ní cuu ní xihí Xítóhó Jesucristú. <sup>2</sup> Te vitna cáhá<sup>n</sup>-ndó nũú sá nchìcú<sup>n</sup> nihnu-ndo nchàa nacuaá ní cáhá<sup>n</sup> ndíi Moisés ní níhí-ndó

Espiritú Yá Ndiöxí ndécú ndìhi-ndo, àdi sá ni sàndáá iní-ndó tnùhu Xítóhó Jesucristú sá nǐ dánèhé ñáhá-ndǐ xii-ndo nǐ níhí-ndó Espiritú-gá ndécú ndìhi-ndo. <sup>3</sup> Te nchòhó ío nǐ ðíquí-ndó chi Espiritú Yá Ndiöxí tá quide váha ñaha-xi xii-ndo cuáhá<sup>n</sup> ní cùu. ¿Te náa vitna mee-ná-ndó cuíní-ndó càda-ndo nacuaá ta quide ñaha Espiritú-gá cuáhá<sup>n</sup> xii-ndo ni cùu-á<sup>n</sup>? <sup>4</sup> Te sàni ì<sup>n</sup> sàni úú iní-í cuendá-ndó sá áú<sup>n</sup> nà cuu nándi yáha-ndo ndècu-ndo ichi Yá Ndiöxí. <sup>5</sup> Te xini-ndó sá Yá Ndiöxí ní taxi-gá Espiritú-gá ní ngúndecu ndìhi-ndo, te ní quide-gá sá vǎ yòo tnàhí ndàcu cada núú-ndó nǐ xini-ndó. Te duca<sup>n</sup> nǐ quide-gá, chi ní sàndáá iní-ndó-gá, dico ñá ðíú cuendá nchaa nàcuáa ní cachí ndí Moisés cada ñáyiú duca<sup>n</sup> nǐ quide-gá.

<sup>6</sup> Te ndí Abrahám duca<sup>n</sup> ío ní sàndáá iní ndí Yá Ndiöxí, núú xiá<sup>n</sup> ní cachí-gá sá nǐ cudíu ndí núú-gǎ sá dúcá<sup>n</sup> nǐ quide ndí. <sup>7</sup> Te càchí tnúhu ndáá-í xii-ndo sá ncháá ñáyiú sàndáá iní ñáhá xii Yá Ndiöxí dàtná ní sàndáá iní ñáhá ndí Abrahám xii-gá, ñáyiú-á<sup>n</sup> ì<sup>n</sup>-ni cùú-yu ndìhi ndí núú-gǎ. <sup>8</sup> Te núú tùtú Yá Ndiöxí ní ngódó tnùní tnúhu váha, tnúhu sá nǐ xáha<sup>n</sup> Yá Ndiöxí xii ndí Abrahám, te duha ní xáha<sup>n</sup>-gǎ xii ndí: “Nchaa ñáyiú nǐhí ñuyíú cada váha-í-yu sá cuendá-n”, duha ní xáha<sup>n</sup>-gǎ xii ndí. Te sá dúcá<sup>n</sup> nǐ ngódó tnùní núú tùtú Yá Ndiöxí ndéé dàvá-á<sup>n</sup>, te xiá<sup>n</sup> cútnùní sá sàa nduu, te cue ñáyiú ñá túú cùu ñáyiú isràèl vá cùndècu-gá cuéchi-yu núú-gǎ te núu na quíndáá iní ñáhá-yu xii-gá. <sup>9</sup> Te xiá<sup>n</sup> núu nchaa ñáyiú sàndáá iní ñáhá xii Yá Ndiöxí cada váha ñaha-gǎ xií-yu dàtná ní quide váha-gá ndí Abrahám, chi ndí-á<sup>n</sup> duca<sup>n</sup> nǐ sàndáá iní ñáhá ndí xii-gá.

<sup>10</sup> Te nchaa ñáyiú cuíní cada nchaa nàcuáa ní cáhá<sup>n</sup> ndí Moisés cuendá sá cuíní-yu sá vǎ cùndècu-gá cuéchi-yu núú Yá Ndiöxí, ñáyiú-á<sup>n</sup> daña nǐhnu ñaha-gá xií-yu, chi vá ndácü-yu cada-yu nàcuáa sàni iní-yu, te duca<sup>n</sup> càda-gá chi quèe ndáá-xi nàcuáa càhá<sup>n</sup>-xi núú tùtú-gá núú càchí-xi sá ncháá ñáyiú ñá túú quide nchaandi túhú nàcuáa ní cáhá<sup>n</sup> ndí Moisés te daña nǐhnu ñaha-gá xií-yu. <sup>11</sup> Te núu na cànchicú<sup>n</sup> nǐhnu-ni-o càda-o nacuaá ní cáhá<sup>n</sup> ndí Moisés, te ñá túú vèdana chindee ñaha-xi xii-o nacuaá vá cùndècu-gá cuéchi-o núú Yá Ndiöxí. Te

ndáá chi núú tùtú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gǎ cuéchi-xi ndècu ío váha ndécú-yu núú-gǎ. <sup>12</sup> Te núu ðicó ío ñáyiú quide nchaandi túhú nàcuáa ní cáhá<sup>n</sup> ndí Moisés ñá, te ñá túú xini ñuhu-xi quíndáá iní-yu tnúhu Xítóhó Jesucristú, chi núú tùtú Yá Ndiöxí càchí-xi sá núu ðicó ío ñáyiú ndacu cada nchaa nàcuáa ní cáhá<sup>n</sup> ndí Moisés ñá, te cundecu váha-yu núú Yá Ndiöxí.

<sup>13</sup> Te tnúhu ní chídó tnùní ndí Moisés càchí-xi sá ío ndècu cuéchi-o núú Yá Ndiöxí cuendá sá ñá ndácú-ó càda-o nchaa nacuaá ní cáhá<sup>n</sup> ndí, te cuendá xiá<sup>n</sup> tá dàña nǐhnu ñaha-gá xii-o cuáhá<sup>n</sup>. Dico Xítóhó Jesucristú ní xido-gá nchaa cuéchi-o cuendá sá vǎ dáña nǐhnu ñaha-gá Yá Ndiöxí xii-o. Te càchí-xi núú tùtú Yá Ndiöxí: “Í<sup>n</sup> tée na càta caa-güedé ì<sup>n</sup> yutnu, te tée-á<sup>n</sup> cùú-dé tée dàña nǐhnu ñaha Yá Ndiöxí”, duha càchí-xi núú tùtú-gá. <sup>14</sup> Te duca<sup>n</sup> nǐ yáha Xítóhó Jesucristú, chi cuíní Yá Ndiöxí sá nduu táhú nchaa ñáyiú ñá túú cùu ñáyiú isràèl cundecu váha-yu dàtná ní nduu táhú ndí Abrahám ndécú váha ndí. Te duca<sup>n</sup> nǐ yáha-gá cuendá nchaa nchoo ñáyiú sàndáá iní ñáhá xii-gá ngúndecu ndìhi-o Espiritú Yá Ndiöxí sá nǐ cachí méé-gǎ taxi-gá.

#### *Nàcuáa ní cachí Yá Ndiöxí cada-gá*

<sup>15</sup> Te nchòhó cue ñáyiú ndècu ndìhi-í ichi Yá Ndiöxí na càchí tnúhu-í xii-ndo nàcuáa quide cue ñáyiú ñuyíú-a cuendá tecú tnùní-gá-ndó nàcuáa quide Yá Ndiöxí. Chi ñáyiú-á<sup>n</sup> òré cuíní-yu cada-yu ì<sup>n</sup> sá cáda-yu, te díhna-gá ndátnùhu-yu te òré cùú ì<sup>n</sup>nuú-yu, te sáha firmá-yu ì<sup>n</sup> tutú te tutú-á<sup>n</sup> vǎ yòo ì<sup>n</sup> ndacu cáhá<sup>n</sup> sá vǎ nándìhi-gá-xi, te nǐ vǎ yòo-gá ndacu nágá tnúhu chido tnùní núú-xí. <sup>16</sup> Te duca<sup>n</sup> nǐ quide Yá Ndiöxí ndìhi ndí Abrahám, chi ní xáha<sup>n</sup>-gǎ xii ndí nàcuáa cada-gá, te tnúhu-á<sup>n</sup> cùú-xí cuendá méé ndí ndìhi cuendá ì<sup>n</sup> ñani tnáhá ndí cundecu ñuyíú-a ndéé cuéé-gá. Te núú tùtú-gá càchí-xi sá tnúhu-á<sup>n</sup> cùú-xí cuendá ì<sup>n</sup>-ni ñani tnáhá ndí te ñá ðíú cuendá nchaá-yu. Te ñani tnáhá ndí tée cùu cuendá tnúhu-á<sup>n</sup> cùú Xítóhó Jesucristú. <sup>17</sup> Te na càchí tnúhu-í xii-ndo sá Yá Ndiöxí ní quide ndáá duu<sup>n</sup>-gá ndìhi ndí Abrahám nàcuáa cada-gá. Te sa ní cuu cúmí cièndú ócú úxí cuía sá dúcá<sup>n</sup> nǐ xáha<sup>n</sup> Yá Ndiöxí xii ndí Abrahám, te dàtnùní

ní xáha<sup>n</sup>-gã xii ndíi Moisés chido tnùní ndíi nàcuáa cada ñáiyu, te nchaa tnúhu ní chídó tnùní ndíi Moisés ñá túú dàquee tíhú-xi tnúhu sá ñí xáha<sup>n</sup> Yã Ndiõxí xii ndíi Àbrahám nàcuáa cada-gá. <sup>18</sup> Te núu dìcò cuendá nchaa tnúhu sá ñí chídó tnùní ndíi Moisés ní nàníhí tàhú-ó ñá, te ñá túú-gã xíní ñùhu-xi cada cuendá-ó tnúhu ní xáha<sup>n</sup> Yã Ndiõxí xii ndíi Àbrahám cada-gá ní cùu te núu duca<sup>n</sup>. Te ndíi-á<sup>n</sup> ñí naníhí tàhú ndíi chi duca<sup>n</sup> ñí cachí Yã Ndiõxí cada ñaha-gã xii ndíi.

<sup>19</sup> Te nchaa tnúhu ní cáhá<sup>n</sup> ndíi Moisés ní ngódó núú-xí nchicú<sup>n</sup> nihnu ñáiyu cuendá duca<sup>n</sup> cùtnuní iní-yu sá ndécú cuèchi-yu, te nchicú<sup>n</sup> nihnu-ní-yu ndéé ní sáá nduu ñí quexìo Yaá cúú ñàní tnáhá ndíi Àbrahám, chi Yaá-á<sup>n</sup> duca<sup>n</sup> ñí xáha<sup>n</sup> Yã Ndiõxí quixi-gá cada váha-gá nchaa ñáiyu. Te nchaa tnúhu ní chídó tnùní ndíi Moisés, chi Yá Ndiõxí ní tendaha-gã cue espíritú xínú cuèchi núú-gã ní sáhá<sup>n</sup>-xi ní xítnúhu ñaha-xi xii ndíi nàcuáa danèhé ndíi ñáiyu. <sup>20</sup> Te Yá Ndiõxí ñá túú ní cáhá<sup>n</sup>-gá núú méé ñáiyu, chi ndíi Moisés ní cáhá<sup>n</sup> ndíi yuhu-gá núú-yu, dico cùtnáhá ní cáhá<sup>n</sup> ndíi-gá ndíi Àbrahám chi núú méé núú ì<sup>n</sup> ndíi ndíi-gá ní xáha<sup>n</sup>-gã xii ndíi nàcuáa cada-gá.

*Nàcuáa ndúu nchaa tnúhu ní chídó tnùní ndíi Moisés*

<sup>21</sup> Te nchaa nàcuáa ní chídó tnùní ndíi Moisés, ndíi nchaa nàcuáa ní xáha<sup>n</sup> Yã Ndiõxí xii ndíi Àbrahám cada-gá, ñá túú dàquee tíhú tnáhá-xí. Te núu dìcò nánihí tàhú ñáiyu nchicú<sup>n</sup> nihnu nchaa nàcuáa ní cáhá<sup>n</sup> ndíi Moisés ñá te cudíu-yu núú-gã cuendá-ni sá nchicú<sup>n</sup> nihnú-yu nchaa nàcuáa ní cáhá<sup>n</sup> ndíi ni cùu. <sup>22</sup> Te núu tütú Yã Ndiõxí càchí-xi: “Nchaa nchòhó ñáiyu ndècu ñuyíú ndécú cuèchi-ndo”, duha càchí-xi. Te duca<sup>n</sup> càhá<sup>n</sup>-xi cuendá quíndáá iní-ó Xítohó Jesucristú, te naníhí tàhú-ó chi duca<sup>n</sup> ñí cachí Yã Ndiõxí cada-gá.

<sup>23</sup> Te cùtnáhá vátá cùndècu ndíi-gá-ó tnúhu Xítohó Jesucristú, te nchicú<sup>n</sup> nihnu-o nchaa nàcuáa ní cáhá<sup>n</sup> ndíi Moisés, te ní cutnùní iní-ó sã ìo ndècu cuèchi-o ni cùu. Te duca<sup>n</sup>-ni nchicú<sup>n</sup> nihnu-o ndéé ní sáá nduu ñí quexìo Xítohó Jesucristú ñuyíú-a, te ní sándáá iní-ó-gã. <sup>24</sup> Te nchaa tnúhu sá ñí chídó tnùní ndíi Moisés ní sanu ichi ñaha-xi xii-o nàcuáa cada-o cùndècu-o, te

duca<sup>n</sup>-ni sanu ichi ñaha-xi xii-o ndéé ní sáá nduu ní quexìo Xítohó Jesucristú ñuyíú-a. Te duca<sup>n</sup> ñí cuu cuendá quíndáá iní-ó-gã, te vá cùndècu-gá cuèchi-o núú Yã Ndiõxí. <sup>25</sup> Te vitna ní ngúndècu ndíi-o tnúhu Xítohó Jesucristú, te ñá túú-gã xíní ñùhu-xi canu ichi ñaha nchaa tnúhu ní chídó tnùní ndíi Moisés.

<sup>26</sup> Te vitna tnáhá nchaa nchòhó cúú-ndó dèhe Yá Ndiõxí, chi ní sándáá iní-ndó Xítohó Jesucristú. <sup>27</sup> Te nchòhó ní sandute-ndo dàtná càchí-gá, te ndècu-ndo ndíi-gá, te quide-ndo nchaa nàcuáa ní cáhá<sup>n</sup>-gá ndécú-ndó, te ío ndècu yíñuhu-ndo núú Yã Ndiõxí dàtná ndécú yíñuhu mee Xítohó Jesucristú. <sup>28</sup> Te vitna ì<sup>n</sup>-ni cùu-o nchaa-o ndècu-o ndíi Xítohó Jesucristú cuèi cùu-o ñáiyu israhél àdi ñá túú cùu-o, te cuèi cùu-o ñáiyu ñá túú tnáhí dàñá quee núú chíú<sup>n</sup> pàtróo<sup>n</sup>-xi àdi cuu-o ñáiyu dàñá queé núú chíú<sup>n</sup> pàtróo<sup>n</sup>-xi, te cuèi téé te cuèi ñadíhí ì<sup>n</sup>-ni cùu-o nchaa-o ndècu-o ndíi Xítohó Jesucristú. <sup>29</sup> Te nchòhó ndécú ndíi-ndo Xítohó Jesucristú, te cùu-ndo dàtná cue ñaní tnáhá ndíi Àbrahám, chi ní nduu táhú-ndó cùndècu váha-ndo núú Yã Ndiõxí dàtná ní nduu táhú ndíi-á<sup>n</sup> ndécú váha ndíi núú-gã, te duca<sup>n</sup> chi mee-gã duca<sup>n</sup> ñí cachí-gá cunduu.

## 4

<sup>1</sup> Te nchòhó xíní-ndó sã ì<sup>n</sup> té lĩhli chi vátá nãgá cuãñaha tãtã-dè cuu cuendá-dé chi lĩhli-dé, te ì<sup>n</sup>-ni cùu-dé ndíi téé xínu cuechi, dico na sáá nduu cuèhnu-dé, te nduu táhú-dé nchaa sá ndécú ndíi tãtã-dé.

<sup>2</sup> Te xitò-yu té lĩhli-á<sup>n</sup> sáhnú-dé ndéé sáá nduu ñí cachí tãtã-dé sá cuãñaha-dé sá ndúú táhú-dé. <sup>3</sup> Te duca<sup>n</sup> sãtnahá-xi cùu nchoo, chi nchicú<sup>n</sup> nihnu-o nchaa nàcuáa ní cáhá<sup>n</sup> cue téé ní xíndècu ndéé sanaha ni cùu. <sup>4</sup> Te ní sáá nduu ñí quide Yá Ndiõxí dàtná ní cachí-gá, te ní tendaha-gã Déhe-gá Xítohó Jesucristú ní quixi-gá ñuyíú-a, ní dácácú ñaha ì<sup>n</sup> ñadíhí te ní cuu-gá ñáiyu, te ní quide-gá nchaa nàcuáa ní cáhá<sup>n</sup> ndíi Moisés. <sup>5</sup> Te duca<sup>n</sup> ñí tendaha Yã Ndiõxí Déhe-gá cuendá sá vá cãchicú<sup>n</sup> nihnu-gá-ó nchaa nàcuáa ní chídó tnùní ndíi Moisés cuendá duca<sup>n</sup> te cuu-o dèhe Yá Ndiõxí.

<sup>6</sup> Te Yá Ndiõxí ní taxi-gá Espíritú Déhe-gá Xítohó Jesucristú ndécú ndíi-ndo chi



cùu-ndo déhe-gá, te Espiritú-á<sup>n</sup> chíndèe ñaha-xi xii-ndo te cächí-ndó: “Yòhó Dútú Ndiöxí cúu-n Tátá méé-ndí”, duha cächí-ndó. <sup>7</sup> Te xiá<sup>n</sup> cútnùní iní-ndó sã cúu-ndó dèhe Yá Ndiöxí vitna, te ñá túú-gã cúu-ndó dàtná cue ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi. Te sã dúcá<sup>n</sup> cùu-ndo déhe-gá, te Xítohó Jesucristú taxi-gá nchaa sã vãha ní cachí Yá Ndiöxí nduu táhú-ndó.

*Té Pãblú ío sàni iní-dé cuendá nchaa ñáyiú ndècu ichi Xítohó Jesucristú*

<sup>8</sup> Te cútnàhá vátá quìndáá-gá iní-ndó tnúhu Yá Ndiöxí ní xinu cuechi-ndo núú nchaa sã cächí-yu cùu ndiöxí te ñá ndàá sã ndiöxí cúu-xí. <sup>9</sup> Te vitna nchòhó càhá<sup>n</sup> ndihí-ndo Yá Ndiöxí, te mee-gã xini ñáhá-gã xii-ndo, te ñá túú ndùu váha-xi nanchòcáva iní-ndó càda tucu-ndo nacuáa ní xóo cada-ndo díhna, chi nchaa xiá<sup>n</sup> ñá túú vèdana nàndíhi-xi. <sup>10</sup> Te nchòhó cànehe íi-ni-ndo ndùu cachí-ndó íi, te ñu-ni duca<sup>n</sup> quide-ndo dava yoó ndihí dava cuíá, te ndí tnahá nduu sàcòo vico ñu-ni duca<sup>n</sup> quide-ndo cànehe íi-ndó nduu-á<sup>n</sup>. <sup>11</sup> Te ío sàni iní-í cuendá-ndó, chi na cuáhá<sup>n</sup> àu<sup>n</sup> ná cuu ní dánèhé ñáhá-í xii-ndo tnúhu Yá Ndiöxí.

<sup>12</sup> Te càhá<sup>n</sup> ndàhú-í núú nchòhó ñáyiú ndècu ndihí-í ichi Xítohó Jesucristú sã cadá-ndó dàtná quidè-í ñá túú nchìcú<sup>n</sup> nihnu-í nchaa tnúhu ní càhá<sup>n</sup> ndíi Moisés, chi yúhú quidè-í vitna dàtná ní quide nchòhó ñá túú ní cãchicú<sup>n</sup> nihnu-ndo nàcuáa ní càhá<sup>n</sup> ndíi. Te cútnàhá ní xíndecu ndihí ñaha-í xii-ndo ní quide váha ñaha-ndo xii-í. <sup>13</sup> Te sa nàha-ndo sã cútnàhá ní càhá<sup>n</sup>-í tnúhu Xítohó Jesucristú núú-ndó ndèe díhna ní cuhú-í, núú xiá<sup>n</sup> ní xíndecu ndihí ñaha-í xii-ndo ní càhá<sup>n</sup>-í tnúhu-gá núú-ndó. <sup>14</sup> Te cuéhé sã ní tnahá-í-á<sup>n</sup> cúu-xí ñ<sup>n</sup> cuéhé sã vã yóo tnàhí cundee iní-xi cundecu ndihí ñaha-xii-í ní cùu, dico nchòhó chi ío váha ní càhá<sup>n</sup> ndihí ñaha-ndo xii-í, te ñá túú ní sàni cuehé ní sàni duha iní-ndó cuendá-í, te ní càhá<sup>n</sup> ndihí ñaha-ndo xii-í dàtná tnúhu sã yúhú cúu-í ñ<sup>n</sup> espíritú xínú cuèchi núú Yá Ndiöxí àdi datná méé Xítohó Jesucristú. <sup>15</sup> ¿Te ná ní tnahá-ndó núú ñá túú-gã sání vãha iní-ndó cuendá-í dàtná ní xóo cada-ndo ndèe díhna ío váha ní xóo caní iní-ndó cuendá-í? Te na cächí tnúhu ndáá-í xii-ndo sã ío ní cuu iní ñáhá-ndó xii-í

cútnàhá ní xíndecu ndihí ñaha-í xii-ndo, te nándi sã ndécú ndihí-ndo taxi-ndo xii-í ní cùu, te núú dícó sã cúu te ndéé tinùu-ndo tava-ndo te taxi-ndo xii-í ní cùu. <sup>16</sup> ¿Te náa cùu úhú iní ñáhá-ndó xii-í vitna cuendá sã càhá<sup>n</sup>-í tnúhu ndáá tnúhu Yá Ndiöxí núú-ndó-á<sup>n</sup>?

<sup>17</sup> Te ío ñáyiú ío váha càhá<sup>n</sup> ndihí ñaha-xii-ndo, dico ñáyiú-á<sup>n</sup> ñúhú cuéhé iní-yu, chi cuíní-yu sã vã cúu-gã càhá<sup>n</sup> ndihí tnàha-o, chi mee-nã-yu cundecu ndihí-ndo cuíní-yu. <sup>18</sup> Te váha quide ñáyiú càhá<sup>n</sup> ndihí ñaha-xii-ndo ndihí tnúhu yíñùhu, te núú cuíní-yu cadá-yu ñ<sup>n</sup> sã vãha sã cúu-xí-ndó. Te duca<sup>n</sup>-ni na càdá-yu cuèi òré ñá túú ndècu ndihí ñaha-í xii-ndo. <sup>19</sup> Te nchòhó ñáyiú ní sanu ichi-í ichi Xítohó Jesucristú cächí tnúhu-í xii-ndo sã quidè-xí iní-í dàtná quidè-xí iní ñ<sup>n</sup> ñadíhí ñaha sa ní tnahá òré cacu déhe-xi, te duca<sup>n</sup> quide-xi iní-í, chi ío vãi sani iní-í cuendá-ndó dàtná ní xóo cada-í ndéé díhna, te duca<sup>n</sup>-ni càdá-í ndéé ná sàá nduu càda-ndo nchaa nacuáa càhá<sup>n</sup> Xítohó Jesucristú. <sup>20</sup> ¿Te ío váha cada-xi te núú dícó tnavíi sa ndècu ndihí ñaha-í xii-ndo cuendá càhá<sup>n</sup>-í núú-ndó nàcuáa cada-ndo, te ñá cútnùní iní-í nása cada-í cuendá-ndó!

*Cuendá ndíi Àgár ndihí ndíi Sără*

<sup>21</sup> Te nchòhó ñáyiú cuíní canchicú<sup>n</sup> nihnu nchaa tnúhu ní càhá<sup>n</sup> ndíi Moisés, ¿náa ñá túú tècú tnùní-ndó nàcuáa càhá<sup>n</sup>-xi tnúhu ní chidó tnùní ndíi? <sup>22</sup> Chi cächí tnúhu ní chidó tnùní ndíi-á<sup>n</sup> sã ndíi Àbrahám ní xíndecu úú déhe ducu<sup>n</sup> ndíi, te ñ<sup>n</sup>-dé ní cuu déhe ndíi ndihí ñadíhí méé ndíi ndíi Sără, te ingá-dé ní cuu-dé déhe ndíi ndihí ñ<sup>n</sup> ndíi ní xinu cuechi núú-yu ní xínani Àgár. <sup>23</sup> Te sã dúcá<sup>n</sup> ní cacu déhe ndíi Sără, chi mee Yá Ndiöxí ní cundàhú iní ñáhá-gã xii-a<sup>n</sup>, chi duca<sup>n</sup> ní cachí-gá cada-gá. Dico ndíi ní xinu cuechi-á<sup>n</sup> chi duca<sup>n</sup> tnàhí ní nduu táhú ndíi-á<sup>n</sup> sã cóo déhe ndíi. <sup>24</sup> Te na cächí tnúhu-í xii-ndo nã cúu sã nánèhé ndi ndùú cue ndíi díhí-á<sup>n</sup>. Te úú xito ní càhá<sup>n</sup> Yá Ndiöxí nàcuáa cada-gá, te ñ<sup>n</sup> ndíi-á<sup>n</sup> nánèhé ndíi nàcuáa ní càhá<sup>n</sup> Yá Ndiöxí xito díhna nuu, te ingá tucu ndíi-á<sup>n</sup> nánèhé ndíi nàcuáa ní càhá<sup>n</sup> tucu-gá xito cùu uú. Te ndíi Àgár-á<sup>n</sup> nánèhé ndíi nàcuáa ní xáha<sup>n</sup> Yá Ndiöxí xii ndíi Moisés yucu Sináí cada ñáyiú, te nchaa ñáyiú nchìcú<sup>n</sup>



nihnu nchaa tnúhu-án cúu-yu dàtná déhe ndíi Àgár téé ní xinu cuechi, chi téé-án ñà túú tnàhí ni dàñá-dé quee-dé núú chíú<sup>n</sup> pàtróó<sup>n</sup>-dē, te duca<sup>n</sup> sãtnahá-xi cùu-yu chi nchícú<sup>n</sup> nihnú-yu nchaa nàcuáa ní xáha<sup>n</sup> Yã Ndiõxí xii ndíi Moisés. <sup>25</sup> Te tnúhu Àgár queé-xi: Yucu Sinài, te yucu-án yíndèhu-xi nació<sup>n</sup> Àrabiá. Te ndíi Àgár-án nánèhé tucu ndíi cue ñáyiu ndècu ñúú Jerusàlén, chi ñáyiu-án ndécú-ní-yu dàtná ní xíndecu ndíi Àgár ndihí déhe ndíi, chi cue ndíi-án ní cuu cue ndíi ñáyiu ñà túú tnàhí ni dàñá quee núú chíú<sup>n</sup> pàtróó<sup>n</sup>-xi, te duca<sup>n</sup> sãtnahá-xi cùu ñáyiu-án chi nchícú<sup>n</sup> nihnu-ní-yu nchaa nàcuáa ní cáhá<sup>n</sup> ndíi Moisés. <sup>26</sup> Dico nchoo ní nduu táhú-ó cùndecu-o ñúú Jerusàlén sáa nùú ndécú Yã Ndiõxí, te vitna chi ñà túú-gã nchícú<sup>n</sup> nihnu-o nchaa nàcuáa ní cáhá<sup>n</sup> ndíi Moisés. <sup>27</sup> Te duha càhá<sup>n</sup>-í, chi núú tütú Yã Ndiõxí càchí-xi:

Yòhó ñaha ní nduu táhú vã cóó dēhe-xi ní cùu, vitna cana saa-n sã cúú ñí-í ní-n cuèi vátá quíní-gá-n nãsa càcu ñí<sup>n</sup> landú.

Te cuèi ní cuu táhú-n sã vã cóó dēhe-n ní cùu dico ío-gá titní déhe-n còo daçúxí xíchí ní cuu táhú tnàhí sã cóó dēhe-xi.

Duha càchí-xi núú tütú-gá. <sup>28</sup> Te nchoo cuè ñáyiu ndècu ichi Xítóhó Jesucristú vitna cùu-o datná ndíi Isàác, chi ndíi-án ní cacu ndíi, chi mee Yã Ndiõxí ní cachí-gá sã cacú ndíi. Te duca<sup>n</sup> sãtnahá-xi cùu nchoo chi ní nduu-o dēhe-gá vitna chi duca<sup>n</sup> ní cachí tucu-gá cunduu. <sup>29</sup> Te déhe ndíi Àgár ní nduu táhú tnàhí ndíi sã cacú ndíi ñuyíú-a, te ndíi-án ní cuu úhú iní ndíi ndíi Isàác, te ndíi Isàác-án chi Espíritú Yã Ndiõxí ní quide ní cacu ndíi. Te duca<sup>n</sup> sãtnahá-xi cùu vitna, chi nchaa nchoo ñáyiu ndècu ndihí Espíritú Yã Ndiõxí cúú úhú iní ñáhá ñáyiu xii-o. <sup>30</sup> Te núú tütú Yã Ndiõxí càchí-xi: “Chí nàcuíçú<sup>n</sup> xíchí xínú cuèchi ndihí déhe-xi na nùhú-yu, chi déhe xíchí xínú cuèchi-án ñà túú nã níhí-dē nduu táhú-dē, chi mee-ni dēhe ñaha ndècu vehe-xi nduu táhú-dē sã cuãñaha tátá-dē”, duha càchí-xi núú tütú-gá. <sup>31</sup> Te nchoo cuè ñáyiu ndècu ichi Xítóhó Jesucristú ñà túú-gã cúú-ó dàtná cúú dēhe ndíi ní xinu cuechi-án, chi ní cuu-o vitna datná cúú ndíi ní nduu táhú nchaa sã ní sãñaha tátá-xi-án. Te duca<sup>n</sup> ní cuu, chi Yá

Ndiõxí ní dácäcu ñaha-gã xii-o cuendá sã vã cãchícú<sup>n</sup> nihnu-gá-ó nchaa nàcuáa ní cáhá<sup>n</sup> ndíi Moisés.

## 5

### *Canchicú<sup>n</sup> nihnu-ni-o ichi Xítóhó Jesucristú*

<sup>1</sup> Te Xítóhó Jesucristú ní quide-gá nàcuáa vá cání iní-ó sã nánihí tàhú-ó te núu na cãchícú<sup>n</sup> nihnu-o nàcuáa ní cáhá<sup>n</sup> ndíi Moisés, te ñiu-ni duca<sup>n</sup> cãni iní-ó cùndecu-o te vá ngõ cãni iní-ó sã nánihí tàhú-ó te núu na cãchícú<sup>n</sup> nihnu-o càda-o nàcuáa ní cáhá<sup>n</sup> ndíi, chi núu duca<sup>n</sup> na càda-o te ío dandòho-o mee-o datná ní xóo ndoho-o cùtnahá vátá cùndecu-gá-ó ichi-a.

<sup>2</sup> Te yúhú té Pãblú cuíní-í sã cùndedòho-ndo ñí<sup>n</sup> tnúhu na càhá<sup>n</sup>-í-a. Te núu nchòhó cuãha-ndo sèñá ñí<sup>n</sup>-ndo cuendá sã sãndáá iní-ndó nàcuáa ní cachí ndíi Moisés cada-ndo, te núu duca<sup>n</sup> na càda-ndo ña, te àú<sup>n</sup> nã cuu ndècu-ndo ichi Xítóhó Jesucristú te núu duca<sup>n</sup>. <sup>3</sup> Te dàtná ní cachí-í xii-ndo, te ñiu-ni duca<sup>n</sup> càhá<sup>n</sup> tucu-í vitna sã nùu ndèda-ni càa ñí<sup>n</sup> téé na cuãha-dé sèñá ñí<sup>n</sup>-dē, te xini ñuhu-xi sã dàcuítí tàú-dé cada-dé nchaa nàcuáa ní cáhá<sup>n</sup> ndíi Moisés. <sup>4</sup> Te nchaa nchòhó ñáyiu sàni iní sã ñà túú-gã cuèchi-xi ndècu núú Yã Ndiõxí cuendá sã nchícú<sup>n</sup> nihnu-ndo nchaa nàcuáa ní cáhá<sup>n</sup> ndíi Moisés, ñà túú-gã ndécú-ndó ndihí Xítóhó Jesucristú, te ni Yã Ndiõxí ñà túú-gã cùndàhú iní ñáhá-gã xii-ndo càda váha ñaha-gã. <sup>5</sup> Dico nchaa nchoo ñáyiu sãndáá iní ñáhá xii-gã cùñiu-o núú-gã, chi chindee ñaha Espíritú-gá xii-o, te ndètu cahnu-ná-ó sáa nduu cùñaha nùú Yã Ndiõxí xii-o sã cúñiu-o núú-gã. <sup>6</sup> Te nchoo cuè ñáyiu ndècu ndihí Xítóhó Jesucristú ñí<sup>n</sup>-ni quide-xi cuèi na cuãha-o sèñá ñí<sup>n</sup>-o àdi vá cuãha-o, chi ñà túú chindee ñaha-xi xii-o nàcuáa cundecu váha-o ndihí-gá. Te ñí<sup>n</sup>-dìi díi-ni sã xini ñuhu-xi quindáá iní-ó Xítóhó Jesucristú, te núu duca<sup>n</sup> na càda-o te cuu iní-ó cuè tnaha ñáyiu-o.

<sup>7</sup> Te nchòhó ío váha quide-ndo ndecu-ndo ichi Yá Ndiõxí ní cùu, te vitna cùñúhu-í sã ñà túú-gã sãndáá váha iní-ndó tnúhu-gá, te duca<sup>n</sup> quide-ndo chi ndècu ñáyiu sànu ichi ñaha xii-ndo ñngá ichi. <sup>8</sup> Te ñà díú Yã Ndiõxí Yáá ní cáhá<sup>n</sup> ñáhá xii-ndo duca<sup>n</sup> ni cachí-gá cada-ndo sã vã quindáá-gá iní-ndó tnúhu-gá. <sup>9</sup> Te nchòhó xini-ndó

sã nõu luha levadurá ná quihu yuchi te dândaa-xi. Duca<sup>n</sup> sãtnahá-xi cùu ñáyi dândahú ñáhá xii-ndo, chi cuini-yu dàcuíta nihnu ñáhá-yu xii-ndo nchaa-ndo. <sup>10</sup> Te yúhú cútnúni ndáá iní-í sá Xítohó Jesucristú chindee ñaha-gá xii-ndo cuendá sá ñã túú nãgá tnúhu quindáá iní-ndó, dico nchaa ñáyi duca<sup>n</sup> dândahú ñáhá xii-ndo nacháhu-yu núú Yã Ndiõxí nchaa sá quidè-yu cuèi ná-gá ñáyi cùu-yu.

<sup>11</sup> Te càchí tnúhu-í xii nchòhó ñáyi ndècu ndihí-í ichi Yã Ndiõxí sá nõu dìcò dánhé-ni-í ñáyi sá cuãha-yu sèñá ñii-yu dàtná ní cachí ndíi Moisés ñá, te vã yõ cuu úhú iní ñáhá xii-í ní cùu, te ni vã túu úhú iní-yu cuendá sá ñi xihí Xítohó Jesucristú núú cùrúxí ní cùu. <sup>12</sup> Te nchaa ñáyi dàsatú iní ñáhá xii-ndo sã cuãha-ndo sèñá ñii-ndo, te váha-gá sá ná cáda-yu mée-yu ñi tnúndòho, te ñã díú sã dúcá<sup>n</sup> cànuichi ñáhá-yu xii-ndo cùndecu-ndo.

<sup>13</sup> Te nchòhó ñáyi ndècu ndihí-í ichi Xítohó Jesucristú ñu-gá ní taunihnu ñaha-gã xii-ndo cuendá sá vã cáncicú<sup>n</sup> nihnu-gá-ndó nchaa nacuaá ní cáhá<sup>n</sup> ndíi Moisés, dico vã cání iní-ndó sã sã dúcá<sup>n</sup> ñi taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vèxi iní-ndó, dico cuu iní tnáhá-ndó ñi ñi-ndo te chindee tnaha-ndo. <sup>14</sup> Chi duca<sup>n</sup> càhá<sup>n</sup> Yã Ndiõxí sá cúú iní-ó cuè tnaha ñáyi dàtná cúú iní-ó mée-o. Te núu duca<sup>n</sup> na càda-o, te quide-o nchaa nacuaá tau-xi cada-o dàtná càhá<sup>n</sup> nchaa tnúhu ní chídó tnúni ndíi Moisés. <sup>15</sup> Te núu nchòhó cúú úhú iní tnáhá-ndó ndècu-ndo, te ñã túú quide váha-ndo te núu duca<sup>n</sup> quide-ndo, dico yúhú càchí-í sá vã dúcá<sup>n</sup>-gã cada-ndo cùndecu-ndo cuendá sá vã dácuíta nihnu tnaha-ndo.

*Nàcuáa sàni iní ñáyi ndècu ichi cuehé ichi duha ndihí nàcuáa sàni iní ñáyi ndècu ndihí Espiritú Yã Ndiõxí*

<sup>16</sup> Te na càchí tnúhu-í xii-ndo sã cáda-ndó nchaa nacuaá cuini mée Espiritú Yã Ndiõxí cada-ndo, te duca<sup>n</sup> te vã cání-gã iní-ndó càda-ndo nãndi nchaa sá cuèhé sá dúhá sàni iní mée-ndó. <sup>17</sup> Chi nchaa xiã<sup>n</sup> ñã túú tnáhá tnúhu-xi ndihí Espiritú Yã Ndiõxí. Te ñu-ni duca<sup>n</sup> quide Espiritú Yã Ndiõxí, chi ñã túú tnáhá iní-xi nchaa sá cuèhé sá dúhá sàni iní-ndó. Te sá dúcá<sup>n</sup> ñã túú tnáhá tnúhu

tnaha-xi xiã<sup>n</sup> ñã túú nihí ndée-ndó càda-ndo ñi sá váha sàni iní-ndó càda-ndo. <sup>18</sup> Te nõu quide-ndo nchaa nacuaá sànu ichi ñaha Espiritú Yã Ndiõxí, te ñã túú-gã táxi tnúni ñáhá nchaa tnúhu ní chídó tnúni ndíi Moisés xii-ndo.

<sup>19</sup> Te nchaa ñáyi xini-yu nchaa nàcuáa quide ñáyi quide cuehé quidé duha. Te duha quidé-yu: Cue tée càhá<sup>n</sup> ndihí-güedé ñáyi dñí te ñã díú ñadihí-güedé cúu-yu, te ñu-ni duca<sup>n</sup> xiquide cue ñáyi dñí, te nãndi-gá nchaa sá cuèhé sá dúhá cuãhá<sup>n</sup> vèxi-yu quidé-yu. <sup>20</sup> Te quide cahnú-yu nchaa sá càchí-yu cùu ndiõxí te ñã ndáá sá ndiõxí cúu-xí, te quide nduu tnahá-yu, te cùu úhú iní tnáhá-yu, te nãá-yu, te cùu cuiñú tnáhá-yu, te ío yáchí cudèè<sup>n</sup>-yu, te ndúcú-yu mee-ni sã cúu-xí mée-yu, te ñã túú cùu ñi nuú-yu cundecú-yu, te quide ñi tnahá-yu. <sup>21</sup> Te cùu cuedú iní-yu nchaa sá ndécú ndihí dava-gá-yu, te sãhni tnahá-yu, te ío quihú-yu, te ndi cuu ndi cuú-yu quidé-yu nchaa sá cuèhé sá dúhá, te nãndi-gá nchaa sá cuèhé sá dúhá quidé-yu. Te sa càchí tnúhu-í xii-ndo sã ncháá ñáyi duca<sup>n</sup> xiquide vã ndúú tãhú-yu cundecú-yu núú ndécú Yã Ndiõxí táxi tnúni-gã.

<sup>22</sup> Dico Espiritú Yã Ndiõxí chindèe ñaha-xi xii-o cuu iní tnáhá-ó, te cùdí iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tnáhá-ó, te quide ndáá-ó ndècu-o. <sup>23</sup> Te ndáhú iní-ó, te quide-o nchaa nacuaá tau-ó càda-o, te nchaa xiã<sup>n</sup> chindèe ñaha Espiritú Yã Ndiõxí quidé-ó, te núu duca<sup>n</sup> quide-o, te vã yõ ñi-gã cáhá<sup>n</sup> sá ñã túú quide váha-o ndècu-o. <sup>24</sup> Te nchoo cuè ñáyi ndècu ndihí Xítohó Jesucristú, sa ñaha-o sá ñi xihí-gã núú cùrúxí sá cuendá-ó, núu xiã<sup>n</sup> duu<sup>n</sup> duu<sup>n</sup> ní dáñá-ó nchaa ichi cuehé ichi duha, te ñã túú-gã táxi tnúni ñáhá ñi ñi sá cuèhé sá dúhá sã ñi xóo caní iní-ó ní cùu. <sup>25</sup> Te vitna ní ngúndecu ndihí-o Espiritú Yã Ndiõxí chindèe ñaha-xi, te xini ñu-hu-xi sá cáda-ó nàcuáa sànu ichi ñaha Espiritú-gã cada-o.

<sup>26</sup> Te vã cáda càhnu-o mee-o, te vã ndúcú-ó plètú, te ni vã cúu cuedú iní-ó sã ndécú ndihí tnaha ñáyi-o.

*Chindee tnàha-o ìn ìn-o*

<sup>1</sup> Te nchòhó ñáiyu ndècu ndihí-í ichi Xítohó Jesucristú cächí tnúhu-í xii-ndo sã nõu ìn ñáiyu ndècu ndihí-ndo ichi-gá ní quidé-yu ìn sá ñà túú tàú-yu cadá-yu núú-gã, te nchòhó ñáiyu quide váha ndècu ndihí Espíritú Yã Ndiõxí cáhá<sup>n</sup>-ndó dôho cue ñáiyu duca<sup>n</sup> xiquide-á<sup>n</sup> cuendá nucúnu ichí-yu, te vii vii cáhá<sup>n</sup> ndihí-ndõ-yu, te ío coto-ndo mée-ndo cuendá sá vã cádá-ndó ìn sá ñà túú tàú-ndó càda-ndo núú-gã. <sup>2</sup> Te ío chindee tnàha-ndo, te cuáha tnàha-ndo tnúhu ndee ìni cundecu-ndo cuendá nchaa sá yáha-ndo. Te núu duca<sup>n</sup> na càda-ndo, te quide-ndo nchaa nacuaa ní cáhá<sup>n</sup> Xítohó Jesucristú cada-o.

<sup>3</sup> Te núu ío ìn-ndo cächí-ndó sã ìo váha quide-ndo ndecu-ndo ichi Yã Ndiõxí te ñã ndáa ñã, te dicó dándàhú-ndó mée-ndo sá dúcá<sup>n</sup> quide-ndo. <sup>4</sup> Te ndi ðí<sup>n</sup> ndi ðí<sup>n</sup> càda cuendá-ndó nõu quide váha-ndo ndècu-ndo àdi ñã túú quide váha-ndo. Te núu quide váha-ndo ndècu-ndo ñã, te cudí<sup>n</sup> ìni-ndó sã cúu-xí mée-ndo, te vá cání ìni-ndó sã quidé vãha-gá-ndó dàcúúxí dàva-gá-yu. <sup>5</sup> Chi tàú-ó sã ndi ðí<sup>n</sup> ndi ðí<sup>n</sup> càda cuendá-ó nacuaa ndècu-o.

<sup>6</sup> Te nchaa nchòhó ñáiyu dàcuaha tnúhu Yã Ndiõxí chindee-ndo cuè téè dàcuaha ñaha xii-ndo tnúhu-gá cuañaha-ndo nãndi sá xíní ñùhu-güedé.

<sup>7</sup> Te vá dándàhú-ndó mée-ndo cundecu-ndo, chi vá cúu cùdiquí ndeé-ó Yã Ndiõxí, chi nchòhó xíní-ndó sã nõu na càda váha-o cundecu-o, te cùu-xí ìn sá vãha sá cúu-xí-ó, dico núu vá cádá vãha-o ñã, te ío ndoho-o te núu duca<sup>n</sup> na càda-o. <sup>8</sup> Te núu quide-o nchaa sá cuèhé sá dúhá sàni ìni-ó, te ðiu-ni xíã<sup>n</sup> dàcuíta nihnu ñaha-xi xii-ó, dico núu quide-o nchaa nacuaa sànu ichi ñaha Espíritú Yã Ndiõxí xii-o, te cundecu ndihí-o Yã Ndiõxí ni caa ni quíhí<sup>n</sup>. <sup>9</sup> Te xìni ñuhu-xi vá dáñã ndèé-ó càda váha-o cundecu-o, te duca<sup>n</sup> te sáa nduu càda váha ñaha Yã Ndiõxí xii-o, te núu vá ná tũhú ìni-ó càda váha-o cundecu-o. <sup>10</sup> Te cada-o sã vãha sá cúu-xí nchaa tnaha ñáiyu-o vitna ndecu-o ñuyú-a, te ío-gá tàú-ó chindee-o cue ñáiyu ndècu ndihí-o ichi Xítohó Jesucristú.

*Tnúhu ndéé núu ní ndihí-ná*

<sup>11</sup> Te cundehe-ndo sã ndãa ndãa lètrá téé-í núu tütú-a sá cúu-xí-ndó. <sup>12</sup> Te nchaa

ñáiyu quide yicá sá cuãha-ndo sèñã ñi-ndo dàtná ní cachí ndi Moisés, ñáiyu-á<sup>n</sup> cúu-yu ñáiyu cuení cudíu núu tnàha ñáiyu-xi. Te duca<sup>n</sup> quidé-yu cuendá sá vã ndóhõ-yu cuendá nchaa tnúhu sá dánèhé ñáhã sã ñi xíhí Xítohó Jesucristú núu cùrúxí. <sup>13</sup> Te ni ñáiyu sa ní ngúndecu ndihí sèñã ñi-xi ñã túú quidé-yu nchaa nacuaa ní cáhá<sup>n</sup> ndi Moisés, dico mée-yu cuení-yu sá cuãha-ndo sèñã ñi-ndo. Te duca<sup>n</sup> quidé-yu chi quide cahnú-yu mée-yu núu nchaa dava-gã ñáiyu. <sup>14</sup> Te yúhú chi ñã túú quide cahnu-í mée-í cuendá nchaa sá quidé-í, chi mee-ni sã ìo cùu váha ìni-í sá Xítohó Jesucristú ní xíhí-gá núu cùrúxí cuendá-ó. Te ðiu cuendá sã ñi xíhí-gá ñã túú-gã ndécù-í ichi cuèhé ichi duha, te ni ñã túú-gã táxi tnùnì ñáhã ñi ìn sá cuèhé sá dúhá xii-í. <sup>15</sup> Te ñã túú ñã chindèe ñaha-xi xii-o cuéi na cuãha-o sèñã ñi-o àdi vá cuãha-o, chi ndècu ndihí-o Xítohó Jesucristú, te ní nduu-o dàtná ìn ñáiyu saa, te xíã<sup>n</sup> cúu-xí sã ìo-gá xíní ñùhu-xi. <sup>16</sup> Te xicá<sup>n</sup> táhù-í núu Yã Ndiõxí sá ncháã nchòhó ñáiyu quide nchaa nacuaa cáhá<sup>n</sup>-í-a cundecu nahi-ndo, nchòhó ñáiyu cùu cuendá Yã Ndiõxí dàtná ñáiyu isràél chi ñáiyu-á<sup>n</sup> ñi cachí-gá sá cúu cuendá-gá. Te mee-gã ío cundàhú ìni ñáhã-gã xii-ndo chindee ñaha-gã.

<sup>17</sup> Te není vitna cuení-í sá vã yõo ìn-gá chidácá nihnu ñaha xii-í cuendá chiu<sup>n</sup> quide-í, chi yayacá<sup>n</sup> sa ní nduu tìlòhó ñi-í cuendá sá ndóhõ-í cuendá Xítohó Jesucristú.

<sup>18</sup> Te nchòhó ñáiyu ndècu ndihí-í ichi Xítohó Jesucristú xicá<sup>n</sup> táhù-í núu-gã sã ìo na chindee ñaha-gã xii-ndo nchaa-ndo. Te duca<sup>n</sup> na cunduu. Te ío chí cádá ndèe ìni-ñã vitna.



## TUTÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ ÉFESÚ

*Té Păblú cādūha-dé tutú quíhí<sup>n</sup> ndaha ñáyiū xĩndecu ichi Xítohó Jesucristú ndécú ñuú Éfesú*

<sup>1</sup> Yúhú té Păblú ní tendaha ñaha Yá Ndiöxí cāhá<sup>n</sup>-í tnúhu Xítohó Jesucristú núú ñáyiū, chi duca<sup>n</sup> ñí cachí Yá Ndiöxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiū cùu cuendá Yá Ndiöxí xĩndecu ñuú Éfesú, te diu-ni nchòhó cúú-ndó ñáyiū sàndáá iní ñáhá xii Xítohó Jesucristú.

<sup>2</sup> Te xicá<sup>n</sup> táhù-í núú Dütú Ndiöxí Yaá cúú Tātá-ó, ndihí núú Xítohó Jesucristú sá ná chĩndee chitúu ñaha-gă xii-ndo, te duca<sup>n</sup> ndè nduú-gă ná cādá te ío váha cuu iní-ndó cundecu-ndo.

*Espiritú Yá Ndiöxí chĩndè ñaha-xi xii-o chi ndècu ndihí-o Xítohó Jesucristú*

<sup>3</sup> Te cachí-ó sá ïo cāhnu cuu Yá Ndiöxí Yaá cúú Tātá Xítohó Jesucristú, te ndéé andiū quide Yá Ndiöxí nchaa sá vāha sá cúú-xi-ó cuendá sá ndécú ndihí-o Espiritú-gă, te duca<sup>n</sup> quide-gă chi ndècu ndihí-o Xítohó Jesucristú. <sup>4</sup> Te ndéé cútnáhá vátá ngăva-gă ñuyíú ñí cachí Yá Ndiöxí sá nchóó cùu-o ñáyiū cùu cuendá-gă, te duca<sup>n</sup> ñí cachí-gă sá cuendá Xítohó Jesucristú cuendá sá nchóó cùu-o ñáyiū ñá túú tnàhí ná cumání cundecu núú-gă, te duca<sup>n</sup> te vá cundècu cuèchi-o. <sup>5</sup> Te Yá Ndiöxí ío cùu iní ñáhá-gă xii-o núu xiá<sup>n</sup> duca<sup>n</sup> ñí cachí-gă ndéé cútnáhá vátá ngăva-gă ñuyíú sá nchóó ndùu-o déhe-gă. Te sá cuendá nchaa sá cādá Xítohó Jesucristú sá cúú-xi-ó, xiá<sup>n</sup> duca<sup>n</sup> ñí cachí Yá Ndiöxí, te duca<sup>n</sup> ñí cachí-gă chi duca<sup>n</sup> tnàhí ní sani iní-gă cunduu. <sup>6</sup> Te xiá<sup>n</sup> núu xini ñuhu-xi sá nchóó cāchí-ó sá ïo cāhnu cuu Yá Ndiöxí, chi ío cundahú iní ñáhá-gă chĩndè ñaha-gă xii-o. Te duca<sup>n</sup> quide-gă chi ndècu ndihí-o Xítohó Jesucristú Yaá ío cùu iní-gă. <sup>7</sup> Te Yá Ndiöxí ío cùu iní ñáhá-gă xii-o núu xiá<sup>n</sup> Xítohó Jesucristú ní sati ñíñí-gă te ní

xíhí-gă cuendá dacăcu nihnu ñaha-gă xii-o núú ùhú núú ndàhú, te duca<sup>n</sup> cāda cahnu iní-gă nchaa yicá cuèchi-o. <sup>8</sup> Te Yá Ndiöxí ío cundahú iní ñáhá-gă chĩndè ñaha-gă xii-o, nācuāa ngūndecu ndihí-o nchāa sá xini tnùní-ó te duca<sup>n</sup> te cuu-o ñáyiū tècú tnùní. <sup>9</sup> Te Yá Ndiöxí ní dánèhé ñáhá-gă xii-o nchāa sá ndúú yùhu, nchaa sá ñí sani iní-gă cada-gă. Te duca<sup>n</sup> ñí quide-gă chi duca<sup>n</sup> ñí sani iní-gă cunduu. <sup>10</sup> Te sá ñí sani iní-gă cada-gă te dacuitíi sá cādá-gă ná sàa nduu, te na sàa nduu-án te mee-gă cada sá Xítohó Jesucristú quindaha-gă nchaa sá ío andiū, ndihí nchaa sá ío ñuyíú-a.

<sup>11</sup> Te nchoo ñí nduu táhú-ó ñí nduu-o ñáyiū cùu cuendá Yá Ndiöxí chi ndècu ndihí-o Xítohó Jesucristú. Te duca<sup>n</sup> ñí cuu chi duca<sup>n</sup> tnàhí ní sani iní Yá Ndiöxí cunduu. Te nchaandi túhú sá quide-gă, quide-gă nācuāa sàni iní mée-gă cunduu.

<sup>12</sup> Te duca<sup>n</sup> ñí cuu cuendá sá nchūhú ñáyiū díhna nuu ñí sàndáá iní tnúhu Xítohó Jesucristú cāhá<sup>n</sup>-ndí sá ïo cāhnu cuu mee Yá Ndiöxí cuendá nchaa sá vāha quide-gă.

<sup>13</sup> Te nchòhó tucu cútnáhá ní xĩndedóho-ndo tnúhu ndáá tnúhu sá cāhá<sup>n</sup> nācuāa naníhí táhú-ó ní cuu ñí nuu-ndo ndihí Xítohó Jesucristú chi ní sàndáá iní-ndó-gă. Te xiá<sup>n</sup> cútnùní sá nchòhó ní nduu-ndo ñáyiū cùu cuendá Yá Ndiöxí, chi ní ngūndecu ndihí-ndo Espiritú-gă sá ñí cachí-gă taxi-gă.

<sup>14</sup> Te sá ndécú ndihí-o Espiritú Yá Ndiöxí xiá<sup>n</sup> cútnùní sá ndáá nduu táhú-ó cundecu-o ndihí-gă ná sàa nduu nācuaca ñaha-gă xii nchaa nchoo ñáyiū cùu cuendá-gă, te sá dúcá<sup>n</sup> cāda-gă núu xiá<sup>n</sup> tàù-ó cāchí-ó sá ïo cāhnu cuu-gă.

*Té Păblú xicá<sup>n</sup> táhú-dè núú Yá Ndiöxí cuendá cue ñáyiū ndècu ichi-gă*

<sup>15</sup> Te yúhú nihí-í tnúhu sá nchòhó ío váha sàndáá iní-ndó Xítohó Jesucristú, te nchaa ñáyiū cùu cuendá Yá Ndiöxí ío cùu iní-ndó-yu. <sup>16</sup> Te xiá<sup>n</sup> núu ñá túú dàña ndéé-í ndacá<sup>n</sup> táhú-í núú-gă cuendá-ndó, te ío xicá<sup>n</sup> táhú-í <sup>17</sup> núú Yá Ndiöxí Yaá cúú Tātá Xítohó Jesucristú cuendá-ndó. Te diu-ni Yá Ndiöxí cúú-gă Yaá ío cāhnu cuu. Te xicá<sup>n</sup> táhú-í núú Yá Ndiöxí sá mée-gă ná cādá sá Espiritú-gă chĩndee ñaha-xi xii-ndo cuendá cuu-ndo ñáyiū tècú tnùní, te na



càda-xi sá cùtnùnì iní-ndó nàcuáa sàni iní Yá Ndiöxí. <sup>18</sup> Te duca<sup>n</sup> xicá<sup>n</sup> táhù-í núú Yá Ndiöxí cuendá-ndó, cuendá sá nchòhó tecú tnùnì-ndó nàcuáa ndùu tnúhu ndee iní ní taxi-gá ní ngúndecu ndìhi-ndo cùtnàhá ní cáhá<sup>n</sup> ñáhá-gã xii-ndo. Te duca<sup>n</sup> cùtnuní tucu iní-ndó sã ncháá sã ñí cachí-gá taxi-gá nduu táhú nchoo cuè ñáyiu cùu cuendá-gá cúu-xí mèe cuií-ni sá ïo-gá váha. <sup>19</sup> Te cùtnuní tucu iní-ndó sã Yá Ndiöxí ío càhnu cuu-gá quidé-gã nchaa núú sã vãha sá cúu-xí nchòo ñáyiu sàndáá iní ñáhá xii-gá, chi quide-gá sá vã yòo tnàhí ndàcu cada sá cúu-xí-ó dàtná ní quide-gá <sup>20</sup> ní dándótó-gã Xítóhó Jesucristú cùtnàhá ní xihí-gá. Te ní taxinucóo-gá Xítóhó Jesucristú xio cùha-gá táxi tnùnì-gá. <sup>21</sup> Te Xítóhó Jesucristú ío-gá cùnùu-gá dàcúúxí nchàa núú cuè espíritú, ndìhi dàcúúxí nchàa cue tée yìndaha ñáyiu, ndìhi dàcúúxí nchàa dava-gá cue tée cùnùu. Te cuèi vitna te cuèi ndéé núú cuàhá<sup>n</sup> núú vèxi duca<sup>n</sup>-ni ïo cunu-gã taxi tnùnì-gá. <sup>22</sup> Te mee Yá Ndiöxí ní quide-gá sá Xítóhó Jesucristú taxi tnùnì-gá nchaandi túhú sá ío, te ñiu-ni mee Yá Ndiöxí ní cachí-gá sá ncháá ñáyiu cùu cuendá-gá quindaha ñàha Xítóhó Jesucristú. <sup>23</sup> Te cada iní-ó sã ncháá ñáyiu cùu cuendá Yá Ndiöxí cúu-yu yiqui cùñú Xítóhó Jesucristú, chi ñ<sup>n</sup>-ni cùu-yu ndìhi-gá, te mee-gã táxi tnùnì-gá nchaandi túhú sá ío.

## 2

*Yá Ndiöxí ío cùndahú iní ñáhá-gã xii-o núu xiã<sup>n</sup> ní dàcãcu nihnu ñaha-gã*

<sup>1</sup> Te nchòhó cúu-ndó dàtná ñáyiu ní xihí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndìhi Yá Ndiöxí ní caa ní quíhí<sup>n</sup>. <sup>2</sup> Te duca<sup>n</sup> ñí xíndecu-ndo ìchi cuehé ìchi duha, chi ní cáncicú<sup>n</sup> nihnu-ndo nchàa sá cuèhé sá dúhá ío ñuyíú-a, te ní xóo cada-ndo nchàa nacuáa càhá<sup>n</sup> sácúíhná, te ñiu-ni sácúíhná-ã<sup>n</sup> táxi tnùnì-xi nchaa dava-gá espíritú cùndìhi-xi, te ñiu-ni-xi ndècu ndìhi-xi nchaa ñáyiu ñá túú cuìní tñi tnúhu càhá<sup>n</sup> Yá Ndiöxí, te dàcáhá<sup>n</sup> ñáhá-xi xii-yu cuendá cundecu-ní-yu ìchi cuehé ìchi duha. <sup>3</sup> Te nchaa-o dùca<sup>n</sup> ní xóo cada-o dàtná quidé cuè ñáyiu-á<sup>n</sup>, chi ní xóo cada-o nchàa sá cuèhé sá dúhá ñí xóo canì iní-ó,

te nándi-gá nchaa sá cuèhé sá dúhá ñí xóo cahu iní-ó ñí xóo cada-o, núu xiã<sup>n</sup> tàù-ó sã dándòho ñaha Yá Ndiöxí xii-o ni cùu datná tàù-xi dandòho-gá nchaa ñáyiu duca<sup>n</sup> ndècu ìchi cuehé ìchi duha-á<sup>n</sup>. <sup>4</sup> Te Yá Ndiöxí ío cùu iní ñáhá-gã xii-o núu xiã<sup>n</sup> ní cundàhú iní ñáhá-gã xii-o <sup>5</sup> cuèi cùu-o datná ñáyiu ní xihí sá cuendá nchaa sá cuèhé sá dúhá quide-o ni cuu. Te duca<sup>n</sup> ñí quide-gá ní cundàhú iní ñáhá-gã xii-o cuendá cundecu-o ndìhi Xítóhó Jesucristú vitna, te cuu ñ<sup>n</sup>nuu-o ndìhi-gá. Te sá cuendá-ni sá cùndahú iní ñáhá Yá Ndiöxí xii-o xiã<sup>n</sup> ní quide-gá nàcuáa nchoo nàníhí tàhú-ó. <sup>6</sup> Te cada iní-ó sã dàtná ní quide Yá Ndiöxí cùtnàhá ní dándótó-gã Xítóhó Jesucristú cùtnàhá ní xihí-gá duca<sup>n</sup> ñí quide ñaha-gã xii-o chi ndècu-o ndìhi-gá vitna. Te Xítóhó Jesucristú sa ndècu-gá andiù núú ndécú Yá Ndiöxí. Te cada iní-ó sã Yá Ndiöxí sa ní quide-gá sá nchóó ñí ngúndecu túu-o ndìhi Xítóhó Jesucristú, chi ío váha ndècu-o vitna. <sup>7</sup> Te Yá Ndiöxí quidé vãha ñaha-gã xii-o vitna cuendá sá ná sàá nduu, te ñiu-ni mee-gã cada te cutnùnì iní nchaa ñáyiu sá ïo cùu iní ñáhá-gã xii-o, te duca<sup>n</sup> ïo chìndee chitúu ñaha-gã xii-o cuendá sá ndécú ndìhi-o Xítóhó Jesucristú. <sup>8</sup> Te Yá Ndiöxí ío cùndahú iní ñáhá-gã xii-ndo núu xiã<sup>n</sup> ní quide-gá sá nchòhó nàníhí tàhú-ndó. Te duca<sup>n</sup> ñí quide-gá chi ní sàndáá iní-ndó-gã. Te ñá díú sã cuendá ñ<sup>n</sup> chiu<sup>n</sup> ni quide-ndo duca<sup>n</sup> ní nàníhí tàhú-ndó, chi mee Yá Ndiöxí ní cuìní-gá sá dícó-ni duca<sup>n</sup> nàníhí tàhú-ndó. <sup>9</sup> Te mee Yá Ndiöxí ní cachí-gá sá ñà díú cuendá ñ<sup>n</sup> chiu<sup>n</sup> quide-o nàníhí tàhú-ó, te duca<sup>n</sup> ñí cachí-gá cuendá sá vã cádá càhnu-o mee-o. <sup>10</sup> Te Yá Ndiöxí ní quide ñaha-gã xii-o dàtná ñ<sup>n</sup> ñáyiu saa cuendá sá ñí tnahá tnúhu-o ndìhi Xítóhó Jesucristú, te duca<sup>n</sup> ñí quide-gá cuendá sá cádá-ó mèe-ni sá vãha. Te Yá Ndiöxí duca<sup>n</sup> tnàhí ní sani iní-gá cunduu sá nchóó cùu-o ñáyiu cada mee-ni sã vãha.

*Xítóhó Jesucristú quidé-gã ío váha cùu iní-ó ndècu-o*

<sup>11</sup> Te nchòhó chí dándàcu iní nàcuáa ní xíndecu-ndo ni cùu, chi ñá túú cùu-ndo ñáyiu isràél, te ni ñà túú quide-ndo datná quidé ñáyiu-á<sup>n</sup>, chi ñáyiu-á<sup>n</sup> sãha-yu señá

ñí-yu, te dàquee tihũ-yu nchaa ñáyiú ñá túú ndècu seña ñí-xi. <sup>12</sup> Te chí dándàcu iní nàcuáa ní xíndecu-ndo, chí dàvá-án ñà túú ní xíndecu-ndo ndihí Xítohó Jesucristú, te ni ñà túú ní xõo cuu tnahá tnúhu-ndo ndihí ñáyiú isràél, te ni ñà túú ní xìní tnùnì-ndó nàcuáa ndùu tnúhu sá ñí cáhá<sup>n</sup> ndáá Yá Ndiõxí nàcuáa cada váha-gá ñáyiú, te ni ñà túú ní cùu-ndo ñáyiú quíndaha-gã, te ni ñà túú ní xõo níhí-ndó tnúhu ndee iní sá cùndècu-ndo ndihí-gá. <sup>13</sup> Te cuèi ní cuu-ndo ñáyiú ñá túú tnàhá tnúhu ndihí Yá Ndiõxí ní cùu, dico vitna ní tnahá tnúhu-ndo ndihí-gá chí cùu ñí nuu-ndo ndihí Xítohó Jesucristú, cuèndá sá ñí satí ñíhí-gã te ní xíhí-gá te xíã<sup>n</sup> duca<sup>n</sup> tnàhá tnúhu-ndo ndihí Yá Ndiõxí vitna. <sup>14</sup> Te Xítohó Jesucristú ní quide-gá sá nchóó ïo váha cuu iní-ó cùndecu-o, te ñíu-ni-gá ní quide cuèndá sá vã dáquee tihú ñáhá ñáyiú isràél xii ñáyiú ñá túú cùu ñáyiú isràél, te duca<sup>n</sup> ñí ná cuú-yu cundecú-yu. <sup>15</sup> Te sá ñí xíhí Xítohó Jesucristú, xíã<sup>n</sup> ñá túú-gã cùnùu nchaa tnúhu sá sánú ìchi ñaha xii ñáyiú nàcuáa cadá-yu cundecú-yu ni cùu. Te duca<sup>n</sup> ñí xíhí Xítohó Jesucristú cuèndá sá cuè ñáyiú isràél ndihí cue ñáyiú ñá túú cùu ñáyiú isràél ñí ná cuú-yu cundecú-yu ichi-gá, te duca<sup>n</sup> te vã dáquee tihú tnàhá-gã-yu, te ïo váha cundecu ndihí tnàhá-yu. <sup>16</sup> Te duca<sup>n</sup> ñí quide Xítohó Jesucristú ní xíhí-gá núú cùrúxí cuèndá sá cuè ñáyiú cùu ñáyiú isràél ndihí cue ñáyiú ñá túú cùu ñáyiú isràél vã dáquee tihú tnàhá-gã-yu. Te duca<sup>n</sup> ñí xíhí-gá cuèndá ñí ná cuú-yu tnahá tnúhu-yu ndihí Yá Ndiõxí nàcuáa cuu váha iní ñáhá-gã xii-yu.

<sup>17</sup> Te cuèi cùu-ndo ñáyiú ñá túú tnàhí xìní ndáá cuèndá Yá Ndiõxí ní cùu, dico Xítohó Jesucristú ní quixi-gá ñíyíú-a ní cáhá<sup>n</sup>-gá tnúhu váha nàcuáa ïo váha cuu iní-ndó cùndecu-ndo ndihí Yá Ndiõxí. Te ñíu-ni duca<sup>n</sup> ñí quide-gá sá cúu-xí nchaa ñáyiú sa xìní cuèndá Yá Ndiõxí, ñíu-ni ñáyiú isràél. <sup>18</sup> Te cuèi cùu-o ñáyiú isràél àdi ñá túú cùu-o dico ñíu-ni mee Xítohó Jesucristú ní quide-gá sá ncháá-ó tnàhá tnúhu-o ndihí Dútú Ndiõxí Yáá cúu Tãtá-ó. Te duca<sup>n</sup> ñí tnahá tnúhu-o ndihí Yá Ndiõxí chí ní ngúndecu ndihí-o Espíritú-gá. <sup>19</sup> Te nchòhó ñáyiú ñá túú cùu ñáyiú isràél ní cuu-ndo

ñáyiú ñá túú tnàhá tnúhu ndihí Yá Ndiõxí ní cùu, dico vitna chí ñí ná ní cuu-ndo ndihí nchaa dáva-gá ñáyiú cùu cuèndá-gá chí cùu-ndo déhe-gá. <sup>20</sup> Te cada iní-ó sã cuè téé ní táuchíú<sup>n</sup> Xítohó Jesucristú cáhá<sup>n</sup> tnúhu-gá, ndihí cue téé ní xõo cáhá<sup>n</sup> tnúhu Yá Ndiõxí ndéé sanaha cùu-güedé dàtná cimientú ñí vehe, te nchòhó cúu-ndó dàtná ndóho sá sàá vehe-án, te cada tucu iní-ó sã Xítohó Jesucristú cúu-gã ñí yúú cùnùu cuu cimientú vehe-án. <sup>21</sup> Te duca<sup>n</sup> ïo váha cùu ñí nuu nchaa ndóho-án ndihí yúú cùnùu-án, te duca<sup>n</sup> tucu ïo váha ta quèe tnàha nchaa ndóho-án cuáa. Te xíã<sup>n</sup> cada iní-ó sã cúu-xí vehe Yá Ndiõxí, vehe sá ïo ní cuu íí. Te duca<sup>n</sup> sãtnahá-xi cùu nchaa ñáyiú ndècu ichi Xítohó Jesucristú chí ní tnahá tnúhu-yu ndihí-gá, te ñí nduu ñí nduu ta cùu vii cuu váha-gá-yu núú Yá Ndiõxí cuáhá<sup>n</sup>. <sup>22</sup> Te tnàhá nchòhó duca<sup>n</sup> sãtnahá-xi cùu-ndo chí ní ngúndecu ndihí-ndo Xítohó Jesucristú, te duca<sup>n</sup> ta cùu vii cuu váha tucu-ndo núú Yá Ndiõxí cuáhá<sup>n</sup>, te cùu-ndo datná vehe Yá Ndiõxí chí ndècu ndihí-ndo Espíritú-gá.

### 3

*Té Pãblú yíhí ñíquí-dé cáhá<sup>n</sup>-dé tnúhu Xítohó Jesucristú núú ñáyiú ñá túú cùu ñáyiú isràél*

<sup>1</sup> Te yúhú té Pãblú yíhí-í vecaá sá cuèndá sá cáhá<sup>n</sup>-í tnúhu Xítohó Jesucristú núú nchòhó ñáyiú ñá túú cùu ñáyiú isràél, núu xíã<sup>n</sup> ñíu cuèndá-gá duha yíhí-í vecaá vitna. <sup>2</sup> Te nchòhó sa nàha-ndo sá Yá Ndiõxí ní cundàhú iní ñáhá-gã xii-í, te ní cachí-gá sá yúhú quíhí ñíquí-í cáhá<sup>n</sup>-í tnúhu Xítohó Jesucristú núú-ndó, te cuèndá sá cáhá<sup>n</sup>-í tnúhu-gá núú-ndó te cuu-xi sá vãha sá cúu-xí-ndó. <sup>3</sup> Te yúhú sa ní cachí tnúhu-í xii-ndo lùha nàcuáa ndùu tnúhu ndùu yuhu ni cuu, sá ñí cachí tnúhu Yá Ndiõxí xii-í. <sup>4</sup> Te òré dàcuaha-ndo tnúhu ndùu yuhu-án ní cùu te quini-ndó sã yúhú tècú tnùnì-í nàcuáa ndùu tnúhu-án, te tnúhu-án cáhá<sup>n</sup>-xi cuèndá Xítohó Jesucristú. <sup>5</sup> Te tnúhu-án cúu-xí tnúhu sá vã yõo tnàhí xìní ní cùu, dico cue téé ní táuchíú<sup>n</sup> Xítohó Jesucristú cáhá<sup>n</sup> tnúhu-gá, ndihí cue téé cáhá<sup>n</sup> nàcuáa dàcahu iní ñáhá Yá Ndiõxí ní níhí-güedé tnúhu ndùu yuhu-án, chí Espíritú Yá Ndiõxí ní xáha<sup>n</sup>-xi xii-güedé. <sup>6</sup> Te duha cáhá<sup>n</sup>

tnúhu ndùu yuhu-á<sup>n</sup> ní cùu: “Cuèi ñáyiú ñá túú cùu ñáyiú isràél te cuèi ñáyiú cùu ñáyiú isràél dico ì<sup>n</sup>-ni ndùu táhù-yu sá vâha núú Yă Ndiöxí, te núu na quindáá iní-yu tnúhu sá cãhá<sup>n</sup> nãcuáa naníhí tàhù-yu, te ì<sup>n</sup>-nã cúú-yu cundecú-yu, te duca<sup>n</sup> ì<sup>n</sup>-ni cada váha ñaha Yă Ndiöxí xii-yu te núu na cundecu ndihí-yu Xítóhó Jesucristú”, duha ndùu tnúhu ndùu yuhu-á<sup>n</sup> ní cùu.

<sup>7</sup> Te Yă Ndiöxí ní cundàhú iní ñáhã-gã xii-í ní taxi-gã chiú<sup>n</sup> quide-í cãhá<sup>n</sup>-í tnúhu-gã, te mee-gã quidé-gã sá yúhú ndacu-í cãhá<sup>n</sup>-í tnúhu-gã. <sup>8</sup> Te nchaa ñáyiú cùu cuendá Yă Ndiöxí cúú-yu ñáyiú ío-gã cúnùu cadã-yu chiú<sup>n</sup>-gã dàcúúxí yúhú, te cuèi duca<sup>n</sup> dico Yă Ndiöxí ní cundàhú iní ñáhã-gã xii-í ní taxi-gã chiú<sup>n</sup> quide-í cãhá<sup>n</sup>-í tnúhu-gã núu cuè ñáyiú ñá túú cùu ñáyiú isràél. Te tnúhu-gã-á<sup>n</sup> cãhá<sup>n</sup>-xi sá sũúni ío váha cada ñaha Xítóhó Jesucristú xii-o. <sup>9</sup> Te duca<sup>n</sup> ní cachí Yă Ndiöxí sá cãhá<sup>n</sup>-í tnúhu-gã cuendá danèhé-í nchaa ñáyiú. Te sá danèhé-í-yu-á<sup>n</sup> cúú-xí tnúhu ndùu yuhu sá ní sani iní-gã ndéé sanaha nãcuáa cada váha-gã cue ñáyiú. Te ndéé dàvã-á<sup>n</sup> ní quesaha ndùu yuhu tnúhu-á<sup>n</sup> ní cùu. Te ñu-ni-gã cúú-gã Yaá ní cadúha nchaandí túhú sá ío. <sup>10</sup> Te duca<sup>n</sup> ndùu yuhu tnúhu-á<sup>n</sup> ní cùu cuendá sá nchãá espíritú cúnùu ndecu andíu quini-xi vitna nãcuáa quide nchaa ñáyiú ní tuha ñaha xii Yă Ndiöxí cuendá duca<sup>n</sup> cùtnuní iní-xi sá ío váha cùtnuní iní-gã nãcuáa cada-gã. <sup>11</sup> Te Yă Ndiöxí ní sani iní-gã ndéé sanaha nãcuáa ní cuini-gã cada Xítóhó Jesucristú, te ní sãá nduu ní quide Xítóhó Jesucristú nãcuáa ní cuini Yă Ndiöxí cada-gã. <sup>12</sup> Te vitna cùyí-o cãhá<sup>n</sup> ndihí-o Yă Ndiöxí cuendá sá ndécú ndihí-o Xítóhó Jesucristú, te sãndãá iní-ó-gã. <sup>13</sup> Te núu xiã<sup>n</sup> cãhá<sup>n</sup>-í dóho-ndo sã cuèi duha ndòho-í vitna dico vá ná túhú iní-ndó cãchicú<sup>n</sup> nihnu-ndo ìchi Xítóhó Jesucristú. Te sá dúhá ndòho-í te cùu-xi sá váha sá cúú-xí-ndó, chi cuu-ndo ñáyiú cùu cahnu núú Yă Ndiöxí.

#### *Xítóhó Jesucristú ío cùu iní ñáhã-gã xii-o*

<sup>14</sup> Te sá cuendá nchaa sá ní sani iní Dútú Ndiöxí quidé-gã xiã<sup>n</sup> yúhú ngũñí xiti-í núú-gã cãhá<sup>n</sup> ndihí-í-gã, te ñu-ni-gã cúú Yãá cúú Tãtã Xítóhó Jesucristú. <sup>15</sup> Te mee

Yă Ndiöxí ní cachí-gã sá nchãá espíritú ndécú andíu cunduu-xi datná ní cachí mée-gã cunduu-xi. Te ní cachí tucu-gã sá nchóó cùu-o ñáyiú, te cunduu-o datná cuini mée-gã cunduu-o. <sup>16</sup> Te xicã<sup>n</sup> táhù-í núú Dútú Ndiöxí sá Espíritú-gã ná cadã nãcuáa cuita níhí ndéé-gã-ndó quíhí<sup>n</sup> cundecu-ndo ìchi-gã, te duca<sup>n</sup> xicã<sup>n</sup> táhù-í núú-gã cada Espíritú-gã chi ío cãhnu cuu-gã. <sup>17</sup> Te xicã<sup>n</sup> táhù tucu-í núú Yă Ndiöxí sá Xítóhó Jesucristú ná cundecu ndihí ñaha-ni-gã xii-ndo chi sãndãá iní-ndó-gã, te duca<sup>n</sup> te vá dáñã ndéé-ndó ío cuu iní tnáhã-ndó. <sup>18</sup> Te xicã<sup>n</sup> táhù tucu-í núú Yă Ndiöxí cuendã-ndó ndihí cuendã dava-gã ñáyiú cùu cuendã-gã, cuendã sá cùtnuní iní-ndó sã sũúni cùu iní ñáhã Xítóhó Jesucristú xii-o. <sup>19</sup> Te duha xicã<sup>n</sup> táhù-í núú Yă Ndiöxí chi cuini-í sá nchãá-ndó tècú tnuní-ndó sã ío cùu iní ñáhã Xítóhó Jesucristú xii-o cuèi vá ndácú cãva-o quini-ó nãcuáa cùu iní ñáhã-gã xii-o. Te xicã<sup>n</sup> táhù tucu-í núú Yă Ndiöxí sá ío na cundecu ndihí ñaha-gã xii-ndo, te duca<sup>n</sup> cãchicú<sup>n</sup> nihnu-ndo cadã-ndo nchaa nãcuáa quide mee-gã.

<sup>20</sup> Te Yă Ndiöxí ío-gã vai sá ndácú-gã táxi-gã dàcúúxí sã xicã<sup>n</sup>-ó núú-gã, te cuèi ndéé nchaa sá ñã túú sãni iní-ó níhí-ó te tàxi-gã, te duca<sup>n</sup> chi mee-gã ndécú ndihí ñaha-gã xii-o, te ndacu-gã quidé-gã nãndí sá váha sá cúú-xí-ó. <sup>21</sup> Te vitna nchaa nchoo ñáyiú ndecu ìchi Xítóhó Jesucristú chí ná cãchí-ó sã ío cãhnu cuu Yă Ndiöxí, te duca<sup>n</sup>-ni cãhá<sup>n</sup>-ó sã ío cãhnu cuu-gã ní caa ní quíhí<sup>n</sup> chi ndecu ndihí-o Xítóhó Jesucristú. Te duca<sup>n</sup> na cunduu.

## 4

### *Espíritú Yă Ndiöxí quidé-xi cùu ì<sup>n</sup>nuu-o ndecu-o*

<sup>1</sup> Te yúhú té Pãblú yíhí-í vecaá sá cuendá Xítóhó Jesucristú, te cãhá<sup>n</sup> ndàhú-í núú-ndó sã cadã váha-ndo cundecu-ndo datná tàú-xi cada cue ñáyiú ní cãhá<sup>n</sup> Yă Ndiöxí cundecu ndihí-gã. Te nchòhó tnáhã-ndó cùu-ndo ñáyiú ní cãhá<sup>n</sup> ñáhã Yă Ndiöxí cundecu ndihí-gã. <sup>2</sup> Te vá cadã cãhnu-ndo mee-ndo, cunduu váha iní-ndó, cunduu cãhnu iní-ndó, te cuu iní tnáhã-ndó nãcuáa duca<sup>n</sup> cundee iní-ndó núu ná cúú sã cùmãní núú tnáhã-ndó. <sup>3</sup> Te ío nducu ndèe-ndo cuu ì<sup>n</sup>nuu-ndo cundecu-ndo, chi Espíritú Yă



Ndiöxí chindee ñàha-xi xii-ndo, te duca<sup>n</sup> ïo váha cuu iní-ndó cùndecu-ndo chi cùu ì<sup>n</sup>nuu-ndo. <sup>4</sup> Te nchoo ñàyiu ndècu ichi Xítóhó Jesucristú ì<sup>n</sup>-ni cùu-o, te duca<sup>n</sup> ì<sup>n</sup>-ni Espíritú Yá Ndiöxí ndécú, te ðiu-ni duca<sup>n</sup> ì<sup>n</sup>-ni tnúhu ndee iní ní ngúndecu ndihi-o cùtnàhá ní cáhá<sup>n</sup> ñáhá Yá Ndiöxí xii-o. <sup>5</sup> Te ì<sup>n</sup>-ni Xítóhó Jesucristú ndécú tàxi tnuní ñáhá-gã xii-o, te ì<sup>n</sup>-ni cùu-o sandáá iní-ó tnúhu-gá, te ì<sup>n</sup>-ni ñí sandute-o. <sup>6</sup> Te ì<sup>n</sup>-ni Dútú Ndiöxí cúú Yáá cúú Tátá-ó nchàa-o, te ðiu-gá cùnù-gá yíndàha ñaha-gá xii-o nchàa-o. Te Yá Ndiöxí dácàhá<sup>n</sup>-gá iní-ó quide-o chiu<sup>n</sup>-gá, te duca<sup>n</sup> ndècu ndihi ñaha-gá xii-o nchàa-o.

<sup>7</sup> Te nchoo ndì ðí<sup>n</sup> ndì ðí<sup>n</sup> chindee ñaha Yá Ndiöxí xii-o quide-o nacuaá ndùu chiu<sup>n</sup> ní cachí Xítóhó Jesucristú cada-o. <sup>8</sup> Te quèe ndáá-xi nacuaá càhá<sup>n</sup>-xi núú tütú Yá Ndiöxí núú càchí-xi:

Xítóhó Jesucristú cuándaa-gá andiu te ïo cùnùu-gá,

chi nchaa cue espíritú cúú ùhú iní ñáhá xii-gá ñá túú ní ndàcu-xi naá ndihi ñaha-xi xii-gá,

te mee-gã ní cachí-gá nacuaá ndùu chiu<sup>n</sup> nduu táhú ì<sup>n</sup> ì<sup>n</sup> ñáyiu cadá-yu.

Duha càchí-xi núú tütú-gá.

<sup>9</sup> Te sá dúcá<sup>n</sup> càhá<sup>n</sup>-xi sá cuándaa-gá andiu xiã<sup>n</sup> cùtnuní iní-ó sã ñí cuu<sup>n</sup>-gá ñuyíú-a. <sup>10</sup> Te Xítóhó Jesucristú ní cuu<sup>n</sup>-gá ñuyíú-a, te ðiu-ni-gá cuándaa-gá andiu cuendá ïo cunuu-gã taxi tnùní-gá nchaandi túhú sá ïo. <sup>11</sup> Te ní dácãhñu-gá cue tée xínu cuechi núú-gã ì<sup>n</sup> ì<sup>n</sup> núú chiú<sup>n</sup> cada-güedé. Te ní cachí-gá sá dâva-güedé cáhá<sup>n</sup>-güedé tnúhu-gá, te dava-güedé ní cachí-gá sá cáhá<sup>n</sup>-güedé nacuaá dâcahu iní ñáhá Yá Ndiöxí xii-güedé. Te dava-güedé ní cachí-gá sá cúú-güedé cue tée datècú tnúhu cue ñáyiu nacuaá cadá-yu naníhí táhú-yu. Te dava-güedé ní cachí-gá sá cúú-güedé cue tée quindaha ñaha xii ñáyiu dacuaá ñaha-güedé xií-yu tnúhu-gá. <sup>12</sup> Te duca<sup>n</sup> ñí cachí-gá cada cue tée-á<sup>n</sup> cuendá canu ichi-güedé cue ñáyiu cùu cuendá Yá Ndiöxí cuendá duca<sup>n</sup> ñáyiu-á<sup>n</sup> ñíhí-yu nacuaá cadá-yu chiú<sup>n</sup>-gá, te duca<sup>n</sup> cuíta níhí ndéé-gã-yu cundecú-yu ichi Xítóhó Jesucristú. <sup>13</sup> Te duca<sup>n</sup> ñí cachí Xítóhó

Jesucristú cunduu ndéé sáá nduu cùu ì<sup>n</sup>nuu-o quindáá iní-ó tnúhu-gá, te duca<sup>n</sup> cùu ì<sup>n</sup>nuu-o tecú tnùní-ó nacuaá ndùu cuendá-gá chi ðiu-gá cúú-gã Déhe Yá Ndiöxí, te cuu-o ñáyiu ïo quide ndáá dàtná quidé mée Xítóhó Jesucristú. Te duca<sup>n</sup> te ñá túú tnáhí-gá ná cùmání-ó núú Yá Ndiöxí. <sup>14</sup> Te duca<sup>n</sup> te vá cúú-gã-ó dàtná cue landú vátá cùtnuní váha-gã iní-xi, te ni vã cádá-gã-ó dàtná quidé ndùte lamár, chi ndute-á<sup>n</sup> òré quéné tãchí te cuáhá<sup>n</sup>-xi duha cuáhá<sup>n</sup>-xi dâcá<sup>n</sup>, te duca<sup>n</sup> chi vá quindáá-gá iní-ó tnúhu càhá<sup>n</sup> nchaa ñáyiu dândahú ñáhá xii-o, chi ñáyiu-á<sup>n</sup> ïo váha xító-yu nacuaá dândahú ñáhã-yu xii-o chi càchí-yu sá cáhá<sup>n</sup>-yu tnúhu Yá Ndiöxí dico ñá ndáá. <sup>15</sup> Te nchoo ïo cuu iní tnáhá-ó, te vá dândahú tnáhá-ó, chi cáhá<sup>n</sup>-ó mée-ni sá ndáá. Te xini ñuhu-xi sá ì<sup>n</sup> nduu ì<sup>n</sup> nduu cuíta cada ndáá-gã-ó quíhí<sup>n</sup> dàtná quidé ndáá mée-gã, te ðiu-ni-gá cúú-gã Yaá cùnùu cuu díhna tàxi tnuní ñáhá-gã xii-o. <sup>16</sup> Te ðiu-ni Xítóhó Jesucristú quidé ñaha-gá xii nchaa nchoo ñáyiu ndècu ichi-gá dàtná yiqui cùñú mée-gã, chi ì<sup>n</sup> yiqui cùñú ïo váha ní quée tnàha ì<sup>n</sup> ì<sup>n</sup> xichi, te duca<sup>n</sup> yìhí túchi yiqui cùñú-ã<sup>n</sup> yótnì-xi nchaa nacuaá ní quée tnàha. Te duca<sup>n</sup> sãtnahá-xi cùu nchoo chi ì<sup>n</sup>-ni cùu-o ndecu-o ichi Xítóhó Jesucristú táxi tnùní ñáhá-gã xii-o. Te núu nchoo quide-o nchaa nacuaá tàú-xi cunduu te cùu iní tnáhá-ó, te duca<sup>n</sup> ta ñíhí ndéé-gã-ó cuáhá<sup>n</sup> ndécú-ó ìchi-gá.

*Vá cádá-gã-ó dàtná ní xóo cada-o cùtnàhá ní xíndecu-o ìchi cuehé ichi duha*

<sup>17</sup> Te vitna yúhú cáhá<sup>n</sup>-í dóho-ndo quide-í núú Xítóhó Jesucristú sá vã cùndecu-gá-ndó dàtná xíndecu ñáyiu ñá túú sàndáá iní ñáhá xii Yá Ndiöxí, chi nchaa ñáyiu-á<sup>n</sup> ñà túú vèdana nândíhí nchaa sá sání iní-yu. <sup>18</sup> Te ni ñà túú vèdana cùtnuní iní-yu nacuaá ndùu tnúhu ndáá tnúhu Yá Ndiöxí. Te ñáyiu-á<sup>n</sup> ñà túú ndùu táhú-yu cundecú-yu nacuaá cuíni Yá Ndiöxí, chi ñá túú vèdana tècú tnùní-yu te duca<sup>n</sup> chi ïo sáá iní-yu. <sup>19</sup> Te ñá túú tnáhí-gá ná sání iní-yu ndécú-yu ichi cuehé ichi duha, te ïo cùdì<sup>n</sup> iní-yu ndécú-yu ichi ðí<sup>n</sup> iní, te ñá díú-ní xiã<sup>n</sup> chi nândi-gá nchaa sá cuehé sá dúhá quidé-yu ndécú-yu. <sup>20</sup> Dico tnúhu Xítóhó Jesucristú sá ñí sàndáá



iní-ndó chi ñá túú dùca<sup>n</sup> sanu ichi ñaha-xi xii-ndo cada-ndo. <sup>21</sup> Te nchòhó ní cutnùnì iní-ndó nàcuáa ndùu cuendá Xítohó Jesucristú, te dàcuaha-ndo tnúhu ndáá ñu-ni tnúhu-gá nàcuáa ndècu-ndo ichi-gá. <sup>22</sup> Te vitna vá cáni-gá iní-ndó càda-ndo datná ní xóo cada-ndo cùtnàhá ní xíndecu-ndo ìchi cuehé ichi duha, chi núu nchaa-ni sá cuèhé sá dúhá-ã<sup>n</sup> ná cùhu<sup>n</sup>-ni iní-ndó càda-ndo, te uu<sup>n</sup>-gá uu<sup>n</sup>-gá cuita dacuíta nihnu ñaha-xi xii-ndo quíhí<sup>n</sup>, chi núu nchaa-ni sá cuèhé sá dúhá-ã<sup>n</sup> ná cùhu<sup>n</sup>-ni iní-ndó te dàticá nuu ñaha-xi xii-ndo. <sup>23</sup> Te nchòhó, xini ñuhu-xi sá vá dúcá<sup>n</sup>-gá cani iní-ndó càda-ndo te tàú-ndó ndùu-ndo datná ñ<sup>n</sup> ñáyiu ní cacu túu saa. <sup>24</sup> Te nduu iní-ndó dàtná cuìnì mée Yá Ndiöxí cunduu, chi nduu-xi nàcuáa càa iní mée-gá, te duca<sup>n</sup> te cuu-ndo ñáyiu ío váha cada ndáá, te cuu ndisa-ndo ñáyiu ñá túú tnàhí ná cumánì cundecu núú-gá.

<sup>25</sup> Te cuendá xíã<sup>n</sup> núu càhá<sup>n</sup>-í dóho-ndo sá nchòhó vá dácuañdehnde-gá-ndó dàtná ní xóo cada-ndo, te mee-nã sá ndáá càhá<sup>n</sup> ndihí tnàha-ndo, chi ñ<sup>n</sup>-ni cùu-o ndecu-o ichi Xítohó Jesucristú.

<sup>26</sup> Te núu cùdée<sup>n</sup>-ndó te cada cuendá-ndó sá vá cáda-ndó ñ<sup>n</sup> cuèchi sá dúcá<sup>n</sup> cùdée<sup>n</sup>-ndó, te vá dúcá<sup>n</sup>-ní cùhu<sup>n</sup> iní-ndó tnúhu sätú iní-á<sup>n</sup>. <sup>27</sup> Te vá dáñá-ndó mèe-ndo dandahú ñáhá sàcuíhná xii-ndo.

<sup>28</sup> Te núu dava-ndo cùu-ndo ñadúhú te vá dúcá<sup>n</sup>-gá cada-ndo, chi nducu-nã-ndó ñ<sup>n</sup> chiu<sup>n</sup> váha cada-ndo nàcuáa duca<sup>n</sup> ñihí-ndó sá chíndèe-ndo cue ñáyiu ndàhú ñáyiu ñá túú nã ndécú ndihí.

<sup>29</sup> Te vá càhá<sup>n</sup>-gá-ndó nì ñ<sup>n</sup> tnúhu cuèhé, chi mee-nã tnúhu vii tnúhu váha càhá<sup>n</sup>-ndó nàcuáa duca<sup>n</sup> ngünu ichi cue ñáyiu ndédóho ñaha xii-ndo, te núu duca<sup>n</sup> na càda-ndo te cuu-xi sá váha sá cúú-xí ñáyiu duca<sup>n</sup> ndédóho ñaha xii-ndo-á<sup>n</sup>. <sup>30</sup> Te vá cáda-gá-ndó nì ñ<sup>n</sup> sá ñà túú tàú-ndó càda-ndo cuendá sá vá dándihú-ndó ìní Espiritú Yá Ndiöxí, chi ñu Espiritú-gá ndécú ndihí-ndo, te xíã<sup>n</sup> cutnùnì iní-ndó sá sáá nduu nàcuaca ñaha-gá xii-ndo cundecu-ndo ndihí-gá ni caa ni quíhí<sup>n</sup>.

<sup>31</sup> Te vá dásätú-gá-ndó ìní tnàha ñáyiu-ndo, te ni vá cúhú<sup>n</sup> ìní-ndó tnúhu sätú ìní, te ni vá cùdée<sup>n</sup>-gá-ndó, te cuèi núú chítú núú tàcá vá càhá<sup>n</sup> cana-ndo cùcuèhé-ndó tnàha ñáyiu-ndo, te ni vá cuátnùhu-ndo tnàha ñáyiu-ndo, te ni vá cáni cuèhé cani

duha iní-ndó cuendá tnàha ñáyiu-ndo. <sup>32</sup> Te cundàhú iní tnàhá-ndó, te cada tnàha-ndo sá váha, te cada càhnu iní tnàhá-ndó núu ná cúú sá cúmãní núú tnàhá-ndó dàtná ní quide Yá Ndiöxí ní quide càhnu iní-gá nchaa yíca cuèchi-ndo sá cuendá Xítohó Jesucristú.

## 5

*Nàcuáa tàú-xi cundecu nchaa ñáyiu cùu déhe Yá Ndiöxí*

<sup>1</sup> Te nchòhó cúú-ndó ñáyiu ío cùu iní ñáhá Yá Ndiöxí, te ñu déhe-gá cúú-ndó núu xíã<sup>n</sup> xini ñuhu-xi canchicú<sup>n</sup> nihnu-ndo càda-ndo datná quidé mèe-gá. <sup>2</sup> Te ío cuu iní tnàhá-ndó cundecu-ndo datná cúú ìní ñáhá Xítohó Jesucristú xii-ndo, chi ñu-gá ní cachí-gá sá cúú-gá cuendá nchaa cuèchi-o te ní xihí-gá, te sá dúcá<sup>n</sup> nì xihí-gá te ní cuu-gá dàtná ñ<sup>n</sup> táhú sá cúú-xí Yá Ndiöxí, te ío váha ní cuu iní Yá Ndiöxí sá dúcá<sup>n</sup> nì quide-gá.

<sup>3</sup> Te sá cuendá sá nchòhó cúú-ndó ñáyiu cùu cuendá Yá Ndiöxí núu xíã<sup>n</sup> nchaa nchòhó cue téé vá càhá<sup>n</sup> ndihí-ndo ñáyiu ñihí te núu ñá díú ñàdihí-ndó cùú-yu, te duca<sup>n</sup>-ni nchàa nchòhó cue ñáyiu ñihí tucu vá càhá<sup>n</sup> ndihí-ndo cue téé te núu ñá díú yí-ndo cuu-güedé, te ni vá cáni tnàhí iní-ndó cundecu-ndo ichi díí ìní, te ni vá xihó-ndó nì ñ<sup>n</sup> sá ndécú ndihí tnàha ñáyiu-ndo, te ni ñ<sup>n</sup> nchaa xíã<sup>n</sup> vá cáni ìní-ndó càda-ndo, te ni vá cácu nèhe-ndo.

<sup>4</sup> Te ni vá càhá<sup>n</sup>-ndó ñ<sup>n</sup> tnúhu sá ni vá cúú cùndedóho ñáyiu, te ni vá càhá<sup>n</sup>-ndó ñ<sup>n</sup> tnúhu cùtèxínu, te ni dàva-gá nchaa tnúhu sá ñà túú vèdana nàndihí vá càhá<sup>n</sup>-ndó, chi nchaa tnúhu-á<sup>n</sup> ñà túú tàú-xi càhá<sup>n</sup>-ndó, te xini ñuhu-xi sá váha-gá sá ndàcá<sup>n</sup> táhú-ndó núú Yá Ndiöxí cuendá nchaa sá váha quide-gá. <sup>5</sup> Te nchòhó sa xini ndáá-ndó sá ncháá cue téé càhá<sup>n</sup> ndihí ñáyiu ñihí te ñá díú ñàdihí-güedé cúú-yu, ndihí cue ñáyiu ñihí càhá<sup>n</sup> ndihí cue téé te ñá díú yí-yu cùu-güedé, nchaa ñáyiu-á<sup>n</sup> vá ndúú tãhú-yu cundecú-yu núú ndécú Yá Ndiöxí ndihí Xítohó Jesucristú táxi tnùnì-gá. Te ni cue ñáyiu xíndecu ichi díí ìní, te ni cue ñáyiu xihó nchaa sá ndécú ndihí tnàha ñáyiu-xi vá ndúú tãhú-yu cundecú-yu ndihí-gá núú

ndécú-gã táxi tnùnì-gá. Te tnúhu sá càchí-ó xìho-o nchaa sá ndécú ndìhì tnahà ñáyìu-o, ìñ-ni cùu-xi ndìhì tnúhu sá càchí ñáyìu quìde cahnú-yu nchaa sá càchí-yu cùu ndiòxí te ñá ndáá sá ndiòxí cúú-xí. <sup>6</sup> Te vâ quìndáá iní-ndó nì ìñ<sup>n</sup> tnúhu sá ñà túú nàndìhì càhá<sup>n</sup> ñáyìu, chi ñáyìu-á<sup>n</sup> ïo dandòho ñaha Yá Ndiòxí xii-yu cuèndá nchaa sá cuèhé sá dúhá quidé-yu chi ñá túú sàndáá iní ñáhã-yu xii-gá. <sup>7</sup> Núu xíã<sup>n</sup> càhá<sup>n</sup>-í dóho-ndo sã vã ñihí tnáhã-ndó ndìhì cue ñáyìu-á<sup>n</sup>.

<sup>8</sup> Te nchòhó ní cuu-ndo dàtná cue ñáyìu ní xíndecu núú néé chi ní xíndecu-ndo ìchi cuehé ìchi duha, dico vitna ní ngúndecu-ndo ìchi Xítóhó Jesucristú, te ñá túú-gã ndécú-ndó núú néé dàtná ní xíndecu-ndo nì cùu. Te vitna cada-ndo nchaa nacuaá tàú-xi cunduu chi ndècu-ndo ìchi-gá. <sup>9</sup> Te sá cuèndá sá ndécú-ndó ìchi-gá núu xíã<sup>n</sup> cúú-ndó ñáyìu váha, te quìde ndáá-ndó ndècu-ndo, te ñá túú dàcuandehnde-ndo chi càhá<sup>n</sup>-ndó mèe-ni sá ndáá. <sup>10</sup> Te ïo váha cada cuèndá-ndó nchaa sá cúú váha iní Xítóhó Jesucristú, te xíã<sup>n</sup> cada-ndo. <sup>11</sup> Te vâ cáncñícú<sup>n</sup> nihnu-ndo tnáhã-ndó càda-ndo datná quidé cue ñáyìu ndècu ìchi cuehé ìchi duha, chi nchòhó tàú-ndó càhá<sup>n</sup>-ndó dóho nchaa ñáyìu duca<sup>n</sup> ndècu ìchi cuehé ìchi duha-á<sup>n</sup> cuèndá nchaa sá quidé-yu. <sup>12</sup> Te cucaha<sup>n</sup> núú-ndó vã càhá<sup>n</sup>-ndó cuèndá nì ìñ<sup>n</sup> sá cuèhé sá dúhá quìde dayuhu nchaa ñáyìu-á<sup>n</sup>. <sup>13</sup> Dico òré dándixi túu tnúhu Yá Ndiòxí iní-yu nàcuáa quidé-yu te cùtnuní iní-yu sá ñá túú quìde váha-yu, te duca<sup>n</sup> ndixi cuéchi iní-yu cuèndá nchaa sá cuèhé sá dúhá quidé-yu. <sup>14</sup> Te núú tütú Yá Ndiòxí càchí-xi:

Nchòhó cúú-ndó dàtná ñáyìu xidí, te vitna ndiquíú iní-ndó,  
te cùu tucu-ndo datná ñáyìu ní xíhí, te vitna ndoto-ndo,  
te Xítóhó Jesucristú chindee ñaha-gá xii-ndo nàcuáa vâ cùndècu-gá-ndó ìchi cuehé ìchi duha.  
Duha càhá<sup>n</sup>-xi núú tütú-gá.

<sup>15</sup> Te ïo váha cada cuèndá-ndó nàcuáa cada-ndo cùndecu-ndo, te vâ cadá-ndó dàtná xíquide cue ñáyìu ñá túú tècú tnùnì, chi cada-ndo dàtná xíquide ñáyìu ïo váha sàá díquí-xi. <sup>16</sup> Te ìñ<sup>n</sup> nduu ìñ<sup>n</sup> nduu cani iní-ndó càda-ndo nchaa nacuaá tàú-xi cunduu, chi

vitna ïo cùnuu nchaa sá cuèhé sá dúhá. <sup>17</sup> Te cuu-ndo ñáyìu tècú tnùnì cuèndá duca<sup>n</sup> cùtnuní iní-ndó nàcuáa cuèní Yá Ndiòxí cada-ndo, te vâ cadá-ndó dàtná xíquide cue ñáyìu ñá túú tnàhí cùtnuní iní-xi nàcuáa cuèní Yá Ndiòxí cadá-yu. <sup>18</sup> Te vâ cúú-ndó ñáyìu quihu chi núu duca<sup>n</sup> na càda-ndo te dàcuíta nihnu-ndo mèe-ndo, te dañã-ndo mèe-ndo sá Espiritú Yá Ndiòxí ná tàxi tnuní ñáhã-xi xii-ndo. <sup>19</sup> Te càhá<sup>n</sup>-ndó nàcuáa-ni cuáhã<sup>n</sup> ndudú sá nì xóo cata nchaa cue ñáyìu ndéé sanaha nì xóo chiñuhú-yu Yá Ndiòxí. Te càhá<sup>n</sup>-ndó nàcuáa cuáhã<sup>n</sup> ndudú sá chiñuhu-ndo Yá Ndiòxí, te cata-ndo. Te cuéi nchaa dava-gá ndudú ñiu-ni duca<sup>n</sup> càhá<sup>n</sup>-ndó te cata-ndo. Te nì yùhu nì iní-ndó càta-ndo nchaa ndudú-á<sup>n</sup> chiñuhu-ndo Yá Ndiòxí. <sup>20</sup> Te vâ dañã ndéé-ndó ndacá<sup>n</sup> táhú-ndó núú Tãtã-ó Dütú Ndiòxí cuéi ndècu váha-ndo àdi ñá túú ndècu váha-ndo. Te duca<sup>n</sup> càda-ndo chi ndècu ndìhì-ndo Xítóhó Jesucristú.

*Tàú-xi sá quìndáá iní tnáhã cue ñáyìu ndècu ìchi Xítóhó Jesucristú*

<sup>21</sup> Te nchòhó ñáyìu ndècu ìchi Xítóhó Jesucristú tàú-xi sá quìndáá iní tnáhã-ndó, te duca<sup>n</sup> càda-ndo chi nèhe-ndo sá yíñuhu núú Yá Ndiòxí.

<sup>22</sup> Te nchaa nchòhó ñáyìu ñáhí ndécú yì-xi, xini ñuhu-xi sá quìndáá iní-ndó yì-ndo datná sàndáá iní-ndó Xítóhó Jesucristú. <sup>23</sup> Chi yì-ndo tàxi tnuní ñáhã-güedé xii-ndo dàtná quidé Xítóhó Jesucristú táxi tnùnì ñáhã-gã xii nchoo cue ñáyìu ndècu ìchi-gá. Te ñiu-gá cúú-gã Yaá ní dácãcu nihnu ñaha xii-o núú ùhú núú ndàhú, te cùu-o datná yiqui cùnú-gá. <sup>24</sup> Te dàtná quidé nchòo ñáyìu ndècu ìchi Xítóhó Jesucristú sàndáá iní-ó tnè-o nchaa tnúhu càhá<sup>n</sup>-gá, duca<sup>n</sup> tàú-xi cada nchaa nchòhó ñáyìu ñáhí quìndáá iní-ndó tnè-ndo nchaa tnúhu càhá<sup>n</sup> yì-ndo.

<sup>25</sup> Te tnáhã nchaa nchòhó cue téé tucu tàú-xi sá ïo cuu iní-ndó ñàdìhí-ndó dàtná quidé Xítóhó Jesucristú cúú iní ñáhã-gã xii nchaa nchoo ñáyìu ndècu ìchi-gá, chi mee-gã ní xíhí-gá sá cuèndá-ó sã cúú iní ñáhã-gã xii-o. <sup>26</sup> Te duca<sup>n</sup> nì quide-gá cuèndá sá ncháá ñáyìu vitna ngúndecu ìchi-gá cuu yíñuhú-yu núú Yá Ndiòxí, te duca<sup>n</sup> ndàda ndoo ndada nine-gá iní-yu sá

cuendá sá quindáá iní-yu tnúhu Yá Ndiöxí, te cuanduté-yu. <sup>27</sup> Te duca<sup>n</sup> ñi quide-gá cuendá sá ncháá ñáiyu na ngündecu ichi-gá ío váha cundecú-yu núú-gã, te duca<sup>n</sup> vã cündecu-gá ni ñ<sup>n</sup> cuéchi-yu núú-gã, te ni ñ<sup>n</sup>-gá sá ñà túú-gã ná cumání-yu núú-gã chi ío cundecu yíñùhu-yu. <sup>28</sup> Te sá dúcá<sup>n</sup> quide Xítohó Jesucristú sá cúú-xí cuè ñáiyu ndècu ichi-gá, xiá<sup>n</sup> tàú-xi sá nchòhó cue téé xíndecu ñadìhí-xi cuu iní-ndó ñadìhí-ndó, te coto-ndó-yu dàtná xító-ndó yìqui cuñú méé-ndó, te cada iní-ndó sã ncháá cuè téé ío cùu iní ñadìhí-xi cùu iní-güedé méé-güedé chi ñ<sup>n</sup>-nã cúú-yu. <sup>29</sup> Te nchoo sã naha-o sá ñi ñ<sup>n</sup> ñáiyu ñã túú dàquee tíhù-yu yìqui cuñú-yu, chi da uu<sup>n</sup>-gá chindèé-yu te xító-yu. Te ñ<sup>n</sup>-ni duca<sup>n</sup> quide Xítohó Jesucristú ndìhi nchaa ñáiyu ndècu ichi-gá, <sup>30</sup> chi cùu-o datná yìqui cuñú méé-gã, te duca<sup>n</sup> chi ñ<sup>n</sup>-ni cùu-o ndìhi-gá. <sup>31</sup> Te tnúhu Yá Ndiöxí càchí-xi: “Sá cuendá xiá<sup>n</sup> nùu nchaa cue téé na ñihí ñadìhí-xi te ñ<sup>n</sup>-ná cada-güedé tátá-güedé ndìhi nãná-güedé, te ñadìhí-nã-güedé cuu cuu ndìhi-güedé, te duca<sup>n</sup> ñ<sup>n</sup>-ná cuu-güedé ndìhi-yu”, duha càchí-xi. <sup>32</sup> Te tnúhu-a cùu-xi ñ<sup>n</sup> tnúhu càhnu vihi, te duca<sup>n</sup> sã tñàhá-xi cùu Xítohó Jesucristú ndìhi cue ñáiyu ndècu ichi-gá. <sup>33</sup> Te càhá<sup>n</sup>-ni tucu-í dóho nchaa nchòhó cue téé xíndecu ñadìhí-xi sá ío cuu iní-ndó ñadìhí-ndó te coto-ndó-yu dàtná xító-ndó mèe-ndo, te duca<sup>n</sup>-ni nchàa nchohó ñáiyu ñ<sup>n</sup> tucu canehe-ndo sã yíñùhu núú yí-ndo.

## 6

<sup>1</sup> Te nchaa nchòhó cue landú, quindáá iní-ndó tátá-ndó ndìhi nãná-ndó chi duca<sup>n</sup> cuíní Yá Ndiöxí cunduu, te ñ<sup>n</sup>-ni duca<sup>n</sup> tñàhá-tàú-xi cada-ndo. <sup>2</sup> Te Yá Ndiöxí ní cachí-gá sá canèhe-ndo sá yíñùhu núú tátá-ndó ndìhi núú nãná-ndó. Te tnúhu-á<sup>n</sup> cúú-xí tnúhu cùnuu ní càhá<sup>n</sup>-gá cada cue ñáiyu cuendá cada váha ñaha-gã xii-yu. <sup>3</sup> Te ní cachí-gá sá nùu duca<sup>n</sup> na càda-ndo te ío váha cundecu-ndo, te duca<sup>n</sup> ío naha cùdíi-ndo cündecu-ndo ñuyíú-a.

<sup>4</sup> Te nchaa nchòhó cue téé cùu tátá, vá dásatú-ndó ñ<sup>n</sup> cue déhe-ndo chi canu ichi-ndo-güèxi nacuáa tàú-xi cunduu,

te dacuàha-ndo-güèxi nchaa tnúhu váha nàcuáa cuíní Yá Ndiöxí cunduu.

<sup>5</sup> Te nchaa nchòhó cue ñáiyu xínu cuechi, quindáá iní-ndó cuè ñáiyu dii chiú<sup>n</sup>-xi quide-ndo, te canehe-ndo sã yíñùhu núú-yu, te ío váha cuu iní-ndó càda-ndo chiú<sup>n</sup>-yu, te duca<sup>n</sup> ñi yuhu ñi iní-ndó càda-ndo. Te cada iní-ndó sã dàtná tnúhu sá chiú<sup>n</sup> Xítohó Jesucristú quidé-ndó.

<sup>6</sup> Te dava ñáiyu xínu cuechi, mee-ñi òré ndéhe ñáiyu dii chiú<sup>n</sup>-xi quidé-yu ío ndùcu ndeé-yu quide chiú<sup>n</sup> váha-yu cuendá cuíní-yu cudiú-yu. Dico nchòhó vá dúcá<sup>n</sup> càda-ndo, chi cuèi ndècu ñáiyu dii chiú<sup>n</sup>-xi quide-ndo àdi ñã túú-yu dico cada chiú<sup>n</sup> váha-ni-ndo, te cada iní-ndó sã dàtná tnúhu sá chiú<sup>n</sup> Xítohó Jesucristú quidé-ndó, te cada-ndo ñi yuhu ñi iní-ndó nàcuáa cuíní Yá Ndiöxí cunduu. <sup>7</sup> Te ío váha cuu iní-ndó càda-ndo chiú<sup>n</sup>-á<sup>n</sup>, chi cada iní-ndó sã dàtná tnúhu sá chiú<sup>n</sup> Xítohó Jesucristú quidé-ndó te ñã díú chiú<sup>n</sup> cue ñáiyu ñuyíú-a.

<sup>8</sup> Te nchòhó sa cùtnuní iní-ndó sã nàcuáa ndùu chiú<sup>n</sup> váha ní quide-ndo ñ<sup>n</sup> ñ<sup>n</sup>-ndo, te duca<sup>n</sup> cünduu sá táxí Xítohó Jesucristú nduu táhú-ndó cuèi cùu-ndo ñáiyu dàñá queé nùú chiú<sup>n</sup> pàtróo<sup>n</sup>-xi àdi cuu-ndo ñáiyu ñã túú tñàhá dàñá quee núú chiú<sup>n</sup> pàtróo<sup>n</sup>-xi.

<sup>9</sup> Te nchaa nchòhó ñáiyu xíndecu ndìhi ñáiyu xínu cuechi, tñàhá-ndó tàú-ndó càda váha-ndo sã cúú-xí cuè ñáiyu xínu cuechi núú-ndó, te vá cündùu nínu iní-ndó nùú-yu, te chí cuàha cuendá sá díú-ní Xítohó Jesucristú Yaá ndécú àndiú taxi tñuní ñàhá-gã xii-ndo ndìhi-yu, te sá cúú-xí mèe-gá chi ñ<sup>n</sup>-ni cùu-ndo núú-gã, te ñ<sup>n</sup>-ni càda ñaha-gã xii-ndo.

*Yá Ndiöxí chindèe-gá cue ñáiyu ndècu ichi-gá cuendá sá vã ndácú sàcuíhná nàa ndìhi ñaha-xi xii-yu*

<sup>10</sup> Te vitna nchaa nchòhó ñáiyu ndècu ndìhi-í ichi Xítohó Jesucristú càchí tnúhu-í xii-ndo sã ío nducu-ndo nàcuáa cada-ndo níhi ndéé-ndó cùu ñ<sup>n</sup>-nuu-ndo ndìhi Xítohó Jesucristú, chi mee-gã ío càhnu cuu-gá, te chindee ñaha-gã xii-ndo. <sup>11</sup> Te ñ<sup>n</sup>-ni nchaa sã ñi nduu táhú-ndó nùú Yá Ndiöxí ñ<sup>n</sup>-ni nchaa xiá<sup>n</sup> cuhu<sup>n</sup> iní-ndó, chi xiá<sup>n</sup> chindee ñaha-xi xii-ndo níhi ndéé-ndó cündecu-ndo cuendá sá vã dándàhú ñàhá sàcuíhná



xii-ndo. <sup>12</sup> Chi nchoo ñà díú cuè ñáyiú ñuyíú-a nàá ndihí-o, chi ndihí cue espíritú cündihí yucu ñávãha, te ñu-ni nchaa espíritú-án cùnũ-xi cuéi núú ñũ quide-xi nchaa sá cuèhé sá dúhá, te ñu-ni-xi cùnũ-xi ñuyíú-a sànu ichí-xi cue ñáyiú quidé-yu nchaa sá cuèhé sá dúhá. <sup>13</sup> Te ío cuhu<sup>n</sup> iní-ndó nchaa sá ñi nduu táhú-ndó núú Yã Ndiõxí cuendá duca<sup>n</sup> ñihí ndéé-ndó cundeçu-ndo, te vá ndácú yucu ñávãha ná cada ñaha-xi xii-ndo oré cuení-xi coto ndeé ñáhá-xí. Te sátá ná dàquee tíhú-ndó yucu ñávãha te ñihí-ni cunduu-ndo cundeçu-ndo ichi Yã Ndiõxí. <sup>14</sup> Te duca<sup>n</sup> cundeçu-ni-ndo ichi Yã Ndiõxí cada-ndo dàtná xiquide cue sandàdú, chi cue téé-án ño ñihí xĩndáa-güedé. Te cáhá<sup>n</sup>-ndó mée-ni tnúhu ndáá tnúhu Yã Ndiõxí, te cuu-ndo dàtná cue sandàdú cue téé ndàda tíi xití-xi òré quihí<sup>n</sup>-güedé nàá-güedé. Te duca<sup>n</sup> sãtnahá-xi cuu-ndo te núu na cáhá<sup>n</sup>-ndó mée-ni tnúhu ndáá tnúhu Yã Ndiõxí. Te cada ndáá-ndó cundeçu-ndo ichi-gã, te cuu-ndo dàtná cue sandàdú cue téé xĩxĩhu sá yídãhu ñaha xii-güedé òré nàá-güedé cuendá sá vã ñicuehé-güedé. Te duca<sup>n</sup> sãtnahá-xi cuu-ndo te núu na càda ndáá-ndó cundeçu-ndo ichi-gã. <sup>15</sup> Te cundeçu túha-ndo cáhá<sup>n</sup>-ndó tnúhu Xitohó Jesucristú, tnúhu sá cáhá<sup>n</sup> nãcuáa cuu váha iní ñáyiú cundeçu-yu, te cuu-ndo dàtná cue sandàdú cue téé ndíhu zapátú-xi quihí<sup>n</sup>-güedé nàá-güedé. Te duca<sup>n</sup> sãtnahá-xi cuu-ndo te núu na cundeçu túha-ndo cáhá<sup>n</sup>-ndó tnúhu Xitohó Jesucristú núú ñáyiú. <sup>16</sup> Te càhí tnúhu tucu-í xii-ndo sã ño quĩndáa iní-ndó Yã Ndiõxí cuendá sá vã ndácú sãcuĩhná nã cada ñaha-xi xii-ndo, te duca<sup>n</sup> te cuu-ndo dàtná cue sandàdú cue téé xĩnehe vítú chĩnè-güedé sãquĩdãhu ñaha-xi xii-güedé cuendá sá vã cuicú<sup>n</sup>-güedé sã nchicú<sup>n</sup> ñuhú téé ñaha cue téé nàá ndihí-güedé. Te duca<sup>n</sup> sãtnahá-xi cuu-ndo te núu na quĩndáa iní-ndó Yã Ndiõxí. <sup>17</sup> Te ío cuhu<sup>n</sup> iní-ndó sã ñi naníhí tàhú-ndó, te cuu-ndo dàtná cue sandàdú cue téé ñũhu mbelú cáxí<sup>n</sup>. Te duca<sup>n</sup> sãtnahá-xi cuu-ndo te núu na cuhu<sup>n</sup> iní-ndó sã ñi naníhí tàhú-ndó. Te ío cuhu<sup>n</sup> iní-ndó tnúhu Yã Ndiõxí, chi tnúhu-án ñi taxi Espíritú-gã ndécú ndihí-ndo chĩndee ñaha-xi xii-ndo, te cuu-ndo dàtná cue sandàdú cue téé xĩnehe machití cuáhã<sup>n</sup>-güedé nàá-güedé.

Te duca<sup>n</sup> sãtnahá-xi cuu-ndo te núu na cuhu<sup>n</sup> iní-ndó tnúhu Yã Ndiõxí. <sup>18</sup> Te vá dàña ndéé-ndó cáhá<sup>n</sup> ndihí-ndo Yã Ndiõxí nãcuáa chĩndee ñaha Espíritú-gã xii-ndo, te cácã<sup>n</sup> táhú-ndó núú-gã ñũ ná cuení-ndó, te ío cundeçu túha-ndo cáhá<sup>n</sup> ndihí-ndo-gã, te vá nátũhú iní-ndó cácã<sup>n</sup> táhú-ndó núú-gã cuendá nchaa dava-gã cue ñáyiú cùu cuendá-gã. <sup>19</sup> Te tnáhã cuendá-í cácã<sup>n</sup> táhú-ndó núú Yã Ndiõxí cuendá sá ná chĩndee ñaha-gã xii-í ñihí-í tnúhu cáhá<sup>n</sup>-í òré cáhá<sup>n</sup>-í tnúhu-gã, te duca<sup>n</sup> vã yũhú-í cáhá<sup>n</sup>-í nãcuáa ndũu tnúhu sã cáhá<sup>n</sup> nãcuáa naníhí tàhú-ó núú ñáyiú tnúhu sã vãtã cündedóho-gã-yu. <sup>20</sup> Te Yã Ndiõxí ní cachí-gã sã yũhú cuu-í ñi<sup>n</sup> téé cada-í núú-gã cáhá<sup>n</sup>-í tnúhu-gã núú ñáyiú, te ñu cuendá tnúhu-án yĩhí-í vecaá vitna. Te ío cácã<sup>n</sup> táhú-ndó núú Yã Ndiõxí cuendá-í cuendá sã yũhú cuyĩ-í ñi yũhu ñi iní-í cáhá<sup>n</sup>-í tnúhu-gã núú ñáyiú nãcuáa tàú-xi cunduu.

#### *Tnúhu ndéé núú ñi ndihí-ná*

<sup>21</sup> Te té Tiquicú téé ío cùu iní-í ndécú ndihí-o ichi Xitohó Jesucristú cúú-dé ñi<sup>n</sup> téé ío váha quide ndáá xínú cuèchi-dé núú Xitohó Jesucristú, téé-án cachí tnúhu-dé xii-ndo nãcuáa cùu ndecu-í ndihí nchaa nãcuáa quide-í cuendá duca<sup>n</sup> cùtnuní iní-ndó. <sup>22</sup> Te cuendá xĩã<sup>n</sup> ñũ cuení-í tendaha-ĩ-dé quixi-dé núú ndécú-ndó cuendá cachí tnúhu-dé xii-ndo nchaa nãcuáa cùu ndecu-ndí iha, te duca<sup>n</sup> tàxi-gã-dé tnúhu ndee iní cundeçu ndihí-ndo.

<sup>23</sup> Te xicã<sup>n</sup> táhú-í núú Tãtã-ó Dütú Ndiõxí ndihí núú Xitohó Jesucristú sã nchãã nchòhó ñáyiú ndècu ndihí-í ichi-gã sã ñu-gã ná cádá te ío váha cuu iní-ndó cundeçu-ndo, te duca<sup>n</sup> ño cuu iní tnáhã-ndó, te ío quĩndáa iní-ndó-gã. <sup>24</sup> Te nchòhó ío cùu iní-ndó Xitohó Jesucristú, te ñã túú dàña ndeé-ndó cùu iní-ndó-gã. Te mee Yã Ndiõxí ío na chĩndee chitúu ñaha-gã xii-ndo. Te duca<sup>n</sup> na cunduu. Te ío chí cádá ndèe iní-nã vitna.



## TUTÚ NÍ CADÚHA TĒ PĀBLÚ QUIHI<sup>n</sup> NDAHA ÑÁYIU ÑUÚ FÌLIPÚ

*Té Pāblú cadūha-dé tutú quíhí<sup>n</sup> ndaha ñáyiú quide ndáá xĩndecu ichi Xítóhó Jesucristú ndécú ñúú Fìlipú*

<sup>1</sup> Yúhú té Pāblú ndihí té Timùteú cúú-ndí cue téé xĩnu cuechi núú Xítóhó Jesucristú, te tēndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndihí cue téé chĩndee ñaha xii-ndo, ndihí nchaa dava-gá ñáyiú xĩquide ndáá ndécú ìchi-gá ñúú Fìlipú. <sup>2</sup> Te xicá<sup>n</sup> táhù-í núú Tátá-ó Dütú Ndiõxí ndihí núú Xítóhó Jesucristú sá ná chĩndee chitúu ñaha-gá xii-ndo, te duca<sup>n</sup> ndí nduú-gá ná cádá te ío váha cuu iní-ndó cùndecu-ndo.

*Té Pāblú cāhá<sup>n</sup> ndihí-dé Yá Ndiõxí cuendá nchaa ñáyiú ndècu ichi-gá*

<sup>3</sup> Te ndí tnahá òré ndácú ìní ñáhà-í xii-ndo, te ndácá<sup>n</sup> táhù-í núú Tátá-ó Dütú Ndiõxí sá ndécú-ndó ìchi-gá. <sup>4</sup> Te ndí tnahá òré duca<sup>n</sup> quide-í te ío cùdí ìní-í cāhá<sup>n</sup> ndihí-í-gá cuendá-ndó. <sup>5</sup> Chi ndéé cútnáhá ní sándáá iní-ndó-gá ní ngüíta-ndo tnáhá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú. <sup>6</sup> Te yúhú sàni ndáá iní-í sá Yá Ndiõxí Yaá ní quesaha chĩndee ñaha xii-ndo quide váha-ndo ndècu-ndo, te ñu-ni-gá chĩndee ñaha-gá xii-ndo càda váha-ndo cùndecu-ndo ndéé ná sàá nduu quixi tucu Xítóhó Jesucristú. <sup>7</sup> Te duca<sup>n</sup> tnáhí tàú-xi cani iní-í sá cúú-xí-ndó, chi ío cùu iní ñáhà-í xii-ndo. Te tnáhá-ndó ío chĩndee chitúu ñaha Yá Ndiõxí xii-ndo ndècu-ndo, te ñu-ni duca<sup>n</sup> chĩndee ñaha-gá xii-ndo tnáhá-ndó cuéi vitna yìhí-í vecaá, te ñu-ni duca<sup>n</sup> chĩndee ñaha-gá xii-í cuéi òré cuáhá<sup>n</sup>-í núú cué ñáyiú ñá túú tnáhá iní tnúhu-gá, chi ñihí-í tnúhu nādanhocáva-í ñúu ná tnúhu cāhá<sup>n</sup>-yu cuendá-gá, te nchaa ñáyiú xāhá<sup>n</sup>-í xii-yu sá tnúhu-gá cúú-xí tnúhu ndáá cuiti. <sup>8</sup> Te mee Yá Ndiõxí náhá ndáá-gá sá yúhú ío cùu iní ñáhà-í xii-ndo dàtná cúú ìní ñáhá mèe Xítóhó Jesucristú xii-o. <sup>9</sup> Te xicá<sup>n</sup>

táhù-í núú Yá Ndiõxí sá díú-gá ná chĩndee ñaha-gá xii-ndo te uu<sup>n</sup>-gá cuita cuu iní tnáhá-gá-ndó quíhí<sup>n</sup>, te duca<sup>n</sup> ío váha cuita cutnùní iní-ndó nchaa nacuáa sàni iní-gá cada-ndo, te duca<sup>n</sup> ío váha cuita cutnùní tucu iní-ndó nācuáa cundecu-ndo. <sup>10</sup> Te duca<sup>n</sup> cùtnuní tucu iní-ndó nchaa sá ío-gá váha xini ñuhu-xi cada-ndo, te duca<sup>n</sup> te cuu-ndo ñáyiú cada mee-ni sá váha, te duca<sup>n</sup> ñà túú tnáhí ná cùmání-ndó ñúú Yá Ndiõxí ndéé ná sàá nduu quixi tucu Xítóhó Jesucristú. <sup>11</sup> Te ñu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá váha nācuáa cuini Yá Ndiõxí. Te sá dúcá<sup>n</sup> ná càda-ndo te ío cada cāhnu-ndo-gá, te nchaa dava-gá ñáyiú cāhá<sup>n</sup> váha-yu cuendá-gá.

*Xítóhó Jesucristú ío cùnuu-gá ndécú ndihí-gá té Pāblú*

<sup>12</sup> Te nchaa nchòhó ñáyiú ndècu ndihí-í ichi Xítóhó Jesucristú na càchí tnúhu-í xii-ndo sá úú<sup>n</sup>-gá tá xité nuu tnúhu-gá vitna yìhí-í vecaá. <sup>13</sup> Te nchaa cue téé cùu sandadú xĩndecu vechiú<sup>n</sup> núú ndécú tēe cùnuu xini-güedé sá sá cuendá sá cāhá<sup>n</sup>-í tnúhu Xítóhó Jesucristú duha yìhí-í vecaá, te ñu-ni duca<sup>n</sup> sá xini nchaa dava-gá ñáyiú sá sá cāhá<sup>n</sup>-í tnúhu-gá duha yìhí-í vecaá. <sup>14</sup> Te cuendá sá dúhá yìhí-í vecaá xĩá<sup>n</sup> ío-gá vai ñáyiú ndècu ichi Yá Ndiõxí ta cùtnuní-gá iní-yu sá cúú-gá ñúu Yaá ío quide ndáá, te uu<sup>n</sup>-gá tá cùyí<sup>n</sup>-yu cāhá<sup>n</sup>-yu tnúhu-gá, te ñá túú tnáhí-gá yúhú-yu cāhá<sup>n</sup>-yu.

<sup>15</sup> Te na càchí-í tnúhu ndáá-í xii-ndo sá dàva ñáyiú cāhá<sup>n</sup>-yu tnúhu Xítóhó Jesucristú cuendá-ni sá cúú cuedú ìní ñáhà-yu xii-í sá ío chĩndee ñaha-gá xii-í cāhá<sup>n</sup>-í tnúhu-gá. Te duca<sup>n</sup> quidé-yu chi cuini-yu nàá ndihí ñáhà-yu xii-í, dico davá-yu chi ío váha sàni iní-yu cāhá<sup>n</sup>-yu tnúhu-gá. <sup>16-17</sup> Te ñáyiú-á<sup>n</sup> cāhá<sup>n</sup>-yu tnúhu-gá chi cùu ìní ñáhà-yu xii-í, te sa náhà-yu sá sá cuendá sá cāhá<sup>n</sup> váha-í cuendá tnúhu-gá núú ñáyiú ñá túú tnáhá ìní tnúhu-gá, cuendá xĩá<sup>n</sup> yìhí-í vecaá. Te dava-gá-yu cāhá<sup>n</sup>-yu tnúhu Xítóhó Jesucristú cuendá-ni sá cuini-yu cuu sá váha xii mèe-yu, te ñá díú sá cāhá<sup>n</sup>-yu cuendá sá sání váha iní-yu. Te duca<sup>n</sup> quidé-yu chi cuendá cuini-yu sá nāndí-gá

cada ñaha-güedě xii-í. <sup>18</sup> Dico ío cùdíí ìní-í sá càhá<sup>n</sup>-yu tnúhu Xítóhó Jesucristú cuèi cùu váha ìní-yu àdi ñá túú cùu váha ìní-yu càhá<sup>n</sup>-yu.

Te ñu-ni duca<sup>n</sup> cùdíí ìní-í núú cuàhá<sup>n</sup> núú vèxi. <sup>19</sup> Te cùtnuní ìní-í sá sã cuendá nchaa sá quidé ñaha-güedě xii-í, cuendá xiã<sup>n</sup> cada váha ñaha Yã Ndiöxí xii-í, chi nchòhó ío càhá<sup>n</sup> ndihí-ndo-gã cuendá-í, te Espíritú ní taxi Xítóhó Jesucristú ndécú ndihí-o ío chindee ñaha-xi xii-í. <sup>20</sup> Te cuíní-í sá ñã túú tnàhí ná cumáni-í núú Yã Ndiöxí cuendá sá vã cúú càhá<sup>n</sup> núú-í, te cùtnuní ìní-í sá díú-gã chindee ñaha-gã xii-í. Te cuíní tucu-í sá ño cuyi-í càhá<sup>n</sup>-í tnúhu-gã vitna dàtná tá quide-í véxi, te duca<sup>n</sup> ño cada nínu-í Xítóhó Jesucristú cuèi vitna ñini ndècu-í ñuyíú-a te cuèi na cùú-í duca<sup>n</sup>-ni càda nínu-í-gã. <sup>21</sup> Te ñini ndècu-í ñuyíú-a te Xítóhó Jesucristú ío cùnuu-gã ndécú ndihí ñaha-gã xii-í, te na sàá nduu cùú-í te ío-gã váha tnàhá-í chi nucúndecu-í ndihí-gã. <sup>22</sup> Te núu na cùndecu-gã-í ñuyíú-a te cada-gã-í chiú<sup>n</sup> sá cúú-xí Yã Ndiöxí, te ñã cùtnuní ìní-í nása cada-í núu sá cùndècu-í àdi sá cùú-í. <sup>23</sup> Te ío vãi sani ìní-í te cuíní-í cúú-í chi ío-gã váha cundecu-í núú ndécú Xítóhó Jesucristú. <sup>24</sup> Dico sá cúú-xí nchòhó chi ío xini ñuhu-xi cundecu-í. <sup>25</sup> Te cùtnuní ndáá ìní-í sá ñi tnúhu ndáá càhá<sup>n</sup>-í, te cùtnuní tucu ìní-í sá cùndècu-ní-í cundecu ndihí ñaha-í xii-ndo nchàa-ndo cuendá chindee ñaha-í xii-ndo cuíta quindáá-gã ìní-ndó Xítóhó Jesucristú quíhí<sup>n</sup>, te duca<sup>n</sup> ño cudíí ìní-ndó cùndecu-ndo. <sup>26</sup> Te duca<sup>n</sup> te uu<sup>n</sup>-gã cachí-ndó sã ño càhnu cuu Xítóhó Jesucristú cuendá sá ñi dácãcu ñaha-gã xii-í ndécú ndihí ñaha-í xii-ndo.

<sup>27</sup> Te xini ñuhu-xi cada-ndo nchaa nacuaá càhá<sup>n</sup> tnúhu Xítóhó Jesucristú. Te núu ní ndacu-í véxi coto ñaha-í xii-ndo, te dàvá-án quiní ndáá-í sá ndécú-ní-ndó ìchi Xítóhó Jesucristú. Dico núu ñá túú ní ndacu-í quixi coto ñaha-í xii-ndo ñã, te ñu-ni níhí-í tnúhu sá ndécú-ní-ndó ìchi-gã, te níhí tucu-í tnúhu sá ñi-ní cùu-ndo ndecu-ndo, te níhí tucu-í tnúhu sá ñi-nuu nducu ndee-ndo cahá<sup>n</sup>-ndó tnúhu Yã Ndiöxí núú ñáyu, tnúhu sá sàndáá ìní-ndó. <sup>28</sup> Te ñá túú yuhú-ndó nchàa sá quidé ñaha ñáyu cùu úhú ìní ñáhá xii-ndo, te sá dúcá<sup>n</sup> quide-ndo ñá túú yuhú-ndó

nchàa sá quidé ñáhá-yu xii-ndo, te ndìxi túu ìní-yu sá nchòhó ndécú-ndó ñi<sup>n</sup> ichi núú nánihí tàhú-ndó, te ñáyu-á<sup>n</sup> cuíta ni-hnú-yu, chi duca<sup>n</sup> ñi cachí Yã Ndiöxí cunduu. <sup>29</sup> Te mee Yã Ndiöxí ní taxi-gã tnúhu ndee ìní sá quindáá ìní-ó Xítóhó Jesucristú, te ñá díú-ní sã quindáá ìní-ó-gã chi tnàhá ndoho-o cuendá-gã. <sup>30</sup> Te tnàhá nchòhó ndóhó-ndó cuendá-gã vitna, te nchòhó ní xiní núú-ndó nàcuáa ní ndoho-í, te vitna níhí-ndó tnúhu nchaa nàcuáa ndòho tucu-í.

## 2

*Xítóhó Jesucristú ñá túú ní quide nínu-gã mée-gã dico Yã Ndiöxí ní quide nínu ñaha xii-gã*

<sup>1</sup> Te Xítóhó Jesucristú dácàhu ìní ñáhá-gã xii-ndo nàcuáa cundecu-ndo, te cùu ìní ñáhá-gã xii-ndo nàcuáa cuu váha ìní-ndó cùndecu-ndo, te ndècu ndihí-ndo Espíritú Yã Ndiöxí, te ío cùndahú ìní tnàhá-ndó. <sup>2</sup> Te xiã<sup>n</sup> núu càhá<sup>n</sup>-í dóho-ndo sã ño cuu ñi-nuu-ni-ndo cùndecu-ndo nacuaá ío-gã cudíí ìní-í, te ñi-ni cùu ìní tnàhá-ndó, te ñi-ni càni ìní-ndó, te ñi-ni càda-ndo. <sup>3</sup> Te vã cáda ñi-nu-ndo mée-ndo nducu-ndo mee-ni sá cúú-xí mée-ndo, chi cunduu ndàhú ìní-ndó, te caní ìní-ndó sã tnàhá ñáyu-ndo ño-gã cùnùu-yu dácúúxí mée-ndo. <sup>4</sup> Te ní vã cáni ìní-ndó nducu-ndo mee-ni sá váha sá cúú-xí mée-ndo, chi nducu-ndo sã cúú-xí tnàhá cuendá tnàhá ñáyu-ndo.

<sup>5</sup> Te ío váha caní ìní-ndó nàcuáa cundecu-ndo dàtná quidé mée Xítóhó Jesucristú. <sup>6</sup> Te ñi-ni cùu Xítóhó Jesucristú ndihí Yã Ndiöxí. Te cuèi duca<sup>n</sup> dico mee Xítóhó Jesucristú ní sani ìní-gã sã ñã túú cùyica cundecu-gã taxi tnùní-gã ndihí Yã Ndiöxí. <sup>7</sup> Te ní dáñá-gã sá cùnùu-gã andiu te ní quixi-gã ñuyíú-a ní cuu-gã ñi ñáyu, te ní quide-gã dàtná quidé ñi tée xinu cuechi. <sup>8</sup> Te ní cuu-gã ñi tée dàtná ndáa cue tée xindecu ñuyíú-a, te ní cuu-gã ñi tée ío ndàhú ìní-xi chi ñá túú ní quide nínu-gã mée-gã, te ní sàndáá ìní-gã ní quide-gã nchaa nàcuáa ní xáha<sup>n</sup> Yã Ndiöxí xii-gã cùtnàhá ní quixi-gã ñuyíú-a. Te sá dúcá<sup>n</sup> ní sàndáá ìní-gã xiã<sup>n</sup> ní xihí-gã núú cùrúxí. <sup>9</sup> Te xiã<sup>n</sup> ío ní quide nínu ñaha Yã Ndiöxí xii Xítóhó Jesucristú cuendá ío cunuu-gã. Te ní xáha<sup>n</sup> Yã Ndiöxí xii Xítóhó Jesucristú sá cúú-gã Xítóhó nchaa

ñáyiú ndècu ñuyíú-a. <sup>10</sup> Te duca<sup>n</sup> ñi quide Yá Ndiòxí cuendá nchaa Espiritú ndécú àndiú, ndihi nchaa ñáyiú ndècu ñuyíú-a, ndihi nchaa ñáyiú ní xihí ngüñí xití-yu ndihi nchaa espíritú-á<sup>n</sup> te cachí-yu ndihi-xi sá ïo càhnu cuu Xítoho Jesucristú. <sup>11</sup> Te nchaá-yu cachí-yu sá Xítoho Jesucristú cúú-gã Yaá táxi tñuní. Te sá dúcá<sup>n</sup> càdá-yu, te quide cahnú-yu Dútú Ndiòxí.

*Ñáyiú ndècu ichi Xítoho Jesucristú cúú-yu dàtná ñ<sup>n</sup> ñuhú*

<sup>12</sup> Te xiá<sup>n</sup> ñuu nchaa nchòhó ñáyiú ïo cùu iní-í cuini-í sá quindáá iní ñáhá-ndó xii-í dàtná ní quide-ndo cùtnàhá ní xindecu ndihi ñaha-í xii-ndo, chi dàvá-á<sup>n</sup> ñà túú tñahí ni dàña ndeé-ndó ni sándáá iní ñáhá-ndó xii-í. Te cuini-í sá úú<sup>n</sup>-gã quindáá iní ñáhá-ndó xii-í vitna ñà túú ndècu ndihi ñaha-í xii-ndo. Te ïo nducu ndèe-ndo cada-ndo nchaa nacuaa tàú-xi cunduu ndeé ná sàá nduu ndùu táhú-ndó cùndecu-ndo ndihi Xítoho Jesucristú, te ïo canehe-ndo sã yíñùhu núú-gã. <sup>13</sup> Te Yá Ndiòxí ïo váha dàcahu iní ñáhá-gã xii-ndo càda-ndo nchaa nacuaa cuini-í mée-gã, te ñuu-ni mee-gã chíndèe ñaha-gã xii-ndo dùca<sup>n</sup> quide-ndo.

<sup>14</sup> Te vá caní iní-ndó ñà tñuhu cáhá<sup>n</sup>-ndó cuendá ñáyiú, te ni ñà túú nãndi tñuhu cùtnàha-ndo ndihí-yu, <sup>15</sup> te duca<sup>n</sup> te cuu-ndo ñáyiú ñà túú cuèchi-xi núú Yá Ndiòxí. Te nchòhó ñáyiú cùu déhe Yá Ndiòxí, ñà túú tñahí-gã ná cumání-ndó núú-gã ñini ndècu-ndo tnuú nchaa ñáyiú ndècu ichi cuehé ichi duha ñuyíú-a, ñáyiú cuihna iní-xi. Te cuu-ndo dàtná chódíní sã dáyèhé niú nee, <sup>16</sup> te duca<sup>n</sup> chi dàcuaha-ndo ñáyiú tñuhu Yá Ndiòxí tñuhu sá cáhá<sup>n</sup> nàcuáa naníhí tàhú-yu. Te núu duca<sup>n</sup>-ni na càda-ndo te òré ná sàá nduu càda ndáá Xítoho Jesucristú nchaa yíca cuèchi ñáyiú, te dàvá-á<sup>n</sup> vã cúú càha<sup>n</sup> núú-í, chi ñà túú diò duca<sup>n</sup> ni sàhni iní-í cada-í nchaa chiú<sup>n</sup> ní táhú-gã. <sup>17</sup> Te nchòhó ïo váha quide-ndo ndecu-ndo ichi Yá Ndiòxí chi sándáá iní-ndó-gã, te yúhú cahni ñaha-güedé xii-í cuendá nchaa sã váha quide-ó. Te xiá<sup>n</sup> ïo cùdíí iní-í te cùdíí tucu iní-í dàtná cùdíí iní-ndó cuendá nchaa sã váha quide-ndo. <sup>18</sup> Te ñuu-ni duca<sup>n</sup> ïo chí cùdíí iní dàtná cùdíí iní mée-í cuendá nchaa sã yãha-í ndécú-í.

*Té Timùteú ndihi té Epafròditú*

<sup>19</sup> Te núu Xítoho Jesucristú ná càchí-gã te ndíhi-ni tendaha-í té Timùteú quixi-dé quixi coto ñaha-dé xii-ndo nàcuáa cudíí iní-ndó. Te òré ndixi-dé canaha-dé tñuhu ndixi núu nása cùu ndecu-ndo, te tñahá yúhú ïo cudíí iní-í tucu. <sup>20</sup> Te núu ncháá cuè té ndècu ndihi-í te ñ<sup>n</sup>dii-ni té Timùteú-a cùu-dé téé ïo váha sàni iní-xi dàtná sání iní-í, chi ñuu tñahí-ni-dé ïo sàni iní-dé ñuu nása ndècu-ndo. <sup>21</sup> Chi dava-gã-güedé mee-ni sã cúú-xi mée-güedé ïo sàni iní-güedé, te ñà túú sàni iní-güedé cada-güedé chiú<sup>n</sup> tahu Xítoho Jesucristú. <sup>22</sup> Te nchòhó sa xini-ndó sã té Timùteú-a cùu-dé ñ<sup>n</sup> téé quide váha chi nãndi sã tá yãha-dé véxi te quide ndee iní-dé. Te cùu-dé dàtná ñ<sup>n</sup> déhe-í ndécú ndihi ñaha-dé xii-í xínú cuèchi-ndí núu Xítoho Jesucristú cáhá<sup>n</sup>-ndí tñuhu-gã núu ñáyiú. <sup>23</sup> Te òré ná cùtnuní ñuu nása cada ñaha-güedé xii-í te ndíhi-ni tendaha-í-dé quixi coto ñaha-dé xii-ndo. <sup>24</sup> Te sàni iní-í sã Xítoho Jesucristú cada-gã te tñahá mée-í ïo ndíhi quixi coto ñaha-í xii-ndo.

<sup>25</sup> Te tñahá sání iní-í sã ïo xini ñuhu-xi tendaha-í té Epafròditú téé ndècu ndihi-o ichi Xítoho Jesucristú ndixi coto ñaha-dé xii-ndo, chi tñahá-dé quidé-dé chiú<sup>n</sup>-gã te quide ndee iní-dé tñahá-dé nãndi yãha-dé sã cuendá-gã, te ñuu mee-ndo ñi tendaha-ndo-dé véxi-dé cuendá coto ñaha-dé xii-í. <sup>26</sup> Te duca<sup>n</sup> cuini-í tendaha-í-dé ndixi-dé chi mee-dé ïo sàni iní-dé ndixi cáhá<sup>n</sup> ndihi ñaha-dé xii-ndo, te ïo ndíhú iní-dé sã ni ñihí-ndó tñuhu sã cùhú-dé ní cùu. <sup>27</sup> Te ndáá sã ñi cùhú-dé chi luha ndiquí<sup>n</sup>-ná cuú-dé ní cùu, dico Yá Ndiòxí ní cundàhú iní ñáhá-gã xii-dé ní quide tátna ñaha-gã te ní ndúha-dé. Te ñà díú-ni mée-dé duca<sup>n</sup> ni cundahú iní ñáhá-gã xii-dé chi tñahá yúhú ïo ní cundàhú iní ñáhá-gã xii-í, chi núu ni xihí-dé te ïo-gã ndíhú iní-í ní cùu. <sup>28</sup> Te xiá<sup>n</sup> ïo ndíhi cuini-í tendaha-í-dé ndixi-dé cuendá òré nasáá-dé núú-ndó te ïo cudíí iní-ndó, te duca<sup>n</sup> yúhú ñà túú-gã ná caní iní-í. <sup>29</sup> Te òré nasáá-dé te ïo cudíí iní-ndó nàquehe<sup>n</sup> cuendá-ndó-dé, te duca<sup>n</sup> ïo ndacá<sup>n</sup> táhú-ndó núu Xítoho Jesucristú cuendá-dé. Te ïo canehe-ndo sã yíñùhu núu nchaa cue téé quide datná quidé-dé. <sup>30</sup> Chi téé-a sa luha ndiquí<sup>n</sup>-ná cuú-dé ní cùu sã



xínú cuèchi-dé núú Xítóhó Jesucristú, te ní sani iní-dé sá ñà túú nã cada-xi cuèi na cùú-dé ní quide-dé nchaa chiù<sup>n</sup> sá cúmãní cada-ndo cuendá-í ní cùu.

### 3

#### *Ñáyiu cùndáá núú Yã Ndiõxí*

<sup>1</sup> Te vitna nchaa nchòhó ñáyiu ndècu ndihí-í ichi Xítóhó Jesucristú càhá<sup>n</sup> ndàhú-í núú-ndó sã ïo cudíí iní-ndó sã yíndàha ñaha-gá xii-ndo. Te yúhú ñá túú cùu dusa<sup>n</sup>-í tee tucu-í nchaa tnúhu sá sã ní dánèhé ñàhà-í xii-ndo, chi cùu-xi tnúhu sã ïo chindee ñaha-xi xii-ndo. <sup>2</sup> Te ío quíhi iní-ndó vã cáda cuendá-ndó ní ì<sup>n</sup> tnúhu càhá<sup>n</sup> cue téé ío cuihna iní-xi ñá túú tnàhí cuíní cada sã vãha, chi cue téé-á<sup>n</sup> néhé-güedé iní iná chi càchí-güedé sá ncháá cué téé xini ñuhu-xi cuáha-güedé sèñá ñi-güedé cuendá duca<sup>n</sup> cùdiu-güedé núú Yã Ndiõxí. <sup>3</sup> Dico nchoo chi cùdiu-o núú Yã Ndiõxí cuèi dava-o sã ní ngündecu sèñá ñi-o te dava-o ñáhá, chi Espiritú-gá chindèe ñaha-xi xii-o quide-o nchaa nacuaá tàú-xi cunduu cuendá cuu càhnu-gá. Te ío cudíí iní-ó càchí-ó sã ïo càhnu cuu Xítóhó Jesucristú, te ñá túú sàni iní-ó sã sã cuendá nchaa sã vãha quide-o cùdiu-o núú Yã Ndiõxí. <sup>4</sup> Te núú dícó cuendá nchaa sã vãha quide-o cùdiu-o núú Yã Ndiõxí, te yúhú sa ama-gá cùdiu-í núú-gã cuendá nchaa sã ñi quide-í ní cùu te núu dícó duca<sup>n</sup>. Te ío cue téé càchí-güedé sã cùdiu-güedé núú Yã Ndiõxí cuendá nchaa sã vãha quide-güedé. Te yúhú uu<sup>n</sup>-gã duca<sup>n</sup> càhá<sup>n</sup>-í nũu dícó sã cúú chi yúhú ní xídó-gã-í ní quide-í dàcúxí dàva-gã-güedé. <sup>5</sup> Te núú ùná-ni nduu sã ñi cacu-í te ní sáha-güedé sèñá ñi-í, te yúhú cúú-í téé isràél, te mei ñàni tnàhá ndíi Benjàmín téé ní xíndecu ndéé sanaha cùu-í. Te càhá<sup>n</sup>-í tnúhu hèbreú tnúhu càhá<sup>n</sup> tãtà-í ndihí nãnà-í, te ní cundihí-í nchaa cue téé cùu fariséú, te ní cãncicú<sup>n</sup> nihnu-í nchaa nàcuáa ní cáhá<sup>n</sup> ndíi Moisés dàtná xíquide mee-güedé. <sup>6</sup> Te yúhú ní sani iní-í sã ì<sup>n</sup> ichi ndáá ndécù-í ní cùu, te ío ní cuíní-í cunu cuechi-í núú Yã Ndiõxí, núu xíã<sup>n</sup> nãndi sã ñi quide-í nchaa ñáyiu ndècu ichi Xítóhó Jesucristú, te vã yõo ì<sup>n</sup> ní xóo cúñaha ì<sup>n</sup> tnúhu xii-í cachí-yu sã ñà túú quide-í nàcuáa ní cáhá<sup>n</sup> ndíi Moisés ní cùu. <sup>7</sup> Te

nchaa sã sání iní-í sã ïo nãndihí nchicú<sup>n</sup> nihnu-í ní cùu, ní cutnùní iní-í sã ñà túú tnàhí chindee ñaha-xi nacuaá cundáá-í núú Yã Ndiõxí, núu xíã<sup>n</sup> duu<sup>n</sup> duu<sup>n</sup> ní xehndé iní-í sã vã chindèe ñaha-xi cuendá sã ñi cuíní-í cundecu ndihí-í Xítóhó Jesucristú. <sup>8</sup> Te nchaa sã càchí ñáyiu chindee ñaha cundáá-ó núú Yã Ndiõxí ní cutnùní iní-í sã ñà túú chindee ñaha-xi. Te yúhú ní cutnùní iní-í sã ïo-gã váha tnàhá tnúhu-o ndihí Xítóhó Jesucristú. Te nchaa sã sání iní-í chindèe ñaha xii-í ní cùu, ñá túú-gã sàndáá iní-í sã chindèe ñaha-xi vitna chi ní cutnùní iní-í sã ñà túú nãndihí-xi. Te duca<sup>n</sup> quide-í ñá túú-gã sàndáá iní-í nchaa xíã<sup>n</sup> sã chindèe ñaha-xi, chi cuíní-í sã úú<sup>n</sup>-gã cuita tnàhá tnúhu-í ndihí Xítóhó Jesucristú quíhí<sup>n</sup>, <sup>9</sup> te cuu ì<sup>n</sup>nuu-í ndihí-gã, te duca<sup>n</sup>-ni cundáá-í núú Yã Ndiõxí dàtná cundáá-í vitna, dico ñá díú cuendá sã nchicú<sup>n</sup> nihnu-í nàcuáa ní cáhá<sup>n</sup> ndíi Moisés ní cùu, chi cuendá sã sàndáá iní-í Xítóhó Jesucristú. Te Yã Ndiõxí ní quide-gã cundáá-í núú-gã, te duca<sup>n</sup> chi ní sàndáá iní-í Xítóhó Jesucristú. <sup>10</sup> Te cuíní-í cutnùní iní-í nchaa nàcuáa sàni iní Xítóhó Jesucristú, te cuíní-í sã ïo chindee ñaha-gã, te diu-ni-gã cúú-gã Yaá ní xihí te ní ndoto-gã, te duca<sup>n</sup> cuíní-í cada-gã cuendá cada-í nchaa nàcuáa cuíní-gã. Te cuíní-í tnàhá-í ndoho-í dàtná ní ndoho-gã. Te yúhú cuíní-í sã vã cáda-í ní ì<sup>n</sup> sã ñà túú tnàhá iní Yã Ndiõxí, chi diu cuendá-á<sup>n</sup> ní xihí Xítóhó Jesucristú. <sup>11</sup> Te cuíní-í sã Yã Ndiõxí cachí-gã te tnàhá-í ndoto na sàá nduu ndòto nchaa ñáyiu sa ní xihí ní xíndecu ichi-gã.

#### *Cada-o nchaa nacuaá tàú-xi cunduu cuendá níhí-ó sã ndúú tãhú-ó*

<sup>12</sup> Te cùmání-gã cada-í nchaa nàcuáa càhá<sup>n</sup>-í-a, te cùmání-gã cada-í nchaa nàcuáa càhá<sup>n</sup> Yã Ndiõxí cuendá sã ñà túú-gã ná cumání-í núú-gã. Te ío ndùcu ndee-í nchicú<sup>n</sup> nihnu-í quide-í nàcuáa duca<sup>n</sup> ñà túú-gã ná cumání-í núú-gã, chi diu cuendá-á<sup>n</sup> ní cáhá<sup>n</sup> ñáhá Xítóhó Jesucristú xii-í. <sup>13</sup> Te nchaa nchòhó ñáyiu ndècu ndihí-í ichi Xítóhó Jesucristú càchí tnúhu-í xii-ndo sã cùtnuní ndáá iní-í sã vítná cùmání-gã cada-í nchaa nàcuáa ñá túú-gã ná cumání-í núú-gã. Te ní níhí-í ì<sup>n</sup> sã ïo xini ñuhu-xi cada-í te xíã<sup>n</sup> quide-í, te



ñá túú-gă quidé cuendá-í nchaa sá nǐ xóo cada-í, te ío ndùcu ndee-í quidè-í nchaa nàcuáa càhá<sup>n</sup> Yă Ndiöxí. <sup>14</sup> Te ndùcu ndee vihi-í nchicú<sup>n</sup> nihnu-í quidè-í nchaa nàcuáa càhá<sup>n</sup>-gá, te ñiu-ni duca<sup>n</sup> càda-í ndéé ná sàá nduu sáá-í núú ndécú-gă taxi-gá sá ndúú tǎhù-í. Te duca<sup>n</sup> tnàhí sa ní càhá<sup>n</sup> ñáhá-gă xii-o cùndecu-o ndihi-gá, te duca<sup>n</sup> nǐ càhá<sup>n</sup> ñáhá-gă xii-o sǎ cuendá Xítóhó Jesucristú chi tnàhá tnúhu-o ndihi-gá.

<sup>15</sup> Te nchaa nchòhó ñáyiú quide váha ndècu ichi Yă Ndiöxí xini ñuhu-xi cani iní-ndó dàtná sání iní-í-a, àdi núu dava-ndo ñà túú sàni iní-ndó dàtná sání iní-í-a, dico mee Yă Ndiöxí dandixi túu-gá iní-ndó te cutnùní iní-ndó nàcuáa cada-ndo. <sup>16</sup> Te xini ñuhu-ni-xi cada-o nchaa nacuáa ta quide-o véxi.

<sup>17</sup> Te nchaa nchòhó ñáyiú ndècu ndihi-í ichi Xítóhó Jesucristú càhá<sup>n</sup>-í dóho-ndo sǎ cǎnchícú<sup>n</sup> nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchicú<sup>n</sup> nihnu nchaa nàcuáa dànehé ñáhà-í xii-ndo cuendá duca<sup>n</sup> càda-ndo tnahá-ndó. <sup>18</sup> Te sa ní cuu vai xito cachí tnúhu-í xii-ndo sǎ ío ñáyiú ñá túú tnàhí cùu váha iní-xi sá nǐ xíhí Xítóhó Jesucristú núú cùrúxí cuendá sá nánihí tǎhú-ó. Te ndihi ndute núu-í dándàcu iní ñáhà-í xii-ndo cuendá-yu. <sup>19</sup> Te sáá nduu te nchaa ñáyiú duca<sup>n</sup> xǐquide-á<sup>n</sup> cuíta nihnú-yu, chi mee-ni nchàa sá cuèhé sá dúhá ñuhu iní-yu te ñiu-ni nchaa xǐá<sup>n</sup> cúnùu quidé-yu, te cucaha<sup>n</sup> núú-yu cuendá nchaa sá quidè-yu núu dìcò sá cúú, dico ñáhá chi da quide cahnú-yu mèe-yu cuendá nchaa xǐá<sup>n</sup>. Te mee-ni nchàa sá ío ñuyíú-a ñuhu iní-yu. <sup>20</sup> Dico nchoo chi andiu ndècu núú cúú ñúú-ó, te ndètu cahnu-o sáá nduu quixi tucu Xítóhó Jesucristú nacuaca ñaha-gă xii-o. Te ñiu-ni-gá cúú-gă Yaá ní dácàcu nihnu ñaha xii-o núú ùhú núú ndáhú. <sup>21</sup> Te yiqui cùñú-ó chi vá cùdǐ-xi cundecu-xi dàtná cáá-xí vitna, dico mee Xítóhó Jesucristú nadama-gá yiqui cùñú-ó te ndada-gá dàtná ní nduu yiqui cùñú mèe-gă cùtnàhá ní ndoto-gá. Te duca<sup>n</sup> càda-gá chi ndàcu-gá quidé-gă nchaa sá váha càchí iní-gá, te duca<sup>n</sup> tàxi tnuní-gá nchaandi túhú sá ío.

## 4

*Ío cudǐí iní-ó sǎ ndécú-ó ichi Xítóhó Jesucristú*

<sup>1</sup> Te nchaa nchòhó ñáyiú ío cùu iní-í ndécú ndihi-í ichi Xítóhó Jesucristú ío cuiní-í càhá<sup>n</sup> ndihi ñaha-í xii-ndo. Te ío cudǐí iní-í cuendá nchaa sá váha quide-ndo chi ñá túú ní xíta chiú<sup>n</sup> Yă Ndiöxí ní quide-í sá cúú-xi-ndó, te ñiu-ni nchòhó ñáyiú ío cùu iní-í càhá<sup>n</sup>-í dóho-ndo sǎ cǎnchícú<sup>n</sup> nihnu-ni-ndo ichi Xítóhó Jesucristú.

<sup>2</sup> Te yòhó tá Vòdiá ndihi yòhó tá Sǐntiqué càhá<sup>n</sup> ndàhú-í núú-ndó sǎ cúú ñ<sup>n</sup>nuu-ndo cundecu-ndo ichi Xítóhó Jesucristú. <sup>3</sup> Te yòhó té cùndihi-í quide ndáá quidé nchàa chiú<sup>n</sup> quide-í, càhá<sup>n</sup> ndàhú-í núú-n sǎ chǐndèe tnúhu-n úú ñáyiú dǐhí-á<sup>n</sup> cuendá sá ná cùu ñ<sup>n</sup>nuú-yu cundecú-yu, chi cùtnàhá ní xǐndecu ndihi ñáhà-yu xii-í ío ní chindee ñáhà-yu xii-í, ndihi té Clémenté, ndihi nchaa dava-gá-yu ní quide-ndí chiú<sup>n</sup> Xítóhó Jesucristú, te nchaa ñáyiú-á<sup>n</sup> sa yòdo tnuní-yu núú tütú Yă Ndiöxí sá ndúú tǎhù-yu cundecú-yu ndihi-gá ni caa ni quǐhí<sup>n</sup>.

<sup>4</sup> Te nchaa-ni nduu ío cudǐí iní-ndó sǎ ndécú-ndó ichi Xítóhó Jesucristú. ¡Te càhá<sup>n</sup>-ni tucu-í dóho-ndo sǎ cudǐí ndisa iní-ndó! <sup>5</sup> Te ío váha cuu iní-ndó càhá<sup>n</sup> ndihi-ndo ñáyiú cuendá ná cùtnuní iní-yu sá cúú-ndó ñáyiú váha iní-xi, chi sa ta cùyatni nduu quixi tucu Xítóhó Jesucristú.

<sup>6</sup> Te ñá túú tnàhí ná cani iní-ndó te núu nása cùu ndecu-ndo, chi càhá<sup>n</sup> ndihi-ndo Yă Ndiöxí cuendá sá ná chindee ñaha-gá xii-ndo. Te ío ndacá<sup>n</sup> tǎhú-ndó núú-gă. <sup>7</sup> Te núu duca<sup>n</sup> na càda-ndo te Yă Ndiöxí cada-gá te ío váha cuu iní-ndó cùndecu-ndo. Te nchoo ñáyiú ñá túú cùtnuní iní-ó nása quide-gá ndéé duca<sup>n</sup> ío váha cùu iní-ó, te duca<sup>n</sup> ío váha cùu iní-ó chi cùu ñ<sup>n</sup>nuu-o ndihi Xítóhó Jesucristú.

*Mee-ni sǎ váha cuhu<sup>n</sup> iní-ó*

<sup>8</sup> Te càhá<sup>n</sup> ndàhú tucu-í núú nchàa nchòhó ñáyiú ndècu ndihi-í ichi Xítóhó Jesucristú sá mèe-ní sǎ váha cuhu<sup>n</sup> iní-ndó. Te xini ñuhu-xi cuhu<sup>n</sup> iní-ndó mèe-ni nchaa tnúhu ndáá, ndihi nchaa tnúhu yǐñùhu, ndihi nchaa tnúhu sá ío cudǐí iní-ó, ndihi nchaa tnúhu sá ío vii ío váha cuáhá<sup>n</sup>, ndihi nchaa tnúhu sá ñà túú ñuhu tnahá tnúhu cuèhé, ndihi nchaa tnúhu sá càchí ñáyiú

váha, ndihi nchaa dava-gá tnúhu sá sání iní méé-ndó sã ò váha te ñu-ni nchaa xiã<sup>n</sup> cuhu<sup>n</sup> iní-ndó.

<sup>9</sup> Te cútnàhá ní xíndecu ndihi ñaha-í xii-ndo ní dánèhé ñàhá-í nàcuáa cada-ndo te ní sándáá iní-ndó. Te xiã<sup>n</sup> càhá<sup>n</sup>-í dóho-ndo sã vã dáñá ndèé-ndó càda-ndo, te ñu-ni duca<sup>n</sup> vã dáñá ndèé-ndó càda-ndo nchaa nacuáa ní quide-í ní xiní-ndó. Te núu duca<sup>n</sup> na càda-ndo te Yá Ndiõxí Yaá quidé ò váha cùu iní-ó ndècu-o cundecu ndihi ñaha-gá xii-ndo.

*Ñáyiú ñuú Filipú ndécú ichi Xítóhó Jesucristú sãñàhá-yu sá ndúú tãhú tẽ Pãblú*

<sup>10</sup> Te cùdíí víhí iní-í ndàcá<sup>n</sup> tãhú-í núú Xítóhó Jesucristú sá ní ndacu iní ñàhá-ndó xii-í, dico ñá díú sã ñà túú ñùhu iní ñàhá-ndó xii-í chi dicó sã ñã ñihí-ndó nàcuáa cada-ndo chindee ñaha-ndo xii-í ní cùu. <sup>11</sup> Te ñá díú sã dúhá càhá<sup>n</sup>-í te cani iní-ndó sã càchí tnúhu-í xii-ndo sã ò ñ<sup>n</sup> sã cùmãní xii-í, chi yúhú cùu váha-ni iní-í núu ò xii-í àdi ñá túú ò. <sup>12</sup> Te xini-í cunduu ndàhú-í, te xini-í cunduu cuica-í, te xini-í caxi-í ndahá xiti-í, te xini-í cuú-í docó, te xini-í nàcuáa quide-xi oré ñá túú vèdana ná ndécú ndihi-o, te xini-í nàcuáa quide-xi oré xidó ndécú ndihi-o. Te duca<sup>n</sup> ñí cutúha-í quidè-í cuendá nchaa nàcuáa ta yãha-í véxi. <sup>13</sup> Te nchaa ndàcu-í quidè-í chi Xítóhó Jesucristú chindèe ñaha-gá xii-í. <sup>14</sup> Te nchòhó ò váha ní quide-ndo ñí cundàhú iní ñàhá-ndó xii-í ní chindee ñaha-ndo vitna ndecu ndihi-í tnúndòho.

<sup>15</sup> Te nchòhó cue ñáyiú ñuú Filipú sa nàha-ndo nacuáa ní cuu cútnàhá ní ngúita-í càhá<sup>n</sup>-í tnúhu Xítóhó Jesucristú distritú Macèdoniá, te cútnàhá ní ndee-í distritú-á<sup>n</sup> te ñu tnàhí-ni nchòhó ní taxi-ndo sã ndúú tãhú-í, te nchaa ñáyiú ndècu ichi Xítóhó Jesucristú dava-gá xichi ñá túú tnàhí ní chindee ñahá-yu xii-í. <sup>16</sup> Te cuèi cútnàhá ní xíndecu-í ñuú Tesalónica títñí xito ní tendaha-ndo sã ndúú tãhú-í sá ñí cutnùní iní méé-ndó ñí xini ñùhu-í. <sup>17</sup> Te vã caní iní-ndó sã sã dúhá càhá<sup>n</sup>-í te cuini-í nãndi-gá taxi tãhú-ndó, te duha càhá<sup>n</sup>-í chi Yá Ndiõxí ò-gá vãi sã váha cada ñaha-gã xii-ndo sã dúcá<sup>n</sup> quide-ndo. <sup>18</sup> Te ní xidó vãi nchaa sá xiní ñùhu-í ndécú ndihi-í vitna, te duca<sup>n</sup> ò vãi sã ndécú ndihi-í ní cuu chi ní tendaha tucu-ndo sã ndúú tãhú-í véxi ndihi té

Epafròditú. Te tãhú-a cùu-xi datná ñ<sup>n</sup> tãhú sã ñí sãha-ndo mèe Yá Ndiõxí, te cùu vii cuu váha iní-gá sã dúcá<sup>n</sup> ñí quide-ndo. <sup>19</sup> Te núu ná cuú sã xiní ñùhu-ndo, te mee Yá Ndiõxí ò vãi taxi-gá chi ò vãi sã ndécú ndihi-gá, te duca<sup>n</sup> càda-gá chi ndècu ndihi-o Xítóhó Jesucristú. <sup>20</sup> Te vitna nchaa-o chí ná càchí-ó sã ò càhnu cuu Tátá-ó Dútú Ndiõxí ní caa ní quíhí<sup>n</sup>. Te duca<sup>n</sup> na cùnduu.

*Tnúhu ndéé núú ñí ndihi-ná*

<sup>21</sup> Te cúñaha-ndo sã ò na càda ndee iní nchaa ñáyiú ndècu ichi Xítóhó Jesucristú, ñáyiú cùu cuendá Yá Ndiõxí. Te tnàhá nchaa ñáyiú xíndecu ichi Xítóhó Jesucristú ndécú ndihi-í quidé ndèe iní ñàhá-yu xii-ndo. <sup>22</sup> Te nchaa ñáyiú cùu cuendá Yá Ndiõxí xinú cuèchi vehe té Cèsár tée yindaha cuéhé nació<sup>n</sup> quidé ndèe iní ñàhá-yu xii-ndo, ndihi nchaa dava-gá ñáyiú cùu cuendá-gá.

<sup>23</sup> Te Xítóhó Jesucristú ò na chindee chitúu ñaha-gã xii-ndo nchaa-ndo. Te duca<sup>n</sup> na cùnduu. Te ò chí cadá ndèe iní-nã vitna.

## TUTÚ NÍ CADÚHA TĒ PĀBLŪ QUIHĪ<sup>n</sup> NDAHA ÑÁYIU ÑUÚ CÒLOSÁ

*Té Pāblū cādūha-dé tutú quíhĪ<sup>n</sup> ndaha ñáyiu x̄ndecu ichi Xítohó Jesucristú ndécú ñuú Còlosá*

<sup>1</sup> Yúhú té Pāblū ní tendaha ñàha Yá Ndiöxí càhá<sup>n</sup>-í tnúhu Xítohó Jesucristú núú ñáyiu chi duca<sup>n</sup> cuení méé Yá Ndiöxí cunduu, te cādúha-í tutú-a ndihĪ té Timúteú <sup>2</sup> cuendá daquixi-í ndaha nchòhó ñáyiu ñuú Còlosá, ñáyiu cùu cuendá Yá Ndiöxí, ñáyiu quide ndáá ndécú ichi Xítohó Jesucristú, te xicá<sup>n</sup> táhù-í núú Tātá-ó Dütú Ndiöxí sá ïo na chindee chitúu ñaha-gá xii-ndo, te duca<sup>n</sup> ndi nduú-gá ná cádá te ïo váha cuu iní-ndó cūndecu-ndo.

*Té Pāblū càhá<sup>n</sup> ndihĪ-dé Yá Ndiöxí cuendá ñáyiu sàndáá iní ñáhá xii Xítohó Jesucristú*

<sup>3</sup> Te duca<sup>n</sup>-ni càhá<sup>n</sup> ndihĪ-ndí Yá Ndiöxí Yaá cúu Tātá Xítohó Jesucristú ndácá<sup>n</sup> táhú-ndĪ núú-gá cuendá nchaa nācuáa quide-ndo ndecu-ndo, <sup>4</sup> chi nihĪ-ndí tnúhu sá ïo sàndáá iní-ndó Xítohó Jesucristú, te duca<sup>n</sup> ïo cùu iní-ndó nchaa ñáyiu cùu cuendá Yá Ndiöxí. <sup>5</sup> Te duca<sup>n</sup> quide-ndo chi sàndáá iní-ndó sá ndúú táhú-ndó cūndecu-ndo núú ndécú Xítohó Jesucristú, te tnúhu-á<sup>n</sup> nĪ nihĪ-ndó cūtnàhá ní xīndedóho-ndo tnúhu ndáá tnúhu Xítohó Jesucristú. <sup>6</sup> Te tnúhu Xítohó Jesucristú tá xitē nuu-xi nihĪ ñuyúu cuáhá<sup>n</sup>. Te vai ñáyiu ta sàndáá iní-yu cuáhá<sup>n</sup>, te ta quidé-yu mee-ni sá vāha cuáhá<sup>n</sup> ndécū-yu ichi-gá. Te nchòhó chi ndéé cūtnàhá ní tecú dóho-ndo tnúhu-gá ní quesaha-xi ta cùu vai ñáyiu ñuú-ndó tá quide ndáá-yu núú-gá cuáhá<sup>n</sup>. Te dāvā-á<sup>n</sup> nĪ cutnūnĪ ndáá ndisa iní-ndó sá Yá Ndiöxí ïo chindee chitúu ñaha-gá xii-ndo. <sup>7</sup> Te duca<sup>n</sup> nĪ dánèhé ñáhá tē Ēpafrás tēe ïo cùu iní-ndí, chi tnàhá-dé ïo quide ndáá-dé xínú cuèchi-dé núú Xítohó Jesucristú quidé-dē núú-ndĪ dācuàha ñaha-dé xii-ndo tnúhu-gá. <sup>8</sup> Te cāchĪ tnúhu-dé xii-ndí sá ïo cùu iní ñáhá-ndó xī-ndí, te duca<sup>n</sup>

quide-ndo chi Espiritú Yá Ndiöxí chīndèe ñaha-xi xii-ndo.

<sup>9</sup> Te ndéé cūtnàhá ní nihĪ-ndĪ tnúhu nācuáa quide-ndo ndecu-ndo ndéé dāvā-á<sup>n</sup> nĪ ngūita-ndí ñá túu dàña ndee-ndí xicá<sup>n</sup> táhú-ndĪ núú Yá Ndiöxí cuendá-ndó sá Espiritú-gá ná tàxi-xi nchaa-gá sá cūmānĪ quini tnūnĪ-ndó, te duca<sup>n</sup> te cutnūnĪ váha-gá iní-ndó nācuáa cuení Yá Ndiöxí cada-ndo. <sup>10</sup> Te sá dūcá<sup>n</sup> te ndacu-ndo cada-ndo mee-ni sá vāha dàtná cuení Xítohó Jesucristú cada nchaa ñáyiu ndecu ichi-gá. Te duca<sup>n</sup> ïo nduu vétú iní-gá te núu na cada-ndo nchaa núú sá vāha. Te duca<sup>n</sup> ïo-gá cuita cutnūnĪ iní-ndó nchaa nācuáa cuení Yá Ndiöxí cada-ndo. <sup>11</sup> Te mee-gá cúu-gá Yaá ïo cūnuu, te diu-gá ïo chindee ñaha-gá xii-ndo, te cudĪ iní-ndó cuēi nāndi na cada ñaha ñáyiu xii-ndo sá cuendá-gá, te duca<sup>n</sup> ïo cunduu càhnu iní-ndó. <sup>12</sup> Te ndacá<sup>n</sup> táhú-ó nūú Dütú Ndiöxí chi ní quide túha ñaha-gá xii-o cuendá nduu táhú-ó cūndecu-o ndihĪ nchaa dava-gá ñáyiu yīndaha-gá x̄ndecu núu cāndòo canine ñá túu tnàhĪ-gá ni ĩ<sup>n</sup> cuèchi ïo. <sup>13</sup> Te diu-gá ní quide ní dáñá-ó nchaa ichi cuehé ichi duha núu táxi tnūnĪ yucu ñāvāha, te ní nachihĪ ñaha-gá xii-o ndàha Déhe-gá Yaá ïo cùu iní-gá. <sup>14</sup> Te Déhe-gá ní xihĪ-gá cuendá sá nchóó cācu nihnu-o nūú ùhú núu ndàhú, te ní quide càhnu iní-gá nchaa sá cuèhé sá dūhá nĪ quide-o.

*Ñáyiu cùu ĩ<sup>n</sup>nuu ndihĪ Yá Ndiöxí cuendá sá nĪ xihĪ Xítohó Jesucristú*

<sup>15</sup> Te Yá Ndiöxí cúu-gá Yaá vá cúu quini-ó dico Xítohó Jesucristú chi ní quixi túu-gá ñuyúu-a, te ní quide-gá nchaa nācuáa sàni iní-gá. Te dàtná-ni sàni iní-gá te duca<sup>n</sup> sàni iní Yá Ndiöxí, te Yaá-á<sup>n</sup> duca<sup>n</sup>-ni ndecu-gá ndéé cūtnàhá vátá ngāva-gá ñuyúu. <sup>16</sup> Te Xítohó Jesucristú ní quide-gá núu Yá Ndiöxí ní cadúha-gá nchaa sá ïo andiu ndihĪ nchaa sá ïo ñuyúu-a, te ní cadúha-gá nchaa sá cúu quini núu-ó cūndehe-o, ndihĪ nchaa sá vā quini tnàhĪ-o, ndihĪ nchaa espiritú cūnū vihi xinu cuechi núu Yá Ndiöxí, ndihĪ nchaa dava-gá espiritú xínú cuèchi. Te nchaa ní cadúha Xítohó Jesucristú chi duca<sup>n</sup> nĪ cachĪ Yá Ndiöxí cunduu. Te duca<sup>n</sup> nĪ cachĪ Yá Ndiöxí cunduu cuendá nchaa cuu-xi mee-ni sá vāha sá cúu-xī Xítohó

Jesucristú. <sup>17</sup> Te Xítoho Jesucristú duca<sup>n</sup>-ni ndècu-gá ndéé cútnàhá vátá ngáva-gá ñuyíú-a, te ñuú núú ndáhá-gã cándòdo ñuyíú-a, ndihì andiù, ndihì nchaandi túhú sá ío. <sup>18</sup> Te ñuú Xítoho Jesucristú cùnùu-gá yíndàha ñaha-gá xii nchaa nchoo ñáyiù ndècu ichi-gá, te ñuú-gá quidé-gã ndécú vaha-o núú-gã. Te núú ncháá ñáyiù ndoto ñuú-gá cúú-gã Yáá ío càhnu cuu sa ní ndoto, te sá dúcá<sup>n</sup> ní ndoto-gá te xiá<sup>n</sup> cúú-gã Yáá ío tàxi tnuní nchaandi túhú sá ío ñuyíú-a ndihì andiù. <sup>19</sup> Te duca<sup>n</sup> ío cùnùu-gá táxi tnùní-gá chi ndáá sá ñ<sup>n</sup>-ni cuu-gá ndihì Yá Ndiöxí. <sup>20</sup> Te Xítoho Jesucristú ní xihí-gá núú cùrúxí, chi duca<sup>n</sup> ní cuiní Yá Ndiöxí cunduu cuèndá sá vã yõo ñ<sup>n</sup>-gá cuu úhú iní ñáhá xii-gá cuèi ñáyiù xíndecu ñuyíú-a, te cuèi cue espíritu ndécú àndiù. <sup>21</sup> Te nchòhó cútnàhá vátá cùndècu-gá-ndó ìchi Xítoho Jesucristú ñá túú tnàhí ní xõ cáhá<sup>n</sup> ndihì-ndo-gã, chi mee-ni ní xõo cuu úhú iní-ndó-gã, te mee-ni nchàa sá cuèhé sá dúhá ní xõo cunuu ní xõo cada-ndo ni cùu, dico Xítoho Jesucristú ní quide-gá ní tnàhá tnúhu-ndo ndihì Yá Ndiöxí vitna. <sup>22</sup> Chi ñuú cuèndá-á<sup>n</sup> ní xihí Xítoho Jesucristú núú cùrúxí cuèndá sá nchóó ndùu ndoo nduu nine iní-ó ngündecu-o núú Yá Ndiöxí, te duca<sup>n</sup> te ñá túú tnàhí-gá ná cumání-ó núú-gã, te vã yõo ñ<sup>n</sup>-gá cachí sá nchóó ndècu cuèchi-o. <sup>23</sup> Te núú vã dáñá ndèé-ndó quíndáá iní-ndó Xítoho Jesucristú, te cundecu-ni-ndo ìchi-gá, te vã cání iní-ndó dàña-ndo tnúhu ndee iní ní taxi-gá ndécú ndihì-o. Te nchaa tnúhu-gá-á<sup>n</sup> tá xité nuu-xi nihí ñuyíú cuáhá<sup>n</sup>, te ñuú-ni tnúhu-á<sup>n</sup> càhá<sup>n</sup> yúhú té Páblú dánèhé-í ñáyiù.

*Té Páblú yihí díquí-dé cáhá<sup>n</sup>-dé tnúhu Xítoho Jesucristú núú ñáyiù ndècu ichi-gá*

<sup>24</sup> Te vitna ío cùdíí iní-í ndóhò-í cuèndá-ndó, chi Xítoho Jesucristú ío ní ndoho-gá cuèndá-ó, te tnàhá yúhú ndóhò-í cuèndá nchaa ñáyiù ndècu ichi-gá, dico vitna cùmání-gã ndoho-í cuèndá-yu. <sup>25</sup> Te Yá Ndiöxí ní cachí-gá sá yúhú quihì díquí ñáhà-í xii nchaa nchòhó ñáyiù ndècu ichi-gá cuèndá danèhé ñáhá vaha-í xii-ndo tnúhu-gá cuèndá cuu-xi sá vaha sá cúú-xí-ndó. <sup>26</sup> Te nchaa tnúhu sá dánèhé

ñáhà-í xii-ndo ñá túú ní tècú dóho nchaa ñáyiù ní xíndecu ndéé sanaha, te mee-gã ní cuiní-gá sá ncháá nchòo ñáyiù yíndaha-gá vitna cundecu ndihì-o tnúhu-á<sup>n</sup>. <sup>27</sup> Te mee-gã ní cachí-gá sá dátúu-gá nchaa tnúhu sá ío vii ío vaha cuáhá<sup>n</sup> núú nchàa ñáyiù yíndaha-gá. Te tnúhu-á<sup>n</sup> cúú-xí cuèndá tnàhá nchaa nchòhó ñáyiù ñá túú cùu ñáyiù israél. Te tnúhu-á<sup>n</sup> dánèhé ñáhá-xi xii-ndo sá Xítoho Jesucristú ndécú ndihì ñaha-gá xii-ndo. Te cuèndá xiá<sup>n</sup> ní ngündecu ndihì-ndo tnúhu ndee iní cundecu-ndo ndihì-gá ní caa ní quíhí<sup>n</sup>.

<sup>28</sup> Te nchúhú mee-ni cuèndá Xítoho Jesucristú càhá<sup>n</sup> vaha-ndí, te dàsahú-ndí ñáyiù nàcuáa cadá-yu. Te vaha vèhi danèhé-ndí nchaa ñáyiù nàcuáa tecú tnùní-yu tnúhu-gá, te duca<sup>n</sup> dànèhé-ndí-yu nàcuáa cundáá-yu núú Yá Ndiöxí, te duca<sup>n</sup> chi tnàhá tnúhu-yu ndihì Xítoho Jesucristú. <sup>29</sup> Te cuèndá xiá<sup>n</sup> ío ndùcu ndee-í quidè-í chiù<sup>n</sup> Xítoho Jesucristú, te mee-gã ío chindee ñaha-gá xii-í núu xiá<sup>n</sup> ndácù-í quidè-í chiù<sup>n</sup>-gá.

## 2

<sup>1</sup> Te cuiní-í sá nchòhó cutnùní iní-ndó sã ío sàni iní-í cuèndá-ndó, ndihì cuèndá nchaa ñáyiù ndècu ñuú Laodiceá, ñáyiù xíndecu ichi Xítoho Jesucristú. Te duca<sup>n</sup>-ni ío sàni iní-í cuèndá nchaa ñáyiù vátá quiní ñáhá-gã xii-í. <sup>2</sup> Te cuiní-í sá nchòhó ndihì nchaa ñáyiù-á<sup>n</sup> ío nducu ndèe-ndo canchicú<sup>n</sup> nihnu-ndo ìchi Xítoho Jesucristú, te ío cuu iní tnàhá-ndó, te duca<sup>n</sup> cùu ñ<sup>n</sup>-nuu-ndo cundecu-ndo. Te cuiní-í sá nchòhó ndihì dava-gá ñáyiù-á<sup>n</sup> ío vaha sáá sá xini tnùní-ndó cuèndá tecú tnùní-ndó nchàa nacuáa ndùu cuèndá Xítoho Jesucristú chi ío ndùu yuhu ni cuu, dico vitna ní dátúu-gá núú-ó. <sup>3</sup> Te Xítoho Jesucristú néhé vaha-gá nchaa tnúhu sá ío xini ñuhu-xi tecú tnùní-ó. <sup>4</sup> Te duha càhá<sup>n</sup>-í chi cuiní-í sá vã quíndáá iní-ndó ní ñ<sup>n</sup> tnúhu càhá<sup>n</sup> nchaa ñáyiù cuiní dandáhú ñáhá xii-ndo cuèi ío vaha càhá<sup>n</sup>-yu. <sup>5</sup> Te cuèi ñá túú ndècu ndihì ñaha-í xii-ndo dico duca<sup>n</sup>-ni ío ñuhu iní ñáhà-í, te ío cùdíí iní-í chi nihí-í tnúhu sá ío cùu ñ<sup>n</sup>-nuu-ndo ndecu-ndo, te ñá túú dàña ndéé-ndó sàndáá iní-ndó Xítoho Jesucristú.



<sup>6</sup> Te dàtná-ni ní sándáá iní-ndó Xítóhó Jesucristú, te duca<sup>n</sup>-ni quindáá iní-ndó-gã canchicú<sup>n</sup> nihnu-ndo ìchi-gá. <sup>7</sup> Te ni yùhu ni iní-ndó cànchicú<sup>n</sup> nihnu-ndo ìchi-gá, te duca<sup>n</sup> cuíta cutnuni-gá iní-ndó nchàa nacuaá càhá<sup>n</sup>-gá quíhí<sup>n</sup>. Te vá dáñá ndèè tnàhí-ndo quindáá iní-ndó nchàa tnúhu sá ní dánèhé ñáhá cuè téè càhá<sup>n</sup> tnúhu-gá xii-ndo. Te xini ñuhu-xi ndacá<sup>n</sup> táhú vîhi-ndo núú Yá Ndióxi cuendá nchaa tnúhu-á<sup>n</sup>.

*Ñáyiú ío váha tnàhá tnúhu ndihi Xítóhó Jesucristú*

<sup>8</sup> Te ío quíhi iní-ndó cùndecu-ndo chi xica cuu ñáyiú cuení dandàhú ñáhá xii-ndo, te ñáyiú-á<sup>n</sup> càhá<sup>n</sup>-yu mee-ni nchàa tnúhu ní cahu iní nchaa cue téè ñuyíú-a, te nchaa tnúhu-á<sup>n</sup> ñá túú vèdana nàndíhi-xi. Te duca<sup>n</sup> quidé-yu chi nchicú<sup>n</sup> nihnu-ni-yu nchaa nacuaá ní xóo cada ñáyiú ní xindecu ndéè sanaha. Te càhá<sup>n</sup>-yu nacuaá sàni iní yucu ñávàha, te ñá túú càhá<sup>n</sup>-yu nacuaá cuení méè Xítóhó Jesucristú.

<sup>9</sup> Te Xítóhó Jesucristú cúú-gã ì<sup>n</sup> ñáyiú dico ì<sup>n</sup>-ni cùu-gá ndihi Dútú Ndióxi. <sup>10</sup> Te nchòhó chi ñá túú tnàhí-gá ná cúmání-ndó núú-gã chi ndècu ndihi-ndo Xítóhó Jesucristú. Te ío cùnnu-gá te tàxi tnuní-gá nchaa núú cuè espíritú cùnùu. <sup>11</sup> Te mee-gã ní ndada ndoo ní ndada nine-gá iní-ndó chi ní ngúndecu ndihi-ndo-gã te duca<sup>n</sup> ñà túú-gã ndécú-ndó ìchi cuehé ìchi duha, te cada iní-ndó sã ní ngúndecu ndihi-ndo ì<sup>n</sup> seña, chi ní ndada ndoo ní ndada nine-gá iní-ndó, dico ñá díú ì<sup>n</sup>-ni cuu-xi ndihi seña sã sãha cue téè isràél ñi-güedé. <sup>12</sup> Te nchòhó sa ní sandute-ndo te cada iní-ndó sã dàtná tnúhu sá ní xihí-ndó ndihi Xítóhó Jesucristú, te ní nguindúxi-ndo ndihi-gá, te ní ndoto-ndo ndihi-gá, te duca<sup>n</sup> càda iní-ndó chi ñá túú-gã ndécú-ndó ìchi cuehé ìchi duha. Te duca<sup>n</sup> chi sándáá iní-ndó nchàa nacuaá quide Yá Ndióxi, te diu-gá ní dándótó-gã Xítóhó Jesucristú. <sup>13</sup> Te nchòhó cútnàhá ndécú-ndó ìchi cuehé ìchi duha cùu-ndo datná ñáyiú ní xihí, chi ñá túú tnàhá tnúhu-ndo ndihi Yá Ndióxi ní cùu, te ni ñá díú ñáyiú isràél cúú-ndó. Te Yá Ndióxi ní cachí-gá sã nchóó ío váha tnàhá tnúhu-ndo ndihi Xítóhó Jesucristú vitna. Te duca<sup>n</sup>

ni quide-gá chi sa ní quide càhnu iní-gá nchaa sá cuèhé sá dúhá ni xóo cada-o. <sup>14</sup> Te vitna duu<sup>n</sup> duu<sup>n</sup> ñá túú-gã cuèchi-ò ndècu núú-gã. Te nchoo ñà túú cuení-ò càda-o nacuaá càhá<sup>n</sup>-gá, te cuendá xiá<sup>n</sup> ío ndècuèchi-ò, te vâi nacháhu-ò núú-gã ní cùu. Te vitna ñá túú-gã ni ì<sup>n</sup> cuèchi-ò ndècu núú-gã, chi diu cuendá-á<sup>n</sup> ni xihí Xítóhó Jesucristú núú cùrúxi. <sup>15</sup> Te sá dúcá<sup>n</sup> ni xihí Xítóhó Jesucristú núú cùrúxi, te duu<sup>n</sup> duu<sup>n</sup> ní dáquée tihú-gã sácuihná ndihi nchaa espíritú cùndíhi-xi, te ní quendóo canúú-xi, te mee-gã ío cùnnu-gá táxi tnuní-gá.

*Nanducu nihnu-ò mee-ni sá váha càchí Xítóhó Jesucristú*

<sup>16</sup> Te núu dava ñáyiú xicuèhé ñáhã-yu xii-ndo cuendá sã ñà túú xèxi-ndo xihí-ndo datná quidé méè-yu te vá cadá cuendá-ndó, te ni vâ cadá cuendá-ndó te núu xicuèhé ñáhã-yu xii-ndo cuendá sã ñà túú cãnehe íí-ndó vico quide méè-yu núú cuía núú cuía, ndihi vico quidé-yu ndi tnahá yóó, ndihi cuendá sã ñà túú cãnehe íí-ndó nduu ndetatú-yu. <sup>17</sup> Te nacuaá quidé-yu ndi tnahá òré quidè-yu nchaa vico-á<sup>n</sup>, ndihi nacuaá quidé-yu ndi tnahá nchaa nduu cãnehe íí-yu-á<sup>n</sup>, te cada iní-ò sã sã quidè-yu-á<sup>n</sup> dánèhé núú ñáhã-xi nacuaá cada Xítóhó Jesucristú núú cuahá<sup>n</sup> núú vèxi.

<sup>18</sup> Te vá quindáá iní-ndó ni ì<sup>n</sup> tnúhu càhá<sup>n</sup> ñáyiú càchí sã cuíta nihnu-ndo cuendá sã ñá túú tnè-ndo tnúhu càhá<sup>n</sup>-yu, chi càchí-yu sã ío xini ñuhu-xi cada cahnu-ò nchaa cue espíritú xínú cuèchi núú Yá Ndióxi, te ni yùhu ni iní-ò cãnehe-ò sã yíñùhu núú-xi. Te ñáyiú-á<sup>n</sup> càchí-yu sã ndàá càhá<sup>n</sup>-yu chi dàcoto ñaha saní-yu nacuaá càhá<sup>n</sup>-yu, te ío quide cahnú-yu méè-yu cuendá nchaa sã sání ìní méè-yu quidé-yu, te ñá túú vèdana nàndíhi nchaa sã quidè-yu. <sup>19</sup> Te nchaa ñáyiú duca<sup>n</sup> xiquide-á<sup>n</sup> ñà túú tnàhá tnúhu-yu ndihi Xítóhó Jesucristú. Te mee-gã cúú-gã Yaá cùnùu taxi tnuní ñáhã-gã xii nchaa nchoo ñáyiú ndècu ìchi-gã, te chindee ñaha-gã xii-ò ndècu-ò ìchi-gã, te mee-gã quidé-gã cúú ì<sup>n</sup>nuu-ò ndecu-ò, te ta quide-ò nchaa nacuaá cuení Yá Ndióxi cuahá<sup>n</sup>.

<sup>20</sup> Te nchòhó cúú-ndó dàtná ñáyiú ní xihí ndihi Xítóhó Jesucristú cuendá sã vâ

cánchicú<sup>n</sup> nihnu-gá-ndó nàcuáa càhá<sup>n</sup> ñáiyu ñá túú ndècu ichi-gá. Te núu duca<sup>n</sup> ña, ¿te ná cuendá tñí<sup>n</sup>-ní-ndó tñùhu càhá<sup>n</sup> ñáiyu-á<sup>n</sup> te quide-ni-ndo datná quidè-yu? <sup>21</sup> Chi ñáiyu-á<sup>n</sup> càchí-yu sá íó sá ni vǎ cúú tèe ndaha-o, te dava ni vǎ cúú càxi-o, te dava ni vǎ cúú tñí-o. <sup>22</sup> Te nchaa xǎ<sup>n</sup>, núú néhé chiu<sup>n</sup>-ni-o ndìhi nihnu-xi. Te nchaa sá dúcá<sup>n</sup> càhá<sup>n</sup>-yu-á<sup>n</sup> cúú-xí mée-ni sá ní cahu iní mée nchàa ñáiyu ñuyú-a nàcuáa cadá-yu cundecú-yu. <sup>23</sup> Te nchaa tñùhu càhá<sup>n</sup>-yu-á<sup>n</sup> sánùu sá cúú-xí ñí<sup>n</sup> tñùhu càhá<sup>n</sup> ñí<sup>n</sup> téé ío váha sáa díquí-xi, chi càchí-yu sá cadá càhnu-o Yá Ndióxi nàcuáa véxi iní mée-ó, te cunduu ndàhú iní-ó dico ñá túú dànehé ñáhǎ-yu nàcuáa tàú-xi cunduu. Te càchí tucú-yu sá cadá ùhú-ó mée-o, chi duca<sup>n</sup> cuiní Yá Ndióxi cada-o càchí-yu. Te nchaa xǎ<sup>n</sup> ñá túú vǎdana chindee ñaha-xi xii-o cuendá sá vǎ táxi tñùní ñáhǎ ní ñí<sup>n</sup> sá cuèhé sá dúhá sàni iní-ó.

### 3

<sup>1</sup> Te nchòhó cada iní-ndó sǎ ní xíhí-ndó ndìhi Xítohó Jesucristú te ní ndoto-ndo ndìhi-gá, núu xǎ<sup>n</sup> tàú-ndó càda-ndo nchaa sá vǎha dàtná cuiní mée-gǎ chi mee-gǎ núcòo-gǎ xio cùha Dútú Ndióxi chi tñàhá-gǎ ío cùnùu-gǎ. <sup>2</sup> Te ío cuhu<sup>n</sup> iní-ndó nchàa sá vǎha càchí Xítohó Jesucristú nduu táhú-ndó cundecu ndìhi-ndo, te vǎ cúhú<sup>n</sup> iní-ndó mée-ni nchaa sá íó ñuyú-a. <sup>3</sup> Te duca<sup>n</sup> càda-ndo chi cùu-ndo datná ñáiyu ní xíhí ndìhi Xítohó Jesucristú, chi ñá túú-gǎ ndécú-ndó ichi cuèhé ichi duha. Te Yá Ndióxi néhé cuendá ñáhǎ-gǎ xii-ndo chi tñàhá tñùhu-ndo ndìhi Xítohó Jesucristú. <sup>4</sup> Te Xítohó Jesucristú cúú-gǎ Yaá ndécú ndìhi ñaha xii-o vitna, te sáa nduu quee túu ndìhi ñaha-gǎ xii-o àndiu, te tñàhá-ó ío cunuu-o ndìhi-gǎ.

*Duu<sup>n</sup> duu<sup>n</sup> dañà-o nchàa sá cuèhé sá dúhá ñùhu iní-ó te cada-o mée-ni sá vǎha*

<sup>5</sup> Te duu<sup>n</sup> duu<sup>n</sup> dañà-ndo nchàa sá cuèhé sá dúhá ñùhu iní-ndó. Te nchaa nchòhó cue téé vǎ càhá<sup>n</sup> ndìhi-ndo ñáiyu dìhí te núu ñá díú ñàdìhí-ndó cùú-yu, te duca<sup>n</sup>-ni nchàa nchòhó cue ñáiyu dìhí tucu vǎ càhá<sup>n</sup> ndìhi-ndo cuè téé te núu ñá díú yíi-ndo cuu-güedé, te nchaa-ndo vǎ cání-gǎ iní-ndó

càda-ndo ní ñí<sup>n</sup> sá cuèhé sá dúhá ndìhi tñaha ñáiyu-ndo. Te vǎ cání cuèhé cani duha-gǎ iní-ndó sǎ cúú-xí-ndó ndìhí-yu, te vǎ cání-gǎ iní-ndó ní ñí<sup>n</sup> sá cuèhé sá dúhá, te ní vǎ xíhó-ndó ñí<sup>n</sup> sá ndécú ndìhi tñaha ñáiyu-ndo, chi núu duca<sup>n</sup> na càda-ndo xiho-ndo sá ndécú ndìhí-yu te ñí<sup>n</sup>-ni cùu-ndo ndìhi ñáiyu chìñuhu nchaa sá càchí-yu cùu ndióxí te ñá ndàá sá ndióxí cúú nchàa xǎ<sup>n</sup>. <sup>6</sup> Te nchaa ñáiyu duca<sup>n</sup> xíquide ío dandòho ñaha Yá Ndióxi xii-yu na sáa nduu tñúndòho tñùhu ndàhú, chi ñá túú sàndáa iní ñáhǎ-yu xii-gǎ. <sup>7</sup> Te nchòhó cútnàhá ní xíndecu-ndo ichi cuèhé ichi duha, te tñàhá-ndó ní xóo cada-ndo dàtná quidé nchàa ñáiyu-á<sup>n</sup>. <sup>8</sup> Te vitna duu<sup>n</sup> duu<sup>n</sup> dañà-ndo nchàa sá ná càchí tñùhu-í-a; Vǎ cúdée<sup>n</sup>-gǎ-ndó, te ní vǎ cùnduu líhli-gǎ iní-ndó, te ní vǎ cúú ùhú-gǎ iní-ndó tñaha ñáiyu-ndo, te ní vǎ cùcuèhé-gǎ-ndó-yu, te ní ñí<sup>n</sup>-gǎ tñùhu cuèhé vǎ càhá<sup>n</sup>-ndó. <sup>9</sup> Te ní vǎ dácuàndehnde-gǎ-ndó, chi nchòhó sa ní dáñá-ndó nchàa ichi cuèhé ichi duha, te ñá túú-gǎ sání cuèhé sání dùha iní-ndó ñá cada-ndo vitna datná ní xóo cada-ndo. <sup>10</sup> Te vitna nchòhó ní nduu-ndo ñáiyu váha, te uu<sup>n</sup>-gǎ tá cùnùní iní-ndó nchàa nàcuáa cuiní Yá Ndióxi cada-ndo, te duca<sup>n</sup> ta ndùcu ndee-ndo quide-ndo mee-ni sá vǎha dàtná quidé mée-gǎ. <sup>11</sup> Te vitna ní ngúndecu ndìhi-ndo Xítohó Jesucristú, te vǎ cadá cuendá-gǎ-ndó ñùu cùu-ndo ñáiyu isràél àdi ñá túú cùu-ndo, te ní vǎ cadá cuendá-ndó ñùu cùu-ndo ñáiyu ní ngúndecu sèñá ñí<sup>n</sup>-xi àdi ñáhǎ, te ní vǎ cadá cuendá-ndó ñùu cùu-ndo ñáiyu véxi ñuú xicá, te ní vǎ cadá cuendá-ndó ñùu cùu-ndo ñáiyu cùu neñuú, te ní vǎ cadá cuendá-ndó ñùu cùu-ndo ñáiyu ñá túú tñáhí dàñá quee núú chíú<sup>n</sup> pàtróo<sup>n</sup>-xi, te ní vǎ cadá cuendá-ndó ñùu cùu-ndo ñáiyu dàñá quee núú chíú<sup>n</sup> pàtróo<sup>n</sup>-xi, chi Xítohó Jesucristú cùnùu-gǎ ndécú ndìhi ñaha-gǎ xii-o nchàa-o.

<sup>12</sup> Te Yá Ndióxi ní dáquéé dèi<sup>n</sup> ñaha-gǎ xii-ndo cuendá cundecu-ndo ndìhi-gǎ, te vitna cùu-ndo ñáiyu quide ndàá ndécú ichi-gǎ. Te mee-gǎ ío cùu iní ñáhǎ-gǎ xii-ndo ñùu xǎ<sup>n</sup> tàú-ndó cùndahú iní tñàhá-ndó, te ío váha cuu iní-ndó chindee tñaha-ndo, te cuu-ndo ñáiyu ndàhú iní-xi,

te ío vii ío váha cuu iní-ndó cùndecu ndihí tnaha-ndo, te ío càhnu cunduu iní-ndó cuendá nchaa sá quidé ñàha ñáyiu xii-ndo. <sup>13</sup> Te duca<sup>n</sup> cànehe-ndo tnúhu càhnu iní núu ndí mèe-ndo nacuaá ndècu-ndo ichi-gá, te cada càhnu tucu iní-ndó núu ná cúu sá cúmání núu tnáhá-ndó. Te dàtná ní quide càhnu iní Xítóhó Jesucristú nchaa sá ñà túú vâha ní xóo cada-ndo duca<sup>n</sup> càda-ndo cada cahnu iní-ndó nchaa sá cúmání núu tnáhá-ndó ndècu-ndo. <sup>14</sup> Te xini ñuhu vihi-xi sá ío cuu iní tnáhá-ndó cùndecu-ndo, chi núu duca<sup>n</sup> na càda-ndo, te quide-ndo nchaa dava-gá sá càhá<sup>n</sup>-í, te ñà túú tnàhí-gá ná cúmání-ndó. <sup>15</sup> Te dañá-ndo sá Yá Ndiöxí ná chindee ñaha-gá nacuaá ío váha cuu iní-ndó cùndecu-ndo, chi ñiu cuendá-á<sup>n</sup> ní càhá<sup>n</sup> ñáhá Yá Ndiöxí xii-ndo cuendá cuu ñ<sup>n</sup>nuu-ndo ndihí nchaa dava-gá ñáyiu ndècu ichi-gá, te duca<sup>n</sup>-ni ío ndacá<sup>n</sup> táhú-ndó núu-gá.

<sup>16</sup> Te ío cuhu<sup>n</sup> iní-ndó tnúhu Xítóhó Jesucristú, te ío váha cuáha-ndo cuendá nacuaá càhá<sup>n</sup> tnúhu-gá te duca<sup>n</sup> dānehé tnáhá-ndó. Te ío càhá<sup>n</sup> dóho tnàha-ndo nacuaá cada-ndo cānchicú<sup>n</sup> nihnu-ndo càda-ndo nchaa nacuaá càhá<sup>n</sup> tnúhu-gá, te cata-ndo ndudú ndéé núu tütú Yá Ndiöxí, ndihí nchaa dava-gá ndudú sá xini méé-ndó xita-ndo te nchaa xiá<sup>n</sup> cata-ndo chñuhu-ndo Yá Ndiöxí. Te òré xitá-ndó te ni yùhu ni iní-ndó ndacá<sup>n</sup> táhú-ndó núu-gá. <sup>17</sup> Te cuhu<sup>n</sup> iní-ndó Xítóhó Jesucristú òré sání iní-ndó càda-ndo ñ<sup>n</sup> chiu<sup>n</sup> àdi ná tnúhu cuiní-ndó càhá<sup>n</sup>-ndó, te ñiu-ni-gá cuhu<sup>n</sup> iní-ndó. Te xini ñuhu-xi ndacá<sup>n</sup> táhú-ndó núu Yá Ndiöxí, te ñiu-ni Xítóhó Jesucristú chindee ñàha-gá xii-ndo ndacá<sup>n</sup> táhú-ndó núu Tátá-ó Dütú Ndiöxí.

*Nacuáa tàù ñáyiu ndècu ichi Xítóhó Jesucristú cada-yu sá cúu-xi ndí meé-yu*

<sup>18</sup> Te nchaa nchòhó ñáyiu ñáyiu ndècu yñ-xi quindáá iní-ndó yñ-ndo, chi duca<sup>n</sup> tàù-xi cada nchaa ñáyiu ñáyiu ndécú ichi Xítóhó Jesucristú. <sup>19</sup> Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cūcuèhé-ndó-yu. <sup>20</sup> Te nchaa nchòhó ñáyiu ndècu tátá-xi ndihí náná-xi quindáá iní-ndó-yu, chi núu duca<sup>n</sup> na càda-ndo te nduu vétú iní Yá Ndiöxí. <sup>21</sup> Te nchaa nchòhó ñáyiu cūu tátá ndihí náná vá dásátú-ndó iní cue déhe-ndo, chi núu duca<sup>n</sup> na càda-ndo te ni vâ quixí-gá iní-güexi

cada-güexi sá vâha. <sup>22</sup> Te nchaa nchòhó ñáyiu xinu cuechi quindáá iní-ndó nchaa ñáyiu cūu patróo<sup>n</sup>-ndó, te ni yùhu ni iní-ndó càda-ndo nchaa chiu<sup>n</sup> tahú-yu cuèi òré ndécú-yu àdi òré ñà túú-yu, te ñà díú òré-ni ndèhé-yu cada-ndo cuendá-ni sá cuiní-ndó cūñiu-ndo núu-yu, chi cada-ndo sá néhé-ndó sá yññuhu núu Xítóhó Jesucristú. <sup>23</sup> Te nchaa chiu<sup>n</sup> sani iní-ndó càda-ndo te cada-ndo ni yuhu ni iní-ndó, te sá dúcá<sup>n</sup> càda-ndo-á<sup>n</sup> te cada-ndo cuendá sá xínú cuèchi-ndo núu Xítóhó Jesucristú te ñà díú núu ñáyiu ñuyíú-a xinu cuechi-ndo. <sup>24</sup> Te nchòhó sa ñàha-ndo sá Xítóhó Jesucristú taxi-gá sá ndúú táhú-ndó te núu duca<sup>n</sup> na càda-ndo, chi cūu-ndo ñáyiu xinu cuechi núu-gá. <sup>25</sup> Te nchaa ñáyiu quide nchaa sá cuèhé sá dúhá náchahu-yu núu Yá Ndiöxí cuendá nchaa sá quidé-yu, te mee-gá vá cadá cuendá-gá cuèi ná ñáyiu cūu-yu, chi nchaá-yu náchahu-yu nchaa sá ñà túú vâha quidé-yu núu-gá.

## 4

<sup>1</sup> Te nchaa nchòhó ñáyiu cūu patróo<sup>n</sup> cuu-ndo ñáyiu váha, te cada-ndo nchaa nacuaá tàù-xi cunduu ndihí nchaa ñáyiu xinu cuechi núu-ndó, te cunaha-ndo sá àññiu ndecu Yaá cúu Xítóhó-ndó taxi tñuní ñáhá-gá xii-ndo.

<sup>2</sup> Te nchaa nchòhó ñáyiu ndècu ichi Xítóhó Jesucristú, vá dañá ndéé-ndó càhá<sup>n</sup> ndihí-ndo Yá Ndiöxí, te ío cuhu<sup>n</sup> iní-ndó-gá òré càhá<sup>n</sup> ndihí-ndo-gá, te òré-á<sup>n</sup> ío ndacá<sup>n</sup> táhú-ndó núu-gá. <sup>3</sup> Te cáca<sup>n</sup> táhú-ndó tnàhà cuendá-ndí núu-gá cuendá sá díú-gá ná cadá te ndacu-ndí càhá<sup>n</sup>-ndí tnúhu-gá núu nchaa dava-gá ñáyiu, te duca<sup>n</sup> càhá<sup>n</sup>-ndí tnúhu Xítóhó Jesucristú sá ñà túú ní xñndecu ndihí nchaa ñáyiu ní xñndecu ndéé sanaha, te ñiu cuendá tnúhu-á<sup>n</sup> yññí-í vecaá vitna. <sup>4</sup> Te càhá<sup>n</sup> ndihí-ndo Yá Ndiöxí cuendá càhá<sup>n</sup>-í nacuaá tàù-xi cunduu te tecú tñuní-yu.

<sup>5</sup> Te cada-ndo nchaa nacuaá tàù-xi cunduu sá cúu-xi nchaa ñáyiu ñà túú ndècu ichi-gá, te duca<sup>n</sup>-ni ío nducu ndèe-ndo cada-ndo nchaa nacuaá tàù-xi cunduu. <sup>6</sup> Te cada cuendá-ndó sá ío vii ío váha cunduu tnúhu càhá<sup>n</sup> ndihí-ndó-yu, te càhá<sup>n</sup>-ndó

ñ<sup>n</sup> tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ñ<sup>n</sup> íñ<sup>n</sup>-yu.

### *Tnúhu ndée núú ñí ndíhi-ná*

<sup>7</sup> Te té Tiquicú téé ío cùu iní-ó ndècu ndíhi-o ichi Xítohó Jesucristú, téé-á<sup>n</sup> cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítohó Jesucristú te ío váha quíde ndáá-dé. <sup>8</sup> Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndíhi-ndo. <sup>9</sup> Te tnàhá tucu té Onésimú téé ío cùu iní-ó ndècu ndíhi-o ichi Xítohó Jesucristú quixi ndíhi-dé, te ñíu-ni téé ñúú-ndó cùu-dé te tnàhá-dé ío váha quíde ndáá-dé. Te ndí ndúú-güedé cachí tnúhu-güedé nchaa nàcuáa cùu iha.

<sup>10</sup> Te té Aristarcú téé yíhi ndíhi-í vecaá quíde ndèe iní ñáhá-dě xii-ndo ndíhi té Mácú ñani prímú tē Bèé. Te sa nàha-ndo nchaa nacuaáa ní cáhá<sup>n</sup>-í cada-ndo quèhe<sup>n</sup> cuendá-ndó tē Mácú, te núu na quixi-dé quixi coto ñaha-dě xii-ndo, te ío váha cuu iní-ndó quèhe<sup>n</sup> cuendá-ndó-dě. <sup>11</sup> Te tnàhá téé nani Jesús, àdi Bustú chi úu ñíu-dé, quíde ndèe iní ñáhá-dě xii-ndo. Te cue téé-a cùu-güedé cue téé israhél ní chitnahá ñáhá-güedě xii-í cáhá<sup>n</sup>-ndí núú ñáiyu nàcuáa ndíhu ndaha ñaha Yá Ndiöxí xii-yu, te ni ñ<sup>n</sup>-gá ñáiyu israhél ñá túú quíde datná quíde-güedě. Te ío váha taxi-güedé tnúhu ndee iní xii-í. <sup>12</sup> Te tnàhá téé ñúú-ndó tē Épafrás quíde ndèe iní ñáhá-dě xii-ndo, te cùu-dé tnàhá-dé téé xínu cuechi núú Xítohó Jesucristú. Te duca<sup>n</sup>-ni ñí yuhu ñí iní-dé xicá<sup>n</sup> táhú-dě núú Yá Ndiöxí cuendá-ndó cuendá sá cáncícú<sup>n</sup> nihnu-ni-ndo ichi-gá, te duca<sup>n</sup> te ío váha tecú tnùn-ndó nchaa nacuaáa cuení Yá Ndiöxí cada-ndo, te ñíu-ni duca<sup>n</sup> cáncícú<sup>n</sup> nihnu-ndo cada-ndo. <sup>13</sup> Te yúhú cáhí tnúhu ndáá-í xii-ndo sã sũúni sàni iní-dé sá méé-ní sã váha cuu xii-ndo cundecu-ndo ndíhi nchaa ñáiyu xíndecu ichi Xítohó Jesucristú ndécú ñúú Laodiceá, ndíhi nchaa ñáiyu xíndecu tucu ichi-gá ndécú ñúú Hièrapólís. <sup>14</sup> Te tnàhá tée Lúca téé xini nchaa núú yücú sã quíde tátna quíde ndee iní ñáhá-dě xii-ndo téé ío cùu iní-ó, te tnàhá tucu té Dêmás quíde ndèe iní ñáhá-dě xii-ndo.

<sup>15</sup> Te cúñaha-ndo na càda ndee iní nchaa ñáiyu ndècu ndíhi-o ichi Xítohó Jesucristú ndécú ñúú Laodiceá, ndíhi tá Mífás, ndíhi nchaa ñáiyu ndècu ichi-gá tàcá vehe-xi dàcuahá-yu tnúhu-gá. <sup>16</sup> Te tutú cadúha-í-a tendaha-í quixi ndaha-ndo, te òré ná ndíhi dàcuaha-ndo te tendaha-ndo quíhi<sup>n</sup> ndaha ñáiyu xíndecu ichi-gá ndécú ñúú Laodiceá cuendá dacuahá-yu tnàhá-yu. Te ñíu-ni duca<sup>n</sup> dàcuaha-ndo tutú tendaha-í quíhi<sup>n</sup> ndaha ñáiyu ñúú Laodiceá òré ná dándixí-yu ndaha-ndo. <sup>17</sup> Te na cáhí tnúhu-í xii-ndo nàcuáa cúñaha-ndo xii té Arquipú, te duha cúñaha-ndo xii-dé: “Yá Ndiöxí ní taxi-gá chiú<sup>n</sup> quíde-n, te ío váha cada cuendá-n càda-n nchaa nacuaáa ní cachí-gá”, duha cúñaha-ndo xii-dé.

<sup>18</sup> Te yúhú tée Páblú ndíhi ndaha mee-í tée-í ñ<sup>n</sup> úú tnúhu-a quíde ndee iní ñáhá-í xii-ndo, te cunaha-ndo sã yúhú yíhi-í vecaá. Te Yá Ndiöxí ío na chíndee chitúu ñaha-gã xii-ndo. Te duca<sup>n</sup> na cunduu. Te ío chí cadá ndèe iní-nã vitna.



# TUTÚ DÍHNA NUU NĪ CADÚHA TĒ PĀBLÚ QUIHĪ<sup>n</sup> NDAHA ÑÁYIU ÑUÚ TESALÓNICÁ

*Té Pāblú ndihī cue tée cūndihī-dé  
cádúha-güedé tutú quihī<sup>n</sup> ndaha ñáyiū xīndecu  
ichi Xítoho Jesucristú ndécú ñuú Tesalónicá*

<sup>1</sup> Yúhú té Pāblú cādúha-í tutú-a ndihī té Silvanú, ndihī té Timùteú cuendá daquixi-í ndaha nchòhó ñáyiū ndècu ndihī-ndí ichi Xítoho Jesucristú ndécú ñuú Tesalónicá, chi cūu ñnuu-ndo ndihī Tátá-ó Dütú Ndiöxí, ndihī Xítoho Jesucristú. Te xicá<sup>n</sup> táhú-í núú Dütú Ndiöxí, ndihī núú Xítoho Jesucristú sá ïo na chindee chitúu ñaha-gă xii-ndo, te duca<sup>n</sup> ndí nduú-gá ná càda te ïo váha cuu iní-ndó cūndecu-ndo.

*Ñáyiū ñuú Tesalónicá ïo váha sàndáá iní-yu  
Yá Ndiöxí*

<sup>2</sup> Te ndí tnahá òré càhá<sup>n</sup> ndihī-ndí Yá Ndiöxí ndacá<sup>n</sup> táhú-ndí núú-gá sá ïo quide váha-ndo ndècu-ndo, te duca<sup>n</sup> xicá<sup>n</sup> táhú-ndí núú-gá sá ná còto ñaha-gă xii-ndo. <sup>3</sup> Te ïo ndacá<sup>n</sup> táhú-ndí núú Tátá-ó Dütú Ndiöxí sá ñi yuhu ñi iní-ndó sàndáá iní-ndó-gă, te xīnu cuechi-ndo núú-gă, te cūu iní tnahá-ndó nàcuáa ndècu-ndo ichi-gá ñuū xīá<sup>n</sup> ïo xīto tnahá-ndo. Te cūtnuní ndáá iní-ndó sá quixí tūcu Xítoho Jesucristú ñuū xīá<sup>n</sup> ñá túú dàña ndeé-ndó ndètu-ndo-gá. <sup>4</sup> Te nchòhó ñáyiū ndècu ndihī-ndí ichi Xítoho Jesucristú sa ñaha-ndí sá Yá Ndiöxí ïo cūu iní ñáhá-gă xii-ndo, te diu-gá ní cáhá<sup>n</sup> ñáhá-gă xii-ndo cuendá cundecu-ndo ichi-gá. <sup>5</sup> Te cūtnáhá ní dánèhé ñáhá-ndí xii-ndo tñuhu-gá, chi ñá díú sá cúú ñí méé-ndí duca<sup>n</sup> ñí dànèhé ñáhá-ndí xii-ndo, chi mee Espiritú Yá Ndiöxí ní chindee ñàha-xi ní cáhá<sup>n</sup>-ndí ñi yuhu ñi iní-ndí tñuhu-gá núú-ndó. Te ñaha-ndo sá cūtnáhá ní xīndecu ndihī ñaha-ndí xii-ndo ñi quide-ndí nàcuáa càhá<sup>n</sup> Yá Ndiöxí cuendá sá cúú-xí sá váha sá cúú-xí-ndó.

<sup>6</sup> Te nchòhó nchícú<sup>n</sup> nihnu-ndo quide-ndo vitna datná quidé-ndí, chi quide váha-ndo datná quidé mèe Xítoho Jesucristú, te díí ñí ní tñi-ndo ìchi-gá cuèi ní ndoho ní tnahá-ndó, chi mee Espiritú-gá ní chindee ñàha-xi xii-ndo. <sup>7</sup> Te sá dúcá<sup>n</sup> quide váha-ndo ñuú Yá Ndiöxí, xīá<sup>n</sup> yīnchícú<sup>n</sup> nihnu ñáyiū distritú Macèdoniá, ndihī ñáyiū distritú Acăyá xīquide váha-yu tnahá-yu, ñáyiū xīndecu ichi-gá. <sup>8</sup> Te diu-ndo ñi sanu ichi-ndo ñáyiū distritú Macèdoniá, ndihī ñáyiū distritú Acăyá, te ñá díú-ñí ñáyiū nchaa ñuú-á<sup>n</sup> chi nchaa ñáyiū dava-gá ñuú ñihí-yu tñuhu sá ïo sàndáá iní-ndó Yá Ndiöxí. Te ñá túú-gă ná tñuhu cáhá<sup>n</sup>-ndí cuendá-ndó, chi nchaa-yu sa ñihí-yu tñuhu sá ïo váha quide-ndo ndecu-ndo. <sup>9</sup> Te mèe-yu xicáhá<sup>n</sup> váha-yu cuendá-ndó sá ïo váha ní quehe<sup>n</sup> cuendá ñáhá-ndó xii-ndí cūtnáhá ní quixi-ndí díhna nuu. Te ní dáñá-ndó nchaa sá càchí-ndó cūu ndiöxí-ndó chi ñá díú ndiöxí cúú-xí, te ní tñi-ndo ìchi Yá Ndiöxí Yaá ndécú tūu andiū chi diu-gá cúú-gă Ndiöxí ndisa, te xīnu cuechi-ndo núú-gă vitna, <sup>10</sup> te ndètu-ndo quixi tucu Xítoho Jesucristú Déhe Yá Ndiöxí Yaá ndécú andiū, chi diu-ñi-gá ní quixi-gá ñuyíú-a ní xihí-gá, te ní ndoto-gá ní dándótó ñàha Yá Ndiöxí xii-gá. Te diu-ñi Xítoho Jesucristú dácăcu nihnu ñaha-gă xii-o ñuú úhú núú ndàhú, chi sàndáá iní-ó-gă.

## 2

*Nàcuáa ndiū chiu<sup>n</sup> ní quide té Pāblú ñuú  
Tesalónicá*

<sup>1</sup> Te nchòhó ñáyiū ndècu ndihī-ndí ichi Xítoho Jesucristú ñaha-ndo sá ñá díú àú<sup>n</sup> ñá cuu ñi quixi coto ñaha-ndí xii-ndo, chi ní sàndáá iní-ndó tñuhu Yá Ndiöxí. <sup>2</sup> Te ñaha-ndo sá cūtnáhá ní xīndecu-ndí ñuú Filipú ïo ní xúhu<sup>n</sup> tñuhu cuèhé tñuhu duha núú-ndí, te ní caniha-güedé xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáhá<sup>n</sup>-ndí tñuhu Yá Ndiöxí núú-ndó, chi mee-gă ní chindee ñàha-gá xii-ndí cuèi ïo chitu ñáyiū ní cuu úhú iní ñáhá xii-ndí. <sup>3</sup> Te ñá túú ní dándahú ñáhá-ndí xii-ndo chi mee-ñi tñuhu ndáá ní cáhá<sup>n</sup>-ndí núú-ndó, te ñi ñá túú ní

ɨ̃n̄ tnúhu cuèhé ñúhú ìní-ndí ní cáhá<sup>n</sup>-ndí tnúhu-gá núú-ndó chi sa ní nduu ndoo ní nduu nine iní-ndí. <sup>4</sup> Te mee Yă Ndiõxí ní cachí-gá sá cáhá<sup>n</sup>-ndí tnúhu-gá, te cáhá<sup>n</sup>-ndí nàcuáa cùu iní méé-gă, chi sa nàha-gă nàcuáa càa iní-ndí, te ñá túú càhá<sup>n</sup>-ndí nàcuáa cùu iní ñáyiu. <sup>5</sup> Te nàha-ndo sá ñà díú ɨ̃n̄ tnúhu cudíí iní-ndó cùndecu-ndo ichi ñuyúú ní cáhá<sup>n</sup>-ndí núú-ndó cuèndá taxi-ndo dǐhú<sup>n</sup>. Te Yă Ndiõxí sa nàha-gă sá cáhá<sup>n</sup> ndáá-ndí. <sup>6</sup> Te ñá ɨ̃n̄ ndùu ni quide-ndí ɨ̃n̄ sá cádá-ndí cuèndá-ni sá cádá càhnu ñaha-ndo xii-ndí, àdi cada cahnu ñaha dava-gă ñáyiu, te cuèi tàù ndisa-ndí sá cádá càhnu ñaha-ndo xii-ndí ní cùu, chi chiu<sup>n</sup> Xítóhó Jesucristú quidé-ndí, te dícó-ni sá nchũhú ñá túú ní cuìní-ndí sá dúcá<sup>n</sup> càda-ndo. <sup>7</sup> Te ío vii ío váha ní cáhá<sup>n</sup>-ndí núú-ndó, dàtná quidé ɨ̃n̄ ñaha cuu náná vii vii cáhá<sup>n</sup> ndihí cue déhe-a<sup>n</sup> dàcuehnu ñaha-a<sup>n</sup> xii-güexi. <sup>8</sup> Te duca<sup>n</sup> ío cùu iní ñáhá-ndí xii-ndo, dico ñá díú-ní sá ñí cáhá<sup>n</sup>-ndí tnúhu Yă Ndiõxí núú-ndó, chi ndéé iní-ndí taxi-ndí ní dácótó ñàha-xi, te núu dícó ní cùu-xi sá cúú, cuèndá sá ío cùu iní ñáhá-ndí xii-ndo. <sup>9</sup> Te nchòhó ñáyiu ndècu ndihí-ndí ichi Xítóhó Jesucristú nàha-ndo sá ío ní quide chiu<sup>n</sup>-ndí cuèndá ní níhí-ndí sá ñí xexi-ndí. Te cuèi nduu cuèi niú ní quide chiu<sup>n</sup>-ndí ní níhí-ndí sá ñí xexi-ndí ní cáhá<sup>n</sup>-ndí tnúhu Yă Ndiõxí núú-ndó cuèndá sá ñà túú ní cuìní-ndí chichiu<sup>n</sup> ñaha-ndí xii-ndo.

<sup>10</sup> Te nchòhó ñáyiu sàndáá iní tnúhu Yă Ndiõxí xìní ndáá-ndó sá cúú-ndí cue téé váha te duca<sup>n</sup> sà naha Yă Ndiõxí tucu, te ní xica-ndí ichi ndáá òré ní cáhá<sup>n</sup>-ndí tnúhu-gá núú-ndó te diu-ni duca<sup>n</sup> quide-ndí vitna. Te vá yõ ɨ̃n̄ cáhá<sup>n</sup> sá ñà túú quide ndáá-ndí ndécú-ndí. <sup>11</sup> Te nàha tucu-ndo sá ñí dácáhá<sup>n</sup> ñáhá-ndí xii-ndo, te ní taxi-ndí tnúhu ndee ìní xii-ndo nchàa-ndo, te dàtná quidé ɨ̃n̄ tátá ndihí cue déhe-dé ní quide-ndí. <sup>12</sup> Te ní cachí-ndí xii-ndo sá cádá ndáá-ndó cùndecu-ndo nacuáa tàù-xi cada nchaa ñáyiu tnàhá tnúhu ndihí Yă Ndiõxí, chi mee-gă ní cáhá<sup>n</sup> ñáhá-gă xii-o cuèndá nduu táhú-ó cùndecu-o ndihí-gá núú ío váha càa ndecu-gá táxí tnùní-gá.

<sup>13</sup> Te xǎ<sup>n</sup> ío ndàcá<sup>n</sup> táhú-ndí núú Yă Ndiõxí sá nchòhó òré ní tedòho-ndo tnúhu-gá ní cáhá<sup>n</sup>-ndí, te ní sàndáá iní-ndó chi ní cutnùní iní-ndó sá díú tnúhu Yă Ndiõxí cúú-xí, te ñá díú tnúhu ñáyiu ñuyúú-a cùu-xi. Te ndáá sá cúú-xí ɨ̃n̄ sá ío váha sá cúú-xí nchòo cue ñáyiu ní sàndáá iní tnúhu-gá. <sup>14</sup> Te nchòhó ñáyiu ndècu ndihí-í ichi Xítóhó Jesucristú, ío ní ndoho ní tnàhá-ndó sá ñí quide ñaha ñáyiu ñuú-ndó. Te nchòhó ní ndoho-ndo dàtná ní ndoho nchaa ñáyiu tàcá dácua<sup>n</sup>ha tnúhu Xítóhó Jesucristú ndécú dístítú Júdeá, chi tnàhá-yu ío ní dándóhó ñàha ñáyiu ñuú-yu. <sup>15</sup> Te diu-ni ñáyiu dístítú Júdeá-á<sup>n</sup> ñí sahní-yu cue téé ní xóo cáhá<sup>n</sup> tnúhu Yă Ndiõxí ndéé sanaha. Te diu-ni ñaní tnàhá-yu cùu cue ñáyiu ní sahní ñaha xii Xítóhó Jesucristú, te sátá xǎ<sup>n</sup> te ní ngüíta-yu ní cuu úhú iní ñáhá-yu xii-ndí, núu xǎ<sup>n</sup> ñá túú tnàhá iní Yă Ndiõxí nchaa sá quidé-yu, te ndéé nchaa dava-gă ñaní tnàhá-yu cùu úhú iní-yu. <sup>16</sup> Te ío chidácá nihnu ñàhá-yu xii-ndí òré cáhá<sup>n</sup>-ndí tnúhu Yă Ndiõxí núú ñáyiu ñá túú cùu ñáyiu isràél, te duca<sup>n</sup> quide ñáyiu-á<sup>n</sup> cuèndá cuìní-yu sá vǎ cáhá<sup>n</sup>-ndí tnúhu-gá, sá cádá cuèndá naníhí tàhú ñáyiu ñá túú cùu ñáyiu isràél-á<sup>n</sup>, te sá dúcá<sup>n</sup> quidé-yu te ío ta cùu vai-gă cuéchi-yu cuáhá<sup>n</sup>. Te Yă Ndiõxí ío cùdée<sup>n</sup>-gă núú-yu, te tendaha-gă ɨ̃n̄ tnúndòho quixi sá cúú-xí-yu te ío ndohó-yu.

*Té Pǎblú cuìní-dé quíngoto-dé ñáyiu xǎndecu ichi Xítóhó Jesucristú ndécú ñuú Tesàlónicá*

<sup>17</sup> Te nchòhó ñáyiu ndècu ndihí-ndí ichi Xítóhó Jesucristú ní quee-ndí núú-ndó, te cuèi ní cuxica-ndí dico duca<sup>n</sup>-ni ñúhu iní ñáhá-ndí xii-ndo, te ío ñúhu iní-ndí sá quíxí còto ñaha tucu-ndí xii-ndo. <sup>18</sup> Te yúhú té Pǎblú duca<sup>n</sup>-ni ñúhu iní-í sá cuèdicó méé-í quixi-í, quixi coto ñaha-í xii-ndo, dico yucu ñávàha chidácá nihnu ñaha-xi xii-í. <sup>19</sup> Te nchoo ñáyiu ndècu ichi Xítóhó Jesucristú ndètu-ni-gá-ó quèxio-gá candeca ñaha-gă xii-o ndàa andíu cundecu-o ndihí-gá. Te cùdíí víhí ìní-ndí sá cuèndá-gá chi ní chindee ñàha-gá ní sanu ichi ñaha-ndí xii-ndo ìchi-gá, te ío vai ñáyiu cáhá<sup>n</sup> váha-yu

cuendá-ndí ná sàá nduu quìxi tucu-gá. <sup>20</sup> Te duca<sup>n</sup> ìo vâi ñâyiu cáhá<sup>n</sup> váha-yu cuendá-ndí cuendá sá ñi sanu ichi ñaha-ndí xii-ndo ìchi-gá, te quide váha-ndo. Te xiá<sup>n</sup> ío cùdíí ìní-ndí.

### 3

<sup>1-2</sup> Te sa ní cunduu ñá túú-gã càhá<sup>n</sup> ndihì tñaha-o, núu xiá<sup>n</sup> ñá ní cùndee-gá ìní-ndí ní tendaha-ndí té Timùteú ní quixi coto ñaha-dě xii-ndo, te nchúhú ní quendóo-ndí ñuú Àtenás, chi tñahá-dé xínú cuèchi-dé núu Yá Ndiöxí, ndihì núu Xítóhó Jesucristú càhá<sup>n</sup>-dé tñuhu-gá núu ñâyiu. Te ní quixi-dé ní taxi-dé tñuhu ndee ìní xii-ndo cuendá sá ìo quindáá-ni ìní-ndó Xítóhó Jesucristú, te canchicú<sup>n</sup> nihnu-ni-ndo ñi yuhu ñi ìní-ndó ìchi-gá. <sup>3</sup> Te vá nátùhú ìní-ndó càchicú<sup>n</sup> nihnu-ndo ìchi-gá sá dúhá cùu úhú ìní ñáhá ñâyiu xii-o, te nchòhó sa nàha-ndo sá dàcuítíí sã ndóhó vìhi-o cuendá-gá. <sup>4</sup> Te ndéé cùtnáhá ndécú ndihì ñaha-gá-ndí xii-ndo ñi cachí tñuhu ndáá-ndí sá ìo ndoho-o, te duca<sup>n</sup> ndisa quide-xi. <sup>5</sup> Te xiá<sup>n</sup> ñuú ñá ní cùu váha-gá ìní-í chi cuendá ñá túú-gã ní ñihí-í tñuhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tñuhu-dé núu-ndó ñuú ndècu-ni-ndo ichi Xítóhó Jesucristú, chi ní sani ñi ní sani úú ìní-í sá cùú-xí-ndó, chi ná ndéé chidácá nihnu ñaha yùcu ñávãha xii-ndo te cuíta chiú<sup>n</sup> ní quide-ndí sá cùú-xí-ndó ñi cáhá<sup>n</sup>-í.

<sup>6</sup> Te ñáhá, chi ní ndexìo té Timùteú sá ñi quixi-dé ñuú-ndó, te nàha-dé tñuhu ní nasáá sá ñi yuhu ñi ìní-ni-ndo sàndáá ìní-ndó Yá Ndiöxí, te cùu ìní-ndó cuè tñaha ñâyiu-ndo. Te càchí-dé sá ìo ñùhu ìní ñáhá-ndó xii-ndí, te ío cuíní-ndó cáhá<sup>n</sup> ndihì ñaha-ndo, te ñi-ndi duca<sup>n</sup> ìo cuíní nchúhú cáhá<sup>n</sup> ndihì ñaha-ndí xii-ndo tucu. <sup>7</sup> Te ío ndòho-ndí chi ío cùu úhú ìní ñáhá ñâyiu xii-ndí, dico sá ñi ñihí-ndí tñuhu sá nchòhó ñâyiu ndècu ndihì-ndí ichi Xítóhó Jesucristú ñá túú dàña ndéé-ndó sàndáá ìní-ndó Yá Ndiöxí, te xiá<sup>n</sup> cùú-xí ñi tñuhu càhnu ìní ní ñihí-ndí chi ní ñaníhí ndéé-ndí. <sup>8</sup> Te ní nduu vétú ìní-ndí sá ñi ñihí-ndí tñuhu ndècu-ni-ndo ichi-gá. <sup>9</sup> Te òré càhá<sup>n</sup>

ndihì-ndí Yá Ndiöxí, te ío ndàcá<sup>n</sup> táhú-ndí núu-gã cuendá sá ña túú dàña nihnu-ndo ichi-gá, núu xiá<sup>n</sup> ío cùdíí ìní-ndí. <sup>10</sup> Te cuèi nduu cuèi níu xicá<sup>n</sup> táhú-ndí núu Yá Ndiöxí sá méé-gã ná càda te sáá ñi nduu nàníhí tñahá-ó cuendá danèhé ñáhá váha-gá-ndí tñuhu-gá sá cùmání-gã xii-ndo.

<sup>11</sup> Te mee Tãtá-ó Dütú Ndiöxí, ndihì Xítóhó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. <sup>12</sup> Te mee Xítóhó Jesucristú ná chindee ñaha-gá xii-ndo, te ío-gá cuita cuu ìní tñahá-gã-ndó nàcuáa ndècu-ndo ichi-gá ndihì nchaa dava-gá ñâyiu dàtná cùú ìní ñáhá-ndí xii-ndo. <sup>13</sup> Te xicá<sup>n</sup> táhú tucu-ndí núu Tãtá-ó Dütú Ndiöxí sá ñi yuhu ñi ìní-ndó càchicú<sup>n</sup> nihnu-ni-ndo ìchi-gá, te duca<sup>n</sup> te cundáá-ndó núú-gã, te ñá túú-gã ná cumání-ndó òré ná sáá nduu quixi tucu Xítóhó Jesucristú ndihì nchaa ñâyiu sa ndècu ndihì-gá.

### 4

#### *Nàcuáa cuíní Yá Ndiöxí cada-o*

<sup>1</sup> Te nchòhó ñâyiu ndècu ndihì-í ichi Xítóhó Jesucristú càhá<sup>n</sup> ndàhú-í núu-ndó sã cùndèdòho-ndo na càhá<sup>n</sup>-í nàcuáa nduu tñuhu càhá<sup>n</sup> Xítóhó Jesucristú, chi mee-gã cuíní-gá sá cádá-ndó nàcuáa ní dánèhé ñáhá-ndí xii-ndo cuendá cuu váha ìní Yá Ndiöxí núu-ndó, te duca<sup>n</sup>-ni càda-ndo ndéé núu cuahá<sup>n</sup> núu vèxi.

<sup>2</sup> Te nchòhó sa nàha-ndo nàcuáa ní cáhá<sup>n</sup>-ndí núu-ndó, chi ní cáhá<sup>n</sup>-ndí nàcuáa ní táuchíú<sup>n</sup> Xítóhó Jesucristú te ní cachí-gá sá <sup>3</sup> Yá Ndiöxí cuíní-gá sá cádá ndáá-ó cùndecu-o ichi-gá. Te nchoo cuè téé vá càhá<sup>n</sup> ndihì-o ñâyiu ñihí te núu ñá díú ñàdihí-ó cùú-yu, te ñi cuè ñâyiu ñihí vá càhá<sup>n</sup> ndihí-yu téé núu ñá díú yí-yu cùu-güedé. <sup>4</sup> Te núu xiá<sup>n</sup> nchaa nchòhó tñaha téé-í ndí ñi cùndecu ñadihí-ndó, te ñi-ndi duca<sup>n</sup> nchòhó cue ñâyiu ñihí tucu ndi ñi cùndecu yí-ndo, te mee-ni tñuhu yíñùhu cáhá<sup>n</sup> ndihì tñaha-ndo. <sup>5</sup> Te vá cání cuèhé caní duha ìní-ndó dàtná quidé cuè ñâyiu ñá túú sàndáá ìní tñuhu Yá Ndiöxí. <sup>6</sup> Te ñi ñi-ndo vá cání ìní-ndó dàndahú-ndó tñaha téé-ndo cáhá<sup>n</sup> ndihì-ndo ñàdihí-güedé. Te duca<sup>n</sup>-ni nchòhó cue ñâyiu ñihí tucu vá

cání ìní-ndó dàndahú-ndó tnàha dìhí-ndó cǎhá<sup>n</sup> ndìhi-ndo yíi-yu. Chi núu duca<sup>n</sup> na càda-ndo, te Yá Ndiòxí ío dandòho ñaha-gá xii-ndo dàtná ní cachí-ndí ndéé díhna. <sup>7</sup> Chi Yá Ndiòxí ní cǎhá<sup>n</sup> ñáhá-gǎ xii-o cuèndá sá cǎdá-ó mèe-ni sá vǎha, te ñá díú sǎ cuèhé sá dúhá. <sup>8</sup> Te nchaa ñáyiu na càda sǎá ìní-xi tnúhu cǎhá<sup>n</sup>-ndí, te quíde sǎá ìní-yu núú Yá Ndiòxí, chi ñá díú tnúhu téé ñuyíú-a cùu-xi, chi tnúhu Yá Ndiòxí, Yaá ní taxi Espíritú-gá ndécú ndìhi-o cuu-xi.

<sup>9</sup> Te nchòhó ñáyiu ndècu ndìhi-í ichi Xítohó Jesucristú, ñá túú-gǎ xíní ñùhu-xi cachí tnúhu-í xii-ndo sǎ cúú ìní tnáhá-ndó, chi Yá Ndiòxí sa ní dánèhé ñáhá-gǎ xii-ndo nàcuáa cuu ìní tnáhá-ndó, ndìhi nàcuáa cuu ìní-ndó dàva-gǎ tnàha ñáyiu-ndo. <sup>10</sup> Te duca<sup>n</sup> xiquide-ndo ndìhi nchaa ñáyiu ndècu ndìhi-ndo ichi Xítohó Jesucristú ndécú dìstrítú Macèdoniá. Te cǎhá<sup>n</sup> ndàhú-ndí núú-ndó sǎ cǎdá ndǎá-gǎ-ndó, te cuita cuu ìní-gǎ-ndó cuè tnaha ñáyiu-ndo quíhí<sup>n</sup>. <sup>11</sup> Te cada ndee ìní-ndó cùndecu ñucaxi ìní-ndó, te cuhu<sup>n</sup> ìní-ndó chiu<sup>n</sup> mee-ndo, te xíá<sup>n</sup> cada-ndo dàtná ní dánèhé ñáhá-ndí xii-ndo. <sup>12</sup> Te duca<sup>n</sup> te tnáhá nchaa ñáyiu ñá túú sàndáá ìní tnúhu Yá Ndiòxí cǎhá<sup>n</sup> váha-yu cuèndá-ndó, te duca<sup>n</sup> te ñá túú tnàhí-gǎ ná cùmání xii-ndo.

#### *Nàcuáa cada-xi òré quixi tucu Xítohó Jesucristú*

<sup>13</sup> Te vitna na cǎchí tnúhu-ndí xii nchòhó ñáyiu ndècu ndìhi-ndí ichi Xítohó Jesucristú cuèndá nchaa ñáyiu sa ní xíhí, ñáyiu ní sàndáá ìní tnúhu Yá Ndiòxí cuèndá sá vǎ ndìhú ìní-ndó cuèndá-yu dàtná xiquide nchaa ñáyiu ñá túú yíhi ìní-xi sá quíxí tucu Xítohó Jesucristú ñuyíú-a. <sup>14</sup> Te nchoo sàndáá ìní-ó sǎ ñí xíhí Xítohó Jesucristú te ní ndoto-gǎ ní dándótó ñàha Yá Ndiòxí, te sàndáá tucu ìní-ó sǎ dàtná ní dándótó Yá Ndiòxí Xítohó Jesucristú, duca<sup>n</sup> dándoto-gǎ nchaa ñáyiu ní xíhí ñáyiu ní sàndáá ìní ñáhá xii-gǎ.

<sup>15</sup> Te na cǎchí tnúhu tucu-ndí ìngá tnúhu nàcuáa ní cǎhá<sup>n</sup> Xítohó Jesucristú, chi ní cachí-gǎ sá ná sǎá nduu quixi tucu-gǎ te nchaa ñáyiu sàndáá ìní tnúhu-gǎ ndécú vívú ñuyíú-a vá códó núú-yu núú ñáyiu ní xíhí ndaa andíu, chi jùndú candeca ñaha-gǎ

xii-yu ndaa. <sup>16</sup> Chi Xítohó Jesucristú quee túu-gǎ andíu, te cana-gǎ nchaa ñáyiu ní sàndáá ìní tnúhu-gǎ, te òré-á<sup>n</sup> Yá Ndiòxí cada-gǎ te òré-á<sup>n</sup>, cǎhá<sup>n</sup> ì<sup>n</sup> cúú te òré-ni-á<sup>n</sup> ndoto nchaa ñáyiu ní xíhí, ñáyiu ní sàndáá ìní tnúhu-gǎ. <sup>17</sup> Te dàtní nchaa nchoo ñáyiu xíndecu vívú ñuyíú-a naníhí tnáhá-ó ndìhi-yu, te ndanchita-o ndìhu-o xítí vícò naníhí tnáhá-ó ndìhi Xítohó Jesucristú, te candeca ñaha-gǎ xii-o ndaa andíu cundecu ndìhi-o-gǎ ni caa ni quíhí<sup>n</sup>. <sup>18</sup> Núu xíá<sup>n</sup> chí cuàha tnàha tnúhu ndee ìní, te vá ndìhú ìní-ndó chi naníhí tǎhú-ndó núú-gǎ.

## 5

<sup>1</sup> Te nchòhó ñáyiu ndècu ndìhi-í ichi Xítohó Jesucristú ñá túú-gǎ xíní ñùhu-xi sá cǎchí tnúhu-í xii-ndo sǎ quíxí tucu-gǎ, te ni ñá túú-gǎ xíní ñùhu-xi sá cǎchí tnúhu-í xii-ndo nǎsa cada-xi òré quixi-gǎ. <sup>2</sup> Chi nchòhó sa nàha ndǎá-ndó sǎ Xítohó Jesucristú quixi-gǎ nduu ñá túú yíhi ìní-ó, chi dàtná quíde ì<sup>n</sup> ñadúhú cada-gǎ òré quixi-gǎ, chi nduu ñá túú nǎ yíhí ìní-ó quixi tucu-gǎ. <sup>3</sup> Te sǎá nduu te cachí nchaa ñáyiu ndècu ichi cuehé ichi duha: “Vitna ío váha cùu ìní-ó ndècu-o, te ñá túú-gǎ ná cùmání xii-o”, duha quesàhá-yu. Te ñáyiu-á<sup>n</sup> òré ñá túú nǎ yíhí ìní-yu, te quèxio tnúndòho tnúhu ndàhú sá cúú-xí-yu. Chi cada-xi dàtná quíde-xí ì<sup>n</sup> ñáyiu dìhí ní tnáhá òré cacu déhe-xi, chi na ìní-yu ní dátñhú ñáhá-xí te vá cǎcu-yu núú tnúndòhó-yu, te duca<sup>n</sup> sǎ tnáhá-xi yáha nchaa ñáyiu ñá túú ndècu ichi-gǎ, chi na ìní-yu quexio tnúndòho sá cúú-xí-yu te vá cǎcu-yu núú tnúndòho-á<sup>n</sup>. <sup>4</sup> Te nchòhó ñáyiu ndècu ndìhi-í ichi Xítohó Jesucristú, ñá túú-gǎ ndécú-ndó ichi cuehé ichi duha, núu xíá<sup>n</sup> sa yíhi-ná ìní-ndó nduu quixi-gǎ te vá yáha-ndo dàtná yáha nchaa ñáyiu ñá túú ndècu ichi-gǎ, chi ñáyiu-á<sup>n</sup> ñá túú nǎ yíhí ìní-yu sá quíxí-gǎ. Te na ìní-yu quexio-gǎ dàtná quíde ñadúhú na ìní-ó quíhu-güedé vehe-o dùhu-güedé duca<sup>n</sup> càda-gǎ òré quixi-gǎ. <sup>5</sup> Te nchoo ñá túú-gǎ ndécú-ó ìchi cuehé ichi duha, te ichi-á<sup>n</sup> cúú-xí dàtná ì<sup>n</sup> ichi nee ndècu-o ni cuu, te vitna sa ní ngúndecu-o ìchi váha, te duca<sup>n</sup> chi Yá Ndiòxí ní dándíxí tǔu-gǎ



iní-ó cuendá cutnùní iní-ó nàcuáa ndùu cuendá-gá. <sup>6</sup> Te xini ñuhu-xi dandixi túu-o iní-ó, te cada váha-o cùndecu-o ichi-gá, te vá cáda-ó dàtná quidé nchàa ñáyiú ñá túú sàndáá iní ñáhá xii-gá, chi ñáyiú-á<sup>n</sup> ñà túú-gã quidé cuendá-yu te núu quide váha-yu àdi ñá túú quide váha-yu ndècú-yu. <sup>7</sup> Te nchaa ñáyiú quide cuehé quidé dùha cuú-yu dàtná ñ<sup>n</sup> ñáyiú xidí àdi xini, chi ñá túú quide cuendá-yu nàcuáa cada-yu ñ<sup>n</sup> sá váha dàtná cuiní Yã Ndiõxí. <sup>8</sup> Te nchòhó ñáyiú sa ní cutnùní iní-xi nàcuáa ndùu ichi váha, dandixi túu-ndo iní-ndó cùndecu-ndo, te quindáá ndisa iní-ndó Yã Ndiõxí, te cuu iní-ndó cuè tnaha ñáyiú-ndo te duca<sup>n</sup> te vá táxi tnùnì ñáhá nì ñ<sup>n</sup> sá cuèhé sá dúhá xii-ndo. Te ío cuhu<sup>n</sup> iní-ndó sá cùndecu-ndo ndihí-gá nì caa nì quihí<sup>n</sup>. <sup>9</sup> Chi Yã Ndiõxí ní cachí-gá sá vã quihí<sup>n</sup>-ó núú ùhú núú ndàhú, chi mee-gã nacuaca ñaha-gã xii-o cùndecu-o ndihí-gá, chi ní sàndáá iní-ó Xítóhó Jesucristú. <sup>10</sup> Te mee Xítóhó Jesucristú ní xihí-gá sá cuendá nchaa yícá cuèchi-o, te ní ndoto-gá cuendá nduu táhú-ó cùndecu-o ndihí-gá andiú na sàá nduu cuèi sa ní xihí-ó, àdi vátá cùú-gá-ó. <sup>11</sup> Núu xiã<sup>n</sup> chí cuãha tnàha tnúhu ndee iní, te chindee tnàha-ndo cundecu-ndo ichi-gá dàtná tá quide-ndo véxi.

*Té Pãblú dáquini sàhú-dé ñáyiú ndècu ichi Xítóhó Jesucristú*

<sup>12</sup> Te nchòhó ñáyiú ndècu ndihí-ndí ichi Xítóhó Jesucristú, càhá<sup>n</sup> ndàhú-ndí núú-ndó sá cánèhe-ndo sá yíñùhu núú cuè téè cùnùu xinu cuechi núú Yã Ndiõxí, cue téè dānehé ñáhá xii-ndo nacuáa cundecu-ndo ichi-gá. <sup>13</sup> Te cáhá<sup>n</sup> váha-ndo ndihí-güedé, te cuu iní-ndó-güedé, chi nàha-ndo sá chíú<sup>n</sup> Yã Ndiõxí quidé-güedé. Te cundecu ndihí váha tnàha-ndo nchaa-ndo.

<sup>14</sup> Te càhá<sup>n</sup> ndàhú tucu-ndí núú-ndó sá cáhá<sup>n</sup>-ndó dôho nchaa ñáyiú ñá túú cuiní cada chiú<sup>n</sup>, te duca<sup>n</sup> cuãñaha-ndo tnúhu ndee iní xii nchaa ñáyiú quíyuhu iní-xi canchicú<sup>n</sup> nihnu ichi-gá, te chindee tucu-ndo nchaa ñáyiú vátá ngũnu ichi váha-gá, te cunduu càhnu iní-ndó núú-yu ncháá-yu.

<sup>15</sup> Te cada ndee iní-ndó te núú ndècu tnaha ñáyiú-ndo cùu úhú iní ñáhã-yu

xii-ndo, te vá tnàhá-ni-ndo cùu úhú iní-ndó-yu. Te mee-ni sã váha cada-ndo sã cùú-xí nchàa tnaha ñáyiú-ndo.

<sup>16</sup> Te nchaa nduu ío cudíí iní-ndó cùndecu-ndo. <sup>17</sup> Te ñ<sup>n</sup> nduu ñ<sup>n</sup> nduu cáhá<sup>n</sup> ndihí-ndo Yã Ndiõxí. <sup>18</sup> Te ndacá<sup>n</sup> táhú-ndó núú-gã te núu nãndi cùu sá yãha-ndo ndècu-ndo, chi duca<sup>n</sup> cuiní-gá cada-o, te diu duca<sup>n</sup> ndùu tnúhu càhá<sup>n</sup> Xítóhó Jesucristú.

<sup>19</sup> Te vá quèhndé nihnu-ndo chiú<sup>n</sup> quide Espiritú Yã Ndiõxí iní-ndó. <sup>20</sup> Te vá cáda sàá iní-ndó núú cuè téè càhá<sup>n</sup> tnúhu Yã Ndiõxí nàcuáa dàcahu iní ñáhá-gã xii-güedé. <sup>21</sup> Te cada cuendá váha-ndo nàcuáa càhá<sup>n</sup>-güedé, te tñi-ndo nchàa tnúhu váha càhá<sup>n</sup>-güedé. <sup>22</sup> Te dañã-ndo nchàa ichi cuehé ichi duha.

<sup>23</sup> Te mee Yã Ndiõxí quidé-gã ío váha cùu iní-ó ndècu-o ichi-gá. Te xicá<sup>n</sup> táhú-í núú-gã sá ná càda íí ñáhá-gã xii-ndo, te na còto ñaha-gã xii-ndo ndihí iní-ndó cuendá sá vã cáda-gã-ndó nì ñ<sup>n</sup> sá cuèhé sá dúhá, te diu-ni duca<sup>n</sup> na càda-gá sá cùú-xí-ndó ndéé ná sàá nduu quixi tucu Xítóhó Jesucristú ñuyú-a. <sup>24</sup> Chi Yã Ndiõxí Yaá ní cáhá<sup>n</sup> ñáhá xii-o cada-gá nàcuáa ní cáhá<sup>n</sup>-gá, te chindee ñaha-gã xii-ndo.

*Té Pãblú quidé ndèe iní-dé ñáyiú xñdecu ichi Xítóhó Jesucristú ndècú ñúú Tesalónica*

<sup>25</sup> Te nchòhó ñáyiú ndècu ndihí-í ichi Xítóhó Jesucristú, cáca<sup>n</sup> táhú-ndó núú Yã Ndiõxí sá ná chindee ñaha-gã xii-ndí.

<sup>26</sup> Te cúñaha-ndo xii nchaa ñáyiú ndècu ndihí-o ichi Xítóhó Jesucristú sá nì yuhu nì iní-ndí quidé ndèe iní ñáhá-ndí xii-ndo ndihí-yu.

<sup>27</sup> Te vitna mee Yã Ndiõxí ndéhé-gã sá càhá<sup>n</sup> ndàhú-í núú-ndó sá dácuãha-ndo tutú-a núú nchàa ñáyiú ndècu ndihí-o ichi-gá.

<sup>28</sup> Te Xítóhó Jesucristú ío na chindee chitúu ñaha-gã xii-ndo núú cuahá<sup>n</sup> núú vèxi. Te duca<sup>n</sup> na cùnduu. Te ío chí cáda ndèe iní-nã vitna.

## TUTÚ CÚÚ ÛÚ NÍ CADÚHA TÉ PÄBLÚ QUIHI<sup>n</sup> NDAHA ÑÁYIU ÑUÚ TESÀLÓNICÁ

*Té Päblú ndihi cue té cündihi-dé cadúha-güedé tutú quíhí<sup>n</sup> ndaha ñáyiú xĩndecu ichi Xítóhó Jesucristú ndécú ñúú Tesàlónicá*

<sup>1</sup> Yúhú té Päblú cadúha-í tutú-a ndihi té Silvanú, ndihi té Timúteú cuendá daquixi-í ndaha nchòhó ñáyiú ndècu ndihi-ndí ichi Xítóhó Jesucristú ndécú ñúú Tesàlónicá, chi tnàhá tnúhu-ndo ndihi Tátá-ó Dütú Ndiöxí, ndihi Xítóhó Jesucristú. <sup>2</sup> Te xicá<sup>n</sup> táhú-ndí núú Dütú Ndiöxí, ndihi núú Xítóhó Jesucristú sá ná chĩndee chítúú ñaha-gá xii-ndo, te duca<sup>n</sup> ndi nduú-gá ná cadá te ío váha cuu iní-ndó cündecu-ndo.

*Yá Ndiöxí cada ndáá-gá cuéchi nchaá ñáyiú ndècu ichi cuehé ichi duha na sàá nduu quixi tucu Xítóhó Jesucristú*

<sup>3</sup> Te nchòhó ñáyiú ndècu ndihi-ndí ichi Xítóhó Jesucristú, càchí tnúhu-í xii-ndo sá cúnàha-ndo sá ñà túú dàña ndee-ndí ndàcá<sup>n</sup> táhú-ndí núú Yá Ndiöxí cuendá-ndó, chi dacuítí dùca<sup>n</sup> taú-xi cunduu chi ío-gá tá sàndáá iní-ndó-gã cuáhá<sup>n</sup>, te duca<sup>n</sup> ùu<sup>n</sup>-gá tá cùu iní tnáhá-ndó nàcuáa ndècu-ndo ichi Yá Ndiöxí. <sup>4</sup> Núu xíá<sup>n</sup> nchúhú ío váha càhá<sup>n</sup>-ndí cuendá-ndó núú nchaá ñáyiú sàndáá iní tnúhu Yá Ndiöxí nchaá núú tàcá-yu dàcuahá-yu tnúhu-gá, chi ío sàndáá iní-ndó-gã, te ñá túú dàña ndeé-ndó nchìcú<sup>n</sup> nihnu-ndo ìchi-gá, te quide cahnu-ni iní-ndó cuèi nándi sá yáha-ndo ndècu-ndo ichi-gá. <sup>5</sup> Te sá dúcá<sup>n</sup> quide váha-ndo ndècu-ndo xíá<sup>n</sup> cútnùní nàcuáa cada ñaha Yá Ndiöxí xii-ndo na sàá nduu, chi nduu táhú-ndó cündecu-ndo núú táxí tnùní-gá, te duca<sup>n</sup> càda-gá chi cùu-gá Yaá quidé ndáá cuíti. Te vitna ndòho-ndo nacuaa ndíhu ndaha-gã dava-gá ñáyiú.

<sup>6</sup> Te Yá Ndiöxí ío váha ndáá quidé-gã, chi mee-gã nachinaa-gá nchaá sá quidé ñaha ñáyiú cùu úhú iní ñáhá xii-ndo, <sup>7</sup> te nchoo ñáyiú ndòho cuendá Xítóhó Jesucristú nucündecu váha-o na sàá nduu nùu túu-gá andiú, te tnàhá cue espíritú xínú

cuèchi núú Yá Ndiöxí cuu<sup>n</sup> ndihi-gá, te cue espíritú-á<sup>n</sup> quidé-xí nchaá núú chiú<sup>n</sup> tahu-gá. Te òré nuu túu-gá andiú ndihi cue espíritú-á<sup>n</sup>, te ío dàtása<sup>n</sup>-xi andiú. <sup>8</sup> Te dandòho-gá nchaá ñáyiú ñá túú tnàhá tnúhu ndihi Yá Ndiöxí, ñáyiú ñá túú sàndáá iní tnúhu Xítóhó Jesucristú tnúhu sá càhá<sup>n</sup> nàcuáa naníhí tàhú-yu. <sup>9</sup> Te nchaá ñáyiú-á<sup>n</sup> ìo dandòho ñaha-gá xii-yu, chi ndohó-yu ni caa ni quíhí<sup>n</sup>, te vá cündécú-yu núú ìo váha càa ndecu-gá táxí tnùní-gá. <sup>10</sup> Te duca<sup>n</sup> càda ñaha-gá xii-yu na sàá nduu, te dàvá-á<sup>n</sup> ìo cada càhnu ñaha nchaá ñáyiú sàndáá iní ñáhá xii-gá. Te tnàhá nchaá nchòhó ñáyiú ní sàndáá iní tnúhu ní càhá<sup>n</sup>-ndí duca<sup>n</sup> càda-ndo, te nchaá-o ìo cuñúhu-o-gã dàvá-á<sup>n</sup>.

<sup>11</sup> Te cuendá xíá<sup>n</sup> núu ío xicá<sup>n</sup> táhú-ndí núú Dütú Ndiöxí sá ná chĩndee ñaha-gá xii-ndo cündecu váha-ndo ìchi-gá dàtná cuíní mée-gã cundecu nchaá ñáyiú ní càhá<sup>n</sup>-gá cundecu ndihi-gá. Te xicá<sup>n</sup> táhú tùcu-ndí núú-gã sá ìo na chĩndee ñaha-gá xii-ndo càda-ndo nchaá sá váha sàni iní-ndó, ndihi cuendá chiú<sup>n</sup> quide-ndo cuendá-gá, te duca<sup>n</sup> chi sàndáá iní-ndó-gã. <sup>12</sup> Te núu duca<sup>n</sup> na càda-ndo, te càhá<sup>n</sup> váha ñáyiú cuendá Xítóhó Jesucristú, te tnàhá-ni nchòhó càhá<sup>n</sup> váha-yu cuendá-ndó, chi mee Yá Ndiöxí ndihi Xítóhó Jesucristú cündàhú iní ñáhá-gã chĩndee ñaha-gá xii-ndo.

## 2

*Té quixi dandàhú ñáyiú*

<sup>1</sup> Te nchòhó ñáyiú ndècu ndihi-ndí ichi Xítóhó Jesucristú càchí tnúhu-ndí xii-ndo nàcuáa cada-xi nduu na quixi tucu-gá, chi quixi-gá nacuaa ñaha-gã xii-o, núu xíá<sup>n</sup> càhá<sup>n</sup>-ndí dóho-ndo. <sup>2</sup> Te ñá díú sã íí<sup>n</sup> tnúhu tecú dóho-ndo te ngúita-ndo càni íí<sup>n</sup> caní úú iní-ndó, te ni vã yúhú-ndó te núu véxi íí<sup>n</sup> téé càchí-dé sá càhá<sup>n</sup>-dé tnúhu Yá Ndiöxí, te càchí-dé sá sà véxi Xítóhó Jesucristú, te vá quindáá iní-ndó tnúhu càhá<sup>n</sup>-dé chi ñá ndáá, àdi véxi íí<sup>n</sup> téé nèhe íí<sup>n</sup> tutú núú-ndó te càchí-dé sá yúhú ní tendaha-í véxi, te núú tütú-á<sup>n</sup> càhá<sup>n</sup>-xi sá sà véxi Xítóhó Jesucristú, te diú-ni vá quindáá iní-ndó nàcuáa càhá<sup>n</sup>-xi, te ndèda-ni càa ñáyiú càhá<sup>n</sup>-yu

dává-án sã sà véxi-gá dico vá quindáá tnàhí iní-ndó. <sup>3</sup> Núu xiã<sup>n</sup> dátũha ñaha-ĩ xii-ndo cuendá sá vã dáñá tnàhí-ndo mềe-ndo dandahú ñáhá ñáyiu. Chi cùmání-gã sáá nduu quixi tucu Xítohó Jesucristú, te ngũita nchaa ñáyiu cuu úhú iní-yu Yá Ndiõxí, te dává-án quini-yu ì<sup>n</sup> tée xidó quidé nchaa sá cuèhé sá dúhá, te tée-án quihí<sup>n</sup>-dé núu ùhú núu ndàhú ni caa ni quihí<sup>n</sup>. <sup>4</sup> Te ñu-ni tée-án vã nděe iní-dé nchaa sá cãchí ñáyiu cùu ndiõxí-yu ndihí nchaa dava-gá sá quidé cãhnú-yu, te cachí-dé sá ïo cùnuu-dé, te quihu-dé ndée xití veñũhu núu ndécú cuè ñáyiu chiñũhu ñaha xii Yá Ndiõxí coo-dé, te cúñaha-dě xii-yu sá cúu-dě Yá Ndiõxí.

<sup>5</sup> Te dandacu iní-ndó chi nchaa tnũhu-a sa ní cachí tnũhu-í xii-ndo cùtnàhá ní xindecu ndihí ñaha-ĩ. <sup>6</sup> Te nchòhó sa cùtnuní iní-ndó nã cúu sã ngání ñaha xii tée-án nõu ñã túú-dě vitna, dico na sáá nduu tau-xi quee-dé caca cuu-dé te dává-án quini ñáhá nchaa ñáyiu. <sup>7</sup> Te ío titní núu sã cuèhé sá dúhá quide yucu ñávãha dicó-ni sá vátá quini-gá ñáyiu, dico ndècu ì<sup>n</sup> sá ñã dáñá càda-xi nchaandi túhú nãcuáa cãchí iní-xi, dico sáá nduu xòcuñí sá ñã dáñá-ã<sup>n</sup> te dává-án càda-xi nchaa nãcuáa cãchí iní-xi. <sup>8</sup> Te sáá nduu quini-yu tée quide nchaa sá cuèhé sá dúhá-ã<sup>n</sup> ñuyiú-a. Te òré ná quixi túu Xítohó Jesucristú, te mee-ni sã dátãsa<sup>n</sup>-xi, ndihí yócó yuhu-gá cuú tée-án. <sup>9</sup> Te sãcuíhná tendaha-xi tée-án quixi-dé, te cuãñaha-xi tnũhu ndee ìni càda-dé nãndi sá cáda-dě. Te càda-dé sá ñã túú tnàhí ndacu ni ì<sup>n</sup> ñáyiu ñuyiú-a càda-yu, dico mee-ni dandahú ñáhá-dě xii-yu caca cuu-dé. <sup>10</sup> Te nchaa núu sã cuèhé sá dúhá càda-dé dandahú-dé nchaa ñáyiu sa ñũhu ichi cuáhá<sup>n</sup> núu ùhú núu ndàhú, chi ñã túú ní cuini-yu quindáá iní-yu tnũhu ndáá tnũhu Yá Ndiõxí cuendá naníhí tãhú-yu. <sup>11</sup> Te sá dúcã<sup>n</sup> ñã túú ní cuini-yu quindáá iní-yu tnũhu ndáá, núu xiã<sup>n</sup> ñã ñã Yá Ndiõxí dacáhá<sup>n</sup> yucu ñávãha iní-yu quindáá iní-yu nchaa tnũhu ndehnde <sup>12</sup> cuendá cuíta ni-hnú-yu, te duca<sup>n</sup> yãha-yu chi ñã túú sãndáá iní-yu tnũhu ndáá cãhá<sup>n</sup> Yá Ndiõxí, chi mee-ni nchaa sá cuèhé sá dúhá cùdí<sup>n</sup> iní-yu quidé-yu, te cuíta nihnú-yu chi duca<sup>n</sup> ñi cachí Yá Ndiõxí cunduu.

*Ñáyiu ní cachí Yá Ndiõxí naníhí tãhú*

<sup>13</sup> Te nchòhó ñáyiu ndècu ndihí-ndí ichi Xítohó Jesucristú, ñáyiu ío cùu iní-gá cãchí tnũhu-ndí xii-ndo sã ñã túú ñã ñã ndee-ndí ndacã<sup>n</sup> tãhú-ndí núu Yá Ndiõxí cuendá-ndó, chi duca<sup>n</sup> tau-xi cunduu, chi Yá Ndiõxí ní cachí-gá ndée cùtnàhá vátã ngãva-gá ñuyiú sã naníhí tãhú-ndó, te ñu Espiritú-gá dacáhá<sup>n</sup>-xi iní-ndó ndècu yĩnhu-ndo núu-gã, te sãndáá iní-ndó tnũhu ndáá cãhá<sup>n</sup>-gã nõu xiã<sup>n</sup> ní naníhí tãhú-ndó. <sup>14</sup> Chi cuendá tnàhí-a ní cãhá<sup>n</sup> ñáhá Yá Ndiõxí xii-ndo, te duca<sup>n</sup> ñi naníhí tãhú-ndó chi ní sãndáá iní-ndó tnũhu Xítohó Jesucristú ní cãhá<sup>n</sup>-ndí núu-ndó, te sáá nduu te cundecu-ndo tnàhá-ndó nõu ío vãha caa ní nduu tãhú Xítohó Jesucristú ndécú-gã.

<sup>15</sup> Núu xiã<sup>n</sup> nchòhó ñáyiu ndècu ndihí-ndí ichi Xítohó Jesucristú ío cãhá<sup>n</sup>-ndí dóho-ndo sã vã dáñá ñihnu-ndo ichi-gã, te ni vã nãcuãnaa-ndo nchaa tnũhu ní cãhá<sup>n</sup>-ndí núu-ndó cùtnàhá ní xindecu ndihí ñaha-ndí xii-ndo, te ñu-ni duca<sup>n</sup> càda-ndo nchaa tnũhu tẽndaha-ndí véxi. <sup>16-17</sup> Te xicã<sup>n</sup> tãhú-ndí núu-gã sã ná dacáhã<sup>n</sup>-gã iní-ndó cundecu-ni-ndo ichi-gã, te duca<sup>n</sup> ïo na chĩndee ñaha-gã xii-ndo cãhá<sup>n</sup>-ndó mềe-ni tnũhu vãha, te càda vãha-ndo cundecu-ndo nacuáa cuu vãha iní-gã, chi mee Dũtú Ndiõxí ío cùu iní ñáhã-gã xii-o, te ñu-gã ní taxi-gã tnũhu ndee ìni cundecu ndihí-o ñi caa ni quihí<sup>n</sup>, te ní cachí tnũhu tucu-gã ñngã tnũhu vãha sã cùndetu-o Xítohó Jesucristú.

### 3

#### *Cãhá<sup>n</sup> ndihí-ndo Yá Ndiõxí cuendá-ndí*

<sup>1</sup> Te nchòhó ñáyiu ndècu ndihí-ndí ichi Xítohó Jesucristú, ndée núu ndihí-ñã cãchí tnũhu-í xii-ndo sã cãhá<sup>n</sup> ndihí-ndo Yá Ndiõxí cuendá-ndí cuendá sã ná chĩndee ñaha-gã xii-ndí, te duca<sup>n</sup> ndihí-ni cutènuu tnũhu Xítohó Jesucristú nchaa xichi, te cudí<sup>n</sup> ìni-yu tnũhu-gã ñãndá quidé nchòhó. <sup>2</sup> Te cãhá<sup>n</sup> ndihí tucu-ndo Yá Ndiõxí cuendá sã ná còto ñaha-gã xii-ndí, te ñã túú ñã càda ñaha ñáyiu cuihna ìni-xi ndècu ichi cuèhé ichi duha xii-ndí, chi ñã nchãã-yu sãndáá iní-yu tnũhu-gã. <sup>3</sup> Dico Xítohó Jesucristú quidé-gã nchaa sã cãhá<sup>n</sup>-gã, te ñu-gã càda te nchòhó cundecu-ni-ndo

ìchi-gá, te coto ñaha-gã xii-ndo cuendá sá ñà túú nã cada ñaha yùcu ñávãha. <sup>4</sup> Te Xítohó Jesucristú quidé-gã cútnùní iní-ndí sá nchòhó quidé-ndó nchàa nacuaá ní dánèhé ñáhá-ndí xii-ndo, te ñu-ni duca<sup>n</sup> càda-ndo cundecu-ndo. <sup>5</sup> Te xicá<sup>n</sup> táhú-ndí núú Yá Ndióxi sá ná chindee ñaha-gã xii-ndo cùu iní-ndó-gã, te ñu-ni-gá ná chindee ñaha-gã xii-ndo cùnduu cahnu iní-ndó, chi Xítohó Jesucristú duca<sup>n</sup> ño càhnu iní-gá.

### *Tàú-ó càda chiu<sup>n</sup>-o*

<sup>6</sup> Te nchòhó ñáiyu ndècu ndihí-í ichi Xítohó Jesucristú, càhá<sup>n</sup>-í dóho-ndo sá méé-gã cuíní-gá sá vã nihí tnáhá-gã-ndó ndihí ndéda-ni càa ñáiyu càchí sá sàndáá iní tnúhu-gá, ñáiyu ñá túú cuíní cada chiu<sup>n</sup>, chi ñáiyu duca<sup>n</sup> xíquide ñá túú cuíní-yu tní<sup>n</sup>-yu tnúhu sá ñí dánèhé ñáhá-ndí xii-ndo. <sup>7</sup> Te nchòhó sa xini-ndó nàcuáa cada-ndo cundecu-ndo canchicú<sup>n</sup> nihnu-ndo nàcuáa quide-ndí. Te cútnáhá ní xindecu ndihí ñaha-ndí xii-ndo chi ni ñ<sup>n</sup> nduu ñá túú ní tühío-ndí. <sup>8</sup> Te ni ñà túú dicó duca<sup>n</sup> ni quèhe<sup>n</sup>-ndí sá ndécú ndihí ñáiyu caxi-ndí àdi canehe-ndí, chi cuèi nduu cuèi niú ío ní quide chiu<sup>n</sup>-ndí ní níhí-ndí díhú<sup>n</sup> ñí saa<sup>n</sup>-ndí nchaa sá ñí nàndíhí-ndí cuendá sá ñà túú ní cuíní-ndí chichiu<sup>n</sup> ñaha-ndí xii-ndo. <sup>9</sup> Te cuèi tàú ndisa-ndí cachí tnúhu-ndí xii-ndo sã chindèe ñaha-ndo xii-ndí ní cùu, dico ní quide chiu<sup>n</sup>-ndí cuendá ní cuíní-ndí danèhé ñáhá-ndí xii-ndo nàcuáa cada-ndo cundecu-ndo. <sup>10</sup> Te cútnáhá ní xindecu ndihí ñaha-ndí xii-ndo ñí cachí-ndí sá ncháá ñáiyu ñá túú cuíní cada chiu<sup>n</sup> te vã cuãha-ndó-yu sá cáxí-yu. <sup>11</sup> Te vitna nihí-ndí tnúhu sá ío dava nchòhó ñá túú tnáhí quide chiu<sup>n</sup>-ndo, chi àú<sup>n</sup> nã cuu ndí cuu ndí cuu-ni-ndo núú ndécú dàva-gá tnàha ñáiyu-ndo. <sup>12</sup> Te yúhú càhá<sup>n</sup>-í dóho nchaa nchòhó ñáiyu duca<sup>n</sup> ñà túú cuíní cada chiu<sup>n</sup> sá cádá chiu<sup>n</sup>-ndo cuendá níhí-ndó nchàa sá cóhó sã cáxí-ndó, te duha càhá<sup>n</sup>-í dóho-ndo, chi duca<sup>n</sup> cuíní Xítohó Jesucristú Yaá táxí tnùní ñáhá xii-o cada-ndo, te òré cada chiu<sup>n</sup>-ndo te vã ño cada dusa<sup>n</sup>-ndo.

<sup>13</sup> Te nchòhó ñáiyu ndècu ndihí-í ichi Xítohó Jesucristú, vã dáña ndèé-ndó càda-ndo mee-ni sá vãha. <sup>14</sup> Te núu ñ<sup>n</sup>

ñáiyu ndècu ndihí-ndo ñá túú cuíní-yu tní<sup>n</sup>-yu tnúhu càhá<sup>n</sup>-ndí núú tütú-a, te cundehe-ni-ndo núu ndéda càá-yu, te vã nihí tnáhá-gã-ndó ndihí-yu cuendá sá ná cùcaha<sup>n</sup> núú-yu, <sup>15</sup> dico vã cúú ùhú iní-ndó-yu, chi càhá<sup>n</sup>-ndó dóho-yu cada-ndo sã ndécú-ndó ìchi Xítohó Jesucristú ndihí-yu.

### *Tnúhu ndéé núú ñí ndihí-ná*

<sup>16</sup> Te mee Xítohó Jesucristú ío vãha cùu iní-gá ndécú-gã, te xicá<sup>n</sup> táhú-í núú-gã sá méé-gã ná cádá te ío vãha cuu iní-ndó tnáhá-ndó cundecu-ndo cuèi nása-gá ná cundecu-ndo. Te mee-gã ná cundecu ndihí ñaha-gã xii-ndo nchàa-ndo.

<sup>17</sup> Te vitna yúhú té Páblú tée-í tnúhu-a quide ndee iní ñáhá-í xii-ndo, te ñu-ni duha càa nchaa letrá-í nchaa núú tütú cáduha-í. <sup>18</sup> Te xicá<sup>n</sup> táhú-í núú Xítohó Jesucristú sá ño na chindee chitúu ñaha-gã xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nã vitna.



## TUTÚ DÍHNA NUU NÍ CADÚHA TÉ PÄBLÚ QUIH<sup>n</sup> NDAHA TÉ TIMÛTEÚ

*Té Păblú cădũha-dé tutú quih<sup>n</sup> ndaha té Timùteú*

<sup>1</sup> Yúhú té Păblú ní tendaha ñaha Yá Ndiõxí cãhá<sup>n</sup>-í tnúhu Xítóhó Jesucristú núú ñáyiú chi duca<sup>n</sup> ñí cachí Yá Ndiõxí cunduú, te diu-gá cúú-gã Yaá ní dácăcu ni-hnu ñaha xii-o núú ùhú núú ndàhú. Te tnàhá Xítóhó Jesucristú duca<sup>n</sup> ñí cachí-gá sá cãhá<sup>n</sup>-í tnúhu-gá, te diu-gá ní taxi-gá tnúhu ndee ìní xii-o sã cùndecu-o ndihí-gá ñí caa ñí quih<sup>n</sup>. <sup>2</sup> Te yòhó té Timùteú cúú-n ñ<sup>n</sup> tée ní sanu ichi ndisa-í ichi Xítóhó Jesucristú chi ío váha ní sándáá ìní-n-gã. Te cãdũha-í ñ<sup>n</sup> tutú daquixi-í ndaha-n. Te xicá<sup>n</sup> táhù-í núú Tátá-ó Dütú Ndiõxí ndihí núú Xítóhó Jesucristú sá ío na chindee chitúu ñaha-gã xii-n, te duca<sup>n</sup> ndi nduú-gá ná cãdá te ío váha cuu ìní-n cùndecu-n.

*Cuendá nchaa ñáyiú dândahú tnàha ñáyiú-xi*

<sup>3</sup> Te nàha-n nacuáa ní cãhá<sup>n</sup>-í cùtnàhá ní quee-í ñuú Éfesú véxi-í distritú Macèdoniá, chi ní cachí-í sá quéndõo-n ñuú-á<sup>n</sup> cãhá<sup>n</sup>-n dôho nchaa ñáyiú dândahú ñáhá cãchí sá cãhá<sup>n</sup> tnúhu Yá Ndiõxí te ñá ndáá sá cãhá<sup>n</sup>-yu tnúhu-gá, te diu-ni duca<sup>n</sup> cãhá<sup>n</sup>-í vitna cada-n cùndecu-n. <sup>4</sup> Te cúñaha-n xii-yu sá vã cãdá cuendá-yu nchaa cuendú ñihí-yu nacuáa ní xóo cada ñáyiú ní xindee ndéé sanaha, te nchaa cuendú-á<sup>n</sup> dicó chináá ñáhá-xí chi ñá túú vèdana nândihí-xi, te ñí ñá túú chindee ñaha-xi cada-o nacuáa cuení Yá Ndiõxí, chi mee-ni sã quindáá ìní-ó-gã quidé-xí quide-o nchaa nacuáa cuení-gã.

<sup>5</sup> Te duha cãhá<sup>n</sup>-í cúñaha-n xii-yu cuendá sá ná cùu ìní-yu tnàha ñáyiú-yu, te xini ñuhu-xi nduu ndoo nduu nine ìní-yu, te cunduu váha ìní-yu, te quindáá ìní-yu Yá Ndiõxí, te vá cãní ñ<sup>n</sup> cani úú ìní-yu, te núu duca<sup>n</sup> na cãdá-yu te cuu ìní ndisá-yu nchaa tnàha ñáyiú-yu. <sup>6</sup> Chi dava ñáyiú ñá túú-gã quidè-yu nchaa nacuáa cãhá<sup>n</sup>-í-a,

chi mee-nã nchaa cuendá sá ñá túú vèdana nândihí xicãhá<sup>n</sup>-yu. <sup>7</sup> Te cuení-yu cãhá<sup>n</sup>-yu nchaa tnúhu ní cãhá<sup>n</sup> ndii Moisés dico ñá ndácũ-yu, chi cuèi ñí yùhu ñí ìní-yu cãhá<sup>n</sup>-yu dico ñá tècú tnùní-yu nacuáa ní cãhá<sup>n</sup> ndii, te ñí tnúhu cãhá<sup>n</sup> mée-yu ñá cùtnùní ìní-yu nacuáa ndùu-xi.

<sup>8</sup> Te sa nàha-o sá ncháá tnúhu ní cãhá<sup>n</sup> ndii Moisés váha, te núu na tècú tnùní-ó ñá cuendá duca<sup>n</sup> ñí ngúndecu nchaa tnúhu-á<sup>n</sup>.

<sup>9</sup> Te cùtnuní ìní-ó sã ñá díú sã cúú-xí nchaa ñáyiú quide váha ndècu ñuyiú-a ñí ngúndecu nchaa tnúhu-á<sup>n</sup>, chi ní ngúndecu-xi sã cúú-xí nchaa ñáyiú ñá túú quide váha, ndihí cuendá nchaa ñáyiú ío sãá ìní-xi, ndihí cuendá nchaa ñáyiú quide cuehé quidé dùha, ndihí cuendá nchaa ñáyiú ío ndècu cuéchi-xi, ndihí cuendá nchaa ñáyiú ñá túú nèhe vèdana sá yíñùhu núú Yá Ndiõxí, ndihí cuendá nchaa ñáyiú ñá túú cãhá<sup>n</sup> váha cuendá ichi Yá Ndiõxí, ndihí cuendá nchaa ñáyiú sàhni tátá-xi ndihí nãná-xi, ndihí cuendá nchaa dava-gá ñáyiú sàhni tnaha, <sup>10</sup> ndihí cuendá nchaa cue tée cãhá<sup>n</sup> ndihí ñáyiú ñihí te ñá díú ñãdihí-güedé cúú-yu, ndihí cuendá tucu nchaa ñáyiú ñihí cãhá<sup>n</sup> ndihí cue tée te ñá díú yí-yu cùu-güedé, ndihí cuendá nchaa cue tée cãhá<sup>n</sup> ndihí tnàha ndi mee tée-xi, ndihí cuendá nchaa ñáyiú chiváha tnàha ñáyiú-xi cuendá sá cuení-yu ñihí-yu díhú<sup>n</sup>, ndihí cuendá nchaa ñáyiú ndehnde, ndihí cuendá nchaa ñáyiú cãcunehe ndéé Yá Ndiõxí cuendá cuení-yu cutnùní ìní tnàha ñáyiú-yu sá cãhá<sup>n</sup> ndáá-yu, te ñá ndáá sá cãhá<sup>n</sup> ndáá-yu, ndihí cuendá nchaa ñáyiú quide nchaa dava-gá sã ñá túú tàuchiu<sup>n</sup> Yá Ndiõxí cadá-yu. Cuendá nchaa ñáyiú duca<sup>n</sup> xiquide ní ngúndecu nchaa tnúhu-á<sup>n</sup>. <sup>11</sup> Te nchaa tnúhu-á<sup>n</sup> ñ<sup>n</sup>-ni cùu-xi ndihí nchaa tnúhu sã ñí cachí Yá Ndiõxí cãhá<sup>n</sup>-í, te tnúhu-á<sup>n</sup> cúú-xí tnúhu váha vihi, chi mee-gã ío váha ìní-gã.

*Té Păblú ndacá<sup>n</sup> táhú-dè núú Yá Ndiõxí sã ñí cundahú ìní ñáhá-gã xii-dé*

<sup>12</sup> Te Xítóhó Jesucristú ní cutnùní ìní-gá sã cãdá ndáá-í cada-í nchaa chiú<sup>n</sup> tahu-gã. Te ndacá<sup>n</sup> táhù-í núú-gã sã ñí taxi-gã chiú<sup>n</sup>-gã quidè-í, te ío chindee ñaha-gã xii-í. <sup>13</sup> Te ní taxi-gã chiú<sup>n</sup>-gã quidè-í cuèi ní xóo cãhá<sup>n</sup>

cuèhé-í cuendá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá ñí xóo cada-í-yu dico ní cundàhú iní ñáhá Yă Ndiöxí xii-í, chi vátá quindáá-gá iní-í Xítóhó Jesucristú cútnàhá duca<sup>n</sup> ñí xóo cada-í, te ni ñă cútnùní iní-í nchaa sá quidè-í ní cùu, te cuèi duca<sup>n</sup> ñí xóo cada-í, <sup>14</sup> dico Yă Ndiöxí ío ní cundàhú iní ñáhá-gă xii-í te chindee ñaha-gá. Te mee Xítóhó Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

<sup>15</sup> Te ñihí-ó tnùhu sá Xítóhó Jesucristú ní quixi-gá ñuyíú-a cuendá sá dácăcu nihnu-gá nchaa ñáyiú ndècu ichi cuehé ichi duha. Te tnùhu-án cúú-xí ñ<sup>n</sup> tnùhu ndáá, te xini ñuhu-xi quindáá iní nchaa nchoo ñáyiú ndècu ñuyíú-a. Te yúhú cùú-í téé ío-gá ndécú cuèchi-xi núú Yă Ndiöxí ní cùu. <sup>16</sup> Te Yă Ndiöxí ní cundàhú iní ñáhá-gă ní dácăcu nihnu ñaha-gă xii yúhú téé xidó ndécú cuèchi-xi ni cùu, cuendá cutnùní iní nchaa ñáyiú sá Xítóhó Jesucristú ío càhnu iní-gá. Te sá dúcá<sup>n</sup> ñí quide ñaha-gă xii-í, te xiă<sup>n</sup> cutnùní iní-yu sá núu na quindáá iní ñáhă-yu xii-gá te cundecú-yu ndihí-gá ni caa ni quíhí<sup>n</sup>. <sup>17</sup> Te nchaa-o chí ná càchí-ó să ío càhnu cuu Yă Ndiöxí, te canehe-o să yíñuhu núú-gă ni caa ni quíhí<sup>n</sup>, chi mee-gă cúú-gă Yaá táxí tnùní nchaa nduu nchaa quíú. Te cùu-gá ñ<sup>n</sup> Yaá ñá túú xini núú-ó, te ñ<sup>n</sup>dii díí-ni-gă ío ndècu ndihí-gá nchaa sá xini tnùní-gá.

<sup>18</sup> Te yòhó té Timùteú téé cùu datná ñ<sup>n</sup> déhe mee-í sa nàha-n nacuáa ní cáhá<sup>n</sup> dava-gá cue téé cáhá<sup>n</sup> tnùhu Yă Ndiöxí cuendá-n, te diu-ni duca<sup>n</sup> cáhá<sup>n</sup>-ú tucu, te cada-n nchaa nacuáa cáhá<sup>n</sup> tnùhu-án chi diu nchaa tnùhu-án canu ichi ñaha-xi xii-n cada-n nchaa nacuáa cuini Yă Ndiöxí. <sup>19</sup> Te ío quindáá iní-n Xítóhó Jesucristú, te cada váha-n cundecu-n nacuáa cundecu váha iní-n, chi dava ñáyiú ñá túú-gă duca<sup>n</sup> quidé-yu núu xiă<sup>n</sup> ñá túú-gă sàndáá iní-yu nacuáa cáhá<sup>n</sup> tnùhu-gá. <sup>20</sup> Te diu-ni duca<sup>n</sup> ñí quide té Himèneú ndihí té Lijandru ní dáñá ndèe-güedé ñá túú-gă sàndáá iní-güedé nacuáa cáhá<sup>n</sup> tnùhu Xítóhó Jesucristú, te ní xáha<sup>n</sup>-í xii-güedé sá ná cundoho-ná-güedé núu nása cada ñaha sàcuíhná xii-güedé,

te duca<sup>n</sup> ñí xáha<sup>n</sup>-í cuendá sá vă cáhá<sup>n</sup> cuèhé-gá-güedé cuendá Yă Ndiöxí.

## 2

### *Nàcuáa cáhá<sup>n</sup> ndihí-o Yă Ndiöxí*

<sup>1</sup> Te na càchí tnùhu-í xii-n nchaa nacuáa cada-n. Te díhna-gá càchí tnùhu-í sá cáhá<sup>n</sup> ndihí-n Yă Ndiöxí cuendá nchaa ñáyiú te núu nása cùu xindecú-yu, te cácá<sup>n</sup> táhú-n núú-gă cuendá-yu, te duca<sup>n</sup> ío ndacá<sup>n</sup> táhú-n núú-gă cuendá nchaa sá vâha quide ñaha-gă xií-yu. <sup>2</sup> Te duca<sup>n</sup> cáhá<sup>n</sup> ndihí-n Yă Ndiöxí cuendá nchaa cue téé cùnno ndihí cuendá nchaa dava-gá cue téé cùchiu<sup>n</sup> cuendá cada váha-güedé, te duca<sup>n</sup> nchòo ñá túú ná cuu cundecu-o, te ñá túú tnàhí ná cani iní-ó cundecu-o, te ío cundecu yíñuhu-o núú Yă Ndiöxí, te cada-o nchaa nacuáa tàú-xi cunduu. <sup>3</sup> Te núu duca<sup>n</sup> na càda-o cáhá<sup>n</sup> ndihí-o Yă Ndiöxí cuendá nchaa ñáyiú te quide váha-o, te ndùu vétú iní Yă Ndiöxí Yaá ní dácăcu nihnu ñaha xii-o núú ùhú núú ndàhú. <sup>4</sup> Te mee-gă cuini-gá sá ncháá ñáyiú tecú tnùní-yu nchaa tnùhu cáhá<sup>n</sup>-gá, chi cuini-gá sá nanihí tàhú-yu. <sup>5</sup> Te ñ<sup>n</sup>-ni Dútú Ndiöxí ndécú, te ñ<sup>n</sup>-ni Xítóhó Jesucristú, te medii-ni Xítóhó Jesucristú quidé-gă tnàhá tnùhu-o ndihí Yă Ndiöxí. <sup>6</sup> Te Xítóhó Jesucristú ní dáñá-gă méé-gă ní sahani ñaha-güedé xii-gá cuendá sá cuini-gá sá căcu nihnu nchaa ñáyiú ndècu ñuyíú núú ùhú núú ndàhú. Te Yă Ndiöxí cuini-gá sá ncháá ñáyiú ñuyíú ndécú vitna níhí-yu tnùhu nacuáa ní cuu ní xihí Xítóhó Jesucristú. <sup>7</sup> Te Yă Ndiöxí ní cachí-gá sá cáhá<sup>n</sup>-í tnùhu-án ndèni ní cuu núú xindecu ñáyiú ñá túú cùu ñáyiú isràél, te mee-ni tnùhu ndáá dánèhé-í-yu nacuáa quindáá iní ñáhă-yu xii-gá, te yúhú cáhá<sup>n</sup> ndáá-í sá Yă Ndiöxí ní cachí-gá sá cáhá<sup>n</sup>-í tnùhu-gá chi ndècu ndihí-í Xítóhó Jesucristú, te ñá túú dandahú ñáhà-í xii-n.

<sup>8</sup> Te yúhú cuini-í sá ncháá xichi cáhá<sup>n</sup> ndihí cue téé Yă Ndiöxí, te na cunduu ndoo cunduu nine iní-güedé òré ndonehe-güedé ndaha-güedé cáhá<sup>n</sup> ndihí ñaha-güedé xii-gá, chi vá cúú cùdéé<sup>n</sup>-güedé cuendá nchaa sá quidé ñaha ñáyiú xii-güedé, te ni vă caní iní-güedé cúcuèhé tnàhá-güedé ndihí-yu. <sup>9</sup> Te càchí tnùhu-í xii-n să ncháá ñáyiú dihí ná cunduu dío-yu nacuáa tàú-xi cunduu, te

vá cündüu cuehé cunduu duha dàtná cáá dño nchaa ñáyi ndècu ichi cuehé ichi duha, te na ndàdá-yu díquǐ-yu nàcuáa tàú-xi cunduu, te vá ndádá cuèhé ndada duhá-yu, te vá cání iní-yu cunduu vií-yu ndihí sá ïo ndèyáhu, te ni vǎ cání iní-yu cuihnú-yu dóó sǎ ïo ndèyáhu. <sup>10</sup> Te mee-ni sǎ vǎha cadá-yu, chi duca<sup>n</sup> tàú-xi cada nchaa ñáyi dñí ndécú ichi Yá Ndiöxí. <sup>11</sup> Te òré tàcá-yu núú dácuahá-yu tnúhu Yá Ndiöxí, te cue ñáyi dñí-á<sup>n</sup> na nàhi dacuahá-yu tnúhu-gá, te cadá-yu nchaa nàcuáa càhá<sup>n</sup> cue té dácuaaha ñaha xii-yu tnúhu-gá. <sup>12</sup> Te yúhú càchí-í sá vǎ cúú dácuaaha ñáyi dñí cue té, te ni vǎ cúú tàxi tnuní ñáhá-yu xii-güedé chi cunduu tnáví-ni yuhú-yu cundedóho-yu. <sup>13</sup> Te duca<sup>n</sup> xini ñuhu-xi cadá-yu, chi Yá Ndiöxí ní cadúha-gá dñha-gá té Àdán te dàtnuní ní cadúha-gá tá Èvá. <sup>14</sup> Te ñá díú mèe té Àdán ní dándahú ñáhá sácuihná xii-dé, chi tá Èvá ní dándahú-xi, te ñá túú ní quide váha-xi núú Yá Ndiöxí sá dúcá<sup>n</sup> ní sándáá iní-xi tnúhu ní cáhá<sup>n</sup> sácuihná-á<sup>n</sup>. <sup>15</sup> Dico ñáyi dñí ní nduu táhǔ-yu sá cóo dèhe-yu, te naníhí tàhú-yu te núú vá dáñá ndéé-yu canchicú<sup>n</sup> nihnú-yu ichi Yá Ndiöxí, te cundecu yíñuhú-yu núú-gǎ, te cuu iní-yu nchaa tnàha ñáyiú-yu, te cadá-yu nchaa nàcuáa tàú-xi cunduu cundecú-yu.

### 3

*Nàcuáa tàú cue té yíndaha ñaha xii ñáyi ndècu ichi Yá Ndiöxí cada-güedé*

<sup>1</sup> Te ïo ï<sup>n</sup> tnúhu càhá<sup>n</sup> ñáyi sá núu ï<sup>n</sup> té cuini quíndaha ñaha xii ñáyi ndècu ichi Yá Ndiöxí, te ï<sup>n</sup> sá vǎha cuini-dé cada-dé càchí-yu, te ndáá quée-xí tnúhu càhá<sup>n</sup>-yu. <sup>2</sup> Te yúhú càchí-í sá cuè té duca<sup>n</sup> na quíndaha ñaha xii ñáyi te xini ñuhu-xi cuu-güedé cue té quide ndáá cuèndá sá vǎ càhá<sup>n</sup> ñáyi cuèndá-güedé sá ñá túú quide ndáá-güedé. Te na cùu-güedé cue té ndèca ï<sup>n</sup> caa-ni ñadihí, te na cùu-güedé cue té ñá túú quide cutexínu ndècu, te na cùu-güedé cue té quide nchaa nàcuáa tàú-xi cunduu, te na cùu-güedé cue té sǎñaha núu vehe ndetatú nchaa ñáyi ñuhu ichi, te na cùu-güedé cue té dānehé ñáhá

vǎha xii ñáyi tnúhu Yá Ndiöxí. <sup>3</sup> Te vá cúu-güedé cue té quihu, te ni vǎ cúu-güedé cue té ndècu pletú, te ni vǎ cúu-güedé cue té dícó-ni duca<sup>n</sup> nihí dñhú<sup>n</sup>, te ni vǎ cúu-güedé cue té sàni iní nàá, te ni vǎ cúu-güedé cue té ñuhu iní mee-ni dñhú<sup>n</sup>. Chi na cùu-güedé cue té váha iní-xi te cunduu càhnu iní-güedé. <sup>4</sup> Te na cùu-güedé cue té ïo váha sànu ichi ñadihí-xi ndihí landú-xi, te na cùu-güedé cue té quide nàcuáa sándáá iní ñáhá landú-xi cuèndá canehe-güexi sá yíñuhu núu-güedé. <sup>5</sup> Chi núu cùu-güedé cue té ñá ndácú cànuichi ñadihí-xi ndihí landú-xi, te vá ndácú-güedé quíndaha-güedé cue ñáyi ndècu ichi Yá Ndiöxí. <sup>6</sup> Te vá cúu-güedé cue té íchí ní sándáá iní-xi tnúhu Yá Ndiöxí, chi na cuáhá<sup>n</sup> te cada nínu-güedé méé-güedé te cuíta nihnu-güedé dàtná ní xíta nihnu sácuihná. <sup>7</sup> Te xini ñuhu-xi cuu-güedé cue té càhá<sup>n</sup> váha ñáyi cuèndá-xi, cuèi ñá díú ñáyi ndècu ichi Yá Ndiöxí cuèndá sá vǎ cuátnuhu ñaha ñáyi xii-güedé, chi núu ñáhá te cūdāna te sácuihná quesaha-xi tàxi tnuní ñáhá-xi xii-güedé.

*Cue té chindee ñaha xii cue té yíndaha ñaha xii ñáyi ndècu ichi Yá Ndiöxí*

<sup>8</sup> Te tnàhá cue té chindee ñaha xii cue té yíndaha ñaha xii ñáyi ndècu ichi Yá Ndiöxí xini ñuhu-xi cuu-güedé cue té quide nchaa nàcuáa tàú-xi cunduu, te vá cúu-güedé cue té càchí sá càhá<sup>n</sup> ndáá te ñá ndáá, te ni vǎ cúu-güedé cue té quihu, te ni vǎ cúu-güedé cue té sàni iní-xi dícó-ni duca<sup>n</sup> nihí dñhú<sup>n</sup>. <sup>9</sup> Te xini ñuhu-xi cuu-güedé cue té ñá túú dàña ndéé sándáá iní tnúhu Yá Ndiöxí, te na cùu-güedé cue té ïo váha cùu iní-xi cuèndá nchaa sá vǎha quide-güedé. <sup>10</sup> Te xini ñuhu-xi coto ndéé ñáhá xii-güedé te núu cùu-güedé cue té quide váha, te núu cùu-güedé cue té quide váha ña te cuu chindee-güedé cue té yíndaha ñaha xii ñáyi ndècu ichi Yá Ndiöxí. <sup>11</sup> Te tnàhá tucu nchaa ñáyi dñí ná cadá-yu nchaa nàcuáa tàú-xi cunduu, te vá cündüu yití yuhú-yu, te ni vǎ cúu-yu ñáyi quide cutexínu ndècu, te na cùu-yu ñáyi ïo váha quide ndáá. <sup>12</sup> Te nchaa cue té chindee ñaha xii cue té yíndaha ñaha xii ñáyi ndècu ichi Yá Ndiöxí, xini



ñuhu-xi cuu-güedé cue té ndècu ì<sup>n</sup> caa-ni ñadihí-xi, te na cùu-güedé cue té sànu ichi váha ñadihí-xi ndihí landú-xi. <sup>13</sup> Te núu na càda ndáá-güedé chindee-güedé cue té yìndaha ñaha xii ñáyi ndècu ichi Yá Ndiöxí, te canehé-yu sá yíñuhu núu-güedé, te duca<sup>n</sup> te vá cúu càhá<sup>n</sup> núu-güedé càhá<sup>n</sup>-güedé núu ñáyi tñuhu Xítohó Jesucristú sá sàndáá iní-güedé.

#### *Ío càhnu cuu tñuhu càhá<sup>n</sup> Yá Ndiöxí*

<sup>14</sup> Te cuiní-í ndihí-ni quixi coto ñaha-í xii-n dico díhna-gá cadúha-í tutú-a daquixi-í ndaha-n <sup>15</sup> chi na cuáhá<sup>n</sup> cuyaa-í. Te xía<sup>n</sup> núu cadúha-í tutú-a daquixi-í ndaha-n cuendá cutnùní iní-n nása cada-n cùndecu-n ndihí nchaa ñáyi ndècu ichi Yá Ndiöxí. Te ñáyi-á<sup>n</sup> cúu-yu dàtná ì<sup>n</sup> vehe cùu cuendá Yá Ndiöxí Yaá ndécú nchàa nduu nchaa quíú, chi ndècu ndihí ñaha-gá xii-yu, te cúu-yu ñáyi càhá<sup>n</sup> váha cuendá tñuhu-gá. <sup>16</sup> Te cùtnùní ndáá iní-ó sá ío càhnu cuu tñuhu càhá<sup>n</sup> Xítohó Jesucristú, tñuhu sá càhá<sup>n</sup> nàcuáa nduu ichi ndecu-o, te duha càhá<sup>n</sup> tñuhu-á<sup>n</sup>:  
Te ní quixi Yá cúu Ndiöxí ñuyú-a ní cuu-gá ì<sup>n</sup> ñáyi,  
te Espíritú Yá Ndiöxí ní càhá<sup>n</sup> ndáá-xi sá cúu-gá ì<sup>n</sup> Yaá ío váha quide ndáá,  
te cue espíritú xínú cuèchi núu Yá Ndiöxí ní xíní ndáá-xi nchaa nàcuáa ní quide Yaá ní quixi ñuyú-a.  
Te ní xité nuu tñuhu-gá nihí ñuyú-a,  
te ndèni ní cuu ní ngúita-yu sàndáá iní ñáhá-yu xii-gá,  
te mee-gá cuánda-gá andiu.  
Duha càhí tñuhu-á<sup>n</sup>.

## 4

#### *Ñáyi dañu nihnu vá quíndáá-gá iní-yu Yá Ndiöxí*

<sup>1</sup> Te Espíritú Yá Ndiöxí càhá<sup>n</sup> ndáá-xi sá sáa nduu dañu nihnu dava ñáyi ndècu ichi-gá vá quíndáá iní ñáhá-gá-yu xii-gá, te duca<sup>n</sup> chi cue espíritú cùndihí yucu ñáváha dandáhú ñáhá-xi xii-yu, te mee-ná nchaa tñuhu càhá<sup>n</sup> nchaa ñáyi cùndihí nchaa espíritú-á<sup>n</sup> cuhu<sup>n</sup> iní-yu. <sup>2</sup> Te nchaa ñáyi duca<sup>n</sup> cùndihí cue espíritú cùndihí yucu ñáváha-á<sup>n</sup> cúu-yu ñáyi ío dàndahú méé-xi

chi càhí-yu sá càhá<sup>n</sup> ndáá-yu te ñá ndáá, te ñá túu tñáhí-gá ná quidé-xi iní-yu cuendá nchaa sá cuèhé sá dúhá quidé-yu. <sup>3</sup> Te ñáyi-á<sup>n</sup> quesàhá-yu sá vá cúu càndeca tñaha ñáyi, te ni vá cúu càxí-yu dava núu sá xíní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuiní-gá sá ncháá nchòo ñáyi sàndáá iní tñuhu-gá ndacá<sup>n</sup> táhú-ó núu-gá òré caxi-o. <sup>4</sup> Te nchaa sá ní cadúha Yá Ndiöxí cúu-xi sá váha te vá dáquèe tñhú-ó, te xini ñuhu-xi ndacá<sup>n</sup> táhú-ó núu-gá cuendá nchaa xía<sup>n</sup>. <sup>5</sup> Te Yá Ndiöxí càhí-gá sá méé-gá quidé-gá cúu-xi sá váha sá cúu-xi-ó te núu na ndacá<sup>n</sup> táhú-ó núu-gá.

#### *Té quide ndáá xínú cuèchi núu Xítohó Jesucristú*

<sup>6</sup> Te núu na dàcuaha-n ñáyi ndècu ndihí-o ichi Xítohó Jesucristú nchaa nàcuáa càhá<sup>n</sup>-í-a ña, te cuu-n ì<sup>n</sup> té quide ndáá xínú cuèchi núu-gá, te nducu ndè-ni-n dacuaha-n tñuhu Yá Ndiöxí sá sàndáá iní-n, te canchicú<sup>n</sup> nihnu-ni-n càda-n nchaa nàcuáa càhá<sup>n</sup>-gá, te núu duca<sup>n</sup> nà cada-n, te níhí ndéé-n cùndecu-n ichi-gá. <sup>7</sup> Te vá cáda cuendá-n nchàa cuendú cuèhé cuendú duha càhá<sup>n</sup> ñáyi, ndihí nchaa dava-gá cuendú sá ñà túu nàndihí cuendá sá ñà túu nà cumání-n cùndecu-n núu Yá Ndiöxí. <sup>8</sup> Te núu ì<sup>n</sup> chiu<sup>n</sup> cada-o te nàcaá luha yiqui-o te nàndihí-xi luha, dico ío-gá nàndihí-xi te núu cada-o sá cùndecu yíñuhu-o núu Yá Ndiöxí. Te núu duca<sup>n</sup> na càda-o te cùu-xi ì<sup>n</sup> sá váha sá cúu-xi-ó vitna, te ni caa ni quíhí duca<sup>n</sup> cùu-xi ì<sup>n</sup> sá váha sá cúu-xi-ó. <sup>9</sup> Te xini ñuhu-xi sá ncháá-ndó quíndáá iní-ndó nchàa tñuhu càhá<sup>n</sup>-í-a chi cùu-xi tñuhu ndáá. <sup>10</sup> Te vitna ío nducu ndee-o quide-o chiu<sup>n</sup> Yá Ndiöxí Yaá ndécú nchàa nduu nchaa quíú te quide ndee iní-ó cuendá nchaa sá quidé ñaha ñáyi xii-o, chi sàndáá iní-ó sá díú-gá chindèe ñaha-gá xii-o. Te nchaa ñáyi cùndahú iní ñáhá-gá te chindee ñaha-gá xii-yu, dico ñáyi sàndáá iní ñáhá xii-gá ío-gá cùnùu-yu chindee ñaha-gá xii-yu, chi dàcácu nihnu ñaha-gá núu ùhú núu ndáhú.

<sup>11</sup> Te nchaa tñuhu-á<sup>n</sup> cùñaha-n xii-yu, te càhá<sup>n</sup>-n dõho-yu sá ná càdá-yu nchaa nàcuáa càhá<sup>n</sup>-xi. <sup>12</sup> Te ío cada váha-n cùndecu-n cuendá sá vá yõ daquèe tñhú



ñáhá xii-n cuendá sá cúu-n tēe cuechi, te ío váha cada-n nchàa sá tàu-n càda-n cuendá duca<sup>n</sup> càncicú<sup>n</sup> nihnu nchaa ñáyi ndècu ichi Yá Ndiöxí, te vii vii cáhá<sup>n</sup> ndihí-n-yu, te cuu iní-n-yu, te ío quindáá iní-n Yá Ndiöxí, te mee-ni sã váha cani iní-n, te duca<sup>n</sup> càda-n cuendá càncicú<sup>n</sup> nihnú-yu. <sup>13</sup> Te nini cùyaa-í quixi-í, te ío nducu ndèe-n cáhá<sup>n</sup> ndodo-n tnũhu Yá Ndiöxí núu-yu, te dacuahá-n-yu nàcuáa càhá<sup>n</sup> tnũhu-gá, te cáhá<sup>n</sup>-n dõho-yu nàcuáa cuu vii cuu váha iní-yu cundecú-yu ichi Yá Ndiöxí. <sup>14</sup> Te vá dáñá ndèe-n càda-n nacuáa ndùu táhú nĩ taxi Yá Ndiöxí ní ngũndecu ndihí-n cũtnáhá ní sacá<sup>n</sup> ndodo cue tēe yĩndaha ñaha xii ñáyi ndècu ichi Yá Ndiöxí ndaha-güedé díquí-n, te ní cachí tnũhu-güedé sá dúcá<sup>n</sup> ní cuiní Yá Ndiöxí cunduu.

<sup>15</sup> Te ni yũhu ni iní-n càda-n nchaa nacuáa càhá<sup>n</sup>-í-a cuendá sá ná quini ñáyi sá ïo-gá váha ta quide-n cuáhá<sup>n</sup>. <sup>16</sup> Te ío váha cundehe-n nchàa nacuáa quide-n, ndihí nchaa nàcuáa dānehé-n-yu, te vá dáñá ndèe-n dùca<sup>n</sup> cada-n. Te núu duca<sup>n</sup> na càda-n te nduu táhú-n cundecu váha-n núu Yá Ndiöxí ni caa ni quihí<sup>n</sup> ndihí nchaa ñáyi na tēdõho nchaa tnũhu càhá<sup>n</sup>-n.

## 5

*Nàcuáa tàu-xi cada-o cundecu-o ndihí ñáyi sàndáá iní tnũhu Yá Ndiöxí*

<sup>1</sup> Te vá tēnàá-n nchàa cue tēe cùu sacuéhé chi vii vii cáhá<sup>n</sup>-n dõho-güedé, te cada iní-n sã dàtná tātá-n cùu-güedé, te ñu-ni duca<sup>n</sup> vì vii cáhá<sup>n</sup>-n dõho nchaa cue tēe cuechi, te cada iní-n sã dàtná cue ñani-n cùu-güedé.

<sup>2</sup> Te ñu-ni duca<sup>n</sup> vì vii cáhá<sup>n</sup> tucu-n dõho nchaa ñáyi ñihí ñáyi cùu sacuéhé, te cada iní-n sã dàtná nāná-n cùu-yu, te ñu-ni duca<sup>n</sup> vì vii cáhá<sup>n</sup> tucu-n dõho nchaa ñáyi ñihí ñáyi cuechi, te cada iní-n sã dàtná cue cúha-n cùu-yu, te ío cuu váha iní-n òrē duca<sup>n</sup> cáhá<sup>n</sup>-n dõho nchaa ñáyi cuechi-ã<sup>n</sup>.

<sup>3</sup> Te canehe-n sã yĩñũhu núu ñáyi ñihí ní quendóo quēe, te chindēe-n-yu núu ndáhú-yu. <sup>4</sup> Te núu ñ<sup>n</sup> ñaha quēe ndécú cuē déhe-a<sup>n</sup> àdi cue déhe ñani-a<sup>n</sup>, te ío xini ñũhu-xi cada-güexi nchaa nacuáa tàu-xi cunduu núu-a<sup>n</sup> chi duca<sup>n</sup> cuiní Yá Ndiöxí cada-güexi. Te núu duca<sup>n</sup> na càda-güexi te nānchocáva-güexi quide-güexi sã váha sá

cúu-xi ñáyi ní dācuéhnú ñaha xii-güexi. Te núu duca<sup>n</sup> na càda-güexi te quide váha-güexi te ío nduu vétú iní Yá Ndiöxí. <sup>5</sup> Te ñáyi quēe ñáyi ndáhú ndécú ichi Yá Ndiöxí sàndáá iní-yu sá díu-gã chindēe ñaha-gá xii-yu, te cuēi nduu cuēi niú ñá túu dāña ndeé-yu càhá<sup>n</sup> ndihí ñáhá-yu xii-gá. <sup>6</sup> Te nchaa ñáyi quēe cúdí iní quide nchaa sá cuēhé sá dúhá cùu-yu dàtná ñáyi ní xihí cuēi ndècu vívũ-yu. <sup>7</sup> Te cúñaha-n xii nchaa ñáyi sá ná cadã-yu nchaa tnũhu càhá<sup>n</sup>-í-a cuendá sá ñà túu nã cumānĩ-yu cundecú-yu, te duca<sup>n</sup> vã yõo cáhá<sup>n</sup> cuēhé cuendá-yu. <sup>8</sup> Te ío xini ñũhu-xi chindeé-yu cue tnàha ñáyi-yu, dico ío-gá xini ñũhu-xi chindeé-yu cue ñáyi cùu ndi meé-yu ndècu ndihí-yu, te núu vá dúcá<sup>n</sup> cadá-yu te ñá túu-gã sàndáá iní-yu cadá-yu nàcuáa càhá<sup>n</sup> Yá Ndiöxí. Te sá dúcá<sup>n</sup> ná cadá-yu te vihi-gá quidē-yu dācúxí ñáyi ndècu ichi cuehé ichi duha.

<sup>9</sup> Te chido tnùnĩ-n mēe-ni ñáyi quēe ñáyi sa ndècu únídico cuíá-xi àdi vihi-gá cuendá ñáyi-á<sup>n</sup> cadá-yu nchaa nàcuáa cuiní Yá Ndiöxí núu nchàa ñáyi ndècu ichi-gá, te ñáyi-á<sup>n</sup> xini ñũhu-xi cuú-yu mee-ni ñáyi ní quide ndáá ní xĩndecu ndihí yĩ-xi. <sup>10</sup> Te na cùu-yu ñáyi quēe quide váha cùu núu nchàa ñáyi, te na cùu-yu ñáyi quēe xini canu ichi váha cue landú-xi, te na cùu-yu ñáyi sãñaha nũu vehe ndetatú cue ñáyi ñũhu ichi, te na cùu-yu ñáyi ndècu túha quide nani chiú<sup>n</sup> cuendá cue ñáyi ndècu ichi Yá Ndiöxí, te na cùu-yu ñáyi chĩndee nchaa ñáyi ndècu ndihí tnũndõho tnũhu ndáhú, te na cùu-yu ñáyi ñá túu dāña ndeé quide nchàa núu sã váha.

<sup>11</sup> Te vá chidó tnùnĩ-n ñáyi quēe ñáyi ñá túu ndècu únídico cuíá-xi cada chiú<sup>n</sup> Yá Ndiöxí, chi núu cuechi-gã-yu ña, te vá cundáá-yu cadá-yu chiú<sup>n</sup>-gá, chi quesáhá-yu natnāndaha tucú-yu. <sup>12</sup> Te sá cuendá xĩã<sup>n</sup> te nacháhu-yu núu Yá Ndiöxí, chi vá cadá-gã-yu nàcuáa ní cuu tnũhu cadá-yu ni cùu. <sup>13</sup> Te ngũita-yu cani iní-yu quihí<sup>n</sup>-yu ndi vehe ndi vehe caca nihní-yu, te nchaa ñáyi duca<sup>n</sup> quide ío cùu cuhndú-yu, te cùyiti yuhú-yu, te ndēni ní cuu cuáhá<sup>n</sup>-yu chĩnee díquí-yu vehe tnàha

ñáyíu-yu ndèhé-yu núu nása ndècú-yu, te ñá túú tàú-yu duca<sup>n</sup> càdá-yu, te càhá<sup>n</sup>-yu mee-ni tnùhu sá ñà túú nàndíhi. <sup>14</sup> Núu xí<sup>n</sup> cuíní-í sá ncháá ñáyíu quèé ñáyíu cuechi na nàtnándaha tucú-yu cuendá cuú-yu náná, te duca<sup>n</sup> càdá-yu nchaa sá xíní ñùhu-xi cadá-yu vehé-yu, te núu duca<sup>n</sup> na càdá-yu, te nchaa ñáyíu cùu úhú iní ñáhá xì-o vá nìhí-gá-yu tnúhu cáhá<sup>n</sup> cuèhé-yu cuendá tnúhu Yá Ndiöxí. <sup>15</sup> Te dava ñáyíu quèé ndécú ichi Yá Ndiöxí ní cùu ní dáñá-yu te ní tñí-yu tnúhu càhá<sup>n</sup> sácúíhná.

<sup>16</sup> Te núu dava ñáyíu ndècu ichi Yá Ndiöxí ndécú ndìhí-yu ì<sup>n</sup> ñaha quèé cúu ndì meé-yu ña, te tàú-yu chindee ñáhá-yu xii-a<sup>n</sup> cuendá sá vǎ ìo chi chiù<sup>n</sup>-a<sup>n</sup> nchaa ñáyíu ndècu ichi Yá Ndiöxí, te duca<sup>n</sup> te nchaa ñáyíu ndècu ichi-gá-á<sup>n</sup> ñíhí ndéé-gǎ-yu chindèé-yu dava-gá ñáyíu quèé ñá túú vèdana ndècu ndìhi.

<sup>17</sup> Te nchaa cue téé ìo váha quède yìndaha ñaha xii ñáyíu ndècu ichi Yá Ndiöxí ìo xini ñuhu-xi canehe sá yíhí ñùhu núu-güedé, te chindee ñaha xii-güedé. Te uu<sup>n</sup>-gá tàú ñáyíu duca<sup>n</sup> càdá-yu sá cúu-xí ncháa cue téé ni yùhu ni iní càhá<sup>n</sup> tnúhu-gá. <sup>18</sup> Te núu tütú Yá Ndiöxí càchí-xi: “Vá chíhí-ndó ñùnu yuhu ndicutu oré dánchezí-dí triú”, duha càchí-xi. Te càchí tucu-xi ingá xichi: “Ì<sup>n</sup> téé quède chiu<sup>n</sup> dacuítí tàú-xi sá cúhú<sup>n</sup> yǎhu-dé”, duha càchí-xi núu tütú-gá.

<sup>19</sup> Te núu ìo ñáyíu véxi sàcá<sup>n</sup> cuéchi núu-n cuendá ì<sup>n</sup> téé yìndaha ñaha xii ñáyíu ndècu ichi Yá Ndiöxí ñá, te cada cuendá-n tnùhu càhá<sup>n</sup>-yu te núu véxi-yu ndìhi úú àdi úní ñáyíu càhá<sup>n</sup> ndáá nàcuáa ní cuu, á<sup>n</sup> nùu ñáhá te vá cadá cuendá-n tnùhu càhá<sup>n</sup>-yu. <sup>20</sup> Te núu cue téé yìndaha ñaha xii ñáyíu-á<sup>n</sup> ndécú cuèchi-güedé, te cáhá<sup>n</sup>-n dǎho-güedé núu ncháa ñáyíu ndècu ichi-gá cuendá sá dává-gǎ-yu vá cúyí<sup>n</sup>-yu duca<sup>n</sup> càdá-yu. <sup>21</sup> Te Yá Ndiöxí ndìhi Xítóhó Jesucristú náhá-gǎ ndìhi cue espíritú xínú cuèchi núu-gǎ sá yǎhú càhá<sup>n</sup>-í dóho-n sǎ cadá-n ncháa nàcuáa càhá<sup>n</sup>-í-a, te ì<sup>n</sup>-ni cáhá<sup>n</sup> ndìhi-n cuè téé xíní tnáhá ndìhi-n, ndìhi cue téé ñá túú xíní tnáhá ndìhi-n. <sup>22</sup> Te vá ìo cundíhí iní-n tàxi ndecu-n ì<sup>n</sup> téé quìndaha ñaha xii ñáyíu, chi díhna-gá cada cuendá-n te núu cùu-dé ì<sup>n</sup> téé quède ndáá,

chi núu cuendá-ni na tàxi ndecu-n-dé te vá cadá ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ìo coto-n mèe-n vá cadá-n nì ì<sup>n</sup> sá cuèhé sá dúhá.

<sup>23</sup> Te duca<sup>n</sup> ìo mee-ni cùhú xítí-n te vá cóhó-n mèe-ni ndute, chi tnáhá luha vínú ndéhé yoho yàha stilé coho-n cuendá cada tátna-xi.

<sup>24</sup> Te dava ñáyíu cùtnuní nchaa sá cuèhé sá dúhá quidé-yu, te cùtnuní tucu sá náchǎhu-yu na sáá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sáá nduu cùndáá cuèchi-yu te dává-á<sup>n</sup> cutnùní. <sup>25</sup> Te duca<sup>n</sup> sǎtnahá-xi cùu nchaa sá vǎha quède dává-yu chi cùtnuní, te cuèi ñá túú cùtnuní òré-ni dico dacuítí sǎ sáá nduu cùtnuní.

## 6

<sup>1</sup> Te nchaa ñáyíu ndècu tnuú quidé chiù<sup>n</sup> ndìhi ì<sup>n</sup> patróo<sup>n</sup> xini ñuhu-xi ìo canehé-yu sá yíñùhu núu-dé cuendá sá vǎ càhá<sup>n</sup> cuèhé ñáyíu cuendá Yá Ndiöxí, te ni vǎ càhá<sup>n</sup> cuèhé-yu cuendá tnúhu-gá. <sup>2</sup> Te núu patróo<sup>n</sup> cue ñáyíu xínu cuechi-á<sup>n</sup> sàndáá iní-dé Yá Ndiöxí, te ñá díú sǎ dúcá<sup>n</sup> sàndáá iní-dé Yá Ndiöxí te vá cánèhé-yu sá yíñùhu núu-dé, chi uu<sup>n</sup>-gá tàú-yu cada váha-yu cunu cuèchí-yu núu-dé, te duca<sup>n</sup> na càdá-yu chi xínu cuechí-yu núu tée sàndáá iní ndìhí-yu tnúhu Yá Ndiöxí. Te vá dáñá ndèé-n dànehé-n-yu nchaa nàcuáa càhá<sup>n</sup>-í-a, te cúñaha-n xii-yu sá ná càdá-yu.

### *Nduu vétú iní-ó cùndecu-o*

<sup>3</sup> Te ìo cue téé ñá túú tñí-güedé nàcuáa càhá<sup>n</sup> tnúhu Xítóhó Jesucristú, te cue téé-á<sup>n</sup> càchí-güedé sá càhá<sup>n</sup> ndáá-güedé dico ñá ndáá, chi ñá túú càhá<sup>n</sup>-güedé nàcuáa cuáhá<sup>n</sup> tnúhu-gá. Te nchaa tnúhu Xítóhó Jesucristú cúu-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. <sup>4</sup> Te nchaa cue téé duca<sup>n</sup> xíquide quède cahnu-güedé méé-güedé dico ñá túú vèdana xíní-güedé, te cue téé-á<sup>n</sup> ñá túú ndècu váha iní-güedé chi nándi tnúhu sá ñà túú nàndíhi cuíní-güedé cùtnàha-güedé. Te ngüita-güedé cúu cuèdú iní tnáhá-güedé, te nàá ndìhi tnáhá-güedé, te xícuèhé tnáhá-güedé, te ñá túú-gǎ cúu vǎha iní núu tnáhá-güedé. <sup>5</sup> Te cue téé-á<sup>n</sup> mee-ni nàá-güedé chi ñá túú sàni váha iní-güedé, te ni ñà túú xíní-güedé

nàcuáa cuáhá<sup>n</sup> tnúhu ndáá tnúhu Yá Ndiöxí, te cächí-güedé sá ïo váha cundecu-güedé ichi-gá chi sàni iní-güedé sá ïo vâi dîhú<sup>n</sup> nîhí-güedé cundecu ndîhi-güedé. Te yúhú cáhá<sup>n</sup>-í dóho-n sã vã nîhí tnáhá-n ndîhi nchaa cue téé duca<sup>n</sup> xîquide. <sup>6</sup> Te ndáá sá ïchi Yá Ndiöxí cúu-xí ï<sup>n</sup> ichi sá ïo váha cundecu-o, dico xîni ñuhu-xi nduu vétú iní-ó nàcuáa ndècu-o ñuyúú-a. <sup>7</sup> Te nchoo cuè ñáyiú chi ñá túú vèdana nèhe-o ní quexìo ñuyúú-a, te ñu-ni duca<sup>n</sup> ñà túú vèdana canehe-o quîhí<sup>n</sup> òré ná cúú-ó. <sup>8</sup> Te ío xîni ñuhu-xi nduu vétú iní-ó te núu ndècu-ni sá cúnchìto-o ndîhi dóó cuhnu-o. <sup>9</sup> Te ío ñáyiú ío cuiní-yu cuu cuicá-yu, te ñáyiú-á<sup>n</sup> dácàhu iní ñáhá yùcu ñávãha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidè-yu, te nchaa sá quidè-yu-á<sup>n</sup> ñà túú vèdana nándîhi-xi chi uu<sup>n</sup>-gá ndádá ndàhú ñáhá-xi xii-yu, te dàcuíta nihnu ñaha-xi. <sup>10</sup> Chi nchaa ñáyiú ñuhu iní mee-ni dîhú<sup>n</sup>, te xîá<sup>n</sup> quidè-xí ngüíta-yu sàni iní-yu cadá-yu nándi sá cuèhé sá dúhá. Te ío ñáyiú ndècu ichi Yá Ndiöxí te sá tnúhu duca<sup>n</sup> ñuhu iní mee-ni dîhú<sup>n</sup> nî dáñã-yu ñá túú-gã sàndáá iní ñáhã-yu xii-gã, te vitna ñá túú tnàhí-gã ndécú vãha iní-yu.

*Cahni iní-ó càda-o nchaa nacuáa cáhá<sup>n</sup> Yá Ndiöxí chi sàndáá iní-ó-gã*

<sup>11</sup> Te yòhó téé quidè chiu<sup>n</sup> Yá Ndiöxí xîni ñuhu-xi vá cadá-n dàtná quidè nchaa ñáyiú ní cachí-í sá ñà túú quidè ndáá, te vá dáñã ndéé-n càda ndáá-n cundecu-n, te cada-n nàcuáa nduu vétú iní Yá Ndiöxí, te ío quindáá iní-n-gã, te cuu iní-n nchaa tnaha ñáyiú-n, te cada càhnu iní-n nchaa sá ná yãha-n cundecu-n ichi-gá, te cunduu ndàhú iní-n. <sup>12</sup> Te cahni iní-n càda-n nchaa nacuáa cuiní Yá Ndiöxí chi sàndáá iní-n-gã, te ío cuhu<sup>n</sup> iní-n sã cundècu-n ndîhi Yá Ndiöxí nî caa nî quîhí<sup>n</sup>, chi ñu cuendá tnàhí-á<sup>n</sup> nî cáhá<sup>n</sup> ñáhã-gã xii-n, te ní cáhá<sup>n</sup> ndáá-n núú vâi ñáyiú sá ïo váha sàndáá iní-n-gã. <sup>13</sup> Te Yá Ndiöxí Yaá quidè nchìto nchaandi túhú sá ío ñuyúú nàha-gá sá cáhá<sup>n</sup>-í dóho-n vitna, te ñu-ni duca<sup>n</sup> naha tucu Xitohó Jesucristú Yaá ní cáhá<sup>n</sup> tnúhu ndáá núú tẽ Pilatú <sup>14</sup> sá quindáá iní-n càda-n nchaa nacuáa cáhá<sup>n</sup> Yá Ndiöxí, te nchaa tnúhu cáhá<sup>n</sup>-gã cada-n nàcuáa vá dáquèe tíhú ñáhã ñáyiú xii-n, te

duca<sup>n</sup>-ni càda-n ndéé ná sàá nduu quixi tucu Xitohó Jesucristú. <sup>15</sup> Te quixi tucu-gá chi duca<sup>n</sup> ní cachí Yá Ndiöxí cunduu, te mee Yá Ndiöxí náhã-gã ná nduu quixi tucu Xitohó Jesucristú. Te Yá Ndiöxí ío váha cùu iní-gá te ï<sup>n</sup>dîi dîi-ni-gã ío-gá cúnùu-gá dàcúxí cuè téé tàxi tnuní ï<sup>n</sup> ï<sup>n</sup> nàció<sup>n</sup> ndîhi nchaa dava-gá cue téé cùnùu, chi tàxi tnuní ñáhã-gã xii-güedé, te nchaa ñáyiú ndècu ñuyúú-a tàxi tnuní-gá. <sup>16</sup> Te ñu-gá cúu-gã Yaá ndécú nchaa nduu nchaa quíú, te ío càhnu cuu-gá chi dàtná dáyehé nchìcanchii dáyehé-xi núú ndécú-gã, te vá yòo ï<sup>n</sup> cùyii dayatni núú ndécú-gã, te nî ñã túú nî ï<sup>n</sup> ñáyiú xîní ñáhã xii-gã te nî vã ndácú-yu quini ñáhã-yu xii-gã. Te ío na cànehe nchaa ñáyiú sá yíñuhu núú-gã nî caa nî quîhí<sup>n</sup>, te duca<sup>n</sup> ïo na tàxi tnuní-gá nî caa nî quîhí<sup>n</sup>. Te duca<sup>n</sup> na cunduu.

<sup>17</sup> Te cáhá<sup>n</sup>-n dóho nchaa ñáyiú cuica ndècu ndîhi nchaa sá ío ñuyúú-a cuendá sá vã cadá càhnu-yu mèè-yu, te duu<sup>n</sup> duu<sup>n</sup> vá cundèé iní-yu nî ï<sup>n</sup> sá ndécú ndîhí-yu chi vá cúdî-xi, te cáhá<sup>n</sup>-n dóho-yu sá ná cundèé iní-yu Yá Ndiöxí chi ñu-gã cúu-gã Yaá ndécú nchaa nduu nchaa quíú, te chitu núú ndáhã tàxi-gã nchaa sá xîní ñuhu-o, chi cuiní-gá sá ïo cuu váha iní-ó cundecu-o. <sup>18</sup> Te cáhá<sup>n</sup> tucu-n dóho-yu sá ná cadá-yu mee-ni sã vãha, te cuendá nchaa sá vãha cadá-yu-á<sup>n</sup> te cuú-yu ï<sup>n</sup> ñáyiú cuica sá cúu-xí Yá Ndiöxí, te na cundecu túha-yu chindèé-yu cue ñáyiú ndàhú cuáñáhã-yu sá xîní ñuhú-yu. <sup>19</sup> Te núu duca<sup>n</sup> na càda-yu te Yá Ndiöxí cuáñaha-gã sá ndúú tãhú-yu na sàá nduu, te ngündecu váha-yu ndîhi-gá nî caa nî quîhí<sup>n</sup>.

*Tnúhu ndéé núú nî ndîhi-ná*

<sup>20</sup> Te yòhó té Timùteú cáhá<sup>n</sup>-í dóho-n sã ïo cada cuendá-n vã dãma tnúhu ní taxi Yá Ndiöxí danèhé-n ñáyiú, te vá cadá cuendá-n nchaa cuendú cuèhé cuendú duha ío ñuyúú-a chi ñá túú nándîhi-xi, te nî vã cadá cuendá-n nchaa tnúhu xitnaha ñáyiú cächí sá xicá naha tnúhu cue téé túha chi ñá dîú ï<sup>n</sup> tnúhu ndáá cúu-xí. <sup>21</sup> Te ío ñáyiú ñá túú-gã sàndáá iní-yu tnúhu Yá Ndiöxí, chi ní quidè cuendá-yu nchaa tnúhu xica naha ñáyiú-á<sup>n</sup>.

Te Yá Ndiǒxí ná chìndee chitúu ñaha-gă  
xii-n. Te duca<sup>n</sup> na cùnduu. Te ío cada ndee  
ìní-nă vitna.



## TUTÚ CÚÚ ÒÚ NÍ CADÚHA TÉ PÄBLÚ QUIHI<sup>n</sup> NDAHA TÉ TIMÛTEÚ

*Té Păblú cáduha-dé tutú quíhi<sup>n</sup> ndaha té Timùteú*

<sup>1</sup> Yúhú té Păblú ní tendaha ñàha Yá Ndiöxí càhá<sup>n</sup>-í tnúhu Xítohó Jesucristú núú ñăyiu, chi duca<sup>n</sup> ñí cachí Yá Ndiöxí cunduu. Te càhá<sup>n</sup>-í dàtná ní cachí Yá Ndiöxí sá ncháá nchòo ñăyiu ndècu ndihí Xítohó Jesucristú naníhí tǎhú-ó. <sup>2</sup> Te yúhú té Păblú cáduha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te ñíu-í ní sanu ichi ñaha-í xii-n ichi Xítohó Jesucristú, te xicá<sup>n</sup> tǎhú-í núú Dütú Ndiöxí ndihí núú Xítohó Jesucristú sá ío na chindee chitúu ñaha-gǎ xii-n, te cundàhú iní ñáhà-gǎ, te duca<sup>n</sup> ndí nduú-gǎ ná cádá te ío váha cuu iní-n cùndecu-n.

*Cáhá<sup>n</sup> váha-o cuendá Xítohó Jesucristú*

<sup>3</sup> Te cuéi nduu cuéi níu duca<sup>n</sup>-ni càhá<sup>n</sup> ndihí-í Yá Ndiöxí cuendá-n, te ndàcá<sup>n</sup> tǎhú-í núú-gǎ, te xínu cuechi-í núú-gǎ dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndáá-í núú-gǎ dàtná ní xóo cada-güedé. <sup>4</sup> Te ío sàni iní-í naníhí tnáhà-ó cuendá ío cudíí iní-í, chi ndàcu iní-í sá ío ní ndáhyú-n sǎ ndíhú iní-n cùtnáhà ní quide ndee iní-í tnáhà-ó. <sup>5</sup> Te ñaha-í sá sàndáá ndisa iní-n Yá Ndiöxí dàtná ní ngúíta díhna-gǎ xítná-n tǎ Lòidá ndihí nǎná-n tǎ Eùnicé quídě-yu, te cùtnuní ndáá iní-í sá díú tnáhà-n ío váha sàndáá iní-n-gǎ.

<sup>6</sup> Te xǎ<sup>n</sup> dándàcu iní ñáhà-í xii-n cuendá sá ío-gǎ nducu ndée-n cada-n chiu<sup>n</sup> ní nduu tǎhú-n núú Yá Ndiöxí cada-n, chi ní taxi-gǎ tnúhu ndee iní ní ngúndecu ndihí-n cùtnáhà ní sacá<sup>n</sup> ndodo-í ndaha-í díquí-n sǎ díú chiú<sup>n</sup>-gǎ cada-n. <sup>7</sup> Te Espíritú sá ñí taxi Yá Ndiöxí ndécú ndihí-o ñǎ túú cùu-xi ñ<sup>n</sup> Espíritú sá cádá nàcuáa yùhú-ó, chi cùu-xi ñ<sup>n</sup> Espíritú sá táxí tnúhu ndee iní cada-o chiú<sup>n</sup>-gǎ, te ñíu-xi quide cuu iní tnáhà-ó ñ<sup>n</sup> ñ<sup>n</sup>-o, te ñíu-ni tucu-xi quide cut-nuní iní-ó nàcuáa cada-o cùndecu-o. <sup>8</sup> Te

xǎ<sup>n</sup> núu vá cúcàha<sup>n</sup> núú-n cǎhá<sup>n</sup> váha-n cuendá Xítohó Jesucristú, te ní vǎ cúcàha<sup>n</sup> núú-n sǎ dúhá yíhi-í vecaá sá cuendá-gǎ, te xini ñíhu-xi sá tnáhà-n ndòho-n sá cuendá tnúhu-gǎ, te cundee iní-n ndòho-n, chí Yá Ndiöxí chindee ñàha-gǎ xii-n. <sup>9</sup> Te Yá Ndiöxí ní dácǎcu nihnu ñaha-gǎ xii-o núú ùhú núú ndàhú, te ní cachí-gǎ sá cádá-ó ncháa nacuáa cuení méé-gǎ cunduu, te duca<sup>n</sup> ñí quide-gǎ chi duca<sup>n</sup> ñí sani iní méé-gǎ cunduu sá cádá váha ñaha-gǎ xii-o, te ñǎ díú sǎ ío váha quide-o ndecu-o duca<sup>n</sup> ni quide-gǎ. Te ndéé cùtnáhà vátá ngáva-gǎ ñíuyú ñí cachí-gǎ sá cádá váha ñaha-gǎ xii nchaa nchoo ñăyiu ní ngúndecu ndihí Xítohó Jesucristú vitna. <sup>10</sup> Te vitna cùtnuní iní-ó sǎ ío váha quide ñaha-gǎ xii-o, chí ní quixi Xítohó Jesucristú ñíuyú-a ní dácǎcu nihnu ñaha-gǎ xii-o núú ùhú núú ndàhú, te Yaá-á<sup>n</sup> ñí quide-gǎ cuendá sá vǎ cùú-gǎ-ó cùú dúcá<sup>n</sup>-ó, chí ní cachí-gǎ sá cùndecu-o ni caa ni quíhi<sup>n</sup> te núu na quíndáá iní-ó tnúhu-gǎ.

<sup>11</sup> Te ní cachí-gǎ sá càhá<sup>n</sup>-í tnúhu-gǎ núú ñăyiu ñǎ túú cùu ñăyiu isràél te dacuàha váha-í-yu tnúhu-gǎ, te cuéi nděni ní cuu ndécú-yu te quíhi<sup>n</sup>-í càhá<sup>n</sup>-í tnúhu-gǎ núú-yu chí duca<sup>n</sup> ñí cachí-gǎ cunduu. <sup>12</sup> Te cuendá xǎ<sup>n</sup> nándí sá ndóhò-í vitna cuendá-gǎ, dico ñǎ túú cùcaha<sup>n</sup> núú-í chí cùtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dáñà-í méé-í núú ndáhà-gǎ, te cùtnuní ndáá iní-í sá cótó ñaha-gǎ xii-í ndéé ná sàá nduu nàcuaca ñaha-gǎ.

<sup>13</sup> Te vá dáñá ndéé-n càda-n nchaa nacuáa càhá<sup>n</sup> tnúhu váha ní dǎnehé ñáhà-í xii-n, te ío quíndáá iní-n Yá Ndiöxí, te nchaa-o nàcuáa ndècu-o ndihí Xítohó Jesucristú ío cuu iní tnáhà-ó ñ<sup>n</sup> ñ<sup>n</sup>-o. <sup>14</sup> Te cada cuendá váha-n sǎ vǎ dǎma tnúhu Yá Ndiöxí sá ñí taxi-gǎ ndécú ndihí-n, te Espíritú-gǎ sá ñí taxi-gǎ ndécú ndihí-o chindee ñaha-xi xii-n.

<sup>15</sup> Te yòhó sa xini-n sǎ ncháa ñăyiu ndècu distritú Àsiá, ñăyiu ní sàndáá iní tnúhu Xítohó Jesucristú ní dáñá ñáhà-yu xii-í, te tnáhà té Fígeló ndihí té Hèrmógenés ní dáñá ñaha-güedé xii-í. <sup>16</sup> Te xicá<sup>n</sup> tǎhú-í núú Xítohó Jesucristú sá ná chindee-gǎ cue ñăyiu cùu ndí mee té Onésíforó, chí ñíu-dé ío vǎi xito ní quixi-dé ní quide cuendá ñáhà-dě

xii-í, te ní taxi-dé tnúhu ndee iní, te ñá túú ní cùcaha<sup>n</sup> núú-dě sá yíhí-í vecaa. <sup>17</sup> Te cùtnàhá ní xíndecu-dé ñuú Rómá duca<sup>n</sup>-ni ní xóo nanducu ñàha-dé xii-í ndéé ndéé naníhí ñàhá-dě. <sup>18</sup> Te xìcá<sup>n</sup> táhú tucu-í núú Xítóhó Jesucristú sá ná cùndahú iní ñàhá-gã xii-dé nduu na sàá cundáá cuéchi nchaa ñáyiu. Te yòhó sa xìní ndáá-n sã ïo ní chindee ñàha-dé xii-o cùtnàhá ní xíndecu-o ñúú Éfesú.

## 2

### *Tée quide ndáá xínú cuèchi núú Xítóhó Jesucristú*

<sup>1</sup> Te yòhó téé cùu datná ì<sup>n</sup> déhe mee-í ïo nducu ndèe-n cada-n nacuaá níhí ndéé-gã-n cùndecu-n ichi Xítóhó Jesucristú chi ñu-gá chindee ñàha-gá xii-n. <sup>2</sup> Te nchaa tnúhu sá ní dánèhé ñàhá-í xii-n ndìhí nchaa dava-gá ñáyiu, xíá<sup>n</sup> danèhé-n dàva-gá cue téé quide ndáá cuèndá danèhé-güedé dava-gá ñáyiu.

<sup>3</sup> Te cahni iní-n ndòho-n cunu cuechi-n núú Xítóhó Jesucristú dàtná cuini-n ndòho ì<sup>n</sup> sandadú sàhni iní-dé xínú cuèchi-dé. <sup>4</sup> Chi ni ì<sup>n</sup> sandadú ñá túú nãgá sání iní-dé cada-dé òré xínú cuèchi-dé cuèndá cudùu-dé núú tée taxi tnuñí ñàhá. <sup>5</sup> Te ñu-gá duca<sup>n</sup> sãtnahá-xi cùu tucu ì<sup>n</sup> téé dàdiqui, chi núu vá dàdiqui-dé nàcuáa tàú-xi cunduu te vá nihí-dé sá ndúú táhú-dě. <sup>6</sup> Te núu ì<sup>n</sup> téé xínu cuechi ïo ndùcu ndee-dé quidé chiú<sup>n</sup>-dé chíhí-dě tatá, te ñu-gá tàú-dé díhna-gá-dé níhí-dě sá cùhú<sup>n</sup> yãhu-dé. <sup>7</sup> Te caní iní-n nchàa tnúhu càhá<sup>n</sup>-í-a, te Xítóhó Jesucristú chindee ñàha-gá xii-n te tecú tnùní-n nchàa.

<sup>8</sup> Te ndacu iní-n sã Xítóhó Jesucristú ní cuu-gá ñani tnàhá ndí Dáví, te ní xíhí-gá te ní ndoto-gá, te ñu-gá duca<sup>n</sup> ndùu tnúhu dànehé-í ñáyiu. <sup>9</sup> Te ïo dàndòho ñàha ñáyiu xii-í cuèndá sá càhá<sup>n</sup>-í tnúhu-gá, te quide ñàhá-yu xii-í dàtná quidé-yu ì<sup>n</sup> téé ní quide ì<sup>n</sup> cuéchi càhnu, chi ní chihi ñàhá-yu ve-caá xii-í, dico tnúhu Yá Ndiòxí chi vá ndácù-yu nganí-yu. <sup>10</sup> Te xíá<sup>n</sup> ñu cuèi nándi cùu nchaa sá quidé ñàhá-yu xii-í, dico quide cahnu iní-í cuèndá sá naníhí táhú tnàhá nchaa dava-gá ñáyiu cuini Yá Ndiòxí cundecu ndìhí-gá, chi nchaa ñáyiu na tnàhá tnúhu ndìhí Xítóhó Jesucristú

nduu táhú-yu cundecú-yu ndìhí-gá núú ïo váha càa ndecu-gá ni caa ni quíhí<sup>n</sup>.

<sup>11</sup> Te xéhé cúú-xí ì<sup>n</sup> tnúhu ndáá cuiti: Nchoo cùu-o datná ñáyiu ní xíhí ndìhí Xítóhó Jesucristú chi ñá túú-gã ndécú-ó ìchi cuehé ichi duha, te xíá<sup>n</sup> ñu cuèi na sàá nduu cùú-ó ñu-yú-a, dico ñu-ni cundecu-o ndìhí-gá.

<sup>12</sup> Te núu na cùndee iní-ó ndòho-o nándi sá ndóhó-ó sã cuèndá-gá, te sáá nduu te cunuu-o ndìhí-gá.

Te núu na càhá<sup>n</sup>-ó sã ñà túú xìní-ó-gã, te ñu-ni duca<sup>n</sup> cùñaha-gã xii-o sã ñà túú xìní ñàhá-gã ná sàá nduu càa ndáá-gá cuéchi nchaa ñáyiu.

<sup>13</sup> Te núu nchoo ñà túú quide ndáá-ó ndècu-o núú-gã ñá, dico mee-gã chi ïo ndáá quidé-gã, chi Yá Ndiòxí nchaa sá sání iní-gá quidé-gã.

### *Tée quide nacuaá ndùu vétú iní Yá Ndiòxí*

<sup>14</sup> Te dandacu iní-n nchàa ñáyiu ndècu ndìhí-o ichi Xítóhó Jesucristú nchaa tnúhu càhá<sup>n</sup>-í-a, te cùñaha-n xii-yu sá Xítóhó Jesucristú cuini-gá sã ñà túú-gã nándi tnúhu cùtnàhá-yu, chi nchaa tnúhu càhá<sup>n</sup>-yu-á<sup>n</sup> dácuíta nihnu-xi ñáyiu ndèdòho ñàha xii-yu, chi ñá túú vèdana nándìhí nchaa tnúhu-á<sup>n</sup>. <sup>15</sup> Te ïo nducu ndèe-n cada ndáá-n cùndecu-n núú Yá Ndiòxí, te cada-n chiú<sup>n</sup>-gá nàcuáa nduu vétú iní-gá, te càhá<sup>n</sup> ndáá-n tnúhu-gá, cuèndá sá vã cúcàha<sup>n</sup> núú-n núú-gã. <sup>16</sup> Te vá càdá cuèndá-n nchàa tnúhu sá ñà túú vèdana nándìhí càhá<sup>n</sup> ñáyiu cuèndá Yá Ndiòxí, chi nchaa ñáyiu càhá<sup>n</sup> tnúhu-á<sup>n</sup> ndìhí nchaa ñáyiu sàcùndedòho ñàha xii-yu uu<sup>n</sup>-gá quidé-yu nchaa sá cuéhé sá dúhá. <sup>17</sup> Te nchaa tnúhu-á<sup>n</sup> cùtenuu-xi dàtná quidé ì<sup>n</sup> cuéhé sã ñani ñàha xii ñáyiu xité nuu-xi nihí yiqui cùñú-yu. Te tnàhá té Himènéu ndìhí té Filetú càhá<sup>n</sup>-güedé tnúhu-á<sup>n</sup> quidé-güedé dàtná quidé ñáyiu-á<sup>n</sup>. <sup>18</sup> Te cue téé-á<sup>n</sup> ñà túú-gã càhá<sup>n</sup> ndáá-güedé dàtná càhá<sup>n</sup> tnúhu Yá Ndiòxí, chi càhí-güedé sá ncháá nchòo ñáyiu ndècu ichi Yá Ndiòxí cúú-ó dàtná cue ñáyiu sa ní ndoto, dico na cùú ndisa-o te vá ndótó-gã-ó càhí-güedé. Te dava ñáyiu ní dáñá-yu sá sàndáá iní-yu tnúhu Yá Ndiòxí sá dúcá<sup>n</sup> càhá<sup>n</sup>-güedé. <sup>19</sup> Te cuèi duca<sup>n</sup> quide davá-yu, dico Yá Ndiòxí ní taxi ndecu-gá

cue ñáiyu ni yùhu ni iní ndécú ìchi-gá, te cùtnuní sá ndécú ndìhi ñaha-gá xií-yu, chi ì<sup>n</sup> xichi núú tütú-gá càchí-xi sá méé-gă xìní-gá cue ñáiyu cùu cuendá-gá. Te ìngá tucu xichi núú tütú-gá càchí-xi sá ncháá ñáiyu sàndáá iní ñáhá xì Xítóhó Jesucrìstú xìní ñùhu-xi sá vă cùndècu-gá-yu ichi cuèhé ichi duha.

<sup>20</sup> Te ñáiyu cuica chi ndècu ndìhi-yu vehé-yu cóhó sá ñí cuáha mee-ni dîhú<sup>n</sup> cuáá<sup>n</sup>, ndìhi cóhó sá ñí cuáha mee-ni dîhú<sup>n</sup> cuixí<sup>n</sup>, te nchaá cóhó-á<sup>n</sup> cúú-xí dâtná cue ñáiyu ñá túú ñă cúmăní núú Yă Ndiöxí. Te ndècu ndìhi tucú-yu cóhó sá ñí cuáha mee-ni ñùhu, ndìhi cóhó sá ñí cuáha mee-ni yùtnu, te nchaá cóhó-á<sup>n</sup> cúú-xí dâtná cue ñáiyu ñá túú quide ndáá núú Yă Ndiöxí.

<sup>21</sup> Te nchaá ñáiyu ío ndècu yîñuhu núú Yă Ndiöxí cúú-yu ñáiyu ñá túú ñihí tnáhá ndìhi cue ñáiyu ñá túú quide ndáá núú-gă, te cue ñáiyu ndècu yîñuhu núú-gă-á<sup>n</sup> ñă túú tnàhí quée cáva-yu quidé-yu nchaá chîu<sup>n</sup> tahu-gá.

<sup>22</sup> Te ío cada cuendá-n vă cadá-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiöxí, te quindáá iní-n-gă, te cuu iní-n ncháa tnaha ñáiyu-n, te cundecu nahi-n, chi duca<sup>n</sup> tàú-xi cada-n ndìhi nchaá dava-gá ñáiyu sa ní nduu ndoo ní nduu nine iní-xi ñáiyu càhá<sup>n</sup> ndìhi ñaha xì Yá Ndiöxí. <sup>23</sup> Te vă cadá cuendá-n ñí ì<sup>n</sup> tnúhu xîtnàha ñáiyu chi ñá túú vèdana nàndíhi-xi, chi núu na càda cuendá-ó te dîcò dánáá ñáhá-xí. <sup>24</sup> Chi nchaá cue téé xînu cuechi núú Yă Ndiöxí xìní ñùhu-xi càhá<sup>n</sup> váha-güedé ndìhi nchaá ñáiyu, te danèhé ñáhá vâha-güedé tnúhu-gá, te cunduu càhnu iní-güedé te vă nâá-güedé. <sup>25</sup> Te vii vii càhá<sup>n</sup>-güedé dóho nchaá ñáiyu sâá iní-xi, ñáiyu ñá túú tnàhá iní tnúhu ndáá tnúhu Yá Ndiöxí, te duca<sup>n</sup> te cudana Yá Ndiöxí cada-gá te ndixi túu iní-yu sá ñă túú quide váha-yu ndécú-yu te quindáá iní-yu tnúhu-gá. <sup>26</sup> Te duca<sup>n</sup> te cutnùní iní-yu sá sâcuíhná cùnùu-xi taxi tnuní ñáhá-xí xií-yu, chi dâcahu iní ñáhá-xí xií-yu quidé-yu nchaá nàcuáa cùu iní-xi ni cùu.

### 3

*Nàcuáa cada ñáiyu òré sa ta cùyatni sáá nduu quixi tucu Xítóhó Jesucrìstú*

<sup>1</sup> Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quixi tucu Xítóhó Jesucrìstú, chi dâvá-á<sup>n</sup> ío cada úhú-xi. <sup>2</sup> Chi ngüíta ñáiyu cuhu<sup>n</sup> iní-yu mee-ni sá cúú-xí mèé-yu, te cuhu<sup>n</sup> iní-yu mee-ni dîhú<sup>n</sup>, te ío cada càhnú-yu mèé-yu, te cunduu yíchí iní-yu, te càhá<sup>n</sup> cuèhé-yu cuendá Yă Ndiöxí, te vă quindáá-gá iní-yu ñí tătă-yu ñí ñănă-yu, te ñí vă ndácá<sup>n</sup> táhú núú tnáhă-yu cuendá nchaá sá vâha cada tnàhá-yu, te cadá-yu mee-ni sá ñă túú tnàhá iní Yă Ndiöxí. <sup>3</sup> Te vă cúú iní tnáhá ndì meé-yu, te nâá-yu te vă cuánâá-yu, te tee tnàhá-yu cuéchi neñùú, te vă cuánâá-yu cadá-yu nchaá sá cuèhé sá dúhá sàni iní-yu, te ío cunduu cuihna iní-yu, te vă tnàhá iní-yu nchaá sá vâha. <sup>4</sup> Te dayuhu cuâha cuendá tnáhă-yu núú cuè téé cùchiu<sup>n</sup>, te ío cunduu yîñ iní-yu cadá-yu nândí sá ñă túú vâha, te ío cada nínu-yu mèé-yu, te mee-ni ncháa sá cúú<sup>n</sup> iní-yu cadá-yu, te vă cúú<sup>n</sup> iní-yu nanducu ñihnú-yu Yá Ndiöxí. <sup>5</sup> Te quesàhá-yu sá tnàhá-yu ndécú-yu ichi Yá Ndiöxí dico vă cadă-yu nchaá nàcuáa càhá<sup>n</sup>-gá.

Te yúhú càchí tnúhu-í xii-n sá vă ñihí tnáhá-n ndìhi nchaá ñáiyu duca<sup>n</sup> quide. <sup>6</sup> Te dava ñáiyu-á<sup>n</sup> quîhí<sup>n</sup>-yu dava vehe núú xîndecu ñáiyu, te ngüíta-yu dandàhú-yu ñáiyu dîhí ñá túú xìní dana cuendá Yă Ndiöxí, te ñáiyu dîhí-á<sup>n</sup> cúú-yu ñáiyu ndècu vihi cuéchi-xi, chi ío cùdîí iní-yu quidé-yu nchaá nâni sá cuèhé sá dúhá sàni iní-yu. <sup>7</sup> Te cuèi ío dâcuahá-yu, dico ñá túú cùtnuní iní-yu nása cuáhá<sup>n</sup> tnúhu ndáá tnúhu Yá Ndiöxí. <sup>8</sup> Te ñáiyu duca<sup>n</sup> dândahú ñáhá xì cue ñáiyu dîhí-á<sup>n</sup> ñă túú càhá<sup>n</sup> váha-yu cuendá tnúhu Yá Ndiöxí, chi quidé-yu dâtná ní quide ndíi Jănés ndìhi ndíi Jămbrés chi cue ndíi-á<sup>n</sup> ñă túú ní cùu váha iní cue ndíi núú ndíi Moisés cuendá tnúhu ní càhá<sup>n</sup> ndíi. Te ñáiyu-á<sup>n</sup> cúú-yu ñáiyu sâni iní mee ñine-ni nchaá sá cuèhé sá dúhá, te cuèi càchí-yu sá sàndáá iní-yu Yá Ndiöxí dico ñá ndâá sá sàndáá iní ñáhă-yu xii-gá. <sup>9</sup> Dico vă ndácú-gă-yu dandàhú-yu vâi ñáiyu, chi nchaá ñáiyu cutnùní iní-yu sá ío ñí dîquî<sup>n</sup>-yu, te ñá túú càhá<sup>n</sup> ndáá-yu dâtná ní quide cue téé úú ñá túú ní tnàhá iní



tnúhu ní cáhá<sup>n</sup> ndíi Moisés.

*Té Păblú dásàhú-dé té Timùteú*

<sup>10</sup> Te yòhó quidé-n nchàa nacuáa ní dánèhé ñáhà-í xii-n, te ní xiní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyíú-a, te xiní-n sã ïo sàndáá iní-í Yă Ndiöxí, te ïo càhnu iní-í, te cùu iní-í nchaa ñáyiu, te xiní tucu-n sã ïo quide cahnu iní-í cuèi nándi sá yăha-í ndécù-í dico ñá túú dàña ndeé-í ichi-gá. <sup>11</sup> Te ïo vâi sá quidé ñaha ñáyiu xii-í dándòho ñahá-yu sá ndécù-í ichi Xítohó Jesucrìstú, te sa nàha tucu-n datná ní quide ñahá-yu xii-í cùtnàhá ní xindecu-í ñuú Antiòquiá, ndihí ñuú Ìconiú, ndihí ñuú Lìstrá, chi ïo ní dándóhó ñahá-yu xii-í sá cuendá-gá. Dico Xítohó Jesucrìstú ïo ní xito ñaha-gã xii-í te ní chindee ñaha-gá cuèi nándi cùu sá ñi yăha-í. <sup>12</sup> Te na càchí tnúhu ndáá-í xii-n sã ïo vâi sá ñà túú vâha cada ñaha ñáyiu xii nchaa ñáyiu cuení sá ñà túú nã cumání nùú Yă Ndiöxí cuendá sá ndécú ndihí-yu Xítohó Jesucrìstú. <sup>13</sup> Dico dava ñáyiu càchí-yu sá càhá<sup>n</sup>-yu tnúhu Yă Ndiöxí te ñã ndàá sá càhá<sup>n</sup>-yu tnúhu-gá, ñáyiu-á<sup>n</sup> uu<sup>n</sup>-gá cuita cada-gá-yu nchaa sá cuèhé sá dúhá quihí<sup>n</sup>, te duca<sup>n</sup>-ni ïo dandàhú tnáhã-yu.

<sup>14</sup> Te yòhó chi ïo váha ní sàndáá iní-n tnúhu Yă Ndiöxí sá dacuàha-n, te vitna càhá<sup>n</sup>-í dòho-n sã vã dáñã ndeé-n quindáá iní-n tnúhu-á<sup>n</sup>, te yòhó sa nàha-n ná cúú ñáyiu ní dánèhé ñahá xii-n tnúhu-gá. <sup>15</sup> Te yòhó chi ndeé cùtnàhá cúú làndú-n ñi ngüíta-n dàcuaha-n tnúhu ndeé núú tütú Yă Ndiöxí, te ñu-ni nchaa tnúhu-gá canu ichi ñaha-xi xii-n te naníhí tãhú-n, chi sàndáá iní-n Xítohó Jesucrìstú. <sup>16</sup> Te nchaa cue téé ní tee tnúhu Yă Ndiöxí, chi ñu-ni mee-gã ní dácáhu ìní ñahá-gã xii-güedé nàcuáa tee-güedé, te tnúhu-gá ïo váha dacuàha-o nchaa dava-gá ñáyiu, te càhá<sup>n</sup>-xi dòho-o sã vã cùndècu-gá-ó ìchi cuehé ichi duha, te núú ñã túú quide ndáá-ó ndècu-o te nàcanu ichi ñaha-xi, te dānehé ñahá-xi nàcuáa cada-o cùndáá-ó nùú Yă Ndiöxí. <sup>17</sup> Te ñu-ni tnúhu-gá dátũha ñaha vâha-xi xii nchoo cuè ñáyiu ndècu ndihí-gá cuendá cada-o nchàa núú sã vâha.

**4**

<sup>1</sup> Te Xítohó Jesucrìstú quixi-gá taxi tnúni-gá ñuyíú-a, te cada ndáá-gá cuèchi nchaa ñáyiu sa ní xihí, ndihí cuèchi nchaa ñáyiu xindecu vïvú. Te mee-gã ndihí Yă Ndiöxí náhá-gã sá ïo càhá<sup>n</sup>-í dòho-n vitna <sup>2</sup> sá ïo dacuàha-n ñáyiu tnúhu-gá, te vã dáñã ndeé-n dàcuahá-n-yu ndèda-ni càa oré cuèi ñã túú cuení-yu cundedòho-yu, te nchaa ñáyiu ñã túú cuení cada ndáá cúñaha ndáá-n nchàa nacuáa quidé-yu. Te cúñaha tucu-n xii-yu sá vã dúcá<sup>n</sup>-gã cadá-yu, te càhá<sup>n</sup>-n dòho-yu cuendá cada ndáá-yu cundecú-yu. Te ïo cunduu càhnu iní-n òré càhá<sup>n</sup>-n dòho-yu, te ïo dacuàhá-n-yu tnúhu-gá. <sup>3</sup> Chi sáá nduu te vã càchí-gá-yu cundedòho-yu nchaa tnúhu sá sánú ìchi ñaha cundecu váha-o nùú Yă Ndiöxí, chi mee-nã nchaa sá cúdí ìní mée-yu cundedòho-yu, te ndúcú-yu cue téé dánèhé ñahá xii-yu nchaa tnúhu cùu iní-yu-á<sup>n</sup>. <sup>4</sup> Te vã cadá cuendá tnàhí-gá-yu tnúhu ndáá tnúhu Yă Ndiöxí, chi mee-nã tnúhu sá ñà túú nàndihí cada cuendá-yu. <sup>5</sup> Dico yòhó ïo quihí iní-n cùndecu-n, te cahni iní-n cuèi nándi na ndòho-n, te dacuàha-ni-n ñáyiu tnúhu Yă Ndiöxí, ñáyiu vátá quindáá iní ñahá-gã xii-gá, te cada-ni-n nchàa chiu<sup>n</sup> ní tãhú-gã cada-n.

<sup>6</sup> Te yúhú sa ñuhu ichi-ná-í quihí<sup>n</sup>-í núú ndécú Yă Ndiöxí cundecu-í, chi sa ní cuyatni cahni ñaha-güedé xii-í cuendá sá xínú cuèchi-í núú-gã. <sup>7</sup> Te ní quide-í nchaa chiu<sup>n</sup> ní tãhú Yă Ndiöxí cada-í te vitna ní xínu cava nchaa chiu<sup>n</sup> ní tãhú-gã-á<sup>n</sup> ní quide-í, te ñã túú ní dàña ndeé-í ní sàndáá iní-í-gá, te duca<sup>n</sup>-ni sàndáá iní-í-gá ndeé vitna. <sup>8</sup> Te vitna sa ndècu túha-ná sá ndúú tãhú-í cuendá sá quidé ndáá-í núú Yă Ndiöxí, te Xítohó Jesucrìstú taxi-gá tãhú-ã<sup>n</sup> nduu tãhú-í ná sáá nduu, chi cùu-gá ñ<sup>n</sup> Yaá quidé ndáá cuiti, te ñã díú-ní yúhú taxi-gá tãhú-ã<sup>n</sup> cuu cuendá-í, chi tnàhá nchaa ñáyiu ndètu cahnu-ná sáá nduu quixi tucu-gá ñuyíú-a cuãñaha-gã tãhú-ã<sup>n</sup> nduu tãhú-yu.

*Chiu<sup>n</sup> tahu té Păblú cada té Timùteú*

<sup>9</sup> Te cuení-í sá ïo ndihí quixi-n quixi coto ñaha-n xii-í. <sup>10</sup> Chi té Dêmás ñã túú-gã quidé cuendá ñahá-dé xii-í, chi mee-nã nchaa sá ïo ñuyíú-a ïo cùdí ìní-dé. Te ní dándò



ñaha-dě cuáhá<sup>n</sup>-dé ñuú Tesalónicá, te té Crèscénté cuáhá<sup>n</sup>-dé cundecu-dé distritú Gàlaciá, te té Titú cuáhá<sup>n</sup>-dé cundecu-dé distritú Dàlmaciá. <sup>11</sup> Te ì<sup>n</sup>dìi-ná té Lùcá ndécú ndìhi ñaha-dé xii-í, te cúñaha-n xii té Măcú quixi-n ndìhi-dé, chi tée-á<sup>n</sup> ndacu-dé cada-dé ì<sup>n</sup> chi<sup>n</sup>-í. <sup>12</sup> Te té Tiquicú ní tendaha-í-dé cuáhá<sup>n</sup>-dé ñuú Éfesú. <sup>13</sup> Te òré quixi-n te yáha-n vèhe té Cărpú cáá ñuú Tròás canehe-n ì<sup>n</sup> dóó tìcachi ní dándöo-í vehe-dé quixi, ndìhi nchaa librú-í, te tnàhá nchaa dava-gá tutú-í ndécú vèhe-dé canehe-n quixi chí xíá<sup>n</sup> ío-gá xíní ñùhu-í. <sup>14</sup> Te té Lijandrú tée cùu rerú ío vài sá ñà túú văha ní cuu quide ñaha-dé xii-í, dico mee Yă Ndiöxí nánhá-gă nása cada ñaha-gă xii-dé cuëndá sá dúcá<sup>n</sup> quide-dé. <sup>15</sup> Te vá nihí tnáhá-n ndìhi-dé chí ío cáhá<sup>n</sup> cuèhé-dé cuëndá nchaa tnúhu cáhá<sup>n</sup>-ó.

<sup>16</sup> Te cútnáhá ndécá ñaha-güedé xii-í ní sáhá<sup>n</sup> núú cuè tée cùchiu<sup>n</sup> xito díhna nuu, chí mee dìi ní sáhá<sup>n</sup> te ñá túú ní sáhá<sup>n</sup> ni ì<sup>n</sup> cue tée cùndìhi-í, chí nchaa-güedé ní dándöo ñaha-güedé xii-í, te yúhú xìcá<sup>n</sup> táhù-í núú Yă Ndiöxí sá vă cáda cuëndá-gá sá dúcá<sup>n</sup> nì quide-güedé. <sup>17</sup> Dico Xítóhó Jesucrìstú ní chindee ñaha-gá xii-í, chí ní taxi-gá tnúhu ndee ìní ní cáhá<sup>n</sup>-í tnúhu-gá năcuáa tàú-xi cunduu núú cuè tée-á<sup>n</sup> ndìhi núú nchaa ñáyiu, dico ñá díú ñáyiu isràél cúú-yu, te díu-gá ní dăcăcu nihnu ñaha-gă xii-í ñá túú ní sàhni ñaha-güedé. <sup>18</sup> Te mee Xítóhó Jesucrìstú coto ñaha-gă xii-í te ñá túú nă cuu cuèi nándi sá ná cáda ñaha ñáyiu xii-í te díu-ni-gá coto ñaha-gă xii-í ndée ná sàa nduu sáá-í andíu nùú ndécú-gă táxi tnùnì-gá. Te nchaa-o chí ná cächí-ó să ìo cāhnu cuu-gá ni caa ni quíhí<sup>n</sup>. Te duca<sup>n</sup> na cunduu.

### *Tnúhu ndée núú nì ndìhi-ná*

<sup>19</sup> Te ío cúñaha-n na càda ndee ìní tá Priscá, ndìhi té Aquilú, ndìhi cue ñáyiu cùu ndi mee té Onèsíforó. <sup>20</sup> Te té Èrastú ní quendóo-dé ñuú Còrintú, te té Tröfimú ní dándöo-í-dé ñuú Miletú chí cùhú-dé. <sup>21</sup> Te ío cundìhí ìní-n quixi-n oré vátá sàá-gá yóó quidé vîxi<sup>n</sup>-xi. Te ío cada ndee ìní-n cächí té Èúbulú, ndìhi té Pudenté, ndìhi té Línú, ndìhi tá Clàudiá, ndìhi nchaa dava-gá ñáyiu sàndáá ìní tnúhu Xítóhó Jesucrìstú.

<sup>22</sup> Te xìcá<sup>n</sup> táhù-í núú Xítóhó Jesucrìstú sá ná cundecu ndìhi ñaha-gá xii-n ndìhi nchaa dava-gá-yu. Te duca<sup>n</sup> ío na chindee chítúu ñaha-gă xii-ndo nchaa-ndo. Te duca<sup>n</sup> na cunduu. Te ío chí cáda ndèe ìní-nă vitna.

## TUTÚ NÍ CADÚHA TÉ PÄBLÚ QUIHI<sup>n</sup> NDAHA TÉ TÌTÚ

*Té Păblú cadŭha-dé tutú quíhí<sup>n</sup> ndaha té Títú*

<sup>1</sup> Yúhú té Păblú xínú cuèchi-í núú Yă Ndiöxí, te diu-gá ní tendaha ñaha-gá xii-í cãhá<sup>n</sup>-í tnúhu Xítohó Jesucristú núú ñáyiú cuendá quíndáá iní nchaa ñáyiú ní cachí Yă Ndiöxí naníhí tàhú, ndihí cuendá sá tècú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. <sup>2</sup> Te yúhú dácua<sup>n</sup>há-í yu tnúhu-gá cuendá cundecu ndihí-yu tnúhu ndee iní sá cundècu ndihí-yu Yă Ndiöxí ni caa ni quíhí<sup>n</sup>, chi ndéé cútnàhá vátá ngăva-gá ñuyúú-a ní cachí-gá sá cundècu ndihí ñaha-gá xii-yu, te ñá túú dándahú ñáhá-gă, chi quide-gá #<sup>n</sup> sá cãhá<sup>n</sup>-gá. <sup>3</sup> Te ní sáá nduu ñí cachí-gá sá ñihí-yu tnúhu nãcuáa cuáhá<sup>n</sup> tnúhu-gá, te diu-ni tnúhu-á<sup>n</sup> ñí cachí Yă Ndiöxí Yaá dácăcu nihnu ñaha xii-o núú ùhú núú ndàhú sá dácua<sup>n</sup>há-í ñáyiú. <sup>4</sup> Te tutú-a cadúha-í cuendá daquixi-í ndaha yohó té Títú, té ní sanu ichi ndisa-í ichi Xítohó Jesucristú, chi #<sup>n</sup>-ni tnúhu sãndáá iní-ó. Te xicá<sup>n</sup> táhú-í núú Tãtá-ó Dútú Ndiöxí sá ío na chĩndee chitúu ñaha-gă xii-n, te diu-ni-gá ná càda te ío váha cuu iní-n cundecu-n. Te xicá<sup>n</sup> táhú tùcu-í núú Xítohó Jesucristú Yaá dácăcu nihnu ñaha xii-o núú ùhú núú ndàhú sá díú-ní dùca<sup>n</sup> na cada ñaha-gá xii-n.

*Chìu<sup>n</sup> quide té Títú distritú Crětá*

<sup>5</sup> Te yúhú ní dándõo ñaha-í xii-n distritú Crětá, chi cuíní-í cada-n nchàa chiu<sup>n</sup> cumání, te cuíní-í taxi ndecu-n cuè téé quíndaha ñaha xii cue ñáyiú sãndáá iní tnúhu Yă Ndiöxí xĩndecu #<sup>n</sup> #<sup>n</sup> ñuú yĩndèhu distritú-á<sup>n</sup>, te cada-n nãcuáa ní cachí-í cada-n. <sup>6</sup> Te cue téé cada chìu<sup>n</sup>-á<sup>n</sup> xíní ñùhu-xi cuu-güedé mee-ni cuè téé ío váha quide ndáá nãcuáa vá yõ cáhá<sup>n</sup> dóho-güedé, te na cùu-güedé cue téé ndècu #<sup>n</sup> dii-ni ñadihí-xi. Te duca<sup>n</sup> nchàa landú-güedé ná cùu-güexi landú sãndáá iní ñáhá xii

Yă Ndiöxí cuendá sá vã yõ cuatnuñaha xii-güexi quesahá-yu sá ío sáá iní-güexi te quide-güexi nãndi sá ñà túú tàú-güexi cada-güexi. <sup>7</sup> Chi xini ñuhu-xi sá ncháá cuè téé quíndaha ñaha xii ñáyiú sãndáá iní tnúhu Yă Ndiöxí ío cundecu yĩñùhu-güedé, chi duca<sup>n</sup> tàú-xi cada nchaa cue téé quide chiu<sup>n</sup> Yă Ndiöxí, te xini ñuhu tucu-xi sá vã cúú-güedé cue téé ñí iní-xi, te ni vã cúú-güedé cue téé ñihli iní-xi, te ni vã cúú-güedé cue téé quihu, te ni vã cúú-güedé cue téé plètú, te ni vã cúú-güedé cue téé dicó-ni duca<sup>n</sup> ñihí díhú<sup>n</sup>. <sup>8</sup> Te xini ñuhu-xi cuu-güedé cue téé sãñaha ñuu vehe ndetatú cue ñáyiú ñùhu ichi, cue téé quide váha sá cúú-xi tnàha ñáyiú-xi, cue téé ío váha cùtnuní iní-xi nãcuáa cada cundecu ñuyúú-a, cue téé quide ndáá xĩndecu, cue téé quide nchaa nãcuáa ndùu vétú iní Yă Ndiöxí, cue téé xito mee-xi ñá túú quide cutexínu. <sup>9</sup> Te na cùu-güedé cue téé ío váha sãndáá iní tnúhu váha tnúhu Yă Ndiöxí sá ñí dãnèhé ñáhà-í xii-ndo cuendá duca<sup>n</sup> te cue téé-á<sup>n</sup> ndacu-güedé cáhá<sup>n</sup>-güedé dóho ñáyiú cuendá cadă-yu nchaa nãcuáa cãhá<sup>n</sup> Yă Ndiöxí, te níhí-güedé tnúhu cáhá<sup>n</sup> váha-güedé núú nchàa ñáyiú dàquee tíhú tnúhu Yă Ndiöxí, te mee-ni cuè téé duca<sup>n</sup> quide váha taxi ndecu-n quíndaha-güedé ñáyiú sãndáá iní tnúhu-gá.

<sup>10</sup> Te na càchí tnúhu-í xii-n sã vái ñáyiú sáá iní-xi ío, te cãhá<sup>n</sup>-yu mee-ni tnúhu sá ñà túú nãndíhí, te dándahú-yu tnàhá ñáyiú-yu, te ñáyiú isràél ío-gá vãi-yu duca<sup>n</sup> xĩquide. <sup>11</sup> Te nchaa ñáyiú duca<sup>n</sup> xĩquide xini ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dãnèhé-yu dava-gá ñáyiú #<sup>n</sup> sá ñà túú tàú-yu dacua<sup>n</sup>há-yu, te duca<sup>n</sup> quide-yu cuendá-ni sá ñihí-yu díhú<sup>n</sup>, te ío títní xichi ní cuu dándahú-yu nchaa ñáyiú xĩndecu #<sup>n</sup>-ni vèhe.

<sup>12</sup> Te ní cachí #<sup>n</sup> téé ío váha sáá díquí-xi ndècu mei ñuú distritú Crětá sá ncháá ñáyiú ñuú-dé-á<sup>n</sup> ío ndèhndé-yu, te ío cuihna iní-yu, te ío vãi xexí-yu, te cùhndú-yu. <sup>13</sup> Te ndáá ní cáhá<sup>n</sup>-dé chi duca<sup>n</sup> quide-yu, te xĩá<sup>n</sup> ío cáhá<sup>n</sup>-n dóho-yu cuendá sá ná quíndáá váha iní-yu tnúhu Yă Ndiöxí. <sup>14</sup> Te cúñaha-n xii-yu sá vã cadá cuendá-yu nchaa tnúhu ndehnde cãhá<sup>n</sup> ñáyiú isràél, te ni vã cadá

cuendá-yu nchaa tnúhu càhá<sup>n</sup> ñáiyu ñá túú cuení quindáá iní tnúhu Yá Ndiöxí.

<sup>15</sup> Te nchaa sá ñí cadúha Yá Ndiöxí ió ñuyíú-a cùu-xi mee nine-ni sá vâha sá cúu-xí nchaa ñáiyu sa ní nduu ndoo ní nduu nine iní-xi ndècu ichi Yá Ndiöxí. Dico nchaa sá ñí cadúha-gá ñá túú cùu-xi sá vâha sá cúu-xí nchaa ñáiyu ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sá cuèhé sá dúhá ñùhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu. <sup>16</sup> Te càchí-yu sá sàndáá iní-yu Yá Ndiöxí, dico nchaa sá quidè-yu-á<sup>n</sup> càchí tnùnì-xi sá ñá ndáá. Te Yá Ndiöxí chi duu<sup>n</sup> duu<sup>n</sup> ñá túú tnàhá iní-gá nchaa nàcuáa quidè-yu, chi ío sàá iní-yu, te ñá túú quidè-yu ni ñí<sup>n</sup> sá vâha.

## 2

### *Tnúhu váha tnúhu Yá Ndiöxí*

<sup>1</sup> Te yòhó òré dánèhé-n ñáiyu, te danèhé-n-yu mee-ni nàcuáa càhá<sup>n</sup> tnúhu váha tnúhu Yá Ndiöxí. <sup>2</sup> Te nchaa cue téé cùu sacuéhé ná càda cuendá-güedé vá cáda cùtèxínu-güedé cundecu-güedé, te na cùndecu yíñuhu-güedé, te na cuâha váha-güedé cuendá nàcuáa cada-güedé cundecu-güedé, te na quindáá váha iní-güedé Yá Ndiöxí, te na cùu iní-güedé tnàha ñáiyu-güedé, te na cùnduu cahnu iní-güedé cuèi nándi sá ná yâha-güedé. <sup>3</sup> Te vitna càhá<sup>n</sup> tucu-í sá cúu-xí nchaa ñáiyu dìhí ñáiyu cùu sacuéhé sá ná cùndecu yíñuhú-yu, te vá cúu-yu ñáiyu yiti yùhu-xi, te ni vâ cúu-yu ñáiyu quihu, te na dànèhé-yu nchaa dava-gá ñáiyu cada váha-yu. <sup>4</sup> Te na dàsahú-yu nchaa ñáiyu dìhí ñáiyu cuechi cuendá ná cùu iní-yu yíi-yu, ndihí cue landú-yu, <sup>5</sup> ndihí cuendá sá ná càni váha iní-yu nàcuáa cundecú-yu, ndihí cuendá sá vâ càní iní-yu cadá-yu ni ñí<sup>n</sup> sá cuèhé sá dúhá, ndihí cuendá sá ná càda-yu nchaa chiù<sup>n</sup> ñuhu vehé-yu, ndihí cuendá sá cáda váha-yu nchaa tnàha ñáiyú-yu, ndihí cuendá sá ná cáda-yu nchaa nàcuáa càhá<sup>n</sup> yíi-yu, te duca<sup>n</sup> xini ñuhu-xi cadá-yu cuendá sá vâ yòo càhá<sup>n</sup> cuèhé cuendá tnúhu Yá Ndiöxí. Duha cúñaha-n xii cue ñáiyu dìhí

ñáiyu cùu sacuéhé cuendá duca<sup>n</sup> dàsahú-yu nchaa ñáiyu dìhí ñáiyu cuechi.

<sup>6</sup> Te yòhó càhá<sup>n</sup>-n dõho nchaa cue téé cuechi cuendá sá ná càni váha iní-güedé nàcuáa cundecu-güedé, <sup>7</sup> te cada-n mèe-ni sá vâha cuendá duca<sup>n</sup> càchicú<sup>n</sup> nihnu-güedé cada-güedé, te òré danèhé-n-güedé te ío váha cuu iní-n dànèhé-n-güedé, te ndihí tnúhu yíñuhu càhá<sup>n</sup> ndihí-n-güedé. <sup>8</sup> Te càhá<sup>n</sup>-n mèe-ni tnúhu váha, te duca<sup>n</sup> te vá yòo ñí<sup>n</sup> càhá<sup>n</sup> cuèhé cuendá tnúhu càhá<sup>n</sup>-n, te nchaa ñáiyu cùu úhú iní ñáhá xii-o cucaha<sup>n</sup> núu-yu, te vá nihí-yu tnúhu càhá<sup>n</sup> cuèhé-yu cuendá-ó.

<sup>9</sup> Te ío càhá<sup>n</sup>-n dõho nchaa cue téé xinu cuechi sá ná quindáá iní-güedé cada-güedé nchaa chiù<sup>n</sup> tahu patróo<sup>n</sup>-güedé nàcuáa cudíu-güedé núu cuè téé-á<sup>n</sup>, te vá càhá<sup>n</sup> sàá iní-güedé. <sup>10</sup> Te vá càní iní-güedé duhu-güedé, te cada ndáá-güedé cuendá sá ñá túú ñá caní iní ñáhá cuè patróo<sup>n</sup>-güedé, te duca<sup>n</sup> te cutnùnì iní ñáiyu sá tnúhu Yá Ndiöxí ío váha dànèhé ñáhá-xí nàcuáa cada-o cùndecu-o, te diu-gá cúu-gã Yaá dácãcu nihnu ñaha xii-o núu úhú núu ndàhú.

<sup>11</sup> Te nchoo ñí cutnùnì iní-ó sã Yá Ndiöxí ío cùndahú iní-gá nchaa nchoo ñáiyu ndècu ñuyíú-a, te ní taxi-gá tnúhu ndee iní sá nánihí tàhú nchaandi túhú ñáiyu te núu na quindáá iní ñáhã-yu xii-gá. <sup>12</sup> Te ní càchí-gá sá dáñá-ó nchaa ichi cuehé ichi duha chi ñá tnàhá iní-gá cundecu-o ìchi-á<sup>n</sup>, te vá ío cuhu<sup>n</sup> iní-ó nchaa sá ío ñuyíú-a, te ní càchí tucu-gá sá ío caní iní-ó nàcuáa cundecu-o vitna ndecu-o ñuyíú-a te cada ndáá-ó cùndecu-o cuendá nduu vétú iní-gá. <sup>13</sup> Te cundetú-o sàá nduu càhnu vihi, nduu quixi tucu Xitohó Jesucristú Yaá cúu Ndiöxí-ó, te diu-gá ní dácãcu nihnu ñaha-gã xii-o núu úhú núu ndàhú. Te nduu-ã<sup>n</sup> ío cudíi iní-ó. <sup>14</sup> Te mee-gã ní xihí-gá chi duca<sup>n</sup> ñí cuení-gá cunduu, te duca<sup>n</sup> ñí quide-gá cuendá nchoo vâ cùndecu-gá-ó ichi cuehé ichi duha, te nduu ndoo nduu nine iní-ó, te duca<sup>n</sup> te cuu-o cuè ñáiyu quindaha-gã, te ni yùhu ni iní-ó càda-o mee-ni sá vâha.

<sup>15</sup> Te nchaa tnúhu-á<sup>n</sup> danèhé-n-yu te cúñaha-n xii-yu nàcuáa cadá-yu, te càhá<sup>n</sup>-n dõho-yu te núu ñá túú quide ndáá-yu. Te cada-n sã cúu-n ñí<sup>n</sup> téé xinu cuechi núu Yá

Ndiöxí, te vá dáñá-n mèe-n daquee tihú ñáhá ñáyiú xii-n.

### 3

*Nchaa sá tàú ñáyiú ndècu ichi Yá Ndiöxí cadá-yu*

<sup>1</sup> Te cúñaha-n xii-yu sá ná quíndáá iní-yu cadá-yu nchaa nàcuáa càhá<sup>n</sup> nchaa cue tée cùchiu<sup>n</sup>, te tàú-yu chindee ñáhá-yu xii-güedé nchaa chiú<sup>n</sup> váha quíde-güedé.

<sup>2</sup> Te vá càhá<sup>n</sup> cuèhé-yu cuendá ñáyiú, te vá cùndùu pletú-yu, te na cùú-yu ñáyiú ndàhú iní-xi, te na cùndahú iní-yu nchaa tnàha ñáyiú-yu.

<sup>3</sup> Te tnàhá-ó nǐ xóo cada-o dàtná quidé ñáyiú-á<sup>n</sup> vitna, chi ío nǐ ñáyiú-ó chi ñá təcú tnùní-ó nàcuáa càhá<sup>n</sup> tnúhu Yá Ndiöxí ní cùu, te ío ní xínduu sáá iní-ó nǐú-gá, te ní xíndecu-o ñ<sup>n</sup> ichi sá ñà túú tàú-ó cùndecu-o ni cuu, te nándi sá cuèhé sá dúhá ío ñuyíú-a ní xóo cudíí iní-ó nǐ xóo cada-o chi ní xóo taxi tnùní ñáhá-xi xii-o, te ní xóo cada cuèhé ní xóo cada duha-o ni cùu, te ní xíndecu-o ñchi cuedú iní, te cuendá nchaa sá nǐ xóo cada-o-á<sup>n</sup> xíá<sup>n</sup> ío ní xóo cuu úhú iní ñáhá ñáyiú xii-o, te duca<sup>n</sup>-ni nchòo tucu ní xóo cuu úhú iní-ó-yu. <sup>4</sup> Te Yá Ndiöxí Yaá ní dácăcu nihnu ñaha xii-o núú ùhú núú ndàhú ní dándíxi túu-gá iní-ó nàcuáa cutnùní iní-ó sǎ ío váha iní-gá, te cùu iní ñáhá-gǎ xii nchaa nchoo ñáyiú ndècu ñuyíú-a. <sup>5</sup> Te Yá Ndiöxí ní dácăcu nihnu ñaha-gǎ xii-o núú ùhú núú ndàhú, dico ñá díú cuendá ñ<sup>n</sup> sá váha quíde-o ndecu-o ñuyíú-a duca<sup>n</sup> nǐ quíde-gá, chi mee-gǎ duca<sup>n</sup> tnàhí ní cundàhú iní ñáhá-gǎ xii-o. Te ní nduu ndoo ní nduu nine iní-ó, te ní cuu-o dàtná ñ<sup>n</sup> ñáyiú saa, chi Espíritú Yá Ndiöxí duca<sup>n</sup> nǐ quíde ñaha-xi xii-o. <sup>6</sup> Te Espíritú-gá ní taxi-gá nǐ yùhu nǐ iní-gá ndécú ndíhi-o, te duca<sup>n</sup> nǐ quíde-gá chi ní sándáá iní-ó Xitohó Jesucristú Yaá ní dácăcu nihnu ñaha xii-o núú ùhú núú ndàhú. <sup>7</sup> Te ío cùndahú iní ñáhá-gǎ xii-o nǐu sa ní quíde ndáá-gá cuéchi-o te ní cuu-o dèhe-gá, núu xíá<sup>n</sup> vitna ndètu-ná-ó sáá nduu ndùu táhú-ó cùndecu-o ndíhi-gá nǐ caa nǐ quíhí<sup>n</sup>.

<sup>8</sup> Te tnúhu ní cáhá<sup>n</sup>-í-a cùu-xi tnúhu ndáá cuítì, te cuíní-í sá nǐ yuhu nǐ iní-n càhá<sup>n</sup>-n tnúhu-gá núú-yu cuendá sá ncháá

ñáyiú sándáá iní ñáhá xii Yá Ndiöxí nducu ndée-yu cadá-yu mee-ni sǎ váha, te tnúhu-á<sup>n</sup> cúú-xi mèe-ni tnúhu váha, te ío váha sá cúú-xi-yu. <sup>9</sup> Te vá cadá cuendá-n ncháa tnúhu sá ñà túú nándíhi xítnàha ñáyiú, te vá cadá cuendá-n ñáyiú nándi càhá<sup>n</sup> cuendá nchaa sá nǐ xóo cada cue ñáyiú ní xíndecu ndée sanaha, te vá cadá cuendá-n ncháa tnúhu xítnàha ñáyiú xícuèhé tnàhá cuendá tnúhu ní chídó tnùní ndíi Moisés, chi nchaa tnúhu xítnàhá-yu-á<sup>n</sup> ñà túú tnàhí nándíhi-xi, te dàcuíta ñaha-xi xii-o.

<sup>10</sup> Te núu ío ñáyiú ní ngüíta-yu nándi tnúhu càhá<sup>n</sup>-yu cuendá sá vǎ cúú ñ<sup>n</sup>nuu cue ñáyiú ndècu ichi Yá Ndiöxí ñá, te ñáyiú-á<sup>n</sup> càhá<sup>n</sup> sàhú-n dǎho-yu ñ<sup>n</sup> úú xito, te núu vá tnǐ-yu tnúhu càhá<sup>n</sup>-n ñá, te vá nǐhí tnàhá-gǎ-n ndíhi-yu. <sup>11</sup> Te duca<sup>n</sup> càda-n, chi ñáyiú-á<sup>n</sup> duu<sup>n</sup> duu<sup>n</sup> ñá túú-gǎ cuíní-yu cadá-yu sá váha, chi mee-nǎ sá cuèhé sá dúhá tnàhá iní-yu cadá-yu, te cùtnuní iní mèe-yu sá ñà túú quíde ndáá-yu, te sáá nduu te nacháhu-yu nchaa sá quídè-yu.

*Nàcuáa cada té Titú*

<sup>12</sup> Te cuíní-í tendaha-í té Artemás quixi-dé núú ndécú-n àdi té Tiquicú, te òré ná quèxio ndéda-ni càa ñ<sup>n</sup> cue téa-a núú ndécú-n, te ío nducu ndèe-n quíhí<sup>n</sup>-n ñúú Nicópolis núú quíhí<sup>n</sup>-í cundecu-í, chi yàcá<sup>n</sup> cuíní-í quíhí<sup>n</sup>-í cundecu-í yóo quídè vǐxi<sup>n</sup>-xi. <sup>13</sup> Te ío cuáñaha-n ncháa sá xíní ñùhu té Zénás téé ío váha xíní nchaa nàcuáa càhá<sup>n</sup> lèi, ndíhi té Àpolós cuendá sá ñà túú nǎ cumání xii-güedé ichi. <sup>14</sup> Te cuíní-í sá ncháá ñáyiú ndècu ndíhi-o ichi Yá Ndiöxí cada váha-yu, te cuáñàhá-yu ñ<sup>n</sup> sá xíní ñùhu ñáyiú, te ío váha chiú<sup>n</sup> cadá-yu te núu duca<sup>n</sup> na cadá-yu.

*Tnúhu ndée núú nǐ ndíhi-ná*

<sup>15</sup> Te vitna ío cada ndee iní-n càchí nchaa ñáyiú ndècu ndíhi-í iha, te cúñaha-n sǎ ío na càda ndee iní nchaa ñáyiú cùu iní ñáhá xii-o, ñáyiú sándáá iní ñáhá xii Yá Ndiöxí. Te Yá Ndiöxí ío na chindee chítúu ñaha-gǎ xii-ndo ncháa-ndo. Te duca<sup>n</sup> na cùnduu. Te ío chí cadá ndèe iní-nǎ vitna.



## TUTÚ NÍ CADÚHA TĚ PĀBLŮ QUIHĪ<sup>n</sup> NDAHA TĚ FILEMÓN

*Té Pāblú cādūha-dé tutú quihĪ<sup>n</sup> ndaha té  
Filèmon*

<sup>1</sup> Te yúhú té Pāblú tée yĭhi vecaá sá cuendá Xítohó Jesucrístú cādūha-í ĩ<sup>n</sup> tutú ndihĪ té Timùteú cuendá daquixi-í ndaha yòhó té Filèmon, te ío cùu iní ñáhà-í xii-n chi tnàhá-n quide-n chiu<sup>n</sup> Yá Ndiöxí. Te tutú-a tēndaha-í quixi ndaha-n <sup>2</sup> ndihĪ ndaha ñaha nàni Apiá ñaha ndècu ndihĪ-o ichi Xítohó Jesucrístú, ndihĪ ndaha té Àrquipú, chi tnàhá-dé quidé-dě chiu<sup>n</sup> Yá Ndiöxí, ndihĪ ndaha nchaa ñáyiú tàcá vehe-n dàcuahá-yu tnúhu-gá. <sup>3</sup> Te xicá<sup>n</sup> táhù-í núú Tātá-ó Dütú Ndiöxí ndihĪ núú Xítohó Jesucrístú sá ío na chīndee chitúu ñaha-gă xii-ndo, te duca<sup>n</sup> ndi nduú-gá ná cādá te ío váha cuu iní-ndó cūndecu-ndo.

*Té Filèmon ío sàndáá iní-dé Xítohó Jesu-  
crístú te cùu iní-dé tnàha ñáyiú-dé*

<sup>4</sup> Te ndi tnàhá òré càhá<sup>n</sup> ndihĪ-í Yá Ndiöxí cuendá-n ndàcá<sup>n</sup> táhù-í núú-gă. <sup>5</sup> Chi nihĪ-í tnúhu sá ío sàndáá iní-n Xítohó Jesucrístú, te cùu iní-n cuè ñáyiú ndècu ichi-gá. <sup>6</sup> Te xicá<sup>n</sup> táhù-í núú Yá Ndiöxí sá dàtná-ni sàndáá iní-n-gă duca<sup>n</sup>-ni dānehé-n ñáyiú cuendá duca<sup>n</sup> ngūnu ichi-yu tnàhá-yu, te cutnūnĪ iní-yu nācuáa ndūu nchaa sá vāha tàxi Xítohó Jesucrístú xii-o, te tnàhá-yu nduu táhū-yu nchaa sá vāha-án. <sup>7</sup> Te yòhó té Filèmon cúu-n tēe ndècu ndihĪ-í ichi Xítohó Jesucrístú càchĪ tnúhu-í xii-n sã ío cùdĪ iní-í cuendá sá ío váha quide-n ndecu-n, chi cùu iní-n nchaa ñáyiú ndècu ichi Yá Ndiöxí, te uu<sup>n</sup>-gá nihĪ ndèe-í sá dúcá<sup>n</sup> quide-n, te dĪu-n ío sáhă-n-yu tnúhu ndee iní ndécú ndihĪ-yu.

*Té Pāblú chíndèe tnúhu-dé té Ònésimú*

<sup>8</sup> Te yúhú té Pāblú ní taxi Xítohó Jesu- crístú tnúhu ndee iní ndécú ndihĪ-í sá táxi tnūnĪ ñáhà-í xii-n te tahu-ĭ chiu<sup>n</sup> cada-n, dico vá táxi tnūnĪ ñáhà-í xii-n, <sup>9</sup> chi váha-gá sá càhá<sup>n</sup> ndàhú-í núú-n sã cādá-n nchaa nacuáa càhá<sup>n</sup>-í chi ío cùu iní ñáhà-í xii-n.

Chi yúhú sa ta yĭ-í cuáhá<sup>n</sup>, te yĭhi-í vecaá cuendá sá càhá<sup>n</sup>-í tnúhu Xítohó Jesucrístú. <sup>10</sup> Te càhá<sup>n</sup> ndàhú-í núú-n sã ñà túú nã cani iní-n cuendá té Ònésimú, chi ní cuu-dé vitna dàtná ĩ<sup>n</sup> déhe-í, chi ní sàndáá iní-dé tnúhu Yá Ndiöxí ní xáha<sup>n</sup>-ĭ xii-dé vitna yĭhi-í vecaá.

<sup>11</sup> Te nàha-n sá cūtnàhá ní xīndecu ndihĪ-n-dě ñà túú ní quide ndáá-dé, dico vitna ío váha quide-dé ndécú ndihĪ-í-dé, te dĪu-ni duca<sup>n</sup> càda-dé òré cundecu ndihĪ tucu-n-dé. <sup>12</sup> Te vitna tendaha-í-dé ndixi-dé cundecu tucu-n ndihĪ-dé, te òré quehe<sup>n</sup> cuendá-n-dě, te cada iní-n sã yŭhú ní quehe<sup>n</sup> cuendá-n. <sup>13</sup> Te vitna yĭhi-í vecaá sá cuendá tnúhu Xítohó Jesucrístú, te cuinĪ-í ngani-í-dé cunu cuechi-dě núú-í cuendá cada-dé núú-n ní cùu. <sup>14</sup> Dico ñà túú ní ngāni-í-dé, chi vātá ndātnūhu ndihĪ ñaha-gă-í xii-n nūu nāsa cachĪ-n cūnduu. Te ñà cūndèe iní-í cada yica-ĭ cada-n ĩ<sup>n</sup> sá vāha sá cúu-xì-í, chi cuinĪ-í sá mēe-n cāni iní-n nūu cuu àdĪ sá vã cúu. <sup>15</sup> Te ní cunduu nĭ quee té Ònésimú vehe-n, te cudana te mee Yá Ndiöxí duca<sup>n</sup> nĭ cachĪ-gá cunduu cuendá dacuàha-dé cada váha-dé. Te ndixi tucu-dé cundecu ndihĪ duca<sup>n</sup>-nã-n-dé. <sup>16</sup> Te vá cúu-gă-dé dàtná ĩ<sup>n</sup> tēe xīnu cuechi chi ní cuu-dé dàtná ĩ<sup>n</sup> ñāni-ó chi ní sàndáá iní-dé Yá Ndiöxí, te yúhú ío cùu iní-í-dé, dico yòhó uu<sup>n</sup>-gá cuu iní-n-dě, chi cùu-dé ĩ<sup>n</sup> tnàha ñáyiú-o, te ndècu-dé ichi Yá Ndiöxí.

<sup>17</sup> Te ĩ<sup>n</sup>-ni cùu-o ndecu-o ichi Yá Ndiöxí nūu xiã<sup>n</sup> càhá<sup>n</sup> ndàhú-í núú-n sã quéhé<sup>n</sup> cuendá-n-dě dàtná quéhé<sup>n</sup> cuendá-n yŭhú òré quéxi-í vehe-n. <sup>18</sup> Te núu ío ĩ<sup>n</sup> sá nĭ cumāni-dě núú-n ñà túú ní quide ndáá-dé cūtnàhá ní xīndecu-n ndihĪ-dé, àdĪ ío ĩ<sup>n</sup> sá tàú-dé te vá ndàcá<sup>n</sup> cuendá-n nūú-dě, chi yúhú ndacá<sup>n</sup> cuendá-n nūú-í. <sup>19</sup> Te ndaha mee yŭhú té Pāblú cādūha-í tutú-a càchĪ tnúhu-í xii-n sã ná chăhu-í nchaa sá nĭ quide-dé. Dico dandācu saú iní-n sã yŭhú ní sanu ichi ñaha-ĭ xii-n ĭchi Xítohó Jesu- crístú. <sup>20</sup> Dico yòhó tēe ndècu ndihĪ-í ichi Xítohó Jesucrístú cada ndee iní-n càda-n tnúhu ndàhú càhá<sup>n</sup>-í núú-n chi ndècu-o ichi-gá. Te duca<sup>n</sup> càda-n nacuáa cuu-xi dàtná ĩ<sup>n</sup> tnúhu ndee iní sá cúu-xì-í, chi ndi nduú-ó ndècu-o ichi-gá.

<sup>21</sup> Te cūtnūnĪ iní-í sá cādá-n nchaa nacuáa càhá<sup>n</sup>-í, te cūtnūnĪ tucu iní-í sá ío-gá vāi

sá vǎha cada-n dàcúúxí tnǎhu ndàhú cǎhá<sup>n</sup>-í núú-n, núu xǎ<sup>n</sup>tèndaha-í tutú-a véxi ndaha-n. <sup>22</sup> Te vitna cuìní-í cada túha-n ì<sup>n</sup> vehe cundecu-í, chi sàni iní-í sá quíxí còto ñaha-í xii-ndo, te ndètu-í sáá nduu-ǎ<sup>n</sup> chi nchòhó xìcá<sup>n</sup> táhú-ndó núú Yǎ Ndiǒxí cuèndá-í.

*Tnúhu ndéé núú nǎ ndihí-ná*

<sup>23</sup> Te ío cada ndee ìní-n cǎchí té Ępafrás té yǎhi ndihí-í vecaá sá cuèndá tnúhu Xítóhó Jesucristú. <sup>24</sup> Te ío cada ndee ìní tucu-n cǎchí té Mǎcú, ndihí té Arístarcú, ndihí té Dēmás, ndihí té Lùcá, chi tnàhá cue té-ǎ<sup>n</sup> quède-güedé chiú<sup>n</sup> Xítóhó Jesucristú.

<sup>25</sup> Te Xítóhó Jesucristú ío na chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cǎdá ndèe iní-nǎ vitna.

## TUTÚ QUIHI<sup>n</sup> NDAHA CUE ÑÁYIU HÈBREÚ

*Dútú Ndiõxí ní cachí-gá sá Dèhe-gá cada núú-gă*

<sup>1</sup> Te ndéé sanaha, Yá Ndiõxí ní xáha<sup>n</sup>-gă xii cue téé ní cachí iní méé-gă cada núú-gă cáhá<sup>n</sup>-güedé tnúhu-gá núú nchàa ñani tnáhá-ó nǐ xíndecu ndéé dāvá-á<sup>n</sup> te ðiu duca<sup>n</sup> nǐ quide-güedé. Te tǐtnǐ xito duca<sup>n</sup> nǐ xáha<sup>n</sup>-gă xii-güedé ní cáhá<sup>n</sup>-güedé tnúhu-gá. Te ndǐ dǐí<sup>n</sup> ndǐ dǐí<sup>n</sup> nǐ xítñúhu ñaha-gă xii-güedé nàcuáa cáhá<sup>n</sup>-güedé tnúhu-gá núú-yu. <sup>2</sup> Te sátá nǐ cuu vâi nduu ta yâha cuáhá<sup>n</sup>, te ní sáá nduu nǐ cachí Yă Ndiõxí sá Dèhe-gá cada núú-gă cáhá<sup>n</sup> tnúhu-gá núú-ó. Te ðiu-ni mee-gă ní táúchíú<sup>n</sup> nǐ cadúha Dèhe-gá ñuyíú ndǐhi nchaa sá íó, te ní cachí-gá sá ncháá cùu-xi cuendá Dèhe-gá. <sup>3</sup> Te Dèhe Yá Ndiõxí ío càhnu cuu-gá dàtná càhnu cuu mee-gá, te dàtná-ni sàni iní méé-gă ðiu-ni duca<sup>n</sup> sàni iní Dèhe-gá chi tnáhá-gá cúú-gă Ndiõxí, te sá cuendá tnúhu càhá<sup>n</sup> Dèhe-gá xiǎ<sup>n</sup> ndécú-ni nchàa sá íó ñuyíú, te duca<sup>n</sup> chi ío càhnu cuu Dèhe-gá, te ðiu-ni Dèhe-gá ní quide nàcuáa vá cùndècu-gá cuèchi-o. Te sátá dúcá<sup>n</sup> te ní ngóo-gá xio cùha Tátá-gă Dútú Ndiõxí Yáá ío cùnūu ndecu andiu.

*Dèhe Dútú Ndiõxí ío-gá cùnūu-gá dàcúúxi cuè espíritú xínú cuèchi núú-gă*

<sup>4</sup> Te Dèhe Yá Ndiõxí ío-gá cùnūu-gá dàcúúxi cuè espíritú xínú cuèchi núú-gă, te duca<sup>n</sup> chi ní nduu táhú-gă núú Tátá-gă Dútú Ndiõxí sá ío-gá cùnūu-gă dàcúúxi cuè espíritú-á<sup>n</sup>. <sup>5</sup> Chi Yá Ndiõxí ñá túú ní xâha<sup>n</sup>-gă xii ni ñ<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Dèhe-gá, te duha ní xáha<sup>n</sup>-gă:  
Yòhó cúú-n Dèhe mee-í,  
te duca<sup>n</sup>-ni cùndecu-n núú ndécú-í.  
Duha ní xáha<sup>n</sup>-gă. Te ní cachí tucu Yá Ndiõxí:  
Yúhú cúú-í Tátá Yáá-á<sup>n</sup>,  
te mee-gă cúú-gă Dèhe-í.

Duha ní cachí-gá. <sup>6</sup> Te cútnáhá ní ten-daha-gă Dèhe-gá Yáá ío cùnūu ní quixi-gă ñuyíú-a, te ní cachí-gá:

Tàú-xi sá ncháá cuè espíritú xínú cuèchi núú-í chiñuhu-xi Dèhe-í.

Duha ní cachí-gá. <sup>7</sup> Te Yá Ndiõxí ní cáhá<sup>n</sup>-gá cuendá cue espíritú xínú cuèchi núú-gă, te ní cachí-gá:

Yúhú quidè-í sá ncháá cuè espíritú xínú cuèchi núú-í cúú-xí dàtná táchí,  
te ðiu-ni cue espíritú-á<sup>n</sup> quidè-í sá cúú-xí dàtná itá ñuhú.

Duha càchí-gá. <sup>8</sup> Dico Dèhe-gá chi ñá túú dùca<sup>n</sup> ni xáha<sup>n</sup>-gă, chi duha ní xáha<sup>n</sup>-gă:

Yòhó tnáhá-n cùu-n Ndiõxí dàtná cúú yúhú Yáá cúú Tátá-n,

te duca<sup>n</sup>-ni tàxi tnuní-n nǐ caa ni quíhí<sup>n</sup>,  
te ío váha ndáá quidé-n tàxi tnuní-n.

<sup>9</sup> Te dàquee tihú-n nchàa sá cuèhé sá dúhá,  
te cùu iní-n nchàa sá vâha,  
núu xiǎ<sup>n</sup> yúhú Yáá cúú Tátá-n nǐ quide-í sá ío-gá vii ío-gá váha cuu iní-n,  
dàcúúxi nchàa dava-gă ñáyiu ndècu ndǐhi-n.

Duha ní xáha<sup>n</sup>-gă xii Dèhe-gá. <sup>10</sup> Te ní xáha<sup>n</sup> tucu Yá Ndiõxí xii Dèhe-gá:

Yòhó cúú-n Yáá ío cùnūu, chi ndéé cútnáhá ñá túú vèdana ná íó te ní cadúha-n ñuyíú ndǐhi andiu.

<sup>11</sup> Te andiu ndǐhi ñuyíú chi naa-xi, dico yòhó chi cundecu-ni-n nǐ caa ni quíhí<sup>n</sup>.

Te andiu ndǐhi ñuyíú chi ndǐhi-xi dàtná ndǐhí ñ<sup>n</sup> dóó,

<sup>12</sup> te dàtná cùni-n quide ñáyiu ndǐhi ñ<sup>n</sup> dóó òré ndàcá<sup>n</sup> tnáhnú-yu tàxi ndécú-yu ñ<sup>n</sup> xio, duca<sup>n</sup> càda-n ñuyíú ndǐhi andiu,

te dàtná nádâma dóó ñáyiu duca<sup>n</sup> càda tucu-n ñuyíú ndǐhi andiu.

Te yòhó dàtná-ni càa-n ndecu-n vitna duca<sup>n</sup>-ni cùnduu-ñ cundecu-n ni caa ni quíhí<sup>n</sup>, chi vá yǐi tnáhí-n.

Duha ní xáha<sup>n</sup> Yă Ndiõxí xii Dèhe-gá. <sup>13</sup> Te Yá Ndiõxí ñá túú ní xâha<sup>n</sup>-gă xii ni ñ<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Dèhe-gá, te duha ní xáha<sup>n</sup> tucu-gă:

Ngóo xio cùha-í taxi tnuní-n,

te yúhú cada-í te nchaa sá cúú úhú iní ñáhá xii-n canehe-xi sá yíñuhu núú-n.

Duha ní xáha<sup>n</sup>-gã xii Déhe-gá. <sup>14</sup> Te nchaa espíritú xínú cuèchi núú Yă Ndiöxí mee-ni chiu<sup>n</sup>-gá quidé-xí, chi tëndaha-gá cue espíritú-á<sup>n</sup> cuáhá<sup>n</sup>-xi nchaa núú ndécú cuè ñáyiú ní nduu táhú cundecu ndihí-gá chindee ñàha-xi xií-yu.

## 2

*Vá dáñá ndèé-ó tnũhu sá càhá<sup>n</sup> nàcuáa naníhí tãhú-ó*

<sup>1</sup> Te sá cuendá sá ïo cùnuu Xítóhó Jesucristú, núu xiá<sup>n</sup> ío xini ñuhu-xi cada cuendá-ó nchaa tnũhu càhá<sup>n</sup>-gá sá sà ní xíndedóho-o cuendá sá vã dáñá ñihnu-o. <sup>2</sup> Te cue espíritú xínú cuèchi núú Yă Ndiöxí ní cáhá<sup>n</sup>-xi tnũhu-gá ndéé sanaha, te tnũhu ní cáhá<sup>n</sup> cue espíritú-á<sup>n</sup> cúú-xí sã ndáa cuiti. Te nchaa ñáyiú ñá túú ní cuini tñi nchaa tnũhu ní cáhá<sup>n</sup> cue espíritú-á<sup>n</sup>, te ni ñã túú ní cuini-yu cundedóho-yu, nchaa ñáyiú-á<sup>n</sup> ñi nacháhu-yu nàcuáa nduu nchaa cuèchi ní quidé-yu ñi ñi-yu. <sup>3</sup> Te sá dúcá<sup>n</sup> ñi yáha cue ñáyiú-á<sup>n</sup>, xiá<sup>n</sup> cútnùní ndáa iní-ó sã vã cãcu ñihnu-o te núu na dàña ñihnu-o tnũhu sá càhá<sup>n</sup> nàcuáa naníhí tãhú-ó, tnũhu sá ïo cùnuu, chi nacháhu-o te núu duca<sup>n</sup> na càda-o. Te díhna-gá Xítóhó Jesucristú ní cáhá<sup>n</sup>-gá tnũhu-á<sup>n</sup> te nchaa ñáyiú ní xíndedóho nchaa nàcuáa nduu tnũhu-á<sup>n</sup> ñi cáhá<sup>n</sup> ndáa-yu tnũhu-á<sup>n</sup> núú-ó. <sup>4</sup> Te tnàhá Yă Ndiöxí cundihí-gá nchaa ñáyiú-á<sup>n</sup> quidé-gã nàcuáa cutnùní iní-ó sã tnũhu-á<sup>n</sup> cúú-xí tnũhu ndáa, chi quide-gá titní núú sã vã yõ tnàhí ndàcu cada te ío cunũhu-o. Te Espíritú Yă Ndiöxí quidé-xí nàcuáa nduu táhú-ó ndi díí<sup>n</sup> núú chiu<sup>n</sup> cada-o nàcuáa cuini méé-gã. Te sá dúcá<sup>n</sup> quide Yá Ndiöxí nchaa xiá<sup>n</sup>, xiá<sup>n</sup> cútnùní iní-ó sã tnàhá-gá càhá<sup>n</sup>-gá sá tnũhu-á<sup>n</sup> cúú-xí tnũhu ndáa.

*Xítóhó Jesucristú ní xínduu yiqui cunũ-gá dàtná cáa yiqui cuñú nchoo cuè ñáyiú ñuyúú-a*

<sup>5</sup> Te Yá Ndiöxí vã táxi ndècu-gá cue espíritú xínú cuèchi núú-gã taxi tnùní-xi ñuyúú sáa sã vátá quini-gá-ó, te ñi cuendá xiá<sup>n</sup> càhá<sup>n</sup>-í. <sup>6</sup> Te núú tütú Yă Ndiöxí cãchí-xi: Yòhó Dútú Ndiöxí ñá túú ñã cúú cuè ñáyiú ñuyúú ñu ndacu iní-n-yu, àdi chin-deé-n-yu.

<sup>7</sup> Te yòhó ní cachí-n sã nchaa ñáyiú ñuyúú-a vã cùnùú-yu dàtná cùnùu cue espíritú xínú cuèchi núú-n, dico ní cachí-n sã sàa nduu te ío cùnùú-yu tnàhá-yu, te mee-n cãhá<sup>n</sup>-n sã ïo càhnu cuú-yu,

te ní cachí tucu-n sã táxi tnùní-yu nchaa sã ñi cadúha-n.

<sup>8</sup> Te duca<sup>n</sup> nchãandi túhú sá ío quindàhá-yu. Duha cãchí-xi núú tütú-gá. Te sá dúcá<sup>n</sup> ñi cachí Yă Ndiöxí sá quindàha ñáyiú ñuyúú nchaa sá ío, xiá<sup>n</sup> cútnùní sá nchãandi túhú sá ío taxi tnùní-yu, dico vátá sàa-gá nduu dùca<sup>n</sup> quini-ó càda-xi. <sup>9</sup> Te nchoo sa ñaha-o sá tnàá-ni ñi quide Yá Ndiöxí cuendá sá vã cùnùu Xítóhó Jesucristú dàtná cùnùu cue espíritú xínú cuèchi núú-gã. Te duca<sup>n</sup> ñi quide Yá Ndiöxí chi ní cundàhú iní-gá nchaa ñáyiú ñuyúú-a, chi ní cachí-gá sá Déhe-gá cuú cuendá nchaa-yu, te Xítóhó Jesucristú ío ní ndoho-gá òré ní xihí-gá, núu xiá<sup>n</sup> ní nduu táhú-gã cùnùu vihi-gá vitna. Te mee Yă Ndiöxí cãchí-gá sá ïo càhnu cuu Déhe-gá.

<sup>10</sup> Te Yá Ndiöxí ní cadúha-gá nchãandi túhú sá ío nàcuáa ní cachí iní méé-gã, te sá dúcá<sup>n</sup> ñi quide-gá ñu xiá<sup>n</sup> váha-ni sã ñi cachí-gá sá Xítóhó Jesucristú nãndi ndoho-gá te cuú-gá cuendá duca<sup>n</sup> ñã túú tnàhí-gá ná cùmání-gã núú Yă Ndiöxí. Te sá dúcá<sup>n</sup> ñi cuu núu xiá<sup>n</sup> ní níhí Yă Ndiöxí nàcuáa cada-gá càndeca-gá nchaa ñáyiú cùu déhe-gá quihí<sup>n</sup> núú ïo váha càa cundecú-yu ndihí-gá ni caa ni quihí<sup>n</sup>. Te Xítóhó Jesucristú cúú-gã Yaá ní quide nàcuáa nduu táhú cue ñáyiú cundecú-yu ndihí Yá Ndiöxí.

<sup>11</sup> Te Xítóhó Jesucristú cúú-gã Yaá quidé ndècu yihnu ñáyiú núú Yă Ndiöxí ñáyiú sãndáa iní ñáhá xii-gá, te Xítóhó Jesucristú ndihí cue ñáyiú-á<sup>n</sup> ñi-ni Yáa cúú Tãtã-yu ndihí-gá, núu xiá<sup>n</sup> Xítóhó Jesucristú Yaá cúú Déhe Dútú Ndiöxí ñã túú cùcaha<sup>n</sup> núú-gã càhá<sup>n</sup>-gá sá ñàní-gá ndihí cùha-gá cúú nchaa ñáyiú-á<sup>n</sup>. <sup>12</sup> Te quèe ndáa-xi nàcuáa càhá<sup>n</sup>-xi núú tütú Yă Ndiöxí núú cãchí-xi nàcuáa ní xáha<sup>n</sup> Xítóhó Jesucristú xii Tãtã-gã Dútú Ndiöxí, te duha ní xáha<sup>n</sup>-gã:

Cáhá<sup>n</sup> váha-í cuendá-n núú nchaa cue tée cùu datná ñani-í ndihí núú nchaa cue



ñáyiú ðíhí cúú ðàtná cúha-í,  
te cata-í ndudú chiñuhu ñaha-í xii-n núú  
tàcá-yu.

Duha yòdo tnuní núú tùtú-gá nàcuáa ní  
xáha<sup>n</sup> Dèhe-gá xii-gá. <sup>13</sup> Te ingá tucu xi-  
chi núú tùtú Yă Ndiöxí càhá<sup>n</sup>-xi nàcuáa ní  
cáhá<sup>n</sup> Xítóhó Jesucristú cuendá-gá, te duha  
ní cachí-gá:

Yúhú ncha-a-ni nduu quindáá iní-í Tătà-í  
Dútú Ndiöxí.

Duha càchí-xi núú tùtú Yă Ndiöxí nàcuáa ní  
cáhá<sup>n</sup> Xítóhó Jesucristú. Te ingá tucu xichi  
núú tùtú Yă Ndiöxí càhá<sup>n</sup>-xi nàcuáa ní cáhá<sup>n</sup>  
tucu Xítóhó Jesucristú, te duha ní cachí-gá:

Iha ndècu ndihí-í ncha-a ñáyiú cùu déhe  
Tătà-í Dútú Ndiöxí, te ðiu-ni ñáyiú-á<sup>n</sup>  
ní taxi cuendá Tătà-í cuu cuendá-í.

Duha càchí-xi núú tùtú-gá nàcuáa ní cáhá<sup>n</sup>  
Xítóhó Jesucristú.

<sup>14</sup> Te sá cuendá ncha-a ñáyiú cùu déhe Yă  
Ndiöxí cúú-yu yiqui cùñú, núu xiá<sup>n</sup> duca<sup>n</sup>  
tnàhá Xítóhó Jesucristú ní cuu-gá yiqui  
cùñú, te duca<sup>n</sup> ní cuu-gá yiqui cùñú cuendá  
cuú-gá, te sá dúcá<sup>n</sup> cùú-gá te ndacu-gá  
daquèe tíhú-gă sácuihná, te ðiu sácuihná-á<sup>n</sup>  
quidé-xí xihí ñáyiú. <sup>15</sup> Te duca<sup>n</sup> ní quide-gá  
cuendá sá cuè ñáyiú ñuyú-a vá yùhú-gá-yu  
sá cùú-yu, chi ncha-a-ni nduu yùhú-yu  
sá cùú-yu. <sup>16</sup> Te na càchí tnúhu ndáá-í  
sá Xítóhó Jesucristú ní quixi-gá cuendá  
chindee-gă cue ñáyiú cùu ñaní tnàhá ndíi  
Abrahám, te ñá ðíú cuendá sá chindèe-gá  
cue espíritú xínú cuèchi núú Yă Ndiöxí.  
<sup>17</sup> Te cuendá xiá<sup>n</sup> núu ðai ní xini ñuhu-xi  
sá cúú-gá ñáyiú cuendá yăha-gá nándi sá  
yăha-gá ðàtná yăha cue ñáyiú cùu ndi  
mee-gá cuendá duca<sup>n</sup> cùu-gá dútú ïo cùnuu  
te cuu ndáá-gá núú Yă Ndiöxí, te cundàhú  
iní-gá ncha-a ñáyiú te cuú-gá cuendá sá vă  
cúndècu-gá cuèchi-yu núú Yă Ndiöxí. <sup>18</sup> Te  
mei òré ndóhó Xítóhó Jesucristú ní xito  
ndéé ñáhá sácuihná xii-gá te núu ndisa sá  
vă cáda-gă ni ï<sup>n</sup> sá ñà túú tàú-gá cada-gá,  
te sá dúcá<sup>n</sup> ní ndoho-gá xiá<sup>n</sup> núu ndácú-gá  
chindèe-gá ncha-a ñáyiú duca<sup>n</sup> yăha.

### 3

*Xítóhó Jesucristú ïo-gá cùnùu-gá dàcúúxi  
ndíi Moisés*

<sup>1</sup> Te nchòhó cúú-ndó ñáyiú ndècu ndihí-í  
ichi Xítóhó Jesucristú ñáyiú cùu cuendá Yă

Ndiöxí, te tnàhá-ndó cùu-ndo ñáyiú ní cáhá<sup>n</sup>  
ñáhá-gă cuendá cundecu-ndo ndihí-gá. Te  
yúhú càchí tnúhu-í xii-ndo sá ïo váha cada  
cuendá-ndó nàcuáa ndùu cuendá Xítóhó Je-  
sucristú, chi ðiu-gá cúú-gă Yaá ní tendaha  
ñàha Dútú Ndiöxí ní quixi-gá ñuyú-a, te  
ðiu-gá cúú-gă Dútú ïo cùnuu chi quide-gá  
núú Yă Ndiöxí. Te ðiu-ni cuendá Xítóhó  
Jesucristú càhá<sup>n</sup> tnúhu sá ni sàndáá iní-ó.

<sup>2</sup> Te mee Yă Ndiöxí ní sáha chiú<sup>n</sup>-gá Xítóhó  
Jesucristú, te ïo ndáá quidé-gă chiú<sup>n</sup>-á<sup>n</sup> sá  
cúú-xí Yă Ndiöxí, te ðiu-ni duca<sup>n</sup> ní quide  
ndíi Moisés ní quide ndíi chiú<sup>n</sup> ní táhú Yă  
Ndiöxí, te ïo ndáá ní quide ndíi chiú<sup>n</sup>-gá sá  
cúú-xí nchàa ñáyiú cùu cuendá-gá, te cue  
ñáyiú-á<sup>n</sup> cúú-yu ðàtná vehe mee-gă. <sup>3</sup> Te ï<sup>n</sup>  
téè dàcaa ï<sup>n</sup> vehe váha ïo càhnu-gá cúú-dé  
dàcúúxi vèhe dacao-dé. Te duca<sup>n</sup> sàtnahá-xi  
cùu Xítóhó Jesucristú chi ïo-gá càhnu cuu-gá  
dàcúúxi ndíi Moisés. <sup>4</sup> Te nchoo sà naha-o  
sá ncháá vèhe dacuítí ndècu cue téè ní  
dácáá, dico sa nàha tucu-o sá Yă Ndiöxí  
quidé-gă ndécú nchàa sá ïo ñuyú-a. <sup>5</sup> Te  
ndíi Moisés-á<sup>n</sup> ïo ndáá ní quide ndíi chiú<sup>n</sup>  
ní táhú Yă Ndiöxí ní quide ndíi sá cúú-xí  
nchàa ñáyiú cùu cuendá-gá. Te sá dúcá<sup>n</sup>  
ní quide ndíi xiá<sup>n</sup> ní cuu ndíi ï<sup>n</sup> téè ní  
xinu cuechi núú Yă Ndiöxí. Te ní xáha<sup>n</sup>  
ndíi xii ncha-a ñáyiú cùu cuendá-gá nàcuáa  
cáhá<sup>n</sup>-gá ndéé cuéé-gá. <sup>6</sup> Dico Xítóhó Jesu-  
cristú cúú-gă Déhe mee Yă Ndiöxí, te cùu-gá  
Yaá ïo quide ndáá yíndàha-gá ncha-a ñáyiú  
cùu cuendá Yă Ndiöxí. Te tnàhá-ó cùu-o  
ñáyiú cùu cuendá-gá, te ðiu-ni duca<sup>n</sup> cùu  
cuendá ñáhá-gă xii-o te núu na càncicú<sup>n</sup>  
nihnu-ni-o càni ndáá iní-ó cuendá-gá ndéé  
ná sàá nduu ngündecu-o ndihí-gá.

*Cue ñáyiú cùu cuendá Yă Ndiöxí ïo váha  
cùu iní-yu ndécú-yu ndihí-gá*

<sup>7</sup> Te núú tùtú Yă Ndiöxí yódó tnùní nàcuáa  
ní cáhá<sup>n</sup> Espíritú-gá, te duha ní cachí-xi:

Te núu nchòhó ndédóho-ndo nchàa tnúhu  
cáhá<sup>n</sup> Yă Ndiöxí vitna,

<sup>8</sup> te vá cúndùu sáá iní-ndó ðàtná ní xínuu  
sáá iní ñáyiú ní dàquèé tíhú tnúhu Yă  
Ndiöxí, ñáyiú ní xíndecu xití yucu,

chi ñáyiú-á<sup>n</sup> ní xito ndéé-yu Yă Ndiöxí núu  
nása cada ñaha-gă xií-yu.

Duha ní cachí Espíritú-gá. <sup>9</sup> Te cächí tucu Espíritú Yă Ndiöxí nàcuáa ní cáhá<sup>n</sup> méé-gă, te duha ní cachí-gá:

Xití yucu ní xito ndéé ñáhá cuè ñani tnáhá-ndó nǐ xíndecu ndéé sanaha xii-í,

te duca<sup>n</sup> nǐ quide ñáhá-yu cuèi ní xiní-yu nchaa sá nǐ quide-í ndi ùdico cuía nǐ xíndecú-yu xití yucu-á<sup>n</sup>.

<sup>10</sup> Te sá dúcá<sup>n</sup> nǐ quidé-yu núu xiă<sup>n</sup> ní cudéè<sup>n</sup>-í núu-yu,

núu xiă<sup>n</sup> ní cáhá<sup>n</sup>-í cuendá-yu, te ní cachí-í:

“Ñáyiú-a quide-ní-yu nchaa sá ñà túú tâu-yu cadá-yu te ni ñà túú cuini-yu cadá-yu nchaa nàcuáa sàni iní-í,

te ni ñà túú cuini-yu cadá-yu nàcuáa càhá<sup>n</sup>-í”,

duha ní cáhá<sup>n</sup>-í cuendá-yu.

<sup>11</sup> Te xiă<sup>n</sup> núu ní cudéè<sup>n</sup>-í núu-yu te ní xáha<sup>n</sup> ndáá-í xií-yu sá vǎ ndúú tǎhǔ-yu cundecu váha-yu núu ndécú-í.

Duha ní cachí Yă Ndiöxí cächí Espíritú-gá.

<sup>12</sup> Te nchòhó ñáyiú ndècu ndihí-í ichi Xítóhó Jesucristú, càhá<sup>n</sup>-í dóho-ndo sǎ ïo cada cuendá-ndó vǎ cáni cuèhé iní-ndó te ngóo-ndo vǎ quíndáá-gá iní-ndó Yă Ndiöxí te dañá-ndo ìchi-gá, te diu-gá cúu-gă Yaá ndécú nchaa nduu nchaa quíú. <sup>13</sup> Te ñ<sup>n</sup> nduu ñ<sup>n</sup> nduu ío chí cuăha tnàha tnúhu ndee iní cundecu-ndo nini ndecu-ndo ñuyíú-a cuendá sá vǎ xǐnu iní-ndó càda-ndo nándi sá cuèhé sá dúhá, te duca<sup>n</sup> te vǎ cúu sàá iní-ndó núu Yă Ndiöxí. <sup>14</sup> Te vǎ dáñá ndéè-ó càni ndáá iní-ó nàcuáa cada ñaha Yă Ndiöxí xii-o, te dàtná-ni ní sani iní-ó ndéé cútnàhá ní tuha-o ìchi Yă Ndiöxí, te diu-ni duca<sup>n</sup> càni iní-ó ndéé ná sàá nduu vǎ cundècu-gá-ó ñùyíú-a, te núu duca<sup>n</sup> na càda-o te cùu ñ<sup>n</sup>nuu-o ndihí Xítóhó Jesucristú.

<sup>15</sup> Te duha càhá<sup>n</sup>-xi ñ<sup>n</sup> xichi núu tütú Yă Ndiöxí:

Te núu nchòhó ndédóho-ndo nàcuáa càhá<sup>n</sup> Yă Ndiöxí vitna,

te vǎ cundùu sàá iní-ndó dàtná ní xínduu sàá iní cue ñáyiú ní dáquéé tǐhú tnúhu-gá ndéé sanaha.

Duha cächí-xi núu tütú-gá. <sup>16</sup> Te cue ñáyiú duca<sup>n</sup> nǐ xínduu sàá iní-xi cùu-yu ñáyiú ní ndeñuhu ndíi Moisés nàció<sup>n</sup> Ègíptú, te ñáyiú-á<sup>n</sup> nǐ xíndedóho-yu tnúhu ní cáhá<sup>n</sup> Yă Ndiöxí te ní quide sàá iní-yu ní dáquéé

tǐhǔ-yu tnúhu-gá. <sup>17</sup> Te ndi ùdico cuía nǐ xúhu<sup>n</sup>-yu ichi ío ní cudéè<sup>n</sup> Yă Ndiöxí núu-yu cuendá sá nǐ quidé-yu nándi nchaa sá cuèhé sá dúhá, te ñáyiú-á<sup>n</sup> nǐ xihí-yu xití yucu.

<sup>18</sup> Te nchaa ñáyiú-á<sup>n</sup> ñà túú ní cuini-yu tñí-yu tnúhu ní cáhá<sup>n</sup> Yă Ndiöxí núu xiă<sup>n</sup> ní cáhá<sup>n</sup> ndáá-gá sá vǎ ndúú tǎhǔ-yu cundecú-yu núu ïo váha càa ndecu-gá. <sup>19</sup> Te xiă<sup>n</sup> núu nchoo cùtnuní iní-ó sǎ nchaa ñáyiú-á<sup>n</sup> ñà túú ní nduu tǎhǔ-yu cundecu váha-yu núu ndécú-gă, chi ñà túú ní sàndáá iní-yu tnúhu ní cáhá<sup>n</sup>-gá.

## 4

<sup>1</sup> Te vitna ndècu ndihí-gá-ó tnúhu Yă Ndiöxí tnúhu sá dǎnèhé ñáhá xii-o sá cúu cundecu váha-o núu ndécú-gă, te tǎu-xi quiyùhú iní-ó chí na cuáhá<sup>n</sup> te vǎ ndúú tǎhǔ-ó cundecu váha-o núu ndécú-gă. <sup>2</sup> Te tnàhá nchoo nǐ ngúndecu ndihí-o tnúhu sá càhá<sup>n</sup> nàcuáa naníhí tǎhǔ-ó dàtná ní xíndecu ndihí cue ñáyiú ndéé sanaha, dico ñáyiú-á<sup>n</sup> chí ñà túú vèdana ni nándihí-xi cuèi ní xíndedóho-yu tnúhu-á<sup>n</sup> chí ñà túú ní sàndáá iní ñáhǎ-yu xii-gá. <sup>3</sup> Dico nchoo cùu-o ñáyiú ní sàndáá iní tnúhu Yă Ndiöxí, núu xiă<sup>n</sup> nduu tǎhǔ-ó cundecu váha-o núu ndécú-gă, te ní quee ndáá-xi nàcuáa càhá<sup>n</sup>-gá núu tütú-gá núu cächí-xi:

Yúhú ní cudéè<sup>n</sup>-í núu-yu, te ní cáhá<sup>n</sup> ndáá-í sá vǎ ndúú tǎhǔ-yu cundecu váha-yu núu ndécú-í.

Duha ní cachí-gá. Te cuu nduu tǎhǔ-yu cundecu váha-yu núu ndécú Yă Ndiöxí ní cùu, chí sa ní xínu cava nchaa chiú<sup>n</sup> ní quide-gá sá nǐ cadúha-gá ñuyíú. <sup>4</sup> Te núu tütú Yă Ndiöxí càhá<sup>n</sup>-xi nàcuáa ní quide-gá nduu úsá, te duha cächí-xi:

Yă Ndiöxí ní quide chiú<sup>n</sup>-gá íñú nduu ní quide-gá nchaa chiú<sup>n</sup>-gá te ní nde-tatú-gá nduu úsá.

Duha cächí-xi núu tütú-gá. <sup>5</sup> Te cächí tucu-xi núu tütú Yă Ndiöxí nàcuáa ní cáhá<sup>n</sup>-gá cuendá cue ñáyiú ndéé sanaha, te duha ní cachí-gá:

Cue ñáyiú-a vǎ ndúú tǎhǔ-yu cundecu váha-yu núu ndécú-í ndétátú-í.

Duha ní cachí-gá. <sup>6</sup> Te ñáyiú ní xíndedóho tnúhu sá càhá<sup>n</sup> nàcuáa naníhí tǎhǔ-ó ndéé sanaha, ñà túú ní nduu tǎhǔ-yu cundecu váha-yu núu ndécú Yă Ndiöxí ndétátú-gá,

te duca<sup>n</sup> chi ñá túú ní sàndáá iní ñáhă-yu xii-gá, dico íó-gá ñáyiu nduu táhú cundecu váha núú ndécú-gă ndétátú-gá. <sup>7</sup> Te ní xica cuéhé nduu sá dúcá<sup>n</sup> ñà túú ní sàndáá iní ñáhă ñáyiu-á<sup>n</sup> xii-gá, te dàtnùní ní cáhá<sup>n</sup> ndíi Dàvíi yuhu-gá nàcuáa cada-gá vitna, te diu-ni nàcuáa sa yòdo tnuní diu-ni duca<sup>n</sup> chido tnuní tucu-í nàcuáa ní cáhá<sup>n</sup> ndíi yuhu-gá, te duha ní cachí-gá:

Te núu nchòhó ndèdòho-ndo tnũhu càhá<sup>n</sup>-í te vá cádá sàá iní-ndó.

Duha ní cachí-gá. <sup>8</sup> Te ndíi Jòsué ní sanu ichi ndíi ñáyiu núú quihí<sup>n</sup>-yu cundecu váha-yu, dico ñá díú cuendá xíã<sup>n</sup> ní cáhá<sup>n</sup> Yă Ndiõxí, chi cuendá nàcuáa cada-gá vitna ní cáhá<sup>n</sup>-gá. <sup>9</sup> Núu xíã<sup>n</sup> sáá nduu ndũu táhú nchaa ñáyiu cùu cuendá Yă Ndiõxí ngũndecu váha-yu núú ndécú-gă ndétátú-gá. <sup>10</sup> Te nchaa ñáyiu duca<sup>n</sup> na ndũu táhú cundecu váha núú ndécú Yă Ndiõxí ndétátú-gá, te tnàhá-yu ndetátú-yu cuendá nchaa sá vâha ní quidé-yu dàtná ndétátú méé-gă. <sup>11</sup> Te xini ñuhu-xi sá nchóó ío nducu ndèe-o nducu-o nacuáa cada-o cuendá nduu táhú-ó ngũndecu váha-o núú ndécú Yă Ndiõxí ndétátú-gá, chi na cuáhă<sup>n</sup> dava-ndo càda-ndo datná ní quide cue ñáyiu ñá túú ní sàndáá iní ñáhă xii-gá, te vá ndúú táhú-ndó cundecu váha-ndo núú ndécú-gă te núu duca<sup>n</sup> na càda-ndo.

<sup>12</sup> Te tnũhu Yă Ndiõxí cúu-xí dàtná ñ<sup>n</sup> sá nchító-ó chi quide-xi nândi sá quidé-xí, te cùu-xi datná ñ<sup>n</sup> sá dèé<sup>n</sup> víhí-gă dàcúúxí ñ<sup>n</sup> yuchí sá ndèé úú xio núu-xi. Te duca<sup>n</sup> sãtnahă-xi cùu tnũhu-gá chi quée-xi iní-ó, te dândixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o. <sup>13</sup> Te ni ñ<sup>n</sup> sá ní cadúha Yă Ndiõxí vá cáni iní-ó sá ndácú-xí nguivâha-xi núú-gă, chi nchaandi túhú sá sání iní-ó ndècu túu-xi núú-gă, te diu núú Yàá-á<sup>n</sup> na càni cuendá-ó nchaa sá quidé-ó.

#### *Xítóhó Jesucristú cúu-gă Dútú ío cùnũu*

<sup>14</sup> Te Xítóhó Jesucristú cúu-gă Dútú ío cùnũu ndecu ndihí-o, te diu-gá cúu-gă Déhe Dútú Ndiõxí, te Yàá-á<sup>n</sup> cuãndaa-gá andiu ní nucũndecu-gá núú Yă Ndiõxí, núu xíã<sup>n</sup> tàú-xi sá cáncìcú<sup>n</sup> nihnu-ni-o quĩndáá iní-ó-gă. <sup>15</sup> Te mee Yàá-á<sup>n</sup> ío cùnũu-gá cúu-gă dútú-ó ndècu ndihí-o, te ío na

cũndahú iní ñáhă-gă xii-o cuendá sá ñă ñihí ndéé-ó cundecu-o. Te duca<sup>n</sup> càda-gá chi ní yáha-gá dàtná yâha mee-o, chi nchaa sá ní yáha-gá-á<sup>n</sup> ní cuu-xi sá cádá-gă nândi nchaa sá cuéhé sá dúhá ní cùu dico ni ñ<sup>n</sup> ñá túú ní quide-gá. <sup>16</sup> Núu xíã<sup>n</sup> tàú-ó sã nchóó ní yuhu ní iní-ó cáhá<sup>n</sup> ndihí-o Yă Ndiõxí Yáá ío cũndahú iní ñáhă xii-o chindee ñaha-gá, te duca<sup>n</sup> càda-o te cundahú iní ñáhă-gă chindee ñaha-gá xii-o ndèda-ni càa oré xini ñũhu-o-gá.

## 5

<sup>1</sup> Te nchaa cue dútú cùnũu núú ñáyiu isràél diu-ni ñáyiu cùu-güedé, te duca<sup>n</sup> ní ngũndecu-güedé cuendá cada-güedé chiũ<sup>n</sup> sá cúu-xí Yă Ndiõxí cuendá-yu, chi diu cue téé-á<sup>n</sup> ní xóo nacani cuendá-güedé núú-gă quiti ní xóo cahni-güedé ní xóo nduu táhú-gă, te duca<sup>n</sup> ní xóo cada-güedé cuendá sá cádá càhnu iní Yă Ndiõxí cuéchi-yu, te duca<sup>n</sup> ní xóo nacani cuendá tucu-güedé núú-gă nchaa dava-gá sá ní xóo níhí-güedé ní xóo nduu táhú-gă. <sup>2</sup> Te nchaa cue dútú-ã<sup>n</sup> ní xóo cundee iní-güedé nchaa sá ní xóo cada nchaa ñáyiu ñá túú ní quide ndáá ñáyiu ñá túú cùtnuní iní-xi, te duca<sup>n</sup> ní xóo cada cue dútú-ã<sup>n</sup> chi tnàhá-güedé ñá túú ní xóo níhí ndéé-güedé cundecu-güedé cuendá nchaa sá ní xóo yáha-güedé. <sup>3</sup> Te sá cuendá sá dúcá<sup>n</sup> ñà túú ní xóo níhí ndéé-güedé núu xíã<sup>n</sup> dai ní xini ñuhu-xi sá tnàhá-güedé cuáha-güedé Yă Ndiõxí sá ndúú táhú-gă cuendá méé-güedé dàtná quidé-güedé cuendá ñáyiu.

<sup>4</sup> Te ni ñ<sup>n</sup> téé vá ndácú-dè cuu-dé dútú cùnũu cuendá-ni sá càchí iní méé-dè te núu ñá díú mèe Yă Ndiõxí duca<sup>n</sup> cuini-gá sá cúu-dè dútú cùnũu datná ní quide-gá ndíi Àrón. <sup>5</sup> Te cuéi Xítóhó Jesucristú chi ñá díú mèe-gá ní quide-gá méé-gă ñ<sup>n</sup> dútú cùnũu nacuáa cada nínu-gá méé-gă, chi mee Tãtá-gă Dútú Ndiõxí duca<sup>n</sup> ní cachí-gá sá cúu-gă Dútú cùnũu, te duca<sup>n</sup> chi Yă Ndiõxí ní xáha<sup>n</sup>-gă:

Yòhó cúu-n Déhe-í,

te cuini-í sá dúhá-ni cundecu-n núú ndécú-í. Duha ní xáha<sup>n</sup>-gă xii Xítóhó Jesucristú. <sup>6</sup> Te núú tütú Yă Ndiõxí yódó tnuní nàcuáa ní xáha<sup>n</sup> tucu-gá xii Xítóhó Jesucristú, te duha ní xáha<sup>n</sup>-gă:



Yòhó cúú-n dütú cundecu ni caa ni quíhí<sup>n</sup>, te cùu-n datná ní cuu ndí Melquisèdec. Duha ní xáha<sup>n</sup>-gã xii Xítohó Jesucristú. <sup>7</sup> Te cùtnàhá ní xíndecu Xítohó Jesucristú ñuyíú-a te níhi ní xóo cáhá<sup>n</sup> ndíhi-gã Yã Ndiòxí te ní xóo cáhá<sup>n</sup> ndàhú-gã núú-gã, te ní xóo ndáhyú-gã òré duca<sup>n</sup> ñí xóo cáhá<sup>n</sup> ndíhi-gã Yã Ndiòxí, te duca<sup>n</sup> ñí quide-gã chi nàha-gã sá Yã Ndiòxí cúú-gã Yaá ndacu dàcácu nihnu ñaha xii-gã cuendá sá vã cùú dúcá<sup>n</sup>-gã. Te Yã Ndiòxí ní xíndedóho-gã nchaa tnúhu ní cáhá<sup>n</sup> Xítohó Jesucristú cuendá sá ñí quide-gã nchaa nàcuáa ní xáha<sup>n</sup> Yã Ndiòxí cada-gã. <sup>8</sup> Te sá cuendá nchaa sá ñí ndoho Xítohó Jesucristú xiá<sup>n</sup> ní cutnùnì iní-gã cada-gã nchaa dava-gã sá vãha nàcuáa cuiní méé Yã Ndiòxí cada-gã. Te duca<sup>n</sup> ñí cuu cuèi cùu-gã Déhe Yã Ndiòxí. <sup>9</sup> Te sá dúcá<sup>n</sup> ñí quide-gã nchaa nàcuáa cuiní méé Yã Ndiòxí, xiá<sup>n</sup> nũu vitna cùu-gã Yaá dácácu nihnu nchaa ñáyíu sàndáa iní ñáhá xii-gã núú ùhú núú ndàhú. <sup>10</sup> Te mee Yã Ndiòxí ní cachí-gã sá Xítohó Jesucristú cúú-gã dütú cùnùu datná ní cunuu ndí Melquisèdec cùtnàhá ní cuu ndí dütú ñuyíú-a.

### *Cuendá ñáyíu cuiní dañà nihnu ichi Yã Ndiòxí*

<sup>11</sup> Te vài-gã tnúhu ndècu cáhá<sup>n</sup>-í nàcuáa ndùu cuendá Xítohó Jesucristú, ndíhi ndí Melquisèdec, te dicó-ni sá nchòhó ío cuèé tècú tnùnì-ndó, te yúhú ío ùhú ñíhí-í nàcuáa cáhá<sup>n</sup>-í nàcuáa tecú tnùnì-ndó.

<sup>12</sup> Te nchòhó sa ní cuu cuèhé nduu ndècu-ndo ichi Xítohó Jesucristú, te tàú-ndó dānehé-ndó cuè ñáyíu ndècu ichi-gã tnúhu-gã nũu dicó sá cúú, dico xini ñuhu-ni-xi sá cùndècu ñáyíu danèhé ñáhá tnúhu-gã xii-ndo, tnúhu sá ñí dácúhá-ndó ndéé díhna sá ñà túú ùhú tecú tnùnì-ndó. Te sá dúcá<sup>n</sup> quide-ndo núu xiá<sup>n</sup> cúú-ndó dàtná cue landú vitna sàdi camá, landú vátá cúú-gã caxi dítá. <sup>13</sup> Chi nchaa ñáyíu cùu datná landú vitna sàdi, ñáyíu-á<sup>n</sup> cúú nèñuú-yu ñà túú cùtnuní iní-yu nàcuáa càhá<sup>n</sup> tnúhu sá càhá<sup>n</sup> nàcuáa cada ndáa-yu cundecú-yu. <sup>14</sup> Te nchaa sá vátá cúú-gã caxi cue landú yíquí<sup>n</sup> xiá<sup>n</sup> cúú-xí cuendá cue ñáyíu sacuéhé, te xiá<sup>n</sup> cúú-xí dàtná tnúhu sá dácúhá ñáyíu sa ní níhí ndéé ndècu ichi-gã,

ñáyíu sa ní cutnùnì vãha iní-xi nándi cùu nchaa sá cuèhé sá dúhá, ndíhi nándi cùu nchaa sá vãha.

## 6

<sup>1</sup> Te xiá<sup>n</sup> nũu vitna xini ñuhu-xi dacuaha-o dava-gã tnúhu Yã Ndiòxí cuendá duca<sup>n</sup> te cuu-o ñáyíu tècú tnùnì nchaa tnúhu-gã. Te xini ñuhu-xi sá ncháa tnúhu Xítohó Jesucristú sá ñí dácúhá-ó ndéé díhna vã dácúhá-gã-ó dàtná ní dácúhá-ó chi sa tècú tnùnì-ó. Te ñà túú-gã xini ñuhu-xi dacuaha-o datná ní dácúhá-ó ndéé díhna nàcuáa cada-o ndixi cuèchi iní-ó cuendá nchaa sá cuèhé sá dúhá quide-o, sá tá dácúíta nihnu ñaha xii-o cuhá<sup>n</sup> ní cùu. Te duca<sup>n</sup> vã dácúhá-gã tucu-o dàtná ní dácúhá-ó ndéé díhna nàcuáa cada-o quindáa iní-ó Yã Ndiòxí, <sup>2</sup> ndíhi cuendá nàcuáa ní dácúhá-ó nàcuáa cuandute-o, ndíhi cuendá nàcuáa cada-o càcá<sup>n</sup> ndodo-o ndàha-o díquí ñáyíu ní sàndáa iní ñáhá xii-gã. Te duca<sup>n</sup> ñà túú-gã xini ñuhu tucu-xi dacuaha-o datná ní dácúhá-ó ndéé díhna cuendá nàcuáa ndoto cue ñáyíu ní xíhí, ndíhi cuendá nàcuáa ní dácúhá-ó sã Yã Ndiòxí daquíhí<sup>n</sup>-gã ñáyíu núú ùhú núú ndàhú ni caa ni quíhí<sup>n</sup>. <sup>3</sup> Te núu Yã Ndiòxí ná cachí-gã, te cuita dacuáha-gã-ó nchaa dava-gã tnúhu sá cùmání quíhí<sup>n</sup>.

<sup>4</sup> Te cue ñáyíu sa tècú tnùnì tnúhu Yã Ndiòxí, ñáyíu sa xini nchaa nàcuáa ndùu nchaa sá vãha quide ñaha Yã Ndiòxí xii-o ndíhí-yu, ñáyíu sa chindee ñaha Espíritú Yã Ndiòxí, <sup>5</sup> ñáyíu sa cùtnuní iní-xi sá ño vãha tnúhu Yã Ndiòxí, ñáyíu sa xini nàcuáa ta quide Yã Ndiòxí véxi nchaa sá vã yòo tnàhí ndàcu cada, <sup>6</sup> te núu ñáyíu-á<sup>n</sup> ná ngúíta tucú-yu daquèe tíhú duú<sup>n</sup>-yu tnúhu Yã Ndiòxí, te vã ndácú-gã-ó nà canu ichi-ó-yu nàcuáa ndixi cuèchi iní-yu te núu duca<sup>n</sup> na càdá-yu, te sá dúcá<sup>n</sup> ná càdá-yu te tnàhá-yu cúú-yu dàtná cue téé ní sahní ñaha xii Xítohó Jesucristú Déhe Yã Ndiòxí núú cùrúxí. Te sá dúcá<sup>n</sup> ná càdá-yu te ngóo dava-gã ñáyíu cáhá<sup>n</sup> cuèhé-yu cuendá Xítohó Jesucristú. <sup>7</sup> Te nchaa ñáyíu cúú-yu dàtná ñuhu, chi ñuhu-á<sup>n</sup> ndi tnahá òré cúú<sup>n</sup> dǎú te xíhi-xi ndute, te dava ñuhu vãha cùu sá xítú ñáyíu, te sá cúú nũu ñuhu-á<sup>n</sup> ño nándíhi-xi, te mee Yã Ndiòxí quidé-gã



cúú sã vãha núú ñúhú-ã<sup>n</sup>. <sup>8</sup> Dico núú da iñu na ndaa núú ñuhu-á<sup>n</sup> te ñã túú vëdana nãndíhi-xi te núú duca<sup>n</sup>, te Yá Ndiöxí vá cúú vãha iní-gá cuendá ñuhu-á<sup>n</sup> sã dúcá<sup>n</sup> dà iñu ndaa núú-xi, te iñu-á<sup>n</sup> ndihí-xi cáyú. Te duca<sup>n</sup> sãtnahá-xi cùu ñáyiu dàquee tíhú tnùhu Yá Ndiöxí chi ñã túú cùu vãha iní-gá núú-yu.

*Níhí-ó sã ndétú-ó ndiùu táhú-ó*

<sup>9</sup> Te cuëi duha càhá<sup>n</sup>-í dico nchòhó cue ñáyiu ío cùu iní-í, chi cùtnuní ndáá iní-í sá vã cáda-ndó dàtná xíquide dava-gá ñáyiu, te mee-ni sã vãha cuu xii-ndo chi cùu-ndo ñáyiu sa ní naníhí tãhú. <sup>10</sup> Te duca<sup>n</sup> chi Yá Ndiöxí cúú-gã Yaá ío vãha quide ndáá, te vá dáná ndòdo iní-gá nchaa sá vãha quide-ndo, te ni vã dáná ndòdo iní-gá nãcuáa quide-ndo cuu iní-ndó-gã, te sá dúcá<sup>n</sup> quide-ndo cuu iní-ndó-gã xíã<sup>n</sup> chindèe-ndo cue ñáyiu ndècu ndihí-ndo ichi Xítohó Jesucristú, te duca<sup>n</sup>-ni ta quide-ndo véxi ndéé vitna. <sup>11</sup> Te cuiní-í sá ñ<sup>n</sup> ñ<sup>n</sup>-ndo nducu ndee-ndo cada-ndo nãcuáa cuiní Yá Ndiöxí dàtná tá quide-ndo véxi, te ñ<sup>n</sup>-ni duca<sup>n</sup> càda-ndo ndéé ná sãá nduu ndiùu táhú-ndó cùndecu-ndo ndihí-gá núú ndécú-gã, te duca<sup>n</sup> te níhí-ndó nchàandi túhú sá ndétú-ndó ndiùu táhú-ndó cùndecu ndihí-ndo ni caa ni quíhí<sup>n</sup>. <sup>12</sup> Te yúhú cuiní-í sá nchòhó vá túhíó-ndo càda-ndo nchaa nãcuáa cuiní Yá Ndiöxí, te cada-ndo dàtná quidé ñáyiu sãndáá iní tnùhu-gá, ñáyiu càhnu iní-xi. Te sá dúcá<sup>n</sup> quidé-yu xíã<sup>n</sup> nihí-yu nchaa sá ñí cachí Yá Ndiöxí nduu táhú-yu.

<sup>13</sup> Te cútnahá ní xáha<sup>n</sup> Yá Ndiöxí xii ndíi Àbrahám nãcuáa cada-gá, te ní cacunehe-gá méé-gã nãcuáa cutnùní iní ndíi sá ndáa cada-gá nãcuáa ní xáha<sup>n</sup>-gã xii ndíi, te vá yõo ñ<sup>n</sup> ni càcunehe-gá cuendá sá quíndáá iní ndíi tnùhu ní cáhá<sup>n</sup>-gá. Te duca<sup>n</sup> ñí quide-gá chi ñ<sup>n</sup>ndíi díi-ni mee-gã ío cùnuu-gá. <sup>14</sup> Te duha ní xáha<sup>n</sup>-gã xii ndíi Àbrahám: “Yòhó té Àbrahám na càchí tnùhu ndáá-í xii-n sã ío chindee ñàha-í xii-n, te cáyá cuéhé víhí ñàní tnáhá-n”, duha ní xáha<sup>n</sup>-gã xii ndíi. <sup>15</sup> Te ndíi Àbrahám ío ní quide ndee iní ndíi ní xíndetu ndíi, te duca<sup>n</sup> te Yá Ndiöxí ní quide-gá nãcuáa ní xáha<sup>n</sup>-gã cada-gá sá cúú-xí ndíi. <sup>16</sup> Te núú ñ<sup>n</sup> ñáyiu càhá<sup>n</sup> ñ<sup>n</sup> tnùhu ndáá cuiti te càcu nehé-yu Yá

Ndiöxí cuendá quíndáá iní tnàha ñáyiu-yu tnùhu càhá<sup>n</sup>-yu, te òré duca<sup>n</sup> na càhá<sup>n</sup>-yu te ñã túú-gã sá dácáá ñáyiu càhá<sup>n</sup> ndihí-yu cuendú. <sup>17</sup> Te duca<sup>n</sup> ñí quide Yá Ndiöxí ní cáhá<sup>n</sup> ndáá-gá sá cáda-gã nãcuáa ní cachí-gá, te duca<sup>n</sup> ñí cáhá<sup>n</sup>-gá cuendá nchaa ñáyiu ní cachí-gá nduu táhú sã cáda-gã nãcuáa cutnùní iní-yu sá quidé-gã ñ<sup>n</sup> sá càhá<sup>n</sup>-gá, te ni ñã túú nãdáma-gá ñ<sup>n</sup> sá càhá<sup>n</sup>-gá. <sup>18</sup> Te nchoo ñí natuha-o Yá Ndiöxí cuendá dàcácu nihnu ñaha-gã xii-o núú ùhú núú ndàhú, te ní níhí-ó tnùhu ndee iní ndécú ndihí-o cuendá sá vã dáñá ndèé-ó cùndetu-o sãá nduu ndiùu táhú-ó cùndecu-o ndihí-gá. Te duca<sup>n</sup> ní níhí-ó tnùhu ndee iní chi Yá Ndiöxí ní cáhá<sup>n</sup> ndáá-gá sá cáda-gã nãcuáa ní cachí-gá, te ñã túú dàndahú ñáhá-gã, te ni ñã túú nãdáma-gá ñ<sup>n</sup> sá ñí cachí-gá cada-gá. <sup>19</sup> Te tnùhu ndee iní ndécú ndihí-o xíã<sup>n</sup> quidé-xí cùtnuní ndáá iní-ó sã ndúú táhú-ó cùndecu-o ndihí Yá Ndiöxí núú ndécú-gã, te duca<sup>n</sup> cùtnuní ndáá ndisa iní-ó sã cuendá Xítohó Jesucristú Yaá ndécú núú Yá Ndiöxí. <sup>20</sup> Te duca<sup>n</sup> ñí nucúndecu Xítohó Jesucristú núú Yá Ndiöxí cuendá duca<sup>n</sup> cànchicú<sup>n</sup> nihnu-o càda-o, te duca<sup>n</sup> ñí nucúndecu-gá núú Yá Ndiöxí chi cùu-gá dútú cùnùu datná ní cunuu ndíi Melquisèdec ñuyíu-a, te duca<sup>n</sup>-ni cùu-gá dútú cùnùu ni caa ni quíhí<sup>n</sup>.

## 7

*Xítohó Jesucristú cúú-gã dútú dàtná ní cuu ndíi Melquisèdec*

<sup>1</sup> Te ndíi Melquisèdec ní xíndaha ndíi cue ñáyiu ñúú Sàlém, te ní cuu ndíi dútú ñí xinu cuechi ndíi núú Dútú Ndiöxí Yaá ío cùnuu. Te ndíi Melquisèdec-á<sup>n</sup> ñí xíca<sup>n</sup> táhú ndíi núú Yá Ndiöxí cuendá ndíi Àbrahám cútnahá ní sáhá<sup>n</sup> ndíi Àbrahám-á<sup>n</sup> ñí nàá ndíi ndihí cue dava-gá cue téé yíndaha ñáyiu. Te cue téé-á<sup>n</sup> ñã túú ní ndàcu-güedé nàá-güedé ndihí ndíi Àbrahám-á<sup>n</sup> chi ní xíta-güedé. <sup>2</sup> Te nchaa sá ñí níhí ndíi Àbrahám-á<sup>n</sup> núú ñí nàá ndíi, te ní quide ndíi úxí xichi te ñ<sup>n</sup> xichi núú ùxí-á<sup>n</sup> ñí sãñaha ndíi xii ndíi Melquisèdec. Te ñ<sup>n</sup> ndíi Melquisèdec-á<sup>n</sup> quée-xí: Téé ío vãha quide ndáá yíndaha ñaha xii ñáyiu, duha quèe-xi. Te ní xóo danàni ñahá-yu xii

ndíi Tée yìndaha ñuú Sàlém, duha ní xóo danàni ñahá-yu. Te tnúhu Sàlém-án quée-xi: Ñuú ndécú nàhi, duha quèe-xi tnúhu-án. Núu xíá<sup>n</sup> quée tucu-xi nacuáa nàni ndíi Tée yìndaha ñuú ndécú nàhi, duha quèe tucu-xi diu ndíi. <sup>3</sup> Te ñá túú tnúhu núu yoo cùu tátá ndíi ndíhi náná ndíi, te ni ñà túú tnúhu núu yoo cùu xíi ndíi ndíhi xítná ndíi, te ni ñà túú tnúhu núu nándi cùu ñáyiu ní cuu ñaní tnáhá ndíi ní xíndecu ndéé sanaha-gă, te ni ñà túú tnúhu núu ná ama ní cacu ndíi, te ni ñà túú tnúhu núu ná ama ní xíhí ndíi. Te ndíi-án duca<sup>n</sup>-ni ñi cuu ndíi dútú ñi xíndecu ndíi, te duca<sup>n</sup> sãtnahá-xi cùu Xítóhó Jesucristú déhe Yá Ndiöxí chi cuu-gá dútú ñi caa ñi quíhí<sup>n</sup>.

<sup>4</sup> Te vitna chí cuăha váha cuendá sá ndíi Melquisédéc ní cuu ndíi ñ<sup>n</sup> tée ío ní cuu càhnu ní xíndecu ñuyíú-a, chi ndíi Àbrahám tée ní cuu ñaní tnáhá-ó ñi xíndecu ndéé sanaha ñi quide ndíi úxí xichi nchaa sá ñi níhí ndíi núú ñi nàá ndíi. Te ñ<sup>n</sup> xichi núú ùxí-án ñi sãñaha ndíi xii ndíi Melquisédéc. <sup>5</sup> Te ndíi Moisés ní chídó tnùní ndíi nàcuáa cada nchaa dútú, cue tée ní cuu ñaní tnáhá ndíi Lèví sá cuè tée-án quehe<sup>n</sup>-güedé ñ<sup>n</sup> xichi núú ùxí xichi sá ñihí cue ñáyiu isràél ñáyiu cùu ñaní tnáhá-güedé cuu cuendá-güedé. Te duca<sup>n</sup> quide-güedé cuèi ñaní tnáhá-güedé ndíhi-yu ní cuu ndíi Àbrahám. <sup>6</sup> Te cuèi ñá díú ñàní tnáhá ndíi Melquisédéc cúú ndíi Àbrahám dico ní quehe<sup>n</sup> ndíi Melquisédéc-án ñ<sup>n</sup> xichi núú ùxí xichi nchaa sá ñi níhí ndíi Àbrahám. Te ndíi Melquisédéc-án ñi xicá<sup>n</sup> táhú ndíi núú Yá Ndiöxí cuendá ndíi Àbrahám. Te diu-ni ndíi Àbrahám-án ñi xáha<sup>n</sup> Yá Ndiöxí xii ndíi sá cádá váha ñaha-gă xii ndíi. <sup>7</sup> Te sa cùtnuní iní-ó sã ñúu ñ<sup>n</sup> tée na càcá<sup>n</sup> táhú-dé núú Yá Ndiöxí cuendá ñ<sup>n</sup> ñáyiu, te tée-án cúnùu-gá-dé. <sup>8</sup> Te cue dútú ñáyiu isràél quéhé<sup>n</sup>-güedé ñ<sup>n</sup> xichi núú ùxí xichi nchaa sá ñihí-yu cùu cuendá-güedé, te cue tée-án cuú-güedé. Te núú tütú Yá Ndiöxí càchí-xi sá ndíi Melquisédéc ndécú-ní ndíi, te duca<sup>n</sup> càhá<sup>n</sup>-xi chí ñá túú tnúhu sá ñi xíhí ndíi. <sup>9-10</sup> Te sá dúcá<sup>n</sup> ñi sãñaha ndíi Àbrahám sá ñi nduu táhú ndíi Melquisédéc, te xíá<sup>n</sup> cada iní-ó sã sá ndecu ndíhi ndíi Àbrahám cue ñaní tnáhá ndíi Lèví cue tée cùu dútú, cue tée quehe<sup>n</sup> ñ<sup>n</sup> xichi núú ùxí xichi nchaa sá ñihí ñáyiu isràél cuèi vátá cáciú-gă-güedé.

Te cada iní-ó sã tnáhá-güedé ní sáha-güedé ndíi Melquisédéc ñ<sup>n</sup> xichi núú ùxí xichi nchaa sá ñi níhí ndíi Àbrahám núú ñi nàá ndíi. Te duca<sup>n</sup> càda iní-ó chí cue tée-án cúú-güedé ñaní tnáhá ndíi Àbrahám cuèi vátá cáciú-gă-güedé dàvá-án.

<sup>11</sup> Te sá cuendá cue dútú cue tée cùu ñaní tnáhá ndíi Lèví ní ngúndecu ndíhi cue ñáyiu isràél tnúhu sá sánú ìchi ñaha xii-yu nàcuáa cada-yu cundecú-yu. Te ñaní tnáhá ndíi Àrón cúú cuè dútú-án. Te núu dícó cue dútú-án ní ndacu-güedé cada-güedé nàcuáa cudíu ñáyiu isràél núú Yá Ndiöxí, te ñá túú-gă xíni ñúhu-xi ngúndecu ingá dútú dàtná ndíi Melquisédéc ní cùu. Te dútú-án ñà túú ní cùu-dé dàtná ní cuu cue ñaní tnáhá ndíi Àrón. <sup>12</sup> Te núú cuè dútú cue tée cùu ñaní tnáhá ndíi Lèví-án ñi ngúndecu ingá dútú. Te sá dúcá<sup>n</sup> ñi ngúndecu ingá dútú xíá<sup>n</sup> dacuítí ñi xini ñúhu-xi sá dăma nàcuáa ndúu tnúhu sá sánú ìchi ñaha xii-yu nàcuáa cada-yu cundecú-yu. <sup>13-14</sup> Te diu-ni cuendá dútú-án sa ñihí-ó tnúhu, te dútú-án cúú Xítóhó Jesucristú, te ñá díú ñàní tnáhá ndíi Àrón cúú-gă chí ñaní tnáhá ndíi Jùdá cúú-gă. Te nchaa-o tà xini ndáá-ó sã ñàní tnáhá ndíi Jùdá cúú-gă, te ndíi Moisés ñá túú tnáhí ná ní càchí ndíi cuendá cue ñaní tnáhá ndíi Jùdá sá cúú-güedé dútú, chí ñi ñ<sup>n</sup>-güedé ñá túú ní cùu-güedé dútú ní cùu.

<sup>15</sup> Te vitna cùtnuní ndáá iní-ó nàcuáa ní cuu, chí Xítóhó Jesucristú cúú-gă ingá dútú dàtná ní cuu ndíi Melquisédéc. <sup>16</sup> Te ñá díú cuendá tnúhu sá sánú ìchi ñaha xii ñáyiu nàcuáa cada-yu cundecú-yu duca<sup>n</sup> ní cùu-gá dútú, chí ní cuu-gá dútú cuendá sá cúú-gă Yaá cundecu ñi caa ñi quíhí<sup>n</sup> chí vá ñ<sup>n</sup> ndúu te ndíhi ñihnu-gá. <sup>17</sup> Te duha ní xáha<sup>n</sup> Yá Ndiöxí xii-gá:

Yòhó cúú-n dütú dàtná ní cuu ndíi Melquisédéc,

te cundecu-n nchaa nduu nchaa quíú.

Duha ní xáha<sup>n</sup> Yá Ndiöxí xii-gá. <sup>18</sup> Te xíá<sup>n</sup> ñúu nchaa tnúhu ndéé díhna, tnúhu sá ñi xíndecu ndíhi cue dútú ñà túú-gă cúnùu-xi vitna chí ñá túú-gă xíni ñúhu-xi te ni ñà túú ñà chíndèe ñaha-xi. <sup>19</sup> Te diu-ni tnúhu-án cúú-xí tnúhu sá ñi chídó tnùní ndíi Moisés canu ìchi ñaha xii ñáyiu nàcuáa cada-yu cundecú-yu. Te tnúhu-án ñà túú vèdana ñi quide-xi nacuáa chindee-xi ñáyiu

cuđiú-yu núú Yá Ndiöxí. Dico vitna ní ngúndecu ndihi-o tñuhu ndee iní sá ïo-gá váha dàcúúxí tñuhu ndéé díhna, chi ndècu ndihi-o Xítohó Jesucristú Yaá cúú dütú-ó. Te Yaá-án quidé-gã tñahá tñuhu-o ndihi Yá Ndiöxí vitna.

<sup>20</sup> Te Yá Ndiöxí ní cáhá<sup>n</sup> ndáá cuiti-gá sá Xítohó Jesucristú cuu-gá dütú. <sup>21</sup> Dico ñá túú dùca<sup>n</sup> ní cáhá<sup>n</sup>-gá cuendá cue ñaní tñahá ndíi Lèví cue téé ní cuu dütú, cuéi mei òré ní chisaha-güedé ní cuu-güedé dütú. Te cútnahá ní chisaha Xítohó Jesucristú cúú-gã dütú, te Yá Ndiöxí ní xáha<sup>n</sup> ndáá cuiti-gã xii-gã, te duha ní xáha<sup>n</sup>-gã:

Yúhú Dütú Ndiöxí cáhá<sup>n</sup> ndáá cuiti-í te vá dãmà-í tñuhu cáhá<sup>n</sup>-í:  
 “Yòhó cúú-n dütú dàtná ndíi Melquisèdec, te cundecu-n nì caa nì quíhí<sup>n</sup>.”

Duha ní xáha<sup>n</sup> Yá Ndiöxí xii Xítohó Jesucristú. <sup>22</sup> Te Xítohó Jesucristú quidé-gã nàcuáa cutnùnì ndáá iní-ó sã Yá Ndiöxí cada-gá ingá núú sã váha sá cúú-xí-ó dàtná ní cachí-gã, te xíã<sup>n</sup> cúú-xí sã ïo-gá váha dàcúúxí tñuhu ní cáhá<sup>n</sup>-gá ndéé díhna. <sup>23</sup> Te ío cuéhé cue ñaní tñahá ndíi Lèví ní cuu-güedé dütú, te duca<sup>n</sup> cuendá sá ñà túú ní cùdíi-güedé cundecu-güedé chi ní ndihi-güedé ní xíhí. <sup>24</sup> Dico Xítohó Jesucristú chi vá cúú-gã, chi cundecu-gã nì caa nì quíhí<sup>n</sup> núu xíã<sup>n</sup> ðiu-ni-gã cuu-gã dütú, te vá yòo ï<sup>n</sup>-gã cuu dütú cada núú-gã. <sup>25</sup> Te núu xíã<sup>n</sup> Xítohó Jesucristú dácãcu nìhnu ñaha-gã xii nchoo ñáyiu núú ùhú núú ndàhú, nchoo ñáyiu sàndáá iní ñahá xii-gã, te ðiu-ni nchoo cùu-o ñáyiu tñahá tñuhu ndihi Yá Ndiöxí, te vá ï<sup>n</sup> ndùu-gã te cuíta nihnu-o. Te duca<sup>n</sup> chi Xítohó Jesucristú ñá túú xòcuíñí-gã núú Yá Ndiöxí cáhá<sup>n</sup> ndàhú-gã cuendá-ó.

<sup>26</sup> Te Xítohó Jesucristú cúú-gã Yaá cúú dütú cùnùu xini ñuhu-o cundecu ndihi-o, te ðiu-gã cúú-gã Yaá chindèe chitúu ñaha xii-o, te cùu-gã Yaá ío quide ndáá núú Yá Ndiöxí, te cùu-gã Yaá cándòo canine chi ñá túú tñahí cuéchi-gã. Te ñá túú tñahí quide-gã dàtná quidé nchàa cue ñáyiu ndècu ichi cuehé ichi duha, te cùu-gã Yaá ní nucúndecu andíu núú ndécú Yá Ndiöxí te yàcá<sup>n</sup> táxí tñùnì-gã. <sup>27</sup> Te ñá túú quide-gã dàtná ní quide cue dütú nì cunuu nì xíndecu, chi cue dütú-ã<sup>n</sup> ï<sup>n</sup> nduu ï<sup>n</sup>

nduu ní xóo cahni-güedé quiti ní xóo nduu táhú Yá Ndiöxí, te díhna-gã cuendá nchaa cuéchi mee-güedé duca<sup>n</sup> ní xóo cada-güedé te dàtnùnì duca<sup>n</sup> ní xóo cada tucu-güedé cuendá nchaa cuéchi ñáyiu. Dico Xítohó Jesucristú chi ï<sup>n</sup> xito-ni ní xíhí-gã sá cúú-xí nchàa ñáyiu chi duca<sup>n</sup> nì sani iní-gã, te vá ï<sup>n</sup> ndùu-gã duca<sup>n</sup> càda tucu-gã. <sup>28</sup> Te sá cuendá nchaa tñuhu ní chídó tñùnì ndíi Moisés xíã<sup>n</sup> ní xíndecu cue téé ní cuu dütú cùnùu, te cue téé-ã<sup>n</sup> ní cuu-güedé cue téé yíca cuéchi-xi. Te sátá dúcá<sup>n</sup> nì chídó tñùnì ndíi Moisés nàcuáa cada ñáyiu, te ní xica cuéhé víhí ndùu te dàtnùnì ní cáhá<sup>n</sup> ndáá cuiti Yá Ndiöxí sá Dèhe-gã cuu-gã dütú cùnùu. Te Yaá cúú Dèhe-gã-ã<sup>n</sup> nì quide-gã nchaa nàcuáa tàù-xi cunduu, te ðiu-ni duca<sup>n</sup> càda-gã nì caa nì quíhí<sup>n</sup>.

## 8

### *Xítohó Jesucristú cúú-gã dütú cùnùu*

<sup>1</sup> Te Xítohó Jesucristú Yaá cúú dütú cùnùu ndecu ndihi-o cuándaa-gã andíu, te ní ngóo-gã xio cùha Dütú Ndiöxí Yaá ío cùnùu, te tñahá-gã cùnùu-gã. Te ðiu cuendá-a cùu-xi sá ïo-gã cùnùu ta cáhá<sup>n</sup>-ndí véxi. <sup>2</sup> Te núú ndécú Yá Ndiöxí cúú-xí núú ìí víhí. Te cada iní-ó sã cúú-xí ï<sup>n</sup> vehe te xíã<sup>n</sup> ndécú Xítohó Jesucristú cúú-gã dütú, te vehe-ã<sup>n</sup> nì dácáá mèe Yá Ndiöxí te ñá díú cuè téé ñuyíú-a. <sup>3</sup> Te sá cuendá nchaa tñuhu ní chídó tñùnì ndíi Moisés xíã<sup>n</sup> ní xíndecu cue dütú cùnùu cuendá sá cáhni-güedé quiti nduu táhú Yá Ndiöxí, te nacani cuendá-güedé núú-gã nchaa dava-gã sá nihí-güedé nduu táhú-gã. Te xíã<sup>n</sup> núu dai ní xini ñuhu-xi sá tñahá Xítohó Jesucristú cuañaha-gã ï<sup>n</sup> sá ndúú táhú Yá Ndiöxí, te táhú-ã<sup>n</sup> cúú-xí mèe-gã chi ní xíhí-gã ní cuu-gã dàtná ï<sup>n</sup> táhú sã cúú-xí Yá Ndiöxí. <sup>4</sup> Te núu nì xíndecu-ni Xítohó Jesucristú ñuyíú-a te vá cúú-gã dütú ní cùu, chi sa ndècu cue dütú sãñaha nchàa sá ndúú táhú Yá Ndiöxí dàtná cáhá<sup>n</sup> nchaa tñuhu ní chídó tñùnì ndíi Moisés. <sup>5</sup> Te nchaa sá quidé cuè dütú ñáyiu isràèl nùtnahá-xi luha nchaa sá quidé Xítohó Jesucristú Yaá cúú dütú cùnùu ndecu andíu. Te quèe ndáá-xi nàcuáa ní xáha<sup>n</sup> Yá Ndiöxí xii ndíi Moisés cútnahá tá cùyatni ngúíta ndíi dacàa ndíi vehe-gã, te duha ní xáha<sup>n</sup>-gã: “Ío váha cada



cuendá-n nàcuáa dacàa-n vehe-í dàtná cáá sã ní dánèhé ñáhà-í xii-n xití yucu”, duha ní xáha<sup>n</sup>-gã xii ndíi. <sup>6</sup> Dico vitna chi Xítoho Jesucristú cúu-gã dútú cùnùu, te ïo-gã càhnu nduu chiu<sup>n</sup> quide-gã dàcúúxí cuè dútú cue ñáyiu isràél. Te ñu Xítoho Jesucristú cúu-gã Yaá quidé tnàhá tnúhu-o ndíhi Yá Ndiöxí, te duca<sup>n</sup> chi Yá Ndiöxí ïo-gã váha ndùu tnúhu ní cáhá<sup>n</sup>-gã xito cùu uú dàcúúxí tnúhu ní cáhá<sup>n</sup>-gã ndéé díhna, te duca<sup>n</sup> ïo váha ndùu tnúhu ní cáhá<sup>n</sup>-gã xito cùu uú chi ní cachí-gã sã ñngá núú sã ïo-gã váha cada ñaha-gã xii-o vitna.

<sup>7</sup> Te núu nàcuáa ní cachí Yá Ndiöxí cada ñaha-gã xii-o ndéé díhna ní quide-xi nchaa nacuaa tàú-xi cunduu nàcuáa nduu táhú-ó cundecu váha-o núu-gã ñá, te ñá túú xini ñuhu-xi cáhá<sup>n</sup> tucu-gã sã cádá-gã ñngá núú sã váha sã cúu-xí-ó vitna ni cuu. <sup>8</sup> Te Yá Ndiöxí ñá túú ní cùu váha iní-gã núú ñáyiu isràél núu xiá<sup>n</sup> ní cáhá<sup>n</sup>-gã cuendá-yu, te duha ní cachí-gã:

Yúhú cúu-í Dútú Ndiöxí, te duha ndùu tnúhu na cáhá<sup>n</sup>-í: Sãá nduu te cada-í ñngá núú sã váha sã cúu-xí cuè ñani tnàhá ñáyiu isràél, ndíhi cue ñani tnàhá ndíi Jüdá ñu-ni ñáyiu isràél.

<sup>9</sup> Te tnúhu sã cáhá<sup>n</sup>-í-a ñá túú ñ<sup>n</sup>-ni cuu-xi ndíhi tnúhu sã ní xáha<sup>n</sup>-í xii cue ñáyiu ní cuu ñani tnàhá-yu ní xíndecu ndéé sanaha càda-í-yu,

te ñu-ni dàvá-á<sup>n</sup> ní quide yica-í ní ndeñuhu-í-yu nació<sup>n</sup> Ègiptú,

te ñá túú ní cuini-yu tní<sup>n</sup>-yu tnúhu ní xáha<sup>n</sup>-í xii-yu cuendá duca<sup>n</sup> càda váha-í-yu,

te xiá<sup>n</sup> núu ní dáñá ñhnu-í-yu ñá túú-gã ní quide cuendá-í-yu.

<sup>10</sup> Te na sãá nduu te duha ndùu tucu ñngá núú sã váha cada-í cue ñáyiu isràél.

Te yúhú cada-í nàcuáa cutnùni váha iní-yu nàcuáa cuini-í cadá-yu,

te duca<sup>n</sup> ní yuhu ni iní-yu cadá-yu.

Te yúhú Yá Ndiöxí quindaha-í-yu,

te mèe-yu cuú-yu ñáyiu cùu cuendá-í.

<sup>11</sup> Te dàvá-á<sup>n</sup> chi ni ñáyiu cùu ndí meé-yu, te ni cuè dava-gã ñáyiu vá cùtnúhu tnàhá-yu sã nátùha ñahá-yu xii-í,

chi dàvá-á<sup>n</sup> nchaa ñáyiu cundecu ndíhi ñahá-yu xii-í,

cuèi ñáyiu cùnùu te cuèi ñáyiu ñá túú cùnùu.

<sup>12</sup> Te dàvá-á<sup>n</sup> cada càhnu iní-í nchaa sã cuèhé sã dúhá quidé-yu,

te vá ñ<sup>n</sup> ndùu-gã ndacu iní-í nchaa sã quidé-yu.

Duha ní cachí Yá Ndiöxí cuendá ñáyiu isràél. <sup>13</sup> Te sã dúcá<sup>n</sup> ní cáhá<sup>n</sup> Yá Ndiöxí sã cádá-gã ñngá núú sã váha sã cúu-xí ñáyiu xiá<sup>n</sup> cutnùni sã tnúhu sã ní cáhá<sup>n</sup>-gã díhna ñá túú-gã xini ñuhu-xi. Te cada iní-ó sã tnúhu-á<sup>n</sup> cúu-xí ñ<sup>n</sup> sã ní cunaha ndècu te ñá túú-gã nándíhi-xi te cuíta-ná-xi, duca<sup>n</sup> sãtnahá-xi cùu tnúhu sã ní cáhá<sup>n</sup>-gã ndéé díhna.

## 9

### *Cuendá vehe Yá Ndiöxí*

<sup>1</sup> Te tnúhu sã ní cáhá<sup>n</sup> Yá Ndiöxí ndéé díhna cùu-xi cuendá nàcuáa cada ñáyiu isràél chiñuhu ñahá-yu xii-gã, ndíhi cuendá vehe-gã caa ñuyú-a. <sup>2</sup> Te ñáyiu isràél ní dácáa-yu vehe Yá Ndiöxí, te vehe-á<sup>n</sup> ní

cuu-xi vehe dóo te ní xúhu<sup>n</sup> nehu xití-xi. Te cuartú díhna ní xínani-xi cuartú ní cuu íí, te xiá<sup>n</sup> ní xíndecu ñ<sup>n</sup> sã ndéé dité-xi sã ní cándodó ñ<sup>n</sup> caa candíl núú dité-xi, te ní xínutnii ñ<sup>n</sup> mèsá ní xóo códo páa ní xóo nduu táhú Yá Ndiöxí. <sup>3</sup> Te cuartú cúu ùú ní xínani-xi cuartú ní cuu íí víhi-gã. <sup>4</sup> Te xití cuartú-á<sup>n</sup> ní xínutnii ñ<sup>n</sup> sã ní cuáha mee-ni díhú<sup>n</sup> cuáa<sup>n</sup> te núu xiá<sup>n</sup> ní xóo cahmi-güedé dúsa sã sãhá<sup>n</sup> tnámí. Te ñu-ni xiá<sup>n</sup> ní xíndecu tucu ñ<sup>n</sup> càjá ní cuu mee-ni díhú<sup>n</sup> cuáa<sup>n</sup> te xití càjá-á<sup>n</sup> ní xúhu<sup>n</sup> ñ<sup>n</sup> lítu ní cuáha

mee-ni díhú<sup>n</sup> cuáa<sup>n</sup>, te xití lítu-á<sup>n</sup> ní xúhu<sup>n</sup> mànáá sã ní xóo caxí-yu dàvá-á<sup>n</sup>. Te ñu-ni

xití càjá-á<sup>n</sup> ní xúhu<sup>n</sup> tnudii ndíi Àrón sã ní saa itá-xi, ndíhi yúú sã ní xíndéé tnúhu ní cáhá<sup>n</sup> Yá Ndiöxí nàcuáa cada ñáyiu. Te duha

ní xínani càjá-á<sup>n</sup>: Càjá sã ñúhú tnúhu ní cáhá<sup>n</sup> Yá Ndiöxí sã cúu-xí ñáyiu, duha ní xínani-xi. <sup>5</sup> Te núu càjá-á<sup>n</sup> ní cándodó ùú

tnàhá sã ní cadúha-yu, te xiá<sup>n</sup> cáá-xí dàtná cáá espíritú xínú cuèchi núú Yá Ndiöxí. Te

cuendá úú xiá<sup>n</sup> ní cutnùni iní-yu sã ïo càhnu cuu Yá Ndiöxí, te sã ní cadúha-yu-á<sup>n</sup> ndéé

ndíxi<sup>n</sup>-xi, te ndíxi<sup>n</sup>-xi-á<sup>n</sup> ñáhu-xi xio xio núú quidé càhnu iní Yá Ndiöxí nchaa yíca cuèchi

ñáyiu, dico vá cúu-gã cáhá<sup>n</sup>-í cuendá nchaa

dava-gã xiá<sup>n</sup> vitna.



6 Te nchaa xiã<sup>n</sup> ní xíndecu xití vehe Yá Ndiöxí, te cue dútú ní xóo quihu-güedé #<sup>n</sup> nduu #<sup>n</sup> nduu xití cuartú díhna ní xóo cada-güedé nàcuáa tàú-güedé cada-güedé sá cúú-xí Yá Ndiöxí. 7 Te cuartú cúú úú-á<sup>n</sup> chi mee-ni dütú cúnùu ní xóo quihu-dé #<sup>n</sup> xito-ni ndi tnahá cuíá. Te ndi tnahá òré duca<sup>n</sup> ní xóo quihu dütú cúnùu-á<sup>n</sup> te ní xóo canehe-dé níñi ní xóo quihu ní xóo nduu táhú Yá Ndiöxí. Te duca<sup>n</sup> ní xóo cada dütú-á<sup>n</sup> cuendá sá Yá Ndiöxí cada càhnu iní-gá nchaa yíca cuèchi mee-dé, ndihi nchaa yíca cuèchi ñáyiú. 8 Te sá dúcá<sup>n</sup> mèe-ni dütú cúnùu ní xóo quihu-dé xití cuartú ní cuu íí-gã-á<sup>n</sup>, xiã<sup>n</sup> Espiritú Yá Ndiöxí quidé-xí cùnnumí iní-ó sã ñini duca<sup>n</sup> ní xíndecu vehe-á<sup>n</sup> ní xóo cada-yu nàcuáa ní xóo cúñaha Yá Ndiöxí cada-yu. Te xiã<sup>n</sup> cùnnumí sá vátá sáa-gá nduu cáhá<sup>n</sup> ndihí-yu Yá Ndiöxí nàcuáa tàú-xi cunduu. 9 Te sá dúcá<sup>n</sup> ní xíndecu vehe-á<sup>n</sup>, ndihi sá dúcá<sup>n</sup> ní xóo cada nchaa cue dütú-á<sup>n</sup>, xiã<sup>n</sup> cùnnumí iní-ó nàcuáa quide Yá Ndiöxí vitna, chi nchaa quití ní xóo cahni cue dütú-á<sup>n</sup> ní xóo nduu táhú Yá Ndiöxí, ndihi nchaa dava-gá sá ní xóo nduu táhú-gã ñá túú ní quide-xi nàcuáa nduu ndoo nduu nine iní cue ñáyiú nàcuáa cutnùní iní-yu sá ñà túú-gã cuèchi-yu ndècu núú Yá Ndiöxí. 10 Te sá dúcá<sup>n</sup> ní xóo cada nchaa dütú-á<sup>n</sup> ní níhí tñáhá-xí ndihi nchaa tñúhu sá dánèhé ñáhá xii ñáyiú ná cúú sã cáxi-yu ndihi ná cúú sã cúú còhó-yu ndihi nàcuáa ndàhá-yu. Te tñúhu-á<sup>n</sup> ní cuu-xi mee-ni sã ní sanu ichi ñaha xii-yu nàcuáa cundecú-yu ñuyíú-a. Te tñúhu-á<sup>n</sup> ní nándíhi-xi ndéé ní sáa nduu ní nadama Yá Ndiöxí tñúhu-á<sup>n</sup> cuendá sá vã dúcá<sup>n</sup>-gã cada-yu cundecú-yu.

11 Te Xítohó Jesucristú ní quixi-gã ñuyíú-a, te diu-gã cúú-gã Yaá cúú dütú cúnùu, te xiã<sup>n</sup> núu quide-gã nchaa sá vãha sá cúú-xí-ó. Te vitna ní nucúndecu-gã núú ío vii ío vãha càa, te núú ndécú-gã-á<sup>n</sup> ñà túú cùu-xi #<sup>n</sup> vehe sá ní dácáa cuè téé ñuyíú-a. 12 Te cada iní-ó sã Xítohó Jesucristú cuánguihu-gã xití cuartú núú ní cuu íí víhi dàtná ní xóo cada dütú cúnùu ní xíndecu ndéé sanaha, chi ní nucúndecu-gã núú ndécú Yá Ndiöxí. Dico ñá túú ní quide-gã dàtná ní xóo cada dütú cúnùu ní xíndecu ndéé sanaha, chi dütú-á<sup>n</sup> òré ní xóo

quihu-dé xití cuartú ní cuu íí-gã-á<sup>n</sup>, te ní xóo canehe-dé níñi chivá ndihi níñi chëhlu ní xóo quihu. Dico Xítohó Jesucristú chi níñi mée-gã ní sati ní xihí-gã núú cùrúxí, te xiã<sup>n</sup> duu<sup>n</sup> duu<sup>n</sup> cuáhá<sup>n</sup>-gã ní nucúndecu-gã núú ndécú Yá Ndiöxí. Te sá dúcá<sup>n</sup> ní quide-gã xiã<sup>n</sup> ní naníhí tàhú-ó. 13 Te nchaa ñáyiú ní xóo cada nàcuáa vã cúú-gã-yu ñáyiú ní cuu íí, ñáyiú-á<sup>n</sup> ní xóo códo ñáhá cuè dütú níñi ndicutu, ndihi níñi chivá, ndihi yáa cùñú chëhlu quití sàhni-güedé cuendá nduu íí tucú-yu. 14 ¡Dico níñi Xítohó Jesucristú chi ío-gã nándíhi-xi sá cúú-xí nchòo ñáyiú xíndecu vitna! Te cuendá níñi-gã-á<sup>n</sup>, chi Espiritú Yá Ndiöxí sá ndécú nchaa nduu nchaa quiú ní cuu #<sup>n</sup>nuu-xi ndihi Xítohó Jesucristú sá cúú cùú-gã cuendá cuu-gã dàtná #<sup>n</sup> táhú sã cúú-xí Yá Ndiöxí cuèi cùu-gã Yaá ñá túú tñáhí cuèchi-xi, te ní sati níñi-gã te ní xihí-gã. Te cuendá xiã<sup>n</sup> ní cutnùní iní-ó sã Yá Ndiöxí ní quide càhnu iní-gã nchaa sá ñà túú vãha ní quide-o, te ní nduu ndoo ní nduu nine iní-ó. Te duca<sup>n</sup> ní nduu ndoo ní nduu nine iní-ó cuendá sá ndácú-ó cùnu cuèchi-o núú Yá Ndiöxí Yaá ndécú nchaa nduu nchaa quiú.

15 Te Xítohó Jesucristú ní quide ndáa-gã núú Yá Ndiöxí cuendá cue ñáyiú ndècu ñuyíú-a. Te cuendá xiã<sup>n</sup> Yá Ndiöxí cada-gã ingá núú sã vãha sá cúú-xi-yu dàtná ní cachí-gã, te duca<sup>n</sup> càda-gã sá cuendá nchaa ñáyiú ní cáhá<sup>n</sup>-gã cundecu ndihí-gã, chi ñáyiú-á<sup>n</sup> nduu táhú-yu cundecu ndihi vãha ñáhá-yu xii-gã ní caa ní quihí<sup>n</sup> chi duca<sup>n</sup> ní cachí-gã, te duca<sup>n</sup> chi Xítohó Jesucristú ní xihí-gã núú cùrúxí cuendá sá Yá Ndiöxí cada càhnu iní-gã nchaa yíca cuèchi-yu, nchaa cuèchi sá ní quide-yu cutnàhá ní cunuu tñúhu sá ní cáhá<sup>n</sup>-gã díhna. 16 Te nchoo xini-ó sã núu #<sup>n</sup> téé na càdúha #<sup>n</sup> tutú nàcuáa cada ñáyiú dàcáhñu-yu nchaa sá ndécú ndihí-dé, te tutú-á<sup>n</sup> xini ñúhu-xi ndéé ná yãha nduu cùú-dé. 17 Te ñá túú tàú-xi cada ñáyiú nàcuáa cáhá<sup>n</sup>-xi núú tütú-á<sup>n</sup> ñini ndècu téé ní cadúha, dico sátá ná yãha cuú-dé te cada-yu nàcuáa cáhá<sup>n</sup>-xi. 18 Te cuèi tñúhu ní cáhá<sup>n</sup> Yá Ndiöxí ndéé díhna nàcuáa cada vãha-gã ñáyiú, te diu-ni ndihi níñi ní cundáa-xi chi ní sàhni-güedé quití

te ní sati níñí-güedi. <sup>19</sup> Te ndí Moisés ní cáhá<sup>n</sup> ndodo ndí núu ncháa ñáyi nàcuáa ní cachí Yá Ndióxi cada-yu, te nàcuáa-ni nduu tnúhu ní chídó tnúni ndí núu tütú ndí ní cáhá<sup>n</sup> ndí, te ní dácá ndí ndute níñí chēhlu ndíhi níñí chívá līhli, te ní quehe<sup>n</sup> ndí ñ<sup>n</sup> dité yutnu nani hisópó ndíhi luha idi tīcuéhé, te ní chindóyo ndí níñí-á<sup>n</sup>. Te ní sódo ndí núu tütú ndéé tnúhu Yá Ndióxi sá ní chídó tnúni ndí-á<sup>n</sup>, te tnáhá cue ñáyi xīndecu-á<sup>n</sup> ní chúcú ndí. <sup>20</sup> Te ní xáha<sup>n</sup> ndí Moisés xī-yu: “Cuèndá níñí-a ní cundáá sá Yá Ndióxi cada ñaha-gá xii-ndo sá vāha chi duca<sup>n</sup> ní cachí-gá cada-gá sá cúu-xí-ndó”, duha ní xáha<sup>n</sup> ndí xī-yu. <sup>21</sup> Te díu-ni duca<sup>n</sup> ní quide tucu ndí ní chúcú ndí níñí vehe-gá ndíhi ncháa sá nándíhi-güedé òré chíñùhu-güedé Yá Ndióxi ndécú xítí vehe-gá-á<sup>n</sup>. <sup>22</sup> Te tnúhu ní chídó tnúni ndí Moisés càchí-xi sá méé-ní níñí chucu-güedé ncháa sá cānehe chiñù-güedé òré chíñùhu-güedé Yá Ndióxi, te sacú-ná te ndíhi ndoo ncháa xíá<sup>n</sup> chucu-güedé níñí ní cūu. Te dacuítí ní xini ñuhu-xi sá cáti níñí cuèndá duca<sup>n</sup> cada cahnu iní Yá Ndióxi ncháa yíca cuéchi ñáyi.

*Xítoho Jesucristú ní xíhí-gá núu cùrúxi cuèndá sá vā cùndecu-gá cuéchi-o nūú Yá Ndióxi*

<sup>23</sup> Te sá cuèndá sá ní xíhí Xítoho Jesucristú núu cùrúxi, xíá<sup>n</sup> ñá túu-gá cuéchi-o ndècu núu Yá Ndióxi. Te cuèndá ncháa sá ní xíhí xítí vehe-gá sá ní dácáá ñáyi isràél xíá<sup>n</sup> cútnúni iní-ó nàcuáa quide-xi núu ndécú-gá. Te dacuítí ní xini ñuhu-xi sá cáhni-güedé cue quití ní cachí Yá Ndióxi cuèndá nduu íi ncháa sá ní xíhí xítí vehe-gá-á<sup>n</sup>. Te cuéi duca<sup>n</sup> ní sahani-güedé cue quití-á<sup>n</sup> dico ñá túu ní quide-xi nàcuáa ngúndecu váha-o nūú Yá Ndióxi. Dico Xítoho Jesucristú ní xíhí-gá, te sá ní xíhí-gá xíá<sup>n</sup> ní quide-gá nàcuáa ngúndecu váha-o nūú Yá Ndióxi. <sup>24</sup> Te Xítoho Jesucristú cuándaa-gá andíu nūú ndécú Yá Ndióxi cáhá<sup>n</sup> ndàhú-gá cuèndá-ó, te Xítoho Jesucristú chi ñá díu ñ<sup>n</sup> vehe ní dácáá cué téé ñuyú-a cuánguihu-gá. Te vehe Yá Ndióxi sá ní dácáá cué ñáyi isràél ñuyú-a ndéé sanaha, ndíhi ncháa

nàcuáa ní xóo cada-güedé xítí vehe-gá-á<sup>n</sup> xíá<sup>n</sup> cútnúni iní-ó nàcuáa quide-xi núu ndécú-gá. <sup>25</sup> Te dútú cúnúu núu ñáyi isràél ní xóo quíhu-dé núu cuíá núu cuíá xítí cuártú ní cuu íi víhí-gá-á<sup>n</sup>, te ní xóo canehe-dé níñí ní xóo quíhu xítí cuártú-á<sup>n</sup> dico ñá díu níñí méé-dé. Dico Xítoho Jesucristú chi ñá túu duca<sup>n</sup> ní quide-gá chi ñ<sup>n</sup> xito-ni ní sati níñí-gá te ní xíhí-gá. <sup>26</sup> Chi núu ní xíhí-gá nuu núu te ndéé cútnáhá ní ngáva ñuyú duca<sup>n</sup> ngüita-gá cada-gá ní cūu, te vitna ta ndíhi nduu cuáhá<sup>n</sup> ní quixi-gá ñuyú-a ní xíhí-gá ñ<sup>n</sup> xito-ni cuèndá cuu-gá dàtná ñ<sup>n</sup> táhú sá cúu-xí Yá Ndióxi, te duca<sup>n</sup> ní quide-gá cuèndá sá vā cùndecu-gá cuéchi ñáyi núu Yá Ndióxi. <sup>27</sup> Te nchoo cué ñáyi ñuyú-a chi ñ<sup>n</sup> xito-ni cuú-ó te dàtnúni duca<sup>n</sup> te cada ndáá Yá Ndióxi cuéchi-o. <sup>28</sup> Te duca<sup>n</sup> sátnahá-xi cūu Xítoho Jesucristú chi ñ<sup>n</sup> xito-ni ní xíhí-gá cuèndá sá vā cùndecu-gá cuéchi ñáyi núu Yá Ndióxi, te duca<sup>n</sup> ní cuu ní xíhí-gá chi mee-gá duca<sup>n</sup> ní cachí-gá cunduu. Te quixi tucu Xítoho Jesucristú ñuyú-a dico ñá díu-gá sá cáda-gá cuèndá sá vā cùndecu-gá cuéchi ñáyi núu Yá Ndióxi, chi quixi-gá nacuaca-gá ncháa ñáyi ndètu ñaha xii-gá cuèndá cundecú-yu ndíhi-gá ní caa ní quíhí<sup>n</sup>.

## 10

<sup>1</sup> Te ncháa tnúhu ní xáha<sup>n</sup> ndí Moisés xii ñáyi isràél cada-yu, ncháa tnúhu-á<sup>n</sup> ní quide-xi ní cutnúni luha iní-yu nàcuáa cada Yá Ndióxi cada váha ñaha-gá xii-o vitna. Dico ñá díu mèi nàcuáa ní xáha<sup>n</sup> ndí Moisés xii ñáyi quide Yá Ndióxi vitna chi dáma quide-gá. Te ncháa tnúhu ní cáhá<sup>n</sup> ndí Moisés ñá túu ní ndàcu-xi cada-xi nàcuáa cundáá ncháa ñáyi túha ñaha xii Yá Ndióxi cuéi ní xóo cahni-güedé quití ní xóo nduu táhú-gá núu cuíá núu cuíá. <sup>2</sup> Te núu dicó sá ní xóo cahni-güedé quití ní xóo nduu táhú Yá Ndióxi ní quide-xi nàcuáa nduu ndoo nduu nine iní cue ñáyi, te vá cáhni-gá-güedé cue quití-á<sup>n</sup> nduu táhú-gá ní cūu, te duca<sup>n</sup> te cutnúni iní-yu sá ñá túu-gá cuéchi-yu ndècu núu Yá Ndióxi ní cūu. <sup>3</sup> Te sá dúcá<sup>n</sup> ní xóo cahni-güedé quití ní xóo nduu táhú Yá Ndióxi núu cuíá núu cuíá, xíá<sup>n</sup> ní xóo ndacu iní cue ñáyi ncháa sá

cuèhé sá dúhá nǐ xóo cada-yu. <sup>4</sup> Te duca<sup>n</sup> chi níñí ndicutu-á<sup>n</sup> ndihí níñí chivá-á<sup>n</sup> ñà túú ní xóo ndacu-xi cada-xi nàcuáa vá cündècu cuèchi-yu núú Yá Ndiöxí.

<sup>5</sup> Te xiá<sup>n</sup> núu cútnàhá ní quexìo Xítohó Jesucristú ñuyíú-a ní xáha<sup>n</sup>-gǎ xii Yá Ndiöxí: Yòhó Tǎtà-í, ñà túú ndùu vétú váha iní-n sǎ sǎhni-güedé quití ndùu táhú-n, te ni ñà túú ndùu vétú váha tucu iní-n cuendá nchaa dava-gǎ sá táxi-güedé ndúú táhú-n,

núu xiá<sup>n</sup> ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

<sup>6</sup> Te ni ñà túú ndùu vétú váha iní-n cuendá quití sǎhmi-güedé ndúú táhú-n te ni ñà túú ndùu vétú váha iní-n cuendá nchaa dava-gǎ sá táxi-güedé ndúú táhú-n cuendá sá vǎ cündècu-gǎ cuèchi ñáyíu núú-n.

<sup>7</sup> Núu xiá<sup>n</sup> yúhú ní cachí-í xii yòhó Tǎtà-í Dútú Ndiöxí sá yúhú véxi-í ñuyíú-a cada-í nchaa sá cuiní-n cada-í dàtná yódó tnùnì cuendá-í núú tütú-n.

Duha ní xáha<sup>n</sup> Xítohó Jesucristú xii Tǎtà-gǎ Dútú Ndiöxí. <sup>8</sup> Te Xítohó Jesucristú díhna-gǎ ní xii-gǎ Yá Ndiöxí Yaá cúú Tǎtà-gǎ: “Yòhó Tǎtà-í ñà túú ndùu vétú váha iní-n cuendá quití sǎhni-güedé ndúú táhú-n, ndihí cuendá quití sǎhmi-güedé ndúú táhú tucu-n cuendá sá vǎ cündècu-gǎ cuèchi ñáyíu núú-n, ndihí cuendá nchaa dava-gǎ táhú sǎ táxi-güedé xii-n ñà túú ndùu vétú váha iní-n cuendá nchaa xiá<sup>n</sup>”, duha ní xáha<sup>n</sup> Xítohó Jesucristú xii Tǎtà-gǎ Dútú Ndiöxí. Te duca<sup>n</sup> nǐ xáha<sup>n</sup>-gǎ cuèi núú tütú ndíi Moisés yódó tnùnì sá dúcá<sup>n</sup> cada-güedé.

<sup>9</sup> Te sátá dúcá<sup>n</sup> te ní xáha<sup>n</sup> tùcu-gǎ xii Tǎtà-gǎ Dútú Ndiöxí: “Yòhó Tǎtà-í Dútú Ndiöxí, mee-í véxi-í ñuyíú-a cuendá cada-í nchaa nàcuáa cuiní-n”, duha ní xáha<sup>n</sup>-gǎ xii Tǎtà-gǎ. Te sátá dúcá<sup>n</sup> nǐ cáhá<sup>n</sup> Xítohó Jesucristú xiá<sup>n</sup> ní cutnùnì sá ñà túú-gǎ xíní ñùhu-xi duca<sup>n</sup> cada-güedé cahni-güedé nchaa quití-á<sup>n</sup>, te duca<sup>n</sup> chi mee Xítohó Jesucristú ní xihí-gǎ ní cuu-gǎ dàtná ñ<sup>n</sup> táhú sǎ cúú-xí Yá Ndiöxí, te duca<sup>n</sup> nǐ cuu chi duca<sup>n</sup> tnàhí ní cachí Yá Ndiöxí cunduu.

<sup>10</sup> Te Xítohó Jesucristú ní quide-gǎ nàcuáa ní cuiní Yá Ndiöxí cada-gǎ, chi ní xihí-gǎ núú cùrúxí chi duca<sup>n</sup> nǐ cuiní méé-gǎ cunduu, te ñ<sup>n</sup> xito-ni ní xihí-gǎ sá cuendá nchaa ñáyíu,

te cuendá xiá<sup>n</sup> núu ndècu yiñuhu-o núú-gǎ vitna.

<sup>11</sup> Te cue dútú ñáyíu israél chi ñ<sup>n</sup> nduu ñ<sup>n</sup> nduu ní xóo cahni-güedé quití ní xóo nduu táhú-gǎ, te ñà túú ní dàma-güedé nàcuáa ní xóo cada-güedé. Te nchaa sá nǐ xóo cada-güedé-á<sup>n</sup> ñà túú ní quide-xi nàcuáa vá cündècu-gǎ cuèchi ñáyíu núú Yá Ndiöxí.

<sup>12</sup> Dico Xítohó Jesucristú ní cachí-gǎ sá cúú cùú-gǎ, te ní xihí-gǎ núú cùrúxí cuendá nchaa yícá cuèchi nchaa nchoo ñáyíu ndècu ñuyíú-a. Te sátá dúcá<sup>n</sup> te dàtnùnì ní ngóo-gǎ xio cùha Dútú Ndiöxí táxi tnùnì-gǎ, te vá ñ<sup>n</sup> nduu ñ<sup>n</sup> quiú-gǎ te cuú-gǎ.

<sup>13</sup> Te ñ<sup>n</sup> ni xiá<sup>n</sup> cundecu-gǎ cundetu-gǎ ndéé sáá nduu cànehe nchaa sá cúú ùhú iní ñáhá xii-gǎ sá yiñuhu núú-gǎ. <sup>14</sup> Te cuendá sá nǐ xihí Xítohó Jesucristú ñ<sup>n</sup> xito-ni xiá<sup>n</sup> ní cuu-gǎ dàtná ñ<sup>n</sup> táhú sǎ cúú-xí Yá Ndiöxí, xiá<sup>n</sup> ní quide-xi sá ncháá ñáyíu cùu cuendá-gǎ ñà túú-gǎ ná cumání-yu núú-gǎ ni caa ni quihí<sup>n</sup>. <sup>15</sup> Te mee Espiritú Yá Ndiöxí cáhá<sup>n</sup> ndáá-xi nàcuáa ní cáhá<sup>n</sup>-gǎ cuendá-ó, te duha ní cáhá<sup>n</sup>-gǎ:

<sup>16</sup> Sáá nduu te cada-í nchaa ñáyíu nàcuáa na cáhá<sup>n</sup>-í-a,

te cada-í nàcuáa cutnùnì iní-yu tnúhu sá dánèhé-í-yu tnúhu sá cánúichi ñaha xií-yu nàcuáa cada-yu cundecú-yu,

te cada tucu-í sá tní-yu nchaa tnúhu-á<sup>n</sup>. Duha ní cachí-gǎ. <sup>17</sup> Te ní cachí tucu-gǎ:

Te vá ñ<sup>n</sup> nduu ñ<sup>n</sup> quiú-gǎ ndacu iní-í sá quidé sáá iní-yu tnúhu-í,

te ni vá ñ<sup>n</sup> nduu ñ<sup>n</sup> quiú-gǎ te ndacu iní-í nchaa sá cuèhé sá dúhá quidé-yu.

Duha ní cáhá<sup>n</sup> Yá Ndiöxí cáhí Espiritú-gǎ.

<sup>18</sup> Te sátá dúcá<sup>n</sup> quide cahnu iní Yá Ndiöxí nchaa cuèchi-o, núu xiá<sup>n</sup> ñà túú-gǎ xíní ñùhu-xi cuú quití nduu táhú-gǎ cuendá nchaa sá cuèhé sá dúhá quide-o.

### *Tàú-ó sǎ tnàhá tnúhu-o ndihí Yá Ndiöxí*

<sup>19</sup> Te cue dútú nǐ xóo cunuu núu ñáyíu israél cue téé-á<sup>n</sup> nǐ xóo quihu-güedé xití cuártú ní cuu íí víhí-gǎ. Dico nchoo cuè ñáyíu ndècu ichi Xítohó Jesucristú vitna tàú-ó sǎ nǐ yuhu ni iní-ó tnàhá tnúhu-o ndihí Yá Ndiöxí. Te cuu tnàhá tnúhu-o ndihí-gǎ chi Xítohó Jesucristú ní sati níñí-gǎ te ní xihí-gǎ núú cùrúxí. <sup>20</sup> Te cada iní-ó sǎ



dóo sã ní xíndedí nàcuáa ní xóo quíhu-güedé xítí cuártú ní cuu íí víhí-gã-á<sup>n</sup> ní xócuñí, te duca<sup>n</sup> càda iní-ó chi Xítohó Jesucristú ní xíhí-gá cuendá nchoo ñhí-ó nàcuáa cada-o ngündecu váha-o sã cúu-xí-gã. <sup>21</sup> Te ñu-gã cúu-gã Yaá cúu ñtú-ó, te ñu-gã cúu-gã Dútú cúnüu ndecu-gá núu ndécú Yã Ndiöxí. <sup>22</sup> Núu xíã<sup>n</sup> xíní ññhu-xi sã ño tnahá tñuhu-o ññhi Yã Ndiöxí, te vá cáni ññ<sup>n</sup> caní úu iní-ó, te ío váha quindáa iní-ó-gã chi ñu-gã ní ndada ndoo ní ndada nine-gá iní-ó cuendá nchoo cùtnuní iní-ó sã ñã túu-gã cuéchi-o ndècu núu-gã. Te ní sandute-o cuendá sã dúcá<sup>n</sup> ní nduu ndoo ní nduu nine iní-ó. <sup>23</sup> Te nchoo càhá<sup>n</sup> ndáá-ó sã ndécú ññhi-o tñuhu ndee ññí sã ndúú tãhú-ó cùndecu ññhi-o Yã Ndiöxí, te xíni ññhu-xi sã vá dáñá ndèé-ó càncicú<sup>n</sup> ññhu-o tñuhu ndee ññí-án<sup>n</sup> chi Yã Ndiöxí cada-gã nàcuáa ní cachí-gá sã cúu-xí-ó. <sup>24</sup> Te xíni ññhu-xi cuhu<sup>n</sup> iní tñáhá-ó te chindee tñaha-o nacuáa duca<sup>n</sup> cùu iní tñáhá-gã-ó, te cada-o mée-ni sã váha. <sup>25</sup> Te nchoo vá dáñá ndèé-ó nàtacá-ó núu dácuàha-o tñuhu Yã Ndiöxí, te vá cáda-ó dàtná xíquide davá-yu ñã túu-gã cuíni-yu quixí-yu núu dácuàha-o tñuhu-gã. Chi xíni ññhu-xi sã cuàha tñaha-o tñuhu ndee ññí canchicú<sup>n</sup> ññhu-o ñchi-gã, te uu<sup>n</sup>-gã duca<sup>n</sup> taú-xi cada-o vitna ta cuyatni nduu quixi tucu Xítohó Jesucristú ñuyíu-a.

<sup>26</sup> Te cue ñáyiu sa ní tecú tñuní nàcuáa càhá<sup>n</sup> tñuhu Yã Ndiöxí te núu na ngüita-yu ññucú<sup>n</sup> cadá-yu nándi sã cuèhé sã dúhá, te àú<sup>n</sup> ñã cuu ní xíhí Xítohó Jesucristú cuendá-yu, te ni vá yóo ññ<sup>n</sup>-gã cuú cuendá sã vá cùndecu-gã cuéchi-yu núu Yã Ndiöxí. <sup>27</sup> Te núu duca<sup>n</sup> na càda-yu nándi sã cuèhé sã dúhá, te ío quiyùhú iní-yu nàcuáa cada ñaha Yã Ndiöxí xii-yu. Chi nchaa ñáyiu cùu úhú iní ñáhá xii-gã daquihí<sup>n</sup> ñáhá-gã xii-yu núu ññhú núu càyú núu ño ndohó-yu. <sup>28</sup> Te nchaa ñáyiu ní xóo daquèe tihú tñuhu ní cáhá<sup>n</sup> ndíi Moisés, te núu ndècu úu àdi úní ñáyiu càhá<sup>n</sup> ndáá sã dúcá<sup>n</sup> ní dáquée tihú-yu tñuhu ní cáhá<sup>n</sup> ndíi, te vá yóo ní xóo cundàhú iní ñáhá xii nchaa ñáyiu duca<sup>n</sup> ní xóo cada chi ní xóo cahni ñaha-güedé. <sup>29</sup> Te núu duca<sup>n</sup> ní ndoho cue ñáyiu duca<sup>n</sup> ní dáquée tihú tñuhu ní cáhá<sup>n</sup> ndíi Moisés-án<sup>n</sup>, te uu<sup>n</sup>-gã ndoho cue ñáyiu dàquee tihú ñáhá xii Xítohó Jesucristú Yaá cúu Dèhe Yã

Ndiöxí ñu-ni ñáyiu càchí sã ñã túu nándihi ññí-gã. Te ññí-gã-á<sup>n</sup> ní sati, te ní xíhí-gá, te duca<sup>n</sup> ní cuu cuendá cada Yã Ndiöxí ingá núu sã váha sã cúu-xí nchòo ñáyiu ndècu ñuyíu-a dàtná ní cachí-gá cada-gã. Te ñu-ni cuendá ññí-gã-á<sup>n</sup> ní nduu ndoo ní nduu nine iní cue ñáyiu-án<sup>n</sup> ní cùu, te ñu-ni ñáyiu-án<sup>n</sup> càhá<sup>n</sup> úhú-yu Espiritú Yã Ndiöxí sã chindèe chitúu ñaha xii-o. <sup>30</sup> Te nchoo sã naha-o sã Yã Ndiöxí càchí-gã ññ<sup>n</sup> xichi núu tütú-gã: “Yúhú cada-í te nacháhu ñáyiu nchaa sã quidè-yu, te duha càhá<sup>n</sup>-í chi nachinaa-í cuendá nchaa sã quidè-yu-án<sup>n</sup>”, duha càchí-gã. Te sa ñaha tucu-o nacuáa càhá<sup>n</sup>-xi núu tütú-gã núu càchí-xi: “Yã Ndiöxí cada ndáá-gã cuendá nchaa sã quidè ñáyiu cùu cuendá-gã”, duha càchí-xi núu tütú-gã. <sup>31</sup> Te ío ndàhú ndoho cue ñáyiu na dàndoho ñaha Yã Ndiöxí, te ñu-gã cúu-gã Yaá cúnüu nchaa nduu nchaa quíu!

<sup>32</sup> Te chí dándacu iní nàcuáa ní quide-ndo cùtnáhá vitna cuu saa ní tecú tñuní-ndó tñuhu Yã Ndiöxí, chi dàvá-á<sup>n</sup> ní quide càhnu iní-ndó cuèi nándi sã ní yáha-ndo cuendá-gã. <sup>33</sup> Te dava-ndo ní quide úhú ñáhá ñáyiu xii-ndo núu chítú núu tàcá, te nándi tñuhu cuèhé tñuhu duha ní xáhã<sup>n</sup>-yu xii-ndo. Te dava-ndo ní cuyñi-ni-ndo ní xíndecu ññhi tñaha-ndo cuèi nándi ní ndoho dava-gã-ndó. <sup>34</sup> Te ní cundàhú iní-ndó cuè ñáyiu yíhi vecaá, te cuèi ní quendeé ñáyiu sã ndécú ññhi-ndo dico ñã túu ní ndíhú iní-ndó chi ní cudíi-ni iní-ndó. Te duca<sup>n</sup> ní quide-ndo chi sa ñaha-ndo sã ndúú tãhú-ndó sã ño-gã váha, te xíã<sup>n</sup> cundecu ññhi-ndo ní caa ní quíhí<sup>n</sup>. <sup>35</sup> Te xíã<sup>n</sup> vá dáñá ndèé-ndó quindáa iní-ndó nàcuáa ní cachí Yã Ndiöxí cada ñaha-gã xii-ndo, chi sáa nduu te ío váha cada ñaha-gã xii-ndo. <sup>36</sup> Te nchòhó xíní ññhu-xi ío cada ndee ññí-ndó càda-ndo nchaa nacuáa càhá<sup>n</sup> Yã Ndiöxí, te duca<sup>n</sup> te nduu tãhú-ndó sã ní cachí-gã nduu tãhú-ndó cùndecu ññhi-ndo ní caa ní quíhí<sup>n</sup>. <sup>37</sup> Te Yã Ndiöxí càchí-gã núu tütú-gã:

Ta cùyatni víi-ñã nduu quixi Yaá quixi ñuyíu-a, te vá cùyàa-gã.

<sup>38</sup> Te nchaa ñáyiu cundáa núu-í ñã túu dàña ndeé-yu sàndáa iní ñáhã-yu xii-í, te cuendá xíã<sup>n</sup> cundecu-ní-yu ñchi-í,



dico núu na dàñá-yu ichi-í te vá cúu vâha iní-í núu-yu.

Duha càchí Yă Ndiöxí núu tùtú-gá.

<sup>39</sup> Dico nchoo chi ñá túu cùu-o ñáyiu duca<sup>n</sup> xíquide dàñá-ó ichi Yă Ndiöxí, chi cùu-o ñáyiu nchícú<sup>n</sup> nihnu-ni sàndáá iní-ó-gă, te sá dúcá<sup>n</sup> te nduu táhú-ó cùndecu-o ndihí-gá ni caa ni quíhí<sup>n</sup>, te ñá túu cùu-o ñáyiu dàña nihnu ichi-gá te xíta nihnú-yu.

## 11

### *Ñáyiu sàndáá iní ñáhá xii Yă Ndiöxí*

<sup>1</sup> Te núu sàndáá ndisa iní-ó Yă Ndiöxí te duca<sup>n</sup> cùtnuní ndáá iní-ó sá nihí-ó sá cuení-ó núu-gă. Te núu sàndáá iní-ó-gă te duca<sup>n</sup> cùtnuní ndáá tucu iní-ó sá càhá<sup>n</sup> ndáá-gá cuendá nchaa sá ñà túu xini-ó. <sup>2</sup> Te duca<sup>n</sup> nǐ quide ñáyiu ní xíndecu ndéé sanaha ío ní sàndáá iní-yu Yă Ndiöxí te xíá<sup>n</sup> núu ío váha ní cuu iní ñáhá-gă xii-yu.

<sup>3</sup> Te núu nchoo sàndáá ndisa iní-ó Yă Ndiöxí te cùtnuní ndáá iní-ó sá sá cuendá tnúhu ní cáhá<sup>n</sup>-gá ní cuáha andíu ndihí ñuyíú-a. Te cùtnuní iní-ó sá ñà díu sá cuendá ñ<sup>n</sup> sá túu ndèhe-o ío ñuyíú-a ní cuáha andíu ndihí ñuyíú-a.

<sup>4</sup> Te ndíi Àbél ío ní sàndáá iní ndíi Yă Ndiöxí núu xíá<sup>n</sup> ío-gá ní cuu iní-gá sá ní sáñaha ndíi ní nduu táhú-gă dàcúúxí sá ní sáñaha ndíi Càin xii-gá ní nduu táhú-gă. Te ndíi Àbél-á<sup>n</sup> nǐ cutnùní iní ndíi sá ní cudíu ndíi núu Yă Ndiöxí cuendá sá ní quehe<sup>n</sup> cuendá-gá sá ní sáñaha ndíi ní nduu táhú-gă. Te cuéi ñá túu-gă ndíi ndècu ñuyíú-a dico yòdo tnuní sá ní sàndáá iní ndíi Yă Ndiöxí cuendá duca<sup>n</sup> càda-o canchicú<sup>n</sup> nihnu-o.

<sup>5</sup> Te té Ènóc téé ní xíndecu ndéé sanaha ñà túu ní xihí-dé chi ní nacuaca ñaha túu Yă Ndiöxí xii-dé cuendá sá ní sàndáá iní ñáhá-dé xii-gá. Te vá yòo ní nànihí ñáhá xii-dé chi mee-gă ní nacuaca ñaha-gă xii-dé. Te núu tùtú Yă Ndiöxí càchí-xi sá cùtnàhá vátá nàcuàca ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gă xii-dé. <sup>6</sup> Te nchaa ñáyiu ñá túu sàndáá iní ñáhá xii Yă Ndiöxí ñá ndácú-yu cadá-yu nàcuáa cudíu-yu núu-gă, chi nchaa ñáyiu cuení tuha ñaha xii-gá xini ñuhu-xi sá quíndáá iní-yu sá ndécú-gă, te quíndáá

iní-yu sá núu na nànducu nihnu ñáhá-yu xii-gá te cuáñaha-gă xii-yu sá ndúú tãhú-yu.

<sup>7</sup> Te Yă Ndiöxí ní dátúha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáha<sup>n</sup> Yă Ndiöxí cada ndíi, te ní cadúha ndíi ñ<sup>n</sup> bàrcú cuendá xití bàrcú-á<sup>n</sup> quée ndíi ndihí nchaa ñáyiu vehe ndíi cuendá cácu nihnú-yu. Te duca<sup>n</sup> nǐ quide ndíi chi ní sàndáá iní ndíi Yă Ndiöxí. Te sá dúcá<sup>n</sup> nǐ sàndáá iní ndíi-á<sup>n</sup> Yă Ndiöxí xíá<sup>n</sup> ní cutnùní sá ncháá ñáyiu ío ndècu cuéchi-yu, chi ñá túu ní cànchicú<sup>n</sup> nihnú-yu cadá-yu nàcuáa ní quide ndíi. Te sá dúcá<sup>n</sup> nǐ quide ndíi ní sàndáá iní ndíi Yă Ndiöxí xíá<sup>n</sup> ío ní cundáá ndíi núu-gă.

<sup>8</sup> Te Yă Ndiöxí ní xáha<sup>n</sup>-gă xii ndíi Àbrahám sá quée ndíi ñuu núu ndécú ndíi quíhí<sup>n</sup> ndíi ñngá xichi cundecu ndíi. Te ní quide ndíi nàcuáa ní xáha<sup>n</sup> Yă Ndiöxí chi ní quee ndíi cuáhá<sup>n</sup> ndíi núu cuáñaha Yă Ndiöxí cundecu ndíi. Te òré ní quee ndíi núu ndécú ndíi te ñá túu ní cùtnuní iní ndíi ndéé cúu núu cuáhá<sup>n</sup> ndíi cundecu ndíi. Te duca<sup>n</sup> nǐ quide ndíi chi ní sàndáá iní ndíi Yă Ndiöxí. <sup>9</sup> Te sá dúcá<sup>n</sup> nǐ sàndáá iní ndíi Yă Ndiöxí núu xíá<sup>n</sup> ní xíndecu ndíi núu nǐ sáñaha-gă cundecu ndíi, te cuéi duca<sup>n</sup> dico ñá túu ní quide ñuu ndíi xíá<sup>n</sup>. Te ní xóo cundecu ndíi vehe cùtexínu vehe dóo. Te díu-ni duca<sup>n</sup> nǐ quide ndíi Isàác ndihí ndíi Jàcób chi tnàhá cue ndíi-á<sup>n</sup> nǐ cachí Yă Ndiöxí sá ndúú tãhú cue ndíi xíá<sup>n</sup> cundecu cue ndíi. <sup>10</sup> Te duca<sup>n</sup> nǐ quide ndíi Àbrahám chi ní xíndetu ndíi ndéé ní sáá nduu ndúu táhú ndíi cundecu ndíi núu ndécú Yă Ndiöxí. Te núu ndécú-gă-á<sup>n</sup> cúu-xi ñuu ní cadúha mee-gă, te ñuu-á<sup>n</sup> cudíi-xi ni caa ni quíhí<sup>n</sup>.

<sup>11</sup> Te ndíi Sàrá, sa ní xídó cuá ndíi sá cóo dèhe ndíi chi sa ní sahnu víhi ndíi, dico Yă Ndiöxí ní quide-gá te ní xóo ñ<sup>n</sup> déhe ndíi. Te duca<sup>n</sup> chi ní sàndáá iní ndíi Yă Ndiöxí te ní cutnùní ndáá iní ndíi sá cadá-gă nàcuáa ní xáha<sup>n</sup>-gă xii ndíi. <sup>12</sup> Te cuéi ío ní sahnu ndíi Àbrahám ndihí ñadíhí ndíi, ndíi Sàrá dico dacuitíi nǐ nduu táhú-yu ní xóo ñ<sup>n</sup> déhe-yu. Te xíá<sup>n</sup> núu ío cuéhé ndíquín yává ndíi Àbrahám ní cáyá dàtná cuéhé chòdíní ndéé andíu, ndihí dàtná cuéhé ñuhu cúchí làmár, chi ní vã yòo ñ<sup>n</sup> ndacu cahu ñaha xii-yu sá cuéhé-yu.

<sup>13</sup> Te cue ndíi-á<sup>n</sup> duca<sup>n</sup>-ni nǐ sàndáá iní cue ndíi Yă Ndiöxí ndéé ní sáá nduu nǐ xihí

cue ndíi. Te cue ndíi-án ñà túú ní ndùu táhú cue ndíi quini cue ndíi nchaa nàcuáa ní cachí Yá Ndiöxí cada-gá, dico ní cutnùni ndáá iní cue ndíi-án nàcuáa cada-gá núu cuahá<sup>n</sup> núu vëxi. Te ío ní cudíí iní cue ndíi, te ní cachí cue ndíi sá dícó-ni ichi yáha cue ndíi ñuyíú-a, chi ñá díú ñuyíú-a cundecu duca<sup>n</sup> cue ndíi. <sup>14</sup> Te sá dúcá<sup>n</sup> ndùu tnúhu ní cáhá<sup>n</sup> cue ndíi-án, xiá<sup>n</sup> ní cutnùni sá cuini cue ndíi ingá xichi núu cundècu cue ndíi. <sup>15</sup> Te ni ñà díú ñúú núu ní quee cue ndíi ni cuini cue ndíi núhú cue ndíi. Chi núu duca<sup>n</sup> ni sàni iní cue ndíi te núhú cue ndíi ni cùu. <sup>16</sup> Dico ñáhá chi cuini cue ndíi quíhí<sup>n</sup> cue ndíi ñ<sup>n</sup> xichi núu vâha-gá cáá cundecu cue ndíi. Te núu dúcá<sup>n</sup> ño-gá váha càa-án cúu-xí ñúú núu ndécú Yá Ndiöxí, te sá dúcá<sup>n</sup> ñi sani iní cue ndíi xiá<sup>n</sup> ñúu ío váha cùu iní Yá Ndiöxí càchí-gá sá ñà túú cùcaha<sup>n</sup> núu-gã cúu-gã Ndiöxí cue ndíi-án, te cùtnuní iní-ó sã ndáá sá dúcá<sup>n</sup> càhá<sup>n</sup>-gá chi ní quide túha-gá ñ<sup>n</sup> xichi núu cundècu cue ndíi-án.

<sup>17</sup> Te ndíi Àbrahám ní xíndecu ñ<sup>n</sup>dii-ni déhe ndíi ndíhi ñadíhi ndíi, te cùtnàhá ní xito ndéé ñáhá Yá Ndiöxí xii ndíi ní xicá<sup>n</sup>-gá déhe ndíi, ndíi Isàác cuendá nduu táhú ñáhá-gã xii ndíi. Te ní xáha<sup>n</sup> ndíi sá cúu ndùu táhú-gã déhe ndíi, te duca<sup>n</sup> ñi quide ndíi chi ní sándáá iní ñáhá ndíi xii-gá. Te sa ndècu túha ndíi sá cuãñaha ndíi déhe ndíi xii-gá cuèi mee Yá Ndiöxí ní xáha<sup>n</sup> ndáá-gá xii ndíi <sup>18</sup> sá sã cuendá ndíi Isàác te ngúndecu cue ñani tnáhá ndíi. <sup>19</sup> Te duca<sup>n</sup> ñi quide ndíi Àbrahám, chi ní cutnùni ndáá iní ndíi sá Yá Ndiöxí ndácú-gã dándoto-gá cuèi ñáyiu sa ní xíhí. Te sá dúcá<sup>n</sup> ñi xáha<sup>n</sup> ndíi xii Yá Ndiöxí sá cúu ndùu táhú-gã déhe ndíi, te xiá<sup>n</sup> cada iní-ó sã sà ní xíhí ndíi Isàác te ní ndoto tucu ndíi ní nucúndecu ndíi ndíhi tãtã ndíi, ndíi Àbrahám.

<sup>20</sup> Te ndíi Isàác ní xicá<sup>n</sup> táhú ndíi núu Yá Ndiöxí cuendá sá cada váha-gá cue déhe ndíi, ndíi Jácób ndíhi ndíi Esàú núu cuahá<sup>n</sup> núu vëxi. Te duca<sup>n</sup> ñi quide ndíi chi ní sándáá iní ndíi Yá Ndiöxí. <sup>21</sup> Te sa ta cùyatni-ná nduu cùu ndíi Jácób, te ní xicá<sup>n</sup> táhú ndíi núu Yá Ndiöxí cuendá cue déhe ñani ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yá Ndiöxí. Te duca<sup>n</sup> ñi quide ndíi chi ní sándáá iní ñáhá ndíi xii-gá. <sup>22</sup> Te cùtnàhá sa ta cùyatni

vií-nã nduu cùu ndíi Chèé, te ní cachí ndíi sá cue ñáyiu isràél sáá nduu quèé-yu núu xíndecu-yu-án. Te ní cáhá<sup>n</sup> tucu ndíi nàcuáa cada-yu yiqui cùñú ndíi na sáá nduu quèé-yu núu ndécú-yu-án. Te duca<sup>n</sup> ñi quide ndíi chi ní sándáá iní ndíi Yá Ndiöxí.

<sup>23</sup> Te cùtnàhá ní cacu ndíi Moisés te ní chiváha ñaha nãná ndíi ndíhi tãtã ndíi úní yóó. Te duca<sup>n</sup> ñi quide cue ndíi-án chi ní sándáá iní cue ndíi Yá Ndiöxí. Te ní quide cuendá cue ndíi-án sã ío váha càa ndíi Moisés déhe cue ndíi, te ñà túú ní yuhú cue ndíi nàcuáa ní cáhá<sup>n</sup> tée cùu Faraón sá cáhni-dé cue landú. <sup>24</sup> Te sáta ñi sañu ndíi Moisés te duu<sup>n</sup> duu<sup>n</sup> ní cachí ndíi sá vã càhá<sup>n</sup> ñáyiu sá déhe yoco tée cùu Faraón cúu nãná ndíi. Te duca<sup>n</sup> ñi quide ndíi chi ní sándáá iní ndíi Yá Ndiöxí. <sup>25</sup> Te duca<sup>n</sup> ñi quide tucu ndíi chi ní tnahá-gá iní ndíi ndoho ndíi ndíhi nchaa ñáyiu cùu cuendá Yá Ndiöxí dàcúúxí sã cudíí iní ndíi cundecu tnaa ndíi ichi cuèhé ichi duha. <sup>26</sup> Chi ní sani iní ndíi sá váha-gã ndoho ndíi cúcuèhé ñáhá cuè ñáyiu xii ndíi sá cuendá Yaá quixi ñuyíú-a dàcúúxí sã cundècu ndíhi ndíi nchaa sá ío Ègiptú. Te duca<sup>n</sup> ñi quide ndíi chi ní xúhu<sup>n</sup> iní ndíi sá Yá Ndiöxí cuãñaha-gã sá ndúú táhú ndíi. <sup>27</sup> Te ndíi Moisés ní quee ndíi nació<sup>n</sup> Ègiptú te ñà túú ní quide cuendá ndíi sá ío cùdéé<sup>n</sup> tée cùu Faraón núu ndíi. Te duca<sup>n</sup> ñi quide ndíi chi ní sándáá iní ndíi Yá Ndiöxí. Te ní quide càhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiöxí ndécú ndíhi ñaha túu-gá xii ndíi cuèi ñà túú ní xini núu ñáhá ndíi xii-gá. Te duca<sup>n</sup> ñi sani iní ndíi chi Yá Ndiöxí ndécú ndíhi ñaha-gá xii ndíi.

<sup>28</sup> Te ndíi Moisés cúu ndíi téé ní tausaha ñi quide vico pascuá ndíhi cue ñáyiu isràél, te dàvá-án ñi táuchíú<sup>n</sup> ndíi ní sañi-yu mbéé te ñíhí quiti-án ñi dácánúu-yu yuyèhé-yu. Te duca<sup>n</sup> ñi quide ndíi chi ní sándáá iní ndíi Yá Ndiöxí. Te duca<sup>n</sup> ñi quide tucu ndíi cuendá sá espíritú sá ñi tendaha Yá Ndiöxí cahni-xi mee-ni déhe téé déhe díhna cue ñáyiu Ègiptú, te vá cáhni-xí ñi ñ<sup>n</sup> déhe cue ñáyiu isràél. <sup>29</sup> Te ndute làmár sá nání Mâr Tícuèhé ní quèé dava-xi ní natúu ñuhu yìhí ní ñíhí ñi yáha cue ñáyiu isràél. Te duca<sup>n</sup> ñi cuu chi ní sándáá iní-yu Yá Ndiöxí. Te cue téé

Ègíptú tnàhá-güedé nchìcú<sup>n</sup>-güedé cuáhá<sup>n</sup> dico ñá túú ní ndàcu-güedé yáha-güedé chi ní ndihì-güedé ní cáhá.

<sup>30</sup> Te cue ñáyiú isràél ní dúcú<sup>n</sup> ndèe-yu úsá nduu ñúú Jericó te ní ngoyo nchaa sá ñúdòco. Te duca<sup>n</sup> ñí cuu chi ní sándáá iní-yu Yá Ndiöxí. <sup>31</sup> Te ñ<sup>n</sup> ñaha ní xíndecu ichi díí iní ní xínani-a<sup>n</sup> Ràháb, ñaha-á<sup>n</sup> ñà túú ní xihí-a<sup>n</sup> dàtná ní xihí nchaa ñáyiú ío ní cuu sáá iní-xi núú Yá Ndiöxí, chi ní cuu váha iní-a<sup>n</sup> núú cuè téé ní tendaha cuè ñáyiú isràél ní sángoto dayuhu ñúú-a<sup>n</sup>. Te duca<sup>n</sup> ñí quide-a<sup>n</sup> chi ní sándáá iní-a<sup>n</sup> Yá Ndiöxí.

<sup>32</sup> Te núú dicó sá cúú te cáhá<sup>n</sup>-í cuèndá ndíi Gedèón, ndihì cuèndá ndíi Bàrác, ndihì cuèndá ndíi Sànsón, ndihì cuèndá ndíi Jèfté, ndihì cuèndá ndíi Dàvíí, ndihì cuèndá ndíi Sàmuel, ndihì cuèndá nchaa cue téé ní xóo cáhá<sup>n</sup> tnúhu Yá Ndiöxí ndéé sanaha, te nchaa cuèndá cue téé-á<sup>n</sup> cáhá<sup>n</sup>-í te núú dicó cùyáchí-í dico ñá túú cùyáchí-í. <sup>33</sup> Te nchaa cue ndíi-á<sup>n</sup> ní sándáá iní cue ndíi Yá Ndiöxí núu xiá<sup>n</sup> ní xóo ndacu cue ndíi ní xóo nàá cue ndíi ndihì nchaa ñáyiú dava-gá ñúú. Te nchaa ñáyiú-á<sup>n</sup> ñà túú ní xóo ndacú-yu nàá-yu ndihì cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gá xii cue ndíi. Te cuèi nchaa cue quiti déé<sup>n</sup> ñà túú ní ndàcu-güedi ná cada ñaha-güedi xii cue ndíi. <sup>34</sup> Te ní xóo ndacu cue ndíi ní xóo ndahvá cue ndíi ñuhú sá vǎ yǎo tnàhí ndàcu ndahvá, te ní cácu cue ndíi vá yǎo ní ndàcu cahni ñaha xii cue ndíi. Te cue ndíi-á<sup>n</sup> ñà túú ñihí ndéé cuè ndíi ní cùu, dico ní níhí ndéé cuè ndíi chi Yá Ndiöxí ní chindee ñàha-gá xii cue ndíi, te nchaa ndíi-á<sup>n</sup> ío ní níhí ndéé cuè ndíi ní nàá cue ndíi ndihì nchaa ñáyiú ní cuu úhú iní ñàhá xii cue ndíi, te nchaa ñáyiú duca<sup>n</sup> ñí xóo nàá ndihì cue ndíi-á<sup>n</sup> ñà túú ní xóo ndacú-yu nàá ndihì ñàhá-yu xii cue ndíi chi ní xóo cunú-yu. Te duca<sup>n</sup> ñí cuu chi ní sándáá iní cue ndíi Yá Ndiöxí. <sup>35</sup> Te dava ñáyiú dñí ní nduu táhǎ-yu ní ndoto cue ñáyiú ní xíndecu ndihì-yu ní nucúndecu ndihì ñaha tùcú-yu.

Te dava ñáyiú ío ní dándóhó ñàha tnaha ñáyiú-yu te ní xihí-yu, dico ñá túú ní dàñá-yu ichi váha nàcuáa cácu nihnú-yu núú tnàha ñáyiú-yu, te duca<sup>n</sup> chi ní cuiní-yu sá ndótǎ-yu ndéé cuèé-gá nàcuáa ngúndecu

váha-yu núú ndécú Yǎ Ndiöxí. <sup>36</sup> Te dava cue ndíi ío ní ndoho cue ndíi chi ío ní cudíquí ndeé ñàhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñàhá-yu, te ní chihì ñàhá-yu xii cue ndíi vecaá. <sup>37</sup> Te dava cue ndíi ní sahani ñàhá-yu ndihì yúú. Te dava cue ndíi ní chidava ndáá ñàhá-yu ní xehndé ñàhá-yu ndihì sierrá. Te dava cue ndíi ní xito ndéé ñàhá-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñàhá-yu ndihì machítí. Te mee-ni ñí mbéé ndihì ñí chivá, ní xóo cuu dóo cue ndíi. Te mee-ni ñí cue quiti-á<sup>n</sup> ní xóo cuu dóo cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandíhú-yu iní cue ndíi, te nándí sá ñí xóo cada ñàhá-yu xii cue ndíi ní xóo dandòho ñàhá-yu. <sup>38</sup> Te cue ndíi-á<sup>n</sup> ío-gá ní xínduu váha iní cue ndíi dàcúxí nchaa dava-gá ñáyiú. Te nchaa cue ndíi-á<sup>n</sup> ñí xica cuu cue ndíi cuèi nchaa núú ñà túú vǎ yǎo tnàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchii yaú ní xóo cundecu cue ndíi. <sup>39</sup> Te ío ní cudíu cue ndíi núú Yá Ndiöxí cuèndá sá ní sándáá iní ñàhá cuè ndíi xii-gá. Te cuèi duca<sup>n</sup> ñí quide cue ndíi dico ñá túú ní xini cue ndíi nchaa sá ní cachí Yá Ndiöxí cada-gá. <sup>40</sup> Te duca<sup>n</sup> ñí cuu chi ñí sá ío-gá váha ní cachí Yá Ndiöxí cada-gá. Te sá dúcá<sup>n</sup> ío-gá váha ní cachí-gá cada-gá cúú-xi cuèndá nchoo ndihì cuèndá cue ndíi-á<sup>n</sup> cuèndá sá ñà díú mèe-ni cue ndíi-á<sup>n</sup> cundáá cue ndíi núú-gǎ, chi tnàhá nchoo cundáá-ó núú-gǎ.

## 12

### *Ío cuhu<sup>n</sup> iní-ó Xítohó Jesucristú*

<sup>1</sup> Te cue ñáyiú ní xíndecu ndéé sanaha ñí quidé-yu nàcuáa ní cutnùní sá ñí sándáá iní-yu Yá Ndiöxí. Te cada iní-ó sá ncháá ñáyiú-á<sup>n</sup> xíndéhé ñàhá-yu xii-o vitna. Núu xiá<sup>n</sup> xini ñúhu-xi sá vǎ cáda-ó ní ñí sá cuèhé sá dúhá chi díu nchaa xiá<sup>n</sup> quidé-xi ñà túú cundáá-ó núú Yá Ndiöxí. Te vá cáda cuèndá-ó nchaa sá quidé tñèñu iní-ó nàcuáa ndacu-o càda-o nchaa nàcuáa cáhá<sup>n</sup>-gá. Te ío càhnu cunduu iní-ó càncicú<sup>n</sup> nihnu-o càda-o nchaa nàcuáa ní cachí-gá cada-o cundecu-o ñuyú-a. <sup>2</sup> Te ío cuhu<sup>n</sup> iní-ó Xítohó



Jesucristú, chi diu-gá ní quide ní sándáá iní-ó Yá Ndiöxí, te diu-ni duca<sup>n</sup> quide-gá cuëi vitna te cuëi ndéé núú cuhá<sup>n</sup> núú vëxi diu-ni duca<sup>n</sup> càda-gá sá quíndáá iní-ó Yá Ndiöxí. Te Xítohó Jesucristú ío ní quide ndee iní-gá ní ndoho-gá te ní xihí-gá núú cùrúxí, te ñá túú ní quide cuendá-gá cuëi #<sup>n</sup> sácá<sup>n</sup> núú cúu-xí sá dúcá<sup>n</sup> ní ndoho-gá. Te duca<sup>n</sup> ní quide-gá chi sa naha-gá sá ná yáha sá dúcá<sup>n</sup> ndòho-gá te ío cudí iní-gá. Te vitna núcòo-gá xio cùha núú núcòo Yá Ndiöxí te tàxi tnuní-gá.

<sup>3</sup> Te xini ñuhu-xi sá ío cada cuendá-ndó nàcuáa ní quide Xítohó Jesucristú chi Yaá-án ío ní quide càhnu iní-gá nchaa sá ní ndoho-gá ní quide ñaha nchaa ñáyi ndècu ichi cuehé ichi duha xii-gá. Te duca<sup>n</sup> càda cuendá-ndó nàcuáa ní quide-gá cuendá sá vã tũu dusa<sup>n</sup>-ndo, te ni vã nátũhú iní-ndó càda-ndo nchaa nacuáa càhá<sup>n</sup>-gá. <sup>4</sup> Te nchòhó dáquèe tihú-ndó nchaa sá cuèhé sá dúhá dico vátá cáhni ñaha-gá-yu xii-ndo sá dúcá<sup>n</sup> quide-ndo. <sup>5</sup> Te ndacu iní-ndó nàcuáa càhá<sup>n</sup> Tãtá-ó Dütú Ndiöxí dásàhú ñáhá-gã xii nchoo cuè ñáyi cùu dèhe-gá. Te duha càchí-gá núú tütú-gá:

Nchòhó cue dèhe mee-í, vã cání iní-ndó sã àu<sup>n</sup> nã cuu dandoho ñaha-í xii-ndo,

te ni vã nátũhú iní-ndó òré càhá<sup>n</sup>-í dóho-ndo nàcuáa cada-ndo cùndecu-ndo

<sup>6</sup> Chi mee-í dándòho-í nchaa ñáyi cùu iní-í cuendá sá cùndáá-yu núu-í,

te quide úhú-í-yu, te diu-ni-yu cùu-yu ñáyi càchí-í cúu dèhe-í.

Duha càchí-gá núú tütú-gá. <sup>7</sup> Te ío cada ndee iní-ndó sã dúcá<sup>n</sup> dandoho ñaha Yá Ndiöxí xii-ndo, chi quide-gá sá cúu-gã Tãtá-ó. Te ñá túú nì #<sup>n</sup> tée cùu tãtá te cachí-ó sã ñá túú sãnu ichi-dé cue dèhe-dé nàcuáa tàú-xi cunduu. <sup>8</sup> Te núu Yá Ndiöxí ñá túú dandoho ñaha-gá xii-ndo dàtná dándòho-gá cue ñáyi càchí-gá cúu dèhe-gá, te ñá díu dèhe mee-gã cúu-ndó te núu duca<sup>n</sup>, chi cùu-ndo datná cue ñáyi ñá túú cùtnuní yoo cùu tãtá-xi. <sup>9</sup> Te nchoo sã naha-o sã cùtnhá ní cuu landú-ó nã sanu ichi ñaha tãtá-ó nàcuáa tàú-xi cunduu, te duca<sup>n</sup> nã xóo canehe-o sã yíñuhu núu-güedë te diu-ni duca<sup>n</sup> nèhe-o sã yíñuhu núu-güedë vitna. Te núu duca<sup>n</sup> nã sándáá iní-ó tãtá-ó, te ío-gá xini ñuhu-xi quíndáá iní-ó Tãtá-ó

Dütú Ndiöxí cuendá duca<sup>n</sup> ndùu táhú-ó cùndecu-o ndihí-gá ni caa ni quihí<sup>n</sup>, chi diu-gá cúu-gã Yaá ní chihí iní-ó. <sup>10</sup> Te cùtnhá ní cuu landú-ó, ñá túú tìtní nduu ni càniha tãtá-ó nã sanu ichi ñaha-güedë xii-o nàcuáa ní cuu iní mée-güedë. Te Yá Ndiöxí duca<sup>n</sup> dandoho ñaha-gá xii-o sãnu ichi ñaha-gá cuendá cúu-xí sã vãha sá cúu-xí-ó, te duca<sup>n</sup> quide-gá cuendá nchoo càda ndáá-ó dàtná quidé mée-gá. <sup>11</sup> Te òré yéxi #<sup>n</sup> tnúndòho sá cúu-xí-ó te ñá túú cùdí iní-ó chi dandihú iní ñáhá-xí xii-o. Te nchaa ñáyi ngúnu ichi sá cuendá nchaa tnúndòho-án te ngüita-yu quide ndáá-yu, te ío váha cùu iní-yu ndècú-yu.

### *Vá dáquèe tihú-ó tñuhu Yá Ndiöxí*

<sup>12</sup> Te núu xã<sup>n</sup> ío chí ndúcú ndèe-gá canchicú<sup>n</sup> nihnu-ndo ichi Xítohó Jesucristú, te vã dicó yica cùu iní-ndó canchicú<sup>n</sup> nihnu-ndo ichi-gá. <sup>13</sup> Te cada váha-ndo cùndecu-ndo ichi-gá cuendá nchaa ñáyi sãni #<sup>n</sup> sani úú iní-xi níhí ndéë-yu cundecú-yu ichi-gá te vã ná tũhú iní-yu canchicú<sup>n</sup> nihnú-yu.

<sup>14</sup> Te nducu-ndo nàcuáa cada-ndo cùndecu váha-ndo ndihí cue tñaha ñáyi-ndo, te ío cada váha-ndo cùndecu-ndo nacuáa cundáá-ndó núú Yá Ndiöxí chi núu vã dúcá<sup>n</sup> càda-ndo te vã ndúú táhú-ndó cùndecu-ndo ndihí-gá. <sup>15</sup> Te ío váha cada cuendá-ndó nàcuáa cada-ndo cùndecu-ndo, chi núu ñáhá te vã chindèe ñaha-gá Yá Ndiöxí xii-ndo. Te ío váha cada cuendá tucu-ndo nàcuáa cundecu-ndo vã cání cuehé iní-ndó cuendá Yá Ndiöxí, chi núu duca<sup>n</sup> na càda-ndo te dava-gá ñáyi ndècu ndihí-ndo ichi-gá tñahá-yu ngüita-yu duca<sup>n</sup> càdá-yu, te vã cùndècu váha-gá-ndó ndihí-yu ichi-gá. <sup>16</sup> Te cada cuendá tucu-ndo sã vã cùndècu-ndo ichi díí iní, te ni vã dáquèe tihú-ndó nì #<sup>n</sup> sá cúu cuendá Yá Ndiöxí dàtná ní quide ndíi Esàú, chi sã cuãñaha tãtá ndíi-án nduu táhú ndíi ni cùu ní dama ndíi #<sup>n</sup> cóhó comidá. <sup>17</sup> Te nchòhó sa naha-ndo sã cùtnhá ní cuini ndíi Esàú cáca<sup>n</sup> táhú tãtá ndíi núú Yá Ndiöxí cuendá nchaa sã ndúú táhú ndíi ni cùu, te ñá túú ní xicá<sup>n</sup> táhú tãtá ndíi núú Yá Ndiöxí nàcuáa cuini mée ndíi ni cùu. Te ní ndáhyú víhí ndíi, te cuëi duca<sup>n</sup> ní quide ndíi dico ñá túú ní ndacu-gá ndíi nãníhí ndíi táhú sã ní dama ndíi comidá.



18 Te cue ñáyiú israhél ní sátuhá-yu ñ̃ yucu núú càyú ñuhú, te nchòhó ñá túú ndéé duca<sup>n</sup> sàhá<sup>n</sup> tuha-ndo ñ̃ yucu núú càyú ñuhú dàtná ní quide cue ñáyiú-á<sup>n</sup>. Te cútnàhá duca<sup>n</sup> ñ̃ sátuhá-yu yucu-á<sup>n</sup> te ní cunee vìhi nihií yucu-á<sup>n</sup>, te ní quene táchí ñ̃hi. 19 Te ní tecú dóho-yu ní cáhá<sup>n</sup> ñ̃ cútú, te ní tecú tucu dóho-yu ní cáhá<sup>n</sup> Yă Ndiôxí ní cáhá<sup>n</sup> ndihí ñaha-gă xii-yu. Te nchaa ñáyiú ní tecú dóho-xi ní cáhá<sup>n</sup>-gá te ní cuini-yu sá vă cãhá<sup>n</sup>-gá. 20 Te duca<sup>n</sup> ñ̃ quidé-yu chi ñá túú ní cùndee iní-yu nàcuáa ní cáhá<sup>n</sup>-gá, te duha ní cachí-gá: “Te cuèi ñ̃ quiti nà yáha xití yucu-a, te cahni-ndo-di ndihí yúú àdi ndihí ñ̃ yutnu puyá”, duha ní cachí-gá. 21 Te sá dúcá<sup>n</sup> ñ̃ quide-xi ní xiní-yu xiã<sup>n</sup> ío ní dáyuhú ñáhá-xi xii-yu. Te tnàhá té Moisés ní yùhú-dé, te ní cachí-dé: “Quidi ñaha-xi xii-í sá yùhú-í”, duha ní cachí-dé.

22 Te nchòhó, ñá túú quide-ndo datná ní quide cue ñáyiú-á<sup>n</sup> ñ̃ sáhá<sup>n</sup> tuhá-yu yucu-á<sup>n</sup>, dico cada iní-ndó sã sà ní tuha-ndo yùcu Siôn sá ndécú núú ndécú Yă Ndiôxí, ndihí ñuu-gă ñuu Jerusálén sá cáa àndiu te diu-gá cúú-gă Yaá ndécú nchaa nduu nchaa quíú. Te diu-ni xiã<sup>n</sup> xindecu cuéhé víhí cuè espíritú xinú cuèchi núú-gă 23 chíñùhu ñaha-xi xii-gá. Te nchòhó cúú-ndó cuè ñáyiú cùu cuendá Yă Ndiôxí, te ní tnahá tnúhu-ndo ndihí nchaa dava-gă ñáyiú cùu cuendá-gá, ñáyiú yòdo tnuní núú tütú-gă ndécú àndiu, te diu-ni ñáyiú-á<sup>n</sup> cuãñaha-gă xii-yu sá ndúú tãhũ-yu. Te nchòhó ní tuha-ndo Yă Ndiôxí Yaá cada ndáá yícá cuèchi nchaa ñáyiú. Te cada iní-ndó sã ñ̃ tnahá tnúhu-ndo ndihí cue ñáyiú ní quide ndáá ní xindecu ichi Yă Ndiôxí ñuyíú-a. Te ñáyiú-á<sup>n</sup> ñà túú tnàhí-gá ná cúmãñi-yu vitna ndécú-yu núú-gă. 24 Te ní tnahá tnúhu-ndo ndihí Xítóhó Jesucristú Yaá ní quide nàcuáa cada Yă Ndiôxí ingá núú sã vãha sá cúú-xi nchaa nchoo ñáyiú ndècu ñuyíú-a, chi ní sati níñi-gă te ní xihí-gá núú cùrúxi. Te níñi Xítóhó Jesucristú ñá túú ñ̃-ni cuu-xi ndihí níñi ndií Àbél, chi diu cuendá níñi-gă-á<sup>n</sup> ñ̃ quide cãhnu iní Yă Ndiôxí nchaa cuèchi-o.

25 Núú xiã<sup>n</sup> ío cada cuendá-ndó vă dáquèe tihú-ndó tnúhu cãhá<sup>n</sup> Yă Ndiôxí, chi nchaa

ñáyiú ní xindecu ndéé sanaha dùca<sup>n</sup> ní quidé-yu ní dáquèe tihũ-yu tnúhu ní cáhá<sup>n</sup>-gá ñuyíú-a sá cúú-xi-yu. Te ñá túú ní cãcu-yu chi ní nacháhu-yu sá dúcá<sup>n</sup> ñ̃ quidé-yu. Te uu<sup>n</sup>-gá tucu nchoo chi vă cãcu-o te núú duca<sup>n</sup> na dàquee tihú-ó tnúhu cãhá<sup>n</sup> Yă Ndiôxí ndéé andiu sã cúú-xi-ó. 26 Te cútnàhá ní cáhá<sup>n</sup> Yă Ndiôxí ndéé sanaha te ní quidi-xi ñuyíú. Te vitna cãchí-gá: “Yúhú quidi tucu-í ingá xito ñuyíú, te ñá díú mèe-ni ñuyíú duca<sup>n</sup> quidi-í chi tnàhá andiu quidi-í”, cãchí-gá. 27 Te sá dúcá<sup>n</sup> cãhá<sup>n</sup>-gá sá ingá xito tucu duca<sup>n</sup> càda-gá xiã<sup>n</sup> cútnuní sá ncháándi túhú sá tũu ndèhe-o danaa-gá. Te nchaa sã ñà túú ndéé tũu quini-ó ñuyíú-a xiã<sup>n</sup> vă quidi-xi te ni vă náá-xi. 28 Te núú ñ̃ cachí Yă Ndiôxí nduu táhú-ó cùndecu-o chi mee-gă táxi tnuní-gá xiã<sup>n</sup>, te ni vă quidi-xi te ni vă náá-xi. Te xiã<sup>n</sup> ío xini ñuhu-xi ndacá<sup>n</sup> táhú-ó núú-gă, te yñùhu yñùhu cunu cuechi-o núú-gă nàcuáa cuu vãha iní-gá, te duca<sup>n</sup> cùhu<sup>n</sup> iní-ó sã ño cãhnu cuu-gá. 29 Te Tãtá-ó Dütú Ndiôxí cúú-gă dàtná ñ̃ ñuhú chi danàa-gá nchaa sã ñà túú quide nàcuáa cuu vãha iní-gá.

## 13

### *Nàcuáa tàú-xi cada-o cuendá cuu vãha iní Yă Ndiôxí*

1 Te nchaa nchòhó ñáyiú ndècu ichi Xítóhó Jesucristú, vă dáñá ndéé-ndó cùu iní tnàhá-ndó nàcuáa ndècu-ndo ichi-gá. 2 Te cunaha-ndo sã núu ío ñáyiú ñuhu ichi ní quexió-yu vehe-ndo te cuãñaha-ndo vèhe ndetatú-yu, te cuãñaha-ndo sã cáxi-yu. Chi davá-yu ndéé espíritú xinú cuèchi núú Yă Ndiôxí ní sáhá<sup>n</sup> vehé-yu ní quehe<sup>n</sup> cuendá-yu te ñá túú ní cùtnuní iní-yu sá díú espíritú xinú cuèchi núú-gă cúú-xi.

3 Te ndacu tucu iní-ndó cuè ñáyiú xixihí vecaá, te cada iní-ndó sã tnàhá-ndó yihí-ndo vecaá ndihí-yu. Te ndacu tucu iní-ndó nchaa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

4 Te nchaa ñáyiú na cãchí-yu sá ñ̃ sá vãha cùu-xi sá ñ̃ tée ndihí ñ̃ ñadihí ná nihí tnàhá-yu candeca tnàhá-yu. Te nchòhó cue tée vă cáni iní-ndó cãhá<sup>n</sup> ndihí-ndo ñadihí te núú ñá díú ñadihí-ndó cùu-yu. Te duca<sup>n</sup>-ni

nchòhó cue ñáyiú òhí tucu vá cání ìní-ndó cǎhá<sup>n</sup> ndìhì-ndo tēe te núu ñá díú yì-ndo cuu-güedé, chí Yá Ndiòxí dandòho-gá nchaa ñáyiú ndècu ichi díí ìní.

<sup>5</sup> Te vá cúhú<sup>n</sup> ìní-ndó mèe-ni díhú<sup>n</sup>. Te núu nándi cùu nchaa sá ndécú ndìhì-ndo te díu-ni nchaa xiǎ<sup>n</sup> sa nduu vétú ìní-ndó, chí Yá Ndiòxí ní cachí-gá: “Ni ì<sup>n</sup> nduu vá dáñá òhnu ñaha-í xii-ndo, chí nchaa-ni nduu chindee ñaha-í”, duha ní cachí-gá. <sup>6</sup> Te xiǎ<sup>n</sup> núu nchoo ò yuhu ò ìní-ó cǎhá<sup>n</sup>-ó ì<sup>n</sup> ì<sup>n</sup>-o, te cachí-ó:

Yá Ndiòxí cúú-gǎ Yaá chíndèe ñaha xii-í, núu xiǎ<sup>n</sup> ñá túú yùhú-í cuèi nándi cǎhá<sup>n</sup> ñáyiú cada ñahá-yu xii-í.

Duha cachí-ó.

<sup>7</sup> Chí ndácú ìní cue tēe ní sanu ichi ñaha xii-ndo ichi Xítohó Jesucristú cue tēe ní cǎhá<sup>n</sup> tnúhu Yá Ndiòxí núú-ndó, te ío váha chí nácuaha cuendá nàcuáa ní quide nchaa cue tēe-á<sup>n</sup> ò xíndecu-güedé ndéé ní sáa nduu ò xíhí-güedé. Te ío quindáa ìní-ndó Yá Ndiòxí dátá ní xóo cada cue tēe-á<sup>n</sup>.

<sup>8</sup> Te dátá-ni ní quide Xítohó Jesucristú ndéé sanaha díu-ni duca<sup>n</sup> quide-gá vitna, te díu-ni duca<sup>n</sup> càda-gá ndéé núú cuahá<sup>n</sup> núú vèxi. <sup>9</sup> Te vá dáñá-ndó mèe-ndo dandahú ñahá ñáyiú dacàhá<sup>n</sup> ñahá xii-ndo natuha-ndo ìngá ichi, ñáyiú dànehé tnàha ñáyiú-xi nándi sá ò cutúha-yu, te nchaa xiǎ<sup>n</sup> ñá túú ì<sup>n</sup>-ni cǎhá<sup>n</sup>-xi ndìhì tnúhu sá ndécú ndìhì-ndo. Te Yá Ndiòxí chíndèe ñaha-gá xii-o nàcuáa níhí ndéé-ó cùndecu-o ichi-gá, te duca<sup>n</sup> te cuu-xi sá váha sá cúú-xí-ó, te ñá díú cuendá ì<sup>n</sup> sá xéxí-ó òhí ndéé-ó ndècu-o ichi-gá. Te dava ñáyiú cǎchí-yu sá dává núú comidá cuu caxi-o te dava ñahá nàcuáa níhí ndéé-ó cùndecu-o ichi-gá, dico ñá ndáa sá sǎ dúcá<sup>n</sup> vá cǎxí-ó nchaa núú comidá níhí ndéé-ó cùndecu-o ichi-gá.

<sup>10</sup> Chí Xítohó Jesucristú ní xíhí-gá cuendá-ó núú cùrúxí, te nchaa ñáyiú nchícú<sup>n</sup> òhnu-ni quide nchaa nàcuáa ní quide nchaa dútú ò xinu cuechi núú Yá Ndiòxí ndéé sanaha, ñáyiú-á<sup>n</sup> vá cúú tnàhá tnúhu-yu ndìhì Xítohó Jesucristú Yaá ní xíhí núú cùrúxí sá dúcá<sup>n</sup> quidè-yu. <sup>11</sup> Chí dútú cùnù-gá ní xíndecu ndìhì cue ñáyiú isràèl, tēe-á<sup>n</sup> ò xóo canehé-dé níhí nchaa quiti ní xóo cǎhni-dé ní xóo quíhu ndéé xití cuartú ní cuu íi-gǎ. Te duca<sup>n</sup> ò xóo cada dútú-ǎ<sup>n</sup>

cuendá cada càhnu ìní Yá Ndiòxí nchaa yícá cuèchi ñáyiú, te cuñú nchaa quiti-á<sup>n</sup> ò xóo cǎhmi-güedé ì<sup>n</sup> xio yuhu ñúú. <sup>12</sup> Te duca<sup>n</sup> ò yáha Xítohó Jesucristú chí ndéé ì<sup>n</sup> xio yuhu ñúú ní sahani ñaha-güedè xii-gá. Te cuendá níhí-gǎ sá ò sati núú cùrúxí núú ò xíhí-gá, ní nduu ndoo ò nduu ò nine ìní cue ñáyiú sàndáa ìní ñahá xii-gá. <sup>13</sup> Te vitna chí ná túha-o Xítohó Jesucristú te cada ndee ìní-ó ndòho-o dátá ní ndòho-gá. <sup>14</sup> Te ñuyú-a ò ì<sup>n</sup> xichi ñá túú ndéé cáa ì<sup>n</sup> ñúú cudí ò caa ò quíhí<sup>n</sup> cuendá cundecu-o, dico duca<sup>n</sup>-ni ñúhu ìní-ó ì<sup>n</sup> xichi núú ndúú táhú-ó cùndecu-o ò caa ò quíhí<sup>n</sup>.

<sup>15</sup> Te núu xiǎ<sup>n</sup> xíni ñúhu-xi sá vá dáñá ndéé-ó chíñuhu-o Dútú Ndiòxí chí Xítohó Jesucristú ní quide-gá nàcuáa ndacu-o tnàhá tnúhu-o ndìhì Yá Ndiòxí, te òré cǎhá<sup>n</sup> ndìhì-o-gǎ te nuu núu ndacá<sup>n</sup> táhú-ó núú-gǎ. Te nchaa tnúhu cǎhá<sup>n</sup>-ó òré cǎhá<sup>n</sup> ndìhì-o-gǎ cúú-xi dátá ì<sup>n</sup> táhú sǎ cúú-xí-gǎ. <sup>16</sup> Te vá dáñá ndéé-ndó càda-ndo mee-ni sá váha cundecu-ndo, te duca<sup>n</sup> chindee tnaha-ndo ì<sup>n</sup> ì<sup>n</sup>-ndo ndìhì sá ndécú ndìhì-ndo. Te núu duca<sup>n</sup> na càda-ndo te cani ìní-ndó sǎ cúú-xi dátá ì<sup>n</sup> táhú sǎ ò váha cùu ìní Yá Ndiòxí.

<sup>17</sup> Te quindáa ìní-ndó càda-ndo nchaa nàcuáa cǎhá<sup>n</sup> cue tēe yìndaha ñaha xii-ndo nàcuáa ndècu-ndo ichi Xítohó Jesucristú, chí díu cue tēe-á<sup>n</sup> quidè cuendá ñahá-güedè xii-ndo nàcuáa cundecu váha-ndo núú-gǎ. Te sáa nduu nàcani tnúhu-güedé núú-gǎ núu ò quide váha-güedé àdi ñá túú ò quide váha-güedé ní xíndecu ndìhì ñaha-güedè xii-ndo. Te núu duca<sup>n</sup> na càda-ndo quindáa ìní-ndó-güedè te cudí ìní-güedè cundecu ndìhì ñaha-güedè xii-ndo, te vá ndìhú ìní-güedè. Te núu vá dúcá<sup>n</sup> càda-ndo te vá cúú-xi sǎ váha xii-ndo nchaa sá quidè-güedè sá cúú-xí-ndó.

<sup>18</sup> Te cǎhá<sup>n</sup> ndàhú-í núú-ndó sǎ cǎhá<sup>n</sup> ndìhì-ndo Yá Ndiòxí cuendá-ndí. Te nchúhú cùtnùní ndáa ìní-ndí sá ñá túú ò cùmǎní-ndí núú Yá Ndiòxí, te duca<sup>n</sup> chí ndùcu-ndí nàcuáa quide-ndí cundáa-ndí núú-gǎ. <sup>19</sup> Te cǎhá<sup>n</sup> ndàhú tucu-í núú-ndó sǎ ò cǎcá<sup>n</sup> táhú-ndó núú Yá Ndiòxí cuendá sá méé-gǎ ná cáda te ío ndìhì quixi coto ñaha tucu-í xii-ndo.

*Tnúhu ndéé núú nǐ ndihí-ná*

<sup>20</sup> Te Yá Ndiǒxí Yaa quidé cùu váha iní-ó ndècu-o, Yaa-á<sup>n</sup> nǐ dándótó-gǎ Xítóhó Jesucristú. Te Xítóhó Jesucristú-á<sup>n</sup> cúu-gǎ dàtná ì<sup>n</sup> toli ío-gǎ quéné cǎva xító mbéé. Te duca<sup>n</sup> sǎtnahá-xi cùu-gǎ cuendá sá nǐ sati níñí-gǎ te ní xíhí-gǎ, te duca<sup>n</sup> nǐ cuu cuendá sá nǐ quide ndáá-gǎ ndihí Yá Ndiǒxí sá cáda-gǎ ingá núú sǎ váha sá cúu-xí nchòo cue ñáyiú ndècu ñuyíú-a. Te nàcuáa ní quide ndáá-gǎ ndihí Yá Ndiǒxí te ðiu-ni duca<sup>n</sup> càda-xi núú cuàhá<sup>n</sup> núú vèxi. <sup>21</sup> Te xicá<sup>n</sup> táhù-í núú Yá Ndiǒxí sá méé-gǎ ná chindee ñaha-gǎ xii-ndo cuendá cada-ndo mèe-ni sá váha nàcuáa cuiní méé-gǎ, te mee-gǎ ná cáda ñaha-gǎ xii-o nchàa sá váha sá sání iní-gǎ. Te ðiu-ni duca<sup>n</sup> na tàuchiu<sup>n</sup>-gǎ cada Xítóhó Jesucristú sá cúu-xí-ó, duha xicá<sup>n</sup> táhù-í núú-gǎ. Te vitna nchaa-o chǐ ná càchí-ó sǎ ìo càhnu cuu Xítóhó Jesucristú ni caa ni quíhí<sup>n</sup>. Te duca<sup>n</sup> na cùnduu.

<sup>22</sup> Te càhá<sup>n</sup> ndàhù-í núú nchòhó ñáyiú ndècu ndihí-í ichi Xítóhó Jesucristú sá cáda càhnu iní-ndó nàcuáa ndùu nchaa tnúhu càhá<sup>n</sup>-í dásàhú ñàhà-í xii-ndo, chi ñá túú vǎi tnúhu chido tnuní-í núú tütú-a sá cúu-xí-ndó.

<sup>23</sup> Te càchí tnúhu-í xii-ndo sǎ tǎ Timùteú téé ndècu ndihí-o ichi Xítóhó Jesucristú ní cácu-dé ñá túú-gǎ yíhí-dě vecaá. Te núu na quèxio ndihí-dé núú ndécù-í te quixi-í ndihí-dé núú ndécú-ndó quixi coto ñaha-ndí.

<sup>24</sup> Te cúñaha-ndo sǎ ìo na càda ndee iní nchaa cue téé yìndaha ñaha xii-ndo nàcuáa ndècu-ndo ichi Yá Ndiǒxí. Te duca<sup>n</sup> cǔñaha tùcu-ndo xii nchaa dava-gǎ ñáyiú cùu cuendá-gǎ sá ìo na càda ndee iní-yu. Te cue ñáyiú nàció<sup>n</sup> Itàliá ñáyiú ndècu ndihí-o ichi-gǎ càchí-yu sá ìo cada ndee iní-ndó.

<sup>25</sup> Te Yá Ndiǒxí ío na chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ìo chí cáda ndèe iní-nǎ vitna.

## TUTÚ NÍ CADÚHA TÉ SÀNTIAÚ

*Té Sàntiaú cadúha-dé tutú quíhí<sup>n</sup> ndaha ñáyiú isràél nchíté nuu nihí ñuyíú*

<sup>1</sup> Yúhú té Sàntiaú xínú cuèchi-í núú Yá Ndiöxí ndihí núú Xítohó Jesucristú, te tée-í tnúhu-a quide ndee iní ñáhà-í xii nchòhó ñáyiú isràél nchíté nuu nihí ñuyíú-a.

*Yá Ndiöxí táxí-gá sá xini tnùní-ó*

<sup>2</sup> Te nchòhó ñáyiú ndècu ndihí-í ichi Xítohó Jesucristú, ío cudíí ìní-ndó cundecu-ndo cuéi náí cùu sá ùhú véxi cuèndá-ndó, <sup>3</sup> chi duca<sup>n</sup> te cutnùní ìní-ndó sá sàndáá ndisa ìní-ndó-gá, te cunduu càhnu ìní-ndó cuéi náí ná yáha-ndo. <sup>4</sup> Te cunduu càhnu-ni ìní-ndó te duca<sup>n</sup> te cuu-ndo ñáyiú váha, te cundáá-ndó núú Yá Ndiöxí, te duca<sup>n</sup> te ñá túú-gá ná cumání-ndó núú-gá.

<sup>5</sup> Te núu cùmání sá xini tnùní-ó, te cacadá-ó núú Yá Ndiöxí te mee-gá taxi-gá, chi ío váha ìní-gá, te ñá túú cùnini ìní-gá núú-ó. <sup>6</sup> Te ni yùhu ni ìní-ó cacadá-ó núú-gá, te quindáá ndisa ìní-ó sá táxí-gá sá cùmání quini tnùní-ó, te vá cání ñ<sup>n</sup> caní úú ìní-ó. Chi nchaa ñáyiú sàni ñ<sup>n</sup> sàni úú ìní-xi cùú-yu dàtná ndute làmár cuáhá<sup>n</sup>-xi duha cuáhá<sup>n</sup>-xi dàcá<sup>n</sup> nàá-xi òré quéné tächí. <sup>7</sup> Te nchaa ñáyiú duca<sup>n</sup> sàni ìní-xi, te vá cání ìní-yu sá nihí-yu sá xicá<sup>n</sup>-yu núú-gá. <sup>8</sup> Chi nchaa ñáyiú sàni ñ<sup>n</sup> sàni úú ìní-xi ñá cutnùní ìní-yu ndédacàa sá sání ìní-yu cadá-yu.

<sup>9</sup> Te nchaa ñáyiú ndàhú ñáyiú ndècu ichi-gá, xini ñuhu-xi ñá túú-gá ná caní ìní-yu, mee-ná cudíí ìní-yu, chi Yá Ndiöxí chindèe ñaha-gá xií-yu. <sup>10</sup> Te nchaa ñáyiú cuica xini ñuhu-xi cundecu váha ìní-yu núú Yá Ndiöxí cuéi náí ná yáha-yu. Chi ñáyiú-án cùú-yu dàtná itá nchaa cùhú sá ñá túú cùdíí naha. <sup>11</sup> Chi òré ní cuu níhi càhni nchícanhii, te ní dádíí-ni-xi nchaa cùhú cuíí-á<sup>n</sup> te ní cóyo-ni nchaa itá-xi, te ñá túú-gá cáá vìi. Te duca<sup>n</sup> sàtnahá-xi cùu ñáyiú cuica chi núú chíú<sup>n</sup>-ní-yu xihí-yu.

*Nchaa ñáyiú quide càhnu ìní-xi nchaa sá yáha-yu*

<sup>12</sup> Te váha táhú nchaa ñáyiú quide càhnu-ni ìní-xi cuéi nándi sá yáha-yu ndécú-yu ichi Yá Ndiöxí, chi òré ná ndihí nchaa xíá<sup>n</sup> yáha-yu, te cuáñaha Yá Ndiöxí ñ<sup>n</sup> coróná váha vìhi cundecu ndihí-yu, te ndáá chi duca<sup>n</sup> càhá<sup>n</sup> Yá Ndiöxí sá táxí-gá xii nchaa nchoo ñáyiú ñùhu ìní ñáhá xii-gá.

<sup>13</sup> Te nchaa ñáyiú sàni ìní-xi cada nándi sá cuèhé sá dúhá, te vá cání ìní-yu sá Yá Ndiöxí táuchiu<sup>n</sup>-gá duca<sup>n</sup> cadá-yu, chi Yá Ndiöxí ñá quíú te caní ìní-gá cada-gá ñ<sup>n</sup> sá cuèhé sá dúhá, te ni ñá túú tàuchiu<sup>n</sup>-gá sá dúcá<sup>n</sup> cadá-yu. <sup>14</sup> Te cuíni-yu cadá-yu nchaa sá cuèhé sá dúhá chi duca<sup>n</sup> véxi ìní-yu. <sup>15</sup> Te nchaa ñáyiú ío ñùhu ìní nchaa sá cuèhé sá dúhá te quidé-yu, te núu na càda-ní-yu te cuíta nihnú-yu.

<sup>16</sup> Te nchòhó ñáyiú ío cùu ìní-í ndécú ndihí-í ichi Xítohó Jesucristú, vá dáñá-ndó mèe-ndo dandahú ñáhá ñáyiú xii-ndo. <sup>17</sup> Chi nchaa sá váha véxi-xi núú Yá Ndiöxí Yaá ndécú àndiu, chi ñ<sup>n</sup> mee-gá ní cadúha-gá àndiu ndihí nchaa chódíní, ndihí yóó, ndihí nchícanhii. Te Yá Ndiöxí ñá túú ndi quehe<sup>n</sup> ndi quehe<sup>n</sup>-gá sá cání ìní-gá, te ni ñá túú cùu-gá dàtná ñ<sup>n</sup> cuándáhú cuáhá<sup>n</sup>-xi duha cuáhá<sup>n</sup>-xi dàcá<sup>n</sup>, chi ñ<sup>n</sup>-ni sá sání ìní-gá. <sup>18</sup> Te Yá Ndiöxí ní cuíni-gá sá cùú-ó dèhe-gá, te ndáá sá cùú-ó dèhe-gá chi sàndáá ìní-ó tnùhu-gá. Te nchoo ñáyiú sàndáá ìní-xi tnùhu-gá cùnùu-gá-ó chi ní nduu-o dèhe-gá.

*Ichi ndáá cuíi*

<sup>19</sup> Te nchòhó ñáyiú ío cùu ìní-í ndécú ndihí-í ichi Xítohó Jesucristú, cund-edóho-ndo ñ<sup>n</sup> tnùhu na càhá<sup>n</sup>-í-a. Te cuíni-í sá cundecu túha-ndo cundédóho-ndo tnùhu Yá Ndiöxí, te caní váha ìní-ndó nàcuáa càhá<sup>n</sup>-ndó, te cunduu càhnu ìní-ndó te vá cùdèé<sup>n</sup>-ndó. <sup>20</sup> Chi núu na cùdèé<sup>n</sup>-ó te ñá túú quide váha-o núú Yá Ndiöxí. <sup>21</sup> Te daña-ndo nchaa sá cuèhé sá dúhá ío ñuyíú-a. Te quindáá ìní-ndó tnùhu Yá Ndiöxí ndécú ndihí-ndo, te vá cùndùu sáá ìní-ndó, te duca<sup>n</sup> te naníhí tàhú-ndó.

<sup>22</sup> Te quindáá ìní-ndó tnùhu-gá te vá cuèndá-ni cundédóho-ndo, chi núu na cundédóho-ndo te vá tníí-ndó ñá, te dicó-ni dandahú-ndó mèe-ndo te vá naníhí tàhú-ndó. <sup>23</sup> Chi nchaa ñáyiú dicó-ni



sàcúndedóho tnúhu-gá te ñá túú sàndáá iní-yu, ñáiyu-á<sup>n</sup> cúu-yu dàtná ì<sup>n</sup> ñáiyu sàcúndehé-ní nùú-xi núú yùtátá. <sup>24</sup> Chi nini ndèhé-yu ní xiní-yu núú-yu, te ní xócání-yu te ní nacuanaa-ní-yu nàcuáa càa núú-yu. Te duca<sup>n</sup> sàtnahá-xi cùu ñáiyu sàcúndedóho tnúhu Yá Ndiöxí, te ñá túú tñí-yu. <sup>25</sup> Te nchaa ñáiyu dàcuaha ndisa tnúhu ní dándõo Yá Ndiöxí nihnu-ní-yu ichi-gá, chi ñá díú ì<sup>n</sup> sá vèe cùu-xi. Te ñáiyu-á<sup>n</sup> ñà túú dìcò-ni sàcúndedóho-yu chi quide ndáá-yu núú-gã, te cùdí iní-yu xíndecú-yu.

<sup>26</sup> Te nchaa ñáiyu càchí sá ndécú ichi ndáá te cùtexínu-ní càhá<sup>n</sup>-yu, te xíá<sup>n</sup> dìcò-ni dándahú-yu mèe-yu sá ndécú-yu ichi ndáá. <sup>27</sup> Te núu ndècu-o ichi ndáá cuiti ichi Dútú Ndiöxí, te chindee-o nchaa ñáiyu ní ndóo ndàhú, ndìhi ñáiyu quèe ndécú ndìhi tnúndòho tnúhu ndàhú, te vá cádá-ó nãndi sá cuèhé sá dúhá ió ñuyú-a.

## 2

### *Ì<sup>n</sup>nuu-ni cùu iní-ó nchaa tnahá ñáiyu-o*

<sup>1</sup> Te nchòhó ñáiyu ndècu ndìhi-í ichi Xítohó Jesucristú Yaá cùnùu, ì<sup>n</sup>nuu-ni càhá<sup>n</sup> ndìhi váha-ndo nchaa tnahá ñáiyu-ndo. <sup>2</sup> Te núu núú nàtácá-ndó chihnuhu-ndo Yá Ndiöxí ní sáá ì<sup>n</sup> tée ió váha càa dóó nihnú-dě, te ní sáá tucu ì<sup>n</sup> tée nihnu dóó ndàhú, <sup>3</sup> te núu tée nihnu dóó vâha-ni-á<sup>n</sup> néhé-ndó sã yíñùhu núú-dě, te taxinucóo-ndo-dě ì<sup>n</sup> núú xilé váha, te tée ndàhú-á<sup>n</sup> daxòcòo-ndo-dě ì<sup>n</sup> xio àdi canucóo-ndo-dě núú ñùhú, <sup>4</sup> te núu duca<sup>n</sup> na càda-ndo te ñá túú quide váha-ndo. Chi ì<sup>n</sup>-ni-dé cúú iní-ndó, te ì<sup>n</sup>-dé ñá túú cùu iní-ndó.

<sup>5</sup> Te nchòhó ñáiyu ió cùu iní-í ndécú ndìhi-í ichi Xítohó Jesucristú, chí cùndedóho tucu tnúhu na càhá<sup>n</sup>-í-a. Yá Ndiöxí càhá<sup>n</sup>-gá vâi ñáiyu ndàhú cuendá tnahá tnúhu ndìhi ñàhá-yu xii-gá, te ndècu váha-gá-yu dàcúxí ñáiyu cuica ñáiyu ñá túú sàndáá iní tnúhu-gá, chi ní cachí-gá sá ncháá ñáiyu na cùu iní ñàhá xii-gá nduu táhù-yu cundecú-yu ndìhi-gá ni caa ni quíhí<sup>n</sup>.

<sup>6</sup> Te nchòhó, ñá túú nèhe-ndo sá yíñùhu núú ñáiyu ndàhú, chi núú ñáiyu cuica-ni nèhe-ndo sá yíñùhu. ¿Te náa ñá cùtnùní iní-ndó sã ñáiyu cuica dándohó ñaha-gá-yu xii-ndo, te càndeca ñàhá-yu sàhá<sup>n</sup> núú cuè

tée cùchiu<sup>n</sup>-á<sup>n</sup>? <sup>7</sup> Te diu-ní-yu ió càhá<sup>n</sup> cuèhé-yu cuendá Xítohó Jesucristú, te nchòhó sa ní nduu-ndo dèhe-gá.

<sup>8</sup> Te ì<sup>n</sup> ndudú cùnùu-gá ní càhá<sup>n</sup> Yá Ndiöxí ní ngódó tnùní núú tütú-gá càchí-xi sá cúú iní-ó tñaha ñáiyu-o dàtná cúú iní-ó mèe-o. Te núu duca<sup>n</sup> na càda-o te quide váha-o.

<sup>9</sup> Dico núu ñá túú cùu iní ì<sup>n</sup>nuu-o cuè tnahá ñáiyu-o, te cuu cuèchi xii-o chí ñá túú quide-o nacuaa càhá<sup>n</sup> Yá Ndiöxí. <sup>10</sup> Te núu ì<sup>n</sup> ñáiyu ndàunihnu ì<sup>n</sup> sá càhá<sup>n</sup> Yá Ndiöxí, te dava-ni quide-yu ña, te ñáiyu-á<sup>n</sup> ñà túú quide-yu nàcuáa càhá<sup>n</sup> ndudú Yá Ndiöxí.

<sup>11</sup> Te Yá Ndiöxí ní cachí-gá sá tée ndècu ñadihí-xi vá càhá<sup>n</sup> ndìhi-dé ingá ñadihí. Te diu-ni-gá ní cachí-gá sá vã cáhni-ó tñaha ñáiyu-o. Te cuèi ñá túú càhá<sup>n</sup> ndìhi-o ingá ñadihí, te núu sàhni-o tnahá ñáiyu-o te ñá túú quide-o nacuaa càhá<sup>n</sup> ndudú Yá Ndiöxí.

<sup>12</sup> Te nchoo xini ñuhu-xi càhá<sup>n</sup>-ó tñuhu váha te cada ndáá-ó, chí ñá díú ì<sup>n</sup> sá vèe cùu-xi sá ní cachí Yá Ndiöxí cada-o. Te mee-gã ní cachí-gá sá cádá ndáá-gá cuèchi-o na sáá nduu. <sup>13</sup> Te nchaa ñáiyu ñá túú cùndahú iní tñaha ñáiyu-xi, te vá cùndahú iní ñàhá-gã xii-yu na sáá nduu càda ndáá-gá cuèchi-yu.

Te nchaa ñáiyu cùndahú iní tñaha ñáiyu-xi te Yá Ndiöxí cùndahú iní ñàhá-gã xii-yu na sáá nduu-ã<sup>n</sup>.

<sup>14</sup> Te nchòhó ñáiyu ndècu ndìhi-í ichi Xítohó Jesucristú, te núu càchí-ó sã sàndáá iní-ó Yá Ndiöxí te ñá túú quide-o sá vâha, te ñá túú ndèe nándìhi-xi, chí vá nánihí tãhú-ó te núu duca<sup>n</sup> na càda-o. <sup>15</sup> Te núu ndèhe-o ì<sup>n</sup> tnahá ñáiyu-o ñà túú dõo-yu àdi ñá túú sã cùnchitò-yu, <sup>16</sup> te xãha<sup>n</sup>-o: “Núhú-n te nducu-n dõó cuhnu-n te nducu-n sã cáxí-n”, xãha<sup>n</sup>-o, te ñá túú nã sãñaha-o, te sá dúcã<sup>n</sup> quide-o te ñá túú quide váha-o.

<sup>17</sup> Te núu càchí-ó sã sàndáá iní-ó Yá Ndiöxí te ñá túú quide váha-o ndècu-o, te vèdana nándìhi-xi.

<sup>18</sup> Te ió ñáiyu càchí-yu sá sàndáá iní-yu Yá Ndiöxí, te ió ñáiyu càchí-yu sá mèe-ní sã vâha quide-yu. Te yúhú càchí-í sá nùu ñá túú quide-o sá vâha, te ñá túú sàndáá iní-ó Yá Ndiöxí. Te nchoo quide-o sá vâha núu xíá<sup>n</sup> cùtnùní iní-ó sã sàndáá iní-ó-gã. <sup>19</sup> Te ió ñáiyu càchí sá ì<sup>n</sup>dii-ni Yá Ndiöxí ndécú,

### *Quindáá iní-ó Yá Ndiöxí te cada váha-o*

<sup>14</sup> Te nchòhó ñáiyu ndècu ndìhi-í ichi Xítohó Jesucristú, te núu càchí-ó sã sàndáá iní-ó Yá Ndiöxí te ñá túú quide-o sá vâha, te ñá túú ndèe nándìhi-xi, chí vá nánihí tãhú-ó te núu duca<sup>n</sup> na càda-o. <sup>15</sup> Te núu ndèhe-o ì<sup>n</sup> tnahá ñáiyu-o ñà túú dõo-yu àdi ñá túú sã cùnchitò-yu, <sup>16</sup> te xãha<sup>n</sup>-o: “Núhú-n te nducu-n dõó cuhnu-n te nducu-n sã cáxí-n”, xãha<sup>n</sup>-o, te ñá túú nã sãñaha-o, te sá dúcã<sup>n</sup> quide-o te ñá túú quide váha-o.

<sup>17</sup> Te núu càchí-ó sã sàndáá iní-ó Yá Ndiöxí te ñá túú quide váha-o ndècu-o, te vèdana nándìhi-xi.

<sup>18</sup> Te ió ñáiyu càchí-yu sá sàndáá iní-yu Yá Ndiöxí, te ió ñáiyu càchí-yu sá mèe-ní sã vâha quide-yu. Te yúhú càchí-í sá nùu ñá túú quide-o sá vâha, te ñá túú sàndáá iní-ó Yá Ndiöxí. Te nchoo quide-o sá vâha núu xíá<sup>n</sup> cùtnùní iní-ó sã sàndáá iní-ó-gã. <sup>19</sup> Te ió ñáiyu càchí sá ì<sup>n</sup>dii-ni Yá Ndiöxí ndécú,

<sup>19</sup> Te ió ñáiyu càchí sá ì<sup>n</sup>dii-ni Yá Ndiöxí ndécú,

te váha-ni càhá<sup>n</sup>-yu. Te tnàhá yucu ñávàha ndihì nchaa espíritú cùndihì-xi xiní-xi sá ndécú ñ<sup>n</sup>dii-ni Yá Ndiòxí, te yùhú-xi dico ñá túú tñ<sup>n</sup>-xi tnúhu-gá. <sup>20</sup> Te ío ñ<sup>n</sup> ñ<sup>n</sup>quí-ó te núu na càchí-ó sã sãndáá iní-ó Yá Ndiòxí, te vá cáda-ó sã vãha. <sup>21</sup> Te ñ<sup>n</sup>aní tnàhá-ó ndíi Àbrahám téé ní xíndecu ndéé sanaha ñ<sup>n</sup> ngúndecu váha ndíi núú Yá Ndiòxí, chi ní xito ndéé ñáhá-gã xii ndíi núu ndisa sá cáhni ndíi déhe ndíi té Isàác nduu táhú-gã ní cùu, te dàvá-á<sup>n</sup> ñ<sup>n</sup> cutnùní iní-gá sá ío sãndáá iní ñáhá ndíi xii-gá, núu ñá ní dàña-gá cahni ndíi déhe ndíi. <sup>22</sup> Te nàha-o sá ndíi Àbrahám ñá díú-ní sã méé-ní sã ñ<sup>n</sup> sãndáá iní ñáhá ndíi xii-gá, chi ní tñ<sup>n</sup> ndíi tnúhu-gá. <sup>23</sup> Te duca<sup>n</sup> ñ<sup>n</sup> quee ndáá-xi nàcuáa càhá<sup>n</sup>-xi núú tütú Yá Ndiòxí núú càchí-xi: “Ndíi Àbrahám ní sãndáá iní ndíi ní quide ndíi nchaa nàcuáa ní xáha<sup>n</sup> Yá Ndiòxí, te ní ngúndecu váha ndíi núú-gã, te ní cachí-gá sá cúú ndíi ñ<sup>n</sup> téé ío váha tnàhá tnúhu ndihì-gá”, duha càchí-xi núú tütú-gá.

<sup>24</sup> Te xíá<sup>n</sup> cùtnùní iní-ó sã ñá díú mèe-ni sá quíndáá iní-ó Yá Ndiòxí, chi núu na càda-o nàcuáa cuu váha iní-gá te ngúndecu váha-o núú-gã. <sup>25</sup> dàtná ní quide-gá tá Ràháb ñ<sup>n</sup> ñ<sup>n</sup>adìhí ní xíndecu ndéé sanaha, chi xíchí-ã<sup>n</sup> ñ<sup>n</sup> xíndecu-xi ichi díí iní, dico ní tuha-xi ichi Yá Ndiòxí te ní ngúndecu váha-xi núú-gã, chi ní chindee-xi cuè téé israhél cue téé ní xica chi<sup>n</sup>-gã, te ní sanu ichi ñaha-xi xii-güedé ñ<sup>n</sup> ichi núú vã nánihí ñáhá cuè téé cùu úhú iní ñáhá xii-güedé. <sup>26</sup> Te nchaa ñáiyu càchí sá sãndáá iní Yá Ndiòxí, te ñá túú quidé-yu nàcuáa càhá<sup>n</sup>-gá ñáiyu-á<sup>n</sup> cúú-yu dàtná ñ<sup>n</sup> ñáiyu ní xíhí. Chi ñá túú-gã ndíxí tũu iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáiyu ñá túú cuíní tñ<sup>n</sup> tnúhu càhá<sup>n</sup> Yá Ndiòxí.

### 3

#### *Nàcuáa quide yaa-o*

<sup>1</sup> Te nchòhó ñáiyu ndècu ndihì-í ichi Xítohó Jesucristú, vá ncháá-ndó càni iní-ndó cùu-ndo mestrú dacuàha-ndo ñáiyu tnúhu Yá Ndiòxí chi íí cáá-xí. Chi na quítnahá nduu nàcuáha-o cuèndá núú-gã, te núu ñá túú ní quide ndáá-ó ñá, te vá cúú vãha iní-gá núú-ó. <sup>2</sup> Te nchaa-o ío cuèhé sã ñá túú vãha quide-o. Te nchaa

ñáiyu ñá túú càhá<sup>n</sup> tnúhu cuèhé tnúhu duha cùu-yu ñáiyu ñá túú ñá cùmáni chi ío ndáá quidé-yu. Te xiní-yu cotñ<sup>n</sup>-yu mèe-yu, te quide váha-yu núú Yá Ndiòxí. <sup>3</sup> Te dàtná cuíní-ndó cùu ñ<sup>n</sup> quiti te núu na chihì-o frenú yuhu-di, te cotñ<sup>n</sup>-o-di te ngúnu ichi-di, te duca<sup>n</sup> sãtnahá-xi cùu ñáiyu sãcotñ<sup>n</sup> mee-xi, chi ñá túú càhá<sup>n</sup>-yu tnúhu cuèhé tnúhu duha. <sup>4</sup> Te dàtná cuíní-ndó cùu barcú cuèi nàhnu vihi-xi, dico òré quéné ñ<sup>n</sup>hi táchí te tùndaha-xi ñ<sup>n</sup> xio, dico téé dàcaca ndacu-dé dáquihí<sup>n</sup>-dé-xi ndihì ñ<sup>n</sup> yutnu sá dánàni-güedé tímú ndàa núú càchí iní-dé quihí<sup>n</sup>-xi. <sup>5</sup> Te duca<sup>n</sup> cùu tucu yaa-o chi ío líhli-xi dico ío cuèhé tnúhu càhá<sup>n</sup>-ó ndihì-xi. Te duca<sup>n</sup>-ni sãtnahá-xi cùu tucu sá lúhá ñùhú chi sàhmi-xi ñ<sup>n</sup> yucu. <sup>6</sup> Te díu-ni duca<sup>n</sup> sãtnahá-xi cùu yaa-o chi ío cuèhé tnúhu cuèhé tnúhu duha càhá<sup>n</sup>-ó ndihì-xi, te dàcuíta nihnu ñaha-xi xii-o. Te ío cuèhé cuèchi quide-o ndihì-xi cuendá sá ñùyíú-a ñùhu tnahá ñùhú tñ<sup>n</sup> yucu ñávàha dàticá nihnu ñaha-xi. <sup>7</sup> Te ndacu-o càda masú-ó nchàa núú quiti ío ñùyíú cuèi quiti déé<sup>n</sup> quiti xica núú ñùhú, te cuèi quiti ndàva, te cuèi cóó, te cuèi quiti ñùhu xití ndute làmár, chi duca<sup>n</sup> quide dava cue téé ñùyíú-a. <sup>8</sup> Dico yàa-o chi vá yóo ñ<sup>n</sup> ndàcu cada masú ñáhá xii-xi nàcuáa càhá<sup>n</sup>-ó mèe-ni tnúhu váha ndihì-xi, chi mee-ni tnúhu cuèhé tnúhu duha cùnuu-gá càhá<sup>n</sup>-ó ndihì-xi. Te cùu-xi datná ñ<sup>n</sup> venènú chi dàti-u-xi iní-ó. <sup>9</sup> Te díu-ni ndihì yàa-o quide cahnu-o Dútú Ndiòxí Yá cúú Tãtá-ó, te díu-ni ndihì yàa-o càhá<sup>n</sup> úhú-ó cuè tnahá ñáiyu-o. Te xiní ñùhu-xi vá dúcá<sup>n</sup> càda-o, chi mee-gã ní chihì-gá sá xiní tnùní-ó ndihì iní-ó, dàtná cáá mèe-gã ñùhú iní-gá. <sup>10</sup> Te díu-ni yuhu-o quèe tnúhu váha càhá<sup>n</sup>-ó, te díu-ni yuhu-o quèe tnúhu cuèhé tnúhu duha. Te nchòhó ñáiyu ndècu ndihì-í ichi Xítohó Jesucristú cunaha-ndo sã ñá túú ndèu váha-xi duca<sup>n</sup> càda-o. <sup>11</sup> Te ñá túú xiní-ndó sã ñ<sup>n</sup> núú quèé ñihni ndute, te quèe ndute váha te quèe ndute úá-ã<sup>n</sup>. <sup>12</sup> Te nchòhó ñáiyu ndècu ndihì-í ichi Xítohó Jesucristú, te ñá túú xiní-ndó sã ñ<sup>n</sup> yutnu ngúxí, te cùu<sup>n</sup> aceitúná, àdi xiní-ndó sã ñ<sup>n</sup> yoho yaha stilé te cùu<sup>n</sup> ngúxí. Te duca<sup>n</sup> cuèi ñ<sup>n</sup> núú quèé ñihni ndute, vá cúú quèe ndute váha te quee

ndute úhá. Te duca<sup>n</sup> sãtnahá-xi cùu yuhu-o chi vá cúú càhá<sup>n</sup>-ó tnũhu váha te cáhá<sup>n</sup>-ó tnũhu cuèhé tnũhu duha.

*Nchaa sá vãha xini tnùnì-ó tàxi Yá Ndiõxí*

<sup>13</sup> Te núu ndècu ñáyiú túha tnuú-ndó ñáyiú cùtnuní iní-xi, te xini ñuhu-xi mee-ni sá vãha cadá-yu, duca<sup>n</sup> te cutnùnì iní-ó sã túha ndisá-yu, te vá cadá càhnú-yu mèé-yu. <sup>14</sup> Te núu nchoo cuèdú iní-ó te cuiní-ó cùnũu-o núú tnàha ñáyiú-o, te vá càchí-ó sã túha-o, chi ñá túú quide ndáá-ó te núu duca<sup>n</sup> na càda-o. <sup>15</sup> Chi ñá díú xiã<sup>n</sup> ní dànehé ñáhá Yá Ndiõxí, chi ñuyíú iha ní cacu ni-hnu-xi cuendá sá yùcu ñávãha dàcahu iní ñáhá-xí. <sup>16</sup> Te núu ndécú ñáyiú cuèdú iní ñáyiú cuiní cunuú, te yacá<sup>n</sup> mee-ni ndáhú nãá xĩndecú-yu, te ñá túú quide váha-yu, chi mee-ni nchàa sá cuèhé sá dúhá quidé-yu. <sup>17</sup> Te núu ní taxi Yá Ndiõxí sá xini tnùnì-ó, te cada váha-o, te cáhá<sup>n</sup> ndihí váha-o nchàa tnaha ñáyiú-o, te tnĩ-o tnũhu váha càhá<sup>n</sup>-yu, te cundàhú iní-ó-güë-yu te chindee-õ-yu, te vá caní ñ<sup>n</sup> cani úú iní-ó, te ío cunduu ndáá iní-ó. <sup>18</sup> Te núu cuiní-ó ñá túú nã cuu cundecu-o ñuyíú-a, te cada váha-o sã cúú-xí tnàha ñáyiú-o cuendá sá ñá túú nã cuu cundecu-o ndihí-yu. Te duca<sup>n</sup> te nguínchicú<sup>n</sup> dava-gá tnàha ñáyiú-o càda váha-yu.

## 4

*Vá cúú cundecu-o ichi Yá Ndiõxí te cada-o nãndí sá cuèhé sá dúhá*

<sup>1</sup> ¿Te xini-ndó nã cuendá nãá ñáyiú te xĩsahni tnàhá-yu-ã<sup>n</sup>? Te nãá-yu sá tnũhu cuèdú iní, chi ñu-ni xiã<sup>n</sup> ñúhú iní-yu, te ñá túú ndècu váha iní-yu. <sup>2</sup> Chi cuiní-yu cundecu ndihí-yu ñ<sup>n</sup> sá ñá túú ndècu ndihí-yu, te ñá túú nihí-yu núu xiã<sup>n</sup> xĩcuu cuèdú iní tnáhã-yu, te xĩcuèhé tnáhã-yu, te càni tnahá-yu, te xĩsahni tnàhá-yu. Te ñá túú nihí-yu sá cuiní-yu chi ñá túú xicá<sup>n</sup>-yu núú Yá Ndiõxí. <sup>3</sup> Te cuèi xicá<sup>n</sup>-yu ñ<sup>n</sup> sá cuiní-yu núú-gã te ñá túú sãñaha-gã, chi ñá túú xicá<sup>n</sup>-yu ñ<sup>n</sup> sá cúú xĩ-yu sá vãha, chi ñ<sup>n</sup> sá ná ndihí-yu núú cadã-yu nchaa sá cuèhé sá dúhá xicá<sup>n</sup>-yu, núu xiã<sup>n</sup> ñá nihí-yu. <sup>4</sup> Te nchaa ñáyiú duca<sup>n</sup> xĩquide ío cùu sáá iní-yu núú Yá Ndiõxí. Te

nàha-ndo sá ncháá ñáyiú cùdí iní-xi cundecu ichi cuèhé ichi duha cùu úhú iní-yu Yá Ndiõxí, chi vá cúú cundecu-o ichi cuèhé ichi duha, te cundecu-o ichi-gã. <sup>5</sup> Te ñá túú díó duca<sup>n</sup> càhá<sup>n</sup>-xi núú tütú Yá Ndiõxí núú càchí-xi: “Yá Ndiõxí ní taxi-gã Espiritú-gã ndécú ndihí-o. Te Espiritú-gã-á<sup>n</sup> cuiní-xi sá méé-ní-gã cuhu<sup>n</sup> iní-ó”, duha càchí-xi núú tütú-gã. <sup>6</sup> Te Yá Ndiõxí ío chindee ñaha-gã cuendá cada ndáá-ó nũú-gã dàtná càchí tucu-xi núú tütú-gã núú càchí-xi: “Yá Ndiõxí ñá túú cùu váha iní-gã núú nchàa ñáyiú quide cahnu mee-xi, dico chindee-gã cue ñáyiú ndàhú iní-xi”, duha càhá<sup>n</sup>-xi núú tütú-gã. <sup>7</sup> Te cada-ndo nãcuáa càhá<sup>n</sup> Yá Ndiõxí. Te vá cadá-ndó nãcuáa cuiní yucu ñávãha, duca<sup>n</sup> te xóo cóo ndéé ñáhá-xí xì-ndo. <sup>8</sup> Te tnĩ-ndo tnũhu càhá<sup>n</sup> Yá Ndiõxí te cundecu ndihí ñaha-gã xii-ndo. Te nchaa nchòhó ñáyiú ndècu ichi cuèhé ichi duha dañã-ndo ìchi-á<sup>n</sup> te cada váha-ndo. Te nchaa nchòhó ñáyiú sàni iní cunu cuechi nũú Yá Ndiõxí te quide-ni-ndo nchaa sá cuèhé sá dúhá, te ñá túú quide váha-ndo nũu duca<sup>n</sup>, chi xini ñuhu-xi sá càcã<sup>n</sup>-ndó nũú Yá Ndiõxí sá ná ndádá ndòo ndada nine-gã iní-ndó. <sup>9</sup> Te ndixi cuèchi iní-ndó nchàa sá quidé-ndó ndéé ndáhyú ndisa-ndo sã ndihú iní-ndó, te ñá díú dà cudí iní-ndó. <sup>10</sup> Te náhmã-ndó nũú Yá Ndiõxí nchaa sá ñí quide-ndo, te ngũndecu váha-ndo nũú-gã.

*Vá càhá<sup>n</sup>-ó nchàa sá quidé tnàha ñáyiú-o*

<sup>11</sup> Te nchòhó ñáyiú ndècu ndihí-í ichi Xítóhó Jesucristú, vá cuátnũhu tnaha-ndo, chi nchaa ñáyiú sãtnũhu tnaha dícó-ni ndàa nuú-yu ndèhe tnahá-yu, te ñá túú càhá<sup>n</sup> váha-yu cuendá tnũhu Yá Ndiõxí sá sánú ichi ñaha xií-yu nãcuáa cundecú-yu, chi dàquee tíhũ-yu tnũhu-á<sup>n</sup>. Te núu càchí-ndó sã ñá túú càhá<sup>n</sup> váha tnũhu Yá Ndiõxí, te xiã<sup>n</sup> quée-xí sã ñá túú sãndáá iní-ndó tnũhu càhá<sup>n</sup>-gã, te cuiní-ndó cùnũu tnũhu-ndo nũú tnũhu-gã. <sup>12</sup> Te mee Yá Ndiõxí ní cachí-gã nãcuáa cada-o, te ñu-ni mee-gã càhá<sup>n</sup>-gã te núu ní quide váha-o, àdi ñá túú ní quide váha-o. Te ñu-ni mee-gã dàcácu nihnu ñaha-gã xii-o nũú úhú núú ndàhú, te ñu-ni-gã daquihí<sup>n</sup> ñáhã-gã xii-o nũú úhú núú ndàhú-á<sup>n</sup> te núu vá cadá vãha-o. Te



nchoo ñà túú ñă cúú-ó, te núu mee-ni nchàa sá quidé tnàha ñáyiu-o cùndehe-o.

*Ñá túú cùtnuní iní-ó ñăsa túndaá-ó ìngá nduu*

<sup>13</sup> Te dava nchòhó càchí-ndó sã vítna àdi tneé quíhí<sup>n</sup>-ndó ì<sup>n</sup> ñuuú, te yàcá<sup>n</sup> cundecu-ndo ì<sup>n</sup> cuíá cada-ndo ì<sup>n</sup> ndáhú te níhí-ndó díhú<sup>n</sup>. <sup>14</sup> Te ni ñă xìní-ndó ñă cúú sã yàha-ndo vítna àdi tneé. Te nchoo cùu-o datná ì<sup>n</sup> vícó núhú, chi vícó-ã<sup>n</sup> tnàvíí ndéhé-ó te tna tnaa-gá sa ní ndóñhú-xí. Duca<sup>n</sup> sãtnahá-xí cùu nchoo chi ì<sup>n</sup> úú nduu duha vèxi-o ñùyíú-a te ndoñuhu-o. <sup>15</sup> Te núu sàndaá iní-ó Yã Ndiöxí te duha cáhá<sup>n</sup>-ó: “Te núu Ndiöxí ñă càchí-gá sá cùndècu tnaa-o ñùyíú-a te cada chi<sup>n</sup>-o”, duha cachí-ó. <sup>16</sup> Dico mee-ndo chi ío ñí iní-ndó cuíní-ndó cùnuu tnúhu-ndo núú Yã Ndiöxí, te ñá túú nduu váha-xí sá dúcá<sup>n</sup> quíde-ndo. <sup>17</sup> Te núu xìní-ó càda-o sá vãha te ñá túú quíde-o, te cùu-xí ì<sup>n</sup> cuéchi núú-gã.

## 5

*Tnúhu sá dátũha ñaha xì nchaa ñáyiu cuica ñà túú sàndaá iní tnúhu Yã Ndiöxí*

<sup>1</sup> Te nchòhó ñáyiu cuica ñáyiu cuihna iní-xí cundedóho-ndo tnúhu na càhá<sup>n</sup>-í-a. Vítna ngúíta-ndo ndíhú iní-ndó, te ndáhyú víhí-ndó, chi quixi ì<sup>n</sup> tnúndòho cuendá-ndó te ndoho víhi-ndo. <sup>2</sup> Te nchaa sá ndécú ndíhi-ndo ndíhi cuita tíu quíhí<sup>n</sup>, te quee tíquidi dóó-ndó, <sup>3</sup> te díhú<sup>n</sup>-ndó caxi cudi ñúhu. Te xiá<sup>n</sup> cuita naquiní ndeé-ndó tnúndòho sá ñà túú quíde váha-ndo. Te ndíhi-ndo ndíhi díhú<sup>n</sup>-ndó sã ñí taxúha-ndo, chi vítna sa ta cùyatni sáá nduu ndíhi ñùyíú-a. <sup>4</sup> Te nchaa cue téé ní quíde chi<sup>n</sup> núú chíú<sup>n</sup>-ndó ñí ndatnúhu-ndo ndíhi-güedé nàcuáa cháhu-ndo-güedé ní cùu, te ñá túú ní chãhu-ndo-güedé nàcuáa ní xáha<sup>n</sup>-ndo xì-güedé, núu xiá<sup>n</sup> ío ndècuéchi-ndo. Te Yã Ndiöxí Yaá ndécú àndíu ní tecú dóho-gá nàcuáa càhá<sup>n</sup>-güedé sá ñí dándàhú-ndó-güedé. <sup>5</sup> Te nchòhó ñáyiu cuica, sá ndécú váha-ni-ndo cùndee iní-ndó, núu quíde-ni-ndo nchaa sá vèxi iní-ndó. Te cùu-ndo datná ì<sup>n</sup> quítí nùcuíhnu mee-ni xèxi-dí, te sáá nduu sàhni-güedé-dí. Te duca<sup>n</sup> sãtnahá-xí cùu nchòhó chi ndècu váha-ndo vítna, te sáá ì<sup>n</sup> nduu nàcháhu-ndo nchàa sá quíde-ndó núú Yã Ndiöxí te núu vá

quíndaá iní-ndó-gã. <sup>6</sup> Te quíde úhú iní-ndó sàhni-ndo cue ñáyiu quíde ndáá núú Yã Ndiöxí, te ñá túú ñă quíde-yu.

*Cunduu càhnu iní-ó te cáhá<sup>n</sup> ndíhi-o Yã Ndiöxí*

<sup>7</sup> Te nchòhó ñáyiu ndècu ndíhi-í ichi Xítóhó Jesucristú, cada ndee-ni iní-ndó cùndetu-ndo ndéé ná quixi tucu-gá ñùyíú-a, te cada-ndo dàtná quíde nchàa ñáyiu chíhi tatá chi sàcùndetú-yu ndéé cúú<sup>n</sup> dáú te chíhí-yu. Te cùndee-ni iní-yu sàcùndetú-yu ndéé cúú<sup>n</sup>-gã dáú te cùu itú-yu, te ndúdí iní-yu. <sup>8</sup> Te duca<sup>n</sup> càda nchòhó tucu cada ndee iní-ndó cùndetu-ndo, chi sa ta cùyatni nduu quixi tucu Xítóhó Jesucristú. <sup>9</sup> Te duha nduu tnúhu càhá<sup>n</sup>-í núú nchòhó ñáyiu ndècu ndíhi-í ichi Xítóhó Jesucristú, vá ndàcá<sup>n</sup> cuéchi núú tnáhá-ndó te núu nása cùu ndecu-ndo, chi ñá cuéhé-gá nduu cùmání te quixi Cristú nacuaca ñaha-gã xii-o cùndecu-o núú Yã Ndiöxí, te mee-gã cada ndáá-gá cuéchi-o. <sup>10</sup> Te nchòhó ñáyiu ndècu ndíhi-í ichi Xítóhó Jesucristú, ndacu iní-ndó nàcuáa ní quíde nchaa cue téé ní xóo cáhá<sup>n</sup> tnúhu Yã Ndiöxí ndéé sanaha sá ío càhnu ní xínduu iní-güedé cuéi nándi ní ndoho-güedé. <sup>11</sup> Te cùtnuní iní-ó sã cúú-ó ñáyiu ío váha táhú-xí te núu na càda cahnu iní-ó nchàa sá ná yàha-o cuendá Yã Ndiöxí. Te nàha-ndo sá ndíi Jób duca<sup>n</sup> ñí quíde ndíi, chi nándi sá ñí yàha ndíi te ní quíde càhnu iní ndíi. Te sátá ñí yàha ní ndoho ndíi, te ío cuéhé sã ñí sãñaha Yã Ndiöxí xii ndíi. Chi ío váha iní-gá te ío cùndahú iní-gá nchaa ñáyiu ío càhnu iní-xí.

<sup>12</sup> Te nchòhó ñáyiu ndècu ndíhi-í ichi Xítóhó Jesucristú, chí cùndédóho tucu tnúhu na càhá<sup>n</sup>-í-a, chi ío xini ñuhu-xí. Vá cácu nèhe-ndo Yã Ndiöxí òré cuíní-ndó sã cùtnuní iní ñáyiu sá ndáá cada-ndo ì<sup>n</sup> sá càhá<sup>n</sup>-ndó. Te ñí vá cácu nèhe-ndo sá càchí-yu cùu ndíoxí cadũha cue téé ñùyíú-a. Te núu ì<sup>n</sup> sá xicá<sup>n</sup> tnàha ñáyiu-ndo núú-ndó te cúñaha-ni-ndo te núu cuu àdi sá vã cúú. Te vá cácu nèhe-ndo Yã Ndiöxí, duca<sup>n</sup> te vá dándòho ñaha-gã xii-ndo.

<sup>13</sup> Te núu ndòho-ndo te cáhá<sup>n</sup> ndíhi-ndo Yã Ndiöxí, àdi te núu ndècu váha-ndo te cudíi iní-ndó te chíñuhu-ndo-gã, <sup>14</sup> àdi núu cùhú-ndó te cana-ndo cuè téé yíndaha ñaha xii-ndo nacuáa ndècu-ndo ichi Yã Ndiöxí



cuèndá tee-güedé acití díquí-ndó, te cáca<sup>n</sup> táhú-güedě núú-gă cuèndá-ndó dàtná ní cachí méé-gă cunduu. <sup>15</sup> Te núu quindáá ndisa iní-ndó sá ndúha-ndo, te ndúha-ndo chi Yá Ndiöxí cada tátna ñaha-gă xii-ndo, àdi núu ní quide-ndo ì<sup>n</sup> sá ñà túú tàú-ndó càda-ndo núú-gă te cada càhnu iní-gá cuéchi-ndo. <sup>16</sup> Te xini ñuhu-xi cùtnùhu tnàha-ndo oré ñá túú cùndáá-ndó núú Yá Ndiöxí cuèndá chindee tnùhu tnàha-ndo cáhá<sup>n</sup> ndihi-ndo-gă te xocàni-gá cuéhé-ndó, te cada càhnu iní-gá nchaa sá ñà túú vâha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yá Ndiöxí na cáca<sup>n</sup>-yu ì<sup>n</sup> sá cuìní-yu núú-gă te nihí-yu, chi sàá tnùhu-yu núú-gă. <sup>17</sup> Te té Èliás, téé ní xíndecu ndéé sanaha ñí cáa-dé dàtná cáá nchò. Te ní cáhá<sup>n</sup> ndihi-dé Yá Ndiöxí ñí yùhu ñí iní-dé ní xáha<sup>n</sup>-dě xii-gá sá vâ dácù<sup>n</sup>-gá dáú, te ní tni<sup>n</sup>-gá tnùhu ní cáhá<sup>n</sup>-dé, te ñá ní dàcuu<sup>n</sup>-gá dáú ùní cuíá dava. <sup>18</sup> Te dătnùní duca<sup>n</sup> te ní cáhá<sup>n</sup> ndihi tucu té Èliás-á<sup>n</sup> Yá Ndiöxí sá dácù<sup>n</sup>-gá dáú te ní cuu<sup>n</sup>, te ní cuu tucu nchaa sá ñí xitu-güedé.

<sup>19</sup> Te nchòhó ñáyiú ndècu ndihi-í ichi Xítóhó Jesucristú, te núu dava-ndo sà ndecu-ndo ichi Yá Ndiöxí ní cùu te ní dáhá-ndó, te ndècu tucu dava-ndo nadaxinu iní tnáhá-ndó nùcúndecu tucu-ndo ìchi-gá, <sup>20</sup> te núu duca<sup>n</sup> na càda-ndo te dácácu nihnu tnàha-ndo núú ùhú núú ndàhú, te mee Yá Ndiöxí cada càhnu iní ñáhá-gă xii-ndo cuèi ío cuéhé cuéchi ní quide-ndo.

## TUTÚ DÍHNA NUU NÌ CADÚHA TÉ PÈLÚ

*Té Pèlú cadúha-dé tutú sá cúú-xí cuè ñáyiu sàndáá iní ñáhá xii Yá Ndiöxí*

<sup>1</sup> Yúhú té Pèlú ní tendaha ñaha Xítóhó Jesucristú xíca cùu-í cãhá<sup>n</sup>-í tnúhu-gá, te cadúha-í tutú-a sá cúú-xí nchòhó ñáyiu xínchíté nuu ndècu distritú Pòntó, ndihì distritú Gàlaciá, ndihì distritú Capadociá, ndihì distritú Àsiá, ndihì distritú Bitiniá. <sup>2</sup> Chi Dútú Ndiöxí ní cachí-gá sá cúú-ndó dèhe-gá ndéé cùtnàhá vátá ngáva-gá ñuyíú, te Espiritú-gá ní quide-xi ndècu yíñuhu-ndo núú-gã vitna. Te ní cachí-gá sá cúú-ndó dèhe-gá cuendá tñi-ndo nchaa tnúhu cãhá<sup>n</sup> Xítóhó Jesucristú, ndihì cuendá nduu ndoo nduu nine iní-ndó, chi ñu cuendá-á<sup>n</sup> ní xíhí Xítóhó Jesucristú. Te xíca<sup>n</sup> táhù-í núú Yá Ndiöxí sá ïo na chindee chitúu ñaha-gã xii-ndo cuèi vitna te cuèi núú cuahá<sup>n</sup> núú vèxi, te ñu-ni-gã ná cádá te ío váha cuu iní-ndó cùndecu-ndo.

*Tnúhu ndee iní sá ndécú ndihì ñáyiu sàndáá iní ñáhá xii Yá Ndiöxí*

<sup>3</sup> Te vitna chí ná cãhí-ó sã ïo cãhnu cuu Yá Ndiöxí Yaá cúú Tãtá Xítóhó Jesucristú, chi ñu-gã ío ní cundàhú iní ñáhá-gã xii-o núu xíá<sup>n</sup> ní quide-gã sá nchóó ñi nduu-o dàtná ñi ñáyiu saa vitna. Te duca<sup>n</sup> ñi quide ñaha-gã xii-o cuendá sá Xítóhó Jesucristú ní xíhí-gã te ní ndoto-gã. Te cuendá sá ñi nduu-o dàtná ñi ñáyiu saa, xíá<sup>n</sup> ní ngúndecu ndihì-o tnúhu ndee iní <sup>4</sup> sá cùndecu ndihì-o-gã ñi caa ñi quíhí<sup>n</sup>, chi duca<sup>n</sup> ñi cachí-gã cunduu. Te yacá<sup>n</sup> vá quini-gã-ó ñi ñi sá cuèhé sá dúhá, te ío cudíí iní-ó cùndecu-o ndihì-gã ñi caa ñi quíhí<sup>n</sup>. <sup>5</sup> Te sá sàndáá iní-ó Yá Ndiöxí, núu xíá<sup>n</sup> coto ñaha-gã xii-o ndéé ná sãá nduu nàquehe<sup>n</sup> cuendá ñáhá-gã chi ío cãhnu cuu-gã.

<sup>6</sup> Te xíá<sup>n</sup> ío cudíí iní-ndó ndècu-ndo, te cuèi nãndi ndòho-ndo ndecu-ndo dico sacú-ñi nduu duca<sup>n</sup> ndòho-ndo. <sup>7</sup> Te òré ná cádá cãhnu iní-ndó yãha-ndo nchaa sá ná cáda ñaha ñáyiu xii-ndo, te duca<sup>n</sup> te cutnùní sàndáá ndisa iní-ndó Yá Ndiöxí, te sá dúcá<sup>n</sup> sàndáá iní-ndó Yá Ndiöxí ío-gã

váha dàcúxí dñhú<sup>n</sup> cuàá<sup>n</sup> chi xíá<sup>n</sup> ñá túú cùdí-xi. Te cuèi duca<sup>n</sup> dico xito ndéé náhí-ní-güedé núu ndisa cùu-xi dñhú<sup>n</sup> cuàá<sup>n</sup>. Te duca<sup>n</sup> sãtnahá-xi cùu nchòhó cuendá nchaa sá ndóhó-ndó, te na sãá nduu quixi tucu Xítóhó Jesucristú te cúñaha-gã xii-ndo: “Ío váha ní quide-ndo, te vitna ío cãhnu cuu-ndo, te táu-ndó núcúndecu váha-ndo”, duha cúñaha-gã xii-ndo.

<sup>8</sup> Te vitna ío cùu iní-ndó Xítóhó Jesucristú cuèi vátá quini-gã-ndó-gã, te duca<sup>n</sup> ïo sàndáá iní-ndó-gã, te ío cudíí iní-ndó te súúní ñi ñá cùtnùní iní-ndó ñasa cunduu tnúhu cãhá<sup>n</sup>-ndó sá dúcá<sup>n</sup> ïo cudíí iní-ndó <sup>9</sup> cuendá sá ñi naníhí táhù-ndó, chi ní sàndáá iní-ndó-gã.

<sup>10</sup> Te cue téé ní xóo cãhá<sup>n</sup> tnúhu Yá Ndiöxí ndéé sanaha ñi cachí-güedé nãcuáa cada-gã cundàhú iní ñáhá-gã xii-o vitna. Te cue téé-á<sup>n</sup> ïo váha ní dácuahá-güedé nãcuáa cada Yá Ndiöxí dàcácu nihnu ñaha-gã xii-o vitna.

<sup>11</sup> Te Espiritú Xítóhó Jesucristú ní ngúndecu ndihì cue téé-á<sup>n</sup> ñi xáha<sup>n</sup>-xi xii-güedé nãcuáa ndoho-gã, te ní xáha<sup>n</sup> tucu-xi xii-güedé sá sãtá ná yãha ndoho-gã te ío cunuu-gã ndihì Yá Ndiöxí. Te ío ní sani iní-güedé núu ná nduu sãá duca<sup>n</sup> cáda-xi, ndihì nchaa nãndi-gã cúú sã cádá-xi. <sup>12</sup> Te Yá Ndiöxí ní xáha<sup>n</sup>-gã xii-güedé sá ncháá tnúhu váha cãhá<sup>n</sup>-güedé vá cúú-xi cuendá méé-güedé, chi cuendá nchoo cuè ñáyiu ndècu ñuyíú-a vitna cùu-xi. Te ñu-ni tnúhu-á<sup>n</sup> cúú tnúhu cãhá<sup>n</sup> nchúhú cue téé cãhá<sup>n</sup> tnúhu Yá Ndiöxí núú-ndó. Te Espiritú sá ñi taxi Yá Ndiöxí ndécú ndihì-o chindee ñaha-xi xii-ndí cãhá<sup>n</sup>-ndí tnúhu-gã. Te cue espíritú xínú cuèchi núú Yá Ndiöxí ío cuini-xi quini ndáá-xi nchaa nãcuáa cuahá<sup>n</sup> tnúhu-á<sup>n</sup>.

*Yá Ndiöxí cãhí-gã sá cádá-ó mèe-ñi sá vãha*

<sup>13</sup> Te sá dúcá<sup>n</sup> ïo váha ní quide ñaha Yá Ndiöxí xii-ndo xíá<sup>n</sup> xíní ññhu-xi ío váha cuáha-ndo cuendá nãcuáa cundecu-ndo te vá cãní iní-ndó cáda-ndo ñi ñi sá cuèhé sá dúhá, te ío quindáá iní-ndó sá Yá Ndiöxí cáda váha ñaha-gã nduu na quixi tucu Xítóhó Jesucristú. <sup>14</sup> Te ío tñi-ndo nchaa tnúhu cãhá<sup>n</sup> Yá Ndiöxí, te vá cúhú<sup>n</sup>-gã iní-ndó nãndi sá cuèhé sá dúhá sã ñi xúhu<sup>n</sup> iní-ndó cùtnàhá vátá cùndecu-gã-ndó ichi-gã te ñi vã cádá-ndó. <sup>15</sup> Te cada-ndo

mèe-ni sá vǎha cundecu-ndo dàtná quidé mèe Yá Ndiöxí Yaá ní cáhá<sup>n</sup> ñáhá xì-o cundecu-o ndìhi-gá. <sup>16</sup> Te cǎchí-gá núú tütú-gá: “Cada-ndo mèe-ni sá vǎha cundecu-ndo, chi duca<sup>n</sup> quíde yúhú”, duha cǎchí-gá núú tütú-gá.

<sup>17</sup> Te Yá Ndiöxí cada ndáá-gá cuéchi nchaa ñáyiú, te vá cádá cuèndá-gá cuèi náí ñáyiú cùú-yu, te nchòhó cǎchí-ndó sǎ díú Tǎtá-ndó cùu-gá te ndáá, núu xǎ<sup>n</sup> xíní ñùhu-xi canehe-ndo sá yǎñùhu núú-gǎ ndi nchaa nduu cundecu-ndo ñuyíú-a. <sup>18</sup> Te ñu-gá ní dácǎcu nihnu ñaha-gǎ xii-ndo ñ<sup>n</sup> ichi sá ñà túú nàndìhi ní sanu ichi ñaha cuè ñaní tnáhá-ndó ní xindecu ndéé sanaha ní cùu, te nchòhó sa nàha-ndo sá sǎ dúcá<sup>n</sup> ní quíde ñaha Yá Ndiöxí ní dácǎcu nihnu ñaha-gǎ xii-ndo ìchi-á<sup>n</sup> ñà túú ní chǎhu-gá ní ñ<sup>n</sup> díhú<sup>n</sup> cuáá<sup>n</sup>, te ní ñ<sup>n</sup> díhú<sup>n</sup> cuixí<sup>n</sup> sá ndíhí nihnu ñuyíú-a cuèndá-ndó. <sup>19</sup> Chi Xítóhó Jesucristú ní quixi-gá ní sati níñí-gǎ, te ní xíhí-gá núú cùrúxí cuèndá sá nchóó nàníhí tàhú-ó, te cùu-gá dàtná ñ<sup>n</sup> mbèé quítì ío váha iní-xi, quítì cǎndoo canine. <sup>20</sup> Te duca<sup>n</sup> ní ndoho Xítóhó Jesucristú, chi duca<sup>n</sup> tnàhí ndéé tnuní ndoho-gá ndéé cútnáhá vátá ngǎva-gá ñuyíú. Te duca<sup>n</sup> ní yáha-gá cútnáhá ní quixi-gá òré vitna cùmání sǎá nduu nàa ñuyíú-a cuèndá nchoo cùu-xi sá vǎha xii-o vitna. <sup>21</sup> Te nchòhó sa níhí-ndó tnùhu nàcuáa ní yáha Xítóhó Jesucristú cútnáhá ní quixi-gá ñuyíú-a, núu xǎ<sup>n</sup> sàndáá iní-ndó Yá Ndiöxí. Te Yá Ndiöxí ní dándótó-gǎ Xítóhó Jesucristú, te sǎtá ní dándótó ñàha-gá te ní cachí-gá sá ío cǎhnu cuu Xítóhó Jesucristú. Te sá dúcá<sup>n</sup> ní cuu, xǎ<sup>n</sup> ío sàndáá iní-ndó Yá Ndiöxí, te ní taxi-gá tnúhu ndee ìní ndécú ndìhi-ndo sá sǎá nduu cùndecu-ndo ndìhi-gá ní caa ní quíhí<sup>n</sup>.

<sup>22</sup> Te Espíritú Yá Ndiöxí ní quíde-xi te ní sàndáá iní-ndó tnùhu-gá, te xǎ<sup>n</sup> ní nduu ndoo ní nduu nine iní-ndó, te cùu iní tnáhá ndísa-ndo nacuáa ndècu-ndo ichi Yá Ndiöxí, te xíní ñuhu ndísa-xi sá ío ní yùhu ní iní-ndó cùu iní tnáhá-ndó ñ<sup>n</sup> ñ<sup>n</sup>-ndo. <sup>23</sup> Te nchòhó ní nduu-ndo dàtná ñ<sup>n</sup> ñáyiú saa sá cuèndá tnúhu Yá Ndiöxí, te tnúhu-á<sup>n</sup> candeca-xi iní-ndó ní caa ní quíhí<sup>n</sup>, te vá ñ<sup>n</sup> ndùu ndìhi nihnu-xi, te ñà díú cuèndá ñáyiú ñuyíú-a ní

ndùu-ndo ñ<sup>n</sup> ñáyiú saa chi cuèndá tnúhu-gá.

<sup>24</sup> Chi núú tütú Yá Ndiöxí cǎchí-xi:

Nchaa ñáyiú ndècu ñuyíú-a cùú-yu dàtná cùhú, chi cùhú-ǎ<sup>n</sup> tnaa-ni cùdíi-xi te xíhí-xi, duca<sup>n</sup> sǎtnahá-xi cùú-yu.

Te nchaa sá ndécú ndìhí-yu cùu-xi datná ñ<sup>n</sup> itá cùhú-ǎ<sup>n</sup>, chi itá-á<sup>n</sup> tnaa-ni tucu cùdíi-xi te ndàhvá-xi, duca<sup>n</sup> sǎtnahá-xi cùu nchaa sá ndécú ndìhí-yu.

<sup>25</sup> Dico tnúhu Yá Ndiöxí chi vá náá tnàhí-xi, chi duha-ni ndècu-xi, te ñu-ni duha cundecu-xi ní caa ní quíhí<sup>n</sup>.

Duha cǎchí-xi núú tütú-gá. Te ñu tnúhu-á<sup>n</sup> ní dánèhé ñáhá nchùhú cue téé cǎhá<sup>n</sup> tnúhu Yá Ndiöxí xii-ndo.

## 2

<sup>1</sup> Te xǎ<sup>n</sup> xíní ñùhu-xi dañà-ndo nchaa núú sǎ cuèhé sá dúhá, te dañà-ndo ìchi tnúhu ndehnde, te dañà-ndo vǎ dándàhú-gá-ndó mèe-ndo sá quíde vǎha-ndo, te dañà-ndo ìchi cuèdú ínì, te dañà-ndo nchaa tnúhu yítì. <sup>2</sup> Te cada-ndo cuèndá sá cùú-ndó dàtná cue landú yíquí<sup>n</sup> vitna sadi camá, chi landú-á<sup>n</sup> mee-ni sàdi-güexi te sàhnu-güexi. Te cada iní-ndó sǎ dúcá<sup>n</sup> càda-ndo chi xíní ñuhu-xi sá ío cuhu<sup>n</sup> iní-ndó dàcuaha-ndo tnúhu Yá Ndiöxí, chi xǎ<sup>n</sup> cùú-xi mèe-ni tnúhu váha, te duca<sup>n</sup> te cuita cuehnu nihnu-ndo ìchi-gá quíhí<sup>n</sup> ndéé ná sǎá nduu cùndecu-ndo núú ndécú-gǎ. <sup>3</sup> Te duca<sup>n</sup> xíní ñuhu-xi cada-ndo, chi nchòhó sa ní cutnùnì ndísa iní-ndó sǎ Yá Ndiöxí ío váha iní-gá.

*Xítóhó Jesucristú cùú-gǎ dàtná ñ<sup>n</sup> yúú*

<sup>4</sup> Te ío nanducu nihnu-ni-ndo Xítóhó Jesucristú Yaá quíde nàcuáa naníhí tàhú-ó. Te ñu-gá ní cuu-gá dàtná ñ<sup>n</sup> yúú sǎ ñà túú nàndìhi sá cùú-xi ñáyiú ñuyíú-a, chi ní dáquée tíhú ñáhǎ-yu xii-gá. Dico Yá Ndiöxí ní cachí-gá sá Xítóhó Jesucristú cùú-gǎ dàtná ñ<sup>n</sup> yúú sǎ ío-gá váha, chi ío cùnuu-gá. <sup>5</sup> Te nchòhó sa ní naníhí tàhú-ndó, te ío-gá chí nándücu nihnu Yá Ndiöxí cuèndá cuu ñ<sup>n</sup>nuu-ndo cùndecu-ndo ndìhi Espíritú-gá. Te núu duca<sup>n</sup> na càda-ndo te cuu-ndo dàtná yúú vǎha dàcaa-güedé dava vehe, te cuu tucu-ndo dàtná cue dútú ní xinu cuechi núú Yá Ndiöxí ndéé sanaha, nàcuáa ñà túú nǎ cumání-ndó nùú-gǎ, chi nchaa cue téé-á<sup>n</sup> ní xóo cuáha ñaha-güedé

sá nǐ xóo nduu táhú-gǎ. Te nchòhó vitna tàú-ndó càda-ndo nchaa nacuaá càhá<sup>n</sup>-gá, te nduu vétú iní-gá. Te duca<sup>n</sup> càda-ndo chi ndècu-ndo ndihí Xítóhó Jesucristú. <sup>6</sup> Te Yá Ndiòxí càchí-gá núú tütú-gá:

Yúhú taxi ndecu-í ì<sup>n</sup> Yaá ñuú Sìón,  
te cuu-gá dàtná ì<sup>n</sup> yúú vǎha sá sánútnǐ-güedé  
xíquí cimièntú ì<sup>n</sup> vehe, chi yúhú ní  
cachí-í sá Yáá-á<sup>n</sup> ïo cunuu-gǎ.

Te nchaa ñáyiu quindáá iní ñáhá xii-gá vǎ  
ì<sup>n</sup> ndùu ndixi cuèchi iní-yu sá dúcá<sup>n</sup>  
sàndáá iní ñáhǎ-yu xii-gá.

Duha càchí-gá núú tütú-gá. <sup>7</sup> Te nchòhó ñáyiu sàndáá iní ñáhá xii Xítóhó Jesucristú ïo cùu iní-ndó-gǎ, te nchaa ñáyiu ñá túú sàndáá iní ñáhá xii-gá quidè-yu dàtná càhá<sup>n</sup>-xi núú tütú Yá Ndiòxí núú càchí-xi:

Yúú sǎ nǐ dáquéé tǐhú cue téè dàcaa vehe,  
xíǎ<sup>n</sup> cúú-xí yúú sǎ ïo-gá nándǐhi  
vitna.

Duha càchí-xi núú tütú-gá. Te yúú-ǎ<sup>n</sup> cada iní-ó sǎ cúú-xí Xítóhó Jesucristú, chi ní dáquéé tǐhú ñáhá-güedé xii-gá. <sup>8</sup> Te càchí tucu-xi ìngá xichi núú tütú Yá Ndiòxí:

Yúú-ǎ<sup>n</sup> nguñenu ñáyiu te nduá-yu.

Duha càchí-xi núú tütú-gá. Te tnúhu-á<sup>n</sup> quée-xí sǎ ïo quide sáá iní ñáyiu núú-gǎ, chi ñá túú cuení-yu tnǐ-yu tnúhu càhá<sup>n</sup>-gá, te duca<sup>n</sup> tnàhí ndéè tnuní sá ncháá ñáyiu ñá túú cuení tnǐ tnúhu càhá<sup>n</sup>-gá, te ïo cùu sáá iní-yu núú-gǎ.

### *Ñáyiu ndècu ndihí Yá Ndiòxí*

<sup>9</sup> Te nchoo cùu-o ñáyiu sa ní dáquéé dǐ<sup>n</sup> ñaha Yá Ndiòxí xii-o cuendá cundecu-o ndihí-gá, te cùu-o dütú xínú cuèchi-o núú-gǎ, te mee-gǎ cúú-gǎ Yaá ïo cunuu, te cùu-o ñáyiu quide ndáá xǐndecu ichi-gá te cùu tucu-o ñáyiu yǐndaha-gá. Te duca<sup>n</sup> nǐ quide ñaha-gǎ xii-o cuendá sá cǔñaha-o xii nchaa ñáyiu sá ïo càhnu cuu-gá, te ïo vǎi núú sǎ vǎha quide-gá, te dǐu-gá ní quide ní dáñá-ó nchaa ichi cuèhé ichi duha ndècu-o ní cuu, te ní sanu ichi ñaha-gǎ xii-o ì<sup>n</sup> ichi váha, te vitna cùtnuní iní-ó sǎ ïo càhnu cuu-gá. <sup>10</sup> Te nchoo cùu-o ñáyiu ñá túú ndècu ndihí Yá Ndiòxí ní cùu, dico vitna ní ngúndecu ndihí-o-gǎ, te dàvá-á<sup>n</sup> vǎtá sáá-gá nduu càda váha ñaha-gǎ xii-o, dico vitna sa

ní sáá nduu quide váha ñaha-gǎ xii-o, chi ïo cùndahú iní ñáhá-gǎ.

### *Cada váha-o cùndecu-o cunu cuechi-o núú Yá Ndiòxí*

<sup>11</sup> Te nchòhó ïo cùu iní ñáhá-í xii-ndo, te càchí tnúhu-í xii-ndo sǎ nchóó cùu-o datná cue ñáyiu ndècu tñaduha ì<sup>n</sup> ñuú, te duca<sup>n</sup> sǎtnahá-xi cùu-o chi tnaa-ni ndècu-o ñuyúú-a, te sáá nduu nduu táhú-ó cùndecu-o núú ndécú Yá Ndiòxí táxí tnùní-gá, te xǐǎ<sup>n</sup> càhá<sup>n</sup> ndàhú-í núú-ndó sǎ vǎ càdá-ndó nǐ ì<sup>n</sup> sá cuèhé sá dúhá sàni iní-ndó, chi nchaa xǐǎ<sup>n</sup> ñá túú cùu-xi sǎ váha sá cúú-xi-ndó. <sup>12</sup> Te cada váha-ndo cùndecu-ndo núú nchaa ñáyiu ñá túú ndècu ichi Yá Ndiòxí, te cuèi na càhá<sup>n</sup> ñáyiu sá nchòhó nchicú<sup>n</sup> nihnu-ndo ichi cuèhé ichi duha, dico quini-yu nchaa sá váha quide-ndo, dico na sáá nduu dǎndixi túu Yá Ndiòxí iní-yu sá ñá túú quide váha-yu ndécú-yu, te dàvá-á<sup>n</sup> cachí-yu sá quide váha-ndo ndècu-ndo, te cada càhnú-yu Yá Ndiòxí.

<sup>13</sup> Te Xítóhó Jesucristú cuení-gá sá nchòhó ïo quindáá iní-ndó nchaa cue téè cùchiu<sup>n</sup> taxi tnuní ñáhá xii-ndo, te duca<sup>n</sup>-ni quindáá iní-ndó cuèi mee téè cunuu vihi-gá yǐndàha ñaha xii ñáyiu. <sup>14</sup> Te duca<sup>n</sup>-ni quindáá iní-ndó nchaa dava-gá cue téè cunuu, chi Yá Ndiòxí duca<sup>n</sup> nǐ cachí-gá cunduu sá cuè téè-á<sup>n</sup> cada ndáá-güedé nchaa cuèchi ñáyiu quide cuèhé quide dùha ndecu, te càhá<sup>n</sup> váha-güedé cuendá nchaa ñáyiu xǐquide váha ndècu. <sup>15</sup> Te Yá Ndiòxí cuení-gá sá càdá váha-ndo cùndecu-ndo cuendá nchaa ñáyiu ïo nǐ dǐquí-xi càhá<sup>n</sup> cuèhé cuendá-ndó sǎ ndécú-ndó ichi Yá Ndiòxí vá ñihí-gá-yu tnúhu càhá<sup>n</sup>-yu.

<sup>16</sup> Te nchòhó, Yá Ndiòxí ní quide-gá sá cúú-ndó ñáyiu cuu cada nàcuáa véxi iní méé-xí, dico ñá díú sǎ dúcá<sup>n</sup> nǐ quide ñaha-gǎ xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sǎ cúú-ndó ñáyiu xǐnu cuechi núú Yá Ndiòxí. <sup>17</sup> Te canehe-ndo sǎ yǐñùhu núú nchaa ñáyiu, ndihí núú téè cunuu vihi yǐndaha ñaha xii-yu, te cuu iní tnáhá ndǐ mee-ndo nacuaá ndècu-ndo ichi Yá Ndiòxí, te ïo canehe-ndo sǎ yǐñùhu núú-gǎ.

*Nchaa nàcuáa ndoho-o cùndecu-o ichi Xítóhó Jesucristú*



18 Te nchaa nchòhó ñáyiú xínu cuechi canehe-ndo sã yíñuhu núú cuè patrón-ndó, te quindáá iní-ndó càda-ndo nchaa chiu tahu-güedé. Te ññ-ni càda-ndo núú cuè téé váha iní-xi, ndihi núú cuè téé ío cuihna iní-xi. 19 Te núú nchòhó ná càda ndee iní-ndó ndòho-ndo nchaa sã ñà túú tàú-ndó ndòho-ndo cuendá sã cuiní-ndó cundáá-ndó núú Yá Ndiöxí ñá, te ío nduu vétú iní-gá. 20 Te núú nchòhó ní quide-ndo ññ cuéchi, te sàhni iní-ndó dandòho ñaha ñáyiú xii-ndo, ¿te ná sã váha cùu xiá-i? Dico núú nchòhó ná cáda ndèe iní-ndó ndòho-ndo nchaa sã cáda ñaha ñáyiú xii-ndo sã cuendá sã quidé-ndó sã váha ña, te núú duca<sup>n</sup> na càda-ndo te cùu-xi ññ sã váha núú Yá Ndiöxí. 21 Te Yá Ndiöxí ní cachí-gá sã cáda ndèe iní-ó ndòho-o nándi ndòho-o sã cuendá sã quidé-ó sã váha, chi ío ní ndòho Xítóhó Jesucristú cuendá-ó, te duca<sup>n</sup> tàú-ó cànchicú<sup>n</sup> nihnu-o càda ndee iní-ó ndòho-o nándi ndòho-o, chi duca<sup>n</sup> ní quide-gá. 22 Te mee-gá ñà túú quide-gá ni ññ sã cuèhé sã dúhá, te ni ññ tnúhu ndehnde ñà túú càhá-gá. 23 Te òré ní xóo cúcuèhé ñáhá-güedé xii-gá, te ñà túú ní xóo danchòcáva-gá tnúhu cuèhé, te òré ní xóo dandòho ñaha-güedé xii-gá, te ñà túú ní xáha-gá xii-güedé sã ío ná cada ñaha-gá, chi núú ndáhá Yá Ndiöxí ní xóo nachihi-gá méé-gá, ndihi nchaa sã sání iní-güedé cada ñaha-güedé xii-gá. Te Yá Ndiöxí cúú-gá Yaá ío váha cada ndáá cuéchi nchaa ñáyiú na sàá nduu. 24 Te Xítóhó Jesucristú cúú-gá Yaá ní xíhí núú cùrúxí cuendá nchaa cuéchi nchoo ñáyiú ndècu ñuyíú-a. Te duca<sup>n</sup> ní xíhí-gá cuendá nchoo dùu<sup>n</sup> duu<sup>n</sup> dañá-o nchaa ichi cuehé ichi duha, te cada ndáá-ó cundecu-o ichi-gá. Te ní dánicuehé ñáhá-güedé xii-gá, te sã dúcá<sup>n</sup> ní ndòho-gá xiá<sup>n</sup> ní ngúndecu váha nchoo vitna. 25 Te nchoo cùu-o datná cue mbéé cue qui<sup>n</sup> ní xíta ní cùu, dico vitna ní tuha-o Xítóhó Jesucristú, te Yaá-án cúú-gá datná ññ toli xító ñaha-gá xii-o vitna cuendá sã vã cuíta nihnu-o.

### 3

*Nàcuáa tàú ñáyiú tnándaha cadá-yu cundecú-yu*

1 Te nchaa nchòhó ñáyiú ññ ní tnandaha ío quindáá iní-ndó yñ-ndo cuendá sã núu

ñà túú sàndáá iní-güedé tnúhu Yá Ndiöxí te quindáá iní-güedé cuendá sã ndéhe-güedé quidé ndáá-ndó ndècu-ndo, te ni ñà túú xini ñuhu-xi cáhá<sup>n</sup>-ndó tnúhu-gá núú-güedé. 2 Chi ndèhe mee-güedé sã nchòhó quidé ndáá-ndó ndècu-ndo, te nèhe-ndo sã yíñuhu núú Yá Ndiöxí. 3 Te vá cáni iní-ndó mèe-ni cunduu vii-ndo, te ndada-ndo díqui-ndó nàcuáa tàú-xi cunduu, te vá cáni iní-ndó nándi canehe-ndo, te ni vã cáni iní-ndó cuihnu-ndo mee-ni dóó váha sã ío vii ndáa. 4 Chi iní-ndó xini ñuhu-xi cunduu vii cunduu váha-xi núú Yá Ndiöxí cuèi vitna te cuèi núú cuáhá<sup>n</sup> núú véxi, te cuu-ndo ñáyiú ío càhnu iní-xi, te núú duca<sup>n</sup> na càda-ndo te ío cuu váha iní Yá Ndiöxí. 5 Te duca<sup>n</sup> ío vii ío váha ní xínduu iní nchaa ñáyiú ññ ní xíndecu ndéé sanaha, te ñáyiú-án ío ní sàndáá iní-yu Yá Ndiöxí te ní cudíu-yu núú-gá, te ní tnñ-yu nchaa tnúhu ní cáhá<sup>n</sup> yñ-yu. 6 Te duca<sup>n</sup> ní xóo cada ndíi Sárá ní xóo quindáá iní ndíi yñ ndíi, ndíi Àbrahám, te ní cánehe ndíi ññ-án sã yíñuhu núú yñ ndíi. Te núú nchòhó quidé váha-ndo ndècu-ndo te ñà túú yuhú-ndó ñà cada ñaha tnàha ñáyiú-ndo xii-ndo, te núú duca<sup>n</sup> quide váha-ndo ndècu-ndo te quide-ndo datná ní quide ndíi Sárá.

7 Te nchòhó cue téé ndècu ññ ññ-xi ío váha cuáha-ndo cuendá nàcuáa cundecu váha-ndo ndíi-yu, te ío vii cáhá<sup>n</sup> ndíi-ndó-yu, chi ñáyiú-án íi-gá-yu dàcúxí nchòo cue téé, te duca<sup>n</sup> càda-ndo chi ndíi ndúú-ndó ndúú táhú-ndó cundecu-ndo ndíi Yá Ndiöxí, te núú duca<sup>n</sup> na càda-ndo te òré cáhá<sup>n</sup> ndíi-ndo Yá Ndiöxí te tedóho ñaha-gá xii-ndo.

*Ñáyiú quide sã váha ndòhó-yu*

8 Te càhí tnúhu tucu-í xii-ndo sã ío cuu ññ-ndo cundecu-ndo, te cundáhú iní tnáhá-ndó ññ ññ-ndo, te cuu iní tnáhá tucu-ndo nàcuáa ndècu-ndo ichi Yá Ndiöxí, te cuu-ndo ñáyiú ndáhú iní-xi. 9 Te núú ññ sã ñà túú váha quide ñaha ñáyiú xii-ndo, te ñà díú-ní dùca<sup>n</sup> nanchocáva-ndo càda-ndó-yu, àdi xícuèhé ñáhá-yu xii-ndo, te vá ná danchocáva-ndo ññ-ni tnúhu cuèhé, chi cáca<sup>n</sup> táhú-ndó núú Yá Ndiöxí cuendá sã ná cáda váha ñaha-gá xii-yu, te duca<sup>n</sup> càda-ndo chi Yá Ndiöxí ní cáhá<sup>n</sup> ñáhá-gá xii-ndo cuendá sã cáda váha ñaha-gá xii-ndo

tnàhá-ndó. <sup>10</sup> Te núú tùtú Yă Ndiöxí cächí-xi:

Nchaa ñáyiú cuìní cundecu váha ndi nchàa nduu nini cundecú-yu ñuyíú-a, xini ñuhu-xi sá vă cãhá<sup>n</sup>-yu tnúhu cùtexínu, te ni vă dâcuàndehndé-yu.

<sup>11</sup> Te xini ñuhu-xi duu<sup>n</sup> duu<sup>n</sup> dañá-yu nchaa ichi cuèhé ichi duha, te cadá-yu mee-ni sã vâha, te ío ndúcú-yu nâcuáa cadá-yu cundecu váha-yu ndihi tnàha ñáyiú-yu te ñiu-ni duca<sup>n</sup> cànchicú<sup>n</sup> nihnú-yu cadá-yu.

<sup>12</sup> Te Yá Ndiöxí xító-gă nchaa ñáyiú quide ndáá núú-gă te tedóho-gă nchaa tnúhu cãhá<sup>n</sup>-yu, dico nchaa ñáyiú ñá túú cuìní cada ndáá, ñáyiú-á<sup>n</sup> ñà túú cùu váha iní-gă núú-yu.

Duha cächí-xi núú tùtú-gă.

<sup>13</sup> Te vá yôo níhí ndéé cada ñaha xii-o ñ<sup>n</sup> sá ñà túú vâha te núu mee-ni sã vâha na càda-o cundecu-o. <sup>14</sup> Àdi núu ná cúú sã ná cáda ñàha ñáyiú xii-o sã cuendá sá quidé vâha-o ndècu-o ña, te sá dúcá<sup>n</sup> ná cáda ñàhá-yu xii-o cùu-xi ñ<sup>n</sup> sá vâha sá cúú-xí-ó núú Yă Ndiöxí. Te na cächí tnúhu-í xii-ndo sã vă yùhú-ndô-yu, te ni vă cùndiyí-ndó cuendá nchaa sá ná càda ñàhá-yu xii-ndo. <sup>15</sup> Te nèhe-ndo sá yíñuhu núú Xítóhó Jesucristú. Te ío cundecu túha-ndo dânehé-ndó ñáyiú véxi ndùcu tnúhu núú-ndó nâcuáa ndùu tnúhu ndee iní ní taxi Xítóhó Jesucristú ndécú ndihi-ndo, te cuu vii cuu váha iní-ndó cãhá<sup>n</sup> ndihi-ndô-yu, te cãhá<sup>n</sup>-ndó núú-yu mee-ni tnúhu yíñuhu nacúaa cùu váha iní Yă Ndiöxí. <sup>16</sup> Te ío cada váha-ndo cùndecu-ndo cuendá sá vă cùndiyí-ndó, te núu duca<sup>n</sup> na càda-ndo, te nchaa ñáyiú xicuèhé ñàhá xii-ndo cuendá sá quidé vâha-ndo ndècu-ndo ichi Xítóhó Jesucristú quendóo canúú-yu ndihi nchaa tnúhu cãhá<sup>n</sup>-yu, chi nchòhó quidé vâha-ndo ndècu-ndo. <sup>17</sup> Te váha-gă sá ndóhó-ó cuendá sá quidé-ó sã vâha te núu mee Yă Ndiöxí duca<sup>n</sup> cuìní-gă cunduu, te ñá díú sã ndóhó-ó cuendá sá ñà túú quide-o sã vâha.

<sup>18</sup> Te Xítóhó Jesucristú ní xihí-gă sá cuendá nchaa cuéchi nchaa nchoo ñáyiú ndècu ñuyíú-a, te ñ<sup>n</sup> xito-ni duca<sup>n</sup> ní xihí-gă te duca<sup>n</sup> te vá cùú tnàhí-gă, te mee-gă

cúú-gă Yaá ñá túú tnàhí cuéchi-xi, te duca<sup>n</sup> ní ndoho-gă cuendá nchaa cuéchi ñáyiú ndècu ñuyíú-a ñáyiú ñá túú cuìní cada ndáá núú Yă Ndiöxí, te duca<sup>n</sup> ní cuu cuendá sá núcùndecu váha-yu núú Yă Ndiöxí te núu na quindáá iní ñàhá-yu xii-gă. Te mee-gă ní xihí-gă dico Espiritú-gă chi ní xindecu-ni-xi, <sup>19</sup> te Espiritú-gă ní sáhá<sup>n</sup>-xi ní cãhá<sup>n</sup>-xi tnúhu Yă Ndiöxí núú nchaa espíritú ñáyiú ndècu núú ùhú núú ndàhú. <sup>20</sup> Te ñáyiú-á<sup>n</sup> cúú ñáyiú ní xindecu ndéé sanaha cùtnàhá ní xindecu ndí Nôé, chi ñáyiú-á<sup>n</sup> ío ní quide sàá iní-yu núú Yă Ndiöxí. Te Yă Ndiöxí ío váha iní-gă, chi ní dâcâcâ-gă nduu ní xindecu ndí Nôé ní cadúha ndí bàrcú cuendá ndétú-gă ndixi cuéchi iní-yu sá ñà túú quide váha-yu ndècú-yu ni cùu. Te dàvá-á<sup>n</sup> ní ndaa ndute ñuyíú te ní cácu úná duha ná tnàhá ñáyiú, chi ní quée-yu xití bàrcú-á<sup>n</sup>, te ñá túú ní cãhá-yu. <sup>21</sup> Te sá dúcá<sup>n</sup> ní cácu ñáyiú úná-á<sup>n</sup> ñà túú ní cãhá-yu ndute ní ndaa ñuyíú dàvá-á<sup>n</sup>. Te xiã<sup>n</sup> quée-xí sã cuândute ñáyiú vitna, te naníhí tàhú-yu te núu na quindáá iní-yu tnúhu ndáá tnúhu Yă Ndiöxí. Te ñá díú sã cuândute-o te nduu ndoo nduu nine yiqui cùñú-ó te naníhí tàhú-ó, chi xini ñuhu-xi náhmá-ó núú Yă Ndiöxí nchaa yíca cuéchi-o, te nduu ndoo nduu nine iní-ó, te duca<sup>n</sup> te naníhí tàhú-ó, chi Xítóhó Jesucristú ní xihí-gă cuendá-ó te ní ndoto-gă. <sup>22</sup> Te Yaá-á<sup>n</sup> cuândaa-gă andiu, te ní ngóo-gă xio cùha Yă Ndiöxí, te tàxi tnuní-gă nchaa espíritú cùnùu ndihi nchaa dava-gă cue espíritú xínú cuéchi.

## 4

### *Cada-o nâcuáa cuìní mée Yă Ndiöxí*

<sup>1</sup> Te Xítóhó Jesucristú ní ndoho-gă cùtnàhá ní xindecu-gă ñuyíú-a, te vitna nchòhó cundecu túha-ndo ndòho-ndo cuendá-gă, chi nchaa ñáyiú ndòho nândi sá ndóhó cuendá-gă dañá-yu nchaa sá cuèhé sá dúhá. <sup>2</sup> Te duca<sup>n</sup> ñà túú-gă ndécú-yu ichi cuèhé ichi duha, chi mee-nã nâcuáa cãhá<sup>n</sup> Yă Ndiöxí quidè-yu ndècú-yu ñuyíú-a. <sup>3</sup> Te nchòhó sa nàha-ndo sá ío cuèhé núú sã cuèhé sá dúhá ní xóo cada-o cùtnàhá vátá cùndecu-gă-ó ichi Yă Ndiöxí, chi ní xóo cada-o nchaa sá cuèhé sá dúhá cùdí iní nchaa ñáyiú ñá túú sàndáá iní tnúhu-gă,

te dàvá-á<sup>n</sup> nǐ xóo cada-o nchàa núú sǎ cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáiyu quihu, te ní xóo cundecu-o víco núú nǐ xóo cada-o nchàa sá ñà túú vǎha, te ní xóo níhí tnáhá-ó ndìhí nchaa tnaha quihu-o, te ní xóo chiñuhu-o nchàa sá càchí-yu cùu ndióxí te ñá ndáá sá ndiöxí cúú nchàa xiǎ<sup>n</sup>, te nándi-gá nchaa sá cuèhé sá dúhá nǐ xóo cada-o dàvá-á<sup>n</sup>. <sup>4</sup> Te ñáiyu-á<sup>n</sup> cúñuhu-yu vitna sá ñà túú-gǎ nihí tnáhá-ó ndìhí-yu cada-o nchàa sá cuèhé sá dúhá quidé-yu, te xiǎ<sup>n</sup> càhá<sup>n</sup> cuèhé-yu cuendá-ó vitna. <sup>5</sup> Dico sáá nduu te ñáiyu-á<sup>n</sup> nǎhmá-yu nchaa sá quidé-yu núú Xítohó Jesucristú, chi diu-gá sa ndècu túha-gá sá cáda ndáá-gá cuéchi nchaa ñáiyu sa ní xíhí, ndìhí cuéchi nchaa ñáiyu xíndecu vǐvú. <sup>6</sup> Te cue ñáiyu sa ní xíhí ní xíndedóho tnúhu Xítohó Jesucristú, te cuéi ní xíhí-yu dàtná xíhí dava-gá ñáiyu, dico espíritú-yu chi ní nduu táhú-xi ndècu váha-xi dàtná ndécú Yá Ndiöxí.

<sup>7</sup> Te vitna ta cùyatni danaa Yá Ndiöxí ñuyíú-a núú xiǎ<sup>n</sup> ío váha cuáha-ndo cuendá nàcuáa cundecu-ndo, te càhá<sup>n</sup> ndìhí-ndo-gǎ. <sup>8</sup> Te xìni ñuhu-xi sá ío cuu iní tnáhá-ndó ñ<sup>n</sup> ñ<sup>n</sup>-ndo, chi núú duca<sup>n</sup> na cùu iní tnáhá-ndó ñ<sup>n</sup> ñ<sup>n</sup>-ndo, te vá cání-gǎ iní-ndó càda cuendá-ndó nchàa sá ñà túú vǎha quide ñaha ñáiyu xii-ndo, <sup>9</sup> te nchòhó ñáiyu xíndecu vehe-xi cuáha nùu-ndo vehe xii cue ñáiyu ñuhu ichi na ndetatú-yu, te ío váha cuu iní-ndó dùca<sup>n</sup> cada-ndo. <sup>10</sup> Te Yá Ndiöxí ní taxi-gá ndí díí<sup>n</sup> núú táhú ndécú ndìhí-ndo ñ<sup>n</sup> ñ<sup>n</sup>-ndo, te nàcuáa ndùu táhú nǐ nduu táhú-ndó ñ<sup>n</sup> ñ<sup>n</sup>-ndo te duca<sup>n</sup> chindee tnaha-ndo, te vá dáñá ndéé-ndó càda-ndo nchaa nacuáa tàuchiu<sup>n</sup> Yá Ndiöxí cada-ndo, te chindee ñaha-gá xii-ndo. <sup>11</sup> Te dava nchòhó ñáiyu càhá<sup>n</sup> tnúhu Yá Ndiöxí núú ñáiyu, xìni ñuhu-xi càhá<sup>n</sup>-ndó nàcuáa ndùu tnúhu-gá núú-yu, te dava nchòhó ñáiyu quide nchaa núú chiu<sup>n</sup> chindee tnaha ñáiyu-xi, xìni ñuhu-xi cada-ndo sá Yá Ndiöxí chindèe ñaha-gá xii-ndo, te duca<sup>n</sup> càda-ndo nchaa núú sá vǎha, chi Xítohó Jesucristú tnáhá-gá chindèe ñaha-gá xii-ndo, te duca<sup>n</sup> ío cuu càhnu Yá Ndiöxí. Te vitna tàú-ó càhá<sup>n</sup>-ó sá ío càhnu cuu Xítohó Jesucristú, chi diu-gá cùnùu-gá nchaa nduu nchaa quíú, te duca<sup>n</sup> na cùnduu.

### *Ndoho tnahá-ó cùndecu-o ichi Xítohó Jesucristú*

<sup>12</sup> Te nchòhó ñáiyu ío cùu iní-í, vá cúñuhu-ndo sǎ ío ndòho-ndo ndecu-ndo ichi Xítohó Jesucristú, chi sá dúcá<sup>n</sup> ndòho-ndo-á<sup>n</sup> cútnùní ndisa sá sàndáá iní-ndó-gǎ, te vá cání iní-ndó nǎ cuendá duca<sup>n</sup> ndòho-ndo. <sup>13</sup> Chi da cudíí iní-ndó te núu ndòho-ndo datná ní ndoho Xítohó Jesucristú, te duca<sup>n</sup> sùúní cùdíí iní-ndó òré ná quixi tucu-gá ñuyíú-a te dàvá-á<sup>n</sup> quini-ndó sǎ ío càhnu cuu-gá. <sup>14</sup> Te núu xícuèhé ñáhá ñáiyu ndècu ichi cuehé ichi duha xii-ndo cuendá sá ndécú-ndó ichi Xítohó Jesucristú, te xiǎ<sup>n</sup> cúú-xí ñ<sup>n</sup> sá vǎha sá cúú-xí-ndó núú-gǎ, te duca<sup>n</sup> chi Espíritú Yá Ndiöxí sá ío cùnùu ndecu ndìhí ñaha-xi xii-ndo, te nchaa ñáiyu ndècu ichi cuehé ichi duha-á<sup>n</sup> càhá<sup>n</sup> cuèhé-yu cuendá Xítohó Jesucristú, dico nchòhó càchí-ndó sǎ ío càhnu cuu-gá. <sup>15-16</sup> Te núu nchòhó dándòho ñaha ñáiyu xii-ndo sǎ cuendá sá ndécú-ndó ichi Xítohó Jesucristú ñá, te vá cúú càhá<sup>n</sup> núú-ndó, chi ndacá<sup>n</sup> táhú-ndó núú Yá Ndiöxí cuendá sá ndécú-ndó ichi-gá. Te cuéi ndòho-ndo ndecu-ndo, dico ñá túú cùu-ndo ñáiyu sàhni ndíyí te ni ñà túú cùu-ndo ñáiyu dùhu, te ni ñà túú cùu-ndo ñáiyu quide cuehé quidé dùha, te ni ñà túú cùu-ndo ñáiyu chindee tnúhu tnàha ñáiyu-xi ñ<sup>n</sup> sá ñà túú tàú-ndó càda-ndo.

<sup>17</sup> Te vitna sa quèsaha Yá Ndiöxí cada ndáá-gá nchaa sá quidé nchòo ñáiyu ndècu ndìhí-gá, te núu duca<sup>n</sup> te ndéé-gá cada-gá nchaa ñáiyu ñá túú sàndáá iní ñáhá xii-gá òré ná sáá nduu dùca<sup>n</sup> cada ñaha-gá xii-yu. <sup>18</sup> Te nchòhó xini-ndó sǎ ñáiyu quide váha ndècu ichi Xítohó Jesucristú ndòho tnahá-yu ndécú-yu, dico sáá nduu te nduu táhú-yu cundecú-yu ndìhí-gá. Te núu duca<sup>n</sup> ndòho nchaa ñáiyu quide váha ña, ¿te nása-gá yáha nchaa ñáiyu ndècu ichi cuehé ichi duha na sáá nduu càda ndáá Yá Ndiöxí cuéchi-yu-i? <sup>19</sup> Te nchaa nchòhó ñáiyu ndòho nacuáa cuíni Yá Ndiöxí xini ñuhu-xi sá vǎ dáñá ndéé-ndó càda váha-ndo cùndecu-ndo, te ío quindáá iní-ndó sǎ xító ñaha-gá xii-ndo. Te diu-gá cúú-gǎ Yaá ní cadúha ñaha xii-o, te quide-gá ñ<sup>n</sup> sá càhá<sup>n</sup>-gá.



*Nàcuáa tàú-xi cada ñáyiú ndècu ichi Xítóhó Jesucristú*

<sup>1</sup> Te yúhú càhá<sup>n</sup>-í dóho nchaa nchòhó cue téé yíndaha nchaa dava-gá ñáyiú ndècu ichi Xítóhó Jesucristú, chi tnàhá yúhú yíndàha-í ñáyiú ndècu ichi-gá, te sàndáá iní-í tnúhu-gá, te ní xiní-í nchaa nàcuáa ní ndoho-gá, te sáá nduu te tnàhá-í cunuu-í ndihí-gá. <sup>2</sup> Te ío canehe cuèndá-ndó nchàa ñáyiú ndècu ichi Yá Ndiöxí yíndàha-ndo te cada-ndo dàtná quidé cuè toli, chi cue téé-á<sup>n</sup> ò váha xító-güedé mbéé-güedé. Te canehe cuèndá-ndó-yu sá cúú iní méé-ndó te ñá díú sá ò ñá ñáyiú cada yica ñàha xii-ndo, te ni ñá díú sá cuíní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi duca<sup>n</sup> cuíní Yá Ndiöxí cunduu. <sup>3</sup> Te vá cáda-ndó sá ò cùnuu-ndo núú-yu, chi cada-ndo mèe-ni sá váha cuèndá duca<sup>n</sup> càncicú<sup>n</sup> nihnú-yu cada-yu tnàhá-yu. <sup>4</sup> Te òré ná quíxí tucu Xítóhó Jesucristú Yá néhé cuèndá ñàhá xii-o nchaa-o ñuyíú-a, te taxi-gá sá ò váha nduu táhú-ó, te cunuu-o ndihí-gá ni caa ni quíhí<sup>n</sup>.

<sup>5</sup> Te nchòhó ñáyiú ndècu ichi Xítóhó Jesucristú càhá<sup>n</sup>-í dóho-ndo sá ò quíndáá iní-ndó cuè téé yíndaha ñàha xii-ndo nacuáa ndècu-ndo ichi-gá, te nchaa-ndo tàú-ndó quíndáá iní tnàhá-ndó ñá ñá-ndo, chi núú tütú Yá Ndiöxí càchí-xi ñá xichí:

Nchaa ñáyiú quíde cahnu mee-xi ñá túú cùu váha iní Yá Ndiöxí núú-yu, dico nchaa ñáyiú ndàhú iní-xi te chìndee ñàha-gá xii-yu.

Duha càchí-xi núú tütú-gá. <sup>6</sup> Te dañà-ndo mèe-ndo núú ndàhá Yá Ndiöxí, chi mee-gá ò cùnuu-gá. Te núú duca<sup>n</sup> na càda-ndo, te sáá nduu te cada nínu ñàha-gá xii-ndo.

<sup>7</sup> Te nchaa sá yàha-ndo ndècu-ndo te nachihí-ndo ndàha Yá Ndiöxí, chi mee-gá xító ñàha-gá xii-ndo.

<sup>8</sup> Te ío váha cuáha-ndo cuèndá cundecu-ndo, te quíhí iní-ndó chi sàcuíhná xicá cùu-xi cuíní-xi dacuíta nihnu ñàha-xi xii-o, chi ò cùu úhú iní ñàhá-xí, te cùu-xi datná ñá quíti déé<sup>n</sup> xicá ndùcu sá cáxí-xí. <sup>9</sup> Te ío quíndáá iní-ndó Xítóhó Jesucristú, te vá dáñá-ndó mèe-ndo dandahú ñàhá sàcuíhná xii-ndo càda-ndo nacuáa cuíní-xi, chi ñàha-ndo sá ncháá ñáyiú ndècu ichi Xítóhó

Jesucristú xíndecu nihí ñuyíú ndóhó-yu dàtná ndóhó nchòo ndecu-o ichi-gá. <sup>10</sup> Dico sacú-ni nduu duha cundoho-o te dàtnúni ñá túú-gá ná cumáni-ó cundecu-o núú Yá Ndiöxí, te dàvá-á<sup>n</sup> vǎ cání ñá cani úú iní-ó cundecu-o ichi-gá. Te ío-gá ngúndecu ndihí-o tnúhu ndee iní cada-o nchàa nacuáa càhá<sup>n</sup>-gá, te duca<sup>n</sup> càda-o chi mee Yá Ndiöxí ò chindee ñàha-gá xii-o, te díu-ni Yá-á<sup>n</sup> ò cùu iní ñàhá-gá xii-o, chi ní cáhá<sup>n</sup> ñàhá-gá xii-o cundecu-o núú ò váha càa ndecu-gá cundecu-o ni caa ni quíhí<sup>n</sup>, te duca<sup>n</sup> ni quíde-gá chi ní sàndáá iní-ó Xítóhó Jesucristú. <sup>11</sup> Te ío ndacá<sup>n</sup> táhú-ó núú Yá Ndiöxí chi ò càhnu cuu-gá, te cùnuu-gá nchaa nduu nchaa quíú. Te duca<sup>n</sup> na cunduu.

*Tnúhu ndéé núú ní ndihí-ná*

<sup>12</sup> Te té Silvanú xiní-í sá cúú-dé ñá téé quíde ndáá ndécú ichi Xítóhó Jesucristú, te díu-dé ní cáhá<sup>n</sup> ndàhú-í núú-dé ní tee-dé ñá úú tnúhu sá ni xàhá<sup>n</sup>-í xii-dé núú tütú-a cuèndá daquixi-í ndaha-ndo, te núú tütú-a càchí tnúhu ndáá-í xii-ndo sá Yá Ndiöxí ò cùu iní ñàhá-gá, te chìndee ñàha-gá xii-ndo ndècu-ndo, te càchí tnúhu tucu-í xii-ndo sá ò quíndáá iní-ndó sá ndáá duca<sup>n</sup> quíde ñàha-gá xii-ndo.

<sup>13</sup> Te cue ñáyiú ndècu ñúú Babiloniá, ñáyiú ndècu ichi Yá Ndiöxí, díu-ni ñáyiú ní cachí Yá Ndiöxí sá nánihí táhú dàtná cúú nchòhó, ò quíde ndee iní ñàhá-yu xii-ndo, te tnàhá té Mácú téé cùu datná ñá déhe-í quidé ndee iní ñàhá-dé xii-ndo. <sup>14</sup> Te ndihí tnúhu yíñùhu cada ndee iní tnàhá-ndó ñá ñá-ndo, te xicá<sup>n</sup> táhú-í núú Yá Ndiöxí sá ò na cundecu nahí nchaa nchòhó ñáyiú ndècu ndihí Xítóhó Jesucristú. Te duca<sup>n</sup> na cunduu. Te ío chí cáda ndèe iní-ñá vitna.



## TUTÚ CÚÚ ÒÚ NÍ CADÚHA TÉ PÈLÚ

*Té Pèlú cadúha-dé tutú quíhí<sup>n</sup> ndaha ñáyiú sàndáá iní tnúhu Yá Ndióxi*

<sup>1</sup> Yúhú té Xímú, àdi Pelú chi úú òú-í, xínú cuèchi núú Xítóhó Jesucristú, chi mee-gá ní tendaha ñàha-gá xii-í xicá cùu-í càhá<sup>n</sup>-í tnúhu-gá. Te cadúha-í tutú-a sá cúú-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te duca<sup>n</sup> chi Tátá-ó Dútú Ndióxi ní dácàhá<sup>n</sup>-gá iní-ó ní sàndáá iní-ó-gá, chi cùu-gá Yáá ío váha quide ndáá ndíhi Xítóhó Jesucristú Yáá dácàcu nihnu ñaha xii-o núú ùhú núú ndàhú. <sup>2</sup> Te xicá<sup>n</sup> táhù-í núú Yá Ndióxi sá ùu<sup>n</sup>-gá uu<sup>n</sup>-gá ná cuita chindee chitúu ñaha-gá xii-ndo quíhí<sup>n</sup>, te duca<sup>n</sup> ío váha cuu iní-ndó cùndecu-ndo, te duca<sup>n</sup> càda-gá chi ta cùtnuní-gá iní-ndó nàcuáa ndùu cuendá-gá, te duca<sup>n</sup> ta cùtnuní tucu iní-ndó nchàa nàcuáa ndùu cuendá Xítóhó Jesucristú Yáá cúú Xítóhó-ó.

*Nàcuáa quide ñáyiú ndècu ichi Xítóhó Jesucristú*

<sup>3</sup> Te Yá Ndióxi ío càhnu cuu-gá chi chindee ñaha-gá xii-o quide ndáá-ó ndècu-o datná cuíní mée-gá, te duca<sup>n</sup> chi cùtnuní iní-ó nàcuáa sàni iní Xítóhó Jesucristú Yáá ní càhá<sup>n</sup> ñáhá xii-o. Te òré ní càhá<sup>n</sup> ñáhá-gá xii-o te ní cutnùní iní-ó sá ío càhnu cuu-gá te ío váha quide-gá. <sup>4</sup> Te duca<sup>n</sup> ní cutnùní tucu iní-ó nàcuáa ní càhá<sup>n</sup>-gá cada ñaha-gá xii-o, te tnúhu ní càhá<sup>n</sup>-gá-á<sup>n</sup> ío càhnu cuu-xi te ío váha, te nchoo ní sàndáá iní-ó tnúhu-á<sup>n</sup> núu xíá<sup>n</sup> ñá túú-gá ndécú-ó ichi cuehé ichi duha te ni ñà túú-gá sání iní-ó càda-o nándi sá cuèhé sá dúhá, te ní cuu vii ní cuu váha iní-ó vitna. <sup>5</sup> Te sá dúcá<sup>n</sup> quide-gá te xíá<sup>n</sup> ío nducu ndèe-ndo cada-ndo nchaa nàcuáa càhá<sup>n</sup>-í-a, te nchòhó sàndáá iní-ndó-gá dico ñá díú mèe-ni xíá<sup>n</sup> chi tnàhá xíní ñuhu-xi cada ndáá-ndó cùndecu-ndo. Te núu quide ndáá-ndó ndècu-ndo te xíní ñuhu-xi tecú tnùní-ndó tnúhu-gá. <sup>6</sup> Te núu tècú tnùní-ndó te cùu-ndo ñáyiú xíní cotnì mee-xi, te núu cùu-ndo ñáyiú sàcòo tñì mee-xi te xíní ñuhu-xi cunduu cahnu iní-ndó cuèi nándi sá ná yàha-ndo

cùndecu-ndo, te núu càhnu iní-ndó te xíní ñuhu-xi cada ndáá-ndó cùndecu-ndo datná cuíní mée Yá Ndióxi cada-ndo. <sup>7</sup> Te núu quide ndáá-ndó ndècu-ndo, te xíní ñuhu-xi ío cuu iní tnàhá ndì mee-ndo nàcuáa ndècu-ndo ichi-gá, te núu cùu iní tnàhá ndì mee-ndo te xíní ñuhu-xi cuu iní-ndó nchàa dava-gá tnàha ñáyiú-ndo.

<sup>8</sup> Te núu sa duca<sup>n</sup> quide-ndo ndecu-ndo te uu<sup>n</sup>-gá cuita duca<sup>n</sup> càda-ndo quíhí<sup>n</sup> núú cuahá<sup>n</sup> núú vèxi, te núu duca<sup>n</sup> quide-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nàcuáa sàni iní Xítóhó Jesucristú quíhí<sup>n</sup>. <sup>9</sup> Te nchaa ñáyiú ñá túú cuíní duca<sup>n</sup> càda cuú-yu ñáyiú ñá túú tnàhí ndìxi túu iní-xi sá Yá Ndióxi sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cada-yu, te ñáyiú-á<sup>n</sup> cúu-yu dàtná ñì ñáyiú cuàá àdi datná ñì ñáyiú ñá túú cùtnuní váha núú-xi, te duca<sup>n</sup> sàtnahá-xi cùu-yu cuendá sá dúcá<sup>n</sup> quidé-yu. <sup>10</sup> Te xíá<sup>n</sup> núu yúhú càhá<sup>n</sup>-í dóho nchaa nchòhó ñáyiú ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndióxi ní càhá<sup>n</sup> ñáhá-gá xii-ndo, te duca<sup>n</sup> ní quide-gá chi duca<sup>n</sup> ní cachí-gá cada-gá. Te vá ñì<sup>n</sup> ndùu cani iní-ndó dàña-ndo ichi-gá, te núu vá dáñá ndèe-ndó càda-ndo nchaa nàcuáa càhá<sup>n</sup>-í-a. <sup>11</sup> Te núu duca<sup>n</sup> na càda-ndo cundecu-ndo, te ío vii ío váha cada Yá Ndióxi quehe<sup>n</sup> cuendá ñáhá-gá xii-ndo òré ná sàá-ndó núú ndécú Xítóhó Jesucristú táxi tnùní-gá nchaa nduu nchaa quíú, te òú-ni Yáá-á<sup>n</sup> cúú Xítóhó-ó te ní dácàcu nihnu ñaha-gá xii-o núú ùhú núú ndàhú.

<sup>12</sup> Te duca<sup>n</sup>-ni quíhí-í dandàcu iní ñáhà-í xii-ndo nchàa tnúhu càhá<sup>n</sup>-í-a cuèi sa xíní-ndó tnúhu-á<sup>n</sup>, te cuèi sàndáá váha iní-ndó nchàa tnúhu ndáá dácùaha-ndo. <sup>13</sup> Te yúhú quidé cuendá-í sá ío tàú-xi càhá<sup>n</sup>-í dóho-ndo nìni ndecu-í ñuyíú-a cuendá sá vā nàcuànaa-ndo nàcuáa cada-ndo cùndecu-ndo. <sup>14</sup> Chi Xítóhó Jesucristú ní cachí-gá sá ñà túú-gá vāi nduu cundecu-í ñuyíú-a te cuú-í. <sup>15</sup> Te ío nducu ndèe-í nducu-í nàcuáa cada-í cuendá quendóo ndíhi-ndo nchàa tnúhu càhá<sup>n</sup>-í-a, te cuèi na yàha cuú-í dico vā nàcuànaa-ndo cada-ndo nchaa nàcuáa càhá<sup>n</sup> tnúhu sá dánèhé ñáhà-í xii-ndo vitna.

*Cue téé ní xini núú sǎ ǎ cǎhnu cuu Xítóhó Jesucristú*

16 Te sa ní dánèhé ñáhá-ndǎ xii-ndo sǎ ǎ cǎhnu cuu Xítóhó Jesucristú. Te ní cachí tnúhu tucu-ndǎ nǎcuáa cada-gá òré quixi tucu-gá, te tnúhu-án cúu-xí tnúhu ndáa cuiti te ñá díú tnúhu sǎ ní sani iní cue ñáyiú ñuyíú-a cùu-xí, chi nchúhú ní xini núú-ndǎ nǎcuáa ní quide-xi cútnàhá ní cutnùní iní-ndǎ sǎ ǎ cǎhnu cuu Xítóhó Jesucristú. 17 Chi dàvá-án ǎ váha ní quide Tǎtá-ó Dútú Ndiǒxí ní quide cǎhnu-gǎ Xítóhó Jesucristú, te diu-ni dàvá-án ní cǎhá<sup>n</sup> Dútú Ndiǒxí ndéé andiú ní xáha<sup>n</sup>-gǎ xii Xítóhó Jesucristú: “Yòhó cúu-n Dèhe-í téé ío cùu iní-í, te ío cùdí iní ñáhà-í xii-n”, duha ní xáha<sup>n</sup> Yǎ Ndiǒxí xii Xítóhó Jesucristú. 18 Te nchúhú ní tecú dóho-ndǎ ní cǎhá<sup>n</sup> Yǎ Ndiǒxí ndéé andiú cútnàhá duca<sup>n</sup> ní xáha<sup>n</sup>-gǎ xii Xítóhó Jesucristú, chi tnàhá-ndǎ ndécú-ndǎ ndíhi-gǎ yucu núú dúcá<sup>n</sup> ní quide cǎhnu ñaha Yǎ Ndiǒxí xii-gǎ.

19 Te ndècu ndíhi-o nchaa tnúhu ní cǎhá<sup>n</sup> cue téé ní xóo cǎhá<sup>n</sup> tnúhu Yǎ Ndiǒxí ndéé sanaha te nchaa tnúhu-án cǎhá<sup>n</sup>-xi nchaa nǎcuáa cada-xi vitna, te cutnùní iní-ó sǎ tnúhu ndáa cúu-xí, te xini ñuhu-xi cada cuendá váha-ndo nchaa nǎcuáa cǎhá<sup>n</sup> tnúhu-án, chi tnúhu-án cúu-xí dátá ñ<sup>n</sup> ñuhú dáyèhé-xi ndéé òré véxi túndaá quéné chòdíni cǎhnú dáyehé-dí. Te duca<sup>n</sup> sǎtnahá-xi cùu tnúhu-án chi quide-xi nǎcuáa cutnùní iní-ó cuendá Xítóhó Jesucristú. 20 Te xini ñuhu-xi sǎ ǎ-ó-gǎ cada cuendá-ndó sǎ ñà túú ñáyiú tecú tnùní ní ñ<sup>n</sup> tnúhu sǎ ní chídó tnùní cue téé ní cǎhá<sup>n</sup> tnúhu Yǎ Ndiǒxí ndéé sanaha, te núu Yǎ Ndiǒxí vá cáda-gǎ nǎcuáa cutnùní iní-yu nǎcuáa cǎhá<sup>n</sup> nchaa tnúhu-án. 21 Te cue téé-án ǎ ní xindecu yíñuhu-güedé núú Yǎ Ndiǒxí, te nchaa tnúhu sǎ ní cǎhá<sup>n</sup>-güedé-án ñà túú cùu-xi tnúhu sǎ ní cahu iní méé-güedé, chi Espiritú Yǎ Ndiǒxí ní dácáhu iní ñáhá-xí xii-güedé nǎcuáa cunduu tnúhu cǎhá<sup>n</sup>-güedé.

## 2

*Cue téé cachí sǎ cǎhá<sup>n</sup> tnúhu Yǎ Ndiǒxí te ñà ndàá*

1 Te ndéé sanduu chi ní xindecu cue téé ní xóo dandàhú ñáhá xii ñáyiú isràél cǎchí sǎ cǎhá<sup>n</sup> tnúhu Yǎ Ndiǒxí te ñà

ndàá sǎ cǎhá<sup>n</sup>-güedé tnúhu-gǎ, te diu-ni duca<sup>n</sup> tucu cundecu cue téé dandàhú ñáhá xii-ndo vitna, chi cachí-güedé sǎ cǎhá<sup>n</sup>-güedé tnúhu Yǎ Ndiǒxí te ñà ndàá. Te cue téé-án ǎ yídáhu cǎhá<sup>n</sup>-güedé, te nchaa tnúhu cǎhá<sup>n</sup>-güedé-án dacuita nihnu ñaha-xi xii-ndo te núu na tédóho-ndo, chi cue téé-án vǎ ñunu-güedé sǎ Xítóhó Jesucristú ní xíhí-gǎ cuendá-güedé. Te sǎ dúcá<sup>n</sup> cáda-güedé ío-gǎ ndíhi dacuita nihnu-güedé méé-güedé. 2 Te vǎi ñáyiú xínu iní-yu cáda-yu nǎndí sǎ cuèhé sǎ dúhá cuendá sǎ dúcá<sup>n</sup> cáda cue téé-án, te cuendá xǎ<sup>n</sup> ngóo ñáyiú cǎhá<sup>n</sup> úhú-yu cuendá ichi Yǎ Ndiǒxí. 3 Te mee-ni tnúhu sǎ ní cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sǎ cúu-xí tnúhu ndáa te ñà ndàá cuendá-ni sǎ cuǎñaha-ndo díhú<sup>n</sup> xii-güedé, chi diu-ni xǎ<sup>n</sup> tnàhí cuhu<sup>n</sup> iní-güedé, dico Yǎ Ndiǒxí sa ní cunaha ndècu túha-gǎ cuendá cada ndáa-gǎ cuèchi-güedé, te na sǎa nduu te cuíta nihnu duu<sup>n</sup>-güedé, chi Yǎ Ndiǒxí vá nǎcuànaa-gǎ ñ<sup>n</sup> sǎ ní cachí-gǎ cada-gǎ.

4 Te Yǎ Ndiǒxí ñà túú ní quide cǎhnu iní-gǎ sǎ ní quide cue espíritú ñà túú ní cuini cada ndáa xínu cuèchi núu-gǎ ní cùu, chi ní dáquihí<sup>n</sup> ñáhá-gǎ xii-xi ñ<sup>n</sup> xichi núú ǎ ndòho-xi ndecu-xi, te xǎ<sup>n</sup> cundedí nihnu-xi ndéé sǎa nduu cuíta nihnu duu<sup>n</sup>-ná-xi. 5 Te Yǎ Ndiǒxí ñà túú ní quide cǎhnu tucu iní-gǎ nchaa sǎ ní quide ñáyiú ñuyíú díhna, chi dàvá-án ní dándáa-gǎ ndute ñuyíú ní cǎhá nchaa ñáyiú ndècu ichi cuèhé ichi duha te ñ<sup>n</sup> díj-ni té Nòé ndíhi úsá-gǎ tucu cue ñáyiú cùu ndí mee-dé ní dácácu nihnu-gǎ. Te té Nòé-án cúu-dé téé ní cǎhá<sup>n</sup> dóho-yu nǎcuáa cada váha-yu cundecú-yu ní cùu te ñà túú ní cuini-yu. 6 Te Yǎ Ndiǒxí ní dǎngává-gǎ ñuhú ní dánáa-gǎ ñáyiú ñuú Sòdomá ndíhi ñáyiú ñuú Gómorrá te mee-nǎ yǎa ní nduu ñuú-án. Te sǎ dúcá<sup>n</sup> ní cuu xǎ<sup>n</sup> cútnùní iní-ó nǎcuáa cada ñaha Yǎ Ndiǒxí xii nchaa ñáyiú ñà túú quide váha. 7 Dico té Lót téé ní quide ndáa ní xindecu ñ<sup>n</sup> ñuú-án dàvá-án chi ní dácácu nihnu ñaha-gǎ xii-dé. Te nchaa ñáyiú ñuú núú ní xindecu-dé-án ǎ ní xínduu cuihna iní-yu, te mee-ni ichi díí iní ní xindecú-yu, te sǎ dúcá<sup>n</sup> ní xóo cáda-yu xǎ<sup>n</sup> ío ní ndíhú iní té Lót. 8 Te

ɨ<sup>n</sup> nduu ɨ<sup>n</sup> nduu ní xóo cada ndàhú-xi iní té Lõt-á<sup>n</sup> cuendá nchaa tnúhu cuèhé tnúhu duha ní xóo cáhá<sup>n</sup>-yu ní xóo cundedóho-dé, ndìhi cuendá nchaa sá cuèhé sá dúhá n̄ xóo cadá-yu ní xóo quini-dé, te mee-dé ní cuu-dé ɨ<sup>n</sup> téé ní xínduu vii ní xínduu váha iní-xi núú Yá Ndiõxí. <sup>9</sup> Te sá dúcá<sup>n</sup> n̄ yáha té Nõé ndìhi té Lõt, xíá<sup>n</sup> cútnùní iní-ó sá Yá Ndiõxí ío chindee-gá cue ñáyiú quide ndáá ndécú ìchi-gá cuendá sá v̄ cadá-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiõxí càchí-gá sá ncháá ñáyiú ndècu ìchi cuehé ìchi duha sa ndècu túha-yu sá quíhí<sup>n</sup>-yu núú ùhú núú ndàhú nduu nà yáha cundáá cuèchi-yu.

<sup>10</sup> Te uu<sup>n</sup>-gá cada ñaha Yá Ndiõxí xii nchaa cue téé ndècu ìchi díí iní, te dàquee tìhú-güedě nchaa tnúhu sá sánú ìchi ñaha xii-o nacuaá cada-o cùndecu-o, te cùu-güedé cue téé ñí iní-xi, te yí iní-güedé, te ñá túú yùhú-güedé cáhá<sup>n</sup> úhú-güedé cuendá nchaa espíritú cúnú. <sup>11</sup> Te cue espíritú xínú cuèchi núú Yá Ndiõxí ío cùnuu-xi dacúxí cuè téé-á<sup>n</sup>, dico ñá túú cùyí-xi cáhá<sup>n</sup>-xi dàtná cáhá<sup>n</sup> cue téé-á<sup>n</sup> òré ndácá<sup>n</sup> cuèchi-xi núú Yá Ndiõxí cuendá nchaa sá quidé cuè espíritú cùndìhi yucu ñáváha.

<sup>12</sup> Te nchaa cue téé dandàhú ñáhá xii-ndo-á<sup>n</sup> cúu-güedě dàtná cue quiti, chi cue quiti-á<sup>n</sup> ñá túú ndècu sá xìní tnùnì-güedí, chi cue quiti-á<sup>n</sup> n̄ cacu-güedí sá tn̄-ó-güedí te cahni-o-güedí. Te duca<sup>n</sup> sãtnahá-xi cùu nchaa cue téé-á<sup>n</sup>, chi cáhá<sup>n</sup> cuèhé-güedé cuendá ndédani cãa espíritú cuèi ñá túú xìnì-güedé ná espíritú cúu-xí, te ñu-ni mee-güedě dácuíta nihnu-güedé méé-güedě sá dúcá<sup>n</sup> quide-güedé, <sup>13</sup> te sáá nduu te nacháhu-güedé nchaa sá quidé-güedě-á<sup>n</sup>, te cuèi nduu cuèi niú cúdí iní-güedé quidé-güedě nchaa núú sá cuèhé sá dúhá sàni iní-güedé. Te òré nãtacá-ndó càda-ndo ɨ<sup>n</sup> vico chiñuhu-ndo Yá Ndiõxí te chitnahá ñáhá-güedě xii-ndo, te cada dusa<sup>n</sup>-güedě sá cúdí iní-güedé sá dandàhú ñáhá-güedě xii-ndo, te dícó sácá<sup>n</sup> núú cuáha ñaha-güedě xii-ndo dùca<sup>n</sup> na cada-güedé.

<sup>14</sup> Te nchaa cue téé-á<sup>n</sup> òré xìnì-güedé ɨ<sup>n</sup> ñáyiú d̄hí te ndìhi-ni sàni iní-güedé cáhá<sup>n</sup> ndìhi ñaha-güedě xii-yu, te ñá túú ndùu vétú iní-güedé cuendá nchaa sá cuèhé sá

dúhá quide-güedé chi uu<sup>n</sup>-gá uu<sup>n</sup>-gá sání iní-güedé cada-güedé. Te cuáhá<sup>n</sup>-güedé dandàhú-güedé nchaa ñáyiú ñá túú nihí ndéé càda ndáá cuendá canchicú<sup>n</sup> nihnú-yu nchaa tnúhu cáhá<sup>n</sup>-güedé. Te mee-ni ncháa sá ndécú ndìhi tnaha ñáyiú-güedé cúu iní-güedé, te cue téé-á<sup>n</sup> cúu-güedě cue téé duu<sup>n</sup> duu<sup>n</sup> sa ní xíta nihnu núú Yá Ndiõxí. <sup>15</sup> Chi cùu-güedé cue téé v̄ cáni-gá iní-xi cada ndáá, te nchìcú<sup>n</sup> nihnu-ná-güedé quidé-güedě nãcuáa ní xóo cada ndí Balaám déhe ndí Bèór, chi ndí Balaám-á<sup>n</sup> n̄ xóo tnahá iní ndí cada ndí chiú<sup>n</sup> cuehé nãcuáa ní xóo níhí ndí díhú<sup>n</sup>. <sup>16</sup> Te Yá Ndiõxí ní quide-gá ní cáhá<sup>n</sup> búrru ndí ní tenáá ñáhá-dí xii ndí cuendá sá v̄ cadá ndí ɨ<sup>n</sup> cuèchi sàni iní ndí cada ndí ni cùu. Te sá dúcá<sup>n</sup> n̄ cuu xíá<sup>n</sup> ní nguítuu ndí ñá túú ní quide ndí ɨ<sup>n</sup> sá ñá túú nandìhi sàni iní ndí ni cùu.

<sup>17</sup> Te nchaa cue téé duca<sup>n</sup> x̄iquide cùu-güedé dàtná ɨ<sup>n</sup> doco yìchí, te cùu tucu-güedé dàtná ɨ<sup>n</sup> vícò sá xídó tãchí te ñá túú d̄u nchídó-xí, te sa ndècu túha ɨ<sup>n</sup> xichi núú ìo nee quíhí<sup>n</sup>-güedé cundecu-güedé ni caa ni quíhí<sup>n</sup>. <sup>18</sup> Te cue téé-á<sup>n</sup> cáhá<sup>n</sup>-güedé dàtná cáhá<sup>n</sup> ɨ<sup>n</sup> téé ío cùu cahnu dico ñá túú vèdana nandìhi nchaa tnúhu cáhá<sup>n</sup>-güedé, te cue téé-á<sup>n</sup> dandàhú-güedé nchaa ñáyiú íchí n̄ dáñá ìchi cuehé ìchi duha, te xãha<sup>n</sup>-güedě xii-yu sá cúu-ní cadá-yu nchaa sá cuèhé sá dúhá quide nchaa ñáyiú ndècu ìchi díí iní, <sup>19</sup> te xãha<sup>n</sup> tucu-güedé sá cúu-ní cadá-yu nani véxi iní-yu cuèi sá v̄aha te cuèi sá cuèhé, dico mee-güedě chi mee-ni sá cuèhé sá dúhá cùnuu quide-güedé. Te nchaa ñáyiú ñá ndácú dàña nándi sá cuèhé sá dúhá cúu-yu dàtná ɨ<sup>n</sup> ñáyiú xinu cuechi ñá túú tnàhí dàñá quee núú chíú<sup>n</sup> pãtróó<sup>n</sup>-xi. Te duca<sup>n</sup> sãtnahá-xi cùu-yu chi ñá ndácú-yu dàñá-yu nándi sá cuèhé sá dúhá quidé-yu. <sup>20</sup> Te núu ñáyiú sa ní dáñá ncháa ìchi cuehé ìchi duha cuendá sá n̄ cùtnùnì iní-yu nãcuáa ndùu tnúhu Xitohó Jesucristú, Yaá ní dácãcu nihnu ñaha xii-o núú ùhú núú ndàhú ná nãchocáva iní-yu cundecu tucu-yu ìchi cuèhé ìchi duha, te mee-nã sá cuèhé sá dúhá tàxi tnunì ñáhá-xí xii-yu, te núu duca<sup>n</sup> te v̄a-gá tucu cadá-yu dacúxí dàtná ní xóo cadá-yu cútnahá vátá cútnùnì-gá iní-yu nãcuáa ndùu tnúhu-gá.



21 Te váha-gá sá vă ngũnu ichi-yu ichi ndáá ní cùu te ñá díú sã sà ní ngũnu ichi-yu te ní dáñã-yu nchaa tnũhu-gá sá sà ní níhĩ-yu ndècu ndihĩ-yu sànu ichi ñaha-xi nacuáa cundecú-yu ní cùu. 22 Te ñáyiú duca<sup>n</sup> xĩquide quèe ndáá-xi nàcuáa cuáhá<sup>n</sup> ì<sup>n</sup> cuèndú sá cãchĩ-xi: “Iná ní nacaxi-di sá ñi ndusa<sup>n</sup>-di, te cùchĩ quiti ichi ní xichi ndute cãndoo cuáhá<sup>n</sup>-ni tucu-di cuchi ñuhu-di núú ndèhýú”, duha cuáhá<sup>n</sup> cuèndú-á<sup>n</sup>.

### 3

#### *Xítohó Jesucristú quixi tucu-gá*

1 Te nchaa nchòhó ñáyiú ío cùu iní-í cùtnuní iní-í sá ìo váha sàni iní-ndó, te xéhe cúú-xí tütú cúú ùú cãdũha-í sá cúú-xí-ndó, te ì<sup>n</sup>-ni cãhá<sup>n</sup>-í dándàcu iní ñáhà-í xii-ndo nchàa tnũhu sá sà ní xíndedóho-ndo. 2 Chi cuìní-í sá vă nàcuànaa-ndo nchaa tnũhu ní cãhá<sup>n</sup> nchaa cue téé ní xóo cãhá<sup>n</sup> tnũhu Yá Ndiõxí ndéé sanaha, te ní vă nàcuànaa-ndo nchaa tnũhu ní cãhá<sup>n</sup> cue téé ní cãhá<sup>n</sup> tnũhu Xítohó Jesucristú Yáa ní dácãcu nihnu ñaha xii-o núú ùhú núú ndáhú, chi ñu nchaa tnũhu-á<sup>n</sup> sánú ìchi ñaha-xi xii-o nacuáa cada-o cundecu-o.

3 Te ío-gá xíní ñuhu-xi cùtnuní iní-ndó nàcuáa cada-xi òré vátá sàá-gá nduu quixi tucu Xítohó Jesucristú ñuyíú-a, te cãchĩ tnũhu-í xii-ndo sã cùndècu ñáyiú cuhu<sup>n</sup> iní mee-ni nchàa sá cuèhé sá dúhá te mee-ni xĩã<sup>n</sup> cadá-yu, te cãhá<sup>n</sup> cuèhé cãhá<sup>n</sup> duhá-yu cuèndá tnũhu Yá Ndiõxí. 4 Te cachĩ-yu: “Ñá ndáá sá quixí Xítohó Jesucristú ñuyíú-a, chi núu quixi-gá te sá ndéé ama-gá sa ní quexìo-gá ní cùu. Te dàtná-ni quide-xi vitna ñu-ni duha ní quesaha-xi quide-xi ndéé cùtnàhá ní ngáva ñuyíú, te ñu-ni duha quide-xi ndéé cùtnàhá ní xíndecu cue ñani tnáhá-ó ndéé sanaha, te ñu-ni duha quide-xi ndéé ní sáá nduu ní xihĩ-güedé, te ñu-ni duha quide-xi ndéé vitna”, duha cãhá<sup>n</sup>-yu. 5 Te ñucùu<sup>n</sup> cadá-yu vá cadá cuèndá-yu sá Yá Ndiõxí ní cãhá<sup>n</sup>-gá te ní ngúndecu andiú ndihĩ ñuyíú-a, te ñu-gá ní quide ní quene ñuhu yìchĩ xitĩ ndute ní ngúndecu-xi ì<sup>n</sup> xio. 6 Te ì<sup>n</sup> xito ní dándáá Yá Ndiõxí ndute ñuyíú-a ní dánáá-gã nchaa sá ío. 7 Te Yá Ndiõxí ní cachĩ-gá sá cùndècu-ni ñuyíú-a ndihĩ andiú ndéé ná sáá nduu cada-gá nchaa nàcuáa ní cãhá<sup>n</sup>-gá sá cúú-xí

nchàa ñáyiú ndècu ichi cuèhé ichi duha, te dàvá-á<sup>n</sup> danàa-gá nchaa ñáyiú-á<sup>n</sup> chi cáyú andiú ndihĩ ñuyíú-a.

8 Te nchaa nchòhó ñáyiú ío cùu iní-í, ío cuhu<sup>n</sup> iní-ndó tnũhu na cãhá<sup>n</sup>-í-a, chi Yá Ndiõxí ñá túú sàni iní-gá dàtná sání ìni méé-ó, te ì<sup>n</sup> nduu cùu-xi datná úxi cièndú cuíá, te úxi cièndú cuíá-ã<sup>n</sup> cúú-xí dàtná ì<sup>n</sup> nduu sá cúú-xí-gã. 9 Te Yá Ndiõxí ñá túú dàna ndodo iní-gá vá cadá-gã ì<sup>n</sup> sá cãhá<sup>n</sup>-gá dàtná cãchĩ cue ñáyiú sá dáná ndòdo iní-gá cada-gá ì<sup>n</sup> sá cãhá<sup>n</sup>-gá, chi ñucùu<sup>n</sup> tnahí dácaca-gá nduu cuèndá sá ìo cùndahú iní ñáhá-gã xii-o, te cuìní-gá sá ncháá ñáyiú ndixi túu iní-yu sá ñá túú quide váha-yu ndècú-yu te tuhá-yu ichi-gá, te duca<sup>n</sup> quide-gá chi cuìní-gá sá vă cuíta nihnu ni ì<sup>n</sup>-yu.

10 Te dàtná quidé cuè ñadúhú quĩhu-güedé ì<sup>n</sup> vehe dùhu-güedé òré ñá túú yìhĩ iní xítohó vehe-á<sup>n</sup>, te duca<sup>n</sup> càda Xítohó Jesucristú chi nduu ñá túú yìhĩ iní ñáyiú ñuyíú-a quixi tucu-gá, te dàvá-á<sup>n</sup> cada-xi andiú dàtná quidé-xi òré níhĩ vìhĩ cãhá<sup>n</sup> ñuhu, te ñu-ni òré-á<sup>n</sup> ndoñuhu àndiú, te cáyú nchaa chódíní, te cáyú tucu tnáhá ñuyíú-a ndihĩ nchaa sá ío.

11 Te vitna nchòhó sa xíní-ndó sã náá ñuyíú-a te xĩã<sup>n</sup> ío xini ñuhu-xi cada váha-ndo cùndecu-ndo, te cada-ndo nàcuáa cuìní méé Yá Ndiõxí cunduu. 12 Te ío nducu ndèe-ndo duca<sup>n</sup> cada-ndo cuèndá duca<sup>n</sup> ndihĩ-ni sáá nduu càda-gá nchaa nàcuáa cãhá<sup>n</sup>-gá, te duca<sup>n</sup> nchòhó cundecu túha-ndo sáá nduu-ã<sup>n</sup>. Te ñu-ni nduu-ã<sup>n</sup> ndoñuhu àndiú chi cáyú-xi, te ñu-ni duca<sup>n</sup> ndoñuhu tucu nchaa chódíní chi ndihĩ-di cáyú. 13 Te nchoo ndètu-o sáá nduu cùndecu-o ì<sup>n</sup> ñuyíú sáá, te quini-ó ì<sup>n</sup> andiú saa datná ní cachĩ Yá Ndiõxí, te yacá<sup>n</sup> chi mee-nã cue ñáyiú quide váha cundecu.

14 Te nchòhó ñáyiú ío cùu iní-í, ñini ndètu-ndo sáá nduu dùca<sup>n</sup> cada-xi ío nducu ndèe-ndo cada-ndo mee-ni sá váha cundecu-ndo ichi Yá Ndiõxí, te cundecu nahi-ndo, te cada-ndo nchàa nacuáa vá cùndècu cuéchi-ndo nũú-gã. 15 Te ío cada cuèndá-ndó sã dácaca-gá nduu dùca<sup>n</sup> cada-gá chi cuìní-gá sá ncháá ñáyiú nanihĩ tãhú-yu. Te té Pãblú téé ío cùu iní-ó ndècu ndihĩ-o ichi Xítohó Jesucristú ñu-ni nàcuáa



càhá<sup>n</sup>-í-a ðiu-ni duca<sup>n</sup> ñi tee-dé ì<sup>n</sup> núú tütú ní dácáxí-dě ndaha-ndo, te ní tee-dé nàcuáa ní dácáhu íní ñáhá Yá Ndiõxí xii-dé. <sup>16</sup> Te ðiu-ni duca<sup>n</sup> càhá<sup>n</sup>-dé nchaa dava-gá núú tütú cádũha-dé, te dava tnúhu càhá<sup>n</sup>-dé ío úhú tecú tnùní-ó, núú xíã<sup>n</sup> ñáyiu ñá túú cùtnuní váha iní-xi, ñáyiu ío yáchí sàndáá iní-xi ì<sup>n</sup> tnúhu, ñáyiu-á<sup>n</sup> tècú tnùní dátñi-yu nchaa tnúhu ní chídó tnùní-dé, ndihí nchaa dava-gá tnúhu yòdo tnuní núú tütú Yá Ndiõxí, te sá dúcá<sup>n</sup> quidé-yu te dacuïta nihnú-yu mèé-yu.

<sup>17</sup> Te nchòhó ñáyiu ío cùu iní-í, sa cùtnuní iní-ndó nàcuáa quide dava ñáyiu, núú xíã<sup>n</sup> ío xini ñuhu-xi quihí iní-ndó cùndecu-ndo cuendá duca<sup>n</sup> cùndecu-ni-ndo ichi-gá, te vá dáñá-ndó mèe-ndo dandahú ñáhá nchàa cue tée ndècu ichi cuehé ichi duha, chí cue tée-á<sup>n</sup> ñà túú sàni váha iní-güedé cuendá tnúhu Yá Ndiõxí. Te núú na dàña-ndo mee-ndo dandahú ñáhá-güedè xii-ndo te vá cùndècu váha-gá-ndó ìchi-gá dàtná ndécú-ndó vitna. <sup>18</sup> Te nchòhó uu<sup>n</sup>-gá uu<sup>n</sup>-gá cuita cutnùní-gá iní-ndó quíhí<sup>n</sup> nchaa nàcuáa ta chindee ñaha Xítohó Jesucristú xii-ndo cuáhá<sup>n</sup>. Te duca<sup>n</sup> ío-gá cuita cutnùní iní-ndó nchàa nacuáa sàni iní-gá, te ðiu-gá cúú-gá Yaá ní dácácu nihnu ñaha xì-o núú ùhú núú ndàhú. Te chí ná càchí-ó sã ío càhnu cuu-gá cuèi vitna té cuèi ndéé núú cuáhá<sup>n</sup> núú vèxi. Te duca<sup>n</sup> na cùnduu. Te ío chí cádá ndèe iní-ñã vitna.

## TUTÚ DÍHNA NÍ CADÚHA TÉ JUÀÁ

### *Tnúhu sá cãhá<sup>n</sup> nãcuáa naníhí tãhú-ó*

<sup>1</sup> Te yúhú té Juàá cãchí tnúhu-í xii-ndo cuendá Crístú Yáá cãhá<sup>n</sup> nãcuáa cundecu ndíhi-o Yã Ndiöxí. Te Crístú-á<sup>n</sup> sa ndècu-gá ndéé cútñhá ní ngáva ñuyú. Te yúhú ní xiní núu-í ndíhi cue téé ní xica cuu ndíhi-í nãcuáa càa nãcuáa ndùu-gá. Te ní xíndedóho-ndí tnúhu ní cãhá<sup>n</sup>-gá, te ní tendaha-ndí-gá te ní cutnùní ndáá iní-ndí sá ñ<sup>n</sup> yiqui cuñú cúu-gã. <sup>2</sup> Te ní quixi túu-gá ñuyú-a, te ní xiní-ndí-gá, te xiã<sup>n</sup> cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gá ndíhi Tãtá-gã Dútú Ndiöxí ní cùu, te ní quixi-gá ñuyú-a ní xíndecu-ndí ndíhi-gá. Te ní cachí tnúhu-gá xii-ndí sá ndúú tãhú-ó cundecu ndíhi-o Yã Ndiöxí ní caa ní quíhí<sup>n</sup> te núu na quíndáá iní-ó-gã. <sup>3</sup> Te xiã<sup>n</sup> dátúu-ndí núu-ndó nchàa sá ní xiní-ndí, ndíhi nchaa sá ní xíndedóho-ndí cuendá cuu ñ<sup>n</sup>nuu-o nchàa-o datná nchúhú cúu ñ<sup>n</sup>nuu-ndí ndíhi Tãtá-ó Dútú Ndiöxí, ndíhi Déhe-gá Xítohó Jesucrístú. <sup>4</sup> Te xiã<sup>n</sup> núu tè-í nchaa tnúhu-a cuendá cudí iní-ó nchàa-o.

### *Yá Ndiöxí cúu-gã datná ñ<sup>n</sup> ñuhú*

<sup>5</sup> Te nchaa tnúhu ní dánèhé ñáhá Xítohó Jesucrístú xii-ndí, xiã<sup>n</sup> dánèhé ñáhà-í xii-ndo. Te ní cachí-gá sá Yã Ndiöxí cúu-gã datná ñ<sup>n</sup> ñuhú dáyèhé-gá iní-ó, te duca<sup>n</sup> sãtnahá-xi cùu-gá chi ío váha quide-gá, te ñá túu quide-gá ní ñ<sup>n</sup> sá cuèhé sá dúhá. <sup>6</sup> Te núu cãchí-ó sã ndécú-ó ìchi Yã Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túu quide ndáá-ó núu-gã. <sup>7</sup> Te núu na càda váha-o datná quidé mèe-gá, te cuu ñ<sup>n</sup>nuu-o nchàa-o. Te ndada ndoo ndada nine-gá iní-ó, chi cada cãhnu iní-gá nchaa sá cuèhé sá dúhá quide-o, chi ñu cuendá-á<sup>n</sup> ní xíhí Déhe-gá Xítohó Jesucrístú núu cùrúxí.

<sup>8</sup> Te núu cãchí-ó sã ñà túu quide-o ní ñ<sup>n</sup> sá cuèhé sá dúhá, te dãndahú-ó mèe-o, te ñá túu quide ndáá-ó núu Yã Ndiöxí.

<sup>9</sup> Te núu na nãhmá-ó nchàa yíca cuèchi-o

núu-gã, te mee-gã cada cãhnu iní-gá, te ndada ndoo-gá iní-ó, cuendá cada ndáá-ó cundecu-o ìchi-gá, chi mee-gã ío váha quide-gá te ío ndáá quidé-gã, duca<sup>n</sup> ní cãhá<sup>n</sup>-gá te duca<sup>n</sup> quide-gá. <sup>10</sup> Te núu na cãchí-ó sã ñà túu quide-o ní ñ<sup>n</sup> sá cuèhé sá dúhá, te quide-o Yã Ndiöxí ñ<sup>n</sup> ñándéhné, dico ñá túu ndèhnde-gá. Te ñá túu ndècu tnúhu-gá iní-ó te núu duca<sup>n</sup> na càda-o.

## 2

### *Xítohó Jesucrístú cãhá<sup>n</sup> ndàhú-gá cuendá-ó*

<sup>1</sup> Te nchòhó ñáyíu cùu datná déhe-í, chido tnuní-í nchaa tnúhu-a cuendá sá vã cáda-ndó ní ñ<sup>n</sup> sá cuèhé sá dúhá. Dico núu ñ<sup>n</sup>-ndo quide-ni-ndo nãndí sá cuèhé sá dúhá, te ndècu ñ<sup>n</sup> Yáá cãhá<sup>n</sup> ndàhú cuendá-ó núu Yã Ndiöxí. Te Yáá-á<sup>n</sup> cúu-gã Xítohó Jesucrístú Yáá quidé ndáá. <sup>2</sup> Te ní xíhí-gá sá cuendá nchaa yíca cuèchi-o cuendá ngúndecu váha-o núu-gã te núu na quíndáá iní-ó-gã. Te ñá díu-ní sã cuendá yíca cuèchi nchoo ní xíhí-gá, chi tnàhá cuendá nchaa yíca cuèchi ñáyíu ní càa xico ñuyú.

<sup>3</sup> Te núu cada-o nchàa nãcuáa cãhá<sup>n</sup> Yã Ndiöxí, te cutnùní iní-ó sã ndécú-ó ìchi-gá. <sup>4</sup> Te núu cãchí-ó sã ndécú-ó ìchi-gá te ñá túu quide-o nãcuáa cãhá<sup>n</sup>-gá, te dàcuandehnde-o, te ñá túu quide ndáá-ó núu-gã. <sup>5</sup> Te núu sãndáá ndisa iní-ó tnúhu-gá, te quide-o nchaa nãcuáa cãhá<sup>n</sup>-gá, te duca<sup>n</sup> te cùu iní ndisa-o-gã, te cutnùní ndáá iní-ó sã ndécú-ó ìchi-gá. <sup>6</sup> Te núu cãchí-ó sã ndécú-ó ìchi Yã Ndiöxí, te xini ñuhú-xi cada ndáá-ó cundecu-o ñuyú-a datná ní quide ndáá Xítohó Jesucrístú cútñhá ní xíndecu-gá ñuyú-a.

### *Ndudú sáá*

<sup>7</sup> Te nchòhó ñáyíu ndècu ndíhi-í ìchi Xítohó Jesucrístú, ñá túu chido tnuní-í ñ<sup>n</sup> tnúhu saa sã cúu-xí-ndó, chi ñu-ni tnúhu sá ní ngúndecu ndíhi-ndo ndéé díhna, tnúhu ní xíndedóho-ndo ndéé cútñhá ní sãndáá iní-ndó-gã, xiã<sup>n</sup> chídó tnuní-í. <sup>8</sup> Te tnúhu-a cùu-xi datná ñ<sup>n</sup> tnúhu saa tè-í dãndacu iní ñáhà-í xii-ndo nãcuáa ní quide Xítohó Jesucrístú cútñhá ní quixi-gá ñuyú-a ní quide váha-gá, te tnàhá nchòhó ní tnúu-ndo tnúhu-gá te quide váha-ndo tnàhá-ndó. Te

vitna ì<sup>n</sup> nduu ì<sup>n</sup> nduu ta cùu vai ñáyiú ta dàña nchaa sá cuèhé sá dúhá cuáhá<sup>n</sup>, chi Xítóhó Jesucristú tá dándixi túu-gá iní-yu cuèndá cutnùní iní-yu nàcuáa ndùu cuendá Yá Ndiöxí.

<sup>9</sup> Te núu càchí-ó sá quidé vâha-o, te cùu úhú iní-ó tnâha ñáyiú-o, te xíã<sup>n</sup> ñá túú quide ndáá-ó, chi ndècu-ni-o ichi cuehé ichi duha sá dúcá<sup>n</sup> quide-o. <sup>10</sup> Te núu na cùu iní-ó tnâha ñáyiú-o datná cúu ìní ñáhá mèe Yá Ndiöxí xii-o ña, te quide ndáá-ó núú-gã, te vá cánúichi-o tnaaha ñáyiú-o ì<sup>n</sup> ichi cuehé ichi duha. <sup>11</sup> Te núu cùu úhú iní-ó tnâha ñáyiú-o, te ñá túú quide vâha-o núú Yá Ndiöxí, chi ndècu-ni-o ichi cuehé ichi duha, te ñá túú cùtnuní iní-ó sá quidé-ó. Chi cùu-o datná ì<sup>n</sup> tée ndècu núú néé chi ñá cùtnuní núú-dě ndèe ichi quíhí<sup>n</sup>-dé. Duca<sup>n</sup> sãtnahá-xi cùu nchoo chi ñá cùtnuní iní-ó ndèe ichi quíhí<sup>n</sup>-ó te núu duca<sup>n</sup> na càda-o cuu úhú iní-ó tnâha ñáyiú-o.

<sup>12</sup> Te nchòhó ñáyiú cùu datná déhe-í, yúhú chídó tnùní-í tnúhu-a ì<sup>n</sup> núú tütú càchí tnúhu-í xii-ndo sã ñí quide càhnu iní Yá Ndiöxí nchaa cuèchi-ndo, chi ñíu cuèndá-á<sup>n</sup> ñí xíhí Xítóhó Jesucristú. <sup>13</sup> Te nchòhó ñáyiú sacuéhé, yúhú tée-í tnúhu-a sá cúu-xi-ndó chi càhá<sup>n</sup> ndihí-ndo Jèsús, te Yaá-á<sup>n</sup> sa ndècu-gá ndéé cùtnahá ní ngáva ñuyíú. Te nchòhó ñáyiú nchícú<sup>n</sup>-gá tée tucu-í tnúhu-a sá cúu-xi-ndó chi ñá túú sãndáá iní-ndó tnúhu càhá<sup>n</sup> yucu ñãvâha.

Te nchaa nchòhó ñáyiú cùu datná déhe-í, tée tucu-í tnúhu-a sá cúu-xi-ndó, chi sa càhá<sup>n</sup> ndihí-ndo Tãtã-ó Dütú Ndiöxí. <sup>14</sup> Te nchòhó ñáyiú ñí sãhnu, yúhú chídó tnùní-í tnúhu-a ì<sup>n</sup> núú tütú chi càhá<sup>n</sup> ndihí-ndo Jèsús, te Yaá-á<sup>n</sup> sa ndècu-gá ndéé cùtnahá ní ngáva ñuyíú. Te nchòhó ñáyiú nchícú<sup>n</sup>-gá, yúhú chídó tnùní-í tnúhu-a chi ío ñíhí ndéé-ndó ndècu-ndo, chi tnì<sup>n</sup>-ndo tnúhu càhá<sup>n</sup> Yá Ndiöxí. Te ñá túú sãndáá iní-ndó tnúhu càhá<sup>n</sup> yucu ñãvâha.

<sup>15</sup> Te vá cùhú<sup>n</sup> ìní-ndó ñí ì<sup>n</sup> sá cuèhé sá dúhá ío ñuyíú-a, te ñí vã cání ìní-ndó càda-ndo. Chi núu na cùhu<sup>n</sup> iní-ó nchãa sá cuèhé sá dúhá ío ñuyíú-a ña, te ñá túú Tãtã-ó Dütú Ndiöxí ñúhú ìní-ó te núu duca<sup>n</sup> na càni iní-ó. <sup>16</sup> Te nchaa ñáyiú ñuyíú-a quidé-yu nchaa sá cuèhé sá dúhá, chi ñíu nchaa xíã<sup>n</sup> cùdã ìní-yu cadã-yu. Te nchaa sá cuèhé sá dúhá sãni iní-yu, ndihí nchaa

sá xíní-yu quidé-yu. Te xíquide nínu-yu mèe-yu cuèndá nchaa sá ndécú ndihí-yu. Te nchaa sá ñã túú vâha ní cacu nihnu-xi ñuyíú-a. <sup>17</sup> Te nchaa sá ñã túú vâha ío ñuyíú-a, ndihí nchaa sá sãní cuèhé sãní dùha iní-yu cuita ndihí nihnu-xi quíhí<sup>n</sup>. Te nchaa ñáyiú tnì<sup>n</sup> tnúhu càhá<sup>n</sup> Yá Ndiöxí cundecú-yu ndihí-gá ñí caa ñí quíhí<sup>n</sup>.

*Tnúhu ndáá tnúhu Yá Ndiöxí ndihí tnúhu ndehnde*

<sup>18</sup> Te nchòhó ñáyiú cùu datná déhe-í, sa ñíhí-ndó tnúhu sá quíxí ì<sup>n</sup> tée cunuu-gã-dé cuu úhú iní-dé Crístú. Te sa xíndecu-gá ñáyiú cùu úhú iní ñáhá xii-gá, núu xíã<sup>n</sup> cùtnuní iní-ó sã sã ta cuyatni nduu naa ñuyíú-a. <sup>19</sup> Te ñáyiú-á<sup>n</sup> ñí xíndecu ndihí ñáhá-yu xii-o, te ñí queé-yu cuáhã<sup>n</sup>-yu chi ñá túú ñí cùu ì<sup>n</sup>nuu-o ndihí-yu. Chi núu dícó ñí cùu ì<sup>n</sup>nuu-o ndihí-yu te cundecu ndihí ñáhã<sup>n</sup>-yu xii-o ñí cùu. Te duha ñí cuu cuèndá cutnùní ndáá iní-ó nchãa-o sá ñã túú cùu ì<sup>n</sup>nuu-o ndihí-yu, chi ñá túú sãndáá iní-yu Yá Ndiöxí.

<sup>20</sup> Te Xítóhó Jesucristú ñí taxi-gá Espíritú Yá Ndiöxí ndécú ndihí-o, núu xíã<sup>n</sup> tècú tnùní-ó tnúhu-gá. <sup>21</sup> Te cuèndá sá xíní-ndó tnúhu ndáá tnúhu Yá Ndiöxí núu xíã<sup>n</sup> tée-í tnúhu-a, te ñá ñíú ì<sup>n</sup> sã ñã cùtnuní iní-ndó cùu-xi. Te sa nãha-ndo sã ñí ì<sup>n</sup> tnúhu ndehnde ñã túú ñútnahã-xi núú tnúhu Yá Ndiöxí, chi mee ñíne-ñí tnúhu ndáá cúu-xi.

<sup>22</sup> Te nchaa ñáyiú càchí sã ñã ñíú Jèsús cúu Crístú Yaá ñí tendaha Yá Ndiöxí ñí quixi ñuyíú-a dàcuandehndé-yu, te cùu úhú iní-yu Jèsús. Te ñíu-ñí-yu càchí-yu sã ñã ñíú Dêhe Yá Ndiöxí cúu Jèsús, te sã dúcã<sup>n</sup> quidé-yu te cùu úhú iní-yu Yá Ndiöxí ndihí Déhe-gá Jèsús. <sup>23</sup> Te nchaa ñáyiú ñã túú sãndáá iní sã Dêhe Yá Ndiöxí cúu Jèsús, ñáyiú-á<sup>n</sup> ñã túú ndécú-yu ichi Tãtã-ó Dütú Ndiöxí. Te nchaa ñáyiú càhá<sup>n</sup> sã Dêhe Yá Ndiöxí cúu Jèsús, ñáyiú-á<sup>n</sup> ndécú-yu ichi Tãtã-ó Dütú Ndiöxí.

<sup>24</sup> Te nchaa tnúhu Yá Ndiöxí ñí tecú dóho-ndo ndèe díhna, tnúhu-á<sup>n</sup> cùhu<sup>n</sup> iní-ndó. Te núu nchaa tnúhu-á<sup>n</sup> ná cùhu<sup>n</sup>-ñí iní-ndó, te cundecu ndihí-ndo Yá Ndiöxí ndihí Déhe-gá cuèi vá cùndècu túu-ndo ndihí-gá ñuyíú-a. <sup>25</sup> Te Jèsús ñí cachí-gá sã ndúú tãhú-ó cundecu ndihí-o-gá ñí caa ñí quíhí<sup>n</sup> andíu.

26 Te cuendá nchaa ñáiyu dándahú ñáhá xii-ndo ní chídó tnùn-í tnúhu-a, 27 dico nchòhó chi ndècu ndih-ndo Espíritú Yá Ndiöxí sá ñí taxi Xítohó Jesucristú. Núu xiá<sup>n</sup> ñá túú xini ñuhu-ndo ñáiyu danèhé ñáhá xii-ndo, chi mee Espíritú-gá dánèhé ñáhá-xí nchaa sá vaha. Te nchaa sá dánèhé ñáhá-xí xii-ndo cuu-xi sá ndáá, te ñá díú ñ<sup>n</sup> tnúhu ndehnde. Te vitna chí cáncñícú<sup>n</sup> nihnu-ni ichi Yá Ndiöxí dàtná ní sanu ichi ñaha mée Espíritú-gá xii-ndo.

28 Te nchòhó ñáiyu cùu datná déhe-í, chí cáncñícú<sup>n</sup> nihnu-ni ichi Xítohó Jesucristú, chi cuendá òré ná quixí tucu-gá ñuyíú-a te vá yuhú-ndó te ñí vá cúu cáha<sup>n</sup> núu-ndó núu-gá. 29 Te nchòhó sa ñaha-ndo sá mée-gá quidé ndáá-gá, te sa xini-ndó sá ncháá ñáiyu quide ndáá cúu-yu déhe Yá Ndiöxí.

### 3

#### *Ñáiyu cùu déhe Yá Ndiöxí*

1 Te chí cuáha cuendá sá ño cùu iní ñáhá Tātá-ó Dütú Ndiöxí xii-o cuendá sá cúu-ó déhe-gá, chí duca<sup>n</sup> ñí cachí-gá, te déhe ndisa-gá cúu-ó. Te núu xiá<sup>n</sup> ñáiyu ndècu ichi cuehé ichi duha ñá cúu quini ñáhá-yu xii-o, chí ñá túú xini-yu nacuáa ndùu cuendá Yá Ndiöxí. 2 Te nchòhó ñáiyu ío cùu iní-í, vitna cùu-o déhe Yá Ndiöxí, te vátá cútnuní váha-gá iní-ó ñasa cunduu-o ndèé núu cuáhá<sup>n</sup> núu vèxi. Dico sa cútnuní iní-ó sá òré ná quixi tucu Xítohó Jesucristú te nduu-o dàtná cáá mée-gá, chí quini-ó-gá nacuáa-ni caa nacuáa-ni ndùu-gá. 3 Te nchaa ñáiyu sa ndètu ñaha xii-gá sa ta ngündecu túha-yu cuáhá<sup>n</sup>, chí ta ndùu ndoo nduu nine iní-yu cuáhá<sup>n</sup> dàtná cáá ndòo caa nine mee-gá.

4 Te nchaa ñáiyu quide nándi sá cuehé sá dúhá ñá túú quide váha-yu núu Yá Ndiöxí, chí ní cachí-gá sá vā dúcá<sup>n</sup> càda-o. 5 Te sa ñaha-ndo sá ñí quixi túu Xítohó Jesucristú ñuyíú-a cuendá cada càhnu iní-gá nchaa sá cuehé sá dúhá quide-o, chí mee-gá ñá túú quide-gá ñí ñ<sup>n</sup> sá cuehé sá dúhá. 6 Te nchaa ñáiyu ndècu ichi Yá Ndiöxí ñá túú ñùhú-yu ichi cuehé ichi duha. Te nchaa ñáiyu ñùhu ichi cuehé ichi duha ñá túú xini-yu nacuáa ndùu cuendá Xítohó Jesucristú te ñí ñá túú xini-yu nása caa-gá. 7 Te nchòhó ñáiyu cùu datná déhe-í, vá dáñá-ndó mée-ndo

dándahú ñáhá ñáiyu ndècu ichi cuehé ichi duha, chí càchí-yu sá cúu cùndecu-o ichi Yá Ndiöxí te cada-o nándi sá cuehé sá dúhá dico ñá ndáá. Te nchaa ñáiyu quide váha quide ndáá-yu dàtná quidé mée Jesús. 8 Te nchaa ñáiyu ndècu ichi cuehé ichi duha ndècu ndihí-yu yucu ñávaha, chí duca<sup>n</sup> quide mee-xi ndéé cútnahá vátá ngáva-gá ñuyíú. Te xiá<sup>n</sup> ní quixi Jesús Déhe Yá Ndiöxí ní dáquéé tñhú-gá nchaa sá quidé yucu ñávaha.

9 Te nchaa ñáiyu ní natuha ichi Yá Ndiöxí ní nduú-yu déhe-gá, te ñá túú-gá quidè-yu nándi sá cuehé sá dúhá chí ní ndada ndoo ní ndada nine-gá iní-yu. Núu xiá<sup>n</sup> ñá túú-gá quidè-yu nándi sá cuehé sá dúhá, chí ní ngündecu ndihí ñaha-gá xii-yu. 10 Te cútnuní iní-ó nándi cùu ñáiyu cùu déhe Yá Ndiöxí, te cútnuní iní-ó nándi cùu ñáiyu cùu déhe yucu ñávaha. Te nchaa ñáiyu ñá túú quide ndáá, te cùu úhú iní-yu tnàha ñáiyú-yu, te ñáiyu-á<sup>n</sup> ñá díú déhe Yá Ndiöxí cúu-yu.

#### *Cuu iní tnáhá-ó ñ<sup>n</sup> ñ<sup>n</sup>-o*

11 Te ndéé òré ní natuha-o ichi Yá Ndiöxí ní tecú dóho-o sá cúu iní-ó tnàha ñáiyu-o.

12 Te vá cùndùu úhú iní-ó dàtná ní quide ndíi Càin, chí ndíi-á<sup>n</sup> ñí xindecu ndíi ndihí yucu ñávaha núu xiá<sup>n</sup> ní sahani ndíi ñaní ndíi. Te duca<sup>n</sup> ñí quide ndíi chí ní xindecu ndíi ichi cuehé ichi duha, te ñaní ndíi ní xindecu-dé ichi váha.

13 Te nchòhó ñáiyu ndècu ndihí-í ichi Xítohó Jesucristú, vá cáda cuendá-ndó sá cúu úhú iní ñáhá nchaa ñáiyu ndècu ichi cuehé ichi duha xii-ndo. 14 Te cunaha-ndo na càchí tnúhu-í xii-ndo sá ñùu na cùu iní-ó tnàha ñáiyu-o, te cútnuní iní-ó sá sá ní dáñá-ó ichi sá tá dàcuíta nihnu ñaha xii-o cuáhá<sup>n</sup> ní cùu, te vitna ní tñi-o ichi váha. Te nchaa ñáiyu ñá túú cùu iní tnàha ñáiyu-xi ñùhu-ni-yu ichi cuáhá<sup>n</sup>-yu núu úhú núu ndàhú. 15 Te nchaa ñáiyu ñá cúu quini ndéé tnàha ñáiyu-xi cùu-yu dàtná ñ<sup>n</sup> ñáiyu sahani ndíyi. Te nchòhó sa ñaha-ndo sá ñí ñ<sup>n</sup> ñáiyu sahani ndíyi ñá túú ndècu ndihí-yu tnúhu ndee iní sá nánihí tñhú-yu. 16 Te Xítohó Jesucristú ní xihí-gá cuendá nchaa yíca cuèchi-o, núu xiá<sup>n</sup> cútnuní iní-ó sá ño cùu iní ñáhá-gá xii-o. Te xiá<sup>n</sup> cútnuní iní-ó nacuáa cada-o cùu iní-ó tnàha ñáiyu-o,



te cuèi na cùú-ó cuendá sá cúú-xí ñ<sup>n</sup>-yu, cuendá-nã sá ná dàcácu nihnu-ò-yu núú tnũndòho ndecú-yu. <sup>17</sup> Te núú ndècu ndihì-o sá cóhó sã cáxí-ó ndihì nchaa sá nándihì-o, te ndècu ñáyiu ndàhú ñá túú vèdana ná ndécú ndihì, te ñá túú chindee-ó-yu, te ñá túú cùu iní-ó Yã Ndiõxí te núú duca<sup>n</sup> na càda-o. <sup>18</sup> Te nchòhó ñáyiu cùu datná déhe-í vá cuendá-ni cùnàha càhá<sup>n</sup>-ndó sã cúú iní tnáhá-ndó, chi cuu iní tnáhá ndisa-ndo te coto tnàha-ndo.

### *Vá yùhú-ó nũú Yã Ndiõxí*

<sup>19</sup> Te núú duca<sup>n</sup> na càda-o, te cutnùnì iní-ó sã ndécú-ó ìchi ndáá ichi Yá Ndiõxí, te ñá túú-gã ná quihì iní-ó nũú-gã. <sup>20</sup> Te núú ndihú iní-ó cuendá ñ<sup>n</sup> sá ñi quide-o, te sa nàha Yá Ndiõxí te núú ní quide váha-o àdi ní quide cuèhé-ó, chi sa nàha ndáá-gã nàcuáa càa iní-ó. <sup>21</sup> Te nchòhó ñáyiu ío cùu iní-í, na càchí tnúhu-í xii-ndo, te núú ñá túú nã sání iní-ó te ñá túú nã quidé-ó, te vá yùhú-ó nũú Yã Ndiõxí. <sup>22</sup> Te nchaa sá vãha na càcá<sup>n</sup>-ó nũú Yã Ndiõxí, te mee-gã taxi-gá chi tnè-o tnúhu càhá<sup>n</sup>-gã, te quide-o nchaa nacuáa cùu iní-gã. <sup>23</sup> Te ní cachí Yã Ndiõxí sá quindáá iní-ó Dèhe-gá Xítóhó Jesucrìstú, te cuu iní-ó tnàha ñáyiu-o dàtná ní cachí-gã. <sup>24</sup> Te nchaa ñáyiu tnè tnúhu-gã ndécú-yu ichi-gã, te ndècu ndihì ñaha-gã xii-yu. Te cùtnunì iní-ó sã ndécú-ó ndihì-gã chi ní taxi-gã Espíritú-gã ndécú ndihì-o.

## 4

### *Ñáyiu ndècu ndihì Espíritú Yã Ndiõxí ndihì ñáyiu cùu úhú iní ñáhá xii Xítóhó Jesucrìstú*

<sup>1</sup> Te nchòhó ñáyiu ío cùu iní-í, vá cùtexínu quindáá iní-ndó tnúhu càhá<sup>n</sup> nchaa ñáyiu càchí sá ndécú ndihì Espíritú Yã Ndiõxí. Chi díhna-gã cada cuendá váha-ndo te núú càhá<sup>n</sup> ndáá-yu nàcuáa càhá<sup>n</sup> tnúhu Yá Ndiõxí, chi ío vãi ñáyiu ñuyú-a cachí-yu sá càhá<sup>n</sup>-yu tnúhu-gã dico ñá ndáá. <sup>2</sup> Te duha cutnùnì iní-ó nãndi cùu ñáyiu ndècu ndihì Espíritú Yã Ndiõxí. Nchaa ñáyiu càhá<sup>n</sup> ndáá sá Xítóhó Jesucrìstú ní quixi-gã ñuyú-a te ní cuu-gã ñ<sup>n</sup> yiqui cùñú, ñáyiu-á<sup>n</sup> cúú-yu ñáyiu cùu cuendá Yã Ndiõxí. <sup>3</sup> Te nchaa ñáyiu ñá túú càhá<sup>n</sup> nàcuáa càa Jesús cútnáhá ní quixi-gã ñuyú-a ñáyiu-á<sup>n</sup>

dándahú ñáhã-yu, chi ñá túú cùu-yu ñáyiu cùu cuendá Yã Ndiõxí. Te diu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiu cuu úhú iní ñáhá xii-gã, dico yúhú càchí tnúhu-í xii-ndo sã sã ndecú-yu.

<sup>4</sup> Te nchòhó ñáyiu cùu datná déhe-í, ndècu ndihì-ndo Yá Ndiõxí, te ñá dáñá-ndó dándahú ñáhã nchaa ñáyiu càchí sá càhá<sup>n</sup> tnúhu-gã te ñá ndáá. Te ñá túú sàndáá iní-ndó chi Yá Ndiõxí Yaá ndécú ndihì-ndo taxi tnunì víhí-gã dàcúúxí yùcu ñávãha ndècu ndihì nchaa ñáyiu ñuhu ichi cuehé ichi duha. <sup>5</sup> Te nchaa ñáyiu dándahú ñáhã sã càhá<sup>n</sup> tnúhu Yá Ndiõxí ndécú-yu ichi cuehé ichi duha, te mee-ni cuendá nchaa sá ío ñuyú-a càhá<sup>n</sup>-yu. Te tédóho ñaha nchaa dava-gã ñáyiu ndècu diu-ni ichi cuehé ichi duha. <sup>6</sup> Te nchoo cùu-o ñáyiu cùu cuendá Yã Ndiõxí. Te nchaa ñáyiu xĩndecu ichi-gã tnè-yu tnúhu càhá<sup>n</sup>-ó, te nchaa ñáyiu ñá túú ndècu ichi-gã ñá túú tnè-yu tnúhu càhá<sup>n</sup>-ó. Te duha te cùtnunì iní-ó nãndi cùu ñáyiu càhá<sup>n</sup> ndáá, te cùtnunì tucu iní-ó nãndi cùu ñáyiu dándahú ñáhã.

### *Cuu iní-ó tnàha ñáyiu-o dàtná cúú iní ñáhá mèe Yá Ndiõxí xii-o*

<sup>7</sup> Te nchòhó ñáyiu ío cùu iní-í, xini ñuhu-xi cuu iní tnáhá-ó dàtná cúú iní ñáhá mèe Yá Ndiõxí xii-o, chi mee-gã táxí-gã sá xini tnùnì-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe Yá Ndiõxí, te cùtnunì ndáá iní-yu sá ndécú ndihì ñaha-gã xii-yu. <sup>8</sup> Te nchaa ñáyiu ñá túú cùu iní tnàha ñáyiu-xi ñá túú ndècu ndihì-yu Yá Ndiõxí. Te nchaa ñáyiu ndècu ndihì Yá Ndiõxí, ñáyiu-á<sup>n</sup> sãñaha-gã sá xini tnùnì-yu cuendá cuu iní-yu tnàha ñáyiu-yu. <sup>9</sup> Te cùtnunì iní-ó sã cúú iní ñáhã Yã Ndiõxí xii-o nchaa-o, chi ní tendaha-gã ñ<sup>n</sup>dii díi-ni Déhe-gá Xítóhó Jesucrìstú ní quixi-gã ñuyú-a cuendá sá díú-gã cada te naníhí tàhú-ó, te núú na quindáá iní-ó tnúhu-gã. <sup>10</sup> Te ío cùu iní ñáhã Yã Ndiõxí xii-o nchaa-o. Te ñá díú sã méé-ó cùu iní-ó-gã, chi díhna-gã méé-gã sa cùu iní ñáhã tnáhí-gã xii-o, núú xiã<sup>n</sup> ní tendaha-gã Déhe-gá ní quixi-gã ñuyú-a ní xihí-gã sá cuendá nchaa yicá cuèchi-o.

11 Te nchòhó ñáyiú ío cùu iní-í, xìnì ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. 12 Te ni ñ<sup>n</sup> nchoo ñáyiú ndècu ñuyíú-a ñá túú xìní-ó nàcuáa càa Yá Ndiöxí, dico nchoo ñáyiú ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xiã<sup>n</sup> cúú ìní tnáhá-ó ñ<sup>n</sup> ñ<sup>n</sup>-o, te cùtnuní iní-ó sã cúú ìní ndisa-o-gã. 13 Te cùtnuní iní-ó sã ndécú-ó ìchi-gá, te ndècu ndìhi ñaha-gá xii-o, chi ní taxi-gá Espíritú-gá ndécú ndìhi-o. 14 Te yúhú ndìhi dava-gá cue téé ní xica cuu ndìhi-gá càhá<sup>n</sup>-ndí sá ñí xìní-ndí Jèsús Déhe Yá Ndiöxí ní quixi-gá ñuyíú-a, chi Tátá-ó Dütú Ndiöxí ní tendaha ñaha xii-gá ní quixi-gá cuendá dàcácu nihnu-gá nchaa nchoo ñáyiú ndècu ñuyíú-a núú ùhú núú ndàhú. 15 Te nchaa ñáyiú càhá<sup>n</sup> ni yùhu ni iní-xi sá Dèhe Yá Ndiöxí cúú Jèsús, ñáyiú-á<sup>n</sup> ndécú-yu ichi-gá te ndècu ndìhi ñaha-gá xií-yu.

16 Te sàndáá iní-ó ñí yuhu ni iní-ó sã Yá Ndiöxí cúú ìní ñáhá-gã xii-o, chi duca<sup>n</sup> iní-gá. Te nchaa ñáyiú cùu iní ñáhá xii Yá Ndiöxí ndécú ndìhi ñaha-gá xií-yu. 17 Te núu ndisa cùu iní-ó Yá Ndiöxí te vá yùhú-ó òré ná sáá nduu tàud<sup>ñ</sup> ñaha-gá xii-o tnúú nchaa ñáyiú ndècu ichi cuehé ichi duha, chi quide ndáá-ó ndècu-o núú-gã ñuyíú-a dàtná ní quide mee Jèsús. 18 Chi nchaa ñáyiú cùu iní ñáhá xii Yá Ndiöxí ñá túú-gã yùhú-yu, te núu cùu iní ndisá-yu-gã. Te núu yùhú-yu te xiã<sup>n</sup> sa ndòhó-yu, chi ñùhú-yu ichi cuáhá<sup>n</sup>-yu núú ùhú núú ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

19 Te cuu iní-ó Yá Ndiöxí, chi mee-gã ndéé cútnáhá vátá quìndáá-gá iní-ó tnùhu-gá sa cùu iní ñáhá-gã xii-o. 20 Te nchaa ñáyiú càchí sá cúú ìní-yu Yá Ndiöxí, te cùu ùhú iní-yu tnàha ñáyiú-yu, ñáyiú-á<sup>n</sup> dácuàndehndé-yu. Te núu ñá túú cùu iní-yu tnàha ñáyiú-yu ndècu ñuyíú-a ña, te uu<sup>n</sup>-gá quidè-yu Yá Ndiöxí Yaá ñá túú xìní núú-yu. 21 Te càchí-gá núú tnùhu-gá sá ñáyiú na cùu iní ñáhá xii Yá Ndiöxí, te duca<sup>n</sup>-ni cùu iní-yu tnàha ñáyiú-yu.

## 5

*Nchaa ñáyiú ní ndacu ní dáñá ìchi cuehé*

### *ichi duha*

1 Te nchaa ñáyiú sàndáá iní sá Jèsús cúú-gã Crístú Yaá ní quixi ñuyíú-a, ñáyiú-á<sup>n</sup> cúú-yu déhe Yá Ndiöxí. Te cùu iní-yu Tátá-ó Dütú Ndiöxí, te cùu iní-yu Déhe-gá. 2 Te núu cùu iní-ó Yá Ndiöxí te quide-o nacuáa càhá<sup>n</sup>-gá, te cùtnuní iní-ó sã cúú ìní tnáhá ndisa-o nacuáa ndècu-o ichi-gá. 3 Te núu cùu iní-ó Yá Ndiöxí te tnè-o tnùhu càhá<sup>n</sup>-gá, chi cùtnuní iní-ó sã ñà díú ñ<sup>n</sup> sá ùhú cúú-xí dàtná càchí ñáyiú. 4 Te nchaa nchoo ñáyiú cùu déhe-gá sa ní dáñá-ó ìchi cuehé ichi duha, chi ní sàndáá iní-ó Jèsús núu xiã<sup>n</sup> ní ndacu-o ñí dáñá-ó ìchi-á<sup>n</sup>. 5 Te nchaa ñáyiú sàndáá iní sá Dèhe Yá Ndiöxí cúú Jèsús ní ndacú-yu ní queé-yu ichi cuehé ichi duha.

### *Nàcuáa ní càhá<sup>n</sup> Yá Ndiöxí cuendá Jèsús*

6 Te Xítohó Jesucristú ní quixi-gá ñuyíú-a, te ní sandute-gá. Te ñá díú-ní xiã<sup>n</sup>, chi ní xíhí-gá sá cuendá nchaa yíca cuèchi-o. Te Espíritú Yá Ndiöxí càhá<sup>n</sup>-xi mee-ni sã ndáá, chi càhá<sup>n</sup> Espíritú-gá-á<sup>n</sup> sã Jèsús cúú-gã Crístú Yaá ní quixi ñuyíú-a. 7 Te úní testiú ndécú àndiú, Tátá-ó Dütú Ndiöxí, ndìhi Déhe-gá Xítohó Jesucristú, ndìhi Espíritú-gá. Te ñ<sup>n</sup>-ni tnùhu càhá<sup>n</sup> ndi nùnì testiú-á<sup>n</sup>. 8 Te duca<sup>n</sup> cùu-xi ñuyíú-a tucu, chi càhá<sup>n</sup> Espíritú Yá Ndiöxí sá Jèsús cúú-gã Crístú. Te ní sandute-gá, te ní xíhí-gá sá cuendá nchaa yíca cuèchi-o. Te xiã<sup>n</sup> cútnùnì ndáá iní-ó sã díú Jèsús cúú-gã Crístú. 9 Te núu tnè-o tnùhu váha càhá<sup>n</sup> ñáyiú, te váha-gã tnè-o tnùhu càhá<sup>n</sup> Yá Ndiöxí, chi càhá<sup>n</sup> ndáá-gá sá Dèhe-gá cúú Jèsús. 10 Te nchaa ñáyiú sàndáá iní sá Jèsús cúú-gã Déhe Yá Ndiöxí, ñáyiú-á<sup>n</sup> cútnùnì iní-yu sá cúú-xí ñ<sup>n</sup> sá ndáá. Te nchaa ñáyiú ñá túú sàndáá iní tnùhu càhá<sup>n</sup> Yá Ndiöxí quidè-yu-gá ñ<sup>n</sup> ñándéhdé, dico ñá túú ndéhdé-gá, chi mèé-yu ñá túú sàndáá iní-yu sá Dèhe-gá cúú Jèsús dàtná càchí mèé-gã. 11 Te Yá Ndiöxí càchí tnùhu ndáá-gá sá cùndècu-o ndìhi-gá ni caa ni quíhí<sup>n</sup>. Te duha càhá<sup>n</sup>-gá chi sàndáá iní-ó Dèhe-gá. 12 Te nchaa ñáyiú na quìndáá iní ñáhá xii Déhe-gá cundécú-yu ndìhi-gá ni caa ni quíhí<sup>n</sup>. Te nchaa ñáyiú ñá túú sàndáá iní ñáhá xii Déhe-gá vá cùndécú-yu ndìhí-gá.

*Sáhu ndèé núú nǐ ndìhi-ná*

<sup>13</sup> Te cuèndá sá sàndáá iní-ndó Dèhe Yá Ndiǒxí núu xǎ<sup>n</sup> chídó tñuní-í tñúhu-a cuèndá cutnùní iní-ndó sá cùndècu ndìhi-o-gá nǐ caa nǐ quíhí<sup>n</sup>.

<sup>14</sup> Te ñá túú tñúhu yùhú cáhá<sup>n</sup> ndìhi-o Yá Ndiǒxí, chi tedóho ñaha-gǎ xii-o núu ñ<sup>n</sup>-ná sá ná càcá<sup>n</sup>-ó núú-gǎ dàtná cuìní méé-gǎ.

<sup>15</sup> Te cùtnuní iní-ó sǎ táxí-gǎ sá xìcá<sup>n</sup>-ó núú-gǎ, chi nàha-o sá tédóho ñaha-gǎ xii-o núu na càcá<sup>n</sup>-ó nàcuáa cùu iní-gá.

<sup>16</sup> Te núu xìní-ó ñǎyiu ndècu ichi Yá Ndiǒxí te quidé-yu sá ñá túú vǎha núú-gǎ, te ndèhe-o sá ñá túú ní xíta nihnu duú<sup>n</sup>-yu, te cáhá<sup>n</sup> ndìhi-o Yá Ndiǒxí cuèndá-yu, te dàcácu nihnu ñaha-gǎ xií-yu te núu na nùcúnu ichi váha-yu. Chi íó ñáyiu xídó quidé nǎndí sá ñá túú vǎha te xíta nihnu duú<sup>n</sup>-yu, te vá càhá<sup>n</sup> ndìhi-gá-ó Yá Ndiǒxí cuèndá-yu. <sup>17</sup> Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácuíta nihnu ñaha dùu<sup>n</sup>.

<sup>18</sup> Te nàha-o sá nchóó ñáyiu cùu déhe Yá Ndiǒxí ñá túú-gǎ sání iní-ó càda-o nǎndí sá cuèhé sá dúhá. Te duca<sup>n</sup> chi mee Jèsús déhe Yá Ndiǒxí xító ñaha-gá xii-o, núu xǎ<sup>n</sup> ñá ndácú-gǎ yucu ñǎvǎha dàxínu iní ñáhá-xí xii-o cada-o sá ñá túú vǎha.

<sup>19</sup> Te nchoo nàha-o sá ndécú ndìhi-o Yá Ndiǒxí. Te nchaa ñáyiu ndècu ichi cuehé ichi duha tàxi tñuní ñáhá-nǎ yucu ñǎvǎha xii-yu.

<sup>20</sup> Te nàha tucu-o sá ñùyíú-a ní quixi Jèsús Déhe Yá Ndiǒxí ní taxi-gá sá xìní tñuní-ó cuèndá cutnùní iní-ó sá méé-gǎ cúú-gǎ Ndiǒxí-ó. Te ndècu ndìhi-o mee-gá ndìhi Déhe-gá Jèsús, te ñ<sup>n</sup>díí ní mee-gá cúú-gǎ Yá Ndiǒxí, te ndècu dava-gá sá nácuáca ñaha-gá xii-o cùndècu-o ndìhi-gá nǐ caa nǐ quíhí<sup>n</sup>. <sup>21</sup> Te nchòhó ñáyiu cùu datná déhe-í, vá quèndáá iní-ndó nchàa sá càchí-yu cùu ndiǒxí, chi dìcò ndaha cue téé ñuyíú-a ní cuáha nchaa xǎ<sup>n</sup>. Te duca<sup>n</sup> na cùnduu. Te ío chí cádá ndèe iní-nǎ vitna.

## TUTÚ CÚÚ ÙÚ NÍ CADÚHA TÉ JUÀÁ

*Tnúhu Yá Ndiõxí ndihí nàcuáa cuu iní tnáhá-ó*

<sup>1</sup> Te yúhú té Juàá té yìndaha ñaha xii ñáyiú sàndáá iní tnúhu Jèsús, tèe-í tnúhu-a ñí núú tütú daquixi-í ndaha yòhó ñaha ní cáhá<sup>n</sup> ñáhá Yá Ndiõxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiõxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhá-ndí xii-ndo.

<sup>2</sup> Te cùu iní ñáhá-ndí xii-ndo chi ndècu ndihí-ndo tnúhu ndáá tnúhu Yá Ndiõxí, te duca<sup>n</sup>-ní cùndecu-o ndihí tnúhu-á<sup>n</sup> ni caa ni quíhí<sup>n</sup>. <sup>3</sup> Te xicá<sup>n</sup> táhù-í núú Tátá-ó Dütú Ndiõxí, ndihí núú Déhe-gá Xítohó Jesucristú sá ná chíndèe ñaha-gá xii-ndo, te coto ñaha-gá te ío váha cuu iní-ndó cùndecu-ndo. Te duha xicá<sup>n</sup> táhù-í núú-gá chi ndècu ndihí-o tnúhu ndáá tnúhu Yá Ndiõxí, te cùu iní-ó-gá.

<sup>4</sup> Te ío cùdíí iní-í, chi ní naníhí-í ñí ùú déhe-n, te quidé-yu nàcuáa sànu ichi ñaha tnúhu ndáá dàtná ní táuchíú<sup>n</sup> mèe Tátá-ó Dütú Ndiõxí. <sup>5</sup> Te vitna yòhó ñaha ní cáhá<sup>n</sup> ñáhá Yá Ndiõxí, cächí tnúhu-í xii-n sá xíní ñúhu-xi cuu iní-ó tnàha ñáyiú-o. Te ñá díú ñí tnúhu saa cùu-xi, chi díu-ni tnúhu sá ñí ngúndecu ndihí-o ndèe cútnàhá ní tuha-o ìchi Yá Ndiõxí. <sup>6</sup> Te núu cùu iní-ó Yá Ndiõxí, te cùu iní-ó tnàha ñáyiú-o dàtná ní cachí méé-gá, te tñí-o nchaa tnúhu càhá<sup>n</sup>-gá. Te ní cachí-gá sá cúú iní-ó-gá, te cuu iní-ó tnàha ñáyiú-o. Te tnúhu-a ní tecú dóho-o ndèe cútnàhá ní tuha-o ìchi-gá.

*Cue téè dándahú tnàha ñáyiú-xi*

<sup>7</sup> Te ío vai ñáyiú dándahú ñáhá xica cuú-yu ñuyíú-a, te cächí-yu sá ñá ndáá sá Xítohó Jesucristú ní cuu-gá ñí ñáyiú ndisa. Te nchaa ñáyiú duha càhá<sup>n</sup> dácuàndehndé-yu, te cùu úhú iní-yu Jèsús. <sup>8</sup> Te quíhí iní-ndó sá vâ dándahú ñáhá ñáyiú-á<sup>n</sup> xii-ndo cuèndá sá vâ cuíta chiú<sup>n</sup> Yá Ndiõxí ní quide-o. Te òré

ná quíxí tùcu Jesús ñuyíú-a te taxi-gá nchaa sá váha cùu iní méé-gá cùndecu ndihí-o.

<sup>9</sup> Te nchaa ñáyiú dàña tnúhu Xítohó Jesucristú, te nàtní-yu ingá ichi, ñáyiú-á<sup>n</sup> ñá túú ndècu ndihí-yu Yá Ndiõxí. Te nchaa ñáyiú ñá túú dàña tnúhu Xítohó Jesucristú ndècu ndihí-yu Yá Ndiõxí ndihí Déhe-gá Xítohó Jesucristú. <sup>10</sup> Te núu véxi ñáyiú núú ndécú-ndó cächí-yu sá càhá<sup>n</sup>-yu tnúhu Yá Ndiõxí te ñá ndáá, te vá cuáha-ndo tnúhu danèhé ñáhá-yu xii-ndo, te ni vâ cuáha-ndó-yu tnúhu ndee iní cuèndá chiú<sup>n</sup> quidé-yu. <sup>11</sup> Chi núu na càhá<sup>n</sup> ndihí váha-ndó-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

*Tnúhu ndéé núú ñí ndihí-ná*

<sup>12</sup> Te ío vai-gá tnúhu cuíní-í cachí tnúhu-í xii-ndo, dico vá téé-gá-í chi cuíní-í quixi-í núú ndécú-ndó ndàtnúhu-o cuèndá cudíí víhí iní-ó nchaa-o.

<sup>13</sup> Te nchaa cue déhe cúhú-n, ñáyiú ní cáhá<sup>n</sup> ñáhá Yá Ndiõxí quidé ndèe iní ñáhá-yu xii-n.



## TUTÚ CÚÚ ÌNÍ NÍ CADÚHA TÉ JUÁÁ

### *Càhá<sup>n</sup> váha-yu cuèndá té Gǎyú*

<sup>1</sup> Te yúhú té Juáá téé yìndaha ñaha xii ñáiyu sàndáá iní tnúhu Jèsús, chido tnuní-í tnúhu-a ì<sup>n</sup> núú tutú sá cúú-xí yòhó té Gǎyú téé ío cùu iní-í, chi ndècu ndìhi-n tnúhu ndáá tnúhu Yá Ndiòxí.

<sup>2</sup> Te yòhó téé ío cùu iní-í, xicá<sup>n</sup> táhù-í núú Yá Ndiòxí sá cùndècu váha-n ñà túú nǎ cumání xii-n, te vá cùhú-n, chi sa nàha-í sá ndécú váha-n núú Yá Ndiòxí. <sup>3</sup> Te ío ní cudíí ìní-í òré ní sáá ñáiyu ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá ñu-ni tnúhu-gá te tnì-n nchaa nacuáa càhá<sup>n</sup> tnúhu-á<sup>n</sup>. <sup>4</sup> Te ío cùdíí ìní-í ní níhí-í tnúhu sá ncháá-ní ñáiyu ní sanu ichi-í ichi Yá Ndiòxí ndécú-nǎ-yu ichi-gá, te quide-ní-yu nchaa nacuáa càhá<sup>n</sup>-gá.

<sup>5</sup> Te yòhó téé ío cùu iní-í, ío váha quide-n núú Yá Ndiòxí, chi chìndee-n nchaa ñáiyu véxi dava-gá ñúú xicá, ñáiyu sàndáá iní tnúhu Yá Ndiòxí. <sup>6</sup> Te nchaa ñáiyu-á<sup>n</sup> càhá<sup>n</sup>-yu núú tàcá ñáiyu càhá<sup>n</sup> ndìhi Yá Ndiòxí iha sá ío cùu iní-n nchaa tnahá ñáiyu-n dàtná càhá<sup>n</sup> Yá Ndiòxí. Te yúhú càhá<sup>n</sup> ndàhú-í núú-n sǎ cádá ndè-ni iní-n chìndee-n nchaa ñáiyu-á<sup>n</sup> nchaa sá xíní ñùhú-yu ichi. Te núu duca<sup>n</sup> na càda-n te quide-n nacuáa cùu iní Yá Ndiòxí, te xìnu cuechi-n tnahá-n núú-gǎ. <sup>7</sup> Chi nchaa ñáiyu-á<sup>n</sup> nǎ tnì-yu ichi cuáhá<sup>n</sup>-yu càhá<sup>n</sup>-yu tnúhu Jèsús. Te ñá túú tnì-yu ní ì<sup>n</sup> sá sǎñaha ñáiyu ñá túú ndècu ichi Yá Ndiòxí. <sup>8</sup> Te núu xǎ<sup>n</sup> nchoo xìni ñuhu-xi chindee-o nchaa ñáiyu xìnu cuechi núú-gǎ ñáiyu càhá<sup>n</sup> tnúhu-gá, te duca<sup>n</sup> te cutnùnì iní-ó sǎ tnahá-ó xìnu cuechi-o ndìhí-yu núú-gǎ.

### *Ñá túú quide váha té Diótrefés*

<sup>9</sup> Te yúhú ní tendaha-í tutú cuáhá<sup>n</sup> núú tàcá ñáiyu chìñuhú-yu Yá Ndiòxí, dico ì<sup>n</sup> téé ndècu-á<sup>n</sup> nání-dě Diótrefés, te ñá sàndáá iní-dé nchaa tnúhu càhá<sup>n</sup>-í, chi cuìní-dé cunuu-dě núú-yu. <sup>10</sup> Te òré quixi-í te cada ndáá-ó nchaa tnúhu cuèhé tnúhu duha càhá<sup>n</sup>-dé cuèndá-í. Te ñá díú-ní xǎ<sup>n</sup>

quidé-dě, chi nchaa ñáiyu véxi ingá ñúú càhá<sup>n</sup> tnúhu Yá Ndiòxí ñá túú càhá<sup>n</sup> ñáhá-dě vehe-dé, te ní ñǎ dáñá-dě càhá<sup>n</sup> ndìhi ñaha dàva-gá ñáiyu xii-yu. Te nchaa ñáiyu cuìní càhá<sup>n</sup> ndìhi ñaha xii-yu, te quèñuhu ñaha duu<sup>n</sup>-ni-dé ñá dáñá-gǎ-dé níhí tnáhá-yu ndìhi nchaa ñáiyu tàcá dácua<sup>n</sup>ha tnúhu Yá Ndiòxí.

<sup>11</sup> Te yòhó téé ío cùu iní-í, vá cùndècu-n ichi cuehé ichi duha dàtná quidé nchaa dava-gá ñáiyu, cada-n mèe-ni sá váha. Chi nchaa ñáiyu quide váha ndécú-yu ichi Yá Ndiòxí. Te nchaa ñáiyu quide nchaa sá cuèhé sá dúhá ñà túú ndécú-yu ichi Yá Ndiòxí.

### *Nchaa ñáiyu càhá<sup>n</sup> váha-yu cuèndá té Demètriú*

<sup>12</sup> Te nchaa ñáiyu càhá<sup>n</sup> váha-yu cuèndá té Demètriú, chi quide ndáá-dé dàtná càhá<sup>n</sup> Yá Ndiòxí. Te tnahá yúhú càhá<sup>n</sup>-í cuèndá-dé sá ío váha quide-dé, te nchòhó sa nàha-ndo sá yùhú càhá<sup>n</sup> ndáá-í.

### *Tnúhu ndéé núú nǎ ndìhi-ná*

<sup>13</sup> Te vǎi-gá tnúhu cuìní-í cachí tnúhu-í xii-n ní cùu, dico ñá ní tèe-gá-í, <sup>14</sup> chi cuìní-í quixi ndìhi-í, te càhá<sup>n</sup>-ó núú núú-ó.

<sup>15</sup> Te ío cada ndee ìní, te xicá<sup>n</sup> táhù-í núú Yá Ndiòxí sá ná cùndecu váha-n ñà túú nǎ cuu cundecu-n. Te nchaa cue ñáiyu xíní tnáhá ndìhi-o ndecu iha quide ndee iní ñáhá-yu xii-n. Te yòhó cúñaha-n nchaa ñáiyu xíní tnáhá ndìhi-í ndécú xǎ<sup>n</sup> ná càda ndee iní-yu. Te ío cada ndee ìní-nǎ vitna.

## TUTÚ NÍ CADÚHA TÉ JUDÁS

*Té Jùdás càdúha-dé tutú quíhí<sup>n</sup> ndaha ñáyiu ní cachí Yá Ndiöxí nduu cuèndá-gá*

<sup>1</sup> Yúhú té Jùdás ñaní té Jàcobó xínú cuèchi-í nùú Xítóhó Jesucristú, te càdúha-í tutú-a sá cúú-xí nchòhó ñáyiu ní cachí Yá Ndiöxí Yaá cúú Tàtá-ó ndùu cuendá-gá, ñáyiu ío cùu iní-gá. Te dàtná-ni xító ñaha-gá xii-ndo vitna ñu-ni duca<sup>n</sup> còto ñaha-gá xii-ndo ndèé ná sàá nduu quixi tucu Xítóhó Jesucristú ñuyíú-a. <sup>2</sup> Te xicá<sup>n</sup> táhù-í nùú Yá Ndiöxí sá ïo-gá ná chindee chitúu ñaha-gá xii-ndo, te na cùtnuní-gá iní-ndó sá ïo cùu iní ñáhá-gá xii-ndo, te duca<sup>n</sup> ïo váha cuu iní-ndó cùndecu-ndo.

*Ñáyiu ñá túú càhá<sup>n</sup> tnúhu ndáá tnúhu Yá Ndiöxí*  
*(2 Pedro 2:1-17)*

<sup>3</sup> Te nchòhó ñáyiu ío cùu iní-í, duca<sup>n</sup>-ni ïo sàni iní-í cadúha-í ñ<sup>n</sup> tutú sá cúú-xí-ndó cuèndá danèhé ñáhà-í xii-ndo nàcuáa ní cuu ní naníhí táhú-ó dico ñá túú càdúha-í, dico vitna quide cuendá-í sá xíní ñùhu-gá-xi cáhá<sup>n</sup>-í nùú tütú-í sá nchòhó ío cundehe-ndo tnúhu cáhá<sup>n</sup>-ndó ndíhí ñáyiu, te cáhá<sup>n</sup>-ndó nàcuáa ndùu tnúhu sàndáá iní mée-ndó, chi ñu-ni tnúhu-á<sup>n</sup> ní cáhá<sup>n</sup> Yá Ndiöxí sá cúú-xí nchàa ñáyiu ndècu ichi-gá. Te vitna ñá túú-gá ná tnúhu càhá<sup>n</sup>-gá sá cúú-xí-yu, chi sa ní cáhá<sup>n</sup> duu<sup>n</sup>-gá. <sup>4</sup> Te duha càhá<sup>n</sup>-í nùú tütú-a sá cúú-xí-ndó, chi ñihí-í tnúhu sá xicá cùu ñáyiu chitnahá ñáhá xii-ndo, te ni ñà túú xíní-ndó ñá ñáyiu cùú-yu, te ñáyiu-á<sup>n</sup> cùú-yu ñáyiu cùu úhú iní ñáhá xii Yá Ndiöxí. Te ñ<sup>n</sup> xichi nùú tütú Yá Ndiöxí càchí-xi sá ñáyiu-á<sup>n</sup> quíhí<sup>n</sup>-yu nùú ùhú nùú ndàhú, te ñu-ni ñáyiu-á<sup>n</sup> càchí-yu sá ïo váha iní Yá Ndiöxí ñùu xíá<sup>n</sup> cuu-ni cadá-yu nchaa sá cuèhé sá dúhá. Te dàquee tíhù-yu Yá Ndiöxí Yaá ío cùnuu, ndíhí Xítóhó Jesucristú.

<sup>5</sup> Te nchòhó sa xíní váha-ndo nàcuáa ní quide Yá Ndiöxí ndéé sanaha dico dàndacu iní ñáhà-í xii-ndo, chi dàvá-á<sup>n</sup> ñí queñuhu-gá ñáyiu israél nàció<sup>n</sup> Ègíptú, te dàva ñáyiu-á<sup>n</sup> ñà túú ní sàndáá iní ñáhá-yu

xii-gá te ní dánáá ñàha-gá xii-yu. <sup>6</sup> Te nchaa espíritú ñá túú ní cuení cada ndáa cunu cuechi nùú Yá Ndiöxí ní quee-xi nùú ndécú-xí, te mee-gá ní sadí nihnu ñaha-gá xii-xi ñ<sup>n</sup> xichi nùú néé te vá cãcu-xi, chi sáá nduu te nayáha-xi cundecu-xi nùú ùhú nùú ndàhú ñi caa ñi quíhí<sup>n</sup>. <sup>7</sup> Te dàndacu iní ñáhá tucu-í xii-ndo nàcuáa ní yáha ñáyiu ñuú Sòdomá, ndíhí ñáyiu ñuú Gòmorrá, ndíhí nchaa ñáyiu ñuú ní cáa yatni xíá<sup>n</sup>, chi tnàhá-yu ñá túú ní quide váha-yu dàtná ní quide nchaa cue espíritú-á<sup>n</sup>. Chi cue téé ní xóo cáhá<sup>n</sup> ndíhí tnàha ndí mee-güedé, te ñu-ni duca<sup>n</sup> ñí xóo cada cue ñáyiu díhí tucu. Te sá dúcá<sup>n</sup> ñí quidé-yu nùu ní dányóyó Yá Ndiöxí ñuhú ñuú-yu ní dánáá ñàha-gá xii-yu. Te xíá<sup>n</sup> cùtnuní iní-ó sá nchàa ñáyiu ñá túú cuení cada váha nùú-gá quíhí<sup>n</sup>-yu nùú ùhú nùú ndàhú ñi caa ñi quíhí<sup>n</sup>.

<sup>8</sup> Te ñu-ni duca<sup>n</sup> quide ñáyiu chitnahá ñáhá xii-ndo cuení-yu dàndàhú ñáhá-yu, chi càchí-yu sá dácòto ñaha saní-yu nàcuáa cadá-yu, nùu xíá<sup>n</sup> nándí nchaa sá cuèhé sá dúhá quidé-yu sá cúú-xí yíqui cuñú-yu, te dàquee tíhù-yu nchaa nàcuáa càhá<sup>n</sup> Yá Ndiöxí cada-o, te càhá<sup>n</sup> úhú-yu cuèndá nchaa espíritú cùnùu. <sup>9</sup> Te mee espíritú cùnùu-gá xínú cuèchi nùú Yá Ndiöxí nání Mìguél ní nàá-xi ndíhí sácuíhná cuèndá yíqui cùñú ndí Moisés. Te espíritú-á<sup>n</sup> ñà túú ní cùyí-xi cáhá<sup>n</sup> úhú-xi sácuíhná-á<sup>n</sup>, chi ní xáha<sup>n</sup>-ni-xi: “Mee Yá Ndiöxí náhá-gá te nùu nása cada ñaha-gá xii-n”, duha ní xáha<sup>n</sup>-xi. <sup>10</sup> Te nchaa ñáyiu duca<sup>n</sup> dàndahú ñáhá xii-ndo-á<sup>n</sup> càhá<sup>n</sup> cuèhé-yu cuèndá nchaa sá vátá cùtnuní-gá iní-yu nása ndùu, te quidé-yu dàtná quidé cuè quíti chi cue quíti-á<sup>n</sup> quidé-güedí nání véxi iní-güedí, te ni ñà túú cùtnuní iní-güedí nchaa sá quidé-güedí. Te duca<sup>n</sup> sà tnàhá-xi cùú-yu, chi nchaa sá cuèhé sá dúhá véxi iní-yu quidé-yu, te sá dúcá<sup>n</sup> quidé-yu xíá<sup>n</sup> tá xíta nihnú-yu cuáhá<sup>n</sup>.

<sup>11</sup> ;Te ndàhú ní cuú-yu chi ío ndohó-yu!, chi quidé-yu dàtná ní quide ndí Cáin. Te nándí sá quidé-yu cuèndá sá cuení-yu díhú<sup>n</sup> dàtná ní xóo cada ndí Bàlaám. Te ío cùu sáá iní-yu nùú Yá Ndiöxí dàtná ní xóo cada ndí Còré, nùu xíá<sup>n</sup> tá xíta nihnú-yu cuáhá<sup>n</sup>. <sup>12</sup> Te

dìcò sácá<sup>n</sup>núú sǎha ñàhá-yu xii-ndo òrè nàtàcá-ndó quìde-ndo vico chiñuhu-ndo Yá Ndiòxí. Te òré xéxí ndìhi ñàhá-yu xii-ndo te mee-ni sǎ cúú-xí mèé-yu quìde cuendá-yu, te ñá túú nèhé-yu sǎ yíñuhu núú Yǎ Ndiòxí. Te cùú-yu dàtná ì<sup>n</sup> vícò sǎ cuàhá<sup>n</sup>-xi duha cuáhá<sup>n</sup>-xi dàcá<sup>n</sup> te ñá túú dǎú nchídó-xí, duca<sup>n</sup> sǎ tnahá-xi cùú-yu. Te cùu tucú-yu dàtná ì<sup>n</sup> yutnu vídí sǎ ñà túú tnahí cùu<sup>n</sup> sávídí-xi, te nchaa yutnu duca<sup>n</sup> ñà túú cùu<sup>n</sup> sávídí-xi te tñuhu-güedé ndéé yóho-xi te xihí duu<sup>n</sup>-xi. Te duca<sup>n</sup> sǎtnahá-xi cùú-yu, chi ñá túú quìde váha-yu. <sup>13</sup> Te cùu tucú-yu dàtná ndute làmár, chi ndute-á<sup>n</sup> òré càndá-xi te quecòo tíñú-xi ì<sup>n</sup> xio. Te cùu tucú-yu dàtná ì<sup>n</sup> chódíní cuáhá<sup>n</sup>-di duha cuáhá<sup>n</sup>-di dàcá<sup>n</sup>. Te duca<sup>n</sup> sǎtnahá-xi cùú-yu, chi ñá túú cuíní-yu cada váha-yu. Te ñáyíu-á<sup>n</sup> daquìhí<sup>n</sup> ñáhá Yǎ Ndiòxí xií-yu ì<sup>n</sup> xichi núú néé núú sǎ ndecu túha cundecú-yu ni caa ni quíhí<sup>n</sup>.

<sup>14</sup> Te ndíquí<sup>n</sup> yǎvá ndíi Àdán téé cùu usá ní xínani Ènóc ní dácáhú ìní ñáhá Yǎ Ndiòxí xii-dé ní cáhá<sup>n</sup>-dé ñu-ni cuendá nchaa ñáyíu-á<sup>n</sup>. Te ní cachí-dé: “Na càchí tñuhu-í xii-ndo sǎ Yǎ Ndiòxí quixi-gá ndìhi cuèhé víhí espíritú xínú cuèchi núú-gǎ. <sup>15</sup> Te dàvá-á<sup>n</sup> cada ndáá-gǎ cuèchi nchaa ñáyíu te daquìhí<sup>n</sup>-gǎ nchaa ñáyíu ndècu ichi cuehé ichi duha núú ùhú núú ndàhú, te duca<sup>n</sup> càda ñaha-gǎ xií-yu, chi mee-ni sǎ cuèhé sǎ dúhá quidé-yu, te càhá<sup>n</sup> úhú ñáhǎ-yu xii-gǎ”, duha ní cachí te Ènóc. <sup>16</sup> Te ñáyíu-á<sup>n</sup> ò yica ìní-yu chi ñá túú ndùu vétú ìní-yu nàcuáa ndécú-yu ñuyíú-a, te sàtnuhú-yu tñaha ñáyíú-yu te mee-ni sǎ cuèhé sǎ dúhá sàni ìní-yu quidé-yu, te quìde cahnú-yu mèé-yu, te mee-ni càhá<sup>n</sup> váha-yu núú tñaha ñáyíú-yu cuendá cuíní-yu sǎ cáda vǎha ñaha ñáyíu-á<sup>n</sup> xií-yu.

### *Té Judás càhá<sup>n</sup>-dé dóho ñáyíu ndècu ichi Yá Ndiòxí*

<sup>17</sup> Te nchòhó ñáyíu ò cùu ìní-í, càhá<sup>n</sup> ndàhú-í núú-ndó sǎ ò cuhu<sup>n</sup> ìní-ndó tñuhu sǎ sǎ ní dǎnèhé ñáhá cuè téé ní tendaha Xítohó Jesucristú càhá<sup>n</sup> tñuhu-gǎ núú ñáyíu. <sup>18</sup> Te sa ñaha-ndo sǎ ní cachí-güedé sǎ cùmání-gǎ quixi tucu Xítohó Jesucristú ñuyíú-a, te coo ñáyíu cáhá<sup>n</sup> cuèhé cáhá<sup>n</sup> duha cuendá tñuhu-gǎ. Te ñáyíu-á<sup>n</sup> cada-yu mee-ni sǎ cuèhé sǎ dúhá vèxi ìní mèé-yu.

<sup>19</sup> Te ñáyíu-á<sup>n</sup> cúú-yu ñáyíu càhá<sup>n</sup> nándi tñuhu sǎ ñà túú nándìhi cuendá sǎ vǎ cúú ì<sup>n</sup>nuu-ndo cundecu-ndo, te mee-ni sǎ cuèhé sǎ dúhá ñuhu ìní-yu, te ñá túú ndècu ndìhí-yu Espíritú Yǎ Ndiòxí.

<sup>20</sup> Te nchòhó ñáyíu ò cùu ìní-í, ò dacuàha-ndo tñuhu Yá Ndiòxí sǎ ní sándáá ìní-ndó cuendá duca<sup>n</sup> cuita cuehnu nihnu-ndo ichi-gǎ quíhí<sup>n</sup>, te cáhá<sup>n</sup> ndìhi-ndo Yǎ Ndiòxí nàcuáa dàcahu ìní ñáhá Espíritú-gǎ xii-ndo. <sup>21</sup> Te ò coto-ndo mèe-ndo cundecu-ndo cuendá cuu váha ìní ñáhá Yǎ Ndiòxí xii-ndo, te cundet-ndo sǎá nduu quixi Xítohó Jesucristú ñuyíú-a nacuaca ñaha-gǎ xii-ndo cundecu-ndo ndìhi-gǎ ni caa ni quíhí<sup>n</sup>, chi Yaá-á<sup>n</sup> ò cùndahú ìní ñáhá-gǎ xii-o.

<sup>22</sup> Te ñáyíu sàni ì<sup>n</sup> sàni úú ìní-xi cúñaha-ndo xií-yu nàcuáa cada-yu cundecú-yu ichi Yá Ndiòxí. <sup>23</sup> Te nchaa ñáyíu ta xíta nihnu ñuhu ichi cuáhá<sup>n</sup> núú ùhú núú ndàhú, ò cundìhí ìní-ndó cùñaha-ndo xií-yu tñuhu Yá Ndiòxí cuendá sǎ ná cǎcu nihnú-yu, te cundàhú ìní-ndó-yu, te quíhi ìní-ndó vǎ cáda-ndó tñaha-ndó nàcuáa quidé-yu, chi daquèe tíhú-ndó nchaa sǎ cuèhé sǎ dúhá quidé-yu-á<sup>n</sup>.

### *Nàcuáa ndacá<sup>n</sup> táhú-ó núú Yǎ Ndiòxí*

<sup>24</sup> Te Yá Ndiòxí chindee ñaha-gǎ xii-ndo cuendá sǎ vǎ cùndècu-ndo ichi cuehé ichi duha, te cunduu ndoo cunduu nine ìní-ndó càndeca ñaha-gǎ xii-ndo quíhí<sup>n</sup> cundecu-ndo núú ò váha càa ndecu-gǎ, te ò cudíhí ìní-ndó. <sup>25</sup> Te Yá Ndiòxí ò ndècu ndìhi-gǎ nchaa sǎ xíní tñùní-gǎ te ñu-gǎ ní dácácu nihnu ñaha-gǎ xii-o núú ùhú núú ndàhú, te duca<sup>n</sup> ní quidè ñaha-gǎ xii-o chi ndècu ndìhi-o Xítohó Jesucristú. Te ò ndacá<sup>n</sup> táhú-ó núú Yǎ Ndiòxí, chi ò càhnu cuu-gǎ ndécú-gǎ táxi tñùní-gǎ, te súúní vǎha ìní-gǎ, te ndàcu-gǎ quidé-gǎ nchaa sǎ vǎha, te duca<sup>n</sup>-ni ò càhnu cuu-gǎ ndéé cùtñahá vátá ngǎva-gǎ ñuyíú, te duca<sup>n</sup>-ni ò càhnu cuu-gǎ ndéé vitna, te ñu-ni duca<sup>n</sup> ò càhnu cuu-gǎ ni caa ni quíhí<sup>n</sup>, duha xíní ñuhu-xi ndacá<sup>n</sup> táhú-ó núú-gǎ. Te duca<sup>n</sup> na cùnduu. Te ò chí cáda ndèe ìní-nǎ vitna.

## NCHAA SÁ NĬ XINÍ TĒ JUÀÁ NDIĬHI NCHAA SÁ NĬ TECÚ DÓHO-DÉ

*Xítohó Jesucristú xáha<sup>n</sup>-gã xii té Juàá nchaa nàcuáa cada-xi ñuyíú*

<sup>1</sup> Te Yá Ndiöxí ní xáha<sup>n</sup>-gã xii Xítohó Jesucristú nchaa sá tá cùyatni vií-nã cada-xi ñuyíú-a cuendá sá cũñaha-gã xii cue tée xínu cuechi núú-gã, te Xítohó Jesucristú ní tendaha-gã ñ<sup>n</sup> espíritú xínu cuèchi núú-gã ní quixi-xi ní cachí tñúhu-xi nchaa tñúhu-án xii yúhú té Juàá té xínu cuechi núú-gã, te nchaa tñúhu-án ndéé núú tütú-a. <sup>2</sup> Te yúhú cächí tñúhu ndáá-í xii-ndo nàcuáa ní cáhán Yá Ndiöxí, te cãhá<sup>n</sup> ndáá tucu-í cuendá Xítohó Jesucristú, ndihi cuendá nchaa sá nĭ xini-í.

<sup>3</sup> Te váha táhú ñáyiú dàcuaha nchaa tñúhu ndéé núú tütú-a, te váha tucu táhú ñáyiú ndédóho, te váha tucu táhú nchaa ñáyiú tñi nacuáa cãhá<sup>n</sup>-xi, chi sa ta cùyatni vií-nã nduu càda-xi nchaa nacuáa cãhá<sup>n</sup>-xi.

*Té Juàá cãdũha-dé tutú quíhí<sup>n</sup> ndaha ndi ùsá xichi cue ñáyiú ndècu ichi Yá Ndiöxí*

<sup>4</sup> Te yúhú té Juàá cãdũha-í tutú daquixi-í ndi ùsá xichi núú ndécú nchòhó ñáyiú ndècu ichi Yá Ndiöxí ndécú distritú Àsiá. Te mee-gã ná chindee chitúu ñaha-gã xii-ndo, te ío váha cuu iní-ndó cùndecu-ndo. Te cuèi ndéé sanaha ñ<sup>n</sup>-ni-gã ndécú, te ñ<sup>n</sup>-ni-gã ndécú cuèi vitna, te duca<sup>n</sup>-ni cùndecu-gã cuèi ndéé núú cuahán núú vëxi, te ñ<sup>n</sup>-ni duca<sup>n</sup> ío na chindee chitúu ñaha ndi ùsá cue espíritú ndécú núú-gã xii-ndo, te ío váha cuu iní-ndó cùndecu-ndo. <sup>5</sup> Te ñ<sup>n</sup>-ni duca<sup>n</sup> na càda tucu Xítohó Jesucristú, te ñ<sup>n</sup>-ni-gã cúú-gã Yaá cãhá<sup>n</sup> ndáá, te ñ<sup>n</sup>-ni-gã ní xihí-gã te díhna-gã ní ndoto, te dàtnùní ndéé cuèé-gã te ndoto cue ñáyiú ní xihí, te ñ<sup>n</sup>-ni-gã táxi tñùní-gã nchaa cue té yìndaha ñaha xii ñáyiú ndècu ñuyíú-a. Te ío cùu iní ñáhã-gã xii-o, te mee-gã ní sati níñi-gã te ní xihí-gã núú cùrúxí sá cuendá nchaa sá cuèhé sá dúhá quide-o, te ní ndada ndoo ní ndada nine-gã iní-ó, <sup>6</sup> te vitna ní quide ñaha-gã xii-o dàtná cue té yìndaha

ñáyiú, te ní quide ñaha tucu-gã xii-o dàtná cue dútú xínu cuèchi-o núú Tãtã-gã Dútú Ndiöxí. Te vitna nchaa-o chí ná cächí-ó sã ío cãhnu cuu Xítohó Jesucristú, te ío cùnuu-gã, te duca<sup>n</sup>-ni na cùnuu-gã ñi caa ñi quíhí<sup>n</sup>. Te duca<sup>n</sup> na cùnduu.

<sup>7</sup> Te cundehe-ndo àndiú! Chi ichi xití vícò quixi Xítohó Jesucristú, te nchaa ñáyiú ndècu ñuyíú-a quini ñáhã-yu xii-gã, te tñáhã nchaa ñáyiú ñ<sup>n</sup>-ni cùu ndihi ñáyiú ní dánicuehé ñáhã xii-gã quini ñáhã-yu, te nchaa ñáyiú xíndecu ñiñi ñuyíú, ñáyiú ñá tütú cùu váha iní ñáhã xii-gã ndiñú iní-yu òré quini ñáhã-yu xii-gã, te ndáá sá dúcá<sup>n</sup> càda-xi.

<sup>8</sup> Te Yá Ndiöxí cächí-gã: “Yúhú ío cùnuu-í chi ñ<sup>n</sup>-ni sa ndècu ndéé cùtnáhã ní ngáva ñuyíú, te ñ<sup>n</sup>-ni-í cundecu ndéé ná sàá nduu nàa-xi ndihi nchaa sá ío, chi yúhú cundecu-í ñi caa ñi quíhí<sup>n</sup>”, duha cächí Yá Ndiöxí Yaá ndácú quide nchaandi tühú sá váha. Chi ñ<sup>n</sup>-ni-gã sa ndècu ndéé cùtnáhã ní ngáva ñuyíú, te ñ<sup>n</sup>-ni-gã ndécú-gã vitna, te duca<sup>n</sup>-ni cùndecu-gã ñi caa ñi quíhí<sup>n</sup>.

*Té Juàá ní xini-dé Xítohó Jesucristú Yaá ío cùnuu*

<sup>9</sup> Te yúhú té Juàá té ndècu ndihi-ndo ichi Xítohó Jesucristú, tñáhã-í ndòhò-í cuendá-gã dàtná ndòhò-ndó, te tñáhã-í nduu táhù-í cundecu ndihi ñaha-í xii-ndo núú ndécú Yá Ndiöxí táxi tñùní-gã. Te ío quide cahnu iní-ó cuèi nándi yáha-o ndècu-o sá cuendá Xítohó Jesucristú. Te yúhú ní ngava-í vecaa ñ<sup>n</sup> ñuu nání Pãtmós, te ñuu-án cáá xití ndute lámár. Te duca<sup>n</sup> ñi cuu cuendá sá cãhá<sup>n</sup>-í tñúhu Yá Ndiöxí, te cãhá<sup>n</sup> váha-í cuendá Xítohó Jesucristú. <sup>10</sup> Te ñ<sup>n</sup> nduu ndumìngú nduu nàtacá-ó chihñuhu-o Yá Ndiöxí ní quide ñaha Espíritú-gã xii-í nàcuáa cächí iní-xi, te ní tecú dóho-í níhi ní cáhã<sup>n</sup> ñ<sup>n</sup> sá ñi cáhã<sup>n</sup> ndàa sàtã-í te dàtná níhi cãhá<sup>n</sup> ñ<sup>n</sup> cútú duca<sup>n</sup> níhi ní cáhã<sup>n</sup>-xi. <sup>11</sup> Te cächí sá cãhá<sup>n</sup>-án:

—Yúhú sa ndècu-í ndéé cùtnáhã ní ngáva ñuyíú, te ñ<sup>n</sup>-ni-í cundecu-í ndéé ná sàá nduu nàa-xi ndihi nchaa sá ío, te chido tñùní-n ñ<sup>n</sup> núú tütú sá ná dànehé núú ñáhã-í xii-n, te daquihí<sup>n</sup>-n tütú-án ndi ùsá xichi núú xíndecu cue ñáyiú ndècu ichi Yá Ndiöxí xíndecu distritú Àsiá, ndaha



ñáyiú ñuú Éfesú, ndaha ñáyiú ñuú Èsmirná, ndaha ñáyiú ñuú Përgamú, ndaha ñáyiú ñuú Tiàtirá, ndaha ñáyiú ñuú Sárdís, ndaha ñáyiú ñuú Filàdelfiá, ndaha ñáyiú ñuú Laodiceá, nchaa ñáyiú ñuú-án daquihí<sup>n</sup>-n tütú-án ndahá-yu —càchí sá càhá<sup>n</sup>-án.

<sup>12</sup> Te ní nchócuñhu-í ndéhè-í nñu ná cúú sá càhá<sup>n</sup>-án, te ní xiní-í xñnutñi úsá tñahá sá nñi cuáha mee-ni dñhú<sup>n</sup> cuàá<sup>n</sup> sá ndéé dité-xi, te núú dité-xi-án yíndòdo ñ<sup>n</sup> caa candíl. <sup>13</sup> Te cuádava tnuú nchaa xiá<sup>n</sup> ní xiní-í nùtnñi Yaá cáá dàtná cáá nchàa nchoo ñáyiú ndècu ñuyíú-a, te ñihnu-gá ñ<sup>n</sup> dóó cání càa-xi ndéé núú sàhá-gá, te yídúcú<sup>n</sup>nuu ñ<sup>n</sup> sìrchú ní cuáha mee-ni dñhú<sup>n</sup> cuàá<sup>n</sup> pèchú-gá. <sup>14</sup> Te idi díquí-gá cuixí<sup>n</sup> quiyí dàtná cuixí<sup>n</sup> idi dava mbéé, àdi yúhá sá quée òré quidé vñxi<sup>n</sup>-xi, te tinùu-gá quidé-xí dàtná quidé-xí òré sàá itá ñuhú. <sup>15</sup> Te sàhá-gá súúni dàtása<sup>n</sup>-xi dàtná dàtása<sup>n</sup> sá nání bròncé òré càyú-xi duca<sup>n</sup> dàtása<sup>n</sup>-xi sàhá-gá, te dòndaha tñuhu càhá<sup>n</sup>-gá quidé-xí dàtná quidé-xí dòndaha tñi víhí yùte. <sup>16</sup> Te xio ndaha cùha-gá núndàha-gá úsá tñahá chódíní, te mei yùhu-gá quéné ñ<sup>n</sup> yuchí cahnú ndèé úú xio núú-xi, te núú-gá quidé-xí dàtná quidé-xí nñu nchìcanchii òré súúni ngòyo cahni.

<sup>17</sup> Te sá dúcá<sup>n</sup> càa Yaá-án nñi xiní-í nñu xiá<sup>n</sup> ní yùhú-í ní nduá-í núú-gá, te ní cuu-í dàtná ñ<sup>n</sup> téé ní xihí sá dúcá<sup>n</sup> ño ní yùhú-í, dico mee-gá ní sacá<sup>n</sup> ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñi-ni yùhú sa ndècu-í ndéé cùtnahá ní ngáva ñuyíú, te ñi-ni yùhú cundecu-í ndéé ná sàá nduu nàa-xi ndihí nchaa sá ío. <sup>18</sup> Te yùhú cù-í Yaá ní xihí te ní ndoto-í, te vitna ndècu vívù-í, te duca<sup>n</sup>-ni cùndecu-í ñi caa ñi quihí<sup>n</sup>. Te yùhú cùnùu-í núú nchàa ñáyiú ní xihí te ñi-ni-í cùnùu-í núú ndécü-yu. <sup>19</sup> Te chido tñuní-n nchàa sá ñi xiní-n-án ñ<sup>n</sup> núú tütú, ndihí nchaa nàcuáa cùu vitna, ndihí nchaa sá cáda-xí ndéé núú cuàhá<sup>n</sup> núú vñxi-gá.

<sup>20</sup> Te na càchí tñuhu-í xii-n nàcuáa quèe-xi ndi usá chódíní ñi xiní-n yòtni-í xio ndaha cùha-í, ndihí nàcuáa quèe-xi ndi usá sá ñi cuáha mee-ni dñhú<sup>n</sup> cuàá<sup>n</sup>, sá ndéé dité-xi te yíndodo ñ<sup>n</sup> caa candíl núú dité-xi-án. Te ndi usá chódíní-án, xiá<sup>n</sup> cúú-xí sá cùtnuní iní-ó

sá ndécú úsá cue téé xinu cuechi núú Yá Ndiöxí, te ndi usá cue téé-án ndécú-güedé ndi usá xichi núú ndécú ñáyiú ndècu ichi Yá Ndiöxí. Te cuèndá ndi usá sá ndéé dité-xi-án, xiá<sup>n</sup> cúú-xí sá cùtnuní iní-ó sá ndécú úsá xichi ñáyiú ndècu ichi Yá Ndiöxí —duha càchí Yaá càhá<sup>n</sup>-án.

## 2

*Tñuhu sá cúú-xí ñáyiú xñndecu ichi Yá Ndiöxí ndécú ñuú Éfesú*

<sup>1</sup> Te ní cachí tucu Yaá càhá<sup>n</sup>-án xii-í sá chídó tñuní-í nchaa tñuhu sá vítñá càhá<sup>n</sup>-gá ñ<sup>n</sup> núú tütú, te tendaha-í quihí<sup>n</sup> ndaha téé xinu cuechi núú Yá Ndiöxí ndécú ñuú Éfesú sá cúú-xí cuè ñáyiú xñndecu ichi-gá ndécú ñuú-án, te duha ní cachí-gá: “Yúhú cù-í Yaá núndàha úsá chódíní xio ndaha cùha-í, te xica cuu-í núú ndécú ndi usá sá ñi cuáha mee-ni dñhú<sup>n</sup> cuàá<sup>n</sup>, sá ndéé dité-xi te yíndodo ñ<sup>n</sup> caa candíl núú dité-xi. <sup>2</sup> Te yùhú xiní-í nchaa nàcuáa quide nchohó ñáyiú xñndecu ichi Yá Ndiöxí ndécú ñuú Éfesú, te xiní-í sá ño ndècu ndee-ndo quide chiu<sup>n</sup>-ndo cuendá-gá, te ío quide cahnu iní-ndó ndècu-ndo quide-ndo chiu<sup>n</sup>-gá. Te xiní-í sá ñà túú tñahí tñahá iní-ndó nàcuáa quide nchaa ñáyiú ndècu ichi cuehé ichi duha. Te xiní tucu-í sá xitó ndéé-ndó cuè téé càchí sá ñi tendaha-í véxi càhá<sup>n</sup> tñuhu-í te ñà ndàá sá càhá<sup>n</sup>-güedé tñuhu-í, te duca<sup>n</sup> te cùtnuní iní-ndó sá ñà ndàá sá càhá<sup>n</sup>-güedé tñuhu-í. <sup>3</sup> Te xiní tucu-í sá ño ndòho-ndo quide-ndo chiu<sup>n</sup> cuendá-í, te duca<sup>n</sup> ño quide cahnu iní-ndó cuèi nándi yàha-ndo, te ñà túú cùu dusa<sup>n</sup>-ndo quide-ndo chiu<sup>n</sup>-án. <sup>4</sup> Dico ñà túú cùu váha iní-í chi nchòhó ñà túú-gá quidé-ndó dàtná ní xóo cada-ndo cùtnahá vitna cùu vii-ñi ní sándáá iní ñáhá-ndó xii-í, chi vitna ñà túú-gá cúú iní ñáhá vñhi-ndo datná ní xóo cada-ndo dàvá-án. <sup>5</sup> Te chí dándacu iní nàcuáa ní xóo cada-ndo cùtnahá vitna cùu saa ní sándáá iní ñáhá-ndó xii-í, te ndixi cuèchi iní-ndó sá ñà túú-gá quidé vñha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sá ndécú ndihí-ndo ñ<sup>n</sup> sá ñi cuáha mee-ni dñhú<sup>n</sup> cuàá<sup>n</sup>, sá ndéé dité-xi te yíndodo ñ<sup>n</sup> caa candíl núú dité-xi. Te núú vá ndixí cuèchi iní-ndó nàcuáa quide-ndo ndècu-ndo ña,

te quixi-í xocàni-í xiá<sup>n</sup>, te duca<sup>n</sup> sãtnahá-xi cada ñaha-í xii-ndo te núu vá ndíxi cuèchi iní-ndó nãcuáa quide-ndo ndecu-ndo, te duca<sup>n</sup> te vá yõo-gá nãtacá chiñuhu ñaha xii-í ñuú-ndó. <sup>6</sup> Dico quide váha-ndo ñ<sup>n</sup> xichi chi dàquee tihú-ndó nchàa sá quidé cuè ñáyiú cùu nicolaitás, te yúhú tnàhá-í dáquèe tihú-í nchaa sá quidé ñáyiú-á<sup>n</sup>. <sup>7</sup> Te nchòhó cada cuendá váha-ndo nãcuáa xãha<sup>n</sup>-í xii Espiritú Yá Ndiõxí xãha<sup>n</sup>-xi xii cue ñáyiú ndècu ichi-gá xĩndecu nchaa xichi. Te duha ndùu tnúhu xãha<sup>n</sup>-í xii Espiritú-gá xãha<sup>n</sup>-xi xii-yu: Cúñaha-n xii nchaa ñáyiú sá nõu na càda ndee iní-yu yáha-yu nándi sá ná yãha-yu sá cuendá-í, te yúhú cada-í te nduu táhú-yu cundecu váha-yu núu ndécú Yá Ndiõxí, duha xãha<sup>n</sup>-í xii Espiritú-gá cúu-xi ñáyiú”, duha càchí Yaa càhá<sup>n</sup>-á<sup>n</sup>. Te nchaa tnúhu-á<sup>n</sup> ñi chidó tnùn-í sá cúu-xi ñáyiú xĩndecu ichi Yá Ndiõxí ndécú ñuú Éfesú.

*Tnúhu sá cúu-xi ñáyiú xĩndecu ichi Yá Ndiõxí ndécú ñuú Èsmirná*

<sup>8</sup> Te ní cachí tucu Yaa càhá<sup>n</sup>-á<sup>n</sup> xii-í sá chidó tnùn-í nchaa tnúhu sá vítná càhá<sup>n</sup>-gá ñ<sup>n</sup> núu tütú, te tendaha-í quíhí<sup>n</sup> ndaha tée xĩnu cuechi núu Yá Ndiõxí ndécú ñuú Èsmirná sá cúu-xi cuè ñáyiú xĩndecu ichi-gá ndécú ñuú-á<sup>n</sup>, te duha càchí-gá: “Yúhú ndécú-í ndéé cútñahá ní ngáva ñuyúú, te ñu-ni-í cundecu-í ndéé ná sáa nduu nãa-xi ndihí nchaa sá ìó, te ñu-ni-í ní xihí te ní ndoto-í ndécú-í vitna. <sup>9</sup> Te yúhú xìn-í nchaa nãcuáa quide nchohó ñáyiú ndècu ichi Yá Ndiõxí ndécú ñuú Èsmirná. Te xìn-í sá ìo ndòho-ndo ndecu-ndo sá cuendá-í, te xìn-í tucu-í sá ìo ndàhú-ndó dico cùu-ndo ñáyiú xĩndecu váha núu Yá Ndiõxí. Te xìn-í tucu-í sá ìo càhá<sup>n</sup> cuèhé ñáyiú isràèl cuendá-ndó, dico ñá túú quidé-yu nãcuáa tàú-yu cadá-yu sá cúu-yu ñáyiú isràèl, chi cùu-yu ñáyiú xĩnu cuechi mee-ni núu sãcuíhná. <sup>10</sup> Dico nchòhó vá yúhú-ndó cuèi nándi cùu nchaa sá ná ndòho-ndo cuendá-í, chi sãcuíhná cada-xi te ngava dava-ndo vècaá, te duca<sup>n</sup> càda-xi chi cuín-í coto ndéé ñáhá-xi xii-ndo núu ndisa sá vã ná túhú iní-ndó sã nchicú<sup>n</sup> nihnu-ndo ìchi Yá Ndiõxí. Te ndòho-ndo úxi nduu dico vá dáñá ndéé-ndó càncicú<sup>n</sup> nihnu-ni-ndo ìchi-gá cuèi na cùu-ndó sã cuendá-gá, te yúhú cada-í te nduu táhú-ndó cundecu-ndo

ndihí-gá ni caa ni quíhí<sup>n</sup>. <sup>11</sup> Te nchaa nchòhó cada cuendá váha-ndo nãcuáa xãha<sup>n</sup>-í xii Espiritú Yá Ndiõxí xãha<sup>n</sup>-xi xii cue ñáyiú ndècu ichi-gá xĩndecu nchaa xichi, te duha ndùu tnúhu xãha<sup>n</sup>-í xii Espiritú-gá xãha<sup>n</sup>-xi xii-yu: Cúñaha-n xii nchaa ñáyiú sá nõu na cùndee iní-yu yáha-yu nándi sá ná yãha-yu sá cuendá-í te vá cuíta nihnú-yu na sáa nduu cuíta nihnu nchaa dava-gá ñáyiú, duha xãha<sup>n</sup>-í xii Espiritú-gá cúu-xi ñáyiú”, duha ní cachí Yaa càhá<sup>n</sup>-á<sup>n</sup>. Te nchaa tnúhu-á<sup>n</sup> ñi chidó tnùn-í sá cúu-xi ñáyiú xĩndecu ichi Yá Ndiõxí ndécú ñuú Èsmirná.

*Tnúhu sá cúu-xi ñáyiú xĩndecu ichi Yá Ndiõxí ndécú ñuú Pèrgamú*

<sup>12</sup> Te ní cachí tucu Yaa càhá<sup>n</sup>-á<sup>n</sup> xii-í sá chidó tnùn-í nchaa tnúhu sá vítná càhá<sup>n</sup>-gá ñ<sup>n</sup> núu tütú, te tendaha-í quíhí<sup>n</sup> ndaha tée xĩnu cuechi núu Yá Ndiõxí ndécú ñuú Pèrgamú sá cúu-xi cuè ñáyiú xĩndecu ichi-gá ndécú ñuú-á<sup>n</sup>, te duha càchí-gá: “Yúhú cúu-í Yaa néhé ñ<sup>n</sup> yuchí cáni te ndéé úu xio núu-xi. <sup>13</sup> Te yúhú xìn-í nchaa nãcuáa quide nchohó cue ñáyiú xĩndecu ichi Yá Ndiõxí ndécú ñuú Pèrgamú, te xìn-í tucu-í sá ndécú-ndó nõu ìo cùnuu yucu ñávãha, te ñá túú dàña ndéé-ndó nchicú<sup>n</sup> nihnu-ndo ìchi-í, te duca<sup>n</sup> ìo sãndáá iní ñáhá-ni-ndó xii-í, te ñu-ni duca<sup>n</sup> ñi quide-ndo cútñahá ní sahni-güedé té Àntipás núu ndécú-ndó ñu-ni núu dúcá<sup>n</sup> ìo cùnuu yucu ñávãha. Te ndí-á<sup>n</sup> ñi quide ndáá ndíi ní xĩndecu ndíi ichi-í chi ní càhá<sup>n</sup> váha ndíi cuendá-í. <sup>14</sup> Dico ñá túú cùu váha iní-í cuendá ñ<sup>n</sup> úú sá quidé-ndó, chi ndècu ndihí-ndo ñáyiú nchicú<sup>n</sup> nihnu-ni nchaa nãcuáa ní càhá<sup>n</sup> ndíi Balaám. Chi ndí-á<sup>n</sup> ñá túú ní quide váha ndíi chi ní dácáhu ñi ndíi ñngá tée ní xĩnani Bálac nãcuáa cada-dé canu ichi-dé cue ñáyiú isràèl ñngá ichi sá ñá túú váha, chi ní xãha<sup>n</sup> tã Bálac-á<sup>n</sup> xii-yu sá cáxi-yu nchaa sá ndúú táhú nchaa sá ñi cadúha cue tée ñuyúú-a ñãnani ñáyiú ndiõxí te ñá ndáá sá ndiõxí cúu-xi, te ní dácáhu ñi ñáhá-dẽ xii-yu sá cùndécú-yu ichi ñi ñi. <sup>15</sup> Te ndècu ndihí tucu-ndo ñáyiú nchicú<sup>n</sup> nihnu sá dácuàha cue ñáyiú cùu nicolaitás. Te nchaa sá dácuàha ñáyiú-á<sup>n</sup> dáquèe tihú-í, <sup>16</sup> te nchòhó chí dándixi cuèchi iní sá ñá túú quide váha-ndo ndècu-ndo, chi núu ñáhá te

quixi-í nàá-í ndihí cue ñáyiú-án ndihí yuchí cání sã quéné yùhu-í. <sup>17</sup> Te nchaa nchòhó cada cuendá váha-ndo nàcuáa xãha<sup>n</sup>-í xii Espiritú Yá Ndiòxí xãha<sup>n</sup>-xi xii cue ñáyiú ndècu ichi-gá xĩndecu nchaa xichi. Te duha ndùu tnúhu xãha<sup>n</sup>-í xii Espiritú-gá xãha<sup>n</sup>-xi xii-yu: Cúñaha-n xii nchaa ñáyiú sã núu na càda ndee iní-yu yáha-yu nándi sã ná yãha-yu sã cuendá-í, te yúhú cuãñaha-í sã ndúú yùhu xii-yu caxi-yu ì<sup>n</sup> sã vátá quíní-gá-yu caxi-yu. Te xíá<sup>n</sup> cúú-xí mànáá sã ñí xóo caxi cue ñáyiú ní xĩndecu ndéé sanaha, te cuãñaha tùcu-í ì<sup>n</sup> caa yũú cuixí<sup>n</sup> xii-yu, te núú yũú-ã<sup>n</sup> cundeé ì<sup>n</sup> diu saa. Te diu-án vã yõo tnàhí xini chi ì<sup>n</sup>dií ní ñáyiú na quèhe<sup>n</sup> cuendá diu-án quini-yu, duha xãha<sup>n</sup>-í xii Espiritú-gá cúu-xi ñáyiú”, duha càchí Yáá càhá<sup>n</sup>-án. Te nchaa tnúhu-án ñí chídó tnùn-í sã cúú-xí ñáyiú xĩndecu ichi Yá Ndiòxí ndécú ñùú Pèrgamú.

*Tnúhu sã cúú-xí cuè ñáyiú xĩndecu ichi Yá Ndiòxí ndécú ñùú Tiàtirá*

<sup>18</sup> Te ní cachí tucu Yáá càhá<sup>n</sup>-án xii-í sã chídó tnùn-í nchaa tnúhu sã vítná càhá<sup>n</sup>-gá ì<sup>n</sup> núú tùtú, te tendaha-í quihí<sup>n</sup> ndaha tẽe xĩnu cuechi núú Yá Ndiòxí ndécú ñùú Tiàtirá sã cúú-xí cuè ñáyiú xĩndecu ichi-gá ndécú ñùú-án, te duha càchí-gá: “Yúhú cúu-í Déhe Yá Ndiòxí, te càa tinuu-í dàtná cáá itá ñuhú, te sãhá-í cáá dàtná cáá sã nání brõncé òré ñuhú-xi núú ñuhú càyú-xi. <sup>19</sup> Te yúhú xini-í nchaa nàcuáa quide nchòhó ñáyiú xĩndecu ichi Yá Ndiòxí ndécú ñùú Tiàtirá. Te xini tucu-í sã ìo cùu iní-ndó Yá Ndiòxí te sãndáá iní-ndó-gã. Te xini tucu-í nàcuáa ndùu chiu<sup>n</sup> quide-ndo sã cúú-xí-gã. Te xini tucu-í sã ìo quide cahnu iní-ndó cuèi nándi cùu sã yãha-ndo ndècu-ndo. Te xini tucu-í sã ìo-gá ndúcú ndèe-ndo quide váha-ndo vitna dacúxí cùtnàhá vitna cùu saa ní sãndáá iní-ndó Yá Ndiòxí. <sup>20</sup> Dico ñá túú cùu váha iní-í cuendá ì<sup>n</sup> sã quidé-ndó, chi ñá túú tnàhí ná sání iní-ndó ndècu ndihí-ni-ndo ñáyiú nchicú<sup>n</sup> nihnu nchaa nàcuáa dànehé ñáhá ñaha nani Jezabél. Te ñaha-án càchí-a<sup>n</sup> sã càhá<sup>n</sup>-a<sup>n</sup> tnúhu Yá Ndiòxí dico ñá ndáá sã càhá<sup>n</sup>-a<sup>n</sup> tnúhu-gá, te cuáhá<sup>n</sup>-a<sup>n</sup> dàndahú-a<sup>n</sup> nchaa ñáyiú xĩnu cuechi núu-í ndihí nchaa sã dánèhé ñáhá-án cuendá cundecú-yu ichi díí iní, te caxi-yu nchaa sã ndúú táhú

nchaa sã ñí cadúha cue tée ñuyú-a dànani ñáyiú ndiòxí te ñá ndáá sã ndiòxí cúu nchaa xíá<sup>n</sup>. <sup>21</sup> Te ní cuu vai nduu ta dacaca-í ndécú-án cuendá ndixi cuéchi iní-a<sup>n</sup> sã ñá túú quide váha-a<sup>n</sup> ndècu-a<sup>n</sup>, te cuèi duca<sup>n</sup> quide-í dico ñá túú cuini-a<sup>n</sup> ñáña-a<sup>n</sup> ñí ì<sup>n</sup> sã cuèhé sã dúhá quide-a<sup>n</sup>. <sup>22</sup> Te vitna yúhú ìo dandòho-í-a<sup>n</sup> chi tni ñaha cuèhé xii-a<sup>n</sup>, te diu-ni duca<sup>n</sup> ìo dandòho-í nchaa ñáyiú quide datná quidé-án te núu vá ndixi cuèchi iní-yu sã ñá túú quide váha-yu ndécú-yu, te dàñá-yu nchaa sã cuèhé sã dúhá quidé-yu. <sup>23</sup> Te nchaa ñáyiú cùndihí ñaha xii ñaha-án cahni-í-yu, te duca<sup>n</sup> te nchòhó ndihí dava-gá nchaa ñáyiú xĩndecu ichi Yá Ndiòxí ndécú nchaa xichi cutnuni iní-ndó ndihí-yu sã yúhú cúu-í Yáá xini ndáá nchaa nàcuáa sãni iní ñáyiú, ndihí nchaa nàcuáa quide-xi iní-yu. Te nchòhó nàcuáa ndùu sã quidé-ndó ì<sup>n</sup> ì<sup>n</sup>-ndo te duca<sup>n</sup> cùnduu sã táxi-í nduu táhú-ndó. <sup>24</sup> Te dava nchòhó ñáyiú ndècu ñùú Tiàtirá, ñáyiú ñá túú nchicú<sup>n</sup> nihnu nàcuáa dànehé ñáhá ñaha nani Jezabél-án ñá túú xini-ndó ñá cúú sã càchí ñáyiú ndùu yuhu dacahu iní ñáhá yùcu ñávãha. Te nchòhó, ñá túú ñágá cachí tnúhu-í xii-ndo càda-ndo <sup>25</sup> diu-ná sã ìo nducu ndèe-ndo cada-ndo nchaa nàcuáa càhá<sup>n</sup> tnúhu sã ndécú ndihí-ndo, te duca<sup>n</sup>-ni càda-ndo ndéé òré quixi tucu-í. <sup>26</sup> Te nchaa nchòhó ñáyiú na càda ndee iní yáha nándi sã ná yãha sã cuendá-í, te núu na càda-ni-ndo nchaa nàcuáa cuini-í cada-ndo ndéé nduu vã cùndecu-gá-ndó ñuyú-a, te yúhú taxi-í tnúhu ndee iní xii-ndo sã táxi tnùn-í-ndó nchaa ñáyiú ñuyú <sup>27</sup> dàtná ní quide mee Tãtà-í Dútú Ndiòxí ní taxi-gá tnúhu ndee iní ndécú ndihí-í, te duca<sup>n</sup> càda ñaha-í xii-ndo tàxi-í tnúhu ndee iní xii-ndo cuendá ìo taxi tnùn-í-ndó, te cada iní-ndó sã cáda-ndó cuè ñáyiú dàtná quidé-xi ì<sup>n</sup> quidi òré tàhú-xi càchi duu<sup>n</sup>-xi, te duca<sup>n</sup> chi nchòhó cada-ndo sã ncháá ñáyiú ñá túú quide váha cuíta nihnú-yu. <sup>28</sup> Te cada iní-ndó sã dàtná dáyhé chódini quiti quene òré sa ta tũndaá-ñá cuáhá<sup>n</sup> duca<sup>n</sup> càda-xi òré ná sãá nduu ngũta-xi cada váha-xi, te duca<sup>n</sup> chi yúhú cada-í nàcuáa nduu táhú-ndó cùndecu ndihí ñaha-ndo xii-í núú ìo váha càa ndecu-í. <sup>29</sup> Te nchaa nchòhó cada cuendá váha-ndo nàcuáa xãha<sup>n</sup>-í xii Espiritú Yá Ndiòxí xãha<sup>n</sup>-xi xii cue ñáyiú



ndècu ichi-gá xĩndecu nchaa xichi”, duha càchí Yaa càhá<sup>n</sup>-á<sup>n</sup>. Te nchaa tnúhu-á<sup>n</sup> nĩ chídó tnùn-í sá cúú-xí ñáyiú xĩndecu ichi Yá Ndiõxí ndécú ñúú Tiàtirá.

### 3

*Tnúhu sá cúú-xí ñáyiú xĩndecu ichi Yá Ndiõxí ndécú ñúú Sãrdís*

<sup>1</sup> Te ní cachí tucu Yaa càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ñ<sup>n</sup> núú tütú, te tendaha-ĩ quíhí<sup>n</sup> ndaha téé xĩnu cuechi núú Yá Ndiõxí ndécú ñúú Sãrdís sá cúú-xí cuè ñáyiú xĩndecu ichi-gá ndécú ñúú-á<sup>n</sup> te duha càchí-gá: “Yúhú cúú-í Yaa ndécú ndíhi ndí usá espíritú cúú cuendá Yá Ndiõxí, te diu-ni-í cúú-í Yaa ndécú ndíhi ndí usá chódíní. Te yúhú xìn-í nchaa nàcuáa quide nchóhó ñáyiú xĩndecu ichi Yá Ndiõxí ndécú ñúú Sãrdís, te xìn-í sá cúú-ndó dàtná ñáyiú ní xíhí cuèi càchí ñáyiú sá ñáhá. <sup>2</sup> Te chí cuáha cuendá nàcuáa quide-ndo ndecu-ndo vitna, te nducu ndèe-ndo cada-ndo ñ<sup>n</sup> úú-gá nchaa sá vãha nchícú<sup>n</sup> nihnu-ndo vitna, chí sa ndètu víi-nã dañá-ndo nchãa-ndí túhú sá vãha quide-ndo ní cuu, te quide cuendá-í sá ñã túú quide-ndo nchaa nacuáa cuíní Yá Ndiõxí cada-ndo. <sup>3</sup> Te chí dándacu iní nàcuáa càhá<sup>n</sup> tnúhu sá nĩ xĩndedóhó-ndo cutnãhá ní tuha-ndo ichi Yá Ndiõxí, te canchicú<sup>n</sup> nihnu-ndo càda-ndo nacuáa càhá<sup>n</sup> tnúhu-á<sup>n</sup>, te ndixi cuèchi iní-ndó sã ñã túú quide váha-ndo ndècu-ndo, te núu vá nacuáha-ndo cuendá nàcuáa quide-ndo ndecu-ndo ñã, te cada-í dàtná quidé ñadúhú, chí òré ñã túú nã yíhí iní-ndó quèxio-í núú ndécú-ndó. <sup>4</sup> Dico ndècu ndíhi-ndo ñ<sup>n</sup> úú ñáyiú càndoo caa nine iní-xi, chí ñáyiú-á<sup>n</sup> nĩ nduu táhũ-yu cuihnú-yu dóó cuixí<sup>n</sup> cuendá cundecu ndíhi-í-yu, te duca<sup>n</sup> chí cùdiú-yu núú-í. <sup>5</sup> Te nchaa ñáyiú na càda ndee iní-xi yãha nándí sá ná yãha sá cuendá-í, te ñáyiú-á<sup>n</sup> nduu táhũ-yu cuihnú-yu dóó cuixí<sup>n</sup>, te vá náquète-í diú-yu núú tütú núú yódó tnùn-í cue ñáyiú ní nduu táhú cundecu ndíhi-í ní caa ní quíhí<sup>n</sup>, te cúñaha-ĩ xii Tãtà-í Dútú Ndiõxí ndíhi cue espíritú xĩnú cuèchi núú-í sá ñáyiú-á<sup>n</sup> cúú-yu ñáyiú cùu cuendá-í. <sup>6</sup> Te nchaa nchòhó cada cuendá váha-ndo nàcuáa xãha-ĩ xii Espíritú Yá

Ndiõxí xãha<sup>n</sup>-xi xii cue ñáyiú ndècu ichi-gá xĩndecu nchaa xichi”, duha càchí Yaa càhá<sup>n</sup>-á<sup>n</sup>. Te nchaa tnúhu-á<sup>n</sup> nĩ chídó tnùn-í sá cúú-xí ñáyiú xĩndecu ichi Yá Ndiõxí ndécú ñúú Sãrdís.

*Tnúhu sá cúú-xí cuè ñáyiú xĩndecu ichi Yá Ndiõxí ndécú ñúú Filãdelfiá*

<sup>7</sup> Te ní cachí tucu Yaa càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ñ<sup>n</sup> núú tütú, te tendaha-ĩ quíhí<sup>n</sup> ndaha téé xĩnu cuechi núú Yá Ndiõxí ndécú ñúú Filãdelfiá sá cúú-xí cuè ñáyiú xĩndecu ichi-gá ndécú ñúú-á<sup>n</sup>, te duha càchí-gá: “Yúhú cúú-í Yaa ío váha quide ndáá te ñã túú tnãhí cuèchi-í. Te díhna-gá ndíi Dávíí ní taxi tnùn-í ndíi ñáyiú, te vitna yúhú táxí tnùn-í-yu, te yúhú càhá<sup>n</sup>-í te núu ndëndida càa ñáyiú ndíhu ndaha-ĩ te ndëndida càa ñáyiú vá ndíhu ndaha-ĩ. <sup>8</sup> Te yúhú xìn-í nchaa nàcuáa quide nchóhó ñáyiú xĩndecu ichi Yá Ndiõxí ndécú ñúú Filãdelfiá, te yúhú ní quide-í nàcuáa ní níhí-ndó ñ<sup>n</sup> ichi cahnu quide-ndo chiu<sup>n</sup>-í, te vá yõo ñ<sup>n</sup> cada nàcuáa vá níhí-gá-ndó nàcuáa cada-ndo chiu<sup>n</sup>-í. Te cuèi ñã túú ío níhí ndéé-ndó cundecu-ndo ichi Yá Ndiõxí dico tní-ndo nchaa tnúhu càhá<sup>n</sup>-í, te ní ñ<sup>n</sup> xito ñã túú càhá<sup>n</sup>-ndó sã ñã túú ndècu ndíhi ñaha-ndo xii-í. <sup>9</sup> Te nchaa ñáyiú quide nchaa nacuáa cuíní yucu ñãvãha, ñáyiú-á<sup>n</sup> cúú-yu ñáyiú isrãél, te cuèi cúú-yu ñáyiú isrãél dico ñã túú quidé-yu nàcuáa tàú-yu cadá-yu, te yúhú cada-í sá ncháá ñáyiú-á<sup>n</sup> canehé-yu sá yíñũhu núú-ndó, te cutnùn-í iní-yu sá yũhú ío cùu iní ñáhà-í xii-ndo. <sup>10</sup> Te ío quide ndee-ni iní-ndó nchícú<sup>n</sup> nihnu-ndo quide-ndo nchaa nacuáa ní càhá<sup>n</sup>-í, te xĩã<sup>n</sup> coto ñaha-ĩ xii-ndo ñã túú nã tnahá-ndó ndúu na quixi nchaa tnúndòhó tnúhu ndàhú ñuyíú-a. Te òré quexio nchaa tnúndòhó-á<sup>n</sup> ñuyíú-a te dàvá-á<sup>n</sup> cutnùn-í nàcuáa ndúu sá quidé ñ<sup>n</sup> ñ<sup>n</sup> ñáyiú. <sup>11</sup> Te ío ndíhi quixi tucu-í. Te vá dáñã ndéé-ndó càda-ndo nchaa sá vãha nchícú<sup>n</sup> nihnu-ndo quide-ndo cuendá sá vã cuíta sá ní cachí Yá Ndiõxí nduu táhú-ndó. <sup>12</sup> Te nchaa nchòhó ñáyiú na càda ndee iní yãha nándí sá ná yãha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tãtà-í Dútú Ndiõxí, te vá ñ<sup>n</sup> ndúu-gá



xocuĩñí-ndó nũú ndécú-gă. Te cada iní-ndó sã dâtná sá chídó tnùnı-ı dıu Tătâ-ı Dútú Ndiöxı ñı-ndo chi duca<sup>n</sup>-ni cundecu-ndo ndıhi-gă, te cada tucu inı-ndó sã dâtná sá chídó tnùnı-ı nâcuáa nani ñuú-gă ñı-ndo, chi dıu ñuú-gă-án cundecu-ndo, te ñuú-án nani-xı Jêrusalén Sáá, duha nani ñuú-gă. Te ñuú-án quee-xı andıu nũú ndécú Yă Ndiöxı Yaá cúú Tătâ-ı quée-xı ñuyıú. Te cada tucu inı-ndó sã dâtná sá chídó tnùnı-ı dıu mee-ı ñı-ndo, te xıá<sup>n</sup> cúú-xı ñı dıu saa, te duca<sup>n</sup> càda inı-ndó chi cundecu ndıhi ñaha-ndo xı-ı. <sup>13</sup> Te nchaa nchòhó cada cuendá váha-ndo nâcuáa xăha<sup>n</sup>-ı xıi Espıritú Yă Ndiöxı xăha<sup>n</sup>-xı xıi cue ñáyıu ndècu ichi-gă xındecu nchaa xıchı”, duha càchı Yaá càhá<sup>n</sup>-án. Te nchaa tnúhu-án nı chídó tnùnı-ı sá cúú-xı ñáyıu xındecu ichi Yă Ndiöxı ndécú ñuú Filàdelfıá.

*Tnúhu sá cúú-xı ñáyıu xındecu ichi Yă Ndiöxı ndécú ñuú Laodıceá*

<sup>14</sup> Te càchı tucu Yaá càhá<sup>n</sup>-án xıi-ı sá chídó tnùnı-ı nchaa tnúhu sá vítná càhá<sup>n</sup>-gă ñı núú tütú, te tendaha-ı quıhı<sup>n</sup> ndaha tée xınu cuechi núú Yă Ndiöxı ndécú ñuú Laodıceá sá cúú-xı cuè ñáyıu xındecu ichi-gă ndécú ñuú-án, te duha càchı-gă: “Yúhú cúú-ı Yaá quidé nũú Yă Ndiöxı, te cúú-ı Yaá quidé ndáá chi càhá<sup>n</sup> ndáá cuıti-ı nâcuáa càhá<sup>n</sup> Yă Ndiöxı. Te yúhú cúú-ı Yaá nı quide nı ngúndecu nchaa sá ñı cadúha Yă Ndiöxı. <sup>15</sup> Te yúhú xıni-ı nchaa nâcuáa quide nchohó ñáyıu xındecu ichi Yă Ndiöxı ndécú ñuú Laodıceá, te xıni-ı sá ñà túú cuını-ndó cànchicú<sup>n</sup> nihnu-ndo nchaa nâcuáa càhá<sup>n</sup>-ı, te nı ñà túú cuını-ndó dañã duu<sup>n</sup>-ndo. Te váha-gă sá dúú<sup>n</sup> dùu<sup>n</sup> cada-ndo nchaa nâcuáa càhá<sup>n</sup>-ı àdi núú ñáhã te duu<sup>n</sup> duu<sup>n</sup> dañã-ndo. <sup>16</sup> Te sá dúcã<sup>n</sup> quide-ndo ñã túú cuını-ndó dùu<sup>n</sup> duu<sup>n</sup>-ni cada-ndo nâcuáa càhá<sup>n</sup>-ı, te nı ñà túú cuını-ndó dùu<sup>n</sup> duu<sup>n</sup>-ni dañã-ndo te sáá nduu vã cundèe-gă inı-ı cuendá nchaa sá quidé-ndó-ă<sup>n</sup>, te daqueè tíhú ñáhã-ı xıi-ndo. <sup>17</sup> Te càchı-ndó sã cuıcá-ndó, te ío váha ta yăha-ndo nchaa nduu cuáhã<sup>n</sup>, te ñã túú tnàhı ná cúmãní xıi-ndo, te ñã túú cıtnunı inı-ndó sá cúú-ndó dâtná cue ñáyıu ío ndàhú yăha, te cúu-ndo datná ñáyıu ndàhú, ñáyıu ío cundahú inı ñáhã tnàha ñáyıu-xı, te cúu-ndo datná cue ñáyıu cuáá, te cúu tucu-ndo datná cue ñáyıu ndàhú ñã túú tnàhı dóo-xı.

<sup>18</sup> Te na càchı tnúhu-ı xıi-ndo sã càdá-ndó dâtná xıquide cue ñáyıu sãa<sup>n</sup> ñı sá ñı cuáha mee-nı dıhú<sup>n</sup> cuáá<sup>n</sup> sá ío váha càa, te duca<sup>n</sup> quidé-yu te ío-gă cúú cuıcá-yu. Te cada tucu-ndo dâtná xıquide cue ñáyıu sãa<sup>n</sup> dóo cuıxı<sup>n</sup> sácuıhnu-yu cuendá sá vã cúu-yu dâtná ñáyıu ndàhú ñã túú dóo-xı, te cada tucu-ndo dâtná quidé cuè ñáyıu sãa<sup>n</sup> yúcu quée núú-xı nâcuáa cutnùnı váha núu-yu, te duha càhá<sup>n</sup>-ı xăha<sup>n</sup>-ı xıi-ndo chi cuını-ı sá nãtuha ñaha-ndo xıi-ı, te ío váha cundecu-ndo sã cúú-xı Yă Ndiöxı. <sup>19</sup> Te càhá<sup>n</sup>-ı dóho nchaa ñáyıu cúu inı-ı òré ñã túú quide ndáá-yu, te dândoho-ı-yu, núu xıá<sup>n</sup> cuını-ı sá nchòhó ndıxi cuéchi inı-ndó sã ñã túú quide váha-ndo ndècu-ndo. <sup>20</sup> Te na càchı tnúhu-ı xıi-ndo sã yúhú cúú-ı dâtná ñı tée nıtnı yuyèhe ndaa quehé te càhá<sup>n</sup>-ı ñáyıu yıhi xıtı vehe, te núu na càda cuendá-yu sá càhá<sup>n</sup>-ı te nacaá<sup>n</sup>-yu yuyèhe te quıhu-ı xıtı vehe cudıni-ı ndıhi-yu, te duha càhá<sup>n</sup>-ı chi cuını-ı cundecu ndıhi ñaha-ı xıi-ndo. <sup>21</sup> Te nchaa nchòhó ñáyıu na càda ndee inı-xı yăha nãndı sá ná yăha sá cuendá-ı, te yúhú taxi-ı xıi-ndo ñı xıchı núú ndécú-ı cundecu-ndo te cunuu-ndo tnàhá-ndó dâtná cınnu-ı, chi yúhú duca<sup>n</sup> ñı quide ndee inı-ı ní yăha-ı nãndı sá ñı yăha-ı te vitna ní nduu táhú-ı ndécú-ı núú ndécú Tătâ-ı Dútú Ndiöxı cınnu-ı. <sup>22</sup> Te nchaa nchòhó cada cuendá váha-ndo nâcuáa càhá<sup>n</sup> Espıritú Yă Ndiöxı xăha<sup>n</sup>-xı xıi cue ñáyıu ndècu ichi-gă xındecu nchaa xıchı”, duha càchı Yaá càhá<sup>n</sup>-án. Te nchaa tnúhu-án nı chídó tnùnı-ı sá cúú-xı ñáyıu xındecu ichi Yă Ndiöxı ndécú ñuú Laodıceá.

## 4

*Nâcuáa chıñuhu ñáyıu Yă Ndiöxı andıu*

<sup>1</sup> Te sáta ñı yăha duca<sup>n</sup> ñı cuu te ní xıni-ı nchıı andıu, te ní càhá<sup>n</sup> tucu Yaá ní càhá<sup>n</sup> ndıhi ñaha xıi-ı dıhna, te Yaá-án ñı càhá<sup>n</sup> níhi-gă dâtná càhá<sup>n</sup> níhi ñı cútú, te ní cachı-gă xıi-ı:

—Taquène iha te na dãnehé ñáhã-ı xıi-n nchaa nâcuáa cada-xı ndée núú cuáhã<sup>n</sup> núú vèxi—càchı-gă.

<sup>2</sup> Te òré-nı-án ñı quide ñaha tucu Espıritú Yă Ndiöxı xıi-ı nâcuáa càchı inı-xı, te dıu-nı òré-án ñı xıni-ı nıtnı ñı xılé váha andıu te càa datná cáá xılé sácõo nchıhi cue ñáyıu ío cınnu, te núú xılé váha-án núcõo Yăá

táxí tnùní. <sup>3</sup> Te Yaá-án cáá-gǎ dàtná cáá yúú chàhnchí yúú vǎha sá nání jǎspé, te càa tucu-gá dàtná cáá yúú vǎha sá nání còrnálná, te ñùhu doco ñaha ñ<sup>n</sup> cóó yáhnchí xii-gá, te tǎsa<sup>n</sup>-di dàtná tǎsa<sup>n</sup> ñ<sup>n</sup> yúú vǎha sá nání èsmeraldá. <sup>4</sup> Te ní xiní tucu-í nútn<sup>ñ</sup> ócó cúmí xilé vǎha ñi càndéé núú núcõo-gá, te núú xilé-án xñucóo ócó cúmí cue téé cùu sacuéhé te xixihnu-güedé mee-ni dõó cuixí<sup>n</sup>, te ñ<sup>n</sup> caa coróná sá ñi cuáha mee-ni dǐhú<sup>n</sup> cuàá<sup>n</sup> xixúhu<sup>n</sup> díquí-güedé. <sup>5</sup> Te núú núcõo Yaá táxí tnùní-án sàà nduté, te càhá<sup>n</sup> ñùhu te xica chíhi-xi dónaha, te càyú úsá iti núú núcõo-gá, te sá úsá iti-án xǎ<sup>n</sup> cútnùní sá ndécú úsá espíritú cúú cuendá-gá. <sup>6</sup> Te ndècu ñ<sup>n</sup> sá ndécú ndàa núú-gǎ te xǎ<sup>n</sup> cáá dàtná cáá làmár, te dàtná cáá vǐdriú cáá ñihí.

Te ñi càndéé dǐñi Yaá núcõo-án xñutn<sup>ñ</sup> cúmí quiti te titní víhí tñuu-güedi ndeé ndàa sátá-güedi ndihí ndàa núú-güedi. <sup>7</sup> Te quiti díhna nuu càa-di datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí núú tée, te quiti cùu cúmí cáá-dí dàtná cáá yàcolo oré cuáhá<sup>n</sup>-di núú tàchí. <sup>8</sup> Te ndi cúmí quiti-án ndeé ínù ndíxí<sup>n</sup>-güedi ñ<sup>n</sup> ñ<sup>n</sup>-güedi, te ñihí xití ndíxí<sup>n</sup>-güedi ndihí ndàa sátá ndíxí<sup>n</sup>-güedi ndeé tñuu-güedi, te nduu niú chíñùhu-güedi Yá Ndiõxí, te xǎha<sup>n</sup>-güedi xii-gá:

Yòhó Dútú Ndiõxí duca<sup>n</sup>-ni ta quide ndáá-n vèxi, te duca<sup>n</sup>-ni quide ndáá-n cuéi vitna, te diu-ni duca<sup>n</sup> càda ndáá-n núú cuáhá<sup>n</sup> núú vèxi,

te cùu-n Yaá quidé nchàa-ndi túhú sá vǎha, te diu-ni-n sà ndecu-n ndeé cútnáhá ní cuáha ñuyúú,

te diu-ni-n ndècu-n cuéi vitna, te diu-ni-n cùndecu-n cuéi ndeé núú cuáhá<sup>n</sup> núú vèxi.

Duha xǎha<sup>n</sup> cué quiti-án xii Yaá núcõo núú xilé vǎha-án chíñùhu ñaha-güedi.

<sup>9</sup> Te cue quiti-án ño ndàcá<sup>n</sup> táhú-güedi núú Yáá núcõo núú xilé vǎha-án cuendá nchaa sá quidé-gá. Te Yaá-án cúú-gǎ Yaá ndécú nchàa nduu nchaa quiú. Te cue quiti-án càchí-güedi sá ño càhnu cuu-gá te nèhe-güedi sá yíñùhu núú-gǎ. Te ndi tnahá òré duca<sup>n</sup> càhá<sup>n</sup>-güedi, <sup>10</sup> te ndi òcó cúmí cue

tée cùu sacuéhé xñucóo-án ngüñí xití-güedé núú Yáá núcõo-án, chi diu-gá cúú-gǎ Yaá ndécú nchàa nduu nchaa quiú te chíñùhu ñaha-güedé xii-gá, te tàva-güedé coróná ñùhú díquí-güedé te tàxi ndecu-güedé núú-gǎ, te xǎha<sup>n</sup>-güedé xii-gá:

<sup>11</sup> Yòhó cúú-n Dútú Ndiõxí Yaá cúú cuendá ñáhá xii-ndí, te ño càhnu cuu-n, te ño vǎha quide-n, te nèhe-ndí sá yíñùhu núú-n, chi duca<sup>n</sup> tàú-xi cada-ndí, chi yòhó cúú-n Yáá ní cadúha nchaandi túhú sá ño, te duca<sup>n</sup> ñi ngúndecu nchaa xǎ<sup>n</sup> chi mee-n dùca<sup>n</sup> ní sani iní-n càda-n.

## 5

*Cuendá Yaá cáá dàtná cáá ñ<sup>n</sup> mbéé quiti ní dán'cuèhé-güedé ndihí cuendá ñ<sup>n</sup> tutú*

<sup>1</sup> Te ní xiní tucu-í sá Yáá núcõo núú xilé vǎha-án nundàha-gá ñ<sup>n</sup> tutú ní nacaúnuu xio ndaha cùha-gá, te ndeé lètrá ndàa sátá-xi ndihí ndàa xití-xi, te úsá tnáhá tutú líhli ñùhu seyú ndeé sátá tütú-án cuendá sá vǎ dáñá-xi nacaá. <sup>2</sup> Te ní xiní-í ñ<sup>n</sup> espíritú xínú cuèchi núú Yá Ndiõxí, te ndeé vǐhi-xi te ñihí càhá<sup>n</sup>-xi, te càchí-xi:

—¿Yoo tàú-xi xocàni nchaa tutú líhli ñùhu seyú ndeé sátá tütú-a te nadacàa-xi? — càchí espíritú-án.

<sup>3</sup> Dico ñi àndi, te ñi núú ñùyúú-a, te ñi ndàa xití ñùhu ñá túú ñ<sup>n</sup> ñáyiu tàú-xi nadacàa tutú-án te cundèhé-yu. <sup>4</sup> Te yúhú ní ngüíta-í ndàhyú víhí-í cuendá sá ñà túú ñi ñ<sup>n</sup> ñáyiu tàú-xi nadacàa tutú-án cundèhé-yu. <sup>5</sup> Te ñ<sup>n</sup> cue téé cùu sacuéhé xñucóo xǎ<sup>n</sup> ñi cachí-güedé xii-í:

—Vá ndàhyú-gá-n, te cada cuendá-n chi Yaá ño cùnuu cuu ndi mee cue ñáyiu cùu ñani tnáhá ndí Jùdá, diu-ni Yaá cúú ñani tnáhá ndí Dàvíí, Yaá-án cúú-gǎ Yaá ní ndacu ní yáha nchaa nándi sá ñi yáha, núu xǎ<sup>n</sup> diu-gá tàú-gá xocàni-gá nchaa tutú líhli ñùhu seyú ndeé sátá tütú-án te nadacàa-gá —duha càchí téé cùu sacuéhé-án.

<sup>6</sup> Te tnuú ndi òcó cúmí cue téé cùu sacuéhé xñucóo-án, ndihí tnuú ndi cúmí quiti xñutn<sup>ñ</sup>-án, ndihí núú núcõo Yaá táxí tnùní-án ñi xiní-í nútn<sup>ñ</sup> ñ<sup>n</sup> Yaá cáá dàtná cáá ñ<sup>n</sup> mbéé quiti ní dán'cuèhé-güedé te ní

xíhí-di ni cùu te ní ndoto-di, te ndèè úsá ndiqui-di, te ndèè úsá tinùu-di, te sá úsá tinùu-di-án cùtnùní sá ndécú úsá espíritú cúu cuèndá Yá Ndiöxí, duca<sup>n</sup> caa Yaá-án nǐ xiní-í. Te cue espíritú-án nǐ tendaha-gǎ xícá cùu-xi ni caa xico ñuyúú. <sup>7</sup> Te Yaá cáá dàtná cáá ì<sup>n</sup> mbéé quitì ní dánìcuèhé-güedé-án nǐ sáhá<sup>n</sup>-gá núú Yàá núcõo núú xilé váha-án. <sup>8</sup> Te òré ní quehe<sup>n</sup>-gá tutú-án te ndi cùmí quitì xǐnutnǐ xía<sup>n</sup> nǐ ngüíñí xítí-güèdi núu-gǎ, te duca<sup>n</sup> nǐ ngüíñí xítí tucu ndi ócò cùmí cue téé cùu sacuéhé xǐnucóo-án, te ndi díí<sup>n</sup> núu-güedé xǐnehe-güedé yaá sá nání àrpá, te xǐnehe tucu-güedé ndi díí<sup>n</sup> núu-güedé ì<sup>n</sup> caa tǐcùú ní cuáha mee-ni díhú<sup>n</sup> cuáá<sup>n</sup>, te chitu düsa sá sáhá<sup>n</sup> tnámí. Te ñúhmá düsa sá sáhá<sup>n</sup> tnámí-án cúu-xí dàtná nchaa tnúhu càhá<sup>n</sup> nchaa ñáyiu ndècu ichi Yá Ndiöxí òré càhá<sup>n</sup> ndihì ñàhá-yu xii-gá. <sup>9</sup> Te xíta-güedé ì<sup>n</sup> ndudú sáá ndihì cue quitì-án chíñùhu ñaha-güedé xii-gá, te càchí-güedé ndihì cue quitì-án:

Yòhó tàu-n quehe<sup>n</sup>-n tutú-a te xocàni-n nchaa tutú líhli ñùhu seyú ndèè sátá-xi,

chi yòhó ní satì níñí-n te ní xíhí-n, te cuèndá xǐá<sup>n</sup> ní nduu cuèndá Yá Ndiöxí cue ñáyiu ì<sup>n</sup> ì<sup>n</sup> nàció<sup>n</sup>, ndihì ñáyiu xǐndecu ì<sup>n</sup> ì<sup>n</sup> ñuú, ndihì ñáyiu càhá<sup>n</sup> ndi díí<sup>n</sup> ndi díí<sup>n</sup> núú tnúhu, ndihì ñáyiu xǐndecu ì<sup>n</sup> ì<sup>n</sup> xichi.

<sup>10</sup> Te ní quidé-n-yu dàtná cue téé yindaha ñáyiu, te ní quide tucú-n-yu dàtná cue dútú sá cúu-xí Yá Ndiöxí.

Te sáá nduu te taxi tnùnì-yu ñuyúú-a. Duha càhá<sup>n</sup> cue téé-án ndihì cue quitì-án chíñùhu-güedé ndihì-güedi Yaá-án.

<sup>11</sup> Te sátá dúcá<sup>n</sup> te ní tecú dóho-í ní cáhá<sup>n</sup> cuéhé víhí espíritú xínú cuèchi ni candéé núú núcõo Yaá táxí tnùnì-án, ndihì núú xǐnutnǐ ndi cùmí cue quitì-án, ndihì núú xǐnucóo cue téé cùu sacuéhé-án, te ní xiní-í sá sùúnì cuéhé víhí espíritú-án xǐndecu xía<sup>n</sup>,

<sup>12</sup> te níhi ní cáhá<sup>n</sup> cue espíritú-án, te càchí-xi: Yòhó Yaá cáá dàtná cáá ì<sup>n</sup> mbéé quitì ní dánìcuèhé-güedé te ní xíhí ní cùu te ní ndoto,

te yòhó ío càhnu cuu-n, te ndècu ndihì-n nchaandi túhú, te ío ndècu ndihì-n sá xìnì tnùnì-n,

te ndàcu-n quide-n nchaa sá cùnì-n, te nèhe-ndí sá yíñùhu núu-n, te ío váha quide-n,

te chíñùhu ñaha-ndí xii-n, chi duca<sup>n</sup> tàú-ndí cada-ndí chi ío càhnu cuu-n.

Duha càchí nchaa cue espíritú-án xáha<sup>n</sup>-xi xii-gá chíñùhu ñaha-xi.

<sup>13</sup> Te ní tecú dóho-í ní cáhá<sup>n</sup> nchaandi túhú sá nǐ cadúha Yá Ndiöxí ndécú àndiu, ndihì nchaa sá ndécú ñuyúú, ndihì nchaa sá ndécú xítí ñuhu, ndihì nchaa sá ñúhú xítí ndute làmár, te xǐcachí-xi:

Yòhó Yaá núcõo núú xilé váha, ndihì yòhó Yaá cáá dàtná cáá ì<sup>n</sup> mbéé quitì ní dánìcuèhé-güedé táxí tnùnì-ndó, te nèhe-ndí sá yíñùhu núu-ndó,

te duca<sup>n</sup> ío ndàcá<sup>n</sup> táhú-ndí núu-ndó, chi ío váha quide-ndo te ío cùnnu-ndo,

te diu-ni duha cáhá<sup>n</sup> váha-ndí cuèndá-ndó nǐ caa ni quíhí<sup>n</sup>.

Duha càchí nchaa sá nǐ cadúha Yá Ndiöxí.

<sup>14</sup> Te ndi cùmí cue quitì xǐnutnǐ-án càchí-güedi:

—¡Duca<sup>n</sup> na cùnduu! —cachí-güedi.

Te ndi ócò cùmí cue téé cùu sacuéhé xǐndecu-án nǐ ngüíñí xítí-güedé chíñùhu-güedé Yaá ndécú nchaa nduu nchaa quíú.

## 6

### *Cuèndá úsá tutú líhli ñùhu seyú*

<sup>1</sup> Te sátá dúcá<sup>n</sup> te ní xiní-í sá Yàá cáá dàtná cáá ì<sup>n</sup> mbéé quitì ní dánìcuèhé-güedé-án nǐ xócánì-gǎ ì<sup>n</sup> tutú líhli ñùhu seyú ndèè sátá tütú sá nǐ nadúcú<sup>n</sup> nuu-án, te ní tecú dóho-í ní cáhá<sup>n</sup> ì<sup>n</sup> quitì cùmí xǐnutnǐ-án, te níhi ní cáhá<sup>n</sup>-di dàtná càhá<sup>n</sup> ñúhu, te càchí-di:

—¡Taqùxi cundehe-n! —cachí-di.

<sup>2</sup> Te òré-ni-án nǐ xiní-í ì<sup>n</sup> cuáyú cuixí<sup>n</sup> yódó ñàha ì<sup>n</sup> sá yódó ñàha xii-di, te sá yódó ñàha xii-di-án néhé-xí ì<sup>n</sup> arcú sá cúu tnùxii-xi, te ní nduu táhú-xi ì<sup>n</sup> coróná, te ní ndacu-xi ní cunuu-xi te duca<sup>n</sup>-ni ta cùnnu-xi cuáhá<sup>n</sup>.

<sup>3</sup> Te òré ní xócánì-gǎ tutú líhli cùu uú ñúhú sèyú ndèè sátá tütú sá nǐ nadúcú<sup>n</sup> nuu-án, te ní tecú dóho-í ní cáhá<sup>n</sup> tucu ìngá quitì cùu uú xǐnutnǐ-án, te càchí-di:

—¡Taqùxi cundehe-n! —cachí-di.

<sup>4</sup> Te òré-ni-án nǐ xiní tucu-í ì<sup>n</sup> cuáyú tícuèhé ní quee-di cuáhá<sup>n</sup>-di, te yòdo ñaha ì<sup>n</sup>

sá yódó ñàha xii-di, te sá yódó ñàha xii-di-án ñí níhí-xi tnúhu ndee ìní sá dátìcánuu-xi ñáyíu vá cùndècu ndìhi tnaha váha-gá-yu, te ngüíta ñáyíu cahni tnàhá-yu, te ní nduu táhú-xi ñí yuchí cáhnú vîhi.

<sup>5</sup> Te òré ní xócání tùcu Yaá-án ingá tutú lìhli cùu uní ñúhú sèyú ndèé sátá tùtú sá ñí nadúcú<sup>n</sup> nuu-án, te ní tecú dóho-í ní cáhá<sup>n</sup> quítì cùu uní xñnutnîí xíá<sup>n</sup>, te cächí-di:

—¡Taquìxi cundehe-n! —cachí-di.

Te òré-ni-án ñí xiní tucu-í ñí cuàyú tnúú te yòdo ñaha tucu ñí sá yódó ñàha xii-di, te sá yódó ñàha-án nùndàha-xi úú yaxi<sup>n</sup> libre. <sup>6</sup> Te ní tecú dóho-í ní cáhá<sup>n</sup> ñí sá ñí cáhá<sup>n</sup> tnuú cue quítì xñnutnîí-án, te cächí-xi:

—Ñí cuàrtú-nă trîú níhí-ndó sã ñí dîhú<sup>n</sup> denàriú, te úní cuàrtú-nă cebàdá níhí-ndó sã ñí tùcu dîhú<sup>n</sup> denàriú, dico acítì ndìhi ndudí ndéhé yoho yàha stilé chi vá ndíhí ñìhnu —duha cächí sá càhá<sup>n</sup>-án.

<sup>7</sup> Te òré ní xócání tùcu Yaá-án tutú lìhli cùu cumí ñúhú sèyú ndèé sátá tùtú sá ñí nadúcú<sup>n</sup> nuu-án, te ní tecú tucu dóho-í ní cáhá<sup>n</sup> tucu ingá quítì cùu cumí xñnutnîí-án, te cächí-di:

—¡Taquìxi cundehe-n! —cachí-di.

<sup>8</sup> Te òré-ni-án ñí xiní tucu-í ñí cuàyú yàhà, te yòdo ñaha tucu ñí sá yódó ñàha xii-di, te sá yódó ñàha xii-di-án nání-xí Sã xihí, te xíá<sup>n</sup> sáhní-xí ñáyíu, te sátá xíá<sup>n</sup> nchìcú<sup>n</sup> sá nèhé núú ndécú ñáyíu ní xihí. Te cùmí xichí cùu ñuyíú, te sá sáhní ñàha xii ñáyíu-án ñí níhí-xi tnúhu ndee ìní danàa-xi ñáyíu ñí xichí ñuyíú, te davá-yu cahni ñaha-xi ndìhi yuchí, te cada-xi sá cóo tnámá te cuú-yu, te cada tucu-xi sá cóo cuèhé cahni-xi ñáyíu, te ñíu-ni tucu-xi cada sá ncháá quítì déé<sup>n</sup> cahni-di ñáyíu.

<sup>9</sup> Te òré ní xócání tùcu Yaá-án tutú lìhli cùu uhú<sup>n</sup> ñúhú sèyú ndèé sátá tùtú sá ñí nadúcú<sup>n</sup> nuu-án, te òré-án ñí xiní-í nùtnîí ñí núú sácódó sã ndúú táhú Yã Ndiöxí, te ndàa caha xíá<sup>n</sup> ní xiní-í xñndecu nchaa àlmá ñáyíu ní sahní-güedé núú ñuyíú sã cuèndá tnúhu Yá Ndiöxí, ndìhi sá cuèndá sá ñí cáhá<sup>n</sup> váha-yu cuèndá-gá. <sup>10</sup> Te nchaa àlmá-án ñíhi xí cáhá<sup>n</sup>-xi, te xàhà<sup>n</sup>-xi xii Yá Ndiöxí:

—Yòhó Dútú Ndiöxí cúu-n Yàá ñá túú tnàhí cuéchi-xi, te ñá túú tnàhí quée cáva-n quide-n ñí sá càhá<sup>n</sup>-n. ¿Te ná ndèé ama dandòho-n ñáyíu ndècu ñuyíú nachinaa-n

cuèndá sá ñí quide ñàhá-yu xii-ndí-i? — cächí cue àlmá-án xàhà<sup>n</sup>-xi xii-gá.

<sup>11</sup> Te sátá dúcá<sup>n</sup> te nchaa cue àlmá ñáyíu-án ñí níhí-xi dóó cuixí<sup>n</sup> ní quée cuíhnu-xi, te ní xítñúhu ñaha xii-xi sá ná ndètatú-xi te cundetú tnaa-xi ndèé ná xñnu cava cuú ñáyíu nàcuáa ndèé tnuní dàtná ní xihí cue ñáyíu dii àlmá-xi cùu-xi. Te ñáyíu sa ní xihí-án ñí-ni cùú-yu ndìhi ñáyíu vitna cuú-án chi mee-ni chùu<sup>n</sup> Xítóhó Jesucristú quidè-yu, te ñíu-ni ichi-gá ndécú-yu.

<sup>12</sup> Te òré ní xócání tùcu Yaá-án tutú lìhli cùu ñúhú sèyú ndèé sátá tùtú sá ñí nadúcú<sup>n</sup> nuu-án, te ní xiní-í súúni ñíhi ní quidí-xi ñuyíú, te ní cutnuu ñíhi núú nchìcanchii dàtná ñí dóó tnúú, te ní cuu tìcuèhé ñíhi ñíhi núú yóó. <sup>13</sup> Te ní xiní-í ní ngoyo chódíni ñuyíú-a dàtná ngóyó ngüxí yíhí òré quéné tächí ñíhi. <sup>14</sup> Te ní xiní-í ní nadúcú<sup>n</sup> nuu andíu dàtná nádúcú<sup>n</sup> nuu ñí tutú te ní ndóñúhú-xí, te nchaa tìndúú ñí xica ndehe-xi núú ndécú-xí, te duca<sup>n</sup> ñí xica ndehe tucu nchaa tìndúú yìchí ndécú xítì ndute làmár. <sup>15</sup> Te nchaa cue téé yìndaha ñáyíu ní nguívàha-güedé, ndìhi nchaa dava-gá cue téé ío tàxi tnuní, ndìhi nchaa ñáyíu cuica, ndìhi nchaa cue téé tàxi tnuní sandàdú, ndìhi cue sandàdú cue téé ío váha sàá díquí-xi nàcuáa cada-güedé nàá-güedé, ndìhi nchaa ñáyíu ñá túú tnàhí dàñá quée núú chíú<sup>n</sup> pàtróó<sup>n</sup>-xi, ndìhi nchaa ñáyíu dàñá quée núú chùu<sup>n</sup> pàtróó<sup>n</sup>-xi. Te dava ñáyíu-án ñí nguívàha-yu xití yáú, te davá-yu ní nguívàha-yu nchaa tnuú cava. <sup>16</sup> Te xàhà<sup>n</sup>-yu nchaa tìndúú ndìhi nchaa cava:

—Chí təcùu<sup>n</sup> chivàha ñaha-ndo xii-ndí cuèndá sá vã quíní ñàhá Yàá ío tàxi tnuní núcóo núú xilé váha, ndìhi cuèndá sá vã dándòho ñaha Yàá cáá dàtná cáá ñí mbéé quítì ní dancuèhé-güedé, chi Yaá-án ío cùdéé<sup>n</sup>-gã núú-ndí —duha cächí nchaa ñáyíu-án xàhà<sup>n</sup>-yu xii nchaa tìndúú-án ndìhi nchaa cava-án.

<sup>17</sup> Te vitna ní sáá nduu ío cùu cahnu nduu tnúndòho tnúhu ndàhú, te vá yóo ñí cundee ìní-xi yàha nchaa tnúndòho-a.

## 7

*Ñáyíu isràèl ñáyíu naníhí tàhú*



1 Te sátá xǎ<sup>n</sup> te ní xiní-í cúmí tnàhá espíritú xínú cuèchi núú Yǎ Ndiǒxí xǐnutnǐ-xi ndi cúmí xio ñuyíú, te cue espíritú-á<sup>n</sup> ñi ngani-xi táchi cuèndá sá vǎ cuícó-gǎ-xi ni làmár, te ni dǐquí yutnu, te ni ñ<sup>n</sup> xichi ñuyíú vǎ cuícó-gǎ-xi. 2 Te cue espíritú-á<sup>n</sup> ndécú ndihí-xi tnúhu ndee iní danàa-xi sá ió làmár ndihí sá ió ñuhu yìchí, te ní xiní tucu-í ingá espíritú xínú cuèchi núú Yǎ Ndiǒxí ní quee nchita-xi ndàa nacuáa quène nchíanchii, te nùndaha-xi seyú Yǎ Ndiǒxí Yaá ndécú nchàa nduu nchaa quiú, te níhi ní cáhá<sup>n</sup>-xi xǎha<sup>n</sup>-xi xii ndi cúmí cue espíritú-á<sup>n</sup>:

3 —Vǎ dánàa-ndo sá ió làmár, te ni vǎ dánàa-ndo yutnu, te ni ñ<sup>n</sup> sá ió ñuyíú vǎ dánàa-ndo, chi cundet-ndo ndéé ná tàxi ndecu-ndí ñ<sup>n</sup> sèñá tneé nchaa ñáyiú xínu cuechi núú Tǎtá-ó Dǔtú Ndiǒxí — duha càchí espíritú-á<sup>n</sup> xǎha<sup>n</sup>-xi xii ndi cúmí espíritú xǐnutnǐ ndi cúmí xichi ñuyíú.

4 Te ní tecú dóho-í ní cáhá<sup>n</sup> ñ<sup>n</sup> sá ñi cáhá<sup>n</sup>, te ní cachí-xi sá núú ndí úxúú xichi cue ñáyiú isràél te ní xínu ñ<sup>n</sup> cièndú údico cúmí mǐl-yu ní ngúndecu sèñá tneé-yu. 5 Te núú ñ<sup>n</sup> cièndú údico cúmí mǐl ñáyiú-á<sup>n</sup>, te ní xínu úxúú mǐl cue ñani tnàhá ndíi Jùdá ní ngúndecu sèñá tneé-yu, te úxúú mǐl cue ñani tnàhá ndíi Rùbén, te úxúú mǐl cue ñani tnàhá ndíi Gǎd, 6 te úxúú mǐl cue ñani tnàhá ndíi Àsér, te úxúú mǐl cue ñani tnàhá ndíi Neftalí, te úxúú mǐl cue ñani tnàhá ndíi Manàsés, 7 te úxúú mǐl cue ñani tnàhá ndíi Mió, te úxúú mǐl cue ñani tnàhá ndíi Lèví, te úxúú mǐl cue ñani tnàhá ndíi Isàcár, 8 te úxúú mǐl cue ñani tnàhá ndíi Zabulón, te úxúú mǐl cue ñani tnàhá ndíi Chèé, te úxúú mǐl cue ñani tnàhá ndíi Benjamín, nchaandi túhú ñáyiú-á<sup>n</sup> ñi ngúndecu sèñá tneé-yu.

### *Cuéhé víhí ñáyiú ñihnu dóó cuixí<sup>n</sup>*

9 Te sátá xǎ<sup>n</sup> te ní xiní-í cuéhé víhí ñáyiú, ñáyiú ñ<sup>n</sup> ñ<sup>n</sup> nàció<sup>n</sup>, ndihí ñáyiú ñ<sup>n</sup> ñ<sup>n</sup> ñúú, ndihí ñáyiú càhá<sup>n</sup> ndi dǐí<sup>n</sup> ndí dǐí<sup>n</sup> núú tnúhu, ndihí ñáyiú ní xíndecu ñ<sup>n</sup> ñ<sup>n</sup> xichi, te nchaa ñáyiú-á<sup>n</sup> xǐnutnǐ-yu ndàa núú Yàá táxi tnùní núú xilé váha, ndihí núú Yàá cáá dàtná cáá ñ<sup>n</sup> mbéé quiti ní dánícuèhé-güedé, te vǎ yǒo ñ<sup>n</sup> ndàcu cahu ñaha xii-yu chi cuéhé víhí-yu, te

ncháa-yu xǐxǐhnu-yu mee-ni dóó cuixí<sup>n</sup>, te nùndahá-yu ncháa-yu ñ<sup>n</sup> caa ndàha yutnu ñúú. 10 Te ncháa-yu níhi xícáhá<sup>n</sup>-yu, te càchí-yu:

Yaá táxi tnùní núú xilé váha cùu-gá Ndiǒxí-ó,

te diu-gá ndihí Yaá cáá dàtná cáá ñ<sup>n</sup> mbéé quiti ní dánícuèhé-güedé ní dácacu ñihnu ñaha-gǎ xii-o núú ùhú núú ndàhú.

Duha càchí nchaa ñáyiú-á<sup>n</sup>. 11 Te nchaa espíritú xínú cuèchi núú Yǎ Ndiǒxí ní nadúcú<sup>n</sup>ndéé-xi xǐnutnǐ-xi ni càndéé núú núú Yàá núú xilé váha, ndihí núú xǐnucóo cue téé cùu sacuéhé, ndihí cue ndi cúmí quiti xǐnutnǐ-á<sup>n</sup>, te nchaa-xi ní ngúíñí xítí-xí te ní ngúnu ndeyí-xi núú Yàá núú xilé váha-á<sup>n</sup>, te nchaa-xi ní ngúíta-xi chíñuhu ñaha-xi xii-gá, 12 te càchí-xi:

Na càhá<sup>n</sup> ndáá-ndí núú yòhó Tǎtá-ndí Dǔtú Ndiǒxí sá ió càhnu cuu-n, te ndàcu-n guide-n nchaa sá váha cuíní-n, te ió váha guide-n, te ndècu ndihí-n nchaa sá xini tnùní-n,

te chíñuhu ñaha-ndí xii-n, te duca<sup>n</sup> ndàcá<sup>n</sup> táhú-ndí núú-n cuèndá nchaa sá quidé-n, te nèhe-ndí sá yíñuhu núú-n,

te tnúhu càhá<sup>n</sup>-ndí-a cùu-xi tnúhu ndáá, te diu-ni duha cáhá<sup>n</sup>-ndí ndéé núú cuàhá<sup>n</sup> núú vèxi.

Duha càchí nchaa cue espíritú-á<sup>n</sup> xǎha<sup>n</sup>-xi xii Yaá núú xilé váha-á<sup>n</sup>.

13 Te ñ<sup>n</sup> cue téé cùu sacuéhé xǐndecu-á<sup>n</sup> ñi xícá<sup>n</sup> tnúhú-dé núú-í, te càchí-dé:

—¿Yóndí cùu ñáyiú dàcá<sup>n</sup> xǐxǐhnu dóó cuixí<sup>n</sup>-á<sup>n</sup>, te ndéé véxi-yu núu dàcá<sup>n</sup> xǐndáá-yu-i? —càchí-dé.

14 Te yúhú ní xáha<sup>n</sup>-í:

—Tǎtá, ñá túú xiní-í, dico mee-n xiní-n — duha ní xáha<sup>n</sup>-í xii-dé.

Te dàtnùní ní cachí tnúhu-dé xii-í ná cúú ñáyiú-á<sup>n</sup>, te càchí-dé:

—Nchaa ñáyiú-a cùu-yu ñáyiú ní quee núú ió víhí tnúhu ndòho tnúhu ndàhú sá vǎ cùndéé iní-ó te véxi-yu iha, te cùu-yu ñáyiú sa ní nduu ndoo ní nduu nine iní-xi cuèndá sá ñi sati níñí Yàá cáá dàtná cáá ñ<sup>n</sup> mbéé quiti ní dánícuèhé-güedé, cuèndá xǎ<sup>n</sup> vitna ní ndihí-yu ní nduu cuixí<sup>n</sup> dóó xǐxǐhnu-yu. 15 Te núu xǎ<sup>n</sup> vitna

ní nduu táhũ-yu ndécú-yu núú ndécú Yá Ndiõxí Yaá táxí tñùnì núcõo núú xilé váha, te cuèi nduu cuèi niú xínú cuèchí-yu núú-gã vitna, te diu-gá xító ñaha-gã xií-yu. <sup>16</sup> Te vitna ní sáá-yu núú-gã cundécú-yu te vá ndóhó-gã-yu docó, te ní vã quìnì-gá-yu ndohó-yu yíchí-yu ndute, te ní vã quìnì-gá-yu ndohó-yu cahni nchíanchii, te ñá túú-gã ná cahni ndohó-yu. <sup>17</sup> Te duca<sup>n</sup> chi Yaá cáá dàtná cáá ì<sup>n</sup> mbéé quitì ní dánícuèhé-güedé ndécú-gã núú nútn̄i xilé váha núcóo Yá Ndiõxí Yaá táxí tñùnì, Yaá-án coto ñaha-gã xií-yu dàtná quidé ì<sup>n</sup> toli oré xító-dě mbéé-dě, te candeca ñaha-gã xií-yu quíhí<sup>n</sup> núú tõo ndute, te ndute-án cúú-xí ndute candeca iní-yu, te Yá Ndiõxí cada-gá sá vã quìnì-gá-yu tñúhu ndàhyú —duha ní cachí tñúhu téè cùu sacuéhé-ã<sup>n</sup> xii-í.

## 8

*Cuendá tìcùú sá ñí cuáha mee-ni dǐhú<sup>n</sup> cuáá<sup>n</sup>*

<sup>1</sup> Te sátá dúcá<sup>n</sup> te Yaá cáá dàtná cáá ì<sup>n</sup> mbéé quitì ní dánícuèhé-güedé ní xócánì-gã tutú líhli cùu usá ñúhú sèyú ndèé sátá tütú sá ñí nadúcú<sup>n</sup>nuu-án, te òré-án ñí cunahi sùúnì nàvii-ñá ní cuu andiu dàtná cuádava òré. <sup>2</sup> Te ní xiní-í usá tñàhá espíritú xínú cuèchi núú Yá Ndiõxí xĩnutn̄i-xi núú núcõo-gá, te ní níhí-xi ì<sup>n</sup> caa cütú xĩnehe-xi. <sup>3</sup> Te dàtnùnì ní xiní tucu-í ingá espíritú xínú cuèchi núú-gã ní quexìo-xi nehe-xi ì<sup>n</sup> tìcùú ní cuáha mee-ni dǐhú<sup>n</sup> cuáá<sup>n</sup> te ñúhu vai dúsa sá sàhá<sup>n</sup> tñámí, te ní ngúnutn̄i espíritú-án nùú ndécú sã ñí cuáha mee-ni dǐhú<sup>n</sup> cuáá<sup>n</sup> núú sácõdó sã ndúú tǎhú Yá Ndiõxí, te xíã<sup>n</sup> nútn̄i-xi ndàa núú-gã, te dúsa sá sàhá<sup>n</sup> tñámí-án cahmì espíritú-án nùú sácõdó sã ndúú tǎhú-gã-án cuendá ñúhmá dǔsa-án cundihí-xi nchaa tñúhu càhá<sup>n</sup> ñáyiu càhá<sup>n</sup> ndihí ñaha xii-gá, nchaa ñáyiu cùu cuendá-gá. <sup>4</sup> Te nùndaha espíritú-án tìcùú ñúhú dǔsa sá sàhá<sup>n</sup> tñámí càyú, te quène ñúhmá nútn̄i-xi núú Yá Ndiõxí, te ñúhmá-ã<sup>n</sup> cundihí-xi nchaa tñúhu càhá<sup>n</sup> ñáyiu càhá<sup>n</sup> ndihí ñaha xii-gá, nchaa ñáyiu cùu cuendá-gá. <sup>5</sup> Te ní quehe<sup>n</sup> espíritú-án tìcùú te ní dáchítú-xi ñúhú yódó nùú sácõdó sã ndúú tǎhú Yá Ndiõxí, te ní xiténuu-xi ñuyú, te òré duca<sup>n</sup> ñí quide-xi te ní cáhá<sup>n</sup>

víhí ñúhu, te ío dusa<sup>n</sup> ñí quide-xi ñuyú, te ní sáá ndúté, te níhi víhi ní tñáa.

*Ndi usá espíritú ní tiú-xi ì<sup>n</sup> caa cütú xĩnehe-xi*

<sup>6</sup> Te ndi usá cue espíritú xĩnehe ì<sup>n</sup> caa cütú-ã<sup>n</sup> ñí ngúndecu túha-xi cuendá tiú-xi.

<sup>7</sup> Te espíritú díhna nuu ñí tiú-xi cütú néhé-xí, te ñuyú-a ní ngoyo ñíñi dàcánuu-xi ndihí ñuhú ndihí níñi, te luha-ná te cuu dava ñuyú ní cáyú, te luha-ná te cuu dava tucu nchaa yutnu ío ñuyú ní cáyú, te luha-ná te cuu dava tucu nchaa cùhú ío ñuyú ní cáyú.

<sup>8</sup> Te espíritú cúú ùú ní tiú-xi cütú néhé-xí, te dàtná cáá ì<sup>n</sup> tñdúú cáá ì<sup>n</sup> sá ñí ngava xití làmár te nchícú<sup>n</sup> ñuhú, te luha-ná te cuu dava ndute làmár-án ñí nduu-xi níñi. <sup>9</sup> Te luha-ná te cuu dava nchaa quitì xixúhu<sup>n</sup> xití làmár-án ñí xihí-güedi, te luha-ná te cuu dava nchaa bàrcú ní quée naa-xi xití ndute.

<sup>10</sup> Te espíritú cúú ùní ní tiú-xi cütú néhé-xí, te ní ngava ì<sup>n</sup> chódínì cáhnú ndèé andiu ñuyú te nchícú<sup>n</sup> ñuhú-di, te ñuhú-án cáá dàtná cáá ñuhú iti. Te luha-ná te cuu dava nchaa yúte ní ngava chódínì-ã<sup>n</sup>, te luha-ná te cuu dava tucu nchaa núú quènihni ndute ní ngava-di. <sup>11</sup> Te chódínì-ã<sup>n</sup> nánì-dí: Yúcú Ùá. Te ndute xica nchaa yúte-án ndihí nchaa ndute quènihni-án ñí cuu úa-xi dàtná yúcú ùá, te ío cuéhé ñáyiu ní xihí sá dúcá<sup>n</sup> ñí cuu úa ndute-án.

<sup>12</sup> Te espíritú cúú cùmí ní dácàhá<sup>n</sup>-xi cütú néhé-xí, te luha-ná te cuu dava nchíanchii ñá túú ní dàyehé-xi, te duca<sup>n</sup> lùha-ná tucu cuu dava yóo ñà túú ní dàyehé-di, te duca<sup>n</sup> lùha-ná te cuu dava tucu nchaa chódínì ñà túú ní dàyehé-güedi, te luha-ná te cuu dava nduu ñà túú ní dàyehé nchíanchii, te duca<sup>n</sup> lùha-ná te cuu dava niú ñá túú ní dàyehé yóo ndihí nchaa chódínì.

<sup>13</sup> Te sátá dúcá<sup>n</sup> te ní xiní-í xícó ì<sup>n</sup> espíritú xínú cuèchi núú Yá Ndiõxí núú tàchí, te ní tecú dóho-í níhi càhá<sup>n</sup>-xi, te càchí-xi:

—Ío ndàhú ndoho nchaa ñáyiu xĩndecu ñuyú òré ná dàcahá<sup>n</sup> únì-gá cue espíritú cùmání cütú xĩnehe-xi, chí sa xĩndecu túha-ná-xi sá dácàhá<sup>n</sup>-xi!— duha càchí espíritú-án.

## 9

1 Te espíritu cúu ùhú<sup>n</sup> ní tiú-xi cútú néhé-xí, te òré-á<sup>n</sup> ní xiní-í ní quee ì<sup>n</sup> espíritu andiu te càa-xi datná cáá ì<sup>n</sup> chódíní, te ní ngava-xi ñuyíú, te ní níhí-xi ì<sup>n</sup> ndacaá néhé-xí cuèndá nacaá<sup>n</sup>-xi yuyèhe yaú cùnú víhí. 2 Te ní nacaá<sup>n</sup>-xi yaú-á<sup>n</sup> te ní ngúíta-xi ní quene ñúhmá dàtná quéné ñúhmá ì<sup>n</sup> xítnú cáhnú vîhi, te ní quene táchí ní xítenuu-xi ñúhmá-á<sup>n</sup> te ní sadí-xi núú nchícanhii, te ní cunee ñuyíú. 3 Te xítí ñúhmá-á<sup>n</sup> ní quene tíca làngóstá, te ní xítenuu-di ñuyíú, te déé<sup>n</sup>-güedi dàtná déé<sup>n</sup> nchacua. 4 Te ní ngúndecu ndîhi-güedi tnúhu ndee ìní cuèndá sá dándòho-güedi mee-ni ñáyiu ñá túú ndéé seña Yă Ndiöxí tneé-xi, te ñá túú nă cada-di nchaa yutnu ndîhi nchaa cúhú. 5 Te ñá túú tnúhu ndee ìní ndécú ndîhi-güedi sá cáhni-güedi ñáyiu, chi mee-ni sá dándòho ñaha-güedi xií-yu úhú<sup>n</sup> yóó. Te òré ní ngúíta-güedi dándòho ñaha-güedi xií-yu te tãhú tnúhú núú dáquëe-güedi ìñu-güedi dàtná quidé-xi núú dáquëe nchacua ìñu-güedi. 6 Te ñáyiu-á<sup>n</sup> xicá<sup>n</sup> tãhú-yu sá ndîhi cuú-yu cuèndá sá ïo ndòhó-yu dàquëe ñaha nchaa quiti-á<sup>n</sup> ìñu-di xií-yu te ñá cuini-xi cuú-yu, te ì<sup>n</sup> nduu ì<sup>n</sup> nduu sàni ìní-yu cuú-yu te ñá túú cuini-xi cuú-yu chi ñá túú tnúhu xihí sá cúu-xí-yu.

7 Te nchaa tíca làngóstá-á<sup>n</sup> xindáa-güedi dàtná ndáa nchaa cuáyú cue téé cuáhá<sup>n</sup> nàá, te díquí-güedi ñúhu ì<sup>n</sup> sá cáá dàtná cáá còroná ní cuáha mee-ni dîhú<sup>n</sup> cuáá<sup>n</sup>, te núú-güedi càa datná cáá núú cuè téé. 8 Te idi díquí-güedi càa datná cáá ìdi díquí ñáyiu dîhí, te núhu-güedi càa datná cáá núhu ndicaha. 9 Te yídúcú<sup>n</sup>nuu-güedi ì<sup>n</sup> sá cáá dàtná cáá càá, te ndíxí<sup>n</sup>-güedi quide-xi datná quidé-xi núú vëxi cuéhé víhí càrretá sá tãñuhu cuayú cuáhá<sup>n</sup>-güedé ndîhi-güedi núú nàa-güedé. 10 Te ndéé ìñu núú lùhmá-güedi dàtná ndéé ìñu núú lùhmá nchacua, te ìñu núú lùhmá-güedi-á<sup>n</sup> dáquëe-güedi ñáyiu dándòho ñaha-güedi xií-yu, te duca<sup>n</sup>-ni càda-güedi dándòho ñaha-güedi xií-yu ndéé xínu úhú<sup>n</sup> yóó. 11 Te nchaa tíca làngóstá-á<sup>n</sup> táxí tnùní ñáhá espíritu sá táxí tnùní yaú cùnú víhí, te

espíritu-á<sup>n</sup> nání-xí Àbadón tnúhu hèbreú, te tnúhu griégú nání-xí Àpolión, te ndi ndúú tnúhu-á<sup>n</sup> quée-xí: Sá dánàa ñáyiu.

12 Te tnúndòho-a cuu-xi tnúndòho díhna nuu, te vitna cùmání ùú-gá.

13 Te espíritu cúu ìñú ní tiú-xi cútú néhé-xí. Te núú Yă Ndiöxí nútnî ì<sup>n</sup> sá ní cuáha mee-ni dîhú<sup>n</sup> cuáá<sup>n</sup> núú sácódó sá ndúú tãhú-gã, te ndi cùmí xiqui-xi xîndecu ì<sup>n</sup> caa ndiqui, te ní tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup> nihnu ndi cùmí ndiqui-á<sup>n</sup>. 14 Te sá cáhá<sup>n</sup> nihnu ndiqui-á<sup>n</sup> xãha<sup>n</sup>-xi xîi espíritu cúu ìñú sá ní tiú cútú-á<sup>n</sup>:

—Cuáhá<sup>n</sup> nandaxi-n ndi cumí espíritu ndútú ndècu yúte càhnu nani Eúfratés — càchí sá cáhá<sup>n</sup>-á<sup>n</sup> xãha<sup>n</sup>-xi xîi espíritu-á<sup>n</sup>.

15 Te sátá dúcá<sup>n</sup> te ní nandáxí ndi cùmí cue espíritu-á<sup>n</sup> cuèndá cahni-xi cuéhé víhí ñáyiu, te sa yatni dàtná cuádava ñáyiu xîndecu ñuyíú cahni-xi, te duca<sup>n</sup> chi sa ndècu túha tnàhí cue espíritu-á<sup>n</sup> ndétú-xí sàá òré, àdi nduu, àdi yóó, àdi cuía duca<sup>n</sup> càda-xi cahni-xi ñáyiu. 16 Te ní xiní-í nchaa cue sandàdú cündîhi-xi xixódó-güedé cuáyú, te ní níhí-í tnúhu sá xínu úú cièndú millón-güedé.

17 Te duha xîndáa cue cuáyú-á<sup>n</sup> ndîhi cue téé yòdo ñaha-á<sup>n</sup> ní xiní-í: Te cue téé-á<sup>n</sup> yídúcú<sup>n</sup> nuu ì<sup>n</sup> sá yídúcú<sup>n</sup>nuu pèchú-güedé, te luha ticuèhé te luha cuìi datná cuìi andiu, te luha cuáá<sup>n</sup>, te nchaa cuáyú-á<sup>n</sup> cáá díquí-güedi dàtná cáá díquí ndicaha, te yuhu-güedi quene ñuhú ndîhi ñúhmá, ndîhi àzufre nchícú<sup>n</sup> ñuhú. 18 Te ïo cuéhé ñáyiu ñuyíú ní xihí chi luha-ná te cudavá-yu ní xihí sá cuèndá ñuhú-á<sup>n</sup> ndîhi ñúhmá-á<sup>n</sup> ndîhi àzufre-á<sup>n</sup>. 19 Te ndîhi núú lùhmá-güedi ndîhi yuhu-güedi dándòho-güedi ñáyiu, te núú lùhmá-güedi nèhe-xi díquí cõó, te diu-ni dàtná cáá cõó cáá ñihí lùhmá-güedi.

20 Te nchaa dava-gá ñáyiu ní cácu ñá túú ni xihí núú nchaa tnúndòho-á<sup>n</sup> ñá túú ní cuini-yu dàñá-yu ichi cuéhé ichi duha ndécú-yu, chi quide cahnu-ní-yu nchaa espíritu cündîhi yucu ñávãha, ndîhi nchaa sá càchí-yu cùu ndióxí ní cadúha cue téé ñuyíú-a, te dava xíá<sup>n</sup> ní cuáha mee-ni dîhú<sup>n</sup> cuáá<sup>n</sup>, te dava ní cuáha mee-ni dîhú<sup>n</sup> cuixí<sup>n</sup>, te dava ní cuáha sá nání broncé, te dava ní cuáha mee-ni yúú, te dava ní cuáha mee-ni

yùtnu, te nchaa xíà<sup>n</sup> ñá túú cùtnuní núú-xi, te ni ñá túú tècú dóho-xi, te ni ñá ndácú-xí càca-xi. <sup>21</sup> Te ni sã sáhní tnahá-yu, te ni sã sáhní ndùu tnahá-yu, te ni sã ndécú-yu ichi díí ìní, te ni sà dúhú ndàchiu<sup>n</sup> tnahá-yu ñá túú ní cuìní-yu dàñá-yu.

## 10

*Ì<sup>n</sup> espíritú xínú cuèchi núú Yă Ndiöxí néhé-xí ì<sup>n</sup> librú*

<sup>1</sup> Te sátá dúcá<sup>n</sup> te ní xiní tucu-í ì<sup>n</sup> espíritú cùnùu xinu cuechi núú Yă Ndiöxí ní quee-xi andi<sup>u</sup>, te yìhi-xi xití vícò cuãnguee-xi ñuyíú te ndàa díquí-xi ndècu ì<sup>n</sup> cóó yáhnchí, te núú-xi súúní chàhnchí dàtná chàhnchí núú nchìcanchii, te ndi ndúú díhí<sup>n</sup>-xi càa datná cáá itá ñuhú. <sup>2</sup> Te nùndaha-xi ì<sup>n</sup> librú lĩhli ní nandicá, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí. <sup>3</sup> Te espíritú-á<sup>n</sup> ñihí vĩhi ní cáhá<sup>n</sup>-xi, te ní quide-xi dàtná quidé ì<sup>n</sup> ndicaha oré cánásàa-di, te òré duca<sup>n</sup> ñihí vĩhi ní cáhá<sup>n</sup>-xi te úsá xito ní cáhá<sup>n</sup> ñuhú. <sup>4</sup> Te sátá ñí yáha ní cáhá<sup>n</sup> ñuhú-á<sup>n</sup> úsá xito, te chido tnùní-í ì<sup>n</sup> núú tùtú nàcuáa ní cáhá<sup>n</sup>-xi ní cùu, te mei òré-á<sup>n</sup> ñí tecú dóho-í ní cáhá<sup>n</sup> ì<sup>n</sup> sá ñí cáhá<sup>n</sup> andi<sup>u</sup> te càchí-xi:

—Vá chidó tnùní-n nàcuáa ní cáhá<sup>n</sup> ñuhú-á<sup>n</sup>, iní méé-ní-n ná cùhu<sup>n</sup> —duha càchí sá ñí cáhá<sup>n</sup>-á<sup>n</sup>.

<sup>5</sup> Te espíritú sá nùtnhí ì<sup>n</sup> xio sáhá-xi núú ndute làmár-á<sup>n</sup> ndihí ingá xio sáhá-xi núú ñuhu yìchí-á<sup>n</sup> ñí xiní-í ní ndonehe-xi ndaha cùha-xi, <sup>6</sup> te càchí-xi:

—Yă Ndiöxí Yaá ndécú nchàa nduu nchaa quíú Yaá ní cadúha ñuyíú, ndihí andi<sup>u</sup>, ndihí làmár, ndihí nchaa sá ió, Yaá-á<sup>n</sup> náhá ndää-gá sá yùhú càhá<sup>n</sup> ndää-í, te vá cùyàa vihi <sup>7</sup> te cada-xi nchaa nàcuáa ndùu tnúhu ndùu yuhu ní cáhá<sup>n</sup>-gá, tnúhu ní xáha<sup>n</sup>-gã xii cue téé ní xinu cuechi núú-gã, cue téé ní xóo cáhá<sup>n</sup> tnúhu-gá ndéé sanaha, chi òré ná tìu espíritú cúú úsá cútú néhé-xí, te òré-á<sup>n</sup> cada-xi nchaa nàcuáa ndùu tnúhu ndùu yuhu sá ñí xáha<sup>n</sup>-gã xii nchaa cue téé-á<sup>n</sup> —duha càchí espíritú-á<sup>n</sup>.

<sup>8</sup> Te sátá dúcá<sup>n</sup> te ní tecú tucu dóho-í ní cáhá<sup>n</sup> tucu sá ñí cáhá<sup>n</sup> andi<sup>u</sup>-á<sup>n</sup>, te càchí-xi xii-í:

—Cuahá<sup>n</sup> te quehe<sup>n</sup>-n librú lĩhli sá ñí nandicá nùndaha espíritú-á<sup>n</sup>, espíritú sá

nùtnhí ì<sup>n</sup> xio sáhá-xi núú ndute làmár, te ì<sup>n</sup> xio sáhá-xi núú ñuhu yìchí —duha càchí sá ñí cáhá<sup>n</sup>-á<sup>n</sup>.

<sup>9</sup> Te yúhú ní sáhá<sup>n</sup>-í núú ndécú espíritú-á<sup>n</sup> xicá<sup>n</sup>-í librú lĩhli nèhe-xi-á<sup>n</sup>, te ní cachí-xi:

—Iha te caxi-n, te cuvidí yuhu-n dàtná cúvidí òré xihí-n ndùdí ñúñú, dico xití-n chi cada úa-xi —càchí-xi.

<sup>10</sup> Te ní quehe<sup>n</sup>-í librú lĩhli nùndaha espíritú-á<sup>n</sup> ñí xexi-í, te yuhu-í ní quide vidí-xi dàtná vidí ndudí ñúñú, dico sátá ñí ngava-xi xití-í te ní quide úa-xi. <sup>11</sup> Te ní cachí tucu espíritú-á<sup>n</sup> xii-í:

—Dacuití cáhá<sup>n</sup> tucu-n nàcuáa càchí Yă Ndiöxí cuendá ñáyiu titní víhí nàció<sup>n</sup>, ndihí cuendá ñáyiu titní víhí ñúú, ndihí cuendá ñáyiu càhá<sup>n</sup> ndí díí<sup>n</sup> ndí díí<sup>n</sup> núú tnúhu, ndihí cuendá cue téé yìndaha ñáyiu.

## 11

*Cuendá úú cue téé càhá<sup>n</sup> nàcuáa càchí Yă Ndiöxí*

<sup>1</sup> Te ní níhí-í ì<sup>n</sup> tnuyoo nàcuáa chicùhá-í ì<sup>n</sup> sá chicùhá-í, te ní cáhá<sup>n</sup> ì<sup>n</sup> sá ñí cáhá<sup>n</sup>, te càchí-xi:

—Ndacuíñí te chicùhá-n vèhe Yă Ndiöxí, te chicùhá tucu-n núú sácódó sã ndúú tãhú-gã, te cahu-n nã daha tnahá ñáyiu chĩñuhu ñaha xii-gá xĩndecu. <sup>2</sup> Dico vá chicùhá-n ndàa quehé vehe-gá, chi xiá<sup>n</sup> ñí nduu cuendá cue ñáyiu ñá túú cùu ñáyiu isràél, te ñáyiu-á<sup>n</sup> nduu nuu-nã-yu núú ñí cuu ñúú-gá, te cada-yu dàtná càchí iní méé-yu, te údico úú yóo duca<sup>n</sup> cada-yu.

<sup>3</sup> Te yúhú tendaha-í úú tnahá cue téé cáhá<sup>n</sup> yuhu-í nàcuáa càchí Yă Ndiöxí, te úxúú ciendú únídico nduu duca<sup>n</sup> cáhá<sup>n</sup>-güedé yuhu-í cada-güedé núú-í, te cuihnu-güedé dóó tnúú sã sácúhnu cue ñáyiu ndihú iní-xi —duha càchí sá càhá<sup>n</sup>-á<sup>n</sup>.

<sup>4</sup> Te ndi ndúú cue téé-á<sup>n</sup> cúú-güedé dàtná úú yutnu òlívú sá xĩnutnhí núú Yă Ndiöxí, ndihí dàtná úú sá ndéé dité-xi, sá yìndòdo ì<sup>n</sup> caa candíl núú dité-xi ndècu tucu núú-gã, te di<sup>u</sup>-gá cúú-gã Yaá yìndàha ñuyíú. <sup>5</sup> Te ñáyiu na càni iní-xi ná cada ñaha xì-güedé te yuhu-güedé quene ñuhú cahmi ñaha-xi xii-yu, te duca<sup>n</sup> cada-güedé cahni-güedé nchaa ñáyiu na cùu úhú iní ñáhá xì-güedé.

<sup>6</sup> Te ndi ndúú-güedé ndécú ndihí-güedé



tnúhu ndee iní cada-güedé sá vǎ cúú<sup>n</sup> dǎú, te duca<sup>n</sup> càda-güedé nini cǎhá<sup>n</sup>-güedé nàcuáa cǎchí Yǎ Ndiǒxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiú titní núú tnúhu ndòho, te duca<sup>n</sup> càda-güedé ná daha xito cǎchí iní méé-güedé. <sup>7</sup> Te nà yáha sá cǎhá<sup>n</sup>-güedé nàcuáa ní cachí Yǎ Ndiǒxí, te dàvǎ-á<sup>n</sup> quene ì<sup>n</sup> quiti déé<sup>n</sup> yàú cùnú víhí sǎ ìo néhé cáá, te quiti-á<sup>n</sup> ngüíta-di nàá-di ndihí ndi ndúú cue téé-á<sup>n</sup> te cahni ñaha-di xii-güedé. <sup>8</sup> Te yiqui cùñú cue téé-á<sup>n</sup> cautùu-xi ì<sup>n</sup> tnuú ñuú cǎhnú ñuú ní sahani-güedé Xítoho Jesucristú núú cùrúxí, te diu Yaá-á<sup>n</sup> cúú Xítoho-ó ndihí-güedé, te cǎchí ñáyiú sá ñúú-á<sup>n</sup> cúú-xí dàtná ñuú Sòdomá ndihí nàció<sup>n</sup> Ègiptú. <sup>9</sup> Te úní nduu dava cautùu yiqui cuñú-güedé xián, te ñáyiú nchaa nàció<sup>n</sup>, ndihí ñáyiú nchaa ñuú, ndihí ñáyiú cǎhá<sup>n</sup> ndí dǐí<sup>n</sup> ndí dǐí<sup>n</sup> núú tnúhu, ndihí ñáyiú xíndecu nchaa xichi quiní-yu yiqui cùñú-güedé, te vǎ dáñǎ-yu nguíndǔxi. <sup>10</sup> Te nchaa ñáyiú-á<sup>n</sup> nduu vétú iní-yu sá dúcá<sup>n</sup> cùú cue téé cǎhá<sup>n</sup> nàcuáa cǎchí Yǎ Ndiǒxí-á<sup>n</sup>, te ío cudǐí iní-yu, te nándi sá cuǎha táhu tnáhǎ-yu sá cúdí<sup>n</sup> iní-yu sá dúcá<sup>n</sup> ní xihí-güedé, te duca<sup>n</sup> chí diu-güedé ní quide ío ní ndohó-yu. <sup>11</sup> Te sátá ná yǎhá úní nduu dava sá dúcá<sup>n</sup> cùú-güedé te Yǎ Ndiǒxí dandòto ñaha-gá xii-güedé, te ndacóo-güedé, te nchaa ñáyiú na quiní sá ndótó-güedé te yùhú víhí-yu. <sup>12</sup> Te ndi ndúú cue téé-á<sup>n</sup> tecú dóho-güedé cǎhá<sup>n</sup> ì<sup>n</sup> sá cǎhá<sup>n</sup> ndéé andiu, te cùñaha-xi xii-güedé:

—Chí táquene iha —duha cùñaha sǎ cǎhá<sup>n</sup>-á<sup>n</sup> xii-güedé.

Te cue téé-á<sup>n</sup> quǐhu-güedé ì<sup>n</sup> xití vícò caa-güedé andiu, te nchaa ñáyiú cùu úhú iní ñáhǎ xii-güedé quiní ñáhǎ-yu xii-güedé caa-güedé andiu. <sup>13</sup> Te òré-á<sup>n</sup> níhi víhi tnáa ñuyíú, te úxí xichi cùu-xi ñuú núú cùndecu-güedé-á<sup>n</sup> te ì<sup>n</sup> xichi ñuú-á<sup>n</sup> naa, te cuú úsá mǐl ñáyiú, te nchaa dava-gá ñáyiú cácu vǎ cùú yùhú víhí-yu, te cachí-yu sǎ ìo cǎhnu cuu Yǎ Ndiǒxí Yaá ndécú andiu.

<sup>14</sup> Te tnúndòho-a cuu-xi tnúndòho cuu úú yáha, te vitna sa ndètu víi-ñǎ tucu sǎá tnúndòho cuu uní.

*Espiritú cúú ùsá tǐú-xi cútú néhé-xi*

<sup>15</sup> Te espíritu cúú ùsá ní tǐú-xi cútú néhé-xi, te òré-á<sup>n</sup> ní tecú níhi ní cǎhá<sup>n</sup> titní sá ní cǎhá<sup>n</sup> andiu, te cǎchí-xi:

Nchaa sá cúú cuendá nchaa ñáyiú ñuyíú táxí tnùní-yu ní cùu ní nduu cuendá Tǎtá-ó Dútú Ndiǒxí táxí tnùní-gá, Te tnàhá Yaá ní tendaha-gǎ ní sǎhá<sup>n</sup> ñuyíú táxí tnùní-gá nchaa xiǎ<sup>n</sup>,

te diu-gá taxi tnùní-gá ní caa ní quíhí<sup>n</sup>.

Duha ní cǎhá<sup>n</sup> nchaa sá ní cǎhá<sup>n</sup>-á<sup>n</sup>. <sup>16</sup> Te ndi òcò cúmí cue téé sacuéhé xínucóo núú xilé váha ní ngüíñí xiti-güedé núú Yǎ Ndiǒxí, te ní nuu núú-güedé ndàa núú ñúhú te ní ngüíta-güedé chíñúhu ñaha-güedé xii-gá, <sup>17</sup> te cǎchí-güedé:

Ío ndàcá<sup>n</sup> táhu-ndí núú yòhó Dútú Ndiǒxí, Yaá ndácú quide nchaandi túhú sá vǎha, te diu-ni-n ndècu-n ndéé cùtnàhá ní ngáva ñuyíú, te diu-ni-n ndècu-n vitna, te diu-ni-n cùndecu-n ndéé núú cuáhá<sup>n</sup> núú véxi, te ío cǎhnu cuu-n te ní ngüíta-n ìo-gá táxí tnùní-n.

<sup>18</sup> Te nchaa ñáyiú xíndecu ñuyíú xícudé<sup>n</sup>-yu núú-n,

te vitna ní sǎá nduu dándohó-n-yu chí ñá túú cùu váha iní-n núú-yu,

te cada ndáá-n cuèchi nchaa ñáyiú sa ní xihí,

te ní sǎá tucu nduu cuǎñaha-n sǎ ndúú tǎhú nchaa ñáyiú ní xinu cuechi núú-n ní cǎhá<sup>n</sup>-yu tnúhu-n, ndihí nchaa dava-gá ñáyiú cùu cuendá-n, chí ñáyiú-á<sup>n</sup> néhé-yu sá yíñúhu núú-n,

te cuèi ñáyiú cùnunu ndihí ñáyiú ñá túú cùnunu cuǎñaha-n sǎ ndúú tǎhú-yu,

te ní sǎá tucu nduu dànaa-n nchaa ñáyiú sahani tnaha ñáyiú-xi.

Duha cǎchí ndi òcò cúmí cue téé sacuéhé-á<sup>n</sup> xǎha<sup>n</sup>-güedé xii Yǎ Ndiǒxí.

<sup>19</sup> Te ní xiní-í ní nacaá<sup>n</sup> yuyèhe vehe Yǎ Ndiǒxí andiu, te xití vehe-gá-á<sup>n</sup> ní xiní-í ndécú cǎjá ñúhú sǎ yódó tnùní nàcuáa ní cundáá cada-gá sá cúú-xí ñáyiú, te òré-á<sup>n</sup> ní xiní-í ní sǎá ndúté, te ní cǎhá<sup>n</sup> ñúhu te ío dusa<sup>n</sup> ní quide-xi, te níhi víhi ní tnáa, te súuní cǎhnu dáú ñíñí ní cuu<sup>n</sup>.

## 12

*Cuendá ì<sup>n</sup> ñadǐhí ndihí cuendá ì<sup>n</sup> quiti déé<sup>n</sup> nání dragón*

1 Te ío vihi ní quide-xi ñ̃ sá ñ̃ quide-xi andïu, te ní xiní-í ñ̃ ñ̃adihí te dóó níhnú-áñ quide-xi datná quidé-xí nũú nchĩcanchii, te ndàa núú sàhá-a<sup>n</sup> quide-xi datná quidé-xí nũú yóó, te ñ̃uhu ñ̃ coroná díquí-a<sup>n</sup> te ndèé úxúú chódíní. 2 Te ñ̃uhu déhe-a<sup>n</sup> te càna saa-a<sup>n</sup> sá quidé úhú ñ̃há-xí xì-a<sup>n</sup> chí sa ndètu vií-nã cacu déhe-a<sup>n</sup>. 3 Te dātñuní ní quide tucu-xi sá ñ̃ quide-xi andïu, te ní xiní-í ñ̃ quitì càhnu quitì ticuehé, quitì déé<sup>n</sup> nání dràgón, te ndèé úsá díquí-di ndihì úxí ndiqui-di, te ñ̃ caa coroná ñ̃uhú ñ̃ caa díquí-di-áñ. 4 Te quitì-áñ luha-ná te cuu dava nchaa chódíní dāngòyo-di ñ̃uyúú ndihì lúhmá-di, te quitì-áñ ñ̃ ngúnu tñ̃i-di núú ñ̃aha ndètu vií-nã cacu déhe-xi-áñ cuendá caxi-di déhe-a<sup>n</sup> òré cacu ñ̃ cùu. 5 Te ñ̃aha-áñ ñ̃ cacu déhe-a<sup>n</sup> te téé cùu-dé, te té líhli-áñ ío cunuu-dé taxi tñ̃uní-dé nchaa ñ̃áyiú ñ̃uyúú, te mee Yã Ndiòxí ní nacuaca ñ̃aha-gã xii té líhli-áñ cuendá cundecu ndihì ñ̃aha-dé xii-gã núú ndécú-gã táxi tñ̃uní-gã. 6 Te ñ̃adihí-áñ ñ̃ xinu-a<sup>n</sup> cuáhá-a<sup>n</sup> xití yucu núú ñ̃ quide túha Yá Ndiòxí cundecu-a<sup>n</sup> cuendá xíá<sup>n</sup> ñ̃hí-a<sup>n</sup> caxi-a<sup>n</sup>, te duca<sup>n</sup> ñ̃hí-a<sup>n</sup> sá caxí-áñ úxúú ciendú únídico nduu chí duca<sup>n</sup> nduu cundecu-a<sup>n</sup> xíá<sup>n</sup>.

7 Te sátá dúcá<sup>n</sup> te andïu ñ̃ xiní-í espíritú cúnúu xinu cuechi núú Yã Ndiòxí nání Mìguél, ndihì nchaa dava-gá espíritú cúndihì-xi, te nchaa espíritú-áñ nãá-xi ndihì quitì déé<sup>n</sup> nání dràgón ndihì nchaa espíritú cúndihì-di. 8 Te quitì-áñ ñ̃à túú ní ndàcu-di ndihì nchaa espíritú cúndihì-di, te ñ̃à túú ní ñ̃hí-gã-di núú cúndècu-di andïu ndihì nchaa espíritú cúndihì-di-áñ. 9 Te cue espíritú xínú cuèchi núú Yã Ndiòxí-áñ ñ̃ dāngává-xí quitì déé<sup>n</sup> nání dràgón-áñ ndihì nchaa espíritú cúndihì-di ñ̃uyúú, te quitì-áñ cúú-dí mèi sàcuíhná àdi sá càchí-ó cùu yucu ñ̃ávãha, te ñ̃ diu xíá<sup>n</sup> ní dāndàhú-xi ñ̃áyiú ñ̃hí ñ̃uyúú, te ñ̃ diu-ñi xíá<sup>n</sup> ní nduu-xi cóó ñ̃ dāndàhú-xi ñ̃áyiú ndéé sanaha.

10 Te ní tecú dóho-í níhi ní cáhá<sup>n</sup> tucu ñ̃ sá ñ̃ cáhá<sup>n</sup> andïu, te càchí-xi:

—Vitna te Yá Ndiòxí ní quide-gá ní ngúndecu ñ̃áyiú ndihì-gá, te ío càhnu cuu-gá, te ío tàxi tñ̃uní-gá, te tñ̃há Crístú Yáá ní tendaha Yã Ndiòxí ní quixi ñ̃uyúú-a ío tàxi tñ̃uní-gá, te duca<sup>n</sup> chí sa ní xócuíñí sàcuíhná

sã sũúní nũnúu sacá<sup>n</sup> cuèchi núú Tātá-ó Dütú Ndiòxí cuendá nchaa ñ̃áyiú ndècu ndihì-o ichi-gá, te nduu niú duca<sup>n</sup> sàcá<sup>n</sup> cuèchi-xi núú-gã cuendá-yu ñ̃i cùu. 11 Dico ní ndacú-yu ní cunúú-yu núú sàcuíhná sã dúcá<sup>n</sup> sàcá<sup>n</sup> cuèchi cuendá-yu-áñ ní cùu, te duca<sup>n</sup> ñ̃i cunúú-yu sá cuendá Yáá cáá dātñá cáá ñ̃ mbéé quitì ní dāñcuèhé-güedé, chí Yáá-áñ ñ̃ sati ñ̃hí-gã te ní xíhí-gá sá cuendá-yu, te duca<sup>n</sup> ñ̃i cunuu tucú-yu sá cuendá sá sàndáá iní ñ̃há-yu xii Yáá-áñ, te ñ̃à túú ní yuhú-yu cuú-yu sá cuendá-gã.

12 Te vitna ío chí cúdí ñ̃ iní nchaa nchòhó espíritú xínú cuèchi núú Yã Ndiòxí, ndihì nchaa nchòhó ñ̃áyiú ndècu andïu, dico ñ̃ndàhú ní cuu nchaa ñ̃áyiú xĩndecu ñ̃hí ñ̃uyúú! Chí sũúní cùdéé<sup>n</sup> sàcuíhná ñ̃ ngava-xi te nāñdi cada ñ̃aha-xi xii-yu, te duca<sup>n</sup> chí cùtñuní iní-xi sá sàcú duha-ná nduu cúdí-xi cundecu-xi —duha càchí sá ñ̃ cáhá<sup>n</sup> andïu.

13 Te sátá ñ̃i quee quitì déé<sup>n</sup> nání dràgón-áñ andïu ñ̃i ngava-di ñ̃uyúú quitì cùu mèi sàcuíhná-ñ̃, te quitì-áñ ñ̃i chinchícú-di ñ̃adihí ñ̃aha ní cacu déhe téé-xi-áñ. 14 Te ñ̃adihí-áñ ñ̃i nduu táhú-a<sup>n</sup> ní quene úú ndíxí-a<sup>n</sup>, te càa datná cáá ndíxí<sup>n</sup> ñ̃i yacòlo càhnu vihi cuendá ndava-a<sup>n</sup> núhú-a<sup>n</sup> yucu núú ñ̃i cachí Yã Ndiòxí cundecu-a<sup>n</sup>, te yacá<sup>n</sup> cundecu-a<sup>n</sup> úní cuíá dava cuendá sá vã ñ̃hí ñ̃háá quitì déé<sup>n</sup> quitì nání dragón-áñ te xíá<sup>n</sup> ñ̃hí-a<sup>n</sup> sá caxí-áñ, te quitì-áñ cúú tucu-di datná ñ̃i cóó déé<sup>n</sup>. 15 Te quitì-áñ ñ̃i quene cuéhé ndute yuhu-di, te ndute ní quene yuhu-di-áñ ñ̃i cuu-xi ñ̃i yúte, te duca<sup>n</sup> ñ̃i quide-di cuendá ndute-áñ cuido-xi ñ̃adihí-áñ ní cùu. 16 Te ñ̃uhu yìchí ní chindee-xi ñ̃adihí-áñ, chí ní ndátá te ní quée naa-ñi ndute ní quene yuhu quitì-áñ. 17 Te sátá dúcá<sup>n</sup> ñ̃i quide-xi xíá<sup>n</sup> ní cudéé<sup>n</sup> víhí quitì-áñ nũú ñ̃adihí-áñ, te ní xica-di cuáhá-di núú xĩndecu nchaa dava-gá cue déhe ñ̃adihí-áñ cuendá nãá ndihì ñ̃aha-di, te ñ̃áyiú-áñ cúú-yu ñ̃áyiú tñ̃i nchaa tñ̃uhu càhá<sup>n</sup> Yã Ndiòxí, te nchícú<sup>n</sup> ñ̃i hnú-yu nchaa tñ̃uhu sá càhá<sup>n</sup> váha cuendá Xítóhó Jesucrístú.

## 13

*Cuendá úú quitì*

1 Te yúhú ní ngúnu tñí-í yuhu làmár, te ní xiní-í ní quene ì<sup>n</sup> quitì te ndèé úsá díquí-dì te úxí ndiqui-dì, te núú ì<sup>n</sup> ì<sup>n</sup> ndiqui-dì-án ndécú ì<sup>n</sup> caa coroná. Te ì<sup>n</sup> ì<sup>n</sup> díquí-dì-án ndèé tñúhu sá càhá<sup>n</sup> úhú-xi cuendá Yá Ndiòxí. 2 Te quitì-án cáá-dí datná cáá cuiñí, te sáhá-dì càa datná cáá sáhá òso, te yuhu-dì càa datná cáá yùhu ndicaha. Te quitì déé<sup>n</sup> nání dràgón ní sáñaha-dì tñúhu ndee ìní xii quitì-án cuendá taxi tñúni víhí-dí, te dràgón-án ñ sáñaha-dì núú ndécú-dí tàxi tñuní-dì xii quitì ní quene xití làmár-án, te duca<sup>n</sup> ñ quide-dì cuendá sá ñihí ndèé quitì-án cunuu-dì. 3 Te ì<sup>n</sup> díquí quitì ní quene xití làmár-án càhú víhí càa ní nícuèhé, te sa ndètu víí-nǎ cuú-dì sànuu dico ní ndúha-dì, te ñihí ñuyúú ñ ñihí ñáyiu tñúhu sá dúcá<sup>n</sup> ñ cuu, te ío ní cuñúhu-yu te ní tuhá-yu quitì-án. 4 Te nchaa ñáyiu-án ñ cachí-yu sá ìo càhnu cuu quitì déé<sup>n</sup> quitì nàni dragón-án cuendá sá ñ sáñaha-dì tñúhu ndee ìní sá táxi tñuní quitì ní quene xití làmár-án, te ní ngúita-yu ní chiñuhú-yu quitì ní quene xití làmár-án, te càchí-yu:

—Vá yõo ì<sup>n</sup> nǔtnahá ñáhá xii quitì-a, te ñi vǎ yõo ì<sup>n</sup> ndacu nàá ndihí ñaha xii-dì — cachí-yu.

5 Te ní ñihí-dì tñúhu ndee ìní sá càhá<sup>n</sup> úhú-dì Yá Ndiòxí, te cada càhnu-dì mee-dì, te údico úú yóó duca<sup>n</sup> ñ ñihí-dì tñúhu ndee ìní-án cunuu-dì. 6 Te duca<sup>n</sup> ñ quide-dì ní càhá<sup>n</sup> úhú-dì Yá Ndiòxí ndihí cuendá nchaa sá quidé-gǎ, te ñu-ni duca<sup>n</sup> ñ càhá<sup>n</sup> úhú-dì núú ndécú-gǎ, te ní càhá<sup>n</sup> úhú tucu-dì nchaa ñáyiu ndècu ndihí-gá andiu. 7 Te duca<sup>n</sup> ñ ñihí-dì tñúhu ndee ìní sá nàá-dì ndihí nchaa ñáyiu cùu cuendá Yá Ndiòxí, te duca<sup>n</sup> nàá ndihí ñaha-dì xii-yu ndèé òré vá ndácú-gǎ-yu nàá ndihí ñàhá-yu xii-dì, te tñàhá ní ngúndecu ndihí-dì tñúhu ndee ìní sá táxi tñuní-dì ñáyiu nchaa nàción, ndihí ñáyiu nchaa ñuú, ndihí nchaa ñáyiu càhá<sup>n</sup> ndí díí<sup>n</sup> ndí díí<sup>n</sup> núú tñúhu, ndihí ñáyiu xíndecu nchaa xichi. 8 Te cue ñáyiu ñihí ñuyúú ñ cachí-yu sá ìo càhnu cuu quitì-án, te ñáyiu-án cúú-yu ñáyiu ñá túú yòdo tñuní núú tütú Yá cáá datná cáá ì<sup>n</sup> mbéé quitì ní dánicuèhé-güedé Yá ní xihí ní cùu te ní ndoto. Te ndèé cútnàhá ní ngáva ñuyúú sa

yòdo tñuní ñáyiu naníhí tàhú, dico ñáyiu càchí sá ìo càhnu cuu quitì-án ñá túú yòdo tñuní-yu núú tütú-gá.

9 Te nchaa nchòhó ñáyiu xíndedóho chí cùndedóho váha nchaa nàcuáa cuáhá<sup>n</sup> tñúhu-án. 10 Te nchaa ñáyiu na chihí tñaha ñáyiu-xi vecaá te sáá nduu te quihí<sup>n</sup>-yu tñàhá-yu vecaá, te nchaa ñáyiu sàhni tñaha ñáyiu-xi ndihí yuchí te ñu-ni ndihí yuchí cuú-yu tñàhá-yu, te xíá<sup>n</sup> núu ío xini ñuhu-xi sá ncháá ñáyiu cùu cuendá Yá Ndiòxí cunduu càhnu ñni-yu, te quíndáá ñi ñáhá-yu xii-gá.

11 Te ní xiní tucu-í ingá quitì ní quene-dì núú ñuhu yìchí, te ndèé úú ndiqui-dì te càa datná cáá ndiqui canerú, te càhá<sup>n</sup>-dì datná càhá<sup>n</sup> quitì déé<sup>n</sup> nání dràgón. 12 Te datná ndécú ndihí quitì ní quene xití làmár-án tñúhu ndee ìní sá táxi tñuní-dì duca<sup>n</sup> ndècu ndihí quitì ní quene ñuhu yìchí-án tñúhu ndee ìní taxi tñuní-dì cada-dì núú quitì ní quene xití làmár-án, te quitì ní quene ñuhu yìchí-án ñ quide yica-dì sá ncháá ñáyiu xíndecu ñihí ñuyúú chiñuhú-yu quitì ní quene xití làmár-án, quitì càhú víhí ñ tñahá ní nícuèhé te ní ndúha-dì. 13 Te quitì ní quene xití ñuhu yìchí-án ñ quide-dì titní núú sǎ vǎ yõo tñàhí ndàcu cada, te nchaa ñáyiu ní xiní-yu sá ndèé andiu ñ dǎngóyó-dí ñùhú ñuyúú. 14 Te sá dúcá<sup>n</sup> ñ ngúndecu ndihí-dì tñúhu ndee ìní ní quide-dì nchaa xíá<sup>n</sup> ní quide-dì núú quitì ní quene xití làmár-án, te sá dúcá<sup>n</sup> ñ quide-dì te xíá<sup>n</sup> ní dándàhú-dì nchaa ñáyiu xíndecu ñihí ñuyúú, te ní xáha<sup>n</sup>-dì xii-yu sá ndúcú-yu ì<sup>n</sup> sá cadúha-yu nàcuáa-ni càa nacuáa-ni ndùu quitì ní quene xití làmár-án, quitì càhú víhí ñ tñahá ní nícuèhé díquí-xi-án ñ quée machití te ñá túú ní xihí-dì chí ní xíndecu-ni-dì. 15 Te quitì ní quene xití ñuhu yìchí ní ngúndecu ndihí tucu-dì tñúhu ndee ìní sá chíhí-dí ìní sá ñ cadúha-yu-án, sá ñ natavá-yu datná cáá quitì ní quene xití làmár-án, te duca<sup>n</sup> ñ quide quitì-án cuendá càhá<sup>n</sup> sá ñ cadúha-yu-án, te xíá<sup>n</sup> cada-xi cuú nchaa ñáyiu ñá túú ní cuñí chiñuhú ñaha xii-dì. 16 Te quitì ní quene xití ñuhu-án quidé-dí sǎ ncháá ñáyiu ngúndéé ì<sup>n</sup> tñuní ndaha

cuhá-yu àdi tneé-yu, te duca<sup>n</sup> ñí quide-di cuèi ñáyiu cùnūu te cuèi ñáyiu ñá túú cùnūu, te cuèi ñáyiu cuica te cuèi ñáyiu ndàhú, te cuèi ñáyiu ñá túú dàñá quee núú chíú<sup>n</sup> pàtróó<sup>n</sup>-xi, te cuèi nchaa ñáyiu dàñá quée núú chíú<sup>n</sup> pàtróó<sup>n</sup>-xi nchaa<sup>n</sup>-yu duca<sup>n</sup> ñí ngúndeé tnuní ñí<sup>n</sup>-yu. <sup>17</sup> Te ní quide-di sá ncháá ñáyiu ñá túú ndèe tnuní ñí<sup>n</sup>-xi vá cúú cuáá<sup>n</sup>-yu sá càchí iní-yu te ni vǎ cúú dícó-yu ñí<sup>n</sup> sá cuìní-yu dícó-yu, te tnuní-á<sup>n</sup> cúú-xí diu quiti ní quene xití làmár-á<sup>n</sup> àdi númerú-di. <sup>18</sup> Te xini ñuhu-xi sá ncháá ñáyiu ío váha cùtnuní iní-xi ío váha cuáha-yu cuendá nàcuáa quée-xi númerú quiti-á<sup>n</sup>, te númerú-á<sup>n</sup> cúú-xí ñí<sup>n</sup> ciendú únídico ñí<sup>n</sup>, te cùu-xi cuendá ñí<sup>n</sup> ñáyiu ñuyíú.

## 14

### *Cuendá ñí<sup>n</sup> ciendú údico cúmí mǐl ñáyiu*

<sup>1</sup> Te sátá dúcá<sup>n</sup> te ní xiní-í Yáa cáa dàtná cáa ñí<sup>n</sup> mbéé quiti ní dánícuèhé-güedé nùtní<sup>n</sup>-gá ñí<sup>n</sup> yucu ñuú nání Sión ndécú àndiū, te nutní<sup>n</sup>-gá ndihí ñí<sup>n</sup> ciendú údico cúmí mǐl ñáyiu, te tneé-yu ndèe diu-gá ndihí diu tátá-gǎ Dútú Ndióxi. <sup>2</sup> Te ní tecú dóho-í ní quide-xi andiū dàtná quidé-xi núú xíca cuèhé víhí ndüte, te quide tucu-xi datná quidé-xi òré níhi víhi cahá<sup>n</sup> ñúhu, te quide tucu-xi datná quidé-xi òré cuéhé víhí ñáyiu càní-yu àrpá. <sup>3</sup> Te ní tecú dóho-í xixita yuhu sǎ xítá yùhu núú Yáa núcõo núú xilé váha, ndihí núú ndi cùmí cue quiti xínutní<sup>n</sup>-á<sup>n</sup>, ndihí núú nchaa cue tée cùu sacuéhé xínucóo-á<sup>n</sup>, te xixita-xi ñí<sup>n</sup> ndudú sáa. Te mee-ni cuè ñáyiu ñí<sup>n</sup> ciendú údico cúmí mǐl-á<sup>n</sup> quée díquí-yu ndudú-á<sup>n</sup>, te ñáyiu-á<sup>n</sup> cúú-yu ñáyiu ní dácãcu nihnu ñaha Yáa cáa dàtná cáa ñí<sup>n</sup> mbéé quiti ní dánícuèhé-güedé núú ñáyiu ndècu ichi cuehé ichi duha xíndecu ñuyíú, te vá yõo ñí<sup>n</sup>-gá quée díquí-xi ndudú sáa-á<sup>n</sup> chi mee-ni ñáyiu ní cácu nihnu-á<sup>n</sup> quée díquí-yu. <sup>4</sup> Te ñáyiu ní cácu nihnu-á<sup>n</sup> cúú-yu ñáyiu ñá túú ní xíndecu ichi díí iní, te cùu-yu ñáyiu càndoo canine iní-xi, te ndèni ní cuu cuáhá<sup>n</sup> Yáa cáa dàtná cáa ñí<sup>n</sup> mbéé quiti ní nícuèhé-á<sup>n</sup>, te duca<sup>n</sup>-ni ndèndaha ñàhá-yu xii-gá cuáhá<sup>n</sup>, te ñáyiu-á<sup>n</sup> ñí cácu nihnú-yu núú nchaa ñáyiu ñuyíú, ñáyiu ndècu ichi

cuehé ichi duha, te ñáyiu ní cácu nihnu-á<sup>n</sup> cúú-yu ñáyiu díhna nuu ñí nduu táhú Yá Ndióxi cuu cuendá-gá ndihí Yáa cáa dàtná cáa ñí<sup>n</sup> mbéé quiti ní dánícuèhé-güedé. <sup>5</sup> Te cùu-yu ñáyiu ñá túú càhá<sup>n</sup> ní ñí<sup>n</sup> tnúhu ndehnde, te càndoo canine iní-yu ndècú-yu núú núcõo Yá Ndióxi táxi tnuní-gá.

### *Cuendá úní cue espíritú xínú cuèchi núú Yá Ndióxi*

<sup>6</sup> Te sátá dúcá<sup>n</sup> te ní xiní-í ñí<sup>n</sup> espíritú xínú cuèchi núú Yá Ndióxi xícó-xí cuádava andiū, te ndècu ndihí-xi tnúhu sá càhá<sup>n</sup> nàcuáa naníhí tàhú-ó, tnúhu sá ñá túú tnàhí ndihí nihnu te tnúhu-á<sup>n</sup> danèhé espíritú-a<sup>n</sup> nchaa ñáyiu ndècu ñuyíú, ñáyiu nchaa nació<sup>n</sup>, ndihí ñáyiu nchaa ñuú, ndihí nchaa ñáyiu càhá<sup>n</sup> ndí díí<sup>n</sup> ndí díí<sup>n</sup> núú tnúhu, ndihí ñáyiu xíndecu nchaa xichi. <sup>7</sup> Te níhi ní cáhá<sup>n</sup>-xi te càchí-xi:

—Nchaa nchòhó ñáyiu ndècu ñuyíú canehe-ndo sǎ yíñùhu núú Yá Ndióxi, te cachí-ndó sǎ ío càhnu cuu-gá chi sa ní sáa nduu càda ndáa-gá nchaa cuèchi-ndo, te chiñuhu-ndo-gǎ chi diu-gá ní cadúha-gá andiū, ndihí ñuhu yíchí, ndihí làmár, ndihí nchaa ndóhoyo —duha càchí espíritú-á<sup>n</sup>.

<sup>8</sup> Te nchícú<sup>n</sup> tucu ingá espíritú xínú cuèchi núú Yá Ndióxi, te càchí-xi:

—Vitna ní naa ñuú Babiloniá ñuú ío cùnūu, te duca<sup>n</sup> ñí naa chi cue ñáyiu ñuú-á<sup>n</sup> ñí quidé-yu ní xíta nihnu nchaa ñáyiu nihí ñuyíú, chi ní sanu ichi ñàhá-yu ichi cuèhé ichi duha —duha càchí espíritú-á<sup>n</sup>.

<sup>9</sup> Te nchícú<sup>n</sup> tucu ingá espíritú xínú cuèchi núú Yá Ndióxi te níhi càhá<sup>n</sup>-xi, te càchí-xi:

—Nchaa ñáyiu chiñuhu ñaha xii quiti ní quene xití làmár, ndihí sá ñí natava ñàhá-yu nàcuáa càa-di-á<sup>n</sup>, ñáyiu ní dàñá mèe-xi ní ngúndeé tnuní ndahá-yu àdi tneé-yu, <sup>10</sup> ñáyiu-á<sup>n</sup> sùúni dándoho ñaha Yá Ndióxi xii-yu chi ío cùdée<sup>n</sup>-gǎ, te duca<sup>n</sup> ío dándoho ñaha-gá xii-yu chi daquihí<sup>n</sup> ñàhá-gǎ xii-yu núú ñúhú núú ñúhú àzufre càyú-xi, te núú cuè espíritú xínú cuèchi núú-gǎ duca<sup>n</sup> dándoho ñaha-gá xii-yu, ndihí núú Yáa cáa dàtná cáa ñí<sup>n</sup> mbéé quiti ní dánícuèhé-güedé.

<sup>11</sup> Te ní caa ní quihí<sup>n</sup> quene ñúhmá núú dúcá<sup>n</sup> cùndecú-yu ndohó-yu-á<sup>n</sup>, te cuèi nduu cuèi niú duca<sup>n</sup> ndòhó-yu. Te duca<sup>n</sup>



ndòho nchaa ñáyiú chìnúhu ñaha xii quitì ní quene xití làmár, ndìhi sá ñí natava ñàhá-yu nàcuáa càa-di-á<sup>n</sup>, te diu-ni ñáyiú-á<sup>n</sup> cúú-yu ñáyiú ní ngúndéé tñuní ndaha-xi àdi tneé-xi —duha càchí espíritú-á<sup>n</sup>.

12 Te xíá<sup>n</sup> xíní ñùhu-xi sá ncháá ñáyiú cùu cuendá Yă Ndiôxí cunduu càhnu iní-yu, chi diu-ni-yu cúú-yu ñáyiú tñi nchaa tñúhu càhá<sup>n</sup>-gá, te ni yùhu ni iní-yu sàndáá iní-yu Xítóhó Jesucristú.

13 Te sáta dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> sá ñí cáhá<sup>n</sup> andiú, te càchí-xi:

—Chido tñuní-n ñ<sup>n</sup> núú tütú nàcuáa na càhá<sup>n</sup>-í-a. “Není vitna ío váha táhú nchaa ñáyiú sàndáá iní tñúhu Xítóhó Jesucristú te xihí-yu” —duha càchí sá ñí cáhá<sup>n</sup>-á<sup>n</sup>.

Te Espíritú Yă Ndiôxí ní cáhá<sup>n</sup>-xi, te càchí-xi:

—Ndáá, chi ndetatú-yu chi ñá túú-gă nágá chiú<sup>n</sup> ndohó-yu cadá-yu, te Yă Ndiôxí sa nàha-gá nchaa nàcuáa ndùu chiú<sup>n</sup> ní quidé-yu —duha càchí Espíritú-gá.

### *Nchaa sá cúú nùú ñúhú*

14 Te sáta dúcá<sup>n</sup> te dàtnùnì ní xíní-í ñ<sup>n</sup> vícò cuixí<sup>n</sup>, te núú vícò-á<sup>n</sup> ñí xíní-í núcòo ñ<sup>n</sup> Yaá, te càa-gá dàtná cáá ñ<sup>n</sup> téé ñuyíú, te díquí-gă ñúhú ñ<sup>n</sup> coroná ní cuáha mee-ni dǐhú<sup>n</sup> cuáá<sup>n</sup>, te nùndaha-gá ñ<sup>n</sup> yuchí ndíquí te súní dǐé<sup>n</sup>. 15 Te ní xíní-í ñ<sup>n</sup> espíritú xínú cuèchi núú Yă Ndiôxí ní quee-xi xití vehe-gá, te níhi ní cáhá<sup>n</sup>-xi xăha<sup>n</sup>-xi xii Yaá núcòo núú vícò-á<sup>n</sup>:

—Sa ní cuu nàquehndé-n nchaa sá ñí cuu ñuyíú ndìhi yuchí ndíquí-n, chi sa ní cuu núcòo tñaha-xi —duha càchí espíritú-á<sup>n</sup> xăha<sup>n</sup>-xi xii Yaá-á<sup>n</sup>.

16 Te Yaá núcòo núú vícò-á<sup>n</sup> ñí dáyăha ndodo-gá yuchí ndíquí-gă núú ñuyíú ñí nataxi tñaha-gá nchaa sá ñí cuu.

17 Te ní xíní tucu-í ingá espíritú xínú cuèchi núú Yă Ndiôxí ní quee-xi xití vehe-gá sá cáá àndiú, te nùndaha-xi tñahá-xi ñ<sup>n</sup> yuchí ndíquí dǐé<sup>n</sup>. 18 Te ní xíní tucu-í ní quee tucu ingá espíritú xínú cuèchi núú Yă Ndiôxí núú núnñi núú sácòdó să ndúú táhú-gă, te ndècu ndìhi-xi tñúhu ndee ìní táxi tñuní-xi ñuhú, te espíritú-á<sup>n</sup> níhi ní cáhá<sup>n</sup>-xi xăha<sup>n</sup>-xi xii espíritú néhé yùchí ndíquí dǐé<sup>n</sup>-á<sup>n</sup>:

—Ngúta naquehndé-n ndìhi yuchí ndíquí-n ndéhé yoho yàha stilé sá ío ñuyíú chi sa ní cuu nàtehndé —duha càchí espíritú-á<sup>n</sup> xăha<sup>n</sup>-xi xii espíritú néhé yùchí ndíquí-á<sup>n</sup>.

19 Te espíritú néhé yùchí ndíquí-á<sup>n</sup> ñí dáyăha ndodo-xi yuchí ndíquí-xi nùú ñuyíú ñí nàquehndé-xi nchaa ndéhé yoho yàha stilé, te ní chihi-xi ñ<sup>n</sup> xichi núú ñí chihi-xi cuendá xíá<sup>n</sup> quihni-xi quee ndudí-xi, te sá dúcá<sup>n</sup> ñí quide-xi xíá<sup>n</sup> cùtnùnì iní-ó să ío cùdée<sup>n</sup> Yă Ndiôxí núú ñáyiú ñuyíú. 20 Te ndéhé yoho yàha stilé-á<sup>n</sup> ñí quihni-xi ñ<sup>n</sup> xio yuhu ñúú, te ndudí ndéhé yoho yàha stilé-á<sup>n</sup> ñí nduu-xi níñí te ní quee-xi núú quíhni ñihnu espíritú-á<sup>n</sup>. Te únì cièndú mǐl mǐtrú ní xica níñí-á<sup>n</sup>, te dàtná ñ<sup>n</sup> mǐtrú dava ní sáá cuehnu níñí-á<sup>n</sup> ñí xica-xi.

## 15

### *Úsá tñúndòho*

1 Te ío vǐhi ní quide-xi ñ<sup>n</sup> sá ñí quide-xi andiú te ní cuñúhu vǐhi-í, te ní xíní-í úsá tñahá espíritú xínú cuèchi núú Yă Ndiôxí, te ñ<sup>n</sup> ñ<sup>n</sup> cue espíritú-á<sup>n</sup> ndécú ndìhi-xi tñúhu ndee ìní dandòho-xi ñáyiú ñuyíú, te nà yáha nchaa tñúndòho-á<sup>n</sup>, te vá cùdée<sup>n</sup>-gă Yă Ndiôxí núú-yu dândòho ñaha-gá xii-yu.

2 Te ní xíní-í ñ<sup>n</sup> làmár te ndute làmár-á<sup>n</sup> cáá dàtná cáá vǐdriú, te dàcánuu-xi ndìhi ñuhú, te yuhu làmár-á<sup>n</sup> xǐnutñi nchaa ñáyiú ní ndacu ní dáquéé tǐhú ñàhá xii quitì ní quene xití làmár-á<sup>n</sup>, te duca<sup>n</sup> ñí ndacú-yu ní dáquéé tǐhú-yu sá ñí natava ñàhá-yu nàcuáa càa-di-á<sup>n</sup>, te duca<sup>n</sup> ñí ndacu tucú-yu ní dáquéé tǐhú tucú-yu númerú-di sá cúú dàtná diú-di, te nchaa ñáyiú-á<sup>n</sup> ñí nduu táhú-yu núú Yă Ndiôxí àrpá xǐnehé-yu cuendá caní-yu. 3 Te xǐxitá-yu ndudú sá ñí xita ndí Moisés ndí ní xinu cuechi núú Yă Ndiôxí ndéé sanaha, te xita tucú-yu ndudú Yaá cáá dàtná cáá ñ<sup>n</sup> mbéé quitì ní dánicuehé-güedé, te càchí-yu:

Yòhó Dútú Ndiôxí ío càhnu cuu-n, chi quide-n nchaa sá vǎ yòo tñahí ndacu cada, te cùu-n Yaá ndacú quide nchaandi túhú sá vǎha,

te ío ndáá quidé-n te ío ndáá càhá<sup>n</sup>-n, te yíndaha-n nchaa ñáyiú ñihí ñuyíú.

<sup>4</sup> Te nchaa ñáyiú nèhé-yu sá yíñuhu núú-n, te nchaá-yu càchí-yu sá ío càhnu cuu-n, chi ñ<sup>n</sup>dìi díi-ni yòhó cúú-n Yàá ío váha quíde ndáá, te nchaa ñáyiú ñihí ñuyíú nataká-yu chiñuhu ñàhá-yu xii-n, te duca<sup>n</sup> càdá-yu chi ndèhé-yu nchaa sá váha quíde-n.

Duha càchí ñáyiú-á<sup>n</sup> xixitá-yu.

<sup>5</sup> Te sátá dúcá<sup>n</sup> te ní xiní-í ní nacaá<sup>n</sup> yuyèhe vehe Yá Ndiöxí andíu, te xití vehe-gá-á<sup>n</sup> ndécú sá ndèé tnúhu-gá. <sup>6</sup> Te xití vehe-gá-á<sup>n</sup> ñi quee úsá tnàhá espíritú xínú cuèchi núú-gá, te ñ<sup>n</sup> ñ<sup>n</sup>-xi ndècu ndihí-xi tnúhu ndee iní dandòho-xi ñáyiú, te xixíhnu-xi mee-ni dóó váha, te súúni váha càndoo, te chàhchí, te yidúcú<sup>n</sup>nuu cínchú ní cuáha mee-ni díhú<sup>n</sup> cuáá<sup>n</sup> pèchú ndi úsá cue espíritú-á<sup>n</sup>. <sup>7</sup> Te ñ<sup>n</sup> quití cúmí xínutñí núú nùtní xilé váha ní sáñaha-di ñ<sup>n</sup> caa sá nàhá tícuú ní cuáha mee-ni díhú<sup>n</sup> cuáá<sup>n</sup> xii ñ<sup>n</sup> ñ<sup>n</sup> espíritú-á<sup>n</sup>, te xití nchaa tícuú-á<sup>n</sup> ñúhú ñ<sup>n</sup> sá ñúhú te xíá<sup>n</sup> cútnúni sá Yá Ndiöxí dandòho-gá ñáyiú ñuyíú, te díu-gá cúú-gá Yáá ndécú nchàa nduu nchaa quíú. <sup>8</sup> Te xití vehe-gá-á<sup>n</sup> ñi chítú ñúhmá, te duca<sup>n</sup> ñi quíde-gá cuendá cutnúni iní ñáyiú sá ío càhnu cuu-gá táxí tnúni-gá, te vá yòo ñ<sup>n</sup> cuu quíhu xití vehe-gá-á<sup>n</sup> ndèé ndihí ndi úsá tnúndòho cada ndi usá cue espíritú-á<sup>n</sup> ñuyíú.

## 16

### *Tnúndòho cada-xi ñuyíú*

<sup>1</sup> Te sátá dúcá<sup>n</sup> te ní tecú dóho-í níhi ní cáhá<sup>n</sup> ñ<sup>n</sup> sá ñi cáhá<sup>n</sup> xití vehe Yá Ndiöxí, te xáha<sup>n</sup>-xi xii ndi usá cue espíritú-á<sup>n</sup>:

—Chí cuáhá<sup>n</sup> coyo-ndo sá ñúhú xití nchaa tícuú néhé-ndó-á<sup>n</sup> núú ñuyíú, chi sá ñúhú-á<sup>n</sup> cúú-xi tnúndòho tendaha Yá Ndiöxí sá cúú-xi nchàa ñáyiú ñuyíú —duha càchí sá càhá<sup>n</sup>-á<sup>n</sup>.

<sup>2</sup> Te espíritú díhna ní sáhá<sup>n</sup>-xi ní coyo-xi sá ñúhú xití tícuú néhé-xi-á<sup>n</sup> ñuyíú, te nchaa ñáyiú ñuhu tnuní quití ní quene xití làmár ñáyiú ní chiñuhu sá ñi natava ñàhá-yu

xii-di, nchaa ñáyiú-á<sup>n</sup> ñi quené-yu ndíhyi tèhyú te súúni dandòho ñaha-xi xii-yu.

<sup>3</sup> Te espíritú cúú ùú ní coyo-xi sá ñúhú xití tícuú néhé-xi núú làmár, te ndute làmár-á<sup>n</sup> ñi nduu-xi níñi te càa-xi datná cáá níñi ñáyiú sa ní xíhí, te nchaa quití ñuhu xití làmár-á<sup>n</sup> ñi xíhí-güedi.

<sup>4</sup> Te espíritú cúú ùni ní coyo-xi sá ñúhú xití tícuú néhé-xi nchàa yúte ndihí nchaa núú quenihni ndute, te ndute nchaa yúte-á<sup>n</sup> ndihí nchaa ndute quenihni-á<sup>n</sup> ñi nduu-xi níñi. <sup>5</sup> Te sátá dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> espíritú xínú cuèchi núú Yá Ndiöxí, espíritú yíndaha ndute, te xáha<sup>n</sup>-xi xii Yá Ndiöxí:

—Yòhó Dútú Ndiöxí cúú-n Yáá quíde ndáá cuítí núu duha quíde-n tendaha-n tnúndòho-a, te díu-ni-n cùu-n Yáá ndécú ndèé cútnàhá ní ngáva ñuyíú, te díu-ni-n cùu-n Yáá ndécú vitna te ñá túú tnàhí cuèchi-n. <sup>6</sup> Chi cue ñáyiú ñuyíú ñi dácácá-yu níñi nchaa ñáyiú ní cáhá<sup>n</sup> tnúhu-n ndihí nchaa dava-gá ñáyiú cùu cuendá-n, te ní sahní-yu nchaa ñáyiú-á<sup>n</sup>, te vitna ní dátíú-n ndute ní nduu-xi níñi te duca<sup>n</sup>-ni càa ndute-á<sup>n</sup> xíhí-yu, te duca<sup>n</sup> tàú-xi ndohó-yu cuendá sá ñi sahní-yu cue ñáyiú cùu cuendá-n —duha càchí espíritú-á<sup>n</sup> xáha<sup>n</sup>-xi xii-gá.

<sup>7</sup> Te ní tecú tucu dóho-í ní cáhá<sup>n</sup> ñ<sup>n</sup> sá ñi cáhá<sup>n</sup> núú nùtní núú sácódó sá ndúú táhú Yá Ndiöxí, te xáha<sup>n</sup>-xi xii-gá:

—Ndáá sá yòhó Dútú Ndiöxí Yáá ndácú quíde nchaandi túhú sá váha dandòho-n ñáyiú nàcuáa tàú-xi cunduu —duha càchí sá càhá<sup>n</sup>-á<sup>n</sup> xáha<sup>n</sup>-xi xii-gá.

<sup>8</sup> Te espíritú cúú cúmí ní coyo-xi sá ñúhú xití tícuú néhé-xi núú nchíanchii cuendá nchíanchii-á<sup>n</sup> cahmi-xi nchaa ñáyiú ñuyíú.

<sup>9</sup> Te nchaá-yu ní ndoho víhí-yu ní cáyú-yu, te cuèi duca<sup>n</sup> ñi ndohó-yu dico ñá túú ní cuíni-yu ndixi cuèchi iní-yu cuendá nchaa sá ñá túú váha quíde-yu, te ní ñá túú ní càchí-yu sá ío càhnu cuu Yá Ndiöxí chí da ní cáhá<sup>n</sup> úhú-yu cuendá-gá, te díu-gá cúú-gá Yáá duca<sup>n</sup> ñi tendaha tnúndòho-á<sup>n</sup> sá cúú-xi-yu.

<sup>10</sup> Te espíritú cúú ùhú ní coyo-xi sá ñúhú xití tícuú néhé-xi núú ndécú quití ní quene xití làmár-á<sup>n</sup> táxí tnúni-di, te nchaa núú

táxi tnùnì-di ní cuu nee, te nchaa ñáyíu ñuyíú ndéé yàá-ná-yu nàcaxi nihnú-yu sá ndóhō-yu. <sup>11</sup> Dico ni ñuca<sup>n</sup> ñá túú ní cuiní-yu dàñá-yu ni ñ<sup>n</sup> sá cuèhé sá dúhá quidé-yu, chi da ní cáhá<sup>n</sup> úhú-yu cuendá Yá Ndiöxí Yaá ndécú àndíu sá cuendá sá dándòho ñaha ndíhyi tēhyú ndéé-yu-á<sup>n</sup> ndíhi nchaa dava-gá sá yáha-yu.

<sup>12</sup> Te espíritú cúú ñnú ní coyo-xi sá ñúhú xití tícúú néhé-xí xití yúte càhnu nani Eúfratés, te ndute yúte-á<sup>n</sup> ñí yíchí cuendá yáha cue téé yíndaha ñáyíu xíndecu ndàa xio nacuaa quène nchícanhii.

<sup>13</sup> Te ní xiní-í ní quee ñ<sup>n</sup> espíritú cúndíhi yucu ñáváha yuhu quití déé<sup>n</sup> nání drágón, te ní xiní tucu-í ní quee tucu ingá espíritú cúndíhi yucu ñáváha yuhu quití ní quee xití làmár, te ní xiní tucu-í ní quee tucu ingá espíritú cúndíhi yucu ñáváha yuhu téé dándahú ñáyíu càchí sá cáhá<sup>n</sup> tnúhu Yá Ndiöxí te ñá ndàá, te ndí nùnì espíritú-á<sup>n</sup> xíndáa-xi dàtná cáá làhvá. <sup>14</sup> Te ndí nùnì espíritú-á<sup>n</sup> quidé-xí sá vā yōo tnáhi ndàcu cada, te xica datacá-xi nchaa cue téé yíndaha ñaha xii ñáyíu xíndecu nihí ñuyíú cuendá nàa-güedé mei ndüu cachí Yá Ndiöxí coo tnúndòho cahnu vihi-gá, te ñíu mee Yá Ndiöxí cúú-gã Yaá ío càhnu cuu. <sup>15</sup> Te Yaá cúú Xítohó-ó ñí cachí-gá: “Cunaha-ndo chi nduu ñà túú yíhi iní-ndó quixi-í núú ndécú-ndó, te cada-í dàtná quidé ñadúhú. Te váha táhú nchaa nchòhó ñáyíu xíndecu túha, chi cùu-ndo datná cue ñáyíu xíndecu túha xíhínu-ni dóo-xi cuendá sá vā cúcàha<sup>n</sup> núú-yu dàtná cúcàha<sup>n</sup> núú cue ñáyíu ñá túú nihnu dóo-xi, te duha cáhá<sup>n</sup>-í cuendá sá nchòhó cundecu túha-ndo òré quexì-í”, duha càchí-gá. <sup>16</sup> Te ndí nùnì cue espíritú cúndíhi yucu ñáváha-á<sup>n</sup> ñí dátàcá-xi nchaa cue téé yíndaha ñaha xii ñáyíu, te ní taxi ndecu ñaha-xi ñ<sup>n</sup> xichi núú nání Armagedón, duha nani xíá<sup>n</sup> tnúhu hèbreú.

<sup>17</sup> Te espíritú cúú úsá ní coyo-xi sá ñúhú xití tícúú néhé-xí núú tàchí, te ní tecú dóho-í níhi ní cáhá<sup>n</sup> Yaá núcòo núú xilé váha xití vehe-gá, te càchí-gá:

—Xéhé-ñá cúmāní te xínu cava nchaa tnúndòho tnúhu ndàhú —duha càchí-gá.

<sup>18</sup> Te sátá dúcá<sup>n</sup> te ní sáá nduté te ní cáhá<sup>n</sup> ñúhu, te súúni ñúsa<sup>n</sup> ní quide-xi, te níhi vihi ní tnáa ñuyíú, te ndéé cùtnàhá ní ngúndecu ñáyíu ñuyíú te vátá ñ<sup>n</sup> xito-gá níhi tnáa dàtná ní quide-xi. <sup>19</sup> Te ñúú cáhnu ío cùnuu nani Babiloniá ní quee dava-xi ní cuu-xi únì xichi, te nchaa ñúú cáá níhi ñuyíú ñí ngoyo nchaa vehe, chi Yá Ndiöxí ní ndacu iní-gá nchaa sá cuèhé sá dúhá quide nchaa ñáyíu ñúú Babiloniá-á<sup>n</sup>, te ñuca<sup>n</sup> ñí quide ñaha-gã xii-yu chi ío cùdéé<sup>n</sup>-gã núú-yu. <sup>20</sup> Te nchaa tìndúú ñí ndóñúhú-xí cuéi nchaa tìndúú ñúhu yíchí ndécú xití làmár. <sup>21</sup> Te ní xiní-í ní cuu<sup>n</sup> ñíñi nàhnu vihi ní ngaundodo-xi cue ñáyíu ñuyíú, te nchaa ñíñi-á<sup>n</sup> vèe-xi dàtná údico kílu, te cue ñáyíu ñuyíú ñí cáhá<sup>n</sup> úhú-yu cuendá Yá Ndiöxí sá dúcá<sup>n</sup> ñí dácúú<sup>n</sup>-gã ñíñi nàhnu vihi-á<sup>n</sup>, chi ní cuu-xi ñ<sup>n</sup> tnúndòho cahnu vihi sá cúú-xi-yu.

## 17

### *Ñadíhi ndécú ichi dí iní*

<sup>1</sup> Te núú úsá espíritú néhé tícúú-á<sup>n</sup>, te ñ<sup>n</sup>-xi ní quixi-xi núú ndécú-í, te càchí-xi xii-í:

—Néhé ná quíhí<sup>n</sup>-ó dànehé ñáhà-í xii-n nchaa tnúndòho sá ndóhó ñadíhi ñaha ndècu ichi dí iní, te ñaha-á<sup>n</sup> cùnùu-a<sup>n</sup> nucóo-a<sup>n</sup> núú ñúhú vihi ndute. <sup>2</sup> Te ñaha-á<sup>n</sup> ndécú dí iní-a<sup>n</sup> ndíhi nchaa cue téé yíndaha ñaha xii ñáyíu xíndecu nihí ñuyíú, te nchaa dava-gá ñáyíu ñuyíú ío iní-yu nchícú<sup>n</sup> nihnú-yu quidé-yu nchaa nàcuáa quide ñaha-á<sup>n</sup> —duha càchí espíritú-á<sup>n</sup>.

<sup>3</sup> Te òré ñuca<sup>n</sup> quide ñaha Espíritú Yá Ndiöxí xii-í nàcuáa càchí iní-xi, te ñ<sup>n</sup> espíritú xínú cuèchi núú-gã ndécá ñaha-xi xii-í cuhá<sup>n</sup> ñ<sup>n</sup> xití yucu, te xití yucu-á<sup>n</sup> ñí xiní-í ñ<sup>n</sup> ñadíhi yódó-á<sup>n</sup> ñ<sup>n</sup> quití ticuehé, te ndéé úsá díquí-di te úxí ndíquí-di, te nihí-di ndéé tnùnì-di mee-ni tnúhu sá cáhá<sup>n</sup> úhú cuendá Yá Ndiöxí. <sup>4</sup> Te ñadíhi-á<sup>n</sup> níhnú-á<sup>n</sup> dóo muradú ndíhi dóo tícuehé, te mee-ni sá ñí cuáha díhú<sup>n</sup> cuáá<sup>n</sup>, ndíhi yúú váha sá nání pèrlá, ndíhi nchaa dava-gá núú yúú váha, mee-ni nchaa xíá<sup>n</sup> ní cuáha sá yíhí lõho-a<sup>n</sup>, ndíhi sá ñúhú dúcú<sup>n</sup>-a<sup>n</sup>, ndíhi sá ñúhú dúcú<sup>n</sup> ndáhá-á<sup>n</sup>, te nùndaha-a<sup>n</sup> ñ<sup>n</sup> tícúú ní cuáha mee-ni díhú<sup>n</sup> cuáá<sup>n</sup> te ñúhu

mee-ni sá cuèhé sá dúhá, te xíá<sup>n</sup> cútnùní iní-ó sá cúú-á<sup>n</sup> ì<sup>n</sup> ñadìhí ñaha ndècu ichi cuehé ichi duha. <sup>5</sup> Te tneé-a<sup>n</sup> ndèé tnuní ì<sup>n</sup> tnúhu, te càchí-xi: “Ñúú Babiloniá ñúú ío cùnunu, cada iní-ndó sá cúú-xí mèi ñadìhí-a, te ñadìhí-a cùu-a<sup>n</sup> ñaha sanu ichi ñaha xii nchaa ñáyiu ñáyiu ndècu ichi ñáyiu ñáyiu, te nándi-gá nchaa sá cuèhé sá dúhá sànu ichi-a<sup>n</sup> nchaa ñáyiu cadá-yu”, duha càhá<sup>n</sup> tnúhu ndèé tnuní tneé ñadìhí-á<sup>n</sup>. Te vá yóo tècú tnuní ná cuèndá duca<sup>n</sup> càhá<sup>n</sup> tnúhu-á<sup>n</sup>. <sup>6</sup> Te ní cutnùní iní-í sá díú ñàhá-á<sup>n</sup> ñí dácáca-á<sup>n</sup> ñíñí ñáyiu cùu cuendá Yá Ndióxi ní sahani ñaha-a<sup>n</sup> xii-yu, te ñáyiu ní xíhí-á<sup>n</sup> cúú-yu ñáyiu ní càhá<sup>n</sup> váha cuèndá Xítoho Jesucristú, te sá dúcá<sup>n</sup> ñí quide-a<sup>n</sup> te ní nduu-a<sup>n</sup> dàtná ì<sup>n</sup> ñáyiu quihu. Te ío ní cuñúhu-í sá dúcá<sup>n</sup> ñí cuu ní xiní-í. <sup>7</sup> Te sáta dúcá<sup>n</sup> te espíritú xínú cuèchi núú Yá Ndióxi-á<sup>n</sup> càchí tucu-xi xii-í:

—Vá ndèé dúcá<sup>n</sup> cuñúhu-n, chi vitna na càchí tnúhu-í xii-n nàcuáa quèe-xi cuendá quiti ndèé úsá díquí-xi ndihi úxí ndiqui-xi-á<sup>n</sup>, ndihi nàcuáa quèe-xi cuendá ñadìhí ñaha yòdo ñaha xii-di-á<sup>n</sup>. <sup>8</sup> Te quiti ní xiní-n-á<sup>n</sup> cúú-dí ì<sup>n</sup> quiti sa ní xíndecu te vitna ñá túú-gã-di ndècu, te sáá nduu te quene-di yaú cùnú víhí sá ío nèhé cáá, te dàtnùní sáá nduu te quíhí<sup>n</sup>-di núú ùhú núú ndàhú ni caa ni quíhí<sup>n</sup>, te cue ñáyiu xíndecu ñuyú cuñúhu víhí-yu quiti-á<sup>n</sup> chi cùu-di ì<sup>n</sup> quiti sa ní xíndecu ní cùu te sáá nduu cùndecu tucu-di, te ñáyiu duca<sup>n</sup> cuñúhu ñaha xii-di-á<sup>n</sup> ñà túú yòdo tnuní-yu núú tütú núú yódó tnuní cue ñáyiu naníhí tàhú, chi ndèé cútnàhá vátá ngáva-gá ñuyú duca<sup>n</sup> sa yòdo tnuní cue ñáyiu naníhí tàhú.

<sup>9</sup> Te nchaa ñáyiu tècú tnuní xini ñuhu-xi caní váha iní-yu cuèndá tnúhu-a. Te ndi úsá díquí quiti-á<sup>n</sup> cada iní-ó sá cúú-xí úsá tìndúú núú núcõo ñadìhí-á<sup>n</sup>. <sup>10</sup> Te ndi úsá díquí quiti-á<sup>n</sup> cada iní-ó sá cúú-xí úsá tnàhá cue téé yíndaha ñaha xii ñáyiu, te úhú<sup>n</sup> cue téé-á<sup>n</sup> ñà túú-gã cùnùu-güedé vitna, te ì<sup>n</sup> téé-á<sup>n</sup> cùnùu-dé vitna te ingá-dé vátá sáá-gá nduu cùnunu-dé, te na sáá nduu dùca<sup>n</sup> cunuu-dé te sacú-ni nduu cunuu-dé. <sup>11</sup> Te quiti ní xíndecu ní cùu te ñá túú-gã-di ndècu vitna, cùu-di datná téé cùu uná yíndaha

ñaha xii ñáyiu, te ì<sup>n</sup>-ni cùu-di ndihi cue téé úsá yíndaha ñáyiu-á<sup>n</sup>, te quiti-á<sup>n</sup> sáá nduu cuíta nihnu-di quíhí<sup>n</sup>-di núú ùhú núú ndàhú ni caa ni quíhí<sup>n</sup>.

<sup>12</sup> Te ndi úxí ndiqui quiti-á<sup>n</sup> cada iní-n sá cúú-xí úxí tnàhá cue téé quíndaha ñaha xii ñáyiu, dico vátá sáá-gá nduu cùnunu-güedé quíndaha ñaha-güedé xii-yu. Te cue téé-á<sup>n</sup> ñíhí-güedé tnúhu ndee iní taxi tnuní-güedé ndihi quiti-á<sup>n</sup>, dico tnaa-ni taxi tnuní-güedé ndihi quiti-á<sup>n</sup>. <sup>13</sup> Te ndi úxí cue téé-á<sup>n</sup> cuu ì<sup>n</sup>nuu-güedé taxi tnuní-güedé, te chindee-güedé quiti-á<sup>n</sup> cuèndá cuu ì<sup>n</sup>nuu-güedé ndihi-di cuèndá taxi tnuní-gá-di. <sup>14</sup> Te cue téé-á<sup>n</sup> nàá-güedé ndihi Yaá cáá dàtná cáá ì<sup>n</sup> mbéé quiti ní dánicuehé-güedé dico vá ndácú-güedé nàá-güedé ndihi-gá chi cuíta-güedé. Te ñadìhí-gá cúú-gã Yaá ío cùnunu taxi tnuní cuèi nchaa téé yíndaha ñaha xii ñáyiu, te duca<sup>n</sup>-ni tàxi tnuní-gá cuèi nchaa dava-gá-yu. Te mee Yá Ndióxi ní cachí-gá nándi cùu nchaa ñáyiu cundecu ndihi Yaá cáá dàtná cáá ì<sup>n</sup> mbéé quiti ní dánicuehé-güedé-á<sup>n</sup>, te ñadìhí-á<sup>n</sup> cúú-yu ñáyiu ní càhá<sup>n</sup>-gá te cùu-yu ñáyiu quide ndáá ndécú ichi-gá —duha càchí espíritú xínú cuèchi núú-gã.

<sup>15</sup> Te ní cachí tucu espíritú-á<sup>n</sup> xii-í:

—Ndute ñuhu núú núcõo ñadìhí ñaha ndècu ichi díí iní-á<sup>n</sup>, ndute-á<sup>n</sup> cada iní-n sá cúú-xí ñáyiu nchaa nació<sup>n</sup>, ndihi ñáyiu nchaa ñúú, ndihi ñáyiu xíndecu nchaa xichi, ndihi ñáyiu càhá<sup>n</sup> ndí díí<sup>n</sup> ndí díí<sup>n</sup> núú tnúhu. <sup>16</sup> Te dàtná ní cachí-í sá ndi úxí ndiqui quiti ní xiní-n-á<sup>n</sup> cúú-xí úxí tnàhá cue téé quíndaha ñaha xii ñáyiu, te cue téé-á<sup>n</sup> cuu úhú iní-güedé ñadìhí ñaha ndècu ichi díí iní-á<sup>n</sup>, te ní vã cadá cuèndá ñàhá-gã-güedé xii-a<sup>n</sup>, te ndada ndàhú ñàhá-güedé, te dacàchi ñaha-güedé xii-a<sup>n</sup>, te cahmi ñaha-güedé. <sup>17</sup> Te mee Yá Ndióxi duca<sup>n</sup> dàcàhá<sup>n</sup>-gá iní cue téé-á<sup>n</sup> cuèndá cada-güedé nàcuáa cuíni méé-gã, te xíá<sup>n</sup> núu cuu ì<sup>n</sup>nuu-güedé cuèndá cuñaha-güedé xii quiti-á<sup>n</sup> cada-di núú-güedé taxi tnuní-di, te duca<sup>n</sup>-ni càda-di núú-güedé taxi tnuní-di ndèé ná sáá nduu càda Yá Ndióxi nàcuáa ní cachí-gá. <sup>18</sup> Te ñadìhí ñaha ní xiní-n-á<sup>n</sup>



cada iní-n sǎ cúú-á<sup>n</sup> ñùú cáhnú ñùú ío cùnūu, te ñuú-á<sup>n</sup> ndécú tée ío-gá cùnūu taxi tnuní nchaa cue tée yíndaha ñaha xii ñáyiu xíndecu ñuyíú —duha ní cachí espíritú xínú cuèchi núú Yǎ Ndiǒxí xii-í.

## 18

### *Ní naa ñuú Babiloniá*

<sup>1</sup> Te duca<sup>n</sup> te dàtnúní ní xíní tucu-í ingá espíritú xínú cuèchi núú Yǎ Ndiǒxí, te ndéé andíu nì dátǎsa<sup>n</sup>-xi te ní dáyyèhé-xi ñuyíú, te espíritú-á<sup>n</sup> ío cùnūu-xi. <sup>2</sup> Te níhi ní cáhá<sup>n</sup>-xi, te cǎchí-xi:

—Ní sǎá nduu nàa ñuú cáhnú ñùú cùnūu nani Babiloniá, te xía<sup>n</sup>-nǎ nataká nchaa núú espíritú cúnđihi yucu ñávǎha cundecu-xi, te vá quée-gǎ-xi xía<sup>n</sup>, te ðiu-ni xía<sup>n</sup> nataká nchaa quití ndàva núú tàchí nchaa quití ndehe quide, quití ñá túú tnàhá iní ñáyiu te xía<sup>n</sup>-nǎ cundecu-güedi. <sup>3</sup> Te duca<sup>n</sup> chi ñáyiu ñuú-á<sup>n</sup> sánú ìchí-yu nchaa ñáyiu ñihí ñuyíú ichi cuèhé ichi duha, te duca<sup>n</sup>-ni xínchícú<sup>n</sup> nihnu nchaa ñáyiu ñuyíú xíquidé-yu, te nchaa cue tée cùnūu yíndaha ñaha xii ñáyiu, cue tée-á<sup>n</sup> cúú ñnuu-güedé ndihi nchaa ñáyiu ñuú-á<sup>n</sup> quidé-güedé ndihí-yu nándi sǎ cuèhé sǎ dúhá. Te nchaa ñáyiu ðico nándi sǎ dícó quèhe<sup>n</sup> ñáyiu ñuú-á<sup>n</sup> ío cùu cuicá-yu, te duca<sup>n</sup> quèhe<sup>n</sup> nchaa ñáyiu ñuú Babiloniá-á<sup>n</sup> nchaa sǎ dícó ñáyiu-á<sup>n</sup> cuendá xǎn cǎnehé-yu ndécú-yu ichi cuèhé ichi duha —duha cǎchí espíritú-á<sup>n</sup>.

<sup>4</sup> Te sǎtá dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> sǎ ní cáhá<sup>n</sup> andíu, te cǎchí-xi:

—Nchaa nchòhó ñáyiu cùu cuendá-í quee-ndo ñùú Babiloniá cuendá sǎ vǎ cúnđecu-ndo tnahá-ndó ìchí cuehé ichi duha dàtná ndécú ñáyiu ñuú-á<sup>n</sup>, te duca<sup>n</sup> te vá quíní-ndó tnúndòho tnúhu ndàhú sǎ quíxí cùu xii ñáyiu-á<sup>n</sup>. <sup>5</sup> Chi ío cuèhé cuèchi-yu ní cuu ndècu núú Yǎ Ndiǒxí, te mee-gǎ nǎhá-gǎ nàcuáa ndùu nchaa sǎ quidé-yu. <sup>6</sup> Te nchòhó ñáyiu cùu cuendá-í, chí nánchòcáva dandòho-ndo ñáyiu-á<sup>n</sup> dàtná quidé mée-yu dándohó-yu cue ñáyiu, te úú xito nanchòcáva-ndo dándohó-ndó-yu, te duca<sup>n</sup> càda-ndo cuendá ío-gá ndohó-yu. <sup>7</sup> Te ío quide cahnú-yu mée-yu, te ío cùdí iní-yu quidé-yu nchaa núú sǎ cuèhé sǎ dúhá, te sǎ dúcá<sup>n</sup> xidó-yu

quidé-yu nchaa sǎ cuèhé sǎ dúhá ñùu xǎn nchòhó ío dandòho-ndó-yu, te duca<sup>n</sup> chi ñáyiu ñuú-á<sup>n</sup> sání iní-yu, te cǎchí-yu: “Nchúhú cúú-ndǎ dàtná ñ<sup>n</sup> ñadìhí ñá túú quée, ñaha ío cùnūu yíndaha ñaha xii ñáyiu. Te duca<sup>n</sup> sǎtnahá-xi cùu-ndí chi nchaa-ni nduu ío váha cùu iní-ndí ndécú-ndǎ, te ní vǎ sǎá ñ<sup>n</sup> nduu te ndíhú iní-ndí”, duha cǎchí ñáyiu ñuú-á<sup>n</sup>. <sup>8</sup> Te sǎ cuendá nchaa sǎ quidé-yu-á<sup>n</sup> ñùu xǎn ñ<sup>n</sup>-ni ndùu sǎá tnúndòho sǎ cúú-xí-yu, te ío ndohó-yu chi ñuú-yu coo tnamá, te coo cuèhé cahni ñaha-xi xii-yu, te ío ndíhú iní-yu, te cǎyú ñuú-yu, te duca<sup>n</sup> ndòhó-yu chi Dútú Ndiǒxí ío cùnūu-gá, te ðiu-gá duca<sup>n</sup> dándohó ñaha-gá xii-yu —duha cǎchí sǎ ní cáhá<sup>n</sup> àndíu-á<sup>n</sup>.

<sup>9</sup> Te nchaa cue tée cùnūu yíndaha ñaha xii ñáyiu ío ndáhyú-güedé sǎ ndíhú iní-güedé òré ná quíní-güedé quene ñúhmá cǎyú ñuú cue ñáyiu Babiloniá, chi ðiu cue tée-á<sup>n</sup> cúú-güedé cue tée cùu ñ<sup>n</sup>nuu ndihí-yu quide-güedé nchaa núú sǎ cuèhé sǎ dúhá ndihí-yu, te duca<sup>n</sup> chi ío tnàhá iní-güedé cundecu-güedé ndihí-yu ichi díí iní. <sup>10</sup> Te cue tée-á<sup>n</sup> xica-nǎ cundecu-güedé cundehe-güedé nàcuáa ndohó nchaa ñáyiu ñuú-á<sup>n</sup> sǎ yùhú-güedé nchaa tnúndòho-á<sup>n</sup>, te cachí-güedé:

—¡Ndàhú nchòhó ñáyiu ñuú cáhnú ñùú cùnūu nani Babiloniá! Chi uu<sup>n</sup> ní sǎá nchaa tnúndòho tnúhu ndàhú sǎ cúú-xí-ndó —duha cachí-güedé.

<sup>11</sup> Te nchaa ñáyiu ðico nchaa sǎ nándihi ñáyiu ñuú Babiloniá tnàhá-yu ío ndáhyú-yu sǎ ndíhú iní-yu chi vá yòo-gá cuaa<sup>n</sup> nchaa sǎ dícó-yu. <sup>12</sup> Te ðicó-yu nchaa sǎ ní cuáha mee-ni ðíhú<sup>n</sup> cuàá<sup>n</sup>, ndihi nchaa sǎ ní cuáha mee-ni ðíhú<sup>n</sup> cuixí<sup>n</sup>, te ðico tucú-yu sǎ ní cuáha mee-ni yùú vǎha yúú nání pèrlá, ndihi nchaa dava-gá sǎ ní cuáha dava-gá yúú vǎha, te ðicó-yu tnàhá dóó sèdá, ndihi ingá núú dóó vǎha sǎ nání línú, ndihi dóó muràdú, ndihi dóó tícuèhé te mee-ni dóó vǎha cùu-xi, te ðico tucú-yu tnàhá yutnu sǎ sàhá<sup>n</sup> tnámí, te ðico tucú-yu sǎ ní cuáha sǎ nání màrfíl, te ðico tucú-yu sǎ ní cuáha mee-ni yùtnu váha sǎ ío ndèyáhu, te ðico tucú-yu sǎ ní cuáha mee-ni càá, ndihi sǎ ní cuáha mee-ni sǎ nání bròncé, ndihi sǎ ní

cuáha mee-ni yúú vâha yúú nání mǎrmól.  
 13 Te dìco tucú-yu canelá, ndihí yúcu sǎ sàhá<sup>n</sup> tnámí, ndihí dúsa sá sàhá<sup>n</sup> tnámí, ndihí yúcu sǎ nání mirrá, te dìco tucú-yu ingá núú dúsa sá sàhá<sup>n</sup> tnámí nàni olivánú, te dìco tucú-yu ndudí ndéhé yoho yàha stilé, ndihí acítí yutnu nàni olívú, ndihí yuchi triú váha, te dìco tucú-yu nchaa dava-gá núú triú, te dicó-yu tnàhá mbéé, ndihí cuàyú, ndihí nchaa dava-gá quití tatá, te dìco tucú-yu tnàhá carrétá, te dìco tucú-yu tnàhá ñáiyu xínu cuechi, ñáiyu ñá túú tnàhí dàñá quee núú chíú<sup>n</sup> pàtróó<sup>n</sup>-xi. 14 Te nchaa ñáiyu dìco-á<sup>n</sup> cǔñàhá-yu xii ñáiyu ñuú Babiloniá:

—jNchaa sá ïo cùdíí ìní-ndó cùndecu ndihí-ndo ni cuu vá ndácú-gǎ-ndó ñihí-ndó vitna, te nchaa sá sání ìní-ndó sǎ ïo váha càa ndecu ndihí-ndo ndihí nchaa dava-gá sá ndécú ndihí-ndo ní ndihí nihnu-xi vitna, te ni ì<sup>n</sup> nduu-gá vá ñihí-ndó ni ì<sup>n</sup> xíǎ<sup>n</sup> cundecu ndihí-ndo! —duha cúñaha ñáiyu-á<sup>n</sup> xii-yu.

15 Te nchaa ñáiyu ní cuu cuica ñí xóo dico nándi nchaa sá ñí xóo dico ñí quehe<sup>n</sup> cue ñáiyu ñuú Babiloniá, nchaa ñáiyu-á<sup>n</sup> xica-nǎ cundecú-yu cundéhé-yu sá yùhú-yu cuèndá nchaa tnúndòho sá yàha cue ñáiyu ñuú-á<sup>n</sup>, te ïo ndáhyú-yu sá ndihú ìní-yu sá dúcá<sup>n</sup> ndòho ñáiyu-á<sup>n</sup>. 16 Te cúñaha tucú-yu:

—jNdàhú nchòhó ñáiyu xǐndecu ñuú cáhnú ñuú nání Babiloniá! Chi nchòhó cúú-ndó dàtná ì<sup>n</sup> ñadìhí ñaha nihnu dóó vâha dóó murádú, ndihí dóó tícuèhé, te mee-ni sǎ ñí cuáha díhú<sup>n</sup> cuàá<sup>n</sup>, ndihí mee-ni sǎ ñí cuáha yúú vâha yúú nání pèrlá, ndihí sá ñí cuáha dava-gá yúú vâha sá ïo vii ndǎa mee-ni nchaa xíǎ<sup>n</sup> ní cuáha sá yíhí lõho-a<sup>n</sup>, ndihí sá ñúhú dǔcú<sup>n</sup>-a<sup>n</sup>, ndihí sá ñúhú dǔcú<sup>n</sup> ndáhá-á<sup>n</sup>. 17 jTe uu<sup>n</sup>ni ní ndihí nihnu nchaandi túhú sá ndécú ndihí ñadìhí-á<sup>n</sup>, te duca<sup>n</sup> sǎtnahá-xi cùu nchohó ní cùu! —duha cúñaha-yu xii cue ñáiyu ñuú Babiloniá.

Te nchaa cue téé dàcaca barcú ndihí nchaa cue téé tàxi tnuní bàrcú-á<sup>n</sup>, ndihí nchaa ñáiyu ñuhu xití bàrcú-á<sup>n</sup>, ndihí nchaa dava-gá cue téé nándi chìu<sup>n</sup> quide ndecu lamár, nchaa ñáiyu-á<sup>n</sup> xica cùndecú-yu 18 te quiní-yu òré queene ñúhmá cǎyú ñuú

cue ñáiyu Babiloniá, te níhi cáhá<sup>n</sup>-yu, te cachí-yu:

—Ni ì<sup>n</sup> ñuú ñá túú nǔtnahá-xi ñuú Babiloniá —duha cáhá<sup>n</sup>-yu.

19 Te nchaa ñáiyu-á<sup>n</sup> chidó-yu ñuhu díquí-yu, te ngúíta-yu ndáhí-yu sá ndihú ìní-yu, te níhi cáhá<sup>n</sup>-yu, te cachí tucú-yu:

—jNdàhú nchòhó ñáiyu xǐndecu ñuú cáhnú ñuú nání Babiloniá! Chi ïo cuica-ndo ni cùu, te diu-ndo ñí quide ní cuu cuica nchaa ñáiyu ndècu ndihí barcú, te vitna uu<sup>n</sup>ni ní naa-ndo ndihí ñuú-ndó —duha cachí-yu.

20 Te nchaa nchòhó ñáiyu ndècu andiú ïo chí cúdíí ìní sá dúcá<sup>n</sup> dàndoho Yá Ndiòxí nchaa ñáiyu ñuú Babiloniá-á<sup>n</sup>, te diu-ni duca<sup>n</sup> chí cúdíí ìní nchaa nchòhó cue téé ní cachí Xítóhó Jesucristú cáhá<sup>n</sup> tnúhu-gá, te diu-ni duca<sup>n</sup> chí cúdíí ìní nchaa nchòhó cue téé cáhá<sup>n</sup> tnúhu Yá Ndiòxí nàcuáa dàcahu ìní ñáhá-gǎ xii-ndo, te diu-ni duca<sup>n</sup> chí cúdíí ìní nchaa dava-gá nchòhó ñáiyu cùu cuendá-gá cuendá sá dúcá<sup>n</sup> dàndoho-gá nchaa ñáiyu ñuú-á<sup>n</sup>. Te duca<sup>n</sup> càda ñaha-gá xii cue ñáiyu-á<sup>n</sup> cuèndá nchaa sá quidé ñàhá-yu xii-ndo.

21 Te sáta dúcá<sup>n</sup> te ní xiní-í ì<sup>n</sup> espíritú xínú cuèchi núú Yá Ndiòxí, te espíritú-á<sup>n</sup> ïo ndee-xi te ní quehe<sup>n</sup>-xi ì<sup>n</sup> yúú cáhnú dàtná càhnu yódó te ní dáquèe-xi xití ndute lamár, te càchí-xi:

—Dàtná ní quide-í ní dáquèe-í yúú xití ndute duca<sup>n</sup> càda-xi ñuú cáhnú ñuú Babiloniá, chí ñáiyu ñuú-á<sup>n</sup> ïo ndihí naá-yu ndihí ñuú-yu, te vá ì<sup>n</sup> nduú ì<sup>n</sup> quíú-gǎ quiní ñáhá ñáiyu xii-yu. 22 Te ni ì<sup>n</sup>-gá ñáiyu càni arpá, te ni ì<sup>n</sup>-gá ñáiyu tiú vílu, te ni ì<sup>n</sup>-gá ñáiyu tiú cútú, te ni ì<sup>n</sup>-gá yaá vá cóo ñuú-á<sup>n</sup>, te ni ì<sup>n</sup>-gá cue ñáiyu xíní cada ì<sup>n</sup> núú chìu<sup>n</sup> vá cóo-gǎ, te ni vá yòo-gá canehe chìu<sup>n</sup> yúú cúú yódó mulínú. 23 Te ni ì<sup>n</sup>-gá ñuhú vá cùndècu ñuú-á<sup>n</sup>, te ni ì<sup>n</sup> nduu-gá vá cóo víco tnándaha, te ñáiyu ñuú-á<sup>n</sup> ñáiyu quide ndáhú cúú-yu ñáiyu ïo-gá cuicá-yu dàcúxí ñáiyu quide ndáhú xǐndecu ñihí ñuyíú, dico nchaá-yu naá-yu chí quide nduú-yu te ïo dàndahú-yu cue ñáiyu ñuyíú sǎ dúcá<sup>n</sup> quidé-yu.

24 Te diu-ni ñuú-á<sup>n</sup> ñí dácácǎ-yu ñíí cue téé ní cáhá<sup>n</sup> tnúhu Yá Ndiòxí, te diu-ni duca<sup>n</sup>

nǐ quidé-yu nchaa dava-gá cue ñáyiú cùu cuendá-gá, te ñu-ní-yu quide xísahni tnàha ñáyiú ñuyíú —duha càchí espíritú-án.

## 19

<sup>1</sup> Te sáta dúcá<sup>n</sup> te ní tecú dóho-í níhi ní cáhá<sup>n</sup> cuéhé víhí ñáyiú andiú, te càchí-yu:

¡Ío càhnu cuu Yá Ndiöxí!, chi ñu-gá cúú-gã Yaá ní dácäcu nihnu ñaha xì-o núú ùhú núú ndàhú, te ío cùnuu-gá, te mee-ni sã vãha quide-gá,

<sup>2</sup> te mee-gã ío váha ndáá quidé-gã quidé ndáá-gá cuéchi nchaa ñáyiú,

chi ñu-gá ní dáquihí<sup>n</sup>-gá ñadihí ñaha ndècu ichi díí iní núú ùhú núú ndàhú, chi ñu-a<sup>n</sup> ní sanu ichi-a<sup>n</sup> ñáyiú ñuyíú ichi cuéhé ichi duha,

te duca<sup>n</sup> nǐ dáquihí<sup>n</sup> ñáhá-gã xii-a<sup>n</sup> núú ùhú núú ndàhú chi nàchinaa-gá sá nǐ sahani-a<sup>n</sup> cue ñáyiú ní xinu cuechi núú-gã.

Duha càchí-yu.

<sup>3</sup> Te càchí tucú-yu:

—¡Ío càhnu cuu Yá Ndiöxí!, chi nchaa nduu nchaa quíú duca<sup>n</sup>-ni quène ñúhmá núú ñúhú ñaha-án càyú-a<sup>n</sup> —duha càchí-yu.

<sup>4</sup> Te ndi òcò cúmí cue téé cùu sacuéhé xĩndecu-án nǐ ngüñí xítí-güedé núú Yá Ndiöxí núú núcòo-gá táxí tnùní-gá, te tnàhá cue quiti cúmí xĩnutnǐ-án nǐ ngüñí xítí-güedé núú-gã, te cue téé-án càchí-güedé ndihí cue quiti-án:

—Sá ndáá sá ío càhnu cuu Yá Ndiöxí — duha càchí-güedé ndihí cue quiti-án.

<sup>5</sup> Te sáta dúcá<sup>n</sup> te ní tecú dóho-í ní cáhá<sup>n</sup> ñ<sup>n</sup> sá nǐ cáhá<sup>n</sup> mei núú núnñí xilé váha núcóo Yá Ndiöxí, te càchí sá càhá<sup>n</sup>-án:

Nchaa nchòhó ñáyiú xinu cuechi núú Yá Ndiöxí, ñu-ni nchòhó ñáyiú nèhe sá yĩñuhu núú-gã,

cáhá<sup>n</sup>-ndó sã ío càhnu cuu-gá cuéi cùnuu-ndo àdi ñá túú cùnuu-ndo.

Duha càchí sá càhá<sup>n</sup>-án.

*Í<sup>n</sup> vico cùu datná vico tnãndaha*

<sup>6</sup> Te sáta dúcá<sup>n</sup> te ní tecú dóho-í ní cáhá<sup>n</sup> cuéhé víhí ñáyiú andiú, te òré duca<sup>n</sup> nǐ cáhá<sup>n</sup>-yu te ní quide-xi dàtná quidé-xi núú xícá cuéhé víhí ndüte, te ní quide tucu-xi dàtná quidé-xi òré càhá<sup>n</sup> níhi víhi ñúhu, te càchí-yu:

¡Ío càhnu cuu Dútú Ndiöxí Yaá cúú Tãtã-ó! Te ío cùnuu-gá táxí tnùní-gá, te quide-gá nchaandi túhú sá vãha.

<sup>7</sup> Te ío chí ná cùdíí iní-ó, te chí ná càchí-ó sã ío càhnu cuu Yá Ndiöxí,

chi vitna ní sáá nduu càda Yaá cáá dàtná cáá ñ<sup>n</sup> mbéé quiti ní dánicuéhé-güedé ñ<sup>n</sup> vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-án, te cada iní-ó sã ñáyiú-án cúú-yu dàtná ñ<sup>n</sup> ñadihí xíchí tnãndaha ndihí-gá,

<sup>8</sup> te ñáyiú-án nǐ nduu táhú-yu cuihnú-yu dóó vãha dóó chàhnchí sá ío váha càndoo.

Duha càchí-yu.

Te sá dúcá<sup>n</sup> nǐ nduu táhú ñáyiú cùu cuendá Yá Ndiöxí dóó vãha ñihnú-yu, xĩ<sup>n</sup> cútnùní iní-ó sã cúú-yu ñáyiú quide ndáá núú-gã.

<sup>9</sup> Te ñ<sup>n</sup> espíritú xínú cuéchi núú Yá Ndiöxí ní cachí tnúhu-xi xii-í, te càchí-xi:

—Chido tnùní-n ñ<sup>n</sup> núú tütú nàcuáa na càhá<sup>n</sup>-í-a: “Vãha táhú nchaa ñáyiú ní cáhá<sup>n</sup> ñáhá Yá cáá dàtná cáá ñ<sup>n</sup> mbéé quiti ní dánicuéhé-güedé cundecú-yu vico, te vico-án cúú-xi dàtná vico tnãndaha cada-gá”, te duha chido tnùní-n chi tnúhu-a cùu-xi tnúhu ndáá tnúhu Yá Ndiöxí —duha càchí espíritú-án.

<sup>10</sup> Te ní ngüñí xítí-í núú espíritú-án cuendá chiñuhu-í-xi ni cùu, te ní cachí-xi:

—Vá dúcá<sup>n</sup> càda-n, chi tnàhá-í dícò xínú cuéchi-í núú Yá Ndiöxí dàtná quidé-n xinu cuechi-n núú-gã ndihí nchaa dava-gá ñáyiú ndècu ndihí-n ichi-gá, ñáyiú nchícú<sup>n</sup> nihnu quide ni yuhu ni iní nchaa nàcuáa càhá<sup>n</sup> Xítohó Jesucristú, te núu xĩ<sup>n</sup> càchí-í sá vã dúcá<sup>n</sup> càda-n, chi mee Yá Ndiöxí chiñuhu-n —duha càchí espíritú-án.

Te nchaa cue téé càhá<sup>n</sup> tnúhu Yá Ndiöxí càhá<sup>n</sup>-güedé nàcuáa nduu tnúhu càhá<sup>n</sup> Xítohó Jesucristú.

*Cuendá Yaá yódó ñ<sup>n</sup> cuayú cuixí<sup>n</sup>*

<sup>11</sup> Te ní xiní-í nchii andiú, te ní xiní-í ní quee ñ<sup>n</sup> Yaá yódó-gã ñ<sup>n</sup> cuayú cuixí<sup>n</sup>. Te Yaá-án nání-gã Yaá quidé ndáá cuiti, duha nani-gá. Te quide-gá nchaa sá càhá<sup>n</sup>-gá, te ío váha quide ndáá-gá cuéchi nchaa ñáyiú, te nchaa ñáyiú nàá ndihí ñaha xì-gá ío váha

xiní-gá nàcuáa cada ñaha-gã xií-yu chi ío ndáá quidé-gã. <sup>12</sup> Te tinúu-gá dáyèhé-xi dàtná dáyèhé ñuhú, te titní coróná ñuhú dǐquí-gã, te nèhe-gá ì<sup>n</sup> sá ndèè diu-gá, te vá yǒo ì<sup>n</sup> cùtnuní iní-xi nása cuáhá<sup>n</sup> tnúhu-á<sup>n</sup>, chi ì<sup>n</sup>dìi díi-ni mee-gã náhá-gã nàcuáa càhá<sup>n</sup>-xi. <sup>13</sup> Te Yaá-á<sup>n</sup> níhnú-gã ì<sup>n</sup> dóo nǐ cuu mee-ni nǐñí, te Yaá-á<sup>n</sup> càchí tnúhu-gá nchaa nàcuáa sàni iní Yã Ndiòxí, núu xiá<sup>n</sup> nání-gã Tnúhu Yá Ndiòxí. <sup>14</sup> Te sátá-gã nchìcú<sup>n</sup> nchaa espíritú xínú cuèchi núú Yã Ndiòxí, te cue espíritú-á<sup>n</sup> cúu-xí dàtná sandadú, te xǐxǐhnu-xi dóo cuìxí<sup>n</sup> dóo vǎha sá càndòo, te xǐxódó-xi cuàyú cuìxí<sup>n</sup>. <sup>15</sup> Te yuhu Yaá yódónùu-á<sup>n</sup> quéné ì<sup>n</sup> yuchí càhnú, te ndihì yuchí-á<sup>n</sup> dànicuèhé-gã nchaa ñáyíu xǐndecu ñuyíú, te ío dandòho ñaha-gã xií-yu, te dàtná quidé tée quìhni ndéhé yoho yàha stilé duca<sup>n</sup> sǎtnahá-xi cada ñaha-gã xií-yu, chi ío dandòho ñaha-gã xií-yu cuèndá sá ío cùdéé<sup>n</sup>-gã. Te mee-gã ío cùnnuu-gá táxí tnùnì-gá, te quide-gã nchaandi túhú sá vǎha. <sup>16</sup> Te sátá dóo níhnú Yáá-á<sup>n</sup> ndihì núú tìcáca<sup>n</sup>-gã yódó tnùnì nàcuáa nàni-gá, te duha càhá<sup>n</sup>-xi: “Tée ío cùnnuu taxi tnunì ñáhá xìi nchaa cue tée yǐndaha ñaha xii ñáyíu ndihì nchaa dava-gã ñáyíu”, duha ndèè tnunì sátá dǒó-gã-á<sup>n</sup> ndihì tìcáca<sup>n</sup>-gã-á<sup>n</sup>.

<sup>17</sup> Te dàtnùnì ní xiní-í ì<sup>n</sup> espíritú xínú cuèchi núú Yã Ndiòxí nùtnǐ-xi núú nchìcanchii, te níhi ní càhá<sup>n</sup>-xi, te xǎha<sup>n</sup>-xi xii nchaa quiti ndava núú tàchí:

—Nchaa nchòhó quiti ndàva, chí táquixi chí caxi-ndo nchàa sá nǐ quide túha Yá Ndiòxí, <sup>18</sup> chí caxi-ndo cùñú nchaa cue tée yǐndaha ñaha xii ñáyíu, ndihì cuñú nchaa cue tée tàxi tnunì ñáhá xii cue sandadú, ndihì cuñú nchaa cue tée ío ñíí xǐndáa, ndihì cuñú nchaa cuàyú, ndihì cuñú nchaa cue tée ní xódó ñaha xii-güedi, ndihì cuñú nchaa dava-gã ñáyíu, ñáyíu ñá túú tnàhí ni dàñá quee núú chíú<sup>n</sup> pàtróó<sup>n</sup>-xi, ndihì cuñú nchaa ñáyíu ní dàñá nǐ quee núú chíú<sup>n</sup> pàtróó<sup>n</sup>-xi, ndihì cuñú nchaa ñáyíu cùnnuu, ndihì cuñú nchaa ñáyíu ñá túú cùnnuu, te nchaa cuñú-á<sup>n</sup> caxi-ndo —càchí espíritú-á<sup>n</sup> xǎha<sup>n</sup>-xi xii nchaa quiti-á<sup>n</sup>.

<sup>19</sup> Te sátá dúcá<sup>n</sup> te ní xiní tucu-í quiti

ní quene xití làmár, ndihì nchaa cue tée yǐndaha ñaha xii ñáyíu, ndihì nchaa cue tée cùu sandadú-güedé ní naníhí tnáhá-güedé ndihì quiti-á<sup>n</sup> cuèndá cuu ì<sup>n</sup>nuu-güedé ndihì-di nàá-güedé ndihì Yaá yódó cuàyú-á<sup>n</sup>, ndihì nchaa cue espíritú cúu sàndadú ndihì-gá. <sup>20</sup> Te cue espíritú cúu sàndadú ndihì Yaá-á<sup>n</sup> nǐ tnǐ-xi quiti-á<sup>n</sup>, ndihì tée ío dandahú ñáhá xii ñáyíu càchí sá càhá<sup>n</sup> tnúhu Yá Ndiòxí te ñá ndáa sá càhá<sup>n</sup>-dé tnúhu-gá, te diu-ni tée-á<sup>n</sup> nǐ quide-dé titní núú sá vǎ yǒo tnàhí ndàcu cada núú quiti-á<sup>n</sup>. Te sá dúcá<sup>n</sup> nǐ quide tée-á<sup>n</sup> xiá<sup>n</sup> ní dándahú-dé ñáyíu ní sàndáa iní-yu ní quée-yu tnunì quiti-á<sup>n</sup>, te ní chiñùhú-yu sá nǐ dándacú ñáhá-yu xii-di, te cue espíritú-á<sup>n</sup> nǐ dáquée-xi quiti-á<sup>n</sup> núú ñuhú núú ñuhú àzúfré càyú-xi, ndihì tée duca<sup>n</sup> dandahú ñáhá xii ñáyíu-á<sup>n</sup>, te xiá<sup>n</sup> cuhu<sup>n</sup> tée-á<sup>n</sup> ndihì quiti-á<sup>n</sup>, te ío ndoho-dé ndihì-di. <sup>21</sup> Te ndihì yuchí càhnú sǎ quéné yùhu Yaá yódó cuàyú-á<sup>n</sup> nǐ sahani-gã nchaa dava-gã cue tée cùndihì quiti-á<sup>n</sup>, te nchaa cue quiti ndàva ní chítú xití-güedi ní xexi-güedi cuñú nchaa cue tée-á<sup>n</sup>.

## 20

### *Úxí cièndú cuíá*

<sup>1</sup> Te sátá dúcá<sup>n</sup> te ní xiní-í ì<sup>n</sup> espíritú xínú cuèchi núú Yã Ndiòxí ní quee-xi andíu, te nùndaha-xi ndacaá nacaá<sup>n</sup>-xi yèhe ì<sup>n</sup> yaú cùnú víhí núú cùndècu sácuíhná, te nùndaha tucu-xi ì<sup>n</sup> cadená càhnú. <sup>2</sup> Te espíritú-á<sup>n</sup> nǐ tnǐ-xi quiti déé<sup>n</sup> nání dragón, te diu-ni quiti-á<sup>n</sup> cúu-dí mèi yucu ñávǎha sá nání sácuíhná, te diu xiá<sup>n</sup> ní nduu-xi cóo ndèé sanaha. Te espíritú-á<sup>n</sup> nǐ dácútú ñaha-xi xii-di, te duca<sup>n</sup>-ni cùndutu-di ndéé xínu úxí cièndú cuíá. <sup>3</sup> Te sátá nǐ dácútú ñaha espíritú-á<sup>n</sup> xii-di te ní dáquée ñaha-xi xii-di yaú-á<sup>n</sup> chí diu yaú-á<sup>n</sup> tàú-di quée-di cundecu-di. Te ní nacadí-xi yuyèhe yaú-á<sup>n</sup>, te ní tee-xi sèyú yuyèhe-á<sup>n</sup> cuèndá sá vǎ quéné-gã-di dandahú-di cue ñáyíu ñuyíú, te xiá<sup>n</sup> cundedí nihnu-di ndéé xínu úxí cièndú cuíá. Te sátá ná yǎha úxí cièndú cuíá-á<sup>n</sup> te nandaxí-di te quene-di yaú núú ñuhú-dí-á<sup>n</sup> caca cuu tnaa-di ì<sup>n</sup> úú nduu.

<sup>4</sup> Te dàtnùnì ní xiní-í xǐnutnǐ titní xilé vǎha, te xiá<sup>n</sup> xǐnucóo nchaa ñáyíu ní



ngúndecu ndihi tnúhu ndee ìní cada ndáá cuéchi nchaa ñáyiu, te ní xiní-í xíndecu tnàhá cue ñáyiu ní xehndé-güedé dúcú<sup>n</sup>-xi cuèndá sá ñí cáhá<sup>n</sup>-yu tnúhu Yá Ndiöxí, ndihi cuèndá sá ñí cáhá<sup>n</sup> váha-yu cuèndá Xítohó Jesucrístú. Te ñá-yu-ñí ñáyiu-á<sup>n</sup> cúú-yu ñáyiu ñá túú ní chihñuhú-yu quiti ní quene xití làmár-á<sup>n</sup>, te ni ñà túú ní chihñuhú-yu sá ñí dándácú ñáyiu ní natava ñàhá-yu xii-di, te ni ñà túú ní dàñá-yu mèé-yu quée-yu tnuní quiti-á<sup>n</sup> chi ni tnèé-yu te ni ndàhá-yu ñá túú ní dàñá-yu quée tnuní-di. Te ní xiní-í ní ndoto cue ñáyiu-á<sup>n</sup> cuèndá tnàhá-yu cunúú-yu taxi tnùní-yu ndihi Xítohó Jesucrístú úxí cièndú cuía. <sup>5</sup> Te dava ñáyiu ní xihí ñá túú ní ndòtó-yu, chi ndée yáha úxí cièndú cuía te dàtnùní ndotó-yu. Te ñáyiu ní xiní-í ní ndoto-á<sup>n</sup> cúú-yu ñáyiu ní ndoto díhna nuu. <sup>6</sup> Te ío váha ní tnahá nchaa ñáyiu ní nduu tãhú ñí ndoto díhna nuu!, chi cue ñáyiu-á<sup>n</sup> ío cùdiú-yu núú Yá Ndiöxí, te nchaa ñáyiu-á<sup>n</sup> vã quihí<sup>n</sup>-yu núú ùhú núú ndàhú, te ñáyiu-á<sup>n</sup> cúú-yu dútú ndécú-yu núú Yá Ndiöxí ndihi núú Xítohó Jesucrístú, te ñáyiu-á<sup>n</sup> cúnúú-yu dàtná cúnúú Xítohó Jesucrístú, te cunuu ndihi ñàhá-yu xii-gá úxí cièndú cuía.

<sup>7</sup> Te sátá ná yãha úxí cièndú cuía-ã<sup>n</sup> te sácúíhná quee-xi núú yíndedí nihnu-xi-á<sup>n</sup>, <sup>8</sup> te ngúíta tucu-xi dandàhú-xi nchaa ñáyiu xíndecu nihí ñuyúú, te cuèi ñáyiu ñúú Gög, te cuèi ñáyiu ñúú Màgóg duca<sup>n</sup> quihí<sup>n</sup>-xi dandàhú ñàhá-xí xii-yu, te datàcá-xi nchaa ñáyiu cuèndá nàá-yu, te cuéhé víhí-yu dàtná cuéhé ñuhu cúchí làmár. <sup>9</sup> Te nchaa ñáyiu-á<sup>n</sup> tñí-yu ichi quihí<sup>n</sup>-yu ñí ichi sá cuàhá<sup>n</sup> núú cáá ñí yodo cahnu vihi, te sáá-yu núú xíndecu ñáyiu cùu cuendá Yá Ndiöxí, te ñáyiu-á<sup>n</sup> chidòcò-yu cue ñáyiu cùu cuendá-gá-á<sup>n</sup> ndihi ñúú-yu, te ñúú-á<sup>n</sup> ío cùu iní-gá, dico mee Yá Ndiöxí dangòyo-gá ñuhú cahmi-gá nchaa ñáyiu duca<sup>n</sup> chidoco ñaha xii ñáyiu cùu cuendá-gá-á<sup>n</sup>, te nchaa ñáyiu-á<sup>n</sup> cuú. <sup>10</sup> Te sácúíhná sã dúcá<sup>n</sup> dandahú ñàhá xii ñáyiu chidoco ñaha xii ñáyiu cùu cuendá Yá Ndiöxí-á<sup>n</sup> dàquée ñaha-gã xii-xi núú ñuhú núú ñuhú àzufré càyú-xi, te ñá-yu-ñí xíá<sup>n</sup> sa ñuhu quiti ní quene xití làmár, ndihi téé ní dandàhú ñáyiu ní

xáha<sup>n</sup>-dẽ xii-yu sá cáhá<sup>n</sup>-dé tnúhu Yá Ndiöxí te ñá ndáá sá cáhá<sup>n</sup>-dé tnúhu-gá, te xíá<sup>n</sup> cuhu<sup>n</sup>-xi ndoho-xi ñí caa ñí quihí<sup>n</sup> ndihi quiti ní quene xití làmár, ndihi téé càchí sá cáhá<sup>n</sup> tnúhu Yá Ndiöxí te ñá ndáá sá cáhá<sup>n</sup>-dé tnúhu-gá.

### *Cùndáá cuéchi ñáyiu*

<sup>11</sup> Te ní xiní-í nútñí ñí xilé váha xilé cuixí<sup>n</sup>, te núú xilé-á<sup>n</sup> núcò ñí Yaá. Te ndèhe Yaá-á<sup>n</sup> ñí ndóñuhú àndiu ndihi ñuyúú-a, te duca<sup>n</sup> ñí ndóñuhú-xí chi vá cùndecu-gá-xi. <sup>12</sup> Te sátá dúcá<sup>n</sup> te ní xiní-í nchaa ñáyiu ní xihí ní cùu, ñáyiu cùnuu ndihi ñáyiu ñá túú cùnuu xínutñí-yu núú Yáá núcò núú xilé váha-á<sup>n</sup>, te Yaá-á<sup>n</sup> cúú-gã Yá Ndiöxí, te òré-á<sup>n</sup> ñí nandicá nchaa tutú núú yódó tnùní nchaa nàcuáa nduu sá ñí quide ñí ñáyiu-á<sup>n</sup>, te ní nandicá tucu ñngá tutú núú yódó tnùní nchaa ñáyiu ní naníhí tãhú, te nchaa ñáyiu ní xihí ní cùu xínutñí-yu núú Yá Ndiöxí cundáá cuéchi-yu, te nchaa nàcuáa nduu nchaa cuéchi-yu yòdo tnuní núú nchaa tutú-á<sup>n</sup> duca<sup>n</sup> cùndáá. <sup>13</sup> Te nchaa ñáyiu ní xihí xití ndute làmár, ndihi nchaa ñáyiu ní xihí núú ñuhu yìchí nchaa ñáyiu-á<sup>n</sup> cundáá cuéchi-yu nàcuáa ní quidé-yu ñí ñí-yu. <sup>14</sup> Te vitna te vá cùú-gá ñáyiu chi ñá túú-gã tnúhu xihí, te nchaa ñáyiu ñuhu núú ñuhú núú càyú ñáyiu-á<sup>n</sup> cúú-yu ñáyiu ní xíta nihnu ñí caa ñí quihí<sup>n</sup>. <sup>15</sup> Te duca<sup>n</sup> chi nchaa ñáyiu ñá túú yòdo tnuní núú tütú núú yódó tnùní nchaa ñáyiu naníhí tãhú ní dáquée ñaha Yá Ndiöxí xii-yu núú ñuhú núú càyú.

## 21

### *Andiu sàa ndihi ñuyúú sáá*

<sup>1</sup> Te sátá dúcá<sup>n</sup> te ní xiní-í andiu sàa ndihi ñuyúú sáá, te andiu sã ndécú díhna ndihi ñuyúú sã ndécú díhna ní ndóñuhú-xí, te tnàhá làmár ní ndóñuhú-xí. <sup>2</sup> Te yúhú té Juáá ní xiní-í ñúú Jerusalén sáá ñí quee-xi núú ndécú Yá Ndiöxí, te ñúú-á<sup>n</sup> cúú-xí ñúú mée-gã, te ío vii càa chi càa datná cáá ñí ñadhí xíchí tñãndaha. <sup>3</sup> Te ní tecú dóho-í níhí ní cáhá<sup>n</sup> ñí sá ñí cáhá<sup>n</sup> andiu, te càchí-xi:

—Chí cùndedóho ñí tnúhu na cáhá<sup>n</sup>-í-a: Yá Ndiöxí ndécú ndihi-gá cue ñáyiu vitna, te duca<sup>n</sup>-nã cundecu ndihi ñaha-gã xii-yu, te ñá-yu-ñí cùú-yu ñáyiu cùu cuendá-gá, te

vá íí<sup>n</sup> ndùu ìí<sup>n</sup> quíú-gǎ te dañá ñàha-gá xií-yu. <sup>4</sup>Te mee Yǎ Ndiǒxí cada-gá sá ñà túú tñàhí-gá ná cani iní-yu cundecú-yu, te ni vǎ quíní-gá-yu tnúhu xihí, te ni vǎ quíní-gá-yu tnúhu ndàhyú, te ni vǎ quíní-gá-yu tnúhu ndìhú iní-xi, te ni vǎ quíní-gá-yu tnúhu cùhú, chi nchaa sá ñí xíní-yu ñuyíú dǐhna vá quíní-gá-yu vitna —duha cǎchí sá ñí cáhá<sup>n-á</sup>.

<sup>5</sup>Te Yaá núcǒo núú xilé váha-á<sup>n</sup> ñí cachí tnúhu-gá xii-í, te cǎchí-gá:

—Yúhú quídè-í nàcuáa nduu saa nchàa sá cùndècu vitna. Te vitna chido tñùní-n ìí<sup>n</sup> núú tütú nchaa tnúhu sá ñí cáhá<sup>n-í-a</sup>, chi nchaa tnúhu-a cùu-xi tnúhu ndáá cuíti —duha cǎchí-gá.

<sup>6</sup>Te dàtnùní ní cachí tnúhu tucu-gá xii-í:

—Sa ní xínu cava nchaa chùu<sup>n</sup> ní sani iní-í cada-í, te ñíu-ni yúhú cùú-í Yaá sa ndècu ndéé cùtnàhá ní ngáva ñuyíú, te ñíu-ni-í cundecu-í ñí caa ñí quíhí<sup>n</sup>. Te nchaa ñáyíu cuení tuha ñaha xii-í te cada iní-yu sá dàtná ndute cùu-xi sá cuǎñaha tǎhù-í xií-yu candeca-xi iní-yu ñí caa ñí quíhí<sup>n</sup>. <sup>7</sup>Te nchaa ñáyíu na cùndee iní yáha nándi sá ná yáha-yu sá cuendá-í, te ñáyíu-á<sup>n</sup> nduu táhù-yu cundecu váha-yu, te yúhú cuu-í Ndiǒxí-yu, te duca<sup>n</sup> mée-yu cuú-yu déhe-í. <sup>8</sup>Te nchaa ñáyíu na yùhú ndoho cuendá-í quíhí<sup>n</sup>-yu núú ñùhú núú càyú ndìhí ñáyíu ñá túú sàndáá iní ñáhá xii-í, ndìhí ñáyíu quíde nándi nchaa sá cuèhé sá dúhá, ndìhí ñáyíu sàhni tñaha, ndìhí ñáyíu ndècu ichi dǐí iní, ndìhí ñáyíu quíde nduu, ndìhí ñáyíu chìñuhu nchaa sá cǎchí-yu cùu ndiǒxí ní cadúha cue téé ñuyíú-a, ndìhí ñáyíu dàcuandehnde, nchaa ñáyíu duca<sup>n</sup> xǐquide-á<sup>n</sup> cuíta nihnú-yu chi quíhí<sup>n</sup>-yu núú ñùhú núú ñùhú àzufré càyú-xi —duha ní cáhá<sup>n</sup> Yǎ Ndiǒxí ní cachí tnúhu-gá xii-í.

### *Ñúú Jerusàlén sáa*

<sup>9</sup>Te núú ùsá espíritú xǐnehe tícùú ñùhú tñùhu ndòho, te ìí<sup>n</sup>-xi ní quixi-xi te cǎchí-xi:

—Taquixi, te na dànehé ñáhà-í xii-n nchàa ñáyíu cùu cuendá Yaá cáá dàtná cáá ìí<sup>n</sup> mbéé quíti ní dánícuèhé-güedé, ñáyíu-á<sup>n</sup> cada iní-n sǎ cùú-yu dàtná ìí<sup>n</sup> xíchí cuéché vitna tñándaha, te duca<sup>n</sup> càda iní-n sǎ cùú-yu

chi cundecú-yu ndìhí-gá —duha ní cachí tnúhu espíritú-á<sup>n</sup> xii-í.

<sup>10</sup>Te òré quídé ñàha espíritú Yǎ Ndiǒxí xii-í nàcuáa cǎchí iní-xi, te espíritú néhé tícùú-á<sup>n</sup> ndéca ñàha-xi xii-í cuásaá ìí<sup>n</sup> tǐndúú dùcú<sup>n</sup>, te xiá<sup>n</sup> ñí dánèhé núú ñáhá-xi xii-í ñúú Jerusàlén te ñúú-á<sup>n</sup> ñí quee-xi núú ndécú Yǎ Ndiǒxí, te ñúú-á<sup>n</sup> cùú-xi ñúú mée-gǎ. <sup>11</sup>Te ñúú-á<sup>n</sup> ìo cǎhnu cuu-xi chi duca<sup>n</sup> ìo cǎhnu cuu mee-gá, te dàtása<sup>n</sup>-xi dàtná dàtása<sup>n</sup> yúú váha sá nání jǎspé yúú cáá dàtná cáá vǐdriú sá tǔu ñngá xio ndàa sátá-xi. <sup>12</sup>Te ñí cǎndéé yuhu ñúú-á<sup>n</sup> sùúní dùcú<sup>n</sup> nchaa sá ñùhú dòco, te nchíí úxúú yuyèhe-xi, te ndí tñahá ìí<sup>n</sup> ìí<sup>n</sup> yuyèhe-á<sup>n</sup> xǐndecu ìí<sup>n</sup> caa espíritú xínú cuèchi núú Yǎ Ndiǒxí. Te ndí tñahá ìí<sup>n</sup> ìí<sup>n</sup> yuyèhe-á<sup>n</sup> yódó tñùní ñíu ìí<sup>n</sup> caa xichí cue ñáyíu isràél. <sup>13</sup>Te úní yuyèhe-xi nchíí ndàa xio nacuáa quèné nchíanchii, te úní tucu yuyèhe-xi nchíí ndàa nacuáa quée nchíanchii, te úní tucu yuyèhe-xi nchíí ndàa xio cuha nacuáa quèné nchíanchii, te úní tucu yuyèhe-xi nchíí ndàa xio datni nacuáa quèné tucu nchíanchii. <sup>14</sup>Te sá ñùhú dòco-á<sup>n</sup> chi úxúú tñahá yúú cùú cimientú-xi, te ndí tñahá ìí<sup>n</sup> ìí<sup>n</sup> yúú-á<sup>n</sup> ndéé ìí<sup>n</sup> caa ñíu cue téé ní cáhá<sup>n</sup> tnúhu Yaá cáá dàtná cáá ìí<sup>n</sup> mbéé quíti ní dánícuèhé-güedé, te ñíu mee-gǎ ní táuchíú<sup>n</sup>-gǎ ní cáhá<sup>n</sup>-güedé tnúhu-gá.

<sup>15</sup>Te espíritú sá cǎhá<sup>n</sup> ndìhí ñaha xii-í-á<sup>n</sup> néhé-xi ìí<sup>n</sup> sá cání ñí cuáha mee-ni dǐhú<sup>n</sup> cuáá<sup>n</sup>, te ndìhí xiá<sup>n</sup> chícùhá-xi ñúú-á<sup>n</sup>, ndìhí sá ñùhú dòco ñúú-á<sup>n</sup>, ndìhí nchaa yuyèhe-xi. <sup>16</sup>Te ñúú-á<sup>n</sup> ìí<sup>n</sup>-ni nèhe-xi cuendá quèhé<sup>n</sup>-xi ndìhí cuendá cǎni-xi, te espíritú-á<sup>n</sup> ní chícùhá-xi ndìhí sá néhé-xi-á<sup>n</sup> ñúú-á<sup>n</sup>, te nèhe-xi ócò úú cièndú mǐl mētrú sá cání te ñíu-ni duca<sup>n</sup> nèhe-xi cuendá quèhé<sup>n</sup>-xi, te ñíu-ni duca<sup>n</sup> nèhe-xi sá dùcú<sup>n</sup> nchaa vehe càa ñúú-á<sup>n</sup>. <sup>17</sup>Te dàtnùní ní chícùhá-xi sá ñùhú dòco ñúú-á<sup>n</sup>, te xiá<sup>n</sup> néhé-xi únídico cúmí mētrú sá dùcú<sup>n</sup>, te ní chícùhá-xi dàtná chícùhá cue ñáyíu ñuyíú-a.

<sup>18</sup>Te sá ñùhú dòco-á<sup>n</sup> ñí cuáha mee-ni yúú váha yúú sá nání jǎspé, te ñíhí ñúú-á<sup>n</sup> cùú-xi mée-ni dǐhú<sup>n</sup> cuáá<sup>n</sup>, te càa datná cáá vǐdriú sá ìo váha cǎndoo te tǔu ndàa ñngá xio. <sup>19</sup>Te ndí úxúú yúú cùú cimientú sá ñùhú dòco-á<sup>n</sup> ndéé ndí dǐí<sup>n</sup> núú yúú vii càa sátá-xi, te yúú dǐhna ndéé mee-ni

yúú vâha sá nání jâspé sâtá-xi, te yúú cúú úú ndèé tucu ingá núú yúú vâha sá nání zâfirú sâtá-xi, te yúú cúú ùní ndèé tucu ingá núú yúú vâha sá nání âgatá sâtá-xi, te yúú cúú cùmí ndèé ingá núú yúú vâha sá nání èsmeraldá sâtá-xi. <sup>20</sup> Te yúú cúú ùhú<sup>n</sup> ndèé tucu ingá núú yúú vâha sá nání ònícé sâtá-xi, te yúú cúú ìnú ndèé tucu ingá núú yúú vâha sá nání còrnalíná sâtá-xi, te yúú cúú ùsá ndèé tucu ingá núú yúú vâha sá nání crìsólítú sâtá-xi, te yúú cúú ùná ndèé tucu ingá núú yúú vâha sá nání bèrilú sâtá-xi, te yúú cúú ì<sup>n</sup> ndèé tucu ingá núú yúú vâha sá nání tòpacíú sâtá-xi, te yúú cúú ùxí ndèé tucu ingá núú yúú vâha sá nání crìsopásá sâtá-xi, te yúú cúú ùxí ì<sup>n</sup> ndèé tucu ingá núú yúú vâha sá nání jâcintú sâtá-xi, te yúú cúú ùxúú ndèé tucu ingá núú yúú vâha sá nání âmatístá sâtá-xi. <sup>21</sup> Te ndi ùxúú yuyèhe sá ñúhú dòco-á<sup>n</sup> cúú-xí mèe-ni yúú vâha sá nání pèrlá, te ndùu ni yúú cúú ì<sup>n</sup> ì<sup>n</sup> yuyèhe-á<sup>n</sup>. Te tnuú cáhnú ndècu xití ñúú-á<sup>n</sup> cúú-xí mèe-ni díhú<sup>n</sup> cuàá<sup>n</sup>, te càa-xi datná cáá vidriú sá tûu ndàa ingá xio.

<sup>22</sup> Te ní xiní-í sá ñà túú vèhe núú chíñùhu ñáyíu Dútú Ndiòxí cáá ñúú-á<sup>n</sup>, chí mee-ná Dútú Ndiòxí Yáa quidé nchàa-ndi túhú sá vâha ndècu ñúú-á<sup>n</sup>, ndihi Yáa cáá datná cáá ì<sup>n</sup> mbéé quiti ní dánícuèhé-güedé. <sup>23</sup> Te ñúú-á<sup>n</sup> ñà túú-gá xíní ñùhu-xi nchíanchii dayèhé-xi, te ni yóó ñà túú-gá xíní ñùhu-xi, chí mee-ná Yáa Ndiòxí dáyéhé-gá ñúú-á<sup>n</sup> ndihi Yáa cáá datná cáá ì<sup>n</sup> mbéé quiti ní dánícuèhé-güedé. <sup>24</sup> Te cue ñáyíu nchaa ñúú cáá ñúyíú, ñáyíu ní naníhí tãhú xíndecu ñúú-á<sup>n</sup> dáyéhé-gá núú-yu, te nchaa cue téé yíndaha ñaha xii-yu nèhe-güedé sá yíñùhu sá cúú-xí ñúú-á<sup>n</sup>, te quíde cahnu ñaha-güedé xii-gá. <sup>25</sup> Te yuyèhe ñúú-á<sup>n</sup> ñà túú tñahí nàndedí, te ñúú-á<sup>n</sup> ñà túú tñahí cùndiquí<sup>n</sup>. <sup>26</sup> Te nchaa ñáyíu nèhé-yu sá yíñùhu sá cúú-xí ñúú-á<sup>n</sup> te quíde cahnú-yu Yáa Ndiòxí. <sup>27</sup> Te ñúú-á<sup>n</sup> vâ cúú cùndecu ni ì<sup>n</sup> ñáyíu ndècu ichi cuehé ichi duha, te ni ì<sup>n</sup> ñáyíu ndehnde, te ni ì<sup>n</sup> ñáyíu quíde sá ñà túú cùu vâha iní Yáa Ndiòxí vá cúú cùndecú-yu ñúú-á<sup>n</sup>, chí mee-ni ñáyíu naníhí tãhú ñáyíu yòdo tñuní núú tütú Yáa cáá datná cáá ì<sup>n</sup> mbéé quiti ní dánícuèhé-güedé,

mee-ni ñáyíu-á<sup>n</sup> cundecú-yu ñúú-á<sup>n</sup>.

## 22

<sup>1</sup> Te sâtá dúcá<sup>n</sup> te diu-ni espíritú-á<sup>n</sup> ní dánèhé núú ñáhá-xí xii-í yúte núú ñúhú ndùte candoo canine, te ndute-á<sup>n</sup> candeca-xi iní ñáyíu ni caa ni quíhí<sup>n</sup>, te ndute-á<sup>n</sup> quée-xí mèi núú núcõo Yáa Ndiòxí ndihi Yáa cáá datná cáá ì<sup>n</sup> mbéé quiti ní dánícuèhé-güedé. <sup>2</sup> Te cuádava tnuú cáhnú yâha xití ñúú-á<sup>n</sup> cáá yúte-á<sup>n</sup>, te xio xio yuhu yúte-á<sup>n</sup> níhnú yùtnu cuu<sup>n</sup> sávidí-xi, te sávidí nchaa yutnu-á<sup>n</sup> cúú tucu-xi sá cándeca iní ñáyíu ni caa ni quíhí<sup>n</sup>, te nchaa yutnu-á<sup>n</sup> cúú<sup>n</sup> sávidí-xi úxúú xito ì<sup>n</sup> cuía chí ndi tñahá yóó cúú<sup>n</sup> sávidí-xi, te nchaa ndaha-xi cùu-xi tátna sá cúú-xí nchàa ñáyíu. <sup>3</sup> Te vá yõo ì<sup>n</sup>-gá cada ì<sup>n</sup> sá ñà túú cùu vâha iní Yáa Ndiòxí ñúú-á<sup>n</sup>. Chí ñúú-á<sup>n</sup> núcõo mee Yáa Ndiòxí ndihi Yáa cáá datná cáá ì<sup>n</sup> mbéé quiti ní dánícuèhé-güedé xítaxi tñuní-gá, te nchaa ñáyíu xínu cuechi núú-gá cada càhnu ñahá-yu xii-gá. <sup>4</sup> Te nchaa ñáyíu-á<sup>n</sup> cundehe núú-yu Dútú Ndiòxí, te tneé-yu cundeé diu-gá. <sup>5</sup> Te ñúú-á<sup>n</sup> vâ quíní-gá-yu niú, te ni vâ cánèhe chiu<sup>n</sup>-gá-yu ñúhú cutnùní núú-yu, te ni nchíanchii ñà túú-gá xíní ñùhu-xi dayèhé ñúú-á<sup>n</sup> chí mee Dútú Ndiòxí dáyéhé-gá, te ni caa ni quíhí<sup>n</sup> cunúú-yu cundecú-yu ñúú-á<sup>n</sup>.

*Sa ta cùyatni nduu quixi tucu Xítóhó Jesucristú*

<sup>6</sup> Te sâtá dúcá<sup>n</sup> te ní cachí tñúhu espíritú xínú cuèchi núú Yáa Ndiòxí-á<sup>n</sup> xii-í:

—Nchaandi túhú tñúhu-a cùu-xi mee-ni tñúhu ndáá cuítí. Te Yáa Ndiòxí Yáa dácàhu iní nchaa cue téé càhá<sup>n</sup> tñúhu-gá nàcuáa càhá<sup>n</sup>-güedé ní tendaha-gá ì<sup>n</sup> espíritú xínú cuèchi núú-gá ní quixi-xi ní dánèhé-xi nchaa ñáyíu xínu cuechi núú-gá nchaa nàcuáa cada-gá, te vá cùyaa-gá duca<sup>n</sup> cada-gá —duha càchí espíritú-á<sup>n</sup>.

<sup>7</sup> Te ní càhá<sup>n</sup> Xítóhó Jesucristú, te càchí-gá:

—Ío ndihi quixi tucu-í!

’Te ío vâha tñahá nchaa ñáyíu tñi nchaa tñúhu càhá<sup>n</sup> Yáa Ndiòxí yódó tñuní núú tütú-a! —duha càchí-gá.

<sup>8</sup> Te yúhú té Juáá ní tecú dóho-í nchaa nàcuáa ní ngódó tñuní núú tütú-a, te ní xiní núú-í nchaa nàcuáa cada-xi ndèé cuèé-gá.

Te sátá dúcá<sup>n</sup> ñi cuu te ní ngüíñi xítì-í núú espíritú sá ñi dánèhé núú ñáhá nchàa xiá<sup>n</sup> cuendá chiñuhu-í-xi ni cùu. <sup>9</sup> Te ní cachí-xi:  
 —Vá dúcá<sup>n</sup> càda-n, chi yúhú dicó xínú cuèchi-í núú Yá Ndióxi dàtná cúú yòhó ndìhi nchaa dava-gá ñáyiú ndècu ndìhi-n ichi-gá càhá<sup>n</sup>-ndó tñuhu-gá, ndìhi nchaa ñáyiú tñi nchaa tñuhu ndèé núú tütú-a, te xiá<sup>n</sup> càchí-í sá vǎ dúcá<sup>n</sup> càda-n, chi mee Yá Ndióxi duca<sup>n</sup> chiñuhu-n-gá —càchí espíritú-á<sup>n</sup> xii-í.

<sup>10</sup> Te ní cachí tñuhu tucu-xi xii-í, te càchí-xi:

—Vá chidáhu-n ñi ñi<sup>n</sup> tñuhu Yá Ndióxi ndèé núú tütú-a, chi sa ní cuyatni cada-xi nchaa nàcuáa ndèé tñuní. <sup>11</sup> Te dañá sǎ ncháá ñáyiú ndècu ichi cuehé ichi duha na cùndecu-ní-yu ichi-á<sup>n</sup>, te duca<sup>n</sup>-ni dàña-n nchaa ñáyiú quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiú quide váha te duca<sup>n</sup>-ni na càda váha-yu cundecú-yu, te nchaa ñáyiú quide nchaa nacuaáa cùu váha iní Yá Ndióxi te ñi<sup>n</sup> duca<sup>n</sup> na càdá-yu cundecú-yu —duha càchí espíritú-á<sup>n</sup>.

<sup>12</sup> Te ní cachí Xítóhó Jesucristú:

—Cundedóho-n tñuhu na càhá<sup>n</sup>-í-a. Ío ndìhi quixi tucu-í, te canehe-í nchaa sá ndúú tǎhú ñáyiú quixi, te nàcuáa ndùu chiun<sup>n</sup> ní quidé-yu ñi<sup>n</sup> ñi<sup>n</sup>-yu te duca<sup>n</sup> cùnduu sá cuññaha-í nduu tǎhú-yu. <sup>13</sup> Te yúhú cúu-í Yaá sa ndècu ndèé cùtnàhá ní ngáva ñuyúí, te ñi<sup>n</sup> cundecu-í ñi<sup>n</sup> caa ñi<sup>n</sup> quíhí<sup>n</sup> —duha càchí-gá.

<sup>14</sup> Te váha tǎhú nchaa ñáyiú sa ní nduu ndoo ní nduu nine iní-xi, chi ñáyiú-á<sup>n</sup> ñi<sup>n</sup> nduu tǎhú-yu quíhu-yu xití ñuú-á<sup>n</sup>, te caxí-yu sávidí yutnu nùtní-á<sup>n</sup> te xiá<sup>n</sup> candeca-xi iní-yu ñi<sup>n</sup> caa ñi<sup>n</sup> quíhí<sup>n</sup>. <sup>15</sup> Te ñuú-á<sup>n</sup> vǎ cúú quíhu ñi<sup>n</sup> ñáyiú ndècu ichi cuehé ichi duha, ñi<sup>n</sup> cuè ñáyiú quide nduu, te ñi<sup>n</sup> cuè ñáyiú ndècu ichi ñi<sup>n</sup> iní, te ñi<sup>n</sup> cuè ñáyiú sàhni tñaha ñáyiú-xi, te ñi<sup>n</sup> cuè ñáyiú chiñuhu nchaa sá ñi<sup>n</sup> cadúha cue téé ñuyúí-a càchí-yu cùu ndióxí, te ñi<sup>n</sup> cuè ñáyiú tñàhá iní dacuàndehnde, te ñi<sup>n</sup> ñáyiú duca<sup>n</sup> xiquide vá ndúú tǎhú-yu quíhu-yu xití ñuú-á<sup>n</sup>.

<sup>16</sup> Te ní càhá<sup>n</sup> tucu Xítóhó Jesucristú, te càchí-gá:

—Yúhú Xítóhó Jesucristú ní tendaha-í espíritú xínú cuèchi núu-í cuendá cachí tñuhu-xi xii-n nàcuáa ndùu tñuhu cúñaha-n xii nchaa ñáyiú ndècu ndìhi-n ichi-í dácuàha tñuhu-í ñi<sup>n</sup> ñi<sup>n</sup> ñuú. Te yúhú cúu-í mei ñàni tñàhá ndìi Dàvií, te cada iní-n sǎ cúu-í dàtná ñi<sup>n</sup> chódíní quiti quène datneé —duha càchí-gá.

<sup>17</sup> Te nchaa ñáyiú cùu cuendá Xítóhó Jesucristú Yaá cáá dàtná cáá ñi<sup>n</sup> mbéé quiti ní dánicuèhé-güedé, ñi<sup>n</sup> ñi<sup>n</sup> ñáyiú-á<sup>n</sup> cúu-yu ñáyiú cada iní-ó sǎ cúu-yu ñi<sup>n</sup> ñadìhí xíchí tñandaha ndìhi ñaha xii-gá, te ñáyiú-á<sup>n</sup> ñi<sup>n</sup>-ni càhá<sup>n</sup>-yu ndìhi Espíritú Yá Ndióxi, te xǎhǎ<sup>n</sup>-yu ndìhi Espíritú-gá xii nchaa dava-gá ñáyiú:

—Chí táquixi —cachí-yu xǎhǎ<sup>n</sup>-yu ndìhi Espíritú Yá Ndióxi.

Te nchaa ñáyiú duca<sup>n</sup> ndèdóho tñuhu-á<sup>n</sup> vitna, te xini ñuhu-xi duca<sup>n</sup> càhá<sup>n</sup>-yu tñàhá-yu cúñàhá-yu xii nchaa dava-gá ñáyiú-á<sup>n</sup>, te nchaa ñáyiú cuini tuha ichi-gá te na quixi-yu, te dicó duca<sup>n</sup> cùu tǎhú-yu sá cándeca iní-yu ñi<sup>n</sup> caa ñi<sup>n</sup> quíhí<sup>n</sup>.

<sup>18</sup> Te nchaa nchòhó ñáyiú ndèdóho nchaa nàcuáa càhá<sup>n</sup> tñuhu Yá Ndióxi ndèé núú tütú-a càhá<sup>n</sup>-í dóho-ndo. Te núu ñi<sup>n</sup> ñáyiú na còdo-gá tñuhu chido tñuní-yu núú tütú-a, te Yá Ndióxi ío dandòho ñaha-gá xii-yu chi yáha-yu nchaa tñundòho yodo tñuní núú tütú-a te núu duca<sup>n</sup> na càdá-yu. <sup>19</sup> Te núu ñi<sup>n</sup> ñáyiú na chidáhu dava tñuhu Yá Ndióxi ndèé núú tütú-a te ñáyiú-á<sup>n</sup> vǎ ndúú tǎhú-yu cundecú-yu ñuú-gá, te ñi<sup>n</sup> vǎ ndúú tǎhú-yu sá cándeca iní-yu ñi<sup>n</sup> caa ñi<sup>n</sup> quíhí<sup>n</sup> dàtná yódó tñuní núú tütú-a.

<sup>20</sup> Te Xítóhó Jesucristú Yaá càhá<sup>n</sup> sá ncháá tñuhu-a cùu-xi tñuhu ndáá ní càhá<sup>n</sup>-gá ní tecú dóho-í, te càchí-gá:

—Ndáá sá ío ndìhi quixi tucu-í —duha càchí-gá.

Te yúhú ní xáha<sup>n</sup>-í xii-gá:

—Duca<sup>n</sup> na cùnduu, taquixi yohó Xítóhó Jesucristú —duha ní xáha<sup>n</sup>-í xii-gá.

<sup>21</sup> Te Xítóhó Jesucristú ío na chindee chitúu ñaha-gǎ xii-ndo nchaa-ndo. Te duca<sup>n</sup> na cùnduu. Te ío chí cádá ndèé iní-nǎ vitna.